


Dios
pejumelivaisibaxuto
pejanalivaisibaxuto



New Testament in Guahibo

Dios pejumelivaisibaxuto pejanalivaisibaxuto

New Testament in Guahibo

copyright © 2011 Wycliffe Bible Translators, Inc.

Language: Guahibo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guahibo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files dated 29 Jan 2022
bc03f416-faf8-5000-bfb5-5ca8a3fa98cf

Contents

SAN MATEO	1
SAN MARCOS	106
SAN LUCAS	167
SAN JUAN	275
HECHOS	345
ROMANOS	440
1 CORINTIOS	484
2 CORINTIOS	529
GÁLATAS	557
EFESIOS	575
FILIPENSES	589
COLOSENSES	599
1 TESALONICENSES	609
2 TESALONICENSES	617
1 TIMOTEO	621
2 TIMOTEO	632
TITO	640
FILEMÓN	645
HEBREOS	648
SANTIAGO	682
1 SAN PEDRO	693
2 SAN PEDRO	705
1 SAN JUAN	713
2 SAN JUAN	722
3 SAN JUAN	724
JUDAS	726
APOCALIPSIS	730

Pexanialivaisi Jesucristo pelivaisi, San Mateo peyaquinaelivaisi

Jesucristo pijasalinaivimi yabara pelivaisi (Lc 3.23-38)

¹ Mapalivaisije Jesucristo pijasalinaivimi pelivaisi. Jesucristo rabaja Davidpijině pemomoxiyajuvěně. Davidpijině pijinia Abrahampijinė pemomoxiyajuvěně. ² Copiaya Abrahampijinėmi xaina pexěnato. Pevěně Isaac. Isaacpijině juya pexěnato xaina. Pevěně Jacob. Jacobpijině juya pexi xaina. Pexiyajuvěně pevěně Judá. Judápijině pematapijiněbeje, pejuyapijivi ata, xaina. ³ Judápijině juya pexěnatobeje xaina. Itsaně pevěně Fares. Itsaně Zara. Bajaraponěmibeje penapijiva pevěně Tamar. Farespijině juya pexěnato xaina. Pevěně Esrom. Esrompijině juya pexěnato xaina. Pevěně Aram. ⁴ Arampijinė juya pexěnato xaina. Pevěně Aminadab. Aminadabpijině juya pexěnato xaina. Pevěně Naasón. Naasónpijině juya pexěnato xaina. Pevěně Salmón. ⁵ Salmónpijině juya pexěnato xaina. Pevěně Booz. Boozpijině penapijiva pevěně Rahab. Boozpijině juya pexěnato xaina. Pevěně Obed. Obedpijině penapijiva pevěně Rut. Obedpijině juya pexěnato xaina. Pevěně Isaí. ⁶ Isaípjině juya pexěnato xaina. Pevěně David. Bajaraponěmi nacuaeetsiněmi. Davidpijině yacajěřeta Uríaspjině pijavami. Nexata bajarapajivibeje juya pexěnato xainabeje. Pevěně Salomón. ⁷ Salomónpijině juya pexěnato xaina. Pevěně Roboam. Roboampjině juya pexěnato xaina. Pevěně Abías. Abíaspijině juya pexěnato xaina. Pevěně Asa. ⁸ Asapijině juya pexěnato xaina. Pevěně Josafat. Josafatpijině juya pexěnato xaina. Pevěně Joram. Jorampijinė juya pexěnato xaina. Pevěně Uzías. ⁹ Uzíaspijině juya pexěnato xaina. Pevěně Jotam. Jotampijinė juya pexěnato xaina. Pevěně Acaz. Acazpijině juya pexěnato xaina. Pevěně Ezequías. ¹⁰ Ezequíaspijině juya pexěnato xaina. Pevěně Manasés. Manaséspjině juya pexěnato xaina. Pevěně Amón. Amónpijině juya pexěnato xaina. Pevěně Josías. ¹¹ Josíaspijině juya pexi xaina. Pexiyajuvěně pevěně Jeconías. Jeconías pematapijině, pejuyapijivi ata, xaina. Pamatacabi Israel nacuapijivi cobecěbiaya caponatsi Babilonia nacuayabelia, bajarapamatacabi naexana Jeconíaspijině.

¹² Bajaraxuacujinae Jeconíaspijině juya pexěnato xaina. Pevěně Salatiel. Salatielpijinė juya pexěnato xaina. Pevěně Zorobabel. ¹³ Zorobabelpijině juya pexěnato xaina. Pevěně Abiud. Abiudpijině juya pexěnato xaina. Pevěně Eliaquim. Eliaquimpijinė juya pexěnato xaina. Pevěně Azor. ¹⁴ Azorpijině juya pexěnato xaina. Pevěně Sadoc. Sadocpijině juya pexěnato xaina. Pevěně Aquim. Aquimpijinė juya pexěnato xaina. Pevěně Eliud. ¹⁵ Eliudpijině juya pexěnato xaina. Pevěně Eleazar. Eleazarpijinė juya pexěnato xaina. Pevěně Matán. Matánpijině juya pexěnato xaina. Pevěně Jacob. ¹⁶ Jacobpijině juya pexěnato xaina. Pevěně José. Bajaraponěmi María pamona. Bajarapovami Jesús pena, poně yabara: “Cristo, poně Dioso athěběvetsica itorobatsi jivi pecapanepaenexa,” jaitsi.

¹⁷ Nexata Abrahampijinėmita petaxuxuabicujinae jivi penaexanaponaejava, treceněta naexana Davidpijině. Bajaraxuacujinae icatsia Davidpijiněmita petaxuxuabicujinae jivi penaexanaponaejava, treceněta icatsia naexana Jeconíaspijině. Pamatacabi Israel nacuapijivi cobecěbiaya caponatsi

Babilonia nacuayabelia, naexana Jeconíaspijinē. Bajaraxuacujinae icatsia Jeconíaspijinēmita petaxuxuabicujinae jivi penaexanaponaejava, trecenē pijavata naexana Jesucristo jane baja, ponē Dioso athëbëvetsica itoroba jivi pecapanepaenexa.

Pacuenia Jesús naexana yabara pelivaisi

(Lc 2.1-7)

¹⁸ Jesucristo itsa naexana mapanacuataje, naexana mapacueniaje. Copiata Josébeje Mariabeje najumejaitabeje penapitsinexabeje. Nexata baja María jejai Josébeje penapitsinexabeje. Bajaraxuacujinae penapitsivajënaeyabeje, María nayapëtane penacoxitsijava Espiritu Santo pejamatabëcueneta. ¹⁹ José, María jane baja pamonanexa, bitso penajamatabëcueneruviabinē. Bajaraxuata José apo jitsipae daxitajivi pitabarata pevajunupaebijava María penacoxitsijava. Nexata picani José bëpënëa jamatabëjumai tsaponaponae:

—Itsanëjavabelia María nacoxita. Nexata ajumejibia copatsianajë. Apo pitsinē baja tsane María tajavanexa, jamatabëjai picani bëpënëa tsaponaponae José.

²⁰ Pamatacabi abaxë José bajarapacuenia najamatabëxainaponapona, majitsinaebota José tsitanaitajëtatsi Dioso pitorobinëtsica, ángel. Nexata ángel jumaitsi Joséjavabelia:

—José, xamë raja Davidpijinē pemomomë. Pëtsa cujunavame nepitsijava María nijavanexa. Tsipaji raja panacueto María yacotaponapona, Espiritu Santo saya pejamatabëcueneta nacoxita. ²¹ Bajarapova exanaena panacuetonëyo. Vënërubianame bajarapanacuetonëyo Jesús. Tsipaji raja bajaraponë capanepaena daxita pijajivi pibisiacuene pexanaeneconimivecua. ²² Bajarapacuenia María panacuetonëyo exanaena pecopiapatsinexa pacuenia baja cajena bajayata Diosojumepaebinëmi profetanëmi Dioso pejamatabëcueneta tajëvelia vajunupaeba. Profetanëmi bajayata tajëvelia bajarapanacuetonëyo yabara jumaitsi mapacueniaje:

²³ Petiriva apo naperabëquenatsinejeva pebijavabelia, nacoxitsiana. Exanaena panacuetonëyo. Vënërubianatsi Emanuel. “Emanuel,” pejaijume: “Dioso nacayajava,” pejaijume, jai bajayata tajëvelia profetanëmi Dioso pejamatabëcueneta, jai ángel majitsinaebota Joséjavabelia.

²⁴ Nexata José piamajitsinaecujinae naëcota. José jumecovënëta pacuenia itorobatsi ángel. Nexata baja José pijaboyaberena María barëpata pijavanexa. ²⁵ Itsiata abaxë José apo imoxoyobi pijava penamataxainacuetonëyo pevecuanaexanaevajënaeyatsi. Bajarapanacuetonëyo jane baja José vënëruba JESUS.

2

Pacuenia tulupu perubenajava pecanaëcobivi najetarubena petaenexa Jesúsneyo yabara pelivaisi

¹ Jesús naexana Belén tomarata, Judea nacuata peecaetomarata. Bajarapamatacabi nacuaevetsinē Herodes Judeanacua eveta. Nexata Jesús penaexanaecujinae, pebijivi, tulupu perubenajava pecanaëcobivi, pata tajënacujavavetsina. Pata Jerusalén tomarajavabetsina. ² Tulupu perubenajava pecanaëcobivi yanijobapona jivijavabelia:

—¿Detsa jota barëecatsi panacuetonëyo naexana judíovi pepo pevetsinënexa? Payapëtaniji bajaraponëyo penaexanaejava. Tsipaji baja cajena pataniji bajaraponëyo penaexanaejavata penaitajëtsituluputo. Bajarapatuluputo pataniji patajanacuatareca. Bajaraxuata paponainajë mabetsinaje patataenexa bajaraponëyo, bajaraponëyo pitabarata yaiyataeya patamatabacabëta patatonubenaenexa, jai tsaponae jivijavabelia tulupu perubenaejava pecanaëcobivi.

³ Nexata Herodes, Judeanacua pevetsinë, vënëlvaisitane tulupu perubenaejava pecanaëcobivi bajarapacuenia pejumaitsaponaejava jivijavabelia Jesúsnëyo yabara. Nexata Herodes bitso najamatabëxaina. Daxita Jerusalén tomarata pejinavanapaevi ata bitso najamatabëxaina. ⁴ Nexata Herodes junata daxita sacerdotevi penamatacaitorobivi, judíovi pecujarubivi yajava, penacaetuatsinexa Herodes pijabota. Nexata Herodes jumaitsi penacaetuatsivijavabelia:

—Bajayata profetanë tajëvelia itsa vajunupaeba Cristo penaexanaejavanexa, ¿detsa jota yabara: “Bajarajota Cristo naexanaena,” jai? jai Herodes.

⁵ Nexata penacaetuatsivi jumaitsi Herodesjavabelia:

—Belén tomarata raja naexanaeyapaeba, Judea nacuata pecaetomarata. Bajayata baja cajena Diosojumepaebinëmi profetanëmi tajëvelia vajunupaeba bajaraponë penaexanaejavanexa Belén tomarata. Bajayata Diosojumepaebinëmi profetanëmi peyaquinaelivaisita bajaraponë penaexanaejavanexa yabara tajëvelia jumaitsi mapacueniajê:

⁶ Belén tomarata naexanaena jivi pepo pevetsinënexa. Bajaraponë jane baja evetsiana Dioso pijajivi, Israel nacuapijivi. Bajaraxuata Judea nacuata penaetomaraxi, daxita tomaraxivecua, Be léntomara cajena bitso peyaiyataetomaratsi tsane,

jai baja cajena mapacueniajê bajayata tajëvelia Diosojumepaebinëmi profetanëmi peyaquinaelivaisita, jai penacaetuatsivi Herodesjavabelia.

⁷ Bajaraxuacujinae Herodes muetsia junata tajënacuaevetsina pepatsivi, tulupu perubenaejava pecanaëcobivi. Nexata Herodes jumaitsi tulupu perubenaejava pecanaëcobivijavabelia:

—¿Detsa baja pajametobeje xaina bajarapatuluputo penaitajëtsicujinae? jai.

⁸ Nexata petsipaebicujinaetsi Herodes itorobalia bajarapamonae Belén tomarabelia. Herodes jumaitsi tulupu perubenaejava pecanaëcobivijavabelia:

—Paponaremelia Belén tomarabelia. Xaniavaetsia pajaitsianame bajaraponëyo. Itsa pacaxitajarabianame, panevajuunucaponaeremena. Nexata xanë ata nalianë tsane. Yaiyataeya tamatabacabëta tonanuaejitsianë bajaraponëyo pitabarata, jai Herodes tulupu perubenaejava pecanaëcobivijavabelia.

⁹ Nexata jane baja tulupu perubenaejava pecanaëcobivi ponalia Belén tomarabelia. Nexata bajarapamonae namutualia penajetarubenaejavata, jemata icatsia napebeta tuluputo, patuluputo bajarapamonae tane pijanacuatareca. Nexata bajarapatuluputo bajarapamonae matacanajetarucatsi. Matapania itsajota Jesúsnëyo pena barëecatsi pematatsënëatsia, bajarapatuluputo rucojopa. ¹⁰ Tulupu perubenaejava pecanaëcobivi itsa tane bajarapatuluputo, bitso barëya. ¹¹ Nexata bajarapamonae boyalia itsa joneya, tane Jesúsnëyo, pena yajava. Nexata tulupu perubenaejava pecanaëcobivi yaiyataeya pematabacabëta tonubenajunua Jesúsnëyo pitabarata. Bajaraxuacujinae pecapatsicajonixi matapana, penamatamotsijavanë pejebicajonixi. Nexata Jesúsnëyo rajuta orojavanë. Rajutanua petuxujuvijavabeje.

Itsajava inciensovënëjava. Itsajava mirravënëjava. ¹² Bajaraxuacujinae tulupu perubenaajava pecanaëcobivi meravi majitsinaebota Dioso itavetatsi penaviabiyaniwa nacuaevetsinë Herodesjavabelia. Nexata tulupu perubenaajava pecanaëcobivi saicaya namutua baja naviaba pijanacuayabereca.

Pacuenia José barënajetabajirava Jesúsnyo Egipto nacuyabelia yabara pelivaisi

¹³ Tulupu perubenaajava pecanaëcobivi penaviabicujinae, Dioso pijaängel meravi José majitsinaebota tsitanaitajëtatsi. Nexata ángel jumaitsi Joséjavabelia:

—José, nonotapunare baja. Barëponare baja penacuetonëyo, pena yajava. Barënajetabajiravare Egipto nacuyabelia. Bajarajotalia barëponaponaename. Matapania icatsia itsa catsipaebianatsi, barënaviatsiaremena. Tsipaji raja nacuaevetsinë Herodes tsiquirinëyo tsmaxërenajitsiatsi pebeyaxuabinexatsi, jai ángel Joséjavabelia.

¹⁴ Nexata José nonotapuna. Piamajitsinaemeravi baja José barëpona Jesúsnyo, pena yajava. Barënajetabajirava Egipto nacuyabelia. ¹⁵ Bajarajotalia José barëponapona bajayajebi. Matapania baja Herodes itsa tēpa, José barëpatsijitsiarena Israel nacuyaberena. Bajarapacuenia tocopiapatatsi tsipaji baja cajena bajayata Diosojumepaebinëmi profetanëmi Dioso pejamatabëcueneta tajëvelia jumaitsi Jesús yabara mapacueniaje: “Taxënato icatsia junatsiarenajë penaviatsinexa Egipto nacuverena,” jai ra Dioso, jai baja cajena bajayata tajëvelia profetanëmi Jesús yabara.

Pacuenia nacuaevetsinë Herodes pijajivi itoroba pebinacuetoxi pebeponaenexa yabara pelivaisi

¹⁶ Nacuaevetsinë Herodes picani jumaitsi tulupu perubenaajava pecanaëcobivijavabelia: “Itsa pacaxitajarabianame bajarapanacuetonëyo, panevajunucaponaeremena,” jai picani Herodes Jesúsnyo yabara. Itsiata tulupu perubenaajava pecanaëcobivi caxitajarabi ata Jesúsnyo, apo vajunucaponaeremena Herodesjavabelia. Nexata Herodes itsa yapëtane tulupu perubenaajava pecanaëcobivi apo pevajunucaponaejavatsirena, caxitajarabi ata Jesúsnyo, Herodes bitso anaepana. Nexata Herodes pijajivi itoroba. Jumaitsi:

—Pabeponaename daxita pebinacuetoxi Belén tomarata, Belén tomarajumavelia penaebonëjava ata. Daxita papebinacuetoxi abaxë apo xainae acueyabi pavaijebe, pabeponaename. Pejananaexanaenacuetoxi ata pabeponaenane, jai Herodes pijajivijavabelia.

Bajarapacuenia Herodes pijajivi itoroba pebinacuetoxi pebeponaenexa, Jesúsnyo picani peyajavabeyaxuabinexatsi. Tsipaji tulupu perubenaajava pecanaëcobivi Herodesjavabelia tsipaeba paepatota taxuxuaba petaejava tulupoto. ¹⁷ Itsa bajarapacuenia pebinacuetoxi beponatsi Belén tomarata, copiapata jane baja pacuenia baja cajena Diosojumepaebinëmi profeta Jeramiaspijinë bajayata tajëvelia yaquina pebinacuetoxi pebejavanexatsi yabara. Bajayata baja cajena profeta Jeramiaspijinë peyaquinaelivaisita tajëvelia jumaitsi mapacueniaje:

¹⁸ Belén tomarajumaverena, Ramá tomarata, ayaicuenia matanueyabiana. Raquelpijiva pemomoxi pexi matanueyabiana. Itavetsi atatsi tsane, itsiata apo copatsi tsane bitso penajamatabëxainaejava. Tsipaji pexi totëpaenatsi,

jai bajayata tajëvelia profeta Jeramiaspijinë peyaquinaelivaisita pecoxibeponaejavanexatsi yabara bajarapatomarata.

¹⁹ Nacuaevevtsinë baja Herodes pepuatëpae, Dioso icatsia pijaánel itoroba Joséjavabelia. Nexata ángel meravi majitsinaebota José tsitanaitajëtatsi Egipto nacuata. ²⁰ Nexata ángel jumaitsi Joséjavabelia:

—José, nonotapunare. Barëponaename baja tsiquirinëyo, pena yajava. Barënaviaremelia baja icatsia Israel nacuayabelia. Tëpa rabaja ponë picani jamatabëbeyaxuabatsi tsiquirinëyo, jai ángel majitsinaebota Joséjavabelia.

²¹ Nexata baja José nonotapuna. Barëpona tsiquirinëyo, pena yajava. José icatsia barënaviata Israel nacuayabelia. ²² Nacuaevevtsinëmi Herodespijinë pexënató pevënë Arquelao. Nexata Arquelao eveta Judeanacua paxa pevënamuto. Nexata José itsa vënëlivaisitane nacuaevevtsinëmi Herodespijinë pexënató pevetsijava Judeanacua, José cujanava Jesúsnyö pebarëponaejava Judea nacuayabelia. Majitsinaebota José Dioso itavetatsi Jesúsnyö pebarëponaeyaniva Judea nacuayabelia. Nexata José barëpona Jesúsnyö Galilea nacuayabelia. ²³ José itsa barëpata Jesúsnyö Galilea nacuayabelia, Nazaret tomarata barëpatajopa pebarëecaenexa Nazaret tomarata. Bajarapacuenia José Nazaret tomarata itsa barëca Jesúsnyö, copiapata jane baja pacuenia baja cajena bajayata Diosojumepaebivimi profetavi tajëvelia jumaitsi. Diosojumepaebivimi profetavi bajayata baja cajena tajëvelia jumaitsi Jesús yabara mapacueniaje: “Ponë Dioso itorobijitsiatsica jivi pecapanepaenexa, bajaraponë yabara jivi jumai tsane: ‘Mara ponëje Nazaret tomarapijinëje,’ jai tsane,” jai baja cajena bajayata tajëvelia profetavimi Jesús yabara.

3

Pacuenia Juan jivibautisabinë Dioso pitorobilivaisi jivi tsipaeba petusato nacuata yabara pelivaisi

(Mr 1.1-8; Lc 3.1-9, 15-17; Jn 1.19-28)

¹ Jesús itsa baja xaina bejamatabëcuene treinta pavaibeje, Juan jivibautisabinë najetarua Judea nacuatusatojava. ² Juan jivibautisabinë Dioso pitorobilivaisi jivi tsipaebanajetarua. Jumai tsanajetarua mapacueniaje:

—Dioso rabaja pijajivi pevetsimatacabinexa, imoxoyo baja pevajënae pecopiapatsinexa. Nexata baja pacopabare pibisiacuene paneexanabiabijava. Panajamatabëcuenepënyorore Diosojavabelia, jai tsanajetarua Juan jivijavabelia.

³ Bajarapacuenia Juan Dioso pitorobilivaisi jivi itsa tsipaebanajetarua, copiapata jane baja pacuenia Diosojumepaebinëmi profeta, Isaíaspijinë, bajayata tajëvelia yaquina Juan pelivaisi. Juan jivibautisabinë Dioso pitorobilivaisi jivi petsipaebanajetaruaejavanexa yabara, yaquina. Profeta Isaíaspijinë peyaquinaelivaisita tajëvelia jumaitsi mapacueniaje:

Tanejumulivaisipaebinë vavajai tsane petusato nacuata. Jumaitsi tsane jivijavabelia: “Jivi baxaneba panamutoverena najetaruaejitsia petuxanenë. Batoroviaexananua namuto. Bajara pijinia pacuenia paxamë ata panajamatabëcuenexaniavaere pepo petuxanenë pepatsivajënaeyarena,” jai tsane tanejumulivaisipaebinë,

jai profeta Isaíaspijinë bajayata peyaquinaelivaisita Dioso pitorobilivaisi Juan jivi petsipaebanajetaruaejavanexa yabara.

⁴ Juan naxatata camellonata pexanaejava. Naepacëta cuerobocoto. Pexaejava ëbosese, jabëra yajava. ⁵ Juan petsipaebilivaisi pejumetaenexatsi, muxunapatabiabatsi Jerusalén tomarapijivi, Judea nacuapijivi ata, Jordánmene

imoxoyopijivi ata. ⁶ Nexata bajarapamonae pibisiacuene pexanaejavami, roviafia Diosojavabelia navecuapaebapona. Nexata bajarapamonae Juan bautisabapona Jordán meneta.

⁷ Jivibitsaëtoxaneto pata Juanjavaberena pebautisabinexa picani Juan. Bajarapamonae apo jumecovënëtsi ata Dioso pitorobilivaisi, jamatabëcuenenavëxaniabiaya jamatabëjumaitsi:

—Juan itsa nacabautisabiana, Dioso nacacapanepaena, jamatabëjai.

Nexata Juan itsa tane ayaibitsaëtoxaneto fariseovi, saduceovi ata, pepatsi-javarena Juan picani pebautisabinexa, nexata Juan jumaitsi bajarapamonaejavabelia:

—¡Panejamatabëcuenenavëxaniabivi! Pacuenia jomo rëcëpa itsa tane isoto petajuenajetaruaejava, bajara saya paitsimë. Dioso rabaja papecananeconitsia exanaematacabinexa, pacaimoxoyotapona. Itsiata acuenebi tsane panevucapanepaenexa Dioso papecananeconitsia exanaematacabinexa. ⁸ Itsa pajitsipame Dioso papecacapanepaejava, pacopabare pibisiacuene paneexanabiabijava. Dioso pajumecovënëtavanapare. Nexata daxitajivi pacayapëtaena pepacuene baja panecopabijava pibisiacuene paneexanabiabijavami. Pacayapëtaenanua panenajamatabëcuene pënëyorotsijava Diosojavabelia. ⁹ Jamatabëcuenenavëxaniabiaya pëtsa panajumaitsimë: “Vaxaitsi cajena Abrahampijinë pemomoxitsi. Nexata Dioso nacacapanepaena,” panajamë pëtsa. Abrahampijinë picani papemomoxi atamë, itsiata pibisiacuene itsa paexanavanapame, nexata bajarapacuene apo pacatonamatamotsi tsipae Diosojavabelia papecacapanepaenexa. Dioso baja cajena caëjëpatsi jivi pexanaenexa mapai botonëmi ataje, Abrahampijinë bepemomoxi Dioso petaenexa. Nexata bajarapamonae ata Dioso itsa apo jumecovënëtsi, Dioso apo capanepae tsipae. Nexata pacopabare pibisiacuene paneexanabiabijava papecacapanepaenexa Dioso. ¹⁰ Peubinaenë pexanaenë itsa apo tonacuaitsitsi pexaniacuai, nicata sipalita daxita ponaenë apo tonacuaitsitsi pexaniacuai. Nexata baja penicatsicujinae itsa niona bajaraponaenë, caetuata. Xuaba isotojavabelia. Nexata bajaraponaenëmi tajuatsi. Bajara pijinia pacuenia paxamë ata Dioso pacaxuabiana infernojavabelia papecatajuenexa, Dioso apo panejumecovënëtsivi. ¹¹ Xanë raja saya jivi bautisabaponajë merata. Tsipaji baja bajarapamonae copaba pibisiacuene pexanabiabijava. Najamatabëcuenepënëyorotana Diosojavabelia. Itsiata baitsi jane ponë tacovëverena najetaruaena, tabautisabivi Espiritu Santo tsijamatabëjoneyaexanaenatsi, pitarunutsicotia yajava. Xanë raja saya beveliajamatabëcuenenë bajaronëvecua. Nexata bajaraponë vecuaauranë pijazapato ata tatocaponaenexa bepijajivitonëcuenianë. ¹² Arrozxainanë baja itsa vereta arroz pesiricaejava, jëaba arroz pejëabijavata pepitsinexa ëpexu. Nexata pijaarroz pejëabijavata, saicoya tsatapona ëpexu pesivecua. Nexata ëpexu xaniavaeteta peetsibojavabelia. Pesi pijinia penetapona vayafuabelia petajuitsinexa. Bajara pijinia pacuenia paxamë ata Dioso pejumecovënëtsivivecua Dioso pacatsatsiana papecaxuabinexa infernojavabelia panenaxuabinexa baja daxitamatacabijavabelianexa. Pamonae pijinia Dioso pejumecovënëtsivi, Dioso capanepaenatsi pijinacuayabetsia. Pamonae pijinia Dioso apo jumecovënëtsi, Dioso naneconitsiaexanaenatsi daxitamatacabijavabelianexa apo pevereverecaes isotojavabelia, jai Juan daxita bajarapamonaejavabelia.

*Pacuenia Juan bautisaba Jesús yabara pelivaisi
(Mr 1.9-11; Lc 3.21-22)*

¹³ Jesús naropota Galilea nacujavaverena. Nexata pata Jordán menejav-
 aberena. Jordán menejavata Juan ponapona. Nexata Jesús pata Juanjav-
 aberena pebautisabinexatsi Juan. ¹⁴ Juan picani apo jitsipae pebautisabi-
 java Jesús. Juan nexata jumaitsi Jesúsjavabelia:

—¿Detsa xuajitsia patame tacabautisabinexa? Xamē rajane biji xanē
 benebautisabame, jai Juan Jesúsjavabelia.

¹⁵ Itsiata Jesús jumaitsi Juanjavabelia:

—Aeconoxae itsiata pacuenia baja cavajētatsi, netoexanaename.
 Xanepana vajaexanaenexa daxita Dioso vajanacaitorobicuenia, jai Jesús
 Juanjavabelia.

Nexata baja Juan jejai pebautisabinexa Jesús. ¹⁶ Nexata jane baja Juan
 bautisaba Jesús. Jesús pebautisabicujinaetsi nonotajuna menevetsina.
 Bajarapaepatota Jesús tane athēbētatsia itaboxo penapatsijava. Nexata
 Jesús tane Espiritu Santo perunaejavatsica beucucuto. Tsimatarunaicatsi.

¹⁷ Nexata Juan jumetane athēbēvetsica Dioso pejumaitsijava: “Mara ponē
 taxēnato tasivanēje. Sivajamatabēcuenebarēyanē bitso,” pejaijava.

4

Pacuenia Jesús jamatabēcueneējēbatsi dovathi yabara pelivaisi

(Mr 1.12-13; Lc 4.1-13)

¹ Jesús pebautisabicujinaetsi, Espiritu Santo ponaeyaexanatsi petusato
 nacuyabelia. Bajarabelia ponaeyaexanatsi pejamatabēcueneējēbinexatsi
 dovathi.

² Nexata petusato nacuata Jesús ponapona cuarenta pamatacabibeje,
 cuarenta pameravibeje yajava. Bajara pijinia pamatacabibeje Jesús apo
 xae pexaejava. Nexata Jesús bitso piajani. ³ Nexata dovathi Jesús imoxoy-
 otatsi pejamatabēcueneējēbinexatsi Jesús picani pibisiacuene pexanaenexa.
 Dovathi jumaitsi Jesúsjavabelia:

—Itsa pepacuene Dioso pexēnatomē, itorobare mapai botonēje penaex-
 anaenexa pan, jai dovathi.

⁴ Jesús nexata jumaitsi dovathijavabelia:

—Jume raja. Dioso raja pejumelivaisibaxutota jumaitsi mapacueniaje:
 “Jivi raja apo namatavenonae ēpexaejava pexaenexa. Jivi raja namatavenona
 daxita Dioso pejumelivaisi ata pejumecovēnēt sinexa pexainaenexa matacabi
 apo pevererecaejava,” jai raja Dioso pejumelivaisibaxutota, jai Jesús
 dovathijavabelia.

⁵ Bajaraxuacujinae icatsia Jesús barēliatsi dovathi Jerusalén tomarabelia.
 Barējunayatsi templobo matatuyabetsia. ⁶ Nexata templobo matatutatsia
 dovathi icatsia jumaitsi Jesúsjavabelia:

—Itsa pepacuene Dioso pexēnatomē, jirevaremeca irabereca.
 Bajarapacuenia jirevaremeca irabereca tsipaji xamē nitsacueneyaniva
 pecae vetsinexa Dioso pejumelivaisibaxutota jumaitsi mapacueniaje:

Dioso itorobianica pijaángelevi pecae vetsinexa. Nexata ángelevi pecobeta
 cayotsiana pecataxutsaquitsianiva ibotonējavabelia,

jai Dioso pejumelivaisibaxutota xamē pecae vetsinexa ángelevi, jai dovathi
 Jesúsjavabelia.

⁷ Jesús nexata icatsia jumaitsi dovathijavabelia:

—Jume raja. Dioso raja pijinia pejumelivaisibaxutota jumaitsi ma-
 pacueniaje: “Itsjivi ata jamatabēcuenenavēxaniabiaya pijacuata apo beja-
 matabējumaitsi: ‘Xanē Dioso jamatabēcueneējētsianajē. Nexata exanaenajē

pacuene bitso netsiyayi tatēpaenexa. Itsiata Dioso neyavenonaena tavecuapanepaenexa bajaraxua. Nexata bajarapacuenia yapētaenajē Dioso taneyavenonaejava, apo bejamatabējai,” jai Dioso pejumelivaisibaxutota, jai Jesús dovathijavabelia.

⁸ Jesús icatsia barēliatsi dovathi pinijitsutoxanetojavabelia. Barējunayatsi bajarapatsutojumabetsia. Nexata bajarapatsutojumavetsica dovathi Jesús tsifajētatsi daxitanacuanē. Daxita bajarapanacuanēta daxitacuene pexainaejava yajavatsitajētatsi. ⁹ Nexata icatsia dovathi jumaiti Jesúsjavabelia:

—Ayaijamatabēcuenenēnē netaeya taitabarata nematabacabēta itsa netonucajunuame, nexata daxita mapanacuanētaje, daxitacuene xua xaina, cayajavarajutsianatsi, jai dovathi Jesúsjavabelia.

¹⁰ Nexata Jesús jumaiti dovathijavabelia:

—Dovathi, nevecuanatixire. Dioso raja pejumelivaisibaxutota jumaiti mapacueniaje: “Daxitajivi vajēcae pematabacabēta caenē pepo petuxanenē Diosojavabelia. Tonacuenebinua bajaraēponēnexa,” jai raja Dioso pejumelivaisibaxutota, jai Jesús dovathijavabelia.

¹¹ Nexata baja dovathi Jesús vecuaponatsi. Bajaraxuacujinae ángelevi patsica Jesús peyavenonaenexatsi.

Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi

(Mr 1.14-15; Lc 4.14-15)

¹² Jesús vënëlivaisitane Juan peetsijavatsi penaneconitsivi pejebabiabibota. Nexata Jesús pona Galilea nacuayabelia. ¹³ Itsiata Jesús apo ponaponae Nazaret tomarata. Ponapona Capernaum tomarata. Capernaum tomara eca Zabulónvënë nacuabeje Neftalivënë nacuabejejavata. Capernaumtomara eca pucaxanetoitapata. ¹⁴ Bajarapacuenia Jesús itsa patajopa Capernaum tomarata Dioso pitorobilivaisi jivi petsipaebinexa, copiapata jane baja pacuenia bajayata Diosojumepaebinē profeta, Isaíaspijinē, tajēvelia yaquina Jesús pelivaisi. Dioso pitorobilivaisi Jesús Capernaum tomarata jivi petsipaebijavanexa yabara, Isaíaspijinē peyaquinaelivaisita tajēvelia jumaiti mapacueniaje:

¹⁵⁻¹⁶ Zabulón nacuapijivi, Neftali nacuapijivi ata, Jordánmene itsapanaverenapijivi ata, bitso apo yapētae Dioso pitorobilivaisi. Galilea nacuata pejinavanapaevi ata, itsaxuayo jinavanapa ayabitšaētoxanetonē apo judíovi, bitso apo yapētae Dioso pitorobilivaisi. Daxita bajarapanacuanēpíjivi pexaniajailivaisi, Dioso pitorobilivaisi, apo peyapētaexae, bepitaquirinacuanējave jinavanapa. Nexata pacuenia pinijicotiaxaneto itayotsipatsi petaenexa xaniavaetsia, bajara pijinia pacuenia bajarapamonae jamatabēcueneyotsianatsi itsa tsipaebianatsi Diosojavabelia pecapanepaelivaisinexatsi,

jai tajēvelia Isaíaspijinē peyaquinaelivaisita Dioso pitorobilivaisi Jesús petsipaebijavanexa yabara bajarapanacuanēpíjivijavabelia.

¹⁷ Nexata Capernaum tomarata Jesús taxuxuaba Dioso pitorobilivaisi jivi petsipaebijava. Dioso pitorobilivaisi Jesús itsa tsipaeba, jivijavabelia jumai tsaponae mapacueniaje:

—Dioso rabaja papecaevetsimatacabinexa, imoxoyo baja pevājēnae pecopiapatsinexa. Nexata baja pacopabare pibisiacuene paneexanabiabijava. Panajamatabēcuenepēnēyorore Diosojavabelia, jai tsaponae Jesús jivijavabelia.

Pacuenia Jesús junata cuatro ponēbeje dujuai peyamatajucabiabivi yabara pelivaisi

(Mr 1.16-20; Lc 5.1-11)

¹⁸ Jesús najetaruca Galilea pucaxaneto itapaya. Nexata Galilea pucaitapata Jesús taenuta anijanēbeje nacaebananēbeje, Simónbeje Andrésbeje. Simón itsavēnē Pedro. Bajaraponēbeje daxitamatacabi canacujitsia dujuai yamatajucabiababeje. Dujuai peyamatajucabiabijavatabeje, yamatajucaponaponabeje. ¹⁹ Nexata Jesús jumaitsi Simónbeje Andrésbejejavabelia:

—Naxanitsia. Panepēnaponarebeje. Nexata pacacujarubianatsibeje jivi panejucaenexabeje. Pacuenia dujuai payamatajucabiabamebeje, bajarapacuenia jivi pajucaenname Dioso pijajivinexa, jai Jesús.

²⁰ Nexata Simónbeje Andrésbeje dujuai peyamatajucabiabijavamibeje, bajarajota puenetabuatabeje. Nexata baja naponabeje Jesús pepēta.

²¹ Bajaraxuacujinae icatsia bebeliayo pevājēnaeyabelia Jesús barēpona. Icatsia taenuta anijanēbeje nacaebananēbeje, Zebedeo pexēnatobeje. Bajaraponēbeje Santiagobeje Juanbeje. Pijajeraēnēta paxa yajava xanebaponaponabeje dujuai peyamatajucaejavanexabeje. Nexata icatsia Jesús junata Santiagobeje Juanbeje. ²² Nexata bajarajota paxa puenetanutabeje jera yajava. Santiagobeje Juanbeje naponabeje baja Jesús pepēta.

Pacuenia Jesús livaisi tsipaeba jivi ayaibitsaētoxanetojavabelia yabara pelivaisi

(Lc 6.17-19)

²³ Jesús jane baja najetaruca daxita Galilea nacujajava. Dioso pitorobilivaisi tsipaebapona judiōvi penacaetuatabiabibonējava. Jesús tsipaebapona jivijavabelia pexanalivaisi. Tsipaebapona Dioso pijajivi pevetsijavanexa. Jamatejemayaexanaponanua daxitaviriavitane pexainaevimī. ²⁴ Nexata daxita Siria nacujajava pejinavanapaevi ata vēnēlivaisitanetsi Jesús. Jesús tocapatatsi daxitaviriavitane pexainaevi. Tocapatatsinua dovathi peyajavajinavanapaevi. Tocapatatsinua pedevacaibivitsi. Tocapatatsinua petabusipacuenabivitsi. Jesús nexata jamatejemayaexanapona daxita bajarapamonae. ²⁵ Nexata Jesús pēnaponatsi jivi ayaibitsaētoxaneto Galilea nacujajivi, Decápolis nacujajivi ata, Jerusalén tomarapijivi ata, Judea nacujajivi ata, Jordánmene itsapanaverenapijivi ata.

5

Pacuenia Jesús jivi livaisi tsipaeba petsutoyenepanajavata yabara pelivaisi

(Lc 6.20-23)

¹ Jesús itsa tane jivibitsaētoxaneto, nexata junaya petsutotsia. Bajarapatsutoyenepanata epatota ecaya. Nexata bajarajota Jesús pijajivi matatoyorotsia nacaetuatsi. ² Nexata Jesús taxuxuaba livaisi petsipaebijava. ³ Jesús jumaitsi pijajivijavabelia mapacueniaje:

—Jamatabēcuenebarēya tsavanapae tsane pamonaē picani mapanacuata yajamatabēcuenebējai tsavanapae pibisiacuene pexanabiabijava. Bajarapamonae jonena Dioso pijanacuayabetsia.

⁴ Jamatabēcuenebarēya tsavanapae tsane pamonaē picani mapanacuata bejamatabējiobi tsavanapae itsamonae pibisiacuene petoexanaeatsi. Bajarapamonae Dioso jamatabēcueneavenonaenatsi.

⁵ Jamatabēcuenebarēya tsavanapae tsane pamonaē apo jamatabēbējai tsabiabi mapanacuata, itsacueniababiabi atatsi itsamonae. Apo

cuenecanaviatabiabinua. Bajarapamonae jinavanapaena Dioso pijanacuatatsia pacuenia Dioso najumecapanepaeya jumaitsi bajarapamonae yabara.

⁶ Jamatabëcuenebarëya tsavanapae tsane pamonaе mapanacuata bitso daxitacuene matatoxenetsia jitsipabiaba pexanaenexa Dioso pitorobicueniatsi. Dioso baja cajena yavenonabiabianatsi pexanaenexa bajarapacuene.

⁷ Jamatabëcuenebarëya tsavanapae tsane pamonaе mapanacuata itsa-monaе ata itaxutotsoniataeyabiaba. Dioso nexata juya itaxutotsoniataeyabiabianatsi bajarapamonae.

⁸ Jamatabëcuenebarëya tsavanapae tsane pamonaе mapanacuata ëpexaniacuene pexanaenexa najamatabëxainabiaba. Bajarapamonae taena Dioso.

⁹ Jamatabëcuenebarëya tsavanapae tsane pamonaе mapanacuata penaitoyavimi ata, nabarajamatabëcuene xanepanaeyaexanapona. Bajarapamonae yabara: “Taxi,” jai tsane Dioso.

¹⁰ Jamatabëcuenebarëya tsavanapae tsane pamonaе mapanacuata bejiobiaexanabiabatsi Dioso pitorobicueniatsi pexanabiabijava yabara. Bajarapamonae jonena Dioso pijanacuayabetsia.

¹¹ Patajajivixamë, itsamonae pibisiacuena itsa pacabaracuaicuajiai, itsiata pajamatabëcuenebarëyamë tsavanapae tsane. Bajarapamonae pacabejiobiaexanae ata tsane, najumetsënëtsiaya pacabaracuaicuajiai atanua tsane, itsiata pajamatabëcuenebarëyamë tsavanapae tsane.

¹² Bajara tsipaji pacuenia panevajënaeyapijivimi ata, Diosojumepaebivimi profetavi, bajayata bejiobiaexanatsi. Nexata pasivajamatabëcuenebarëyamë tsavanapae tsane paxamë ata bajarapacuena itsa pacaexanaena. Tsipaji raja athëbëtatsia itsamatacabi Dioso pacarajutsiana bitso pexaniacuene, jai Jesús pijajivijavabelia.

Pacuenia Dioso pejumecovënëtsivi mapanacuata pejamatabëcuene beyajo, bepecotianua, yabara pelivaisi

(Mr 9.50; Lc 14.34-35)

¹³ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Yajobeno xanepana vajaexabinexa pevi piabejeyaniva. Paxamë rabaja pijinia bepajajomë tsavanapae mapanacuapijivijavabeliaje, mapanacuapijivi bitso piabejeyaniva pibisiacuene pexanaecononi yabara. Paxamë xaniavaetsia panetsipaebavanapaexae Dioso pejumelivaisi, bajarapamonae bitso pibisiacuene apo exanae. Itsiata yajo pexaicaejavami itsa ajibi tsipae, ¿detsa nexata pacuenia icatsia naxaicaeyaexanaejitsipa? Acuenebi. Itsacuenejavayonexa ata baja apo xanepanae tsipae. Saya pexuabinexa, jivi petaxunanonobinexa, xanepanaejitsipa. Bajara pijinia paxamë ata paitsimë tsipae itsa pacopatsipame Dioso panejumecovënëtsijava. Pajamatabëcuenesaëjibimë tsipae. Nexata itsacuenejavayonexa ata, apo paxanepanaemë tsipae.

¹⁴ Pacuenia piaitayotsicotia itayota piaitaquirijavata, bajara pijinia pacuenia paxamë ata Dioso panejumecovënëtsivi pajamatabëcueneitayotsianame piagamatabëcueneitaquirivimi. Bajarapacuena pajamatabëcueneitayotsianame itsa patsitajinavanapaename xaniavaetsia daxitajivi pitabarata. Petsutojumata peecaetomara acuenebi penacaranatecaejava tsipae. ¹⁵ Itsajivi ata lãmparabë pitanojotsicujinae, apo etsi cajoniënëalia. Biji rajane athëbëyo etsia daxitaboënë pitayotecaenexa.

¹⁶ Bajara pijinia pacuenia paxamë ata paitsimëre. Xaniavaetsia

patsitajinavanapare daxitajivi pitabarata. Nexata bajarapamonae pacacuenetaena pexaniacuene paneexanavanapaejava. Nexata bajarapamonae itsa pacacuenetaena pexaniacuene paneexanavanapaejava, jumai tsane paxamë yabara paneaxa Diosojavabelia: “Diosomë, bitso ayaijamatabëcuenenëmë. Yavenonabiabame nijajivi,” jai tsane bajarapamonae paneaxa, athëbëtatsia peecaenëjavabelia, jai Jesús pijajivijavabelia.

Pacuenia Jesús tsipaeba pijajivi bajayata Dioso Moiséspijinëta penajumecopatsilivaisi yabara pelivaisi

¹⁷ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Pëtsa panesivajamatabëjumaitsimë: “Maponë patajopaje piajibiaexanaenexa Dioso Moiséspijinëta penajumecopatsilivaisi. Palivaisi ata Diosojumepaebivimi profetavi bajayata tsipaebapona piajibiaexanaenexa,” panesivajamatabëjamë pëtsa. Apo patajopaenë tajibiaexanaenexa bajarapalivaisibeje. Biji rajane patajopajë taexanaenexa jane baja daxita pacuenia tajëvelia nevajunupaeba bajarapalivaisitabeje. ¹⁸ Xaniajanë pacuenia pacatsipaebijitsiatsi. Dioso Moiséspijinëta penajumecopatsilivaisi epatua itsalivaisicuenia, caeitanetoyo ata, Dioso apo ithothianae tsane. Pacuenia baja Dioso najumecapanepaeya jumaitsi, bajarapacuenia tsitecaena. Nexata copiapatsiana daxita xua Dioso tajëvelia najumecapanepaeya jumaitsi bajarapalivaisitabeje. ¹⁹ Nexata pajivi jumecovënëtsi ata Dioso Moiséspijinëta penajumecopatsilivaisi, itsiata itsa apo jumecovënëtsi caelivaisiyo bajarapayajuvënëlivaisiyo, naneconitsiana Diosojavabelia. Bajarapajivi itsa itavetsiananua itsamonae ata pejumecovënëtsiyaniva bajarapalivaisiyo, nexata bajarapaneconi yabara bajarapajivi beveliajamatabëcuenëjivi taenatsi daxitajivivecua Dioso pijanacuatatsia. Pajivi jumecovënëta daxita bajarapalivaisi, itsa tsipaebanua itsamonae ata pejumecovënëtsinexa bajarapalivaisi, nexata bajarapajivi ayaijamatabëcuenëjivi taenatsi Dioso pijanacuatatsia. ²⁰ Xaniajanë pacuenia pacatsipaebijitsiatsi. Paxamë xaniavaetsia Dioso pajumecovënëre. Xaniavaetsia Dioso pajumecovënëre judiövi pecujarubivi Dioso pejumecovënëtsijava matatoxenëtsia. Xaniavaetsia Dioso pajumecovënëre fariseovi ata Dioso pejumecovënëtsijava matatoxenëtsia. Paxamë xaniavaetsia Dioso itsa apo pajumecovënëtsimë tsane, nexata pacuenia bajarapamonae apo jone tsane Dioso pijanacuayabetsia, bajara paxamë ata paitsimë tsane. Apo panajonemë tsane Dioso pijanacuayabetsia, jai Jesús pijajivijavabelia.

*Pacuenia Jesús muxujioba pijajivi pecopatsinexa penabaraanaepanabiabi-
java yabara pelivaisi*
(Lc 12.57-59)

²¹ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Paxamë rabaja payapëtaneme pacuenia bajayata Moiséspijinë jumaitsi panijasalinaivimijavabelia. Moiséspijinë bajayata panijasalinaivimijavabelia jumaitsi mapacueniaje: “Pëtsa pabeyaxuabame jivitonë. Pajivi beyaxuaba jivitonë, bajarapajivi pananeconitsiaexanaename,” jai

Moiséspijinē panijasalinaivimijavabelia. ²² Itsiata baitsi jane xanē pacat-sipaebatsi mapacueniaje. Pajivi baranaaepana itsajivijavabelia, bajarapajivi naneconita Diosojavabelia. Nutsianatsi Dioso pitabarata penaneconitsiyaexanaenexatsi. Pajivi itsajivi bijatane pibisiacuenia, bajarapajivi naneconita Diosojavabelia. Bajarapaneconi yabara nutsianatsi itsajota nacaetuatabiaba tomara pevetsivi. Nexata naneconitsiyaexanaenatsi. Pajivi itsajivi pitoyaxae, anaeya jumaitsi: “Xamē saya bitso pecamata-jemabinē,” jai, bitso tsiayaitsi. Bajarapaneconi yabara bajarapajivi Dioso naneconitsiyaexanaenatsi infierno isotojavabelia.

²³ Itsa paponame altarpvñjavavabelia panerajutsinexa ofrenda Diosojavabelia, nexata bajarapaepatota itsa panajamatabēnapitame itsajivijavabelia itsacuene paneexanaejava, nexata mapacuenia paexanaenameje. ²⁴ Altarpvñjava pitabarata abaxē papuenera ofrenda panerajutsijavanexa Diosojavabelia. Paponare caecuenia pajivijavabelia pananeconitame panenabarajamatabēcuene xanepanaenexabeje icatsia. Bajaraxuacujinae icatsia panaviatsiaremena altarpvñjavavaberena panerajutsinexa jane baja ofrenda Diosojavabelia.

²⁵ Itsa pananeconitame itsajivijavabelia, nexata itsa pacacapona bajarapajivi jueznējavabelia papecaneconitsinexa, namutua xaniavaetsia panabarēcuai cuajamērebeje panenasivajamatabē xanepanaenexabeje xua yabara picani pacaneconitsijitsia. Bajarapacuenia xaniavaetsia panabarēcuai cuajamērebeje papecanutsiyani jueznē pitabarata. Tspajivi raja jueznē itorobijitsipa policiavi panijaneconi yabara papecacaponanexa penaneconitsivi pejebabiabiboyabelia. Nexata policiavi pacananeconitsiaexanetsipa penaneconitsivi pejebabiabibota. ²⁶ Xaniajanē pacuenia pacatsipaebijitsiatsi. Nexata penaneconitsivi pejebabiabibota itsa pacananeconitsiaexanetsipa, bajaraverena bepijia apo papitsapaemē tsipae. Matapania pamatamotsipame daxita xua yabara pacananeconitsiaexaneta, papitsapaejitsipame, jai Jesús pijajivijavabelia.

Pacuenia Jesús pijajivi muxujioba penacojibinē itsava pejaitsiyani va pijavavecua yabara pelivaisi

²⁷ Icatsia Jesús jumaitsi petsutoyenepanajavata pijajivi ayaibit-saētoxanetojavabelia:

—Paxamē rabaja payapētaneme pacuenia bajayata Dioso Moiséspijinēta penajumecopatsilivaisi jumaitsi. Dioso Moiséspijinēta penajumecopatsilivaisi jumaitsi mapacueniaje: “Pētsa jaitame itsava nijavavecua,” jai. ²⁸ Itsiata baitsi jane xanē mapacuenia pacatsipaebatsije. Ponē petiriva itsa taenuta, nexata itsa jamatabējumaitsi: “Jema xania tavitota pibisiacuene apo caexanaetsi mapovajavabeliaje,” itsa jamatabējai, bajaraponē naneconita Diosojavabelia. Nexata najēpaeya naneconitabeje Diosojavabelia ponēbeje pepacuene itsavajavabelia pibisiacuene pevitota exana pijavavecua.

²⁹ Panecujuaitaxutota panetaejava yabara pibisiacuene itsa paexaname, panaitaxutocajure. Tajē baja paxuare. Xanepana panenavecuaxuabinexa bajarapaitaxuto, padaxitaperabētojivimē Dioso papecaxuabiyani va infiernojavabelia. ³⁰ Panecujuacobeta pibisiacuene itsa paexaname, panacobe-caucure. Tajē baja paxuare. Xanepana panenavecuaxuabinexa, bajarapacobe padaxitaperabētojivimē Dioso papecaxuabiyani va infiernojavabelia, jai Jesús pijajivijavabelia.

Pacuenia Jesús pijajivi muxujioba penacojobinē pijava pexuabijaniva yabara pelivaisi

(Mt 19.9; Mr 10.11-12; Lc 16.18)

³¹ Icatsia Jesús jumaitsi petsutoyenepanajavata pijajivi ayaibit-saētoخانetojavabelia:

—Bajayata Dioso Moiséspijinēta penajumecopatsilivaisi jumaitsi mapacueniaje: “Ponē jamatabēxuaba pijava, copiaya toyaquinae cuyalatoxaxuto pijavajavabelia. Toyaquinae pijava pitavetsilivaisi. Nexata xuacujinae xuabi pijava,” jai bajayata Dioso Moiséspijinēta penajumecopatsilivaisi. ³² Itsiata baitsi jane xanē mapacuenia pacatsipaebatsije. Ponē pijava xuaba, itsanējavabelia bajarapova pevitota pibisiacuene apo vecuaexanae atatsi, bajaraponē naneconita Diosojavabelia pijava pexuabixae. Petiriva pamona pexuabixaetsi, nacojobijitsipa itsanējavabelia. Nexata jane baja bajaraponē pijava pibisiacuene vecuaexanaejitsipatsi itsanējavabelia. Tsipaji abaxē bajaraponē pijavacuenia Dioso totanetsi. Nexata pijinia ponē pita bajaraponē pexuabicovēvami, bajaraponē ata pibisiacuene exana pevitota. Tsipaji abaxē bajaraponē pijavacuenia Dioso totanetsi, jai Jesús pijajivijavabelia.

Pacuenia Jesús pijajivi muxujioba, Jesús pijajivi itsa navajunupaeba xua exanaejitsia, itsajumeyo ata yajava pejumaitsiyaniva jivi pejumexaniataenex-atsi yabara pelivaisi

³³ Icatsia Jesús jumaitsi petsutoyenepanajavata pijajivi ayaibit-saētoخانetojavabelia:

—Paxamē rabaja payapētaneme pacuenia bajayata Moiséspijinē jumaitsi panijasalinaivimijavabelia. Panijasalinaivimi penajumetsēnēsitsyaniva, bajayata Moiséspijinē panijasalinaivimijavabelia jumaitsi mapacueniaje: “Itsa baja pepacuene najumecapanepaeya panavajunupaebame xua paexanaejitsiamē, itsamonae papecajumexaniataenexa itsa pajumaitsimē: ‘Xaniajanē raja. Cajumaitsi mapacueniaje Dioso pitabarata,’ itsa pajamē, pētsa epatua panajamatabēcopatame bajaraxua paexanaenejevamē,” jai bajayata Moiséspijinē panijasalinaivimijavabelia. ³⁴ Itsiata baitsi jane xanē mapacuenia pacaitorobatsije. Najumecapanepaeya itsa panavajunupaebame xua paexanaejitsiamē, roviaalia panavajunupaebare. Pētsa pematatsēnēa itsajumeyo ata yajava pajumaitsimē jivi papecajumexaniataenexa. Papecajumexaniataenexa itsajivi pētsa pajumaitsimē mapacueniaje: “Xaniajanē raja. Cajumaitsi mapacueniaje Dioso pitabarata,” pajamē pētsa. Pētsa pajumaitsimēnua: “Xaniajanē raja. Cajumaitsi mapacueniaje athēbēnacia pevēnēta,” pajamē pētsa. Tsipaji bajarajotatsia Dioso eca pijatronovēnējavata, itsajota ecabiaba pitorobinexa pijajivi. ³⁵ Pētsa pajumaitsimēnua: “Xaniajanē raja. Cajumaitsi mapacueniaje mapairaje pevēnēta,” pajamē pētsa. Tsipaji raja Dioso pijaira. Pētsa bajarapacuenia pajumaitsimē Jerusalēntomara ata pevēnēta. Tsipaji Jerusalēntomara Dioso pepo nacuaeavetsinē pijatomara. ³⁶ Pētsa pajumaitsimēnua: “Xaniajanē cajena. Itsa apo xaniajanē tsane, nexata nacaevetsianajē tanematathinaxuabinexamē tatēpaenexa,” pajamē pētsa. Tsipaji panematatocoto ata Dioso eveta. Nexata paxamē apo pacacaejēpae caematanatoyo ata panenamatananiojaiyaexanaenexa, panenamatanatsaejaiyaexanaenexa ata. ³⁷ Itsa pepacuene paexanaejitsiamē, “Jājā, exanaenajē,” pajamē roviaalia.

Itsa apo pajamatabëexanaemë, “Jume, apo exanaenë tsane,” pajamë rovia. Pematatsënëa pëtsa pajumaitsimë itsajumeyo ata jivi papecajumexaniataenexa. Tspaji bajarapajume dovathi pejamatabëcueneta pajumaitsimë tsipae, jai Jesús pijajivijavabelia.

Pacuenia Jesús pijajivi muxujioba pecunenecnaviatsiyaniva itsajivi itsacueniabi atatsi yabara pelivaisi

(Lc 6.29-30)

³⁸ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi. Bajayata Dioso Moiséspijinëta penajumecopatsilivaisi jumaitsi mapacueniaje: “Pajivi itsanë itaxutobijianatsi, juya bajarapajivi namatamoitaxutobijiana. Pajivi ata itsanë vonotanabiabatsi, juya bajarapajivi namatamovonotanabiabi,” jai bajayata Dioso Moiséspijinëta penajumecopatsilivaisi. ³⁹ Itsiata baitsi jane xanë mapacuenia pacaitorobatsije. Itsanë itsa jamatabëpacabia, pëtsa panayajivibiamë. Itsanë itsa pacaitabarapacabiaxuaba anaeya, nexata icatsia itsanenia ata papecaitarapacataxuabinexa, panaitabaracaeverë. ⁴⁰ Itsajivi itsa pacaneconitsijitsia jueznëjavabelia paneamoneyabijamatabëcuene papecavecuapitsinexa panijacamisa, nexata patocopare panijacamisajumavelia panenaxatatsijava ata papecavecuapitsinexa. ⁴¹ Vajabitsaë itsa pacacaponayaxana pijajava anijakilómetrobejecuenia, nexata patocaponare pematatsënëa ata. Cuatro pakilómetrobejecuenia ata patocaponare. ⁴² Bitso bepejiobijivi itsa pacavajëta itsacuenëjavayo, parajure. Itsa pacacovaeta, patsicopare. “Jume,” pajamë pëtsa, jai Jesús pijajivijavabelia.

Pacuenia Jesús pijajivi muxujioba piasivanexa pitoyavi atatsi yabara pelivaisi

(Lc 6.27-28, 32-36)

⁴³ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Paxamë rabaja payapëtaneme pacuenia bajayata Dioso Moiséspijinëta penajumecopatsilivaisi jumaitsi mapacueniaje: “Pasivamëre papecaypëtaenë bitso. Paitoyamëre papecaitoiyavi,” jai bajayata Dioso Moiséspijinëta penajumecopatsilivaisi. ⁴⁴ Itsiata baitsi jane xanë mapacuenia pacaitorobatsije. Pasivamëre papecaitoiyavi ata. Pamonae ata pibisiacuenia pacabaracuaicuajai, bajarapamonae paxamë xaniavaetsia pabaracuaicuajamëre. Pamonae ata pacaitoya, bajarapamonae pexaniacuene patoexanare. Pamonae ata pibisiacuenia pacabijatane, pibisiacuene pacaexanae ata, patovajëre Diosojavabelia peyavenonaenexatsi. ⁴⁵ Bajarapacuenia nexata paneaxa, athëbëtsatsia peecaenë, papeximëcuenia patsitajinavanapaename. Bajaraponë, paneaxa, yavenonabiaba daxitajivi. Nexata pexanijamatabëcuenevi, pibisijamatabëcuenevi ata, najëpaeya pijapabianë petonaxaniabinexatsi icotia copata. Bajarapacuenia pijinia ema ata copata. ⁴⁶ Itsa pasivamë tsipae ëpapecaasivavi, nexata pexaniacuene apo paxainaemë tsipae Diosojavabelia. Pataneme rabaja. Gobierno pejamatabëcueneta impuestomato peyanijobabivivi bitso pibisiacuene exana. Itsiata bajarapamonae ata asiva piasivavitsi. ⁴⁷ Xaniavaetsia itsa pacopiapitsipame ëpaneyapëtaevi, nexata pexaniacuene apo paexanaemë tsipae pamonae Dioso apo pejumecovënëtsivivecua. Tspaji Dioso apo pejumecovënëtsivi ata

xaniavaetsia copiapitabiaba peypapētaevitsi. ⁴⁸ Pacuenia jamatabēcueneitsi pejamatabēcuenexanepanaenē, paneaxa, athēbētatsia peecaenē, bajara paxamē ata pajamatabēcueneitsimēre, jai Jesús pijajivijavabelia.

6

Pacuenia Jesús pijajivi muxujioba pexaniacuene pexanaenexa yabara pelivaisi

¹ Icatsia Jesús jumaitsi petsutoyenepanajavata pijajivi ayaibit-saētozanetojavabelia:

—¡Xania baja tsane! Pētsa pexaniacuene paexaname saya jivi papecaucuenetaenexa, “Maponē bitso pexaniajamatabēcuenenēje,” papeca-sivajamatabējainexa saya paneexanaejava yabara. Bajarapacuenia itsa paexanaejitsipame, nexata paneaxa, athēbētatsia peecaenējavabelia, apo paxainaemē tsipae itsacuenejavayo ata, pexaniacuenejavayo, papecara-jutsinexa athēbētatsia. ² Bajaraxuata itsa payavenoname bepejiobivi, pētsa panavajunupaebame daxitajivijavabelia paneyavenonaejava bepejiobivi. Itsamonae xua exana, navajunupaebabiaba daxitajivi pitabarata judíovi penacae-tuatabiabibonējava, callejava ata. Bajarapamonae navajunupaebabiaba bepejiobivi peyavenonaejava, bepexaniajamatabēcuenevi saya petaenexatsi jivi. Xaniajanē pacuenia pacatsipaebijitsiatsi. Pamonae bajarapacuenia navajunupaebabiaba, bajarapacuenia penavajunupaebabi-abixae, Diosojavabelia apo xainae tsane athēbētatsia perajutsijavanexatsi.

³ Itsa payavenoname bepejiobivi, pētsa panavajunupaebame itsajivijavabelia ata, bitso papecayapētaevijavabelia ata. ⁴ Muetsia payavenonare bepejiobivi. Nexata paneaxa, papecataenē muetsia paneexanaejava ata, pacarajutsiana bepejiobivi muetsia paneyavenonaematamo, jai Jesús pija-jivijavabelia.

Pacuenia Jesús pijajivi tsipaeba pacuenia Diosojavabelia vajēcaejitsia yabara pelivaisi

(Lc 11.2-4)

⁵ Icatsia Jesús jumaitsi petsutoyenepanajavata pijajivi ayaibit-saētozanetojavabelia:

—Itsa pavajēcame Diosojavabelia, pētsa pavajēcame pacuenia itsamonae vajēcabiaba. Bajarapamonae saya jema vajēcabiaba Diosojavabelia jivi petaenexatsi Dioso bepejumecovēnētsivi. Bajarapamonae jitsipabiaba nu-caeya pevajētsinexa Diosojavabelia daxitajivi pitabarata judíovi penacae-tuatabiabibonējava, calle penaepacaxitajarabijava ata. Bajarapacuenia vajēcabiaba Diosojavabelia Dioso bepejumecovēnētsivi petaenexatsi jivi. Xaniajanē pacuenia pacatsipaebijitsiatsi. Pamonae bajarapacuenia ex-anabiaba, bajarapacuenia pexanaexae, Diosojavabelia apo xainae tsane athēbētatsia perajutsijavanexatsi. ⁶ Nexata paxamē Diosojavabelia itsa pavajēcame, pacaenēmē canacujitsia, pajonemeya panijaboyalia. Pabau-paxatare. Bajaraxuacujinae pavajēcare paneaxajavabelia. Nexata paneaxa pacayajava tsane bajarajota. Nexata paneaxa, papecataenē muetsia pane-exanaejava ata, pacarajutsiana bajaraxua paneexanaematamo.

⁷ Itsa pavajēcame Diosojavabelia, pētsa napēna pavajēcame saya pipianexa panevajēcaejava pacuenia Dioso apo peypapētaevi vajēcabiaba. Dioso apo peypapētaevi jamatabēcuenenavēxaniabiaya jamatabējumai tsabiabi: “Itsa bitso apia vajavajēcaejava Diosojavabelia, nexata matapania Dioso nacajumetaena vajavajēcaejava,” jamatabējai tsabiabi Dioso apo peypapētaevi. ⁸ Pētsa bajarapacuenia paxamē

pajamatabëcuenetsimë. Panevajëcaevajënaeya ata raja paneaxa, Dioso, yapëtane xua panamatavenoname. ⁹ Bajaraxuata itsa pavajëcame Diosojavabelia, pavajëre mapacueniaje:

Taxamë, athëbëtatsia neecaenë, jitsipajë pecayaiyataejava daxitajivi.

¹⁰ Jitsipajë naxanitsiayo pecopiapatsijava daxita nijajivi nevetsijava mapanacuataje. Jitsipajë daxitajivi mapanacuata nejitsipaecuenia pecatoexanabiabinexa, pacuenia baja athëbëtatsia nijajivi nejitsipaecuenia catoexanabiaba, bajarapacuenia pecatoexanavanapaenexa mapanacuapijivi ataje. ¹¹ Ajena, pamatacabinexa, panerajure pataxaejavanexa pacuenia panamatavenonajë.

¹² Panevecuaajibiaexanare pibisiacuene pataexanaeneconimi. Pacuenia paxanë pajamatabëcuenecaevajë, pabarajamatabëcuenexanepanana, itsamonae paxanëjavaberena pibisiacuene patanexanaejava, bajara pijinia pacuenia xamë ata nitabarata pibisiacuene pataexanaejava jamatabëcuenecaevare. Panebarajamatabëcuene xanepanarena. ¹³ Panevecuatsare dovathi patanejamatabëcuenejëbivaniva. Panecapanepare jane pibisiacuenevecua. Pamatacabi xamë taxuxuabianame daxita nijajivi nevetsijava mapanacuataje, nejamatabëcuenesaëta evetsianame. Nexata nijajivi jumai tsane xamë yabara: “Dioso cajena bitso ayaijamatabëcuenenë,” jai tsane. Bajarapacuenia nijajivi evetsianame daxitamatacabijavabelianexa, pajamë tsane mapacueniaje itsa pavajëcame Diosojavabelia,

jai Jesús pijajivijavabelia.

¹⁴ Jesús icatsia jumaitsi pijajivijavabelia:

—Nexata paxamë itsamonae pibisiacuene pacaexanae ata, pajamatabëcuenecaevare. Pabarajamatabëcuenexanepanarena. Nexata paxamë itsamonae pibisiacuene papecaexanaejava, itsa pajamatabëcuenecaevianame, itsa pabarajamatabëcuenexanepanaenamenua, nexata paneaxa, athëbëtatsia peecaenë, pitabarata pibisiacuene paneexanaejava jamatabëcuenecaeviana. Pacabarajamatabëcuenexanepanaenana. ¹⁵ Paxamë itsa apo pajamatabëcuenecaevimë tsane itsamonae pibisiacuene papecaexanaejava, itsa apo pabarajamatabëcuenexanepanaemënu tsane, nexata paneaxa ata apo jamatabëcuenecaevi tsane. Apo pacabarajamatabëcuenexanepanaenu tsane, pitabarata pibisiacuene paneexanaejava, jai Jesús pijajivijavabelia.

Pacuenia Jesús pijajivi tsipaeba pacuenia Jesús pijajivi exanaejitsia pamatacabibeje Diosojavabelia vajëtaçona pexaejava xaenejeva yabara pelivaisi

¹⁶ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Itsa apo paxamë panexaejava pamatacabibeje pavajëcame Diosojavabelia, pëtsa pajinavanapame panaitabaraquiatsinejevamë, panamatatiatsinejevamënu. Itsamonae Diosojavabelia itsa vajëcabiaba pexaejava xaenejeva, pamatacabibeje vajëcabiaba Diosojavabelia, apo naitabaraquiatabiabi, apo namatatiatabinua. Bajarapacuenia jinavanapabiaba pamatacabibeje vajëcabiaba Diosojavabelia tsipaji saya bajarapamonae jitsipa petaevitsi pesivajamatabëjumaitsinexatsi: “Mapamonaeje Dioso bitso pejumecovënëtsivi. Diosojavabelia bitso pevajëcaevi pexaejava xaenejeva. Nayapëtane Diosojavabelia bitso pavajëcaejava. Tsipaji naitabaraquiatsinejeva, namatatiatsinejevanua, jinavanapa,” pesivajamatabëjainexatsi petaevitsi. Xaniajanë pacuenia pacatsipaebijitsiatsi. Bajarapamonae pexaejava xaenejeva vajëcabiabi ata

Diosojavabelia, itsiata bajaraxua apo tonamatamotsitsi Diosojavabelia. Tspaji saya jivi petaenexatsi Dioso bepejumecovënëtsivi, bajarapacuenia vajëcabiaba. ¹⁷ Paxamë itsa apo paxaemë panexaejava pamatacabibeje pavajëcame Diosojavabelia, itsiata panaitabaraquiare. Panamatiarenua xaniavaetsia. ¹⁸ Bajarapacuenia paexanaename jivi peyapëtaeyaniva Diosojavabelia panevajëcaponaejava panexaejava paxaenejevamë. Caenë paneaxa, papecayajavanë, yapëtaena. Nexata bajaraponë itsamatacabi pacarajutsiana panijamatamo, jai Jesús pijajivijavabelia.

Pacuenia Jesús pijajivi tsipaeba xaniavaetsia Dioso petonacuenebavana-paenexa itsamatacabi ayajava pexainaenexa athëbëtatsia yabara pelivaisi
(Lc 12.33-34)

¹⁹ Icatsia Jesús jumaitsi petsutoyenepanajavata pijajivi ayaitbit-saëtoxanetojavabelia:

—Pëtsa pacaetuataponame ayajava panexainaejavanexa mapanacuataje. Tspaji pacatobijianaejitsipa piucubaxaevi. Pacatotasibijitsipsinua. Pacatonacobetoxotsipanua penacobetoxotsivi. ²⁰ Dioso jane xaniavaetsia patonacuenebavanapare. Nexata Diosojavabelia ayajava pexainacuene paxainaename athëbëtatsia. Nexata bajarajotatsia apo pacatobijiana tsane piucubaxaevi. Apo pacatotasibitsinua tsane. Penacobetoxotsivi ata apo pacatonacobetoxotsi tsane. ²¹ Panacuatatsia pacatoxaniavaeta panexainaejavanexa, bajarapanacua panejamatabëëthëtovetsina pajamatabënjinanapaename, jai Jesús pijajivijavabelia.

Pacuenia vajaitaxuto belâmparabë yabara pelivaisi
(Lc 11.34-36)

²²⁻²³ Icatsia Jesús jumaitsi petsutoyenepanajavata pijajivi ayaitbit-saëtoxanetojavabelia:

—Lâmparabë bo ënëtuatujëta itayoteca xaniavaetsia vajataenexa. Bajara pijinia itsi paneitaxuto ata. Paneitaxutoxanepanaexae xaniavaetsia panatsivajënaetaneme. Itsa paitaxutobejemë tsipae, nexata xaniavaetsia apo panatsivajënaetaemë tsipae. Pacatsitaaitaquiri saya tsipae. Bajara pijinia itsi panejamatabëcuene ata. Dioso itsa pacajamatabëcueneitayota, pajitsipaename paneexanabiabinexa pacuenia Dioso pacaitoroba. Nexata xaniavaetsia pajinavanapaename. Itsa panajamatabëxainaejitsipame bitso panexainaejava ëpaxamënexa, nexata bitso pajamatabëcueneitaquirimë tsipae, jai Jesús pijajivijavabelia.

Pacuenia Jesús pijajivi muxujioba bitso pejitsipaeyaniva palata yabara pelivaisi
(Lc 16.13)

²⁴ Icatsia Jesús jumaitsi petsutoyenepanajavata pijajivi ayaitbit-saëtoxanetojavabelia:

—Itsajivi ata acuenebi caecuenia petonacuenebijava anijanëbeje pijatuxanenëbejevavelia. Caenëjavavelia, ponë jitsipa petonacuenebinexa, tonacuenebijitsipa. Ponëjavavelia apo jitsipae petonacuenebijava, apo tonacuenebi tsipae. Bajara pijinia itsi pajivi bitso jitsipa Dioso. Pajivi bitso jitsipa Dioso, nexata itsa tonacueneba Dioso, acuenebi bitso pejitsipaejava palata, jai Jesús pijajivijavavelia.

Pacuenia Dioso pijajivi eveta mapanacuataje yabara pelivaisi
(Lc 12.22-31)

²⁵ Icatsia Jesús jumaitsi petsutoyenepanajavata pijajivi ayaitbit-saëtoxanetojavabelia:

—Xaniajanë pacuenia pacatsipaebijitsiatsi. Pëtsa pasivanajamatabëxainame ëpanexaejava, ëpaneapaejava ata, panevënajinavanapaenexa. Pëtsa pasivanajamatabëxainamenua ëpanenaxatabijavanexa ata. Apo jinavanapaetsi cajena ëvajaxaejavanexa. Apo jinavanapaetsinua ëvajanagerabëxatabinexa. ²⁶ Pataema baratsuimonae pepunaevi. Apo ubi pexaejavanexa. Apo notsinua penaveretaponaejava peetsinexa bota. Itsiata Dioso, paneaxa, athëbëtatsia peecaenë, rajutabiaba pexaejavanexa. ¡Paxamë rabiji bitsoyo Dioso pacaasiva baratsuimonae matatoxenetsia papecarajutsinexa daxita xua panamatavenoname! Bajaraxuata pëtsa bitso pasivanajamatabëxainame ëpanexaejavanexa. ²⁷ ¿Detsa jane ponë paxamëyajuvënënenë cajëpatsi pijacujiruta medio metrocuenia matavëjëa penavitsabiaexanaenexa? Ajibi. Bitso jamatabëbëjai ata tsipae pevitsabinexa, itsiata apo navitsabiaexanae tsipae pijacujiruta.

²⁸ Bajaraxuata pëtsa bitso pasivanajamatabëxainame ëpanenaxatabijavanexa. Pacanaëjere pacuenia vitsabapona pematono vayafोजना. Bajarapamatono apo natsijumanacueneni. Penaxatatsijavanexa ata apo natsijumaexanae. ²⁹ Bajayata nacuaevevtsinëmi Salomónpijinë, bitso pexainaeñemi. Naitabëtsiaya naxatabiabiaba bitso pexaniavirijavanë. Itsiata baitsi jane Salomónpijinë penaitabëtsijava matatoxenetsia bitso aitabë mapamatontoxije. ³⁰ Paxamë bevelia panejumecovënëtsivi Dioso, asaëya bepajumecovënëtame Dioso papecaevetsijava. Ajena pitsijavata vayafota tanetsi pexaniaponamatontoxi. Bajaraxuacujinae, caematacabibecujinae, tajuatsi baja bajarapaponamatontoximi. Pacuenia Dioso aitabëyaexana ponamatontoxi, bajara pijinia pacuenia paxamë ata Dioso pacaxatabiana piaitabëjava itsa pajumecovënëtame Dioso. ³¹ Bajaraxuata pëtsa jamatabëbëjaiya pajamatabëjumaitsimë: “¿De tsaeta xua xaenatsi? ¿De tsaeta xua matavëjëa apaenatsi? ¿De tsaeta xua naxatabianatsi?” pajamatabëjamë pëtsa. ³² Pamonae Dioso apo pejumecovënëtsivi, bajarapacuenia bitso sivanajamatabëxainabiaba ëpexaejavanexa, ëpenaxabijavanexa ata. Itsiata baitsi jane paneaxa paxainame, athëbëtatsia peecaenë. Bajaraponë yapëtane daxita xua panamatavenoname. ³³ Bajaraxuata, daxita xua panamatavenoname, matatoxenetsia, Dioso pijacue bitso pasivanajamatabëxainabiabianame panetoexanavanapaenexa pacuenia Dioso pacaitoroba. Nexata Dioso pacarajutsiana daxita xua panamatavenoname. ³⁴ Itsa baja pajamatabëcuenebëjamë ajena pitsijavata itsacujavayo yabara, pëtsa caecuenia payajavajamatabëcuenebëjamë xua yabara meravia pitsijavata pacatocopiapatsijitsia. Tsipaji xua caematacabi canacujitsia nacamatacabiabijavanexa vajajamatabëcuenebëjainexa, ayaijava baja tsabiabi. Bajaraxuata ajena pitsijavata apo besivajamatabëcuenebëjaitsi xua meravia pitsijavata nacamatacabiapatsijitsia, jai Jesús pijajivijavabelia.

7

Pacuenia Jesús pijajivi muxujioba pitaxutotsoniatanexa itsamonae ata, pacuenia bajarapamonae ata Dioso itaxutotsoniatanetsi, yabara pelivaisi (Lc 6.37-38, 41-42)

¹ Icatsia Jesús jumaitsi petsutoyenepanajavata pijajivi ayaibit-saëtöxanetöjavabelia:

—Pëtsa panataneme pepacuene bepeneaneconijibivi. Nexata itsamonae pibisiacuene pexanaejava xaniavaetsia payapëtaenejevamë,

pëtsa pabaracuaicuajamë mapacueniaje: “Bajarapitsipibisiacuene pexanaevi, Dioso bitso ayaicuenia naneconitsiaexanaenatsi,” pajamë pëtsa. Tsipaji paxamë ata pijinia bajarapitsineconi itsa paxainame, Dioso bitso ayaicuenia pacananeconitsiaexanaejitsipa. ² Itsamonae pexanaejava xaniavaetsia payapëtaenejevamë, pëtsa pabaracuaicuajamë mapacueniaje: “Bajarapitsicuene pexanaevi Dioso naneconitsiaexanaenatsi,” pajamë pëtsa. Tsipaji paxamë ata bajarapitsicuene itsa paexaname, itsamonae pijinia bajarapacuenia pacabaracuaicuajai tsipae. ³ Bajaraxuata paxamë pepacuene bepaneanecunijibivi nataeya pëtsa pamuxujibame itsajivi pijaneconi yabara. Tsipaji raja apo payapëtaemë paxamë ata pijinia paneconivajëto paxainame. ⁴ Nexata paxamë ata ayaineconixaneto itsa paxainame, nexata itsajivijavabelia apo bepajumaitsimë: “Papistiacuene exaname, copare baja,” apo bepajamë. ⁵ Yamaxëitojorobiaya saya bepexaniajamatabëcuenevi nataeya pacuaicuajamë tsabiabi. Itsamonae pijaneconi yabara pabaracuaicuajamë tsabiabi. Itsiata pijinia paxamë ata paneconivajëto paxainame, apo payapëtaemë. Paxamë copiaya pacopabare pibisiacuene paneexanabiabijava. Bajara jane xuacujinae paitavetsianame itsamonae ata pibisiacuene pexanaejava pecopabinexa, jai Jesús pijajivijavabelia.

⁶ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Pëtsa matavëjëa patsipaebaponame Dioso pejumelivaisi, pamonaë pat-sipaebi atamë, apo yayyataë bajarapalivaisi. Tsipaji saya cacocaponabiaba bajarapalivaisi. Vaxaitsi itsanë pijaaviri pexaejavanexa rajutsi atatsi tsipae, saya nacaitoya tsipae. Nacasinjitsipanua. Bajara pijinia jamatabëcueneitsi pamonaë apo yayyataë Dioso pejumelivaisi, patsipaebi atamë. Pacue-nia marrano ata itsa rajutsipatsi perlavënëjjava, bitso penamatamotsijava, saya taxunanonobijitsipa, bajara saya jamatabëcueneitsi bajarapamonae, jai Jesús pijajivijavabelia.

Pacuenia Jesús pijajivi tsipaeba pacuenia Diosojavabelia vajëtaaponaejitsia yabara pelivaisi

(Lc 11.9-13; 6.31)

⁷ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—PavajëtaPONARE Diosojavabelia bajayajebi ata pacuenia bajayajebi ata pajaitsipame panecaxitajarabinexa itsa pacatonaxuaba itsacue-nejavayo. PavajëtaPONARE Diosojavabelia asaëyata pacuenia asaëyata padocodocotsipame baupa papecatobaupatsinexa itsa baupa xatatanuta. ⁸ Bajarapacuenia asaëyata pavajëtaPONARE Diosojavabelia tsipaji pajivi vajëtabiaba, rajutabiabatsi. Pajivi ata jaitabiaba, caxitajarababiaba. Pajivi ata baupa docodocotabiaba, tobaupatabiabatsi.

⁹ Paxamë papebijivimë panexi panexainaeivi. Panexënatonëyo itsa pacavajëta panbë, apo panacoxirajutsimë tsipae iboto. ¹⁰ Itsa pacavajëta dujuainëyo, apo panacoxirajutsimë tsipae jomo. ¹¹ Paxamë paneaja-matabëcuenebejevi ata, payapëtaneme panenacoxirajutsinexa pexaniajava. Paneaxa, athëbëtatsia peecaenë, bitso biji cajena pexaniajamatabëcuene-në paxamë matatoxenetsia. Bajaraponë pacarajutsiana pexaniacuene itsa pavajëtame.

¹² Xua pexaniacuene, paxamë pajitsipame itsamonae papeca-toexanaenexa, copiaya paxamë bajarapapexaniacuene patoexanare bajarapamonaejavabelia. Bajarapajamatabëcuene jëpa Dioso

Moiséspijinëta penajumecopatsilivaisi. Diosojumepaebivimi profetavi peyaquinaelivaisianë ata jëpa bajarapajamatabëcuene, jai Jesús pijajivijavabelia.

Tsiquiribaupayo epatajërëtsialia yabara pelivaisi
(Lc 13.24)

¹³ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Pajonemeya tsiquiribaupayojavalia panepatsinexa Dioso pijanacuayabelia. Tspipaji pinijibaupa, pinijinamutonua, pata infernojavabelia. Nexata jivi ayaibitsaëtoxanetonë bajaraxuayo jonepona. ¹⁴ Pabaupa tsiquiribaupayo, tsiquirinamutoyonua, bajarapanamuto pata maticabi apo pevererecaejava pexainaevi pijanacuayabelia. Nexata saya caejiviyobeje bajaraxuayo jonepona, jai Jesús pijajivijavabelia petsutoyenepanajavata.

Pacuenia peubinaënë itsa nacuaita, nayapëtane pavirianaecueene yabara pelivaisi

(Lc 6.43-44)

¹⁵ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Xania panayajivitaema. Pamonaë saicayacuenia Dioso pejumelivaisivecua jivi tsipaebapona, bajarapamonae najumetsënëtsiaya pacajumai tsabiabi: “Paxanë raja Dioso patanitorobicuenia livaisi jivi tsipaebaponajë,” pacajai tsabiabi. Bajarapamonae Dioso pejumecovënëtsivi cuenecataeya najonena paxamëjavabereña. Itsiata baitsi jane pacuenia nevëthë pianae panaevi jamatabëcueneitsi, bajara jamatabëcueneitsi. Jamatabëpacacopatsiaexana Dioso panejumecovënëtsijavami. ¹⁶ Vaxaitsi rabaja yapëtanetsi mapacuneje. Peubinaënë itsa nacuaita, yapëtanetsi ponaecuai xanepana vajaxaenexa. Nexata bajaraponae cuaixanetsi. Ponaë pijinia pibisiacuai nacuaita, yapëtanetsi piabejecuene. Nexata bajaraponae apo cuaixaetsi. Nexata pacuenia peubinaënë itsa nacuaita, nayapëtane ponaecuai xanepana vajacuaixaenexa, bajara pijinia pacuenia paxamë payapëtaename pacuenia jamatabëcueneitsi bajarapamonae itsa pacuetaename xua exanavanapa. Uvaru apo paucutsimë cucunanaeta. Higovënëcuaito ata apo paucutsimë jomovaënaeta. ¹⁷ Nexata ponaë pexanianae, pexaniacuai pijinia nacuaita vajaxaenexa. Ponaë pijinia pibisianaë, ëpiabejecuai nacuaita. ¹⁸ Pexanianae pexaniacuai nacuaita. Apo nacuaitsi piabejecuai. Pibisianaë pijinia apo nacuaitsi pexaniacuai. ¹⁹ Daxita ponaenë nacuaita pibisiacuai, apo vajaxaecuai, yapëtanetsi. Nexata daxita bajaraponaenëmi nicatatsi. Nexata tajuitatsi isotota. ²⁰ Bajara pijinia pacuenia paxamë ata payapëtaename itsa pacuetaename xua exanavanapa pamonaë saicayacuenia Dioso pejumelivaisivecua jivi tsipaebapona, jai Jesús pijajivijavabelia.

Pacuenia daxitajivi apo jone tsane Dioso pijanacuayabetsia yabara pelivaisi

(Lc 13.25-27)

²¹ Icatsia Jesús jumaitsi petsutoyenepanajavata pijajivi ayaibitsaëtoxanetojavabelia:

—Daxita pamonaë: “Tajatuxanenë,” tanejaivi ata, itsa apo jumecovënëtsi tsane taxa Dioso, athëbëtatsia peacaenë, nexata apo jone tsane taxa Dioso pijanacuayabetsia. Itsiata pamonaë exanavanapa taxa, athëbëtatsia peacaenë, pejitsipaecuenia, ëbajarapamonae jonena taxa pijanacuayabetsia.

²² Pamatacabi copiapatsiana pijaneconi pexainaeivi Dioso penaneconitsiaexanaematacabinexa, bajarapamatacabi jivi ayaibitsaëtoxanetonë nejumaitsi tsane: “Patajatuxanenë, xamë baja cajena nejamatabëcueneta jivi patsipaebabiabajë Dioso pejumelivaisi. Nevënëtanua dovathi jivivecua pacapitsaponaajë. Nevënëtanua pinijicuene pataexanaejavanë, Dioso pesaëta paexanaponaajë,” nejai tsane jivi ayaibitsaëtoxanetonë. ²³ Itsiata baitsi jane xanë jumaitsinë tsane bajarapamonaejavabelia: “Apo pacayapëtaetsi cajena paxamë. Panevecuaponaare pibisiacuene paneexanabiabivi,” janë tsane bajarapamonaejavabelia, jai Jesús pijajivijavabelia.

Pacuenia Jesús livaisi tsipaeba anijanëbeje bo pexanaenëbeje pelivaisicuenia yabara pelivaisi

(Mr 1.22; Lc 6.47-49)

²⁴ Jesús icatsia jumaitsi petsutoyenepanajavata pijajivi ayaibitsaëtoxanetojavabelia:

—Pajivi nejumecovënëtsiana patacatsipaebilivaisi, nexata itsa exanaena taitorobicuenia, apo nacueratsi tsane. Bajarapajivi piatajairata pijabo bepexanetsinë tsane. Tsipaji ponë pijabo exanaejitsia, peyapëtaexae itsajota pijabo exanetsijitsia pebubutsijavanexa, nexata baja bajarajota apo exanetsi pijabo. Nexata pijabo exaneta bitso piatajairata. Nexata bajaraponë bo pexanaejava apo nacueratsi. ²⁵ Bo peveretetsicujinae ayaiemaxaneto jopa. Menianë avajubua tsaponae. Ira bubuta. Ayajiovibo bitso bubujai pijabojavaberena. Itsiata pijabo apo toxuabitsitsia. Tsipaji pijabo exaneta piatajairata. ²⁶ Pajivi nejumetae ata patacatsipaebilivaisi, apo nejumecovënëtsi tsane, nexata itsa apo exanae tsane taitorobicuenia, bajarapajivi nacueratsiana. Pacuenia tajetabota bo pexanetsinë nacuerata bo pexanaejava, bajara itsi tsane. Ponë tajetabota pijabo exaneta, yapëtae ata emarapae pecopiapatsijavanexa, bajaraponë nacuerata bo pexanaejava. ²⁷ Tsipaji bo peveretetsicujinae ayaiemaxaneto jopa. Menianë avajubua tsaponae. Ira bubuta. Ayajiovibo bitso bubujai pijabojavaberena. Pijabo nexata toxuabayatsi. Pepacuene baja nexata homi abeje, jai Jesús mapacueniaje pijajivijavabelia.

²⁸ Itsa baja Jesús najumevereta petsutoyenepanajavata bajarapalivaisi petsipaebijava, pejumetaevitsi bitso jamatabëcuenenabenajaca. ²⁹ Jesús pejumetaevitsi bitso jamatabëcuenenabenajaca tsipaji Jesús livaisi tsipaeba pinijiamatabëcuenepexanaenëcuenia. Apo tsipaebi pacuenia judíovi pecujaru-bivi tsipaebabiaba.

8

Pacuenia Jesús jamatejemayaexana bajayajebi bitso peperabëtsabanaenë yabara pelivaisi

(Mr 1.40-45; Lc 5.12-16)

¹ Itsa baja Jesús runaica petsutojumavetsica, jivi ayaibitsaëtoxaneto pënaponatsi. ² Nexata imoxoyotatsi bajayajebi bitso peperabëtsabanaenë. Pitabarata pematatabacabëta tonucatsi. Bitso peperabëtsabanaenë jumaitsi Jesúsjavabelia:

—Jesús, cacaëjëpa raja tanejamatejemayaexanaenexamë. Itsa jitsipame, nejamatejemayaexanare mapavitanevecuaje, jai bitso peperabëtsabanaenë.

³ Nexata Jesús pecobeta perabëjayalia bitso peperabëtsabanaenë. Jesús jumaitsi bajaraponëjavabelia:

—Jājā, jitsipajë cajena. Jamatejemamë rabaja, jai Jesús bajayajebi bitso peperabëtsabanaenëjavabelia.

Bajarapacuenia Jesús pejumlahtsijavata peperabëtsabanaenëmi baja perabëxanepananajereca. ⁴ Nexata icatsia Jesús jumlahsi bajaraponëjavabelia:

—Nejumlahtaema. Pëtsa tsipaebame itsajivijavabelia ata tacajamatejemaaxanaejava. Naitajëtsiaremelia jane sacerdotenëjavabelia, templobota penacuenebinëjavabelia. Nexata jivi yapëtaena pepacueña baja pecavecuaajibijava niavitanejavami. Diosonexa rajuremelia ofrenda sacerdotenëjavabelia pecavecuaajibiaexanaexae niavitanejavami. Bajara tsipaji pacuenia bajayata vajasalinainëmi Moiséspijinë nacaitoroba. Nexata sacerdotenë cataena pecavecuaajibijava baja niavitanejavami, jai Jesús bajaraponëjavabelia.

Pacuenia vajabitsaë pijacapitán pijabota petonacuenebaponaponaenëtsi, Jesús tojamatejemayaexana yabara pelivaisi (Lc 7.1-10)

⁵ Itsa baja Jesús pata Capernaum tomarabelia, Romano nacuapijivajabitsaëvi pijacapitán Jesús imoxoyorenatsi pevajëtsinexatsi. ⁶ Vajabitsaëvi pijacapitán bitso ayaicuenia vajëta Jesúsjavabelia. Jumlahtsi:

—Petuxanenë, tajajivitonë raja tajabota camata boboca. Bitso cuenabatsi. Pinijicuenia navixaetaeyabiaba, jai.

⁷ Nexata Jesús jumlahsi capitánjavabelia:

—Xanë ponaenajë nijaboyabelia. Nexata cotojamatejemayaexanaenatsi nijajivitonë, jai Jesús.

⁸ Nexata capitán jumlahsi Jesúsjavabelia:

—Petuxanenë, xanë raja bitso beveliajamatabëcuenenëñë xamëvecua. Nexata apo xanepanae tsipae nejonejava tajaboyabelia. Nexata saya maveliaje ënijume itorobare. Nexata tajajivitonë netojamatejema tsane. ⁹ Xanë ata xainajë taneitorobabiabivi taneitorobicuenia tajumecovënëtabiabinexa. Xanë ata juya xainajë vajabitsaëvi tajajivi taitorobicuenia tanetoexanabiabinexa. Nexata itsa itorobajë caenë vajabitsaëñë peponaenexa, bajaraponë ponabiaba. Itsa junarenajë itsanë vajabitsaëñë pepatsinexa xanëjavaberena, bajaraponë patabiabarena. Itsa itorobajë tajajivitonë tanetoexanaenexa itsacuenëjavayo, nexata netoexanabiaba. Bajara pijinia pacuenia xamë ata nexanaenexa cacaëjëpa. Nexata saya maveliaje ënijume itorobare saya ënijumeta tajajivitonë tanetojamatejemayaexanaenexamë, jai capitán Jesúsjavabelia.

¹⁰ Jesús itsa jumetane bajarapacuenia capitán pejumlahtsijavatsi, nexata Jesús jamatabëcuenenabenajaca. Nexata Jesús jumlahsi pepënaponaevitsijavabelia:

—Xaniajanë pacuenia pacatsipaebijitsiatsi. Israel nacuapijivi nejumecovënëtsi ata, itsiata caeto ata apo caxitajarabaxuabinë xanëjavaberena bitso tanesivanajamatabëcuenecopatsinë pacuenia mapacapitán nesivajamatabëcuenecopatsiaya jumlahsiije. ¹¹ Nexata pacatsipaebatsi paneyapëtaenexa. Apo judíovi ata raja, ayaibitsaëtoxonetonë daxitanacuanëpijivi, Dioso jumecovënëtsiana. Nexata apo judíovi ata capanepaenatsi Dioso pijanacuayabetsia. Nexata bajarapamonae Dioso pijanacuatsia, Abrahampijinë yajava, nabaniana. Isaacpijinë ata, Jacobpijinë ata yajava, nabaniana. ¹² Itsiata baitsi jane judíovi, pamonaepicaní Dioso athëbëtsia toxaniavaetsi peyajavajinavanapaxenatsi, bajarapamonae caranata apo jumecovënëtsi Dioso. Nexata bajarapamonae infernojavabelia Dioso xuabianatsi. Bajarajota nuena. Navonosiniana bitso penavixaetaexae, jai Jesús mapacueniaje pepënaponaevitsijavabelia.

¹³ Nexata icatsia Jesús jumaitsi capitánjavabelia:

—Ponare baja nijaboyabelia. Catoexanatsi rabaja pacuenia xanējavaberena nesivanajamatabēcopatsiaya jumaitsimē tacatoexanaenexa, jai Jesús capitánjavabelia.

Nexata bajarapaepatota capitán pijabotalia pijajivitonē baja tojamatejematsi.

Pacuenia Simón Pedro pijava pena Jesús tojamatejemayaexana yabara pelivaisi

(Mr 1.29-31; Lc 4.38-39)

¹⁴ Jesús pona Pedro pijaboyabelia. Nexata Pedro pijabota Jesús taeyabuata Pedro pijava pena peromaebanuaejavatsi camata. ¹⁵ Nexata Jesús cobejayata peromaebanuaevatsi. Jesús pecobejayatsijavata, bajarapova vecuaajibitsireca baja domae. Nexata baja bajarapova jamatejema. Jesús bna pexaejava bajarapova toexanatsi.

Pacuenia ayaibitsaēto jivi, piavitanevi, Jesús jamatejemayaexana yabara pelivaisi

(Mr 1.32-34; Lc 4.40-41)

¹⁶ Itsa baja ajena meravitsia, Jesúsjavaberena tocapatatsi ayaibitsaēto dovathi peyjavajinavanapaevi. Caejumeta saya Jesús caecuenia dovathi vecuacupitsapa bajarapamona. Bajarajota jamatejemayaexananua daxita piavitanevi. ¹⁷ Bajarapacuenia Jesús itsa exana, copiapata jane baja pacuenia Jesús yabara bajayata Diosojumepaebinēmi profeta Isaíaspijinē tajēvelia vajunupaeba. Profeta Isaíaspijinē bajayata tajēvelia jumaitsi mapacueniaj: “Bajaraponē nacavecuajaibiaexanaena vajaavitanejavami,” jai bajayata tajēvelia Isaíaspijinē Jesús yabara.

Pacuenia picani Jesús jamatabēpēnaponatsi itsamona yabara pelivaisi

(Lc 9.57-62)

¹⁸ Nexata Jesús itsa tane jivi ayaibitsaēto pematatoyoronaejavatsi, pija-jivi junata pepēnaxuabinexatsi pucaxaneto itsapanabelia. ¹⁹ Nexata bajarapaepatota judíovi pecujarubinē Jesús imoxoyorenatsi. Judíovi pecujarubinē jumaitsi Jesúsjavabelia:

—Petuxanenē, itsabelia poname, capēnaponaeenatsi cajena, jai.

²⁰ Nexata Jesús jumaitsi judíovi pecujarubinējavabelia:

—Itsa nepēnaponaejitsipame, apo napatabiabimē tsipae tajabota nenacuer-aetabiabinexa. Tsipaji tajabo apo xainaenē. Namo pijamēthēanē xaina pepatabiabinexa pemajitabiabinexa. Baratsui ata pematapenanē xaina. Itsiata baitsi jane xanē, Daxitajivi Pematapijinēnē, itsajavabelia ata apo xainaenē itsajota nacueraevetabiabijitsianē, jai Jesús judíovi pecujarubinējavabelia.

²¹ Nexata Jesús pijajiviyajuvēnēnē jumaitsi Jesúsjavabelia:

—Tajatuxanenē, caepatoyo abaxē necopare tamēthēsinexa taxa petēpaenē, jai.

²² Jesús nexata jumaitsi pijajivitonējavabelia:

—Naxanitsia. Nepēnaponare. Copare maticabi apo pevereverecaejava apo pexainaevinexa pemēthēcaenexatsi nijamonaemi itsa tēpa, jai Jesús pijajivitonējavabelia.

Pacuenia Jesús itaveta joviboxaneto, malataca yajava, piyaijavami yabara pelivaisi

(Mr 4.35-41; Lc 8.22-25)

²³ Jesús, pijajivi yajava, runa jera ënëabereca. Nexata Jesús pijajivi jerata yajavanajetaruca pucajava. ²⁴ Nexata jemata pinijijoviboxaneto najetaruca. Malatacaxanetonë bitso ayai. Nexata malataca jera ënëaberena mera epabajarabona. Itsiata Jesús jamatejema majitanuca. ²⁵ Nexata Jesús pijajivi yaitavabatsi pemajitanucaenë. Jesús pijajivi jumaitsi:

—¡Patajatuxanenë, panecapanepare! ¡Vaxaitsimi rabaja yaothopaenatsi! jai Jesús pijajivi.

²⁶ Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús pijajivijavabelia.

Nexata Jesús namatacotapuna. Pinijijumeta itavetaxuaba jovibo, malataca yajava. Nexata baja daxita puca vainae ecaxuaba. ²⁷ Nexata Jesús pijajivi itsa tane bajaraxua, jamatabëcuenenabenajaca. Nexata Jesús pijajivi najumaitsi:

—¿De meta tsipaji maponëje? ¡Itaveta jovibo, malataca yajava! ¡Jumecovënëtatsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

Pacuenia Gadara tomarapijnëbeje, dovathivi peyajavaponaponanëbeje, Jesús vecuacapitsapa Gerasa nacuata yabara pelivaisi

(Mr 5.1-20; Lc 8.26-39)

²⁸ Jesús pijajivi barëpata pucaxaneto itsapanabelia, Gerasa nacuyabelia. Jesús itsa pata Gerasa nacuata, Gadara tomarapijnëmibeje pitsaparenabeje jivimëthëanëjavaverena. Imoxoyorenatsibeje Jesús. Bajaraponëbeje dovathivi peyajavaponaponanëbeje. Bitso anaepanabiababeje. Nexata itsajivi ata apo ponabiabi bajaraxuayo perucaenamutojova. ²⁹ Nexata dovathivi peyajavaponaponanëbeje vavajaibeje.

—Jesús, Dioso pexënatomë, ¿detsa xua namatavenoname paxanëbejevavaberena? ¿Dioso tsaja daxitajivi penaneconitsia exanaematacabinexavajënaeya patame patanenaneconitsiaexanaenamëbeje? jaiibeje Jesúsjavabelia dovathivi peyajavaponaponanëbeje.

³⁰ Nexata bajarajota, imoxoyo petsutojavata, marranobitsaëttoxaneto xaevanapa. ³¹ Nexata dovathivi bitso vajëca Jesúsjavabelia. Jumaitsi:

—Itsa panexuabijitsiamë maponëbejevecuaje, panetocopare patajonenexa marranobitsaëttoxanetojavabelia, jai.

³² Nexata Jesús jumaitsi dovathivijavabelia:

—Paponare baja panejonenexa marranobitsaëttoxanetojavabelia, jai.

Nexata bajaraponëbeje dovathivi vecuapitsapatsibeje. Nexata baja marranobitsaëttoxanetojavabelia junua dovathivi. Nexata daxita bajara pamarranobitsaëttoxanetomi kujinaeyeca. Pucaxaneto itapajanituareca othopareca. Bajarajota daxita marranobitsaëttoxanetomi meneta bubuna.

³³ Bajara pamarranobitsaëttoxanetomi pevetavanapaevi, rëcëpeca. Itsa bajarapamonae Gadara tomarabelia pata, tsipaeba pacuenia tane. Tsipaebanua pacuenia Jesús dovathivi vecuacapitsapa dovathivi peyajavaponaponanëbeje. ³⁴ Nexata daxita bajarapatomarapijivi ponarena Jesúsjavaberena. Nexata itsa tanetsi Jesús, daxita bajarapamonae jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecuca, jai bajarapamonae Jesúsjavabelia tsipaji cujunavatsi.

9

*Pacuenia Jesús jamatejemayaexana petabusipacuenabinëtsi yabara peliv-
aïsi*

(Mr 2.1-12; Lc 5.17-26)

¹ Jesús runareca jera ënëabereca. Nicabilia puca itsapanabelia. Pata nexata pijatomarabelia. ² Bajarajota Jesús tocapatatsi petabusipacuenabinëtsi. Pacamayota bocabiaba, yavëtarapatatsi. Jesús jamatabëcueneyapëtane pacuenia sivanajamatabëxainatsi petocapatsivitsi. “Nacatojamatejemayaexanaenatsi cajena,” pesivajamatabëjaijavatsi Jesús jamatabëcueneyapëtane. Bajaraxuata petabusipacuenëbinëtsijavabelia Jesús jumaitsi mapacueniaje:

—Tajabananë, jamatabëcuenëbarëyamëre. Pibisiacuene rabaja nexanaeneconimi cavecuaajibiaexanatsi, jai Jesús petabusipacuenabinëtsijavabelia.

³ Nexata judíovi pecujarubivi itsa jumetaeyena bajarapacuenia Jesús pejumaitsijava, najamatabëxainena.

—Maponë Jesúsje Dioso apo pejitsipacuenia cuaicuaijai, jamatabëjai tse-nae judíovi pecujarubivi Jesús yabara.

⁴ Jesús jamatabëcueneyapëtane judíovi pecujarubivi bajarapacuenia pesivanajamatabëxainaejavatsi. Nexata Jesús jumaitsi judíovi pecujarubivijavabelia:

—Panesivanajamatabëxainame xanëjavaberena pibisiajamatabëcuene. ⁵ Paxamë apo pacacaëjëpae ata itsajivi pibisiacuene pexanaeconi panevëcuaajibiaexanaenexa, pacacaëjëpa picani saya jema panejumaitsinexa petabusipacuenëbinëtsijavabelia mapacueniaje: “Cavecuaajibiaexanatsi rabaja pibisiacuene nexanaeneconimi,” panejainexa. Tsiipaji itsajivi ata apo yapëtae tsipae saya jema panejumaitsijava. Itsiata baitsi jane itsa apo pacacaëjëpae panejamatejemayaexanaenexa petabusipacuenëbinëtsi, acuenëbi panejumaitsinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tsiipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecacaëjëpae cuene panejamatejemayaexanaenexa, jai nexata Jesús judíovi pecujarubivijavabelia.

⁶ Icatsia Jesús jumaitsi judíovi pecujarubivijavabelia:

—Xanë Daxitajivi Pematapijinënë, mapanacuata necaëjëpa tavecuaajibiaexanaenexa itsajivi pibisiacuene pexanaeneconimi ata pacuenia baja exanajë maponëjavabeliaje. Nexata patanecueneyapëtaenexamë tanecaëjëpae cuene tavecuaajibiaexanaenexa itsajivi pibisiacuene pexanaeneconimi ata, pataema pacuenia jamatejemayaexanaejitsianë maponëje, jai Jesús judíovi pecujarubivijavabelia.

Nexata icatsia Jesús jumaitsi petabusipacuenabinëtsijavabelia:

—Nonotapunare baja. Nijacamayo pire. Nijaboyabelia baja ponare, jai Jesús.

⁷ Nexata bajarapacuenia Jesús pejumaitsijavata, petabusipacuenabinëmitsi nonotapuna. Pijaboyabelia baja pona. ⁸ Nexata jivi itsa tane bajaraxua, junava cajena bitso. Nexata bajarapamonae jumaitsi Diosojavabelia:

—Diosomë, bitso ayaijamatabëcuenenëmë. Tsiipaji jivi caëjëpae yaexaname pinijicuene pexanaenexa, jai.

Pacuenia Jesús pijajivitonēnexa junata Mateo yabara pelivaisi
(Mr 2.13-17; Lc 5.27-32)

⁹ Jesús baja vecuapona itsajota jamatejemayaexana petabusipacuenabinētsi. Nexata Jesús penajetarucaejavata taeyeta Mateo. Mateo gobierno pejamatabēcuene impuestomatamo pematamoyanijobabiabinē. Pabota jivijavabelia Mateo impuestomatamo matamoyanijobabiaba, bajarapabota eca Mateo. Nexata Jesús jumaitsi Mateojavabelia:

—Mateo, nepēnaponare, jai.

Jejai Mateo. Nexata nonotapuna. Mateo baja napona Jesús pepēta.

¹⁰ Nexata Mateo junata Jesús pebarēnabaninexa pijabota. Nexata Mateo pijabota Jesús pexaejava naxane. Mateo pijabota naena ayaibitsaēto gobierno pejamatabēcuene jivijavabelia impuestomatamo petomatamoyanijobivi. Itsamonae ata nanabane, piagamatabēcuenebejevi. Jesús pijajivi nayajavaeca bajarapamesajavata. ¹¹ Nexata fariseovi itsa tane bajarapacuenene, jamatabēcuenenavēxaniabiaya jumaitsi Jesús pijajivijavabelia:

—Papecacujarubinē rabaja Jesús naneconita Diosojavabelia. Tsipaji gobierno pejamatabēcueneta impuestomatamo pematamoyanijobabiabivijavata, piagamatabēcuenebejevijavatanua, naxaeyeca pexaejava, jai fariseovi Jesús pijajivijavabelia.

¹² Jesús nexata jumetaeyeca bajarapacuenia fariseovi pejumaitsijava. Nexata Jesús jumaitsi fariseovijavabelia:

—Pevaēbinē raja apo vaēbi pejamatabējemavi. Pevaēbinē raja piavitanevi vaēba. Bajara pijinia xanē ata itsinē. Sivapatajopajē tajunatsinexa pibisijamatabēcuenevi pecapanepanexatsi Diosojavabelia. ¹³ Paponare. Palebianame Dioso pejumelivaisibaxuto. Nexata payapētaename pajamatabēcuene yabara jumaitsi Dioso pejumelivaisibaxutota mapacueniaje: “Jitsipajē paneitaxutotsoniataejava itsamonae. Apo jitsipaenē saya patanetobeyabiabijavamē dajubicuene ofrendacuenia patanerajutabiabinexamē,” jai Dioso pejumelivaisibaxutota. Xanē raja apo sivapatajopaenē tajunatsinexa pamonaē baja aneconijibi tsavanapae. Biji rajane sivapatajopajē tajunatsinexa pijaneconi pexainaevi. Junataponajē bajarapamonae pecopabinexa pibisiacuene pexanaejava penajamatabēcuenepēnēyorotsinexa Diosojavabelia, jai Jesús fariseovijavabelia.

Pacuenia Jesús yanijobatsi pamatacabibeje jivi vajētaona Diosojavabelia pexaejava apo pexaeyabiabixae yabara pelivaisi
(Mr 2.18-22; Lc 5.33-39)

¹⁴ Juan pijajivi Jesús imoxoyorenatsi. Nexata Juan pijajivi jumaitsi Jesúsjavabelia mapacueniaje:

—Petuxanenē, paxanē pataxaejava apo paxaeyabiabinē pamatacabibeje pavajētaonajē Diosojavabelia. Bajara pijinia itsi fariseovi ata pamatacabibeje vajētaona Diosojavabelia. Pexaejava apo xaeyabiabi. ¿Detsa xujajitsi xamē nujajivi pamatacabibeje vajētaona Diosojavabelia pexaejava xaeyabiabi? jai Juan pijajivi Jesúsjavabelia.

¹⁵ Nexata Jesús jumaitsi Juan pijajivijavabelia:

—Pamonae junatatsi penacasabifistajavabelia penanabaninexa, apo atso pexaejava itsa abaxē yajavaecatsi pejananacasabinē. Itsiata baitsi jane pejananacasabinē itsa tsmaxēpatsipatsi peveucaponaenexatsi itsajavabelia, nexata bajarapamonae pexaejava apo xae tsipae. Tsipaji bitso najamatabēxainaejitsipa peveucaponaexaetsi. Bajara pijinia itsi tajajivi

ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia vajëtaþona. Itsiata pamatacabi xanë necaponaena bajarapamonaeevecua, nexata jane baja bajarapamatacabi pexaejava apo xae tsane bitso tanesivanajamatabëxainaexae, jai Jesús Juan pijajivijavabelia.

¹⁶ Nexata Juan pijajivi perujujamatabëcuene baja penavecuacopatsinexa, Jesús livaisi tsipaeba comparacióncuenia, Juan pijajivi pejumecovënëtsinexa ëpejanalivaisi, Jesús petsipaebilivaisi. Juan pijajivi anijajamatabëcuenebeje pexainaeyaniva, perujujamatabëcuene baja pecopabinexa, Jesús livaisi tsipaeba comparacióncuenia. Perujujamatabëcuene yabara Jesús jumaitsi Juan pijajivijavabelia mapacueniaje:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapana yanarobotsipa perujuesetojavaverena. Nexata biji bitso pinijivojoto titinaejitsipa. ¹⁷ Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae. Tsipaji pejanavinoranë pejumalitsëxë abaxë xaina. Nexata itsa yatititibia tsipae, naxuabijitsipa vinoranëmi. Bajaraxuata bepaca pejanavinoranë pejanabocodoruanëjavabelia. Nexata vinoranë peyaxanepanaenexa bajayajebi ata pejanabocodoronëta, jai Jesús Juan pijajivijavabelia.

Bajarapacuenia Jesús jumaitsi Juan pijajivi pejumecovënëtsinexa ëpejanalivaisi, Jesús petsipaebilivaisi, perujujamatabëcuene baja pecopabinexa.

Pacuenia Jesús copiya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatovayo, petëpaevayomi, yabara pelivaisi

(Mr 5.21-43; Lc 8.40-56)

¹⁸ Jesús livaisi petsipaebanucaejavata Juan pijajivijavabelia, judíovi penacaetuatabiabibo pevetsinë parena Jesúsjavaberena. Nexata bajaraponë Jesús pitabarata yayataeya pematabacabëta nucajunua. Jumaitsi Jesúsjavabelia:

—Taxënatovayo rabaja aeconoxae netotëpa. Itsiata baitsi jane itsa poname tajaboyabelia, nexata itsa netoperabëjayatsianame necobeta, icatsia netoasaë tsane, jai bajaraponë Jesúsjavabelia.

¹⁹ Nexata Jesús nonotapuna. Judíovi penacaetuatabiabibo pevetsinë pepëta Jesús, pijajivi yajava, napona. ²⁰ Nexata Jesús namutua penajetarucaejavata, pepënëverena imoxoyotatsi petiriva, piavitaneva. Bajarapova pijanacuene pecapunaecujinaetsi doce baja pavaibeje xaina. Nexata bajarapova Jesús pepënëvelia ponataba, jivibitsaëttoxaneto tuatuajëjavalia. Nexata bajarapova tojayataba Jesús penaxatatsijavacopia. ²¹ Bajarapacuenia tojayataba Jesús penaxatatsijavacopia tsipaji bajarapova jamatabëjumaitsi mapacueniaje:

—Itsa tojayatabianajë Jesús penaxatatsijavacopia, nexata tavitanjavami nevecuaajibi tsane, jamatabëjai bajarapova.

²² Nexata Jesús napënëyorotaxuaba. Taenuta bajarapova. Nexata Jesús jumaitsi bajarapovajavabelia:

—Jamatabëcuenebarëyamëre. Xamë nesivajamatabëjumaitsimë: “Itsa tojayatabianajë Jesús penaxatatsijava, nexata tavitanjavami nevecuaajibi

tsane,” nesivajamatabëjamë. Bajaraxuata jamatejemamë baja, jai Jesús bajarapovajavabelia.

Bajarapacuenia Jesús pejumaitsijavata bajarapova jamatejema baja. ²³ Bajaraxuacujinae Jesús jane baja pata judíovi penacaetuatabiabibo pevetsinë pijaboyabelia. Nexata Jesús itsa pata, tane pevajënae pepat-sivi, flauta piobivinxeta itsabelia caponaejitsia petëpaevayo pemëthëtsinexa piobinxeta. Tanenua jivi bitso pinijicuenia pematanueyabavanapaejava petëpaevayo.

²⁴ Nexata Jesús jumaitsi bajarapamonaejavabelia:

—Papitsapare mapabovecuaje. Pejanava raja apo tëpae. Saya raja majita, jai Jesús tsipaji yapëtane Jesús piasaëyaexanaejavanexa bajarapovayo.

Nexata saya bajarapamonae Jesús jumecapocaponatsi bajarapacuenia pejumaitsijava. ²⁵ Jesús nexata bajarapamonae bovecua pitsapaeyaexana. Nexata itsaxuayolia petëpaevayo boca, Jesús joneya. Cobepita petëpaevayo. Bajarapovayo baja namatacota. ²⁶ Nexata daxita bajarapanacuapijivi Jesús vënëlivaisitanetsi piasaëyaexanaejava petëpaevayomi.

Pacuenia Jesús itaxutoxaniavaeta bitso pitaxutotsëcënaenëmibeje yabara pelivaisi

²⁷ Itsa baja Jesús pona judíovi penacaetuatabiabibo pevetsinë pijabovecua, anijanëbeje bitso pitaxutotsëcënaenëbeje Jesús pënaponatsi. Bajaraponëbeje vavajaiya jumai tsaponaebeje Jesúsjavabelia:

—¡Jesús, Davidpijinë pemomo, paneitaxutotsoniataemabeje! jaibeje tsaponae Jesúsjavabelia.

²⁸ Itsa baja Jesús joneya pabojavabelia pona, nexata bajaraponëbeje pënajoneyatsibeje. Nexata Jesús bajarajota jumaitsi bajaraponëbejejavabelia:

—¿Payapëtanemebeje tsaja tanecaëjëpaecuene patacaitaxutoxanepanaeya exanaejavanexabeje? jai Jesús bitso pitaxutotsëcënaenëbejejavabelia.

Nexata bitso pitaxutotsëcënaenëbeje jumaitsideje Jesúsjavabelia:

—Jājā, payapëtanijibeje cajena, jaibeje.

²⁹ Nexata Jesús itaxutojayata bitso pitaxutotsëcënaenëbeje. Jesús jumaitsi bitso pitaxutotsëcënaenëbejejavabelia:

—Pacuenia baja xanëjavaberena nesivanajamatabëcuene copatsiaya panesivanajamatabëxainamebeje patacaitaxutoxaniavaetsinexabeje, bajarapacuenia pacatoexanatsibeje, jai Jesús.

³⁰ Nexata bitso pitaxutotsëcënaenëmibeje itaxutoxanepanabeje baja. Bajaraxuacujinae Jesús asaëya jumeitaveta bajaraponëbeje. Jumaitsi:

—Pëtsa panavajunupaebamebeje itsamonaejavabelia patacaitaxutoxaniavaetsijavabeje, jai Jesús.

³¹ Itsiata saya ajena bajarapabovecua pitsapaliabeje, navajunupaebaponabeje. Pacuenia Jesús itaxutoxaniavaetatsibeje, navajunupaebaponabeje daxita bajarapanacuajava.

Pacuenia Jesús natsipaebiaexana apo pecuacuaijainëmi yabara pelivaisi

³² Itsa baja bovecua pitsapabeje ponëbeje Jesús itaxutoxanepanaeyaexana, bitso pitaxutotsëcënaenëmibeje, nexata icsatsia peyamonae Jesús tocaparenatsi apo pecuacuaijainë. Bajaraponë dovathi peyavaponaponae. ³³ Nexata apo pecuacuaijainë Jesús dovathi itsa vecuacapsapa, cuacuaijai baja xaniavaetsia. Nexata petaevitsi bitso jamatabëcuenenabenajaca. Najumaitsi bajarapamonae:

—Caeto ata cajena Israel nacuata itsajivi ata apo tae mapitsicueneje, najai bajarapamonae.

³⁴ Itsiata baitsi jane fariseovi jamatabëcuenenavëxaniabiaya jumaiti Jesús yabara:

—Mara ponëje dovathi jivivecua capitsapabiaba dovathivi pepo penamat-acaitorobinë pesaëta, jai fariseovi Jesús yabara.

Pacuenia Jesús itaxutotsoniatane jivi yabara pelivaisi

³⁵ Jesús najetaruca daxita tomanëjava, tsiquiritomaraxijava ata. Nex-ata bajarapatomanëjava judiovi penacaetuatabiabibonëjava pexanialivaisi Jesús jivi tsipaebanajetaruca. Tsipaebanajetaruca daxita Dioso pijajivi pevetsijavanexa. Piavitanevi ata Jesús jamatejemayaexanapona, daxitaviri-avitane pexainaevimi. ³⁶ Jesús jivi itsa tane, itaxutobejiobiatane. Tsipaji jivi bitso baja cajena cuerana. Apo caëjëpaetsinua jivi penatoexanaenexa itsacuenëjavayo ata. Jesús jivi sivajamatabëjumaiti mapacueniaje:

—Pacuenia itsi ovejabitsaëtoخانeto itsa toajibitsi pevetsinëtsi, bajara itsi mapamonaeje, sivajamatabëjai Jesús.

³⁷ Nexata Jesús jumaiti pijajivijavabelia:

—Xaniajanë pacuenia pacatsipaebijitsiatsi. Pabita peubijava penaveretsijava abaxë bitso ayaijava sajina penotsinexa. Tsipaji saya caejiviyobeje penotsivi. Bajara pijinia itsi jivi ata Diosojavabelia penajamatabëcopabivinexa. Abaxë sajina ayabitsaëtoخانeto. Itsiata baitsi jane Dioso panetonacuenebivi pacaejiviyomëbeje saya. ³⁸ Bajaraxuata Diosojavabelia pavajëcabiabare icatsi itsamonae Dioso pijajivi pitorobinexa papecayavenonaenexa, jai Jesús pijajivijavabelia.

10

Pacuenia Jesús pijajivi ayabitsaëtoخانetoyajuvënëvi itapeta saya doce ponëbeje apóstolevinexa yabara pelivaisi

(Mr 3.13-19; Lc 6.12-16)

¹ Jesús pijajivi ayabitsaëtoخانetoyajuvënëvi junata saya doce ponëbeje Jesús pebarënacatuatsinexa. Jesús pijajivi pecaëjëpajamatabëcuenetsi jamatabëcuenecaëjëpaeyaexana dovathi peyajavajinavanapaevi pevēcua capitsapaponaenexa, pejamatejemayaexanaponaenexanua daxitaviriavitane pecapunaevitsi.

² Mara doce ponëbeje Jesús pijajivi, apóstolevi, pevënëanëje. Itsanë pevënë Simón. Itsavënë bajaraponë Pedro. Itsanë pevënë Andrés, Simón pejuyapi-jinë. Itsanëbeje pijinia Santiagobeje Juanbeje nacaebananëbeje, Zebedeo pexënatobeje. ³ Itsanë pevënë Felipe. Itsanë Bartolomé. Itsanë Tomás. Itsanë Mateo, impuestomatamo gobiernu pejamatabëcuene jivijavabelia petomatamoyanijobinëmi. Itsanë pevënë Santiago, Alfeo pexënatu. Itsanë pevënë Lebeo. Bajaraponë itsavënë Tadeo. ⁴ Itsanë Simón, celotenë. Itsanë pevënë Judas Iscariote. Bajaraponë bexëajavabelia canajetsijitsiatsi Jesús pijavajabitsaë pecobeyabelia pebeyaxuabinexatsi.

Pacuenia Jesús pijajivi itoroba Dioso pitorobilivaisi jivi petsipaebanaje-tarubenaenexa yabara pelivaisi

(Mr 6.7-13; Lc 9.1-6)

⁵ Jesús pijajivi pitorobivajënaeya jumaiti pijajivijavabelia mapacueniaje:

—Pëtsa paponame apo judíovi pijanacuayabelia. Pëtsa paponame Samaria nacuata penaetomaranëjavabelia ata. ⁶ Paponare jane Israel nacuapijivijavabelia. Pacuenia ovejabitsaëtoxaneto pevetsinëtsi vecuanaxuabavanapa, bajara pijinia pacuenia Israel nacuapijivi Diosovecua naxuabavanapa. ⁷ Patsipaebanajetarubenaename bajarapamonae imoxoyo baja pevajënae pecopiapatsijavanexa Dioso pijajivi pevetsimotacabinexa. ⁸ Pajamatejemayaexanaponaename piavitanevi. Pasaëyaexanaponaenamenua petëpaevimi ata. Pajamatejemayaexanaponaenamenua bajayajebi bitso peperabëtsabanaevi. Pavecuacapitsapaponaenamenua dovathi peyavajavinavanapaevi. Amoneya raja pacacajëpaeyaexanatsi bajarapacuenia paneexanaponaenexa. Bajaraxuata amoneya jivi pajamatejemayaexanaponaename. Pëtsa pamatamoyanijobame panejamatejemaya exanaejamatabëcuene, jai Jesús pijajivijavabelia pitorobivajënaeya.

⁹ Jesús icatsia jumaiti pijajivijavabelia pitorobivajënaeya:

—Panijanamutonexa pëtsa pacaponame palata. ¹⁰ Pëtsa pacaponame panijadoro ata. Saya pajumaponaename caenaxatatsi. Panenataxutat-sijava ata, pataxunaponaename caejava. Naeboyo ata pëtsa pacaponame. Pamonaejavabelia livaisi patsipaebianame, pacarajutsiana panexaejava. Bajarapacuenia pacarajutsiana tsipaji pajivi xaniavaetsia itsanëjavabelia tonacueneba, bajarapajivi juya pexaejava barajutatsi.

¹¹ 'Itsa papatabiabianame pinijitomarata, tsiquiritomarayojavata ata, bajarajota pajaitabianame ponë peyaiyataenëtsi. Nexata bajaraponë pijabota pamajitabianame. Pëtsa panatixitapome itsaboyabelia panemajitsinexa. Matapania icatsia itsajavabelia itsa paponame, bajarapabovecua papitsapaename. ¹² Itsa pabota papatsijitsiamë, ajena pajonejitsiamëlia, pajumaitsimë tsabiabi tsane: “Diosojavabelia raja pacatovajëtsijitsiatsi xaniavaetsia panejinavanapaenexa,” pajamë tsabiabi tsane. ¹³ Itsa bajarapapojivi pacacopiapitsiana xaniavaetsia, nexata pacuenia Diosojavabelia patovajëtime, yavenonaenatsi Dioso. Itsiata baitsi jane itsa apo pacacopiapitsi tsane xaniavaetsia, nexata pëtsa patovajëtime Diosojavabelia peyavenonaenexatsi. ¹⁴ Itsa apo pacacopiapitsi tsane, itsa apo jitsipaenua tsane papecanamuxunaevetsinexa panetsipaebilivaisi, bajarapabo pavecuaponaename. Bajarapatomara ata baja pavecuaponaename. Nexata baja itsa paponaejitsiamë bajarapatomaravecua, paneponaevajënae, bajarapatomarata panataxuatsapërëvarëbianame. Bajarapacuenia itsa panataxuatsapërëvarëbianame, bajarapatomarapijivi yapëtaena Diosojavabelia pananeconitsicuene apo papecapiapitsixae papecanamuxunaevetsinexa panetsipaebilivaisi. ¹⁵ Xaniajanë pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainaevi, bajarapamatacabi Dioso ayaicuenia naneconitsiaexanaenatsi patomarapijivi apo pacacopiapitsi tsane. Paneconivajëtota bajayata Dioso naneconitsiaexana Sodoma tomarapijivimi, Gomorra tomarapijivimi ata, bajarapaneconivajëto matatoxenetsia itsamatacabi Dioso naneconitsiaexanaena patomarapijivi apo pacacopiapitsi tsane, jai Jesús pijajivijavabelia pitorobivajënaeya.

Pacuenia Jesús pijajivi bejibiaexanaejitsiatsi yabara pelivaisi

¹⁶ Icatsia Jesús jumaiti pijajivijavabelia:

—¡Xania panayajivitaename! Pacaitorobianatsi raja bitso pibisiacuene pexanabiavijavabelia. Pacuenia ovejaji tsiaiyatsi itsa jinavanapa pianaepanaevi nevëthë tuatuajëta, bajarapaitsimë tsane. Nexata pacuenia unupijivi nayajivitaeyajinavanapa pitsacueniabiyativatsi, bajara paitsimë

tsane. Pacuenia ata ucucu aneconijibia jinavanapa, bajara paitsimē tsa-
vanapae tsane. ¹⁷ Xania baja tsane. Patajajivixaemē raja jivi pacaneconit-
siana papecananeconitsiaexanaenexa. Nexata itsajota nacaetuatabiaba
tomara pevetsivi, bajarabelia pacacaponana. Judíovi penacaetuatabiabi-
bonējava pacajumatitibabeyabiabiana penaneconitsivi pejumaconitabiabi-
macata. ¹⁸ Patajajivixaemē pacanubiananua nacuaevevtsivi pitabarata, pres-
identevi pitabarata ata. Bajarajota nexata xanē talivaisi patsipaebianame
bajarapamonaejavabelia, apo judíovi ata pitabarata. ¹⁹ Itsiata baitsi jane
itsa pacanubiana nacuaevevtsivi pitabarata, pētsa pajamatabēbējamē pa-
nenayajiviciauaijainexa bajarapamonaejavabelia. Tspaji raja paepa-
tota panayajiviciauaijajamējitsia, bajarapaepatota Dioso pejamatabēcueneta
pacacuaicuaijaiyaexanaena. ²⁰ Itsa panayajiviciauaijajamē tsane, paxamē
panijacuata apo pacuaicuaijajamē tsane. Espiritu Santo raja pacacuaicuai-
jaiyaexanaena.

²¹ Itsamonae pematapijivi, pejuyapijivi ata, canajetsiana nacuaevevtsivi-
javabelia pebeyaxuabinexatsi. Itsamonae nacoxicanajetsiana nacuaevev-
sivijavabelia pebeyaxuabinexatsi. Itsamonae canajetsiana paxa, pena
ata, nacuaevevtsivijavabelia pebeyaxuabinexatsi. ²² Daxita nacuapijivi
pacaityo tsane patajajivixaemē. Pajivi bejibiaexanae atatsi tsane, itsi-
ata itsa casaē tsaponaponaē tsane tanejumecovēnētsijava, bajarapajivi ca-
panepaenatsi Dioso pijanacuayabetsia. ²³ Itsa patomarata pacabejibiaex-
anaena, bajarapatomaravecuā parēcēpecaename itsatomarabelia. Xaniajanē
pacuenia pacatsipaebijitsiatsi. Daxita Israel nacuata penaetomaranējava
abaxē patsipaebiveretsinejavamē pexanialivaisi, xanē, Daxitajivi Pematapi-
jinēnē, itacarajeta icatsia patsianicajē.

²⁴ Itsajivi ata apo jamatabēcuenematatoxenetsi pecujarubinētsi. Itsajivi ata
pijinia itsanē itsa pijajivitonē, apo jamatabēcuenematatoxenetsi pijatuxanenē.
²⁵ Pacuenia pecujarubinē itsamonae copiaya bejibiaexanatsi, bajarapacue-
nia icatsia bajaraponē pecujarubivi ata bejibiaexanaenatsi. Pacuenia
petuxanenē copiaya bejibiaexanatsi, bajarapacuenia icatsia pijajivitonē
ata cotocaevi bejibiaexanaenatsi. Xanē panijatuxanenēnē: “Beelzebú,
daxita dovathivi pijatuxanenē,” nejai tsabiabi itsamonae. Nexata pijinia
patajajivixaemē bitso pibisiavēnēta paxamē ata cotocaevi pacajunatabiabi-
ana, jai Jesús pijajivijavabelia.

*Pacuenia Jesús pijajivi tsipaeba pecujunaviyaniva pebeyaxuabijavatsi
yabara pelivaisi*

(Lc 12.2-7)

²⁶ Icatsia Jesús jumaitsi pijajivijavabelia:

—Pētsa pacujunavame jivi, pacaatiobi ata. Daxita xua jivi muet-
sia pibisiacuene exana, hexējavabelia cueneyapētaeponaenatsi daxitajivi.

²⁷ Palivaisianē muetsia vajaepatojavata pacatsipaebaponatsi, bajarapali-
vaisianē paxamē pinijijumeta patsipaebaponaename jivi penacaetuatabi-
abijavata. ²⁸ Pētsa pacujunavame jivivevi ata. Bajarapamonae pacabeyaxu-
abi ata tsipae, acuenebi matavējēa papecaitsacueniabinexa pepo paneja-
matabēcuenējavabelia. Biji rajane pacujunavare Dioso, ponē caējēpatsi pa-
pecaxuabinexa infiernojavabelia papecabeyaxuabicujinae.

²⁹ Anijanēbeje baratsuitobeje namatamota saya caepalatanēyo. Itsiata
baitsi jane caenē ata baratsuito Dioso pepēya jemata muetsia apo jopaet-
sica petēpaenē. Tspaji paneaxa, Dioso, asiva baratsui ata. ³⁰ Dioso ca-
jena bitso pacaasiva baratsui matatoxenetsia. Nexata panematanatoxi
ata, caematanatoyo canacujitsia, Dioso namatajēta. ³¹ Bajaraxuata pētsa

pacujunavame itsacuenjavayo ata. Tspijaji paxamē Dioso bitso pacaasiva baratsuitoxi matatoxenetsia, jai Jesús pijajivijavabelia.

Pacuenia Jesús pijajivi apo benayavajunuaxainae Jesús pijajivicuene yabara pelivaisi
(Lc 12.8-9)

³² Icatsia Jesús jumaitsi pijajivijavabelia:

—Daxita pamonaē tajajivi, jivi pitabarata itsa navajunupaebiana taja-jivicuene, xanē ata vajunupaebianajē bajarapamonaē tajajivicuene taxa, athēbētatsia peecaenējavabelia. ³³ Pamonaē jumai tsane itsamonaējavabelia: “Xanē cajena Jesús apo pijajivitonēnē,” jai tsane, nexata pijinia bajarapamonaē yabara xanē jumaitsinē tsane taxa Diosojavabelia: “Mara pamonaē apo tajajivije,” janē tsane, jai Jesús pijajivijavabelia.

Pacuenia Jesús apo penajuajumecovēnētsixae, nacaemonaē ata apo najamatabēcuenejēpae tsane yabara pelivaisi
(Lc 12.51-53; 14.26-27)

³⁴ Icatsia Jesús jumaitsi pijajivijavabelia:

—Pētsa panesivajamatabējumaitsimē mapacueniaje: “Jesús rabaja patsica mapanacuayabetsicaje daxitajivi mapanacuataje najamatabēcuenejēpaeja pejinavanapaeyaexanaenexa,” panesivajamatabējamē pētsa. Bajaraxu-anexa apo patsinētsica. Biji rajane xanē tapatsixaetsica mapanacuayabetsicaje, jivi itsa nejumecovēnētsiana, apo najamatabēcuenejēpae tsane pamonaējavabelia apo nejumecovēnētsi, nacaemonaē ata. Napijavajabitsaē tsane namataenetsia. ³⁵ Xanē apo tanenajuajumecovēnētsixaebeje, pebibeje paxabeje apo najamatabēcuenejēpaebeje tsane. Petirivabeje ata, pexēnatoyobeje xanē apo tanenajuajumecovēnētsixae penabeje apo najamatabēcuenejēpaebeje tsane. Pamebeje ata pecopenabeje apo najamatabēcuenejēpaebeje tsane. ³⁶ Nexata xanē apo tanenajuajumecovēnētsixae, caejivi canacujitsia bepivajabitsaējivi taenatsi pijamonaējivi ata.

³⁷ Pajivi nejumecovēnētsi ata, apo niasiva tsane paxa, pena ata, piasivajava matatoxenetsia, bajarapajivi apo tajajivi tsane. Pajivi nejumecovēnētsi ata, apo niasiva tsane pexēnato, pexēnatoyo ata, piasivajava matatoxenetsia, bajarapajivi apo tajajivi tsane. ³⁸ Pajivi nejumecovēnētsi ata, pecajunavi apo nepēnaponae tsane pebeyaxuabixaejitsiatsi xanē tajumelivaisi yabara, bajarapajivi apo tajajivi tsane. ³⁹ Pajivi nayavajunuaxaina tajajivicuene pebejioiaexanaeyanivatsi, pebeyaxuabiyaniavatsinua, bajarapajivi naxuabiana daxitamatabijavabelianexa. Itsiata baitsi jane pajivi beyaxuabatsi tajajivixae, bajarapajivi daxitamatabijavabelianexa Dioso capanepenatsi, jai Jesús pijajivijavabelia.

Pacuenia Dioso matamotsijitsiatsi pamonaē xaniavaetsia copiapita Jesús pijajivi yabara pelivaisi
(Mr 9.41)

⁴⁰ Icatsia Jesús jumaitsi pijajivijavabelia:

—Pajivi pacacopiapitsiana patajajivixae, bajaraxua xanē taniji tane copiapitsijava. Pajivi necopiapitsiana, bajaraxua taxa Dioso tane pecopiapitsijavatsi. ⁴¹ Diosojumepaebinē Dioso matamotsianatsi petonacuenebimatamo. Nexata pajivi xaniavaetsia copiapita Diosojumepaebinē, bajarapajivi ata Dioso matamotsianatsi. Nexata xuavajēto Diosojumepaebinē Dioso matamotsianatsi, bajara pijinia xuavajēto Dioso matamotsianatsi pajivi copiapita Diosojumepaebinē. Pajivi ata exanabiaba Dioso pitorobicueniatsi, bajarapajivi ata

Dioso matamotsianatsi. Nexata pajivi xaniavaetsia copiapita pajivi exanaponapona Dioso pitorobicueniatsi, bajarapajivi ata Dioso matamotsianatsi. Nexata xuavajëto Dioso matamotsianatsi pajivi exanaponapona Dioso pitorobicueniatsi, bajara pijinia xuavajëto bajarapajivi Dioso matamotsianatsi.

⁴² Pajivi yavenonaena tajajivi, tsiquirijavayo ata mera rajutsiana pia-paenexa, bajarapajivi pepacuene matamotsianatsi Dioso, jai Jesús pijajivi-javabelia.

11

Pacuenia Juan jivibautisabinë itoroba pijajiviyajuvënëvi Jesúsjavabelia yabara pelivaisi
(Lc 7.18-35)

¹ Jesús baja najumevereta pijajivi doce ponëbejjavabelia livaisi petsipae-bijava. Nexata baja Jesús pona livaisi petsipaebinexa bajarapanacuata penaetomaranëjava.

² Bajarapamatacabi Juan jivibautisabinë naneconitsiaponapona penaneconitsivi pejebabiabibota. Nexata Juan vënëlivaisitane Dioso pesaëta Jesús pinijicuene pexanaponaejava. Bajaraxuata Juan itoroba pijajiviyajuvënëvi Jesúsjavabelia. ³ Juan itoroba pijajivi peyanijobinexa Jesúsjavabelia. Nexata Juan pijajivi jumaitsi Jesúsjavabelia:

—¿Xamë tsabaja Cristomë? ¿Xamë tsabaja tajëvelia cavajunupaebapona nepatsijavanexatsica daxitajivi necapanepaenexa? Itsa apo Cristomë, ¿abaxë tsaja pacopiaevetavanapaenajë itsanë pepatsinexatsica? jai Juan pijajivi Jesúsjavabelia.

⁴ Nexata Jesús jumaitsi Juan pijajivijavabelia:

—Paponare baja. Patsipaebianame Juan pacuenia baja pataneme taex-anaponaejava. Patsipaebianamenua pacuenia baja pajumetaneme tatsi-paebilivaisi jivijavabelia. ⁵ Apo petaevimi ata itaxutoxaniavaetaponajë xaniavaetsia petaenexa. Petabusipacuenabivitsinua daxita jinavanapaeyaex-anaponaajë. Bajayajebi bitso peperabëtsabanaevinua vecuaajibiaexanaponaajë. Bitso pemuxusipanaevinua jumetaeyaexanaponaajë baja xaniavaetsia pejumetaenexa. Petëpaevimi ata icatsia asaëyaexanaponaajë. Pexanialivaisinua pecapanepaelivaisinexatsi pibisiacuene pexanaeneconimivecua tsipaebaponaajë bepejiobivijavabelia. Daxita bajaraxua taexanaponaejava patanetaejavamë, patsipaebianame Juanjavabelia. ⁶ Pajumaitsimënu tsane Juanjavabelia: “Jesús raja jumaitsi: ‘Jamatabëcuenëbarëya pajivi tsiteca jumecovënëta xanë Dioso pexënatocuenenë,’ jai raja Jesús,” pajamë tsane Juanjavabelia, jai Jesús Juan pijajivijavabelia.

⁷ Itsa baja Juan pijajivi naviabalia, nexata bajarapamonae pecovëta Jesús taxuxuaba jivijavabelia petsipaebijava Juan pelivaisi. Jesús jumaitsi jivijavabelia mapacueniajaje:

—Itsa paponame petusato nacuayabelia, pamatacabi Juan ponapona petusato nacuata, ¿detsa pitsicuene pajamatabënaponaremelia panetaenexa bajarajotalia? ¿Paponaremelia tsaja saya panetaenexa musuli penajëabijava jovibota? ⁸ Itsa apo paponamëlia panetaenexa musuli penajëabijava jovibota, ¿detsa nexata pitsicuene panetaenexa paponaremelia? ¿Paponaremelia

tsaja saya panetaenexa naitabëtsiaya pexaniajava penaxatatsinë? Paxamë rabaja payapëtaneme mapacueneye. Pamonaenaitabëtsiaya pexaniajava naxatababiaba, bajarapamonaen jivananapa nacuanë pevetsivi pijabonëjava. ⁹ ¿Detsa nexata xua pajamatabënaponaremelia panetaenexa petusato nacuyabelia? Paponaremelia raja panetaenexa Diosojumepaebinë profetanë. Xaniajanë pacuenia pacatsipaebijitsiatsi. Juan itsa pataneme, pepacueneye jane baja pepo profetanë, Diosojumepaebinë, pataneme. Nexata saya bevelia profetanë apo pataemë. ¹⁰ Juan pexanaejavanexa, bajayata tajëvelia Dioso pejumelivaisibaxutota vajunupaeba. Dioso tanejumaitisijava ata xanëjavaberena Juan yabara, Dioso pejumelivaisibaxutota jumaitisimapacueniaje:

Itorobianajë nevajënaeyabelia tanejumelivaisipaebinënexa, jivi pecatsivajënaenajamatabëcuenexaniavaetsinexa, jai bajayata Dioso pejumelivaisibaxutota tapatsivajënaeya Juan tanelivaisipebanajetaruaejavanexa yabara.

¹¹ Xaniajanë pacuenia pacatsipaebijitsiatsi. Juan ayaijamatabëcuenenë mapanacuataje. Nexata bajayata Juan pevajënaeya paprofetavi jivananapa, itsanë ata Juan apo jamatabëcuenematatoxenetsitsi. Itsiata baitsi jane pajivi beveliajamatabëcueneyivi ata, itsa nejumecovënëta tacapanepaejavanexa, bajarapajivi ayaijamatabëcueneyivi Dioso exanaenatsi Juan matatoxenetsia.

¹² Juan jivibautisabinë petaxuxuabijavaveliacujinae, Dioso pitorobilivaisi jivi pepsipaebanajetaruaejava mapamatabicabijavaberena ataje, ayaibitsaëtoxaneto picani jivi jitsipa Dioso pitorobilivaisi pejumecovënëtsinexa. Itsiata itsamonae pesaëta caranatapona bajarapamonaen pejumecovënëtsiyaniva Dioso pitorobilivaisi. ¹³ Juan penaexanaevajënaeya, daxita Diosojumepaebivimi profetavi tajëvelia vajunupaebapona itsamatacabi Dioso pijajivi pevetsijavanexa. Dioso Moiséspijnëta penajumecopatsilivaisi ata, tajëvelia vajunupaeba Dioso pijajivi pevetsijavanexa. ¹⁴ Itsa baja jamatabëpajumecovënëtame, pajumecovënëre xua aeconoxae pacatsipaebijitsiatsi. Dioso pejumelivaisibaxutota tajëvelia jumaitisimapacueniaje: “Eliáspijnë icatsia patsiana,” jai. Bajarapacuenia tajëvelia itsa jumaitis, Juan jivibautisabinë yabara jumaitis. Tsipaji pacuenia jamatabëcuenetsi profeta Eliáspijnë, bajara jamatabëcuenetsi Juan ata. Nexata Juan pepatsivajënaeya, tajëvelia yapëtanetsi pacuenia Juan exanaejitsia. ¹⁵ Pajivi jamatabënejumeyapëtanepatacatsipaebilivaisi, nenamuxunaevetsi xaniavaetsia, jai Jesús jivijavabelia.

¹⁶ Jesús icatsia jumaitis jivijavabelia:

—¿Detsa meta pacuenia yapëtaeyaexanaenajë itsamonaejavabelia bajarapamonaen xaniavaetsia papeca yapëtanexa pacuenia paxamë pajamatabëcuenetsimë tsavanapae? Jumaitsinë meta tsane paxamë yabara mapacueniaje: “Bajarapamonaen abaxë saya bepejevaxijivixi, pajivixi tomara tuatujëjava banamuxusitenavanapa. Pejevaxijivixi itsa namuxusitenavanapa, bavavajai tsenae penajua namuxusitenaevijavabelia. ¹⁷ Pevavajajavata bajumaitis: ‘Pacatoobecatsi picani flauta. Itsiata apo payavajibimë. Pacatonaxëanecatsi picani penemuxunanuevajinexa ata. Itsiata apo panuemë,’ bajai tsenae pejevaxi penajua namuxusitenaevijavabelia. Bajara saya jamatabëcuenetsi pamonaen aeconoxae jivananapa mapanacuataje,” janë meta tsane paxamë yabara. ¹⁸ Juan jivibautisabinë Dioso pitorobilivaisi jivi tsipaebanajetarua. Pexaejava itsajavata apo xaeyabiabi, pamatacabibeje Diosojavabelia vajëta. Vinora ata apo apaeyabiabi. Nexata bajaraponë

yabara jamatabêcuenenavêxaniabiaya pajumaitsimê tsabiabi: “¡Juan raja dovathi yajavaponapona!” pajamê tsabiabi jamatabêcuenenavêxaniabiaya. ¹⁹ Bajaraxuacujinae icatsia xanê, Daxitajivi Pematapijinênê, najetarucajê. Itaxutojema xaniji. Matavêjêa apaeyabiabajêna. Nexata xanê yabara icatsia jamatabêcuenenavêxaniabiaya pajumaitsimê tsabiabi: “¡Pataema maponêje! Ayaijava xaejabiaba. Ayaira matavêjêa apaeyabiabanua piaitajibinexa. Barênajamatabêcuenêjêpanua gobierno pejamatabêcuene impuestomatamo pematamoyanijobabiavi. Pamonaeta piagamatabêcuenebejevi, barênajamatabêcuenêjêpa,” pajamê tsabiabi xanê yabara. Itsiata baitsi jane xuanê paxanêbeje Juanbeje paexanaponajêbeje, bajaraxuanê Dioso pejamatabêcueneta pataexanaejavabeje itsamonae xaniavaetsia yapêtaena. Nexata daxita bajarapamonaeta yapêtaena pacuenia Dioso paneyapêtaeayaxanabeje pepacuene pepo pexaniajajamatabêcuene, jai Jesús mapacueniaje jivijavabelia.

Pacuenia Jesús jumaitsi patomarapijivijavabelia apo jumecovênêtsitsi yabara pelivaisi
(Lc 10.13-15)

²⁰ Itsatomanarêjêava Dioso pesaêta Jesús pinijicuene pexanaejavanê navtsia exanapona. Itsiata bajarapatomanarêjêjivi apo copabi pibisiacuene pexanabiabijava. Apo najamatabêcuenepênêyorotsi Diosojavabelia. Nexata Jesús ajumesaêya jumaitsi bajara patomanarêjêjivijavabelia:

²¹ ¡Bitso bepajijobimê tsane paCorazín tomarapijivimê! ¡Bitso bepajijobimê tsane paBetsaida tomarapijivimê ata! Pinijicuene Dioso pesaêta taexanaejavanê patae atamê, itsiata apo panejumecovênêtsimê. Apo pacopabimê pibisiacuene paneexanabiabijava. Apo panajamatabêcuenepênêyorotsimê Diosojavabelia. Bajayata Tiro tomarapijivimi, Sidón tomarapijivimi ata, petuatuajêta bajarapitsipinijicuene itsa tsitaexanaejitsipajê, nexata bajarapamonaemi copabijitsipa pibisiacuene pexanaejava. Najamatabêcuenepênêyorotsipa Diosojavabelia. Bajarapamonaemi nexata pibisiacuene pexanabiabineconi bitso yajamatabêcuenebêjai tsipae. Nexata Diosojavabelia petsitanajamatabêcueneitajêtsinexa peyajamatabêcuenebêjaijava pibisiacuene pexanabiabineconi, naxatabijitsipa piayopapaêbêrêjavanê. Enaejitsipa irata. Ipumana ata natsimataothocaejitsipa bitso peyajamatabêcuenebêjaixae pibisiacuene pexanabiabineconi. ²² Xaniajanê pacuenia pacatsipaebijitsiatsi. PaCorazín tomarapijivimê, paBetsaida tomarapijivimê ata, patae atamê pinijicuene Dioso pesaêta taexanaejavanê, apo panejumecovênêtsimê. Nexata pamatacabi Dioso naneconitsiaexanaeta daxita pijaneconi pexanaevi, bajarapamatacabi bitso ayaicuenia Dioso pacananeconitsiaexanaeta. Paneconivajêtota bajayata Dioso naneconitsiaexana Tiro tomarapijivimi, Sidón tomarapijivimi ata, bajarapaneconivajêto matatoxenetsia Dioso bitso ayaicuenia pacananeconitsiaexanaeta. ²³ Paxamê paCapernaum tomarapijivimê, jamatabêcuenenavêxaniabiaya pajamatabêjumaitsimê tsabiabi: “Vaxaitsi cajena ayajamatabêcuenevitsi. Nexata Dioso nacacapanepaena athêbêabetsia,” pajamatabêjamê tsabiabi. Itsiata baitsi jane athêbêabetsia Dioso apo pacacapanepae tsane. Dioso raja pacaxuabiana infernojavabelia apo patanejumecovênêtsixaemê. Bajayata Sodoma tomarapijivimijavata itsa exanaejitsipajê Dioso pesaêta pinijicuene taexanaejava, pacuenia paxamêjavata exanaponajê, nexata Sodoma tomarapijivimi copabijitsipa pibisiacuene pexanaejava. Najamatabêcuenepênêyorotsipa Diosojavabelia. Nexata bajarapamonaeta

Dioso apo verebiabi tsipaetsi pibisiacuene pexanaeneconi yabara. Nexata abaxê mapamatacabi ataje jivi jinavanapaejitsipa bajarapatomarata. ²⁴ Xaniajanê pacuenia pacatsipaebijitsiatsi. Pamatacabi Dioso naneconitsiaexanaena pijaneconi pexinaeivi, ayaicuenia Dioso pacananeconitsiaexanaena. Tsipaji Dioso pesaêta navitsia pinijicuene taexanaponaejava patae atamê, apo panejumeconvênêtsimê. Nexata Sodomata tomarapijivimi matatoxenetsia Dioso bitso ayaicuenia pacananeconitsiaexanaena, jai Jesús patomarapijivijavabelia apo jumecovênêtsitsi.

Pacuenia Jesús pijajivi junata pejamatabêcueneasaêyaexanaenexa pejamatabêcueneconvênêtsia yabara pelivaisi

(Lc 10.21-22)

²⁵ Jesús pevajêtsijavata paxa Diosojavabelia jumaitsi:

—Axa, nevetsinê athêbêtatsia. Nevetsinê mapanacuajava ataje. “Ayaijamatabêcueneconvênêtsimê bitso,” cajiatsi. Tsipaji pamonaebitso apo penacujarubivi ata, yapêtaeyaexanaename nevetsijavanexa daxita nijajivi mapanacuataje. Bajarapamonaebitso yapêtaeyaexanaename pexanialivaisi, xanê talivaisi, palivaisi vecumatayataeme bitso peyapêtaevi mapanacuapijilivaisije. Bajara-palivaisi vecumatayataeme bitso penacujarubivi ata mapanacuapijicuene yabaraje. ²⁶ Bajarapacuenia exaname tsipaji baja exaname nejitsipaecuenia, jai Jesús paxa Diosojavabelia pevajêtsijavata.

²⁷ Icatsia Jesús jumaitsi pijajivijavabelia:

—Taxa Dioso baja cajena netocopata tayapêtaenexa daxitacuene. Itsajivi ata apo nejamatabêcueneypêtae pacuenia xanê jamatabêcueneitsinê, Dioso pexênatonê. Caenê taxa Dioso nejamatabêcueneypêtane. Itsajivi ata apo jamatabêcueneypêtae pacuenia taxa Dioso jamatabêcueneitsi. Caenê xanê, pexênatonê, jamatabêcueneypêtaniji. Pamonaebitso tojitsipajê tayapêtaeyaexanaenexa pacuenia taxa Dioso jamatabêcueneitsi, bajarapamonaebitso yapêtaeyaxanaponaenajê. ²⁸ Pabita penacuenebabinê, piarevejave pejetabiabinê, bitso havemaxêcuera. Bajara pijinia pacuenia paxamê ata bitso itsa pajamatabêcueneconvênêtsianame pibisiacuene paneexanabiabijava yabara, xanêjavaberena paponare paneajamatabêcueneconvênêtsianame icatsia. ²⁹ Bueyubeje banavêtsijumacaevetaebeje petsivêtsijumabuatsinexatsibeje yugovênêjave penacuenebinexabeje. Bajara pijinia pacuenia paxamê ata panajamatabêcueneconvênêtsianame patacatsijamatabêcueneconvênêtsianame patacatsipaebilivaisi. Panejumeconvênêtsianame pacuenia pacatorobatsi patanetonacuenebinexamê. Nexata panevâjênaeyabelia panejamatabêcueneconvênêtsianame. Tsipaji xanê xaniavaetsia pacatsipaebaponaenatsi. Xanê beayaijamatabêcueneconvênêtsianame nataenê. Nexata bajarajota panajamatabêcueneconvênêtsianame paneajamatabêcueneconvênêtsianame icatsia. ³⁰ Pacuenia bueyu tsivêtsijumabuatsi yugovênêjave petoyapêxanepanaenexatsi penacuenebijava, bajara pijinia pacuenia paxamê ata pacatoyapêxanepanaeyaexanaenatsi paneexanaenexa xua pacatorobijitsiatsi, jai Jesús pijajivijavabelia.

12

Pacuenia Jesús pijajivi trigoxu namutua siricanajetarubena penacueneconvênêtsianame yabara pelivaisi
(Mr 2.23-28; Lc 6.1-5)

¹ Judíovi penacueraevetsimatocabita Jesús, pijajivi yajava, najetaruca trigo pabianējáva. Jesús pijajivi bitso piājani. Nexata trigoxu siricanajetarubena. Xuxaeyabuatapona. ² Nexata fariseovi tane Jesús pijajivi pesiricanajetarubenaējáva trigoxu. Nexata fariseovi jumaitsi Jesúsjavabelia:

—Taema mapamonaeje. Dioso Moiséspijinēta penajumecopatsilivaisi vajanacaitavetsicue neijajivi exana. Apo nacaitavetsi ata trigoxu vajaxaejava, itsiata ajena penacueraevetsimatocabixae, nijajivi apo hexanae mapacueenje, jai fariseovi Jesúsjavabelia.

³ Nexata Jesús jumaitsi fariseovijavabelia:

—Ajena, penacueraevetsimatocabita, tajajivi bajarapacuenia exanae ata, itsiata apo pibisiacue. Tsipaji bitso piājani. ¿Apo palebimē tsipaji Dioso pejumelivaisibaxuto paneyapētaenexa pacuenia vajasalinainē Davidpijinē, pebarēponaevi yajava, exana pamatacabi bitso piājani? ⁴ Davidpijinē joneya Dioso pijatemploboyalia. Nexata Dioso pijatemploboēnēta, mesajumata, bobena Diosonexa ofrendacuenia petojebipanbēanē. Bajarapapanbēanē apo tocopatsitsi picani Davidpijinē, pijajivi ata, pexaenexa penaneconitsiyaniva Diosojavabelia. Ēsacerdotevi picani tocopatatsi pexaenexa. Davidpijinē apo sacerdotenē ata, pijajivi barēxae ata bajarapapanbēanē, itsiata apo vėnananeconitsi Diosojavabelia. ⁵ ¿Apo palebimē tsipaji Dioso Moiséspijinēta penajumecopatsilivaisi paneyapētaenexa pacuenia jumaitsi sacerdotevi yabara? Sacerdotevi templobota penacue nebivi, penacueraevetsimatocabita ata apo nacueraevetabiabi. Penacueraevetsimatocabita sacerdotevi nacue nebabiabi ata templobota, itsiata apo naneconitsi Diosojavabelia. ⁶ Xanē cajena ayaijamatabēcuenenēni. Nexata Dioso netojitsipajivi taneyaiyataenexa templobo matatoxenetsia. ⁷ Dioso pejumelivaisibaxutota jumaitsi mapacueniaje: “Jitsipajē paneitaxutotsoniataenexa itsamonae ata. Apo jitsipañē cajena saya patanetobeyabiabinexamē dajubicuene ofrendacuenia patanerajutabiabinexamē,” jai Dioso pejumelivaisibaxutota. Xua yabara jumaitsi bajarapacuenia, apo pajumeyapētaemē baja cajena. Tsipaji itsa pajumeyapētaejitsipame xua yabara jumaitsi, nexata tajajivi ata paitaxutotsoniataejitsipame. Nexata tajajivi trigoxu pexaejava yabara apo panejumaitsimē tsipae: “Dioso Moiséspijinēta penajumecopatsilivaisi vajanacaitavetsicue neijajivi exanapona,” apo panejamē tsipae. Tsipaji tajajivi apo naneconitsi Diosojavabelia. Tsipaji tajajivi bitso piājanixae, trigoxu xane. ⁸ Nexata xanē, Daxitajivi Pematapijinēnē, netoxanepana cajena tatsipaebinexa xua xanepana jivi pexanaenexa penacueraevetsimatocabita ata, jai Jesús mapacueniaje fariseovijavabelia trigo pabianējávata.

Pacuenia Jesús jamatejemayaexana pebi pecobetsaquenaenē yabara pelivaisi

(Mr 3.1-6; Lc 6.6-11)

⁹ Trigo pabianējávata Jesús livaisi petsipaebicujinae fariseovijavabelia, Jesús baja vecuapona pabianē. Nexata Jesús joneya judíovi penacaetuatabiabiboyalia. ¹⁰ Nexata bajarajota pebi naeca, pecobetsaquenaenē. Itsamonae fariseovi bajarajota jamatabēneconitatsi Jesús. Nexata Jesús naitaxutocaevetatsi xua yabara neconitsijitsiatsi. Nexata fariseovi Jesús jamatabēcuenējēbiaya yanijobatsi mapacueniaje.

—¿Vajanacueraevetsimatocabita ata tsaja xanepana piavitanevi vajajamatejemayaexanaenexa? jai fariseovi Jesúsjavabelia.

¹¹ Jesús nexata jumaitsi fariseovijavabelia:

—Paxamëyajuvënëvi pijaoveja itsa tojopaejitsiparecatsi meramëthëareca, penacueraevetsimatacabita ata ponaejitsipa. Nexata jutsipaina pijaoveja. ¿Baja tsabaitsi jane? ¹² ¡Biji ra jivitonë bitso namatamota oveja matatoxenetsia! Bajaraxuata itsiata nacatoxanepana vajaexanaenexa pexaniacuene vajanacueraevetsimatacabita ata, jai Jesús fariseovijavabelia.

¹³ Nexata Jesús jumaitsi pecobetsaquenaenëjavabelia:

—Namaxërovire, jai Jesús.

Itsa bajaraponë namaxërovita, pacuenia itsanenia cobeitsi, bajara cobeitsi. Cobexanepanareca baja. Pecobetsaquenaenjavi baja ajibi. ¹⁴ Nexata fariseovi itsa tane Jesús pecobexanepanaeyaexanaejava pecobetsaquenaenë, fariseovi anaepana. Nexata pitsaparena judíovi penacaetuatabiabi-bovecua. Nexata jane baja fariseovi najumejaita Jesús pebeyaxuabinexatsi.

Pacuenia Diosojumepaebinë profetanë bajayatami tajëvelia vajunupaebitsi Jesús yabara pelivaisi

¹⁵ Jesús jamatabëcueneypëtane pacuenia fariseovi sivanajamatabëxainatsi. Jesús picani fariseovi jamatabëbeyaxuabatsi. Nexata baja Jesús bajarapamonae vecuapona itsajavabelia. Jivi ayaibitsaëtöxaneto Jesús pënaponatsi. Jesús nexata jamatejemayaexana daxita piavitanevi. ¹⁶ Jesús jumeitaveta bajarapamonae petsipaebiyani va itsamonaejavabelia Jesús Dioso pexënatocuene. ¹⁷ Bajarapacuenia Jesús pejamatejemayaexanaevi itsa jumeitaveta petsipaebiyani va itsamonaejavabelia, copiapata jane baja pacuenia bajayata Diosojumepaebinëmi profeta Isaíaspijinë tajëvelia jumaitsi. Dioso pejumaitisijava Jesús yabara profeta Isaíaspijinë bajayata tajëvelia jumaitsi mapacueniaje:

¹⁸ Maponë taitapetsinë, taitorobicuenia exanabiaba. Bajaraponë tasivanë.

Sivajamatabëcuenebarëyanë. Espiritu Santo runaeyaexanaenicajë bajaraponë pematatsënëatsica. Bajaraponë apo judíovijavabelia tsipaebiana tananeconitsiaexanaejavanexa daxita pibisiacuene pexanaevi.

¹⁹ Bajaraponë itsajivijavabelia ata apo jumeanaenotsi tsane. Livaisi itsa tsipaebapona, pinijijumeta apo vavajai tsane. ²⁰ Pamonaexanë tajumelivaisi pejumecovënëtsijava abaxë apo ajamatabëcuensaë ata, itsiata bajaraponë bajarapamonae apo xuabi tsane. Capanepaena. Pamatacabi tocopiapatsianatsi bajaraponë pijajivi pevetsimatacabinexa, xaniavaetsia bajaraponë evetsiana daxita pijajivi. ²¹ Nexata daxitajivi, apo judíovi ata, sivanajamatabëcueneocopatsianatsi bajaraponë pecapanepaenexa,

jai bajayata tajëvelia profeta Isaíaspijinë Dioso pejumaitisijava Jesús yabara. Bajarapacuenia bajayata tajëvelia jumaitsi Isaíaspijinë peyaquinaebaxutota.

Pacuenia itsamonae Jesús yabara jamatabëcuenenavëxaniabiaya jumaitsi: “Beelzebú raja pesaëta Jesús dovathi jivivecua capitsapapona,” jai yabara pelivaisi

(Mr 3.20-30; Lc 11.14-23; 12.10)

²² Jesús tocapatatsi bitso pitaxutotsëcënaenë, apo penatsipaebinë. Bajaraponë dovathi yajavaponapona. Bajaraponë Jesús jamatejemayaexana. Xaniavaetsia baja nexata tane. Natsipaebanua baja. ²³ Jivi itsa tane Jesús pejamatejemayaexanaejava bajaraponë, jamatabëcuenenabenajaca. Nexata jivi najumaitsi Jesús yabara:

—¿Matsaeta ponë Davidpijinë pemomoje, Dioso pitorobinëtsicaje? najai bajarapamonae Jesús yabara.

²⁴ Nexata fariseovi itsa jumetane bajarapacuenia jivi pejumaitsijava, fariseovi jumaitsi jivijavabelia:

—Mara ponë Jesúsje, dovathi jivivecua capitsapabiaba Beelzebú pesaëta. Beelzebú raja daxita dovathivi pitorobinë, jai fariseovi jivijavabelia jamatabëcuenenavëxaniabiaya Jesús yabara.

²⁵ Jesús jamatabëcueneyapëtane pacuenia fariseovi sivanajamatabëxainatsi. Nexata Jesús jumaitsi fariseovijavabelia:

—Nacaenacuapijivi ata itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaenacuapijivi ata. Bajara pijinia itsipae nacaetomarapijivi ata. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaetomarapijivi ata. Bajara pijinia itsipae nacaemonae ata. Itsa navecuanatsanaejitsipa penasivanavajabitsaëtsinexa, nexata namataenetsia naverebiabijitsipa nacaemonae ata. ²⁶ Bajara pijinia itsipae dovathi ata. Dovathi jivivecua itsa capitsaponaejitsipa pijajivi, dovathivi, nexata bepijavajabitsaënë taejitsipatsitsi pijajivi. Itsajamatabëcuene vecuaxinaejitsipa pijajivi. Pesaë ata apo xainaponae tsipae. ²⁷ Paxamë ata panijajivi dovathi jivivecua capitsapabiaba. Nexata xanë Beelzebú pesaëta dovathi jivivecua itsa capitsapabiabajë, ¿detsa nexata ponë pesaëta panijajivi ata dovathi jivivecua capitsapabiaba? Caenë rabaja Dioso pesaëta. Nexata panijajivi ata pacayapëtane bajarapacuenia jamatabëcuenenavëxaniabiaya panejumait-sijava xanë yabara. ²⁸ Espíritu Santo raja pesaëta xanë dovathi jivivecua capitsapabiabajë. Nexata baja picani jivi beyapëtane Dioso baja petaxuxu-abijava pijajivi pevetsijava paxamë tuatuajëta, jai Jesús fariseovijavabelia.

²⁹ Fariseovi pecanajëtsinexa Jesús bitso piasaënëcuene dovathi matatoxenetsia, jivi icatsia jumaitsi fariseovijavabelia mapacueniaje:

—Itsajivi ata apo caëjëpaetsi pejonenexa bitso piasaënë pijaboyaliala peyacajërëtsinexa xua xaina pijabota. Itsiata itsa patsipa bajaraponë matatoxenetsia bitso piasaënë, nexata cobecëtabuatsipatsi. Taxucëtabuatsipatsi yajava. Matapania bajarapacuenia yacajërëtsipatsi daxita xua xaina pijabota.

³⁰ Pajivi apo neyavenonaeyacaetuatsi jivi Diosojavabelia, bajarapajivi betajavajabitsaëjivi. Tsipaji apo taneyavenonaeyacaetuatsixae, jivi nevecuanacayajata Dioso picani pejumecovënëtsiviminexa.

³¹ Bajaraxuata pacatsipaebijitsiatsi, Dioso caëjëpatsi daxitajivi pibisiacuene pexanaeiconimi pevecuaajibiaexanaenexa. Pibisiacuenia jivi Dioso baracuaicuaijai ata, bajarapaneconi ata Dioso caëjëpatsi pevecuaajibiaexanaenexa. Itsiata baitsi jane pajivi pibisiacuenia baracuaicuaijai Espíritu Santo, pacuenia paxamë pajumaitsimë, Dioso apo vecuaajibiaexanae tsane bajarapaneconi. ³² Pajivi pibisiacuenia nebaracuaicuaijai ata, xanë, Daxitajivi Pematapijinënë, bajarapaneconi ata itsiata Dioso vecuaajibiaexanaenatsi itsa vajëta Diosojavabelia. Itsiata baitsi jane pajivi pibisiacuenia baracuaicuaijai Espíritu Santo, bajarapaneconi Dioso apo vecuaajibiaexanae tsanetsi. Daxitamatacabijavabelianexa apo vecuaajibiaexanae tsanetsi bajarapaneconi, jai Jesús fariseovijavabelia.

Pacuenia peubinaenë itsa nacuaita, nayapëtane pavirianaecuene yabara pelivaisi

(Lc 6.43-45)

³³ Icatsia Jesús jumaitsi fariseovijavabelia:

—Pexanavirianaenë itsa ubatsi, nacuaita pijinia pexaniacuai. Ponae pijinia pibisiana, nacuaita pibisiacuai. Caeviriana canacujitsia yapëtanetsi itsa nacuaita. ³⁴ Bajara pijinia pacuenia paxamë ata

dovathi papijajivimē, panayapētaneme paneajamatabēcuenebejejava. Nexata apo pacacaējēpae panecuaicuajainexa pexaniacuene yabara. Pajamatabēcuene hēpēnēa panejamatabēēthētota panajamatabēxainame, panecuibovojojtuatsina pitsapa panecuaicuajainexa. ³⁵ Itsamonaē pijinia majamatabēcueneitsije. Pacuenia vajaubinae, pexaniae, pexaniacuai pijinia nacuaita, bajara pijinia jamatabēcueneitsi itsamonaē. Ponē pexaniajamatabēcuene, pexaniacuene yabara cuaicuaijai. Tsipaji pexaniajamatabēcuene xaina pejamatabēēthētota. Ponē pijinia pibisiamatabēcuene pibisiacuene yabara cuaicuaijai. Tsipaji pibisiamatabēcuene najamatabēxaina pejamatabēēthētota. ³⁶ Xaniajanē pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexinaevi, caejivi canacujitsia, naneconitsiaexanaponaena caejumeyo canacujitsia pibisiacuenia pecuaicuajajava yabara. ³⁷ Pibisiacuenia panecuaicuajajava yabara Dioso pacananeconitsiaexanaena. Pexanialivaisi itsa pacuaicuajamē tsabiabi tsane, nexata paneconijibimē tsane Diosojavabelia, jai Jesús fariseovijavabelia.

*Pacuenia pibisiamatabēcuenevi Jesús picani itorobatsi Dioso pesaēta pini-
jicuene pexanaejava petsitaexanaenexa yabara pelivaisi
(Mr 8.12; Lc 11.29-32)*

³⁸ Fariseovi, judiovi pecujarubivi ata, jumaitsi Jesúsjavabelia:

—Jesús, pajitsipajē patataenexa Dioso pesaēta pinijicuene nexanaejava, patacayapētaenexa pepacune Dioso athēbēvetsica peaitorobinēcuenetsica, jai bajarapamonaē.

³⁹ Jesús nexata jumaitsi bajarapamonaējavabelia:

—Bitso pibisiacuene paneexanaevi, Dioso panejumecovēnētsijavami panecopabivi. Paneitorobame picani Dioso pesaēta pinijicuene taexanaejava pacatsitaexanaenexa pataneyapētaenamē Dioso pepacune athēbēvetsica taneitorobinēcuenetsica. Itsiata baitsi jane Dioso pesaēta pinijicuene taexanaejava apo pacatsitaexanae tsanetsi. Bajayata pacuenia Diosojumepaebinēmi profeta Jonáspijinē exanatsi, bajara ēpitsicuene taneexanaejava pacatsitajētsianatsi. ⁴⁰ Bajayata Jonáspijinē boca ayainē dujuainē pēnēta acueyabi pamatacabibeje, acueyabi pameravibeje yajava. Bajara pijinia pacuenia xanē ata, Daxitajivi Pematapijinē, bocaenajē mēthēta acueyabi pamatacabibeje, acueyabi pameravibeje yajava. ⁴¹ Bajayata Ninive tomarapijivimi itsa jumetane Dioso pitorobilivaisi, Jonáspijinē petsipaebilivaisi, copaba pibisiacuene pexanaejava. Najamatabēcuene pēnēyorota Diosojavabelia. Copiapatsiana rabaja Dioso papecananeconitsia exanaematacabinexa daxita pijaneconi panexanaevi. Panijaneconi panexanaevi pacanubiana Dioso pitabarata. Nexata bajarapamatacabi Ninive tomarapijivimi nonobapunaena Diosojavabelia papecananeconitsinexa Dioso apo panejumecovēnētsivi. Xanē majotaje ponaponajē, bitso ayaijamatabēcuene nēnē Jonáspijinēmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovēnētsimē. Apo panajamatabēcuene pēnēyorotsimēnua pibisiacuene paneexanaejavavecu. Bajaraxuata ayaineconi paxainame Diosojavabelia. ⁴² Pamatacabi Dioso naneconitsiaexanaena pijaneconi pexanaevi, bajayata peponaponaevami, Saba nacupijivi pevetsivami, nonotapunaena Diosojavabelia papeacanconitsinexa Dioso apo panejumecovēnētsivi. Bajarapova pacaneconitsiana. Tsipaji bajayata bajarapovami tajē nacuataverena ata muxunarena pejumetaenexa

Salomónpijinē, bitso daxitalivaisi peyapētaenēmi, petsipaebilivaisi. Xanē majotaje ponaponajē, bitso ayajamatabēcuenenēnē Salomónpijinēmi matatoxenetsia. Nexata pacatsipaebi atatsi Dioso pejumelivaisi, itsiata apo panejumecovēnētsimē. Apo panenamuxunaevetsimēnuu. Bajaraxuata Dioso pacananeconitsiaexanaena, jai Jesús tajēvelia fariseovijavabelia, judíovi pecujarubivijavabelia ata.

Pacuenia dovathi jivitonē pevejamatabēpitsapaecujinaetsi, icatsia naviarena pecovēyaberena petsijamatabēcaenexatsi icatsia yabara pelivaisi

(Lc 11.24-26)

⁴³ Jesús jumaitsi fariseovijavabelia, judíovi pecujarubivijavabelia ata:

—Dovathi itsa vejamatabēpitsapa jivitonē, nexata dovathi jinaruta petseviiranējava. Jaitapona itsanējavabelia petsijamatabējonenexa penacuer-
aevetsinexa bajaraponējavata. Itsa apo caxitajarabi ponējavabelia tsija-
matabējonejitsia, nexata dovathi jamatabējumaitsi: ⁴⁴ “Naviatsianajē meta
icatsia tajabomijavabelia, paboverena pitsapajē,” jamatabējai dovathi,
ponējavaverena pitsapa icatsia petsijamatabējonexatsi. Dovathi baja caevēa
itsa naviarena, caxitajaraba peyjavaponaponaeñemitsi. Nexata peya-
javaponaponaeñemitsi pejamatabēēthēto, dovathi tane bepēñēsajinecaebo,
bepēñēxaniavaetetsibo, bepiracajuetetsibo. ⁴⁵ Nexata dovathi icatsia sivapona
peyajavapatsinexarena itsadovathivi, siete ponēbeje. Bajarapadovathivi
bitso piacujirubejevi copiaya padovathi matatoxenetsia. Daxita bajara-
padovathivi pebi tsijamatabējunuatsi peyajavaponaponaeñexa. Belia jane
baja pebi dovathivi bitso bejiobiaexanatsi. Copiaya abaxē caenē itsa tsi-
jamatabēcatsi pacuenia bejiobiaexanabiabatsi, matatoxenetsia bejiobiaex-
anatsi. Bajara pijinia pacuenia tocopiapatsianatsi pamonaē aeconoxae
jinavanapa, piacujirubejevi, jai Jesús fariseovijavabelia, judíovi pecujaru-
bivijavabelia ata.

*Pacuenia Jesús pejuyapijivi, pena yajava, nubena bojumavelia yabara peli-
vaisi*

(Mr 3.31-35; Lc 8.19-21)

⁴⁶ Jesús abaxē jivi livaisi itsa tsipaeba bo ēñētuatujāēalia, pata Jesús pe-
juyapijivi, pena yajava. Nexata bojumavelia nubena bajarapamonae. Ja-
matabēbarēcuaicuaijaitsi picani Jesús. ⁴⁷ Nexata itsajivi Jesús tsipaebatsi.

—Patajatuxanenē, ena raja, nejuyapijivi yajava, nuca bojumaverena.
Bajarapamonae pina jitsipa pecabarēcuaicuaijajava, jaitsi Jesús.

⁴⁸ Nexata Jesús jumaitsi petsipaebijivitsijavabelia:

—¿Detsa pitsijamatabēcuenēvi taena, tajuyapijivinu? jai Jesús.

⁴⁹ Nexata Jesús pecobeta itaropita pijajivi. Jumaitsi petsipaebijivitsijav-
abelia:

—Mara jane pamonaē taenajivije, tajuyapijivinu. ⁵⁰ Tsipaji raja pajivi
exana taxa, athēbētatsia peecaenē, pitorobcueniatsi, bajarapajivi cajena
tajuyapijinē, tajuyapijiva, taenanua, jai Jesús petsipaebijivitsijavabelia.

13

*Pacuenia Jesús jivi livaisi tsipaeba pabi peubinē pelivaisicuenia yabara
pelivaisi*

(Mr 4.1-9; Lc 8.4-8)

¹ Jesús baja itsa najumevereta jivijavabelia livaisi petsipaebijava, pitsapa
baja bajarapabovecua. Pona baja itsajavabelia. Nexata Jesús ecojopa

pucaxaneto itapata. ² Nexata pucaitapata jivi ayaibitsaëtoxaneto Jesús itaxutuanacaetuatsi. Nexata Jesús runareca jera ënëabereca. Ecareca jera ënëtareca. Daxita jivibitsaëtoxaneto nubena tajetabovelia. ³ Nexata Jesús daxitacueene livaisianë tsipaeba jivijavabelia. Jesús jumai tsaponae bajarapamonaejavabelia mapacueniaje:

—Peubinë pona pabiabelia peubinexa. ⁴ Nexata itsa pata pabita, peubixu pexucayabajarabicuenia ubanajetaruca. Pexucayabajarabijavata itsaxu othopa pabi tuatuajëjava penajetarucaenamutojumata. Nexata bajarajota pata baratsui. Xane bajarapaxumi juvinejeva. ⁵ Itsaxu pijinia othopa ibopananëjumata, itsajota bitso ira apo aitayaë. Nexata bajarapaxu bepijia juva. Tsipaji bitso ira apo aitayaë. ⁶ Nexata icotia bitso itsa ataju, nexata bajarapaxu juvi ata, tsaquenapona. Tsipaji irabereca bitso apo atabunepepiareca. ⁷ Itsaxu pijinia othopa xanëebacabomijavata. Nexata peubixu xanëebotonë caecuenia itsa yajavajuva, bitso xanëebotonë matacënënatsi peubijavami. ⁸ Itsaxu pijinia othopa pexaniairata. Bajarapaxu itsa juva, vitsaba. Xaniavaetsia nacuaite. Itsabotonë capitsapa cien paxutoyobeje tsaponae. Itsabotonë capitsapa sesenta paxutoyobeje tsaponae. Itsabotonë capitsapa treinta paxutoyobeje tsaponae. ⁹ Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús bajarapalivaisi petsipaebivijavabelia.

Pacuen yabara Jesús jivijavabelia livaisi tsipaeba ëcomparacióncuenia yabara pelivaisi

(Mr 4.10-12; Lc 8.9-10)

¹⁰ Jesús pijajivi imoxoyotatsi. Nexata Jesús pijajivi jumaitsi Jesúsjavabelia:

—Patajatuxanenë, jivijavabelia livaisi itsa tsipaebame, ¿detsa xuajitsia tsipaebame ëcomparacióncuenia? jai Jesús pijajivi.

¹¹ Nexata Jesús jumaitsi pijajivijavabelia:

—Paxamë rabaja xaniavaetsia Dioso pacayapëtaeyaexana Dioso papijajivimë papecaevecsijava. Itsiata itsamonae apo yapëtae bajarapacuenie. ¹² Pajivi xaniavaetsia nejumeyapëtane tatsipaebilivaisi, bajarapajivi icatsia itsalivaisi pematatsënëa Dioso yapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa tatsipaebilivaisi, bajarapajivi xuayovajëto jumeyapëtane picani, nacofënëtsiana. ¹³ Bajaraxuata livaisi itsa tsipaebajë bajarapamonae, ëcomparacióncuenia tsipaebajë. Nexata bajarapamonae tae ata Dioso pesaëta pinijicuenie taexanaejava, itsiata apo yapëtae pajamatabëcuenie yabara exanajë pinijicuenie taexanaejava. Namuxunaevetsi ata tatsipaebilivaisi, itsiata apo jumeyapëtae pajamatabëcuenie xaina tatsipaebilivaisi. ¹⁴ Bajarapacuenia apo jumeyapëtae tsipaji jane baja tocopiapatatsi pacuenia bajayata tajëvelia Diosojumepaebinëmi profeta Isaíaspijinë yaquina. Dioso pejumaitsi sija apo tanejumeyapëtaevinexa yabara, bajayata profeta Isaíaspijinë peyaquinaelivaisita jumaitsi mapacueniaje:

Bajarapamonae picani jumetaena. Itsiata apo jumeyapëtae tsane xua yabara tsipaebianatsi. Bajarapamonae taena picani. Itsiata apo yapëtae tsane pajamatabëcuenie xaina petaejava. ¹⁵ Bajarapamonae ajamatabëcuenetaja tsane. Bajaraxuata benamuxuacabiaya pejinavanapaevi tsane. Benaitaxutotsaquebiaya pejinavanapaevi tsane. Itsa bajarapacuenia apo itsipae, nexata yapëtaejitsipa pajamatabëcuenie xaina xua taena. Jumeyapëtaejitsipanea palivaisi jumetaena. Pejamatabëthëtojavavetsina jumeyapëtaejitsipa.

Nexata xanëjavaberena najamatabëcuenepënëyorotsipa perujuja-matabëcuenevecu. Nexata xanë jamatabëcuene xanepanaeyaex-anaejitsipajë,

jai bajayata tajëvelia Isafaspjinë peyaquinaelivaisita xua yabara tsipaebajë bajarapamonaë apo tanejumeyapëtaejavanexa yabara.

¹⁶ Itsiata baiſi jane paxamë baja pajamatabëcuenëbarëyamë. Tsipaji payapëtaneme pajamatabëcuene xaina xua pataneme. Pajumeyapëtanemenua pajamatabëcuene xaina palivaisi pajumetaneme. ¹⁷ Xaniajanë pacuenia pacatsipaebijitsiatsi. Bajayatami ayailbitsaëto profetavimi necopiaeveta-vanapa tanetaenexa picani tapatsijavatsica. Itsamonae ata aneconijibia pejinavanapaevi Dioso pitabarata, necopiaevetavanapa picani tanetaenexa tapatsijavatsica. Itsiata apo netaenejeva, daxita bajarapamonaë tãpa baja. Jamatabëjumetaeyabiabanua picani palivaisianë baja aeconoxae pax-amë pacatsipaebaponatsi. Itsiata apo jumetaenejeva bajarapalivaisianë, bajarapamonaëmi tãpa baja, jai Jesús pijajivijavabelia.

Pacuenia Jesús yapëtaeyaxana pijajivi pajamatabëcuene xaina palivaisi tsi-paëba peubinë pelivaisicuenia yabara pelivaisi

(Mr 4.13-20; Lc 8.11-15)

¹⁸ Icatsia Jesús jumaitſi pijajivijavabelia:

—Xaniavaetsia panenamuxunaevere panejumeyapëtaenexa pajamatabëcuene xaina palivaisi pacatsipaebatsi pabita peubinë pelivaisicuenia. ¹⁹ Pamonaë jumetaë ata Dioso pejumelivaisi, itsiata itsa apo jumeyapëtaë pejamatabëëthëtota, bajarapamonaë bepiothopaexu pabi tuatuajëjava penajetarucaenamutojumata. Nexata najetaruca dovathi. Nexata bajarapamonaë tsijamatabëjumvinejevatsi, dovathi vecuapitatsi bajarapalivaisimi, petsijamatabëubilivaisimitsi. ²⁰ Pacuenia pijinia itsi paxu othopa ibopananëjumata, itsajota bitso ira apo aitayaë, bajara tsijamatabëcuenëitsitsi itsamonae Dioso pitorobilivaisi. Bajarapamonaë jumetane Dioso pitorobilivaisi. Nexata picani bajarapalivaisi barëyaya jumecovënëta. ²¹ Itsiata baiſi jane pacuenia irabereca apo atabunepepiareca paxu othopa ibopananëjumata, nexata nabijiana, bajara tsijamatabëcuenëitsitsi bajarapamonaë Dioso pitorobilivaisi. Tsipaji pepacuenë pejamatabëëthëtovetsina apo jumecovënëtsi bajarapalivaisi. Nexata apo ajamatabëcuenesaë tsavanapae bajayajebi pejumecovënëtsinexa bajarapalivaisi. Nexata itsa tocopiaapatatsi daxita petoayapëbejecuenetsi, itsa yalivaisibatsinua Dioso pitorobilivaisi yabara, nexata pejumecovënëtsijava bajarapalivaisi bepijia copaba. Pevajënaeyabelia apo jumecovënëttavanapae.

²² Pacuenia pijinia paxu othopa xanëebacabomijavata, itsa juva, bitso matacënënatsi xanëebotonë, bajara tsijamatabëcuenëitsitsi itsamonae Dioso pitorobilivaisi. Jumetane picani bajarapamonaë Dioso pitorobilivaisi. Itsiata baiſi jane bitso jamatabëcuenëenatsi mapanacuapijicuenë yabaraje. Tsipaji najamatabëxaina ayajava palata pexainaenexa. Nexata pijacuata najamatabëcueneyamaxëitojoroba. Bajaraxuata Dioso pitorobilivaisi apo tovitsabitsi pejamatabëëthëtota. Nexata pacuenia itsi pabita piacuajibibotonë, bajara itsi bajarapamonaë. Tsipaji Dioso xaniavaetsia apo tojinavanapae. ²³ Pacuenia pijinia itsi paxu othopa pexaniairata, bajara tsijamatabëcuenëitsitsi itsamonae Dioso pitorobilivaisi. Bajarapamonaë jumetane Dioso pitorobilivaisi. Jumeyapëtanenua. Nexata pevajënaeyabelia tsijamatabëcuenëvitsabaponatsi Dioso pitorobilivaisi. Nexata pacuenia peubijjava capitsapa itsabotonë cien paxutoyobeje tsaponae, itsabotonë sesenta paxutoyobeje tsaponae, itsabotonë treinta paxutoyobeje tsaponae,

bajara tsjamatabëcueneitsitsi bajarapamonae Dioso pitorobilivaisi, jai Jesús pijajivijavabelia.

Pacuenia peubijava tuatuajëa piabejjava juva yabara pelivaisi

²⁴ Dioso apo pejumecovënëtsivi, pamonae najinavanapa Dioso pejumecovënëtsivijavata, itsamatacabi Dioso naneconitsiaexanaena. Nexata jivi peyapëtaenexa bajarapamonae Dioso penaneconitsiaexanaejavanexa, Jesús comparacióncuenia livaisi tsipaeba jivi ayaibitsaëtoxanetojavabelia. Jesús jumaitsi mapacueniaje:

—Mara pacuene jëpaje Dioso pijajivi pevetsijavaje. Pabi pexainaenë, ëpexaniaviatrigouxu uba pijapabita. ²⁵ Itsiata baitsi jane daxitajivi pemaitsijavata meravi, pabi pexainaenë pijavajabitsaënë tojunuatsi pijapabita. Nexata toubatsi trigo tuatuajëjava pibisiaviriajava, betrigobotonë pecataejava. Bajaraxuacujinae vemaxëpona baja. ²⁶ Nexata trigouxu juva. Vitsaba. Itsa baja trigobotonë namatonota, nexata matapania bajarajota nayapëtane pibisiaviriajava yajava penamatonotsijava. ²⁷ Nexata pabi pexainaenë pijajivi pata petsipaebinexatsi. Pabixainaenë pijajivi jumaitsi: “Nijapabita ubame ëpexaniaviatrigouxu. ¿De tsæta pacuenia pitsapa pibisiaviriaxu pibisi-ajava peyajavajuvinea trigojava?” jai pabixainaenë pijajivi. ²⁸ Nexata pabixainaenë jumaitsi pijajivijavabelia: “Tajavajabitsaënë raeta bajaraxua uba,” jai. Nexata pabixainaenë pijajivi jumaitsi: “¿Jitsipame tsaja bajaraxua pataxunaejava?” jai. ²⁹ Itsiata baitsi jane pabixainaenë jumaitsi pijajivijavabelia: “Jume. Tsipaji panexunaejavata payajavaxunaejitsipame trigobotonë. ³⁰ Copatsianatsi abaxë penacuaitsinexa. Nexata penotsimatacabi itorobianajë tanetonotsivi copiaya pecaetuatsinexa piabejjava. Pepacunuanë exanaena. Bajaraxuacujinae bajaraxua tajuitsiana. Bajaraxuacujinae ëtrigouxu netonotsiana taetablabibota tanetoetsinexa,” jai pabixainaenë pijajivijavabelia, jai Jesús jivi ayaibitsaëtoxanetojavabelia.

Pacuenia mostazaxutoyo pejuvicujinae, mostazanae bepiglia vitsaba yabara pelivaisi

(Mr 4.30-32; Lc 13.18-19)

³¹ Jesús livaisi tsipaeba comparacióncuenia jivi ayaibitsaëtoxanetojavabelia. Jumaitsi mapacueniaje:

—Dioso raja pijajivi pevetsijava maitsije. Pacuenia mostazaxutoyo pejuvicujinae, bepiglia vitsaba mostazanae, bajara pijinia itsane Dioso pijajivi ata. Bepiglia Dioso pijajivi ayaibitsaëtoxaneto naexanaena. Pabi pexainaenë mostazaxu uba pijapabita. ³² Mostazaxu raja bitso tsiquirixutoxi daxita peubixuveca. Itsiata baitsi jane mostazanae itsa juva, bepiglia vitsaba. Caevaita pinijinae naexana itsapeubinaenë matatoxenetsia. Nexata baratsui ata pata bajaraponaeta. Pematapananë exana bajaraponaemaxërananëjava. Bajara pijinia itsane jivi ata. Bepiglia ayaibitsaëto Dioso pijajivi naexanaena, jai Jesús jivi ayaibitsaëtoxanetojavabelia.

Pacuenia pan pexanaematabënexa, levaduravënëjava fufunaeyaexana yabara pelivaisi

(Lc 13.20-21)

³³ Jesús livaisi tsipaeba comparacióncuenia jivi ayaibitsaëtoxanetojavabelia. Jumaitsi mapacueniaje:

—Dioso raja pijajivi pevetsijava maitsije. Pacuenia pan pexanaematabënexa, levaduravënëjava yacaëjëpa daxita panmatabëjava, bajara pijinia itsi Dioso pijajivi pevetsijava. Yacaëjëpaena daxitanacuanëjava. Petiriva pan pexanaenexa, acueyabi patarroxanetobeje trigobenonë

matajërëaba levaduravënëjavata. Nexata pan pexanaematabënexa, ayaimatabë ata, levaduravënëjava pijinia tsiquirijavayo ata, itsiata levaduravënëjava yacaëjëpa daxitamatabëjava. Nexata levaduravënëjava fufunaeyaexana daxita panmatabënexa. Bajara pijinia itsi Dioso pijajivi pevetsijava. Yacaëjëpa daxitanacuanëjava Dioso pijajivi pevetsicuene, jai Jesús jivi ayaibitsaëtöxanetojavabelia.

Pacuenia Jesús jivi livaisi tsipaebabiaba comparacióncuenia yabara pelivaisi

(Mr 4.33-34)

³⁴ Jesús itsa tsipaeba jivijavabelia Dioso pijajivi pevetsijavanexa, livaisianë tsipaebapona ëcomparacióncuenia. ³⁵ Bajarapacuenia Jesús jivi livaisianë itsa tsipaebapona ëcomparacióncuenia, tocopiapatatsi jane baja pacuenia Diosojumepaëbinë profetanë bajayata tajëvelia yaquina Jesús petsipaebaponaejavanexa yabara. Jesús comparacióncuenia jivi livaisi petsipaebaponaejavanexa yabara, profetanë peyaquinaebaxutota jumaitsi mapacueniaje:

Jivi itsa tsipaebajë, livaisi tsipaebianajë comparacióncuenia. Tsipaebianajë pitsicuene Dioso nacua pexanaejavaveliacujinae itsajivi ata abaxë apo yapëtae,

jai tajëvelia bajayata profetanë peyaquinaebaxutota Jesús jivi livaisi comparacióncuenia petsipaebaponaejavanexa yabara.

Pacuenia Jesús pijajivi yapëtaeyaexana pajamatabëcuene xaina palivaisi tsipaeba trigobotonë tuatuajëa pejuvijava pelivaisicuenia yabara pelivaisi

³⁶ Jesús naviabiaexana jivi ayaibitsaëtöxaneto. Bajaraxuacujinae Jesús boya joneya. Bajarapabota Jesús pijajivi imoxorenatsi. Nexata Jesús pijajivi jumaitsi:

—Patajatuxanenë, panetsipaebare pajamatabëcuene xaina palivaisi tsipaebame jivi ayaibitsaëtöxanetojavabelia. Baitsi palivaisi tsipaebame trigobotonë tuatuajëa pejuvijava pelivaisicuenia, jai Jesús pijajivi.

³⁷ Nexata Jesús jumaitsi pijajivijavabelia:

—“Ponë uba pexaniaviriatrigöxu,” itsa janë, xanë rabaja, Daxitajivi Pematapijinënë, yabara nayabarajumaitsinë. ³⁸ “Pijapabi,” itsa janë, mapanacua yabaraje jumaitsinë. “Pexaniaviriatrigöxu,” itsa janë, Dioso pijanacuayabetsia pejonevinexa yabara jumaitsinë. “Pibisiaviriajava pejuvijava,” itsa janë, dovathi pijajivinexa yabara jumaitsinë. ³⁹ “Pijavajabitsaënë, ponë pabi pexainaenë toubatsi pibisiaviriajava pejuvinexa,” itsa janë, dovathi yabara jumaitsinë. “Penotsimatacabi,” itsa janë, mapanacua pevereverecaejavanexa yabara jumaitsinë. “Tanetonotsivi itorobianajë,” itsa janë, ángelevi yabara jumaitsinë. ⁴⁰ Nexata pacuenia piabejajava caetuata pexuabinexa isotöjavabelia, bajara pijinia pacuenia tocopia-patsianatsi dovathi pijajivi pexuabinexatsi isotöjavabelia mapanacua je pevereverecaematacabi. ⁴¹ Bajarapamatacabi xanë, Daxitajivi Pematapijinënë, itorobianajë tajaángelevi taevetsinacua tanetovecuajutsinexa daxita pamonaë pibisiacuene pexanabiabivi. Pamonaë ata itsamonaejavabelia pibisiacuene exanaeyaexana, bajarapamonae ata taevetsinacua netovecuajutsiana tajaángelevi. ⁴² Bajarapamonae xuabianatsi infiernojavabelia. Bajarajota nuena. Navonosiniana bitso penavixaetaexae.

43 Pamonae jumecovënëtsiajinavanapa Dioso pitorobicueniatsi, bajarapamonae perabëñaitayotsiana taxa Dioso pijanacuatsia. Pacuenia matacabipijijuameto naitayota, bajarapacuenia perabëñaitayotsiana. Pajivi jamatabëñejumeyapëthane, patacatsipaebilivaisi nenamuxunaevetsi xaniavaetsia, jai Jesús pijajivijavabelia.

Pacuenia pebi caxitajaraba bitso penamatamotsijavanë, itsanë irata pemëthëtetsijavami, yabara pelivaisi

44 Icatsia Jesús comparacióncuenia jumaitsi pijajivijavabelia:

—Pebi irata mëthëteta bitso penamatamotsijavanë. Bajaraxuanë bitso xanepana. Nexata juya itsanë bexëajavabelia bajaraxuanë caxitajarabeta irata. Nexata abaxë bajaraponë apo jutsi bajaraxua. Abaxë saya mataacateta bajarajota. Nexata jamatabëcuenëbarëyaya pona pijaboyabelia. Nexata xuacujinae bajaraponë canajeta daxita pexainaejavaximi. Nexata bajaraponë yacomuata bajarapaira. Tsipaji xua bajaraponë caxitajarabeta irata, bitso xanepana. Bitso namatamota. Nexata pacuenia bitso xanepana, bitso namatamotana, xuanë bajaraponë bajarapaira yacomuata, bajara pijinia itsi Dioso pijajivi pevetsijava. Bitso xanepana. Bitso namatamotana, jai Jesús pijajivijavabelia.

Perlavënëjava bitso penamatamotsijava yabara pelivaisi

45 Icatsia Jesús jumaitsi pijajivijavabelia:

—Pacuenia itsi bitso pexaniavirijava perlavënëjava, bajara pijinia itsi Dioso pijajivi pevetsijava, bitso pexaniacuene. Perlavënëjavanë pecanajetarutsinë jaitapona pexaniavirijavanë juya pecanajetapon-aenexa. 46 Nexata itsa caxitajarabaxuaba pexaniaviriaperlajava, bitso penamatamotsijava, pona pijaboyabelia pecanajetsinexa daxita pexainaejavami. Nexata comuata bajarapaperlajava, jai Jesús pijajivijavabelia.

Dujuai peyamatajucaejava yabara pelivaisi

47 Icatsia Jesús comparacióncuenia jumaitsi pijajivijavabelia:

—Dujuai peyamatajucaejavata, pibisiaviriadujuai itsa yamatajuta, bavecuatsatapona. Bajara pijinia itsi Dioso pijajivi pevetsijava.

Dioso pijajivi vecuatsatapona apo pejumecovënëtsivitsi pexuabinexa infiernojavabelia. Dujuai peyamatajucaejava manuameneta copareca. Nexata daxitaviriadujuai yamatajuta. 48 Itsa vënëca bajaraxua, nexata juta tajetabojavabelia. Bajarajota itapetapona pexaniaviriadujuai. Pexaniaviriadujuai jebapona bemapirejavabelia. Pibisiaviriadujuai pijinia xuabapona. 49 Bajara pijinia itsane nacua pevereverecaematacabi. Angelevi ponaena. Nexata pibisiacuene pexanaevi saicaya tsatsianatsi pexuabinexatsi. Dioso pijinia pitorobicueniatsi pejinavanapaevi saicaya tsatsianatsi pecapanepaenexatsi. 50 Nexata pibisiacuene pexanaevi xuabianatsi infiernojavabelia. Bajarajota nuena. Navonosiniana bitso penavixaetaexae, jai Jesús pijajivijavabelia.

Bitso penamatamotsijavanë, pejanajavanë, perujujanë ata, yabara pelivaisi

51 Jesús yanijoba pijajivijavabelia.

—¿Panejumeyapëtaneme tsabaja daxita xua yabara pacatsipaebatsi? jai Jesús.

Nexata Jesús pijajivi jumaitsi:

—Jājā, pacajumeyapëtanetsi rabaja, jai.

⁵² Nexata Jesús jumaitsi pijajivijavabelia:

—Ponë judíovi pecujarubinë ata, itsa nejumecovënëta, bajaraponë ata tajajivitonë tsane. Nexata pacuenia bo pexainaenë pijabovecua jutapona bitso penamatamotsijavanë, pejanajavanë, perujujavanë ata, bajara pijinia jamatabëcueneitsi tsane ponë nejumecovënëtsiana, judíovi pecujarubinë ata. Tspiji bajaraponë yapëtaena pexanialivaisianë jivijavabelia petsipaebinexa. Bajaraponë yapëtaena xanë talivaisianë, pejanalivaisianë, perujulivaisianë ata, jai Jesús pijajivijavabelia.

Pacuenia Jesús naviata pijanacuayabelia, Nazaret tomarabelia, yabara pelivaisi

(Mr 6.1-6; Lc 4.16-30)

⁵³ Jesús baja penajumeveretsicujinae jivijavabelia livaisianë petsipaebijava comparacióncuenia, pona baja icatsia itsajavabelia. ⁵⁴ Jesús baja naviata pevitsabinacuayabelia. Nexata Jesús pevitsabinacuata taxuxuaba livaisi petsipaebijava judíovi penacaetuatabiabibota. Nexata pejumetaevitsi sivajamatabëcuenenabenajacatsi. Nexata bajarapamonae Jesús jamatabëcueneaebiatanetsi. Bajarapamonae Jesús yabara najumaitsi mapacueniaje:

—¿De tsaeta jota maponë nacujaruba peyapëtaenexa mapalivaisije? ¿De tsaeta pacuenia caëjêpatsi mapacuenia Dioso pesaëta pinijicuene pexanaenexaje? ⁵⁵ Maponëje vaxaitsiyajuvënënë, carpinteronëmi pexënato. Maponëje María pexënato. Bajaraponë pejuyapijivi, Santiago, José, Simón, Judas. ⁵⁶ Papetiriavi ata vajatomarata jinavanapa, maponëje pejuyapijivi. ¿Detsa verena nexata capitsapa palivaisianë nacatsipaebapona maponëje? najai bajarapamonae Jesús yabara.

⁵⁷ Nacaetomarapijivixae, bajarapamonae Jesús apo jumexaniataetsi. Nexta Jesús jumaitsi bajarapamonaejavabelia:

—Bajara maitsabiabije. Diosojumepaebivi profetavi itsanacuapijivi yayiataeyabiabatsi. Itsiata pijanacuapijivi, pijamonae ata, apo yayiataeyabiabatsi, jai Jesús pijatomarapijivijavabelia.

⁵⁸ Jesús pevitsabitomarata pejinavanapaevi apo jumecovënëtsitsi. Bajaraxuata Jesús Dioso pesaëta pinijicuene pexanaejava bajarapatomarata bitso apo tsitaexanae.

14

Pacuenia Juanpijinë jivibautisabinëmi beyaxuabatsi yabara pelivaisi
(Mr 6.14-29; Lc 9.7-9)

¹ Herodes, Galileanacua pevetsinë. Nexata Herodes Jesús vënëlivaisitanetsi Dioso pesaëta pinijicuene pexanaponaejava. ² Nexata Herodes pijajivijavabelia jamatabëcuenenavëxaniabiaya jumaitsi Jesús yabara:

—Juanpijinëmi raeta jivibautisabinëmi icatsia asaë petëpacujinae. Bajaraxuata caëjêpatsi Dioso pesaëta pinijicuene pexanaenexa, jai Herodes Jesús yabara.

³ Bajarapacuenia Herodes jumaitsi tspiji abaxë Juanpijinë itsa asaë, Herodes pijajivi, vajabitsaëvi, itoroba Juanpijinë pevaetabinexatsi. Nexta vajabitsaëvi Juanpijinë cobecëtsiaya caponatsi penaneconitsivi pejebabiabiboyabelia. Bajarapacuenia Herodes pijajivi itoroba Herodes pijava, Herodíasva, pejamatabëcueneta. Herodíasva picani copiata pita Felipe, Herodes pejuyapijinë. Nexata Herodes pejuyapijinë pijava yacajërëta.

⁴ Nexata Herodes pejuyapijinē pijava peyacajērētsixae, Juanpijinē abaxē itsa apo vaetabitsi, Herodes muxujioba. Juanpijinē jumaitsi Herodesjavabelia:

—Acuenebi raja nejuyapijinē pijava nepitsijava, jai Juanpijinē Herodesjavabelia.

⁵ Bajarapacuenia Juanpijinē Herodes pemuxujiobixae, Herodes picani jamatabēbeyaxuabatsi Juanpijinē. Itsiata baitsi jane abaxē apo beyaxuabitsi. Tspaji Herodes cjunava jivi. Daxitajivi Juanpijinē yapētanetsi Diosojumepaebinēcuene. ⁶ Nexata Herodes itsa najamatabēnapita penaexanaematacabi, fiesta exana. Herodes junata jivi ayaibitsaēto. Nexata bajarapafiestamatacabi pejonēyo, pijava pexēnatoyo, pijacujirucuenia caevayo yavajiba daxita Herodes pejunatsivi pitabarata. Nexata Herodes bitso barēitajitsipa peyavajibijava pejonēyo. ⁷ Nexata Herodes najumecapanepaeya pexaniajaijumeta jumaitsi pejonēyojavabelia:

—Xua jitsipame nevajētsianame. Nexata itsa nevajētsianame, itsacuenejava ata carajutsianatsi, jai Herodes najumecapanepaeya pejonēyojavabelia.

⁸ Nexata bajarapovayo pena pitorobicueniatsi jumaitsi mapacueniaje Herodesjavabelia:

—Nerajure platota Juan jivibautisabinē pematabocoto, jai bajarapovayo Herodesjavabelia.

⁹ Bajarapacuenia Herodes pejonēyo itsa jumaitsitsi, Herodes bejamatabējiobi tsanajetsireca. Herodes nexata acuenebi: “Jume,” pejaijava. Tspaji baja najumecapanepaeya jumaitsi pejonēyojavabelia pexaniajaijumeta daxita Herodes pejunatsivi pitabarata. Nexata Herodes jejai. ¹⁰ Nexata Herodes pijajivi, vajabitsaēvi, itoroba penaconitsivi pejebabiabiboyabelia pevēsicutaxuabinoxatsi Juanpijinē. ¹¹ Bajaraxuacujinae vajabitsaēvi Juanpijinē pematabocoto tocaparenatsi platota. Nexata Herodes rajutsiaexana pejonēyojavabelia. Bajarapova juya pena rajuta. Nexata baja Herodíasva yapētane capanepaeya baja Juanpijinē pebeyaxuabijavatsi.

¹² Nexata Juanpijinē pijajivi parena itsajota Juanpijinē boca petēpaenē. Pitatsi petēpaenē. Nexata Juanpijinē pijajivi méthētatsi. Bajaraxuacujinae bajarapamonae pona Jesúsjavabelia petsipaebinexa Juanpijinē pebeyaxuabijavatsi.

*Pacuenia Jesús pexaejava rajuta cinco mil ponēbeje yabara pelivaisi
(Mr 6.30-44; Lc 9.10-17; Jn 6.1-14)*

¹³ Jesús vënëlvivaisitane Juanpijinē pebeyaxuabijavatsi. Nexata Jesús ēpijajivi jerata barēpona itsabelia ajibi jivi. Itsiata baitsi jane jivi ayaibitsaētoxaneto yapētane itsabelia Jesús pona. Nexata pijatomaranē vecuapona. Matatsēnēa najetarubena pepējaisivitsi Jesús. ¹⁴ Itsa Jesús nonotajuna jeravecua, tane jivibitsaētoxaneto. Nexata Jesús itaxutobejiobiatane bajarapamonae. Tocapatatsi piavitanevi. Nexata Jesús tojamatejemayaexana piavitanevi. ¹⁵ Itsa baja caniviyo tsaponae, Jesús pijajivi cujibarenatsi. Nexata Jesús pijajivi jumaitsi:

—Caniviyo rabaja bitso. Majotaje ajibi pexaejava. Tspaji itsajivi ata pijabo apo xainae. Itorobare baja jivi peponaenexa tomaraxijavabelia pecomuacaenexa pexaejava, jai Jesús pijajivi.

¹⁶ Nexata Jesús jumaitsi pijajivijavabelia:

—Apo beponae raja abaxē. Paxamē parajure pexaejava, jai Jesús pijajivijavabelia.

¹⁷ Nexata Jesús pijajivi jumaitsi:

—Paxainajë saya cinco papanbëbeje, anijanëyobeje dujuainëyobeje yajava, jai.

¹⁸ Nexata Jesús jumaitsi pijajivijavabelia:

—Panetocarenamëre pan maberenaje, dujuainëyobeje yajava, jai Jesús.

¹⁹ Nexata Jesús itoroba daxitajivi penaenexa ponajavata. Nexata Jesús pita cinco papanbëbeje, anijanëyobeje dujuainëyobeje yajava. Athëbëa benaëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús Diosojavabelia.

Bajaraxuacujinae Jesús pan epatsicacapona. Pijajivijavabelia rajuta bajarapapan. Nexata juya Jesús pijajivi tscobetsana jivijavabelia. ²⁰ Daxita xaniavaetsia nabane. Bajaraxuacujinae Jesús pijajivi caetuata pan, dujuai yajava, jivi peyajuvënëcopabejibivanë. Nexata vënëba doce xuabeje bemapirecuenia pexanaejavanë. ²¹ Pamonaë pexaejava xane, ayaibitsaëtoxaneto. Cinco mil ponëbeje namatajëjtatsi xaniavaetsia. Petiriavi, pejevaxi ata, apo namatajëjtatsi.

*Pacuenia Jesús mene itaboxoya najetaruca yabara pelivaisi
(Mr 6.45-52; Jn 6.16-21)*

²² Jesús jivi ayaibitsaëtoxaneto pexaejava perajutsicujinae, Jesús pijajivi bepijia runaeyaexanareca jera ënëabereca. Jesús pijajivi copiata itoroba penicabinexa puca itsapanabelia, Betsaida tomarabelia. Nexata Jesús abaxë caenë nacopatanuca bajarajota. ²³ Itsa baja jivi napëvereta penaviabijava, Jesús junaya petsutojumabetsia caenë pevajëtsinexa Diosojavabelia. Nexata Jesús yameravibatsi bajarapatsutojumatsia. ²⁴ Bajarapaepatota Jesús pijajivi jerata epatua nabuatapona pepatsinexa puca itsapanabelia. Nexata Jesús pijajivi pevajënaeverena joviboxaneto najetaruca, malataca bitso ayai. Nexata malataca mene epabajarabapona jera ënëaberena. Nexata mera vënëcapona jera ënëaberena. ²⁵ Bajaraxuacujinae bajayacunua, ajena matacabijitsia, Jesús pijajivi pecovëvelia imoxoyotanajetaruca. Jesús najetaruca mene itaboxoya. ²⁶ Jesús pijajivi itsa tanetsi mene itaboxoya penajetarucajava, nabenajaca. Vavajai pecajunavi.

—iPetëpaenë raeta pejumape najetaruca! jai Jesús pijajivi.

²⁷ Nexata Jesús jumaitsi pijajivijavabelia:

—Xanë raja. Pëtsa panecujunavame. Pajamatejemamëre saya, jai Jesús pijajivijavabelia.

²⁸ Nexata Pedro jumaitsi Jesúsjavabelia:

—Tajatuxanenë, itsa pepacuene xamë, nexata nejunaremelia talianexa mene itaboxoyalia, xamëjavabelia, jai Pedro.

²⁹ Nexata Jesús jumaitsi Pedrojavabelia:

—Renamëre baitsi baja, jai Jesús.

Pedro nexata jeravecua runareca meniabereca. Lia mene itaboxoyalia pepatsinexa Jesúsjavabelia. ³⁰ Itsiata baitsi jane Pedro itsa tane jovibo piasaëjava, bitso cujunavatata. Nexata bubunanajereca. Pedro ajena bubunanajereca, vavajai.

—iJajatuxanenë, nevaetabare! jai Pedro.

³¹ Bepijia Jesús cobepitaraba. Jumaitsi Pedrojavabelia:

—Tsiquirijavayo saya nejumecovënëtame tacaevetsijava. ¿Detsa xuajitsia nejumeebiataneme? jai Jesús.

³² Nexata baja Jesúsbeje Pedrobeje jera enëabelia itsa nonoliabeje, jovibox-anetomi baja ajibi tsaxuabi. ³³ Nexata daxita jerata peponaevi pematatabe-ta tonubena Jesús pitabarata. Jumaitsi bajarapamonae:

—Xaniajai rabaja. Xamë Dioso pexënatomë, jai bajarapamonae Jesúsjavabelia.

Pacuenia Jesús jamatejemayaexana piavitanevi Genesaret nacuata yabara pelivaisi

(Mr 6.53-56)

³⁴ Jesús, pijajivi yajava, pata puca itsapanabelia. Pata Genesaret nacu-ata. ³⁵ Genesaret nacuapijivi itsa yapëtanetsi Jesús cuene, nexata daxita bajarapanacuajava vajunupaebatsi pepatsijava. Nexata tocapatatsi daxita piavitanevi Jesúsjavaberena. ³⁶ Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuene bitso netoexanare. Tocopatsianame maponëje pecatojay-atsinexa nexatatsijavacopia, jai tsabiabi.

Nexata daxita pamonae Jesús nexatatsijavacopia tojayataponatsi, ja-matejema tsaponae piavitanejavavecua.

15

Pacuenia Jesús tsipaeba xua jivi jamatabëcuenebijanatsi yabara pelivaisi
(Mr 7.1-23)

¹ Fariseovi, judíovi pecujarubivi yajava, pata Jerusalén tomaraverena. Bajarapamonae Jesús imoxoyorenatsi. Nexata bajarapamonae jumaitsi Jesúsjavabelia:

² —Jesús, nijajivi naneconita Diosojavabelia. Tsipaji nijajivi apo jume-covënëtsiajinavanapae vajasalinaivi pijacuene. Nijajivi itsa xane pexae-java, xane anijatone napëna nacobequiatsinejeva, jai bajarapamonae Jesúsjavabelia.

³ Nexata Jesús jumaitsi fariseovijavabelia, judíovi pecujarubivijavabelia ata:

—Paxamë apo pajumecovënëtsimë Dioso pitorobilivaisi saicaya vajasali-naivi pijacuene panecatsitecaenexa. ⁴ Dioso Moiséspijinëta penajumecopat-silivaisi jumaitsi mapacueniaje: “Axa yaiyataema. Ena ata yaiyataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspijinëta penajumecopatsilivaisi. ⁵ Itsiata baitsi jane paxamë jivi pamuxubijipenetabiabame peyaiyataeyaniva paxajivi, penajivi ata. Pax-amë jivijavabelia pajumaitsimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipaemë neyavenonaeyava, jumaitsimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata acuenebi patacarajutsinexabeje,’ jamë tsane neyavenonaeyaniva,” pajamë tsabiabi jivijavabelia. ⁶ Nexata caranata Dioso pejumaitsjume: “Axa yaiyataema. Ena ata yaiyataema,” pejaijume jivi pejumecovënëtsijavami paxamë pacopatsiaexanaponame. Tsipaji pax-amë patsipaebaponame saicaya vajasalinaivi pijalivaisi. ⁷ Paxamë saya jivi paneyamaxëtojobivil Diosojumepaebninë profeta Isafaspjinë baja cajena bajayata tajëvelia xaniavaetsia pacavajunupaeba. Bajayata Dioso tajëvelia pejumaitsjava paxamë yabara, profeta Isafaspjinë peyaquinaelivaisita ju-maitsi mapacueniaje:

⁸ Bajarapamonae nejitsipaena saya pijumeta. Itsiata pepo tanejitsipaejamatatabëcuene nevecuatajë tsane. ⁹ Saya baitsi bajarapamonae pija-jumaitsita tsane: “Pacajitsipatsi,” nejai tsane itajara. Itsiata apo xaniajai tsane. Bajarapamonae saya jivi tsipaebaponaena pejamatabëcuene pijilivaisi. Pepo taitorobilivaisi apo tsipaebi tsane,

jai tajëvelia Isaiaspijinë

peyaquinaelivaisita Dioso pejumaitsijava paxamë yabara, jai Jesús fariseovijavabelia, judïovi pecujarubivijavabelia ata.

¹⁰ Nexata icatsia Jesús junata jivi. Jumaitsi jivijavabelia:

—Panenamuxunaevere xaniavaetsia patanejumeyapëtaenexamë patacatsipaebilivaisi. ¹¹ Xua jivi xane pecuibovojotota, pexaevajënaeya napëna anijatonë apo nacobequiatsi ata, apo jamatabëcuenebijianaetsi. Apo vënananeconitsi Diosojavabelia. Baitsi rajane xua jivi pecuibota pibisiacuenia cuaicuajai, bajara jane xua jivi bajamatabëcuenebijianatsi, jai Jesús bajarapamonaejavabelia.

¹² Nexata Jesús pijajivi imoxoyorenatsi. Jesús pijajivi jumaitsi:

—Patajatuxanenë, ¿yapëtaneme tsabaja fariseovi pecabaraanaepanaejava itsa cajumetane bajarapacuenia nejumaitsijava? jai Jesús pijajivi.

¹³⁻¹⁴ Nexata fariseovi yabara Jesús jumaitsi pijajivijavabelia:

—Panamuxujemare saya bajarapamonae. Bajarapamonae saya apo yapëtae. Bajarapamonae bepitatsëcënaevi. Nexata bepematacaponaevi pitatsëcënaevi pijinia. Pitatsëcënaenë itsa matacaponaejitsipa itsanë pijinia pitatsëcënaenë, nexata najujopaejitsiparecabeje mëthëxanetojavareca. Pabita piabejjava itsa juva, nexata yatabutopaya jonatsi vajaveretsinexa. Bajara pijinia pacuenia taxa, athëhëtatsia peecaenë, verebiabianatsi daxita bajarapamonae, jai Jesús pijajivijavabelia fariseovi yabara.

¹⁵ Pedro nexata jumaitsi Jesúsjavabelia:

—Patajatuxanenë, paneyapëtaeyaexanare pajamatabëcuene xaina palivaisi tsipaebame jivijavabelia. Palivaisi baitsi jumaitsimë: “Xua jivi xane pecuibota, apo jamatabëcuenebijianaetsi,” jamë, jai Pedro Jesúsjavabelia.

¹⁶ Nexata Jesús jumaitsi:

—¿Paxamë ata tsarovia abaxë apo panejumeyapëtaemë? ¹⁷ Daxitacuenenexa jivi xane pecuibovojotota, junua pecotsorotuabereca. Bajaraxuacujinae vecuapitsapatsi. ¹⁸ Baitsi rajane xua jivi pecuibuatsina pitsapa pecuaicuajainexa pacuenia najamatabëxaina pejamatabëëthëtovetsina, bajara jane xua jivi jamatabëcuenebijianatsi. ¹⁹ Tsipaji rabaja jivi pejamatabëëthëtovavetsina pitsapa pibisiacuenenexa. Pitsapa pibi pijava pevecuanamatayajitsi jamatabëcuenebixana. Pitsapa petirivijavabelia pebi penaperabëquenetsiatae jamatabëcuenebixana. Pitsapa penacobetoxotsijamatabëcuenebixana. Pitsapa itsamonae pexanaejava yabara najumetsënëtsiaya pepaebijamatabëcuenebixana. Pitsapa itsamonae yabara najumetsënëtsiaya pebaracuaicuajai jamatabëcuenebixana. Daxita bajarapajamatabëcuene pitsapa jivi pejamatabëëthëtovavetsina. ²⁰ Daxita bajarapajamatabëcuene jivi jamatabëcuenebijianatsi. Jivi raja pexaejava xae ata, anijatonë napëna nacobequiatsinejeva, apo jamatabëcuenebijianaetsi, jai Jesús pijajivijavabelia.

Pacuenia Jesús itsanacuapijiva pexënatoyo tojamatejemayaexana yabara pelivaisi

(Mr 7.24-30)

²¹ Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Jesús baja pata bajarapanacuayabelia. ²² Nexata bajarapanacuata ponapona cananeaviriava. Bajarapova apo judíova. Bajarapova Jesúsjavaberena pata. Pinijijumeta bajarapova jumaiti Jesúsjavabelia:

—¡Petuxanenë, Davidpijinë pemomomë, nitaxutotsoniataema! Taxënatovayo dovathi yajavaponapona. Bitso bejiobiayaexanabiabatsi, jai bajarapova Jesúsjavabelia.

²³ Itsiata Jesús apo jumepitsi. Nexata Jesús pijajivi imoxoyorenatsi. Jesús pijajivi jumaiti Jesúsjavabelia:

—Patajatuxanenë, ponaeyaexanare baja mapovaje. Bitso raxua nacapëvabanajetaruca, jai Jesús pijajivi.

²⁴ Nexata Jesús jumaiti bajarapovajavabelia:

—Dioso baja cajena nitoroba tayavenonaenexa ëjudíovi, Israel nacuapijivi, pamonaë Dioso tane beoveja. Tsipaji bajarapamonae Diosovecua naxuabavanapa, jai Jesús bajarapovajavabelia.

²⁵ Itsiata bajarapova imoxoyorenatsi Jesús. Bajarapova Jesús yaiyataeya pematabacabëta nucajunua Jesús pitabarata. Nexata bajarapova jumaiti Jesúsjavabelia:

—¡Petuxanenë, neyavenonare! jai.

²⁶ Nexata Jesús jumaiti bajarapovajavabelia:

—Apo xanepanaë copiaya xamë itsanacuapijivamë tacayavenonaenexa. Abaxë copiaya veyavenonajë tajanacuapijivi, judíovi. Xamë copiaya itsa cayavenonaëjitsipatsi, nexata pacuenia pejevaxi pexaejavaminexa yacajërëtsipajë tarajutsinexa avirixijavabelia, bajara itsinë tsipae, jai Jesús bajarapovajavabelia.

²⁷ Itsiata baitsi jane bajarapova ajumesaë tsaponae. Icatsia jumaiti Jesúsjavabelia:

—Xaniajamë rabaja picani. Itsiata neyavenonare. Tsipaji avirixi ata baxane pexainanëtsi pexaeyecaemesa bëxëpanareca piothopaepërë. Bajara pijinia pacuenia itsiata itsanacuapijiva atanë, neyavenonare, jai bajarapova Jesúsjavabelia.

²⁸ Nexata icatsia Jesús jumaiti bajarapovajavabelia:

—¡Petiriva, bitso najamatabëcuenecopatame Diosojavabelia pecayavenon-aenexa! Nexata pacuenia jumaitsimë, bajarapacuenia Dioso baja cajena catoexanaena, jai Jesús.

Bajarapaepatota bajarapova pexënatovayo Jesús pejamatabëcueneta toja-matejematsi baja pijabotalia.

Pacuenia Jesús jamatejemayaexana ayaibitsaëtoxaneto piavitanevi yabara pelivaisi

²⁹ Itsa panacuata eca Tiro tomarabeje Sidón tomarabeje, Jesús baja ve-cuapona. Nexata Jesús najetaruca Galilea pucaxaneto muxubërëa. Nexata Jesús petsutojumabetsia junaya. Nexata petsutojumatatsia Jesús ecojopa.

³⁰ Nexata jivi ayaibitsaëtoxaneto pata Jesúsjavaberena. Tocapatatsi pejayu-jayunae. Tocapatatsinua bitso pitaxutotsëcënaevi. Tocapatatsinua apo pecuaicuajiaivi. Tocapatatsinua penabejenaevi. Tocapatatsinua ayaibit-saëtoxaneto piavitanevi. Bajarapamonae tojebatsi Jesús pitabarata. Nex-ata Jesús jamatejemayaexana daxita bajarapamonae. ³¹ Nexata jivi ja-matabëcuenenabenajaca itsa tane pecuaicuajiajava apo pecuaicuajiaivimi.

Jesús xanepanaeyaexana penabejenaevimi ata. Xanepanaeyaexana pejayu-jayunaevimi ata. Itaxutoxanepanaeyaexana bitso pitaxutotsécenaevimi ata. Nexata jivi itsa tane bajarapacuene, jumaitsi Diosojavabelia: “Diosomë, bitso ayaijamatabëcuenenëmë, paIsrael nacuapijiviné patajaDiosomë,” jai bajarapamonaë.

Pacuenia Jesús rajuta pexaejava bejamatabëcuene cuatro mil pajivibeje yabara pelivaisi

(Mr 8.1-10)

³² Jesús jivi ayaibitsaëttoxaneto pënjajinavanapatsi. Nexata Jesús junata pija-jivi. Jumaitsi pijajivijavabelia mapacueniaje:

—Netsitabejiobi baja rovia mapamonaëje. Tspiji baja ajena acueyabi pamatacabibeje xaina xanëjavata pejinavanapaecujinaë. Pemarue baja tovereverecatsi. Pexaejava xaenejeva, apo jitsipaenë taitorobijava pepon-aenexa pijabonëjavabelia. Namuto epatua meta cuenabijitsipatsi piäjani, jai Jesús pijajivijavabelia.

³³ Nexata Jesús pijajivi jumaitsi:

—¿Detsa jane pacuenia pexaejava tocaxitajarabianatsi mapajivibit-saëttoxanetoje? Majotaje ajibi pexaejava. Tspiji itsajivi ata pijabo apo xainae majotaje, jai Jesús pijajivi.

³⁴ Nexata Jesús yanijoba pijajivijavabelia.

—¿Detsa papanbëbeje paxainame? jai.

Nexata Jesús pijajivi jumaitsi:

—Siete papanbëbeje paxainajë, dujuainëxi yajava, jai.

³⁵ Nexata Jesús itoroba daxitajivi penaenexa irata. ³⁶ Nexata Jesús pita siete papanbëbeje, dujuainëxi yajava. Nexata Jesús jumaitsi Diosojavabelia: —Pexaniacuene panetoexaname. Panerajutame pataxaejava, jai.

Bajaraxuacujinaë Jesús epatsicacapona pan, dujuainëxi yajava. Nexata Jesús pepatsicacaepan rajuta pijajivijavabelia. Nexata juya Jesús pijajivi tsicobetsana bajarapajivi bitsaëttoxanetojavabelia. ³⁷ Daxita bajarapamonaë nabane xaniavaetsia. Nexata peyajuvënëcopabijavanë Jesús pijajivi caetua-ata. Vënëba siete xuabeje bemapirecuenia pexanaejavanë. ³⁸ Pamonae pexaejava xane, ayaibitsaëttoxaneto. Cuatro mil ponëbeje namataëjëtatsi xaniavaetsia. Petiriavi, pejevaxi ata, apo namataëjëtatsi. ³⁹ Pexaecujinaë pexaejava, Jesús baja naviabiayaexana jivi. Nexata Jesús runareca jera ënëabereca. Pona baja Magdala nacuayabelia.

16

Pacuenia fariseovibeje saduceovibeje Jesús itorobatsi Dioso pesaëta pini-jicuene pexanaejava petsitaexanaenexa picani yabara pelivaisi

(Mr 8.11-13; Lc 12.54-56)

¹ Fariseovibeje saduceovibeje pata Jesúsjavaberena. Nexata bajarapamonaë Jesús jamatabëcueneëjëbiaya itorobatsi picani pinijicuene pexanaejava Dioso pesaëta Jesús petsitaexanaenexa. Bajarapacuenia picani Jesús itorobatsi peyapëtanexatsi Dioso pepacuene athëbëvetsica pitorobinëcuenetsitsica.

² Nexata Jesús jumaitsi bajarapamonaëjavabelia:

—Pamatacabi caniviyo itaboxo tsobia, paxamë pajumaitsimë tsabiabi: “Meravia pexaniamatacabi tsane. Tspiji itaboxo tsobia,” pajamë tsabiabi.

³ Pamatacabi bajayacunua nacuaitaboxo itacaënanuca, pajumaitsimë tsabiabi: “Ajena anacuayaijitsia daxita matacabi. Tspiji nacuaitaboxo itacaënanuca,” pajamë tsabiabi. Payapëtaneme picani xaniavaetsia pacuenia

matacabi itsijitsia. Tshipaji itarērēbo pepitsapaexae, payapētaeyabiabame. Itsiata baitsi jane patae atamē Juan jivibautisabinēmi pexanaponaejava, xanē ata taexanaponaejava patae atamē, itsiata apo payapētaemē Dioso athēbēvetsica taneitorobinēcuenetsica. ⁴ Bitso pibisiajamatabēcuenē xaina pamonaē copaba Dioso pejumecovēnētsijavami. Bajarapamonaē picani nitoroba Dioso pesaēta pinijicuene taexanaejava tatsitaexanaenexa taneyapētaenexa pepacuene Dioso athēbēvetsica taneitorobinēcuenetsica. Itsiata baitsi jane Dioso pesaēta pinijicuene taexanaejava, apo tsitaexanaenē tsane. Pacuenia bajayata Dioso jumepaebinē profeta Jonáspijinē exanatsi, bajara ēpitsicuene taneexanaejava, tsitajētsianajē, jai Jesús petēpaecujinaē icatsia Dioso piasaēyaexanaejavanexatsi yabara.

Jesús baja nexata bajarapamonaē vecuapona.

Pacuenia Jesús pijajivi muxujioba fariseovi petsipaebilivaisi pejumecovēnētsianiva yabara pelivaisi

(Mr 8.14-21)

⁵ Jesús pijajivi nicabilia puca itsapanabelia. Nexata nacofēnēta pamarue. Apo caponaē pan. ⁶ Nexata Jesús pijajivi muxujioba pejumecovēnētsianiva fariseovi, saduceovi ata, itsa tsipaebatsi saicayacuenia Dioso pejumelivaisivecua. Jesús jumaitsi pijajivijavabelia mapacueniaje:

—Panajumetaema. Xania panayajivitaema fariseovi pijalevadura. Panayajivitaema saduceovi ata pijalevadura, jai Jesús pijajivijavabelia.

Bajarapacuenia Jesús jumaitsi fariseovi petsipaebaponaelivaisi, saduceovi ata petsipaebaponaelivaisi, Jesús pijajivi pejumecovēnētsianiva. ⁷ Itsiata Jesús pijajivi apo jumeyapētaetsi. Bajaraxuata Jesús pijajivi nabarēcuaiquaijai bajarapacuenia Jesús pejumaitsijume yabara. Jesús pijajivi jamatabēcuenenavēxaniabiaya najumaitsi:

—Jesús nacajumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai. Baja raeta pacuenia Jesús nacajumaitsi pan apo vajacaponaexae, najai Jesús pijajivi jamatabēcuenenavēxaniabiaya.

⁸ Jesús pijajivi jamatabēcueneyapētane bajarapacuenia jamatabēcuenenavēxaniabiaya pejumaitsijava levadura yabara. Nexata Jesús jumaitsi pijajivijavabelia:

—¿Detsa xuajitsia panajumaitsimē: “Baja raeta pacuenia Jesús nacajumaitsi pan apo vajacaponaexae,” panajamē? ¡Apo payapētaemē tshipaji tanecaējēpaejava taexanaenexa pan itsa namatavenonatsi! ⁹ Paxamē abaxē apo panejumeyapētaemē. ¿Apo panajamatabēnapitsimē tshipaji pacuenia exanajē pamatacabi pan namatavenonatsi? Tsicobetsanajē cinco papanbēmibeje cinco mil ponēbeje pexaenexa. ¿Detsa xuabeje pavēnēbame peyajuvēnēnacopabijavanē bemapirecuenia pexanaejavanē? ¹⁰ ¿Apo panajamatabēnapitsimēnua tshipaji pacuenia tsicobetsanajē siete papanbēmibeje cuatro mil pajivibeje pexaenexa? ¿Detsa xuabeje bajarapamatacabi pavēnēbame peyajuvēnēnacopabijavanē bemapirecuenia pexanaejavanē? ¹¹ Itsa pacajumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” itsa pacajaitsi, pan yabara apo pacajumaitsi, jai Jesús pijajivijavabelia.

¹² Nexata jane baja Jesús pijajivi xaniavaetsia jumeyapētanetsi. Nexata Jesús pijajivi najumaitsi: “Xania panayajivitaema fariseovi pijalevadura. Panayajivitaema saduceovi ata pijalevadura,” nacajai tsaena Jesús,

fariseovi, saduceovi ata, itsa nacatsipaeba saicayacuenia Dioso pejumeliv-aisivecua vajajumecovënëtsyaniva, najai Jesús pijajivi.

Pacuenia Pedro jumaitsi Jesúsjavabelia: “¡Xamë raja Cristomë!” jai yabara pelivaisi

(Mr 8.27-30; Lc 9.18-21)

¹³ Jesús, pijajivi yajava, najetaruca Cesarea de Filipovënë tomaramuxunenia. Nexata Jesús pijajivijavabelia jumaitsi mapacueniaje:

—Xanë, Daxitajivi Pematapijinënë. ¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

¹⁴ Nexata Jesús pijajivi jumaitsi:

—Itsamonaë xamë yabara jumai tsabiabi: “Juanpijinëmi raeta jivibautis-abinëmi icatsia asaë,” jai tsabiabi. Itsamonaë pijinia jumai tsabiabi: “Dioso- jumepaebinëmi raeta, profeta Elíaspijinë, ponëmi bajayata ponapona, icatsia asaë,” jai tsabiabi. Itsamonaë pijinia jumai tsabiabi: “Diosojumepaebinëmi raeta profeta Jeremíaspijinë, ponëmi bajayata ponapona, icatsia asaë. Itsa jume, nexata meta bajayata Diosojumepaebivimi profetavimiyajuvënëne icatsia asaë,” jai tsabiabi itsamonaë xamë yabara, jai Jesús pijajivi.

¹⁵ Nexata Jesús jumaitsi pijajivijavabelia:

—¿Detsa nexata paxamë pajamatabëitsimë xanë yabara? ¿Detsa xanë ponënë? jai Jesús pijajivijavabelia.

¹⁶ Nexata Simón Pedro jumaitsi Jesúsjavabelia:

—Xamë cajena Cristomë, athëbëvetsica Dioso pecaitorobinëtsica jivi neca-panepaenexa. Xamë Dioso piasaëtsaponaponaenë pexënatomë, jai Pedro Jesúsjavabelia.

¹⁷ Jesús nexata jumaitsi Pedrojavabelia:

—Simón, Juan pexënatomë, xamë jamatabëcuenebarëyamë. Tsipaji it-
sajivi ata apo cayapëtaeayaexanaë xanë taneyapëtaenexamë Cristocuenënë.
Biji rajane taxa, athëbëtatsia peecaenë, cayapëtaeayaexana. ¹⁸ Nexata cat-
sipaebianatsi mapacueniaje. Xamë rabaja Pedromë, beibotomë. Pacue-
nia ibopanaxanefojumata pexanetsibo bajayajebi ajamatabësaë tsecaë, ba-
jara pijinia itsane tajajivi tanejumecovënëtsivi Cristocuenënë. Nexata
dovathi apo jamatabëcuenematatoxenetsitsi tsane. ¹⁹ Pacuenia baupaevetsinë
evetsiaexanatsi llavianë, bajara pijinia pacuenia caevetsiaexanaenatsi
athëbënacupijilivaisianë. Xua itavetsianame mapanacuataje, bajaraxua
Dioso ata athëbënacuatatsia itaveta. Xua tocopatsianame pexanaenexa ma-
panacuataje, bajaraxua Dioso ata athëbënacuatatsia tocopata pexanaenexa,
jai Jesús Pedrojavabelia.

²⁰ Nexata Jesús pijajivi jumeitaveta petsipaebiyana itsajivijavabelia
ata: “Mara ponë Cristoje, Dioso athëbëvetsica pitorobinëtsica jivi peca-
panepaenexa,” pejaiyaniva.

Pacuenia Jesús tajëvelia navajunupaeba pebeyaxuabijavanexatsi yabara pelivaisi

(Mr 8.31–9.1; Lc 9.22-27)

²¹ Jesús pebeyaxuabijavanexatsi, tajëvelia navajunupaeba pijajivijav-
abelia. Jumaitsi mapacueniaje:

—Ponaëjitsianë Jerusalén tomarabelia. Nexata bajarajotalia nebejio-
biaexanaena judïovi pijaancianovi, sacerdotevi penamatacaitorobivi ata,
judïovi pecujarubivi ata. Bajaraxuacujinaë nebeyaxuabiana. Itsiata baitsi
jane tatëpacujinaë, acueyabi matacabita, icatsia asaënë tsane, jai Jesús
tajëvelia pijajivijavabelia.

²² Nexata Pedro junata Jesús pebarëponatabinexa pesaicaeyojavabelia. Nexata Pedro pesaicaeyojavatalia jumaitsi Jesúsjavabelia:

—¡Tajatuxanenë, Dioso caitaxutotsoniataena bajarapamonae pecaexanaeyaniva daxita pacuenia tajëvelia navajunupaebame! jai Pedro Jesúsjavabelia.

²³ Nexata Jesús Pedrovecua napëñeyorotaxuaba. Taenuca pijajivi penaejavabelia. Nexata Jesús napëñeyorotsia jumai tsanucæ Pedrojavabelia:

—¡Dovathi, nevecuanatixire! Nejamatabëcuenejëbïjitsipame. Necopare Dioso taneitorobicuenia taexanaenexa. Xamë apo jitsipaemë pacuenia Dioso jitsipa taexanaenexa. Saya jitsipame pacuenia jivi jitsipa taexanaenexa, jai Jesús.

²⁴ Nexata Jesús jumaitsi pijajivijavabelia:

—Pajivi jitsipa tanepënaponaejava, bajarapajivi copatsi pejitsipaecuenia penajamatabëxainabiabijjavami. Exanaponaponæ taitorobicuenia.

Najamatabëcueneveretsinua, bejiobiaexanaejitsia atatsi, beyaxuabijitsia atatsinua, Dioso pejumelivaisi yabara piagamatabëcuenesæ tsaponaponæenexa. Nexata jane baja xuacujinae nepënaponaena.

²⁵ Pajivi exanaponapona penatojitsipaecuenia, apo xainæ tsane matacabi apo pevereverecejava. Pajivi xanë tajamatabëcueneta copata penatojitsipaecuenia pexanaejavami, bajarapajivi xainaena matacabi apo pevereverecejava.

²⁶ Pajivi exanaponapona penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainæ ata, mapanacuapijicueneje, itsiata nacuerata. Tsipaji pexainaecue ne apo capanepæ tsanetsi Diosojavabelia. Tsipaji acuenebi tsane itsajivi ata pematamotsinexa penaxuabiyaniiva Diosovecua. ²⁷ Xanë, Daxitajivi Pematapijinënë, yajavapatsianicajë taxa Dioso pijapenivenivenaecotia. Yajavapatsianicajënu tajaängelevi. Nexata matamotaponaenajë caejivi canacujitsia, tanetonacuenebivi. Naneconitsiaexanaenajë pijinia pijaneconi pexainævi.

²⁸ Xaniajanë pacuenia pacatsipaebijitsiatsi. Daxita paxamë patëpaenejevamë, xanë, Daxitajivi Pematapijinënë, tajajivi ayaibitsætoxaneto naexanaena. Nexata paxamëyajuvënëvi pepuatae tsane xanë tajajivi ayaibitsætoxaneto taevetsijava, tæpaena, jai Jesús pijajivijavabelia.

17

Pacuenia Jesús caepatoyo perabënivenivenataba yabara pelivaisi (Mr 9.2-13; Lc 9.28-36)

¹ Jesús petëpæjavanexa tajëvelia penavajunupaebicujinae, seis pamatacabibejecujinae, Jesús pijajivi, acueyabi ponëbeje, barëjunaya pinijitsutoxanetojumabetsia. Jesús barëjunaya mapamatabëxëyoje: Pedro, Santiago, Juan. Bajarapamatabëxëyo Jesús barëjunaya pinijitsutoxanetojumabetsia. Santiago raja pejuyajijnë Juan. ² Nexata petsutojumatsia Jesús perabënivenivenareca bajarapamonæ pitabarata. Pacuenia matacabipijijumeto banaitayota, bajarapacuenia Jesús itabaranaitayota. Penaxatatsijavareca, daxita nivenivenaeya niojai. ³ Nexata bajarajota Jesús pijajivi tane bajayata petëpaenëmibeje, Moiséspijinëbeje Eliáspijinëbeje. Jesús barëcuaicuaijaisi bajaraponëbeje. ⁴ Nexata Pedro jumaitsi Jesúsjavabelia macueniaje:

—¡Patajatuxanenë, pijacuaxæ panebarëponame! Itsa jitsipame, paca-toexanaenatsi acueyabi pabobërëtoje. Itsabobërëto xamënexa tsane.

Itsabobērēto Moisésnexa tsane. Itsabobērēto Elíasnexa tsane, jai Pedro Jesúsjavabelia.

⁵ Itsa abaxē Pedro cuaicuajjai tsanuca, penaitayotsiitarērēbo mataa-cataxuabatsi daxita bajarapamonae. Nexata bajarapamonae jumetane bajarapaitarērēbojavatsica Dioso pejumaitsijava: “Mara ponē taxēnato, tasivanēje. Bitso sivajamatabēcuenēbarēyanē. Pajumetaema bajaraponē,” pejaijavatsica bajarapamonae jumetane.

⁶ Jesús pijajivi itsa jumetane bajarapacuenia Dioso pejumaitsijavatsica, irataeya othopa irata. Jesús pijajivi bitso najunaviaca. ⁷ Nexata Jesús imoxoyolia pijajivi. Jayalia. Jumaitsi pijajivijavabelia:

—Panonobapunare. Pētsa pajunavame, jai Jesús pijajivijavabelia.

⁸ Nexata Jesús pijajivi itsa naēcobarēcēpalia Jesúsjavabelia, ajibi baja Moisésbeje Elíasbeje. Caenē baja Jesús nuca.

⁹ Nexata Jesús pijajivi itsa barērunanucaponaica petsutojumavetsica, jumeitaveta pijajivi. Jumaitsi pijajivijavabelia:

—Pētsa patsipaebame itsajivi ata pacuene pataneme. Matapania xanē, Daxitajivi Pematapijinēnē, icatsia asaēnē tsane tatēpacujinae, nexata jane baja matapania patsipaebianame, jai Jesús pijajivijavabelia.

¹⁰ Nexata Jesús pijajivi yanijoba Jesúsjavabelia. Jumaitsi:

—Patajatuxanenē, ¿detsa xuajitsia judíovi pecujarubivi jumai tsabiabi: “Bajayata ponēmi ponapona, Elíaspijinē, petēpacujinae icatsia asaē tsane. Bajaraponē copiata patsiana. Bajaraxuacujinae patsiana Cristo, pepo vanacacapanepaenēnexa jane baja,” jai tsabiabi? jai Jesús pijajivi.

¹¹ Nexata Jesús jumaitsi pijajivijavabelia:

—“Copiata Elíaspijinē patsiana. Nexata bajaraponē jamatabēcuenexanetsiana daxitajivi,” itsa jai, Juanpijinēmi jivibautisabinēmi yabara jumaitsi. Xaniajai rabaja pacuenia judíovi pecujarubivi jumai.

¹² Xaniajanē pacuenia pacatsipaebijitsiatsi. Elíaspijinē rabaja patajopa. Itsiata jivi apo yapētaetsi ponēcuenē. Nexata pacuenia jivi jitsipa pexanaenexa bajaraponējavabelia, exana baja. Beyaxuabatsi. Bajara pijinia pacuenia xanē ata, Daxitajivi Pematapijinēnē, nebejiobiaexanaena bajarapamonae, jai Jesús pijajivijavabelia.

¹³ Nexata Jesús pijajivi jumeyapētanetsi. Nexata Jesús pijajivi jamatabējumaitsi:

—“Elíaspijinē rabaja patajopa,” itsa jai Jesús, Juanpijinēmi jivibautisabinēmi yabara jumaitsi, jamatabējai Jesús pijajivi.

Pacuenia Jesús jamatejemayaexana pejevaxinē, dovathi peyajavapon-aponanē, yabara pelivaisi
(Mr 9.14-29; Lc 9.37-43)

¹⁴ Jesús pijajivi, acueyabi ponēbeje, barēnaviata petsutojumavetsica. Nexata bajarapatsutoxanetotabuta vajēnaeēvetatsi jivi ayaiBITSaētoxaneto. Nexata pebi Jesús imoxoyorenatsi. Bajaraponē Jesús yaiyataeya pematatabēta nucajunua Jesús pitabarata. Bajaraponē jumaitsi Jesúsjavabelia:

¹⁵ —Jesús, netoitaxutotsoniataema taxēnatonēyo. Netodevacaiababiabatsi raja. Bitso bejiobi tsabiabi. Anijatonē isotuabelia natajutabiaba. Itsajavata menialia jopabiabalia. ¹⁶ Nijajivijavaberena picani capatajē tanetojamatejemayaexanaenexa. Itsiata baitsi jane apo caējēpaetsi tanetojamatejemayaexanaenexa, jai bajaraponē Jesúsjavabelia.

¹⁷ Nexata Jesús jumaitsi pijajivijavabelia:

—¡Paxamë baja rovia apo pajumecovënëtsimë Dioso papecayavenonaejavanexa! Bajaraxuata apo pacajamatabëcuenecaëjêpae pejevaxinë panevecuacapitsapaenexa dovathi. ¡Paneajamatabëcuenetajavi baja rovia! Pexaniajailivaisivecua saicayacuenia panajamatabëxainame. ¿Detsa paepatojebi abaxë paxamëjavata ponaponaenajê? ¿Detsa paepatojebi abaxë paxamëjavabelia ajamatabëcuenesaënë tsaponapona tsane patanejumecovënëtsinexamë? Panetocarenamëre pejevaxinë, jai Jesús pijajivijavabelia.

¹⁸ Nexata Jesús itaveta dovathi pejevaxinë pevecuapitsapaenexatsi. Nexata baja pejevaxinë dovathi vecuapitsapatsi. Pejevaxinë baja jamatejema.

¹⁹ Bajaraxuacujinae Jesús pijajivi barëcuaicuaijaiti pijaepatojavata. Jesús pijajivi jumaiti:

—Patajatuxanenë, ¿detsa xuajitsia meta paxanë apo panecaëjêpae patavecuacapitsapaenexa dovathi? jai Jesús pijajivi.

²⁰ Nexata Jesús jumaiti pijajivijavabelia:

—Apo pacacaëjêpae pejevaxinë panevecuacapitsapaenexa dovathi. Tsipaji xaniavaetsia apo pajumecovënëtsimë Dioso papecayavenonaejavanexa. Xaniajanë pacuenia pacatsipaebijitsiatsi. Paxamë tsiquirijavayo ata itsa pajumecovënëtsipame Dioso papecayavenonaejavanexa, nexata pacacaëjêpaejitsipa Dioso pesaëta pinijicue paneexanaenexa. Nexata itsa pajumaitisimë tsipae mapatsutoxanetojavabeliaje: “Vecuanatixire majotaje. Itsajavabelia ecaename,” itsa pajamë, pacajumecovënëtsipa. Nexata natixitsipa. Nexata paxamë paneexanaenexa itsacuenejavayo ata, apo pacatsitaayapêbeje tsipae itsa pepacuen xaniavaetsia pajumecovënëtsipame Dioso papecayavenonaejavanexa. ²¹ Mara paviriadovathije apo jitsipae pepitsapaejava. Matapania panexaejava apo paxaemë tsipae pamatacabibeje asaëyata Diosojavabelia pavajêtaponame dovathi pepitsapaenexa, pitsapaejitsipa, jai Jesús pijajivijavabelia.

Pacuenia icatsia Jesús tajêvelia navajunupaeba pebeyaxuabijavanexatsi yabara pelivaisi

(Mr 9.30-32; Lc 9.43-45)

²² Jesús abaxë pijajivi itsa barëponapona Galilea nacuata, pijajivijavabelia tajêvelia navajunupaebaona pebeyaxuabijavanexatsi. Jesús pijajivijavabelia jumai tsaponae mapacueniaje:

—Xanë, Daxitajivi Pematapijinënë, necanajetsiana itsamonae pecobeyabelia. ²³ Bajarapamonae nebeyaxuabiana. Itsiata baitsi jane tanebeyaxuabicujinae, acueyabi matacabita, icatsia asaënë tsane,” jai tsaponae Jesús pijajivijavabelia.

Nexata Jesús pijajivi itsa jumetanetsi bajarapacuenia Jesús penavajunupaebaonaejava petêpaejavanexa, Jesús pijajivi bitso najamatabëxaina.

Pacuenia Jesús matamota impuestomatamo yabara pelivaisi

²⁴ Jesús, pijajivi yajava, pata Capernaum tomarata. Nexata Capernaum tomarata impuestomatamo pematamoyanijobabiabivi pona Pedrojavabelia. Nexata bajarapamonae yanijobatsi Pedro.

—Pedro, ¿xaniajai tsaja? ¿Panijatuxanenë impuestomatamo apo matamotabiabi, paimpuestomatamo judíovi matamobabiaba templobo pevet-sivijavabelia? jaiti.

²⁵ Pedro nexata jumaiti:

—Jãjã. Matamotabiaba cajena, jai.

Nexata Pedro joneya Jesús peecaeboyalialia. Nexata Pedro pejonejavatalialia Jesús peecaeboyalialia, Jesús jumaiti Pedrojavabelia:

—Pedro, ¿detsa xamë jamatabëcueneitsimë? Nacuaevevtsivi palata pepitsinexa, pijajivi itoroba impuestomatamo petoyanijobinexatsi. ¿Detsa nexata pamonaejavabelia nacuaevevtsivi pijajivi yanijobabiaba impuestomatamo? ¿Nacuaevevtsivi tsaja pijamonaejavabelia? Itsa jume, ¿saicayavijavabelia tsaja, nacuaevevtsivi pevetsinacuata pejinavanapaevijavabelia? jai Jesús Pedrojavabelia.

²⁶ Pedro nexata jumaitsi Jesúsjavabelia:

—Nacuaevevtsivi raja pijajivi impuestomatamo yanijobabiaba saicayavijavabelia, nacuaevevtsivi pevetsinacuata pejinavanapaevijavabelia. Apo yanijobabiabi nacuaevevtsivi pijamonaejavabelia, jai Pedro Jesúsjavabelia.

Jesús nexata jumaitsi Pedrojavabelia:

—Pacuenia nacuaevevtsivi pijamonae apo matamotsitsi impuestomatamo, bajara pijinia pacuenia xanë ata apo jitsipaenë picani tamatamotsinexa impuestomatamo templobo pevetsivijavabelia taxa Dioso pijatemploboxae. ²⁷ Itsiata baitsi jane xamë matamotsianame itsajivi ata vajanacabaraanaepanaeyanivabeje. Liamëre pucaxanetojavabelia. Ëjëbianame culupabota. Padujuainëyo copiaya catoxaena, jutsianame. Pecuibota caxitjarabianame palatanëyo. Bajarapapalatanëyota caëjëpaena vajamatamotsinexabeje impuestomatamo xanë tamatamotsinexa, xamë ata nematamotsinexa. Nexata bajarapalatanëyo caponaename impuestomatamo nematamotsinexa templobo pevetsivijavabelia, jai Jesús Pedrojavabelia.

18

Pacuenia Jesús pijajivi jumaitsi: “¿Detsa ponë paxanëyajuvënëne panevecuaayajamatabëcuenenë?” jai Jesúsjavabelia yabara pelivaisi (Mr 9.33-37; Lc 9.46-48)

¹ Jesús baja ita najumevereta Pedrojavabelia pecuaicuaijajava impuesto yabara, daxita Jesús pijajivi imoxoyorenatsi. Nexata Jesús pijajivi jumaitsi Jesúsjavabelia:

—Patajatuxanenë, ¿detsa ponë paxanëyajuvënëne bitso ayaijamatabëcuenenë tsane daxitavecua Dioso pijanacuatatsi? jai.

² Nexata Jesús junata pejevaxinëyo. Pijajivi tuatujëta nuteta pejevaxinëyo.

³ Jesús nexata jumaitsi pijajivijavabelia:

—Xaniajanë pacuenia pacatsipaebijtsiatsi. Mapapejevaxinëyoje bevelijamatabëcuenenëyo nataeya najamatabëcueneocopata Diosojavabelia Dioso pevetsinexatsi. Nexata paxamë ita apo panajamatabëcuenepeñëyorotsimë tsane perujujamatabëcuenevecua bevelijamatabëcuenevi panenataenexa pacuenia mapapejevaxinëyo itsije, nexata apo pajonemë tsane Dioso pijanacuayabetsia. ⁴ Nexata ponë jitsipa Dioso pijanacuatatsia ayaijamatabëcuenenë penaexanaenexa daxitavecua, bajaraponë bevelijamatabëcuenenë natae, pacuenia mapapejevaxinëyo jamatabëcueneitsije.

⁵ Pajivi copiapita tanejumečovëñëtsijiviyo, mapitsijamatabëcuenejiviyoje, bajaraxua xanë taniji tanecopiapitsijava, jai Jesús pijajivijavabelia.

Pacuenia Jesús pijajivi muxujioba itsajivi ata pibisiacuene pexanaeyaexanaeyaniva yabara pelivaisi (Mr 9.42-48; Lc 17.1-2)

⁶ Jesús jumaitsi pijajivijavabelia:

—Pajivi pibisiacuene exanaeyaexanaejitsipa mapitsipejevaxijivixi ataje, tanejumečovëñëtsiyajuvënëñëjiviyo, bajarapajivi Diosojavabelia

bitso naneconitsipa. Nexata Dioso ayaicuenia bajarapajivi naneconitsiaexanaejitsipatsi. Nexata pajivi najamatabëxaina pibisiacuene pexanaeyaexanaenexa tanejumecovënëtsivijavabelia, abaxë pibisiacuene exanaeyaexanaenejeva, bevësicëtatsi ibotoxanetojavabelia. Nexata bajara-pajivi yamaëya, ibotoxaneto yajava, bexuarecatsi pucaxaneto tuatuajëareca. Bajarapajivi bexuarecatsi bitso penaneconitsiyanima Diosojavabelia pibisiacuene ita exanaeyaexana tanejumecovënëtsiviyajuvënëvi. ⁷ ¡Dioso bitso naneconitsiaexanaenatsi mapanacuapijivi pibisiacuene pexanaevi! Pibisiacuene vajanacaexanaeyaexanae jamatabëcuenenexa, navita mapanacuataje. Bajarapajamatabëcueneta tsitecaponaena pevajënaeyabelia. Nexata pajivi pejamatabëcueneta itsamonae pibisiacuene exanaeyaexana, bajarapajivi bitso Dioso naneconitsiaexanaenatsi.

⁸ Bajaraxuata panecobeta, panetaxuta ata, pibisiacuene ita paexaname, panacobecacure. Panataxucazure. Tajë panavecuaxuare. Itsiata xanepana panejonexa cobemataxucaeya, taxumataxucaeya ata, apo pevereverecaenacuajavabelia. Biji rajane apo xanepanae tsipae anijacobe-beje, anijataxubeje ata yajava, panejonexa apo pevereverecaeisotojavabelia. ⁹ Panaitaxutota panetaejava yabara ata pibisiacuene ita paexaname, panaitaxutocajure. Itsiata xanepana panejonexa pacaexitaxutojivimë apo pevereverecaenacuajavabelia. Biji rajane apo xanepanae tsipae anijaitaxutobeje yajava panejonexa infernojavabelia, jai Jesús pijajivijavabelia.

Pacuenia Jesús pijajivi livaisi tsipaeba oveja penaxuabinë pelivaisicuenia yabara pelivaisi

(Lc 15.3-7)

¹⁰ Jesús jumaitsi pijajivijavabelia:

—Itsamona mapanacuata bijiaya taeyabiaba mapitsipejevaxijivixi ataje, tanejumecovënëtsijivixi. Saya beveliajamatabëcuenevi taeyabiaba. Pëtsa bajarapacuenia paxamë ata bijiaya pataneme tanejumecovënëtsivi. Bijiaya pëtsa pataneme mapitsipejevaxinëyo ataje, tanejumecovënëtsijiviyoi. Tsipaji bajarapamonae ángelevi yajavajinavanapa peyavenonabiabinexatsi. Bajarapaángelevi taxa Dioso, athëbëtatsia peecaenë, pitabarata jinavanapa. ¹¹ Xanë, Daxitajivi Pematapijinënë, patajopajë tacapanepaenexa daxita Diosovecua naxuabiaya pejinavanapaevimi, jai Jesús pijajivijavabelia.

¹² Jesús icatsia jumaitsi pijajivijavabelia:

—Pacanaëjere mapacuenenë. Pebi xinaejitsipa cien ponëbeje oveja. Nexata ita toyajuvënënxuabijitsipatsi caenë, oveja pexainaenë puenetsipa noventa y nueve ponëbeje oveja. Bajaraxuacujinae jaitsipa petonaxuabinëtsi. ¹³ Xaniajanë pacuenia pacatsipaebijitsiatsi. Bajaraponë ita caxitajarabijitsipa pijaoveja, petonaxuabinëmitsi, bitso barëyataejitsipa. Nexata noventa y nueve ponëbeje, apo petonaxuabivitsi, pesivajamatabëcuenenarëyajava, matatoxenetsia bitso sivajamatabëcuenenarëya tsipae petonaxuabinëmitsi. ¹⁴ Bajara pijinia pacuenia paneaxa ata, athëbëtatsia peecaenë, apo jitsipae pevécuanaxuabinexatsi caejivi ata mapitsipejevaxijivixi ataje, tanejumecovënëtsivi, jai Jesús pijajivibelia.

Pacuenia Dioso pejumecovënëtsijivi bebarajamatabëcuenexanepana, itsacueniabi atatsi itsajivi, yabara pelivaisi

(Lc 17.3)

¹⁵ Icatsia Jesús jumaitsi pijajivijavabelia:

—Itsanë Dioso pejumecovënëtsinë pibisiacuene papecatoexanaejava, ita pavënëlivaisitaename, xaniavaetsia payanijobianame caenëjavata.

Nexata xaniavaetsia itsa panabarêcuaicuajiamêbeje, panabarajamatabêcuene xanepanaenamebeje. ¹⁶ Xaniavaetsia itsa apo pacabarêcuaicuajiai tsane, nexata Dioso pejumecovênêtsinê pajunatsianame caenê, anijanêbeje ata, paneyajavaponaenexa pibisiacuene papecatoexanaenêjavabelia pemuxujobinexatsi. Nexata bajaraponêbeje pacajumetaena xaniavaetsia panebarêcuaicuajiajjava pibisiacuene papecatoexanaenêjavabelia. Bajarapacuenia itsa paexanaename, nexata pacuenia Dioso pejumelivaisibaxutota jumaiti, paexanaename. ¹⁷ Ponê pibisiacuene pacatoexana, itsa apo namuxunaevetsi tsane paneyajavaponaenêbeje ata pemuxujobijava, nexata daxita Dioso pejumecovênêtsivi penacaetuatsijavata, payanijobianame papibisiacuene pacatoexana. Nexata ponê pibisiacuene pacatoexanaena, daxita Dioso pejumecovênêtsivi muxujobianatsi. Bajaraponê itsa apo namuxunaevetsi tsane, muxujobi atatsi Dioso pejumecovênêtsivi, nexata bajaraponê pataename Dioso apo pejumecovênêtsinêcuenia. Panavecuaitaversioname pepatsiyaniva panenacaetuatsijavata, jai Jesús pijajivijavabelia.

¹⁸ Icatsia Jesús jumaiti pijajivijavabelia:

—Xaniajanê pacuenia pacatsipaebijitsiatsi. Xua jivi paitavetsianame pexanaeyaniva mapanacuataje, bajaraxua Dioso athêbênacuataatsia ata itaveta. Xua jivi patocopatsianame pexanaenexa mapanacuataje, bajaraxua Dioso ata athêbênacuataatsia tocopata pexanaenexa, jai Jesús pijajivijavabelia.

¹⁹ Icatsia Jesús jumaiti pijajivijavabelia:

—Pacatsipaebijitsiatsinua mapacueniaje. Mapanacuata paanijanêmêbeje itsa panajamatabêcuenejêpamebeje xua pavajêtsijitsiamêbeje Diosojavabelia, nexata taxa, athêbêtatsi peecaenê, pacajumecovênêtsianabeje xua pavajêtamebeje. ²⁰ Tspaji itsajota anijajivibeje, acueyabi ata, nacaetuata, tanejumecovênêtsivi, bajarajota xanê bajarapamonae yajavaecaenajê, jai Jesús pijajivijavabelia.

²¹ Nexata Pedro imoxoyolia Jesús. Pedro jumaiti Jesúsjavabelia:

—Tajatuxanenê, panetsipaebame rabaja. Panejumaitisimê mapacueniaje: “Itsajivi Dioso pejumecovênêtsijivi pibisiacuene itsa paexanaena, pajamatabêcaevianame. Barajamatabêcuenexanepanaeya pataename. Itsa pavênêlivaisitaename pibisiacuene papecatoexanaejava, xaniavaetsia payanijobianame caenêjavata. Nexata xaniavaetsia itsa panabarêcuaicuajiamêbeje, panabarajamatabêcuene xanepanaenamebeje,” panejamê. ¿Detsa xuabeje pibisiacuene nexanae ata, pibisiacuene netoexanae atanua, jamatabêcaevianajê barajamatabêcuenexanepanaeya tataenexa bajarapajivi? ¿Siete tsaja xuabeje ata? jai Pedro Jesúsjavabelia.

²² Jesús nexata jumaiti Pedrojavabelia:

—Siete xuabejenexa yabara apo jumaitisnê. Biji rajane siete pase- tentabeje pibisiacuene pacaexanae ata, pibisiacuene pacatoexanae atanua, pajamatabêcaevare barajamatabêcuenexanepanaeya panetaenexa, baitsi cuatrocientos noventa xuabeje ata, jai Jesús Pedrojavabelia.

Ponê apo jitsipae pebarajamatabêcuenexanepanaenexa itsanêjavabelia yabara pelivaisi

²³ Jesús livaisi tsipaeba comparaciôncuenia pijajivijavabelia. Jumaiti mapacueniaje:

—Dioso pijanacuataatsia pijajivijavabelia exanaena pacuenia nacuaevetsinê pijajivijavabelia baexana. Nacuaevetsinê jitsipa piamoneyabivitsi pematamotsinexatsi xua amoneyabatsi. ²⁴ Nexata itoroba pijajivi petotsipaebaponaenexatsi daxita pamona amoneyabatsi.

Nexata pijajivi tobarëparenatsi ponë bitso ayajjava amoneyabatsi, baitsi millones de pesos piamoneyabinëtsi. ²⁵ Nexata bajaraponë apo xainae pematamotsijavanexatsi. Nexata nacuaevevtsinë itoroba pijajivi. Jumaitsi: “Mara ponë bitso ayajjava niamoneyabaje. Nexata pacanajetaxuabianame dajubicuenia itsamonaiejavabelia amoneya petonacuenebaponaenexa daxitamatacabijavabelianexa. Daxita pexi, pijava ata, pecobecovë ata yajava, pacanajetaxuabianame. Bajarapacuenia pitsianajë tsiquirijavayo ata taneamoneyabijavamatamo,” jai nacuaevevtsinë pijajivjavabelia. ²⁶ Nexata ponë amoneyaba, nacuaevevtsinë pitabarata pematabacabëta nucajunua. Pinijicuenia vajëta nacuaevevtsinëjavabelia. Jumaitsi: “Nejamatabëcueneevere abaxë. Camatamotsianatsi rabaja daxita xua camoneyabatsi,” jai. ²⁷ Nexata nacuaevevtsinë itaxutotsoniatane piamoneyabinëtsi. Nexata nacuaevevtsinë jumaitsi piamoneyabinëtsijavabelia: “Daxita rabaja taneamoneyabijavamë, iquinajë. Nexata baja apo nematamotsimë tsane,” jai nacuaevevtsinë piamoneyabinëtsijavabelia. Bajaraxuacujinae copata baja penaviatsinexa. ²⁸ Nexata bajaraponë penaviatsinexa, ajena pitsapalia nacuaevevtsinë pijabovecua, caxitajarabaxuaba itsanë penajuanacuenebabiabinëbeje nacuaevevtsinë pijajava. Bajaraponë nexata jamatabëjumaitsi: “Maponë tsiquirijavayovajëto niamoneyabi ataje, yanijobianajë tanematamotsinexa,” jamatabëjai. Nexata cuibocamisavaetaba. Cuibocuetsaca asaëyata. Jumaitsi bajaraponëjavabelia: “Nematamore taneamoneyabijavamë,” jai. ²⁹ Nexata piamoneyabinëtsi bajaraponë pitabarata pematabacabëta nucajunua. Pinijicuenia vajëta. Jumaitsi: “Nejamatabëcueneevere abaxë. Camatamotsianatsi raja itsiata daxita xua camoneyabatsi,” jai. ³⁰ Itsiata baitsi jane bajaraponë piamoneyabinëtsi apo itaxutotsoniatane. Barëpona baja penaneconitsivi pejebabiabibojavabelia penaneconitsiaexanaenexa. Bajarapacuenia pematamotsinexatsi daxita piamoneyabijavatsi. ³¹ Nexata nacuaevevtsinë pijajivi itsa tane bajarapacuenia pexanaejava penajua nacuenebabiabinëbejejavabelia, bajarapamonae bitso najamatabëxaina. Nexata nacuaevevtsinë pijajivi ponalia petsipaebinexa bajaraxua pijatuxanenëjavabelia. ³² Nexata nacuaevevtsinë pijajivi itsa tsipaebatsi, itoroba icatsia pijajivi petojunatsinexatsi bajaraponë. Nexata itsa tocatatsi, nacuaevevtsinë jumaitsi bajaraponëjavabelia: “Niajamatabëcuenebejenë baja rovia. Catoiquinatsi rabaja picani taneamoneyabijavamë. Tspajji pinijicuenia nevajëtime. ³³ Pacuenia caitaxutotsoniatanetsi, bajara pijinia pacuenia itaxutotsoniataejitsipame pecaamoneyabinë,” jai nacuaevevtsinë. ³⁴ Nexata nacuaevevtsinë bitso baraanaešana millones de pesos piamoneyabinëtsijavabelia. Nexata nacuaevevtsinë jumaitsi pijajivjavabelia: “Bajaraponë pacaponaeremelia penaneconitsivi pejebabiabibojavabelia penaneconitsiaexanaenexatsi. Bajarajota naneconitsiaponaponaena ëpematamoveretsijavabelianexa daxita taneamoneyabijava,” jai nacuaevevtsinë, jai Jesús pijajivjavabelia.

³⁵ Jesús icatsia jumaitsi pijajivjavabelia:

—Bajara pijinia pacuenia paxamë ata taxa, athëbëtsatsia peecaenë, pacaexanaena, itsa apo pajamatabëcaevimë tsane panebarajamatabëcuene xanepanaenexa pamona pacaitsacueniaba, jai Jesús pijajivjavabelia.

*yabara pelivaisi**(Mr 10.1-12; Lc 16.18)*

¹ Jesús pijajivi pemuxujobicujinae pebarajamatabëcuene xanepanaenexa itsamonaē itsacueniabi atatsi, Jesús baja pona Galilea nacuavecua. Jesús nexata pata Judea nacuaavelia, Jordánmene itsapanabelia. ² Jivi ayaiBITSaëtoxaneto pënaponatsi. Bajarajotalia Jesús jamatejemayaexana pivitanevi.

³ Nexata fariseovi Jesús imoxoyorenatsi. Jamatabëcuenejëbiaya yanijobatsi. Jesús bijiaya itsa jumecanaviata, peneconitsinexatsi picani. Nexata fariseovi jumaitsi Jesúsjavabelia:

—¿Xanepana tsaja penacojobinē pijava pexuabinexa itsacuenjavayo ata yabara? jai fariseovi.

⁴ Jesús nexata jumaitsi fariseovijavabelia:

—¿Apo palebimē tsipaji paneyapëtaenexa pacuenia Dioso pejumelivaisibaxutota jumaitsi? Pamatacabi Dioso taxuxuaba nacua pexanaejava, bajarapamatacabi Dioso exana pebi, pijava yajava. ⁵ Nexata Dioso pejumelivaisibaxutota jumaitsi mapacueniaje: “Pebi itsa nacojoba pijavajavabelia, banatsata paxavecua, pena atavecua. Nexata Dioso tane anijajivimibeje becaejivi,” jai Dioso pejumelivaisibaxutota. ⁶ Nexata Dioso apo tae beanijajivibeje. Becaejivi saya tane Dioso. Bajaraxuata itsanē ata apo bexuabi pijava. Tsipaji Dioso pejamatabëcueneta napitsiaexanatsibeje, jai Jesús fariseovijavabelia.

⁷ Nexata icatsia fariseovi jumaitsi Jesúsjavabelia:

—¿Detsa xuajitsia bajayata Moiséspijinē copata penacojobinē petoyaquinaenexa cuyalatobaxuto pijava pitavetsilivaisi pexuabinexa bajarapacuenia? jai fariseovi.

⁸ Jesús nexata jumaitsi fariseovijavabelia:

—Paneajamatabëcuenetajaxae, Moiséspijinē pacatocopata bajarapacuenia paneexanaenexa panexuabinexa panijavajivi. Itsiata baitsi jane Dioso pexanaejivibejejavaveliacujinae, apo tocopatsi picani bajarapacuenia pexanaenexa. ⁹ Nexata mapacuenia pacatsipaebianatsije. Ponē pijava xuaba, itsanējavabelia bajarapova pevitota pibisiacuenae apo vecuaexanae atatsi, bajaraponē naneconita Diosojavabelia pijava pexuabixae. Nexata pijava pexuabinē itsa nacojoba icatsia itsavajavabelia, bajaraponē pibisiacuenae exana pevitota. Tsipaji pepo pijavavecua jaita itsava. Dioso cajena abaxē bajaraponē pexuabiva pijavacuenia totanetsi. Ponē ata itsanē pexuabiva pita, bajaraponē ata pibisiacuenae exana pevitota. Tsipaji itsanē pijavami pita, pova abaxē Dioso totanetsi itsanē pijavacuenia, jai Jesús fariseovijavabelia.

¹⁰ Nexata Jesús pijajivi jumaitsi Jesúsjavabelia:

—Itsa bajarapacuenia pebi apo tocopatsitsi itaxutojema pijava pexuabinexa, nexata meta baja apo benacojobi, jai Jesús pijajivi.

¹¹ Jesús nexata jumaitsi pijajivijavabelia:

—Daxitajivi apo nejumeyapëtae tsane xua yabara jumaitsinē. Itsiata nejumeyapëtaena pamonae Dioso jamatabëcueneyavenonatsi. ¹² Apo caejamatabëcuene raja xua yabara pebijivi apo nacojobi. Itsamonae penabejenaenē naexana. Nexata apo caējëpaetsi penacojobijava. Itsamonae jivi pejamatabëcueneta bepenabejenaenēcuenia exanatsi. Nexata apo caējëpaetsi penacojobijava. Itsamonae ëDioso pijacuenae petonacuenebinxa, apo nacojobi. Nexata ponē jamatabëcuenecaējëpatsi nacojobinejeva peponaponenexa ëDioso pijacuenae petonacuenebinxa, bajaraponē nejumecovënetsi, jai Jesús pijajivijavabelia.

Pacuenia Jesús jumaitsi pejevaxijivixijavabelia yabara pelivaisi
(Mr 10.13-16; Lc 18.15-17)

¹³ Jesúsjavaberena itsamonae pejevaxijivixi tocapataponatsi Jesús pecobeta pejayataponanexa. Petovajétsinexatsinua Diosojavabelia, tocapataponatsi. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pëtsa patocapataponame panexi Jesúsjavaberena, jai.

¹⁴ Nexata Jesús jumaitsi pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena.

Mapitsipejevaxijivixije jumeabinejeva, xaniavaetsia bajumecovëneta palivaisi tsipaebatsi. Nexata pamonae jitsipa pejonejava Dioso pijanacuayabet-sia, bajara pijinia pacuenia jumeabinejeva, xaniavaetsia bejumecovëneta Dioso pejumelivaisi, jai Jesús pijajivijavabelia.

¹⁵ Jesús nexata pecobeta jayatapona pejevaxijivixi, caejiviyo canacujitsia. Bajaraxuacujinae Jesús baja pona bajarapanacuavecua.

Pacuenia pevëjëato, bitso pexainanë, cuaicuaijai Jesúsjavabelia yabara pelivaisi

(Mr 10.17-31; Lc 18.18-30)

¹⁶ Pevëjëato pata Jesúsjavaberena. Nexata pevëjëato jumaitsi Jesúsjavabelia:

—Petuxanenë, pexaniajamatabëcuenenëmë. ¿Detsa pitsicuene, pexaniacuene, exanaenajë taxainanexa matacabi apo pevereverecejava? jai pevëjëato.

¹⁷ Jesús nexata jumaitsi pevëjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. Itsiata itsa jitsipame nexainanexa matacabi apo pevereverecejava, jumecovënere pacuenia Dioso pejumelivaisita itoroba jivi pejumecovënëtsinexa, jai Jesús pevëjëatojavabelia.

¹⁸ Nexata pevëjëato jumaitsi Jesúsjavabelia:

—¿Detsa palivaisi nexata jumecovënëtsianajë? jai.

Nexata Jesús jumaitsi pevëjëatojavabelia:

—Dioso pejumelivaisibaxutota jumaitsi mapacueniaje: “Pëtsa beyaxuabame jivitonë. Pëtsa jaitame itsava nijavavecua. Pëtsa nacobetoxotame. Pëtsa itsamonae pexanaejava yabara najumetsënëtsiaya paebame.

¹⁹ Axa yayiyataema. Ena ata yayiyataema. Asivamëre itsajivi ata pacuenia xamë nijacuata nasivamë,” jai Dioso pejumelivaisibaxutota, jai Jesús pevëjëatojavabelia.

²⁰ Pevëjëato nexata jumaitsi Jesúsjavabelia:

—Daxita rabaja bajarapalivaisianë jumecovënëtajë. ¿Detsa xua netosaica abaxë taexananexa? jai pevëjëato.

²¹ Nexata Jesús jumaitsi pevëjëatojavabelia:

—Itsa jitsipame pepacuene nejamatabëcuenexanepanaejava, nejamatabëcuenevitsabijavanua, nexata ponare. Canajetsiname daxita xua xainame. Bajarapamatamomi tsicobetsanaename bepejiobivi. Nexata bajarapacuenia xainaname bitso nexanaejava Dioso pijanacuatsia. Bajaraxuacujinae nepënaponaename, jai Jesús pevëjëatojavabelia.

²² Nexata pevëjëato itsa jumetane bajarapacuenia Jesús pejumaitsjava, najamatabëxainaeya baja vecuapona Jesús. Tsipaji pevëjëato daxitacuene bitso pexainanë. Nexata pevëjëato apo jamatabëjumecovënëtsi palivaisi Jesús tsipaeba.

²³ Nexata pevëjëato pecovëta Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Ponë bitso daxitacuene pexainaenë, tsiaypëbejetsi bitso penajamatabëcuenecopatsinexa Diosojavabelia pecapanepaenexatsi Dioso pijanacuayabetsia. ²⁴ Icatsia matavëjëa pacajumaitsi. Pacuenia camello acuenebi pejonejava palutaetoitaxutovoju-
tulia, bajara pijinia pacuenia bitso pexainaenë acuenebi tsane pejonejava Dioso pijatomarabetsia, jai Jesús pijajivijavabelia.

²⁵ Jesús pijajivi itsa jumetane bajarapacuenia Jesús pejumaisijava, bitso jamatabëcuenenabenajaca. Jesús pijajivi jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexainaevi ata itsa apo panepae tsane Diosojavabelia? jai.

²⁶ Jesús asaëya naëcota pijajivijavabelia. Jumaitsi pijajivijavabelia:

—Jivi raja apo caëjëpaetsi pijacuata penacapanepaenexa Diosojavabelia. Caenë Dioso caëjëpatsi. Dioso raja caëjëpatsi daxitacuene pexanaenexa, jai Jesús pijajivijavabelia.

²⁷ Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxainaejavami. Nexata baja pacapënjajinavanapatsi. ¿Detsa xua meta panerajutsiana? jai Pedro Jesúsjavabelia.

²⁸ Nexata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pamatacabi daxitacuene pejanajava icatsia naexanaena, xanë, Daxitajivi Pematapijinënë, ecaenajë tronovënëjavata taevetsinexa daxitajivi. Bajarapamatacabi paxamë ata, doce paponëmëbeje patanepënjajinavanapaevimë, paenaename, pacaenëmë canacujitsia, panijatronota vajanajuavevetsinexa xua evetsianajë. Nexata paxamë paenaename jueznëcuenia panenaneconitsiaexanaenexa pijaneconi pexainaevi. Pananeconitsiaexanaename Israelpijnëmë pexi, doce ponëmibeje, pemomoxi. ²⁹ Daxita pamonaë tajamatabëcueneta pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijairanë ata, Dioso nexata bajarapamonae rajutsianatsi ayajava bitso pepuenetsijavanëmi matatoxenetsi. Caeyavayomijamatabëcuene tsaponae, rajutsianatsi cien xuabeje tsaponae pevajënaeyabelia. Rajutsianatsinua matacabi apo pevereverecejava. ³⁰ Pamonaë aeconoxae mapamatacabitaje ayajamatabëcuenevi tanetsi, bajarapamonae itsamatacabi Dioso beveliajamatabëcuenevi exanaenatsi. Pamonaë pijinia mapamatacabitaje beveliajamatabëcuenevi tanetsi, bajarapamonae itsamatacabi Dioso ayajamatabëcuenevi exanaenatsi, jai Jesús pijajivijavabelia.

20

Pacuenia Jesús livaisi tsipaeba pabi pexainaenë petonacuenebivitsi najëpaeya pematamotsijava pelivaisicuenia yabara pelivaisi

¹ Icatsia Jesús jumaitsi pijajivijavabelia:

—Aeconoxae Dioso pejumelivaisi comparacióncuenia pacatsipaebianatsi patanejumeyapëtaenexamë. Dioso pijajivi pematamotsijava pijanacuatsia, jëpa mapalivaisije. Pabixaneto pexainaenë ponapona. Ajena matacabi tsarucaponaë, naropota jivi pejaitsinë petonacuenebinexatsi uvavënëjava peubipabita. ² Caxitajarabaxuaba baja nexata jivi. Junata petonacuenebinexatsi. Caematacabi matamotsiapaeba caedenario. Jejai nexata bajarapamonae. Nexata itoroba pijapabiabelia petonacuenebinexatsi. ³ Bajaraxuacujinae juameto baja tajë itsa rucaina, a las nueve, naropota icatsia. Taenuba tomara tuatuajëta pebijivi, saya

jema pejinavanapaevi. ⁴ Nexata jumaitsi bajarapamonaejavabelia: “Paxamé ata paponaremelia tajapabiabelia. Panetonacuenebianame. Pacamatamotsianatsi raja xaniavaetsia,” jai pabixainaenē. ⁵ Nexata bajarapamonaē ata ponalia petonacuenebinexatsi. Bajaraxuacujinae, matonejeepatota, junata icatsia itsamonaē. Bajarapamonaē ata ponalia petonacuenebinexatsi. Bajaraxuacujinae, bejamatabēcuene a las tres, junata icatsia itsamonaē. Bajarapamonaē ata ponalia petonacuenebinexatsi. ⁶ Bajaraxuacujinae, caniviyo, bejamatabēcuene a las cinco, pabixainaenē icatsia pona tomara tuatuajëareca. Caxitajarabaxuaba icatsia pebijivi, saya jema pejinavanapaevi. Nexata pabixainaenē jumaitsi bajarapamonaejavabelia: “¿Detsa xuajitsia saya daxitamatacabi pajinavanapame panacuenebinejevamē?” jai. ⁷ Nexata bajarapamonaē jumaitsi: “Tsipaji itsajivi ata apo panejunatsi patatonacuenebinexa,” jai. Nexata pabixainaenē jumaitsi: “Paxamé ata paponaremelia tajapabiabelia patanetonacuenebinexamē. Pacamatamotsianatsi raja xaniavaetsia,” jai pabixainaenē. Nexata bajarapamonaē jejai. Ponalia petonacuenebinexatsi. ⁸ Nexata baja juameto itsa tabujuniya, pabixainaenē jumaitsi pijajivitonējavabelia: “Junare baja tanetonacuenebivi. Matamobare baja. Copiaya matamobare pamonaē pepacotocaevi pejonevi. Pamonaē pepacopiaya pejonevi cotocaevi matamobianame,” jai pabixainaenē pijajivitonējavabelia. ⁹ Nexata pamonaē pepacotocaevi junua a las cinco penacuenebinexa, parena pematamobinexatsi. Nexata caenē canacujitsia matamobatsi caedenario. ¹⁰ Nexata daxita pamonaē bajayacunua pepacopiaya junua penacuenebinexa, pepacotocaevi juya parena pematamobinexatsi. Nexata bajarapamonaē jamatabējumaitsi: “Caedenario meta pematatsēnēa vaxaitsi nacamatamobiana. Tsipaji copiaya vaxaitsi junuatsi vajanacuenebinexa,” jamatabējai bajarapamonaē. Itsiata baitsi jane bajarapamonaē ata, caenē canacujitsia, matamobatsi caedenario tsaponae. ¹¹ Nexata bajarapamonaē penacuenebimatamo baja itsa nota, baranaepana pabixainaenējavabelia. ¹² Jumaitsi bajarapamonaē: “Mapamonaē cotocaevi pepatsivi, nacueneba saya caehora. Paxanē baja rovia ayaicuenia panacuenebajē. Icotia daxitamatacabi panetsajava. Itsiata mapamonaē matamobame pacuenia panematamobame,” jai bajarapamonaē. ¹³ Itsiata baitsi jane pabixainaenē jumaitsi bajara pamonaeayajuvēnēnējavabelia: “Itsacujenjavayo ata pibisiacuene apo pacaexanaetsi. Patacajunatsijavata patanetonacuenebinexamē, caedenario pacatsipaebatsi patacamatamotsinexa patanetonacuenebimatamomē. Nexata baja bajarapacuenia pacarajutatsi. ¹⁴ Panijamatamo baja papitame. Paponare baja panijabonējavabelia. Pamonaē cotocaevi junua tanetonacuenebinexa, bajarapamonaē ata matamobajē pacuenia pacamatamobatsi. Bajarapacuenia matamobajē pacuenia xanē jitsipajē. ¹⁵ Tajapalataxae, netoxanepana pacuenia jitsipajē tarajutsinexa. ¿Pacobecaēbame tsaja bajarapamonaē ayajava tarajutsixae? jai pabixainaenē petonacuenebivitsi yajuvēnēnējavabelia. ¹⁶ Bajara pijinia pacuenia Dioso ata, pacuenia jitsipa, exanaena pijajivijavabelia. Pamonaē mapanacuata ayajamatabēcuenevi tanetsi, bajarapamonaē itsamatacabi Dioso beveliajamatabēcuenevi exanaenatsi. Pamonaē pijinia mapanacuata beveliajamatabēcuenevi tanetsi, bajarapamonaē itsamatacabi Dioso ayajamatabēcuenevi exanaenatsi. Bajarapacuenia Dioso exanaena tsipaji picani jivi ayaibitsaētoxaneto Dioso junata. Itsiata bajarapamonaeyajuvēnēvi, caejiviyobeje saya, Dioso jumecovēnēta, jai Jesús pijajivijavabelia.

Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi

(Mr 10.32-34; Lc 18.31-34)

¹⁷ Jesús pona Jerusalén tomarabelia. Nexata Jesús, pijajivi ayaibitsaëto yajava, najetaruca namutua, itsamonae yajava. Nexata bajarapamonaeeve-cua ëpijajivi, doce ponëbeje, Jesús junata pimoxoyotsinexatsi. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniaje:

¹⁸ —Panejumetaema. Mara Jerusalén tomarabelia ponatsije. Bajara-jotalia xanë, Daxitajivi Pematapijinënë, tanevaetabinexa necanajetsiana sacerdotevi penamatacaitorobivi pecobeyabelia. Necanajetsiana judíovi pecujarubivi pecobeyabelia ata. Nexata xanë neneconitsiana tanebeyaxu-abinexa. ¹⁹ Bajaraxuacujinae icatsia necanajetsiana itsanacuaverena pepat-sivi pecobeyabelia. Bajarapamonaeeve necanecaponaena. Nejumatitibabena penaneconitsivi pejumaconitabiabimacata. Bajaraxuacujinae cruzajav-abelia necobematabiabarutsiana tatëpaenexa. Itsiata baitsi jane tanebeyaxu-abicujinae, acueyabi matababita, icatsia asaënë tsane, jai Jesús pijajivijav-abelia tajëvelia penavajunupaebijavata pebeyaxuabijavanexatsi.

Pacuenia Santiagobeje Juanbeje pena vajëta Jesúsjavabelia pexaniacuene petoexanaenexatsi yabara pelivaisi

(Mr 10.35-45)

²⁰ Santiagobeje Juanbeje paxa pevënë Zebedeo. Nexata bajaraponëbeje pena barëliatsibeje Jesúsjavabelia. Bajarapova pematatabacabëta nucajunua Jesús pitabarata. Vajëta pexaniacuene petoexanaenexatsi. ²¹ Nexata Jesús jumaitsi bajarapovajavabelia:

—¿Detsa pitsicuene jitsipame tacatoexanaenexa? jai Jesús.

Nexata bajarapova jumaitsi Jesúsjavabelia:

—Pamatacabi daxitacuene evetsianame, tocopatsianame taxënatobeje nemuxuneneta penaecaenexabeje panenajuaevetsinexa. Itsanë tocopat-sianame necujanenia peecaenexa. Itsanë tocopatsianame netsavenonenia peecaenexa, jai bajarapova Jesúsjavabelia.

²² Nexata Jesús jumaitsi Santiagobeje Juanbejejavabelia:

—Paxamëbeje apo payapëtaemëbeje xua pavajëcaeyaexanamebeje ena xanëjavaberena. ¿Pacacaejëpabeje tsaja panenacaevetsinexabeje papecabejiobiaexanaenexabeje pacuenia xanë nacaevetsianajë tanebejiobiaexanaenexa? ¿Pacacaejëpabejenua tsaja panenacaevetsinex-abeje papecabeyaxuabinexabeje pacuenia xanë nacaevetsianajë tanebeyaxuabinexa? jai Jesús Santiagobeje Juanbejejavabelia.

Nexata Santiagobeje Juanbeje jumaitsibeje:

—Jājā, panecaëjëpabeje cajena, jaiibeje.

²³ Nexata icatsia Jesús jumaitsi Santiagobeje Juanbejejavabelia:

—Paxaniajamëbeje rabaja. Paxamëbeje pacabejiobiaexanaenabeje pacue-nia xanë nebejiobiaexanaena. Pacabeyaxuabianabegenua pacuenia xanë nebeyaxuabiana. Itsiata baitsi jane xua panevajëtaemebeje panenaecaenex-abeje, itsanë tacujanenia, itsanë tatsavenonenia, bajaraxua Dioso apo netocopatsi patacatocopatsinexabeje. Tsipaji raja taxa Dioso ëpitapetsivinexa abaxë bajaraxua toxaniavaeta, jai Jesús Santiagobeje Juanbejejavabelia.

²⁴ Nexata diez ponëbeje Jesús pijajivi vënëtane pepëya bajaraxua Santi-agobeje Juanbeje Jesúsjavabelia pevajëcaejavabeje. Nexata bajarapamonaee jamatabëcuenebaranaepana Santiagobeje Juanbejejavabelia. ²⁵ Nexata Jesús daxita pijajivi junata. Jesús jumaitsi pijajivijavabelia:

—Payapëtaneme rabaja pacuenia nacuaevevtsivi exana. Eveta caenacua canacujitsia. Nexata nacuaevevtsivi pijajivicuenia eveta pamonaev jinanapa pevetsinacuanëjava. Nexata bajarapanacuanë pevetsivi ayaijamatabëcuenevi nataeyabiaba. Xua jamatabëitoroba pevetsinacuanëjava pejinavanapaevi petoexanaenexatsi, ajumesaëya itorobabiaba petoexanaenexatsi. ²⁶ Pëtsa paxamë bajarapamonaev cuenejëpaeya bajarapacuenia paexaname itsamonaevjavabelia. Biji rajane ponë paxamëyajuvënënë jitsipa ayaijamatabëcuenenë penaexanaenexa daxita paxamëvecua, bajaraponë daxita paxamë bepanijajivitonëcuenia bepacayavenonabiaba. ²⁷ Ponë paxamëyajuvënënë jitsipa penaexanaenexa papecanamatacaitorobinënexa, bajaraponë daxita paxamë bepanijajivitonëcuenia bepacayavenonabiaba. ²⁸ Tspijaji rabaja xanë ata, Daxitajivi Pematapijinë atanë, apo patajopañë jivi taneyavenonaenexa. Biji rajane xanë patajopajë tayavenonaenexa daxitajivi. Patajopajë tasivatëpaenexa jivi ayaibitsaëtoxaneto pibisiacuene pexanaenecomimi taneconimatamotsinexa, jai Jesús pijajivijavabelia.

Pacuenia Jesús itaxutoxanepanaeyaexana bitso pitaxutotsëcënaenëbeje, apo petaenëbeje, yabara pelivaisi

(Mr 10.46-52; Lc 18.35-43)

²⁹ Jesús, pijajivi yajava, pitsapa Jericó tomaravecua. Nexata jivi ayaibitsaëto pënaponatsi. ³⁰ Panamutojaya Jesús najetaruca, bajarapanamutojavata ecabeje bitso pitaxutotsëcënaenëbeje, apo petaenëbeje. Nexata bajaraponëbeje itsa jumetanebeje bajarapanamutua imoxoyo Jesús penajetarucajava, vavajaiibeje tsecae.

—Jesús, Davidpijinë pemomomë, paneitaxutotsoniataemabeje! jaibeje tsecae pitaxutotsëcënaenëbeje.

³¹ Jivi picani jumeitavetatsibeje pemoyanexabeje tsecae. Itsiata biji bitsoy orijibia vavajaiibeje tsecae.

—Jesús, Davidpijinë pemomomë, paneitaxutotsoniataemabeje! jaibeje tsecae Jesúsjavabelia.

³² Nexata Jesús muxunanucojopa. Junata pitaxutotsëcënaenëbeje. Jesús jumaitsi bajaraponëbejevavabelia:

—¿Detsa xua pajitsipamebeje patacaexanaenexabeje? jai.

³³ Nexata bajaraponëbeje jumaitsibeje Jesúsjavabelia:

—Jesús, pajitsipajëbeje pataitaxutoxanepanaevjavabeje, jaibeje tsecae.

³⁴ Nexata Jesús itaxutotsoniatane bajaraponëbeje. Jesús itaxutojayata bajaraponëbeje. Bajarajota caecuenia bajaraponëbeje itaxutoxanepanabeje baja. Nexata bajaraponëbeje Jesús pepëta naponabeje.

21

Pacuenia Jesús pata Jerusalén tomarata yabara pelivaisi
(Mr 11.1-11; Lc 19.28-40; Jn 12.12-19)

¹ Jesús baja pijajivi barëimoxoyotanajetaruca Jerusaléntomara. Barëpata baja Betfagé tomarata. Patsutojumata nubena olivonaenë, bajarapatsutoyenapanata eca Betfagétomara. Nexata Betfagé tomarata Jesús jumaitsi pijajivitonëbejevavabelia mapacueniaje:

² —Paponarebeje mapatomarayo ecaliajevavabelia. Bajarajotalia, ajena papatsiaremeliabeje, pataenutsianamebeje burro pecëtanutsinëtsi, pexënatonëyo yajava. Paisinaenamebeje bajarapaburrobeje. Payamaëyacarenamëbeje tsane. ³ “¿Detsa xuajitsia burrobeje paisinamebeje?” itsa

pacajaibeje tsane itsajivi, nexata pajumaitsimēbeje tsane: “Vajatuxanenē raja namatavenona. Aeconoxae raja icatsia canaviatsiarena,” pajamēbeje tsane, jai Jesús pijajivitonēbejevavelia.

⁴ Bajarapacuenia Jesús itša jumaitsi, tocopiapatatsi jane baja pacuenia Diosojumepaebinēmi profetanē bajayata tajēvelia yaquina Jesús pepatsijavanexa yabara Jerusalén tomarata. Jerusalén tomarata Jesús pepatsijavanexa yabara, profetanēmi bajayata peyaquinaelivaisita jumaitsi mapacueniaje:

⁵ Pajumaitsimē tsane Jerusalén tomarapijivijavelia: “Pataename pepo paneevtsinē paxamējavaberena penajetarucajeva. Beveliajamatabēcuenenēcuenia najetarucaena. Pejanaburroyota yapatanajetarucaena,” pajamē tsane Jerusalén tomarapijivijavelia, jai bajayata tajēvelia profetanēmi peyaquinaelivaisita Jerusalén tomarata Jesús pepatsijavanexa yabara.

⁶ Nexata Jesús pijajivitonēbeje liabeje. Jumecovēnētabeje pacuenia Jesús itorobatsibeje. ⁷ Yamaēya carenabeje burro, pexēnatonēyo yajava. Nexata bajarapaburrobeje Jesús pijajivi tsijumajeba pijacama,” pajamē tsane Jerusalén tomarapijivijavelia,

jai bajayata tajēvelia profetanēmi peyaisajumavelia penaxatabijavanē. Jesús yanajetaruca burrota. ⁸ Panamutuarena Jesús najetaruca, bajarapanamutuarena jivi ayaibitsaētoxfaneto, pijacamisajumavelia penaxatabijavanē, Jesús pevajēnaeya namutua yerequejebapona. Itsamonae naemaxērananē, pebaxu yajava, ucubaba. Nexata namutua Jesús tsivajēnaeitabētsiaya jebaponatsi yayataeya pecopiapitsinexatsi. ⁹ Jesús najetarucajevata jivi ayaibitsaētoxfaneto Jesús pevajēnaeya namataxainaeja najetarubena. Itsabit-saētoxfaneto Jesús pecovēya cotocaevanajetarubena. Daxita bajarapamonae vavajai tsanajetarubena. Jumaitsi tsanajetarubena:

—¡Dioso yavenonaenatsi maponēje, pepo nacuaeavtsinēmi Davidpijinē pemomo! ¡Dioso yavenonaenatsi maponē najetarucaje nacua pevtsinēnaxa Dioso pejamatabēcueneta! Nexata vaxaitsi pexaniajamatabēcuene rajutatsi Diosojavavelia, jai tsanajetarubena bajarapamonae.

¹⁰ Nexata Jesús itša pata Jerusalén tomarata, daxita Jerusalén tomarapijivi jamatabēcuenenabenajaca. Nexata nayanijoba.

—¿Detsa meta maponē najetarucaje? najai bajarapamonae.

¹¹ Nexata jivi jumaitsi:

—Jesús ra manajetarucaje, Diosojumepaebinē profetanē. Galilea nacuata peecaetomara, Nazaret tomarapijinē, jai bajarapamonae.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivinua, yabara pelivaisi (Mr 11.15-19; Lc 19.45-48; Jn 2.13-22)

¹² Jesús itša pata Jerusalén tomarata, joneya temploboyalía. Nexata templobota Jesús tane pecanajetabiabivi, pecomuacaevinua. Nexata daxitaitsi:

—Jesús ra manajetarucaje, Diosojumepaebinē profetanē. Galilea nacuata peecaetomara, Nazaret tom bajarapamonae Jesús pitsapaeyaexana templobovecua. Palata pecambiababiabivi ata pijamesanēmi Jesús topēnēyorobajaraba. Ucucu pecanajetabiabivi ata penabiabijavanēminua topēnēyorobajaraba.

¹³ Jesús jumaitsi bajarapamonaejavavelia:

—Dioso baja cajena pejumelivaisibaxutota mapatemplobo yabara tajēvelia jumaitsi mapacueniaje: “Tajabo raja jivi xanējavaberena

penavajëcaebo tsane,” jai Dioso pejumaitisijava Dioso pejumelivaisibaxutota. Itsiata baitsi jane paxamë yamaxëitojorobiaya panenacobetoxotsinexa panacaetuatabiabame mapabotaje, jai Jesús templobota pecanajetabibivijavabelia.

¹⁴ Bajarajota templobota Jesús imoxoyorenatsi pitaxutotsëcënaevi, pejayujayunaevinua. Nexata Jesús bajarapamonae xanepanaeyaexana. ¹⁵ Templobota nubena sacerdotevi. Nubena judíovi pecujarubivinu. Bajarapamonae taenubena Jesús pitaxutoxanepanaeyaexanaejava pitaxutotsëcënaevi. Taenubenanu Jesús pexanepanaeyaexanaejava pejayujayunaevi. Jumetaenubenanu pejevaxi templobota pevavajaijavata pejumaitisijava Jesús yabara: “¡Dioso yavenonaenatsi maponëje, pepo nacuaevevsinëmi Davidpijinë pemomo!” pejaijava Jesús yabara. Bajaraxuata sacerdotevi baranaepanatsi Jesús. Judíovi pecujarubivi ata baranaepanatsi Jesús.

¹⁶ Nexata bajarapamonae jumaitis Jesúsjavabelia:

—¿Tsipaji apo jumetaemë mapapejevaxi xamë yabara pejumaitisaponaejavaje? ¿Apo necajumeitavetsi? jai.

Nexata Jesús jumaitis bajarapamonaejavabelia:

—Jājā. Jumetaniji picani. Itsiata apo jumeitavetsinë. ¿Paxamë tsipaji Dioso pejumelivaisibaxuto apo palebimë paneyapëtaenexa pacuenia tajëvelia jumaitis xanë yabara bajarapapejevaxi pevavajaijavanexa? Dioso pejumaitisijava xanëjavaberena, tajëvelia Dioso pejumelivaisibaxutota jumaitis mapacueniaje:

Pejevaxi, mitoapaenacuetoxi ata, naxëanaeyaexanaename penaxëanaejavata xamëjavaberena pecajumaitisinexa: “Ayaijamatabëcuenenëmë bitso,” pecajainexa,

jai Dioso pejumelivaisibaxutota xanëjavaberena Dioso pejumaitisijava. Bajaraxuata mapapejevaxije jumaitis bajarapacuenia, jai Jesús sacerdotevijavabelia, judíovi pecujarubivijavabelia ata.

¹⁷ Nexata baja Jesús bajarapamonaevecua pona. Jerusalén tomaravecua pitsapa. Navialia Betania tomarayojavabelia. Nexata Jesús Betania tomarayota majita.

*Pacuenia Jesús bijataenuta higeranae piacuaijibixae yabara pelivaisi
(Mr 11.12-14, 20-26)*

¹⁸ Jesús pijajivi Betania tomarata pebarëmajitsicujinae, meravia pitsijavata, bajayacunua, Jesús pijajivi barëlia icatsia Jerusalén tomarabelia. Jesús nexata namutua penajetarucuejavata, piajani. ¹⁹ Jesús nexata taenuta higeranae namuto muxuneneta. Nexata Jesús imoxoyolia higeranae, pecuai itsa xaina, pexaenexa. Pecuai itsiata apo xinae higeranae. Ëpebaxu saya tsanucae. Bajaraxuata nexata Jesús jumaitis higeranaejavabelia:

—¡Xamë baja apo nacuaitsimë tsane! jai Jesús.

Bajarapacuenia Jesús pejumaitisijavata, bepijia higeranae tēpanajereca yatabutopaya. ²⁰ Nexata Jesús pijajivi itsa tane bajaraxua, jamatabëcuenenabenajaca. Nexata Jesús pijajivi nayanijoba.

—¿Detsa pacuenia maponae bepijia tēpanajerecaje? najai.

²¹ Nexata Jesús jumaitis pijajivijavabelia:

—Xaniajanë pacuenia pacatsipaebijitsiatsi. Itsa pajamatabëjumaitsimë tsipae Dioso yabara: “Dioso nejumecovënëtsiana xua vajëtsianajë Diosojavabelia,” itsa pajamatabëjamë tsipae, nexata paxamë ata pacacajëpaejitsipa paneexanaenexa pacuenia exanaejë mapahigeranaejavabeliaje. Itsiata

ëbajarapacuenene paneexanaenexa, apo pacacaëjêpae tsipae. Pematatsënëa itsacuenejavanënu paneexanaenexa, pacacaëjêpaejitsipa. Nexata itsa pajumaitsimë tsipae mapatsutojavabelia ataje: “Natixire majotavecuaje. Pucaxanetojavabelia jopare,” itsa pajamë tsipae, pacajumecovënëtsipa. Nexata mapatsuto ataje paneitorobicuenia pacajumecovënëtsipa. ²² Nexata daxitacuene xua pavajëtsianame Diosojavabelia, pasivajamatabëjumaitsimë tsane mapacueniaje: “Xua vajëtajë Diosojavabelia, pepacuenene Dioso nejumecovënëtsiana,” pasivajamatabëjamë tsane. Nexata xua pavajëtsianame Diosojavabelia, Dioso pacajumecovënëtsiana, jai Jesús pijajivijavabelia.

Pacuenia Jesús caëjêpatsi daxitacuene pexanaenexa yabara pelivaisi

(Mr 11.27-33; Lc 20.1-8)

²³ Jesús junua temploboyalia. Nexata templobota Jesús jivi livaisi tsipaeba. Nexata templobota Jesús imoxoyorenatsi sacerdotevi, judíovi pijaancianovi yajava. Nexata bajarapamonae jumaitsi Jesúsjavabelia:

—¿Jipatsa pejamatabëcueneta pecanajetabiabivi, pecomuacaevinua, capitapame mapatemplobopanabovecuaje? jai bajarapamonae Jesúsjavabelia.

²⁴ Nexata Jesús jumaitsi bajarapamonaejavabelia:

—Xanë copiaya caejumeyo pacayanijobianatsi. Itsa paxamë panejumecanaviatsianame, nexata xanë juya pacatsipaebianatsi ponë nitoroba taexanaenexa bajarapacuenene. ²⁵ ¿Jipatsa jane pejamatabëcueneta Juanpijinë jivi bautisabaponapona? ¿Dioso tsaja pejamatabëcueneta? Itsa jume, ¿jivi tsaja pejamatabëcueneta? jai Jesús bajarapamonaejavabelia.

Nexata ëpamonae nabarëcuaicuaijai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabëcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovënëtsimë Juanpijinë pepaebilivaisi?” nacajai tsipae. ²⁶ “Jivi raja saya pejamatabëcueneta Juanpijinë jivi bautisabaponapona,” itsa jai tsipaetsi, nexata jivi belia nacabeyejebijitsipa. Bajarapacuenia nacabeyejebijitsipa tsipaji raja Juanpijinë yabara daxitajivi sivajamatabëjumaitsi: “Juanpijinë raja pepacuenene Diosojumepaebinëmi,” sivajamatabëjai, najai sacerdotevi, judíovi pijaancianovi yajava.

²⁷ Nexata saya bajarapamonae jumaitsi Jesúsjavabelia:

—Apo payapëtaenë ponë Juanpijinë itorobatsi jivi pebautisabaponaenexa, jai.

Nexata Jesús jumaitsi bajarapamonaejavabelia:

—Nexata xanë ata apo pacatsipaebi tsanetsi ponë nitoroba taexanaenexa bajarapacuenene, jai Jesús.

Pacuenia Jesús jivi livaisi tsipaeba anijanëbeje pexënatobeje pexainanë pelivaisicuenia yabara pelivaisi

²⁸ Jesús icatsia jumaitsi sacerdotevijavabelia, judíovi pijaancianovijavabelia ata:

—Panejumecanaëjëtsianame palivaisi aeconoxae pacatsipaebijitsiatsi. Pebi xaina anijanëbeje pexënatobeje. Nexata pexënatojavabelia jumaitsi: “Taxënato, ajena netonacuenebianame tajauvabacabota,” jai pexënatojavabelia. ²⁹ Nexata bajaraponë paxajavabelia jumaitsi: “¡Jume!

¡Apo jitsipañë tanacuenebija! jai. Itsiata xuacujinae bajaraponë icatsia najamatabëxaina. Nexata jamatabëjumaitsi: “Xanë baja rovia pibisiajamatabëcuene najamatabëxainajë. Nexata baja ponajë taxa tatonacuenebinexa,” jamatabëjai. Naropota baja penacuenebinë.

³⁰ Bajaraxuacujinae pexënatobeje pexainanë pona icatsia itsanë

pexënatojavabelia. Bajaraponëjavabelia ata jumaitsi: “Taxënato, ajena netonacuenebianame tajauvacabota,” jai pexënatojavabelia. Nexata jejai itajara pexënato. Itsiata apo ponae. ³¹ ¿Detsa ponë bajaraponëbejeyajuvënënë paxa jumecovënëta? jai Jesús bajarapamonaejavabelia.

Nexata bajarapamonae jumaitsi Jesúsjavabelia:

—Copiata ponë paxa itorobatsi, apo jejai ata, itsiata paxa tonacueneba, bajaraponë paxa jumecovënëta, jai.

Nexata Jesús jumaitsi bajarapamonaejavabelia:

—Xaniajanë pacuenia pacatsipaebijitsiatsi. Bajara pijinia itsane pamona copabiana pibisiacuene pexanabiabijavami, pamonaenajamatabëcuene pënëyorotsiana Diosojavabelia. Impuestomatamo gobiernopejamatabëcuene petomatamoyanijobabiabivimi ata jonena Dioso pijanacuayabetsia itsa najamatabëcuene pënëyorota Diosojavabelia. Petiriavi palata pepitsinexa pevitota pibisiacuene pexanabiabivimi ata jonena Dioso pijanacuayabetsia itsa najamatabëcuene pënëyorota Diosojavabelia pibisiacuene pexanabiabijavamivecua. Itsiata baitsi jane paxamë apo pajonemë tsane. ³² Juanpijinë jivibautisabinë patajopa Dioso pejumelivaisi papecatsipaebinexa panenajamatabëcuene pënëyorotsinexa pibisiacuene paneexanabiabijavavecua. Itsiata paxamë apo pajumecovënëtsimë bajarapalivaisi. Itsiata bajarapalivaisi jumecovënëta impuestomatamo gobiernopejamatabëcuene pematamoyanijobabiabivi. Petiriavi palata pepitsinexa pevitota pibisiacuene pexanabiabivimi ata jumecovënëta bajarapalivaisi. Paxamë patae atamë bajarapamonae pejumecovënëtsijava, itsiata apo panajamatabëcuene pënëyorotsimë panejumecovënëtsinexa Dioso, jai Jesús bajarapamonaejavabelia.

Pacuenia exana pijamatabëcuenebejevi, itsanë pijauvacaboto petoevetsivi, yabara pelivaisi

(Mr 12.1-12; Lc 20.9-19)

³³ Icatsia Jesús jumaitsi sacerdotevijavabelia, judíovi pijaancianovijavabelia ata:

—Xaniavaetsia panemuxunaevere mapalivaisije. Pijaira pexainanë pijairata uba ayaibacoboxaneto uvavënëjava. Bajaraxuacujinae pijaira mata-toyorotsia, ibopanaxanetonë mataropotsia pefaratsijavata, yacaranata. Bajaraxuyacaranatsijava athëëabetsia apia jivitonë matatoxenetsia. Bajaraxuacujinae irata méthë cueyeta. Nexata pecueyetsimëthëjavata exana uvacuuaibarëmene pecayujucabiabijavanexa. Bajaraxuacujinae pijauvacaboto tuatuajëta exananuta piapiabotsia, penacuaitsimatacabi itsa tonaveretatsi, athëëyo pevetaabiabeaenexa pijauvacaboto.

—Nexata bajaraponë itsamonae evetsiaexana pijauvacaboto. Uvacaboto pexainanë jumaitsi petoevetsivisjavabelia: “Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonë itorobiarenajë xua panetotsatsianame tanetopitsinexa,” jai uvacaboto pexainanë petoevetsivisjavabelia. Nexata uvacaboto pexainanë tajë nacuavelia pona. ³⁴ Itsa baja uvacaboto pexainanë yapëtane pecopiapatsijava uvacuui penaveretsimatacabi penotsinexa, nexata uvacaboto pexainanë itoroba pijajivi. Itoroba petoevetsivisjavabelia petsicobetsatsinexatsi. ³⁵ Nexata uvacaboto pexainanë pijajivi uvacaboto petoevetsivitsi totaicsi. Caenë bajarapamonaejajuvënënë toconibabitsi. Itsanë pecuene tobexayabatsi. Itsanë ibotonëta totseconatsi. ³⁶ Nexata uvacaboto pexainanë icatsia itsabitsaëto pijajivi itorobalia. Bajara icatsia pacuenia exana uvacaboto pevetsivi.

³⁷ 'Nexata uvabacabo pexainaenē itoroba icatsia pexēnato jane baja. Uvabacabo pexainaenē jamatabējumaitsi: "Netoyaiyataena meta taxēnato," jamatabējai. ³⁸ Itsiata baitsi jane uvabacabo petoevetsivitsi uvabacabo pexainaenē pexēnato ata apo toyaiyataetsi. Itsa tane uvabacabo pexainaenē pexēnato, bajarapamonaē najumaitsi: "Mara ponėje paxa pevēnamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane," najai uvabacabo petoevetsivitsi. ³⁹ Nexata icatsia uvabacabo pexainaenē pexēnato ata tovaetabatsi. Caponaliatsi bajarapauvabacabo pēnēyabelia. Nexata uvabacabo pexainaenē pexēnato ata bajarapacuenia icatsia tobeyaxuabatsi, jai Jesús.

⁴⁰ Nexata bajarapalivaisi yabara Jesús yanijoba sacerdotevijavabelia, jud'ovi pijaancianovijavabelia ata. Jesús jumaitsi:

—Uvabacabo pexainaenē itsa patsiarena, ¿de tsæta xua exanaena uvabacabo petoevetsivitsijavabelia? jai Jesús bajarapamonaējavabelia.

⁴¹ Nexata bajarapamonaē jumaitsi Jesúsjavabelia:

—Pijauvabacabo raeta pexainaenē apo itaxutotsoniatæ tsane. Nexata verebiabiana bajarapamonaemi pibisiacuene pexanaevi. Nexata icatsia itsamonaē evetsiaexanaena bajarapauvabacabo. Nexata uvacuai penaveretsimatacabi bajarapamonaē itsa nota, tsicobetsatsianatsi pacuenia baja tocaējētatsi uvabacabo pexainaenē perajutsinexatsi, jai bajarapamonaē.

⁴² Nexata Jesús jumaitsi bajarapamonaējavabelia:

—Payapētaneme rabaja pacuenia Dioso pejumelivaisibaxutota tajjēvelia jumaitsi xanē yabara. Iboto pelivaisicuenia Dioso pejumelivaisibaxutota jumaitsi xanē yabara mapacueniaje:

Paiboto itsamonaē boexanaevi naitaxutojematabuatsiana petsitaabejexaetsi itajara, bajarapaiboto itsanē pitsiana. Nexata bajarapaibotota xaniavaetsia nayaetsiana botabu daxita itsaibo matatoxenetsia. Vajatuxanenē Dioso raja exanaena bajarapacuenia. Nexata bitso nacatsita pexaniacuene tsane bajarapacuenia, jai tajjēvelia Dioso pejumelivaisibaxutota xanē yabara.

'Bajarapacuenia tajjēvelia Dioso pejumelivaisibaxutota itsa jumaitsi, paxamē apo patanejumecovēnētsijavanexamē yabara jumaitsi. Dioso taneitapetsijava daxitajivi tacapanepaenexa yabara ata jumaitsi. ⁴³ Nexata pacuenia uvabacabo pexainaenē icatsia itsamonaē evetsiaexanaena, bajara pijinia pacuenia Dioso exanaena paxamējavabelia. Xua picani Dioso pacaevetsiaexana, copiarucaena. Nexata juya itsamonaē Dioso evetsiaexanaena bajaraxua, pamonaē xaniavaetsia jumecovēnēta Dioso pitorobicueniatsi.

⁴⁴ Pamonaē apo nejumecovēnētsi Dioso pexēnatocuenenē, bajarapamonaē bitso bejamatabējioibi tsane apo tanejumecovēnētsixæ. Pacuenia ibotojumata pefirapecaejivi, itsa tsapatecatsi, pevixæ bitso yanabejiobita, bajara itsane. Pamonaē naneconitsiaexanaenajē, bajarapamonaē pepacuenia naxuabiana daxitamatacabijavabelianexa. Pacuenia iboto pematacēnēbinētsi apo asaē, bajara itsane, jai Jesús bajarapamonaējavabelia.

⁴⁵ Sacerdotevi penamatacaitorobivi, fariseovi yajava, itsa jumetane bajarapacuenia Jesús pejumaitsijava, bajarapamonaē jamatabējumai tsenæ: "Vaxaitsi yabara raeta jumaitsi," jamatabējai tsenæ bajarapamonaē. ⁴⁶ Nexata picani bajarapamonaē Jesús jamatabēvaetabatsi. Itsiata bajarapamonaē jamatabējumaitsi: "Bajaraponē jivi tanetsi Diosojumepæbinēcuene. Nexata nacaitsacueniabijitsipa vaxaitsi itsa vaetabijitsipatsi maponėje," jamatabējai tsenæ bajarapamonaē. Bajaraxuata Jesús apo vaetabitsi.

22

*Pacuenia Jesús jivi livaisi tsipaeba penacasabifiesta pexanaenē peliv-
aisicuenia yabara pelivaisi*

(Lc 14.15-24)

¹⁻² Jesús icatsia livaisi tsipaeba sacerdotevijavabelia, judíovi pijaancianovi-
javabelia ata. Bajarapacuenia Jesús tsipaeba bajarapamonae peyapētaenexa
pacuenia itsamatacabi itsijitsia, pamatacabi Dioso pijajivi evetsiana. Jesús
jumaitsi mapacueniaje:

—Pepo nacuaevevtsinē fiesta exana pexēnato petonacasabifiestanexatsi.
³ Nexata nacuaevevtsinē jumaitsi pijajivijavabelia: “Pamonae baja tajēvelia
junatajē, patsipaebare baja tanetopatsinexarena fiestanexa jane baja,” jai
nacuaevevtsinē pijajivijavabelia. Pijajivi baja nexata pona petsipaebinexa.
Itsiata pejunatsivi apo jitsipae peponaejava. Nexata nacuaevevtsinē
pijajivi naviabarena petsipaebinexa pijatuxanenējavabelia. ⁴ Nexata
nacuaevevtsinē itsamonae icatsia pijajivi itorobalia pesivaponaenexalia.
Nacuaevevtsinē jumaitsi pijajivijavabelia: “Pajumaitsimē tsane
tajunatsivijavabelia: ‘Veretejeba rabaja panexaejavanexa. Beyaexana
rabaja baca penasitsivi, becerro yajava. Daxita rabaja veretejeba
panenabaninexa. Naxanitsia. Daxita pina paponae remelia,’ pajamē tsane
tajunatsivijavabelia,” jai nacuaevevtsinē pijajivijavabelia. ⁵ Itsiata baitsi
jane bajarapamonae icatsia sivaponaē atalia, nacuaevevtsinē pejunatsivi
apo jejai. Pejunatsiviyajuvēnēnē itsanē pona pijapabianējavabelia.
Itsanē pijinia pona penavijatsinexa. ⁶ Itsamonae nacuaevevtsinē
pijajivi taicatsi. Bejobiaexanatsi pibisiacuenia. Beyejebatsi baja
belia. ⁷ Bajaraxuata nexata nacuaevevtsinē bitso baraanapana
pejunatsivimijavabelia. Nexata nacuaevevtsinē itorobalia vajabitsaēvi
pebenexa pamonae tobeyejebatsi pijajivi. Itorobanua pijatomaranēmi
ata petotajuitsinexa. ⁸ Bajaraxuacujinae nacuaevevtsinē icatsia
pijajivijavabelia jumaitsi: “Daxitacuene baja picani veretejebiaexanajē
taxēnato penacasabifistanexa. Itsiata baitsi jane tajunatsivimi apo
netopatsirena. ⁹ Paponae remelia pinijicallexanetonējavabelia. Nexata
daxita pamonae pacaxitarabaponaename bajarapacallexanetonējava,
pajunataponaename taxēnato penacasabifiestajavaberena pepatsinexa,”
jai nacuaevevtsinē pijajivijavabelia. ¹⁰ Nexata nacuaevevtsinē pijajivi
ponalia. Najetarubena callexanetonējava. Junatapona pajamatabēcuenebejevi,
pejamatabēcuenexanepanaēvi ata. Nexata bajarapamonae barēpona fiesta
pexanaebojavabelia. Nexata pabota fiesta exana, vēnēca jivi.

¹¹ Nexata nacuaevevtsinē jonena bajarapaboyarena petaenexa petopat-
sivitsi. Daxita pamonae topatatsi, junapata xua banaxataba itsa pona
penacasabifiestajavabelia. Nexata nacuaevevtsinē taenuta bajarajota it-
sanē, saicayavirijava penaxatatsinē. Apo naxatatsi xua naxataba daxita.
¹² Nexata nacuaevevtsinē jumaitsi bajaraponējavabelia: “¿Detsa xuajitsia na-
junuame apo nenaxatatsinē pacuenia daxita naxataba penacasabifiesta-
javaberena penajonevi?” jai nacuaevevtsinē. Nexata bajaraponē moy-
nuca. ¹³ Nexata nacuaevevtsinē jumaitsi mesa pevetsivijavabelia: “Maponē
pataxucēreje. Pacobecēre yajava. Paxuaremelia bopēnēyavelia, pitaquiri-
javabelia. Bajarajotalia nuena. Navonosiniana bitso penavixaetaexa,”
jai nacuaevevtsinē. ¹⁴ Pacuenia fiesta pexanaenē ayaibitsaētoxaneto junatsi
ata, caejiviyobeje saya topatatsi, bajara pijinia itsi Dioso pejunatsivi ata.

Dioso picani ayaibitsaëtoxaneto junata pijajivinexa. Itsiata saya caejiviyobeje jumecovënëtsatsi, jai Jesús sacerdotevijavabelia, judíovi pijaancianovijavabelia ata.

Pacuenia Jesús jamatabëcueneëjëbiaya yanijobatsi impuestomatamo pe-matamotsijava yabara pelivaisi

(Mr 12.13-17; Lc 20.20-26)

¹⁵ Fariseovi nacaetuata penabarëcuaicuajainexa. Bajarapamonae najamatabëcuenejëpa Jesúsjavabelia jamatabëcueneëjëbiaya peyanijobinexa. Nexata Jesús bijiaya itsa jumecanaviata, Jesús picani peneconitsinexatsi nacuaeavetsinëjavabelia. ¹⁶ Nexata fariseovi itoroba pijajivi, Herodes pijajivi yajava, Jesúsjavabelia jamatacueneëjëbiaya livaisi peyanijobinexa. Nexata fariseovi pijajivi, Herodes pijajivi yajava, Jesúsjavabelia jamatabëcueneëjëbiaya jumaitsi:

—Jesús, payapëtaniji cajena nexaniajaicuene, xua yabara tsipaebabiabame livaisianë. Pexaniajaicuene tsipaebabiabame pacuenia Dioso jitsipa jivi petojinavanapaenexatsi. Petuxanevi ata xamë apo cujunavimë. Apo auramë livaisi netsipaebabiabijava. Nexata daxitajivi najëpaeya livaisi tsipaebabiabame. ¹⁷ Panetsipaebare pacuenia najamatabëxainame mapacue yabaraje. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabëcueneëjëbiaya Jesúsjavabelia.

¹⁸ Itsiata baitsi jane Jesús jamatabëcueneypëtane bajarapamonae jamatabëcueneëjëbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—Paneyamaxëitojorobivi, ¿detsa xuajitsia jamatabëcueneëjëbiaya paneyanijobame? ¹⁹ Panetsitajëre pitsipalatanëyota pamamatotabiabame impuestomatamo, jai Jesús bajarapamonaejavabelia.

Nexata bajarapamonae Jesús tocaponarenatsi palatanëyo. ²⁰ Jesús itsa tane bajarapalatanëyo, nexata jumaitsi bajarapamonaejavabelia:

—¿Jipatsa mapitabaraje, pevënënu, ruca mapapalatanëyojumataje? jai Jesús.

²¹ Nexata bajarapamonae jumaitsi Jesúsjavabelia:

—Romanonacua raja pepo pevetsinë pitabara, pevënënu, jai.

Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

²² Nexata Jesús xaniavaetsia itsa jumecanaviata, bajarapamonae jamatabëcuenenabenajaca bajarapacuenia Jesús pejumaitsijavata. Nexata baja copatatsi Jesús jamatabëcueneëjëbiaya peyanijobijavatsi. Naviaba baja bajarapamonae.

Pacuenia Jesús tsipaeba jivi petëpaecujinae icatsia piasaëjavanexa yabara pelivaisi

(Mr 12.18-27; Lc 20.27-40)

²³ Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, icatsia apo asaë tsane,” jai tsabiabi. Nexata saduceovi imoxoyorenatsi Jesús. Saduceovi Jesúsjavabelia jumaitsi mapacueniaje:

²⁴ —Jesús, Moiséspijinë bajayata vajanacatoyaquinaelivaisi, jumaitsi mapacueniaje: “Ponë pematapijinë pepua penacojiobinë baja, totëpatsi pexi

xainaenejeva, nexata juyapijinē bepita pematapijinēmi pijavami. Bajara-pacuenia juyapijinē bepita pematapijinēmi pijavami pexi pexainaenexa bajarapovajavabelia. Nexata pexi itsa xainabeje, bematapijinēmi pexi petaenexa daxitajivi,” jai Moiséspijinē bajayata vajanacatoyaquinaelivaisi. ²⁵ Nexata jinavanapa ēnacaemonaē siete ponēbeje paxanējavata. Pepo matapijinē copiaya nacojioba. Nexata bajaraponē pijava vecuatēpa pexi xainaenejeva. Nexata pematapijinēmi pepēnarucaenē pita pematapijinēmi pijavami. ²⁶ Nexata icatsia bajaraponē ata tēpa pexi xainaenejeva bajarapovajavabelia. Nexata icatsia itsanē tuatujēmatapijinē pita bajarapova. Bajara icatsia ponē ata tēpa pexi xainaenejeva bajarapovajavabelia. Bajarapacuenia tēpa daxita siete ponēmibeje nacaemonaemi, bajarapova pepitaponaevi. Itsiata itsanē ata pexi apo xinae bajarapovajavabelia. ²⁷ Bajaraxuacujinae bajarapova ata tēpa baja. ²⁸ “Jivi raja petēpaecujinae, Dioso icatsia asaēyaexanaenatsi,” jamē. “Detsa nexata ponē bajarapamonaeayajuvēnēnē pijava tsane bajarapova bajarapamatacabi? Daxita pamonaē siete ponēmibeje nacaemonaē pitapona picani bajarapovami, jai saduceovi Jesúsjavabelia.

²⁹ Nexata Jesús jumaitsi saduceovijavabelia:

—Paxamē saya pajamatēbēcuenenavēxaniabame. Paxamē raja apo payapētaemē pacuenia Dioso pejumelivaisibaxutota jumaitsi. Apo payapētaemēna pacuenia Dioso caējēpatsi daxitacuenē pexanaenexa. Bajaraxuata jamatabēcuenenavēxaniabiaya paneyanijobame: “Detsa ponē pitsiana bajarapova?” panejamē. ³⁰ Pamatacabi raja petēpaevimi Dioso icatsia asaēyaexanaenatsi, apo nacojiobi baja tsane. Bajarapamatacabita itsajivi ata pexēnatoyo apo canajetsi tsane pebijavabelia petonacojiobinexatsi. Bajarapamonae nacojiobinejeva, jinavanapaena athēbētatsia pacuenia ángelevi jinavanapa. ³¹ Itsa pepacuenē paxamē xaniavaetsia paneyanijobame paneyapētaenexa Dioso icatsia piasaēyaexanaejavanexatsi petēpaevimi, nexata pacatsipaebianatsi. Paxamē rabaja payapētaneme pacuenia bajayata Dioso jumaitsi. Abraham baja pepuatēpae, Isaac ata baja pepuatēpae, Santiago ata baja pepuatēpae, bajarapamonae yabara bajayata Dioso jumaitsi Moiséspijinējavabelia mapacueniaje: ³² “Xanē rabaja abaxē Abraham pijaDiosonē. Isaac ata pijaDiosonē. Jacob ata pijaDiosonē,” jai baja cajena Dioso bajayata petēpaevimi yabara. Bajarapacuenia Dioso pejumaitsixae, nayapētane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athēbētatsia, jai Jesús saduceovijavabelia.

³³ Jivi ayabitseaētōxaneto itsa jumetane bajarapacuenia Jesús pejumaitsi-
java saduceovijavabelia, jivi bitso jamatabēcuenenabenajaca Jesús petsipae-
bilivaisi yabara.

*Palivaisi bitso jivi bejumecovēnēta daxita Dioso pitorobilivaisianē pejume-
covēnētsijava matatoxenetsia yabara pelivaisi*

(Mr 12.28-34)

³⁴ Saduceovi Jesús peyanijobijumetsi, xaniavaetsia Jesús jumecanaviata. Nexata baja moya saduceovi. Nexata fariseovi itsa vēnētane saduceovijavabelia Jesús xaniavaetsia pejumecanaviatsijava, nexata fariseovi nacaetu-
ata penabarēcuaicuaijainexa. Nexata fariseovi najumejaita pacuenia yanijo-
bijitsia Jesúsjavabelia. ³⁵ Nexata fariseoviyajuvēnēnē, judiōvi pecujarubinē,

Jesúsjavabelia jamatabëcuenejëbiaya yanijoba. Jumaitsi Jesúsjavabelia mapacueniaje:

³⁶—Jesús, ¿detsa palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia? jai.

³⁷⁻³⁸ Jesús nexata jumaitsi judíovi pecujarubinëjavabelia:

—Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia, jumaitsi mapacueniaje: “Pasivamëre panijatuxanenë panijaDioso daxita panejamatabëëthëtojavavetsina, daxita panejamatabëcueneta ata, daxita panenajamatabëxainaesäeta ata,” jai. Bajarapalivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia. ³⁹ Bajaraxuacujinae pecotocaevilivaisi, palivaisi bitso jivi bejumecovënëta, jumaitsi icatsia mapacueniaje: “Pasivamëre itsajivi ata pacuenia paxamë panijacuata panasivamë,” jai. Bajarapalivaisi ata jivi bitso bejumecovënëta. ⁴⁰ Pajivi jumecovënëta bajarapalivaisibeje, Dioso baja tanetsi pejumecovënëtsijivicuene daxita Dioso pitorobilivaisianë. Nexata palivaisi ata bajayata Dioso Moisésipijinëta najumecopata, bajarapalivaisi ata pejumecovënëtsijivicuene Dioso tanetsi. Diosojumepaebivimi profetavi ata palivaisianë bajayata tsipaeba, bajarapalivaisi ata pejumecovënëtsijivicuene Dioso tanetsi, jai Jesús judíovi pecujarubinëjavabelia.

Pacuenia Jesucristo yabara Davidpjinë bajayata tajëvelia: “Tajatuxanenë,” jai, yabara pelivaisi

(Mr 12.35-37; Lc 20.41-44)

⁴¹ Fariseovi penacaetuatsijavata, fariseovijavabelia Jesús pijacuata nayabarajumaitsi mapacueniaje:

⁴² —¿Detsa pacuenia pasivanajamatabëxainaname Cristo itsa patsianica? ¿Jipatsa pexënato tsane? nayabarajai Jesús pijacuata fariseovijavabelia.

Nexata fariseovi jumaitsi Jesúsjavabelia:

—Davidpjinë pemomo tsane, jai.

⁴³ Nexata Jesús jumaitsi fariseovijavabelia:

—Pajamatabëcuenenavëxaniabame raja. Cristo raja Dioso pexënato. Bajayata Dioso pejumatsijava Cristo yabara, Davidpjinë Espiritu Santo pejamatabëcueneta tajëvelia jumaitsi mapacueniaje:

⁴⁴ Dioso jumaitsi tajatuxanenëjavabelia:

“Ecare abaxë tacujanena. Vecatsivajënae jumecovënëtsiaexanaenatsi abaxë copiaya nijavajabitsaë nitorobicueningana,” jai Dioso tajatuxanenëjavabelia,

jai bajayata tajëvelia Davidpjinë mapacueniaje Cristo yabara.

⁴⁵ “Nexata Davidpjinë bajayata Cristo yabara: “Tajatuxanenë,” itsa jai, nexata Cristo, Davidpjinë apo pemomo. Tsipaji baja cajena saicaya Cristo Dioso pexënato, nayabarajai Jesús pijacuata fariseovijavabelia fariseovi pecanajëtsinexa Cristo Dioso pexënatocuene.

⁴⁶ Nexata itsanë ata fariseoviyajuvënënë Jesús apo jumepitsitsi caejumeyo ata. Bajaraxuacujinae fariseovi, saduceovi ata, cujunava Jesúsjavabelia baja jamatabëcuenejëbiaya livaisi peyanijobijava.

23

Pacuenia Jesús tsipaeba fariseovijavabelia, judíovi pecujarubivijavabelia ata, bajarapamonae penaneconitsijava Diosojavabelia yabara pelivaisi
(Mr 12.38-40; Lc 11.37-54; 20.45-47)

¹ Jesús jumaitsi jivi ayaibitsaëtojavabelia, pijajivijavabelia ata:

²—Judíovi pecujarubivi, fariseovi ata, Dioso tocopatatsi jivi xaniavaetsia peyapëtaeyaexanaponaenexa pajamatabëcuenelivaisi xaina Dioso Moiséspijinëta penajumecopatsilivaisimi. ³ Nexata pajumecovënëtsianame daxita pacuenia bajarapamonae pacatsipaebapona. Itsiata baitsi jane pëtsa paexaname pacuenia bajarapamonae exanavanapa. Tsipaji xua bajarapamonae pacaitaveta paxamë paneexanaeyaniva, bajaraxua itsiata bajarapamonae exanabiaba. ⁴ Palivaisianë ayapëbeje itsajivi ata pejumecovënëtsinexa, bajarapalivaisianë pacatsipaebabiaba panejumecovënëtsinexa. Pamonae bajarapacuenia pacatsipaeba, itsanë ata bajarapamonaeayajuvënënë apo jamatabënajinae pexanaenexa bajarapacuenia. ⁵ Daxita xua bajarapamonae exana, exanabiaba saya jivi petaenexatsi. Bajarapamonae jamatabëjumai tsabiabi: “Bajaraxua itsa exanaenatsi, jivi nacayiyataena,” jamatabëjai tsabiabi. Bajarapamonae pitapata, pecofiata ata, becajonixicuenia pexanaejavaxita yacajonia cëbarubejebabiaba Diosojumelivaisi peyaquinaebaxutoxi. Bajarapamonae itsamonae matatoxenetsia pijajumanavaitabënexa, piapi-afleco pijanavatabuyalia cëbarubabiaba. Bajarapacuenia bitso jitsipabiaba pexanabiabinexa. ⁶ Bajarapamonae itsa najunatatsi fiestajavabelia penanabaninexa, nexata jitsipabiaba penaenexa pexaniavirijavanëta. Nexata natsiitapetabiaba penaenexa peyayataevitsi penaenexa petsinubijavanëta. Bajarapamonae itsa najoneyabiaba judíovi penacaetuatabibibota, jitsipabiaba penaenexa peyayataevitsi penaenexa petsinubijavanëta. ⁷ Bajarapamonae bitso jitsipabiaba jivi pebajacobinexatsi yayiyataeya callejava ata. “Patanecujarubinë,” pejaijavatsi ata, bitso jitsipabiaba, jai Jesús mapacueniaje fariseovi yabara, judíovi pecujarubivi ata yabara.

⁸ Icatsia Jesús jumaitsi jivi ayaibitsaëtoxanetojavabelia, pijajivijavabelia ata: —Pëtsa paxamë pajitsipame jivi papecajumaitsinexa paxamëjavabelia: “Patanecujarubinë,” papecajainexa. Tsjipaji daxita paxamë bepanacaemonamë Dioso panejumecovënëtsivixae. Xanë, caenënë Cristonë, athëbëvetsica Dioso taneiforobinëtsica jivi tacapanepaenexa, panexainame patacujarubinënexa. ⁹ Itsanë itsa pacacujaruba, “Axa,” pajamë pëtsa bajaraponëjavabelia. Tsjipaji caenë paneaxa paxainame, ponë eca athëbëtatsia. ¹⁰ Pëtsa pajitsipame itsamonae papecajumaitsinexa: “Jivi pevetsinë,” papecajainexa. Tsjipaji xanë, caenënë Cristonë, patacaevetsinë. ¹¹ Ponë paxamëyajuvënënë pacavecuayajamatabëcuenenë, bajaraponë pacayavenonabiaba padaxitamë. ¹² Pajivi daxitajivi matatoxenetsia pijacuata ayaijamatabëcuenejivi natane, bajarapajivi itsamatocabi daxitajivivecua beveliajamatabëcuenejivi Dioso exanaenatsi. Pajivi pijinia daxitajivivecua pijacuata beveliajamatabëcuenejivi natane, bajarapajivi itsamatocabi daxitajivi matatoxenetsia ayaijamatabëcuenejivi Dioso exanaenatsi, jai Jesús jivi ayaibitsaëtoxanetojavabelia, pijajivijavabelia ata.

¹³ Jesús icatsia jumaitsi fariseovijavabelia, judíovi pecujarubivijavabelia ata:

—¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënua, ayaineconi panatsixainame Diosojavabelia! Pacuenia bo babaupaxatata jivi pejonayaniva, bajara bepacuenia paxamë paexaname. Itsamonae jitsipae ata pejonenexa Dioso pijanacuayabetsia, apo pacopat-simë pejonenexa saicayalivaisi panecujarubixae. Paxamë ata apo pajitsi-paemë panejonenexa Dioso pijanacuayabetsia.

¹⁴ ¡Paxamë saya jivi paneyamaxëitojorobivi! ¡Paxamë judíovi panecujarubivi, pafariseovimënua, ayaineconi panatsixainame Diosojavabelia!

Yamaxëitojorobiaya pavecuanotabiabame pamonajivi pevecuatëpaevanëtsi pecobecovëjavaximi. Bajaraxuacujinae pinijicuenia itajara Diosojavabelia pavajëcabiabame. Itsiata pepo panexaniajajamatabëcueneta apo pavajëcabiabimë Diosojavabelia. Bajarapacuenia pavajëcabiabame saya jivi papacataenexa Dioso itajara bitso bepanejumecovënëtsivi. Bajaraxuata bitso ayaicuenia Dioso pacananeconitsiaexanaena pamatacabi Dioso naneconitsiaexanaena daxita pamona Dioso apo pejumecovënëtsivi.

15 'jPaxamë saya jivi paneyamaxëitojorobivi! jPaxamë judíovi panecujarubivi, pafariseovimënuu, ayaineconi panatsixainame Diosojavabelia! Pali-vaishi pacajinavanapame, caejivi ata panejumecovënëtsiaexanaenaxa, papacacueniejëpaenexanua, ayaicuenia daxitajava jivi patsipaeburutame. Nex-ata pajivi pacajumecovënëta, bajarapajivi pevajënaeyabelia bitso naneconitapona Diosojavabelia. Nexata paxamë panejamatabëcueneta bajarapajivi paxamë matatoxenetsia bitso Dioso naneconitsiaexanaenatsi pexuabinexatsi infiernojavabelia.

16 'jPaxamë apo payapëtae atamë, Dioso pejumelivaisi jamatabëcuenenavëxaniabiaya pacujarubabiabame itsamona! Nexata paxamë panecujarubijamatabëcueneta bajarapamona pananeconitsiaexaname Diosojavabelia. jBajaraxuata ayaineconi panatsixainame Diosojavabelia! Paxamë jivijavabelia jamatabëcuenenavëxaniabiaya pajumaitsimë tsabiabi: "Pajivi itsanëjavabelia najumecapanepaeya jumaiti pejumexaniataenexatsi: 'Catoexanaenatsi pepacuene. Cajumaitsitsi cajena templobo pevënëta,' jai, apo itsacuene. Bajarapajivi pejumaitsicovëya apo exanae ata, itsiata apo naneconitsi Diosojavabelia," pajamë tsabiabi. "Pajivi rajane itsanëjavabelia jumaiti pejumexaniataenexatsi: 'Catoexanaenatsi pepacuene. Cajumaitsitsi cajena templobopijiorojavanë pevënëta,' jai, bajara jane xua abeje. Nexata bajarapajivi exanae pejumaitsicovëya penaneconitsiyaniva Diosojavabelia," pajamë tsabiabi jivijavabelia.

17 Pajamatabëcuenenavëxaniabame raja saya bajarapacuenia itsa pajumaitsimë. Biji rajane templobo beyaiyatanetsi bajarapatemplobopijiorojavanë matatoxenetsia. Bajarapaorojavanë ata yayatanetsi. Tsipaji bajarapaorojavanë templobopijiorojavanë. 18 Jamatabëcuenenavëxaniabiaya pajumaitsimë tsabiabinua: "Pajivi itsanëjavabelia najumecapanepaeya jumaiti pejumexaniataenexatsi: 'Catoexanaenatsi pepacuene. Cajumaitsitsi altarvënëjava pevënëta,' jai, apo itsacuene. Bajarapajivi pejumaitsicovëya apo exanae ata, itsiata apo naneconitsi Diosojavabelia," pajamë tsabiabi. "Pajivi rajane pejumexaniataenexatsi itsanëjavabelia jumaiti: 'Catoexanaenatsi pepacuene. Cajumaitsitsi altarvënëjavajumata pebuatsiofrenda pevënëta,' jai, bajara jane xua abeje. Nexata bajarapajivi pepacuene exanae pejumaitsicovëya penaneconitsiyaniva Diosojavabelia," pajamë tsabiabinua jivijavabelia. 19 Paneamatabocotajavi, bepaneitatsëcënavanapaevinua panejamatabëëthëtota. Biji rajane beyaiyatanetsi altarvënëjava, bajarapaaltarvënëjavajumata pebuatsiofrenda matatoxenetsia. Bajarapaofrenda ata yayatanetsi. Tsipaji altarvënëjavajumata boca. 20 Pajivi jumaiti: "Cajumaitsitsi altarvënëjava pevënëta," jai, caecuenia yajavavënëjona bajarapaaltarvënëjavajumata pebocaofrenda.

21 Pajivi pijinia najumecapanepaeya jumaiti pejumexaniataenexatsi: "Cajumaitsitsi templobo pevënëta," jai, caecuenia yajavavënëjona bajarapatemplobota peponaponaenë Dioso. 22 Pajivi pijinia najumecapanepaeya jumaiti pejumexaniataenexatsi: "Cajumaitsitsi athëbëtsia panacua pevënëta," jai, caecuenia yajavavënëjona

Dioso pijatrono. Caecuenia yajavavēñejonanua Dioso, ponē ecabiaba bajarapatronota pitorobabiabinexa pijajivi.

²³ 'iPaxamē jivi paneyamaxēitojorobivi! iPaxamē judiōvi panecujarubivi, pafariseovimēnua, ayaineconi panatsixainame Diosojavabelia! Panenacanabijava diez xuabejeyajuvēñejava, caejavayo, parajutabiabame ofrendacuenia Diosojavabelia. Daxitaviria paneubijavaxi ata, diez xuabejeyajuvēñejava, caejavayo, parajutabiabame ofrendacuenia Diosojavabelia. Bajarapacuenia parajutabiabi atamē, apo pajumecovēñetsimē itsalivaisianē, Dioso papecatonajumecopatsilivaisianē, palivaisianē picani bitso Dioso pacatojitsipa panejumecovēñetsinexa. Bajarapalivaisianē picani pacaitoroba itsamonaejavabelia pexanicuene panetoxanabiabinexa. Pacaitorobanua picani paneitaxutotsoniataeayabiabinexa itsamonae ata. Pacaitorobanua picani xaniavaetsia panenajamatabēcuenecopatsinexa Diosojavabelia. Bajarapacuenia picani bepaexanavanapame pacopatsinejevamē bajaraxua, ofrendacuenia panerajutabiabijava Diosojavabelia. ²⁴ iPaxamē apo payapēta atamē Dioso pejumelivaisi, jamatabēcuenenavēxaniabiaya pacujarubabiabame itsamonae! Palivaisianē Dioso najumecopata panejumecovēñetsinexa, bajarapalivaisianē yajuvēñelivaisixi, saya beveliajamatabēcuenelivaisixi, pacaasaēmē tsavanapae. Palivaisianē picani Dioso bitso pacatojitsipa panejumecovēñetsinexa, caranata panamuxujematame. Nexata panecujarubivi panecujarubicuenia pexanavanapaexae, panecujarubivi ata naneconita Diosojavabelia pacuenia paxamē pananeconitame Diosojavabelia.

²⁵ iPaxamē jivi paneyamaxēitojorobivi! iPaxamē judiōvi panecujarubivi, pafariseovimēnua, ayaineconi panatsixainame Diosojavabelia! "Najamatabēcuenebijianaejitsipajē Diosojavabelia," panejamatabējaitsiabiabixae, panecaxaevajēnae panecaxaenēanē, taza ata, naniavelia paquiatabiabame xaniavaetsia panijasalinaucuenia. Tsipaji jamatabēcuenenavēxaniabiaya pajamatabējumaitsimē tsabiabi: "Itsa caxaejitsipajē xaniavaetsia quiatsinejevanē, Diosojavabelia naneconitsipajē," pajamatabējamē tsabiabi. Itsiata baitsi jane panejamatabēēthētota bēpēnēa panajamatabēxainabiabame pibisiacuene. Panajamatabēxainabiabame itsanē pecobecovē paneyacajērētsinexa. Panajamatabēxainabiabamenua panexainaenexa ayaijava ēpaxamēnexa. ²⁶ Paxamē pafariseovimē, bepaneitaxutotsēcēnaevi panejamatabēēthētota. Pajivi quiata pecaxaenē, taza yajava, piaxuirajibinexa, copiaya xaniavaetsia quiata pēñevēlia. Bajaraxuacujinae xaniavaetsia quiata pejumavelia. Bajara pijinia pacuenia paxamē ata copiaya Dioso pacajamatabēcuenequiatsi paneajamatabēcuenexuirajibinexa. Nexata bajaraxuacujinae pacajamatabēcuenecaējēpaena paneexanaenexa ēpexaniacuene pacuenia Dioso pacaitoroba.

²⁷ 'iPaxamē saya jivi paneyamaxēitojorobivi! iPaxamē judiōvi panecujarubivi, pafariseovimēnua, ayaineconi panatsixainame Diosojavabelia! Itsajota jivimēthēanē bobena, jivimēthēanējumavereca itsamonae caiquina peniojairata bajarapacuenia pitabētsinexa. Itsiata baitsi jane bēpēnēareca petēpaevimi petsabanaejava, pesi yajava, abeje. Bajaraxua apo jitsipaetsi vajajaysinexa. Bajara pijinia paxamē ata Dioso patsitajamatabēcuenēitsimē. ²⁸ Itsamonae naniavelia itsa pacatane, pacatane bepapexaniajamatabēcuenēvimē itajara. Itsiata baitsi jane panejamatabēēthētota bēpēnēa panajamatabēxainabiabame jivi paneyamaxēitojorobinexa. Itsajava ata pematatsēnēa pibisiacuene paneexanaenexa, panajamatabēxainabiabame.

²⁹ ¡Paxamē saya jivi paneyamaxēitojorobivi! ¡Paxamē judíovi panecujarubivi, paxamē ata pijinia pafariseovimē, ayaineconi panatsixainame Diosojavabelia! Bajayata panijasalinaivi Diosojumepaebivimi profetavi beyejeba. Nexata méthēca. Nexata mapamatacabitaje bajarapaprofetavimi peméthēanējumavereca bo paexanabiabame itabētsiaya, jivi itsa tane, penajamatabēnapitabiabinexa bajarapaprofetavimi. Pamonaemi ata bajayata tēpa, pamonaē aneconijibia pejinavanapaevimi Dioso pitabarata, peméthēanējumavereca aeconoxae mapamatacabitaje itabētsiaya parubabiabame itsacuenejavaxi. ³⁰ Bajarapacuenia itabētsiaya paneexanaecujinae, jivijavabelia pajumaitsimē tsabiabi mapacueniaje: “Vajasalinaivimi bajayata pibisiacuene exana. Beyaxuababiaba profetavimi. Pξανē bajarapamatacabi pajinavanapae atanē tsipae, apo payavenonaenē tsipae bajarapamonaemi pebeyabiabijava profetavimi,” pajamē tsabiabi. ³¹ “Vajasalinaivimi beyaxuababiaba profetavimi,” panejaixae, panavajunupaebame papemomoxicuenemē bajayata pamonaemi beyaxuababiaba profetavimi. Bajarapamonaemi papemomoxixaemē, pacuenia bajarapamonaemi jamatabēcueneitsi, bajara paxamē ata pajamatabēcueneitsimē. ³² Paxamē ata papibisiajamatabēcuenevixaemē, xanē ata jamatabēpanebeyaxuabame. ¡Panebeyaxuare paneveretsinexa xua panijasalinaivimi taxuxuaba!

³³ ¡Paxamē bitso pibisiacuene paneexanaevi! Pacuenia jomo rēcēpeca itsa tane petajuenajetarucaejava isoto, bajara paitsimē. Itsiata apo papanepaemē tsane infiernovecua panijaneconi yabara. ³⁴ Paxamē picani pacatoitorobianatsi Diosojumepaebivi profetavi. Pacatoitorobianatsinua picani bitso Dioso pijacuene peypētaeayaexanaevitsi. Pacatoitorobianatsinua picani xanē talivaisi papecatsipaebivinexa. Itsiata baitsi jane bajarapamonaeyajuvēnēvi itsamonaē pabeyaxuabaponaename. Itsamonaē cruzajavabelia pacobematabiaxuababianame. Itsamonaē pajumatitibabeyabianame penaneconitsivi panejumaconitabiabimacata judíovi penacaetuatabiabilonējava. Itsamonaē pabaraponabiabianame itsa tomaranējavabelia ata panebejiobiaexanaenexa. ³⁵ Bajarapacuenia nexata paxamē ayaineconi panatsixainaname Diosojavabelia. Daxita pamonaē aneconijibia pejinavanapaevimi Dioso pitabarata, bajayata panijasalinaivimi beyaxuababiaba. Nexata bajarapaneconimi yajava paxamē pacatsijumajopaena. Dioso pitabarata aneconijibia pejinavanapaevimi, panijasalinaivimi pebeyaxuabaponaejava, taxuxuaba Abelpijinēta. Bajaraxuacujinae icatsia pevājēnaeyabelia beyaxuabapona itsamonaē ata, Dioso pitabarata aneconijibia pejinavanapaevimi. Nexata bexējavaberena ata Berequíaspjinē pexēnatomi, Zacaríaspjinē, panijasalinaivi beyaxuaba. Zacaríaspjinēmi panijasalinaivimi beyaxuaba templobopanabota, templobobeje altarvēnējavabeje tuatujēta. ³⁶ Xaniajanē pacuenia pacatsipaebijitsiatsi. Daxita pamonaemi Dioso pitabarata aneconijibia pejinavanapaevimi, panijasalinaivimi beyaxuababiaba. Bajarapaneconimi yajava, paxamē aeconoxae panejinavanapaevi, pacatsijumajopaena Dioso papecananeconitsiaexanaenexa, jai Jesús judíovi pecujarubivijavabelia, fariseovijavabelianua.

Pacuenia Jesús najamatabēxainaeaya sivanua Jerusalén tomarapijivi yabara pelivaisi

(Lc 13.34-35)

³⁷ Jesús najamatabēxainaeaya sivanua Jerusalén tomarapijivi. Jumaitsi pesivanuejavata mapacueniaje:

—iPaJerusalén tomarapijivimë, pabeyabiabame Diosojumepaebivimi profetavi! iIbotonëta ata patseconabiabame bajarapacuenia panebeyaxu-ababiabinexa Diosojumelivaisi pecaponaevi paxamëjavaberena! iPacuenia vacara banacoxicaetuata pecorofetobëxëpanaberena, bajara pijinia pacuenia xanë ata picani bitso jitsipabiabajë patacaetuatsinexa, patacapanepaenexa picani panijaneconivecua! iItsiata baitsi jane paxamë apo pajejamë cajena! ³⁸ Panejumetaema. Dioso rabaja pacacopata papecaevetabiabjavami. Nexata baja panijatemplobota Dioso apo ponaponae. ³⁹ Xaniajanë pacuenia pacatsipaebijitsiatsi. Paxamë rabaja apo panetaemë tsane matavëjêa. Matapania itsa panejumecovënëtsianame Cristonëcuenenë, Dioso taneitorobinëtsica, icatsia panetaename. Itsa panesivajamatabëjumaitsimënua tsane: “Dioso, bitso yavenonare maponë najetarucaje, nejamatabëcueneta penajetarucaenë,” itsa panesivajamatabëjamë tsane xanë yabara, nexata jane baja icatsia panetaename itsa patsianicajë, jai Jesús mapacueniaje najamatabëxainaeya pesivanuejavata Jerusalén tomarapijivi.

24

Pacuenia Jesús pijajivi tajëvelia tsipaeba itsamatacabi itsanacuapijivi templobo pexuabijavanexatsica yabara pelivaisi

(Mr 13.1-2; Lc 21.5-6)

¹ Jesús pitsaparena temploboverena. Itsa baja Jesús vecuaponaejitsia templobo, pijajivi imoxorenatsi. Nexata Jesús pijajivi jumaitsi:

—Patajatuxanenë, templobo nataema pemuxuneneta penaeboxanetonë ata, jai.

² Nexata Jesús tajëvelia vajunupaeba itsamatacabi itsanacuapijivi bajarapoboxanetonëmi pepenetsijavanexatsica. Jesús jumaitsi pijajivijavabelia mapacueniaje:

—Xaniajanë pacuenia pacatsipaebijitsiatsi. Daxita raja paboxanetonë pataneme, bajarapoboxanetonëmi itsamatacabi itsanacuapijivi penetsianica irabetsica. Nexata paibotonë catsanaruba mapaboxanetonëtaje, itsai-boto ata pejumavereca apo bocae tsane, jai Jesús tajëvelia pijajivijavabelia.

Pacuenia itsijitsia Jerusalén tomarata, daxitanacuanëjava ata, mapanacua pecopiarucaevajënaeje yabara pelivaisi

(Mr 13.3-23; Lc 21.7-24; Lc 17.22-24)

³ Jesús eca petsutojumata, patsutojumata olivonaenë apaaxayo. Jesús itsa eca petsutojumata, nexata pijajivi pijaepatojavata imoxoyorenatsi peyanijobinexatsi. Nexata Jesús pijajivi jumaitsi:

—Patajatuxanenë, pajitsipajë patanetsipaebinexamë patayapëtaenexa paepatota copiapatsijitsia xua vajunupaebame. ¿Detsa peneta pitsicuene pataenajë icatsia itsa patsijitsiamëtsica? ¿Detsa peneta pitsicuene pataenajë mapanacua ata itsa vereverecaëjitsiaje? jai Jesús pijajivi.

⁴ Nexata Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaename. Pëtsa panacopatame itsajivi ata papecayamaxëitojorobinexa. ⁵ Tsipaji raja peyamaxëitojorobinexa, ayaibitsaëto patsiana hexanë itajara tsane. Bajarapamonae najumetsënëtsiaya jumai tsane: “Xanë raja Cristonë, athëbëvetsica Dioso taneitorobinëtsica jivi tacapanepaenexa,” jai tsane. Bajarapamonae jivi ayaibitsaëto yamaxëitojorobiana. ⁶ Vajabitsaë pexanaejava

imoxoyonacuanējāva, tajēnacuanējāva ata, pavēnēlivaisitaename. Itsiata pētsa pajunavame. Bajara peneta itsane mapanacua pevereveceavajēnaeje. Itsiata baitsi jane bepījia bajarapamatacabi mapanacuaje abaxē apo vereverecajuni tsane. ⁷ Mapanacuaje pevereveceavajēnaeje peneta copiaya itsaviriavi nabena itsavirivijavabelia. Itsanacuanēpijivi pijinia nabena itsanacuanēpijivijavabelia. Ayaijaniboxaneto najetarucaena itsanacuanējāva. Vitaneucene ata najetarucaena itsanacuanējāva. Ira najēabiana ayaicuenia itsanacuanējāva. ⁸ Daxita bajarapacuenē itsa pataename, saya abaxē taxuxuabaponaena piayaicuenē, jai Jesūs pijajivijavabelia tajēvelia pevajunupaebijavata pacuenia itsamatacabi itsijitsia mapanacuataje.

⁹ Icatsia Jesūs taxēvelia vajunupaeba pacuenia itsamatacabi itsijitsia mapanacuataje. Jesūs jumaiṣi pijajivijavabelia mapacueniaje:

—Nexata paxamē pacacaponaena nacuaeṣṣivijavabelia papecabējiobi-aexanaenexa. Nexata pacabeyejebiana. Daxitanacuanēpijivi pacaṣtoya tsabiabi tsane patajajivixaemē. ¹⁰ Nexata bajarapamatacabitā jivi ayaibṣaēto navecuacopabiana tanejumecovēnēṣṣjāva. Namataenetsia naitoya tsane. Namataenetsia nacanajetsiana nacuaeṣṣivi pecobeyabelia. ¹¹ Nexata ayaibṣaēto najetarubenaena jivi pēṣṣipaeṣṣaponaevinexa saicayalivaiṣi Dioso pejumelivaiṣivecua. BeDiosojumelivaiṣipaeṣṣivicuenia ṣṣipaeṣṣaponaena. Bajarapamonae yamaxēitojorobiana jivi ayaibṣaētoṣaneto. ¹² Jivi piṣṣiācuenē pexanavanapaevi, pevājēnaeyabelia ayaibṣaētoṣaneto ṣṣaponae tsane. Nexata ayaibṣaēto Dioso pejumecovēnēṣṣivi, namataenetsia penaasivajava vereverecaponaena. ¹³ Itsiata pajivi ajamatabēcuenesaē tsane Dioso pejumecovēnēṣṣijava pēṣṣepaejavabelianexa, bajarapajivi Dioso capanepaenatsi. ¹⁴ Itsamonae daxita nacuanējāva ṣṣipaeṣṣiana jivi peyapēṣṣaenexa imoxoyo baja pevājēnae Dioso pijajivi pecapanepaejavanexa. Bajaraxuacujinae jane baja mapanacua vereverecaenaje, jai Jesūs pijajivijavabelia tajēvelia pevajunupaebijavata pacuenia itsamatacabi itsijitsia mapanacuataje.

¹⁵⁻¹⁶ Icatsia Jesūs tajēvelia vajunupaeba papiayaicuenē itsamatacabi copiapatsijitsia Jerusaleṣn tomarata. Jesūs jumaiṣi pijajivijavabelia mapacueniaje:

—Diosojumepaeṣṣinēmi profeta Danielpijinē piayaicuenē tajēvelia pevajunupaebilivaiṣi bajayata yaquina. Xua panijatomaranēmi vereverecaeyaexanaeṣṣiatsi, bajaraxua pelivaiṣi yaquina. (Pajivi leṣiana mapalivaiṣije, yapēṣṣaena papiayaicuenē vajunupaeba mapalivaiṣitaje.) Nexata paxamē itsa pataename bajarapapiayaicuenē penucaejava templobota, nexata Judea nacua pejinavanapaevi pēṣṣa nubena. Naxanitsiayo rēcēpecaena pēṣṣutonējavabelia. ¹⁷ Pajivi pijabojumata athēbēyo ecaya, itsa vēnēlivaisitaena bajarapapiayaicuenē penucaejava templobota, bajarapajivi perunaecujinaeṣṣica, bepījia najetabajiraviana. Pēṣṣa joneya pijaboyalia peṣṣṣinexa pecobecovē. ¹⁸ Pajivi pijinia nacuenēṣṣaponaena pijapabita, itsa vēnēlivaisitaena bajarapapiayaicuenē penucaejava templobota, bepījia najetabajiraviana. Pēṣṣa naviatā pijaboyabelia peṣṣṣinexa penaxatabijava. ¹⁹ ¡Papetiriavi penacueto yacotajinavanapa, bitso bejiobi tsane bajarapamatacabi! ¡Bitso nabejiobitsiaya jinavanapaena! ¡Papetiriavi ata mitoopaenacetoxi isajinavanapa, bitso bejiobi tsane bajarapamatacabi! ²⁰ Bajaraxuata tajēvelia Diosojavabelia pavajēcare piayapēbejematacabitā papecatocopiapatsiyaniva bajarapapiayaicuenē. Nexata pamatacabi parēcēpecaename,

pexaniamatacabi Dioso pacatocopatsiana bitso nabejiobitsiaya paneponaeyaniva. Pavajëcarenuua penacueraevetsimatacabitaja bajarapapiayaicue papecatocopiapatsiyaniva, nexata papecatoayapëbejeyaniva. ²¹ Tsipaji raja bajarapamatacabi bitso jivi bejiobi tsane. Pabejiobicuene abaxë jivi caeto ata apo tae Dioso nuca pexanaecujinae, bajarapabejiobicuene taena. Bajaraxuacujinae icatsia itsamonae bejiobiaexanae atatsi tsane, itsiata bajarapacuenia bitso apo bejiobiaexanaetsi tsane. ²² Dioso epatua yatuucutsiana jivi bitso nabejiobitsiaya pejinavanapaematacabianëminexa bitso jivi nabejiobitsiaya pejinavanapaeyaniva. Dioso epatua itsa apo yatuucutsi tsipae bitso jivi nabejiobitsiaya pejinavanapaematacabianëminexa, caejivi ata apo asaë tsipae. Itsiata baitsi jane Dioso piavixaxae pijajivi, pitapetsivi, Dioso epatua yatuucutsiana bitso jivi nabejiobitsiaya pejinavanapaematacabianëminexa, jai Jesús pijajivijavabelia tajëvelia pevajanupaebijavata paiaiyaiucue itsamatacabi copiapatsijitsia mapanacuataje.

²³ Icatsia Jesús tajëvelia navajunupaeba icatsia pepatsijavanexatsica. Jesús jumaitsi pijajivijavabelia mapacueniaje:

—Nexata itsajivi yamaxëitojorobiaya itsa pacajumaitsi tsane: “Pataema. Mara Cristo nucaje,” itsa pacajai tsane, pëtsa pajumecovënëtame. Itsa pacajumaitsinua tsane: “Bajarajota nuca Cristo,” itsa pacajai tsane, pëtsa pajumecovënëtame. ²⁴ Itsamonae jumai tsane: “Xanë raja Cristonë,” jai tsane. Itsiata jemajai tsane. Itsamonae jumai tsane: “Diosojumepaebinëñë raja, profetanëñë,” jai tsane. Itsiata jemajai tsane. Bajarapamonae itajara exanaena pinijicuene pexanaejavanë peyamaxëitojorobinexa saya jivi. Nexata bajarapacuenia itsamonae yamaxëitojorobaponaenatsi. Itsiata pamonaepacuenia Dioso pijajivi, Dioso pitapetsivitsi, bajarapamonae apo yamaxëitojorobi tsanetsi. ²⁵ Tajëvelia rabaja maje pacatsipaebatsije. ²⁶ Nexata itsamonae itsa pacajumai tsane: “Cristo raja ponapona petusato nacuatatia. Naxanitsia. Panataename,” itsa pacajai tsane, pëtsa paponaremelia. Itsa pacajumaitsinua tsane: “Cristo raja ponapona mapænëyatuucutsibotaje. Naxanitsia. Panataename,” itsa pacajai tsane, pëtsa pajumecovënëtame. ²⁷ Payapëtaneme rabaja mapacuenieje. Yamaxë itsa nivejai tsajuni athëbëvetsica, caecuenia jivi bacotiatane daxitajava. Bajara pijinia peneta pacuenia daxitanacuanëpijivi caecuenia netaena pamatacabi patsianicajë xanë, Daxitajivi Pematapijinëñë. ²⁸ Payapëtaneme rabaja mapacuenie ataje. Quequeremonae bepijia bayapëtanë itsajota petuxutsaebinëñë boca. Nexata bajarajota bepijia banacaetua. Bajara pijinia pacuenia daxitanacuanëpijivi tajajivi bepijia yapëtaena tapatsijavatsica. Nexata bepijia nacaetuaena xanëjavaberena, jai Jesús pijajivijavabelia tajëvelia penavanupaebijavata icatsia pepatsijavanexatsica.

Pacuenia Jesús tajëvelia navajunupaeba icatsia pepatsijavanexatsica petëpaeacujinae yabara pelivaisi

(Mr 13.24-37; Lc 21.25-33; 17.26-30, 34-36)

²⁹ Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivajënaetsica jivi taena pecujunavicuene. Jivi nabejiobitsiaya jinavanapaena. Nexata jivi nabejiobitsiaya pejinavanapaematacabicujinae, matacabipijijuameto aitaquiri tsane. Meravipijijuameto ata aitaquiri tsane. Tulupu ata othopaenica irabetsica. Daxitacuene, xua rubena athëbëtatsia, najëbiana. Xaniavaetsia apo rubenae tsane. ³⁰ Bajaraxuacujinae jane baja xanë athëbëvetsica najetarucanajë, Daxitajivi Pematapijinëñë. Nexata daxitaviriavi mapanacuapijivi natsinuena pecajunavi pijaneconi yabara. Nexata bajarapaepatota, xanë, Daxitajivi

Pematapijinënë, jivi netaena athëbëvetsica itarërëbota tanajetaruaejava. Patsianicajë daxitacuene taevetsinexa. Tanivenivenaectotia yajavapatsianicajë. ³¹ Bajaraxuacujinae trompeta itsa najumetsiana ayaijumeta, itorbianaajë tajaängelevi. Angelevi daxitanacuanëjavaverena xanëjavaberena neto-caetuatsiana tajajivi, pamonae Dioso pitapetsivitsi, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

³² Jesús icatsia tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjere pacuenia itsi higeranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonenexa. ³³ Bajara pijinia pacuenia peneta itsa pataeneme pecopiapatsijava xua tajëvelia vajunupaebajë, nexata payapëtaeneme imoxoyo baja tavajënae tsane tapatsijavanexatsica. ³⁴ Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëajavabelia ata, apo vereverecae tsane. Matapania xua tajëvelia vajunupaebajë itsa baja copiapatsiana, bajarapamonae jane baja vereverecaena. ³⁵ “Itaboxo, ira yajava, tsitecaena daxitamatacabijavabelianexa,” jamatabëjai ata tsane itsamonae, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua tajëvelia vajunupaebajë, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia.

³⁶ Icatsia Jesús jumaitsi pijajivijavabelia:

—Itsajivi ata apo yapëtae pamatacabita, paepatota ata, copiapatsijitsia daxita xua tajëvelia vajunupaebajë. Athëbëpivivi ata, angelevi, apo yapëtae. Xanë, Dioso pexënato atanë, apo yapëtaenë. Caenë taxa Dioso yapëtane, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³⁷ Jesús icatsia tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Pacuenia bajayata jemata itsi pamatacabi Noëpijinë ponapona, bajara icatsia jemata itsane pamatacabi xanë, Daxitajivi Pematapijinënë, patsianicajë. ³⁸ Pamatacabi Noëpijinë ponapona ira pebubutsivajënaeya, jivi picani xaniavaetsia jamatejema pexaejava xevanapa. Apaevanapanua. Nacojiobapona itsamonae. Itsamonae pexënatoyonë pebijavabelia canajetapona petonacojiobinexatsi. Bajarapamonae jamatejema saya jinavanapa. Nexata bajarapamatacabi Noëpijinë ëpijamonae pinijibarcoxanetojavabelia barëjunua. ³⁹ Daxitajivi abaxë itsiata apo yapëtae paepatota tocopiapatsijitsiatsi peyabubutsijavanexatsi. Nexata itsajivi ata yapëtaenejeva jemata ayaiemaxaneto itsa jopa ira pebubutsinexa, yapëtane jane baja. Bajarapamatacabi bubuna daxitajivi. Bajara pijinia pacuenia itsajivi ata yapëtaenejeva xanë, Daxitajivi Pematapijinënë, tapatsijavanexatsica, jemata patsianicajë. ⁴⁰ Nexata bajarapamatacabita anijanëbeje najuanacuenebanucaenabeje pabita. Itsanë tanejumecovënëtsinë tsane. Itsanë apo tanejumecovënëtsinë tsane. Nexata tanejumecovënëtsinë pitsianatsi ángelnë. Apo tanejumecovënëtsinë copatanutsianatsi. ⁴¹ Bajara pijinia itsane petirivabeje ata. Najuacuabanucaenabeje caejavata. Nexata tanejumecovënëtsiva pitsianatsi ángelnë. Apo tanejumecovënëtsiva copatanutsianatsi.

⁴² Nexata nejamatabëcuenevetsiaya panecopiaevetavanapaename. Tsipaji raja apo panevajënaeyapëtaemë tsane paepatota xanë panijatuxanenënë

icatsia patsijitsianëtsica. ⁴³ Pacanaëjère mapacueneje. Bo pexainaenë itsa yapëtaejitsipa paepatota meravi pijaboyaberena patsijitsia pecobecovë petonacobetoxotsinënexatsi, nexata naëcotsiaya vajënaeevetsipa. Apo copatsi tsipae pijaboyaberena petojoneyanivatsi penacobetoxotsinënexa. ⁴⁴ Bajara pijinia pacuenia paxamë ata najamatabëcuenexaniavaetsiaya panecopiaeve-tavanapaename. Tspaji xanë, Daxitajivi Pematapijinënë, paepatota apo panejamatabënajinaemë tapatsijavanexatsica, jemata icatsia patsianicajë, jai Jesús pijajivijavabelia tajëvelia penavajunupaebijavata itsamatacabi icatsia pepatsijavanexatsica.

Pacuenia Jesús pijajivijavabelia livaisi tsipaeba petuxanenë pijajivitonëbeje pelivaisicuenia yabara pelivaisi (Lc 12.41-48)

⁴⁵ Jesús livaisi tsipaeba pijajivijavabelia petuxanenë pijajivitonëbeje pelivaisicuenia. Bajarapacuenia pijajivijavabelia tsipaeba copiaevetsiaya petonacuenebavanapaenexatsi icatsia pepatsimatacabitsicajavabelianexa. Jesús jumaitsi mapacueniaje:

—Petuxanenë pijajivitonë, ponë xaniavaetsia pijatuxanenë pecovëta tonacuenebaponaponaena, majamatabëcueneitsi tsaneje. Bajaraponë itsa-jamatabëcuene xainaenejeva, copiaevetaponaponaena pijatuxanenë pepatsijavabelianexa. Bajaraponë pijatuxanenë pijajivi pecovëta toevetaponaponaena piabatabiabinexa pexaejava caematacabi canacujitsia pacuenia pijatuxanenë itorobatsi. ⁴⁶ Bajaraponë bitso barëya tsane pamatacabi pijatuxanenë patsiana, xaniavaetsia pijajivi petoevetaponaponaexae pecovëta. ⁴⁷ Xaniajanë pacuenia pacatsipaebijitsiatsi. Ponë xaniavaetsia tonacuenebiana pijatuxanenë pecovëta, bajaraponë evetsiaexanaenatsi daxita xua xaina pijatuxanenë. ⁴⁸ Itsa bajaraponë piagamatabëcuenebejenë tsipae, nexata pijatuxanenë pecovëta jamatabëjumaitsi tsipae: “Tajatuxanenë ajibi tsarucea tsane bajayajebi,” jamatabëjai tsipae. ⁴⁹ Nexata toconibabeyabiabijitsipa pijatuxanenë pijajivi. Ayajiva xaeyabiabijitsipa. Naapaeyabiabijitsipana piaitajibivita. ⁵⁰ Nexata itsajota apo jamatabënajinae tsipae pijatuxanenë pepatsijavanexa, patsipa pijatuxanenë. ⁵¹ Nexata bajaraponë ayaicuenia naneconitsiaexanaejitsipatsi pijatuxanenë. Pacuenia jivi peyamaxëitojorobabiabivi, Dioso ayaicuenia naneconitsiaexanaenatsi, bajarapacuenia pijatuxanenë naneconitsiaexanaejitsipatsi. Nexata natsinuejitsipa. Navonosinijitsipana bitso penavixaetaexae, jai Jesús pijajivijavabelia petuxanenë pijajivitonëbeje pelivaisicuenia petsipaebijavata.

Bajarapacuenia Jesús tsipaeba pijajivi xaniavaetsia pecopiaevetavana-paenexatsi Jesús icatsia pepatsimatacabitsicajavabelianexa.

25

Pacuenia Jesús pijajivi livaisi tsipaeba diez papejanavabeje pijalámparabëxi pecaponaevi pelivaisicuenia yabara pelivaisi

¹ Jesús icatsia jumaitsi pijajivijavabelia:

—Pamatacabi icatsia patsianicajë, tajajivi peyapëtaexae tapatsijavanexatsica, jamatabëcueneaitavaya necopiaevetavanapaena. Itsamonae tajajivi

yapētae ata tapatsijavanexatsica, itsiata jamatabēcueneaitavaya apo necopi-aevetavanapae tsane. Bajarapacue ne yabara pacatsipaebianatsi mapalivaisije. Diez papejanavabeje yapētane itsava pejanava penacasabijavanexa. Nexata diez papejanavabeje pijalámparabēxi, caeva canacujitsia, xaniavaeta penaponaenexa. Nexata capona pijalámparabēxi pabojavabelia eca penacasabivanexa. Bajarajota vajēnaevetsijtsia pepatsijava penacasabinēnexa. Nexata itsa ponabeje penacasabijivibejenexa, bajara-papejanavi penaponaenexa bajarapajivibeje pepēta penacasabifistajavabelia. ²⁻⁴ Bajarapamonaeyajuvēnēvi, cinco povabeje, yapētae ata picani petsicaponaejavanexa aceiteranē pijalámparabēxinexa, itsiata apo tsicaponae itsa tovereverecatsi aceitera peepatsinexa icatsia pijalámparabēxijavabelia. Cinco pijinia povabeje peyapētaexae petsicaponaejavanexa aceiteranē pijalámparabēxinexa, tsicapona. ⁵ Nexata bajarapapetiriavi itayotena pijalámparabēxita. Bajayajebi picani vajēnaeevetena penacasabinēnexa pepatsijava. Nexata pijalámparabēxita paaceiteranē capona, tovereverecaponatsi baja. Tsipaji penacasabinēnexa abaxē cuenenajemata pepatsinexa. Nexata baja daxita bajarapapetiriavi belia itamajitsipana. Nexata baja majita. ⁶ Bajaraxuacujinae ayaimeravi tuatujēta jumetane pevavajajava. “iNajetaruca rajane baja penacasabinēnexa! iPapitsaparemena jane baja panecopiapitsinexa!” pejaijava jumetane. ⁷ Nexata daxita bajarapapetiriavi nonobapuna pecopiapitsinexa jane baja. Papetiriavi aceiteranē tsicapona, epaca pijalámparabēxijavabelia. Caeva canacujitsia pijalámparabēxi ayaiocitia exana. ⁸ Nexata papetiriavi apo tsicaponae aceiteranē, jumaitsi aceiteranē petsicaponaevijavabelia mapacueniaje: “Panenarajure tsiquirijavaxi aceiteraxi. Tsipaji patajalámparabēxi panetoitacaēcaēnapona,” jai bajarapamonae. ⁹ Itsiata aceiteranē petsicaponae vi jumaitsi: “Jume. Apo caējēpae. Paxanē ata meta apo panetocaējēpae tsipae. Paponaremelia. Panijacuta pacomuare itsajotalia canajetabiaba aceiteranē,” jai aceiteranē petsicaponae vi pijalámparabēxinexa. ¹⁰ Nexata papetiriavi aceiteranē apo tsicaponae pijalámparabēxinexa, ponalia aceiteranē pecomuacaenexa. Nexata pecovēta penacasabinēnexa patanajetaruca. Nexata papetiriavi aceiteranē tsicapona pijalámparabēxinexa, napona baja penacasabifistanexa pexanae-bojavabelia. Pejonecujinaelia baupaxatata. ¹¹ Bajaraxuacujinae aceiteranē pijalámparabēxi petsicomuacaevi pata. Nexata bajarapapetiriavi jumaitsi penacasabinēnexajavabelia: “iPanetobaupare! iPanetobaupare! jai tsanubena bojumavelia. ¹² Nexata penacasabinēnexa jumaitsi: “Xaniajanē pacuenia pacatsipaebijitsiatsi. Apo pacayapētaetsi cajena paxamē,” jai bajarapapetiriavijavabelia, jai Jesús mapalivaisije pijajivijavabelia.

¹³ Jesús icatsia jumaitsi pijajivijavabelia:

—Pacuenia cinco povabeje peyapētaexae, aceiteranē tsicapona pijalámparabēxinexa, bajara pijinia pacuenia paxamē ata paneyapētaexae, jamatabēcueneaitavaya panecopiaevetavanapaename. Tsipaji apo payapētaemē tsane pamatacabita, paepatota ata, xanē, Daxitajivi Pematapijinē, icatsia patsijitsianētsica, jai Jesús pijajivijavabelia.

Pacuenia Jesús pijajivi livaisi tsipaeba pijapalata pijajivi pevetsiaexanaenē pelivaisicuenta yabara pelivaisi

(Lc 19.11-27)

¹⁴ Jesús icatsia jumaitsi pijajivijavabelia:

—Tacovēta patajajivimē, itsamonae ata, pamonae tajajivi, panetonacuenebianame. Nexata pamatacabi icatsia patsianicajē,

pacuenia pacasivanajamatabēxainaejitsiatsi, aeconoxae pacatsipaebianatsi. Pacatsipaebianatsi comparacióncuenia mapacueniaje. Petuxanenē itsa ponaejitsia tajēnacuyabelia, junata pijajivi. Evetsiaexana pijapalata petoevetsinexatsi pecovēta.

¹⁵ Caenē canacujitsia evetsiaexanapona petocanacuenebinexatsi pecovēta pacuenia bajarapamonae caējēpatsi. Nexata petuxanenē pijinia evetsiaexana cinco mil ponēbeje pepovi, bitso penamatamotsivi. Itsanē pijinia evetsiaexana dos mil ponēbeje. Itsanē pijinia evetsiaexana mil ponēbeje. Bajaraxuacujinae petuxanenē pona tajēnacuyabelia.

¹⁶ Nexata jane baja ponē evetsiaexana cinco mil ponēbeje, canacueneba jane baja pecovēta bajarapalata. Nexata pematatsēnēa topitsapatsi icatsia itsacinco mil ponēbeje. Nexata baja daxifata diez mil ponēbeje caejavata.

¹⁷ Bajara pijinia pacuenia itsanē canacueneba dos mil ponēbeje. Nexata pematatsēnēa topitsapatsi icatsia itsados mil ponēbeje. ¹⁸ Itsiata baitsi jane ponē toeveta mil ponēbeje, pona pematayatsinexa pijatuxanenē pijapalata. Matayatsia mēthēteta irata.

¹⁹ Bexēa nexata najetaruca petuxanenē. Junata pijajivi peyapētaenexa pacuenia toevetatsi pecovēta pijapalata. ²⁰ Copiaya pata ponē cinco mil ponēbeje evetsiaexanatsi. Nexata bajaraponē tocanaviata pijatuxanenējavabelia diez mil ponēbeje. Jumaitsi bajaraponē pijatuxanenējavabelia:

“Nevetsiaexaname cinco mil ponēbeje tacatoevetsinexa. Bajara macatocanaviatatsi bajarapalataje. Catocanaviatatsi yajava icatsia itsacinco mil ponēbeje, xua nacanabajē bajarapalata,” jai bajaraponē pijatuxanenējavabelia.

²¹ Nexata petuxanenē jumaitsi: “Xanepana rabaja. Xaniavaetsia netoevetaponaponame. Itsajamatabēcuene apo najamatabēxainae. Tsiquirijavayo ata xaniavaetsia netoevetame. Nexata aeconoxae caevetsiaexanaenatsi pematatsēnēa ayaijaya. Jonemena xanējavaberena barēyaya neponaponaenexa xanējavata,” jai petuxanenē pijajivitonējavabelia.

²² Bajaraxuacujinae pata ponē dos mil ponēbeje evetsiaexanatsi. Nexata bajaraponē jumaitsi pijatuxanenējavabelia: “Nevetsiaexaname dos mil ponēbeje tacatoevetsinexa. Bajara macatocanaviatatsi bajarapalataje. Catocanaviatatsi yajava icatsia itsados mil ponēbeje, xua nacanabajē bajarapalata,” jai bajaraponē pijatuxanenējavabelia.

²³ Nexata petuxanenē jumaitsi: “Xanepana rabaja. Xaniavaetsia netoevetaponaponame. Itsajamatabēcuene apo najamatabēxainae. Tsiquirijavayo ata xaniavaetsia netoevetame. Nexata aeconoxae caevetsiaexanaenatsi pematatsēnēa ayaijaya. Jonemena xanējavaberena barēyaya neponaponaenexa xanējavata,” jai petuxanenē pijajivitonējavabelia.

²⁴ Icatsia pata ponē evetsiaexana mil ponēbeje. Bajaraponē jumaitsi pijatuxanenējavabelia: “Cacueneyapētanetsi. Xamē nijajivi apo itaxutobejibiataeyabiabimē. Xamē nijajivi ubiaexanabiabame neubiaexanabiabijava nexata bajarapamonae pejamatabēcueneta ayaijaya palata pecatopitsapaenexa. Bajara pijinia pacuenia xanē ata nevecupit-sipame xua nacanabijitsipajē nijapalata itsa canacuenebijitsipajē.

²⁵ Bajaraxuata junavajē. Ponajē irata tamatayatsiamēthētetsinexa nijapalata. Bajara manijapalata catocanaviatatsije,” jai bajaraponē pijatuxanenējavabelia.

²⁶ Nexata petuxanenē jumaitsi: “Tajajivitonē atamē, itsiata ajamatabēcuenebejemē. Afaetabimēnua. Xamē baja cajena yapētaneme tajajivi taubiaexanabiabijava, taubiaexanabiabijava nexata bajarapamonae pejamatabēcueneta ayaijaya palata tanetopitsapaenexa.

²⁷ Bajaraxuata xanepanaejitsipa itsa netocanacuenebiaexanaejitsipame tajapalata banco pevetsivijavabelia. Nexata aeconoxae banco pevetsivi tajapalata pecacovaetsijamatabëcuene netocanaviatsipa tajapalata pematatsënëa,” jai petuxanenë pijajivitonëjavabelia.

²⁸ Nexata petuxanenë jumaiitsi bajarajota penubenaevijavabelia: “Pavecuapire bajarapamil ponëbeje. Nexata juya parajure ponëjavabelia xaina diez mil ponëbeje. Tspijaji bajaraponë caëjöpatsi tanetoevetsinexa pematatsënëa.

²⁹ Tspijaji pajivi ayaijava baja xaina, pematatsënëa icatsia itsajava rajut-sianatsi. Nexata xainaena ayaijava. Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi. ³⁰ Maponë tajajivitonëje, itsacuenejavayonexa ata, apo netoxanepanae. Paxuabaremelia pitaquirijavabelia. Bajarajota natsinuena. Navonosinianua bitso penavixae-taexae,” jai petuxanenë, jai Jesús comparacióncuenia pijajivijavabelia.

Bajarapacuenia Jesús jumaiitsi pamonae pijaneconi pexainaevi Jesús penaneconitsiaexanaenexa pamatacabi icatsia patsianica.

Pacuenia Dioso naneconitsiaexanaena pijaneconi pexainaevi yabara peli-vaishi

³¹ Jesús tajëvelia navajunupaeba pacuenia itsamatacabi exanaejitsia mapanacuataje. Jesús jumaiitsi pijajivijavabelia mapacueniaje:

—Xanë, Daxitajivi Pematapijinënë, icatsia itsa najetarucaenajë daxitanacua taevetsinexa, ángelevi nematatoronaeya yajavanajetarucaenajë. Nexata ecaenajë tajapenivenivenaetronovënëjavata. ³²⁻³³ Nexata daxitanacuanëpijivi caetuatsianatsi taitabarata. Tsataponaeñajë bajarapamonae. Oveja pevetsinë ovejavecua chivo saicaya tsataponae. Nexata oveja pevetsinë petsavenononia chivo nubenaeyaexana. Pecujuanenia pijinia oveja nubenaeyaexana. Bajara pijinia pacuenia xanë tsataponaeñajë Dioso apo pejumecovënëtsivi, Dioso pejumecovënëtsivivecua. Dioso apo pejumecovënëtsivi tatsavenononia nubenaeyaexanaenajë. Dioso pijinia pejumecovënëtsivi tacujuanenia nubenaeyaexanaenajë. ³⁴ Nexata jumaiitsinë tsane tacujuanenia penubenaevijavabelia, Dioso pejumecovënëtsivi: “Naxanitsia. Paxamë taxa papacaitaxutotsoniataevi. Payajavajinavanapae-name taxa pijanacuataatsia, itsajotatsia pacatoxaniavaeta tajëvelia. Dioso pacatoxaniavaeta nacua pexanaejavaveliacujinae. ³⁵ Itsa tajani, paxamë taxaejava panerajutame. Itsa mera jitsipajë, panerajutame mera. Itsanacuaverena itsa patajë, panecopiapitame xaniavaetsia. ³⁶ Itsa ajibi bitso tanaxatatsijava, panerajutame tanaxatatsijavanexa. Itsa avitanenë, papatame patanetaenexamë. Itsa neeta penaneconitsivi pejebabiabibota, papatame patanetaenexamë,” janë tsane tacujuanenia penubenaevijavabelia.

³⁷ Nexata bajarapamonae nejumai tsane: “Tajatuxanenë, ¿detsa pacujinae nijanijavata patajaccarajutsi nexaejava?” nejai tsane. ¿Detsa pacujinae mera nejitsipaejavata patajaccarajutsi mera? nejai tsane. ³⁸ Itsa jume, nejumai tsane: “¿Detsa pacujinae itsanacuaverena nepatsinë patajaccopiapitsi xaniavaetsia?” nejai tsane. Itsa jume, nejumai tsane: “¿Detsa pacujinae pijajibijavata bitso nenaxatatsijava patajaccarajutsi nenaxatatsijavanexa?” nejai tsane. ³⁹ Itsa jume, nejumai tsane: “¿Detsa pacujinae niavitanejavata patajaponae patacaevetsinexa?” nejai tsane. Itsa jume, nejumai tsane: “¿Detsa pacujinae pecaetsijavata penaneconitsivi pejebabiabibota patajaponae patacataenexa?” nejai tsane. ⁴⁰ Nexata xanë jumaiitsinë tsane bajarapamonaejavabelia: “Xaniajanë pacuenia pacatsipaebijitsiatsi.

Daxita xua patoexaname paneyavenonaenexa tajajiviyajuvënëjivi, bevelijamatabëcuenevi petaevitsijavabelia, bajaraxua xanë taniji xanëjavaberena bepatanetoexanaejavamë,” janë tsane.

⁴¹ Nexata tatsavenonena penubenaevi, Dioso apo pejume-covënëtsivijavabelia, jumaitsinë tsane: “Panevecuanatsare panijaneconi paneyajavajinavanapaevi. Paponaremelia apo peverevereaeisotojavabelia. Bajarapaisoto Dioso tajëvelia toxaniavaeta dovathinexa, dovathi pijajivinexa ata. ⁴² Xanë itsa tajani, paxamë apo panerajutsimë taxaejava. Itsa mera jiitsipajë, apo panerajutsimë mera. ⁴³ Itsanacuaverena itsa patajë, apo panecopiapitsimë xaniavaetsia. Itsa ajibi bitso tanaxatatsijava, apo panerajutsimë tanaxatatsijavanexa. Itsa avitanenë, apo papatsimë patanevetsinexamë. Itsa neeta penaneconitsivi pejebabiabibota, apo papatsimë patanetaenexamë,” janë tsane tatsavenonena penubenaevijavabelia. ⁴⁴ Nexata bajarapamonae pijaneconi peyajavajinavanapaevi nejumai tsane: “Tajatuxanenë, ¿detsa pacujinae niajanijavata apo pacarajutsitsi nexaejava?” nejai tsane. Itsa jume, nejumai tsane: “¿Detsa pacujinae mera nejitsipaejavata mera apo pacarajutsitsi?” nejai tsane. Itsa jume, nejumai tsane: “¿Detsa pacujinae itsanacuaverena nepatsinë, apo pacacopiapitsitsi xaniavaetsia?” nejai tsane. Itsa jume, nejumai tsane: “¿Detsa pacujinae bitso pecatoajibijavata nenaxatatsijava, apo pacarajutsitsi nenaxatatsijavanexa?” nejai tsane. Itsa jume, nejumai tsane: “¿Detsa pacujinae niavitanejavata, apo paponanë patacaevetsinexa?” nejai tsane. Itsa jume, nejumai tsane: “¿Detsa pacujinae penaneconitsivi pejebabiabibota pecaetsijavata, apo paponanë patacataenexa?” nejai tsane bajarapamonae. ⁴⁵ Nexata xanë jumaitsinë tsane bajarapamonaejavabelia: “Xaniajanë pacuenia pacatsipaebijitsiatsi. Bajarapacuenia itsa apo patoexanaemë paneyavenonaenexa tajajiviyajuvënëjivijavabelia, nexata bajaraxua xanë taniji xanëjavaberena apo patanetoexanaejavamë,” janë tsane pijaneconi peyajavajinavanapaevijavabelia. ⁴⁶ Bajaraxuacujinae bajarapamonae ponaena penaneconitsiajinavanapaenexa daxitamatacabijavabelianexa. Pamonae Dioso pejume-covënëtsivi, bajarapamonae Dioso rajutsianatsi matacabi apo peverevereaejava, jai Jesús pijajivijavabelia tajëvelia penavajunupaebijavata itsamatacabi penaneconitsiaexanaejavanexa pijaneconi pexainaevi, pamatacabi icatsia patsianica.

26

Pacuenia picani Jesús pijavajabitsaë jamatabëvaetabatsi yabara pelivaisi (Mr 14.1-2; Lc 22.1-2; Jn 11.45-53)

¹ Itsa baja Jesús najumevereta pijajivijavabelia livaisi petsipaebijava, Jesús icatsia tajëvelia navajunupaeba itsamonae cruzajavabelia pecobematabarutsijavanexatsi. Jesús jumaiti pijajivijavabelia mapacueniaje:

² —Payapëtaneme rabaja anijamatacabibeje pesajinaejava pejonenexa baja pascuavënëfiesta. Nexata xanë, Daxitajivi Pematapijinënë, necana-jetsiana itsamonae pecobeyabelia tanecobematabarutsinexa cruzajavabelia, jai Jesús pijajivijavabelia tajëvelia penavajunupaebijavata cruzajavabelia pecobematabarutsijavanexatsi.

³ Nexata bajarapapatota nacaetuata sacerdotevi penamatacaitorobivi. Nacaetuata judíovi pecujarubivinua. Nacaetuata judíovi pijaancianov-inua. Daxita bajarapamonae nacaetuata Caifásvënëne pijaboxanetota. Bajaraponë Caifás, sacerdotevi pepo penamatacaitorobinë. ⁴ Bajarajota

daxita bajarapamonae najumejaita. Penajumetsënëtsilivaisita picani Jesús jamatabëvaetabatsi pebeyaxuabinexatsi. ⁵ Itsiata bajarapamonae najumaitsi:

—Fiestajavata meta abaxë apo vaetabi tsanetsi jivi vajanacaitacueni-abiyaniva, najai daxita bajarapamonae.

Pacuenia Jesús petiriva tsimataepanatsi petuxujuviaceitera yabara pelivaisi

(Mr 14.3-9; Jn 12.1-8)

⁶ Jesús ponapona Betania tomarata, Simón pijabota. Simón bajayajebi bitso peperabëtsabanaenëmi. ⁷ Nexata Jesús petiriva cobenaimoxoyorenatsi petuxujuviaceitera, alabastrobotellabëta pejeaceitera. Bajarapora bitso penamatamotsira. Nexata Jesús penabanecaejavata mesata, bajarapova tsimataepanaicatsi bajarapaaceitera. ⁸ Nexata Jesús pijajivi itsa taeyena Jesús petsimataepanaejavatsitsica bajarapaaceitera, Jesús pijajivi jamatabëcueneanaepanareca. Nexata ëpamonae najumai tsenae:

—¿Detsa xuajitsia saya xuaba bajarapacuenia maporaje? ⁹ Canajetsipa rajane. Nexata matamopitsipa ayaimatamo. Bajarapapalata rajutsipa bepejiovivi bajarapacuenia peyavenonaenexa, najai tsenae Jesús pijajivi.

¹⁰ Nexata Jesús jumetane bajarapacuenia pijajivi pejumaitsijava. Nexata Jesús jumaitsi pijajivijavabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuene nexanaje. ¹¹ Daxitamatacabi raja bepejiovivi jinavanapa itsaxuayo pajinavanapame. Itsiata baitsi jane xanë daxitamatacabi apo ponaponaenë tsane paxamëjavata. ¹² Itsamonae petëpaejivi batsiperabëëpana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje netsimataepana petuxujuviaceitera, abaxë apo tëpae atanë. Nexata baja bajarapova neperabëxaniavaeta itsamonae tanemëthëtsivajënae. ¹³ Xaniajanë pacuenia pacatsipaebijitsiatsi. Daxitanacuanëjava tajajivi itsa paebanajetarubenaena pexanialivaisi jivi tacapanepaelivaisinexa, vajunupaebabiabiananua pacuenia exana xanëjavaberenana mapapetirivaje, jai Jesús pijajivijavabelia tajëvelia penavajunupaebijavata pebeyaxuabijavanexatsi.

Pacuenia Judas Jesús yajumejailia pijavajabitsaë pecobeyabelia pecanajetsinexa yabara pelivaisi

(Mr 14.10-11; Lc 22.3-6)

¹⁴ Jesús pijajivi, doce ponëbejeyajuvënënë, pevënë Judas Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi pecanajetsinexatsi. ¹⁵ Nexata Judas jumaitsi sacerdotevi penamatacaitorobivijavabelia:

—¿Detsa pacuenia panerajutsipame panecobeyabelia itsa canajetsipajë Jesús? jai Judas.

Nexata bajarapamonae Judas matamotatsi treinta ponëbeje pepo palatanëanë, bitso penamatamotsinëanë. ¹⁶ Nexata bajaraxuacujinae Judas Jesús naitaxutocaevetsia ponapona. Nexata paepatota Judas toyapëxanepanatsi, perajutsinexa jane baja Jesús bajarapamonae pecobeyabelia.

Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaisi

(Mr 14.12-25; Lc 22.7-23; Jn 13.21-30; 1 Co 11.23-26)

17 Junua jane baja fiesta, pafiestajava judíovi baxane levadurata matajërëabinejeva pexanaepan. Nexata Jesús pijajivi imoxoyorenatsi. Yanijobatsi pijajivi.

—¿Detsa belia paponanajë patacamitsaexanaenexa, xua jivi baxane pascua fiestamatacabi, nexaenexa? jai Jesús pijajivi.

18 Nexata Jesús jumaitsi pijajivijavabelia:

—Paponare tomarabelia. Pacatsipaebianatsi ponë pijabota papatsijitsiamë. Pajumaitsimë tsane bo pexainaenëjavabelia mapacueniaje: “Vajanacacujarubinë raja jumaitsi: ‘Imoxoyo rabaja tavajënae tanebeyaxuabinexa. Nexata bajaraponë pijabo netsicopatsiana patacabarëxaenexa xua jivi baxane pascua fiestamatacabi,’ jai raja vajanacacujarubinë,” pajamë tsane bo pexainaenëjavabelia, jai Jesús pijajivijavabelia.

19 Nexata baja Jesús pijajivi pona pacuenia Jesús jumaitsi. Nexata xua jivi baxane pascua fiestamatacabi daxita Jesús pijajivi pebarëxaenexa, Jesús pijajivi exana jane baja.

20 Nexata baja ajena meraviyotsia, Jesús pijajivi, doce ponëbeje, barëeca mesa muxuneneta. 21 Nexata pexaeyenaejavata Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë necanajetsiana tajavajabitsaë pecobeyabelia, jai Jesús pijajivijavabelia Judas yabara.

22 Nexata Jesús pijajivi bejamatabëjireca. Nexata Jesús pijajivi, caenë canacujitsia, Jesúsjavabelia yanijobapona.

—Tajatuxanenë, ¿xanë tsaja tsane? jai tsaponae Jesús pijajivi.

23 Nexata Jesús jumaitsi pijajivijavabelia:

—Ponëbeje peneta caecuenia panajuacajabutsianajëbeje panbë platojavabelia, bajaraponë necanajetsiana tajavajabitsaë pecobeyabelia. 24 Xanë, Daxitajivi Pematapijinënë, tēpaenajë pacuenia baja cajena xanë yabara Dioso pejumelivaisibaxutota tajëvelia jumaitsi. Itsiata ponë tajavajabitsaë pecobeyabelia necanajetsiana, bajaraponë bitso bejiobi tsane pinijicuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipa bajaraponë itsa apo naexanae tsipae. Tsi-paji apo naneconitsi tsipae Diosojavabelia, jai Jesús pijajivijavabelia Judas yabara.

25 Nexata Judas, ponë jane baja canajetsijitsiatsi Jesús pijavajabitsaë pecobeyabelia, jumaitsi:

—Petuxanenë, ¿xanë tsaja tsane? jai.

Nexata Jesús jumaitsi:

—Jājā, xamë rabaja tsane, jai.

26 Pexaeyenaejavata Jesús pita panbë. Jesús jumaitsi Diosojavabelia:

—Pexaniacuene panetoxaname. Panerajutame pan, jai.

Bajaraxuacujinae Jesús epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

27 Bajaraxuacujinae icatsia Jesús copavënëjavata yapita piapaeranexa. Diosojavabelia jumaitsi:

—Pexaniacuene panetoxaname. Panerajutame maporaje, jai.

Bajaraxuacujinae pijajivi bajarapora rajuta. Jumaitsi pijajivijavabelia:

—Papaema padaxitamë maporaje. 28 Tsi-paji tajana othopæna jivi ayaibit-saëtöxaneto pibisiacuene pexanaeconi pevécuaajibiaexanaenexatsi. Nexata tatëpæjaya pejamatabëcueneta, jivi yapëtaena pepacuene xaniajai Dioso

jivi pecapanepaejavanexa, pacuenia baja cajena tajëvelia Dioso najume-capanepaeya jumaitsi. ²⁹ Xaniajanë pacuenia pacatsipaebijitsiatsi. Xanë rabaja mapanacuataje matavëjëa apo apaenë tsane uvacuaira, matapania icatsia pejanauvacuaira pacayajavaapaenatsi taxa pijanacuatatsia, jai Jesús pijajivijavabelia penavajunupaebijavata pebeyaxuabijavanexatsi.

Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai yabara pelivaisi (Mr 14.26-31; Lc 22.31-34; Jn 13.36-38)

³⁰ Jesús pijajivi barënaXëana Diosojumevajianë. Bajaraxuacujinae Jesús pijajivi barëpona petsutojumabelia. Patsutojumata olivonaenë apaaxayo, bajarapatsutojumabelia barëpona. ³¹ Nexata bajarapatsutojumata Jesús jumaitsi pijajivijavabelia:

—Daxita raja paxamë ajena, pameravi, panexuabarëcëpecaename. Tsipaji rabaja patanexuabarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovejabitsaëto nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavanexamë yabara. Nexata ajena, pameravi, tajavajabitsaë itsa nevaetabiana tanebeyaxuabinexa, daxita paxamë panexuabarëcëpecaename. ³² Itsiata baitsi jane tatëpaecujinae, icatsia asaënë tsane. Nexata paxamë panevajënaeyabelia, copiata ponaenajë Galilea nacuyabelia, jai Jesús pijajivijavabelia.

³³ Nexata Pedro jumaitsi Jesúsjavabelia:

—Daxita mapamonaaje caxuabarëcëpecae ata tsane, xanë cajena apo caxuabatabajiravi tsanetsi, jai Pedro.

³⁴ Nexata Jesús jumaitsi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, nanianevëpata, vacara pefiabivajënaeya, nayavajunuaxainaename tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

³⁵ Itsiata Pedro jumaitsi Jesúsjavabelia:

—Nebeyaxuabijitsia ata tsane xamë yajava, itsiata cajena apo nayavajunuaxainaenë tsane nijajivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaitsi.

Pacuenia Jesús vajëta Diosojavabelia Getsemanivënëjavata yabara pelivaisi (Mr 14.32-42; Lc 22.39-46)

³⁶ Jesús pijajivi pecunameravita yajavapata Getsemanivënëjavata. Bajara-jota Jesús jumaitsi pijajivijavabelia:

—Paneevetenarë abaxë majotaje. Abaxë raja imoxoyo majotaliaje vajëtsijitsianë Diosojavabelia, jai Jesús pijajivijavabelia.

³⁷ Nexata Jesús barëpona acueyabi ponëbeje pijajivi. Jesús pijajivi barëpona pesaicaeyojavabelia mapamatabëxëyoje. Pedro, Santiago, Juan, bajarapamatabëxëyo. Santiagobeje Juanbeje Zebedeo pexënatobeje. Bajaraxuacujinae Jesús bitso najamatabëxaina. Nexata bejamatabëjjiobireca.

³⁸ Nexata Jesús jumaitsi pijajivi acueyabi ponëbejejavabelia:

—Xanë bitso pinijicuenia najamatabëxainajë. Nexata bitso tanajamatabëxainajava, jamatabëyatëpajë. Paxamë abaxë majotaje panacopabare. Paitavamë tsane. Pëtsa abaxë pamajitame, jai Jesús pijajivi acueyabi ponëbejejavabelia.

³⁹ Nexata Jesús caenē pevajēnaeyabelia icatsia tsiquirijavayo ponataba. Nexata Jesús irataeya bocajunua pevajētsinexa Diosojavabelia. Jumaiti Diosojavabelia:

—Taxa Diosomē, netocopatame picani tanebeyaxuabinexa betajobicueneta. Daxitacuene raja cacaējēpa nexanaenexa. Nexata necapanepare bajarapabejioibicueveveua. Itsiata xanē apo tajitsipaecuene ata, pacuenia xamē jitsipame, netocopatsianame, jai Jesús Diosojavabelia pevajētsijavata pebeyaxuabijavanexatsi.

⁴⁰ Bajaraxuacujinae Jesús naviarena acueyabi ponēbeje pijajivjavaberena. Caxitajaraba Jesús pijajivi pemajitanubenaevi. Nexata Jesús jumaiti Pedrojavabelia:

—¿Apo pacacaējēpae tsabaja rovia caeepatoyo ata paneaitavatsenaenexa?

⁴¹ Pētsa pamajitame. Paitavamēre. Pavajēre Diosojavabelia papecayavenon-aenexa pibisiacuene paneexanaeyaniva. Tsipaji raja dovathi pacajamatabēcueneējēbiana. Paxamē picani panejamatabēcueneta pexaniacuene jamatabēpaexanabiabame. Itsiata baitsi jane apo pajamatabēcuensaēmē pexaniacuene paneexanaenexa, jai Jesús Pedrojavabelia.

⁴² Nexata icatsia Jesús pona pecovēyabelia pevajētsinexa icatsia Diosojavabelia. Vajēta Diosojavabelia mapacueniaje.

—Axa, itsa apo jitsipaemē tanevecuatsatsinexamē betajioibicueneta tatēpaevajanexa, nexata pacuenia jitsipame, netocopatsianame, jai Jesús Diosojavabelia.

⁴³ Bajaraxuacujinae Jesús icatsia naviarena pijajivjavaberena. Caxitajaraba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana. ⁴⁴ Nexata abaxē bajarapamonae pemajitanubenaevavata, Jesús icatsia pona pecovēyabelia pevajētsinexa icatsia Diosojavabelia. Nexata icatsia vajēta Diosojavabelia pacuenia vajēta copiaya xuabeje vajēta.

⁴⁵ Bajaraxuacujinae icatsia Jesús naviarena pijajivjavaberena. Jumaiti Jesús pijajivjavabelia:

—¿Abaxē tsarovia tsiteca pamajitanubename? Copiapata rabaja paepatota xanē, Daxitajivi Pematapijīnēnē, necanajetsijitsia pibisiacuene pexanaevi pecobeyabelia. ⁴⁶ Panonobapunare baja. Ponaenatsi baja. Imoxoyo rabaja najetaruca tajavajabitsaē pecobeyabelia tanecanajetsinēnexa, jai Jesús pija-jivjavabelia Judas yabara.

Pacuenia Jesús vaetabatsi pijavajabitsaē yabara pelivaisi
(Mr 14.43-50; Lc 22.47-53; Jn 18.2-11)

⁴⁷ Jesús pijavajabitsaē pevaetabijavatanexatsi, cuaicuaijai tsanucacae pijajivjavabelia. Nexata bajarapaepatota patanajetaruca Judas, Jesús pijajivi doce ponēbejeyajuvēnēnēmi. Judas pēnanajetarubenatsi jivi ayaibitsaētoxaneto. Bajarapamonae yajuvēnēvi itsamonae canajetarubena espadanē. Itsamonae canajetarubena naebonē yajava. Bajarapamonae itorobatsi sacerdotevi penamatacaitorobivi, judíovi pijaancianovinua. ⁴⁸ Judas pebarērenavajēnae bajarapamonae, copiaya baja cajena Judas tsipaeba pacuenia bajarapamonae yapētaejitsia Jesúsucue. Judas jumaiti mapacueniaje:

—Ponē raja peneta bajacobiaya itabaratsutsunexuabianajē, bajaraponē Jesús tsane. Bajaraponē pavaetabianame. Pacobecētsiana xaniavaetsia, jai baja cajena Judas pematacanajetarucaevijavabelia pebarērenavajēnae.

⁴⁹ Nexata jane baja Judas itsa patanajetaruca, exana pacuenia jumaiti pematacanajetarucaevijavabelia. Judas Jesús itabaratsutsuniaya bajacobatsi

Judas jane baja pematacanajetarucaevi peyapëtaenexa Jesúscuene. ⁵⁰ Jesús nexata jumaitsi Judasjavabelia:

—Judas, ¿detsa xua yabara patame? jai.

Nexata jane baja Jesús petsimaxëponaevitsi, cujibarëcëpaliatsi. Vaetabatsi. Cobecëtatsi xaniavaetsia pecaponaenexatsi.

⁵¹ Bajarajota Jesús pijajiviyajuvënëñë piijaespada navemarajonotaxu-abina. Muxuyoropaebiaxuaba sacerdotevi pepo penamatacaitorobinë pija-jivitonë. ⁵² Nexata Jesús jumaitsi pijajivitonëjavabelia:

—Nijaespada baja xataremeca pevënojojavareca. Tsipaji pamonae namaxëvanita espadata, daxita bajarapamonae juya espadata babiatsi, jai Jesús.

⁵³ Icatsia Jesús jumaitsi:

—Itsa vajëtsipajë taxa Diosojavabelia taneyavenonaevinexa tanetoitorobinexatsica, nexata tavajëtsiepatota netoitorobijitsipaica bitso ayaiBITSaëtoXanetonë ángelevi. ⁵⁴ Itsa vajëtsipajë taxa Diosojavabelia tanetoitorobinexatsica taneyavenonaevinexa, nexata baja apo netocopiapatsi tsipae pacuenia Dioso pejumelivaisibaxutota tajëvelia nevajunupaeba pacuenia nevaetabijitsia tanebeyaxuabinexa, jai Jesús pijajivitonëjavabelia.

⁵⁵ Nexata Jesús bajarajota jumaitsi petsimaxëponaevitsijavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabinexamë pacuenia pavaetababiabame penacobetoxotsinë. Xanë caematacabi canacujitsia Dioso pejumelivaisi paxamëjavabelia pacatsipaebabiabatsi templobota. Itsiata bajarapamatacabi apo panevaetabimë. ⁵⁶ Mara pacuenia panevaetabameje tanetocopiapatsixae baja pacuenia Dioso pejumelivaisibaxutota bajayata tajëvelia nevajunupaeba, jai Jesús pevaetabivitsijavabelia.

Nexata jane baja Jesús pijavajabitsaë pevaetabijavatatsi, daxita Jesús pijajivi xubarëcëpecatsi pacuenia baja cajena Jesús tajëvelia jumaitsi pijajivijavabelia.

Pacuenia Jesús nutatsi judíovi penamatacaitorobivi pitabarata yabara pelivaisi

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesús pevaetabivitsi caponaliatsi Caifás pijaboyabelia. Bajarapone Caifás sacerdotevi pepo penamatacaitorobinë. Nexata Caifás pijabota nacaetuaana judíovi pecujarubivi, judíovi pijaancianovi yajava. ⁵⁸ Itsa baja Jesús caponaliatsi, nexata Pedro bajarapamonae pecovëya tajiyo najetaruca. Sacerdotevi pepo penamatacaitorobinë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanabojavabelia, itsabelia Jesús cajunuatsi. Nexata sacerdotevi pepo penamatacaitorobinë pijabopanabota, Pedro naeca templobopijipolicíavita. Bajarajota Pedro naeca petaenexa pacuenia Jesús pijavajabitsaë exanatsi.

⁵⁹ Nexata bajarapabo ëñëtuatujëta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarëcuaicuajjai. Bajarapamonae nayanijoba.

—¿Jipatsa yapëtane Jesús pibisiacuene pexanaejava, paneconi yabara beyaxuabijitsiatsi? najai tsaponae.

Itsiata bajarapamonae apo caxitajarabi itsaneconi ata, Jesús pijaneconi. Najumetsënëtsiaya picani peneconitsilivaisinexa, jaita penajumetsënëtsilivaisita picani Jesús pebeyaxuabinexatsi. ⁶⁰ Ayaibitsaëto pata penajumetsënëtsilivaisi pepaebinexa Jesús yabara. Itsiata caelivaisi ata najumejëpaeya apo paebi bajarapamonae. Nexata bajarapamonae apo caxitajarabi paneconi yabara Jesús naneconitsiaexanaejitsiatsi pebeyaxuabiaexanaenexatsi. Bajaraxuacujinae belia anijanëbeje caelivaisi najumejëpaeya neconitatsibeje.

⁶¹ Jumaitsibeje bajaraponëbeje Jesús yabara:

—Maponë jumaitsije: “Xanë necaëjëpa taxuabinexatsica Dioso pijatem-plobo. Necaëjëpanua acueyabi matabacabita icatsi taveretetsinexa itsabo,” jai maponëje, jai beje bajaraponëbeje Jesús yabara.

⁶² Nexata jane baja sacerdotevi pepo penamatacaitorobinë nonotapuna bajarapamonae pitabarata. Nexata jumaiti Jesúsjavabelia:

—¿Apo yapëtaemë tsaja itsalivaisiyo ata nejumecanaviatsinexa? ¿Xaniajai tsabaja pacuenia maponëbeje caneconitsiajumaitsibeje? jai sacerdotevi pepo penamatacaitorobinë.

⁶³ Jesús itsiata moya. Nexata bajaraponë icatsi jumaiti Jesúsjavabelia:

—Caitorobatsi caecuenia tanenavajunupaebinexamë nexaniajajumeta. Itsajume, Diosojavabelia naneconitsianame. Panenavajunupaebare xani-avetsia itsa xamë Cristomë, athëbëvetsica Dioso pecaitorobinëtsica jivi necapanepaenexa. ¿Xamë tsaja Dioso pexënatomë? jai.

⁶⁴ Nexata Jesús jumaiti:

—Jājā, xanë rabaja pacuenia nejumaitsimë. Nexata icatsi pacajumait-sitsi. Paxamë raja panetaename xanë, Daxitajivi Pematapijinënë, taecae-
java Dioso pecujuanenia, daxitajamatabëcuene pecaëjëpaenëtsi. Panetaena-
menea tanajetaruaejava athëbëvetsica itarërëbota, jai Jesús.

⁶⁵ Bajarapacuenia Jesús pejumaitisijava itsa jumetane, sacerdotevi pepo penamatacaitorobinë penaxatsijava anaeya titinaxuaba. Bajarapacuenia titinaxuaba pianepanaexae Jesús pejumaitisijava yabara. Nexata sacer-
dotevi pepo penamatacaitorobinë jumaiti daxita penacaetuatsivijavabelia:

—Mara ponë Dioso apo pejitsipacuenia cuaicuaijaije. Dioso bepexënato nataeya cuaicuaijai. Pijacuata rabaja naneconita bajarapacuenia pecuaicuaijaixae. Pematatsënëa baja apo namatavenonaetsi itsamonae vajanacatsipaebinexa paneconi yabara maponëje naneconitsiaexanaejitsi-
atsi. Paxamë rabaja pajumetaneme maponëje Dioso apo pejitsipacuenia pecuaicuaijaijava. ⁶⁶ ¿Detsa nexata paxamë pajamatabëtsimë? jai sacerdotevi pepo penamatacaitorobinë daxita penacaetuatsivijavabelia.

Nexata daxita penacaetuatsivi jumaiti:

—Naneconita rabaja Diosojavabelia. Nexata baja beyaxuabianatsi, jai bajarapamonae Jesús yabara.

⁶⁷ Nexata bajarapamonae Jesús itabarasuabatsi. Bajaraxuacujinae papaëbërëpanata itaxutocëtatsi. Pitaxutocëtsicujinaetsi itabarat-saquibabeponatsi pecobethaitonëta. Itsamonae itabarapacabixuababi-abatsi. ⁶⁸ Nexata bajarapamonae jumai tsaponae Jesúsjavabelia:

—¿Xamë raja itsa Cristomë, athëbëvetsica Dioso itsa pecaitorobinëtsica jivi necapanepaenexa, nexata vënëjonare ponë caitabarapacabixuaba! jai tsaponae bajarapamonae.

Pacuenia Pedro nayavajunuaxaina Jesús pijajivitonëcuene yabara pelivaisi (Mr 14.66-72; Lc 22.56-62; Jn 18.15-18, 25-27)

⁶⁹ Itsa abaxë Jesús sacerdotevi pepo penamatacaitorobinë pijabo ënëtuatuajëalia yanijobaponatsi xua yabara naneconitsiaexanaejitsiatsi, Pedro naitaxutocaevetsiaya naeca bopanabota. Nexata bajarapabota penacuenebiva Pedro kujirenatsi. Bajarapova jumaitsi Pedrojavabelia:

—Xamë ata rabaja naponaponame Jesúsata, Galilea nacuapijinëta, jai.

⁷⁰ Nexata Pedro itsiata nayavajunuaxaina Jesús pijajivitonëcuene. Daxita bajarajota penubenaevi pitabarata Pedro jumaitsi:

—Xanë cajena apo yapëtaenë pacuene yabara nejumaitsimë, jai.

⁷¹ Sacerdotevi pepo penamatacaitorobinë pijabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaranatsijavaxaneto baupajavabelia Pedro natixilia. Nuca bajarapabaupa muxuneneta. Bajarajota icatsia itsaya, bajarapabota penacuenebiva, Pedro taenutatsi. Nexata bajarapova ata Pedro yabara icatsia jumaitsi bajarajota penubenaevijavabelia:

—Mara ponë ata naponapona Jesúsataje, Nazaret tomarapijinëta, jai bajarapova.

⁷² Nexata icatsia Pedro nayavajunuaxaina Jesús pijajivitonëcuene. Pedro jumaitsi:

—Xaniajanë. Dioso pitabarata cajumaitsi. Apo yapëtaenë cajena bajaraponë, jai.

⁷³ Bajaraxuacujinae icatsia, caeapatoyocujinae, bajarajota penubenaevi kujibarëcëpaliatsi Pedro. Jumaitsi bajarapamonae:

—Xaniajai raeta baja cajena. Xamë Jesús pijajiviyajuvënënëmë. Tsipaji rabaja Galilea nacuapijivi penatsipaebicuenia natsipaebame, jai bajarapamonae Pedrojavabelia.

⁷⁴ Nexata Pedro jumaitsi:

—Itsa apo xaniajanë tsipae paxamëjavabelia, nexata Diosojavabelia naneconitsipajë. Apo yapëtaenë cajena bajaraponë, jai Pedro.

Itsa baja Pedro najumevereta bajarapacuenia pejumaitsijava, vacara fiaba. ⁷⁵ Nexata bajarajota Pedro najamatabënapitajaraba Pedrojavabelia Jesús pejumaitsijava mapacueniaje: “Ajena rabaja, pameravi, vacara pefiabi-vajënaeya, nayavajunuaxainaename tajajivitonëcuenëmë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejaijava Jesús Pedrojavabelia, Pedro najamatabënapitajaraba. Nexata baja Pedro pitsapalia bo matatoyorotsia peyacaranatsijava pënëyabelia. Pinijicuenia Pedro nua.

27

Pacuenia Jesús caponaliatsi Pilatojavabelia yabara pelivaisi (Mr 15.1; Lc 23.1-2; Jn 18.28-32)

¹ Ajena baja matabi tsarucaponae, sacerdotevi penamatacaitorobivi, judiövi pijaancianovi yajava, najamatabëjëpa pacuenia exanaejitsia Jesús pebexuabiaexanaenexatsi. ² Nexata Jesús cobecëtsiaya caponaliatsi nacuaeveitsinë Poncio Pilatojavabelia.

Pacuenia Judas nabeyaxuaba yabara pelivaisi

³ Judas canajetaxuabatsi Jesús pijavajabitsaë pecobeyabelia. Bajaraponë itsa tane Jesús penaneconitsijava pebexuabineaxatsi, nexata bitso najamatabëxaina. Nexata pona petocanaviatsinexa perajutsipalatomitsi, treinta ponëbeje pepo palatanëanë, bitso penamatamotsinëanë. Tocanaviatsijitsia

sacerdotevi penamatacaitorobivijavabelia, judíovi pijaancianovijavabelia ata. ⁴ Judas jumaitsi bajarapamonaejavabelia:

—Pibisiacuene baja rovia exanajé. Bajaraponé itsacuenejavayo ata apo exanaenejeva, panecobeyabelia baja canajetaxuabajé, jai Judas.

Nexata bajarapamonae jumaitsi Judasjavabelia:

—¡Paxané raja patajamatabécueneta apo naneconitsimé tsane! ¡Xamé raja nijacuata naneconitame! jai bajarapamonae Judasjavabelia.

⁵ Nexata Judas templobota othotajarabeta perajutsipalatanéanémitsi. Baraxuacujinae pitsapalia. Pona baja. Nexata pijacuata nabeyaxuaba. Pepuanavésicétsi athébévetsica perucaemaétoxanetota, athébévetsica jirevica irabetsica penacuibosi catarérétajarabaxuabinexa. Bajarapacuenia pijacuata Judas nabeyaxuaba.

⁶ Nexata sacerdotevi penamatacaitorobivi caetuata Judas piothotajara-betsipalatanéané. Najumaitsi bajarapamonae:

—Acuenebi mapapalataje vajabuatsinexa ofrenda vajajebabiabicajónita. Tspijai bajarapalata pejamatabécueneta jivitoné beyaxuabijitsiatsi, najai bajarapamonae.

⁷ Nexata bajarapamonae najamatabējēpa bajarapapalatanéanēta pecomuatsinexa ira. Nexata bajarapamonae bajarapapalatanéanēta comuata canalitoné pefaratabiabiné pijairami. Bajarapamonae comuata bajarapaira, itsanacuaverena pepatsivi itsa tēpa Jerusalén tomarata, bajarapairata pemēthētabiabinexa. ⁸ Baraxuata mapamatacabijav-
aberena ataje vënēruba bajarapaira mapejumaitsvivēnēje: “Papalata pejamatabécueneta jivitoné beyaxuabatsi, bajarapapalatata pecomuatsiira,” pejaivēnē vënēruba. ⁹ Bajarapacuenia itsa comuata bajarapaira, copiapata jane baja pacuenia Diosojumepaebinēmi profeta Jeremíaspijiné bajayata tajēvelia vajunupaeba bajarapalata. Profeta Jeremíaspijiné baja cajena bajarapalata yabara tajēvelia jumaitsi mapacueniaje: “Israelnacua pevetsivi rajutsiana jivitoné pecanajetsinējavabelia treinta ponēbeje, pepo platananitota pexanaenēanē. Bajarapapalatanéanē icatsia bajarapamonae pitsiana. ¹⁰ Nexata bajarapapalatanéanēta bajarapamonae comuatsiana canalitoné pefaratabiabiné pijairami, pacuenia Dioso tajēvelia nejumaitsi,” jai bajayata profeta Jeremíaspijiné tajēvelia pevajunupaebijavata Jesús pematamopitsipalatanexatsi.

*Pacuenia Jesús nutatsi Pilato pitabarata yabara pelivaisi
(Mr 15.2-5; Lc 23.3-5; Jn 18.33-38)*

¹¹ Jesús nutatsi nacuaevevsinē Pilato pitabarata. Nexata Pilato jumaitsi Jesúsjavabelia:

—¿Xamé tsaja judíovi pepo nevetsinē? jai Pilato.

Nexata Jesús jumaitsi Pilatojavabelia:

—Jājā, xanē rabaja pacuenia nejumaitsimē, jai Jesús Pilatojavabelia.

¹² Sacerdotevi penamatacaitorobivi, judíovi pijaancianovi yajava, Jesús neconitaponae atatsi, apo jumepitsi. ¹³ Nexata Pilato jumaitsi Jesúsjavabelia:

—¿Apo jumetaemé tsaja pacuenia mapamonae caneconitaponaje? jai.

¹⁴ Jesús neconitsi atatsi, itsiata apo jumepitsi. Baraxuata Pilato jamatabécuenenabenajaca. Apo yapētae pacuenia Pilato exanaejitsia Jesúsjavabelia.

*Pacuenia baja Pilato tocopata Jesús pebeyaxuabinexatsi yabara pelivaisi
(Mr 15.6-20; Lc 23.13-25; Jn 18.38-19.16)*

15 Nacuaevevtsinē Pilato xaina pijacujirucue. Caevai canacujitsia, pascua fiestamatacabi, Pilato copatabiaba caenē penaneconitsinē pepitsapaenexa penaneconitsivi pejebabiabibovecua. Pajivi yabara jivi vajētabiaba Pilatojavabelia, bajarapajivi Pilato copatabiaba pascua fiestamatacabi. Bajarapacuenia Pilato caenē copatabiaba jivi pesivajamatabēcuene xanepanaenexatsi. 16 Pamatacabi Jesús naneconitsiaexanatsi, bajarapamatacabi penaneconitsivi pejebabiabibota naneconitsiaponapona jivibenē, Barrabásvënēnē. Bajaraponē bitso piacujirubejenēcuene yapētanetsi daxitajivi. 17 Nexata daxita Jerusalén tomarapijivi penacaetuatsijavata Pilato jumaitsi:

—¿Detsa ponē pajitsipame patacatocapitsapaenexa penaneconitsivi pejebabiabibovecua pepitsapaenexa? ¿Barrabás tsaja? Itsa jume, ¿Jesús tsaja, ponē yabara jivi jumaitsi: “Cristo raja athēbēvetsica Dioso pitorobinētsisica jivi pecapanepaenexa,” jaitsi? jai Pilato bajarapamonaejavabelia.

18 Pilato jamatabējumaitsi:

—Xua Jesús exanapona, sacerdotevi penamatacaitorobivi cueneitoyatsi. Bajaraxuata nefocaparena, jamatabējai.

19 Pilato abaxē eca itsajota ecabiaba penaneconitsivi penaneconitsiaexanaenexa. Nexata Pilato pijava tonajumeitorobarenatsi. Pilato pijava Jesús yabara jumaitsirena mapacueniaje: “Copare bajaraponē, ponē it-sacueneneconiyo ata apo penaneconitsinē. Ajenā raja, meravī, amajitsinae-bejenē bajaraponē yabara,” jaitsirena Pilato pijava. Nexata picani Pilato jamatabēcopata Jesús.

20 Itsiata baitsi jane bajarapaepatota sacerdotevi penamatacaitorobivi, judiōvi pijaancianovi yajava, jivijavabelia muxubijiapenetsia jumai tsaponae:

—Pavajētsianame Barrabás pecapitsapaenexatsi. Pavajētsianame Jesús peyaxuabinexatsi, jai tsaponae bajarapamonae.

21 Nexata nacuaevevtsinē Pilato icatsia yanijoba jivijavabelia:

—¿Detsa ponē nexata pajitsipame patacatocapitsapaenexa? jai Pilato.

Nexata bajarapamonae jumaitsi:

—Panetocapitsapare Barrabás, jai.

22 Pilato nexata jumaitsi bajarapamonaejavabelia:

—¿Detsa nexata xua exanaenajē Jesúsjavabelia, ponē yabara: “Cristo, ponē Dioso athēbēvetsica itorobatsi jivi pecapanepaenexa,” jaitsi? jai Pilato bajarapamonaejavabelia.

Nexata daxita bajarapamonae jumaitsi Pilatojavabelia:

—¡Cruzajavabelia cobematabiabarutsiaexanare! jai bajarapamonae.

23 Nexata Pilato jumaitsi bajarapamonaejavabelia:

—¿Detsa pitsineconi yabara cobematabiabarutsiaexanaejitsipajē cruzajavabelia? jai Pilato Jesús yabara.

Itsiata bajarapamonae icatsia pinijijumeta vavajai.

—¡Cruzajavabelia cobematabiabarutsiaexanare! jai tsaponae.

24 Pilato tane piajumesaējava bajarapamonae. Muxujiobi ata, apo jumecovēnētsitsi. Bitsoyo biji caranata bajarapamonae jamatabēnanaecajematapona bajarapatmarata. Nexata Pilato penacobequiatsinexa, pijajivi itoroba petocarenanexatsi mera. Pilato nacobequiata daxitajivi pitabarata bajarapamonae peyapētaenexa Jesús apo penaneconitsiaexanaecuene. Pilato jumaitsi bajarapamonaejavabelia:

—Xanë raja tajamatabëcueneta apo beyaxuabiaexanaenë tsane maponëje, planeconijibinë. Paxamë panejamatabëcueneta pabeyaxuabiaexanaename, jai Pilato.

²⁵ Nexata daxita bajarapamonae jumaitsi:

—¡Itsa bajaraponë planeconijibinë Diosojavabelia, nexata bajaraponë patabeyaxuabineconi jema panetsijumajopaena, pataxi yajava! jai bajarapamonae Pilatojavabelia.

²⁶ Nexata baja Pilato tocopata Barrabás pepitsapaenexa penaneconit-sivi pejebabiabibovecua. Itorobanua vajabitsaëvi ayaicuenia Jesús pejumatiñibabenexatsi penaneconitsivi pejumaconitabiabimacata. Bajaraxuacujinae Pilato tocopata baja Jesús vajabitsaëvi pecobematabiabarutsinexatsi cruzajavabelia.

²⁷ Nexata baja Pilato pijajivi, vajabitsaëvi, Jesús caponaliatsi nacuaevevtsinë Pilato pijaboxanetojavabelia. Nexata bajarajota Jesús matatoyorotsia nacaetuatatsi daxita vajabitsaëvi. ²⁸ Jesús penaxatatsijava vajabitsaëvi vejumajonotatsi saicayajava pexatatsinexatsi. Nexata jane baja vajabitsaëvi Jesús quenetsiataeya xatatatsi petsobiajava benacuaevevtsinëcuenia petaenexatsi. ²⁹ Becoronacuenia pemataxatatsinexatsi, peejuvitoyoroto tsimataexanatsi. Bajarapatoyoroto Jesús mataxatatatsi. Tsioberutatsinua naebo pecujuanenia benacuaevevtsinëcuenia petaenexatsi. Nexata bepeyaiyataecueniatsi bajarapamonae pematabacabëta tonubenatsi Jesús pitabarata. Quenetsiataeya jumai tsaponaeitsi:

—¡Bajaco, judíovi pepo pevetsinë! jai tsaponaeitsi bajarapamonae.

³⁰ Suabaponatsi. Vecuapitatsi naebo. Bajarapanaebota mataconitajarababiabatsi. ³¹ Bajarapacuenia quenetsiataeya pecapocaponaecujinaetsi, vejumajonotatsi baja pexatatsijavatsi. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

Pacuenia jane baja Jesús cruzajavabelia cobematabiabarutatsi yabara pelivaisi

(Mr 15.21-32; Lc 23.26-43; Jn 19.17-27)

³² Vajabitsaëvi Jesús itsa caponaliatsi tomaravecua, namutota caxitajaraba Simónvënënë, Cirene tomarapijinë. Nexata vajabitsaëvi Simón itorobatsi, pacruzajavabelia Jesús cobematabiabaruttsijatsi, peyavenonaeyacaponaeenexa.

³³ Jesús caponaliatsi Gólgotavënë tsojavabelia, bajarapatsutojumata pecobematabiabarutsinexatsi cruzajavabelia. “Gólgota,” itsa jai hebreojumeta, mapajumetaje pejumaitsjume: “Jivimatasipatsuto,” pejajume. ³⁴ Bajarajota picani Jesús rajutatsi vinora, pematajërëabira piatsaxarata. Jesús picani rajutatsi bitso penavixaetaeyaniva pecobematabiabaruttsijavatatsi cruzajavabelia. Jesús pajane bajarapora. Itsiata apo apae.

³⁵ Nexata jane baja Jesús vajabitsaëvi cobematabiabarutatsi cruzajavabelia. Bajaraxuacujinae vajabitsaëvi bajarajota canamuxusita beibotoxi. Bajarapacuenia canamuxusita peyapëtaenexa ponë pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami. Bajarapacuenia vajabitsaë ita natsicobetsana Jesús penaxatatsijavami, tocopiapatsi

jane baja pacuenia Diosojumepaebinēmi profetanē bajayata tajēvelia vajunupaeba Jesús penaxatatsijava. Jesús penaxatatsijava yabara, profetanēmi bajayata tajēvelia jumaitisi mapacueniaje: “Natsicobetsanaena penaxatatsijava. Canamuxusitsiana beibotoxi peypātaenexa ponē pitaponaejitsia,” jai profetanēmi. ³⁶ Bajaraxuacujinae vajabitsaēvi bajarajota evetena penaitaxutocaevetsinexatsi Jesús. ³⁷ Bajarajota Jesús pematabocoto mafatsēnēyo cruzajavata, yaquinaruta tablapayota itsamonae ata peypātaenexa pajamatabēcuene yabara naneconitsiaexanatsi Jesús. Jumai tsarutsi peyaquinaeitane cruzajavata mapacueniaje: “Mara ponē Jesúsje, judíovi pepo pevetsinē,” jai tsarutsi Jesús yabara.

³⁸ Anianjēbeje penacobetoxotsinēbeje Jesús yajavacobematabiabarutatsi. Caenē canacujitsia pijacruzata rubatsi. Bajaraponēbeje Jesús pemuxuneneta rutatsibeje. Itsanē Jesús pecujanenia rutatsi. Itsanē Jesús petsavenonenia rutatsi. ³⁹ Jesús pecobematabiabarutsijavatatsi cruzajavabelia, bajaraxuayo penajetarubenaēvi Jesús itaropitsiaya bijataeyabiabatsi. ⁴⁰ Jumai tsabiabi bajarapamonae:

—Xamē raja imata jumaitsimē: “Xuabianicajē templobo. Acueyabi matacabita icatsia veretetsianajē itsabo,” jamē. Nacapanepare jane baja nijacuatata. Itsa xaniajai Dioso pexēnatomē, nexata cruzajavavetsica runaimica, jai tsabiabi Jesúsjavabelia bajaraxuayo penajetarubenaēvi.

⁴¹ Bajara pijinia pacuenia sacerdotēvi penamatacaitorobivi capocaponatsi Jesús. Judíovi pecujarubivi ata capocaponatsi. Fariseovi ata capocaponatsi. Judíovi pijaancianovi ata capocaponatsi Jesús. Ēpamonae najumaitisi:

⁴²—Maponēje itsamonae yabara jumai tsabiabi: “Capanepaenajē jivi,” jai tsabiabi. Caranata pijacuata penacapanepaenexa apo caējēpaetsi. Itsa xaniajai Israel nacuapijivi pepo pevetsinē, nexata aeconoxae cruzajavavetsica runaenica vajataenexa. Nexata jane baja jumecovēnētsianatsi Cristonēcuene. ⁴³ Bajaraponē pina najamatabēcuene copata Diosojavabelia peyavenonaenexatsi. “Xanē raja Dioso pexēnatonē,” jai tsabiabinua. Nexata taenatsi aeconoxae Dioso pecapanepaejavatsi, najai bajarapamonae capocaponaeya Jesús yabara.

⁴⁴ Ponēbeje penacobetoxotsinēbeje Jesús yajavacobematabiabarutatsi, bajaraponēbeje ata Jesús bijataerucatsibeje bajarapacuenia.

Pacuenia baja Jesús tēpa yabara pelivaisi

(Mr 15.33-41; Lc 23.44-49; Jn 19.28-30)

⁴⁵ Jesús baja itsa tēpaejitsia, ajena matonejejitsia, daxita nacuanējava aitaquiri tsajuni. Matapania caniviyojavabelia, bejamatabēcuene a las tres, nacua napebeta icatsia. ⁴⁶ Nexata paepatota icatsia nacua napebeta, bajarapaepatota pinijicuenia Jesús aējai. Jumaitisi:

—Eli, Eli, ¿lama sabactani? jai Jesús.

Bajarapacuenia Jesús itsa jumaitisi pijajumeta, mapajumetaje pejumaitisijume: “TajaDioso, tajaDioso, ¿detsa xuajitsia baja tajaepato necopatame?” pejaijume.

⁴⁷ Nexata itsamonae bajarajota penubenaēvi bijiaya jumetane bajarapacuenia Jesús pejumaitisijava. Nexata saya jamatabēcuenenavēxaniabiaya jumaitisi bajarapamonae:

—Mara ponē junata profeta Elíaspijinēmi, Diosojumepaebinēmi, jai bajarapamonae.

48 Nexata bajarapamonaeyajuvënënë bepíjia cujinaelia pecarenanexa esponjavënëjáva. Nexata esponjavënëjáva jabutaba pía jatuvínorayalia. Bajaraxuacujinae esponjavënëjáva naeboupita cëtaruta. Toyotsiatsi Jesús pet-susuninexa picani bajaraxua. 49 Itsiata itsamonae jumaitsi:

—Copare abaxë. Taenatsi Elíaspijinë itsa najetaruca pecapanepaenexatsi, jai bajarapamonaecapocaponaeya.

50 Icatsia Jesús pinijicuenia aëjai. Bajaraxuacujinae jane baja Jesús tēpanajereca. 51 Paepatota Jesús tēpanajereca, bajarapaepatota templobo ënëtuatuajëalia peyatuucutarutsipana, ayaipapaëbërëpanaxaneto, titititica tu-atuajëareca, athëbëvetsicacujinae irabereca. Ira najëaba. Ibotoxanetonë ata sarapajunujunua. 52-53 Ayaibitsaëto Dioso pepua pejumecovënëtsivi petëpaevimí pemëthëanë ata napananubena. Nexata Jesús acueyabi matacabita icatsia itsa asaë petëpaeucujinae, pamonaec pemëthëanë napananubena, bajarapamonaec ata cotocaevi asaë. Nexata pitsapa mëthëvetsina. Nexata bajarapamonaec pona Jerusalén tomarabelia. Bajarajotalia naitajëbapona jivi ayaibitsaëtojavabelia.

54 Jesús cruzata petëpaejavata vajabitsaëvi pijacapítán, pijajivi yajava, nuca. Taenubena Jesús petëpaejáva. Jesús petëpaejavata ira najëaba. Nexata bajarapamonaec itsa tane ira penajëabijáva, itsajavanë ata itsa taepona, bajarapamonaec bitso junava. Jumaitsi:

—Matsaena ponë tēpaje, pepacuene baja rovia Dioso pexënato, jai bajarapamonaec.

55 Bajarajota petiriavibitsaëtoxaneto tajiyoverena taenubena Jesús petëpaejáva. Bajarapapetiriavi Jesús pepëta napona Galilea nacuaverena, Jesús peyavenonaevimítsi. 56 Bajara papetiriavibitsaëtoxaneto tuatuajëta nanubena mapamatabëxëyoje. Itsava Mariävënëva, Magdala tomarapijiva. Itsava icatsia Mariävënëva. Bajarapova Santiagobeje Josébeje pena. Itsava pijinia Salomévenëva. Bajarapova pijinia Santiagobeje Juanbeje pena. Bajarapova Salomévenëva, Zebedeo pijáva.

Pacuenia Jesús petëpaenë mëthëtsi yabara pelivaisi
(Mr 15.42-47; Lc 23.50-56; Jn 19.38-42)

57 Itsa baja caniviyotsia, José, Arimatea tomarapijinë, pona nacuaevevtsinë Pilatojavabelia. Bajaraponë José bitso pexainanë pexainaejava. José jumecovënëtaponapona Jesús Cristocuene. 58 Nexata José itsa pata nacuaevevtsinë Pilatojavabelia, vajëta petocopatsinexatsi pemëthëtsinexa Jesús petëpaenë. Nexata Pilato itoroba pijajivi petocopatsinexatsi. 59 Nexata José cruzajavavetsica pitsica Jesús petëpaenë. Mataquionaeya daxitanëreca matakacëba pexaniaviria piapiasábanapanata, piaxuirajibipanata. 60 Bajaraponë José, pamatacabí tēpa pemëthëtsinexatsi picani, iboitapajanitovavata pinijibovaju toexanabuatsi cajena. Nexata bajarapaibovajulia José buata Jesús petëpaenë. Nexata bajaraxuacujinae pinijibopanaxaneto José tixirena. Yavajuvëpaacatabuata. Nexata baja José naviatá pijaboyabelia. 61 Bajarajota ibovaju itapjavata eecabeje anijavabeje ëMariävënëvabeje. Itsava María, Magdala tomarapijiva.

Pacuenia vajabitsaëvi Jesús pemëthë evetavanapa yabara pelivaisi

62 Pascua fiesta pejonematacabinexa pevajënaeya pamatacabí, judíovi baja banacuenevereta penacuenebijáva. Nexata baja pamatacabí judíovi banacuenevereta penacuenebijáva, bitso baja itsa caniviyotsia, sacerdotevi

penamatacaitorobivi, fariseovi ata, ponalia Pilatojavabelia. ⁶³ Nexata bajarapamonae jumaitsi Pilatojavabelia Jesús yabara:

—Pamatacabi abaxê bajaraponê asaê tsaponaponae bitso najumetsênëtiabiaba. Jumai tsabiabi: “Tatêpaecujinae, acueyabi matacabita, icatsia asaênê tsane,” jai tsabiabi. Bajarapejumaitisijava paxanê apo panacofênëtsinë. ⁶⁴ Nexata nijajivi itorobare bajaraponê pemêthê xaniavaetsia pevetsinexa. Nexata nijajivi bajaraponê pemêthê xaniavaetsia evetsiana acueyabi matacabijavabelia, bajaraponê pecapaebimatacabijavabelia. Nexata acuenebi tsane pijajivi meravi pejutsinexatsi mëthêvecua. “Namatacota rabaja Jesús,” pejaijiva ata jivijavabelia, acuenebi tsane. Itsa bajarapacuenia pijajivi jumai tsipae, nexata najumetsênëtsipa copiaya Jesús penajumetsênëtsijava matatoxenetsia. Nexata bajarapacuenia yamaxëitorobijitsipa jivi yayibitsaëtöxaneto, jai bajarapamonae Pilatojavabelia.

⁶⁵ Pilato nexata jumaitsi bajarapamonaejavabelia:

—Mapamonae tajajivi, vajabitsaëvije, payajavaponare. Nexata paitorobare bajarapamonae Jesús pemêthê pevetsinexa xaniavaetsia, jai.

⁶⁶ Nexata bajarapamonae vajabitsaevi barëponalia Jesús pemêthëjavabelia. Bajarapamonae pemaëtoupi catsataruta Jesús pebuatsiibovajutsi pevêpaacatsiibopanajumata. Itsaupi pijinia catsata iboitapajanitöjavabelia. Bajarapacuenia exana peyapêtaenexa petixitsijava muetsia Jesús peyavajuvêpa acatabuatsiibopanatsi. Bajaraxuacujinae itoroba vajabitsaëvi Jesús pemêthëvêpa pevetavanapaenexa.

28

Pacuenia Jesús petêpaecujinae icatsia asaê yabara pelivaisi (Mr 16.1-8; Lc 24.1-12; Jn 20.1-10)

¹ Judíovi baja penacueraevetsimatacabi itsa verevereca, meravia pitsijava, bajayacunua, ajena matacabi tsarucaponae, María, Magdala tomarapijiva, itsaMaría yajava, taeyojopaliabeje Jesús pebuatsiibovajutsijavabelia.

² Jemata ira najëaba. Tsipaji Dioso pijaángel runaica athëbëvetsica. Angel itsa pata Jesús pebuatsiibovajutsijavata, tixita Jesús peyavajuvêpa acatsiibopanaxanetomi. Bajaraxuacujinae ángel eca bajarapaibopanajumata.

³ Bajaraponê ángel naitayota. Pacuenia yamaxëcotia itsi, bajara cotiatsi ángel. Penaxatatsijava niojai daxita peniojaijiva matatoxenetsia.

⁴ Vajabitsaë, pamonae evtanubena Jesús pebuatsiibovajutsivêpa, itsa tane ángel, neconecojai pecajunavi. Bobenajunua bepetêpaevi. ⁵ Nexata ángel jumaitsi petirivabejejavabelia:

—Pêtsa pajunavamebeje. Yapëtaniji xua yabara paponamebeje. Jesús pecobematabiabarutsinëmitsi cruzajavabelia, pajaitamebeje. ⁶ Ajibi raja tsarucae majotaje. Asaê rabaja icatsia pacuenia baja cajena tajëvelia jumaitsi. Parenamêrebeje panetaenexabeje itsajota picani buatatsi. ⁷ Bajaraxuacujinae paliamêbeje tsane bepíjia. Pijajivijavabelia patsipaebianamebeje mapacueniaje: “Petêpaenëmi rabaja icatsia asaê. Panevajënaeyabelia pina pona Galilea nacuayabelia. Baja pina jotalia pacaxitajarabianame,” pajamêbeje tsane pijajivijavabelia. Bajarapalivaisiyo xainajê patacasiipaebinxabeje, jai ángel bajarapovabejejavabelia.

⁸ Nexata bajarapovabeje naviatabajiravabeje Jesús pebuatsiibovajutsivecua. Junavabeje picani. Itsiata barëyabeje bitso. Cujinaetabajiravabeje petsipaebinxabeje Jesús pijajivijavabelia. ⁹ Bajarapovabeje namutualia

pecujinaejinaenajetaruaejavatabeje, Jesús jemata tsitanaitajētatsibeje. Nexata bajarapovabeje cujitabaliabeje Jesúsjavabelia. Bajacobatsibeje. Nexata pematabacabēta nucajunuabeje. Sitaicaliabeje yayiataeya Jesús pecopiapitsinexabeje bajarapacuenia. ¹⁰ Jesús nexata jumaitsi bajarapovabejejavabelia:

—Pētsa pajunavamebeje. Paliamērebeje tajajivijavabelia. Pajumaitsimēbeje tsane tajajivijavabelia: “Jesús raja jumaitsi. Paponaeremelia pina Galilea nacuyabelia. Baja pina jotalia pacacaxitajarabiana Jesús,” pajamēbeje tsane tajajivijavabelia, jai Jesús.

Pacuenia vajabitsaēvi navajunupaeba yabara pelivaisi

¹¹ Paepatota ēMariavēnēvabeje naviatabeje Jesús pebuatsiibovajutsijavavelia, vajabitsaēvi, Jesús pemēthē pevetsiviyajuvēnēvi, pona tomarebelia. Bajarapamonae tsipaeba sacerdotevi penamatacaitorobivijavabelia pacuenia tane bajarapamonae. ¹² Nexata sacerdotevi penamatacaitorobivi pona judíovi pijaancianovijavabelia penabarēcuaicuaijainexa penajamatabējēpaenexa pacuenia exanaejitsia. Nexata jane baja bajarapamonae najamatabēcuenejēpa. Nexata bajarapamonae rajuta ayaijava palata vajabitsaēvijavabelia. ¹³ Bajarapamonae jumaitsi vajabitsaēvijavabelia:

—Jivijavabelia pajumaitsimē tsane: “Meravi pataitamajitsita, Jesús pijajivi pata. Nexata bajarapamonae juta Jesús petēpaenē,” pajamē tsane. ¹⁴ Nexata nacuaevetsinē Pilato itsa jumetaena mapajumeje, paxanē itsiata pacayavenonaenatsi itsacuene papecaexanaeyaniva, jai bajarapamonae vajabitsaēvijavabelia.

¹⁵ Nexata vajabitsaēvi jejai. Nota bajarapapalata. Nexata jane baja vajabitsaēvi pona najumetsēnētsiaya jivijavabelia pejumaitsinexa pacuenia itorobatsi. Nexata vajabitsaēvi najumetsēnētsiaya jumai tsaponae jivijavabelia:

—Meravi pataitamajitsita, Jesús pijajivi pata. Nexata Jesús pijajivi petēpaenē jutatsi, jai tsaponae jivijavabelia.

Bajarapacuenia vajabitsaēvi pepaebixae, judíovi juya bajarapacuenia nat-sipaebapona. Nexata mapamatacabijavaberena ataje judíovi jumai tsabiabi:

—Jesús pijajivi petēpaenē jutatsi, jai tsabiabi.

Pacuenia Jesús petēpaecujinae icatsia itsa asaē, pijajivi itoroba pejumelivaisi jivi petotsipaebanajetarubanaenexatsi daxitanacuanējava yabara pelivaisi (Mr 16.14-18; Lc 24.36-49; Jn 20.19-23)

¹⁶ Jesús pijajivi once ponēbeje pona Galilea nacuyabelia. Jesús pijajivi pona petsutojumabelia, patsutojumatalia Jesús caxitajarabiapaebatsi.

¹⁷ Nexata bajarapatsutojumata Jesús pijajivi itsa taenuta Jesús, yayiataeya pitabarata pematabacabēta tonubena. Itsiata itsamonae Jesús pijajiviayuvēnēvi jamatabēcuenenavēxaniabiaya jamatabējumaitsi:

—Apo Jesús meta, jamatabējai.

¹⁸ Nexata Jesús pijajivi cujirena. Jumaitsi pijajivijavabelia:

—Dioso baja cajena nevetsiaexana daxitacuene athēbētatsia, daxita mapanacujava ataje, taevetsinexa. ¹⁹ Nexata pacaitorobatsi. Paponare daxitanacuanējava daxitanacuanēpijivi tajumelivaisi patanotetsipaebinxamē tanejumecovēnētsinexa. Bajarapamonae pabautisabaponaename taxa pevēnēta, xanē ata pexēnatonē tavēnēta, Espiritu Santo ata pevēnēta. ²⁰ Bajarapamonae patsipaebaponaename pejumecovēnētavanapaenexa daxita pacuenia pacaitorobatsi. Pētsa

panacofēnētame daxitamatacabi patacayajavaponaponaejava. Nacua peverevereaejavabelianexa ata pacayajavaponaponaejava, jai Jesús pijajivijavabelia.

Pexanialivaisi Jesucristo pelivaisi, San Marcos peyaquinaelivaisi

Pacuenia Juan jivibautisabinē jivi livaisi tsipaeba petusato nacuata yabara pelivaisi

(Mt 3.1-12; Lc 3.1-9, 15-17; Jn 1.19-25)

¹ Mara pacuenia taxuxuaba pexanialivaisi, Jesucristo Dioso pexēnato pelivaisije.

² Bajayata Diosojumepaebinēmi, profeta Isaíaspijinē, tajēvelia yaquina Dioso pejumaisijava pexēnatojavabelia. Dioso jumaisi pexēnatojavabelia mapacueniaje:

Itorobianajē nevajēnaeyabelia tanejumelivaisipaebinēnexa. Catsivajēnaexanebijitsia nijanamuto. ³ Nexata tanejumelivaisipaebinē vavajai tsane petusato nacuata. Jumaisi tsane jivijavabelia: “Jivi baxaneba panamutoverena najetarucaejitsia petuxanenē. Batoroviaexananua namuto. Bajara pijinia pacuenia paxamē ata panajamatabēcuenexaniavaere pepo petuxanenē pepatsivajēnaeya paxamējavaberena,” jai tsane tanejumelivaisipaebinē xamē yabara, jai bajayata tajēvelia Dioso pexēnatojavabelia pejumaisijava Juan jivibautisabinē jivijavabelia Dioso pejumelivaisi petsipaebanajetarucaejavanexa yabara.

⁴ Bajaraxuata nexata Juan jivibautisabinē Dioso pejumelivaisipaebinē najetaruca petusato nacuajava Jesús pevajēnaeya. Juan jivijavabelia jumai tsaponae mapacueniaje:

—Pacopabare pibisiacuene paneexanabiabijava. Panajamatabēcuenepēnyorore Diosojavabelia. Bajaraxuacujinae pacabautisabianatsi. Nexata Dioso pacavecuajibiaexanaena panijaneconimi, jai tsaponae Juan jivijavabelia.

⁵ Nexata ayaibitsaētoхането Judea nacuapijivi, Jerusalén tomarapijivina, muxunaponabiabatsi Juan petsipaebilivaisi penamuxunaevetabiabinexatsi. Nexata bajarapamonae pibisiacuene pexanaejavami, roviaia Diosojavabelia navecuapaebapona. Bajaraxuacujinae Juan bautisabapona bajarapamonae Jordán meneta.

⁶ Juan naxatata camellonata pexanaejava. Naepacēta cuerobocoto. Pexaejava ēbosesē, jabēra yajava. ⁷ Juan Jesús pelivaisi jivi tsipaebapona. Jumai tsaponae tajēvelia Jesús yabara:

—Tacovēverena patsiana itsanē. Bajaraponē daxitacuene pexanaenexa pecaējepaenētsi tsane. Xanē raja saya beveliajamatabēcuenenēnē bajaraponēvecua. Nexata vecuaauranē bajaraponē bepijajivitonēnē tanataenexa. Nexata auranē pijazapato ata tataxujonotsinexa. ⁸ Xanē raja saya pacabautisabatsi merata. Ponē rajane xanēcujinae patsiana, bajaraponē pacatsijamatabējoneyaexanaponaena Espiritu Santo, jai tsaponae Juan jivijavabelia Jesús yabara tajēvelia pevajunupaebijavata Jesús penajetarucaejavanexa.

Pacuenia Juan bautisaba Jesús yabara pelivaisi
(Mt 3.13-17; Lc 3.21-22)

⁹ Jesús najetaruca Nazaret tomaraverena, Galilea nacuata pecaetomaraverena. Nexata Juan bautisaba Jesús Jordán meneta. ¹⁰ Jesús pebautisabicujinaetsi menevetsina penonotajunaevavata, tane itaboxo penapatsijava. Bajarajota Jesús tane Espiritu Santo ata perunaevavatsica pe-matatsénëatsica beucucuto. ¹¹ Jesús jumetanenua athëbëvetsica Dioso pe-jumaitisjavatsi: “Xamë raja taxënatomë, bitso tacaasivanë. Bitso casivajamatabëcuenebarëyatsi,” pejaijavatsi.

Pacuenia Jesús jamatabëcuenejëbatsi dovathi yabara pelivaisi

(Mt 4.1-11; Lc 4.1-13)

¹² Jesús Juan pebautisabicujinaetsi, bepijiayo Espiritu Santo ponaeyaexanatsi petusato nacuyabelia. ¹³ Bajarajotalia daxitacueneviria unupijivi jinavanapa. Nexata bajarajota Jesús ponapona, caenë, cuarenta pamatacabibeje. Bajarapamatacabianëta dovathi picani Jesús jamatabëcuenejëbatsi pibisiacuene pexanaenexa. Bajaraxuacujinae angelevi runaica Jesús peyavenonaenexatsi.

Pacuenia Jesús Galilea nacuata taxuxuaba Dioso pitorobilivaisi jivi petsi-paebijava yabara pelivaisi

(Mt 12.12-17; Lc 4.14-15)

¹⁴ Juan penaneconitsiaexanaenexatsi vajabitsaë vaetabatsi. Nexata penaneconitsivi pejebabiabibota Juan naneconitsiaponapona. Nexata abaxë Juan penaneconitsivi pejebabiabibota itsa ponapona, Jesús najetaruca Galilea nacujavaberena. Jesús jivi tsipaebaponarena pexanialivaisi. Tsipaebaponarena daxita Dioso pijajivi pevetsijavanexa. ¹⁵ Jesús jumai tsaponae jivijavabelia mapacueniaje:

—Imoxoyo rabaja pevajënae pecopiapatsinexa Dioso papecaevetsimatacabinexa. Nexata pacopabare pibisiacuene paneexanabiabijava. Panajamatabëcuenepeñëyorore Diosojavabelia. Pajumecovënëre mapapexanialivaisije papecacapanepaelivaisinexa, jai tsaponae Jesús jivijavabelia.

Pacuenia Jesús junata cuatro ponëbeje dujuai peyamatajucabiabivi yabara pelivaisi

(Mt 4.18-22; Lc 5.1-11)

¹⁶ Jesús najetaruca Galilea pucaxaneto itapaya. Nexata Galileapuca itapata Jesús taenuta anijanëbeje nacaebananëbeje, Simónbeje Andrésbeje. Bajaraponëbeje daxitamatacabi canacujitsia dujuai yamatajucabiababeje.

¹⁷ Nexata Jesús jumaitsi bajaraponëbejejavabelia:

—Naxanitsia. Panepënaponarebeje. Nexata pacacujarubianatsibeje jivi panejucaenexabeje. Pacuenia dujuai payamatajucabiabamebeje, bajarapacuenia jivi pajucaenamebeje Dioso pijajivinxaxa, jai Jesús bajaraponëbejejavabelia.

¹⁸ Nexata bajaraponëbeje dujuai peyamatajucabiabijavamibeje bajarajota puenetabuatabeje. Nexata baja naponabeje Jesús pepëta.

¹⁹ Nexata icatsia bebeliayo pevajënaeyabelia Jesús barëpona. Icatsia Jesús taenuta anijanëbeje Santiagobeje Juanbeje, Zebedeo pexënatobeje. Bajaraponëbeje pijajeraënëta xanabanucabeje dujuai peyamatajucaevavabeje. ²⁰ Nexata icatsia Jesús junata bajaraponëbeje ata. Nexata bajaraponëbeje bajarajota jerata puenetanutabeje paxa Zebedeo jane baja. Nexata Zebedeo, pijajivi yajava, nacopatanuca bajarajota. Nexata baja Santiagobeje Juanbeje naponabeje Jesús pepëta.

Pacuenia pebi dovathi peyjavaponaponaeñe Jesús jamatejemayaexana yabara pelivaisi
(Lc 4.31-37)

²¹ Nexata Jesús, pijajivi yajava, pata Capernaum tomarabelia. Judíovi penacueraevetsimatacabitá Jesús joneya judíovi penacuetauatabiabiboyalia. Nexata bajarajota Jesús jivi livaisi tsipaeba. ²² Nexata Jesús pejumetaevitsi jamatabécuenenabenajaca Jesús petsipaebilivaisi yabara. Bajarapamonae jamatabécuenenabenajaca tsipaji xaniavaetsia Jesús tsipaeba Dioso pitorobinétsicuenia. Apo tsipaebi pacuenia judíovi pecujarubivi tsipaebabibaba. ²³ Bajarajota pebi dovathi peyjavaponaponaeñe naeca. Nexata bajaraponé Jesúsjavabelia vavajai tsaxuabi. Jumaitsi:

²⁴ —¡Jesús, Nazaret tomarapijinémē, panevecuaponare baja! ¿Detsa xua panexanaejitsiamé? ¿Najetarucame tsaja pataneveretsinexamé? Xané cajena cayapétanetsi. Xamē raja Dioso pexēnatomē, pepo pexaniajamatabécuenenémē, jai dovathi peyjavaponaponaeñe Jesúsjavabelia.

²⁵ Jesús nexata jumeitaveta dovathi. Jumaitsi:

—¡Moyamēre! ¡Vecuapitsapare baja maponēje! jai Jesús.

²⁶ Nexata dovathi pebi pinijicuenia devacaibiaexanatsi. Dovathi vavajai pinijicuenia. Nexata baja dovathi pitsatabijirava jivitonévecua. ²⁷ Nexata daxitajivi bajarapacuenē ita tane, bitso jamatabécuenenabenajaca. Najumaitsi bajarapamonae:

—¿Detsa mapitsicuenēje? ¿Detsa mapitsipejanacujarubicuenēje? ¡Maponēje Jesús, beDioso pitorobinétsitsica! ¡Dovathi ata jumecovēñētatsi! ¡Nexata Jesús pitavetsixae dovathi, pebi baja vecuapitsapatsi! najai bajarapamonae.

²⁸ Nexata daxita Galilea nacuapijivi bepíjia Jesús vēñēlivaisitanetsi Dioso pesaēta pinijicuenē pexanaponaejava.

Pacuenia Simón Pedro pijava pena Jesús tojamatejemayaexana yabara pelivaisi
(Mt 8.14-15; Lc 4.38-39)

²⁹ Jesús baja pitsapa judíovi penacuetauatabiabibovecua. Nexata Santiagobeje Juanbeje Jesús yajavapona. Jesúsbana naponá Simónbeje Andrésbeje pijaboyabelia. ³⁰ Nexata Simón pijabota Simón pijava pena Jesúsbana pevājēnae romaebanucatsi camata. Nexata itsamonae bepíjia Jesús tsipaebarecēpatsi bajarapova peromaebanucaejavatsi. ³¹ Nexata Jesús imoxoyotabalia peromaebanucaevatsi. Cobeyotsiaya maticota. Nexata bajarajota peromaebanucaevatsi vecuaajibi tsanajetsitsireca baja domae. Nexata bajarapova Jesúsbana pexaejava toexanatsi.

Pacuenia ayaibitsaēto jivi piavitanevi Jesús jamatejemayaexana yabara pelivaisi
(Mt 8.16-17; Lc 4.40-41)

³² Ita baja ajena meravitsia, Jesúsjavaberena tocapatatsi daxita piavitanevi. Tocapatatsinua dovathi peyjavajinavanapaevinua. ³³ Daxita tomarapijivi Jesús pepatsibota baupajavaberena nacaetuata. ³⁴ Nexata Jesús jamatejemayaexana ayaibitsaēto daxitacuenēvitane pexainavimi. Vecuapitsapanua dovathi peyjavajinavanapaevi. Jesús apo tocopatsi dovathi pecuaicuaijainexa jivijavabelia pevajunupaebiyavatsi. Tsipaji dovathi xaniavaetsia Jesús yapétanetsi Dioso pexēnatocuenē.

Pacuenia Dioso pitorobilivaisi Jesús jivi tsipaeba Galilea nacuata yabara pelivaisi

(Lc 4.42-44)

³⁵ Pepo bajayacunua, abaxë itsa apo napebetsi matacabi, Jesús naëcota. Nexata pitsapalia bovecua. Pesaicaeyojavabelia pona pevajëtsinexa Diosojavabelia. Jesús nexata pecovëta matacabi baja. ³⁶ Itsa baja matacabi, Simónbana Jesús pëjaitaponalia. ³⁷ Itsa baja bajarapamonae Jesús caxitajaraba, jumaitsi bajarapamonae:

—Daxita raja cajaitaruta pecataenexa, jai bajarapamonae Jesúsjavabelia.

³⁸ Nexata Jesús jumaitsi:

—Ponatsi baja imoxoyo penaetomaraxijavabelia bajarajotalia tatsipaebinexa Dioso pitorobilivaisi. Bajaraxuanexa bovecua pitsaparenajë, jai Jesús.

³⁹ Nexata daxita Galilea nacujava Jesús jivi tsipaeba pona Dioso pitorobilivaisi judiövi penacaeuatabibonëjava. Jesús jivi dovathi vecuacapit-saponanua.

Pacuenia Jesús jamatejemayaexana bajayajebi bitso peperabëtsabanaenë yabara pelivaisi

(Mt 8.1-4; Lc 5.12-16)

⁴⁰ Jesús imoxoyorenatsi bajayajebi bitso peperabëtsabanaenë. Nexata bajaraponë pematabacabëta nucajunua Jesús pitabarata. Bajaraponë pini-jicuenia vajëta Jesúsjavabelia. Jumaitsi:

—Cacaëjëpa tanejamatejemayaexanaexamë. Itsa jitsipame, nejamatejemayaexanare mapavitanevucuae, jai peperabëtsabanaenë Jesúsjavabelia.

⁴¹ Nexata Jesús bajaraponë itaxutobejiobiatane. Pecobeta perabëjayalia. Jumaitsi:

—Jājā, jitsipajë cajena. Jamatejemamë rabaja, jai Jesús peperabëtsabanaenëjavabelia.

⁴² Bajarapacuenia Jesús pejumaitsijavata peperabëtsabanaenëmi baja perabëxanepananajereca. Jamatejema baja. Peperabëtsabanaejavami baja ajibi.

⁴³ Nexata baja Jesús naviatsiaexana bajaraponë. Pini-jicuenia Jesús muxujioba bajaraponë penaviatsivajënaeya. Jesús jumaitsi:

⁴⁴ —Nejumetaema. Pëtsa itsajivijavabelia tsipaebame tacajamatejemayaexanaejava. Naitajëremelia jane sacerdotenëjavabelia templobota penacuenëbinëjavabelia. Nexata sacerdotenë cataena pecavecuaajibijava baja niavitanejavami. Diosonexa rajuremelia ofrenda sacerdotenëjavabelia pecavecuaajibiaexanaexae niavitanejavami. Bajara tsipaji pacuenia bajayata vajasalinainëmi Moiséspijinë nacaitoroba. Nexata jivi yapëtaena pepacuenë baja pecavecuaajibijava niavitanejavami, jai picani Jesús bajayajebi bitso peperabëtsabanaenëmijavabelia.

⁴⁵ Nexata bajaraponë lia. Itsiata tsipaebanajetaruca daxitajivijavabelia Jesús pejamatejemayaexanaejavatsi. Bajaraxuata Jesús apo jitsipae naitajëtsiaya pejonejava itsatomarabelia ata, jivi ayaibitsaëtoxaneto pematoyoronaeyanivatsi. Jesús saya ponapona tomanë piajibijava. Itsiata cajena daxita nacuanëjavaverena jivi muxunapatabiabatsi Jesús.

2

Pacuenia Jesús jamatejemayaexana petabusipacuenëtsi yabara pelivaisi

(Mt 9.1-8; Lc 5.17-26)

¹ Itsamatacabi icatsia Jesús naviarena Capernaum tomaraberena. Nexata jivi yapètane pabota Jesús patajopa. ² Nexata jivibitsaëttoxaneto nacaet-uata Jesús pepatsibota. Bo baupa ata cajena bitso jivi vënëca. Nexata bajarapamonaejavabelia Jesús tsipaeba Dioso pitorobilivaisi. ³ Nexata cuatro ponëbeje parena, camayota peyavëtacaranajetarubenaevi petabusipacuenebinëtsi. ⁴ Nexata petabusipacuenabinëtsi acuenebi bajarapamonae pecapatsijava Jesús pitabarayabelia. Tsipaji bo ënëtuatuajë bitso jivi yavënëca. Nexata petabusipacuenabinëtsi pecapatsivi, bomatatujuvavetsica vojoexana Jesús pecanacujitsiatsica. Nexata bajarapavojotuatsica camayota yacopatsica petabusipacuenebinëtsi. ⁵ Jesús jamatabëcueneyapètane pacuenia bajarapamonae sivanajamatabëxainatsi. “Nacatojamatejemayaexanaenatsi cajena,” pesivanajamatabëjaijavatsi Jesús jamatabëcueneyapètane. Bajaraxuata petabusipacuenebinëtsijavabelia Jesús jumaitsi mapacueniaje:

—Tajabananë, pibisiacuene rabaja nexanaeconimi cavecuaajibiaexanatsi, jai Jesús.

⁶ Bajarajota judíovi pecujarubiviyajuvënëvi naena. Bajarapamonae itsa jumetaeyena bajarapacuenia Jesús pejumait sijava, nexata jamatabëcuenenavëxaniabiaya bëpënëa jamatabëjumai tsenae mapacueniaje:

⁷ —Maponëje Jesús Dioso apo pejitsipaecuenia cuaicuajiai. Itsanë ata cajena apo caëjëpaetsi itsajivi pibisiacuene pexanaeconimi pevecuaajibiaexanaenexa. Caenë Dioso caëjëpatsi pevecuaajibiaexanaenexa bajarapacuenie, jamatabëjai tsenae bajarapamonae.

⁸ Jesús jamatabëcueneyapètane bajarapamonae jamatabëcuenenavëxaniabiaya bajarapacuenia pesivanajamatabëxainaejavatsi. Nexata Jesús jumaitsi bajarapamonaejavabelia:

—Pëtsa bajarapacuenia panesivanajamatabëxainame. Tsipaji cajena xanë necaëjëpa jivi pibisiacuene pexanaeconimi tavecuaajibiaexanaenexa. ⁹ Paxamë apo pacacaëjëpae ata itsajivi pibisiacuene pexanaeconimi pan-evēcuaajibiaexanaenexa, pacacaëjëpa picani saya jema panejumaitsinexa petabusipacuenebinëtsijavabelia mapacueniaje: “Cavecuaajibiaexanatsi rabaja pibisiacuene nexanaeconimi,” panejainexa. Tsipaji itsajivi ata apo yapëtae tsipae saya jema panejumait sijava. Itsiata baitsi jane itsa apo pacacaëjëpae panejamatejemayaexanaenexa petabusipacuenebinëtsi, acuenebi panejumaitsinexa bajaraponëjavabelia mapacueniaje: “Nonotapunare. Nijacamayo pire. Ponare baja,” panejainexa. Tsipaji bajarapacuenia pajumaitsimë ata, itsa apo jamatejema tsipae bajaraponë, nexata daxitajivi pacayapëtaejitsipa apo papecaëjëpaeacuene panejamatejemayaexanaenexa, jai nexata Jesús judíovi pecujarubivijavabelia.

¹⁰ Icatsia Jesús jumaitsi bajarapamonaejavabelia:

—Xanë, Daxitajivi Pematapijinënë, mapanacuata necaëjëpa tavecuaajibiaexanaenexa itsajivi pibisiacuene pexanaeconimi ata pacuenia baja exanajë maponëjavabeliaje. Nexata patanecueneyapëtaenexamë tanecaëjëpaeacuene tavecuaajibiaexanaenexa itsajivi pibisiacuene pexanaeconimi ata, pataema pacuenia jamatejemayaexanaejitsianë maponëjë, jai Jesús judíovi pecujarubivijavabelia.

Nexata icatsia Jesús jumaitsi petabusipacuenebinëtsijavabelia:

¹¹ —Xamë cajumaitsi. Nonotapunare. Nijacamayo pire. Nijaboyabelia baja ponare, jai Jesús.

¹² Nexata bajarapacuenia Jesús pejumaitsijavata petabusi-pacuenebinēmitsi nonotapuna. Pebocaecamayo baja pita. Pitsapalia baja daxitajivi pitabarata. Nexata daxitajivi itsa tane bajarapacuenē, jamatabēcuenenabenajaquena. Bajarapamonae jumai tsenae mapacueniaje:

—Dioso cajena bitso ayaijatabēcuenenē. Caeto ata abaxē mapitsicuenē pexanaejava apo taetsijē, jai tsenae bajarapamonae.

Pacuenia Jesús pijajivitonēnexa junata Levivēnēnē yabara pelivaisi
(Mt 9.9-13; Lc 5.27-32)

¹³ Jesús pona pucaxaneto itapajavabelia. Nexata jivi ayaibitsaētoxaneto pēnapatatsi bajarabelia. Nexata Dioso pejumelivaisi Jesús tsipaeba bajarapamonaejavabelia. ¹⁴ Bajaraxuacujinae penajetarucaejavata Jesús taeyeta Levivēnēnē, Alfeo pexēnato. Leví eca pabota gobierno pejamatabēcuene jivijavabelia matamoyanijobabiaba impuestomatamo. Nexata Jesús jumaiti Levijavabelia:

—Leví, naxanitsia. Nepēnaponare, jai Jesús.

Jejai Leví. Nexata nonotapuna. Leví baja napona Jesús pepēta.

¹⁵ Nexata Leví junata Jesús pebarēnabaninexa pijabota. Nexata Leví pijabota Jesús pexaejava naxane. Leví pijabota ayaibitsaēto naena gobierno pejamatabēcuene jivijavabelia impuestomatamo pematamoyanijobabiabivi. Itsamonae ata nanabane pijamatabēcuenebejevi. Nexata Jesús pijajivi nabarēeca bajarapamonaejavata. ¹⁶ Nexata fariseovi, judíovi pecujarubivina, Jesús taeyetatsi daxita bajarapamonaejavata pijajivi penabarēnabanecaejava. Nexata bajarapamonae jamatabēcuenenavēxaniabiaya jumaiti Jesús pijajivijavabelia:

—Papecacujarubinē Jesús naneconita Diosojavabelia. Tspiji gobierno pejamatabēcueneta impuestomatamo pematamoyanijobabiabivijavata, pijamatabēcuenebejevijavatana, naxaeyeca pexaejava, jai bajarapamonae Jesús pijajivijavabelia.

¹⁷ Itsa Jesús jumetane mapajumeje, nexata jumaiti bajarapamonaejavabelia:

—Pevaēbinē raja apo vaēbi pejamatejemavi. Pevaēbinē raja piavitanēvi vaēba. Bajara pijinia xanē ata itsinē. Apo sivapatajopaenē tajunatsinexa pamonae baja aneconijibi tsavanapae. Sivapatajopajē raja tajunatsinexa pijaneconi pexainaēvi. Bajarapamonae junataponajē pecopabinexa pibisicuenē pexanaejava penajamatabēcuenepēnyorotsinexa Diosojavabelia, jai Jesús bajarapamonaejavabelia.

Pacuenia Jesús yanijobatsi pamatacabibeje jivi vajētaƨona Diosojavabelia pexaejava apo pexaeyabiabixae yabara pelivaisi
(Mt 9.14-17; Lc 5.33-39)

¹⁸ Itsamatacabi Juan pijajivi, fariseovi pijajivina, pexaejava apo xaevanapae pamatacabibeje Diosojavabelia vajēcapona. Nexata itsamonae Jesúsjavaberena pata. Yanijobatsi pexaejava piatsobicuene yabara. Jumaiti mapacueniaje:

—Juan pijajivi, fariseovi pijajivina, pexaejava apo xaeabiabi pamatacabibeje Diosojavabelia vajētaƨona. ¿Detsa xuajitsia itsiata xamē nijajivi pexaejava xaeabiaba pamatacabibeje Diosojavabelia vajētaƨona? jai Jesús peyanijobivitsi.

¹⁹ Nexata Jesús jumaiti bajarapamonaejavabelia:

—Pamonae junatatsi penacasabifiestajavabelia penanabaninexa, apo at-sobi pexaejava itsa abaxë yajavaecatsi pejananacasabinë. Itsa abaxë pejananacasabinë yajavaponaponatsi, acuenebi pexaejava piatsobinexa bajarapamonae. ²⁰ Itsiata baitsi jane itsa pejananacasabinë tsimaxëpatsipatsi pevecuacaponaeenexatsi itsajavabelia, nexata bajarapamonae pexaejava apo xae tsipae. Tsipaji bitso najamatabëxainaejitsipa pevecuacaponaeaxetsi. Bajara pijinia itsi tajajivi ata. Tayajavaponaponaeepato abaxë apo atsobabiabi pexaejava pamatacabibeje Diosojavabelia vajëta. Itsiata pamatacabi xanë necaponae bajarapamonaevecua, nexata jane baja bajarapamatacabi pexaejava apo xae tsane bitso tanesivanajamatabëxainaeaxae, jai Jesús peyanijobivitsijavabelia.

²¹ Nexata bajarapamonae perujumatabëcuene baja pecopabinexa, Jesús livaisi tsipaeba comparacióncuenia bajarapamonae pejumecovënëtsinexa ëpejanalivaisi, Jesús petsipaebilivaisi. Bajarapamonae anijamatabëcuenebeje pexainaeayaniva perujumatabëcuene baja pecopabinexa, Jesús livaisi tsipaeba comparacióncuenia. Perujumatabëcuene yabara Jesús jumaitsi bajarapamonaejavabelia mapacueniaje:

—Itsajivi ata raja apo catsatarutsi pejanapana perujunaxatatsiesetojavabelia. Itsa catsatarutsipa pejanapanata perujunaxatatsiesetojavabelia, nexata pejanapana yanarobotsipa perujuesetojavaverena. Nexata biji bitso pinijivojoto titinaejitsipa. ²² Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatitibia tsipae. Tsipaji perujubocodoruanë apo yanayeretsi tsipae. Tsipaji pejanavinoranë pejumalitsëxë abaxë xaina. Nexata itsa yatitibia tsipae, mene naxuabijitsipa, vinoranëmi. Bajaraxuata bepaca pejanavinoranë pejanabocodoruanëjavabelia, jai Jesús peyanijobivitsijavabelia bajarapamonae pejumecovënëtsinexa ëpejanalivaisi, Jesús petsipaebilivaisi, perujumatabëcuene baja penacopabinexa.

*Pacuenia Jesús pijajivi namutua siricanajetarubena trigoxu penacuer-
evetsimatacabita yabara pelivaisi*
(Mt 12.1-8; Lc 6.1-5)

²³ Judiovi penacueraevevtsimatacabita Jesús, pijajivi yajava, najetaruca namutua trigo pabianëjava. Nexata Jesús pijajivi piagianixae, trigoxu siricanajetarubena. Xuxaeyabuata. ²⁴ Nexata fariseovi jumaitsi Jesúsjavabelia:

—¡Taema mapacuenije! Dioso Moiséspijinëta penajumecopatsilivaisita vajanacaitavetsicue, nijajivi exana. Apo nacaitavetsi ata trigoxu vajaxaejava, itsiata ajena penacueraevevtsimatacabixae, nijajivi apo bexanae mapacuenije, jai fariseovi Jesúsjavabelia.

²⁵ Nexata Jesús jumaitsi fariseovijavabelia:

—Ajena, penacueraevevtsimatacabita, tajajivi bajarapacuenia exanae ata, itsiata apo pibisiacue. Tsipaji bitso piajani. ¿Apo palebimë tsipaji Dioso pejumelivaisibaxuto paneyapëtaenexa pacuenia vajasalinainëmi Davidpijinë, pebareponaponaevi yajava, exana pamatacabi bitso piajani?

²⁶ Davidpijinë joneya Dioso pijatemploboyalia pamatacabi Abiatarpijinë daxita sacerdotevi penamatacaitorobinë tsaponaponae. Nexata Dioso pijatemploböenëta, mesajumata, bobena Diosonexa ofrendacuenia petojebipanëanë. Bajarapapanëanë itsajivi ata apo tucopatsitsi pexaenexa penaneconitsiyani Diosojavabelia. Ësacerdotevi picani tocopatatsi pexaenexa. Davidpijinë apo sacerdotenë ata, xae ata bajarapapanëanë pijajivi barë, itsiata apo vënananeconitsi Diosojavabelia, jai Jesús fariseovijavabelia.

²⁷ Icatsia Jesús jumaitsi fariseovijavabelia:

—Dioso raja tocopata caematacabi jivi penacueraevetsinexa. Tsipaji Dioso yapètane pacuenia jivi namatavenona penacueraevetsinexa. Dioso apo exanae jivi saya jema peyaiyatenexa penacueraevetsimatacabianè. ²⁸ Nexata xanè, Daxitajivi Pematapijinènè, netoxanepana cajena tatsipæbinexa pacuene xanepana jivi pexanaenexa penacueraevetsimatacabita ata, jai Jesús fariseovijavabelia.

3

Pacuenia Jesús jamatejemayaexana pebi pecobetsaquenaenè yabara pelivaisi

(Mt 12.9-14; Lc 6.6-11)

¹ Penacueraevetsimatacabita Jesús joneya judiövi penacætuatabiabi-boyalìa. Nexata bajarajota pebi naeca pecobetsaquenaenè. ² Nexata Jesús naitaxutocævetatsi fariseovi petænexatsi pecobetsaquenaenè pejamatejemayaexanaejava penacueraevetsimatacabita. Nexata Jesús pecobetsaquenaenè itsa jamatejemayaexana penacueraevetsimatacabita, “Jesús raja naneconita Diosojavabelia. Tsipaji penacueraevetsimatacabita nacueneba,” pejainexa bajarapamonæ. ³ Nexata Jesús jumaitsi pecobetsaquenaenèjavabelia:

—Nonotapunare. Nucare mapamonæ pitabarataje, jai.

⁴ Nexata Jesús jumaitsi fariseovijavabelia:

—Penacueraevetsimatacabita ata xanepana vajaexanaenexa pexaniacuene. Xanepana vajajamatejemayaexanaenexa piavitanevi, jai Jesús fariseovijavabelia.

Nexata fariseovi Jesús apo jumepitsitsi. ⁵ Nexata Jesús anaeya naècota bajarapamonæ. Bajaraxuacujinae Jesús bejamatabèjjobireca. Tsipaji yapètane piamatabècuenetajajava fariseovi. Nexata Jesús jumaitsi pecobetsaquenaenèjavabelia:

—Namaxèrovire, jai.

Nexata pecobetsaquenaenè namaxèrovita. Bajarajota cobexanepanana-jereca baja. Pecobetsaquenaejavami ajibi. ⁶ Nexata fariseovi itsa tane Jesús pecobexanepanaeyaexanaejava pecobetsaquenaenè, fariseovi anaepana. Nexata bajarapabovecua pitsapa. Pona penabarècuaicuaijainexa nacuaevetsinè Herodes pijajivijavabelia. Bajarapamonæ najumejaita Jesús pebeyaxuabinexatsi.

Pacuenia jivi nacaetuata Galilea pucaxaneto itapata yabara pelivaisi

⁷ Jesús, pijajivi yajava, pona Galilea pucaxaneto itapayabelia. Nexata Jesús pënaponaliatsi ayaibitsaètoxaneto Galilea nacuapijivi. ⁸ Nexata Jesús pënaponaliatsi Judea nacuapijivina, Jerusalén tomarapijivina, Idumea nacuapijivina, Jordánmene itsapanaverenapijivina, imoxoyo Tiro tomaravecua pejinavanapaevinua, imoxoyo Sidón tomaravecua pejinavanapaevinua. Daxita bajarapamonæ Jesús pënaponaliatsi tsipaji Jesús vènèlivaitsitanetsi Dioso pesaèta pinijicuene pexanaponæjæva. ⁹ Nexata Jesús pijajivi itoroba jera petoxaniavaetarutsinexatsi menetareca. Itsa bajarapajivibitsaètoxaneto Jesús bitso matacènènaponatsi, nexata bajarapamo ènèabereca Jesús perunaenexareca. ¹⁰ Jesús baja ayaibitsaèto piavitanevi jamatejemayaexana. Bajaraxuata itsamonæ, piavitanevi, Jesúsjavabelia natorotaponabiaba pejayatsinexatsi.

¹¹ Dovathi peyjavajinavanapaevi Jesús itsa taeyabiabatsi, bajarapamonae irata othopabiaba Jesús pitabarata. Bajarapamonae aėjai tsabiabi.

—Xamē tsaena Dioso pexēnatomē, jai tsabiabi dovathi peyjavajinavana-paevi.

¹² Nexata Jesús jumeitaveta bajarapamonae. Jumaitsi:

—“Dioso raja pexēnato,” pajamē pētsa xanē yabara itsajivijavabelia, jai Jesús bajarapamonaejavabelia.

Pacuenia Jesús pijajivi ayaibitsaētoخانetoyajuvēnēvi itapeta saya doce ponēbeje apóstolevinexa yabara pelivaisi

(Mt 10.1-4; Lc 6.12-16)

¹³ Jesús pijajivi ayaibitsaētoخانetoyajuvēnēvi, doce saya ponēbeje, itapeta apóstolevinexa. Jesús pitapetsivajēnae apóstolevinexa, junaya petsutojumabetsia. Bajaravetsica Jesús junatanuca ponēbeje jamatabēitapeta apóstolevinexa. Nexata pamonae Jesús itapeta apóstolevinexa, junaya petsutojumabetsia, Jesúsjavabetsia.

¹⁴ Nexata Jesús caetuata caebitsaētoyo, doce ponēbeje pijajivi, pepēnajanavanapaevinexatsi. Jesús itorobijitsianua bajarapamonae daxitanacuanējāva jivi petsipaebanajetarubenaenexa Dioso pitorobilivaisi.

¹⁵ Jesús pijajivi jamatabēcuenecaējēpaeyaexana Dioso pesaēta pejamatejē-mayaexanaponaenexa piavitanevi. Jamatabēcuenecaējēpaeyaexananua Dioso pesaēta dovathi jivi pevecuacapsapaponaenexa.

¹⁶ Jesús piijaapóstolevi, doce ponēbeje, mapevēnēanēje. Copiaya ponē pevēnē Simón. Bajaraponē Jesús vēruba itsavēnē, Pedro.

¹⁷ Itsanē Santiago. Itsanē Juan. Santiagobeje Juanbeje nacaebananēbeje, Zebedeo pexēnatobeje. Bajaraponēbeje Jesús vēruba Boanerges. “Boanerges,” itsa jai, bajarapamonae pijajumeta

mapajumetaje pejumaitsijume: “Yamaxē pexēnatobeje,” pejaijume.

¹⁸ Itsanē pevēnē Andrés. Itsanē Felipe. Itsanē Bartolomé. Itsanē Mateo. Itsanē Tomás. Itsanē Santiago, Alfeo pexēnato. Itsanē Tadeo. Itsanē Simón, celotenē.

¹⁹ Itsanē Judas Iscariote. Bajaraponē bexējāvabelia Jesús canajetsijitsiatsi pijāvajabitsaē pecobeyabelia pebeyaxuabinexatsi.

Pacuenia itsamonae Jesús yabara jamatabēcuenenavēxaniabiaya jumaitsi: “Beelzebú raja pesaēta, Jesús dovathi jivivecua capsapapona,” jai yabara pelivaisi

(Mt 12.22-32; Lc 11.14-23; 12.10)

²⁰ Jesús boya joneya pijajivi yajava. Icatsia jivibitsaētoخانeto nacaetuata. Nexata acuenebi Jesús pijajivi pebarēnabanijāva.

²¹ Itsamonae Jesús yabara jumaitsi: “Jesús raja matajemabatsi,” jai. Nexata bajarapacuenia itsamonae Jesús yabara pejumaitsijāva, Jesús pijamonae vēnēlivaisitanetsi. Nexata Jesús pijamonae ponarena Jesúsjavaberena pebarēponaenexatsilia picani.

²² Judíovi pecujarubivi, Jerusalén tomaraverena peponaevi, jamatabēcuenenavēxaniabiaya Jesús yabara jumaitsi:

—Mara ponē Jesúsje, Beelzebú yajavapapona. Beelzebú raja daxita dovathivi pevetsinē. Bajaraxuata Jesús Beelzebú pesaēta dovathi jivivecua capsapapona, jai judíovi pecujarubivi jamatabēcuenenavēxaniabiaya Jesús yabara.

²³ Nexata Jesús junata bajarapamonae jamatabēcuenenavēxaniabiaya pejumaitsijāva pecanaējētsinexa. Nexata bajarapamonaejavabelia Jesús jumaitsi mapacueniaje:

—Beelzebú raja dovathivi jivivecua apo capsapapona tsipae. Tsipaji Beelzebú dovathi jivivecua itsa capsapaponaējitsipa, nexata Beelzebú

bepijavajabitsaë taejitsipa pijajivi. ²⁴ Pacanaëjère mapacueneye. Nacae-nacuapijivi ata itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaenacuapijivi ata. ²⁵ Bajara pijinia nacaemonae ata itsipae. Itsa navecuanatsanaejitsipa penasivanavajabitsaëtsinexa, namataenetsia naverebiabijitsipa nacaemonae ata. ²⁶ Bajara pijinia itsipae dovathi ata. Dovathi jivivecua itsa capitsaponaejitsipa pijajivi dovathivi, nexata bepijavajabitsaëne taejitsipatsi pijajivi. Nexata apo sivaajamatabëcuenesaë tsipae pexanaponaejavanexa. Nacopiarucaeyaexanaejitsipa dovathi, jai Jesús judíovi pecujarubivijavabelia.

²⁷ Bajarapamonae pecanaëjëtsinexa Jesús bitso piasaëñeucene dovathi matatoxenetsia, Jesús icatsia jumaitsi bajarapamonaejavabelia mapacueni-aje:

—Itsajivi ata apo caëjèpaetsi pejonenexa bitso piasaëñe pijaboyalia pey-acajërëtsinexa xua xaina pijabota. Itsiata itsa patsipa bajaraponë matatoxenetsia bitso piasaëñe, nexata cobecëtabuatsipatsi. Taxucëtabuatsipatsi yajava. Matapania bajarapacuenia yacajërëtsipatsi daxita xua xaina pijabota. Bajara pijinia pacuenia xanë ata bitso tasaëñe dovathi matatoxenetsia. Bajaraxuata necaëjèpa jivivecua tacapitsapaenexa dovathivi.

²⁸ Xaniajanë pacuenia pacatsipaebatsi. Dioso cajena caëjèpatsi daxitajivi pibisiacuenex pexanaeconi pevecuaajibiaexanaenexa. Pibisiacuenia jivi Dioso baracuaicuajai ata, bajarapaneconi ata Dioso caëjèpatsi pevecuaajibiaexanaenexa. ²⁹ Itsiata baitsi jane pajivi pibisiacuenia baracuaicuajai Espíritu Santo, bajarapajivi Dioso apo vecuaajibiaexanae tsane bajarapaneconi. Bajarapajivi naneconitsiana daxita matacabijavabelianexa, jai Jesús bajarapamonaejavabelia.

³⁰ Bajarapacuenia Jesús jumaitsi tsipaji Jesús Espíritu Santo yajavaponaponaë atatsi, judíovi pecujarubivi jumaitsi Jesús yabara: “Jesús raja Beelzebú yajavaponapona,” jai. Nexata bajaraxuata bajarapamonae naneconita Espíritu Santojavabelia.

Pacuenia Jesús pejuyapijivi, pena yajava, nubena bojumavelia yabara pelivaisi

(Mt 12.46-50; Lc 8.19-21)

³¹ Jesús pejuyapijivi, pena yajava, pata Jesúsjavaberenena. Itsiata bajarapamonae boyalia apo jonelia Jesús penucaeboyalia. Nexata bajarapamonae junatsiaexana Jesús pejumetaeyenaevitsijavabelia. ³² Nexata pamonaë Jesús petsipaebilivaisi matatoyorotsia jumetaeyenatsi, Jesúsjavabelia jumaitsi:

—Patajatuxanenë, ena raja, nejuyapijivi yajava, nuca patapënëverena. Cajaita raja xamë, jai bajarapamonae Jesúsjavabelia.

³³ Nexata Jesús jumaitsi bajarapamonaejavabelia:

—¿Detsa pitsijamatabëcuenevi taena, tajuyapijivinua? jai Jesús.

³⁴ Bajaraxuacujinaë Jesús naëcota pematatoyorotsiaenaevitsi. Jumaitsi bajarapamonaejavabelia:

—Mara jota pamonaë xanëjavata penaevije, bajarapamonae jane taenajivi, tajuyapijivinua. ³⁵ Tsipaji raja pamonaë exana pacuenia Dioso itorobatsi, bajarapamonae jane baja tajuyapijivi, taenajivinua, jai Jesús bajarapamonaejavabelia.

4

Pacuenia Jesús jivi livaisi tsipaeba peubinë pelivaisicuenia yabara pelivaisi (Mt 13.1-9; Lc 8.4-8)

¹ Icatsia Jesús taxuxuaba livaisi petsipaebijava Galilea pucaxaneto itapajavata. Nexata jivi ayaibitsaëtoخانeto nacaetuata itsajota Jesús livaisi tsipaebanuca. Nexata Jesús runareca jera ênëabereca. Ecareca jera ênëtareca. Daxita jivibitsaëtoخانeto tajetabovelía nubena. ² Nexata Jesús daxitacuene livaisianê tsipaeba jivijavabelía. Jesús jumai tsaponae bajarapamonaejavabelía mapacuenajaje:

³ —Panenamuxunaevere mapalivaisije. Peubinê pona pabiabelía peubinea. Nexata itsa pata pabita, peubixu pexucayajabajarabicuenía ubana-jetaruca. ⁴ Nexata pexucayajabajarabijavata itsaxu othopa pabi tuatu-ajêjava, penajetarucaenamutojumata. Nexata bajarajota pata baratsui. Xane bajarapaxumi juvinejeva. ⁵ Itsaxu pijinia othopa ibopananêjumata, itsajota bitso ira apo aitayaê. ⁶ Nexata icotía bitso itsa ataju, nexata bajarapaxu juvi ata, tsaquenapona. Tsipaji irabereca bitso apo atabunepepiareca. ⁷ Itsaxu pijinia othopa xanêebacabomijavata. Nexata peubixu xanêebotonê caecuenía itsa yajavajuva, bitso xanêebotonê maticênênatsi peubijavami. Nexata peubijava apo xainae pecuai. ⁸ Itsaxu pijinia othopa pexaniairata. Nexata juva. Xaniavaetsia vitsabaponanua. Xainanua pecuai. Itsabotonê capitsapa treinta paxutobeje tsaponae. Itsabotonê capitsapa sesenta paxutobeje tsaponae. Itsabotonê capitsapa cien paxutobeje tsaponae, jai Jesús bajarapalivaisi petsipaebivijavabelía.

⁹ Nexata icatsia Jesús jumaitsi jivibitsaëtoخانetojavabelía:

—Pajivi jamatabênejumeyapêtane patacatsipaebilivaisi, nenamuxunaevetsi xaniavaetsia, jai Jesús.

Pacuené yabara Jesús jivijavabelía livaisi tsipaeba êcomparacióncuenía yabara pelivaisi
(Mt 13.10-17; Lc 8.9-10)

¹⁰ Jesús livaisi petsipaebicujinae, jivibitsaëtoخانeto baja Jesús vecuanavia-batsi. Nexata Jesús pijaepato barênacopata doce ponêbeje pijajivi, itsamonae itsiata yajava. Nexata bajarapamonae Jesús yanijobatsi. Bajarapamonae jumaitsi Jesúsjavabelía:

—Palivaisi jivijavabelía tsipaebame peubinê pelivaisicuenía, pajamatabêcuene xaina, patayapêtaenexa panetsipaebare, jai bajarapamonae Jesúsjavabelía.

¹¹ Nexata Jesús jumaitsi bajarapamonaejavabelía:

—Paxamê rabaja xaniavaetsia Dioso pacayapêtaeyaexana Dioso papijajivimê papecaevetsijava. Bajarapacuené abaxê daxitajivi apo yapêtae. Baitsi ra saicaya pamonae apo tajajivi, tsipaebajê livaisianê êcomparacióncuenía.

¹² Bajaraxuata nexata bajarapamonae tae ata Dioso pesaêta pinijicuené taexanaejava, itsiata apo yapêtae pajamatabêcuene yabara exanajê pinijicuené taexanaejava. Nenamuxunaevetsi ata tatsipaebilivaisi, itsiata apo jumeyapêtae pajamatabêcuene xaina tatsipaebilivaisi. Bajarapacuenía apo jumeyapêtae penajamatabêcuenecopatsiyaniiva Diosojavabelía pibisiacuené pexanaeneconimi Dioso pevecuaajibiaexanaeyanivatsi, jai Jesús.

Pacuenía Jesús yapêtaeyaexana pijajivi, itsamonae yajava, pajamatabêcuene xaina palivaisi tsipaeba peubinê pelivaisicuenía yabara pelivaisi
(Mt 13.18-23; Lc 8.11-15)

¹³ Jesús icatsia jumaitsi pijajivijavabelía:

—Itsa apo pajumeyapêtaemê pajamatabêcuene xaina palivaisi pacatsipae-batsi peubinê pelivaisicuenía, ¿detsa nexata pacuenía pajumeyapêtaename

daxita palivaisianē pacatsipaebijtsiatsi comparacióncuenia? jai Jesús pijajivijavabelia.

¹⁴ Nexata icatsia Jesús jumaitsi pijajivijavabelia pijajivi peyapētaenexa pajamatabēcuene xaina palivaisi tsipaeba peubinē pelivaisicuenia:

—Pajivi raja peubixu uba, bajarapajivi bepepaebinē Dioso pitorobilivaisi.

¹⁵ Pacuenia itsi pabita peubixu, paxu othopa pabi tuatuaējəva penajetarucaenamutojumata, bajara tsijamatabēcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsijamatabēubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepijia dovathi najetaruca bajarapamonaejavaberena. Nexata bajarapamonae tsijamatabējuvinejevatsi, dovathi vecuapitatsi bajarapalivaisimi, petsijamatabēubilivaisimitsi. ¹⁶ Pacuenia pijinia itsi paxu othopa ibopananējumata, itsajota bitso ira apo aitayaē, bajara tsijamatabēcueneitsitsi itsamonae Dioso pitorobilivaisi. Bajarapamonae jumetane Dioso pitorobilivaisi. Nexata picani bajarapalivaisi barēyaya jumecovēnēta. ¹⁷ Itsiata baitsi jane pacuenia irabereca apo atabunepēpiareca paxu othopa ibopananējumata, nexata nabijiana, bajara tsijamatabēcueneitsitsi bajarapamonae Dioso pitorobilivaisi. Tsipaji pepacuene pejamatabēēthētovetsina apo jumecovēnētsi bajarapalivaisi. Nexata apo ajamatabēcuenesaē tsavanapae bajayajebi pejumecovēnētsinexa bajarapalivaisi. Nexata itsa tocopapatatsi daxita petoayapēbejecueneitsi, itsa yalivaisibatsinua Dioso pitorobilivaisi yabara, nexata pejumecovēnētsijavami bajarapalivaisi bepijia copaba. Pevajēnaeyabelia apo jumecovēnētavanapae. ¹⁸ Pacuenia pijinia paxu othopa xanēebacabomijavata, itsa juva, bitso matacēnēnatsi xanēebotonē, bajara tsijamatabēcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. ¹⁹ Itsiata baitsi jane bitso jamatabēcueneenatsi mapanacuapijicuene yabaraje. Tsipaji najamatabēxaina ayaijəva palata pexainaenexa. Nexata pijacuata najamatabēcueneyamaxēitojoroba. Daxitacuene mapanacuapijicuene bitso jitsipa pexainaenexa. Bajaraxuata Dioso pitorobilivaisi apo tovitabitsi pejamatabēēthētota. Nexata pacuenia itsi pabita piacuaijibotonē, bajara itsi bajarapamonae. Tsipaji Dioso xaniavaetsia apo tojinavanapae. ²⁰ Pacuenia pijinia itsi paxu othopa pexaniairata, bajara tsijamatabēcueneitsitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, tsijamatabējunuatsi. Nexata tsijamatabēcuenevitsabaponatsi Dioso pitorobilivaisi. Nexata pacuenia peubijəva capitsapa itsabotonē treinta paxutobeje tsaponae, itsabotonē sesenta paxutobeje tsaponae, itsabotonē cien paxutobeje tsaponae, bajara tsijamatabēcueneitsitsi bajarapamonae Dioso pitorobilivaisi, jai Jesús pijajivijavabelia.

Pacuenia Jesús pijajivi livaisi tsipaeba lámparabē pelivaisicuenia yabara pelivaisi

(Lc 8.16-18)

²¹ Jesús icatsia jumaitsi doce ponēbeje pijajivijavabelia, itsamonaejavabelia ata:

—Itsajivi ata lámparabē pitanojotsicujinae apo etsi cajoniēnēalia. Apo etsi cama bēxēpanalia ata. Jume baja cajena. Biji rajane athēbēyo etsia daxitaboēnē pitayotecaenexa. ²² Bajara pijinia itsi palivaisianē

tsipaebaponajë comparacióncuenia daxitajivi picani peyapëtaenexa. Najumematayatsia apo tsipaebaponaenë. Itsamonae nejumetae ata, aeconoxae abaxë apo nejumeyapëtae pajamatabëcuene xaina tatsipaebilivaisianë. Itsiata itsamatacabi, bexëajavabelia, daxitajivi nejumeyapëtaena pajamatabëcuene xaina palivaisianë comparacióncuenia tsipaebaponajë.²³ Pajivi jamatabënejumeyapëtane patacatsipaebilivaisi, xaniavaetsia nena-muxunaevetsi, jai Jesús pijajivijavabelia.

²⁴ Icatsia Jesús jumaitsi bajarapamonaejavabelia:

—Panejumecanaëjere patacatsipaebilivaisi. Itsamonae ata itsa pacatsipaebiana, bajarapamonae ata pajumecanaëjëtsianame papecatsipaebilivaisi. Palivaisivajëto panejumecanaëjëtsianame, nexata bajarapalivaisivajëto pajumeyapëtaenename. Itsiata icatsia pematatsënëa bajarapitsilivaisivajëto Dioso pacayapëtaeyaexanaena.²⁵ Pajivi xaniavaetsia nejumeyapëtane patacatsipaebilivaisi, bajarapajivi icatsia itsalivaisi pematatsënëa Dioso jumeyapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa, bajarapajivi palivaisiyovajëto picani jumeyapëtane, nacofënëtsiana, jai Jesús.

Pacuenia peubixu pejuvicujinae, Dioso pesaëta vitsaba yabara pelivaisi

²⁶ Jesús icatsia jivi comparacióncuenia livaisi tsipaeba Dioso pijajivi pevet-siucene yabara. Jumaitsi mapacueniaje:

—Pacuenia peubixu pejuvicujinae, Dioso pesaëta vitsaba, bajara pijinia pacuenia Dioso pijajivi ata Dioso pesaëta jinavanapa. Peubinë pabita peubixu xucayajabajarabanajetaruca.²⁷ Peubinë peubicujinae vemaxëmajitabiaba meravi canacujitsia. Naëcotabiaba matababita. Bajara-pacuenia panepapona matababianë. Nexata pijinia peubixu pabita juva. Vitsabapona. Itsiata baitsi jane peubinë apo yapëtae pacuenia peubixu pijacuata juva.²⁸ Ira raja pejamatabëcueneta naxaniaba peubijava. Copiata pepaboto vitsabaya. Xuacujinae namatonota. Xuacujinae cuainavereta.²⁹ Itsa baja yaniona peubijava, penotsivi pona penotsinexa. Tsipaji baja penotsimatacabinexa tocopiapatatsi, jai Jesús jivijavabelia.

Pacuenia mostazaxutoyo pejuvicujinae, mostazanae bepijia vitsaba yabara pelivaisi

(Mt 13.31-32; Lc 13.18-19)

³⁰⁻³¹ Jesús icatsia jumaitsi doce ponëbeje pijajivijavabelia, itsamonaejavabelia ata:

—¿De meta xua pelivaisi jëpa Dioso pijajivi bepijia ayaibitsaëtoxaneto penaexanaejavanexa? Jivi meta peyapëtaenexa ayaibitsaëtoxaneto bepijia Dioso pijajivi penaexanaejavanexa, mostazaxutoyo meta pelivaisicuenia tsipaebianajë. Jumaitsinë meta tsane: “Pacuenia mostazaxutoyo pejuvicujinae, bepijia vitsaba mostazanae, bajara pijinia itsane Dioso pijajivi ata. Bepijia Dioso pijajivi ayaibitsaëtoxaneto naexanaena. Mostazaxu raja bitso tsiquirixutoxi daxita peubixuvecua.³² Itsiata baitsi jane mostazanae itsa juva, bepijia vitsaba. Caevaita pinijinae naexana itsapeubinaenë matatoxenetsia. Nexata barsui ata pematapenanë exana mostazanae-maxërananëjavata. Bajara pijinia itsane jivi ata. Bepijia ayaibitsaëto Dioso pijajivi naexanaena,” janë meta tsane mapacueniaje, jai Jesús pijajivijavabelia, itsamonaejavabelia ata.

Pacuenia Jesús jivi livaisi tsipaebabiaba ëcomparacióncuenia yabara pelivaisi (Mt 13.34-35)

³³ Dioso pitorobilivaisi Jesús tsipaebabiaba jivijavabelia. Dioso pitorobilivaisi Jesús jivi tsipaebabiaba ëcomparacióncuenia. Pacuenia baja jivi caëjëpatsi pejumeyapëtaenexa, bajarapacuenia Jesús tsipaebabiaba. ³⁴ Jesús ëcomparacióncuenia livaisi tsipaebabiaba bajarapamonaejavabelia. Itsiata saicaya Jesús ëpijajivijavabelia xaniavaetsia yapëtaeyaxanabiaba pajamatabëcuene xaina daxita bajarapalivaisianë.

Pacuenia Jesús itaveta joviboxaneto, malataca yajava, piyaijavami yabara pelivaisi

(Mt 8.23-27; Lc 8.22-25)

³⁵ Dioso pitorobilivaisi Jesús tsipaeba jivijavabelia. Bajarapamatacabi Jesús petsipaebicujinae itsa baja caniviyotsia, Jesús jumaitsi pijajivijavabelia:

—Nicabaliatsi mapapucaxaneto itsapanabeliaje, jai Jesús.

³⁶ Nexata baja Jesús, pijajivi yajava, vecuapona jivi. Pajerata Jesús ecareca, pijajivi yajava pona. Itsiata itsamonae pënaponatsi itsajeranëta.

³⁷ Nexata pinijijoviboxaneto jemata najetaruca. Nexata malataca jera ënëaberena mera epabajarabapona. Nexata baja jera ënëaberena mera vënëcapona. ³⁸ Jesús itsiata majitanuca jamatejema jeratabufejavavetsina. Namatabëxëyaëtanuca penamatabëxëyaëtabijavata. Nexata Jesús pijajivi yaitavabatsi. Jesús pijajivi jumaitsi:

—¡Patajatuxanenë, vaxaitsimi rabaja yaothopaenatsi! ¿Apo jamatabëcuenebëjamë tsaja? jai Jesús pijajivi.

³⁹ Nexata Jesús pemajitanucaenëmi naëcotapuna. Pinijijumeta itavetaxuaba jovibo. Jesús jumaitsi pucajavabelia, jovibojavabelia ata:

—¡Vainae ecare baja! jai.

Bajarapacuenia Jesús pejumaitsijavata jovibo baja ajibi tsaxuabi. Daxitapuca baja nexata vainae ecaxuaba. ⁴⁰ Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús.

⁴¹ Nexata Jesús pijajivi najunaviaca bajarapacuenie petaexae. Ëpamonae najumaitsi:

—¿De meta tsipaji maponëje? ¡Itaveta jovibo, malataca ata! ¡Jumecovënëtatsi baja rovia maponëje! ¡Nexata baja jovibo, malataca yajava, ajibi tsaxuabi! najai Jesús pijajivi.

5

Pacuenia pebi, dovathivi peyjavaponaponaenë, Jesús vecuacapitsapa Gerasa nacuata yabara pelivaisi

(Mt 8.28-34; Lc 8.26-39)

¹ Jesús pijajivi barëpata pucaxaneto itsapanabelia, Gerasa nacuayabelia.

² Nexata Jesús jerajavavetsina nonotajuna. Pebi dovathivi peyjavaponaponaenë, cujitabarenatsi jivimëthëanëjavaverena. ³ Bajaraponë ponaponabiaba jivimëthëanëjavata. Itsajivi ata apo caëjëpaetsi pecëtsinexa bajaraponë cadenamaëtota ata. ⁴ Cadenamaëtonëta picani taxucëtabiabatsi anijatonë. Cobecëtabiabatsi picani yajava. Itsiata cajena pecobecëtsicadenamaëtotsi ucutajarababiaba pesaëta. Bajaraxuacujinae petaxucëtsicadenamaëtotsi pecobeta tsaquibiaxuababiaba. Nexata cadenamaëtomi tsiquirijavaxi exanapenetabiaba. Itsajivi ata cajena apo caëjëpaetsi pecëtsinexa bajaraponë. Tsipaji bitso asaë. ⁵ Bajaraponë petsutonëjava, jivi petëpaevi pemëthëcaejava,

matacabijebi, meravijebi yajava, ponaponabiaba. Vavajai tsabiabaponaponae. Ibotonējavabelia natsaquibajarababiabaponapona. ⁶ Bajaraponē itsa taetaba Jesús penajetarucaejava, nexata tajēverena kujinaeponarena Jesúsjavaberena. Jesús pitabarata pematatabacabēta nucajunua. ⁷ Bajaraponē aėjai pinijijumeta Jesús pitabarata.

—Jesús, pepo Dioso, athēbētatsia peecaenē, pexēnatomē. ¿Detsa xua jaitame xanējavaberena? Pexaniacuene bitso cavajētatsi Dioso pitabarata. Nejamatābēcuenēbejibitsipame, jai dovathivi peyajavaponaponaenē Jesúsjavabelia.

⁸ Bajarapacuenia jumaitsi dovathivi peyajavaponaponaenē tsipaji Jesús jerajavavetsina penonotajunaejavata, dovathivi peyajavaponaponaenē pematāenēnejavatatsi, Jesús itaveta dovathivi. Jesús jumaitsi dovathivijavabelia mapacueniaje:

—¡Dovathivi, bajaraponē baja pavecuapitsapare! jai Jesús.

⁹ Nexata Jesús jumaitsi bajaraponējavabelia:

—¿Detsa pavēnēmē? jai.

Nexata dovathivi peyajavaponaponaenē navēnēpaeba.

—Tavēnē raja Legión. Tsipaji raja bitso paayaibitsaētoxanetonē, jai dovathivi peyajavaponaponaenē.

¹⁰ Nexata dovathivi pinijicuenia vajēta Jesúsjavabelia itsairabelia pejut-siyānivatsi bajarapairaveca. ¹¹ Nexata bajarajota, imoxoyo petsutojavata, marranobitsaētoxaneto xaevanapa. ¹² Dovathivi bitso vajēca Jesúsjavabelia.

—Paneitorobare marranobitsaētoxanetojavabelia. Panetocopare patajonenexa bajara pamarranobitsaētoxanetojavabelia, jai dovathivi.

¹³ Nexata Jesús tocopata pacuenia dovathivi vajēcatsi. Dovathivi baja pebi vecuapitsapecatsi. Nexata baja marranobitsaētoxanetojavabelia dovathivi junua. Bajara pamarranobitsaētoxaneto jinavanapa anijamilbeje ponēbeje. Nexata daxita marranobitsaētoxanetomi kujinaeyeca. Pucaxaneto itapanituaerca othopareca. Nexata daxita marranobitsaētoxanetomi meneta bubuna.

¹⁴ Bajara pamarranobitsaētoxanetomi pevetavanapaevi rēcēpeca. Pona, pacuene tane, petsipaebinxeta tomarapijivijavabelia, petsipaebinxeta vafafotusatojava penaevijavabelia ata. Nexata jivi ponarena petāenexa bajarapacuenē. ¹⁵ Nexata dovathivi peyajavaponaponaenēmi bajarapamonae taeyeta Jesús pemuxuneneta. Bajaraponē penaxatatsijava baja naxatateca. Jamatejēma baja. Xaniavaetsia eca. Nexata bajarapamonae kujunavatsi Jesús. ¹⁶ Pamonae cuenetanetsi Jesús pejamatejemayaexanaejava dovathivi peyajavaponaponaenēmi, bajarapamonae paeba pepatsivijavabelia daxita pacuene tane. Paeba pacuene ata Jesús exana marranobitsaētoxanetojavabelia. ¹⁷ Nexata Gerasa nacuapijivi jumaitsi Jesúsjavabelia:

—Pexaniacuene pacavajētatsi. Ponare baja patajanacuaveca, jai Gerasa nacuapijivi Jesúsjavabelia tsipaji kujunavatsi.

¹⁸ Jesús baja itsa runareca jera ēnēabereca, ponē dovathivi peyajavaponaponaenēmi, bitso picani navajēca Jesús pepēta penaponaenexa. ¹⁹ Itsiata Jesús apo jejai. Jumaitsi bajaraponējavabelia:

—Ponare nijaboyabelia. Nijamonae tsipaebare papinijicuenē Dioso caexana. Tsipaebare pacuenia ata caitaxutotsoniatane Dioso, jai Jesús dovathivi peyajavaponaponaenēmijavabelia.

²⁰ Nexata baja dovathivi peyajavaponaponaeñemi pona. Taxuxuaba penavajunupaebijava papinijicuene Jesús exanatsi. Bajaraponë nava-junupaebapona Decápolisvënë nacujava. Decápolisvënë nacuata eca diez patomarabeje. Daxitajivi jamatabëcuenenabenajaca itsa jumetanetsi bajaraponë penavajunupaebaponaejava.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi toasaëyaexana Jairo pexënatowayo, petëpaevayomi, yabara pelivaisi

(Mt 9.18-26; Lc 8.40-56)

²¹ Jesús icatsia pecovëyaberena jerata naviarena pucaxaneto itsapanaverena. Nexata tajetabojavatarena jivibitsaëtoxfaneto Jesús matatoyoronatsi. ²² Nexata bajarajota napatajopa Jairovënë. Bajaraponë judíovi penacae-tuatabiabibo pevetsiviyajuvënë. Jairo itsa taetaba Jesús, nexata Jairo pematatabacabëta yayiyataeya Jesús pitabarata nucajunua. ²³ Pinijicuenia Jairo vajëta Jesúsjavabelia. Jumaitsi:

—Taxënatoyo raja netobitso. Najumalipeneta rabaja petëpaenexa. Pex-aniacuene netoexanare. Naxanitsia. Netoperabëjayatsianame necobeta petëpaeyaniva, jai Jairo.

²⁴ Jejai Jesús. Jesús nexata napona Jairo pepëta. Nexata jivibitsaëtoxfaneto Jesús pepënaponaevitsi matatoyorotsia cënënanajetarubenatsi. ²⁵ Bajarapajivibitsaëtoxfaneto tuatujëta itsava, pijanacuene pecapunaevatsi, nanajetaruca. Bajarapova pijanacuene pecapunaecujinaetsi doce baja pavaibeje xaina. ²⁶ Bitso nexata bajarapova bejiobi pexainacuene yabara pevaëbivitsi pejamatabëcueneta. Tsipaji belia daxita pexainaejavaximi navecuavereta pematamobaponaeta pevaëbivitsi. Itsiata apo caevi piavitanevene. Biji caranata pevajënaeyabelia capunaponatsi piavitanevene. ²⁷ Nexata bajarapova jumetane itsamonae pecuaicuajijajava Jesús piavitanevi pejamatejemayaexanaponaejava yabara. Nexata bajarapova ponataba Jesús pepënëvelia, jivibitsaëtoxfaneto tuatujëalia. Nexata bajarapova tojayataba Jesús penaxatatsijava. ²⁸ Tsipaji cajena bajarapova jamatabëjumaitsi: “Itsa Jesús penaxatatsijava tojayatabianajë, tavitanjavami nevecuaajibi tsane,” jamatabëjai. ²⁹ Nexata bajarapova itsa tojayataba Jesús penaxatatsijava, bajarajota pijanacuenemi vecuaajibitsi baja. Nexata bajarapova pijanacuenemi pecaevijavareca, nayapëtane. ³⁰ Jesús ata nayapëtane pesaëta pejamatejemayaexanaejava pepënyabelia. Nexata pejayatabijavatatsi Jesús napënyorotaxuaba. Naëcobaruta. Yanijoba jivijavabelia.

—¿Jipatsa tanaxatatsijava netojayataba? jai.

³¹ Nexata Jesús pijajivi jumaitsitsi:

—Taneme rabaja jivibitsaëtoxfaneto pecacënënanajetarubenaejava. ¿Detsa xuajitsia: “¿Jipatsa tanaxatatsijava netojayataba?” jamë? jaitsi Jesús pijajivi.

³² Jesús naëcobaruta daxitajivijava petaenexa pajivi tojayatabatsi penaxatatsijava. ³³ Nexata bajarapova neconecojai tsanucac pecajunavi pe-nayapëtaexae Jesús pejamatejemayaexanaejavatsi. Nexata bajarapova najetabarena Jesús pitabarayaberena. Pematatabacabëta nucajunua. Nexata daxita pacuene exana, bajarapova tsipaeba Jesúsjavabelia. ³⁴ Nexata Jesús jumaitsi bajarapovajavabelia:

—Xamë nesivajamatabëjumaitsimë: “Jesús penaxatatsijava itsa tojayatabi-anajë, tavitanejavami nevecuaajibi tsane,” nesivajamatabëjamë. Bajaraxu-ata jamatejemamë baja. Ponare baja jamatejema. Niavitanejavami rabaja ajibi, jai Jesús bajarapovajavabelia.

³⁵ Bajarapacuenia Jesús pejumaitsanucaejavata namutoepatota, Jairo pijaboverena peponaevi mätaenenatsi. Bajarapamonae jumaitsi Jairojavabelia:

—Jairo, nexënatoyo rabaja tëpa. Pëtsa baja matavëjëa jamatabëitonotaponame Jesús, jai bajarapamonae Jairojavabelia.

³⁶ Jesús jumetae ata bajarapajume, itsiata jumaitsi Jairojavabelia:

—Jairo, pëtsa najamatabëxainame. Najamatabëcuenecopare saya exanëjavaberena nexënatovayo pecatoasaënexa, jai Jesús Jairojavabelia.

³⁷ Nexata Jesús, pajivibitsaëtoxaneto pënanajetarubenatsi, pueneta bajara-jota. Jesús pona Jairo pijaboyabelia. Jesús saya yajavalia mapamatabëxëyoje: Pedro, Juan, Santiago, Jairo jane baja. Juanbeje Santiagobeje nacaebananëbeje. ³⁸ Itsa baja Jesús palia Jairo pijaboyabelia, tane jivibitsaëto pinijijumeta pematantueyabijava petëpaevayo. ³⁹ Jesús itsa joneya boyalia, jumaitsi bajarapamonaejavabelia:

—Pëtsa bitso pamanantueyabame. Pejanava raja apo tëpae. Saya raja maji-tanuca, jai Jesús tsipaji yapëtane Jesús piasaëyaexanaejavanexa bajarapovayo.

⁴⁰ Bajarapacuenia Jesús pejumaitsiyava, bajarapamonae saya jumecapoc-aponatsi. Nexata daxita Jesús bovecua pitsapaeyaexana. Itsaxuay-olia petëpaevayo boca, Jesús barëjoneya caejiviyobeje saya. Jesús saya barëjoneya mapamatabëxëyoje: petëpaevayo paxa, pena, Jesús pijajivi, acueyabi ponëbeje. Bajarapamatabëxëyo saya Jesús barëjoneya. ⁴¹ Nexata Jesús petëpaevayo cobepita. Jesús pijajumeta jumaitsi:

—Talita cumi, jai, mapajumetaje pejumaitsiyume: “Pejanava, nonota-ponare,” pejaijume.

⁴² Bajarapacuenia Jesús pejumaitsiyavata, pejanavayo nonotabapuna. Ponapona baja. Bajarapovayo doce pavaiibeje xaina. Nexata Jesús peya-javajonevilia pinijicuenia jamatabëcuenenabenajaca bajarapacuenia itsa tane.

⁴³ Nexata Jesús pinijicuenia jumaitsi:

—Pëtsa itsajivi ata patsipaebame mapacueneje, jai Jesús.

Bajaraxuacujinae Jesús jumaitsi pejanavayo penajavabelia:

—Nexënatovayo pexaejava rajure, jai.

6

Pacuenia Jesús naviata pijanacuayabelia, Nazaret tomarabelia, yabara pelivaisi

(Mt 13.53-58; Lc 4.16-30)

¹ Jesús baja, pijajivi yajava, pona Capernaum tomaravecu. Naviata pijanacuayabelia, pevitsabitomarabelia. ² Judíovi penacueraevetsimata-cabita Jesús taxuxuaba jivi livaisi petsipaebijava judíovi penacatuatabi-abibota. Ayaibitsaëtoxaneto pejumetaevitsi sivajamatabëcuenenabenajacatsi. Nexata bajarapamonae Jesús jamatabëcueneabiatanetsi. Bajarapamonae Jesús yabara najumaitsi mapacueniaje:

—¿Detsa meta verena maponë capitsapa mapajamatabëcuenelivaisije? ¿Detsa pacuenia meta yapëtane daxita mapacueneje? ¡Pitsipinijicuenia maponë exanaje, vaxaitsi abaxë caeto ata apo taetsi! ¡Matapania matanetsije!

³ Maponëje vaxaitsiyajuvënënë. Carpinteronë. María pexënato. Bajaraponë

pejuyapijivi Santiago, José, Judas, Simón. Papetiriavi ata vajatamarata jinavanapa, bajaraponē pejuyapijivi, najai bajarapamonae Jesús yabara.

Nacaetomarapijivixae, bajarapamonae Jesús apo jumexaniataetsi. ⁴Nexata Jesús jumaitsi bajarapamonaejavabelia:

—Bajara maitsiabiabiye. Diosojumepaebivi profetavi itsanacuapijivi yaiy-ataeyabiabatsi. Itsiata pijanacuapijivi, pijaviriavi, pijamonae ata, apo yaiy-ataeyabiabitsi, jai Jesús.

⁵Nexata Jesús bajarajota jivi ayaibitsaētojavabelia pinijicuene pexanae-
java apo tsitaexanae. Tsipaji apo jumecovēnētsitsi. Saya caejiviyobeje
piavitanevi pecobeta jayata. Jamatejemaya exana. ⁶Nexata Jesús bitso
najamatabēxaina. Tsipaji jivi apo jumecovēnētsitsi. Bajaraxuacujinae Jesús
tsiquiritomaraxijava Dioso pitorobilivaisi jivi tsipaebanajetarua.

*Pacuenia Jesús pijajivi itoroba Dioso pitorobilivaisi jivi petsipaebanaje-
tarubenaenexa yabara pelivaisi*

(Mt 10.5-15; Lc 9.1-6)

⁷Jesús junata pijajivi doce ponēbeje penacaetuatsinexa. Nexata Jesús pija-
jivi itoroba anijanēbeje tsaponae. Jesús pijajivi pecaējēpaejamatabēcuenetsi ja-
matabēcuenecaējēpaeaxana dovathi peyajavajinavanapaevi pevecuacapi-
sapaponaenexa. ⁸Jesús jane baja pijajivi penaropobivajēnae, Jesús jumaitsi
pijajivjavabelia mapacueniaje:

—Pētsa itsacuenējava ata pacaponame panijanamutonexa. Pētsa
pacaponame panemarue ata, dorota, palata ata. Ēnaeboyoya saya
pacaponare. ⁹Itsiata pataxunaponare panenataxuxatabijava. Caejava
panenaxatatsijava pajumaponare. Pētsa anijacamisabeje pacaponame.

¹⁰Itsajota papatabiabianame, caebota pamajitabiabianame. Pētsa
panatixitaponame itsaboyabelia panemajitsinexa. Matapania icatsia
itsajavabelia itsa paponanename, bajarapabovecua papitsapanaenama.

¹¹Patamarata apo pacacopiapitsi tsane, itsa apo jitsipaenua tsane
papecanamuxunaevetsinexa panetsipaebilivaisi, nexata paponanename
bajarapatomaravecua. Paneponaevajēnae bajarapatomarata panataxu-
atsapērēvarēbianame. Bajarapacuenia itsa panataxuatsapērēvarēbianame,
bajarapatomarapijivi yapētaena Diosojavabelia penaneconitsicuene apo
papecacopiapitsixae papecanamuxunaevetsinexa panetsipaebilivaisi.
Xaniajanē pacuenia pacatsipaebijitsiatsi. Pamatacabi Dioso jivi naneconit-
siaexanaena, bajarapamatacabi Dioso bitso naneconitsiaexanaenatsi
patomarapijivi apo pacacopiapitsi tsane. Paneconivajētota bajayata Dioso
naneconitsiaexana Sodomā tomarapijivimi, Gomorra tomarapijivimi ata,
bajarapaneconivajēto matatoxenetsia Dioso naneconitsiaexanaenatsi
patomarapijivi apo pacacopiapitsi tsane, jai Jesús pijajivjavabelia.

¹²Nexata jane baja Jesús pijajivi naropoba Dioso pitorobilivaisi jivi pet-
sipaebanajetarubenaenexa. Jesús pijajivi naropoba anijanēbeje tsaponae.
Nexata Jesús pijajivi jumai tsaponae jivjavabelia:

—Pacopabare baja pibisiacuene paneexanabiabijava. Panaja-
matabēcuenepēnyorore Diosojavabelia, jai tsaponae.

¹³Jesús pijajivi dovathi peyajavajinavanapaevi vecuacapitsapapona. Pi-
avitanevi ata mataexabapona aceiteranēta. Bajarapacuenia Jesús pijajivi
jamatejemayaexanapona piavitanevi.

*Pacuenia bajayata Juanpijinē jivibautisabinēmi beyaxuabatsi yabara peli-
vaisi*

(Mt 14.1-12; Lc 9.7-9)

14 Herodes, Galileanacua pevetsinē. Nexata Herodes jumetane itsamonae jamatabēcuenenavēxaniabiaya pejumaitisijava Jesús yabara: “Juanpijinē raeta jivibautisabinēmi icatsia asaē petēpaecujinae. Bajaraxuata caējēpatsi Dioso pesaēta pinijicuene pexanaenexa,” pejaijaya itsamonae jamatabēcuenenavēxaniabiaya Jesús yabara, Herodes jumetane.

15 Itsamonae pijinia jumai tsaponae Jesús yabara:

—Bajayata raeta ponēmi ponapona, profeta Eliaspijinēmi, baja raeta ponē, jai tsaponae itsamonae.

Itsamonae pijinia jumai tsaponae Jesús yabara:

—Diosojumepaebinē profeta raja. Tspiji rabaja pacuenia bajayata profetavi jinavanapa, bajara icatsia maponē itsije, jai tsaponae itsamonae.

16 Bajarapacuenia itsamonae jamatabēcuenenavēxaniabiaya pejumaitisaponaejava Jesús yabara, Herodes itsa jumetane, Herodes ata jamatabēcuenenavēxaniabiaya jumaitis Jesús yabara:

—Maraeta Juanpijinēmije, ponēmi bajayata xanē tajajivi vēsiucutaxuabiaexanajē. Icatsia raeta asaē petēpaecujinae, jai Herodes jamatabēcuenenavēxaniabiaya Jesús yabara.

17 Bajarapacuenia Herodes jumaitis tspiji abaxē Juanpijinē itsa asaē, Herodes pijajivi, vajabitsaēvi, itoroba Juanpijinē pevaetabinexatsi. Nexata vajabitsaēvi Juanpijinē cobecētsiaya caponatsi penaneconitsivi pejebabiabiboyalia. Bajarapacuenia Herodes pijajivi itoroba Herodes pijava, Herodíasva, pejamatabēcueneta. Herodíasva picani copiata pita Felipe, Herodes pejuyapijinē. Nexata Herodes pejuyapijinē pijava yacajērēta. 18 Nexata Herodes pejuyapijinē pijava peyacajērētsixae, Juanpijinē abaxē itsa apo vaetabitsi, muxujloba Herodes. Juanpijinē jumaitis Herodesjavabelia:

—Acuenebi raja nejuyapijinē pijava nepitsijava,” jai Juanpijinē Herodesjavabelia.

19 Nexata bajarapacuenia Juanpijinē pejumaitisixae, itoyatsi Herodíasva. Nexata abaxē Juanpijinē itsa ponapona penaneconitsivi pejebabiabibota, bajarapova picani Juanpijinē jamatabēbeyaxuabiaexanatsi. Itsiata apo caējēpaetsi. 20 Tspiji Herodes yapētane Juanpijinē bitso pejamatabēxanepanaenēcuene. Nexata Herodes yaiyatane Juanpijinē. Bajaraxuata Herodes apo tocopatsi pijava pejamatabēcueneta pebeyaxuabinexatsi Juanpijinē. Juanpijinē itsa cuaicuajai tsabiabi Herodesjavabelia, nexata picani Herodes jamatabēbējai tsabiabi pijaneconi yabara. Itsiata Herodes xaniavaetsia namuxunaevetabiaba. 21 Nexata pamatacabi Herodes najamatabēnapita penaexanaematacabi, najamatabēxaina pexaniafiesta pexanaenexa. Bajarapafiestajava Herodes junata pijaboyaberena jivi ayaibitsaētoxaneto penabaninexa. Junata Herodes pijajivi, pamonaē tovetatsi pijairanē. Junata vajabitsaēvi pevetsivinua. Junata petuxanevinua, Galilea nacuata pejinavanapaēvi. Nexata bajarapafiestajavata Herodíasva toyapēxanepanatsi Juanpijinē pebeyaxuabiaexanaenexatsi. 22 Herodíasva toyapēxanepanatsi tspiji pexēnatoyo joneya Herodes pejunatsivi pebarēnabanecaejavalia pijacujirucuenia caevayo peyavajibinexa. Nexata Herodes pejunatsivi bitso barēitajitsipa pejonēyo peyavajibijava. Nexata Herodes najumecapanepaeya pexaniajajumeta jumaitis pejonēyojavabelia:

—Nevajëre xua jitsipame. Carajutsianatsi raja. ²³ Pacuenejava nevajëtsianame, carajutsianatsi. Itsa nevajëtsianame taneevetsiaexanae-nacua ata, tuatuajëjava carajutsianatsi, jai Herodes najumecapanepaeya pejionëyojavabelia.

²⁴ Nexata bajarapovayo pitsatabalia. Jumaitsi penajavabelia:

—¿Detsamë ra xua vajëtsianajë? jai penajavabelia.

Nexata Herodiasva pexënatoyojavabelia jumaitsi:

—Juan jivibautisabinë pematabocoto vajëre, jai.

²⁵ Nexata bepijia bajarapovayo jopajoneya Herodes peceaejavabelia. Jumaitsi Herodesjavabelia:

—Jitsipajë cajena tanerajutsinexamë platota Juan jivibautisabinë pematabocoto, jai bajarapovayo Herodesjavabelia.

²⁶ Nexata Herodes pinijicuenia bejamatabëjiobi tsanajetsireca. Herodes nexata acuenebi: “Jume,” pejaijava. Tsipaji baja Herodes najumecapanepaeya jumaitsi pejionëyojavabelia pexaniaajijumeta daxita pejunatsivi pitabarata. ²⁷ Nexata Herodes bepijia itoroba vajabitsaënë petocarenanexatsi Juan pematabocoto. ²⁸ Vajabitsaënë nexata pona penaconitsivi pejebabiabiboyabelia. Juanpijinëmi vësiucutaxuabatsi. Juanpijinëmi pematabocoto vajabitsaënë carena platota. Nexata pejanava rajutatsi. Nexata bajarapovayo juya pena rajuta. Nexata baja Herodiasva yapëtane capanepaeya baja Juanpijinë pebeyaxuabijavatsi.

²⁹ Nexata Juanpijinë pijajivi itsa vënëtanetsi pebeyaxuabijavatsi, bajarapamonae ponarena Juanpijinë pebocaejavaberena. Pitatsi petëpaenë. Pepitsicujinaetsi Juanpijinë pijajivi mëthëtatsi.

Pacuenia Jesús pexaejava rajuta cinco mil ponëbeje yabara pelivaisi (Mt 14.13-21; Lc 9.10-17; Jn 6.1-14)

³⁰ Jesús pitorobivi, apóstolevi, naviabanajetarubena Jesúsjavaberena. Nexata bajarapamonae Jesúsjavabelia navajunupaeba daxita pacuene exananapa, pacuenia ata jivi livaisi tsipaebavanapa. ³¹ Nexata Jesús jumaitsi bajarapamonaejavabelia:

—Naxanitsia. Ponatsi pesajinaejavabelia. Nacueraevetsianatsi caeepatoyo, jai Jesús.

Bajarapacuenia Jesús jumaitsi pijajivijavabelia tsipaji jivibitsaëttoxanetonë topatabiabatsi. Itsamonae naviabaponabiaba. Itsamonae juya patabiaba. Nexata Jesús pijajivi pebarënanabinexa, apo cuenecaëjëpabiabitsi. ³² Nexata Jesús ëpijajivi jerata yajavapona itsabelia jivi ajibi. ³³ Itsiata jivi ayaibitsaëttoxaneto pëtanetsi Jesús peponaejava. Nexata itsabelia Jesús pona, matatsënëa pënacujinaerubenatsi daxita tomaranëpijivi. Caranata Jesús pevajënaeyabelia pata bajarapamonae. ³⁴ Itsa baja Jesús bana nonobajunaya jeravecua, Jesús tane jivibitsaëttoxaneto. Nexata Jesús bajarapamonae itaxutobejibiatane. Nexata Jesús bajarapamonae sivajamatabëjumaitsi mapacueniaje:

—Pacuenia baitsi ovejabitsaëttoxaneto itsa toajibitsi pevetsinëtsi, bajara itsi mapamonaeje, sivajamatabëjai Jesús.

Nexata Jesús ayaicuenia livaisi tsipaeba bajarapamonaejavabelia. ³⁵ Itsa baja bitso caniviotsia, Jesús pijajivi cujibarenatsi. Jumaitsi:

—Caniviyo rabaja bitso. Majota ajibi pexaejava. Tsipaji itsajivi ata pijabo apo xainae. ³⁶ Itorobare baja jivi peponaenexa imoxoyo penaetomaranëjavabelia pecomuacaenexa pexaejava, jaitsi Jesús pijajivi.

³⁷ Jesús nexata jumaitsi pijajivijavabelia:

—Paxamē parajure pexaejava, jai.

Nexata Jesús pijajivi jumaitsi:

—¿Paponaeñajē tsaja tomarabelia patacomuatsinexa pan doscientos denariota bajarapamonae pexaenexa? jai Jesús pijajivi.

³⁸ Jesús icatsia jumaitsi pijajivijavabelia:

—¿Detsa papanbēbeje paxainame paxamē? Pataema copiata, jai Jesús.

Jesús pijajivi petaecujinae tsipaeba Jesúsjavabelia. Jumaitsi:

—Paxainajē saya cinco papanbēbeje, anijanēyobeje dujuainēyobeje yajava, jai Jesús pijajivi.

³⁹ Nexata Jesús itoroba daxitajivi penaenexa ponajavata. ⁴⁰ Nexata bajarapamonae pepobitsaētonē natsanaeya ena. Caebitsaētota enapona cien pajivibeje. Itsabitsaētota enapona cincuenta pajivibeje. Bajarapacuenia caebitsaēto canacujitsia enapona. ⁴¹ Nexata Jesús pita cinco papanbēbeje, anijanēyobeje dujuainēyobeje yajava. Athēbēa benaēcotsia. Jumaitsi Diosojavabelia:

—Pexaniacuene panetoxaname. Panerajutame pataxaejava, jai Jesús.

Bajaraxuacujinae Jesús pan epatsicacapona. Pijajivijavabelia rajutapona pepatsicacaejava. Nexata juya Jesús pijajivi pan tsicobetsana jivijavabelia. Dujuaijavaxi ata tsicobetsana jivijavabelia. ⁴² Daxita xaniavaetsia nabane. ⁴³ Bajaraxuacujinae Jesús pijajivi caetuata pan, dujuai yajava, jivi peyajuvenēcopabejebijavanē. Nexata vēnēba doce xuabeje bemapirecuenia pexanaejavanē. ⁴⁴ Pamonae pexaejava xane, ayailbitsaētoxaneto. Itsiata ēpebijivi namatajētatsi cinco mil ponēbeje.

Pacuenia Jesús mene itaboxoya najetaruca yabara pelivaisi

(Mt 14.22-27; Jn 6.16-21)

⁴⁵ Jesús jivi ayailbitsaētoxaneto pexaejava perajutsicujinae, Jesús pijajivi bepjjia runaeyaexanareca jera ēnēabereca. Jesús pijajivi copiata itoroba penicabinexa puca itsapanabelia, Betsaida tomarabelia. Jesús baja jivi naviabiaexana. Bajaraxuata abaxē caenē nacopatanuca bajarajota. ⁴⁶ Itsa baja jivi napēvereta penaviabijava, Jesús junaya petsutojumabetsia pevājētsinexa Diosojavabelia. ⁴⁷ Itsa baja bitso meravi, Jesús pijajivi pucaxaneto itapavecuata tajē baja yanajetarubenalia. Jesús abaxē bajarapaepatota caenē nacopatanucarena pucaxanetoitapatarena. ⁴⁸ Nexata Jesús tane pijajivi petoayapēbejejavatsi pevaetsijava. Tsipaji bitso joviboxaneto ayai pevājēnaeverena. Bajaraxuacujinae bajayacunua, ajena matabijitsia, Jesús pijajivi pecovēvelia imoxoyotanajetaruca. Jesús najetaruca mene itaboxoya. Rovia picani xenetsijitsia. ⁴⁹ Jesús pijajivi itsa tanetsi mene itaboxoya penajetarucaejava, Jesús pijajivi jamatabējumaitsi:

—¡Petēpaenēmi raeta pejumape najetaruca! jamatabējai.

Nexata Jesús pijajivi vavajai tsaxuabi ayaijumeta. ⁵⁰ Tsipaji daxita Jesús pijajivi tane bajarapacuenia penajetarucaejava. Nexata Jesús pijajivi jamatabēcuenenajunaviaca. Nexata Jesús bepjjiajo jumaitsi pijajivijavabelia:

—Xanē raja. Pētsa panecujunavame. Pajamatejemamēre saya, jai Jesús pijajivijavabelia.

⁵¹ Nexata baja Jesús nonolia bajarapajera ēnēabelia. Ajibi baja tsaxuabi jovibo. Nexata Jesús pijajivi pinijicuenia jamatabēcuenenajunaviaca. Tsipaji tane jovibo, malataca yajava, Jesús piajibiaexanaejava. ⁵² Jesús baja picani pijajivi copiaya tane, pan tsiquirijavayomi ata, jivibitsaētoxanetojavabelia Jesús perajutsijava. Itsiata Jesús pijajivi apo jamatabēcueneyapētae Jesús

pecaējēpaenēcuenetsi pinijicuene pexanaenexa. Abaxē bajarapamonae ajamatabēcuenetaja.

Pacuenia Jesús jamatejemayaexana piavitanevi Genesaret nacuata yabara pelivaisi

(Mt 14.34-36)

⁵³ Jesús pijajivi jerata yajavapata puca itsapanabelia. Pata Genesaret nacuayabelia. Peyapatsijera bajarajota puca itapata querataruta. ⁵⁴ Nexata Jesús, pijajivi yajava, nototajunaya jeravecua. Bajarajota bepijia jivi yapētanetsi Jesúscuene. ⁵⁵ Nexata Jesús pepatsijava penatsipaebinexa, navajunucacujinaejinaruta daxita bonējáva. Nexata piavitanevi pijacamaxita yavētacarapatatsi itsajota jivi jumetane Jesús pepatsijava. ⁵⁶ Jesús pata tsiquiritomaraxijava, pinijitomaranējáva ata, tomarapēnēya penaebonējáva ata. Daxitajava, itsa patomarata Jesús patabiaba, bajarapatomaranējáva callejavata, jivi tojebabiabatsi piavitanevi. Piavitanevi pecapatsivi pinijicuenia jumai tsabiabi Jesúsjavabelia:

—Pexaniacuene bitso netoexanare. Tocopatsianame maponēje pecatojayatsinexa nenaxatatsijavacopia, jai tsabiabi.

Nexata daxita pamonaē Jesús penaxatatsijavacopia tojayataponatsi, jamatejema baja tsaponae piavitanejavamivecua.

7

Pacuenia Jesús tsipaeba xua jivi jamatabēcuenebijanatsi yabara pelivaisi

(Mt 15.1-20)

¹⁻⁴ Daxita judíovi catsiteca pijasalinaivimi pijacuene. Judíoviyajuvēnēvi, pamonaē fariseovi naexana, bajarapamonae bitso catsiteca pijasalinaivimi pijacuene daxita judíovi matatoxenetsia. Jamatabēcuenenavēxaniabiaya jamatabējumai tsabiabi:

—Itsa catsitecājē tajasalinaivimi pijacuene, nexata Dioso aneconijiblia netaena, jamatabējai tsabiabi.

Nexata bajarapamonae pijasalinaicuenia anijatonē xaniavaetsia itsa apo napēnanacobequiatsi, pexaejava apo xaeyabiabi. Itsajota pexaejavacuene canajetabiaba, bajaraverena itsa naviaba pecomuacaecujinae, bajarapamonae pijasalinaicuenia xaniavaetsia itsa apo napēnanacobequiatsi, pexaejava apo xaeyabiabi. Bajarapamonae pematatsēnē navitsia itsacujiruxi ata, pijasalinaivimi pijacujiru, catsiteca. Bajarapamonae tazaxi, mera peyajebinēanē ata, pecasetsinēanē ata, camanē ata, pijasalinaivimi pijacuenia xaniavaetsia quiatabiaba. Nexata judíovi pecujarubivi Jerusalén tomaraverena pata. Nexata judíovi pecujarubivi, fariseovi yajava, cujibarenatsi Jesús. Nexata bajarapamonae tane Jesús pijajivi judíovi pijasalinaicuenia anijatonē napēnanacobequiatsinejeva penabanijava. Bajaraxuata bajarapamonae jumaitsi Jesúsjavabelia:

—Jesús, nijajivi naneconita Diosojavabelia. ⁵ Tsipaji nijajivi apo jumečovēnētsijajinavanapae vajasalinaivi pijacuene. Nijajivi itsa xane pexaejava, anijatonē napēna apo nacobequiatabiabi, jai bajarapamonae Jesúsjavabelia.

⁶ Jesús nexata jumaitsi bajarapamonaejavabelia:

—¡Paxamē saya jivi paneyamaxēitojorobivi! Diosojumelivaisipaebinēmi profeta Isaiaspijinē baja cajena bajayata tajēvelia xaniavaetsia pacavajunupaeba. Bajayata Dioso tajēvelia pejumaitsiyava paxamē yabara profeta Isaiaspijinē peyaquinaelivaisita jumaitsi mapacueniaje:

Bajarapamonae nejjitsipaena saya pijumeta. Itsiata pepo tanejjitsipaejamatabëcuene nevecuatajë tsane. ⁷ Saya baitsi bajarapamonae pija-jumaitisita tsane: “Pacajitsipatsi,” nejai itajara tsane. Itsiata apo xaniajai tsane. Bajarapamonae saya jivi tsipaebaponaena pejamatabëcuenejjilivaisi. Pepo taitorobilivaisi apo tsipaebi tsane, jai tajëvelia Dioso pejumaitisijava paxamë yabara Isaiáspijinë peyaquinaelivaisita, jai Jesús bajarapamonaejavabelia.

⁸ Jesús icatsia jumaitsi fariseovijavabelia, judíovi pecujarubivijavabelia ata:

—Paxamë Dioso papecaitorobicuenia apo paexanaemë. Caranata ëvajasalinaivi pijacue ne pacatsitecame. Nexata vajasalinaivi pijacuenia xaniavaetsia paquiatabiabame mera peyajebinëanë. Xaniavaetsia paquiatabiabame tazaxi ata. Pematatsënëa navitsia itsacujiru ata pacatsitecame. ⁹ Apo pajumecovënëtsimë Dioso pitorobilivaisi vajasalinaivi pijacue ne panecatsitecaenexa. Apo pajumecovënëtsi atamë Dioso pitorobilivaisi, jamatabëcuene navëxaniabiaya pajamatabëjumaitsimë tsabiabi: “Pexaniacuene raja exanjë,” pajamatabëjamë tsabiabi. ¹⁰ Bajayata Dioso najumecopata Moiséspjinëta. Bajarapalivaisi jumaitsi: “Axa yayiataema. Ena ata yayiataema. Pajivi pibisiacuenia bijatane paxa, pena ata, bajarapajivi pabeyaxuare,” jai Dioso Moiséspjinëta penajumecopatsilivaisi. ¹¹⁻¹² Itsiata baitsi jane paxamë jivi pamuxubijiapenetiabiabame peyaiytaeyaniva paxajivi, penajivi ata. Paxamë pajumaitsimë tsabiabi mapacueniaje: “Axa, ena ata, itsa cavajëta neyavenonaenexa, nexata itsa apo jitsipaemë neyavenonaejava, jumaitsimë tsane mapacueniaje: ‘Daxita xua pacarajutsipatsibeje picani patacayavenonaenexabeje, daxita bajaraxua tsipaebajë baja tarajutsinexa Diosojavabelia. Nexata baja acuenebi patacarajutsinexabeje,’ jamë tsane neyavenonaeyaniva,” pajamë tsabiabi jivijavabelia. ¹³ Nexata caranata Dioso pejumaitisijume: “Axa yayiataema. Ena ata yayiataema,” pejaijume, paxamë jivi pacopabiaexanapona. Tsipaji paxamë patsipaebapona me saicaya vajasalinaivimi pijalivaisi. Itsalivaisianë ata pematatsënëa saicayacuenia patsipaebapona Dioso pitorobilivaisivecua, jai Jesús judíovi pecujarubivijavabelia, fariseovijavabelia ata.

¹⁴ Nexata icatsia Jesús junata jivi. Jumaitsi jivijavabelia:

—Daxita paxamë panenamuxunaevere xaniavaetsia patanejumeyapëtaenexamë. ¹⁵ Xua jivi pecuibota xane, pexaevajënae napëna anijatonë apo nacobequiatsi ata, apo jamatabëcuenebijianaetsi. Apo vënananeconitsi Diosojavabelia. Baitsi rajane xua jivi najamatabëxaina pejamatabëëthëtovetsina, xua ata pibisiacuenia cuaicuajai, bajara baitsi jane xua jivi bajamatabëcuenebijianatsi. ¹⁶ Pajivi jamatabënejumeyapëtane patacatsipaebilivaisi, nenamuxunaevetsi xaniavaetsia, jai Jesús.

¹⁷ Itsa baja Jesús jivivecua natixita, boya joneya. Nexata boyalia pijajivi yanijobatsi bajarapalivaisi. ¹⁸ Nexata Jesús jumaitsi pijajivijavabelia:

—¿Paxamë ata tsarovia abaxë apo panejumeyapëtaemë? Daxitacuene raja pexaejava jivi xae ata, apo jamatabëcuenebijianaetsi. Diosojavabelia apo vënananeconitsi. ¹⁹ Tsipaji raja jivi pexaejava apo tsijamatabëëthëjonetsi. Saya pënëareca joneca. Bajaraxuacujinae icatsia vecuapitsapatsi, jai Jesús.

Bajarapacuenia Jesús jumaitsi Jesús pijajivi peyapëtaeyaxanaenexa pacuenia daxitacuene jivi pexaejava xae ata, apo pibisiacue.

²⁰ Icatsia Jesús jumaitsi:

—Baitsi rajane jivi pejamatabëëthëtojavavetsina, papibisiajamatabëcuene pitsapa, bajara baitsi jane xua jivi jamatabëcuenebijanatsi. ²¹ Tspaji rabaja jivi pejamatabëëthëtojavavetsina pitsapa pibisiacuene penajamatabëxainaenexa. Pitsapa pebi pijava pevēcuanamatayajitsi jamatabëcuenenexa. Pitsapa petiriavijavabelia pebi penaperabëquenetsiatæ jamatabëcuenenexa. Pitsapa jivitonë pebeyaxuabijamatabëcuenenexa. ²² Pitsapa penacobetoxotsijamatabëcuenenexa. Pitsapa itsamonæ pecobecovë penaxainaeyabijamatabëcuenenexa. Pitsapa piacujirubejejamatabëcuenenexa. Pitsapa itsamonæjavabelia peyamaxëitojorobjamatabëcuenenexa. Pitsapa itsamonæ pecobecaëbijamatabëcuenenexa. Pitsapa itsajivi pibisiacuenia pebaracuaicuaijai jamatabëcuenenexa. Pitsapa ayaijamatabëcuenejivi penataejamatabëcuenenexa. Pitsapa saya jema peponaponæjamatabëcuenenexa. ²³ Daxita bajarapajamatabëcuene jivi pejamatabëëthëtojavavetsina pitsapa. Nexata bajarapacuene jivi jamatabëcuenebijanatsi, jai Jesús pijajivijavabelia.

Pacuenia Jesús itsanacuapijiva pexënatoyo tojamatejemayaexana yabara pelivaisi

(Mt 15.21-28)

²⁴ Jesús baja Genesaret nacuavecua pona. Naropota itsanacuayabelia, itsabelia eca anijatomarabeje, Tiro tomarabeje Sidón tomarabeje. Nexata Jesús bajarapanacuatalia bota patajopa. Muetsia picani Jesús patsijitsia. Itsiata acuenebi muetsia pepatsijava. ²⁵ Nexata bepijia petiriva vënëlvaisitaetabatsi Jesús pepatsijava. Nexata petiriva pata Jesúsjavaberena. Nexata bajarapova yayataeya Jesús pitabarata pematabacabëta nucajunua. Bajarapova pexënatoyo dovathi yajavaponapona. ²⁶ Bajarapova sirofeniciaviriava, apo judíova. Nexata Jesúsjavabelia jumaitsi:

—Pexaniacuene bitso netoexanare. Taxënatovayo netovecuapitsapare dovathi, jai bajarapova.

²⁷ Nexata Jesús jumaitsi bajarapovajavabelia:

—Copiaya abaxë veyavenonajë tajanacuapijivi, judíovi. Tspaji apo xanëpanæ xamë itsanacuapijivamë copiaya tacayavenonaenexa. Xamë copiaya itsa cayavenonæjitsipatsi, nexata pacuenia pejevaxi pexæjavaminexa yacajërëtsipajë tarajutsinexa avirixijavabelia, bajara itsinë tsipæ, jai Jesús bajarapovajavabelia.

²⁸ Itsiata baitsi jane bajarapova ajumesæ tsaponæ. Icatsia jumaitsi Jesúsjavabelia:

—Xaniajamë rabaja picani. Itsiata neyavenonare. Tspaji avirixi ata mesa bëxëpanata itsa nubena, nexata pejevaxi pexæpanpërë itsa othopareca mesa bëxëpanareca, banaxane avirixi ata. Bajara pijinja pacuenia itsiata itsanacuapijiva atanë, neyavenonare, jai bajarapova Jesúsjavabelia.

²⁹ Nexata icatsia Jesús jumaitsi bajarapovajavabelia:

—Xaniavaetsia nejumecanaviatame. Naviare baja nijaboyabelia. Dovathi rabaja catovecuapitsapatsi nexënatovayo, jai Jesús.

³⁰ Itsa baja bajarapova pijaboyabelia pata, pexënatovayo taeyabuata jamatejema baja peboæajava camata. Nexata yapëtane pexënatovayo baja petovecuapitsapæjavatsi dovathi.

Pacuenia Jesús jamatejemayaexana bitso siyanë, apo pejumetaenë, piajumecëcënë, yabara pelivaisi

³¹ Jesús baja naropota Tiro nacuavecua. Najetaruca Sidón nacuajava. Bajaraxuacujinae najetaruca Decápolis nacuajava. Bajaraxuacujinae patajopa Galilea pucaxanetojavabelia. ³² Bajarajota jivi tocapatatsi siyanë, bitso apo pejumetaenë, pijajumecëcënë. Nexata bajarapamonae jumaitsitsi Jesúsjavabelia:

—Jesús, pexaniacuene panetoexanare. Panetojayare maponëje pejumetaenexa, pecuaicuaijainexanua, jai bajarapamonae.

³³ Nexata Jesús jivivecua bajaraponë barëpona pesaicaeyojavabelia. Nexata Jesús pecobesitota namataenetsia muxuvojobëta. Bajaraxuacujinae nacobesioniata. Ebarëtojayata. ³⁴ Nexata Jesús athëbëa benaëcotsia. Jesús athëbë venajumalixuabica. Nexata Jesús pijajumeta jumaitsi bajaraponëjavabelia:

—¡Efata! jai.

“Efata,” pejaijume Jesús pijajumeta, mapajumetaje pejumaitsijume: “¡Muxuvojorucaremelia!” pejaijume.

³⁵ Bajarapacuenia Jesús pejumaitsijavata, bajaraponë muxuvojorucalia baja. jumetane jane baja. Peebarëto ata jane baja xanepana. Natsipaeba baja xaniavaetsia. ³⁶ Nexata Jesús jumaitsi bajaraponë petocapatsivitsijavabelia:

—Pëtsa papaebame itsamonaejavabelia pacuene exanajë maponëjavabeliaje, jai picani Jesús asaëyata.

Itsiata bajarapamonae jumeitavetsi atatsi, bitso tsipaebaona jivijavabelia. ³⁷ Nexata pamonaë jumetane bajarapalivaisi, pinijicuenia jamatabëcuenenabenajaca. Bajarapamonae jumaitsi:

—Bajaraponë, Jesús, daxitacuenevitane pexinaevi ata xaniavaetapona. Siyavi ata, bitso apo pejumetaevimi ata, jumetaeyaexanapona. Apo pecaëjêpaevitsi ata pecuaicuaijajava, cuaicuaijaiyaexanapona xaniavaetsia, jai bajarapamonae Jesús yabara.

8

Pacuenia Jesús rajuta pexaejava bejamatabëcuene cuatro mil pajivibeje yabara pelivaisi (Mt 15.32-39)

¹ Itsamatacabi Jesús jivibitsaëtoxaneto muxunanacaetuatatsi. Nexata bajarapamonae penabaninexa, bajarajota pexaejava apo xinae. Nexata Jesús junata pijajivi. Jesús jumaitsi pijajivijavabelia mapacueniaje:

² —Netsitabejiobi baja rovia mapamonaeje. Tsipaji baja ajena acueyabi pamatacabibeje xaina xanëjavata pejinavanapaecujinae. Pemarue baja tovereverecatsi. ³ Itsa meta itorobijitsipajë pijabonëjavabelia peponaenexa pexaejava xaenejeva, apo asaë meta tsipae namutua peponaejava. Tsipaji raja itsamonae pata tajëverena, jai Jesús pijajivijavabelia.

⁴ Nexata Jesús pijajivi jumaitsi:

—¿Detsa jane pacuenia pexaejava berajutatsi? Majotaje ajibi pexaejava. Tsipaji itsajivi ata pijabo apo xinae, jai Jesús pijajivi.

⁵ Nexata Jesús yanijoba pijajivijavabelia.

—¿Detsa papanbëbeje paxainame? jai.

Nexata Jesús pijajivi jumaitsi:

—Siete papanbëbeje paxainajë, jai.

⁶ Nexata Jesús itoroba daxitajivi penaenexa irata. Nexata Jesús pita siete papanbëbeje. Nexata Diosojavabelia Jesús jumaitsi:

—Pexaniacuene panetoexaname. Panerajutame pataxaejava, jai.

Bajaraxuacujinae Jesús epatsicacapona pan. Nexata Jesús pepatsicaeapan rajutapona pijajivijavabelia. Nexata juya Jesús pijajivi bajarapapan tsicobetsana daxitajivi pexaenexa. ⁷ Djuuainëxinua xaina. Icatsia Jesús jumaiti Diosojavabelia dujuainëxi yabara:

—Pexaniacuene panetoexaname. Panerajutame dujuainëxi, jai.

Nexata icatsia pijajivi itoroba petsicobetsanaenexa daxitajivi bajarapadujuainëxi. ⁸ Daxitajivibitsaëtoxaneto nabane xaniavaetsia. Nexata peyajuvenëcopabijavanë Jesús pijajivi caetuata. Vënëba siete xuabeje bemapirecuenia pexanaejavanë. ⁹ Pexaejava nabane bejamatabëcuene cuatro mil pajivibeje. Nexata jane baja pexaejava pexaeujinae, Jesús jivi naviabiaexana pijabonëjavabelia. ¹⁰ Bajaraxuacujinae Jesús, pijajivi yajava, runareca jera ënëabereca. Jesús pijajivi barëpona Dalmanuta nacuayabelia.

Pacuenia fariseovi Jesús itorobatsi Dioso pesaëta pinijicuene pexanaejava petsitaexanaenexa picani yabara pelivaisi

(Mt 16.1-4; Lc 12.54-56)

¹¹ Fariseovi Jesúsjavaberena pata. Bajarapamonae jamatabëcueneëjëbiaya jumenotaponatsi. Nexata bajarapamonae jumaiti Jesúsjavabelia:

—Jesús, Dioso pesaëta pinijicuene exanare. Nexata pacacueneyapëtaenatsi Dioso pepacuenë athëbëvetsica pecaitorobinëcuenetsica, jai.

¹² Nexata bajarapamonae yabara Jesús bitso jamatabëcuenebëjai. Nexata Jesús athëbë venajumalixuabica. Jumaiti:

—¿Detsa xuajitsia panevajëcame pinijicuene patacatsitaexanaenexa pataneyapëtaenexamë pepacuenë Dioso athëbëvetsica taneitorobinëcuenetsica. Xaniajanë pacuenia pacatsipaebijitsiatsi. Itsiata apo pacatsitaexanaetsi tsane pinijicuene taexanaejava, jai Jesús.

¹³ Nexata baja Jesús bajarapamonae vecuapona. Icatsia runareca jera ënëabereca. Pucaxaneto itsapanabelia baja Jesús pona.

Pacuenia Jesús pijajivi muxujioba fariseovi petsipaebilivaisi pejumecovënëtsiyaniva yabara pelivaisi

(Mt 16.5-12)

¹⁴ Jesús pijajivi nacofënëta pamarue. Nexata saya caepanbëyo capona jerata. ¹⁵ Nexata Jesús pijajivi muxujioba pejumecovënëtsiyaniva fariseovi itsa tsipaebatsi saicacuenuia Dioso pejumelivaisivecua. Jesús jumaiti itsajivijavabelia mapacueniaje:

—Panajumetaema. Xania panayajivitaema fariseovi pijalevadura, jai Jesús pijajivijavabelia.

Bajarapacuenia Jesús jumaiti fariseovi petsipaebilivaisi, nacuaevetsinë ata, Herodes, petsipaebilivaisi, Jesús pijajivi pejumecovënëtsiyaniva.

¹⁶ Itsiata Jesús pijajivi apo jumeyapëtaetsi. Bajaraxuata Jesús pijajivi nabarëcuaiuaijai bajarapacuenia Jesús pejumaitsijume yabara. Jesús pijajivi najumaiti:

—Jesús nacajumaiti: “Xania panayajivitaema fariseovi pijalevadura,” nacajai. Baja raeta pacuenia Jesús nacajumaiti pan apo vajacaponaeaxae, najai Jesús pijajivi.

¹⁷ Jesús pijajivi jamatabëcueneypëtane bajarapacuenia jamatabëcuene navëxaniabiaya penajumaitsijava levadura yabara. Nexata Jesús jumaiti pijajivijavabelia:

—¿Detsa xuajitsia panajumaitsimë: “Baja raeta pacuenia Jesús nacajumaitsi pan apo vajacaponaxae,” panajamë? Paxamë abaxë apo panejumeyapëtaemë xua yabara pacajumaitsitsi. Pajamatabëcuenetajamë bitso.¹⁸ Pan yabara raja apo pacajumaitsitsi. Pan itsa namatavenonaejitsipatsi, necaëjëpa taexanaenexa. ¿Apo panajamatabënapitsimë tsipaji pacuenia exanaxë pamatacabi pan namatavenonatsi? ¹⁹ Pacujinae epatsicacajë cinco papanbëmibeje panetsicobetsanaenexa cinco mil ponëbejejavabelia, bajarapacujinae peyajuvënëcopabijavanë, ¿detsa xuabeje pavënëtamë bemapirecuenia pexanaejavanë? jai Jesús pijajivijavabelia.

Nexata Jesús pijajivi jumaitsi:

—Doce xuabeje pavënëtajë, jai.

²⁰ Jesús icatsia jumaitsi:

—Pacujinae epatsicacajë siete papanbëmibeje panetsicobetsanaenexa cuatro mil pajivibejejavabelia, bajarapacujinae peyajuvënëcopabijavanë, ¿detsa xuabeje pavënëtamë bemapirecuenia pexanaejavanë? jai Jesús.

Nexata Jesús pijajivi jumaitsi:

—Siete xuabeje pavënëtajë, jai.

²¹ Nexata Jesús jumaitsi pijajivijavabelia:

—¿Panejumeypëtaneme tsabaja pan yabara apo patacajumaitsijava? Xanë pacajumaitsitsi: “Xania panayajivitaema fariseovi pijalevadura,” pacajaitsi. Bajarapacuenia pacajumaitsitsi panejumecovënëtsianiva fariseovi petsipaebillivaisi, panejumecovënëtsianiva nacuaevevtsinë ata Herodes. Tsipaji bajarapamonae pacatsipaebiana saicayacuenia Dioso pejumelivaisivecua, jai Jesús pijajivijavabelia.

Pacuenia Jesús itaxutoxaniavaeta bitso pitaxutotsëcënaenë, apo petaenë tsiquirijavayo ata, yabara pelivaisi

²² Jesús, pijajivi yajava, patajopa Betsaida tomarata. Nexata Jesús tocana-jetarubenatsi bitso pitaxutotsëcënaenë, apo petaenë. Pinijicuenia vajëcatsi Jesús pitaxutojayatsinexa bajaraponë pitaxutoxanepanaenexa. ²³ Nexata Jesús cobepita. Barëpona pesaicaeyojavabelia, tomarapënëyabelia. Nexata bajarajotalia Jesús peionitota itaxutoexaba. Itaxutojayata. Bajaraxuacujinae Jesús yanijoba.

—¿Cacaëjëpa tsabaja netaejava? jai Jesús.

²⁴ Nexata bajaraponë naëcota. Jumaitsi:

—Taniji pebijivi pejinavanapaejava. Itsiata saya benetsita naejavanë, jai bajaraponë.

²⁵ Nexata icatsia Jesús itaxutojayata. Bajara jane xaniavaetsia naitaxutobabatsiaya naëcota. Itaxutoxanepana jane baja. Xaniavaetsia baja tane.

²⁶ Nexata Jesús jumaitsi bajaraponëjavabelia:

—Naviare nijaboyabelia. Pëtsa abaxë poname tomarabelia. Pëtsa pae-bame itsajivijavabelia ata pacuene caexanatsi, jai Jesús.

Pacuenia Pedro jumaitsi Jesúsjavabelia: “¡Xamë raja Cristomë! jai yabara pelivaisi

(Mt 16.13-20; Lc 9.18-21)

²⁷ Jesús, pijajivi yajava, najetaruca. Pona pepatsinexa Cesarea de Filipovënë tomarajumaverena penaetomaraxijavabelia. Namutua abaxë penajetarubenaejavata Jesús jumaitsi pijajivijavabelia:

—¿Detsa jivi jumai tsabiabi xanë yabara? ¿De tsaeta xanë ponënë? jai Jesús pijajivijavabelia.

²⁸ Nexata Jesús pijajivi jumaitsi:

—Itsamonae xamē yabara jumai tsabiabi: “Juanpijinēmi raeta jivibauti-sabinēmi icatsia asaē,” jai tsabiabi. Itsamonae pijinia jumai tsabiabi: “Diosojumepaebinēmi raeta, profeta Elíaspijinē, ponēmi bajayata ponapona, icatsia asaē,” jai tsabiabi. Itsamonae pijinia jumai tsabiabi: “Bajayata raeta Diosojumepaebivimi profetavimiyajuvēnēnē icatsia asaē,” jai tsabiabi xamē yabara, jai Jesús pijajivi.

²⁹ Nexata icatsia Jesús jumaiti pijajivijavabelia.

—¿Detsa nexata paxamē pajamatabēitsimē xanē yabara? ¿Detsa xanē ponēnē? jai Jesús pijajivijavabelia.

Nexata Pedro jumaiti Jesúsjavabelia:

—Xamē cajena Cristomē, athēbēvetsica Dioso pecaitorobinētsica jivi necapanepaenexa, jai Pedro Jesúsjavabelia.

³⁰ Nexata Jesús pijajivijavabelia jumaiti:

—Pētsa bajarapacuenia itsajivijavabelia papaebame. “Cristo raja,” pajamē pētsa xanē yabara, jai Jesús.

Pacuenia Jesús tajēvelia navajunupaeba pebeyaxuabijavanexatsi yabara pelivaisi

(Mt 16.21-28; Lc 9.22-27)

³¹ Jesús pebeyaxuabijavanexatsi, tajēvelia navajunupaeba pijajivijavabelia. Jumaiti mapacueniaje:

—Xanē, Daxitajivi Pematapijinēnē, pinijicuenia bejiobinē tsane. Judíovi pijaancianovi, sacerdotevi penamatacaitorobivina, judíovi pecujarubivina, apo nejumecovēnētsi tsane Cristonēcuenenē. Nexata bitso nebejiobiaexanaena. Bajaraxuacujinae nebeyaxuabiana. Itsiata baitsi jane tatēpacujinae, acueyabi matacabita, icatsia asaēnē tsane, jai Jesús pijajivijavabelia tajēvelia penavajunupaebijavata pebeyaxuabijavanexatsi.

³² Jesús jumenapebetsiaya pijajivi xaniavaetsia tsipaeba mapajumeje. Nexata Pedro junata Jesús pebarēponatabinexa pesaicaeyojavabelia. Nexata Pedro pesaicaeyojavatalia jumaiti Jesúsjavabelia:

—Pētsa bajarapacuenia cuaicuaijamē netēpaejavanexa yabara, jai Pedro Jesúsjavabelia.

³³ Nexata Jesús Pedrovecua napēnēyorotaxuaba. Taenuca pijajivi penaejavabelia. Nexata Jesús napēnēyorotsia jumai tsanuca Pedrojavabelia:

—¡Dovathi, nevecuanatixire! Tsipaji xamē apo jitsipaemē pacuenia Dioso jitsipa taexanaenexa. Saya ējivi pacuenia jitsipa taexanaenexa, jitsipame, jai Jesús.

³⁴ Nexata Jesús junata pijajivi, daxita jivibitsaēto yajava. Jumaiti bajarapamonaejavabelia:

—Pajivi jitsipa tanepēnaponaejava, bajarapajivi copatsi pejitsipaecuenia pexanaenexa penajamatabēxainabiabijavami. Exanaponaponaetaitorobicuenia. Najamatabēcueneveretsinua bejiobiaexanaejitsia atatsi, beyaxuabijitsia atatsinua, Dioso pejumelivaisi yabara pijamatabēcuenesaē tsaponaponaenexa. Nexata jane baja xuacujinae nepēnaponaena. ³⁵ Pajivi exanaponapona penatojitsipaecuenia, apo xainae tsane matacabi apo pevereverecejajava. Pajivi xanē tajamatabēcueneta copata penatojitsipaecuenia pexanabiabijavami, jivi tacapanepaelivaisitanexa pejamatabēcuenetanua, bajarapajivi xainaena matacabi apo pevereverecejajava. ³⁶ Pajivi exanaponapona penatojitsipaecuenia, bajarapajivi Diosovecua nauabiana. Nexata bajarapajivi daxitacuene xainae ata mapanacuapijicueje, itsiata nacuerata. Tsipaji pexainaecueje apo capanepae tsanetsi Diosojavabelia. ³⁷ Tsipaji

acuenebi tsane itsajivi ata pematamotsinexa penaxuabiyaniwa Diosovecua. ³⁸ Pajivi tajajivitonë ata, Dioso apo pejumecovënëtsivi tuatuajëta, pibisiacuene pexanaevi tuatuajëta ata, navënëlvaisicaura tsane xanë tajajivitonëcuene, tanejumecovënëtsijava ata yabara, nexata juya xanë bajarapajivi, tajajivitonë ata, tajajivitonëcuene vënëlvaisicauranë tsane taxa Diosojavabelia. Bajarapajivi vënëlvaisicauranë tsane pamatacabi icatsia patsianicajë. Baitsi pamatacabi xanë, Daxitajivi Pematapijinënë, ángelevi yajava, patsianicajë, pamatacabi yajavapatsianicajënuwa taxa Dioso pijapenivenivenaecotia, jai Jesús pijajivijavabelia.

9

¹ Icatsia Jesús jumaitsi jivijavabelia:

—Xaniajanë pacuenia pacatsipaebijitsiatsi. Daxita paxamë patëpaenejevamë, Dioso taxuxuabiana pijajivi pevetsijava mapanacuataje. Nexata paxamëyajuvënëvi pepuatae tsane Dioso petaxuxuabijava pijajivi pevetsijava mapanacuataje, tēpaena. Dioso raja pijajivi evetsiana pinijijamatabëcuenesaëta, jai Jesús jivijavabelia.

Pacuenia Jesús caeepatoyo perabënivenivenataba yabara pelivaisi (Mt 17.1-13; Lc 9.28-36)

² Jesús petëpaejavanexa tajëvelia penavajunupaebicujinae, seis pamatacabibejecujinae, Jesús pijajivi, acueyabi ponëbeje, barëpona pinijitsutoxanetojumabetsia. Jesús barëjunaya mapamatabëxëyoje: Pedro, Santiago, Juan. Bajarapamatabëxëyo Jesús barëjunaya pinijitsutoxanetojumabetsia. Nexata petsutojumatatsia Jesús perabënivenivena bajarapamonae pitabarata. ³ Jesús penaxatatsijava bitso nivenivena. Bitso niojai. Mapanacuataje pexaniaquiatsiva ata apo cajëpaetsi bajarapacuenia peniojaiyaxanaenexa. ⁴ Jesús pijajivi bajarajota tane jemata penaitajëtsijava bajayata petëpaenëmibeje, Elíaspijinëbeje Moiséspijinëbeje. Jesús barëcuaicujaitsi bajaraponëbeje. ⁵ Nexata Pedro jumaitsi Jesúsjavabelia mapacueniaje:

—¡Patajatuxanenë, pijacuaxae panebarëponame! Pacatoxanaenatsi acueyabi pabobërëtoheje. Itsabobërëto xamënexa tsane. Itsabobërëto Moisésnexa tsane. Itsabobërëto Elíasnexa tsane, jai Pedro Jesúsjavabelia.

⁶ Bajarapacuenia Pedro jumaitsi Jesúsjavabelia canaëjëtsinejeva. Tsipaji bitso bajarapamonae najunaviaca. Nexata apo yapëtae pacuenia jumaitsijitsia. ⁷ Nexata daxita bajarapamonae pematatsënëvetsica itarërëbo mataacataxabatsi. Nexata bajarapamonae jumetane bajarapaitarërëbojavavetsica Dioso pejumaitisjiva.

—Mara ponë taxënato, tasivanëje. Panamuxunaevere bajaraponë, jaitsica Dioso Jesús pijajivijavabelia.

⁸ Bajarajota bajarapamonae itsa naëcobarëcëpalia Jesúsjavabelia, ajibi baja bajaraponëbeje. Caenë baja Jesús nuca.

⁹ Nexata Jesús pijajivi itsa barërunanucaponaica petsutojumavetsica, jumeitaveta pijajivi. Jumaitsi pijajivijavabelia:

—Pëtsa patsipaebame itsajivi ata pacuene pataneme. Matapania xanë, Daxitajivi Pematapijinënë, icatsia asaënë tsane tatëpacujinae, nexata jane baja matapania patsipaebianame, jai Jesús pijajivijavabelia.

¹⁰ Bajarapamonae, acueyabi ponëbeje, jumecovënëta pejumaitsicueniatsi. Tsiata ëpamonae nayanijobabiaba.

—Jesús jumai tsabiabi: “Tatêpaecujinae icatsia asaënê tsane,” jai tsabiabi. ¿De tsamêra pajamatabêcuene xaina bajarapalivaisi? najai tsabiabi bajarapamonae.

¹¹ Nexata Jesús pijajivi yanijoba Jesúsjavabelia. Jesús pijajivi jumaitsi:

—Patajatuxanenê, ¿detsa xuajitsia judíovi pecujarubivi jumai tsabiabi: “Bajayata ponêmi ponapona, Elíaspjinê, petêpaecujinae icatsia asaê tsane. Bajaraponê copiata patsiana. Bajaraxuacujinae patsiana Cristo, ponê Dioso athêbêvetsica itorobjitsiatsica pepo vajanacacapanepaenênexa jane baja,” jai tsabiabi? jai Jesús pijajivi Jesúsjavabelia.

¹² Nexata Jesús jumaitsi pijajivijavabelia:

—“Copiata Elíaspjinê patsiana. Nexata bajaraponê jamatabêcuenexanetsiana daxitajivi,” itsa jai, Juanpijinêmi jivibautisabinêmi yabara jumaitsi. Nexata baja xaniajai pacuenia judíovi pecujarubivi jumaitsi. Tspijaji baja Juanpijinê tavajênaeya jivi jamatabêcuenexanetanajetaruca. Xanê, Daxitajivi Pematapijinê, athêbêvetsica Dioso nitoroba jivi tacapanepaenexa. Nexata xanê yabara tajêvelia Dioso pejumelivaisibaxutota, jai Jesús pijajivijavabelia.

¹³ Jesús icatsia jumaitsi pijajivijavabelia Juanpijinêmi yabara:

—Xaniajanê pacuenia pacatsipaebijitsiatsi. Elíaspjinê rabaja patajopa. Pepatsicujinae baja exanatsi daxita pacuenia jamatabêexanatsi. Nexata exanatsi pacuenia baja cajena Dioso pejumelivaisibaxutota tajêvelia jumaitsi bajaraponêmi yabara, jai Jesús pijajivijavabelia Juanpijinêmi yabara.

Pacuenia Jesús jamatejemayaexana pejevaxinê, dovathi peyajavaponaponaenê, yabara pelivaisi

(Mt 17.14-21; Lc 9.37-43)

¹⁴ Jesús pijajivi, acueyabi ponêbeje, petsutojumabetsia pebarêponaecujinae, icatsia barênaviatsica. Itsamonae Jesús pijajivi pepuentsivijavabetsica, barênaviatsica. Nexata Jesús tane pijajivi jivibitsaêtoxaneto pevajênae pematoyoronaejavatsi. Jesús tanenua judíovi pecujarubivi anaeya pejumenotsijavatsi Jesús pijajivi. ¹⁵ Nexata bajarapamonae itsa taerêcêpa Jesús, daxita jamatabêcuenebarêyaya cujinaeyeca Jesúsjavabelia pebajacobinexatsi Jesús.

¹⁶ Nexata Jesús jumaitsi bajarapamonaejavabelia:

—¿Detsa xua yabara panajumeanaenotame pinijicuenia? jai Jesús.

¹⁷ Caenê bajarapajivi bitsaêtoxanetoyajuvênê jumaitsi Jesúsjavabelia:

—Jesús, mara picani taxênatonêyo, dovathi peyajavaponaponaenêyo, catocanajetarucatsije. Maponêyoje dovathi apo netonatsipaebiaexanaetsi.

¹⁸ Itsa raja dovathi vaetababiabatsi, irata xuababiabatsi. Nexata bajarajota pecuiothamu tsabiabi. Vonoquiraquirajainua tsabiabi. Daxitanêyo aperabêbaba tsatababiabireca. Picani raja nijajivijavabelia jumaitsinê: “Panetovecuacapsapare dovathi,” janê. Itsiata bajarapamonae apo caêjêpaetsi tanetovecuacapsapaenexa, jai bajaraponê Jesúsjavabelia.

¹⁹ Jesús nexata jumaitsi pijajivijavabelia:

—¡Paxamê baja rovia apo pajumecovênêtsimê Dioso papecayavenonaejavanexa! Bajaraxuata apo pacajamatabêcuenecaêjêpae pejevaxinê panevecuacapsapaenexa dovathi. ¿Detsa paepatojebi abaxê paxamêjavabelia ajamatabêcuenesaênê tsaponapona tsane patanejumecovênêtsinexamê? Panetocarenamêre pejevaxinê, jai Jesús pijajivijavabelia.

²⁰ Nexata tocarenatsi Jesús pejevaxinē. Dovathi itsa tanetsi Jesús, nexata icatsia bajarajota dovathi pejevaxinē tēpajoneyaexanatsi. Irata xuabatsi pejevaxinē. Nexata pejevaxinē natorenaba irata. Pethamu pitsapa pecuibuatsina. ²¹ Nexata Jesús yanijoba pejevaxinē paxajavabelia.

—¿Detsa pamatacabibeje xaina petaxuxuabicujinaetsi mapacueenje? jai Jesús.

Nexata pejevaxinē paxa jumaitsi:

—Penacuetojavaveliacujinae cajena taxuxuabatsi. ²² Bajayajebi picani isotojavalia dovathi netoxuababiabaliatsi. Menialia ata netoxuababiabaliatsi. Beyaxuabijitsiatsi bajarapacuenia. Xamē itsa cacajēpa itsacuenia ata taneyavenonaenamē, ¡nitaxutotsoniataema! ¡Neyavenonare! jai pejevaxinē paxa Jesúsjavabelia.

²³ Nexata Jesús jumaitsi pejevaxinē paxajavabelia:

—Pajivi jumecovēnēta Dioso peyavenonaevanexatsi, bajarapajivi Dioso yavenonatsi daxita xua namatavenona, jai Jesús.

²⁴ Nexata pejevaxinē paxa aējai. Jumaitsi:

—¡Jumecovēnētājē baja cajena! ¡Neyavenonare bitso orijibia tajumecovēnētsinexa! jai bajaraponē Jesúsjavabelia.

²⁵ Nexata Jesús itsa tane jivibitsaētoxaneto penacaetuataponaajava Jesúsjavaberena, nexata Jesús itaveta dovathi. Jumaitsi:

—Dovathi, xamē pejevaxinē apo nenatsipaebiaexanaenē. Apo nejumetaeyaexanaenēnu. Xanē caitavetatsi. Pitsapare mapapejevaxinēvecuaje. Pētsa baja icatsia junuame matavējēa maponēyojavaberena, jai Jesús dovathijavabelia.

²⁶ Nexata dovathi pejevaxinē icatsia aējaiyaexanatsi. Tēpajoneyaexanatsi. Vecuapitsapatsi jane baja. Puenetabuatatsi bepetēpaenēyo. Nexata itsamonae bajarajota jumaitsi:

—Pejevaxinē rabaja tēpa, jai bajarapamonae.

²⁷ Nexata Jesús cobepita pejevaxinē. Cobevaetabiaya yotsina. Nexata pejevaxinē nonotabapuna.

²⁸ Nexata xuacujinae Jesús boya itsa joneya, Jesús pijajivi jumaitsi:

—¿Detsa xuajitsia meta paxanē apo panecaējēpae patavecuacapit-sapaenexa dovathi? jai Jesús pijajivi.

²⁹ Nexata Jesús jumaitsi pijajivijavabelia:

—Mara paviria dovathije apo jitsipae pepitsapaejavaje. Matapania panexaejava apo paxaemē tsipae panevajētsinexa asaēyata Diosojavabelia panecapitsapaenexa dovathi, pitsapaejitsipa, jai Jesús pijajivijavabelia.

Pacuenia icatsia Jesús tajēvelia navajunupaeba pebeyaxuabijavanexatsi yabara pelivaisi

(Mt 17.22-23; Lc 9.43-45)

³⁰ Jesús pejevaxinē dovathi pevecuacapitsapaecujinae, Jesús baja, pijajivi yajava, pona. Nexata Jesús, pijajivi yajava, najetaruca Galilea nacua-
java. Jesús jitsipa pijajivi pebarēnajetarucaenexa bajaraxuayo itsajivi ata yapētaenejevatsi. ³¹ Tsipaji Jesús pebeyaxuabijavanexatsi, tajēvelia nava-
junupaebapona pijajivijavabelia. Jumai tsaponae Jesús pijajivijavabelia mapacueniaje:

—Xanē, Daxitajivi Pematapijinēnē, necanajetsiana itsamonae pecobeyabela. Bajarapamonae nebeyaxuabiana. Itsiata baitsi jane tanebeyaxu-
abicujinae, acueyabi matacabita, icatsia asaenē tsane, jai tsaponae Jesús pijajivijavabelia.

³² Itsiata pijajivi apo jumeyapëtaetsi. Bajarapamonae ajumeura Jesúsjavabelia peyanijobinexa bajarapalivaisi yabara.

Pacuenia Jesús pijajivi: “¿Detsa ponë vaxaitsiyajuvënënë nacavecuayajiamatabëcuenenë bitso?” najai tsanajetarubena yabara pelivaisi (Mt 18.1-5; Lc 9.46-48)

³³ Jesús pijajivi barëpata Capernaum tomarata. Jesús pijajivi pebarëpatsicujinae, boyalia itsa barëjoneya Jesús, yanijoba pijajivijavabelia.

—¿Detsa pitsicuene yabara namutua bitso panajumenotanajetarubename? jai Jesús.

³⁴ Nexata Jesús pijajivi moya. Tsipaji Jesús pijajivi namutua najumaiti tsanajetarubena:

—¿Detsa ponë vaxaitsiyajuvënënë nacavecuayajiamatabëcuenenë bitso? najai tsanajetarubena Jesús pijajivi.

³⁵ Nexata Jesús eca. Junata pijajivi, doce ponëbeje. Jumaiti pijajivijavabelia:

—Pajivi jitsipa ayajiamatabëcuenejivi penaexanaenexa daxitajivi mata-toxenetsia, bajarapajivi beveliajamatabëcuenejivi natae peyavenonaenexa daxitajivi, jai Jesús pijajivijavabelia.

³⁶ Bajaraxuacujinae Jesús cobepita pejevaxinëyo. Pijajivi pitabarata nuteta. Bajaraxuacujinae Jesús isapita. Jumaiti pijajivijavabelia:

³⁷ —Pajivi copiapita tanejumecovënëtsijiviyo, mapitsipejevaxinëyo ataje, xanë taniji tanecopiapitsijava. Pajivi necopiapita, êxanë apo necopiapitsi. Ponë nitoroba, neyjavacopiapita, jai Jesús pijajivijavabelia.

Pacuenia Jesús jumaiti pijajivijavabelia itsa vënëlivaisitane itsanë dovathi jivivecua pecapitsapaejava Jesús pevënëta yabara pelivaisi

(Mt 10.42; Lc 9.49-50)

³⁸ Jesús pijajivitonë, Juan, jumaiti Jesúsjavabelia:

—Tajatuxanenë, pataniji itsanë nevënëta dovathi jivivecua pecapitsapaejava. Itsiata bajaraponë apo paxanëyajuvënënë. Nexata paitavetajë bajaraponë dovathi jivivecua pecapitsapaponaeyava, jai Juan.

³⁹ Nexata Jesús jumaiti Juanjavabelia:

—Pëtsa paitavetame bajaraponë. Tsipaji raja pajivi pinijicuene pexanaeyava exana tavënëta, bajaraxuacujinae acuenebi bajarapajivi tanebaranatsipaebinexa pibisiacuenia. ⁴⁰ Tsipaji raja pajivi pibisiacuene apo najamatabëxainae vaxaitsijavaberena, bajarapajivi nacajamatabëcueneavenona. Bajarapajivi bevaxaitsijamatabëcuenejivi. ⁴¹ Xaniajanë pacuenia pacatsipaebijitsiatsi. Pajivi tsiquirijavayo ata mera pacarajutsiana paneapaenexa patajajivixaemë, bajarapajivi pepacuene Dioso matamotsianatsi mera papecarajutsimatamo, jai Jesús Juanjavabelia.

Pacuenia Jesús pijajivi muxujioba itsajivi ata pibisiacuene pexanaeyaxanaeyaniva yabara pelivaisi

(Mt 18.6-9; Lc 17.1-2)

⁴² Icatsia Jesús jumaiti pijajivijavabelia:

—Pajivi pibisiacuene exanaeyaxanaejitsipa mapitsipevaxijivixi ataje, tanejumecovënëtsiyajuvënëjiviyo, bajarapajivi Diosojavabelia bitso naneconitsipa. Nexata Dioso ayacuena naneconitsiaexanaejitsipatsi. Nexata pajivi najamatabëxaina pibisiacuene pexanaeyaxanaenexa tanejumecovënëtsiyajuvävabellia, abaxë pibisiacuene exanaeyaxanaejeva, bajarapajivi bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatuajëareca.

Bajarapajivi beXuarecatsi bitso penaneconitsiyaniwa Diosojavabelia pibisiacuene itsa exanaeyaexana tanejumeconvënëtsiviyajuvënëvi. ⁴³Bajaraxuata panecobeta pibisiacuene itsa paexaname, panacobecacure. Itsiata xanepana panejonenexa cobemataxucaeja apo pevereverecaenacuajavabelia. Biji rajane apo xanepanae tsipae panejonenexa infiernojavabelia anijacobebeje yajava, itsajota isotocotia apo itaxupae caeto ata. ⁴⁴Bajarajota apo tēpae oro, jivivixaevi. Isotocotia ata apo itaxupae caeto ata. ⁴⁵Itsa panetaxuta ata pibisiacuene paexaname, panataxucaeure. Itsiata xanepana panejonenexa taxumataxucaeja apo pevereverecaenacuajavabelia. Biji apo xanepanae tsipae panejonenexa infiernojavabelia anijataxubeje yajava. ⁴⁶Bajarajota apo tēpae oro, jivivixaevi. Isotocotia ata apo itaxupae caeto ata. ⁴⁷Paneitaxutota ata panetaejava yabara pibisiacuene itsa paexaname, panaitaxutocajure. Itsiata xanepana panejonenexa pacaeitaxutojivimē apo pevereverecaenacuajavabelia, Dioso pijanacuayabelia. Biji rabiji apo xanepanae tsipae panejonenexa anijaitaxutobeje yajava infiernojavabelia. ⁴⁸Bajarajota apo tēpae oro, jivivixaevi. Isotocotia ata apo itaxupae caeto ata. ⁴⁹Dajubinē jivi itsa beyaxuaba Diosojavabelia ofrendacuenia pevi perajutsinexa, viexaba yajota pevixanepanaenexa. Bajara pijinia pacuenia pejamatabēcuenexanepanaenexa, daxita Dioso pijajivi ata jamatabēcueneējēbianatsi manacuataje. ⁵⁰Yajo raja xanepana. Itsiata yajo pexaicaejavami itsa ajibi tsipae, apo xanepanae tsipae itsacuenejavayonexa ata. Bajara pijinia pacuenia paxamē ata pajamatabēcueneitsimē tsipae Diosojavabelia, itsa apo pavecuaapanepaemē tsipae papecajamatabēcuene ējētaaponaejava. Nexata pajamatabēcuenesaemēre panejamatabēcuenexanepanaenexa Diosojavabelia. Pajinavanapare xaniavaetsia itsamonaejavabelia ata, jai Jesús pijajivijavabelia itsajivi ata Jesús pijajivi pibisiacuene pexanaeyaexanaeyaniwa.

10

Pacuenia Jesús jivi livaisi tsipaeba penacojiobinē pijava pexuabiyaniwa yabara pelivaisi

(Mt 19.1-12; Lc 16.18)

¹Jesús baja pona Capernaum tomaravecu. Pona Judea nacuyabelia. Bajaraxuacujinae Jordánmene itsapanabelia, paira, Jesús pona. Bajarajotalia icatsia jivibitsaētoxaneto pata Jesúsjavaberena. Nexata icatsia Jesús livaisi tsipaeba bajarapamonae. Tsipaji baja cajena Jesús livaisi petsipaebanajetarucaenē. ²Nexata fariseovi Jesús cujibarenatsi petsipaebilivaisi yabara jamatabēcueneējēbiaya peyanijobinexatsi. Nexata Jesús bijiaya itsa jume-canaviata, neconitsijitsiatsi. Nexata fariseovi jumaitsi Jesúsjavabelia:

—¿Xanepana tsaja penacojiobinē pijava pexuabinexa? jai.

³Jesús nexata jumaitsi fariseovijavabelia:

—¿Detsa pacuenia bajayata Moiséspijinē pacaitoroba panijavajivi panexuabiyaniwa? jai Jesús.

⁴Nexata fariseovi jumaitsi Jesúsjavabelia:

—Moiséspijinē tocopata, ponē pijava jamatabēxuaba, pexuabinexa. Itsiata baitsi jane Moiséspijinē tocopata, ponē pijava xuabijitsia, copiaya petoyaquinaenexa cuyalatobaxuto pijavajavabelia. Nexata ponē pijava xuabijitsia, copiaya pijava toyaquinabiaba pitavetsilivaisi pexuabinexa jane baja pijava. Bajarapacuenia pexanaenexa, ponē pijava jamatabēxuaba, Moiséspijinē tocopata, jai fariseovi Jesúsjavabelia.

⁵ Nexata Jesús jumaitsi fariseovijavabelia:

—Moiséspijinē raja bajarapacuenia pacatocopata paneajamatabēcuenelivaisitajaxae. ⁶ Pamatacabi Dioso taxuxuaba nacua pexanaejava, bajarapamatacabit Dioso exana pebi, pijava yajava. ⁷ Bajaraxuata pebi itsa nacojioba pijavajavabelia, banatsata paxavecua, pena atavecua. ⁸ Nexata Dioso tane anijavimibeje becaejivi. Nexata Dioso apo tae beanijavibeje. Becaejivi saya tane Dioso. ⁹ Bajaraxuata itsanē ata apo bexuabi pijava. Tsipaji Dioso pejamatabēcueneta napitsiaexanatsibeje, jai Jesús fariseovijavabelia.

¹⁰ Bajaraxuacujinae Jesús pijajivi pijaepato itsa barēnacopata bota, nexata Jesús pijajivi yanijobatsi bajarapacuenē yabara. ¹¹ Nexata Jesús jumaitsi pijavijavabelia:

—Ponē pijava pexuabicujinae, itsava icatsia itsa pita, bajaraponē pibisiacuene exana pevitota. Nexata naneconita Diosojavabelia. Tsipaji itsava jaita pepo pijavavecua. Dioso cajena abaxē bajaraponē pexuabiva pepo pijavacuenia totanetsi. ¹² Bajara pijinia itsi petiriva ata pamona pevcuanaviatsicujinae, itsanē icatsia itsa pitatsi. Bajarapova pibisiacuene exana pevitota. Nexata naneconita Diosojavabelia. Tsipaji itsanē jaita pepo pamonavecua, ponē abaxē Dioso totanetsi pamonacuenia, jai Jesús pijavijavabelia.

Pacuenia Jesús jumaitsi pejevaxijivixijavabelia yabara pelivaisi

(Mt 19.13-15; Lc 18.15-17)

¹³ Jesúsjavaberena itsamonae pejevaxijivixi tocapataponatsi Jesús pejayataponae exa pecobeta. Nexata Jesús pijajivi itaveta pexi pecapatsivi. Jesús pijajivi jumaitsi pexi pecapatsivijavabelia:

—Pētsa patocapataponame panexi Jesúsjavaberena, jai.

¹⁴ Nexata Jesús itsa tane bajarapacuenia pijajivi pejumaitsijava, Jesús jamatabēcuenē anaepanaxuareca. Jumaitsi pijavijavabelia:

—Pētsa paitavetame. Pacopare pejevaxijivixi pepatsinexa xanējavaberena. Mapitsipejevaxijivixije jumeaebinejeva, xaniavaetsia bajumecovēnēta palivaisi tsipaebatsi. Nexata pamonae jitsipa pejonejava Dioso pijanacuayabetsia, bajara pijinia pacuenia jumeaebinejeva xaniavaetsia bejumecovēnēta Dioso pejumelivaisi. ¹⁵ Xaniajanē pacuenia pacatsipaebijitsiatsi. Mapitsipejevaxijivixije itsa jumecovēnēta palivaisi tsipaebatsi, bajumecovēnēta xaniavaetsia jumeaebinejeva. Bajara pijinia pacuenia jumeaebinejeva, xaniavaetsia bejumecovēnēta Dioso pejumelivaisi pamonae jitsipa pejonejava Dioso pijanacuayabetsia, jai Jesús pijavijavabelia.

¹⁶ Nexata Jesús isapitapona pejevaxijivixi, caejiviyo canacujitsia. Pecobeta jayatapona. Jesús pejevaxijivixijavabelia jumai tsaponae:

—Dioso xaniavaetsia caevetsiana, jai tsaponae.

Pacuenia pevējēato, bitso pexainaenē, cuaicuajjai Jesúsjavabelia yabara pelivaisi

(Mt 19.16-30; Lc 18.18-30)

¹⁷ Pabota Jesús pejevaxijivixi isapitapona, bajarapabovecua itsajavabelia baja icatsia Jesús ponaejitsia. Nexata baja Jesús itsa naropotsijitsia, pevējēato cunjinaerucarena Jesúsjavaberena. Jesús pitabarata pematocabēta nuacunua. Jumaitsi pevējēato Jesúsjavabelia:

—Petuxanenē, pexaniajamatabēcuenenēmē. ¿Detsa pitsicuene hexanajē taxainaenexa matababi apo pevereverecaejava? jai pevējēato.

¹⁸ Nexata Jesús jumaitsi pevējēatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. ¹⁹ Xamë baja yapëtaneme pacuenia Dioso pejumelivaisita itoroba jivi pejumecovënëtsinexa. Jumaitsi mapacueniaje: “Pëtsa jaitame itsava nijavavecua. Pëtsa beyaxuabame jivitonë. Pëtsa nacobetoxotame. Pëtsa itsamonae pexanaejava yabara najumetsënëtsiaya paebame. Pëtsa yamaxëitojorobiaya vecuapitame itsajivi pexinaejava. Axa yaiyataema. Ena ata yaiyataema,” jai Dioso pejumelivaisita. Xamë baja yapëtaneme bajarapalivaisi, jai Jesús pevëjëatojavabelia.

²⁰ Nexata pevëjëato jumaitsi Jesúsjavabelia:

—Petuxanenë, daxita rabaja bajarapalivaisianë jumecovënëtajë pejevaxinëjavaveliacujinaenë, jai pevëjëato.

²¹ Nexata Jesús asivaya tane pevëjëato. Jumaitsi:

—Caejava raja catosaica nexanaenexa. Ponare necanajetsinexa daxita nexainaecuenemi. Bajarapamatamomi tscibetsanaename bepejiobivi. Nexata bajarapacuenia xainaename bitso nexainaecuenë Dioso pijanacuatatsia. Nexata najamatabëcueneverere, cabejibiaexanae ata, cabeyaxuabijitsia atanua tajumelivaisi yabara, nijamatabëcuenesaë tsaponaponaenexa. Nexata jane baja xuacujinae nepënaponaename, jai Jesús pevëjëatojavabelia.

²² Nexata pevëjëato itsa jumetane bajarapacuenia Jesús pejumaitsijava, najamatabëxainaeya baja vecuapona Jesús. Tsipaji pevëjëato daxitacuene bitso pexainaenë. Nexata pevëjëato apo jamatabëjumecovënëtsi palivaisi Jesús tsipaeba.

²³ Nexata pevëjëato pecovëta Jesús pijajivi matatoyorotsia naëcota. Jumaitsi:

—¡Pamonae bitso daxitacuene pexinaeivi, tsiyapëbejetsi penajamatabëcuenecopatsinexa Diosojavabelia pecapanepaenexatsi Dioso pijanacuayabetsia! jai Jesús pijajivijavabelia.

²⁴ Nexata Jesús pijajivi jamatabëcuenenabenajaca itsa jumetane bajarapacuenia Jesús pejumaitsijava. Nexata icatsia Jesús jumaitsi pijajivijavabelia:

—Tajamonae, pamonae bitso ëpexinaejevanexa najamatabëxaina, bajarapamonae bitso tsiyapëbejetsi tsane pejonenexa taxa Dioso pijanacuayabetsia. ²⁵ Pacuenia camello ayainëxae, acuenebi pejonejava palutaetoitaxutovojotualia, bajara pijinia pacuenia bitso pexainaenë acuenebi tsane pejonejava Dioso pijatomarabetsia. Tsipaji najamatabëxaina bitso ayaijava pexainaenexa, jai Jesús pijajivijavabelia.

²⁶ Jesús pijajivi itsa jumetane bajarapacuenia Jesús pejumaitsijava, bitso jamatabëcuenenabenajaca. Nexata bajarapamonae jumaitsi Jesúsjavabelia:

—¿Detsa nexata pitsivi panepaena Diosojavabelia bitso pexinaeivi ata itsa apo panepae tsanë Diosojavabelia? jai.

²⁷ Nexata Jesús asaëya naëcota pijajivijavabelia. Jumaitsi pijajivijavabelia: —Jivi raja apo caëjëpaetsi pijacuata penacapanepaenexa Diosojavabelia. Caenë Dioso caëjëpatsi jivi pecapanepaenexa. Dioso raja caëjëpatsi daxitacuene pexanaenexa, jai Jesús pijajivijavabelia.

²⁸ Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxainaejavami. Nexata baja pacapënajinapanatsi, jai Pedro.

²⁹ Nexata Jesús jumaitsi:

—Xaniajanë pacuenia pacatsipaebijitsiatsi. Pajivi xanë tajamatabëcueneta, jivi tacapanepaelivaisitanexa pejamatabëcuenetana,

pueneta pijabomi, pematapijivi ata, pejuyapijivi ata, paxa ata, pena ata, pijava ata, pexi ata, pijapabianē ata, nexata bajarapajivi bitso ayaijava Dioso rajutsianatsi pepuenetsijavanēmi matatoxenetsia. ³⁰ Caejavayomijamatabēcuene tšaponae, rajutsianatsi mapanacuataje cien xuabeje tšaponae pevajēnaeyabelia. Bajarapajivi icatsia xainaena bonē, pematapijivi ata, pejuyapijivi ata, pena ata, pexi ata, pabianē ata. Itsiata bajarapajivi itoya tšanetsi mapanacuapijivije. Bejiobiaexanabiabianatsinua. Itsiata baitsi jane bexēajavabelia xainaena matababi apo peverevereaejava. ³¹ Pamonae aeconoxae mapamatacabitaje ayaijamatabēcuenevi tanetsi, bajarapamonae Dioso beveliajamatabēcuenevi exanaenatsi. Pamonae pijinia mapamatacabitaje beveliajamatabēcuenevi tanetsi, bajarapamonae Dioso ayaijamatabēcuenevi exanaenatsi, jai Jesús pijajivijavabelia.

Pacuenia icatsia Jesús tajēvelia navajunupaeba pebeyaxuabijavanexatsi yabara pelivaisi

(Mt 20.17-19; Lc 18.31-34)

³² Jesús, pijajivi yajava, najetaruca namutua. Pona Jerusalén tomara-belia. Jesús pijajivi, pepēnaponaevitsi, jamatabēcuenenabenajaca. Tšipaji Jesús apo junavi bajarabelia peponaejava, yapētae ata, pacuenia exanaejitsiatsi Jerusalén tomarata. Nexata Jesús icatsia junata pijajivi, doce ponēbeje, pesaicaeyojavabelia. Navajunupaeba tajēvelia pacuenia exanaejitsiatsi Jerusalén tomarata. ³³ Jumaitsi Jesús tajēvelia pijajivijavabelia:

—Panejumetaema. Mara Jerusalén tomarabelia ponatsije. Bajarajotalia xanē, Daxitajivi Pematapijinēnē, sacerdotevi penamatacaitorobivi, judiōvi pecujarubivinua, pecobeyabelia necanajetsiana tanevaetabinexa. Nexata xanē neneconitsiana tanebeyaxuabinexa. Bajaraxuacujinae icatsia necana-jetsiana itsanacuaverena pepatsivi pecobeyabelia. ³⁴ Bajarapamonae necanecaponauena. Nesuabiana. Nejumatitibabena penaneconitsivi peju-maconitabiabimacata. Bajaraxuacujinae nebeyaxuabiana jane baja. Itsi-ata baitsi jane tanebeyaxuabicujinae, acueyabi matababita, icatsia asaēnē tsane, jai tajēvelia pijajivijavabelia Jesús penavajunupaebijavata pebeyaxu-abijavanexatsi.

Pacuenia Santiago-beje Juanbeje vajētabeje Jesúsjavabelia pexaniacuene petoexanaenexatsibeje yabara pelivaisi

(Mt 20.20-28)

³⁵ Zebedeo pexēnatobeje, Santiago-beje Juanbeje, imoxoyoliabeje Jesús. Jumaitsibeje Jesúsjavabelia:

—Patajatuxanenē, pacuenia pacavajētsijitsiatsibeje, bajarapacuenia pajitsipajēbeje patanetoexanaenexamēbeje, jai-beje Santiago-beje Juanbeje Jesúsjavabelia.

³⁶ Nexata Jesús jumaitsi:

—¿Detsa pitsicuene pajitsipamebeje patacatoexanaenexabeje? jai.

³⁷ Nexata Santiago-beje Juanbeje jumaitsibeje:

—Pamatababi daxitacuene evetsianame, panetocopatsianamebeje patanaecaenexabeje nemuxuneneta vajanajuaevetsinexa. Itsanē naecaena necujanenia. Itsanē naecaena netsavenononia, jai-beje.

³⁸ Nexata Jesús jumaitsi:

—Paxamēbeje apo payapētaemēbeje xua panevajētamebeje. ¿Pacacajēpabeje tsaja panenacaevetsinexabeje papecabebiobiaexanaenexabeje pacuenia xanē nacaevetsianajē tanebejiobiaexanaenexa? ¿Pacacajēpabeje tsaja

panenacaevetsinexabeje papecabeyaxuabinexabeje pacuenia xanë nacaevetsianajë tanebeyaxuabinexa? jai Jesús pijajivitonëbejejavabelia.

³⁹ Nexata Santiagobeje Juanbeje jumaitsibeje:

—Jājā, panecaējēpabeje cajena, jaibeje.

Nexata icatsia Jesús jumaiti Santiagobeje Juanbejejavabelia:

—Paxamēbeje pacabejobiaexanaenabeje pacuenia xanë nebejibiaexanaena. Pacabeyaxuabianabejenua pacuenia xanë nebeyaxuabiana.

⁴⁰ Itsiata baitsi jane xua panevajētamebeje panenaecaenexabeje, itsanë tacujuanenia, itsanë tatsavenonenia, bajaraxua Dioso apo netocopatsi patacatocopatsinexabeje. Tspaji raja taxa Dioso ėpitapetsivinexa abaxë bajaraxua toxaniavaeta, jai Jesús Santiagobeje Juanbejejavabelia.

⁴¹ Diez ponēbeje, Jesús pijajivi, itsa vënētane pepëya bajaraxua Santiagobeje Juanbeje Jesúsjavabelia pevājēcaejavabeje, nexata bajarapamonae jamatabēcuenebaraanaepana Santiagobeje Juanbejejavabelia. ⁴² Nexata Jesús daxita pijajivi junata. Jesús jumaiti pijajivijavabelia:

—Payapētaneme rabaja pacuenia nacuaeetsivi exana. Eveta caenacua canacujitsia. Nexata nacuaeetsivi pijajivicuenia eveta pamonaē jinanapana pevetsinacuanējava. Nexata bajarapanacuanē pevetsivi ayaijamatabēcuenevi nataeyabiaba. Xua jamatabēitoroba pevetsinacuanējava pejivananapaevi petoexanaenexatsi, ajumesaēya itorobabiaba petoexanaenexatsi. ⁴³ Pētsa paxamē bajarapamonae cuenejēpaeya bajarapacuenia paexaname itsamonaējavabelia. Biji rajane ponē paxamēyajuvēnēnē jitsipa ayaijamatabēcuenev penaxanaenexa daxita paxamēvecua, bajaraponē

daxita paxamē bepanijajivitonēcuenia bepacayavenonabiaba. ⁴⁴ Ponē paxamēyajuvēnēnē jitsipa penaxanaenexa papecanamatacaitorobinēnexa, bajaraponē daxita paxamē bepanijajivitonēcuenia bepacayavenonabiaba.

⁴⁵ Tspaji rabaja xanë ata, Daxitajivi Pematapijinē atanē, apo patajopaenē jivi taneyavenonaenexa. Biji rajane xanë patajopajē tayavenonaenexa daxitajivi. Patajopajē tasivatēpaenexa jivi ayaibitsaētoanaxeto pibisiacuene pexanaeconimi taneconimatamotsinexa, jai Jesús pijajivijavabelia.

Pacuenia Jesús itaxutoxanepanaeyaexana Bartimeo, bitso pitaxutotsēcēnaenē, apo petaenē, yabara pelivaisi

(Mt 20.29-34; Lc 18.35-43)

⁴⁶ Jesús, pijajivi yajava, pata Jericó tomarabelia. Jesús icatsia, pijajivi yajava, itsamonaenua ayaibitsaētoanaxeto yajava, pitsapa Jericó tomaravecua. Nexata Bartimeovēnēnē, Timeo pexēnato, eca namuto muxuneneta. Bartimeo, bitso pitaxutotsēcēnaenē, apo petaenē. Jivijavabelia amoneya palata pevājēcabiabinē. ⁴⁷ Nexata Bartimeo itsa jumetane Nazaret tomarapijinē Jesús imoxoyo penajetaruaejava, vavajai tsecae.

—jJesús, Davidpijinē pemomomē, nitaxutotsoniataema! jai tsecae Bartimeo.

⁴⁸ Nexata picani itsamonaē jumeitavetatsi Bartimeo pemoyanexa. Itsiata bitsoyo orijibia vavajai tsecae.

—jDavidpijinē pemomomē, nitaxutotsoniataema! jai tsecae Jesúsjavabelia.

⁴⁹ Nexata Jesús muxunanucojopa. Jumaiti jivijavabelia:

—Pajunaremena bajaraponē, jai.

Nexata bajarapamonae junarena Bartimeo. Pejunatsivirena jumaiti Bartimeojavabelia:

—Najamatabēsātaxuare. Nonotapunare. Jesús raja cajunarena, jai bajarapamonae.

⁵⁰ Nexata Bartimeo penajumaxuabipana xuabapuna. Bepijia najetabarena Jesúsjavabarena. ⁵¹ Nexata Jesús yanijoba Bartimeojavabelia.

—¿Detsa xua jitsipame tacaexanaenexa? jai Jesús.

Nexata Bartimeo hitso pitaxutotsēcēnaenē, jumaitsi Jesúsjavabelia:

—Jesús, jitsipajē taitaxutoxanepanaejava, jai.

⁵² Nexata Jesús jumaitsi:

—Ponare baja. Nesivajamatabējumaitsimē: “Jesús nitaxutox-
anepanaeyaexanaena,” nesivajamatabējamē. Bajaraxuata itaxutox-
anepaname baja, jai Jesús Bartimeojavabelia.

Bajarapacuenia Jesús pejumaitsijavata, Bartimeo baja xaniavaetsia tane. Nexata baja bajaraponē Jesús pepēta napona.

11

Pacuenia Jesús pata Jerusalén tomarata yabara pelivaisi
(Mt 21.1-11; Lc 19.28-40; Jn 12.12-19)

¹ Jesús baja pijajivi barēimoxoyotanajetaruca Jerusaléntomara. Barēpata baja Betfagé tomarayobeje Betania tomarayobeje muxuneneta. Itsajota petsutojumata nubena olivonaenē, bajarajota Jesús barēpata. Bajarajota pebarēpatsicujinae Jesús itoroba anijanēbeje pijajivitonēbeje. ² Jesús jumaitsi pijajivitonēbejejavabelia mapacueniaje:

—Paponarebeje mapatomarayo ecaliajejavabelia. Ajena papatsiaremeli-
abeje, pataenutsianamebeje burro, pecētanutsinētsi. Bajarapaburro itsajivi
ata abaxē apo jumaponae. Paisinaenamebeje. Payamaēcarenamēbeje tsane.
³ “¿Detsa xuajitsia paisinamebeje burro?” itsa pacajaiibeje tsane itsajivi,
nexata pajumaitsimēbeje tsane: “Vajatuxanenē raja namatavenona. Ae-
conoxae raja icatsia canaviatsiarena,” pajamēbeje tsane, jai Jesús pijajivi-
tonēbejejavabelia.

⁴ Nexata Jesús pijajivitonēbeje liabeje. Caxitajarabanutabeje burro baupa
muxuneneta. Cētanutatsi burro namuto muxuneneta. Nexata bajar-
aponēbeje burro isinabeje.

⁵ Nexata bajarajota pejinavanapaevi yanijobatsibeje.

—¿Detsa xuajitsia paisinamebeje burro? jaitsibeje.

⁶ Nexata bajaraponēbeje jumaitsiibeje pacuenia baja Jesús itorobatsi-
beje. Nexata tocopatatsibeje pecaponaenexabeje. ⁷ Nexata jane baja
burro capatabeje Jesúsjavabarena. Nexata Jesús pijajivi pijacamisaju-
mavelia penaxatabijavanē burro tsijumajeba. Bajarapajumata Jesús ecaya.

⁸ Jesús penajetarucaenamutojavarena jivi ayaibitsaētoxfaneto pijacamisaju-
mavelia penaxatabijavanē namutua tsivajēnaeyerequejebaponatsi. Itsamonae
naemaxērananē, pebaxu yajava, ucubaba. Nexata namutua Jesús tsi-
vajēnaeitabētsiaya jebaponatsi yayataeya Jesús pecopiapitsinexatsi. ⁹ Jesús
penajetarucavejavata jivi ayaibitsaētoxfaneto Jesús pevajēnaeya namatax-
ainaeya najetarubena. Itsabitsaētoxfaneto Jesús pecovēya cotocaevanaje-
tarubena. Daxita bajarapamonae vavajai tsanajetarubena. Jumai tsana-
jarubena:

—¡Dioso yavenonaenatsi maponē najetarucaje! ¡Vajatuxanenē
pejamatabēcueneta najetaruca! ¹⁰ ¡Dioso yavenonaenatsi maponē
najetarucaje nacua pevetsinēnexa! ¡Pacuenia bajayata vajasalinainēmi
Davidpijinēmi nacua eveta, bajarapacuenia evetsijitsia! ¡Nexata vaxaitsi
pexaniajamatabēcuenē rajutatsi Diosojavabelia! jai tsanajetarubena
bajarapamonae.

¹¹ Nexata jane baja Jesús patajopa Jerusalén tomarata. Templobojavalia joneya. Nexata Jesús templobota naitaxutocaeveta, pacuene jivi exana templobota, petanenaxa. Nexata baja Jesús pepuatae pacuene jivi exana templobota, Jesús baja icatsia pona. Naviata abaxë Betania tomarabelia pijajivi, doce ponëbeje, yajava. Tsipaji baja caniviyotsia.

Pacuenia Jesús bijataenuta higeranae piacuaijibixae yabara pelivaisi
(Mt 21.18-19)

¹² Jesús pijajivi barëmajita Betania tomarata. Nexata bajayacunua Jesús icatsia pijajivi barëlia Jerusalén tomarabelia. Nexata Jesús namutua penajetarucæjavata, piajani. ¹³ Jesús namutovecua tajiyotalia higeranae yabaxua taenuta. Nexata Jesús taeyojopalia bajaraponae pecuai perubenaeyava. Itsa Jesús pata bajaraponaejavabelia, ëpebaxu saya tsanucae. Tsipaji cajena abaxë apo penacuaitsimatacabi. ¹⁴ Nexata Jesús jumaitsi higeranaeyavabelia:

—Itsajivi ata apo cacuaixae tsane matavëjëa, jai Jesús.

Nexata pijajivi jumetanetsi bajarapacuenia Jesús pejumaitsiyava higeranaeyavabelia.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivina, yabara pelivaisi
(Mt 21.12-17; Lc 19.45-48; Jn 2.13-22)

¹⁵ Jesús, pijajivi yajava, pata Jerusalén tomarata. Nexata Jesús joneya temploboyalia. Nexata templobota Jesús tane pecanajetabiabivi, pecomuacævina. Nexata daxita bajarapamonae Jesús pitsapaeyaexana templobovecua. Palata pecambiabiabivi ata pijamesanëmi Jesús topënëyorobajaraba. Ucucu pecanajetabiabivi ata penabiabijavanëminua topënëyorobajaraba. ¹⁶ Jesús apo tocopatsi itsajivi ata itsacueneyava pecaponaenexa templobojava. ¹⁷ Jesús livaisi tsipaeba. Jumaitsi bajarajota pepatsivijavabelia:

—Dioso baja cajena pejumelivaisibaxutota mapatemplobo yabara tajëvelia jumaitsi mapacueniaje: “Tajabo raja daxitanacuanëpijivi xanëjavaberena penavajëcaebo tsane,” jai Dioso pejumaitsiyava Dioso pejumelivaisibaxutota. Itsiata baitsi jane paxamë yamaxëitojorobiaya panenacobetoxotsinexa panacaetuatabiabame mapabotaje, jai Jesús templobota pecanajetabiabivijavabelia.

¹⁸ Sacerdotevi penamatacaitorobivi, judïovi pecujarubivina, jumetane daxita pacuenia Jesús exana jivijavabelia templobota. Nexata bajarapamonae najumejaita pacuenia Jesús beyaxuabijitsiatsi. Bajarapamonae cujunavatsi Jesús. Tsipaji daxitajivi jamatabëcuenenabenajaca Jesús petsipaebilivaisi yabara. ¹⁹ Ajena baja meravitsia, Jesús yajavapona pijajivi Jerusalén tomaravecua.

Pacuenia higeranae tëpanuca yabara pelivaisi
(Mt 21.20-22)

²⁰ Jesús pijajivi barëmajita Betania tomarata. Nexata bajayacunua Jesús icatsia, pijajivi yajava, najetaruca pecovënamutua. Bajarapamonae taenuta higeranae baja petëpanucaeyava daxita yatabutopaya. ²¹ Nexata Pedro najamatabënapita higeranae Jesús pebijataenutsijava. Nexata Pedro jumaitsi Jesúsjavabelia:

—Tajatuxanenë, jica, taema. Pona higeranae bijataenutame, tëpanuca baja. ¿Detsa meta pacuenia tëpa baja? jai Pedro.

²² Nexata Jesús jumaitsi pijajivijavabelia:

—Paxamē bitso pajumecovēnēre Dioso papecatoexanaenexa pacuenia pavajētame. ²³ Xaniajanē pacuenia pacatsipaebijitsiatsi. Itsa pajamatabējumaitsimē tsipae Dioso yabara: “Dioso nejumecovēnētsiana xua vajētsianajē Diosojavabelia,” itsa pajamatabējāmē tsipae, pacajumecovēnētsipa mapatsuto ataje. Nexata itsa pajumaitsimē tsipae mapatsutojavabeliaje: “Natixire majotavecuaje. Pucaxanetojavabelia jopare,” itsa pajamē tsipae, pacajumecovēnētsipa. Nexata mapatsuto ataje paneitorobicuenia, pacajumecovēnētsipa. Itsa pajumecovēnētsianame Dioso papecatoexanaejavanexa, itsa panajamatabēxainaenamenua Dioso ēpapecajumecovēnētsijavanexa, xua pavajētsianame Diosojavabelia, Dioso pacajumecovēnētsiana. ²⁴ Bajaraxuata pacajumaitsi. Daxita xua pavajētsianame Diosojavabelia, pasivajamatabējumaitsimē tsane: “Xua vajētajē Diosojavabelia, pepacune Dioso nejumecovēnētsiana,” pasivajamatabējāmē. Nexata xua pavajētsianame Diosojavabelia, Dioso pacajumecovēnētsiana. ²⁵ Itsajivi pibisiacuene papecaexanaejava, pajamatabēcuenecaevare panevajētsijavata Diosojavabelia. Nexata pabarajamatabēcuenexanepanare bajarapajivi. Nexata pijinia paneaxa, athēbētatsia peecaenē, jamatabēcuenecaeviana paxamē ata pitabarata pibisiacuene paneexanaejava. ²⁶ Paxamē itsa apo pajamatabēcuenecaevimē tsane itsanē pibisiacuene papecaexanaejava, itsa apo pabarajamatabēcuenexanepanaemēnua tsane, nexata pijinia paneaxa, athēbētatsia peecaenē, apo jamatabēcuenecaevi tsane paxamē pitabarata pibisiacuene paneexanaejava. Apo pacabarajamatabēcuenexanepanaenua tsane, jai Jesús pijajivijavabelia.

Pacuenia Jesús caējēpatsi daxitacuene pexanaenexa yabara pelivaisi

(Mt 21.23-27; Lc 20.1-8)

²⁷ Jesús, pijajivi yajava, pata Jerusalén tomarata. Jesús itsa ponapona tem-plobota, nexata sacerdotevi penamatacaitorobivi, judíovi pecujarubivinuua, judíovi pijaancianovinua, parena Jesúsjavaberenena. ²⁸ Nexata bajarapamonae jumaitsi Jesúsjavabelia:

—¿Jipatsa pejamatabēcueneta pecanajetabiabivi, pecomuacaevinua, capit-sapame mapatemplobovecuaje? jai bajarapamonae Jesúsjavabelia.

²⁹ Nexata Jesús jumaitsi bajarapamonaejavabelia:

—Xanē copiaya caejumeyo pacayanijobianatsi. Itsa paxamē panejume-caviatsianame, nexata xanē juya pacatsipaebianatsi ponē nitoroba taex-anaenexa bajarapacune. ³⁰ ¿Jipatsa jane pejamatabēcueneta Juanpijinē jivi bautisabaponapona? ¿Dioso tsaja pejamatabēcueneta? Itsa jume, ¿jivi tsaja pejamatabēcueneta? Panejumecanaviare baitsi jane, jai Jesús bajarapamonaejavabelia.

³¹ Nexata epamonae nabarēcuaicuaijai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabēcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecovēnētsimē Juanpijinē pepae-bilivaisi?” nacajai tsipae. ³² “Jivi raja saya pejamatabēcueneta Juanpijinē jivi bautisabaponapona,” acuenebi vajajajava. Tsipaji mapatomarapijivije ayaiBITSaētoXaneto Juanpijinē yabara sivajamatabējumaitsi: “Juanpijinē raja pepacune Diosojumepaebinēmi,” sivajamatabējai. Nexata bajarapamonae nacabeyejebijitsipa, najai Jesús peyanijobivitsi.

³³ Nexata saya bajarapamonae jumaitsi Jesúsjavabelia:

—Apo payapētaenē ponē Juanpijinē itorobatsi jivi pebautisabaponaenexa, jai.

Nexata Jesús jumaitsi bajarapamonaejavabelia:

—Nexata xanë ata apo pacatsipaebi tsanetsi ponë nitoroba taexanaenexa bajarapacuenë, jai Jesús.

12

Pacuenia exana pijamatabëcuenebejevi, itsanë pijauvabacabo petoevetsivi, yabara pelivaisi
(Mt 21.33-46; Lc 20.9-19)

¹ Jesús livaisi tsipaeba sacerdotevi penamatacaitorobivijavabelia, judiövi pecujarubivijavabelia ata, judiövi pijaancianovijavabelia ata. Jumaitsi macpueniaije:

—Pijaira pexainaenë pijairata uba ayaibacaboboxaneto uvavënëjava. Bajaraxuacujinae pijaira matatoyorotsia ibopanaxanetonë mataropotsia pefaratsijavata yacaranata. Bajarapayacaranatsijava athëbëabetsia apia jivitonë matatoxenetsia. Bajaraxuacujinae irata mëthë cueyeta. Nexata pecueyetsimëthëjavata exana uvacuairëmene pecayujucabiabijavanexa. Bajaraxuacujinae pijauvabacabo tuatuajëta exananuta piapiabotsia, penacuaitsimatacabi itsa tonaveretsi, athëbëyo pevetaabiabecaenexa pijauvabacabo. Nexata bajaraponë itsamonae evetsiaexana pijauvabacabo. Uvabacabo pexainaenë jumaitsi petoevetsivitsijavabelia: “Pamatacabi cuainaveretsiana, natsicobetsatsianatsi. Pamatacabi raja cuainaveretsiana, tajajivitonë itorobiarenajë xua panetotsatsianame tanetopitsinexa,” jai uvabacabo pexainaenë petoevetsivitsijavabelia. Nexata uvabacabo pexainaenë tajë nacuyabelia pona. ² Itsa baja uvabacabo pexainaenë yapëtane pecopiapatsijava uvacuai penaveretsimatacabi penotsinexa, nexata uvabacabo pexainaenë itoroba pijajivitonë. Itoroba petoevetsivitsijavabelia petsicobetsatsinexatsi. ³ Nexata uvabacabo pexainaenë pijajivitonë tovaetabatsi. Toconibabiatsi. Petoconibabecujinaetsi cobesa naviatssiaexanaliatsi. ⁴ Itsiata uvabacabo pexainaenë icatsia itoroba itsanë pijajivitonë petsicobetsatsinexatsi. Bajaraponë ata icatsia tomatajorobixuabatsi. Pibisiacuenia tobijatanetsi. ⁵ Itsiata icatsia uvabacabo pexainaenë itoroba itsanë pijajivitonë. Bajaraponë jane baja tobeyaxuabatsi. Bajaraxuacujinae abaxë icatsia uvabacabo pexainaenë itoroba itsamonae. Bajarapamonaeya-juvënëvi itsamonae totsaquibabiatsi. Itsamonae tobeyejebatsi.

⁶ Abaxë uvabacabo pexainaenë icatsia pitorobinexa, caenë tonacopatatsi. Pexënato bitso piasivanë. Nexata jane baja uvabacabo pexainaenë pexënato icatsia itoroba. Uvabacabo pexainaenë jamatabëjumaitsi: “Tajauvabacabo tanetoevetsivi tajajivi apo netoyaiyatae ata, itsiata meta taxënato netoyaiyataena,” jamatabëjai uvabacabo pexainaenë. ⁷ Itsiata uvabacabo petoevetsivitsi uvabacabo pexainaenë pexënato ata, apo toyaiyataetsi. Itsa tane uvabacabo pexainaenë pexënato, bajarapamonaenë najumaitsi: “Mara ponëje paxa pevënamuto paxa pijauvabacabo pitsipaje. Naxanitsia. Beyaxuabatsi. Nexata raja vaxaitsi vajauvabacabo tsane,” najai uvabacabo petoevetsivitsi. ⁸ Nexata icatsia uvabacabo pexainaenë pexënato ata tovaetabatsi. Icatsia pexënato ata tobeyaxuabatsi. Petëpaenë xuabatsi bajarapauvabacabo pënëyabelia, jai Jesús sacerdotevi penamatacaitorobivijavabelia, judiövi pecujarubivijavabelia ata, judiövi pijaancianovijavabelia ata.

⁹ Icatsia Jesús jumaitsi bajarapamonaejavabelia:

—¿De meta nexata xua exanaena uvabacabo pexainaenë pijauvabacabo petoevetsivitsijavabelia? Uvabacabo raja pexainaenë patsiarena. Verebiabiana daxita bajarapamonaemi. Nexata icatsia itsamonae evetsiaexanaena bajarapauvabacabo, jai Jesús bajarapamonaejavabelia.

¹⁰ Icatsia Jesús jumaitsi:

—Payapëtaneme rabaja pacuenia Dioso pejumelivaisibaxutota tajëvelia jumaitsi xanë yabara. Iboti pelivaisicuenia Dioso pejumelivaisibaxutota jumaitsi xanë yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapai-botota xaniavaetsia nayaëtsiana botabu daxita itsaibo matatoxenetsia.

¹¹ Vajatuxanenë Dioso raja exanaena bajarapacuene. Nexata nacatsita pexaniacuene bitso tsane bajarapacuene, jai tajëvelia Dioso pejumelivaisibaxutota xanë yabara.

Bajarapacuenia tajëvelia Dioso pejumelivaisibaxutota itsa jumaitsi, paxamë apo patanejumecovënëtsijavanexamë yabara jumaitsi. Dioso taneitapetsijava daxitajivi tacapanepaenexa yabara ata jumaitsi, jai Jesús bajarapamonaejavabelia.

¹² Bajarapamonaepicani Jesús jamatabëvaetabatsi. Tsipaji bajarapamonaepumeyapëtanetsi Jesús pejumaitisijava bajarapamonaepabara. Itsiata abaxë apo vaetabitsi. Tsipaji cununava jivi. Nexata baja Jesús bajarapamonaepvecuapona.

Pacuenia Jesús jamatabëcueneëjëbiaya yanijobatsi impuestomatamo pe-matamotsijava yabara pelivaisi

(Mt 22.15-22; Lc 20.20-26)

¹³ Fariseoviyajuvënëvi, Herodes pijajiviyajuvënëvinua, najetarubena Jesúsjavaberena. Bajarapamonaepévetsivitsi itorobatsi livaisi peyanijobinexatsi Jesús. Nexata Jesús bajarapamonaepbijiaya itsa jumecanaviata, peneconitsinexatsi picani nacuaevetsinëjavabelia. ¹⁴ Nexata bajarapamonaepata Jesúsjavaberena. Bajarapamonaepjamatabëcueneëjëbiaya jumaitsi Jesúsjavabelia:

—Jesús, payapëtaniji cajena nexaniajaicuene, xua yabara tsipaebabiabame livaisianë. Petuxanevi ata xamë apo cununavimë. Apo auramë livaisi netsipaebabiabijava. Nexata daxitajivi najëpaeya livaisi tsipaebabiabame. Pexaniajailivaisi tsipaebabiabame pacuenia Dioso jitsipa jivi pejinavanapaenexa. ¿Xanepana tsaja vajamatamotsinexa impuestomatamo Romanonacua pepo pevetsinëjavabelia? Itsa jume, ¿apo xanepana tsaja vajamatamotsinexa? jai bajarapamonaepjamatabëcueneëjëbiaya Jesúsjavabelia.

¹⁵ Itsiata baitsi jane Jesús jamatabëcueneypëtanep bajarapamonaepjamatabëcueneëjëbiaya peyanijobijavatsi peneconitsinexatsi picani. Nexata Jesús jumaitsi bajarapamonaepjavabelia:

—¿Detsa xuajitsia jamatabëcueneëjëbiaya paneyanijobame? Panetocarenamëre palatanëyo. Taejitsianë, jai Jesús.

¹⁶ Nexata bajarapamonaepJesús tocaponarenatsi palatanëyo. Nexata Jesús jumaitsi bajarapamonaepjavabelia:

—¿Jipatsa mapitabaraje, pevënënuu, ruca mapapalatanëyotaje? jai Jesús.

Nexata bajarapamonaepjumaitsi Jesúsjavabelia:

—Romanonacua raja pepo pevetsinë pitabara, pevënënuu, jai.

¹⁷ Nexata Jesús jumaitsi bajarapamonaepjavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

Nexata Jesús itsa jumecanaviata bajarapacuenia, bajarapamonae jamatabëcuenenabenajaca bajarapacuenia Jesús pejumaitsijavata. Nexata bajarapamonae jamatabëjumaiti:

—¡Xaniavaetsia baja rovia Jesús panejumecanaviata! jamatabëjai.

Pacuenia Jesús tsipaeba jivi petëpaecujinae icatsia piasaëjavanexa yabara pelivaisi

(Mt 22.23-33; Lc 20.27-40)

¹⁸ Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, icatsia apo asaë tsane,” jai tsabiabi. Nexata saduceovi imoxoyorenatsi Jesús. Saduceovi jumaiti Jesúsjavabelia mapacueniaje:

¹⁹ —Jesús, Moiséspijinë bajayata vajanacatoyaquinaelivaisi, jumaiti mapacueniaje: “Ponë pematapijinë pepua penacojiobinë baja, totëpatsi pexi xainaenejeva, nexata juyapijinë bepita pematapijinëmi pijavami. Bajarapacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata pexi itsa xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoyaquinaelivaisi.

²⁰ Nexata jinavanapa ënacaemonae siete ponëbeje. Pepo matapijinë copiaya nacojioba. Nexata bajaraponë pijava vecuatëpa pexi xainaenejeva.

²¹ Nexata pematapijinëmi pepënarucaenë pita pematapijinëmi pijavami. Nexata icatsia bajaraponë ata tëpa pexi xainaenejeva bajarapovajavabelia. Nexata icatsia itsanë tuatuajëmatapijinë pita bajarapova. Bajaraponë ata icatsia tëpa pexi xainaenejeva bajarapovajavabelia. ²² Bajarapacuenia tëpa daxita siete ponëmibeje nacaemonae, bajarapova pepitaponaevi. Itsiata itsanë ata pexi apo xainae bajarapovajavabelia. Bajaraxuacujinae belia bajarapova ata tëpa baja. ²³ “Jivi raja petëpaecujinae, Dioso icatsia asaëyaexanaenatsi,” jamë. ¿Detsa nexata ponë, bajarapamonaeyajuvënënë, pijava tsane bajarapova bajarapamatacabi? Daxita pamonae siete ponëmibeje, nacaemonae, pitapona picani bajarapovami, jai saduceovi Jesúsjavabelia.

²⁴ Nexata Jesús jumaiti saduceovijavabelia:

—Paxamë saya pajamatabëcuenenavëxaniabame. Paxamë raja apo payapëtaemë pacuenia Dioso pejumelivaisibaxutota jumaiti. Apo payapëtaemëna pacuenia Dioso cajëpatsi daxitacuenë pexanaenexa. Bajaraxuata jamatabëcuenenavëxaniabiaya paneyanijobame: “¿Detsa ponë pitsiana bajarapova?” panejamë. ²⁵ Pamatacabi raja petëpaevimi Dioso icatsia asaëyaexanaenatsi, apo nacojiobi baja tsane. Bajarapamatacabita itsajivi ata pexënatoyo apo canajetsi tsane pebijavabelia petonacojiobinexatsi. Bajarapamonae nacojiobinejeva, jinavanapaena athëbëtatsia pacuenia ángelevi jinavanapa. ²⁶ Itsa pepacuenë paxamë paneyanijobame Dioso icatsia piasaëyaexanaejavanexatsi petëpaevimi, nexata pacatsipaebianatsi. Paxamë rabaja payapëtaneme pacuenia bajayata Moiséspijinë peyaquinaebaxutota jumaiti. Bajarapabaxutota jumaiti pacuenia Moiséspijinë Dioso barëcuaiquajaiti siquirinaemëyo petajueyecaecotijavaverena. Abraham baja pepuatëpae, Isaac ata baja pepuatëpae, Jacob ata baja pepuatëpae, bajarapamonae yabara bajayata Dioso jumaiti Moiséspijinëjavabelia mapacueniaje: “Xanë rabaja abaxë Abraham pijaDiosonë, Isaac ata pijaDiosonë, Jacob ata pijaDiosonë,” jai Dioso Moiséspijinëjavabelia bajayata petëpaevimi yabara. ²⁷ Bajarapacuenia Dioso pejumaitisixae, nayapëtanë bajarapamonae bajayata tëpae ata, Diosovecua apo penaxuabijava. Aeconoxae ata bajarapamonae Dioso

yajavajinavanapa athëbëatsia. Nexata paxamë itsa pajumaitsimë: “Petëpaevi rabaja petëpaecujinae, icatsia apo asaë tsane,” itsa pajamë, pinijicuenia pajamatabëcuenenavëxaniabame, jai Jesús saduceovijavabelia.

Palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia yabara pelivaisi

(Mt 22.34-40)

²⁸ Judíovi pecujarubinë pata Jesúsjavaberena. Nexata bajaraponë Jesús jümetanetsi xaniavaetsia pejumecanaviataponaejava saduceovijavabelia. Nexata judíovi pecujarubinë jumaitsi Jesúsjavabelia:

—¿Detsa palivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia? jai.

²⁹ Jesús nexata jumaitsi judíovi pecujarubinëjavabelia:

—Palivaisi bitso jivi bejumecovënëta, daxita Dioso pitorobilivaisianë pejumecovënëtsijava matatoxenetsia jumaitsi mapacueniaje: “Paxamë, Israelpijnë papemomoximë, pajumetaema. Vajatuxanenë rabaja caenë Dioso. ³⁰ Bajaraponë panijatuxanenë, panijaDioso, daxita panejamatabëëthëtojavavetsina pasivamëre. Pasivamëre daxita panejamatabëcueneta ata, daxita panenajamatabëxainesaëta ata, daxita panesaëta ata,” pejailivaisi bitso jivi bejumecovënëta daxita Dioso pitorobilivaisianë pejumecovënëtsijava matatoxenetsia. ³¹ Bajaraxuacujinae pecotocaevilivaisi, palivaisi bitso jivi bejumecovënëta, jumaitsi icatsia mapacueniaje: “Pasivamëre itsajivi ata pacuenia paxamë panijacuata panaasivamë,” jai. Bajarapalivaisi ata jivi bitso bejumecovënëta. Ajibi rabaja itsalivaisi pematatsënëa, Dioso pitorobilivaisi, palivaisi bitso jivi bejumecovënëta,” jai Jesús judíovi pecujarubinëjavabelia.

³² Nexata icatsia judíovi pecujarubinë jumaitsi Jesúsjavabelia:

—Jesús, xaniajamë rabaja pacuenia jumaitsimë. Caenë tsaena Dioso ponapona. Ajibi tsaena pematatsënëa itsanë Dioso. ³³ Bejumecovënëtatsi Dioso daxita vajajamatabëëthëtojavavetsina, daxita vajanajamatabëxainesaëta ata, daxita vajasaëta ata. Biasivatsi itsajivi ata pacuenia vaxaitsi vajacuata nasivatsi. Daxita bajaraxua itsa jumecovënëtatsi, bitso nacatonamatamota Diosojavabelia. Bajaraxua bitso nacatonamatamota ofrenda Diosojavabelia vajarajutabiabijava matatoxenetsia. Baitsi xua Diosonexa ofrendacuenia totajutabiabatsi, dajubicuene itsa tobeyabiabatsi, bajaraxua matatoxenetsia bitso nacatonamatamota, jai judíovi pecujarubinë Jesúsjavabelia.

³⁴ Jesús itsa jümetane judíovi pecujarubinë xaniavaetsia pejumecanaviatsijavatsi, nexata Jesús jumaitsi judíovi pecujarubinëjavabelia:

—Tsiquirijavayo catosaica Diosojavabelia nenajamatabëcuenecopatsinexa nijatuxanenë Dioso nexanaenexa, jai Jesús judíovi pecujarubinëjavabelia.

Bajaraxuacujinae daxitajivi baja Jesús cujunavatsi. Nexata baja Jesús jivi jamatabëcuenëjëbiaya livaisi apo yanijobitsi.

Pacuenia Jesucristo yabara Davidpijnë bajayata tajëvelia: “Tajatuxanenë,” jai, yabara pelivaisi

(Mt 22.41-46; Lc 20.41-44)

³⁵ Jesús livaisi tsipaeba templobota. Jesús pijacuata nayabarajumaitsi:

—¿Detsa xuajitsia judíovi pecujarubivi apo jumecovënëtsi Cristo Dioso pexënatocuene, ponë athëbëvetsica Dioso itorobijitsatsica jivi pecapanepaenexa? Bajarapamonae saya jamatabëcuenenavëxaniabiaya jumai tsabiabi Cristo yabara: “Cristo raja itsa patsiana, Davidpijnë pemomo

tsane,” jai tsabiabi. ³⁶ Davidpijinē bajayata Espiritu Santo pejamatabēcueneta tajēvelia jumaitsi Cristo yabara mapacueniaje:

Dioso jumaitsi tajatuxanenējavabelia: “Ecare abaxē tacuajuanenia. Vecat-sivajēnae jumecovēnētsiaexanaenatsi abaxē copiaya nijavajabitsaē nitorobicuenaenaxa,” jai Dioso tajatuxanenējavabelia, jai bajayata tajēvelia Davidpijinē mapacueniaje Cristo yabara.

³⁷ Nexata Davidpijinē bajayata Cristo yabara: “Tajatuxanenē,” itsa jai, nexata Cristo Davidpijinē apo pemomo. Tsipaji baja cajena Cristo saicaya Dioso pexēnato, nayabarajai Jesús judíovi pecujarubivi pecanaējētsinexa Cristo Dioso pexēnato cuene.

Nexata jivibitsaēt oxaneto Jesús pejumetaevitsi jumebarēyatanetsi.

Pacuenia Jesús jumaitsi jivijavabelia: “Judíovi pecujarubivi bitso pinijicuenia Dioso naneconitsiaexanaenatsi,” jai yabara pelivaisi

(Mt 23.1-36; Lc 11.37-54; 20.45-47)

³⁸ Jesús jivi ayaibitsaēt oxanetojavabelia, pijajivijavabelia ata, livaisi tsi-paeba. Nexata Jesús livaisi petsipaebijavata jumaitsi mapacueniaje:

—Xania, panayajivitaema, palivaisi judíovi pecujarubivi tsi-paebapona, panejumecovēnētsiyaniva. Bajarapamonae jitsipabiaba tomara tuatuaējējava piapiajavanē penaxatabiabavanapaenexa jivi peyaiyataenexatsi. Jitsipabiabanua bitso yayiyataeya pebajacobinexatsi callejava.

³⁹ Bajarapamonae itsa najoneyabiaba judíovi penacaetuatabiabonējava, jitsipabiaba penaenexa pexaniavirijavanēta. Nexata natsiitapetabiaba penaenexa peyaiyataevitsi penaenexa petsinubijavanēta. Bajarapamonae itsa napatabiaba fiestajava ata, jitsipabiaba penaenexa peyaiyataevitsi penaenexa petsinubijavanēta.

⁴⁰ Bajarapamonae yamaxēitojorobiaya vecuanotabiabanua pamonajivi pevecuatēpaevanētsi pecobecovējavaxi. Bajarapamonae itajara pinijicuenia vajēcabiaba Diosojavabelia. Itsiata pepo pexaniajajamatabēcueneta apo vajēcabiabi. Bajarapacuenia vajēcabiaba saya jivi petaenexatsi Dioso itajara bitso bepejumecovēnētsivi. Nexata bajarapamonae bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamona Dioso apo pejumecovēnētsivi, jai Jesús judíovi pecujarubivi yabara.

Pacuenia ofrenda rajuta Diosojavabelia pamona pevecuatēpaevatsi yabara pelivaisi

(Lc 21.1-4)

⁴¹ Itsamatacabi Jesús eca templobota. Pacajonita jivi palata jeyabiaba ofrendacuenia perajutsijava Diosojavabelia, bajarapacajoni pecanacujitsita Jesús eca. Nexata Jesús cobetaeyeca jivi palata pejeponaejava bajarapacajonita. Ayajava palata pexainaevi, caejivi canacujitsia, ayajava palata jepona. ⁴² Bajarajota napata pamona pevecuatēpaevatsi, bepejiobiva. Nexata bajarapova najia anijapalatanēyobeje piamatamobinēyobeje. ⁴³ Nexata Jesús junata pijajivi. Jumaitsi pijajivijavabelia:

—Xaniajanē pacuenia pacatsipaebijitsiatsi. Mapovaje pamona pevecuatēpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabēcuenēbarēya daxita xua itsamonae jia bajarapacajonita matatoxenetsia. ⁴⁴ Tsipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje bepejiobiva daxitajavayomi penaevetsijavayotaminexa, jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

13

Pacuenia Jesús pijajivitonējavabelia tajēvelia tsipaeba itsamatacabi itsanacuapijivi templobo pexuabijavanexatsica yabara pelivaisi
(Mt 24.1-2; Lc 21.5-6)

¹Itsa baja Jesús, pijajivi yajava, pitsaparena templobovecua, Jesús pijajivitonē jumaitsi Jesúsjavabelia:

—¡Tajatuxanenē, jica, nataema mapaibotoxanetonēje, mapaboxanetonē ataje! jai Jesús pijajivitonē.

²Nexata Jesús tajēvelia jumaitsi pijajivitonējavabelia:

—Daxita raja mapaboxanetonē tanemeje, bajarapaboxanetonēmi itsamatacabi itsanacuapijivi penetsianica irabetsica. Nexata mapaibotoxanetonēmije itsaiboto ata pejumavereca apo bocae tsane, jai Jesús tajēvelia pijajivitonējavabelia.

Pacuenia itsijitsia Jerusalén tomarata, daxitanacuanējava ata, mapanacua pecopiarucaevajēnaeje yabara pelivaisi
(Mt 24.3-28; Lc 21.7-24; 17.22-24)

³Jesús eca petsutojumata. Patsutojumata olivonaenē apaaxayo templobo canacujitsijavalia, bajarapatsutojumata Jesús eca. Nexata Pedro, Santiago, Juan, Andrés, bajarapamatabēxēyo pijaepatojavata Jesúsjavabelia jumaitsi:

⁴—Patajatuxanenē, pajitsipajē patanetsipaebinxamē patayapētaenexa paepatota copiapatsijitsia xua vajunupaebame. ¿Detsa peneta pitsicueña pataenajē itsa copiapatsijitsia xua jumaitsimē templobo yabara? jai bajarapamonae Jesúsjavabelia.

⁵Jesús nexata tajēvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Xania panayajivitaename. Pētsa panacopatame itsajivi ata papecayamaxēitojorobinexa.

⁶Tsipaji raja peyamaxēitojorobinexa ayaiBITSaēto patsiana bexanē itajara tsane. Bajarapamonae najumetsēnētsiaya jumai tsane: “Xanē raja Cristonē, Dioso athēbēvetsica taneitorobinētsica jivi tacapanepaenexa,” jai tsane. Bajarapamonae jivi, ayaiBITSaēto yamaxēitojorobiana.

⁷Vajabitsaē pexanaejava imoxoyonacuanējava, tajēnacuanējava ata, pavēnēlivaisitaename. Itsiata pētsa pajunavame. Bajara peneta itsane mapanacua peveverecaevajēnaeje. Itsiata baitsi jane bepijia bajarapamatacabi mapanacuataje abaxē apo vereverecajuni tsane.

⁸Mapanacuataje peveverecaevajēnae peneta copiaya itsaviriavi nabena itsaviriavijavabelia. Itsanacuanēpijivi pijinia nabena itsanacuanēpijivijavabelia. Ira najēabiana ayaiCuenia nacuanējava. Ayaijaniboxaneto najetarucaena nacuanējava. AyaiCuenia bitso jivi bejiobi tsane nacuanējava. Daxita bajarapacuenia itsa pataename, saya abaxē taxuxuabaponaena piayaicueña, jai Jesús pijajivijavabelia tajēvelia pevajanupaebijavata pacuenia itsamatacabi itsijitsia mapanacuata.

⁹Icatsia Jesús tajēvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Nexata paxamē xania panayajivitaename. Tsipaji raja xanē patajajivixaemē, tomara pevetsivijavabelia pacacapanabiabiana. Bajarapamonae pacajumaconibabeyabiabiana judiōvi penacuetuabibibonēta. Paxamē patajajivixaemē pacanubiana nacuaeveitsivi pitabarata, presidentevi ata pitabarata. Nexata bajarajota bajarapamonaejavabelia patsipaebianame xanē talivaisi.

¹⁰Nexata daxitanacuanēpijivijava

patsipaebanajetarubenaename pecapanepaelivaisinexatsi. ¹¹ Itsa pacatafaicaena papecaneconitsinexa nacuaevevtsivijavabelia, pëtsa pajamatabëcuenebejëmë panenayajivicuaicuaijainexa bajarapamonaejavabelia. Palivaisi panejamatabëcuenevetsina pacatonaitajëtsiana, patsipaebianame bajarapamonaejavabelia. Tspipaji raja bajarapapatota Espiritu Santo pacacuaicuaijayaexanaena. Paxamë baitsi panejamatabëcueneta apo pacuaicuaijamë tsane. ¹² Bajarapamatacabi patajajivixaemë, panacaemonae atamë, itsajivi panijamonaejivi ata pacacanajetsiana nacuaevevtsivijavabelia papecabeyaxuabinexa. Paneaxa ata, paneena ata, pacacanajetsiana nacuaevevtsivijavabelia papecabeyaxuabinexa. Panexi ata pacacanajetsiana nacuaevevtsivijavabelia papecabeyaxuabinexa. ¹³ Daxitajivi pacaitoya tsane patajajivixaemë. Itsiata pajivi ajamatabëcuenesaë tsane Dioso pejumecovënëtsijava nacua pecopiarucaeajavabelianexa, bajarapajivi Dioso capanepaenatsi, jai Jesús pijajivijavabelia tajëvelia pevajunupaebijavata pacuena itsamatacabi itsijitsia mapanacuataje.

¹⁴ Icatsia Jesús tajëvelia vajunupaeba papiayaicue ne itsamatacabi copiapatsijitsia Jerusaleñ tomarata. Jesús jumaitsi pijajivijavabelia mapacueniaje:

—Diosojumepaebinëmi, profeta Danielpijinë, tajëvelia Dioso pitorobicueniatsi piyaicue ne pevajunupaebliivaisi bajayata yaquina. Xua panijatamaranëmi vereveceayaexanaejitsiatsi, bajaraxua pelivaisi yaquina. (Pajivi lebiana mapalivaisije, yapëtaena papiayaicue ne vajunupaeba mapalivaisitaje.) Nexata paxamë pataename bajarapapiayaicue ne penucaejava templobota, itsajota picani apo benueae. Nexata Judea nacua pejinavanapaevi itsa vënëlivaisitaena bajarapapiayaicue ne penucaejava templobota, pëtsa nubena. Naxanitsiayo bajarapamonae rëcëpecaena ibotsutonëjavabelia. ¹⁵ Pajivi pijabojumata athëbëyo ecaya, itsa vënëlivaisitaena bajarapapiayaicue ne penucaejava templobota, bajarapajivi perunaecujinaetsica bepijia najetabajiraviana. Pëtsa joneya pijaboyaliala pejuvtsinexa pecobecovë. ¹⁶ Pajivi pijinia nacuenebaponapona pijapabita, itsa vënëlivaisitaena bajarapapiayaicue ne penucaejava templobota, bepijia najetabajiraviana. Pëtsa naviata pijaboyabelia pejuvtsinexa penaxatabijava.

¹⁷ ¡Papetiriavi penacueto yacotajinavanapa, bitso bejiobi tsane bajarapamatacabi! ¡Bitso nabejiobitsiaya jinavanapaena! ¡Papetiriavi ata mitoapaenacuetoxi isajinavanapa, bitso bejiobi tsane bajarapamatacabi!

¹⁸ Bajaraxuata tajëvelia Diosojavabelia pavajëcare piayapëbejematacabitata papecatocopiapatsianiva bajarapapiayaicue ne. Nexata pamatacabi parëcëpecaename, pexaniamatacabi Dioso pacatocopatsiana bitso nabejiobitsiaya paneponaeyaniva. ¹⁹ Tspipaji raja bajarapamatacabi bitso jivi bejiobi tsane. Pabejiobicuene abaxë jivi caeto ata apo tae Dioso nacua pexanaecujinae, bajarapabejiobicuene taena. Bajaraxuacujinae icatsia itsamonae bejiobiaexanae atatsi tsane, itsiata bajarapacuenia bitso apo bejiobiaexanaetsi tsane. Tspipaji Dioso epatua yatuucutsiana jivi bitso nabejiobitsiaya pejinavanapaematacabanëminexa, bitso jivi nabejiobitsiaya pejinavanapaeyaniva. ²⁰ Dioso epatua itsa apo yatuucutsi tspipae bitso jivi nabejiobitsiaya pejinavanapaematacabanëminexa, caejivi ata apo asaë tspipae. Itsiata baitsi jane Dioso piasivaxae pijajivi, pitapetsivi, Dioso epatua yatuucutsiana bitso jivi nabejiobitsiaya pejinavanapaematacabanëminexa, jai Jesús pijajivijavabelia tajëvelia pevajunupaebijavata papiayaicue ne itsamatacabi copiapatsijitsia Jerusaleñ tomarata.

²¹ Icatsia Jesús tajëvelia vajunupaeba pacuena itsamatacabi mapanacuataje patsijitsia peyamaxëitorobivi Dioso pejumecovënëtsivi

peyamaxëitojorobinexatsi. Jesús jumaitsi pijajivijavabelia mapacueniaje:

—Nexata itsajivi yamaxëitojorobiaya itsa pacajumaitsi tsane: “Pataema. Mara Cristo nucaje,” itsa pacajai tsane, pëtsa pajumecovënëtame. Itsa pacajumaitsi tsane: “Bajarajota nuca Cristo,” itsa pacajai tsane, pëtsa pajumecovënëtame. ²² Itsamonae jumai tsane: “Xanë raja Cristonë,” jai tsane. Itsiata jemajai tsane. Itsamonae jumai tsane: “Diosojumepaebinënë raja, profetanënë,” jai tsane. Itsiata jemajai tsane. Bajarapamonae itajara exanaena pinijicuene pexanaejavanë peyamaxëitojorobinexa saya jivi. Nexata bajarapacuenia itsamonae yamaxëitojorobaponaenatsi. Itsiata pamonae pepacuene Dioso pijajivi, Dioso pitapetsivitsi, bajarapamonae apo yamaxëitojorobi tsanetsi. ²³ ¡Xania baja tsane! Xanë rabaja pacatsipaebatsi tajëvelia daxitacuene panenayajivitaenexa, jai Jesús pijajivijavabelia tajëvelia pevajunupaebijavata pacuenia itsamatacabi mapanacuataje patsiitsia peyamaxëitojorobivi Dioso pejumecovënëtsivi peyamaxëitojorobinexatsi.

Pacuenia Jesús tajëvelia navajunupaeba icatsia pepatsijavanexatsica petëpaecujinae yabara pelivaisi

(Mt 24.29-35, 42, 44; Lc 21.25-36)

²⁴ Jesús tajëvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanë tapatsivajënaetsica, jivi taena pecujunavicuene. Jivi nabejibitsiaya jinavanapaena. Nexata jivi nabejibitsiaya pejinavanapaematacabicujinae matacabi pijijuameto aitaquiri tsane. Meravipijijuameto ata aitaquiri tsane. ²⁵ Tulupu ata othopaenica irabetsica. Daxitacuene, xua rubena athëbëtatsia, najëbiana. Xaniavaetsia apo rubenae tsane. ²⁶ Nexata bajarapapatota xanë, Daxitajivi Pematapijinënë, jivi netaena athëbëvetsica itarërëbota tanajetaruaejava. Patsianicajë daxitacuene taevetsinexa. Tanivenivenaecotia yajavapatsianicajë. ²⁷ Bajaraxuacujinae ángelevi itorobianajë, pamonae tajajivi, Dioso pitapetsivitsi, daxitanacuënëjavaverena tanetocaetuatsinexa xanëjavaberena, jai Jesús pijajivijavabelia tajëvelia pevajunupaebijavata itsamatacabi icatsia pepatsijavanexatsica.

²⁸ Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjere pacuenia itsi higueranae. Itsa maxëranajuva, nexata pejanabaxu pitsapa. Nexata bajarapacuenia payapëtaneme vai baja imoxoyo pevajënae pejonejavanexa. ²⁹ Bajara pijinia pacuenia peneta itsa pataename pecopiapatsijava, xua yabara pacatsipaebatsi, nexata payapëtaename imoxoyo baja tavajënae tsane tapatsijavanexatsica. ³⁰ Xaniajänë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëjavabelia ata, apo vereverecae tsane. Matapania xua yabara pacatsipaebatsi, itsa baja copiapatsiana, bajarapamonae jane baja vereverecaena. ³¹ “Itaboxo, ira yajava, tsitecaena daxitamatacabi javabelianexa,” jamatabëjai ata tsane itsamonae, itsiata jamatabëcuenenavëxaniabiana. Tspaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³² Jesús icatsia jumaitsi pijajivijavabelia:

—Itsajivi ata apo yapëtae pamatacabita, paepatota ata, copiapatsijitsia daxita xua yabara tajëvelia pacatsipaebatsi. Athëbëpivivi ata, ángelevi, apo

yapëtae. Xanë, Dioso pexënato atanë, apo yapëtaenë. Caenë taxa Dioso yapëtane, jai Jesús pijajivijavabelia.

³³ Icatsia Jesús jumaitsi pijajivijavabelia:

—Xania baja tsane. Daxitamatacabi saya panecopiaevetavanapaename. Tsipaji raja apo payapëtaemë tsane paepatota patsijitsianëtsica. ³⁴ Nexata pacuenia bo pexainanë, pijabo evetsiaexana pijajivi, bajara xanë itsinë tsane. Bo pexainanë itsa ponaejitsia tajënacuyabelia, pijajivi evetsiaexana pijabo. Nexata pijajivi, caejivi canacujitsia, rajutapona petonacuenebavanapaevanexatsi pecovëta. Nexata pijajiviyajuvënëne itoroba baupa pevetsinënexa petoetevabiabinoxatsi pijabobaupa. Bo pexainanë jumaitsi bajaraponëjavabelia: “Xaniavaetsia netoetevabiabianame baupa matapania tapatsimatacabijavabelianexa,” jai bo pexainanë. ³⁵ Nexata paxamë ata bajarapacuenia panecopiaevetavanapaename matapania tapatsimatacabitsicajavabelianexa. Tsipaji raja apo payapëtaemë tsane pamatacabita patsijitsianëtsica. Ajena meravi, caecanivia, patsipajë. Meravi tuatujëta ata patsipajë. Matacabivëpata ata patsipajë. Bajayacunua ata patsipajë. ³⁶ Bajaraxuata xania baja tsane. Daxitamatacabi saya panecopiaevetavanapaename. Jemata itsa patsipajë, paepatota apo panecopiaevetsimë, pacacaxitarabijitsipatsi panemajitsijavata. ³⁷ Palivaisi pacatsipaebatsi paxamëjavabelia, daxitajivinexa jumaitsinë. ¡Daxitamatacabi saya panecopiaevetavanapaename! jai Jesús pijajivijavabelia.

14

Pacuenia picani Jesús pijavajabitsaë jamatabëvaetabatsi yabara pelivaisi (Mt 26.1-5; Lc 22.1-2; Jn 11.45-53)

¹ Anijamatacabibeje abaxë ajibi pejonenexa pascuafiesta, itsafiestanua, pafiestajava judíovi baxane levadurata matajërëbinejeva pexanaepan. Nexata bajarapafiestabejevajënaeya, sacerdotevi penamatacatorobivi, judíovi pecujarubivinua, najumejaita picani bajarapafiestajava pevaetabinoxatsi Jesús. Penajumetsënëtsilivaisita picani jamatabëvaetabatsi Jesús pebeyaxuabinexatsi. ² Itsiata bajarapamonae najumaitsi:

—Fiestajava meta abaxë apo vaetabi tsanetsi jivi vajanacaitsacueniabiyaniva, najai bajarapamonae.

Pacuenia Jesús petiriva tsimataepanatsi petuxujuviaceitera yabara pelivaisi

(Mt 26.6-13; Jn 12.1-8)

³ Jesús ponapona Betania tomarata, Simón pijabota. Simón bajayajebi bitso peperabëtsabanaenëmi. Nexata Jesús pexaeyecaejavata mesata, petiriva cobenaimoxoyorenatsi petuxujuviaceitera, nardovënëra, alabastrobotellabëta pejeaceitera. Bajarapora bitso penamatamotsira. Nexata bajarapova yavëttoxobiaxuaba bajarapora, petuxujuviaceitera. Bajaraxuacujinae Jesús tsimataepanaicatsi bajarapaaceitera. ⁴ Bajarajota itsamonae penaenaeivi itsa tayaena Jesús petsimataepanaejavatsitsica, bajarapamonae jamatabëanaepanareca. Nexata epamonae najumai tsenae:

—¿Detsa xuajitsia saya xuaba bajarapacuenia maporaje? ⁵ Canajetsipa rajane. Nexata matamopitsipa trescientos padenariobeje matatoxenetsia. Bajarapapalata rajutsipa bepejiobivi bajarapacuenia peyavenonaenexa, najai tsenae epamonae.

Bajarapamonae anaepana bajarapovajavabelia.

⁶ Nexata Jesús jumaitsi bajarapamonaejavabelia:

—¿Detsa xuajitsia bajarapacuenia pajumaitsimë bajarapova pexanaejava yabara? Mara povaje pexaniacuene nexanaje. ⁷ Daxitamatacabi raja bepejibivi jinavanapa itsaxuayo pajinavanapame. Pamatacabi pajitsipame pexaniacuene panetoexanaenexa bepejibivijavabelia, nexata patoexanaename. Itsiata baitsi jane xanë daxitamatacabi apo ponaponanenë tsane paxamëjavata. ⁸ Mara papetirivaje pexaniacuene netoexana pacuenia baja cuenecaëjêpatsi. Itsamonae petêpaejivi batsiperabêëpana petuxujuviaceitera peperabêxaniavaetsinexa pemêthêtsivajênae. Bajara pijinia pacuenia mapovaje netsimataepana petuxujuviaceitera, abaxë apo têpae atanë. Nexata baja bajarapova neperabêxaniavaeta itsamonae tanemêthêtsivajênae. ⁹ Xaniajanë pacuenia pacatsipaebijitsiatsi. Daxitanacuanëjava tajajivi itsa paebanajetarubenaena pexanialivaisi jivi tacapanepaelivaisinexa, vajunupaebabiabianana pacuenia exana xanëjavaberena mapapetirivaje, jai Jesús pijajivijavabelia.

Pacuenia Judas pona Jesús pijavajabitsaë pecobeyabelia pecanjetsinexatsi yabara pelivaisi

(Mt 26.14-16; Lc 22.3-6)

¹⁰ Jesús pijajivi doce ponêbejeyajuvênênë pevênë Judas. Itsavênë Iscariote. Nexata Judas pona sacerdotevi penamatacaitorobivijavabelia. Jesús jane baja yajumejailiatsi pecanjetsinexatsi. Nexata jane baja Judas Jesús canajetatsi sacerdotevi penamatacaitorobivi pecobeyabelia. ¹¹ Nexata sacerdotevi penamatacaitorobivi itsa tane bajarapacuenie, barëya. Jumaitsi bajarapamonae Judasjavabelia:

—Palata pacarajutsianatsi, jai.

Nexata jane baja xuacujinae Judas Jesús naitaxutocaevetapononatsi. Nexata paepatota Judas toyapêxanepanatsi, perajutsinexa jane baja bajarapamonae pecobeyabelia.

Pacuenia Jesús barênabane pijajivi pecopiarutsinabani baja pebeyaxuabivajênaetsi yabara pelivaisi

(Mt 26.17-29; Lc 22.7-23; Jn 13.21-30; 1 Co 11.23-26)

¹² Junua jane baja fiesta, pafiestajava judíovi baxane levadurata matajêrêabinejeva pexanaepan. Bajarapamatacabi ovejaji babia pexaenexa pascua fiestamatacabi. Nexata Jesús yanijobatsi pijajivi.

—¿Detsa belia paponanajê patacamitsaexanaenexa pascua fiestamatacabi pexaejava nexaenexa? jai Jesús pijajivi.

¹³ Nexata Jesús itoroba anijanêbeje pijajivitonêbeje. Jumaitsi:

—Tomarabelia paponarebeje. Bajarajotalia pacaxitajarabianamebeje mera canalito pecanjatarucaenë. Bajaraponë papênanajetarucaenamebeje.

¹⁴ Pabota bajaraponë joneyojopaena, bajarapabo pexainanëjavabelia pajumaitsimêbeje tsane: “Vajanacacujarubinë raja jumaitsi: ‘¿Detsa jota pênëyatuucutsibo eca, pabota tajajivi barêxaejitsianë xua jivi baxane pascua fiestamatacabi?’ jai raja vajanacacujarubinë,” pajamêbeje tsane bajarapabo pexainanëjavabelia. ¹⁵ Nexata athêbêabetsia anijairabeje pênëyatuucutsibojavata, pacatsitajêtsianabeje. Bajarapaboênëta athêbêyotsia paira ayaiênëtuatujê tsane. Daxitacuene bajarajota xainaena. Nexata vajaxaejavanexa bajarajotatsia paexanaenamebeje, jai Jesús pijajivitonêbejejavabelia.

¹⁶ Nexata jane baja ponabeje Jesús pijajivitonêbeje. Patabeje baja tomara-belia. Caxitajarababeje daxita pacuenia Jesús jumaitsitsibeje. Nexata xua

jivi baxane pascua fiestamatacabi daxita Jesús pijajivi pebarëxanexa, bajaraponëbeje exanabeje jane baja.

¹⁷ Itsa baja meravitsia, Jesús patajopa bajarajota pijajivi, doce ponëbeje, yajava. ¹⁸ Daxita mesata pexaeyenaejavata, Jesús jumaitsi pijajivijavabelia: —Xaniajanë pacuenia pacatsipaebijitsiatsi. Caenë paxamëyajuvënë, xanëjavata pexaeyecaenë, necanajetsiana tajavajabitsaë pecobeyabelia, jai Jesús.

¹⁹ Nexata Jesús pijajivi bejamatabëjiobireca. Nexata Jesús pijajivi, caenë canacujitsia, Jesúsjavabelia yanijobapona.

—¿Xanë tsaja tsane? jai tsaponae Jesús pijajivi.

²⁰ Nexata Jesús jumaitsi pijajivijavabelia:

—Doce paponëmëbejeyajuvënë raja. Ponëbeje peneta caecuenia pana-juacajabutsianajëbeje panbë platojavabelia, bajaraponë tsane. ²¹ Nexata xanë, Daxitajivi Pematapijinënë, tēpaenajë pacuenia baja cajena xanë yabara Dioso pejumelivaisibaxutota tajëvelia jumaitsi. Itsiata ponë tajavajabitsaë pecobeyabelia necanajetsiana, bajaraponë bitso bejiobi tsane pinijicuenia. Itsa meta bajaraponë apo naexanae tsipae, bajarapacuenia apo necanajetsi tsipae. Nexata xanepanaejitsipatsi bajaraponë itsa apo naexanae tsipae. Tsipaji apo naneconitsi tsipae Diosojavabelia, jai Jesús pijajivijavabelia.

²² Nexata pexaeyenaejavata Jesús pita panbë. Jesús jumaitsi Diosojavabelia:

—Pexaniacuene panetoexaname. Panerajutame pan, jai.

Bajaraxuacujinae epatsënëquejeba bajarapapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, jai.

²³ Bajaraxuacujinae icatsia Jesús copavënëjavata yapita pijajivi pebarëapaeranexa. Diosojavabelia jumaitsi:

—Pexaniacuene panetoexaname. Panerajutame maporaje, jai.

Bajaraxuacujinae pijajivi bajarapora rajuta. Daxita Jesús pijajivi bajara-pora apa.

²⁴ Jesús pijajivijavabelia jumaitsi:

—Tajana raja othopaena jivi ayailbitsaëtoxaneto pecapanepaenexatsi. Nexata tatēpaejava pejamatabëcueneta, jivi yapëtaena pepacuenia xaniajai Dioso jivi pecapanepaejavanexa, pacuenia baja cajena tajëvelia Dioso najumecapanepaeya jumaitsi. ²⁵ Xaniajanë pacuenia pacatsipaebijitsiatsi. Xanë rabaja matavëjëa apo apaenë tsane uvacuaira mapanacuataje, matapania icatsia apaenajë Dioso pijanacuatatsia pejanauvacuaira, jai Jesús pijajivijavabelia.

Pacuenia Jesús tajëvelia jumaitsi Pedrojavabelia: “Pedro, xamë raja nayavajunuaxainaename tajajivitonëcuenemë,” jai, yabara pelivaisi (Mt 26.30-35; Lc 22.31-34; Jn 13.36-38)

²⁶ Jesús pijajivi barënaëana Diosojumevajianë. Bajaraxuacujinae Jesús pijajivi barëpona petsutojumabelia. Patsutojumata olivonaenë apaaxayo, bajarapatsutojumabelia barëpona. ²⁷ Nexata bajarapatsutojumata Jesús jumaitsi pijajivijavabelia:

—Daxita raja paxamë ajena, pameravi, panexuabarëcëpecaename. Tsipaji rabaja patanexuabarëcëpecaejavanexamë yabara, Dioso pejumelivaisibaxutota tajëvelia jumaitsi mapacueniaje: “Beyaxuabianatsi raja oveja pevetsinë. Nexata pijaovejabitsaëto nacayajatsia rëcëpecaena,” jai Dioso pejumelivaisibaxutota paxamë patanexuabarëcëpecaejavanexamë yabara. Nexata ajena,

pameravi, tajavajabitsaä ita nevaetabiana tanebeyaxuabinexa, daxita paxamë panexuabarëcëpecaename. ²⁸ Itsiata bailsi jane tatëpaecujinae icatsia asaënë tsane. Nexata paxamë panevajënaeyabelia copiata ponaenajë Galilea nacuayabelia, jai Jesús pijajivijavabelia.

²⁹ Nexata Pedro jumaisi Jesúsjavabelia:

—Daxita mapamonaaje casuabarëcëpecae ata tsane, xanë cajena apo casuabatabajiravi tsanetsi, jai Pedro.

³⁰ Nexata Jesús jumaisi Pedrojavabelia:

—Xaniajanë pacuenia catsipaebijitsiatsi. Ajena rabaja, pameravi, nanianevëpata, anijajumebeje vacara pefiabivajënaeya, nayavajunuaxainae-name tajajivitonëcuenemë. “Apo yapëtaenë cajena bajaraponë,” jamë tsane xanë yabara acueyabi xuabeje, jai Jesús Pedrojavabelia.

³¹ Itsiata Pedro ajumesaëya jumaisi Jesúsjavabelia:

—Nebeyaxuabijitsia ata tsane xamë yajava, itsiata cajena apo nayavajunuaxainaanë tsane nijajivitonëcuenenë, jai Pedro Jesúsjavabelia.

Daxita Jesús pijajivi bajarapacuenia jumaisi.

Pacuenia Jesús vajëta Diosojavabelia Getsemanivënëjavata yabara pelivaisi (Mt 26.36-46; Lc 22.39-46)

³² Jesús, pijajivi yajava, pata Getsemanivënëjavata. Bajarajota Jesús jumaisi pijajivijavabelia:

—Paneevetenare abaxë majotaje tavajëtsiepatoyo Diosojavabelia, jai.

³³ Nexata Pedro, Santiago, Juan, bajara saya pamatabëxëyo, Jesús barëpona pesaicaeyojavabelia. Bajaraxuacujinae Jesús bitso najamatabëxaina. Nexata bejamatabëjiobireca. ³⁴ Nexata Jesús jumaisi pijajivi acueyabi ponëbejejavabelia:

—Xanë bitso pinijicuenia najamatabëxainajë. Nexata tanajamatabëxainaejava yatëpaejitsianë. Paxamë abaxë majotaje panacopabare. Paitavamë tsane. Pëtsa pamajitame, jai Jesús pijajivi acueyabi ponëbejejavabelia.

³⁵ Nexata Jesús, caenë, pevajënaeyabelia icatsia tsiquirijavayo ponataba. Tspaji Jesús tajëvelia yapëtane pacuenia Dioso tocopatatsi bitso ayaicuenia pebejiobiaexanaenexatsi paepatota pijavajabitsaë beyaxuabijitsiatsi. Nexata Jesús irataeya bocajunua pevajëtsinexa Diosojavabelia. Vajëta picani Diosojavabelia bitso bejibitsiaya pebeyaxuabiyaniavatsi. ³⁶ Nexata Jesús pevajëtsijavata Diosojavabelia, jumaisi:

—Taxa Diosomë, netocopatame picani tanebeyaxuabinexa betajio bicueneta. Daxitacuenë raja cacaejëpa nexanaenexa. Nexata necapanepare bajarapabejiobicuenevecua. Itsiata xanë apo tajitsipaecuenë ata, pacuenia xamë jitsipame, netocopatsianame, jai Jesús pevajëtsijavata Diosojavabelia.

³⁷ Bajaraxuacujinae Jesús naviarena acueyabi ponëbeje pijajivijavaberenä. Caxitarabä Jesús pijajivi pemajitanubenaevi. Nexata Jesús jumaisi Pedrojavabelia:

—Simón, ¿pamajitanubename tsaja? ¿Apo pacacaejëpae tsabaja rovia caepatoyo ata paneaitavatsenaenexa? ³⁸ Pëtsa pamajitame. Paitavamëre. Pavajëre Diosojavabelia pibisiacuenë paneexanaeyaniva. Tspaji raja dovathi pacajamatabëcuenëjëbianä. Paxamë picani peyamatabëcueneta pexaniacuenë jamatabëpaexanabiabame. Itsiata bailsi jane apo pajamatabëcuenesaëmë pexaniacuenë paneexanaenexa, jai Jesús Pedrojavabelia.

³⁹ Nexata icatsia Jesús pona pecovëyabelia pevajëtsinexa icatsia Diosojavabelia. Bajara icatsia pacuenia Jesús vajëta Diosojavabelia pacuenia vajëta copiata. ⁴⁰ Icatsia Jesús naviarena pijajivijavaberena. Caxitajaraba icatsia Jesús pijajivi pemajitanubenaevi. Tsipaji baja Jesús pijajivi bitso itamajitsipana. Nexata Jesús pijajivi apo yapëtae pacuenia jumecanaviatsijitsia Jesúsjavabelia. ⁴¹ Icatsia abaxë Jesús naviatu pecovëyabelia pevajëtsinexa icatsia Diosojavabelia. Bajaraxuacujinae, acueyabi baja xuabeje pevajëtsicujinae, Jesús icatsia rena pijajivijavaberena. Jumaiti Jesús pijajivijavabelia:

—¿Abaxë tsarovia tsiteca pamajitanubename? Ajibi rabaja. Copiapata rabaja paepatota xanë, Daxitajivi Pematapijinënë, necanajetsijitsia pibisiacuene pexanaevi pecobeyabelia. ⁴² Panonobapunare baja. Ponaenatsi baja. Imoxoyo rabaja najetaruca tajavajabitsaë pecobeyabelia tanecanajetsinënexa, jai Jesús pijajivijavabelia Judas yabara.

Pacuenia Jesús vaetabatsi pijavajabitsaë yabara pelivaisi
(Mt 26.47-56; Lc 22.47-53; Jn 18.2-11)

⁴³ Jesús pijavajabitsaë pevaetabijavatanevatsi, cuaicuajiai tsanucae pijajivijavabelia. Nexata bajarapaepatota patanajetaruca Judas, Jesús pijajivi doce ponëbejeyajuvënënëmi. Judas pënanajetarubenatsi jivi ayaibitsaëtoxaneto. Bajarapamonaeyajuvënëvi itsamonae canajetarubena espadanë. Itsamonae canajetarubena naebonë yajava. Bajarapamonae itorobatsi sacerdotevi penamatacaitorobivi, judíovi pecujarubivi ata, judíovi pijaancianovi ata. ⁴⁴ Judas pebarërenavajënae bajarapamonae, copiaya baja cajena Judas tsipaeba pacuenia bajarapamonae yapëtaejitsia Jesúscuene. Judas jumaiti mapacueniaje:

—Ponë raja peneta bajacobiaya itabaratsutsunexuabianajë, bajaraponë Jesús tsane. Bajaraponë pavaetabianame. Pacobecëtsianame xaniavaetsia. Nexata panecobecëtsinë pacaponaeremena, jai baja cajena Judas pematacanajetarucaevijavabelia pebarërenavajënae.

⁴⁵ Nexata jane baja Judas itsa patanajetaruca, exana pacuenia baja cajena jumaiti pematacanajetarucaevijavabelia. Judas Jesús itabaratsutsuniaya bajacobatsi, Judas jane baja pematacanajetarucaevi peyapëtaenexa Jesúscuene. ⁴⁶ Nexata jane baja Jesús pijavajabitsaë vaetabatsi. Cobecëtsi xaniavaetsia.

⁴⁷ Bajarajota Jesús pijajiviyajuvënënë pijaespada navemmarajonotaxuabina. Muxuyoropaebiaxuaba sacerdotevi pepo penamatacaitorobinë pijaivitonë. ⁴⁸ Nexata Jesús jumaiti pevaetabivitsijavabelia:

—Paxamë meta panetaneme betanacobetoxotsinë. Bajaraxuata pacaponame espadanë, naebonë yajava, patanevaetabixamë pacuenia pavaetabixamë penacobetoxotsinë. ⁴⁹ Xanë caematacabi canacujitsia Dioso pejumelivaisi paxamëjavabelia pacatsipaebabiabatsi templobota. Itsiata bajarapamatacabi apo panevaetabimë. Mara pacuenia panevaetabameje tanetocopiapatsixae baja pacuenia Dioso pejumelivaisibaxutota bajayata tajëvelia jumaiti xanë yabara, jai Jesús pevaetabivitsijavabelia.

⁵⁰ Nexata jane baja Jesús pijavajabitsaë pevaetabijavatatsi, daxita Jesús pijajivi xuabarëcëpecatsi pacuenia baja cajena Jesús jumaiti tajëvelia pijajivijavabelia.

Pacuenia pevëjëato najetabajirava yabara pelivaisi

⁵¹ Pevějēato pēnanajetaruca Jesús pecaponaevitsi. Sábanaata namataquinana-jetaruca. Nexata pevějēato bajarapamonae yasábanavaetabatsi. ⁵² Nexata pevějēato sávana naisinaxuaba. Najetabajirava jumasánē.

Pacuenia Jesús nutatsi judíovi penamatacaitorobivi pitabarata yabara pe-livaisi

(Mt 26.57-68; Lc 22.54-55, 63-71; Jn 18.12-14, 19-24)

⁵³ Jesús caponaliatsi sacerdotevi pepo penamatacaitorobinē pijaboyabelia. Nacaetuata bajarajota daxita sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava. ⁵⁴ Itsa baja Jesús caponaliatsi, nexata Pedro bajarapamonae pecovēya tajiyo najetaruca. Sacerdotevi pepo penamatacaitorobinē pijabo matatoyorotsia yacaranata ibopanaxanetonē, mataropotsia pefaratsijavaxanetota. Nexata bajarapayacaranatsijavaxaneto baupa, Pedro najoneya bopanabojavabelia, itsabelia Jesús cajunuatsi. Nexata sacerdotevi pepo penamatacaitorobinē pijabopanabota, Pedro nanonopeca isoto muxuneneta templobopijipolicíavita.

⁵⁵ Nexata bajarapabo ēnētuatuajēta sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nabarēcuaićuajjai. Bajarapamonae nayanijoba.

—¿Jipatsa yapētane Jesús pibisiacuene pexanaejava, paneconi yabara beyaxuabijitsiatsi? najai tsaponae.

Itsiata bajarapamonae apo caxitajarabi itsaneconi ata Jesús pijaneconi.

⁵⁶ Itsamonae saya penajumetsēnētsilivaisi paeba Jesús yabara. Itsiata caelivaisi najuapaebi ata, najumejēpaeya apo paebi bajarapamonae. ⁵⁷ Itsamonae nonobapuna. Penajumetsēnētsilivaisi paeba Jesús yabara. Penonobapunaeviyajuvēnēnē jumaitsi mapacueniaje:

⁵⁸ —Paxanē raja, pamatabēxēyo panubenajē majotaje, pajumetaniji Jesús pejumaisijava. Bajaraponē jumaitsi: “Xanē raja xuabianicajē mapatemploboje, jivi pexanaebo. Acueyabi matababita icatsia itsabo veretetsianajē. Jivi apo pexanaebo tsane,” jai maponē Jesúsje, jai penonobapunaeviyajuvēnēnē.

⁵⁹ Itsiata daxita bajarapamonae najumejēpaeya apo paebi.

⁶⁰ Nexata jane baja sacerdotevi pepo penamatacaitorobinē nonotapuna bajarapamonae pitabarata. Nexata jumaitsi Jesúsjavabelia:

—¿Apo yapētaemē tsaja itsalivaisiyo ata nejumecanaviatsinexa? ¿Xaniajai tsabaja pacuenia mapamonae caneconitsiajumaisiye? jai Jesúsjavabelia sacerdotevi pepo penamatacaitorobinē.

⁶¹ Jesús itsiata moya. Apo jumepitsi cajena. Nexata icatsia sacerdotevi pepo penamatacaitorobinē jumaitsi Jesúsjavabelia:

—¿Xamē tsabaja pepacuene Cristomē, athēbēvetsica Dioso pecaitorobinētsica jivi necapanepaenexa? ¿Xamē tsaja, Dioso pexēnatomē? jai.

⁶² Nexata Jesús jumaitsi bajaraponējavabelia:

—Jājā, xanē rabaja. Paxamē raja panetaename, Daxitajivi Pematapijinēnē, taecaejava Dioso pecujanenia, daxitajamatabēcuene pecajēpaenētsi. Panetaenamenua tanajetarucajava athēbēvetsica itarērēbota, jai Jesús.

⁶³ Bajarapacuenia Jesús pejumaisijava itsa jumetane, sacerdotevi pepo penamatacaitorobinē penaxatatsijava anaeya titinaxuaba. Bajarapacuenia

titinaxuaba pianae panaexae Jesús pejumaitsijava yabara. Nexata sacerdotevi pepo penamatacaitorobinē jumaitsi daxita penacaetuatsivijavabelia:

—Pijacuata rabaja pejumaitsijumeta naneconita. Pematatsēña apo namatavenonaetsi itsamonaē vajanacatsipaebinexa paneconi yabara maponēje naneconitsiaexanaejitsiatsi. ⁶⁴ Paxamē rabaja pajumetaneme maponēje Dioso apo pejisipaecuenia pecuaicuaijajava. Tsipaji Dioso bepexēnato nataeya cuaicuaijai. ¿Detsa nexata paxamē pajamatabēitsimē? jai sacerdotevi pepo penamatacaitorobinē daxita penacaetuatsivijavabelia.

Nexata daxita penacaetuatsivi jumaitsi:

—Naneconita rabaja Diosojavabelia. Nexata baja beyaxuabianatsi, jai bajarapamonaē Jesús yabara.

⁶⁵ Nexata bajarapamonaeyajuvēnēvi Jesús itabarasuabatsi. Bajaraxuacujinae papaēbērēpanata itaxutocētatsi. Pitaxutocētsicujinaetsi itabaratsaquibabeponatsi pecobethaitonēta. Nexata bajarapamonaē jumai tsaponaē Jesúsjavabelia:

—¡Vēnējonare ponē caitabaratsaquibabepona! jai tsaponaē bajarapamonaē.

Bajaraxuacujinae templobopijipolicíavi itabarapacabixuabatsi Jesús.

Pacuenia jane baja Pedro nayavajunuaxaina Jesús pijajivitonēcuene yabara pelivaisi

(Mt 26.69-75; Lc 22.56-62; Jn 18.15-18, 25-29)

⁶⁶ Itsa abaxē Jesús sacerdotevi pepo penamatacaitorobinē pijabo ēnētuaatujēalia yanijobaponatsi xua yabara naneconitsiaexanaejitsiatsi, Pedro naitaxutocaevetsiaya naeca bopanabota. Nexata bajarajota taeyetatsi petiriva, sacerdotevi pepo penamatacaitorobinē pijabota penacuenebiva.

⁶⁷ Bajarapova Pedro taeyetatsi penanonopecaejavata. Nexata bajarapova naitaxutobabatsia asaēya taenucatsi Pedro. Jumaitsi:

—Xamē ata rabaja naponaponame Jesúsata, Nazaret tomarapijinēta, jaitsi.

⁶⁸ Nexata Pedro itsiata nayavajunuaxaina Jesús pijajivitonēcuene. Nexata Pedro jumaitsi bajarapovajavabelia:

—Jume raja. Apo yapētaenē cajena bajaraponē. Apo yapētaenē pacuene yabara nejumaitsimē, jai Pedro.

Bajaraxuacujinae Pedro pejonebaupajavaverenajavabelia natixilia. Nexata vacara fiaba. ⁶⁹ Icatsia bajarapova Pedro tanetsi. Nexata pamonaē bajarajota nubena, bajarapamonaējavabelia bajarapova jumaitsi:

—Mara ponēje Jesús pijajiviyajuvēnēnēje, jai bajarapova Pedro yabara.

⁷⁰ Icatsia nexata Pedro jumaitsi:

—Jume raja. Apo yapētaenē cajena bajaraponē, jai.

Bajaraxuacujinae, icatsia caepatoyocujinae, bajarajota penubenaevi Pedro jumaitsi:

—Xaniajai raeta naca cajena. Xamē Jesús pijajiviyajuvēnēnēmē. Tsipaji rabaja Galilea nacuapijinēmē. Galilea nacuapijivi pecuaicuaijaicuenia cuaicuaijamē, jaitsi.

⁷¹ Nexata Pedro pejumexaniataenexatsi, ajumesaēya jumaitsi:

—Itsa apo xaniajanē tsipae paxamējavabelia, nexata Diosojavabelia naneconitsipajē. Apo yapētaenē cajena ponē yabara panejumaitsimē, jai Pedro.

⁷² Itsa baja Pedro najumevereta bajarapacuenia pejumaitsiyava, vacara icatsia fiaba. Nexata bajarajota Pedro najamatabēnapitajaraba pacuenia Jesús jumaitsi: “Anijajumebeje vacara pefiabivajēnaeya, nayavajunuaxainaname tajajivitonēcuenemē. ‘Xanē cajena apo yapētaenē bajaraponē,’ jamē

tsane xanë yabara acueyabi xuabeje,” pejaijavatsi Jesús, Pedro najaaraba. Nexata bajarajota Pedro bitso najamatabëxaina Jesús pejumaitsijumetsi yabara. Pedro nexata nua.

15

Pacuenia Jesús nutatsi Pilato pitabarata yabara pelivaisi
(Mt 27.1-2, 11-14; Lc 23.1-5; Jn 18.28-38)

¹ Ajena baja matababi tsarucaponae, sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, nacae-tuata. Icatsia pematatsënëa itsamonae bajarapitsijamatabëcuenevi yaja-vanacaetuata penabarëcuaicuaijainexa. Bajaraxuacujinae bajarapamonae Jesús cobecëtsiaya caponliatsi nacuaevevtsinë Pilatojavabelia. ² Nexata Pilato yanijobatsi Jesús.

—¿Xamë tsaja judíovi pepo nevetsinë? jaitsi.

Nexata Jesús jumaitsi Pilatojavabelia:

—Jājā, xanë rabaja pacuenia nejumaitsimë, jai Jesús Pilatojavabelia.

³ Sacerdotevi penama itsamonae bajarapitsijamatabëcuenevi yajtaacitoro-bivi jumaitsi Pilatojavabelia:

—Jesús raja bitso pibisiacuene exanabiaba, jai.

⁴ Nexata icatsia Pilato yanijobatsi Jesús.

—¿Itsaliivaisiyo ata tsaja apo yapëtaemë nejumecanaviatsinexa? ¿Apo jumetaemë mapacuenia pecaneconitsijavaje? jaitsi.

⁵ Itsiata Jesús matavëjëa apo jumepitsi Pilatojavabelia. Bajaraxuata Pilato apo yapëtae pacuenia exanaejitsia Jesúsjavabelia.

Pacuenia baja Pilato tocopata Jesús pebeyaxuabinexatsi yabara pelivaisi
(Mt 27.15-31; Lc 23.13-25; Jn 18.38–19.16)

⁶ Nacuaevevtsinë Pilato xaina pijacujirucue. Caevai canacujitsia, pascua fiestamatababi, Pilato copatabiaba caenë penaneconitsinë pepitsapaenexa penaneconitsivi pejebabiabibovecua. Pajivi yabara jivi Pilatojavabelia vajëcabiaba, Pilato nexata copatabiaba bajarapajivi pascua fiestamata-cabi. Bajarapacuenia Pilato caenë copatabiaba jivi pesivajamatabëcuene xanepanaenexatsi. ⁷ Pamatababi Jesús naneconitsiaexanatsi, bajarapamat-acabi Barrabásvënënë jivi pebarëbevi barënaneconitsiaponapona penaneconit-sivi pejebabiabibota. Barrabás, itsamonae yajava, barënbia picani gobierno pijajivijavabelia. Nexata taicatsi. Naneconitsiaexanejebatsi penaneconit-sivi pejebabiabibota. ⁸ Nexata jivi pona Pilatojavabelia. Jumaitsi bajarapa-monae Pilatojavabelia:

—Pacuenia pascua fiestamatababi copatabiabame caenë pepitsapaenexa penaneconitsivi pejebabiabibovecua, bajarapacuenia panetocopare caenë pepitsapaenexa penaneconitsivi pejebabiabibovecua, jai bajarapamonae Pilatojavabelia.

⁹ Nexata Pilato jumaitsi bajarapamonaejavabelia:

—¿Pajitsipame tsaja patacatocopatsijava pepitsapaenexa Jesús, pajudíovimë pepo papecaevevtsinë? jai Pilato.

¹⁰ Bajarapacuenia Pilato jumaitsi tsipaji yapëtane pajamatabëcuene yabara sacerdotevi penamatacaitorobivi tocaponarenatsi Jesús. Pilato jamatabëcuene yapëtane sacerdotevi penamatacaitorobivi Jesús pecueneitoyaxaetsi petocaponaejavatsirena. ¹¹ Nexata bajarapamonae asaëya vajëca Barrabás pecapitsapaenexatsi. Tsipaji baja cajena sacerdotevi penamatacaitorobivi muxubijiapenetsia jumaitsi jivijavabelia:

—Asaëya pavajëcaename Barrabás pecopatsinexatsi. Nexata Barrabás copatsianatsi pepitsapaenexa penaneconitsivi pejebabiabibovecua. Pëtsa pavajëceme Jesús pecopatsinexatsi, jai baja cajena sacerdotevi penamata-caitorobivi jivijavabelia.

¹² Nexata icatsia Pilato yanijoba jivijavabelia:

—¿Detsa nexata xua pajitsipame taexanaenexa maponëjavabeliaje: “Judíovitsi pepo vajanacaevetsinë,” paneyabarajainëjavabelia? jai Pilato judíovijavabelia Jesús yabara.

¹³ Nexata bajarapamonae vavajai pinijijumeta.

—¡Cruzajavabelia cobematabiabarutsiaexanare! jai Pilatojavabelia.

¹⁴ Nexata Pilato jumaitsi bajarapamonaejavabelia:

—¿Detsa pitsineconi yabara nexata cobematabiabarutsiaexanaejitsipajë? jai Pilato Jesús yabara.

Itsiata bajarapamonae icatsia pinijijumeta vavajai.

—¡Cruzajavabelia cobematabiabarutsiaexanare! jai tsaponae.

¹⁵ Nexata baja Pilato tocopata Barrabás pepitsapaenexa penaneconitsivi pejebabiabibovecua jivi barajamatabëcuexanepanaeya petaenexatsi. Nexata Pilato pijajivi, vajabitsaëvi, itoroba copyaya Jesús ayaicuenia pejumatitibabenexatsi penaneconitsivi pejumaconitabiabimacata. Bajaraxu-acujinae Pilato tocopata baja Jesús vajabitsaëvi pecobematabiabarutsinexatsi cruzajavabelia.

¹⁶ Nexata baja vajabitsaëvi Jesús caponaliatsi nacuaevevtsinë Pilato pijaboxanetojavabelia. Nexata bajarajota nacaetuata daxita vajabitsaëvi.

¹⁷ Bajaraxuacujinae Jesús quenetsiataeya xatatatsi peraënaetsautsaucaejava. Xua nacuaevevtsinë banaxatata, bajaraxua xatatatsi benacuaevevtsinëcuenia petaenexatsi. Coronacuenia pemataxatatsinexatsi, peejuvitoroto tsi-mataexanatsi. Bajarapatoyoroto Jesús mataxatatsi. ¹⁸ Bajaraxuacujinae quenetsiataeya bajacobaponatsi.

—¡Bajaco, judíovi pepo pevetsinë! jai tsaponae bajarapamonae Jesúsjavabelia.

¹⁹ Bajarapamonae caenë canacujitsia mataconibiaxuabaponatsi naebota. Suabaponatsinua. Beyaiyataeya itajara pematabacabëta tonubena-joneyabiabatsi Jesús pitabarata. ²⁰ Jesús quenetsiataeya pecapocaponaecujinaetsi, vejumajonotatsi baja xua xatatatsi, peraënaetsautsaucaejava. Jesús baja icatsia xatatatsi penaxatatsijava. Caponaliatsi jane baja pecobematabiabarutsinexatsi cruzajavabelia.

Pacuenia jane baja Jesús cruzajavabelia cobematabiabarutatsi yabara pelivaisi

(Mt 27.32-44; Lc 23.26-43; Jn 19.17-27)

²¹ Alejandrobeje Rufobeje paxa, Simónvënënë, Cirene tomarapijinë. Nexata Simón najetarua vayafotusatojavaverena. Nexata vajabitsaëvi Simón junatatsi, pacruzajavabelia Jesús cobematabiabarutsijsiatsi, peyavenon-aeycaponaenexa.

²² Caponaliatsi Jesús Gólgotavënë tsutojavabelia. “Gólgota,” ita jai hebreojumeta, mapajumetaje pejumaitisijume: “Jivimatasipatsuto,” pejaijume.

²³ Bajarajota picani Jesús rajutatsi vinora piapaenexa, pematajërëabira mir-ravënëjavata, bitso penavixaetaeyaniva pecobematabiabiavatatatsi cruzajavabelia. Itsiata Jesús apo apae. ²⁴ Nexata jane baja Jesús vajabitsaëvi cobematabiabarutatsi cruzajavabelia. Bajaraxuacujinae vajabitsaëvi bajara-jota canamuxusita beibotoxi. Bajarapacuenia canamuxusita peyapëtaenexa

ponë pitaponaejitsia caejava canacujitsia Jesús penaxatatsijavami, xua jumaponapona. Bajarapacuenia vajabitsaëvi natsicobetsana Jesús penaxatatsijavami.

²⁵ Bajayacunuaepatota, a las nueve, Jesús cobematabiabarutatsi cruzajavabelia. ²⁶ Bajarajota Jesús pematabocoto matatsënëyo yaquinaruta tablapayota itsamonae ata peyapëtaenexa pajamatabëcuene yabara Jesús cobematabiabarutatsi cruzajavabelia. Jumai tsarutsi peyaquinarutsiitane cruzajavata mapacueniaje: “Mara ponëje judíovi pepo pevetsinëje,” jai tsarutsi Jesús yabara. ²⁷ Anijanëbeje penacobetoxotsinëbeje, Jesús yajavacobematabiabarutatsi. Caenë canacujitsia pijacruzata rubatsi. Bajaraponëbeje Jesús pemuxuneneta rutatsibeje. Itsanë Jesús pecujanenia rutatsi. Itsanë Jesús petsavenonenia rutatsi. ²⁸ Bajarapacuenia Jesús itsa yajavacobematabiabarutatsi penacobetoxotsinëbeje, nexata Jesús tocopiapatatsi pacuenia baja cajena Dioso pejumelivaisibaxutota tajëvelia jumaitsi Jesús yabara. Dioso pejumelivaisibaxutota tajëvelia jumaitsi Jesús yabara mapacueniaje: “Naneconitsiaexanaenatsi bepibisiacuene pexanaenëcuena,” jai baja cajena tajëvelia Dioso pejumelivaisibaxutota Jesús yabara.

²⁹ Jesús pecobematabiabarutatsijavatatsi cruzajavabelia, bajaraxuayo penajetarubenaevi Jesús itaropitsiaya bijataeyabiabatsi. Jumai tsabiabi bajarapamonae:

—Yiara jane maitsimëje. Xamë raja imata jumaitsimë: “Xuabianicajë templobo. Acueyabi matabita icatsia veretetsianajë itsabo,” jamë. ³⁰ Nacapanepare jane baja nijacuata. Cruzajavavetsica runaimica, jai tsabiabi Jesúsjavabelia bajaraxuayo penajetarubenaevi.

³¹ Bajara pijinia pacuenia sacerdotevi penamatacaitorobivi, judíovi pecujarubivi ata, capocaponatsi Jesús. Èpamonae najumaitsi:

—Maponëje itsamonae yabara jumai tsabiabi: “Capanepaenajë jivi,” jai tsabiabi. Caranata pijacuata penacapanepaenexa, apo cajëpëaetsi. ³² Itsa xaniajai pepacuene Cristo, athëbëvetsica Dioso pitorobinëtsica jivi pecapanepaenexa, Israel nacuapijivi pepo pevetsinënexanua, aeconoxae runaenica cruzajavavetsica vajataenexa. Nexata jane baja jumecovënëtsianatsi Cristonëcuene, najai bajarapamonae capocaponaeya Jesús yabara.

Ponëbeje ata Jesús yajavacobematabiabarutatsi, bajaraponëbeje ata, Jesús bijataerucatsibeje.

*Pacuenia baja Jesús tēpa yabara pelivaisi
(Mt 27.45-56; Lc 23.44-49; Jn 19.28-30)*

³³ Jesús baja itsa tēpaejitsia, ajena matonejijitsia, daxita nacujava aitaquiri tsajuni. Matapania caniviyojavabelia, bejamatabëcuene a las tres, nacua napebeta icatsia. ³⁴ Nexata icatsia paepatota nacua napebeta, bajara-paepatota pinijicuenia Jesús aëjai. Jumaitsi:

—Eloi, Eloi, ¿lama sabactani? jai Jesús.

Bajarapacuenia Jesús itsa jumaitsi pijajumeta, mapajumetaje pejumaitsi-jume: “TajaDioso, tajaDioso, ¿detsa xuajitsia baja tajaepato necopatame?” pejaijume.

³⁵ Nexata itsamonae bajarajota penubenaevi bijiaya jumetane bajarapacuenia Jesús pejumaitsijava. Nexata saya jamatabëcuenenavëxaniabiaya jumaitsi bajarapamonae:

—Jica, pajumetaema. Mara ponë junata profeta Elíaspijinēmije, Diosojumepaebinēmi, jai bajarapamonaē.

³⁶ Nexata bajarapamonaēyajuvenēnē piajatuvinorayalia bepījia jabu-taxuaba esponjavēnējava. Bajaraxuacujinae esponjavēnējava naeboupita cētaruta. Toyotsiatsi picani Jesús petsutsuninexa bajaraxua. Ponē picani Jesús toyotsiatsi bajaraxua petsutsuninexa, bajaraponē jumaitsi penaju-
nubenaēvijavabelia:

—Bajarapacuenia abaxē copatarutatsi Jesús. Taenatsi Elíaspijinē itsa nataruca cruzavecua penutsinexatsitsica Jesús, jai bajaraponē capocapon-
aeya.

³⁷ Jesús icatsia pinijicuenia aējai. Bajaraxuacujinae jane baja Jesús tēpanajereca. ³⁸ Paepatota Jesús tēpanajereca, bajarapaepatota templobo ēnētuaatuaējēalia peyatuuutarutsipana, ayaipapaēbērēpanaxaneto, titititica tu-
atuaējēareca, athēbēvetsicacujinae irabereca. ³⁹ Nexata paepatota Jesús tēpanajereca, vajabitsaēvi pijacapitán Jesús pitabara canacujitsialia nuca. Nexata bajaraponē taenuca Jesús pinijicuenia peaējajava. Taenucanua Jesús
petēpanajetsijavareca. Nexata vajabitsaēvi pijacapitán jumaitsi:

—Matsaena ponē tēpaje, pepacune baja rovia Dioso pexēnato, jai.

⁴⁰ Bajarajota petiriavibitsaētōxaneto tajiyoverena taenubena Jesús petēpaejava. Bajarapapetiriavi tuatuaējēta nanubena mapamatabēxēyoje. Itsava Mariāvēnēva, Magdala tomarapijiva. Itsava Salomévēnēva. Itsava icatsia Mariāvēnēva. Bajarapova Santiagobeje Josébeje pena. Bajaraponē Santiago, pevējēato abaxē itsanē Santiagovēnēnēvecua. ⁴¹ Pamatacabi abaxē Jesús ponapona Galilea nacuaēta, bajarapapetiriavi Jesús pēnainavanapatsi peyavenonaenexatsi. Papatiriavibitsaētōjavata Mariábana nanubena, bajarapapetiriavi ata Mariábana Jesús najuapēnaponarena Galilea nacuverena Jerusalén tomarabereca.

Pacuenia Jesús petēpaenē mēthētatsi yabara pelivaisi
(Mt 27.57-61; Lc 23.50-56; Jn 19.38-42)

⁴²⁻⁴³ José Arimatea tomarapijinē, judíovi pevetsinē, peyaiyataenētsi. Bajaraponē José copiaevetaponapona pecopiapatsijava pamatacabi caenē Dioso evetsijitsia daxita pijajivi mapanacuataje. Judíovi baja penacuer-
aevetsimatacabinexa pevājēnaeya pamatacabi, caniviyotsia baja. Bajarapa-
matacabi judíovi banacuenevereta baja penacuenebijava. Nexata bajara-
paepatota José acueneura ata, najamatabēsaēta. Nexata lia nacuaevetsinē Pilatojavabelia. Nexata José vajēta Pilatojavabelia petocopatsinexatsi Jesús
petēpaenē pemēthētsinexa. ⁴⁴ Nexata Pilato jamatabējumaitsi:

—Xaniajai tsamē rabaja Jesús tēpa, jamatabējai tsipaji abaxē bajayajebi Jesús apo rucaē cruzajavabelia pecobematabiabarutsicujinaetsi.

Nexata Pilato junata vajabitsaēvi pijacapitán. Nexata Pilato yanijoba vajabitsaēvi pijacapitánjavabelia, Jesús petēpacuene Pilato peyapētaenexa.

⁴⁵ Nexata vajabitsaēvi pijacapitán tsipaeba Pilatojavabelia.

—Jesús rabaja capanepaeya tēpa, jai.

Nexata jane baja Pilato José tocopatatsi cruzajavavetsica pepitsinexa Jesús petēpaenē. ⁴⁶ Nexata José comuata pexaniaviriasábana. Bajaraxu-
acujinae Jesús jane baja cruzajavavetsica patsica Jesús petēpaenē. Daxi-
tanēreca mataquionaeaya matakacēba pexaniaviria piapiasábanapanata. Ba-
jaraxuacujinae itsajota cajena José iboitapajanitojavata pinijiibovaju ex-
anaeyaexanabuata petēpaevi pebutaponaenexa, bajarapaibovajualia José

buata Jesús petëpaenë. Bajaraxuacujinae pinijiibopanaxaneto José tixirena. Yavajuvëpaacatabuata. ⁴⁷ María Magdala tomarapijiva, itsava pijinia María, José pena, bajarapovabeje tanebeje itsajota Jesús buatatsi petëpaenë.

16

Pacuenia Jesús petëpaecujinae icatsia asaë yabara pelivaisi (Mt 28.1-10; Lc 24.1-12; Jn 20.1-10)

¹ Judíovi baja penacueraevetsimatacabi ita verevereca, acueyabi povamaxëto comuata petuxujuvira. Itsava Mariävënëva, Magdala tomarapijiva. Itsava Salomévënëva. Itsava icatsia Mariävënëva. Bajarapova Santiago pena. Bajarapamonae petuxujuvira comuata peperabëexabinexa picani Jesús petëpaenë. ² Nexata baja judíovi penacueraevetsimatacabi ita verevereca, meravia pitsijavata, ajena baja matacabi tsarucaponae, bajarapamonae ponalia Jesús pebuatsiibovajutsijavabelia. ³ Nexata bajarapamonae namutualia najumaitsi tsanajetarubenaë:

—¿Jipatsa meta nacatotixitsiana Jesús peyavajuvëpa acatabuatsiibopanaxanetotsi? najai tsanajetarubenaë bajarapamonae.

⁴ Nexata bajarapamonae ita imoxoyotabatapona, naëcobarëcëpalia ibovajuvabelia. Nexata taeyabuata ibopanaxanëtomí petixitabuatsijavalia ibovajuvëpavecua. Bajarapaibopana bitso pinijiibopanaxaneto. ⁵ Nexata petiriavi ita joneya Jesús pebuatsiibovajutsijavalia, taeyeta pecujuanenia pevëjëato. Bajaraponë naxatateca piapiajava penioponaëjava. Nexata petiriavi najunaviaca. ⁶ Nexata pevëjëato jumaitsi petiriavijavabelia:

—Pëtsa panajunaviacame. Paxamë picani pajaitame Jesús, Nazaret tomarapijinë, ponë cobematabiabarutatsi cruzajavabelia. Asaë rabaja icatsia bajaraponë petëpaecujinae. Ajibi rabaja tsarucacae majotaje. Pataema jane itsajota picani buatatsi. ⁷ Paponare baja. Patsipaebianame pijajivijavabelia, Pedrojavabelia ata. Pajumaitsimë tsane bajarapamonaejavabelia: “Jesús pina panevajënaeyabelia pona Galilea nacuyabelia. Baja pina jotalia pacaxitarabianame Jesús pacuenia baja pacajumaitsi,” pajamë tsane pijajivijavabelia, jai pevëjëato petiriavijavabelia.

⁸ Nexata saya bajarapapetiriavi rëcëpeca Jesús pebuatsiibovajutsivecua. Neconecojai saya pecajunävi. Nexata namutoepatua apo tsipaebi itsajivijavabelia ata. Tspajai bitso junava.

Pacuenia Jesús petëpaecujinae, icatsia ita asaë, tsitanaitajëta María Magdala tomarapijivajavabelia yabara pelivaisi (Jn 20.11-18)

⁹ Judíovi baja penacueraevetsimatacabi ita verevereca, meravia pitsijavata, ajena baja matacabi tsarucaponae, Jesús icatsia asaë petëpaecujinae. Bajarapamatacabi copiata Jesús tsitanaitajëta María, Magdala tomarapijivajavabelia. Bajarapova cajena copiaya Jesús vecuacapsapa siete padovathibeje ita abaxë Jesús apo beyaxuabitsi. ¹⁰ Nexata María, Magdala tomarapijiva, Jesús petsitanaitajëtsicujinaetsi, pona Jesús pijajivijavabelia. Nexata María pevajënae Jesús pijajivi abaxë vënuëyena Jesús. Nexata María ita pata Jesús pijajivijavabelia, tsipaëba pacuenia María tane Jesús. ¹¹ María jumaitsi Jesús pijajivijavabelia:

—Jesús rabaja icatsia asaë petëpaecujinae. Taniji rabaja tajacuata, jai. Tsiata Jesús pijajivi apo jumexaniataetsi María.

Pacuenia Jesús petēpaecujinae icatsia ita asaē, tsitanaitajēta pijajivitonēbejejavabelia yabara pelivaisi
(Lc 24.13-35)

¹² Jesús pijajivitonēbeje najetarucabeje namutua. Nexata Jesús pijaivitonēbeje namutua penajetarucavejavatabeje, Jesús tsitanaitajēta beitsanēcuenia pijajivitonēbejejavabelia. ¹³ Nexata Jesús pijajivitonēbeje ita tanebeje Jesús, naviatecabeje. Nexata pacuenia tanebeje Jesús, tsipaebabeje itsamonae Jesús pijajivijavabelia. Itsiata bajarapamonae apo jumexaniataetsibeje.

Pacuenia Jesús petēpaecujinae, icatsia ita asaē, pijajivi itoroba pexanialivaisi jivi petsipaebanajetarubenaenexa daxitanacuanējava yabara pelivaisi
(Mt 28.16-20; Lc 24.36-49; Jn 20.19-23)

¹⁴ Bexējajavabelia icatsia Jesús tsitanaitajēta pijajivi once ponēbejejavabelia penabanenaejavata mesata. Nexata Jesús pinijicuenia muxujioba pijajivi piagamatabēcuenetajaxae. Muxujiobanua apo pejumecovēnētsixae petsipaebijavatsi pamonaē tane Jesús icatsia piasaējava petēpaecujinae. ¹⁵ Nexata Jesús jumaitsi pijajivijavabelia:

—Paponare daxitanacuanējava daxitajivi panetsipaebanajetarubenaenexa pexanialivaisi pecapanepaelivaisinexatsi. ¹⁶ Pajivi jumecovēnētsiana bajarapalivaisi, nexata pabautisabianame. Bajarapajivi Diosojavabelia capanepaenatsi. Pajivi apo jumecovēnētsi tsane bajarapalivaisi, daxitamatacabijavabelianexa naneconitsiana Diosojavabelia. ¹⁷ Pamonaē peneta jumecovēnētsiana bajarapalivaisi, mapacuenia exanavanapaenaje. Tavēnēta jivivecua capitsapaponaena dovathi. Itsaviriajumetanua, apo penatsipaebijumemi ata, jemata natsipaebiana. ¹⁸ Bajarapamonae jomo pecobeta pitsi ata tsane, apae atanua tsane jivi petēpaeyaexanaera, itsiata apo tēpae tsane. Bajarapamonae ita nacobeuatsiana piavitanejivi pematatsēnēvereca, pejayatsijivi jamatejema tsane piavitanejavavecua, jai Jesús pijajivijavabelia.

Pacuenia Jesús petēpaecujinae, icatsia ita asaē, naviata baja athēbēabetsia yabara pelivaisi
(Lc 24.50-53)

¹⁹ Vajatuxanenē Jesús livaisi petsipaebicujinae pijajivijavabelia, Dioso baja pesaēta catsiatsi athēbēabetsia. Nexata athēbētatsia Jesús eca Dioso pecujanenia penajuaevevtsinexabeje daxitacuene. ²⁰ Nexata jane baja Jesús pijajivi daxitanacuanējava jivi tsipaebanajetarubena bajarapaxanialivaisi. Nexata daxita pamonaē jumetaeyabiabatsi, jumecovēnētabiabatsi pexaniajailivaisi petsipaebicuene. Tsipaji Jesús pijajivi jamatabēcueneyavenonabiaba Jesús pijajivi pinijicuene pexanaenexa jivijavabelia livaisi petsipaebabiabavata.

Pexanialivaisi Jesucristo pelivaisi, San Lucas peyaquinaelivaisi

Pacuenia Lucas taxuxuaba mapabaxutotaje Jesucristo pelivaisi, petoy-aquinaejava Teófilovēnējavabelia, yabara pelivaisi

¹⁻² Pamatacabi abaxē Jesús ponapona mapanacuataje, jivi ayaibitsaētoхането tanetsi peponaponaejava. Bajarapamonae tanetsi Jesús petaxuxuabijavaveliacujinae jivi livaisi petsipaebaponaejava. Nexata bajarapamonae paebanajetarubena tomaranējava Jesús pelivaisi, pexanialivaisi. Nexata tomaranējava Jesús pelivaisi pejumetaevi, ayaibitsaēto, baja cajena yaquina juya mataropotsia petsipaebinexa itsamonaejavabelia. Pacuenia Jesús petaevitsi vajunupaebatsi, bajarapamonae yaquina baja cajena Jesucristo pelivaisi. ³ Nexata xanē ata mapamatacabitaje yanijobaponajē bajarapalivaisi daxita peyapētaevijavabelia. Yanijobaponajē xaniavaetsia tayapētaenexa pacuenia Jesús exanapona petaxuxuabijavaveliacujinae mapanacuataje. Teófilo, catoyaquinatsi. Catoyaquinatsi mapabaxutotaje xamē ata xaniavaetsia neyapētaenexa daxita bajarapalivaisi, Jesucristo pelivaisi. Netsitaxanepana tacatoyaquinaenexa daxita bajarapalivaisi neyapētaenexa pacuenia jumai tsaponae caelivaisi canacujitsia Jesús pexanaponaejavanē yabara, caejava canacujitsia. ⁴ Copiaya baja picani itsamonaecatipaeba bajarapalivaisi. Itsiata icatsia xanē catoyaquinatsi neyapētaenexa jane baja xaniavaetsia bajarapalivaisi pexaniajailivaisicue.

Pacuenia ángel tajēvelia jumaitsi Zacaríasjavabelia: “Nexēnatonēyo raja xainae-name,” jai yabara pelivaisi

⁵ Pamatacabi abaxē Herodes eveta Judeanacia, bajarapamatacabi ponapona sacerdotenē Zacarías. Bajaraponē sacerdotevi Abíasvēnēvijavūvēnē. Zacarías pijava pevēnē Elisabet. Bajarapova sacerdotenēmi Aarōnpijinē pemomoxiyajuvēnēva. ⁶ Bajarapajivibeje xaniavaetsia aneconijibia Dioso pitabarata toponaponabeje. Dioso jumecovēnētsiaya ponaponabeje pacuenia Dioso itorobatsi judiōvi xaniavaetsia pejinavanapaenexa. ⁷ Itsiata bajarapajivibeje pexi apo xainabeje. Tsipaji Elisabet mavecova. Nexata bajarapajivibeje bitso baja perujuvivyobeje.

⁸ Nexata itsamatacabi Zacarías templobota nanacuenebijitsia sacerdotevi penacuenebicue Dioso pitabarata. Pasemanata daxita sacerdotevi, Abiasvēnēvi, nacobenavetsijitsia templobo, bajarapasemana Zacarías daxitasemana nanacuenebijitsia templobota.

⁹ Nexata abaxē sacerdotevi petaxuxuabijavajēnaeya penacuenebijava, pijacujirucuenia exana penayapētaeponaenexa xua caenē canacujitsia nacuenebijitsia templobota. Nexata sacerdotevi pijacujirucuenia pexanaecujinae, itsa baja yapētane xua caenē canacujitsia nacuenebijitsia templobota, nexata Zacarías tocopatatsi temploboēnēalia petajuitsinexa inciensovēnējava, petuxujuvijava. Bajaraxuata Zacarías joneya temploboyalia petajuitsinexa jane baja inciensovēnējava temploboēnēalia.

¹⁰ Paepatota Zacarías tajuitanuca inciensovēnējava temploboēnēalia, jivi ayaibitsaētoхането templobojumavelia vajēcanubena Diosojavabelia.

¹¹ Nexata Zacarías temploboēnēalia, altarvēnējava muxuneneta,

tsitanaitajētatsi ángel. Paaltarvënējavajumata incienso tajuitabiaba Diosonexa, bajarapaaltarvënējava pecujanenia pamuxunenejavata, Zacarías taenuta ángel. ¹² Nexata Zacarías ita taenuta ángel, apo yapēta pacuenia exanaejitsia Zacarías. Bitso jamatabēcuenenajunaviaca. ¹³ Nexata ángel jumaitsi Zacaríasjavabelia:

—Zacarías, pētsa junavame. Dioso baja cajena cajumetane nevajētsijava. Nexata nijava Elisabet catonacoxitsiana. Nexēnatonēyo baja xainaename. Vënērübiana bajaronēyo Juan. ¹⁴ Pinijicuenia, jivi ayaibitsaēto yajava, barēyamē tsane bajaraponēyo ita catonaexanaena. ¹⁵ Tsipaji bajaraponēyo ayaijamatabēcuenenē tsane Dioso pitabarata. Apo apae tsane piataneranē. Vinora ata apo apae tsane. Penaexanaejavaveliacujinae tsijamatabēvënēcaenatsi Espiritu Santo. Nexata Espiritu Santo pitorobicueniatsi, exanabiabiana. ¹⁶ Bajaraponē, Juan, Israel nacupijivi namatabēcuenecopatsiaexanaena Diosojavabelia. ¹⁷ Bajayata Diosojumepabinēmi, profeta Elíaspijinē, ayaijamatabēcuenenēmi, Dioso pesaē yajavaponapona. Espiritu Santo ata pitorobicueniatsi, exanaponapona. Bajara icatsia itsane Juan ata. Bjaraponē pejamatabēcueneta, penacoxiitoyavimi ata, icatsia nacoxiasiva tsanē. Bjaraponē pejamatabēcueneta, itsamonae pijinia pibisijamatabēcuene pexainaevi ata, jamatabēcuene xanepanaeyaexanaena pexaniajamatabēcuene pexainaenexa. Bjarapacuenia bajaraponē jivi jamatabēcuene xanepanaeyaexanaena pepo petuxanenē penajetarucavajēnaeya. Nexata bajarapamonae xaniavaetsia copiapitsiana pepo petuxanenē pamatacabi najetarucaena, jai ángel Zacaríasjavabelia.

¹⁸ Zacarías nexata yanijoba ángeljavabelia. Jumaitsi:

—Ita taxēnato xainaējitsianē, ¿detsa peneta pitsicuene taenajē tayapētaenexa? Tsipaji rabaja xanē perujunēnē. Tajava ata baja perujuva, jai Zacarías.

¹⁹ Nexata ángel jumaitsi Zacaríasjavabelia:

—Xanē raja Gabrielnē, Dioso pijajivitonēnē. Dioso baja cajena nitoroba tacatsipaebinexa mapapexanialivaisije. ²⁰ Xamē saya nejumeeabame, xaniavaetsia catsipaebi atatsi xua pepacuenecacocopiajopaejitsia. Nexata baja aeconoxae apo caejēpae tsane necuaicuajijajava. Matapania jane baja pamatacabi catocopiajopaena xua yabara najumecapanepaeya catsipaebatsi, natsipaebiana icatsia, jai ángel Zacaríasjavabelia.

²¹ Bjarapaepatota jivi templobo jumavelia evetanubenatsi Zacarías pepit-sapaevarena. Najumaitsi bajarapamonae:

—¿De meta xuajitsia Zacarías bepijia apo pitsapaerena templobovecua? najai bajarapamonae.

²² Itsa jane baja Zacarías pitsaparena templobovecua, apo caejēpaetsi pecuaicuajijajava. Nexata pamonaevetanubenatsi templobo jumavelia, najumaitsi:

—Zacarías raeta bemajitsinaebota temploboenēlia itsacuene tane, najai.

Nexata Zacarías apo pecaejēpaexaetsi pecuaicuajijajava, pecobeta tsipaeba besiyānēcuenia jivi peyapētaeyaexanaenexa.

²³ Itsa baja Zacarías vereta penacuenebijava templobota pamatacabi jivorobatsi penacuenebinexa, naviatā baja pijaboyabelia. ²⁴ Bjaraxuacujinae Zacarías pijava, Elisabet, nacoxita jane baja. Nexata bajarapova penacoxitsijava ita yapētane, cinco pajuametobejecuenia itsajavabelia pijabovecua apo ponaponae. ²⁵ Elisabet jamatabējumaitsi:

—Dioso raja taneitaxutotsoniataexae, neyavenona tanacoxitsinexa mapacueniaje. Nexata baja apo auranë tsane tacoxibijava yabara, jamatabëjai Elisabet.

Pacuenia ángel tajëvelia jumaitsi Maríajavabelia yabara pelivaisi

²⁶ Elisabet baja seis pajuametobeje pepuaxainae penacoxitsicujinae, Dioso icatsia itoroba pijaáγγελ Gabriel. Pijaáγγελ itoroba Nazaret tomarabelia, Galilea nacuata peecaetomarabelia. ²⁷ Dioso itoroba áγγελ petsipaebinexa Maríajavabelia. María abaxë pebi apo pequenetsiataevatsi. Áγγελ pepatsivajënaeya Maríajavabelia, Maríabeje baja cajena Josébeje nabarëcuaiacuajibeje penapitsinexabeje. Nacuaevevsinëmi Davidpijinë pemomoxiyajuvënënë José. ²⁸ Áγγελ nexata joneya María peponaponaebota. Áγγελ jumaitsi Maríajavabelia:

—María, cabajacobatsi. Pexaniajamatabëcuenia Dioso pecataeva. Dioso cayajavaponaponaena. Bitso cayavenonaena xamë daxita nevëna petiriavi matatoxenetsia, jai áγγελ.

²⁹ Nexata María itsa jumetane bajarapacuenia áγγελ pejumaitsijavatsi, María jamatabëjumaitsi:

—¿Detsa meta pitsijamatabëcuene yabara nejumaitsi áγγελ mapacueniaje? jamatabëjai María.

³⁰ Icatsia áγγελ tajëvelia jumaitsi Maríajavabelia:

—María, pëtsa junavame. Tsipaji raja Dioso pexaniajamatabëcuenia catane. ³¹ Xamë raja nacoxitsianame. Cavecuaanaexanaena raja pebinëyo. Bajaraponëyo vënërubianame Jesús. ³² Bajaraponëyo ayaijamatabëcuenenë tsane. “PinijiDioso, athëbëatsia peecaenë, mapexënaatoje,” jaitsi tsane jivi. Nexata vajatuxanenë Dioso nacuaevevsinë exanaenatsi. Pacuenia pijasalinainëmi Davidpijinë bajayata nacuaevevsinëmi, bajara icatsia itsane. ³³ Bajaraponë evetsiana Israel nacuapijivi daxita matacabijavabelianexa, jai áγγελ tajëvelia Maríajavabelia.

³⁴ Nexata María jumaitsi áγγελjavabelia:

—¿Detsa pacuenia nacoxitsipajë? Xanë raja tamona apo xainanë, jai María áγγελjavabelia.

³⁵ Áγγελ nexata tajëvelia jumaitsi Maríajavabelia:

—Espíritu Santo raja patsianica xamëjavabetsica. Nexata Espíritu Santo Dioso pesaëta caevetsiana. Bajaraxuata panacuetonëyo cavecuaanaexanaena, tsatsianatsi Diosonexa. “Dioso ra mapexënaatoje,” jaitsi tsane jivi. ³⁶ Nijamonaeva ata Elisabet, perujuva ata, exanaena panacuetonëyo. “Mavecova raja,” jai atatsi jivi, itsiata baja penacoxitsicujinae xaina baja seis pajuametobeje. ³⁷ Dioso raja caëjëpatsi daxitacuene pexanaenexa, jai áγγελ tajëvelia Maríajavabelia.

³⁸ Nexata María jumaitsi áγγελjavabelia:

—Xanë raja Dioso pijajivitovanë. Pacuenia nejumaitsimë, bajarapacuenia Dioso xanëjavaberena exanaena, jai María.

Nexata baja María vecuaponatsi áγγελ.

Pacuenia María sivaxaina Elisabetjavabelia yabara pelivaisi

³⁹ María penacoxitsijavanexa petsipaebicujinaetsi áγγελ, caemat-acabibejecujinae, María pona petsutonënacuaata peecaetomarabelia. Bajarapatomara eca Judea nacuata. ⁴⁰ Nexata María joneya Zacarías pijaboyalía. Bajacobanuta pijamonaeva Elisabet. ⁴¹ María itsa bajacobanuta

Elisabet, nexata Elisabet peyacotajinaenacuetoyo tsicotonayucutajarabatsi. Nexata jane baja Elisabet tsijamatabëvënëcatsi Espíritu Santo. ⁴² Nexata Elisabet Espíritu Santo itorobatsi pinijijumeta Maríajavabelia pejumaitsinexa mapacueniaje:

—Dioso cajena bitso cayavenona daxita petiriavi matatoxenetsia. Panacuetonëyo ata exanaename, bajarapanacuetonëyo Dioso bitso peyavenonabihinëtsi tsane. ⁴³ Xamë tajatuxanenë penamë tsane. ¿Detsa xuajitsia beveliajamatabëcueneva atanë, nesivaxainamerë? ⁴⁴ Itsa nebajacobanutame, tayacotajinaenacuetoyo nayucutajaraba pebarëyaxae. ⁴⁵ Barëyamë Dioso pecajumaitsicuenia nejumecovënëtsiva. Tsipaji pepacuenie catocopiapatsiana daxita pacuenia vajatuxanenë Dioso pitorobinëtsica ángel tajëvelia catsipaeba, jai Elisabet Maríajavabelia.

⁴⁶ Nexata María jumaitsi Elisabetjavabelia:

Tajamatabëthëtojavavetsina jumaitsinë Diosojavabelia: “Ayaijamatabëcuenenëmë bitso,” janë. ⁴⁷ Sivajamatabëcuenebarëyanë Dioso tanecapanepaenënexa. ⁴⁸ Sivajamatabëcuenebarëyanë. Tsipaji pijajivitovanë, beveliajamatabëcueneva atanë, Dioso nitapeta. Tatëpaecujinae ata tsane, tavënamuto, pevajënaeyabelia daxitajivi xanë yabara jumai tsabiabi tsane: “Dioso bitso peyavenonaevamitsi,” jai tsabiabi tsane. ⁴⁹ Bajarapacuenia daxitajivi jumai tsabiabi tsane xanë yabara. Tsipaji ayaijamatabëcuenenë Dioso netoexanabiabiana ayai cuene pexanaejavanë. Dioso raja apo pejitsipaenë jivi pibisiacuene pexanaejava. ⁵⁰ Daxita pamonaë Dioso yaityaena, bajarapamonaë juya Dioso itaxutotsoniataeyabiabiana. ⁵¹ Dioso raja pecaëjëpaenëtsi pinijicuene ata pexanaenexa pecobeta. Pamonaë jamatabëjumaitsi tsavanapae: “Vaxaitsi cajena ayaijamatabëcuenevitsi,” jamatabëjai tsavanapae, bajarapamonaë Dioso nacayajatsiaexana baja. ⁵² Pinijinacuanë pevetsivimi ata, bajarapanacuanë pevetsijavami Dioso vecuapitsapaeyaexana. Nexata bajaraxuacujinae Dioso juya evetsiaexana bajarapanacuanë beveliajamatabëcuenevimi ata. ⁵³ Pamonaë pijinia bitso pijani, bajarapamonaë Dioso rajuta pexanianabanijava. Pamonaë pijinia bitso pexainaevi mapanacuapijicuene, bajarapamonaë Dioso apo pejumecovënëtsixae, bajarapamonaë Dioso apo rajutsi. ⁵⁴ Dioso yavenona pijajivi, Israel nacuapijivi. Apo nacofënëtsi cajena. Dioso itaxutotsoniataeyabiaba Israel nacuapijivi. ⁵⁵ Bajarapacuenia Dioso pijajivi itaxutotsoniataeyabiaba daxitamatacabijavabelianexa. Tsipaji baja cajena bajarapacuenia Dioso najumecapanepaeya jumaitsi vajasalinainëmi Abrahampijinëjavabelia, daxita pemomoxijavabelianexa ata pitaxutotsoniataeyabiabijavanexa yabara,

jai María Elisabetjavabelia.

⁵⁶ Nexata María acueyabi pajuametobeje naponapona Elisabet pijabota. Bajaraxuacujinae María baja naviaa pijaboyabelia.

Pacuenia Juan naexana jivibautisabinënexa yabara pelivaisi

⁵⁷ Juameto baja ecaica, pajuametoa Elisabet penacueto vecuanaexanaejitsiatsi. Penacuetonëyo jane baja vecuanaexanatsi. ⁵⁸ Itsa Elisabet yapëtane Dioso pitaxutotsoniataecuenetsi, bitso Elisabet jamatabëcuenebarëya. Daxita

pamonaē ata ena imoxoyo, pijabo muxuneneta, bajarapova pijamonaeya-juvënëvi ata, sivajamatabëcuenebarëyatsi. ⁵⁹ Itsa baja penacuetonëyo caesemana xaineca penaexanaecujinae, Elisabetbeje Zacariásbeje pexënatonëyo perabëcaucutsiaexanabeje judíovicuenia. Baitsi bou Piperabëcaucutsiaexanabeje. Nexata daxita bajarapamonaē pata Elisabetbeje Zacariásbejexavaberena. Bajarajota picani penacuetonëyo tovënërubijitsiatsibeje paxa pevënëcuenia paxa picani pevënëxainaenexa. ⁶⁰ Itsiata Elisabet jumaitsi pamonaējavabelia picani tovënërubijitsiatsibeje:

—Jume. Pevënë raja tsane Juan, jai Elisabet bajarapamonaējavabelia.

⁶¹ Nexata bajarapamonaē jumaitsi:

—¿Detsa xuajitsi jitsipame bajarapavënë? Itsanë ata cajena nijamonaeya-juvënëñē apo xainae bajarapavënë, jai bajarapamonaē Elisabetjavabelia.

⁶² Nexata bajarapamonaē penacuetonëyo jane baja paxa junata. Pecobeta yanijoba pavënë Zacariás jitsipa petovënërubinexatsi. ⁶³ Nexata Zacariás vajëta tablapayo peyaquinaenexa. Nexata yaquinaruta: “Juan rabaja pevënë,” pejaitane. Nexata daxita bajarapamonaē jamatabëcuenenabenajaca. ⁶⁴ Bajarajota jemata icatsia Zacariás cuaicuaijai baja. Nexata jivi pitabarata Zacariás jumai tsaponae Diosojavabelia:

—Diosomë, ayaijamatabëcuenenëmë bitso, jai tsaponae.

⁶⁵ Daxita pamonaē bajarapatomarata imoxoyo penaevi, itsa jumetane pacuenia Zacariás Dioso yavenonaponatsi, pinijicuenia jamatabëcuenenabenajaca. Itsamonaē bajarapanacuata petsutonëjava penaevi ata, daxita bajarapamonaē ata, vënëlivaisitane bajarapacuenē yabara. ⁶⁶ Daxita pamonaē jumetane bajarapacuenē yabara, apo nacofënëtsi. Jamatabënajinavanapabiaba bajarapacuenē. Nexata bajarapamonaē nayanijobabiaba.

—¿De meta jamatabëcuenētsi tsane bajarapanacuetonëyo itsa vitsabiana? najai tsabiabi bajarapamonaē.

Bajarapacuenia nayanijobabiaba tsipaji bitso Dioso yavenonaponatsi bajarapanacuetonëyo.

Pacuenia Zacariás tajëvelia jumaitsi yabara pelivaisi

⁶⁷ Zacariás, Juan jivibautisabinënëxaxa, tsijamatabëvënëñēcatsi Espiritu Santo. Nexata Zacariás Espiritu Santo itorobatsi jivijavabelia pejumaitsinexa mapacueniaje:

⁶⁸ Pexaniajamatabëcuene rajutatsi vaxaitsi pepo vajatuxanenëjavabelia, Israel nacuapijivitsi vajaDiosojavabelia. Tsipaji pijajivitsi nacatoitorobianica vajanacacapanepaenënëxaxa vajanecónivecua.

⁶⁹ Dioso cajena nacatoitorobianica pinijicuene pexanaejava pecaëjëpaenëtsi vajanacacapanepaenexa. Bajaraponë Dioso pijajivitonëmi Davidpijinë pemomoxiyajuvënëñē tsane. ⁷⁰ Bajayata Diosojumepaebivimi profetavi, Dioso pitorobicueniatsi pejinavanapaevi, tajëvelia najumecapanepaeya jumaitsi bajaraponë vajanacacapanepaejavanexa yabara. ⁷¹ Tajëvelia profetavimi najumecapanepaeya jumaitsi bajaraponë vajanacacapanepaejavanexa vajavajabitsaëvivecua, daxita vajanacaitoyavi atavecua. ⁷² Dioso nacaitaxutotsoniataena pacuenia tajëvelia najumecapanepaeya jumaitsi vajasalinavimijavabelia. Dioso cajena apo nacofënëtsi pacuenia najumecapanepaeya jumaitsi vajasalinavimijavabelia. ⁷³ Bajayata copiaya bajarapacuenē yabara Dioso najumecapanepaeya jumaitsi vajasalinainëmi

Abrahampijinējavabelia. ⁷⁴ Dioso baja najumecapanepaeya jumaitsi vajanacapanepaenexa vajavajabitsaēvecua. Bajarapacuenia Dioso nacacapanepaena ajunavijibia vajatonacuenebavanapaenexa. ⁷⁵ Nexata bajarapacuenia Dioso itsa tonacuenebavanapaenatsi, jinavanapaenatsi pibisiacuene exanaenevatsi Dioso pitabarata vajaasaētsavanapaepato abaxē mapanacuataje,

jai Zacarías jivijavabelia tajēvelia pevajunupaebijavata Jesús Dioso pitorobi-javanexatsitsica vajanacacapanepaenexa.

⁷⁶ Icatsia Zacarías jumaitsi pexēnatonēyojavabelia mapacueniaje:

Taxēnatonēyo, xamē yabara itsamonae jumai tsabiabi tsane: “Mara ponēje pinijiDioso, athēbētatsia peecaenē, pijaprofetanēje,” jai tsabiabi tsane. Xamē raja itsaxuayo pepo petuxanenē najetaruaejitsia, pevajēnaeya jivi tsipaebanajetaruaename pesivanajamatabēcueneocopatsinexa bajaraponējavabelia pamatacabi bajaraponē najetaruaena. ⁷⁷ Tsipaebanajetaruaename jivijavabelia pacuenia Dioso bajarapamonae capanepaejitsiatsi. Tsipaji bajarapamonae pibisiacuene pexanaeconimi Dioso vecuaajibiaexanaenatsi. ⁷⁸ Dioso vajanacaitaxutotsoniataexae, nexata nacayapētaeyaexanaena vajanacacapanepaenēnexa athēbēvetsica pepatsijavanexatsica. ⁷⁹ Nexata bajaraponē jivijavabelia itsa tsipaebanajetaruaena pexaniajailivaisi, jamatabēcueneitayotsiana daxita pijamatabēcueneitaquirivimi. Baitsi pamonae picani cjunava petēpaejava, bajaraponē petsipaebilivaisi pejamatabēcueneta, bajarapamonae yapētaena jamatabēcuenexanepanaeya pejinavanapaenexa,

jai Zacarías pexēnatonēyojavabelia tajēvelia pevajunupaebijavata Jesús jivijavabelia Dioso pejumelivaisi petsipaebanajetaruaejavanexa.

⁸⁰ Nexata jane baja xuacujinae Juan jivibautisabinēnexa vitsabanajetarua. Yajavaajamatabēcuenesaē baja cajena tsanajetaruae Dioso pejumelivaisi yabara. Nexata baja Juan itsa penaveretsinē, ponapona petusato nacuata. Matapania itsa taxuxuabijitsia jivi petsipaebinxaxa Jesús pelivaisi, naitajēta jivijavabelia pevēnēlivaisitaenexatsi daxita Israel nacuapijivi.

2

Pacuenia Jesús naexana yabara pelivaisi (Mt 1.18-25)

¹ Imoxoyo baja pevajēnae Jesús penaexanaejavanexa. Nexata bajarapamatacabijava Romanonacua pepo pevetsinē, Augusto, taxuxuaba pijajivi pitorobijava jivi petonamataējētsinexatsi. Jumaitsi pijajivijavabelia:

—Daxitajivi, pamonae taevetsinacuanējava jinavanapa, panetona-mataējētsianame, jai.

² Bajarapamatacabi pijinia nacuae vetsinē Cireniovēnēnē saicaya itsanacua eveta, Siriavēnēnacua. ³ Nexata nacuae vetsinē Augusto pevetsinacuanējava penaetomaranēta pejinavanapaevi, apo jinavanapae ēpijatomaranējava. Itsamonae najinavanapa itsatomaranējava. Bajaraxuata pamonae najinavanapa itsatomaranējava, caejivi canacujitsia, pijasalinaivimi pijatomaranējavabelia pona. Bajarapamonae pona penamataējētsinexatsi pijasalinaivimi pijatomaranējava.

⁴ Bajaraxuata José ata barēpona Belén tomarabelia. José barēnaropota Nazaret tomarata, Galilea nacuata pecaetomarata. José barēpona Belén tomarabelia, Judea nacuata pecaetomarabelia. Tsipaji baja cajena José

pijasalinainēmi, Davidpijinē, bajayata Belén tomarata ponapona. ⁵ José barēpona María, pova pita pijavanexa. Bajarapova yacotapona itsa baja imoxoyo pevājēnae penacueto pevecuanaexanaenexatsi. ⁶⁻⁷ Nexata baja itsa patabeje Belén tomarata, ponaponabeje dajubi pevetabiabibota. Tsipaji baja pabota jivi patabiaba, pevājēnaebeje baja jivi yavēnēca. Nexata apo nayacaējēpaetsibeje bajarapabota penaecaenexabeje. Bajaraxuata patabeje dajubi pevetabiabibota. Nexata dajubi pevetabiabibota María jane baja vecuanaexanatsi penacuetonēyo, copiaya penacoxitsinacueto. Barēeca dajubi pevetabiabibota. Jumaquioneta papaēbērēpanaxita. Buateta dajubi pexaejavanexa pemitsaothocabiabimoēnēta.

Pacuenia āngelevi patsica Jesús penaexanaelivaisi petsipaebinexa oveja pevetsivijavabelia yabara pelivaisi

⁸ Belén tomarajumaverena imoxoyovayafota, oveja pevetsivi evetavanapa. Bajarapamonae meravi nacobenaevetabiaba pijaovejabitsaētonē. ⁹ Jemata oveja pevetsivi tsitanaitajētatsi Dioso pijaāngel. Nexata Dioso pijapenivenivenaecotia oveja pevetsivi matatoyorotsia itayotatsi. Najunavica bajarapamonae pinijicuenia. ¹⁰ Nexata āngel jumaitsi oveja pevetsivijavabelia:

—Pētsa panajunaviacame. Pexanialivaisi raja pacatocanajetarucatsi pesivarārēyanexa daxitajivi. ¹¹ Ajena rabaja, mapameravitaje, naexana baja daxitajivi pecapanepaenēnēxa. Naexana Belén tomarata, patomarata bajayata nacuaevetsinēmi Davidpijinēmi ponapona. Ponē naexana, bajaraponē pepo petuxanenē Cristo, Dioso athēbēvetsica pitorobinētsitsica jivi pecapanepaenexa. ¹² Paneyapētaenexa pacuenia pacatsipaebatsi, penacuetonēyo pataeyabuatsiansaname mapacueniaje. Penacuetonēyo pataeyabuatsiansaname papaēbērēpanaxita pejumaquionaenacuetonēyotsi. Boquecaena dajubi pexaejava pemitsaothocabiabimoēnēta, jai āngel oveja pevetsivijavabelia.

¹³ Bajara saya jota jemata oveja pevetsivi tsitanaitajētatsi ayaibitsaētoanaxeto āngelevi, copiaya petsipaebiāngelnētsijavata. Bajarapamonae āngelevi pexaniajamatabēcuene rajuta Diosojavabelia. Penaxēanaejavata āngelevi jumaitsi mapacueniaje:

¹⁴ ¡Dioso, athēbētatsia peecaenē, pinijicuene rabaja exana! Pamonaē Dioso jumecovēnēta, Dioso sivajamatabēcuenebarēyatsi. Daxita bajarapamonae jamatabēcuenexanepanaeya jinavanapaeyaexanaena Dioso, jai āngelevi penaxēanaejavata.

¹⁵ Itsa baja āngelevi naviaba athēbēabetsia, oveja pevetsivi āngelevi pecovēta najumaitsi:

—Ponaliatsi Belén tomarabelia. Taenatsi pecopiapatsijava pacuene yabara vajatuxanenē Dioso pitorobiāngelnētsica nacatsipaeba, najai oveja pevetsivi āngelevi pecovēta.

¹⁶ Nexata bajarapamonae bepijiayo ponalia Belén tomarabelia. Pata itsajota Mariabeje Josébeje barēecabeje penacuetonēyo. Penacuetonēyo boqueca dajubi pexaejava pemitsaothocabiabimoēnēta. ¹⁷ Oveja pevetsivi itsa taeyabuateta penacuetonēyo pacuenia baja cajena āngelnē tsipaebatsi, nexata pona petsipaebaponaenexa daxitajivijava pacuenia bajarapanacuetonēyo taeyabuateta. ¹⁸ Nexata daxita pamonaē jumetane oveja pevetsivi pepaebilivaisi, jamatabēcuenenabenajaca. ¹⁹ María baja cajena pejamatabēthētota yapētaeponapona daxita bajarapacuene yabara. ²⁰ Oveja baja

pevetsivi naviabaponalia. Oveja pevetsivi namutualia jumai tsanajetarubena Diosojavelia:

—Diosomē, bitso ayaijamatabēcuenenēmē. Pexaniajamatabēcuene pacarajutatsi patanetoexanaexaemē pexaniacuene, jai tsaponaelia oveja pevetsivi.

Bajarapacuenia jumaitsi tsipaji baja tane daxita pacuenia ángelnē tsipaebatsi.

Pacuenia Jesúsnyō caponaliatsi temploboyavelia yabara pelivaisi

²¹ Jesúsnexta penaexanaecujinae, ocho matacabita, perabēcaucutatsi judiovicuenia. Baitsi boupiperabēcaucutatsi. Vēnērubatsinua jane baja pevēnē pexainaenexa. Vēnērubatsi “Jesús,” pejaivēnēta. Tsipaji baja cajena abaxē María nacoxitsinejeva Jesúsnexta, tajēvelia ángel jumaitsi Marijavelia: “Bajaraponēyo vēnērubianame Jesús,” jai.

²² Nexta jane baja tocopiajopatsibeje Josébeje Mariabeje pexanaenexabeje pacuenia bajayata Dioso Moiséspijinēta penajumecopatsilivaisi itorobatsi daxita judiōvi pexanaenexa penacuetonēyo itsa tonaexanatsi. Nexta Jerusalén tomaravelia barēponabeje penacuetonēyo. Nexta Jerusalén tomarata, templobota, María ofrenda rajuta Diosojavelia penajamatabēcuene xaniavaetsinexa Diosojavelia. Rajutabejenua penacuetonēyo Diosojavelia pijajivitonēnexa petonacuenebinexa itsa penaveretsinē. ²³ Bajarapacuenia Josébeje Mariabeje exanabeje tsipaji Dioso Moiséspijinēta penajumecopatsilivaisi jumaitsi: “Penacasabijivibeje pexi itsa xainabeje, nexta copiaya panacuetonēyo xainabeje, totsatsibeje Dioso pijajivitonēnexa,” jai. ²⁴ Josébeje Mariabeje rajutabeje ofrenda Diosojavelia pacuenia Dioso Moiséspijinēta penajumecopatsilivaisi itorobatsibeje. Rajutabeje tsiquiriviria ucucutoyobeje. Itsa jume, rajutabeje meta pinijiyoviria ucucutobeje.

²⁵ Bajarapamatacabi ponapona Jerusalén tomarata Simeónvēnēnē. Bajaraponē jumecovēnētsiaponapona pacuenia Dioso pejumelivaisibaxutota jumaitsi. Nexta bajarapamatacabi Israelnacia eveta Romano nacuaverena ēpepatsivi. Nexta Romano nacuaverena pepatsivi pevetsixae Israelnacia, bejiobiaexanabiabatsi Israel nacupijivi. Bajaraxuata Simeón copiaevetaponapona Dioso pejamatabēcueneta petovecuajutsinexatsi Israelnacia pevetsivi. Nexta baja Romano nacuaverena pepatsivi, pevecuapit-sapaenexa Israelnacia pevetsicuene. Espiritu Santo yajavaponapontsi Simeón. ²⁶ Nexta Espiritu Santo pejamatabēcueneta Simeón tajēvelia yapētaeyaexanatsi pacuenia Simeón petēpaevajēnae taejitsia Cristo, ponē Dioso athēbēvetsica itorobiapaebica jivi pecapanepaenexa. ²⁷ Nexta Espiritu Santo pejamatabēcueneta Simeón joneyaexanatsi temploboyavelia. Bajaraxuata Simeón tane Mariabeje Josébeje pebarējonejavatabeje Jesúsnyō temploboyarena pexanaenexabeje pacuenia Dioso Moiséspijinēta penajumecopatsilivaisi itorobatsibeje. ²⁸ Nexta Simeón isapita Jesúsnyō. Pexaniajamatabēcuene rajuta Diosojavelia. Pexaniajamatabēcuene Simeón perajut-sijavata Diosojavelia, Simeón jumaitsi mapacueniaje:

²⁹ Tajatuxanenē, baja rajane netocopatsianame nijajivitonēnē jamatabēcuenexanepanaeya tatēpaenexa. Tsipaji baja netaeyaexaname pacuenia baja cajena tajēvelia najumecapanepaeya nejumaitsimē.

³⁰ Taitaxutota rabaja taniji maponēje, ponē itorobimica jivi pecapanepaenēnexa xamējavavelia. ³¹ Ponē itorobimica jivi pecapanepaenēnexa, daxitajivi taenatsi. ³² Maponēje

petsipaebilivaisita, pamonaē apo judiōvi ata, jamatabēcueneitayotsiana.

Yapëtaeyaexanaena pacuenia jamatabëcueneitsimë. Nexata maponëje pejamatabëcueneta apo judíovi yaiyataena nijajivi judíovi, jai Simeón templobota Diosojavabelia pexaniajamatabëcuene perajutsija-
vata Jesúsnëyo yabara.

³³ Nexata Josébeje Mariábeje itsa jumetanebeje bajarapacuenia Simeón pejumaitsijava Jesúsnëyo yabara, jamatabëcuenenabenajacabeje. ³⁴⁻³⁵ Bajaraxuacujinae Simeón tovajëta Diosojavabelia peyavenonaenex-
atsibeje Josébeje Mariábeje, Jesúsnëyo yajava. Bajaraxuacujinae Simeón jumaiti Mariájavabelia:

—Mapanacuetonëyoje, Dioso itapetatsi. Maponëje petsipaebilivaisi jivi ayaibitsaëtoxfaneto apo jumecovënëtsi tsanetsi. Nexata jivi ayaibitsaëtoxfaneto naxuabiana, Israel nacuapijivi. Ayaibitsaëtoxfaneto pijinia jumecovënëtsianatsi. Nexata pijinia ayaibitsaëtoxfaneto capanepaena. Maponëje Dioso pesaëta pinijicuene pexanaejava, tsitaexanaena jivi peyapëtaenexa Dioso pitorobinëtsitsica. Maponëje itajëtsiana pacuenia jivi ayaibitsaëtoxfaneto, caejivi canacujitsia, bëpënëa pibisiajamatabëcuene najamatabëxainabiaba. Jivi ayaibitsaëtoxfaneto apo jumecovënëtsi tsanetsi. Pibisiacuenia saya baranatsipaebianatsi. María, xamë nexata pepo nejamatabëëthëtojavavetsina bitso sivajamatabëcuenebëjamë tsane itsa yapëtaename pacuenia exanaejitsiatsi, jai Simeón Mariájavabelia Jesús yabara tajëvelia pevajunupaebijavata pacuenia Jesús exanaejitsiatsi.

³⁶⁻³⁷ Bajara pijinia pamatacabi templobota ponapona Diosojumepae-
biva profetava, Anavënëva. Bajarapova Fanuelpijinë pexënatoyo, Aser-
pijinë pemomoxiyajuvënëva. Bajarapova bitso baja perujuva. Ochenta y cuatro baja pavaijebeje xaina. Nacasaba picani abaxë itsa pejanava. Penacasabicujinae siete pavaijebeje pepuaxainae pamonajavabelia, vecu-
atëpatsi pamona. Itsajavabelia apo vecuaponabiabi templobo. Mata-
cabijebi, meravijebi yajava, Dioso tonacuenebabiaba templobota. It-
sajavata pexaejava apo xaeyabiabi pamatacabibeje vajëcabiaba Diosojav-
abelia. ³⁸ Nexata bajarapova ata pata itsajota Josébeje Mariábeje nucabeje
templobota. Simeón pisanucaejavata Jesúsnëyo, isataenuta bajarapova. Nexata bajarapova pexaniajamatabëcuene rajuta Diosojavabelia Jesúsnëyo
yabara. Romano nacuaverena pepatsivi Israelnacua pevetsixae, Israel
nacuapijivi copiaevetavanapa Dioso pejamatabëcueneta petovecuajutsinex-
atsi, nexata baja Romano nacuaverena pepatsivi pevecuapitsapaenexa Is-
raelnacua pevetsicuene. Nexata daxita pamonaecopiaevetavanapa Dioso
pejamatabëcueneta petovecuajutsinexatsi Israelnacua pevetsivi, daxita ba-
jarapamonaejavabelia, bajarapova tsipaebabiaba Jesúsnëyo pelivaisi.

*Pacuenia Jesús ponapona Nazaret tomarata pebarënaviatsicujinaetsi tem-
plobojavaverena yabara pelivaisi*

³⁹ Josébeje Mariábeje Jerusalén tomarata templobota exanaeveretabeje
baja daxita pacuenia Dioso Moiséspijinëta penajumecopatsilivaisi itorobat-
sibeje. Nexata baja pijatomarabelia Jesúsnëyo barënaviatabeje, Nazaret
tomarabelia, Galilea nacuata peecaetomarabelia. ⁴⁰ Nexata jane baja
Jesúsnëyo vitsaba Nazaret tomarata. Ajamatabëcuenesaë tsaonaecopiaevetavanapa Dioso
pijacuene yabara. Jamatabëcuenevitsabaponanua. Dioso yavenonaponatsi
ayaicuenia.

*Pacuenia Jesúsnëyo templobota barëcuaiuaijai judíovi pecujarubivijavabelia
yabara pelivaisi*

41 Caevai canacujitsia Josébeje Mariabeje ponabiababeje Jerusalén tomarabelia. Ponabiababeje pascuavēñfiesta penataeyabiabinexabeje. 42 Nexata baja Jesúsñeyo doce pavaibeje itsa xaina, barēponabeje icatsia Jerusalén tomarabelia pascuafiesta penataenexa. 43 Itsa baja copiaruca pascuafiesta, daxita baja penataevi bajarapafiesta, naviaba baja pijabonējavabelia. Nexata Jesúsñeyo nacopatanucalia Jerusalén tomaratalia. Mariabeje Josébeje abaxē apo yapētaeabeje Jesúsñeyo pevecuanacopatsijavatsiliabeje. 44 Jamatabējumaitsibeje saya:

—Jesúsñeyo raeta nanajetaruca vajanajuaponaevita, jamatabējaibeje.

Bajaraxuata caematacabi baja pepuaponaebeje namutua, itaxanabeje Jesúsñeyo. Nexata yanijobabeje pijamonaejavabelia, peyapētaevitsibejejavabelia ata. 45 Itsiata apo caxitajarabibeje. Nexata naviatecabeje Jerusalén tomarabelia pejaitsinexabeje Jesúsñeyo.

46 Acueyabi matacabita caxitajarababeje templobota. Jesúsñeyo naeca judíovi pecujarubivi tuatujēta. Jumetaeyeca bajarapamonae penabarēcuaicuaijailivaisi. Nexata Jesúsñeyo yanijobapona bajarapamonae penabarēcuaicuaijailivaisi yabara. 47 Nexata daxita Jesúsñeyo pejumetaeyenaevitsi, taeyena Jesúsñeyo xaniavaetsia pejumeyapētaejava judíovi pecujarubivi penabarēcuaicuaijailivaisi. Taeyenanua xaniavaetsia pejumecanaviataponaejava, abaxē tsiquirinēyovajēto ata. Bajaraxuata jamatabēcuenenabenajaquena bajarapamonae. 48 Josébeje Mariabeje itsa tanebeje bajarajota Jesúsñeyo penaecaejava, nexata jamatabēcuenenabenajacabeje. María nexata jumaitsi:

—Taxēnato, ¿detsa xuajitsia panevpeñacoparemenabeje? Paxanēbeje patacajaitarutsijavatabeje, bitso pacaitaxanatsibeje, jai María.

49 Nexata Jesúsñeyo jumaitsi penajavabelia:

—¿Detsa xuajitsia bajarapacuenia panejaitarutamebeje? Panejaitsipamebeje raja mapabotaje. Tsiapaji raja xanē taxa Dioso pijacuene taexanaenexa mapabotaje, nejamatabēcuenenabiaba, jai Jesúsñeyo.

50 Itsiata bajarapajivibeje apo jumeyapētaeabeje pajamatabēcuene yabara jumaitsi Jesúsñeyo.

51 María baja cajena pejamatabēēthētota yapētaeponapona daxita bajarapacuenie yabara. Nexata baja bajarapajivibeje pepēta Jesúsñeyo napona baja Nazaret tomarabelia. Nazaret tomarata Jesúsñeyo xaniavaetsia jumecovēñētsiaponapona pacuenia Josébeje Mariabeje itorobabiababeje. 52 Jesús abaxē vitsabanajetaruca. Jamatabēcuene vitsabanajetarucanua. Nexata Dioso pexaniajamatabēcuenia tanetsi. Daxita pamona Jesúsñeyo yapētanetsi, pexaniajamatabēcuenia tanetsi.

3

Pacuenia Juan jivibautisabinē jivi livaisi tsipaeba petusato nacuata yabara pelivaisi

(Mt 3.1-12; Mr 1.1-8; Jn 1.19-28)

¹ Pamatacabi pepo nacuaevetsinē Tiberiovenēñē xaina quince pavaibeje pevetsicujinae Romanonacua, bajara pijinia pamatacabi itsanacuanē eveta itsamonae. Bajarapamatacabi nacuaevetsinē Poncio Pilato eveta Judeanacua. Bajara pijinia pamatacabi nacuaevetsinē Herodes eveta Galileanacua. Bajara pijinia pamatacabi Herodes pejuyapijinē, nacuaevetsinē Felipe, eveta Itureanacua, Traconitenacua yajava. Bajara

pijinia pamatacabi nacuaevevtsinē Lisianas eveta Abilinianacua. ² Bajara pijinia pamatacabi Anásbeje Caifásbeje Israel nacuata sacerdotevi pepo penamatacaitorobinēbeje tsaponaponae. Bajara pijinia pamatacabi Juan, Zacarías pexēnato, petusato nacuata ponapona. Nexata Dioso itorobatsi jivi petsipaebanajetarucaenexa Dioso pitorobilivaisi. ³ Nexata Juan jivi tsipaebanajetaruca Dioso pitorobilivaisi daxita Jordánmene imoxoyo penaenacuanēta pejinavanapaevijava. Juan jumai tsanajetarucacae jivijavabelia:

—Panajamatabēcuenepēnēyorore Diosojavabelia. Pacopabare pibisiacuene paneexanabiabijava. Nexata pacabautisabianatsi Dioso papecavecuaajibiaexanaenexa pibisiacuene paneexanaeconomics, jai tsanajetarucacae Juan jivijavabelia.

⁴ Bajarapacuenia Juan jivi ita tsipaebanajetaruca, copiajopa jane baja pacuenia Diosojumepaebinēmi profeta Isaíaspijinē bajayata tajēvelia yaquina Juan yabara. Juan jivibautisabinē Dioso pitorobilivaisi jivijavabelia petsipaebanajetarucacaejavanexa yabara, yaquina. Profeta Isaíaspijinē peyaquinaelivaisita tajēvelia jumaitsi mapacueniaje:

Tanejumulivaisipaebinē vavajai tsane petusato nacuata. Jumai tsane jivijavabelia: “Jivi baxaneba panamutoverena najetarucacaejitsia petuxanenē. Batoroviaexananua namuto. ⁵ Daxita namutua pafotonē rubena, atsa baothoca penamatajēpaeyaexanaenexa namuto. Daxita petsutonēmi, pinijibotsutoxanetonēmi ata, banamatajēpaeyaexana. Baroviayaexananua penatoxorotsinamutomi ata. Banamatajēpayaexananua namutua pebobenaemēthēanēmi ata. Bajara pijinia pacuenia paxamē ata panajamatabēcuenexaniavaere pepo petuxanenē pepatsivajēnaeya paxamējavaberena. ⁶ Nexata daxitanacuanēpijivi yapētaena Dioso pecapanepaejavanexatsi pijaneconivecua,”

jai baja cajena profeta Isaíaspijinē bajayata peyaquinaelivaisita, Dioso pitorobilivaisi, Juan jivi petsipaebanajetarucacaejavanexa yabara.

⁷ Jivi ayaibitsaētoxaneto pata Juanjavaberena Juan picani pebautisabinexa bajarapamonae. Bajarapamonae apo jumecovēnētsi ata Dioso pitorobilivaisi, jamatabēcuenenavēxaniabiaya jamatabējumaitsi:

—Juan ita nacabautisabiana, Dioso nacacapanepaena, jamatabējai.

Nexata Juan jumaitsi bajarapamonaejavabelia:

—¡Panajamatabēcuenenavēxaniabivi! Pacuenia jomo rēcēpeca ita tane isoto petajuenajetarucacaejava, bajara saya paitsimē. Dioso rabaja papecananeconomicsia exanaematacabinexa pacaimoxoyotapona. Itsiata acuenebi tsane panevecuapanepaenexa Dioso papecananeconomicsia exanaematacabinexavecua. ⁸ Ita pajitsipame Dioso papecapanepaejava, pacopabare pibisiacuene paneexanabiabijava. Dioso pajumecovēnētsiajinavanapare.

Nexata daxitajivi pacayapētaena pepacuene baja panecopabijava pibisiacuene paneexanabiabijavami. Pacayapētaenanua panenajamatabēcuenepēnēyorotsijava Diosojavabelia. Jamatabēcuenenavēxaniabiaya pētsa panajumaitsimē: “Vaxaitsi cajena Abrahampijinē pemomoxitsi. Nexata Dioso nacacapanepaena,” panajamē pētsa. Abrahampijinē picani papemomoxi atamē, itsiata pibisiacuene ita paexanavanapame, nexata bajarapacueni apo pacatonamatamotsi tsipae papecapanepaenexa Diosojavabelia. Dioso baja cajena caējēpatsi jivi pexanaenexa mapaibotonēmi ataje, Abrahampijinē bepemomoxi Dioso petanenexa. Nexata bajarapamonae ata Dioso ita

apo jumecovënëtsi, Dioso apo capanepae tsipae. Nexata pacopabare pibisiacuene paneexanabiabijavami papecapapanepaenexa Dioso.
⁹ Peubinaenë pexainaenë itsa apo tonacuaititsi pexaniacuai, nicata sipalita daxita ponaenë apo tonacuaititsi pexaniacuai. Nexata baja penicatsicujinae, itsa niona bajaraponaenë, caetuata. Xuaba isotojavabelia. Nexata bajaraponaenëmi tajuatsi. Bajara pijinia pacuenia paxamë ata Dioso pacaxuabiana infernojavabelia papecatajuenexa, Dioso apo panejumecovënëtsivi, jai Juan bajarapamonaejavabelia.

¹⁰ Nexata bajarapamonae jumaitsi Juanjavabelia:

—¿Detsa nexata pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai bajarapamonae.

¹¹ Nexata Juan jumaitsi bajarapamonaejavabelia:

—Pajivi anijacamisabeje xaina, rajutsi pajiviyo apo xinae camisa. Pajivi pexaejava xaina, tsicobetsatsi pajiviyojavabelia apo xinae pexaejava, jai Juan.

¹² Gobierno pejamatabëcuene impuestomatamo pematamoyanijobabiabivi ata, pata Juanjavaberena Juan picani pebautisabinexa bajarapamonae. Nexata bajarapamonae ata jumaitsi Juanjavabelia:

—Juan, ¿detsa pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai bajarapamonae.

¹³ Nexata Juan jumaitsi bajarapamonaejavabelia:

—Itsa pamatamoyanijobabiabame impuestomatamo, pamatamoyanijobabiabare pamatamota papecaitorobivi pacatocopata paneyanijobabiabinexa. Pëtsa matatoxenetsia bajarapamatamovecua yamaxëitojorobiaya payanijobabiabame paxamë saya panepitsinexa bajarapapalata, jai Juan bajarapamonaejavabelia.

¹⁴ Nexata icatsia vajabitsaë ata jumaitsi Juanjavabelia:

—Juan, ¿jica paxanë tsane? ¿Detsa pacuene paexanaenajë daxitajivi pataneyapëtaenexa pepacuene patacopabijava pibisiacuene pataexanabiabijavami? jai vajabitsaë.

Nexata Juan jumaitsi vajabitsaëjavabelia:

—Pëtsa panejumesaëta itsajivi ata palata payacajërëtime. Pëtsa namumetsënëtsiaya itsajivi ata pananeconitsiaexaname saya palata papecarajutsinexa pecajunavi. Saya pasivabarëyamëre pacueneta pacamatamotapona papecaitorobivi, jai Juan vajabitsaëjavabelia.

¹⁵ Jivi itsatsacajinaeya copiaevetavanapa Cristo, ponë Dioso athëbëvetsica itorobijitsia pepatsijavatsica jivi pecapanepaenexa. Nexata bajarapamonae Juan itsa tanetsi, bajarapamonae jamatabëcuenenavëxaniabiaya jamatabëjumaitsi Juan yabara:

—Baja raeta jane maCristoje, daxitajivi pecapanepaenënexa, jamatabëjai bajarapamonae Juan yabara.

¹⁶ Nexata Juan jumaitsi daxita bajarapamonaejavabelia:

—Xanë raja saya pacabautisabatsi merata. Itsiata baitsi jane itsanë tacovëverena najetarucaena. Bajara jane ponë pacatsijamatabëjoneyaexanaena Espiritu Santo, pitarunutsicotia yajava. Xanë raja saya bevelijamatabëcuenenëbë bajaraponëvecua. Nexata bajaraponë vecuaauranë pijazapatö ata tataxujonotsinexa beprijajivitonëcuenianë.

¹⁷ Arrozxainaenë baja itsa vereta arroz penotsijava, jëba arroz pejëabijavata ëpexu pepitsinexa. Nexata pijaarroz pejëabijavata, tsatapona saicaya ëpexu pesivecua. Nexata ëpexu xaniavaeteta peetsibojavabelia. Pesi pijinia

penetapona vayafuabelia petajuitsinexa. Bajara pijinia pacuenia paxamē ata, Dioso pejumecovēnētsivivecua Dioso pacatsatsiana papecaxuabinexa infernojavabelia panenaxuabinexa baja daxitamatacabijavabelianexa. Pamonae pijinia Dioso pejumecovēnētsivi, Dioso capanepaenatsi pijanacuayabetsia. Pamonae pijinia Dioso apo jumecovēnētsi, Dioso naneconitsiaexanaenatsi daxitamatacabijavabelianexa apo pevevereacaesotojavabelia, jai Juan daxita bajarapamonaejavabelia.

¹⁸ Bajarapacuenia ayailivaisianēta Juan muxujiobapona jivi. Tsipaebanajetaruca pexanialivaisi pecapanepaelivaisinexatsi Diosojavabelia. ¹⁹ Bajaraxuacujinae icatsia Juan itaveta nacuaevevtsinē Herodes. Tsipaji Herodes pejuyapijinē pijava yacajērēta, Herodíasvēnēva. Daxita Herodes pibisiacuene pexanaejavanē ata, itaveta Juan. ²⁰ Itsiata baitsi jane Juan Herodes apo jumecovēnētsitsi. Caranata biji orijibia icatsia Herodes pibisiacuene exana. Herodes itoroba pijajivi Juan pevaetabinoxatsi, penaneconitsivi pejebabiabibota peetsinexatsi.

Pacuenia Juan bautisaba Jesús yabara pelivaisi

(Mt 3.13-17; Mr 1.9-11)

²¹ Juan pevaetabivajēnaetsi penaneconitsivi pejebabiabibota peetsinexatsi, jivi bautisabaponapona. Bajarapamatacabi Juan bautisaba Jesús ata. Jesús pebautisabicujinaetsi itsa vajēta Diosojavabelia, athēbētatsia itaboxo napatsia. ²² Athēbēvetsica Espiritu Santo naitajētsiaya Jesús tsi-matarunaicatsi beucucuto. Nexata Jesús jumetane athēbēvetsica Dioso pe-jumaitsijavatsi: “Xamē raja taxēnatomē, bitso tacaasivanē. Bitso casivajamatabēcuenebarēyatsi,” pejaijavatsi.

Jesucristo pijasalinaivimi pevēnēanē yabara pelivaisi

(Mt 1.1-17)

²³ Itsa baja Jesús xaina bejamatabēcuene treinta pavaibeje, taxuxuaba jane baja jivi Dioso pitorobilivaisi petsipaebijava. Jivi tanetsi Jesús beJosé pexēnato. José paxapijinē pevēnē Elí. ²⁴ Elí paxapijinē pevēnē Matat. Matat paxapijinē pevēnē Leví. Leví paxapijinē pevēnē Melqui. Melqui paxapijinē pevēnē Jana. Jana paxapijinē pevēnē José. ²⁵ José paxapijinē pevēnē Matatías. Matatías paxapijinē pevēnē Amós. Amós paxapijinē pevēnē Nahum. Nahum paxapijinē pevēnē Esli. Esli paxapijinē pevēnē Nagai. ²⁶ Nagai paxapijinē pevēnē Maat. Maat paxapijinē pevēnē Matatías. Matatías paxapijinē pevēnē Semei. Semei paxapijinē pevēnē Josec. Josec paxapijinē pevēnē Judá. ²⁷ Judá paxapijinē pevēnē Joanán. Joanán paxapijinē pevēnē Resa. Resa paxapijinē pevēnē Zorobabel. Zorobabel paxapijinē pevēnē Salatiel. Salatiel paxapijinē pevēnē Neri. ²⁸ Neri paxapijinē pevēnē Melqui. Melqui paxapijinē pevēnē Adi. Adi paxapijinē pevēnē Cosam. Cosam paxapijinē pevēnē Elmadam. Elmadam paxapijinē pevēnē Er. ²⁹ Er paxapijinē pevēnē Josué. Josué paxapijinē pevēnē Eliezer. Eliezer paxapijinē pevēnē Jorim. Jorim paxapijinē pevēnē Matat. ³⁰ Matat paxapijinē pevēnē Leví. Leví paxapijinē pevēnē Simeón. Simeón paxapijinē pevēnē Judá. Judá paxapijinē pevēnē José. José paxapijinē pevēnē Jonam. Jonam paxapijinē pevēnē Eliaquim. ³¹ Eliaquim paxapijinē pevēnē Melea. Melea paxapijinē pevēnē Mena. Mena paxapijinē pevēnē Matata. Matata paxapijinē pevēnē Natán. ³² Natán paxapijinē pevēnē David. David paxapijinē pevēnē Isai. Isai paxapijinē pevēnē Obed. Obed paxapijinē pevēnē Booz. Booz paxapijinē pevēnē Sala. Sala paxapijinē pevēnē Naasón. ³³ Naasón paxapijinē pevēnē Aminadab. Aminadab paxapijinē pevēnē Admin. Admin paxapijinē pevēnē Arni. Arni

paxapijinē pevēnē Esrom. Esrom paxapijinē pevēnē Fares. Fares paxapijinē pevēnē Judá. ³⁴ Judá paxapijinē pevēnē Jacob. Jacob paxapijinē pevēnē Isaac. Isaac paxapijinē pevēnē Abraham. Abraham paxapijinē pevēnē Taré. Taré paxapijinē pevēnē Nacor. ³⁵ Nacor paxapijinē pevēnē Serug. Serug paxapijinē pevēnē Ragau. Ragau paxapijinē pevēnē Peleg. Peleg paxapijinē pevēnē Heber. Heber paxapijinē pevēnē Sala. ³⁶ Sala paxapijinē pevēnē Cainán. Cainán paxapijinē pevēnē Arfaxad. Arfaxad paxapijinē pevēnē Sem. Sem paxapijinē pevēnē Noé. Noé paxapijinē pevēnē Lamec. ³⁷ Lamec paxapijinē pevēnē Matusalén. Matusalén paxapijinē pevēnē Enoc. Enoc paxapijinē pevēnē Jared. Jared paxapijinē pevēnē Mahalaleel. Mahalaleel paxapijinē pevēnē Cainán. ³⁸ Cainán paxapijinē pevēnē Enós. Enós paxapijinē pevēnē Set. Set paxapijinē pevēnē Adán. Adánpijinē Dioso pexanaenētsi.

4

Pacuenia picani Jesús jamatabēcuenejēbatsi dovathi yabara pelivaisi (Mt 4.1-11; Mr 1.12-13)

¹ Jesús baja naviarena Jordán meneverena Juan pebautisabicujinaetsi. Tsijamatabēvēnēcatsi bitso Espiritu Santo. Nexata Espiritu Santo ponaeyaexanatsi petusato nacuayabelia. ² Bajarajotalia Jesús ponapona cuarenta pamatacabibeje. Bajara pijinia pamatacabibeje Jesús pexaejava apo xae. Jesús nexata bitso pajani. Dovathi nexata jamatabēcuenejēbatsi pibisiacuene picani pexanaenexa. ³ Dovathi jumaiti Jesúsjavabelia:

—Itsa pepacuene Dioso pexēnatomē, itorobare mapaibotoyoje penaexanaenexa panbē, jai dovathi Jesúsjavabelia.

⁴ Jesús nexata jumaiti dovathijavabelia:

—Jume raja. Dioso raja pejumelivaisibaxutota jumaiti mapacueniaje: “Jivi raja apo namatavenonae ēpexaejava pexaenexa. Jivi raja namatavenona daxita Dioso pejumelivaisi ata pejumecovēnētsinexa pexainaenexa matabi apo peverevercaejava,” jai raja Dioso pejumelivaisibaxutota, jai Jesús dovathijavabelia.

⁵ Bajaraxuacujinae icatsia Jesús barēliatsi dovathi pinijitsutoxanetojavabelia. Barējunayatsi bajarapatsutojumabetsia. Nexata bajarapatsutojumavetsica dovathi Jesús tsitajētatsi bepimia daxitanacuanē. ⁶ Nexata icatsia dovathi jumaiti Jesúsjavabelia:

—Xanē raja carajutsianatsi daxita mapanacuanēje nevetsinexa. Daxita bajarapanacuanēta paitabēcuene taneme, cayajavarajutsianatsi. Nexata bitso nexainaenē tsane nexinaejava. Daxita tanerajutsijavanēmi, necaējēpa juya tarajutsinexa pajivijavabelia jamatabērajutajē.

⁷ Ayaijamatabēcuenenēnē netaeya taitabarata nematabacabēta ita netonucajunuame, nexata daxita mapanacuanēje nijanacuanē tsane, jai dovathi Jesúsjavabelia.

⁸ Nexata Jesús jumaiti dovathijavabelia:

—Dovathi, nevecuanatixire. Dioso raja pejumelivaisibaxutota jumaiti mapacueniaje: “Daxitajivi vajēcae pematabacabēta caenē, pepo petuxanenē Diosojavabelia. Tonacunenibinua bajaraēponēnexa,” jai raja Dioso pejumelivaisibaxutota, jai Jesús dovathijavabelia.

⁹ Bajaraxuacujinae abaxē icatsia Jesús barēliatsi dovathi Jerusalén tomarebelia. Jerusalén tomarata barējunayatsi temploboxaneto matatuyabetsia. Nexata templobo matatutatsia dovathi icatsia jumaiti Jesúsjavabelia:

—Itsa pepacuene Dioso pexēnatomē, jirevaremeca irabereca. ¹⁰ Bajarapacuenia jirevaremeca irabereca. Tsipaji xamē peitsacueneyaniva pecaevetsinexa, Dioso pejumelivaisibaxutota jumaitsi mapacueniaje: Dioso itorobianica pijaánglevi pecaevetsinexa. ¹¹ Nexata ánglevi pecobeta cayotsiana pecataxutsaquitsiyaniva ibotonējavabelia, jai Dioso pejumelivaisibaxutota xamē pecaevetsinexa ánglevi, jai dovathi Jesúsjavabelia.

¹² Jesús nexata icatsia jumaitsi dovathijavabelia:

—Jumē raja. Dioso raja pijinia pejumelivaisibaxutota jumaitsi mapacueniaje: “Itsajivi ata jamatabēcuenenavēxaniabiaya pijacuata apo bejamatabējumaitsi: ‘Xanē Dioso jamatabēcueneējētsianajē. Nexata natoexanaenajē pacuene bitso netsiayai tatēpaenexa. Itsiata Dioso neyavenonaena tavecuapanepaenexa bajaraxua. Nexata bajarapacuenia yapētaenajē Dioso taneyavenonaejava,’ apo bejamatabējai,” jai Dioso pejumelivaisibaxutota, jai Jesús dovathijavabelia.

¹³ Bajaraxuacujinae itsa baja dovathi daxitacuene Jesús jamatabēcueneējēbiveretatsi pibisiacuene picani Jesús pexanaenexa, nexata abaxē yatucopatatsi itsamatacabijavabelia icatsia pejamatabēcueneējētsinexatsi.

Pacuenia Jesús Galilea nacuata taxuxuaba Dioso pitorobilivaisi jivi petsipaebijava yabara pelivaisi

(Mt 4.12-17; Mr 1.14-15)

¹⁴ Jesús baja itsa naviatu petusato nacuaverena, Galilea nacuyaberena, Espíritu Santo pesaē yajavaponapona. Nexata daxita Galilea nacupijivi vēñelivaisitanetsi Jesús. ¹⁵ Judíovi penacaetuatabibonējava Jesús jivi livaisi tsipaebanajetaruca. Daxitajivi nexata Jesús yabara jumai tsabiabi: “Maponēje bitso ayaijamatabēcueneñē,” jai tsabiabi.

Pacuenia Jesús naviatu pijatomarabelia, Nazaret tomarabelia, yabara pelivaisi

(Mt 13.53-58; Mr 6.1-6)

¹⁶ Nexata Jesús naviatu pevitsabitomarabelia, Nazaret tomarabelia. Nexata pepatsicujinae Nazaret tomarata, judíovi penacueraevetsimatacabita Jesús najoneya judíovi penacaetuatabiboyalia. Tsipaji baja cajena Jesús bajarapacuenia exanabiaba. Nexata judíovi penacaetuatabibota Jesús nonotapuna Dioso pejumelivaisibaxuto petsimuxulebinexa daxita bajarajota penaevi pejumetaenexa. ¹⁷ Nexata Jesús tsicoberutatsi profeta Isaíaspijinē bajayata peyaquinaebaxuto. Nexata Jesús bajarapabaxuto baxupata. Nexata jane baja daxita bajarajota penaevi pejumetaenexa, Jesús tsimuxuleba itsajota bajarapabaxutota tajēvelia Jesús yabara jumaitsi mapacueniaje:

¹⁸ Dioso pijaEspíritu Santo netsijamatabēca. Tsipaji Dioso nitapeta tatsipaebinexa pexanialivaisi pibisiacuene pexanabiabijava bepeyajamatabēcuenejioibivijavabelia. Nitorobanua taja-matabēcuenexaniavaetsinexa bajarapamonae pibisiacuene pexanabiabineconi yabara bepeyajamatabēcuenejioibijavavecu. Nitorobanua taja-matabēcuenexaniavaetsinexa pamonaē piyajamatabēcueneitaquirivi, pamonaē abaxē apo yapētaē pexaniajailivaisi. Nitorobanua tacapanepaenexa pamonaē jamatabēcuenebejioibitabiabatsi pijavajabitsaē. ¹⁹ Nitorobanua tatsipaebinexa pacuenia baja Dioso najamatabēcuenevereta pecapanepaenexa pijajivi,

pejaitanejavata tajëvelia Jesús yabara Isaíaspijinë peyaquinaebaxutota Jesús tsimuxulebanuca daxita bajarajota penaevi pejumetaenexa.

²⁰ Bajaraxuacujinae Jesús baja bajarapabaxuto baxuacata. Tocanaviata baja judíovi penacaetuatabibota penacuenenibinëjavabelia. Bajaraxuacujinae Jesús baja icatsia ecareca. Daxita pamonaë judíovi penacaetuatabibibota ena, Jesús asaëyata taeyenatsi. ²¹ Nexata icatsia Jesús jumaitsi bajarapamonaëjavabelia:

—Aeconoxae Dioso pejumelivaisibaxuto pacatsimuxulebiveretatsi. Xua yabara bajarapabaxutota jumaitsi, bajaraxua baja aeconoxae mapamatacabitaje copiapata baja, jai Jesús bajarapamonaëjavabelia.

²² Nexata daxitajivi pexaniajamatabëcuenia Jesús yabara cuaicuaijai. Jamatabëcuenenabenajaca pexanialivaisi Jesús petsipaëbixae. Nexata bajarapamonaë Jesús jamatabëcuenaëbiatanetsi. Nexata bajarapamonaë nayanijobona. Najumaitsi:

—¿Matsa baja ponë Josëpijinë apo pexënatoje? najai tsenaë bajarapamonaë Jesús yabara.

Tsipaji saya bajarapamonaë jamatabëjumai tsenaë:

—Josëpijinë raja pexënato, jamatabëjai tsenaë.

²³ Nexata Jesús jamatabëcueneyapëtane pacuenia sivanajamatabëxainatsi bajarapamonaë. Nexata Jesús jumaitsi bajarapamonaëjavabelia:

—Xaniajanë cajena pacuenia pacatsipaëbijitsiatsi. Pacuenia pajumaitsimë tsabiabi pajiviyojavabelia pajamatabëcuenaëbiataneme, bajara pijinia pacuenia xanëjavabereña ata panejumaitsimë tsane patanejamatabëcuenaëbiataexaemë. Panejumaitsimë tsane mapacueniaje: “Pacuenia pacavënëlivaisitanetsi Dioso pesaëta pinijicuene nexanaëjava Capernaum tomarata, bajara icatsia pitsicuene exanare majotaje nevitsabitomarata,” panejamë tsane, jai Jesús judíovi penacaetuatabiabibota penaëvijavabelia.

²⁴ Icatsia Jesús jumaitsi bajarapamonaëjavabelia:

—Xaniajanë cajena pacuenia pacatsipaëbijitsiatsi. Itsanë ata Diosojumepaëbinëmi profetanë pijanacuapijivi apo jumecovënëtsitsi petsipaëbilivaisi. Jamatabëcuene aëbiataeyabiabatsi pijanacuapijivi. ²⁵ Bajayata profetanëmi beje pinijicuene exanaë atabeje, pinijicuene apo exanaëbeje pijanacuata. Bajara pijinia pacuenia xanë ata pinijicuene apo exanaëne tsane tavitsabitomarata. Bajayata, abaxë pamatacabi profeta Elíaspijinë ponapona Israel nacuata, bajarapamatacabi, emarapae ata, ema apo jopae. Nexata acueyabi pavaibeje epatua ajibi ema. Nexata daxita nacuanëjava bitso janibo. Bajarapamatacabi janibovajënaeya pamonajivi pevecuatëpaevanëtsi ayaibitsaëto jinavanapa Israel nacuata. Bitso bejiobi tsavanapae. ²⁶ Itsiata Elíaspijinë Dioso apo itorobitsi peyavenonaënaë bajarapamonaëyajuvënëva. Elíaspijinë Dioso itorobatsi peponaënaë Sarepta tomarapijivijavabelia, Sarepta tomarata pamona pevecuatëpaevatsi Elíaspijinë peyavenonaënaë. Sareptomara eca Sidón nacuata. ²⁷ Bajayata, Elíaspijinë pevënamuto, profeta Eliseopijinë ponapona Israel nacuata. Bajayajebi bitso peperabëtsabanaëvi, ayaibitsaëto picani jinavanapa Israel nacuata. Itsiata bajarapamatacabi profeta Eliseopijinë caenë ata pijanacuapijinë, bajayajebi bitso peperabëtsabanaëviyajuvënëne, apo jamatejemayaëxanaë. Caenë bajayajebi bitso peperabëtsabanaëne Naamán, Siria nacuaverena pepatsinë, jamatejemayaëxana, jai Jesús judíovi penacaetuatabiabibota penaëvijavabelia.

²⁸ Nexata bajarapamonae itsa jumetane bajarapacuenia Jesús pejumait-sijava, bitso Jesús baraanaepanatsi bajarapamonae. ²⁹ Bajarapamonae nonobapuna. Vaetabatsi Jesús. Caponaliatsi tomarajumabelia. Patsutoyenepanata eca Nazarettomara, bajarapatsutojumabetsia Jesús caponayatsi pexuabinexatsireca picani bajarapatsuto itapajanitovavareca. ³⁰ Itsiata baitsi jane Jesús bajarapamonae tuatuajëta najetaruca eca, pëtaenejevatsi vecuapona baja Capernaum tomarabelia. Nexata baja Jesús vecuapanepa bajarapamonae.

Pacuenia pebi, dovathi peyjavaponaponae, Jesús jamatejemayaexana yabara pelivaisi

(Mr 1.21-28)

³¹ Jesús pata Capernaum tomarata. Capernaum tomara eca Galilea nacuata. Nexata Capernaum tomarata Jesús jivi livaisi tsipaeba judíovi penacueraevetsimatacabita. ³² Itsa bajarapamonae jumetane palivaisi Jesús tsipaeba, jamatabëcuenenabenajaca. Tsipaji xaniavaetsia tsipaeba Dioso pitorobinëtsicuenia.

³³ Bajarajota judíovi penacuetaubiabibota pebi, dovathi peyjavaponaponae, naeca. Nexata bajaraponë Jesúsjavabelia vavajai tsaxuabi. Jumaitsi:

³⁴ —¡Jesús, Nazaret tomarapijinëmë, panevecuaponare baja! ¿Detsa xua paneexanaejitsiamë? ¿Najetarucame tsaja pataneveretsinexamë? Xanë cajena cayapëtanetsi. Xamë raja Dioso pexënatomë, pepo pexaniajamatabëcuenenëmë, jai dovathi peyjavaponaponae Jesúsjavabelia.

³⁵ Jesús nexata jumeitaveta dovathi. Jumaitsi:

—¡Moyamë! ¡Vecuapitsapare baja maponëje! jai Jesús.

Nexata dovathi pebi xuabatsi irata daxita bajarapamonae pitabarata. Dovathi baja pebi vecuapitsapatsi itsiata itsacuenia exanaenejevatsi.

³⁶ Nexata daxitajivi bajarapacuenia itsa tane, bitso jamatabëcuenenabenajaca. Najumaitsi bajarapamonae:

—¿De meta pacuenia maponë caëjëpatsi pijumeta pexanaenexa mapacueniaje? ¡Maponëje Jesús, beDioso pitorobinëtsitsica! ¡Itaveta dovathi pepit-sapaenexa jivivecua! ¡Nexata baja dovathi pitsapa jivivecua! najai bajarapamonae.

³⁷ Nexata Jesús vënëlivaisitanetsi daxita bajarapanacuapijivi.

Pacuenia Simón Pedro pijava pena Jesús tojamatejemayaexana yabara pelivaisi

(Mt 8.14-15; Mr 1.29-31)

³⁸ Judíovi penacuetaubiabibito pevecuapitsapaecujinae, Jesús joneya Simón Pedro pijaboyalia. Nexata bajarajota Jesús pevajënae, Simón pijava pena bitso romaebanucatsi. Nexata bajarajota itsamonae Jesús tsipaebarecëpatsi bajarapova peromaebanucavejavatsi. ³⁹ Jesús nexata cujillia peromaebanucavevatsi. Vecuaitaveta peromaebijavatsi. Nexata bajarajota peromaebanucavevatsi domae baja vecuajibi tsanajetsitsireca. Bajarapova baja jamatejema. Nexata bajarapova Jesúsvana pexaejavanexa toexanatsi.

Pacuenia ayaibitsaëto jivi, piavitanevi, Jesús jamatejemayaexana yabara pelivaisi

(Mt 8.16-17; Mr 1.32-34)

⁴⁰ Itsa baja ajena meravitsia, jivi piavitanevi, daxitaviriavitane pexainaevi, tocapatatsi Jesúsjavaberena. Jesús nexata perabëjayatapona caejivi

canacujitsia, piavitanevi. Bajarapacuenia Jesús jamatejemayaexana daxita piavitanevi. ⁴¹ Itsamonaē ayaibitsaēto, dovathi peyavajavinavanapaevi, Jesús vecuacapsapapona. Nexata dovathi itsa pitsapa, vavajai tsabiabi Jesúsjavabelia.

—Xamē raja Dioso pexēnatomē, jai tsabiabi.

Nexata Jesús jumeitavetabiaba dovathi. Apo tocopatabiabi pecuaicuai-jainexa petsipaebiyaniwa itsamonaējavabelia. Tsipajī dovathi xaniavaetsia yapētanetsi Cristo athēbēvetsica Dioso pitorobijavatsi jivi pecapanepaenexa.

Pacuenia Dioso pitorobilivaisi Jesús jivi tsipaeba Galilea nacuata yabara pelivaisi

(Mr 1.35-39)

⁴² Bajayacunua, ajena baja maticabi tsarucaponaē, Jesús pitsapa tomar-avecua. Pona pesaicaeyojavabelia. Nexata jivi pējaitatsi. Yapēnapatatsi itsajota Jesús eca. Asivatsi bajarapamonaē Jesús pevecuaponaeyaniva itsa-javabelia. ⁴³ Nexata Jesús jumaitsi bajarapamonaējavabelia:

—Itsatomaranējava ata raja tsipaebijitsianē pexanialivaisi pacuenia Dioso evetsijitsia pijajivi mapanacuataje. Bajarapalivaisi tatsipaebinexa jivi, Dioso baja cajena nitorōba, jai Jesús bajarapamonaējavabelia.

⁴⁴ Bajarapacuenia Jesús Judea nacujava livaisi jivi tsipaebanajetaruca judiōvi penacaetuatabibonējava.

5

Pacuenia dujuai bitso ayaijavaxaneto juta peyamatajucaejavata yabara pelivaisi

(Mt 4.18-22; Mr 1.16-20)

¹ Itsamatacabi Jesús nuca Genesaret pucaxaneto itapata. Nexata jivi ayaibitsaēto-xaneto cēnēnaponatsi imoxoyo pejumetaenexatsi Jesús petsipaebilivaisi, Dioso pitorobilivaisi. ² Nexata Jesús anijajerabeje taeruta bajarajota pucaitapata. Bajarapamobeje dujuai peyamatajucaevi Simónbana vecuanonobajunarēcēpa. Nexata bajarajota imoxoyo Simónbana quiatanubena dujuai peyamatajucaejava. ³ Nexata Jesús runareca jera ēnēabereca, Simón pijajera ēnēabereca. Jesús itoroba Simón jera peyatorotsinexatsilia tsiquirijavayo puca tuatuaējōjavabelia. Jesús eca jeraēnēta. Nexata Jesús jera ēnējavaverena livaisi tsipaebeca bajarapajivi bitsaēto-xanetojavabelia. ⁴ Itsa baja Jesús copata jivi livaisi petsipaebijava, nexata jumaitsi Simónjavabelia:

—Pavaeremelia jera piavajubuajavabelia. Pacoparemecca dujuai paneyamatajucaejava. Payamatajutsianame dujuai, jai Jesús Simónjavabelia.

⁵ Nexata Simón jumaitsi Jesúsjavabelia:

—Jesús, payamatajucajē rabaja picani meravijebi. Itsiata apo payamatajutsinē caenēyo ata. Itsiata pacuenia paneitorobame, pacopatsiarecajē dujuai patayamatajucaejava, jai Simón Jesúsjavabelia.

⁶ Nexata copareca pitorobicueniatsi. Itsa jutsina dujuai peyamatajucaejava, ayaijavaxaneto bitso dujuai yajutsina. Nexata dujuai peyamatajucaejava imoxo peyamaēucuucuae. ⁷ Nexata itacovaebarena penajuayamatajucaevi peponaenexarena itsamota peyavenonaenexatsi. Bajarapamonaē nubenalia puca itapatalia. Nexata bajarapamonaē ponarena. Vēnēta bajarapamobeje dujuai. Imoxo dujuai peyabubunae bajarapamobeje.

⁸ Nexata Simón Pedro itsa tane bajarapacuenē, pematabacabēta tonuca Jesús pitabarata. Jumaitsi Jesúsjavabelia:

—Tajatuxanenë, nevecuanatixire. Tsipaji xanë pibisiacuene taexanaenë, jai Simón Jesúsjavabelia.

⁹ Bajarapasamota peyavenonaenexatsi. Bajarapamonae nubenalia puca itapatalia. Nexata bajarapamonae ponarena. Vëncuenia Simón jumaitsi tsipaji penajuayamatajucaevi yajava bitso jamatabëcuenenabenajaca, bitso ayaijavaxaneto dujuai peyamatajutsixae. ¹⁰ Ponëbeje Simón yanatatsi, Santi-agobeje Juanbeje. Bajaraponëbeje Zebedeo pexënatobeje. Bajaraponëbeje ata jamatabëcuenenabenajacabeje. Nexata Jesús jumaitsi Simónjavabelia:

—Pëtsa najunaviacame. Cacujarubianatsi jivi nejucaenexa. Nexata pacuenia dujuai jucabiabame, bajarapacuenia jivi jucaename Dioso pija-jivinxexa, jai Jesús Simónjavabelia.

¹¹ Nexata bajarapamonae robobocalia jerabeje tajetabojavabelia. Bajaraxuacujinae bajarapamonae pecajinavanapaejavaximi rajuta itsamonaejavabelia. Bajaraxuacujinae pënapona baja Jesús.

Pacuenia Jesús jamatejemayaexana bajayajebi bitso peperabëtsabanaenë yabara pelivaisi

(Mt 8.1-4; Mr 1.40-45)

¹² Jesús itsa ponapona tomarata, nexata bajarajota patajopa pebi, bajayajebi bitso peperabëtsabanaenë. Itsa bajaraponë tane Jesús, pematabacabëta irataeya bocajunua Jesús pitabarata. Vajëta piniicuenia Jesúsjavabelia. Jumaitsi:

—Tajatuxanenë, cacaëjëpa raja tanejamatejemayaexanaenexamë mapavitanevecuaje. Itsa jitsipame, nejamatejemayaexanare mapavitanevecuaje, jai bitso peperabëtsabanaenë Jesúsjavabelia.

¹³ Nexata Jesús pecobeta perabëjayalia bitso peperabëtsabanaenë. Jumaitsi bajaraponëjavabelia:

—Jājā, jitsipajë cajena. Jamatejemamë rabaja, jai Jesús peperabëtsabanaenëjavabelia.

Bajarapacuenia Jesús pejumaitsijavata peperabëtsabanaenëmi baja perabëxanepananajereca. ¹⁴ Nexata Jesús jumeitaveta bajayajebi bitso peperabëtsabanaenëmi petsipaebiyaniiva itsajiviyojavabelia ata pacuenia Jesús jamatejemayaexana bajaraponë. Jesús jumaitsi:

—Naitajëremelia jane sacerdotenëjavabelia, templobota penacuenenbinëjavabelia. Nexata sacerdotenë cataena pecavecuajibijava baja niavitanejavami. Diosonexa rajuremelia ofrenda sacerdotenëjavabelia pecavecuajibixae niavitanejavami. Bajara tsipaji pacuenia bajayata vajasalinainëmi Moiséspijinë nacaitoroba. Nexata jivi yapëtaena pepacuene baja pecavecuajibijava niavitanejavami, jai picani Jesús bajayajebi bitso peperabëtsabanaenëmijavabelia jivi ayabitsaëto pevenëlivaisitaeyanivatsi.

¹⁵ Itsiata Jesús vënëlivaisitanetsi daxita bajarapanacuapijivi. Nexata Jesús jivi itsa vënëlivaisitanetsi, ayabitsaëtoxaneto patapona Jesúsjavaberena penamuxunaevetsinexatsi petsipaebilivaisi. Bajarapamonae pata Jesús pejamatejemayaexanaenexanua piavitanejavavecu. ¹⁶ Itsiata Jesús itsajavata jivivecu natixitabiaba pesaicaeyojavabelia. Bajarajota vajëtabiaba Diosojavabelia.

Pacuenia Jesús jamatejemayaexana petabusipacuenabinëtsi yabara pelivaisi

(Mt 9.1-8; Mr 2.1-12)

¹⁷ Itsamatacabi Jesús jivi livaisi tsipaeba. Bajarajota naena fariseovi. Naenanua judíovi pecujarubivi ata. Bajarapamonae pata Galilea nacuata penaetomaranêjavaverena, Judea nacuata penaetomaranêjavaverena ata, Jerusalêná tomaraverena ata. Nexata bajarapamatacabi Jesús Dioso pesaêta caêjêpaeyaexanatsi jivi pejamatejemayaexanaenexa piavitanejavavecia. ¹⁸ Nexata bajarajota Jesúsjavaverena pebijivi camayota yavêtacaraparena petabusipacuenabinêtsi. Bajarapamonae picani bajaraponê boyalia yavêtacarajonejitsialia peyabuatsinexa Jesús pitabarata. ¹⁹ Itsiata acuenebi boyalia pecajonejava. Tsipaji bitso jivi bajarapabo yavênêca. Nexata bajarapamonae petabusipacuenabinêtsi bojumabetsia cajunaya. Bomatatu javavetsica vojoexana. Nexata bajarapavojotuatsica petabusipacuenabinêtsi camayota yacopatsicatsi jivi tuatuajêatsica Jesús pitabarayatsica. ²⁰ Jesús jamatabêcueneyapêtane pacuenia bajarapamonae sivanajamatabêxainatsi. “Nacatojamatejemayaexanaenatsi cajena,” pesivajamatabêjajjavatsi Jesús jamatabêcueneyapêtane. Bajaraxuata petabusipacuenabinêtsijavabelia Jesús jumaitsi mapacueniaje:

—Pibisiacuene rabaja nexanaeconimi cavecuaajibiaexanatsi, jai Jesús bajaraponêjavabelia.

²¹ Nexata judíovi pecujarubivi, fariseovinua, itsa jumetaeyena Jesús pejumaitsijava bajarapacuenia, najamatabêxainena bêpênêa mapacueniaje:

—¿De meta maponêje? Maponêje Dioso apo pejitsipacuenia cuaicuaijai. Itsanê ata cajena apo caêjêpaetsi itsajivi pibisiacuene pexanaeconimi pevecuaajibiaexanaenexa. Caenê Dioso caêjêpatsi itsajivi pibisiacuene pexanaeconimi pevecuaajibiaexanaenexa, jamatabêjai tsenae bajarapamonae bêpênêa Jesús yabara.

²² Nexata Jesús jamatabêcueneyapêtane bajarapamonae bêpênêa pesivana-jamatabêxainenaenajava bajarapacuenia. Nexata Jesús jumaitsi bajarapamonaejavabelia:

—Pêtsa bajarapacuenia panesivanajamatabêxainame. Tsipaji cajena xanê necaêjêpa jivi pibisiacuene pexanaeconimi tavecuaajibiaexanaenexa.

²³ Paxamê apo pacacaêjêpae ata itsajivi pibisiacuene pexanaeconimi panevecuaajibiaexanaenexa, pacacaêjêpa picani saya jema panejumaitsinexa pejamatejemavijavabelia mapacueniaje: “Cavecuaajibiaexanatsi rabaja pibisiacuene nexanaeconimi,” panejainexa. Tsipaji itsajivi ata apo yapêtae tsipae saya jema panejumaitsijava. Itsiata baitsi jane itsa pepacuenê apo pacacaêjêpae panejamatejemayaexanaenexa petabusipacuenabinêtsi, nexata acuenebi panejumaitsinexa bajaraponêjavabelia mapacueniaje: “Nonotapunare. Ponare baja,” panejainexa. Tsipaji bajarapacuenia pajumaitsimê ata, itsa apo jamatejema tsipae bajaraponê, nexata daxitajivi pacayapêtaejitsipa apo papecacacaêjêpaeacuene panejamatejemayaexanaenexa bajaraponê, jai nexata Jesús bajarapamonaejavabelia.

²⁴ Icatsia Jesús jumaitsi bajarapamonaejavabelia:

—Xanê, Daxitajivi Pematapijinêné, mapanacuata necaêjêpa tavecuaajibiaexanaenexa itsajivi pibisiacuene pexanaeconimi ata pacuenia baja exanajê maponêjavabeliaje. Nexata patanecueneyapêtaenexamê tanecaêjêpaejava tavecuaajibiaexanaenexa itsajivi pibisiacuene pexanaeconimi ata, pataema pacuenia jamatejemayaexanaejitsianê maponêje, jai Jesús bajarapamonaejavabelia.

Nexata icatsia Jesús jumaitsi petabusipacuenebinêtsijavabelia:

—Xamê cajumaitsi. Nonotapunare. Nijacamayo pire. Nijaboyabelia baja ponare, jai Jesús.

²⁵ Nexata bajarapacuenia Jesús pejumlahsijavata, petabusi-pacuenebinëmitsi nonotabapuna baja daxitajivi pitabarata. Pebo-caecamayo pita. Pona baja pijaboyabelia. Penajetarucaejavata namutua, Diosojavabelia jumai tsanajetarucæ: “Diosata daxita pamonaetane petabusipacuenabinëmitsi baja pejamatejemajava, pinijicuenia jamatabëcuenenabenajaca. Nexata bajarapamonæ jumaitsi Diosojavabelia:

—Diosomë, pexaniacuenene bitso nexanaenë, jai Diosojavabelia.

Daxitajivi itsa tane bajaraponë pejamatejemajava, pejamatabëcueneta bëpënëa bitso junæ. Nexata bajarapamonæ najumaitsi:

—Ajena, mapamatacabitaje, tanetsi Dioso pinijicuenene pexanaejava, najai bajarapamonæ.

*Pacuenia Jesús pijajivitonënexa junata Levivënë yabara pelivaisi
(Mt 9.9-13; Mr 2.13-17)*

²⁷ Jesús baja vecuapona pabota jamatejemayaexana petabusipacuenabinëtsi. Nexata Jesús penajetarucaejavata taeyeta Levivënë. Bajaraponë pematamoyanijobinë impuestomatamo gobierno pejamatabëcuenene. Pabota jivijavabelia matamoyanijobabiaba impuestomatamo, bajarapabota eca Leví. Nexata Jesús jumaitsi Levíjavabelia:

—Leví, nepënaponare, jai Jesús.

²⁸ Jejai Leví. Nexata nonotapuna. Copata baja daxita pacuene bajarajota nacuenebabiaba. Pënapona Jesús.

²⁹ Bajaraxuacujinae Leví pijabota napata Jesús. Nexata Leví pinijifiesta toexana Jesús nexa. Tsipaji Leví jamatabëcuenenarëya Jesús pejunatsixaetsi pijajivitonënexa. Nexata Leví pijabota naena ayailbitsaëto jivijavabelia impuestomatamo pematamoyanijobivi gobierno pejamatabëcuenene. Itsamonæ ata Leví pijabota naena mesa muxuneneta. ³⁰ Nexata fariseovi, judíovi pecujarubavinua, Leví pijabo jumapënëvelia penubenaevi, jamatabëcuenenavëxaniabiaya baracuaicuaijaisi Jesús pijajivijavabelia. Bajarapamonæ Jesús yabara jumaitsi:

—Jesús rabaja naneconita Diosojavabelia. Tsipaji gobierno pejamatabëcuenene impuestomatamo pematamoyanijobabiabivijavata, pijamatabëcuenenebejevijavatanua, naxaeyeca pexaejava, jai bajarapamonæ jamatabëcuenenavëxaniabiaya Jesús pijajivijavabelia.

³¹ Jesús itsa jumetane fariseovi, judíovi pecujarubivinua, pebaracuaicuaijajavatsi, nexata Jesús jumaitsi bajarapomonæjavabelia mapacueniaje:

—Pevaëbinë raja apo vaëbi pejamatejemavi. Pevaëbinë raja pivitanevi vaëba. ³² Bajara pijinia xanë ata itsinë. Apo sivapatajopaenë tajunatsinexa pamonaetane baja aneconijibi tsavanapae. Sivapatajopajë raja tajunatsinexa pijaneconi pexainaevi. Bajarapomonæ junataponajë pecopabinexa pibisacuene pexanaejava, penajamatabëcuenepënëyorotsinexa Diosojavabelia, jai Jesús bajarapomonæjavabelia.

*Pacuenia Jesús yanijobatsi pamatacabibeje jivi vajëta pona Diosojavabelia pexaejava apo pexaeyabiabixae yabara pelivaisi
(Mt 9.14-17; Mr 2.18-22)*

³³ Fariseovi, judíovi pecujarubivinua, jumaitsi Jesúsjavabelia:

—Juan pijajivi, fariseovi pijajivinua, pexaejava apo xaeyabiabi pamatacabibeje Diosojavabelia vajëcapona. ¿Detsa xuajitsia xamë nijajivi pexaejava xaeyabiaba Diosojavabelia pevajëcaematacabianë ata? jai bajarapomonæ.

³⁴ Jesús nexata comparacióncuenia jumaitsi bajarapomonæjavabelia:

—Pamonae junatatsi penacasabifiestajavabelia penanabaninexa, apo at-sobi pexaejava itsa abaxë yajavaecatsi pejananacasabinë. ³⁵ Itsiata baitsi jane itsa pejananacasabinë tsi maxëpatsipatsi pijavajabitsaë pevecuacapon-aenexatsi itsajavabelia, nexata pecovëta bajarapamonae apo xae tsipae pexaejava. Tsipaji bitso najamatabëxainaejitsipa. Bajara pijinia itsi tajajivi ata. Tayajavaponaponaepato abaxë apo atsobabiabi pexaejava pamata-cabibeje Diosojavabelia vajëtapona. Itsiata pamatacabi xanë necaponaena bajarapamonaevēcua, nexata jane baja bajarapamatacabi pexaejava apo xae tsane bitso tanesivanajamatabëxainaeaxae, jai Jesús peyanijobivitsijav-abelia.

³⁶ Nexata bajarapamonae perujumatabëcuene baja penavecuaco-patsinexa, Jesús livaisi tsipaeba comparacióncuēnia, bajarapamonae pejumecovēnëtsinexa ëpejanalivaisi, Jesús petsipaebilivaisi. Bajarapamonae anijajamatabëcuenebeje pexainaeyaniva, perujumatabëcuene baja penavecuacopabinexa, Jesús livaisi tsipaeba comparacióncuēnia. Perujumatabëcuene yabara Jesús jumaitsi bajarapamonaejavabelia mapacueniaje:

—Itsajivi ata apo caucutsi pejananaxatatsijava pejanapana pecatsatarutsinexa perujunaxatatsiesetojavabelia. Itsa caucutsipa pecatsatarutsinexa pejanapana perujunaxatatsiesetojavabelia, nexata bijianaejitsipa pejananaxatatsijava. Apo itajitsipaenua tsipae pejanapana peruceajava perujunaxatatsiesetojavabelia. ³⁷ Itsajivi ata pijinia apo epacae pejanavinoranë perujubocodoruanëjavabelia bajayajebi peyajebinexa. Pejanavinoranë itsa epacaejitsipa perujubocodoruanëjavabelia, nexata pejanavinoranë yatititibia tsipae. Tsipaji perujubocodoruanë apo yanayeretsi tsipae xaniavaetsia. Tsipaji pejanavinoranë pejumalitsëxë abaxë xaina. Nexata itsa yatititibia tsipae, naxuabijitsipa vinoranëmi. ³⁸ Bajaraxuata bepaca pejanavinoranë pejanabocodoruanëjavabelia. ³⁹ Itsajivi perujuvinora piapaecujinae, apo jitsipae piapaenexa pejanavinora. Tsipaji jamatabëjumaitsi: “Perujuvinora bitso xanepana pejanavinora matatoxenetsia,” jamatabëjai, jai Jesús bajarapamonaejavabelia comparacióncuēnia. Bajarapacuenia Jesús jumaitsi comparacióncuēnia tsipaji bajarapamonae catsiteca perujumatabëcuene. Nexata Jesús jitsipa bajarapamonae pejumecovēnëtsinexa ëpejanalivaisi, palivaisi Jesús tsipaeba.

6

Pacuenia Jesús pijajivi namutua siricanajetarubena trigoxu judíovi pe-nacueraevetsimatacabita yabara pelivaisi
(Mt 12.1-8; Mr 2.23-28)

¹ Judíovi penacueraevetsimatacabita Jesús, pijajivi yajava, najetaruca namutua trigo pabianëjava. Nexata Jesús pijajivi piajanixae, trigoruanë sir-icanajetarubena. Xunacobenacaquiatanajetarubena. Xuxaeyabuatapona. ² Nexata fariseoviyajuvēnëvi jumaitsi Jesús pijajivijavabelia:

—Paxamë raja paexaname Dioso Moiséspijinëta penajumecopatsilivaisi vajanacaitavetsiucene. Apo nacaitavetsi ata trigoxu vajaxaeyaniva, itsiata ajena penacueraevetsimatacabixae, apo bepaexanaemë mapacueniaje, jai fariseovi Jesús pijajivijavabelia.

³ Jesús nexata jumaitsi fariseovijavabelia:

—Ajena, penacueraevetsimatacabita, tajajivi bajarapacuenia exanae ata, itsiata apo pibisiacuene. Tsipaji bitso piajani. ¿Apo palebimē tsi-paji Dioso pejumelivaisibaxuto paneyapētaenexa pacuenia vajasalinainēmi Davidpijinē, pebarēponaponaevi yajava, exana pamatacabi bitso piajani?
⁴ Bajaraponē Davidpijinē joneya Dioso pijatemploboyalia. Nexata Dioso pijatemploboēnēta, mesajumata bobena Diosonexa ofrendacuenia peto-jebipanbēanē. Bajarapapanbēanē itsajivi ata apo tocopatsitsi pexaenexa penaneconitsiyaniva Diosojavabelia. Ēsacerdotevi picani pexaenexa tocopatatsi. Davidpijinē apo sacerdotenē ata, pijajivi barēxae ata bajarapapanbēanē, itsiata apo vēnananeconitsi Diosojavabelia, jai Jesús fariseovijavabelia.

⁵ Icatsia pematatsēnēa Jesús jumaitsi fariseovijavabelia:

—Xanē, Daxitajivi Pematapijinēnē, netoxanepana cajena tatsipaebinexa pacuene xanepana jivi pexanaenexa penacueraevetsimatacabita ata, jai Jesús.

Pacuenia Jesús jamatejemayaexana pebi pecobetsaquenaenē yabara pelivaisi

(Mt 12.9-14; Mr 3.1-6)

⁶ Itsamatacabi Jesús joneya judiōvi penacatuatabibiboyalia judiōvi penacueraevetsimatacabita. Nexata bajarajota Jesús jivi livaisi tsipaeba. Bajarajota pebi pecujanenia pecobetsaquenaenē, naeca. ⁷ Nexata Jesús naitaxutocaevetenatsi judiōvi pecujarubivi, fariseovinua, petaenexatsi Jesús pejamatejemayaexanaejava pecobetsaquenaenē judiōvi penacueraevetsimatacabita. Nexata Jesús pecobetsaquenaenē itsa jamatejemayaexana penacueraevetsimatacabita, “Jesús raja pibisiacuene exana,” pejainexa bajarapamonae. ⁸ Nexata Jesús yapētane pacuenia bajarapamonae sivanajamatabēxainatsi. Nexata Jesús jumaitsi pecobetsaquenaenējavabelia:

—Nonotapunare. Nucare majotaje mapamonae pitabarataje, jai Jesús.

Nexata pecobetsaquenaenē nonotapuna. Nuca bajarapamonae pitabarata. ⁹ Nexata Jesús jumaitsi penaitaxutocaevetenaevitsijavabelia:

—Penacueraevetsimatacabita ata xanepana vajaexanaenexa pexaniacuene. Xanepana vajajamatejemayaexanaenexa piavitanevi, jai Jesús penaitaxutocaevetenaevitsijavabelia.

¹⁰ Jesús matatoyorotsia naēcoba daxita pamonaē ena bajarajota. Jesús jumaitsi pecobetsaquenaenējavabelia bajarapamonae pitabēnejeva:

—Namaxērovire, jai Jesús.

Nexata baja pecobetsaquenaenē namaxērovita. Bajarajota cobexanepananajereca baja. Pecobetsaquenaējavami ajibi. ¹¹ Nexata judiōvi pecujarubivi, fariseovinua, itsa tanē Jesús pecobexanepanaeyaxanaejava pecobetsaquenaenē, bitso anaepana. Nexata jane baja najumejaita pacuenia Jesús beyaxuabijitsiatsi.

Pacuenia Jesús pijajivi ayaiBITSaētoXanetoyajuvēnēvi itapeta saya doce ponēbeje apóstolevinexa yabara pelivaisi

(Mt 10.1-4; Mr 3.13-19)

¹² Jesús pijajivi ayaiBITSaētoXanetoyajuvēnēvi, doce saya ponēbeje, itapeta apóstolevinexa. Jesús pitapetsivajēnaeya apóstolevinexa, junaya petsutojumabetsia pevajētšinexa Diosojavabelia. Nexata Jesús meravijebi bajarapatsutojumatatsia vajētapona Diosojavabelia. ¹³ Bajayacunua, ajena baja matacabi tsarucaponae, Jesús junata daxita pijajivibitsaētoXaneto bajaraponējavabelia. Nexata bajarajota itapeta pijajivibitsaētoXanetoyajuvēnēvi,

doce saya ponëbeje. Bajarapamonae Jesús vënëruba apóstolevi. ¹⁴ Pamonaee Jesús itapeta apóstolevinexa mapevënëanëje. Copiaya ponë, pevënë Simón. Bajaraponë Jesús vënëruba itsavënë, Pedro. Itsanë Andrés, Simón Pedro jane baja pejuyapijinë. Itsanë Santiago. Itsanë Juan. Itsanë Felipe. Itsanë Bartolomé. ¹⁵ Itsanë Mateo. Itsanë Tomás. Itsanë Santiago, Alfeo pexënato. Itsanë Simón, celotenë. ¹⁶ Itsanë Judas, Santiago pejuyapijinë. Itsanë Judas Iscariote. Bajaraponë bexëajavabelia Jesús canajetsijtsiatsi pijavajabitsaë pecobeyabelia pebeyaxuabinexatsi.

Pacuenia Jesús jivi ayaibitsaëtoخانeto livaisi tsipaeba yabara pelivaisi
(Mt 4.23-25)

¹⁷ Jesús baja, pijajivi ayaibitsaëtoخانeto yajava, runaica petsutojumavetsica. Nexata epatua petsutoyenepanaxavata, itsajota ira namatajëpa, Jesús yajavanuca pijajivi ayaibitsaëtoخانeto. Bajarajota nexata jivi nacaetuata ayaibitsaëtoخانeto. Bajarapamonae Judea nacuapijivi, itsamonae Jerusalén tomarapijivi, itsamonae Tiro tomarapijivi, itsamonae Sidón tomarapijivi. Tiro tomarabeje Sidón tomarabeje, manuameneitapata ecabeje. Daxita bajarapatomaranëpijivi nacaetuata pejumetaenexa Jesús petsipaebilivaisi. Bajarapamonae patanua Jesús pejamatejemayaexanaenexa piavitanejavavecu. ¹⁸ Bajarapamonaeyajuvënëvi itsajamatabëcuene tsabiabi dovathi pejamatabëcueneta. Bajarapamonaenua Jesús jamatejemayaexana. ¹⁹ Daxita pamonaee bajarajota nacaetuata, Jesús picani jamatabëjayabatsi. Tsipaji Jesús daxitajivi piavitanejavavecu jamatejemayaexanapona pecajëpaejamatabëcuenetatsi.

Pacuenia Jesús pijajivi tsipaeba Jesús pijajivi pejamatabëcuenebarëyajavanexa, apo pejamatabëcuenebarëyajavanexanua, yabara pelivaisi
(Mt 5.1-12)

²⁰ Jesús pijajivi naëcota asaëya. Jumaitsi bajarapamonaeejavabelia: —Panajamatabëcuene copabame baja Diosojavabelia paneponaenexa Dioso pijatomarabetsia. Bajaraxuata paxamë bepanejamatabëcuenejibivimi panijaneconi yabara, aeconoxae baja pajamatabëcuenebarëyamë Diosojavabelia. ²¹ Pajitsipame Dioso pijacuene. Pajamatabëcuenebarëyamë baja. Tsipaji Dioso athëbëtatsia pacarajutsiana daxitacuene xua panamatavenoname. Paneyanuevimi pibisiacuene paneexanaeneconi yabara, pacavecuajibiaexana baja bajarapaneconi. Bajaraxuata itsamatacabi pajamatabëcuenebarëyamë tsane. ²² Xanë, Daxitajivi Pematapijinënë, patajajivixae, itsa pacaitoya tsane jivi, itsiata pasivajamatabëcuenebarëyamë tsane. Bajarapamonae pacanavecuaitavetsi ata tsane, itsiata pasivajamatabëcuenebarëyamë tsane. Pibisiacuena pacabijatae ata tsane, pibisiacuena pacabaracuacuajiai ata tsane, itsiata pasivajamatabëcuenebarëyamë tsane. ²³ Bajarapacuenia pacaexanae ata tsane, itsiata pasivajamatabëcuenebarëyamë tsane. Tsipaji raja Dioso athëbëtatsia pacarajutsiana bitso pexaniacuene jivi papecaitojajamatabëcuene. Pamonaee pacaitoya tsane, bajarapamonae pijasalinaivimi bajayata itoya Diosojumepaebivimi profetavi. Nexata bajarapamonae pijasalinaivimi bajayata bejiobiaexanapona Diosojumepaebivimi profetavi. Bajarapamonae aeconoxae ata pijasalinaivimi cuenejëpavanapa. Bajaraxuata paxamë ata icatsia bajarapamonae pacaitoya tsane pijasalinaivimi pecuenejëpavanapaexae.

²⁴ 'Daxitacuene mapanacuata panexainaevi, Dioso bitso ayaicuena pacabejiobiaexanaena. Tshipaji pacabarëyamë tsavanapae ëpanexainaejava mapanacuataje.

²⁵ 'Bitso bepajamatabëcuenejobimë tsane daxitacuene mapanacuata pane-natojitsipaecuene panexainaevi. Pasivajamatabëcuenebarëyamë picani tsavanapae panexainaejava. Itsiata baitsi jane itsamatacabi itsa patëpaename, panetëpaecujinae panajamatabëxainaname ayaicuena.

'Bepajamatabëcuenejobimë tsane panejëajëajaitsabiabivi sivabarëyaya mapanacuapijicueneje. Paneasaëtsavanapaeepato abaxë mapanacuataje pane-sivajamatabëcuenebarëya tsabiabixae bajarapacuene, panetëpaecujinae bitso payanuename pibisiacuene panexanaeneconi.

²⁶ 'Mapanacuapijivi pexaniacuena pacabaracuaicuajai tsabiabi saicayacuena Dioso pejumelivaisivecua panetsipaebabiabixae. Itsiata baitsi jane pamatacabi Dioso pacananeconitsiaexanaena, bitso bepajamatabëcuenejobimë tsane. Tshipaji pacuenejëpame bajayata pamonami jinavanapa. Bajarapamonami bajayata jivi tsipaebabiaba saicayacuena Dioso pejumelivaisivecua. Nexata bajarapamonami pexaniacuena baracuaicuajaitsi tsabiabi mapanacuapijivije, jai Jesús pijajivi ayaibitsaëtoxanetojavabelia.

Pacuenia Jesús pijajivi muxujioba piasivanexa pitoyavi atatsi yabara peli-vaishi

(Mt 5.38-48; 7.12)

²⁷ Icatsia Jesús jumaitsi petsutoyenepanajavata pijajivi ayaibit-saëtoxanetojavabelia:

—Pacatsipaebijitsiatsi icatsia patanenamuxunaevetsivimë. Pasivamëre papecaitojavi ata. Pexaniacuene patoexanare pamonae pacaitya.

²⁸ Payavenonare pamonae pacabijatane pibisiacuena. Pamonae pacabaracuaicuajai pibisiacuena, patovajëre Diosojavabelia peyavenon-aenexatsi. ²⁹ Itsajivi itsa pacaitabarapacabixuaba aneaya, nexata icatsia itsanena ata patonaitabaracaevere papecaitarapacabixuabinexa. Itsajivi itsa pacayacajërëta panijacamisajumavelia panenaxatatsijava, nexata patocopare panijacamisa ata papeyacajërëtsinexa. ³⁰ Pajivi itsacuenejavayo amoneya pacavajëta, parajure. Itsajivi itsa pacayacajërëta itsacuenejavayo, pëtsa payanijobame papecatocanaviatsinexa. ³¹ Xua pexaniacuene, paxamë pajitsipame itsamonae papecatoexanaenexa, coplaya paxamë bajarapapexaniacuene patoexanare bajarapamonaejavabelia, jai Jesús pijajivi ayaibitsaëtoxanetojavabelia.

³² Icatsia Jesús jumaitsi pijajivijavabelia:

—Itsa pasivamë tshipae Diosojavabelia. Tshipaji piagamatabëcuenebejevi ata, pamonae asivatsi, banamataenetsianasiva. ³³ Pexaniacuene itsa patoexanae-jitsipame pexaniacuene ëpapecatoexanaevijavabelia, nexata apo paxainamë tshipae pexaniacuene Diosojavabelia. Tshipaji piagamatabëcuenebejevi ata, pexaniacuene batoexana penajamatabëcuenejëpaevijavabelia. ³⁴ Itsa patsicopatsipame ëpanejamatabëcuene yapëtaevijavabelia baja, papecatocanaviatsinexa pacuenia patsicopatame, nexata apo paxainamë tshipae pexaniacuene Diosojavabelia. Tshipaji piagamatabëcuenebejevi ata, batsicopata penajamatabëcuenejëpaevijavabelia, pamonae jamatabëcuenyapëtane baja petocanaviatsinexatsi. ³⁵ Nexata pasivamëre panijavajabitsaë ata. Bajara-pamonaejavabelia pexaniacuene patoexanare. Bajarapamonae patsicopare panajamatabëxainanejevamë papecatocanaviatsinexa panetsicopat-

sicuenia. Bajarapacuenia bitso paxainaename pexaniacuene Diosojavabelia papecarajutsinexa athëbëtsia. Bajarapacuenia ita paexanavana-paename, Dioso, athëbëtsia peecaenë, pexicuenia pacaexanaena. Tsipaji Dioso pitaxutotsoniataenë piagamatabëcuenebejevi ata. Itsamonae Dioso yavenonae atatsi, itsiata apo canaëjëtsi Dioso peyavenonaejavatsi. Bajarapamonae apo canaëjëtsi ata Dioso peyavenonaejavatsi, itsiata tsiteca Dioso itaxutotsoniataeyabiaba. ³⁶ Pacuenia Dioso daxitajivi itaxutotsoniataeyabiaba, bajarapacuenia paxamë ata itsamonae ata paitaxutotsoniataename, jai Jesús pijajivi ayaibitsaëtoxanetojavabelia.

Pacuenia Jesús pijajivi muxujioba pitaxutotsoniataenexa itsamonae ata, pacuenia bajarapamonae ata Dioso itaxutotsoniatanetsi, yabara pelivaisi (Mt 7.1-5)

³⁷ Icatsia Jesús jumaitsi pijajivi ayaibitsaëtoxanetojavabelia petsutoyenepanajavata:

—Pëtsa panataneme pepacueni bepaneaneconijibivi. Nexata itsamonae pibisiacuene pexanaejava xaniavaetsia payapëtaenejevamë, pëtsa pabaracuaicuijamë mapacueniaje: “Bajarapitsipibisiacuene pexanaevi, Dioso bitso ayaicuenia naneconitsiaexanaenatsi,” pajamë pëtsa. Nexata paxamë ata juya bajarapacuenia itsamonae apo pacabaracuaicuijai tsane pibisiacuene paneexanaejava yabara. Itsamonae pibisiacuene pacaexanae ata, pajamatabëcuenecaevare. Pabarajamatabëcueneexanepanarenua. Nexata pijinia Dioso pitabarata pibisiacuene paneexanaejava Dioso jamatabëcuenecaeviana. Pacabarajamatabëcueneexanepanapananua.

³⁸ Parajutaponare itsamonaejavabelia penamatavenonaejavaxi. Nexata juya paxamë Dioso pacarajutaponaena pacuenia jitsipa papecarajutsinexa. Pacarajutsiana xuavajëto itsamonae parajutame matatoxenetsia, jai Jesús daxitajivijavabelia petsutoyenepanajavata.

³⁹ Jesús icatsia comparacióncuenia tsipaeba bajarapamonaejavabelia malivaisije:

—Ponë bitso itaxutotsëcëna, apo caëjëpaetsi pematacaponaenexa itsanë, ponë pijinia bitso itaxutotsëcëna. Itsa matacaponaejitsipa, nexata najujapaejitsiparecabeje bajaraponëbeje caemëthëxanetojavareca.

⁴⁰ Itsajivi pijinia ita nacujaruba, yapëtae ata baja penacujarubijava, apo jamatabëcuene matatoxenetsi pecujarubinëtsi. Itsa baja penacujarubijivi vereta xaniavaetsia penacujarubijava, nexata saya najamatabëcuenejëpabeje pecujarubinëtsibeje, jai Jesús pijajivijavabelia.

⁴¹ Jesús pijajiviyajuvënëvi pepacueni bepianeconijibivi natane. Nexata ita cujirutane itsamonae itsacuenejavayö pexanaejava, jumai tsabiabi: “Mapitsicuene pexanaevi Dioso bitso ayaicuenia naneconitsiaexanaenatsi,” jai tsabiabi. Nexata bajarapacuenia pejumaitsabiabixae, Jesús pijajivi piurabinexa jumaitsi mapacueniaje:

—Pëtsa paxamë pepacueni bepaneaneconijibivi nataeya pamuxujobame itsajivi pi-paneconi yabara. Tsipaji raja apo payapëtaemë paxamë ata pijinia paneconivajëto paxainame. ⁴² Nexata paxamë ata ayaineconixaneto ita paxainame, nexata itsanëjavabelia apo bepajumaitsimë: “Tajabananë, papibisiacuene exaname, copare,” apo bepajamë. Yamaxëitojorobiaya saya bepexaniajamatabëcuenevi nataeya pacuaicuijamë tsabiabi. Itsamonae pijaneconi yabara pabaracuaicuijamë tsabiabi. Itsiata pijinia paxamë ata paneconivajëto paxainame, apo payapëtaemë. Paxamë copiyaya pacopabare pibisiacuene paneexanabiabijava. Bajara jane xuacujinae paitavetsianame itsamonae ata pibisiacuene pexanaejava penavecuacopatsinexa, jai Jesús pijajivijavabelia.

Pacuenia peubinaenē itsa nacuaita, nayapētane pavirianaecuene yabara pelivaisi

(Mt 7.17-20; 12.34-35)

⁴³ Icatsia Jesús jumaitsi pijajivi ayaibitsaētoخانetojavabelia petsu-toyenepanajavata:

—Pexaniavirianaenē itsa ubatsi, nacuaita pijinia pexaniacuai. Apo nacuaiti pibisiacuai. Ponae pijinia pibisianaē, apo nacuaiti pexaniacuai.

⁴⁴ Caevirianaē canacujitsia yapētanetsi itsa nacuaita. Higovēnecuito apo paucutsimē cucunanaeta. Uvaru pijinia apo paucutsimē saya pejuviēnēbotota. ⁴⁵ Bajara pijinia itsi jivi ata. Pexaniajamatabēcuene pexaniacuene yabara cuaicuajiai. Tsipaji pexaniajamatabēcuene xaina pejamatabēēthētota. Pibisiajamatabēcuene pijinia pibisiacuene yabara cuaicuajiai. Tsipaji pibisiajamatabēcuene najamatabēxaina pejamatabēēthētota. Nexata pacuene yabara pebi pecuaibovojotota cuaicuajiai, bajarapacuene pitsapa pejamatabēēthēttojavavetsina, jai Jesús pijajivijavabelia.

Pacuenia Jesús livaisi tsipaeba anijanēbeje bo pexanaenēbeje pelivaisicuenia yabara pelivaisi

(Mt 7.24-27)

⁴⁶ Icatsia Jesús jumaitsi pijajivi ayaibitsaētoخانetojavabelia petsu-toyenepanajavata:

—¿Detsa xuajitsia: “Tajatuxanenē,” panejamē tsabiabi ata, itsiata apo panejumecovēnētšimē patacaitorobicuenia? ⁴⁷⁻⁴⁸ Pajivi xanējavaberena pata tanenamuxunaevetsinexa, tanejumecovēnētšinexanua, bajarapajivi apo nacueratsi tsane. Bajarapajivi piatajairata bo bepexanaenē tsane. Bajarapajivi yabara pacatsipaebianatsi. Bo pexanaenēnexa, peyapētaexae itsajota pijabo exanaejitsia pebubutsijavanexa, nexata naesituru atajaya xaniavaetsia mēthēca piatajairata. Nexata pijabo toyabubutsi ata, petojopaeyanivatsi. Bajaraxuacujinae bo baja vereteta. Itsa baja mene avajubuatsica, pijabo toyabubutatsi. Mera asaētsica bojavabetsica. Itsiata pijabo apo tonanequetsitsi. Tsipaji naesituru xaniavaetsia mēthēca piatajairata. Nexata bajaraponē apo nacueratsi bo pexanaejava. ⁴⁹ Pajivi nejumetae ata tsane tatsipaebilivaisi, itsiata itsa apo nejumecovēnētšimē tsane tatsipaebilivaisi, nacueratsiana. Bajarapajivi tajetabota bo bepexanaenē tsane. Ponē tajetabota pijabo exaneta, yapētae ata emarapae pecopiapatsijavanexa, bajaraponē nacuerata bo pexanaejava. Tsipaji bo peveretetsicujinae, mene avajubuatsica. Nexata pijabo toyabubutatsi. Bo nexata jopaica. Pepacuene baja nexata abeje, jai Jesús pijajivijavabelia.

7

Pacuenia vajabitsaē pijacapitán pijabota petonacuenebaponaponaeñtsi, Jesús tojamatejemayaexana yabara pelivaisi

(Mt 8.5-13)

¹ Jesús baja itsa najumevereta pijajivi ayaibitsaētoخانetolivaisi petsipaebijava petsutoyenepanajavata, pona baja Jesús Capernaum tomara-belia. ² Capernaum tomaronē ponapona Romano nacuapijinē, vajabitsaē pijacapitán. Bajaraponē pijajivitonē, bitso piasivanē, toavitantsi. Totēpaējitsiatsi baja. ³ Bajaraponē capitán vēñēlivaisitanetsi Jesús pejamateje-mayaexanaponaejava piavitanevi. Nexata capitán jumaitsi judíovi pijaancianovijavabelia:

—Panetojunaremelia Jesús. Pabarëpatsiaremena tajaboyaberena tanetomatejemayaexanaenexa tajajivitonë, jai capitán judíovi pijaancianovijavabelia.

⁴ Nexata bajarapamonae pona Jesúsjavabelia. Itsa pata Jesúsjavabelia, pini-
jicunia junata. Jumaitsi Jesúsjavabelia:

—Bajaraponë capitán bitso pexaniajamatabëcuenenë. Nexata tojamate-
jemayaexanaename pijajivitonë. ⁵ Tsipaji raja bajaraponë nacaasiva vax-
aitsi judíovitsi. Matamota cajena pijapalatata vajanacatoexanetsinexa va-
janacaetuatabibonexa, jai judíovi pijaancianovi Jesúsjavabelia.

⁶ Nexata Jesús nalia bajarapamonae pepëta. Itsa baja imoxoyotanje-
tarubena capitán pijabo, nexata capitán icatsia peyapëtaevitsi itoroba Jesús
pemataenenaenexatsi. Capitán peyapëtaevitsi itoroba Jesúsjavabelia peju-
mitsinexa mapacueniaje:

—Petuxanenë, pëtsa paremena tajaboyaberena. Apo caquenetsiatæ-
jitsipaetsi. Beveliajamatabëcuenenënë raja saya xanë xamëvecua. Nex-
ata apo xanepanae tsipae nenajonejava tajaboyaberena. ⁷ Apo neja-
matabëcuenecäëjæpaenua taponaejava xamëjavabelia ata. Saya bajaraver-
ena itorobare ënijume. Nexata tajajivitonë netojamatejema tsane. ⁸ Xanë
ata xainajë taneitorobabiabivi taneitorobicuenia tajumecovënëtabiabinexa.
Xanë ata juya xainajë vajabitsaë, tajajivi, taitorobicuenia tanetoexanabi-
abinexa. Nexata itsa itorobajë caenë vajabitsaënë peponaenexa, bajaraponë
ponabiaba. Itsa junarenajë itsanë vajabitsaënë pepatsinexa maberenaje,
bajaraponë patabiabarëna. Itsa itorobajë tajajivitonë tanetoxanaenexa
itsacuenejavayo, nexata netoexanabiaba. Bajara pijinia pacuenia xamë
ata nexanaenexa, cacaëjæpa. Nexata saya bajaraverena ënijume itorobare
saya ënijumeta tajajivitonë tanetojamatejemayaexanaenexamë, jai capitán
mapacueniaje petonajumeitorobijume Jesúsjavabelia.

⁹ Jesús itsa jumetane bajarapacuenia capitán petonajumeitorobijumetsi,
jamatabëcuenenabenajaca capitán petonajumeitorobijumetsi yabara. Nexata
napënëyorotaxuaba Jesús. Jumaitsi pepënanajetarubenaevitsijavabelia:

—Xaniajanë pacuenia pacatsipaebijitsiatsi. Caeto ata cajena Israel
nacuapijinë apo caxitajarabaxuabinë xanëjavaberena bitso tanesivanaja-
matabëcuenecopatsinë pacuenia mapacapitán nesivajamatabëcuenecopatsiaya
jumaitsije, jai Jesús capitán yabara. ¹⁰ Nexata baja pamonaë capitán
itorobalia Jesús petsipaebinxatsi capitán penajumeitorobilivaisi, navi-
abarena baja capitán pijaboyaberena. Itsa baja pata boyaberena, caxita-
jaraba baja capitán pijajivitonë pejamatejemanë.

*Pacuenia pamona pevecuatëpaevatsi pexënato Jesús toasaëyaexana,
petëpaenëmi, yabara pelivaisi*

¹¹ Jesús pona Naín tomarabelia. Nexata yanatatsi pijajivi, itsamonae
yajava, ayaibitsaëttoxaneto. ¹² Itsa baja Jesús patanajetaruca Naín tomara
imoxoyovata, nexata camataenenatsi petëpaenë pecanajetarubenaevi.
Bajarapamonae petëpaenë tomaravelia capitsapa pemëthëtsinexa
tomarapënëyabelia. Ponë tæpa, bajaraponëmi pamona pevecuatëpaevatsi
pexënato, pepo cainë. Nexata pamona pevecuatëpaevatsi pexënato, petëpaenë,
itsa caponaliatsi pemëthëtsinexatsi, tomaraverena jivi ayaibitsaëttoxaneto
pënaponatsi. ¹³ Nexata Jesús itsa tane bajarapova, tsitabejiobitsi bitso.
Nexata Jesús jumaitsi bajarapovajavabelia:

—Matanueyabijitsipame, jai Jesús.

14 Nexata Jesús cujitalalia petēpaenē peyacajoniacanajetarubenaevi. Pecobeta jayata cajoni. Nexata petēpaenē peyacajoniacanajetarubenaevi, nubenaothopa. Nexata Jesús jumaitsi petēpaenējavabelia:

—Pevējēato, xanē raja cajumaitsi. Namatacore, jai Jesús.

15 Nexata baja petēpaenēmi namatacota. Cuaicuajai. Jesús baja tocanaviata piasaenē penajavabelia. 16 Nexata daxita petaevitsi jamatabēcuenenabenajaca. Najumaitsi bajarapamonaē:

—Dioso bitso ayaijamatabēcuenenē. Pinijiamatabēcuene pexainaenē, profeta, nacatsitanajamatabēcueneitajēta. Dioso pinijicuene pexanaejava ata nacatsitajēta vajataenexa, najai bajarapamonaē Jesús yabara.

17 Daxita Judea nacuapijivi, imoxoyo nacuanējava ata pejinavanapaevi, Jesús vēnēlivaitsanetsi xua exana.

Pacuenia Juan jivibautisabinē itoroba pijajivitonēbeje Jesúsjavabelia yabara pelivaisi

(Mt 11.2-19)

18 Juan jivibautisabinē naneconitsia ponapona penaneconitsivi pejebabi-abibota. Nexata pijajivi tsipaebatsi daxita Jesús pexanaponaejava yabara. Nexata Juan junata anianēbeje pijajivitonēbeje pitorobinexa Jesúsjavabelia.

19 Juan pitorobivajēnaē pijajivitonēbeje, jumaitsi bajaraponēbejejavabelia:

—Pajumaitsimēbeje tsane Jesúsjavabelia: “¿Xamē tsabaja Cristomē? ¿Xamē tsabaja tajēvelia cavajunupaebapona nepatsijavanexatsica daxitajivi necapanepaenexa? Itsa apo Cristomē, ¿abaxē tsaja pacopiaevetavanapaenajē itsanē athēbēvetsica Dioso pitorobinexatsicatsi jivi pecapanepaenexa?” jai raja Juan,” pajamēbeje tsane Jesúsjavabelia, jai Juan pijajivitonēbejejavabelia.

20 Nexata Juan pijajivitonēbeje itsa patabeje Jesúsjavabelia, Juan pijajivitonēbeje jumaitsi beje Jesúsjavabelia:

—Juan raja jivibautisabinē paneitorobabeje patacayanijobinexabeje. “¿Xamē tsabaja Cristomē? ¿Xamē tsabaja tajēvelia cavajunupaebapona nepatsijavanexatsica daxitajivi necapanepaenexa? Itsa apo Cristomē, ¿abaxē tsaja pacopiaevetavanapaenajē itsanē pepatsijavanexatsica?” jai raja Juan, jai beje jane baja Jesúsjavabelia.

21 Nexata bajaraponēbeje pitabēta Jesús jamatejemayaexanapona ayaitbit-saēto xaneto piavitanēvi. Dovathi peyajavajinavanapaevi ata vecuacapit-sapa dovathi. Itaxutoxanepanaeyaexanana pamonaē bitso itaxutotsēcēna.

22 Nexata Jesús jumaitsi Juan pijajivitonēbejejavabelia:

—Paponarebeje baja. Patsipaebianamebeje Juanjavabelia pacuenia baja patanemebeje taexanaponaejava. Patsipaebianamebejenua pacuenia baja pajumetanemebeje tatsipaebilivaisi jivijavabelia. Apo petaevimī ata itaxutoxaniavaetaponajē xaniavaetsia petaenexa. Petabusipacuen-abivitsinua daxita jinavanapaeyaexanaponajē. Bajayajebi bitso peper-abētsabanaevinua vecuajibiaexanaponajē baja. Bitso pemexusipanaevinua jumetaeyaexanaponajē baja xaniavaetsia pejumetaenexa. Petēpaevimī ata icatsia asaēyaexanaponajē. Pexanialivaisinua pecapanepaelivaisinexatsi pibisiacuene pexanaeneconimivecua, tsipaebaponajē bepejio bivi javabelia. Daxita bajaraxua taexanaponaejava patanetaejavamēbeje, patsipaebianamebeje Juanjavabelia. 23 Pajumaitsimēbejenua tsane Juanjavabelia: “Jesús raja jumaitsi: ‘Jamatabēcuenebarēya pajivi tsitaca nejumecovēnēta xanē Dioso pexēnatocueneenē,’ jai raja Jesús,” pajamēbeje tsane Juanjavabelia, jai Jesús Juan pijajivitonēbejejavabelia.

24 Itsa baja Juan pijajivitonēbeje naviatabeje, nexata bajaraponēbeje pecovēta Jesús taxuxuaba jivijavabelia petsipaebijava Juan pelivaisi. Jesús jumaitsi jivijavabelia:

—Itsa paponame petusato nacuyabelia pamatacabi Juan ponapona petusato nacuata, ¿detsa pitsicuene pajamatabēnaponaremelia panetaenexa bajarajotalia? ¿Paponaremelia tsaja saya panetaenexa musuli penajēabijava jovibota? 25 Itsa apo paponamēlia panetaenexa musuli penajēabijava jovibota, ¿detsa nexata pitsicuene panetaenexa paponaremelia? ¿Paponaremelia tsaja saya panetaenexa naitabētsiaya pexaniajava penaxatatsinē? Paxamē rabaja payapētaneme mapacueneje. Pamonae naitabētsiaya pexaniajava naxatababiaba, pamonae ata nabanebiaba pexanianabanijavanē, bajarapamonae jinavanapa nacuanē pevetsivi pijabonējava. 26 ¿Detsa nexata xua pajamatabēnaponaremelia panetaenexa petusato nacuyabelia? Paponaremelia raja panetaenexa Diosojumepaebinē profetanē. Xaniajanē pacuenia pacatsipaebijitsiatsi. Juan itsa pataneme, pepacuene jane baja pepo profetanē, Diosojumepaebinē, pataneme. Nexata saya bevelia profetanē apo pataemē. 27 Juan pexanaejavanexa, bajayata tajēvelia Dioso pejumelivaisibaxutota vajunupaeba. Dioso tanejumaitsijava ata xanējavabereña, Dioso pejumelivaisibaxutota jumaitsi mapacueniaje:

Itorobianajē nevajēnaeyabelia tanejumelivaisipaebinēnexa jivi pecatsivajēnae najamatabēcuenexaniavaetsinexa, jai bajayata Dioso pejumelivaisibaxutota athēbēvetsica tapatsivajēnaeyatsica Juan tanelivaisi paebanajetarucaejavanexa yabara.

28 Juan ayaijamatabēcuenenē mapanacuataje. Nexata bajayata Juan pevajēnaeya paprofetavimi jinavanapa, itsanē ata Juan apo jamatabēcuenematatoxenetsitsi. Itsiata baitsi jane pajivi beveliajamatabēcuenējivi ata, itsa najamatabēcopata baja Diosojavabelia pijatuxanenē pexanaenexa, bajarapajivi juya Dioso ayaijamatabēcuenējivi exanaenatsi Juan matatoxenetsi, jai Jesús Juan jivibautisabinē yabara.

29 Juan vēnēlivaisitanetsi daxitajivi. Impuestomatamo pematamoyanijobivi ata gobierno pejamatabēcuenē, vēnēlivaisitanetsi. Bajarapamonae jumecovēnēta palivaisi Dioso najumecopata Juanjavabelia. Nexata Juan bautisaba bajarapamonae. 30 Itsiata fariseovi, judiōvi pecujarubivina, namuxujemata bajarapalivaisi. Nexata picani pacuenia Dioso tojitsipatsi bajarapamonae pexanaenexa, apo exanae. Nexata Juan apo bautisabi bajarapamonae.

31 Jesús icatsia jumaitsi jivijavabelia:

—¿Detsa meta pacuenia yapētaeyaexanaenajē itsamonaejavabelia bajarapamonae xaniavaetsia papecaypētaenexa pacuenia paxamē pajamatabēcuenēitsimē tsavanapae? Jumaitsinē meta tsane paxamē yabara mapacueniaje: 32 “Bajarapamonae abaxē saya bepejevaxijivixi, pajivixi tomara tuatujējava banamuxusitenavanapa. Pejjevaxijivixi itsa namuxusitenavanapa, bavavajai tsenae penajua namuxusitenaevijavabelia. Pevavajaijavata bajumaitsi: ‘Pacatoobecatsi picani flauta. Itsiata apo payavajibimē. Pacatonaxēanecatsti picani panemuxunanuevajinexa ata. Itsiata apo panuemē,’ bajai tsenae pejevaxi penajua namuxusitenaevijavabelia. Bajara saya jamatabēcuenēitsi pamonae aeconoxae jinavanapa mapanacuataje,” janē meta tsane paxamē yabara. 33 Juan jivibautisabinē Dioso pitorobilivaisi jivi tsipaebanajetaruca. Pexaejava itsajavata apo xaeyabiabi pamatacabibeje Diosojavabelia vajētapona. Vinora ata apo apaeyabiabi. Nexata bajaraponē

yabara jamatabëcuenenavëxaniabiaya pajumaitsimë tsabiabi: “¡Juan raja dovathi yajavaponapona!” pajamë tsabiabi jamatabëcuenenavëxaniabiaya.
³⁴ Bajaraxuacujinae icatsia xanë, Daxitajivi Pematapijinënë, najetarucajë. Itaxutojema xaniji. Matavëjëa apaeyabiabajënu. Nexata xanë yabara icatsia jamatabëcuenenavëxaniabiaya pajumaitsimë tsabiabi: “¡Pataema maponëje! Ayaijava xaeyabiaba. Ayaira matavëjëa apaeyabiabanua piaitajibinexa. Barënajamatabëcuenejëpanua gobierno pejamatabëcuene impuestomatamo pematamoyanijobabiabivi. Pamonaë ata pija-matabëcuenebejevi, barënajamatabëcuenejëpa,” pajamë tsabiabi xanë yabara.
³⁵ Itsiata baitsi jane itsamonaë xaniavaetsia yapëtaena paxanëbeje Juanbeje Dioso jamatabëcueneta bitso pataneyapëtaeyaexanaejavabeje. Nexata daxita bajarapamonae yapëtaena pacuenia Dioso paneyapëtaeyaexanabeje pepacuenepo pexaniajajamatabëcuene, jai Jesús mapacueniaje jivjavabelia.

Pacuenia Jesús exanatsi Simón pijabota yabara pelivaisi

³⁶ Fariseonë, Simónvënë, pijabota Jesús penanabaninexa, junatatsi. Nexata Jesús napona Simón pijaboyabelia. Jesús naeca mesa muxuneneta penanabaninexa. ³⁷ Bajarapatomarata ponapona petiriva, pibisiacuene pexanabiabiva pevitota palata pepitsinexa. Bajarapova itsa jumetane penanabanijavanexa Jesús Simón pijabota, nexata bajarapova capata alabastrovënë ibotota pexanaebotellabë. Pevënëcaebë pexaniapetuxujuvia-ceitera. Bajarapova capata bajarapaaceitera Jesús petsitaxuepacaenexa. ³⁸ Nexata bajarapova Jesús petaxusalibëniya, pematabacabëta nucajunua petsitaxuepacaenexa jane baja bajarapaaceitera. Nexata saya bajarajota itacarajeta bajarapova nua. Tsipaji pibisiacuene pexanabiabineconi bitso yanajamatabëxaina. Nexata bajarapova pitaxutobarëmene othopa Jesús petaxujavabereca. Nexata bajarapova pematadata taxuiguica. Bajaraxuacujinae yayataeya taxutsutsune. Tsitaxuepaca jane baja petuxujuviaceitera. ³⁹ Nexata Simón, ponë Jesús junatatsi, itsa tane pacuenia petiriva exana Jesúsjavabelia, nexata Simón jamatabëjumaitsi mapacueniaje:

—Itsa peneta pepacuenepa ponë Jesús, pepo profetanë tsipaeje, nexata yapëtaejitsipa pitsijamatabëcueneva taxujayabatsi. Yapëtaejitsipa bajarapova pibisiacuene pexanabiabivacuene. Nexata apo tocopatsi tsipae petaxujayabinexatsi, jamatabëjai Simón Jesús yabara.

⁴⁰ Nexata Jesús jumaitsi Simónjavabelia:

—Simón, xainajë livaisiyo tacatsipaebineja, jai Jesús.

Simón nexata jumaitsi:

—Jesús, netsipaebare, jai.

⁴¹ Nexata Jesús jumaitsi Simónjavabelia comparacióncuenia:

—Palata petsicopababiabinë amoneyabatsi anijanëbeje. Caenë amoneyabatsi quinientos padenariobeje. Itsanë amoneyabatsi saya cincuenta padenariobeje. ⁴² Nexata bajaraponëbeje apo xainaabeje juya petocanaviatsinexabeje petsicopatsimatamotsibeje. Nexata palata petsicopatsinë jumaitsi bajaraponëbejejavabelia: “¡Iquinajë baja bajaraxuami pata-niamoneyabijavamëbeje. Naxuabi baja jema,” jai. ¿Detsa nexata ponë bitso sivajamatabëcuenebarëya palata petsicopatsinëtsibejejavabelia? jai Jesús Simónjavabelia.

⁴³ Simón nexata jumaitsi Jesúsjavabelia:

—Ponë meta picani ayaijava amoneyaba, sivajamatabëcuenebarëya palata petsicopatsinëtsijavabelia, jai Simón.

Nexata Jesús jumaitsi:

—Xaniajamē rabaja, jai Jesús Simónjavabelia.

⁴⁴ Jesús napēñeyorota petirivajavabelia. Nexata jumaitsi Simónjavabelia:

—Simón, ¿taneme tsabaja pacuenia exana xanējavaberena mapovaje? Xanē junuajē nijaboyaberena. Tsiata yaiyataeya xaniavaetsia apo necopiapit-simē. Apo nerajutsimē mera ata tanataxuquiatsinexa. Mapovaje netax-uguiata baja pitaxutobarēmeneta. Netaxuiquicanua pematana. ⁴⁵ Xamē nijabota patsi atanē, apo nitabaratsutsunimē tanecopiapitsinexamē xani-avaetsia. Mapovaje tapatsicujinae apo copatsi cajena yaiyataeya tanetax-utsutsuneponaejava. ⁴⁶ Xamē xaniavaetsia tanecopiapitsinexamē, apo net-simataepanaemē aceitera. Mapovaje netsitaxuepaca pexaniapetuxujuvia-ceitera. ⁴⁷ Nexata catsipaebatsi neyapētaenexa mapacuneje. Mapovaje pini-jicuenia nesivajamatabēcuenearēya. Tsipaji ayaineconi ata pibisiacuene pexanaeneconimi, vecuaajibiaexanajē. Pajivi saya tsiquirineconiyo vecuaa-jibiaexanajē, pibisiacuene pexanaeneconi, nayapētane. Tsipaji saya bajara-pajivi tsiquirijavayo nesivajamatabēcuenearēya, jai Jesús Simónjavabelia.

⁴⁸ Nexata Jesús jumaitsi petirivajavabelia:

—Pibisiacuene rabaja nexanaeneconimi cavecuaajibiaexanatsi, jai Jesús.

⁴⁹ Itsamonae ata, pamonae Simón junata penanabaninexa Simón pijabota, naena mesa muxuneneta. Nexata bajarapamonae najumai tsenae Jesús yabara:

—¿Detsa meta maponēje? Jamatabēcuenenavēxaniabiaya natane bepeja-matabēcuenecaējēpaenētsi jivi pibisiacuene pexanaeneconi pevecuaajibiaex-anaenexa, najai tsenae bajarapamonae.

⁵⁰ Nexata Jesús jumaitsi petirivajavabelia:

—Dioso pecacapanepaeva tsane pibisiacuene nexanaeneconimivecua. Tsipaji nesivanajamatabēcuenecopatame xanējavaberena. Jamatejema baja ponare. Cavecuaajibiaexanatsi rabaja pibisiacuene nexanaeneconimi, jai Jesús petirivajavabelia.

8

Pacuenia Jesús, pijajivi, pebijivi, petiriavinua, yajavanajetaruca yabara pelivaisi

¹ Simón pijabota Jesús penanabanicujinae, najetaruca pinijitomaranējava, tsiquiritomaraxijava ata. Tsiapaebanajetaruca pacuenia Dioso pijajivi evetsijitsia. Jesús, pijajivi doce ponēbeje, apóstolevi, yajavanajetaruca.

² Jesús yajavanajetaruca petiriavinua, papetiriavi dovathi vecuacapitsapa yajuvēñevi. Papetiriavi ata piavitanejavavecua Jesús jamatejemaya exana yajuvēñevi, Jesús yajavanajetaruca. Bajarapapetiriaviyajuvēñeva, caeva pevēñē María, Magdala tomarapijiva. Bajarapova Jesús vecuacapitsapa siete ponēbeje dovathivi. Bajarapadovathivi Jesús pevecuacapitsapaecujinae, María pēnaponatsi. ³ Itsava pevēñē Juana, Cuzavēñēñē pijava. Bajaraponē Cuzavēñēñē, nacuaevetsinē Herodes pijajivitonē. Itsava pevēñē Susana. Bajarapapetiriavi pematatsēñea, itsapetiriavi, ayabitsaēto, yajavanajetaruca Jesús. Bajarapapetiriavi pexainaepalatayajuvēñējava, rajuta Jesúsjavabelia. Nexata xuaxi Jesús pijajivi barēnamatavenona pebarēcomuatsinexa bajarapa-palatata.

Pacuenia Jesús jivi livaisi tsipaeba peubinē pelivaisicuenia yabara pelivaisi (Mt 13.1-9; Mr 4.1-9)

⁴ Jivi naropoba tomaranëjavaverena. Pata Jesúsjavaberena petaenexatsi. Itsa baja ayaibitsaëtoxaneto nacaetuata Jesúsjavaberena, nexata Jesús livaisi tsipaeba peubinë pelivaisicuenia. Jesús jumaitsi mapacueniaje:

⁵ —Peubinë pona pabiabelia peubinea. Nexata itsa pata pabita, peubixu pexucayajabajarabucenia ubanajetaruca. Nexata itsaxu othopa pabi tuatujëjava penajetarucaenamutojumata. Bajarapaxu jivi taxunanonoba. Nexata bajarapaxumi juvinejeva baratsui xane. ⁶ Itsaxu pijinia othopa ibopananëjumata, itsajota bitso ira apo aitayae. Nexata bajarapaxu juvi ata, tsaquenapona. Tsipaji ira tseva. ⁷ Itsaxu pijinia othopa xanëebacabomijavata. Nexata peubixu xanëebotonë caecuenia itsa yajavajuva, bitso xanëebotonë matacënëatsi peubijavami. ⁸ Itsaxu pijinia othopa pexaniairata. Bajarapaxu itsa juva, vitsaba. Nexata xaniavaetsia nacuaïta. Itsabotonë capitsapa cien paxutoyobeje ata, jai Jesús jivi ayaibitsaëtoxanetojavabelia.

Itsa Jesús tsipaeba bajarapalivaisi, pinijijumeta jumaitsi:

—Pajivi jamatabëjumeyapëtane patacatsipaebilivaisi, nenamuxunaevetsi xaniavaetsia, jai Jesús bajarapalivaisi petsipaebivijavabelia.

Pacuene yabara Jesús jivijavabelia livaisi tsipaeba ëcomparacióncuenia yabara pelivaisi

(Mt 13.10-17; Mr 4.10-12)

⁹ Nexata Jesús pijajivi yanijobatsi. Jesús pijajivi jumaitsi Jesúsjavabelia:

—Palivaisi jivijavabelia tsipaebame peubinë pelivaisicuenia, pajamatabëcuene xaina, patayapëtaenexa panetsipaebare, jai Jesús pijajivi Jesúsjavabelia.

¹⁰ Jesús nexata jumaitsi pijajivijavabelia:

—Paxamë rabaja xaniavaetsia Dioso pacayapëtaeyaexana Dioso papijajivimë papecaevetsijava. Bajarapacuene abaxë daxitajivi apo yapëtae. Bajaraxuata bajarapamonae itsa tsipaebajë livaisi, ëcomparacióncuenia tsi-paebaponajë. Nexata bajarapamonae tae ata Dioso pesaëta pinijicue-ne taexanaejava, itsiata apo yapëtae pajamatabëcuene yabara exanajë pinijicue-ne taexanaejava. Namuxunaevetsi ata tatsipaebilivaisi, itsiata apo jumeyapëtae pajamatabëcuene xaina tatsipaebilivaisi, jai Jesús pijajivijavabelia.

Pacuenia Jesús yapëtaeyaexana pijajivi pajamatabëcuene xaina palivaisi tsi-paeba peubinë pelivaisicuenia yabara pelivaisi

(Mt 13.18-23; Mr 4.13-20)

¹¹ Icatsia Jesús jumaitsi pijajivijavabelia:

—Mara pajamatabëcuenelivaisi xainaje, palivaisi pacatsipaebatsi pabita peubinë pelivaisicuenia. Pacuenia itsi pabita peubixu, bajara pijinia itsi Dioso pitorobilivaisi jivi pejamatabëëthëta. Dioso pitorobilivaisi jivi itsa tsipaebatsi, tsijamatabëubatsi Dioso pitorobilivaisi. ¹² Nexata pacuenia itsi pabita peubixu, paxu othopa pabi tuatujëjava penajetarucaenamutojumata, bajara tsijamatabëcueneitsi itsamonae Dioso pitorobilivaisi. Bajarapamonae itsa tsipaebatsi Dioso pitorobilivaisi, jumetane picani. Tsi-jamatabëubatsi jane baja picani Dioso pitorobilivaisi. Itsiata baitsi jane pejumetaecujinae bajarapalivaisi, bepijia dovathi najetaruca bajarapamonaejavaberena. Nexata bajarapamonae tsijamatabëjuvinejevatsi, petsijamatabëubilivaisitsi dovathi baja vecuapitatsi bajarapalivaisimi. Vecuapitatsi pevabënaeyabelia Dioso pejumecovënëtsiyaniva, Dioso pecapanepayanivatsi pibisiacuene pexanaeconivecu. ¹³ Pacuenia pijinia itsi paxu othopa ibopananëjumata, itsajota bitso ira apo aitayae, bajara tsijamatabëcueneitsi itsamonae Dioso pitorobilivaisi. Bajarapamonae Dioso pitorobilivaisi

jumetane. Nexata picani bajarapalivaisi barëyaya jumecovënëta. Itsiata baitsi jane pacuenia irabereca apo atabunepepiareca paxu othopa ibopananëjumata, nexata nabijiana, bajara tsijamatabëcueneitsitsi bajarapamonae Dioso pitorobilivaisi. Tsipaji saya caeapatoyo jumecovënëta bajarapalivaisi. Nexata paepatota dovathi jamatabëcuenejëtatsi, copaba baja bajarapalivaisi pejumecovënëtsijavami. ¹⁴ Pacuenia pijinia paxu othopa xanëebacabomijavata, itsa juva, bitso matacënënatsi xanëebotonë, bajara tsijamatabëcueneitsitsi itsamonae Dioso pitorobilivaisi. Jumetane picani bajarapamonae Dioso pitorobilivaisi. Itsiata baitsi jane bitso jamatabëcueneenatsi mapanacuapijicuene yabaraje. Tsipaji najamatabëxaina ayaijava palata pexainaenexa. Najamatabëxainanua pexanaenexa pacuene mapanacuapijivi exana saya jema pebarëyanexa. Bajaraxuata Dioso pitorobilivaisi apo tovtsabitsi pejamatabëëthëtota. Nexata pacuenia itsi pabita piacuaijibibotonë, bajara itsi bajarapamonae. Tsipaji Dioso xaniavaetsia apo tojnavanapae. ¹⁵ Pacuenia pijinia itsi paxu othopa pexaniarata, bajara tsijamatabëcueneitsitsi itsamonae Dioso pitorobilivaisi. Bajarapamonae ajamatabëcuenexuirajibi. Ëpexaniajamatabëcuene najamatabëxaina. Casaë tsavanapae pevajënaeyabelia Dioso pejumelivaisi pejumecovënëtsijava. Nexata Dioso pejumelivaisi tsijamatabëcuenevitsabaponatsi pevajënaeyabelia. Tsipaji exanavanapa Dioso pitorobicueniatsi, jai Jesús pijajivijavabelia itsa tsi-paeba peyapëtaeyaexanaenexa palivaisi jivijavabelia tsipaeba pabita peubinë pelivaisicuenia.

Pacuenia Jesús pijajivijavabelia livaisi tsipaeba lámparabë pelivaisicuenia yabara pelivaisi
(Mr 4.21-25)

¹⁶ Icatsia Jesús jumaitsi pijajivijavabelia:

—Itsajivi ata lámparabë pitanojtsicujinae, apo mataacatetsi itsacuenejavata. Cama bexëpanalia ata apo etsi. Biji rajane athëbëyo etsia jivi boyaberena pejonevi petsivajënaeitayotecaenexa. ¹⁷ Bajara pijinia itsi palivaisianë tsipaebaponajë comparacióncuenia daxitajivi picani peyapëtaenexa. Najumematayatsia apo tsipaebaponaenë. Itsamonae nejumetae ata, aeconoxae abaxë apo nejumeyapëtae pajamatabëcuene xaina tatsipaebilivaisianë. Itsiata itsamatacabi, bexëajavabelia, daxitajivi nejumeyapëtaena pajamatabëcuene xaina palivaisianë comparacióncuenia tsipaebaponajë, jai Jesús pijajivijavabelia.

¹⁸ Icatsia Jesús jumaitsi pijajivijavabelia:

—Panejumecanaëjère patacatsipaebilivaisi. Itsamonae ata itsa pacatsipaebiana, bajarapamonae ata pajumecanaëjëtsianame papecatsipaebilivaisi. Palivaisivajëto panejumecanaëjëtsianame, nexata bajarapalivaisivajëto panejumeyapëtaename. Itsiata icatsia pematatsënëa bajarapitsilivaisivajëto Dioso pacayapëtaeyaexanaena. Pajivi xaniavaetsia nejumeyapëtane patacatsipaebilivaisi, bajarapajivi icatsia itsalivaisi pematatsënëa Dioso jumeyapëtaeyaexanaenatsi. Itsiata pajivi apo jitsipae pematatsënëa pejumeyapëtaeponaenexa, bajarapajivi palivaisiyovajëto picani jumeyapëtane, nacofënëtsiana, jai Jesús pijajivijavabelia.

Pacuenia Jesús pejuyapijivi, pena yajava, nubena bojumavelia yabara pelivaisi

(Mt 12.46-50; Mr 3.31-35)

¹⁹ Jesús pejuyapijivi, pena yajava, pata Jesúsjavaberena. Itsiata acuenebi bajarapamonae pimoxoyotsijava Jesús. Tsipaji bitso jivi ayaibitsaëto Jesús

matatoyorotsia vënëcatsi. ²⁰ Nexata pamonaē Jesús petsipaebilivaisi mata-toyorotsia jumetaeyenatsi, jumaitsi Jesúsjavabelia:

—Patajatuxanenë, ena raja, nejuyapijivi yajava, nuca patapënëverena. Bajarapamonaē pina jitsipa pecataejava, jai Jesúsjavabelia.

²¹ Nexata Jesús jumaitsi daxita bajarapamonaējavabelia:

—Pamonaē jumetane Dioso pejumelivaisi, jumecovënëtanua pacuenia Dioso itorobatsi, bajarapamonaē jane baja tajuyapijivi, taenajivinua, jai Jesús bajarapamonaējavabelia.

Pacuenia Jesús itaveta joviboxaneto, malataca yajava, piyaijavami yabara pelivaisi

(Mt 8.23-27; Mr 4.35-41)

²² Itsamatacabi Galilea nacuaē Jesús, pijajivi yajava, runareca jera ënëabereca. Jumaitsi pijajivijavabelia:

—Nicabaliatsi mapapucaxaneto itsapanabeliaje, jai Jesús.

²³ Itsa baja naropobalia, Jesús majitanuca. Nexata pinijijoviboxaneto jemata najetaruca. Malataca nexata bitso ayai. Nexata malataca jera ënëaberena mera epabajarabapona. Mera nexata vënëcapona jera ënëaberena. Buhunaējitsia baja bajarapamo. ²⁴ Nexata Jesús pemajitanucaenë pijajivi yaitavabatsi. Jesús pijajivi jumaitsi:

—¡Patajatuxanenë, vaxaitsimi rabaja yaothopaenatsi! jai Jesús pijajivi.

Nexata Jesús pemajitanucaenëmi naëcotapuna. Pinijijumeta itavetaxuaba jovibo, malataca yajava. Jovibo baja nexata ajibi tsaxuabi. Mene ata baja nexata vainae ecaxuaba. ²⁵ Nexata Jesús jumaitsi pijajivijavabelia:

—¿Detsa xuajitsia bitso pajunavame? ¿Tsipaji apo payapëtaemë Dioso papecaevetsijava? jai Jesús pijajivijavabelia.

Nexata Jesús pijajivi ita tane Jesús pitavetsijava jovibo, malataca yajava, Jesús pijajivi jamatabëcuenenajunaviaca bëpënëa. Nexata Jesús pijajivi naju-maitsi:

—¿De meta tsipaji maponëje? ¡Itaveta jovibo, malataca yajava! ¡Nexata jumecovënëtatsi! ¡Nexata baja jovibo, malataca yajava, ajibi tsaxuabi! najai Jesús pijajivi.

Pacuenia pebi, dovathivi peyajavaponaponaenë, Jesús vecuacapitsapa Gerasa nacuaē yabara pelivaisi

(Mt 8.28-34; Mr 5.1-20)

²⁶ Jesús pijajivi barëyaëta pucaxaneto itsapanabelia, Gerasa nacuaeyabelia. Gerasanacua boca puca itsapanaverena, Galileanacua pecanacujitsialia. ²⁷ Itsa Jesús jervecua nonotajunaya, mataenenarenatsi bajarapanacuapi-jinë, dovathivi peyajavaponaponaenë. Bajaraponë bajayajëbi baja jumasa ponaponabiaba. Pijabota apo ponaponaē. Jivimëthëanëjavata saya pon-aponabiaba. ²⁸ Nexata bajaraponë ita pata Jesúsjavaberena, pematabacabëta nucajunua Jesús pitabarata. Pinijijumeta aëjai.

—Jesús, Dioso athëbëtatsia peecaenë pexënatomë. ¿Detsa xua jaitame xanëjavaberena? Pexaniacuenë bitso cavajëtatsi. Neja-matabëcuenëbejobitsipame, jai dovathivi peyajavaponaponaenë Jesúsjavabelia.

²⁹ Bajarapacuenia jumaitsi dovathivi peyajavaponaponaenë tsipaji Jesús jerajavavetsina penonotajunaējavata, dovathivi peyajavaponaponaenë pemataenenaējavatatsi, Jesús itaveta dovathivi. Jesús jumaitsi dovathivijavabelia mapacuatiaje: “¡Dovathivi, bajaraponë baja pavecuapitsapare!” jai. Bajaraponë anijatonë dovathivi vaetababiabatsi. Jivi picani bajaraponë

cadenamaëtonëta cobecëtabiabatsi. Yajavataxucëtabiabatsi cadenamaëtonëta xaniavaetsia picani peecaenexa. Itsiata baitsi dovathivi peyajavaponaponënen ucubabiaba cadenamaëtonëmi. Dovathivi pejamatabëcueneta najetabajaravabiaba petusatuabelia. ³⁰Nexata Jesús jumaitsi bajaraponëjavabelia:

—¿Detsa pavënëme? jai Jesús.

Nexata bajaraponë navënëpaeba.

—Tavënë raja Legión, jai.

Bajarapacuenia navënëpaeba tsipaji dovathivi ayaibitsaëtoخانeto tsijamatabëjinavanapatsi. ³¹Bajarapadovathivi vajëta Jesúsjavabelia infiernojavabelia Jesús pitorobianiva. ³²Nexata bajarajota, imoxoyo petsutojavata, marranobitsaëtoخانeto xaevanapa. Dovathivi bitso vajëta Jesúsjavabelia.

—Panetocopare patajonenexa marranobitsaëtoخانetojavabelia, jai dovathivi.

Jesús nexata pevajëtsicueniatsi tocopata. ³³Nexata dovathivi pebi vecuapit-sapecatsi. Nexata marranobitsaëtoخانetojavabelia baja junua dovathivi. Nexata daxita bajarapamarranobitsaëtoخانetomi cujinaeyeca. Pucaxaneto itapajanituareca othopareca. Bajarajota daxita marranobitsaëtoخانetomi meneta bubuna.

³⁴Marrano pevetsivi itsa tane bajarapacueni, rëcëpeca. Pona, pacuene tane, petsipaebinexa tomarapijivijavabelia, petsipaebinexa vayafotusatojava penaevijavabelia ata. ³⁵Nexata jivi ponarena petaenexa bajarapacueni. Jivi itsa parena Jesúsjavaberena, taeyeta dovathivi peyajavaponaponëneni peecaejava Jesús pemuxuneneta. Penaxatatsijava baja bajaraponë naxatateca. Jamatejema baja. Xaniavaetsia eca. Nexata bajarapamonae cjunavatsi Jesús. ³⁶Pamonae cuenetanetsi Jesús pejamatejemayaexanaejava dovathivi peyajavaponaponëneni, bajarapamonae paeba pepatsivijavabelia daxita pacuenia tane. ³⁷Bajarapamonae bitso cjunavatsi Jesús. Nexata daxita Gerasa nacuapijivi jumaitsi Jesúsjavabelia:

—Pexaniacuene pacavajëtatsi. Ponare baja patajanacuavecua, jai Gerasa nacuapijivi Jesúsjavabelia tsipaji cjunavatsi.

Nexata baja Jesús runareca jera ënëbereca. Ponaejitsia baja. ³⁸Nexata dovathivi peyajavaponaponëneni bitso picani navajëca Jesúsjavabelia pe-
naponenexa picani Jesús pepëta.

—Petuxanenë, netocopare tanaponenexa nepëta, jai picani Jesúsjavabelia.

Itsiata Jesús apo jejai. Jumaitsi bajaraponëjavabelia:

³⁹—Ponare nijamonaejavabelia. Tsipaebianame pacuenia ayaicuene nijatuxanenë Dioso catoexana, jai Jesús.

Nexata baja bajaraponë pona. Tsipaebapona daxita pijatomarapijivijavabelia pacuenia Jesús jamatejemayaexanatsi.

Pacuenia Jesús copiaya namutoepatota jamatejemayaexana piavitaneva, pacuenia icatsia cotocaevi tosaëyaexana Jairo pexënatovayo, petëpaevayomi, yabara pelivaisi

(Mt 9.18-26; Mr 5.21-43)

⁴⁰Jesús icatsia pecovëyaberena naviarena jerata pucaxaneto itsapanaverena. Nexata jivi ayaibitsaëtoخانeto copiapitatsi barëyaya. Tsipaji baja cajena copiaevetavanapatsi pepatsijavarena. ⁴¹Nexata bajarajota napatajopa Jairovënënenë. Bajaraponë judiövi penacatuatabiabibo pevetsinë. Jairo pe-matabacabëta yaiyataeya Jesús pitabarata nucajunua. Pinijicuenia junata. Jumaitsi Jesúsjavabelia:

—Tapëta ponare tajaboyabelia, jai.

⁴² Bajarapacuenia Jairo jumaitsi Jesúsjavabelia tsipaji caevayo pexënatovayo totëpaejitsiatsi. Bajarapovayo xaina doce pavaibeje. Itsa Jesús napona Jairo pepëta, jivibitsaëtoxaneto Jesús pepënaponaevitsi matatoyorotsia cënënanajetarubenatsi.

⁴³ Bajarapajivibitsaëtoxaneto tuatujëta, itsava pijanacuenene pecapunae-vatsi nanajetarua. Bajarapova pijanacuenene pecapunaecujinaetsi, doce baja pavaibeje xaina. Beyajiobi tsabiabi bajarapajana. Daxita pexainae-javaximi navecuavereta pematamobita pevaëbivitsi. Itsiata baitsi jane itsanë ata pevaëbivitsi apo jamatejemayaexanaetsi bajarapavitanevecua. ⁴⁴ Nexata bajarapova ponataba Jesús pepënevëvelia, jivibitsaëtoxaneto tuatujëalia. Nexta bajarapova tojayataba Jesús penaxatatsijavocopia. Nexata bajarapaepa-tota pijanacuenemi vecuaajibitsi baja.

⁴⁵ Jesús nexata jumaitsi:

—¿Jipatsa tanaxatatsijava netojayataba? jai Jesús.

Daxitajivi jumaitsi Jesúsjavabelia:

—Xanë cajena apo cajayatabitsi, jai.

Nexata Pedrobana jumaitsi:

—Patajatuxanenë, jivibitsaëtoxaneto raja camatatoyorotsia cënënanajetarubena. Apo becaajayatsijibi. ¿Detsa xuajitsi: “¿Jipatsa tanaxatatsijava netojayataba?” jamë? Itsajiviyo raeta baja cajayataba, jai Pedrobana.

⁴⁶ Nexata Jesús jumaitsi:

—Itsajiviyo baja cajena tanaxatatsijava netojayataba. Yapëtaniji bajarapa-jiviyo tajamatejemayaexanaejava tasaëta, jai Jesús.

⁴⁷ Nexata petiriva jamatabëjumaitsi:

—Jesús baja yapëtane tanejamatejemayaexanaejava, jamatabëjai.

Nexata bajarapova najetabarena Jesús pitabarayaberena. Neconecojai pecajunavi. Pematabacabëta tonucajunua Jesús pitabarata. Bajarapova nexata navajunupaeba daxitajivi tuatujëta pacuene yabara tojayataba Jesús penaxatatsijava. Navajunupaebanua pacuenia jamatejemayaexanatsi pejayatabijavata. ⁴⁸ Nexata Jesús jumaitsi bajarapovajavabelia:

—Xamë nesivajamatabëjumaitsimë: “Jesús penaxatatsijava itsa tojayatabi-anajë, tavitanejavami nevecuaajibi tsane,” nesivajamatabëjamë. Bajaraxu-ta jamatejemamë baja. Ponare baja jamatejema, jai Jesús bajarapovajavabelia.

⁴⁹ Bajarapacuenia Jesús pejumaitsanucaejavata namutoepatota, pataba jivitonë Jairo pijaboverena. Bajaraponë jumaitsi Jairojavabelia:

—Jairo, nexënatoyo rabaja tëpa. Pëtsa baja matavëjëa ja-matabëitonotaponame Jesús, jai bajaraponë Jairojavabelia.

⁵⁰ Jesús jumetae ata bajarapajume, itsiata jumaitsi Jairojavabelia:

—Jairo, pëtsa najamatabëxainame. Najamatabëcuenecopare saya ëxanëjavaberena. Nexënatovayo raja jamatejema tsane, jai Jesús Jairojavabelia.

⁵¹ Itsa Jesús pata Jairo pijabota, apo tocopatsi ayaibitsaëto penajonenexa Jesús pepëta petëpaevayo pebocaejavabelia. Tocopata saya penajonenexa mapamatabëxëyoje. Pedro, Santiago, Juan, petëpaevayo paxa, pena, ba-jara saya pamatabëxëyo tocopata penajonenexa Jesús pepëta. Pamonaë Jesús pevajënaë ena Jairo pijabota, bajarapamonae Jesús pitsapaeyaexana.

⁵² Daxitajivi pinijicuenia matanueyaba petëpanucaevayo. Nexata Jesús ju-maitsi:

—Pëtsa pamatanueyabame. Pejanava raja apo tēpae. Saya raja majitanuca, jai Jesús bajarapamonaejavabelia tsipaji yapētane Jesús piasaēyaexanaejavanexa bajarapovayo.

⁵³ Bajarapacuenia Jesús pejumaitsijava, bajarapamonaē saya Jesús jume-capocaponatsi. Tsipaji bajarapamonaē yapētane bajarapovayo baja picani pepacune petēpaejava. ⁵⁴ Nexata Jesús petēpaevayo cobepita. Jumaitsi pinijijumeta:

—Pejanavayo, nonotabapunare, jai Jesús.

⁵⁵ Nexata bajarapacuenia Jesús pejumaitsijavata, petēpanucaevayomi nonotabapuna. Asaē baja icatsia petēpaevayomi. Nexata Jesús jumaitsi pejanavayo penajavabelia:

—Nexēnatovayo pexaejava rajure, jai Jesús.

⁵⁶ Nexata pejanavayo paxa, pena ata, bitso jamatabēcuenenabenajacabeje. Nexata Jesús jumaitsi bajarapajivibejevabelia:

—Pëtsa papaebamebeje itsajivijavabelia ata pacuene pacatoexanatsibeje, jai Jesús.

9

Pacuenia Jesús pijajivi itoroba Dioso pitorobilivaisi jivi petsipaebanajetarubenaenexa yabara pelivaisi

(Mt 10.5-15; Mr 6.7-13)

¹ Jesús junata pijajivi, doce ponēbeje, penacaeuatsinexa. Nexata Jesús jumaitsi bajarapamonaejavabelia mapacueniaje:

—Pacajamatabēcuenē caējēpaeyaexanatsi rabaja papeca-caējēpaejamatabēcuenē dovathi peyajavajinavanapaevi ata panevecuacapit-sapaponaenexa. Pacajamatabēcuenē caējēpaeyaexanatsinua piavitanevi ata panejamatejemayaexanaponaenexa. ² Patsipaebanajetarubenaename daxitajivijava pacuenia Dioso pijajivi evetsijitsia. Piavitanevi ata pajamatejemayaexanaponaename, jai Jesús pijajivijavabelia.

³ Jesús jane baja pijajivi penaropobivajēnae, Jesús jumaitsi pijajivijavabelia mapacueniaje:

—Pëtsa itsacuenējava ata pacaponame panijanamutonexa. Pëtsa pacaponame naebo, dorō ata, panemarue ata, palata ata. Caejava saya panenaxatatsijava pajumaponare. Pëtsa anijacamisabeje pacaponame.

⁴ Itsa papatabiabianame tomarata, caebota pamajitabiabianame. Pëtsa panatixitaponame itsaboyabelia panemajitsinexa. Matapania icatsia itsajavabelia itsa paponaname, bajarapabovecua papitsapaename.

⁵ Patomarata apo pacacopiapitsi tsane pexanialivaisi panetsipaebinexa, nexata pavecuaponaename bajarapatomara. Panevecuaponaevajēnae bajarapatomara, bajarapatomarata panataxuatsapērēvarēbianame. Bajarapacuenia itsa panataxuatsapērēvarēbianame, yapētaena bajarapatomarapijivi Diosojavabelia penaneconitsicuenē apo papecacopiapitsixae papecanamuxunaevetsinexa panetsipaebilivaisi, jai Jesús pijajivijavabelia.

⁶ Bajaraxuacujinae Jesús pijajivi naropoba jane baja. Najetarubena daxitatomaraxijava. Tsipaebanajetarubena jane baja pexanialivaisi jivi pecapanepaelivaisinexatsi pibisiacuenē pexanaeneconimivecua. Jamatejemayaexanaponanua piavitanevi daxitajava.

Pacuenia Juanpijinē jivibautisabinēmi beyaxuabatsi yabara pelivaisi
(Mt 14.1-12; Mr 6.14-29)

7 Herodes, Galileanacua pevetsinë, vënëlivaisitanetsi daxita Jesús pinijicuene pexanaponaejava. Nexata Herodes najamatabëxaina Jesús yabara. Tspaji itsamonae jamatabëcuenenavëxaniabiaya Jesús yabara jumai tsaponae: “Juanpijinë raeta jivibautisabinëmi petëpaecujinae icatsia asaë,” jai tsaponae Jesús yabara. Nexata bajarapacuenia itsamonae pejumaitsaponaejava Herodes pejumetaexae, najamatabëcuenepatajërërëcaeya najamatabëxaina Jesús yabara.

8 Itsamonae pijinia jumai tsaponae Jesús yabara:

—Bajayata raeta ponëmi ponapona, profeta Elíaspijinëmi, icatsia asaë, jai tsaponae itsamonae.

Itsamonae pijinia jumai tsaponae Jesús yabara:

—Bajayata raeta pamonaemi jinavanapa, profetavimiyajuvënënë, icatsia asaë, jai tsaponae itsamonae Jesús yabara.

Bajarapacuenia itsamonae jamatabëcuenenavëxaniabiaya pejumaitsaponaejava Jesús yabara, Herodes jumetane.

9 Nexata Herodes jamatabëjumaitsi:

—Xanë bajayata tajajivi itorobajë Juanpijinë jivibautisabinëmi pebeyaxubinexa. Nexata baja tajajivi Juanpijinëmi vësiucutaxuaba. Beyaxuaba baja. ¿De tsaeta nexata ponë pinijicuene pexanaponaejava, vënëlivaisitaeyabiabajë? jamatabëjai Herodes Jesús yabara.

Bajaraxuata Herodes bitso jamatabëtane Jesús.

Pacuenia Jesús pexaejava rajuta cinco mil ponëbeje yabara pelivaisi (Mt 14.13-21; Mr 6.30-44; Jn 6.1-14)

10 Jesús pitorobivi, apóstolevi, jivi pexanialivaisi petsipaebanajetarubenaecujinae, naviabanajetarubena baja Jesúsjavaberena. Nexata bajarapamonae pepatsicujinae Jesúsjavaberena, navajunupaeba Jesúsjavabelia daxita pacuenia exanavanapa. Nexata Jesús barëpona pijajivi pesajinaejavabelia, Betsaidatomara imoxoyojavabelia. 11 Itsiata baitsi jane jivi ayaibitsaëtoxaneto pëtanetsi. Nexata bajarapamonae Jesús pecovëvelia pëjaitatsi. Nexata bajarapamonae itsa pata Jesúsjavata, Jesús copiapita xaniavaetsia. Nexata Jesús tsipaeba bajarapamonaejavabelia pacuenia Dioso eveta pija jivi mapanacuataje. Jesús jamatejemayaexananua piavitanevi.

12 Itsa baja caniviyo tsaponae, Jesús pijajivi doce ponëbeje cujibarenatsi. Jumaitsitsi:

—Itorobaremelia baja jivi peponaenexa imoxoyo penaetomaraxijavabelia, imoxoyo penaebonëjavabelia ata. Bajarabelia bajarapamonae nama jitsiana. Pexaejavanua namitsavajëtsiana. Majotaje ajibi pexaejava. Tspaji itsajivi ata pijabo apo xainae majotaje, jai Jesús pijajivi.

13 Nexata Jesús jumaitsi pijajivijavabelia:

—Paxamë parajure pexaejava, jai Jesús.

Nexata Jesús pijajivi jumaitsi:

—Paxainajë saya cinco papanbëbeje, anijanëyobeje dujuainëyobeje yajava. ¿Jitsipame tsaja patacomuacaenexa pexaejava daxita mapamonae penaxaenexaje? jai Jesús pijajivi.

14 Bajarapajivibitsaëtoxaneto bejamatabëcuene cinco mil ponëbeje. Nexata Jesús jumaitsi pijajivijavabelia:

—Paenaeyaexanare pepobitsaëtonë, bejamatabëcuene cincuenta ponëbeje tsaponae caebitsaëtota, jai Jesús pijajivijavabelia.

15 Nexata Jesús pijajivi bajarapacuenia exana. Enaeyaexana jane baja daxita jivibitsaëtoxaneto. 16 Nexata Jesús pita cinco papanbêbeje, anianêyobeje dujuainêyobeje yajava. Athêbêa benaëcotsia. Jumaitsi Diosojavabelia:

—Pexaniacuene panetoexaname. Panerajutame pataxaejava, jai Jesús.

Bajaraxuacujinae Jesús pan epatsicacapona, dujuainêyobeje yajava. Pepatsicacaejava pijajivijavabelia rajutapona petsicobetsanaenexa daxitajivi. 17 Daxita xaniavaetsia nabane. Bajaraxuacujinae jivi peyajuvênêcopabejebijavanê, Jesús pijajivi vênêba doce xuabeje bemapirecuenia pexanaejavanê.

Pacuenia Pedro jumaitsi Jesúsjavabelia: “¡Xamê raja Cristomê!” jai yabara pelivaisi

(Mt 16.13-19; Mr 8.27-29)

18 Itsamatacabi Jesús caenê vajêta Diosojavabelia pijajivi pitabêta. Nexata xuacujinae Jesús jumaitsi pijajivijavabelia:

—¿Detsa jivi jumai tsabiabi xanê yabara? ¿De tsaeta xanê ponênê? jai Jesús pijajivijavabelia.

19 Nexata Jesús pijajivi jumaitsi:

—Itsamonae xamê yabara jumai tsabiabi: “Juanpijinê raeta jivibautisabinêmi icatsia asaê,” jai tsabiabi. Itsamonae pijinia jumai tsabiabi: “Diosojumepaebinêmi raeta. Profeta Elíaspijinê, ponêmi bajayata ponapona, icatsia asaê,” jai tsabiabi. Itsamonae pijinia jumai tsabiabi: “Bajayata raeta Diosojumepabivimi profetavimiyajuvênênê icatsia asaê,” jai tsabiabi xamê yabara, jai Jesús pijajivi.

20 Nexata icatsia Jesús jumaitsi pijajivijavabelia:

—¿Detsa nexata paxamê pajamatabêitsimê xanê yabara? ¿Detsa xanê ponênê? jai Jesús pijajivijavabelia.

Nexata Pedro jumaitsi Jesúsjavabelia:

—Xamê raja cajena Cristomê, athêbêvetsica Dioso peccaitorobinêtsica jivi necapanapaenexa. Xamê cajena Dioso pexênatomê, jai Pedro Jesúsjavabelia.

Pacuenia Jesús tajêvelia navajunupaeba pebeyaxuabijavanexatsi yabara pelivaisi

(Mt 16.20-28; Mr 8.30–9.1)

21 Jesús jumeitaveta pijajivi. Jumaitsi mapacueniaje:

—Pêtsa pajumaitsimê jivijavabelia: “Jesús raja Dioso pexênato,” pajamê pêtsa, jai Jesús.

22 Nexata Jesús pebeyaxuabijavanexatsi, tajêvelia navajunupaeba. Jumaitsi pijajivijavabelia mapacueniaje:

—Xanê, Daxitajivi Pematapijinênê, pinijicuenia bejibobinê tsane. Judíovi pijaancianovi, sacerdotevi penamatacaitorobivinu, judíovi pecujarubivinu, apo nejumecovênêtsi tsane xanê Cristonêcuenenê. Nexata bitso nebejioxiaexanaena. Bajaraxuacujinae nebeyaxuabiana. Itsiata baitsi jane tatêpaecujinae, acueyabi matababita, icatsia asaênê tsane, jai Jesús pijajivijavabelia tajêvelia penavajunupaebijavata pebeyaxuabijavanexatsi.

23 Bajaraxuacujinae Jesús jumaitsi daxitajivijavabelia:

—Pajivi jitsipa tanepênaponaejava, bajarapajivi copatsi penatojitsipacuenia pexanaenexa penajamatabêxainabiabijavami. Exanapononae taitorobicuenia. Bajarapajivi caematacabi canacujitsia najamatabêcueneveretsinua, bejioxiaexanaejitsia atatsi, beyaxuabijitsia atatsinua, Dioso pejumelivaisi

yabara piamatabäcuenesaë tsaponaponaenexa. Nexata jane baja xucujinae nepënaponaena. ²⁴ Pajivi exanaponaena penatojitsipaecuenia, apo xainae tsane matababi apo pevererecaejava. Pajivi xanë taja-matabäcueneta copata penatojitsipaecuenia pexanaejavami, bajarapajivi xainaena matababi apo pevererecaejava. ²⁵ Pajivi exanaponaena penatojitsipaecuenia, bajarapajivi Diosovecua naxuabiana. Nexata bajarapajivi daxitacuene xainae ata mapanacuapijicueneje, itsiata nacuerata. Tsipaji pexainaecuenia apo capanepae tsanetsi Diosojavabelia. ²⁶ Pajivi tajajivitonë ata, navënëlivaisicaura tsane jivijavabelia xanë tajajivitonëcuene, tanejumecovënëtsijava ata yabara, nexata juya xanë, Daxitajivi Pematapijinënë, bajarapajivi tajajivitonë ata, tajajivitonëcuene vënëlivaisicauranë tsane taxa Diosojavabelia. Bajarapajivi vënëlivaisicauranë tsane pamatababi icatsia patsianicajë taxa Dioso pijapenivenivenaecotia yajava, tananeconitsiaexanaenexa daxita pijaneconi pexainaevi. Yajavapatsianicajëna Dioso pijaängelevi. ²⁷ Xaniajanë pacuenia pacatsipaebijitsiatsi. Daxita paxamë patëpaenejevamë, Dioso taxuxuabiana daxita pijajivi pevetsicuene mapanacuataje. Nexata paxamëyajuvënëvi pepuatae tsane Dioso petaxuxuabijava daxita pijajivi pevetsicuene mapanacuataje, tēpaena, jai Jesús bajarapamonaejavabelia.

*Pacuenia Jesús caepatoyo perabënivenivenataba yabara pelivaisi
(Mt 17.1-8; Mr 9.2-8)*

²⁸ Jesús petëpaejavanexa tajëvelia penayajunupaebicujinae, bejamatabäcuenia ocho pamatababibejucujinae, Jesús pijajivi, acueyabi ponëbeje, barëjunaya petsutojumabetsia. Barëjunaya mapamatabäxëyoje: Pedro, Santiago, Juan. Bajarapamatabäxëyo Jesús barëjunaya petsutojumabetsia pevajëtsinexa Diosojavabelia. ²⁹ Diosojavabelia pevajëtsijavata, Jesús itabaranivenivena. Penaxatatsijava ata bitso nivenivenaeya niojai. ³⁰ Bajarajota jemata naitajëta anijanëbeje, ponëmibeje bajayata tēpa. Bajaraponëbeje Jesús barëcuaicuajitsi. Bajaraponëbeje tsaena Moiséspijinëbeje Eliáspijinëbeje. ³¹ Bajaraponëbeje matatoyorotsia nivenivenabeje. Jesús bana nabarëcuaicuajijai Jesús petëpaejavanexa yabara. Pacuenia Jesús bejiobiaexanaejitsiatsi Jerusalén tomarata, bajarapacuenia yabara nabarëcuaicuajijai. ³² Pedrobana penajuajinavanapaevi bitso itamajitsipanae ata, itsiata naëcotavanapa. Nexata bajarapamonae tane Jesús matatoyorotsia penivenivenaejava. Tanenua Moisésbeje Eliásbeje pebarëcuaicuajivatsi Jesús. ³³ Itsa baja Moisésbeje Eliásbeje Jesúsvecua ponaejitsiatsibeje, nexata bajarapaepatota Pedro jumai tsaxuabi Jesúsjavabelia:

—¡Patajatuxanenë, pijacuaxae panebarëponame! Pacatoexanaenatsi acueyabi pabobërëtoje. Itsabobërëto xamënexa tsane. Itsabobërëto Moisésnexa tsane. Itsabobërëto Eliásnexa tsane, jai Pedro.

Pedro xaniavaetsia najamatabäxainaenejeva, bajarapacuenia jumaitsi. ³⁴ Pedro abaxë itsa cuaicuajijai tsanucae, itarërëbo mataacataxuabatsi daxita bajarapamonae. Jesús pijajivi najunaviaca itsa mataacataxuabatsi itarërëbo. ³⁵ Nexata bajarapaitarërëbojavavetsica Dioso jumaitsitsica:

—Mara ponë taxënato, tasivanëje. Bajaraponë panamuxunaevere, jaitsica Dioso itarërëbojavavetsica Jesús pijajivijavabelia.

³⁶ Itsa baja Dioso najumevereta bajarapacuenia pejumaitsijavatsica, Jesús pijajivi tane caenë baja Jesús penucuaejava bajarajota. Jesús pijajivi tae ata

bajarapacuenē, moya saya jinavanapa. Bajarapamonae abaxē apo tsipaebi itsamonaejavabelia, tae ata bajarapacuenē.

*Pacuenia Jesús jamatejemayaexana pejevaxinē, dovathi peyjavapon-
aponaenē, yabara pelivaisi*

(Mt 17.14-21; Mr 9.14-29)

³⁷ Jesús pebarēcuaicuajiaucujinae Moisésbeje Elíasbeje, pijajivi acueyabi ponēbeje yajava, naviatšica petsutojumavetsica. Nexata mataenenatsi jivi ayaibitsaētoxaneto. ³⁸ Nexata caenē bajarapajivi bitsaētoxanetoyajuvēnēnē pinijijumeta jumaitši Jesúsjavabelia:

—Jesús, nitaxutotsoniataema. Netotaema taxēnatonēyo. Caenēyo rabaja tsipaji xainajē. ³⁹ Dovathi vaetababiabatsi. Nexata jemata aējai tsabiabi. Tēpajoneyaexanabiabatsi. Daxitanē neconecojaiya aperabēbaba tsatababiabireca. Nexata bajarajota pecubothamu tsabiabi. Bitso bejiobiaexanabiabatsi. Dovathi abaxē apo jamatabēcopatsitsi. ⁴⁰ Picani raja nijajivijavabelia jumaitšinē: “Panetovecuacapitsapare dovathi,” janē. Itsiata apo caējēpaetsi tanetovecuacapitsapaenexa, jai bajaraponē Jesúsjavabelia.

⁴¹ Nexata Jesús jumaitši daxita pijajivijavabelia:

—¡Paxamē baja rovia apo pajumecovēnētšimē Dioso papecayavenonaejavanaxa! Bajaraxuata apo pacajamatabēcuenecaējēpae pejevaxinē panevecuacapitsapaenexa dovathi. ¡Paneajamatabēcuenetajavi baja rovia! ¿Detsa paepatojebi abaxē paxamējavabelia ajamatabēcuenesaenē tsaponaponae tsane patanejumecovēnētšinxamē? jai Jesús daxita pijajivijavabelia.

Nexata Jesús jumaitši pejevaxinē paxajavabelia:

—Barērenamēre nexēnatonēyo, jai Jesús.

⁴² Ajena pejevaxinē imoxoyotabarena Jesúsjavaberena, dovathi icatsia irata xuabatsi pejevaxinē. Daxitanē aperabēbaba tsatabireca. Nexata Jesús itaveta dovathi pejevaxinē pevecuapitsapaenexatsi. Nexata baja Jesús jamatejemayaexana pejevaxinē. Tocanaviata baja pejamatejemanē paxajavabelia.

⁴³ Daxitajivi bitso jamatabēcuenenabenajaca Dioso pesaēta Jesús pevecuacapistapaexae dovathi bajaraponēyo.

*Pacuenia icatsia Jesús tajēvelia navajunupaeba pebeyaxuabijavanexatsi
yabara pelivaisi*

(Mt 17.22-23; Mr 9.30-32)

Jivibitsaētoxaneto Jesús jamatabēcuenēbarēyaya tanetsi daxita Jesús pexanaejava yabara. Nexata Jesús pebeyaxuabijavanexatsi, tajēvelia navajunupaeba pijajivijavabelia. Jesús jumaitši mapacueniaje:

⁴⁴—Xaniavaetsia panenamuxunaevere. Pētsa panacofēnētame. Xanē, Daxitajivi Pematapijinēnē, necanajetsiana itsamonae pecobeyabelia, jai Jesús pijajivijavabelia tajēvelia penavajunupaebijavata pebeyaxuabijavanexatsi.

⁴⁵ Itsiata baitši jane Jesús pijajivi apo jumeyapētae xua yabara Jesús jumaitši. Baitši bajarapamonae Dioso apo tocopatsitsi pejumeyapētaeyaniva xua yabara Jesús jumaitši. Bajarapamonae ajumeura Jesúsjavabelia peyanijobijava xua yabara Jesús jumaitši.

*Pacuenia Jesús pijajivi: “¿Detsa ponē vaxaitsiyajuvēnēnē nacavecuayajia-
matābēcuenenē bitso?” najai tsanajetarubenaē namutua yabara pelivaisi*

(Mt 18.1-5; Mr 9.33-37)

⁴⁶ Jesús pijajivi anaeya namutua najumenotsiaya nalivaisitanajetarubena. Najumaitši tsanajetarubenaē bajarapamonae:

—¿Detsa ponë vaxaitsiyajuvënënë nacavecuayaijamatabëcuenenë bitso? najai tsanajetarubenaes Jesús pijajivi.

⁴⁷ Nexata Jesús pijajivi jamatabëcuenyapëtane pacuenia najamatabëxaina. Nexata Jesús cobepita pejevaxinëyo. Pemuxuneneta nuteta. ⁴⁸ Jumaitsi pijajivijavabelia:

—Pajivi copiapita tanejumeconvënëtsijiviyo, mapitsipejevaxinëyo ataje, xanë taniji tanecopiapitsijava. Pajivi necopiapita, ëxanë apo necopiapitsi. Ponë nitoroba, neyjavacopiapita. Nexata pëtsa bepaayajamatabëcuenevimë panataneme. Tsipaji ponë paxamëyajuvënënë beveliajamatabëcuenenë natane paxamëvecua, bajaraponë bitso ayaijamatabëcuenenë taenatsi Dioso daxita paxamë matatoxenetsia, jai Jesús pijajivijavabelia.

Pacuenia Jesús jumaitsi pijajivijavabelia itsa vënëlivaisitane itsanë dovathi jivivecua pecapitsapaejava Jesús pevënëta yabara pelivaisi (Mr 9.38-40)

⁴⁹ Jesús pijajivitonë, Juan, jumaitsi Jesúsjavabelia:

—Tajatuxanenë, pataniji itsanë nevënëta dovathi jivivecua pecapitsapaejava. Itsiata bajaraponë apo paxanëyajuvënënë. Nexata paitavetajë bajaraponë dovathi jivivecua pecapitsapaponaejava, jai Juan.

⁵⁰ Nexata Jesús jumaitsi Juanjavabelia:

—Pajivi pibisiajamatabëcuene apo najamatabëxainae vaxaitsijaberena, bajarapajivi nacajamatabëcuenyavenona. Bajarapajivi bevaxaitsijamatabëcuenejivi. Bajaraxuata pëtsa baja paitavetame bajaraponë xanë tavënëta jivivecua dovathi itsa capitsapapona, jai Jesús Juanjavabelia.

Pacuenia Jesús jumeitaveta Santiagobeje Juanbeje yabara pelivaisi

⁵¹ Itsa baja imoxoyo pevajënae pamatacabi Jesús athëëabetsia Dioso caponaejitsiatsi, ajamatabëcuenesaë baja peponaenexa Jerusalén tomarabelia. ⁵² Jesús nexata pevajënaeyabelia pijajivitonëbeje natsivajënaeitoroba, Santiagobeje Juanbeje. Bajaraponëbeje ponabeje Samaria nacuata peecaetomarajavabelia petocovaetsinexabeje pabota picani Jesús patsijitsia. ⁵³ Itsiata baitsi jane Samaria nacupijivi apo jamatabëcopiapitsitsi Jesús. Tsipaji baja bajarapamonae yapëtane Jesús peponaëjavanexa Jerusalén tomarabelia. ⁵⁴ Nexata Jesús pijajivitonëbeje itsa yapëtanebeje Samaria nacupijivi Jesús apo pecopiapitsijavanexatsi, nexata jumaitsibeje Jesúsjavabelia:

—Patajatuxanenë, bajayata profeta Elíaspijinë vajëta Diosojavabelia Dioso pitorobinexatsica isotocotia peverebiabinexa piamatabëcuenebejevi. ¿Baja tsaja pitsicue ne jitsipame patavajëtsinexa Diosojavabelia peveriapaenexatsi pamona apo jitsipae pecopiapitsijava? jai beje Jesús pijajivitonëbeje.

⁵⁵ Nexata Jesús naëcota pijajivitonëbejejavabelia. Jumeitaveta pijajivitonëbeje. Jesús jumaitsi:

—Paxamëbeje apo pajamatabëcuenyapëtaemëbeje Espiritu Santo, ponë pacayajavaponaponabeje. ⁵⁶ Xanë, Daxitajivi Pematapijinëne, apo patsinëtsica taverëbiabinexa jivi. Biji rajane patsicajë tacapanepanexa jivi pibisiacuene pexanae neconivecua, jai Jesús pijajivitonëbejejavabelia.

Nexata baja Jesús, pijajivi yajava, pona itsatomarabelia.

Pacuenia picani itsamonae Jesús jamatabëpënaponatsi yabara pelivaisi (Mt 8.19-22)

⁵⁷ Jesús pijajivi namutua peyajavanajetarucaejavata, judíovi pecujarubinë jumaitsi Jesúsjavabelia:

—Jesús, itsabelia poname, capënaponaenatsi cajena, jai judíovi pecujaru-biné.

⁵⁸ Nexata Jesús jumaitsi bajaraponëjavabelia:

—Itsa nepënaponaejitsipame, apo napatabiabinimé tsipae tajabota nenacuer-aevetabiabinexa. Tsipaji tajabo apo xainanë. Namo pijamëthëanë xaina pepatabiabinexa pemajitabiabinexanua. Baratsui ata pematapenanë xaina. Itsiata baitsi janë xanë, Daxitajivi Pematapijinënë, itsajavabelia ata apo xainanë, itsajota nacueraevetabiabijitsianë, jai Jesús.

⁵⁹ Bajaraxuacujinae Jesús jumaitsi icatsia itsanëjavabelia:

—Nepënaponare, jai Jesús.

Nexata bajaraponë jumaitsi:

—Tajatuxanenë, caeepatoyo abaxë necopare tamëthëtsinexa taxa petëpaenë, jai bajaraponë Jesúsjavabelia.

⁶⁰ Jesús nexata jumaitsi bajaraponëjavabelia:

—Copare matakabi apo pevereverecaejava apo pexainaevinexa pemëthëcaenexatsi nijamonaemi itsa tëpa. Xamë saicaya nepënaponare jivi netsipaebinexa pacuenia Dioso evetsijitsia daxita pijajivi mapanacuataje, jai Jesús bajaraponëjavabelia.

⁶¹ Bajaraxuacujinae icatsia itsanë jumaitsi Jesúsjavabelia:

—Tajatuxanenë, jitsipajë tacapënaponaejava. Itsiata abaxë caeepatoyo necopare tanapëjibinexa tajabota pejinavanapaevijavabelia, jai bajara-ponë.

⁶² Nexata Jesús jumaitsi bajaraponëjavabelia:

—Pajivi Dioso tonacuenebi ata, itsiata jamatabënajinabiaba pijaperujamatabëcuene, xua exanabiaba, bajarapajivi apo cajëpaetsi xaniavaetsia Dioso petonacuenebinexa pitorobicueniatsi. Tsipaji najamatabëcueneepatajërërëcaeya nacueneba, jai Jesús bajaraponëjavabelia.

10

Pacuenia Jesús pijajivi itoroba, setenta ponëbeje, Dioso pejumelivaisi jivi petsipaebanajetarubenaenexa yabara pelivaisi

¹ Jesús icatsia itsamonae itapeta pijajivinexa, setenta ponëbeje. Bajarapamonae Jesús itoroba anijanëbeje tsaponae Jesús pevajënaeya Dioso pejumelivaisi jivi petsipaebanajetarubenaenexa. Itoroba petsipaebanajetarubenaenexa daxita tomanëjava, tsiquiritomaraxijava ata, itsaxuayo Jesús najetarucaejitsia. ² Jesús pijajivi penaropobivajënae, Jesús jumaitsi pijajivjavabelia mapacueniaje:

—Xaniajanë pacuenia pacatsipaebijitsiatsi. Ayaipabi pexainanë caecuenia uba ayajava peubijava. Nexata baja itsa tonaveretatsi peubijava, caejiviyobeje tonotatsi. Nexata notsi ata, abaxë bitso ayajava tosajinatsi penotsinexa. Bajara pijinia itsi jivi ata Diosojavabelia penajamatabëcuenecopabivinexa. Abaxë sajina ayaibitsaëtöxaneto. Itsiata baitsi jane paxamë Dioso panetonacuenebivi pacaejiviyomëbeje saya. Bajaraxuata Diosojavabelia pavajëre icatsia Dioso pijajivi pematatsënëa itsamonae pitorobinexa papecayavenonaenexa. ³ Paponare baja Dioso pejumelivaisi jivi panetsipaebanajetarubenaenexa. Panayajivitaeyajinavanapaename. Pacaitorobianatsi raja bitso pibisiacune pexanabiabivjavabelia. Pacuenia ovejaxi tsiayaitsi itsa jinavanapa pianaeponaevi nevëthë tuatujëata, bajarapaitsimë tsane. ⁴ Pëtsa pacaponaeme itsacuenejava ata, dorö ata, palata ata, zapato ata. Itsa pabajacobianame itsajivi namutoepatota, pëtsa

bajayajebi pabarëcuaicuajiamë tsanunubenaë panenajematsiyaniva. ⁵ Itsa pajonejitsiamë itsamonae pijaboyalia, panejonevajënaelia copiaya pajumaitsimë tsane Diosojavabelia: “Dioso, yavenonare mapabopijivije jamatabëcuenexanepanaeya pejinavanapaenexa,” pajamë tsane copiaya Diosojavabelia. ⁶ Bajarapabo pexainanë itsa jitsipaena pejamatabëcuene xanepanaeyaexanaenexatsi Dioso, nexata bajaraponë jamatabëcuene xanepanaeyaexanaenatsi Dioso. Itsa apo muxujitsipae tsane bajarapacuenia panejumaitsijava, nexata Dioso apo jamatabëcuene xanepanaeyaexanae tsanetsi bajaraponë. ⁷ Itsajota papatabiabianame, caeböta pamajitabiabianame. Pëtsa panatixitaponame itsaböxijavabelia. Aurajibia paxaeyabiabianamenua xua pacaabata bajarapaböta. Pëtsa pauramë panexaejava papecarajutsijava yabara. Tspaji panetsipaebixae patacaitorobilivaisi, pacarajutsiana panexaejava. Tspaji itsajivi itsa tonacueneba itsanëjavabelia, barajutatsi pexaejava. ⁸ Itsa papatabiabianame tomarata, itsa paböta bajarapatomarapijivi xaniavaetsia pacacopiapita, nexata panaxaenname xua pacaabata. ⁹ Bajarapatomarata pajamatejemayaexanaenname piavitanevi. Pajumaitsimë tsane bajarapatomarapijivijavabelia: “Dioso daxita pijajivi pevetsimatacabinexa, imoxoyo baja pevajënae pecopiapatsinexa,” pajamë tsane. ¹⁰ Itsiata baitsi jane patomarata panepatsicujinae apo pacacopiapitsi tsane, bajarapatomarapijicallejavata panubenaenname. Pajumaitsimë tsane bajarapatomarapijivijavabelia mapacueniaje: ¹¹ “Panijatomarapijia sapërë patataxuta rubena. Nexata panavetaxuvarëbajë. Bajarapacuenia panavetaxuvarëbajë panenayapëtaenexa Diosojavabelia pananeconitsijava. Pananeconitame Diosojavabelia. Tspaji apo panecopiapitsimë patanenamuxunaevetsinexamë palivaisi picani pacatsipaebijitsiatsi. Itsiata panenamuxunaevere paneyapëtaenexa mapalivaisiije. Dioso daxita pijajivi pevetsimatacabinexa, imoxoyo baja pevajënae pecopiapatsinexa,” pajamë tsane. ¹² Xaniajanë pacuenia pacatsipaebijitsiatsi. Pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso naneconitsiaexanaena patomarapijivi apo pacacopiapitsi tsane. Paneconivajëtota bajayata Dioso naneconitsiaexana Södoma tomarapijivimi, bajarapaneconivajëto matatoxenetsia Dioso naneconitsiaexanaena patomarapijivi apo pacacopiapitsi tsane, jai Jesús pijajivijavabelia, setenta ponëbejevavabelia.

Pacuenia Jesús jumaitsi patomarabejepijivi Dioso xuabijitsia infiernojavabelia apo pejumecovënëtsixaetsi yabara pelivaisi (Mt 11.20-24)

¹³ Icatsia Jesús jumaitsi pijajivijavabelia, setenta ponëbejevavabelia:

—¡Bitso bejiobi tsane Corazin tomarapijivi! ¡Bitso bejiobi tsane Betsaida tomarapijivi ata! Pinijicuene Dioso pesaëta taexanaejavanë, xua itsajivi ata apo caëjëpaetsi pexanaenexa, bajarapatomarabejepijivi tae ata, itsiata apo nejumecovënëtsi. Apo copabi pibisiacune pexanabiabijava. Apo najamatabëcuenepënëyorotsi Diosojavabelia. Bajayata Tiro tomarapijivimi, Sidón tomarapijivimi ata, petuatuajëta bajarapitsipinijicuene itsa tsitaexanaejitsipajë, nexata bajarapamonaemi copabijitsipa pibisiacune pexanaejava. Najamatabëcuenepënëyorotsipa Diosojavabelia. Bajarapamonaemi nexata pibisiacune pexanaebiabineconi bitso yajamatabëcuenebëjai tsipae. Nexata Diosojavabelia petsitanajamatabëcueneitajëtsinexa peyajamatabëcuenebëjaijava pibisiacune pexanabiabineconi, naxatabijitsipa piayopapaëbërëjavanë. Enaejitsipa irata. Ipumana ata natsimataothocaejitsipa bitso peyajamatabëcuenebëjaixae pibisiacune pexanabiabineconi.

¹⁴ Itsiata baitsi jane Corazín tomarapijivi, Betsaida tomarapijivi ata, tae ata pinijicuene Dioso pesaëta taexanaejavanë, apo nejumecovënëtsi. Nexata pamatacabi Dioso naneconitsiaexanaena daxita pijaneconi pexainaevi, bajarapamatacabi bitso ayaicuenia Dioso naneconitsiaexanaenatsi. Paneconivajëtota bajayata Dioso naneconitsiaexana Tiro tomarapijivimi, Sidón tomarapijivimi ata, bajarapaneconivajëto matatoxenetsia Dioso bitso ayaicuenia naneconitsiaexanaena Corazín tomarapijivi, Betsaida tomarapijivi ata. ¹⁵ Capernaum tomarapijivi picani najamatabëxaina Dioso pecaponaejavatsi athëbëabetsia. Itsiata baitsi jane bajarapamonae apo tanejumecovënëtsixae, Dioso xuabianatsi infiernojavabelia, jai Jesús Corazín tomarabeje Betsaida tomarabejepijivi yabara.

¹⁶ Icatsia Jesús jumaiti pijajivijavabelia, setenta ponëbejejavabelia:

—Pajivi pacanamuxunaevetsiana, bajarapajivi taenajë xanë tanenamuxunaevetsijava. Pajivi pacanayajiviitavetsiana, bajarapajivi taenajë xanë tanenayajiviitavetsijava. Bajarapajivi Dioso ata taenatsi Dioso penayajiviitavetsijava. Bajarapacuenia Dioso ata taenatsi penayajiviitavetsijava tsipaji xanë Dioso nitoroba, jai Jesús pijajivijavabelia Jesús pijajivi setenta ponëbeje pitorobivajënaeya.

Nexata jane baja Jesús pijajivi naropoba. Dioso pejumelivaisi jivi tsi-paebanajetarubena daxita tomaranëjava. Saicaya navecuanajetarubena anijanëbeje tsaponae.

Pacuenia Jesús pijajivi, setenta ponëbeje, naviabanajetarubena, Dioso pejumelivaisi jivi daxitanacuanëjava petsipaebanajetarubenaecujinae, yabara pelivaisi

¹⁷ Jesús pijajivi, setenta ponëbeje, Dioso pejumelivaisi jivi daxitanacuanëjava petsipaebanajetarubenaecujinae, barëyaya naviabanajetarubena Jesúsjavabereña. Nexata pepatsicujinae bajarapamonae jumaiti Jesúsjavabelia:

—Tajatuxanenë, dovathivi baja cajena itsa paitavetaponajë nevënëta, panejumecovënëtabiaba, jai bajarapamonae Jesúsjavabelia.

¹⁸ Jesús nexata jumaiti pijajivijavabelia:

—Xanë baja cajena taniji dovathi athëbëvetsica pejopaejavatsica pacuenia yamaxë bajopaica. ¹⁹ Xanë baja cajena pacajamatabëcuene cajëpaeayaexanatsi papecacajëpaejamatabëcuene panejamatabëcuene matatoxenetsinexa vajavajabitsaenë dovathi. Nexata jomo pacuetsacuetsanae atamë tsane, aqueto ata pacuetsacuetsanae atamë tsane, apo pacaitsacueniabi tsane.

²⁰ Itsiata pëtsa bitso pasivajamatabëcuenebarëyamë dovathi itsa paitavetame papecajumecovënëtsijava. Bitso jane pasivajamatabëcuenebarëyamëre tsavanapae Dioso papijajivixamë Dioso papecavënëyaquinarubijava athëbëtatsia, jai Jesús pijajivijavabelia, setenta ponëbejejavabelia.

Pacuenia Jesús jamatabëcuenebarëya yabara pelivaisi
(Mt 11.25-27; 13.16-17)

²¹ Jesús bitso jamatabëcuenebarëyayaexanatsi Espíritu Santo. Nexata Jesús jumaiti paxa Diosojavabelia:

—Axa, nevetsinë athëbëtatsia. Nevetsinë mapanacuajava ataje. “Ayaijamatabëcuenenëmë bitso,” cajaitsi. Tsipaji pamona bitso apo penacujarubivi ata, yapëtaeyaexaname pacuenia itsamatacabi daxita nijajivi evetsijitsiamë mapanacuataje. Bajarapamonae yapëtaeyaexanaename pexanialivaisi, xanë

talivaisi, palivaisi vecumatayatame bitso peyapētaevi mapanacuapijilivaisije. Bajarapalivaisi vecumatayatame bitso penacujarubivi ata mapanacuapijicuene yabaraje. Bajarapacuenia exaname tsipaji baja exaname nejitsipaecuenia, jai Jesús paxa Diosojavabelia pevajētsijavata.

²² Icatsia Jesús jumaitsi pijajivijavabelia, jivijavabelia ata:

—Taxa Dioso baja cajena netocopata tayapētaenexa daxitacuene. It-sajivi ata apo nejamatabēcueneyapētae pacuenia xanē jamatabēcueneitsinē, Dioso pexēnatonē. Caenē, taxa Dioso, nejamatabēcueneyapētane. It-sajivi ata apo jamatabēcueneyapētae pacuenia taxa Dioso jamatabēcueneitsi. Caenēnē, xanē pexēnatonē, jamatabēcueneyapētaniji pacuenia taxa Dioso jamatabēcueneitsi. Pamonae tojitsipajē tayapētaeyaexanaenexa pacuenia taxa Dioso jamatabēcueneitsi, bajarapamonae ata yapētaeyaexanaenajē, jai Jesús pijajivijavabelia, jivijavabelia ata.

²³ Nexata Jesús napēnēyorota. Ēpijajivijavabelia jumaitsi:

—Paxamē baja pajamatabēcuenebarēyamē panetaexae pacuene baja pataeponame. ²⁴ Xaniajanē pacuenia pacatsipaebijitsiatsi. Bajayata ayaibitsaēto profetavimi necopiaevetavanapa picani tanetaenexa tapatsijavatsica. Nacuaeivsivimi ata necopiaevetavanapa picani tanetaenexa tapatsijavatsica. Itsiata netaenejeva tapatsijavatsica, bajarapamonaemi tēpa baja. Jamatabējumetaeyabiabanua picani palivaisianē baja aeconoxae paxamē pacatsipaebaponatsi. Itsiata apo jumetaenejeva bajarapalivaisinē, bajarapamonaemi tēpa baja, jai Jesús pijajivijavabelia.

Pacuenia pexaniajamatabēcuenē, Samaria nacuapijinē, yavenona itsanē yabara pelivaisi

²⁵ Itsamatacabi Jesús livaisi tsipaebanuca pijajivijavabelia. Nexata bajarajota judiōvi pecujarubinē nonotapuna. Bajaraponē Jesúsjavabelia jamatabēcueneējēbiaya jumaitsi:

—Jesús, ¿detsa xua exanaenajē Dioso tanerajutsinexa matacabi apo pevereverecejava? jai judiōvi pecujarubinē.

²⁶ Nexata Jesús jumaitsi judiōvi pecujarubinējavabelia:

—¿Detsa jane jumaitsi bajarapacuenē yabara bajayata Dioso Moiséspijinēta penajumecopatsilivaisi jivi pejumecovēnētsinexa? jai Jesús.

²⁷ Nexata judiōvi pecujarubinē jumaitsi Jesúsjavabelia:

—Bajayata Dioso Moiséspijinēta penajumecopatsilivaisi jumaitsi mapacueniaje: “Daxita panejamatabēēthētojavavetsina, daxita panejamatabēcueneta ata, daxita panesaēta ata, daxita panenajamatabēxainaesāta ata, pasivamēre panijatuxanenē panijaDioso. Pasivamēre itsajivi ata pacuenia paxamē panijacuata panasivamē,” jai bajayata Dioso Moiséspijinēta penajumecopatsilivaisi, jai judiōvi pecujarubinē Jesúsjavabelia.

²⁸ Nexata icatsia Jesús jumaitsi judiōvi pecujarubinējavabelia:

—Xaniavaetsia nejumecanaviatame. Bajarapacuenia exanaponaponare. Nexata pepacuene xainaename matacabi apo pevereverecejava, jai Jesús.

²⁹ Itsiata baitsi jane judiōvi pecujarubinē bijiaya jumecovēnēta bajarapalivaisi. Asivaya apo tae itsamonae ata. Bajaraxuata judiōvi pecujarubinē matavējēa jumaitsi Jesúsjavabelia:

—¿Detsa nexata pitsijivi asivanē tsane? jai judiōvi pecujarubinē.

³⁰ Nexata icatsia Jesús jumaitsi judiōvi pecujarubinējavabelia mapacueniaje:

—Pebi namutua najetaruca Jerusalén tomaraverena. Naropota pepatsinexa Jericó tomaraberena. Nexata jivi pecaponaejava peyacajērēbabiabivi, bajaraponē epatua vaetabatsi. Daxita pecobecovē yacajērētatsi. Penaxatabijavanēmi ata yacajērētatsi. Nexata pinijicuenia conibabiatsi. Puenetabuatatsi picani petēpanuacnexa bajarajota.

³¹ Nexata bajarapanamutua sacerdotenē najetaruca, templobota penacuenebabiabinē. Nexata sacerdotenē bajaraponē ita taeyabuata, matavaquetanucapona. Pona baja rovia. ³² Bajaraxuacujinae icatsia bajarapanamutua itsanē, templobota penacuenebabiabinē, najetaruca. Bajaraponē taenucajopa. Bajaraxuacujinae matavaquetanucapona. Pona baja icatsia rovia bajaraponē ata. ³³ Bajaraxuacujinae icatsia bajarapanamutua Samaria nacuapijinē najetaruca. Nexata bajaraponē ita taeyabuata, tsitabejibitsi bitso. ³⁴ Nexata bajaraponē cujilia.

Vajēnēvaēba aceiterata, vinorata yajava. Vajēnēcēba papaēbērēpanaxita. Bajaraxuacujinae Samaria nacuapijinē pijaburrojumata buatsia. Nexata bajaraponē capona jivi pepatabiabiboyabelia. Bajarajota Samaria nacuapijinē eveta xaniavaetsia. ³⁵ Meravia pitsijavata Samaria nacuapijinē ita baja ponaējitsia itsabela najetaruca, juta anijapalatanēbeje, bitso penamatamotsinēbeje. Matamota bajarapabo pexainaenē. Jumaiti bajaraponējavabelia: “Netoevetsianame maponēje. Itsa matamovereverecaena, pematatsēnēa nevetsimatamo, bajarapapalata icatsia caevēarena camatamotsianatsi,” jai Samaria nacuapijinē bo pexainaenējavabelia, jai Jesús mapacueniaje judiōvi pecujarubinējavabelia.

³⁶ Bajaraxuacujinae judiōvi pecujarubinējavabelia Jesús yanijoba bajarapalivaisi yabara. Jumaiti mapacueniaje:

—Pamonaē, acueyabi ponēmāxēto, taeyabuata pecobecovē peyacajērētšinētsi. ¿Detsa ponē bajarapamonaeyajuvēnēnē asivaya tane bajaraponē? jai Jesús.

³⁷ Nexata judiōvi pecujarubinē jumaiti Jesúsjavabelia:

—Ponē pitaxutotsoniataexae yavenona, bajaraponē asivaya tane, jai judiōvi pecujarubinē Jesúsjavabelia.

Nexata Jesús jumaiti judiōvi pecujarubinējavabelia:

—Ponare baja. Xamē ata bajarapacuenia asivaya itaxutotsoniataeyabiabianame itsamonae ata, jai Jesús judiōvi pecujarubinējavabelia.

Pacuenia Jesús jumaiti Martabeje Maribeje pijabota yabara pelivaisi

³⁸ Jesús, pijajivi yajava, najetaruca pevājēnaeyabelia. Nexata tomarayota pata. Bajarapatomarayota Jesús xaniavaetsia copiapitatsi petiriva, Martavēnēva. Nexata Marta pijabota Jesús napata. ³⁹ Marta peyujapijiva xaina, Marivēnēva. Nexata María eca Jesús pitabarata penamuxunaevetecaenaxa Jesús petsipaebilivaisi. ⁴⁰ Nexata Marta bitso jamatabēcuenēnatsi penacuēnabijava, Jesús pexaejavanexa ata pemitšaexanaenexa. Nexata Marta cujilia Jesús. Jumaiti:

—Tajatuxanenē, tajuyapijiva netocopata caevanē taexanaenexa daxita xua exanaejitsianē. Itorobare taneyavenonaenexa, jai Marta Jesúsjavabelia.

⁴¹ Nexata Jesús jumaiti Martajavabelia:

—Marta, xamē bitso cajamatabēcuenēna nexanaenexa daxita xuanē jamatabēcuaname. ⁴² Caejava bitso xanepana nexanaenexa, tanenamuxunaevetsinexamē. María baja cajena tanenamuxunaevetecaexae tatsipae-bilivaisi, catsuitapeta pexaniacuene daxitacuene matatoxenetsia. Nexata

acuenebi itsajivi ata peyacajërëtsijavatsi tatsipaebilivaisi pejumetaejava, jai Jesús Martajavabelia.

11

Pacuenia Jesús pijajivi tsipaeba pacuenia Diosojavabelia vajëcaejitsia yabara pelivaisi
(Mt 6.9-15; 7.7-11)

¹ Jesús vajëtabiaba Diosojavabelia. Nexata itsamatacabi, itsa baja Jesús najumevereta pevajëtsijava Diosojavabelia, Jesús pijajiviyajuvënënë jumaitsi Jesúsjavabelia:

—Patajatuxanenë, panejumecujarubare pacuenia pavajëtabiabijitsianë Diosojavabelia. Pacuenia Juanpijinë jivibautisabinëmi jumecujarubabiaba pijajivi pacuenia vajëtabiabijitsia Diosojavabelia, bajarapijinia pacuenia xamë ata panejumecujarubare pavajëtabiabijitsianë Diosojavabelia, jai Jesús pijajiviyajuvënënë.

² Jesús nexata jumaitsi pijajivijavabelia mapacueniaje:

—Itsa pavajëtabiabianame Diosojavabelia, pajumaitsimë tsabiabi tsane: Taxamë, athëbëtatsia neecaenë, jitsipajë pecayaiyatejava daxitajivi. Jitsipajë naxanitsiayo pecopiapatsijava daxita nijajivi nevetsijava mapanacuataje. Jitsipajë daxitajivi mapanacuata nejitsipaecuenia pecatoexanabiabijava, pacuenia baja athëbëtatsia nijajivi nejitsipaecuenia catoexanabiaba, bajarapacuenia pecatoexanavanapaenexa mapanacuapijivi ataje. ³ Caematacabi canacujitsia panerajure pataxaejavanexa pacuenia panamatavenonajë. ⁴ Panebarajamatabëcuene xanepanarena nitabarata pibisiacuene pataexanaejava. Nexata panevecuaajibiaexanare pibisiacuene pataexanaeconi. Tsipaji paxanë ata itsamonae paxanëjavaberena pibisiacuene patanexanaejava pajamatabëcuenecaevajë. Nexata pabarajamatabëcuenexanepanajë. Panevecuatsare dovathi patanejamatabëcueneëjëbivaniva. Panecapanepare jane pibisiacuenevecua, pajamë tsane mapacueniaje itsa pavajëtabiabianame Diosojavabelia, jai Jesús pijajivijavabelia.

⁵ Icatsia Jesús pijajivijavabelia jumaitsi comparacióncuenia Jesús pijajivi peyapëtaenexa pacuenia vajëcabiabijitsia Diosojavabelia:

—Paxamëyajuvënënë meravi tuatujëta ponaejitsipa bitso peyapëtaenëtsi pijaboyabelia. Nexata jumai tsipae: “Cacovaetatsi acueyabi papanbëyobeje.

⁶ Itsanë raja, taneyapëtaenë, tajëverena peponaenë, aeconoxae tajabota netopata. Nexata bitso piajani. Itsiata xanë apo xainaaenë itsacuenejavayo ata pexaejava tarajutsinexa,” jai tsipae paxamëyajuvënënë meravi tuatujëta peyapëtaenëtsijavabelia. ⁷ Nexata bo ënëverena bajaraponë jumepitsipatsi. Jumaitsi tsipae: “Nejamatabëitonotsipame. Baupa rabaja xaniavaetsia xatatanutajë. Taxi raja barëmajitanucajë caeamata. Nexata acuenebi tanonotapunaejava tacarajutsinexa xua nevajëtame. Itsa nonotapunaejitsipajë, yaitavabijitsipajë taxi,” jai tsipae peyapëtaenëtsi. Itsiata baitsi jane bajaraponë perajutsinexatsi ajumesaëya vajëcaponaejitsipa. ⁸ Xaniajanë pacuenia pacatsipaebijitsiatsi. Bajaraponë apo jamatabënonotapunae ata, itsiata nonotapunaejitsipa perajutsinexa pecovaebijavatsi. Itsiata peyapëtaenëxaetsi, bajarapacuenia apo rajutsi tsipae. Biji rajane rajutsipa daxita pacuenia namatavenona ajumesaëya pevajëcaponaexaetsi. ⁹ Xaniajanë pacuenia pacatsipaebijitsiatsi. Itsacuenejavayo itsa pacatonaxuabijitsipa, nexata bajayajebi ata

pajaitsipame matapania panecaxitarabijavabelianexa. Bajara pijinia pacuenia bajayajebi ata pavajëtabiabianame Diosojavabelia papecajumecovënëtsinexa. Bo ata itsa baupa xatatanuta, nexata asaëyata pabaupadocodocotsipame matapania papecatobaupatsijavabelianexa. Bajara pijinia pacuenia asaëyata pavajëtabiabianame Diosojavabelia papecajumecovënëtsinexa. ¹⁰ Bajarapacuenia asaëyata pavajëtabiabianame Diosojavabelia. Tsipaji pajivi vajëtabiaba, rajutabiabatsi. Pajivi ata jaitabiaba, caxitarababiaba. Pajivi ata baupa docodocotabiaba, tobaupatabiabatsi, jai Jesús pijajivijavabelia comparacióncuenia.

¹¹⁻¹² Icatsia Jesús jumaitsi pijajivijavabelia:

—Paxamë papebijivimë, panexi panexinaevi. Panexënatonëyo itsa pacavajëta panbë, apo panacoxirajutsimë tsipae iboto. Itsa pacavajëta dujuainëyo, apo panacoxirajutsimë tsipae jomo. Itsa pacavajëta vacaratobëto, apo panacoxirajutsimë tsipae aqueto. ¹³ Paxamë paneajamatabëcuenenebejevi ata, payapëtaneme panenacoxirajutsinexa pexaniajava. Paneaxa, athëbëtatsia peecaenë, bitso biji cajena pexaniajamatabëcuenenë paxamë matatoxenetsia. Bajaraponë pacarajutsiana pexaniacuenë itsa pavajëtame. Bajaraponë rajutsiana Espiritu Santo daxita pamonaë vajëtatsi, jai Jesús pijajivijavabelia.

Pacuenia itsamonae Jesús yabara jamatabëcuenenavëxaniabiaya jumaitsi: “Beelzebú raja pesaëta Jesús dovathi jivivecua capitsapapona,” jai yabara pelivaitsi

(Mt 12.22-30; Mr 3.20-27)

¹⁴ Pebi ponapona, dovathi pejamatabëcueneta apo penatsipaebinë. Nexata bajaraponë Jesús dovathi vecuacapitsapa. Pebi baja dovathi Jesús itsa vecuacapitsapa, natsipaeba baja. Jivibitsaëttoxaneto petaevi bajarapacuenë, bitso jamatabëcuenenabenajaca. ¹⁵ Itsiata baitsi jane itsamonae fariseovi Jesús baracuaicuaijaitsi pibisiacuenia.

—Maponë Jesúsje, dovathi jivivecua capitsapabiaba Beelzebú pesaëta. Beelzebú raja daxita dovathivi pepo penamatacaitorobinë, jai fariseovi jamatabëcuenenavëxaniabiaya Jesús yabara.

¹⁶ Itsamonae icatsia fariseovi Jesús picani jamatabëcuenenëjëbiaya itorobatsi pinijicuenë Dioso pesaëta pexanaejava Jesús petsitaexanaenexa. Bajara-pacuenia picani itorobatsi fariseovi peyapëtaenexa pepacuenë Jesús Dioso pitorobinëcuenetsitsica. ¹⁷ Itsiata Jesús jamatabëcueneyapëthane pacuenia fariseovi sivanajamatabëxainatsi. Nexata fariseovijavabelia Jesús jumaitsi mapacueniaje:

—Nacaenacuapijivi ata itsa navecuanatsanaejitsipa penasivanavajabit-saëtsinexa, nexata namataenetsia naverebiabijitsipa daxita bajarapamonae. Bajara pijinia pacuenia nacaemonae ata itsipae. Itsa navecuanatsanaejit-sipa penasivanavajabitsaëtsinexa, nexata namataenetsia naverebiabijitsipa nacaemonae ata. ¹⁸ Bajara pijinia itsipae dovathi ata. Dovathi jivivecua itsa capitsapaponaejitsipa pijajivi, dovathivi, nexata bepijavajabitsaë taejitsipa pijajivi. Itsajamatabëcuenë vecuaxainaejitsipa pijajivi. Pesaë ata apo xainaponae tsipae. Mapacuenia pacatsipaebatsije tsipaji paxamë xanë yabara apo pacanaëjëtsinejevamë jamatabëcuenenavëxaniabiaya pajumaitsimë: “Jesús raja dovathi jivivecua capitsapabiaba Beelzebú pesaëta,” pajamë xanë yabara. ¹⁹ Paxamë ata panijajivi dovathi jivivecua capitsapabi-aba. Nexata xanë Beelzebú pesaëta dovathi jivivecua itsa capitsapabiabajë,

¿detsa nexata ponë pesaëta panijajivi ata dovathi jivivecua capitsapabi-aba? Caenë rabaja Dioso pesaëta. Nexata panijajivi ata pacayapëtane bajarapacuenia jamatabëcuenenavëxaniabiaya panejumaitisijava xanë yabara. ²⁰ Espiritu Santo pesaëta xanë dovathi jivivecua capitsapabiabajë. Nexata baja picani jivi beyapëtane Dioso baja petaxuabijava pijajivi pevetsijava paxamë tuatuajëta, jai Jesús fariseovijavabelia.

²¹ Fariseovi pecanaëjëtsinexa Jesús bitso piasaënëcuene dovathi matatoxenetsia, Jesús icatsia comparacióncuenia jumaiti fariseovijavabelia mapacueniaje:

—Ponë bitso piasaënë, aitatsacaya pijanae cobenaevetabiabijitsipa pijabo, itsamonaë peyacarëjëtsiyanivatsi pecobecovë. Nexata daxita pecobecovë xaniavaetsia tobobenaëjitsipatsi, jai Jesús dovathi pijajivi pevetsijava yabara.

²² Icatsia Jesús pijacuata nayabarajumaiti mapacueniaje:

—Itsiata baitsi jane itsa najetarucæjitsipa itsanë bitso piasaënë boxainaenë matatoxenetsia, nexata cueneamoneyabijitsipatsi. Aitatsacaya pijanae cobenaevetabiabi ata tsipae, itsiata vecuapitsipatsi pijanae, daxita pecobecovëjavaxi yajava, nayabarajai Jesús pijacuata comparacióncuenia dovathi pejamatabëcueneamoneyabijava yabara.

²³ Icatsia Jesús jumaiti fariseovijavabelia:

—Pajivi apo neyavenonaeyacaetuatsi jivi Dioso pijajivinexa, bajarapajivi betajavajabitsaëjivi. Tspaji apo taneyavenonaeyacaetuatsixae, jivi nevecuanacayajata Dioso picani pejumecovënëtsiviminexa, jai Jesús fariseovijavabelia.

Pacuenia dovathi jivitonë pevejamatabëpitsapacujinaetsi, icatsia naviarena pecovëyaberena petsijamatabëccaenexatsi icatsia yabara pelivaisi

(Mt 12.43-45)

²⁴ Icatsia Jesús jumaiti fariseovijavabelia:

—Dovathi itsa vejamatabëpitsapa jivitonë, nexata dovathi jinaruta petseviiranëjava. Jaitapona itsanëjavabelia petsijamatabëjonenexa dovathi penacueraevetsinexa bajaraponëjavata. Itsa apo caxitajarabi, ponëjavabelia tsijamatabëjonejitsia, nexata dovathi jamatabëjumaiti: “Naviatsianajë meta icatsia tajabomijavabelia, paboverena pitsapajë,” jamatabëjai dovathi, ponëjavaverena pitsapa icatsia petsijamatabëjonexatsi. ²⁵ Dovathi baja caevëa itsa naviarena, caxitajaraba peyajavaponaponænëmitsi. Nexata peyajavaponaponænëmitsi pejamatabëëthëto, dovathi tane bepënësjajinecaëbo, bepënëxaniavaetetsibo, bepiracajuetetsibo. ²⁶ Nexata dovathi icatsia sivapona peyajavapatsinexarena itsadovathivi, sieteponëbeje. Bajarapadovathivi bitso piacujirubejevi copiaya padovathi matatoxenetsia. Daxita bajarapadovathivi pebi tsijamatabëjunuatsi peyajavaponaponænëxa. Belia jane baja pebi dovathivi bitso bejiobiaexanatsi. Copiaya abaxë caenë itsa tsijamatabëcatsi pacuenia bejiobiaexanabiabatsi, matatoxenetsia bejiobiaexanatsi, jai Jesús fariseovijavabelia.

Pacuenia Jesús tsipaëba xua yabara jivi jamatabëcuenebarëya yabara pelivaisi

²⁷ Itsa abaxë Jesús livaisi tsipaëba fariseovijavabelia, petiriva bajarapajivi bitsaëttoxanetoyajuvënëva pinijjumeta vavajai tsaxuabi. Jumaiti Jesúsjavabelia:

—¡Jamatabëcuenebarëya baja cajena ena, pecanavitaniabiva, pecavitsatsiva! jai petiriva Jesúsjavabelia.

²⁸ Nexata Jesús jumaitsi bajarapovajavabelia:

—Xaniajamē rabaja. Itsiata baitsi jane pamonae jumetane Dioso pejumelivaisi, nexata itsa jumecovēnēta bajarapalivaisi, bajarapamonae jane bitso jamatabēcuenebarēya tsavanapae taena matatoxenetsia, jai Jesús petirivajavabelia.

Pacuenia pibisiajamatabēcuenevi Jesús picani itorobatsi Dioso pesaēta pini-jicuene pexanaejava petsitaexanaenexa yabara pelivaisi

(Mt 12.38-42; Mr 8.12)

²⁹ Jivi ayaibitsaētoخانeto Jesús itsa matatoyorotsia nacaetuatatsi, nexata Jesús jumaitsi:

—Pamonae aeconoxae jinavanapa, bitso pibisiajamatabēcuenevi. Bajarapamonae picani nitoroba Dioso pesaēta pinijicuene taexanaejava tatsitaexanaenexa, taneyapētaenexa Dioso pepacuene athēbēvetsica taneitorobinēcuenetsica. Itsiata baitsi jane Dioso pesaēta pinijicuene taexanaejava, apo tsitaexanaenē tsane. Bajayata pacuenia Diosojumepabinēmi profeta Jonáspijinē exanatsi, bajara ēpitsicuene taneexanaejava, tsitajētsianajē. ³⁰ Bajayata daxita Nínive tomarapijivi yapētane profeta Jonáspijinē Dioso pitorobinēcuenetsi. Tsipaji ayaicuene exanatsi Dioso. Bajara pijinia pacuenia xanē ata, Daxitajivi Pematapijinēnē, pinijicuene Dioso nexanaena. Nexata daxita pamonae aeconoxae jinavanapa, neyapētaena pepacuene Dioso athēbēvetsica taneitorobinēcuenetsica.

³¹ Itsamatacabi copiapatsiana Dioso penaneconitsiaexanaematacabinexa daxita pijaneconī pexinaeivi. Bajarapamonae nubianatsi Dioso pitabarata. Nexata bajarapamatacabi bajayata povami ponapona, Saba nacuapijivimi pevetsivami, nonotapunaena. Nexata bajarapova Diosojavabelia neconitsiana pamonae aeconoxae jinavanapa, Dioso apo pejumecovēnētsivi. Bajarapova neconitsiana tsipaji bajayata bajarapovami tajē nacuatabuverena ata muxunanajetaruca pejumetaenexa Salomónpijinē, bitso daxitalivaisi peyapētaenēmi, petsipaebilivaisi. Xanē raja majotaje ponaponajē, bitso ayaijamatabēcuenenēnē Salómonpijinēmi matatoxenetsia. Itsiata baitsi jane pamonae aeconoxae jinavanapa mapanacuataje, apo nenamuxunaevetsi. Bajaraxuata ayaineconī xaiña Diosojavabelia, jai Jesús.

³² Icatsia Jesús jumaitsi jivi ayaibitsaētoخانetojavabelia:

—Bajayata Nínive tomarapijivi itsa jumetane Dioso pitorobilivaisi, Jonáspijinē petsipaebilivaisi, copaba pibisiacuene pexanaejava. Najamatabēcuenepēnēyorota Diosojavabelia. Pamatacabi copiapatsiana Dioso penaneconitsiaexanaematacabinexa daxita pijaneconī pexinaeivi, bajarapamatacabi Nínive tomarapijivimi ata nonobapunaena Diosojavabelia peneconitsinexa pamonae aeconoxae jinavanapa, Dioso apo pejumecovēnētsivi. Tsipaji xanē majota ponaponajē bitso ayaijamatabēcuenenēnē Jonáspijinēmi matatoxenetsia. Itsiata baitsi jane pamonae aeconoxae jinavanapa mapanacuataje, tsipaebi atanē Dioso pejumelivaisi, apo najamatabēcuenepēnēyorotsi pibisiacuene pexanaejavavecu. Bajaraxuata Dioso naneconitsiaexanaenatsi bajarapamonae, jai Jesús jivi ayaibitsaētoخانetojavabelia tajēvelia pevajunupaebijavata itsamatacabi Dioso jivi penaneconitsiaexanaejavanexa.

Pacuenia vajaitaxuto belámparabē yabara pelivaisi

(Mt 5.15; 6.22-23)

³³ Icatsia Jesús jumaitsi jivibitsaētoخانetojavabelia:

—Itsajivi ata lámparabë pitanojotsicujinae, apo mataacatetsi itsacuenejavata. Cajoniënëalia ata apo etsi lámparabë. Biji rajane athëbëyo etsia. Jivi boyaberena pejonevi tsivajënaeitayotecaejitsia. ³⁴ Lámparabë boënëta itayoteca xaniavaetsia vajataenexa. Bajara pijinia itsi paneitaxuto ata. Paneitaxutoxanepanaexae, xaniavaetsia panatsivajënaetaneme. Itsa paitaxutobejemë tsipae, nexata xaniavaetsia apo panatsivajënaetaemë tsipae. Pacatsitaaitaquiri saya tsipae. Bajara pijinia itsi panejamatabëcuene ata. Dioso itsa pacajamatabëcueneitayota, pajitsipaename paneexanabiabinexa pacuenia Dioso pacaitoroba. Nexata xaniavaetsia pajinavanapaename. Itsa panajamatabëxainaejitsipame bitso panexainaejava ëpaxamënexa, nexata bitso pajamatabëcueneitaquirimë tsipae. ³⁵ Panayajivitaema xua panajamatabëxainabiabame, papecajamatabëcuene aitaquiriyaexanaeyaniva. ³⁶ Itsa paexanavanapaename pacuenia Dioso pacaitoroba, nexata pacajamatabëcueneitayotsiana Dioso. Tsiquirijavayo ata apo aitaquiri tsane panejamatabëcuene. Nexata pacuenia lámparabë daxita boënë xaniavaetsia itayoteca pecotiata, bajara pijinia pacuenia paxamë ata pacajamatabëcueneitayotsiana Dioso, jai Jesús jivi ayaibitsaëttoxanetojavavelia.

Pacuenia Jesús tsipaeba fariseovijavavelia, judíovi pecujarubivijavavelia ata, pacuenia bajarapamonae naneconita Diosojavavelia yabara pelivaisi (Mt 23.1-36; Mr 12.38-40; Lc 20.45-47)

³⁷ Itsa baja Jesús najumevereta livaisi petsipaebijava, nexata fariseonë junatatsi Jesús penanabaninexa fariseonë pijabota. Jesús nexata najoneya fariseonë pijaboyalia. Naeca mesa muxuneneta penanabaninexa. ³⁸ Fariseonë itsa tane Jesús penabanijava anijatonë nacobequiatsinejeva, fariseonë jamatabëcuenenabenajaca. Pacuenia daxita judíovi pijacuenia anijatonë nacobequiatabiaba penabanivajënae, apo itsi Jesús. ³⁹ Nexata Jesús jumatsi fariseovijavavelia:

—Paxamë pafariseovimë panecaxaejavënae plato, taza ata, naniavelia bapaquiatame xaniavaetsia panijacuenia. Tsipaji jamatabëcuenenavëxaniabiaya pajamatabëjumatsimë tsabiabi: “Itsa caxaejitsipajë xaniavaetsia quiatsinejevanë, Diosojavavelia naneconit-sipajë,” pajamatabëjamë tsabiabi. Bajarapacuenia paquiatabiabi atamë xaniavaetsia panecaxaejavanënexa papecajamatabëcuene bijianaeyaniva picani, itsiata pananeconitaponame Diosojavavelia. Tsipaji bajarapacuenia paquiatabiabi atamë, caranata panejamatabëëthëtota panajamatabëxainabiabame pibisiacuene. Panajamatabëxainabiabame itsanë pecobecovë paneyacajërëtsinexa. Panajamatabëxainabiabamenua paneexanaenexa pibisiacuene ata. ⁴⁰ ¡Apo paneyapëtaevi baja rovia! Dioso cajena pexanaenë daxitacuene. Dioso baja cajena pacaperabëxana. Pacajamatabëëthëexanaua. ⁴¹ Pejajamatabëcuene itsa paxinaejitsipame, nexata pexaniacuene patoexanabiabijitsipame itsamonaejavavelia. Daxita xua ata papecajamatabëcuene bijianaeyaniva, pajanijunavame panexaeyaniva, xua ata pacobejunavame panejayatsiyaniva, apo pacatsitapibisiacuene tsipae, jai Jesús fariseovijavavelia.

⁴² Icatsia Jesús jumatsi fariseovijavavelia:

—¡Paxamë pafariseovimë ayaineconi panatsixainame Diosojavavelia! Panenacanabijava diez xuabejeyajuvënëjava, caejavayo, parajutabiabame

ofrendacuenia Diosojavabelia. Daxitaviria paneubijavaxi ata diez xubejeyajuvënëjava, caejavayo, parajutabiabame ofrendacuenia Diosojavabelia. Xanepana baja picani bajarapacuenia panerajutabiabijava Diosojavabelia. Itsiata bajarapacuenia parajutabiabi atamë, pepacuene apo pajitsipaemë Dioso. Bajaraxuata pananeconitame Diosojavabelia. Pananeconitamenua Diosojavabelia tsipaji pacuene ata picani xanepana panetoexanabiabinexa itsamonaejavabelia, apo pasivanajamatabëxainamë. Bajaraxua picani paxamë bepanajamatabëxainame panetoexanabiabinexa itsamonaejavabelia, jai Jesús fariseovijavabelia.

⁴³ Icatsia Jesús jumaitsi fariseovijavabelia:

—¡Paxamë pafariseovimë ayaineconi panatsixainame Diosojavabelia! ¡Tsi-paji bepaayajamatabëcuenevimë panataeyabiabame! Judíovi penacaetuatabiabilbonëjava itsa panajoneyabiabame, pajitsipabiabame paneenaenexa peyayataevitsi penaenexa petsinubijavanëta. Pajitsipabiabamenua jivi papecabajacobinexa callejava bitso yayataeya, jai Jesús fariseovijavabelia.

⁴⁴ Icatsia Jesús jumaitsi judíovi pecujarubivijavabelia, fariseovijavabelia ata:

—¡Paxamë judíovi panecujarubivi, paxamë ata pijinia pafariseovimë, ayaineconi panatsixainame Diosojavabelia! Paxamë itajara jivi bepatsita pexaniajamatabëcuenevimë tsabiabi pibisijamatabëcuene panexainaevi ata. Pacuenia itsamonae pona jivi pemëthëanë matatsënëa apo peyapëtaexae xua xaina bëpënëareca, bajara pijinia itsi pamonae pacayaiyatane apo peyapëtaexae pacuenia pajamatabëcuenebejemë bëpënëa. Bajarapamonae pacayaiyatane tsipaji apo yapëtae bajarapamonae bëpënëa paneajamatabëcuenebejeyava, jai Jesús judíovi pecujarubivijavabelia, fariseovijavabelia ata.

⁴⁵ Nexata bajarapacuenia Jesús pejumaitsijavata, judíovi pecujarubiviayajuvënëjë jumaitsi Jesúsjavabelia:

—Jesús, itsa mapacuenia jumaitsimëje, paxanë yabara ata pibisiacuenia jumaitsimë, jai Jesúsjavabelia judíovi pecujarubiviyajuvënëjë.

⁴⁶ Jesús nexata jumaitsi judíovi pecujarubinëjavabelia:

—¡Paxamë ata, judíovi panecujarubivi, ayaineconi panatsixainame Diosojavabelia! Palivaisianë ayapébeje itsajivi ata pejumecovënëtsinexa, bajarapalivaisianë jivi patsipaebabiabame pejumecovënëtsinexa. Bajarapalivaisianë patsipaebabiabi atamë itsamonae pejumecovënëtsinexa, paxamë itsiata apo panajamatabëxainamë paneexanaenexa bajarapacuenia, jai Jesús judíovi pecujarubinëjavabelia.

⁴⁷ Icatsia Jesús jumaitsi judíovi pecujarubivijavabelia:

—¡Paxamë judíovi panecujarubivi, ayaineconi panatsixainame Diosojavabelia! Bajayata pamatacabi jinavanapa panijasalinaivimi, beyaxuababiaba Diosojumepaebivimi profetavi. Nexata juya paxamë bajarapaprotetavimi pemëthëanëjumavereca bonë paexanajebame, jivi itsa tane bajarapabonë, penajamatabënapitabiabinexa bajarapaprotetavimi.

⁴⁸ Bajarapacuenia paneexanaexae, pacuenejëpame bajayata panijasalinaivimi pexanaecuene. Panijasalinaivi bajayata beyaxuababiaba profetavimi. Nexata juya paxamë bonë paexanajebame bajarapaprotetavimi pemëthëanëjumavereca, jai Jesús judíovi pecujarubivijavabelia.

⁴⁹ Icatsia Jesús jumaitsi judíovi pecujarubivijavabelia:

—Bajarapacuenia paneexanaejavanexa yabara, daxitacuene Dioso peyapëtaenëxae, bajayata tajëvelia jumaitsi paxamë yabara mapacueniaje: “Bajarapamonaejavabelia toitorobianajë profetavi.

Toitorobianajēnua apóstolevi ata. Bajarapamonae itsiata beyaxu-ababiabiana tatoitorobiviyajuvēnēvi. Bejiobiaexanabiabiananua tatoitorobiviyajuvēnēvi,” jai baja cajena bajayata tajēvelia Dioso bajarapacuenia paxamē paneexanaejavanexa yabara. ⁵⁰ Dioso baja cajena nacua pexanaejavaveliacujinae, panijasalinaivimi beyaxuabapona profetavimi. Nexata bajarapaneconi yajava paxamē pananeconitame Diosojavabelia. Nexata bajarapaneconi yajava Dioso pacananeconitsiaexanaena, paxamē aeconoxae mapamatacabitaje panejinavanapaevi. ⁵¹ Panijasalinaivimi profetavimi pebeyaxuabaponaejava, taxuxuaba Abelpijnēta. Bajaraxuacujinae icatsia pevajēnaeyabelia beyaxuabapona itsaprofetavimi ata. Nexata bexējavaberena ata icatsia panijasalinaivimi beyaxuaba Zacariáspijinēmi. Zacariáspijinēmi panijasalinaivimi beyaxuaba templobopanabota, baitsi templobobeje altavēnējavebeje petuatuajēta. Xaniajanē pacuenia pacatsipaebijitsiatsi. Nexata bajarapaneconi yajava Dioso pacananeconitsiaexanaena paxamē, aeconoxae mapamatacabitaje panejinavanapaevi, jai Jesús judíovi pecujarubivijavabelia.

⁵² Icatsia Jesús jumaitsi judíovi pecujarubivijavabelia:

—¡Paxamē judíovi panecujarubivi, ayaineconi panatsixainame Diosojavabelia! “Vaxaitsi xaniavaetsia Dioso pejumelivaisi yapētanetsi,” pajamatabējamē tsabiabi picani. Itsiata baitsi jane apo payapētaemē. Saicayalivaisi Dioso pejumelivaisivecua jivi patsipaebabiabame. Pacuenia bo baupaxatata jivi pejonayaniva, bajara saya pacuenia paxamē paexaname jivijavabelia. Nexata itsamonae jitsipae ata pejonejava picani Dioso pijanacuayabetsia, paxamē saicayalivaisi panetsipaebabiabixae, apo pacopatsimē pejonenexa Dioso pijanacuayabetsia. Paxamē ata apo pajitsipaemē panejonenexa Dioso pijanacuayabetsia, jai Jesús judíovi pecujarubivijavabelia.

⁵³⁻⁵⁴ Bajarapacuenia Jesús pejumaitsicujinae, pitsapa baja bovecua. Bajaraxuacujinae judíovi pecujarubivi, fariseovi yajava, Jesús itoyatsi. Nexata jamatabēitonotabiabatsi. Jamatabēcueneējēbiaya livaisi yanijobabiabatsi. Nexata Jesús bijiaya itsa jumecanaviata, bajarapalivaisi yabara peneconitsinexatsi picani nacuaevevtsinējavabelia.

12

Pacuenia Jesús tsipaeba jivi pejumecovēnētsianiva fariseovi petsipaebilivaisitsi yabara pelivaisi

¹ Penacaetuataponaejavata jivi pepo ayailbitsaētoxaneto cajena tsaponae, baitsi miles pajivibeje. Nexata jivi nataxucuetasabatuxuabapona. Nexata Jesús pijajivijavabelia copiaya tsipaeba livaisi, pejumecovēnētsianiva fariseovi itsa tsipaebatsi saicayalivaisi Dioso pejumelivaisivecua. Jesús pijavivijavabelia jumaitsi mapacueniaje:

—Xania panayajivitaema fariseovi pijalevadurayaniva. “Levadura,” itsa janē, peyamaxēitojorobilivaisi yabara pacajumaitsitsi. Fariseovi raja bepacsita pexaniajamatabēcuenevi itajara tsane, pibisiajamatabēcuene pexainaevi ata. ² Daxita abaxē palivaisianē jivi aeconoxae apo yapētae, bajarapalivaisianē itsamatacabi daxitajivi yapētaeponaena xaniavaetsia. Pibisiaeuene muetsia itsajivi pexanaejava ata, itsamatacabi xaniavaetsia yapētaena daxitajivi. ³ Xua ata muetsia pavajunupaebame meravi, bajaraxua ata, itsamatacabi itsajivi vajunupaebiana matacabita daxitajivijavata. Xua

ata pēnēyatuucutsiboēnēta baupa xatatsiaya muetsia vēpaxapaxajaiya pava-
junupaebame, bajaraxua ata itsamatacabi itsajivi pinijijumeta vajunupa-
biana jivi penacaetuatsijavata, jai Jesús pijajivijavabelia.

*Pacuenia Jesús tsipaeba pijajivi pecujunaviyaniva jivivevi yabara pelivaisi
(Mt 10.26-31)*

⁴ Icatsia Jesús jumaitsi pijajivijavabelia:

—Tajamonae, pacatsipaebijitsiatsi. Pētsa pacujunavame jivivevi ata.
Bajarapamonae pacabeyaxuabi ata tsipae, acuenebi matavējēa papecait-
sacueniabinexa. ⁵ Biji rajane pacatsipaebijitsiatsi panecujunavinexa Dioso.
Tsipaji Dioso caējēpatsi papecaxuabinexa infiernojavabelia papecabeyaxu-
abicujinae, jai Jesús pijajivijavabelia.

⁶ Icatsia Jesús jumaitsi pijajivijavabelia:

—Cinco ponēbeje baratsui saya namatamota anijapalatanēyobeje. Tsipaji
amatamobi. Bajarapacuenia amatamobi ata, itsiata caenēyo ata Dioso apo
nacofēnētsi bajarapabaratsuiyajuvenēnē. ⁷ Paxamē rabiji bitso Dioso pacaa-
siva baratsui matatoxenetsia. Tsipaji panamatamotame baratsui matatox-
enetsia. Dioso bitso papecaasivaxae, panematanatoxi ata, caematanatoyo
canacujitsia, Dioso baja cajena namataējēta. Bajaraxuata pētsa pacuju-
navame itsacuenejava ata, jai Jesús pijajivijavabelia.

*Pacuenia Jesús pijajivi apo benayavajunuaxainae Jesús pijajivicuene
yabara pelivaisi*

(Mt 10.32-33; 12.32; 10.19-20)

⁸ Icatsia Jesús jumaitsi pijajivijavabelia:

—Pacatsipaebijitsiatsi raja. Daxita pamonae tajajivi, jivi pitabarata
navajunupaebiana tajajivicuene. Bajarapamonae juya xanē, Daxitajivi Pe-
matapijinēnē, vajunupaebianajē tajajivicuene Dioso pijaāngelevi pitabarata.

⁹ Pamonae jumai tsane itsamonaejavabelia: “Xanē cajena Jesús apo pi-
jajivitonēnē,” jai tsane, bajarapamonae yabara juya xanē, jumaitsinē
tsane: “Mara pamonae cajena apo tajajivije,” janē tsane Dioso pijaāngelevi
pitabarata, jai Jesús pijajivijavabelia.

¹⁰ Icatsia Jesús jumaitsi pijajivijavabelia:

—Pajivi pibisiacuenia nebaracuaicuajai ata, xanē, Daxitajivi Pematapi-
jinēnē, bajarapaneconi yabara itsa navajēta Diosojavabelia, itsiata vecuaa-
jibiaexanaenatsi Dioso. Itsiata baitsi jane pajivi pibisiacuenia baracuaicuaj-
jai Espiritu Santo, bajarapajivi bajarapaneconi Dioso apo vecuajibiaex-
anaetsi tsane, jai Jesús pijajivijavabelia.

¹¹ Icatsia Jesús jumaitsi pijajivijavabelia:

—Itsa pacacaponaelia tomaraevetsivijavabelia, judiōvi penacaetuatabi-
abibojavabelia ata, papecayanijobinexa, pētsa pajamatabēcuenebējamē pa-
nenayajivicuaicuajijavanexa yabara. ¹² Tsipaji raja bajarapaepatota,
Espiritu Santo pacacuaicuajiyaxanaena pacuenia panayajivicuaicuaj-
jamējitsia, jai Jesús pijajivijavabelia.

*Pacuenia Jesús jivi livaisi tsipaeba bitso pesivanajamatabēxainaejaniva ayai-
java pexainaejava pexainaejava yabara pelivaisi*

¹³ Jivi ayaibitsaētoxanetoyajuvenēnē jumaitsi Jesúsjavabelia:

—Jesús, taxapijinē picani petēpaevajēnae netocopata pevēnamuto
tapitsinexa pecobecovēyajuvenējavanē. Nexata tamatapijinē pita
bajaraxuanē. Nexata itorobare tamatapijinē tanerajutsinexa taxapijinē
tanerajutsiapaebijavanē, jai bajaraponē Jesúsjavabelia.

¹⁴ Jesús nexata jumaitsi bajaraponējavabelia:

—Itsajivi ata cajena apo nitorobi jueznēnēxanē, tananeconitsiaex-
anaenexa ponē naneconita. Itsajivi ata cajena apo nitorobi axapijinē
pecobecovē patacatsicobetsatsinexabeje, jai Jesús.

¹⁵ Nexata icatsia Jesús jumaitsi daxitajivijavabelia:

—Xania pataema. Pētsa bitso panajamatabēxainame ēpaxamēnēxa ayaijava
panexainaenēxa. Tsipaji jivi pexainaejava ayaijava xainae ata tsipae, ba-
jarapamonae pexainaejava yabara jamatabēcuēnēxanēpanaēya apo jinavana-
pae tsipae, jai Jesús.

¹⁶ Nexata Jesús tsipaeba livaisi bajarapamonaejavabelia mapacueniaje:

—Ponapona bitso riconē. Pijapabianē tocapitsapabiabatsi ayaijava pex-
ainaecuene. ¹⁷ Riconē nexata jamatabējumaitsi: “¿De meta pacuenia exanae-
najē? Netoajibi baja rovia taetaponaējavabelianēxa taubijava,” jamatabējai
riconē. ¹⁸ Riconē nexata icatsia jamatabējumaitsi: “Yapētaniji rajane baja
pacuenia exanaejitsianē. Paboxita jebabiabajē taubijava, penetsianicajē
taexanaenēxa icatsia ayaiiboxanetonē bajarapacovēta. Bajarapaboxane-
tonēta jane baja jebianajē daxita taubijava, daxita tacobecovē yajava.
¹⁹ Nexata baja xainaenajē bajayajebinēxa daxitacuene xua namatavenon-
ajē. Nexata jane baja xuacujinae nacueraevetsianajē. Pexaniacuene na-
banebiabianajē. Pexaniaviriaranēnua matavējēa apayabiabianajē taita-
jibinēxa. Nexata barēyanē tsabiabi tsane,” jamatabējai riconē. ²⁰ Nexata
bajarapaepatota Dioso jumaitsi riconējavabelia: “Apo neyapētaenē baja rovia
xamē. Ajena baja, mapameravitaje, tēpaename. ¿Iipatsa nexata nevēnamuto
pitsiana daxita nexaniavaetējibijavanēmi?” jai Dioso riconējavabelia, jai
Jesús mapalivaisije daxitajivijavabelia.

²¹ Icatsia Jesús jumaitsi bajarapamonaejavabelia:

—Bajara pijinia pacuenia paxamēyajuvēnēvi ata tocopiapatsianatsi pa-
monae ayaijava natocaetuatapona ēpamonae pexainaenēxa. Bajarapa-
monae itsiata pepacuene bepejibivi tsane Diosojavabelia, jai Jesús bajarapa-
monaejavabelia.

*Pacuenia Dioso pijajivi eveta mapanacuataje yabara pelivaisi
(Mt 6.25-34)*

²² Jesús nexata jumaitsi pijajivijavabelia:

—Xaniajanē pacuenia pacatsipaebijitsiatsi. Pētsa pasivanaja-
matabēxainame ēpanexaejava panevēnājinavanapaenēxa. Pētsa pasivana-
jamatabēxainamenuea ēpanenaxatabijavanēxa ata. ²³ Apo jinavanapaetsi
cajena ēvajaxaejavanēxa. Apo jinavanapaetsinua ēvajapanerabēxatabinēxa.
²⁴ Pacanaējēre pacuenia baratsui apo ubi pexaejavanēxa. Apo notsinua
penaveretaponaējava. Apo xainaenuea penaveretaponaējava peetsibonēxa.
Itsiata Dioso rajutabiabātsi pexaejavanēxa. ¡Paxamē rabiji bitsoyo Dioso
pacaasiva baratsuimonae matatoxenetsia papecarajutsinēxa daxita
xua panamatavenoname! Bajaraxuata pētsa pasivanajamatabēxainame
ēpanexaejavanēxa, ēpanenaxatabijavanēxa ata. ²⁵ ¿Detsa jane ponē
paxamēyajuvēnēnē caējēpatsi pijacujiruta medio metrocuenia matavējēa
penavitsabiaexanaenēxa? Ajibi. Bitso jamatabēbējai ata tsipae
pevitsabinēxa, itsiata apo navitsabiaexanae tsipae pijacujiruta. Nexata
saya najamatabēcuēnēcuersatsipa pejamatabēcuēnebējajava penavitsabi-
aexanaejavanēxa. Tsipaji apo tonamatamotsitsi bajaraxua. ²⁶ Bajara
pijinia pacatoitsi paxamē ata daxita xua pasivajamatabēcuēnebējamē.
Apo pacatonamatamotsi. Bajaraxuata apo bepajamatabēcuēnebējamē
itsacuenejavayo ata yabara, jai Jesús pijajivijavabelia.

²⁷ Icatsia Jesús jumaitsi pijajivijavabelia:

—Pacanaējere pacuenia bitso pexaniamatono pitsapa, mapamatonoje. Bajarapamatono apo natsijumanacuenebi. Penaxatatsijavanexa ata apo natoexanae. Bajayata nacuaevetsinē Salomónpijinē bitso pexainaenēmi. Naitabētsiaya naxatabiaba bitso pexaniavirijavanē. Itsiata baitsi jane Salomónpijinē penaitabētsijava matatoxenetsia bitso aitabē mapamatonotoxije. ²⁸ Paxamē, bevelia Dioso panejumecovēnētsivi, asaēya bepajumecovēnētame Dioso papecaevetsijava. Ajena pitsijavata vayafota tanetsi pexaniaponamatanotoxi. Bajaraxuacujinae, caematacabibejecujinae, tajuatsi baja bajarapaponamatonotoximi. Pacuenia Dioso aitaēyaexana ponamatonotoxi, bajara pijinia pacuenia paxamē ata itsamatacabi Dioso pacaxatabiana piaitaējjava. ²⁹ Bajaraxuata pētsa pasivanajamatabēxainavanapame ēpanexaejavanexa, ēpanematavējēaapaejavanexa ata. Biji rajane pajumecovēnētavanapare Dioso. ³⁰ Pamonae Dioso apo pejumecovēnētsivi, bitso sivanajamatabēxainabiaba ēpexaejavanexa, ēpenaxatabijavanexa ata. Itsiata baitsi jane paneaxa Dioso paxainame. Bajaraponē yapētane daxita xua panamatavenoname. ³¹ Bajaraxuata, daxita xua panamatavenoname, matatoxenetsia Dioso pijacuene bitso pasivanajamatabēxainabiabianame Dioso pijacuene panetoexanavanapaenexa. Nexata Dioso pacarajutsiana daxita xua panamatavenoname, jai Jesús pijajivijavabelia.

Pacuenia Jesús tsipaeba pijajivi xaniavaetsia Dioso petonacuenebavananexa itsamatacabi ayajjava pexainaenexa athēbētatsia yabara pelivaisi (Mt 6.19-21)

³² Icatsia Jesús jumaitsi pijajivijavabelia:

—Tajamonae, paxamē patajajivimē pacaevijiviyomēbeje ata, pētsa paju-navame. Tsipaji paneaxa pacaitapeta panecobenaevetsinexa pamatacabi bajaraponē evetsiana daxitacuene. ³³ Pacanajere panexainaeyajuvēnējjava, bitso paneasivajava ata. Nexata bajarapapalata parajutsianame bitso bepejibivijavabelia. Nexata juya Dioso athēbētatsia pacarajutsiana bitso penamatamotsijava, apo peverevereaejjava. Bajarajotatsia acuenebi pejonejjava penacobetoxotsivi papecayacajērētsinexa. Itsanē ata ajibi papecatoucubax-aenēnexa. ³⁴ Panacuatatsia pacatoxaniavaeta panexinaejavanexa, bajarapanacua panejamatabēēthētovetsina pajamatabēnainavanapaenename, jai Jesús pijajivijavabelia.

Pacuenia Jesús pijajivi tsipaeba pacujinae icatsia patsijitsiatsica najamatabēcuenexaniavaetsiaya pevājēnae pijajivi pecopiaevetavanapaenexatsi yabara pelivaisi

³⁵ Jesús icatsia pepatsijavanexatsica tajēvelia navajunupaeba. Jesús jumaitsi pijajivijavabelia mapacueniaje:

—Icatsia raja jemata patsianicajē. Nexata najamatabēcuenexaniavaetsiaya panecopiaevetavanapaenename. ³⁶ Payapētaneme rabaja mapacueneje. Petuxanenē itsa pona penacasabifestajavabelia, pijajivi tonajumecopata meravijebi ata pecopiaevetavanapaenexatsi pepatsijavarena. Nexata petuxanenē pijajivi meravi ata copiaevetavanapatsi. Nexata petuxanenē jemata meravi najetarucua ata, baupa itsa docodocofa, nexata bajarapamonae bepijia tobaupata pijatuxanenē. ³⁷ Bajarapamonae barēya pijatuxanenē naēcotsiaya pecopiaevetavanapaevjavata pepatsixae. Xaniajanē pacuenia pacatsipaebijitsiatsi. Nexata petuxanenē pijajivi cae-cuenia petobaupatsixaetsi, petuxanenē pijajivi sivajamatabēcuenebarēya.

Nexata petuxanenē pepatsicujinae xaniavaeta mesa. Enaeyaexanaena pijajivi. Nexata caranata petuxanenē bajarapamonae beprijavitonē nataeya rajuta pexaejava pijajivi. ³⁸ Meravi tuatuajēta petuxanenē patsi ata, itsa jume, matabcibivēpata patsi ata, nexata petuxanenē pijajivi naēcotsiaya pecopiaevetavanapaējavata pijatuxanenē pecaxitajarabixaetsi, petuxanenē pijajivi barēya. ³⁹ Pacanaējēre mapacuenēje. Bo pexainaenē itsa yapētaejitsipa paepatota meravi pijabojavaberena patsijitsia pecobecovē petonacobetoxotsinēnexatsi, nexata apo majitsi tsipae. Vajēnaeevetecaejitsipa meravijebi. Apo copatsi tsipae pijaboyaberena petojoneyanivatsi penacobetoxotsinēnexa. ⁴⁰ Bajara pijinia pacuenia paxamē ata najamatabēcuenexaniavaetsiaya panecopiaevetavanapaename tapatsijavatsica. Tsipaji xanē, Daxitajivi Pematapijinēnē, paepatota apo panejamatabēnajinaemē tapatsijavanexatsica, jemata icatsia patsianicajē, jai Jesús pijajivijavabelia tajēvelia penavajunupaebijavata icatsia pepatsijavanexatsica.

Pacuenia Jesús pijajivijavabelia livaisi tsipaeba, petuxanenē pijavitonēbeje pelivaisicuenia, yabara pelivaisi

(Mt 24.45-51)

⁴¹ Pedro jumaitsi Jesúsjavabelia:

—Tajatuxanenē, ζpalivaisi aeconoxae panetsipaebame, baja tsaja palivaisi ēpaxanē panijajivinexanē? Itsa jume, ζitsamonaenexa ata tsaja yajava? jai Pedro.

⁴² Jesús nexata jumaitsi Pedrojavabelia:

—Mara pejamatabēcuenēitsivinexa yabara pacatsipaebatsije. Petuxanenē pijavitonē, ponē xaniavaetsia pijatuxanenē pecovēta tonacuenēbaponapona pijacuene, maitsiije. Petuxanenē pijavitonē itsajamatabēcuenē xainaenejeva, copiaevetaponapona pijatuxanenē pepatsimatocabijavabelianexa. Bajaraponē pijatuxanenē pijajivi pecovēta toevetaponapona xaniavaetsia. Toabataponapona pexaejava caematacabi canacujitsia pacuenia itorobatsi pijatuxanenē. ⁴³ Bajaraponē bitso barēya pamatacabi pijatuxanenē pata xaniavaetsia pijajivi pecovēta petoetevetaponaponaexae.

⁴⁴ Xaniajanē pacuenia pacatsipaebijitsiatsi. Ponē bajarapacuenia xaniavaetsia tonacuenēba pijatuxanenē pecovēta, bajaraponē icatsia evetsiaexanatsi daxita xua xaina pijatuxanenē.

⁴⁵ Petuxanenē pijavitonē itsa piamatabēcuenēbejenē tsipae, nexata bajaraponē pijatuxanenē pecovēta jamatabējumai tsipae: “Tajatuxanenē ajibi tsarucae tsane bajayajebi,” jamatabējai tsipae. Nexata pijatuxanenē pijajivi, pamonaē evetsiaexanatsi xaniavaetsia picani petoevetsinexa, toconibabeyabiabijitsipa. Conibabeyabiabijitsipa pebijivi, petriavi ata. Bajaraponē ayajava pexaejava xaeyabiabijitsipa. Aitajibinua tsabiabi tsipae. ⁴⁶ Nexata itsajota apo jamatabēnajinae tsipae pijatuxanenē pepatsijavanexa, bajarapaepatota jemata patsipa pijatuxanenē. Nexata bajaraponē pijatuxanenē pinijicuenia naneconitsiaexanaejitsipatsi. Bajara pijinia pacuenia Dioso ata itsamatacabi pinijicuenia naneconitsiaexanaena pamonaē Dioso apo pejumecovēnētsivi, jai Jesús Pedrojavabelia.

⁴⁷ Icatsia Jesús jumaitsi pijajivijavabelia:

—Ponē itsanē pijavitonē, yapētae ata picani pacuenia itorobatsi pijatuxanenē petoexanaenexa, itsiata itsa apo toexanaē pijatuxanenē pitorobicueniatsi, bajaraponē pinijicuenia jumaconibabējitsipatsi ayaicuerobocotota.

⁴⁸ Ponē ata pijinia itsanē pijavitonē, itsa apo jumeyapētae xaniavaetsia petoexanaenexa pacuenia pijatuxanenē itorobatsi, nexata pijatuxanenē

pitorobicueniatsi saicayacuenia itsa toexana, bajaraponë ata jumaconi-babejitsipatsi. Itsiata pinijicuenia apo jumaconibabe tsipaetsi. Pajivi pijinia ayaijava rajutatsi, bajarapajivi yabara vaxaitsi basivajamatabëjumaitsitsi: “Juya meta mapajivije ayaijava rajutabiabiana itsamonaiejavabelia,” basi-vajamatabëjaisi. Pajivi pijinia evetsiaexanatsi ayaijava, bajarapajivi pevetsiaexanaenëtsi sivajamatabëjumaitsitsi: “Itsa netocanacuenebiana taevetsiaexanaejava, ayaijava netopitsapaena,” sivajamatabëjaisi pevetsiaexanaenëtsi, jai Jesús pijajivijavabelia.

Pacuenia Jesús apo penajuajumecovënëtsixae, nacaemonae ata apo najamatabëcuenejëpae tsane yabara pelivaisi
(Mt 10.34-36)

⁴⁹ Icatsia Jesús jumaitsi pijajivijavabelia:

—Xanë raja patajopajë daxitanacuapijivi pibisiacue ne pexanaeneconi yabara tasivatëpaenexa. Nexata bajarapamonaeyajuvënëvi itsamona ne jumecovënëtsiana. Nexata nacaemonae ata apo najamatabëcuenejëpae tsane. Itsa baja capanepaeya cruzata daxitajivi sivatëpaejitsipajë, jamatabëcuenebarëyanë baja tsipae. ⁵⁰ Itsiata baitsi jane abaxë netosajina bajaraxua yabara tanejamatabëcuenejëtsinexa tanebeyaxuabijavata. ¡Bitso baja rovia najamatabëxainajë! ¡Matapania nebeyaxuabiana, jamatabëcuenecaevianajë! ⁵¹ Pëtsa panesivajamatabëjumaitsimë mapacueniaje: “Jesús rabaja patsica mapanacuayabetsicaje daxitajivi mapanacuataje najamatabëcuenejëpae pejinavanapaeyaexanaenexa,” panesivajamatabëjamë pëtsa. Bajaraxuanexa apo patsinëtsica. Biji rajane xanë tapatsixaetsica mapanacuayabetsicaje, jivi itsa nejumecovënëtsiana, apo najamatabëcuenejëpae tsane pamonaiejavabelia apo nejumecovënëtsi, nacaemonae ata. Itsamona napijavajabitsaë tsane. Nexata apo najamatabëcuenejëpae tsane. ⁵² Ajena mapamatacabijavaliacuajinaeje jivi apo najamatabëcuenejëpae tsane. Cinco pajivibeje, nacaemonae ata, caebota pejinavanapaevi ata, apo najamatabëcuenejëpae tsane xanë apo tanenajuajumecovënëtsixaebeje. Pamona cinco pajivibeje nacaemonae, bajarapamonaeyajuvënëvi, acueyabi pajivibeje, nejumecovënëtsiana. Anijajivibeje apo nejumecovënëtsi tsane. Itsa jume, anijajivibeje nejumecovënëtsiana. Acueyabi pajivibeje apo nejumecovënëtsi tsane. ⁵³ Bajarapabopijivi, paxabeje pexënatobeje, apo najamatabëcuenejëpaebeje tsane xanë apo tanenajuajumecovënëtsixaebeje. Petirivabeje pijinia, penabeje pexënatoyobeje ata, apo najamatabëcuenejëpaebeje tsane xanë apo tanenajuajumecovënëtsixaebeje. Pamebeje pecopenabeje ata apo najamatabëcuenejëpaebeje tsane xanë apo tanenajuajumecovënëtsixaebeje, jai Jesús pijajivijavabelia.

Pacuenia Jesús asaëya jivi muxujioba apo pecanajëtsixae Jesús Dioso pexënatocuene yabara pelivaisi
(Mt 16.1-4; Mr 8.11-13)

⁵⁴ Jesús icatsia jumaitsi jivi ayaibitsaëtoxanetojavabelia:

—Itsa pataneme vaëvetsica itarërëbo pepitsapaejava, nexata pajumaitsimë tsabiabi: “Ajena raja emajitsia,” pajamë tsabiabi. Nexata bajarapamatacabi ema jopabiaba. ⁵⁵ Itsa pataneme jovibo pepitsapaejava epatajërëtsiarena la surverena, pajumaitsimë tsabiabi: “Ajena raja icotia ataju tsane,” pajamë tsabiabi. Nexata bajarapamatacabi icotia ataju tsabiabi. ⁵⁶ Nexata

itsamonae pacatane bepatsita pexaniajamatabëcuenevimë itajara, papibisi-ajamatabëcuenevi atamë. Payapëtaeyabiabame pacuenia matakabi itsijitsia itarërëbo pepitsapaejava panetaeyabiabixae. Bajarapacuenia picani payapëtaeyabiabame. Itsiata baitsi jane patae atamë daxita xua Juan-pijnëmi jivibautisabinëmi exanapona, patae atamënuu daxita xua xanë ata exanaponajë, caranata xanë apo paneyapëtaemë Dioso athëbëvetsica taneitorobinëcuenetsica, jai Jesús jivi ayaibitsaëttoxanetojavabelia.

Pacuenia penaneconitsijivi xaniavaetsia bebarëcuaicuajai pajivijavabelia naneconita penasivajamatabëxanepanaenexabeje, peneconitsiyanivatsi jueznëjavabelia, yabara pelivaisi

(Mt 5.25-26)

⁵⁷ Jesús icatsia jumaitsi jivi ayaibitsaëttoxanetojavabelia:

—Pacanaëjère panijacuata paneexanaenexa pacuene xanepana.

⁵⁸ Itsa pananeconitame itsajivijavabelia, nexata itsa pacacapona bajarapajivi jueznëjavabelia papecanconitsinexa, namutua xaniavaetsia panabarëcuaicuajiamërebeje panenasivajamatabë xanepanaenexabeje xua yabara pacaneconitsijitsia. Bajarapacuenia xaniavaetsia panabarëcuaicuajiamërebeje papecanutsiyaniva jueznë pitabarata. Tspaji raja jueznë itorobijitsipa policíavi panijaneconi yabara papacacaponaenexa penaneconitsivi pejebabiabiboyabelia. Nexata policíavi pacananeconitsiaexanetsipa penaneconitsivi pejebabiabibota.

⁵⁹ Xaniajanë pacuenia pacatsipaebijitsiatsi. Nexata penaneconitsivi pejebabiabibota itsa pacananeconitsiaexanetsipa, bajaraverena bepijia apo papitsapaemë tspae. Matapania pamatamotsipame daxita xua yabara pacananeconitsiaexaneta, papitsapaejitsipame, jai Jesús jivi ayaibitsaëttoxanetojavabelia.

13

Pacuenia jivi benajamatabëcuenepeñëyorota pibisiacuene pexanabiabijavavecuayabara pelivaisi

¹ Itsamonae jumaitsi Jesúsjavabelia:

—Galilea nacuverena pepatsivi, baca beyaxuaba Jerusalén tomarata templobota. Bajarapamonae baca beyaxuaba ofrendacuenia pevi perajutsinexa Diosojavabelia. Nexata bajarapaepatota nacuaevevtsinë Pilato pibisiacuene exana. Itoroba vajabitsaë Galilea nacuapijivimi pebeyejebinxatsi templobota. Itsajota Galilea nacuapijivimi baca beyaxuababuata, bajarapacovëta icatsia beyejebatsi bajarapamonaemi. Nexata bajarapamonaemi pijana namatajërëata bacajana yajava, jai itsamonae Jesúsjavabelia.

² Jesús nexata jumaitsi bajarapamonaejavabelia:

—“Pamonaemi bajarapacuenia beyejebatsi, bitso meta pibisiacuene pexanavimi daxita pijanacuapijivi matatoxenetsia. Bajaraxuata beyejebatsi panaxuabinexa Diosovecu,” ¿pajamatabëjamë tsaja? ³ Jume baja cajena. Bajarapamonaemi ata picani bitso pibisiacuene apo exanae pijanacuapijivi matatoxenetsia. Itsiata Dioso tocopatatsi bajarapamonaemi pebeyejebinxatsi, penacopabivi pecanaëjëtsinexa Diosojavabelia penaneconitsijiva. Paxamë ata itsa apo pacopabimë tsane pibisiacuene penexanabiabijava, itsa apo panajamatabëcuenepeñëyorotsimë tsane Diosojavabelia, nexata bajarapacuenia paxamë ata panaxuabianame Diosovecuata itsa patëpaename. ⁴ Pamatacabi ata jemata Jerusalén tomarata jopanucaya

athëbëabetsia piapiabotsia, Torre de Siloëvënëbo, dieciocho pajivibeje matacënëbatsi. Nexata baja tēpa bajarapamonaemi. “Pamonaemi matacënëbatsi, pibisiacuene meta bitso pexanaevimi daxita Jerusalén tomarapijivi mata-toxenetsia. Bajaraxuata matacënëbatsi penaxuabinexa Diosovecua,” ¿pajamatabëjamë tsaja? ⁵ Jume baja cajena. Bajarapamonaemi ata picani bitso pibisiacuene apo exanae pijatomarapijivi matatoxenetsia. Paxamë ata itsa apo pacopabinë tsane pibisiacuene paneexanaejava, itsa apo panajamatabëcuene pēñeyorotsimë tsane Diosojavabelia, nexata daxita paxamë ata bajarapacuenia panaxuabianame Diosovecua itsa patēpaename, jai Jesús bajarapamonaejavabelia.

Pacuenia Jesús jivi livaisi tsipaeba piacuajibihigueranae pelivaisicuenia yabara pelivaisi

⁶ Jesús jivi livaisi tsipaeba piacuajibihigueranae pelivaisicuenia. Jesús jivi piacuajibihigueranae pelivaisicuenia petsipaebijavata, pijaperujujamatatabëcuene apo penavecuacopatsivi yabara Jesús jumaitsi mapacueniaje:

—Pebi pijapabi tuatuajëta caenae peubinae xainanuta, higeravënënae. Nexata picani taeyojopalia bajaraponae penacuaitisijava. Itsiata baitsi jane apo nacuaitsi. ⁷ Nexata jumaitsi pijapabi petoevetsinëtsijavabelia: “Taema maponaaje. Acueyabi picani pavaibeje taeyopajë tacuainotabiabinexa maponaecuajije. Itsiata acuajibi tsabiabi. Nexata baja netonicataxuare. Apo becopatantsitsi bajaraponae. Ira caranatanuca saya,” jai pijapabi pexainaenë. ⁸ Itsiata baitsi jane pijapabi petoevetsinëtsi jumaitsi: “Copatanantsianatsibeje abaxë mapavaije. Nexata bacatuirabianajë bacata-sitoxita. ⁹ Baja raeta xuacujinae xanepanaena. Nexata aeconoxae pavai nacuaitisiana. Nexata aeconoxae pavai ata itsa apo nacuaitsi tsane, nexata jane baja catonicataxuabianatsi,” jai pijapabi petoevetsinëtsi, jai Jesús.

Bajarapacuenia Jesús jumaitsi tsipaji Dioso xuabijitsia pamonae pijaperujujamatatabëcuene apo pecopatsivi.

Pacuenia Jesús jamatejemayaexana judíovi penacueraevetsimatacabita penajumafurutsivami yabara pelivaisi

¹⁰ Itsamatacabita judíovi penacueraevetsimatacabita, Jesús jivi livaisi tsipaeba judíovi penacaetuatabiabibota. ¹¹ Bajarajota naeca petiriva. Dovathi pejamatabëcueneta bajarapova dieciocho pavaibeje xaina penajumafurutsicujinae. Nexata apo caëjēpaetsi tsiquirijavayo ata penaepasirovitsijava. ¹² Itsa Jesús taeyeta bajarapova, nexata junarena. Jesús jumaitsi bajarapovajavabelia:

—Niatanejavami rabaja cavecuajibi, jai Jesús bajarapovajavabelia.

¹³ Jesús tsimatanacobebuata bajarapova. Nexata bajarajota petiriva naepasirovitsixanepana baja. Nexata bajarapova jumai tsaponae Diosojavabelia:

—¡Diosomë, bitso pexaniacuene netoexaname ayaijamatabëcuenenëxaemë! jai tsaponae bajarapova Diosojavabelia.

¹⁴ Itsiata baitsi jane judíovi penacaetuatabiabibito pevetsinë Jesús baraanaepanatsi judíovi penacueraevetsimatacabita Jesús pejamatejemayaexanaexae penajumafurutsiva. Tsipaji judíovi apo jitsipae itsajivi ata itsacuenejavayo pexanaenexa penacueraevetsimatacabita. Nexata judíovi penacaetuatabiabibito pevetsinë jamatabëjumaitsi:

—Jesús nacueneba penacueraevetsimatacabita. Jesús apo jumecovënëtsi patajasalinaivi patanifavetsicuene, jamatabëjai.

Nexata judíovi penacaetuatabiabibo pevetsinē najumejematsiaya jumaitsi jivijavabelia:

—Caesemana canacujitsia xainaponatsi seis pamatacabibeje vajanacuenebinexa. Bajarapamatacabijava bepatatsi vajanacajamatejsemayaexanaenexa. Nexata abaxē penacueraevetsimatacabita apo bepatatsi vajanacajamatejemayaexanaenexa, jai judíovi penacaetuatabiabibo pevetsinē najumejematsiaya jivijavabelia.

¹⁵ Nexata Jesús jumaitsi judíovi penacaetuatabiabibo pevetsinējavabelia:

—Paxamē saya jivi paneyamaxēitojorobivi. Bepatsita pexaniajamatabēcuenevimē itajara itsamonae, papibisiajamatabēcuenevi atamē. Paxamē ata panacuenebabiabame penacueraevetsimatacabita ata. Paxamē penacueraevetsimatacabita ata panijabaca, burro ata, paisinabiabame panecaponaenexa merajavabelia mera piapaenexa. ¹⁶ Mapovaje Abrahampijinē pemomoxiyajuvēnēva jamatejemayaexanjē. Tspajaj bajarapova namatamota Dioso pitabarata dajubinē matatoxenetsia. Dovathi pejamatabēcueneta penajumafurutsicujinae, xaina baja dieciocho pavaibeje. Bajaraxuata penacueraevetsimatacabita ata jamatejemayaexanjē piatanecuenecua, jai Jesús judíovi penacaetuatabiabibo pevetsinējavabelia.

¹⁷ Bajarapacuenia Jesús itsa jumaitsi, nexata daxita pecueneitoyavitsi moya ena. Aura tsenae bajarapamonae. Itsamonae pijinia Jesús sivajamatabēcuenebarēyatsi pinijicuenē Dioso pesaēta pexanaponaejavanē yabara.

Pacuenia mostazaxutoyo pejuvicujinae, mostazanae bepijia vitsaba yabara pelivaisi

(Mt 13.31-32; Mr 4.30-32)

¹⁸ Jesús jumaitsi jivijavabelia:

—¿De meta xua pelivaisi jēpa Dioso pijajivi bepijia ayaibitsaētoxaneto penaexanaejavanexa? Jivi meta peyapētaenexa ayaibitsaētoxaneto bepijia Dioso pijajivi penaexanaejavanexa, mostazaxutoyo meta pelivaisicuenia tsipaebianajē. ¹⁹ Pebi capona mostazaxutoyo peubinexa pijapabita. Nexata baja mostazaxutoyo pebi itsa uba pijapabita, bajarajota mostazanae bepijia vitsaba. Bepijia baja mostazanae pinijinae naexana. Baratsui ata exana pematapenanē bajaraponaemaxēranaxijava. Bajara pijinia pacuenia Dioso pijajivi ata itsane. Bepijia ayaibitsaētoxaneto naexanaena Dioso pijajivi, jai Jesús jivijavabelia.

Pacuenia pan pexanaematabēnēxa, levaduravēnējava fufunaeyaexana yabara pelivaisi

(Mt 13.33)

²⁰ Icatsia Jesús jumaitsi jivijavabelia:

—¿De meta palivaisi jēpa pecacaējēpaejava Dioso pijajivi pevetsicuenē daxitanacuanējava? ¿De meta pacuenia jivi livaisi tsipaebianajē peyapētaenexa Dioso pijajivi pevetsicuenē peyacaējēpaejava daxitanacuanējava? ²¹ Levaduravēnējava meta pelivaisicuenia tsipaebianajē. Petiriva pan pexanaenexa, acueyabi patarrobeje trigobenonē matajērēaba levaduravēnējavata. Nexata pan pexanaematabēnēxa, ayaimatabē.

Tsquiribaupayo epatajērētsialia yabara pelivaisi

(Mt 7.13-14, 21-23)

²² Jesús jivi livaisi tsipaebanajetaruca pinijitomaranējava, tsiquirito-maraxijava ata, pepatsinexa Jerusalén tomarabelia. ²³ Nexata Jesús jivi

livaisi petsipaebijavata, itsanë yanijobatsi Jesús. Bajaraponë jumaitsi Jesúsjavabelia:

—Jesús, ¿Dioso tsaja capanepaena caebitsaëtoyo saya? jai.

Nexata Jesús jumaitsi daxita jivijavabelia:

²⁴ —Xaniajanë pacuenia pacatsipaebijitsiatsi. Pajamatabëcuenesaëmëre bitso panevajënaeyabelia itsamatacabi athëbëtatsia panejonenexa tsiquiribaupayojavalia. Jivi picani itsamatacabi athëbëtatsia ayaibitsaëtoxaneto jamatabëjonena tsiquiribaupayojavalia. Itsiata apo caejëpaetsi tsane pejonenexa. ²⁵ Bo pexainaenë itsa nonotapunaena baupa pexatatsinexa, paxamë bo jumapënëvelia panubenaenamë. Nexata picani panejonenexa pabaupadococotsianame. Pajumaitsimë tsane: “Tajatuxanenë, panetobaupare,” pajamë tsane. Itsiata bajaraponë pacajumaitsi tsane: “Apo pacayapëtaetsi cajena paxamë. Itsaverena ata papatame, apo yapëtaenë,” pacajai tsane. ²⁶ Nexata paxamë pajumaitsimë tsane: “Xamë baja cajena panebarënanabaneme. Panebarëmatavëjëaapamenua. Patajatomaranejjava ata baja cajena jivi livaisi tsipaebabiabame,” pajamë tsane. ²⁷ Itsiata bajaraponë pacajumaitsi tsane: “Apo pacayapëtaetsi cajena paxamë. Itsaverena ata papatame, apo yapëtaenë. Pibisiacuene paneexanabiabivi, panevecuaponare baja,” pacajai tsane. ²⁸ Dioso pijanacuatsia pataename Abrahampijinë, Isaacpijinë ata, Jacobpijinë ata, daxita Diosojumepaebivimi profetavi ata. Daxita bajarapamonaë penajuajinavanapaejava Dioso pijanacuatsia pataename. Nexata paxamë bajarajota pinijicuenia panatsinuenamë. Panavonosinianamenua bitso paneanaepanaexae. Tsi-paji paxamë Dioso pijanacuavecua panenaxuabinexa pacaxuabiana infiernojavabelia. ²⁹ Itsavirajumevi patsiana daxitanacuanëjavaverena. Nexata daxita bajarapamonaë naenaena penabaninexa Dioso pijanacuatsia. ³⁰ Pamonaë aeconoxae mapamatacabitaje ayaijamatabëcuenëvi tanetsi, bajarapamonaeyajuvënëvi, ayaibitsaëtoxaneto, itsamatacabi Dioso beveliajamatabëcuenëvi exanaenatsi. Pamonaë pijinia mapamatacabitaje beveliajamatabëcuenëvi tanetsi, bajarapamonaeyajuvënëvi, ayaibitsaëtoxaneto, itsamatacabi Dioso ayaijamatabëcuenëvi exanaenatsi, jai Jesús daxitajivijavabelia.

Pacuenia Jesús najamatabëxainaeja sivanua Jerusalén tomarapijivi yabara pelivaisi

(Mt 23.37-39)

³¹ Itsa baja Jesús najumevereta jivi livaisi petsipaebijava, fariseovi pata Jesúsjavaberena. Nexata fariseovi jumaitsi Jesúsjavabelia:

—Jesús, mapatomara baja vecuaponareje. Nacuaevetsinë raja Herodes cabeyaxuabiapaeba, jai fariseovi.

³² Jesús nexata jumaitsi fariseovijavabelia:

—Paponaremëlia. Bajaraponë Herodes, jivi peyamaxëitorobabibinëjavabelia, pajumaitsimë tsane mapacueniaje: “Jesús raja jumaitsi: ‘Ajena raja abaxë, meravia ata icatsia, vecuacapitsaponaenajë dovathi peyajavajinavanapaevi. Piavitanevi ata jamatejemayaexanaponaenajë. Nexata abaxë pameravia bajarapacuenia taexanaejava copatsianajë,’ jai raja Jesús,” pajamë tsane Herodesjavabelia.

³³ Diosojumepaebivimi profetavimi beyejebabiabatsi Jerusalén tomarata. Tsi-paji profetavi acuenëvi saicayatomarata petëpaejava Jerusalén tomaravecua. Bajaraxuata xanë ata ponaenajë tavajënaeyabelia Jerusalén tomarabelia. Nexata ponaenajë ajena. Itsa jume, meravia, pameravia ata, tanebeyaxuabinexa Jerusalén tomarata, jai Jesús fariseovijavabelia.

³⁴ Nexata Jesús najamatabëxainaeaya sivanua Jerusalén tomarapijivi. Jerusalén tomarapijivi Jesús najamatabëxainaeaya pesivanuejavata, jumaiti mapacueniaje:

—¡Pajerusalén tomarapijivimë, pabeyajebabiabame Diosojumepaebivimi profetavi! ¡Ibotonëta ata patseconabiabame bajarapacuenia panebeyaxuababiabinexa Diosojumelivaisi pecaponaevi paxamëjavaberenal! ¡Pacuenia vacara banacoxicaetuata pecorofetobëxëpanaberenal, bajara pijinia pacuenia xanë ata picani bitso jitsipabiabajë patacacaetuatsinexa, patacacapanepaenexa picani panijaneconivecua! ¡Itsiata baitsi jane paxamë apo pajejamë cajena! ³⁵ Panejumetaema. Dioso rabaja pacacopata papecaevetabiabijavami. Nexata baja panijatemplobota Dioso apo ponaponae. Xaniajanë pacuenia pacatsipaebijitsiatsi. Paxamë baja apo panetaemë tsane matavëjëa. Matapania itsa panejumecovënëtame Cristonëcuenenë, Dioso taneitorobinëtsica, icatsia panetaename. Itsa panesivajamatabëjumaitsimënua tsane: “Dioso, bitso yavenonare maponë najetarucaje. Bajaraponë nejamatabëcueneta najetaruca,” itsa panesivajamatabëjamë tsane, nexata jane baja icatsia panetaename itsa patsianicajë, jai Jesús mapacueniaje najamatabëxainaeaya pesivanuejavata Jerusalén tomarapijivi.

14

Pacuenia Jesús jamatejemayaexana pebi, bitso daxitanë peyajinaenë, yabara pelivaisi

¹ Itsamatacabi, judíovi penacueraevetsimatocabita, Jesús pona fariseovi penamataitorobinë pijaboyabelia penanabaninexa. Nexata bajarapabota itsamonae fariseovi Jesús naitaxutocaevetatsi. ² Nexata Jesús pitabarata eca pebi, daxitanë peyajinaenë. ³ Jesús nexata jumaiti judíovi pecujarubivijavabelia, fariseovijavabelia ata:

—¿Penacueraevetsimatocabita ata tsaja piavitanevi vajajamatejemayaexanaenexa, Dioso nacatocopata? Jume. ¿Apo nacatocopsi tsaja? jai Jesús judíovi pecujarubivijavabelia, fariseovijavabelia ata.

⁴ Itsiata bajarapamonae moya ena. Nexata Jesús cobepita peyajinaenë. Jamatejemayaexana baja. Itoroba baja peponaenexa bajarapabovécua.

⁵ Jesús nexata jumaiti judíovi pecujarubivijavabelia, fariseovijavabelia ata:

—Itsa panijaburro, panijabaca ata, pacatojopaejitsipareca meramëthëareca, nexata penacueraevetsimatocabita ata, bepíjia pajutarëcëpaejitsipame. ¿Baja tsabaitsi jane? jai Jesús judíovi pecujarubivijavabelia, fariseovijavabelia ata.

⁶ Nexata bajarapamonae acuenebi pejumecanaviatsijava Jesúsjavabelia.

Pacuenia Jesús jivi muxujioba peyaiyataevitsi penaenexa petsinubijavanëta penaenexa penatsiitapetsiyanima yabara pelivaisi

⁷ Fariseonë pijabota Jesús tane fariseonë pejunatsivi. Bajarapamonae natsiitapeta peyaiyataevitsi penaenexa petsinubijavanëta penaenexa mesa muxuneneta. Nexata Jesús muxujioba bajarapamonae beveliajamatabëcuenevi penataenexa. Jesús jumaiti daxitajivijavabelia mapacueniaje:

⁸ —Itsa pacajunata panenanabaninexa penacasabifiestajavabelia, pëtsa panatsiitapetame paneenaenexa peyaiyataevitsi penaenexa petsinubijavanëta. Tspíjaji itsanë ayaijamatabëcuenenë paxamë matatoxenetsia itsa

najunatatsi, napatsipa. ⁹ Nexata papecajunatsinē pacacujitsiparena. Nexata pacajumai tsipae: “Tocopare bajaraxua maponē peecaenexaje,” pacajai tsipae. Nexata paxamē pauramē tsipae ita pacanatixitsiaexana paneecaenexa beveliajamatabēcuenēveni penaenexa petsinubijavanēta. ¹⁰ Itsa pacajunata, paenaename beveliajamatabēcuenēveni penaenexa petsinubijavanēta. Matapania papecajunatsinē ita pacajumai tsane: “Natixiremena. Peyaiyataevitsi penaenexa tatsinubijavanēta ecare,” ita pacajai tsane, paenaename bajaraxuanēta. Nexata bajarapacuenia daxita mesa muxuneneta panenajuaenaevi pacataena papēcayaiyataejava papecajunatsinē. ¹¹ Pajivi ayaijamatabēcuenējivi natane, bajarapajivi beveliajamatabēcuenējivi taenatsi Dioso. Pajivi pijinia beveliajamatabēcuenējivi natane, bajarapajivi ayaijamatabēcuenējivi taenatsi Dioso, jai Jesús judiōvi pecujarubivijavabelia, fariseovijavabelia ata.

¹² Nexata Jesús icatsia jumaitsi pejunatsifariseonētsijavabelia:

—Itsa junatame itsamonae nebarēnabaninexa nijabota matonejepijijava, itsa jume, caniviyopijijava ata, pētsa junatame ēnyepētaevi. Pētsa junatame nebarēnabaninexa ēnijamonae. Pētsa junatame ēnijamonaeviriavi ata. Pētsa junatame ēricovi, pamonae nijabo muxuneneta jinavanapa. Tsipaji bajarapamonae juya canamatamojunatsipa pijabota pecabarēnabaninexa. Nexata bajarapacuenia canamatamotsipa bajarapamonae. ¹³ Itsa junatame itsamonae fiesta nebarēxanaenexa, junatsianame bepejiobivi, penabejenaevi ata, pejayujayunaevi ata, bitso pitaxutotsēcēnaevi ata. ¹⁴ Nexata bajarapacuenia pepacuene jamatabēcuenēbarēyamē tsane. Tsipaji bajarapitsivi acuenebi juya pecanamatamojunatsijava tsane. Nexata nijamatamo xainaename pamatacabi icatsia Dioso asaēyaexanaena pamonae tēpa, pexaniajamatabēcuenēvimi, jai Jesús pejunatsifariseonētsijavabelia.

Pacuenia Jesús jivi livaisi tsipaeba pinijifiesta pexanaenē pelivaisicuenia yabara pelivaisi
(Mt 22.1-10)

¹⁵ Daxita mesa muxuneneta penaevi jumetane Jesús petsipaebilivaisi. Nexata fariseoviyajuvēnēnē jumaitsi Jesúsjavabelia:

—Jamatabēcuenēbarēya tsane pajivi nanabaniana Dioso pijanacuatatsia, jai fariseoviyajuvēnēnē.

¹⁶ Nexata fariseovi peyapētaenexa itsamonae Dioso apo pejumecovēnētsijava, junatsi atatsi, Jesús jumaitsi comparaciōncuenia mapacueniaaje:

—Fiesta pexanaenē pijajivi itoroba ayaijava pexaejava pexanaenexa. Nexata tajēvelia junatsiaexana jivi ayabitsaētōxaneto petopatsinexatsi.

¹⁷ Bajaraxuacujinae pexaejava baja ita vereta, fiesta pexanaenē itoroba pijajivitonē peponaenexa pejunatsivijavabelia: “Naxanitsia baja. Pexaejava rabaja vereta,” pejainexa. ¹⁸ Itsiata baitsi jane daxita pejunatsivi apo topatsitsirena. Itsanē saya peponaeyaniva, pijajivitonēta tonajumeitorobarenatsi pejumaitsilivaisi mapacueniaaje:

“Xanē aeconoxaeta comuatabajē ira. Nexata ponaejitsianē bajarabelia tatanexa bajarapaira. Pexaniacuene netoexanaename. Pētsa jamatabēcuenēanaepaname xanējavaberena,” pejailivaisi tonajumeitorobarenatsi pijajivitonēta. ¹⁹ Itsanē pijinia saya peponaeyaniva, pijajivitonēta tonajumeitorobarenatsi pejumaitsilivaisi mapacueniaaje:

“Xanē comuatajē diez ponēbeje bueyu tanetoroborobocaevinexa. Nexata ponaejitsianē taējētsinexa bajarapabueyu. Pexaniacuene netoexanaename. Pētsa jamatabēcuenēanaepaname xanējavaberena,” pejailivaisi tonajumeitorobarenatsi pijajivitonēta. ²⁰ Itsanē pijinia saya

peponaeyaniva, pijajivitonëta tonajumeitorobarenatsi pejumlahtsilivaisi mapacueniaje: “Xanë raja aeconoxaeta nacasabajë. Bajaraxuata acuenebi taponaejava,” pejalilivaisi tonajumeitorobarenatsi pijajivitonëta. Bajarapacuenia daxita pamonaë picani fiesta pexanaenë junata, peponaeyaniva saya tonajumeitorobarenatsi pijajivitonëta. ²¹ Nexata fiesta pexanaenë pijajivitonë naviarena pijatuxanenëjavaberena. Tsipaeba pijatuxanenëjavabelia daxita pacuenia najumerubatsi. Nexata fiesta pexanaenë anaepana. Jumaitsi pijajivitonëjavabelia: “Naxanitsiayo liamëre tomarabelia. Junatanajetarucaename jivi piniijallexanetonëjava, tsiquiricallexijava ata. Junatsiname bepejiobivi, penabjenaevi ata, pejayujayunaevi ata, bitso pitaxutotsëcënaevi ata, penanabaninexa tajabota,” jai fiesta pexanaenë pijajivitonëjavabelia. Nexata baja pijajivitonë pona pejunatsinexa jivi. ²² Jivi bebarëpatsicujinaerena, jumaitsi pijatuxanenëjavabelia: “Tajatuxanenë, exanjë rabaja taneitorobicueniamë. Itsiata abaxë sajinanubena itsamesanë itsamonaenexa,” jai bajaraponë pijatuxanenëjavabelia. ²³ Nexata petuxanenë icatsia jumaitsi pijajivitonëjavabelia: “Liamëre icatsia carreteranëjavabelia, namutonëjavabelia ata. Junatanajetarucaename asaëyata carreterajava peponaevi, namutojava ata peponaevi, penanabaninexa tajabota pevënëcaenexa tajabo. ²⁴ Pamonaë picani copiata junatajë penanabaninexa, caenë ata bajarapamonaeyajuvënënenë, apo naxae tsane bajarapapexaejava,” jai petuxanenë pijajivitonëjavabelia, jai Jesús fariseoviyajuvënënenëjavabelia jivi peyapëtaenexa itsamonaë Dioso apo pejumecovënëtsijava, junatsi atatsi.

Pacuenia Jesús tsipaeba jivijavabelia, pajivi Jesús jamatabëpënaponatsi, copiaya penajamatabëcueneretsinexa Jesús pepënaponaejavënaeyatsi yabara pelivaisi (Mt 10.37-38)

²⁵ Jivibitsaëttoxaneto Jesús pënjajinavanapatsi. Nexata Jesús napënëyorota bajarapamonaëjavabelia. Jesús jumaitsi mapacueniaje:

²⁶ —Ponë xanëjavaberena patsi ata, itsiata itsa apo niasiva tsane daxita pijamonae matatoxenetsia, nexata bajaraponë apo tajajivitonë tsane. Bajaraponë itsa apo niasiva tsane paxa, pena ata, pematapijivi ata, pejuyapijivi ata, piäsivajava matatoxenetsia, nexata apo tajajivitonë tsane. Bajaraponë itsa apo niasiva tsane pijava, pexi ata, pijacuata penaasivajava ata, matatoxenetsia, nexata bajaraponë apo tajajivitonë tsane. ²⁷ Ponë xanë yabara itsamonaë jamatabëpebeyaxuabixaetsi, jamatabëpebejiobiaexanaexaetsinua, nexata pecajunavi itsa apo nepënaponae tsane, bajaraponë apo tajajivitonë tsane. ²⁸ Paxamëyajuvënënenë itsa jamatabëexana bo, athëbëabetsia piapiaboxanetotsia, nexata copiaya najamatabëcueneretsipa pacuenia exanaejitsia. “¿Netocaëjëpa tsamëra baja tajapalatata taveretsinexa tajabo?” jamatabëjai tsipae copiaya.

²⁹ Itsa apo najamatabëcueneretsi tsipae copiaya, nexata bo pexanaëjava taxuxuabi ata, apo veretsi tsipae itsa apo tocaëjëpaetsi pijapalata. Nexata pijabo petotaevitsi, capocaponaejitsipatsi. ³⁰ Baracuaicuajitsi tsipae: “Bajaraponë picani taxuxuaba pijabo pexanaëjava. Itsiata apo tocaëjëpaetsi pijapalata peveretsinexa pijabo,” jaitsi tsipae capocaponaeja petotaevitsi.

³¹ Nacuaevepsinë pijinja, itsanacuaverena itsa sivanavajabitsaëtsijitsiatsi, nexata copiaya najamatabëxainaejitsipa. Jamatabëjumaitsi tsipae mapacueniaje: “Tajajivi saya diez mil ponëbeje. Tanebarëtsimaxëponaevinexa, veinte mil ponëbeje. ¿Baja tsamëra tajajivi nebarëcuenecaëjëpaena tabarëbenexa tajavajabitsaënë pijajivi, veinte mil ponëbejejavabelia?”

jamatabējai tsipae copiaya. ³² Nexata bajarapacuenia penajamatabēxainaecujinae, bajaraponē yapētaejitsipa apo pebarēcuenecaejeēpaejavatsi pebarēbenexa pijavajabitsaēnē pijajivijavabelia. Itsa abaxē tajē pevājēnae pepatsijavarena pijavajabitsaēnē, nexata najumexuabijitsipalia pijajivita penabarajamatabēcuene xanepanaenexabeje vajabitsaēcuene pexanaeyanivabeje. ³³ Bajara pijinia pacuenia paxamēyajuvēnēvi ata itsa apo najamatabēcueneveretsi copiaya penajamatabēcuenepeñeyorotsinexa daxita pexainaejavavecu, nexata acuenebi tajajivi taexanaenexa, jai Jesús jivi ayaibitsaētoxanetojavabelia.

Pacuenia Jesús jivi livaisi tsipaeba comparacióncuenia pacuenia jamatabēcueneitsi tsipae Jesús pijajivitonē itsa copatsipa Jesús pejumecovēnētsijavami yabara pelivaisi

(Mt 5.13; Mr 9.50)

³⁴ Jesús icatsia comparacióncuenia jumaitsi jivi ayaibitsaētoxanetojavabelia mapacueniaje:

—Yajo abaxē itsa xaica, xanepana. Itsiata yajo pexaicaejavami itsa ajibi tsipae, ¿detsa pacuenia icatsia naxaicaeyaexanaejitsipa? Acuenebi. ³⁵ Itsacueneyavayonexa ata baja apo xanepanae tsipae. Nexata peubijava petsibacathocaenexa ata, apo xanepanae tsipae. Tsipaji pacuenia peubijava petsibacathocaebeno, itsa tsibacathoca, peubijava naxaniabi-aexana, bajara apo itsi tsipae bajarapayajomi. Pacuenia bacatasi ata itsa tsibacathoca, peubijava naxaniabiaexana, bajara apo itsi tsipae bajarapayajomi. Nexata saya jema xuabijitsipa bajarapayajomi. Pajivi jamatabēnējumeyapētane patacatsipaebilivaisi, nenamuxunaevetsi xaniavaetsia, jai Jesús comparacióncuenia bajarapamonaejavabelia.

Bajarapacuenia Jesús jumaitsi comparacióncuenia jivi peyapētaenexa pacuenia jamatabēcueneitsipae Jesús pijajivitonē itsa copatsipa Jesús pejumecovēnētsijavami. Nexata Diosovecu naxuabijitsipa.

15

Pacuenia Jesús jivi livaisi tsipaeba oveja penaxuabinē pelivaisicuenia yabara pelivaisi

(Mt 18.10-14)

¹ Gobierno pejamatabēcuene impuestomatamo pematamoyanijobabi-abivi, pata Jesúsjavaberena. Yajavaparenanua piagamatabēcuenebejevi. Bajarapamonaē pata penamuxunaevetsinexa Jesús petsipaebilivaisi. ² Nexata fariseovibeje judíovi pecujarubivibeje itsa tane gobierno pejamatabēcuene impuestomatamo pematamoyanijobabiabivi pepatsijava Jesúsjavaberena, itsa tanenua piagamatabēcuenebejevi ata pepatsijava Jesúsjavaberena, nexata fariseovibeje judíovi pecujarubivibeje Jesús baracuaicuijaitsi. Bajarapamonaē najumaitsi mapacueniaje:

—Mara ponēje naneconita Diosojavabelia. Tsipaji copiapitabiaba piagamatabēcuenebejevi ata. Naxaeyabiabanua pexaejava bajarapamonaeta, najai fariseovibeje judíovi pecujarubivibeje Jesús yabara jamatabēcuenenavēxaniabiaya.

³ Nexata Jesús pebaracuaicuijaixaetsi, Jesús bajarapamonaejavabelia livaisi tsipaeba mapacueniaje:

⁴ —Paxamēyajuvēnēnē xainaejitsipa cien ponēbeje oveja. Nexata itsa toyajuvēnēnaxuabijitsipatsi caenē, oveja pexainanē petusatota puenetsipa noventa y nueve ponēbeje. Nexata jaitsi petonaxuabinētsi

matapania pecaxitarabijavabelianexa. ⁵ Nexata oveja pexainaenē itsa baja caxitarabijitsipa petonaxuabinēmitsi, barēyataejitsipa. Boyaberena vētacarapatsipa petonaxuabinēmitsi. ⁶ Nexata oveja pexainaenē petonaxuabinēmitsi itsa capatsipa boyaberena, junatsipa peyapētaevitsi. Junatsipa pijabo muxuneneta imoxoyo penaevi ata. Nexata oveja pexainaenē jumai tsipae bajarapamonaejavabelia: “Panecobenabarēyamēre. Tspaji tajaovejayo, tanetonaxuabinēyomi picani, caxitarabajā baja,” jai tsipae oveja pexainaenē bajarapamonaejavabelia. ⁷ Xaniajanē pacuenia pacatsipaebijitsiatsi. Mapanacuataje Dioso pitabarata pijaneconi pexinaejivi ata, itsa copatsiana pibisiacuene pexanabiabijava, itsa najamatabēcuenepēnēyorota Diosojavabelia, bajara pijinia pacuenia sivabarēyatsi tsane athēbētatsia pejinavanapaevi. Bajarapajivi, athēbētatsia pejinavanapaevi, sivabarēyatsi tsane noventa y nueve pajivibeje Dioso pitabarata pianeconijibitsavanapaevi pesivabarēyatsabiabijava matatoxenetsia, jai Jesús fariseovijavabelia, judíovi pecujarubivijavabelia ata.

Pacuenia Jesús livaisi tsipaeba penaxuabipalatanēyo pelivaisicuenia yabara pelivaisi

⁸ Icatsia Jesús jumaitsi fariseovijavabelia, judíovi pecujarubivijavabelia ata:

—Petiriva xinaejitsipa diez ponēbeje palatanēanē, bitso penamata-motsinēanē. Nexata itsa toyajuvēnēnaxuabijitsipatsi caenē, itanojotsipa lāmpara. Bo ira cajuetsipa xaniavaetsia pejaitsinexa. Matapania itsa pitabuatsipa petonaxuabipalatanētsi, copatsipa pejaitsijava. ⁹ Itsa baja caxitarabijitsipa petonaxuabipalatanēmitsi, nexata junatsipa peyapētaevitsi. Junatsipa pijabo muxuneneta imoxoyo penaevi ata. Bajarapova nexata jumai tsipae bajarapamonaejavabelia: “Panecobenabarēyamēre. Tspaji tajapalatanēyo, tanetonaxuabinēyomi picani, caxitarabajā baja,” jai tsipae petiriva bajarapamonaejavabelia. ¹⁰ Xaniajanē pacuenia pacatsipaebijitsiatsi. Pajivi copatsiana pibisiacuene pexanabiabijavami, itsa najamatabēcuenepēnēyorotsiananua Diosojavabelia, bajara pijinia pacuenia athēbētatsia ángelevi sivabarēyatsi tsane, jai Jesús fariseovijavabelia, judíovi pecujarubivijavabelia ata.

Pacuenia picani juyapijinē paxavecua naxuabaponapona yabara pelivaisi

¹¹ Icatsia Jesús livaisi tsipaeba fariseovijavabelia, judíovi pecujarubivijavabelia ata. Jesús jumaitsi mapacueniaje:

—Pebi xaina anijanēbeje pexēnatobeje. ¹² Nexata juyapijinē jumaitsi paxajavabelia: “Axa, xuanē picani netocopatame tapitsinexa nevēnamuto, bajaraxuanē abaxē apo tēpae atamē, nerajure baja tajajavanexa,” jai juyapijinē. Nexata pexēnatobeje pexainaenē pexēnatobejejavabelia rajata daxita pexainaevanēmi. ¹³ Nexata paxa perajutsicujinaetsibeje, caematacabibejecujinae, juyapijinē canajeta daxita pexainaevanēmi pecaetatsinexa palata. Bajaraxuacujinae jane baja pona tajēnacuayabelia. Bajarajotalia pibisiacuene exanaponapona. Nexata vereta daxita paxa perajutsijavanēmitsi. ¹⁴ Nexata daxita bajarapanacuapijivi janibocuene tspatatsi. Bajaraponē peveretsicujinae daxita pijapalatasi, bitso namatavenona pexaejava. ¹⁵ Nexata jaita penacuenebinexa bajarapanacuata peecaenējavabelia. Bajaraponē itorobatsi pijairanējjava petoetevaponaponaenexa pijamarrano. ¹⁶ Nexata bajaraponē bitso piajanixae, pepenenexa picani ayaijava jamatabēxaeyabiaba bopocuai, marrano pexaeyabiabijava. Bajarajota itsajivi ata apo rajutsitsi

pexaejavanexa. ¹⁷ Nexata belia bajaraponë xaniavaetsia najamatabëxaina. Jamatabëjumaitsi mapacueniaje: “Taxa pijabota pexaejava ayaijava xaina pijajivi ayaibitsaëto piabatsinexa. Tonacopatabiabatsi ayaijava pexaejava. Itsiata xanë majotaje tēpaejitsianë baja tajani. ¹⁸ Nexata taxajavabelia naviatnsianajë. Jumaitsinë meta tsane taxajavabelia: ‘Axa, pibisiacuene exanajë Diosojavabelia, xamëjavabelia ata. ¹⁹ Abejenë raja. Auranë baja rovia xamëjavabelia: ‘Taxënato,’ tanejamëjava. Nexata saya nijajivitonënë nexanare,’ janë meta tsane taxajavabelia,’ jamatabëjai juyapijinë. ²⁰ Nexata baja naviaata paxajavabelia.

²¹ Itsa abaxë tajëverena najetaruca, pexënato pexainanënë copiatane. Nexata bajaraponë pexënato itaxutobejiobiatane. Mataenetsia cunjinaejinalia pexënato. Nacoxivaetabarucapona. Copiapitsiaya itabaratsutsunexuaba pexënato. ²¹ Nexata bajaraponë jumaitsi paxajavabelia: ‘Axa, pibisiacuene raja exanajë Diosojavabelia, xamëjavabelia ata. Abejenë raja. Nexata baja rovia auranë xamëjavabelia: ‘Taxënato,’ tanejamëjava,’ jai paxajavabelia. ²² Itsiata baitsi jane pexënato pexainanënë bajarajota jumaitsi pijajivijavabelia: ‘Naxanitsia. Bepijiayo taxënato patocaponaremena daxita matatoxenetsia pexaniapana, penajumaxuabipana. Pajumaacare bajarapapanata. Anillonua pacobesixatare. Zapatonua pataxuxatare. ²³ Penasitsinë becerro papiremelia. Pabeyaxuabianame vajaxaenexa. ¡Fiesta exanaenatsi vajabarëyanexa! ²⁴ Tsipaji raja maponë taxënatoje: ‘Tēpa meta baja,’ sivajamatabëjanë picani. Itsiata tsaena ponapona. ‘Naxuaba meta baja,’ sivajamatabëjanë picani. Itsiata baja icatsia patajopa,’ jai pexënato pexainanënë pijajivijavabelia. Nexata taxuxuaba fiesta pexanaejava.

²⁵ Bajaramatacabi matapijinë pabiabelia nacuenebaponapona. Nexata penaviatsinë bo itsa imoxoyotanajetaruca, jumetane música. Jumetanenua peyavajibijava. ²⁶ Nexata bajaraponë junata paxa pijajiviyajuvënë. Jumaitsi: “¿Detsa pitsicuene yabara fiesta paexaname?” jai matapijinë. ²⁷ Nexata paxa pijajivitonë jumaitsi: ‘Nejuyapijinë baitsi patajopa. Axa nexata paneitoroba patabeyaxuabinexa becerro, penasitsinë. Jamatejema tsaena ponapona nejuyapijinë,’ jai bajaraponë matapijinëjavabelia. ²⁸ Nexata matapijinë bitso anaepana. Apo jitsipae boyabelia pejonejava. Nexata paxa sivapitsaparenatsi. Jumaitsi pexënatojavabelia: ‘Naxanitsia. Najonemeya,’ jai pexënatojavabelia. ²⁹ Nexata matapijinë jumaitsi paxajavabelia: ‘Jume. Bajayajebi baja rovia catonacuenebaponaponatsi xanë. Caeto ata cajena apo cajumeapajejaitsi. Itsiata baitsi jane caeto ata apo nerajutsimë chivoyo ata fiesta tabarëxanaenexa tayapëtaevi. ³⁰ Itsiata aeconoxae patajopa baja nexënato, ponë vereta nijapalatami petiriavijavabelia. Nexata tobeyaxuabame becerro, penasitsinë,’ jai matapijinë paxajavabelia. ³¹ Nexata bajaraponë jumaitsi pexënatojavabelia: ‘Taxënato, xamë cajena xanëjavata ponaponame daxitamatacabi. Nexata daxita xua taxainaejava nijajava baja cajena. ³² Itsiata aeconoxae namatavenonatsi vajabarëyanexa. Tsipaji nejuyapijinë: ‘Tēpa meta baja,’ tasivajamatabëjainëmi, itsiata tsaena asaë. Penaxuabaponaponanëmi icatsia baja patajopa,’ jai bajaraponë pexënatojavabelia, jai Jesús mapalvaisije fariseovijavabelia, judfovi pecujarubivijavabelia ata.

16

Pacuenia pijatuxanenë pecobecovë petoevetsinë toveretapona pevetsiaexanaejavanëtsi yabara pelivaisi

1 Jesús pijajivijavabelia livaisi tsipaeba. Jumaitsi mapacueniaje:

—Petuxanenë, bitso pexainaenë, ponapona. Bajaraponë xaina pijajivitonë petoevetsinexatsi pecobecovë. Itsiata pepëya pijajivitonë pecobecovë toveretaponatsi. Nexata itsamonae tsipaebatsi pepëya pijajivitonë pecobecovë petoveretaponaejavatsi. 2 Nexata petuxanenë pijajivitonë junata. Jumaitsi pijajivitonëjavabelia: “Xamë pina tapëya netoveretaponame tacaevetsiaexanaejava. Pabaxutojavabelia matamoyaquinarubame xuanë canajetaponame tacobecovë, xuanënuu netocomuataponame, bajarapabaxuto netocanaviatsianame. Nexata baja itsa netocanaviatsianame bajarapabaxuto, matavëjêa apo netoevetsimë tsane tacobecovë,” jai petuxanenë pijajivitonëjavabelia. 3 Nexata pijajivitonë sivapona bajarapabaxuto petocanaviatsinexa pijatuxanenë. Nexata bajarapabaxuto petocanaviatsivajënae jamatabëjumaitsi: “¿De tsaeta xua exanaenajë? Tajatuxanenë baja necapitsapaejitsia pecobecovë tatoevetaponaponaejavavecua. Apo necaëjêpae tsane tanacuenebinexa pabi tajacuata tanaevetsinexa. Bitso auranënuu tsipae itsamonaejavabelia amoneya tavajëtaponae nexa palata tanamitsacomuatabiabinexa taxaejava. 4 Taneamoneyabivi meta abaxë, xua niamoneyaba, bevelia tovënëjonaponaenajë. Nexata tajatuxanenë tanecapitsapaejitsia, bajarapamonae pijaboyabelia itsa ponaenajë, xaniavaetsia necopiapitsiana. Nexata bajarapamonaejavata naponaponaenajë,” jamatabëjai bajaraponë. 5 Nexata bajaraponë junata daxita pamonaë abaxë amoneyabatsi. Nexata pamonaë amoneyabatsi, bajarapamonae, caenë canacujitsia, patapona bajaraponëjavaberena. Nexata bajaraponë copiaya petopatsinëtsijavabelia jumaitsi: “¿Detsa pacuenia niamoneyabame abaxë, xua tajatuxanenë pijajava catsicopatatsi? jai bajaraponë. 6 Nexata ponë amoneyabatsi, jumaitsi: “Camoneyabatsi abaxë tacarajutsinexa aceiteranë ochocientos pagalónbeje,” jai. Nexata bajaraponë jumaitsi piamoneyabinëtsijavabelia: “Bevelia saya catocopsiansianë. Mara picani pacuenia niamoneyabameje, tanetoitanerubibaxutotamëje. Pire cajena. Icatsia itsabaxutojavabelia saya cuatrocientos pagalónbejenexa bepíjia yaquinarure. Nexata saya bajarapacuenia tajatuxanenë rajutsianame,” jai bajaraponë piamoneyabinëtsijavabelia. 7 Bajaraxuacujinae icatsia itsanë topatatsi. Nexata icatsia jumaitsi bajaraponëjavabelia: “¿Jica xamë? ¿Detsa pacuenia niamoneyabame?” jai. Nexata bajaraponë jumaitsi: “Camoneyabatsi abaxë tacarajutsinexa cien pabultobejê trigoxubultonë,” jai. Nexata bajaraponë jumaitsi piamoneyabinëtsijavabelia: “Mara picani pacuenia niamoneyabameje, tanetoitanerubibaxutotamëje. Pire cajena. Icatsia itsabaxutojavabelia saya ochenta pabultobejenexa yaquinarure. Nexata saya bajarapacuenia tajatuxanenë rajutsianame,” jai bajaraponë piamoneyabinëtsijavabelia. Bajarapacuenia exanapona daxita piamoneyabivitsijavabelia pesivajamatabëcuene xanepanaenexatsi, xaniavaetsia pecopiapitsinexatsi pijabota penaponaponaenexa, pijatuxanenë itsa navecuacapitsapatsi. Nexata jane baja daxita piamoneyabivitsi tocanaviabatsi. Bevelia matamota petoyaitaneturutaponae baxutonëtsi. 8 Bajaraxuacujinae pijatuxanenëjavabelia pona perajutsinexa jane baja bajarapabaxutonë. Nexata pijatuxanenë jumaitsi: “Xamë baja rovia pibisiacuene exaname. Itsiata baitsi jane niaitatsacaxae, exaname pacuenia catoxanepanae jitsia nevajënaeyabelia,” jaitsi pijatuxanenë. Nexata pacuenia pijatuxanenë pepëya pecobecovë petocanajetabibinë ajamatabëcueneitatsaca, bajara pijinia pacuenia Dioso apo pejumecovënëtsivi ajamatabëcueneitatsaca Dioso pejumecovënëtsivi matatoxenetsia

mapanacuapijicuene yabaraje, jai Jesús pijajivijavabelia.

⁹ Icatsia Jesús jumaitsi pijajivijavabelia:

—Pacamuxujiobatsi xaniavaetsia. Mapanacuapijipalatata payavensonare itsamonaē. Nexata pacuenia pijatuxanenē pecobecovē petoēvetsinē, pesivajamatabēcuene xanepanaevitsi xaina, xaniavaetsia pecopiapitsinexatsi pijabota penaponaponaenexa pijatuxanenē pecapitsapaecujinaetsi, bajara pijinia pacuenia paxamē ata athēbētatsia paxainaeneme papecasivajamatabēcuene xanepaenaēvi. Nexata pamatacabi patēpame, itsajota apo panamatavenonaemē palata, Dioso pacacopiapitsiana apo pevereverecaebonējavatatsia, jai Jesús pijajivijavabelia.

¹⁰ Icatsia Jesús jumaitsi pijajivijavabelia:

—Pajivi xaniavaetsia toeveta tsiquirijavayo ata itsanē pecobecovē, bajara-pajivi xaniavaetsia toevetsipa ayajava ata. Pajivi bijiaya toeveta tsiquirijavayo ata itsanē pecobecovē, bajarapajivi bijiaya toevetsipa ayajava ata. ¹¹ Itsanē pecobecovē, mapanacuapijicueneje, palata ata, xaniavaetsia itsa apo patoēvetsimē tsipae, nexata itsajivi ata apo pacaēvetsiaexanaē tsipae Dioso pijacuene, xua bitso namatamota mapanacuapijicuene matatoxenetsiaje. ¹² Itsa xaniavaetsia apo patoēvetsimē tsipae itsanē pecobecovē, nexata pitsijava picani pacaēvetsiaexana, bajarapitsijava itsajivi ata apo pacarajutsi tsipae pepo panijajavanexa, jai Jesús pijajivijavabelia.

¹³ Icatsia Jesús jumaitsi pijajivijavabelia:

—Itsajivi ata acuenebi caecuenia petonacuenebijava anijanēbeje pijatuxanenēbeje. Caenējavabelia jitsipaejitsipa petonacuenebijava. Itsanējavabelia apo jitsipae tsipae petonacuenebijava. Bajara pijinia itsi pajivi bitso jitsipa Dioso. Pajivi bitso jitsipa Dioso, nexata itsa tonacueneba Dioso, acuenebi bitso pejitsipaejavaya palata, jai Jesús pijajivijavabelia.

¹⁴ Fariseovi, bitso palata pejitsipaevi, jumetaeyena Jesús petsipaebilivaisi pijajivijavabelia. Nexata fariseovi jumecapocaponatsi Jesús. ¹⁵ Jesús nexata jumaitsi fariseovijavabelia:

—Paxamē pajitsipabiabame jivi pejumaitsinexa paxamē yabara: “Fariseovi raja pexaniajamatabēcuenevi,” pejainexa. Itsiata baitsi jane Dioso pacajamatabēcuenyapētane pexaniajamatabēcuene apo panexainaēvicuene. Pacuene bitso jivi tsitapexaniacuenetsi, bajarapacuene Dioso apo tsitapexaniacuenetsi, jai Jesús fariseovijavabelia.

Pacuenia Jesús tsipaeba fariseovijavabelia bajayata Dioso Moiséspijinēta penajumecopatsilivaisi, pacuenia ata Dioso pijajivi evetsijitsia, yabara pelivaisi

¹⁶ Icatsia Jesús jumaitsi fariseovijavabelia:

—Juanpijinē jivibautisabinēmi pepatsivajēnaeya, jivi xaina Dioso Moiséspijinēta penajumecopatsilivaisi pejumecovēnētšinexa. Bajayata Diosojumepaebivi profetavi ata petsipaebilivaisianē ata, xaina jivi pejumecovēnētšinexa. Itsiata Juanpijinē pepatsicujinae, pexanialivaisi tsipaebaponajē. Tsipaebaponajē Dioso pijajivi pevetsijavanexa. Nexata daxitajivi bitso jitsipa penajonenexa Dioso pijanacuayabetsia, jai Jesús fariseovijavabelia.

¹⁷ Icatsia Jesús jumaitsi fariseovijavabelia:

—Mapanacuaje, itaboxo yajava, jemata vereverecaena. Itsiata baitsi jane palivaisi Dioso Moiséspijinēta najumecopata, bajarapacuenia apo vereverecae tsane. Nexata daxita pacuene yabara tajēvelia vajunupaeba bajarapalivaisita, pepacuene xaniajai tsane, jai Jesús fariseovijavabelia.

Pacuenia Jesús livaisi tsipaeba penacojobinē pijava pexuabijaniva yabara pelivaisi

(Mt 19.1-12; Mr 10.1-12)

¹⁸ Icatsia Jesús jumaitsi fariseovijavabelia:

—Ponē pijava xuaba, nexata icatsia itsava itsa pita, bajaraponē pibisiacue exana pevitota. Nexata naneconita Diosojavabelia. Tsipaji pepo pijavavecua jaīta itsava. Dioso cajena abaxē bajaraponē pexuabiva pepo pijavacuenia totanetsi. Ponē ata itsanē pexuabiva pita, bajaraponē ata pibisiacue exana pevitota. Nexata naneconita Diosojavabelia. Tsipaji itsanē pijava yacajērēta, pova abaxē Dioso tanetsi itsanē pepo pijavacuenia, jai Jesús fariseovijavabelia.

Bitso riconē Lázaro beje yabara pelivaisi

¹⁹ Icatsia Jesús livaisi tsipaeba fariseovijavabelia. Jesús jumaitsi mapacueniaje:

—Bitso pexaināenē, riconē, ponapona. Daxitamatacabi naxatabiaba bitso pexaniaviriājanē. Pexaejava, pexaniaviriājava, xaeyabiaba.

²⁰ Riconē pijabo matatoyorotsia yacaranata ibopanaxanetonē mataropotsia pefaratsijavaxanetota. Nexata bajarapacaranatsijavaxaneto jumavelia baupa muxuneneta, bepejiobinē, Lázarovēnēnē, boquecabiaba. Lázaro daxitanē perabētsabana. ²¹ Lázaro picani jamatabēxaeyabiaba riconē pexaeyabiabijavata piothopaepērē mesa bēxēpanareca. Avirixi ata patabiaba itsajota Lázaro bocabiaba. Petsabanaejava raebabiabatsi. ²² Nexata baja belia Lázaro tēpa. Petēpaecujinae Lázaro āngelevi caponayatsi Dioso pijanacuayabetsia, itsabetsia Abrahampijinē petēpaecujinae ponapona. Bajaraxuacujinae riconē ata tēpa. Mēthētatsi. ²³ Riconēmi petēpaecujinae pata petēpaevi pepatabiabinacuayabelia. Nexata bajarapanacuata riconēmi bitso navixae-taeya bejiobi tsaponaponae. Nexata riconēmi athēbēa benaēcotsia. Tajētatsia taenuta Abraham penucaejava. Lázaro nucaya Abraham pemuxunentatsia. ²⁴ Nexata riconēmi vavajai. Jumaitsi Abrahamjavabelia: “Amo Abraham, nitaxutotsoniataema. Netoitorobimica Lázaro. Nacobeupijabutsi merata neebarētocainejebiaexanaejitsia. Bitso jamatabēfaenājē mapatajutaje,” jai riconēmi. ²⁵ Nexata Abraham jumaitsi riconēmijavabelia: “Tamomo, namatabēnapire. Pamatacabi pinaena abaxē asaēmē tsaponaponae nenaexanaeirata, ēpexaniacue picani xainame. Lázaro pijinia pamatacabi abaxē asaē tsaponaponae, bitso picani bejiobi. Itsiata juya mapamatacabi pexaniacuenia majotaje catsuponapona. Xamē biji navixae taeya ponaponame. ²⁶ Itsajivi jamatabēponae ata bajarabereca, acuenēbi itsiata pepanepaenexa bajarabereca. Tsipaji bitso ayaiitapajanitoxanetoreca. Bajaraxuata paxamē ata apo pacacaejēpae panepanepaenexa mabetsinaje,” jai Abraham. ²⁷ Nexata icatsia riconēmi jumaitsi Abrahamjavabelia: “Amo Abraham, pexaniacue cavajētatsi. Tonajumeitorobianame Lázarota taxa pijabo-yabelia. ²⁸ Bajarajotalia xainājē cinco ponēbeje tajuyapijivi. Xaniavaetsia Lázaro tsipaebiana. Muxujibiana bajarapamonae ata peponaeyaniva mapanavixaetaeyabiabinacuaya berenaje,” jai riconēmi Abrahamjavabelia. ²⁹ Nexata icatsia Abraham jumaitsi riconēmijavabelia: “Bajarapamonae baja xaina Moiséspijinē peyaquinaelivaisianē. Diosojumepaebivimi psetavai ata peyaquinaelivaisianē ata, xaina baja. Nexata nejuyapijivi itsa apo jitsipae tsane peponaenexa bajarapanacuayabelia, nexata nejuyapijivi jumecovēnētsiana bajarapamonaemi peyaquinaelivaisianē,” jai Abraham riconēmijavabelia. ³⁰ Riconēmi icatsia jumaitsi Abrahamjavabelia: “Jume raja.

Apo jumecovënëtsi tsane cajena bajarapalivaisianë. Itsiata itsajivi itsa asaë tsane petëpaecujinae penaviatsinexa pecovëyabelia, tsipaebiana tajuyapijivi-javabelia. Nexata tajuyapijivi copabiana pibisiacuene pexanabiabijava. Najamatabëcuenepeñeyorotsiana Diosojavabelia,” jai riconëmi Abrahamjavabelia. ³¹ Nexata icatsia Abraham jumaitsi riconëmijavabelia: “Nejuyapijivi itsa apo jumecovënëtsi Moiséspijinë peyaquinaelivaisianë, Diosojumepaebivimi profetavi peyaquinaelivaisi ata, nexata pajivi asaë petëpaecujinae, mavelia ponae ata tsipaeje petsipaebinexa nejuyapijivijavabelia, itsiata nejuyapijivi apo jumecovënëtsi tsipae bajarapajivi ata,” jai Abraham riconëmijavabelia, jai Jesús fariseovijavabelia.

17

Pacuenia Dioso pijajivixae, itsamonae jamatabëcuenejëbjijitsiatsi pibisiacuene pexanaenexa yabara pelivaisi
(Mt 18.6-7, 21-22; Mr 9.42)

¹ Jesús jumaitsi pijajivijavabelia:

—Xanë tajajivixae, itsamonae jamatabëcuenejëbabiabianatsi pibisiacuene pexanaenexa. Nexata itsamonae pejamatabëcueneta tajajivi pibisiacuene exanaena. Nexata pajivi pejamatabëcueneta tajajivi pibisiacuene exanaena, bajarapajivi Diosojavabelia bitso naneconitsiana. Nexata bajarapajivi pinijicuenia Dioso naneconitsiaexanaenatsi. ² Itsamonae Dioso pejumecovënëtsivi, abaxë bepejevaxijamatabëcuene xaina Dioso pejumecovënëtsijava yabara. Nexata apo ajamatabëcuenesaë. Nexata pajivi tajajivijavabelia pibisiacuene jamatabëxanaeyaexana, abaxë tajajivijavabelia pibisiacuene exanaeyaexanaenejeva, bajarapajivi bevësicëtatsi ibotoxanetojavabelia. Nexata bajarapajivi yamaëya, ibotoxaneto yajava, bexuarecatsi pucaxaneto tuatuajëareca. Bajarapacuenia bexuarecatsi, tajajivijavabelia pibisiacuene itsa exanaeyaexana bitso penaneconitsiyanima Diosojavabelia. ³ Nexata xania. Panayajivitaema pibisiacuene, jai Jesús pijajivijavabelia.

—Icatsia Jesús jumaitsi pijajivijavabelia:

—Itsanë Dioso panenajuajumecovënëtsivi pibisiacuene itsa pacaexanaena paxamëjavaberena, bajaraponë xaniavaetsia paitavetsianame. Nexata baja itsa aura tsane pibisiacuene papecaexanaejava yabara, nexata pexaniajajumeta itsa pacanavajunupaebiana pecopatsijavanexa bajarapacuenia, pajamatabëcueneceavianame pibisiacuene papecaexanaejava. Pabarajamatabëcueneexanepanaename bajaraponë. ⁴ Caematacabita siete xuabeje pibisiacuene pacaexanae ata tsane, itsiata siete xuabeje itsa aura tsane pibisiacuene papecaexanaejava yabara, nexata pexaniajajumeta itsa pacanavajunupaebiana pecopatsijavanexa bajarapacuenia, itsiata pajamatabëcueneceavianame. Pabarajamatabëcueneexanepanaename bajaraponë, jai Jesús pijajivijavabelia.

Pacuenia Jesús jumaitsi pijaapóstolevijavabelia yabara pelivaisi

⁵ Jesús pijaapóstolevi jumaitsi Jesúsjavabelia:

—Patajatuxanenë, paneyavenonare: “Xanë cajena necaëjëpa daxitacuene taexanaenexa,” nejaitsabiabijava orijibia patacajumecovënëtsinexa, jai Jesús pijaapóstolevi.

⁶ Nexata Jesús jumaitsi pijaapóstolevijavabelia:

—Tsiquirijavayo ata xanë yabara itsa pajamatabëjumaitsimë tsipae: “Xaniajai cajena. Jesús caëjëpatsi daxitacuene pexanaenexa,” itsa pajamatabëjamë tsipae, nexata paxamë ata pacacaëjëpaejitsipa ayaicuene paneexanaenexa. Nexata itsa pajumaitsimë tsipae mapanaejaxanaxanetojavabeliaje: “Yatabutopaya natixire. Nucaename pucaxaneto tuatuajëtalia,” itsa pajamë tsipae, nexata naejava ata pacajumecovënëtsipa cajena, jai Jesús pijaapóstolevijavabelia.

Pacuenia itsajivi pijatuxanenë pitorobicueniatsi toexanabiaba yabara pelivaisi

⁷ Jesús icatsia jumaitsi pijaapóstolevijavabelia:

—Paxamëyajuvënënë xainaejitsipa pijajivitonë. Nexata itorobijitsipa petonacuenebaponaponaenexatsi. Nexata bajaraponë pijatuxanenë ira petocueponaponaecujinae, patsipa pijatuxanenë pijaboyaberena. Itsa jume, baca petoetaponaponaecujinae patsipa. Nexata paxamëyajuvënënë petuxanenëxae, pijajivitonëjavabelia apo jumai tsipae: “Jonemena baja. Ecare nexaejava tacarajutsinexa,” apo jai tsipae pijajivitonëjavabelia. ⁸ Jume baja cajena. Biji rajane jumai tsipae pijajivitonëjavabelia: “Netoexanare taxaejavanexa. Nexata abaxë nevetanucaename tanabanijavata. Bajaraxuacujinae xamë nabanianame,” jai tsipae pijajivitonëjavabelia. ⁹ “Xanepana rabaja. Pexaniacuene bitso netoexaname,” apo jai tsabiabinua pijajivitonëjavabelia petonacuenebabiabijavatsi yabara. Bajarapacuenia apo jumai tsabiabi tsipae tsipaji saya pijajivitonë tsaponapona. Nexata pacuenia pijatuxanenë itorobatsi, bajaraponë exanabiabijitsipa. ¹⁰ Bajarapacuenia paxamë ata patoexanare Dioso papecaitorobicuenia. Itsa patoveretsianame Dioso papecaitorobicuenia panetoexanavanapaejava, nexata saya namataenetsia panajumaitsimë tsane: “Vaxaitsi saya vajatuxanenë pijajivitsi. Nexata vajanacaitorobicuenia toexanavanapatsi,” panajamë tsane. Pëtsa panajumaitsimë: “Itsajivi meta nacajumai tsane: ‘Xanepana rabaja. Xaniavaetsia Dioso patonacuenebame,’ nacajai meta tsane,” panajamë pëtsa, jai Jesús pijaapóstolevijavabelia.

Pacuenia Jesús jamatejemaya exana diez ponëbeje, bajayajebi bitso peperabëtsabanaevi, yabara pelivaisi

¹¹ Jesús pona Jerusalén tomarabelia. Itsajota Samaria nacuabeje Galilea nacuabeje namuxunenecaxitajarababeje, bajaraxuayo Jesús najetaruca. ¹² Itsa baja Jesús patsijitsia tsiquiritomarayojavabelia, mataenenatsi diez ponëbeje bajayajebi bitso peperabëtsabanaevi. Itsiata tajiyo bajarapamonae vecuanubenaohopatsi. ¹³ Bajarapamonae ayaijumeta jumaitsi Jesúsjavabelia:

—¡Jesús, paneitaxutotsoniataema! jai.

¹⁴ Nexata Jesús itsa tane bajarapamonae, Jesús jumaitsi bajarapamonaejavabelia:

—Panaitajëtsianame sacerdotevijavabelia papecaperabëtaenexa, jai Jesús bajarapamonaejavabelia.

Nexata bajarapamonae pona sacerdotevijavabelia. Nexata bajarapamonae namutua penajetarubenaajavata pepatsinexa sacerdotevijavabelia, namutua baja perabëxanepananajetarubena. ¹⁵ Daxita bajarapamonae peperabëxanepanaejava itsa tane, nexata caenë saya bajarapamonaeayajuvënënë naviateca Jesúsjavabelia. Bajaraponë namutua ayaijumeta Diosojavabelia

jumai tsanajetaruca: “¡Diosomē, bitso ayaijamatabēcuenenēmē! ¡Tavitanejavami baja vecua, nejamatejemayaexaname!” jai tsanajetaruca bajaronē Diosojavabelia.

¹⁶ Bajaraponē itša pata Jesúsjavabelia, pematatabcabēta irataeya bocajunua Jesús pitabarata.

—Pexaniacue neotoexaname. Nejamatejemayaexaname baja tavitanejavamivecua, jai Jesúsjavabelia.

Bajaraponē Samaria nacuapijinē. ¹⁷ Nexata Jesús jumaitši bajarajota penubenaevijavabelia:

—Diez ponēbeje bitso peperabētsabanaevi jamatejemayaexanajē. ¿Detsa meta xuajitsia daxita apo najuapatsi? ¹⁸ Maponēje caenē saicaya nacuapijinē, apo judionē ata, naviateca Diosojavabelia pejumaitšinexa: “¡Diosomē, bitso ayaijamatabēcuenenēmē! ¡Tavitanejavami baja vecua, nejamatejemayaexaname!” pejinexa Diosojavabelia, jai Jesús bajarajota penubenaevijavabelia Samaria nacuapijinē yabara.

¹⁹ Nexata Samaria nacuapijinējavabelia Jesús jumaitši:

—Nonotapnare. Ponare baja. Jamatejemamē rabaja tanejumečovēnētsixaemē tacajamatejemayaexanaevanexa, jai Jesús.

Pacuenia Jesús tsipaeba pijajivijavabelia, fariseovijavabelia ata, pecopiapatsijava baja Dioso pijajivi pevetsijava mapanacuataje yabara pelivaisi (Mt 24.23-28, 36-41)

²⁰ Fariseovi jumaitši Jesúsjavabelia:

—¿Detsa paepatota copiapatsiana Dioso pijajivi pevetsijava pijajivi mapanacuataje? jai fariseovi.

Nexata Jesús jumaitši fariseovijavabelia:

—Dioso taxuxuabi ata pijajivi pevetsijava mapanacuataje, apo taetsi vajitaxutota. ²¹ Nexata jivi apo jumai tsane: “Copiapata rabaja majotaje Dioso pijajivi pevetsijava mapanacuataje,” apo jai tsane. “Copiapata rabaja majotaliaje Dioso pijajivi pevetsijava mapanacuataje,” apo jainua tsane. Dioso rabaja capanepaeya aeconoxae evetāpona pijajivi paxamē tuatuajēta, jai Jesús fariseovijavabelia.

²² Nexata Jesús itsamatacabi mapanacuaje pevetsijavanexa, tajēvelia navajunupaeba pijajivijavabelia. Jesús jumaitši mapacueniaje:

—Itsamatacabi xanē, Daxitajivi Pematapijinēnē, mapanacuaje taevetsinē tsane. Nexata paxamē picani bitso pajitsipaename patanetaenexamē mapanacuaje taevetsicue. Itsiata baišis jane apo pataemē tsane mapanacuaje taevetsicue. ²³ Nexata itsamonae pacajumai tsane: “Bajarajotalia eca mapanacua pepo pevetsinēje,” pacajai tsane xanē yabara. Itša jume, pacajumai tsane: “Majota ecaje, mapanacua pepo pevetsinēje,” pacajai tsane xanē yabara. Itsiata pētsa paponame. Pētsa pamuxunaponamenua bajarapamonae pepēta. ²⁴ Pacuenia yamaxē itša nivejai tsajuni athēbēvetsica, caecuenia jivi cotiatane daxitajava, bajara pijinia pacuenia daxitanacuanēpijivi caecuenia netaena pamatacabi patsianicajē xanē, Daxitajivi Pematapijinēnē. ²⁵ Itsiata copiaya ayaicuenia navixaetaeya bejiošinē tsane. Mapanacuataje pejinavanapaevi apo nejumecovēnētsinua tsane Dioso athēbēvetsica taneitorobinēcuenetsica. ²⁶ Pacuenia bajayata jemata itši pamatacabi Noépijinē ponapona, bajara icatsia jemata itšane pamatacabi xanē, Daxitajivi Pematapijinēnē, jemata icatsia patsianicajē. ²⁷ Bajayata pamatacabi Noépijinē ponapona, jivi picani xaniavaetsia jamatejema pexaejava xaevanapa. Apevanapanua. Nacojiobapona itsamonae. Itsamonae

pexēnatoyonē pebijavabelia canajetapona petonacojibinexatsi. Bajarapamonae jamatejema saya jinavanapa. Nexata bajarapamatacabi Noépijinē ēpijamonae pinijibarcojavabelia barējunua. Nexata daxitajivi merata bubuna jemata ira itsa bubuta. ²⁸ Bajara pijinia itsi bajayata pamatacabi Lotpijinē ponapona. Jivi saya jamatejema jinavanapa. Pexaejava xaevanapa. Apaevanapanua. Comuacapona. Canajetapona. Ubapona pijapabianē. Pijabonē ata exanapona. ²⁹ Itsiata baitsi jane pamatacabi Lotpijinē Sodomatomara vecuapitsapa, jemata athēbēvetsica pinijicuenia isotonē othopaica. Othopaica pitarutsiibotonēnua. Nexata daxita Sodoma tomarapijivimi tajuatsi. Nexata baja verebiabatsi. ³⁰ Bajara pijinia pacuenia icatsia jemata itsane pamatacabi xanē, Daxitajivi Pematapijinēnē, jemata icatsia patsianicajē, jai Jesús pijajivijavabelia tajēvelia penavajunupaebijavata icatsia pepatsijavanexatsica.

³¹ Icatsia Jesús jumaitsi pijajivijavabelia:

—Pamatacabi xanē jemata patsianicajē, itsajivi ata pētsa sivanajamatabēxaina mapanacuapijicueje. Nexata pajivi athēbēyo bojumatsia ecaya, perunaecujinaetsica, pētsa sivanajamatabēxaina pijaboēnēalia pebobenaejavanē pejutsinexa. Pajivi pijinia pijapabita nacuenebaponapona, pētsa najamatabēxaina penaviatsinexa pijaboyabelia. ³² Panajamatabēnapire pacuenia bajayata Lotpijinē pijavami exanatsi. Lotpijinē pijavami pesivanajamatabēxainaexae mapanacuapijicue, napijivitaeyojopa. Nexata baja tēpa. ³³ Pajivi exanaponapona penatojitsipacuenia, apo xainae tsane matacabi apo peverevereaejava. Itsiata baitsi jane pajivi xanē tajamatabēcueneta copatsiana penatojitsipacuenia pexanabiabijavami, bajara-pajivi xainaena matacabi apo peverevereaejava, jai Jesús pijajivijavabelia.

³⁴ Icatsia Jesús jumaitsi tajēvelia pijajivijavabelia:

—Xaniajanē pacuenia pacatsipaebijitsiatsi. Pamatacabi patsianicajē, bajarapameravi anijanēbeje majitanucaenabeje caecamata. Itsanē tanejumecovēnētsinē tsane. Itsanē apo tanejumecovēnētsinē tsane. Nexata tanejumecovēnētsinē pitsianatsi āngelnē. Apo tanejumecovēnētsinē copatabuat-sianatsi. ³⁵ Anijavabeje pijinia najuacuabanucaenabeje caejavata. Nexata tanejumecovēnētsiva pitsianatsi. Apo tanejumecovēnētsiva copatanut-sianatsi. ³⁶ Anijanēbeje pijinia najuanacuenebanucaenabeje pabita. Nexata tanejumecovēnētsinē pitsianatsi. Apo tanejumecovēnētsinē copatanut-sianatsi, jai Jesús tajēvelia pijajivijavabelia.

³⁷ Jesús nexata pijajivi itsa jumetane bajarapacuenia Jesús pejumatsijava, bajarapamonae jumaitsi Jesúsjavabelia:

—Patajatuxanenē, ¿detsa jota bajarapacuenia yajuvēnēpitsianatsi? jai Jesús pijajivi.

Nexata Jesús jumaitsi tajēvelia pijajivijavabelia:

—Pacuenia quequeremonae bepijia yapētane itsajota petuxutsaebinē boca bajarajota penacaetuatsinexa, bajara pijinia pacuenia daxita taja-jivi bepijia yapētaena tapatsijavatsica penacaetuatsinexa xanējavaberena, jai Jesús pijajivijavabelia.

18

Pacuenia Jesús pijajivijavabelia livaisi tsipaeba jueznē pelivaisicuenia yabara pelivaisi

¹ Jesús pijajivi livaisi tsipaeba mapacueniaje Jesús pijajivi jamatabēcuenecueranaenejeva pevajētabibinexa Diosojavabelia. ² Nexata Jesús jumaitsi pijajivijavabelia:

—Tomarata ponapona jueznë. Bajaraponë pevetsinë jivi penaneconit-siaexanaecuene. Bajaraponë Dioso apo cujunavi. Jivi ata apo cujunavi. ³ Bajarapatomarata ponapona pamona pevecuatëpaevatsi. Bajarapova ponabiaba jueznëjavabelia pejumaitisabiabinexa: “Naneconitsiaexanare ponë xanëjavaberena naneconita. Naneconitsiaexanare pacuenia caitoroba nijatuxanenë bajarapitsivi nenaneconitsiaexanaenexa,” pejaitsabiabinexa, bajarapova ponabiaba jueznëjavabelia. ⁴ Itsiata abaxë bajayajebi jueznë apo jamatabëcuencyavenonae bajarapova. Belia baja bexëa jueznë jejai. Nexata jueznë jamatabëjumaitsi: “Dioso picani apo cujunavinë. Jivi ata picani apo cujunavinë. ⁵ Itsiata mapovaje tanejamatabëitonotabiabixae, yavenonaenajë pacuenia nitorobabiaba. Nexata baja bajarapova matavëjëa apo patabiabiarena tsane xanëjavaberena tanecueranaeyaexanaenexa,” jamatabëjai jueznë, jai Jesús pijajivijavabelia.

⁶ Jesús icatsia jumaitsi pijajivijavabelia:

—Bajara jamatabëcueneitsi jueznë, pibisijamatatabëcuenenë ata. Yavenona bajarapova asaëya pevajëcabiabixaeitsi. ⁷ Bajara pijinia pacuenia Dioso ata pijajivi yavenonaena itsamonae pibisiacuene itsa exanatsi. Bajarapacuenia Dioso pijajivi yavenonaena bajarapamonae itsa vajëtabiabiana Diosojavabelia matacabijebi, meravi yajava. Dioso cajena apo cuenenajematsi tsane itsa yavenonaena pijajivi. ⁸ Xanijanjë pacuenia pacatsipaebijitsiatsi. Dioso apo cuenenajematsi tsane itsa yavenonaena pijajivi itsamonae pibisiacuene pexanaeyanivatsi. Pamatacabi xanë, Daxitajivi Pematapijinënë, icatsia pat-sianicajë, ¿caxitajarabianajë tsaja abaxë tanecopiaevetavanapaevi? jai Jesús pijajivijavabelia.

Pacuenia itsanë fariseonë, itsanë impuestomatamo gobierno pejamatabëcuene pematamoyanijobinë, vajëtabeje Diosojavabelia yabara pelivaisi

⁹ Itsajota Jesús pijajivijavabelia livaisi tsipaeba, bajarajota nubena itsamonae. Bajarapamonae jamatabëjumai tsabiabi: “Vaxaitsi cajena pexaniamatabëcuenevitsi itsamonaevecuia. Itsamonae bitso nacavecuapibisiijamatabëcuenevi,” jamatabëjai tsabiabi. Nexata bajarapamonaejavabelia Jesús livaisi tsipaeba. Jumaitsi mapacueniaje:

¹⁰ —Anijanëbeje tsiabeje templobojavabetsia pevajëtsinexabeje Diosojavabelia. Caenë fariseonë. Itsanë gobierno pejamatabëcuene impuestomatamo pematamoyanijobabiabinë. ¹¹ Nexata fariseonë nuca. Fariseonë pevajëtsijavata Diosojavabelia, bitso bepxaniamatabëcuenenë nataeya jumaitsi mapacueniaje: “Diosomë, pexaniamatabëcuene carajutatsi. Tspipaji pacuenia itsamonae jamatabëcueneitsi tsenae, bajara xanë apo jamatabëcueneitsinë. Yamaxëitojorobiaya jivi apo tavecuancobetoxotsinë. Apo tacujirubejenë cajena. Apo tajaitsinë itsava tajavavecuia. Pacuenia maponëje gobierno pejamatabëcuene impuestomatamo pematamoyanijobabiabinë jamatabëcueneitsije, bajara xanë apo tajamatabëcueneitsinë. ¹² Caesemana canacujitsia, anijamatacabibëje, najamatabëcuenexaniavaetsiaya ponaponabiabajë xaenejevanë taxaeyava tacavajëtsinexa xamëjavabelia. Daxita pacuene nacanabajë, diez xuabejeyajuvënëjaya, caejava, xamëjavabelia carajutabiabatsi ofrendacuena,” jai mapacueniaje fariseonë templobota pevajëtsijavata Diosojavabelia. ¹³ Nexata ponë gobierno pejamatabëcuene impuestomatamo pematamoyanijobabiabinë, pevajëtsijavata Diosojavabelia tajiyo nucalia piauraxae. Athëbëabetsia ata penavëyotsijava

cujunava. Namëpabëbenuca pecobeta pejamatabëbëjaixae pibisiacuene pexanaeconi yabara. Nexata bajaraponë Diosojavabelia pevajëtsijavata jumaiti mapacueniaje: “¡Diosomë, nitaxutotsoniataema! ¡Pibisiacuene cajena bitso xanë exanabiabajë!” jai bajaraponë templobota pevajëtsijavata Diosojavabelia, jai Jesús mapacueniaje bepexaniajamatabëcuenevi penataevijavabelia.

¹⁴ Icatsia Jesús jumaiti bajarapamonaejavabelia:

—Xaniajanë pacuenia pacatsipaebijitsiatsi. Ponë gobierno pejamatabëcuene impuestomatamo pematamoyanijobabiabinë, bajarapacuenia pevajëtsixae Diosojavabelia, Dioso baja vecuaajibiaexanatsi pibisiacuene pexanaeconimi. Nexata baja bajaraponë naviata pijaboyabelia pianeconijibinë. Ponë fariseonë, navajëtsi ata Diosojavabelia, itsiata pijaneconi yajava naviata pijaboyabelia. Tsipaji beayaijamatabëcuenenë natane pevajëtsijavata Diosojavabelia. Bajaraxuata pajivi beayaijamatabëcuenejivi natane itsamonaevécua, bajarapajivi beveliajamatabëcuenejivi natane itsamonaevécua, bajarapajivi ayaijamatabëcuenejivi exanaenatsi Dioso, jai Jesús bepexaniajamatabëcuenevi penataevijavabelia.

*Pacuenia Jesús jumaiti pejevaxijivixijavabelia yabara pelivaisi
(Mt 19.13-15; Mr 10.13-16)*

¹⁵ Itsamonae pejevaxijivixi tocapataponatsi Jesús pecobeta pejayatapon-aenexa. Nexata Jesús pijajivi itsa tane bajarapacueni, Jesús pijajivi itaveta pexi pecapatsivi. Jesús pijajivi jumaiti pexi pecapatsivijavabelia:

—Pëtsa patocapataponame panexi Jesúsjavabelia, jai.

¹⁶ Nexata Jesús jumaiti pijajivijavabelia:

—Pëtsa paitavetame. Pacopare pejevaxijivixi pepatsinexa xanëjavaberena. Mapitsipejevaxijivixije jumeabinejeva xaniavaetsia bajumecovënëta palivaisi tsipaebatsi. Nexata pamonaë jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovënëta Dioso pejumelivaisi. ¹⁷ Xaniajanë pacuenia pacatsipaebijitsiatsi. Mapitsipejevaxijivixije itsa jumecovënëta palivaisi tsipaebatsi, bajumecovënëta xaniavaetsia jumeabinejeva. Nexata pamonaë jitsipa pejonejava Dioso pijanacuayabetsia, bajara pijinia pacuenia jumeabinejeva xaniavaetsia bejumecovënëta Dioso pejumelivaisi. Nexata pamonaë jumeabinejeva xaniavaetsia jumecovënëtsiana Dioso pejumelivaisi, bajarapamonaë jonena Dioso pijanacuayabetsia. Itsiata baitsi jane pamonaë Dioso pejumelivaisi jumeabinejeva xaniavaetsia apo jumecovënëtsi tsane, apo jone tsane Dioso pijanacuayabetsia, jai Jesús pijajivijavabelia.

Pacuenia pevëjëato, bitso pexainanë, cuaicuaijai Jesúsjavabelia yabara pelivaisi

(Mt 19.16-30; Mr 10.17-31)

¹⁸ Pevëjëato, judíovi pevetsinë, yanijoba Jesúsjavabelia. Pevëjëato jumaiti mapacueniaje:

—Petuxanenë, pexaniajamatabëcuenenëmë, ¿detsa pitsicuene exanaenajë taxainaenexa maticabi apo pevereverecaëjava? jai pevëjëato.

¹⁹ Nexata Jesús jumaiti pevëjëatojavabelia:

—¿Detsa xuajitsia: “Pexaniajamatabëcuenenëmë,” nejamë? Ajibi raja itsapebi ata pexaniajamatabëcuenenë. Caenë rabaja Dioso pexaniajamatabëcuenenë. ²⁰ Xamë baja yapëtaneme pacuenia Dioso pejumelivaisita itoroba jivi pejumecovënëtsinexa. Jumaiti mapacueniaje: “Pëtsa jaitame

itsapetiriva nijavavecua. Pëtsa beyaxuabame jivitonë. Pëtsa nacobetox-otame. Pëtsa itsamonae pexanaejava yabara najumetsënëtsiaya paebame. Axa yayiataema. Ena ata yayiataema,” jai Dioso pejumelivaisita. Xamë baja yapëtaneme bajarapalivaisi, jai Jesús pevëjëatojavabelia.

²¹ Nexata pevëjëato jumaitsi Jesúsjavabelia:

—Daxita rabaja bajarapalivaisianë jumecovënëtajë pejevax-inënëjavaveliacujinae, jai pevëjëato.

²² Itsa Jesús jumetane bajarapacuenia pejumecanaviatsijavatsi, nexata icatsia jumaitsi pevëjëatojavabelia:

—Abaxë raja catosaica caejava nexanaenexa. Canajere daxita nexainaejavami. Bajarapamatamomi tsicobetsanaename bepejiobivi. Bajaraxuacujinae nepënaponaename. Nexata bajarapacuenia xainaname bitso nexainae-cuene Dioso pijanacuatatsia, jai Jesús pevëjëatojavabelia.

²³ Bajarapacuenia Jesús itsa jumaitsi pevëjëatojavabelia, nexata pevëjëato bitso bejamatabëjiobi tsanajetsireca. Tsipaji pevëjëato daxitacuene bitso pexainanë. Nexata pevëjëato apo jamatabëjumecovënëtsi palivaisi Jesús tsipaeba. ²⁴ Itsa Jesús tane pevëjëato bepejamatabëjiobi tsanajetsijavareca, nexata pevëjëato pecovëta jumaitsi pijajivijavabelia:

—¡Pamonae bitso daxitacuene pexinaevi, tsiaypëbejetsi bitso penajamatabëcuenecopatsinexa Diosojavabelia pecapanepaenexatsi Dioso pijanacuayabetsia! ²⁵ Pacuenia camello acuenebi pejonejava palutaetoitaxutovojotualia, bajara pijinia pacuenia bitso pexainanë acuenebi tsane pejonejava Dioso pijatomarabetsia, jai Jesús pijajivijavabelia.

²⁶ Nexata Jesús pijajivi jumaitsi Jesúsjavabelia:

—¿Detsa nexata pitsivi panepaena Diosojavabelia, bitso pexinaevi ata, itsa apo panepae tsane Diosojavabelia? jai Jesús pijajivi.

²⁷ Jesús nexata jumaitsi pijajivijavabelia:

—Pacuene jivi apo caëjëpaetsi pexanaenexa, bajarapacuenia Dioso caëjëpaetsi pexanaenexa, jai Jesús pijajivijavabelia.

²⁸ Nexata Pedro jumaitsi Jesúsjavabelia:

—Patajatuxanenë, paxanë rabaja pacopatajë daxitacuene pataxainaejavami. Nexata baja pacapënajinavanapatsi, jai Pedro.

²⁹⁻³⁰ Jesús nexata jumaitsi:

—Xaniajanë pacuenia pacatsipaebijitsiatsi. Pajivi Dioso pijacuene petonacuenebinexa pueneta pijabomi, paxa ata, pena ata, pematapijivi ata, pejuypajivivi ata, pijava ata, pexi ata, nexata bajarapajivi mapanacuataje pepuenetsijavami matatoxenetsia Dioso rajutsianatsi. Nexata bajarapajivi bejëjavabelia petëpaecujinae ata Dioso rajutsianatsi matakabi apo pev-ereverecaejava, jai Jesús pijajivijavabelia.

Pacuenia icatsia Jesús tajëvelia navajunupaeba pebeyaxuabijavanexatsi yabara pelivaisi

(Mt 20.17-19; Mr 10.32-34)

³¹ Jesús itsamonaevvecua ëpijajivi, doce ponëbeje, junata pimoxoyotsinexatsi. Nexata Jesús pebeyaxuabijavanexatsi, tajëvelia navajunupaeba pijajivijavabelia. Jesús jumaitsi mapacueniaje:

—Panëjumetaema. Mara Jerusalén tomarabelia ponatsije. Bajayata Diosojumepaebivimi profetavi, xanë, Daxitajivi Pematapijinënë, talivaisi tajëvelia yaquina. Pacuenia nexanaejitsia, daxita bajarapalivaisi bajayata

profetavimi tajëvelia yaquina. Nexata daxita pacuenia xanë talivaisi bajayata tajëvelia profetavimi yaquina, daxita jane baja bajarapacuenia Jerusalén tomaratalia netocopiapatsiana. ³²Itsanacuaverena pepatsivi pecobeyabelia necanajetsiana tanebeyaxuabinexa. Bajarapamonae necanecaponaena. Nebijataena pibisiacuenia. Nesuabiana. ³³Nejumatitibabena penaneconitsivi pejumaconitabiabimacata. Bajaraxuacujinae nebeyaxuabiana. Itsiata baitsi jane tanebeyaxuabicujinae, acueyabi matababita, icatsia asaenë tsane, jai Jesús pijajivijavabelia tajëvelia penavajunupaebijavata pebeyaxuabijavanexatsi.

³⁴Itsiata Jesús pijajivi apo jumeypäetae pajamatabëcuene yabara Jesús jumaitsi.

Pacuenia Jesús itaxutoxanepanaeyaexana bitso pitaxutotsëcënaenë, Jericó tomarapijinë, yabara pelivaisi (Mt 20.29-34; Mr 10.46-52)

³⁵Jesús imoxoyotanajetaruca Jericótomara. Nexata namuto muxuneneta eca bitso pitaxutotsëcënaenë, apo petaenë. Bajaraponë amoneya palata vajëcabiabeca jivijavabelia. ³⁶Nexata bitso pitaxutotsëcënaenë itsa jumetane jivibitsaëttoxaneto pecuaicuaijai tsanajetarubenaejava namutua, bajaraponë epajunateca.

—¿Detsa xua pajaitame? jai tsecae bajaraponë.

³⁷Nexata jivi jumaitsi bajaraponëjavabelia:

—Jesús raja, Nazaret tomarapijinë, maxuayo najetarucaje, jai jivi.

³⁸Nexata pitaxutotsëcënaenë vavajai tsecae.

—¡Jesús, Davidpijinë pemomomë, nitaxutotsoniataema! jai tsecae bajaraponë.

³⁹Nexata picani itsamonae, Jesús pevajënaeya penajetarubenaevi, jumeitaveta bajaraponë pemoyanexa. Itsiata biji bitsoyo orijibia vavajai tsecae.

—¡Davidpijinë pemomomë, nitaxutotsoniataema! jai tsecae pitaxutotsëcënaenë.

⁴⁰Nexata Jesús muxunanucojopa. Jumaitsi pijajivijavabelia:

—Panetocomacaponaremena pitaxutotsëcënaenë, jai Jesús.

Itsa baja imoxoyo tocanajetarubenatsi, Jesús jumaitsi pitaxutotsëcënaenëjavabelia:

⁴¹—¿Detsa xua jitsipame tacaexanaenexa? jai Jesús.

Nexata bitso pitaxutotsëcënaenë jumaitsi Jesúsjavabelia:

—Jesús, jitsipajë taitaxutoxanepanaejava, jai pitaxutotsëcënaenë.

⁴²Jesús nexata jumaitsi pitaxutotsëcënaenëjavabelia:

—Itaxutoxanepaname rabaja. Tsipaji nesivajamatabëjumaitsimë mapacueniaje: “Jesús nitaxutoxanepanaeyaexanaena,” nesivajamatabëjamë, jai Jesús pitaxutotsëcënaenëjavabelia.

⁴³Bajarapacuenia Jesús pejumaitisjavata, bitso pitaxutotsëcënaenëmi xaniavaetsia baja tane. Nexata bajaraponë napona baja Jesús pepëta. Bajaraponë namutua jumai tsanajetarucaé Diosojavabelia:

—¡Diosomë, bitso pexaniacuenia netoexaname! jai tsanajetarucaé bajaraponë.

Pamonae ata tane bajaraponë pitaxutoxanepanaejava baja, daxita bajarapamonae ata Diosojavabelia jumai tsanajetarubenaé:

—¡Diosomë, bitso ayaijamatabëcuenenëmë! jai tsanajetarubenaé Diosojavabelia.

19

Pacuenia nabarëcuaicuaijabeje Jesúsbeje Zaqueo beje yabara pelivaisi

¹ Jesús najetaruca Jericó tomarajava. ² Jericó tomarata ponapona Zaqueo vënë. Bajaraponë gobierno pejamatabëcuene impuestomatamo pe matamoyanijobabi bivi penamatacaitorobinë. Zaqueo bitso pexainanë pexainaejava. ³ Nexata Zaqueo jamatabëtane Jesús. Itsiata apo caëjêpaetsi petaejava. Tspaji Zaqueo petoyaecaenëyo. Jivibitsaëttoxaneto matatoyorotsia nubenatsi Jesús Zaqueo pevajënae. ⁴ Nexata Zaqueo cujinaeponalia jivibitsaëttoxaneto pevajënaeyabelia Jesús peponaenamutuabelianexa. Junaya naejavatsia athëbëvetsica petaenucaenexa Jesús penajetarucaejava. ⁵ Nexata Jesús namutua itsa imoxoyotanjataruca, itsa ponaeta Zaqueo athëbëyo nucaya, bajaraponaejavatsia Jesús naëcotsia. Nexata Jesús taenutsia Zaqueo. Jesús nexata jumaisi Zaqueo javabelia:

—Zaqueo, naxanitsiayo runaimica. Nijaboyabelia raja patsijitsianë, jai Jesús.

⁶ Nexata Zaqueo naxanitsiayo runajopaica. Barëyaya copiapita pijaboyabelia pebarëponaenexa Jesús. ⁷ Daxita pamonaie Jesús matatoyorotsia najetarubenatsi, itsa tane bajarapacuenë, Jesús baracuaicuaijaisi tsanajetarubenaie. Èpamonaie najumaisi tsanajetarubenaie Jesús yabara:

—Jesús raja naponaponaejitsia Zaqueo pijabota, caranata pibisiacuene pexanaenë pijabota, najai tsanajetarubenaie bajarapamonae Jesús yabara.

⁸ Nexata Zaqueo pijabota Jesús eca mesa muxuneneta. Bajarajota Jesús pitabarata Zaqueo nonotapuna. Jumaisi Jesús javabelia:

—Tajatuxanenë nejumetaema. Tsatsianejê namatajêpaeya taxainajava tarajutsinexa bepejiobivijavabelia. Pamonaie yamaxëitojorobiaya vecuanotajê tamatamoyanijobijavata impuestomatamo, bajarapamonae tocanavibianajê. Nexata tayamaxëitojorobijamatabëcuene bajarapamonae rajut-sianajê juya cuatro xuabeje tsaponai caijavayomijamatabëcuene, jai Zaqueo Jesús javabelia; ⁹ Nexata Jesús jumaisi Zaqueo javabelia:

—Zaqueo, ajena rabaja pamatacabi, caxitajarabame, nijamonae yajava, nijaneconivecua pecacapanepaejavanexa Diosojavabelia. Tspaji baja nijamonae barëjumeconvënëtame Dioso. Zaqueo, xamë Abrahampijinë pemomomëcuenia. Itsiata baitsi jane ajena baja Diosojavabelia nenajamatabëcuenecopsixae, Dioso jane baja catane pepacuenë Abrahampijinë pemomomëcuenia. ¹⁰ Xanë, Daxitajivi Pematapijinënë, sivapatajopajê tajaisinexa Diosovecua penaxuabivi tacapanepaenexa pijaneconivecua, jai Jesús Zaqueo javabelia.

Oro palatanënë, diez ponëbeje, yabara pelivaisi

(Mt 25.14-30)

¹¹ Zaqueo pijabota itsamonae namuxunaevetena Jesús pet-sipaebilivaisi Zaqueo javabelia. Pamonaie namuxunaevetena, jamatabëcuenenavëxaniabiaya jamatabëjumai tsenae: “Imoxoyo rabaja ecalia Jerusaléntomara. Nexata Jesús itsa patsialia Jerusalén tomarabelia, copiajopaena jane baja daxita Dioso pijajivi pevetsijava,” jamatabëjai tsenae bajarapamonae. Bajarapacuenia jamatabëjumai tsenae tspaji baja Jerusaléntomara imoxoyo ecalia Jesús pepatsinexa.

¹² Bajaraxuata Jesús livaisi tsipaeba bajarapamonae javabelia. Jesús jumaimatabëcuenenavëxaniabiaya jamatabëjumai tsenae: “Imoxoyo rabaja ecaliatsi mapacueniaje:

—Petuxanenē ponapona pijanacuata. Nexata pepo nacuaevevtsinē tonajumeitorobarenatsi tajēnacuaaverena. Petonajumeitorobijumetsirena jumaiivsirena mapacuenaijae: “Ponaename maberenaje nacua nevetsinēnexa tacaexanaenexa nijanacua nevetsinexa. Bajaraxuacujinae naviatsiaremelia nijanacua jane baja nevetsinexa,” jaitsirena petonajumeitorobijumetsirena. ¹³ Nexata petuxanenē peponaevajēnae, junata pijajivi, diez ponēbeje. Nexata petuxanenē pijajivi evetsiaexana pijapalatanēanē, oronēanē, bitso penamatamotsinēanē. Caenē canacujitsia caepalatanē evetsiaexanapona. Nexata petuxanenē pijajivi jumaiivsijajivajavelia: “Bajarapapalatata pacomuataponaename. Xua pacomuataponaename, icatsia pacanajetaponaename. Nexata bajarapacuenia netoayaijava tsaponae tsane tajapalata,” jai petuxanenē pijajivijavelia. Bajaraxuacujinae pona jane baja. ¹⁴ Itsiata baiitsi jane pevetsinacuatana pejinavanapaevi, bitso itoyatsi petuxanenē. Nexata bajarapamonae petuxanenē pecovēvelia itsamonae itorobalia, itsajotalia petuxanenē nacua pevetsinēnexa exanaejitsiatsi, bajarajotalia pejumaiivsinexa: “Apo pajitsipaenē bajaraponē patanevetsinēnexa patajanacuata,” pejainexa petuxanenē yabara. ¹⁵ Itsiata baiitsi jane petuxanenē pijanacua baja pevetsinēnexa exanatsi. Nexata baja naviarena pijanacuayaberena pevetsinexa jane baja pijanacua. Nexata baja parena. Nexata petuxanenē pepatsicujinaerena, junata icatsia pijajivi peyapētaenexa jane baja pacuenia caenē canacujitsia pijapalatanēanē pijajivi tocanacuenebatsi pecovēta. ¹⁶ Copiaya pepatsinē jumaiivsijajituxanenējavavelia: “Tajatuxanenē, nijapalatanē, taneevetsiaexanaenēmē, catopitsapa baja diez ponēbeje. Nexata baja daxitata once ponēbeje,” jai. ¹⁷ Nacuaevevtsinē nexata jumaiivsijajivitonējavavelia: “Xanepana rabaja. Xaniavaetsia netoebetaponaponaename. Tsiquirijavayo ata xaniavaetsia netoebetame. Nexata icatsia diez patomarabeje netoebetaponaponaename,” jai nacuaevevtsinē pijajivitonējavavelia. ¹⁸ Icatsia itsanē pijatuxanenē pijapalatanē petoevetsinē pata. Nexata bajaraponē jumaiivsijajituxanenē, nijapalatanē, taneevetsiaexanaenēmē, catopitsapa baja cinco ponēbeje pematatsēnē,” jai. ¹⁹ Nacuaevevtsinē nexata jumaiivsijajivitonējavavelia: “Xamē icatsia cinco patomarabeje netoebetaponaponaename,” jai nacuaevevtsinē pijajivitonējavavelia. ²⁰ Nexata icatsia itsanē pijatuxanenē pijapalatanē petoevetsinē pata. Jumaiivsijajituxanenējavavelia: “Tajatuxanenē, mara nijapalatanēje, taneevetsiaexanaenēmē. Pañuelopanayota yamatacētsiaya catoevetatsi. ²¹ Bajarapacuenia catoevetatsi tsipaji cacujunavatsi. Niajamatabēcuenesaenē. Xamē apo itaxutobejiobiataeyabiabimē nijajivi, pamonaē catoeveta nijajava. Itorobabiabame nijajivi pecatopitsinexa apo nijajava ata. Itorobabiabamenua pecatonotsinexa apo neubiaexanaejava ata,” jai pijatuxanenē pijapalatanē petoevetsinē. ²² Nexata nacuaevevtsinē jumaiivsijajivitonējavavelia: “¡Acujirubejemē xamē! Bijiaya netoebetame. Naneconitame bajarapacuenia tanejumiivsijavamē yabara. Xamē baja cajena yapētaneme tajamatabēcuenesaenējava tajajava yabara. Pacuenia itorobabiabajē tajajivi tanetopitsinexa apo tajajava ata, yapētaneme baja. Pacuenia ata itorobabiabajē tanetonotsinexa apo taubiaexanaejava ata, yapētaneme baja. ²³ Xanepanaejitsipa xamē banco pevetsivi itsa netocanacuenibiaexanaejitsipamē tajapalatanē. Nexata banco pevetsivi aeconoxae tajapalatanē netocanaviatsipa. Nexata pecacovaetsijamatabēcuene itsajava palata netoyajavacanaviatsipa,” jai nacuaevevtsinē pijajivitonējavavelia. ²⁴ Nexata nacuaevevtsinē jumaiivsijajivitonējavavelia.

pijajivijavabelia: “Tajapalatanē panetovecuapire maponēje. Nexata juya parajure ponē xaniavaetsia netoeveta tajapalatanē. Bajaraponē xaniavaetsia netocanacueneba. Nexata baja pematatsēnēa diez papalatanēbeje netopitsapaeyaexana. Nexata taevetsiaexanaenēa once ponēbeje,” jai nacuaeveitsinē. ²⁵ Nexata nacuaeveitsinē pijajivi jumaiysi pijatuxanenējavabelia: “Patajatuxanenē, bajaraponē xaina baja ayajava. ¿Detsa xuajitsia rajutsijitsiamē pematatsēnēa?” jai pijajivi. ²⁶ Nexata nacuaeveitsinē jumaiysi pijajivijavabelia: “Pacatsipaebatsi rabaja. Pajivi baja ayajava xaina, pematatsēnēa icatsia itsajava rajutsianatsi. Itsiata pajivi tsiquirijavayo xaina, bajarapajivi pijatsiquirijavayomi vecuapitsianatsi. ²⁷ Tajavajabitsaē, pamonaē picani apo jitsipae mapanacua taevetsijavaje, bajarapamonae pacaponaremena maberenaje patanevecuaverebiabinexamē taitabēta,” jai nacuaeveitsinē pijajivijavabelia, jai Jesús livaisi petsipaebijavata Zaqueo pijabota.

Pacuenia Jesús pata Jerusalén tomarata yabara pelivaisi
(Mt 21.1-11; Mr 11.1-11; Jn 12.12-19)

²⁸ Jesús baja itsa najumevereta livaisi petsipaebijava Zaqueo pijabota, pona baja Jerusalén tomarabelia. ²⁹ Jerusalén tomaravecuia imoxoyo eca pet-suto. Bajarapatsutojumata nubena olivonaenē. Bajarapatsuto canacujitsita anijatomarayobeje ecabeje, Betfagé tomarayobeje Betania tomarayobeje. Jesús itsa imoxoyotanjataruca bajarapatomarayobeje, nexata itoroba pijajivitonēbeje bajarapatomarayobejejavabelia. ³⁰ Jesús jumaiysi pijajivitonēbejejavabelia:

—Paponarebeje mapatomarayo ecaliajejavabelia. Itsa rabaja papatsiaremeliabeje, pataenutsianamebeje burro pecētanutsinētsi. Bajara-paburro itsajivi ata abaxē apo jumaponae. Paisinaenamebeje. Payamaēcarenamebeje tsane. ³¹ “¿Detsa xuajitsia paisinamebeje burro?” itsa pacajaiabeje tsane itsajivi, nexata pajumaiysimēbeje tsane: “Vajatuxanenē raja namatavenona,” pajamēbeje tsane, jai Jesús pijajivitonēbejejavabelia.

³² Nexata Jesús pijajivitonēbeje liabeje. Pacuenia Jesús jumaiysi, bajara-pacuenia caxitajarabanucabeje burro. ³³ Nexata itsa isinabeje, burro pexainaevi jumaiysitsibeje:

—¿Detsa xuajitsia paisinamebeje burro? jaitsibeje.

³⁴ Nexata Jesús pijajivitonēbeje jumaiysibeje burro pexainaevijavabelia:

—Vajatuxanenē raja namatavenona. Bajaraxuata paisinajēbeje, jaiabeje.

³⁵ Nexata jane baja burro capatabeje Jesúsjavaberenā. Nexata Jesús pijajivi burro tsijumajeba pijacamisajumavelia penaxatabijavanē. Jesús baja bajarapaburrojumata ecaya. ³⁶ Jesús itsa yanajataruca burrota, panamutovelia Jesús patsijitsia Jerusalén tomarabelia, bajarapanamutua jivi pijacamisajumavelia penaxatabijavanē namutua tsivajēnaeyerequejebaponatsi yayataeya pecopiapitsinexatsi. ³⁷ Patsutojumata olivonaenē nubena, bajarapatsutojavatsica namuto namatononavarucaica. Nexata bajarapanamutuatsica Jesús imoxoyotanjataruca neparsinexa Jerusalén tomarata. Nexata jivi ayaiabitsaētoxaneto, Jesús pijajivi yajava, vavajai tsanajetarubenaē. Sivabarēyaya vavajai Diosojavabelia:

—¡Diosomē, bitso ayaijamatabēcuenenēmē! jai tsanajetarubenaē bajarapamonae.

Bajarapacuenia vavajai tsanajetarubenaē tsipaji bajarapamonae kujirutaeyabiaba Jesús Dioso pesaēta ayaicuene pexanaponaejavanē.

³⁸ Bajarapamonae jumai tsanajetarubenaē Jesús yabara:

—iMaponë najetarucaje, bitso ayaijamatabëcuenenë Dioso pejamatabëcueneta najetaruca jivi pevetsinënexa! iJamatabëcuenexanepanaeya jinavanapa daxita pamonaē athëbëtatsia jinavanapa! iPinijicuene rabaja exana Dioso! jai tsanajetarubenaē namutua daxita Jesús pijajivi.

³⁹ Nexata fariseovi najetarubena bajarapajivibitsaëtoxaneto tuatuajëta. Nexata fariseovi jumaitsi Jesúsjavabelia:

—Jesús, jumeitavere baja nijajivi bajarapacuenia pejumaitsiyaniva xamë yabara, jai fariseovi.

⁴⁰ Nexata Jesús jumaitsi fariseovijavabelia:

—Xaniajanë pacuenia pacatsipaebijitsiatsi. Mapamonaēje moya itsa najetarubenaējitsipa, nexata juya ibotonë vavajai tsenaē tsipae, jai Jesús fariseovijavabelia.

⁴¹ Itsa baja Jesús imoxoyo taeyeta Jerusaléntomara, nexata Jesús sivanua Jerusalén tomarapijivi. ⁴² Jesús pesivanuejavata Jerusalén tomarapijivi, Jesús jumaitsi Jerusalén tomarapijivi yabara mapacueniaje:

—iBitso picani jitsipajë Jerusalén tomarapijivi mapamatacabitaje peyapëtaenëxa pacuenia Dioso pepacuene jamatabëcuene xanepanaeyaexanaejitsipatsi, itsa nejumecovënëtsipa! Abaxë raja aeconoxae Dioso apo tocopatsitsi peyapëtaeyaniva bajarapacuenia. ⁴³ Nexata tocopiapatsianatsi pibisiamatacabi. Pijavajabitsaë tsi maxëpatsianatsi. Nexata pijatomara matatoyorotsia foto yacaranatsia cuerutsianatsi petsimaxënuubenaenexatsi bajarapafotota. Pijatomara matatoyorotsia peyacaranatsiibopanaxanetopënëya, pijavajabitsaë foto matatoyorotsia cuenatsi. Bajarapacuenia yacaranatsianatsi pijavajabitsaë. ⁴⁴ Nexata irabetsica topenetsianatsi pijabonëmi. Nexata daxita Jerusalén tomarapijivi benatsi. Pijatomara matatoyorotsia peyacaranatsiibopanaxanetomì ata tosarababenatsi. Nexata itsaibopana ata apo bocae tsane itsaibopana jumavereca. Bajarapacuenia itsane tsipaji xanë apo neyapëtae Dioso athëbëvetsica taneitorobinëtsica, Daxitajivi Pematapijinënë, jai Jesús pesivanuejavata Jerusalén tomarapijivi.

Pacuenia Jesús Jerusalén tomarata templobovecua pitsapaeyaexana pecanajetabiabivi, pecomuacabiabivinua, yabara pelivaisi
(Mt 21.12-17; Mr 11.15-19; Jn 2.13-22)

⁴⁵ Jesús pepatsicujinae Jerusalén tomarata, joneya temploboyalia. Nexata templobota Jesús tane pecanajetabiabivi, pecomuacabiabivinua. Nexata daxita bajarapamonae Jesús pitsapaeyaexana templobovecua. ⁴⁶ Jesús jumaitsi bajarapamonaejavabelia:

—Dioso baja cajena pejumelivaisibaxutota mapatemplobo yabara tajëvelia jumaitsi mapacueniaje: “Tajabo raja jivi xanëjavaberena penavajëcaebo tsane,” jai Dioso pejumelivaisibaxutota. Itsiata baitsi jane paxamë yamaxëitojorobiaya panenacobetoxotsinexa, panacaeuatabiabame mapabotaje, jai Jesús templobota pecanajetabiabivijavabelia.

⁴⁷ Bajaraxuacujinae caematacabi canacujitsia Jesús jivi livaisi tsipaebabibabaja bajarapatemplobota. Nexata sacerdotevi penamatacaitorobivi, judiövi pejararubivinua, tomaraevetsivinua, najumejaita picani Jesús pebeyaxuabineaxatsi. ⁴⁸ Itsiata acuenebi Jesús pebeyaxuabijavatsi. Tsipaji Jesús itsacueneneconi ata apo xainae. Daxitajivi yayatanetsi. Jesús jivi petsipae bilivaisianë xaniavaetsia namuxunaevetabiabatsi.

20

Pacuenia Jesús caējēpatsi daxitacuene pexanaenexa yabara pelivaisi
(Mt 21.23-27; Mr 11.27-33)

¹ Itsamatacabi Jesús templobota jivi livaisi tsipaeba. Tsipaeba pexanialivaisi jivi pecapanepaelivaisinexatsi pibisiacuene pexanaeoneconivecua. Nexata bajarajota pata sacerdotevi penamatacaitorobivi, judiōvi pecujarubivinu, judiōvi pijaancianovinua. ² Nexata bajarapamonae jumaitsi Jesūsjavabelia:

—Panetsipaebare cajena. ¿Jipatsa pejamatabēcueneta pecanajetabiabivi, pecomuacabiabivinu, capitsapame mapatemplobovecuaje? jai.

³ Jesús nexata jumaitsi bajarapamonaejavabelia:

—Xanē copiaya caejumeyo pacayanijobianatsi patanejume-canaviatsinexamē. ⁴ ¿Jipatsa jane pejamatabēcueneta Juanpijinē jivi bautisabaponapona? ¿Dioso tsaja pejamatabēcueneta? Itsa jume, ¿jivi tsaja pejamatabēcueneta? jai Jesús bajarapamonaejavabelia.

⁵ Nexata epamonae nabarēcuaicuajjai. Najumaitsi:

—¿De meta pacuenia jumecanaviatsianatsi? Vaxaitsi itsa jumai tsipaetsi: “Dioso raja pejamatabēcueneta,” itsa jai tsipaetsi, nexata Jesús nacajumai tsipae: “¿Detsa nexata xuajitsia apo pajumecōvēnētšimē Juanpijinē pepeabibilivaisianē?” nacajai tsipae. ⁶ “Jivi raja saya pejamatabēcueneta Juanpijinē jivi bautisabaponapona,” itsa jai tsipaetsi, nexata daxitajivi anaeya ibotonēta nacatseconaejitsipa vajanacabeyejebinxexa. Bajarapacuenia nacabeyejebijitsipa tsipaji daxitajivi Juanpijinē yabara sivajamatabējumaitsi: “Juanpijinē raja pepacune Diosojumepaebinēmi,” sivajamatabējai, najai sacerdotevi penamatacaitorobivi, judiōvi pecujarubivinu, judiōvi pijaancianovinua.

⁷ Nexata saya bajarapamonae jumaitsi Jesūsjavabelia:

—Apo payapētaenē ponē Juanpijinē itorobatsi jivi pebautisabaponaenexa, jai.

⁸ Nexata Jesús jumaitsi bajarapamonaejavabelia:

—Nexata xanē ata apo pacatsipaebi tsanetsi ponē nitoroba tacapit-sapaenexa bajarapamonae templobovecua, jai Jesús.

Pacuenia exana pijamatabēcuenebejevi, itsanē pijauvacababo petoetsivivi yabara pelivaisi

(Mt 21.33-44; Mr 12.1-11)

⁹ Jesús taxuxuaba livaisi petsipaebijava jivijavabelia. Jumaitsi mapacue-niaje:

—Pijaira pexainanē pijairata uba ayaibacaboxaneto uvavēnējava. Bajaraxuacujinae itsamonae evetsiaexana pijauvacababo. Jumaitsi bajarapamonaejavabelia: “Pamatacabi cuainaveretsiana, natsicobetsanaenatsi. Pamatacabi raja cuainaveretsiana, tajajivitonē itorobiarenajē xua panetsatsianame tanetopitsinexa,” jai uvacababo pexainanē petoetsivitsijavabelia. Nexata uvacababo pexainanē tajēnacuayabelia pona bajayajebi pijajibitsarucaenexa. ¹⁰ Itsa baja uvacababo pexainanē yapētane pecopiapatsijava uvacuai penaveretsimatacabi penotsinexa, nexata uvacababo pexainanē itoroba pijajivitonē. Itoroba petoetsivitsijavabelia petsicobetsatsinexatsi. Nexata uvacababo pexainanē pijajivitonē tovaetabatsi. Toconibabiatsi. Petoconibabecujinaetsi cobesa naviatšiaexanal-
liatsi. ¹¹ Itsiata uvacababo pexainanē icatsia itoroba itsanē pijajivitonē
petsicobetsatsinexatsi. Bajaraponē ata icatsia pibisiacuena tobijatanetsi.
Toconibabiatsi. Peconibabecujinaetsi cobesa naviatšiaexanal-
liatsi. ¹² Itsiata

uvabacabo pexainaenē icatsia itoroba itsanē pijajivitonē. Icatsia bajaronē ata tomatajorobabiatsi. Uvabacabopēnēyabelia xuabatsi.

¹³ Nexata uvabacabo pexainaenē jamatabējumaiatsi: “¿Detsa nexata xua exanaenajē? Itorobianajē cajena taxēnato, tasivanē. Itsa raeta itorobianajē taxēnato, bajarapamonae netoyaiyataena,” jamatabējai uvabacabo pexainaenē. ¹⁴ Itsiata baiatsi jane uvabacabo petoevetsivitsi, uvabacabo pexainaenē pexēnato ata apo toyaiyataetsi. Itsa tane uvabacabo pexainaenē pexēnato, bajarapamonae najumaiatsi: “Mara ponēje itsamatacabi paxa pevēnamuto paxa pijauvabacabo pitsipaje. Naxanitsia. Beyaxuabatsi. Nexata raja vxaiatsi vajauvabacabo tsane,” najai uvabacabo petoevetsivitsi. ¹⁵ Nexata uvabacabo pexainaenē pexēnato ata tovaetabatsi. Caponaliatsi bajarapauvabacabo pepēnēyabelia. Bajarapacuenia icatsia tobeyaxuabatsi, jai Jesús.

Nexata Jesús yanijoba bajarapalivaisi petsipaebivijavabelia. Jumaiatsi:

—¿De meta nexata xua exanaena uvabacabo pexainaenē pijauvabacabo petoevetsivitsijavabelia? ¹⁶ Uvabacabo raja pexainaenē, patsiarena. Verebiabiana daxita bajarapamonaemi. Nexata icatsia itsamonae evetsiaexanaena bajarapauvabacabo, jai Jesús bajarapamonaejavabelia.

Jesús penamuxunaevetsivitsi itsa jumetane bajarapacuenia Jesús pejumelivaisijava, bajarapamonae jumaiatsi:

—¡Dioso pētsa copata bajarapacuenia pexanaenexa paxanējavaberena! jai bajarapamonae.

¹⁷ Nexata Jesús asaēyata naēcota bajarapamonaejavabelia. Jumaiatsi bajarapamonaejavabelia:

—Payapētaneme rabaja pacuenia Dioso pejumelivaisibaxutota tajēvelia jumaiatsi xanē yabara. Iboti pelivaisicuenia Dioso pejumelivaisibaxutota jumaiatsi xanē yabara mapacueniaje:

Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanē pitsiana. Nexata bajarapaibotota xaniavaetsia nayaētsiana botabu daxita itsaibo matatoxenetsia, jai tajēvelia Dioso pejumelivaisibaxutota xanē yabara.

’Bajarapacuenia tajēvelia Dioso pejumelivaisibaxutota itsa jumaiatsi, judíovi penamatacaitorobivi apo tanejumecovēnētsijavanexa yabara jumaiatsi. Dioso taneitapetsijava daxitajivi tacapanepaenēnexa yabara ata jumaiatsi, jai Jesús.

¹⁸ Icatsia Jesús jumaiatsi mapacueniaje:

—Pamonae apo nejumecovēnētsi Dioso pexēnatocuenenē, bajarapamonae bitso bejamatabējiobi tsane apo tanejumecovēnētsixae. Pacuenia ibotojumata pefrapecaejivi, itsa tsapatecatsi, pevixae bitso yanabejiobita, bajara itsane. Pamonae naneconitsiaexanaenajē, bajarapamonae pepacuenie naxuabiana daxitamatacabijavabelianexa. Pacuenia iboto pematacēnēbinētsi apo asaē, bajara itsane, jai Jesús bajarapamonaejavabelia.

Pacuenia Jesús jamatabēcuenejēbiaya yanijobatsi impuestomatamo pe-matamotsijava yabara pelivaisi
(Mt 22.15-22; Mr 12.13-17)

¹⁹ Palivaisi Jesús tsipaeba templobota, bajarapalivaisi sacerdotevi penamatacaitorobivi, judíovi pecujarubivi ata, jumeyapētane. Nexata bajarapamonae najumaiatsi:

—Vaxaiatsi raja Jesús nacajai, najai.

Nexata picani bajarajota bajarapamonae Jesús jamatabēvaetabatsi. Itsiata bajarapamonae abaxē apo vaetabitsi. Tsipaji cujunava jivi.

²⁰ Nexata itsamatacabi bajarapamonae itorobarena pijajivi yaenebiaya petonamuxunaevetsinexatsi Jesús. Nexata bajarapamonae pijajivi bepexaniajamatabëcuenevi itajara jinavanapa Jesúsjavata. Bajarapamonae namuxunaevetena Jesús jivi livaisi petsipaebijavata. Bijiaya Jesús jivi livaisi itsa tsipaeba, bajarapalivaisi yabara picani Jesús pecaponaenexatsi nacuaevetsinëjavabelia peneconitsinexatsi. ²¹ Nexata bajarapamonae jamatabëcueneëjëbiaya jumaitsi Jesúsjavabelia mapacueniaje:

—Jesús, pacayapëtanetsi jivi pepacue ne pexaniajailivaisi netsipaebijava. Daxitajivi, ricovi ata, bepejobivi ata, najëpaeya yayataeya pexaniajailivaisi tsipaebabiabame bajarapamonae pejinavanapaenexa pacuenia Dioso jitsipa. ²² Panetsipaebare. ¿Xanepana tsaja vajamatamotsinexa impuestomamoto Romanonacua pepo pevetsinëjavabelia? Itsa jume, ¿apo xanepanae tsaja vajamatamotsinexa? jai bajarapamonae jamatabëcueneëjëbiaya Jesúsjavabelia.

²³ Itsiata baitsi jane Jesús jamatabëcueneyapëthane bajarapamonae jamatabëcueneëjëbiaya peyanijobijavatsi peneconitsinexatsi picani. Nexata Jesús jumaitsi bajarapamonaejavabelia:

—¿Detsa xuajitsia panejamatabëcueneëjëbame? ²⁴ Panetsitajëre palatanëyo, jai Jesús.

Nexata bajarapamonae tsitajëtatsi palatanëyo. Nexata Jesús jumaitsi bajarapamonaejavabelia:

—¿Iipatsa mapitabaraje, pevënënuu, ruca mapapalatanëyojumataje? jai Jesús.

Nexata bajarapamonae jumaitsi Jesúsjavabelia:

—Romanonacua raja pepo pevetsinë pitabara, pevënënuu, jai.

²⁵ Nexata Jesús jumaitsi bajarapamonaejavabelia:

—Nexata parajutabiabianame Romanonacua pepo pevetsinë pijajava. Parajutabiabianame pijinia saicaya Diosojavabelia Dioso pijajava, jai Jesús.

²⁶ Nexata bajarapamonae ajibi Jesús peyabaravaetabijavatsi jivijavabelia livaisi petsipaebijava yabara. Tsipaji xaniavaetsia Jesús jumecanaviata bajarapamonae jamatabëcueneëjëbiaya peyanijobijavatsi. Caranata bajarapamonae jamatabëcuenenabenajaca xaniavaetsia Jesús pejumecanaviatsixae bajarapamonaejavabelia. Moya baja nexata ena bajarapamonae.

Pacuenia Jesús tsipaeba jivi petëpaecujinae icatsia piasaëjavanexa yabara pelivaisi

(Mt 22.23-33; Mr 12.18-27)

²⁷ Saduceovi saicaya itsalivaisi xaina. Bajarapamonae jamatabëcuenenavëxaniabiaya jumai tsabiabi: “Petëpaevi rabaja petëpaecujinae, apo asaë icatsia tsane,” jai tsabiabi. Nexata saduceovi imoxoyobatsi Jesús. Saduceovi jumaitsi Jesúsjavabelia mapacueniaje:

²⁸ —Jesús, Moiséspijinë bajayata vajanacatoyaquinaelivaisi, jumaitsi mapacueniaje: “Ponë pematapijinë pepua penacojobinë baja, itsa tëpa pexi xainaenejeva, nexata juyapijinë bepita pematapijinëmi pijavami. Bajarpacuenia juyapijinë bepita pematapijinëmi pijavami pexi pexainaenexa bajarapovajavabelia. Nexata pexi itsa xainabeje, bematapijinëmi pexi petaenexa daxitajivi,” jai Moiséspijinë bajayata vajanacatoyaquinaelivaisi. ²⁹ Nexata jinavanapa ënacamonae, siete ponëbeje. Pepo matapijinë copiata nacojioba. Nexata bajaraponë pijava vecuatëpa pexi xainaenejeva.

³⁰ Nexata pematapijinëmi pepënarucaenë pita pematapijinëmi pijavami. Nexata icatsia bajaraponë ata tëpa pexi xainaenejeva bajarapovajavabelia.

³¹ Nexata icatsia itsanë tuatuajëmatapijnë pita bajarapova. Bajara icatsia ponë ata tēpa pexi xainaenejeva bajarapovajavabelia. Bajarapacuenia daxita baja siete ponëbeje, nacaemonaemi, pitaponae ata bajarapova, itsiata itsanë ata pexi apo xinae bajarapovajavabelia. Bajarapacuenia daxita siete ponëmibeje tēpa. Vereverea baja. ³² Belia baja bajarapova ata tēpa. ³³ “Jivi raja petēpaecujinae, Dioso icatsia asaēyaexanaenatsi,” jamë. ¿Detsa nexata ponë, bajarapamonaeyajuvënënë, pijava tsane bajarapova bajarapamatacabi? Daxita pamonae siete ponëmibeje, nacaemonaemi, pitapona picani bajarapovami, jai saduceovi Jesúsjavabelia.

³⁴ Nexata Jesús jumaiti saduceovijavabelia:

—Aeconoxae mapanacuataje pebijivi, petiriavi ata, nacojiobapona. It-samonaex pexënatoyonë pexainaevi pebijavabelia canajetapona petonacojiobinexatsi. ³⁵ Itsiata baitsi jane pamonae Dioso itapetatsi, apo pevereverecaenacuataatsia jinavanapaena. Bajarapamonae petēpaecujinae, Dioso icatsia asaēyaexanaenatsi. Bajarapamonae bajarapanacuataatsia apo nacojiobi baja tsane. Bajarajotatsia itsajivi ata pexënatoy apo canajetsi tsane pebijavabelia petonacojiobinexatsi. ³⁶ Bajarapamonae acuenebi tsane petēpaejava. Tsi-paji bajarapamonae jinavanapaena athëbëtatsia pacuenia ángelevi jinavanapa. Bajarapamonae baja Dioso pexi tsane. Tsi-paji baja petēpaecujinae Dioso icatsia asaēyaexanaenatsi. ³⁷ Moisés-pijnë bajayata yaquina pacuenia Dioso tsipaebatsi tsiquirinaemëyo petajueyecaecotiajavaverena. Nexata Moisés-pijnë peyaquinaelivaisita, jumaiti pacuenia Dioso icatsia asaēyaexanaejitsia petēpaevimi. Nexata Moisés-pijnë nacayapëtaeyaexana Dioso icatsia piasaēyaexanaejavanexa petēpaevimi. Tsi-paji baja Abraham pepuatēpae, Isaac ata baja pepuatēpae, Jacob ata baja pepuatēpae, bajarapamonae yabara bajayata Moisés-pijnë peyaquinaelivaisita jumaiti mapacueniaje: “Xanë rabaja Abraham pijaDiosonë, Isaac ata pijaDiosonë, Jacob ata pijaDiosonë,” jai baja cajena Dioso bajayata Moisés-pijnëjavabelia. ³⁸ Bajarapacuenia Dioso pejumaitisixae, nayapëtane bajarapamonae bajayata tēpae ata, Diosovecua apo penaxuabijava. Aeconoxae ata bajarapamonae Dioso yajavajinavanapa athëbëtatsia. Daxita petēpaevi Dioso cajena apo tsitatēpaetsi, jai Jesús saduceovijavabelia.

³⁹ Nexata judíovi pecujarubivi jumaiti Jesúsjavabelia:

—Jesús, saduceovi xaniavaetsia jumecanaviatame, jai judíovi pecujarubivi.

⁴⁰ Bajaraxuacujinae saduceovi cjunava baja icatsia peyanijobijava Jesúsjavabelia.

Pacuenia Jesucristo yabara Davidpijnë bajayata tajëvelia: “Tajatuxanenë,” jai yabara pelivaisi

(Mt 22.41-46; Mr 12.35-37)

⁴¹ Jesús pijacuata nayabarajumaiti judíovi pecujarubivijavabelia mapacueniaje:

—¿Detsa xuajitsia jivi apo canaëjëtsi Cristo Dioso pexënatocuene? Jivi saya jamatabëcuenenavëxaniabiaya jumai tsabiabi Cristo yabara: “Cristo raja itsa patsiana, saya Davidpijnë pemomo tsane,” jai tsabiabi. ⁴² Davidpijnë bajayata tajëvelia pejumaitisijava Cristo yabara Salmosvënëbaxutota, jumaiti mapacueniaje:

Dioso jumaiti tajatuxanenëjavabelia: “Ecare abaxë tacujuanenia.

⁴³ Vecatsivajënae jumecovënëtsiaexanatsi abaxë copiaya nijavajabitsaë nitorobicuenianexa,” jai Dioso tajatuxanenëjavabelia,

jai Salmosvënëbaxutota Davidpijinë bajayata pejumlahitsijava Cristo yabara.

⁴⁴ 'Nexata Davidpijinë bajayata Cristo yabara: "Tajatuxanenë," itsa jai, nexata Cristo Davidpijinë apo pemomo. Tsipaji baja cajena Cristo saicaya Dioso pexënato, nayabarajai Jesús judíovi pecujarubivijavabelia, judíovi pecujarubivi pecanaëjëtsinexa Cristo Dioso pexënatocuene.

Pacuenia Jesús tsipaeba pijajivijavabelia judíovi pecujarubivi penaneconitsijava Diosojavabelia yabara pelivaisi

(Mt 23.1-36; Mr 12.38-40; Lc 11.37-54)

⁴⁵ Itsa abaxë daxitajivi namuxunaevetatsi Jesús petsipaebilivaisi, Jesús jumaiti pijajivijavabelia:

⁴⁶ —Xania, panayajivitaema palivaisi judíovi pecujarubivi tsipaebaona panejumecovënëtsyaniva. Bajarapamonae jitsipabiaba tomara tuatuajëjava piapiajavanë penaxatabiabanapanaxa jivi peyayataenexatsi. Jitsipabiabanua bitso yayataeya pebajacobinexatsi callejava. Bajarapamonae itsa najoneyabiaba judíovi penacaetuatabiabiabonëjava, jitsipabiaba penaenexa pexaniaviriajavanëta. Nexata natsiitapetabiaba penaenexa peyayataevitsi penaenexa petsinubijavanëta. Bajarapamonae itsa napatabiaba fiestajava ata, jitsipabiaba penaenexa peyayataevitsi penaenexa petsinubijavanëta. ⁴⁷ Bajarapamonae yamaxëitojorobiaya vecuanotabibanua pamonajivi pevecutëpaevanëtsi pecobecovëjavaxi. Bajarapamonae itajara pinijicuenia vajëcabiaba Diosojavabelia. Itsiata pepo pexaniajajamatabëcueneta apo vajëcabiabi. Bajarapacuenia vajëcabiaba saya jivi pëtaenexatsi Dioso itajara bitso bepejumecovënëtsivi. Nexata bajarapamonae bitso pinijicuenia Dioso naneconitsiaexanaenatsi pamatacabi Dioso naneconitsiaexanaena daxita pamonae Dioso apo pejumecovënëtsivi, jai Jesús pijajivijavabelia judíovi pecujarubivi yabara.

21

Pacuenia ofrenda rajuta Diosojavabelia pamona pevecutëpaevatsi yabara pelivaisi

(Mr 12.41-44)

¹ Templobota Jesús cobetane bitso pexainaevi ayaijava palata pejeponaeva cajonijavabelia. Bajarajota jivi palata jeyabiaba ofrendacuenia perajutsijava Diosojavabelia. ² Bajarajota Jesús cobetanenua pamona pevecutëpaevatsi, bepejiobiva, penajejava anijapalatanëyobeje. Bajarapova najia anijapalatanëyobeje piamatamobinëyobeje. ³ Jesús nexata jumaiti pijajivijavabelia:

—Xaniajanë pacuenia pacatsipaebijitsiatsi. Mapovaje pamona pevecutëpaevatsi bejiobi bitso. Xuayo jia cajonita ofrendacuenia perajutsinexa Diosojavabelia, bajaraxuayo bitso Dioso sivajamatabëcuenëbarëya daxita xua itsamonae jia bajarapacajonita matatoxenetsia. ⁴ Tsipaji rabaja xua bajarapamonae apo namatavenonae, jia bajarapacajonita ofrendacuenia perajutsinexa Diosojavabelia. Itsiata mapovaje, bepejiobiva, daxitajavayo penaevetsijavayotaminexa jia bajarapacajonita ofrendacuenia perajutsinexa Diosojavabelia, jai Jesús pijajivijavabelia.

Pacuenia Jesús tajëvelia tsipaeba pijajivi itsamatacabi itsanacuapijivi pexubijavanexatsica templo yabara pelivaisi

(Mt 24.1-2; Mr 13.1-2)

⁵ Jerusalén tomarata templo itabëtsiaya exaneta pexaniaviriaibotonëta. Jivi Diosojavabelia ofrendacuenia perajutsijavanë ata, templobota

itabëtsiaya ruba templobo pitaitabëtsecaenexa. Nexata Jesús pijajiviyajuvënëvi nabarëcuaiquaijai tsaponae templobo pitabëtetsijava yabara. Nexata Jesús tajëvelia vajunupaeba pacuenia itsamatacabi itsanacuapijivi xuabijitsiatsica templobo, daxita bajarapaaitabëcuene yajava. Jesús jumaitsi pijajivijavabelia mapacueniaje:

⁶—Itsamatacabi itsanacuapijivi xuabianica mapatemplobomije. Nexata daxita xua pataneme, pitabëcuene yajava, penetsianica. Nexata templobopi-jiibotonë caiboto ata pejumavereca apo boca tsane, jai Jesús pijajivijavabelia.

Pacuenia itsijitsia Jerusalén tomarata, daxitanacuanëjava ata, mapanacua pecopiarucaevajënaeje yabara pelivaisi

(Mt 24.3-28; Mr 13.3-23)

⁷Jesús pijajivi jumaitsi:

—Patajatuxanenë, pajitsipajë patanetsipaebijavamë patayapëtaenexa paepatota copiapatsijitsia xua vajunupaebame. ¿Detsa pitsicuene peneta pataenajë itsa copiapatsijitsia xua jumaitsimë templobo yabara? jai Jesús pijajivi.

⁸Jesús nexata tajëvelia vajunupaeba pacuenia itsamatacabi itsijitsia mapanacuataje. Jesús pijajivijavabelia jumaitsi mapacueniaje:

—Xania panayajivitaename. Pëtsa panacopatame itsajivi ata papecaya-maxëitojorobinexa. Tsipaji raja peyamaxëitojorobinexa, ayaibitsaëto patsiana hexanë itajara tsane. Bajarapamonae najumetsënëtsiaya jumai tsane: “Xanë raja Cristonë, athëbëvetsica Dioso taneitorobinëtsica jivi tacapanepaenexa,” jai tsane. “Imoxoyo rabaja pevajënae nacua pevereverecaenexa,” jai tsane itsamonae. Itsiata pëtsa pajumecovënëtamë bajarapamonae. Pëtsa papëñaponamenua. ⁹Vajabitsaë pexanaejava imoxoyonacuanëjava, tajënacuanëjava ata, pavënëlivaisitaename. Itsiata pëtsa pajunavame. Peneta bajara itsane mapanacua pevereverecaevajënaeje. Itsiata baitsi jane bepijia bajarapamatacabi mapanacuaje abaxë apo vereverecajuni tsane, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuata.

¹⁰Jesús icatsia tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Mapanacuaje pevereverecaevajënae, peneta copiaya itsaviriavi nabena itsaviriavijavabelia. Itsanacuanëpijivi pijinia nabena itsanacuanëpijivijavabelia. ¹¹Ira najëbiana ayaicuenia nacuanëjava. Nacuanëjava ayaijaniboxaneto najetarucaena, piavitanecuene yajava. Itaboxotatsia pitsapana piyajiunavicuene, pinijicuene pexanaejavanë yajava, jai Jesús pijajivijavabelia.

¹²Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Bajarapacuenie pecopijapaevajënaeya patajajivixaemë, pacataicaena. Pacabejiobiaexanaena. Pacacoponaena judíovi penacaetuatabiabi-bonëjavabelia papecanconitsinexa. Penaconitsivi pejebabiabibota pacajebiana. Patajajivixaemë, pacanubiana presidentevi pitabarata, nacuaeetsivi pitabarata ata. ¹³Nexata bajarajota xanë talivaisi, pexanialivaisi, patsipaebianame xaniavaetsia. ¹⁴Nexata pëtsa tajëvelia panatsinajamatabëxainame pacuenia panayajivicuicuajamëjitsia bajarapamonaejavabelia. ¹⁵Tsipaji paepatota panayajivicuicuajamëjitsia, bitso peyapëtaevicuenia pacacuaicuajaiyaexanaenatsi. Nexata caenë ata panijavajabitsaënë apo cajëpaetsi tsane papecajumecanaviatsinexa.

¹⁶ Bajarapamatacabi patajajivixaemē, panacaemonae atamē, itsajivi panijamonaejivi ata pacacanajetsiana nacuaevevetsivijavabelia papecabeyaxuabinexa. Paneaxa ata, paneena ata, panijabanajivi ata, bitso papecaypaētaejivi ata, bajarapamonae caranata pacacanajetsiana. Nexata pacayajuvēnēbeyaxuabiana. ¹⁷ Daxitajivi pacaitoya tsabiabi tsane patajajivixaemē. ¹⁸ Itsiata baitsi jane pepo panejamatabēcuenelivaisi bajarapamonae apo itsacueniabi tsane. ¹⁹ Itsa pajamatabēcuenesaemē tsavanapae tsane, nexata matacabi apo pevereverecaējava paxainaename, jai Jesús pijajivijavabelia tajēvelia pevajunupaebijavata pacuenia itsamatacabi itsijsia mapanacuataje.

²⁰ Icatsia Jesús tajēvelia vajunupaeba papiayaicuene itsamatacabi copiap-sijsijsia Jerusalén tomarata, Jesús jumaitsi pijajivijavabelia mapacueniaje:

—Itsa pataename vajabitsaē, itsanacuaverena pepatsivi, Jerusaléntomara matatoyorotsia peyacaranatsijavatsi, nexata pajamatabēitsimē tsane: “Imoxoyo rabaja pevajēnae Jerusaléntomara pevereverecaenexa,” pajamatabējamē tsane. ²¹ Nexata bajarapamatacabi Judea nacua pejinavanapaevi, itsa tane bajarapacune, berēcēpeca cajena ibotsutonējavabelia. Jerusalén tomarapijivi ata berēcēpeca pijatomaravecuca. Itsamonae pijinia, Jerusalén tomarapijivi, bajarapamatacabi Jerusalén tomarapēnēyabelia itsa jinavanapa, apo benaviabirena pijaboyaberena.

²² Bajarapacuenia Jerusalén tomarapijivi itsa tocopiajopaenatsi, tocopiajopaenatsi jane baja Dioso penaneconitsiaexanaematacabsi. Nexata jane baja tocopiajopaenatsi daxita pacuenia baja cajena pepo bajayatami tajēvelia vajunupaeba Diosojumelivaisibaxutota. ²³ Bajarapavajabitsaēmatacabi bitso ayaicuenia bejiobi tsane mapanacuapijivije. ¡Papetiriavi penacueto yacotajinavanapa, bitso bejiobi tsane bajarapamatacabi bitso nabebiobitsiaya peponaexae tsane! ¡Papetiriavi ata mitoopaenacuetoxi isajinavanapa, bitso bejiobi tsane bajarapamatacabi! Bajarapacuenia daxita mapanacuapijivije pinijicuenia Dioso naneconitsiaexanaenatsi.

²⁴ Bajarapavajabitsaēmatacabi itsanacuaverena Jerusalén tomarapijivi vajabitsaē tsimaxēpatsianatsi. Nexata itsabitsaētomi, Jerusalén tomarapijivimi, beyejebianatsi. Itsabitsaētomi pijinia, Jerusalén tomarapijivimi, caponaenatsi itsanacuanējavabelia. Nexata bajaraxuacujinae itsanacuanēpijivi patsiana Jerusalén tomarata. Nexata juya bajarapamonae jinavanapaena Jerusalén tomarata. Nexata itsanacuaverena pepatsivi evetsiana Jerusaléntomara. Matapania daxita itsanacuaverena pepatsivi vecuapitsapaena Jerusaléntomara, copatsiana baja bajarapamonae pevetsijava Jerusaléntomara, jai Jesús pijajivijavabelia tajēvelia pevajunupaebijavata papiayaicuene itsamatacabi copiapatsijsijsia Jerusalén tomarata.

Pacuenia Jesús tajēvelia navajunupaeba icatsia pepatsijavanexatsica petēpaecujinae yabara pelivaisi

(Mt 24.29-35, 42-44; Mr 13.24-37)

²⁵ Jesús tajēvelia navajunupaeba itsamatacabi icatsia pepatsijavanexatsica. Jesús jumaitsi pijajivijavabelia mapacueniaje:

—Xanē tapatsivajēnaetsica, jivi taena pecujunavicuene. Matacabipijijuametotatsia, xua naitajētsiana, meravipijijuametotatsia ata, xua naitajētsiana, tulupujavatatsia ata, xua naitajētsiana, bajaraxuanē jivi bitso cujunaviana. Daxita nacuanēpijivi bitso najunaviacaena itsa jumetaena manuameneta pinijimalataca bitso penajumetsijava. ²⁶ Daxitanacuanējava

bitso jivi najamatabëxainae na ita taena piayaicuene petocopiajopaejavatsi. Nexata daxita nacuanëjava jivi tēpajoneyabiabiana pecajunavi. Daxita xua athëbëtatsia rubena, najëbiana. Xaniavaetsia apo rubenae tsane. ²⁷ Nexata bajarapaeapatota jivi netaena, Daxitajivi Pematapijinënë, athëbëvetsica itarëbota tanajetaruceajava. Patsianicajë daxitacuene taevetsinexa. Tanivenivenaectotia yajavapatsianicajë. ²⁸ Itsa pataename pecopiajopaejava bajarapacuene, nexata panajamatabëcuenesaëtsianame. Tsipaji rabaja imoxoyo pevajënae tsane papecacapanepaenexa jivi papecabejiobia exanaebiabijavamivecua, jai Jesús pijajivijavabelia tajëvelia penavajunupaebijavata itsamatacabi icatsia pepsitjivanexatsica.

²⁹ Icatsia Jesús tajëvelia vajunupaeba pacuenia itsamatacabi itsijitsia mapanacuataje. Jesús jumaitsi pijajivijavabelia mapacueniaje:

—Pacanaëjere pacuenia itsi higueranae, itsavirianaenë ata. ³⁰ Itsa baja imoxoyo pevajënae tsaponae vai pejonejavanexa, bajaraponaenë pejan-abaxu juva. Nexata bajarapacuenia payapëtaneme vai baja imoxoyo pevajënae pejonejavanexa. ³¹ Bajara pijinia pacuenia peneta ita pataename pecopiapatsijava xua yabara pacatsipaebatsi, nexata payapëtaename imoxoyo baja pevajënae pecopiapatsijavanexa tsane pamatacabi daxita Dioso pijajivi evetsijitsia mapanacuataje, jai Jesús pijajivijavabelia tajëvelia pevajunupaebijavata pacuenia itsamatacabi itsijitsia mapanacuataje.

³² Icatsia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Pitsijamatabëcuenevi aeconoxae mapamatacabitaje jinavanapa, bajarapitsijamatabëcuenevi abaxë, bexëajavabelia ata, apo vereverecae tsane. Matapania xua yabara pacatsipaebatsi ita baja copiapatsiana, bajarapamonae jane baja vereverecaena. ³³ “Itaboxo, ira yajava, tsitecaena daxitamatacabi javabelianexa,” jamatabëjai ata tsane itsamonae, itsiata jamatabëcuenenavëxaniabiana. Tsipaji jemata itaboxo, ira yajava, vereverecaena. Nexata palivaisi pacatsipaebatsi, apo najumetsënëtsinë tsane. Nexata xua yabara pacatsipaebatsi, pacuenia baja najumecapanepaeya jumaitsinë, daxita bajaraxua copiapatsiana, jai Jesús pijajivijavabelia.

³⁴ Icatsia Jesús jumaitsi pijajivijavabelia:

—Nayajivitaeya pajinavanapaename. Pëtsa panajamatabëxainame pibisiacuene paneexanaenexa, paneaitajibinexa ata. Pëtsa pasivanajamatabëxainame maëpanacuapijijamatabëcueneye. Belia bajarapacuenia paneexanavanapaejavata, jemata copiapatsipa tapatsimatacabinexatsica. ³⁵ Pacuenia dujuai peyamatajucaejava, meniareca jemata jivi xuareca dujuai peyamatajutsinexa, bajara pijinia pacuenia xanë tapatsimatacabinexatsica, jemata daxitanacuanëjava copiapatsiana. ³⁶ Bajaraxuata nayajivitaeya pajinavanapaename. Daxitamatacabi canacujitsia panayajivivajëcabiabianame Diosojavabelia paneajamatabëcuenesaë tsaponaenexa, panevecuapanepaponaenexa daxita papibisiacuene patocopiapataponaena. Daxita bajarapapibisiacuene panevecuapanepaecujinae ata, pavajëcabiabianame Diosojavabelia. Nexata pamatacabi xanë, Daxitajivi Pematapijinënë, patsianicajë, papecacaëjpaenexa panenubenaejava taitabarata, jai Jesús pijajivijavabelia.

³⁷ Icatacabi canacujitsia Jesús livaisi tsipaebabiaba templobota. Nexata icatsia caemeravi canacujitsia Jesús tomaravecua pitsapabiaba pema-jitabiabinexa petsutojumabelia. Nexata patsutojumata olivonaenë nubena, bajarapatsutojumata Jesús majitabiaba. ³⁸ Daxita bajayacunua canacujitsia

jivi patabiaba templobota penamuxunaevetabiabinexatsi Jesús petsipae-bilivaisi.

22

Pacuenia Judas pona Jesús pijavajabitsaë pecobeyabelia pecanajetsinexatsi yabara pelivaisi

(Mt 26.1-5, 14-16; Mr 14.1-2, 10-11; Jn 11.45-53)

¹ Imoxoyo baja pevajënae pejonenexa pascuavënëfiesta. Bajarapafiestamatacabi jivi baxane levadurata matajërëabinejeva pexanaepan.

² Sacerdotevi penamatacaitorobivi, judíovi pecujarubivinuva, najumejaita pacuenia picani bajarapamonae Jesús beyaxuabijitsiatsi. Itsiata abaxë bajarapamonae Jesús apo beyaxuabitsi. Tsipaji bajarapamonae jivi cjunava.

³ Nexata dovathi tsijamatabëjunuatsi Judas. Judas, ponë vënërubatsi itsavënë, Iscariote. Bajaraponë Jesús pijajivi, doce ponëbejeyajuvënë. ⁴ Judas yapëtane itsajota nacaetuata sacerdotevi penamatacaitorobivi, templobopijipolicíavi penamatacaitorobivi yajava. Nexata bajarabelia Judas pona pebarëcuaicuajainexa bajarapamonae. Nexata Judas tsipaeba pacuenia rajutsijitsia Jesús bajarapamonae pecobeyabelia. ⁵ Nexata bajarapamonae barëya. Rajutsiapaebatsi palata. ⁶ Jejai Judas. Nexata Judas Jesús naitaxutocaeveysia ponapona. Paepatota Judas toyapëxanepanatsi, perajutsinexa jane baja Jesús bajarapamonae pecobeyabelia. Bajarapacuenia Judas najamatabëxaina pexanaenexa itsajota bitso jivi apo navitsi.

Pacuenia Jesús barë nabane pijajivi pecopiarutsinabani baja pebeyaxuabivajënaetsi yabara pelivaisi

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Junua jane baja pascuavënëfiesta, pafiestamatacabi jivi baxane levadurata matajërëabinejeva pexanaepan. Bajarapamatacabi ovejaxi babia pexaenexa pascua fiestamatacabi. ⁸ Nexata Jesús itoroba pijajivitonëbeje, Pedrobeje Juanbeje. Jesús jumaitsi pijajivitonëbejejavabelia:

—Paponarebeje paneexanaenexabeje vajaxaejavanexa. Xua jivi baxane pascua fiestamatacabi, bajaraxua vajaxaenexa paexanaenamebeje, jai Jesús pijajivitonëbejejavabelia.

⁹ Nexata Pedrobeje Juanbeje jumaitsibeje Jesúsjavabelia:

—¿Detsa jota jitsipame bajaraxua pataexanaenexabeje? ¿Detsajota bajaraxua xaenatsi? jaibeje.

¹⁰ Jesús nexata jumaitsi pijajivitonëbejejavabelia:

—Tomarabelia itsa papatsianamebeje, pacaxitajarabianamebeje mera canalito pecanajetarucaenë. Bajaraponë papënanajetarucaenamebeje. Pabota bajaraponë joneyojopaena, bajarapabota panapatsianamebeje. ¹¹ Nexata pajumaitsimëbeje tsane bajarapabó pexainaenëjavabelia: “Vajanacacujarubinë raja Jesús jumaitsi: ‘¿Detsa jota pënëyatuucutsibo eca, pabota tajajivi barëxaejitsianë xua jivi baxane pascua fiestamatacabi?’ jai raja Jesús,” pajamëbeje tsane bajarapabó pexainaenëjavabelia. ¹² Nexata athëbëabetsia nijairabeje pexainaebojavata, pacatsitajëtsianabeje. Bajarapabonëta, athëbëyotsia paira, ayaiënetuatuajë tsane. Daxitacuene bajarajota xainaena. Nexata xua jivi baxane pascua fiestamatacabi, bajarajota paexanaenamebeje vajaxaenexa, jai Jesús pijajivitonëbejejavabelia.

¹³ Nexata jane baja bajaraponëbeje ponabeje. Caxitajarababeje daxita pacuenia Jesús jumaitsi. Nexata xua jivibaxane pascua fiestamatacabi, daxita Jesús pijajivi pebarëxaenexa, bajaraponëbeje exanabeje jane baja.

¹⁴ Itsa baja copiajopa pexaeapatotanexa, Jesús, pijajivi doce ponëbeje, apóstolevi, yajava, eca mesa muxuneneta. ¹⁵ Nexata Jesús jumaitsi pijajivijavabelia:

—Tatëpaevajënae bitso jitsipajë patacayajavaxaejava mapapascua fiestamatacabi pexaejavaje. ¹⁶ Xaniajanë pacuenia pacatsipaebijitsiatsi. Matavëjëa rabaja mapanacuataje apo xaenë tsane pascua fiestamatacabi pexaejava. Matapania daxita patajajivimë Dioso itsa pacacapanepaena panijaneconivecua, bajara jane icatsia matapania taxa Dioso pijanacuatsia xaenajë pascua fiestamatacabi pexaejava, jai Jesús pijajivijavabelia.

¹⁷ Nexata Jesús copavënëjavata yapita pijajivi pebarëapaeranexa. Jesús jumaitsi Diosojavabelia:

—Pexaniacuene panetoexaname. Panerajutame maporaje, jai Jesús.

Bajaraxuacujinae pijajivijavabelia jumaitsi:

—Maporaje payapire. Papaema padaxitamë mapacopataje. ¹⁸ Xaniajanë pacuenia pacatsipaebijitsiatsi. Matavëjëa rabaja mapanacuataje apo apaenë tsane uvacuaira. Matapania itsa copiajopaena daxita Dioso pijajivi pevetsimatacabi, apaenajë icatsia, jai Jesús pijajivijavabelia.

¹⁹ Bajaraxuacujinae Jesús pita panbë. Jesús jumaitsi Diosojavabelia:

—Pexaniacuene panetoexaname. Panerajutame pan, jai Jesús.

Bajaraxuacujinae epatsënëquejeba bajarapanbë. Rajuta pijajivi. Jesús jumaitsi pijajivijavabelia:

—Paxaema. Mara tavitoje, patacasivatëpaejava paxamënexa. Tatëpaecujinae mapacuenia paexanabiabianameje patanenajamatabënapitabiabinexamë, jai Jesús pijajivijavabelia.

²⁰ Nexata jane baja daxita Jesús pijajivi barë nabane. Penabanicujinae Jesús icatsia yapita pijajivi pebarëapaeranexa. Jesús jumaitsi pijajivijavabelia:

—Dioso baja cajena najumecapanepaeya jumaitsi pejanalivaisi papecapanepaenexa bajaraponëjavabelia. Bajarapacuenia pacacapanepaena tajana pejamatabëcueneta. Tajana raja runaena papecacomuatsinexa pibisiacuene paneexanaeconimivecua. Mapacapejavataje padaxitamë papaema panenajamatabënapitabiabinexa pacuenia Dioso bajarapapejanalivaisita najumecapanepaeya jumaitsi papecapanepaenexa bajaraponëjavabelia, jai Jesús pijajivijavabelia.

²¹ Icatsia Jesús jumaitsi pijajivijavabelia:

Panejumetaema. Ponë necanajetsijitsia tajavajabitsaë pecobeyabelia, bajaraponë naeca mapamesa muxunenetaje. ²² Xanë, Daxitajivi Pematapijinënë, tēpaenajë pacuenia tajëvelia Dioso netocopata. Itsiata baitsi jane ponë necanajetsiana tajavajabitsaë pecobeyabelia, bitso bejiobi tsane, jai Jesús.

²³ Nexata Jesús pijajivi najumai tsenae:

—¿De meta ponë vaxaitsiyajuvënë, canajetsiana Jesús pijavajabitsaë pecobeyabelia? najai tsenae Jesús pijajivi.

Pacuenia Jesús pijajivi: “¿Detsa ponë vaxaitsiyajuvënë nacavecuaayajamatabëcuenënë bitso?” najai yabara pelivaisi

²⁴ Jesús pijajivi anaeya najumenotsiaya nalivaisita. Najumaitsi:

—¿Detsa ponë vaxaitsiyajuvënë nacavecuaayajamatabëcuenënë? najai Jesús pijajivi.

²⁵ Nexata Jesús jumaitsi pijajivijavabelia:

—Nacuaevevetsivi pacuenia jamatabēpacaitoroba panetoexanaenexa, ajumesaēya pacaitorobabiaba papijajivimē, bajarapamonae pevetsinacuanējava panejinavanapaevi. Itsiata baitsi jane bajarapacuenia pacabejiobiaexanabiabi ata, bajarapamonae jitsipabiaba paxamē bajarapamonae yabara panejumaitsinexa: “Bajaraponē vajanacayanacuaevevetsinē, bitso pexaniacuene nacatoexanabiaba,” panejainexa. ²⁶ Pētsa paxamē bajarapamonae cuenejēpaeya bepaayaajamatabēcuenevimē panataneme. Ponē raja peneta paxamēyajuvēnēnē daxita paxamē pacavecuayaajamatabēcuenenē, bajaraponē peneta daxitajivi bepijajivitonēcuenia yavenonaena. ²⁷ Mapanacuata petuxanenē itsa xaeyeca mesata, petuxanenē jamatabēcuenevetatsi pijajivitonē. Tsipaji petuxanenē ayajamatabēcuenenē pijajivitonē matatoxenetsia. Itsiata xanē bajarapitsijamatabēcuene apo xainaenē. Ponaponajē paxamējavata daxita paxamē bepanijajivitonēnēcuenia patacayavenonaenexa, jai Jesús.

²⁸ Icatsia Jesús jumaitsi pijajivijavabelia:

—Pacuenia jivi nitoya, nebejiobiaexananua, bajarapacuenia paxamē ata patajajivixaemē, pacaexana. Bajarapacuenia pacaexanae ata tsane, itsiata apo panenavecuacopabimē tsane. Tsitecaeya paneyajavajinavanapame. ²⁹ Bajaraxuata nexata pacuenia taxa Dioso nitoroba jivi taevetsinexa, bajara pijinia pacuenia juya xanē ata paxamē pacaitorobatsi jivi paneevetsivinexa. ³⁰ Nexata paxamē pacajamatabēcuenecaējēpaena taevetsinacuatatsia tajamesata panenanabaninexa, panenamatavējēaapaenexanua. Paenae-name jueznēcuenia panenaneconitsiaexanaenexa pijaneconi pexainaevi. Nexata pananeconitsiaexanaename Israelpjinēmī pexī, doce ponēmibeje, pemomoxiyajuvēnēvi, jai Jesús pijajivijavabelia.

Pacuenia Jesús tajēvelia jumaitsi Pedrojavabelia: “Pedro, xamē raja nayavajunuaxainaename tajajivitonēcueneemē,” jai yabara pelivaisi (Mt 26.31-35; Mr 14.27-31; Jn 13.36-38)

³¹ Jesús jumaitsi Pedrojavabelia:

—Simón, dovathi baja cajena jamatabēcapita xanēvecua. Bitso cajamatabēcueneējēbiana tanenavecuacopatsinexamē. Pacuenia arrozxainaenē arrozu jēaba pesi pevecuaxuabinexa, bajara pijinia pacuenia pecaxuabinexa xanēvecua cajamatabēcueneējēbiana dovathi. ³² Itsiata baitsi jane catovajētatsi Diosojavabelia necopatsiyaniva tanejumecovēnētsijavamē. Itsa navecuapaebianame nenaneconitsijava Diosojavabelia, nexata jane baja bajaraxuacujinae jamatabēcuene babataponaponaenename Dioso pejumecovēnētsivi, jai Jesús Pedrojavabelia.

³³ Pedro nexata jumaitsi Jesúsjavabelia:

—Tajatuxanenē, najamatabēcueneveretajē baja. Penaneconitsivi pejebabiabibota caetsi ata, tanaponaponaenexa xamēta. Najamatabēcueneveretajē baja tacayajavatēpaenexanua, jai Pedro Jesúsjavabelia.

³⁴ Nexata icatsia Jesús jumaitsi:

—Pedro, xaniajanē pacuenia catsipaebijitsiatsi. Ajena, mapameravijataje, vacara pefiavijēnaeya nayavajunuaxainaename tajajivitonēcueneemē. “Xanē cajena apo yapētaenē bajaraponē,” jamē tsane acueyabi xuabeje xanē yabara, jai Jesús Pedrojavabelia.

Pacuenia baja itsa imoxoyo pevājēnae Jesús pebeyaxuabinexatsi, tsipaeba pijajivijavabelia yabara pelivaisi

³⁵ Jesús yanijoba pijajivijavabelia. Jesús jumaitsi mapacueniaje:

—Imata panamuto itsa pacaitorobatsi Dioso pejumelivaisi jivi daxitanacuanëjava panetsipaebanajetarubenaenexa, pacaitavetatsi panecaponaeayaniva doro, palata ata, zapato ata. ¿Bajarapamatacabi panamatavenoname tsaja itsacuenejava? jai Jesús pijajivijavabelia.

Nexata Jesús pijajivi jumaitsi:

—Jume. Apo panamatavenonaenë cajena itsacuenejava ata bajarapamat-acabi, jai.

³⁶ Jesús nexata jumaitsi:

—Baja rajane aeconoxae panamuto, pajivi doro xaina, bajarapajivi caponae pijadoro. Palata ata caponae. Pajivi espada apo xinae, bajarapajivi penajumaxuabipana canajetsi. Comuatsi espada. ³⁷ Xaniajanë pacuenia pacatsipaebijitsiatsi. Pacuenia xanë yabara Diosojumelivaisibaxutota tajëvelia jumaitsi, bajarapacuenia netocopiapatsiana. Dioso pejumelivaisibaxutota tajëvelia xanë yabara jumaitsi mapacueniaje: “Naneconitsiaexanaenatsi bepibisiacuene pexanaenëcuenia,” jai tajëvelia xanë yabara Diosojumelivaisibaxutota. Nexata bajarapacuenie imoxoyo baja pevajënae tanetocopiapatsinexa, jai Jesús pijajivijavabelia.

³⁸ Nexata Jesús pijajivi jumaitsi:

—Tajatuxanenë, mara anijaespadabejeje, jai Jesús pijajivi.

Nexata Jesús jumaitsi pijajivijavabelia:

—Xanepana rabaja, jai Jesús.

Pacuenia Jesús vajëta Diosojavabelia Getsemanivënëjavata yabara pelivaisi (Mt 26.36-46; Mr 14.32-42)

³⁹ Jesús pitsapa bovecua. Pacuenia ponabiaba, bajarapacuenia icatsia poná petsutojumabelia. Patsutojumata olivonaenë apaaxayo, bajarapatsutojumabelia pona. Nexata Jesús pijajivi pënaponatsi. ⁴⁰ Jesús pijajivi itsa barëpata bajarapatsutojumabelia, Jesús jumaitsi pijajivijavabelia:

—Pacajamatabëcuenejëbiana raja dovathi pejamatabëcueneta. Pavajëtaponare aeconoxae Diosojavabelia paneajamatabëcuenesaënexa panecopabiyana patanejumecovënëtsijavamë, jai Jesús.

⁴¹ Nexata Jesús pijajivi vecuanatixilia bejamatabëcuene treinta metro.

Jesús nucajunua pematabacabëta pevajëtaponaenexa Diosojavabelia. ⁴² Jesús pevajëtsijavata jumai tsaponae Diosojavabelia:

—Taxa Diosomë, netocopatame picani tanebeyaxuabinexa betajio-bicueneta. Itsa jitsipame, necapanepare bajarapabejiobicuenevecua. Itsiata xanë apo tajitsipaecuene ata, pacuenia xamë jitsipame, netocopatsianame, jai Jesús pevajëtsijavata Diosojavabelia.

⁴³ Nexata Jesús athëbëpijángel tsitanaitajëtatsi pejamatabëcuene asaëyaexanaenexatsi. ⁴⁴ Jesús pebeyaxuabijanexatsi yabara, bitso natsinajamatabëxaina. Nexata Jesús bitso orijibia asaëyata vajëtapona Diosojavabelia. Jesús bitso Janetatsi. Pacuenia itsi pijana, bajara itsi Jesús pejanetsibarëmenetsi. Topitopijai irabereca.

⁴⁵ Jesús pevajëtsicujinae itsa nonotapuna, lia pijajivijavabelia. Nexata Jesús pijajivi caxitajaraba pemajitanubenaevi. Tspajai Jesús pijajivi bitso penajamatabëxainajava, cuerana. ⁴⁶ Nexata Jesús jumaitsi pijajivijavabelia:

—¿Detsa xuajitsia pamajitanubename? Panonobapunare. Pavajëtaponare Diosojavabelia, dovathi pejamatabëcueneta pacajamatabëcuenejëbi ata paneajamatabëcuenesaënexa, jai Jesús pijajivijavabelia.

Pacuenia Jesús vaetabatsi pijavajabitsaë yabara pelivaisi (Mt 26.47-56; Mr 14.43-50; Jn 18.2-11)

⁴⁷ Jesús pijavajabitsaë pevaetabijavatanexatsi, cuaicuajjai tsanucae pija-jivijavabelia. Nexata bajarapaepatota jivi ayaibitsaëtoxaneto, Jesús petsi-maxêponaevitsi, najetarubena. Ponë vënërubatsi Judas, Jesús pijajivi doce ponëbejeyajuvënënëmi, matacanajetaruca bajarapamonae. Nexata Judas najetabelia Jesúsjavabelia. Itabaratsutsuniaya bajacobatsi. ⁴⁸ Nexata Jesús bajarajota jumaitsi Judasjavabelia.

—Judas, ¿matsa pacuenia nitabaratsutsuniaya nebjacobame xanë, Dax-itajivi Pematapijinënë, tanecanajetsinexamë tajavajabitsaë pecobeyabeli-aje? jai Jesús.

⁴⁹ Jesús pijajivi itsa tane pacuenia Jesús exanaejitsiatsi, nexata bajarapamonae jumaitsi Jesúsjavabelia:

—Tajatuxanenë, ¿namaxëvanitsianatsi tsaja espadata? jai Jesús pijajivi.

⁵⁰ Nexata caenë Jesús pijajiviyajuvënënë namaxëvanita. Sacerdotevi pepo penamatacaitorobinë pijajivitonë muxuyoropaebiaxuaba pecujanenia pamuxuyoroto. ⁵¹ Nexata Jesús jumaitsi pijajivitonëjavabelia:

—Copabare baja, jai Jesús.

Nexata Jesús bajaraponë muxuyoroyataba. Jesús baja muxuyororuta icatsia bajaraponë. ⁵² Pamonae Jesús tsimaxëpatatsi, itsamonae sacerdotevi penamatacaitorobivi, itsamonae templobopijipoliciaivi penamatacaitorobivi, itsamonae judíovi pijaancianovi. Bajarapamonae caponaejitsiatsilia Jesús. Nexata Jesús jumaitsi bajarapamonaejavabelia:

—Paxamë meta panetaneme betanacobetoxotsinë. Bajaraxuata paponame espadanë, naebonë yajava, patanevaetabinexamë pacuenia pavaetababiabame penacobetoxotsinë. ⁵³ Xanë caematacabi canacujitsia Dioso pejumelivaisi paxamëjavabelia pacatsipaebabiabatsi templobota. Itsiata bajarapamatacabi apo panevaetabimë. Nexata mapaepatotaje panetsimaxëpatame dovathi, jivi piajamatabëcuene itaquiriyaexanaenë, papecaitorobixae, jai Jesús petsimaxëpatsivitsijavabelia.

Pacuenia jane baja Pedro nayavajunuaxaina Jesús pijajivitonëcuene yabara pelivaisi

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jesús pevaetabicujinaetsi, caponaliatsi sacerdotevi pepo penamatacaitorobinë pijaboyabelia. Nexata Pedro bajarapamonae pecovëvelia tajijo pënanajetaruca. ⁵⁵ Nexata pabota Jesús capatatsi, bajarajota, panabo tuatu-ajëta, vajabitsaë isoto itajuruteta. Bajarapamonae isoto matatoyorotsia ena. Pedro nexata naitaxutocaevevtsiaya naeca bajarapamonaejavata. ⁵⁶ Nexata bajarapabota penacuenebiva, Pedro itsa taeyetätsi penanonopecaejavata isoto muxuneneta, naitaxutobabatsia asaëya taenucatsi. Nexata itsamonaejavabelia bajarapova jumaitsi Pedro yabara:

—Mara ponë ata Jesús pijajivitonëje, jai bajarapova.

⁵⁷ Nexata Pedro jumaitsi bajarapovajavabelia:

—Jume raja. Xanë cajena apo yapëtaenë bajaraponë, jai Pedro bajarapovajavabelia Jesús yabara.

⁵⁸ Bajaraxuacujinae icatsia itsajivi Pedro taeyetatsi. Bajarapajivi ata icatsia jumaitsi Pedrojavabelia:

—Xamë ata rabaja cajena Jesús pijajiviyajuvënënëmë, jai.

Nexata Pedro jumaitsi bajarapajivijavabelia:

—Jume raja. Xanë raja cajena apo Jesús pijajiviyajuvënënënë, jai Pedro.

⁵⁹ Bejamatabëcuene caehoracujinae, icatsia itsanë jumaitsi:

—Xaniajai rabaja cajena. Maponëje Jesústa naponaponaje. Tsipaji rabaja bajaraponë ata Galilea nacuapijinë, jai bajaraponë Pedro yabara.

⁶⁰Nexata Pedro nayajumetane. Pedro nexata jumaitsi bajaraponëjavabelia:

—Apo yapëtaenë cajena pacuene yabara jumaitsimë, jai Pedro.

Bajarapacuenia Pedro pejumaisijavata, vacara baja fiaba. ⁶¹Nexata Jesús boverena namuxufeta Pedrojavaberena. Taeyerenatsi Pedro. Nexata bajarapaepatota Pedro najamatabënapitajaraba Jesús pejumaisijavatsi: “Pedro, ajena, mapameravitaje, vacara pefiabivajënaeya nayavajunuaxainaename tajajivitonëcuenemë. ‘Xanë cajena apo yapëtaenë bajaraponë,’ jamë tsane xanë yabara acueyabi xuabeje,” pejaijavatsi Jesús, najamatabënapitajaraba Pedro. ⁶²Nexata baja Pedro pitsapalia bopanabovecua. Pinijicuenia nua.

Pacuenia Jesús pijavajabitsaë capocaponatsi yabara pelivaisi
(Mt 26.67-68; Mr 14.65)

⁶³Pamonae Jesús vaetabatsi, capocaponatsi. Itabaratsaquibabeponatsi pecobethaitonëta. ⁶⁴Papaëbërëpanata itaxutocëtatsi. Pitaxutocëtsicujinaetsi icatsia itabaratsaquibabeponatsi pecobethaitonëta. Nexata bajarapamonae jumai tsaponae Jesúsjavabelia:

—¡Vënëjonare ponë caitabaratsaquibaba! jai tsaponae.

⁶⁵Pibisiacuenianua bajarapamonae jumai tsaponae Jesúsjavabelia.

Pacuenia Jesús nutatsi judíovi penamatacaitorobivi pitabarata yabara pelivaisi
(Mt 26.59-66; Mr 14.55-64; Jn 18.19-24)

⁶⁶Ajena baja matabi tsarucaponae, nacaetuata judíovi pijaancianovi, sacerdotevi penamatacaitorobivi yajava, judíovi pecujarubivi yajava. Nexata Jesús caponarenatsi bajarapamonae penacaetuatsijavaberena. Bajara-jota bajarapamonae jumaitsi Jesúsjavabelia:

⁶⁷—Panetsipaebare. ¿Xamë tsabaja rovia Cristomë, athëbëvetsica Dioso pecaitorobinëtsica jivi necapanepaenënexa? jai bajarapamonae.

Nexata Jesús jumaitsi bajarapamonaejavabelia:

—“Xanë rabaja Cristonë, athëbëvetsica Dioso taneitorobinëtsica jivi tacapanepaenexa,” pacajai atatsi tsipae, itsiata apo panejumecovënëtsimë tsipae. ⁶⁸Itsalivaisiyo pacayanijobi atatsi tsipae, itsiata apo panejumecanaviatsimë tsipae. Apo panecopatsimënuu tsipae. ⁶⁹Itsiata baitsi jane tavajënaeyabelia xanë, Daxitajivi Pematapijinëne, ecaenajë taxa Dioso pecujanenia patanajuaevetsinexabeje daxitacuene. Bajaraponë pecajëpaenëtsi daxitajamatabëcuene, jai Jesús bajarapamonaejavabelia.

⁷⁰Nexata daxita bajarapamonae jumaitsi Jesúsjavabelia:

—¿Xamë tsabaja Dioso pexënatomë? jai bajarapamonae.

Nexata Jesús jumaitsi bajarapamonaejavabelia:

—Jājā, xanë rabaja pacuenia panejumaisimë. Bajaraponëne, jai Jesús.

⁷¹Nexata bajarapamonae najumaitsi:

—Ajibi rabaja abaxë vajeavetaponaejava jivi neconitsiaya vajanacatsi-paebaponaenexa pacuene yabara naneconitsiaexanaejiatsiatsi maponëje. Vaxaitsi rabaja vajacuata jumetanetsi pacuenia maponëje cuaicuaijai Dioso apo pejisipaecuenia. Tsipaji beDioso pexënato natane, najai bajarapamonae.

23

Pacuenia Jesús nutatsi Pilato pitabarata yabara pelivaisi
(Mt 27.1-2, 11-14; Mr 15.1-5; Jn 18.28-38)

¹ Daxita judíovi pijaancianovi nonobapuna. Sacerdotevi penamatacaitorobivi ata nonobapuna. Judíovi pecujarubivi ata nonobapuna. Nexata bajarapamonae Jesús caponaliatsi itsaboyabelia, Judeanacua pevetsinē Pilato pijaboyabelia. ² Bajarajota Pilato pitabarata bajarapamonae neconitsi-aya jumaitsi Jesús yabara:

—Mara ponēje naneconita. Tshipaji muxubijiapenetapona jivi pianaepanaenexa nacuaevetsivijavabelia. Paneitavetaponanua patamatamotsiyaniva Romanonacua pepo pevetsinē pejamatabēcueneta impuestomatamo pataneyanijobijava. Jumai tsaponanua: “Xanē raja Cristonē, nacua taevetsinē,” jai tsaponae maponēje, jai bajarapamonae Jesús yabara neconitsiaya Pilatojavabelia.

³ Nexata Pilato jumaitsi Jesúsjavabelia:

—¿Xamē tsaja judíovi pepo nevetsinē? jai.

Nexata Jesús jumaitsi Pilatojavabelia:

—Jājā, xanē rabaja pacuenia nejumaitsimē, jai Jesús Pilatojavabelia.

⁴ Pilato nexata jumaitsi sacerdotevi penamatacaitorobivijavabelia, jivi ayaibitsaētoxanetojavabelia ata:

—Apo caxitajarabinē cajena itsacujiruneconi ata pexinaejava maponēje, paneconi yabara naneconitsijitsia, jai Pilato.

⁵ Itsiata bajarapamonae ajumesaē. Orijibia neconitsia jumaitsi Jesús yabara:

—Bajaraponē daxita Judea nacuapijivi muxubijiapenetapona bajarapamonae pianaepanaenexa Judeanacua pevetsivijavabelia. Taxuxuaba cajena bajaraponē bajarapacuenē pexanaejava Galilea nacuata. Nexata maberena ataje bajarapacuenia icatsia exanapona, jai bajarapamonae Jesús yabara Pilatojavabelia.

Pacuenia Jesús nutatsi Herodes pitabarata yabara pelivaisi

⁶ Pilato itsa jumetane bajarapamonae peneconitsijavatsi Jesús, nexata Pilato jumaitsi bajarapamonaejavabelia:

—¿Matsa ponēje Jesús, Galilea nacuapijinēje? jai Pilato.

⁷ Nexata bajarapamonae tsipaeba Pilatojavabelia Jesús Galilea nacuapijinēcuene. Nexata Pilato itoroba pijajivi Jesús pecaponaenexatsilia Herodesjavabelia. Tshipaji Herodes Galileanacua pevetsinē. Bajarapamatacabi Herodes ponapona Jerusalén tomarata. ⁸ Nexata Herodes itsa tane Jesús, barēya. Tshipaji Herodes vënëlivaisitaeyabiaba Dioso pesaēta Jesús pinijicuene pexanaponaejavanē. Nexata Jesús pinijicuene pexanaejava Dioso pesaēta jamatabētane Herodes. ⁹ Nexata Herodes ayaicuenia yanijobapona Jesúsjavabelia. Itsiata Jesús apo jumepitsi caejumeyo ata.

¹⁰ Bajarajota nubena sacerdotevi penamatacaitorobivi, judíovi pecujarubivi yajava. Bajarapamonae ayaijumeta neconitaponatsi Jesús Herodesjavabelia. ¹¹ Nexata Herodes, pijajivi yajava, Jesús capocaponatsi. Bitso pexaniajava, xua nacuaevetsinē banaxatata, bajaraxua Jesús quenetsiataeya xatatatsi. Bajarapacuenia Jesús quenetsiataeya xatatatsi pepo nacuaevetsinēcuenia petaenexatsi. Bajaraxuaciujinae icatsia canaviabarenatsi Pilatojavaberena. ¹² Pilatobeje Herodesbeje naitoyabeje picani. Itsiata bajarapamatacabi nabarajamatabēcuenexanapanabeje. Naxaniababeje baja.

*Pacuenia baja Pilato tocopata Jesús pebeyaxuabinexatsi yabara pelivaisi
(Mt 27.15-26; Mr 15.6-15; Jn 18.39–19.16)*

¹³ Pilato junata penacaetuatsinexa sacerdotevi penamatacaitorobivi. Junata penacaetuatsinexa bajarapatomarata pejinavanapaevi ata. ¹⁴ Nexata Pilato jumaiti bajarapamonaejavabelia Jesús yabara:

—Paxamë panetocapatame maponëje. “Mara ponëje naneconita. Tsi-paji muxubijiapenetapona jivi pianaepanaenexa nacuaevevtsivijavabelia,” panejamë. Itsiata baitsi jane xanë picani tajacuata yanijobajë xani-avaetsia paneitabëta. Nexata xua yabara paneconitame, ajibi picani. Maponëje itsacujiruneconi ata apo xainae, paneconi yabara naneconitsi-jitsia. ¹⁵ Herodes ata apo naneconitsiaexanaetsi. Saya icatsia nacoto-canaviarena. Pataneme rabaja. Itsacujiruneconi ata apo xainae maponëje, paneconi yabara beyaxuabijitsiatsi. ¹⁶ Nexata tajajivi itorobianajë bajaraponë saya tajajivi pejumaconibabenexa penaneconitsivi pejumaconibebeyabiabimacata. Bajaraxuacujinae copatsianajë, jai Pilato bajarapamonaejavabelia.

¹⁷ Caevai canacujitsia, pascuavënë fiestamatacabi, Pilato copatabiaba caenë penaneconitsinë pepitsapaenexa penaneconitsivi pejebabiabibovecua. Pilato copatabiaba ponë jivi vajëtatsi pecopatsinexa. Nexata bajarapacuenia copatabiaba jivi pesivajamatabëcuene xanepanaenexatsi. ¹⁸ Nexata bajarapamonae itsa jumetane Pilato picani Jesús pecopatsiapaebijava, nexata daxita bajarapamonae caecuenia vavajai Jesús yabara. Bajarapamonae pevavajaijavata, Jesús yabara jumaiti Pilatojavabelia mapacue-niaje:

—¡Majane ponë beyaxuareje! ¡Barrabás jane panetocapitsapare! jai bajarapamonae.

¹⁹ Bajaraponë Barrabás Jesús pevajënaeya bajarapatomarata barënabia gobierno pijajivijavabelia. Nexata Barrabás jivitonë beyaxuaba. Bajaraxuata naneconitsiaponapona penaneconitsivi pejebabiabibota. ²⁰ Pilato picani jamatabëcopata Jesús. Bajaraxuata picani icatsia Pilato tsipaebijitsia jivijavabelia Jesús baja pecopatsinexa. ²¹ Itsiata baitsi jane bajarapamonae orijibia vavajai.

—¡Cruzajavabelia cobematabiabarutsiaexanare! ¡Cruzajavabelia cobematabiabarutsiaexanare! jai tsaponae bajarapamonae Pilatojavabelia.

²² Icatsia Pilato jumaiti bajarapamonaejavabelia:

—¿Detsa xuajitsia? ¿Detsa papibisiacuene exana maponëje? Apo caxitarabinë cajena itsacujiruneconi ata, paneconi yabara beyaxuabijitsiatsi. Nexata tajajivi itorobianajë bajaraponë saya tajajivi pejumaconibabenexa penaneconitsivi pejumaconibebeyabiabimacata. Bajaraxuacujinae copatsianajë peponaenexa baja, jai Pilato.

²³ Itsiata bajarapamonae ajumesaë. Vavajai tsaponae.

—¡Cruzajavabelia cobematabiabarutsiaexanare! jai tsaponae bajarapamonae Pilatojavabelia.

Nexata bajarapamonae, sacerdotevi penamatacaitorobivi yajava, bitso pevavajaitsaponaexae, belia baja Pilato jejai. ²⁴ Nexata baja Pilato tocopata pacuenia bajarapamonae vajëtatsi. ²⁵ Nexata Pilato itoroba pijajivi Barrabás, ponë jivitonë beyaxuaba, pecapitsapaenexatsi pepitsapaenexa baja penaneconitsivi pejebabiabibovecua. Caranata Jesús, planeconijibinë, pebeyaxuabinexatsi Pilato itoroba pijajivi.

Pacuenia jane baja Jesús cruzajavabelia cobematabiabarutatsi yabara pelivaisi

(Mt 27.32-44; Mr 15.21-32; Jn 19.17-27)

²⁶ Vajabitsaë itsa caponaliatsi Jesús cruzajavabelia pecobematabiabarutsinexatsi, Simón pijinia najetaruca vavafoverena. Nexata vajabitsaë vaetabatsi Simón. Simón Cirene tomarapijinë. Nexata Simón vajabitsaë itorobatsi, pacruzajavabelia Jesús cobematabiabarutsijsiatsi, petocaponaenexa. Nexata bajarapacruza Simón tovëtaranajetaruca Jesús pecovëya.

²⁷ Jesús pënanajetarubenatsi, jivi ayaibitsaëtoxaneto. Bajarapamonaeyajuvëni, petiriavi ayaibitsaëto, Jesús bitso pënueyababuataponatsi ayaijumeta.

²⁸ Nexata Jesús napënyorota. Jumaitsi bajarapapetirivijavabelia:

—Paxamë petiriavi, paJerusalén tomarapijivimë, pëtsa panepënuayabame xanë. Paxamë jane panatsinuema. Panexi ata patsinuema. ²⁹ Itsa copiajopaena piayaimatacabi, jivi bitso bejiobi tsane. Nexata jivi jumai tsane: “Mavecovi itsiata bevelia nacatsunabejiobitane pexi apo pexainaexae,” jai tsane jivi bajarapamatacabi mavecovi yabara. ³⁰ Nexata bajarapamatacabi jivi bitso itsa nabejiobitaena, belia jitsipaena petëpaejava. Nexata jivi najumai tsane: “Vajatëpaenexa, nacatoxanepanaejitsipa pinijiibotsutonë itsa nacamatacënëbajarabijitsipa,” najai tsane jivi. ³¹ Xanë itsacujiruneconi apo xainae atanë, nebejiobiaexanaena itsa necobematabiabarutsiana cruzajavabelia. Nexata pamonaepibisiacuene pexanaevi bitso xanë matatoxenetsia, bejiobiaexanaenaenatsi itsa tocopiapatsianatsi piayaimatacabi, jai Jesús bajarapapetirivijavabelia.

³² Itsabelia vajabitsaë Jesús caponatsi, bajarabelia anijanëbeje penaneconitsinëbeje, Jesús yajava, caponatsi. Bajaraponëbeje piajamatabëcuenebejenëbeje vajabitsaë caponatsibeje Jesús peyajavabeyaxuabinexatsibeje. ³³ Itsa baja capaliatsi Jivimatasipavënë tsutojavabelia, nexata cruzajavabelia Jesús yajavacobematabiabarutatsi bajaraponëbeje. Itsanë rutatsi itsacruzata Jesús pecujuanenia. Itsanë rutatsi itsacruzata Jesús petsavenonenia. ³⁴ Jesús baja cruzajavabelia pepuacobematabiabarutatsi, jumaitsi paxa Diosojavabelia:

—Axa, mapamonaeejtaxutotsoniataema. Vecuaxuare paneconi xaina pibisiacuene taneexanaexae mapacuenaiae. Tsipaji raja apo yapëtae. Bajaraxuata mapacuena nexanaje, jai Jesús paxa Diosojavabelia.

Nexata vajabitsaë, pamonaep Jesús cobematabiabarutatsi cruzajavabelia, bajarajota namuxusita. Penamuxusitsijavaxi irata natsipenepeneta. Bajarapacuenia vajabitsaë penamuxusitsijavaxi canamuxusita peyapëtaenexa ponë pitaponaejitsia caejava canacujitsia Jesús penaxatsijavami, xua jumaponapona. ³⁵ Bajarajota daxitajivi taenubena. Judíovi pevetsivi Jesús capocaponatsi. Bajarapamonaep capocaponaeya jumaitsi Jesús yabara:

—Ëitsamonae yabara jumai tsabiabi: “Capanepaenajë jivi,” jai tsabiabi. Baja rajane pijacuata nacapanepae itsa xaniajai pepacuene Cristo, Dioso athëbëvetsica pitorobinëtsitsica jivi pecapanepaenexa, jai judíovi pevetsivi Jesús yabara.

³⁶ Vajabitsaë ata Jesús capocaponatsi. Nexata capocaponaeya cujibarenatsi. Rajutsijsiatsi piajatuvinora piapaenexa Jesús. ³⁷ Nexata vajabitsaë jumaitsi Jesúsjavabelia:

—Itsa xamë judíovi pepo nevetsinë, nexata nacapanepare nijacuata, jai vajabitsaë Jesúsjavabelia.

³⁸ Bajarajota Jesús pematabocoto matatsenëyo tablapajumata, Pilato pija-jivi yaquinaruta acueyabi paviriavibeje pijajumeta. Itsaitane yaquinaruta griegojumeta. Itsaitane yaquinaruta latinjumeta. Itsaitane yaquinaruta hebreojumeta. Peyaquinarubiitane jumai tsarubi mapacueniaje: “Mara ponëje judíovi pepo pevetsinëje,” jai tsarubi Jesús yabara. ³⁹ Itsanë pija-matabëcuenebejenë cruzajavabelia pecobematabiabarutsinëtsi, Jesús anaeya bijataerucatsi.

—Itsa xamë Cristomë, athëbëvetsica Dioso pecaitorobinëtsica jivi necapanepaenexa, nijacuata nacapanepare. Paxanëbeje ata panecapaneparebeje, jai tsarucae Jesúsjavabelia.

⁴⁰ Itsanë pijinia itsacruzajavabelia pecobematabiabarutsinëtsi, jumeitavetaruca. Jumai tsarucae penajuananeconitsinëbejejavabelia:

—¿Dioso tsaja apo cjunavimë netëpaenexa, cacobematabiabi ata nijaneconi yabara mapacueniaje? ⁴¹ Vaxaibeje rabiji vajaneconi xainatsibeje vajatëpaenexabeje. Nacarutabeje mapacueniaje pibisiacuene vajaexanaexa-beje. Mabiji ponëje caeto ata pibisiacuene apo exanae, jai tsarucae bajaraponë jumeitavetsiaya penajuananeconitsinëbejejavabelia.

⁴² Icatsia xuacujinae bajaraponë jumaitsi Jesúsjavabelia:

—Jesús, xanë nenajamatabënapitsianame pamatacabi xamë evetsianame mapanacuaje, jai bajaraponë Jesúsjavabelia.

⁴³ Nexata Jesús jumaitsi bajaraponëjavabelia:

—Xaniajanë pacuenia catsipaebijitsiatsi. Ajena, pamatacabi, neyavavaponaponaename paraísojavatatsia, jai Jesús bajaraponëjavabelia.

Pacuenia baja Jesús tēpa yabara pelivaisi

(Mt 27.45-56; Mr 15.33-41; Jn 19.28-30)

⁴⁴ Jesús baja itsa tēpaejitsia, matonejeepatota, daxita nacuanëjava aitaquiri tsajuni. Matapania acueyabi pahorabejecujinae, caniviyojavabelia, nacua napebeta icatsia. ⁴⁵ Paepatota Jesús tēpanajereca, bajarapaepatota templobo enëtuatujäalia pënëyatuucutarutsipana, ayaipapaëbërëpana, tuatujäetsica tititicaica. ⁴⁶ Nexata Jesús ayajumeta jumaitsi Diosojavabelia:

—Axa, xamëjavabelia daxita tajamatabëcuene carajutatsi, jai Jesús.

Itsa baja Jesús najumevereta bajarapajume, tēpanajereca jane baja.

⁴⁷ Nexata Romano nacuapijinë, vajabitsaë pijacapitán, itsa tane daxita bajarapacuene, bajaraponë Diosojavabelia jumaitsi:

—Diosomë, bitso ayaijamatabëcuenenëmë. Xaniajai tsaena baja. Maponë tēpaje, pianeconijibinë, jai vajabitsaë pijacapitán.

⁴⁸ Daxita pajivibitsaëtoxaneto taenubena pacuenia Jesús jumaliverevereca, bajarapamonae bitso najamatabëxainaeya naviaba pijabonëjavabelia.

⁴⁹ Daxita pamonaë Jesús peyapëtaevitsi, pebijivi, petiriavi ata, pamonaë Galilea nacuverena pënaponatsi, tajiyojavaverena taenubena, petaenexa Jesús pebeyaxuabijavatsi.

Pacuenia Jesús petëpaenë buatatsi ibovajualia yabara pelivaisi

(Mt 27.57-61; Mr 15.42-47; Jn 19.38-42)

⁵⁰ Jerusalén tomarata ponapona José, Arimatea tomarapijinë. Bajaraponë pexaniajamatabëcuenenë, xaniavaetsia peponaponaenë Dioso pitabarata. Bajaraponë judíovi pevetsinë. ⁵¹ José copiaevetaponapona pecopiajopajava pamatacabi caenë Dioso evetsijitsia daxita pijajivi mapanacuataje. Nexata José apo jamatabëcuenejēpae pacuenia judíovi exana Jesúsjavabelia. ⁵² José nexata lia nacuaevetsinë Pilatojavabelia. Vajëta petocopatsinexatsi

pemëthëtsinexa petëpaenë Jesús. ⁵³ Bajaraxuacujinae José cruzajavavetsica pitsica Jesús petëpaenë. Daxitanëreca mataquionaeya matacacëba pexaniaviria piapiasábanapanata. Nexata cajena itsajota José iboitapajanitojavata piniijiibovaju toexanabuatatsi petëpaevi pebuataponaenexa, bajarapai-
bovualia buata Jesús petëpaenë. Bajarapavualia abaxë itsajiviyo ata petëpaejiviyo José apo buatsi. ⁵⁴ Pamatacabi José bajarapacuenia vajëta Pilatojavabelia Jesús petëpaenë pemëthëtsinexa, bajarapamatacabi judíovi penacuenebijava banacuenevereta baja pecopiajonevajënaeya penacueraevetsimatacabinexa. Nexata paepatota José ibovajualia buata Jesús petëpaenë, bajarapaeepatota José baja tocopiapataponatsi penacueraevetsimatacabinexa.

⁵⁵ Papetiriavi Jesús pënaponatsi Galilea nacuaverena, bajarapapetiriavi tajiyo José pecovëya najetarubena. Nexata bajarapapetiriavi tane Jesús petëpaenë José pebuatsijava bajarapaibovualia. ⁵⁶ Bajaraxuacujinae bajarapapetiriavi naviaba baja pijaboyabelia. Nexata pepatsicujinae pijaboyabelia, bajarapapetiriavi xaniavaeta pexaniapetuxujivira, pexaniapetuxujuvitsapato yajava, Jesús petëpaenë peperabëexabinexa. Nexata abaxë bajarapapetiriavi nacueraeveta judíovi penacueraevetsimatacabita pacuenia itorobatsi Dioso Moiséspijinëta bajayata penajumecopatsilivaisi.

24

Pacuenia Jesús petëpaecujinae icatsia asaë yabara pelivaisi (Mt 28.1-10; Mr 16.1-8; Jn 20.1-10)

¹ Judíovi baja penacueraevetsimatacabi verevereca. Nexata meravia pitsijavata, ajena juameto pitsapaina, papetiriavi xaniavaeta pexaniapetuxujuvijava, icatsia ponalia Jesús petëpaenë pebuatsiibovajutsijavabelia. Patuxujuvijava xaniavaeta Jesús petëpaenë peperabëexabinexa, caponalia Jesús petëpaenë peperabëexabinexa jane baja picani. Itsapetiriavi yajava ponalia peyanabinexatsi. ² Itsa baja palia, nexata bajarapapetiriavi tane Jesús petëpaenë pebuatsiibovajutsi peyavëpaacatsiibopanaxanetomi petixitanutsijavalia. ³ Bajarapamonae joneya picani Jesús pebuatsiibovajutsijavalia. Itsiata baitsi jane apo caxitajarababuatsi petëpaenë, pepo petuxanenë Jesús. ⁴ Nexata bajarapapetiriavi bitso jamatabëcuenenajunaviaca. Apo yapëta pacuenia exanaejitsia. Bajarajota nexata bajarapapetiriavi taenuta anjanëbeje ángelnëbeje. Bajaraponëbeje penaxatatsijavabeje nivenivena bitso. ⁵ Bajarapapetiriavi bitso cjunava bajarapaángelnëbeje. Nexata pecajunavi pematabacabëta irataeya bobena. Nexata bajarapaángelnëbeje jumaisi petiriavijavabelia:

—¿Detsa xuajitsia petëpaenë pebuatsijavatatsi, pajaitame? Bajaraponë asaë baja icatsia. ⁶ Bajaraponë majotaje ajibi baja tsarucaae. Dioso rabaja icatsia asaëyaexanatsi. Panajamatabënapire pacuenia pacatsipaeba Galilea nacuada pamatacabi abaxë asaë tsaponaponae. ⁷ Bajaraponë baja cajena tajëvelia pacajumaisi: “Xanë, Daxitajivi Pematapijinënë, necanajetsiana pibisijamatabëcuenevi pecobeyabelia. Nexata bajarapamonae cruzajavabelia necobematabiabarutsiana tanebeyaxuabinexa. Itsiata baitsi jane tanebeyaxuabicujinae, acueyabi matacabita, icatsia asaënë tsane,” pacajai baja cajena tajëvelia Jesús itsa abaxë pamatacabi pacayajavaponapona, jai ángelnëbeje petiriavijavabelia.

⁸ Nexata bajarapapetiriavi najamatabēnapita pacuena Jesús tajēvelia jumaitsi. ⁹ Nexata baja bajarapapetiriavi naviabarena Jesús petēpaenē bebuatsiibovajutsijavaverena. Nexata bajarapapetiriavi tsipaeba daxita bajarapacue yabara once ponēbeje, Jesús pijaapóstolevijavabelia. Tsipaebanua daxita itsamonae Jesús pijajivjavabelia ata. ¹⁰ Bajarapapetiriaviyavūvēni itsava Mariavēnēva. Bjarapova Magdala tomarapijiva. Itsava pijinia Juanavēnēva. Itsava pijinia icatsia Mariavēnēva. Bjarapova Santiago pena. Itsapetiriavi yajava tsipaeba bajarapacue yabara apóstolevijavabelia. ¹¹ Bajarapapetiriavi apóstolevijavabelia tsipaebi ata bajarapacue yabara, itsiata apóstolevi apo jumexaniataetsi. Apóstolevi saya bajarapalivaisi yabara jamatabējumaitsi: “Saya meta bajarapapetiriavi pijacuata exana bajarapalivaisi,” jamatabējai apóstolevi.

¹² Itsiata baitsi jane Pedro pitsapalia bovecua. Nexata cujinaejinalia Jesús petēpaenē bebuatsiibovajutsijavabelia. Nexata Pedro bajarapaibovajualia itsa naēcolia, taeyejeba pebobenaejava bajarajota daxitanēreca Jesús mataquionaeya pematacacēbipanamitsireca. Nexata baja Pedro naviaata boyaberena. Najamatabēxaina bajarapacue yabara.

Pacuenia Jesús petēpaecujinae icatsia itsa asaē, pijajivitonēbeje pēcaxitajarabaxuaba, Emaús tomarabelia peponaenēbeje, yabara pelivaisi (Mr 16.12-13)

¹³ Pamatacabi bajarapapetiriavi tane ángelnēbeje, bajarapamatacabi Jesús pijajivitonēbeje Jerusalén tomaravelia naropotabeje. Ponabeje Emaús tomarabelia. Bjarapatomara eca once pakilómetrobeje Jerusalén tomarave-cua. ¹⁴ Bjaraponēbeje baracuaicuajibeje tsanajetaruae daxita pacuene copiapata. ¹⁵ Itsa abaxē bajarapalivaisi cuaicuajiai tsanucaponaebje, Jesús pēcaxitajarabalia. Nexata Jesús muxunenianajetaruca bajaraponēbeje. ¹⁶ Bjaraponēbeje tae atabeje Jesús, itsiata apo yapētaebje Jesús cuene. ¹⁷ Nexata Jesús yanijoba bajaraponēbejevavabelia. Jesús jumaitsi:

—¿Detsa pitsicuene pabaracuaicuajimēbeje tsanucaponaenamutua? ¿Detsa xuajitsia bepajamatabēcuenejiobimēbeje? jai Jesús bajaraponēbejevavabelia.

¹⁸ Bjaraponēbeje itsanē pevēnē Cleofas. Nexata Cleofas jumaitsi Jesúsjavabelia:

—Daxitajivi baja cajena yapētane pacuene copiapata Jerusalén tomarata mapamatacabitaje. ¿Xamē tsaja caenēmē apo njanayapētae bajarapacue, naponaponaē atamē bajarapatomarata? jai Cleofas caranata Jesúsjavabelia.

¹⁹ Nexata Jesús jumaitsi bajaraponēbejevavabelia:

—¿Detsa pitsicuene copiapata? jai.

Nexata icatsia bajaraponēbeje jumaitsi Jesúsjavabelia:

—Jesúspijinē raja, Nazaret tomarapijinēmi, profetanēmi. Piniijicuene exanapona Dioso pesaēta. Bitso xaniavaetsia jivi pexanialivaisi tsipaebapona. Nexata daxitajivi sivajamatabēcuenebarēya bajaraponēmi. Dioso ata sivajamatabēcuenebarēyatsi. ²⁰ Nexata sacerdotevi penamatacaitorobivi, vajanacaevetsivi yajava, canajetatsi Jesús spijinēmi. Canajetaxuabatsi Jesús spijinē cruzajavabelia pecobematabarutsinexatsi pebexaxuabinexatsi. ²¹ Paxanē picani bajaraponēmi yabara pajamatabējumaitsinē: “Bjaraponē nacavecuacapitsapaena itsanacuaverena pepatsivi, pamonaē apo judíovi, vajanacayanacuavevetsijavavecu pepitsapaenexa,” pajamatabējanē

tsavanapae picani Jesúspijinē yabara. Nexata Jesúspijinē pebeyaxuabicu-jinaetsi, ajena baja xaina acueyabi pamatacabibeje. ²² Paxanēyajuvēnēvi, petiriavi, ajena, bajayacunua, panenabenajacaeyaxana. Bajarapamonae bajayacunua, ajena juameto pitsapaina, ponalia Jesús petēpaenē pebuatsiibovajutsijavabelia. ²³ Itsiata apo caxitajarababuatsi bajarajota Jesús petēpaenē. Nexata bajarapapetiriavi naviabarena. Bajarapamonae panetsipaeba pacuenia bemajitsinaebota tane ángelnēbeje. Ángelnēbeje pina nexata jumaitsibeje petiriavijavabelia: “Jesús rabaja asaē tsaponaponae icatsia,” jai pina. ²⁴ Nexata itsamonae paxanējuvēnēvi pona Jesús petēpaenē pebuatsiibovajutsijavabelia. Nexata tane pacuenia baja petiriavi panetsipaeba. Jesús itsiata petēpaenē apo taeyabuatsi, jaiibeje Jesúsjavabelia Emaús tomarabelia peponaenēbeje.

²⁵ Nexata Jesús jumaiti bajaraponēbejejavabelia:

—¡Paxamēbeje saya paneajamatabēcuenetajanēbeje! Apo pajumecovēnētismēbeje daxita profetavi peyaquinaelivaisianē. ²⁶ Nexata apo payapētaemēbeje pacuenia Cristo, Dioso athēbēvetsica pitorobinētsitsica jivi pecapanepaenexa, copiaya bitso bejiobiaexanaejitsiatsi peponaevajēnaeya paxa Diosojavabetsia athēbētatsia paxa pemuxuneneta peecaenexa, nayabarajai Jesús bajaraponēbejejavabelia.

²⁷ Nexata Jesús xaniavaetsia navajunupaeba bajaraponēbejejavabelia daxita pacuenia Dioso pejumelivaisibaxutota tajēvelia jumaiti Jesús yabara. Taxuxuaba jane baja penavajunupaebijava pacuenia Moiséspijinē peyaquinaebaxutota tajēvelia jumaiti Jesús yabara. Bajaraxuacujinae icatsia navajunupaeba pacuenia daxita itsaprofetavi peyaquinaebaxutonēta ata jumaiti Jesús yabara.

²⁸ Itsa baja imoxyotanajetarubena patomarata bajaraponēbeje patsijitsiabeje, Jesús itajara rovia bepeponaiejitsia bajaraponēbejevecua. ²⁹ Nexata bajaraponēbeje bitso asivabeje Jesús penajuamajitsinexa bajarapatomarata. Jumaitsibeje bajaraponēbeje Jesúsjavabelia:

—Namajire abaxē mapatomarataje. Caniviyo rabaja bitso. Meravijitsia rabaja, jaiibeje bajaraponēbeje Jesúsjavabelia.

Nexata baja Jesús najoneya pabota bajaraponēbeje patabeje. ³⁰ Itsa bajaraponēbeje yajavaecabeje mesa muxuneneta, Jesús pita panbē. Jumaiti paxa Diosojavabelia:

—Pexaniacuene panetoexaname. Panerajutame pan, jai Jesús.

Bajaraxuacujinae epatsēnēquejeba panbē. Rajutatsi bajaraponēbeje.

³¹ Bajarajota matapania bajaraponēbeje yapētanebeje Jesús cuene. Itsiata baitsi jane bajarajota vecuacaevatsibeje Jesús. Apo taebeje baja matavējēa.

³² Nexata bajaraponēbeje najumaitsibeje:

—Namutua vajanacanavajunu paebanucaponaejavatabeje pacuenia jumaiti Diosojumelivaisibaxutota, bitso muxunajamatabēcuenebarēyatsibeje, najaiibeje bajaraponēbeje.

³³ Nexata bajarajota bepíjia naropotabeje Emaús tomaravecua. Naviatabeje baja Jerusalén tomarabelia. Nexata Jerusalén tomarabelia itsa patabeje, caxitajarababeje penacaetuatsijavata once ponēbeje apóstolevi, itsamonae yajava Jesús pijajivi. ³⁴ Nexata penacaetuatsivi jumaiti bajaraponēbejejavabelia:

—Xaniajai baja cajena. Vajatuxanenē icatsia asaē tsaponaponae. Simón baja tsitanaitajētatsi, jai bajarapamonae.

³⁵ Nexata ponēbeje Emaús tomaraverena patabeje, tsipaebabeje bajara-pamonaejavabelia pacuenia namutoepatualia pēcaxinatsibeje Jesús. Tsi-paebabejenua pacuenia matapania yapētanebeje Jesús cuene, pitabēta itsa epatsēnēquejeba panbē.

*Pacuenia Jesús petēpaecujinae tsitanaitajēta pijajivijavabelia yabara peliv-
aisi*

(Mt 28.16-20; Mr 16.14-18; Jn 20.19-23)

³⁶ Ponēbeje Emaús tomaraverena patabeje, tsipaebabeje Jesús pijajivijav-abelia pacuenia tanebeje Jesús Emaús tomaratalia. Nexata bajarapaepatota Jesús tsitanaitajēta pijajivijavabelia. Jesús jemata nuca pijajivi tuatujēta. Jesús bajacoba pijajivi.

³⁷ Nexata Jesús pijajivi bitso nabenajaca.

—Petēpaenēmi raeta pejumape maje, jamatabējai bajarapamonaē Jesús yabara.

³⁸ Nexata Jesús jumaitsi pijajivijavabelia:

—¿Detsa xuajitsia pajunavame? ¿Detsa xuajitsia panejamatabēthētota pajumeaebame icatsia tasaējava? ³⁹ Panecobetaema. Tataxubeje ata pataema. Xanē rabaja maje. Panejayabare. Paneyorobarenua xaniavaetsia. Petēpaenēmi raja peneta pejumape avijibi. Asijibinua. Apo perabēitsi cajena pacuenia xanē perabēitsinē, jai Jesús pijajivijavabelia.

⁴⁰ Jesús itsa jumaitsi mapacueniaje, nacobeitajēta pijajivijavabelia. Nataxuitajēta yajava. ⁴¹ Jesús pijajivi bitso tsitapexaniacuenetsi. Itsiata baitsi jane Jesús pijajivi abaxē apo jumexaniatae xaniavaetsia Jesús cuene. Jesús nexata jumaitsi pijajivijavabelia:

—¿Paxainame tsabaja itsacuenējavayo patanerajutsinexamē taxaenexa? jai Jesús.

⁴² Nexata Jesús pijajivi rajutatsi pesebidujuaijavayo, jabēperiyo yajava.

⁴³ Pita baja Jesús. Nexata Jesús pijajivi pitabarata xane. ⁴⁴ Nexata Jesús jumaitsi pijajivijavabelia:

—Mapacuenē taneexanaejavanexa yabaraje, pacatsipaebabiabatsi baja cajena tajēvelia pamatacabi abaxē pacayajavaponaponatsi. “Pacuenia bajayata tajēvelia xanē yabara jumaitsi Moisés pjinē peyaquinaebaxutota, Diosojumepaebivimi profetavi peyaquinaebaxutota ata, Salmosvēnēbaxutota ata, bajarapacuenia netocopiapatsiana,” pacajaitsi tsabiabi baja cajena pamatacabi abaxē pacayajavaponaponatsi. Daxita rabaja bajarapacuenē netocopiapata jane baja, jai Jesús pijajivijavabelia.

⁴⁵ Nexata Jesús pijajivi jamatabēcuenecaējēpaeyaexana Jesús pijajivi xani-avaetsia pejumeyapētaenexa pacuenia Dioso pejumelivaisibaxutota tajēvelia jumaitsi Jesús yabara. ⁴⁶ Jesús jumaitsi pijajivijavabelia mapacueniaje:

—Dioso pejumelivaisibaxutota tajēvelia jumaitsi pacuenia xanē, Cristonē, athēbēvetsica Dioso taneitorobinētsica jivi tacapanepaenexa, nebejjobitsiaya nebeyaxuabijitsia. Jumaitsinua pacuenia tatēpaecujinae, acueyabi mata-cabita, icatsia Dioso niasaēyaexanaejitsia tatēpaējavaveca. ⁴⁷ Jumaitsinua pacuenia patajajivimē tajumelivaisi patsipaebaponaejitsiamē daxitajivi-javabelia. Nexata tajumelivaisi patsipaebaponaename daxitajivi penaja-matabēcuenepēnēyorotsinexa Diosojavabelia, pibisiacuenē pexanaeconimi pevēcuaajibianaenexatsi Dioso. Copiaya Jerusalén tomarata pataxuxu-abianame panetsabebijava. Bajaraxuacujinae patsipaebanajetarubenaename daxitanacuanējava. ⁴⁸ Paxamē rabaja pataneme daxita pacuene netocopiapata. Nexata jivi patsipaebaponaename daxita bajarapacuenē

yabara. ⁴⁹ Espíritu Santo, ponë taxa Dioso najumecapanepaeya pacarajut-siapaeba, pacatoitorobianicatsi papecatsijamatabëjonenexa. Abaxë pajina-vanapaename majotaje Jerusalén tomarata. Matapania Dioso athëbëvetsica pacajamatabëcuene caëjëpaeyaexanaena pinijicue ne paneexanaponaenexa, paponaname jane baja tajumelivaisi jivi panetsipaebanajetarubenaenexa daxitanacuanëjava, jai Jesús pijajivijavabelia.

Pacuenia Jesús petëpaecujinae icatsia itsa asaë, tsia baja athëbëabetsia yabara pelivaisi

(Mr 16.19-20)

⁵⁰ Jesús pijajivi matalalia Betania tomarabelia. Jesús nacobeyotsiaya pijajivi tovajëcanuca Diosojavabelia Jesús pijajivi peyavenonaenexatsi Dioso. ⁵¹ Nexata saya bajarajota Jesús pijajivi athëbëabetsia baja vecuapona. Jesús baja Dioso caponatsi athëbëabetsia.

⁵² Jesús pijajivi jamatabëjumaitsi:

—¡Vajatuxanenë bitso ayaijamatabëcuenenë! jamatabëjai.

Bajaraxuacujinae Jesús pijajivi barëyaya naviaba Jerusalén tomarabelia.

⁵³ Templobojavabelia Jesús pijajivi joneyabiaba pevajëcabiabinexa Diosojavabelia. Jesús pijajivi pexaniajamatabëcuene rajutabiaba Diosojavabelia.

Pexanialivaisi Jesucristo pelivaisi, San Juan peyaquinaelivaisi

Pacuenia vaxaitsi banaexanatsi mapanacuataje, bajarapacuenia Cristo penaexanaejava mapanacuataje paxa Dioso pejamatabëcuenelivaisi itajëtsinexa yabara pelivaisi

¹ Itsa abaxë ajibi itsacuenejavayo ata mapanacuataje, Cristo baja cajena ponapona athëbëtsia. Cristo raja paxa Dioso pejamatabëcuenelivaisiitajëtsinë jivijavabelia. Cristobeje paxa Diosobeje najuaponaponabeje. Cristo ata rabaja Dioso baja cajena. ² Daxitacuen baja cajena pexanaejava petaxuxuabivajënaeya ata, Cristobeje paxa Diosobeje najuaponaponabeje. ³ Cristo baja cajena daxitacuen mapanacuapijicueneye exana. Exana athëbëpijicueneye ata. Bajarapacuenexanaeyaexanatsi paxa Dioso. Bajaraxuata itsacuenejavayo ata apo vecuaexanaetsi itsanë ata. ⁴ Cristo baja cajena rajuta piasaëjumali daxitacueneviria mapanacuataje. Cristo baja cajena bepecotia picani. Nexata jivi jamatabëcueneyatota pexaniajailivaisita. ⁵ Pacuenia pecotia itayota piaitaquirijavata, bajarapacuenia Cristo petsipaebilivaisita jivi jamatabëcueneyatota. Nexata dovathi, jivi piajamatabëcueneyatayotiaaxanaenë, apo caëjëpaetsi pevereverecaeyaexanaenexa bajarapalivaisi.

⁶ Nexata Dioso itoroba caenë pebi. Bajaraponë pevënë Juan. ⁷ Nexata Juan pona petsipaebinxexa jivijavabelia Cristo pelivaisi. Nexata Juan tsi-paeba daxitajivi pejumetaenexa Cristo pelivaisi, pejumecovënëtsinexana. ⁸ Juan raja jivi apo pejamatabëcueneyatotsinë. Juan raja pona saya jivi petsipaebanajetarucaenexa xaniavaetsia Cristo pelivaisi. ⁹ Bajaraponë Cristo jamatabëcueneyatotsiana daxitajivi. Bajaraponë xaniajai jivi pejamatabëcueneyatotsinë. Bajaraponë Cristo patsica baja mapanacuayabetsicaje.

¹⁰ Cristo, ponë paxa Dioso jamatabëcuenelivaisiitajëta jivijavabelia, ponapona baja mapanacuataje. Itsiata baitsi jane mapanacuapijivi apo yapëtae bajaraponë mapanacua pexanaenëcueneye. ¹¹ Cristo patsica pexanaenacuayabetsica. Itsiata baitsi jane mapanacuapijivi apo jumecovënëtsitsi Dioso pexënatocueneye. ¹² Itsiata itsamonae jumecovënëtatsi. Nexata Cristo tocopata bajarapamonae paxa Dioso pexi pexanaenexatsi. ¹³ Bajarapamonae penaexanaematacabi, abaxë Dioso pexicueneya apo taetsi. Pebi petiriva pepitsicujinae, pexi itsa jamatabëxainabeje, pexi xainabeje. Itsiata bajarapamonae itsa naexana, abaxë Dioso apo pexi. Matapania pacuenia Dioso tojitsipatsi, bajarapamonae itsa jumecovënëta Cristo Dioso pexënatocueneye, Dioso pexi exanatsi.

¹⁴ Cristo, paxa Dioso pejamatabëcuenelivaisi itajëtsinënexa jivijavabelia, itsa patsica mapanacuayabetsicaje, naexana pacuenia vaxaitsi baexanatsi mapanacuataje. Nexata bajarapacuenia Cristo ponapona vaxaitsi tuat-uajëta. Bajaraponë vënërubatsi Jesús. Paxanë payapëtaniji Cristo ayajiamatabëcuenenëcueneye. Tsiapai pataniji pinijicueneye pexanaejavaenë. Bajaraponë Cristo, pepo caenë Dioso pexënatocueneye. Piniijicuenia asiva mapanacuapijivije. Cuaicuajiai ëpexaniajailivaisi. ¹⁵ Bajaraxuata Juan, Jesús itsa vajunupaebanajetaruca jivijavabelia, jumai tsanajetarucacae mapacueniajaje:

—Baja rajane mauponë yabara pacajumaitssije: “Ponë tacovëverena patiana, bajaraponë bitso xanë nevecuaayajamatabëcuenenë. Tspiji baja cajena tanaexanaevajënaeya ata bajaraponë ponapona,” jai tsanajetarucæ Juan jivijavabelia Jesús yabara.

¹⁶ Bajaraponë Jesús cajena pepo pexaniajamatabëcuenenë. Pexaniacuene nacatoexanabiaba. Nacayavenonabiaba. ¹⁷ Bajayatami baja cajena picani Dioso Moiséspijinëta najumecopata jivi pejumecovënëtsinexa. Itsiata baitsi jane mapamatacabita Jesucristo patajopaica mapanacuayabetsicaje vajanacatsipaebinexa paxa Dioso vajanacaasivajava, vajanacatsipaebinexanua pexaniajailivaisi. ¹⁸ Itsajivi ata vaxaitsiyajuvënëjivi Dioso apo tae. Bajaraxuata apo yapëtaetsi pacuenia Dioso jamatabëcuenelivaisiitsi. Itsiata caenë Dioso pexënato, ponëbeje najuaponaponabeje, bajaraponë nacayapëtaeyaexanaica pacuenia jamatabëcuenelivaisiitsi paxa Dioso.

Pacuenia Juan jivibautisabinë Jesucristo pelivaisi xaniavaetsia tsipæbanajetaruca jivijavabelia yabara pelivaisi (Mt 3.11-12; Mr 1.7-8; Lc 3.15-17)

¹⁹ Judíovi, Jerusalén tomarapijivi, Juanjavabelia itoroba sacerdotevi, itsamonaæ templobo pevetsivi yajava, bajarapamonaæ peyanijobinexa Juanjavabelia. Nexata bajarapamonaæ itsa pata Juanjavabelia, yanijoba Juanjavabelia. Jumaitsi:

—¿Jipatsamë xamë? ¿Xamë tsaja Dioso peccaitapetsinë? jai bajarapamonaæ Juanjavabelia.

²⁰ Juan nexata bajarapamonaæjavabelia xaniavaetsia roviaalia navajunupaeba. Jumaitsi:

—Xanë ra apo Cristonë, ponë Dioso athëbëvetsica itorobijitsiatsica jivi pecapanepaenexa, jai Juan.

²¹ Nexata icatsia matavëjëa yanijobatsi.

—¿Detsa nexata ponëmë? ¿Xamë tsaja profeta Elíaspijinëmë, ponëmi bajayata ponapona? jai bajarapamonaæ Juanjavabelia.

Nexata Juan jumaitsi:

—Jume raja. Xanë raja bajara apo ponënë, jai Juan.

Nexata icatsia yanijobatsi matavëjëa.

—¿Xamë tsabaja nexata profetanëmë? ¿Xamë tsabaja pacacopiaevetavana-patsi nepatsijavanexatsica? jai bajarapamonaæ Juanjavabelia.

Nexata icatsia Juan jumaitsi:

—Jume raja. Xanë raja apo bajaraponënë, jai.

²² Nexata bajarapamonaæ jumaitsi:

—¿Detsa nexata ponëmë? Pajitsipajë patanenavajunupaebinexamë xaniavaetsia patayapëtaenexa ponëcuenemë patatsipaebinexa patanitorobivijavabelia. ¿Detsa nexata pacuenia navajunupaebianame? jai bajarapamonaæ Juanjavabelia.

²³ Juan nexata jumaitsi bajarapamonaæjavabelia:

—Xanë raja saya petusato nacuata itsa jumelivaisipaebajë, tavavajainë: “Panajamatabëcuenexaniavaere pepo petuxanenë pepatsivajënaeyarena,” tajainë. Bajarapacuenia tajumaitsijavanexa, bajayatami tajëvelia yaquina profeta Isíaspijinë, jai Juan.

²⁴ Nexata fariseovi pitorobivitsi icatsia yanijobatsi Juan.

²⁵ —Itsa xamë apo Cristomë, apo Elíaspijinëmënu, apo profetanëmënu, ponë pacopiaevetavanapajë pepatsijavanexatsica, ¿detsa nexata xuajitsia xamë jivi bautisabaponame? jaitsi bajarapamonaæ.

²⁶ Juan nexata jumaitsi:

—Xanë saya bautisabaponajë ëmerata. Itsiata paxamë tuatujëta ponapona ponë apo payapëtaemë. ²⁷ Bajaraponë tacovëverena jane baja pata. Itsiata xanë bajaraponëvecua bevelijamatatabëcuenenë. Nexata acobeuranë tatoisinaenexa ata pijazapatomaëto tataxujonotsinexa pijazapato, jai Juan bajarapamonaejavabelia Jesús yabara.

²⁸ Bajarapacuenia Juan yanijobatsi Jordánmene itsapanatalia, Betaniavënë tomarajavata, Juan jivi itsa bautisabaponapona.

Pacuenia Jesús beovejayo tanetsi yabara pelivaisi

²⁹ Fariseovi pijajivi Juan peyanijobicujinaetsi peyapëtaenexatsi ponëcuene, meravia pitsijavata, Juan taetaba Jesús penajetarucæjava Juanjavaberena. Nexata Juan jumaitsi jivijavabelia:

—Pataema, mara ponëje, Dioso athëbëvetsica pitorobinëtsitsicaje. Bajaraponë Dioso bepijaovejayo tsane. Pacuenia jivi ovejayo babeyaxuaba pevi ofrendacuenia perajutsinexa Diosojavabelia, bajara itsanetsi maponëje. Nacaevetsiana pebeyaxuabinexatsi. Nexata bajarapacuenia matamotsiana daxita nacuanëpijivi pibisiacuene pexanaeconimi. ³⁰ Baja rajane maponë yabara itsa pacatsipaebatsi, pacajumaitsitsi tsabiabi mapacueniaje: “Tacovëverena patsiana itsanë. Bajaraponë nevecuaayajiamatabëcuenenë bitso. Tspaji baja cajena tanaexanaevajënaeya ata, bajaraponë ponapona,” pacajaitsi tsabiabi. ³¹ Apo yapëtaenë picani bajaraponë. Itsiata apo yapëtae atanë, pacabautisabanajetarucatsi merata palsrael nacuapijivimë. Ponë yabara pacatsipaebatsi, bajara jane maponë najetarucæje, jai Juan jivijavabelia Jesús penajetarucæjavata.

³² Icatsia Juan jumaitsi jivijavabelia Jesús yabara:

—Xanë taniji Espiritu Santo perunaejavatsica athëbëvetsica beucucuto. Nexata tsmatanacopatsicatsi bajaraponë. ³³ Xanë abaxë itsiata apo yapëtaenë bajaraponë Cristocuene. Itsiata Dioso, taneitorobinë merata jivi tabautisabaponaenexa, nejumaitsi baja cajena copiata: “Papebi pematësënëatsica taename Espiritu Santo perunaejavatsitsica petsijamatabëcaenexatsi, bajaraponë jane baja jivi tsijamatabëjoneyaexanaena Espiritu Santo,” nejai baja cajena copiata Dioso. ³⁴ Pacuenia baja cajena taniji, pacatsipaebatsi. Bajaraponë baja cajena Dioso pexënato, jai Juan jivijavabelia Jesús yabara.

Pamonæ copiaya Jesús yajavaponapona yabara pelivaisi

³⁵ Juan jivijavabelia petsipaebicujinae Jesús Dioso pexënatocuene, meravia pitsijavata, Juan yajavaponapona anijanëbeje pijajivitonëbeje. ³⁶ Itsa Juan tane Jesús pexenetanajetarucæjavatsi, nexata Juan jumaitsi pijajivitonëbejejavabelia:

—Pataemabeje. Mara ponë najetarucæje, Dioso bepijaovejayo tsane, jai Juan pijajivitonëbejejavabelia Jesús pebeyaxuabijavanexatsi yabara, tspaji Jesús tocopiapatsijitsiatsi pacuenia Dioso tocopatatsi.

³⁷ Nexata Juan pijajivitonëbeje itsa jumetanebeje bajarapacuenia Juan pejumaitsijava, Juan pijajivitonëmibeje pënaponabeje Jesús. ³⁸ Jesús napënyorotojopa. Taenucajopa. Yanijoba bajaraponëbejejavabelia.

—¿Detsa xua pajaitamebeje? jai Jesús.

Nexata bajaraponëbeje jumaitsibeje:

—Petuxanenë, ¿detsa jota ecame? jai beje Jesúsjavabelia.

³⁹ Jesús nexata jumaitsi bajaraponëbejejavabelia:

—Naxanitsia. Panataenamebeje itsajota ponaponajë, jai Jesús.

Nexata bajaraponëbeje naponabeje baja Jesús pepëta caniviyoeapatota. Nexata baja tanebeje itsajota ponapona Jesús. Nexata bajarapamatacabi nayacaniviyobeje tsaponaponae Jesúsjavata.

⁴⁰ Bajaraponëbejeyajuvënënë itsanë pevënë Andrés. Andrés raja Simón Pedro pejuyapijinë. ⁴¹ Andrés nexata bepíjia pona pematapijinë Simón pejaitsinexa. Itsa baja Andrés pematapijinë caxitajaraba, jumaitsi pematapijinëjavabelia:

—Pacaxitajarabajë rabaja Mesías, jai Andrés pematapijinëjavabelia.

Bajarapamonae pijajumeta: “Mesías,” itsa jai, mapajumetaje pejumaitsi-jume: “Cristo, ponë athëbëvetsica Dioso itorobjiitsiatsica jivi pecanepaenexa,” pejaijume.

⁴² Nexata Andrés barëlia pematapijinë Simón Jesúsjavabelia. Itsa Jesús tane Simón, nexata Jesús jumaitsi Simónjavabelia:

—Simón, xamë raja Jonás pexënatomë. Cavënërubianatsi Cefas, jai Jesús Simónjavabelia.

“Cefas,” itsa jai, bajarapamonae pijajumeta mapajumetaje pejumaitsi-jume: “Pedro,” pejaijume.

Pacuenia Jesús junata Felipebeje Natanaelbeje Jesús pijajivitonëbejenexa yabara pelivaisi

⁴³ Jesús baja ponaejitsia Galilea nacuyabelia. Jesús nexata peponae-vajënae, caxitajarabaxuaba Felipe. Nexata Jesús jumaitsi Felipejavabelia:

—Nepënaponaename, jai Jesús.

⁴⁴ Bajaraponë Felipe Betsaida tomarapijinë. Andrésbeje Pedrobeje ata Betsaida tomarapijinëbeje. ⁴⁵ Felipe nexata pona pejaitsinexa Natanael. Itsa baja Felipe caxitajaraba, jumaitsi Natanaeljavabelia:

—Pacaxitajarabajë rabaja ponë pelivaisi bajayatami tajëvelia Moiséspijinë yaquina. Dioso penajumecopatsilivaisi jivi pejumecovënëtsinexa bajayata Moiséspijinë itsa yaquina, yaquinanua bajaraponë ata pelivaisi. Bajaraponë pelivaisi bajayata profetavi ata tajëvelia yaquina. Bajaraponë Jesús Nazaret tomarapijinë, Josépijinë pexënat, jai Felipe Natanaeljavabelia.

⁴⁶ Nexata Natanael jumaitsi:

—Itsanë ata cajena pexaniajamatabëcuenenë Nazaret tomarata apo ponaponae, jai Natanael.

Felipe nexata jumaitsi Natanaeljavabelia:

—Naxanitsia. Nataename jane, jai Felipe.

⁴⁷ Jesús itsa tane Natanael pecujitanajetarucaejavatsi, nexata Jesús Natanael yabara jumaitsi pijajivijavabelia:

—Mara ponë najetarucaje, Israelpijinë pemomo, Dioso pitabarata xani-avaetsia peponaponaenë. Apo peyamaxëitojorobinë itsajivi ata, jai Jesús pijajivijavabelia Natanael yabara.

⁴⁸ Nexata Natanael jumaitsi Jesúsjavabelia:

—¿Detsa pacuenia nejamatatabëcueneyapëtaneme? jai Natanael.

Nexata Jesús jumaitsi Natanaeljavabelia:

—Felipe cajena pecajunatsivajënaeya, catanetsi neecaejava higuerae bëxëpanata. Nexata cajamatatabëcueneyapëtanetsi, jai Jesús.

⁴⁹ Natanael nexata jumaitsi Jesúsjavabelia:

—Petuxanenë, xamë rabaja Dioso pexënatomë. Israelnacua pepo nevetsinë, jai Natanael Jesúsjavabelia.

⁵⁰ Jesús nexata jumaitsi:

—“Catanetsi cajena neecaejava higuerae bēxēpanata,” tacajaixae, jamatabējumaitsimē xanē yabara: “Maponėje Dioso cajena pexēnato,” jamatabējāmē. Xamē taename bajarapacue ne matatoxenetsia Dioso pesaēta pinijicue ne taexanaejavanē, jivi apo pexanaecapanepaejavanē. Nexata bajaraxuanē taexanaejava itsa taenāmē, pepacue ne jane baja neyapētaename Dioso pexēnato cuenenē, jai Jesús Natanaeljavabelia.

⁵¹ Icatsia Jesús jumaitsi pijajivijavabelia:

—Xaniajanē pacuenia pacatsipaebijitsiatsi. Pataename itaboxo penapatsijava. Pataenamenua Dioso pijaāngelevi pejunaejavatsia athēbēabetsia. Pataenamenua perunaejavatsica ata xanējavabetsica, Daxitajivi Pematapijinējavabetsica, jai Jesús pijajivijavabelia.

2

Pacuenia Jesús exana Caná tomarata pamatacabi Caná tomarapijinē nacasaba yabara pelivaisi

¹ Jesús pebarēcuaiquaijicujinae Natanael, acueyabi pamatacabibejucujinae, Caná tomarapijinē exana penacasabifiestanexa. Galilea nacuata eca Canátomara. Jesús pena naponapona fiesta pexanaejavata. ² Nexata Jesús pijajivi nabarējumatatsi penacasabifiestajavabelia. Jesús nexata pijajivi nabarēpata penacasabifiestajavabelia. ³ Fiesta pexanaenē itsa baja tovereverecatsi vinora, Jesús pena jumaitsi:

—Vinora rabaja tovereverecatsi, jai pexēnatojavabelia.

⁴ Jesús nexata jumaitsi penajavabelia:

—Ena, ¿detsa xuajitsia netsipaebame bajarapacue ne? Abaxē raja apo netocopiapatsi paepatota exanaejitsianē bajaraxua, jai Jesús penajavabelia.

⁵ Nexata Jesús pena jumaitsi mesa pevetsivijavabelia:

—Daxita pacuenia taxēnato aeconoxae pacaitorobiana, paexanaename, jai.

⁶ Nexata bajarajota nubena seis pacanalitobeje, ibocanalitonē. Caecanalitota mera caējēpapona bejamatabēcuene quince pagalónbeje. Nexata bajarapacanalitonēta peyaenaemeranēta, judiōvi pijacuenia anijatonē xaniavaetsia nacobequiatabiaba penabanivajēnae. ⁷ Jesús nexata jumaitsi mesa pevetsivijavabelia:

—Pavēnēbare mera mapacanalitonē nubena je, jai Jesús.

Nexata mesa pevetsivi xaniavaetsia mera vēnēba bajarapacanalitonē. Pijiyorotoxijava copabapona.

⁸ Nexata Jesús jumaitsi bajarapomaejavabelia:

—Papuare tsiquirirayo. Patocaponaremelia fiesta pevetsinē pepajainexa, jai Jesús.

Nexata baja mesa pevetsivi tocaponalia. ⁹ Nexata jane baja fiesta pevetsinē pajane bajarapora, merami pexanaevinora. Bajaraponē abaxē apo yapētae itsaverena capitsapa bajarapavinora. Itsiata mesa pevetsivi yapētane mera pevēnēbixae bajarapacanalitonēta. Pepajanicujinae vinora, fiesta pevetsinē junata fiesta pexanaenē, ponē pejananacasabinē. ¹⁰ Nexata fiesta pevetsinē jumaitsi pejananacasabinējavabelia:

—Mapavinoraje bitso xanepana. Daxita pamonaē fiesta pexanaevi, copiaya batsanaeyaexana pexaniavinora. Nexata baja fiesta pexanaenē pejunatsivi itsa apa ayaijava, cotocaevi batsanaeyaexana bevelia penamatamot-sivinoranē. Tsiipaji baja ayaijava piapaexae, cotocaevi apae ata beveliar, apo yapētae beveliaracuene. Itsiata baitsi jane xamē bajarapacuenia apo

exanaemë. Evetame abaxë cotocaevi patanerajutsinexamë pexaniavinora, jai fiesta pevetsinë pejananacasabinëjavabelia.

¹¹ Bajarapapinijiucene Dioso pesaëta Jesús exana Caná tomarata. Canátomara eca Galilea nacuata. Caná tomarata Jesús jane baja taxuxuaba Dioso pesaëta pinijiucene pexanaponaejava. Bajarajota jane baja Jesús najamatabëcueneitajëta Dioso pesaëta ayaicucene pexanaejava pecaëjëpaenëcuenetsi. Nexata pijajivi orijibia sivanajamatabëcueneecopabaponatsi. Jesús pijajivi jamatabëjumaitsi:

—Xaniajai rabaja. Pepacuene Cristo, ponë copiaevetavanapatsi pepatsijavatsica vajanacacapanepaenexa, jamatabëjai.

¹² Bajaraxuacujinae Jesús baja pona Capernaum tomarabelia. Yajavapona pena, pejuyapijivinuua, pijajivinuua. Capernaum tomarata caematacabibeje jinavanapa.

Pacuenia Jesús Jerusalén tomarata templobovecua pitsapaeyaexana pecanajetsivi, pecomuacaevinua, yabara pelivaisi

(Mt 21.12-13; Mr 11.15-18; Lc 19.45-46)

¹³ Judíovi baja pijafiesta pexanaenexa, toimoxoyotsi pascuavënëfiesta. Bajaraxuata Jesús pona Jerusalén tomarabelia. ¹⁴ Nexata Jerusalén tomarata, templobota, Jesús caxitajarabaxuaba pecanajetanubenaevi baca, oveja ata, ucucu ata. Tane palata pecambiabenaevinua. ¹⁵ Jesús itsa tane bajarapacuene, nexata quiobatata peyorotsimacanexa. Nexata Jesús daxitajivibitsaëto capitsaparena temploboënëverena. Bajarapamonae pijaoveja yajava, pijabaca yajava, Jesús capitsaparena. Nexata palata pecambiabenaevi pijapalata irabelia tocayajabaraba. Pijamesaxi ata topënëyorobaraba.

¹⁶ Nexata ucucu pecanajetanubenaevijavabelia Jesús jumaitsi:

—Mapaucucuje pacapitsaparemelia. ¡Pëtsa pacanajetame mapaboënëtaje, taxajavabelia jivi penavajëcaebota! jai Jesús.

¹⁷ Nexata Jesús pijajivi itsa jumetane bajarapacuenia Jesús pejumaitsiyava, jumenajamatabënapita pacuenia Dioso pejumelivaisibaxutota jumaitsi. Bajarapacuenia Jesús pexanaponaejavanexa yabara, tajëvelia Dioso pejumelivaisibaxutota jumaitsi mapacueniaje: “Neyabarabeyaxuabijitsia ata tsane, jitsipajë Dioso pijabo petoyaiyataejavatsi,” jai Dioso pejumelivaisibaxutota.

¹⁸ Nexata judíovi itsa tane Jesús jivi pecapitsapaejava temploboënëverena, judíovi jumaitsi Jesúsjavabelia:

—¿Dioso tsaja caitoroba nejutsinexa bajarapamonae temploboënëvecua? Itsa caitoroba Dioso bajarapacuenia nexanaenexa, nexata pinijiucene ata exanare Dioso pesaëta patacayapëtaenexa Dioso pecaitorobinëcuene, jai judíovi Jesúsjavabelia.

¹⁹ Nexata Jesús jumaitsi judíovijavabelia:

—Itsa paxuabimica mapatemploboje, nexata icatsia veretetsianajë acueyabi matacabita, nayabarajai Jesús judíovijavabelia petëpaecujinae icatsia Jesús piasaëjavanexa yabara.

²⁰ Nexata judíovi apo jumeyapëtae xua yabara Jesús jumaitsi. Bajaraxuata judíovi jumaitsi mapacueniaje:

—Xamë acueyabi matacabita apo matacotsimë tsipae. Itsamonae baja cajena mapatemploboxanetoje peveretsinexa, nacueneba cuarenta y seis pavalbeje, jai judíovi.

²¹ Itsiata baitsi jane Jesús peperabëto yabara: “Mapatemploboje,” jai saya. ²² Bajaraxuata icatsia Jesús itsa asaë petëpaecujinae, Jesús pijajivi jumenajamatabënapitatsi. Jesús pijajivi jumenajamatabënapitatsi tajëvelia

Jesús penavajunupaebijava mapacueniaje: “Itsiata baitsi jane tatëpaeucujinae, acueyabi matababita, icatsia asaënë tsane,” pejaijava, Jesús pijajivi jume-najamatabënapitatsi. Nexata Jesús pijajivi jumecovënëta pacuenia Dioso pejumelivaisibaxutota jumaitsi. Jesús ata pacuenia jumaitsi, jumecovënëta.

Pacuenia Jesús jamatabëcueneyapëtane daxitajivi yabara pelivaisi

²³ Pamatacabi pascuafiesta exana, Jesús ponapona Jerusalén tomarata. Nexata Jerusalén tomarata jivi ayaibitsaëtoxaneto jumecovënëta Cristocuene. Tsipaji bajarapamonae Jesús cuenetanetsi Dioso pesaëta pinijicuene pexanaejavanë, jivi apo pexanaecapanepaejavanë. Itsiata baitsi jane bajarapamonae pepacuene xaniavaetsia apo jumecovënëtsi. ²⁴ Bajaraxuata Jesús apo yajavaponaponae bajarapamonae. Tsipaji Jesús jamatabëcueneyapëtane bajarapamonae xaniavaetsia apo pejumecovënëtsijavatsi. ²⁵ Jesús apo namatavenonae itsajivi petsipaebinxatsi peyapëtaenexa pacuenia jamatabëcuenetsi jivi. Tsipaji Jesús pejamatabëcueneyapëtaenë pacuenia daxitajivi jamatabëcuenetsi.

3

Pacuenia Jesús barëcuaicuajjai Nicodemo yabara pelivaisi

¹ Nicodemo fariseonë. Nexata catsitecaponapona fariseovi pijacuene. Nicodemo judiövi pevetsiviyajuvënënë. ² Nexata Nicodemo meravi pona Jesúsjavabelia. Nexata itsa pata, Jesúsjavabelia Nicodemo jumaitsi:

—Petuxanenë, pacayapëtanetsi baja cajena athëbëvetsica Dioso pecaitorobinëcuenetsica patanetsipaebaponaenexamë Dioso pejumelivaisi. Itsa Dioso apo cayajavaponaponae tsipae, nexata apo exanaemë tsipae pinijicuene nexanaejavanë, xuanë baja exanaponame, jai Nicodemo Jesúsjavabelia.

³ Nexata Jesús jumaitsi Nicodemojavabelia:

—Xaniajanë pacuenia catsipaebijitsiatsi. Pajivi Dioso pejamatabëcueneta apo naexanae tsane icatsia bepejananaexanaejiviyo, bajarapajivi Dioso apo pijajivitonë tsane, jai.

⁴ Nexata Nicodemo jumaitsi Jesúsjavabelia:

—¿Detsa jane pacuenia penaveretsijivi baja icatsia naexanaejitsipa bepejananaexanaejiviyo? ¡Apo caëjëpaetsi rabaja icatsia pejonenexa pena pecototalia penaexanaenexa icatsia bepejananaexanaejiviyo! jai Nicodemo Jesúsjavabelia.

⁵⁻⁶ Jesús nexata jumaitsi Nicodemojavabelia:

—Xaniajanë pacuenia catsipaebijitsiatsi. Pajivi pena pecototoverena naexana, yaperabëanaexana baja cajena. Pajivi pijinia Espiritu Santo pejamatabëcueneta naexana bepejananaexanaejiviyo, bajarapajivi Diosojavabelia ajamatabëcuenesaëyaexanatsi, Espiritu Santo petsijamatabëecaexaetsi. Pajivi Dioso pejamatabëcueneta jamatabënaexana icatsia bepejananaexanaejiviyo, bajarapajivi xanepana pebautisabinexatsi merata. Nexata bajarapajivi Espiritu Santo rajutsianatsi pejanajamatabëcuene. Nexata bajarapajivi Dioso pijajivitonëcuenia evetsianatsi. ⁷ “Xamë ata baja cajena icatsia benaexaname bepejananaexanaejiviyo cuenia,” tacajaijava yabara, pëtsa jamatabëcuenenabenajacame. ⁸ Jovibo banajetaruca itsabelia jamatabënajetaruca. Jumetaneme saya ëpijume. Itsiata apo yapëtaemë it-saverena pona, itsabelia ata pona. Bajara pijinia pacuenia apo yapëtaemë pacuenia jivi Espiritu Santo pejamatabëcueneta naexanaeyaexanatsi bepejanaexanaejivicuenia, jai Jesús Nicodemojavabelia.

⁹ Nexata icatsia Nicodemo jumaitsi Jesúsjavabelia:

—¿Detsa pacuenia itsipae bajaraxua? jai Nicodemo.

¹⁰ Jesús nexata jumaitsi:

—Xamë picani Israel nacuapijivi necujarubinë. ¿Itsia tsaja apo jumeyapëtaemë palivaisi catsipaebatsi? ¹¹ Xaniajanë pacuenia catsipaebijitsiatsi. Juan jivibautisabinë. Bajaraponëbeje patayapëtaelivaisibeje, jivi patsipaebaponajëbeje. Xua pepacune patanijibeje, bajaraxua ata jivijavabelia patsipaebaponajëbeje. Itsia baitsi jane patatsipaebilivaisianëbeje, apo panejumecovënëtsimë. ¹² Catsipaebi atatsi xua Dioso exanapona mapanacuataje, itsia apo nejumecovënëtsimë. ¿Detsa nexata pacuenia nejumecovënëtsianame itsa catsipaebianatsi xua Dioso exanapona athëbëtsia? jai Jesús.

¹³ Icatsia Jesús pijacuata nayabarajumaitsi Nicodemojavabelia:

—Itsajivi ata cajena apo ponae Dioso pijanacuayabetsia icatsia pepatsinexatsica mapanacuayabetsicaje petsipaebinexa jivijavabelia pacuenia itsi athëbëtsia. Caenë, Daxitajivi Pematapijinë, cajëpatsi jivi petsipaebinexa pacuenia itsi athëbëtsia. Tsipaji baja cajena bajaraponë athëbëvetsica pepatsinë. Tsipaji baja cajena athëbëtsia peponaponaenë.

¹⁴ Bajayata petusato nacuata jivi ayaibitsaëto yatëpapona jomo pesinijavatsi. Nexata bajarapaepatota Moiséspijinë jomo jumapecataeya pexanaenë, naejavata athëbëyo ruta. Nexata jomo pesinivitsi peyatëpaeviminexa, itsa taepona bajaraponë, asaë tsaponae. Bajara pijinia pacuenia, Daxitajivi Pematapijinë ata, athëbëyo rutsianatsi cruzajavabelia. Bajarapacuenia rutsianatsi cruzata petëpaenexa. ¹⁵ Nexata pajivi bajaraponëjavabelia sivanajamatabëcopata, apo naxuabi tsane. Bajarapajivi xainaena maticabi apo peverevereaejava, nayabarajai Jesús pijacuata Nicodemojavabelia.

Pacuenia Dioso exana piasivaxae mapanacuapijivije yabara pelivaisi

¹⁶ Icatsia Jesús pijacuata nayabarajumaitsi Nicodemojavabelia:

—Pinijicuenia Dioso asiva mapanacuapijivije. Bajaraxuata itorobica pepo caenë pexënato mapanacuayabetsicaje mapanacuapijivije Diosovecua penaxuabiyani. Pamonae sivanajamatabëcopata Dioso pexënatojavabelia, apo naxuabi tsane. Bajarapamonae maticabi apo peverevereaejava, Dioso rajutsianatsi. ¹⁷ Dioso apo itorobitsica pexënato mapanacuayabetsicaje mapanacuapijivije pijaneconi yabara penaneconitsiaexanaenexa. Biji rajane Dioso itorobica pexënato, pejamatabëcueneta Dioso pecapanepaenexa mapanacuapijivije pibisiacuene pexanaeconimivecua, nayabarajai Jesús pijacuata Nicodemojavabelia.

¹⁸ Icatsia Jesús pijacuata nayabarajumaitsi Nicodemojavabelia:

—Pajivi sivanajamatabëcopata Daxitajivi Pematapijinëjavabelia, bajarapajivi Dioso apo naneconitsiaexanaetsi tsane pibisiacuene pexanaeconimi yabara. Pajivi apo sivanajamatabëcopatsi Daxitajivi Pematapijinëjavabelia, bajarapajivi baja naneconita Diosojavabelia. Nexata Dioso naneconitsiaexanaenatsi. Tsipaji apo sivanajamatabëcopatsi pepo caenë Dioso pexënatojavabelia. ¹⁹ Ponë Daxitajivi Pematapijinë, bepecotia picani. Tsipaji jivi tsipaebapona pexaniajailivaisi jivi pejamatabëcuenitayotsinexa. Itsia mapanacuapijivi apo jitsipae pejamatabëcuenitayotsinexatsi. Jitsipa saya pi-aitaquirijamatabëcuene. Tsipaji bajarapamonae pibisiacuene exanavanapa. Bajaraxuata bajarapamonae naneconitsiaexanaenatsi Dioso. ²⁰ Daxita pamonae pibisiacuene exanavanapaevi, apo jitsipae Daxitajivi Pematapijinë pejamatabëcuenitayotsinexatsi. Bajaraxuata Daxitajivi Pematapijinëjavabelia

apo patsi. Tsipaji cujunava peyapëtaeayaexanaeyanivatsi penaneconitsijava Diosojavabelia pibisiacuene pexanaeneconi yabara. ²¹ Pamonaе jume-covënëta Dioso pexaniajailivaisi, bajarapamonae apo cujunavi. Bajarapamonae pata Daxitajivi Pematapijinëjavabelia pejamatabëcueneitayotsinexatsi. Bajarapamonae jitsipa daxitajivi peyapëtaenexatsi Dioso peyavenonaponaejavatsi xua exanavana, nayabarajai Jesús pijacuata Nicodemojavabelia.

Pacuenia Juan jivibautisabinë vajunupaeba Jesús yabara pelivaisi

²² Jesúsbeje Nicodemoheje pecuaicuaijaicujinaebeje, Jesús baja, pijajivi yajava, pona Judea nacuyavelia. Nexata Judea nacuata bajayajebi Jesús pijajivi barëponapona. Bajarapamonae bautisabapona jivi. ²³ Juan pijinia it-samonaе bautisabapona Enón tomarata. Enóntomara eca Salimtomara imoxoyojavata. Bajarajöta Juan jivi bautisabapona tsipaji ayaimera. Juan jivi topataponatsi pebautisabinexa. Nexata pepataponaevi, Juan bautisabapona. ²⁴ Bajarapacuenia Juan jivi bautisabapona abaxë itsa apo etsitsi penaneconitsivi pejebabiabibota.

²⁵ Nexata Juan pijajiviyajuvënëvi anaeya najumenotsiaya cuacuajjai judionëjavabelia. Juan pijajivi jumaisi:

—¿De meta ponë itsa nacabautisaba, nacajamatabëcuenexaniavaetsiana Dioso vajanacabarajamatabëcuene xanepanaenexa? jai Juan pijajivi judionëjavabelia.

²⁶ Nexata Juan pijajivi pona Juanjavabelia. Nexata bajarapamonae Juanjavabelia jumaisi Jesús yabara:

—Ponë caxitajarabame Jordánmene itsapanatalia, ponë vajunupaebame paxanëjavaberena, bajaraponë ata aeconoxae jivi bautisabapona. Nexata daxitajivi bajaraponëjavabelia pona, jai Juan pijajivi.

²⁷ Nexata Juan jumaisi pijajivijavabelia:

—Xuavajëto xaina caejivi canacujitsia, Dioso perajutsixaetsi xaina.

²⁸ Pamatacabi jumaisinë tsabiabi jivijavabelia: “Xanë raja apo Cristonë, ponë Dioso athëbëvetsica itorobijitsiatsica jivi pecapanepaenexa. Saya raja taneitorobinë Cristo pevajënaeya, talivaisipaebanajetarucaenënexa,” itsa janë, paxamë ata panejumetaeyabiabame. ²⁹ Ponë pita petiriva pijavanexa, nacasaba. Nexata pejananacasabinë peyapëtaenëtsi, namuxunaevetanuca imoxoyo. Bajaraponë ata nabarëya itsa jumetane pejananacasabinë pebarëyajava. Bajara pijinia pacuenia xanë ata aeconoxae bitso jamatabëcuenebarëyanë, itsa vënëlivaisitanijivi peponaejava Jesúsjavabelia.

³⁰ Pevajënaeyavelia jivi ayabitsoætoxaneto Jesús pënaponaenatsi. Xanë nexata tanepënaponaevi bevelia tsaponae tsane, jai Juan pijajivijavabelia.

Pacuenia Juan tsipaeba pijajivijavabelia Jesús athëbëvetsica pepatsijava yabara pelivaisi

³¹ Icatsia Juan jumaisi pijajivijavabelia:

—Athëbëvetsica pepatsinë, bitso cajena ayajamatabëcuenenë daxitajivi matatoxenetsia. Pamonaе naexana mapanacuataje, bajarapamonae saya mapanacuapijivije. Nexata saya cuacuajjai ëmapanacuapijicuene yabaraje. Itsiata baitsi jane ponë athëbëvetsica pepatsinë, bajaraponë daxitajivi mata-toxenetsia bitso ayajamatabëcuenenë. ³² Bajaraponë picani tsipaeba jivijavabelia pacuene tane athëbëtsatsia. Tsipaebanua picani palivaisi ata jumetane athëbëtsatsia. Itsiata baitsi jane daxitajivi jumeabatsi petsipaebilivaisianë.

³³ Pajivi jumeconvënëta athëbëvetsica pepatsinë pepaebilivaisi, bajarapajivi

Dioso ata yabara jamatabējumaitsi: “Dioso cajena pexaniajailivaisi pepaebinē,” jamatabējai. ³⁴ Ponē Dioso itorobatsi, bajaraponē tsipaeba jivijavabelia Dioso pitorobilivaisi. Tsipaji Dioso rajutatsi Espiritu Santo. Yajavaponaponaejaxanatsinua Espiritu Santo ayaicuenia. ³⁵ Dioso bitso asiva pexēnato. Tocopata daxitacuene pevetsinexa, pitorobinexanua. ³⁶ Pajivi najamatabēcopata Dioso pexēnatojavabelia, xainaena matababi apo peverevereaejava. Pajivi apo najamatabēcopatsi Dioso pexēnatojavabelia, matababi apo peverevereaejava apo xinae tsane. Bajarapajivi Dioso naneconitsiaexanaenatsi daxita matababijavabelianexa, jai Juan pijajivijavabelia.

4

Pacuenia Jesús barēcuaiquaijai Samaria nacuapijiva yabara pelivaisi

¹ Fariseovi jumetane jivi pejumaisijava: “Jesús baja pijajivi ayaibit-saētōxaneto xainaponapona. Bautisabaponanua jivi ayaibitsaēto Juan mata-toxenetsia,” pejaijava. ² Itsiata Jesús pecobeta apo bautisabi caejivi ata. Jesús rajane pijajivi bautisabapona jivi. ³ Nexata Jesús itsa yapētane fariseovi pevēnēlivaisitaevajatsi pacuenia jivi baracuaiquaijaitsi, nexata naviata Judea nacuverena. Pona Galilea nacuayabelia.

⁴ Nexata Galilea nacuayabelia peponaenē, Jesús, pijajivi yajava, patanajetaruca Samaria nacujajava. Tsipaji bajaraxuayo namuto najetaruca. ⁵ Nexata Jesús ecojopa Samaria nacuata peecaetomarata, Sicarvēnē tomarata. Sicar tomaravecuia imoxoyo boca pairayo Jacobpijinē bajayata rajuta pexēnato Josépijinē. ⁶ Bajarapairayota eca meramēthē, pamēthē Jacobpijinē bajayata cueyeta. Jesús sicuerana peponaejava namuto. Nexata Jesús ecojopa meramēthē muxuneneta. Matonejeepeatota Jesús ecojopa. ⁷⁻⁸ Jesús caenē eca meramēthējavata. Tsipaji Jesús pijajivi tomarabelia pona pecomuacaenexa pexaejava. Nexata bajaraberena Samaria nacuapijiva rena pepuatsinexa mera bajarapamēthēta. Nexata Jesús jumaitsi Samaria nacuapijivajavabelia:

—Mera nerajure, jai Jesús.

⁹ Nexata Samaria nacuapijiva jumaitsi:

—¿Detsa xuajitsia mera nevajētame niapaenexa? Xamē judiónēmē. Xanē saicaya Samaria nacuapijivanē, jai bajarapova Samaria nacuapijiva Jesúsjavabelia.

Bajarapacuenia Samaria nacuapijiva jumaitsi Jesúsjavabelia tsipaji judíovibeje Samaria nacuapijivibeje naitajitsibiaya nanaēcotabiaba. ¹⁰ Nexata Jesús jumaitsi Samaria nacuapijivajavabelia:

—Pajamatabēcuenē Dioso jitsipa pecarajutsinexa, apo yapētaemē. Xanē ata mera tacavajētsinē apo nejamatabēcueneyapētaemē. Itsa nejamatabēcueneyapētaejitsipame, nexata xanējavaberena copiaya mera nevajētsipame tacarajutsinexa. Nexata carajutsipatsi piavitavamera, jivi pejamatabēcuenēasaēyaxanaemera daxitamatababijavabelianexa, jai Jesús Samaria nacuapijivajavabelia.

¹¹ Nexata Samaria nacuapijiva jumaitsi Jesúsjavabelia:

—Xamē apo caponaemē nijavaxiyo mera nepuatsinexa. Meramēthē raja tajēreca bitso. ¿Detsa jota pitsipame nexata piavitavamera tanerajutsinexamē? ¹² Vajasalinainēmi Jacobpijinē ayaijamatabēcuenenēmi. Bajayata naca-tocopata mapameramēthēje. Bajaraponēmi, pexi ata, pijadajubi ata, mera apa mapamēthētaje. ¿Xamē tsaja nexata Jacobpijinēmi matatoxenetsia bitso ayaijamatabēcuenenēmē? jai Samaria nacuapijiva Jesúsjavabelia.

¹³ Jesús nexata jumaitsi:

—Jivi apaeyabiabi ata mapamëthëpjiimeraje, itsiata mera pejitsipaejava apo tovereverecabiabitsi. ¹⁴ Pajivi apaena xanë tarajutsimera, bajarapajivi xainaena matakabi apo peverevereaejava. Nexata pacuenia meramëthë eca daxitamatabijavabelianexa, bajara itsa tsane bajarapajivi, jai Jesús.

¹⁵ Nexata Samaria nacuapijiva jumaitsi Jesúsjavabelia:

—Bajarapamera nerajure icatsia mera tanamatavenonaponaeayaniva. Nexata baja mera apo puanabiabinë tsane mapamëthëaberenaje, jai Samaria nacuapijiva.

¹⁶ Jesús nexata jumaitsi Samaria nacuapijivajavabelia:

—Amona junaremelia. Yajavarenamë tsane, jai Jesús.

¹⁷ Nexata Samaria nacuapijiva jumaitsi:

—Apo xainaenë raja tamona, jai.

Nexata Jesús jumaitsi:

—“Apo xainaenë raja tamona,” itsa jamë, apo najumetsënëtsimë cajena.

¹⁸ Xainame picani amonajivi cinco ponëbeje. Ponë aeconoxae xainame, apo amona cajena. Tsipaji saya nijajara. Bajaraxuata xaniavaetsia netsipae-bame, jai Jesús Samaria nacuapijivajavabelia.

¹⁹ Nexata Samaria nacuapijiva itsa jumetane bajarapacuenia Jesús peju-maitsijava, nexata Samaria nacuapijiva jumaitsi Jesúsjavabelia:

—¿Xamë tsabaja Diosojumepaebinëmë profetanëmë? ²⁰ Patajasalinaivimi baja cajena navajëcabiaba Diosojavabelia mapatsutojumataliaje. Itsiata baitsi jane pajudïovimë pajumaitsimë tsabiabi: “Jivi itsa navajëca Diosojavabelia, benavajëcabiaba Jerusalën tomaraata Dioso pejumecovënëtsinexatsi,” pajamë tsabiabi, jai Samaria nacuapijiva.

²¹ Jesús nexata jumaitsi:

—Nejumecovënëtsianame pacuenia catsipaebijitsiatsi. Imoxoyo rabaja pejavënae papecatocopiapatsinexa Diosojavabelia panevajëcabiabinexa, paponaejevamë mapatsutojavabeliaje, paponaejevamë Jerusalën tomara-belia ata. ²² PaSamaria nacuapijivimë, pavajëcabiabi atamë Diosojavabelia, xaniavaetsia apo payapëtaemë Dioso. Paxanë rajane pajudïovinë xaniavaetsia payapëtaniji Dioso, ponëjavabelia pavajëcabiabajë. Tsipaji xanë daxitajivi tacapanepaenë tsane, judïoviyajuvënënë. ²³ Ajena mapamata-cabijavaveliacujinaeje, pevajënaeyabelia ata tsaponae, daxita pamonae jamatabëvajëta Diosojavabelia, bajarapamonae xaniavaetsia vajëtsiana daxita pejamatabëëthëtojavavetsina. Pepo pexaniajaijamatabëcueneta vajëtsiana Diosojavabelia. Bajarapitsivi Dioso jitsipa pevajëtsijavatsi. ²⁴ Dioso cajena apo vajataenë. Pamonae vajëta Diosojavabelia, xaniavaetsia pexaniajaijamatabëcueneta bevajëta, pepo pejamatabëëthëtojavavetsina, jai Jesús Samaria nacuapijivajavabelia.

²⁵ Nexata Samaria nacuapijiva jumaitsi:

—Yapëtaniji rabaja pepatsijavanexatsica Mesías, ponë Cristo, baitsi ponë athëbëvetsica Dioso itorobijitsiatsica jivi pecapanepaenexa. Itsa bajarapone patsianica, nacatsipaebiana daxitacuenëlivaيسانë, jai Samaria nacuapijiva Jesúsjavabelia.

²⁶ Jesús nexata jumaitsi Samaria nacuapijivajavabelia:

—Xanë rabaja Cristonë, jai.

²⁷ Nexata bajarapaepatota tomaraverena parena Jesús pijajivi. Bajarapamonae jamatabëcuenenabenajaca Jesús pecuaicuaijaitsanucaexae Samaria nacuapijivajavabelia. Itsiata itsanë ata: “¿Detsa xua jitsipame?” apo jai

Samaria nacuapijivajavabelia. Jesúsjavabelia ata apo yanijobi: “¿Detsa xua-jitsia bajarapova barëcuaicuajamë?” apo jai itsanë ata. ²⁸ Nexata bajarajota Samaria nacuapijiva pueneteta pijacanalito. Navialia pijatomarabelia. Tsi-paebalia jivi. Nexata jumaitsi Jesús yabara:

²⁹ —Panataemelia ponë netsipaeba daxita pacuenia exanajë. ¿Baja tsamëra jane apo Cristo, ponë athëbëvetsica Dioso itorobijitsiatsica jivi peca-panepaenexa? jai Samaria nacuapijiva.

³⁰ Nexata bajarapamonae pijatomaravelia ponalia. Taeothopalia Jesús.

³¹ Itsa abaxë bajarapamonae apo patsilia Jesúsjavabelia, Jesús pijajivi jumaitsi:

—Patajatuxanenë, naxaema itsjavayo, jai.

³² Nexata Jesús jumaitsi pijajivijavabelia:

—Xainajë raja saicaya taxaejavanexa paxamë apo paneyapëtaejava, jai Jesús.

³³ Nexata Jesús pijajivi, ëpamonae, nayanijoba.

—¿Itsanë tsamëra tsipaji vajacovëta Jesús pexaejava tocapatatsi penaban-inexa? najai Jesús pijajivi.

³⁴ Nexata Jesús jumaitsi:

—Pacuenia taneitorobinëtsica nitoroba, jitsipajë taexanaenexa. Jitsipajë baja tanacueneveretsinexa xua nitoroba. Bajara jane xua betaxaejava taniji. ³⁵ Paxamë pajumaitsimë tsabiabi peubijava yabara: “Saica raja abaxë cuatro pajuametobeje peubijava penaveretsinexa,” pajamë tsabiabi. Itsiata xanë pacatsipaebianatsi jivi yabara. Pataema mapamonae najetarubenaje. Pacuenia baja peubijava navereta penotsinexatsi, bajara itsi mapamonaeje. Mapamonaeje jumecovënëtsiana itsa tsipaebianatsi Dioso pejumelivaisi. ³⁶ Pajivi tsipaebiana tajumelivaisi jivi pejumecovënëtsiaexanaenexa, matakabi apo peverevereaejava jivi pexainaenexa, bajarapajivi sivajamatabëcuenebarëya tsane ayaibitsaëto itsa jumecovënëtsianatsi. Itsamonae baja picani namataxainaeya tsipaeba bajarapamonaejavabelia Dioso pejumelivaisi. Itsiata baitsi jane apo jumecovënëtsitsi. Nexata bajarapamonae ata itsa vënëlivaisitaena pejumecovënëtsijava tajumelivaisi, bajarapamonae ata sivajamatabëcuenebarëya tsane. ³⁷ Jivi bajumaitsi peubijava yabara mapacueniaje: “Copiaya itsanë uba. Itsa baja navereta peubijava, saicaya icatsia itsanë nota,” bajai. ³⁸ Nexata baja itsaxuayo itsamonae copiaya Dioso pejumelivaisi asaëyata tsipaebapona, bajara icatsia xuayo paxamë ata talivaisi panetsipaebinexa, pacaitorobatsi. Nexata pamonae copiaya Dioso pejumelivaisi tsijamatabëubatsi, ayaibitsaëto bajarapamonae najamatabëcuene copaba baja Diosojavabelia panetsipaebixae talivaisi, jai Jesús pijajivijavabelia.

³⁹ Samaria nacuapijiva, pova Jesús barëcuaicuajai mera mëthëjavata, pijatomarapijivijavabelia tsipaeba ayaibitsaëtoxanetojavabelia Jesús yabara. Nexata Samaria nacuata pejinavanapevi, Sicar tomarapijivi, ayaibitsaëtoxaneto jumecovënëta Cristocuene. Jumecovënëta Cristocuene penavajunupaebixae bajarapova bajarapatomarapijivijavabelia: “Daxita pacuene exanajë, Jesús netsipaeba,” pejaixae. ⁴⁰ Nexata Samaria nacuapijivi itsa parena Jesúsjavaberena, bajarapamonae Jesús asivatsi penaponaponaenexa bajarapamonaejavata. Nexata Jesús bajarapamonaejavata naponapona anijamatacabibeje. ⁴¹ Itsa bajarapamonae pijacuatata jumetane Jesús petsipaebilivaisi, nexata icatsia ayaibitsaëtoxaneto jumecovënëta Cristocuene. ⁴² Nexata bajarapamonae jumaitsi penavajunupaebivajavabelia:

—Pajumecovënëtajë apo ëpatanetsipaebijumemë yabara. Biji rajane pajumecovënëtajë tsipaji baja patajacuata ata pajumetaniji Jesús vajanacatsipaeblivaisi. Payapëtaniji baja cajena bajaraponë pexaniajajava Cristocuene. Payapëtaniji bajaraponë mapanacuapijivije pecapanepaejavanexa, pibisiacuene pexanaeconimivecua, jai bajarapamonae penavajunupaebivajavelia.

Pacuenia Jesús tojamatejemayaexana gobierno pijajivitonë pexënatonëyo yabara pelivaisi

⁴³ Samaria nacuata anijamatacabibeje Jesús peponaponaecujinae, vecuapona baja Samarianacua. Nexata jane baja pona Galilea nacuyavelia.

⁴⁴ Jesús jumai tsabiabi pijajivijavelia:

—Pajivi Dioso jumepaebabiaba, bajarapajivi apo yayiataetsi pijanacuapijivi, jai tsabiabi Jesús.

⁴⁵ Itsa baja Jesús palia Galilea nacuyavelia, bajarapanacuapijivi xaniavaetsia copiapitatsi. Tsipaji baja cajena bajarapamonae ata Jerusalén tomarata pascua fiestamatacabi Jesús tanetsi. Nexata Jesús ayaicuene Dioso pesaëta pexanaejava bajarapamonae cujirutanetsi fiestamatacabi.

⁴⁶ Nexata icatsia Jesús naviata Caná tomaraberena. Canátomara eca Galilea nacuata. Bajarapatomarata Jesús copiaya merami exana vinora. Caná tomarata ponapona gobierno pijajivitonë, ayaijamatabëcuenenë. Bajaraponë pexënatonëyo toavitane tsanucaetsi Capernaum tomaratalia. ⁴⁷ Nexata gobierno pijajivitonë vënëlivaisitanetsi Jesús Judea nacujavaverena pepatsijava, Galilea nacuyaberena. Nexata bajaraponë lia Jesúsjavavelia. Pini-jicuenia junata pijaboyavelia pebarëponaenexa Jesús petojamatejemayaexanaenexatsi pexënatonëyo. Tsipaji baja gobierno pijajivitonë pexënatonëyo totëpaejitsiatsi. ⁴⁸ Nexata Jesús jumaitsi bajaraponëjavavelia:

—Paxamë cajena apo panejumecovënëtsimë. Matapania itsa pataneme ayaicuene Dioso pesaëta taexanaejava, jivi apo pexanaecapanepaejava, panejumecovënëtsianame, jai Jesús.

⁴⁹ Nexata gobierno pijajivitonë jumaitsi:

—Jesús, naxanitsiayo tapëta ponare taxënatonëyo abaxë petëpaejavjënaya, jai.

⁵⁰ Jesús nexata jumaitsi bajaraponëjavavelia:

—Naviaremelia nexënatonëyojavavelia. Nexënatonëyo rabaja icatsia catojamatejema, jai Jesús.

Bajaraponë jumecovënëta pacuenia Jesús jumaitsi. Nexata baja lia pijaboyavelia. ⁵¹ Itsa bajaraponë patanajetarucalia, nexata pijajivi mataenarenatsi. Nexata pijajivi jumaitsitsi:

—Nexënatonëyo rabaja icatsia jamatejema tsecae, jaitsi.

⁵² Nexata bajaraponë yanijoba pijajivijavelia.

—¿Detsa xuayota juameto itsa ruca, jamatejema baja? jai tsapatsi bajaraponë.

Nexata pijajivi jumaitsi:

—Canivi, matonejeepatota, vecuaajibitsi baja peromaebijavatsi, jai pija-jivi.

⁵³ Nexata bajaraponë jamatabëjumaitsi:

—Bajarapaepatota canivi Jesús nejumaitsi: “Nexënatonëyo rabaja icatsia catojamatejema,” nejai, jamatabëjai.

Bajaraxuata bajaraponë, pijamonae yajava, jumecovënëta Jesús Cristonëcuene.

⁵⁴ Jesús penaviatsicujinae Judea nacua javaverena, Galilea nacua javaberena, cotocævi bajarapapini ICUENE Dioso pesaëta exana Galilea nacua ta.

5

Pacuenia Betzatavënë pucayojavata Jesús jamatejemayaexana petabusipacuenabinëtsi yabara pelivaisi

¹ Judíovi fiesta exana Jerusalén tomarata. Nexata Jesús nalia. ² Jerusalén tomarata, ovejaxi pecajoneyabiabibaupa imoxoyojavata, pecueyetsipucayo eca. Bajarapapucayo hebreojumeta pevënë Betzata. Bajarapapucayo mata-toyorotsia cinco pabobërètobeje eca. ³ Bajarapabobërëtonëjavata piavitanevi ayaibitsaëtoxaneto bobena. Itsamonae bitso pitaxutotsëcënaevi. Itsamonae peyayujayunaevi. Itsamonae peperabëcuenabivitsi. Daxita bajarapamonae evetanubena pucayo pemenenacujirubijava. ⁴ Athëbëvetsica ángel jemata runabiabica pucayojavabetsica. Nexata pucayo menenacujirubabiaba. Pemenenacujirubijavata, pajivi copiaya runareca pucayojavabereca, bajarapajivi pavitanecuene capunatsi, vecuaajibiaexanabiabatsi. ⁵ Bajarajota naboca treinta y ocho pavaibeje piavitanetsanucaenë, petabusipacuenabinëtsi. ⁶ Itsa Jesús taeyabuata bajaraponë, nexata yapëtaeyabuata bajaya-jebi piavitanenëcuene. Nexata Jesús jumaitsi bajaraponëjavabelia:

—¿Jitsipame tsaja nejamatejemajava? jai Jesús.

⁷ Nexata bajaraponë jumaitsi:

—Itsajivi ata apo xainaenë tanecopatsinexareca pucayojavabereca itsa mene nacujiruba. Ajena narunabiabijitsianëreca, bajarapaepatota itsajivi netsurunabiabareca copiaya, jai piavitanetsanucaenë.

⁸ Jesús nexata jumaitsi piavitanetsanucaenëjavabelia:

—Namatacore. Pire nijapanayo. Ponare baja, jai Jesús.

⁹ Bajarapacuenia Jesús pejumaitsijavata, jamatejema baja piavitanetsanucaenëmi. Pita baja pijapanayo. Ponaexanepana baja. Bajarapacuenia petabusipacuenabinëtsi Jesús jamatejemayaexana judíovi penacuer-aevetsimatocabita. ¹⁰ Nexata judíovi jamatabëcuenavëxaniabiaya jumaitsi petabusipacuenabinëmitsijavabelia:

—Ajena raja vajanacueraevetsimatocabi. Nexata apo xanepanae necaponaponaenexa nijapanayo, jai judíovi, tsipaji bajarapamonae apo jitsipae itsajivi ata pexanaenexa itsacuenëjavayo ata penacueraevetsimatocabita.

¹¹ Nexata petabusipacuenëbinëmitsi jumaitsi judíovijavabelia:

—Tanejamatejemayaexanaenë raja nejumaitsi: “Nijapanayo pire. Ponare baja,” nejai, jai petabusipacuenabinëmitsi judíovijavabelia.

¹² Nexata icatsia judíovi jumaitsi:

—¿Jipatsa nexata cajumaitsi: “Nijapanayo pire. Ponare baja,” cajai? jai.

¹³ Itsiata bailsi jane bajaraponë apo vënëyapëtae pavënënenë jamatejemayaexanatsi. Apo vënëyapëtae Jesús. Tsipaji bitso jivi ayaibitsaëtoxaneto bajarajota jinavanapa. Jesús baja cajena pepuaponae itsajavabelia, yani-jobatsi. ¹⁴ Bajaraxuacujinae icatsia Jesús caxitajarabaxuaba bajaraponë templobota. Nexata Jesús jumaitsi bajaraponëjavabelia:

—Taema. Aeconoxae baja jamatejemamë. Icatsia pëtsa baja matavëjëa exaname pibisiacuene. Icatsia raja itsa exaname, bitsomë tsipae, jai Jesús bajaraponëjavabelia.

¹⁵ Nexata bajaraponë pona baja. Tsipaeba judíovijavabelia.

—Jesús tsaena raja nejamatejemayaexana, jai judíovijavabelia.

¹⁶ Bajaraxuata nexata judíovi Jesús jamatabëitonotatsi. Jamatabëbeyaxuabatsinua. Tshipaji jamatejemayaexana piavitanevi judíovi penacueraevetsimatacabita. ¹⁷ Nexata Jesús jumaitsi judíovijavabelia:

—Taxa Dioso raja piavitanevi jamatejemayaexanabiaba daxitamatacabi. Bajaraxuata xanë ata piavitanevi jamatejemayaexanajë daxitamatacabi, jai Jesús judíovijavabelia.

¹⁸ Bajarapacuenia Jesús penalivaisipaebixae judíovijavabelia, itoyatsi bitso. Bajarapamonae jamatabëbeyaxuabatsi. Tshipaji Jesús jamatejemayaexana piavitanevi judíovi penacueraevetsimatacabita. Orijibia Jesús jumaitsi: “Taxa raja Dioso,” jai. Bajarapacuenia Jesús pejumaitsixae, nexata judíovi bitso jamatabëbeyaxuabatsi.

Pacuenia Dioso pexënatò jamatabëcuenecaëjèpatsi daxitacuenepexanaenexa yabara pelivaisi

¹⁹ Jesús jumaitsi judíovijavabelia:

—Xaniajanë pacuenia pacatsipaebijitsiatsi. Xanë, Dioso pexënatonë, itsacuenejavayo ata apo exanaenë èxanë tajamatabëcueneta. Pacuenia taniji taxa pexanaejava, bajarapacuenia xanë ata exanajë. ²⁰ Taxa niasiva. Nexata neyapëtaeyaexana daxita pacuene taxa yapëtane. Tavajënaeyabelia neyapëtaeyaexanaponaena bajarapacuenia matatoxenetsia ayaicuene taexanaponaenexa. Nexata exanaenajë ayaicuene taexanaejavanë. Paxamë itsa pataenane ayaicuene taexanaejavanë, pajamatabëcuenenabenajacaename. ²¹ Taxa petëpaevimimi ata icatsia asaëyaexana. Xanë ata necaëjèpa tasaëyaexanaenexa petëpaejivi ata, pajivi jamatabëasaëyaexanajë. ²² Taxa raja apo naneconitsiaexanae tsane itsajivi ata. Xanë raja, pexënatonë, nitoroba tananeconitsiaexanaenexa pibisiacuene pexanaevi. ²³ Bajarapacuenia nitoroba tananeconitsiaexanaenexa taneyaiyataenexa daxitajivi pacuenia bajarapamonae yaiyatane taxa. Pajivi apo neyaiyatae, Dioso pexënatonë, bajarapajivi taxa ata apo yaiyatae, jai Jesús judíovijavabelia.

²⁴ Icatsia Jesús jumaitsi judíovijavabelia:

—Xaniajanë pacuenia pacatsipaebijitsiatsi. Pajivi nenamuxu-naeveta tapaebilivaisi, itsa jumecovënëtanua Dioso athëbëvetsica taneitorobinëcuenetsica, nexata bajarapajivi xainaena matacabi apo peverevereaejava. Nexata bajarapajivi apo naneconitsiaexanaenë tsane pibisiacuene pexanaeneconi yabara. Bajarapajivi tēpae ata tsane, capanepaenatsi Diosojavabelia. ²⁵ Xaniajanë pacuenia pacatsipaebijitsiatsi. Pamonae apo xinae matacabi apo peverevereaejava, pijamatacabi baja tocopiapatatsi tanejumetaenexa, xanë Dioso pexënatonë, tatsipaebilivaisi. Nexata pajivi nesivanajamatabëcopata, xainaena matacabi apo peverevereaejava. ²⁶ Taxa raja caëjèpatsi jivijavabelia perajutsinexa matacabi apo peverevereaejava. Nexata xanë ata taxa necaëjèpaeayaexana jivi tarajutsinexa matacabi apo peverevereaejava. ²⁷ Nitorobanua tananeconitsiaexanaenexa pibisiacuene pexanaevi. Tshipaji xanë, Daxitajivi Pematapijinënë. ²⁸ Pëtsa pajamatabëcuenenabenajacame patacatsipaebilivaisi yabara. Itsamatacabi nejumetaena daxita petëpaevimimi ata tatsipaebilivaisi. ²⁹ Nexata bajarapamonae pemëthëanëmi vecuapitsapaena. Pamonae pexaniacuene pexanaevimi, Dioso icatsia asaëyaexanaenatsi. Nexata bajarapamonae xainaena matacabi apo peverevereaejava. Pamonae pibisiacuene pexanaevimi, icatsia Dioso asaëyaexanae atatsi tsane, bajarapamonae naneconitsiaya jinavanapaena daxitamatacabijavabelianexa, jai Jesús judíovijavabelia.

Pacuenia Jesús jivi tsitanajamatabëcueneitajëta pecajëjpaenëcuenetsi daxitacuenepexanaenexa yabara pelivaisi

³⁰ Icatsia Jesús jumaiti judiovijavabelia:

—Xanë tajamatabëcueneta apo exanaenë tsane itsacueneyavayo ata. Taneitorobinëtsica taneitorobicuenia, pijaneconi pexinaeivi naneconitsiaya jinavanapaeyaexanaenajë. Nexata saya itaxutojema apo naneconitsiaexanaenë tsane. Itsa naneconitsiaexanaenajë jivi, paneconivajëto xaina caejivi canacujitsia, bajarapaneconivajëtota caejivi canacujitsia naneconitsiaexanaenajë. Apo exanaenë tsane pacuenia jamatabëexanajë tajacuata. Pacuenia jitsipa taxa taneitorobinëtsica, bajarapacuenia exanaenajë. ³¹ Itsa navënëlivaisipaebijitsipajë, “Xanë rabaja ayaijamatabëcuenenënë,” itsa janë tsipae, itsiata itsamonaesaya nejumeaebijitsipa. ³² Itsiata baja Juanpijinë jivibautisabinëmi nevajunupaeba xaniavaetsia. Yapëtaniji bajaraponë tanevajunupaebijava pexaniajajamatabëcueneta. ³³ Paxamë itsamonaepaitorobame tanevënëlivaisianijobinexa Juan jivibautisabinëmijavabelia. Nexata

Juanpijinë xanë talivaisi, pexaniajailivaisi, tsipaeba paitorobivijavabelia. ³⁴⁻³⁶ Pacanajamatabënapitsiaexanatsi pacuenia Juanpijinë nevënëlivaisipaeba panejumecovënëtsinexa patacapanepaejavanexa taxa Diosojavabelia. Juanpijinë abaxë itsa ponapona mapanacuatajê, belâmparabë picani. Pacajamatabëcueneitayota. Caepatoyo picani pasivajamatabëcuenebarëyamë papecatsipaebilivaisi. Juanpijinë itsa nevënëlivaisipaeba, pacayapëtaeyaexana baja cajena pexaniajailivaisi tapaebinëcuene. Itsiata baitsi jane Juanpijinë bajarapacuenia apo pacatsipaebi ata tsipae, xanë xainajë itsanë tanevënëlivaisipaebinënexa. Bajaraponë bitso ayaijamatabëcuenenë Juanpijinëmi matatoxenetsia. Bajaraponë taxa. Taxa netocopata pinijicuene taexanaenexa. Nexata pinijicuene exanajë daxitajivi tanesivajamatabëjumaitsinexa: “Xaniajai tsaena. Maponëje pepacuene Dioso athëbëvetsica pitorobinëtsicsicaje.” tanesivajamatabëjainexa. ³⁷ Taxa,

ponë nitorobica, tajëvelia baja cajena nevënëlivaisi yaquinaeyaexana pejumelivaisibaxutota. Caeto ata taxa livaisi papecatsipaebijava, apo pajumetaemë. Apo pataemënuu. ³⁸ Nexata pejumelivaisi apo pacatsijamatabëjone. Tsipaji apo panejumecovënëtsimë taxa athëbëvetsica taneitorobinëtsica. ³⁹ Paxamë picani xaniavaetsia palebabiabame Dioso pejumelivaisibaxuto. Bajarapacuenia palebabiabame tsipaji jamatabëcuenenavëxaniabiaya pajamatabëjumaitsimë tsabiabi: “Xaniavaetsia itsa lebajë Dioso pejumelivaisi, nexata Dioso nerajutsiana maticabi apo pevereverecejava,” pajamatabëjamë tsabiabi. Itsa palebabiabame Dioso pejumelivaisibaxuto, ponë yabara palebabiabame, xanë rabaja cajena. ⁴⁰ Paxamë itsiata apo panejumecovënëtsimë panexainaenexa maticabi apo pevereverecejava, jai Jesús judiovijavabelia.

⁴¹ Icatsia Jesús jumaiti judiovijavabelia:

—Apo exanaenë ayaiacuene taexanaejava saya jivi tanesivajamatabëjumaitsinexa: “Jesús raja ayaijamatabëcuenenënë,” tanesivajamatabëjainexa. ⁴² Pacajamatabëcueneypëtanetsi. Yapëtaniji cajena apo panejitsipaejava Dioso. ⁴³ Xanë athëbëvetsica patsicajë mapanacuayabet-sicajë taxa Dioso taneitorobixae-tsica. Itsiata apo panejumecovënëtsimë. Itsanë itsa pacatopsiana saya bajaraponë pejamatabëcuene pijilivaisi papecatsipaebinexa, nexata pajumecovënëtsianame. ⁴⁴ Paxamë pajitsipame mapanacuata ëjivi papecasivabarëyanexa, papecaiyataenexanua. Apo panajamatabëxainaemë cajena Dioso papecasivabarëyanexa.

Bajaraxuata apo pacacaejēpae panejumecovēnētsinexa Dioso pejumelivaisi. ⁴⁵ “Mara ponēje nacaneconitsijitsia Diosojavabelia,” panesivajamatabējamē pētsa. Xanē raja apo pacaneconitsi tsanetsi. Paxamē jamatabēcuenenavēxaniabiaya pajamatabējumaitsimē tsabiabi: “Bajayata Dioso Moiséspijinēta najumecopata jivi pejumecovēnētsinexa. Bajarapalivaisi baja jumecovēnētsiajinavanapatsi. Bajaraxuata nacacapanepaena Dioso,” pajamatabējamē tsabiabi jamatabēcuenenavēxaniabiaya. Itsiata bajarapalivaisivecua saya pajinavanapame. Nexata bajarapalivaisi pacaneconitsiana Diosojavabelia. ⁴⁶ Itsa pepacuene pajumecovēnētsipame Dioso Moiséspijinēta penajumecopatsilivaisi, nexata xanē ata panejumecovēnētsipame. Tsipaji cajena bajayatami tajēvelia nevajunupaeba Moiséspijinē peyaquinaebaxutota. ⁴⁷ Apo pajumecovēnētsimē Moiséspijinē peyaquinaelivaisi. Bajaraxuata nexata apo panejumecovēnētsimē xanē patacatsipaebilivaisi, jai Jesús judíovijavabelia.

6

Pacuenia Jesús pexaejava rajuta cinco mil ponēbeje yabara pelivaisi (Mt 14.13-21; Mr 6.30-44; Lc 9.10-17)

¹⁻⁴ Bitso baja imoxoyo pevajēnae pejonenexa judíovi pijafieta, pascuavēnēfieta. Bajarapamatacabi Jesús pona Galilea pucaxaneto itsapanabelia. Bajarapapuca itsavēnē Tiberiaspuca. Nexata jivi ayaibitsaētoخانeto Jesús pēnaponatsi. Tsipaji Dioso pesaēta Jesús ayaiacuene exanapona. Piavitanevi jamatejemayaexana pona. Nexata Jesús junaya petsutojumabetsia. Jesús, pijajivi yajava, ecaya petsutojumatatsia. ⁵ Itsa Jesús tane jivibitsaētoخانeto pecujibijavatsirena, Jesús jumaitsi Felipejavabelia:

—¿Detsa belia comuatsianatsi pexaejava pexaenexa mapabitsaētoخانetoje? jai Jesús.

⁶ Bajarapacuenia Jesús jumaitsi tsipaji jamatabēyapētane pacuenia Felipe jumecanaviatsijitsiatsi. Jesús baja cajena picani yapētane pacuenia pexaejava mitsaexanaejitsia bajarapajivibitsaētoخانeto. ⁷ Nexata Felipe jumaitsi Jesúsjavabelia:

—Doscientos denariocuenia comuatsi atatsi tsipae pan, apo yacaējēpaetsi tsipae pexaenexa daxita mapajivibitsaētoخانetoje, jai Felipe.

⁸ Itsanē Jesús pijajivitonē Andrés, Simón Pedro pejuyapijinē, jumaitsi Jesúsjavabelia:

⁹ —Majotaje napatajopa pejevaxinēyo. Xaina bajaraponēyo cinco panbēbeje, cebadavēnēbenota pexanaepanbēanē. Xaina anijanēyobeje dujuainēyobeje yajava. Bajaraxuaxi apo caējēpae tsipae cajena vajarajutsinexa mapajivibitsaētoخانetoje, jai Andrés.

¹⁰ Nexata Jesús jumaitsi pijajivijavabelia:

—Daxita bajarapamonae paenaeyaexanare, jai Jesús.

Nexata Jesús pijajivi itoroba jivi penaenexa ponajumavereca. Bajarapajivibitsaētoخانeto bejamatabēcuene cinco mil meta ponēbeje. ¹¹ Nexata Jesús pita panbēxi. Bajaraxuacujinae pexaenexa vajēta Diosojavabelia.

—Pexaniacuene panetoexaname. Panerajutame pataxaejavanexa, jai Jesús Diosojavabelia.

Bajaraxuacujinae Jesús pan rajuta pijajivijavabelia. Nexata juya Jesús pijajivi tsicobetsana daxita penaejivibitsaëtoxanetojavabelia. Bajara icatsia pacuenia Jesús vajëta Diosojavabelia dujuainëyobeje pexaenexa.

—Pexaniacuene panetoexaname. Panerajutame pataxaejavanexa, jai Jesús Diosojavabelia.

Bajaraxuacujinae icatsia dujuaijavaxi tsicobetsana daxita penaejivibitsaëtoxanetojavabelia. Daxita bajarapamonae xaniavaetsia nabane. ¹²Itsa baja bajarapamonae penia, Jesús jumaitsi pijajivijavabelia:

—Pacaetuare baja peyajuvënënacopabenaejavanë penaxuabenaeyaniva, jai Jesús pijajivijavabelia.

¹³Nexata Jesús pijajivi caetuata peyajuvënënacopabenaejavanë. Vënëba doce xuabeje bemapirecuenia pexanaejavanë. Cinco papanbëmimebeje picani cebadavënëbenota pexanaepanbëanë. ¹⁴Nexata bajarapajivibitsaëtoxaneto itsa tane Jesús ayaicueno Dioso pesaëta pexanaejava, najumaitsi Jesús yabara:

—Diosojumepaebinë profeta, ponë vaxaitsi copiaevetavanapatsi pepatsijavanexatsica, bajara jane maponëje. ¹⁵Vaetabianatsi maponëje. Vajanacayanacuaevetsinë exanaenatsi bajaraponë, najai picani bajarapamonae.

Nexata Jesús jamatabëcueneyapëtane bajarapacuenia pesivanajamatabëxainaejavatsi. Bajaraxuata Jesús baja vecuapona. Najetaruca pinijitsutonëjava caenë.

Pacuenia Jesús mene itaboxoya najetaruca yabara pelivaisi

(Mt 14.22-27; Mr 6.45-52)

¹⁶Itsa baja meravi, Jesús pijajivi puca itapayabereca pona. ¹⁷Jesús abaxë patsinejeva pijajivijavata, aitaquiri baja. Nexata pijajivi runareca jera ënëabereca. Nicabijitsia Capernaum tomarabelia. ¹⁸Jesús baja pijajivi pepuaponaer jera, taxuxuaba jovibo pebubujaijava. Nexata malataca bitso ayai. ¹⁹Pavëpata Jesús pijajivi naropoba, bajarapavëpa baja bejamatabëcueno cinco pakilómetrobeje, seis pakilómetrobeje ata, pepuavecuanajetarubenaelia, Jesús pijajivi kujitanajetaruca. Jesús najetaruca mene itaboxoya. Nexata Jesús pijajivi tanetsi. Jesús pijajivi cujunavatsi. ²⁰Nexata Jesús jumaitsi pijajivijavabelia:

—¡Xanë raja najetarucajë! ¡Pëtsa panecujunavame! jai Jesús pijajivijavabelia.

²¹Nexata Jesús pijajivi jamatabëcuenobarëya. Jesús baja nexata nonorena jera ënëaberena. Nexata bajarapaepatota Jesús baja, pijajivi yajava, pata Capernaum tomarabelia.

Pacuenia Jesús pëjaitatsi jivi yabara pelivaisi

²²Pamonae Jesús pexaejava rajuta, abaxë nacopabilia puca itsapanatalia. Nexata meravia pitsijavata bajarapamonae najumaitsi:

—Canivi caejera perucaejava, tanetsi majotaje. ËJesús pijajivi runareca penicabinexalia. Nexata Jesús nacopatanuca majotaje, najai bajarapamonae.

²³Bajara saya paepatota itsamonae jeranë yaparena Tiberias tomaraverena. Itsajota Jesús pevajëtsicujinae Diosojavabelia pexaejava rajuta jivi ayaibitsaëtoxaneto, bajarajota vecuaimoxoyo yaëba. ²⁴Nexata pamonae Jesús pexaejava rajuta, bajarapamonae tane Jesús pijajivi pebarëajibitsarucaejava bajarajota. Nexata bajarapamonae runareca jera ënëabereca penicabinexalia Capernaum tomarabelia. Bajarapatomarabelia pona pepëjaitsinexatsi Jesús.

Pacuenia Jesús bepítavapan yabara pelivaisi

²⁵ Jesús pepējaitšivitsi itsa pata Capernaum tomarabelia, caxitajarabatsi Jesús. Nexata bajarapamonae jumaitšis Jesúsjavabelia:

—Jesús, ¿detsa pacujinae patame baja maberenaje? jai.

²⁶ Jesús nexata jumaitšis bajarapamonaejavabelia:

—Xaniajanē pacuenia pacatsipaebijitsiatsi. Paxamē panejaitame tšipaji xaniavaetsia panabaneme xanējavata. Apo panejaitšimē panejumečovēnētšinxamē Cristocuenenē, Dioso taneitorobinētšica. Patae atamē ayaiçuene Dioso pesaēta taexanaejava, apo panejumecovēnētšimē. ²⁷ Pētsa pacajamatabēçueneena ēpeverevereceaajava yabara. Pacuenia panexaeajava baverevereca, bajarapitsijava. Biji rajane pacajamatabēçueneena apo peverevereceaajava yabara. Nexata xanē, Daxitajivi Pematapijinēnē, pacarajutšianatsi matacabi apo peverevereceaajava. Taxa Dioso baja cajena nitoroba patacarajutšinexa matacabi apo peverevereceaajava, jai Jesús bajarapamonaejavabelia.

²⁸ Nexata bajarapamonae jumaitšis Jesúsjavabelia:

—¿Detsa nexata xua bepaexanajē Dioso pejitsipaecuene? jai bajarapamonae.

²⁹ Nexata Jesús jumaitšis bajarapamonaejavabelia:

—Mara pacuene Dioso jitsipa panexanaenexaje. Panejumecovēnēre xanē Dioso taneitorobicuenetsica, jai Jesús.

³⁰ Nexata icatsia bajarapamonae jumaitšis Jesúsjavabelia:

—¿Detsa nexata xua pinijicuene Dioso pesaēta nexanaejava panetsitaexanaename patacajumecovēnētšinexa Dioso pecaitorobicuenetsica?

³¹ Vajasalinaivimi pina bajayata baxaevanapa manávēnējava petusato nacuata pacuenia baja Dioso pejumelivaisibaxutota jumaitšis. Dioso baja cajena pejumelivaisibaxutota jumaitšis mapacueniaje: “Bajarapamonae rajutabiabatsi pexaeajava athēbēpijijava,” jai Dioso pejumelivaisibaxutota vajasalinaivimi yabara, jai bajarapamonae Jesúsjavabelia.

³² Jesús nexata bajarapamonaejavabelia jumaitšis:

—Xaniajanē pacuenia pacatsipaebijitsiatsi. Moiséspijinē petusato nacuata vajasalinaivimi pexaeajava apo rajutsi athēbēpijijava. Taxa Dioso raja rajutabiaba bajarapamonae pexaejavanexa. Nexata pijinia aeconoxae paxamē ata Dioso pacarajutšiana athēbēpijipan, pepacuene pexaniajaipan.

³³ Ponē athēbēvetsica pepatsinē, Dioso rabaja pijapan. Bajaraponē mapanacuapijivijavabeliaje rajutšiana matacabi apo peverevereceaajava, nayabarajai Jesús pijacuata bajarapamonaejavabelia.

³⁴ Nexata bajarapamonae jumaitšis:

—Jesús, bajarapapan panerajutaponaename daxitamatacabi canacujitsia, jai.

³⁵ Nexata Jesús jumaitšis bajarapamonaejavabelia:

—Papan jivi rajutšianatsi matacabi apo peverevereceaajava, xanē rabaja bajarapannē. Pajivi xanējavaberena pata, apo piajani cajena tsane pejamatabēēthētota. Pajivi nesivanajamatabēcopata xanējavaberena, apo jitsipae tsane icatsia mera. ³⁶ Paxamē apo panejumecovēnētšimē, patae atamē Dioso pesaēta pinijicuene taexanaejava. ³⁷ Daxita pamonae taxa tanerajutšivi, patsiana xanējavaberena. Pajivi patsiana xanējavaberena, apo navecujitavetsinē tsane. ³⁸ Xanē apo patsinētšica athēbēvetsica taexanaenexa étajamatabēcujirupijijava. Biji rajane patsicajē taexanaenexa pacuenia nitoroba taneitorobinētšica. ³⁹ Mara pacuene taxa Dioso jitsipa tatoexanaenexaje. Apo jitsipae cajena tatoxabijava caejivi ata tanerajutšiviyajuvēnēvi.

Pamatacabi icatsia patsianicajë, daxita bajarapamonae toasaëyaexanaenajë icatsia petëpaejavamivecua. ⁴⁰ Mara pacuene taxa Dioso jitsipaje. Daxita pamonae tanetaevi Dioso pexënatonë, nexata itsa nesivanajamatabëcopata, bajarapamonae xainaena matacabi apo peverevereaejava. Bajarapamonae icatsia asaëyaexanaenajë petëpaejavamivecua pamatacabi icatsia patsianicajë, jai Jesús bajarapamonaejavabelia.

⁴¹ “Xanë rabaja athëbëvetsica tapatsipan,” penayabarajaijava Jesús jivijavabelia, judíovi baracuaicuaijaiti pepënëvelia. ⁴² Nexata judíovi najumaiti:

—Mara ponë Jesús, Josépijinë pexënatoje. Vaxaiti baja cajena yapëtanetsi paxapijinë, pena ata. Nexata bajaraponë acuenebi pejumaitisjava: “Athëbëvetsica tapatsinë,” pejajjava, najai judíovi Jesús yabara.

⁴³ Nexata Jesús jumaiti bajarapamonaejavabelia:

—Jamatabëcuenenavëxaniabiaya pëtsa panebaracuaicuaijamë tapënëverena. ⁴⁴ Itsajivi ata raja apo caëjëpaetsi pijacuata xanëjavaberena tanesivanajamatabëcopatsinexa. Matapania taxa Dioso, taneitorobinëtsica, itsa caëjëpaeyaexanaenatsi, nesivanajamatabëcopatsiana. Pajivi nesivanajamatabëcopatsiana, asaëyaexanaenajë petëpaejavamivecua pamatacabi icatsia patsianicajë. ⁴⁵ Bajayata Diosojumepaebivimi peyaquinaelivaisi jumaiti mapacueniaje: “Dioso cajena yapëtaeyaexanaena daxitajivi pexaniajailivaisi,” jai. Nexata pajivi jumecovënëta taxa peyapëtaeyaexanaelivaisi, bajarapajivi xanë ata nesivanajamatabëcuenecopatsiana, jai Jesús judíovijavabelia.

⁴⁶ Icatsia Jesús jumaiti judíovijavabelia:

—Itsajivi ata cajena taxa apo tae. Xanë raja caenënë taxa Dioso taniji. Tspajivi bajaravetsica tapatsinë. ⁴⁷ Xaniajanë pacuenia pacatsipaebijitsiatsi. Pajivi nesivanajamatabëcopatsiana, xainaena matacabi apo peverevereaejava. ⁴⁸ Xanë rabaja pitavapannënë. Nexata jivi rajutsianajë matacabi apo peverevereaejava. ⁴⁹ Bajayata panijasalinaivimi xaevanapa picani manävënjëjava petusato nacuata. Itsiata baitsi jane bajarapamonae bajayajebi bajaraxua xaevanapae ata, tëpa itsiata. ⁵⁰ Xanë raja pacanavajunupaebatsi athëbëvetsica tapatsinë. Pajivi nesivanajamatabëcuenecopatsiana, pepacuene apo tëpae tsane. ⁵¹ Xanë rabaja cajena pitavapannënë, athëbëvetsica tapatsinë. Pajivi jumecovënëtsiana tasivatëpaejava pijaneconi yabara, jamatabëcuenenaitava tsaponaponae tsane daxitamatacabijavabelianexa. Papan rajutsianajë tanejumecovënëtsivi, tavito rabaja tsane. Navirajutsianajë daxitanacuapijivi pexainaenexa matcabi apo peverevereaejava, nayabarajai Jesús judíovijavabelia.

⁵² Nexata judíovi najumeanaenota ëpamonae bajarapacuenia Jesús pejumaitisjava yabara. Najumaiti bajarapamonae:

—¿Detsa pacuenia maponë nacanavirajutsipa vajavixaenexaje? Acuenebi raja vajanacanavirajutsijava vajavixaenexa, najai judíovi.

⁵³ Jesús nexata jumaiti judíovijavabelia:

—Xaniajanë pacuenia pacatsipaebijitsiatsi. Xanë, Daxitajivi Pematapijinënë. Itsa paxamë apo panevixaemë tsane, apo panejanaapaemënu tsane, nexata matacabi apo peverevereaejava, apo paxainaemë tsane. ⁵⁴ Pajivi nevixaena, nejanaapaenanua, xainaena matacabi peverevereaejava. Pamatacabi icatsia patsianicajë, bajarapajivi icatsia asaëyaexanaenajë petëpaejavamivecua. ⁵⁵ Tavito rabaja cajena pepo pexaniajaijava jivi pexaenexa. Tajana rabaja pijinia pepo pexaniajaijava jivi piapaenexa. ⁵⁶ Pajivi

nevixaena, nejanaapaenanua, bajarapajivi yajavaponaponaenajë. Bajara-pajivi ata pijinia neyjavaponaponaena. ⁵⁷ Taxa, ponë nitorobica, bajaraponë daxitamatacabijavabelianexa piasaëtsaponaponaenë. Bajaraponë pejamatabëcueneta xanë ata daxitamatacabijavabelianexa asaenë tsaponaponaë. Nexata pajivi nevixaena, bajarapajivi pijinia tajamatabëcueneta asaë tsaponaponaë tsane daxitamatacabijavabelianexa. ⁵⁸ Athëbëvetsica pepatsipan, xua yabara baja pacatsipaebatsi, bajarapapan apo jëpae papan bajayata panijasalinaivimi xaevanapa. Bajarapapanmi bajayajebi xaevanapae ata, bajarapamonaemi itsiata tëpa baja cajena. Biji rajane pajivi xanë nevixaena, ponaponaena daxitamatacabijavabelianexa, jai Jesús judíovijavabelia.

⁵⁹ Bajarapacuenia Jesús jumaiti judíovijavabelia livaisi petsipaebijavata Capernaum tomarata, judíovi penacaetuatiabihibota.

Matacabi apo pevereverecaejava yabara pelivaisi

⁶⁰ Ayaibitsaëto, pamonaë Jesús pepëta najinavanapa, itsa jumetane Jesús petsipaebilivaisi, apo jumexaniataë. Najumaiti ëpamonaë:

—Penajumetsënëtsilivaisi saya nacatsipaëba. ¿Jipatsa jumecovënëtsiana? Ajibi cajena, najai ëpamonaë.

⁶¹ Nexata Jesús jamatabëcueneyapëtane pacuenia pepënëvelia baracuaicuaijaiti. Nexata Jesús yanijoba pepënaponaevitsijavabelia. Jumaiti:

—¿Apo bepexaniajailivaisi tsaja pajumetaneme patacatsipaebilivaisi?

⁶² Xanë Daxitajivi Pematapijinënë. ¿Detsa paitsimë tsipae itsa pataejitsipame tatsiajava athëbëbetsia taponaponaenacuamijavabetsia? ⁶³ Espiritu Santo baja cajena pejamatabëcueneta jivi xaina matacabi apo pevereverecaejava. Ëjivi raja pejamatabëcueneta apo caëjëpaetsi pexainaenexa matacabi apo pevereverecaejava. Patacatsipaebilivaisi baja cajena papecatsijamatabëjonenexa picani, panexainaenexa matacabi apo pevereverecaejava.

⁶⁴ Itsiata baitsi jane paxamëyajuvënëvi abaxë apo nejumecovënëtsi, jai Jesús.

Jesús bajarapalivaisi petsipaebivajënaë ata, jamatabëcueneyapëtane pamonaë apo jumecovënëtsijitsiatsi. Jamatabëcueneyapëtanenua tajëvelia ponë canajetsijitsiatsi pijavajabitsaë pecobeyabelia. ⁶⁵ Nexata Jesús icatsia jumaiti pepënaponaevitsijavabelia:

—Bajaraxuata cajena pacajumaitisiti: “Itsajivi ata raja apo caëjëpaetsi pijacuata xanëjavaberena tanesivanajamatabëcopatsinexa. Matapania taxa Dioso, taneitorobinëtsica, itsa caëjëpaëyaxanaenatsi, nesivanajamatabëcopatsiana,” pacajaiti, jai Jesús pepënaponaevitsijavabelia.

⁶⁶ Bajara nexata jota ayaibitsaëto Jesús pepënaponaevitsi vepënaviabatsi baja. Nexata bajarapamonaë pematatsënëa baja apo pënaponaetsi Jesús.

⁶⁷ Nexata Jesús yanijoba doce ponëbeje pijajivijavabelia. Jumaiti:

—¿Paxamë ata tsabaja pajamatabënaviabame? jai Jesús.

⁶⁸ Nexata Simón Pedro jumaiti Jesúsjavabelia:

—Tajatuxanenë, itsa panaviabajë, ¿jipatsa nexata papënaponaëjitsipajë xamëvecua? Xamë rabaja caenëmë panetsipaebame matacabi apo pevereverecaejava pataxainaenexa. ⁶⁹ Paxanë rabaja pacajumecovënëtsi patanetsipaebilivaisimë. Pacayapëtanetsinua baja cajena Cristocuenemë, Dioso piasaëtsaponaponaenë daxitamatacabijavabelianexa pexënatomë, jai Simón Pedro Jesúsjavabelia.

⁷⁰ Jesús nexata jumaiti pijajivijavabelia:

—Xanë rabaja pacaitapëtatsi doce paponëmëbeje. Itsiata baitsi jane paxamëyajuvënënë, itsanë, dovathi pijajivitonë tsaponaponaë, jai Jesús.

¹ Bajarapacuenia Jesús itša jumaitši, Judas Iscariote, Simón pexēnato, yabara jumaitši. Judas Jesús canajetsijtsiatsi pijavajabitsaē pecobeyabelia. Judas rabaja picani Jesús pijajivitonē, doce ponēbejeyajuvēnē.

7

Pacuenia Jesús pejuyapijivi apo jumecovēnētsi yabara pelivaisi

¹ Jesús ponapona Galilea nacuajava. Apo jitsipae peponaponaeva Judea nacuajava. Tsipaji bajarajota judíovi jamatabēbeyaxuabatsi. ² Imoxoyo baja pevājēnae pejonenexa fiesta, pafiestamatacabi judíovi bobērētonē exanabiaba. Nexata judíovi bajarapabobērētonēta jinavanapabiaba bajarapafiestamatacabi. ³ Nexata Jesús pejuyapijivi junatatsi penaponaenexa bajarapafiestajavabelia. Jesús pejuyapijivi jumaitši:

—Pētsa nacopatame majotaje. Judea nacuajavabelia liamēre. Bajaratotalia pijinia Dioso pesaēta pinijicuene nexanaponaeva nijajivi tsitaexanaename. ⁴ Pajivi pexanaeva yabara jitsipa pevēnēlvaisitaenexatsi daxitanacuapijivi, bajarapajivi pexanaeva muetsia apo exanae. Nexata pepacuene Dioso pesaēta pinijicuene itša exanaponaename, nexata icatsia pinijicuene tsitaexanaename fiestajavata daxitanacuapijivi pitabarata. Nexata daxitajivi cayapētaena, jaitši Jesús pejuyapijivi.

⁵ Jesús pejuyapijivi ata apo jamatabējumecovēnētsi Cristocuene. Bajaraxuata bajarapacuenia pejuyapijivi ata jumaitšitsi. ⁶ Nexata Jesús jumaitši pejuyapijivijavabelia:

—Abaxē raja tajamatacabi apo netocopiapatsi tanaitajētšinexa daxitajivijavabelia. Itsiata paxamē apo paitsimē. Paepatota jamatabēpaponame, pacatoxanepana paneponaenexa. ⁷ Mapanacuapijivi cajena acuenebi paxamē papecaitoyajava. Itsiata baitši jane xanē nitoya. Tsipaji itavetaponajē pibisiacuene pexanavanapaejava. ⁸ Paxamē baja paponare fiestajavabelia. Xanē ra abaxē apo ponaenē. Tsipaji abaxē apo netocopiapatsi paepatota ponaejitsianē, jai Jesús pejuyapijivijavabelia.

⁹ Bajarapacuenia Jesús pejumaitšicujinae, abaxē Jesús nacopatanuca Galilea nacuata pecofocaevinexa.

Pacuenia Jesús napona fiestajavabelia yabara pelivaisi

¹⁰ Jesús pejuyapijivi fiestajavabelia pepuaponae, Jesús ata cotocaevi napona fiestajavabelia. Jesús nexata jivibitsaēto tuatuajēta apo naponae muetsia pepatsinexa. ¹¹ Jesús picani jaitšitsi judíovi pevetsivi fiestajava. Najumaitši judíovi pevetsivi:

—¿Detsa xania jota ponapona bajaraponē? najai judíovi pevetsivi Jesús yabara.

¹² Ayailbitsaēto jivi vēpaxapaxajaiya baracuaicuajaitši Jesús. Itsamonae jumaitši Jesús yabara:

—Pexaniajamatabēcuenenē raja, jai itsamonae.

Itsamonae pijinia jumaitši:

—Apo pexaniajamatabēcuenenē raja Jesús. Peyamaxēitojorobinē ra saya jivi, jai Jesús yabara.

¹³ Itsajivi ata apo cuaicuajai ayaijumeta Jesús yabara. Tsipaji jumejunava judíovi pevetsivi pejumetaeyanivatsi.

¹⁴ Itsa baja fiesta epatua tsaponae pevereverecaenexa, nexata Jesús joneya temploboyalia. Taxuxuaba jane baja livaisi petsipaebijava. ¹⁵ Judíovi pevetsivi jamatabëcuenenabenajaca itsa jumetane Jesús pepaebilivaisi. Nexata judíovi pevetsivi najumaitsi:

—Maponëje bitso livaisi yapëtane. Picani livaisi apo nacujarubi pacuenia vaxaitsi nacujarubatsi, najai tsanubenae judíovi pevetsivi Jesús yabara.

¹⁶ Jesús nexata jumaitsi judíovi pevetsivijavabelia:

—Tatsipaebilivaisi raja apo tajamatabëcuenepijilivaisi. Dioso raja, ponë nitorobica, bajaraponë pejumelivaisi tsipaebaponajë. ¹⁷ Pajivi jamatabëexana Dioso pejitsipaecuenia, bajarapajivi yapëtaena pepacune Dioso pejume-livaisi tatsipaebijava. Nexata yapëtaenana tajamatabëcuenepijilivaisi itsa tsipaebajë. ¹⁸ Pajivi tsipaeba ëpejamatabëcuenepijilivaisi, tsipaeba saya jivi peyaiyataenexatsi. Itsiata baitsi jane pajivi tsipaeba jivi peyaiyataenexa Dioso, bajarapajivi cajena tsipaeba pexaniajailivaisi. Bajarapajivi apo yamaxëitojorobi jivi. Tspajivi pacuenia Dioso itorobatsi, tsipaeba, jai Jesús judíovi pevetsivijavabelia.

¹⁹ Jesús icatsia jumaitsi judíovijavabelia:

—Moiséspijinë baja cajena bajayata yaquina Dioso penajumecopatsilivaisi jivi pejumecovënëtsinexa. Itsiata baitsi jane paxamëyajuvënëjivi, caejivi ata, apo jumecovënëtsi bajarapalivaisi. Bajarapalivaisi pacaitavetsi ata jivi panebeyaxuabiyani, ¿detsa xuajitsia itsiata xanë jamatabëpanebeyaxuabame? jai Jesús judíovijavabelia.

²⁰ Nexata judíovi jumaitsi Jesúsjavabelia:

—Dovathi baja cajena yajavaponapona. Itsajivi ata raja apo jamatabëcabeyaxuabi, jai judíovi.

²¹ Jesús nexata jumaitsi bajarapamonaejavabelia:

—Caejavayo Dioso pesaëta pinijicuene taexanaejava exanajë penacueraevetsimatacabita. Nexata itsa pataneme bajarapacune, daxita paxamë pajamatabëcuenenabenajacame penacueraevetsimatacabita taexanaexae bajarapacune. ²² Paxamë ata penacueraevetsimatacabita ata panacuenebababame. Tspajivi penacuetonëyo paperabëcautabiabame penacueraevetsimatacabita ata ocho pamatacabibeje itsa xaina penaexanaecujinae. Baitsi paboupiperabëcautabiabame, Moiséspijinë baja cajena papecaitorobicune. (Itsiata Moiséspijinë apo taxuxuabi bajarapacune. Bajaraponëmi cajena pevajënaeya ata, panijasalinaivimi taxuxuaba bajarapacune.) ²³ Bajarapacuenia penacuetonëyo paperabëcautabiabame penacueraevetsimatacabita ata, panejumecovënëtsinexa Moiséspijinë pitorobicuenia. ¿Detsa nexata xuajitsia xanë panebaraanaepaname penacueraevetsimatacabita pebi tajamatejemayaexanaejava yabara? ²⁴ Xaniavaetsia abaxë payapëtaenejevamë itsajivi pibisiacune pexanaejava, pëtsa abaxë pananeconitsiaexaname. Matapania xaniavaetsia payapëtaename, payanijobianamenua, itsa baja xaniajai naneconita, baja rajane pananeconitsiaexanaename, jai Jesús judíovijavabelia.

Pacuenia Jesús navajunupaeba itsaverena pata yabara pelivaisi

²⁵ Itsamonae Jerusalén tomarata pejinavanapaevi najumaitsi Jesús yabara:

—¿Matsa ponë apo jaitarutsitsi pebeyaxuabinexatsije? ²⁶ ¡Pataema! Bajaraponë cuaicuañjai tsanucæ daxitajivi pitabarata. Itsiata itsajivi ata apo jumeitavetsi. Vajanacaevetsivi ata meta jumecovënëta bajaraponë pepacune Dioso athëbëvetsica pitorobjavatsitsica jivi pecapanepaenexa.

Bajaraxuata bajarapamonae apo jumeitavetsi. ²⁷ Vaxaitsi cajena yapëtanetsi itsaverena pata maponëje. Nexata acuenebi pijacuata: “Cristonë raja,” pejajjava. Tspiji Cristo yabara tajëvelia jumaitsi mapacueniaje: “Itsajivi ata apo yapëtae tsane itsaverena patsijitsia Cristo,” jai, najai Jerusalén tomarapijivi Jesús yabara.

²⁸ Nexata Jesús livaisi petsipaebijavata templobota, jumetane bajarapamonae pebaracuaicuajijavatsi. Nexata Jesús ayajumeta jumaitsi bajarapamonaejavabelia:

—Xanë yabara pajumaitsimë: “Yapëtanetsi bajaraponë. Yapëtanetsinua itsaverena pata bajaraponë,” pajamë. Itsiata baitsi jane apo patsinë taja-matabëcueneta. Biji rajane taneitorobinëtsica ponapona athëbëtsia. Paxamë cajena apo payapëtaemë bajaraponë. ²⁹ Xanë yapëtaniji bajaraponë. Tspiji athëbëtsica tapatsinë. Bajaraponë baja cajena nitorobica manpacuayabetsicaje, jai Jesús bajarapamonaejavabelia.

³⁰ Nexata picani Jesús bajarapamonae jamatabëvaetabatsi penaneconitsi-aexanaexatsi. Itsiata abaxë itsajivi ata apo vaetabitsi. Tspiji abaxë Jesús apo tocopiapatsitsi pijamatacabi pevaetabinexatsi. ³¹ Itsiata baitsi jane bajarapomonaeyajuvënevë ayalbitsaëto jumecovënëta Cristocuene. Nexata bajarapomonaenajumaitsi:

—Itsa pina Cristo patsianica, Dioso pesaëta pinijicuene pexanaejava exanaena. Bajara maponë pepacuene Cristoje, ponë Dioso athëbëtsica itorobijitsiatsica jivi pecapanepaenexa. Tspiji nacatsitajëta pesaë. Pinijicuene pexanaejava exana Dioso pesaëta. Tspiji cajena itsanë ata mapanacuata apo caëjëpaetsi bajarapitsipinijicuene pexanaenexa, najai bajarapomonae Jesús yabara.

Pacuenia fariseovi itoroba policíavi Jesús pevaetabinexatsi yabara pelivaisi

³² Fariseovi jumetane jivi pejumaitsijava: “Pepacuene rabaja maponë Cristoje,” pejajjava Jesús yabara. Nexata fariseovibeje judíovi penamatacaitorobivibeje najamatabëcuenëjëpabeje pitorobinexa policíavi. Nexata policíavi pona templobojavabelia pevaetabinexatsi picani Jesús. Itsiata abaxë Jesús apo vaetabitsi. ³³ Jesús nexata templobota jumaitsi judíovijavabelia:

—Abaxë raja bajayayo itsiata pacayajavaponaponaenatsi. Bajaraxuacujinae jane baja naviatsianiajë taneitorobinëtsicajavabetsia. ³⁴ Paxamë picani panejaitsianame. Itsiata apo panecaxitajarabimë tsane. Tspiji apo pacacajëpae tsane paneponaenexa itsabetsia ponaejitsianë, jai Jesús judíovijavabelia.

³⁵ Nexata judíovi nayanijoba ëpamonae.

—¿De tsaeta belia maponë pijaponaejitsiaje peponaenexa, itsajota vaxaitsi apo caxitajarabijitsiatsi? Ponaejitsia raeta griëgovi pijatomaranëjavabelia, itsabelia judíovi jinavanapa. Griëgovi raeta livaisi tsipaebijitsia Jesús. ³⁶ Jesús nacajumaitsi: “Paxamë picani panejaitsianame. Itsiata apo panecaxitajarabimë tsane. Tspiji apo pacacajëpae tsane paneponaenexa itsabetsia ponaejitsianë,” nacajai. ¿De tsaeta pitsijamatabëcuene yabara bajarapacuenia Jesús nacajumaitsi? najai judíovi.

Apo pevereverecaamera yabara pelivaisi

³⁷ Pafiestamatacabi judíovi bobërëtonë exanabiaba, pecopiarucaematacabi, jivi bitso najamatabëcuenerëviabiaya bajinavanapa. Nexata bajarapamatacabi jivi ayalbitsaëto pitabarata Jesús nonotabapuna. Ayajumeta Jesús jumai tsanucæ:

—Pajivi mera jitsipa, xanëjavaberena ponae piapaenexa. ³⁸ Dioso pejumelivaisibaxutota jumaitsi mapacueniaje: “Pajivi nesivanajamatabëcuenecopatsiana, bajarapajivi pejamatabëëthëtota xainaena daxitamatacabi pepitsaparucaemera. Baitsi bajarapajivi asivaya teyabiabiana itsamonae ata. Nexata jamatabëcueneyavenonabiabiana itsamonae ata tanesivanajamatabëcuene copatsinexa, bajarapamonae ata pexainaenexa matacabi apo peverevereaejava,” jai Jesús judíovijavabelia.

³⁹ “Pajivi nesivanajamatabëcuenecopatsiana, bajarapajivi pejamatabëëthëtota xainaena daxitamatacabi pepitsaparucaemera,” itsa jai Jesús, jumaitsi Espíritu Santo yabara. Baitsi pajivi jumecovënëta Jesús petsipaebilivaisi, tsijamatabëcaenatsi Espíritu Santo. Itsiata baitsi jane abaxë Espíritu Santo apo patsitsica. Tsipaji abaxë Jesús apo ponae athëbëabetsia.

Pacuenia daxitajivi Jesús yabara apo najamatabëcuenejëpae yabara pelivaisi

⁴⁰ “Pajivi nesivanajamatabëcopatsiana, bajarapajivi pejamatabëëthëtota xainaena daxitamatacabi pepitsaparucaemera,” pejaijava Jesús, jivi itsa jumetane, itsamonae jumaitsi:

—Xaniajai rabaja. Maponë Diosojumepaebinë profetanëje, ponë copi-aevetavanapatsi pepatsijavanexatsica, jai bajarapamonae.

⁴¹ Itsamonae pijinia jumaitsi:

—Jume raja. Bajara maponë Cristoje, ponë Dioso athëbëvetsica itorobijitsica jivi pecapanepaenexa, jai itsamonae.

Itsiata itsamonae jumaitsi:

—¡Apo Cristo raja! Tsipaji Cristo Galilea nacuaverena apo patsi tsipae.

⁴² Dioso baja cajena pejumelivaisibaxutota jumaitsi pacuenia Davidpijinë pemomoxiyajuvënëne naexanaejitsia Cristo. Bajaraponë peneta naexanaena Belén tomarata, patomarata Davidpijinë bajayata ponapona, jai bajarapamonae.

⁴³ Bajarapacuenia nexata jivi ayailbitsaëto apo najamatabëcuenejëpae Jesús yabara. ⁴⁴ Itsamonae picani Jesús jamatabëvaetabatsi penaneconitsiaexanaenexatsi. Itsiata itsajivi ata apo vaetabitsi.

Pacuenia Jesús yabara judíovi pevetsivi apo jumecovënëtsi Cristonëcuene yabara pelivaisi

⁴⁵ Papolicíavi picani fariseovibeje judíovi penamatacaitorobivibeje itorobalia Jesús pevaetabinexatsi, itsiata apo vaetabitsi. Naviabalia baja cobesa. Nexata fariseovibeje judíovi penamatacaitorobivibeje jumaitsi policíavijavabelia Jesús yabara:

—¿Detsa xuajitsia apo pacaponaemërena bajaraponë? jai fariseovibeje judíovi penamatacaitorobivibeje.

⁴⁶ Nexata policíavi jumaitsi:

—Bajaraponë Dioso pitorobicueniatsi, xaniavaetsia jivi livaisi tsipaeba, itsajivi ata apo pepaëbicuenia. Bajaraxuata apo pavaetabinë patacaponaenexarena, jai policíavi.

⁴⁷ Nexata fariseovi jumaitsi:

—¿Paxamë ata tsabaja pacayamaxëitojoroba bajaraponë? ⁴⁸ Caenë ata vajanacaevetsiviyajuvënëne, fariseoviyajuvënëne ata, apo jumecovënëtsi baja cajena bajaraponë Cristonëcuene. ⁴⁹ Pamonae jumecovënëta bajaraponë Cristonëcuene, apo yapëtae pacuenia bajayata Dioso Moiséspijinëta penajumecopatsilivaisi jumaitsi jivi pejumecovënëtsinexa. Nexata bajarapamonae apo peyapëtaexae bajarapalivaisi, naneconita Diosojavabelia.

Nexata Dioso naneconitsiaexanaenatsi, jai fariseovi policíavijavabelia Jesús Cristonëcuene pejumecovënëtsivi yabara.

⁵⁰ Nicodemo, ponë copiaya Jesús taeyojopalia meravi, bajaraponë naeca bajarajota. Bajaraponë Nicodemo fariseoviyajuvënënë. Nicodemo nexata jumaiti pevëna fariseovijavabelia:

⁵¹ —Vajalivaisi cajena nacaitaveta itsajivi ata vajananeconitsiaexanaeyaniva, abaxë copiaya xaniavaetsia navajunupaebinejeva paneconi xaina bajarapajivi, jai Nicodemo.

⁵² Nexata bajarapamonae jumaiti Nicodemojavabelia:

—¿Xamë ata tsabaja Galilea nacuapijinëmë necajumecovënëtsi bajaraponë Cristonëcuene? Lebare Dioso pejumelivaisibaxuto. Yapëtaename pacuenia jumaiti. Caenë ata cajena Diosojumepaebinë profeta apo patsi Galilea nacujavaverena, jai bajarapamonae.

Petiriva pibisiacuene pexanaeva pamona pepëya yabara pelivaisi

⁵³ Fariseovibeje judíovi penamatacaitorobivibeje pebijataecujinae policíavi, fariseovi baja caenë canacujitsia naviaba pijabonëjavabelia.

8

¹ Jesús pona Olivovënë tsutojavabelia. ² Nexata meravia pitsijavata, bajayacunua, Jesús icatsia naviarena temploboyaberena. Nexata daxitajivi itaxutuanacaetuanatsi. Nexata Jesús ecojopa templobota. Livaisi tsipaeba bajarapamonaejavabelia. ³ Nexata temploboyaberena judíovi pecujarubivi, fariseovi yajava, caparena petiriva Jesúsjavaberena. Bajarapamonae petiriva vaetaba pamona pepëya itsanëjavabelia pevitota pibisiacuene pexanaponaponaejavata. Nexata petiriva nutatsi daxitajivi pitabarata. ⁴ Nexata judíovi pecujarubivi, fariseovi yajava, jumaiti Jesúsjavabelia:

—Jesús, mara povaje pavaetabajë pamona pepëya itsanëjavabelia pibisiacuene pexanaponaponaejavata. ⁵ Dioso Moiséspijinëta penajumecopat-silivaisi nacaitoroba baja cajena vajatseconaenexa ibotonëta bajarapitsiva vajabeyaxuabinexa bajarapacuenia. ¿Detsa paitsinë tsane mapovaje? jai bajarapamonae Jesúsjavabelia.

⁶ Bajarapamonae jumaiti bajarapacuenia Jesús saya pejamatabëcueneëjësinoxatsi. Nexata Dioso Moiséspijinëta penajumecopat-silivaisivecua, saicayacuenia, Jesús itsa jumecanaviata, bajarapamonae neivatsijitsiatsi picani. Itsiata Jesús jamatabëcueneyapëthane pacuenia bajarapamonae sivanajamatabëxainatsi. Nexata Jesús ira taeyecaxuaba. Pecobesitota ira yaquineca. ⁷ Bajarapamonae bitso yanijobapona Jesúsjavabelia. Nexata jane baja Jesús nonotapuna. Jumaiti bajarapamonaejavabelia:

—Ponë paxamëyajuvënënë pibisiacuene apo pexanaenë, bajaraponë copita iboto bixanae bajarapovajavabelia, jai Jesús.

⁸ Nexata icatsia Jesús ecareca. Ira taeyeca icatsia. Ira yaquineca icatsia. ⁹ Nexata bajarapamonae itsa jumetane bajarapacuenia Jesús pejumaitisijava, bajarapamonae najamatabënapita, caenë canacujitsia, pibisiacuene pexanavanapaejava. Nexata bajarapamonae, caenë canacujitsia, templobovecua pitsapapona. Copiaya perujuvi pitsapa. Bajaraxuacujinae pevëjëavi pitsapa. Itsa baja daxita pitsapa, caenë Jesús templobota nacopateca petiriva yajava. Bajarapova abaxë nuca bajarajota. ¹⁰ Nexata Jesús itsa nonotapuna, caeva taenuta. Nexata Jesús jumaiti petirivajavabelia:

—¿Detsa belia pona pamonaē caneconita picani? ¿Itsanē ata tsaja apo cabixanaē ibotota nijaneconi yabara pecananeconitsiaexanaenexa? jai Jesús petirivajavabelia.

¹¹ Nexata bajarapova jumaitsi:

—Jume raja. Caenē ata apo nebixanaē ibotota, jai bajarapova.

Nexata Jesús jumaitsi:

—Xanē ata apo cananeconitsiaexanaetsi. Ponare baja. Pētsa baja icatsia pibisiacuene exaname, jai Jesús bajarapovajavabelia.

Jesús mapanacuapijivije pexaniajailvaisita pejamatabēcueneitayotsinē yabara pelivaisi

¹² Jesús icatsia templobota jumaitsi jivijavabelia:

—Xanē raja pexaniajailvaisita daxitanacuapijivi jamatabēcueneitayotsianajē. Pajivi nepēnapeaena, bajarapajivi jamatabēcueneitayotsianajē. Nexata xainaena maticabi apo peverevere-caejava. Bajarapajivi itsamatacabijavabelia ata apo ajamatabēcueneitaquiri tsane, jai Jesús jivijavabelia.

¹³ Nexata fariseovi jumaitsi Jesúsjavabelia:

—Xamē saya nijacuata najamatabēcuenelivaisipaebame. Nexata apo payapētaenē nexaniajaicuene. Bajaraxuata apo pacajumecovēnētsitsi, jai fariseovi.

¹⁴ Jesús nexata jumaitsi fariseovijavabelia:

—Najamatabēcuenelivaisipaebi atanē tajacuata, itsiata cajena xaniajanē. Tsipaji xanē yapētaniji itsaverena patajē. Itsabelia ata ponaejitsianē, yapētaniji. Itsiata paxamē apo payapētaemē itsaverena patajē. Itsabelia ata ponaejitsianē, apo payapētaemē. ¹⁵ Paxamē paexanabiabame pacuenia baexana mapanacuapijivije. Itaxutojema jivi pananeconitsiaexanabiabame payapētaenejevamē pepacuene paneconivajēto xaina. Xanē abaxē apo naneconitsiaexanaenē itsajivi ata. ¹⁶ Itsiata itsamatacabī, itsa naneconitsiaexanaenajē Diosojavabelia pijaneconi pexainaēvi, naneconitsiaexanaenajē paneconivajētota xaina. Tsipaji caenēnē apo naneconitsiaexanaenē tsane. Taxa Dioso, ponē nitorobica, bajaraponē neyajava tsane jivi tananeconitsiaexanaematacabī. ¹⁷ Dioso Moiséspijinēta penajumecopatsilivaisi peyaquinaebaxutota jumaitsi mapacueniaje: “Palivaisi anijajivibeje najumejēpaeya paebabeje, bajarapalivaisi bepajumecovēnētame,” jai. ¹⁸ Xanē baja cajena najamatabēcuenelivaisipaebajē. Taxa ata, ponē nitorobica, nevajunupaeba. Nexata baja panijanēnēbeje najumejēpaeya pacatsipaebatsibeje xanē talivaisi, jai Jesús fariseovijavabelia.

¹⁹ Nexata fariseovi jumaitsi:

—¿Detsa jota nexata ponapona axa? jai.

Nexata Jesús jumaitsi fariseovijavabelia:

—Paxamē ra cajena apo paneyapētaemē. Taxa ata apo payapētaemē. Itsa paneyapētaejitsipame, nexata taxa ata payapētaejitsipame, jai Jesús fariseovijavabelia.

²⁰ Bajarapacuenia Jesús jumaitsi livaisi petsipaebijavata templobota. Itsajota ofrendacuenia palata pejebabiabicajonianē bobena, bajarajota Jesús livaisi tsipaebanuca. Itsiata abaxē itsajivi ata Jesús apo vaetabitsi penaneconitsiaexanaenexatsi. Tsipaji abaxē pijamatacabī apo tocopiapat-sitsi pevaetabinexatsi.

Pacuenia Jesús tajēvelia jumaitsi: “Paxamē apo pacacaējēpae tsane paneponaenexa itsabelia ponaejitsianē,” jai yabara pelivaisi

²¹ Jesús icatsia templobota tajëvelia jumaitsi fariseovijavabelia:

—Xanë pacavecuaponaenatsi. Nexata paxamë panejaitsonianame. Paxamë pibisiacuene paneexanaeconi, Dioso apo pacavecuajibiaexanae tsane. Nexata panijaneconi payajavatëpaename. Bajaraxuata paxamë apo pacacajëpae tsane paneponaenexa itsabelia ponaejitsianë, jai Jesús fariseovijavabelia.

²² Nexata judíovi jamatabëcuenenavëxaniabiaya najumaitsi Jesús yabara:

—Covë nabeyaxuabijitsia. Bajaraxuata nacajumaitsi: “Apo pacacajëpae tsane paxamë paneponaenexa itsabelia ponaejitsianë,” nacajai, najai judíovi.

²³ Nexata Jesús jumaitsi judíovijavabelia:

—Paxamë baja cajena mapanacuapijivimëje. Xanë saicaya athëbëvetsica tapatsinë. Paxamë mapanacuata panejinavanapaevije. Xanë raja maapo panacuapijinëje. ²⁴ Bajaraxuata pacajumaitsi: “Paxamë pibisiacuene paneexanaeconi, Dioso apo pacavecuajibiaexanae tsane. Nexata panijaneconi payajavatëpaename,” pacajaitsi. Nexata paxamë panijaneconi payajavatëpaename itsa apo panejumecovënëtsimë patacavecuajibiaexanaejavanexa pibisiacuene paneexanaeconi, jai Jesús fariseovijavabelia.

²⁵ Nexata fariseovi jumaitsi Jesúsjavabelia:

—¿Detsa xamë ponëmë? jai.

Jesús nexata jumaitsi:

—Pacanavajunupaebatsi rabaja. Tataxuxuabijavaveliacujinae livaisi patacatsipaebijava, pacanavajunupaebaponatsi baja cajena. ²⁶ Paxamë bitso pibisiacuene paexanabiabame. Nexata ayailivaisi xainajë itsamonaejavabelia patacavajunupaebinexa pibisiacuene paneexanaejava. Nexata pibisiacuene paneexanaeconi yabara, necajëpa picani patacananeconitsiaexanaenexa. Itsiata baitsi jane ponë nitorobica, petsipaebinë pexaniajailivaisi. Pacuenia bajaraponë netsipaeba xanëjavaberena, bajarapacuenia juya xanë tsipaebajë mapanacuapijivijavabeliaje, jai Jesús fariseovijavabelia.

²⁷ Itsiata baitsi jane fariseovi apo jumeyapëtae bajarapacuenia Jesús petsipaebijava paxa Dioso yabara. ²⁸ Bajaraxuata Jesús jumaitsi bajarapamonaejavabelia:

—Itsa xanë, Daxitajivi Pematapijinënë, paneyotarutsiaexanaename cruzjavabelia patanebeyaxuabiaexanaenamë, nexata matapania bajarapamatacabi paneyapëtaename ponëcuenenë. Nexata bajarapamatacabi payapëtaenamenua patacatsipaebijava apo tajamatabëcuenepijilivaisi. Biji rajane pacuenia taxa copiata netsipaeba, bajarapacuenia juya pacatsipaebatsi paxamëjavabelia. ²⁹ Taxa, ponë nitorobica, neyjavaponapona baja cajena. Tajaepato apo neponaponaeyaexanae. Tsipaji exanabiabajë pacuene yabara taxa nesivajamatabëcuenenëbarëyajitsia, jai Jesús bajarapamonaejavabelia.

³⁰ Itsa Jesús jumaitsi bajarapacuenia, ayabitsaëtoxaneto judíovi jumecovënëtsi Cristonëcuene: “Xaniajai cajena. Maponëje Dioso itorobicatsi,” jamatabëjai judíovi Jesús yabara.

Dioso pexi yabara pelivaisi, dovathi ata pexi yabara pelivaisi

³¹ Pajudíovi jumecovënëta Cristonëcuene, bajarapajudíovijavabelia Jesús jumaitsi:

—Itsa paxamë tsiteca pajumecovënëtaavanapaename patacatsipaebilivaisi, nexata baja pepacuene patajajivimë tsane. ³² Nexata palivaisi pacatsipaebatsi, payapëtaename baja pexaniajailivaisicuene. Nexata

baja itsa payapëtaename bajarapapexaniajailivaisi, pacopabianame baja itsanë papecaitorobicuenia panetoexanabiabijavami, jai Jesús bajarapajudíovijavabelia.

³³ Nexata pajudíovi apo jumecovënëtsi Cristonëcuene, jumaitsi Jesúsjavabelia:

—Paxanë rabaja cajena Abrahampijinë papemomoxinë. Paxanë dajubicuenia apo panecanajetsi itsanëjavabelia amoneya patatonacuenebabibinexa. “Pacopabianame baja itsanë papecaitorobicuenia panetoexanabiabijavami,” itsa panejamë, ¿detsa pitsilivaisi yabara panejumaitsimë? jai Jesúsjavabelia pajudíovi apo jumecovënëtsi Cristonëcuene.

³⁴ Jesús nexata jumaitsi bajarapajudíovijavabelia:

—Xaniajanë pacuenia pacatsipaebijitsiatsi. Daxita pamonae pibisiacuene pexanaevi, jamatabëcueneitorobabiabatsi dovathi pejamatabëcueneta.

³⁵ Ponë itsanë pijajivitonë naexana, bajaraponë itsiata pijatuxanenë apo pexiyajuvënënë. Ponë petuxanenë pexiyajuvënënë, daxitamatacabijavabelianexa petuxanenë pexënato tsaponaponae. ³⁶ Nexata pijinia xanë, Dioso pexënatonë, itsa copiarucaeyaxanaenajë dovathi papecaitorobabiabijavami, copiarucaeyaxanaenajë daxitamatacabijavabelianexa. Nexata baja dovathi apo pacaitorobabiabi tsane matavëjêa pibisiacuene paneexanaenexa. ³⁷ Yapëtaniji cajena Abrahampijinë papemomoxicuene. Itsiata baitsi jane jamatabëpanebeyaxuabame. Tsipaji apo panejumecovënëtsimë patacatsipaebilivaisi. ³⁸ Xanë rabaja pacuenia taxa netsitajëta, jivi tsipaebabiabajë. Paxamë ata paexanabiabame pacuenia paneaxajivi pacaitoroba, jai Jesús judíovijavabelia.

³⁹ Nexata judíovi jumaitsi:

—Pataxajivi baja cajena pexaniajamatabëcuenevi. Abrahampijinë rabaja cajena patamopijinëmi, patajasalinainëmi, jai judíovi.

Jesús nexata jumaitsi bajarapamonaejavabelia:

—Itsa pepacuene paxamë Abrahampijinë papemomoximë tsipae, paexanaejitsipame peneta pacuenia exanabiaba Abrahampijinëmi.

⁴⁰ Pacatsipaebi atatsi pexaniajailivaisi, pacuenia taxa Dioso netsipaeba, itsiata paxamë jamatabëpanebeyaxuabame. ¡Abrahampijinë cajena caeto ata apo exanae bajarapitsicuene! ⁴¹ Paxamë paexanabiabame pacuenia itsanë paneaxa pacaitorobabiaba, jai Jesús judíovijavabelia dovathi yabara.

Nexata judíovi jumaitsi:

—Paxanë cajena mapanacuataje pataenajivi apo panenacoxitsi itsanëjavabelia pataxajivivecua pibisiacuene pexanaecujinae. Paxainajë caenë pataxa, athëbëpjinë. Pataxa rabaja Dioso, jai bajarapamonae.

⁴² Nexata Jesús jumaitsi bajarapamonaejavabelia:

—Itsa pepacuene Dioso paneaxa tsipae, nexata paxamë asivaya pane-taejitsipame. Tsipaji Diosojavavetsica tapatsinë. Majotaje ponaponajë. Xanë raja saya tajamatabëcueneta apo patsinëtsica. Dioso raja nitorobica. ⁴³ ¿Detsa xuajitsia paxamë apo panejumeyapëtaemë patacatsipaebilivaisi? Apo pajitsipaemë patanenamuxunaevevetsinexamë bajarapalivaisi. ⁴⁴ Paxamë rabaja cajena paneaxa dovathi. Papijajivimë. Pejitsipaecuenia jamatabëpatoexanabiabame. Dovathi rabaja cajena jivibenë Dioso nacua pexanaejava petaxuxuabijavaveliacujinae. Pexaniajailivaisi apo najamatabëxainae. Caeto ata cajena pexaniajailivaisi apo paebi. Itsa najumetsënëta, bajaraponë pijacujiru baja cajena. Tsipaji pena-jumetsënëtsinë. Jivi ata najumetsënëtsiaexanabiaba. ⁴⁵ Xanë baja cajena pexaniajailivaisi pacatsipaebatsi. Itsiata apo panejumecovënëtsimë. ⁴⁶ ¿Jipatsa

paxamëyajuvënënë netane pibisiacuene taexanaejava? Ajibi cajena. It-sacuenejavayo ata, xua pibisiacuene, apo exanaenë. Pexaniajailivaisi pacatsipaebabiabi atatsi, ¿detsa xuajitsia itsiata apo panejumecovënëtsimë? ⁴⁷ Pajivi Dioso pijajivitonë, bajarapajivi namuxunaeveta Dioso pejumelivaisi. Itsiata baitsi xua paxamë Dioso apo papijajivimë. Bajaraxuata apo pajitsipaemë patanenamuxunaevetsinexamë Dioso pejumelivaisi, jai Jesús judíovijavabelia.

Pacuenia Cristo, ponë Dioso itorobica, ponapona baja cajena Abrahampijinë pevajënaeya ata yabara pelivaisi

⁴⁸ Judíovi jumaitsi Jesúsjavabelia:

—Paxanë itsa pacajumaitssiti: “Xamë raja Samaria nacuapijinëmë, dovathi neyjavaponaponaenë,” itsa pacajaisi, paxaniajanë cajena, jai judíovi Jesúsjavabelia.

⁴⁹ Jesús nexata jumaitsi judíovijavabelia:

—Xanë cajena dovathi apo yjavaponaponaenë. Xanë taxa Dioso yayi-ataeya ponaponajë. Itsiata paxamë apo paneyaiyataemë. ⁵⁰ Xanë raja xua exanaponajë, apo exanaenë jivi saya taneyaiyataenexa. Itsiata baitsi jane taxa netojitsipa jivi taneyaiyataenexa. Bajaraponë naneconitsiaexanaena pamonae apo neyaiyatae. ⁵¹ Xaniajanë pacuenia pacatsipaebijitsiatsi. Pajivi jumecovënëtsiana tatsipaebilivaisi, bajarapajivi tēpae ata tsane, pepacujiru apo tēpae tsane daxitamatacabijavabelianexa. Nexata xainaena matababi apo peverevereaejava, jai Jesús judíovijavabelia.

⁵² Nexata judíovi jumaitsi:

—Aeconoxae pepacuene dovathi pecayjavaponaponaejava, payapētaniji. Tspaji Abrahampijinëmi tēpa. Daxita Diosojumepaebivimi profetavi ata, tēpa. Itsiata xamë jumaitsimë tsaponae: “Pajivi jumecovënëtsiana tatsipaebilivaisi, bajarapajivi tēpae ata tsane, pepacujiru apo tēpae tsane daxitamatacabijavabelianexa,” jamë tsaponae. ⁵³ Vamopijinëmi Abrahampijinë, ayaijamatabëcuenenëmi ata, bajayata tēpa. Daxita Diosojumepaebivimi profetavi ata tēpa. ¿Xamë tsaja Abrahampijinëmi matatoxenetsia beayaijamatabëcuenenëmë nataneme? ¿Detsa beponëmë nataneme? jai judíovi.

⁵⁴ Jesús nexata jumaitsi judíovijavabelia:

—Itsa xanë tajacuata najumaitsinë tsipae: “Xanë bitso ayaijamatabëcuenenënë,” itsa janë tsipae, nexata ajumematamobinë tsipae. Itsiata baitsi jane taxa Dioso, ponë yabara paxamë ata: “PatajaDioso raja,” pajamë, bajaraponë neyaiyatane. ⁵⁵ Itsiata paxamë apo payapētaemë bajaraponë. Xanë cajena yapētaniji. Nexata xanë Dioso yapētae atanë, itsa yavajunuaxainaejitsipajë, “Apo yapētaenë cajena bajaraponë,” itsa janë tsipae Dioso yabara, najumetsënëtsipajë pacuenia paxamë panajumetsënëtabiabame. Itsiata xanë pepacuene Dioso yapētaniji. Jumecovënëtajënua pacuenia Dioso nitorobabiaba.

⁵⁶ Bajayata Abrahampijinë panijasalinainëmi jamatabëcuenenëbarëya. Tspaji tajëvelia yapētane mapanacuayabetsicaje tapatsijavanexatsica. Nexata Abrahampijinëmi nesivajamatabëcuenenëbarëya baja cajena, jai Jesús judíovijavabelia.

⁵⁷ Nexata judíovi jumaitsi Jesúsjavabelia:

—Abaxë raja xamë apo xainaemë cincuenta pavaibeje ata. ¿Detsa pacuenia nexata taejitsipame Abrahampijinë? Abrahampijinë baja cajena pepo bajayatami tēpa, jai judíovi Jesúsjavabelia jumeaebiaya.

⁵⁸ Jesús nexata jumaitsi judíovijavabelia:

—Xaniajanë pacuenia pacatsipaebijitsiatsi. Xanë raja cajena ponaponajë Abrahampijinë pevajënaeya ata, jai Jesús judíovijavabelia.

⁵⁹ Nexata bajarapacuenia Jesús itsa jumaitsi judíovijavabelia, judíovi nota ibotonë. Tseconaejitsiatsi picani Jesús ibotonëta. Itsiata baitsi jane Jesús namatayatsia pitsapa templobovecua bajarapamonae petuatujëalia. Jesús baja nexata judíovi itsajavabelia vecuapona.

9

Pacuenia Jesús itaxutoxanepanaeyaexana ecënaenë yabara pelivaisi

¹ Jesús najetaruca namutua. Nexata tane penaexanaejaveliacujinae bitso pitaxutotsëcënaenë. ² Nexata Jesús pijajivi jumaitsi Jesúsjavabelia:

—Patajatuxanenë, ¿detsa meta xuajitsia maponë naexana bitso pitaxutotsëcënaenëje? ¿Paxa tsaeta pibisiacuene pexanaejamatabëcuene? Itsa jume, ¿pena tsaeta pibisiacuene pexanaejamatabëcuene maponë itaxutotsëcënaje? Itsa jume, ¿baja tsaeta ponë pijacuata pibisiacuene natoexana? jai Jesús pijajivi.

³ Jesús nexata jumaitsi pijajivijavabelia:

—Jume raja. Mara ponëje paxa, pena ata, pibisiacuene pexanaejamatabëcuene, apo itaxutotsëcënaeje. Naexana bitso pitaxutotsëcënaenë saya daxitajivi petaenexatsi Dioso icatsia pitaxutoxanepanaeyaexanaejavatsi.

⁴ Payapëtaneme rabaja mapacueneje. Matacabita xanepana vajanacuenebinexa. Itsa baja meravi, acuenebi vajanacuenebinexa. Bajara pijinia itsinë xanë ata. Taponaponaematacabi xanepana tatonacuenebinexa ponë nitorobica. Itsa pamatacabi nebeyaxuabiana, acuenebi tsane tatonacuenebinexa. ⁵ Abaxë paepatojebi ponaponaenajë mapanacuataje, daxitajivi jamatabëcueneitayotsianajë pexaniajailivaisita, jai Jesús pijajivijavabelia.

⁶ Bajarapacuenia Jesús pejumaitsicujinae irabelia suabaxuaba. Peionitota tsorobojavayo exana. Nexata itaxutoexaba bitso pitaxutotsëcënaenë.

⁷ Nexata Jesús jumaitsi bitso pitaxutotsëcënaenëjavabelia:

—Ponare baja. Naitaxutoquiaremelia pecueyetsipucayojavabelia, Siloëvënë pucayojavabelia, jai Jesús.

“Siloé,” itsa jai bajarapamonae pijajumeta, mapajumeta pejumaitsi jume: “Pitorobinëtsitsica,” pejaijume.

Nexata bitso pitaxutotsëcënaenë lia baja. Naitaxutoquiatojopalia. Naviarena baja pitaxutoxanepanaenë. ⁸ Nexata itsajota ponapona bitso pitaxutotsëcënaenëmi, imoxoyo penaevi, pamonae ata taeyabiabatsi, daxita bajarapamonae nayanijoba.

—¿Matsa ponë palata amoneya pevajëcabiabecaenëmije? najai bajarapamonae.

⁹ Nexata itsamonae jumaitsi:

—Jājā, bajara covë ponë, jai.

Itsiata itsamonae jumaitsi:

—Apo ponë raja. Bajara saya itsiata beponë, jai.

Nexata pitaxutotsëcënaenëmi pijacuata jumaitsi:

—Jājā, xanë rabaja, jai bajaraponë.

¹⁰ Nexata bajarapamonae jumaitsi pitaxutotsëcënaenëmijavabelia:

—¿Detsa nexata pacuenia taneme baja? jai.

¹¹ Nexata pitaxutotsëcënaenëmi jumaitsi:

—Ponë raja Jesúsvenënë, exana tsorobojavayo. Nitaxutoexaba. Nexata ne-jumaitsi: “Liamëre pecueyetsipucayojavabelia, Siloévënë pucayojavabelia. Naitaxutoquiaremelia,” nejai Jesús. Nexata baja lianë. Itsa naitaxuto-quiatajê bajarapapucayota, taniji baja, jai pitaxutotsęcënaenëmi.

¹² Nexata bajarapamonae jumaitsi:

—¿Detsa jota bajaraponë ponapona? jai.

Nexata icatsia pitaxutotsęcënaenëmi jumaitsi:

—Apo yapëtaenë itsajota ponapona, jai.

Pacuenia bitso pitaxutotsęcënaenëmi caponaliatsi fariseovijavabelia peyanijobinexatsi yabara pelivaisi

¹³ Pitaxutotsęcënaenëmi pitaxutoxanepanaejava jivi itsa tane, yanijobatsi peyapëtaenexa pacuenia itaxutoxanepana. Pamonaë yanijobaponatsi, bajarapamonae pitaxutotsęcënaenëmi caponaliatsi fariseovijavabelia.

¹⁴ Pamatacabi Jesús exana tsorobojavayo pitaxutoxanepanaeyaexanaenexa bitso pitaxutotsęcënaenëmi, bajarapamatacabi judíovi penacueraevetsimat-acabi. ¹⁵ Nexata jane baja fariseovi yanijoba pitaxutotsęcënaenëmijavabelia.

—¿Detsa pacuenia nexata itaxutoxanepaname? jai fariseovi.

Nexata pitaxutotsęcënaenëmi jumaitsi:

—Nitaxutoexaba raja tsorobojavayota. Bajaraxuacujinaë naitaxuto-quiatajê. Nexata aeconoxae taniji baja, jai pitaxutotsęcënaenëmi fariseovi-javabelia.

¹⁶ Nexata fariseovi najumaitsi:

—Ponë bajarapacuenë exana, Dioso apo pitorobinëtsi cajena. Tsipaji apo yayiyataë penacueraevetsimatacabi, najai fariseovi.

Itsiata bajarapamonaeyajuvënëvi itsamonaë najumaitsi:

—Itsa pibisiacuene pexanaenë tsipae, apo caëjêpae tsipaetsi bajarapitsip-inijicuene pexanaenexa, najai itsamonaë.

Nexata daxita fariseovi apo najamatabëcuenejêpae. ¹⁷ Nexata icatsia fariseovi yanijoba pitaxutotsęcënaenëmijavabelia.

—¿Detsa jane xamë bejamatabëitsimë ponë caitaxutoxanepanaeyaexana yabara? jai fariseovi.

Nexata pitaxutotsęcënaenëmi jumaitsi:

—Bajaraponë cajena Diosojumepaëbinë profeta, jai.

¹⁸ Judíovi apo jumexaniataë pitaxutoxanepanaeyaexanaejavatsi yabara. Nexata bajarapamonae junata pitaxutotsęcënaenëmi paxa, pena yajava.

¹⁹ Judíovi jane baja yanijoba pitaxutotsęcënaenëmi paxabeje penabejejavabelia. Jumaitsi:

—¿Baja tsa maponë panexënatobejeje, ponë penaexanaejavaveliacujinaë pitaxutotsęcënaenëmije? ¿Detsa pacuenia aeconoxae baja tane? jai judíovi.

²⁰ Nexata pitaxutotsęcënaenëmi paxabeje penabeje jumaitsiibeje:

—Maponëje pataxënatobeje payapëtanijibeje cajena. Payapëtanijibejenua penaexanaejavaveliacujinaë pitaxutotsęcënaejava. ²¹ Itsiata baitsi jane aeconoxae apo payapëtaenëbeje pacuenia baja itaxutoxanepana. Apo payapëtaenëbejenua ponë itaxutoxanepanaeyaexanatsi. Bajaraponë taxënato payanijobare. Penaveretsinë rabaja. Pijacuata pacatsipaëbiana, jai pitaxutotsęcënaenëmi paxabeje penabeje judíovijavabelia.

²² Judíovi baja cajena najamatabëcuenejêpa pevajënaeitavetsinexa penajoneyaniva judíovi penacatuatabibojavaberena pajivi jumaitsi: “Jesús rabaja cajena Cristo, ponë Dioso athëbëvetsica itorobijitsiatsica jivi pecapanepaenexa,” pejaijivi. Bajaraxuata pitaxutotsęcënaenëmi

paxabeje penabeje bajarapacuenia jumecanaviatabeje pecujunavixaebeje judíovi. ²³ Bajaraxuata bajarapajivibeje jumaitsibeje: “Taxénatojavabelia payanijobare. Penaveretsinē rabaja,” jaibeje.

²⁴ Nexata judíovi icatsia junata pitaxutotsēcēnaenēmi. Jumaitsi bajara-ponējavabelia:

—Panetsipaebare xaniavaetsia Dioso pitabarata. Paxanē baja cajena payapētāniji bajaraponē pibisiacuene pexanaenēcuene, jai judíovi Jesús yabara.

²⁵ Nexata pitaxutotsēcēnaenēmi jumaitsi:

—Pibisiacuene meta pexanaenē. Xanē apo yapētaenē. Itsiata baitsi jane nitaxutoxanepanaeyaexana taitaxutotsēcēnaenēmi, jai pitaxutotsēcēnaenēmi.

²⁶ Nexata icatsia judíovi jumaitsi:

—¿Detsa pacuenia catonexana netaexa? jai judíovi.

²⁷ Nexata pitaxutotsēcēnaenēmi jumaitsi judíovijavabelia:

—Pacatsipaebatsi rabaja picani xaniavaetsia. Itsiata apo panejumecovēnētšinē. ¿Detsa xuajitsia pajitsipame patacatsipaebaponaenexa icatsia? ¿Paxamē ata tsaja pajitsipame panejumecovēnētšinexa bajaraponē papijajivinxamē? jai pitaxutotsēcēnaenēmi judíovijavabelia.

²⁸ Nexata judíovi bijatanetsi pitaxutotsēcēnaenēmi. Jumaitsitsi:

—Xamē raeta baja cajena bajaraponē pijajivitonēmē. Paxanē raja saicaya Moiséspijinē petsipaebilivaisi pajumecovēnētavanapajē. ²⁹ Paxanē baja cajena payapētāniji pepacuene Dioso pebarēcuaiquaijajivatsi Moiséspijinē. Itsiata baitsi jane ponē cabarēcuaiquaijai, apo payapētaenē itsaverena pata, jai judíovi.

³⁰ Nexata pitaxutotsēcēnaenēmi jumaitsi judíovijavabelia:

—¿Detsa xuajitsia nitaxutoxanepanaeyaexanae ata, apo payapētaemē itsaverena pata bajaraponē? ³¹ Yapētanetsi baja cajena mapacueneje. Diosojavabelia vajētsi ata pamonaē pibisiacuene pexanaevi, Dioso baja cajena apo namuxunaevetsi. Dioso baja cajena banamuxunaeveta itsa vajētatsi pejtisipaecuenia yaityaeya petojinavanapavetsi. ³² Caeto ata mapanacuapijivi apo vënëlivaisitaetsi ponē caējēpatsi pitaxutoxanepanaeyaexanaenexa penaexanaejavaveliacujinae bitso pitaxutotsēcēnaenē. ³³ Peneta bajaraponē itsa apo patsi tsipae Diosojavavetsica, nexata apo caējēpaetsi tsipae pexanaenexa Dioso pesaēta pinijicuene pexanaejava, jai pitaxutotsēcēnaenēmi judíovijavabelia.

³⁴ Nexata judíovi jumaitsi:

—Xamē cajena pibisiacuene exaname nenaexanaejavaveliacujinae. ¿Itsiata tsaja caranata pibisiacuene nexanaenē jamatabēpanemuxujibame? jai judíovi pitaxutotsēcēnaenēmijavabelia.

Nexata torotajarabaxuabatsi judíovi penacatuatabiabibo pevecuapitsapaenexa.

Pacuenia Dioso apo pejumecovēnētšivi jamatabēcueneaitaquiri tsavanapae yabara pelivaisi

³⁵ Jesús vënëlivaisitane pitaxutoxanepanaeyaexanaenē judíovi petorobajarabijavatsi judíovi penacatuatabiabibo pevecuapitsapaenexa. Nexata Jesús itsa caxitjaraba pitaxutoxanepanaeyaexanaenē, Jesús jumaitsi pitaxutoxanepanaeya exanaenējavabelia:

—¿Najamatabēcopatame tsabaja Dioso pexénatojavabelia? nayabarajai Jesús.

³⁶ Nexata ponē Jesús itaxutoxanepanaeyaexana, jumaitsi:

—¿Detsa ponē Dioso pexēnato tanajamatabēcopatinsixa bajara-ponējavabelia? jai.

³⁷ Jesús nexata pijacuata nayabarajumaitsi:

—Ponē rabaja cabarēcuaiquaijai, Dioso rabaja pexēnato, nayabarajai Jesús.

³⁸ Nexata ponē Jesús itaxutoxanepanaeayaexana, pematabacabēta nuca Jesús pitabarata. Jumaitsi Jesúsjavabelia:

—Tajatuxanenē, casivanajamatabēcopatatsi baja cajena, jai.

³⁹ Nexata Jesús jumaitsi pitaxutoxanepanaeaya exanaenējavabelia:

—Xanē patajē mapanacuayabetsicaje jivi penayapētaenexa pijaneconi pexainaejava. Nexata pamonaē pexaniajailivaisi tatsipaebijavata najamatabēcueneyapētaena pijaamatabēcuenetaquiririjava, bajarapamonae jamatabēcueneyatotsianajē pexaniajailivaisita. Pamonaē jemajai. Apo yapētae ata pexaniajailivaisi, jamatabējumaitsi: “Vaxaitsi rabaja yapētanetsi pexaniajailivaisi,” jamatabējai, bajarapamonae apo jamatabēcueneyatotsinē tsane, jai Jesús.

⁴⁰ Nexata fariseovi, bajarajota penubenaevi, jumetane bajarapacuenia Jesús pejumaitsijava. Nexata fariseovi jumaitsi Jesúsjavabelia.

—¿Paxanē ata tsabaja pajamatabēcuenetaquirinē tsavanapae? jai.

⁴¹ Jesús nexata jumaitsi fariseovijavabelia:

—Jājā, bitso pajamatabēcuenetaquirimē tsavanapae. Tsipaji jamatabēcuenenavēxaniabiaya pajamatabējumaitsimē tsabiabi: “Vaxaitsi rabaja jumecovēnētatsi Dioso,” pajamatabējame tsabiabi. Nexata Dioso pejumelivaisi payapētae atamē, itsiata pibisiacuenae paexaniabiabame. Nexata bitso pananeconitame Diosojavabelia. Paxamē Dioso pejumelivaisi apo paneyapētaexae, itsa pajamatabēcuenetaquirimē tsipae, nexata bitso apo pananeconitsimē tsipae Diosojavabelia, jai Jesús fariseovijavabelia.

10

Oveja pecajoneyabiabicorral yabara pelivaisi

¹ Jesús jumaitsi fariseovijavabelia:

—Xaniajanē pacuenia pacatsipaebijitsiatsi. Oveja pecajoneyabiabicorral ēnēabelia saicayanē pejonenexa, apo jone corral baupajava. Junaya saya peyenepanatsia pejonenexalia. Bajaraponē penacobetoxotsinēnexa oveja. ² Ponē peneta joneya corral baupayalia, bajaraponē cajena oveja pevetsinē.

³ Nexata corral baupa pevetsinē tobaupatatsi pijaoveja pecapitsapaenexa. Itsa baja pijaoveja capitsapa corralvecua, pijaoveja jumeyapētanetsi. Tsipaji junataponā pijaoveja caenē canacujitsia pevēnēta. ⁴ Pecapitsapaecujinae daxita pijaoveja, bajaraponē oveja pevājēnaeaya namataxainanajetaruca. Nexata pijaoveja pēnaponatsi. Tsipaji jumeyapētanetsi pijaoveja. ⁵ Oveja apo pēnaponaē tsipae saicayanē. Tsipaji apo jumeyapētae. Vecuarēcēpecaejitsipa saya, nayabarajai Jesús fariseovijavabelia.

⁶ Bajarapacuenia Jesús oveja pevetsinēcuenia nataeaya comparacióncuenia nalivaisipaeba fariseovijavabelia. Itsiata fariseovi apo jumeyapētaetsi Jesús comparacióncuenia penalivaisipaebijava.

Pacuenia Jesús xaniavaetsia eveta pijajivi yabara pelivaisi

⁷ Jesús jumaitsi fariseovijavabelia:

—Xaniajanē pacuenia pacatsipaebijitsiatsi. Pacuenia oveja junua corral baupajava, pepanepaenexa corral ēnēaberena, bajara xanē itsinē jivi pejonenexa xanējava, pepanepaenexa Dioso pijatomarabetsia. ⁸ Itsamonae xanē tavājēnaeaya penajumetsenēsilivaisi jivi tsipaebapona. Bajarapamonae

oveja bepenacobetoxotsivi. Jamatabēneyacajērēta tajajivi. Itsiata baitsi jane tajajivi apo jumecovēnētsi bajarapamonae. ⁹ Xanē rabaja cajena baupanē. Pajivi nesivanajamatabēcopatsiana, jonena xanējava pepatsinexa Dioso pitajomarabetsia. Bajarapajivi capanepaenatsi Diosojavabelia. Pijaoveja xaniavaetsia pevetsinē, caebajayacunua canacujitsia capitsapa corralvecua oveja pexaejava pejaitsinexa. Icatsia caecaniviyo canacujitsia cajunua corraljavaberena. Bajara pijinia pacuenia xanē ata xaniavaetsia evetsianajē pajivi nesivanajamatabēcopatsiana, jai Jesús fariseovijavabelia.

¹⁰ Icatsia Jesús jumaitsi fariseovijavabelia:

—Penacobetoxotsinē bapata oveja penacobetoxotsinexa, pebeyaxu-ababiabinexanua. Bajarapacuenia oveja peveretaponaenexa bapata. Bajara pijinia jamatabēcueneitsi pamonae pata penajumetsēnētsilivaisi jivi petsipaebaponaenexa. Itsiata baitsi jane xanē patajopacajē mapanacuayabetsicajē xanē tajamatabēcueneta jivi pexainaenexa maticabi apo pevereverecejaveja, bitso jamatabēcuenebarēyaya pejinavanapaenexanua. ¹¹ Pacuenia itsi xaniavaetsia pevetsinē pijaoveja, bajara pijinia xanē itsinē taevetsinexa tajajivi. Xaniavaetsia pevetsinē pijaoveja jamatabējumaitsi: “Itsanē netobeyaxuabijitsia ata tsane tajaoveja, apo copatsinē tsane tanetoyajuvēnēbeyaxuabiyaniya tajaoveja. Nexata xanē tajaoveja yapijivinacaevetsianajē tanebeyaxuabinexa,” jamatabējai. Bajara pijinia xanē ata jamatabēitsinē tajajivi yabara. ¹² Itsiata ponē saya toevetsipa itsanē pijaoveja, bajaraponē apo xainae tsipae bajarapaovejabitsaēto. Saya toevetaponaponaejitsipa pematamotsinexatsi. Nexata nevēthē oveja itsa tsimaxēnajataraeajitsipa, bajaraponē xuabatabajiravijitsipa ovejabitsaētomi. Nexata oveja nevēthē itsa yajuvēnēvaetabijitsipatsi, nacayajatecaejitsipa ovejabitsaētomi. ¹³ Oveja pevetsinē najetabajiravijitsipa. Tsipaji saya pematamotsinexatsi nacuenebaponaponaejitsipa. Nexata apo jamatabēbjai tsipae oveja yabara, jai Jesús fariseovijavabelia.

¹⁴⁻¹⁵ Icatsia Jesús jumaitsi:

—Pacuenia itsi xaniavaetsia pevetsinē pijaoveja, bajara pijinia itsinē xanē ata taevetsinexa tajajivi, pamonae taniji beovejacuenia. Pacuenia taxa neyapētane, bajara pijinia pacuenia xanē ata yapētaniji taxa. Pacuenia pijinia xaniavaetsia yapētaniji tajajivi, bajara pijinia pacuenia tajajivi ata neyapētane. Xanē sivatēpaenajē tajajivi. ¹⁶ Xainajē baja itsabitsaēto tajajivi. Itsiata abaxē bajarapamonae apo yajavajinavanapae mapabitsaētojavataje. Itsiata itsamaticabi capatsianajē bajarapamonae mapabitsaētojavaberena. Nexata daxita bajarapamonae nejumecovēnētsiana taitorobicuenia. Caebitsaētoxfaneto jane baja tajajivi netonaexanaena. Bajarapamonae xanē caenēnē evetsianajē, jai Jesús.

¹⁷ Icatsia Jesús jumaitsi:

—Taxa niasiva. Tsipaji tajajivi yabara nacaevetsianajē tanebeyaxuabinexa. Itsiata icatsia tatēpaecujinae asaēnē tsane. ¹⁸ Itsa apo nacaevetsinē tsipae tanebeyaxuabinexa, itsajivi ata apo caējēpaetsi tsipae tanebeyaxuabinexa. Itsiata tajacuata nacaevetsianajē tanebeyaxuabinexa. Necaējēpa tatēpaenexa. Necaējēpanua icatsia tasaēnēna tatēpaecujinae. Bajarapacuenia taxa netocopata, jai Jesús.

¹⁹ Judíovi itsa jumetane bajarapacuenia Jesús pejumaitsiyava, judíovi apo najamatabēcuenejēpa. ²⁰ Judíovi ayailbitsaēto najumaitsi Jesús yabara:

—Dovathi raja bajaraponē yajavaponaponatsi. Matajemabatsi ra saya. ¿Detsa xuajitsia bajaraponē panamuxunaevetame? najai bajarapamonae.

²¹ Itsiata bajarapamonae yajuvēnēvi itsamonae najumaitsi:

—Ponë dovathi yajavaponaponatsi, apo caējēpaetsi tsipae cajena pecuaicuaijainexa mapacueniaje. Apo caējēpaetsinua tsipae pitaxutoxanepanaeyaexanaenexa bitso pitaxutotsēcēnaenēmi, najai bajarapamonaeyajuvēnēvi Jesús yabara.

Pacuenia Jesús judíovi navecuaitavetatsi yabara pelivaisi

²² Emarapaeta Jerusalén tomarata fiesta exana. Bajarapafiesta exana judíovi penajamatabēnapitsinexa bajayata judíovi pijasalinaiví templobo pexanebetsijava. ²³ Nexata pamatacabi fiesta exana, Jesús ponapona bajarapatemplobojavata, Portal de Salomónvñējavata. ²⁴ Nexata Jesús judíovi matatoyorotsi nacaatuatatsi. Judíovi jumaitsi Jesúsjavabelia:

—Apo payapētaenē pacuenia panajamatabēxainaejitsianē xamē yabara. ¿Detsa pacujinae paneyapētaeyaexanaenama patacayapētaenexa pepacuene ponēmē? Itsa pepacuene Cristomē, Dioso athēbēvetsica pecaitorobinētsica jivi necapanepaenexa, panetsipaebare cajena rovalia, jai judíovi.

²⁵ Jesús nexata jumaitsi judíovijavabelia:

—Pacatsipaebatsi rabaja picani rovalia. Itsiata apo panejumecovēnētsimē. Taxa Dioso pesaēta pinijicuene exanajē. Bajara papinijicuene exanajē taxa taneitorobicuenia. Nexata itsa exanajē bajarapapinijicuene, pacatsitaexanatsi picani taxa taneitorobicuene. ²⁶ Itsiata baitsi jane apo panejumecovēnētsimē Cristonēcuenenē. Tsipaji paxamē apo patajajivimē. ²⁷ Tajajivi, pamonaē taniji beovejacuenia, bajarapamonaē nejumeyapētane. Bajarapamonaē pijinia yapētaniji. Nexata nepēnapona. ²⁸ Bajarapamonaē rajutsianajē matacabi apo peverevecaejava. Bajarapamonaē taxa Diosovecua apo naxuabi tsane. Itsajivi ata apo neyacajērētsi tsane tajajivi. ²⁹ Taxa baja cajena ayaijamatabēcuenenē daxitajivi matatoxenetsia. Bajaraponē nerajuta bajarapamonaē. Nexata itsajivi ata apo caējēpaetsi tsane taxa pecobevecua pepitsinexa bajarapamonaē. ³⁰ Taxa, xanē, caenē rabaja panaexanajēbeje, jai Jesús judíovijavabelia.

³¹ Nexata picani bajarajota judíovi jamatabēbeyaxuabatsi Jesús. Judíovi nota ibotonē Jesús picani petseconaexatsi ibotonēta. ³² Jesús nexata jumaitsi judíovijavabelia:

—Ayajjava pexaniacuene taxa Dioso pesaēta exanaponajē paxamē paneitabarata. ¿Detsa nexata pitsineconi yabara panetseconaejitsiamē ibotonēta? Jai Jesús judíovijavabelia.

³³ Judíovi nexata jumaitsi:

—Pexaniacuene raja nexanaejava yabara apo pacatseconaejitsiatsi. Pacatseconaejitsiatsi raja nenaneconitsixae Diosojavabelia. Tsipaji pibisiacuena, Dioso apo pejitsipaecuena, cuaicuaijamē. Xamē saya jivitonē atamē, beDiosonēmē nataneme, jai judíovi Jesúsjavabelia.

³⁴ Jesús nexata jumaitsi judíovijavabelia:

—Dioso pejumaitsiyava, Dioso pejumelivaisibaxutota jumaitsi mapacueniaje: “Paxamē ata rabaja padiosovimē,” jai Dioso pejumelivaisibaxutota Dioso pejumecovēnētsivi yabara. ³⁵ Nexata Dioso pejumelivaisibaxutota bajarapacuenia itsa jumaitsi Dioso pejumecovēnētsivi yabara, acuenēbi bajarapamonaē yabara vajajumaitsinexa: “Bajarapamonaē apo diosovi,” vajajainexa. ³⁶ Dioso cajena nitapeta. Nexata nitorobica mapanacuayabetsicaje. ¿Detsa nexata xuajitsia panėjumaitsimē: “Xamē raja naneconitamē Diosojavabelia. Pibisiacuena cuaicuaijamē Dioso apo pejitsipaecuena. Tsipaji jumaitsimē: ‘Xanē raja Dioso pexēnatonē,’ jamē,” panejamē. ³⁷ Itsa apo

exanaenë tsipae pacuenia taxa nitoroba, nexata acuenebi tsipae patanesivanajamatabëcopatsinexamë. ³⁸Itsiata baitsi jane exanaponajë pacuenia taxa nitoroba. Nexata apo panesivanajamatabëcopatsi atamë, itsiata bepajumecovënëtamë Dioso pesaëta taexanaejava, pacuene baja exanaponajë. Itsa pajumecovënëtsianame bajarapacuene Dioso pesaëta taexanaponaejava, nexata payapëtaename taxa Dioso taneyajavaponaponaejava. Payapëtaenamenua xanë ata pijinia taxa Dioso tayajavaponaponaejava, jai Jesús judíovijavabelia.

³⁹ Bajarapacuenia Jesús jumaitsi ata, itsiata judíovi jamatabëvaetabatsi penaneconitsiaexanaenexatsi. Itsiata Jesús vecuapanepa.

⁴⁰ Nexata Jesús navalia Jordánmene itsapanabelia, panacuatalia copiaya Juanpijinë jivi bautisababiaba. Bajarajotalia Jesús ponapona. ⁴¹Jivi ayaibitsaëtoxaneto ponalia petaenexatsi Jesús. Nexata bajarapamonae jumaitsi:

—Juanpijinë Dioso pesaëta pinijicuene apo exanaponae ata, itsiata daxita pacuenia tajëvelia vajunupaeba maponë yabaraje, xaniajai cajena, jai bajarapamonae Jesús yabara.

⁴² Nexata jane baja bajarajota jivi ayaibitsaëtoxaneto jumecovënëta Jesús Dioso athëbëvetsica pitorobinëcuenetsi.

11

Pacuenia baja Lázaro tēpa yabara pelivaisi

¹ Lázaro, Betania tomarapijinë, avitane tsanucaë Betania tomarata. Bajarapatomarata ponaponabeje pematapijivabeje, Mariabeje Martabeje. ²Bajarapova María itsamatacabi Jesús tsitaxuepanaena petuxujuvira. Daxitarayomi tsitaxuepanaena. Bajaraxuacujinae bajarapova pematnata taxuiquicaenanua. ³Nexata pamatacabi Lázaro avitane tsanucaë, Mariabeje Martabeje tonajumeitorobaliabeje Jesús. Jumaitsiabeje:

—Tajatuxanenë, niasivanë raja Lázaro catoavitane, jaibeje.

⁴ Jesús itsa jumetane bajarapovabeje petonajumeitorobijumetsi, nexata Jesús jumaitsi pijajivijavabelia:

—Mapavitane taje Lázaro apo tēpae tsane daxitamatacabijavabelianexa. Biji rajane bajarapavitane pejamatabëcueneta jivi yapëtaena Dioso pinijicuene pexanaenexa pecaëjēpaenëcuenetsi. Yapëtaenanua xanë ata, Dioso pexënatonë, pinijicuene taexanaenexa tanecaëjēpaenëcuene, jai Jesús pijajivijavabelia.

⁵ Jesús bitso asivaya taeyabiaba Martabana, Mariabana, Lázarobana. ⁶ Jesús vënëlivaisitae ata Lázaro bitso piavitanejava, itsiata abaxë apo ponae Betania tomarabelia. Anijamatacabibeje abaxë ponapona Jordánmene itsapanatalia.

⁷ Bajaraxuacujinae Jesús jumaitsi pijajivijavabelia:

—Ponaliatsi icatsia Judea nacuyabelia, jai Jesús.

⁸ Jesús nexata pijajivi jumaitsi:

—Patajatuxanenë, canivita saya judíovi bajarajotalia jamatabëcatseconapicani ibotonëta. ¿Itsiata tsabaja icatsia ponaeliatsi bajarabelia? jai pijajivi.

⁹ Jesús nexata jumaitsi pijajivijavabelia:

—Matacabi raja xaina doce pahorabeje. Nexata pajivi matacabita ponapona, apo firapecae. Tsipaji icotiata napebeta xaniavaetsia. ¹⁰Itsiata pajivi meravi ponapona, firapeca. Tsipaji meravi apo napebetsi xaniavaetsia. Bajara pijinia xanë ata itsinë. Ponaë ata tsanetsi Betania tomarabelia, itsiata apo nitsacueniabi tsane. Tsipaji abaxë tajamatacabi apo netocopiapatsi, jai Jesús pijajivijavabelia petëpaejavanexa yabara.

¹¹ Bajaraxuacujinae Jesús peponaevajēnae jumaitsi pijajivijavabelia:

—Vajayapëtaenë rabaja Lázaro majitanuca. Nexata baja ponajë. Itavabijitsianë Lázaro, jai Jesús.

¹² Nexata pijajivi jumaitsi:

—Patajatuxanenë, itsa raeta saya Lázaro majitanuca, itsiata jamatejema tsane, jai Jesús pijajivi.

¹³ “Vajayapëtaenë rabaja Lázaro majitanuca,” itsa jai Jesús, Jesús picani pejumaisijume, “Lázaro rabaja tēpa,” pejajjume. Itsiata Jesús pijajivi apo jumeyapëtaetsi. Bajarapamonae Jesús pijajivi jamatabëcuenenavëxaniabiaya jamatabëjumaisi: “Lázaro meta saya majitanuca pacuenia majitanucabiaba meravi,” jamatabëjai. ¹⁴ Bajaraxuata nexata Jesús roviaalia jumaitsi pijajivijavabelia:

—Lázaro rabaja tēpa. ¹⁵ Paepatota Lázaro tēpa, bajarajotalia apo ponaponanë. Bajaraxuata barëyanë paxamë yabara. Barëyanë tsipaji Lázaro petëpaexae, xaniavaetsia panejumecovënëtsianame. Baja nexata ponatsi, jai Jesús pijajivijavabelia.

¹⁶ Jesús pijajiviyajuvënënë, Tomás, ponë icatsia itsavënë vënërubatsi Sapalanë. Bajaraponë jumaitsi penajuaponaevijavabelia:

—Naponatsi Jesús pepëta. Ibotonëta itsa tseconatsi, vajayajavatëpaenexa bajaraponë, jai Tomás.

Pacuenia Jesús cajëpatsi petëpaevi ata icatsia piasaëyaexanaenexa yabara pelivaisi

¹⁷ Pepuaxainae baja cuatro pamatacabibeje Lázaropijinë pemëthëtsicujinaetsi, Jesús matapania patajopa Betania tomarata.

¹⁸ Betaniatomara eca imoxoyo Jerusalén tomaravecu. Bejamatabëcuene anijakilómetrobeje eputua navecuacabeje bajarapatomarabeje. ¹⁹ Jesús pepatsivajënaeya Betania tomarata, ayaibitsaëtoxaneto judíovi pata Martabeje Mariabejevaberena Lázaro petëpaexae. Bajarapamonae jumaitsi bajarapovabejevabelia:

—Paxanë itsiata pacayanabatsi. Panajamatabëxainajë paxanë ata papecavecuatëpaexaebeje panejuyapijinëbeje, Lázaro, jai bajarapamonae.

²⁰ Itsa Marta vënëlvaisitane Jesús penajetarucejava, pitsapa pijabovecu pemataenenaenexa Jesús. María itsiata bota nacopateca. ²¹ Nexata Marta itsa mataenatsi Jesús, Marta jumaitsi Jesúsjavabelia:

—Tajatuxanenë, itsa majota ponaponaejitsipameje, apo tēpae tsipae tajuyapijinë. ²² Itsiata yapëtaniji aeconoxae ata Dioso carajutsiana daxita pacuene vajëtame Diosojavabelia, jai Marta.

²³ Nexata Jesús jumaitsi Martajavabelia:

—Nejuyapijinë raja itsiata icatsia asaë tsaaponaponae tsane, jai Jesús.

²⁴ Nexata Marta apo jumeyapëtae Jesús piasaëyaexanaejavanexa Lázaro. Bajaraxuata Marta jumaitsi Jesúsjavabelia mapacueniaje:

—Yapëtaniji rabaja pacuenia icatsia Lázaro Dioso asaëyaexanaejitsiatsi pamatacabita icatsia asaëyaexanaenatsi daxita petëpaevimi, jai Marta.

²⁵ Nexata Jesús jumaitsi Martajavabelia:

—Xanë rabaja petëpaevi ata icatsia tasaëyaexanaenë, tarajutsinë matacabi apo pevereverecejave. Pajivi nejumecovënëtsiana Cristonëcuenënë, bajarapajivi tēpae ata, itsiata icatsia asaë tsane. ²⁶ Pajivi abaxë pamatacabita asaë tsaaponaponae mapanacuataje, itsa nejumecovënëtsiana Cristonëcuenënë, bajarapajivi tēpae ata, xainaena matacabi apo pevereverecejave. ¿Xamë tsabaja bajarapalivaisi jumecovënëtime? jai Jesús Martajavabelia.

²⁷ Marta nexata jumaitsi:

—Tajatuxanenë, jumecovënëtajë rabaja. Xamë rabaja cajena Cristomë, Dioso pexënatomë, ponë pacopiaevetavanapajë athëbëvetsica pepatsija-vanexatsica mapanacuayabetsicaje jivi pecapanepaenexa, jai Marta.

Pacuenia Jesús vënuu Lázaro pemëthëjavata yabara pelivaisi

²⁸ Itsa baja Marta najumelivaisivereta bajarapalivaisi, naviaata pijaboyabelia pejunatsinexa pejuyapijiva María. Nexata Marta muetsia jumaitsi Mariájavabelia:

—Vajanacacujarubinë rabaja pata. Cajunalia raja bajaraponë, jai Marta.

²⁹ Caejumetae María Jesús pejunatsijavatsilia, nonotabapuna. Pona Jesúsjavabelia petaenexa. ³⁰ Jesús abaxë apo patsi Betania tomaraberenä. Ecojopa abaxë itsajotalia Marta mataenenatsi. ³¹ Pajudíovi bajarapovabeje pijabota pata peyanabinexatsibeje Lázaro petëpaexae, bajarapamonae tane María penonotabapunaejava bepíjia pepitsatabijavalia bovecua. Nexata bajarapamonae María pënaponatsi. Tspíjaj bajarapamonae jamatabëjumaitsi:

—María raeta pejuyapijinëmi pemëthëjavabelia pona pematanyabinexa, jamatabëjai:

³² Itsa María palia, itsajotalia Jesús ecojopa, nexata María pematabacabëta nucajunua Jesús pitabarata. Jumaitsi:

—Tajatuxanenë, itsa majota ponaponaejitsipameje, apo tëpae tspíjaj pejuyapijinë Lázaro, jai María Jesúsjavabelia.

³³ Jesús itsa tane María penueyaxuabijava, judíovi ata María peyajavapat-sivi penuejava itsa tane, Jesús nexata bitso najamatabëxainaxuaba. ³⁴ Nexata Jesús jumaitsi bajarapamonaejavabelia:

—¿Detsa jota pamëthëtamë Lázaro? jai Jesús.

Nexata bajarapamonae jumaitsi Jesúsjavabelia:

—Naxanitsia. Taename itsajota pamëthëtajë Lázaro, jai.

³⁵ Jesús nexata vënuu Lázaro. ³⁶ Nexata judíovi najumaitsi:

—Pataema Jesús penuejava. Jesús picani bitso asiva petëpaenëmi, najai judíovi.

³⁷ Itsamonae judíovi najumaitsi Jesús yabara:

—Mara ponëje itaxotoxaniavaeta bitso pitaxutotsëcënaenëmi ataje xani-avaetsia petaenexa. ¿Apo caëjëpaetsi tsamëra tsipae Lázaropíjinë pejamatejemaexanaenexa petëpaeyaniva? najai bajarapamonae.

Pacuenia Lázaro petëpaecujinae Jesús icatsia asëyaexana yabara pelivaisi

³⁸ Jesús bitso sivanajamatabëxaina Lázaropíjinë. Nexata Jesús cujilia Lázaropíjinë pemëthëtsiibovajutsijavabelia. Ibopanaxanetota Lázaro yamëthëvëpa acatabuatatsi. ³⁹ Jesús nexata jumaitsi bajarajota penapatsivíjavabelia:

—Pavecuatixiremelia mapaibopanaxanetoje, jai Jesús.

Nexata Marta, petëpaenë pematapíjiva, jumaitsi:

—Tajatuxanenë, tuxutsaeba raeta baja bitso Lázaro. Tspíjaj rabaja petëpaecujinae, ajena baja cuatro pamatacabibeje xaina, jai Marta Jesúsjavabelia.

⁴⁰ Jesús nexata jumaitsi Martajavabelia:

—Catsipaebatsi rabaja pacuenia taejitsiamë Dioso ayaiucene pexanaejava itsa jumecovënëtamë Dioso, jai Jesús.

⁴¹ Nexata bajarapamonae Lázaropíjinë pemëthëvëpavecua tixilia ibopanaxaneto. Jesús itaboxo naëcotsiaya jumaitsi:

—Taxa, pexaniajamatabëcuene carajutatsi tanejumetaexaemë.
 42 Yapëtaniji cajena tanenamuxunaevetabiabijavamë. Itsiata icatsia cavajëttatsi mapamonaaje ayaibitsaëtoxaneto pejumecovënëtsinexa taneitorobinëcuenemëtsica, jai Jesús Diosojavabelia.

43 Bajarapacuenia Jesús pejumaitsicujinae, ayaijumeta jumaitsi Lázaro pebutsiibovajutsijavabelia:

—¡Lázaro, bajara jane mëthëvecua pitsaparemena! jai Jesús.

44 Nexata baja Lázaro petëpaenëmi pitsaparena mëthëvecua. Piapiasábanata daxitanëreca mataquionaeya pematacacëbicujinaetsireca abaxë, pitsaparena. Pitabaraacatsipapaëbërëpanatsi abaxë tsiteca itabaraacatatsi. Jesús nexata jumaitsi bajarapamonaejavabelia:

—Pavecuaisinare bajarapapana. Pacopare peponaenexa pijaboyabelia, jai Jesús.

Pacuenia picani Jesús pijavajabitsaë jamatabëvaetabatsi yabara pelivaisi
 (Mt 26.1-5; Mr 14.1-2; Lc 22.1-2)

45 Judíovi, pamonaë María yanabatsi, tane Lázaro petëpaenëmi Jesús piasaëyaexanaejava. Nexata bajarapamonaeyajuvënëvi ayaibitsaëto jumecovënëta Jesús Dioso pexënatocuene. 46 Itsiata itsamonae bajarapamonaeya-juvënëvi pona fariseovijavabelia. Nexata tsipaeba pacuenia Jesús Lázaro petëpaenëmi asaëyaexana. 47 Nexata fariseovi, sacerdotevi penamatacaitorobivi yajava, nacaetuata. Nexata bajarapamonaë junata penacaetuatsinexa judíovi pijaancianovi, judíovi pecujarubivi ata yajava. Nexata bajarapamonaë najumaitsi:

—¿Detsa meta vaxaitsi itsanetsi? Bajaraponë Dioso pesaëta pinijicuene pexanaejava exanapona. 48 Itsa vaxaitsi cuenecopatsipatsi bajarapacuenie pexanaponaejava, daxitajivi jumecovënëtaaponaejitsipa bajaraponë. Apo jumecovënëtsi tsipae Romanonacua pevetsivi. Nexata Romanonacua pevetsivi anaepanaejitsipa. Itorobijitsiparena pijajivi, vajabitsaë. Nexata vajabitsaë itsa patsiparena, vajatemplobo nacatöxuabijitsipaica. Nacaverebiabijitsipana, najai bajarapamonaë.

49 Bajarapamonaeyajuvënëne pevënë Caifás. Bajarapamatacabi bajaraponë Caifás, sacerdotevi pepo penamatacaitorobinë tsaponaponaë. Nexata Caifás jumaitsi penajanacaetuatsivijavabelia:

—Paxamë raja apo payapëtaemë. 50 Nexata Romanonacua pevetsivi vajabitsaë itsa itorobarena, vajanacaverebiabiyaniya, bepanajamatabëxainame mapacueniaje. Bajaraponë caenë itsa beyaxuabiaexanaenatsi, bajaraponë pejamatabëcueneta daxita judíovitsi vajavajabitsaë apo nacaverebiabi tsane, jai Caifás Jesús yabara.

51 Itsiata baitsi jane Caifás apo jumaitsi bajarapacuenia pijacuata penajamatabëxainacuena. Biji rajane bajarapamatacabi Caifás daxita sacerdotevi pepo penamatacaitorobinëxae, Dioso bajarapacuenia jumaitsiayaexanatsi. Bajarapacuenia Caifás tajëvelia jumaitsi tsipaji Jesús sivatëpaejitsia daxita judíovi. 52 Itsiata Jesús apo sivatëpae tsane ëjudíovi. Daxitanacuanëjava, pamonaë nacayajataruta Dioso pexi, bajarapamonaë ata pecaetuatsinexa, sivatëpaena Jesús. 53 Bajarapacuenia bajara pamatacabijavaveliacujinae cajena judíovi pevetsivi najamatabëveretapona pacuenia bajarapamonaë Jesús beyaxuabijitsiatsi.

54 Bajaraxuata Jesús apo ponabiabi baja itsabelia judíovi nacaetuatabiaba. Nexata Judea nacuavecua pitsapa. Jesús baja nexata pona petusatonacua

imoxoyojavabelia, Efraínvënë tomarjavabelia. Nexata bajarapatomarata Jesús ponapona pijajivi yajava.

⁵⁵ Imoxoyo baja pevajënae judíovi pijafiesta pejonematacabinexa, pascuavënëfiesta. Nexata jivi ayaibitsaétoxfaneto pona Jerusalén tomara-belia. Pona pexanaenexa pacuenia exanabiaba fiestavajënaeya penajamatabëcuene xaniavaetsinexa Diosojavabelia. Bajarapamonae naropoba tsiquiritomaraxijavaverena. ⁵⁶ Nexata bajarapamonae jaitarutatsi Jesús. Itsa bajarapamonae nacaetuata templobota, nayanijoba. Najumaitsi:

—¿Detsa xamë jamatabëitsimë? ¿Jesús tsamëra patsiana mapafiestajavaje? Jume. Apo patsi tsamëra tsane, najai ëpamonae.

⁵⁷ Nexata fariseovibeje sacerdotevi penamatacaitorobivibeje najumecopata jivijavabelia petonaitaxutocaevetsinexatsi Jesús. Nexata pajivi yapëtane itsajota Jesús ponapona, petsipaebinexa bajarapamonaejavabelia. Nexata fariseovibeje sacerdotevi penamatacaitorobivibeje itsa yapëtane itsajota Jesús ponapona, pevaetabinexatsi Jesús penaneconitsiaexanaenexatsi.

12

Pacuenia Jesús petiriva tsitaxuepanatsi petuxujuviaceitera yabara pelivaisi

(Mt 26.6-13; Mr 14.3-9)

¹ Pejonenexa baja pascuavënëfiesta, saica seis pamatacibibeje. Nexata bajarapamatacabi Jesús baja pona Betania tomarabelia. Bajarapatomarata ponapona Lázaro, ponë Jesús asaëyaexana petëpaenëmi. ² Bajarajota Jesús pexaejava toexanatsi caniviyopijijava. Bajarajota Marta pexaejava tsanaponapona. Lázaro nanabaneca pamesata Jesús nabaneca. ³ Nexata María carena epatuabotellabëyota petuxujuviaceitera, nardovënëra. Bajarapora bitso penamatomotsira. Nexata bajarapaaceitera María tsitaxuepana Jesús. Bajaraxuacujinae icatsia pematadata taxuiquica. Daxita bo tuatujé tuxuderecaruta. ⁴ Nexata Jesús pijajiviyajuvënënië, Judas Iscariote, Simón pexënato, ponë itsamatacabi Jesús canajetsijitsiatsi pijavajabitsaë pecobeyabelia, jumaitsi:

⁵ —¿Detsa xuajitsia apo canajetsi bajarapatuxujuvira. Matamopitsipa trescientos denario. Bajarapapalata rajutsipa bepejiobivi bajarapacuenia peyavenonaenexa, jai Judas Iscariote.

⁶ Itsiata bajarapacuenia Judas apo jumaitsi pesivanajamatabëxainaexae bepejiobivi. Judas raja penacobetoxotsinë. Jesúsbana pijapalatadoro pevet-siaexanaenëxaetsi, Judas nacobetoxotabiaba bajarapapalatayajuvënëjava. ⁷ Nexata Jesús jumaitsi Judasjavabelia petiriva yabara:

—Copare bajarapova xanëjavaberena pexanaenexa bajarapacuenia. Itsamonae petëpaejivi batsiperabëepana petuxujuviaceitera peperabëxaniavaetsinexa pemëthëtsivajënae. Bajara pijinia pacuenia mapovaje xaniavaeta bajarapora tanetsiperabëepanaenexa, apo tēpae atanë, taneperabëxaniavaetsinexa itsamonae tanemëthëtsivajënae. Tsipaji baja imoxoyo tavajënae tanemëthëtsinexa. ⁸ Daxitamatacabi raja bepejiobivi jinavanapa itsaxuayo pajinavanapame paneyavenonaenexa. Itsiata baitsi jane xanë daxitamatacabi apo ponaponaenë tsane paxamëjavata, jai Jesús Judasjavabelia.

Pacuenia judíovi najamatabëxaina pebeyaxuabinexatsi Lázaro yabara pelivaisi

⁹ Ayaibitsaëtoخانeto judïovi vënëlivaisitanetsi Jesús pepatsijava Betania tomarata. Judïovi nexata ponalia Betania tomarabelia petaenexatsi Jesús. Itsiata bajarapamonae apo ponaelia petaenexa ës Jesús. Ponalia petaenex-anua Lázaro, ponë Jesús asaëyaexana, petëpaenëmi. ¹⁰ Nexata sacerdotevi penamatacaitorobivi daxita baja sivanajamatabëjëpa pebeyaxuabinexatsi Lázaro, Jesús yajava. ¹¹ Bajarapamonae najamatabëjëpa pebeyaxuabinexatsi Lázaro. Tsipaji judïovi ayaibitsaëto natsanapona sacerdotevivecua petaxae Lázaro piasaëtsaponaponaejava petëpaecujinae. Nexata bajarapajudïovi jume-covënëtapona Jesús Dioso pexënatocuene.

Pacuenia Jesús pata Jerusalén tomarata yabara pelivaisi
(Mt 21.1-11; Mr 11.1-11; Lc 19.28-40)

¹² Jivi ayaibitsaëtoخانeto pata Jerusalén tomarata pascuafiesta petaenexa. Nexata bajarapamonae Jesús vënëlivaisitanetsi pepatsijavanexa Jerusalén tomarata. Jesús naropota Betania tomaraverena. ¹³ Nexata bajarapamonae Jesús pevajënae baxuucubaba benaxarebobaxutonë. Bajarapamonae pona baja pecopiapitsinexa Jesús. Itsa panamutoverena Jesús najetaruca, bajarapanamutuabelia bajarapamonae pona. Itsa baja bajarapamonae Jesús copiapita, bajarapamonae vavajai tsabuataponae.

—¡Dioso yavenonaenatsi! ¡Maponë najetarucaje, vajatuxanenë pejamatabëcueneta najetaruca Israel nacuapijivi pepo pevetsinënexa! jai tsanajetarubenae bajarapamonae Jesús yabara.

¹⁴ Nexata Jesús caxitajarabaxuaba burro. Bajarapaburro Jesús jumaponatsi pepatsinexa Jerusalén tomarata. Jesús burrojumata pepatanajetarucaejavanexa Jerusalén tomarata, Dioso pejumelivaisibaxutota tajëvelia jumaitsi mapacuajaje:

¹⁵ Pajerusalén tomarapijivimë, pëtsa pajunavame. Pataename pepo papecaevetsinënexa penajetarucaejava. Pejanaburroyota yapatanajetarucaena,

jai tajëvelia Dioso pejumelivaisibaxuto Jesús burrojumata pepatanajetarucaejavanexa Jerusalén tomarata.

¹⁶ Itsa bajarapacuenia Jesús pata Jerusalén tomarata, copiapata jane baja pacuenia Dioso pejumelivaisibaxutota tajëvelia jumaitsi Jesús yabara. Bajarapamatacabi Jesús pijajivi tae ata bajarapacueni, itsiata abaxë apo yapëtae pecopiapatsijava bajarapacueni. Matapania baja Jesús pepuaponae athëbëabetsia, Jesús pijajivi yapëthane pecopiapatsijava baja pacuenia Dioso pejumelivaisibaxutota tajëvelia jumaitsi Jesús yabara.

¹⁷⁻¹⁸ Pamonae tane pamatacabi Jesús Lázaro asaëyaexana petëpaenëmi, bajarapamonae tsipaeba Jerusalén tomarapijivijavabelia. Tsipaeba pacuenia bajarapamonae tane Jesús Lázaro piasaëyaexanaejavata petëpaenëmi. Bajaraxuata jivi ayaibitsaëto pitsapa tomaravelia pecopiapitsinexatsi Jesús.

¹⁹ Nexata fariseovi itsa tane bajarapacueni, najumaitsi:

—Pataema. Daxitajivi pënaponatsi Jesús. Vaxaitsi baja nexata acuenebi vajaexanaejava Jesús jivi pepënaponaejavatsi yabara, najai fariseovi.

Pacuenia Grecia nacuapijivi Jesús jamatabëtanetsi yabara pelivaisi

²⁰ Ayaibitsaëto jivi pata Jerusalén tomarata Diosojavabelia pevajëtsinexa pascuavënë fiestamatacabita. Bajarapamonaeyajuvënëvi itsamonae Grecia nacuapijivi. ²¹ Nexata Grecia nacuapijivi cujibaliatsi Felipe. Felipe Betsaida tomarapijinë. Betsaidatomara eca Galilea nacuata. Nexata Grecia nacuapijivi jumaitsi Felipejavabelia:

—Felipe, pajamatabētāniji raja Jesús, jai.

²² Felipe nexata pona Andrésjavabelia petsipaebinea pacuenia Grecia nacuapijivi jumaiti. Nexata Felipebeje Andrésbeje ponabeje petsipaebinea-beje Jesúsjavabelia. ²³ Nexata Jesús jumaiti bajaraponēbejejavabelia:

—Xanē, Daxitajivi Pematapijinēnē, tajamatacabi baja netocopiapata tanaviatsinexa baja athēbēabetsia ayaijamatabēcuenenēnē Dioso taneex-anaenexa. ²⁴ Xaniajanē pacuenia pacatsipaebijitsiatsi. Trigoxuto itsa apo ubitsi irabelia, saya tsitecanuca caexutoyo. Itsiata itsa ubatsi, pejuvicu-jinae xutsabana vajaubixutoyomi penacopatsinexa pejanaboto. Nexata itsa nacuaia bajarapaboto, ayaijava pexu capitsapa. ²⁵ Bajara pijinia itsi jivi ata. Pajivi jamatabējumaiti ata tsane petēpaeyaniva: “Xanē naya-jivitaeyaponaponaenajē tanebejiobiaexanaeyaniva, tanebeyaxuabiyāniva ata,” jamatabējai ata tsane, itsiata tēpaena. Nexata Diosovecua naxuabiana. Biji rajane pajivi nesivanajamatabēcopatsiaya jamatabējumaiti tsane: “Jema nebejiobiaexanaena. Jema nebeyaxuabiananua Jesús pijajivitonēxanē,” jamatabējai tsane, bajarapajivi xainaena matababi apo peverevercaejava.

²⁶ Pajivi jamatabēnetonacueneba, bajarapajivi nepēnaponaena. Nexata pajivi netonacuenebiana, neyjavaponaponaena itsajota ponaponaenajē. Pajivi netonacuenebiana, bajarapajivi yabara taxa Dioso jumaiti tsane: “Bajarapajivi sivajamatabēcuenēbarēyanē,” jai tsane, jai Jesús Felipebeje Andrésbejejavabelia.

Pacuenia Jesús tajēvelia navajunupaeba pacuenia beyaxuabijitsiatsiyabara pelivaisi

²⁷ Jesús bēpēnēa jamatabējumaiti:

—Aeconoxae bitso najamatabēxainajē. ¿Detsa meta jumaitsinē tsane taxajavabelia? Jumaitsinē meta tsane: “Taxa, betajibicuenia tanebeyaxu-abijavaminexa, vecuanecapanepaename,” janē meta tsane taxajavabelia. Jume raja. Bajarapacuenia meta apo vajētsinē tsane. Tsipaji betajibicuenia tanebeyaxuabinexa, patajē mapanacuayabetsicaje, jamatabējai Jesús.

²⁸ Nexata Jesús Diosojavabelia jumaiti:

—Taxa, pacuenia jitsipame nexanaenexa jivi pecayaiyataenexa, exanare, jai Jesús.

Nexata bajarajota Jesús jumetane athēbēvetsica ayaijume. Jumaititsica mapacueniaje:

—Jivi rabaja cajena neyaiyatane. Itsiata matavējēa neyaiyataena, jaitsica.

²⁹ Jivibitsaēto bajarajota penubenaevi jumetane bajarapajume. Nexata bajarapamonae jumaiti:

—Yamaxē raeta najumeta, jai.

Itsamonae pijinia jumaiti:

—Angel raeta barēcuaicuaijaiti Jesús, jai.

³⁰ Nexata Jesús jumaiti bajarapamonaejavabelia:

—Xanē raja tajumetaenexa bajarapajume apo jumaititsica. Paxamē raja panejumetaenexa jumaititsica. ³¹ Aeconoxae rabaja copiapatsiana Dioso penaneconitsiaexanaematacabinexa daxita pijaneconi pexainaevi. Vecuaxuabiananua dovathi, ponē mapanacuata jivi itorobabiaba pibisiacue ne pexanaenexa. ³² Itsa neyotarutsiana cruzajavabelia tanebeyaxuabinexa, nexata daxitajivi jitsipaeyaexanaenajē xanē tanesivanajamatabēcuenē copatsinexa, jai Jesús.

³³ Bajarapacuenia Jesús tajēvelia jumaiti jivijavabelia jivi peyapētaenexa pacuenia Jesús tēpaejitsia. ³⁴ Nexata bajarapamonae jumaiti Jesúsjavabelia:

—Dioso Moiséspijinëta penajumecopatsilivaisi tajëvelia jumaitsi mapacueniaje: “Cristo, ponë athëbëvetsica Dioso itorobijitsiatsica jivi pecapanepaenexa, asaë tsaponaponae tsane daxitamatacabijavabelianexa pevetsinexa mapanacuaje,” jai. Itsiata xamé Cristo atamé, jumaitsimë: “Xanë, Daxitajivi Pematapijinënë, neyotarutsiana cruzajavabelia tanebeyaxuabinexa,” jamë. ¿Detsa nexata ponë Cristo daxita matacabijavabelianexa asaë tsaponaponae tsane?” jai bajarapamonae Jesúsjavabelia.

³⁵ Nexata Jesús jumaitsi bajarapamonaejavabelia:

—Imoxoyo rabaja pevajënae taponaeatacabibexa. Abaxë raja itsiata taponaeatacabibeje, pacatsipaebianatsi pexaniajailivaisi patacajamatabëcueneitayotsinexa. Nexata itsa pacatsipaebianatsi pexaniajailivaisi, panejumecovënëtsianame paneajamatabëcueneitaquiriyaniva. Pajivi ajamatabëcueneitaquiri, apo xainae tsane matacabi apo peverevereaejava.

³⁶ Xanë rabaja pexaniajailivaisita pacajamatabëcueneitayotsianatsi. Taponaeatacabibeje abaxë mapanacutaje, panesivanajamatabëcopatsianame. Bajarapacuenia nexata jamatabëcueneitayotsiaya pajinavanapaename, jai Jesús bajarapamonaejavabelia.

Bajarapacuenia pejumaitsicujinae, Jesús baja pona pevecuanamatayabinexa bajarapamonae.

Pacuenia judíovi jamatabëjumaitsi Jesús yabara: “Maponëje apo Cristo, ponë copiaevetavanapatsi vajanacacapanepaenexa,” jamatabëjai yabara pelivaisi

³⁷ Jesús ayaicuene pexanaejava Dioso pesaëta judíovi pitabarata exanapona. Judíovi tae ata bajarapacuenie, itsiata apo jumecovënëtsi Cristocuene. ³⁸ Nexata judíovi itsa apo jumecovënëtsi Cristocuene, copiapata jane baja pacuenia bajayata tajëvelia yaquina Diosojumepaebinëmi, profeta Isaíaspijinë. Judíovi Cristocuene apo pejumecovënëtsijavanexa yabara, bajayata Isaíaspijinë peyaquinaelivaisita tajëvelia jumaitsi mapacueniaje:

Dioso, patatsipaebilivaisi cajena jivi apo panejumecovënëtsi tsane. Bajarapamonae apo panejumecovënëtsi tsane, tae ata nesaëta pinijicuene pataexanaejava, jai bajayata tajëvelia Isaíaspijinë peyaquinaelivaisita judíovi Cristocuene apo pejumecovënëtsijavanexa yabara.

³⁹ Bajaraxuata Cristo patsi ata, judíovi apn jumecovënëtsi Cristocuene. Isaíaspijinë peyaquinaelivaisita, judíovi yabara icatsia tajëvelia jumaitsi mapacueniaje:

⁴⁰ Bajarapamonae Dioso itaxutotsëcënaeyaexanaena. Ajamatabëcuenetajaya exanaenanua. Bajarapacuenia Dioso exanaena bajarapamonaejavabelia. Nexata bajarapamonae tae ata tsane pinijicuene Dioso pesaëta pexanaejava, itsiata bajarapamonae apo yapëtae tsane pajamatabëcuene livaisi xaina petaejava. Nexata bajarapamonae Diosojavabelia apo najamatabëcuene pënyorotsi tsane perujuamatabëcuenevecu. Nexata apo jamatabëcuene xaniavaetsinë tsane, jai bajayata tajëvelia Isaíaspijinë peyaquinaelivaisita judíovi Cristocuene apo pejumecovënëtsijavanexa yabara.

⁴¹ Bajarapacuenia Isaíaspijinë yaquina tsipaji bajayata Isaíaspijinë bema-jitsinaebota tane Jesús ayajamatabëcuene pexainanenëcuene. Bajaraxuata bajayata Isaíaspijinë bajarapacuenia Jesús vajunupaeba baja cajena.

⁴² Itsiata judíoviyajuvënëvi ayaibitsaëto jumecovënëta Cristocuene. Judíovi pevetsivi ata jumecovënëta Cristocuene. Bajarapamonae judíovi pevetsivixae, apo navajunupaebi pejumecovënëtsijava Cristocuene. Tsipaji cuju-
nava fariseovi. Bajarapamonae bēpēnēa jamatabējumaitsi:

—Apo navajunupaebinē tsane tajumecovënëtsijava Cristocuene tanecapitsapaeyaniva fariseovi judíovi penacactuatabibibovecua, jamatabējai bēpēnēa bajarapamonae.

⁴³ Tsipaji bajarapamonae jitsipa penajuaevetsivi pesivabarēyajavatsi Dioso pesivabarēyajavatsi matatoxenetsia.

Pacuenia jivi naneconitsijitsia Diosojavabelia itsa apo jumecovënëtsi Jesús petsipaebilivaisi yabara pelivaisi

⁴⁴ Jesús jumaitsi ayaijumeta jivijavabelia:

—Pajivi jumecovënëtsiana Cristocuenenē, bajarapajivi ēxanē yabara apo jumecovënëtsi tsane. Taxa, ponē nitorobica, bajaraponē yabara ata jumecovënëtsiana.

⁴⁵ Pajivi necueneyapētaena, bajarapajivi taneitorobinētsica ata cueneyapētaena. ⁴⁶ Xanē rabaja pexaniajailivaisita jamatabēcueneitayotsianajē mapanacuapijivije. Nexata pajivi

jumecovënëtsiana Cristocuenenē, apo ajamatabēcueneitaquiri tsane. ⁴⁷ Pajivi jumeyapētae ata tsane tatsipaebilivaisi, itsiata itsa apo jumecovënëtsi tsane bajarapalivaisi, bajarapajivi naneconitsiana Diosojavabelia.

Itsiata xanē bajarapajivi apo naneconitsiaexanaenē tsane. Tsipaji xanē apo patsinētsica tananeconitsiaexanaenexa mapanacuapijivije. Biji rajane xanē patsicajē tacapanepaenexa mapanacuapijivije. ⁴⁸ Pajivi

nenayajiviitavetsiana, apo nejumecovënëtsinua tsane tatsipaebilivaisi ata, bajarapajivi taxa Dioso naneconitsiaexanaenatsi. Bajarapajivi taxa Dioso naneconitsiaexanaena pamatacabi naneconitsiaexanaena daxita

pijaneconi pexainaeivi tatsipaebilivaisi apo pejumecovënëtsixae. ⁴⁹ Tsipaji xanē tajamatabēcueneta apo paebinē bajarapalivaisi. Taxa raja, ponē nitorobica, nitoroba bajarapalivaisi jivi tatsipaebinxaxa. ⁵⁰ Yapētanjiji

baja cajena jivi pexainaejavanexa matacabi apo pevereverecaējava itsa jumecovënëta taxa pitorobilivaisi. Nexata bajarapalivaisi itsa tsipaebaponajē jivijavabelia, tsipaebaponajē pacuenia taxa Dioso nitoroba

tatsipaebinxaxa, jai Jesús jivijavabelia.

13

Pacuenia Jesús bevelijamatabēcuenenē nataeya taxuquiatapona pijajivi, caenē canacujitsia, yabara pelivaisi

¹ Caematacabi baja saica pejonexa pascuavënēfiesta. Jesús nexata yapētane pamatacabita pijavajabitsaē beyaxuabijitsiatsi. Yapētanenua peponaejavanexa paxa Diosojavabetsia. Jesús bitso asiva pijajivi, mapanacuapijivije. Jesús nexata bajarapamatacabi pijajivi

tsitanajamatabēcuenēitajēta piasivacuene.

² Jesús pijajivi barēnabane caniviyopijijava. Nexata Judas Iscariote, Simón pexēnato, dovathi pejamatabēcueneta najamatabēxainaeaxanatsi. Nexata Judas najamatabēxaina Jesús pecanajetsinexa pijavajabitsaē pecobeyabelia. ³ Jesús yapētane paxa Dioso perajutsijavatsi daxitacuene pevetsinexa. Yapētanenua paxa Diosojavabetsica pepatsijava. Icatsia pacuenia ata naviansijitsia paxa Diosojavabetsia, yapētane. ⁴ Nexata Jesús pijajivi pe-

barēnabanijavata, Jesús nonotapuna mesajavata. Najumajonota penaxatatsijava. Nexata toalla naepacēta. ⁵ Jesús mera epata penacobequatsinējavabelia

petaxuquiatsinexa pijajivi. Jesús nexata beveliajamatabëcuenenë nataeya taxuquiatapona pijajivi, caenë canacujitsia. Taxuquicapona icatsia pija-taollata penaepacëtsipanata.

⁶Itsa Jesús taxuquiatsijitsia Simón Pedro, nexata Simón Pedro jumaiitsi:

—Tajatuxanenë, apo jitsipaenë tanetaxuquiatsijavamë. Tspiji ayaija-matabëcuenenëmë, jai Simón Pedro Jesúsjavabelia.

⁷Jesús nexata jumaiitsi:

—Aeconoxae abaxë apo yapëtaemë pajamatabëcuene yabara cataxuquiat-sijitsiatsi. Itsiata baitsi jane bexëajavabelia yapëtaename, jai Jesús.

⁸Nexata Pedro jumaiitsi:

—Apo catonataxucopatsi tsanetsi tanetaxuquiatsinexamë, jai Pedro.

Jesús nexata jumaiitsi:

—Itsa apo cataxuquiatsi tsanetsi, nexata apo tajajivitonëmë tsane, jai Jesús Pedrojavabelia.

⁹Simón Pedro nexata jumaiitsi:

—Tajatuxanenë, ëtataxu nexata apo netoquiatsimë tsane. Tacobe ata, tamatabocoto ata, netoquiatsianame, jai Pedro.

¹⁰Jesús nexata jumaiitsi Pedrojavabelia:

—Pajivi baja navane, apo namatavenonae baja pequiatsinexatsi daxitanë. Saya namatavenona ëpetaxuquiatsinexatsi. Tspiji baja daxitanë axuirajibi. Paxamë rabaja pajamatabëcuenexuirajibimë. Itsiata baitsi jane apo padaxi-tamë, jai Jesús Pedrojavabelia.

¹¹“Pajamatabëcuenexuirajibimë. Itsiata baitsi jane apo padaxitamë,” jai Jesús. Tspiji yapëtane tajëvelia ponë canajetsijitsiatsi pijavajabitsaë pecobeyabelia.

¹²Petaxuquiatsicujinae pijajivi, Jesús baja icatsia penaxatatsijava nax-atata. Eca icatsia mesa muxuneneta. Jumaiitsi pijajivijavabelia:

—¿Payapëtaneme tsabaja paxamë pajamatabëcuene yabara pacataxuquiatatsi? ¹³“Vajanacacujarubinë,” pajamë tsabiabi itsa panabarëcuaiacujajamë xanë yabara. Itsajavata: “Vajatuxanenë,” pajamë tsabiabi. Paxaniajamë rabaja cajena. Bajara tspiji taitsinë.

¹⁴Xanë, patacacujarubinë ata, panijatuxanenë atanënu, beveliaja-matabëcuenenënë nataeya pacataxuquiatatsi bepanijajivitonënëcuenia. Nexata bajarapacuenia paxamë ata beveliajamatabëcuenevi nataeya panataxuquiatabiabianame namataenetsia. ¹⁵Pacatsitaexanatsi bajarapacuenia paxamë ata bajarapacuenia namataenetsia panena-toxanaenexa. ¹⁶Xaniajanë pacuenia pacatsipaebijitsiatsi. Paxamë cajena apo panejamatabëcuene matatoxenetsimë. Tspiji itsanë ata apo jamatabëcuenematatoxenetsi pitorobinëtsi. ¹⁷Payapëtaneme rabaja pajamatabëcuene yabara panijatuxanenë atanë, beveliajamatabëcuenenënë nataeya pacataxuquiatatsi. Nexata pijinia paxamë ata bajarapacuenia beveliajamatabëcuenevi nataeya namataenetsia nasivaya itsa panayavenonabiabianame, pajamatabëcuenebarëyamë tsavanapae tsane, jai Jesús pijajivijavabelia.

¹⁸Icatsia Jesús jumaiitsi pijajivijavabelia:

—Daxita raja itsiata apo pajamatabëcuenebarëyamë tsavanapae tsane. Tspiji caenë paxamëyajuvënë, ponë naxaena xanëta, bajaraponë necana-jetsiana tajavajabitsaë pecobeyabelia pacuenia tajëvelia jumaiitsi Dioso pe-jumelivaisibaxutota. Yapëtaniji ponë necanajetsijitsia. Tspiji xanë pat-acaitapetsivi patajajivinexamë, pacajamatabëcuenyapëtanetsi pacanenëmë

canacujtsia. Nexata pacuenia tajëvelia Dioso pejumelivaisibaxutota jumaitsi xanë yabara, bajarapacuenia netocopiapatsiana. ¹⁹ Pacatsipaebatsi bajarapacuenia taneexanaevajënaeya. Nexata itsa nebeyaxuabiana, panejumecovënëtsianame xanë Cristocuenenë pacuenia baja cajena pacatsipaebatsi. ²⁰ Xaniajanë pacuenia pacatsipaebijitsiatsi. Pajivi copiapitsiana taitorobinë, xanë neyjavacopiapitsiana. Pajivi necopiapitsiana, bajarapajivi neyjavacopiapitsiana taxa Dioso, ponë nitorobica, jai Jesús pijajivijavabelia.

Pacuenia Jesús navajunupaeba Judas pecanajetsijavanexatsi pijavajabit-saë pecobeyabelia yabara pelivaisi

(Mt 26.20-25; Mr 14.17-21; Lc 22.21-23)

²¹ Jesús pejamatabëëthëtota bëpënëa bitso natsinajamatabëxaina. Nexata roviaalia Jesús jumaitsi pijajivijavabelia:

—Xaniajanë pacuenia pacatsipaebijitsiatsi. Caenë paxamëyajuvënënë necanajetsiana tajavajabitsaë pecobeyabelia, jai Jesús pijajivijavabelia.

²² Nexata Jesús pijajivi nataeyena. Tsipaji apo yapëtae ponë yabara Jesús jumaitsi. ²³ Jesús pijajiviyajuvënënë, caenë bitso asivaya tane. Bajaraponëbeje Jesúsbeje namuxuneniaxaeyecabeje. ²⁴ Nexata bajaraponë Jesúsjavabelia petoyanijobinexatsi, Simón Pedro pecobeta itorobeca.

—Yanijobare ponë yabara Jesús jumaitsi, jai tsecae Simón Pedro pecobeta.

²⁵ Nexata bajaraponë natixireca. Eca bitso Jesús pemuxuneneta peyanijobinexa Jesúsjavabelia.

—Tajatuxanenë, çipatsa yabara jumaitsimë? jai bajaraponë Jesúsjavabelia.

²⁶ Nexata Jesús jumaitsi pijajivitonëjavabelia, bitso piasivanëjavabelia:

—Ponë ra peneta panjavayo tocajabutsianajë, bajaraponë tsane, jai Jesús pijajivitonëjavabelia, bitso piasivanëjavabelia.

Nexata Jesús panjavayo pita. Cajabuta. Nexata jane baja rajuteta Judas Iscariote, Simón pexënatoyjavabelia. ²⁷ Judas itsa pita pan, nexata bajarajota Judas dovathi tsijamatabëjunuatsi. Nexata Jesús jumaitsi Judasjavabelia:

—Xua baja exanaejitsiamë, naxanitsiayo baja exanare, jai Jesús.

²⁸ Itsiata baitsi jane pamonaë najuaxaeyena bajarapamesata, apo jumeyapëtae xua yabara Jesús jumaitsi Judasjavabelia. ²⁹ Judas toevetabiaba bajarapamonae pijapalatadoro. Bajaraxuata Judas yabara Jesús pijajivi jamatabëjumaitsi:

—Jesús raeta itoroba Judas pecomuatsinexa vajaxaejavanexa fiestajavata. Itsa jume, itoroba meta perajutsinexa itsacuenëjavaxi bepejiovivijavabelia, jamatabëjai Jesús pijajivi.

³⁰ Itsa baja Judas pan pita, bovecua pitsapalia vayafuabelia, meravi baja.

Pacuenia Jesús pijajivi itoroba namataenetsia penaasivatsavanapaenexa yabara pelivaisi

³¹ Pabota Jesús pijajivi barënacætuata, bajarapabovecua Judas pitsapalia. Nexata Judas pepitsapaecujinaelia Jesús jumaitsi pijajivijavabelia:

—Aeconoxae rabaja xanë, Daxitajivi Pematapijinënë, najamatabëcueneitajëtsianajë ayajamatabëcuene taxinaejava. Taxa Dioso ata bajarajota yajavajamatabëcueneitajëtsianajë ayajamatabëcuene pexinaejava. ³² Nexata taxa Dioso juya nejamatabëcueneitajëtsiana ayajamatabëcuene taxinaejava. Bajarapacuenë baja naxanitsiayo taxa Dioso exanaena. ³³ Bepataximë patacataevi. Bajara maapo pacayajavaponaponaetsi tsane bajayajebije. Paxamë panejaittsianame.

Pacuenia jumaitsinē itsamonae judiŋovijavabelia, bajarapacuenia paxamējavabelia ata pacajumaitsijitsiatsi. Apo pacacaējēpae tsane paneponaenexa itsabelia ponaejitsianē. ³⁴ Pacatsipaebijitsiatsi icatsia pejanalivaisi. Paexanavanapaenae name mapacueniaje. Pasivamē tsavanapae tsane itsamonae ata. Pacuenia xanē pacaašivatsi, bajarapacuenia namataenetsia panaasivamē tsavanapae tsane. ³⁵ Namataenetsia itsa panaasivamē tsavanapae tsane, nexata daxitanacuanēpijivi pacayapētaena patajajivicuenemē, jai Jesús pijajivijavabelia.

Pacuenia Jesús tajēvelia jumaitsi Pedrojavabelia: “Pedro, xamē nayavajunuaxainaenae name tajajivitonēcuenemē,” jai yabara pelivaisi
(Mt 26.31-35; Mr 14.27-31; Lc 22.31-34)

³⁶ Simón Pedro yanijoba Jesúsjavabelia.

—Tajatuxanenē, ¿detsa belia ponaejitsiamē? jai Pedro.

Nexata Jesús jumaitsi Pedrojavabelia:

—Itsa belia ponaejitsianē, aeconoxae apo cacaejēpae tanepēnaponaenamē. Itsiata baitsi jane itsamatacabi nepēnaponaenae, jai Jesús Pedrojavabelia.

³⁷ Nexata Pedro jumaitsi Jesúsjavabelia:

—Tajatuxanenē, ¿detsa xuajitsia apo necaejēpae aeconoxae tacapēnaponaenexa? Daxita pacuenia nitorobame, catonexanaejitsipatsi. Nebeyaxuabijitsia ata tsipae xamē yabara, apo cacopatsi tsipaetsi, jai Pedro Jesúsjavabelia.

³⁸ Jesús nexata jumaitsi Pedrojavabelia:

—¿Xaniajamē tsaja? ¿Nacaevetsipame pecabeyaxuabinexa taneasivaxaemē? Xaniajanē pacuenia catsipaebijitsiatsi. Vacara raja pefiabivajēnaeya, nayavajunuaxainaenae name tajajivitonēcuenemē. “Apo yapētaenē cajena bajaraponē,” jamē tsane xanē yabara acueyabi xuabeje, jai Jesús Pedrojavabelia.

14

Pacuenia Jesús benamuto paxa Diosjavabetsia yabara pelivaisi

¹ Jesús jumaitsi pijajivijavabelia:

—Pētsa bitso panajamatabēxainae name patacavecuaponaejavanexa yabara. Panajamatabēcuenecopare Diosjavabelia, xanējavaberena ata.

² Taxajavatatsia pexaniabobitsaētonē xaina panejinavanapaenexa. Itsa bajara apo itsipae, apo pacatsipaebi tsipaetsi. Nexata bajarabetsia ponaejitsianē patacatsivajēnaexaniavaetsinexa itsajota papatsijitsiamē. ³ Xanē taponaeujinae mavetsiaje, itsa baja veretsianajē patacatsivajēnaexaniavaetsijava itsajota papatsijitsiamē, icatsia patsianicajē patacacaponaenexatsia jane baja. Nexata bajarajotatsia pacayajavaecaenatsi, itsajota ecaenajē. ⁴ Paxamē baja payapētaneme itsabelia ponaejitsianē. Payapētanemenua baja panepatsinexa itsajotatsia ecaeitsianē, jai Jesús pijajivijavabelia.

⁵ Nexata Tomás, Jesús pijajivitonē, jumaitsi:

—Tajatuxanenē, apo payapētaenē cajena itsabelia ponaejitsiamē. ¿Detsa nexata pacuenia payapētaenajē namuto pataponaenexa itsabelia ponaejitsiamē? jai Tomás Jesúsjavabelia.

⁶ Jesús nexata jumaitsi:

—Xanē rabaja benamutonē. Tspipaji xanē tajamatabēcueneta jivi panepaena athēbēbetsia. Xanē rabaja pepo pexaniajailivaisi jivi

tatsipaebaponaenë. Xanë rabaja xainajë matabacabi apo peverevereaejava tarajutsinexa pamonaes nesivanajamatabëcopata. Itsajivi ata apo patsicapanepae tsane taxajavabetsia xanë itsa apo nejumecovënëtsi. ⁷ Paxamë picani bajayata apo paneyapëtaemë. Nexata picani taxa ata apo payapëtaemë. Aeconoxae rabaja paneyapëtaneme. Nexata baja taxa ata payapëtaneme. Patanemenua baja, jai Jesús.

⁸Nexata Felipe jumaitsi Jesúsjavabelia:

—Tajatuxanenë, panetsitajëre axa. Pajitsipajë baja cajena bitso axa patataenexa, jai Felipe Jesúsjavabelia.

⁹Jesús nexata jumaitsi:

—Felipe, bajajajebi rabaja pacayjavaponaponatsi. ¿Itsia tsaja abaxë xaniavaetsia apo paneyapëtaemë? Pajivi netane, bajarapajivi taxa ata tane. ¿Detsa xuajitsia nexata nevajëcame taxa netaenexa? ¹⁰ Taxa baja cajena neyjavaponapona. Xanë ata taxa yajavaponaponajë. ¿Abaxë tsaja apo jumecovënëtsimë? Palivaisi pacatsipaebatsi, tajamatabëcueneta baja cajena bajarapalivaisi apo pacatsipaebitsi. Taxa raja, ponë neyjavaponapona, bajaraponë pejamatabëcueneta bajarapalivaisi neyapëtaeayaxana. Nexata bajarapalivaisi pacatsipaebatsi. ¹¹ Panejumecovënëre taxa tayjavaponaponaejava. Panejumecovënërenua taxa ata tanyjavaponaponaejava. Patacotsipaebilivaisianë apo panejumecovënëtsi atamë, itsia ayaicuen Dioso pesaëta taexanaexae, panejumecovënëre taxa tayjavaponaponaejava. ¹² Xaniajanë pacuenia pacatsipaebijitsiatsi. Pajivi nejumecovënëtsiana, bajarapajivi exanaena pacuenia xanë exanajë. Ayaicuen taexanaejava matatoxenetsia bajarapajivi exanaena. Tspaji xanë naviatiansianajë taxajavabetsia. ¹³⁻¹⁴ Daxita xua xanë tavënëta pavajëtsianame taxajavabelia, pacatoexanaenatsi cajena. Xanë, Dioso pexënatonë, bajarapacuenia pacatoexanaenatsi taxajavabelia panejamatabëcuenëbarëyanexa, jai Jesús pijajivijavabelia.

Pacuenia Jesús najumecapanepaeya jumaitsi pitorobinexatsica Espiritu Santo jivijavabetsica yabara pelivaisi

¹⁵Icatsia Jesús jumaitsi pijajivijavabelia:

—Itsa paneasivamë, paexanabiabianame pacuenia pacaitorobatsi.

¹⁶ Vajëtsianajë taxajavabelia itsanë juya papecatoitorobinexatsica papecayavenonaenënexa daxitamatabijavabelianexa. Bajaraponë Espiritu Santo. ¹⁷ Espiritu Santo cajena pepo pexaniajailivaisi jivi peyapëtaeayaxanaenë. Bajaraponë mapanacuapijivi abaxë apo tsijamatabëcaetsi. Tspaji bajarapamonae apo nejumecovënëtsi. Nexata apo yapëtae ponë Espiritu Santo. Apo yapëtaenua cajena Espiritu peponaponaejava ata. Itsia baitsi jane paxamë Espiritu Santo payapëtaneme baja. Tspaji baja bajaraponë pacayjavaponapona. Espiritu Santo cajena pacatsijamatabëcaena daxitamatabijavabelianexa. ¹⁸ Ponae atanë tsane taxajavabetsia, itsia apo pacaxuabi tsanetsi. Icatsia raja patsianicajë patacayjavaponaponaenexa. ¹⁹ Caematabibejecujinae baja jivi apo netae tsane. Itsia icatsia paxamë panetaeneme. Paxamë paxainaname matabacabi apo peverevereaejava. Tspaji tatëpacujinae icatsia asaenë tsaponaponaes tsane. ²⁰ Pamatabacabi Espiritu Santo patsianica paxamëjavabetsica, bajarapamatabacabi payapëtaeneme taxa tayjavaponaponaejavanexa. Payapëtaenamenua paneyajavajinavanapaejavanexamë. Payapëtaenamenua xanë ata patacayjavaponaponaejavanexa. ²¹ Pajivi yapëtane, taitorobicuenia nejumecovënëtanua, bajarapajivi niasiva. Pajivi niasiva, bajarapajivi

taxa juya asivatsi. Xanë ata bajarapajivi asivanë. Tsitanaitajëtsianajë bajarapajivijavabelia, jai Jesús pijajivijavabelia.

²² Itsanë Judasvënënë, itsiata apo Judas Iscariote, jumaitsi Jesúsjavabelia:

—Tajatuxanenë, ¿detsa xuajitsia ëpaxanë panetsitanaitajëtsianame? ¿Detsa xuajitsia apo tsitanaitajëtsimë tsane itsamonaejavabelia? jai Judas Jesúsjavabelia.

²³ Jesús nexata jumaitsi Judasjavabelia:

—Pajivi niasiva tsane, nejumecovënëtsiananua tatsipaebilivaisi, bajarapajivi juya taxa asiva tsanetsi. Nexata paxanëbeje, taxabeje, bajarapajivi payajavaponaenajëbeje. ²⁴ Pajivi apo niasiva tsane, bajarapajivi apo nejumecovënëtsinua tsane tatsipaebilivaisi. Xanë palivaisi pacatsipaebaponatsi, xanë raja apo tajumelivaisi. Taxa raja, ponë nitorobica, pejumelivaisi, jai Jesús Judasjavabelia.

²⁵ Icatsia Jesús jumaitsi pijajivijavabelia:

—Abaxë patacayajavaponaponaeepato pacatsipaebijitsiatsi mapacueniaje. ²⁶ Taxa tajamatabëcueneta, Espíritu Santo pacatoitorobianica papecayavenonabiabinexa. Nexata Espíritu Santo pacayapëtaeayaexanaena daxitacuenene. Pacanajamatabënapitsiaexanaenanua daxita palivaisi pacatsipaebaponatsi, jai Jesús.

²⁷ Icatsia Jesús jumaitsi pijajivijavabelia:

—Pacanapëjibatsi jamatabëcuenexanepanaeya. Pacajamatabëcuene barëyayaexanaenatsi. Bajarapajamatabëcuenebarëyajava, apo jëpae mapanacuata pebarëyajava. Nexata bepíjia apo vereverecae tsane paxamë panejamatabëcuenebarëyajava. Pëtsa pajamatabëcuenebëjamë. Pëtsa pacujunavamenua itsacuenene ata. ²⁸ Panejumetaneme rabaja patacajumaitsiyava mapacueniaje: “Xanë baja ponaenajë taxajavabetsia. Itsiata baitsi jane icatsia pacasivapatsianicatsi,” patacajajava. Itsa bitso panejitsipaejitsipame, nexata pasivajamatabëcuenebarëyamë tsipae taponaejavanaxa taxajavabetsia. Tsiipaji taxa nevecuuaayajamatabëcuenenë.

²⁹ Bajarapacuenia pacajumaitsi taponaejavajënaeya. Nexata itsa copiapatsiana patacajumaitsicovëya, panejumecovënëtsianame Dioso pexënatocuenenë, jai Jesús pijajivijavabelia.

³⁰ Icatsia Jesús jumaitsi pijajivijavabelia:

—Apo necuenecaëjëpae rabaja pematatsënëa livaisi patacatsipaebaponaeenexa. Tsiipaji rabaja imoxoyo dovathi najetaruca, ponë mapanacuapijivi pijatuxanenë. Itsiata baitsi jane bajaraponë apo caëjëpaetsi xanë taneitorobinexa tatoexanaenexa pacuenia picani bajaraponë jitsipa. Apo caëjëpaetsinua taneitsacueniabinexa. ³¹ Biji rajane pacuenia taxa nitoroba tatoexanaenexa, bajarapacuenia exanaenajë. Nexata daxita mapanacuapijivije yapëtaena taxa tasivajava. Panonobapunare. Ponatsi baja mapacovëvecuajë, jai Jesús pijajivijavabelia.

15

Pacuenia Jesús bepeubinae yabara pelivaisi

¹⁻² Jesús jumaitsi comparacióncuenia pijajivijavabelia:

—Xanë rabaja bepexaniaviriauavanaenë. Nexata paxamë patajajivimë, bepatamaxëranamë. Pacuenia peubijava pevetsinë xaniavacetsia eveta, bajara pijinia pacuenia taxa nacaeveta. Nexata pacuenia peubijava pevetsinë vecuacucuba pibisiamaxëranaxi, penacopatsinexa ëpexaniamaxëranë, bajara itsi taxa. Nexata pacuene taxa apo pacatojitsipae,

pacavecuajibiaexanaponaena. Nexata pacuenia taxa Dioso pacatojitsipa, panevajënaeyabelia paexanavanapaename. ³ Paxamë rabaja panejume-covënètame patacatsipaebilivaisi. Bajaraxuata taxa baja pacavecuaxuaba pibisiajamatabëcuenemi. ⁴ Paxamë paneyajavajinavanapaename. Nexata xanë ata pacayajavaponaponaenatsi. Pamaxërana apo tabunucae tsipae pepo naejavabelia, apo nacuaiitsi tsipae. Bajara pijinia pacuenia paxamë ata paitsimë tsipae ita apo paneyajavajinavanapaemë tsipae. Xaniavaetsia apo pajinavanapaemë tsipae, jai Jesús pijajivijavabelia.

⁵ Icatsia Jesús jumaitsi pijajivijavabelia:

—Xanë rabaja beuvanaenë. Paxamë nexata bepatamaxërananëmë. Nexata pajivi neyajavaponaponaena, xanë ata pijinia bajarapajivi yajavaponaponaenajë. Bajarapajivi exanabiabiana bitso Dioso pejitsipaecuenia. Itsa apo paneyajavajinavanapaemë tsipae, nexata apo pacacajëpae tsipae panijacuata pexaniacuene paneexanaenexa. ⁶ Peubijava pevetsinë, piabejemaxëranaxi caucuba penacopatsinexa ëpexaniamaxërananë. Bajaraxuacujinae bajarapamaxëranaxi xuaba. Nexata baja ita niona bajarapamaxëranaxi, caetuata pexuabinexa isotojavabelia. Bajara pijinia pacuenia taxa Dioso exanaenatsi pamona apo neyajavajinavanapae tsane, jai Jesús pijajivijavabelia.

⁷ Icatsia Jesús jumaitsi:

—Itsa paxamë tsitecaeya panejumecovënëtavanapaename, nexata apo panacofënëtsimë tsane patacatsipaebilivaisi. Nexata panevajëtabiabianame xua pajitsipame. Nexata pacarajutsianatsi xua panevajëtame. ⁸ Itsa paxamë jivi patsitaexanavanapaename taxa Dioso pejitsipaecuenia, jivi yaiyataenatsi taxa. Nexata daxitajivi paxamë yabara jumai tsane: “Xaniajai rabaja. Bajarapamonaepacuene Jesús pijajivi,” jai tsane. ⁹ Pacuenia taxa niasiva, bajara pijinia pacuenia xanë ata pacaasivatsi. Tsiteca paexanavanapaename xua pacaitorobatsi. Tsipaji bitso pacaasivatsi. ¹⁰ Taxa niasiva. Tsipaji baja jumecovënëtajë taneitorobicuenia. Nexata yapëtaniji taxa taneasivajava. Bajara pijinia pacuenia paxamë ata ita panejumecovënëtavanapaename pacuenia pacaitorobatsi, nexata payapëtaename patacasivajava, jai Jesús pijajivijavabelia.

¹¹ Icatsia Jesús jumaitsi pijajivijavabelia:

—Xanë bitso jamatabëcuenebarëyanë. Nexata pacatsipaebatsi paxamë ata panejamatabëcuenebarëyanexa pacuenia xanë jamatabëcuenebarëyanë. Pacatojitsipatsi bitso panejamatabëcuenebarëya tsavanapaenexa. ¹² Mapacuenia paexanavanapaenameje. Pacuenia xanë pacaasivatsi, bajara pijinia pacuenia paxamë ata namataenetsia panaasivamë tsavanapae tsane pacaenëmë canacujitsia. ¹³ Pajivi peyapëtaejivitsi bitso asiva, jamatabëcuene yavenonabiabijitsipa daxitacuene yabara. Peyapëtaejivitsi pijaneconi yabara ata, yapijivinabeyaxuabiaexanaejitsipa. Nexata bajarapacuenia daxitajivi yapëtaejitsipa pepacujiru bajarapajivi bitso piasivajava peyapëtaejivitsi. Bajarapacuenia yapijivinabeyaxuabia exanaejitsipa bitso piasivaxae peyapëtaejivitsi. Nexata baja pematatsënëa itsajivi ata apo caëjëpaetsi bajarapacuenia pexanaejivi matatoxenetsia piasivanexa peyapëtaejivitsi. ¹⁴ Itsa paexanavanapaename patacaitorobicuenia, nexata baja patajamonaemë tsane. ¹⁵ Aeconoxae baja cajena saya bepatajajivucueniamë apo pacataetsi. Bepatajajivucueniamë baja bitso pacatanatsi. Tsipaji baja pacayapëtaeyaexanatsi daxita pacuenia taxa nitoroba taexanaenexa. Tsipaji mapanacuata petuxanenë pijajivi apo yapëtaeyaexanae daxita pacuenia petuxanenë exanaejitsia. ¹⁶ Paxamë raja apo panejunatsimë.

Biji rajane xanë pacajunatatsi patanepënaponaenexamë. Nexata xanë pacaitorobatsi panëexanavanapaenexa Dioso pejitsipaecuenia. Nexata xua paexanavanapaenama, apo pevereverecaevanexa tsane. Daxita pacuene tavënëta pavajëtsianame taxa Diosojavabelia, pacarajtsiana cajena. ¹⁷ Mara pacuene paneexanaenexa pacaitorobatsije. Namataenetsia panaasivamë tsavanapae tsane pacaenëmë canacujitsia, jai Jesús pijajivijavabelia.

Pacuenia Jesús pijajivi mapanacuapijivi itoyajitsiatsi yabara pelivaisi

¹⁸ Jesús icatsia tajëvelia jumaitsi pijajivijavabelia:

—Mapanacuapijivi, Dioso apo pejumecovënëtsivi, itsa pacaitoya tsane, panajamatabënapitsianame xanë copiaya taneitoyajava bajarapamonae.

¹⁹ Mapanacuapijivi, pamonae Dioso apo pejumecovënëtsivi, namataenetsia nasiva tsavanapae. Paxamë ata bajarapamonae itsa pajamatabëcuenejëpa vanapaejitsipame, nexata paxamë ata bajarapamonae pacaasiva tsipae. Itsiata baitsi jane xanë baja pacajunatatsi bajarapamonaevēcua. Nexata baja paxamë apo pajamatabëcuenejëpaemë bajarapamonae. Bajaraxuata pacaitoya tsane bajarapamonae. ²⁰ Panajamatabënapitabiabianame najumecapanepaeya patacajumaitsijava:

“Itsanë ata apo jamatabëcuenematatoxenetsi pijatuxanenë,” patacajajava. Nebejiobiaexana itsamonae. Nexata paxamë ata itsamonae pacabejiobiaexanaena. Itsamonae nejumecovënëta tatsipaebilivaisi. Nexata pijinia paxamë ata itsamonae pacajumecovënëtsiana panetsipaebilivaisi. ²¹ Bajarapacuenia pacaexanaena mapanacuapijivijē xanë patajajivixaemë. Tsipaji bajarapamonae apo yapëtae Dioso, ponë nitorobica, jai Jesús tajëvelia pijajivijavabelia.

²² Icatsia Jesús jumaitsi pijajivijavabelia:

—Xanë itsa apo patsinëtsica tsipae mapanacuayabetsicaje, mapanacuapijivi apo naneconitsi tsipae Diosojavabelia. Tsipaji bajarapamonae Dioso apo peyapëtaexae, pibisiacue ne exanaejitsipa. Nexata xanë tapatsixaetsica mapanacuayabetsicaje, bajarapamonae yapëtae baja Dioso. Nexata bajarapamonae yapëtae ata Dioso, pibisiacue pexanaexae, nexata naneconita Diosojavabelia. Nexata acuenebi bajarapamonae pejumaitsiyava pibisiacue ne pexanaejava yabara: “Apo tayapëtaexae Dioso, pibisiacue exanajē,” pejaiyava. ²³ Nexata pamonae nitoya, bajarapamonae taxa ata itoya.

²⁴ Bajarapamonaejavata Dioso pesaëta pinijicue ne taexanaejava exanabiabajē. Bajaraxua itsajivi ata apo exanae mapanacuata. Bajarapamonaejavata pinijicue ne taexanaejava itsa apo exanaenë tsipae, apo naneconitsi tsipae Diosojavabelia. Tsipaji bajarapamonae apo yapëtae tsipae Dioso. Bajarapamonae tae ata Dioso pesaëta pinijicue ne taexanaejava, itsiata apo nejumecovënëtsi. Bajarapamonae nitoya. Taxa ata itoya. Nexata naneconita Diosojavabelia. ²⁵ Bajarapacuenia nitoya tsipaji baja cajena bajayata tajëvelia bajarapamonae taneitoyajavanexa yabara, Dioso pejumelivaisibaxutota jumaitsi mapacueniaje: “Nitoya tsane bajarapamonae, ajibi tanyabaraitoyajava ata,” jai tajëvelia Dioso pejumelivaisibaxutota xanë yabara, jai Jesús pijajivijavabelia.

²⁶ Icatsia Jesús jumaitsi pijajivijavabelia:

—Vajëtsianajē taxajavabelia pitorobinexatsica Espiritu Santo, pexaniajailivaisi pepaëbinënexa. Itsa patsianica Espiritu Santo taxajavavetsica, nexata pacayavenonaena. Pacajamatabëcuene asaëyaexanaenanua. Espiritu Santo xanë nevajunupaebiana xaniavaetsia. ²⁷ Paxamë baja cajena tataxuxu-abijavaveliacujinae jivi livaisi tatsipaebijava, paneyajavajinavanapame. Bajaraxuata paxamë ata xaniavaetsia panevajunupaebianame, jai Jesús pijajivijavabelia.

16

¹ Icatsia Jesús jumaitsi pijajivijavabelia:

—Bajarapacuenia pacatsipaebatsi panecopabiyaniwa patanejume-covënësilivaisimë. ² Paxamë papecaitoiyavi, pacacapitsapabiabiana judiövi penacaeuatabiabibovecua. Belia jane baja itsamatacabi-javabelia pacabeyejebiana. Nexata pamonaë pacabeyejebiana, jamatabëcuenenavëxaniabiaya jumaitsi tsane: “Dioso pejitsipaecuenia tobeyejbajë mapamonaeje,” jai tsane. ³ Bajarapamonae xanë apo neyapëtae. Apo yapëtae cajena taxa ata. Bajaraxuata bajarapacuenia pacaxanaena. ⁴ Bajarapacuenia tajëvelia pacatsipaebatsi baja cajena. Nexata jane baja pamatacabi pacatsipatsiana bajarapacuenë, panajamatabënapitsianame pacuenia baja cajena tajëvelia pacatsipaebatsi, jai Jesús pijajivijavabelia.

Pacuenia Espiritu Santo exanaejitsia jivijavabelia yabara pelivaisi

Icatsia Jesús jumaitsi pijajivijavabelia:

—Tataxuxuabijavaveliacujinae jivi livaisi tatsipaebijava, abaxë apo pacatsipaebitsi mapacujene yabaraje. Bajarapacuenia jone pacatsipaebitsi tsipaji abaxë pacayavaponaponatsi. ⁵ Itsiata baitsi jane aeconoxae baja payapëtae atamë tanaviatsijavanexa taneitorobinëjavabetsia, itsanë ata paxamëyajuvënënë apo neyanijobi. “¿Detsa belia ponaejitsiamë?” apo nejai. ⁶ Pacanavajunupaebatsi baja cajena tanaviatsijavanexa. Bajaraxuata bitso panajamatabëxainame. ⁷ Palivaisi aeconoxae pacatsipaebijitsiatsi, pexaniajailivaisi cajena. Pacatoxanepanaena itsa baja pacavecuaponaenatsi. Itsa apo pacavecuaponaë tsipaetsi, apo pacatopatsitsica tsipae Espiritu Santo papecayajavaponapon-aenexa. Espiritu Santo pacayavenonabiabiana. Pacajamatabëcuene asaëyaexanaenanua. Itsa ponaenajë taxajavabetsia, nexata Espiritu Santo pacatoitorobianicatsi. ⁸ Nexata Espiritu Santo patsianica. Nexata Espiritu Santo pejamatabëcuenetjailivaisi cajena. Pacatoxanepanaena itsa baja pacavecuaponaenatsi. Itsa apo pacavecuaponaë tsipaetsi, apo pa, pamonaë Dioso apo pejumecovënëtsivi, nacueneyapëtaena pibisiacuenë pexanaejava. Yapëtaenanua pacuene xanepana pexanavanapaenexa Dioso pitabarata. Yapëtaenanua pacuenia Dioso naneconitsiaexanaejitsiatsi bajarapamonae pibisiacuenë pexanaeneconï yabara. ⁹ Espiritu Santo pejamatabëcueneta, bajarapamonae nacueneyapëtaena pibisiacuenë pexanaevicuenë. Tsipaji xanë bajarapamonae apo nejumecovënëtsi pibisiacuenë pexanaeneconï tavecuajibiaexanaejavanexa. ¹⁰ Nexata Espiritu Santo pejamatabëcueneta, bajarapamonae yapëtaena pacuene xanepana pexanavanapaenexa Dioso pitabarata. Tsipaji baja xanë naviatsianajë taxajavabetsia. Nexata baja bajarapamonae pematatsënëa apo netae tsane. ¹¹ Bajarapamonae Espiritu Santo pejamatabëcueneta, yapëtaena pacuenia Dioso naneconitsiaexanaejitsia daxita pamonaë pibisiacuenë pexanaevi dovathi pejamatabëcueneta. Tsipaji Dioso naneconitsiaexanaena dovathi, ponë mapanacuapijivi itorobabiaba pibisiacuenë pexanaenexa, jai Jesús pijajivijavabelia.

¹² Icatsia Jesús jumaitsi pijajivijavabelia:

—Ayailivaisi picani abaxë xainajë patacatsipaebinexa. Itsiata baitsi jane abaxë apo pacajamatabëcueneceajëpae bajarapalivaisi panajumeyapëtaenexa. ¹³ Matapania pamatacabi patsianica Espiritu Santo, ponë pexaniajailivaisi pepaebinë, bajaraponë pacayapëtaeayaexanaena daxita pexaniajailivaisi. Espiritu Santo raja apo pacayapëtaeayaexanae tsane saicaya

pejamatabëcuenepijilivaisi. Daxita raja pacuenia taxa Dioso jumaitsi, juya Espiritu Santo pacayapëtaeyaexanaena. Nexata tajëvelia Espiritu Santo pacayapëtaeyaexanaena pacuene pevajënaeyabelia copiapataponaejitsia. ¹⁴ Espiritu Santo pejamatabëcueneta jivi neyaiyataena. Tsiipaji xanë talivaisi, pexaniajailivaisi, Espiritu Santo pacayapëtaeyaexanaena. ¹⁵ Daxita taxa pexainaejava, xanë ata rabaja tajajava. Bajaraxuata pacajumaitsi: “Xanë talivaisi, pexaniajailivaisi, Espiritu Santo pacayapëtaeyaexanaena,” pacajaitsi, jai Jesús pijajivijavabelia.

Pacuenia bepejamatabëcuenepijilivaisi jamatabëcueneparëyajitsia yabara pelivaisi

¹⁶ Icatsia Jesús jumaitsi pijajivijavabelia:

—Caematacabibecujinae rabaja apo panetaemë tsane. Itsiata icatsia itsamatacabibecujinae panetaename. Bajara jane xuacujinae ponaenajë baja taxajavabetsia, jai Jesús.

¹⁷ Nexata pijajivijavuvënëvi nayanijoba ëpamonae.

—¿Detsa majumaitsi pajumeje? Jesús nacajumaitsi: “Caematacabibecujinae rabaja apo panetaemë tsane. Itsiata icatsia itsamatacabibecujinae panetaename. Bajara jane xuacujinae ponaenajë baja taxajavabetsia,” nacajai. ¹⁸ ¿De tsaeta pejumaitsi jume: “Caematacabibecujinae rabaja apo panetaemë tsane. Itsiata icatsia itsamatacabibecujinae panetaename,” nacajai? Apo jumeyapëtaetsi cajena xua yabara nacajumaitsi, najai Jesús pijajivi.

¹⁹ Jesús jamatabëcuenepëtane pacuenia picani pijajivi jamatabëyanijobatsi. Nexata Jesús tajëvelia jumaitsi pijajivijavabelia:

—Pacajumaitsi mapacueniaje: “Caematacabibecujinae rabaja apo panetaemë tsane. Itsiata icatsia itsamatacabibecujinae panetaename,” pacajaitsi. ¿Baja tsa pajume yabara panayanijobame? ²⁰ Xaniajanë pacuenia pacatsipaebijitsiatsi. Xanë itsa tēpaenajë, paxamë panuename. Bitso xanëjitsia panajamatabëxainaname. Itsiata baitsi jane pamonae apo nejumecovënëtsi, barëya tsane tatēpaejava yabara. Itsiata baitsi jane xuacujinae paxamë icatsia bitso panesivajamatabëcueneparëyamë tsane itsa panetaename icatsia. ²¹ Pamatacabi petiriva vixanotatsi penacueto pevecuanaexanaenexatsi, bitso bayanajamatabëxaina. Itsiata penacueto pevecuanaexanaecujinaetsi, pevixae apo najamatabënapitsi. Panacueto baja vecuanaexanatsi, sivajamatabëcueneparëya. ²² Bajara pijinia pacuenia paxamë ata bitso panajamatabëxainaname itsa tēpaenajë. Itsiata icatsia itsa panetaename, bitso panesivajamatabëcueneparëyamë tsane. Nexata itsajivi ata apo caëjēpaetsi tsane papecavecuajibiaexanaenexa panejamatabëcueneparëyajava, jai Jesús pijajivijavabelia.

²³ Icatsia Jesús jumaitsi pijajivijavabelia:

—Pamamatacabi icatsia panetaename, apo paneyanijobimë baja tsane itsacuenejavayo ata. Tsiipaji baja Espiritu Santo pacayapëtaeyaexanaena daxitacuene. Xaniajanë pacuenia patsipaebijitsiatsi. Taxa pacarajutsiana daxita xua tavënëta pavajëtabiabianame taxajavabelia. ²⁴ Abaxë tavënëta taxajavabelia apo pavajëtsimë itsacuenejavayo ata. Aeconoxae rajane baja tavënëta taxajavabelia pavajëtabiabianame. Nexata taxa itsa pacarajutsiana xua pavajëtsianame, bitso pajamatabëcueneparëyamë tsane taxajavabelia, jai Jesús pijajivijavabelia.

Pacuenia Jesús jamatabëcueneamoneyaba dovathi, ponë itorobabiaba mapanacuapijivije pibisiacue pexanaenexa, yabara pelivaisi

²⁵ Icatsia Jesús jumaitsi pijajivijavabelia:

—Palivaisi baja pacatsipaebabiabatsi, najumematayatsiaya pacatsipaebabiabatsi. Itsiata itsamatacabi livaisi apo pacatsipaebi tsanetsi najumematayatsiaya. Biji rajane pacatsipaebianatsi jumenapebetsiaya taxa pelivaisi.

²⁶ Bajarapamatacabi paxamë baja taxajavabelia pavajëtabianame tavënëta. Nexata baja xanë apo patacatovajëtabiabi tsanetsi taxajavabelia.

²⁷ Paxamë paneasivamë. Panejumecovënëtamenua taxa taneitorobinëcuenetsica. Bajaraxuata paxamë taxa pacaasiva. Nexata panijacuata taxajavabelia itsa pavajëtabianame, taxa pacajumetaena.

²⁸ Xanë baja cajena ponaponajë taxajavatatsia. Nexata taxajavavetsica ponajë tapatsinexa mapanacuayabetsicaje. Nexata icatsia ponaenajë mapanacuavecuaje. Naviatsianiajë baja taxajavabetsia, jai Jesús pijajivijavabelia.

²⁹ Nexata Jesús pijajivi jumaitsi:

—Baja rajane jumenapebetsiaya panetsipaebame. Najumematayatsia baja apo panetsipaebimë. ³⁰ Nexata baja pacajamatabëcueneypëtanetsi daxitacue neyapëtaenëcuene. Xamë panejamatabëcueneypëtaneme palivaisi picani jamatabëpacayanijobatsi. Bajaraxuata pacajumecovënëtatsi baja Dioso athëbëvetsica pecaitorobinëcuenetsica, jai Jesús pijajivi.

³¹ Jesús nexata jumaitsi pijajivijavabelia:

—¿Nexata tsabaja aeconoxae panejumecovënëtame taxa Dioso athëbëvetsica taneitorobinëcuenetsica? ³² Imoxoyo rabaja pevajënae panenacayatsinexa panenaviabinexa panijabonëjavabelia. Paxamë panexuabanutsianame caenënë.

Itsiata baitsi jane apo caenënë tsane. Tsipaji taxa yajavaponaponajë. ³³ Bajarapacue tajëvelia paneyapëtaenexa, pacatsipaebabiabatsi baja cajena. Nexata xanëjavaberena panenajamatabëcuene copatsixae, ajunavijibia pajinavanapaename. Mapanacuata panejinavanapaepato mapanacuapijivije pacabejiobiaexanabiabiana. Itsiata pajamatabëcuenesaëmë tsavanapae tsane. Xanë rabaja jamatabëcueneamoneyabajë dovathi, ponë itorobabiaba mapanacuapijivije pibisiacue pexanaenexa, jai Jesús pijajivijavabelia.

17

Pacuenia Jesús pijajivi tovajëta paxa Diosojavabelia yabara pelivaisi

¹ Jesús dovathi pejamatabëcueneamoneyabijava pijajivijavabelia petsipaebicujinae, Jesús athëbëa benaëcotsia. Nexata jumaitsi paxa Diosojavabelia:

—Taxa, netocopiapata rajane baja daxita pacuenia netocopatame. Tsi-tajëre jivi pacuenia xanë nexënatoxaenë, bitso ayaijamatabëcuenenënë. Bajarapacuenia itsa tsitajëtsianame, nexata jivi yapëtaena pacuenia xamë Diosomë bitso ayaijamatabëcuenenëmë. ² Xamë rabaja netocopatame daxitajivi taevetsinexa. Nexata necaëjëpa tarajutsinexa matacabi apo peverevere caejava daxita pamonae nerajutame. ³ Matacabi apo peverevere caejava pexainaevinexa, cayapëtae baja caenëmë pepo Diosonëcuenemë. Bajarapamonae neyapëtanenua baja Jesucristonë athëbëvetsica taneitorobinëmëtsica, jai Jesús paxa Diosojavabelia.

⁴ Icatsia Jesús jumaitsi paxa Diosojavabelia:

—Xanë rabaja mapanacuapijivijavabeliaje, apo pecajumecovënëtsivijavabelia, cajamatabëcueneitajëtatsi bitso ayaijamatabëcuene nexainaejava. Veretajënuu baja daxita xua nitorobame tacatoexanaenexa.

⁵ Taxa, pamatacabi abaxë ajibi mapanacuaaje, itsa cayajavaponaponatsi, necotia yajavaponaponajë ayaijamatabëcuenenëxaenë. Bajarapacuenia icatsia aeconoxae ata netocopatsianame vajanajuaevetaponaponanexabeje daxitacuene, jai Jesús paxa Diosojavabelia.

⁶ Icatsia Jesús jumaitsi paxa Diosojavabelia:

—Xamë itapetame itsamonae mapanacuataje tanesivanajamatabëcopatsinexa. Xanë nexata yapëtaeyaexanajë bajarapamonae pacuenia jamatabëcuenetsimë. Bajarapamonae nijajivi nerajutame. Xaniavaetsia cajumecovënëta nijumelivaisi. ⁷ Aeconoxae baja bajarapamonae nijajivi yapëtane xamë nejamatabëcueneta taexanaponaejava daxita xuanë exanaponajë. ⁸ Daxita palivaisi netsipaebame, xanë juya bajarapalivaisi tsipaebajë bajarapamonae. Nexata nejumecovënëta. Nexata yapëtane bajarapamonae pepacuene tapatsijava xamëjavavetsica. Nejumecovënëta xamë athëbëvetsica taneitorobinëcuenemëtsica, jai Jesús paxa Diosojavabelia.

⁹ Icatsia Jesús jumaitsi paxa Diosojavabelia:

—Cavajëtatsi bajarapamonanexa. Apo cavajëtsitsi raja apo pecajumecovënëtsivinexa. Cavajëtatsi raja tanerajutsivimënexa. ¹⁰ Daxita pamonaenijajivi, bajarapamonae xanë ata tajajivi. Daxita pamonaenitajajivi, bajarapamonae xamë ata nijajivi. Daxitajivi neyapëtane ayaijamatabëcuene taxainaejava. Tsipaji tajajivi xaniavaetsia netojinavanapa, jai Jesús paxa Diosojavabelia.

¹¹ Icatsia Jesús jumaitsi paxa Diosojavabelia:

—Xanë baja apo ponaponanë tsane mapanacuataje. Tsipaji baja ponaejitsianë xamëjavabetsia. Itsiata baitsi jane tajajivi jinavanapaena abaxë mapanacuataje. Taxamë, bitso nianeconijibinë. Tanerajutsivimë nesaëta evetsianame pibisiacuenevecua. Vaxaitsibeje caejamatabëcuene xainatsibeje. Nexata bajarapamonae ata tojitsipajë caejamatabëcuene pexainanexa. Pacuenia vaxaitsibeje jamatabëcuenetsitsibeje, bajara pejamatabëcuenetsinexa. ¹² Itsa abaxë yajavaponaponajë bajarapamonae mapanacuataje, nesaëta evetaponaponajë. Nexata apo nevecuanaxuabi daxita. Caenë saya nevecuanaxuabiana. Bajaraponë nevecuanaxuabiana tsipaji tocopiapatsianatsi pacuenia baja cajena tajëvelia jumaitsi nijumelivaisibaxutota bajaraponë yabara, jai Jesús paxa Diosojavabelia Judas yabara.

¹³ Icatsia Jesús jumaitsi paxa Diosojavabelia mapacueniaje:

—Aeconoxae baja ponaenajë xamëjavabetsia. Itsiata abaxë taponaponatabiepatoyo mapanacuataje, cavajëtatsi. Bajarapacuenia cavajëtatsi tajajivi bitso pejamatabëcuenearëyanexa pacuenia xanë bitso jamatabëcuenearëyanë. ¹⁴ Xanë baja tajajivi tsipaebajë nijumelivaisi. Pacuenia mapanacuapijivije, apo pecajumecovënëtsivi, jamatabëcuenetsi, xanë apo jamatabëcuenetsinë. Bajaraxuata tajajivi ata itoyatsi mapanacuapijivije. Tsipaji apo jamatabëcuenejëpae.

¹⁵ Apo cavajëtsitsi raja nejutsinexa tajajivi mapanacuapijivivecuaje. Cavajëtatsi raja nevetabiabinexa tajajivi dovathivecu. ¹⁶ Pacuenia xanë apo jamatabëcuenejëpaenë mapanacuapijivije, bajara pijinia pacuenia tajajivi ata apo jamatabëcuenejëpae mapanacuapijivije.

¹⁷ Nijumelivaisi cajena pexaniajailivaisi. Bajaraxuata tanejumecovënëtsivi baja yavenonaename penatsatsinexa dovathi pejamatabëcuenecua. Nexata bajarapamonae exanavanapaena xamë netojitsipaecuenia nijumelivaisi baja petsijamatabëcaexaetsi. ¹⁸ Pacuenia xamë nitorbame pexaniajailivaisi tatsipaebinexa mapanacuapijivijavabeliaje, bajara pijinia pacuenia juya xanë ata itorobajë tajajivi pexaniajailivaisi petsipaebinexa mapanacuapijivijavabeliaje. ¹⁹ Pacuenia xamë netojitsipame, tajajivi

yapijivinacaevetsianajë xanë tanebeyaxuabinexa. Nexata bajarapamonae pacuenia xamë tojitsipame, catoexanavanapaena. Tsipaji baja bajarapamonae yapëtane nijumelivaisi pexaniajailivaisicuene, jai Jesús paxa Diosojavabelia.

²⁰ Icatsia Jesús jumaitsi paxa Diosojavabelia mapacueniaje:

—Itsiata apo cavajëtsitsi ëtajajivinexa. Cavajëtatsi raja bexëajavabelia tanejumecovënëtsivinexa ata. Tajajivi itsamatacabi bajarapamonaejavabelia itsa tsipaebaponaena tajumelivaisi, nexata bexëajavabelia bajarapamonae nejumecovënëtsiana. ²¹ Nexata cavajëtatsi daxita bajarapamonae penajamatabëcuenejëpaenexa. Xamë neyajavaponaponame. Xanë ata pijinia cayajavapononatsi. Bajara pijinia pacuenia tojitsipajë daxita bajarapamonae ata vajanacayajavajinavanapaenexabeje. Tojitsipajë bajarapamonae penajamatabëcuenejëpaenexa. Nexata bajarapamonae najamatabëcuenejëpaeya pejinavanapaejava, itsa tane daxita mapanacuapijivije, pejumecovënëtsinexa xamë athëbëvetsica taneitorobinëcuenemëtsica.

²² Pacuenia xamë yapëtaeyaexaname tajajivijavabelia xanë bitso ayajamatabëcuene taxinaejava, bajara pijinia pacuenia xanë ata bajarapomonaejavabelia yapëtaeyaexanajë baja bajarapamonae ata ayajamatabëcuenevi baja penaexanaejava tanejumecovënëtsixae. Nexata bajarapamonae tanejumecovënëtsixae, najamatabëcuenejëpa baja pacuenia vaxaitsibeje najamatabëcuenejëpatsibeje. ²³ Tajajivi yajavapononajë. Xamë pijinia neyajavaponaponame. Nexata tajajivi caejamatabëcuene xainaena. Nexata daxita mapanacuapijivije itsa taena tajajivi najamatabëcuenejëpaeya pejinavanapaejava, yapëtaena xamë athëbëvetsica taneitorobinëcuenemëtsica. Yapëtaenanua bajarapamonae niasivajava pacuenia xanë ata niasivamë, jai Jesús paxa Diosojavabelia.

²⁴ Icatsia Jesús jumaitsi paxa Diosojavabelia:

—Taxa, bajarapamonae xamë nerajutame. Nexata jitsipajë bajarapamonae ata penajinavanapaenexa itsabelia ponaejitsianë. Jitsipajë bajarapamonae taneyajavajinavanapaenexa, taneyapëtaenexa bitso ayajamatabëcuene taxinaejava. Tsipaji nacua nexanaevajënaeya ata, xamë niasivamë. Bajaraxuata ayajamatabëcuenenënë nexaname. ²⁵ Taxa, itsaneconi ata apo nexainaenë. Mapanacuapijivi, pamonae apo cajumecovënëtsi, apo cayapëtae. Itsiata xanë cayapëtanetsi. Mapamonaeje, tajajivi, yapëtane baja xamë athëbëvetsica taneitorobijavamëtsica. ²⁶ Xanë tajajivi yapëtaeyaexanajë pecayapëtaenexa. Abaxë itsiata pevajënaeyabelia pecayapëtaeponaenexa, yapëtaeyaexanaponaenajë. Pacuenia xanë niasivamë, bajara pijinia pacuenia bajarapamonae ata namataenetsia penaasivanexa, yapëtaeyaexanaponaenajë. Xanë bajarapamonae yajavaponaponaenajë, jai Jesús paxa Diosojavabelia.

18

Pacuenia Jesús pijavajabitsaë vaetabatsi pebeyaxuabinexatsi jane baja yabara pelivaisi

(Mt 26.47-56; Mr 14.43-50; Lc 22.47-53)

¹ Jesús pevajëtsicujinae paxa Diosojavabelia, pijajivi barëpona Cedrónvënënajata itsapanabelia. Nexata bajarajotalia peubinaenë bacabobëxëpanata, Jesús pijajivi barëpata. ² Bajarajota cajena Jesús pijajivi barënacaetuatabiaba. Bajaraxuata Judas, Jesús pijajivitonë ata, ponë canajetsijitsiatsi pijavajabitsaë pecobeyabelia, yapëtane itsajota Jesús pijajivi barënacaetuatabiaba. ³ Nexata Judas peyapëtaexae, bajarajota

barëpata vajabitsaë. Barëpatanua templobopijipolicíavi. Bajarapamonae itorobatsi sacerdotevi penamatacaitorobivibeje fariseovibeje. Judas pematacaponaevi capona espadanë, naebonë yajava. Lámparabëanënuu capona. Beisotabuqueranënuu capona penatsivajënaeitayotsinexa. ⁴ Nexata baja Jesús yapëtane daxita pacuenia exanaejitsiatsi bajarapamonae. Nexata Jesús najetabalia. Jumaitsi bajarapamonaejavabelia:

—¿Jipatsa pajaitame? jai Jesús.

⁵ Nexata bajarapamonae jumaitsi:

—Jesús raja, Nazaret tomarapijinë, pajaitajë, jai bajarapamonae.

Jesús nexata jumaitsi:

—Xanë rabaja maje, jai.

Judas, ponë Jesús pijavajabitsaë pecobeyabelia canajetatsi, nanuca bajarapamonaejavata. ⁶ “Xanë rabaja maje,” pejaijavata Jesús, bajarapamonae pematabëxëpa toquequenaponalia. Othopa irata. ⁷ Nexata icatsia Jesús jumaitsi:

—¿Jipatsa nexata pajaitame? jai.

Nexata icatsia bajarapamonae jumaitsi:

—Jesús raja, Nazaret tomarapijinë, pajaitajë, jai bajarapamonae.

⁸ Nexata Jesús jumaitsi bajarapamonaejavabelia:

—“Xanë rabaja maje,” pacajaitsi rabaja. Xanë itsa panejaitame, pacopat-sianame mapamonaeje peponaenexa, jai Jesús pijajivi yabara.

⁹ Bajarapacuenia Jesús itsa jumaitsi, copiajopa jane baja pacuenia tajëvelia jumaitsi Jesús. Jesús baja cajena pijajivi yabara tajëvelia jumaitsi mapacue-niaje: “Pamonae taxa nerajuta, itsanë ata apo nevecuanaxuabi tsane,” jai cajena Jesús tajëvelia pijajivi yabara. Bajarapacuenie jane baja copiajopa.

¹⁰ Nexata Jesús pijajivitonë, Simón Pedro, namaracëtaaponapona espada. Nexata Simón Pedro espada navemarajonotaxuabina. Pecujuanenia pamuxuyorotomí, muxuyoropaebiaxuaba sacerdotevi pepo penamatacaitorobinë pijajivitonë. Ponë Simón Pedro muxuyoropaebiaxuaba, pevënë Malco.

¹¹ Nexata Jesús jumaitsi Pedrojavabelia:

—Nijaespada baja pevënojojavareca xataremeca. Taxa baja cajena neto-copata tanebejiobiaexanaenexa. Bajaraxuata nacaevetsianajë tanebejiobi-aexanaenexa, jai Jesús Pedrojavabelia.

Pacuenia Jesús nutatsi sacerdot. Pecujuanenia pamuxuyorotomí, muxuyoropaebiaxuaba sacerdotevi pepo penamataeivi pepo penamatacaitorobinë pitabarata yabara pelivaisi

(Mt 26.57-58; Mr 14.53-54; Lc 22.54)

¹² Vajabitsaëvi pijacapitán, pijajivi yajava, judíovi pijapolicíavinua, nacobenavaetabatsi Jesús. Nexata cobecëtatsi. ¹³ Caponatsi baja Anásvënëne pijaboyabelia. Anás paxuyo Caifás. Bajarapamatacabi Caifás sacerdotevi pepo penamatacaitorobinë tsaponapona. ¹⁴ Bajaraponë Caifás jumaitsi baja cajena copiaya judíovijavabelia Jesús yabara: “Bajaraponë caenë itsa beyaxuabiaexanaenatsi, bajaraponë pejamatabëcueneta daxita judíovitsi vajavajabitsaë apo nacaverebiabi tsane,” jai.

Pacuenia jane baja Pedro nayavajunuaxaina Jesús pijajivitonëcuene yabara pelivaisi

(Mt 26.69-70; Mr 14.66-68; Lc 22.55-57)

¹⁵ Itsa baja Jesús caponaliatsi sacerdotevi pepo penamatacaitorobinë pijaboyabelia, Simón Pedrobeje, itsanëbeje, Jesús pijajivitonëbeje,

tajiyo pënanajetarucabeje. Ponë Simón Pedro yanatatsi, bajaraponë yapëtanetsi sacerdotevi pepo penamatacaitorobinë. Sacerdotevi pepo penamatacaitorobinë pijabo matatoyorotsia yacaranata ibopanaxanetonë, mataropotsia pefaratsijavaxanetota. Nexata ponë Pedro yanatatsi, bajarapayacaranatsijavaxaneto baupa najoneya. Nexata panepa bopanabojavabelia, itsabelia Jesús cajunuatsi. ¹⁶ Nexata Pedro nucojopa sacerdotevi pepo penamatacaitorobinë pijabo matatoyorotsia peyacaranatsijavaxaneto baupa jumavelia. Nexata ponë Pedro yanatatsi, caevëa pitsaparena. Nexata bajaraponë cuaicuajjai baupa pevetsivajavabelia Pedro ata penajonenexalia. Nexata baja Pedro ata tocopatatsi bopanabojavabelia penajonenexalia. Nexata baja Pedro ata najoneya bopanabojavabelia. ¹⁷ Nexata baupa pevetsiva jumaiti Pedrojavabelia:

—¿Xamë ata tsabaja Jesús apo pijajivitonëmë? jai.

Pedro nexata jumaitsi:

—Jume raja. Xanë raja Jesús apo pijajivitonënë, jai Pedro.

¹⁸ Bajarapaepatota bitso bajarapameravi cainejeba. Nexata bajarapabota penacuenebivi, policíavi yajava, isoto itajuruteta bopanabota. Bajarapamonae nonopanubena. Nexata Pedro nanuca bajarapamonaejavata. Nanonpanuca.

Pacuenia sacerdotevi pepo penamatacaitorobinë Jesús yanijobatsi yabara pelivaisi

(Mt 26.59-66; Mr 14.55-64; Lc 22.66-71)

¹⁹ Anás jane baja sacerdotevi pepo penamatacaitorobinë jumaiti Jesúsjavabelia:

—¿Detsa pamatabëxëyo nijajivi? ¿Detsa palivaisi tsipaebabiabame nijajivi? jai.

²⁰ Jesús nexata jumaitsi Anásjavabelia:

—Xanë daxitajivi pexanialivaisi tsipaebabiabajë itsajota nacaetuatabiaba. Tsipaebabiabajë penacaetuatsibonëjava, templobota ata. Muetsia cajena itsamatacabi ata apo tsipaebinë. ²¹ ¿Detsa xuajitsia nexata neyanijobame? Yanijobare pamonaejavabelia tsipaebabiabajë. Nexata bajarapamonae catsipaebiana pacuenia nejumetaeyabiaba. Bajarapamonae yapëtane xua yabara pexanialivaisi tsipaebabiabajë, jai Jesús sacerdotevi pepo penamatacaitorobinëjavabelia.

²² Itsa bajarapacuenia Jesús jumaiti, nexata bajarajota penucaenë templobopijipolicianë itabarapacataxuabatsi. Policianë jumaiti Jesúsjavabelia:

—Pëtsa bajarapacuenia cuaicuajjamë sacerdotevi pepo penamatacaitorobinëjavabelia, jai.

²³ Jesús nexata jumaiti policianëjavabelia:

—Itsa pibisiacuenia cuaicuajjanë, netsipaebare papibisiacuenie yabara cuaicuajjanë. ¿Detsa xuajitsia saya xaniavaetsia tajumaitsijava yabara, nebiame? jai Jesús.

²⁴ Nexata Anás itoroba Jesús cobecëtsiaya tsiteca pecaponaenexatsi Caifásjavabelia, ponë sacerdotevi pepo penamatacaitorobinëjavabelia.

Pacuenia icatsia Pedro nayavajunuaxaina Jesús pijajivitonëcuene yabara pelivaisi

(Mt 26.71-75; Mr 14.69-72; Lc 22.58-62)

²⁵ Pedro abaxë nanonpanuca isotojavata. Nexata bajarajota penubenaevi jumaititsi:

—¿Xamē ata tsabaja Jesús apo pijajivitonēmē? jaitsi.

Pedro nexata nayavajunuaxainaeya jumaitsi:

—Jume raja. Xanē raja Jesús apo pijajivitonēnē, jai Pedro.

²⁶ Nexata icatsia bajarajota sacerdotevi pepo penamatacaitorobinē pijaivitonē, ponē Pedro muxuyoropaebiaxuaba pijamonaenē, jumaitsi:

—Xamē cajena covē catanetsi Jesúsjavata, peubinaenē bacabojavata, jai.

²⁷ Pedro icatsia nayavajunuaxainaeya jumaitsi:

—Jume raja. Xanē cajena apo yapētaenē Jesús, jai Pedro.

Itsa baja Pedro najumeveretaba bajarapacuenia pejumaitsijava, vacara baja fiaba.

Pacuenia Jesús nutatsi Pilato pitabarata yabara pelivaisi

(Mt 27.1-2, 11-14; Mr 15.1-5; Lc 23.1-5)

²⁸ Itsa baja ajena matababi tsina, Jesús capitsapatsi Caifás pijabovecua. Nexata Jesús caponaliatsi nacuaevevtsinē Pilato pijaboyabelia. Judíovi, pamonaē najetarubena Jesús peneconitsinexatsi, apo najonelia nacuaevevtsinē Pilato pijaboyalia. Tsipaji Pilato apo judíonē. Judíovi apo joneyabiabi apo judíonē pijaboyalia. Bajarapamonae ita jonejitsipa Pilato pijaboyalia, bajarapamonae judíovixae, jamatabējumai tsipae: “Najamatabēcuenebijianajē Dioso pitabarata apo judíonē pijaboyalia tanajonexae. Nexata tavēna judíovi apo netocopatsi tsane tanaxaenexa pascua fiestamatababi pexaejava,” jamatabējai tsipae bajarapamonae. ²⁹ Nexata Pilato pitsaparena. Jumaitsi judíovijavabelia:

—¿Detsa pitsineconi yabara pacapatame maponēje? jai Pilato judíovijavabelia.

³⁰ Nexata judíovi jumaitsi:

—Itsa raja pibisiacueni apo pexanaenē tsipae, apo pacatocapatsi tsipaetsi maberenaje, jai judíovi.

³¹ Nexata icatsia Pilato jumaitsi:

—Paca ponaremelia caevēalia. Pananeconitsiaexanaename panijacuata pacuenia panijalivaisi pacaitoroba paneexanaenexa, jai Pilato judíovijavabelia.

Nexata judíovi icatsia jumaitsi:

—Paxamē baitsi jane apo panetocopatsimē patabeyaxuabinexa itsanē ata pijaneconi yabara, jai judíovi.

³² Bajarapacuenia Jesús tocopiapatatsi pacuenia baja cajena tajēvelia pijajivijavabelia navajunupaebapona pebeyaxuabijavanexatsi. ³³ Nexata Pilato icatsia joneya pijaboyalia. Jumaitsi Jesúsjavabelia:

—¿Xamē tsaja judíovi pepo nevetsinē? jai.

³⁴ Jesús nexata jumaitsi Pilatojavabelia:

—¿Xamē tsaja nejamatabēcueneta neyanijobame? Jume. ¿Catsipaeba tsaja itsamonae xanē judíovi pepo taevetsinēcuene? jai Jesús.

³⁵ Pilato nexata jumaitsi:

—Xanē raja apo judíonēnē. Bajarapacuenia apo tacasivanajamatabēxainaeta. Judíovi raja, caranata nijanacuapijivi, sacerdotevi penamatacaitorobivi yajava, cacapata maberenaje pecaneconitsinexa xanjējavabena. ¿Detsa jane xua exaname? jai Pilato Jesúsjavabelia.

³⁶ Nexata Jesús jumaitsi Pilatojavabelia:

—Mara panacua xanē apo taevetsinēje. Itsa ra peneta mapanacua taevetsinē tsipaeje, nexata paepatota judíovi nevaetaba, daxita tajajivi

neyapijivinamaxëvanitsipa tapanepaenexa. Xanë raja mapanacua apo taevetsinëje, jai Jesús Pilatojavabelia.

³⁷ Nexata Pilato jumaitsi:

—¿Xamë tsaja nexata jivi nevetsinë? jai.

Jesús nexata jumaitsi:

—Jājā, xanë raja jivi taevetsinë pacuenia nejumaitsimë. Bajaraxuata patajē mapanacuayabetsicaje tatsipaebinexa jivi pexaniajailivaisi. Daxita pamonaē jitsipa pexaniajailivaisi, nenamuxunaevetabiaba bajarapalivaisi, jai Jesús Pilatojavabelia.

³⁸ Nexata Pilato jumaitsi Jesúsjavabelia:

—¿Detsa pacuenia nayapëtane pexaniajailivaisicuene? jai.

Pacuenia baja Pilato tocopata Jesús pebeyaxuabinexatsi yabara pelivaisi (Mt 27.15-31; Mr 15.6-20; Lc 23.13-25)

Pilato peyanijobicujinae Jesúsjavabelia, Pilato icatsia pitsapalia. Nexata Pilato jumaitsi judíovijavabelia:

—Apo caxitarabinë cajena itsacujiruneconi ata pexanaejava, paneconi yabara bajaraponë naneconitsijitsia. ³⁹ Penaneconitsivi pejebabiabibota naneconitsia peponaponaenë pepitsapaenexa itsa panevajëtame, nexata pascua fiestamatacabi caenë pacatocapitsapabiabatsi. ¿Pajitsipame tsaja patcatocapitsapaenexa penaneconitsivi pejebabiabibovecua pepitsapaenexa pajudíovimë papecaevetsinë? jai Pilato judíovijavabelia Jesús yabara.

⁴⁰ Nexata bajarajota daxitajudíovi vavajai.

—¡Pëtsa abaxë copatame bajaraponë! ¡Panetocapitsapaename jane Barrabás! jai judíovi.

Bajaraponë Barrabás bitso penacobetoxotsinë. Bajaraxuata penaneconitsivi pejebabiabibota, naneconitsiaponapona.

19

¹ Pilato pijajivi itoroba Jesús pejumatitibabenexatsi penaneconitsivi pejumaconitabiabimacata. ² Nexata pejumatitibacujinaetsi vajabitsaë Jesús becoronacuenia tsimataexanatsi peejuvitoyoroto. Mataxatatsi bajarapaejuvitoyoroto. Bajaraxuacujinae quenetsiataeya benacuaevetsinëcuenia xatatatsi peraënaeyatsausauejjava. ³ Nexata vajabitsaë imoxoyoliatsi Jesús. Vajabitsaë capocaponaeya jumaitsi tsabuataponaē Jesúsjavabelia:

—¡Bajaco, judíovi pepo pevetsinë! jai tsabuataponaē.

Vajabitsaë pecobeta Jesús itabarapacababeyabuataponatsi.

⁴ Pilato nexata icatsia pitsapalia. Jumaitsi judíovijavabelia:

—Pacatocanaviarenatsi icatsia maberenaje paneyapëtaenexa. Apo caxitarabinë itsacujiruneconi ata pexanaejava, paneconi yabara naneconitsijitsia maponëje, jai Pilato Jesús yabara.

⁵ Nexata peejuvitoyoroto Jesús namataxatatsiaya pitsaparena. Naxatata peraënaeyatsausauejjava. Nexata Pilato jumaitsi judíovijavabelia:

—¡Baja rajane nuca maponëje! jai Pilato.

⁶ Nexata sacerdotevi penamatacaitorobivi, policíavi yajava, itsa tanetsi Jesús, nexata bajarapamonaē vavajai.

—¡Cruzajavabelia cobematabiabarutsiaexanare! ¡Cruzajavabelia cobematabiabarutsiaexanare! jai bajarapamonaē Jesús yabara.

Pilato nexata jumaitsi bajarapamonaējavabelia:

—Paxamē pacaponaremelia. Cruzajavabelia pacobematabiabarut-sianame. Tsipaji raja xanē apo caxitajarabinē itsacujiruneconi ata pexanaejava, jai Pilato.

⁷ Nexata judíovi jumaitsi Pilatojavabelia:

—Mara ponē Dioso apo pejitsipaecuenia jumaitsi: “Xanē raja Dioso pexēnatonē,” jai. Paxanē pajudíovinē patajalivaisita itaveta bajarapacuenia pejumaitsiyaniva itsajivi ata. Bajaraxuata bajaraponē baja bebeyaxuabatsi, jai judíovi Jesús yabara.

⁸ Pilato ita jumetane bajarapamonae pejumaitsiyava: “Mara ponē Dioso apo pejitsipaecuenia jumaitsi: ‘Xanē raja Dioso pexēnatonē,’ jai,” pejaijava Jesús yabara, nexata hitso Pilato junava. ⁹ Nexata icatsia Pilato pijaboyalia barējoneya Jesús. Yanijoba icatsia Jesúsjavabelia.

—¿Detsa nexata verena neponaenē? jai Pilato.

Itsiata Jesús apo jumepitsi.

¹⁰ Nexata Pilato jumaitsi:

—¿Detsa xuajitsia apo nejumepitsimē? ¿Apo yapētaemē tsipaji mapanacua taevetsinēcueneje? Nejamatabēcuenecaeje pa raja taitorobinexa tajajivi cruzajavabelia pecacobematabiabarutsinexa. Nejamatabēcaeje pa taitorobinexa pecacopatsinexa ata, jai Pilato.

¹¹ Jesús nexata jumaitsi:

—Itsa Dioso apo catocopatsi tsipae mapanacua neveysinexaje, nexata xanējavaberena ata apo cacaējepae tsipae taneitsacueniabinxamē. Itsiata baitsi jane ponē necanajeta xamē necobeyabelia, bitso naneconita Diosojavabelia xamē matatoxenetsia, jai Jesús Pilatojavabelia.

¹² Itsa bajarapacuenia Jesús jumaitsi, nexata picani Pilato jamatabēcopatatsi Jesús.

Itsiata baitsi jane judíovi vavajai Jesús pecopatsiyanivatsi. Jumaitsi:

—¡Itsamonaē raja paxanēyajuvēnēvi ¡Itsi pa maponēje pevetsinēnexatsi! ¡Nexata ita copatsianame maponēje, naneconitsianame nijatuxanenējavabelia, Romanonacua pepo pevetsinējavabelia, pepo vajanacayanacuaevetsinējavabelia jane baja! ¡Nexata maponēbejeje nijatuxanenēbeje naitoyabeje tsane! jai judíovi Pilatojavabelia.

¹³ Nexata Pilato ita jumetane bajarapacuenia judíovi pejumaitsiyava, Pilato eca tribunalvēnējavata, xuata Pilato ecabiaba jivi ita naneconitsiaexanaejitsia. Xuata Pilato ecabiaba jivi ita naneconitsiaexanaejitsia, hebreojumeta pevēnē Gabata. Bajarajota pirafaratsiira. Nexata Pilato itorobea pijajivi pecapitsapaenexatsi Jesús Pilato pijabovecua. ¹⁴ Pascuavēnēfiesta pejonematacabinexa pevajēnaeya pamatacabi, matoneje, bajarapacuenia Jesús exanatsi. Nexata Pilato jumai tsecae judíovijavabelia:

—¡Mara jota nucaje papecaevetsinēje! jai Pilato Jesús yabara.

¹⁵ Itsiata saya bajarapamonae vavajai.

—¡Beyaxuabiaexanare! ¡Jema tēpae! ¡Cruzajavabelia cobematabiabarutsiaexanare! jai judíovi.

Pilato nexata jumaitsi:

—¿Pajitsipame tsaja cruzajavabelia tacobematabiabarutsiaexanaejava papecaevetsinēmi? jai Pilato.

Nexata sacerdotevi penamatacaitorobivi jumaitsi Pilatojavabelia:

—Caenē raja Romanonacua pevetsinē paxainajē pepo patanevetsinē. Paxanē raja apo paxainanē itsanē pematatsēnēa pepo patanevetsinē, jai sacerdotevi penamatacaitorobivi.

¹⁶ Nexata baja Pilato rajuta judíovi pecobeyabelia Jesús pecobematabiabarutsinexatsi cruzajavabelia. Itsiata Pilato pijajivi itoroba Jesús pecaponenexatsilia petsutojumabelia.

Pacuenia jane baja Jesús cruzajavabelia cobematabiabarutatsi yabara pelivaisi

(Mt 27.32-44; Mr 15.21-32; Lc 23.26-43)

¹⁷ Jesús nexata vajabitsaë ita caponaliatsi, caponaeyaexanatsi cruza, pacruzajavabelia Jesús cobematabiabarutsijsiatsi. Caponaliatsi Jivimatasipavënë tsutojavabelia. Hebreojumeta bajarapatsuto pevënë Gólgota. ¹⁸ Bajarapatsutojumata Jesús cruzajavabelia cobematabiabarutatsi. Anijanëbeje yajavacobematabiabarutatsi. Caenë canacujitsia pijacruzata rubatsi. Itsanë Jesús pecujanenia ruca. Itsanë Jesús petsavenonenia ruca. ¹⁹ Pilato pijajivi itoroba petoyaquinaenexatsi tablapayojumata. Nexata Pilato pijajivi itoroba bajarapatablapayo petomatabiabarutsinexatsi Jesús perucaecruzaupita. Jumaí tsarucae bajarapaitane mapacueniaje: “Mara ponëje Jesús, Nazaret tomarapijinëje, judíovi pepo pevetsinë,” jai tsarucae bajarapaitane. ²⁰ Pajumatsutota Jesús cobematabiabarutatsi cruzajavabelia, bajarapajumatsuto eca tomaravecua imoxoyo. Bajaraxuata judíovi ayaibitsaëtoxaneto tomarapijivi leba bajarapaitane. Bajarapaitane yaquinaruta acueyabi paviriavibeje pijajumeta. Yaquinaruta hebreojumeta, griegojumetana, latínjumetana. ²¹ Nexata sacerdotevi penamatacaitorobivi jumaitsi Pilatojavabelia:

—Apo xanepanae raja neyaquinarutsiaexanaenexa mapejumaitsiitaneje, “Mara ponëje, judíovi pepo pevetsinëje,” pejaiitane. Biji rajane icatsia yaquinarutsiaexanare pejumaitsiitane mapacueniaje: “Mara ponë jumaitsi: ‘Xanë raja judíovi pepo taevetsinë,’ jai,” pejaiitane icatsia yaquinarutsiaexanare, jai sacerdotevi penamatacaitorobivi Pilatojavabelia.

²² Nexata Pilato jumaitsi sacerdotevi penamatacaitorobivijavabelia:

—Pacuenia baja yaquinarutsiaexanjë, bajarapacuenia jema rucae, jai Pilato sacerdotevi penamatacaitorobivijavabelia.

²³ Vajabitsaë Jesús pecobematabiabarutsicujinaetsi cruzajavabelia, Jesús penaxatatsijavami, xua jumaponapona, vajabitsaë nota. Cuatro xuabeje tsanaeya jeba. Caenë canacujitsia natsicobetsanaejitsia. Saicaya tsatabuata itsajava, xua Jesús naxatatabiaba piapijavareca. Bajaraxua apo xainae pecaucutsiajoroneajava. Pecuejava saya caepanacujinae. ²⁴ Nexata vajabitsaë najumaitsi:

—Apo titicae tsanetsi bajaraxua. Canamuxusitsianatsi beibotoxi vajayapëtaenexa ponë pitsijitsia bajaraxua, najai vajabitsaë.

Bajarapacuenia vajabitsaë ita exana, Jesús jane baja tocopiapatatsi pacuenia baja cajena Dioso pejumelivaisibaxutota, tajëvelia jumaitsi Jesús penaxatatsijava yabara. Dioso baja cajena pejumelivaisibaxutota, tajëvelia jumaitsi Jesús penaxatatsijava yabara mapacueniaje: “Natsicobetsanaena tanaxatatsijava. Canamuxusitsiana beibotoxi peyapëtaenexa ponë pitsijitsia,” jai baja cajena tajëvelia Dioso pejumelivaisibaxutota Jesús penaxatatsijava yabara. Nexata vajabitsaë canamuxusita beibotoxi peyapëtaenexa ponë pitsijitsia piapijavareca, Jesús penaxatatsijavami.

²⁵ Pacujinae abaxë Jesús athëbëyo ruca cruzata, cruza bëxëpanata nubena acueyabi povamaxëto ëMariävënëvanë. Itsava Jesús pena. Itsava Jesús penava, Cleofas pijava. Itsava María, Magdala tomarapijiva. ²⁶ Nexata Jesús

itsa taerucaica, taenutsica pena, pijajivitonë bitso piasivanë yajava. Jesús pena pemuxuneneta nuca bajaraponë. Jesús nexata jumaitsi penajavabelia:

—Ena, maponë nuca nemuxunenetaje, benexënatocuenia taename, jai Jesús penajavabelia.

²⁷ Bajaraxuacujinae icatsia Jesús jumaitsi pijajivitonëjavabelia:

—Mapovaje beenacuenia taename, jai Jesús.

Bajaraxuacujinae Jesús pijajivitonë pijaboyabelia barëpona Jesús pena, Jesús pena penaecaenexa bajaraponë pijabota.

Pacuenia baja Jesús tēpa yabara pelivaisi

(Mt 27.45-56; Mr 15.33-41; Lc 23.44-49)

²⁸ Jesús baja yapētane petocopiarucaejavatsi daxita pacuenia tajëvelia vajunupaebatsi Dioso pejumelivaisibaxutota. Nexata jane baja Jesús pecopiarutsinexa daxita abaxë xua tosaicatsi, Jesús jumaitsi:

—Mera bitso jitsipajë, jai Jesús.

²⁹ Nexata bajarajota vaxi eca. Vënëqueca piajatuvinora. Nexata vajabitsaënë esponjavënëjava jabuta bajaraporayalia. Bajaraxuacujinae naeboupita ruta bajarapaesponjavënëjava. Toyotsiatsi Jesús. Tsiuiborutatsi Jesús petsutsuninexa. ³⁰ Jesús nexata tsutsune bajaraxua. Bajaraxuacujinae Jesús jumaitsi:

—Daxita rajane baja taexanaejava, veretajë, jai Jesús.

Nexata irataeya tēpanajereca.

Pacuenia Jesús becuerebota yenecacuatatsi yabara pelivaisi

³¹ Pascuavënë fiesta junua. Nexata abaxë caematacabi sajina pejonenexa judiövi penacueraevetsimatacabinexa. Bajaraxuata judiövi apo jitsipae Jesús bana baja matavëjëa perubenaеjava cruzata. Tsipaji pascuavënë fiestamatacabi itsa junua judiövi penacueraevetsimatacabinexa, judiövi bitso banajamatabëcuenerëviaba daxita penacueraevetsimatacabiänë matatoxenetsia. Bajaraxuata judiövi vajëta Pilatojavabelia Pilato vajabitsaë pitorobinexa pethaëepatsicababenexatsi Jesús bana, cruzata perubenaevi, bepijia bajarapamonae petëpaenexa. Itsa baja bajarapamonae tēparubena, penötsinexatsitsica cruzavecua pecaponaenexatsi itsajavabelia. ³² Nexata vajabitsaë itsa ponalia, Jesús peyajaya cobematabiabarutsinëtsibeje asaëbeje abaxë tsarucaе. Bajaraxuata copiaya itsanë thaëepatsicabiabatsi. Bajaraxuacujinae icatsia itsanë thaëepatsicabiabatsi. ³³ Nexata Jesús vajabitsaë itsa cujibaltsi, taerutatsi baja Jesús petëpaenë. Bajaraxuata Jesús apo thaëepatsicabiabitsi.

³⁴ Itsiata baitsi jane vajabitsaëviyajuvënëne becuerebota Jesús yenecacuatatsi. Bajarapavajënëyarena pitsapa pijana, mera yajava. ³⁵ Xanë raja, Juannë, pacatoyaquinatsi mapalivaisije. Tataenë bajarapacuenie. Nexata xanë yapētaniji bajarapacuenie pexaniajaicuenie. Nexata bajarapalivaisi pacatoyaquinatsi panejumecovënëtsinexa paxamë ata. ³⁶ Bajarapacuenia Jesús apo thaëepatsicabiabitsi petocopiapatsixaetsi pacuenia baja cajena Dioso pejumelivaisibaxutota tajëvelia jumaitsi Jesús yabara. Dioso baja cajena pejumelivaisibaxutota Jesús yabara tajëvelia jumaitsi mapacueniaje: “Apo siepatsicabiabi tsanetsi itsiata caesitoyo ata,” jai baja cajena tajëvelia Dioso pejumelivaisibaxutota Jesús yabara. ³⁷ Itsabaxutota pijinia tajëvelia jumaitsi Jesús yabara mapacueniaje: “Bajarapamonae taena pecuatsivajënëtsi,” jai baja cajena itsabaxutota Jesús peyenecacuatatsijavanexatsi yabara.

Pacuenia Jesús petëpaenë mëthëtatsi yabara pelivaisi
(Mt 27.57-61; Mr 15.42-47; Lc 23.50-56)

³⁸ José, Arimatea tomarapijinë. Bajaraponë judíovi pevetsiviyajuvënë. Nexata José jumecovënë taponapona Jesús Cristocuene. Itsiata apo namatabëcueneitajëtsi pejumecovënëtsijava Jesús Cristocuene. Tsipaji cunava penajuaejetsivi judíovi. Nexata baja Jesús itsa tēpa, José itsiata najamatabëcueneitajëta. José vajëta Pilatojavabelia Jesús petëpaenë pepitsinexatsica cruzajavavetsica pemëthëtsinexa. Nexata baja tocopatatsi. Nexata José lia Jesús perucaejavabelia pecaponaenexa Jesús petëpaenë.

³⁹ Nicodemo, ponë meravi pona pebarëcuacuajainexa Jesús, bajaraponë ata judíovi pevetsiviyajuvënë. Nexata Nicodemo Joséta nalia. Caponabeje treinta pakilobeje petuxujuvibenonë, pematajërëabibenonë petuxujujavata. ⁴⁰ Nexata Josébeje Nicodemobeje cruzajavavetsica pitsicabeje Jesús petëpaenë. Petsiothocaecujinaebeje petuxujuvibenonë, pexaniaviria piapiasábanapanata mataquionaeya daxitanëreca matacacëbabeje. Bajarpacuenia exanabeje tsipaji judíovi baxaniavaeta petëpaejiviyo pemëthëtsinexa bajarapacuenia. ⁴¹ Itsajota Jesús cruzajavabelia cobematabiabarutatsi, bajarajota imoxoyo peubinaenë ayaiabacoboxaneto eca. Bajarapabacabojavata Jesús petëpaevajënaeya, José cajena exanaeyaexanabuata iboitapanitovavata pinijiibovaju. José pijamonaejivi itsa totëpatsi, pebuatsinexa bajarapaibovajulia. José ata itsa tēpa, pebuatsinexatsi bajarapaibovajulia. Nexata bajarapaibovajulia abaxë itsajiviyo ata petëpaejiviyo apo buatsitsi.

⁴² Nexata bajarapaibovajulia Josébeje Nicodemobeje Jesús petëpaenë buatabeje. Tsipaji bajarapaibovaju boca imoxoyo. Judíovi ata baja penacueravetsimatacabinexa, bitso baja imoxoyo pejonenexa. Bajaraxuata bajarapaibovajulia Jesús petëpaenë buatsi.

20

Pacuenia Jesús petëpaecujinae icatsia asaë yabara pelivaisi
(Mt 28.1-10; Mr 16.1-8; Lc 24.1-12)

¹ Judíovi baja penacueravetsimatacabi verevereca. Nexata meravia pitsijavata, bajayacunua, ajena matacabi tsarucapona, itsiata abaxë itsa aitaquiri, María Magdala tomarapijiva pona Jesús petëpaenë pebuatsiibovajutsijavabelia. Nexata María tane ibopanaxanetomi petixitanutsijavalia ibovajuvëpavecua. ² Nexata María cujinaejinarena itsaberena Simón Pedro ponapona. Bajarajota Simón Pedro yajavaponapona itsanë Jesús pijajivitonë, ponë bitso asiva Jesús. Nexata María jumaitsi bajaraponëbejijavabelia:

—Vajatuxanenëmi ra covë jutatsi pebuatsiibovajutsivecua. Apo payapëtaenë raja itsabelia icatsia buatsi, jai María.

³ Nexata Pedrobeje Jesús pijajivitonëbeje ponabeje Jesús pebuatsiibovajutsijavabelia. ⁴ Najuacujinaejinaliabeje. Itsiata itsanë Jesús pijajivitonë bitsojinaeya cujinaejina Pedro matatoxenetsia. Bajaraponë copiaya palia Jesús pebuatsiibovajutsijavabelia. ⁵ Itsa bajaraponë nabëxëtsutsiaya naëcolia ibovaju bëxëpanalia, nexata taeyabualia Jesús daxitanë pematacacëbipanamitsireca pebocaejava bajarapaibovajulia. Bajaraponë itsiata abaxë apo jonelia. ⁶ Bajaraxuacujinae Simón Pedro cotocaevi pata. Nexata ibovajulia Pedro joneya. Pedro ata tane Jesús pematacacëbipanamitsireca pebocaejava bajarajota. ⁷ Papanata Jesús saicaya matacëtatsi, apo yajavabocae bajarajota. Saicayajavata xaniavaetsia quionabuata. ⁸ Nexata ponë

copiaya pata Jesús pebuatsiibovajutsijavata, najoneya jane baja. Tane pacuenia Jesús vecuapitsapa bajarapaibovaju. Nexata jane baja bajaraponë jumecovënëta xaniavaetsia Jesús icatsia piasaëjava petëpaecujinae. ⁹ Abaxë picani bajaraponë apo jumeyapëtae pacuenia Dioso pejumelivaisibaxutota jumaitsi Jesús petëpaecujinae icatsia piasaëjavanexa yabara. ¹⁰ Bajaraxuacujinae Jesús pijajivitonëbeje naviatabeje baja pijaboyabelia.

Pacuenia Jesús petëpaecujinae tsitanaitajëta María Magdala tomarapijiva-javabelia yabara pelivaisi
(Mr 16.9-11)

¹¹ María nuenuca Jesús petëpaenë pebuatsiibovajutsijumavelia. Nexata María yaitaxutonueya nabëxëtsutsiaya naëcolia ibovaju bëxëpanalia. ¹² Nexata María taeyelia anijanëbeje ängelnëbeje, penioponaejava penaxatatsinëbeje. Ecabeje itsajota picani Jesús petëpaenë buatatsi. Itsanë eca Jesús pematabocotomijavavereca. Itsanë eca Jesús petaxumijavatsina. ¹³ Nexata ängelnëbeje jumaitsiibeje Maríajavabelia:

—¿Detsa xuajitsia nuame? jaibeje.

María nexata jumaitsi:

—Tsipaji covë itsamonae jutatsi tajatuxanenëmi. Nexata apo yapëtaenë itsabelia icatsia buatatsi, jai María ängelnëbejejavabelia.

¹⁴ María ajena najumeveretanajelia bajarapacuenia pejumaitsijava, napënëyorotsiaya naëcolia. Taenuta Jesús penuceajava bajarajota. Itsiata abaxë María apo yapëtae Jesúsucene. ¹⁵ Nexata Jesús jumaitsi Maríajavabelia:

—¿Detsa xuajitsia nuame? ¿Jipatsa jaitame? jai Jesús.

María nexata Jesús yabara saya jamatabëjumaitsi:

—Matsamëra ponë mapaunubacabo pevetsinëje, jamatabëjai María.

Bajaraxuata María caranata Jesúsjavabelia jumaitsi mapacueniaje:

—Xamë itsa jutame Jesús petëpaenë, netsipaebare itsajota buatame. Pitsi-jitsianë tacaponaenexa, jai María.

¹⁶ Jesús nexata junataxuaba María pevënëta.

—¡María! jai Jesús.

María nexata napënëyorolia Jesúsjavabelia. Judíovi pijajumeta María jumaitsi Jesúsjavabelia:

—¡Rabuni! jai. “Rabuni,” itsa jai hebreojumeta, mapajumetaje pejumaitsi-jume: “Xamë tanecujarubinëmë,” pejaijume.

¹⁷ Jesús nexata icatsia jumaitsi Maríajavabelia:

—Pëtsa nejayaremena. Tspaji raja abaxë apo ponaenë taxa peecaejavabetsia. Nonare jane tajajivijavabelia. Tspabianame tajajivijavabelia taponaejavanexa taxajavabetsia. Taxa rabaja, paxamë ata paneaxa. Ponë tajaDioso, bajaraponë paxamë ata panijaDioso, jai Jesús Maríajavabelia.

¹⁸ Nexata María Magdala tomarapijiva pona baja petsipaebinexa Jesús pijajivijavabelia. Pona baja petsipaebinexa pacuenia tane pepo petuxanenë Jesús. Nexata María Jesús pijajivijavabelia tsipaebanua daxita pacuenia Jesús jumaitsi.

Pacuenia Jesús petëpaecujinae tsitanaitajëta pijajivijavabelia yabara pelivaisi
(Mt 28.16-20; Mr 16.14-18; Lc 24.36-49)

¹⁹ Pamatacabi María tane Jesús, icatsia itsa asaë petëpaecujinae, bajara-pameravi nacaetuata daxita Jesús pijajivi. Daxita baupanë xaniavaetsia

nayabaupaxataba. Tsipaji Jesús pijajivi judíovi cujunava. Jesús itsiata joneya. Jemata nuca pijajivi tuatujëta. Jesús jumaitsi pijajivijavabelia:

—¡Paxamë saya pajamatabëjemamëre! ¡Pëtsa pajunavame! jai Jesús.

²⁰ Bajarapacuenia Jesús pejumaitsicujinae, pijajivijavabelia tsitajëta pecobevajënëbeje. Nayenevajënëitajëtanua pijajivijavabelia. Bajarajota Jesús pijajivi bitno barëya icatsia petaexae pijatuxanenë. ²¹ Nexata Jesús icatsia jumaitsi:

—¡Paxamë saya pajamatabëjemamëre! ¡Pëtsa pajunavame! Pacuenia taxa nitoroba, bajarapacuenia juya pacaitorobatsi jivijavabelia pexanialivaisi panetsipaebaponaenexa, jai Jesús pijajivijavabelia.

²² Nexata Jesús uxunelia asaëyata pijajivi pematatsënëalia. Jumaitsi pijajivijavabelia:

—Espíritu Santo pacopiapire panejamatabëëthëtota papecatsijamatabëecaenexa. ²³ Nexata itsamonae pibisiacuene pexanaeneconi itsa pavecuajibiaexanaename, nexata baja pibisiacuene pexanaeneconimi pepacune vecuajibitsi tsane. Itsa apo pavecuajibiaexanaemë tsane itsamonae pibisiacuene pexanaeneconi, nexata pibisiacuene pexanaeneconi apo vecuajibitsi tsane, jai Jesús pijajivijavabelia.

Pacuenia Tomás Jesús tane Dioso piasaëyaexanaecujinaetsi petëpacujinae yabara pelivaisi

²⁴ Jesús pijajiviyajuvënënë, pevënë Tomás, ponë vënërubatsi itsavënë, Sapalanë. Bajaraponë piajibitsarucaejavata, Jesús pijajivijavabelia tsitanaitajëta. ²⁵ Nexata Tomás itsa pata, Jesús pijajivi jumaitsi Tomásjavabelia:

—Pacatsutanetsi rabaja necovëta vajatuxanenë, jai Jesús pijajivi.

Nexata Tomás jumeaebiaya jumaitsi:

—Itsa pepacune taenajë cruzajavabelia clavota pecobematabiabarut-sivajënëtsibeje, nacobesibëtsianajë pecobevajënëyalia. Nacobesibëtsianajë peyenevajënëyalia ata. Nexata jane baja matapania jumecovënëtsianajë Jesús icatsia piasaëjava petëpacujinae, jai Tomás Jesús yabara.

²⁶ Bajaraxuacujinae, ocho pamatacabibejecujinae, Jesús pijajivi icatsia bota nacaetuata. Tomás ata jane baja naponapona. Nexata daxita baupanë icatsia xaniavaetsia nayabaupaxataba. Jesús itsiata joneya. Jemata nuca pijajivi tuatujëta. Jesús jumaitsi pijajivijavabelia:

—¡Paxamë saya pajamatabëjemamëre! ¡Pëtsa pajunavame! jai Jesús.

²⁷ Bajaraxuacujinae Jesús jumaitsi Tomásjavabelia:

—Tomás, taema rajane baja tacobevajënëbeje. Nacobesibëtsiaremelia jane baja tacobevajënëyalia. Nacobesirovire jane baja tayenevajënëyalia nebëtsinexa. Pëtsa baja xuacujinae jumeaebame. Jumecovënëre jane baja icatsia tasaëjava tatëpacujinae, jai Jesús Tomásjavabelia.

²⁸ Nexata Tomás jumaitsi Jesúsjavabelia:

—¡Tajatuxanenë, tajaDioso! jai Tomás.

²⁹ Jesús nexata icatsia jumaitsi:

—Tomás, aeconoxae rajane baja jumecovënëtame icatsia tasaëjava tatëpacujinae. Tsipaji baja nijacuata netaneme. Xamë matatoxenetsia bitso nesivajamatabëcuenebarëya tsane pamona apo netae ata, itsiata jumecovënëta icatsia tasaëjava tatëpacujinae, jai Jesús Tomásjavabelia.

Pjamatabëcuene yabara yaquina mapacuyalatoje yabara pelivaisi

³⁰ Jesús pijajivi pitabëta exanapona orijibia itsajavanë pinijicuene Dioso pesaëta pexanaejavanë. Itsiata bajaraxuanë pelivaisi

apo yajavayaquinaenë mapacuyalatotaje. ³¹ Itsiata mapalivaisi pacatoyaquinatsije panejumecovënëtsinexa Jesús athëbëvetsica Dioso pitorobijavatsica vajanacacapanepaenexa, panejumecovënëtsinexanua Jesús Dioso pexënatocuene. Nexata itsa pajumecovënëtsianame mapalivaisije, paxainaenename matacabi apo pevereverecaejava Jesús pejamatabëcueneta.

21

Pacuenia Jesús petëpaecujinae icatsia itsa asaë, tsitanaitajëta pijajivijavabelia, siete ponëbejjavabelia, yabara pelivaisi

¹ Jesús petëpaecujinae icatsia itsa asaë, tsitanaitajëta pijajivijavabelia Tiberiasvënë pucaxanetoitapata. Jesús icatsia pijajivi itsa tsitanaitajëta, maitsije. ² Caejavata Jesús pijajivi najuajinavanapa mapamatabëxëyoje. Najuaonaponabeje Simón Pedrobeje Tomásbeje, ponë vënërubatsi itsavënë, Sapalanë. Najuaonaponabeje pijinia anijanëbeje, Zebedeo ëpexënatobeje. Najuaonaponabeje pijinia itsanëbeje icatsia pematatsënëa. Natanael ata naponapona bajarajota. Canávënë tomarapijinë Natanael. Canátomara eca Galilea nacuata. ³ Nexata Simón Pedro jumaitsi penajuajinavanapaevijavabelia:

—Djuuai raja yamatajucaejiatsianë, jai Pedro.

Nexata penajuajinavanapaevi jumaitsi:

—Paxanë ata panaponaenajë xamëta, jai.

Nexata pucaxanetovjavabelia pona. Bajarajotalia jerata naropoba. Itsiata bajarapameravi caenë ata dujuainë bajarapamonae apo yamatajutsi.

⁴ Ajena baja matacabi tsina, Jesús pijajivi tsitanaitajëta Tiberiaspuca itapata. Itsiata Jesús pijajivi apo yapëtaetsi Jesús cuene. ⁵ Nexata Jesús jumaitsi pijajivijavabelia:

—¿Jica? ¿Djuuainë apo payamatajutsimë caenë ata? jai Jesús.

Nexata Jesús pijajivi jumaitsi:

—Ajibi cajena, jai.

⁶ Nexata icatsia Jesús jumaitsi pijajivijavabelia:

—Djuuai paneyamatajucaejava, panecujuanenia pamuxunene, pacoparemecca jerayenepanareca. Bajarapacuenia payamatajutsianame dujuai, jai Jesús pijajivijavabelia.

Nexata Jesús pijajivi dujuai peyamatajucaejava bajarapacuenia copareca. Bajaraxuacujinae pejutsinexatsina menevecua apo cajëpaetsi. Tsipaji bitso ayajjava dujuai tojunuatsi. ⁷ Nexata Jesús pijajivitonë, ponë Jesús bitso asiva, bajarapone jumaitsi Pedrojavabelia:

—¡Vajatuxanenë tsaena rabaja maje! jai Pedrojavabelia.

Nexata Simón Pedro caejumetaetabi bajarapacuenia pejumaitsijava Jesús yabara, jumasa penucaenë, naxatataxuaba penaxatatsijava. Jopanucalia menialia naxanitsiayo pepatabinexa Jesúsjavabelia. ⁸ Jesús pijajivi meneitapaveca tajë apo yarubena. Cien metrocuenia saya yarubenalialia. Nexata itsamonae Pedrobana penajuajinavanapaevi jerata pata tajetabuabelia. Robobocabuatapona dujuai peyamatajucaejava. Tovënëcatsi cajena dujuai.

⁹ Bajarapamonae itsa nonobajunalia tajetabuabelia, taeyeta isotoitaire. Bajara paisotoitairejumavereca taeyabuata dujuainë, panbëanë yajava.

¹⁰ Nexata Jesús jumaitsi pijajivijavabelia:

—Aeconoxae dujuai itsa payajutsiaremena, pacaponaenimina panexaniavaetsinexa, jai Jesús pijajivijavabelia.

¹¹ Pedro nexata jeraënëa berunareca tajetabuaberena peyarobobo-caenexarena dujuai peyamatajucaejava. Nexata bajaraxua dujuai

vënēca pinijidujuainēanē. Ciento cincuenta y tres ponēbeje. Itsiata dujuai peyamatajucaejava, dujuai ayaijava ata, apo yaucuucucae. ¹² Nexata Jesús jumaitsi pijajivijavabelia:

—Naxanitsia. Vepanabanianame, jai Jesús pijajivijavabelia.

Itsanē ata Jesús pijajivitonē apo yanijobi Jesúsjavabelia. “¿Jipatsamē?” apo jai. Tsipaji baja bajarapamonae yapētane pijatuxanenē Jesús cuene. ¹³ Jesús nexata cujilia bajarapaisoto. Pita baja panbēanē. Tsicobetsana pijajivi. Bajarapacuenia icatsia Jesús dujuaijavanē ata tsicobetsana pijajivi.

¹⁴ Bajarapacuenia Jesús pijajivijavabelia acueyabijava tsitanaitajēta, petēpaecujinae icatsia itsa asaē.

Pacuenia Jesús petēpaecujinae itsa naitajēta cuaicuaijai Simón Pedrojavabelia yabara pelivaisi

¹⁵ Penabaniveretsicujinae Jesús jumaitsi Simón Pedrojavabelia:

—Simón, Jonás pexēnatomē, ¿xamē tsaja bitso niasivamē mapamonae taneasivajava matatoxenetsiaje? jai Jesús.

Pedro nexata jumaitsi:

—Jājā. Xamē rabaja nejamatabēcueneyapētaneme tacaasivajava, jai Pedro Jesúsjavabelia.

Jesús nexata jumaitsi Pedrojavabelia:

—Nexata pacuenia pijaoveja pevetsinē xaniavaetsia baeveta pijaoveja, bajara pijinia pacuenia xamē xaniavaetsia netoevetabianame tajajivi, pamonae tanepejanajumecovēnētsivi. Bajarapamonae taniji betajaovejaxicuenia, jai Jesús.

¹⁶ Nexata icatsia Jesús jumaitsi Pedrojavabelia:

—Simón, Jonás pexēnatomē, ¿xamē tsaja niasivamē? jai.

Pedro nexata icatsia jumaitsi:

—Jājā. Xamē rabaja nejamatabēcueneyapētaneme tacaasivajava, jai Pedro Jesúsjavabelia.

Jesús nexata icatsia jumaitsi:

—Nexata xamē netoevetsianame tajajivi, pamonae nesivanajamatabēcopata xanējavaberenā. Bajarapamonae taniji betajaovejacuenia, jai Jesús.

¹⁷ Icatsia matavējēa Jesús jumaitsi Pedrojavabelia:

—Simón, Jonás pexēnatomē, ¿xamē tsaja niasivamē? jai icatsia.

Pedro nexata bejamatabējibireca matavējēa peyanijobaponaexaetsi Jesús piasivajava yabara. Nexata Pedro jumaitsi Jesúsjavabelia:

—Xamē baja cajena yapētaneme daxitacuene. Nexata baja nejamatabēcueneyapētaneme bitso tacaasivajava, jai Pedro.

Jesús nexata tajēvelia jumaitsi Pedrojavabelia:

—Nexata xamē netoevetsianame tajajivi, pamonae taniji betajaovejacuenia. ¹⁸ Xaniajanē pacuenia catsipaebijitsiatsi. Itsa abaxē pamatacabi pevējēatomē, naxatatabiabame nenaxatatsijava nijacuata. Nexata nejitsipajavelia ponabiabame. Itsa pamatacabi perujunēmē tsane, pacuenia bitso perujunēyo banamaxēcaeveta itsajivi pijacamisa pexatatsinexatsi, bajarapacuenia namaxēcaevetsianame itsamonae pecacobecētsinexa pecaponaenexa itsabelia picani apo jitsipaemē tsane neponaejava, j Xaniajanē pacuenia catsipaebijitsiatsi. Itsa abaxē pamatacabi pevējēatomē, naxatai Jesús tajēvelia Pedrojavabelia.

¹⁹ Bajarapacuenia Jesús jumaitsi Pedrojavabelia Pedro tajēvelia peyapētaenexa pacuenia beyaxuabijitsiatsi Dioso pejumelivaisi

pejumecovënëtsixae. Itsa baja Jesús najumevereta bajarapacuenia pejumaitsijava, Jesús jumaitsi Pedrojavabelia:

—Pedro, naxanitsia. Nepënaponare, jai Jesús.

Nexata baja Pedrobeje Jesúsbeje ponatababeje pesaicaeyojavabelia.

Jesús pijajivitonë, ponë bitso Jesús asiva, penavajunupaebijava yabara pelivaisi

²⁰ Xanë Juannë, Jesús pijajivitonënë, bitso taneasivanë. Pamatacabi caniviyoopijijava panabaniji Jesús pebeyaxuabivajënaetsi, xanë Jesús pemuxuneneta ecajë. Nexata bajarajota yanijobecajë. “Tajatuxanenë, ¿jipatsa cacanajetsiana nijavajabitsaë pecobeyabelia?” janë Jesúsjavabelia. Nexata Jesús pebeyaxuabicujinaetsi, icatsia itsa asaë, panetsitanaitajëta. Nexata bajarapamatacabi Jesúsbeje Pedrobeje pesaicaeyojavabelia ponatababeje. Nexata xanë pecovëvelia cotocaevajë. Nexata Pedro Jesús pecovëya najetaruca. Pedro itsa napënyorotaba caevëarena, netaetaba bajaraponëbeje pecovëya tanajetarucaejava. ²¹ Nexata Pedro itsa netane, xanë tatëpaejavanexa yabara, yanijoba Jesúsjavabelia.

—Tajatuxanenë, ¿detsa pacuenia tēpaena maponëje? jai Pedro Jesúsjavabelia.

²² Jesús nexata jumaitsi Pedrojavabelia xanë yabara:

—Itsa xanë tojitsipaejitsipajë bajaraponë piasaëtsaponaponaenexa, asaë tsaponaponaë tsipae matapania icatsia tapatsimatacabitsicajavabelianexa. Pëtsa bajaraponë tatocopatsijava yabara, najamatabëxainame. Tsipaji xua bajaraponë tocopatsipajë, apo xamënexa tsipae. Nexata xamë saicaya caasaëmë tsaponaponaë tsane nexanaejava, pacuene caitorobatsi, jai Jesús Pedrojavabelia.

²³ Bajaraxuata patanajuajinavanapaevi, Jesús pijajivi, xanë yabara jamatabëcuenenavëxaniabiaya najumai tsabiabi: “Juan raeta apo tēpae tsane,” najai tsabiabi. Itsiata baitsi jane Jesús apo jumaitsi: “Juan raja apo tēpae tsane.” apo jai. Jumaitsi rajane mapacueniaje: “Itsa xanë tojitsipaejitsipajë bajaraponë piasaëtsaponaponaenexa, asaë tsaponaponaë tsipae matapania icatsia tapatsimatacabitsicajavabelianexa. Pëtsa bajaraponë tatocopatsijava yabara, najamatabëxainame. Tsipaji xua bajaraponë tocopatsipajë, apo xamënexa tsipae,” jai Jesús xanë yabara Pedrojavabelia.

²⁴ Xanë Jesús pijajivitonënë. Patanajuajinavanapaevi xanë yabara jamatabëcuenenavëxaniabiaya najumai tsabiabi: “Juan raeta apo tēpae tsane,” najai tsabiabi. Bajarapacuenia tanesivajamatabëjumaitsinë, Juannë, yaquinajë daxita mapalivaisije. Yapëtanetsi baja cajena palivaisianë Jesús nacatsipaeba, pexaniajailivaisianë.

²⁵ Jesús pinijicuene pexanaejavanë Dioso pesaëta, ayajjava exana manacuataje. Itsajavanë ata exana pematatsënëa. Nexata bajaraxuanë, caejavayo canacujitsia pelivaisi, itsamonae itsa yaquinaejitsipa, bajaraxuanë pelivaisibaxutonë bitso ayajjava tsipae. Nexata meta bajarapalivaisibaxutonë vënëcaejitsipa mapanacuaje.

Pacuenia exanavanapa Jesús pitorobivi, apóstolevi

Pacuenia Jesús tajëvelia vajunupaeba Espíritu Santo pepatsijavanexatsica mapanacuayabetsicaje yabara pelivaisi

¹ Teófilo, xanë Lucasnë, catoyaquinatsi mapabaxutoje. Copiaya baja cajena catoyaquinatsi itsabaxutota daxita Jesús pexanaejavanë pelivaisi. Nexata copiayapijibaxutota catoyaquinatsi xuamaxëto Jesús exana petaxuxuabijavaveliacujinae pexanaejava. Daxita bajaraxuanë pelivaisi, catoyaquinatsi. Pacuenia ata Jesús pexanialivaisi jivi tsipaebaponapona, abaxë itsa ponapona mapanacuataje, bajarapalivaisi ata catoyaquinatsi.

² Matapania pamatacabi Jesús athëbëabetsia Dioso caponatsi, bajarajota Jesús baja copiaruta pexanaejava. Nexata baja itsajota Jesús copiaruta pexanaejava, bajarajota pijinia copiarutajë copiayapijibaxutota tacatoyaquinajava, Jesús pexanaejavanë pelivaisi. Athëbëabetsia Jesús Dioso pecaponaevajënaetsi, Jesús itapeta pijajiviyajuvënëvi apóstolevinexa. Nexata Jesús itoroba pijajivi, apóstolevi, jivi pexanialivaisi petsipaebanajetarubenaenexa daxitanacuanëjava. Espíritu Santo pejamatabëcueneta Jesús yapëtaeyaexanatsi pacuenia itorobijitsia pijajivi, apóstolevi. ³ Bajaraxuacujinae Jesús pijavajabitsaë beyaxuabatsi. Jesús petëpaecujinae icatsia itsa asaë, anijatonë tsitanaitajëtabiaba pijajivijavabelia. Cuarenta baja pamatacabibeje itsa panepa Jesús icatsia piasaëcujinae, pona jane baja athëbëabetsia. Bajarapacuenia anijatonë Jesús pijajivi petsitanaitajëtsixae petëpaecujinae, nexata pijajivi yapëtanetsi Jesús icatsia piasaëjava petëpaecujinae. Jesús pijajivi itsa tsitanaitajëtabiaba, Jesús pijajivi tsipaebabiaba Dioso pijajivi pevetsijavanexa.

⁴ Nexata Jesús pijajivi itsa tsitanaitajëta Jerusalén tomarata, Jesús jumaitsi pijajivijavabelia mapacueniaje:

—Pëtsa abaxë paponame mapatomaravecuaje. Pacopiaevetavanapae-name abaxë Espíritu Santo. Bajaraponë yabara taxa Dioso najumecapanepaeya jumaitsi papecatoitorobinexatsica. Xanë ata bajaraponë yabara pacatsipaebatsi baja cajena panecopiaevetavanapaenexa. ⁵ Juanpijinë raja jivi bautisabanajetarua ëmerata. Itsiata baitsi jane caematacabibejecujinae paxamë Dioso pacatsijamatabëjoneyaexanaena Espíritu Santo, jai Jesús pija-jivijavabelia.

Pacuenia Jesús petëpaecujinae icatsia itsa asaë, athëbëabetsia baja pona yabara pelivaisi

⁶ Jesús petëpaecujinae icatsia itsa asaë, tsitanaitajëta pijajivijavabelia. Nexata Jesús pijajivi penacaetuatsijavata, Jesús pijajivi yanijobatsi. Jesús pijajivi jumaitsi mapacueniaje:

—Patajatuxanenë, ¿xaniajai tsabaja? ¿Itsanacuapijivi pevetsijava mapanacuaje pecopatsinexa, xamë vecuapitsapaeyaexanaename mapamat-acabitaje? ¿Nexata tsaja vajaviriavi judíovi juya evetsiaexanaename vanacayanacuavevetsinexa? jai Jesús pijajivi.

⁷ Nexata Jesús jumaitsi pijajivijavabelia:

—Xua yabara paneyanijobame, paneyapëtaenexa, taxa Dioso apo paca-tocopatsi. Apo pacatocopatsi paneyapëtaenexa pamatacabita, paepatota ata, taxa Dioso pexanaejava, copiapatsijitsia. Caenë taxa Dioso yapëtane

pamatacabi bajaraxua copiapatsijitsia. ⁸ Itsiata baitsi jane paxamē ajumejunavijibia papaebianame xanē talivaisi Espíritu Santo itsa pacatsijamatabēpatsianica paxamējavabetsica. Nexata panelivaisipaebanajetarubenaename Jerusalén tomarajava, Judea nacujava ata, Samaria nacujava ata, tajēnacuatubajava ata, jai Jesús pijajivijavabelia.

⁹ Bajarapacuenia Jesús pejumaitsicujinae pijajivijavabelia, Jesús baja pijajivi pitabēnejeva, athēbēabetsia Dioso caponatsi. Itarērēbo baja Jesús pēcaevaya. Nexata baja Jesús pijajivi acuenebi matavējēa petaejaya. ¹⁰ Nexata Jesús pijajivi pētaenubena athēbēabetsia Jesús pepēcaevijavatsia. Nexata ángelnēbeje, penioponaejava penaxatatsinēbeje, Jesús pijajivi jemata bajara-jota tsitanaitajētatsi. ¹¹ Nexata ángelnēbeje jumaitisibeje Jesús pijajivijavabelia:

—PaGalilea nacupijivimē, ¿detsa xuajitsia athēbēabetsia pataenubename? Bajaraponē Jesús paxamējavavetsia Dioso pacavecuacaponatsi athēbēabetsia. Bajaraponē icatsia itsmatacabi patsianica. Pacuenia pataneme petsiajaya, bajara icatsia pacuenia patsianica, jai ángelnēbeje Jesús pijajivijavabelia.

Pacuenia Jesús pijajivi natsicueyaitapeta Matíasvēnē apóstolenēxayabara pelivaisi

¹² Jesús baja peponaecujinae athēbēabetsia, Jesús pijajivi, apóstolevi, naviba Jerusalén tomaraberena. Naviba olivonaenē penubenaetsutojavaverena. Bajarapatsuto eca caekilómetrocuenia Jerusalén tomaravecu. ¹³ Nexata Jesús pijajivi pata Jerusalén tomarata. Nexata pabota Jesús pijajivi najinavanapa, athēbēyo pexanaeirajavabetsia junaya. Tspajiji baja cajena tsicopatatsi bajarapairatatsia pejinavanapaenexa. Pamona Jesús pijajivi apóstolevi, mapevēnēanēje. Itsanē pevēnē Pedro. Itsanē Santiago. Itsanē Juan. Itsanē Andrés. Itsanē Felipe. Itsanē Bartolomé. Itsanē Mateo. Itsanē Santiago, Alfeo pexēnato. Itsanē Simón. Bajaraponē celotenē. Itsanē pevēnē Judas, Santiago pejuypijinē. ¹⁴⁻¹⁵ Pabota Jesús pijajivi apóstolevi najinavanapa, athēbēyo pexanaeirajavatatsia, nacaetuatabiaba caejavata pevajētabiabinexa Diosojavabelia. Jesús pena María, Jesús pejuypijivi ata, itsapetiriavi ata yajava, nacaetuatabiaba pevajētabiabinexa Diosojavabelia. Bajarapajivibitsaēto ciento veinte pajivibeje. Nexata penacaetuatsijavata bajarapamonae tuatuajēta Pedro nonotapuna. Pedro nexata jumaitsi penacaetuatsivijavabelia:

¹⁶ —Tajamonae, copiapata rajane baja pacuenia baja cajena tajēvelia jumaitsi Dioso pejumelivaisibaxutota. Pacuenia bajayata Davidpijinē Espíritu Santo pejamatabēcueneta tajēvelia vajunupaebiaexanatsi Judaspijinē pexanaejavanexa, copiapata jane baja. Tspajiji Judaspijinē itsa matacapona pamona Jesús vaetabijitsiatsi, Judaspijinē tocopiapatatsi baja pacuenia Davidpijinē tajēvelia jumaitsi. ¹⁷ Judaspijinē picani paxanēyajuvēnēnēmi. Jesús picani bajaraponēmi itapeta penanacuenebinexa paxanēta. ¹⁸ Judaspijinē ira comuata pibisiacuenepexanaematamopalatata. Bajaraponēmi pijacuata nabeyaxuaba. Nexata penabeyaxuabicujinae, pematono ira bejopaica. Nexata cototitititacajunua. Daxita pēnēmi pitsatajarabarena. ¹⁹ Daxita Jerusalén tomarapijivi vēnēlivaisitanetsi daxita xua tocopiapatatsi Judaspijinēmi. Nexata Judaspijinēmi pecomuatsiira, Jerusalén tomarapijivi vēnēruba Acéldama. “Acéldama,” itsa jai bajarapamonae pija-jumeta, mapajumetaje pejumaitsiijume: “Papatata pejamatabēcueneta jivitonē beyaxuabatsi, bajarapalatata pecomuatsiira,” pejaijume, jai Pedro penacaetuatsivijavabelia.

²⁰ Icatsia Pedro jumaitsi penacaetuatsivijavabelia:

—Salmosvënëbaxutota tajëvelia Judaspijinë yabara comparacióncuenia jumaitsi mapacueniaje:

Pijabo jivinebo xuabetsiana. Itsajivi ata apo ponaponae tsane bajarapabota, jai tajëvelia Salmosvënëbaxutota Judaspijinë apóstolenë penaexanaejavavecua pepitsapaejavanexa yabara.

Itsajavata Salmosvënëbaxutota icatsia tajëvelia jumaitsi Judaspijinë yabara mapacueniaje:

Bajaraponëmi penacuenebijavami, itsanë pitsiana,

jai itsajavata Salmosvënëbaxutota itsanë icatsia apóstolenë penaexanaejavanexa yabara Judaspijinë pepitsapaejamatabëcuene, jai Pedro penacaetuatsivijavabelia.

²¹ Icatsia Pedro jumaitsi:

—Caenë panetsicueyaajibi doce paponëbejenexanë Jesús petëpaecujinae Dioso icatsia piasaëyaexanaejavatsi patataejava patanajuapaebinxaxa. Bajaraxuata bitapetatsi itsanë pataneyanabinexa. Paxamë tuatuajëta ena patanajuapënjajinavanapaevi vajatuxanenë Jesús pamatacabi abaxë ponapona mapanacuataje. ²² Juanpijinë raja bautisaba Jesús. Bajara pamatacabijavaveliacujinae, panajuapënjajinavanapajë Jesús, matapania athëbëabetsia Dioso patanevecua caponaematacabitsijavabelia. Nexata bajarapitsinë bitapetatsi Jesús petëpaecujinae Dioso icatsia piasaëyaexanaejavatsi patataejava patanajuapaebinxaxa, jai Pedro penacaetuatsivijavabelia.

²³ Nexata pamonae nacaetuata, Dioso pejumecovënëtsivi, anijanëbeje itapeta, Pedrohana jane baja Jesús penajuapënjajinavanapaevi. Bajaraponëbejeyajuvënënë caenë acueyabi pavënëbeje xaina. Itsavënë José. Itsavënë Barsabás. Itsavënë Justo. Itsanë caevënë xaina. Bajaraponë pevënë Matías.

²⁴ Bajaraxuacujinae bajarapamonae najumaitsi:

—Vajëtsianatsi Diosojavabelia vajanacayapëtaeyaexanaenexa, najai.

Nexata jane baja bajarapamonae peyapëtaenexa, ponë Dioso itapetsijitsiatsi apóstolenënexa, vajëta Diosojavabelia. Bajarapamonae pevajëtsijavata Diosojavabelia, jumaitsi mapacueniaje:

—Patajatuxanenë, daxitajivi nejamatabëcueneypëtaenë.

Maponëbejeyajuvënënëje, ponë itapetame apóstolenënexa, panetsitajëre.

²⁵ Nexata ponë itapetame, pitsiana xua Judaspijinë vecuapitsapa. Bajaraxua Judaspijinë vecuapitsapa peponaexae infiernojavabelia, jai bajarapamonae pevajëtsijavata Diosojavabelia.

²⁶ Bajaraxuacujinae bajarapamonae pijacuenecujirua exana peyapëtaenexa jane baja ponë apóstolenënexa. Nexata bajarapamonae yapëtane Matías apóstolenënexa. Nexata baja Matías najunua once ponëbeje Jesús pijajivi apóstolevijavabelia. Nexata baja apóstolevi doce ponëbeje.

2

Pacuenia jane baja athëbëvetsica Espiritu Santo patsica Jesús pijajivi petsijamatabëjonexatsi yabara pelivaisi

¹ Itsa baja panepa cincuenta pamatacabibeje pascuavënëfiesta pevereceacujinae, icatsia junua Pentecostésvënëfiesta. Nexata bajarapamatacabi daxita Jesús pijajivi nacaetuata caejavata. ² Nexata bajarapamatacabi athëbëvetsica jemata najumeta bepinijijoviboxaneto. Nexata pabota Pedrohana nacaetuatenaxa, daxitabo najumeteca. ³ Bajarapamonae tane

athëbëvetsica perunaejavatsica bepitarunutsicotia. Nexata bajarapamonae caejivi canacujitsia bajarapacotia tsmatanatsanaeyarunaicatsi. ⁴ Nexata daxita bajarapamonae tsijamatabëvënëcatsi Espíritu Santo. Nexata bajarapamonae jemata taxuxuaba penatsipaebijava itsaviriajumenëta, apo penatsipaebijumemi picani. Espíritu Santo saya pejamatabëcueneta bajarapacuenia itsaviriajumenëta natsipaebiaexanatsi.

⁵ Bajarapamatacabita Jerusalén tomarata jinavanapa ayaibitsaëtoxaneto judíovi. Bajarapamonae saicaya daxitanacuanëjava penaexanaevi. Bajarapamonae saya napata Jerusalén tomarata penataenexa Pentecostésvënëfiesta. Bajarapamonae bitso pejumecovënëtsivi Dioso.

⁶ Nexata bajarapamonae itsa jumetane bepinijjoviboxaneto athëbëvetsica penajumetsijava, nexata pabota Jesús pijajivi nacatuatena, bajarapabota muxunanacaetuaana ayaibitsaëtoxaneto bajarapamonae. Paviriajumenëta Jesús pijajivi Espíritu Santo pejamatabëcueneta natsipaebiaexanatsi, bajarapamonae pijajumenë. Nexata bajarapamonae xaniavaetsia jumetane xua yabara Jesús pijajivi tsipaebapona. Bajaraxuata bajarapamonae bitso jamatabëcuenenabenajaca. Tsipaji bajarapamonae caenacuapijivi canacujitsia xaniavaetsia jumetaepona pepo pijajumeta Jesús pijajivi petsipaebilvaisianë. ⁷ Athëbëvetsica bepinijjoviboxaneto penajumetsijava pemuxunanacaetuaanaevi, pinijicuenia najamatabëxainaeaya jamatabëcuenenabenajaca. Nexata bajarapamonae najumaitsi:

—Daxita mapamonae natsipaebanubenaje, Galilea nacuapijivi. Apo penatsipaebivi picani vajajumenë. ⁸ Vaxaitsi itsaverena patatsi, caenacuapijivitsi canacujitsia saicaya xainatsi vajajumenë, apo penatsipaebijumenë mapamonaeje. ¿Detsa pacuenia itsiata vaxaitsi, caenacuapijivitsi canacujitsia, vjanaexanaejavaveliacujinae vajanatsipaebijumenëta caëjèpatsi penatsipaebinexa mapamonaeje? ⁹ Vaxaitsiyajuvënëvi raja itsamonae Partia nacuapijivi. Itsamonae Media nacuapijivi. Itsamonae Elam nacuapijivi. Itsamonae Mesopotamia nacuapijivi. Itsamonae Judea nacuapijivi. Itsamonae Capadocia nacuapijivi. Itsamonae Ponto nacuapijivi. Itsamonae Asiavënë nacuapijivi. ¹⁰ Itsamonae Frigia nacuapijivi. Itsamonae Panfilia nacuapijivi. Itsamonae Egipto nacuapijivi. Itsamonae Africa nacuapijivi, Cirene tomarapënëverenapijivi. Itsamonae vaxaitsiyajuvënëvi judíovi, Roma tomarapijivi. Itsamonae apo judíovi, Roma tomarapijivi. Bajarapamonae apo judíovi ata, Dioso jumecovënëtanapanapa pacuenia vaxaitsi judíovitsi jumecovënëtanapanapatsi Dioso. ¹¹ Itsamonae vaxaitsiyajuvënëvi Creta nacuapijivi. Itsamonae Arabia nacuapijivi. Itsiata daxitatsi jumetanetsi xaniavaetsia Jesús pijajivi vajanacatsipaebilvaisianë vajajumenëta. Caejivi canacujitsia bajarapamonae Dioso pinijicuenene pexanaejava yabara nacatsipaebapona, najai athëbëvetsica bepinijjoviboxaneto penajumetsijava pemuxunanacaetuaanaevi.

¹² Nexata daxita bajarapamonae jamatabëcuenenajunaviacanubena. Nexata bajarapamonae najumaitsi:

—¿Detsa meta mapsitsijamatabëcuene yabara itsije? najai.

¹³ Itsamonae saya jumecaponaeya jumaitsi Jesús pijajivi yabara:

—Aitajibi ra saya mapamonaeje, jai.

Pacuenia Pedro tsipaeba athëbëvetsica bepinijjoviboxaneto penajumetsijava pemuxunanacaetuaanaevijavabelia yabara pelivaisi

¹⁴ Apóstolenē Pedro nonotapuna once ponēbeje apóstolevi yajava. Nexata Pedro pinijijumeta jumaitsi athēbēvetsica bepinijijoviboxaneto penajumet-sijava pemuxunanacaetuaevijavabelia:

—Tajamonae judíovi, Jerusalén tomarata panenapatsivi, panenamuxu-naevere. Paxamē ata Jerusalén tomarata paneenaevi, xaniavaetsia panenamuxunaevere paneyapētaenexa xua yabara pacatsipaebijitsiatsi. ¹⁵ Paxamē mapamonae yabaraje pajumaitsimē: “Aitajibi ra saya mapamonaeje,” pajamē. Mara pamonae apo aitajibije. Bajayacunuaepato raja abaxē maje. Bajarapaepatota jivi apo aitajibi tsabiabi. ¹⁶ Mara pamonae paxamē panijajumenēta Espíritu Santo pejamatabēcueneta natsipaebiaexanatsije pecopiapatsixae baja xua bajayata tajēvelia Joelpijinē Diosojumepaebinēmi vajunupaeba. Bajaraxua yabara Dioso pejumaitsiyava Joelpijinē bajayata tajēvelia jumaitsi mapacueniaje:

Dioso jumaitsi: ¹⁷ “Itsa baja imoxoyo pevajēnae tsane mapanacua pevereverecaenexaje, itorobianicajē Espíritu Santo daxitanacuapijivi, pamonae tajajivi petsijamatabējonexatsi. Daxita panexi, pebijivi, petiriavi, paebiana palivaisi Espíritu Santo paebiaexanaenatsi, xanē talivaisi. Pevjēavi pebijivi taena xua tsitajētsianajē bemajitsinaebocuenia. Perujuvi pebijivi piamajitsinaejavata tsipaebianajē. ¹⁸ Nexata daxita pamonae tanetonacuenebivi, pebijivi, petiriavi ata, bajarapamatacabi Espíritu Santo toitorobianicajē petsijamatabējonexatsi. Nexata bajarapamonae paebiana xanē talivaisi. ¹⁹ Tsitajētsianajē itaboxotatsia pinijicuene taexanaejava. Daxita mapanacuajava ata pinijicuene taexanaejava tsitajētsianajē. Ayai tsane pljana. Ayai tsane isotocotia. Ayai tsane petsēxē mapanacuataje. ²⁰ Nexata matabicipijijuameto aitaquiri tsane. Meravipijijuameto bepijana itatsobia tsane. Bajara itsane mapanacuataje itsa baja peneta imoxoyo pevajēnae tsane icatsia pepatsimatacabinexatsica pepo petuxanenē. Bajarapamatacabi bajaraponē pinijicuene pexanaejava pecaējēpaenēcuenetsi, tsitajētsiana daxitajivijavabelia. ²¹ Nexata pajivi navajētsiana pepo petuxanenējavabelia, bajarapajivi capanepaenatsi,” jai Dioso,

jai bajayata tajēvelia Joelpijinē Diosojumepaebinēmi Dioso pejumaitsiyava bajaraxua yabara, jai Pedro athēbēvetsica bepinijijoviboxaneto penajumet-sijava pemuxunanacaetuaevijavabelia.

²² Icatsia Pedro jumaitsi bajarapamonaejavabelia:

—Tajamonae judíovi, panenamuxunaevere paneyapētaenexa xua yabara pacatsipaebijitsiatsi. Jesús, Nazaret tomarapijinē, Dioso pesaēta pinijicuene pexanaejava exanapona paxamē tuatujēta. Nexata Jesús pacayapētaeyaexana Dioso ayaiacuene pexanaejava pecaējēpaenēcuenetsi. Bajarapacuenia paxamē baja payapētaneme Jesús Dioso pitorobinēcuenetsi. Xaniavaetsia rabaja payapētaneme paxamējavata Jesús pexanaejava bajarapapinijicuene. ²³ Bajaraponē Jesús paxamē panecobeyabelia canajetatsi. Nexata paxamē pabeyaxuabame. Tsipaji patocopatame piamatabēcuenēbejevi Jesús cruzajavabelia pecobematabiabarutsinexatsi. Bajarapacuenia Jesús pabeyaxuabame tsipaji baja cajena Dioso tajēvelia najamatabēxaina bajarapacuenia Jesús panebeyaxuabinexa. ²⁴ Itsiata baitsi jane Jesús petēpaecujinae Dioso icatsia asaēyaexanatsi. Dioso capanepatsi petēpaejavavecua. Tsipaji Jesús Dioso pexēnatoxae, acuenebi pematatoxensijavatsi petēpaejava. ²⁵ Bajayata Davidpjinē tajēvelia yaquina Dioso pejumelivaisibaxutota Jesús icatsia piasaējavanexa

petēpaecujinae. Davidpijinē itsa yaquina Jesús pejumaitsijava Diosojavabelia icatsia piasaējavanexa petēpaecujinae, yaquina mapejumaitsiitaneje:

Yapētāniji Dioso taneyajavaponaponaejava. Tamuxuneneta ponapona, tacujuanenia. Bajaraxuata apo junavinē tsane. ²⁶ Bajaraxuata jamatabēcuenearēyanē tsane. Nexata jivijavabelia tsipaebianajē jamatabēcuenearēyajava. Bajaraxuata yapētāniji tatēpaecujinae icatsia tasaējavanexa. ²⁷ Xamē, Diosomē, apo necopatsimē tsane petēpaevi peponaenacuayabelia. Apo necopatsimēnua tsane taperabētsabanaenexa nexēnatonē. ²⁸ Netsitajētame baja cajena taponanemutonexa taxainaenexa matabaci apo peverevereaejava. Nējamatabēcuenearēyaexaname itsa neyajavaponaponame,

pejaaitane bajayata Davidpijinē yaquina Dioso pejumelivaisibaxutota Jesús pejumaitsijava Diosojavabelia, jai Pedro athēbēvetsica bepinijijoviboxaneto penajumetsijava pemuxunanacaetuanavijavabelia.

²⁹ Icatsia Pedro jumaitsi bajarapamonaejavabelia:

—Tajamonae, jumenapebetsiaya pacatsipaebianatsi vajasalinainēmi Davidpijinē yabara. Bajayata baja tēpa Davidpijinēmi. Nexata mēthētatsi. Yapētānēsi itsajota mēthētatsi. ³⁰ Davidpijinēmi raja Diosojumepaebinēmi profetanēmi. Davidpijinēmi baja cajena yapētane pacuenia Dioso pexaniajaijumeta najumecapanepaeya jumaitsi. Davidpijinēmijavabelia Dioso najumecapanepaeya jumaitsi mapacueniaje: “Pacuenia xamē evetame Israelnacua, bajara icatsia pacuenia bexējavabelia caenē nemomoxiyajuvēnēnē evetsiana nevetsinacuami, Israelnacua,” jai Dioso najumecapanepaeya mapacueniaje Davidpijinēmijavabelia Jesús yabara.

³¹ Davidpijinē baja cajena tajēvelia yapētane Jesús athēbēvetsica Dioso pitorobijavanexatsi jivi pecapanepaenexa. Tajēvelia yapētanenua Jesús petēpaecujinae Dioso icatsia piasaēyaexanaejavanexatsi. Bajaraxuata bajayata Davidpijinē tajēvelia cajena vajunupaeba Jesús petēpaecujinae Dioso icatsia piasaēyaexanaejavanexatsi. Davidpijinēmi peyaquinaebaxutota tajēvelia Jesús yabara jumaitsi mapacueniaje: “Nexata apo copatsi tsanetsi petēpaevi peponaenacuayabelia. Apo copatsi tsanetsinua peperabētsabanaenexa,” jai baja cajena Davidpijinē peyaquinaebaxutota Jesús yabara. ³² Bajaraxuata Jesús baja icatsia Dioso asaēyaexanatsi petēpaecujinae. Jesús Dioso piasaēyaexanaejavatsi, daxita baja paxanē patāniji. Bajaraxuata pacatsipaebatsi. ³³ Jesús caponatsi athēbēbetsia Dioso pecujanenia peecaenexa. Nexata baja paxa Dioso rajutatsi Espiritu Santo pacuenia baja cajena najumecapanepaeya Dioso jumaitsi. Nexata bajaraxuacujinae Jesús juya itorobica Espiritu Santo paxanējavabetsica. Nexata xua pinijicuene pexanaejava, aeconoxae pataenubename, pajumetanemenua, palivaisianē mapamonae panijajumenēta pacatsipaebaje, bajaraxua Espiritu Santo pejamatabēcueneta exana. ³⁴ Itsiata baitsi jane ponē athēbēbetsia Dioso caponatsi, apo Davidpijinē. Davidpijinē bajayata tajēvelia Jesús yabara jumaitsi mapacueniaje:

Dioso jumaitsi tajatuxanenējavabelia: “Evetecare abaxē tacujuanenia.

³⁵ Vecatsivajēnae jumecovēnēsiaexanaenatsi abaxē copiaya nijavajabitsaē nitorobicuenianexa,” jai Dioso tajatuxanenējavabelia, jai bajayata tajēvelia Davidpijinē Jesús yabara.

³⁶ Bajaraxuata daxita Israel nacuapijivi xaniavaetsia beyapētane Jesús pelivaisi, ponē paxamē pacobematabiabarutame cruzajavabelia. Bajara-ponē Jesús, Dioso exanatsi pepo petuxanenē. Bajaraponē Jesús, Cristo ca-

jena, ponē Dioso itorobica vajanacacapanepaenexa, jai Pedro athēbēvetsica bepiniijoviboxaneto penajumetsijava pemuxunanacaeuanaevijavabelia.

³⁷ Itsa bajarapamonae jumetane Pedro bajarapacuenia pejumaitisijava, nexata bajarapamonae bejamatabējiobireca pinijicuenia. Nexata bajarapamonae yanijoba Pedrojavabelia, itsamonae Jesús pijajivi apóstolevijavabelia ata.

—Tajamonae, ¿detsa nexata pitsicuene paexanaenajē patajaneconi yabara? jai nexata bajarapamonae Pedrobanajavabelia.

³⁸ Pedro nexata jumaitsi bajarapamonaejavabelia:

—Daxita paxamē pibisiacuene paneexanaejava pacopabare. Panajamatabēcuenepēnyorore Diosojavabelia. Nexata pacabautisabiana Jesucristo pejamatabēcueneta papecavecuaajibiaexanaenexa daxita pibisiacuene paneexanaeneconi. Bajara jane xuacujinae Dioso pacarajutsiana Espíritu Santo papecatsijamatabējonexa. ³⁹ Dioso raja cajena jitsipa papecarajutsinexa Espíritu Santo. Dioso raja jitsipa panexijavabelia ata perajutsinexa Espíritu Santo. Dioso raja jitsipa itsanacuanēpijivi, tajēnacuanējava pejinavanapaevi ata, perajutsinexa Espíritu Santo. Daxita pamonae Dioso junatsiana pijajivinexa, tsijamatabējonenatsi Espíritu Santo, jai Pedro bajarapamonaejavabelia.

⁴⁰ Bajarapacuenia Pedro itsa tsipaeba, itsalivaisi pematatsēnēa tsipaeba bajarapamonaejavabelia. Pedro pinijicuenia muxujioba bajarapamonae. Pedro jumaitsi mapacueniaje:

—Pamonae Jesús beyaxuaba, pibisiacuene pexanaevi, bajarapamonae naxuabiana. Nexata paxamē ata bajarapamonae paneyajavanaxuabiyaniva, pavecuanajamatabēcuenepēnyorore Diosojavabelia, jai Pedro.

⁴¹ Nexata Pedro petsipaebilivaisi bajarapamatacabi jumecovēnētatsi tres mil pajivimaxēto. Nexata daxita bajarapamonae Jesús pijajivi bautisaba. Nexata bajarapamonae najunua baja Jesús pijajivijavabelia. ⁴² Nexata bajarapamonae jumecovēnēta palivaisi Jesús pijajivi apóstolevi tsipaebapona. Daxita bajarapamonae Jesús pijajivi yajava, apóstolevinua yajava, najamatabēcuenējēpaeya jinavanapa. Daxita nacaetuatabiaba pevājēcabinexa Diosojavabelia. Nacaetuatabiabanua caejavata pexaenexa, penajamatabēnapitabinexa xua yabara Jesús sivatēpatsi.

Pacuenia jinavanapa pamonae copiaya Jesús pelivaisi jumecovēnēta yabara pelivaisi

⁴³ Daxitajivi cjunava Dioso. Tsipaji Dioso yavenonabiaba apóstolevi. Nexata apóstolevi Dioso pesaēta pinijicuene pexanaejava, exanabiaba.

⁴⁴ Daxita pamonae jumecovēnēta Jesús pelivaisi, nacaetuatabiaba najamatabecuenējēpaeya. Bajarapamonae daxita pexinaejava nacobenaxainaeya evetabiaba. ⁴⁵ Paepatota itsajivi bitso namatavenona, peyavenonaenexa bajarapamonae yajuvēnēvi pexinaejava canajetapona. Pijairanē ata canajetapona. Pijabonē ata canajetapona. Pacuenejavaxi xaina, canajetapona.

Nexata bajaraxuamatamopalata, daxita bajarapamatamo, natsicobetsanabiaba pacuenia caejivi canacujitsia namatavenona. ⁴⁶ Bajarapamonae caematacabi canacujitsia nacaetuatabiaba templobota. Daxita bajarapamonae pijabonējava jamatabēcuenēbarēyaya xaeyabiaba pexaejava najamatabēcuenējēpaeya.

⁴⁷ Nexata bajarapamonae jumai tsabiabi Diosojavabelia: “Diosomē, bitso ayajamatabēcuenenēmē. Paneyavenonabiabame,” jai tsabiabi. Nexata daxita Jerusalén tomarapijivi, bajarapamonae pexaniacuena

yaiyataeyabiabatsi. Nexata itsamonae ata, caematacabi canacujitsia Jesús pelivaisi jumecovënëtapona pecapanepaenexatsi pibisiacuene pexanaeconivecua. Bajarapamonae najonepona Jesús pelivaisi pejumecovënëtsivijavabelia.

3

Pacuenia apóstolenëbeje Jesús pejamatabëcueneta xanepanaeyaexanabeje apo pecaëjëpaenëtsi peponaponaejava yabara pelivaisi

¹ Judíovi caniviyoeapatota, bejamatabëcuene a las tres, templobota vajëcabiaba Diosojavabelia. Nexata itsamatacabi, bajarapaepatóta, Pedrobeje Juanbeje naponabeje templobojavabelia. ² Ponë apo pecaëjëpaenëtsi peponaponaejava penaexanaejavabeliacujinae, capatabiabatsi pijamonae peetabiabinexatsi templobobaupa muxuneneta. Bajarapabaupa pevënë Pexaniabaupa. Caematacabi canacujitsia bajarapabaupa muxuneneta bajaraponë etabiabatsi pijamonae. Nexata bajaraponë amoneya palata vajëcabiabeca bajarapabaupajava pejoneponaevita templobojavaberena. ³ Nexata itsa bajaraponë taeyeca Pedrobeje Juanbeje pejonenajetarucaejavabeje templobojavaberena, vajëqueca palata. ⁴ Nexata Pedrobeje Juanbeje naëcotabeje bajaraponëjavabelia. Nexata Pedro jumaitsi bajaraponëjavabelia:

—Panetaemabeje, jai Pedro.

⁵ Nexata bajaraponë naitaxutocaevetsiaya jamatabëjumai tsecae:

—Nerajutsianabeje tsamë raja itsacuenejavayo, jamatabëjai tsecae bajaronë.

⁶ Pedro nexata jumaitsi bajaraponëjavabelia:

—Palata raja apo xainaenë. Itsiata baitsi jane xua xainajë, carajutsianatsi. Jesucristo, Nazaret tomarapijinë, pecaxanepanaeyaexanaexae baja, nonotapunare. Ponaponare baja, jai Pedro.

⁷ Nexata bajaraponë pecujanenia pacobe, Pedro cobevaetabiyotsia. Bajarajota bajaraponë daxitaneniabeje asisaëreca baja. ⁸ Nexata bajaraponë jirevajunua. Petaxuta nuca. Ponaponare baja. Nexata bajaraponë templobo ënëabelia najoneya Pedrobeje Juanbeje pepëta. Bajaraponë jirevanajetaruca. Jumai tsanajetaruca Diosojavabelia:

—Diosomë, jbitso ayaijamatabëcuenenëmë! ¡Tsipaji baja nexanepanaeyaexaname! jai tsanajetaruca Diosojavabelia.

⁹ Nexata daxitajivi tanetsi peponaponaejava. Jumetanetsinua pexaniajamatabëcuene perajutsijava Diosojavabelia. ¹⁰ Bajarapamonae itsa tanetsi, yapëtanetsi palata pevajëcabiabecaenëmi templobobaupa muxuneneta, Pexaniabaupavënë muxuneneta. Nexata daxita bajarapamonae itsa tane bajaraponë baja pexanepanaejava, bitso jamatabëcuenenajunaviaca.

Pacuenia Jesús pelivaisi Pedro jivi tsipaeba templobo ënëtuatujëta, Portal de Salomónvënëjavata, yabara pelivaisi

¹¹ Ponë penaexanaejavaveliacujinae apo peponaponanëmi, Pedro pexanepanaeyaexanaecujinae, Pedrobeje Juanbeje apo copatsitsibeje. Nexata templobo ënëtuatujëta, Portal de Salomónvënëjavata, ponë Pedro xanepanaeyaexana, Pedrobeje Juanbeje najuamaxëvaetabanucatsibeje. Nexata jivi ayaibitsaëto itaxutuaothopatsi. Jamatabëcuenenabenajaca bajarapamonae. ¹² Nexata Pedro itsa tane bajarapamonae pejamatabëcuenenabenajacaejava, nexata Pedro jumaitsi bajarapamonaejavabelia:

—Tajamonae judíovi, ¿detsa xuajitsia pajamatabëcuenenabenajacame maponë yabaraje? ¿Detsa xuajitsia bitso panenaëcobamebeje mapacueniaje? Paxanëbeje yabara meta pajamatabëjumaitsimë mapacueniaje: “Maponëbeje xanepanaeyaexanabeje apo pecaëjëpaenëmitsi peponaponaejava. Tspaji baja caëjëpatsibeje bajarapacuenë pexanaenexabeje. Bajarapacuenë caëjëpatsibeje tspaji meta Dioso pitabarata aneconijibia ponaponabeje,” pajamatabëjamë meta paxanëbeje yabara. Paxanëbeje raja patajamatabëcuenetabeje apo paexanaenëbeje bajarapacuenë. Jesús raja exana bajarapacuenë. ¹³ Vajasalinaivi baja cajena Abrahampijinë, Isaacpjinë, Jacobpjinë. Bajarapamonae pijaDioso pexë nato Jesús. Nexata Dioso jivi yapëtaeyaexana Jesús bitso ayajamatabëcuenë pexainaenëcuenë. Bajaraponë Jesús paxamë parajutame vajanacayanacuaevetsivi pecobeyabelia. Vajanacayanacuaevetsinë Pilato copatsijitsia ata Jesús, itsiata paxamë pajumesaëmë. Apo pajitsipaemë Pilato pecopatsijava Jesús. ¹⁴ Apo pavajëcaemë Pilatojavabelia pecopatsinexatsi Jesús, itsacueneneconiyo apo pexainaenë, pepo planeconijibinë. Caranata biji pibisiacuenë pexanaenë, jivibenë, pecopatsinexatsi, pajumesaëmë. Pavajëcame Pilatojavabelia jivibenë pepitsapaenexa penaneconitsivi pejebabihibovecua. ¹⁵ Ponë Dioso itorobica vajanacarajutsinexa matababi apo pevereverecaejava, bajaraponë caranata pabeyaxuabame. Itsiata baitsi jane Jesús petëpaecujinae, Dioso icatsia asaëyaexanatsi. Bajarapacuenë patataexae, pacatsipaebatsi. ¹⁶ Bajaraponë Jesús pejamatabëcueneta xanepanaeyaexanatsi baja maponëje, apo pecaëjëpaenëmitsi peponaponaejava. Maponëje najamatabëcuenecopata Jesúsjavabelia. Bajaraxuata maponëje Jesús baja xanepanaeyaexanatsi paneitabarata, panetaeyabiabinë, paneyapëtaenë, jai Pedro bajarapamonaejavabelia Portal de Salomónvënëjavata.

¹⁷ Icatsia Pedro jumaitsi bajarapamonaejavabelia:

—Tajamonae, yapëtaniji pacuenë pacabarëexana itsamonae, papecaevetsivi yajava. Tspaji apo payapëtaemë xaniavaetsia. Bajaraxuata pabeyaxuabame Jesús. ¹⁸ Bajayata Diosojumepaebivimi profetavi tajëvelia vajunupaeba Jesús athëbëvetsica Dioso pitorobijavanexatsi jivi pecapanepaenexa. Profetavimi tajëvelia vajunupaebanua Jesús bitso pebejibiaexanaejavanexatsi daxitajivi pijaneconi yabara. Bajarapacuenë Jesús baja tocopiapatatsi itsa pabeyaxuabame. Tspaji baja Dioso bajarapacuenia tocopatatsi. ¹⁹ Nexata baja aeconoxae paneyapëtaexae Jesús petëpaejava daxitajivi pijaneconi yabara, pacopabare baja panijaperujamatabëcuenemi. Panajamatabëcuenepënëyorore baja Diosojavabelia. Nexata pibisiacuenë paneexanaeneconimi, Dioso pacavecuaajibiaexanaena. Nexata pacajamatabëcuenë asaëyaexanaena Dioso. ²⁰ Tspaji raja icatsia itsamatababi Dioso athëbëvetsica itorobianica Jesús, ponë bajayata Dioso itapeta papecayavenonaenexa. ²¹ Jesús raja abaxë ecaya athëbëtatsia. Matapania pamatababi Dioso xanebijitsia daxitacuenë, icatsia patsianica Jesús. Bajarapacuenia Jesús pepatsijavanexatsica, Diosojumepaebivimi profetavi bajayata tajëvelia vajunupaeba. ²² Vajasalinaivimijavabelia baja cajena bajayata tajëvelia profeta Moiséspjinë Jesús yabara jumaitsi mapacueniaje: “Pacuenia nitroba xanë profetanëxanë, bajarapacuenia icatsia vajatuxanenë Dioso itorobiana itsanë profetanë, paxamë panemomoxiyajuvënëntë tsane. Nexata pacuenë yabara bajaraponë profeta pacatsipaebiana, pajumecovënëntsianame xaniavaetsia. ²³ Tspaji daxita pamonaë apo

jumecovënëtsi tsane bajaraponë profeta petsipaebilivaisi, pepacuene Dioso pijajivivecua tsatsiana. Nexata bajarapamonae Dioso verebabena,” jai baja cajena bajayata tajëvelia Moiséspijinë vajasalinaivimijavabelia Jesús pepatsijavanexatsica yabara, jai Pedro bajarapamonaejavabelia Portal de Salomónvënëjavata.

²⁴ Icatsia Pedro jumaitsi bajarapamonaejavabelia:

—Xua baja aeconoxae mapamatacabitaje copiapatapona, bajayata tajëvelia profeta Samuelpijinë copiaya vajunupaeba. Bajara icatsia xuacujinae cotocaevi paprofetavimi ata bajarapacuenia tajëvelia vajunupaebapona bajaraxua. ²⁵ Paxamë rabaja profetavimi papemomoximë. Nexata xua Dioso najumecapanepaeya jumaitsi perajutsinexa panijasalinaivimijavabelia, bajaraxua paxamë Dioso pacarajutsiana. Bajayata tajëvelia Dioso jumaitsi vajasalinainëmi Abrahampijinëjavabelia Jesús yabara: “Caenë nemomoxiyajuvënënë itorobianajë jivi peyavenonaenexa. Nexata nemomoxiyajuvënënë yavenonaena caenacuapijivi canacujitsia, mapanacuata pejinavanapaevi,” jai Dioso tajëvelia Abrahampijinëmijavabelia Jesús yabara. ²⁶ Nexata baja copiaya paxamëjavabetsica Dioso pexënato pacatoitorobica. Bajarapacuenia Dioso pexënato pacatoitorobica paxamë pacaevivimë canacujitsia papecayavenonaenexa panenajamatabëcuene pënëyorotsinexa pibisiacuene paneexanaejavavecua, jai Pedro bajarapamonaejavabelia Portal de Salomónvënëjavata.

4

Pacuenia Pedrobeje Juanbeje Jesús pelivaisi tsipaebabeje tomaraevetsivi-javabelia yabara pelivaisi

¹ Pedrobeje Juanbeje abaxë Jesús pelivaisi tsipaebabeje bajarapamonaejavabelia Portal de Salomónvënëjavata. Nexata bajaraberena jemata patana-jetarubena sacerdotevi. Patanajetarubena saduceovinu. Pematatsënëa patanajetaruca itsanë capitán. Bajaraponë capitán templobopijipolicíavi pevetsinë. ² Daxita bajarapamonae baranaepanatsibeje Pedrobeje Juanbeje. Tsipaji Pedrobeje Juanbeje Jesús pelivaisi petsipaebijavatabeje, jumai tsaponaebeje:

—Jivi tēpae ata tsane, icatsia asaë tsane petēpaecujinae. Bajarapalivaisi cajena pexaniajailivaisi. Tsipaji baja icatsia Jesús asaëyaexanatsi petēpaecujinae, jaibeje tsaponae.

³ Nexata bajarapamonae vaetabatsibeje. Caponaliatsibeje peetsinexatsibeje penaneconitsivi pejebabiabibota. Meravia pitsijavata jutsijitsiatsibeje. Tsipaji baja bitso caniviyo. ⁴ Itsiata baitsi jane baja jivibitsaëttoxanetonë capanepaeya jumecovënëtatsibeje pevaetabivajënaeyatsibeje. Nexata daxita pamonae jumecovënëta Jesús pelivaisi, ëpebijivi namataëjëtatsi cinco mil ponëbeje.

⁵ Nexata meravia pitsijavata nacaetuata judíovi pevetsivi. Nacaetuata judíovi pijaancianovinu. Nacaetuata judíovi pecujarubivinu. Daxita bajarapamonae nacaetuata Jerusalén tomarata. ⁶ Nexata bajarajota napata sacerdotenë Anás. Bajaraponë Anás sacerdotevi pepo penamata-caitorobinëmi. Napata Caifás ata. Napata Juan ata. Napata Alejandro ata. Napata itsamonae ata, Anás pijamonae. ⁷ Nexata Pedrobeje Juanbeje nutatsibeje daxita bajarapamonae pitabarata. Nexata bajarapamonae jumaitsi Pedrobeje Juanbejejavabelia:

—¿Jipatsa pejamatabëcueneta paxanepanaeyaexanamebeje apo pecaëjëpaenëmitsi peponaponaejava? jai bajarapamonae Pedrobeje Juanbejejavabelia.

⁸⁻⁹ Nexata Pedro Espíritu Santo bitso jamatabëcueneyavenonatsi. Nexata Pedro jumaitsi bajarapamonaejavabelia:

—Paxamë judíovi paneevetsivi, paxamë ata pijinia paancianovimë, paneyanijobamebeje paneyapëtaenexa ponë pejamatabëcueneta paxanepanaeyaexanajëbeje apo pecaëjëpaenëmitsi peponaponaejava. Paneyanijobamebejenua paneyapëtaenexa pacuenia paxanepanaeyaexanajëbeje bajaraponë. ¹⁰ Nexata pacatsipaebianatsi daxita paxamë paneyapëtaenexa daxita Israel nacuapijivi ata peyapëtaenexa. Jesús, Nazaret tomarapijinë, ponë paxamë pacobematabiabarutame cruzajavabelia, bajaraponë icatsia Dioso asaëyaexanatsi petëpaecujinae. Bajaraponë Jesús pejamatabëcueneta maponë paneitarata nucaje, xanepanaeyaexanatsi, jai Pedro.

¹¹ Icatsia Pedro jumaitsi bajarapamonaejavabelia:

—Bajaraponë Jesús yabara Dioso pejumelivaisibaxutota bajayata tajëvelia jumaitsi comparacióncuenia mapacueniaje: Paiboto itsamonae boexanaevi naitaxutojematabuatsiana petsitaabejexaetsi itajara, bajarapaiboto itsanë pitsiana. Nexata bajarapaibotota xaniavaetsia yaëtsiana botabu daxita itsaibo matatoxenetsia, jai tajëvelia Dioso pejumelivaisibaxutota.

Bajarapacuenia Dioso pejumelivaisibaxutota comparacióncuenia itsa jumaitsi Jesús yabara, judíovi penamatacaitorobivi Jesús apo pejumecovënëtsijavanexa yabara, jumaitsi. Dioso pitapetsijavatsi Jesús daxitajivi pecapanepaenexa yabara ata jumaitsi. ¹² Caenë Jesús caëjëpatsi vajanacapanepaenexa pibisiacuenë vajaexanaeconivecua. Bajaraxuata Dioso itorobica Jesús. Tsipaji baja ajibi pematatsënëa mapanacuataje itsanë ata pejamatabëcueneta vajanacapanepaenexa Diosojavabelia, jai Pedro bajarapamonaejavabelia.

¹³ Bajarapamonae yapëtane Pedrobeje Juanbeje ajumejunavijibia Jesús pelivaisi petsipaebijavabeje bajarapamonaejavabelia. Bajarapamonae yapëtanenua bajaraponëbeje bajayajebi apo penacujarubinëbeje peyaquinaejava. Itsiata bitso yapëtanebeje pexanialivaisi. Saya bajaraponëbeje penacuenebinëbeje. Nexata judíovi pevetsivi jamatabëcuenenabenajaca. Bajarapamonae nexata jamatabëjumaitsi Pedrobeje Juanbeje yabara:

—Bajaraponëbeje cajena penaponaponaeñebeje Jesúsata. Bajaraxuata bitso baja yapëtanebeje bajarapalivaisi, jamatabëjai.

¹⁴ Bajarapamonae tane apo pecaëjëpaenëmitsi peponaponaejava penanucæjava Pedrobeje Juanbejejavata. Nexata bajarapamonae acuenebi pejumaisijava: “Jume raja. Jesús raja pejamatabëcueneta apo xanepanae maponëje,” acuenebi pejaijava. Tsipaji apo pecaëjëpaenëmitsi peponaponaejava Jesús pejamatabëcueneta ponapona baja. ¹⁵ Nexata bajarapamonae Pedrobeje Juanbeje caepatoyo navecuacapsapatsibeje pecovëta ëpamonae penabarëcuaicuaijainexa.

¹⁶ Nexata Pedrobeje Juanbeje pecovëta caepatoyo penavecuacapsapaejavatatsibeje, bajarapamonae najumaitsi:

—¿Detsamë raja pacuene exanaenatsi bajaraponëbejejavabelia? Daxita Jerusalén tomarapijivi xaniavaetsia yapëtane bajaraponëbeje pexanepanaeyaexanaejavabeje apo pecaëjëpaenëmitsi peponaponaejava. Nexata acuenebi jivijavabelia vajajumaisijava: “Apo

xanepanaeyaexanaebeje raja bajaraponēbeje,” vajajaijava. ¹⁷ Pinijicuena vaxaitsi bajaraponēbeje itavetsianatsi petsipaebiyavabeje matavējēa Jesús pelivaisi itsajiviyojavabelia ata. Nexata bajarapacuenia apo tsipaebibeje baja tsane itsamonaejavabelia Jesús pelivaisi, najai bajarapamonaē Pedrobeje Juanbeje pecovēta caeepatoyo penavecuacapsapaejavatsibeje.

¹⁸ Nexata icatsia Pedrobeje Juanbeje caevēalia pejonexaliabeje, junalitsibeje. Nexata jane baja bajarapamonaē jumaitsi Pedrobeje Juanbejejavabelia:

—Pētsa baja icatsia matavējēa jivi patsipaebaponamebeje Jesús pelivaisi. Pacoparebeje baja jivi panetsipaebaponaejavabeje Jesús pelivaisi, jai bajarapamonaē.

¹⁹ Nexata Pedrobeje Juanbeje jumaitsibeje bajarapamonaejavabelia:

—Paxamē panijacuata panajamatabēxainare pacuene xanepana pataexanaponaenexabeje Dioso pitabarata. Itsa pacajumecovēnētsipatsibeje paxamē patanitavetsijavamēbeje, nexata apo pajumecovēnētsinēbeje tsipae Dioso patanitorobijavabeje. ²⁰ Acuenebi cajena patacopatsijavabeje jivi patatsipaebaponaejavabeje xua patanijibeje, palivaisi ata pajumetanijibeje, jaiibeje Pedrobeje Juanbeje bajarapamonaejavabelia.

²¹ Icatsia judíovi pevetsivi orijibia itavetsibeje jivi petsipaebaponaejanivabeje Jesús pelivaisi. Bajaraxuacujinae copatatsibeje baja peponaenexabeje. Ajibi peyabarananeconitsia exanaejavanexatsibeje. Tsipaji daxitajivi jumai tsaponaē Diosojavabelia:

—Diosomē, bitso ayaijamatabēcuenenēmē, jai tsaponaē.

Bajarapacuenia daxitajivi pexaniajamatabēcuene rajuta Diosojavabelia Pedrobeje Juanbeje pexanepanaeyaexanaexabeje apo pecaējēpaenēmitsi peponaponaejava. ²² Ponē xanepanaeyaexanatsi Dioso pesaēta pinijicuene pexanaejavata, bajaraponē penaexanaecujinae xaina baja cuarenta pavaibeje pematatsēnēa.

Pacuenia Dioso pejumecovēnētsivi vajēca Diosojavabelia pecaējēpaeyaexanaenexatsi Jesús pelivaisi ajumejunavijibia jivi pepaebaponaeanaxa yabara pelivaisi

²³ Itsa baja Pedrobeje Juanbeje judíovi pevetsivi copatatsibeje peponaenexabeje, navialiabeje baja itsabelia jinavanapa Dioso pejumecovēnētsivi. Nexata Pedrobeje Juanbeje Jesús pelivaisi jivi petsipaebaponaejanivabeje sacerdotevi penamatacaitorobivi pitavetsijavatsibeje, navajunupaebabeje Dioso pejumecovēnētsivijavabelia. Navajunupaebabejenua judíovi pijaancianovi ata pitavetsijavatsibeje. ²⁴ Nexata Dioso pejumecovēnētsivi ita jumetane Pedrobeje Juanbeje penavajunupaebijavabeje, nexata daxita Dioso pejumecovēnētsivi Pedrobana najamatabēcuenejēpaeya vajēca Diosojavabelia. Daxita bajarapamonaē pevajēcaejavata Diosojavabelia, jumaitsi mapacueniaje:

—Xamē pinijiDiosomē, nexanaenē cajena itaboxo. Nexanaenē daxita itaboxopijicuene ata. Nexanaenē ira ata. Nexanaenē daxita irapijicuene ata. Nexanaenē manuamene ata. Nexanaenē daxita manuamenepijicuene ata. ²⁵ Xamē Diosomē, bajayata Espíritu Santo pejamatabēcuenetajjēvelia yapētaeyaexaname patajasalinainēmi Davidpijinē. Nexata nijajivitonē Davidpijinē tajjēvelia nexēnato Jesús vajēca jumaitsi mapacueniaje: Itsanacuanēpijivi, pamonaē apo judíovi, bitso anaepanabiabiana. Saya jema najamatabēxainabiabiana pexanaenexa picani xua apo caējēpaetsi pexanaenexa. ²⁶ Pinijinacuanē pevetsivi nacaetuatsiana.

Tomaranë pevetsivi ata nacaetuatsiana. Bajarapamonae najamatabëxainaeana, xamë Diosomë, nijacuene pecatobijianaenexa. Najamatabëxainaeana pebejiobiaexanaenexa Cristo, ponë itorobianimica jivi peceanepaenexa, jai bajayata tajëvelia Davidpijinë Espiritu Santo pejamatabëcueneta, Jesús pebejiobiaexanaejavanexatsi yabara, jai Pedrohana pevajëcaejavata Diosojavabelia.

²⁷ Icatsia Pedrohana jumaitsi pevajëcaejavata Diosojavabelia:

—Mapatomarataje Herodesbeje, Poncio Pilatobeje, barënacaeuatabeje it-sanacuanëpijivi. Barënacaeuatabeje apo judíovi. Barënacaeuatabeje judíovi ata yajava. Bajarapamonae nacaetuata penajumejaitsinexa pacuenia beyaxuabijitsiatsi nexë nato Jesús, ponë athëbëvetsica itorobimica. Bajarpacuenia itsa barënacaeuatabeje, copiapata jane baja xua bajayata tajëvelia Davidpijinë vajunupaeba. ²⁸ Bajarapamonae nacaetuata pexanaenexatsi daxita pacuenia baja cajena bajayata nexë nato tocopatame pexanaenexatsi. ²⁹ Patajatuxanenë, yapëtaneme judíovi pevetsivi patanitavetsijava jivi patatsipaebaponaeyaniva nexë nato pelivaisi. Paxanë panijajivinë. Nexata panerajutsianame patanecaëjëpejamatabëcuene ajumejunavijibia jivi patatsipaebaponaenexa nexë nato pelivaisi. ³⁰ Itsa patomarata patsipaebianajë nexë nato pelivaisi, jamatejemayaexanaename piavitanevi. Pinijicuene nexanaejava exanaename jivi peyapëtaenexa bitso ayajamatabëcuene nexainaeenëcuene. Bajarapapiniijicuene exanaename nexë nato Jesús pejamatabëcueneta, jai Pedrohana pevajëcaejavata Diosojavabelia.

³¹ Itsa baja bajarapamonae vereta pevajëcaejava Diosojavabelia, bajarajota ira nanequetajaraba. Daxita bajarapamonae Espiritu Santo tsijamatabëvënëcatsi. Nexata bajarapamonae Espiritu Santo petsijamatabëvënëcaexaetsi, ajumejunavijibia jane baja jivi tsipaebapona Jesús pelivaisi.

Pacuenia Dioso pejumecovënëtsivi, xua xaina, daxita nacobenaxainaeayaveta yabara pelivaisi

³² Ayabitsaëtoخانeto Dioso pejumecovënëtsivi najamatabëjëpaeya jina-
vanapa. Bajarapamonae xua xaina, apo najamatabëxainae caejivi pexainaeana. Nexata daxita bajarapamonae xua xaina, nacobenaxaina daxita. ³³ Nexata apóstolevi asaëya tsipaebabiaba jivijavabelia Jesús pelivaisi. Tsipaebabiaba pacuenia icatsia Dioso asaëyaexanatsi vajatuxanenë Jesús petëpaecujinae. Dioso bitso yavenonabiabatsi daxita bajarapamonae. ³⁴ Nexata bajarapamonae Dioso pejumecovënëtsivi caenë ata apo yajuvënëbejio pexanaejava yabara. Tsipaji pamonae bitso xaina iranë, bonë ata, canajetabiaba. Nexata bajarapamonae xua canajeta, bajarapamatamopalata capatabiaba. ³⁵ Nexata bajarapapalata rajutabiaba apóstolevijavabelia. Nexata juya apóstolevi tsicobetsanabiaba penajua-jinavanapaevijavabelia pacuenia baja caejivi canacujitsia namatavenonapona. ³⁶ Bajarapamonae yajuvënënë itsanë pevënë José, Chiprevënë tunaetota penaexanaenë. Bajaraponë Levípijinë pemomoxiyajuvënënë. Bajaraponë apóstolevi vënërubatsi itsavënë, Bernabé. Bajarapavënë hebreojumeta pejumaitsijume: “Jivi pejamatabëcuene barëyayaexanaenë,” pejaijume. ³⁷ Nexata José ata pijaira canajeta. Bajaraxuacujinae José capata pijairamatamopalata. Nexata bajarapapalata rajuta apóstolevijavabelia.

5

Pacuenia tēpabeje Ananíasbeje pijava Safirabeje, penajumetsēnētsixaebeje apóstolenē Pedro pitabarata yabara pelivaisi

¹ José pijaira pecanajetsicujinae, Ananías ata pijava Safirabeje yajuvēncanajetabeje pijaira. ² Nexata Ananíasbeje pijavabeje pijairamatamoyajuvēnēpalata muetsia copatabeje. Bajaraxuacujinae Ananías peyajuvēncopatsipalata calia apóstolevijavabelia. Nexata Ananías jumaitsi apóstolevijavabelia:

—Tajaira yajuvēncanajetajē. Nexata pacarajutatsi daxita bajarapairamatamopalata panetsicobetsanaenexa vajanajuajinavanapaevijavabelia, jai.

³ Nexata Pedro jumaitsi Ananíasjavabelia:

—Ananías, ¿detsa xuajitsia jumecovēnētame dovathi pecayamaxēitorobjiva nenajumetsēnētsinexa Espiritu Santojavabelia? Xamē baja rovia nijairamatamopalata yajuvēncopatame. ⁴ Nijairami necanajetsivajēnaeya, nijaira baja cajena picani saicaya. Nijaira necanajetsicujinae ata, xua nijairamatamo pitame, nijajava baja cajena picani saicaya. ¿Detsa xuajitsia nexata mapacuenia neyamaxēitorobjiva najamatabēxainameje? Ēpaxanējavaberena baja cajena apo najumetsēnētsimē. Najumetsēnētame baja cajena Diosojavabelia ata, jai Pedro.

⁵ Ananías itsa jumetane bajarapacuenia Pedro pejumaitsjava, Ananías petēpaenē irata jopa. Nexata daxita pamonaē vēnēlīvaisitane bajarapacuenia Ananías petēpaejava, pinijicuenia jamatabēcuenenajunaviaca. ⁶ Nexata pabota Ananías petēpaenē boca, bajarapaboyarena pevējēavi jonena. Mataquiona petēpaenē. Bajaraxuacujinae capitsapalia pemēthētsinexa.

⁷ Bajaraxuacujinae bexēa, acueyabi pahorabejecujinae, Ananíaspijinē pijava jonena. Bajarapova abaxē apo yapētae pamona pevecuatēpaejavatsi.

⁸ Pedro icatsia yanijoba bajarapovajavabelia. Jumaitsi:

—Netsipaebare. ¿Xaniajai tsabaja? ¿Mapamatotaje pacanajetamebeje panijairamibeje? jai Pedro.

Nexata bajarapova jumaitsi:

—Xaniajai rabaja. Bajarapacuenia pacanajetajēbeje, jai bajarapova.

⁹ Nexata Pedro jumaitsi bajarapovajavabelia:

—¿Detsa xuajitsia amonabeje panajamatabēcueniejēpamebeje panenajumetsēnētsinexabeje Espiritu Santojavabelia? Namuxunaevere. Jumia naviabanajetarubena rabaja amonami pemēthēcavēvia. Bajarapamonaē icatsia xamē ata cacaponaelia pecamēthētsinexa, jai Pedro.

¹⁰ Nexata bajarajota Pedro pitabarata bajarapova ata icatsia petēpaeava irata jopa. Itsa jonena pevējēavi penaviabanajetarubenaēvi, Ananíaspijinē pemēthēcavēvia, caxitajarababuata petēpanucaeva. Nexata icatsia bajarapamonaē capitsapalia bajarapova pemēthētsinexa pamonami pemēthē muxuneneta. ¹¹ Nexata daxita Dios pejumecovēnētsivi, itsamonaē ata, pamonaē bajarapajivibeje petēpaejava vēnēlīvaisitanetsi, bitso junava.

Pacuenia apóstolevi pinijicue ne pexanaejavanē exanapona Dioso pesaēta yabara pelivaisi

¹² Apóstolevi Dioso pesaēta exanapona pinijicue ne pexanaejavanē Jerusalén tomarapijivi pitabarata. Daxita Dios pejumecovēnētsivi nacaetuatabiaba templobo ēnētuatujēta, Portal de Salomónvēnējavata.

¹³ Itsamonae, pamonaē Dioso apo pejumecovēnētsivi, junava penanacae-tuatsijava bajarapamonaeta. Itsiata daxita Jerusalén tomarapijivi pexaniacuenia yaityaeyabiaba Dioso pejumecovēnētsivijavabelia. ¹⁴ Pevajēnaeyabelia jivibitsaētoخانeto jumecovēnētaponā Jesús pelivaisi, pebijivi, petiriavi ata. Nexata daxita bajarapamonaē nanacaeutuabiaba Dioso pejumecovēnētsivijavabelia. ¹⁵ Apóstolevi Dioso pesaēta pinijicue ne pexanaponaexae, itsamonae tocapatabiabatsi piavitanevi callejavaberena. Nexata piavitanevi tojebabiabatsi callejavata camata. Itsamonae tulimanēta tojebabiabatsi. Nexata Pedro itsa najetaruca callejava, piavitanevi jitsipabiaba Pedro pitacaēnae ata petsijopaejavatsi pejamatejemanexa bajarapamonaē piavitanejavavecuā. ¹⁶ Nexata jivibitsaētoخانetonē patabiaba Jerusalén tomaraberena imoxoyo penaetomaraxijavaverena penaropobivi. Bajarapamonaē Pedro tocapatabiabatsi piavitanevi. Tocabatabiabatsinua bitso dovathi peyajavajinavanapevi. Nexata Pedro daxita bajarapamonaē jamatejemayaexanabiaba.

Pacuenia apóstolevi taicatsi penaneconitsiaexanaenexatsi yabara pelivaisi

¹⁷ Sacerdotevi pepo penamatacaitorobinē yavavaponapona saduceovi. Nexata daxita bajarapamonaē pinijicuenia anaepana apóstolevijavabelia. Tsi-paji cuenecaēbatsi. ¹⁸ Bajaraxuata taicatsi apóstolevi. Jebatsi penaneconit-sivi pejebabiabibota. ¹⁹ Itsiata baitsi jane bajarapameravi Dioso pijaängel apóstolevi tobaupanatsi penaneconitsivi pejebabiabibo baupanē. Nexata ángel apóstolevi matacapitsapaliatsi. Ángel jumaitsi apóstolevijavabelia:

²⁰ —Paponare templobojavabelia. Patsipaebianame jivijavabelia mapapejanalivaisi, Dioso vajanacayavavaponaponaējava, jai ángel apóstolevijavabelia.

²¹ Apóstolevi itsa jumetane bajarapacuenia ángel pejumaitsijava, nexata ajena matabi tsina, apóstolevi ponalia templobojavabelia. Nexata apóstolevi templobota Jesús pelivaisi jivi tsipaebanubena.

Nexata pijinia bajarapaepatota sacerdotevi pepo penamatacaitorobinē peyajavaponaponaēvi barēnacaetuata itsabota. Nexata junata penacaetuatsinexa judíovi pijaancianovi. Junatanua penacaetuatsinexa judíovi pecujarubivi. Nexata bajarapamonaē jumaitsi templobopijipolicíavijavabelia:

—Panetosivaponaremelia apóstolevi penaneconitsivi pejebabiabibojavabelia. Nexata panetobarēpatsiaremena maberenaē, jai.

²² Nexata templobopijipolicíavi itsa ponalia, apo caxitajarabi apóstolevi penaneconitsivi pejebabiabibota. Nexata apo pecaxitajarabixae, naviabarena cobesa petsipaebinexa penacaetuatsivijavabelia. ²³ Nexata templobopijipolicíavi jumaitsi bajarapamonaējavabelia:

—Itsa paliajē penaneconitsivi pejebabiabibojavabelia, daxitabaupanē xaniavaetsia nabaupaxatabanubena. Bajarajota nubena picani pevetanubenaēvi baupanē. Itsiata baitsi jane itsa pabaupatajē, caenē ata apo ecae bajarapabo ēnētuaatujēalia, jai policíavi.

²⁴ Nexata templobopijipolicíavi pijacapitán, sacerdotevi penamatacaitorobinua, itsa jumetane bajarapacuenia policíavi pejumaitsijava, bajarapamonaē jamatabējumaitsi:

—¿Detsamēra nexata itsi apóstolevi? jamatabējai bajarapamonaē.

²⁵ Nexata bajarapaepatota itsanē pebi parena, templobojavaverena ponaenē. Jumaitsi bajaraponē bajarapamonaējavabelia:

—¡Panejumetaema! Pamonaē pacajunuame penaneconitsivi pejebabiabibota, bajarapamonaē cajena nubena templobotalia. Jivijavabelia tsipaebanubena Jesús pelivaisi, jai bajaraponē.

²⁶ Nexata templobopijipolicíavi pijacapítan barēlia pijajivi. Nexata policíavi apóstolevi xaniavaetsia saya caponarenatsi. Tsipaji jamatabējumaitsi:

—Anaeya itsa taicaejitsipatsi apóstolevi, nexata jivi nacabaraanaepanaejitsipa. Nexata nacatseconaejitsipa ibotonēta, jamatabējai policíavi.

²⁷ Itsa baja apóstolevi caparenatsi, nexata nubatsi sacerdotevi penamatacaitorobivi pitabarata, judíovi pijaancianovinnua pitabarata, judíovi pecujarivinua pitabarata. Nexata bajarajota sacerdotevi pepo penamatacaitorobinē jumaitsi apóstolevijavabelia:

²⁸ —Paxanē baja cajena pacajumaitsitsi: “Pētsa baja matavējēa jivi patsipaebame Jesús pelivaisi,” pacajaitsi. ¿Itsiata tsabaja rovia apo panejumečovēnētsimē? Pataema jane pacuenia Jerusalén tomarata yacaējēpaponapanetsipaebilivaisi. Paxamē jamatabēpaneconitame Jesús pebeyaxuabijavatsi yabara, jai sacerdotevi pepo penamatacaitorobinē apóstolevijavabelia.

²⁹ Nexata sacerdotevi pepo penamatacaitorobinē bajarapacuenia pejumaitsixae, Pedro, itsaapóstolevi yajava, jumaitsi bajarapamonaējavabelia:

—Namatavenonatsi vajajumecovēnētsinexa xua vajaDioso nacaitoroba. Nexata Dioso vajanacaitorobicuenia, saicayacuenia jivi itsa nacaitoroba, apo bejumecovēnētsitsi. ³⁰ Paxamē Jesús pabeyaxuabame pamatacabita pacobematabiabarutame cruzajavabelia. Vajasalinaivimi pijaDioso Jesús icatsia asaēyaxanatsi petēpaecujinae. ³¹ Nexata Dioso jumaitsi Jesúsjavabelia: “Ecare tacujanenia. Xamē rabaja ayajiamatabēcuenenēmē. Jivi nevetsinētsane. Necapanepaenēnua tsane,” jai Dioso Jesúsjavabelia. Bajarapacuenia Dioso jumaitsi Jesúsjavabelia vaxaitsi judíovitsi pibisiacuene vajaexanabiabijava vajacopabijavanexa yabara jumaitsi. Vajanajamatabēcuenepēnyorotsijavanexa ata Diosojavabelia yabara jumaitsi. Tsipaji Dioso jitsipa Jesús pejamatabēcueneta daxitajivi aneconijibia petanenexa. ³² Nexata bajarapacuenie yabara jivijavabelia itsa patsipaebaponajē, Espírítu Santo paneyajava tsabiabi. Dioso cajena rajutapona Espírítu Santo pamonaē jumecovēnēta Dioso, jai Pedro, itsaapóstolevi yajava, daxita bajarapamonaējavabelia.

³³ Nexata daxita bajarapamonaē itsa jumetane bajarapacuenia Pedrobana pejumaitsiyava, nexata bitso anaepana. Jamatabēbeyejebatsi picani apóstolevi. ³⁴ Itsiata apo beyejebitsi. Tsipaji bajarapamonaeya-juvēnēnē judíovi pecujarubinē, Gamalielvēnēnē, nonotapuna daxita penajuavi pitabarata. Bajaraponē fariseonē, Dioso Moiséspijinēta penajumecopatsilivaisi pecujarubinē. Daxitajivi peyaiyataenētsi. Nexata Gamaliel itoroba apóstolevi caepatoyo pepitsapaenexalia. ³⁵ Nexata apóstolevi caepatoyo pepitsapaējavatalia, pecovēta, Gamaliel jumaitsi penajuavijavabelia:

—Tajamonaē judíovi, panajamatabēxainare xaniavaetsia. Pētsa paexaname pacuenia panajamatabēxainame mapamonaējavabeliaje. ³⁶ Panajamatabēnapire pacuenia Teudasvēnēnēmi bajayata exanatsi. Bajaraponēmi picani nacua pevetsinēnexa, ayajiamatabēcuenenē bitso jamatabēnaexana. Nexata picani pijajivinnexa pēnajinavanapatsi cuatrocientos ponēbeje. Itsiata Teudaspijinēmi beyaxuabatsi. Bajaraponēmi pepēnajinavanapaevitsi, pamonaē pijajivinnexa picani, daxita nacayajateca. Nexata copiaruca baja bajarapacuenemi. ³⁷ Bajaraxuacujinae icatsia

pamatacabi gobierno pejamatabēcueneta daxitajivi namataējētsi, Judasvēnēnēmi, Galilea nacuapijinēmi, bajarapacuenia pijinia jivi ayaibitsaētoxoneto pēnainavanapatsi. Bajaraponēmi ata beyaxuabatsi. Nexata daxita pepēnainavanapaveitsi nacayajateca. Nexata baja copiaruca bajarapacuenemi.³⁸ Bajaraxuata nexata mapamonaēje apóstolevi yabara pacatsipaebijitsiatsi. Pētsa paitsacueniabame bajarapamonaē. Itsa bajarapamonaē saya mapanacuapijivi pejamatabēcueneta tsipaebavanapaje, bepījia peneta bajarapamonaē pētsipaebilivaisi vereverecaena.³⁹ Itsa jume, Dioso pejamatabēcueneta bajarapamonaē bajarapalivaisi jivi itsa tsipaebavanapa, nexata acuenebi tsipae paxamē bajarapacuenē panevereverecaeyaxanaejava. Belia ayaineconi panatsixanaejitsipame Diosojavabelia, jai Gamaliel daxita penajuavijavabelia.

⁴⁰ Nexata daxita bajarapamonaē jumecovēnētatsi Gamaliel. Apóstolevi icatsia caevēlia pejonexalia junaliatsi. Bajaraxuacujinae apóstolevi, caenē canacujitsia, ayaicuenia jumatitibabeponatsi penaneconitsivi pejumaconitabiabimacata. Itavetatsi icatsia matavējēa jivi pētsipaebiyāniva Jesús pelivaisi. Bajaraxuacujinae copabatsi jane baja peponaenexa.⁴¹ Apóstolevi nexata pitsaparena bajarapabovecua. Barēyaya ponalia apóstolevi. Tsipaji Dioso tocopatatsi bajarapacuenia bepejiobiaexanaponaenexatsi Jesús pijajivixae.⁴² Nexata caematacabi canacujitsia templobota, bonējava ata, apóstolevi asaēya Jesús pelivaisi tsipaebapona jivijavabelia. Apóstolevi jivijavabelia tsipaebapona pexanialivaisi, Jesucristo, ponē Dioso itorobica jivi pecapanepaenexa, pelivaisi.

6

Pacuenia itapetatsi siete ponēbeje díaconovinexa yabara pelivaisi

¹ Jesús pelivaisi pejumecovēnētaeponaēvi, pevājēnaeyabelia ayaibitsaētoxonetonē tsaponaē. Bajarapamatacabi Jesús pelivaisi jumecovēnētaeponaē griegovi, judiōvi ata. Nexata pamonaējivi pevecuatēpaevanētsi, pmonaē bitso bejiobi, bajarapamonaējavabelia apóstolevi rajutabiaba penamatavenonaējavanē. Nexata Jesús pelivaisi penajuajumecovēnētsivi, pamonaē griegovi, jumaitsi judiōvijavabelia:

—Caematacabi canacujitsia apóstolevi pamonaējivi pevecuatēpaevanētsijavabelia, tsicobetsanabiaba pexaejavanexa. Nexata xuavajētōnē panijaviriavijavabelia rajutabiaba, bajaraxuavajētōnē patajaviriavijavabelia apo rajutabiabi, jai griegovi judiōvijavabelia.

² Doce ponēbeje, apóstolevi, najamatabēcuenējēpa pacuenia exanaejitsia judiōvibeje griegovibeje penacobecaēbabiabixae. Nexata apóstolevi junata penacaetuatsinexa daxita pamonaē Jesús pelivaisi pejumecovēnētsivi. Nexata baja itsa nacaetuata daxita bajarapamonaē, apóstolevi jumaitsi bajarapamonaējavabelia:

—Tajamonaē, paxanē itsa patsicobetsanabiabijitsipajē pexaejava bitso penamatavenonaēvijavabelia, nexata apo panecuenecaējēpabiabi tsipae jivi patatsipaebinexa Dioso pitorobilivaisi.³ Nexata paitapetsianame siete ponēbeje, paxamēyajuvēnēvi. Paitapetsianame papebijivi caejamatabēcuenē pexainaevi, bitso pētsijamatabēvēnēcaēvitsi Espiritu Santo, bitso peyapētaeyaxanaēvitsi Espiritu Santo pejamatabēcuenē. Bajarapamonaē paitorobianame bepejiobivijavabelia pētsicobetsanabiabinexa penamatavenonaēcuene.⁴ Nexata paxanē saicaya patsitecavanapaenajē

patavajëcabiabijava Diosojavabelia. Patsipaebabiabianajënua Dioso pitorobilivaisi jivijavabelia, jai apóstolevi penacaeuatsijavata daxita Jesús pelivaisi pejumecovënëtsivijavabelia.

⁵ Nexata daxita pamonaë nacaetuata, itsa jumetane bajarapacuenia apóstolevi pejumaitsijava, tsitananepanatsi. Nexata bajarapamonaë itapeta mapamatabëxëyoje. Itapeta Estebanvënënë, ponë bitso Dioso pejumecovënëtsinë, Espíritu Santo petsijamatabëvënëcaenëtsi. Itapeta Felipevënënë. Itapeta Prócorovënënë. Itapeta Nicanorvënënë. Itapeta Timónvënënë. Itapeta Parmenasvënënë. Itapeta Nicolásvënënë. Nicolás itsanacuapijinë, Antioquía tomarapijinë. Bajaraponë apo judíonë. Itsiata judíovicuenia Dioso najumecovënëtaponapona. ⁶ Daxita bajarapamatabëxëyo pitapetsicujinaetsi, nubatsi apóstolevi pitabarata. Nexata pamonaë itapetatsi, caenë canacujitsia pematabocotojumavereca apóstolevi nacobebuatanubena Diosojavabelia petovajëtsijavata.

⁷ Nexata jane baja apóstolevi, itsamonae yajava, Dioso pitorobilivaisi jivi tsipaebapona Jerusalén tomarata. Nexata Jerusalén tomarata ayaibit-saëttoxaneto tsaponae Jesús pelivaisi pejumecovënëtsivi. Sacerdotevi ata ayaibitsaëto jumecovënëtapona Jesús pelivaisi.

Pacuenia Esteban vaetabatsi penaneconitsiaexanaenexatsi yabara pelivaisi

⁸ Dioso bitso yavenonabiabatsi Esteban. Nexata Esteban Dioso pesaëta pinijicuenë pexanaejava, exanabiaba. Daxitajivi pitabarata Dioso pesaëta pinijicuenë pexanaejava, Esteban exanapona. ⁹ Nexata itsamonae Esteban anaeya jumenotatsi. Bajarapamonaë nacaetuatabiaba judíovi penacaeuatabiabibota. Bajarapabo pevënë Esclavos Libertados. Bajarapamonaë caenacuaverena apo pepatsivi. Itsamonae Cirene nacuaverena pepatsivi. Itsamonae Alejandría tomaraverena pepatsivi. Itsamonae Cilicia nacuaverena pepatsivi. Itsamonae Asiavënë nacuaverena pepatsivi. Bajarapamonaeya-junëñëvi Esteban anaeya jumenotatsi. ¹⁰ Nexata bajarapamonaeyajuvëñëvi Esteban anaeya itsa jumenotatsi, Espíritu Santo yavenonatsi pejumecanavitsijavata bajarapamonaëjavabelia. Bajaraxuata nexata daxita bajarapamonaë Esteban apo jumecanaviatsicapanepaetsi juya. ¹¹ Nexata pamonaë Esteban anaeya jumenotatsi, matamota itsamonae Esteban peneconitsinexatsi jivijavabelia. Nexata pamonaë matamotatsi penajumetsënëtsinexa Esteban yabara, najumetsënëtsia jane baja jumaisi jivijavabelia:

—Pajumetaniji pibisiacuenia Esteban pebaracuaicuajitsabiabijava Moiséspijinë. Pajumetanijina pibisiacuenia pebaracuaicuajitsabiabijava Dioso ata, jai bajarapamonaë Esteban yabara.

¹² Bajarapacuenia bajarapamonaë pejumaisixae, nexata daxitajivi anaepana. Judíovi pijaancianovi ata anaepana. Judíovi pecujarubivi ata anaepana Estebanjavabelia. Nexata daxita bajarapamonaë Esteban cujibarenatsi. Vaetabatsi. Caponaliatsi penutsinexatsi sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata. ¹³ Nexata icatsia bajarapamonaë junata pamonaë jane baja matamota najumetsënëtsiaya peneconitsinexatsi Esteban. Nexata bajarapamonaë itsa pata, jumaisi Esteban yabara:

—Mara ponëje Esteban apo cueranaë Dioso apo pejitsipacuenia pebaracuaicuajitsabiabijava templobo. Apo cueranaëna Dioso Moiséspijinëta penajumecopatsilivaisi ata pebaracuaicuajitsabiabijava.

¹⁴ Pajumetaniji maponëje pejumaisijava: “Jesús, Nazaret tomarapijinë,

xuabianica mapatemploboje. Dioso Moiséspijinëta penajumecopatsilivaisi ata vajajumecovënëtsijava, nacacopabiaexanaena Jesús,” jai maponëje, jai najumetsënëtsiaya Esteban yabara pamona matamotatsi.

¹⁵ Nexata sacerdotevi penamatacaitorobivi, judiövi pijaancianovi ata, judiövi pecujarubivi ata, naëcobarëcëpatsi Esteban. Nexata bajarapamonae Esteban pitabaranaëcobarëcëpaejavatatsi, betsita ángelnëitabara tsarucae Esteban.

7

Pacuenia Esteban jumecanaviata sacerdotevi pepo penamatacaitorobinë yabara pelivaisi

¹ Sacerdotevi pepo penamatacaitorobinë jumaitsi Estebanjavabelia:

—¿Xaniajai tsabaja? ¿Jumaitsimë tsabiabi pacuenia mapamonae caneconit-siajumaitsije? jai sacerdotevi pepo penamatacaitorobinë.

² Nexata sacerdotevi penamatacaitorobivijavabelia, judiövi pijaancianovijavabelia ata, judiövi pecujarubivijavabelia ata, Esteban jumaitsi mapacueniaje:

—Tajamonae, patanevetsivimë, panenamuxunaevere. VajaDioso bitso ayaijamatabëcuenenë. Tsitanaitajëta baja cajena bajayata vajasalinainë Abrahampijinëjavabelia. VajaDioso tsitanaitajëta Abrahampijinëjavabelia abaxë Abrahampijinë ita ponapona Mesopotamia nacuata. Bajarapanacuata Abrahampijinë ponapona pevarapaevajënaeya Harán nacuyabelia.

³ Dioso jumaitsi Abrahampijinëjavabelia: “Nijairavecua ponare. Daxita nijamonae ata vecuaponare. Ponare pairajavabelia catsitajëtsianatsi,” jai Dioso Abrahampijinëjavabelia. ⁴ Bajaraxuata Abrahampijinë Caldea nacujavaverena pona. Nexata pata Harán nacuyaberena. Bajarapanacuata Abrahampijinë ita ponapona, nexata paxapijinëmi Harán nacuata vecuatëpatsi. Paxapijinëmi pevecuatëpaeucujinaetsi, Dioso icatsia Abrahampijinë varapaeyaexanatsi mapairajavaberena, itsajota vaxaitsi aconoxae jinavanapatsi. ⁵ Itsiata Abrahampijinë Dioso apo rajutsitsi itsairayo ata pepo pijairanexa. Jume cajena. Tsiquiriirayo ata apo rajutsitsi. Itsiata tajëvelia Dioso najumecapanepaeya jumaitsi Abrahampijinëjavabelia: “Carajutsianatsi nijairanexa daxita mapaira tanemeje. Nevënamuto nexi bajarapaira xainaena,” jai Dioso. Abaxë Abrahampijinë pexi ita apo xainae, bajarapacuenia Dioso najumecapanepaeya jumaitsi Abrahampijinëjavabelia. ⁶ Icatsia Dioso tajëvelia jumaitsi Abrahampijinëjavabelia: “It-samatacabi nemomoxi mapairaje vecuaponaena. Nexata najinavanapaena itsanacuapijivi pijanacuata. Bajarapanacuata nemomoxi pijajivi exanaenatsi. Bajaraxuacujinae nemomoxi bajarapanacuavecua pitsapaena. Nexata icatsia mapanacuayaberena patsiana. Nexata mapanacuataje xanëjavaberena najamatabëcuenecopatsiaya navajëcabiabiana,” jai baja cajena tajëvelia Dioso Abrahampijinëjavabelia. ⁸ Nexata Abrahampijinë Dioso itorobatsi peperabëcaucutaponaenaxa daxita papebinacuetoxi naexana Abrahampijinë pijabota, baitsi pebupiperabëcaucutaponaenaxa. Bajarapacuenia Abrahampijinë pexanaenaxa Dioso itorobatsi Abrahampijinë penajamatabënapitabiabinexa

Dioso peyavenonaeyapaebijavatsi. Nexata Abrahampijinē pijava vecua-naexanatsi pebinēyo. Bajaraponēyo pevēnē Isaac. Nexata baja penacuetonēyo penaexanaecujinae, ocho pamatacabibeje itsa xaina, Abrahampijinē boupiperabēcauta pexēnatonēyo pacuenia Dioso itorobatsi. Bajaraxuacujinae icatsia juya Isaacpijinē pexēnato xaina. Isaacpijinē pexēnato pevēnē Jacob. Bajara icatsia pacuenia Isaacpijinē ata boupiperabēcauta pexēnatonēyo. Bajaraxuacujinae icatsia Jacobpijinē pexi xaina doce ponēbeje. Bajara icatsia pacuenia Jacobpijinē ata boupiperabēcaucuba pexi. Bajarapadoce ponēbejējaverena penaexanaponaevi doce pabit-saētoebeje naexana, jai Esteban sacerdotevi penamatacaitorobivijavabelia, judíoivi pijaancianovijavabelia ata, judíoivi pecujarubivijavabelia ata.

⁹ Icatsia Esteban jumaitsi bajarapamonaejavabelia:

—Nexata Jacobpijinē pexi, ponēbeje nacaemonaemi, vaxaitsi vajasalinaivi. Bajarapamonaemi pejuyapijinē Josépijinē. Nexata Josépijinē cuencaēbatsi pematapijivi. Bajaraxuata Josépijinē pecaponaenexatsi Egipto nacuyabelia, canajetaxuabatsi pematapijivi. Itsiata Josépijinē Dioso yajavaponaponatsi. ¹⁰ Nexata Josépijinē bepejiobiaexanaejavaminexatsi Egipto nacuata, vecuapanepaponapona. Dioso daxitacuene Josépijinē Egipto nacuata yapētaeyaxanaponatsi. Bajaraxuata Egiptonacua pevetsinēmi, Josépijinē pexaniajamatabēcuenia tanetsi. Nexata Egiptonacua pevetsinēmi tocopatatsi Josépijinē pecobenaevetsinexa Egiptonacua. Egiptonacua pevetsinēmi pijabo ata petoevetsinexa, Josépijinē tocopatatsi, jai Esteban bajarapamonaejavabelia.

¹¹ Icatsia Esteban jumaitsi bajarapamonaejavabelia:

—Nexata pinijianiboxaneto pata daxita Egipto nacujava, Canaán nacujava ata. Nexata bitso bejiobi jivi. Canaán nacuata vajasalinaivi jane baja apo xinae pexaejava. ¹² Itsiata Egipto nacuata janibovajēnaeya, Josépijinē pecomuaquejebijava ayaijava xaniavaetejeba trigoxu. Nexata Jacobpijinē vēnētane Egipto nacuata pexaejava pexainaejava trigoxu. Nexata Jacobpijinē pexi itoroba Egipto nacujavabelia pesivaponaenexalia pexaejava. Bajarapanamuto ponalia, copiaya jane baja pexaejava pesivaponaenamutolia Jacobpijinē pexi, pamonaē jane baja vajasalinaivi. Itsiata Jacobpijinē pexi pejuyapijinējavata comuacae ata, apo yapētae pejuyapijinēcuene. ¹³ Bajaraxuacujinae vajasalinaivi icatsia cotocaevi panamuto itsa sivaponalia pexaejava, nexata Josépijinē jumaitsi pematapijivijavabelia: “Xanē raja Josēnē panejuyapijinēnē,” jai Josépijinē. Bajaraxuata nexata Egipto nacuaevetsinēmi yapētane bajarapamonaē Josépijinē pijamonaecuenē. ¹⁴⁻¹⁵ Nexata Josépijinē tonajumexuaba paxa Jacobpijinē penavarapaenexa Egipto nacuyabelia. Nexata Jacobpijinē daxita pexi, pemomoxi yajava, varapa Egipto nacuyabelia. Nexata Jacobpijinē, daxita pexi, pemomoxi yajava, itsa pata Egipto nacuata pejinavanapaenexa, nanamataējēta setenta y cinco pajivibeje. Bajaraxuacujinae Egipto nacuata Jacobpijinē tēpa. Pexi ata vajasalinaivimi jane baja bajarapanacuata icatsia tēpa. ¹⁶ Bexēajavabelia vajasalinaivimi jane baja petēpaevimi pesijebinexatsi ibovajuta, Siquem tomarata, sicaponatsi Siquem tomarabelia. Bajarapai-
bovajuta cajena jivi petēpaevi, jebabiaba. Abrahampijinē abaxē itsa asaē vajasalinaivimi pevajēnaeya, comuata bajarapaibovaju. Hamorpijinē pexita comuata bajarapaibovaju, jai Esteban sacerdotevi penamatacaitorobivijavabelia, judíoivi pijaancianovijavabelia ata, judíoivi pecujarubivijavabelia ata.

¹⁷ Icatsia Esteban jumaitsi bajarapamonaejavabelia:

—Nexata baja itsa panepapona bejamatabëcuene trescientos veinte pavaibeje vajasalinaivimi pejinavanapaecujinae Egipto nacuata, nexata Abrahampijinë pemomoxi, vajasalinaivimi jane baja, ayaibitsaëttoxaneto tsaponae Egipto nacuata. Nexata jane baja pijinia imoxoyo pevajënae tsaponae pecopiapatsinexa pacuenia Dioso pexaniajajumeta najumecapanepaeya jumaitsi Abrahampijinëjavabelia, baitsi jane baja Dioso pejamatabëcueneta vajasalinaivimi pejutsinexatsi Egipto nacuaverena pejinavanapaenexa Canaán nacuata. ¹⁸ Nexata bajarapamatacabi itsanë junua pevetsinexa Egiptonacua. Ponë Egiptonacua pejanaevetsinë, bajaraponë apo yapëtae Josépjinë Egiptonacua pevetsinëmicuene. Tsipaji baja bajayata, bajaraponë pevajënaeya, tëpa baja Josépjinë. ¹⁹ Nexata Egiptonacua pejanaevetsinë, vajasalinaivimi apo itaxutotsoniaetaetsi. Ayaicuenia nacuenebiaexanabiabatsi. Bejlobiaexanabiabatsinua. Vajasalinaivi pexi pebinëyo itsa tonaexanatsi, nacuaeveitsinë pejamatabëcueneta penetsiaexanabiabatsi bajarapacuenia petëpaenexa pebinacuetoxi. ²⁰ Bajarapamatacabi naexana Moiséspjinë. Moiséspjinë bitso pexanianacuetonëyo. Dioso barëya tanetsi. Nexata Moiséspjinë penaexanaecujinae, paxabeje penabeje muetsia evetatsi bota acueyabi pajuametobeje. ²¹ Bajaraxuacujinae Moiséspjinë paxabeje penabeje xuabatsi baja. Nexata nacuaeveitsinë pexënatoyo Moiséspjinë pitatsi nacoxiyabijitsiatsi. Nexata nacuaeveitsinë pexënatoyo Moiséspjinë vitsatatsi pexënatonëyocuenia. ²² Nexata Moiséspjinë cujarubatsi daxitacuene, xua Egipto nacuapijivi yapëtane. Nexata Moiséspjinë bitso yapëtane livaisi petsipaebinexa jivijavabelia. Pexanaejava ata pecobeta bitso yapëtane, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

²³ Icatsia Esteban jumaitsi bajarapamonaejavabelia:

—Itsa baja Moiséspjinë cuarenta pavaibeje xaina penaexanaecujinae, sivanajamatabëxaina petaenexa pijamonae itsajota jinavanapa. ²⁴ Nexata baja Moiséspjinë pona petaenexa pijamonae. Nexata baja Moiséspjinë itsa ponapona panacuata pijamonae jinavanapa, Moiséspjinë pitabëta Egipto nacuapijinë tobejlobiaexanatsi pijamonaenë. Nexata Moiséspjinë bajara-jota pijamonaenë yamatamobeyaxuaba Egipto nacuapijinë. ²⁵ Moiséspjinë nexata jamatabëjumaitsi: “Daxita tajamonae, Israelpjinë pemomoxi, nesivajamatabëjumaitsi tsane: ‘Moisés cajena nacayavenonaena vajavecuapit-sapaenexa Egiptonacua,’ nesivajamatabëjai tsane,” jamatabëjai picani Moiséspjinë. Itsiata baitsi jane Moiséspjinë pijamonae bajarapacuenia apo sivajamatabëjumaitsitsi. ²⁶ Moiséspjinë pebeyaxuabicujinae Egipto nacuapijinë, icatsia meravia pitsijavata, Moiséspjinë caxitajaraba anijanëbeje penabejavatabeje. Bajaraponëbeje Moiséspjinë ëpijamonaenëbeje, Israelpjinë pemomobeje. Nexata Moiséspjinë xaniavaetsia itaveta penabeyanivabeje matavëjëa. Jumaitsi: “iPanabejitsipamebeje! Panapijamonaenëmëbeje raja. ¿Detsa xuajitsia panabiamebeje?” jai Moiséspjinë. ²⁷ Nexata ponë matapita penabejavabeje, torotajarabatsi Moiséspjinë. Bajaraponë jumaitsi Moiséspjinëjavabelia: “¿Jipatsa catocopata patanevetsinëxexamë? ¿Jipatsa catocopata, pibisiacuene itsa paexanajë, pataneconitsiaexanabiabinexamënu? ²⁸ ¿Nebeyaxuabijitsiamë tsaja icatsia xanë ata pacuenia canivi beyaxu-abame Egipto nacuapijinë?” jaitsi Moiséspjinë pijamonaenë. ²⁹ Nexata Moiséspjinë itsa jumetane bajarapacuenia pejumajitsijavatsi pijamonaenë,

nexata Moisésþþijnë najetabajirava Madián nacuayabelia. Bajarapanacuatalia ponapona. Nexata bajarapanacuatalia Moisésþþijnë nacojioba. Xaina anijanëbeje pexënatobeje, jai Esteban sacerdotevi penamatacaitorobivijavabelia, judíovi þijaancianovijavabelia ata, judíovi pecujarubivijavabelia ata.

³⁰ Icatsia Esteban jumaitsi bajarapamonaejavabelia:

—Bajaraxuacujinae icatsia cuarenta baja pavaibeje itsa panepa Moisésþþijnë peponaponaecujinae Madián nacuata, Dioso tsitanaitajëtatsi beángelnëcuenia. Bajarapacuenia tsitanaitajëtatsi petusato nacuata, Sinaivënëtsuto canacujitsita. Tsiquirinaemëyo petajueyecaecotia tuatuajëta, tsitanaitajëtatsi Dioso Moisésþþijnë. Itsiata tsiquirinaemëyo apo veriajavitsi.

³¹ Moisésþþijnë itsa tane, jamatabëcuenenabenajaca. Nexata cujitabilia xaniavaetsia imoxoyo petanexa tsiquirinaemëyo petajueyecaecotia. Nexata bajarapacotiajavaverena Dioso jumaitsi Moisésþþijnëjavabelia:

³² “Xanë raja nijasalinaivimi þijaDiosonë. Abrahampijinë, Isaacþþijnë ata, Jacobþþijnë ata, þijaDiosonë,” jai Dioso. Nexata bajarajota Moisésþþijnë neconecoþai pecajunavi. Apo naëcotsilia baja icatsia matavëþea. ³³ Nexata icatsia bajarapacotiajavaverena Dioso jumaitsi Moisésþþijnëjavabelia: “Nataxujonore nijazapato. Tsipaji raja taitabarata nucame. ³⁴ Taniþi rabaja tajajivi nijamonae Egipto nacuata bitso beþeþiobicuenia þejinavanapeajava. Jumetanþi bajarapamonae penatsinueyabiþijava. Nexata runaicaþë bajarapamonae tajutsinexa Egipto nacuaverena. Naxanitsia. Caitorobijitsiatsi Egipto nacuayabelia,” jai Dioso Moisésþþijnëjavabelia tsiquirinaemëyo petajueyecaecotiajavaverena, jai Esteban sacerdotevi penamatacaitorobivijavabelia, judíovi þijaancianovijavabelia ata, judíovi pecujarubivijavabelia ata.

³⁵ Icatsia Esteban jumaitsi bajarapamonaejavabelia:

—Nexata Moisésþþijnë Dioso itorobatsi peponaenexa Egipto nacuayabelia, vajasalinaivimi Egipto nacuata þeþeþiobiaexanabiþijavatsivecua þeþutsinexa Egipto nacuaverena. Moisésþþijnë peponaevajënaeya Egipto nacuayabelia, pamatacabi abaxë Moisésþþijnë ponapona panacuata vajasalinaivimi jinavanapa, bajarapamatacabi vajasalinaivimi Moisésþþijnë navecuaitavetatsi. Vajasalinaivimi jumaitsi Moisésþþijnëjavabelia: “¿Jipatsa catocopata patanevetsinënexamë? ¿Jipatsa catocopata, þibisiacuenë itsa paexanajë, pataneconitsiaexanabiþinexamënuu?” jai vajasalinaivimi. Bajarapacuenia vajasalinaivimi navecuaitavetsi ata, itsiata Dioso itorobatsi Moisésþþijnë peponaenexa vajasalinaivimijavabelia. ³⁶ Moisésþþijnë nexata pona Egipto nacuayabelia. Nexata Egipto nacuata Moisésþþijnë Dioso pesaëta þinijicuenë pexanaeþava, exanapona. Bajaraxuacujinae Moisésþþijnë Egipto nacuaverena vajasalinaivimi jane baja matacanajetaruca. Nexata Moisésþþijnë epatuarena Rojovënë manuamene maxëranajavata, Dioso pesaëta þinijicuenë pexanaeþava exana. Bajaraxuacujinae cuarenta pavaibeje itsa jinavanapa petusato nacuata, itsajavanë icatsia Dioso pesaëta þinijicuenë pexanaeþavanë, Moisésþþijnë exanapona. ³⁷ Bajarapamatacabi cajena Moisésþþijnë jumaitsi vajasalinaivimijavabelia: “Pacuenia xanë Dioso nitoroba Diosojumelivaisi jivi tatsipaebinënexa profetanëxanë, bajarapacuenia Dioso pacatoitorobanica itsanë profetanë Diosojumelivaisi papacetsipaebinënexa. Bajaraponë þaxamëþajuvënëþ tsane. Bajaraponë þajumecovënëþsianame,” jai cajena Moisésþþijnë bajayata tajëvelia vajasalinaivimijavabelia Jesús yabara. ³⁸ Moisésþþijnë þarënaeactuata vajasalinaivimi petusato nacuata, Sinaivënë tsutomuxuneneta. Nexata Sinaivënë

tsutojumabetsia caenë Moiséspijinë junaya. Nexata Sinaivënë tsutojumatatsia Moiséspijinë ángeljavabelia tocaucauijai vajasalinaivimi. Nexata Moiséspijinëta Dioso penajumecopatsilivaisi jivi pejumecovënëtsinexa, Sinaivënë tsutojumatatsia tonajumecopatatsi. Bajarapalivaisi Dioso najumecopata Moiséspijinëta vaxaitsi ata bajarapalivaisi vajaxanaenexa mapamatacabijavaberenaje, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

³⁹ Icatsia Esteban jumaitsi bajarapamonaejavabelia:

—Vajasalinaivimi apo jamatabëjumecovënëtsi Moiséspijinë. Apo jitsipae cajena matavëjêa penamatacaitorobinënexatsi. Vajasalinaivimi picani najamatabëxaina epatua Moiséspijinë pevepënaviabinxatsi Egipto nacuayabelia.

⁴⁰ Moiséspijinë bajayajebi ponaponaya Sinaivënë tsutojumatatsia. Nexata Moiséspijinë pecovëta vajasalinaivimi jumaitsi Aarónpijinëjavabelia: “Exanare diosovi vajanacamatacaponaenexa. Apo yapëtaetsi rabaja pacuenia exanatsi Moisés vajanacamatacaponaenë Egipto nacuaverena,” jai. ⁴¹ Nexata vajasalinaivimi becerro jumapecataeya exana oronë. Nexata bajarapajumapenëjavabelia pevi perajutsinexa, ofrendacuenia tobia dajubi. Bajaraxuacujinae vajasalinaivimi jamatabëcuenebarëyaya fiesta exana pecobeta pexanaexae oronë. Tsipaji bajarapajumapenë vajasalinaivimi bepjadiosonë tane. ⁴² Bajaraxuata Dioso baja copata peyavenonaejava vajasalinaivimi. Nexata baja Dioso tocopata vajasalinaivimi najamatabëcuenecopatsiaya penavajëcabiabinexa itaboxopijitulupujavabelia. Diosojumepaebinë profeta peyaquinaebaxutota, Dioso pejumajtsijava vajasalinaivimi yabara jumaitsi mapacueniajê:

Israelpijinë papemomoximë, pamatacabi abaxë pajinavanapame cuarenta pavaibeje petusato nacuatalla, pabeyabiabi atamë baca, oveja yajava, bajarapavi xanë apo panerajutabiabimë ofrendacuenia. ⁴³ Bajarapavi parajutabiabame ofrendacuenia panenatoexanaediosovijavabelia. Tsipaji bajarapamatacabi pacajinavanapame carpabo bepanijadiosonë panetaenë Molocvënëdiosonë pijabonexa. Pacajinavanapamenua tuluputo, jumapecataeya panenatoexanaetuluputo, Renfánvënëtuluputo. Nexata bajarapatuluputo pataneme bepanijadioso. Panecobeta saya paneexanaediosovi, pacajinavanapame najamatabëcuenecopatsiaya bajarapadiosovijavabelia panenavajëcabiabinexa. Bajaraxuata panijanacuavecua pacacaponaeaxanaenatsi Babilonianacua pënyabelia pairajavabelia,

jai Dioso pejumajtsijava mapacueniajê profetanë peyaquinaebaxutota vajasalinaivimi yabara, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

⁴⁴ Icatsia Esteban jumaitsi bajarapamonaejavabelia:

—Bajayata vajasalinaivimi itsa jinavanapa petusato nacuata, cajinavanapa Dioso pijacarpoboxaneto, bajarapabota Diosojavabelia pevajëtabiabinexa. Nexata Dioso Moiséspijinëta penajumecopatsilivaisi, Dioso peyaquinaeibopanayobeje, vajasalinaivimi xaniavaetabuatabiaba bajarapacarpabo ënëtuatuajëta. Copiaya Moiséspijinë jumapecataeya Dioso tsitajëtatsi pacuenia bajarapacarpabo exanetsijitsia. Nexata juya Moiséspijinë itoroba vajasalinaivijavabelia. Nexata vajasalinaivimi exaneta bajarapacarpabo pacuenia Dioso cuenecataeya tsitajëtatsi Moiséspijinë. ⁴⁵ Bajaraxuacujinae bajarapacarpabo rajutatsi vajasalinaivimi pecajinavanapaenexa. Nexata vajasalinaivimi itsabelia varapa,

caponabiaba bajarapacarpabo. Moiséspijinë baja itsa tēpa, Josuépijinë juya matacapona vajasalinaivimi. Josuépijinë nexata pamatacabi vajasalinaivimi matacanajetaruca, caparena bajarapacarpabo mapanacuayaberenaje. Nexata vajasalinaivimi vajabitsaë exana mapanacuataje pejinavanapaevimijavabelia. Nexata vajasalinaivimi mapairaje yacajërëta. Pamatacabi Josuépijinë vajasalinaivimi matacanajetaruca mapanacuayaberenaje, Dioso rēcēpecaeyaexanatsi mapanacuapijivimije Josuébana pevajēnaetarena. Nexata hexēajavaberena ata, pamatacabi Davidpijinë mapanacua evetaje, vajasalinaivimi abaxē cajanavanapa bajarapacarpabo. ⁴⁶ Nexata Dioso pexaniajamatabēcuenia tanetsi Davidpijinë, mapanacuaje pevetsinēmi. Nexata picani Davidpijinë bitso jitsipa Dioso pijabonexa templobo pexanaeyaexanaenexa. Baitsi paDioso bajayata Jacobpijinë jumecovēnēta, Davidpijinë jane baja pamopiinēmi. ⁴⁷ Itsiata baitsi jane Davidpijinë Dioso apo tocopatsitsi templobo pexanaeyaexanaenexa. Davidpijinë pexēnato, Salomónpijinë, Dioso pijabonexa templobo exanaeyaexana, Davidpijinë baja pepuatēpae. ⁴⁸ Pepo Dioso athēbētatsia peecaenē, bajaraponē apo ponaponae bota, jivi pexanaebota. Diosojumepaebinē profetanē bajayata jumaitsi mapacueniaje Dioso pejumaitisijava:

⁴⁹ Athēbētatsia daxitacuene taevetsinē. Mapanacuajava ata taevetsinē. ¿Detsa nexata xuajitsia bo panetoexanetsipame? Apo namatavenon-aenē cajena bo tanacueraevetsinexa. ⁵⁰ Xanē daxitacuene taex-anaenē,

jai profeta bajayata Dioso pejumaitisijava, jai Esteban sacerdotevi penamat-acaitorobivijavabelia, judíovi pijaancianovijavabelia ata, judíovi pecujaru-bivijavabelia ata.

⁵¹ Icatsia Esteban jumaitsi bajarapamonaejavabelia:

—Paneajamatabēcuenetajavi. Paneamatabocotajavinua. Apo pajumecovēnētšimē Dioso pejumelivaisi. Apo pacopatsimē Espiritu Santo papacatsijamatabējonexa. Pacuenia panijasalinaivimi bajayata itsi, bajara saya icatsia paxamē paitsimē. ⁵² Diosojumepaebivi profetavi tajēvelia vaju-nupaebapona Cristo, pepo planeconijibinē pepatsijavanexatsica. Nexata panijasalinaivimi daxita bajarapaprotetavimi bejiohiaexanabiaba. Beyejebabiabanua. Nexata jane baja Cristo itsa patsica, paxamē pijavajabit-saë pecobeyabelia pacanajetaxuabame. Bajarapacuenia Cristo pabeyaxu-abame. ⁵³ Angelevi pacarajutsi ata Dioso Moiséspijinēta penajumecopatsili-vaisi jivi pejumecovēnētšinexa, itsiata paxamē apo pajumecovēnētšimē ba-jarapalivaisi, jai Esteban sacerdotevi penamatacaitorobivijavabelia, judíovi pijaancianovijavabelia ata, judíovi pecujarubivijavabelia ata.

Pacuenia Esteban beyaxuabatsi yabara pelivaisi

⁵⁴ Sacerdotevi penamatacaitorobivi, judíovi pijaancianovi ata, judíovi pecujarubivi ata, itsa jumetane Esteban petsipaebilivaisi, anaepana bitso Estebanjavabelia. Nexata bajarapamonae pecaanae, navonoquiarabaxane.

⁵⁵ Itsiata Esteban bitso jamatabēcuenevēnēca Espiritu Santo. Esteban athēbēa benaēcotsia. Nexata tane Dioso pijapenivenivenaectotia. Taenutsianua Jesús penucaejava paxa Dioso pemuxuneneta, pecujuanenia. ⁵⁶ Nexata Esteban jumaitsi daxita bajarapamonaejavabelia:

—¡Panataema! Taniji itaboxo penapatsijavatsia. Daxitajivi Pematapijinē, ponē naexana mapanacuataje, pacuenia voxaitsi banaexanatsi, nucaya paxa Dioso pemuxuneneta, pecujuanenia, jai Esteban.

⁵⁷ Nexata sacerdotevi penamatacaitorobivi, judíovi pijaancianovi ata, judíovi pecujarubivi ata, pecobenëta namuxuvojoacaba. Bajarapamonae vavajai pinijicuenia. Daxifa caecuenia cujibarenatsi Esteban pevaetabinexatsi. ⁵⁸ Bajarapamonae Esteban caponaliatsi tomarapënëyabelia. Nexata tomarapënëtalia Esteban tseconatsi ibotonëta. Nexata daxita pamonae jumetane Esteban petsipaebilivaisi, najumajonejeba pijacamisajumavelia penaxatabijavanë. Nexata Esteban petseconaevajënaetsi ibotonëta, bajarapamonae penajumajonejebijavanë pevëjëato Saulovënënë evetsiaexanatsi. ⁵⁹ Petseconanubenaiejavatatsi ibotonëta, Esteban vajëta Diosojavabelia. Jumaitsi:

—Tajatuxanenë Jesús, daxita pepo tajamatabëcuene pire, jai Esteban.

⁶⁰ Bajaraxuacujinae Esteban pematabacabëta nuca. Aëjai pinijijumeta.

—Tajatuxanenë, itaxutobejiobiataema mapamonaeje. Vecuaajibiaexanare paneconi natsiexana xamëjavabelia tanebejiobiaexanaexae mapacueniaje, jai Esteban.

Bajaraxuacujinae Esteban tēpanajereca baja.

8

Pacuenia Saulo jaita Jesús pelivaisi pejumecovënëtsivi penaneconitsiaexanaenexa yabara pelivaisi

¹⁻³ Sacerdotevi penamatacaitorobivi, judíovi pijaancianovi ata, judíovi pecujarubivi ata, Estebanpijinë baja itsa beyaxuabatsi, Saulo tsitaxanepanatsi. Nexata pebijivi, pamonae Dioso bitso jumecovënëta, bajarapamonae Estebanpijinë mëthëtatsi. Matanueyabatsi bitso.

Bajarapamatacabi jane baja sacerdotevi penamatacaitorobivi, judíovi pijaancianovi ata, judíovi pecujarubivi ata, taxxuaba pebejiobiaexanaponaejava Jesús pelivaisi pejumecovënëtsivi Jerusalén tomarata. Saulo jane baja jaitaruta Jesús pelivaisi pejumecovënëtsivi Jerusalén tomarata. Caebo canacujitsia jonepona. Nexata taicapona pebejivi, petiriavi ata, pamonae Jesús pelivaisi pejumecovënëtsivi. Penaneconitsivi pejebabiabiboyabelia Saulo cajonepona bajarapamonae. Nexata ayaibitsaëttoxaneto Jesús pelivaisi pejumecovënëtsivi, Jerusalén tomarapijivi, rëcëpeca itsatamaranëjavabelia. Itsamonae rëcëpeca Samaria nacuayabelia. Itsiata apóstolevi nacopaba Jerusalén tomarata.

Pacuenia pexanialivaisi, Jesús pelivaisi, pejumecovënëtsivi, tsipaebapona Samaria nacujajava yabara pelivaisi

⁴ Pamonaes Jesús pelivaisi pejumecovënëtsivi, rëcëpeca Jerusalén tomaravecua. Nexata itsaxuayo bajarapamonae najetarubena, jivi tsipaebanajetarubena pexanialivaisi, Jesucristo pelivaisi. ⁵ Pamonaes rëcëpeca yajuvënënë, pevënë Felipe. Bajaraponë lia Samaria nacuata peecaetomara javabelia. Bajarapatomarapijivijavabelia Felipe tsipaeba Jesús pelivaisi. Jumaitsi:

—Jesús raja Cristo, ponë Dioso itorobica jivi pecapanepaenexa, jai tsaponae Felipe Samaria nacuata peecaetomarapijivijavabelia.

⁶ Itsa patomarata Felipe Jesús pelivaisi tsipaebabiaba, jivi ayaibitsaëttoxaneto nacaetuatabiaba. Daxita bajarapamonae xaniavaetsia namuxu-naevetabiaba Felipe itsa tsipaebabiaba Jesús pelivaisi. Bajarapamonae tane Felipe Dioso pesaëta pinijicuenia pexanaejavanë. ⁷ Pamonaes dovathi peyavajainavanapaevi, Felipe vecuacapitsapabiaba. Dovathi pinijijumeta aëjai

tsabiabi itsa vecuacapitsapabiaba Felipe. Nexata dovathi peyajavajinavana-paevimi, jamatejema baja tsabiabi. Pamonae ata petabusipacuenabivitsi, peyajuyayunaevi ata, jamatejemayaexanapona Felipe. ⁸ Bajaraxuata daxita bajarapatomarapijivi jamatabëcuenebarëya.

⁹ Bajarapatomarata Simónvënëñë ponapona. Bajaraponë jivi pejorobiabinë. Bajayajebi daxita Samaria nacuapijivi yamaxëitojorobaponapona. Simón jumai tsabiabi bajarapatomarapijivijavabelia:

—Xanë bitso jivi taxaniavaetsinë, jai tsabiabi.

¹⁰ Daxitajivi, petuxanevi ata, Simón pejumaitsijava namuxunaevetabiat-batsi. Bajarapamonae nexata Simón yabara jumai tsabiabi:

—Maponëje Simón pinijicuene pexanaejava caëjëpatsi. Dioso raeta yavenonatsi, jai tsabiabi bajarapamonae Simón yabara.

¹¹ Bajarapacuenia Samaria nacuapijivi xaniavaetsia jumecovënëtabiaba tsipaji Simón pejorobicueneta bajayajebi jivi yamaxëitojorobiabiaba. ¹² Nexata Felipe Samaria nacuapijivijavabelia tsipaeba Dioso pijajivi pevetsijavanexa. Jesucristo pelivaisi ata tsipaeba. Nexata Samaria nacuapijivi jumecovënëta Felipe petsipaebilivaisi. Bajarapamonae pebijivi, petiriavi ata, Felipe bautisaba.

¹³ Nexata jane baja Simón jivi pejorobiabinë ata jumecovënëta Felipe petsipaebilivaisi. Nexata baja Simón ata Felipe bautisaba. Bajaraxuacujinae Felipe pepëta naponapona Simón. Nexata Simón jamatabëcuenenabenajacabiaba itsa taeyabiaba Dioso pesaëta Felipe pinijicuene pexanaponaejavanë.

¹⁴ Nexata apóstolevi Jerusalén tomarata pejinavanapaevi, vënëlivaisitane Samaria nacuapijivi Dioso pitorobilivaisi pejumecovënëtsijava. Nexata apóstolevi jumaiti peyajuvënëñëbejejavabelia:

—Pedro, paxamëbeje Juanbeje, pataemeliabeje Samaria nacuapijivi, pejumecovënëtsivi Dioso pitorobilivaisi, jai apóstolevi.

Nexata Pedrobeje Juanbeje ponabeje. ¹⁵ Itsa bajaraponëbeje patabeje Samaria nacuyabelia, tovajëtabeje Diosojavabelia Espiritu Santo petsijamatabëpatsinexatsitsica Samaria nacuapijivi, Dioso pitorobilivaisi pejumecovënëtsivi. ¹⁶ Bajarapacuenia tovajëtabeje tsipaji abaxë Samaria nacuapijivi Espiritu Santo apo tsijamatabëpatsitsitsica. Abaxë saya bautisabatsi bajarapamonae Jesús pevënëta. ¹⁷ Nexata Pedrobeje Juanbeje petovajëtsijavatabeje Diosojavabelia, tsimatnacobebeuatabeje Samaria nacuapijivi. Nexata jane baja Samaria nacuapijivi Espiritu Santo tsijamatabëpatsitsici.

¹⁸ Nexata Simón itsa tane Samaria nacuapijivi Espiritu Santo petsimatarunaejavatsitsica apóstolenëbeje Samaria nacuapijivi tsimatnacobebuatsiaya petovajëtsijavatabeje Diosojavabelia, nexata Simón palata tsipaeba apóstolenëbejejavabelia. ¹⁹ Simón jumaiti:

—Panerajurebeje mapacaëjëpaejamatabëcueneje. Pajivi tsimatnacobebeuatajë tatovajëtsijavata Diosojavabelia, bajarapajivi petsimatarunaenexatsitsica Espiritu Santo, jai Simón apóstolenëbejejavabelia.

²⁰ Nexata Pedro jumaiti Simónjavabelia:

—Xamë cajena Dioso caxuabiana infiernojavabelia. Nexata vereverecaename nijalata yajava. Tsipaji najamatabëxainame necomuatsinexa ëpalata Dioso amoneya jivi perajutsijavatsica. ²¹ Tsipaji pepacune apo najamatabëcuene copatsimë xaniavaetsia Diosojavabelia. Nexata Dioso patajumecovënëtsivita, apo nanacuenëbimë tsane. ²² Copare baja papibisiacuene najamatabëxainame. Najamatabëcuene pënëyorore Diosojavabelia.

Vajëre Diosojavabelia pecavecuaajibiaexanaenexa papibisiacuene najamatabëxainame. ²³ Xanë cajena yapëtaniji necueneëbijava Jesús pelivaisi pejumecovënëtsivi. Yapëtanijinua pecajamatabëcueneecënënaejava pibisiacuene nexanaeneconi, jai Pedro.

²⁴ Nexata Simón jumaitsi:

—Panetovajërebeje Diosojavabelia tanevecuaajibiaexanaenexa paneconi xainajë Dioso tanexuabiyaniava infiernojavabelia pacuenia panejumait-simëbeje, jai Simón.

²⁵ Bajaraxuacujinae Pedrobeje Juanbeje bajarapatomarapijivijavabelia tsipaebabeje pacuenia tanebeje Dioso pexanaejava. Tsipaebabejenua Dioso pitorobilivaisi. Bajaraxuacujinae Pedrobeje Juanbeje itsa navialiabeje Jerusalén tomarabelia, Samaria nacuata penaetomaranëjava tsipaebanajetarucabeje pexanialivaisi, Jesús pelivaisi.

Pacuenia Felipe bautisaba Etiopía nacuapijinë yabara pelivaisi

²⁶ Dioso pijaängel jumaitsi Felipejavabelia:

—Nonotapunare. Maxuayolia roviaalia liamëreje. Panamuto Jerusalén tomaraverena naropota pepatsinexa Gaza tomarabelia, bajarapanamutualia liamëre, jaiängel Felipejavabelia.

Bajarapanamuto petusato nacujava rucalia pepatsinexa Gaza tomara-belia. ²⁷ Nexata Felipe xaniavaeta pijajavaxi peponaenexa baja. Bajaraxuacujinae naropolia jane baja. Nexata bajarapanamutualia Felipe caxitaraba Etiopía nacuapijinë. Bajaraponë palata pevetsinë. Etiopíanacua pevetsiva pijapalata tovetabiaba. Bajaraponë, Etiopía nacuapijinë, Jerusalén tomarajavabelia pona najamatabëcuenecepatsiaya pevajëtsinexa Diosojavabelia templobota. ²⁸ Nexata baja Etiopía nacuapijinë Jerusalén tomaraverena naviatanajetaruca. Navialia baja pijanacuayabelia. Pijamoyota, carrozavënë moyota, yanajetaruca. Nexata lebanajetaruca Diosojumelivaisi-paebinë profeta Isaiaspijinë bajayata peyaquinaebaxuto. ²⁹ Nexata Espiritu Santo jumaitsi Felipejavabelia:

—Bitsojinaremelia. Pëcaxinaeremelia mapamoje. Imoxoyo pemuxunenia nucaponaename, jai Espiritu Santo.

³⁰ Felipe nexata cujinaejinalia. Nexata baja Felipe pëcaxinalia Etiopía nacuapijinë. Nexata Felipe jumetane Etiopía nacuapijinë pelebanajetarucæjava profeta Isaiaspijinë peyaquinaebaxuto. Nexata Felipe jumaitsi Etiopía nacuapijinëjavabelia:

—¿Xamë tsaja pepacuene jumeyapëtaneme palivaisi lebanajetarucame? jai Felipe.

³¹ Nexata Etiopía nacuapijinë jumaitsi:

—¿Detsa pacuenia jumeyapëtaejitsipajë itsa apo netsipaebi xaniavaetsia itsanë ata? jai.

Nexata Etiopía nacuapijinë junatatsi Felipe carrozavënë moyo ënëabetsia Felipe penajunaenexatsia penamuxuneniaecaenexabeje.

³² Profeta Isaiaspijinë peyaquinaebaxutota, palivaisi Etiopía nacuapijinë lebanajetaruca, tajëvelia Jesús yabara jumaitsi mapacueniaje:

Pacuenia oveja moya, caponae atatsilia pebeyaxuabinexatsi, bajara pijinia pacuenia bajaraponë ata moya tsane, caponae atatsilia pebeyaxuabinexatsi. Pacuenia ovejaya naxunae atatsi, moya, bajara pijinia pacuenia bajaraponë ata moya tsane, yapëtae ata pebejiobiaexanaejavanexatsi. ³³ Bejiobiaexanaenatsi. Pibisiacuene apo exanae ata, naneconitsiaexanatsi. Itsajivi ata bajaraponë yabara apo jumaitsi

tsane: “Mara pamonaeye bajaraponēmi pemomoxije,” apo jai tsane. Tsipaji beyaxuabianatsi,

jai tajēvelia mapacueniaje Isaíaspijinē peyaquinaebaxutota Jesús yabara, palivaisi Etiopía nacuapijinē lebanajetaruca.

³⁴ Nexata Etiopía nacuapijinē jumaitsi Felipejavabelia:

—Pexaniacuene netoexanare. Netsipaebare ponē yabara yaquina profeta Isaíaspijinē mapacueniaje. ¿Baja tsa ponē pijacuata nayabarajumaitsi? Itsa jume, ¿itsanē yabara tsaja jumaitsi? jai Etiopía nacuapijinē Felipejavabelia.

³⁵ Nexata palivaisi Etiopía nacuapijinē lebanajetaruca, bajara-palivaisi Jesús yabara pejumlahitsijava copiaya Felipe yapētaeayaexana. Bajaraxuacujinae icatsi tsipaeba pexanialivaisi, Jesús pelivaisi.

³⁶ Penajetarucaejavatabeje bajarapanamutua, patabeje itsajota merayo eca. Nexata Etiopía nacuapijinē jumaitsi Felipejavabelia:

—Mara jota meraje. Jitsipajē picani xanē tanebautisabinexamē. Itsiata baitsi jane yapētaneme xua yabara apo xanepanae tanebautisabinexamē, jai Etiopía nacuapijinē Felipejavabelia.

³⁷ Nexata Felipe jumaitsi:

—Itsa jumecovēnētame xaniavaetsia daxita nejamatabēēthētojavaverena, nexata necaējēpa tacabautisabinexa, jai Felipe.

Nexata bajaraponē jumaitsi:

—Jumecovēnētajē rabaja. Jesucristo raja xaniajai Dioso pexēnato, jai Etiopía nacuapijinē Felipejavabelia.

³⁸ Nexata bajaraponē pijamo nucojopaeyaexana. Bajaraponēbeje Felipebeje runarecabeje merajavabereca. Felipe bautisaba Etiopía nacuapijinē. ³⁹ Nexata penonotajunaecujinaetsinabeje, Espiritu Santo pitatsi Felipe Etiopía nacuapijinē pitabarata. Itsiata Etiopía nacuapijinē apo tae pacuenia Felipe pitatsi Espiritu Santo. Bajaraxuacujinae Etiopía nacuapijinē apo taetsi baja Felipe matavējēa. Itsiata Etiopía nacuapijinē pona baja barēyaya pijanacuayabelia. ⁴⁰ Felipe Espiritu Santo caliatsi Azoto tomarabelia. Felipe nexata daxita tomaranējava tsipaebanajetaruca pexanialivaisi, Jesús pelivaisi. Matapania Felipe itsa patajopa Cesarea tomarata, caejavata ponapona.

9

Pacuenia Saulo jumecovēnēta Jesús yabara pelivaisi

(Hch 22.6-16; 26.12-18)

¹ Saulo cajena Jerusalén tomarata apo copatsi petaicaponaejava daxita pamonaeye Jesús pelivaisi jumecovēnēta pebeyejebiaexanaenexa. Bajaraxuata Saulo pona daxita sacerdotevi pepo penamatacaitorobinējavabelia. ² Nexata Saulo sacerdotevi pepo penamatacaitorobinējavabelia jumaitsi:

—Netsicobeyaquinare cuyalatobaxutonē tacaponaenexa Damasco tomarabelia. Damasco tomaratalia judiōvi penacaetuatabiabilbonē pevetsivi tarajutsinexa. Nexata bajarapamonaeye itsa tane neyaquinaebaxutonē, tane-copatsinexa daxita Jesús pelivaisi pejumecovēnētsivi tataicaenexa. Nexata itsa taicajē pebijivi, petiriavi ata, tacapatsinexa mapatomaraberanaje penaneconitsivi pejebabiabibota tajebinexa, jai Saulo.

Nexata sacerdotevi pepo penamatacaitorobinē jejai. Nexata cuyalato-baxutonē tscicobeyaquinatsi Saulo pecaponaenexa Damasco tomarabelia.

³ Bajaraxuacujinae Saulo jane baja pona Damasco tomarabelia. Nexata ajena Saulo imoxoyotanaajetaruca Damascotomara, jemata Saulo penajetarucaejavata namutua matatoyorotsia naitayotatsi athēbēvetsica. ⁴ Nexata

Saulo irataeya bocajunua irata. Jumetaenuca athëbëvetsica pejumaitsijava Jesús. Jumaitsi mapacueniaje:

—Saulo, Saulo, ¿detsa xuajitsia tajajivi netobejiobiaexanaponame? jai Jesús.

⁵ Nexata Saulo jumaitsi:

—Tajatuxanenë, ¿detsa ponëmë? jai.

Nexata icatsia athëbëvetsica Jesús jumaitsi Saulojavabelia:

—Xanë raja Jesúsñë. Tajajivi netobejiobiaexanaponame. ¿Detsa xuajitsia apo tajitsipaecuenia exanaponame? Xamë nijacuata najamatabëcuenebijianaponame, jai Jesús athëbëvetsica.

⁶ Saulo nexata neconecojai pecajunavi. Nexata jumaitsi:

—Tajatuxanenë, ¿detsa xua nexata jitsipame taexanaexa? jai.

Nexata Jesús jumaitsi:

—Nonotapunare baja. Ponaename baja Damasco tomarabelia. Bajarajotalia catsipaebiana pacuenia exanaejitsiamë, jai Jesús.

⁷ Nexata papebijivi Saulo yajavanajetaruca, najunaviacanubena. Nexata moya nubena. Tsipaji jumetane pajume athëbëvetsica jumaitsi Saulojavabelia. Bajarapajume jumetae ata, itsiata bajarapamonae apo tae jivitonë.

⁸ Nexata Saulo, irata pebocaenëmi, nonotapuna. Naëcobaruta picani. Itsiata apo naëcotsixanepanae. Tsipaji itaxutomeravibatsi. Nexata papebijivi Saulo yajavanajetaruca, bajarapapebijivi saya Saulo comacaponaliatsi Damasco tomarabelia. ⁹ Nexata Saulo natsivajënaetaenejeva, Damasco tomarata ponapona acueyabi pamatacabibeje. Apo xae pexaejava. Apo apaenua mera.

¹⁰ Damasco tomarata ponapona Ananías, Dioso pejumecovënëtsinë. Nexata Jesús bemajitsinaebocuenia tsitanaitajëta Ananíasjavabelia. Nexata Jesús junataxuaba.

—¡Ananías! jai.

Nexata Ananías jumaitsi Jesúsjavabelia:

—Tajatuxanenë, canamuxunaevetatsi rabaja, jai Ananías.

¹¹ Nexata Jesús bajarajota jumaitsi Ananíasjavabelia:

—Nonotapunare. Ponaename pacallejavabelia jivi vënëruba Peroviacalle. Bajarajotalia Judas pijabota vënëyanijobianame Saulovënënë, Tarso tomarapijinë. Bajaraponë Saulo maparucaeje xanëjavaberena navajëqueca.

¹² Bajaraponë Saulo bemajitsinaebocuenia tsitajëtajë pacuenia exanaejitsiamë bajaraponëjavabelia. Nexata Saulo bemajitsinaebota catane pacuenia nejonecujinaelia bajaraponë tsmatanacobeuatsijitsiamë petaenexa icatsia xaniavaetsia, jai Jesús Ananíasjavabelia.

¹³ Nexata Ananías itsa jumetane bajarapacuenia Jesús pejumaitsijava, nexata Ananías jumaitsi Jesúsjavabelia:

—Tajatuxanenë, anijatonë vënëlivaisitaniji pacuenia bajaraponë Saulo exanaponapona. Vënëlivaisitaniji bajaraponë pebejiobiaexanaponaejava Jerusalén tomarata daxita pecajumecovënëtsivi. ¹⁴ Maberena ataje icatsia itorobatsi sacerdotevi penamatacaitorobinë petotaicaenexa daxita pamonaecajumecovënëtsivi jinavanapa mapatamarataje, jai Ananías Jesúsjavabelia.

¹⁵ Nexata Jesús jumaitsi Ananíasjavabelia:

—Ponare baja. Tsipaji bajaraponë Saulo itapetajë baja tanelivaisipaebinxanua itsanacuanëpijivijavabelia, tanelivaisipaebinxanua bajarapanacuanë pevetsivijavabelia ata, tanelivaisipaebinxanua Israel nacuapijivijavabelia. ¹⁶ Xanë Saulo tsitajëtianajë pacuenia

itsamatacabi Saulo itsamonae bejiobiaexanaejitsiatsi. Bajaraponë bitso bejiobiaexanaenatsi talivaisi yabara, jai Jesús Ananíasjavabelia bemajitsinaebocuenia petsitanaitajëtsijavata.

¹⁷ Bjaraxuacujinae Ananías jane baja lia. Joneya pabota Saulo ponapona. Ananías nexata nacobebeuata Saulo pematobocotojumavereca. Ananías jumaisi Saulojavabelia:

—Tajabananë Saulo, pepo petuxanenë raja Jesús, ponë catsitanaitajëta namutua nenajetarucaejavata, bajaraponë nitoroba. Bajaraponë nitoroba tacatsimatanaacobebeuatsinexa pecavecuajibinexa baja pecaitaxutomeravibijava icatsia baja netaenexa xaniavaetsia. Nitorobanua tacatsimatanaacobebeuatsinexa pecatsijamatabëvënëcaenexa Espiritu Santo, jai Ananías Saulojavabelia.

¹⁸ Bjarapacuenia Ananías pejumaisijavata Saulojavabelia, Saulo veitaxutothopatsi xua itaxutocaranatatsi, bedujuatseboco. Nexata jane baja icatsia Saulo xaniavaetsia tane. Saulo nexata nonotapuna. Bjaraxuacujinae bautisabatsi baja. ¹⁹ Bjaraxuacujinae pexaejava baja xane. Nexata baja icatsia Saulo aperabësaëreca. Saulo nexata Damasco tomarata caematcabibeje naponapona Dioso pejumecovënëtsivita.

Pacuenia Saulo paeba Jesús pelivaisi Damasco tomarata yabara pelivaisi

²⁰ Saulo pejumecovënëtsicujinae Jesús Dioso pexënatocuene, bepijiayo Saulo taxuxuaba jivi petsipaebijava Jesús pelivaisi judíovi penacaetuatabiabinonëjava. Saulo jivi itsa tsipaebapona Jesús pelivaisi, jumai tsaponae.

—Pepacuenie raja Dioso pexënato Jesús, jai tsaponae Saulo.

²¹ Nexata daxita pamonaie jumatane Saulo petsipaebilivaisi, jamatabëcuenenabenajaca. Najumaisi bajarapamonae Saulo yabara:

—Mara ponëje bejiobiaexanapona Jerusalén tomaratalia daxita pamonaie jumecovënëta Jesús pelivaisi. Icatsia picani pata mapatomaraberenaje petaicaenexa daxita pamonaie jumecovënëta Jesús pelivaisi. Nexata itsa taica, pecaponaenexa picani Jerusalén tomarabelia, sacerdotevi penamat-acaitorobivjavabelia, najai bajarapamonae Saulo yabara.

²² Itsiata Saulo ajumejunavijibia bitso asaëyata tsipaebapona Jesús pelivaisi. Nexata Saulo xaniavaetsia jivi yapëtaeyaexana xaniajai Jesús Dioso pitorobinëtsitsica jivi pecapanepaenexa. Nexata judíovi Damasco tomarata penaevi moya. Apo yapëtae pacuenia jumecanaviatsijitsiatsi Saulo.

Pacuenia Saulo vecuapanepa judíovi yabara pelivaisi

²³ Saulo Damasco tomarata petaxuxuabicujinae Jesús pelivaisi jivi petsipaebaponaejava, bexëajavabelia judíovi sivanajamatabëcueneyanabatsi pebeyaxuabinexatsi Saulo. ²⁴ Nexata caematacabi canacujitsia, caemeravi canacujitsia ata, Saulo judíovi vajënaeevetabiabatsi pebeyaxuabinexatsi picani. Pabaupaxanetojavalia jivi pitsapabiaba Damasco tomaravelia penaropobivi, bajarapabaupaxaneto muxuneneta Saulo judíovi vajënaeevetabiabatsi pebeyaxuabinexatsi picani. Itsiata Saulo nayalivaisijumatane judíovi pebeyaxuabiapaebijavatsi. Bjaraxuata Saulo bajarapabaupaxanetojavalia apo pitsapaelia. ²⁵ Damascotomara matatoyorotsia yacaranata piatayaëibopanaxanetota. Bjarapayacaranatsijavaxaneto athëbëabetsia apia, pacuenia pinijinaejavaxaneto apia. Bjarapayacaranatsijavaxaneto ibopananë mataropotsia catsanaeya farata. Nexata Dioso pejumecovënëtsivi, Saulo pepënaponaevitsi, itsa baja maravi, Saulo ecaeyaexanatsi bemapirecuenia pexanaejavaxanetoënëta. Nexata Damasco tomara matatoyorotsia peyacaranatsiibopanaxaneto

yenepanata athëbëyo perucaeventanavojutualia, Saulo yacoparecatsi irabereca Damasco tomarapënyëabela. Bajarapacuenia Saulo Damasco tomarata judiövivecua panepa pebeyaxuabiyaniivatsi.

Pacuenia Saulo Jerusalén tomarata copiapitatsi yabara pelivaisi

²⁶ Saulo itsa patajopa Jerusalén tomarata, Saulo picani jitsipa penaponaponaejava Jesús pelivaisi pejumecovënëtsivijavata. Itsiata daxita bajarapamonae Saulo cujunavatsi. Tshipaji apo jumexaniataetsi Saulo pejumecovënëtsijava Jesús pelivaisi. ²⁷ Itsiata Bernabé barëlia apóstolevijavabelia apóstolevi peyapëtaenexatsi Saulo. Nexata Bernabé tsipaeba apóstolevijavabelia pacuenia Saulo namutua penajetarucaejavata tane Jesús bemajitsinaebota. Pacuenia ata Saulo Jesús barëcuaicuajaitisi, Bernabé tsipaeba apóstolevijavabelia. Pacuenia ata Saulo ajumejunavijibia tsipaebapona Damasco tomarata Jesús pelivaisi, Bernabé tsipaeba apóstolevijavabelia. ²⁸ Nexata baja Saulo ponapona Jerusalén tomarata. Naponapona apóstolevijavata. ²⁹ Saulo tsipaebapona ajumejunavijibia Jesús pelivaisi. Saulo barëcuaicuajai tsabiabi judiövi, griegojume penatsipaebivi. Barënajumenotabiaba bajarapamonae. Itsiata baitsi jane bajarapamonae najamatabëxaina pacuenia beyaxuabijitsiatsi Saulo. ³⁰ Jesús pelivaisi pejumecovënëtsivi, jumetane Saulo pebeyaxuabiapaebijavatsi. Nexata Jesús pelivaisi pejumecovënëtsivi, Saulo pënaxuabatsi Cesarea tomarabelia. Bajarajotacujinae Saulo itorobatsi pevajënaeyabelia penajetarucaenexa pepatsinexa Tarso tomarabelia.

³¹ Bajaraxuacujinae nexata daxitajava, itsaxuayo Jesús pelivaisi pejumecovënëtsivi jinavanapa, xaniavaetsia baja jinavanapa. Copabatsi baja pebejiobiaexanabibijavatsi. Nexata Judea nacuata, Galilea nacuata ata, Samaria nacuata ata, Jesús pelivaisi pejumecovënëtsivi caebitsaëto canacujitsia xaniavaetsia jinavanapa. Nexata daxita jamatabëcuenevitsabapona Jesús pelivaisi pejumecovënëtsijava. Bajarapamonae xaniavaetsia jumecovënëtanapa Jesús pelivaisi pibisiacuene pexanaeyaniva. Espiritu Santo yavenonaponatsi. Nexata itsamonae ata Jesús pelivaisi apo pejumecovënëtsivimi, ayailbitsaëtoxaneto jumecovënëtanapa Jesús pelivaisi.

Pacuenia Jesucristo pejamatabëcueneta Pedro jamatejemayaexana Eneasvënë yabara pelivaisi

³² Pedro najetaruca daxitatomaranëjava pesivaxainaenexa Dioso pejumecovënëtsivi. Nexata najetaruca Lida tomarajava ata pesivaxainaenexa Lida tomarata pejinavanapaevi, Dioso pejumecovënëtsivi. ³³ Nexata Pedro Lida tomarata taeyabuata Eneasvënë. Bajaraponë ocho pavaiibeje xaina camata peboacaecujinae. Tshipaji tabusipacuenabatsi. ³⁴ Pedro nexata jumaitisi bajaraponëjavabelia:

—Eneas, cajamatejemayaexana rabaja Jesucristo. Nonotapunare. Xanebare nijacama, jai Pedro.

Nexata Eneas bajarajota nonotapuna. ³⁵ Nexata daxita Lida tomarapijivi, Sarón nacuapijivi ata, tanetsi Eneas pejamatejemajava. Bajarapamonae nexata pijaperujumatabëcuene pecatsitecaejavami, copaba baja. Najamatabëcuenecopaba baja Jesucristojavabelia.

Pacuenia Pedro Dorcasvënëva petëpaecujinae icatsia asaëyaexana yabara pelivaisi

³⁶ Jope tomarata ponapona Dioso pejumecovënëtsiva, Tabitavënëva. Barapova pevënë griegojumeta Dorcas. Dorcas daxita matacabi canacujitsia pexaniacuene toexanabiaba itsamonaiejavabelia. Bepejiobivijavabelia rajutabiaba penamatavenonaiejavaxi bajarapacuenia peyavenonaenexa. ³⁷ Pamatacabi Pedro ponapona Lida tomarata, Dorcas avitane Jope tomarata. Nexata baja Dorcas tēpa Jope tomarata. Peperabēquiatsicujinaetsi petēpaeva buatatsi anijairabeje pexainaebo ënētuaatujēta. Athēbēyo pairatsia, bajarapaënētuaatujētatsia buatatsi. ³⁸ Jopetomara eca imoxoyo Lida tomaravecua. Dioso pejumecovënëtsivi vënëlivaisitanetsi Pedro peponaponaejava Lida tomarata. Nexata Dioso pejumecovënëtsivi itoroba anijanēbeje pejumaitsinexabeje Pedrojavabelia: “Pedro, naxanitsia. Liamēre Jope tomara-belia,” pejinexabeje Pedrojavabelia. Nexata bajaraponēbeje Lida tomara-belia sivaliabeje Pedro.

³⁹ Nexata Pedro narena bajaraponēbeje pepēta. Pedro itsa napata pabota petēpaeva boca, tsitajētatsi itsajota petēpaeva boca. Nexata pamonajivi pevecuatēpaevanētsi, Dorcaspijiva pevënuevitsi, Pedro matatoyorotsia itaxutuanuenubenatsi. Bajarapamonae Pedro tsitajēbatsi Dorcaspijiva pejoro-caejavanē, penaxatabijavanē, penajumaacabipananē ata, xuanē Dorcaspijiva rajuta bajarapamonaejavabelia pamatacabi abaxē asaē tsaponapona. ⁴⁰ Nexata paënētuaatujēta petēpaeva boca, bajarapaënētuaatujēvecua Pedro daxita bajarapamonae pitsapaeyaexana. Bajarapamonae itsa pitsapalia, Pedro pematabacabēta nuca pevajētsinexa Diosojavabelia. Nexata Pedro pevajētsicujinae Diosojavabelia, napēnēyorota petēpaevajavabelia. Pedro jumaitsi petēpaevajavabelia:

—Tabita, nonotapunare, jai Pedro.

Nexata petēpaevami naēcota. Itsa tanetsi Pedro, bajarapova namatacota. ⁴¹ Pedro nexata bajarapova cobevaetabiaya nonotapunaeyaexana. Nexata Pedro junarena daxita Dioso pejumecovënëtsivi, pamonajivi pevecuatēpaevanētsi ata. Nexata tsitajēta bajarapamonaejavabelia petēpaevami icatsia piasaējava. ⁴² Nexata Dioso pesaēta bajarapapinjicueene Pedro pexanaejava, daxita Jope tomarapijivi yapētane. Nexata jivibitsaēttoxaneto jumecovënēta Jesús Dioso pexēnatocuene. ⁴³ Nexata Pedro bajayajebi ponapona Jope tomarata. Simón bacabocotonē peyacueyacuecaeyaexanaenē, pijabota Pedro naponapona.

10

Pacuenia Pedro barēcuaicuaijai Corneliovënēnē yabara pelivaisi

¹ Cesarea tomarata ponapona Corneliovënēnē. Apo judionē. Bajaronē Italia nacuaverena pepatsivi vajabitsaēvi pijacapitán. ² Cornelio pijabopijivi barējumecovënētaponapona Dioso. Dioso bitso yayiataeya Cornelio ponapona. Cornelio palata ayaijava rajutabiaba judíovijavabelia peyavenonaenexa judíovi bepejiobivi. Cornelio vajētabiaba Diosojavabelia. ³ Itsamatacabi caniviyoeapatota, bejamatabēcuene a las tres, Cornelio be-majitsinaebota tane Dioso pijaängel pejonejavarena pijaboyarena. Nexata junataxuabatsi.

—¡Corneliol! jaitsi.

⁴ Cornelio nexata naēcota ángeljavabelia. Bitso cujanava. Nexata Cornelio jumaitsi ángeljavabelia:

—¿Detsa xua jitsipame? jai.

Nexata ángel jumaitsi:

—Nevajëtabiabijava Diosojavabelia, nerajutabiabijava ata penamatavenonaecue ne bepejio bivijavabelia, daxita bajaraxua Dioso tsitaxanepanatsi. Dioso nexata apo nacofënëtsi bajaraxua. ⁵ Itorobare nijavivi Jope tomarabelia pecatojunatsinexa Simón, ponë itsavënë vënërubatsi, Pedro. ⁶ Bajaraponë Simón naponapona Jope tomarata, itsanë Simón, bacabocotonë peyacueyacucaeyaexanaenë, pijabota. Bajaraponë Simón pijabo eca manuamene itapata. Nexata Simón, ponë itsavënë vënërubatsi, Pedro, itsa patsiarena, catsipaebiana pacuenia exanaejitsiamë, jai ángel Corneliojavabelia bemajitsinaebota.

⁷ Bajarapacuenia ángel bemajitsinaebota pejumlahitsicujinae Corneliojavabelia, ángel baja pona. Nexata Cornelio junata anijanëbeje pijabota petonacuenebaponaponaenëtsibeje. Pematatsënëa junata caenë vajabitsaenë. Bajaraponë vajabitsaenë Dioso peyaiyataenë. Bajaraponë Cornelio yavenonabiabatsi. ⁸ Nexata Cornelio copiata tsipaeba bajarapamonaejavabelia daxita pacuenia tsipaebatsi ángel. Bajaraxuacujinae Cornelio itoroba bajarapamonae peponaenexa jane baja Jope tomarabelia, Simón pesivaponenexa. Nexata baja bajarapamonae naropoba.

⁹ Meravia pitsijavata, matonejeeapatota, bajarapamonae Jope tomara imoxoyotanajetarubena. Bajara pijinia paepatota Pedro pabota naponapona, bajarapabo jumabetsia junaya. Bajarapabo pejumlahamatajêpaebo. Pedro junaya bajarapabojumatatsia pevajëtsinexa Diosojavabelia. ¹⁰ Pedro bitso piäjani. Jamatabë nabane picani. Itsiata pexaejava pexanaevi abaxë apo veretsi pexaejava. Nexata Pedro bemajitsinaebota tane. ¹¹ Pedro tane itaboxo penapatsijava. Nexata athëbëvetsica runaica irabetsica ayaipanaxaneto, besábanapanaxaneto. Bajarapapanaxaneto cuatro pamaëtotabeje namataenetsia upicëta. Bajarapacuenia yamaëya copatsica. ¹² Bajarapapanaxaneto tuatuajëta nubena daxitacueneviria. Nubena daxitaviria cuatro pataxutabeje pejinavanapaevi. Bobena daxitaviria pecotobëxëta pejinavanapaevi. Nubena daxitaviria pepunaevi. ¹³ Nexata Pedro jumetanë athëbëvetsica pejumlahitsijava: “Pedro, nonotapunare. Beyaxuare daxita mapamonaeje nexaenexa,” pejaijava athëbëvetsica, Pedro jumetanë.

¹⁴ Nexata Pedro jumaitsi:

—Jume raja. Caeto ata raja xanë apo xanë bajarapavirianëxi tanejamatabëcuenebijianaeyaniva. Tsipaji Dioso Moiséspijinëta patanetonajumecopatsilivaisi, paneitaveta bajarapavirianëxi pataxayeniva, jai Pedro.

¹⁵ Icatsia athëbëvetsica jumaitsi Pedrojavabelia:

—Pavirianëxi caitorobatsi nexaenexa, xaema. Pëtsa jumaitsimë: “Apo xanë raja bajarapavirianëxi tanejamatabëcuenebijianaeyaniva,” jamë pëtsa, jai athëbëvetsica.

¹⁶ Acueyabi xuabeje bajarapacuenia athëbëvetsica napëna jumaitsi Pedrojavabelia. Bajaraxuacujinae bajarapapanaxaneto athëbëbetsia baja icatsia yapëcaevaya. ¹⁷ Pedro nexata najamatabëxainaejamatabëjumaitsi tsecae:

—¿Detsa meta pitsijamatabëcuene yabara netsitajëta bajaraxua? jamatabëjai tsecae Pedro.

Pedro abaxë itsa najamatabëxaineca bajarapacuenia, Cornelio pijavivi pata. Pabota Pedro naponapona, bajarapabo matatoyorotsia yacaranata ibopanaxanetonë mataropotsia pefaratsijavaxanetota. Nexata bajarapayacaransijavaxaneto baupa muxuneneta nubena bajarapamonae. Bajarapamonae namutuarena yanijobanajetarubena jivijavabelia peyapëtaenexa itsajota eca Simón, bacabocotonë peyacueyacucaeyaexanaenë, pijabo.

¹⁸ Nexata bajarapamonae pepatarēcēpaecujinae, baupa pēnēvelia ayaijumeta yanijoba. Jumaitsi:

—¿Baja tsa mapabota Simón naponaponaje, ponē vērērubatsi itsavēnē, Pedro? jai bajarapamonae.

¹⁹ Pedro abaxē bojumatatsia athēbēyo najamatabēxainecaya bemajitsinaebota petaejava yabara. Nexata Espiritu Santo jumaitsi Pedrojavabelia:

—Taema. Acueyabi ponēbeje casivaparena. ²⁰ Nexata nonotapunare. Runaremeca baja nenaponaenexa bajarapamonae pepēta. Jamatejema saya ajamatabēcuencovēbia naponaname. Tsipaji raja xanē itorobarenajē bajarapamonae, jai Espiritu Santo Pedrojavabelia.

²¹ Nexata baja Pedro runareca Cornelio pijajivijavabereca. Pedro jumaitsi bajarapamonaejavabelia:

—Ponē pajaitame, xanē rabaja maje. ¿Detsa xuajitsia panesivaparemena? jai Pedro.

²² Nexata Cornelio pijajivi jumaitsi Pedrojavabelia:

—Vajabitsaēvi raja pijacapitán Cornelio pejamatabēcuene panajetarubēnajē. Bajaraponē pexaniajamatabēcuenenē. Dioso bitso pejumecovēnētsinē. Nexata bajaraponē Diosojavabelia vajēcabiaba. Daxita judiōvi yayiatanetsi. Nexata judiōvi jumai tsabiabi bajaraponē yabara: “Pexaniajamatabēcuenenē raja Cornelio,” jai tsabiabi. Dioso raja pijaāngel itorobatsi Cornelio pecajunatsinexa. Bajaraxuata paxanē pacasivaponarenatsi Cornelio pijaboyabelia nenaponaenexa. Cornelio cajumetaejitsia palivaisi tsipaebijitsiamē bajaraponējavabelia, jai Cornelio pijajivi Pedrojavabelia.

²³ Nexata Pedro copiapita boyaberena pejonenexa bajarapamonae. Bajarapamonae abaxē namajita bajarapabota. Bajayacunua jane baja Pedro napona bajarapamonae pepēta. Pedro pēyanatatsi itsamonae Jope tomarapijivi, Dioso pejumecovēnētsivi. Itsiata abaxē bajarapamatacabi apo patsilia. Epatua abaxē majitaothopa.

²⁴ Nexata meravia pitsijavata Pedrobana jane baja palia Cesarea tomarebelia. Cornelio nexata pijabota yajavanuca pejunatsivi, pijamonaeviriavi. Yajavanucanua itsamonae, pamonaē bitso Cornelio peyapētaevitsi. Pedro jane baja barēvajēnaeevetanucatsi. ²⁵ Pedro itsa patanajetaruca Cornelio pijabopānabota, Cornelio copiapitatsi. Nexata Cornelio pematabacabēta nucajunua Pedro pitabarata. Tsipaji bitso yayiataeya copiapitsijitsia picani.

²⁶ Nexata Pedro apo jitsipae bajarapacuenia bitso yayiataeya pecopiapitsijavatsi. Nexata Pedro maxēvaetaba. Nonotapunaeyaexana. Nexata Pedro jumaitsi Corneliojavabelia:

—Nonotapunare. Tsipaji saya pacuenia xamē jamatabēcueneitsimē, bajara saya xanē ata jamatabēcueneitsinē, jai Pedro.

²⁷ Nexata Pedro Cornelio barēcuaicuajijai tsanucaponae panabojavarena. Pedro itsa najoneya Cornelio pijaboyalia, tane jivibitsaētoxfaneto Cornelio pijabota penacaetuatsivi. ²⁸ Nexata Pedro jumaitsi Cornelio pijabota penacaetuatsivijavabelia:

—Paxamē baja cajena xaniavaetsia payapētaneme mapacuenēje. Paxanē pajudiōvinē patajasalinaivimi apo panetocopatsi patayajavajinavana-paenexa apo judiōvi. Bijiaya pataeyabiabajē apo judiōvi. Apo panetocopatsinua patajonenexa apo judiōvi pijaboyalia. Itsiata baitsi jane aeconoxeta baja Dioso nitaveta tacopatsinexa baja bajarapajamatabēcuene. Nexata Dioso netocopata tayajavaponaponaenexa apo judiōvi ata. Netocopatanua tanajonenexa apo judiōvi ata pijaboyalia. ²⁹ Bajaraxuata itsa nejunata taponaeenexa maberenaje, narenanē bepījia ajamatabēcuencovēbia. Nexata

jamatabë yapëtaniji xua yabara panejunatame, jai Pedro Cornelio pijabota penacaetuatsivijavabelia.

³⁰ Nexata bajarajota Cornelio jumaitsi Pedrojavabelia:

—Xanë imata, canivyoepatota, bejamatabëcuene a las tres, vajëtajë Diosojavabelia. Nexata bajarapaepatota jemata taitabarata netsitanaitajëta ángel. Ajena baja cuatro pamatacabibeje xaina bajarapacueña tateacujinae. Ángel penaxatatsijava nivenivena. ³¹ Nexata ángel nejumaitsi: “Cornelio, Dioso rabaja cajumetane nevajëtsijava. Yapëthane baja nerajutabiabijava bepejiozivijavabelia penamatavenonaecueña. ³² Nexata nijajivi itorobare Jope tomarajavabelia pecatojunatsinexa Simón, ponë vënërubatsi itsavënë, Pedro. Bajaraponë naponapona itsanë Simón, bacabocotonë peyacueyacuëcaeyaexanaenë, pijabota. Bajaraponë Simón pijabo eca manuamene itapata. Nexata Simón, ponë itsavënë vënërubatsi, Pedro, itsa patsiarena, catsipaebiana pacuenia exanaejitsiamë,” nejai ángel. ³³ Bajaraxuata bepijiayo casivaponaeyaexanatsi. Xamë baja nexata pexaniajamatabëcuëña netopatame. Bajaraxuata nevajënae daxita paxanë panacaetuatajë Dioso pitabarata. Pacaevetatsi patacajumetaenexa daxita palivaisi Dioso caitoroba patanetsipaëbinexamë, jai Cornelio Pedrojavabelia.

Pacuenia Pedro livaisi tsipaëba Cornelio pijabota yabara pelivaisi

³⁴ Pedro jane baja taxuxuaba livaisi petsipaëbijava. Jumaitsi:

—Matapania rajane baja yapëtaniji. Najëpaeya tsaena Dioso nacajitsipa daxitaviriavitsi. ³⁵ Caenacuapijivi canacujitsia, pamonaë Dioso yayiyataeyajinavanapa, jumecovënëtsiajinavanapanua pacuenia Dioso itorobatsi, bajarapamonae Dioso jitsipa. ³⁶ Dioso cajena pexanialivaisi, Jesucristo pelivaisi, tonajumecopata Israel nacuapijivijavabelia. Nexata bajarapalivaisi tsipaëbatsi Israel nacuapijivi pibisiacueña pexanaeneconivecua Jesucristo pejamatabëcueneta pecapanepaenexatsi Dioso. Jesucristo raja daxitajivi pijatuxanenë. ³⁷ Payapëtaneme rabaja mapacueñeje. Juanpijinë jivibautisabinëmi jivi livaisi petsipaëbanajetarucaecujinae, pebautisabaponaecujinaeña, Jesús cotocaevi tsipaëbanajetaruca Galilea nacujava, Judea nacujava ata. ³⁸ Payapëtaneme rabaja mapacueñeje. Jesús, Nazaret tomarapijinë, Dioso rajuta Espiritu Santo. Nexata Espiritu Santo pejamatabëcueneta Jesús caëjëpatsi daxitacueña pexanaenexa. Nexata Jesús jamatejemayaexanapona daxita pamonaë dovathi pejamatabëcueneta avitane. Bajarapacuenia Jesús exanapona tsipaji Dioso yajavaponaponatsi. ³⁹ Paxanë baja cajena pataniji daxita xua Jesús exanapona Judea nacuata, Jerusalén tomarata ata. Itsamonae beyaxuabatsi Jesús. Cobematabiabarutatsi cruzajavabelia. ⁴⁰ Itsiata baitsi jane Jesús pemëthëtsicujinaetsi, acueyabi matacabita, Dioso icatsia asaëyaexanatsi. Dioso Jesús caëjëpaeyaexanatsi patanetsitanaitajëtabiabinexa paxanëjavaberena. ⁴¹ Itsiata Jesús apo tsitanaitajëtsi daxitajivijavabelia. Èpaxanëjavaberena saya panetsitanaitajëtabiaba. Tajëvelia baja cajena Dioso paneitapeta patataevinexa Jesús petëpaecujinae icatsia itsa asaë. Bajaraxuata Jesús petëpaecujinae icatsia itsa asaë, panetsitanaitajëtabiaba. Nexata panebarëñabane. Panebarëmatavëjëaapanua. ⁴² Nexata Jesús paneitoroba patatsipaëbaponaenexa daxitajivijavabelia pexanialivaisi, Jesús pelivaisi. Paneitorobanua patatsipaëbaponaenexa Dioso pejamatabëcueneta itsamatacabi Jesús penaneconitsiaexanaejavanexa

daxita pijaneconi pexainaevi. Itsamatacabi Jesús naneconitsiaexanaena piasaëvi, petëpaevimi ata. ⁴³ Athëbëvetsica Jesús pepatsivajënaetsica, bajayata jinavanapa Diosojumepaebivimi profetavi. Nexata profetavimi tajëvelia vajunupaebapona Jesús pejamatabëcueneta Dioso pevēcuaajibiaexanaejavanexa pibisiacue ne pexanaeconimi, pajiviyo jumecovënëta Jesús pelivaisi, jai Pedro Cornelio pijabota penacaetuatsivijavabelia.

Pacuenia Espiritu Santo tsijamatabëjunuatsi apo judíovi ata yabara pelivaisi

⁴⁴ Pedro abaxë livaisi petsipaebanuaejavata Corneliobanajavabelia, Espiritu Santo tsijamatabëjunuatsi daxita pamonaë jumetaeyena Pedro petsipaebilivaisi. ⁴⁵ Nexata judíovi Dioso pejumecovënëtsivi, Pedro peyajavapatsivi, itsa tane bajarapacue ne, jamatabëcuenenabenajacanubena. Jamatabëcuenenabenajaca tsipaji apo judíovi ata Espiritu Santo tsijamatabëjunuatsi. ⁴⁶ Nexata Pedro peyajavapatsivi yapëtane Espiritu Santo petsijamatabëjonejavatsi Corneliobana. Tsipaji Corneliobana cuaicuaijai itsavirijumenëta, apo penatsipaebijumenëmi. Corneliobana jumai tsaponae Diosojavabelia:

—Diosomë, bitso ayaijamatabëcuenenëmë, jai tsaponae.

⁴⁷ Bajaraxuata Pedro jumaitsi peyajavapatsivijavabelia:

—Pacuenia vaxaitsi Dioso nacarajuta Espiritu Santo, bajara pijinia pacuenia mapamonaë ataje Dioso rajutatsi Espiritu Santo. Bajaraxuata itsajivi ata acunëbi pejumaitsiyava bajarapamonaë yabara: “Pëtsa mapamonaëje pabautisabame merata,” pejaiyava, jai Pedro.

⁴⁸ Nexata Jesucristo pevënëta Pedro bautisaba Corneliobana. Pedro pebautisabicujinaë Corneliobana, asivatsi abaxë Pedro naponaponaenexa bajarajota caematacabibeje.

11

Pacuenia Pedro navajunupaeba Dioso pejumecovënëtsivijavabelia Jerusalén tomarata yabara pelivaisi

¹ Apóstolevi vënëlvivaisitane apo judíovi ata Corneliobana pejumecovënëtsijava Jesús pelivaisi. Judea nacuata pejinavanapaevi ata, pamonaë jumecovënëta Jesús pelivaisi, vënëlvivaisitane apo judíovi ata Corneliobana pejumecovënëtsijava Jesús pelivaisi. ² Nexata pamatacabi Pedro pata Jerusalén tomarata, judíovi, pamonaë jumecovënëta Jesús pelivaisi, jumaitsi Pedrojavabelia:

³ —¿Detsa xuajitsia Cesarea tomarata naponaponame apo judíovi pijabota? ¿Detsa xuajitsia nanabaneme apo judíovita? jai judíovi Pedrojavabelia.

⁴ Nexata Pedro tsipaeba judíovijavabelia pacuenia taxuxuaba bajara-pacue ne yabara. Pedro jumaitsi judíovijavabelia:

⁵ —Pamatacabi naponaponajë Jope tomarata Simón, bacabocotonë peyacueyacuecaeyaexanaenë, pijabota, vajëtajë Diosojavabelia. Nexata Diosojavabelia tavajëtsijavata bemajitsinaebota taniji athëbëvetsica perunaëjavatsica ayaipanaxaneto, besábanapanaxaneto. Bajarapapanaxaneto cuatro pamaëtotabeje namataenetsia upicëta. Nexata bajarapapanaxaneto xanëjavabetsica yamaëya copatsica. ⁶ Itsa naitaxutobabatsia naëcotajë xani-avaetsia tataenexa xua yajavanajetaruca bajarapapanaxaneto tuatuajëta, nexata taniji cuatro pataxutabeje pejinavanapaevi. Taniji unupijivina,

pianaepanaevi. Taniji pecotobëxëta pejinavanapaevinua. Taniji pepunaevinua. ⁷ Nexata jumetaniji athëbëvetsica tanejumaitsijava: “Pedro, nono-tapunare. Beyaxuare daxita mapamonaeye nexaenexa,” nejai. ⁸ Nexata jumaitsinë: “Jume raja. Caeto ata raja xanë apo xaenë bajarapavirianëxi tanejamatabëcuenebijianaeyaniva. Tsipaji Dioso Moiséspijinëta pataneton-ajumecopatšilivaisi, paneitaveta bajarapavirianëxi pataxaeyaniva,” janë. ⁹ Nexata athëbëvetsica icatsia nejumaitši: “Pavirianëxi caitorobatsi nexaenexa, xaema. Pëtsa jumaitšimë: ‘Apo xaenë raja bajarapavirianëxi tanejamatabëcuenebijianaeyaniva,’ jamë pëtsa,” nejai athëbëvetsica. ¹⁰ Acueyabi xuabeje bajarapacuenia athëbëvetsica napëna nejumaitši. Bajaraxuacujinae bajarapapanaxaneto daxita bajarapamonae athëbëabetsia baja icatsia yapëcaevaya. ¹¹ Bajarapaepatota jane baja acueyabi ponëbeje nesivapata pabota naponaponajë. Bajarapamonae itorobatsi Cesarea tomaraverena. ¹² Nexata Espiritu Santo nitoroba bajarapamonae pepëta ajamatabëcueneconvëbia tanaponaenexa Cesarea tomarabelia. Mapamonaeye vajamonae, seis ponëbeje Dioso pejumecovënëtsivi, nepëyanata Cesarea tomarabelia. Nexata panajoneyajë Cornelio, vajabitsaëvi pijacapitán, pijaboyalialia. ¹³ Nexata Cornelio panetsipaeba pijabota petsitanaitajëtsijavatsi ángel. Angel pina jumaitši Corneliojavabelia: “Itorobare nijajivi Jope tomarabelia pecatojunatsinexa Simón, ponë vënërubatsi itsavënë, Pedro. ¹⁴ Bajaraponë itša patsiarena, catsipaebiana pacuenia exanaejišiamë Dioso pecavecuajibiaexanaenexa daxita pibisiacuene nexanaeconimi, daxita nijabopijivi yajava,” jai pina ángel Corneliojavabelia. ¹⁵ Nexata jane baja itša taxuxuabajë livaisi tatsipaebijava Cornelioabanajavabelia, Espiritu Santo tsijamatabëpatsicatsi Cornelioabana. Pacuenia vaxaitsi copiaya nacatsijamatabëpatsica Espiritu Santo, bajara pijinia pacuenia bajarapamonae ata tsijamatabëpatsicatsi Espiritu Santo. ¹⁶ Nexata najamatabënapitajë Jesús patanejumaitsijava mapacueniaje: “Juanpijinë raja jivi bautisabanajetaruca émerata. Itsiata baitsi jane caematacabibejecujinae paxamë Dioso pacatsijamatabëjoneyaexanaena Espiritu Santo,” patanejaijiva Jesús, najamatabënapitajë. ¹⁷ Xaniajai baja cajena. Dioso rajutapona Espiritu Santo apo judíovi ata pacuenia vaxaitsi nacarajuta Espiritu Santo vajajumecovënëtsixae vajatuxanenë Jesucristo. Nexata acuenebi tacaranatsijava Dioso perajutsijava Espiritu Santo apo judíovi ata, jai Pedro judíovijavabelia, Jesús pelivaisi pejumecovënëtsivijavabelia.

¹⁸ Nexata judíovi itša jumetane bajarapacuenia Pedro pejumaitsijava, moya baja. Nexata judíovi jamatabëcuenebarëya Diosojavabelia. Nexata Dioso yabara jumaitši:

—Xaniajai rabaja. Dioso bajarapacuenia exana apo judíovi ata matababi apo peververeceajava pexainaenexa, itša copaba pibisiacuene pexanabibijava penajamatabëcuenepënëyorotsinexa Diosojavabelia, jai judíovi.

Pacuenia Dioso pejumecovënëtsivi Antioquía tomarata jinavanapa yabara pelivaisi

¹⁹ Pamatacabi Estebanpijinë beyaxuabatsi, Dioso pejumecovënëtanapaevi Jerusalén tomarata rëcëpeca daxitanacuanëjava. Bajarapacuenia rëcëpeca tsipaji bitso bejiobiaexanaponatsi. Jesús pelivaisi pejumecovënëtsixae, itoyatsi. Itsamonae tajëbelia rëcëpeca Fenicia tomarabelia. Itsamonae rëcëpeca Chipre tunaetota peecaotomarabelia. Itsamonae rëcëpeca Antioquía tomarajavabelia. Nexata bajarapamonae Jesús pelivaisi tsipaebapona bajarapatomaranëjava ëjudíovijavabelia.

Itsaviriavijavabelia apo tsipaebaponae. ²⁰ Itsamonae Jesús pelivaisi pejumecovënëtsivi, Chipre tunaetota peccaetomarapijivi, Cirene tomarapijivi ata, pona Antioquía tomarabelia. Bajarapamonae pijinia Antioquía tomarata apo judíovijavabelia tsipaebapona pexanialivaisi, Jesús pelivaisi. ²¹ Pamonae apo judíovijavabelia tsipaeba Jesús pelivaisi, Dioso yavenonatsi. Nexata apo judíovi ayaiBITSaëtoxaneto jumecovënëta Jesús pelivaisi. NajamatabëcuenePënyorota Diosojavabelia pibisiacuene pexanabiabijavavecu.

²² Jerusalén tomarata pejinavanapaevi, Jesús pelivaisi pejumecovënëtsivi, vënëlivaisitane apo judíovi ata Antioquía tomarapijivi Jesús pelivaisi pejumecovënëtsijava. Nexata bajarapamonae Bernabé itorobaliatsi Antioquía tomarabelia petaenexa apo judíovi ata Jesús pelivaisi pejumecovënëtsijava. ²³ Nexata Bernabé ita pata Antioquía tomarabelia, tane apo judíovi ata Dioso peyavenonaejavatsi. Nexata Bernabé sivajamatabëcuenebarëya apo judíovi ata. Nexata Bernabé muxujioba apo judíovi ata daxita bajarapamonae pejamatabëthëtovetsina ajamatabëcuenesaëya peyavajavinavanapaenexa Dioso. ²⁴ Bernabé bitso pexaniajamatabëcuenenë. Jamatabëcuenevënëca Espíritu Santo. Nexata exanabiaba Espíritu Santo pitorobicueniatsi. Dioso bitso pejumecovënëtsinë Bernabé. Bajaraxuata nexata jivibitsaëtoxaneto jumecovënëta Dioso.

²⁵ Bajaraxuacujinae Bernabé baja pona Tarso tomarabelia pejaitsinexa Saulo. Nexata baja Bernabé ita caxitarababa Saulo, barërena Saulo Antioquía tomarabereña. ²⁶ Nexata Antioquía tomarata caevai naponaponabeje Dioso pejumecovënëtsivijavata. Jivi ayaiBITSaëtoxaneto livaisi tsipaebabiababeje. Antioquía tomarata daxita pamonae Jesús pelivaisi jumecovënëtavánapa, bajarapamonae pijatomarapijivi pepo copiaya jane baja vënërubatsi Cristianovi.

²⁷ Pamatacabi abaxë Bernabébeje Saulobeje ponaponabeje Antioquía tomarata, Diosojumepaebivi profetavi, Jerusalén tomaraverena penaropobivi, pata Antioquía tomarata. ²⁸ Bajarapaprofetavijavuvënëne pevënë Agabo. Nexata Agabo nonotapuna Dioso pejumecovënëtsivi penacaetuatsijavata. Nexata Agabo tajëvelia vajunupaeba ayaijaniboxaneto pecopiapatsijavanexa tajëvelia Espíritu Santo peyapëtaeyaexanaeatsi. Agabo jumaiti mapacueniaje:

—Ayaijaniboxaneto raja copiapatsiana daxitanacuanëjava, jai tajëvelia Agabo.

Bajarapajaniboxaneto hexëa copiapata Agabo pejumaitsicuenia pamatacabi nacuaevetsinë Claudio evetaponapona Romanonacua. ²⁹ Bajaraxuata cajena janibovajënaeya, Antioquía tomarapijivi daxita Dioso pejumecovënëtsivi najamatabëcuenejëpa peyavenonaenexa Judea nacuapijivi Dioso pejumecovënëtsivi. Nexata Antioquía tomarapijivi, caenë canacujitsia, najamatabëcuenevereta Judea nacuapijivijavabelia perajutsinexa palata pacuenia cuenecaëjëpatsi. ³⁰ Nexata baja Antioquía tomarapijivi ita tocaetuatsivereta, bajarapamonae itorobatsibeje Bernabébeje Saulobeje petocaponaenexabeje bajarapapalata Judea nacuapijivijavabelia, Dioso pejumecovënëtsivi pijaancianovijavabelia. Nexata ancianovi petsicobetsanaenexa bepejiobivijavabelia.

¹ Nacuaevevtsinē Herodes bejiobiaexanapona Jesús pelivaisi pejume-covēnētsivi. ² Herodes pijajivi itoroba espadata pebeyaxuabinexatsi Santi-ago, Juan pematapijinēmi. ³ Herodes ita tane judiōvi petsitaxanepanaeja-vatsi Santiago pebeyaxuabijavatsi, nexata icatsia Herodes itoroba pijajivi Pedro pevaetabinexatsi. Bajarapacuenia Herodes exana fiestamatacabi, pafiestamatacabi judiōvi baxane levadurata matajērēabinejeva pexanaepan. ⁴ Pedro pevaetabucujinaetsi, penaneconitsivi pejebabiabibota etatsi. Ba-jarapabota cuatro pabitsaētobeje vajabitsaēvi Pedro nacobenaevetabiabatsi. Itsabitsaēto ita pitsapa, juya itsabitsaēto evetabiabatsi. Caebitsaētota jina-vanapa vajabitsaēvi cuatro ponēbeje tsaponae. Nexata picani Herodes naja-matabēxaina Pedro penutsinexatsi daxita judiōvi pitabarata pascuavēnēfiesta peverevevecaecujinae. ⁵ Nexata Pedro eca penaneconitsivi pejebabiabib-ota. Vajabitsaē xaniavaetsia Pedro yabaupaevetabiabatsi bajarapabovecua Pedro pepitsapaeyaniva. Itsiata baitsi jane daxita Dioso pejumecovēnētsivi, asaēyata Diosojavabelia tovajētaponatsi Pedro.

*Pacuenia Dioso pejamatabēcueneta Pedro capanepatsi penaneconitsivi pe-
jebabiabibovecua yabara pelivaisi*

⁶ Pamatacabi picani Herodes Pedro nutsijitsiatsi daxita judiōvi pitabarata, bajarapamatacavajēnaeya pameravi, penaneconitsivi pejebabiabibo ēnētuaatujēta Pedro majitanuca anijanēbeje vajabitsaēnēbeje, pevetsinētsibeje, petuatuajēta. Vajabitsaēnēbeje Pedro yamaēcabocatsibeje anijacadenamaētotabeje. Itsanēbeje pijinia yabaupaevetatsi. ⁷ Jemata Dioso pijaängel naitajēta Pedrojavata. Nexata penaneconitsivi pejebabiabibo ēnētuaatujēta naitayota. Pedro pemajitanucaenē āngel yenejayatabatsi Pedro penaēcotsinexa. Āngel jumaitsi Pedrojavabelia:

—Naxanitsiayo nonotapunare, jai āngel.

Nexata Pedro pecobecētsicadenamaētotsibeje vecobejoparecatsi baja.

⁸ Nexata icatsia āngel jumaitsi Pedrojavabelia:

—Nijacorrea xaniavaetsia naepacatarērēre. Nataxuxatare baja nijazap-ato, jai āngel.

Pedro nexata xaniavaetsia naepacatarērētaxuaba pijacorrea. Nataxux-atataxuaba pijazapato. Nexata icatsia āngel jumaitsi:

—Naxatare nijacamisajumavelia nenaxatatabiabiava. Nepēnaponare, jai āngel Pedrojavabelia.

⁹ Pedro nexata napona āngel pepēta. Itsiata Pedro xaniavaetsia apo najamatabēcueneyapētae. Nexata Pedro xaniavaetsia apo yapētae pepacuenē āngel pebarēponaejavatsi. Nexata saya Pedro jamatabējumaitsi:

—Amajitsinaenē meta, jamatabējai.

¹⁰ Itsiata baitsi jane xenetsiabeje penamataxainae ēnētuaatujētareca peyabaupaevetecaevajabitsaēnētsi. Icatsia xenetabeje pecotocaevi ēnētuaatujētatsina peyabaupaevetecaevajabitsaēnētsi. Bajaraxuacujinae pepitsapaenexabeje callejavabelia, nucojopabeje pepo baupaxanetojavata jane baja. Bajarapabaupaxaneto hierrobaupaxaneto. Nexata bajarapabaupaxaneto tonabaupatsibeje pijacuata. Pitsatabaliabeje jane baja callejavabelia. Nexata callejavareca penajetarucejavatabeje, āngel jemata ajibi tsojopae. ¹¹ Pedro jane baja xaniavaetsia najamatabēcueneyapētane. Nexata Pedro jamatabējumaitsi:

—Baja rajane matapania aeconoxae xaniavaetsia naja-matabēcueneyapētaniji. Dioso tsaena itorobica pijaängel tanecapanepaenexa

Herodes pecobevecua. Nexata baja judíovi apo netae tsane Herodes pijajivi tanebeyaxuabijava, jamatabējai Pedro.

¹² Pedro najamatabēxaina pacuenia exanaejitsia. Nexata lia María pi-jaboyabelia. Bajarapova María, Juan pena, ponē vērūrubatsi itsavēnē, Marcos. María pijabota ayaibitsaētōxaneto Dioso pejumecovēnētsivi nacaetuata Diosojavabelia petovajēcaenexatsi Pedro. ¹³ María pijabo matatorotsia yacaranata ibopanaxanetonē mataropotsia pefaratsijavaxanetota. Nexata bajarapayacaranatsijavaxaneto baupa, Pedro docodocota petobaupatsinexatsi. Nexata bajarapabota penacuenebivayo, Rode, pitsaparena petaenexa ponē baupa docodocotanunuca. ¹⁴ Nexata Rode itsa jumeyapētane Pedrocuene, nexata abaxē apo tobaupatsi. Rode cujinaelia boyabelia pejamatabēcuenebarēyatsajonexae. Nexata Rode tsipaeba María pijabota penacaeuatsivijavabelia. Jumaitsi:

—¡Pedro rajane baja nucalia baupa pēnēverena! jai Rode.

¹⁵ Nexata bajarapamonae jumaitsi:

—¡Camatajemaba raja saya! jai.

Itsiata icatsia Rode jumaitsi:

—¡Xaniajanē raja pepacuene! Pedro raja nucalia baupa pēnēverena, jai Rode.

Bajarapamonae nexata jumaitsi:

—Apo Pedro raeta. Pevetsiāngeltsi raeta, jai bajarapamonae.

¹⁶ Nexata bajarapamonae pecuaicuaijajavata, Pedro tsiteca baupa docodocotanunuca. Nexata jane baja bajarapamonae tobaupata Pedro pejonenexarena. Bajarapamonae itsa tanetsi Pedro, bajarapamonae jamatabēcuenenajunaviaca. ¹⁷ Nexata Pedro nacobeyota bajarapamonae pemoyanexa. Pedro tsipaeba pacuenia Dioso pejamatabēcueneta capanepatsi penaneconitsivi pejebabiabibovecua. Pedro jumaitsi:

—Patsipaebianame mapalivaisije Santiagojavabelia. Patsipaebianame itsamonaejavabelia ata, Dioso pejumecovēnētsivijavabelia, jai Pedro.

Bajaraxuacujinae Pedro pitsapalia. Itsajavabelia icatsia pona.

¹⁸ Itsa baja matakabi tsina, vajabitsaēvi, pamonaē Pedro evetabiabatsi pananeconitsivi pejebabiabibota, bitso jamatabēcuenebējai. Tsipaji bajarapamonae apo yapētae itsabelia Pedro pona. ¹⁹ Nexata Herodes itoroba bajarapamonae pejaitsinexatsi Pedro. Itsiata bajarapamonae Pedro apo caxitajarabitsi. Nexata picani Herodes xaniavaetsia yanijoba pamonaē Pedro evetabiabatsi penaneconitsivi pejebabiabibota. Nexata baja bajarapamonae Pedro pevecuapanepaexae, Herodes anaepana. Nexata Herodes itsamonae vajabitsaēvi itoroba bajarapamonae pebeyejebinxatsi Pedro bajarapamonae pevecuapanepaexae. Nexata baja beyejebatsi. Bajaraxuacujinae nacuaevevtsinē Herodes Judea nacuaevecua pona. Pona Cesarea tomarabelia peponaponaenexa Cesarea tomarata.

Pacuenia tēpa nacuaevevtsinē Herodes yabara pelivaisi

²⁰ Nacuaevevtsinē Herodes itsa ponapona Cesarea tomarata, baraanaepana bitso Tiro tomarapijivijavabelia, Sidón tomarapijivijavabelia ata. Nexata Herodes pebaraanaepanaexae, bajara patomarabejepijivijavabelia copatsiaexana pexaejava petocaponabiabijava bajara patomarabejepijivijavabelia. Nexata bajarapatomarabejepijivi sivana-jamatabēcueneyanaba xaniavaetsia pebarēcuaiicuaijainexa nacuaevevtsinē Herodesjavabelia. Tsipaji bajarapatomarabejepijivi jitsipa icatsia pexaejava petocapatabinexatsi pijatomarabejevavaberena Herodes pevetsinacujavaverena. Nacuaevevtsinē Herodes pijabo petoevtsinētsi

pevënë Blasto. Nexata Tiro tomarapijivibeje Sidón tomarapijivibeje copiaya cuaicuaijai Blastojavabelia Blasto pexaniajamatabëcuene petoxainaenexa petocuaicuaijainexa Herodesjavabelia. Nexata Blasto jejai. Tocuaicuaijai Herodesjavabelia Herodes icatsia pebarajamatabëxanepanaenexa bajara patomarabejepijivijavabelia. ²¹ Nexata Herodes tocaëjêta pamatacabi patsijitsia bajarapatomarabejepijivi Herodes pijaboyabelia. Nexata pamatacabi Herodes tocaëjêta bajarapamonae pepatsinexa, Herodes naitabëtsia naxatata nacuaevevtsinë penaxatatsicuenia. Nexata jane baja bajarapatomarabejepijivi pata pebarëcuaicuaijainexa Herodes. Nexata daxita bajarapamonae pitabarata nacuaevevtsinë peecaejavata, Herodes eca. Nexata Herodes xaniavaetsia barëcuaicuaijai bajara patomarabejepijivijavabelia. ²² Nexata bajarapatomarabejepijivi Herodes yabara pinijijumeta yamaxëitojoroblaya jumai tsaponae pebarajamatabëxanepanaenexatsi:

—¡Maponêje nacabarëcuaicuaijaije, apo jivitonê! ¡Diosonê tsaena! jai tsaponae bajarapatomarabejepijivi Herodes yabara.

²³ Bajarapacuenia pejumaitsjava bajarapatomarabejepijivi Herodes apo pejumeitavetsixae, Dioso pijaángel naneconitsiaexanatsi Herodes. Avitaniayaexanatsi. Herodes nexata oro ênêverenetsi. Herodes nexata oro pênenverenijavatsi yatêpa.

²⁴ Nexata Dioso pejumecovênëtsivi, daxitanacuanêjava tsipaebapona Dioso pitorobilivaisi. Nexata Dioso pitorobilivaisi pejumecovênëtsivi ayabit-saëtoxaneto tsaponae.

²⁵ Itsa baja Bernabébeje Saulobeje palata petocaponaevijavabelia livaisi petsipaebijavabeje najumeveretabeje, naviatabeje baja Jerusalén tomaraverena. Navialiabeje baja Antioquía tomarabelia. Barëliabeje Juan, ponê vênêrubatsi itsavênê, Marcos.

13

Pacuenia Bernabébeje Saulobeje junatatsibeje Dioso pitorobilivaisi jivi petsipaebaponaenexabeje daxitanacuanêjava yabara pelivaisi

¹ Antioquía tomarata Dioso pejumecovênëtsivijavata, jinavanapa mapamatabëxëyoje. Itsanê Bernabé. Itsanê Simón, ponê vênêrubatsi itsavênê, Negro. Itsanê Lucio. Bajaraponê Cirene tomarapijinê. Itsanê Saulo. Itsanê Manaén. Bajarapamonae cajena profetavi, Dioso pejumecovênëtsivijavabelia livaisi petsipaebabiabivina. Herodes Galileanacia pevetsinë. Herodesbeje Manaénbeje penajuavitsabinêbeje. ² Itsamatacabi daxita bajarapapofetavi, Dioso pejumecovênëtsivi yajava, culto pexanaevajënaeya, pexaejava apo xae japasa Diosojavabelia pevajëcaenexa. Nexata bajarajota Espiritu Santo jumaitsi daxita bajarapamonaejavabelia:

—Panetotsare saicaya Bernabébeje Saulobeje. Xua yabara junatajêbeje, bajaraxua jane baja tanetonacuenëbinexabeje, jai Espiritu Santo.

³ Nexata jane baja daxita bajarapamonae japasa vajëca Diosojavabelia. Bajaraxuacujinae Bernabébeje Saulobeje bajarapamonae tsmatanacobebutatsibeje. Tovajëtatsibeje Diosojavabelia. Nexata jane baja copatatsibeje peponaenexabeje jivi daxitanacuanêjava petsipaebaponaenexabeje Dioso pitorobilivaisi.

Pacuenia apóstolenêbeje Dioso pitorobilivaisi jivi tsipaebabeje Chipre tunae-toxanetota penaetomaranêjava yabara pelivaisi

⁴ Bernabébeje Saulobeje Espíritu Santo pejamatabécueneta itorobatsibeje. Nexata baja ponabeje Seleucia tomarabelia. Nexata Seleucia tomarata naropotabeje. Naponabeje velapanata peponaebarcota. Nanicababeje Chipre tunaetoxanetojavabelia. ⁵ Nexata napaliabeje Salamina tomarata. Bajarapatomarata tsipaebaponabeje Dioso pitorobilivaisi judíovi penacaetuatabibonéjava. Juan napona Bernabébeje Saulobeje pepéta peyavenonabiabinexa. ⁶ Nexata bajarapamonae Chipre tunaetoxaneto matatuverelia. Nexata pata Pafos tomarata. Bajarapatomarata bajarapamonae caxitararaba judioné, Barjesúsvenéné. Bajaraponé jivi pejorobiné. Bajaraponé jivi yamaxéitororobiaya jumai tsabiabi: “Xané raja tsipaebabiabajé Dioso taneitorobicuenia,” jai tsabiabi. ⁷ Nexata Barjesúsbeje najuaponaponabiababeje Sergio Paulobeje. Sergio Paulo Chipre tunaetoxaneto pevetsiné. Sergio Paulo cajena bitso bepíjia peyapétaené palivaisi tsipaebatsi. Nexata Sergio Paulo pijajivi itoroba petojunatsinexatsi Bernabébeje Saulobeje. Tsipaji Sergio Paulo bitso jamatabéjumatane Dioso pitorobilivaisi. ⁸ Itsiata baitsi jane Barjesús, jivi pejorobiné, poné vénérubatsi itsavéné, Elimas, najamatabécuené epatajérèrecaeyaexana Sergio Paulo Bernabébeje Saulobeje petsipaebaponaelivaisibeje yabara. Bajarapacuenia Barjesús najamatabécuené epatajérèrecaeyaexana Sergio Paulo pejumecovénétsiyaniva Dioso pitorobilivaisi. ⁹ Nexata Saulo, poné vénérubatsi itsavéné, Pablo, tsijamatabévénécatsi Espíritu Santo. Nexata Pablo naécota asaéyata Barjesúsjavabelia. ¹⁰ Pablo jumaitsi Barjesúsjavabelia:

—¡Xamé jivi neyamaxéitororobiné, pibisiacuene nexanaené, dovathi pijajivitonémé, pexaniajamatabécuené pexanaejava nitoyané! Apo jamatabécopatsimé nenajumetsénétsijava pejumecovénétsiyaniva pamona picani jamatabéjumecovénéta Dioso pijapexaniajailivaisi. ¹¹ Dioso raja aeconoxae cananeconitsiaexanaena. Nexata apo natsivajénaetaemé tsane. Matapania anijajuametone panepaena, icatsia natsivajénaetaename, jai Pablo Barjesúsjavabelia.

Nexata bajarajota Barjesús itaxutomeravibajunuatsi. Bitso itaxutoaitaquiri. Nexata saya Barjesús nacobenajayaruta itsané pecobevaetabinexatsi pecomacaponaenexatsi pijaboyabelia. ¹² Sergio Paulo ita tane bajarapacuené, nexata jumecovénéta Jesús pelivaisi. Sergio Paulo bitso jamatabécuenenajunaviaca ita jumetane Jesús pelivaisi Bernabébeje Pablobeje petsipaebijavatabeje.

Pacuenia Pablobeje Bernabébeje ponaponabeje Antioquía tomarata, Pisidia nacuata peccaetomarata, yabara pelivaisi

¹³ Pablobana Chipre tunaetota Jesús pelivaisi petsipaebavanapaecujinae, Pafos tomarata nanaropoba velapanata peponaebarcoxanetota. Nicaba Panfilia nacuyabelia. Nexata Panfilia nacuatatalia pata Perge tomarata. Juan baja Perge tomarata itsajamatabécuené najamatabéxaina. Nexata baja naviateca Jerusalén tomarabelia. ¹⁴ Nexata Pablobeje Bernabébeje icatsia nanaropotabeje Perge tomarata. Nexata icatsia patabeje Antioquía tomarabelia, Pisidia nacuata peccaetomarabelia. Judíovi penacaetuatabibibota. Bajarajota naecabeje. ¹⁵ Nexata daxita bajarapabota pejonevi, namuxunaeveta Dioso Moiséspijinéta penajumecopatsilivaisi. Namuxunaevetanua

Diosojumepaebivimi profetavi bajayata peyaquinaelivaisi ata. Bajaraxuacujinae judíovi penacatuatabiabibo pevetsivi, pijajivitoné itoroba. Nexata bajaraponé jumaitsi Pablobeje Bernabébejejavabelia:

—Tajabananébeje, itsa payapétanemebeje itsalivaisiyo panetsipaebinexabeje, aeconoxae patsipaebianamebeje jivi piijamatabécuenesaénexa Diosojavabelia, jai bajaraponé Pablobeje Bernabébejejavabelia.

¹⁶ Nexata jane baja Pablo nonotapuna. Nacobeyota jivi pemoyanexa. Pablo nexata jumaitsi:

—Tajamonae judíovi, panenamuxunaevere. Tajamonae, paxamé ata apo pajudíovimé, Dioso panejitsipaevi, abaxé panenamuxunaevere pacuenia jumaitsinéjitsia. ¹⁷ PaDioso aeconoxae judíovitsi vajaDioso, bajarapaDioso bajayata baja cajena itapetatsi vajasalinaivimi pijajivinexa. Nexata Dioso pejamatabécueneta vajasalinaivimi pexi ayaibitsaétoxaneto xainapona. Nexata vajasalinaivimi ayaibitsaétoxaneto tsaponae pamatacabi jinavanapa Egipto nacuata. Nexata Dioso pesaéta vajasalinaivimi mataponatsi Egipto nacuaverena. ¹⁸ Vajasalinaivimi Dioso pejitsipaecuenia apo exanabiabi ata, itsiata Dioso cuarenta pavaibeje xaniavaetsia evetatsi petusato nacuata. ¹⁹ Dioso cajena verebiaba siete panacuabejepijivi, Canaánvéné nacuata pejinavanapaevimi. Nexata baja Dioso vajasalinaivimi totsatatsi bajarapanacuanéjava juya pejinavanapaenexa. ²⁰ Bajaraxuacujinae Dioso itoroba vajasalinaiviyajuvénéni juezmonae penaexanaponaenexa, vajasalinaivimi pevetsivinexatsi. Juezmonae nexata penaexanaponaevi, vajasalinaivimi evetavanapatsi cuatrocientos cincuenta pavaibeje. Matapania profeta Samuelpijiné evetatsi vajasalinaivimi, copata baja juezmonae pevetsijavatsi. Tsipaji baja profeta Samuelpijiné pecotocaevijuezné. ²¹ Nexata vajasalinaivimi jumaitsi profeta Samuelpijinéjavabelia: “Pajitsipajé nitorobijava vajajuvénéné penaexanaenexa vajanacayanacuae vetsinénexa,” jai. Nexata profeta Samuelpijiné Dioso pejamatabécueneta itoroba Saúlpijiné vajasalinaivimi cuarenta pavaibeje peyanacuae vetaponaponaenexatsi. Bajaraponémi Saúlpijiné, Cispijiné pexénato, vajasalinainémi Benjamínpijiné pemomoxiyajunénéné. ²² Bajaraxuacujinae Saúlpijiné Dioso copatsiaexanatsi pecopatsinexa baja vajasalinaivimi peyanacuae vetsijavatsi. Nexata juya Dioso itoroba Davidpijiné vajasalinaivimi peyanacuae vetsinexatsi. Dioso jumaitsi Davidpijiné yabara mapacueniaje: “Isaí pexénato, David, jamatabécueneyapétaniji. Bajarapitsiné jitsipajé. Bajaraponé David daxita pacuenia jitsipajé, netoexanaena,” jai Dioso Davidpijiné yabara. ²³ Davidpijiné raja pemomoyota naexana Jesús. Dioso cajena itorobica Jesús Israel nacuapijivitsi vajanacacapanepaenexa pacuenia Dioso tajévelia najumecapanepaeya jumaitsi vajasalinaivimijavabelia. ²⁴ Jesús petaxuxuabivajénaeya jivi livaisi petsipaebaponaejala, copiaya Juanpijiné jivibautisabinémi tsipaebanajetaruca daxita Israel nacuapijivijava. Jumai tsanajetaruca Juanpijiné: “Pacopabare baja daxita pibisiacuene paneexanabiabijava. Panajamatabécuenepénéyorore Diosojavabelia. Bajaraxuacujinae pacabautisabianatsi,” jai tsanajetaruca Juanpijiné. ²⁵ Juanpijiné abaxé itsa apo beyaxuabitsi, jumai tsaponae jivijavabelia: “Poné pacopiaevetavanapame, xané raja apo bajaraponé. Xanécujiinae rajane bajaraponé najetarucaena. Xané raja saya beveliajamatabécuenenéné bajaraponévecua. Nexata bajaraponé bepíajivitonénécuenia ata tataxujonotsinexa pijazapato, vecuaaurané,”

jai tsaponae Juanpijinē Jesús yabara, jai Pablo judíovijavabelia judíovi penacaetuatabiabibota.

²⁶ Icatsia Pablo jumaitsi judíovijavabelia judíovi penacaetuatabiabibota:

—Tajamonae Abrahampijinē papemomoximē, Dioso paneyaiyataevi. Dioso raja nacatoitoroba mapalivaisije vajanacapanepaenexa Diosojavabelia. ²⁷ Itsiata Jerusalén tomarapijivi apo yapētae Jesús pecapanepaejavanaxatsi. Jerusaléntomara pevetsivi ata apo yapētae Jesús pecapanepaejavanaxatsi. Bajarapamonae apo jumeyapētaenua pacuenia jumaitsi Jesús yabara bajayata profetavi peyaquinaebaxutota. Penacueraevetsimatacabianē canacujitsia lebabibi ata bajarapabaxuto judíovi penacaetuatabiabibota, itsiata bajarapamonae apo jumeyapētae. Bajarapamonae itsa neconita Jesús pebeyaxuabinexatsi, nexata judíovi exana pacuenia baja cajena Diosojumepaebivi profetavi tajēvelia vajunupaeba Jesús pexanaejavanexatsi. ²⁸ Judíovi apo caxitajarabi ata Jesús itsacueneneconi pexainajava, itsiata bajarapamonae vajēta nacuaevetsinē Pilatojavabelia Jesús pebeyaxuabinexatsi. ²⁹ Nexata jane baja Jesús itsa beyaxuabatsi, copiapata jane baja daxita pacuenia Jesús yabara tajēvelia jumaitsi Dioso pejumelivaisibaxutota. Bajaraxuacujinae Jesús petēpaenē pitsicatsi cruzajavavetsica. Bajaraxuacujinae mēthētatsi. ³⁰ Itsiata baitsi jane Dioso icatsia asaēyaexanatsi Jesús petēpaecujinae. ³¹ Jesús petēpaecujinae Dioso icatsia itsa asaēyaexanatsi, bajayajebi anijatonē tsitanaitajētabiaba pijajivijavabelia, pamonaē yanatatsi pamatacabi Jesús pona Galilea nacujavaverena Jerusalén tomarabera. Bajarapamonae nexata maparucaje tsipaebapona jivijavabelia Jesús pelivaisi, jai Pablo bajarapamonaejavabelia judíovi penacaetuatabiabibota.

³² Icatsia Pablo jumaitsi bajarapamonaejavabelia judíovi penacaetuatabiabibota:

—Nexata pacatsipaebianatsi pexanialivaisi. Dioso cajena vajasalinaivimijavabelia tajēvelia najumecapanepaeya jumaitsi pacuenia Dioso toexanaejitsia vajasalinaivijavabelia. ³³ Vaxaitsi rabaja cajena bajarapamonae pemomoxitsi. Nexata pacuenia Dioso tajēvelia najumecapanepaeya jumaitsi vajasalinaivimijavabelia, nacatocopiapata jane baja. Tsi-paji baja Jesús Dioso icatsia asaēyaexanatsi petēpaecujinae pacuenia baja cajena jumaitsi Salmosbaxutota. Dioso pejumaitsijava Jesúsjavabelia, Salmosbaxutota jumaitsi mapacueniaje: “Ajena raja, pamatacabi, canutatsi daxitajivi pitabarata pecayapētaenexa xanē taxēnatocuenemē,” jai cajena Salmosbaxutota Dioso pejumaitsijava Jesúsjavabelia. ³⁴ Dioso baja asaēyaexanatsi Jesús petēpaejavavecua. Jesús baja nexata icatsia apo tēpae tsane itsamatacabijavabelia ata. Bajarapacuenē yabara baja cajena vaxaitsi yapētanetsi. Tsi-paji Dioso pejumelivaisibaxutota tajēvelia jumaitsi mapacueniaje: “Caexanaenatsi pacuenia baja cajena najumecapanepaeya jumaitsinē Davidpijinējavabelia,” jai Dioso pejumelivaisibaxutota bajayata Dioso pejumaitsijava Jesúsjavabelia. ³⁵ Bajaraxua yabara Jesús pejumaitsijava Diosojavabelia Salmosbaxutota icatsia jumaitsi mapacueniaje: “Nexēnatonē apo necopat-simē tsane taperabētsabanaejavabelia,” jai Salmosbaxutota. ³⁶ Davidpijinē abaxē itsa asaē tsaponaponae, jumecovēnētsiaponapona pacuenia Dioso itorobatsi. Bajaraxuacujinae Davidpijinē tēpa baja. Nexata Davidpijinē mēthētatsi pamojivimi pemēthēanē muxuneneta. Nexata Davidpijinē mēthēabelia perabētsabana baja. ³⁷ Itsiata baitsi jane Jesús, ponē Dioso icatsia asaēyaexanatsi, petēpaecujinae bajaraponē apo perabētsabanae

cajena mëthëabelia. ³⁸ Tajamonaë, bepayapëtaneme ponë yabara pacatsipaebatsi. Jesús raja pejamatabëcueneta Dioso baja pacavecuajibiaexana pibisiacuenë paneexanaeneconimi. ³⁹ Pajivi Jesús jumecovënëtsiana, bajarapajivi daxita pibisiacuenë pexanaeneconi Dioso vecuajibiaexanaenatsi Jesús pejamatabëcueneta. Pajivi apo jumecovënëtsicapanepeaë ata Dioso Moiséspijinëta penajumecopatsilivaisi, jamatabëjumaitsi: “Xanë baja jumecovënëtajë Dioso Moiséspijinëta penajumecopatsilivaisi. Nexata pibisiacuenë taexanaeneconi Dioso nevecuajibiaexanaena,” jamatabëjai, itsiata bajarapajivi pibisiacuenë pexanaeneconi Dioso apo vecuajibiaexanaetsi tsane. Tspaji Dioso Moiséspijinëta penajumecopatsilivaisi itsajivi ata apo jumecovënëtsicapanepeaë. ⁴⁰ Xania baja tsane. Xaniavaetsia pajinavana-paena pëpëcatocopiapatsiyaniva pacuenia Diosojumepaëbivi profetavi peyaquinaebaxutota tajëvelia jumaitsi. Tspaji raja profetavi peyaquinaebaxutota, tajëvelia jumaitsi mapacueniaje:

⁴¹ Panecapocaponaëvi, ¡xania baja pataename! Panajunaviacaename raja. Tspaji raja panevecuanaxuabianame. Panejinavanapaepatota xanë, Diosonë, exanaenajë ayaicuenë taexanaejavanë. Nexata taexanaejavanë pelivaisi, itsamonaë xaniavaetsia pacatsipaëbi ata tsane, itsiata apo pajumecovënëtsimë tsane, jai Diosojumepaëbivi profetavi peyaquinaebaxutota Dioso penaneconitsiaexanaejavanexa yabara pamonaë Dioso apo pejumecovënëtsivi, jai Pablo bajarapamonaëjavabelia judiövi penacaetuatabiabibota.

⁴² Pablobeje baja Bernabëbeje pitsapaejitsiabeje judiövi penacaetuatabiabibovecua. Nexata bajarajota pamonaë apo judiövi, junatatsibeje icatsia itsamatacabi judiövi penacueraevetsimatacabita petsipaëbinotxabeje bajarapalivaisi. ⁴³ Penacaetuatsivi baja naviaba judiövi penacaetuatabiabibovecua. Nexata Pablobeje Bernabëbeje judiövi penacaetuatabiabibovecua itsa pitsapabeje, jivi ayaibitsaëto pënaponatsibeje. Bajarapamonaëyajuvenëvi itsamonaë judiövi, itsamonaë apo judiövi. Pamonaë apo judiövi, bajarapamonaë catsiteca judiövicuënia Dioso pejumecovënëtsijava. Nexata Pablobeje Bernabëbeje muxujioabeje bajarapamonaë pevajënaeyabelia ajamatabëcuenesaëya pejumecovënëtavanapaenexa Dioso pitaxutotsoniatæjævatsi.

⁴⁴ Bajara jane xuacujinaë icatsia judiövi penacueraevetsimatacabita, bajarapatomarapijivi muxunanacaetuatsibeje ayaibitsaëtoxonetonë Dioso pitorobilivaisi penamuxunaevetsinexatsibeje. ⁴⁵ Nexata judiövi itsa tane bajarapajivibitsaëtoxonetonë Pablobeje Bernabëbeje pemuxunanacaetuatsijavatsibeje, judiövi bitso cuënaëbatsi. Nexata judiövi jumaitsi jivijavabelia pejumecovënëtsiyaniva bajarapalivaisi:

—Pacuenia Pablo pacatsipaëba, apo xaniajai cajena, jai judiövi Pablo petsipaëbilivaisi yabara.

Judiövi bitso pibisiacuenia baracuaicuaijaitsi Pablo. ⁴⁶ Itsiata Pablobeje Bernabëbeje ajumëjunavijibia tsipaëbaponabeje Dioso pitorobilivaisi. Jumaitsiibeje tsaponae mapacueniaje:

—Copiaya baja picani pacatsipaëbatsibeje Dioso pitorobilivaisi paxamë pajudiovimëjavabelia. Itsiata apo pajitsipaëmë bajarapalivaisi panejumecovënëtsinexa. Tspaji apo pajitsipaëmë panexainaenexa matacabi apo peverevereçajava. Paxanëbeje baja nexata pacavecuaponatsibeje patatsipaëbinexabeje bajarapalivaisi apo judiövijavabelia. ⁴⁷ Bajarapacuenia pacave-

cuaponatsibeje tsipaji baja pepo petuxanenē bajarapacuenia paneitoroba-beje. Dioso cajena pejumelivaisibaxutota tajēvelia jumaitsi mapacueniaje:

Caitorobianatsi nejamatabēcueneitayotsinexa pamonae apo judíovi. Baitsi jane tsipaebanajetarucaename tajumelivaisi daxitanacuanējava, nacuatubujava ata pejinavanapaevi, pecapanepaenexatsi pibisiacuene pexanaeconivecua,

jai Dioso pejumelivaisibaxutota, jai Pablo judíovijavabelia.

⁴⁸ Apo judíovi itsa jumetane bajarapacuenia Pablo pejumaitsijava, nexata apo judíovi jamatabēcuenebarēya. Nexata apo judíovi jumaitsi:

—Dioso cajena pitorobilivaisi pexanialivaisi bitso, jai.

Nexata jane baja apo judíovi ata jumecovēnēta Dioso, pamonae baja cajena tajēvelia Dioso itapeta matababi apo peveverecaejava pexainae nexa.

⁴⁹ Nexata jane baja daxita bajarapanacuata pejinavanapaevi jumetane Dioso pitorobilivaisi. ⁵⁰ Itsiata baitsi jane pajudíovi Pablobeje Bernabébeje cueneitoyatsibeje, muxubijiapenetsiaya barēcuaiquajai tomaraevetsivijavabelia, petuxanevi pijavajivijavabelia ata. Nexata bajarapamonae anaepana Pablobeje Bernabébejevavabelia. Nexata baja Pablobeje Bernabébeje capitsapatsibeje bajarapanacuvecua. ⁵¹ Nexata Pablobeje Bernabébeje bajarapatomarata nataxuatsapērēvarēbabeje. Bajarapacuenia nataxuatsapērēvarēbabeje bajarapatomarapijivi peyapētaenexa penaneconitsijava Diosojavabelia, apo pejumecovēnētsixae Dioso pitorobilivaisi. Bajaraxuacujinae Pablobeje Bernabébeje Iconio tomarabelia baja ponabeje. ⁵² Itsiata daxita pamonae Dioso pejumecovēnētsivi, Antioquía tomarata pejinavanapaevi, jamatabēcuenebarēya. Espíritu Santonua jamatabēcuenevēncavanapa. Nexata exanabiaba pacuenia Espíritu Santo itorobatsi.

14

Pacuenia Pablobeje Bernabébeje ponaponabeje Iconio tomarata yabara pelivaisi

¹ Iconio tomarata Pablobeje Bernabébeje judíovi penacaetuatabiibota najoneyabeje. Bajarajota xaniavaetsia tsipaebabeje Jesús pelivaisi. Nexata jivibitsaētoxaneto judíovi, apo judíovi ata, jumecovēnēta Jesús pelivaisi.

² Itsiata baitsi jane itsamonae judíovi, Dioso apo pejumecovēnētsivi, itoroba apo judíovi pianaepanaenexa Jesús pelivaisi pejumecovēnētsivijavabelia.

³ Bajarapacuenie peyapētaexabeje, Pablobeje Bernabébeje bajayajebi ponaponabeje bajarajota. Tsipaebabiababeje ajumejunavijibia Jesús pelivaisi. Tsipaji yapētanebeje Dioso peyavaponaponaejavatsibeje. Nexata daxitajivi yapētaeyaxanaponabeje Dioso pitaxutotsoniataejavatsi bajarapamonae. Nexata daxita bajarapamonae yapētane Jesús pelivaisi pexaniajailivaisicuenie. Tsipaji bajaraponēbeje ayaicuenie pexanaejava Dioso pesaēta exanaponabeje. ⁴ Itsiata bajarapatomarapijivi apo najamatabēcuenejēpae. Itsamonae jitsipa pejumecovēnētsinexa judíovi petsipaebilivaisi. Itsamonae jitsipa pejumecovēnētsinexa apóstolenēbeje petsipaebilivaisi. ⁵ Nexata judíovi, apo judíovinia, tomara pevetsivinia, jamatabēbijatanetsibeje Pablobeje Bernabébeje. Jamatabētseconatsibejenua ibotonēta. ⁶ Nexata Pablobeje Bernabébeje nayajumetanebeje pacuenia exanaejitsiatsibeje. Nexata vecuanajetabajiravabeje Listra tomarabelia, Derbe tomarabelia ata. Bajarapatomarabeje

ecabeje Licaonia nacuata. Bajarapatomarabeje pepënëya penaetomaraxi-
java ata najetarucabeje. ⁷ Daxita bajaraxuayo tsipaebanajetarucabeje pexa-
nialivaisi, Jesús pelivaisi.

Pacuenia Pablo ibotonëta tseconatsi Lистра tomarata yabara pelivaisi

⁸ Lистра tomarata naeca petaxucuenabinëtsi. Penaexanaejavaveliacujinae
apo ponaponae caeto ata. ⁹ Bajaraponë najumetaeyeca Pablo
petsipaebilivaisi. Nexata Pablo naitaxutobabatsiaya naëcota
bajaraponëjavabelia. Nexata Pablo jamatabëcueneyapëtane petaxu-
cuenabinëtsi pejamatabëjumaitsijava: “Dioso pepacune caëjëpatsi
tanetaxuxanepanaeyaexanaenexa,” pejamatabëjajjava. ¹⁰ Nexata Pablo
pinijijumeta jumaitsi petaxucuenabinëtsijavabelia:

—Nonotapunare. Ponaponare baja, jai Pablo.

Nexata bajaraponë jirevapuna. Ponapona baja. ¹¹ Jivibitsaëttoxanetonë
itsa tane Pablo petaxuxanepanaeyaexanaejava petaxucuenabinëmitsi, nex-
ata bajarapamonae pijajumeta, Licaoniajumeta, pinijijumeta jumaitsi ma-
pacueniaje:

—¡Diosonëbeje cajena! ¡Bevaxaitsi jivitonëbejecuenia patsica vaxaitsijavabet-
sica! jai bajarapamonae.

¹² Bajarapanacuapijivi xaina pijadiosovi. Itsiata apo pepo diosovi.
Nexata Bernabë tanetsi beZeusvënëdiosonë. Pablo pijinja tanetsi be-
Hermesvënëdiosonë. Tsipaji Pablo penamatacanajetarucaenë. Nexata jivi
barëcuai cuajjai tsabiabi. ¹³ Zeusvënëdiosonë pijatemplobo eca Listratomara
jumaverena, Lистра tomarabelia pejonebaupa imoxoyovecua. Nexata sacer-
dotenë, Zeusvënëdiosonë pijatemplobota penacuenebabiabinë, capata
torobitsaëto Lистра tomarabelia pejonebaupajavaberena. Bajarapatorobit-
saëto matabocoitabëtsiaya tsmataruba pematono. Nexata sacerdotenë,
Lистра tomarapijivi yajava, tobejitsiatsibeje picani bajarapatorobitsaëto
Pablobeje Bernabëbeje ofrendacuenia bajarapavi petotajuitsinexatsibeje.
Bajarapacuenia picani totajuitsijitsiatsibeje tsipaji bediosonëbeje tanetsi-
beje. ¹⁴ Nexata Bernabëbeje Pablobeje itsa jumetanebeje bajarapacuenie
petoexanaejavanexatsibeje, apo jitsipaebeje. Nexata penaxatatsijavabeje
mëpabëtittinaxuabarecabeje. Tsipaji Dioso apo pejitsipacuenia bajarapa-
monae toexanaejitsiatsibeje. Nexata cujinaejinaliabeje jivibitsaëttoxanetonë
penacaetuanajavabelia. Nexata bajarapajivibitsaëttoxanetonë tuatuajëta
nucabeje. Pinijijumeta Pablo jumaitsi:

¹⁵ —¿Detsa xuajitsia bajarapacuenie panetoexanaejitsiamë? Paxanëbeje
ata raja saya pajivitonënëbeje. Pacuenia paxamë pajamatabëcuenieitsimë,
bajara saya paxanëbeje ata patajamatabëcuenieitsinëbeje. Papatajopajëbeje
patacatsipaebinexabeje pexanialivaisi. Panajamatabëcuenepënëyorore ba-
jarapacuenia paneexanabiabijavavecua panejumecovënëtsinexa pepo Dioso
apo peyamatacabiavereverecaenë. Dioso raja daxitacuenie pexanaenë.
Exana mapanacuaje, mapanacuapijicuenie yajava. Exana itaboxo ata,
itaboxopijicuenie yajava. Exana manuanene ata, manuanenepijicuenie
yajava. ¹⁶ Dioso copata vajavajënaeya daxitanacuapijivi pejinavanapaenexa
pijacuata penatojitsipacuenia. ¹⁷ Nexata Dioso daxitacuenie pexanae-
java, nacobecovëtaeyaexanabiaba daxitajivijavabelia. Nexata picani ba-
jarapamonae becanaëjëta Dioso peponaponaejava. Tsipaji Dioso pexani-
acuenie toexanabiaba bajarapomonaemijavabelia. Bajara icatsia pacue-
nia vaxaitsijavaberena ata pexaniacuenie Dioso nacatoexana. Ema naca-
torunaeyaexanabiabica. Nexata vajuabijava nacatonaxaniabiaexanabi-

aba. Nexata bajarapacuenia vajaxaejava nacarajutabiaba. Nacajamatabêcuenebarëyayaexananua, jai Pablo pamonaiejavabelia picani torobitsaeto tobejitsiatsibeje.

¹⁸ Bajarapacuenia Pablo jumaitsi ata, itsiata picani bajarapamonae jamatabêtobiatsibeje torobitsaeto petotajuitsinexatsibeje bajarapavi ofrendacuenia Pablobeje Bernabêbejenexa. Itsiata baja belia copatsiaexanabeje.

¹⁹ Nexata judiövi, Dioso apo pejumecovênëtsivi, parena Antioquia tomaraverena, Iconio tomaraverena ata. Bajarapajudiövi Listra tomarapijivijavabelia najumetsënëtsiaya neconitatsibeje Pablobeje Bernabêbeje pebaraanaepanaenexatsibeje. Nexata Listra tomarapijivi ibotonëta tseconatsi Pablo. Bajaraxuacujinae tomarapënëyabelia robobocaliatsi. Tsipaji baja bepetëpaenë taeyabuataatsi. ²⁰ Itsiata baitsi jane Dioso pejumecovênëtsivi Pablo matatoyorotsia itsa taenubenatsi pexuababuatsijavatatsi, nexata Pablo nonotapuna icatsia. Icatsia Pablo caevëa jonena Listra tomaraberena. Meravia pitsijavata Pablobeje Bernabêbeje ponabeje baja Derbe tomarabelia.

²¹ Nexata Derbe tomarata tsipaebaponaponabeje pexanialivaisi, Jesús pelivaisi. Nexata jumecovênëtsibeje jivibitsaëtoxaneto. Bajaraxuacujinae icatsia naviatanajetarucabeje Listra tomarajava, Iconio tomarajava ata, Antioquia tomarajava ata. ²² Bajarapatomaranëjava Jesús pelivaisi tsipaebanajetarucabeje pejamatabêcuene asaëyaexanaponaenexabeje Dioso pejumecovênëtsivi. Muxujibaponabeje bajarapamonae pevajënaeyabelia ajamatabêcuenesaëya pecatsitecaenexa Dioso pejumecovênëtsijava. Pablobeje Bernabêbeje jumai tsaponabeje Dioso pejumecovênëtsivijavabelia:

—Dovathi pejamatabêcueneta, pinijicuenia nacajamatabêcuenejëtaponae na daxita vajajonevinexa Dioso pijanacuayabetsia, jaiabeje tsaponae Dioso pejumecovênëtsivijavabelia.

²³ Caebitsaeto canacujitsia, Dioso pejumecovênëtsivijava, toitapetaponabejenua ancianovinexa, Dioso pejumecovênëtsivi pevetsivinexa. Nexata itsa pabitsaëtojavata toitapetsijitsibeje, penacaetuatsivajënaeya apo xaeyabiabeje pexaejava. Nexata penacaetuatsijavata itsa toitapetabeje, japasa tovajëtabiabeje Diosojavabelia bajarapamonae peyavenonaenexatsi Dioso. Jumai tsabiabiabeje Diosojavabelia:

—Diosomë, xaniavaetsia yavenonaename mapaancianovije xaniavaetsia pecatoevetsinexa nijajivi, jaiabeje tsabiabi Diosojavabelia.

Pacuenia Pablobeje Bernabêbeje naviatabeje Antioquia tomarabelia, Siria nacuata peecaetomarabelia, yabara pelivaisi

²⁴ Pablobeje Bernabêbeje Pisidianacua pexenetsicujinaeabeje, patabeje Panfilia nacuayabelia. ²⁵ Nexata Panfilia nacuata, Perge tomarata, Dioso pitorobilivaisi jivi tsipaebabeje. Bajaraxuacujinae icatsia patabeje Atalia tomarata. ²⁶ Nexata Atalia tomarata naropotabeje barcota. Menia jane baja ponabeje. Naviatabeje jane baja Antioquia tomarabelia. Tsipaji baja cajena pamatacabi taxuxuabijitsibeje Dioso pitorobilivaisi jivi petsipaebanajetarucaenexabeje, naropotabeje Antioquia tomarata. Nexata pamatacabi naropotabeje Antioquia tomarata, penaropotsivajënaeyabeje, Dioso pejumecovênëtsivi tsimatianacobeuatatsibeje Dioso peyavenonaponaenexatsibeje jivi petsipaebanajetarucaejavatabeje Dioso pitorobilivaisi. Pablobeje Bernabêbeje Antioquia tomarata patabeje. Tsipaji baja toveretabeje daxita pacuenia Dioso itorobatsibeje. ²⁷ Itsa baja Antioquia tomarata patabeje,

junatabeje penacaetuatsinexa daxita Dioso pejumecovënëtsivi. Nexata bajarapamonaejavabelia tsipaebabeje daxita Dioso peyavenonaponaejavatsibeje. Tsipaebabejenua apo judíovi ata pejumecovënëtsijava Dioso pitorobilivaisi. Tsipaji baja cajena Dioso tocopata apo judíovi ata pejumecovënëtsinexa bajarapalivaisi. ²⁸ Pablobeje Bernabébeje Antioquía tomarata bajayajebi naponaponabeje Dioso pejumecovënëtsivijavata.

15

Pacuenia apóstolevi, ancianovi yajava, nacaetuata Jerusalén tomarata yabara pelivaisi

¹ Pamatacabi Pablobeje Bernabébeje ponaponabeje Antioquía tomarata, judíovi, Judea nacuaverena peponaevi, pata Antioquía tomarata. Nexata bajarapamona Dioso pejumecovënëtsivijavabelia livaisi tsipaeba. Petsipaebijavata bajarapamona jamatabëcuenenavëxaniabiaya jumaitsi mapacueniaje:

—Panamatavenoname paxamë ata papecaperabëcaucubinexa pacuenia Dioso Moiséspijinëta najumecopata. Itsa jume, nexata acuenebi tsane papecapanepaejava Diosojavabelia, jai tsaponae judíovi, pepatsivi Judea nacuaverena.

² Bajarapacuenia pejumaitsaonaexae, nexata Pablobeje Bernabébeje pinijicuenia namataenetsia barënajumenotabeje pajudíovi pata Judea nacuaverena. Nexata Antioquía tomarapijivi Dioso pejumecovënëtsivi, Pablobeje Bernabébeje itapetatsibeje pitorobinexatsibeje Jerusalén tomarabelia. Nexata Pablobeje Bernabébeje yajavaponabeje Dioso pejumecovënëtsiviyajuvëñevi. Itorobatsibeje peyanijobinexabeje peperabëcaucubicuene yabara apóstolevijavabelia, ancianovijavabelia ata, Jerusalén tomarata pejinavanapaevijavabelia.

³ Itorobatsibeje Dioso pejumecovënëtsivi. Nexata Pablobana ita pona, najetarubena Fenicia nacujava, Samaria nacujava ata. Bajaraxuayo Dioso pejumecovënëtsivijavabelia tsipaebaona apo judíovi ata pijaperujujamatabëcuene pecopabijava, pejumecovënëtsinexa Dioso. Nexata daxita Dioso pejumecovënëtsivi jamatabëcuenebarëya ita jumetane bajarapalivaisi.

⁴ Pablobana ita pata Jerusalén tomarabelia, Dioso pejumecovënëtsivi, apóstolevinua, ancianovinua, xaniavaetsia copiapitatsi. Nexata Pablobeje Bernabébeje bajarapamonaejavabelia tsipaebabeje daxita Dioso peyavenonaponaejavatsibeje pamatacabi Dioso pitorobilivaisi jivi tsipaebanajetarucabeje. ⁵ Nexata fariseovi, Dioso pejumecovënëtsivi, nonobapuna. Fariseovi jumaitsi mapacueniaje:

—Dioso pejumecovënëtsivi apo judíovi ata, namatavenona peperabëcaucubinexatsi. Namatavenonana bajarapamona pejumecovënëtsinexa Dioso Moiséspijinëta penajumecopatsilivaisi, jai fariseovi Dioso pejumecovënëtsivi.

⁶ Nexata nacaetuata apóstolevi, ancianovi yajava, apo judíovi ata peperabëcaucubijavatsi yabara penabarëcuaiicujainexa. ⁷ Bajayajebi baja namataenetsia penabarëcuaiicujainexa, nexata Pedro nonotapuna. Jumaitsi:

—Tajamona, payapëtaneme rabaja mapacuneje. Xañë baja cajena bajaya Dioso nitapeta, paxamëyajuvënëñë, apo judíovijavabelia tatsipaebinxexa pexanialivaisi, Jesús pelivaisi. Nexata apo judíovi ata Dioso papanepaenexatsi Jesús pelivaisi ita jumecovënëta. ⁸ Dioso cajena daxitajivi pejamatabëcuenyapëtaenë. Yapëtanetsi Dioso aneconijibia petaejava apo judíovi ata. Yapëtanetsi bajarapacueni tsipaji apo judíovi ata

Dioso rajuta Espíritu Santo. Pacuenia vaxaitsi judíovitsi Dioso nacarajuta Espíritu Santo, bajara pijinia pacuenia Dioso rajuta Espíritu Santo apo judíovi ata. ⁹ Pacuenia vaxaitsi judíovitsi Dioso nacajitsipa, bajara pijinia pacuenia Dioso jitsipa apo judíovi ata. Bajaraxuata apo judíovi ata pibisiacuene pexanaeconimi Dioso vecuaajibiaexanatsi Jesús pelivaisi pejumecovënëtsixae. ¹⁰ Pëtsa pajumeaebame Dioso aneonijibia petaejava apo judíovi ata. Pëtsa bajarapamonae paitorobame pejumecovënëtsinexa piayapëbejelivaisi, Dioso Moiséspijinëta penajumecopatsilivaisi. Tsipaji bajarapalivaisi vaxaitsi ata apo nacacaëjêpae vajajumecovënëtsinexa. Vajasalinaivimi ata apo caëjêpaetsi pejumecovënëtsinexa bajarapalivaisi. ¹¹ Vaxaitsi baja jumecovënëtsi Jesús pelivaisi. Nexata vajatuxanenë Jesucristo pejamatabëcueneta Dioso vajanacaitaxutotsoniataexae, nacapanepaena pibisiacuene vajaexanaeconivecua. Bajara pijinia pacuenia apo judíovi ata Jesucristo pejamatabëcueneta Dioso capanepaenatsi pibisiacuene pexanaeconivecua, jai Pedro apóstolevijavabelia, ancianovijavabelia ata.

¹² Dioso pitorobilivaisi Bernabébeje Pablobeje apo judíovijava itsa tsi-paebanajetarucabeje, Dioso pesaëta pinijicuene pexanaejavanë exanaponabeje. Nexata bajaraxua Bernabébeje Pablobeje itsa navajunupaebabeje, daxita apóstolevi, ancianovi ata, moya ena. Xaniavaetsia namuxunaevetena. ¹³ Itsa baja Pablobeje Bernabébeje najumeveretabeje petsipaebijavabeje, nexata Santiago jumaitsi apóstolevijavabelia, ancianovijavabelia ata:

—Tajamonae, panenamuxunaevere. ¹⁴ Simón Pedro raja nacatsipaeba Dioso aneonijibia petaejava apo judíovi ata pecapanepaenexa pibisiacuene pexanaeconivecua Jesús pelivaisi itsa jumecovënëta. ¹⁵ Bajarapacuenia apo judíovi ata aneonijibia Dioso petaejavanexa yabara, bajayata tajëvelia Diosojumepaebivi profetavi peyaquinaelivaisita vajunupaeba baja cajena. Dioso pejumaitsijava apo judíovi yabara Dioso pejumelivaisibaxutota jumaitsi mapacueniaje:

¹⁶ “Bajayata abaxë pamatacabi Davidpijinë evetaponapona Israelnacua, xaniavaetsia jivi nejumecovënëttavanapa. Bajara icatsia pacuenia jivi xaniavaetsia tanejumecovënëttavanapaenexa, yavenonaenajë. ¹⁷ Nexata apo judíovi ata, daxita pamonaë junatsianajë tajajivinexa, bajarapamonae ata jitsipaena tanejumecovënëtsinexa,” jai bajayata Dioso mapacueniaje. ¹⁸ Dioso baja cajena tajëvelia yapëtaeyaexana daxita mapacuene yabaraje,

jai profetavi peyaquinaelivaisita, jai Santiago apóstolevijavabelia, ancianovijavabelia ata.

¹⁹ Icatsia Santiago jumaitsi apóstolevijavabelia, ancianovijavabelia ata:

—Nexata xanë jamatabëitsinë mapacueniaje. Apo jamatabëitonotsi tsanetsi baja matavëjêa apo judíovi, pamonaë baja najamatabëcuenepënëyorota Diosojavabelia. ²⁰ Itsiata baitsi jane caelivaisiyobeje toyaquinaenatsi cuyalatobaxutota vajayapëtaeyaexanaenexa bajarapamonae. Itsamonae xaina pecobeta saya jumapecataeya pexanaenëanë bepíjadosovi petaenexa. Nexata bajaraxunanëjavabelia ofrendacuena pevi perajutsinexa, tobeyabiaba baca, oveja ata. Toyaquinaenatsi bajarapayajuvënëvi pexaeyaniva. Toyaquinaenatsinua daxita pebijivi peyapëtaenexa, daxita petiriavi ata peyapëtaenexa. Papebijivi baja nacojioba, pematayajibiyanivatsi itsavajavabelia pijavavecua. Papebijivi pijinia abaxë apo nacojiobi, pematayajibiyanivatsi petirivajavabelia. Bajara pijinia pacuenia petiriavi ata. Papatiriavi baja nacojioba, pematayajibiyanivatsi

itsanëjavabelia pamonavecua. Papetiriavi pijinia abaxë apo nacojiobi pematayajibyanivatsi pebijavabelia. Toyaquinaenatsinua bajarapamonae pexaeyaniva cuibocuetsacaeya pebeyaxuabinë pevi, pexaeyaniva peja ata. Bajarapacuenia toyaquinaenatsi apo judíovi ata Dioso pejumecovënëtsivi peyapëtaenexa xua vaxaitsi judíovitsi cujanavatsi. Nexata itsamatacabijavabelia ata apo judíovi pejamatabëcuenebijianaeyaniva judíovijavabelia. ²¹ Tsipaji bajarapalivaisi Dioso Moiséspijinëta penajumecopatsijavaveliacujinae, vajasalinaivimi caetomara canacujitsia itavetabiabatsi bajarapacueni. Itavetabiabatsi bajarapacueni penacueraevetsimatacabianë canacujitsia penacaetuatabiabibonëjava, jai Santiago apóstolevijavabelia, ancianovijavabelia ata.

²² Nexata daxita apóstolevi, ancianovinua, daxita Dioso pejumecovënëtsivinua, najamatabëjēpa penaitapetsinexa bajarapamonae yajuvënëvi pitorobinexa Antioquia tomarabelia Pablobeje Bernabébeje pepëta. Nexata itapetatsibeje Silasbeje Judasbeje. Judas vënërubatsi itsavënë, Barsabás. Bajaraponëbeje Dioso pejumecovënëtsivi penamatacaitorobivi yajuvënënebeje. ²³ Pacuyalatobaxuto bajaraponëbeje tocaponaejitsiabeje Antioquia tomarapijivijavabelia, Siria nacuapijivijavabelia ata, Cilicia nacuapijivijavabelia ata, jumaitsi mapacueniaje:

—Tajamonae, paxanë paapóstolevinë, pacajamatabënajinaliatsi. Vajamonae ancianovi ata pacajamatabënajinalia. Pacajamatabënajinaliatsi daxita apo pajudíovimë, Antioquia tomarata panejinavanapaevi. Paxamë ata Siria nacuata panejinavanapaevi, pacajamatabënajinaliatsi. Paxamë ata Cilicia nacuata panejinavanapaevi, pacajamatabënajinaliatsi. ²⁴ Pavënëlivaisitaniji pacuenia pacajumaitsi paxanë yajuvënëvi papecasivaxainaevilia. Bajarapamonae pina nexata pacanajamatabëcuene epatajërëcaeyaexanapona. Tsipaji pina bajarapamonae pacajumaitsi: “Panamatavenoname paxamë ata papecaperabëcaucubinexa. Panamatavenonamenua panejumecovënëtsinexa Dioso Moiséspijinëta penajumecopatsilivaisi,” pacajai pina. Pamonae pacajumaitsi bajarapacuenia, paxanë cajena apo paitorobinë paxamëjavabelia. ²⁵ Nexata paxanë patanacaetuatsijavata, panajamatabëcuenejēpajē pataitapetsinexa ponëbeje paitorobijitsianë paxamëjavabelia pecaponaenexabeje patacatoyaquinaelivaisi. Bajaraponëbeje naliabeje Bernabébeje Pablobeje pepëta. ²⁶ Vajabananëbeje, Bernabébeje Pablobeje, bitso vaxaitsi asivatsi. Bajaraponëbeje vajatuxanenë Jesucristo pejumelivaisi yabara itsamonae jamatabëbeyaxuababiabi atatsibeje, tsiata ajamatabëcuenesaëbeje tsaponapona. ²⁷ Nexata bajaraponëbeje pepëta pacatoitorobatsi Judasbeje Silasbeje. Nexata Judasbeje Silasbeje xaniavaetsia pacatsipaebiana pacuene yabara pacatoyaquinatsi cuyalatobaxutota. ²⁸ Itsa panacaetuatajē Espiritu Santo paneyavenona patayapëtaenexa peyapëxanepanaelivaisi patacatoitorobinexa panejumecovënëtsinexa. Nexata baja apo panamatavenonamë panejumecovënëtsinexa piayapëbejelivaisi, palivaisi daxita pajudíovinë pajumecovënëtajē. Pacaitorobatsi palivaisi bitso panamatavenoname panejumecovënëtsinexa. ²⁹ Pecobeta saya jumapecataeya pexanaenënejavabelia ofrendacuenia pevi perajutsinexa itsamonae itsa tobia baca, oveja ata, pëtsa paxaneme bajarapayajuvënëvi. Pëtsa paxaneme peja. Pëtsa paxaneme cuibocuetsacaeya pebeyaxuabinë pevi. Papebijivi baja nacojioba, pëtsa matayajibatsi itsavajavabelia pijavavecua. Papebijivi pijinia abaxë apo

nacojiobi, pëtsa matayajibatsi petirivajavabelia. Bajara pijinia pacuenia petiriavi ata. Papetiriavi baja nacojioba, pëtsa matayajibatsi itsanëjavabelia pamonavecuu. Papetiriavi pijinia abaxë apo nacojiobi, pëtsa matayajibatsi pebijavabelia. Itsa pejumecovënëtime bajarapalivaisi, nexata xaniavaetsia pajinavanapaename. Bajara saya palivaisiyo pacatoyaquinatsi, jai apóstolevi, ancianovi yajava, apo judiovijavabelia petoyaquinaebaxutota Jerusalén tomaravelia.

³⁰ Nexata jane baja bajarapacuyalatobaxuto petocaponanexabeje apo judiovijavabelia, Judasbeje Silasbeje itorobatsibeje penaponanexabeje Pablobeje Bernabébeje pepëta. Nexata baja naponabeje. Bajarapamonae pata Antioquia tomarabelia. Nexata Antioquia tomarapijivi junata daxita Dioso pejumecovënëtsivi penacaetuatsinexa. Nexata penacaetuatsijavata rajutabeje bajarapacuyalatobaxuto. ³¹ Antioquia tomarapijivi itsa leba bajarapacuyalatobaxuto, bajarapamonae bitso jamatabëcuenabarëya. ³² Judasbeje Silasbeje Diosojumepaebinëbeje profetanëbeje. Nexata ayailivaisi tsipaebabeje Antioquia tomarapijivijavabelia. Nexata baja bajarapamonae ajamatabëcuenesaë Diosojavabelia pejumetaexae palivaisi tsipaebabeje Judasbeje Silasbeje bajarapamonaejavabelia. ³³ Bajayajebi baja Antioquia tomarata Judasbeje Silasbeje naponaponabeje. Bajaraxuacujinae Dioso pejumecovënëtsivijavabelia xaniavaetsia napëjjobabeje penaviatsinexabeje baja pitorobivitsijavabelia. ³⁴ Pepuanapëjjobibeje baja, Silasbeje abaxë itsiata icatsia nacopatabeje bajarajota. ³⁵ Pablobeje Bernabébeje ata abaxë ponaponabeje Antioquia tomarata. Dioso pitorobilivaisi tsipaebaponaponabeje. Itsamonae Dioso pejumecovënëtsivi yajavaponaponabeje Dioso pitorobilivaisi penajuatsipaebabiabinexa.

Pacuenia icatsia Pablo cotocaevi panamuto pona jivi icatsia petsipae-binexa Dioso pitorobilivaisi yabara pelivaisi

³⁶ Antioquia tomarata Pablobeje Bernabébeje bajayajebi ponaponabeje. Pablo jumaiti Bernabéjavabelia:

—Ponatsibeje icatsia vajataenexabeje vajamonae Dioso pejumecovënëtsivi. Daxita tomaranëjava, itsaxuayo baja imata tsipaebanajetarucatsibeje Dioso pitorobilivaisi, bajaraxuayo icatsia najetarucaenatsibeje. Taenajetarucaenatsibeje pacuenia jinavanapa bajarapamonae, jai Pablo Bernabéjavabelia.

³⁷ Bernabé nexata bitso jitsipa pebarëponanexabeje icatsia Juan, ponë venërubatsi itsavënë, Marcos. ³⁸ Itsiata bailsi jane Pablo apo jitsipae baja icatsia Marcos pebarëponanexabeje. Tspaji imata copiaya panamuto barëponabeje picani, Marcos epatua naviateca Panfilia nacuata. Nexata Marcos xaniavaetsia apo yavenonaeyaveretsi Dioso pitorobilivaisi jivi petsipaebaponaejava. ³⁹ Nexata Pablobeje Bernabébeje apo najamatabëcuenëjëpaebeje Marcos pebarëponaejavabejenexa yabara. Nexata baja Pablobeje Bernabébeje navecuanatsatabeje. Bernabé jane baja nexata Marcos barëpona. Velapanata peponaebarcota Bernabébeje Marcosbeje naponabeje. Nexata nicababeje Chipretunaeto nacuyabelia. ⁴⁰ Nexata pijinia Pablo itapeta Silas peyanatsinexatsi. Dioso pejumecovënëtsivi tovjätatsibeje Diosojavabelia peyavenonaponanexatsibeje penajetarucaejavabeje. ⁴¹ Nexata Pablobeje Silasbeje Siria nacujava, Cilicia nacujava ata, Dioso pitorobilivaisi jivi tsipaebanajetarucabeje. Nexata bajarapanacuanëpijivi Dioso pejumecovënëtsivi, caebitsaëto canacujitsia, Diosojavabelia ajamatabëcuenesaë tsaponae.

16

Pacuenia Timoteo Lистра tomarata nanaropota Pablobeje Silasbeje pepëta yabara pelivaisi

¹ Pablobeje Silasbeje patabeje Derbe tomarata. Patabeje Lистра tomarata ata. Lистра tomarata caxitajarababeje Dioso pejumecovënëtsinë, Timoteo. Timoteo pena judíova, Dioso pejumecovënëtsiva. Itsiata baitsi jane Timoteo paxapijinë griegonë. ² Daxita Dioso pejumecovënëtsivi, Lистра tomarapijivi, Iconio tomarapijivi ata, Timoteo yabara jumai tsabiabi:

—Timoteo raja xaniavaetsia Dioso jumecovënëtaponapona, jai tsabiabi.

³ Pablo jitsipa Timoteo pebarëponaejava. Nexata Pablo Timoteo pebarëponaevajënae, judíovi pijacuenia perabëcaucutsiaexana. Baitsi boupiperabëcaucutsiaexana. Bajarapacuenia Pablo perabëcaucutsiaexana pebaraanaepanaeyanivatsi pevëna judíovi. Tsipaji itsaxuayo barënajetarucæjitsia, judíovi penaperabëcaucubivi jinavanapa. Nexata judíovi apo jitsipae peyavajinavanapaejava apo peperabëcaucutsinëtsi. Nexata Pablo Timoteo perabëcaucutsiaexanaenejeva itsa barënajetarucæjitsipa bajarapamonaejava, yapëtaejitsipatsi Timoteo, apo peperabëcaucutsijavatsi. Tsipaji Timoteo paxapijinë griegonë, apo peperabëcaucutsinëtsi. ⁴ Pablobana tomaranëjava itsa najetarubena, caetomarapijivi canacujitsia, tsipaebapona Dioso pejumecovënëtsivijavabelia palivaisi toyaquinatsi Jerusalén tomaraverena. Tsipaebanajetarubena caetomarapijivi canacujitsia pejumecovënëtsinexa pacuenia apóstolevi, ancianovi ata, itorobatsi Jerusalén tomaraverena. ⁵ Bajaraxuata Dioso pejumecovënëtsivi, caebitsaëto canacujitsia, bitso ajamatabëcuenesaë tsaponae Diosojavabelia. Caematacabi canacujitsia Dioso pitorobilivaisi ayaibitsaëto jumecovënëtapona.

Pacuenia Pablo bemajitsinaebota tane Macedonia nacuapijinë yabara pelivaisi

⁶ Espíritu Santo apo tocopatsitsi Pablobana petsipaebinexa Dioso pitorobilivaisi Asiavënë nacuata. Bajaraxuata Pablobana najetarubena Frigia nacujava, Galacia nacujava ata. ⁷ Pablobana itsa najetarubena Misianacua muxubërëa, jamatabëpata picani Bitinia nacujava. Itsiata baitsi jane Espíritu Santo apo tocopatsitsi pepatsinexa Bitinia nacujava. ⁸ Nexata Misianacua canacujitsialia roviaalia ponalia. Pata Troas tomarabelia. ⁹ Nexata Troas tomarata meravi Pablo bemajitsinaebota taenuta Macedonia nacuapijinë. Macedonia nacuapijinë asaëyata jumaitsi Pablojavabelia:

—Naxanitsia. Macedonia nacuayabelia ponare. Paneyavenonaename, jai Macedonia nacuapijinë.

¹⁰ Pablo bemajitsinaebota petaenutsicujinae Macedonia nacuapijinë, bepíjia paxaniavaetajë patajavavaxi patanicabinexalia Macedonia nacuyabelia. Nexata panajumaitsinë:

—Xaniajai cajena. Dioso nacaitoroba Macedonia nacuapijivijavabelia vajatsipaebinexa pexanialivaisi, Jesús pelivaisi, panajanë.

Pacuenia Pablobeje Silasbeje ponaponabeje Filipos tomarata yabara pelivaisi

¹¹ Troas tomarata panaropobajë. Panaponajë barcota. Roviaalia panayanicabaliajë patapatsinexa Samotratiatunaeto nacuyabelia. Troas tomarata patanaropobicujinae, meravia pitsijavata, panapatajë Neápolis tomarabelia.

¹² Bajaraxuacujinae matatsënä paponajë Filipos tomarabelia. Filipostomara Macedonia nacuata eca. Filipostomara daxita tomaranëvecua ayaitomaraxaneto. Filipos tomarata najinavanapa ayaiBITSÄETOXANETO Roma tomaraverena pepatsivi. Bajarapatomarata panajinavanapajë caematacabimaxëto. ¹³ Nexata abaxë itsa panajinavanapajë Filipos tomarata, judíovi penacueraevetsimatocabita papitsapajë tomarapënëyabelia. Paponajë mene itapayavelia patajaitsinexa itsajota nacaetuatabiaba judíovi pevajëcabiabinexa Diosojavabelia. Nexata mene itapaya itsa pajaitanajetarubena, petiriavi penacaetuatenaevi mene itapata, patayejebajë. Nexata pajamatabëjumaitsinë:

—Bajara macovë jotaje judíovi nacaetuatabiaba pevajëcabiabinexa Diosojavabelia, pajamatabëjanë.

Nexata bajarajota panaenajë. Nexata bajarajota Dioso pitorobilivaisi pat-sipaebajë petiriavijavabelia. ¹⁴ Bajarapapetiriavijavuvënëva pevënë Lidia. Bajarapova Tiatira tomarapijiva, penamatamotsipapaëbërë, perajejaipa-paëbërë, pecanajetabiabiva. Dioso bitso pejumecovënëtsiva. Bajarapova panenamuxunaeveta xaniavaetsia. Dioso jamatabëcueneyavenonatsi. Nexata bajarapova jumecovënëta Pablo petsipaebilivaisi. ¹⁵ Bajaraxuacujinae bajarapova, pijabopijivi yajava, itsa bautisabatsi baja, bajarapova panejumaitsi:

—Itsa paxamë panetneme pepacuene Dioso tajumecovënëtsivacuene, nexata tajabota abaxë panajinavanapaename, panejai bajarapova.

Bitso bajarapova asaëyata panejunata patanajinavanapaenexa pijabota. Nexata panaponajë bajarapova pijaboyabelia bajarapova pijabota patanajinavanapaenexa.

¹⁶ Paponabiabajë mene itapayabelia Dioso pitorobilivaisi patatsipaebabiabinexa itsajota judíovi nacaetuanabiaba. Belia itsanamutota panemataenena petiriva, dovathi peyajavaponaponaeva. Bajarapadovathi pejamatabëcueneta tajëvelia petiriva yapëtaeyabiaba itsacuenejavaxi yabara. Bajarapova pijamonae pecanajetsivatsi pijatuxanevi amoneya petonacuenebabiabinexa. Nexata bajarapova pijumata pijatuxanevi ayaijava palata pitabiaba. Tsipaji itsajivi itsa yanijoba bajarapovajavabelia itsacuenejavayo yabara, bajarapova tajëvelia xaniavaetsia tsipaebabiaba. Nexata pacuena bajarapova tajëvelia jumai tsabiabi itsajivijavabelia, xaniajai tsabiabi. Nexata papalata matamotabiabatsi petsipaebabiabijamatabëcuene, pijatuxanevi pitabiaba. ¹⁷ Bajarapova nexata panepënanajetarucabiaba. Bajarapova pinijijumeta jumai tsanajetarucabiabi paxanë yabara:

—Mapapebijivije, athëbëtsatia peecaenë Dioso pijajivi. Pacatsipae-bapona papecacapanepaelivaisinexa pibisiacuene paneexanaeconeive-cua, jai tsanajetarucabiabi petiriva paxanë yabara.

¹⁸ Bajarapacuenia najuamatacabianë jumai tsanajetarucabiabi itsa panepënanajetarucabiaba. Nexata bitso Pablo pejamatabëitonotabiabixaetsi, belia napënyorotaxuaba bajarapovajavabelia. Jumaitsi:

—Dovathi, caitavetatsi Jesucristo pevënëta. Vecuapitsapare baja mapovaje, jai Pablo.

Bajarapacuenia Pablo pejumaitsijavata dovathi baja petiriva vecuapitsapatsi.

¹⁹ Nexata bajarapova pijatuxanevi yapëtane baja pecopiarucaejava bajarapova pijumata palata penotabiabijava. Nexata bajarapova pijatuxanevi

vaetabatsibeje Pablobeje Silasbeje. Robobocaponaliatsibeje tomara tuat-uajëabelia. Caponatsibeje tomara pevetsivijavabelia. ²⁰ Jivi penaneconitsiaexanabiabivi, juezmonae, pitabarata nutatsibeje. Pamona Pablobeje Silasbeje vaetabatsibeje, najumetsënëtsiaya jumaitsi juezmonaejavabelia Pablobeje Silasbeje yabara:

—Mara papebibeje judionëbeje. Anaepanaeyaexanaponabeje vajatomara-pijivi. ²¹ Tsipaebaponabeje vajanacuapijivi pejumecovënëtsinexa palivaisi vaxaitsi Romano nacuapijivitsi apo nacatocopatsi vajajumecovënëtsinexa, jai najumetsënëtsiaya bajarapamona Pablobeje Silasbeje yabara.

²² Nexata jivi ayaibitsaëttoxaneto baraanaepanatsibeje Pablobeje Silasbeje. Nexata juezmonae itoroba vajabitsaë Pablobeje Silasbeje penaxatsijavabeje pevejumajonotsinexatsibeje. Bajaraxuacujinae itoroba ayaicuenia pejumaconibabenexatsibeje naebota. ²³ Ayaicuenia pejumaconibabecujinaetsibeje, juezmonae icatsia itoroba vajabitsaë Pablobeje Silasbeje penaneconitsivi pejebabiabibota peetsinexatsibeje. Bajaraxuacujinae icatsia juezmonae itoroba penaneconitsivi pejebabiabibo pevetsinë Pablobeje Silasbeje xaniavaetsia pevetsinexatsibeje penaneconitsivi pejebabiabibo ënëtuatuajëta. ²⁴ Penaneconitsivi pejebabiabibo pevetsinë juezmonae pitorobixaetsi xaniavaetsia pevetsinexa, nexata penaneconitsivi pejebabiabibo pënëyatuucubijavanë, pecopiarucaejavatareca, Pablobeje Silasbeje etatsibeje. Peponaponaeyanivabeje penaitabarataeyaexanaetablapabeje tusatualia sixataliatsibeje. Bajaraxuacujinae xaniavaetsia yasicatarërëtsibeje cepovënëjavata.

²⁵ Nexata meravituatuajëta Pablobeje Silasbeje vajëtabeje Diosojavabelia. Diosojumevajianë naxëanecabeje Diosojavabelia. Itsamona pijinia penaneconitenaevi bajarapabota, jumetanetsibeje penaxëanecaejavabeje.

²⁶ Nexata jemata bajarapaepatota ira najëabapeneta pinijicuenia. Penaneconitsivi pejebabiabibo, daxitabo, nanequebeca. Caecuenia daxita baupanë nabaupana pijacuata. Daxita penaneconitsivi pacadenamaëttonëta cobecëbejebatsi, vecobeothopatsi. ²⁷ Penaneconitsivi pejebabiabibo pevetsinë naëcotapuna pemajitecaenëmi. Nexata itsa tane daxita baupanë penabaupanaevabeje, navemarajonotaxuabina pijaespada penabeyaxuabinexa picani. Tsipaji jamatabëjumaitsi:

—Daxita meta baja penaneconitsivi rëcëpeca. Nexata bajarapajamatabëcuene yabara nenaneconitsiaexanaena tomara pevetsivi, jamatabëjai.

²⁸ Nexata bajarajota itacarajeta Pablo pinijijumeta jumai tsaxuabi:

—Pëtsa nabeyaxuabame. Daxita raja patananeconitsivi panubenajë, jai Pablo.

²⁹ Nexata penaneconitsivi pejebabiabibo pevetsinë itoroba pijajivitonë petocarenanexatsi pitayotabiabijava. Nexata bepija tocarenatsi. Penaneconitsivi pejebabiabibo pevetsinë bitso neconecojai pecajunavi. Nexata bajaraponë pematabacabëta nucajunua Pablobeje Silasbeje pitabarata. ³⁰ Bajaraxuacujinae penaneconitsivi pejebabiabibo pevetsinë barëpitsapaliatsibeje Pablobeje Silasbeje. Penaneconitsivi pejebabiabibo pevetsinë jumaitsi:

—¿Detsa xua exanaenajë tanecapanepaenexa Diosojavabelia? jai Pablobeje Silasbejejavabelia.

³¹ Nexata Pablobeje Silasbeje jumaitsiibeje:

—Najamatabëcuenecopare pepo petuxanenë Jesucristojavabelia pecacapanepaenexa Diosojavabelia. Xamë nijabota pejinavanapevi

ata Jesucristojavabelia najamatabëcuenecopatsi pecapanepaenexatsi Diosojavabelia, jaibeje.

³² Nexata Pablobeje Silasbeje tsipaebabeje Dioso pitorobilivaisi bajaraponëjavabelia, daxita pijabota pejinavanapaevijavabelia ata.

³³ Penaneconitsivi pejebabiabibo pevetsinë bajarapaepatota, meravi, Pablobeje Silasbeje jumavajënëquiatatsibeje. Nexata bajaraponë,

pijabopijivi yajava, bautisababeje Pablobeje Silasbeje. ³⁴ Bajaraxuacujinae penaneconitsivi pejebabiabibo pevetsinë pijaboyabelia Pablobeje Silasbeje barëliatsibeje. Nexata pexaejava rajutatsibeje. Bajaraponë, pijabopijivi yajava, pinijicuenia jamatabëcuenebarëya Dioso pejumecovënëtsixae.

³⁵ Nexata pepo bajayacunua juezmonae itorobalia vajabitsaë penaneconitsivi pejebabiabibo pevetsinëjavabelia pejumaitsinexa: “Capitsapaename pina baja Pablobeje Silasbeje,” pejainexa. ³⁶ Nexata penaneconitsivi pejebabiabibo pevetsinë jumaitsi Pablojavabelia:

—Juezmonae rabaja netonajumeitorobarena patacacapitsapaenexabeje. Paponarebeje baja xaniavaetsia, jai penaneconitsivi pejebabiabibo pevetsinë.

³⁷ Itsiata baitsi jane Pablo jumaitsi juezmonae pitorobivajabitsaëvijavabelia:

—Juezmonae naneconita pijatuxanevijavabelia, paxanëbejejavaberenata. Tspaji abaxë copiata xaniavaetsia yapëtaenejeva paneconi paxainajëbeje, paxanëbeje paRomano nacuapijinë atanëbeje, juezmonae itoroba paxamëyajuvënëvi patanejumaconibabenexabeje daxita tomarapijivi pitabarata. Bajaraxuacujinae paneetabeje mapabotaje. Nexata aeconoxae juezmonae saya paxamë pacaitorobarena pepëya patanecapitsanaenexamëbeje. Juezmonae ponaerena pijacuata patanecapitsapaenexabeje, jai Pablo juezmonae pitorobivajabitsaëvijavabelia.

³⁸ Nexata vajabitsaë tsipaeba juezmonaejavabelia pacuenia Pablo jumaitsi. Nexata juezmonae itsa jumetane Pablobeje Silasbeje Romano nacuapijinëbejecuene, bitso jamatabëcuenenajunaviaca. ³⁹ Nexata juezmonae parena. Jumaitsi Pablobeje Silasbejejavabelia:

—Pauranë paxamëbejejavabelia vajabitsaë pataitorobixae pibisiacuene papecaexanaenexabeje, jai juezmonae.

Nexata juezmonae pijacuata Pablobeje Silasbeje penaneconitsivi pejebabiabibovecua capitsapatsibeje. Juezmonae barajamatabëcuenexanepanaeya Pablobeje Silasbeje itorobatsibeje peponaenexabeje baja tomaravecua. ⁴⁰ Pablobeje Silasbeje pecapitsapaecujinaetsibeje,

ponabeje baja Lidia pijaboyabelia. Nexata Lidia pijabota itsa tanebeje Dioso pejumecovënëtsivi, muxujobabeje bajarapamonae pijamatabëcuensaënexa Diosojavabelia. Bajaraxuacujinae ponabeje baja bajarapatomaravecua.

17

Pacuenia Pablobeje Silasbeje Tesalónica tomarata jaitatsibeje pevaetabinexatsibeje yabara pelivaisi

¹ Pablobeje Silasbeje najetarucabeje Anfípolis tomarajava, Apolonia tomarajava ata. Bajaraxuacujinae patabeje Tesalónica tomarabelia. Nexata Pablobeje Silasbeje Tesalónica tomarata napononabeje acueyabi pasemanabeje. Tesalónica tomarata eca judíovi penacaetuatabiabibo. ² Nexata Pablo pijacujirucuenia judíovi penacueraevetsimatacabianë canacujitsia najoneyabiaba bajarapabota. Dioso pitorobilivaisi Pablo tsipaebabiaba

bajarapabota penacaetuatabiabiavijavabelia. Tsiapaebabiaba pacuenia Dioso pejumelivaisibaxutota jumaitsi. ³ Pablo jumai tsabiabi judíovi penacaetuatabiabiabota:

—Dioso baja cajena pejumelivaisibaxutota tajévelia vajunupaebatsi Cristo, poné baja Dioso itorobica jivi pecapanepaenexa. Tajévelia baja cajena Dioso pejumelivaisibaxutota Cristo vajunupaebatsi pijavajabitsaé ayaicuenia pebejiobiaexanaejavanexatsi. Vajunupaebatsinua baja cajena Cristo petépaecujinae icatsia piasaéjavanexa. Bajaraponé raja Jesús, poné pelivaisi pacatsipaebatsi. Bajaraponé raja Cristo, poné Dioso itorobica jivi pecapanepaenexa, jai tsabiabi Pablo ita tsiapaebabiaba Dioso pitorobilivaisi judíovi penacaetuatabiabiabota.

⁴ Nexata judíoviyajuvénévi jumecovénéta Pablo petsipaebabiabilivaisi. Ayaibitsaéto griegoví ata, Dioso pejitsipaevi, jumecovénéta Pablo petsipaebabiabilivaisi. Ayaibitsaéto petiriavi ata, petuxanevi pijavajivi, jumecovénéta Pablo petsipaebilivaisi. Nexata daxita bajarapamonae nacaetuatabiaba Pablobeje Silasbejejavata. ⁵ Nexata judíovi, pamonaé apo jumecovénétsi Pablo petsipaebabiabilivaisi, Pablo cuenecaébatsi. Tsiapaji Pablojavabelia jivi ayaibitsaéto jonepona. Nexata bajarapajudíovi junata jivi ayaibitsaétoxaneto pibisiajamatabécuenevi, saya jema pejinavanapaevi tomarapijicallejava. Nexata pejunatsicujinae bajarapajudíovi pejunatsivi jane baja barénacaetuata. Nexata daxita bajarapajudíovi, pejunatsivi jane baja yajava, barénajamatabécueneyanaba. Nexata itoroba bajarapatomarapijivi pianaepanaenexa Dioso pejumecovénétsivijavabelia. Pablobeje Silasbeje naponaponabeje Jasónvénéné pijabota. Nexata daxita pamonaé anaepana bajarapatomarata, Pablobeje Silasbeje jemata tsimaxépatatsibeje Jasón pijabota. Vaetabijitsiatsibeje picani penutsinexatsibeje tomara pevetsivi pitabarata. ⁶ Jasón pijabota Pablobeje Silasbeje apo pecaxitajarabixae-tsibeje, nexata pamonaé anaepana, vaetabatsi Jasón, itsamonaé yajava, pamonaé Dioso pejumecovénétsivi. Robobocaponaliatsi Jasónbana tomara pevetsivijavabelia. Nexata pamonaé anaepana, tomara pevetsivi pitabarata najumetsénétsiaya pinijijumeta jumaitsi Pablobeje Silasbeje yabara:

—Pablobeje raja Silasbeje daxitanacuanéjava pejinavanapaevi itorobaponabeje pianaepanaenexa. Nexata jane baja aeconoxae vajatomarajavaberena ata patabeje. ⁷ Nexata Jasón, maponé nucaje, tocopata pijabota penaponaponaebeje Pablobeje Silasbeje. Daxita pamonaé Jasón mayajavanucaje, Pablobana ata, daxita bajarapamonae, apo jumecovénétsi cajena Romanonacua pepo pevetsiné pitorobilivaisi. Daxita bajarapamonae jumai tsabiabi: “Romanonacua pepo pevetsiné rabaja apo nacayanacuaevevetsi. Itsané rabaja nacayanacuaevétta. Bajaraponé pevéné Jesús,” jai tsabiabi daxita bajarapamonae, jai najumetsénétsiaya tomara pevetsivijavabelia pamonaé anaepana.

⁸ Nexata bajarapacuenia pejumaitsijava ita jumetane, daxita tomarapijivi tomara pevetsivinua bitso anaepana. ⁹ Nexata Jasón, Dioso pejumecovénétsivi yajava, palata matamotsiaexanatsi tomara pevetsivijavabelia, Pablobeje Silasbeje pevecuapitsapaenexabeje bajarapatomara. Tomara pevetsivi jumaitsi:

—Itsa rabaja ponaenabeje bajaraponébeje mapatomaravecuaje, pacatocanaviabianatsi panijapalata, jai tomara pevetsivi Jasónbanajavabelia.

Bajaraxuacujinae copabatsi baja Jasónbana penaviabinexa pijabonéjavabelia.

Pacuenia Pablobeje Silasbeje ponaponabeje Berea tomarata yabara pelivaisi

¹⁰ Jasónbana tomara pevetsivi pecopabicujinaetsi, bajarapameravi, Dioso pejumecovènètsivi bepíjia itorobatsi Pablobeje Silasbeje peponaenexabeje, Berea tomarabelia. Pablobeje Silasbeje pepatsicujinaeliabeje Berea tomarata najunuabeje judíovi penacaetuatabibojavabelia.

¹¹ Ajamatabècuenetaja pajudíovi jinavanapa Tesalónica tomarata. Nexata apo jumecovènètsi Dioso pitorobilivaisi. Pajudíovi jinavanapa Berea tomarata, bajarapacuenia apo ajamatabècuenetaja. Bajarapajudíovi bitso jitsipa pejumetaenexa Dioso pitorobilivaisi. Nexata Pablo caematacabi canacujitsia judíovi penacaetuatabiabibota Dioso pitorobilivaisi tsipaebabiaba bajarapajudíovijavabelia. Nexata Pablo itsa copata petsipaebabiabijava, bajarapajudíovi pijacuata Dioso pejumelivaisibaxutota xaniavaetsia nacujarubabiaba peyapètaenexa xaniajai bajarapacuenia itsa jumaitsi Pablo petsipaebabiabilivaisi. ¹² Berea tomarapíjivi judíovi ayaibitsaèto jumecovènèta Pablo petsipaebabiabilivaisi. Ayaibitsaèto píjinia griegovi ata jumecovènèta. Jumecovènèta pebíjivi. Jumecovènèta petiriavi ata. Bajarapapetiriavi petuxanenèanè píjavajivi.

¹³ Pajudíovi jinavanapa Tesalónica tomarata, Pablo vènèlívaisitanetsi Dioso pitorobilivaisi petsipaebabiabijava Berea tomarata. Nexata bajarapajudíovi ponalia Berea tomarabelia. Nexata bajarapajudíovi itoroba Berea tomarapíjivi ayaibitsaèto pianaepanaenexa Pablojavabelia. ¹⁴ Nexata Berea tomarapíjivi, pamonaè jumecovènèta Pablo petsipaebabiabilivaisi, bajarapamonaè Pablo bepíjia itorobatsi peponaenexa manuamene itapata peacaetomarabelia. Silasbeje abaxè Timoteobeje nacopatabeje Berea tomarata. ¹⁵ Pamonaè Pablo yanataponaliatsi, pènxuabatsi Atenas tomarabelia. Nexata Atenas tomaraverena bajarapamonaeta Pablo tonajumexuaba Silasbeje Timoteobeje. Jumaitsi:

—Itsa cuencaèjèpaenatsibeje, bepíjia renabeje tsane tanecaxitajarabinexabeje Atenas tomarata, jai Pablo bajarapamonaèjavabelia.

Bajaraxuacujinae pamonaè Pablo pènxuabatsi, naviaba baja Berea tomarabelia.

Pacuenia Pablo ponapona Atenas tomarata yabara pelivaisi

¹⁶ Pablo abaxè Atenas tomarata evetaponapona Silasbeje Timoteobeje pepatsijavabeje Atenas tomaraberena. Nexata Pablo itsa ponapona Atenas tomarata, tane pecobeta jumapcataeya pexanaenèanè piapaxayojava daxita Atenas tomara tuatujèjava. Nexata Atenas tomarapíjivi pematabacabèta nubenabiaba pevajècabiabinexa bajarapajumapcataevijavabelia. Nexata Pablo itsa tane bajarapacuenia, bejamatabèjiobi bitso. ¹⁷ Nexata judíovi penacaetuatabiabibota Pablo Dioso pitorobilivaisi yabara barènajumenotabiaba pevèna judíovi. Barènajumenotabiabanua apo judíovi ata, pamonaè Dioso pejitsipaevi. Caematacabi canacujitsia barènajumenotabiabanua pamonaè Pablo caxitajarabatsi tomara tuatujèta. ¹⁸ Nexata Pablo caxitajaraba pebíjivi, epicúreomonaè pecujarubilivaisi pejumecovènètavanapaevi. Caxitajarabanua itsapebíjivi, estoicosmonaè pecujarubilivaisi pejumecovènètavanapaevi. Bajarapamonaè ata Pablo barènajumenota. Nexata Pablo pebarènajumenotsijavata, bajarapamonaèyajuvèñevi Pablo yabara muetsia najumaitsi:

—¿Detsa meta pitsilivaisi maponèje namatatsapatsia nacabarècuaicuaijaije? najai bajarapamonaè Pablo yabara.

Itsamonaè píjinia Pablo yabara najumaitsi:

—Itsanacuapijivi racovë pijadiosovi pelivaisipaebinë, najai bajarapamonae.

Bajarapacuenia najumaitsi tsipaji Pablo tsipaebaona pexanalivaisi, Jesús pelivaisi. Tsipaebaponanua petëpaevimi icatsia itsamatacabi pisaëjavanexa petëpaecujinae. ¹⁹ Nexata bajarapamonae Pablo barëponaliatsi Areópagovënë tsutojavabelia, patsutojavabelia tomara pevetsivi nacaetuatabiaba penabarëcuaiucuijainexa. Itsa baja palia bajarabelia, bajarapamonae jumaitsi Pablojavabelia:

—Panetsipaebare patayapëtaenexa papejanalivaisi tsipaebaponame. ²⁰ Panetsimuxuaitothia abaxë palivaisi tsipaebaponame. Nexata pajitsipajë patayapëtaenexa pajamatabëcuenelivaisi xaina palivaisi tsipaebaponame, jai Atenas tomarapijivi Pablojavabelia.

²¹ Atenas tomarapijivi, itsanacuaverena pepatsivinua, pamonae bajarapatomarata najinavanapa, daxita bajarapamonae jamatabëcuenenabiabatsi pejanalivaisi pejumetaeyabiabinexa. Jamatabëcuenenabiabatsinua petsipaebabiabinexa itsamonaejavabelia ata.

²² Nexata Pablo nonotapuna bajarapamonae tuatujëta Areópagovënë tsutojavata. Jumaitsi:

—PaAtenas tomarapijivimë, pacatanetsi rabaja panijadiosovi bitso papecajamatabëcuenenabiabijava. ²³ Tanajetarucabiabijavata panijatamaracallejava, taeyabiabajë itsaxuayo pavajëcabiabame panijadiosovijavabelia. Nexata caxitajarabajë altarvënëjava, itsajota jivi vajëcabiaba abaxë apo yapëtae ata padiosojavabelia vajëcabiaba. Bajarapaaltarvënëjavata peyaquinarutsiitane jumai tsarucae mapacueniaje: “Padioso abaxë apo yapëtaetsi, bajarapadiosojavabelia vajëcabiabianatsi mapaaltarjavataje,” jai tsarucae peyaquinarutsiitane. PaDioso yabara yaquinaruta bajarapaaltarvënëjavata, nexata bajarapaDiosojavabelia paxamë baja najamatabëcuenecopatsiaya panavajëcabiabame, abaxë apo payapëtae atamë bajarapaDioso, bajarapaDioso yabara jane baja aeconoxae pacatsipaebijitsiatsi, jai Pablo Atenas tomarapijivijavabelia.

²⁴ Icatsia Pablo jumaitsi Atenas tomarapijivijavabelia:

—PaDioso yabara pacatsipaebijitsiatsi, mapanacua exanaje. Exana daxita mapanacuapijicueneyajava. BajarapaDioso pepo pevetsinë jane baja daxita mapanacuae. Pevetsinë itaboxo ata. BajarapaDioso cajena apo ponaponae jivi pexanaetemplota. ²⁵ BajarapaDioso apo namatavenonae jivi peyavenonaenexatsi. Tsipaji apo namatavenonae itsacueneyavayo ata. Biji rajane bajaraponë nacarajuta caepatoyo vajasaëtsavanapaejumaliyonexa. Nacarajutanua daxita xua namatavenonatsi, jai Pablo pepo Dioso, athëbëtatsia pecaenë, yabara.

²⁶ Icatsia Pablo jumaitsi Atenas tomarapijivijavabelia:

—BajarapaDioso abaxë copiaya caenë pebi exana. Bajaraxuacujinae bajarapapebijavaverena naexanapona daxitaviriajumevi pijasalinaivimi. Nexata bajarapapebijavaverena penaexanaponaevi yacajëpa pejinavanapaejava daxitanacuanëjava. Nexata Dioso caeviriajumevi canacujitsia tocopataponamatacabiabe asaë tsavanapaejitsia. Tocopataponanua panacuanëjava jinavanapaejitsia. ²⁷ Bajarapacuenia Dioso tocopata mapanacuataje daxita bajarapamonae Dioso pejitsipaenexa penajamatabëcuenecopatsinexa Diosojavabelia. Dioso cajena tajë apo nacavecuapononae. ²⁸ Dioso raja pejamatabëcueneta asaë tsavanapaetsi. Bajarapacuenia Dioso pejamatabëcueneta asaë tsavanapaetsi tsipaji baja cajena paxamëyajuvënëvi bajayata peyaquinaelivaisita jumaitsi:

“Vaxaitsi ata rabaja Dioso pexitsi,” jai. ²⁹ Nexata Dioso itsa pexitsi, Dioso yabara jamatabëcuenenavëxaniabiaya apo bejamatabëjumaitsitsi mapacueniaje: “Dioso raja oronanitota, platananitota ata, ibotota ata pexanaenësi. Nexata pacuenia bitso pecujanivitsi pecobeta pexanaenëanë pexaniacuenia exana, bajara pitsinë Dioso,” apo bejamatabëjaitsi jamatabëcuenenavëxaniabiaya Dioso yabara. ³⁰ Jivi abaxë bajayata apo yapëtae Dioso peponaponaejava. Nexata bajayata jivi pibisiacuene exanabiabi ata, Dioso abaxë najamatabëcuenecataita. Nexata abaxë Dioso apo naneconitsiaexanae bajarapamonae pibisiacuene pexanabiabijava yabara. Itsiata baitsi jane maparucaeje Dioso itoroba daxitajivi daxitanacuanëjava pejinavanapaevi pibisiacuene pexanabiabijava pecopabinexa baja, penajamatabëcuenepëñëyorotsinexa Diosojavabelia. ³¹ Bajarapacuenia Dioso itoroba tsipaji baja Dioso jivi penaneconitsiaexanaematacabinexa tocajëtaruta. Pamatacabi Dioso tocajëtaruta, itsa copiapatsiana, naneconitsiaexanaena daxitanacuanëpjjivi. Nexata Dioso jivi itsa naneconitsiaexanaena, caejivi canacujitsia paneconivajëto xainapona, bajarapaneconivajëtota naneconitsiaexanaponaena. Ponë jivi naneconitsiaexanaejitsia, Dioso baja cajana itapeta. Daxitajivi beyapëtane ponë Dioso itapeta. Tsipaji baja bajaraponë Dioso icatsia asaëyaexana petëpaecujinae, jai Pablo Atenas tomarapijivjavabelia Jesús yabara.

³² Nexata Atenas tomarapijivi itsa jumetane bajarapacuenia Pablo pejumaitsijava Jesús petëpaecujinae Dioso icatsia piasaëyaexanaejavatsi yabara, Atenas tomarapijivi Pablo jumecaponatsi. Itsamonae pijinia itsiata jumaitsi Pablojavabelia:

—Icatsia itsamatacabijavabelia pacanamuxunaevetsianatsi bajarapalivaisi, jai itsamonae.

³³ Nexata baja Pablo bajarapamonae vecuapona. ³⁴ Itsamonae itsiata pënaponatsi. Bajarapamonae jumecovënëta Pablo petsipaebilivaisi. Pamonaе jumecovënëta Pablo petsipaebilivaisi yajuvënënë, pevënë Dionisio. Bajaraponë Dionisio, Areópagovënë tsutojavata penacaetuatabiabi pevet-siviyajuvënënë. Petiriva ata, Dámarisvënëva, jumecovënëta Pablo petsipaebilivaisi. Itsamonae yajava jumecovënëta.

18

Pacuenia Pablo ponapona Corinto tomarata yabara pelivaisi

¹ Atenas tomarata Pablo jivi petsipaebaponaponaecujinae Dioso pitorobilivaisi, pona baja. Nexata pata Corinto tomarabelia. ² Nexata Corinto tomarata Pablo caxitajaraba judionë, Aquilavënënë, Ponto nacuapijinë. Bajaraponë Aquila caematacabibeje abaxë xaina Corinto tomarata pepatsicujinae Italia nacuaverena. Yajavapata pijava Priscilavënëva. Bajarapajivibeje Italia nacuaverena patabeje. Bajaraverena patabeje tsipaji Romanonacua pepo pevetsinë, Claudiovënënë, capitsapona daxita judíovi pepitsapaenexa Roma tomaravecu. Romatomara eca Italia nacuata. Nexata Pablo pona Aquila pijaboyabelia. ³ Nexata Aquila pijabota Pablo naponapona. Nexata carpabonë Pablo nayavenonaeya jorocabiaba Aquila. Pablo nanacueneba tsipaji Pablo ata yapëtane pejorocaejava carpabonë. ⁴ Judíovi penacaetuatabiabi, penacueraevetsimatacabianë canacujitsia, Pablo judíovi tsipaebabiaba Dioso pitorobilivaisi. Pablo tsipaebabiaba judíovijavabelia, apo judíovijavabelia ata, bajarapamonae pejumecovënëtsinexa palivaisi Pablo tsipaebabiaba.

⁵ Silasbeje Timoteobeje Corinto tomarata itsa patabeje Macedonia nacuaverena, Pablo baja copata Aquila peyavenonaeyajorocabiabijava carpabonē. Nexata Pablo caematacabi canacujitsia Jesús yabara jumai tsaponae judíovijavabelia:

—Jesús raja pepacuene Cristo, ponē copiaevetavanapatsi pepatsijavatsica vajanacapanepaenexa, jai tsaponae Pablo Jesús yabara.

⁶Nexata bajarapacuenia Pablo pejumaitsaponaejava Jesús yabara, judíovi baranaepanatsi. Pablo pibisiacuenia bijatanetsi. Nexata Pablo penaxatatsijava najumajonotaxuaba. Nēnēbabia bajarapamonae peyapētaenexa penaneconitsijava Diosojavabelia. Tspaji apo jumecovēñetsi, Pablo tsi-paebi ata Jesús yabara. Pablo nexata jumaitsi judíovijavabelia:

—Paxamē saya panejamatabēcueneta panaxuabianame Diosovecua. Xanē tajamatabēcueneta apo panaxuabimē tsane. Panijacuata panaxuabianame. Tspaji cajena pacatsipaebi atatsi Jesús yabara, apo panejumecovēñetsimē. Aeconoxae rabaja copatajē patacatsipaebabiabijava paxamējavabelia bajarapalivaisi. Tavajēnaeyabelia baja ponaenajē tatsipaebaponaenexa bajarapalivaisi apo judíovijava, jai Pablo judíovijavabelia.

⁷ Nexata Pablo judíovi penacaetuatabiabibovecua pitsapa. Nexata pona Justovēnēnē pijaboyabelia. Nexata Justo pijabota Pablo naponapona. Bajaraponē Justo penavajēcabiabinē Diosojavabelia. Pijabo eca judíovi penacaetuatabiabibibo muxuneneta. ⁸ Nexata Crispovēnēnē, judíovi penacaetuatabiabibo pevetsinē, daxita pijabopijivi barējumecovēñeta Jesús pelivaisi. Ayaibitsaēto Corinto tomarapijivi, pamonae jumetane Pablo petsipaebabiabilivaisi, jumecovēñeta. Nexata bajarapamonae nabautisaba. ⁹ Nexata meravi bemajitsinaebota Dioso jumaitsi Pabloyavabelia:

—Pētsa junavame. Pētsa copatame netsipaebaponaejava tajumelivaisi.

¹⁰Xanē raja cayajavatsi. Nexata itsajivi ata apo caitsacueniabi tsane. Tspae-baponaename tajumelivaisi. Tspaji rabaja tajajivi ayaibitsaēto tsaponae mapatomarataje, jai Dioso.

¹¹ Nexata Pablo ponapona Corinto tomarata dieciocho pajuametobeje. Tspae-bapona Dioso pitorobilivaisi Corinto tomarapijivijavabelia.

¹² Pamatacabi Galiónvēnēnē Acayanacua evetaponapona, judíovi najamatabēcuenējēpaeya tsimaxēnacaetuatsi Pablo pevaetabinexatsi. Nexata itsa vaetabatsi, Pablo caponaliatsi penutsinexatsi nacuaevevtsinē Galión pitabarata. ¹³ Nexata judíovi jumaitsi nacuaevevtsinē Galiónjavabelia:

—Mara ponēje jivi livaisi tsipaebaponaje pejumecovēñetsinexa Dioso. Itsiata baitsi jane saicayacuenia Dioso pejumelivaisivecua tsipaebapona. Paxanē cajena bajarapacuenia apo panetonajumecopatsi Dioso Moiséspijinēta penajumecopatsilivaisi, jai judíovi nacuaevevtsinē Galiónjavabelia Pablo yabara.

¹⁴ Ajena picani Pablo jumepitsijitsia judíovi, itacarajeta nacuaevevtsinē Galión jumaitsi judíovijavabelia:

—Paxamē pajudíovimē, bepayaepetaneme mapacueneje. Itsa maponēje nacobetoxotsipa, jivitonē ata itsa beyaxuabijitsipa, pacajumexaniataejitsipatsi. Nexata naneconitsiaexanaejitsipajē. ¹⁵ Paxamē saya pabarēnajumenotame maponēje papecatsipaebaponaelivaisi yabara. Pabarēnajumenotamenua panijasalinaivi pijalivaisi yabara ata. Nexata saya paxamē panijacuata bajaraxua yabara pabarēcuacuajamēre pacuenia pajitsipame. Xanē raja apo evetsinē bajarapalivaisi, jai nacuaevevtsinē Galión judíovijavabelia.

¹⁶ Nexata baja nacuaevevtsinē Galión navecuapitsapaeyaexana judíovi. ¹⁷ Nacuaevevtsinē Galión judíovi navecuapitsapaeyaexanae ata, caecuenia abaxē judíovi apo ponae pijabonējavabelia. Nexata griegovi, bajarajota penubenaevi, nacobenavaetaba judíoviyajuvēnēnē, Sóstenesvēnēnē. Bajaronē Sóstenes judíovi penacaetuatabiabibo pevetsinē. Nexata griegovi Sóstenes conibabia nacuaevevtsinē Galión pitabarata, ajibi ata peyabaraconi-babejava. Nexata nacuaevevtsinē Galión tae ata bajarapacuenae, apo itavetsi.

Pacuenia Pablo pepatsicujinae Antioquía tomarata, icatsia naropota acueyabinamutonexa jivi petsipaebaponaenexa Dioso pitorobilivaisi yabara pelivaisi

¹⁸ Pablo abaxē bajayajebi ponapona Corinto tomarata. Bajaraxuacujinae Dioso pejumecovēnētsivita napējioba. Napona barcota Siria nacuyaabelia. Pablo yajavapona Priscilabeje Aquilabeje. Nexata epatua Cenecea tomarata, Pablo mataxunatsi. Daxitamatanami matacasibatsi jivi peyapētaenexatsi petoveretsijava Dioso petonacuenebijava pacuenia baja cajena Diosojavabelia Pablo najumecapanepaeya jumaitsi. ¹⁹ Pablobana Aquilabana Priscilabana itsa pata Efeso tomarata, Pablo baja vecuanatsata Priscilabeje Aquilabeje. Nexata Pablo Efeso tomarata joneya judíovi penacaetuatabiabiboyalia. Nexata bajarajota barēnalivaisita judíovi. ²⁰ Nexata picani Efeso tomarata Pablo judíovi asivatsi abaxē penaponaponaenexa anijamatacabianē. Itsiata Pablo apo jejai. ²¹ Nexata Pablo itsa napējioba, bajarapamonaejavabelia jumaitsi:

—Naxanetajē tapatsinexa Jerusalén tomarabelia tataenexa pafiesta baja imoxoyo pevājēnae pejonenexa. Itsiata icatsia najetarucaenajē paxamējavaberena itsa Dioso jitsipa, jai Pablo judíovijavabelia.

Nexata Pablo Efeso tomarata barcota nanaropota. ²² Itsa baja Pablo pata Cesarea tomarabelia, pona icatsia Jerusalén tomarabelia pebajacobinexa daxita Dioso pejumecovēnētsivi. Bajaraxuacujinae icatsia naviatu Antioquía tomarabelia. ²³ Antioquía tomarata bajayajebi ponapona. Bajaraxuacujinae icatsia naropota. Najetaruca daxita tomaranējava. Najetaruca Galacia nacuata penaetomaranējava, Frigia nacuata penaetomaranējava ata. Bajaratomaranējava pejinavanapaevi Dioso pijalivaisita Pablo jamatabēcuene asaēyaexananajetaruca daxita Dioso pejumecovēnētsivi.

Pacuenia Apolos Dioso pitorobilivaisi tsipaeba Efeso tomarapijivijavabelia yabara pelivaisi

²⁴ Judionē Apolosvēnēnē pata Efeso tomarata, Alejandría tomarapijinē. Bajaraponē xaniavaetsia Dioso pitorobilivaisi jivi tsipaebabiaba. Jumeyapētane bitso pacuenia Dioso pejumelivaisibaxutota jumaitsi. ²⁵ Apolos itsamonae epatua tsipaebatsi Jesús pelivaisi. Itsiata baitsi jane xaniavaetsia daxitalivaisi apo tsipaebitsi. Palivaisi Juanpijinē jivijavabelia tsipaebapona, bajarapalivaisi Apolos xaniavaetsia tsipaebatsi. Juanpijinē jivi pebautisabaponaejava ata Apolos xaniavaetsia tsipaebatsi. Apolos xaniavaetsia Jesús pelivaisi apo tsipaebi atatsi, itsiata ajamatabēcuenesaēya xaniavaetsia tsipaebanajetaruca Jesús pelivaisi. ²⁶ Apolos ajumejunavijibia Dioso pitorobilivaisi jivi tsipaeba judíovi penacaetuatabiabibota. Nexata Priscilabeje Aquilabeje itsa jumetanebeje Apolos petsipaebilivaisi, nexata bajarapajivibeje junatabeje Apolos. Nexata Apolos napona Priscilabeje Aquilabeje pijaboyabelia. Nexata bajarapajivibeje daxitalivaisi jane baja, Jesús pelivaisi, xaniavaetsia tsipaebabeje

Apolosjavabelia xaniavaetsia Apolos peyapëtaenexa Jesús pelivaisi. ²⁷ Itsa baja Apolos naropotsijitsia Efeso tomaravecua peponaenexa Acaya nacuyabelia, Dioso pejumecovënëtsivi, Efeso tomarapijivi, yavenonatsi peponaenexa. Tsicobeyaquinatsi cuyalatobaxuto pecaponaenexa, Dioso pejumecovënëtsivijavabelia perajutsinexa Acaya nacuata. Bajarapacuenia tsicobeyaquinatsi Acaya nacuapijivi, Dioso pejumecovënëtsivi, xaniavaetsia Apolos pecopiapitsinexatsi. Apolos baja itsa pata Acaya nacuyabelia, Apolos bitso yavenona Acaya nacuapijivi Dioso pejumecovënëtsivi. ²⁸ Daxitajivijavabelia Apolos tsipaebapona Jesús pelivaisi. Nexata pacuenia Dioso pejumelivaisibaxutota jumaitsi Jesús yabara, Apolos tsipaebapona daxitajivijavabelia. Nexata Apolos daxitajivi yapëtaeyaexanapona Jesús pepacueni Dioso athëbëvetsica pitorobijavatsitsica jivi pecapanepaenexa. Nexata baja judiovi moya ena. Tsipaji acuenebi judiovi: “Jume raja,” pejajjava Apolos petsipaebilivaisi yabara.

19

Pacuenia Pablo ponapona Efeso tomarata yabara pelivaisi

¹ Pamatacabi abaxë Apolos ponapona Corinto tomarata, bajarapamat-acabi pijinia Pablo ibotsutonë nacujavaverena najetaruca pepatsinexa Efeso tomaraberena. Efeso tomarata Pablo itsa pata, caxitajaraba cae-jivibeje Jesús pelivaisi pejumecovënëtsivi. ² Nexata Pablo yanijoba bajarapamonaejavabelia.

—¿Espiritu Santo tsabaja pacatsijamatabëjunua pamatacabi ajena pajumecovënëtame Jesús pelivaisi? jai Pablo.

Nexata bajarapamonae jumaitsi:

—Jume. Apo payapëtaenë patanetsijamatabëjonejava Espiritu Santo. Apo pavënëtaenë cajena Espiritu Santo ata, jai bajarapamonae Pablojavabelia.

³ Nexata Pablo jumaitsi:

—¿Detsa pitsijamatabëcuene yabara pacabautisaba? jai Pablo bajarapamonaejavabelia.

Nexata bajarapamonae jumaitsi:

—Pajamatabëcuene yabara raja Juanpijinë panetsipaeba, bajarapajamatabëcuene yabara panebautisaba, jai bajarapamonae.

⁴ Pablo nexata jumaitsi bajarapamonaejavabelia:

—Juanpijinë raja bautisabapona pamonae baja copaba pibisiacuene pexanaejava, pamonae baja najamatabëcuenepënëyorota Diosojavabelia. Itsiata baitsi jane Juanpijinë jumai tsaponae jivijavabelia: “Panamatavenoname panejumecovënëtsinexa ponë xanë tacovëverena patsiana, baitsi Jesús. Bajaraponë Cristo, ponë Dioso itorobica,” jai tsaponae Juanpijinë jivijavabelia, jai Pablo bajarapamonaejavabelia.

⁵ Bajarapamonae itsa jumecovënëta Jesús pelivaisi, nexata Pablo bautisaba bajarapamonae petuxanenë Jesús pevënëta. ⁶ Nexata Pablo pevajëtsijavata Diosojavabelia, tsimatnacobëbuata bajarapamonae. Nexata bajarapamonae Espiritu Santo tsijamatabëjunuatsi. Nexata bajarapamonae itsa cuaicuaijai, ajumeitothia pecuaicuaijajava. Tsipaji itsaviriajumenëta, apo penatsipaebijumenëmi, cuaicuaijai. Bajaraxuacujinae jane baja bajarapamonae Dioso pitorobilivaisi tsipaebapona jivijavabelia. ⁷ Daxita meta bajarapamonae bejamatabëcuene doce ponëbeje.

⁸ Efeso tomarata Pablo acueyabi pajumetobeje ponapona. Nexata Pablo Efeso tomarata, judiovi penacaetuatabibibota, judiovijavabelia ajumejunavijibia tsipaebabiaba Dioso pitorobilivaisi. Pablo judiovi

barēnajumenotabiaba Dioso pijajivi pevetsijavanexa yabara. Bajarapacuenia Pablo barēnajumenotabiaba judíovi pejumecovēnētsinexa Dioso pijajivi pevetsijavanexa. ⁹ Itsamonae itsiata amatabocotaja. Apo jitsipae pejumecovēnētsijava bajarapalivaisi. Bajarapamonae daxitajivi pitabarata pibisiacuenia baracuaicuaijai pexanialivaisi, Jesús pelivaisi. Nexata baja Pablo vecuanatsata bajarapamonae apo pejumecovēnētsixae Jesús pelivaisi. Pablo nexata, Jesús pelivaisi pejumecovēnētsivi yajava, pona Tirannovēnēnē pijaescuelabojavabelia, bajarapabota penacaetuatabiabinexa. Bajarapabota nexata Pablo caematacabi canacujitsia pexanialivaisi, Jesús pelivaisi, jivi tsipaebabiaba. ¹⁰ Bajarapacuenia Pablo tsipaebaponapona anijavaibeje. Nexata daxita Asiavēnē nacuapijivi, judíovi, apo judíovi ata, jumetane petuxanēnē Jesús pelivaisi. ¹¹ Dioso yavenonatsi Pablo Dioso pesaēta pinijicuene pexanaejavanē pexanaponaenexa. ¹² Nexata pamonae toavitanētsi, pijamonae Pablo penaxatabijavanē, pijapañueloxi ata, daxita xuaxi Pablo naperabēcajayaba, tocaponabiaba piavitanēvi peperabēcajayabinexa. Nexata piavitanēvi bajaraxua itsa tsiperabēbuatatsi, jamatejema baja tsabiabi. Dovathivi peyajavajinavanapaevi ata vecuapitsapabiabatsi.

¹³⁻¹⁴ Itsamonae judíovi tomaranējava najetarubena. Bajarapamonae Jesús pelivaisi apo jumecovēnētsi ata, itsiata dovathi jivivecua capitsapapona. Pajudíovi bajarapacuenia dovathi jivivecua capitsapapona, siete ponēbeje tsavanapae. Bajarapamonae Esceavavēnēnē, sacerdotēvi penamatacaitorobinē, ēpexi tsavanapae. Nexata bajarapamonae vēnētane Jesús. Nexata bajarapamonae najumaitsi:

—Dovathi jivivecua capitsapaenatsi petuxanēnē Jesús pevēnēta, najai.

Nexata jane baja itsa tane dovathi peyajavaponaponaenē, bajarapamonae jumaitsi:

—Dovathi, pacaitavetatsi, ponē Pablo vajunupaebaona, petuxanēnē Jesús pevēnēta. Vecuapitsapare baja maponēje, jai Esceavavēnēnē pexi dovathi peyajavaponaponaenējavabelia.

¹⁵ Nexata Esceva pexi itsa itaveta dovathi, dovathi jumaitsi mapacueniaje: —Yapētaniji raja Jesús. Yapētaniji Pablo ata. Itsiata paxamē apo pacayapētaetsi. ¿Detsa jane paxamē papamonaemē? jai dovathi.

¹⁶ Nexata bajarajota dovathi peyajavaponaponaenē, tsimaxējirevarenatsi bajarapamonae. Pinijisaēta dovathi peyajavaponaponaenē biatsi. Nexata amoneyabatsi. Pinijicuenia tsaquibabiatsi. Vejumatitcatsi penaxatabijavanēmi. Nexata bajaraponē pijabovecua bajarapamonae yarēcēpeca pebejavatsi. Jumasa nexata rēcēpeca. ¹⁷ Nexata daxita Efeso tomarapijivi, judíovi, apo judíovi ata, vēnēlivaisitane pacuenia dovathi peyajavaponaponaenē exanatsi Esceva pexi. Nexata Efeso tomarapijivi bitso jamatabēcuenenajunaviaca. Nexata daxita bajarapamonae yayiatane Jesús pevēnē.

¹⁸ Nexata ayaibitsaētoxaneto Dioso pejumecovēnētsivi, patapona Pabloanajavaberena. Nexata bajarapamonae daxitajivi pitabarata navecuapaebaona pibisiacuene pexanabiabijava. ¹⁹ Nexata ayaibitsaēto penajorobicuene peyapētaevi, capata pijacuyalatobaxutonē, penajorobicuene yabara pecajinavanapaebaxutonē. Pamatacabi bajarapamonae comuaca bajarapabaxutonē, ayaimatamota comuaca. Nexata daxita bajarapamonae bajarapacuyalatobaxutonēmi tajuita isotota daxitajivi pitabarata. Petajuitsicujinae itsa namataējēta petajuitsibaxutonēmi pematamo, xuaba pina cincuenta mil ponēbeje

palatanëanë. Bajarapapalatanëanë bitso penamatamotsinëanë. ²⁰ Nexata bajarapacuenia Dioso pitorobilivaisi yacaëjêpaponâ baja daxitanacuanëjava. Nexata ayaibitsaëto tsaponae Dioso pejumecovënëtsivi.

²¹ Bajaraxuacujinae Pablo najamatabëxaina peponaenexa Macedonia nacuajava, Acaya nacuajava ata, petaenajetarucaenexa Dioso pejumecovënëtsivi. Bajaraxuacujinae ponaejitsia Jerusalén tomarabelia. Pablo nexata jumaitsi:

—Tapatsicujinae Jerusalén tomarabelia, ponaenajê icatsia Roma tomarabelia ata, jai Pablo.

²² Nexata Pablo itoroba Macedonia nacuayabelia anijanëbeje pijajivitonëbeje, Timoteobeje Erastobeje. Pablo abaxê bajayajebi ponapona Asiavënë nacuata.

Pacuenia picani Pablo Efeso tomarata jamatabëbeyaxuabatsi yabara pelivaisi

²³ Pablo itsa ponapona Asiavënë nacuata, Efeso tomarapijivi bitso anaepana Jesús pelivaisi pejumecovënëtsivijavabelia. ²⁴ Efeso tomarapijivi anaepana Pablobanajavabelia Demetrio pejamatabëcueneta. Demetrio platananita templobo jumapecataeya exanabiaba, tsiquiriboxi. Saya pecobeta jumapecataeya pexanaediosova, Artemisavënë diosova, pijatemplobo jumapecataeya Demetrio exanabiaba bajarapoboxi. Demetrio templobo jumapecataeya itsa exanabiaba, bajarapoboxi pebarënacuenebivi bitso ayaicuenia palata barêpitabiaba bajarapoboximatamo. ²⁵ Nexata Demetrio junata pebarënacaetuatsinexa daxita pebarënacuenebabiabivi bajarapoboxi. Junatanua itsamonae ata, pamonaë pijinia jumapecataeya pexanaejavanë nacuenebabiaba. Nexata Demetrio jumaitsi bajarapamonaejavabelia:

—Paxamê rabaja payapëtaneme mapacueneye. Jumapecataeya vajaexanabiabijavanë vajacanajetabiabixae, ayajava palata xainaponatsi. ²⁶ Pataneme rabaja. Pajumetanemenua baja Pablo pejumaitsaponaëjava mapacueniaje: “Jivi raja pecobeta jumapecataeya pexanaenëanë, apo diosovi cajena,” pejaitsaponaëjava. Nexata jivi ayaibitsaëtoxaneto mapatomarapijivije jumecovënëtapona Pablo bajarapacuenia petsipaebaponaëjava. Itsiata apo êmapatomarapijivije. Daxita Asiavënë nacuapijivi ata jumecovënëtapona. ²⁷ Bajarapacuenia jivi ayaibitsaëto pejumecovënëtaponaëjava apo nacatoxanëpanae. Tsiapaji jivi apo nacacomuatsi tsiapae Artemisavënë diosova pijacuene vajanacuenebijava. Pinijijamatabëcuene pexainaediosova Artemisa pijatemplobo ata, apo yayiatue tsiapae. Baitsi padiosova daxita Asiavënë nacuapijivi, daxitanacuanëpijivi ata, pematabacabëta tonubenabiaba pevajëcabiabinexa bajarapovajavabelia, verevereaejitsipa. Nexata baja bajarapovajavabelia jivi apo vajëcabiabi tsiapae, jai Demetrio templobo jumapecataeya tsiquiriboxi pexanabiabivijavabelia.

²⁸ Nexata bajarapamonae itsa jumetane bajarapacuenia Demetrio pejumaitsijava, nexata bitso bajarapamonae anaepana. Pinijijumeta vavajai tsaponae. Jumaitsi:

—iPinijijamatabëcuene raja pexainaediosova, Efeso tomarapijivitsi vajadiosova! jai tsaponae bajarapamonae.

²⁹ Nexata daxita Efeso tomarapijivi itsa jumetane, bitso anaepana Pablobanajavabelia. Nexata ponëbeje Pablo yanatatsi, Gayobeje Aristarcobeje, Efeso tomarapijivi vaetabatsibeje. Bajaraponëbeje Macedonia

nacuapijinēbeje. Daxitajivi vaetabiaya nacobenacaponatsibeje pinijibox-anetojavabelia, itsabelia baja cajena daxita tomarapijivi nacaetuatabiaba.

³⁰ Pablo picani jumaitsi Dioso pejumecovēnētsivijavabelia:

—Xanē najonejtsianē mapaboyalaje taneyanatsinēbeje tayajivicuaicuai-jainexa penacaetuatsivijavabelia, jai.

Itsiata Dioso pejumecovēnētsivi apo tocopatsitsi Pablo penajonenexalia.

³¹ Asiaevēnē nacuapijivi pevetsivi, Pablo yapētanetsi. Nexata bajarapamonae asaēya Pablo tonajumeitorobarenatsi penajoneyaniva bajarapaboyabelia pebeyaxuabiyantivatsi. ³² Efeso tomarapijivi penacaetuatsijavata, nalivaisijēpaeya apo cuaicuaijai. Nexata pevavajaijavata itsamonae itsalivaisicuenia vavajaiya jumai tsaponae. Itsamonae pijinia itsalivaisicuenia vavajai tsaponae. Tsipaji jivi ayaibitsaēto xaneto apo yapētae palivaisi yabara nacaetuata. ³³ Nexata Efeso tomarapijivi penacaetuatsijavata, caejiviyobeje judiōvi nanacaetuata. Bajarapajudiōvi yapētane palivaisi yabara jivi ayaibitsaēto nacaetuata. Nexata bajarapajudiōvi tsipaeba Alejandrovēnēnējavabelia Alejandro peyapētaenexa xua yabara jivi ayaibitsaēto nacaetuata. Tsipaji Alejandro ata judiōnē. Nexata Alejandro pevēna judiōvi pēnatorobajarabiaya itorobatsi daxitajivi pitabarata penucaenexa. Nexata Alejandro nacobeyota jivi pemoyanexa petsipaebinexa Efeso tomarapijivi pianaepanaeyaniva daxita judiōvijavabelia. ³⁴ Itsiata baitsi jane Efeso tomarajivi apo tocopatsi Alejandro pecuaicuaijainexa. Itsa daxitajivi yapētane Alejandro judiōnēcuene, nexata daxita vavajaiya jumai tsaponae anijahorabejecuenia mapacueni-aje:

—iPiniijamatabēcuene raja pexainaediosova Artemisa, Efeso nacuapijivitsi vajadioso! jai tsaponae bajarapamonae.

³⁵ Bajaraxuacujinae nexata tomara jane baja pevetsinē daxitajivi moyaexana. Nexata jumeitavetsiaya jumaitsi:

—PaEfeso tomarapijivimē, daxitanacuanēpijivi baja cajena yapētane vanacatocopatsijava vajaevetsinexa mapatomarataje peecaabo, pinijijamatabēcuene pexainaediosova Artemisa pijatemplobo. Daxitanacuanēpijivi baja cajena yapētane diosojumapeibotova, Artemisa, athēbēvetsica pejopaejava mapatomarataje. ³⁶ Nexata bajarapadiosojumapeibotova athēbēvetsica pejopaejava yabara, acuenebi itsajivi ata: “Jumē,” pejaijava. Nexata pajamatejemamēre. Pētsa abaxē itsacuenē paexaname copiaya panajamatabēxainaenejevamē xaniavaetsia. ³⁷ Mapapebibeje paxamē pacapatameje, apo penacobetoxotsinēbeje templobopijijava. Pibisicuenia apo baracuaicuaijibejenua vajadioso Artemisa, jai Efeso tomara pevetsinē Efeso tomarata penacaetuatsivijavabelia.

³⁸ Icatsia tomara pevetsinē jumaitsi bajarapamonaejavabelia:

—Demetriobana itsa jamatabēneconita itsajivi, nexata neconitsi juezmanae pitabarata, jivi peneconitabiabibota. Bajara saya xua juezmanae evetavanapa. ³⁹ Itsa apo paneconitsijitsiamē jivi, saya itsa panacaetuatae itsacuenelivaisiyo yabara, nexata saya roviaia papaebare xaniavaetsia daxitajivi penacaetuatsijavata, pacuenia gobierno nacaitoroba. ⁴⁰ Xaniajanē pacuenia pacatsipaebijitsiatsi. Ajena, mapamatacabitaje, mapacuenia itsa exanaponaejitsipatsije, nacananeconitsiaexanaejitsipa gobierno. Bajarapacuenia nacananeconitsiaexanaejitsipa tsipaji itsacueneneconi itsajivi xainaenejeva, mapacuenia aneya nacaetuatsije, jai Efeso tomara pevetsinē penacaetuatsivijavabelia.

⁴¹ Itsa baja Efeso tomara pevetsinē najumevereta bajarapacuenia petsipaebijava, itoroba baja daxitajivi penaviabinexa pijabonējavabelia.

20

Pacuenia Pablo najetaruca Macedonia nacuajava, Grecia nacuajava ata, yabara pelivaisi

¹ Itsa baja Efeso tomarapijivi jamatabëcaeva pianaeapanajava, nexata Pablo junata penacaetuatsinexa daxita Dioso pejumecovënëtsivi. Nexata Pablo muxujioba Dioso pejumecovënëtsivi pevajënaeyabelia piagamatabëcuenesaë tsavanapaenexa Dioso pejumecovënëtsijava. Pablo nexata pexaniacuenia napëjioba bajarapamonae. Bajaraxuacujinae Pablo baja pona Macedonia nacuaylabelia. ² Nexata Pablo itsa pata Macedonia nacuaylabelia, pexanialivaisi tsipaebanajetaruca Macedonia nacuapijivi Dioso pejumecovënëtsivi pevajënaeyabelia piagamatabëcuenesaë tsavanapaenexa Dioso pejumecovënëtsijava. Bajaraxuacujinae icatsia Pablo pata Grecia nacuaylabelia. ³ Nexata Grecia nacuaata Pablo ponapona acueyabi pajuametobeje. Bajaraxuacujinae picani Pablo barcota naponaejitsia Siria nacuaylabelia. Nexata Pablo nayajumetane Siria nacuaata judíovi pevajënaeetsijavatsi pebeyaxuabinexatsi. Bajaraxuata Pablo najamatabëxaina icatsia pecovëya penaviatsinexa matatsënëa Macedonia nacuajava. ⁴ Pamonae Pablo yanatatsi, mapevënëanëje. Sópater, Berea tomarapijinë. Aristarcobeje pijinia Segundobeje, Tesalónica tomarapijinëbeje. Gayo pijinia Derbe tomarapijinë. Timoteo pijinia Listra tomarapijinë. Tíquicobeje pijinia Trófimobeje, Asiavënë nacuapijinëbeje. Bajarapamonae Pablo yanatatsi. Nexata Pablo itsa barëpata Filipos tomarata, xanë Lucasnë, necaxitaraba. ⁵ Nexata daxita pamonae Pablo yanatatsi, namataxainaeja baja ponalia Troas tomarabelia. Nexata paxanëbeje Pablobeje abaxë panacopatajëbeje Filipos tomarata, Macedonia nacuaata pecaetomarata. Nexata pamonae namataxainaeja baja ponalia, paneevetavanapabeje Troas tomaratalia. ⁶ Nexata paxanëbeje Filipos tomarata barcota pananaropotajëbeje pepuavereverecae baja pafiestamatacabi judíovi baxane levadurata matajërëabinejeva pexanaepan. Panaponajëbeje jane baja Troas tomarabelia. Cinco matacabi panapaliajëbeje Troas tomarabelia. Nexata pamonae paneevetavanapabeje Troas tomaratalia, papëcaxinajëbeje baja. Nexata abaxë Troas tomarata pajinavanapajë siete pamatacabibeje.

Pacuenia Pablo ponapona Troas tomarata yabara pelivaisi

⁷ Troas tomarata domingomatacabi panacaetuatajë daxita Dioso pejumecovënëtsivi yajava, patanajamatabënapitsinexa xua yabara Cristo sivatëpa. Pablo nexata livaisi tsipaeba. Meravia baja pitsijavata Pablo Mileto tomarabelia naropotsijitsia. Bajaraxuata Pablo livaisi tsipaeba meravijebi. ⁸ Panacaetuatajë athëbëabetsia pënëyatuucubibota. Nexata athëbëyo para paenayajë, itsajotatsia pitayotsijavanë ayaijava rubena xaniavaetsia pitayotsinexa. ⁹ Nexata pevëjëato ventanajavata eca, Euticovënënë. Pablo nexata bajayajebi livaisi tsipaeba. Nexata belia pevëjëato bitso itamajitsipaneca. Nexata baja majiteca. Pemajitecaenë nexata pevëjëato jopareca acueyabi pairabejèjavavereca. Nexata pevëjëato itsa sivarunarecatsi, petëpaenë baja pitatsi. ¹⁰ Nexata Pablo sivarunareca. Pematabacabëta caeeya isapita petëpaenë. Nexata Pablo jumaitis Dioso pejumecovënëtsivijavabelia:

—Pëtsa panajamatabëxainame. Asaë rabaja icatsia pevëjëato, jai Pablo.

Nexata pevëjëato icatsia asaë. ¹¹ Nexata Pablo icatsia caevëa junaya. Pejunaecujinaetsia epatsënëca jane baja pan. Tsicobetsana jane baja daxita

Dioso pejumecovënëtsivi pexaenexa. Pexaecujinae abaxë icatsia Pablo bajayajebi cuaicuaijai. Pecuaicuaijainë belia yamatacabibecatsi. Bajaraxuacujinae Pablo jane baja pona Mileto tomarabelia. ¹² Nexata baja pevëjëato piasaënë barënaviabatsi pijaboyabelia. Barëya bitso bajarapamonae pi-asäexae pevëjëato petëpacujinae.

Pacuenia Pablobana naropoba Troas tomarata pepatsinexa Mileto tomarabelia yabara pelivaisi

¹³ Paxanë Pablo paneitoroba barcota menia namataxainaeya patanapon-aenexa Asón tomarabelia. Bajarapacuenia Pablo paneitoroba tsipaji Pablo matatsënëa najetaruaejitsia pepatsinexa Asón tomarabelia. Nexata Pablo itsa pata Asón tomarata, bajarapatomarata patayapitsinexa. ¹⁴ Nexata jane baja Pablo itsa pata Asón tomarata, Pablo baja nanonorena barco ënëberena. Nexata baja panaponajë Mitilene tomarabelia. ¹⁵ Bajaraxuacujinae icatsia Mitilene tomarata pananaropobajë. Nexata meravia pitsijavata panapatajë Quíotomara canacujitsialia peecaetomarabelia. Bajarapatomarata icatsia patananaropobicujinae, meravia icatsia pitsijavata, panapatajë Samos tunaetota peecaetomarabelia. Bajarapatomarata icatsia patananaropobicujinae, panapatajë icatsia Trogilio tomarabelia. Nexata abaxë Trogilio tomarata panacueraevetajë. Nexata icatsia Trogilio tomarata patananaropobicujinae, caematacabicujinae, icatsia panapatajë jane baja Mileto tomarabelia. ¹⁶ Pablo rovia jamatabëxeneta Efesotomara, Asiavënë nacuata peecaetomara. Tsipaji apo jamatabëponaponae bajayajebi Asiavënë nacuata. Pablo bepijia jamatabëpata Jerusalén tomarabelia Pentecostësvënë fiestavajënaeya.

Pacuenia Pablo Mileto tomarata livaisi tsipaeba Efeso tomaraverena pepatsivi, ancianovijavabelia, yabara pelivaisi

¹⁷ Mileto tomaravelia Pablo tonajumeitoroba Efeso tomarapijivi ancianovi pepatsinexarena Mileto tomaraberena. ¹⁸ Nexata baja ancianovi itsa parena Pablojavaberena, Pablo jumaitsi bajarapaancianovijavabelia: —Paxamë baja cajena payapëtaneme mapacueje. Asiavënë nacuata tapatsimatacabijavaveliacujinae, Dioso pitorobilivaisi tsipaebapononajë Asiavënë nacuata. Daxitamatacabi tonacuenebajë Dioso pijacuene. ¹⁹ Dioso pijacuene itsa tonacuenebapononajë, apo jamatabëjumaitsinë: “Xanë bitso ayajamatabëcuenenënë,” apo jamatabëjanë. Itsa taeyabiabajë itsamonae pecopabijava Dioso pejumecovënëtsijavami, bitso sivanueyabiabajë. Bitso bejiobinëna tsabiabi tsipaji judíovi jamatabënebeyaxuababiaba. ²⁰ Daxita Dioso pitorobilivaisi pacatsipaebabiabatsi papecajamatabëcueneyavenonaenexa. Caelivaisi ata apo pacavecuacopatsitsi. Pacatsipaebabiabatsi baja cajena daxitajivi pitabarata. Pacatsipaebabiabatsinua baja cajena panijabonëjava ata. ²¹ Asäeya tsipaebabiabajë judíovi, apo judíovi ata, daxita bajarapamonae pecopabinexa pibisiacuene pexanabiabijava penajamatabëcuenepënëyorotsinexa Diosojavabelia. Bajaraxuacujinae jane baja pejumecovënëtsinexa vajatuxanenë Jesucristo pelivaisi. ²² Mara jotacujinaeje ponaenajë Jerusalén tomarabelia Espiritu Santo taneitorobixae bajarabelia taponaeenexa. Itsiata xaniavaetsia apo yapëtaenë pacuenia nexanaejitsia Jerusalén tomarapijivi. ²³ Itsiata caejavayo yapëtaniji. Caetomara canacujitsia Dioso pitorobilivaisi tatsipaebanajetaruaejavata Espiritu Santo nejumai tsabiabi: “Caetsiana raja penaneconitsivi pejebabiabibota. Xamë bitso benejiobicuene

taename,” nejai tsabiabi Espiritu Santo. ²⁴ Itsiata baitsi jane cajena apo junavinē bajarapacue ne yabara. “Belia nebeyaxuabijitsipa,” apo jamatabējanē cajena. Jamatabēveretajē pacuene vajatuxanenē Jesús nitoroba tatonacuenebinexa daxitajivi tatsipaebanajetarucaenexa pexanialivaisi. Dioso vajanacaitaxutotsoniatæjava, jai Pablo ancianovijavabelia.

²⁵ Icatsia Pablo jumaitsi ancianovijavabelia:

—Paxamējava naponaponajē patacatsipaebinexa Dioso pevetsijavanexa daxita pijajivi. Tajēvelia baja cajena yapētaniji. Apo panetaemē rabaja tsane matavējæ. ²⁶ Bajaraxuata ajena baja pacatsipaebatsi. Itsajivi paxamēyajuvēnjivi itsa naxuabiana Diosovecua, apo naxuabi tsane xanē taja-matabēcueneta. ²⁷ Apo naxuabi tsane xanē taja-matabēcueneta tsipaji baja daxita Dioso pitorobilivaisi xaniavaetsia baja cajena pacatsipaebatsi. Caelivaisiyo ata apo pacavecuacopatsitsi, jai Pablo ancianovijavabelia.

²⁸ Icatsia Pablo jumaitsi ancianovijavabelia:

—Xaniavaetsia nayajivitaeya pajinavanapare pibisiacue ne panexanaeyaniva. Pacuenia oveja pexainævi xaniavaetsia evetavanapa pijaoveja, bajara pijinia pacuenia xaniavaetsia pævetavanapaename daxita pamonaæ Dioso pejumecovēnētsivi. Espiritu Santo raja pacaitoroba panetoevetsinexa vajatuxanenē Jesús pijajivi, pamonaæ comuata pijanata. ²⁹ Tajēvelia baja cajena yapētaniji tacovēya penajetarubenaæjavanexa saicayacuenia Dioso pejumelivaisivecua petsipaebivi. Bajarapamonæ najetarubenaena jivi Dioso pejumecovēnētsijava peverevecaeyæxanaenexa. Pacuenia nevēthē pianæpanævi verene oveja, bajara jamatabēcuenetsane bajarapamonæ peverevecaeyæxanaenexa jivi Dioso pejumecovēnētsijavami. ³⁰ Paxamēyajuvēnēvi ata saicayacuenia Dioso pejumelivaisivecua tsipaebaponaena peyamaxētojorobinexa Dioso pejumecovēnētsivi. Nexata Dioso pejumecovēnētsivi navecuanatsanaena pepēnaponaenexa bajarapamonæ. ³¹ Bajaraxuata xaniavaetsia pævetavanapare Dioso pejumecovēnētsivi. Panajamatabēnapire mapacuenēje. Xanē baja cajena acueyabi pavaibeje, caematacabi canacujitsia, meravai yajava, caeto ata apo copatsinē patacamuxujiobijava bitso patacaasivaxæ. Itsajavata tanuejavata ata pacamuxujiobabiabatsi, jai Pablo Efeso tomarapijiancianovijavabelia.

³² Icatsia Pablo jumaitsi bajarapamonæjavabelia:

—Tajamonæ, nexata baja pacacopatatsi Dioso pecobeyabelia Dioso papecaevetsinexa. Dioso pejumelivaisi nacatsipaeba Dioso vajanacaa-sivajava. Nexata bajarapalivaisi pacajamatabēcueneyavenonaena. Bajarapalivaisi caējēpatsi papecajamatabēcuenæ asaēyæxanaenexa Diosojavabelia. Dioso pacacapanepaena pacuenia Dioso capanepaena daxita pamonaæ Dioso aneconijibia tane. ³³ Xanē itsa naponaponajē paxamējavata, apo najamatabēxainænē tanaxainæyabinexa itsanē pijapalata, penaxatabijava ata. ³⁴ Payapētaneme baja cajena mapacuenēje. Tacobeta nacuenebajē tanamatuvenæjavaxi tacomuataponæenexa, tayajavaponaponaevi ata tatocomuatsinexa. ³⁵ Pacatsitanacuneitajētatsi baja cajena pacuenia paxamē ata bepanacuenebame. Bepayavenonamenua itsamonæ bitso bepejibivi. Tsipaji baja cajena vajatuxanenē Jesús jumaitsi mapacueniaje: “Xanepana bitso itsamonæjavabelia vajarajutabiabijava vaxaitsi itsamonæ vajanacarajutabiabijava matatoxenetsia. Tsipaji bitso jamatabēcuenæbarēyatsi itsa rajutatsi itsamonæjavabelia vajanacarajutsijava matatoxenetsia,” jai raja Jesús, jai Pablo ancianovijavabelia.

³⁶ Itsa baja Pablo najumevereta bajarapacuenia petsipaebijava, Pablo daxita ancianovi pematabacabêta barënuca pebarënavajëtsinexa Diosojavabelia. ³⁷ Bajaraxuacujinae Pablo baja pona. Nexata ancianovi pënuayabatsi. Nexata Pablo ita napëjioba ancianovi, yaitaxutonueya vaetabiaya itabaratsusuneponatsi. ³⁸ Bitso ancianovi najamatabëxaina. Tsipaji Pablo jumaitsi:

—Apo panetaemë rabaja tsane matavëjêa, jai.

Bajaraxuacujinae Pablo barcojavabelia peponaejavata, bajarapamonae pëntaxuabaliatsi barcojavabelia.

21

Pacuenia Pablo pona Jerusalén tomarabelia yabara pelivaisi

¹ Itsa baja panapëjiobiveretajë ancianovi, panarunarecajê baja barco ënëabereca. Pananicabaliajê roviaia patapatsinexalia Cos tomarabelia. Bajaraxuacujinae, meravia pitsijavata, panapatajê abaxê epatua Rodas tomarata. Bajaraxuacujinae abaxê icatsia panapatajê Pátara tomarabelia. ² Nexata Pátara tomarata icatsia pacaxitajarabajê itsabarco. Bajara-pabarco ponaejitsia Fenicia nacuayabelia. Nexata icatsia bajarapabarcota patanaponaenexa, panarunarecajê bajarapamo ënëabereca. Panaponajê jane baja. ³ Nexata barcota patanajetarubenaejavata, pataeyetajê patatsavenononia Chipretunaeto. Paxenetanajetarubenaajê rovia. Paponajê Siria nacuayabelia. Nexata baja papatajê Siria nacuayabelia Tiro tomarata. Nexata Tiro tomarata juteta barcoënëta pecaponaejava. ⁴ Nexata Tiro tomarata pacaxitajarabajê Dioso pejumecovënëtsivi. Bajarapamonaejavata pajinavanapajê siete pamatacabibeje. Bajarapamonae tajëvelia Espiritu Santo pejamatabëcueneta yapëtaeyaexanatsi Pablo pebejiobiaexanaejavanexatsi Jerusalén tomarata. Nexata bajarapamonae jumaitsi Pablojavabelia:

—Pëtsa poname Jerusalén tomarabelia, jai picani bajarapamonae.

⁵ Itsiata baja icatsia siete pamatacabibejecujinae panaropobajê. Nexata Tiro tomarapijivi, daxita Dioso pejumecovënëtsivi, pijavajivi yajava, pexi yajava, patapëta naponalia mene itapayabelia patanepëtaenexa pataponaejava. Nexata mene itapatalia, tajetabota, daxita bajarapamonae yajava, panubenajê patamatabacabêta patavajëtsinexa Diosojavabelia.

⁶ Bajaraxuacujinae panapëjiobajê baja daxita Dioso pejumecovënëtsivi. Ivatsia baja panarunarecajê barco ënëaberena. Bajarapamonae baja naviabalia pijabonëjavabelia.

⁷ Tiro tomarata patananaropobicujinae, panapatajê Tolemaida tomarabelia. Bajarapatomarata pabajacobajê Dioso pejumecovënëtsivi. Bajarapamonaejavata panajinavanapajê caematacabi. ⁸ Meravia icatsia pitsijavata pananaropobajê. Panapatajê icatsia Cesarea tomarabelia. Cesarea tomarata patapatsicujinae, panaponajê Felipe pijaboyabelia. Felipe, Dioso pitorobilivaisi jivi petsipaebinë, siete ponëbeje diaconoviyajuvënë. Bajaraponë pijabota panajinavanapajê. ⁹ Felipe xaina cuatro povabeje pexi. Bajarapapetiriavi abaxê apo nacojiobi. Bajarapamonae tsipaebabiaba jivijavabelia Dioso pitorobilivaisi, palivaisi Espiritu Santo pejamatabëcueneta yapëtaeyaexanatsi. ¹⁰ Itsa baja paxainajê anjamatacabianê Felipe pijabota patanapatsicujinae, Judea nacuaverena pata Diosojumepaebinë profeta, Agabovënë. ¹¹ Bajaraponë pata paxanëjavaberena Felipe pijabota. Nexata Agabo Pablo pijacorreaocoto veeponotatsi. Bajarapabocotota Agabo nacobecëtabeje. Nataxucëtabeje yajava. Nexata Agabo jumaitsi:

—Espíritu Santo raja nejumaitsi tajëvelia mapacueniaje: “Jerusalén tomarata pejinavanapaevi, judíovi, mapacuenia cëtsianatsi mapacorrebocoto pexainaenëje. Bajaraxuacujinae canajetsianatsi itsanacuapijivi pecobeyabelia, apo judíovijavabelia,” jai raja tajëvelia Espiritu Santo, jai Agabo Pablo yabara.

¹² Nexata itsa pajumetaniji bajarapacuenia Agabo patanetsipaebijava, nexata paxanë, Cesarea tomarapijivi yajava, panacobenaasivanë picani Pablo peponaeyaniva Jerusalén tomarabelia. ¹³ Nexata Pablo panejumaitsi:

—¿Detsa xuajitsia panuame? ¿Panenajamatabëxainaeya exanaejitsiamë tsaja? Xanë raja evetajë tanecëtsinexa. Evetajë tanebeyaxuabijava ata Jerusalén tomarata vajatuxanenë Jesús pelivaisi yabara, panejai Pablo.

¹⁴ Pasiva atanë tsabiabi, Pablo itsiata apo najamatabëcopatsi peponaeyava Jerusalén tomarabelia. Nexata baja belia pacopatajë pataasivatsabiabijava. Pajumaitsinë nexata:

—Pacuenia Dioso tojitsipatsi pexanaenexatsi, beexanaenatsi baja, pajanë.

¹⁵ Caematacabibejucujinae paxaniavaetajë patacobecovëjavaxi. Nexata jane baja panaropobajë Jerusalén tomarabelia. ¹⁶ Itsamonae Dioso pejumecovënëtsivi, Cesarea tomarapijivi, paneyanalia. Bajarapamonae panebarëpona Mnasónvënë, Chipretunaeto nacuapijinë, pijaboyabelia. Nexata bajaraponë pijabota panajinavanapajë. Bajaraponë copiaya Dioso pejumecovënëtsiviyajuvënë.

Pacuenia Pablo Jerusalén tomarata Santiago barëcuaicuaijai yabara pelivaisi

¹⁷ Itsa papatajë Jerusalén tomarabelia, Dioso pejumecovënëtsivi panecopiapita jamatabëcuenebarëyaya. ¹⁸ Nexata meravia pitsijavata Pablo panebarëshivaxaina Santiagojavabelia. Nexata Santiago pijabota naena ancianovi. ¹⁹ Nexata Pablo bajarapamonae bajacoba. Pebajacobicujinae Pablo bajarapamonaejavabelia navajunupaeba daxita pacuene Pablo exanapona apo judíovijava ata Dioso peyavenonaexaetsi. ²⁰ Itsa jumetane bajarapacuenia Pablo penavajunupaebijava, nexata Santiago, ancianovi yajava, jamatabëcuenebarëya. Nexata daxita bajarapamonae pejumetaexae bajarapacue, pexaniajamatabëcuene rajuta Diosojavabelia. Nexata Santiagobana jumatsi Pablojavabelia:

—Patajabanänë, yapëtaneme baja cajena mapacuenije. Judíovi bitso ayabitseaëtoxaneto, miles pajivibeje Dioso pejumecovënëtsivi. Yapëtanemenua baja mapacuenije. Daxita bajarapajudíovi jumecovënëtsi ata Jesús pelivaisi, itsiata abaxë tsiteca jumecovënëtavanapa Dioso Moiséspijinëta penajumecopatsilivaisi. ²¹ Pajudíovi apo jumecovënëtsi Jesús pelivaisi, xamë netsipaebaponaelivaisi cayabaranajumetsënëtabiaba. Nexata bajarapajudíovi najumetsënëtsiaya jumai tsabiabi Jesús pelivaisi pejumecovënëtsijudíovijavabelia: “Itsa raja Pablo livaisi tsipaebaona judíovijava, itsanacuanëjava pejinavanapaevi, Pablo itavetabiaba judíovi pecopatsinexa Dioso Moiséspijinëta penajumecopatsilivaisi pejumecovënëtsijavami. Itavetabiabanua bajarapamonae pecopabinexa peperabëcaucubijava pexi. Pablo itavetabiabanua bajarapamonae pecatsitecaeyaniva vajasalinaivi pijacue,” jai tsabiabi bajarapamonae najumetsënëtsiaya xamë yabara Jesús pelivaisi pejumecovënëtsijudíovijavabelia, jai Santiagobana Pablojavabelia.

²² Icatsia Santiagobana jumatsi Pablojavabelia:

—¿Detsa nexata vaxaitsi itsanetsi? Itsa raeta judíovi Jesús pelivaisi pejumecovênetsivi, cavênêlivaitsitane nepatsijava, nacaetuatsiana penabarêcuaicuajainexa xamê yabara. ²³ Nexata daxitajivi pecayapêtaenexa nejumecovênetsijava Dioso Moiséspijinêta penajumecopatsilivaisi, exanaename pacuenia pacaitorobijitsiatsi. Majotaje cuatro ponêbeje paxanêyajuvênêvi vereta baja pexanaejava pacuenia baja najumecapanepaeya jumaitsi Diosojavabelia. Nexata bajarapamonae ponaejitsia temploboyabelia ofrenda perajutsinexa Diosojavabelia. ²⁴ Nexata naponaname bajarapamonaeta temploboyabelia. Nexata templobota nanajamatabêcuenexaniavaetsianame nïajamatabêcuenesaênexa Diosojavabelia. Pacuenia bajarapamonae najamatabêcuenexaniavaetsijitsia pijamatabêcuenesaênexa Diosojavabelia, bajarapacuenia nanajamatabêcuenexaniavaetsianame. Nexata daxita xua bajarapamonae notsiana templobota ofrenda perajutsinexa Diosojavabelia, ponêjavabelia notsiana, bajaraxua xamê daxita cobecovêmatamotsianame. Bajaraxuacujinae bajarapamonae daxitamatanami matacasibianatsi. Bajarapacuenia itsa exanaename, daxita judíovi cayapêtaena nejumecovênetsijava Dioso Moiséspijinêta penajumecopatsilivaisi. Nexata daxita judíovi yapêtaena najumetsênetsiaya pecabaracuaicuajai tsabiabijava pajudíovi apo jumecovênetsi Jesús pelivaisi. ²⁵ Pamonaepo judíovi, pijasalinaivi apo itavetsitsi daxita pacuene vaxaitsi judíovitsi vajasalinaivi nacaitaveta. Nexata pamonaepo judíovi ata, Dioso pejumecovênetsivi, pataitavetsinexa, caelivaisiyobeje patoyaquinajê cuyalatota. Itsa patoyaquinajê, pajumaitsinê mapacueniaje: “Pecobeta saya pexanaenêanêjavabelia pevi perajutsinexa ofrendacuenia itsa tobia baca oveja ata, pêtsa paxaneme bajarapayajuvênêvi. Pêtsa paxaneme peja. Pêtsa paxaneme cuibocuetsacaeya pebeyaxuabinê pevi. Papebijivi baja nacojioba, pêtsa matayajibatsi itsavajavabelia pijavavecua. Papebijivi pijinia abaxê apo nacojiobi, pêtsa matayajibatsi petirivajavabelia. Bajara pijinia pacuenia petiriavi ata. Papetiriavi baja nacojioba, pêtsa matayajibatsi itsanêjavabelia pamonavecua. Papetiriavi pijinia abaxê apo nacojiobi, pêtsa matayajibatsi pebijavabelia,” pajanê itsa patoyaquinajê apo judíovijavabelia, jai Santiagobana Pablojavabelia.

Pacuenia Pablo templobota vaetabatsi penaneconitsivi pejebabiabibota peetsinexatsi yabara pelivaisi

²⁶ Santiagobana Pablo pitorobicujinaetsi, meravia pitsijavata, Pablo napona pebijivi cuatro ponêbeje pepêta pacuenia Santiagobana itorobatsi. Pablo nexata najamatabêcuenexaniavaetapona pijamatabêcuenesaênexa Diosojavabelia cuatro ponêbeje yajava. Bajaraxuacujinae Pablo temploboyalia joneya sacerdotevijavabelia, petsipaebinexa pamatacabi copiarucaeijitsia Pablobana penajamatabêcuenexaniavaetsijava Diosojavabelia. Bajarapamatacabi cuatro ponêbeje Diosojavabelia ofrenda perajutsijavanênexa templobota notsijitsia. Nexata picani daxita bajaraxua Pablo cobecovêmatamotsijitsia bajaraxua pecanajetsivijavabelia.

²⁷ Nexata sietepamatacabibecujinae, pamatacabi jane baja Pablo, cuatro ponêbeje yajava, Diosojavabelia ofrenda rajutsijitsia, Pablo templobota tanetsi judíovi, Asiavênê nacuverena pepatsivi. Nexata bajarapajudíovi itoroba daxita Jerusalén tomarapijivi pianaepanaenexa Pablojavabelia.

Nexata Jerusalén tomarapijivi, Asiavënë nacuaverena pepatsivi yajava, nacobenavaetabatsi Pablo. ²⁸ Nexata bajarapamonae vavajai pinijijumeta. Najumetsënëtsiaya jumaitsi:

—¡Tajamonae judíovi, naxanitsia! ¡Paneyavenonare! Maponėje daxitanacuanějava livaisi tsipaebanajetaruca daxitanacuanējipijivi vajanacaitoyanexa vaxaitsi manacuapijivitsije. Itavetaponanua Dioso Moiséspijinēta penajumecopatsilivaisi jivi pejumecovënëtsiyaniva. Itavetaponanua mapatemplobo ataje jivi peyaiyataeyaniva. Apo judíovi ata Pablo barějoneyabiaba matemploboyarenaje. Nexata baja Dioso tsitaabejtsi mapatemploboje, Dioso pijatemplobo. Nexata baja Pablo naneconita Diosojavabelia, jai najumetsënëtsiaya judíovi Pablo yabara Asiavënë nacuaverena pepatsivi.

²⁹ Bajarapacuenia vavajaiya jumaitsi tsipaji baja copiaya bajarapajudíovi Pablo tanetsi pebarēponaponaejava Jerusalén tomarata apo judionē, Trófimovënëne, Efeso tomarapijinē. Nexata jamatabēcuenenavēxaniabiaya bajarapamonae jamatabējumaitsi:

—Pablo raeta apo judionē barējjunua mapatemploboyarenaje, jamatabējai Trófimo yabara.

Pablo cajena Trófimo apo barějone temploboyalia.

³⁰ Nexata Asiavënë nacuaverena pepatsivi, Pablo yabara penajumetsënëtsilivaisi, daxita Jerusalén tomarapijivi jumetane. Nexata bitso anaepana. Nexata daxita bajarapamonae kujinaejinarena templobojavaberena. Bajarapamonae vaetabatsi Pablo. Robobocatsi vayafuabelia temploboēnevēcua. Nexata templobobaupaxanetonē bepíjia vecuabaupaxatabatsi. ³¹ Bajarapamonae picani Pablo jamatabēbeyaxuabatsi. Nexata bajarapaepatota itsamonae tsipaeba vajabitsaē pepo pevetsinē, comandantejavabelia. Tsipaeba pacuenia daxita Jerusalén tomarapijivi bitso anaepanavanapa. ³² Nexata comandante bepíjia barēlia pijajivi vajabitsaēvi, vajabitsaēvi pijacapitánvi yajava. Cujinaejina jivi penacaeuatsijavabelia. Nexata judíovi itsa tane comandante vajabitsaēvi pebarēpatsijava, nexata judíovi copaba pebejavatsi Pablo.

³³ Nexata comandante Pablo kujirenatsi. Vaetabiaexanatsi pijajivi. Comandante itoroba pijajivi Pablo pecētsinexatsi anijacadenamaētotabeje. Bajaraxuacujinae yanijoba judíovijavabelia.

—¿Detsa maponėje? ¿Detsa xua exana maponėje? jai comandante.

³⁴ Nexata bajarapajivi bitsaētoxanetonējajuvēnevi comandantejavabelia najuatsipaebanubena pinijijumeta. Nexata comandante apo jumetae xaniavaetsia bitso jivi pevavajaixae. Nexata comandante itoroba vajabitsaē Pablo pecaponaenexatsi vajabitsaē pijaboyabelia. ³⁵ Pablo capatatsi vajabitsaē pijaboitapata. Vajabitsaē pijabo pepēnevēvelia xaina beescalercuenia pexanaejava. Nexata bajarajota Pablo vajabitsaē nacobenayotsiaya cajuayatsi vajabitsaē pijaboyalia pecajonenexatsi. Tsipaji icatsia bajarajota Pablo jivi bejitsiatsi bitso pianaepanaexae. ³⁶ Jivibitsaētoxanetonē Pablo barabocabuataponatsi. Vavajai tsabuataponae bajarapamonae.

—¡Pabeyaxuare! jai tsabuataponae Pablo yabara.

Pacuenia Pablo navajunupaeba jivibitsaētoxanetonējavabelia yabara pelivaisi

³⁷ Itsa baja Pablo vajabitsaēvi pijaboyalia cajonejitsiatsi, nexata Pablo griegojumeta jumaitsi comandantejavabelia:

—Netocopare tacatsipaebinxae caejumeyo, jai Pablo.

Nexata comandante jumaitsi:

—¿Xamē tsaja natsipaebame griegojume? ³⁸ ¿Xamē tsaja apo Egipto nacuapijinēmē? ¿Xamē tsaja imata jivi apo itorobimē pianaepanaenexa gobiernojavabelia? ¿Xamē tsaja imata penamaxēvanitsivi cuatro mil ponēmāxēto apo barēnajatabajiravimē petusato nacuayabelia? jai comandante Pablojavabelia.

³⁹ Nexata Pablo jumaitsi:

—Jume raja. Xanē raja saicaya judíonēnē, Tarso tomarapijinēnē. Tarso tomara cajena pinijitomara daxita Cilicia nacuata penaetomaranēvecua. Pexaniacuene netoexanare. Netocopare livaisi tatsipaebinexa mapamonaejavabeliaje, jai Pablo.

⁴⁰ Nexata comandante tocopatatsi livaisi petsipaebinexa. Pablo nuca vajabitsaē pijabo pepēnēvelia beescalercuena pexanaejavajumata. Pablo nacobeyota jivi pemoyanexa. Nexata baja jivi itsa moya, Pablo navajunupaeba bajarapamonaejavabelia hebreojumeta.

Pablo jumaitsi:

22

¹—Tajamona, panenamuxunaevere. Paxamē ata vajanacua paneevetsivi, panenamuxunaevere. Vepacanavajunupaebatsi daxita xua exanjē, jai Pablo hebreojumeta judíovijavabelia.

² Bajarapajudíovi itsa jumetane palivaisi Pablo tsipaeba hebreojumeta, nexata bitso ajumejibia namuxunaevetena. Nexata Pablo icatsia jumaitsi:

³—Xanē raja judíonēnē. Naexanjē Tarso tomarata, Cilicia nacuata peeaetomarata. Itsiata vitsabajē mapatomarataje, Jerusalén tomarata. Pecujarubinē Gamaliel necujaruba. Nexata xaniavaetsia necujaruba daxita vajasalinaivi pijacuene. Nexata picani jamatabējumaitsinē tsabiabi: “Daxita tajamatabēcueneta Dioso pejitsipaecuenia tonacuenebianajē,” jamatabējanē tsabiabi. Bajarapacuenia aeconoxae daxita paxamē ata pajamatabēitsimē tsavanapae, jai Pablo.

⁴ Pablo icatsia jumaitsi:

—Xanē abaxē picani bajayata barajinabiabajē pamonaē jumecovēnēta pexanialivaisi, Jesucristo pelivaisi. Pamonaē jumecovēnēta Jesús pelivaisi, taicaponajē pebijivi. Taicaponajē petiriavi ata. Jebaponajē bajarapamonaē penaneconitsivi pejebabiabibota. Jitsipajē picani pebeyejebinexatsi daxita bajarapamonaē. ⁵ Sacerdotevi pepo penamatacaitorobinē, daxita judíovitsi vajaanianovi ata, pacatsipaebijitsipa bajarapacuenia, pacuenia baja xaniavaetsia pacanavajunupaebatsi. Tspajē bajarapamonaejavabelia vajētajē tanetsicobeyaquinaenexa cuyalato tatocaponaenexa pamonaē judíovi jivananapa Damasco tomaratalia. Nexata bajarapajudíovi itsa yoroba bajarapaxuto, tanetocopsinexa picani Jesús pelivaisi pejumecovēnētsivi tataicaenexa. Nexata jane baja picani lianē tataicaenexa daxita pexanialivaisi, Jesús pelivaisi, pejumecovēnētsivi, tacapatsinexa picani maberanaje Jerusalén tomaraberena penaneconitsiaexanaenexatsi, jai tsanucāe Pablo judíovijavabelia.

Pacuenia Pablo navajunupaeba pacuenia taxuxuaba Jesús pelivaisi pejumecovēnētsijava yabara pelivaisi

(Hch 9.1-19; 26.12-18)

⁶ Pablo icatsia jumaitsi hebreojumeta judíovijavabelia:

—Nexata jane baja ponajē Damasco tomarabelia. Itsa baja imoxoyotana-jetarucājē Damasco tomara, jemata matonejeepatota pinijicotia nematatoy-oroetsia naitayota athēbēvetsica. ⁷ Nexata bajarajota irataeya bocajunujē

irata. Jumetaenucajē athēbēvetsica tanejumaitsijava: “Saulo, Saulo, ¿detsa xuajitsia xanē tajajivi netobejiobiaexanaponame?” tanejajjava. ⁸ Nexata xanē jumaitsinē: “Tajatuxanenē, ¿detsa ponēmē?” janē. Nexata icatsia nejumaitsi: “Xanē raja Jesúsnē, Nazaret tomarapijinēnē. Xanē raja tajajivi netobejiobiaexanaponame,” nejai. ⁹ Papebijivi yajavanajetarucajē, tane baja cajena athēbēvetsica penaitayotsicotia. Itsiata baitsi jane apo jumetae xua yabara nebarēcuacuajijai athēbēvetsica. ¹⁰ Nexata xanē jumaitsinē: “Tajatuxanenē, ¿detsa xua nexata exanaenajē?” janē. Nexata pepo petuxanenē nejumaitsi: “Nonotapunare baja. Ponaename baja Damasco tomarabelia. Bajarajotalia catsipaebiana pacuenia exanaejitsiamē,” nejai. ¹¹ Nexata bajarapacotia tataecujinae bitso nitaxutomeraviba. Apo necaējēpae tataejava. Nexata saya tayajavaponaevi necomacaponalia Damasco tomarabelia, jai Pablo judíovijavabelia:

¹² Icatsia Pablo jumaiti judíovijavabelia:

—Bajarajota Damasco tomarata ponapona Ananíasvēnēnē, bitso pejumecovēnētsinē Dioso Moiséspijinēta penajumecopatsilivaisi. Bajaraponē Ananías yabara daxita judíovi, Damasco tomarapijivi, jumai tsabiabi: “Bitso raja Dioso pejumecovēnētsinē Ananías,” jai tsabiabi. ¹³ Nexata bajaraponē Ananías xanējavaberena patajopa tanetaenexa. Nexata nejumai tsanucacae: “Tajabananē Saulo, icatsia rabaja itaxutoxanepaname,” nejai. Bajarapacuenia tanejumaitsijavata icatsia baja itaxutoxanepanjē. Nexata baja taniji Ananías. ¹⁴ Nexata icatsia Ananías nejumaitsi: “Vamojivimi rabaja pijaDioso caitapeta. Caitapeta baja neyapētaenexa pacuenia catojitsipa netoexanaenexa. Caitapetanua netaenexa Dioso pitabarata Jesús pepo pianeconijibinē. Caitapetanua nejumetaenexa Jesús pecatsipaebilivaisi. ¹⁵ Nexata ponaename daxitanacuanēpijivijavabelia netsipaebanajetarucaenexa pacuenia taneme, pacuenia ata jumetaneme Jesús pelivaisi. ¹⁶ ¿Detsa nexata xuajitsia abaxē najamatabējematsia ponaponame? Nonotapunare. Cabautsariana. Jesúsjavabelia nenajamatabēcuenecopatsixae, daxita pibisiacuene nexanaeconimi cavecuajibiaexanaena,” nejai Ananías, jai Pablo judíovijavabelia.

Pacuenia Pablo itorobatsi Dioso pitorobilivaisi petsipaebaponaenexa apo judíovijava yabara pelivaisi

¹⁷ Pablo icatsia jumaiti hebreojumeta judíovijavabelia:

—Bajaraxuacujinae Damasco tomaraverena naviarenajē baja Jerusalén tomaraberena. Nexata itsa patajē Jerusalén tomarata, ponajē templobojavabelia tavajētsinexa Diosojavabelia templobota. Nexata tavajētsijavata Diosojavabelia, taniji bemajitsinaebota pepo petuxanenē Jesús. ¹⁸ Nexata Jesús nejumaitsi: “Naxanitsiayo bepijia vecuaponare Jerusaléntomara. Tsipaji raja mapatomarapijivije apo cajumecovēnētsi tsane netsipaebijava xanē talivaisi,” nejai Jesús bemajitsinaebota. ¹⁹ Nexata xanē jumaitinē: “Tajatuxanenē, bajarapamonae judíovi xaniavaetsia baja cajena neyapētane. Bajarapamonae neyapētane judíovi penacaetuatabibonējava tataicaponaejava daxita pamonae cajumecovēnēta taconibabeyabiabinexa naebota. ²⁰ Bajarapamonae neyapētane xanē ata bajarapamonae jamatabēcuenejēpaeya tataenucaejava pamatacabi Estebanpijinē, pecalivaisipaebinēmi, beyaxuabatsi. Bajarapamatacabi, pamonae Estebanpijinē beyaxuabatsi, penajumajonejebijavanē tovetanucajē,” janē pepo petuxanenē Jesúsjavabelia. ²¹ Nexata pepo petuxanenē nejumaitsi: “Ponare baja

Jerusalén tomaravecua. Caitorobijitsiatsi raja itsanacuanēpijivijavabelia, apo judíovijavabelia,” nejai pepo petuxanenē, jai Pablo judíovijavabelia.

Pacuenia Pablo exanatsi vajabitsaē pepo pevetsinē comandante yabara pelivaisi

22 Judíovi namuxunaevetatsi Pablo penavajunupaebijava. Nexata itsa jumetane judíovi pacuenia Pablo navajunupaeba, nexata icatsia judíovi vavajai tsaponae pinijijumeta. Jumai tsaponae:

—¡Maponēje pabeyaxuare! ¡Mara pitsinē apo becopatsitsi peponapon-aenexa matavējēaje! jai tsaponae judíovi Pablo yabara.

23 Bajarapamonae pinijijumeta vavajai tsaponae. Pijacamisajumavelia penaxatabijavanē, vebabia bitso pianaepanaexae. Atsabenonē cayabajarabarena Pablojavaberena pebaraanaepanaexaetsi. 24 Nexata vajabitsaē pepo pevetsinē, comandante, pijajivi itoroba Pablo pecajonenexatsi vajabitsaē pijaboyalia. Comandante itoroba pijajivi Pablo picani pejumatitibabenexatsi penaconitsivi pejumaconitabiabimacata. Bajarapacuenia picani Pablo exanaejitsiatsi Pablo pentsipaebinexa vajabitsaējavabelia xua yabara judíovi neconitsiaya pinijicuenia vavajai tsaponae Pablo yabara. 25 Nexata jane baja Pablo itsa cētetatsi vajabitsaē picani pejumatitibabenexatsi, nexata Pablo jumaitsi bajarajota penucaenē vajabitsaē pijacapitánjavabelia:

—Xanē raja Romano nacuapijinēnē. Nexata itsa panejumaconibabejitsipame abaxē copiaya neneconitsinejeva juezmonae pitabarata, nexata panevemaxēnaneconitsipame. Tspaji nijatuxanenē, Romanonacua pepo pevetsinē, pacaitaveta bajarapacuenia paneexanaeyaniva, jai Pablo vajabitsaē pijacapitánjavabelia.

26 Capitán itsa jumetane bajarapacuenia Pablo pejumaitsiyava, nexata capitán lia vajabitsaē pepo pevetsinē comandantejavabelia. Capitán jumaitsi comandantejavabelia:

—Xania baja tsane pacuene exanaejitsiamē Pablojavabelia. ¡Maponēje Pablo Romano nacuapijinē baja cajena! jai capitán comandantejavabelia.

27 Nexata comandante rena Pablojavaberena. Jumaitsi Pablojavabelia:

—¿Xaniajai tsabaja? ¿Xamē Romano nacuapijinēmē? jai comandante.

—Jājā, jai Pablo.

28 Nexata comandante jumaitsi Pablojavabelia:

—Xanē ata baja maparucaeje Romano nacuapijinēnē naexanajē. Tspaji baja matamotajē ayaimatamota bepepo Romano nacuapijinēnē tanaexanaenexa, jai comandante.

Bajarapacuenia jumaitsi tspaji comandante saicayanacuata penaexanaenē.

Pablo nexata jumaitsi comandantejavabelia:

—Xanē apo matamotsinē. Tspaji baja cajena pepo Romano nacuapijinēnē. Naexanajē cajena Romano nacua, jai Pablo comandantejavabelia.

29 Nexata picani pavajabitsaē Pablo jumaconibabejitsiatsi, vecuaponatsi baja. Vajabitsaēvi pepo pevetsinē ata, comandante, Pablo cujunavatsi itsa yapētanetsi Pablo Romano nacuapijinēcuene. Cujunavatsi pecētsiaexanaexaetsi cadenamaētonēta.

Pacuenia Pablo navajunupaeba daxita judíovi pevetsivi pitabarata yabara pelivaisi

³⁰ Pablo penavajunupaebicujinae Romano nacuapijinēcuene, meravia pitsijavata, vajabitsaē pepo pevetsinē, comandante, jamatabēyapētane xaniavaetsia paneconi yabara judíovi neconitsijitsiatsi Pablo. Nexata comandante pijajivi itoroba Pablo pevecuaisinaenexatsi cadenamaēto. Nexata comandante junata sacerdotevi penamatacaitorobivi, judíovi pijaancianovi ata yajava, judíovi pecujarubivi ata yajava, penacaetuatsinexa. Nexata caponarenatsi Pablo, penutsinexatsi daxita penacaetuatsivi pitabarata.

23

¹ Pablo naēcota daxita penacaetuatsivi. Nexata Pablo jumaitsi bajarapamonaejavabelia:

—Tajamonae, xaniavaetsia cajena ponaponabiabajē naja-matabēcuenebijianaenejevanē Dioso pitabarata mapamatacabijavaberena ataje, jai Pablo bajarapamonaejavabelia.

² Nexata Ananías, sacerdotevi pepo penamatacaitorobinē, jumaitsi Pablo pimoxoyotanubenaevitsijavabelia:

—Pacuibotsaquibiaxubare Pablo, jai Ananías, sacerdotevi pepo penamatacaitorobinē.

³ Nexata Pablo jumaitsi Ananíasjavabelia:

—¡Dioso rajane juya pepacue ne xamē catsaquibiaxubiana! Xamē majotaje ecame taneneconitsinexamē. Tsipaji xamē xanē yabara jamatabēcuenenavēxaniabiaya jamatabējumaitsimē: “Maponēje Pablo naneconita Diosojavabelia,” jamatabējamē. Nexata xamē nijacuata naneconitame nijagobiernojavabelia. Tsipaji itorobame mapamonaeje tanetsaquibiaxubinae taaneconijibinē, jai Pablo Ananíasjavabelia.

⁴ Bajarajota penubenaevi jumaitsi Pablojavabelia:

—Xamē raja jumeitavetame Dioso pijajivitonē, sacerdotevi pepo penamatacaitorobinē, jai bajarapamonae Pablojavabelia Ananías yabara.

⁵ Nexata Pablo jumaitsi:

—Tajamonae, xanē apo yapētaenē Ananías sacerdotevi pepo penamatacaitorobinēcuene. Itsa yapētaejitsipajē, apo jumaitsinē tsipae bajarapacuenia. Tsipaji Dioso pejumelivaisibaxutota jumaitsi mapacueniaje: “Pētsa jumeitavetame pecaēvetsinē,” jai Dioso pejumelivaisibaxutota, jai Pablo Ananías yabara.

⁶ Nexata Pablo jamatabēcuenyapētane penacaetuatsivi. Tsipaji penacaetuatsivi caelivaisi apo xainae. Jamatabēcuenyapētaneme itsamonae pecatsitecaejava saduceovi pecujarubicuene. Jamatabēcuenyapētane itsamonae pijinia pecatsitecaejava fariseovi pecujarubicuene. Nexata Pablo pinijijumeta jumaitsi:

—Tajamonae, xanē raja fariseonēnē. Fariseovi pecujarubicuene jume-covēnētajē. Taxapijinē baja cajena fariseonē. Tamojivimi ata cajena fariseovi. Majotaje neneconitsijitsia. Tsipaji jivi petēpaecujinae Dioso icatsia piasaēyaexanaejavanexa, jumecovēnētajē, jai Pablo.

⁷ Bajarapamonae itsa jumetane bajarapacuenia Pablo pejumaitsijava, nexata najumeanaenota fariseovibeje saduceovibeje. Bajarapamonae nexata apo najamatabēcuenejēpae baja. Nexata anaeya bajarajota navecuansana baja. ⁸ Saduceovi jumeaebabiaba fariseovi pejumecovēnētsilivaisi. Nexata saduceovi jumai tsabiabi:

—Jivi petēpaecujinae, acuenebi icatsia Dioso piasaēyaexanaejava. Ajibi raja cajena ángelevi. Ajibi raja cajena petēpaevi ata pejumape, jai tsabiabi saduceovi.

Fariseovi jumecovënëta jivi petëpaecujinae Dioso icatsia pi-asaëyaexanaejavanexa. Jumecovënëtanua ángelevi ata pejinavanapaejava. Jumecovënëtanua petëpaevi ata pejumape pejinavanapaejava. ⁹ Apo penajamatabëcuenejëpaexae, daxita bajarapamonae bajarajota pinijijumeta vavajai tsaponae. Nexata pamonae judíovi pecujarubivi, fariseoviyajuvënëvi, nonobapuna. Anaeya jumaitsi saduceovijavabelia:

—Itsacuene ata cajena pibisiacuene apo exanae maponë Pabloje. Xaniajai meta cajena. Petëpaejivi pejumape tsipaebatsi. Itsa jume, ángel meta tsipaebatsi. Paxanë nexata itsacuene ata apo paexanaenë tsane Pablojavabelia Diosojavabelia patananecotsiyaniva, jai fariseovi saduceovijavabelia.

¹⁰ Nexata bajarapamonae pinijicuenia nabijataeya najumeanaenotapona. Nexata vajabitsaë pepo pevetsinë, comandante, belia jamatabëjumaitsi: “Pablo meta baja bajarapamonae beyaxuabianatsi,” jamatabëjai. Nexata comandante junata pijajivi peponaenexa. Pablo baja jutatsi bajarapamonaevecuca. Comandante itoroba pijajivi Pablo pecaponaenexatsi vajabitsaë pijaboyabelia.

¹¹ Nexata bajarapameravi Jesús tsitanaitajëtatsi Pablo. Jesús nuca Pablo pemuxuneneta. Jumaitsi:

—Ajamatabëcuenesaëmëre nevajënaeyabelia. Pacuenia tsipaebame xanë talivaisi majotaje Jerusalén tomarata, bajara icatsia pacuenia tsipaebianame xanë talivaisi Roma tomarata ata, jai Jesús Pablojavabelia.

Pacuenia picani Pablo judíovi jamatabëbeyaxuabatsi yabara pelivaisi

¹² Pablo petsitanaitajëtscijinaetsi Jesús, meravia pitsijavata, judíovi nacaetuata. Najamatabëcueneyanaba jane baja picani Pablo pebeyaxuabinexatsi. Nexata picani pebeyaxuabivajënaetsi, bajarapamonae najumecapanepaeya najumaitsi:

—Vaxaitsi apo xae tsanetsi itsacuenejavayo ata. Mera ata apo apae tsanetsi. Matapania baja Pablo beyaxuabianatsi, nabanianatsi. Mera ata apaanatsi, najai bajarapamonae.

¹³ Pamonae picani Pablo jamatabëbeyaxuabatsi, cuarenta ponëbeje pe-matatsënëa. ¹⁴ Bajaraxuacujinae bajarapamonae pona sacerdotevi penamatacaitorobivijavabelia. Pona judíovi pijaancianovijavabelia ata. Tsi-paji bajarapamonae caejavata nacaetuatena. Nexata pamonae cuarenta ponëbeje, pamonae picani Pablo jamatabëbeyaxuabatsi, jumaitsi sacerdotevi penamatacaitorobivijavabelia, judíovi pijaancianovijavabelia ata:

—Paxanë rajane baja najumecapanepaeya panajumaitsinë: “Vaxaitsi apo xae tsanetsi itsacuenejavayo ata. Matapania baja Pablo beyaxuabianatsi, nabanianatsi,” panajanë. ¹⁵ Nexata paxamë sacerdotevi panenamatacaitorobivi, paxamë ata judíovi papijaancianovimë, panacaetuatsianame judíovi pecujarubivi yajava panenabarëcuaiquajainexa. Nexata daxita paxamë patonajumeitorobianame cuyalatota vajabitsaë pepo pevetsinë, comandantejavabelia. Pavajëttsianame comandantejavabelia paecatocarenanexa Pablo. Pajumaitsimë tsane yamaxëitojorobiaya comandantejavabelia: “Pajitsipajë icatsia matavëjëa patayanijobijava Pablo, pijaneconi patayapëtaenexa xaniavaetsia, paneconi xaina,” pajamë tsane. Nexata paxanë epatotalia pavajënaeevetsianajë Pablo. Itsa rena, patabeyaxuabinexa patsinejeva maberanaje, jai pamonae cuarenta ponëbeje, pamonae picani Pablo jamatabëbeyaxuabatsi.

Nexata sacerdotevi penamatacaitorobivi, judíovi pijaancianovi ata, jejai comandantejavabelia petonajumeitorobinexa Pablo pecarenanexatsi.

¹⁶ Itsiata bairi jani Pablo pematapijiva pexenato jumetane Pablo pevajenaevetsiapaebijavatsi pebeyaxuabinexatsi picani. Nexata bajaraponë pona vajabitsaë pijaboyabelia. Itsa baja bajaraponë joneya vajabitsaë pijaboyalia, bajarapalivaisi tsipaeba Pablojavabelia. ¹⁷ Nexata bajaraxuacujinae Pablo junata caenë vajabitsaë pijacapitan. Pablo jumaiti:

—Barëponare mapapevëjëatoje papecanamatacaitorobinë, comandantejavabelia. Itsalivaisiyo xaina petsipaebinexa, jai Pablo.

¹⁸ Nexata Pablo piopaxa capitán barëponatsi vajabitsaë pepo pevetsinë, comandantejavabelia. Nexata capitán jumaiti comandantejavabelia:

—Naneconitsia raja peponaponanë Pablo nejunta. Nexata nitoroba tabarëponanexa mapapevëjëatoje xamëjavaberenä. Tsipaji pina catsipaebijitsia itsalivaisiyo, jai capitán comandantejavabelia.

¹⁹ Nexata comandante cobepitatsi pevëjëato. Barëliatsi pesaicaeyojavabelia. Comandante nexata jumaiti pevëjëatojavabelia:

—¿Detsa pitsilivaisi xainame tanetsipaebinexamë? jai.

²⁰ Nexata pevëjëato jumaiti:

—Sacerdotevi penamatacaitorobivibeje, judiovi pijaancianovibeje, najamatabëcueneyanaba pecavajëtsinexa meravia netocalianexa Pablo bajarapamonaejavabelia. Bajarapamonae cayamaxëitojorobiaya cajumaitsiapaebi: “Pajitsipajë icatsia matavëjëa patayanijobijava Pablo, pijaneconi patayapëtaenexa xaniavaetsia, paneconi xaina,” cajaiyapaebi bajarapamonae.

²¹ Itsiata pëtsa jumecovënëtame bajarapamonae. Tsipaji cuarenta ponëbeje pematatsënëa namatayabiaya epatöta Pablo vajenaevetsiapaebatsi pebeyaxuabinexatsi. Bajarapamonae daxita najumecapanepaeya najumaiti baja: “Apo xae tsanetsi itsacuenejavayo ata. Mera ata apo apae tsanetsi. Matapania baja Pablo beyaxuabianatsi, nabanianatsi. Mera ata apaenatsi,” najai baja capanepaeya bajarapamonae. Aeconoxae saya bajarapamonae eveta Pablo necaliajava, jai pevëjëato comandantejavabelia.

²² Nexata comandante jumaiti pevëjëatojavabelia:

—Pëtsa tsipaebame itsajivi ata tanetsipaebilivaisimë, jai comandante. Bajaraxuacujinae pevëjëato baja itorobatsi caevëalia.

Pacuenia Pablo itorobatsi nacuaevetsinë Félixjavabelia yabara pelivaisi

²³ Vajabitsaë pepo pevetsinë, comandante, junata anijanëbeje, vajabitsaë pijacapitanbeje. Jumaiti:

—Panaxaniavaetsiaexanarebeje vajabitsaë petaxuta peponaevinexa doscientos ponëmaxëto, setenta pijinia ponëbeje caballojumata peponaevinexa, doscientos pijinia ponëmaxëto becuerereboxanetonë, lanzavënëjavanë, pecaponaevinexa. Panaxaniavaere paneponaenexa Cesarea tomarabelia ajena, mapameravitaje, bejamatabëcuene a las nuevejave. ²⁴ Itsacaballobeje pijinia Pablo peyaponaenexa, patoxaniavaere. Xaniavaetsia evetsiaya pacaponaename Pablo nacuaevetsinë Félixjavabelia, jai comandante capitánbejejavabelia.

²⁵ Bajaraxuacujinae comandante tsicobeyaquina cuyalatobaxuto pitorobinexa nacuaevetsinë Félixjavabelia. Comandante peyaquinaecuyalatoxutota jumaiti mapacueniaje:

²⁶ “Félix, pecayaiyatanë, nacua nevetsinë. Xanë raja Claudio Lisi-avënënenë catoyacuinatsi. Cabajacobatsi. ²⁷ Judiovi raja vaetabatsi ponë caitoitorobaliatsi, Pablovënënenë. Beyaxuabijitsiatsi picani. Nexata itsa vënëlivaisitani jai Pablo Romano nacuapijinëcuene, sivalianë. Tajajivi

vajabitsaë taneyavenonaecueneta yacajërëtajë judíovi pecobevecua, ajena baja picani beyaxuabijitsiatsi. Nexata caponaeyaexanajë tajajivi vajabitsaë pijaboyabelia. ²⁸ Bajaraxuacujinae sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata, nutsiaexanajë. Bajarapacuenia nutsiaexanajë bajarapamonae pitabarata tayapëtaenexa jane baja picani paneconi yabara Pablo judíovi neconitsijitsiatsi. ²⁹ Itsiata baitsi jane Pablo itsacueneneconi ata apo xainae, paneconi yabara beyaxuabijitsiatsi, paneconi yabara ata etsijitsiatsi penaneconitsivi pejebabiabibota. Judíovi saya Pablo neconitsijitsiatsi judíovi pijasalinaivi pijacuen yabara. ³⁰ Nexata itsajivi netsipaeba judíovi namutoepatota Pablo pevajënaeevetsiapaebijavatsi pebeyaxuabinexatsi. Bajaraxuata nexata najamatabëxainajë Pablo tacatoitorobinexa xamëjavabelia. Nexata pajudíovi Pablo neconitsijitsiatsi, itorobajë peneconitsinexatsi xamë nitabarata. Bajara masaya daxitajumeyoje,” jai mapacueniaje comandante petoyaquinaebaxutota nacuaevetsinë Félixjavabelia.

³¹ Nexata vajabitsaë exana baja pacuenia itorobatsi comandante. Bajarapameravi vajabitsaë baja Pablo caponaliatsi Antípatris tomarabelia. ³² Nexata meravia pitsijavata bajarapavajabitsaëyajuvënëvi, petaxuta peponaevi, Antípatris tomarata naviabarena baja pijaboyaberenä. Pamonae caballojumata peponaevi, pevajënaeyabelia abaxë caponaliatsi Pablo. ³³ Caponaliatsi Cesarea tomarabelia. Nexata Cesarea tomaratalia vajabitsaë rajuta petocaponacuyalatoxuto nacuaevetsinë Félixjavabelia. Yajavarajutanua Pablo bajaraponë pecobeyabelia. ³⁴ Nexata nacuaevetsinë Félix leba baja petocapatsicuyalatoxutotsi. Bajaraxuacujinae nacuaevetsinë Félix jumaitsi Pablojavabelia:

—¿Detsa panacuapijinëmë? jai.

Nexata Pablo jumaitsi:

—Xanë raja Cilicia nacuapijinënë, jai.

Nexata yapëtanetsi Pablo Cilicia nacuapijinëcuene. ³⁵ Nexata icatsia nacuaevetsinë Félix jumaitsi Pablojavabelia:

—Cajumetaenatsi abaxë itsa parena judíovi pecaneconitsivinexa, jai nacuaevetsinë Félix.

Bajaraxuacujinae nacuaevetsinë Félix itoroba pijajivi xaniavaetsia pevetsinexatsi Pablo. Nexata Pablo evetatsi Herodespijinë pexanaeyaexanaebota.

24

Pacuenia Pablo navajunupaeba nacuaevetsinë Félix pitabarata yabara pe-livatsi

¹ Pablo Cesarea tomarata penaneconitsiaexanaecujinaetsi, cinco pamatacabibejecujinae, Ananías, sacerdotevi pepo penamatacaitorobinë, parena Cesarea tomaraberenä. Parena judíovi pijaancianovi yajava, Tértulovënëvi yajava. Tértulo abogadonë, jivi peneconitsicuenë peyapëtaenë. Bajaraxuata judíovi junata bajaraponë petocuaicuaijainexatsi nacuaevetsinë Félixjavabelia. Nexata judíovi, Tértulo yajava, nubena nacuaevetsinë Félix pitabarata peneconitsinexatsi jane baja Pablo. ² Itsa caparenatsi Pablo, nexata Tértulo taxuuba peneconitsijavatsi Pablo. Tértulo jumaitsi nacuaevetsinë Félixjavabelia mapacueniaje:

—Pecayaiyataenë nacua nevetsinë. Xaniavaetsia nevetsixae mapanacuaaje, bajayajebi xaniavaetsia pajinavanapajë. Xamë

nejamatabëcueneta daxita mapanacuapijicuene, xua abeje picani, xanebiaexanaponame pevajënaeyabelia. ³ Nexata pabarëyanë patanetoexanaejavamë yabara daxita mapanacuajavaje. Bajaraxuata pexaniajamatabëcuene pacarajutatsi. ⁴ Caepatoyo saya pacajamatabëitonotatsi. Pexaniacuene panetoexanare. Panenamuxunaevere caejumeyobeje. ⁵ Payapëtaniji baja cajena maponëje Pablo bitso piacujirubejenëcuene. Daxitanacuanëjava, itsaxuayo judíovi jinavanapa, itorobapona pianaepanaenexa judíovi penavecuanatsanaenexa. Mara ponëje Nazaret tomarapijinëmi petsipaebilivaisi pejumecovënëtsivi, penamatacaitorobinëje. ⁶ Mara ponëje Dioso pijatemplobo Jerusalén tomaratala jamatabëbijiana picani. Tsipaji apo judíovi barëjoneya templobonëalia. Bajaraxuata pavaetabajë. Nexata pacuenia paneitoroba pajudíovinë patajalivaisi, jamatabëpabeyaxuabajë picani penaneconitsixae. ⁷ Itsiata baitsi jane itacarajeta vajabitsaë pepo pevetsinë, comandante Lisias, barëpata pijajivi. Pinijsaëta paneyacajërëta Pablo. Nexata comandante Lisias panejumaitsi: “Pajivi jamatabëneconita Pablo, ponae nacuaevetsinë Félixjavabelia bajaraponë pitabarata peneconitsinexa,” panejai. ⁸ Nexata itsa yanijobianame maponëje Pablo, yapëtaename baja daxita pacuenia xaniavaetsia pacatsipaebatsi Pablo pexanaejava yabara, jai Tértulo mapacueniaje nacuaevetsinë Félixjavabelia.

⁹ Judíovi bajarajota Tértulo pemuxuneneta penubenaevi ata neconitatsi Pablo. Bajarapajudíovi jumaitsi nacuaevetsinë Félixjavabelia:

—Xaniajai rabaja Tértulo. Daxita pacuenia Tértulo cajumaitsi, bajarpacuenia exana Pablo, jai judíovi nacuaevetsinëjavabelia.

¹⁰ Nacuaevetsinë Félix nacobeyota juya Pablo pitorobinexatsi Pablo jane baja penavajunupaebinxaxa nacuaevetsinë Félix pitabarata. Nexata Pablo jumaitsi nacuaevetsinë Félixjavabelia:

—Yapëtaniji baja cajena xamë bajayajebi mapanacuapijivi nenaneconitsiaexanabiabijava. Bajaraxuata barëyanë tacatsipaebinxaxa xua exanajë.

¹¹ Nexata taxaniajajumeta catsipaebianatsi. Itsa yanijobijitsipame itsamonaejavabelia ata, nexata catsipaebijitsipa pacuenia aeconoxae catsipaebianatsi. Ajena raja abaxë saya xainajë doce pamatacabibeje tapatsicujinae Jerusalén tomarata. Patajë najamatabëcuenecopatsiaya tanavajëtsinexa Diosojavabelia templobota. ¹² Bajarapatemplobota judíovi apo netae tabarëcuaicuajijajava itsajivi ata. Apo netaenua judíovi penacaeuatabiabi-bonëjava jivi taitorobijava pianaepanaenexa. Apo netaenua tomaranëjava ata taitorobijava jivi pianaepanaenexa. ¹³ Nexata acuenebi itsajivi ata pejumaitsijava xanë yabara: “Xanë raja pepacuene taniji xua Pablo exana,” pejajava. Tsipaji itsajivi ata apo netae pibisiacuene taexanaejava. ¹⁴ Nexata pacuene yabara catsipaebijitsiatsi, xaniajanë cajena. Patajasalinaivi pijaDioso jumecovënëtsiaponaponajë. Tonacuenebaponaponajë. Pejanajamatabëcueneta Dioso jumecovënëtsiaponaponajë. Baitsi pexanialivaisi, Jesucristo pelivaisi, jumecovënëtsiaponaponajë. Bajara palivaisi yabara judíovi jumaitsi tsabiabi: “Apo pexaniajailivaisi cajena bajarapalivaisi. Dioso baja cajena apo nacatocopatsi vajajumecovënëtsinexa bajarapalivaisi,” jai tsabiabi judíovi. Itsiata Jesucristo taneitorobicuena jumecovënëtsi atanë, Dioso Moiséspijinëta penajumecopatsilivaisi yajava jumecovënëtaaponaponajë. Bajayata Diosojumepaebivi profetavi peyaquinaelivaisianë ata jumecovënëtajë. ¹⁵ Mapajudíovi nubenaje, jumecovënëta mapacuenia pejumaitsilivaisije: “Dioso icatsia asaëyaexanaena petëpaevimi,”

pejailivaisi. Xanë ata bajarapalivaisi jumecovënëtajë. Baitsi daxita pamonae tēpa, pexaniajamatabëcuenevimi, pibisiajamatabëcuenevimi ata, itsamatacabi icatsia Dioso asaëyaexanaena. ¹⁶ Bajaraxuata bitso jitsipajë xaniavaetsia taponaponaejava tanajamatabëcuenebijianaeyaniva Dioso pitabarata, tanajamatabëcuenebijianaeyaniva daxitajivi ata pitabarata, jai Pablo nacuaeavetsinë Félixjavabelia.

¹⁷ Icatsia Pablo jumaitsi nacuaeavetsinë Félixjavabelia:

—Caevaimaxëto baja cajena ajibinë tsarucae Jerusalén tomaravecua Dioso pitorobilivaisi jivi tatsipaebinxaxa daxitanacuanëjava. Bajaraxuacujinae icatsia naviatajë Jerusalén tomarabelia. Tocapaliajë ofrenda tarajutsinexa bepejiobivi. Patajë picani templobota ofrenda tarajutsinexa Diosojavabelia. ¹⁸ Itsa baja veretajë templobota tanajamatabëcuenexaniavaetsijava Diosojavabelia tajamatabëcuensaënexa, tarajutsinexa picani bajarapaofrenda Diosojavabelia, nexata bajarapaepatota judíovi, Asiavënë nacuapijivi, necaxitajaraba templobota. Nexata nevaetaba tanenaneconitsiaexanaenexa. Itsa necaxitajaraba templobota, apo yajavanucaenë ayaibitsaëto. Daxita templobopijivi yäjai. Templobopijivi ajumejibia jinavanapa. ¹⁹ Bajara baitsi jane pamonae judíovi, Asiavënë nacuapijivi, tanetaevi templobota, bepatsirena maberenaje taneneconitsinexa jane baja itsa necuenetane pibisiacuene taexanaejava. ²⁰ Itsa jume, nexata mapamonaeje, nitabarata penubenaevi, vecae taitabëta catsipaebi, itsa netane pibisiacuene taexanaejava pamatacabi nucajë sacerdotevi penamatacaitorobivi pitabarata, judíovi pijaancianovi ata pitabarata, judíovi pecujarubivi ata pitabarata. ²¹ Saya meta caelivaisiyo bajarapamonae catsipaebiana xanë talivaisi. Tspiji pamatacabi nucajë judíovi pijaancianovi pitabarata, ayajumeta jumaitsinë: “Mapamatacabitaje neneconitsiana. Tspiji jivi petëpaecujinae Dioso icatsia piasaëyaexanaejava, jumecovënëtajë,” janë. Nexata meta bajarapacuenia tajumaitsijava yabara bajarapamonae jamatabëneneconita xamëjavabelia, jai Pablo nacuaeavetsinë Félixjavabelia.

²² Nacuaeavetsinë Félix xaniavaetsia yapëtane daxitanacuanëjava jivi pejumecovënëtaponaejava Jesucristo pelivaisi. Nexata nacuaeavetsinë Félix pejumetaecujinae Pablo petsipaebilivaisi, nacuaeavetsinë Félix naviabiaexana baja pamonae picani Pablo neconitsijitsiatsi. Nexata nacuaeavetsinë Félix jumaitsi Tértulobanajavabelia, Jerusalén tomaraverena pepatsivijavabelia:

—Itsa patsiarena vajabitsaë pepo pevetsinë, comandante Lisias, yapëtaenajë pacuenia exanaejiatsianë Pabloyavabelia, jai.

²³ Nexata nacuaeavetsinë Félix jumaitsi vajabitsaë pijacapitánjavabelia:

—Pablo barëevetsianame xaniavaetsia penajetabajiraviyaniva. Itsiata tocopatsianame peponaponaejava bajarajota pacëtsinejevamë. Tocopatsianamena peyapëtaevitsi pesivaxainanexatsi perajutsinexatsinua penamatavenonaejavaxi, jai nacuaeavetsinë Félix vajabitsaë pijacapitánjavabelia.

²⁴ Bajaraxuacujinae, caematacabibejecujinae, nacuaeavetsinë Félix icatsia pata pijava yajava, Drusilavënëva. Drusila judíova. Nexata nacuaeavetsinë Félix itoroba pijajivitonë petojunatsinexatsi Pablo. Nexata Pablo ita pata, Pablo livaisi tsipaeba nacuaeavetsinë Félixjavabelia. Pablo tsipaeba jivi penajamatabëcuene copaponaejava Jesucristojavabelia. ²⁵ Pablo tsipaebanua Dioso pitorobjiva jivi pejinavanapaenexa pibisiacuene exanaejava Dioso pitabarata. Pablo tsipaebanua jivi xaniavaetsia penaevetsijavanexa pevitota pibisiacuene pexanaeyaniva. Pablo tsipaebanua itsamata-

cabi Dioso penaneconitsiaexanaejavanexa pibisiacuene pexanaevi. Nexata nacuaevevtsinē Félix itsa jumetane bajarapacuenia Pablo petsipaebilivaisi, najunaviaca. Nexata bajarajota nacuaevevtsinē Félix jumaitsi Pablojavabelia:

—Pitsapare baja abaxē. Icatsia cajunatsianatsi itsajota cuenesajinajē, jai nacuaevevtsinē Félix.

²⁶ Nacuaevevtsinē Félix jamatabējumaitsi Pablo yabara:

—Pablo meta nerajutsiana palata tacopatsinexa penaneconitsijavavecua, jamatabējai.

Bajaraxuata Félix anijatonē pijajivi itorobabiaba Pablo petojunatsinexatsi pebarēcuaiacuajainexatsi. ²⁷ Anijavaibeje bajarapacuenia Félix pijajivi itorobabiaba Pablo petojunatabinexatsi. Belia baja Félix vecuapitsapa nacua pevetsicuene. Nexata juya itsanē, Porcio Festovēnēnē, tocopatatsi bajara-panacua pevetsinexa. Félix baja pitsapae ata, itsiata Félix pejamatabēcueneta Pablo apo tocopatsitsi pepitsapaenexa penaneconitsijavavecua. Bajara-pacuenia Félix exana judíovi pesivajamatabēcuenē barēyanexatsi.

25

Pacuenia Pablo navajunupaeba pejananacuaevevtsinē Festo pitabarata yabara pelivaisi

¹ Festo patajopa Cesarea tomarata pexanaenexatsi nacuaevevtsinēnexa. Pepatsicujinae, acueyabi pamatacabibejecujinae, Festo baja pona Cesarea tomaravecua. Pona Jerusalén tomarabelia. ² Nexata Jerusalén tomaratalia sacerdotevi penamatacaitorobivi Pablo neconitatsi pepēya nacuaevevtsinē Festojavabelia. Neconitatsinua judíovi ata, pamonae petuxanevi. ³ Bajarapamonae pinijicuenia vajēta nacuaevevtsinē Festojavabelia petocapatsinexatsirena Pablo Jerusalén tomarberena. Bajarapacuenia vajēta tsipaji baja cajena bajarapamonae najamatabēcuenēvereta picani Pablo pebeyaxuabiaexanaenexatsi namutoepatota. ⁴ Nexata nacuaevevtsinē Festo jumaitsi bajarapamonaejavabelia:

—Pablo raja naneconitsia ponapona Cesarea tomarata. Xanē raja caematacabibejecujinae ponaejitsianē Cesarea tomarabelia. ⁵ Pablo pibisiacuene itsa exana, nexata papecanamatacaitorobivi tapēta naponaeana Cesarea tomarabelia peneconitsinexa Pablo, jai nacuaevevtsinē Festo bajarapamonaejavabelia.

⁶ Bajarapacuenia nacuaevevtsinē Festo pejumaitsicujinae, nacuaevevtsinē Festo abaxē ponapona Jerusalén tomarata ocho pamatacabibeje. Itsa jume, diez meta pamatacabibeje. Bajaraxuacujinae pona jane baja Cesarea tomarabelia. Nexata meravia pitsijavata nacuaevevtsinē Festo eca itsajota nacuaevevtsinē ecabiaba jivi penaneconitsiaexanaenexa. Nexata pijajivi itoroba petocapatsinexatsi Pablo. ⁷ Pablo itsa joneya, nexata judíovi, Jerusalén tomaraverena pepatsivi, matatoyorotsia imoxoyotatsi Pablo. Najumetsēnētsiaya neconitatsi beayaineconi pexainēnēcuenia. Itsiata baitsi jane xua yabara picani Pablo neconitatsi picani, bajarapamonae apo jumenamatamotsi peneconitsijavatsi. ⁸ Nexata Pablo nayajivijumaitsi peneconitsianivatsi:

—Itsacuene ata pibisiacuene apo exanaenē. Nexata xanē judíovi pitorobilivaisijavabelia, templobojavabelia ata, Romanonacua pepo pevetsinējavabelia ata, apo naneconitsinē, jai Pablo nacuaevevtsinē Festojavabelia.

⁹ Nexata nacuaevetsinē Festo yanijoba Pablojavabelia judiōvi pejamatabēcuenabarēyanexa nacuaevetsinē Festojavabelia. Nacuaevetsinē Festo Pablojavabelia jumaitsi mapacueniaje:

—¿Jitsipame tsaja neponaejava Jerusalén tomarabelia bajarajotalia pecaneconitsinexa taitabarata mapacueene yabaraje? jai nacuaevetsinē Festo Pablojavabelia.

¹⁰ Pablo nexata jumaitsi:

—Nucajē rabaja majotaje xamē nitabarata. Tsipaji nijatuxanenē, Romanonacua pepo pevetsinē, itoroba majotaje peneconitsinexatsi pibisiacuene pexanaevi. Bajaraxuata apo beneitorobimē itsajavabelia taneconitsinexamē. Itsacuene ata pibisiacuene apo exanaenē judiōvijavabelia. Bajarapacueene xamē xaniavaetsia yapētaneme baja cajena.

¹¹ Itsa pepacueene naneconitsipajē, nexata ita nebeyaxuabijitsia tajaneconi yabara, nexata apo najamatabēxainaenē tsipae tavecuapanepaenexa tatēpaejava. Itsiata baitsi jane pacuenia mapamonaē naneconitsiajumaitsi, apo xaniajai cajena. Nexata acuenebi itsajivi ata tanecanajetsijava mapamonaē pecobeyabeliaje saya aneconijibia tanebeyaxuabinexa. Nexata jane baja xanē cavajētatsi taneitorobinexamē nijatuxanenējavabelia, Romanonacua pepo pevetsinējavabelia, bajaraponē pitabarata taneconitsinexa, jai Pablo nacuaevetsinē Festojavabelia.

¹² Nexata nacuaevetsinē Festo barēcuaicuajiai pijajivi, pejamatabēcueneyavenonaevitsi. Bajaraxuacujinae nacuaevetsinē Festo jumaitsi Pablojavabelia:

—Xamē nevajētame tacaitorobinexa tajatuxanenējavabelia, Romanonacua pepo pevetsinējavabelia, bajaraponē pitabarata pecaneconitsinexa pibisiacuene ita exaname. Nexata bajaraponējavabelia ponaename, jai nacuaevetsinē Festo Pablojavabelia.

Pacuenia Pablo navajunupaeba nacuaevetsinē Agripajavabelia yabara pe-livaisi

¹³ Pablo pevajētsicujinae nacuaevetsinē Festojavabelia pitorobinexatsi Romanonacua pepo pevetsinējavabelia, caematacabibejecujinae, nacuaevetsinē Agripa, pijava Berenicevēnēva yajava, parena Cesarea tomaraberena. Parenabeje pebajacobinexabeje nacuaevetsinē Festo pejanapatsinēxae nacua pevetsinēnexa. ¹⁴ Agripabeje Berenicebeje caematacabibeje ponaponabeje Cesarea tomarata. Nexata nacuaevetsinē Festo tsipaeba nacuaevetsinē Agripajavabelia Pablo yabara. Nacuaevetsinē Festo jumaitsi:

—Majotaje xainajē pebi naneconitsia peponaponaenē. Félix abaxē mapanacua ita evetaje, bajaraponē naneconitsiaexanatsi. ¹⁵ Nexata ita ponajē Jerusalén tomarabelia, sacerdotevi penamatacaitorobivi, judiōvi pi-jaancianovinua, neconitatsi Pablo xanējavaberena. Bajarapamonaē nevajēta tananeconitsiaexanaenexa Pablo pebeyaxuabinexatsi. ¹⁶ Nexata xanē jumaitsinē bajarapamonaējavabelia: “Romanonacua raja pepo pevetsinē pejamatabēcueneta apo pacopatsinē itsajivi ata pebeyaxuabinexatsi abaxē xaniavaetsia payapētaenejevanē paneconi xaina. Itsajivi pibisiacuene ita exana, nexata namatavenona pecuenetaevitsi pitabarata copiaya peneconitsinexatsi. Nexata pajivi naneconita, bajarajota xanepana penayajivicaicuajainexa paneconi yabara neconitatsi,” janē bajarapamonaējavabelia, jai nacuaevetsinē Festo nacuaevetsinē Agripajavabelia.

¹⁷ Icatsia nacuaevetsinē Festo jumaitsi nacuaevetsinē Agripajavabelia:

—Nexata bajarapajudíovi maberena pepatsicujinaeje, meravia pitsijavata, copiaya joneyajé taecaenexa itsajota ecabiabajé jivi itsa naneconitsiaexanaejitsiané. Nexata itorobajé tajajivi tanetocapatsinexa Pablo xanējavaberena. Tsipaji jamatabėjumaitsiné: “Pablo meta pibisiacuene pexanaexae, neconitatsi,” jamatabėjané. ¹⁸ Itsiata baitsi jane Pablo itsa pata, peneconitsivitsi apo neconitsitsi pibisiacuene pexanaejava yabara pacuenia picani najamatabėxainajé. ¹⁹ Saya judíovi jumeanaenotatsi Pablo Dioso pejumecovėnėtsijava yabara. Jumeanaenotatsinua Pablo petsipaebijava Jesús petėpaejava yabara ata. Jesús yabara Pablo jumaitsi: “Jesús raja apo tēpae. Petėpaeucujinae baja icatsia Dioso asaėyaexanatsi,” jai Pablo bajarapajudíovijavabelia. ²⁰ Nexata xaniavaetsia apo yapėtaenė pacuenia exanaejitsiané bajarapacuene yabara. Nexata jumaitsinė Pablojavabelia: “Jitsipame tsaja neponaejava Jerusalén tomarabelia, bajarajotalia icatsia pecaneconitsinexa pamonae caneconita,” janė picani. ²¹ Itsiata baitsi jane Pablo nevajėta taitorobinexa picani vajatuxanenėbejevavabelia, Romanonacua pepo pevetsinėjavabelia, bajaraponė pitabarata peneconitsinexatsi, pibisiacuene itsa exana Pablo. Itsiata abaxė xanė mapatomarataje Pablo naneconitsiaya ponaponaeyaexanajé. Nexata pamatacabi necuenecaėjėpaena, itorobianajė vajatuxanenėbejevavabelia, jai nacuaevetsinė Festo nacuaevetsinė Agripajavabelia.

²² Nexata nacuaevetsinė Agripa jumaitsi nacuaevetsinė Festojavabelia:

—Xanė ata jitsipajė tajumetaejava Pablo penavajunupaebijava, jai nacuaevetsinė Agripa.

Nexata nacuaevetsinė Festo jumaitsi nacuaevetsinė Agripajavabelia:

—Meravia rabaja jumetaename Pablo penavajunupaebijava, jai nacuaevetsinė Festo.

²³ Nexata meravia pitsijavata nacuaevetsinė Agripa pijava Berenicebeje bitso naitabėtabeje. Nexata naponabeje jivi penacaetuatabiabiboxanetojavabelia. Pėyanatatsibeje vajabitsaė pepo pevetsivi. Pėyanatatsibeje Cesarea tomarapijipetuxanevi ata. Penacaetuatsiboxanetojavalia barėjoneyabeje. Nexata nacuaevetsinė Festo pijajivi itoroba petocaponaexatsirena Pablo. ²⁴ Nexata nacuaevetsinė Festo jumaitsi nacuaevetsinė Agripajavabelia, itsa-monaejavabelia ata:

—Agripa, nacua nevetsinė, daxita paxamė ata majotaje vajanajuanacae-tuatsivi. Pataneme rabaja mapapebi nuca paneitabarataje. Ayabit-saėto judíovi, Jerusalén tomarapijivi, bajaraponė neconitatsi xanėjavaberena Jerusalén tomaratalia. Bajara icatsia pamonae tapėta naponarena Cesarea tomaraberena. Bajara icatsia pacuenia neconitatsi xanėjavaberena. Bajara-pamonae vavajaiya nejumai tsabiabi: “Pajitsipajė Pablo pebeyaxuabinex-atsi,” nejai tsabiabi. ²⁵ Itsiata baitsi jane xanė apo yapėtaenė paneconi yabara beyaxuabijitsiatsi. Maponė nevajėta picani taitorobinexa tajatuxanenėjavabelia, Romanonacua pepo pevetsinėjavabelia, bajaraponė pitabarata peneconitsinexatsi itsa pibisiacuene exana. Bajaraxuata itorobijitsianė Romanonacua pepo pevetsinėjavabelia. ²⁶ Itsiata baitsi jane apo yapėtaenė pacuene yabara toyaquinaejitsianė cuyalatobaxutota tajatuxanenėjavabelia. Bajaraxuata xamė Agripa, nacua nevetsinė, mapamonae ataje, daxita pax-amė paneitabarata Pablo penucaenexa pacatocapatatsi maberena. Paca-tocapatatsi paneyanijobinexa paneconi yabara naneconita. Nexata meta paneyanijobicujinae xanė yapėtaenajė paneconi yabara naneconita. Nexata

bajarajota yapëtaenajë tajatuxanenëjavabelia tatoyaquinaenexa cuyalatobaxutota paneconi yabara judíovi Pablo neconitsijitsiatsi tajatuxanenëjavabelia. ²⁷ Tsipaji acunebi taitorobijava maponëje Pablo tajatuxanenëjavabelia toyquinaenejevanë cuyalato xaniavaetsia peyapëtaenexa paneconi yabara judíovi neconitsijitsiatsi, jai nacuaevevtsinë Festo nacuaevevtsinë Agripajavabelia.

26

Pacuenia Pablo navajunupaeba nacuaevevtsinë Agripa pitabarata yabara pelivaisi

¹ Nacuaevevtsinë Agripa jumaitsi Pablojavabelia:

—Catocopatatsi rabaja nenavajunupaebinexa paneconi yabara judíovi caneconita, jai nacuaevevtsinë Agripa Pablojavabelia.

Nexata Pablo yaiyataeya bajacoba nacuaevevtsinë Agripa. Nexata Pablo jumaitsi nacuaevevtsinë Agripajavabelia mapacueniaje:

² —Barëyanë. Tsipaji ajena pamatacabi netocopatame nitabarata tanavajunupaebinexa daxita paneconi yabara judíovi neneconitsijitsia. ³ Aeconoxaeta bitso barëyanë. Tsipaji yapëtaneme xaniavaetsia daxita palivaisi paxainajë pajudíovinë. Yapëtanemenua pajamatabëcuenelivaisi yabara panajumeanaenotabiabajë. Nexata cavajëtatsi ajamatabëcuenesaëya bajayaepato xaniavaetsia tanenamuxunaevetecaenexamë, jai Pablo nacuaevevtsinë Agripajavabelia.

Pacuenia Pablo navajunupaeba pacuenia ponapona pamatacabi abaxë apo jumecovënëtsi Jesucristo yabara pelivaisi

⁴ Pablo icatsia jumaitsi nacuaevevtsinë Agripajavabelia:

—Daxita judíovi baja cajena neyapëtane pacuenia copiaya ponaponajë bajarapamonaejavata. Bajarapamonae neyapëtane pacuenia ponaponajë patajanacuata tsiquirinëyojavaveliacujinaenë. Neyapëtanenua pacuenia ponaponajë Jerusalén tomarata ata. ⁵ Judíoviyajuvënëvi itsamonae naexana fariseovi. Nexata bajarapamonae Dioso Moiséspijinëta penajumecopatsilivaisi, bitso jumecovënëtsiajinavanapa itsajudíovivecua. Nexata itsa yanijobijitsipame, daxita judíovi catsipaebijitsipa pacuenia picani pejevaxinëjavaveliacujinaenë catsitecaponaponajë fariseovi pecujarubicuene. ⁶ Bajarapamonae neneconitsijitsia tsipaji baja xanë jumecovënëtajë petëpaevimi itsamatacabi Dioso icatsia piasaëyaexanaejavanexa. Tsi-paji baja cajena bajarapacuenia Dioso najumecapanepaeya jumaitsi patajasalinaivimijavabelia. Nexata bajarapalivaisi jumecovënëtajë. ⁷ Daxita raja paxanë, Israelpijinëmi pexi doce ponëmibeje papemomoxinë. Pacopi-aevetavanapajë Dioso icatsia piasaëyaexanaejavanexa petëpaevimi pacuenia baja cajena tajëvelia Dioso najumecapanepaeya jumaitsi patajasalinaivimijavabelia. Bajaraxuata najamatabëcuenecopatsiaya pavajëtabiabajë Diosojavabelia. Patonacuenebavanapajënuca caematacabi canacujitsia, meravi yajava. Agripa, nacua nevetsinë, abaxë nenamuxunaevere. Dioso icatsia petëpaevimi piasaëyaexanaejavanexa, copiaevetaponaponajë. Bajaraxuata judíovi neneconitsijitsia. ⁸ Pëtsa pajamatabëjumaitsimë Dioso yabara: “Dioso raja apo caëjëpaetsi petëpaevi icatsia piasaëyaexanaenexa,” pajamatabëjamë pëtsa, jai Pablo bajarapamonaejavabelia.

Pacuenia Pablo navajunupaeba petaicaponaejava Jesús pejumecovënëtsivi pejebinexa penaneconitsivi pejebabiabibota yabara pelivaisi

⁹ Pablo icatsia jumaitsi nacuaevetsinē Agripajavabelia:

—Xanē abaxē Jesús itsa apo jumecovēnētsinē, jamatabējumaitsinē tsabiabi: “Xanē bejiobiaexanaenajē daxita pamonae jumecovēnēta Jesús, Nazaret tomarapijinē, pelivaisi,” jamatabējanē tsabiabi. ¹⁰ Nexata bajarapacuenia exanajē Jerusalén tomarata. Sacerdotevi penamatacaitorobivi taneitorobixae, ayaibitsaēto Jesús pelivaisi pejumecovēnētsivi jebaponajē penaneconitsivi pejebabiabibota. Itsa bajarapamonae naneconitsiaexanatsi, itsa beyejebatsinua, netsitaxanepana bajarapacuenia pebeyejebijavatsi. ¹¹ Pamonae Jesús pelivaisi jumecovēnēta, anijatonē jumaconibabeyaezanabiabajē judiōvi penacaetuatabibonējava. Bajarapacuenia picani exanaponajē bajarapamonae pecopabinexa Jesús pelivaisi pejumecovēnētsijava. Xanē picani cueneitoyanē bajarapamonae. Nexata itsanacuajava penaetomaranējava ata, jaitarutajē Jesús pelivaisi pejumecovēnētsivi tataicaenexa tajebinexa penaneconitsivi pejebabiabibota, jai Pablo nacuaevetsinē Agripajavabelia.

Pacuenia icatsia Pablo navajunupaeba pacuenia Jesús pelivaisi jumecovēnēta yabara pelivaisi
(Hch 9.1-19; 22.6-16)

¹² Pablo icatsia jumaitsi nacuaevetsinē Agripajavabelia:

—Bajara picani icatsia pacuenia tataicaenexa Damasco tomarata Jesús pelivaisi pejumecovēnētsivi, ponajē picani Damasco tomarabelia. Nitoroba sacerdotevi penamatacaitorobivi. Bajarapamonae pejamatabēcueneta nitoroba tataicaenexa picani Jesús pelivaisi pejumecovēnētsivi tajebinexa penaneconitsivi pejebabiabibota. ¹³ Agripa, nacua nevetsinē, abaxē n-namuxunaeverē. Nexata jane baja ponajē Damasco tomarabelia. Nexata tanajetarucejavata namutua, taniji matonejeepatota athēbēvetsica pinijicotia tanematoyorotsianaityotsijava. Naitayota matacabipijijumetocotia matatoxenetsia. Daxita tayajavaponaevi tayajavanajetarucejavata, panematatoyorotsia naitayota. ¹⁴ Nexata daxita paxanē irata pabobenajunujē. Bajara jota irata jumetaenucajē hebreojumeta athēbēvetsica tanejumaitsijava: “Saulo, Saulo, ¿detsa xuajitsia tajajivi netobejiobiaexanaponame? Xamē nijacuata najamatabēcuenebijianaponame,” tanejaijava, jumetaenucajē irata. ¹⁵ Nexata xanē jumaitsinē: “Tajatuxanenē, ¿detsa ponēmē?” janē. Nexata icatsia nejumaitsi: “Xanē raja Jesús nē. Xanē raja tajajivi netobejiobiaexanaponame. ¹⁶ Nonotabapunare. Catsitanaitajētatsi raja tacaitapetsinexa tajajivitonēnexamē. Xamē nexata tsipaebianame itsajivijavabelia pacuenia aeconoxae netaneme. Tsipaebianamenua pacuenia icatsia catsitanaitajētatsianatsi bexēa itsamatacabijavabelia. ¹⁷ Cacapanepaenatsi raja judiōvi pecobevecua pecaitsacueniabianiva. Caitorobianatsi apo judiōvi pijanacuanējavabelia. Apo judiōvi ata pecobevecua cacapanepaenatsi pecaitsacueniabianiva. ¹⁸ Caitorobatsi rabaja netsipaebinexa apo judiōvijavabelia pexanialivaisi, xanē talivaisi. Nexata apo judiōvi ata najamatabēcuene pēnēyorotsiaexanaename Diosojavabelia. Nexata Dioso pexaniajailivaisita apo judiōvi ata jamatabēcueneitayotsianatsi piaitaquirijamatabēcuenevecua, dovathi pejamatabēcuene itorobabiabijavatsivecua. Nexata apo judiōvi ata talivaisi jumecovēnētsiana. Nexata bajarapamonae pibisiacuene pexanaeconimi, Dioso vecuaajibiaexanaenatsi ita jumecovēnētsiana talivaisi. Nexata apo judiōvi ata pibisiacuene pexanaeconimi, Dioso vecuaajibiaexanaenatsi, pacuenia baja daxita tanejumecovēnētsivi Dioso vecuaa-

jibiaexanatsi pibisiacuene pexanaeconimi,” nejai Jesús mapacueniaje athëbëvetsica, jai Pablo nacuaevevtsinë Agripajavabelia.

*Pacuenia Pablo navajunupaeba pacuenia jumecovënëta Jesús pitorobicue-
niatsi yabara pelivaisi*

¹⁹ Icatsia Pablo jumaitsi nacuaevevtsinë Agripajavabelia:

—Agripa, nacua nevetsinë, abaxë nenamuxunaevere. Nexata pacuenia Jesús athëbëvetsica nejumaitsi, jumecovënëtajë baja cajena. ²⁰ Copiata Jesús pelivaisi tsipaebaponajë Damasco tomarapijivijavabelia, Jerusalén tomarapijivijavabelia ata, Judea nacuapijivijavabelia ata. Bajaraxuacujinae icatsia tsipaebaponajë apo judíovijavabelia ata. Nexata itorobajë daxita bajarapamonae pecopabinexa pibisiacuene pexanabiabijava penajamatabëcuenepënëyorotsinexa Diosojavabelia. Nexata itorobajë xaniavaetsia pejinavanapaenexa pibisiacuene pexanaeyaniva. Nexata baja bajarapacuenia itsa jinavanapa, daxitajivi yapëtanetsi pepacuene penajamatabëcuenepënëyorotsijava Diosojavabelia. ²¹ Bajarapalivaisi tatsipaebaponaexae, nevaetaba judíovi pamatacabi ponaponajë templobota. Nevaetaba tanebeyaxuabinexa picani. ²² Itsiata baitsi jane neyajavaponapona Dioso taneyavenonaenexa mapamatacabijavaberena ataje. Bajaraxuata nucajë majotaje tatsipaebinexa Jesús pelivaisi daxitajivijavabelia. Jesús pelivaisi jivi itsa tsipaebabiabajë, tsipaebabiabajë bepejiobivijavabelia, pepo petuxanevijavabelia ata. Nexata daxita bajarapamonae najëpaeya tsipaebabiabajë peyapëtaenexa xua bajayata tajëvelia Diosojumepaebivimi profetavi vajunupaeba. Profeta Moiséspijinë ata bajayata tajëvelia vajunupaeba bajaraxua. Pacuenia ata bajayata tajëvelia Diosojumepaebivimi profetavi copiaya jumaitsi, tsipaebabiabajë. Bajayata baja cajena profetavimi Cristo yabara jumaitsi mapacueniaje: ²³ “Pamatacabi Cristo Dioso itorobianicatsi jivi pecapanepaenexa, beyaxuabianetsi. Itsiata baitsi jane pebeyaxuabicujinaetsi Dioso icatsia asaëyaexanaenatsi. Nexata Cristo Dioso itsa asaëyaexanaenatsi petëpaecujinae, namataxainaeya asaëyaexanaenatsi daxita petëpaevivecua,” jai bajayata tajëvelia profetavi. Nexata jane baja Cristo Dioso itsa asaëyaexanatsi petëpaecujinae, namataxainaeya jane baja asaëyaexanatsi daxita petëpaevivecua. Nexata pamona Dioso pepuajumecovënëtsi tēpa, Dioso icatsia cotocaevi asaëyaexanaenatsi petëpaecujinae. Nexata bajarapalivaisi tsipaebaponajë judíovijava, apo judíovijava ata. Daxita bajarapamonae itsa jumecovënëta bajarapalivaisi, pecapanepaenexatsi Diosojavabelia, jai Pablo nacuaevevtsinë Agripajavabelia.

*Pacuenia Pablo petsipaebilivaisi pejumetaevitsi, sivanajamatabëxainatsi
yabara pelivaisi*

²⁴ Pablo penavajunupaebijavata, nacuaevevtsinë Festo jumevabaxuabatsi.

—¡Pablo, xamë raja saya camatajemaba! Camatajemaba bitso nenacujaru-
bixae, jai nacuaevevtsinë Festo.

²⁵ Pablo nexata jumaitsi:

—Festo, pecayaiyataenë, nacua nevetsinë. Apo nematajemabi raja xanë. Palivaisi raja pacatsipaebatsi, pepo pexaniajailivaisi. ²⁶ Bajarapalivaisi ajumejunavijibia pacatsipaebatsi tsipaji maponë ecaje, nacua pevetsinë Agripa, xaniavaetsia yapëtane bajarapalivaisi. Agripa xaniavaetsia yapëtane daxita xua Jesús exana. Tsipaji abaxë pamatacabi Jesús ponapona mapanacuataje, daxita xua exana, muetsia apo exanae. ²⁷ Agripa, nacua nevetsinë, xamë baja cajena jumecovënëtime profetavi bajayata

peyaquinaelivaisi. ¿Baja tsabaitsi jane? Cayapëtanetsi baja cajena nejumecovënëtsijava bajarapamonae peyaquinaelivaisi, jai Pablo nacuaevevtsinë Agripajavabelia.

²⁸ Nexata nacuaevevtsinë Agripa jumaitsi Pablojavabelia:

—¿Bepijia tsabaja Jesús pelivaisi jamatabënejumecovënëtsiaexaname? jai nacuaevevtsinë Agripa.

²⁹ Nexata Pablo jumaitsi:

—Vajëtajë Diosojavabelia Jesús pelivaisi bepijia panejumecovënëtsinexa. Itsa jume, beaxayocuenia ata panejumecovënëtsinexa. Daxita paxamë patanejumetaeyenaevimë, jitsipajë panejumecovënëtsijava Jesús pelivaisi. Pacuenia baja xanë jamatabëcueneitsinë, Jesús pelivaisi tajumecovënëtsinë, bajara paxamë ata panejamatabëcueneitsinexa. Itsiata apo pacatojitsipaetsi papecacëbinexa mapitsicadenamaëtonëtajë pacuenia xanë necëtanuta, jai Pablo.

³⁰ Itsa baja Pablo najumevereta bajarapacuenia petsipaebijava, nacuaevevtsinë Festo nonotapuna. Nacuaevevtsinë Agripa ata, pijava Berenice yajava, nonotapuna. Daxita baja penajuanacaetuatsivi ata nonobapuna peponaenexa. ³¹ Pepsitapaecujinaelia bajarapamonae najumaitsi:

—Maponëje Pablo itsacuene baja cajena apo exanae. Nexata picani ajibi paneconi yabara beyaxuabijitsiatsi. Ajibinua paneconi yabara etsijitsiatsi penaneconitsivi pejebabiabibota, najai bajarapamonae Pablo yabara.

³² Nacuaevevtsinë Agripa jumaitsi nacuaevevtsinë Festojavabelia:

—Itsa apo cavajëtsi tsipae nitorobinexa vajatuxanenëbejejavabelia, Romanonacua pepo pevetsinëjavabelia, bajaraponë pitabarata peneconitsinexatsi, nexata baja picani copatsipatsi pepitsapaenexa penaneconitsivi pejebabiabibovecua, jai nacuaevevtsinë Agripa Pablo yabara.

27

Pacuenia Pablo caponaliatsi Roma tomarabelia yabara pelivaisi

¹ Nacuaevevtsinë Festobana najamatabëcuenevereta baja pitorobinexatsi Pablo Italia nacuaayabelia, Romanonacua pepo pevetsinëjavabelia. Nexata Pablo caponaejitsiatsi vajabitsaë pijacapitán, Juliovenënë. Itsamonae naneconitsia pejinavanapaevi, Pablo yajava, caponaejitsiatsi. Ponë Romanonacua pepo pevetsinë, bajaraponë pevënë Augusto. Nexata Augusto pijajivi vajabitsaë pijacapitánmonaeyajuvënë Julio. ² Xanë Lucasnë, naponajë Pablota. Adramitio tomaraverena pepatsibarco ënëabereca parunarecajë. Bajarapamo yaëtanajetarucaejitsia manuaemene muxubërea penaetomaranëjava, pepatsinexa Asiavënë nacuaayabelia. Payajavaponajëbeje Aristarco, Tesalónica tomarapijinë. Tesalónicatomara eca Macedonia nacuata. ³ Meravia pitsijavata epatua panapatajë Sidón tomarata. Capitán Julio yaityatanetsi Pablo. Bajaraxuata Sidón tomarata Pablo tocopatatsi penonotajuaenexa barcoënëvecua, penasivaxainaenexa peyapëtaevitsijavabelia, perajutsinexatsinua xua namatavenona Pablo. ⁴ Bajaraxuacujinae icatsia panaropobajë Sidón tomaravecua. Nexata patavajënaeverena jovibo najetaruca. Nexata Chipretunaeto pacujibaliajë bajarapatunaeto muxubërea patanajetarubenaenexa. Nexata Chipretunaeto patatsavenonenia paxetanajetarubenaenajë. Tsipaji bajarapamuxubërevëlia jovibo beyajetayo. ⁵ Cilicia nacuaabeje Panfilia nacuaabeje canacujitsialia papaliajë. Nexata payaëtajë Mira tomarata. Miratomara eca Licia nacuata.

⁶ Nexata Mira tomarata capitán Julio caxitajaraba barco, Alejandría tomar-verena pepatsimo. Bajarapamo ponaejitsia Italia nacuyabelia. Nexata baja pabarcota pananajetarubenajë, pavecuanonobajunajë. Nexata icatsia capitán Julio panerunaeyaexana Alejandría tomaraverena pepatsibarco ënëabelia. ⁷ Anijamatacabianë bajarapabarcota pananajetarubenajë. Tsipaji beaxayo najetaruca. Pinijicuenecujinae itsiata panajetarubenajë Gnidotomara canacujitsita. Jovibo abaxë tsiteca najetaruca patavajënaeverena. Nexata pamatavaquetajë Cretavënëtunaeto. Panajetarubenajë itsapaitapavelia eca Salmóntomara. Tsipaji bajarapaitapavelia jovibo beyajetayo. ⁸ Piayapëbejecuencia panajetarubenajë manuamea muxubërëa. Nexata patajajë Buenos Puertosvënëjavata, Laseatomara imoxoyojavata.

⁹ Pamatacabianë xanepana menia patanajetarubenaenexa, panevecua-panepapona baja. Nexata baja bitso panetsiyai menia pataponaenexa. Tsipaji bajarapajuametota bitso jovibo ayai tsabiabi. Emarapae ata baja copiajunua. Nexata picani Pablo tsipaeba barcota patanajuaponaevijavabelia. ¹⁰ Pablo picani jumaitis mapacueniaje:

—Xanë raja yapëtaniji nacatsiyai baja bitso menia vajaponaenexa vajavajënaeyabelia. Naxuabijitsipa raeta mapamoje. Naxuabijitsipa raeta mapamoënëtaje pecaponaejava yajava. Vaxaitsi ata meta naxuabijitsipatsi. Nexata abaxë majotaje evetavanapaenatsi emarapae pepanepaejava, jai picani Pablo.

¹¹ Itsiata capitán Julio apo jumecovënëtsi Pablo petsipaebijava. Caranata pacuenia jumaitisibeje barco pexainanë, barco pecaponaenë ata, capitán Julio jumecovënëta. ¹² Buenos Puertosvënëjavata ayapëbeje barco perucaejava bajayajebi. Nexata acuenebi bajarajota pataevetavanapaenexa emarapae pepanepaejava. Nexata picani daxita bajarapamonae bitso jitsipa patavajënaeyabelia pataponaenexa. Jitsipa picani Cretatunaeto muxubërëa patanajetarubenaenexa, itsa cuencajëpatsi, pepatsinexa picani Fenice tomarata. Bajarapatomarata picani jamatabëyaëta pataevetavanapaenexa emarapae pepanepaejava. Fenicetomara eca Creta tunaetototsotota. Nexata bajarapatotsotota xanepana barco perubenaenexa. Tsipaji bajarapatotsotojava apo joneyabiabi jovibo.

Pacuenia pinijijoviboxaneto barco caponatsi Creta tunaetovecua yabara pelivaisi

¹³ Itsa pajinavanapajë Buenos Puertosvënëjavata, barco pexainanë bitso jitsipa peponaenexa pevajënaeyabelia. Nexata bajarapapatota patacovëverena beaxayo jovibo najetaruca. Nexata bajarapamonae itsa tane bajarapajovibo, jitsipa pevajënaeyabelia peyacaponaenexatsi bajarapamonae pejitsipaecuenia. Nexata jane baja panaropobajë. Cretatunaeto muxubërëa panajetarubenajë. ¹⁴ Nexata jemata caepatoyocujinae pinijijoviboxaneto najetaruca Cretatunaeto epatajërëtsiarena barcojavaberena. Bajarapajovibo Nordestevënëjovibo. ¹⁵ Bajarapajovibo barco torotaponatsi Cretatunaetovecua. Apo panecajëpae barco patamuxufetsinexa jovibo pevajënaevelia. Nexata baja pacopatajë pataneyacaponaenexa jovibo. ¹⁶ Paponajë tsiquiritunaetoyo, Claudavënë tunaetoyo, pepënënenia. Bajaraxuayo bitso jovibo apo ayai. Barco petabufevetsina robotanajetaruca jera. Nexata itsajota jovibo beyajetayo, pinijicuenia payamaërobocainajë jera patajutabuatsinexa barco ënëabetsina. ¹⁷ Bajaraxuacujinae bajarapamonae barco epacëbaponaya pinijibumacaxanetonëta barco pesarasaraëcaeyaniva

malatacata. Bajarapamonae junava barco patayayaëyaëcaeyaniva Sirtevënë iratsaubonëjumata. Nexata bajarapamonae isica barcopijivelapananë. Bajaraxuacujinae bajarapamonae copata baja itsabelia jovibo pona, barco pataneyacaponaeenexa jovibota. ¹⁸ Meravia abaxë pitsijavata tsiteca pinijijovibo piayaijava. Nexata bajarapamonae barcoënëta pecaponaejavanë, menia yajuvënëpenereca barco pefafanaenexa. ¹⁹ Bajaraxuacujinae icatsia meravia pitsijavata bajarapamonae menia penereca barcoënëta pecanacuenebijavanë. ²⁰ Bajayajebi baja cajena apo pataenë matabipijijuameto, tulupu ata. Tsipaji bajayajebi pinijijovibo, ema yajava, tsitecanuca. Belia pajamatabëjumaitsinë: “Apo yapanepaetsi meta baja tsane,” pajamatabëjanë.

²¹ Pamatacabibeje bajarapacuenepataniji, bajara pijinia pamatacabibeje apo paxaenë pataxaejava. Nexata Pablo nonotapuna bajarapamonae petuatajëta. Pablo jumaiitsi:

—Itsa paxamë panejumecovënëtsipame pacuenia pacatsipaebatsi, xanepanaejitsipa. Nexata maberenaje apo yaponae tsipaetsi Cretatunaetovecua. Apo bejiobitsinua tsipae. ²² Itsiata baitsi jane aeconoxae pëtsa panatsinajamatabëxainame. Itsajivi ata raja paxamëyajuvënëjivi itsiata apo tēpae tsane. Ëbarco rajane baja naxuabiana. ²³ Ajena baja cajena, pameravi, netsitanaitajëta ángel, Dioso pitorobinëtsica. BajarapaDioso xanë pijajivitonënë. BajarapaDioso tonacuenebaponaponajë. ²⁴ Nexata ángel nejumaitsi: “Pablo, pëtsa junavame. Itsiata raja apo tēpaemë tsane. Tsjipaji raja naitajëtsijitsiamë Romanonacua pepo pevetsinë pitabarata. Xamë raja nejamatabëcueneta Dioso capanepaenatsi petēpaeyaniva daxita pamonaeyajavanajeturacume mapabarcotaje,” nejai ángel. ²⁵ Nexata daxita paxamë panajamatabëcuenesaëre panejamatabëcuenebëjajjavavecua. Najamatabërutajë Diosojavabelia vajanacacapanepaenexa Dioso. Yapëtaniji Dioso vajanacacapanepaejavanexa pacuenia baja ángel netsipaeba. ²⁶ Itsiata baitsi jane cajena jovibo nacayacaponaeenexa itsatunaetojavabelia, jai Pablo.

²⁷ Catorce baja pamatacabibeje itsa paxainajë patanaropobicujinae, meravi jovibo toquebiaya paneyacapona Adriavënë manuamenejava. Nexata meravi tuatuajëta barcota penacuenebivi jamatabëjumaitsi:

—Pitapayabelia covë payapataponajë, jamatabëjai.

²⁸ Nexata bajarapamonae pemaëtota caëjëtapona xuavajëto mene avajubua irabereca peyapëtaenexa. Nexata treinta y seis pametrobeje xaina mene piavajubuajava irabereca. Bajaraxuacujinae, caepatoyocujinae, icatsia caëjëta. Veintisiete icatsia pametrobeje xaina mene piavajubuajava irabereca. ²⁹ Nexata barcota penacuenebivi jamatabëjumaitsi:

—Barco meta payanayaëtojoepenajë ibotojumata, jamatabëjai.

Nexata bajarapamonae barco petabufevetsina, cuatro xuabeje anclavënëjavanë, yamaëya copabareca. Nexata anclavënëjavanë menebëxëpana irabelia itsa vaetaba, barco perucojopaenexa. Bajarapamonae picani bitso jitsipa bepija peyamatacabibijavatsi, penatsivajënae taenajetarubenaenexa. ³⁰ Nexata bajarapaepatota bajarapamonae picani bitso jitsipa ëpamonae penonobajunaenexa barcovecua pepanepaenexa. Nexata bajarapamonae penajuaponaevijavabelia yamaxëitojorobiaya jumaiitsi:

—Icatsia raja pacopabijitsianëreca itsaanclajavanë barcoupitatsia, jai.

Nexata saya ëjera, pamo pajutabuatsinajë, bajarapamonae xuareca peyaponaenexa picani pitapayabelia. ³¹ Nexata Pablo ita tane bajarapamonae jera pexuabijavareca, jumaitsi vajabitsaë pijacapitánjavabelia, capitán pijajivijavabelia ata:

—Mapamonaeje barcota penacuenebivi itja ponaena mapajerataje, paxamë pavajabitsaëmë panapenetsianame meneta, jai Pablo.

³² Nexata barcota penacuenebivi peponaeyaniva jerata, vajabitsaë caucutaxuaba jera pecëtarutsimaëto. Jera baja nexata pona barcovecua.

³³ Ajena baja matababi tsina, Pablo itoroba daxita barcota peponaevi pexaejava pexaenexa. Pablo jumaitsi bajarapamonaejavabelia:

—Catorce baja cajena pamatacabibeje xaniavaetsia apo pamajitsimë. Panexaejava ata apo paxaemë. ³⁴ Bajaraxuata pacaitorobatsi panexaejava panexaenexa, panesaë panexainaenexa panepanepaenexa. Itsiata raja daxita apo paitsacuenemë tsane, jai Pablo bajarapamonaejavabelia.

³⁵ Bajarapacuenia Pablo pejumaitisjavata, panbë pita. Panbë yabara Pablo pexaniajamatabëcuene rajuta Diosojavabelia daxita bajarapamonae pitabarata. Bajaraxuacujinae Pablo epatsënëca panbë. Pablo nexata xane pexaejava. ³⁶ Daxita nexata bajarajota ajamatabëcuenesaëreca baja. Nexata bajarapamonae ata xane pexaejava. ³⁷ Doscientos setenta y seis papajivinëbeje daxitata paponajë bajarapabarcota. ³⁸ Nexata daxita xaniavaetsia penabanicujinae, menia penereca trigoxu sacuanë pefafanaenexa barco.

Pacuenia barco bubuna manuameneta yabara pelivaisi

³⁹ Itsa baja matababi tsarucaponae, barcota penacuenebivi taeyelia petunaeto. Itsiata apo yapëtae bajarapatunaeto. Nexata menetofsoto taerulia. Bajarajotalia tajetabo boca. Nexata picani bajarapamonae najamatabëxaina peyaëtsinexa barco bajarapatajetojavabelia. ⁴⁰ Xuanë anclavënëjavanë, yamaëya copabareca, bajaraxuanë irabelia ita vaetaba, barco patayarucopapenexa. Bajaraxuanëmi yamaëcaucubapenereca. Sarasaranaeyaxananau barco petabufecajëbanajetarubenaepabeje. Nexata barcoupitsia penucaenaeta velapana upicëtarutsia. Velapana nexata jovibota nayerebajaraba. Barco jane baja imoxoyotanajetaruca tajetabo. ⁴¹ Nexata itacarajeta barco pata itsajota anijamenebeje pesaë namataenetsia patabeje. Barco baja payajumanayaëtarabajë iratsaubojumata. Nexata bajarajota barcoupi mëthëmëthëcajunua iratsaubojavabelia. Ataja tsanucae. Barco petabufejavavetsina malataca pesaëta tabufesarabajarabatsi. ⁴² Nexata picani vajabitsaë bajarajota beyejebijitsiatsi daxita penaneconitsivi, pevecuapanepaeyanivatsi pejuejavata. ⁴³ Itsiata vajabitsaë pijacapitán apo tocopatsi. Tsipaji apo jitsipae Pablo yajava pebeyaxuabijavatsi. Nexata capitán itoroba daxita pamonae yapëtane pejuejava, copiaya pejuenexa pitapayabelia copiaya pepatsinexa matatsënëabelia. ⁴⁴ Bajaraxuacujinae pamonae apo yapëtae pejuejava, cotocaevi itoroba tablapanëjumata, barcopanëmijumatanua, pejuenexa. Bajarapacuenia daxita panepa matatsënëabelia.

28

Pacuenia Pablo ponapona Maltavënë tunaetjavata yabara pelivaisi

¹ Itsa baja daxita paxanë xaniavaetsia papanepajë matatsënëabelia, nexata pavënëtaniji bajarapatunaeto. Bajarapatunaeto Malta vënëtunaeto. ² Maltatunaetopijivi bitso paneyavenona. Bajarapamonae pinijiisotoxaneto itajuruteta. Tsipaji bitso ema tsanucae. Nexata bitso cainejeba. Panejunata

daxita patanonopaenexa. ³ Nexata Pablo nota petseviiso. Itamataeta bajara-paisoto. Nexata jomo bitso piatanenē, bebula, pitsatabijirava isotojavaver-ena piatajujavavecu. Nexata Pablo cobesinetsi. Pecobesinijavatatsi tsiteca yajumaruca. ⁴ Maltatunaetopijivi itsa tane Pablo jomo pecobesinerucaejavatsi, nexata najumaitsi bajarapamonae:

—Maraeta ponē jivibenēje. Bajaraxuata manuamene vecuapanepae ata, icatsia Dioso tocopatatsi jomo pesininexatsi. Nexata jivi pebejamatabēcuene, jomo pesinijavatsi peyatēpaenexa, najai Maltatunaetopijivi Pablo yabara.

⁵ Nexata Pablo nacobenēnēbiaxuaba jomo pejopaenexa isotojavabelia. Pablo itsiata apo itsacuene. ⁶ Nexata daxita Maltatunaetopijivi jamatabējumaitsi Pablo yabara:

—Aeconoxae meta Pablo cobeyajinaena. Itsa jume, irata meta petēpaenē jopaena, jamatabējai.

Nexata bajarapamonae bajayaepato evetanubenaē ata Pablo petaenexatsi jomo pecobesinijavatsi peyaisacuenejava, itsiata Pablo apo itsacuene. Nexata icatsia bajarapamonae itsacuenia najamatabēxaina Pablo yabara. Nexata najumaitsi bajarapamonae:

—¡Maraeta papebi diosonēje! najai.

⁷ Maltatunaeto pevetsinē pevēnē Publio. Nexata itsajota panubena-jē, imoxoyo bobena Publio pijairanē. Nexata bajaraponē panecopiapita pexaniacuenia. Bajaraponē pijabota panajinavanapajē acueyabi pamatacabibeje. ⁸ Publio paxa avitane tsanucaē camata. Romaebanucatsi. Bitso suliabatsi. Nexata Pablo taeyojopalia. Vajēta Diosojavabelia. Bajaraxuacujinae piavitanenē pematabocotojumavereca Pablo nacobebuata. Nexata baja Pablo jamatejemayaexana piavitanenēmi. ⁹ Bajarapacuene Pablo itsa exana, nexata daxita piavitanevi Maltatunaetopijivi pata Pablojavaberena. Daxita bajarapamonae ata jamatejemayaexana Pablo. ¹⁰ Maltatunaetopijivi pinijicuenia paneyaiyataeya pamayavenona. Itsa baja icatsia bexēajavabelia itsabarcota panaponajē, nexata Maltatunaetopijivi panerajuta daxita patanamatavenonaejavaxi patponaejavata.

Pacuenia Pablo pata Roma tomarata yabara pelivaisi

¹¹ Malta vēnētunaetota panajinavanapajē acueyabi pajuametobeje. Bajaraxuacujinae baja icatsia panaponajē barcota. Bajarapabarco patavajēnae pata Alejandriā tomaraverena. Bajarapamo Maltatunaetototsotota daxita emarapae ruca. Evetaruca emarapaejuametone pepanepaejava. Bajarapabarcoupita rucabeje jivi saya pecobeta jumapecataeya pexanaenēbeje. Cāstorbeje Pōluxbeje jumapecataeya jivi pecobeta pexanaenēbeje bediosonēbeje petaenexa. ¹² Bajarapabarcota panaponajē. Nexata jane baja panapatajē Italia nacuyabelia. Panapatajē Siracusa tomarata. Siracusa tomarata abaxē panajinavanapajē acueyabi pamatacabibeje. ¹³ Bajaraxuacujinae icatsia panaropobajē. Paponajē manuamene muxubērēa. Nexata icatsia papatajē Regio tomarata. Nexata meravia pitsijavata patacovēverena pexaniajovibo najetaruca. Nexata bajarapajovibo paneyacapona patavajēnaeyabelia. Nexata icatsia anijamatacabibejecujinae papatajē Puteoli tomarata. ¹⁴ Puteoli tomarata pacaxitajarabajē Dioso pejumecovēnētsivi. Bajarapamonae paneasiva caesemana patanajinavanapaenexa bajarapamonaejavata. Bajaraxuacujinae jane baja matatsēnēa paponajē Roma tomarabelia. ¹⁵ Roma tomarapijivi, Dioso pejumecovēnētsivi, patavajēnaelia panevēnēlivaisitane patanajetarubenaeyava. Nexata bajarapamonae panecopiajairēna. Nexata penamataxainaebitsaēto

panemataenena Foro de Apiovënëjavata. Bajaraxuacujinae icatsia itsabitsaëto panemataenena Tres Tabernasvënëjavatalia. Nexata Pablo itsa tane bajarapamonae, pexaniajamatabëcuene rajuta Diosojavabelia. Nexata ajamatabëcuenesaëreca Pablo bajarapamonae petaejavata. ¹⁶ Nexata jane baja papatajê Roma tomarabelia. Nexata Roma tomarata capitán Julio rajuta baja pamonaenaneconitsia capona Cesarea tomaraverena. Rajuta baja penaneconitsivi pejebabiabibo pevetsivi penamatacaitorobinê pecobeyabelia. Itsiata Pablo tocopatatsi saicayabota peponaponaenexa. Caenê vajabitsaënë evetaponaponatsi Pablo penajetabajiraviyaniva.

Pacuenia Pablo tsipaeba Jesús pelivaisi Roma tomarata yabara pelivaisi

¹⁷ Pablo baja itsa xaina acueyabi pamatacabibeje pepatsicujinae Roma tomarata, tonajumexuaba judíovi penamatacaitorobivi pepatsinexa Pablojavaberenena. Itsa baja nacaetuata judíovi penamatacaitorobivi, Pablo nexata jumaitsi judíovi penamatacaitorobivijavabelia:

—Tajamonae, itsacuene apo exanae atanê vajavëna judíovijavabelia, vajasalinaivi pecujarubicuene jumecovënëtsiaponaponaenata ananê, itsiata vajavëna judíovi nevaetaba Jerusalén tomaratalia. Nexata necanajeta tananeconitsinexa Romano nacuapijivi pecobeyabelia. ¹⁸ Nexata Romano nacuapijivi, jivi penaneconitsicuene pevetsivi, neyanijoba xua yabara vajavëna judíovi neneconita. Nexata baja picani Romano nacuapijivi necopatsijitsia. Tsipaji apo caxitajarabi itsacueneneconi ata taxainaejava, paneconi yabara nebeyaxuabiaexanaejitsia. ¹⁹ Itsiata baitsi jane vajavëna judíovi, pamonaeneneconita, apo jitsipae Romano nacuapijivi tanecopatsinexa. Jitsipa picani tanebeyaxuabinexa. Nexata xanê vajetajê taneitorobinexa maberanaje Romanonacua pepo pevetsinê pitabarata taneneconitsinexa pibisiacuene itsa exanajê. Itsiata xanê apo jitsipaanê juya bajarapamonae taneconitsijava tajanacuapijivijavabelia. ²⁰ Bajaraxuata nexata pacajunatatsi patacataenexa patacabarêcuaicuajainexanua. Ponê daxita Israel nacuapijivi copiaevetavanapa athêbêvetsica pepatsijavanexatsica, xanê baja yapêtaniji bajaraponê athêbêvetsica pepatsijavatsica. Nexata xanê vajunupaebaponajê bajaraponê athêbêvetsica pepatsijavatsica. Bajaraxuata necobecëtsiaya yamaëya ponaponajê mapacadenamaëtoje, jai Pablo Roma tomarata judíovi penamatacaitorobivijavabelia.

²¹ Nexata judíovi penamatacaitorobivi jumaitsi Pablojavabelia:

—Itsalivaisi ata baja cajena xamê yabara apo panetonajumeitorobi Judea nacuaverena. Vajavëna judíovi patsti ata bajaraverena, itsiata apo panetsipaebi pibisiacuene xamê nexanaejava. ²² Itsiata baitsi jane pajitsipajê patanetsipaebinexamê pacuenia Jesús pelivaisi jumecovënëtame. Daxitanacuanêpijivi baja cajena baracuacuajai tsabiabi bajara papejanapitsapaelivaisi: “Apo pexaniajailivaisi cajena bajarapalivaisi. Dioso cajena apo nacatocopatsi bajarapalivaisi vajajumecovënëtsinexa,” jai tsabiabi daxitanacuanêpijivi, jai judíovi penamatacaitorobivi Pablojavabelia.

²³ Nexata judíovi penamatacaitorobivi cajëta matacabi icatsia nacaetuatsijitsia pabota Pablo ponapona. Nexata jane baja icatsia itsa nacaetuata, bajarapamonae ayaibitsaëttoxaneto parena pabota Pablo ponapona. Nexata Pablo bajayacunua petaxuxuabicujinae livaisi petsipaebijava, matapania caniviyojavabelia copata. Nexata Pablo tsipaeba bajarapamonaejavabelia Dioso pijajivi pevetsijava mapanacuataje. Pablo tsipaebanua bajarapamonaejavabelia pacuenia jumaitsi Dioso Moiséspijinêta penajumecopatsilivaisi

Jesús yabara. Pablo tsipaebanua pacuenia jumaitsi Diosojumepaebivi profetavi bajayata peyaquinaelivaisita Jesús yabara. Bajarapacuenia Pablo tsipaeba bajarapamonae pejumecovênêtsinexa Jesús pelivaisi. ²⁴ Itsamonae bajarapamonae yajuvênêvi jumecovênêta baja bajarapacuenia Pablo petsipaebilivaisi. Itsiata itsamonae apo jumecovênêtsi. ²⁵⁻²⁶ Nexata daxita bajarapamonae apo najamatabêcuenejêpae. Nexata bajarapamonae penavibivajênae Pablo icatsia jumaitsi bajarapamonae javabelia mapacueniaje:

—Bajayata baja cajena profeta Isaíaspijinê Espiritu Santo pejamatabêcueneta tajêvelia yapêtaeyaexanatsi paxamê apo panejumecovênêtsijavanexa Jesús pelivaisi. Nexata profeta Isaíaspijinê Espiritu Santo itorobatsi petsipaebinexa vajasalinaivimijavabelia mapacueniaje:

Paxamê raja picani pajumetaeyabiabianame palivaisi pacatsipaebabiabiana. Itsiata apo pajumeyapêtaemê tsane xua yabara bajarapalivaisi pacatsipaebabiabiana. Paxamê raja picani pataeyabiabianame xua pacatsitaexanabiabiana. Itsiata apo payapêtaemê tsane pajamatabêcuene yabara bajaraxua pacatsitaexanabiabiana,

jai profeta Isaíaspijinê vajasalinaivimijavabelia.

²⁷ Bajarapacuenia jumaitsi profeta Isaíaspijinê tsipaji baja cajena Dioso tajêvelia jumaitsi paxamê apo panejumecovênêtsijavanexa yabara mapacueniaje:

Bajarapamonae ajamatabêcuenetaja tsane. Nexata benamuxuacabiaya pejinavanapaevi tsane. Benaitaxutotsaquebiaya pejinavanapaevi tsane. Itsa bajarapacuenia apo itsipae, nexata yapêtaejitsipa pajamatabêcuene yabara tsitaexanatsi xua tane. Jumeyapêtaejitsipana palivaisi tsipaebatsi. Pejamatabêêthêtojavavetsina jumeyapêtaejitsipa. Nexata najamatabêcuene pênêyorotsipa perujumatabêcuenevecua. Nexata xanê jamatabêcuene xanepanaeyaexanaejitsipajê pibisiacuenevecua,

jai baja cajena Dioso bajayata tajêvelia paxamê apo panejumecovênêtsijavanexa yabara, jai Pablo judíovijavabelia Roma tomarata.

²⁸ Pablo icatsia jumaitsi judíovijavabelia:

—Pajudíovimê, pajumeyapêtaema mapalivaisije. Ajena baja mapamatacabijavaveliacujinaeje, pevajênaeyabelia, Dioso jivi pecapanepaelivaisinexa apo judíovijavabelia ata tsipaebianatsi. Nexata apo judíovi ata xaniavaetsia namuxunaevetsiana bajarapalivaisi, jai Pablo judíovijavabelia.

²⁹ Itsa baja Pablo najumevereta bajarapacuenia petsipaebijava, nexata jane baja daxita judíovi naviaba. Nexata bajarapalivaisi yabara bajarapamonae namutua nabarêcuaicuaijai tsanajetarubena.

³⁰ Pablo penacovaetsibota anijavaibeje ponapona Roma tomarata. Pablo matamotapona bo pecovaetsijamatabêcuene. Pablo xaniavaetsia copiapitabiaba daxita pamonaev sivaixinabiabatsi. ³¹ Pamonaev Pablo sivaixinabiabatsi, tsipaebabiaba Dioso pijajivi pevetsijava mapanacuataje. Tsipaebabiabanua pepo petuxanenê Jesucristo pelivaisi. Tsipaebabiaba ajumejunavijibia. Itsajivi ata Pablo apo jumeitavetsitsi petsipaebabiabilivaisi.

Mapabaxutoje San Pablo toyaquina Roma tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Roma tomarapijivijavabelia, yabara pelivaisi

¹ Xanë Pablonë, Jesucristo pijajivitonënë. Dioso nejunata. Nexata nitoroba apóstolenëxanë tatsipaebaponaenexa jivi pexanialivaisi, Jesucristo pelivaisi, Diosojavabelia pecapanepaelivaisinexatsi.

² Bajayata vajavajënaeya, Dioso bajarapalivaisi tajëvelia yapëtaeyaexana profetavijavabelia. Nexata bajayata Diosojumepaebivi profetavi itsa yaquina Dioso pejumelivaisibaxutonexa, bajarapamonae yaquina pacuenia Dioso tajëvelia yapëtaeyaexanatsi bajarapapexanialivaisi. ³ Bajarapalivaisi vajatuxanenë Jesucristo, Dioso pexënato pelivaisi. Jesucristo itsa naexana mapanacuataje, Davidpijinë pemomoxiyajuvënëvata naexana. Bajaraponë, Davidpijinë, bajayata Israelnua pepo pevetsinëmi. ⁴ Vajatuxanenë Jesucristo petëpaecujinae, Espiritu Santo icatsia asaëyaexanatsi. Bajarapacuenia piasaëyaexanaeatsi petëpaecujinae, jivi yapëtanetsi Dioso pexënatocuene. Yapëtanetsinua piasaënëcuene ata. ⁵ Jesucristo pejamatabëcueneta Dioso paneitoroba saicaya paapóstolevinexanë, Dioso patatonacuenebinexa. Bajarapacuenia Dioso paneitoroba Dioso pejumelivaisi patatsipaebaponaenexa pamonae apo judíovijava, apo judíovi ata pejumecovënëtsinexa Dioso. ⁶ Nexata paxamë ata Roma tomarata panejinavanapaevi pajumecovënëtame baja Dioso. Tspipaji paxamë ata Dioso pacajunata Jesucristo papijajivinxamë.

⁷ Daxita paxamë, Roma tomarata panejinavanapaevi, pacatoyaquinatsi mapabaxutoje. Dioso pacajitsipa. Nexata pacajunata papijajivinxamë. Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavana-paenexanua.

Pacuenia picani Pablo bitso jamatabëtane Roma tomarapijivi yabara pelivaisi

⁸ Namataxainaea pacatoyaquinarutatsi pacuenia jumaitsinë tsabiabi paxamë yabara Diosojavabelia. Diosojavabelia jumaitsinë tsabiabi mapacueniaje: “Sivajamatabëcuenebarëyanë bitso bajarapamonae Jesucristo pejumecovënëtsixae,” janë tsabiabi Diosojavabelia paxamë yabara. Bajarapacuenia Diosojavabelia jumaitsinë tsabiabi tspipaji daxitanacuanëpijivi pacavajunupaeba xaniavaetsia panejumecovënëtavanapaejava Dioso. ⁹ Xanë daxita tajamatabëcuenesaëta Dioso pijacuene tonacuenebaponaponajë jivi itsa tsipaebabiabajë pexanialivaisi, Dioso pexënato pelivaisi. Dioso yapëtane patacatovajëtabiabijava itsa pacanajamatabënapitabiabatsi tavajëtsijavata Diosojavabelia. ¹⁰ Vajëtabiabajë Diosojavabelia taponaeenexa paxamëjavabelia. Nexata Dioso itsa netocopatsiana taponaeenexa, ponaenajë paxamëjavabelia. Bajayajebi picani bitso jamatabëponabiabajë patacataenexa. ¹¹ Nexata jitsipajë patacataenexa, patacatsipaebinxanua palivaisi Espiritu Santo neyapëtaeyaexana. Bajarapacuenia itsa pacayapëtaeyaexanaenatsi, pajamatabëcuenesaëmë tsaponae tsane orijibia Diosojavabelia. ¹² Namataenetsia najamatabëcueneyavenonaenatsi Dioso pejumelivaisi

vajajumecovënëtsijava. Pacayavenonaenatsi paneajamatabëcuenesaënexa Diosojavabelia. Paxamë ata juya paneyavenonaename bajarapacuenia.

¹³ Tajamonaë, pacatojitsipatsi paneyapëtaenexa mapacuenije. Bajayajebi picani bajayajebi jamatabëponabiabajë patacataenexa. Itsiata apo necuenecaëjëpabiabi taponanexa. Jitsipajë patacatsipaebinexa Jesucristo pelivaisi paxamëyajuvënëvi, pamonaë abaxë apo jumecovënëtsi, pejumecovënëtsinexa Jesucristo. Pamonaë ata baja jumecovënëta, Jesucristo piamatabëcuenesaënexa pevajënaeyabelia. Pacuenia apo judíovi ata jumecovënëta tapona pevajënaeyabelia itsaxuayo tsipaebanajetarucajë, bajara paneitsinexa paxamë ata.

¹⁴ Dioso nitoroba tatsipaebaponanexa Dioso pejumelivaisi daxitajivijava. Nexata Dioso pejumelivaisi jivi tsipaebaponajë pinijitomaranëjava, sasavia penaevijava ata. Tsipaebaponajë mapanacuapijilivaisi bitso peyaëtaevijava ata, apo peyapëtaevijava ata. ¹⁵ Bajaraxuata bitso jitsipajë paxamë, Roma tomarata panejinavanapaevi ata, patacatsipaebinexa pexanialivaisi.

Pacuenia pexanialivaisi, Jesucristo pelivaisi, pinijisaë xaina ayaicuenë pexanaenexa yabara pelivaisi

¹⁶ Apo ajumeuranë tsabiabi jivi tatsipaebabiabijava pexanialivaisi, Jesucristo pelivaisi, jivi pecapanepaelivaisinexatsi Diosojavabelia. Tsipaji bajarapalivaisi pejamatabëcueneta pijaneconi vecuaajibiaexanaenatsi pajivi jumecovënëta bajarapalivaisi. Copiaya patsipaebaponajë bajarapalivaisi judíovi. Bajaraxuacujinaë icatsia cotocaevi patsipaebaponajë apo judíovi.

¹⁷ Bajarapalivaisi nacayapëtaeyaexana pacuenia Dioso nacatoexana aneconijibia Dioso vajanacataenexa. Aneconijibia baja Dioso nacatane Jesucristojavabelia vajavajënaeyabelia vajanajamatabëcuenë copataponaxae. Dioso ra pejumelivaisibaxutota jumaitsi mapacueniaje: “Pajivi jamatabëjumaitsi: ‘Xanë pepacuenë Dioso neyavenonaëna pacuenia najumecapanepaeya jumaitsi,’ jamatabëjai, bajarapajivi Dioso aneconijibia tanetsi. Bajarapajivi xainaëna matababi pevereverecaëjava,” jai Dioso pejumelivaisibaxutota.

Pacuenia daxitatsi mapanacuapijivitsi naneconitatsi Diosojavabelia yabara pelivaisi

¹⁸ Dioso, athëbëtsia peecaenë, vaxaitsi jamatabëcueneyapëtanetsi. Yapëtanetsi mapacueniaje. Dioso baranaapanapona daxita pibisiacuenë pexanaevijavabelia. Bajarapamonaë pevajënaeyabelia pibisiacuenë pejamatabëxanaexae, apo jitsipae pejumecovënëtsinexa pexaniajilivaisi, Dioso pejumelivaisi.

¹⁹ Bajarapamonaë xaniavaetsia beyapëtaenë picani pacuenia Dioso jamatabëcuenetsi. Tsipaji baja picani Dioso tsitanajamatabëcuenëitajëta bajarapamonaëjavabelia. ²⁰ Jivi apo caëjëpaetsi pitaxutota petanexa Dioso. Nexata jivi apo yapëtae pacuenia itsi Dioso. Itsiata baitsi jane picani caëjëpatsi peyapëtaenexa pacuenia Dioso jamatabëcuenetsi. Caëjëpatsi picani peyapëtaenexanua daxitamatabijavabelianexa Dioso bitso piasaëtsaponaponaëjava. Bajaraxua picani jivi caëjëpatsi pijacuata peyapëtaenexa, itsa canaëjëtsipa Dioso pexanaëjavanë mapanacuataje. Nexata bajarapamonaë acuenëbi pejumaitsinexa: “Apo payapëtaenë cajena pacuenia Dioso jamatabëcuenetsi,” pejainexa.

²¹ Bajarapamonaë yapëtae ata Dioso peponaponaëjava, itsiata apo yayiatae. Caeto ata cajena Diosojavabelia pexaniajamatabëcuenë apo rajutsi. “Pexaniacuenë rabaja panetoexaname,” apo jai. Biji saya caranata ënatsiquejemajava yabara najamatabëxainabiaba. Nexata pevajënaeyabelia apo peyapëtaexae pexanialivaisi, ajamatabëcuenëitaquiri tsaponaë.

²² Jamatabëcuenenavëxaniabiaya bajarapamonae jamatabëjumai tsabiabi: “Vaxaitsi cajena bitso vajayapëtaevi daxitacuene,” jamatabëjai tsabiabi bajarapamonae. Itsiata baitsi jane cajena apo yapëtae. ²³ Bajarapamonae apo najamatabëcuenecopabi ayaijamatabëcuenenë Diosojavabelia, ponë apo petëpaenënexa daxitamatacabijavabelianexa. Caranata saya jivi pecobeta jumapecataeya pexanaenëanëjavabelia najamatabëcuenecopaba. Bajarapamonae navajëcabiaba itsamonae pecobeta jivi jumapecataeya pexanaenëanëjavabelia. Navajëcabiabanua itsamonae pecobeta pepunaevi jumapecataeya pexanaenëanëjavabelia ata. Navajëcabiabanua itsamonae pecobeta jomo jumapecataeya pexanaenëanëjavabelia ata. Navajëcabiabanua itsamonae pecobeta cuatro pataxutabeje pejinavanapaevi jumapecataeya pexanaenëanëjavabelia ata.

²⁴ Bajaraxuata Dioso tocopata bajarapamonae pibisiacuene pexanavanapaenexa. Nexata pacuenia jamatabëexana, exanavanapa. Nexata bajarapamonae pevitota pibisiacuene namataenetsia natoexanabiaba. ²⁵ Bajarapacuenia Dioso tocopata pacuenia bajarapamonae jitsipa pexanavanapaenexa tsipaji bajarapamonae Dioso pejumelivaisi, pexaniajailivaisi, apo jamatabëjumecovënëtsi. Jumecovënëta saya caranata penajumetsënëtsilivaisi, jivi pecobeta jumapecataeya pexanaenëanë pelivaisi. Bajarapamonae apo yaiyatae pepo Dioso, ponë daxitacuene exana mapanacuatate. Caranata yaiyataeya navajëcabiaba Dioso pecobecovëjavëjavabelia. Najamatabëcuenecopabanua ëbajaraxuanëjavabelia. Bajarapamonae nexata saya namuxujemata caranata pepo Dioso, ponëjavabelia jivi daxitamatacabijavabelianexa jumaitsijitsia: “Diosomë, bitso ayaijamatabëcuenenëmë,” jaijitsia. Bajara itsi tsane.

²⁶ Bajaraxuata Dioso tocopata bajarapamonae pibisiacuene pexanabiabinexa. Pacuenia jamatabëexana, exanavanapa. Mapanacuata picani Dioso tocopata petiriavi pebi pejitsipaenexa. Itsiata baitsi jane bajarapamonae ëpetiriavi najitsipa. Nexata ëpetiriavi namataenetsia naperabëquenetsiataeyabiaba. ²⁷ Bajara pijinia pacuenia Dioso tocopata pebijivi petiriva pejitsipaenexa. Itsiata baitsi jane bajarapamonae ëpebijivi najitsipa. Nexata ëpebijivi namataenetsia naperabëquenetsiataeyabiaba. Bajarapacuenia pibisiacuene penatsiexanaexae, Dioso ayaicuenia naneconitsiaexanaponatsi bajarapamonae.

²⁸ Bajarapamonae apo jamatabënajinae Dioso. Pacuenia picani Dioso tojitsipatsi bajarapamonae pexanaenexa, apo exanae. Bajaraxuata Dioso tocopata bajarapamonae penajamatabëxainaienexa ëpibisiacuene pexanaejava. ²⁹ Bajarapamonae exanavanapa bitso daxita pibisiacuene. Èpibisiacuene yabara najamatabëxainabiaba penaperabëquenetsiataenexa. Daxita pibisiacuene sivanajamatabëxainabiabanua. Jamatabëxainainaeyababiabanua itsamonae pecobecovë. Pibisiacuene jamatabëxanabiabanua itsamonaejavabelia. Cuenecaëbabiabanua itsamonae pexainaejava. Jamatabëbeyaxuababiabanua jivi. Namataenetsia nabijataeya najumeanaenotabiabanua. Bitso cajena jivi yamaxëitojorobabiabanua. Èpamonae ata bitso naitoya tsabiabinua. ³⁰ Bajarapamonae itsamonae pepëya pibisiacuenia najumetsënëtsia baracuaicuajai tsabiabinua. Bajarapamonae apo jitsipaenua Dioso. Nexata itoya Dioso pijacuene. Apo yaiyataeyabiabinua itsamonae ata. Naitaxutojematsia naëcotabiabanua itsamonae. Bajarapamonae jumaitsi tsabiabi: “Xanë bitso ayaijamatabëcuenenënë itsamonae matatoxenetsia,” jai tsabiabi itsamonaejavabelia. Bajarapamonae najamatabëxainabiabanua itsamonae

ata pibisiacuene pexanaeyaexanaenexa. Bajarapamonae apo jumecovënëtabiabinua paxajivi, penajivi ata. ³¹ Bajarapamonae apo jamatabējumeyapētaeyabiabinua caelvaisiyo ata, Dioso pejumelivaisi. Bajarapamonae itsajivijavabelia najumecapanepaeya pejumaitsicuenia, apo exanabiabinua. Bajarapamonae asivaya apo taeyabiabinua itsajivi ata. Bajarapamonae itsajivi itsa itsacueniabatsi, apo jitsipabiabi pexaniabinexa icatsia. Bajarapamonae apo itaxutotsoniataeyabiabinua itsajivi ata. ³² Bajarapamonae bitso xaniavaetsia yapētane picani pacuenia Dioso itorobatsi pexanaenexa. Yapētanenua picani Dioso pavenecuaxuabijavanexa bajarapitsipibisiacuene pexanaevi. Itsiata baitsi jane bajarapamonae tsiteca pibisiacuene exanapona. Orijiabia sivabarēya tsabiabi itsamonae ata pibisiacuene itsa exana.

2

Pacuenia itsamatacabi Dioso naneconitsiaexanaejitsia pijaneconi pexainaevi yabara pelivaisi

¹ Paxamē pajudíovimē, pacatsipaebianatsi mapacueniaje. Pajudíovimē pajumaitsimē tsabiabi itsajivi yabara: “Mara pajivi pibisiacuene exanaje. Nexata Dioso naneconitsiaexanaenatsi,” pajamē tsabiabi. Bajarapacuenia paxamē itsa pajumaitsimē tsabiabi itsajivi yabara, nexata paxamē ata Dioso pacananeconitsiaexanaena. Tsipaji paxamē ata pibisiacuene paexaname bajarapacuenia itsa pajumaitsimē tsabiabi itsajivi yabara. ² Yapētanetsi baja cajena mapacuenije. Itsamatacabi Dioso naneconitsiaexanaena pibisiacuene pexanaevi. Itsamatacabi Dioso itsa naneconitsiaexanaena pibisiacuene pexanaevi, caejivi canacujitsia, paneconivajēto xaina, bajarapaneconivajētota Dioso naneconitsiaexanaponaena. ³ Bajara pijinia pacuenia paxamē ata pibisiacuene paexanabiabi atamē, pajumaitsimē tsabiabi itsajivi yabara: “Mara pajivi pibisiacuene exanaje. Nexata Dioso naneconitsiaexanaenatsi,” pajamē tsabiabi. Bajara pijinia pacuenia paxamē ata bajarapitsipibisiacuene paneexanabiabixae, pētsa pajamatabējumaitsimē tsabiabi: “Vaxaitsi judíovitsi Dioso pijajivixaetsi, apo nacananeconitsiaexanae tsane Dioso,” pajamatabējamē pētsa. Tsipaji Dioso naneconitsiaexanaena daxita pibisiacuene pexanaevi. ⁴ Bepacanaējētame xaniavaetsia pacuenia Dioso jamatabēcueneitsi. Dioso cajena abaxē bepíjia apo naneconitsiaexanae pibisiacuene pexanaevi ata. Dioso raja abaxē jamatabēcueneevetaponapona pibisiacuene pexanaevi ata pevajētsinexatsi pevecuaajibiaexanaenexa pijaneconi. Paxamē ata Dioso pacatojitsipa peneconpabinexa pibisiacuene paneexanabiabijava, panenajamatabēcuene pēnyorotsinexa Diosojavabelia. Bajaraxuata abaxē Dioso pacaitaxutotsoniata. ⁵ Itsiata paxamē pajamatabēcuenetajamē bitso. Apo pajamatabēcopatsimē pibisiacuene paneexanaejava. Nexata ayaineconi panatoexanaponame panevajēnaeyabelia. Nexata ayaicuenia Dioso pacananeconitsiaexanaena pamatacabi Dioso naneconitsiaexanaena daxita pijaneconi pexainaevi. ⁶ Bajarapamatacabi Dioso naneconitsiaexanaponaena caejivi canacujitsia. Paneconivajēto natoexanaponaena itsa abaxē asaē tsaponapona mapanacuataje, bajarapaneconivajētota Dioso caejivi canacujitsia naneconitsiaexanaponaena. ⁷ Itsamonae jamatabēcueneenabiabatsi ēpexaniacuene pexanabiabinexa. Bajarapamonae jitsipabiabanua pejinavanapanexa Dioso pijapenivenivenaenacuatatsia. Jitsipabiabanua Dioso pesivajamatabēcuenebarēyanexatsi. Jitsipabiabanua pexainanexa matacabi apo pevereverecejava. Bajarapamonae Dioso rajutsianatsi matacabi apo pevereverecejava. ⁸ Itsamonae natojitsipa

daxitacuene pexainaejava ëbajarapamonaenexa. Apo jumecovënëtsinua pexaniajailivaisi. Saya exanavanapa ëpibisiacuene. Bajarapamonaë Dioso anaëya ayaicuena naneconitsiaexanaenatsi. ⁹ Daxitajivi pibisiacuene exana, judíovi, apo judíovi ata. Daxita bajarapamonaë pibisiacuene pexanaëxae, Dioso bejiobiaexanaenatsi. Bitso yanajamatabëxainaanua pijaneconi. ¹⁰ Itsiata baitsi jane daxita pamonaë pexaniacuene pexanaëvi, judíovi, apo judíovi ata, Dioso pijapenivenivenaenacuatsia jinavanapaena. Dioso sivajamatabëcuenebarëya tsanetsi. Jinavanapaenanua jamatabëcuenexanepanaëya.

¹¹ Dioso itsa naneconitsiaexanaena daxita pijaneconi pexinaëvi, najëpaëya naneconitsiaexanaena. Paneconivajëta xaina caejivi canacujitsia, bajarapaneconivajëtota Dioso naneconitsiaexanaponaëna caejivi canacujitsia. ¹² Pamonaë apo judíovi, yapëtaë ata xua pibisiacuene, itsiata bajarapapibisiacuene exanavanapa. Nexata bajarapapibisiacuene pexanavanapaëxae, Dioso naneconitsiaexanaenatsi apo judíovi. Pamonaë judíovi, yapëtaë ata pacuenia Dioso Moiséspijnëta penajumecopatsilivaisi jumaitsi pibisiacuene pexanaëyaniva, itsiata bajarapapibisiacuene exanavanapa. Nexata bajarapapibisiacuene pexanavanapaëxae, Dioso naneconitsiaexanaenatsi judíovi. ¹³ Dioso raja judíovi aneconijibia apo taë saya jema judíovi peyapëtaëjava yabara, palivaisi Dioso tonajumecopata Moiséspijnëta. Dioso raja judíovi aneconijibia tane matapania judíovi itsa exanavanapa pacuenia Dioso itoroba Moiséspijnëta petonajumecopatsilivaisi. ¹⁴ Pamonaë apo judíovi, apo tsipaëbitsi Dioso Moiséspijnëta penajumecopatsilivaisi. Itsiata apo judíovi ata itsajavata exana pacuenia itoroba Dioso Moiséspijnëta penajumecopatsilivaisita. Apo judíovi apo muxujiobi atatsi, yapëtane pejamatabëëthëtota xua pexaniacuene pexanaenexa. Yapëtanëna xua ata pibisiacuene pexanaëyaniva. ¹⁵ Pamonaë pexaniacuene exanavanapa tsipaëbinejevatsi Dioso Moiséspijnëta penajumecopatsilivaisi, bajarapamonaë exanavanapa pejamatabëëthëtota peyapëtaëcuënia, pacuenia itorobatsi Dioso Moiséspijnëta penajumecopatsilivaisita. Daxita apo judíovi yapëtane pejamatabëëthëtota pexaniacuene pexanaenexa. Yapëtanëna xua pibisiacuene pexanaëyaniva. ¹⁶ Jemata raja copiapatsiana pamatacabi Dioso itorobijitsia Jesucristo penaneconitsiaexanaenexa daxitajivi. Nexata Jesucristo daxitajivi naneconitsiaexanaëna muetsia daxitajivi pibisiacuene pexanavanapaëneconi yabara. Naneconitsiaexanaenanua papibisiacuene ata muetsia daxitajivi najamatabëxainavanapa yabara. Nexata bajarapamatacabi daxitajivi nayapëtaëna Dioso penaneconitsiaexanaëjavanexatsi muetsia pexanavanapaëneconi yabara. Bajarapacuenia jivi tsipaëbaponajë Dioso pitorobilivaisi itsa tsipaëbaponajë.

Judíovi yabara, Dioso Moiséspijnëta penajumecopatsilivaisi ata, yabara pelivaisi

¹⁷ Pajudíovimë, pajumaitsimë tsabiabi: “Vaxaitsi raja judíovitsi. Vaxaitsi yapëtanetsi Dioso Moiséspijnëta penajumecopatsilivaisi. Bajaraxuata Dioso nacacapanëpaena. Dioso raja ëjudíovitsi vajaDioso,” pajamë tsabiabi. ¹⁸ Payapëtanëme baja cajena xua Dioso pacatojitsipa panëxanaenexa. Payapëtanëmenua Dioso Moiséspijnëta penajumecopatsilivaisi. Bajaraxuata payapëtanëme xua pexaniacuene paneitapetsinëxa paneexanavanapaenëxa. ¹⁹ Pajamatabëjumaitsimëna tsabiabi:

“Vaxaitsi cajena bitso yapëtanetsi Dioso pejumelivaisi, vajatsipaebinexa pamonaë jumetaë ata Dioso pejumelivaisi, abaxë apo pejumeyapëtaëvi pexaniajailivaisicuene. Vaxaitsi jamatabëcueneitayotsianatsi pamonaë piamatabëcueneitaquirivi, Dioso pejumelivaisivecua saya pejinavanapaëvi,” pajamatabëjamënuua tsabiabi. ²⁰ Pajamatabëjumaitsimënuua tsabiabi: “Vaxaitsi cajena nacacaëjëpa vajayapëtaëyaëxanaënexa pamonaë abaxë apo yapëtaë pacuenia Dioso jamatabëcueneitsi. Nacacaëjëpanua vajayapëtaëyaëxanaënexa pamonaë ata pejanajumecovënëtsivi Dioso. Nacacaëjëpa bajarapacuenia vajayapëtaëyaëxanaënexa tsipaji yapëtanetsi pacuenia Dioso jumaitsi Moiséspijinëta penajumecopatsilivaisita. Bajarapalivaisi pexaniajailivaisi baja cajena. Yapëtaëyaëxana pacuenia jivi exanaëjitsia,” pajamatabëjamë tsabiabi. ²¹ Bajarapacuenia paxamë patsipaëbabiabi atamë itsamonaëjavabelia, itsiata paxamë ata apo paëxanaëmë bajarapacuenia. “iPëtsa panacobetoxotame,” pajamë tsabiabi itsamonaëjavabelia. Itsiata paxamë panacobetoxotabiabame. ²² “Pëtsa panaperabëquenetsiataneme itsavajavabelia panijavajivivecua,” pajamë tsabiabi ata itsamonaëjavabelia, itsiata paxamë panaperabëquenetsiataëyabiabame itsavajavabelia panijavajivivecua. Paxamë pajumaitsimë tsabiabi: “Jumapecataya pexanaënanëjavabelia penavajëcaecuene bitso abeje. Itsa pajonejitsipame jumapecataëya pexanaënanë penubenaëbota, pacajamatabëcuene bijianaëjitsipa,” pajamë tsabiabi. Itsiata paxamë pajoneyabiabame jumapecataëya pexanaënanë penubenaëbota penamatamotsijavanë, ofrendacuenia pejëbijavanë, panenacobetoxotabiabinexa. ²³ Paxamë pajudïovimë jivi picani patsipaëbabiabame Dioso Moiséspijinëta penajumecopatsilivaisi, bitso pexanëpanaëlivaisi. Itsiata paxamë ata apo pajumecovënëtsimë bajarapalivaisi. Bajaraxuata jivi apo yayataë Dioso. ²⁴ Bajara paneitsixae, copiapata jane baja pacuenia baja cajena Dioso pejumelivaisibaxutota tajëvelia pacavajunupaëba. Dioso pejumelivaisibaxutota tajëvelia itsa pacavajunupaëba, jumaitsi paxamë yabara mapacueniajaje: “Pamonaë apo judïovi, pibisiacuenia Dioso baracuaicuaijai tsane judïovi xaniavaetsia apo petsitajinavanapaëxae,” jai tajëvelia Dioso pejumelivaisibaxutota paxamë Dioso apo panejumecovënëtsijavanëxa yabara.

²⁵ Paxamë pajudïovimë papebijivimë, pacaperabëcaucuba itsa abaxë patquirinacuetoximë. Baitsi pacaboupiërabëcaucuba. Bajarapacuenia pacaperabëcaucuba panenayapëtaënexa Dioso papijajivicuenemë. Bajarpacuenia pacatonamatamota matapania itsa pajumecovënëtavapaname Dioso Moiséspijinëta penajumecopatsilivaisi. Itsa apo pajumecovënëtsimë tsipae Dioso Moiséspijinëta penajumecopatsilivaisi, papeçaperabëcaucubivi ata, itsiata Dioso apo papijajivimë tsipae. ²⁶ Pamonaë apo judïovi ata, apo peperabëcaucubivi atatsi, pejumecovënëtavapanapaëxae pacuenia Dioso Moiséspijinëta penajumecopatsilivaisi itorobatsi, nexata bajarapamonaë ata Dioso pija-jivivicuenia tanetsi. ²⁷ Pamonaë apo judïovi, apo peperabëcaucubivi atatsi, itsiata pejumecovënëtavapanapaëxae Dioso Moiséspijinëta penajumecopatsilivaisi, bajarapamonaë itsamatacabi pacaurabiana Diosojavabelia. Bajarpacuenia pacaurabiana Diosojavabelia tsipaji Dioso Moiséspijinëta penajumecopatsilivaisi payapëtaë atamë, papeçaperabëcaucubivi atanua, itsiata apo pajumecovënëtsimë Dioso Moiséspijinëta penajumecopatsilivaisi. ²⁸ Pajivi perabëcaucutsi atatsi penayapëtaënexa Dioso pijajivitonëcuene, saya peperabëcaucutsijavatsi yabara Dioso pijajivitonëcuenia apo taetsi. ²⁹ Pajivi

pepacuene Dioso pijajivitonē, bajarapajivi peneta pejamatabēēthētovetsina Dioso jumecovēnēta. Pajivi pepacuene Dioso pijajivitonē, bajarapajivi saya naniavelia apo perabēcaucutsitsi. Biji rajane pejamatabēējētota pejanajamatabēcuene rajutatsi Espiritu Santo. Bajarapajivi xua exanaponapona, exanaponapona Dioso pesivabarēyanexatsi. Bajaraxua apo exanaponaponaē saya mapanacuapijivi pesivabarēyanexatsi.

3

¹ ¿Detsa xua judíovi xaina Diosojavabelia, pamonaē apo judíovivecua? ¿Detsa xua yabara toxanepanatsi Diosojavabelia ponē peperabēcaucutsinētsi apo peperabēcaucutsinētsivecua? ² Palivaisianē judíovi toxanepanatsi Diosojavabelia, navita. Penamataxainaelivaisi, palivaisi judíovi toxanepanatsi Diosojavabelia, maitsije. Dioso tonajumelivaisicopatatsi bajarapamonaejavabelia. ³ Itsamonae judíovi apo jumecovēnētsi pacuenia Dioso najumecapanepaeya jumaitsi petoxanaenexatsi. Pētsa bajarapacuene yabara pajamatabējumaitsimē mapacueniaje: “Dioso meta itsiata apo exanaē tsane pacuenia picani najumecapanepaeya jumaitsi pexanaenexa. Tsipaji judíovi apo jumecovēnētsi,” pajamatabējamē pētsa Dioso yabara. ⁴ Dioso cajena apo penajumetsēnētsinē. Jivi rajane banajumetsēnēta. Dioso pexaniajailivaisi jivijavabelia petsipaebabiabijava yabara, tajēvelia Dioso pejumelivaisibaxutota jumaitsi mapacueniaje:

Xamē Diosomē, pexaniajailivaisi jivijavabelia tsipaebabiabame. Jivi cajumaeabi ata, itsiata daxitajivi peyapētaenexa, xamē apo nena-jumetsēnētsinē,
jai Dioso pejumelivaisibaxutota.

⁵ Pibisiacuene vajaexanaejava yabara Dioso nacananeconitsiaexanaena. Nexata Dioso vajanacananeconitsiaexanaejavata, najamatabēcueneitajētsiana daxitajivi peyapētaenexa Dioso apo pejitsipaenēcuene pibisiacuene pexanaejava. Bajaraxuata pamonaē naneconita Diosojavabelia, Dioso naneconitsiaexanabiaba. Nexata Dioso jivi penaneconitsiaexanaejava yabara, itsa jumaitsinē tsipae: “Dioso pibisiacuene exana itsa naneconitsiaexana pijaneconi pexinaevi,” itsa janē tsipae, nexata jamatabēcuenenavēxaniabiaya jumaitsinē tsipae. Tsipaji Dioso itsa apo naneconitsiaexanaē tsipae pijaneconi pexinaevi, Dioso apo najamatabēcueneitajētsi tsipae pibisiacuene pexanaejava apo pejitsipaenēcuene. Nexata pacuenia Dioso apo pejumecovēnētsivi banajamatabēxaina, bajarapacuenia najamatabēxainaejitsipajē. ⁶ Tsipaji Dioso saya jema jivi apo penaneconitsiaexanaenē. Itsa saya jema Dioso jivi naneconitsiaexanaejitsipa, apo naneconitsiaexanaē tsipae ēpianeconi pexinaevi. Nexata caejivi canacujitsia pibisiacuene pexanaeneconi yabara, paneconivajēto xainapona, bajarapaneconivajētota Dioso apo naneconitsiaexanaponaē tsipae.

⁷ Itsamonae meta jamatabēcuenenavēxaniabiaya jumaitsi tsane mapacueniaje: “Daxitajivi pemataējētsinexa Dioso apo penajumetsēnētsinēcuene, vaxaitsi yamaxēitojorobiaya jivi livaisi tsipaebabiabianatsi. Bajarapacuenia yamaxēitojorobiaya jivi livaisi tsipaebabiabi atatsi tsane, itsiata Dioso apo nacananeconitsiaexanaē tsane. Tsipaji vaxaitsi yamaxēitojorobiaya jivi livaisi vajatsipaebabiabijava pejamatabēcueneta, daxitajivi canaējētsiana Dioso bitso pexaniajanēcuene, apo penajumetsēnētsinēcuene. Bajaraxuata Dioso apo nacananeconitsiaexanaē tsane vajanajumetsēnētatabijava yabara,” jai meta tsane itsamonae jamatabēcuenenavēxaniabiaya.

⁸ Bajarapacuenia itsa najamatabēxainaena bajarapamonae, nexata meta

jamatabêcuenenavêxaniabiaya mataropotsia jumaitsi tsane: “Pibisiacuene meta vaxaexanaejava ata xanepana. Nexata pibisiacuene exanabiabianatsi. Tsipaji vaxaitsi pibisiacuene vaxaexanabiabijava pejamatabêcueneta, daxitajivi canaêjêtsiana Dioso pibisiacuene apo pexanaenêcuene,” jai meta tsane bajarapamonae jamatabêcuenenavêxaniabiaya. Bajarapacuenia itsa jumai tsane, nexata pexaniajailivaisi jivijavabelia apo tsipaebabiabi tsane. Itsiata baitsi jane itsamonae najumetsênêtsiaya xanê yabara jumai tsabiabi: “Pablo raja itorobapona jivi bajarapacuenia pibisiacuene pexanaenexa,” jai tsabiabi xanê yabara. Bajarapacuenia pejumaitsvi xanê yabara, Dioso naneconitsiaexanaenatsi.

Pacuenia daxitajivi naneconita Diosojavabelia yabara pelivaisi

⁹ ¿Nexata tsaja êjudiovi saicaya aneconijibia Dioso tane daxita mapanacuapijivi vecuaje? Jume raja. Jumaitsinê baja cajena mapacueniaje. Daxitatsi mapanacuapijivitsije pibisiacuene êvaxaexanaevi. Judiovi, apo judiovi ata, bajara itsi. ¹⁰ Daxitatsi pibisiacuene vaxaexanaejava yabara, Dioso pejumelivaisibaxutota jumaitsi mapacueniaje:

Caejivi ata aneconijibia apo ponaponae Dioso pitabarata. ¹¹ Ajibi peyapêtaejivi pacuenia Dioso jamatabêcuenetsi. Ajibi pepacue pejamatabêêthêtovetsina pejumecovênêtsijivi Dioso. ¹² Daxita Diosovecua naxuabiaya jinavanapa. Daxita ajamatabêcuenebeje. Ajibi pexaniacuene pexanabiabijivi. ¹³ Pacuenia petêpaenê pemêthê tuxutsaeba, bajara itsi bajarapamonae pecuibovojotota pecuaicuajajava pibisialivaisi. Pijumeta jivi yamaxêitorobabiaba. Pacuenia jomo pecuibovojotota xaina piatanejava, bajara pijinia itsi bajarapamonae pecuaicuajajava penajumetsênêtsilivaisi. ¹⁴ Pecuibovojotota cuaicuaijai êpibisialivaisi pianaepanaenexa. ¹⁵ Itsacuene apo exanae atatsi, bepijia jitsipa jivi pebeyaxuabinexa. ¹⁶ Itsabelia jinavanapa, bejiobiaexanabiaba itsamonae. ¹⁷ Bajarapamonae apo yapêtae xaniavaetsia peyajavajinavanapaenexa jivi. ¹⁸ Bajarapamonae apo canaêjêtsi pejunavînexa Diosojavabelia,

jai mapacueniaje Dioso pejumelivaisibaxutota daxitatsi mapanacuapijivitsi yabara.

¹⁹⁻²⁰ Vaxaitsi baja cajena yapêtanetsi mapacuenieje. Bajayata Dioso pejumelivaisi tonajumecopata êjudiovi picani pejumecovênêtavanapaenexa. Itsiata judiovi apo jumecovênêtsicanepae bajarapalivaisi. Bajaraxuata judioviyajuvênê, caenê ata, acuenebi pejumaitsinexa: “Xanê cajena apo tonaneconitsinê Dioso,” pejainexa. Daxita mapanacuapijivi, judiovi, apo judiovi ata, beyapêtane penaneconitsijava Diosojavabelia. Tsipaji itsajivi ata apo caêjêpaetsi pejumecovênêtsinexa pacuenia itoroba Dioso penajumecopatsilivaisita. Bajarapalivaisi Dioso najumecopata pibisiacuene vaxaexanavanapaejava vajasivajamatabêjumaitsinexa mapacueniaje: “Xaniajai rabaja. Xanê ata pibisiacuene taexanaenê,” vajajamatabêjainexa bajarapalivaisi pejamatabêcueneta.

Pacuenia Dioso aneconijibia tane pajivi najamatabêcuenecopata Jesucristo-javabelia yabara pelivaisi

²¹ Aeconoxae baja mapamatacabitaje Dioso nacayapêtaeyaxana pacuenia nacatoexana aneconijibia vajanacataenexa. Dioso apo jamatabêjumaitsi: “Pamonae jumecovênêtsicanepa Moiséspijinêta tanajumecopatsilivaisi, bajara êpamonae aneconijibia taenajê,” apo jamatabêjai. Pacuenia Dioso

capanepaejitsia Dioso pejumecovënëtsivi, bajayata Diosojumepaebivi profetavi tajëvelia yaquina Dioso pejumelivaisibaxutota. ²² Mara pacuenia Dioso jivi aneconijibia taneje. Pajivi jamatabëjumai: “Xaniajai. Jesucristo itsa tēpa cruzata, pibisiacuene taexanaeconi yabara tēpa,” jamatabëjai, bajarapajivi Dioso aneconijibia tanetsi. Dioso aneconijibia taenatsi daxita pamonaie jumecovënëta Jesucristo cruzata pesivatēpaejavatsi pijaneconi yabara. Tspaji Dioso daxitajivi najēpaeyatane. ²³ Daxitajivi baja cajena pibisiacuene exana. Bajaraxuata caejivi ata aneconijibia Dioso pejitsipaecuenia apo toponaponaie. Daxitajivi Diosovecua naxuabiaya jinavanapa. ²⁴ Itsiata baitsi jane Dioso pinijicuenia piasivaxae daxitajivi, aneconijibia tane daxita pamonaie jumecovënëta Jesucristo cruzata pesivatēpaejavatsi pijaneconi yabara. Jivi apo namatavenonaie pijacuata penaneconimatamotsinexa Diosojavabelia. Tspaji baja aneconijibia tanetsi Jesucristo pecomuatsixaetsi pibisiacuene pexanaeconivecua. ²⁵ Dioso copata Jesucristo petēpaenexa cruzata vajanacaneconimatamotsinexa, pibisiacuene vajaexanaeconimi. Nexata itsa jumecovënëtatsi Jesucristo cruzata vajanacasivatēpaejava, nacavecuaajibiaexana pibisiacuene vajaexanaeconimi. Bajarapacuenia Dioso copata Jesucristo cruzata vajanacasivatēpaenexa mapanacuapijivitsi. Tspaji Dioso apo jitsipae pibisiacuene vajaexanaejava. Bajaraxuata Dioso aneconijibia nacatane Jesucristo itsa nacaneconimatamota, pibisiacuene vajaexanaeconimi. Pepo bajayata pejinavanapaevimiyajuvënëvi ata, namatabëcuene copaba Diosojavabelia. Nexata bajarapamonaie pibisiacuene exanaie ata, itsiata Dioso apo naneconitsiaexanaetsi. Tspaji Dioso tajëvelia yapētane Jesucristo pesivatēpaejavanexa bajarapamonaie ata pibisiacuene pexanaeconi yabara. ²⁶ Ajena, mapamatacabitaje, Dioso jivi tsitanajamatabëcueneitajēta jivi pibisiacuene pexanaejava Dioso apo pejitsipaenëcuene. Tsitanajamatabëcueneitajētanaie aneconijibia petaejavanexa pamonaie jumecovënëta Jesucristo pesivatēpaejavatsi cruzata pijaneconi pevuaajibiaexanaenexatsi.

²⁷ Bajarapacuenia Dioso nacatoexana aneconijibia vajanacataenexa. Dioso aneconijibia apo nacatae vajacuata vajaexanaejava yabara. Biji rajane Dioso aneconijibia nacatane vajajumecovënëtsixae Jesucristo vajanacasivatēpaejava cruzata vaneconi yabara. Nexata ayaijamatabëcuenejivitsi vajanacataenexa, acuenebi vajajumaitsinexa itsajivijavabelia: “Xanē taexanaejava pejamatabëcueneta, Dioso aneconijibia netane,” vajainexa acuenebi. ²⁸ Vaxaitsi baja cajena yapētanetsi mapacueneje. Dioso aneconijibia tane pajivi jumecovënëta Jesucristo pesivatēpaejavatsi cruzata pijaneconi yabara. Bajarapajivi apo jumecovënëtsi ata Dioso Moiséspijinëta penajumecopatsilivaisi, Dioso itsiata aneconijibia tanetsi pejumecovënëtsixae Jesucristo pesivatēpaejavatsi cruzata pijaneconi yabara.

²⁹ Dioso raja ējudiōvi apo pijaDioso. Dioso raja apo judiōvi ata pijaDioso. ³⁰ Caenē rabaja Dioso. Pematatsënëa baja itsanē Dioso ajibi. Bajaraponē Dioso judiōvi aneconijibia tane, pamonaie jumecovënëta Jesucristo pesivatēpaejavatsi cruzata pijaneconi yabara. Bajara pijinia pacuenia Dioso aneconijibia tane pamonaie apo judiōvi ata. ³¹ Vaxaitsi baja xaniavaetsia Jesucristo jumecovënëtatsi vajanacasivatēpaejava cruzata vaneconi yabara. Nexata Dioso Moiséspijinëta penajumecopatsilivaisi yabara, apo bejamatabëjumaitsi: “Dioso Moiséspijinëta penajumecopatsilivaisi tajumecovënëtsijavami, copatajē baja. Tspaji baja jumecovënëtajē Jesucristo tane-

sivatēpaejava cruzata tajaneconi yabara,” apo bejamatabējaisi. Biji rajane Jesucristo vajanacasivatēpaejava cruzata, itsa jumecovēnētatsi, Dioso Moiséspjinēta penajumecopatsilivaisi ata bajarajota yajavajumecovēnētatsi.

4

Pacuenia Abrahampijinē bajayata Dioso aneconijibia tanetsi pejumecovēnētatsi pacuenia Dioso najumecapanepaeya jumaitsitsi yabara pelivaisi

¹ Pacatsipaebijitsiatsi pajamatabēcuenelivaisi yabara Abrahampijinē Dioso aneconijibia tanetsi. ² Abrahampijinē pijacuata ēpexaniacuene itsa exanabiabijsipa, nexata jumaitsi tsipae Diosojavabelia: “Ēpexaniacuene taexanabiabixae, nexata aneconijibia netaneme,” jai tsipae. Itsiata baitsi jane Abrahampijinē Diosojavabelia apo jumaitsi bajarapacuenia. Tspaji Abrahampijinē ēpexaniacuene pijacuata exanabiabi ata tsipae, bajaraxua yabara Dioso aneconijibia apo taetsi tsipae. ³ Biji rajane Dioso pejumelivaisibaxutota Abrahampijinē yabara jumaitsi mapacueniaje: “Abrahampijinē najamatabēcopatsiaya Diosojavabelia pejamatabējumaitsiabiabixae: ‘Xaniajai. Pepacuene Dioso netoexanaena pacuenia najumecapanepaeya nejumaitsi,’ pejamatabējaisiabiabixae, nexata Dioso aneconijibia tanetsi,” jai Dioso pejumelivaisibaxutota Abrahampijinē yabara. ⁴ Pajivi itsanē pijajava tonacuenebaponapona, bajarapajivi xua rajutatsi, amoneya apo rajutsitsi. Petonacuenebixae matamotatsi. ⁵ Pajivi apo exanae ata pexaniacuene, itsiata jamatabējumaitsi: “Dioso, ponē penaneconitsivi pijaneconivecua ajibiaexanabiabi, bajaraponē pepacuene necapanepaena pacuenia najumecapanepaeya jumaitsi tanecapanepaenexa,” jamatabējai, bajarapajivi Dioso aneconijibia taenatsi pecapanepaenexatsi pijaneconivecua. ⁶ Pepo bajayata Davidpijinē vajunupaeba pejamatabēcuenebarēyajava pamonaē baja Dioso aneconijibia tanetsi. Bajarapacuenia Dioso aneconijibia tanetsi bajarapamonae pejumecovēnētatsi Dioso najumecapanepaeya pejumaitsicueniatsi. Bajarapamonae Dioso aneconijibia apo taetsi, pijacuata ēpexaniacuene exanabiabi ata. ⁷ Davidpijinē pepo bajayata tajēvelia bajarapamonae yabara jumaitsi mapacueniaje:

Jamatabēcuenebarēya baja tsavanapae pamonaē picani naneconita Diosojavabelia. Barajamatabēcuenexanepanatsi baja Dioso.

Tspaji baja pibisiacuene pexanaeneconimi, vecuaajibiaexanatsi.

⁸ Jamatabēcuenebarēya baja tsaponaponaē pajivi pibisiacuene pexanaejivi ata, itsiata Dioso aneconijibia itsa tanetsi, jai mapacueniaje Davidpijinē bajayata.

⁹ Bajarapacuenia Davidpijinē itsa jumaitsi, pejamatabēcuenebarēyatsavanapaevi baja, ējudiovi, peperabēcaucubivitsi yabara, apo jumaitsi. Pamonaē apo judiovi, apo peperabēcaucubivi atatsi, yabara jumaitsi. Xaniajanē pacuenia pacatsipaebijitsiatsi. Abrahampijinē bajayata Dioso jumecovēnēta najumecapanepaeya pejumaitsicueniatsi. Nexata baja Abrahampijinē Dioso aneconijibia tanetsi pibisiacuene pexanaeneconimivecua. ¹⁰ ¿Abrahampijinē tsajane baja pepuaperabēcaucutsitsi, Dioso aneconijibia tanetsi? Jume raja. Abaxē apo perabēcaucutsinejeva atatsi, aneconijibia tanetsi pejumecovēnētatsi Dioso najumecapanepaeya pejumaitsicueniatsi.

¹¹ Dioso baja aneconijibia pepuataetsi, Abrahampijinē perabēcaucutatsi. Bajarapacuenia Abrahampijinē perabēcaucutatsi daxitajivi peyapētaenexatsi Dioso aneconijibia petaejavatsi. Bajaraxuata daxita pamonaē apo peperabēcaucubivi atatsi, itsa jamatabējumaitsi: “Xaniajai. Pepacuene Dioso

netoexanaena pacuenia najumecapanepaeya jumaiti,” ita jamatabėjai, bajarapamonae Abrahampijinė bepexi Dioso tanetsi, apo peperabėcaucubivi atatsi. Abrahampijinė abaxė apo perabėcaucutsi atatsi, Dioso pejumecovėnėtsixae, aneconijibia tanetsi. ¹²Xaniajai rabaja. Abrahampijinė bepexi Dioso tanetsi daxita pamonaē peperabėcaucubivitsi. Bajarapamonae Abrahampijinė bepexi Dioso tanetsi apo ēpeperabėcaucubijavatsi yabara. Biji rajane Abrahampijinė bepexi Dioso tanetsi tsipaji bajarapamonae ata abaxė apo perabėcaucubi atatsi, jumecovėnėta pacuenia Dioso najumecapanepaeya jumaiti.

Pacuenia tocopiapatatsi pajivi jumecovėnėta pacuenia Dioso najumecapanepaeya jumaiti petoexanaenexatsi yabara pelivaisi

¹³ Bajayata Dioso najumecapanepaeya jumaiti Abrahampijinėjavabelia: “Carajutsianatsi daxita mapairaje nijairanexa. Nevėnamuto ata, nexi, nemo-moxi ata, pijairanexa,” jai Dioso Abrahampijinėjavabelia. Bajarapacuenia Dioso jumaiti Abrahampijinėjavabelia tsipaji Dioso aneconijibia tanetsi Abrahampijinė pejumecovėnėtsixae pacuenia Dioso najumecapanepaeya jumaiti. Nexata acuenebi vajajumaitisnexa: “Abrahampijinė Dioso aneconijibia tanetsi tsipaji jumecovėnėta Dioso Moiséspijinėta penajumecovėnėtsilivaisi,” vajajainexa. Tsipaji baja Abrahampijinė pepuatėpae, bexėa Moiséspijinė ponapona. ¹⁴ Dioso najumecapanepaeya ita jumai tsipae perajutsinexa bajarapaira ēpamonae jumecovėnėtapona Dioso Moiséspijinėta penajumecopatsilivaisi, nexata bajarapamonae, Abrahampijinė pemomoxi ata, apo rajutsitsi tsipae bajarapaira. Tsipaji itsajivi ata, bajarapamonae yajuvėnėjivi, apo jumecovėnėtsicapanepe Dioso Moiséspijinėta penajumecopatsilivaisi. Bajarapamonae Dioso pejumecovėnėtsijava ata, nacueratsipa. Dioso najumecapanepaeya bajarapaira perajutsiapaebijavamitsi ata, toajumematamobi tsipaetsi. ¹⁵ Tsipaji daxita pamonaē apo jumecovėnėtsi pacuenia Dioso itoroba Moiséspijinėta penajumecopatsilivaisita, bajarapamonae Dioso naneconitsiaexanaena. Itsiata baitsi jane ita ajibi tsipae pitavetsilivaisitsi, nexata pijinia ajibi tsipae peyabarananeconitsia exanaē javanexatsi.

¹⁶ Dioso cajena najumecapanepaeya jumaiti Abrahampijinėjavabelia amoneya perajutsinexa bajarapaira. Perajutsinexa Abrahampijinė pejijavabelianexa ata, pemomoxijavabelianexa ata. Bajarapaira Abrahampijinė Dioso rajutsiapaebatsi Dioso najumecapanepaeya pejumaitisjavatsi Abrahampijinė pejumecovėnėtsixae. Bajarapaira Dioso najumecapanepaeya ita rajutsiapaeba pamonaē jumecovėnėta Dioso Moiséspijinėta penajumecopatsilivaisi, bajara ēpamonae itsiata apo rajutsiapaebi. Biji rajane rajutsiapaeba pamonaē ata jumecovėnėta pacuenia Dioso najumecapanepaeya jumaiti, pacuenia bajayata Abrahampijinė jumecovėnėta Dioso najumecapanepaeya pejumaitiscueniatsi. Bajaraxuata daxitatsi, Dioso vajajumecovėnėtsivi, Dioso nacatane Abrahampijinė bepexitsi. ¹⁷ Bajarapacuenia Abrahampijinė bepexitsi Dioso vajanacataejavanexa yabara, Dioso pejumaitisjiva Abrahampijinėjavabelia Dioso pejumelivaisibaxutota tajėvelia jumaiti mapacueniaje: “Ayaibitsaētoخانeto jivi bepijasalinainėmė cataeyaexanaenatsi,” jai Dioso pejumelivaisibaxutota tajėvelia Dioso pejumaitisjiva Abrahampijinėjavabelia vaxaitsi yabara. Dioso baja cajena icatsia piasaēyaexanaenė petėpaevimi ata. Xua picani abaxė ajibi mapanacuataje, Dioso baja exana pijumeta.

¹⁸ “Abraham raeta baja pexi apo xainae tsane,” sivajamatabėjai atatsi daxitajivi bajayata, itsiata Abrahampijinė Dioso apo jumeaebi.

Jumecovënëta Dioso pejumlahtsicueniatsi. Evetaponapona jivi ayabit-saëtoxaneto pamo pexanaenexatsi pacuenia Dioso najumecapanepaeya jumlahtsitsi. ¹⁹ Bajarapamatacabi Abrahampijinë imoxo pexainae cien pavaibeje. Bajaraponë pijava Sara, mavecova. Perujuvayo baja pijinia. Pexi picani pexainaeenexabeje, apo caëjëpaetsibeje. Tsipaji baja bitso perujujivibeje. Bajaraxua Abrahampijinë nacueneyapëtae ata, itsiata jumecovënëta Dioso pacuenia najumecapanepaeya jumlahtsitsi petoexanaenexatsi. ²⁰ Apo jumeaebi pacuenia Dioso najumecapanepaeya jumlahtsitsi. Bitso biji pevajënaeyabelia jamatabëcuenevetaponapona pacuenia Dioso najumecapanepaeya jumlahtsitsi petocopiapatsinexatsi. Nexata Dioso yabara Abrahampijinë jumai tsabiabi: “Dioso cajena bitso ayajamatabëcuenenë,” jai tsabiabi. ²¹ Abrahampijinë xaniavaetsia yapëtane Dioso pecaëjëpaenëcuenetsi petoexanaenexatsi daxita pacuenia najumecapanepaeya jumlahtsitsi. ²² Abrahampijinë Dioso jumecovënëta petoexanaenexatsi pacuenia najumecapanepaeya jumlahtsitsi. Bajaraxuata Dioso aneconijibia tanetsi.

²³ Dioso pejumelivaisibaxutota jumlahtsi pacuenia Dioso aneconijibia tanetsi Abrahampijinë pejumecovënëtsixae Dioso najumecapanepaeya pejumlahtsicueniatsi. Bajarapacuenia Dioso pejumelivaisibaxutota apo jumlahtsi saya vajayapëtaenexa Abrahampijinë pelivaisi. ²⁴ Biji rajane nacatoyaquina vaxaitsi ata vajanacamuxujiobinexa. Nexata vaxaitsi ata itsa jumecovënëtatsi pacuenia Dioso najumecapanepaeya jumlahtsi, aneconijibia Dioso nacatane. Bajaraponë Dioso vajatuxanenë Jesucristo icatsia asaëyaexanatsi petëpaecujinae. ²⁵ Dioso athëbëvetsica itorobica Jesús vajanacasivatëpaenexa mapanacuataje. Nexata Jesús itsa nacasivatëpa, nacaneconimatamota pibisiacuene vajaexanaeconimi. Bajaraxuacujinae Dioso icatsia asaëyaexanatsi petëpaejavavecua vajanacavecuaajibiaexanaenexa vaneconimi. Nexata baja Dioso aneconijibia nacatane Jesús pejamatabëcueneta.

5

Pacuenia jamatabëcuenebarëya pajivi Dioso aneconijibiatanetsi yabara pelivaisi

¹ Dioso aneconijibia nacatane vajajumecovënëtsixae pacuenia Dioso najumecapanepaeya jumlahtsi. Nexata sivajamatabëcuenebarëyatsi tsavana-pae Dioso. Vajatuxanenë Jesucristo vajanacasivatëpaexae vaneconiconi yabara, bajaraponë pejamatabëcueneta nacajamatabëcuenebarëyayaexana. ² Vajajumecovënëtsixae Jesucristo vajanacasivatëpaejava, Dioso nacaitaxutotsoniataeyabiaba. Nexata Dioso sivajamatabëcuenebarëyatsi. Tsipaji yapëtanetsi itsamatacabi Dioso vajayajavajinavanapaejavane peniveni-venaenacuatsia. ³ Mapanacuapijivi nacabejiobiaexanabiabi ata, itsiata sivajamatabëcuenebarëyatsi tsabiabi. Tsipaji yapëtanetsi vajanacabejiobiaexanabiabicueneta, nacajamatabëcueneasaëyaexanapona Diosojavabelia. Nexata nacajamatabëcuenecaëjëpa vajanajamatabëcueneasëtsinexa, daxita pibisiacuene nacatocopiapatsi ata. ⁴ Itsa najamatabëcueneasëtsi, nacatocopiapatsi ata pibisiacuene, Dioso pijinia nacasivabarëya. Nexata itsa yapëtanetsi Dioso vajanacasivabarëyajava, nexata jamatabëcuenevetatsi Dioso vajanacatoexanaenexa pacuenia najumecapanepaeya jumlahtsi. ⁵ Nexata itsa

jamatabëcuenevetatsi Dioso vajanacatoexanaenexa pacuenia najumecapanepaeya jumaitsi, apo nacueratsitsi tsane. Bajarapacuenia apo nacueratsitsi tsane tsipaji baja Dioso nacarajuta Espiritu Santo vajanacatsijamatabëcaenexa. Nexata Espiritu Santo xaniavaetsia nacayapëtaeyaexana Dioso vajanacaasivajava.

⁶ Vaxaitsi bitso ajamatabëcuenesaëjibitsi pibisijamatabëcuenevixaetsi. Acuenebi vajuacata vajanacapanepaenexa Diosojavabelia vajaneconi yajava. Itsiata baitsi jane Dioso pecaëjët simatacabita, Cristo nacasivatëpa pibisiacuene vajaexanaeneconi yabara. ⁷ Mapanacuataje itsajivi itsa jamatabëcuenevavenona itsanë, nexata itsa beyaxuabiapaebatsi pejamatabëcuenevavenonaexae, pecajunavi baja apo jamatabëcuenevavenonaes tsipae. Itsajivi meta itsiata jamatabëcuenevavenonaëjitsipa, beyaxuabijitsia atatsi. Bajarapacuenia jamatabëcuenevavenonaëjitsipa itsa bitso pexaniajamatabëcuenenë, ponëjavabelia jamatabëcuenevavenonaëjitsia. ⁸ Itsiata baitsi jane vaxaitsi Dioso nacayavenona, pibisiacuene vajaexanaevi ata. Nexata Dioso nacatsitanajamatabëcueneitajëta bitso vajanacaasivajava. Dioso pexë nato athëbëvetsica itorobica vajanacasivatëpaenexa mapanacuataje. ⁹ Jesucristo vajanacasivatëpaexae, nexata baja maparucajeje Dioso aneconijibia nacatane. Bajaraxuata yapëtanetsi Jesucristo pejamatabëcueneta Dioso vajanacapanepaejavanexa vajanacananeconitsia exanaejavanexamivecua. ¹⁰ Vaxaitsi picani Dioso pijavajabitsaëvitsi. Nexata pexë nato vajanacasivatëpaexae, Dioso baja nacabarajamatabëcuenexanepana. Bajaraxuata maparucajeje yapëtanetsi Dioso pepacuene vajanacapanepaejavanexa vajanacananeconitsia exanaejavaminexavecua. Tsiipaji pexë nato asaë taponaponae vajanacatocuaicuaijinënexa paxajavabelia. ¹¹ Orijibia vaxaitsi bitso sivajamatabëcuenebarëyatsi Dioso vajanacaasivajava. Tsiipaji vajatuxanenë Jesucristo pejamatabëcueneta Dioso baja nacabarajamatabëcuenexanepana.

Adánpijinë Cristo ata yabara pelivaisi

¹² Copiaya caenë, Adánpijinë, pibisiacuene exana. Nexata mapanacuataje daxitajivi pibisiacuene pexanaejavanexa, taxuxuaba. Taxuxuabanua jivi petëpaejavanexa. Nexata jivi petëpaejava, yacaëjëpa daxitanacuapijivijava. Tsiipaji daxitanacuapijivi pibisiacuene exana. ¹³ Dioso Moiséspijinëta penajumecopatsilivaisi ata pevajënaeya, mapanacuapijivi pibisiacuene exanavanapa. Itsiata abaxë apo petonajumecopatsixaetsi Dioso pejumelivaisi, itsajivi ata acuenebi pejumatsijavatsi: “Pananeconitame raja Diosojavabelia,” pejaijavatsi pibisiacuene pexanaejava yabara. ¹⁴ Adánpijinë peponaponaejavaveliacujinae, jivi jinavanapa. Bajarapamonaemi jinavanapa Moiséspijinë pevajënaeya. Daxita bajarapamonaemi ata pibisiacuene exana. Nexata tēpaponae. Bajarapamonaepibisiacuene itsa exana, itsiata Adánpijinë papibisiacuene exana, cuenejēpaeya apo exanae. Cristo, ponë tajëvelia vajunupaebatsi pepatsijavanexatsica, Adánpijinëbeje, apo najamatabëcuenejēpaebeje. Adánpijinë pejamatabëcueneta, daxitajivi pibisiacuene exanavanapa. Nexata daxitajivi naneconita Diosojavabelia. Cristo pijinia pejamatabëcueneta, jivi ayaibitsaët oxaneto Dioso aneconijibia tanetsi.

¹⁵ Nexata Adánpijinë papibisiacuene exana, apo najēpaebeje papexaniacuene Dioso nacatoexana Jesucristo pejamatabëcueneta. Caenë, Adánpijinë, pibisiacuene pexanaejava pejamatabëcueneta, daxitajivi tēpaponae. Biji rajane Dioso vajanacaitaxutotsoniatējava, bitso pexaniacuene. Tsiipaji Dioso

athëbëvetsica itorobica vajatuxanenë Jesucristo vajanacasivatëpaenexa mapanacuataje, vajanacavecuajibiaexanaenexa daxita vajaneconimi. Nexata bajarapacuenia caenë, Jesucristo, pexaniacuene exana pecapanepaenexa jivi ayaibitsaëttoxaneto. ¹⁶ Caenë saya picani Adánpijinë. Itsiata pibisiacuene itsa exana, yacaëjêpa daxitajivijava. Nexata daxitajivi pibisiacuene pexanaexae, naneconita Diosojavabelia. Itsiata baitsi jane Jesucristo xaniavaeta daxita xua Adánpijinë pejamatabëcueneta bijiana picani. Jesucristo pejamatabëcueneta Dioso aneconijibia tane daxita pamonaë jumecovënëta Jesucristo pesivatëpaejavatsi pibisiacuene pexanaeneconi yabara. ¹⁷ Caenë Adánpijinë pibisiacuene pexanaexae, daxitajivi tēpapona bajarapamonae ata pibisiacuene pexanaexae. Itsiata caenë Jesucristo vajanacasivatëpaexae, maparuceaje Dioso baja nacaitaxutotsoniatane. Bajaraxuata itsacuenejaváyo ata Dioso apo toexanae atatsi, Dioso aneconijibia nacatane. Daxita pamonaë jumecovënëta Jesucristo pejamatabëcueneta Dioso aneconijibia petaejavatsi, bajarapamonae ajamatabëcuenesaë tsavanapae tsane Dioso jumecovënëtsijava Jesucristo peyavenonabiabixaetsi.

¹⁸ Daxitajivi naneconita Diosojavabelia caenë, Adánpijinë, copiaya pibisiacuene pexanaexae. Caenë pijinia, Jesucristo, pexaniacuene pexanaexae, daxita pamonaë jumecovënëta Jesucristo pesivatëpaejavatsi pibisiacuene pexanaeneconi yabara, Dioso aneconijibia tanetsi. Nexata bajarapamonae Dioso rajutsianatsi matacabi apo peverevercaejava. ¹⁹ Caenë, Adánpijinë, copiaya apo jumecovënëtsi Dioso pitorobicueniatsi. Nexata bajaraponë pejamatabëcueneta, jivi ayaibitsaëttoxaneto pibisiacuene exana. Nexata icatsia bexëa caenë, Jesucristo, xaniavaetsia jumecovënëta Dioso pitorobicueniatsi. Nexata Jesucristo pejamatabëcueneta, jivi ayaibitsaëttoxaneto Dioso aneconijibia tanetsi.

²⁰ Bajayata Dioso Moiséspijinëta najumecopata jivi pejumecovënëtsinexa. Nexata bajarapalivaisi itavetatsi pibisiacuene picani pexanaeyaniva. Itsiata baitsi jane jivi apo caëjêpaetsi penajamatabëcuenesaëtsinexa. Nexata pibisiacuene exanabiaba. Nexata bajarapalivaisi pitavetsixaetsi pibisiacuene picani pexanaeyaniva, itsiata jivi pibisiacuene itsa exana, nacueneyapëtane pibisiacuene pexanaejava. Nexata jivi pevajënaeyabelia pibisiacuene itsa exana, Dioso pijinia pevajënaeyabelia bitso itaxutotsoniataeponatsi. ²¹ Daxitatsi tēpaenatsi. Tsipaji daxitatsi pibisiacuene exanatsi. Bajara pijinia pacuenia daxitatsi Dioso vajanacaitaxutotsoniataexae, Dioso aneconijibia nacatane. Dioso nacarajutsiana matacabi apo peverevercaejava vajatuxanenë Jesucristo vajanacasivatëpaexae.

6

Pacuenia Dioso pejumecovënëtsivi pejanajamatabëcuene yajavajinavanapa yabara pelivaisi

¹ Itsajivi meta jamatabëcuenenavëxaniabiaya jamatabëjumaitsi tsane: “Dioso vajanacaitaxutotsoniataexae, aneconijibia nacatane. Nexata icatsia ayaiucenia Dioso vajanacaitaxutotsoniataenexa, vajavajënaeyabelia pibisiacuene exanavanapaenatsi,” jamatabëjai meta tsane jamatabëcuenenavëxaniabiaya. ² ¡Jume raja! Pëtsa baja vaxaitsi pibisiacuene exanatsi pematatsënëa. Petēpaenë baja apo najamatabëxinae pibisiacuene pexanaenexa. Bajara pijinia pacuenia vaxaitsi ata bejamatabëcuenëitsitsi pibisiacuene vajaexanaeyaniva. ³ Paxamë bepapyapëtaneme pajamatabëcuene yabara nabautisabatsi. Itsa nabautisabatsi, becaeperabëto nacaexana Jesucristojavabelia.

Nexata vaxaitsi bejamatabějumaitsitsi mapacueniaje: “Jesucristo cruzata itsa tēpa, xanē ata betaneyajavatēpae cruzata,” bejamatabējaitsi. Bajarapajamatabēcuene yabara nabautisabatsi. ⁴ Itsa Jesucristo bevajanacayajavatēpae, nexata bevajanacayajavamēthētsitsi. Nexata Jesucristo petēpaecujinae, Dioso pesaēta icatsia itsa asaēyaexanatsi, bevajanacayajavaasaēyaexanaetsi icatsia. Vaxaitsi pejanajamatabēcuene vajajavajavinavanapaenexa, copatatsi baja vajaperujumatabēcuenemi. Bajarapajamatabēcuene yabara nabautisabatsi.

⁵ Becaeperabēto vajanacaexanaexae Jesucristojavabelia, nexata daxitatsi Jesucristo cruzata bevajanacayajavatēpae. Nexata Jesucristo petēpaecujinae, Dioso icatsia itsa asaēyaexanatsi, bevajanacayajavaasaēyaexanaetsi.

⁶ Jesucristo itsa rutatsi cruzata pebeyaxuabinexatsi, vajaperujumatabēcuenemi yajavarutatsi vajanacavecuajibiaexanaenexa pibisiacuene vajanacaexanaeya exanaejamatabēcuenemi. Bajarapacuenia vajanacatoexanaexae, pematatsēnēa baja apo hexanaetsi pibisiacuene.

⁷ Pacuenia baja petēpaenē pibisiacuene apo exanae, bajara pijinia vaxaitsi ata bejamatabēcueneitsitsi pibisiacuene vajaexanaeyaniva.

⁸ Jesucristo cruzata bevajanacayajavatēpaexae, nexata bejamatabějumaitsitsi mapacueniaje: “Yajavajavinavanapaenatsi Jesucristo daxitamatacabijavabelianexa,” bejamatabējaitsi. ⁹ Yapētanetsi vajatuxanenē Jesucristo Dioso icatsia piasaēyaexanaejavatsi petēpaecujinae. Nexata baja icatsia

Cristo pematatsēnēa apo tēpae tsane. ¹⁰ Itsa baja Cristo tēpa daxitajivi pibisiacuene pexanaeneconi yabara, caecuenia copiarutsiaya sivatēpa daxitamatacabijavabelianexa. Nexata baja Cristo icatsia pematatsēnēa apo tēpae tsane. Biji rajane Dioso yajava daxitamatacabijavabelianexa asaē tsonaponae tsane athēbētatsia, itsajotatsia ajibi petēpaecueni. ¹¹ Nexata paxamē panejamatabēēthētota pajamatabějumaitsimēre tsavanapae: “Tajaperujumatabēcuenemi baja navecuatēpaeyabajē. Nexata baja pibisiacuene apo exanaenē tsane. Biji rajane asaēnē baja tsonaponae Dioso taneitorobucuenia tatoexanabiabinexa. Tsipaji baja tajatuxanenē Jesucristo neyjavaponapona,” pajamatabējamēre tsavanapae.

¹² Bajaraxuata pētsa baja panajamatabēxainabiabame pibisiacuene paneexanaenexa panijacuata panenatojitsipaecuenia. ¹³ Pētsa panacopatame daxita xua pibisiacuene paneexanaenexa. Tsipaji paxamē bepanetēpaecujinae, Dioso icatsia bepapecaasaēyaexanaevi. Nexata pajumaitsimēre tsabiabi Diosojavabelia: “Tajatuxanenē, catonucatsi majotaje. Cajamatabēcuenevetaponaponaenatsi daxitamatacabijavabelianexa pacuenia xamē jitsipame tacatoexanabiabinexa,” pajamēre tsabiabi Diosojavabelia. ¹⁴ Nexata pacacājēpaena panenajamatabēcuenesaētsinexa icatsia caevēalia paneexanaeyaniva papibisiacuene panijacuata panatojitsipame. Tsipaji Dioso papacaitaxutotsoniataexae, Dioso pacayavenonabiabiana. Nexata baja apo paexanavanapaemē tsane pacuenia pacaitoroba Dioso Moiséspijnēta penajumecopatsilivaisi.

Pacuenia itsane pajivi nacopata epibisiacuene pexanaejavabelia yabara pelivaisi

¹⁵ Itsajivi meta jamatabēcuenenavēxaniabiaya jamatabėjumai tsane: “Dioso vajanacaitaxutotsoniataexae, aneconijibia nacatane. Nexata baja tsiteca apo exanavanapae tsanetsi pacuenia nacaitoroba Dioso Moiséspijnēta penajumecopatsilivaisi. Nexata baja itaxutojema pibisiacuene exanavanapaenatsi,” jamatabėjai meta tsane itsajivi jamatabēcuenenavēxaniabiaya. jJume raja! Pibisiacuene apo

bexanavanapaetsi. ¹⁶ Paxamē rabaja xaniavaetsia payapētaneme mapacueneje. Itsa panacopatsipame itsanē papijajivinxamē, nexata pacuenia bajaraponē pacaitorobabiaba, pajumecovēnētābiabijitsipame. Bajara pijinia paitsimē tsipae itsa panacopatsipame pibisiacuene paneexanabiabinexa. Nexata bajarapapibisiacuene bepapijajivimēcuenia, pacuenia pacajamatabēcuenēitorobabiaba, paexanavanapaejitsipame. Nexata bajarapaneconi pejamatabēcueneta papitsipame panetēpaejavanexa, Diosovecua panenaxuabinexa daxitamatacabijavabelianexa. Itsiata itsa pajumecovēnētavanapaename Dioso, nexata pacuenia Dioso pacatojitsipa, patoexanavanapaename. ¹⁷ Bajayajebi picani panacopatame pibisiacuene paneexanavanapaenexa. Nexata pibisiacuene bepapijajivimēcuenia, pacuenia pacajamatabēcuenēitorobabiaba, ēpibisiacuene paexanavanapame. Nexata itsiata maparucaeje daxita panejamatabēcueneta pajumecovēnētavanapame baja papexaniajalivaisi itsamonaē pacatsipaeba. Bajaraxuata paxamē yabara Diosojavabelia jumaitsinē tsabiabi: “Xanepana rabaja. Ayaicuenia yavenoname bajarapamonae,” janē tsabiabi. ¹⁸ Aeconoxae baja Dioso pacacopatsiaexana pibisiacuene paneexanavanapaenamē. Nexata jane baja panajamatabēcuxiname ēpexaniacuene paneexanavanapaenexa. ¹⁹ Peyapēxanepanaecuenia pacatoyaquinatsi mapalivaisije xaniavaetsia panejumeyapētaenexa xua yabara pacatoyaquinatsi. Bajayajebi picani panacopatame pibisiacuene paneexanavanapaenexa. Nexata bajarapapibisiacuene bepapijajivimēcuenia pacuenia pacajamatabēcuenēitorobabiaba, ēpibisiacuene picani paexanavanapame panevajēnaeyabelia. Itsiata baja aeconoxae panajamatabēcuenērajure Diosojavabelia ēpexaniacuene paneexanavanapaenexa panevajēnaeyabelia. Bajarapacuenia Dioso pacatojitsipa paneexanavanapaenexa.

²⁰ Pamatacabi picani abaxē ēpibisiacuene paexanavanapame, Dioso papecattojitsipaecuenia apo paexanavanapaemē. Saya jamatejema pajinavanapame. ²¹ Itsiata apo pacatoxanepanaē itsacuenejavayonexa ata daxita papibisiacuene picani paexanavanapame. Payaauramē tsabiabi pibisiacuene paneexanaejava. Pamonaē tsiteca pibisiacuene exanavanapa, bajarapamonae Diosovecua naxuabiana daxitamatacabijavabelianexa. ²² Paxamē rabaja Dioso pacacapanepa pibisiacuene paneexanaeconomiecua. Bajaraxuata Diosojavabelia panajamatabēcuenērajutame baja Dioso papijajivinxamē. Nexata apo panacueratsimē tsane. Dioso papecattojitsipaecuenia pajinavanapaename. Panetēpaeucujinaē paxainaename matacabi apo pevereverecejava. ²³ Pamonaē pibisiacuene pexanaevi, Dioso rajutsianatsi petēpaejavanexa, Diosovecua penaxuabinexa daxitamatacabijavabelianexa. Pamonaē jumecovēnēta vajatuxanenē Jesucristo pesivatēpaejavatsi pijaneconi yabara, bajarapamonae itsamatacabi Dioso amoneya rajutsianatsi matacabi apo pevereverecejava.

7

Pacuenia Dioso pejumecovēnētsivi Dioso Moiséspijinēta penajumecopatsilivaisi apo bejumecovēnētsi pecapanepaenexatsi yabara pelivaisi

¹ Tajamonae, payapētaneme rabaja Dioso Moiséspijinēta penajumecopatsilivaisi. Nexata baja pijinia payapētaneme pacuenia jivi bajarapalivaisi bejumecovēnētavanapa itsa abaxē asaē tsavanapae mapanacuataje. Itsiata

baitsi jane itsa baja tēpa, acuenebi baja pematatsēnēa bajarapalivaisi pe-
 jumecovēnētavanapaenexa. ² Pova baja pamona pexainaeva, acuenebi peve-
 cuanaviatsinexa pamona, penacojobinexa icatsia itsanējavabelia. Tsipaji
 Dioso Moiséspijinēta penajumecopatsilivaisi itaveta bajarapacuenē. Itsiata
 baitsi jane pova baja pamona vecuatēpatsi, nexata matapania tocopatatsi
 penacojobinexa icatsia itsanējavabelia itsa jitsipa penacojobijava. ³ Pova
 pamona pexainaeva, itsa nacojobijitsipa itsanējavabelia, pamona abaxē
 itsa asaē tsaponapnae, nexata bajarapova ayaineconi natsiexanaejitsipa
 Diosojavabelia. Tsipaji pamonavecua itsanējavabelia naperabēquenetsiate
 ponapnaejitsipa. Itsiata baitsi jane baja pova baja pamona vecuatēpatsi,
 Dioso Moiséspijinēta penajumecopatsilivaisi apo itavetsitsi penacojobijava
 itsanējavabelia. Nexata pova baja pamona vecuatēpatsi, nacojobi ata icatsia
 itsanējavabelia, ayaineconi apo natsiexanae tsipae Diosojavabelia.

⁴ Tajamonae, bajara pijinia paitsimē paxamē ata. Pacuenia petiriva
 pamona pitorobabiabicueniatsi, jumecovēnētabiaba, bajara pijinia pacuenia
 pajumecovēnētabiabame picani Dioso Moiséspijinēta penajumecopatsilivaisi
 papecaitorobicuenia. Jesucristo bepaneyajavatēpaexae, nexata Dioso
 Moiséspijinēta penajumecopatsilivaisi bepanevacuatēpaē. Nexata baja
 icatsia apo pajumecovēnētavanapaemē bajarapalivaisi papecaitorobicuenia.
 Maparucaeje Cristo baja papijajivimē, ponē icatsia Dioso asaēyaexanatsi
 petēpaecujinae. Cristo icatsia Dioso bepapecayajavaasaēyaexanae pacuenia
 Dioso pacatojitsipa paneexanavanapaenexa. ⁵ Pamatacabi abaxē Cristo
 pelivaisi apo jumecovēnētsitsi, pibisiacuene exanavanapatsi vajacuata
 vajanatojitsipaecuenia. Nexata bajarapamatacabi itsa nacaitaveta Dioso
 Moiséspijinēta penajumecopatsilivaisi pibisiacuene vajaexanaeyaniva,
 caranata saya bevajanacaitorobi pibisiacuene vajaexanaenexa. Nexata
 bitso pibisiacuene exanavanapatsi. Bajaraxua yabara picani Diosovecua
 naxuabijainavanapatsi. ⁶ Itsiata baja maparucaeje palivaisi Dioso
 Moiséspijinēta najumecopata, bajarapalivaisi vajajumecovēnētsijavami,
 Dioso baja nacacopabiaexana Cristo bevajanacayajavatēpaexae. Nexata
 papexaniacuene aeconoxae exanavanapatsi, apo exanavanapaetsi
 saya vajanacaitorobixae bajayata peyaquinaelivaisimi, Dioso
 Moiséspijinēta penajumecopatsilivaisi. Jume baja cajena. Espiritu
 Santo raja pejanajamatabēcueneta vajanacaitorobixae, exanavanapatsi
 bajarapapexaniacuene.

*Dioso Moiséspijinēta penajumecopatsilivaisi, pacuenia ata Pablo pibisi-
 acuene pexanaenexa najamatabēxaina, penavajunupaebijava, yabara pelivaisi*

⁷ Itsajivi meta jamatabēcuenenavēxaniabiaya jamatabējumaitsi tsane:
 “Dioso Moiséspijinēta penajumecopatsilivaisi, itsacuenejavayonexa ata
 apo xanepanae,” jamatabējai meta tsane. ¡Jume raja! Itsa ajibi tsipae
 bajarapalivaisi, nexata apo nacueneyapētaenē tsipae pibisiacuene
 taexanaejava. Tsipaji Dioso Moiséspijinēta penajumecopatsilivaisita,
 itsalivaisianē yajava, jumaitsi mapacueniaje: “Pētsa cobecaēbame itsajivi
 pexanaejava,” jai. Nexata itsa apo yapētaenē tsipae bajarapalivaisi, xanē
 apo nacueneyapētaenē tsipae pibisiacuene taexanaejava, itsajivi pexanae-
 java cobecaēbi atanē. ⁸ Dioso Moiséspijinēta penajumecopatsilivaisi, itsa
 nitaveta itsamonae pexanaejava tacobecaēbijaniva, nexata caranata bitso
 betanitorobi tacobecaēbinexa itsamonae pexanaejava. Pamatacabi abaxē
 apo yapētaenē Dioso Moiséspijinēta penajumecopatsilivaisi, apo jitsipae
 picani taexanaenexa bajarapacuenē. ⁹ Bajayata abaxē itsa apo yapētaenē

bajarapalivaisi, jamatejemanē saya. Itsiata pamatacabi xaniavaetsia yapētaniji xua yabara Dioso nitaveta, nexata jitsipajē bitso pibisiacuene taexanaenexa. Bitso najamatabēxainajē. Bajarapalivaisi pejamatabēcueneta yapētaniji pibisiacuene taexanaexae, Diosovecua naxuabiaya tatēpaejavanexa picani. ¹⁰ Bajarapalivaisi Dioso najumecopata Moiséspijinēta jivi picani jamatabēcuenēbarēyaya xaniavaetsia pejinavanapaenexa. Itsiata xanē bajarapalivaisi pejamatabēcueneta apo jamatabēcuenēbarēyanē. Tsipaji pibisiacuene taexanaexae, bajarapalivaisi pejamatabēcueneta yapētaniji Diosovecua tanaxuabijavanexa picani. Nexata bitso najamatabēxainajē. ¹¹ Papibisiajamatabēcuenē xainajē tajamatabēēthētota, pibisiacuene neexanaeyaexanabiaba. Nexata pacuenia jumaitsi bajarapalivaisi, naneconitajē picani Diosovecua tanaxuabinexa.

¹² Palivaisi Dioso Moiséspijinēta najumecopata, pexanialivaisi cajena.

¹³ Nexata bajarapapexanialivaisi pejamatabēcueneta yapētaniji Diosovecua tanaxuabijavanexa picani. Tsipaji xanē tajamatabēēthētota papibisiajamatabēcuenē xainajē pejamatabēcueneta, exanabiabajē pibisiacuene. Bajaraxuata Diosovecua naxuabijitsianē picani. Bajarapacuenia daxitajivi bajarapalivaisi pejamatabēcueneta, nacueneyapētaena pibisiacuene pexanaejava. Taexanaexae xua bajarapalivaisita itaveta, naneconitajē Diosojavabelia. Bajarapalivaisi itsa yapētaniji, nexata tajamatabēēthētota papibisiajamatabēcuenē xainajē, nitorobapona bitsoyo pibisiacuene taexanaponenexa.

¹⁴ Palivaisi Dioso Moiséspijinēta najumecopata jivi pejumecovēnētsinexa, yapētanetsi bajarapalivaisi Dioso penajumecopatsijava. Bajarapalivaisi jivi pejumecovēnētsinexa, bexaina pejanajamatabēcuenē. Itsiata baitsi jane xanē bajara apo jamatabēcuenētsinē. Tajacuata saya ētanatojitsipacuenia exanapononajē. Caranata saya najamatabēxainabiabajē ēpibisiacuene taexanabiabinexa, papibisiajamatabēcuenē tajamatabēēthētota xainajē taneitorobabiabicuenia. ¹⁵ Xua pexaniacuene, jamatabēexanabiabajē picani. Itsiata bajaraxua apo exanabiabinē. Biji papibisiacuene apo jitsipaenē picani taexanabiabinexa, bajaraxua caranata exanabiabajē. “¿De tsaeta xuajitsia bajarapacuenia exanabiabajē?” jamatabējanē belia. ¹⁶ Itsa exanabiabajē papibisiacuene picani apo jitsipaenē taexanabiabinexa, nexata sivajamatabēbējanē tsabiabi. Bajaraxuata yapētaniji jane baja Dioso penajumecopatsilivaisi pexanialivaisiacuene. Tsipaji Dioso penajumecopatsilivaisi itaveta pibisiacuene pexanaejava. ¹⁷ Bajarapapibisiacuene exanae atanē, itsiata apo betanatsitaexanae itajara. Papibisiajamatabēcuenē abaxē xainajē tajamatabēēthētota, nexanaeyaexanapona bajarapapibisiacuene. ¹⁸ Tajamatabēcuenē cajena bitso abeje. Yapētaniji itsacuenejavayonexa ata apo netoxanepanae daxita tajamatabēcuenē. Natojitsipajē picani pexaniacuene taexanabiabinexa. Itsiata apo nejamatabēcuenēcaējēpabiabi pexaniacuene taexanabiabinexa. ¹⁹ Papexaniacuene jitsipajē taexanabiabinexa picani, itsiata apo exanabiabinē. Caranata saya exanabiabajē pibisiacuene, xua picani apo jitsipaenē taexanaenexa. ²⁰ Nexata itsa exanabiabajē xua picani apo jitsipaenē taexanabiabinexa, nexata bajaraxua apo betanatsitaexanae itajara. Tsipaji papibisiajamatabēcuenē abaxē xainajē tajamatabēēthētota, nexanaeyaexanapona bajarapapibisiacuene.

²¹ Nexata jane baja yapētaniji pacuenia jamatabēcuenētsinē tsabiabi. Paepatota picani jitsipajē pexaniacuene taexanabiabinexa, itsiata apo exanabiabinē. Tsipaji papibisiajamatabēcuenē xainajē, abaxē yajavapononajē. ²² Tajamatabēcueneta jamatabējumaitsinē tsabiabi: “Jitsipajē

tajumecovënëtsinexa Dioso pejumelivaisi,” jamatabëjanë tsabiabi picani. ²³ Itsiata baitsi jane belia najamatabëcuenyapëtaniji. Papibisiacuene exanabiabajë, bajarapapibisiacuene picani tajamatabëcueneta apo jitsipañë taexanaenexa. Tajamatabëcueneta picani jitsipajë pexaniacuene taexanaenexa, Dioso tanetojitsipacuena. Caranata exanabiabajë ëpibisiacuene. Tajaperujamatabëcuene saya bepijajivitonëncuena toponaponajë.

²⁴ ¡Xanë bitso bejiobinë! Bajarapapibisiagamatabëcuene yabara Dioso picani nenaneconitsiaexanaejitsia tanaxuabinexa Dioso vecua daxitamatacabijavabelianexa. “¿Jipatsa meta nevecuaajibiaexanaena bajarapapibisiagamatabëcuene?” jamatabëjanë belia. ²⁵ Nexata Dioso javabelia jumaitsinë: “Pexaniacuene rabaja netoexaname,” janë. Tshipaji vajatuxanenë Jesucristo jamatabëcuenecaëjëpatsi taneyavenonaenexa. Bajaraxuata ëpibisiacuene jamatabëxanae atanë, jitsipajë daxita tajamatabëcuenevetsina tajumecovënëtsinexa pacuena Dioso itoroba.

8

Pacuenia Espiritu Santo nacajamatabëcuenyavenona yabara pelivaisi

¹ Pamonaë baja Jesucristo yajavajinavanapa, bajarapamonae Dioso baja apo naneconitsiaexanaetsi tsane. Bajarapamonae penatojitsipacuena, pibisiacuene apo exanavanapae. Biji rajane exanavanapa pacuenia Espiritu Santo tojitsipatsi. ² Nexata bajarapacuenia xanë ata Jesucristo itsa yajavaponaponajë, nexata Espiritu Santo pesaëta neyavenonabiaba xaniavaetsia taponaponae. Nexata baja apo exanaponanë pibisiacuene. Papibisiagamatabëcuene picani nenaneconitsiaexanabiaba daxitamatacabijavabelianexa picani tananeconitsiaponaponae, bajarapajamatabëcuenemi Espiritu Santo baja nevecuaajibiaexana. ³ Vaxaitsi vajacuata apo nacajamatabëcuene caëjëpae vajajumecovënëtsinexa Dioso Moiséspijnëta penajumecopatsilivaisi. Bajaraxuata apo nacacaëjëpae vajacuata vajanacapanepaenexa Dioso javabelia. Itsiata Dioso caëjëpatsi vajanacapanepaenexa. Athëbëvetsica Dioso itorobica pepo caenë pexënato. Nexata mapanacuata Dioso pexënato itsa naexana, nacaperabëjëpa picani pibisiacuene vajaexanaevi. Bajaraponë vaxaitsi pibisiacuene vajaexanae neconi yabara, nacasivatëpa. Nexata baja nacavecuajibiaexana papibisiagamatabëcuene picani xainatsi, pajamatabëcuene picani nacaexanaeyaexanabiaba pibisiacuene. ⁴ Bajarapacuenia Dioso nacatoexana vajanacajamatabëcuenecaëjëpaenexa pexaniacuene vajaexanaejava pacuenia Dioso Moiséspijnëta penajumecopatsilivaisi jumaitsi. Nexata nacacaëjëpa vajaexanaenexa pexaniacuene. Tshipaji apo exanavanapatsi pacuenia vajacuata natojitsipatsi. Biji rajane exanavanapatsi pacuenia Espiritu Santo nacatojitsipa.

⁵ Pamonaë exanavanapa pijacuata penatojitsipacuena, bajarapamonae jamatabëcuene enabiabatsi ëpibisiacuene pexanaenexa. Pamonaë pijinja exanavanapa Espiritu Santo pejitsipacuena, bajarapamonae jamatabëcuene enabiabatsi Espiritu Santo pejitsipacuena pexanavanapaenexa. ⁶ Pamonaë saya exanavanapa pijacuata penatojitsipacuena, bajarapamonae bepejamatabëcuenetëpaevi Dioso pitabarata. Nexata Dioso vecua naxuabiaya jinavanapa. Pamonaë pijinja exanavanapa Espiritu Santo pejitsipacuena, bajarapamonae jamatabëcuene barëyaya jinavanapa Dioso pitabarata. Bajarapamonae itsamatacabi xainaenanua matacabi apo pevereverecaëjava. ⁷ Pamonaë saya exanavanapa pijacuata penatojitsipacuena, bajarapamonae itoya Dioso. Tshipaji

apo exanae pacuenia Dioso penajumecopatsilivaisi itorobatsi. Apo jamatabëcuenecaëjêpaetsi pejumecovënëtsinexa bajarapalivaisi. ⁸ Pamonae saya exanavanapa pijacuata penatojitsipaecuenia, bajarapamonae apo jamatabëcuenecaëjêpaetsi pexanaenexa Dioso pejitsipaecuenia.

⁹ Maparucaeje paxamë apo paexanavanapamë pacuenia panijacuata panatojitsipame. Espiritu Santo, ponë Cristo itorobica, pepacune pacatsijamatabëeca. Nexata Espiritu Santo pejitsipaecuenia, paexanavanapame. Pajivi Espiritu Santo apo tsijamatabëecaetsi, bajarapajivi Cristo apo pija-jivitonë. ¹⁰ Paneperabëto tēpaena pibisiacuene paneexanaejamatabëcuene. Itsiata Cristo papijajivixaemë, nexata pepo panejamatabëcuene athëbëtatsia jinavanapaena daxitamatabijavabelianexa. Tsipaji Dioso aneconijibia pacatane. ¹¹ Dioso asaëyaexanatsi Jesús petëpaecujinae. Nexata paxamë Espiritu Santo itsa pacatsijamatabëeca, pacuenia Jesús Dioso asaëyaexanatsi petëpaecujinae, bajara pijinia pacuenia paxamë ata Dioso pacaasaëyaexanaena panetëpaecujinae. Nexata panetëpaecujinae Dioso pacaperabëasaëyaexanaena Espiritu Santo papecatsijamatabëecaexae.

¹² Tajamonae, bajarapacuenia Dioso nacaexanaena. Bajaraxuata xanepana vajaexanavanapenexa pacuenia Dioso nacatojitsipa. Copatatsi baja vajacuata vajanatojitsipaecuenia vajaexanabiabijavami.

¹³ Tsipaji pibisiacuene itsa paexanavanapaejitsipame panijacuata panenatojitsipaecuenia, nexata itsa patëpame, Diosovecua panaxuabijitsipame daxitamatabijavabelianexa. Itsiata baitsi jane Espiritu Santo papecayavenonaejamatabëcueneta itsa pacopatame panijacuata panenatojitsipaecuenia pibisiacuene paneexanabiabijavami, nexata itsamatabi paxainaename matabi apo peverevereaejava.

¹⁴ Pamonae exanavanapa Espiritu Santo pitorobicueniatsi, bajarapamonae Dioso pexi. ¹⁵ Itsa nacatsijamatabëjunua Espiritu Santo, Dioso pexitsi nacaexana. Saya bepajajivicueniatsi apo nacaexanae cjunaviaya vajatonacuenebinexa. ijume baja cajena! Biji rajane pepacune Dioso pexitsi nacaexana. Nexata Espiritu Santo pejamatabëcueneta: “¡Axa!” nacajaiyaexana vajavajëtsijavata Diosojavabelia. ¹⁶ Vajajamatabëëthëtota Dioso pijaEspiritu Santo nacayapëtaeayaexana Dioso pexicuenetsi. ¹⁷ Nexata Dioso pexixaetsi, itsamatabi Jesucristo yajava Dioso nacatsicobetsanaena daxita xua Dioso toxaina pexi petsicobetsanaenexa. Nexata Dioso pexixaetsi, pacuenia Jesucristo bejiobiaexanatsi, bajara pijinia pacuenia vaxaitsi ata itsamonae nacabejiobiaexanaena. Nexata jane baja xuacujinae Dioso yajavajinavanapanatsi Dioso pijapenivenivenacuatsia.

¹⁸ Xaniajai. Maparucaeje itsamonae nacabejiobiaexanapona mapanacuataje. Itsiata bajaraxua yabara apo najamatabëxainaetsi. Tsipaji baja yapëtanetsi itsamatabi bitso vajajamatabëcuenebarëyajavanexa Dioso pijanacuatsia. ¹⁹ Daxita mapanacuapijivi itatsacajinaeya vajënaeevetavanapa petocopiapatsinexatsi pamatabi Dioso nacaitajëtsijitsia bajarapomonaejavabelia Dioso pexitsi vajanacaexanaecueni. Bajarapomonae vajanacayapëtaenexa Dioso pexicuenetsi, Dioso nacaitajëtsijitsia bajarapomonaejavabelia. Vaxaitsi baja Dioso vajajumecovënëtsivi, Dioso baja nacajamatabëcuenexaniavaeta. ²⁰ Daxitacuene Dioso pexanaejava mapanacuataje pevererecaponaena. Tsipaji bajarapacuenia Dioso copata pevererecaponaenexa. Bajaraxua apo naneconitsi ata Diosojavabelia, itsiata pevererecaena. Tsipaji baja Dioso copata bajarapacuenia daxitacuene pevererecaponaenexa Adánpijinë pibisiacuene pexanaejava pejamatabëcueneta. Itsiata baitsi jane itsamatabi Dioso

copiarucaeyaexanaena daxitacuene pevereverecaponaejava. ²¹ Dioso pexitsi nacaasaëyaexanaena vajatëpaecujinae, pacuenia copiaya Cristo ata Dioso asaëyaexanatsi. Bajarapamatacabi, daxitacuene Dioso pexanaejava mapanacuataje pevereverecaponaejava, Dioso copiarucaeyaexanaena. ²² Yapëtanetsi baja cajena pacuenia itsi daxitacuene mapanacuataje. Pacuenia itsi unupijivi, pejuvijavanë ata, bejiobi abaxë. Tsi-paji xaina piavitaneacuene, pe-tëpaecuene ata. Nexata abaxë tsitecapona bajarapabejiobicuene mapamatacabijavaberena ataje. ²³ Daxita xua tanetsi mapanacuataje, bajaraëxua bajarapacuenia apo bejiobi piavitaneacuene yabara. Vaxaitsi ata cajena bejiobitsi tsavanapae. Espiritu Santo vajanacatsijamatabëecaexae, yapëtanetsi mapacueneje. Dioso pexixaetsi itsamatacabi nacaperabëithianaena pacuenia Cristo perabëithianatsi. Nexata bitso jitsipatsi vajajamatabëëthëtovetsina Dioso vajanacaperabëithianaenexa vajaperabëvereverecaejavavecuena. ²⁴ Jumecovënëtsi Jesucristo vajanacasivatëpaejava pibisiacuene vajaexanaeneconi yabara. Nexata yapëtanetsi Dioso vajanacaperabëithianaevanexa. Bajarapacuene nexata abaxë copiaevetavanapatsi. Itsa baja Dioso nacarajutsipa xua nacarajutsipaeba, nexata baja apo copiaevetavanapatsi tsipae vajanacarajutsinexa. Tsi-paji baja ajibi tsipae vajayabaracopiaevetavanapaejava itsa baja nacarajutsipa. ²⁵ Nexata abaxë evetavanapatsi xua Dioso nacarajutsipaeba vajanacarajutsinexa. Nexata abaxë copiaevetavanapatsi bajayajebi ata itsajamatabëcuene vecuaxainaenejevatsi.

²⁶ Vajaajamatabëcuenesaëjibixae, Espiritu Santo nacayavenonabiaba mapamatacabi ataje abaxë bajaraxua vajacopiaevetavanapaenexa. Vaxaitsi apo yapëtaetsi xaniavaetsia vajavajëtsinexa Diosojavabelia. Nexata Espiritu Santo bëpënëa bitso nacasivanajamatabëxainaeya nacatovajëtabiaba asaëyata Diosojavabelia. Xua apo vënëjonecapanepaetsi, Espiritu Santo nacatovajëtabiaba. ²⁷ Dioso cajena vajanacajamatabëcuenyapëtaenë pacuenia najamatabëxainatsi. Nexata Dioso yapëtane xua Espiritu Santo nacatovajëtsijitsi. Tsi-paji Dioso vajanacatojitsipacuena, Espiritu Santo nacatovajëtabiaba Diosojavabelia Dioso pijajivixaetsi.

Pacuenia Dioso pejumecovënëtsijivi daxita pibisiacuene tocopiapatsi atatsi, bejamatabëcuenematatoxeneta daxita bajarapapibisiacuene Jesucristo peyavenonabiabixaetsi yabara pelivaisi

²⁸ Yapëtanetsi mapacueneje. Daxita xua apo vajajitsipacuene, Dioso nacatocopata vajanacatocopiapatabixinexa. Nexata bajaraxua nacatocopiapatabiaba saya vajanacajamatabëcueneëjëtsinexa. Nexata bajaraxua itsa nacajamatabëcueneëjëta, apo nacatsitapexaniacuene itajara. Itsiata Dioso vajajumecovënëtsivi yapëtanetsi bajaraxua vajanacajamatabëcueneëjëtsijava pejamatabëcueneta vajanacajamatabëcuene asaëyaexanaevanexa Diosojavabelia. Vaxaitsi Dioso nacajunata pexitsi vajanacaexanaenexa pacuenia nacasivanajamatabëxaina. ²⁹ Vajanaexanaevajënaeya ata, Dioso yapëtane pexitsi vajanacaexanaevanexa. Nexata vajanaxanaevajënaeya ata, Dioso nacasivanajamatabëcuenevereta vajanacaexanaenexa pacuenia pexënato jamatabëcueneitsi. Nexata vajanaxanaevajënaeya ata, Dioso nacasivanajamatabëcuenevereta Dioso pexënato pejuyapijivitsi ayaibitsaëtotsi vajanacaexanaenexa. ³⁰ Bajarapacuenia vajanaexanaevajënaeya ata, Dioso vajanacasivanajamatabëcuene veretsixae, najamatabëxaina pexitsi vajanacaexanaenexa. Nexata jane baja mapamatacabitaje

nacajunata pexitsi vajanacaexanaenexa. Dioso vajanacajunatsixae, nexata nacavecuaajibiaexana pibisiacuene vajaexanaeneconimi. Nexata baja aneconijibia Dioso nacatane. Nexata itsamatacabi Dioso javajinavanapaenatsi Dioso pijapenivenivenaenacuatsia.

³¹ Nexata Dioso yabara bejumaitsitsi mapacueniaje: “Dioso cajena vajanacayavenonaenē. Nexata itsajivi ata apo caējēpaetsi vajanacajamatabēcuene matatoxenetsinexa,” bejaitsi. ³² Dioso baja cajena apo nacavecuaasiva pexēnato. Biji rajane copata pexēnato vajanacasivatēpaenexa daxita vaxaitsi vajaneconi yabara. Nexata bajarapacuenia vajanacatoexanaeae, yapētanetsi Dioso vajanacarajutsijavanexa daxita vajanamataavenaecuene ata. ³³ Dioso baja cajena nacaitapeta. Nexata vaxaitsi yabara Dioso jumaitsi: “Bajarapamonae baja aneconijibia taniiji,” jai Dioso najumecapanepaeya. Nexata cajena itsajivi ata apo caējēpaetsi vajanacaneconitsinexa Diosojavabelia pibisiacuene vajaexanaejava yabara. ³⁴ Itsajivi ata cajena apo caējēpaetsi vajanacaneconitsiaexanaenexa pibisiacuene vajaexanaejava yabara. Tsipaji baja capanepaeya Jesucristo nacasivatēpa vajanacaneconimatamotsinexa. Nexata Cristo petēpaecujinae Dioso icatsia asaēyaexanatsi. Maparucaeje Jesucristo eca athēbētatsia, Dioso pemuxuneneta, pecujanenia. Cristo pijajivitsi Diosojavabelia nacayajivicuaicuaijai. ³⁵ Cristo baja cajena vajanacaasivanē. Nexata itsajivi ata apo caējēpaetsi Cristo vajanacaasivacuene vajanavecuacopiarucaeyaexanaenexa. Nacabejiobiaexanae ata tsipae, piayapēbejecuene nacatocopiapatsi ata tsipae, itsiata vajanacaasivanē Cristo tsiteca nacaasiva tsipae. Vajanacaitoyaxae, nacabarajinae ata tsipae, vajani tsabiabi ata tsipae, itsiata vajanacaasivanē Cristo tsiteca nacaasiva tsipae. Bitso bejiobi atatsi tsipae, bitso nacatsiayai ata tsipae, nacabeyaxuabiapaebi ata tsipae, daxita bajarapitsicuene nacatocopiapatsi ata tsipae, itsiata vajanacaasivanē Cristo tsiteca nacaasiva tsipae. ³⁶ Vaxaitsi yabara mapajamatabēcuenelivaisi jēpaje. Bajayata Dioso pijajivi navajunupaeba Diosojavabelia pacuenia itsamonae bejiobiaexanaponatsi. Dioso pejumelivaisibaxutota bajarapamonaemi penavajunupaebijume itanerubena. Jumaitsi mapacueniaje:

Xamē Diosomē, panijajivixae, daxitamatacabi itsamonae jamatabēpanebejebabiaba picani. Pacuenia oveja pebeyaxuabinexa capona, bajarapacuenia jamatabēpaneexanabiaba, jai Dioso pejumelivaisibaxutota.

Bajara pijinia pacuenia vaxaitsi ata aeconoxae nacaexanapona. ³⁷ Nexata daxita xua pibisiacuene, nacatocopiapatabiabiana. Nacabejiobiaexanabiabiana. Nexata itsiata vaxaitsi bajaraxua jamatabēcuene matatoxenetabiabianatsi. Tsipaji Cristo vajanacaasivanē, nacayavenonabiabiana. ³⁸ Nexata yapētaniji mapacuenieje. Itsacunenjavayo ata apo caējēpaetsi Cristo vajanacaasivacuene vajanavecuacopiarucaeya exanaenexa. Vajatēpacuene ata, vajaasaētsavanapaecuene ata, ángelevi ata, dovathivi penamatacaitorobivi ata, apo caējēpaetsi Cristo vajanacaasivacuene vajanacavecuacopiarucaeya exanaenexa. Piayapēbejecuene, xua baja nacatocopiapata, xua ata abaxē nacatocopiapatsijitsia, daxita bajaraxua ata, apo caējēpaetsi Cristo vajanacaasivacuene vajanacavecuacopiarucaeya exanaenexa. ³⁹ Athēbēbetsia vajaponaejava ata, ira bēxēpanabereca vajaponaejava ata, apo caējēpaetsi Cristo vajanacaasivacuene vajanacavecuacopiarucaeya exanaenexa. Dioso pexanaejava, itsacunenjavayo ata, apo caējēpaetsi Cristo vajanacaasivacuene vajanacavecuacopiarucaeya exanaenexa. Yapētanetsi

Dioso vajanacaasivajava. Tspaji Dioso vajanacaasivaxae, vajatuxanenē Jesucristo athēbēvetsica itorobicatsi vajanacasivatēpaenexa mapanacuataje.

9

Pacuenia Dioso pijajivinexa itapeta judiōvi yabara pelivaisi

¹ Najamatabēcuenecopatajē Cristojavabelia. Nexata apo najumetsēnētšinē. Pexaniajailivaisi cajena pacatoyaquinatsi. Palivaisi pacatoyaquinatsi pexaniajailivaisicuene tayapētaenexa, Espiritu Santo tajamatabēthētota neyapūtaeaxana. ² Bitso sivanajamatabēxainajē tavēna judiōvi, Israel nacupijivi. Belia betaajamatabētane tasivanajamatabēxainaejava bajarapamonaē. ³ Bajarapamonaē apo pejumecovēnētšixae Cristo, bitso sivanajamatabēxainajē. Bajaraxuata bajarapamonaē yabara jamatabējumaitšinē: “Itsa xanē Dioso netocopatsipa tanaxuabinexa Cristovecua, bajarapamonaē juya pecapanepaenexatsi, nexata bajarapacuenia exanaejitsipajē bajarapamonaē Dioso pecapanepaenexatsi,” jamatabējanē belia tavēna judiōvi yabara. ⁴ Bajarapamonaē judiōvi, Israelpijinē pemomoxi. Bajarapamonaē pijasalinaivimijavabelia bajayata picani Dioso ayaicuenia yavenonabiaba. Itsiata bajarapamonaemi Dioso apo jumecovēnētši. Dioso picani itapeta bajarapamonaemi Dioso pexi pexanaenexa. Bajarapamonaemi tanenua baja picani Dioso pijapenivenivenaecotia. Dioso baja picani najumecapanepaeya jumaitšinua bajarapamonaemijavabelia peyavenonabiabinexa. Dioso Moiséspijinēta penajumecopatsilivaisi ata, rajuta picani bajarapamonaemi pejumecovēnētavanapaenexa. Dioso picani itorobanua bajarapamonaemi pexanaenexa templo, bajarapabota pevajēcabiabinexa Diosojavabelia. Dioso picani najumecapanepaeya jumaitšinua petoitorobinexatsica Cristo bajarapamonaemi picani pecapanepaenēnexatsi pibisiacuene pexanaeconimivecua. ⁵ Bajarapamonaemi pijasalinaivimi, pevēnējonevimi Dioso pejumecovēnētšijava. Cristo itsa naexana mapanacuataje, judiōnēcuenia naexana. Cristo nexata pijamonaē judiōvi. Bajaraponē Cristo, Diosonē baja cajena, daxitacuene pevetsinē. Nexata bajaraponējavabelia jivi jumai tsabiabi tsane: “Xamē Cristomē, bitso baja cajena ayaijamatabēcuenenēmē,” jai tsabiabi tsane daxitamatacabijavabelianexa. Bajara itsi tsane.

⁶ Itsiata daxita judiōvi apo jumecovēnētši pacuenia Dioso najumecapanepaeya jumaitši. Nexata Dioso apo toexanaē daxita judiōvijavabelia pacuenia Dioso najumecapanepaeya jumaitši. Nexata Dioso yabara vaxaitsi jamatabēcuenenavēxaniabiaya apo bejumaitšitsi mapacueniaje: “Pacuenia Dioso najumecapanepaeya jumaitši judiōvijavabelia petoexanaenexa, bajarapacuenia itsiata Dioso apo toexanaē daxita judiōvijavabelia,” apo bejaitši vaxaitsi jamatabēcuenenavēxaniabiaya Dioso yabara. Bajarapacuenia Dioso yabara vaxaitsi jamatabēcuenenavēxaniabiaya apo bejumaitšitsi. Tspaji Dioso tajēvelia apo itapetsi daxita judiōvi pijajivinexa. Bajaraxuata pacuenia Dioso tajēvelia najumecapanepaeya jumaitši, apo toexanaē daxita judiōvijavabelia. ⁷ Tspaji bajayata Abrahampijinē pemomoxi ayaibitsaēto xainae ata, daxita itsiata Dioso apo totaetsi Abrahampijinē pepo pemomoxicuenia. Dioso tajēvelia jumaitši Abrahampijinējavabelia mapacueniaje: “Ani-janēbeje nexēnatobeje xinae atamē tsane, taitapetsinēxae, caenē nexēnato, Isaac, pexi catotaenatsi pepo nemomoxicuenia,” jai Dioso. ⁸ Bajaraxuata

yapētanetsi mapacueneye. Pajivi naexanae ata Abrahampijinė pemomoxiya-juvėnėjivi, itsiata bajarapajivi Dioso apo taetsi Abrahampijinė pepo pemomojivicuenia. Matapania pajivi jumecovėnėta pacuenia Dioso najumecapanepaeya jumaitis, bajarapajivi jane baja Abrahampijinė pepo pemomojivicuenia tanetsi Dioso. ⁹ Dioso tajėvelia najumecapanepaeya jumaitis Abrahampijinėjavabelia mapacueniaje: “Icatsia caevaicujinae patsianajė. Nexata nijava, Sara, xainaena pexėnatonacueto,” jai Dioso Abrahampijinėjavabelia Isaacpijinėnaxa yabara.

¹⁰ Nexata jane baja xuacujinae Isaacpijinė naexana. Bajaraxuacujinae icatsia hexėa Isaacpijinė baja pepuanacojiobi, Dioso icatsia tajėvelia jumaitis vijasalinainė Isaacpijinė pijava Rebecapijivjavavelia, Rebecapijiva baja pepuayacotaponaponae sapananėbejenexa. ¹¹⁻¹³ Itsa abaxė bajaraponėbeje apo naexanaebeje, pexaniacuene ata abaxė itsa apo exanaebeje, pibisiacuene ata abaxė itsa apo exanaebeje, bajarapamatacabi Dioso tajėvelia jumaitis Rebecapijivjavavelia mapacueniaje: “Panacuetonėyo copiaya cavecuanaexanaena, bajaraponėyo jamatabėcueneevetsiana pejuyapijinė pitorobabiabinexatsi pijajivitonėcuenia,” jai Dioso tajėvelia Rebecapijivjavavelia. Bajarapacuenia Dioso pejumaitisijava Rebecapijivjavavelia najumejėpabeje pacuenia jumaitis Dioso pejumelivaisibaxutota. Rebecapijiva pexėnatobeje yabara Dioso pejumelivaisibaxutota jumaitis mapacueniaje: “Asivanė juyapijinė Jacob, matapijinė Esaú matatoxenetsia,” jai Dioso pejumelivaisibaxutota Dioso pejumaitisijava. Nexata bajaraponėbeje tocopiapatsibeje pacuenia Dioso tajėvelia jumaitis pacuenia Dioso itapetsijitsiatsi juyapijinė. Baitsi Jacob Dioso pijajivitonėnaxa itapetatsi matapijinėvecua. Nexata bajarapacuenia yapētanetsi mapacueneye. Dioso cajena baitapeta pajivi jamatabėitapeta pijajivitonėnaxa. Dioso apo itapetsi bajarapajivi pexaniacuene pexanaejava yabara. Bajarapacuenia Dioso tajėvelia itapeta juyapijinė matapijinėvecua penaexanaevajėnaeyabeje ata cajena.

¹⁴ Pajivi Dioso jitsipa pitapetsinexa, nexata itsa itapeta, bajaraxua yabara vaxaitsi apo bejumaitisitsi mapacueniaje: “Dioso baja pacuenia exana, apo xanepanae,” apo bejaitis vaxaitsi. ¹⁵ Tsipaji cajena Dioso bajayata jumaitis Moiséspijinėjavavelia: “Pajivi jamatabėitaxutotsoniataniji, itaxutotsoniatanaejė,” jai Dioso. ¹⁶ Nexata pajivi Dioso jamatabėitaxutotsoniatane, itaxutotsoniatane. Nexata itsajivi apo jamatabėjumaitis ata: “Jitsipajė xanė Dioso taneitaxutotsoniataejava,” apo jamatabėjai ata, itsiata Dioso itaxutotsoniatanetsi. Bajarapajivi itsacuenejavayo ata Dioso pejitsipaecuenia apo exanabiabi ata, itsiata Dioso itaxutotsoniatanetsi. ¹⁷ Palivaisi bajayata Dioso jumaitis Egiptonacua pevetsinėjavavelia, bajarapalivaisi Dioso pejumelivaisibaxutota ruca. Jumai tsarucae mapacueniaje: “Xanė catocopatatsi nevetsinexa nijaira. Pinijicuene taexanaejava exanaenaejė paxamė tuatuajėta. Itsiata baitsi jane apo nejumecovėnėtsimė tsane. Nexata daxita nacuapijivi neyapėtaena tasaėncuene,” jai tsarucae Dioso pejumelivaisibaxutota Egiptonacua pevetsinėjavavelia Dioso pejumaitisijava. ¹⁸ Nexata pajivi Dioso jamatabėitaxutotsoniatane, itaxutotsoniatane. Pajivi pijinia Dioso jamatabėjamatabėcuenetajayaexana pejumecovėnėtsiyanivatsi, jamatabėcuenetajayaexana.

¹⁹ Nexata meta Dioso yabara pajumaitisimė tsane: “Bajarapacuenia Dioso jivi itsa jamatabėcuenetajayaexana pejumecovėnėtsiyanivatsi, nexata bajarapajivi Dioso apo benaneconitsia exanae. Tsipaji bajarapajivi apo jumecovėnėtsi Dioso piagamatabėcuenetajaya exanaeaxetsi” pajamė meta tsane Dioso yabara. ²⁰ Tajamonae, pėtsa bajarapacuenia pajumaitisimė. Dioso

yabara cajena bajarapacuenia apo bepajumaitsimë. Tspijaji Dioso pacaexana. Canalito itsa caëjêpaejitsipatsi pecuaicuaijainexa, itsacanalitovecua saicayacuenia faratsi atatsi, pefaratsivatsijavabelia apo jumaiti tspiae: “¿Detsa xuajitsia itsacanalitovecua saicayacuenia nefaratame?” apo jai tspiae pefaratsivatsijavabelia. ²¹ Tspijaji atsananitota canalito pefaratsiva caëjêpatsi canalito pefaratsinexa pacuenia jamatabêfarata. Nexata caëjêpatsi pefaratsinexa copiaya pexaniacanalito bo tuatuajêta itabêtsiaya peetsinexa. Bajaraxuacujinae bajara paatsananitoyajuvênêjavata caëjêpatsi pefaratsinexa itsacanalito, beveliacanalito, pecajayababiabinexa saya.

²² Bajara pijinia pacuenia Dioso baja exana jivijavabelia pacuenia tsitanepanatsi. Ayaicuenia Dioso jamatabêneconitsiaexana daxita pamonaë naneconita bajaraponêjavabelia. Jamatabêtsitajêtanua pesaë bajarapamonaëjavabelia. Itsiata baiti jane abaxê bajayajebi Dioso najamatabêcuenecataita peverebiavijavabelianexa. ²³ Biji rajane pamonaë Dioso jamatabêcapanepa, bajarapamonaë capanepaena. Bajarapacuenia Dioso jamatabêexana vaxaitsi vajanacaitaxutotsoniataevijavaberena, vajanacatsitanajamatabêcuene itajêtsinexa ayajamatabêcuene pexinaëjava. Tspijaji baja cajena vajaraexanaevajênaeya ata, Dioso nacaitapeta vajayajavajinavanapaenexa athêbêtatsia. ²⁴ Vaxaitsi judíoviyajuvênêvitsi. Itsamonae vaxaitsiyajuvênêvi apo judíovi. Itsiata Dioso nacajunata daxitatsi pijajivinxatsi. ²⁵ Dioso pejumelivaisibaxutota, bajayata Oseaspijinê peyaquinaebaxutota, Dioso pejumaitisjava apo judíovi yabara, tajêvelia jumaiti mapacueniaje:

Pamonaë picani apo tajajivi, bajarapamonaë yabara jumaitisinê tsane: “Tajajivi raja mapamonaëje,” janê tsane. Bajarapamonaë picani apo jitsipaenê. Itsiata bajarapamonaë yabara jumaitisinê tsane: “Tajajivi raja mapamonaëje, tasivavi,” janê tsane. ²⁶ Panacuapijivijavabelia picani jumaitisinê tsane: “Paxamê raja apo patajajivimê,” janê tsane picani, itsiata bajarapanacuapijivi bexêa nejumecovênêtsiana. Nexata bajarapanacuapijivi yabara itsamonae jumai tsane: “Mara pamonaëje Dioso piasaëtsaponaponaenê pexije,” jai tsane,

jai Oseaspijinê bajayata peyaquinaebaxutota, pamonaë apo judíovi ata, Dioso pijajivi pexanaëjavanexatsi yabara.

²⁷ Isaíaspijinê pijinia bajayata tajêvelia judíovi yabara jumaiti mapacueniaje: “Israelpijinê pemomoxi bitso ayabitsaëtöxaneto tsane. Pacuenia manuaenepijitajetaboatsapêrê itsi, bajara itsane. Itsiata baiti jane bajarapamonaëyajuvênêvi, caejiviyobeje saya, Dioso capanepaenatsi. ²⁸ Daxita pamonaë naneconita Diosojavabelia, bajarapamonaë naxanitsiayo Dioso naneconitsiaexanaena,” jai Isaíaspijinê peyaquinaebaxutota. ²⁹ Itsabaxutota pijinia Isaíaspijinê peyaquinaebaxutota, icatsia jumaiti mapacueniaje:

Dioso raja ángelevi ayabitsaëtöxaneto penamatacaitorobinê. Bajaraponê Dioso itsa apo nacaitaxutotsoniataë tspiae, nexata daxitatsi vaxaitsi, Israelpijinê pemomoxitsi, nacaverebiabijitsipa. Nacaverebiabijitsipa pacuenia bajayata verebiabatsi daxita Sodoma tomarapijivimi, Gomorra tomarapijivimi ata,

jai Isaíaspijinê peyaquinaebaxutota.

Pacuenia judíovi apo jumecovênêtsi pexanialivaisi jivi pecapanepaelivaisinxatsi yabara pelivaisi

³⁰ Vaxaitsi yapêtanetsi mapacuenieje. Apo judíovi picani apo jumecovênêtsi ata Dioso aneconijibia petanexatsi, itsiata Dioso aneconijibia tanetsi, pejumecovênêtsixae Jesucristo pesivatêpaejavatsi pibisiacuenie pexanaeneconi

yabara. ³¹ Itsiata baitsi jane judíovi jamatabêcuenenavêxaniabiaya jumai tsabiabi: “Itsa jumecovênêtavanapaenatsi Dioso Moiséspijinêta penajumecopatsilivaisi, nexata Dioso aneconijibia nacataena,” jai tsabiabi. Itsiata bajaraxua yabara Dioso aneconijibia apo taetsi. Tsipaji apo caêjêpaetsi pejumecovênêtsicapaneapaenexa bajarapalivaisi. ³² Apo caêjêpaetsi Dioso aneconijibia petaelexatsi. Tsipaji judíovi apo jumecovênêtsi Jesucristo pesivatêpaejavatsi pibisiacuene pexanaeconi yabara. Biji rajane jamatabêcuenenavêxaniabiaya jumai tsabiabi. “Itsa jumecovênêtavanapaenatsi Dioso Moiséspijinêta penajumecopatsilivaisi, nexata Dioso aneconijibia nacataena,” jai tsabiabi. Bajaraxuata judíovi Diosovecua naxuabijianavanapa, Cristo Dioso athêbêvetsica pitorobijavatsitsica, apo pejumecovênêtsixae. Caranata saya anaepanabiaba bajarapalivaisi yabara. ³³ Dioso tajêvelia Cristo yabara pejumaitsijava, Dioso pejumelivaisibaxutota jumaiti mapacueniaje:

Puenetanutsianajê Jerusalén tomarata ponê itorobijitsianê jivi pecapanepaenexa. Bajaraponê itsamonae apo jumecovênêtsitsi tsane. Nexata bajarapamonae nevecuanaxuabiana. Itsiata baitsi jane pajivi jumecovênêtsiana bajaraponê, bajarapajivi apo nacueratsi tsane,

jai tajêvelia Dioso pejumelivaisibaxutota Cristo jivi pesivatêpaejavanexa pibisiacuene pexanaeconi yabara.

10

¹ Tajamonae, jitsipajê bitso tajamatabêêthêtovetsina judíovi Dioso pecapanepaenexatsi. Bajaraxuata tovajêtabiabajê Diosojavabelia. ² Judíovi picani Dioso ayaicuenia bitso jamatabêtonacuenebabiaba Dioso pesivabarêyanexatsi. Itsiata baitsi jane apo yapêtae pacuenia Dioso tojitsipatsi petoexanavanaapaenexa. Judíovi saya jamatabêcuenenavêxaniababiaba. ³ Bajarapamonae apo yapêtae pacuenia exanaejitsia Dioso aneconijibia petaelexatsi. Jamatabêcuenenavêxaniabiaya jumai tsabiabi: “Itsa jumecovênêtavanapaenatsi Dioso Moiséspijinêta penajumecopatsilivaisi, nexata Dioso aneconijibia nacataena,” jai tsabiabi bajarapamonae. Apo jumecovênêtsi pacuenia Dioso itorobatsi pexanavanapaenexa Dioso aneconijibia petaelexatsi. ⁴ Pajivi jumecovênêta Cristo pesivatêpaejavatsi pibisiacuene pexanaeconi yabara, bajarapajivi Dioso baja aneconijibia tanetsi. Bajaraxuata pematatsênêa baja apo benajamatabêxainae pejumecovênêtsinexa icatsia Dioso Moiséspijinêta penajumecopatsilivaisi Dioso aneconijibia petaelexatsi.

⁵ Pamonae jitsipa Dioso aneconijibia petaelexatsi pejumecovênêtsixae Dioso Moiséspijinêta penajumecopatsilivaisi, bajarapamonae yabara Moiséspijinê bajayata peyaquinaelivaisi jumaiti mapacueniaje: “Pajivi jumecovênêtsicapaneapaena daxita pacuenia bajarapalivaisita itorobatsi, bajarapajivi matapania Dioso aneconijibia taenatsi,” jai Moiséspijinê bajayata peyaquinaelivaisita. ⁶ Nexata baja pamonae jumecovênêta Cristo pesivatêpaejavatsi pibisiacuene pexanaeconi yabara, bajarapamonae pejumeitavetsinexatsi, Dioso jumaiti mapacueniaje: “Pêtsa pajamatabêjumaitisimê: ‘¿Jipatsa meta athêbêabetsia ponaena mapanacuayabetsicaje pebarêpatsinexatsica vajanacayavenonaenênexa?’ pajamatabêjamê pêtsa. ⁷ Pêtsa pajamatabêjumaitisimêna: ‘¿Jipatsa meta ponaena, itsabereca petêpaevi jinavanapa, piasaêyaexanaenexa petêpaevivecua vajanacayavenonaenênexa?’ pajamatabêjamê pêtsa, jai Dioso jivi pejumeitavetsijava. Nexata itsajivi ata apo

bejamatabējumaitsi bajarapacuenia. Tsipaji baja Cristo athëbëvetsica patsica vajanacasivatëpaenexa mapanacuataje. Petëpaeucujinae ata baja icatsia Cristo asaë petëpaejavavecua vajanacacapanepaenexa. ⁸ Dioso aneonijibia vajanacataejavanexa yabara, Dioso pejumelivaisibaxutota jumaitsi mapacueniaje: “Dioso rabaja pejumelivaisi panatoxainame. Bajara palivaisi yabara panabarëcuaicuaijamë tsabiabi. Panejamatabëëthëtota ata baja bajarapalivaisi yabara panajamatabëxainabiabame,” jai Dioso pejumelivaisibaxutota. Bajarapalivaisibeje nalivaisijëpabeje palivaisi paxanë pacatsipaebatsi panejumecovënëtsinexa Cristo papecasivatëpaejava pibisiacuene paneexanaeneconi yabara. ⁹ Itsamatacabi Diosojavabelia papecacapanepaevi tsane itsa paexanavanapaeneme mapacueniaje. Panavajunupaebabiabare itsamonaejavabelia panejumecovënëtsijava Jesús Dioso pexënatocuene. Pajumecovënërenua panejamatabëëthëtovavavetsina Jesús petëpaeucujinae icatsia Dioso piasaëyaexanaejavatsi. ¹⁰ Tsipaji baja jivi pejamatabëëthëtota jumecovënëta Cristo pesivatëpaejavatsi pibisiacuene pexanaeneconi yabara. Bajaraxuata Dioso baja aneonijibia tanetsi. Jivi pecuibovojotota navajunupaebabiaba pejumecovënëtsijava Cristo pesivatëpaejavatsi pibisiacuene pexanaeneconi yabara. Nexata bajarapacuenia nayapëtane bajarapajivi Dioso pepacuene pecapanepaejavanaxatsi.

¹¹ Dioso pejumelivaisibaxutota jumaitsi mapacueniaje: “Pajivi jumecovënëtsiana, bajaraponë apo nacueratsi tsane,” jai Dioso pejumelivaisibaxutota Cristo jivi pesivatëpaejavavenexa pibisiacuene pexanaeneconi yabara. ¹² Dioso raja jivi najëpaeya tane. Pacuenia tane judíovi, bajarapacuenia tane apo judíovi ata. Caenë, Dioso, daxita bajarapamonae pijatuxanenë. Ayaicuenia Dioso itaxutotsoniatane daxita pamonaevajëta bajaraponëjavabelia. ¹³ Cristojavabelia jivi penavajëtsijavanexa, Dioso pejumelivaisibaxutota jumaitsi mapacueniaje: “Pajivi pepo petuxanenëjavabelia navajëta pecapanepaenexatsi, bajarapajivi capanepaenatsi,” jai Dioso pejumelivaisibaxutota. ¹⁴ Itsiata acuenebi itsajivi ata penavajëtsinexa Cristojavabelia itsa abaxë apo jumecovënëtsi Cristo pesivatëpaejavatsi pibisiacuene pexanaeneconi yabara. Itsajivi ata acuenebi pejumecovënëtsinexa Cristo pelivaisi itsa abaxë apo yapëtae Cristo pelivaisi. Itsajivi ata acuenebi peyapëtaenexa Cristo pelivaisi itsa abaxë apo tsipaebitsi. ¹⁵ Dioso pijajivi itsa apo itorobi tsipae daxitajivijava Cristo pelivaisi petsipaebaponaenexa, nexata itsajivi ata apo yapëtae tsipae Cristo pelivaisi. Dioso pejumelivaisi jivi petsipaebaponaevinexa yabara, Dioso pejumelivaisibaxutota jumaitsi mapacueniaje: “¡Pexaniacuene bitso itsa najetarubena pexanialivaisi jivi petsipaebivinexa!” jai.

¹⁶ Pexanialivaisi tsipaebi atatsi, itsiata daxitajivi apo jitsipae pejumecovënëtsinexa pexanialivaisi pecapanepaelivaisinexatsi picani Diosojavabelia. Isaíaspijinë ata, bajayata jivi apo jumecovënëtsitsi. Nexata Isaíaspijinë Diosojavabelia jumaitsi mapacueniaje: “Tajatuxanenë, daxitajivi apo nejumecovënëtsi tatsipaebilivaisi. Caejiviyobeje saya nejumecovënëta,” jai bajayata Isaíaspijinë Diosojavabelia. ¹⁷ Nexata jivi itsa tsipaebatsi Cristo pesivatëpaejavatsi pibisiacuene pexanaeneconi yabara pejumetaexae, jumecovënëta baja.

¹⁸ Judíovi ata baja picani jumetane Cristo pesivatëpaejavatsi pibisiacuene pexanaeneconi yabara. Itsiata judíovi apo jumecovënëtsi. Dioso pejumelivaisibaxutota jumaitsi mapacueniaje:

Dioso pijajivi Dioso pejumelivaisi tsipaebanajetarubena daxitanacuanējāva. Nexata baja Dioso pejumelivaisi yacaējēpa daxitanacuanējāva, jai Dioso pejumelivaisibaxutota.

¹⁹ Judíovi baja picani jumetane Cristo pesivatēpaejavatsi pibisiacue ne pexanae neconi yabara. Itsiata judíovi apo jumecovēnētsi. Moiséspijinē bajayata tajēvelia yaquina judíovi Dioso apo jumecovēnētsijavanexa. Yaquinanua apo judíovi juya Dioso jumecovēnētsijavanexa. Judíovijavabelia Dioso tajēvelia pejumaisijava, bajayata Moiséspijinē yaquina mapacueniaje:

Itsanacuanēpijivi paxamē bijiaya panaēcotabiabame. Bajarapamonae tajajivi exanaenajē. Nexata bajarapamonae pacuenecaēbianame. Bajarapamonae tajumelivaisi apo jamatabējumeyapētae picani. Itsiata tajajivi exanaenajē. Nexata bajarapamonae pacuenecaēbiaanaepanaename, jai Moiséspijinē bajayata peyaquinaebaxutota Dioso tajēvelia pejumaisijava judíovijavabelia.

²⁰ Isaíaspijinē ata bajayata ajumejunavijibia jumaitsi Dioso tajēvelia pejumaisijava. Apo judíovi yabara Dioso pejumaisijava, Isaíaspijinē jumaitsi mapacueniaje:

“Pamonae picani apo nejitsipae, apo nejumecovēnētsinua, bajarapamonae itsiata itsamatacabi nejumecovēnētsiana. Nexata baja neyapētaena. Bajarapamonae apo nevēnēlivaisiyanijobi ata, najamatabēcueneitajētsianajē bajarapamonaejavabelia,” jai Dioso tajēvelia,

jai bajayata Isaíaspijinē.

Bajaraxuata nayapētane tajēvelia Dioso penajamatabēcueneveretsijava pecapanepaenexa apo judíovi ata. ²¹ Biji rajane judíovi yabara Dioso pejumaisijava, Isaíaspijinē bajayata jumaitsi mapacueniaje: “Daxitamatacabi junatababajā pamonae apo nejumecovēnētsi. Bajarapamonae apo exanae taitorobicuenia,” jai bajayata Isaíaspijinē Dioso pejumaisijava judíovi yabara. Nexata nayapētane mapacuenije. Judíovi junatsi atatsi Dioso, itsiata apo jumecovēnētsi Dioso pecapanepaenexatsi.

11

Pacuenia judíovi, Israel nacuapijiviyajuvēnēvi, Dioso capanepaejitsiatsi yabara pelivaisi

¹ ¿Dioso tsabaja pijajivi judíovi, Israel nacuapijivi, daxita Dioso navecuaxuaba? Jume raja. Apo navecuaxuabi. Xanē ata raja judíonēnē, Israel nacuapijinēnē. Tajasalinainē cajena Abrahampijinē. Benjāminpijinē ata pemomoxiyajuvēnēnē. ² Bajayata baja cajena vajavajēnaeyami, Dioso pijajivinexa itapeta judíovi, Israel nacuapijivi. Nexata Dioso apo navecuaxuabi tsane bajarapamonae. Payapētaneme rabaja pacuenia Dioso pejumelivaisibaxutota jumaitsi profeta Elíaspijinē yabara. Profeta Elíaspijinē pina pevajētsijavata Diosojavabelia, neconitsiaya jumaitsi Israel nacuapijivi yabara mapacueniaje: ³ “Tajatuxanēnē, mapamonaeje, Israel nacuapijivi, catobepona daxita pecajumelivaisipaebivimi profetavi. Toxobabianua altarvēnējavanē, itsajota tajuitabiaba dajubivi pecarajutsinexa ofrendacuenia. Nexata baja xanē caenēnē, nijajivitonēnē, nacopatajē. Xanē ata baja jamatabēnebeyaxuaba,” jai pina profeta Elíaspijinē Diosojavabelia Israel nacuapijivi yabara. ⁴ Itsiata baitsi jane Dioso pina jumaitsi profeta Elíaspijinējavabelia mapacueniaje:

“Apo caenēmē raja. Xainajē baja tajajivi, siete mil ponēbeje, Israel nacuapijiviyajuvēnēvi. Bajarapamonae xaniavaetia nejumecovēnētavanapa. Pematabacabēta apo tonubenaenē penavajēcaenexa Baalvēnēnē, jumapectaetaeya pexanaenētsi, pitabarata,” jai pina Dioso bajayata profeta Elíaspijinējavabelia. ⁵ Bajara pijinia itsi maparucae ataje. Caejiviyobeje pijinia Dioso itapetsitsi pijajivinxaxa pitaxutotsoniataexaetsi. ⁶ Bajarapamonae Dioso pexaniacuene petoexanavanapaejava yabara, apo itapetsitsi. Bajarapamonae Dioso itsa itapetsipatsi ēpexaniacuene Dioso petoexanavanapaejava yabara, nexata saya bajarapamonae Dioso itapetsipatsi ēpexaniacuene petoexanavanapaejava yabara. Nexata bajarapamonae saya Dioso pitaxutotsoniataexaetsi, apo itapetsitsi tsipae.

⁷ Mara pacuenia itsi Israel nacuapijivije, Dioso apo pejumecovēnētsivi. Bajarapamonae apo jumecovēnētsi Dioso pecapanepaejavanaxatsi. Itsi-ata baitsi jane bajarapamonae yajuvēnēvi, caejiviyobeje, Dioso itapetsitsi pijajivinxaxa. Bajarapamonae jumecovēnēta pexaniajailivaisi, Dioso pejumelivaisi, pecapanepaelivaisinexatsi Diosojavabelia. Itsamonae apo jumecovēnētsi bajarapalivaisi. Tsipaji ajamatabēcuenetaja. Apo jumecovēnētsi Dioso pejumelivaisi, pexaniajailivaisi, pecapanepaelivaisinexatsi picani Diosojavabelia. ⁸ Israel nacuapijivi, Dioso apo pejumecovēnētsivi, yabara Dioso pejumelivaisibaxutota jumaitsi mapacueniaje: “Dioso ajamatabēcuenetajayaexanatsi. Bajaraxuata bajarapamonae lebabibi ata Dioso pejumelivaisibaxuto, apo jumecovēnētsi. Bajara itsi bajarapamonae mapamatabijavaberena ataje,” jai Dioso pejumelivaisibaxutota Israel nacuapijivi, Dioso apo pejumecovēnētsivi, yabara. ⁹ Israel nacuapijivi, Dioso apo pejumecovēnētsivi, yabara bajayata Davidpijinē ata jumaitsi mapacueniaje: Israel nacuapijivi fiesta itsa exanabiaba, jamatabēcuenenavēxaniabiaya jamatabējumai tsabiabi: “Dioso cajena nacasivabarēya. Bajaraxuata ayaijava vajaxinaejava xainatsi,” jamatabējai tsabiabi. Itsi-ata baitsi jane pebarēyjavata, itsamatabi jemata tocopiapatsianatsi pijaneconi yabara Dioso jane baja pebaneconitsiaexanaejavanaxatsi. ¹⁰ Bajarapamonae apo yapētae pijaneconi peyjavajinavanapaejava daxitamatabi. Pacuenia bitso piarevejava pecaponaevi, nabēxētsumsiaya bacapona, bajara itsi bajarapamonae pejamatabēthētota pijaneconi yabara. Bitso yanajamatabēxaina pijaneconi,

jai bajayata Davidpijinē Israel nacuapijivi, Dioso apo pejumecovēnētsivi, yabara.

Pacuenia apo judíovi ata Dioso capanepaejitsiatsi yabara pelivaisi

¹¹ Judíovi apo jumecovēnētsi ata Cristo pesivatēpaejavatsi pecapanepaenexatsi Diosojavabelia, itsiata abaxē Dioso apo navecuaxuabi judíovi daxitamatabijavabelianexa. Judíovi apo pejumecovēnētsixae Cristo pelivaisi, juya apo judíovi Dioso tocopatatsi pejumecovēnētsinexa Cristo pelivaisi pecapanepaenexatsi Diosojavabelia. Nexata apo judíovi ata pejumecovēnētsijava Cristo pelivaisi, judíovi itsa taena, nexata judíovi ata jumecovēnētsiana Cristo pelivaisi pecapanepaenexatsi Diosojavabelia. ¹² Judíovi apo jumecovēnētsi Cristo pelivaisi pecapanepaenexatsi Diosojavabelia. Bajaraxuata juya Dioso tocopata apo judíovi ata pejumecovēnētsinexa Cristo pelivaisi pecapanepaenexatsi Diosojavabelia. Nexata apo judíovi ata bajarapacuenia caxitajaraba baja pexaniacuene, judíovi apo pejumecovēnētsixae Cristo pelivaisi. Bajarapacuenia apo judíovi ata aeconoxae baja toxanepanatsi Dioso petocopatsixaetsi pejumecovēnētsinexa Cristo pelivaisi. Itsiata baitsi jane

pacuenia apo judíovi ata aeconoxae toxanepanatsi, bajaraxua matatoxenetsia bitso pexaniacuene caxitarabiana pamatacabi judíovi ayaibitsaëto jane baja jumecovênëtsiana Cristo pelivaisi.

¹³ Aeconoxae baja palivaisi pacatsipaebatsi, bajarapalivaisi paxamë apo pajudíovinxamë. Jitsipajë paneyapëtaenexa Dioso taneitorobicuene. Dioso nitoroba paxamë apo pajudíovimëjavabelia patacatsipaebinexa Dioso pejumelivaisi. Nexata jamatabëjumaitsinë: “Dioso cajena netocopata ayaijamatabëcuene pexinaelivaisi jivi tatsipaebaponaenexa,” jamatabëjanë.

¹⁴ Bajarapacuenia Dioso pejumelivaisi pacatsipaebaponatsi tsipaji jitsipajë tajaviriavi ata, judíovi, Dioso petoexanaenexatsi pacuenia paxamë ata Dioso pacatoexana papecacapanepaenexa. Nexata meta bajarapacuenia judíoviyajuvënëvi ata jumecovênëtsiana Cristo pelivaisi pecapanepaenexatsi Diosojavabelia. ¹⁵ Judíoviyajuvënëvi Cristo navecuaitaveta. Nexata juya pamonaë apo judíovi, Dioso barajamatabëcuenexanepanaeyatane. Pamatacabi judíovi jumecovênëtsiana Cristo pelivaisi, Dioso pitsianatsi pijajivinxaxa. Bajaraxua bitso pinijicuene tsane. Judíovi aeconoxae bepetëpaevi Dioso tanetsi apo jumecovênëtsixae Cristo pelivaisi. Nexata pamatacabi judíovi jumecovênëtsiana Cristo pelivaisi, Dioso taenatsi petëpaecujinaë bepiasaëyaexanaevitsi. ¹⁶ Panbë jivi ofrendacuenia itsa rajuta Diosojavabelia, copiaya pexanaepanbë barajuta. Nexata bajarapapanmatabëta cotocaevi pexanaepan ata, apo rajutsi ata Diosojavabelia, Dioso pijapancuenia tane. Naejava ata petabunepe jivi ofrendacuenia itsa rajuta Diosojavabelia, nexata daxita pemaxërananë ata Dioso pijamaxërananëcuenia tane. Bajara pijinia itsi judíovi ata. Judíovi pijasalinaivimi Dioso itsa itapeta pijajivinxaxa, nexata judíovi pemomoxi ata Dioso pijajivicuenia tane.

¹⁷ Dioso tane judíovi, beolivonaemaxërananë. Olivonaenë pexinaenë, pepo olivonaemaxërananë caucuba juya saicayaviria olivonaemaxëranaxi perubinexa bajarapacovëta. Nexata pepo olivonaë ënëtuatujëprijimera junua bajarapamaxëranaxi ënëtuatujëjava pejuvarubenaenexa pepo olivonaemaxëranajavaberena. Bajara pijinia pacuenia Dioso pacatoexana paxamë apo pajudíovimë. Judíovi apo pejumecovênëtsixae Cristo pelivaisi, paxamë juya, apo pajudíovimë, Dioso papijajivimë pacaexana. ¹⁸ “Judíovivecua Dioso papijajivinë paneexana. Nexata paayaijamatabëcuenevinë judíovivecua,” pajamë pëtsa. Tsipaji payapëtaneme mapacuatebe. Naejava, petabunepe pejamatabëcueneta, xaniavaetsia nuca. Pemaxërana pejamatabëcueneta, xaniavaetsia apo nucae. Bajara pijinia paxamë ata paitsimë. Apo pacaëjëpae paneyavenonaenexa judíovijavabelia. Biji rajane judíovi bepacayavenonaë. Tsipaji judíovi apo jumecovênëtsi Cristo pelivaisi. Nexata judíovi apo pejumecovênëtsixae, Cristo pelivaisi juya paxamë Dioso pacaitaxutotsoniatane. Nexata pacatocopata Cristo pelivaisi panejumecovênëtsinexa Dioso papecacapanepaenexa panijaneconivecua.

¹⁹ Nexata meta pajumaitsimë: “Pacuenia olivonaenë pexinaenë, olivonaemaxërananë caucuba, bajarapacovëta juya perubinexa itsaviriaolivonaemaxëranaxi, bajara pijinia itsi Dioso. Dioso navecuatsata judíovi juya apo judíovitsi vajanacaitapetsinexa pijajivinxaxatsi,” pajamë meta. ²⁰ Pacuenia olivonaenë pexinaenë, pibisiamaxërana caucuta, bajara pijinia itsi Dioso. Dioso navecuatsata judíovi apo pejumecovênëtsixae Cristo pelivaisi. Pacuenia olivonaenë pexinaenë, pecaucutsimaxërana pecovëta juya itsaviriaolivonaemaxërana ruta, bajara pijinia pacuenia paxamë ata judíovi pejamatabëcuenemi, pacapita Dioso papijajivinxamë panejumecovênëtsixae Cristo pelivaisi. Bajaraxuata pëtsa panataneme

paayaijamatabëcuenevimë. Biji rajane xania. Cujunaviaya Dioso pajinavanapare panevecuajopaeyaniva Dioso panejumecovënëtsijava. ²¹ Pacuenia olivonaenë pexainaenë, pibisiamaxërana bacaucuta, bajara pijinia pacuenia Dioso judíovi navecuatsata apo pejumecovënëtsixae Cristo pelivaisi. Judíovi picani Dioso itapeta pijajivinexa. Nexata judíovi Cristo pelivaisi apo pejumecovënëtsixae, Dioso navecuatsata pitapetsivimi ata. Nexata bajarapacuenia paxamë ata Dioso pacanavecuatsatsipa panevajënaeyabelia itsa apo pajumecovënëttavanapaemë tsipae Cristo pelivaisi. ²² Bajaraxuata pacanaëjère mapacueneye. Dioso bitso papecaitaxutotsoniataexae, pacatocopata Cristo pelivaisi panejumecovënëtsinexa. Pacanaëjèrenua mapacueneye. Apo pejumecovënëtsixae Cristo pelivaisi, Dioso navecuatsata pitapetsivimi ata. Xaniajai cajena. Dioso naneconitsiaexanapona daxita pamonaë apo jumecovënëtsi Cristo pelivaisi. Itsiata paxamëjavabelia Dioso pacaitaxutotsoniatane. Nexata panevajënaeyabelia tsiteca Dioso pajumecovënëttavanapare. Itsa pacopabijitsipame Dioso panejumecovënëtsijava, nexata pacuenia olivonaenë pexainaenë, pibisiamaxërana bacaucuta pexuabinexa, bajara pijinia pacuenia paxamë ata Dioso pacanavecuaxuabijitsipa. ²³ Judíovi Dioso pejumeaebijava itsa copatsiana, nexata jumecovënëtsiana Cristo pesivatëpaejavatsi pecapanepaenexatsi Diosojavabelia. Nexata bajarapamonae ata Dioso pijajivi tsane. Nexata pacuenia olivonaenë pexainaenë, pecaucutsimaxëranami icatsia caevëarena pecovëta ruta, bajara pijinia pacuenia Dioso icatsia pitsianatsi judíovi Dioso pijajivinexa. ²⁴ Pacuenia saicayaviria olivonaemaxërana ruta pepo olivonaemaxëranacovëta, bajarapacovëta pejuvarucaenexa, bajara pijinia pacuenia Dioso pacapita paxamë apo pajudíovi atamë Dioso papijajivinexamë. Paxamë apo pajudíoviriavi atamë, itsiata Dioso pacapita papijajivinexamë. Judíovi biji toyapëxanepanatsi icatsia pepitsinexatsi Dioso pijajivinexa. Tspaji bajarapamonae pijasalinaivimi ata Dioso itapeta pijajivinexa.

Pacuenia Dioso capanepaejitsia judíovi, Israel nacuapijivi, yabara pelivaisi

²⁵ Tajamonae, panejamatabëjumaitsiyaniva mapacueniaje: “Vaxaitsi bitso vajayapëtaevi,” panejamatabëjaiyaniva, jitsipajë paneyapëtaenexa mapalivaisije, Dioso muetsia pexainabuatsilivaisimi. Judíoviyajuvënëvi baja cajena ajamatabëcuenetaja. Nexata bajarapamonae apo jumecovënëtsi Cristo pelivaisi. Nexata ayaibitsaëttoxaneto apo judíovi, itsa jumecovënëtsiana Cristo pelivaisi, matapania jane baja judíovi ata jumecovënëtsiana Cristo pelivaisi. ²⁶ Nexata daxita pamonaë judíovi, itsamatacabi Dioso capanepaenatsi pacuenia baja Dioso pejumelivaisibaxutota tajëvelia jumaitsi. Dioso pejumelivaisibaxutota tajëvelia jumaitsi mapacueniaje:

Jerusalén tomaraverena najetarucaena daxitajivi pecapanepaenënexa. Bajaraponë daxita judíovi, pamonaë Israelpijinë pemomoxi, vecuaajibiaexanaena pibisiacuene pexanaeconimi. ²⁷ Itsa bajaraponë vecuaajibiaexanaena pibisiacuene pexanaeconimi, nexata jane baja toexanaenajë pacuenia bajayata tajëvelia najumecapanepaeya jumaitsinë bajarapamonae pijasalinaivimijavabelia,

jai tajëvelia Dioso pejumelivaisibaxutota Dioso pejumaitsijava judíovi pecapanepaejavanexa Cristo pejamatabëcueneta.

²⁸ Judíoviyajuvënëvi Dioso pijavajabitsaë naexana. Tspaji apo jumecovënëtsi Cristo pelivaisi pecapanepaenexatsi Diosojavabelia. Itsiata abaxë

tsiteca Dioso asiva judíovi. Tspaji bajayata copiata Dioso itapeta bajaramonae pijasalinaivimi pijajivinexa. ²⁹ Xua Dioso rajuta judíovijavabelia, apo vecuacanaviatsi. Pamonae pijinia Dioso junata pijajivinexa, apo navecuaxuabi tsane. Nexata itsamatacabi bajarapamonae Dioso athëbëatsia yajavaeacena daxitamatacabijavabelianexa. ³⁰ Paxamë apo pajudíovimë, pamatacabi abaxë Cristo pelivaisi apo pajumecovënëtsimë, Dioso picani apo papijajivimë. Judíovi apo pejumecovënëtsixae Cristo pelivaisi, nexata apo pajudíovi atamë, Dioso pacaitaxutotsoniatane. Papijajivimë baja pacaexana. ³¹ Bajara pijinia pacuenia itsane judíovi ata. Maparucaejë abaxë judíovi apo jumecovënëtsi Cristo pelivaisi. Itsiata itsamatacabijavabelia judíovi ata Dioso itaxutotsoniataenatsi pacuenia paxamë ata Dioso pacaitaxutotsoniatane. ³² Dioso tocopata daxitajivi pijacuata penatojitsipacuena pexanavanapaenexa Dioso pitorobicueniatsi apo pejumecovënëtsixae. Nexata daxitajivi naneconita Diosojavabelia. Bajarapacuenia Dioso tocopata itsamatacabijavabelia icatsia pitaxutotsoniataenexa bajarapamonae.

³³ ¡Dioso baja cajena pitaxutotsoniataenë daxitajivi pecapanepaenexa! ¡Dioso cajena bitso peyapëtaenë! ¡Daxitalivaisi bitso pejumeyapëtaenënu! Pacuenia Dioso najamatabëcuenevereta pexanaenexa, pacuenia ata baja exanapona, vaxaitsi bajaraxua Dioso apo jamatabëcueneypëtaetsi. ³⁴ Dioso pejumelivaisibaxutota jumaiti mapacueniaje. “Vaxaitsi apo jamatabëcueneypëtaetsi xua najamatabëxaina Dioso. Apo nacacajëpaenu vajamuxujiobinexa ata. ³⁵ Dioso cajena itsajivijavabelia ata apo amoneyabi. Nexata xua Dioso rajuta itsajivijavabelia, apo rajutsi piamoneyabimatamo,” jai Dioso pejumelivaisibaxutota Dioso yabara. ³⁶ Tspaji cajena Dioso pijacuata exana daxitacuene. Evetanua daxitacuene. Daxitacuene baja cajena Dioso pijajava. Nexata Diosojavabelia vaxaitsi bejumaititsi tsabiabi mapacueniaje: “¡Diosomë, bitso ayajamatabëcuenenëmë!” bejaiti tsabiabi daxitamatacabijavabelianexa. Bajara itsi tsane.

12

Pacuenia Dioso pejumecovënëtsinë benajamatabëcuenerajuta Diosojavabelia pijajivitonënxaxa daxitamatacabijavabelianexa yabara pelivaisi

¹ Tajamonae, payapëtaneme rabaja Dioso ayaicuenia vajanacaitaxutotsoniataejava. Bajaraxuata pacaitorobatsi mapacueniaje. Pacuenia ofrenda barajutatsi Diosojavabelia Dioso pijajavanexa, bajara pijinia pacuenia panajamatabëcuenerajure Diosojavabelia, pacuenia Dioso pacaitorobapona paneexanabiabinexa daxitamatacabijavabelianexa. Nexata ëDioso pijacuene panetonacunenbijava, pacaasaëmëre tsavanapae papecasivabarëyanexa Dioso. Bajarapacuenia Diosojavabelia panajamatabëcuenerajure panejamatabëëthëtojavavetsina panetsitana-jamatabëcueneitajëtsinexa pepacuene panejitsipaejava Dioso. ² Pëtsa paexanavanapame pacuenia exanavanapa Dioso apo pejumecovënëtsivi. Biji rajane panajamatabëcueneopare Diosojavabelia papecarajutsinexa pejanajamatabëcuene. Nexata bajarapacuenia payapëtaename xua Dioso pacatojitsipa paneexanabiabinexa. Xua Dioso pacatojitsipa paneexanabiabinexa, bajaraxua bitso pexaniacuene. Bajaraxua itsa paexanabiabianame, Dioso pacasivabarëya tsane.

³ Dioso raja taneitaxutotsoniataexae, nitoroba tatonacuenebinexa. Bajaraxuata mapacuenia pacajumaititsije. Pacuenia baja aeconoxae pajamatabëcueneitsimë tsavanapae, bajarapajamatabëcuene matatoxenetsia pëtsa panataneme paayajamatabëcuenevimë bitso. Biji rajane pacaajivimë

canacujitsia, xuavajëto Dioso pacajamatabëcuene caëjëpaeyaexanapona paneexanabiabinexa panenajamatabëcuenecopatsixae Diosojavabelia, bajara-pacuenia saya baja panataema. ⁴ Jivi itsa naexana, yajavanaexana peper-abëto, caeperabëto reca. Itsiata bajarapaperabëtopijivi saicaya xainapona pevënëanë. Caevito canacujitsia saicaya xaina pexanabiabijanexa. ⁵ Bajara pijinia pacuenia vaxaitsi ata itsitsi, Jesucristojavabelia vajanajamatabëcuenecopatsivi. Ayaibitsaëto atatsi, itsiata caenë Cristo beperabëtotsi. Nexata namataenetsia nayavenonabiabianatsi.

⁶ Caejivitsi canacujitsia, pacuenia Dioso nacatojitsipa, saicaya nacajamatabëcuene caëjëpaeyaexanapona vajaexanabiabinexa. Nexata Dioso betonacuenebavanapatsi pacuenia nacajamatabëcuene caëjëpaeyaexanapona. Dioso itsa nacajamatabëcuene caëjëpaeyaexana jivi vajatsipaebabiabinexa Dioso pejumelivaisi, nexata betsipaeabiabatsi xaniavaetsia pacuenia nacajamatabëcuene caëjëpaeyaexana. ⁷ Itsa pijinia Dioso nacajamatabëcuene caëjëpaeyaexana vajayavenonabiabinexa itsamonae Dioso pejumecovënëtsivi, nexata xaniavaetsia beyavenonabiabatsi Dioso pejumecovënëtsivi. Pajivi pijinia Dioso jamatabëcuene caëjëpaeyaexanatsi Dioso pejumelivaisi jivi petsipaeabiabinexa, xaniavaetsia betsipaeabiaba daxita pejamatabëcuenesaëta. ⁸ Pajivi pijinia Dioso jamatabëcuene caëjëpaeyaexanatsi itsamonae pemuxujobabiabinexa pejamatabëcueneasaëyaexanaenexa Dioso pejumecovënëtsijava, bajarapajivi bemuxujobabiaba xaniavaetsia bajarapamonaejavabelia. Pajivi pijinia rajutabiaba pexainaeyajuvënëjjava bepejiobivijavabelia, berajutabiaba itsajamatabëcuene xainaenejeva. Pajivi pijinia itsacueneyava evetsiaexanatsi, bevetaponapona xaniavaetsia. Pajivi pijinia yavenonabiaba piavitanevi, pamonaë ata bitso najamatabëxaina pijamonaejiviyo itsa totëpatsi, beyavenonabiaba barëyaya.

Pacuenia Jesucristo pijajivi bexanavanapa yabara pelivaisi

⁹ Xaniavaetsia namataenetsia panaasivamëre tsavanapae. Paitoyamëre pibisiacuene pexanaejava. Pacaasaëmëre tsavanapae ëpexaniacuene paneexanaejava. ¹⁰ Pacuenia naeacënapijivi bitso nasiva, bajarapacuenia panaasivamëre tsavanapae Cristo papijajivixamë. Itsamonae Dioso pejumecovënëtsivi, patojitsipare itsamonae petanexatsi ayaijamatabëcuenevi paxamë matatoxenetsia. Namataenetsia panayaiyataeyabiabare.

¹¹ Pacaasaëmëre tsavanapae Dioso pijacuene panetonacuenebijava. Pëtsa pafaetabimë. Daxita panejamatabëcuenesaëta patonacuenebabiabare Dioso pijacuene.

¹² Pasivabarëyamëre tsavanapae. Tspijaji rabaja payapëtaneme itsamat-acabi panexinaejavanexa matakabi apo pevereverecaejava. Itsamonae itsa pacabejiobiaexana Cristo papijajivixamë, bajayajebi ata, pëtsa pacopatame. Daxitamatakabi pavajëtabiabare Diosojavabelia pacopatsinejevamë.

¹³ Itsajota Dioso pejumecovënëtsivi namatavenona, payavenonabiabare. Pamonaë pacasivaxaina panijaboyaberena, xaniavaetsia pacopiapitabiabare.

¹⁴ Pamonaë pibisiacuene pacaexana, patovajëtabiabare Diosojavabelia Dioso peyavenonaenexatsi. Patovajëtabiabare pexaniacuene. Pëtsa patovajëtabiabame pibisiacuene juya pibisiacuene pexanaenexatsi.

¹⁵ Pamonaë barëya petocopiapatsixaetsi pexaniacuene, bajarapamonae paxamë ata pajamatabëcuenyavenonaeya barëyamëre. Pamonaë pijinia nua

petocopiapatsixaetsi apo pejiitsipaecuene, bajarapamonae paxamē ata pajamatabēcuene yavenonaeyanuema.

¹⁶ Najamatabēcuenejēpaeya pajinavanapare. Pētsa panataneme paayaijamatabēcuenevimē. Pamonae beevelijamatabēcuenevi ata, xaniavaetsia pataema. Xaniavaetsia payajavajinavanaparena. “Xanē bitso tayapētaenē itsamonae matatoxenetsia,” pajamatabējamē pētsa.

¹⁷ Itsajivi pibisiacuene itsa pacaexana, pētsa juya pibisiacuene panamatamoexaname. Paexanabiabare ēpexaniacuene, xua jivi tsitaxanepanatsi.

¹⁸ Xua Dioso pacajamatabēcuene caējēpaeyaexana paneexanaenexa, bajaraxua paexanabiabare xaniavaetsia panejinavanapaenexa, daxitajivijavabelia itsacue paexanaejevamē. ¹⁹ Tajamonae bitso patacaasivavi, itsamonae pibisiacuene itsa pacaexana, pētsa panamatamotame. Pacopare saya bajarapamonae Dioso penaneconitsiaexanaenexatsi. Tsipaji Dioso pejumait-sijava, Dioso pejumelivaisibaxutota jumaitsi mapacueniaje: “Pamonae pibisiacuene exana itsamonaejavabelia, xanē naneconitsiaexanaenajē,” jai Dioso pejumelivaisibaxutota. ²⁰ Dioso pejumelivaisibaxutota itsabaxutota pijinia jumaitsi mapacueniaje: “Nijavajabitsaēnē itsa pijani, rajure pexaejava. Mera itsa jitsipa, rajure mera piapaenexa. Bajarapacuenia itsa exaname, nexata caurataena nijavajabitsaēnē ata,” jai Dioso pejumelivaisibaxutota. ²¹ Itsajivi pibisiacuene itsa pacaexana, pētsa pibisiacuene panamatamoexaname. Tsipaji bajarapacuenia panajamatabēcuene bijianaejit-sipame. Biji rajane pajivi pibisiacuene pacaexana, pexaniacuene patoexanare. Nexata bajarapacuenia pibisiacuene papecaexanaejivi ata, pajamatabēcuene caeviaexanaename.

13

¹ Daxita pamonae gobierno pijajivi, papecyanacuaevetsivi, pacuenia bajarapamonae pacaitoroba, xaniavaetsia pajumecovēnētabiabare. Tsipaji bajarapamonae, caenē canacujitsia, Dioso pejamatabēcueneta pacayanacuaeveta. Daxita pamonae nacua pevetsivi, pacaeveta Dioso petocopatsixaetsi. ² Nexata pajivi apo jumecovēnētsi pacuenia nacuaevetsinē itorobatsi, bajarapajivi Dioso ata apo jumecovēnētsi. Pamonae apo jumecovēnētsi, nexata bajarapamonae Dioso naneconitsiaexanaenatsi. ³ Pamonae pexaniacuene exanavanapa, nacuaevetsivi apo cujanavi. Pamonae pijinia pibisiacuene exanavanapa, nacuaevetsivi cujanava. Paxamē nexata pexaniacuene paexanavanapare ajunavijibia panejinavanapaenexa. Nexata pacasivabarēya tsane papecyanacuaevetsivi. ⁴ Bajarapamonae Dioso pejamatabēcueneta nacuenebavanapa. Nexata pacaevetavanapa pibisiacuenevecua. Itsiata pibisiacuene itsa paexaname, papecyanacuaevetsivi bepacunavame. Tsipaji bajarapamonae Dioso tocopatatsi papecananeconitsiaexanaenexa. Dioso tocopatatsi bajarapamonae penaneconitsiaexanaenexa daxita pamonae pibisiacuene pexanaevi. ⁵ Bajaraxuata bejumecovēnētatsi pamonae vajanacayanacuaevetsivi. Apo jumecovēnētsi saya vajanacananeconitsiaexanaeyaniva. Jume baja cajena. Biji rajane jumecovēnētatsi tsipaji Dioso pijajivixaetsi, vajajamatabēcueneta yapētanetsi pacuenia hexanavanapatsi. ⁶ Bajaraxuata nacuaevetsivijavabelia impuestomatamo pamatamotabiabame panematamotsipalatata penaevetsinexa. Nacuaevetsivi, Dioso pejamatabēcueneta, tocopatatsi nacua pevetsinexa. Nexata nacua ēpevetsicuene nacueneba.

⁷ Pacuenia pacaejivimē canacujitsia bepatoexaname gobierno pejamatabēcueneta penacuenebivijavabelia, bajarapacuenia patoexanabiabare.

Bajarapamonaeyajuvēnēvi itsa caetuata impuestomatamo, xuavajēto pamoneyabame, pamatamotabiabare. Pamonaē pijinia peyaiyataevitsi, payaiyataeyabiabare. Pamonaē peyaiyataevitsi, bajarapamonaē pexaniacuenia pabaracuaicuajimēre tsabiabi. ⁸ Pētsa pamoneyabame itsajivi ata. Biji rajane pacuenia Cristo pacaasiva, bajarapacuenia paxamē ata panaasivamēre tsavanapae. Pajivi asiva itsajivi ata pacuenia nasiva pijacuata, bajarapajivi jumecovēnētsicapanepa Dioso Moiséspijinēta penajumecopatsilivaisi. ⁹ Dioso Moiséspijinēta penajumecopatsilivaisi, itaveta mapacueniaje: “Pētsa jaitame itsava nijavavecua. Pētsa beyaxuabame jivitonē. Pētsa nacobetoxotame. Pētsa najumetsēnētsiaya baracuaicuajimē itsajivi. Pētsa cobecaēbame itsajivi pexinaejava,” jai Dioso Moiséspijinēta penajumecopatsilivaisi. Nexata paxamē itsa pajumecovēnētsicapanepaejitsipame daxita mapalivaisije, itsalivaisiyo ata yajava, pajumecovēnētsicapanepaejitsipame mapejumaitsilivaisiyoje: “Asivamēre itsajivi ata pacuenia xamē nijacuata nasivamē,” pejailivaisiyo. ¹⁰ Tsipaji pajivi asiva itsajivi ata, pibisiacuene apo exanaē bajarapajivijavabelia. Bajaraxuata itsa asivatsi itsamonaē ata, nexata jumecovēnētsicapanepatsi daxita pacuenia Dioso nacaitoroba.

¹¹ Bajarapacuenia itsamonaē ata biasivatsi. Tsipaji baja yapētanetsi bitso baja imoxoyo pevajēnaē icatsia Jesucristo pepatsijavanexatsica. Vajanacapanepaenēnexa, najetarucaena vajanacacapanepaenexa mapanacuavecuaje. Pamatacabi taxuxuabatsi Jesucristo vajajumecovēnētsijava, nacatsita tajēvajēnaē abaxē itajara Jesucristo icatsia pepatsijavanexatsica. Aeconoxae baja bitso imoxoyo pevajēnaē icatsia Jesucristo pepatsijavanexatsica. ¹² Meravi abaxē aitaquiri. Itsa baja icatsia matabijitsia, pitaquirijavami baja ajibi tsaponaē. Bajara pijinia pacuenia imoxoyo baja pevajēnaē pecopiarucaenexa mapanacuapijivi pibisiacuene pexanaejava yabara pijamatabēcuenaitaquirijavami. Tsipaji baja imoxoyo pevajēnaē icatsia Jesucristo pepatsijavanexatsica. Bajaraxuata bexanavanapatsi epexaniacuene Dioso pejitsipaacuenia. ¹³ Aeconoxae baja vajavajēnaeyabelia, jinavanapae-natsi xaniavaetsia vajayapētaexae pexaniajailivaisi. Apo ponae tsanetsi piaitajibivijava. Apo ponae tsanetsi fiestajava ata, itsajota pibisiacuene exanavanapa. Apo exanaē tsanetsi pibisiacuene vajavitota. Apo exanaē tsanetsi itsacueniejava ata, xua pibisiacuene. Nabijataeya apo najumeanaenotsi tsanetsi. Itsamonaē ata apo cuenecaēbi tsanetsinua. ¹⁴ Biji rajane vajētabiabianatsi vajatuxanenē Jesucristojavabelia vajanacayavanonabibinexa. Vajatuxanenē Jesucristo nacajamatabēcuenesaēyaexanaena vajatoinavanapaxenexa vajanacatojitsipaacuenia. Apo sivanajamatabēxinaē tsanetsi pacuenia vajacuata natojitsipatsi pibisiacuene vajaexanaenexa.

14

Pacuenia Pablo itaveta Roma tomarapijivi Dioso penajuajumecovēnētsivi itsa janitane pexaejava jumapecataeya pexanaenēnējavabelia peyajuvēnērajutsivi, “Pibisiacuene exana mapajivije,” pejaiyaniva, yabara pelivaisi

¹ Pajivi jumecovēnētsi ata Jesucristo pesivatēpaejavatsi pijaneconi yabara, itsiata abaxē itsa apo ajamatabēcuenesaē pejumecovēnētsijava, bajarapajivi ata xaniavaetsia pacopiapire panenacaeuatsibojavaberena itsa najunua. Bajarapajivi pijaneconi yabara Jesucristo pesivatēpaejavatsi pejumecovēnētsicujinae, copata baja pexaeyabiabijavami jumapecataeya

pejanaenēanējavabelia perajutsiyajuvēnēvi. Nexata baja cujanava pexaejava, bepibisiacuene pexanaejava petaexae. Pētsa pajumeanaenotame bajarapitsijivjavabelia panexaeyaexanaenexa icatsia bajarapayajuvēnēvi. ² Itsamonae Cristojavabelia penajamatabēcuenecopatsivi, jamatabējumaitsi: “Daxitacuene xanepana vaxaenexa,” jamatabējai. Itsamonae pijinia abaxē jamatabējumaitsi: “Dioso nacananeconitsiaexanaejitsipa jumapecataeya pexanaenēanējavabelia perajutsiyajuvēnēvi itsa xanetsi,” jamatabējai. Nexata ēpeubijava xane jumapecataeya pexanaenēanējavabelia perajutsiyajuvēnēvi pexaeyaniva. ³ Nexata pajivi xane jumapecataeya pexanaenēanējavabelia perajutsiyajuvēnēvi, pētsa bijiya tane pajivi apo xae jumapecataeya pexanaenēanējavabelia perajutsiyajuvēnēvi. Pajivi pijinia apo xae jumapecataeya pexanaenēanējavabelia perajutsiyajuvēnēvi, pētsa neconitsiya jumaitsi jivjavabelia: “Pibisiacuene exana pajivi xane jumapecataeya pexanaenēanējavabelia perajutsiyajuvēnēvi,” jai pētsa. Tsipaji Cristojavabelia penajamatabēcuenecopatsijivi daxitacuene itaxutojema xae ata, itsiata Dioso tanetsi aneconijibia. Nexata bajarapajivi Dioso capanepaenatsi. ⁴ Dioso apo pacatocopatsi Dioso pijajivitonē neconitsiya jivjavabelia panejumaitsinexa mapacueniaje: “Xua exana bajaraponē, pibisiacuene. Nexata Dioso naneconitsiaexanaenatsi,” panejainexa. Dioso pijajivitonē xaniavaetsia Dioso itsa tonacueneba, xaniavaetsia apo tonacuenebi atanua, caenē, Dioso, toxanepanatsi, pacuenia jamatabējumaitsi, pejumaitsinexa pijajivitonējavabelia. Dioso cajena caējēpatsi peyavenonaenexa pijajivi pejitsipaecuenia xaniavaetsia petojinavanapaenexatsi pesivabarēyanexa.

⁵ Itsamonae Dioso pejumecovēnētsivi yaiyataeyabiaba matababi. Nexata itsamatabcianēvecua caematababi yaiyataeyabiaba. Itsamonae pijinia najēpaeya tane daxitamatabcianē. Pamonaē yaiyataeyabiaba caematababi itsamatabcianēvecua, bajarapamonae xaniavaetsia beyapētane pajamatabēcuenelivaisi yabara yaiyataeyabiaba caematababi. Pamonaē ata pijinia najēpaeya tane daxitamatabcianē, xaniavaetsia beyapētane pajamatabēcuenelivaisi yabara najēpaeya tane daxitamatabcianē. ⁶ Pajivi nacueraeveta itsamatababi, bajarapajivi nacueraeveta peyayataenexa Dioso. Pajivi pijinia apo nacueraevetsi bajarapamatababi, apo nacueraevetsi tsipaji jamatabēexana pacuenia Dioso itorobatsi. Pajivi pijinia xane jumapecataeya pexanaenēanējavabelia perajutsiyajuvēnēvi, bajarapajivi xane peyayataenexa Dioso. Tsipaji jamatabējumaitsi: “Dioso cajena netocopata daxitacuene taxaenexa,” jamatabējai. Nexata pexaniajamatabēcuene rajutabiaba Diosojavabelia. Pajivi pijinia apo xae jumapecataeya pexanaenēanējavabelia perajutsiyajuvēnēvi, bajarapajivi apo xae peyayataenexa Dioso. Tsipaji jamatabējumaitsi: “Mapavije apo xanē tananeconitsyaniva Diosojavabelia,” jamatabējai. Nexata pexaniajamatabēcuene rajutabiaba Diosojavabelia ēpeubijava pexaeyabiabixae.

⁷ Itsajivi ata vaxaitsiyajuvēnējivi, Dioso pejumecovēnētsijivi, apo ponaponae ēpijacuata penatojitsipaecuenia pexanaponaponanexa. Biji rajane exanaponapona pacuenia Cristo tojitsipatsi. Petēpaematababinexa ata yabara, apo jamatabējumaitsi: “Tēpaenajē pamatababi natojitsipajē tatēpaejava,” apo jamatabējai. ⁸ Vaxaitsi abaxē vajaasaētsavanapaepato, tojinavanapatsi pacuenia vajatuxanenē nacatojitsipa. Itsiata baitsi jane itsamatababi, tēpaenatsi. Tsipaji Dioso nacatojitsipaena vajatēpaenexa. Aeconoxae abaxē vajaasaētsavanapaevi, vajatuxanenē pijajivitsi tsavanapae. Vajatēpaecujinae ata tsane, tsiteca vajatuxanenē pijajivitsi tsavanapae tsane. ⁹ Cristo baja cajena nacasivatēpa vajatuxanenē vajaexanaenexa. Nexata icatsia Cristo asaē

tsaponaponae petēpaecujinae. Bajaraxuata Cristo daxitajivi pijatuxanenē. Piasaētsavanapaevi, petēpaevi ata, daxita pamonae najamatabēcuenecopata bajaraponējavabelia, Cristo cajena pijatuxanenē.

¹⁰ Bajaraxuata nexata jumapecataeya pexanaenēanējavabelia perajutsiyajuvēnēvi paxamē panijabanānē pexaejava yabara, baracuaicuajiaiva apo bepajumaitsimē mapacueniaje: “Maponēje pibisiacuene exana. Nexata Dioso naneconitsiaexanaenatsi,” apo bepajamē. Bijiaya ata apo bepataemē bajaraponē. Tspipaji cajena itsamatacabi daxitatsi vaxaitsi Cristo pitabarata nubenaenatsi, caejivitsi canacujitsia, vajanavajunupaebaponaenexa daxita pacuenia exanavanapatsi mapanacuataje. ¹¹ Bajaraxua yabara Dioso pejumelivaisibaxutota tajēvelia jumaitsi mapacueniaje:

Dioso tajēvelia jumaitsi: “Xanē daxitamatacabijavabelianexa tasaētsaponaponae. Nexata tajumaitsijume xaniajanē. Itsamatacabi daxitajivi taitabarata pematabacabēta netonubianaena taneyaiyataexae. Daxitajivi nevajunupaebiana Diosonēcuenena.”

jai Dioso pejumelivaisibaxutota mapacueniaje Dioso tajēvelia pejumaitsi-
java daxitajivi yabara.

¹² Nexata vaxaitsi itsamatacabi, caejivitsi canacujitsia, navajunupaebaponaenatsi Diosojavabelia daxita pacuenia exanavanapatsi mapanacuataje.

Pacuenia Pablo itaveta Roma tomarapijivi Dioso penajuajumecovēnētsivi Diosovecua pejopaeyaexanaeyaniva petsitaexanaejava pejamatabēcueneta yabara pelivaisi

¹³ Itsamatacabi caejivitsi canacujitsia nubenaenatsi Cristo pitabarata vajanavajunupaebaponaenexa pacuenia exanavanapatsi mapanacuataje. Bajaraxuata itsanē vajabanānē pexanaejava yabara, apo bebaracuaicuajiaitsi pibisiacuenia. Biji rajane bejamatabējumaitsitsi mapacueniaje: “Apo tsitaexanaenē tsane itsacuenejavayo ata, xua yabara itsajivi, Dioso pejumecovēnētsijivi, jamatabēcuenebijianaejitsipatsi,” bejamatabējaitsi.

¹⁴ Najamatabēcuenecopatajē xaniavaetsia vajatuxanenē Jesucristojavabelia. Nexata yapētāniji Dioso tanetocopatsijava taxaenexa xua picāni cujunavajē taxaejava Jesucristojavabelia tanajamatabēcuenecopatsivajēnaeya. Itsiata meta itsanē Dioso pejumecovēnētsinē bajaraxua itsa xane, jamatabējumaitsi tspipae: “Dioso apo netocopatsi taxaenexa bajaraxua. Itsa xaejitsipajē, naneconitsipajē Diosojavabelia,” jamatabējai tspipae. Nexata apo xae tspipae bajaraxua. ¹⁵ Panijabanānē itsa apo pexaenē jumapecataeya pexanaenēanējavabelia perajutsiyajuvēnēvi, pētsa patsitaxaneme. Tspipaji paxamē itsa patsitaxaejitsipame jumapecataeya pexanaenēanējavabelia perajutsiyajuvēnēvi, panijabanānē bepibisiacuene patsitaexanaejitsipame itsa patsitaxaejitsipame jumapecataeya pexanaenēanējavabelia perajutsiyajuvēnēvi. Nexata jumapecataeya pexanaenēanējavabelia perajutsiyajuvēnēvi, panijabanānē itsa patsitaxaejitsipame, nexata panijabanānē asivaya apo pataemē tspipae. Tspipaji itsa pacajanitaejitsipa panexaejava jumapecataeya pexanaenēanējavabelia perajutsiyajuvēnēvi, nexata bajaraponē ata naxaejitsipa. Nexata Diosojavabelia bepenaneconitsinē nataejitsipa penaxaexae jumapecataeya pexanaenēanējavabelia perajutsiyajuvēnēvi. Panetsitaxaejava pejamatabēcueneta Diosovecua panaxuabiaexanaeyaniva panijabanānē, pētsa patsitaxaneme jumapecataeya pexanaenēanējavabelia perajutsiyajuvēnēvi. Tspipaji rabaja vajatuxanenē Cristo sivatēpa bajaraponē ata penaxuabianiva.

¹⁶ Payapētae atamē, xua picani xanepana paneexanaenexa, itsiata panijabananē itsa cujanava bajaraxua pexanaenexa, pētsa patsitaexaname. Tspaji panijabananē pacataejitsipa pibisiacuene bepeneexanaevi. ¹⁷ Vaxaitsi baja najamatabēcuene copabatsi Cristojavabelia. Nexata jumecovēnētavanapatsi Dioso. Apo nacaitorobi vajanayanijobabiabinexa évajaxaejava yabara, vajaapaejava ata yabara. Biji rajane nacaitoroba xaniavaetsia aneconijibia najamatabēcuenejēpaeya vajajinavanapaenexa. Nacaitorobanua jamatabēcuenebarēyaya vajajinavanapaenexa Espiritu Santo vajanacatsijamatabēcaexae. ¹⁸ Pajivi Dioso pijacuene tonacuenebaponapona, sivajamatabēcuenebarēyatsi Dioso. Jivi ata xaniavaetsia yaiyatanetsi.

¹⁹ Xua Dioso nacayavenona vajajinavanapaenexa najamatabēcuenejēpaeya, bajaraxua exanavanapaenatsi. Xua ata nacayavenona namataenetsia vajanajamatabēcuene asaēyaexanaenexa Diosojavabelia, bajaraxua ata exanavanapaenatsi. ²⁰ Pētsa patsitaxaneme xua panijabananē tane bepitavetsijavatsi pexaeyaniva. Nexata itsa pacajanitaejitsipa panexaejava, bajarapajivi ata naxaejitsipa. Nexata bepenaneconitsinē Diosojavabelia nataejitsipa. Panexaejava pejamatabēcueneta, bajarapajivi Diosovecua pajopaeayaexanaejitsipame. Bajaraxuayaniva pētsa patsitaxaneme xua cujanava panijabananē. Xaniajai rabaja. Daxitacuene rabaja picani xanepana vajaxaenexa. Itsiata pibisiacuene paexanaejitsipame itsa patsitaxaejitsipame xua panijabananē taejitsipa bepibisiacuene paneexanaejava itsa paxaejitsipame. ²¹ Bajaraxuata pētsa paxaneme jumapecataeya pexanaenēanējavabelia perajutsiyajuvēnēvi. Pētsa papamenua pīatanera paneaitajibyaniva. Pētsa paexanamenua itsacuenejava ata, xua pejamatabēcueneta panijabananē pajopaeayaexanaejitsipame Diosovecua. Pētsa patsitaexaname xua panijabananē jamatabēcuene faefaenaeyaexanaejitsipatsi. ²² Itsa baja xaniavaetsia payapētaneme pexanepanaecuene panexaenexa, xua picani pacujunavame panexaejava Jesucristojavabelia panenajamatabēcuene copatsivajēnaeya, saya pamoyamē tsane. Tspaji Dioso yapētane pacuenia panajamatabēxainame bajaraxua yabara. ¡Bitso jamatabēcuenebarēya pajivi pexanabiabijava yabara jamatabējumaitsi: “Dioso pitabarata aneconijibia toponaponajē,” jamatabējai! ²³ Pajivi pijinia jamatabējumaitsi ata: “Apo xanepanae tsipae taxaenexa bajaraxua,” jamatabējai ata, itsiata itsa xaejitsipa, bajarapajivi pibisiacuene natoexanaejitsipa Diosojavabelia. Tspaji pijacuata najamatabēcuenebijianaejitsipa. Daxita pijinia xua yabara vaxaitsi jamatabējumaitsi: “Dioso apo jitsipae vajaexanaenexa bajaraxua,” jamatabējai atatsi, itsiata itsa exanaejitsipatsi bajaraxua, nexata pibisiacuene natoexanaejitsipatsi Diosojavabelia.

15

Pacuenia becanaējētatsi vajabananē vajajamatabēcuene yavenonaenexa yabara pelivaisi

¹ Vaxaitsi ajamatabēcuenesaētsi Dioso vajajumecovēnētsijava. Nexata beyavenonatsi pamonaē abaxē jamatabēcuenefaefaena Dioso pejumecovēnētsijava. Pētsa exanatsi vaxaitsi vajacuata vajanatojitsipaecuēnia. ² Biji rajane caejivatsi canacujitsia becanaējētatsi vajabananē vajajamatabēcuene yavenonaenexa. Xua yabara vajabananē ajamatabēcuenesaējitsia, bajaraxua betoexanavanapatsi vajabananē pejamatabēcuenevitsabinexa Diosojavabelia. ³ Tspaji Cristo ata, ponē

Dioso athëbëvetsica itorobica jivi pecapanepaenexa, abaxë itsa ponapona mapanacuataje, apo exanae pijacuata penatojitsipaecuenia. Biji rajane nacopata pebejiobiaexanaenexatsi pacuenia Dioso tojitsipatsi. Paxa Diosojavabelia Cristo pejumaisijava, Dioso pejumelivaisibaxutota tajëvelia jumaisi mapacueniaje: “Pacuenia picani jivi xamë pibisiacuenia jamatabëcabaracuaicuaijai, xanë nebaracuaicuaijai tsane,” jai tajëvelia Dioso pejumelivaisibaxutota paxa Diosojavabelia Cristo pejumaisijava. ⁴ Palivaisi bajayata yaquina Dioso pejumelivaisibaxutota, bajarapalivaisi vaxaitsi ata nacatocopata vajajumëcovënëtsinexa, vajanacajamatabëcuene yavenonaenexanua. Bajaraxuata bajayajebi nacabejiobiaexanabiabi ata Dioso pijajivixaetsi, itsiata ajamatabëcuenesaëtsi tsavanapae. Tsipaji yapëtanetsi pacuenia Dioso najumecapanepaeya jumaisi bajarapalivaisita vajanacacapanepaenexa. ⁵ Itsacuenëjavaxi yabara bajayajebi itsa nacajamatabëcuenejëtapona, nexata Dioso nacajamatabëcueneyavenonapona. Nacajamatabëcueneasaëyaxanapona bajayajebinexa ata. Pacatovajëtatsi Diosojavabelia Dioso papecayavenonaenexa, najamatabëcuenejëpaeya daxita panejinavanapaenexa Jesucristo papecatojitsipaecuenia. ⁶ Nexata daxita paxamë najamatabëcuenejëpaeya vajatuxanenë Jesucristo paxa Diosojavabelia pajumaisimë tsabiabi tsane: “Diosomë, bitso ayaijamatabëcuenenëmë,” pajamë tsabiabi tsane.

Pacuenia apo judíovi ata pexanialivaisi tsipaebatsi pecapanepaelivaisinexatsi yabara pelivaisi

⁷ Pajudíovinë, apo pajudíovi atamë, najëpaeya Cristo nacapita pijajivinexatsi. Bajara pijinia pacuenia paxamë ata najëpaeya xaniavaetsia namataenetsia panacopiapitabiabianame. Nexata bajarapacuenia itsa paexanabiabianame, daxitajivi Dioso yayataena. Nexata daxitajivi jumai tsabiabi tsane Dioso yabara: “Dioso cajena bitso ayaijamatabëcuenenë. Tsi-paji pijajivi yavenona xaniavaetsia petojinavanapaenexatsi,” jai tsabiabi tsane. ⁸ Mara pacajumaisitsije. Jesucristo athëbëvetsica patsica mapanacuayabetsicaje peyavenonaenexa judíovi. Bajarapacuenia Jesucristo athëbëvetsica patsica petocopiapatsixaetsi pacuenia bajayata Dioso najumecapanepaeya jumaisi judíovi pijasalinaivijavabelia. Nexata bajarapacuenia Dioso pexaniajainëcuene najamatabëcueneitajëta judíovijavabelia. ⁹ Jesucristo athëbëvetsica patsica pecapanepaenexa apo judíovi ata. Nexata apo judíovi ata Jesucristo pejamatabëcueneta: “Diosomë, bitso ayaijamatabëcuenenëmë,” jai tsabiabi tsane Diosojavabelia. Bajarapacuenia apo judíovi ata jumai tsabiabi tsane Diosojavabelia pitaxutotsoniataexaetsi Dioso. Nexata bajaraxua yabara Cristo paxa Diosojavabelia pejumaisijava, Dioso pejumelivaisibaxutota jumaisi mapacueniaje:

Xanë tjamatabëcueneta, daxitanacuanëpivivi: “Diosomë, bitso ayaijamatabëcuenenëmë,” cajai tsabiabi tsane. Catonaxëanabiabiananua vajianë ata, jai Dioso pejumelivaisibaxutota paxa Diosojavabelia Cristo pejumaisijava.

¹⁰ Apo judíovi ata Dioso pijajivi pexanaejavanexatsi yabara, itsabaxutota Dioso pejumelivaisibaxutota jumaisi mapacueniaje:

Apo pajudíovimë, pajamatabëcuenebarëyamëre Dioso pijajivi, judíovi yajava, jai Dioso pejumelivaisibaxutota apo judíovi ata Dioso pijajivi pexanaejavanexatsi yabara.

¹¹ Itsabaxutota pijinia Dioso pejumelivaisibaxutota jumaisi icatsia mapacueniaje:

Paxamē apo pajudíovimē, Diosojavabelia pajumaitsimēre: “Diosomē, bitso ayaijamatabēcuenenēmē,” pajamēre. Paxamē, padaxitamē, itsamonaejavabelia pajumaitsimēre: “Caenē Dioso bitso ayaijamatabēcuenenē,” pajamēre, jai Dioso pejumelivaisibaxutota.

¹² Isaíaspijinē pijinia itsabaxutota tajēvelia yaquina Jesucristo pelivaisi. Jumaitsi mapacueniajē:

Penacuetonēyo naexanaena. Nexata Isaípijinē bepemomonēyocuenia naexanaena. Itsa vitsabiana, Dioso evetsiaexanaenatsi jivi, daxitanacuanēpijivi. Pamonae apo judíovi, jumecovēnētsiana bajaraponē pesivatēpaejavatsi pecapanepaenexatsi pijaneconivecua, jai tajēvelia Isaíaspijinē peyaquinaebaxutota Jesucristo yabara.

¹³ Yapētanetsi Dioso vajanacacapanepaejavanexa Jesucristo pejamatabēcueneta. Nexata pacatovajētatsi Dioso papecajamatabēcuene barēyayaexanaenexa. Pacatovajētatsinua jamatabēcuenexanepanaeya panejinavanapaenexa. Bajarapacuenia Dioso pacajamatabēcueneyavenonaena tsipaji Dioso pajumecovēnētame. Espiritu Santo ata, ponē pacatsijamatabēca, pesaēta panevajēnaeyabelia pacajamatabēcuene asaēyaexanaponaena Dioso papecacapanepaejavabelianexa.

¹⁴ Tajamonae, pacayapētanetsi paxamē papexaniajamatabēcuenevijavamē. Pacayapētanetsinua paxamē bitso paneyapētaejava Cristo papecasivatēpaejava pibisiacuene paneexanaecononi yabara. Pacayapētanetsinua paneyapētaejava xaniavaetsia namataenetsia panenamuxujöbinexa.

¹⁵ Tajamonae, palivaisi baja payapētaneme, bajarapayajuvēnēlivaisi panenajamatabēnapitsinexa, icatsia ajumeurajibia pacatoyaquinatsi mapabaxutotaje. Bajarapacuenia ajumeurajibia pacatoyaquinatsi tsipaji Dioso nitoroba. ¹⁶ Dioso taneitaxutotsoniataexae, bajarapacuenia nitoroba Jesucristo pijajivitonēnexanē Jesucristo pelivaisi tatsipaebabiabinexa apo judíovijava. Nexata apo judíovi tsipaebabiabajē pexanialivaisi, Jesucristo pelivaisi, pecapanepaelivaisinexatsi Diosojavabelia. Espiritu Santo pejamatabēcueneta apo judíovi ata Cristo pijajivi exanatsi. Bajaraxuata Dioso sivabarēyatsi Dioso pepitsinexatsi bajarapamonae, apo judíovi ata.

¹⁷ Jesucristo pijajivitonēxanē, Jesucristo neyavenonabiaba itsa tonacuenebabiabajē. Bajaraxuata barēyanē tatsipaebaponaenexa itsamonaejavabelia Jesucristo taneyavenonabiabijava tatonacuenebinexa Dioso.

¹⁸ Rovialia tsipaebabiabajē ajumeurajibia. Tsipaebabiabajē vajatuxanenē Jesucristo taneyavenonabiabijava tatonacuenebinexa Dioso. Vajatuxanenē Jesucristo neyavenonabiaba tatsipaebabiabinexa apo judíovijavabelia apo judíovi ata pejumecovēnētsinexa Dioso. Nexata apo judíovi itsa jumetane tatsipaebabiabilivaisi, itsa tanenua Dioso pesaēta pinijicuene taexanaponaejavanē, bajarapamonae jumecovēnēta baja Jesucristo pesivatēpaejavatsi pibisiacuene pexanaecononi yabara.

¹⁹ Vajatuxanenē Dioso pesaēta nejamatabēcuenecaējēpaeyaexana pinijicuene taexanaenexa. Espiritu Santo ata pesaēta nejamatabēcueneyavenona. Bajaraxuata apo judíovi tsipaebaponaajē pexanialivaisi, Jesucristo pelivaisi, Diosojavabelia pecapanepaelivaisinexatsi. Tsipaebaponaajē baja bajarapalivaisi Jerusalén tomarajava. Bajaraxuacujinae tsipaebaponaajē daxitanacuanējava. Tajēnacujavabelia ata, Ilírico nacujavabelia, tsipaebaponaajē. ²⁰ Itsa tsipaebaponaajē pexanialivaisi, Jesucristo pelivaisi, jitsipajē tatsipaebaponaenexa itsaxuayo abaxē jivi apo vēnēlivaisitae Cristo. Apo jitsipaenē tatsipaebaponaejava itsaxuayo baja tavajēnaeya

itsamonae tsipaebapona. ²¹ Bajarapacuenia apo judíovi itsa tsipaebaponajé Jesucristo pelivaisi, copiapata jane baja pacuenia baja cajena Dioso pejumelivaisibaxutota tajèvevia jumaitsi tatsipaebaponaejavanexa yabara.

Mapamatacabitaje apo judíovijava Jesucristo pelivaisi tatsipaebaponaejavanexa yabara, Dioso pejumelivaisibaxutota tajèvevia jumaitsi mapacueniaje:

Pamonae abaxé apo vênêlivaisitae, ponê athêbêvetsica Dioso itorobijitsiatsica jivi pecapanepaenexa, bajarapamonae bajaraponê pelivaisi tsipaebianatsi. Nexata bajarapamonae jumecovênêtsiana ponê pelivaisi tsipaebianatsi,

jai tajèvevia Dioso pejumelivaisibaxutota Dioso pitorobinêtsitsica pelivaisi apo judíovijava mapamatacabitaje tatsipaebaponaejavanexa yabara.

Pacuenia picani Pablo jamatabêponabiaba Roma tomarabelia yabara pelivaisi

²² Bajayajebi picani bitso jamatabêpacataeyabiabatsi. Itsiata apo necuenecaêjêpae taponaeenexa paxamêjavabelia daxitanacuanêjava Dioso pejumelivaisi tatsipaebanajetarucaexae. ²³ Aeconoxae baja veretajé tanacuenebijava mapanacuajavaje. Nexata jane baja ponaenajé paxamêjavabelia.

Tsipaji picani bajayajebi jamatabêpacataeyabiabatsi. ²⁴ Pamatacabi ponaenajé España nacuyabelia, patsianajé copiaya paxamêjavata patacataenexa. Itsa baja nataenatsi, bitso jamatabêcuenebarêya tsavanapae tsanetsi. Bajaraxuacujinae jitsipajé pataneyavenonaenexamê

tajanamutonexa taponaeenexa jane baja España nacuyabelia. ²⁵ Bajara masaya pamatacabitaje ponaenajé Jerusalén tomarabelia ofrenda tatocaponaenexa Dioso jumecovênêtsivi. ²⁶ Dioso jumecovênêtsivi, Macedonia nacuapijivi, Acaya nacuapijivi ata, ofrenda baja toexana. Bajarapaofrenda toexana petoitobinexa Dioso jumecovênêtsivi, pamonae bepejiobivi, Jerusalén tomarata pejinavanapaevi. ²⁷ Macedonia nacuapijivi, Acaya nacuapijivi ata, apo judíovi.

Itsiata tsitanepanatsi bajarapacuenia ofrenda petoexanaenexa peyavenonaenexa juya judíovijavabelia, Jerusalén tomarapijivi. Tsipaji judíovi copiaya yapêtane pexanialivaisi pecapanepaelivaisinexatsi Diosojavabelia. Nexata judíovi pejamatabêcueneta, pamonae apo judíovi ata, yapêtane baja pecapanepaelivaisinexatsi Diosojavabelia.

Bajaraxuata pamonae apo judíovi beyavenona juya judíovijavabelia. Judíoviyajuvênêvi aeconoxae bitso namatavenona peyavenonaenexatsi mapanacuata penamatavenonaejavaxi yabara. ²⁸ Copiaya tocalianê tsane mapaofrendaje Jerusalén tomarapijivijavabelia. Nexata bajaraxuacujinae itsa ponaenajé España nacuyabelia, copiaya patsianajé paxamêjavata. ²⁹ Itsa patsianajé paxamêjavabelia, orijibia pacatsipaebianatsi pexanialivaisi, Cristo pelivaisi, bitso panejamatabêcuenebarêyanexa.

³⁰ Tajamonae, pajumecovênêtame vajatuxanenê Jesucristo. Paneasivamênu Espiritu Santo pejamatabêcueneta papecajamatabêcueneitorobixae pataniasivanexamê. Bajaraxuata pexaniacuene pacavajêtatsi. Itsa pavajêtame Diosojavabelia, xanê ata asaêyata panetovajêtsianame, pacuenia tajacuata natovajêtabiabajê. ³¹ Panetovajêtsianame Diosojavabelia taneyavenonaenexa taneitsacueniabianiva Judea nacuapijivi, Dioso apo jumecovênêtsivi. Panetovajêtsianamenua Dioso jumecovênêtsivi, Jerusalén tomarapijivi, tanevecuapitsinexa xaniavaetsia paofrenda tocaponaejitsianê. Pamonae apo judíovi pejebipalataxae, belia

bajarapaofrenda apo nevecuapitsi tsipae bajarapamonae judíovi. ³² Panetovajëtsianamenua, itsa Dioso jitsipa, barëyaya tapatsinexa paxamëjavabelia. Panetovajëtsianamenua tanejamatabëcuene asaëyaexanaenexa Diosojavabelia itsa ponaponajë paxamëjavata. ³³ Xanë pacatovajëtabiatsi Diosojavabelia papecayajavaponaponaenexa Dioso. Dioso cajena nacayavenabiaba jamatabëcuenebarëyaya vajajinavanapaenexa. Bajara itsi tsane.

16

Pacuenia Pablo jamatabënajinalia peyapëtaevitsi, Roma tomarapijivi, yabara pelivaisi

¹ Payavenonaename vajabanava Febe, pova poneajitsia paxamëjavabelia. Bajarapova yavenonabiaba Dioso pejumecovënëtsivi, Cencrea tomarapijivi. ² Pacopiapitsiname xaniavaetsia bajarapova vajatuxanenë Jesucristo pejamatabëcueneta, pacuenia vaxaitsi copiapitabiabatsi Dioso vajanajuajumecovënëtsivi. Xua namatavenona bajarapova, payavenonaename. Tsipaji bajarapova yavenonabiaba ayaiabitsaëto Dioso pejumecovënëtsivi. Xanë ata neyavenonabiaba.

³ Nebajacobiana Prisca. Prisca pamona ata, Aquila, nebajacobiana. Bajarapajivibeje tayajavanacuenebïjivibeje vajatuxanenë Jesucristo pijacuenë. ⁴ Bajarapajivibeje toyai atatsibeje petëpaejavanexabeje picani, necapanepabeje tatëpaejavaminexavecua. Nexata jumaitsinë: “Pexaniacuene baja cajena bitso panetoexanamebeje,” janë bajarapajivibejejavabelia. Itsiata ëxanë bajarapacuenia apo jumaitsinë. Daxita pamonaë apo judíovi, Dioso pejumecovënëtsivi, bajarapamonae ata, bajarapacuenia jumaitsitsibeje tanecapanepaexaëbeje. ⁵ Pamonaë Dioso pejumecovënëtsivi, pamonaë nacaetuatabiaba Priscabeje Aquilabeje pijabofa, bajarapamonae ata nebajacobiana. Nebajacobiananua tasivanë Epeneto. Bajaraponë daxita Asiavënë nacuapijivivecua copiaya najamatabëcuenecopata Jesucristojavabelia. ⁶ Nebajacobiananua María, pova bitso tonacuenebabiaba Dioso pijacuenë paxamë tuatuajëta. ⁷ Nebajacobiananua tajanacuapijinëbeje, Andrónicobeje Juniasvënënebeje. Bajayata bajaraponëbeje panenajuajeba penaneconitsivi pejebabiabibota. Bajaraponëbeje yayiyataeya baracuaicuaijaittsibeje pevëna apóstolevi ata. Xanë ata tanajamatabëcuenecopatsivajënaeya, bajaraponëbeje najamatabëcuenecopatabeje Cristojavabelia.

⁸ Nebajacobiananua Ampliato. Bitso tasivanë. Tsipaji bajaraponë ata Cristojavabelia najamatabëcuenecopata. ⁹ Nebajacobiananua Urbano. Bajaraponë ata tonacuenebaponapona vajatuxanenë Jesucristo pijacuenë pacuenia vaxaitsi tonacuenebavanapatsi. Nebajacobiananua Estaquis, bitso tasivanë. ¹⁰ Nebajacobiananua Apeles, ponë picani dovathi pejamatabëcueneta jamatabëcuenejëtatsi Cristo pelivaisi pejumecovënëtsijava yabara. Itsiata apo copatsi pejumecovënëtsijava Cristo pelivaisi. Nebajacobiananua Aristóbulo pijamonae. ¹¹ Nebajacobiananua tajanacuapijinë Herodión. Nebajacobiananua Narciso pijamonae, pamonaë penajamatabëcopatsivi Cristojavabelia. ¹² Nebajacobiananua Trifenabeje Trifosabeje, povabeje tonacuenebabiaba Dioso pijacuenë. Nebajacobiananua vajaasivava Pérsida, pova bitso tonacuenebabiaba Dioso pijacuenë. ¹³ Nebajacobiananua Rufo, ponë bitso xaniavaetsia jumecovënëta vajatuxanenë. Bajaraponë pena ata nebajacobiana. Bajarapova bepexënatonë netaeyabiaba. ¹⁴ Nebajacobiananua Asíncrito, Flegonte ata,

Hermas ata, Patrobas ata, Hermes ata, itsamonae ata, pamonaē najinavanapa bajarapamonaejavata. ¹⁵ Nebajacobiananua Filólogo, Julia ata, Nereo ata, Nereo pejuyapijiva ata, Olimpás ata, daxita itsamonae ata, Dioso pejumecovēñetsivi, pamonaē najinavanapa bajarapamonaejavata.

¹⁶ Paxamē ata Dioso panejumecovēñetsixae, xaniavaetsia namataenetsia bitso nasivaya panabajacobabiabare. Daxita pina Dioso pejumecovēñetsivi majotaje pejinavanapaevi pacabajacobalia.

¹⁷ Tajamonae, pacatsipaebatsi itsalivaisi. Penajumetsēñetsilivaisi petsipaebaponaeivi, panayajivitaenane papecayamaxēitojorobianiva. Bajarapamonae namataenetsia pacanajumeanaenotsiaexanaena najamatabēcuenejēpaeya panejinavanapaeyaniva panenavecuansanaenaxa. Palivaisi baja paxamē pajumecovēñetame, bajarapalivaisivecua saicayalivaisi bajarapamonae tsipaebapona. Panavecuatsare bajarapamonae.

¹⁸ Bajarapamonae apo jamatabēexanae pacuenia jitsipa vajatuxanenē Jesucristo. Biji rajane saya jamatabēexana bajarapamonae pijacuata penatojitsipaecuenia. Bajarapamonae jivi tsipaebapona bepexaniajailivaisi itajara. Itsiata baitsi jane bajarapamonae saya jamatabēyamaxēitojoroba pamonaē abaxē xaniavaetsia apo jumeyapētae pexaniajailivaisi.

¹⁹ Daxitajivi paxamē pacavēñēlivaisitane xaniavaetsia panejumecovēñetsijava Dioso. Bajaraxuata pacasivabarēyatsi. Pacatojitsipatsi paneyapētaenexa bitso ēpexaniaeuene paneexanaenaxa. Pētsa panacopatame itsajivi ata papecayamaxēitojorobinexa pibisiacuene paneexanaenaxa. ²⁰ Dioso baja cajena vajanacayavenonaenē najamatabēcuenejēpaeya vajajinavanapaenexa, itsajivi ata vajanacayamaxēitojorobianiva penajumetsēñetsilivaisita. Nexata Dioso bepija pacayavenonaena panejamatabēcueneamoneyabinexa dovathi. Pacatovajētabiabatsi Diosojavabelia vajatuxanenē Jesucristo papecayavenonabiabinexa.

²¹ Pabajacobianame pina Timoteo, Dioso patatonajuanacuenebinēbeje. Pabajacobianamenua pina tajanacuapijivi Lucio, Jasón ata, Sosípater ata.

²² Xanē, Tercionē, mapabaxutotaje Pablo pijume tajumeyaquinaponenē. Xanē ata pacajamatabēnajimatsi. Tsipaji Jesucristojavabelia vajanajamatabēcuenecopatsivi.

²³ Pabajacobianame pina Gayo. Naponaponajē Gayo pijabota. Gayo tocopatabiaba daxita Dioso pejumecovēñetsivi penacaetutabiabinexa Gayo pijabota. Pabajacobianamenua pina Erasto, ponē evetabiaba palata, Corinto tomarapijipalata. Pabajacobianamenua pina vajanabanē Cuarto.

²⁴ Pacatovajētabiabatsi Diosojavabelia daxita paxamē vajatuxanenē Jesucristo papecayavenonabiabinexa. Bajara itsi tsane.

Pacuenia cotocaevipijilivaisita Pablo jumaitsi yabara pelivaisi

²⁵ Vaxaitsi Dioso yabara jumaitsi tsabiabi: “Dioso cajena bitso ayaijamatabēcuenenē,” jaitsi tsabiabi. Dioso, daxitamatacabijavabelianexa peponaponenē, caējēpatsi papecajamatabēcuene asaēyaexanaenexa pejumelivaisita. Bajarapalivaisi pexanialivaisi, Jesucristo pelivaisi, jivi peganepaelivaisinexatsi Diosojavabelia. Bajarapalivaisi jivi tsipaebaponajē. Bajarapalivaisi bajayajebi picani Dioso muetsia xainabuata. Dioso nacua pexanaejavaveliacujinae, muetsia Dioso xainabuata Jesucristo pelivaisi. ²⁶ Bajarapalivaisi bajayata Diosojumelivaisipaebivi profetavi tajēvelia yapētane baja cajena. Nexata bajarapalivaisi profetavi yaquina. Nexata bajarapalivaisi mapamatacabitaje Dioso jane baja nacayapētaeyaexana. Nexata Dioso pijajivi itorobapona daxitanacuanēpivijivajava petsipaebinexa Jesucristo

pelivaisi. Bajarapacuenia Dioso pijajivi itorobapona daxitanacuanëpijivi ata pejumecovënëtsinexa Jesucristo pelivaisi.

²⁷ ¡Caenë rabaja Dioso daxitacuene peyapëtaenë! Bjaraxuata daxitamatacabijavabelianexa vaxaitsi vajatuxanenë Jesucristo pejamatabëcueneta Diosojavabelia jumaitsitsi tsabiabi: “¡Diosomë, bitso ayaijamatabëcuenenëmë!” jaitsi tsabiabi. Bajara itsi tsane.

Mapabaxutoje San Pablo copiaya toyaquina Corinto tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Corinto tomarapijivijavabelia, yabara pelivaisi

¹ Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi pexanialivaisi tatsipaebaponaenexa daxitanacuanëjava. Vajabananë Sóstenes neyavenona mapalivaisije patacatoyaquinaejava paxamëjavabelia. ² Mapabaxutoje patacatoyaquinatsibeje Dioso panejumecovënëtsivi, paCorinto tomarapijivimë. Dioso baja papijajivimë Jesucristo pejamatabëcueneta aneconijibia Dioso papecataexae. Dioso pacajunata papijajivinxamë xaniavaetsia panetojinavanapaenexa. Pacayajavajunata baja cajena daxita Dioso pejumecovënëtsivi, itsanacuanëjava pejinavanapaevi, pamona navajëcabiaba Jesucristojavabelia. Vajatuxanenë Jesucristo rabaja bajarapamonae ata pijatuxanenë. ³ Patatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Corinto tomarapijivi Cristo pijajivixae, Dioso yavenonabiabatsi yabara pelivaisi

⁴ “Xanepana rabaja pacuenia yavenonabiabame bajarapamonae Jesucristo pijajivixae,” janë tsabiabi Diosojavabelia tavajëtabiabijavata paxamë yabara. ⁵ Jesucristo papijajivixamë, daxitacuene yabara Dioso pacajamatabëcueneyavenonabiaba. Pacayavenonabiabanua xaniavaetsia jivi panetsipaebinxae Dioso pejumelivaisi. Pacajumeyapëtaeyaxananua pepo pexaniyajilivaisi. ⁶ Xua yabara pacatsipaebabiabatsi Cristo papecajamatabëcueneyavenonabiabinxae, baja rajane patatocopiapata. Bajarapacuenia papecatocopiapatsixae, nexata baja pajamatabëcuenesaëmë tsavanapae panejumecovënëtsijjava bajarapalivaisi. ⁷ Nexata abaxë paepatojebi pacopiaevetavanapame vajatuxanenë Jesucristo icatsia pepatsijavanexatsica, Dioso pacaçajëpaeyaexanabiaba panetoexanavanapaenexa daxita pacuene Dioso pataçajitsipa. ⁸ Dioso cajena pacayavenonaponaena paneajamatabëcuenesaënexa Dioso panejumecovënëtsijjava daxitamatacabijavabelianexa. Nexata pamatacabi vajatuxanenë Jesucristo icatsia patsianica, toacuenebi tsanetsi itsajivi ata papecaneconitsinexa. ⁹ Dioso cajena bajarapacuenia patatoexanaena. Tspaji pacuenia Dioso najumecapanepaeya jumai tsabiabi pexanaenexa, exanabiaba. Dioso pacajunata pexënato, vajatuxanenë Jesucristo, papijajivinxamë.

Pacuenia Dioso pejumecovënëtsivi navecuanatsanapona apo panajamatabëcuenejëpaexae yabara pelivaisi

¹⁰ Tajamonae, pacaitorobatsi vajatuxanenë papijajivixamë, najamatabëcuenejëpaeya panejinavanapaenexa. Pëtsa panavecuanatsanaeyajoneponame itsajavabelia. Biji rajane najamatabëcuenejëpaeya pajinavanapare. Najamatabëcuenejëpaeya xaniavaetsia panajamatabëcxainare caelivaisi. ¹¹ Mapacuenia patacatoyaquinatsije tspaji Cloëvënëva pijajivi netsipaeba. Apo panajamatabëcuenejëpaemë pina. Daxitatsi baja cajena caenë vajatuxanenë Jesucristo pijajivitsi. Paxamë tuatuajëta

pina itsamonae nabijataeya namataenetsia najumeanaenotabiaba. ¹² Itsamonae pina xanë yabara jumai tsabiabi: “Xanë raja saicaya Pablo pijajivitonënë,” jai pina tsabiabi. Itsamonae pina jumai tsabiabi: “Xanë raja saicaya Apolos pijajivitonënë,” jai pina tsabiabi. Itsamonae pina jumai tsabiabi: “Xanë raja saicaya Pedro pijajivitonënë,” jai pina tsabiabi. Itsamonae pina jumai tsabiabi: “Xanë raja saicaya Cristo pijajivitonënë,” jai pina tsabiabi. ¹³ Bajarapacuenia paxamëyajuvënëvi apo bejumaitsi tsabiabi. Tspaji bajarapalivaisi yabara nabijataeya namataenetsia penajumeanaenotabiabixae, navecuanatsanapona. Bajarapacuenia apo benavecuanatsanapona tsipaji baja cajena Cristo caenë tsaponapona. Apo navitsanae baja cajena. Nexata pamonaeta Cristo pijajivi, caebitsaëto rabaja tsavanapae. Nexata apo benavecuanatsanapona. Nexata itsajivi ata xanë yabara apo bejumaitsi: “Xanë raja saicaya Pablo pijajivitonënë,” apo bejai. Tspaji xanë itsajivi ata apo sivanabeyaxuabiaexanaenë cruzata. Itsajivi ata baja cajena apo bautisabitsi tavënëta tajajivitonë penaexanaenexa. ¹⁴ Xanë baja cajena apo bautisabinë jivi ayaibitsaëto. Saya bautisabajë anijanëbeje, Cristobeje Gayobeje. Bajaraponëbeje itsa bautisabajë, bautisabajë Cristo pevënëta. Nexata jivi ayaibitsaëto apo tabautisabixae, sivabarëyanë Diosojavabelia. ¹⁵ Nexata acuenebi itsajivi ata pejumaitsijava: “Xanë raja nebautisaba Pablo pevënëta. Nexata Pablo pijajivitonënë,” pejaijiva. ¹⁶ Jemajanë tsaena. Bautisabajënuua tsaena Estéfanas pijamonae. Pematatsënëa baja apo najamatabënapitsinë pajiviyo bautisabajë. ¹⁷ Cristo apo nitorobi bitso jivi tabautisabaponaenexa. Biji rajane Cristo nitoroba tatsipaebaponaenexa jivi pexanialivaisi pecapanepaelivaisinexatsi Diosojavabelia. Nexata pacuenia Dioso nejamatabëcuenecaëjëpaeya exanapona, bajarapacuenia pacatsipaebaponaetsi. Apo nitorobi baja cajena tatsipaebaponaenexa pematatsënëa itsalivaisicuenia. Pacuenia tsipaebabiaba pamonaeta yapëtane saya maëpanacuapijilivaisije, bajarapacuenia tatsipaebinxaxa, Cristo apo nitorobi. Nexata itsa tsipaebaponaejitsipajë pacuenia tsipaebabiaba pamonaeta yapëtane saya maëpanacuapijilivaisije, nexata Jesucristo vajanacasivatëpaejava cruzata tsipaebi atanë tsipae jivijavabelia, ajumematamobinë tsipae.

Pacuenia Cristo jivijavabelia tsitajëta Dioso piasaënëcuene, Dioso bitso daxitacuene peyapëtaenëcuene ata, yabara pelivaisi

¹⁸ Itsamonae pijaneconi yajavatëpaena. Bajarapamonae jumetae ata Jesucristo cruzata vajanacasivatëpaejava, bajarapalivaisi apo jumecovënëtsi. Benatsiquejemalivaisi saya tane. Itsiata baitsi jane vaxaitsi Dioso vajanacapanepaevinexa, bajarapalivaisi nacayapëtaeyaexana Dioso piasaënëcuene. ¹⁹ Dioso baja cajena pejumelivaisibaxutota tajëvelia jumaiti mapacueniaje: Itsamonae bitso yapëtane mapanacuapijilivaisije. Bajarapamonae peyapëtaelivaisimi, itsamatacabi vecuaajibiaexanaenajë. Pamonaeta bitso peyapëtaevi itajara tanetsi mapanacuapijivije, xanë itsamatacabi jamatabëcueneitajëtsianajë pacuenia jamatabëcueneitsi. Nexata bajarajota daxitajivi jamatabëcueneypätaenatsi bajarapamonae saya bevelia peyapëtaevicuene, jai baja cajena tajëvelia Dioso pejumelivaisibaxutota.

²⁰ Ponë yapëtane saya maëpanacuapijilivaisije, ajumematamobi cajena. Ponë ata bajayajebi nacujaruba maëpanacuapijilivaisije, nexata yapëtaeta, ajumematamobi cajena. Ponë ata bitso ajumelivaisisaëya cuaicuajjai, bajaraponë ata ajumematamobi cajena. Daxita bajarapitsivi

ajumematamobi, itsa apo natovajëtsi Diosojavabelia peyavenonaenexatsi peyapëtaenexa jane baja xaniavaetsia. Dioso baja cajena nacayapëtaeyaexana mapanacuapijilivaisije natsiquejemalivaisicuene. Tspaji Dioso apo penajamatabëxainaelivaisi. ²¹ Dioso baja cajena daxitacuene bitso peyapëtaenë mapanacuapijilivaisi peyapëtaevi matatoxenetsia. Nexata Dioso apo tocopatsi pejamatabëcueneyapëtaenexatsi pamona bitso yapëtane saya mapanacuapijilivaisije. Biji rajane Dioso jamatabëcapanepa pijaneconivecua pamona jumečovënëta pexanialivaisi, palivaisi patsipaebaponajë, Jesucristo cruzata vajanacasivatëpaelivaisi. Bajarapalivaisi itsamonaë betsitanatsiquejemalivaisi atatsi, itsiata bajarapalivaisi pejamatabëcueneta capanepaenatsi pamonaë jumečovënëtavanapa bajarapalivaisi.

²² Judíovi itsa jumetaeyabiaba patatsipaebijava Diosojavabelia picani pecapanepaelivaisinexatsi, najumai tsabiabi ëpamonaë: “Itsa taejitsipatsi Dioso pesaëta pinijicuene pexanaejava pamonaë nacatsipaeba mapalivaisije, nexata matapania jumečovënëtsipatsi bajarapalivaisi pexaniajailivaisicuene,” najai tsabiabi judíovi. Griegovi ata itsa patsipaebabijë bajarapalivaisi, najumai tsabiabi ëpamonaë: “Mapalivaisije itsa jumejëpaejitsipa palivaisi nacatsipaebabiaba vajayajuvënëvi, daxitalivaisi bitso peyapëtaevi, nexata matapania jumečovënëtsipatsi pexaniajailivaisicuene mapalivaisije,” najai tsabiabi griegovi. ²³ Itsiata baitsi jane paxanë itsa patsipaebaponajë bajarapalivaisi, “Cristo raja nacasivatëpa cruzata vajanacapanepaenexa vaneconivecua,” pajanë tsabiabi. Bajarapacuenia patatsipaebijava judíovi jumetaeyabiabi ata, itsiata apo jumečovënëtsi. Anaepanabiaba saya. Apo judíovi ata itsa jumetaeyabiaba Cristo vajanacasivatëpaejava cruzata, benatsiquejemalivaisi saya jumetaeyabiabi. ²⁴ Itsiata pamonaë Dioso junatatsi pecapanepaenexatsi, judíovi, apo judíovi ata, bajarapamonaë jumeyapëtaepona bajarapalivaisi. Nexata bajarapamonaë yapëtaepona Dioso piasaënëcuene. Tspaji bajarapamonaë Dioso capanepaejitsiatsi pijaneconivecua Cristo pesivatëpaexaetsi cruzata. Bajarapamonaë yapëtaepona Dioso bitso daxitacuene peyapëtaenëcuene. Tspaji Dioso tajëvelia najamatabëxaina bajarapamonaë pibisiacuene pexanaenconivecua pecapanepaenexa Cristo pejamatabëcueneta. ²⁵ Pacuene Dioso exana jivi pecapanepaenexa pijaneconivecua, bajarapacuenie mapanacuapijivije, Dioso apo pejumečovënëtsivi, betsitanatsiquejemacuenetsi. Pacuenia baja cajena Dioso tajëvelia najamatabëxaina jivi pecapanepaenexa, exana baja. Bajaraxua bitso pexaniacuene. Bitso peyapëtaevi ata mapanacuapijilivaisije, apo caëjëpaetsi bajarapacuenia penajamatabëxainanenexa. Dioso itsa copata Cristo pebeyaxuabinexatsi cruzata, bajarapaepatota Dioso saya bepiasaëjibinë tanetsi mapanacuapijivije. Itsiata baitsi jane bajarapaepatota Dioso najamatabëcueneitajëta bitso piasaënëcuene daxita mapanacuapijivije matatoxenetsia. Tspaji bajarapaepatota Dioso pinijicuene exana vajanacapanepaenexa vaneconivecua. ²⁶ Tajamonaë, pacanaëjere mapacuenije. Paxamëyajuvënëvi caejivibeje saya bitso peyapëtaevi mapanacuapijilivaisije. Caejiviyobeje pijinia saya ayaijamatabëcuenevi. Caejiviyobeje saya petuxanevi pexi. Paxamë paayaibitsaëttoxanetomë beveliajamatabëcuene saya panexainaevi. Bajarapacuenia beveliajamatabëcuene panexainaevi ata, itsiata Dioso pacajunata papijajivinexamë. ²⁷ Pamonaë bitso peyapëtaevi mapanacuapijilivaisije, jumai tsabiabi paxamë bajarapalivaisi apo paneyapëtaevi yabara: “Mara pamonaë bitso apo peyapëtaevije,” jai

tsabiabi. Itsiata Dioso pacaitapeta papijajivinxamë, apo paneyapëtaevi ata. Bajarapacuenia Dioso pacaitapeta, pamonaе bitso peyapëtaevi natane, piauranexa Dioso pitabarata, pamatacabi daxita Dioso papijajivimë bitso paneyapëtaevi pacaexanaena. Dioso cajena pacaitapetanua papijajivinxamë, mapanacuapijivije bevaveliajamatatäcuenevimë pacatae ata. Bajarapacuenia Dioso pacaitapeta, pamonaе bitso ayaijamatatäcuenevi natane, piauranexa Dioso pitabarata, pamatacabi daxita Dioso papijajivimë paayaijamatatäcuenevimë pacaexanaena. Bajarapamonae aura tsane itsa nayapëtaena jamatäcuenenavëxaniabiaya bevveliajamatatäcuenevi papecataejava Dioso papijajivimë. ²⁸ Dioso baja cajena pacaitapeta papijajivinxamë, daxitajivi papecaitoxaxae, bijiaya papecanaëcotsivi ata. Bajarapacuenia Dioso pacaitapeta, pamonaе bitso ayaijamatatäcuenevi itajara daxitajivi tanetsi mapanacuataje, Dioso piaurabinexa. Bajarapamonae Dioso urabiana, pamatacabi daxita Dioso papijajivimë paayaijamatatäcuenevimë pacaexanaena. Bajarapamatatäcabi daxitajivi Dioso yapëtaeyaexanaena pijajumematamobijava, pamonaе ayaijamatatäcuenevi itajara tanetsi mapanacuataje. ²⁹ Bajaraxuata Dioso pitabarata jamatäcuenenavëxaniabiaya itsajivi ata apo bejumaitsi itsajivijavabelia: “Xanë bitso ayaijamatatäcuenen taxainaenë,” apo bejai. ³⁰ Dioso papecaitaxutotsoniataexae, pacaitapeta papijajivinxamë. Nexata Jesucristo payajavajinavanapame. Vaxaitsi Dioso jamatäcueneyapëtanetsi. Tsipaji Jesucristo nacajamatatäcueneyavenona Dioso vajajamatatäcueneyapëtaenexa. Jesucristo pejamatäcueneta Dioso aneconijibia nacatane. Pijajivitsinua Dioso nacaexana. Nacavecuaajibiaexanana pibisiacuenen vajaexanaeconimi. ³¹ Bajaraxuata jivijavabelia benavajunupaebatsi Dioso vajanacayavenonaejava. Tsipaji Dioso pejumelivaisibaxutota jumaiti mapacueniaje: “Pëtsa navajunupaebame saya nijacuata nexanaejava yabara jivi pecayiyataenexa. Biji rajane navajunupaebare Dioso pecayavenonaponaejava. Nexata jivi Dioso yaityataena,” jai Dioso pejumelivaisibaxutota.

2

Pacuenia Jesucristo sivatëpa mapanacuapijivije yabara pelivaisi

¹ Tajamonae, pamatacabi ponajë paxamëjavabelia, pacatsipaebatsi baja cajena pexaniajailivaisi, Dioso pejumelivaisi. Nexata bajarapamatatäcabi apo pacatsipaebitsi pacuenia tsipaebabiaba pamonaе bitso peyapëtaevi mapanacuapijilivaisije. Biji rajane pacatsipaebatsi xaniavaetsi jumnapebetsiaya panejumeyapëtaenexa patacatsipaebilivaisi. ² Itsa ponaponajë paxamëjavata, najamatatäcainajë patacatsipaebinexa ëJesucristo pelivaisi. Nexata bitso pacatsipaebabiabatsi Jesucristo vajanacasivatëpaejava cruzata. ³ Paxamëjavata itsa ponaponajë patacatsipaebinexa pexaniajailivaisi, Jesucristo pelivaisi, najamatatäcueneyapëtaniji apo tanecaëjëpaejava tajacuata patacatsipaebinexa. Nexata natsijamatatäcuenebëjanë. Jamatäcuenenecononajë Dioso pitabarata bajarapalivaisi patacatsipaebijavanexa yabara. ⁴ Bajarapamatatäcabi pexaniajailivaisi itsa pacatsipaebabiabatsi, Dioso neyavenonabiaba. Xanë ëtajamatatäcuenesaëta bajarapalivaisi apo pacajumecovënëtsiaexanaetsi. Biji rajane Espiritu Santo pacatsijamatatäcuaicuajaji. Dioso pesaëta pinijicuenen taexanaejava ata, pataneme. Bajaraxuata patacatsipaebilivaisi pexaniajailivaisicuenen, payapëtaneme. Nexata bajarapalivaisi pajumecovënëtame. ⁵ Bajarapacuenia pacatsipaebatsi panenajamatatäcuenecopatsinexa Diosojavabelia, Dioso pesaëta

papecayavenonaponaenexa. Tsipaji apo pacatojitsipaetsi paneyajava-jumecovënëtsinexa pamonae mapanacuataje tanetsi bitso peyapëtaevi mapanacuapijilivaisije.

Pacuenia Dioso najamatabëcueneitajëtaona pejumecovënëtsivitsijavabelia Espiritu Santo pejamatabëcueneta yabara pelivaisi

⁶ Dioso bitso pejumecovënëtsivi tuatuajëta itsa pajinavanapajë, patsipae-bavanapajë Dioso pejumelivaisi, pexaniajailivaisi. Bajarapalivaisi apo yapëtae mapanacuapijivije. Mapanacuanë pevetsivi ata apo yapëtae. Bajarapamonae saicaya itsalivaisi xaina. Bajarapamonae bajarapalivaisi yajavatëpaena. ⁷ Dioso pejumelivaisi, pexaniajailivaisi, itsa patsipae-bavanapajë, patsipae-bavanapajë Cristo vajanacasivatëpaejava vajanacapanepaenexa vajeconivecua. Bajarapalivaisi baja cajena Dioso bajayata tajëvelia muetsia xainabuata. Matapania aeconoxae mapamatacabitaje Dioso nacayapëtaeyaexana bajarapalivaisi. Dioso baja cajena nacua pexanaevajënaeya ata, najamatabëxaina pacuenia exanaejitsia vajanacarajutsinexa matacabi apo peverevercaejava. ⁸ Nexata abaxë pamatacabi Cristo ponapona mapanacuataje, itsanë ata mapanacuanë pevetsiviyajuvënënë apo jumeyapëtae bajarapalivaisi, Cristo pelivaisi. Bajarapamonae itsa jumeyapëtaejitsipa bajarapalivaisi, nexata Cristo apo beyaxuabi tsipaetsi cruzata, ponë pepo petuxanenë, Dioso pexënato. ⁹ Nexata bajarapamonae apo pejumeyapëtaexae Cristo pelivaisi, copiapata jane baja pacuenia Dioso pejumelivaisibaxutota tajëvelia jumaisi mapacueniaje:

Xua abaxë itsajivi ata apo tae, apo jumetaenua, apo sivanajamatabëxainaenua, bajaraxua Dioso baja cajena toxaniavaeta pamonae Dioso pejitsipaevinexa, jai tajëvelia Dioso pejumelivaisibaxutota Cristo vajanacasivatëpaejavanexa cruzata.

¹⁰ Nexata vaxaitsi Cristo vajanacasivatëpaejava, Dioso nacayapëtaeyaexana Espiritu Santo pejamatabëcueneta. Espiritu Santo baja cajena daxitacuene nacayapëtaeyaexana. Pacuenia Dioso najamatabëxaina vajanacapanepaenexa, bajaraxua ata Dioso nacayapëtaeyaexana Espiritu Santo pejamatabëcueneta.

¹¹ Vaxaitsi apo nacacajëpae vajajamatabëcueneyapëtaenexa pacuenia bëpënëa najamatabëxaina itsajivi. Itsiata bajarapajivi pijacuata najamatabëcueneyapëtaene. Bajara pijinia pacuenia vaxaitsi ata Dioso apo jamatabëcueneyapëtae tsipaetsi pacuenia Dioso najamatabëxaina Espiritu Santo itsa apo nacayapëtaeyaexanae tsipae. ¹² Tsipaji Dioso apo nacatocopatsi vajacuata vajajamatabëcueneyapëtaenexa pacuenia Dioso najamatabëxaina. Bajaraxuata Dioso nacarajuta Espiritu Santo vajanacatsijamatabëcaenexa. Nexata Espiritu Santo pejamatabëcueneta nacayapëtaeyaexana pacuenia Dioso nacayavenonaejitsia Jesucristo pejamatabëcueneta. ¹³ Nexata livaisi itsa tsipaebaponatsi Dioso pejumecovënëtsivijavabelia, tsipaebaponatsi pacuenia Espiritu Santo nacayapëtaeyaxanapona. Apo tsipaebaponaetsi mapanacuapijicuene yabaraje, xua vajacuata banajamatabëxainatsi.

¹⁴ Pajivi Dioso apo jumecovënëtsi, bajarapajivi apo jumecovënëtsi palivaisi picani Espiritu Santo ata yapëtaeyaexanaejitsiatsi. Tsipaji saya bajarapalivaisi betsitanatsiquejermalivaisitsi. Bajarapajivi apo cajëpaeatsinua pejumeyapëtaenexa palivaisi Espiritu Santo yapëtaeyaxanatsi. Tsipaji Espiritu Santo petsijamatabënaevitsi, cajëpatsi pejumeyapëtaenexa palivaisi Espiritu

Santo yapëtaeyaxanatsi. ¹⁵ Pajivi tsijamatabëecatsi Espiritu Santo, bajarapajivi pejamatabëcueneta yapëtaeyaxanaponatsi xua Dioso tsitapexaniacuenetsi. Yapëtaeyaxanaponatsinua xua ata Dioso tsitapibisiacuenetsi. Nexata Dioso apo pejumecovënëtsivi apo caëjêpaetsi peneconitsinexatsi bajarapajivi Diosojavabelia. ¹⁶ Dioso pejumelivaisibaxutota bajaraxua yabara jumaiti mapacueniaje: “Itsajivi ata apo yapëtae pacuenia najamatabëxaina pepo petuxanenë Dioso. Nexata itsajivi ata apo caëjêpaetsi pemuxujiobinexa Dioso,” jai Dioso pejumelivaisibaxutota. Nexata pacuenia Cristo jamatabëcuenetsi, bajara vaxaitsi ata jamatabëcuenetsitsi. Nexata itsajivi ata apo caëjêpaetsi vajanacajamatabëcueneyapëtaenexa. Apo caëjêpaetsinua vajanacamuxujiobinexa.

3

Pacuenia Dioso pejumecovënëtsivi najamatabëcuenejêpaeya Dioso betonacuenebavanapa yabara pelivaisi

¹ Tajamonae, palivaisi abaxë ayapêbeje jivi pejumeyapëtaenexa, bajarapalivaisi tsipaebabiabajê Espiritu Santo pitorobicueniatsi pejinavanapaevijavabelia. Nexata bajarapamonae nejumeyapëtaeyabiaba. Itsiata baitsi jane paxamê bajayajebi baja Cristo pelivaisi panejumecovënëtsivi ata, piayapêbejelivaisi apo pacatsipaebabiabitsi. Tsipaji apo panejumeyapëtaemê tsipae. Bajaraxuata abaxë pacatsipaebabiabatsi pacuenia tsipaebabiabajê pamonae pejanajumecovënëtsivi Cristo pelivaisi. Tsitecaeya abaxë bepapejevaxijamatabëcuenemê Cristo panejumecovënëtsijava yabara. Tsipaji apo panejumeyapëtaeponaemê panevajënaeyabelia Cristo pelivaisi. ² Penacuetojiviyo abaxë ëmito barajutatsi. Apo rajutsitsi abaxë pexaenexa pevi. Bajara pijinia pacuenia paxamê ata pamatacabi ajena pajumecovënëtamê Cristo pelivaisi, pacatsipaebatsi peyapëxanepanaelivaisi panejumeyapëtaenexa. Tsipaji abaxë bajarapamatacabi apo pacacaëjêpae panejumeyapëtaenexa palivaisi abaxë ayapêbeje. Itsiata baitsi jane abaxë aeconoxae ata saya patsitecavanapame. Apo pacacaëjêpae panejumeyapëtaenexa pematatsënëa. Bajaraxuata paxamê abaxë bemito paneapaejivixi Cristo pelivaisi panejumecovënëtsijava yabara. ³ Bajarapacuenia pajamatabëcuenetsimê tsipaji abaxë mapanacuapijivije, Dioso apo pejumecovënëtsivi, jamatabëcuenejêpaeya pajinavanapame. Paxamê abaxë panacuenecaëbabiabame. Nabijataeyanua namataenetsia panajumeanaenotabiabame. Natsanaeyanua jamatabëpanavecuajinavanapame. Nexata abaxë pacatsitecavanapame mapanacuapijivi pijacuene. ⁴ Pacuenia Dioso apo pejumecovënëtsivi najamatabëcuenejêpaeya apo jinavanapae, bajarapacuenia paxamê ata najamatabëcuenejêpaeya apo pajinavanapaemê. Tsipaji paxamêyajuvënëvi, itsamonae, xanê yabara jumai tsabiabi: “Pablo raja Apolosvecua ayaijamatabëcuenenê. Bajaraxuata xanê saicaya Pablo pijajivitonënê,” jai tsabiabi. Itsamonae pijinia jumai tsabiabi: “Apolos raja Pablovecua ayaijamatabëcuenenê. Bajaraxuata xanê Apolos pijajivitonënê,” jai tsabiabi. ⁵ Xanê Pablonê, apo ayaijamatabëcuenenênê. Apolos ata raja apo ayaijamatabëcuenenê. Paxanêbeje ata raja Apolosbeje saya Dioso papijajivitonënêbeje. Bajaraxuata pacatsipaebatsibeje vajatuxanenê Cristo pelivaisi. Nexata baja pajumecovënëtamê vajatuxanenê Cristo pelivaisi. Paxanêbeje patonacuenebajêbeje vajatuxanenê Cristo pacuenia paneitoroba-beje. ⁶ Pabixinaevi bauba pabita xua jamatabëuba. Bajaraxuacujinae pabita peubijava eveta petoayabacabejeyanivatsi. Itsiata baitsi jane xua

uba pabita, Dioso pejamatabëcueneta tovtisabiaexanatsi. Bajara pijinia pacuenia xanë ubajë Dioso pejumelivaisi paxamë panejamatabëëthëtota. Bajaraxuacujinae Apolos pacaevetaponapona Dioso pejumelivaisita. Itsiata baitsi jane Dioso pejamatabëcueneta pacajamatabëcueneta vitsabiaexanapona. ⁷ Nexata ponë uba, ponë ata evetaponapona, apo ayajamatabëcuenenëbeje. Caenë baja cajena Dioso ayajamatabëcuenenë. Tsipaji pacuenia pabita peubijava Dioso pejamatabëcueneta vitsabiaexana, bajara pijinia pacuenia Dioso pejamatabëcueneta pacatsijamatabëvitsabiaexanapona Dioso pejumelivaisi. ⁸ Pamonaë jivi tsijamatabëuba Dioso pejumelivaisi, pamonaë ata evetavanapa Dioso pijajivi, najamatabëcuenenëpa daxita. Itsanë ata apo ayajamatabëcuenenë itsamonaëvecua. Itsiata Dioso matamotsianatsi caenë canacujitsia saicaya petonacuenebimatamo. ⁹ Paxanë raja Dioso pijacuenë panebarënacueneba. Paxamë ra pijinia bepapabimë, papabita Dioso panebarëubapona pejumelivaisi. Pacuenia pabita peubijava Dioso pejamatabëcueneta vitsabiaexana, bajara pijinia pacuenia panejamatabëëthëtota Dioso pejumelivaisi vitsabiaexanapona.

Paxamë raja Dioso bepapijabomënua, paboxaneto Dioso panebarëexanapona. ¹⁰ Bo pexanaëvi, pexaniabo pexanaenexa, itsaxuayo bo ënëtuatujënexa, copiaya feratonë bamatatorotsia cueruba ibotoxanetonë pemëthëcaenexa bajarapferatonëjava. Bajaraxuacujinae bajara paibotoxanetonëjumavereca itsaibotonë banajumacatsanejebapona. Nexata xanë, pacuenia Dioso netocopata, copiaya pacatsipaebatsi pexanialivaisi Jesucristo pelivaisi. Nexata baja pajumecovënëtame bajarapalivaisi. Bajaraxuata xanë bo ënëtuatujënexa matatoyorotsia taferacuejava, bitso betanecujaninë. Bajarapferatonëjava ibotoxanetonë tamëthëcaejava ata, bitso betanecujaninë. Tsipaji xanë copiaya pacatsipaebatsi Cristo pelivaisi. Nexata juya pamonaë cotocaëvi pacatsipaebavanapa, pacatsipaeba panevajënaeyabelia paneajamatabëcuenesaë tsaponaenexa Cristo pelivaisi panejumecovënëtsijava. Bajarapamonaë boyenepanexa ibotonë bepecsanaponaëvi bo ënëtuatujënexa matatoyorotsia tamëthëcaebotoxanetonëjumavereca. Boyenepanexa pecatsanaponaëvi baitapetapona ëpexaniavirijava, pavirijava tsixanepana boyenepanexa. Bajara pijinia itsi pamonaë pacaevetavanapa. Ëpexanialivaisi pacatsipaebabiaba paneajamatabëcuenesaënexa Diosojavabelia.

¹¹ Payapëtaneme rabaja mapacueneye. Itsajivi baja capanepaëya boyenepanexa, itsa tsivajënaëmëthëca ibotoxanetonë, nexata baja itsajivi ata bajarapajumabereca icatsia itsaibotoxanetonë apo bemëthëcae. Bajara pijinia paitsimë paxamë ata. Capanepaëya baja pajumecovënëtame Jesucristo papecasivatëpaejava Dioso papecavecuaajibiaexanaenexa pibisiacuene paneaxanaeconimi. Nexata baja apo bepajumecovënëtsimë saicayalivaisi. Tsipaji baja ajibi pematatsënëa itsalivaisi papecacapanepaelivaisinexa panijaneconivecua. ¹² Pamonaë bo exana, maitsije. Itsamonaë exana bitso penamatamotsijavanëta. Itsamonaë exana bevelia penamatamotsijavanëta. Pamonaë pacatsipaebapona pexaniajailivaisi pacuenia Dioso yapëtaëyaexanaponatsi, bajarapamonaë bo bepexanaëvi bitso penamatamotsijavanëta bajayajebi bo pijamatabësäetsecaenexa. Bajarapamonaë bo bepexanaëvi oronanitonëta, platananitonëta ata, penamatamotsiibotonëta ata. Pamonaë pijinia saya pejamatabëcueneta peyapëtaelivaisi pacatsipaebapona, bajarapamonaë bo bepexanaëvi bevelia penamatamotsijavanëta, bajayajebi apo pijamatabësäëjavanëta. Bajarapamonaë bo bepexanaëvi saya naëjavanëta, patebaxutoxita ata, bearrozbotoxita ata. ¹³ Nexata pamatacabi Cristo patsianica,

bajarapamatacabi nayapëtaena caejivi canacujitsia Cristo pijajivi, pamonaē xaniavaetsia tonacuenebavanapa. Bajarapamatacabi Cristo isoto yajavapatsianica. Nexata bajarapaisotota Cristo ëjëtaponæna xua pijajivi, caejivi canacujitsia, tonacuenebatsi. Nexata bajarapacuenia Cristo yapëtaena xaniavaetsia pijajivi petonacuenebijavatsi. ¹⁴ Itsanë bo tonacuenebijitsipa itsanë pijabonexa. Nexata bo petoveretetsicujinae, isoto najetarucæe ata, itsiata bo apo tajue tsipæe isoto apo petajuejavanëta bo pexanetsixæe. Nexata bo penacuenebinë matamotsipatsi. ¹⁵ Itsiata baiſi jane peveretetsibo itsa totajuejitsipatsi isoto petajuejavanëta, bo pexanetsixæe, nexata naxuabijitsipa penacuenebijava. Bo ata naxuabijitsipa. Penacuenebimatamo ata naxuabijitsipa. Itsiata bo pexanaenë apo naxuabi tsipæe. Panepæejitsipa itsiata tsiquirijavayota. Bajara pijinia itsi Cristo pelivaisi papecatsipaebivi ata. Baiſi pamonaē xaniavaetsia pacatsipaeba, capanepænatsi Dioso. Matamotsianatsinua Dioso. Tsipaji pacuenia Dioso yapëtaeyæxanatsi, pexanialivaisi pacatsipaebapona. Pamonaē pijinia apo pacatsipaebi xaniavaetsia, apo matamotsi tsanetsi. Tsipaji saya pejamatabëcueneta peyapëtaelivaisi, pacatsipaebapona. Itsiata bajarapamonaē ata tsiquirijavayota capanepænatsi Dioso.

¹⁶ Payapëtaneme rabaja mapacueneje. Paxamë rabaja Dioso bepapijatemplobomë. Tsipaji Espiritu Santo pacayajavaponapona. ¹⁷ Pajivi bijianaena bajarapatemplobo, Dioso pijabo, nexata juya bajarapajivi Dioso navecuaxuabianatsi. Dioso baja cajena pijatemplobo saicaya Diosonexa. Paxamë rabaja Dioso bepapijatemplobomë.

¹⁸ Pëtsa pajamatabëcuenenavëxaniabame. Itsajivi paxamëyajuvënëjivi itsa jamatabëjumaiſi: “Xanë cajena daxitajivi matatoxenetsia bitso tayapëtaenë mapanacuapijilivaisije,” itsa jamatabëjai, nexata bajarapajivi becopata bajarapajamatabëcuene. Beveliajamatabëcuenejivi saya benatane. Nexata Dioso jamatabëcuenecaëjëpaeya exanaenatsi peyapëtaenexa jane baja Dioso pejumelivaisi. ¹⁹ Daxita palivaisi bitso bepexaniajailivaisitane mapanacuapijivije, itsiata daxita bajarapalivaisi Dioso tsitanatsiquejemalivaisitsi saya. Dioso pejumelivaisibaxutota jumaiſi mapacueniaje: “Dioso cajena naneconitsiaexanaena bitso peyapëtaevi mapanacuapijilivaisije peyamaxëitojorobavanapæjavata itsamonæe,” jai Dioso pejumelivaisibaxutota. ²⁰ Icatsia itsalivaisita Dioso pejumelivaisibaxutota jumaiſi mapacueniaje: “Pepo petuxanenë baja cajena yapëtane piamatamobicuene mapanacuapijilivaisije, bitso peyapëtaevi penajamatabëxainæcuene,” jai Dioso pejumelivaisibaxutota. ²¹ Bajaraxuata itsajivi ata paxamëyajuvënëjivi, Dioso pejumelivaisi patacatsipaebivi, paxanë bepatajajivitonë apo benatae. Bepaayajamatabëcuenevinëna, apo bepanetæe. “Xanë raja saicaya bajaraponë pijajivitonënë,” apo bejai paxanëyajuvënëvi yabara. Biji rajane paxanë bepanijajivinë panataniji Dioso pejumelivaisi patacatsipaebaponaæxæe. Tsipaji baja cajena Dioso pacatocopata daxita xua panamatavenonæe. ²² Xanë Pablonë, Apolos ata, Pedro ata, bajarapamatabëxëyo Dioso panecopata paxamë patacajamatabëcuenejavonænaenexa. Daxita mapanacuata panejinavanapaenexa ata, Dioso pacatocopata. Paneasaëtsavanapaenexa, panetëpaenexa ata, Dioso pacatocopata. Panejinavanapaenexa ajena, panevajënaeyabelia ata panejinavanapaenexa, Dioso pacatocopata. Daxita rabaja bajaraxua Dioso pacatocopata paxamëna. ²³ Pematatsënæa rabaja Dioso pacatocopatanua paxamë Cristo papijajivinexamë. Cristo rabaja pijinia Dioso bepajajivitonë, Dioso pejitsipaecuenia petoexanaæxæe.

4

Pacuenia Cristo pijajivi, apóstolevi, nacuenebavanapa yabara pelivaisi

¹ Paxamē saya panetaema Cristo papijajivinēcuenia. Cristo raja panetocopata jivi patatsipaebavanapaenexa pexanialivaisi. Bajarapalivaisi Dioso pepo bajayata muetsia xainabuata. ² Pajivi itsanē pijajivitonē naexana, bajarapajivi pijatuxanenē pitorobicueniatsi, xaniavaetsia betonacuenebaponapona. ³ Bajaraxuata xanē ata exanaponajē pacuenia vajatuxanenē nitoroba. Nexata paxamē panebaracuaicuajamē tsabiabi ata, itsamonae ata nebaracuaicuajai tsabiabi ata jivi tatsipaebaponaelivaisi yabara, taexanaponaejava ata yabara, itsiata apo nasivajamatabēcuenebējanē patanebaracuaicuajaitsabiabijava yabara. Apo nacuenecanaējētsinēnua pacuenia tonacuenebajē vajatuxanenē. Nexata tamatabēcueneta apo jamatabējumaitsinē: “Xaniavaetsia meta tajatuxanenē tonacuenebaponaponajē. Itsa jume, bijiata meta tonacuenebaponaponajē,” apo jamatabējanē. ⁴ “Jumecovēnētajē daxita pacuenia Dioso nitoroba. Nexata taneitorobicuenia xaniavaetsia tonacuenebajē. Bajaraxuata ajibi Dioso taneyabara naneconitsiaexanaejavanexa,” jamatabējanē ata tsipae, itsiata ajumematamobinē tsipae. Bajaraxuata evetajē vajatuxanenē pijacuta tanejumaitsinexa itsa apo jumecovēnētsinē taneitorobicuenia. ⁵ Bajaraxuata pētsa pabaracuaicuajamē itsamonae ata Dioso petonacuenebavanapaevi. Pacopiaevetavanapare abaxē vajatuxanenē pepatsijavatsica. Bajaraponē itajētsiana bajarapamonae muetsia pexanaejavanēmī ata. Pacuenia caejivi canacujitsia vajatuxanenē pijajivi bēpēnēa najamatabēxaina petonacuenebavanapaejavata, vajatuxanenē itajētsiananua. Bajaraxuacujinae nexata xaniavaetsia petonacuenebavanapaevi, caejivi canacujitsia, Dioso barēyataenatsi petonacuenebavanapaejava yabara.

⁶ Tajamonae, bajarapacuenia pacatoyaquinatsi Apolos yabara, xanē ata yabara, patacayapētaeayaxanaenexa. Bajarapacuenia pacatoyaquinatsi, Dioso pejumelivaisibaxutota pejumaitsicueniavecua, bitso bepaayajamatabēcuenenēnēbeje patanetaeyanivamē. Bajarapacuenia pacatoyaquinatsi itsamonae ata, pamonaē Dioso petonacuenebavanapaevi, najēpaeya paneyaiyataenexa. Pētsa itsamonaevecua beayajamatabēcuenenē pataneme caenē ata. Bajara pijinia pacuenia bevelijamatabēcuenenē pētsa pataneme caenē ata. ⁷ Paxamē ata pētsa itsamonaevecua bepaayajamatabēcuenenēvimē panataneme. Itsa panavajunupaebabiabame, apo panavajunupaebabiabimē Dioso papecayavenonabiabijava. Xua daxita paxainame, Dioso baja cajena pacarajuta panexainaenexa. Pamonae ata pata paxamējavata papecatsipaebinxexa Dioso pejumelivaisi, bajarapamonae ata Dioso pacatocopata. Nexata daxita bajaraxua Dioso papecatocopatsixae, bepaayajamatabēcuenenēvimē pētsa panataneme itsamonaevecua.

⁸ Paxamē jamatabēcuenenavēxaniabiaya panajamatabēxainame mapacueniaje: “Pacuenia ricovi ayajava pecobecovē xaina, bajara vaxaitsi itsitsi Dioso pejumelivaisi vajajumecovēnētsijava. Tspijaji ayailivaisi xainatsi. Tspijaji baja itsamonae bitso nacatsipaebabiaba Dioso pejumelivaisi. Nexata baja pematatsēnēa apo namatavenonaetsi itsajivi ata vajanacatsipaebaponaenexa,” pajamatabējamē tsabiabi jamatabēcuenenavēxaniabiaya. Jamatabēcuenenavēxaniabiaya Dioso pijacuenie bepenevetsivi panataneme. Nexata meta paxanē matatoxenetsia bitso bepaayajamatabēcuenenēvimē panataneme. Dioso pijacuenie itsa paneevetsivi tsipae, nexata pacasivajamatabēcuenenavēyatsi tsipae. Nexata

vajanajuaevetsivi tsipae Dioso pijacuene. ⁹ Paxanë, paapóstolevinë, Dioso covë panetocopata daxitajivi patanetaenexa bijiaya. Panetocopata bepatananeconitsivicuenia patanebeyejebinxä. Bajarapacuenia Dioso panetocopata bijiaya patanetaenexa ángelevi ata, daxitajivi ata. ¹⁰ Paxanë, Cristo xaniavaetsia patajumecovënëtsivi, itsamonae panetane bepatanematajemabivi. Paxamë, Cristo xaniavaetsia apo panejumecovënëtsivi ata, Cristo pijacuene bitso bepaneyapëtaevi itajara panataneme. Caranata paxanë itsamonae bepataajamatabëcuenesaëjibivi panetane. Caranata juya paxamë bepeneajamatabëcuenesaëvi panataneme. Paxanë itsamonae apo paneyaiyata. Paxamë panayaiyataneme. ¹¹ Cristo pelivaisi jivi itsa patsipaebaponajë mapamatacabijavaberena ataje, bitso baja cajena panabejiobitabiabajë. Patajani tsabiabi. Mera pajitsipabiabajë. Bitso pajumaesebejenë tsabiabi. Jivi panebeyabiaba pecobeta. Apo paxainabiabinë pabota panapatsijsianë. ¹² Pacueranabiabajë bitso patanacuenebabiabijava patacobeta. Jivi panebijataeyabiaba pibisiacuenia. Itsiata apo pajumeanaecanaviatabiabinë. Biji caranata paxanë bajarapamonae patovajëtabiabajë Diosojavabelia Dioso peyavenonaenexatsi. Jivi panebejiobiaexanabiaba. Itsiata pajamatabëcuenemoyanë tsabiabi. ¹³ Pibisiacuenia panebaracuaicuajjai tsabiabi itsamonaejavabelia. Itsiata bajarapamonae pexaniajamatabëcuenia xaniavaetsia pamuxujiobabiabajë bajayajebi. Ajena, mapamatacabijavaberena ataje, panetaeyabiaba daxitajivivecua bepaveliajamatabëcuenevinë. Bepaavirinënuä panetaeyabiaba.

¹⁴ Apo pacatoyaquinaetsi raja mapacueniaje patacaurabinexa. Biji rajane pacatoyaquinatsi saya patacamuxujiobinexa xaniavaetsia. Pacuenia muxujiobijitsipajë taxi, bajarapacuenia pacamuxujiobatsi. ¹⁵ Xanë copiaya patsipaebatsi pexanialivaisi, Cristo pelivaisi. Nexata baja panajamatabëcuenecopatame Jesucristojavabelia. Bajaraxuata xanë bepatacavitsatsivixae, panetaneme bepeneaxanë. Paxinae atamë tsipae diez mil ponëbeje papecatsipaebivinexa Cristo pelivaisi, itsiata xanë caenëne panetaejitsipame bepeneaxanë. ¹⁶ Bajaraxuata asaëyata pacamuxujiobatsi. Pacuenia baja pacatsitaexanaponaponatsi, bajarapacuenia necuenejëpaeya pajinavanapare.

¹⁷ Bajaraxuata Timoteo baja pacatoitorobatsi paxamëjavabelia. Bajaronë bitso tasivanë. Betaxënatocuenia tataanë. Xaniavaetsia pejumecovënëtaaponaponanë Dioso. Bajaraponë Timoteo pacatoitorobatsi baja papecatsipaebinxä pacuenia ponaponajë. Nexata Timoteo pacatsipaebiananua pacuenia xanë Jesucristo pijajivitonëxaenë, tsitaexanabiabajë daxita Dioso pejumecovënëtsijava, itsaxuayo tsipaebaponajë Cristo pelivaisi. ¹⁸ Itsamonae paxamëyajuvënëvi, taitorobicuenia apo exanae. Bajarapamonae beayaijamatabëcuenevi natane. Nexata itsa pacatoitorobatsi Timoteo, bajarapamonae xanë yabara jamatabëcuenenavëxaniabiaya jamatabëjumaitsi: “Pablo rabaja apo patsi tsane. Nacacujunava rabaja vajanacataenexa,” jamatabëjai bajarapamonae xanë yabara. ¹⁹ Itsiata baitsi jane Dioso itsa netocopatsiana patacataenexa, ponaenajë naxanitsiayo paxamëjavabelia. Nexata tajacuata taenajë pacuenia jamatabëcueneitsi tsavanapae pamonaebayaijamatabëcuenevi natane. Tsipaji raeta bajarapamonae pepacuee ajamatabëcuenesaë Diosojavabelia. Itsa jume, nexata meta saya pecuibovojotota jumaitsi. ²⁰ Pamonaebayaijamatabëcuenesaë Dioso pijajivi, bajarapamonae nayapëtane. Tsipaji peneta Dioso pesaëta ajamatabëcuenesaë tsavanapae. Èpecuibovojotota apo jumaitsi. Biji rajane bajarapamonae

pejamatabëëthëtojavavetsina Dioso jumecovënëta. ²¹ ¿Detsa xua pajitsipame paxamë itsa ponaenajë paxamëjavabelia? ¿Patacabijataejava tsaja pajitsipame? Itsa jume, ¿pajitsipame tsaja pexaniajamatabëcuenia asivaya patacataejava?

5

Pacuenia Dioso pejumecovënëtsivi tuatuajëta ponapon bitso pibisiacuenepexanaponaponanënë yabara pelivaisi

¹ Paxamë tuatuajëta bitso pibisiacuenepexanaponaponanënë pevitota, daxitajivi pina baracaicuajai tsabiabi. Dioso apo pejumecovënëtsivi ata, papibisiacuenepona exanae, bajaraponë pina exanaponaponanënë. Bajaraponë paxamëyajuvënënë pita pina pijavanexa paxa pijavami. ² ¡Bajaraponë pibisiacuenepexanaejava, apopacuenaitavetsi atamë, itsiata bepaayaijamatabëcuenevimë panataneme! ¡Biji rajane bajaraponë pibisiacuenepexanaejava, bitso bepasivanajamatabëxainame! ¡Bepayapijivauramënuabajaraponë! Bajaraponë pibisiacuenepexanaponaponanënë, bepanavecuacapitsapame. ³ Paxamëjavata aponaponaponanënë atanë, itsiata paxamëjavata betanaponaponanënë, nataniji. Nexata tajëvelia bitso sivanajamatabëxainabiabajë bajaraponë Dioso penaneconitsiaexanaejavanexatsiyabara pibisiacuenepexanaponaponanënë. ⁴ Paxamë panacaetuare vajatuxanenë Jesucristo papijajivixaemë. Apo pacayajava atatsi tsane, itsiata panenacaetuatsijavata, pacajamatabënajinaenatsi. Diosojavabelia pacatovajëtsianatsinua bajarapaepatota. Vajatuxanenë Jesucristo ata pesaë, pacayajava tsane bajarajota. ⁵ Pibisiacuenepexanaponaponanënë paxamë tuatuajëta, panavecuacapitsapare baja dovathijavabelia. Nexata daxita pibisiacuenepenatojitsipaecuenia pexanaejavayabara, dovathi pebejiobiaexanaenexatsi. Nexata belia icatsia Dioso jumecovënëtsiana. Bajarapajamatabëcuenepone jane baja capanepaenatsi pamatacabi vajatuxanenë Jesús patianica.

⁶ Papibisiacuenepexanaponaponanënë panaitaxutojematsi atamë, itsiata bepaayaijamatabëcuenevimë panataneme. Abeje raja pibisiacuenepexanaponaponanënë panecuenenaitaxutojematsijava. Payapëtanemrabaja mapacuenepone. Pan pexanaematabënexa, ayaimatabë ata, levadurajavapijinia tsiquirijavayo ata, itsiata pematajërëabijavata, bacaëjëpaxitamatatabëjavata. Nexata levadura, tsiquirijavayo ata, bafufuneyaexanadaxitamatatabë. Bajara pijinia itsi tsipae caenë itsa pacuenecopatsipame pibisiacuenepexanaponaponanënë paxamë tuatuajëta. Daxitajivi belia pibisiacuenepexanaponanëjitsipa bajaraponë pejamatabëcueneta. ⁷ Bajaraxuata panavecuacapitsapare baja, ponë pibisiacuenepexanaponaponanënë paxamë tuatuajëta, daxitajivi pejamatabëcuenepibijianeyaniva bajaraponë pejamatabëcueneta. Pacuenia itsi perujupanmatatabë, levadurata pematajërëabimatatabë, bajara jamatabëcuenetsi bajaraponë, pibisiacuenepexanaponaponanënë. Bajaraxuata bajaraponë panavecuacapitsapare baja. Paxamë rabaja Jesucristo pejamatabëcueneta pejanajamatabëcuenepaxainame. Nexata pacuenia itsi levadurata apopematajërëabipanmatatabë, bajarapajamatabëcuenetsimë. Tsipaji baja Dioso aneconijibia pacatane. Paxamë baja aneconijibia Dioso pacatane. Tsipaji Cristo pacasivatëpa. Cristo baja cajena beovejayo tanetsi Dioso. Tsipaji nacasivatëpa cruzata pibisiacuenepexanaponaponanënë vajanacavecuajibiaexanaenexa. ⁸ Nexata baja aeconoxae pibisiacuenepone beexanavanapaetsi. Jesucristo pijajivixaetsi, itsajamatabëcuenepone xainaenejevatsi, pexaniajailivaisi jumecovënëtanapanenatsi. Bajarapacuenia itsa jumecovënëtanapanenatsi,

nexata pacuenia itsi levadurata apo pematajërëabipanmatabë, bajarajamatabëcuene itsanetsi aneconijibia vajajinavanapaexae.

⁹ Itsabaxutota baja cajena pacatoyaquinatsi pevitota pibisiacuene pexanaponaevi paneyajavajinavanapaeyaniva. ¹⁰ Dioso apo pejumecovënëtsivi, itsamonae, pibisiacuene exana pevitota. Itsamonae najamatabëxaina ëpamonaenexa ayaijava pexainaecuene pexainaenexa. Itsamonae nacobetoxota. Itsamonae, jumapecataeya pexanaenëanëjavabelia, navajëca. Bajarapitsicuene pexanaevi, Dioso apo pejumecovënëtsivi, panavecuatsatsinexa, patacatoyaquinaebaxutota apo pacaitorobitsi. Bajarapitsicuene pexanaevi, Dioso apo pejumecovënëtsivi, itsa panavecuatsatsipame, nexata pepacuene mapanacuavecuaje athëbëabetsia ëpaneponaenexa tsipae. Tsipaji daxita mapanacuajavaje bajarapitsicuene pexanaevi yacaëjëpa.

¹¹ Patacatoyaquinaebaxutota raja pacaitorobatsi mapacueniaje. Pajivi jumaitsi ata: “Xanë cajena Jesucristo pelivaisi jumecovënëtajë,” jai ata, itsiata pibisiacuene itsa exana pevitota, ëpamonaenexa ata pexainaecuene itsa natojitsipa, jumapecataeya pexanaenëanëjavabelia ata itsa navajëca, itsamonae ata pibisiacuena itsa baracuaicuajai, itsa aitajibi tsabiabinua, itsa nacobetoxotana, bajarapajivi pëtsa payajavajinavanapame. Pëtsa payavaxanemenu caejavata, pacajunatsi ata. ¹²⁻¹³ Pamonaë abaxë Dioso apo pejumecovënëtsivi, bajarapamonaë yabara tajumaitsinexa Dioso apo netocopatsi: “Bajarapamonaë cajena pijaneconi xaina Diosojavabelia,” tajainexa. Dioso cajena abaxë saicaya pepacuene naneconitsiaexanaena bajarapamonaë. Itsiata baitsi jane pamonaë Dioso panenajuajumecovënëtsivi, panenacaeatuatabibibota panenajuajoneyabiabivi, pibisiacuene itsa exana, paxamë bepacueneitavetame. Bajaraxuata nexata panavecuacapitsapare baja ponë paxamë tuatuajëta pevitota pibisiacuene exanaponaë.

6

Pacuenia Dioso pejumecovënëtsivi itavetatsi Dioso penajuajumecovënëtavanapaevi peneconitsiyaniva juezmonaejavabelia yabara pelivaisi

¹ Itsanë paxamëyajuvënëne, Dioso pejumecovënëtsinë, itsa pacaitsacueniaba paxamëjavaberena, nexata jueznëjavabelia paneconitabiabame. Pëtsa bajarapacuenia paexaname. Tsipaji raja juezmonae Dioso apo pejumecovënëtsivi. Bajaraxuata Dioso panenajuajumecovënëtsivi apo bepaneconitsimë juezmonaejavabelia. Biji rajane bepayanijobame Dioso pejumecovënëtsivijavabelia papecatoxanetsinexa bajarapalivaisi. ² Payapëtaneme rabaja mapacueje. Pamatacabi Cristo evetsiana mapanacuaje, daxita Dioso vajajumecovënëtsivi Dioso nacatocopsiansa vajananeconitsiaexanaenexa pamonaë pijaneconi pexanaevi. Daxita mapanacuapijivije, pamonaë Dioso apo pejumecovënëtsivi, vaxaitsi naneconitsiaexanaenatsi. Nexata aeconoxae ata pacacaëjëpa panelivaisixanetsinexa paneconi exana panetuatuajëta. Tsipaji mapanacuata jivi pevetsijamatabëcuene beveliajamatabëcuene saya. Apo ayapëbeje bitso. ³ Payapëtaneme rabaja mapacueje. Pamatacabi Cristo patsianica, vaxaitsi naneconitsiaexanaenatsi daxitajivi. Naneconitsiaexanaenatsi angelevi ata. Nexata abaxë aeconoxae panejinavanapeepato mapanacuataje, pacacaëjëpa panelivaisixanetsinexa paneconi exana panetuatuajëta, mapanacuapijilivaisije. ⁴ Itsiata baitsi jane paxamëyajuvënënjivi itsa pacaitsacueniaba mapanacuataje, itsiata panijacuata apo palivaisixanetabiabimë pacuenia picani bepaexaname. Nexata pajivi pacaitsacueniaba, pacaponabiabame juezmonaejavabelia

penaneconitsiaexanaenexatsi. ⁵ Mapacuenia pacajumaitsitsije patacaurabinexa. Paxamëyajuvënëjivi itsa pacaitsacueniaba, çajibi tsabaja caenë ata paxamëyajuvënëne pexanialivaisi peyapëtaenë pelivaisixanetsinexa bajarapalivaisi? ⁶ Dioso panejumecovënëtsivixae, juezmonaejavabelia apo bepaneconitsimë Dioso panenajujumecovënëtsivi.

⁷ Bajarapacuenia panacaevenavi atamë paneneconitabiabixae juezmonaejavabelia, daxitajivi pacacueneyapëtae xaniavaetsia apo panejinavanapaejava Dioso pitabarata. Nexata panacaevenavimë itsa pacaitsacueniaba, itsa pacatonacobetoxotania, Dioso panejumecovënëtsivixae, xanepanaejitsipa itsa pajamatabëcuenemoyamë tsipae. ⁸ Itsiata baitsi jane paxamë Dioso panenajujumecovënëtsivijavabelia ata, paitsacueniababiabame. Yamaxëitojorobiaya pavecuanacobetoxotabiabamenua.

⁹⁻¹⁰ Payapëtaneme rabaja mapacuenije. Pibisiacuene pexanaevi apo yajavajinavanapaetsi tsane Dioso pijanacuatsia. Bajaraxuata pëtsa paexaname panijacuata panenatojitsipaecuenia. Dioso pijanacuatsia apo yajavajinavanapaetsi tsane pevitota pibisiacuene pexanaevi. Apo yajavajinavanapaetsi tsane jumapecataeya pexanaenëanëjavabelia penavajëcaevi. Apo yajavajinavanapaetsi tsane pejaitsivi itsava pijavavecua. Apo yajavajinavanapaetsi tsane pejaitsivi itsanë pamonavecua. Apo yajavajinavanapaetsi tsane penaquenetsiataevi nacaevënënapibibeje. Apo yajavajinavanapaetsi tsane penacobetoxotsivi. Apo yajavajinavanapaetsi tsane ëpamonaenexa pexainaecuene penatojitsipaevi. Apo yajavajinavanapaetsi tsane piaitajibitsabiavi. Apo yajavajinavanapaetsi tsane itsamonae pibisiacuena pebaracuacuaiajivi. Daxita bajarapitsivi apo yajavajinavanapaetsi tsane Dioso pijanacuatsia. ¹¹ Bajara picani bajayata paxamëyajuvënëvi pacuenia exanavanapa. Itsiata baitsi jane aeconoxae baja pibisiacuene paneexanaeneconimi, Dioso baja pacavecuaajibiaexana. Pacatsata baja Dioso papijajivinxamë. Dioso baja aneconijibia pacatane vajatuxanenë Jesucristo pejamatabëcueneta. Espiritu Santo ata pesaëta pacayavenona panejumecovënëtsinexa vajatuxanenë papecaitorobicuenia.

Pacuenia Dioso pejumecovënëtsivi xaniavaetsia bejinavanapa Dioso pitabarata yabara pelivaisi

¹² Itsamonae jumaitis: “Mapanacuata navita vajaexanaejavanexa. Itsajivi ata apo nacaitavetsi bajarapacuenie vajaexanaenexa,” jai itsamonae. Xaniajai rabaja picani. Itsiata baitsi jane daxita bajarapacuenie vajaexanaenexa, apo nacatoxanepanae. Mapanacuata navitsi ata vajaexanaejavanexa, xua itsajivi ata apo nacaitavetsi, itsiata bejamatabëjumaitisitsi mapacueniaje: “Papibisiacuene taexanaenexa tajamatabëcuene nitorobabiaba, apo exanaenë tsane Cristo pijajivitonëxaenë. Tsipaji itsa exanaejitsipajë bajarapapibisiacuene, nexata tajamatabëcuene bepijajivitonënëcuenia jumecovënëtabiabijsipajë,” bejamatabëjaitsi pibisiacuene vajaexanaeyaniva. ¹³ “Vajaxaejava raja vajacotsorotopijijavanexa. Vajacotsoroto raja pijinia vajaxaejava peecaenexa,” pejaillivaisi, xaniajai baja cajena. Itsiata baitsi jane itsamatacabi Dioso bajarapacueniebeje vereverecaeyaexanaena. Daxita raja vajaperabëtuareca pibisiacuene apo vajaexanavanapaenexa. Vajaperabëto raja Dioso nacatocopata vajatuxanenë vajatonacuenebavanapaenexa. Vajatuxanenë rabaja pijinia vajaperabëtota vajanacayavaponaponanexa. ¹⁴ Dioso baja cajena icatsia asaëyexanatsi vajatuxanenë petëpaecujinae. Bajara pijinia pacuenia vaxaitsi ata itsamatacabi Dioso pesaëta nacaasaëyaexanaena vajatëpaecujinae.

¹⁵ Payapëtaneme rabaja mapacuenije. Pacaenëmë canacujitsia, caenë Cristo peperabëtojavabelia becaeperabëto panaexaname papijajivixaemë.

Xanë ata rabaja Cristo bepeperabëtoyajuvënënënë. Bajaraxuata pibisiacue ne apo bexanaenë tavitota pibisiacue ne pexanabiavivajavabelia, bajarapova bepeperabëtoyajuvënëjavanë tanaexanaeyaniva. ¹⁶ Payapëtaneme rabaja mapacue neje. Pebi pibisiacue ne itsa exana pevitota pibisiacue ne pexanabiavivajavabelia, bajarapajivibeje becaeperabëto naexanabeje. Dioso pejumelivaisibaxutota jumaiti penapitsijivibeje yabara mapacueniaje: “Anijajivimibeje becaejivi naexanabeje,” jai. ¹⁷ Nexata pijinia pajivi najamatabëcuene copata vajatuxanenë Jesucristojavabelia, bajarapajivi becaejivi naexana vajatuxanenë Jesucristojavabelia.

¹⁸ Pevitota pibisiacue ne pexanaeyaexanaejamatabëcuene, pavecuana-jetabajiravabiabare. Itsajava raja pibisiacue ne pexanaejava, bitso jivi apo jamatabëcuenebijianaetsi. Pacuenia pevitota pibisiacue ne pexanaejava, jamatabëcuenebijianatsi, apo itsi. Ponë jaita itsava pijavavecua pibisiacue ne pexanaexana pevitota, bitso pibisiacue ne exana. Petiriva ata, pova jaita itsanë pamonavecua pibisiacue ne pexanaexana pevitota, bitso pibisiacue ne exana. Pajivi bajarapapibisiacue ne exana, bitso najamatabëcuenebijiana. ¹⁹ Payapëtaneme rabaja mapacue neje. Paneperabëto baja cajena Espiritu Santo pijabo papecatsijamatabëcaexae. Dioso cajena pacarajuta pija Espiritu Santo papecatsijamatabëcaenexa. Dioso baja cajena papijajivimë. Nexata paneperabëto ata paxamënexa. Apo panaperabëxainamë panijacuata panenatojitsipaecuenia paneexanavanapaenexa. ²⁰ Tspaji Dioso ayaimatamota pacacomuata. Nexata Dioso papijajivixamë, xaniavaetsia panejamatabëëthëtovetsina Dioso jumecovënëtsiaya pajinavanapare. Nexata daxitajivi Dioso yayiataeponaena paxamë xaniavaetsia itsa patsitajinavanapame.

7

Pemuxujobilivaisi penapitsijivibeje yabara pelivaisi

¹ Xua yabara panetoyaquinaremena pataneyanijobinexamë, nexata aconoxae pacajumecanaviatsijitsiatsi. Xaniajai rabaja picani. Xanepana itsa apo nacojiobi pebi. ² Itsiata baitsi jane jivi navita pevitota pibisiacue ne pexanaevi. Bajaraxuayaniva caepebi canacujitsia pijava bexaina. Bajara pijinia itsi petiriavi ata. ³ Nexata pebi pijava xaniavaetsia bevetaponapona pijavaxae. Bajara pijinia itsi petiriva ata. Xaniavaetsia bevetaponapona pamonaxae. ⁴ Petiriva, penacojiobiva, pijacuata apo naperabëxainae ëbajarapovanexa. Biji rajane petiriva baja itsa nacojioba, pamona pijaperabëtocuenia xainatsi. Bajara pijinia itsi pebi ata. Peperabëto apo naperabëxainae ëbajaraponënexa. Itsa baja nacojioba, pijava pijaperabëtocuenia xainatsi. Nexata namataenetsia naperabëxainabeje. ⁵ Papatirivimë panenacojiobivi baja, pëtsa panaperabëasivamë paneamonajivivecua. Bajara pijinia pacuenia paxamë ata papebijivimë. Pëtsa panaperabëasivamë panijavajivivecua. Matapania pamatacabimaxëto Diosojavabelia panavajëcaejitsiamëbeje, pacatocopatabeje panenavecuanaperabëasivanexabeje. Bajarapacuenia paexanaenamebeje itsa panajamatabëcuenejëpamebeje panenavajëcaenexabeje Diosojavabelia. Pamatacabimaxëto panavajëcaejitsiamëbeje Diosojavabelia, bajarapamatacabimaxëto pëtsa panaimoxoyotamebeje. Itsa baja paveretsianamebeje Diosojavabelia panenavajëcaejavabeje, pëtsa baja panavecuanaperabëasivamëbeje. Tspaji panavajënaeyabeliabeje itsa panavecuanaperabëasivamëbeje tsaponae tspape, nexata dovathi pacajamatabëcuene yamaxëtojorobijitsipabeje. Nexata pibisiacue ne paexanaejitsipamebeje, pacuene picani apo bepaexanaemëbeje.

6 Itsa pacamuxujibatsi panenacojiobinexa pibisiacuene paneexanaeyaniva panevitota, apo pacaitorobitsi daxita panenacojiobinexa. Pamonae jitsipa penacojiobijava, nacojiobi. 7 Pacuenia xanë imasia ponaponajë, bajarapacuenia picani paxamë ata imasia panejnavanapaejava, pacatojitsipatsi. Itsiata baitsi jane Dioso pacanenëmë canacujitsia papecayavenonaponaexae, pacacaëjëpa baja pacuenia paexanavanapaejitsiamë. Itsamonae paxamëyajuvenëvi itsacuenia Dioso jamatabëcuene caëjëpaeyaexanaponatsi Dioso pejitsipacuenia petoexanavanapaenexa. Itsamonae pijinia saicaya itsacuenia Dioso jamatabëcuene caëjëpaeyaexanaponatsi.

8 Mapacuenia saicaya jumaitsinëje pimasiarubenaevijavabelia, pamonajivi pevecuatëpaevitsijavabelia ata. Bajarapamonae picani toxanepanatsi imasia pejnavanapaejava pacuenia xanë imasia ponaponajë. 9 Itsiata baitsi jane itsa apo caëjëpaetsi penajamatabëcuenesaëtsijava, nexata pibisiacuene pevitota pexanaeyaniva, roviaia benacojioba. Bajarapamonae toxanepanatsi roviaia penacojiobijava. Tsipaji itsa apo nacojiobi tsipae, ëpibisiacuene pexanaenexa najamatabëxainaejitsipa. Nexata najamatabëcuene bijianaponaejitsipa.

10 Paxamë baja panenacojiobivi mapacuenia pacajumaitstsijje. Itsiata xanë apo tajamatabëcuene. Pacuenia vajatuxanenë jumaitsi, pacaitorobatsi. Papetiriavimë, pëtsa pavecuanaviabame paneamonajivi. 11 Pacamuxujobi atatsi, itsiata pova vecuanaviata pamona, bajarapova beponapona imasia. Apo benacojiobi baja. Itsa jume, benapitabeje icatsia pamonacovënëbeje. Bajara pijinia itsi pebi ata. Pebi apo hexuabi pijava.

12 Paxamë tuatuajëta Dioso apo pejumecovënëtavanapaevi yabara, jumaitsinë mapacueniaje. Itsiata vajatuxanenë apo pejumaitsjume. Dioso pejumecovënëtsinë pijava, itsa apo pejumecovënëtsiva Dioso, itsiata bajarapova itsa jitsipa peponaponaenexa bajaraponëjavabelia, nexata bajaraponë pijava apo benavecuaitavetsi pevecuanaviatsinexatsi. 13 Dioso pijinia pejumecovënëtsiva pamona, itsa apo pejumecovënëtsinë Dioso, itsiata bajaraponë itsa jitsipa peponaponaenexa bajarapovajavabelia, nexata bajarapova pamona apo benavecuaitavetsi pevecuanaviatsinexatsi. 14 Dioso pejumecovënëtsiva pamona, apo jumecovënëtsi ata Dioso, itsiata bajaraponë Dioso copatsiaexanaenatsi mapanacuapijipibisiacuene pexanabiabijavami. Bajarapacuenia Dioso copatsiaexanaenatsi tsipaji bajaraponë pijava Dioso pejumecovënëtsiva. Bajara pijinia itsane Dioso pejumecovënëtsinë pijava. Apo jumecovënëtsi ata Dioso, bajarapova Dioso copatsiaexanaenatsi mapanacuapijipibisiacuene pexanabiabijavami. Bajarapacuenia Dioso copatsiaexanaenatsi tsipaji bajarapova pamona Dioso pejumecovënëtsinë. Bajarapacuenia Dioso itsa apo copatsiaexanae tsipae pibisiacuene pexanabiabijavami, nexata pacuenia Dioso coxitane pamonae Dioso apo pejumecovënëtsivi, bajarapacuenia coxitaëjitsipatsibeje Dioso. Nexata bajarapajivibeje caejivi pejumecovënëtsixae, Dioso coxitaenatsibeje bepenajuajumecovënëtsijivibeje Dioso. 15 Itsiata Dioso pejumecovënëtsiva pamona, itsa apo pejumecovënëtsinë Dioso, itsa jamatabëvecuanaviatatsi, nexata becopata roviaia pevecuanaviatsinexatsi. Dioso pijinia pejumecovënëtsinë pijava, itsa apo pejumecovënëtsiva Dioso, itsa jamatabëvecuanaviatatsi, nexata becopata roviaia pevecuanaviatsinexatsi. Nexata Dioso pejumecovënëtsinë, pijava pevecuanaviatsinëtsi, bepimasiarucaenë penaexanaenexa. Pova pijinia Dioso pejumecovënëtsiva, pamona pevecuanaviatsivatsi, bepimasiarucaeva penaexanaenexa. Bajarapacuenia hexana imasia peponaponaenexa. Tsipaji Dioso nacajunata jamatabëcuenexanepanaeya vajajina-

vanapaenexa. ¹⁶ Papetiriavimē, paneamonajivi Dioso ita apo pejume-covēnētsivi, paxamē xaniavaetsia panetsitajinavanapaexae tsane panea-monajivi, paneamonajivi ata meta najamatabēcuenecopatsiana Cristojavabelia. Papebijivimē pijinia, panijavajivi Dioso ita apo pejume-covēnētsivi, paxamē xaniavaetsia panetsitajinavanapaexae tsane panijavajivi, panijavajivi ata meta najamatabēcuenecopatsiana Cristojavabelia. Bajaraxuata jamatabēcuenexanepanaeya panacajinavanapare. Pētsa panavecuanaviabame.

¹⁷ Caenē canacujitsia tsiteca hexanaponapona pacuenia Dioso tocopatatsi pexanaponaponaenexa. Xua nacuenebaponapona Dioso pejunatsivajēnaeyatsi Jesucristojavabelia penajamatabēcuenecopatsinexa, bajaraxua mapamatacabi ataje tsiteca benacuenebaponapona. Bajarapacuenia itorobaponajē daxita Dioso pejume-covēnētsivijava pexanialivaisi ita tsipaebanajetarucajē.

¹⁸ Ponē Dioso junatatsi pepua peperabēcaucutsinētsi baja judiōvi pijacuenia, bajaraponē baja bajarapacuenia Dioso bejume-covēnētaponapona. Ponē pijinia Dioso junatatsi abaxē apo peperabēcaucutsinē atatsi judiōvi pijacuenia, bajaraponē baja bajarapacuenia Dioso bejume-covēnētaponapona. Apo benaperabēcaucutsiaexanae.

¹⁹ Vajanacaperabēcaucutsijava, amatamobi Diosojavabelia. Apo vajanacaperabēcaucutsijava ata, amatamobi Diosojavabelia. Dioso rajane vajanacaitorobicuenia vajajume-covēnētavanapaexa, bajara jane xua, namatamota Diosojavabelia.

²⁰ Caejivi canacujitsia benacuenebaponapona xua nacuenebaponapona Dioso pejunatsivajēnaeyatsi.

²¹ Itsamonae baja paxamēyajuvēnēvi Jesucristojavabelia penajamatabēcuenecopatsivajēnaeya, dajubicuenia canajetatsi itsamonaejavabelia amoneya petonacuenebavanapaenexa. Nexata bajarapamonae pijatuxanevi amoneya tonacuenebabiaba. Itsiata baitsi jane bajarapamonae Dioso baja pejunatsixaetsi Jesucristojavabelia penajamatabēcuenecopatsinexa, pētsa natsinajamatabēxaina pijatuxanevi amoneya penacuenebiaexanabiabijavatsi yabara. Jamatejema saya tonacuenebavanapae pijatuxanevi. Itsiata baitsi jane itsamatacabi ita tocopiapatsianatsi pevecupitsapaenexa baja bajarapamonae, nexata vecuapitsapaena amoneya petonacuenebabiabivi.

²² Ponē itsamonaejavabelia canajetatsi, nexata amoneya ita tonacuenebaponapona, bajaraponē bitso pibisiacuene pexanabiabineconimi Cristo baja vecuajibiaexanatsi. Bajarapacuenia vecuajibiaexanatsi pamatacabi najamatabēcuenecopata Cristojavabelia. Copata baja pibisiacuene pexanabiabijavami. Nexata Dioso pitorobicueniatsi exanaponapona. Bajara pijinia itsi ponē ata apo canajetsitsi itsamonaejavabelia. Itsa najamatabēcuenecopata Cristojavabelia, bajaraponē Cristo pijajivitonē baja naexana. Nexata bajaraponē ata exanaponapona Dioso pitorobicueniatsi.

²³ Dioso baja cajena pacacomuata ayaimatamota. Bajaraxuata pētsa baja panacopatame itsajivi ata papecajamatabēcuenebijianaenexa Dioso panejume-covēnētavanapaexavavecu.

Itsa bajarapacuenia panacopatsipame papecajamatabēcuenebijianaenexa, nexata bajarapajivi bepapijajivimē tsipae paneexanavanapaenexa papecaitorobicuenia.

²⁴ Bajaraxuata, xua baja panacuenebavanapame, tsiteca panevajēnaeyabelia xaniavaetsia panacuenebavanapare Dioso pitabarata. Pacaenēmē canacujitsia panacuenebavanapare xua panacuenebavanapame pamatacabi abaxē Dioso apo pacajunatsi panejume-covēnētsinexa. Itsa apo pacaperabēcaucutsi judiōvi pijacuenia, nexata bajarapacuenia pajinavanapare. Itsamonaejavabelia papecacanajetsixae, nexata amoneya ita patonacuenebavanapame, bajarapacuenia tsiteca

patonacuenebavanapare.

²⁵ Itsa panetoyaquinaremena, paneyanijobame abaxë apo penacojiobavanapaevi yabara. Apo yapëtaenë pacuenia vajatuxanenë jumaitsi bajarapitsivi yabara. Itsiata baitsi jane pacatsipaebianatsi pacuenia sivanajamatabëxainajë bajarapitsivi. Dioso tajamatabëcueneeta neyapëtaeyaexana taneitaxutotsoniataexae. Bajaraxuata pacatoxanepana pacuenia pacatsipaebijitsiatsi patanejumecovënëtsinexamë. ²⁶ Dioso vajajumecovënëtavapanapaevi, nacatsiyai bitso aeconoxae vajajinavana-paeepato abaxë mapanacuataje. Tsiipaji itsamonae vajanacaitoyaxae, nacabejiobiaexanaponaena. Bajaraxuata netsitaxanepana bajarapamonae itsa apo nacojiobavanapae. ²⁷ Itsa baja capanepaeya nacojiobivi, pëtsa xuaba pijava. Itsiata baitsi jane itsa abaxë apo nacojiobi, pëtsa jaita pijavanexa. ²⁸ Ponë baja capanepaeya nacojioba, apo pibisiacuene. Petiriva ata baja itsa nacojioba, apo exanae pibisiacuene. Aeconoxae daxita Dioso vajajumecovënëtsivi bitso vajanacatsiyaixae, pamonae baja nacojioba, bajarapamonae toayapëbeje tsanetsi pevēcupanepaenexa bajarapapiayaicuene. Bajarapacuenia petoyapëbejeyanivatsi, bajarapamonae picani tojitsipajë imasia pejinavanapaenexa.

²⁹ Tajamonae, mara pacuenia jamatabëpacajumaitsisije. Imoxoyo rabaja pevajënae vajatuxanenë icatsia pepatsijavanexatsica. Ajena, mapamatacabicujinaelia tsaneje, penacojiobivi ata bepimasiarubenaevicuenia asaëyata betonacuenebavanapa vajatuxanenë. ³⁰ Daxitajivi bejamatabëcueneenatsi ëDioso pijacuene petonacuenebavanapaenexa. Pamonaе bitso najamatabëxaina peyajuvënëtëpaexae, bajarapamonae ata najamatabëxainaenejeva asaëyata betonacuenebavanapa vajatuxanenë. Apo bepenajamatabëxainaevicuenia, bejinavanapa. Pamonaе ata jamatabëcuenebarëya tsavanapae, asaëyata betonacuenebavanapa vajatuxanenë. Apo bepejamatabëcuenebarëyavicuenia betonacuenebavanapa. Pamonaе ata comuaca pexainaejavanexa, asaëyata betonacuenebavanapa vajatuxanenë. Asivaya apo betae xua natocomuaca. ³¹ Pamonaе ata, mapanacuata pexainaejava, canacuenebavanapa, bajarapamonae becanacuenebavanapa jamatabëcuenecënënaenejevatsi bajarapajamatabëcuene. Tsiipaji mapanacuapijicuene vajataejavami verevercapona.

³² Apo pacatojitsipaetsi papecajamatabëcueneenaenexa mapanacuapijicueneje. Ponë abaxë imasia ponapona, jamatabëcueneenatsi ëvajatuxanenë pijacuene. Tsiipaji jitsipa pesivajamatabëcuenebarëyanexatsi vajatuxanenë. ³³ Itsiata baitsi jane penacojiobinë yajavajamatabëcueneenatsi pevetsinexa pijava pesivajamatabëcuenebarëyanexatsi. ³⁴ Apo najamatabëcuenejëpaebeje pijinia penacojiobivabeje pimasiarucaevabeje. Pova apo nacojiobi, jamatabëcueneenatsi ëvajatuxanenë pijacuene. Jitsipa pexaniacuene pexanaponaponaenexa. Jitsipanua pexaniacuene penajamatabëxainaponaponaenexa Dioso pesivajamatabëcuenebarëyanexatsi. Itsiata baitsi jane penacojiobiva yajavajamatabëcueneenatsi pevetsinexa pamona pesivajamatabëcuenebarëyanexatsi.

³⁵ Bajarapacuenia itsa pacajumaitsitsi, apo penacojiobivi apo itavetsinë penacojiobijava. Patacajamatabëcuene yavenonaenexa raja, pacajumaitsitsi bajarapacuenia. Tsiipaji pacatojitsipatsi xaniavaetsia panejinavanapaenexa. Vajatuxanenë bepatonacuenebavanapame daxita panejamatabëcueneeta, panajamatabëcuene epatajërërëcaenejevamë.

³⁶ Ponē pexēnatoyo xaina, itsa tsitaxanepanatsi pexēnatoyo petonacojiobinexatsi, nexata betocopata penacojiobinexa. Tsipaji baja penaveretsiva tsaponaponae. Bajarapova ata baja itsa jitsipa penacojiobinexa, betocopata penacojiobinexa. Itsa tocopata pexēnatoyo penacojiobinexa, apo pibisiacuene. ³⁷ Ponē pijinia pexēnatoyo itsa apo jitsipae abaxē penacojiobinexa, bajaraponē ata itsa najamatabēcuenevereta apo petocopsinexa pexēnatoyo penacojiobijava, nexata bajaraponē ata pexaniacuene exana. ³⁸ Nexata ponē apo tocopatsi pexēnatoyo penacojiobinexa, bajaraponē itsanēvecua bitso pexaniacuene exana.

³⁹ Penacojiobiva baja acuenebi pevecuanaviatsinexa pamona. Tsipaji pamona piasaētsaponaponaeepato, bajaraponē abaxē tsiteca pijava tsaponaponae. Tsipaji bajarapacuenia Dioso najumecopata. Itsiata baitsi jane pamona itsa vecuatēpatsi, bajarapova tocopatatsi icatsia penacojiobinexa. Tocopatatsi penacojiobinexa ponējavabelia jamatabēnacojioba, itsa bajaraponē ata Dioso pejumecovēñetsinē. ⁴⁰ Itsiata bajarapova pamona pevecuatēpaeucujinaetsi, imasia abaxē itsa ponapona, jamatabēcuenebarēya tsaponaponae tsane ēDioso pijacuene pejamatabēcueneenaponaponaexaetsi. Nexata baja itsa nacojiobiana, bevelia baja jamatabēcuenebarēya tsane. Pacuenia copiaya jamatabēcuenebarēya tsaponaponae, apo itsi tsane baja. Bajarapacuenia najamatabēxainajē bajarapacuenia yabara. Bajarapacuenia itsa pacajumaitsitsi, Espírítu Santo neyajavacuaicuaijai.

8

Jumapecataeya pexanaenēanējavabelia perajutsiviyajuvēñējava yabara pelivaisi

¹ Jumapecataeya pexanaenēanē itsamonae tane bepijadiosovi. Nexata bajarapamonae dajubi beyabiaba perajutsinexa bajarapavi jumapecataeya pexanaenēanējavabelia. Bajarapaviyajuvēñējava panexaejava ata yabara, paneyanijobame itsa panetoyaquinaremena. Nexata bajaraxua yabara juya mapacatoyaquinatsijē. Xaniajai rabaja cajena. Daxitatsi baja cajena bajarapacuenie yapētanetsi. Pavi rajuta jumapecataeya pexanaenēanējavabelia, bajarapaviyajuvēñējava xae atatsi tsipae, apo nacaitacueniabi tsipae. Itsiata vajaxaecujinae bajarapaviyajuvēñējava, itsa jamatabējumaitsitsi: “Xanē bitso yapētaniji pamona mapavije atsobabiaba matatoxenetsia,” itsa jamatabējaitsi, abeje rajane bajarapajamatabēcuene. Tsipaji beayajamatabēcuenejivitsi nataejitsipatsi bajarapamonaevecua. Biji rajane xanepana vajajamatabējumaitsinexa mapacueniaje: “Asivaya taniji Dioso patanajuajumecovēñetsivi, pamona atsobabiaba jumapecataeya pexanaenēanējavabelia perajutsiviyajuvēñējava. Nexata xanē ata apo xanē tsane bajarapaviyajuvēñējava. Nexata xaniavaetsia tsitaponaponaenajē bajarapamonae taneitaxutua ajamatabēcuenesaenēna Diosojavabelia,” vajajamatabējaijava xanepana. Bajarapacuenia itsa tsitaponapontatsi Dioso pejumecovēñetsivi, nexata nacaitaxutuaajamatabēcuenesaē tsaponae Diosojavabelia. ² Pajivi jamatabējumaitsi: “Xanē cajena bitso yapētaniji daxitacuene,” jamatabējai, bajarapajivi pejamatabēcuenenavēxaniabijivi. Abaxē ayaijava tosaicatsi xaniavaetsia peyapētaenexa. ³ Itsiata baitsi jane pajivi Dioso jitsipa, bajarapajivi Dioso ata jamatabēcuene yapētanetsi Dioso pejitsipaejava.

⁴ Nexata jitsipajē patacayapētaeyaexanaenexa itsamonae jumapecataeya pexanaenēanējavabelia perajutsiviyajuvēñējava pexaejava yabara. Vaxaitsi baja cajena yapētanetsi jumapecataeya pexanaenēanē apo pexaniajaicuene.

Tsipaji saya jivi pecobeta pexanaejavanë. Yapëtanetsi baja cajena caenë Dioso peponaponaejava. Pematatsënëa baja cajena itsadioso ajibi. ⁵ Jivi raja apo yapëtae. Bajaraxuata saya jamatabëcuenenavëxaniabiaya jumai tsabiabi: “Diosovi raja navitsiajinavanapa athëbëtatsia. Jinavanapa mapanacuajava ataje,” jai tsabiabi jivi jamatabëcuenenavëxaniabiaya. ⁶ Itsiata vaxaitsi yapëtanetsi caenë vaxa Dioso peponaponaejava. Bajaraponë daxitacuene pexanaenë. Bajaraponënexa tojinavanapatsi. Caenë rabaja pijinia pepo vajatuxanenë Jesucristo. Bajaraponë pejamatabëcueneta exana daxitacuene. Bajaraponë pejamatabëcuenetanua nacacapanepaena vajaneconivecua.

⁷ Itsiata baitsi jane itsamonae Dioso pejumecovënëtsivi ata, abaxë apo yapëtae pacuenia picani apo caëjëpaetsi jumapecataeya pexanaenëanë pejamatabëcuenebijianaenexatsi. Bajarapamonae pejevaxijavaveliacujinae jumapecataeya pexanaenëanë taeyabiaba bepiasaëtsavanapaevi. “Papexaejava itsamonae rajutabiaba jumapecataeya pexanaenëanëjavabelia, diosovijavabelia rajutabiaba bajaraxua,” sivejamatabëjai tsabiabi bajarapamonae jamatabëcuenenavëxaniabiaya. Bajaraxuata bajarapamonae aeconoxae Dioso jumecovënëtsi ata, itsa xane jumapecataeya pexanaenëanëjavabelia perajutsiviyajuvënëjava, bajarapamonae jamatabëcuenenavëxaniabiaya jamatabëjumai tsabiabi: “Pibisiacuene meta exanajë Dioso pitabarata mapavi taxaexaeje,” jamatabëjai tsabiabi. Tsipaji Dioso jumecovënëtsi ata, abaxë apo yapëtae pacuenia picani apo caëjëpaetsi jumapecataeya pexanaenëanë pejamatabëcuenebijianaenexatsi. ⁸ Yapëtanetsi rabaja vaxaitsi. Vajaxaejava yabara Dioso pexitsi apo nacaexanae. Xae atatsi, apo xae atatsinua, najëpabeje. Vajaxaejava apo nacavënananeconitsiaexanae Dioso. ⁹ Paxae atamënua, apo paxae atamënua, itsiata picani apo pacaitsacueniabi tsipae. Itsiata baitsi jane xania baja tsane. Dioso panenajuajumecovënëtsivi asivaya panetaexae, pëtsa patsitaexaname itsacuenëjavayo ata, xua bepibisiacuene taejitsipa bajarapamonae. Tsipaji itsa pacacuenetaejitsipa, exanaejitsipa bajarapajivi ata. Nexata Dioso pejumecovënëtsijavavecua pajopaeyaexanaejitsipame bajarapajivi. Tsipaji abaxë jamatabëcuenefaena Dioso pejumecovënëtsijava. ¹⁰ Paxamë pëtsa panabaneme pabojavata jumapecataeya pexanaenëanëjavabelia perajutsiviyajuvënëjava abatabiaba. Paxamë baja payapëtaneme pacuenia apo pacaitsacueniabi picani tsipae, bajarapaviyajuvënëjava paxae atamë. Nexata itsa paxaejitsipame bajarajota, panexaejavata pacataejitsipa itsanë Dioso pejumecovënëtsinë, ponë abaxë bepibisiacuene pexanaejava tane bajarapavi itsa naxaejitsipa. Nexata itsa pacajanitane, bajaraponë ata naxaejitsipa. Nexata penaxaexae, bepenaneconitsinë Diosojavabelia nataejitsipa. ¹¹ Paxamë picani bajarapitsinë matatoxenetsia panepapëtaexae, paxaejitsipame bajarapaviyajuvënëjava. Itsiata nexata bajarapacuenia pajamatabëcuenebijianaejitsipame, ponë Dioso pejumecovënëtsinë ata, abaxë jamatabëcuenefaena Dioso pejumecovënëtsijava. Bajaraponënexa ata cajena Cristo sivatëpatsi. ¹² Bajarapacuenia itsa pajamatabëcuenebijianaejitsipame Dioso pejumecovënëtsijivi, nexata pananeconitsipame Cristojavabelia. ¹³ Bajaraxuata xanë itsa yapëtaniji pacuenia itsajivi, Dioso pejumecovënëtsijivi, belia jopaejitsipa Dioso pejumecovënëtsijavavecua xanë tatsitaxaejava pejamatabëcueneta, nexata caeto ata apo tsitaxaenë tsipae bajarapaviyajuvënëjava asivaya tataexae bajarapajivi.

9

Pacuenia apóstolevi tocopatatsi, xua namatavenona, pevajëtsinexa Dioso pejumecovënëtsivijavabelia yabara pelivaisi

¹ Payapëtaneme rabaja mapacueneye. Xanë apo xae atanë jumapecataeya pexanaenëanëjavabelia perajutsiviyajuvënëjava, itsiata Dioso netocopata daxitacuene taexanaenexa Jesucristojavabelia tanajamatabëcuenecopatsixae. Payapëtanemenua vajatuxanenë Jesucristo taneitapetsijava apóstolenëexanë. Taitaxutota baja cajena taniji vajatuxanenë Jesús. Paxamë ata patacatsipaebixae Jesucristo pelivaisi, nexata baja panajamatabëcuenecopatame Jesucristojavabelia. Tspiji asaëyata tonacuenebaponaponajë vajatuxanenë. ² Itsamonae apo beapóstolenë netae ata, itsiata paxamë apóstolenëcuenenë paneyapëtaneme. Patacatsipaebixae pexanialivaisi, paxamë baja vajatuxanenë pajumecovënëtame. Bajaraxuata picani daxitajivi xaniavaetsia beneyapëtane apóstolenëcuenenë.

³ Itsajota pexanialivaisi jivi tsipaebaponaponajë, Dioso picani netocopata tanerajutsinexa tanamatavenonaejavaxi. Itsamonae paxamëyajuvënëvi nejumeebabibiaba livaisi tatsipaebabiabijava mapacueniaje.

⁴ Paapóstolevinë itsa panacuenebajë Dioso pijacuene, panetocopata itsajota pexanialivaisi patsipaebavanapajë patanerajutsinexa pataxaejava, pataapaejava ata. ⁵ Itsa tanacojobinë tsipae, xanë ata pijinia Dioso netocopatsipa tabarëponaenexa tajava, Dioso pejumecovënëtsiva. Bajarapacuenia netocopatsipa tspiji bajarapacuenia exanavanapa itsamonae apóstolevi. Vajatuxanenë pejuyajivivi ata, apóstolenë Pedro ata, pijava barëponabiaba. ⁶ Itsamonae itsa pacatsipaeba Cristo pelivaisi, pajamatabëcueneyavenonabiabame penamatavenonaejava yabara. Itsiata baitsi jane paxanëbeje Bernabébeje panacuenebabiabajëbeje patajacuatabeje patanaevetsinexabeje. Bajarapacuenia picani apo benacuenebinëbeje patajacuatabeje patanaevetsinexabeje. Nexata picani paxamë, paxanëbeje ata, bepanerajutame patanamatavenonaejavaxibeje. Tspiji paxanëbeje Cristo pelivaisi patacatsipaebabiabixaebeje, Dioso picani panetocopatabeje patanerajutsinexamë patanamatavenonaejavaxibeje.

⁷ Payapëtaneme baja cajena mapacueneye. Itsanë itsa tonacueneba pijatuxanenë, barajutatsi pexaejava. Pamonae ata pijinia vajabitsaë nexanavanapa, itsa rajutaponatsi pexaejava, apo matamataponae pexaejavamatamo pijapalatata. Jume cajena. Tocomuatabiabatsi ponë itorobatsi. Pamonae pijinia xaina uvabacabo, itsajivi ata apo janiitavetsitsi pexaeyaniva penotsicuaiyajuvënëjava. Pamonae pijinia itsanë pijaoveja toeveta, itsajivi ata apo janiitavetsitsi pemiyujucabarëmeneyajuvënëjava piapaeyaniva. Jume cajena. ⁸ “Maraeta pacuenia Pablo nacajumajitsi saya jivi petsitaxanepanaecueniatsi vajaexanavanapaenexa,” pajamatabëjamë pëtsa. Tspiji rabaja Dioso pejumelivaisibaxutota ata bajarapacuenia jumajitsi. ⁹ Dioso pejumelivaisibaxutota jumajitsi pacuenia bueyu copatatsi pexaejava pexaenexa penacuenebijavata ata. Jumajitsi mapacueniaje: “Pabueyu canacuenebame trigoxu pecatotanabataxuabinexa, pëtsa pumuxatatame nepumuxatatabiabiavata. Pëtsa pumuxatatame trigoxu pexaenexa pecatotanabataxuabiavata,” jai Dioso pejumelivaisibaxutota. Bajarapacuenia Dioso pejumelivaisibaxutota itsa jumajitsi, ëbueyu yabara apo jumajitsi. ¹⁰ Biji rajane bajarapacuenia Dioso pejumelivaisibaxutota jumajitsi vajanacayapëtaeyaxanaenexa vajanamatamotsijavanexa vajanacatonacuenebinë. Ponë canacueneba iracuemo itsanë pijatrigoxu

petoubinexa, penacuenebijavata jamatabėjumaitisi: “Pamatacabi naveretsiana trigoxu, bajarapaxuyajuvėnėjava nerajutsiana tatonacuenebimatamo,” jamatabėjai. Nexata penaveretsimatacabi trigoxu rajutatsi. Ponė ata icatsia juya trigoxu penaveretsimatacabi totanabataxuaba, bajaraponė ata jamatabėjumaitisi: “Mapatrigoxuyajuvėnėjavaje nerajutsiana tatonacuenebimatamo,” jamatabėjai. Nexata rajutatsi. Bajara pijinia pacuenia Dioso pijacuene patatonacuenebivi patanamatavenonaejavaxi, paxamė bepanerajutame Cristo pelivaisi patacatsipaebijamatabėcuene. ¹¹ Paubajė baja cajena panejamatabėėthėtota Dioso pejumelivaisi. Jica, nexata juya itsa pacajamatabėcueneevetsipatsi patanerajutsinexamė patanamatavenonaejavaxi, ¹² paxamė rabaja Dioso pejumelivaisibaxutota papecaitorobicuenia, parajutabiabame itsamonae penamatavenonaejavaxi papecatsipaebijamatabėcuene Cristo pelivaisi. Paxanė biji picani panetoxanepana copiaya patanerajutsinexamė itsamonaevecua.

Dioso picani panetocopata patanerajutsinexamė patanamatavenonaejavaxi Cristo pelivaisi patacatsipaebaponaejamatabėcuene. Itsiata apo pacavajėtsitsi patanerajutsinexamė. Biji rajane piayapėbejecuenia panatonacuenebaponajė patajacuata patanaevetsinexa bajarapacuenia. Apo pacavajėtsitsi caeto ata patanerajutsinexamė patanamatavenonaejavaxi. Itsa pacavajėtsipatsi, itsajamatabėcuene meta paxinaejitsipame paxanėjavaberena. Nexata meta apo pajumecovėnėtsimė tsipae patacatsipaebilivaisi, pexanialivaisi, Cristo pelivaisi. ¹³ Payapėtaneme rabaja mapacuenije. Templobota Dioso petonacuenebivi, tocopatatsi bajara patemplobopijipexaejava pexaenexa. Baitsi pamonae penacuenebivi altarvėnėjavata, itsajota dajubi tobeyabiaba ofrendacuenia perajutsinexa bajarapavi Diosojavabelia, bajarapamonae ata Dioso tocopatatsi pexaenexa bajarapavijajuvėnėjava. ¹⁴ Bajara pijinia pacuenia vajatuxanenė Jesucristo itoroba Dioso pejumelivaisi petsipaebaponaevi penamatavenonaejavaxi perajutsinexatsi. Pamonae jumecovėnėtaponae petsipaebilivaisi, bajarapamonae juya herajutapona xua namatavenona petsipaebivitsi. ¹⁵ Itsiata baitsi jane xanė bajarapacuenia netocopatsi ata, apo pacavajėtsitsi itsacuenejavayo ata. Mapabaxutoje pacatoyaquinae atatsi, apo pacatoyaquinaetsi patanerajutaponaenexamė itsacuenejavaxi. Bitso cajena jamatabėcuenebarėyanė. Tsiipaji Cristo pelivaisi pacatsipaebabiabatsi, apo panerajutsi atamė itsacuenejavayo ata. Bajaraxuata baja cajena apo jitsipaenė patanematamotsijavamė. Itsa panematamotsijitsiamė tsipae, nexata jitsipaejitsipajė tatėpaejava patanematamotsiyanimė. Tsiipaji itsa panematamotsipame, copiarucaejitsipa baja patacasivajamatabėcuenebarėya tsabiabijavami. Tsiipaji amoneya patacatsipaebabiabixae Cristo pelivaisi, pacasivajamatabėcuenebarėyatsi tsabiabi.

¹⁶ Apo jamatabėjumaitisinė: “Ayaijamatabėcuenenėnė tatsipaebinėxae jivi pexanialivaisi pecapanepaelivaisinexatsi Diosojavabelia,” apo jamatabėjanė. Jume baja cajena. Pexanialivaisi jivi tsipaebabiabajė. Tsiipaji baja vajatuxanenė nitoroba. ĩBitso meta naneconitsipajė Diosojavabelia jivi itsa apo tsipaebinė tsipae bajarapalivaisi! ¹⁷ Dioso nitorobinejeva, saya xanė tajamatabėcueneta jivi itsa tsipaebaponaejitsipajė pexanialivaisi, Jesucristo pelivaisi, nexata jamatabėcuene evetabiabijsitipajė jivi tanematotabiabinexa pexanialivaisi tatsipaebabiabijamatabėcuene. Itsiata baitsi jane pexanialivaisi jivi tsipaebaponaėjė vajatuxanenė taneitorobixae. Jumecovėnėtaponaponajė pacuenia Dioso nitorobapona.

¹⁸ Bajaraxuata apo nematamotsi ata, tsipaebaponajë pexanialivaisi jivi pecapanepaelivaisinexatsi Diosojavabelia. Dioso nefocopatsi ata jivi tanematamotsinexa pexanialivaisi tatsipaebaponaejamatabëcuene, itsiata apo vajëtsinë tanagerajutsinexa itsacuenejavayo ata. Jivi itsa tsipaebaponajë bajarapalivaisi, bitso jamatabëcuenebarëyanë tsaponae. Bajaraxuata apo jitsipaenë tanematamotsijava.

¹⁹ Apo tanecanajëtsinë raja dajubinëcuenia itsamonaejavabelia amoneya tatonacuenebinexa. Itsiata baitsi jane daxitajivi beprijavitonëncuenia ponaponajë. Bajarapacuenia exanaponaponajë itsamonae ayaibitsaëttoxaneto ata tayavenonaenexa, penajamatabëcuenecopatsinexa Cristojavabelia, pecapanepaenexatsi Diosojavabelia. ²⁰ Judíovi jumecovënëtsiajinavanapa bajayata Dioso Moiséspijinëta penajumecopatsilivaisi. Xanë picani apo jitsipaenë taexanaponaponaeenexa pacuenia itoroba Dioso Moiséspijinëta penajumecopatsilivaisi. Tsipaji baja najamatabëcuenecopatajë Cristojavabelia tajaneconi tanevecuajibiaexanaenexa. Itsiata judíovijava itsa naponaponabiabajë, pacuenia Dioso Moiséspijinëta penajumecopatsilivaisi itorobatsi, judíovi itsa exana, xanë ata bajarapacuenia naexanabiabajë. Bajarapacuenia naexanabiabajë bajarapamonae judíovi xaniavaetsia tanenamuxunaevetsinexa Cristo pelivaisi itsa tsipaebajë. Nexata judíovi itsa najamatabëcuenecopata Cristojavabelia, pecapanepaenexatsi Diosojavabelia. ²¹ Bajara pijinia pacuenia apo judíovijava ata itsa naponaponabiabajë, judíonë atanë, pacuenia apo judíovi jinavanapa, cuenejëpaeya naponaponabiabajë. Bajarapacuenia apo judíovi cuenejëpaeya naponaponabiabajë bajarapamonae xaniavaetsia tanenamuxunaevetsinexa Cristo pelivaisi itsa tsipaebajë. Nexata apo judíovi ata itsa najamatabëcuenecopata Cristojavabelia, pecapanepaenexatsi Diosojavabelia. Bajarapamonae apo judíovi apo jumecovënëtsiajinavanapae bajayata Dioso Moiséspijinëta penajumecopatsilivaisi. Bajarapamonaejava naponaponabiabi atanë, itsiata apo copatsinë tajumecovënëtsijava Dioso pejumelivaisi saicaya tajitsipacuena taponaponaeenexa. Jume baja cajena. Tsipaji jumecovënëtajë Cristo taneitorobicuenia. ²² Itsamonae abaxë ajena najamatabëcuenecopaba Cristojavabelia. Nexata abaxë apo ajamatabëcuenesaë tsavanapae Dioso pejumecovënëtsijava. Bajarapamonaejava cuenejëpaeya naponaponabiabajë. Bajarapacuenia cuenejëpaeya naponaponabiabajë tajamatabëcueneavenonaenexa bajarapamonae pevajënaeyabelia piagamatabëcuenesaë tsavanapaenexa vajatuxanenëjavabelia. Baitsi pacuenia caeviria canacujitsia jivi pijasalinaicuenia jinavanapa, bajarapacuenia xanë ata cuenejëpaeya naponaponabiabajë. Bajarapacuenia cuenejëpaeya naponaponabiabajë bajarapamonae tajamatabëcueneavenonaenexa. Jamatabëcueneavenonaejitsianë bajarapamonaejavuvënëvi ayaibitsaëttoxaneto ata penajamatabëcuenecopatsinexa Cristojavabelia pecapanepaenexatsi Diosojavabelia. ²³ Bajarapacuenia exanaponaponajë baja jivi pejumecovënëtsinexa pexanialivaisi pecapanepaelivaisinexatsi Diosojavabelia, bajarapamonae ata taneyajavacapanepaenexatsi Diosojavabelia.

²⁴ Payapëtaneme rabaja mapacuneje. Penayacobivi pecujinaejinaejava, bacujinaejina daxita. Itsiata baitsi jane ponë bitsojina pecujinaejinaejava daxita penayacobivi matatoxenetsia, bajaraponë caenë bapita xua tsipaebatsi pecujinaejinaematamo, premiovënëjjava. Pacuenia penayacobivi pecujinaejinaejava, daxitasaëta bacujinaejina, bajara pijinia pacuenia paxamë ata daxita panesaëta panevajënaeyabelia patonacuenebavanapare Dioso.

²⁵ Daxita pamonaē penayacobivinexa pecujinaejinaejava, tajēvelia banajamatabēveretavanapa pebitsojinaenexa itsamonae matatoxenetsia. Naxaniavaetavanapanua. Daxitamatacabi canacujitsia nasisaēējēbavanapa caenē canacujitsia. Bajarapamonae najamatabēcuenesaētavanapa, daxita xua abeje, pexanaeyaniva piajumalisaenexa. Bajarapacuenia naxaniavaetavanapa, penayacobijavata itsamonae matatoxenetsia pebitsojinaenexa, perajutsinexatsi corona, naebaxucorona. Itsiata baitsi jane bepija saya piabejecoronanexa. Biji rajane vaxaitsi Dioso vajajumecovēnētsivi, Dioso tonacuenebavanapatsi athēbētatsia vajanacarajutsinexa xua nacatsipaeba, apo peverevereceaevanexa. ²⁶ Pacuenia pebitsojinaenē asaēyata cujinaejina rovia pepatsinexalia petocaējētsijavabeliatsi, bajara pijinia pacuenia xanē ata asaēyata tavajēnaeyabelia exanaponaponajē vajatuxanenē taneitorobicuenia. Tonacuenebaponaponajē asaēyata. Apo tonacuenebiniē saya jema penaxuabinexa tatonacuenebijava. ²⁷ Bajaraxuata naperabēevetsia naevetaponaponajē pibisiacuene taexanaeyaniva. Bajarapacuenia naperabēevetsia naevetaponaponajē tsipaji jitsipajē vajatuxanenē taneisivajamatabēcuenēbarēya tsaponaejava itsamonae itsa tsipaebaponajē pexanialivaisi. Apo jitsipaenē tanecopatsiaexanaejava Dioso tatonacuenebijava. Itsamonae pexanialivaisi tatsipaebicujinae, bijiata itsa ponaponaejitsipajē, Dioso necopatsiaexanaejitsipa tatonacuenebijava.

10

Pemuxujobilivaisi penavajēcaeyaniva jumapecataeya pexanaenēanējavabelia yabara pelivaisi

¹ Tajamonae, pacatojitsipatsi icatsia panenajamatabēnapitsinexa pacuenia bajayatami vajasalinaivimi Moiséspijinē barēpitsaparena Egipto nacuaverena. Moiséspijinē Dioso tsitajētaponatsi itsaxuayo vajasalinaivimi barēnajetaruaejitsia. Vajasalinaivimi pematatsēnēatsia itarērēbo namataxainaeya najetaruca. Nexata bajarapaitarērēbo vajasalinaivimi pēnanajetarubena. Daxitabitsaēto vajasalinaivimi Moiséspijinē barēnicabarena Rojovēnē manuamenemaxērana epatuarena. ² Pacuenia pebi itsa bautisabatsi merata, naexana Dioso pijajivitonē, bajara pijinia pacuenia vajasalinaivimi Moiséspijinē pijajivi naexana itsa pēnaponarena Egipto nacuaverena. Moiséspijinē pijajivi naexana vajasalinaivimi itarērēbo pebēxēpana itsa pēnanajetarubena Moiséspijinē. Rojovēnē manuamenemaxērana epatuarena ata itsa barēnicabarenatsi, Moiséspijinē pijajivi naexana vajasalinaivimi. ³ Daxita vajasalinaivimi caevirijava pexaejava najuanabanepona itsa najetarubena bajarapatusato nacuayarena. Papexaejava Dioso rajutaponatsi, bajarapamonaeimi xaepona. ⁴ Itsa najetarubena, caeviriamera najuaapaepona, Dioso perajutsiratsi. Bajarapamera Dioso tocapitsapatsi ibotoxanetojavaverena. Bajarapamatacabi vajasalinaivimi Cristo yjavaponatsi. Cristo rabaja cajena bajarapaibotoxaneto. ⁵ Itsiata baitsi jane vajasalinaivimiyajuvēnēvi, caejiviyobeje, saya jumecovēnēta pacuenia Dioso najumecapanepaeya jumaitsi. Nexata bajarapajiviyobeje Dioso sivajamatabēcuenēbarēyatsi. Daxita itsamonae apo jumecovēnētsi Dioso. Bajaraxuata vajasalinaivimi Dioso verebiabatsi petusato nacuata.

⁶ Nexata vaxaitsi becanaējētatsi pacuenia vajasalinaivimi bajayata Dioso verebiabatsi pibisiacuene pexanaexae. Nexata vaxaitsi ata vajajamatabēthētovetsina becanaējētatsi pibisiacuene vajaexanaeyaniva.

⁷ Bajaraxuata apo benavajēcaetsi jumapecataeya pexanaenēanējavabelia

pacuenia bajayata vajasalinaivimiyajuvënëvi navajëca jumapecataeya pexanaenëanëjavabelia. Dioso pejumelivaisibaxutota jumaitsi pacuenia vajasalinaivimi pibisiacuene exananapana, fiesta itsa toxana jumapecataeya pexanaenëanënexa. Dioso pejumelivaisibaxutota vajasalinaivimi yabara jumaitsi mapacueniaje: “Bajarapamonae enabiaba penabaninexa, piapaenexanua. Bjaraxuacujinae nonobapunabiaba peyavajibinexa,” jai Dioso pejumelivaisibaxutota vajasalinaivimi yabara. ⁸ Apo hexanaetsinua vajavitota pibisiacuene pacuenia bajayata vajasalinaivimiyajuvënëvi exana. Bjarapitsivi tēpa caematacabita veintitrés mil pajivibeje. ⁹ Apo bejamatabëcueneëjētsitsinua vajatuxanenē pacuenia bajayata vajasalinaivimiyajuvënëvi Dioso jamatabëcueneëjēta. Papibisiacuene vajasalinaivimi pejamatabëëthētota natojitsipa pexanaenexa, Dioso jamatabëcueneëjētsiaya exananapana, peyapētaenexa pacuenia Dioso exanaejitsia bajarapamonaejavaberena. Bjaraxuata vajasalinaivimi jomo pesinicujiruatsi reverecapona. ¹⁰ Pētsa panaepaname Dioso pejumelivaisi papecatsipaebavanapaevijavabelia pacuenia bajayata vajasalinaivimiyajuvënëvi anaepanabiaba Moiséspijinēbeje Aarōnpijinēbejejavabelia. Bjaraxuata Dioso itoroba pijaängel peverebiabinexatsi vajasalinaivimiyajuvënëvimi.

¹¹ Bjarapacuenia exanatsi bajayata vajasalinaivimi. Dioso baja cajena nacayapētaeyaexana pacuenia bajayata vajasalinaivimi Dioso naneconitsiaexanatsi pibisiacuene pexanaexae. Bjarapalivaisi itanerubena Dioso pejumelivaisibaxutota vajanacamuxujiobinexa, vaxaitsi ata bajarapacuenia pibisiacuene vaxaxanaeyaniva. Vaxaitsi rabaja nacua peververeacaeitabarayota jinavanapatsi. ¹² Itsa pajamatabëjumaitsimē: “Xanē cajena ajamatabëcuenesaenē Dioso tajumecovēnētsijava. Nexata apo exanaenē tsane pibisiacuene pacuenia bajayata tajasalinaivimi exana,” itsa pajamatabëjamē, ¡xania baja tsane! Tsipaji paxamē ata bajarapacuenia pibisiacuene paexanaejitsipame. ¹³ Xua baja aeconoxae pataeponame, dovathi pejamatabëcueneta papecajamatabëcueneëjētsijava, bajaraxua daxita Dioso pejumecovēnētsivi tocopiapataponatsi mapanacuataje. Itsiata baitsi jane Dioso pacayavenonapona pacuenia najumecapanepaeya jumaitsi. Dioso cajena apo pacacopatsi tsane dovathi papecajamatabëcueneëjētaponaenexa panēajamatabëcuenesaējava matatoxenetsia. Nexata dovathi itsa pacajamatabëcueneëjēta, itsiata Dioso pacayavenonapona paneajamatabëcuenesaē tsaponanexa. Nexata papecajamatabëcueneëjētsijava, pavecuapanepaponaename pibisiacuene paexanaenejevamē.

¹⁴ Tajamonae bitso patacaasivavi, jumapecataeya pexanaenëanëjavabelia itsamonae penavajëcaecuene, nayajivitaeya pajinavanapare.

¹⁵ Pacajamatabëcuenecaējēpa baja cajena panejumeyapētaenexa patacatsipaebilivaisi. Nexata panejumecanaējēre patacatsipaebilivaisi paneyapētaenexa itsa pexaniajailivaisi. ¹⁶ Itsa nacaetuanatsi vajanajamatabënapitsinexa xua yabara Cristo nacasivatēpa, najuaxanatsi pan. Najumatavējēapatsinua vajamatavējēaapaera. Nexata pan yabara, vajamatavējēaapaera ata yabara, Diosojavabelia jumaitsi: “Pexaniacuene bitso panetoxaname. Panerajutame pan. Panerajutame patamatavējēaapaera ata,” jaitsi. Itsa nacaetuatatsi vajanajamatabënapitsinexa xua yabara Cristo nacasivatēpa, caebitsaēto naexanatsi Cristo yajava, ponē nacasivatēpa cruzata. ¹⁷ Ayailbitsaētoxaneto atatsi, caepan itsiata najuaxanetsi. Nexata vaxaitsi Cristo vajayajavajinavanapaexae,

caebitsaētotsi Cristo pijajivitsi naexanatsi.

¹⁸ Pacanaējere pacuenia judiovi baexana. Itsamonae dajubi beyabibabajarapavi ofrendacuenia perajutsinexa Diosojavabelia. Nexata pamonaenaxane bajarapavi, caebitsaēto Dioso pijajivi naexana. ¹⁹ Mara pajamatabēcuene yabara jumaitsinēje. Jumapecataya pexanaenēanē, itacuenejavayo ata pexanaenexa, apo caējēpaetsi. Bajara pijinia itsi pavi ata jumapecataeya pexanaenēanējavabelia rajuta. Apo caējēpaetsi jivi xae ata pejamatabēcuenebijianaenexatsi. Tsipaji jumapecataeya pexanaenēanē, bajarapavi apo ithothianae bajarapavivecua. ²⁰ Nexata abaxē pamonaenaxane Dioso apo yapētae, dajubinē itsa tobeyaxuaba ofrendacuenia pevi perajutsinexa jumapecataeya pexanaenēanējavabelia, bajarapavi dovathinexa saya. Apo Diosonexa cajena. Bajaraxuata apo pacatojitsipaetsi panenaxaenexa bajarapamonaenaxa. Itsa panaxaejitsipame bajarapamonaenaxa, nexata caebitsaēto panaexanaejitsipame dovathi yajava. ²¹ Paxamē baja panenabanivi, paneapaevinua, vajatuxanenē pijamesata. Nexata baja acuenēbi panenabaninexa, paneapaenexanua, itsajota Dioso apo pejumecovēnētsivi dovathi pijacuene exanavanapa. ²² Vaxaitsi Dioso vajajumecovēnētsivi, apo jitsipaetsi vajatuxanenē vajanacabaraanaepanaenaxa. Dioso pijacuene, dovathi pijacuene ata, anijacuenebeje itsa exanaponaenaxa, nexata vajatuxanenē nacabaraanaepanaenaxa. Vaxaitsi cajena apo vecuaasaetsi vajatuxanenē. Nexata apo vecuapanepaetsi tsipae vajatuxanenē itsa nacananeconitsiaenaxa.

Pacuenia Dioso pejumecovēnētsivi bejinavanapa itsamonae pejamatabēcuenebijianaenaxa yabara pelivaisi

²³ Xaniajai rabaja pacuenia itsamonae jumaitsi. Mapanacuata navita vaxaxanaenaxa. Itsajivi ata apo nacaitavetsi bajarapacuenia vaxaxanaenaxa. Itsiata baitsi jane apo nacatoxanepanaenaxa bajarapacuenia vaxaxanaenaxa. Daxitacuene, xua itsajivi ata apo nacaitavetsi vaxaxanaenaxa, exanaenaxa atatsi tsipae, itsiata apo nacajamatabēcueneasaenaxa tsipae Dioso vajajumecovēnētsijava. ²⁴ Pētsa pajamatabējumaitsimē: “¿De tsaeta xua natoexanaenaxa, xua exanēnaxa netoxanepanaenaxa?” pajamatabējamē pētsa. Biji rajane pajamatabējumaitsimēre. “¿De tsaeta xua toexanaenaxa, xua itsamonaxa toxanepanaenaxa?” pajamatabējamēre.

²⁵ Dioso baja cajena pacatocopata panexaenaxa itaxutojema. Nexata pacatocopata panexaenaxa pavi canajeta pecanajetsibota. Nexata pētsa payanijobame. “¿Matsa pavi jumapecataeya pexanaenēanējavabelia peyajuvēnērajutsivije?” pajamē pētsa. Itsa payanijobijitsipame bajarapacuenia: “Jājā, bajarapayajuvēnēvi,” pacajai tsipae. Nexata paxamē pajamatabējumaitsimē tsipae bajarapavi yabara: “Mapavije itsa xaejitsipajē, nexata pibisiacuene exanaenaxa Dioso pitabarata,” pajamatabējamē tsipae. Saya pacomuare payanijobinejevamē. ²⁶ Dioso baja cajena pacatocopata itaxutojema panexaenaxa. Tsipaji mapanacuaje, daxita mapanacuapijucueni ataje, Dioso baja cajena pijajava.

²⁷ Dioso apo pejumecovēnētsijivi ata itsa pacajunata panenabaninexa pijaboyabelia, panaponare panenabaninexa itsa pajitsipame. Xua pacaabata, paxaema payanijobinejevamē. “¿Matsa pavi jumapecataeya pexanaenēanējavabelia peyajuvēnērajutsivije?” pajamē pētsa. ²⁸ Itsamonaxa Dioso pejumecovēnētsivi bepibisiacuene pexanaenaxa taejitsipa itsa xaejitsipa bajarapayajuvēnēvi. Nexata panexaevajēnaeya, bajarapamonaenaxa peyajuvēnē itsa pacajumaitsi: “Mara pavije jumapecataeya pexanaenēanējavabelia ofrendacuenia peyajuvēnērajutsivije,” itsa pacajai, pētsa patsitaxaneme. Itsa

apo patsitaxaemē tsane, nexata apo pajamatabēcuenebijianaemē tsane bajaraponē. ²⁹ Itsa patsitaxaejitsipame, bajaraponē ata naxaejitsipa. Nexata bajaraponē jamatabējumai tsipae: “Pibisiacuene baja cajena exanajē Dioso pitabarata mapavije tanaxaexae,” jamatabējai tsipae.

Bajarapacuenia patacatsipaebijava, itsanē Dioso pejumecovēnētšinē ita jumetaena, jamatabēcuenenavēxaniabiaya meta jumaitsi tsane mapacueniaje: “Jumapecataeya pexanaenēanējavabelia perajutsiviyajuvēnējava taxaeyabiabinexa, Dioso netocopata. Nexata baja xaeyabiabajē. Itsiata icatsia aeconoxae nitaveta itsanē Dioso pejumecovēnētšinē ita tsitaxaniji bajarapayajuvēnēvi, bepibisiacuene petaeyaniva. ¿De meta xuajitsia xanē epatua copatsipajē bajarapayajuvēnēvi taxaeyabiabijavami? ³⁰ Taxaevajēnae bajarapavi, ‘Xanepana rabaja,’ janē tsabiabi Diosojavabelia tanerajutsixae taxaenexa. ¿Detsa nexata xuajitsia jivi nebaracuaicuaijai tsipae bepibisiacuene taexanaenē taxaejamatabēcuene bajarapayajuvēnēvi?” jai meta tsane jamatabēcuenenavēxaniabiaya itsanē Dioso pejumecovēnētšinē. ³¹ Mara pacuenia pacatsipaebatsije panecopatsinexa paneexanabiabijavami ata, itsajivi ata panejamatabēcuenebijianaeyaniva panetsitaexanaejava pejamatabēcueneta. Itsa paxaneme, ita papamenua, daxitacuene ita paexanamenua, xaniavaetsia itsamonae patsitaexanavanapaename paxamē panetsitaexanaejava yabara jivi papecasivajamatabējumaitsinexa: “Dioso cajena ayaijamatabēcuenenē. Tsipaji pijajivi yavenona xaniavaetsia petojinavanapaenexatsi,” papecasivajamatabējainexa. ³² Bajaraxuata pētsa patsitaexaname itsacueneyavayo ata itsajivi ata Diosovecua itsajamatabēcuene pexainayaniva. ³³ Pacuenia xanē tsitaexanaponaponajē itsamonae tanesivajamatabēcuenebarēyanexa, bajarapacuenia paxamē ata patsitaexanavanapare itsamonae. Apo najamatabēxainabiabinē taexanaenexa xua ēxanēnexa netoxanepana. Biji rajane najamatabēxainabiabajē tatoexanaenexa xua toxanepanatsi itsamonae ata. Bajarapacuenia toexanaponajē bajarapamonae ata Dioso pejumecovēnētšinexa pecapanepaenexatsi pijaneconivecua.

11

¹ Itsamonae patsitaexanavanapare pacuenia xanē pacatsitaexanaponatsi. Xanē raja pijinia cuenejēpaeya ponaponajē Cristo.

Pacuenia petirivi namataacatsiaya bejunua Dioso pejumecovēnētšivi penacaetuatabihibota yabara pelivaisi

² Tajamonae, panejamatabēnainabiabame. Pacuenia pacaitorobatsi, bajarapacuenia paexanavanapamenua. Bajaraxuata pacasivajamatabēcuenebarēyatsi. ³ Pacatojitsipatsi panepapētaenexa mapacuenije. Athēbēvetsica Dioso itorobicatsi Cristo. Nexata juya mapanacuataje Cristo caepebi canacujitsia itorobapona. Bajara pijinia itsi pebi ata. Pebi juya itorobapona pijava. Pebi peyaiyataenexa Cristo, apo benamataacatsi papaēbērēpanayota jivi penacaetuatsibota. ⁴ Bajaraxuata pebi Diosojavabelia penavajētsijavata, itsamonaejavabelia ata Dioso pejumelivaisi petsipaebijavata, ita namataacatsipa papaēbērēpanayota, nexata Cristo athēbēvetsica yapijiviaura tsipaetsi. ⁵ Petiriva rajane pamona pejumecovēnētšabiavacuene itsamonae peyapētaenexatsi, benamataacata papaēbērēpanayota jivi penacaetuatsibota. Bajarapacuenia benamataacata penavajētsijavata Diosojavabelia, itsamonaejavabelia petsipaebijavata ata Dioso pejumelivaisi. Itsa apo namataacatsi

tsipae, nexata pamona yapijiviaura tsipaetsi. Pacuenia petiriva amataura tsipae itsa mataxunaejitsipatsi, bajara pijinia pacuenia petiriva pamona yapijiviaura tsipaetsi, papaëbërëpanayota itsa apo namataacatsi tsipae jivi penacaeuatsibota. ⁶ Petiriva itsa apo namataacatsi tsipae papaëbërëpanayota, pacuenia pebi apo namataacatsi, nexata itsa bemataxunatsi pacuenia pebi bamataxunatsi, bajarapova namatacaura tsipae. Bajaraxuata petiriva jivi penacaeuatsibota, benamataacata papaëbërëpanayota pamona peyapijiviaurayanivatsi. ⁷ Dioso itsa exana pebi, nacujirujëpaeyaexana. Nexata pacuenia itsi Dioso, bajara itsi pebi. Nexata pebi xaniavaetsia itsa ponapona, jivi pecanaëjëtsinexa Dioso bitso ayaijamatabëcuene pexainaenëcuene. Bajaraxuata pebi apo benamataacatsi papaëbërëpanayota penavajëtsijavata Diosojavabelia, itsamonaejavabelia Dioso pejumelivaisi petsipaebijavata ata. Itsiata baitsi jane petiriva benamataacata papaëbërëpanayota penayapëtaenexa pamonavecu beveliajamatabëcuene pexinaevacuene. ⁸ Copiata Dioso pebi itsa exana, petiriva peyenyajuvënësitomita apo exanae. Biji rajane pebi peyenyajuvënësitomita cotocaevi Dioso exana petiriva. ⁹ Petiriva baja cajena Dioso exana pebinexa. ¹⁰ Bajarapajamatabëcuene yabara petiriva benamataacata papaëbërëpanayota. Petiriva namataacatsia itsa ponapona, ángelevi tanetsi pamona pejumecovënëtabiavacuene. ¹¹ Vaxaitsi Dioso vajajumecovënëtavapaevi, xanepana namataenetsia vajanajamatabëcuene asaëyaexanaenexa. Pebi namatavenona petiriva. Petiriva pijinia namatavenona pebi. ¹² Xaniajai rabaja. Pebi peyenyajuvënësitomita Dioso exana petiriva. Itsiata baitsi jane bajaraxuacujinae petiriavita naexanapona pebijivi. Tsipaji Dioso pejamatabëcueneta bajarapacuenia copata.

¹³ Panijacuata pacanaëjère. ¿Xanepana tsaja petiriavi penavajëtsinexa Diosojavabelia papaëbërëpanayota namataacatsinejeva? Jume raja. Namataacatsiaya raja papaëbërëpanayota petiriavi benavajëta Diosojavabelia. ¹⁴ Vaxaitsi baja cajena vajajamatabëëthëtota yapëtanetsi mapacuneje. Pebi itsa amatanapiareca, amataura tsipae. ¹⁵ Vajajamatabëëthëtota yapëtanetsinua mapacuneje. Petiriva pijinia itsa amatanapiareca, toxanepanatsi. Yabarëya pematana. Dioso cajena petiriva tocopatatsi piamatanapianexareca. Nexata bepemataacatsitsi pematana. ¹⁶ Itsajivi itsa jamatabëpanejumeeanaenota petiriavi papaëbërëpanayota penamataacatsijava yabara, nexata bajarapajivijavabelia pajumaitsinë tsane mapacueniaje: “Paxanë bajarapacuenia panajamatabëxainajë petiriavi papaëbërëpanayota penamataacatsijava yabara. Bajarapacuenia itsamonae ata, pamona Dioso pejumecovënëtsivi, najamatabëxaina. Tsipaji baja cajena patajacuene,” pajanë tsane pajivijavabelia jamatabëpanejumeeanaenota petiriavi papaëbërëpanayota penamataacatsijava yabara.

Pacuenia itsamonae ayaijva xaeyabiaba itsa nacaetuatabiaba penajamatabënapitsinexa xua yabara Cristo sivatëpatsi yabara pelivaisi

¹⁷ Pacatoyaquinatsi mapalivaisije patacamuxujobinexa. Aeonoxae xua paexanabiabame, apo pacatoxanepanae. Panacaetuatabiabi atamé, itsiata apo pajamatabëcuenesaëmë tsaponae panevajënaeyabelia Dioso panejumecovënëtsijava. Caranata saya panevajënaeyabelia pajamatabëcuenecueranapona. ¹⁸ Najamatabëxainajë copiaya patacamaitsinexa mapacueniaje. Pacavënëlivaisitanetsi. Apo panajamatabëcuenëjëpabiabimë pina itsa panacaetuatabiabame panenacaetuatabiabibota. Caebota pina panacaetuatabiabi atamé, navecuanatsanaeya

pina panavecuauenabiabame pacaebitsaëtoximë canacujitsia. “Xaniajai raeta baja. Baja raeta pacuenia exanabiaba,” jamatabëjanë belia paxamë yabara. ¹⁹ Baja raeta pacuenia navecuansanaeya panavecuauenabiabame. Tsipaji meta pajamatabëjumaitsimë tsabiabi: “Vaxaitsi cajena Dioso pepacuenie jumecovënëtsi. Nexata vajanacaetuatsijavata, Dioso apo pejumecovënëtsivi navecuatsatsianatsi Dioso apo ëpejumecovënëtsivi saicaya penaenexa,” pajamatabëjamë meta tsabiabi. ²⁰ Xua yabara Cristo pacasivatëpa, panenajamatabënapitsinexa panacaetuatabiabi atamë, najamatabëcuenejëpaeya apo panacaetuatabimimë. Nexata Dioso pacatane saya jema bepanenacaetuatsivi. ²¹ Tsipaji copiaya panepatsivi panenabaniepatota, ayaijavanë paxaeyabiabame. Apo paevetabiabimimë abaxë itsamonae pepatsijava caecuenia panenajuanabaninexa. Itsamonae paxamëyajuvënëvi ayaijava xaeyabiaba. Ayaira vinora matavëjëa apaeyabiabanua. Nexata vënaaitajibi tsabiabi. Nexata pamonaie cotocaevi pepatsivi, yaverevereciabiaba. Nexata pijani tsabiabi. ²² Ëpanexaejavanexa ita pasivanacaetuatabiabame, panijabonë paxainame panijabonëjava panenabaninexa, paneapaenexanua. Bijiaya pataeyabiabame pamonaie nacaetuatabiaba penavajëcaenexa Diosojavabelia. Paurababiabamenua pamonaie bepejiobivi, pexaejava apo penacapatsivi. Pexaniacuene cajena apo paexanabiabimimë bajarapacuenia ita paexanabiabame. Bajarapacuenia saya paneexanabiabixae, pananeconitame Diosojavabelia.

Pajamatabëcuene yabara nacaetuatabiaba Dioso pejumecovënëtsivi caejuameto canacujitsia yabara pelivaisi

(Mt 26.26-29; Mr 14.22-25; Lc 22.14-20)

²³ Imata baja cajena pacatsipaebatsi pacuenia vajatuxanenë Jesús pijajivi barëexana. Pameravi vajatuxanenë pijavajabitsaë pecobeyabelia canajetsijitsiatsi, bajarapameravi vajatuxanenë cobenanua panbë. ²⁴ “Pexaniacuene panetoexaname. Pan panerajutame,” pejaicujinae Diosojavabelia, panbë epatsënëca. Jumaitsi pijajivijavabelia: “Mara tavije patacasivatëpaejava paxamënexa. Mapacueniaje tacovëta paexanabiabianame patanenajamatabënapitsinexamë,” jai vajatuxanenë Jesús pijajivijavabelia. ²⁵ Penanicujinae bajara icatsia pacuenia Jesús cobenanua pecaapaejava. Nexata icatsia jumaitsi pijajivijavabelia: “Dioso baja cajena najumecapanepaeya jumaitsi papecacapanepaenexa. Nexata pacuenia Dioso najumecapanepaeya jumaitsi, pacacapanepaena tajana pejamatabëcueneta. Tajana raja nevecuarunaena tatëpaejavata papecacomuatsinexa panijaneconivecua. Mapacaapaejavataje, ita papaeyabiabianame, panenajamatabënapitabiabianame,” jai vajatuxanenë Jesús pijajivijavabelia. ²⁶ Nexata paxamë bajarapacuenia ita paexanabiabame, patsitanaitajëtabiabame itsamonaejavabelia xua yabara vajatuxanenë pacasivatëpa cruzata. Bajarapacuenia paexanabiabare vajatuxanenë icatsia pepatsimatocabitsicajavabelianexa.

Pacuenia Dioso pejumecovënëtsivi benaxaniavaeta, ita nacaetuata penajamatabënapitsinexa xua yabara Cristo sivatëpatsi, yabara pelivaisi

²⁷ Jivi ita nacaetuata penajamatabënapitsinexa xua yabara Cristo sivatëpatsi, becanaëjëtena. Tsipaji canaëjëtsinejeva ita naxane pan, ita apanua vajatuxanenë pecaapaejavata, bajarapajivi naneconitsipa vajatuxanenëjavabelia, vajatuxanenë pevito, pijana ata, apo peyaiytaexae. ²⁸ Bajaraxuata caejivi canacujitsia xaniavaetsia benajamatabëcuenejaita pecaxitajarabinexa paneconi xainaponapona Dioso pitabarata. Bajarapacuenia benajamatabëcuenejaita pan penaxaevajënaeya,

pematavějēaapaera ata penaapaevajēnaeya. ²⁹ Itsa naxane pan, itsa naapanua pematavějēaapaera, becanaējēta pajamatabēcuenē yabara vajatuxanenē sivatēpatsi cruzata. Pajivi canaējētsinejeva naxane pan, naapanua pematavějēaapaera, bajarapajivi pijacuata naneconitapona Diosojavelia. ³⁰ Bajaraxuata paxamē ayaibitsaēto payajuvēnēavitanemē. Nexata itsamonaē payajuvēnēcueraname. Itsamonaē payajuvēnētēpame baja. ³¹ Bajaraxuata vaxaitsi vajanaxaevajēnaē pan, vajanaapaevajēnaē ata pematavějēaapaera, benajamatabēnapitatsi Jesucristo vajanacasivatēpaejava vajaneconi yabara. Benajamatabēcuenējaitatsinua paneconi xainatsi Dioso pitabarata vajanavajunupaebinexa Diosojavelia. Bajarapacuenia itsa exanaenatsi, vajatuxanenē apo nacananeconitsiaexanaē tsane. ³² Itsa naneconitsianatsi, nexata vajatuxanenē nacabejiobiaexanaponaena Dioso apo pejitsipaecuene vajaexanaejava vajacopatsinexa. Bajarapacuenia vajatuxanenē nacaexanaena Dioso apo pejumecovēnētsivi yajava Diosovecua vajanaxuabiyanima.

³³ Bajaraxuata itsa panacaetuame panenajamatabēnapitsinexa xua yabara Cristo pacasivatēpa, paevetabiabianame abaxē daxita pepatsijava caecuenia panenajuaxaenexa. ³⁴ Pajivi pijajani, bajarapajivi copiaya benabane pijabota pejonevajēnaeya panenacaetuatsibojavaberena. Nexata panenacaetuatsijavata, bajarapajivi apo naneconitsi tsane Diosojavelia. Itsamatabēcuenējavaxi pematatsēnēa, xua yabara paneyanijobame, abaxē apo pacatoyaquinaetsi mapabaxutotaje. Itsa pacataenatsi, pacatsipaebianatsi bajarajotalia.

12

Pacuenia Dioso pejumecovēnētsivi Espiritu Santo pejamatabēcueneta jamatabēcuenecaējēpaeyaexanatsi pexanaenexa pacuenia Dioso itorobaponatsi yabara pelivaisi

¹ Tajamonaē, jitsipajē patacatoyaquinaejava paneyapētaenexa mapacueneje. Caējivi canacujitsia Dioso pejumecovēnētsivi Espiritu Santo pejamatabēcueneta jamatabēcuenē caējēpaeyaexanaponatsi pexanaenexa pacuenia Dioso itorobaponatsi.

² Paxamē rabaja payapētaneme mapacueneje. Pamatacabi abaxē Dioso apo pajumecovēnētsimē, dovathi pacayamaxēitorobabiaba. Nexata panevajētsinexa jumapecataeya pexanaenēnējavavelia, panematabacabēta patonubenabiabame. Jumapecataeya raja pexanaenēnē, apo caējēpaetsi itsacuenējavayo ata pexanaenexa. ³ Bajaraxuata pacatoyaquinatsi paneyapētaenexa mapacueneje. Pajivi jumaitsi: “Jesús raja Dioso apo pexēnato,” jai, bajarapajivi Espiritu Santo apo yajavaponaponatsi. Pajivi rajane jumaitsi: “Jesucristo raja pepo petuxanenē,” jai, bajara jane pajivi Espiritu Santo yajavaponaponatsi.

⁴ Daxita xua Dioso pejumecovēnētsivi Espiritu Santo pejamatabēcueneta jamatabēcuenē caējēpaeyaexanaponatsi, apo najēpae. Caenē canacujitsia saicayacuenia jamatabēcuenē caējēpaeyaexanaponatsi. Itsiata baitsi jane caenē Espiritu Santo pejamatabēcueneta jamatabēcuenē caējēpaeyaexanaponatsi daxita bajarapamonaē. ⁵ Xua jivi Dioso tonacuenēbavanapa, apo caevirianacuenēbijava. Navita cajena xua jivi Dioso tonacuenēbavanapa. Itsiata caenē Dioso pijacuene tonacuenēbavanapa.

⁶ Dioso pijacuene petonacuenēbivi, apo nacuenējēpae. Itsiata rabaja caenē Dioso daxita yavenonatsi petonacuenēbavanapaenexa. ⁷ Caējivi

canacujitsia, Dioso pejumecovënëtsivi, Espíritu Santo pejamatabëcueneta jamatabëcuenecaējēpaeyaexanatsi xua Dioso tonacuenebavanapaejitsia. Nexata bajarapamonae, caejivi canacujitsia, caējēpatsi peyavenonaenexa bajarapajamatabëcueneta daxita Dioso pejumecovënëtsivijavabelia. ⁸ Itsamonae Dioso pejumecovënëtsivi, Espíritu Santo pejamatabëcueneta jamatabëcuene caējēpaeyaexanaponatsi pemuxujobinexa xaniavaetsia itsamonaejavabelia, xaniavaetsia pejinavanapaenexa Dioso pitabarata. Itsamonae pijinia jamatabëcuene caējēpaeyaexanaponatsi jivi xaniavaetsia peyapētaeyaexanaenexa pexaniajailivaisi, Jesús pelivaisi. Itsiata baitsi jane caeEspíritu Santo pejamatabëcueneta bajarapacuenia jamatabëcuene caējēpaeyaexanaponatsi bajarapamonae. ⁹ Itsamonae pijinia jamatabëcuene caējēpaeyaexanaponatsi penajamatabëcuenerutsinexa Diosojavabelia Dioso peyavenonabiabinexatsi daxitacuene yabara. Itsamonae pijinia jamatabëcuene caējēpaeyaexanaponatsi pejamatejemayaexanaenexa piavitanevi. CaeEspíritu Santo rabaja pejamatabëcueneta bajarapacuenia jamatabëcuene caējēpaeyaexanaponatsi. ¹⁰ Itsamonae pijinia jamatabëcuene caējēpaeyaexanaponatsi Dioso pesaēta pinijicue pexanaejavanē pexanaenexa. Itsamonae pijinia jamatabëcuene caējēpaeyaexanaponatsi petsipaebinexa itsamonaejavabelia pacuenia Dioso yapētaeyaexanatsi. Itsamonae pijinia jamatabëcuene caējēpaeyaexanaponatsi pejumeyapētaenexa itsajivi itsa tsipaebatsi penajumetsënëtsilivaisi dovathi pejamatabëcueneta. Jamatabëcuene caējēpaeyaexanatsinua pejumeyapētaenexa itsajivi itsa tsipaebatsi pexaniajailivaisi Espíritu Santo pejamatabëcueneta. Itsamonae pijinia jamatabëcuene caējēpaeyaexanaponatsi pecuaicuaijainexa itsajivi ata mapanacuata apo pejumetaejumeta. Itsamonae pijinia jamatabëcuene caējēpaeyaexanaponatsi pejumetaenexa bajarapajume juya pejumevajunupaebaponaenexa itsamonaejavabelia. Nexata bajarapamonae tsipaebapona pajamatabëcuenelivaisi xainapona caelivaisi canacujitsia, palivaisianē tsipaebapona pamonae cuaicuaijai itsajivi ata mapanacuata apo pejumetaejumeta. ¹¹ Itsiata baitsi jane caeEspíritu Santo pejamatabëcueneta jamatabëcuene caējēpaeyaexanaponatsi daxita bajarapamonae. Pacuenia Espíritu Santo jitsipa pejamatabëcuenecaējēpaeyaexanaponaeenexa Dioso pejumecovënëtsivijavabelia, bajarapacuenia Espíritu Santo caejivi canacujitsia jamatabëcuene caējēpaeyaexanaponatsi Dioso pejumecovënëtsivi.

Pacuenia daxita Dioso pejumecovënëtsivi caenē Cristo bepeperabēto yabara pelivaisi

¹² Pavi xainatsi vajaperabētota, caevito canacujitsia pevënë xainapona. Vajavi xainatsi navitsiaya. Caevito canacujitsia saicaya pexanaejavanexa, xainapona. Itsiata baitsi jane caeperabētotsireca. Bajara pijinia itsitsi daxita Dioso vajajumecovënëtsivi. Caejivitsi canacujitsia saicaya vajanacuenebijavanexa, Espíritu Santo pejamatabëcueneta nacajamatabëcuene caējēpaeyaexanaponae ata, itsiata caenē Cristo bepeperabētotsi. ¹³ Daxitatsi rabaja Dioso vajajumecovënëtsivi, itsa nacabautisaba, caeEspíritu Santo nacatsijamatabëca caebitsaētonexatsi, caenē Cristo bepeperabētonexatsi. Judíovi atatsi, apo judíovi atatsi, dajubicuenia vajanacacanjetsivi ata itsamonaejavabelia amoneya vajatonacuenebinexa, apo vajanacacanjetsivi ata itsamonaejavabelia, daxitatsi, caeEspíritu Santo nacatsijamatabëca.

¹⁴ Pavi jivi peperabētuareca xaina, caevito canacujitsia pevënë xainapona. Nexata caevënëvito jivi apo xinae peperabētuareca. ¹⁵ Nexata jivi petaxu

itsa caējēpaejitsipatsi pecuaicuaijainexa, petaxu meta jumaitsi tsipae: “Apo pecobenē raja. Bajaraxuata maapo paperabētōyajuvēnjavanēje,” jai meta tsipae. Itsiata baitsi jane cajena jemajai tsipae. Tsitecaeya bajarapaperabētōyajuvēnjējava tsipae. Pijumeta saya apo naexanae tsipae saicayajava. ¹⁶ Jivi pemuxuyoroto ata itsa caējēpaejitsipatsi pecuaicuaijainexa, pemuxuyoroto meta jumai tsipae: “Apo pitaxutonē raja. Bajaraxuata maapo paperabētōyajuvēnjavanēje,” jai meta tsipae. Itsiata baitsi jane cajena jemajai tsipae. Tsitecaeya bajarapaperabētōyajuvēnjējava tsipae. Pijumeta saya apo naexanae tsipae saicayajava. ¹⁷ Jivi daxitanē peperabētūareca itsa xainaejitsipa ēpitaxutonē, ħdetsa nexata pacuenia jumetaejitsipa? Acuenebi tsipae. Daxitanē peperabētūareca itsa xainaejitsipa ēpemuxuyorotonē, ħdetsa nexata pacuenia tuxunijitsipa? Acuenebi tsipae. ¹⁸ Bajaraxuata jivi peperabētūareca caevēnevito Dioso apo torutsi. Saicaya pevēnē pexainaevitonē, caevito canacujitsia, jivi peperabētūareca Dioso torutaponā itsajota jitsipa petorutsinexa. ¹⁹ Itsa meta jivi peperabētūareca xainaejitsipa caevitoreca, aithothia meta tsipae. Nexata apo bejivitonē perabētō tsipae. ²⁰ Itsiata baitsi jane maitsije. Jivi peperabētūareca navitsiaxainae ata saicaya caevito canacujitsia pevēnē pexainaevi, itsiata rabaja caeperabētoreca.

²¹ Nexata jivi pitaxutobeje caējēpae atatsibeje tsipae pecuaicuaijainexabeje, itsiata acuenebi tsipae pejumaitsinexabeje pecobebejejavabelia: “Apo pacanamatavenonaetsibeje cajena,” pejainexabeje. Jivi pematabocotota ata caējēpae atatsi tsipae pecuaicuaijainexa, itsiata acuenebi tsipae pejumaitsinexa petaxubejejavabelia: “Apo pacanamatavenonaetsibeje cajena,” pejainexa. Tspaji daxita pavi xainatsi vajaperabētota, namatavenonatsi. ²² Bajaraxuata vajaperabētota pavi xainatsi, pavi itajara apo bevajanacatsitanamatavenonae, bajarapavi bitso pepacueni namatavenonatsi. ²³ Pavi xainatsi vajaperabētota, pavi vaxaitsi natanetsi bevelia, bajarapavi banaperabēxatatatsi naitabētsiaya. Pavi naperabēcauratsi, naperabēcaranatsiaya banaperabēxatatatsi xaniavaetsia. ²⁴ Pavi apo naperabēcauratsi, apo naperabēxatatatsi xaniavaetsia. Bajarapacuenia vajaperabētota Dioso nacavimataropobiaruba. Nexata picani pavi bevelia vajanamatavenonae, bajarapavi itsiata naitabētsia banaperabēxatatatsi. Nexata bajarapacuenia bajarapavi ata bevajanamatavenonae tanetsi. ²⁵ Nexata pavi vajaperabētota xainatsi, apo navecuanatsanae. Nexata daxita pavi xainatsi vajaperabētota, namataenetsia naeveta. ²⁶ Vajaperabētota pavi xainatsi, caevito itsa atane, nexata daxita itsavijavabelia ata baatane. Caevito ata pijinia itsa naitabētsianaxatatatsi, nexata daxitaperabētotsireca bayajavabarēyatsi.

²⁷ Daxita rabaja paxamē Dioso papijajivimē. Nexata caenē Cristo beperabētō panaexaname. Pavi Cristo peperabētota xaina, bajara bepajuvēnevī Dioso pacatane pacaenēmē canacujitsia. ²⁸ Vajaperabētota pavi xainatsi, caevito canacujitsia saicaya xainapona pexanaponaevanexa. Bajara pijinia itsi Dioso pejumecovēnētsivi. Caejivi canacujitsia Dioso itapetaponatsi saicaya caejivi canacujitsia pexanaponaenexa xua Dioso tocopatatsi. Copiata Dioso itapeta apōstolevinexa. Xuacujinae icatsia cotocaevi itapeta petsipaebivinexa itsamonaejavabelia pacuenia Dioso yapētaeyaexanatsi. Xuacujinae icatsia Dioso itapeta, pacuenia Dioso pejumelivaisibaxutota jumaitsi, peyapētaeyaexanaevinexa itsamonaejavabelia. Xuacujinae icatsia Dioso itapeta Dioso pesaēta piinjicue ne pexanaejava pexanaponaevinexa. Xuacujinae Dioso itapeta piavitanevi pejamatejemayaexanaevinexa. Xuacujinae icatsia Dioso itapeta bepejiobivi pyavenevinexa. Xuacujinae icatsia Dioso itapeta Dioso pejumecovēnētsivi penamatacaitorobivinexa. Xuacujinae icatsia Dioso

itapeta pecuaicuajiaivinexa itsajivi ata mapanacuata apo pejumetaejumeta. ²⁹ Nexata daxita apo epäóstolevi. Nexata pijinia daxita apo epäetsipaebivinexa itsamonaejavabelia pacuenia Dioso yapētaeyaexanatsi. Nexata pijinia daxita apo epäyapētaeyaexanaponaevinexa itsamonaejavabelia pacuenia Dioso pejumelivaisibaxutota jumaitsi. Nexata pijinia daxita Dioso pesaēta pinijicuene pexanaejava, apo epäxanaponaevinexa. ³⁰ Nexata pijinia daxita apo epäejamatejemayaexanaevinexa piavitanevi. Nexata pijinia daxita apo epäpecuaicuajiaivinexa itsajivi ata mapanacuata apo pejumetaejumeta. Nexata pijinia daxita apo epäjumetaevinexa bajarapajume, juya itsamonaejavabelia pejumevajunupaebaponaenexa pajamatabēcuenelivaisi xainapona caelivaisi canacujitsia, palivaisianē tsipaebapona pamonaē cuacuajiai itsajivi ata mapanacuata apo pejumetaejumeta. ³¹ Bajarapacuenia itsamonaē pejamatabēcuenecaējēpaeya exanaejavatsi matatoxenetsia panevajēnaeyabelia bitso pajitsipare Dioso papecajamatabēcuenecaējēpaeya exanaenexa, paneyavenonaenexa daxita Dioso pejumecovēnētsivijavabelia. Daxita baja xua yabara pacatsipaebatsi, daxita bajaraxua matatoxenetsia panevajēnaeyabelia bitso pajitsipare Dioso papecajamatabēcuenecaējēpaeya exanaenexa itsamonaē ata paneasivanexa.

13

Pacuenia jivi namataenetsia benaasiva yabara pelivaisi

¹ Dioso nejamatabēcuenecaējēpaeya exanaejitsipa tacuaicuajainexa itsajivi ata mapanacuata apo pejumetaejumeta. Angelevi ata pijajumeta cuaicuajianē tsipae. Nexata jivi netaejitsipa ayajamatabēcuenenēnē. Bajarapacuenia Dioso nejamatabēcuenecaējēpaeyaexanae ata tsipae, itsiata itsamonaē ata itsa apo asivanē tsipae, nexata saya bajaraxua netoamatamobi tsipae Dioso pitabarata. Nexata palivaisi ata tsipaebaponaejitsipajē jivi pejumetaejumeta, apo nejumecovēnētsi tsipae. Nexata pacuenia tambor, itsa jume, plato itsajivi penajumetsiaexanaejava namuxujematatsi, bajarapacuenia nenamuxujematsipa tatsipaebilivaisi. ² Dioso nejamatabēcuenecaējēpaeya exanaejitsipa xaniavaetsia tayapētaenexa Dioso pejumelivaisi, asaēyata tatsipaebinexa itsamonaejavabelia. Yapētaejitsipajēnua daxita Dioso muetsia penajamatabēxainaelivaisianē ata. Yapētaejitsipajēnua daxita Dioso pijacuene ata. Bajarapacuenia xaniavaetsia yapētae atanē tsipae, itsiata itsamonaē ata itsa apo asivanē tsipae, nexata saya bajaraxua netoamatamobi tsipae Dioso pitabarata. Dioso bitso tajumecovēnētsinē tsipae. Nexata itsa jumaitsinē tsipae: “Dioso baja cajena mapatsutoxanetoje nevecuatixitsiana,” itsa janē tsipae, nexata Dioso nevecuatixitsipa. Bajarapacuenia exanae atanē tsipae, itsiata itsa apo asivanē tsipae itsamonaē ata, nexata saya bajaraxua netoamatamobi tsipae Dioso pitabarata. ³ Rajutaponaejitsipajē bepejibivijavabelia daxita taxainaejavaximi. Nacaevetsipajēnua tanetajuitsinexa, tanebeyaxuabinexa ata, Dioso pejumelivaisi yabara. Bajarapacuenia nacaevetsi atanē tsipae, itsiata itsa apo asivanē tsipae itsamonaē ata, nexata saya bajaraxua netoamatamobi tsipae Dioso pitabarata.

⁴ Majamatabēcuenetsije pajivi asiva itsamonaē ata. Bajarapajivi bajayajebi itsacueniabi atatsi, ajamatabēcuenesaē bajarapamonaejavabelia. Pajivi asiva itsamonaē ata, itaxutotsoniatane bajarapamonae. Pajivi asiva itsamonaē ata, apo cuenecaēbi bajarapamonae. Pajivi asiva itsamonaē ata, “Xanē ayajamatabēcuenenēnē bajarapamonae matatoxenetsia,” apo jai itsajivijavabelia. ⁵ Pajivi asiva itsamonaē ata, bajarapajivi apo ataejitsibi

itsajivi ata. Apo exanae itsacuene ata piurabinexa bajarapamonaejavabelia. Pajivi asiva itsamonae ata, daxifa xua xanepana, eponēnexa apo natonajamatabēxainae. Pajivi asiva itsamonae ata, bepījia apo anaepanae bajarapamonaejavabelia. Pajivi asiva itsamonae ata, itsacueniabi atatsi, apo jamatabētsitecae juya pecuene canaviatsinexa bajarapamonaejavabelia.

⁶ Pajivi asiva itsamonae ata, bajarapamonae itsa tocopiapatatsi pibisiacuene, bajarapajivi apo sivajamatabēcuenebarēya bajarapamonae pibisiacuene petocopiapatsijavatsi yabara. Biji rajane pajivi asiva itsamonae ata, itsa bajarapamonae Dioso pejitsipaecuenia exanavanapa, bajarapajivi sivajamatabēcuenebarēya bajarapamonae Dioso pejitsipaecuenia pexanavanapaejava yabara. ⁷ Pajivi asiva itsamonae ata, bajarapajivi piasivaviyajuvēnēvi itsacueniabi atatsi, najamatabēcuenesaēta pevājēnaeyabelia piasivajava bajarapamonae. Pajivi asiva itsamonae ata, bajarapajivi apo pepāpētaevi ata, sivajamatabējumaitsi mapacueniaje: “Maraeta pamonaē ata pexaniajamatabēcuenevije,” sivajamatabējai. Pajivi asiva itsamonae ata, bajarapajivi pibisiacuene pexanaevi ata, sivajamatabējumaitsi mapacueniaje: “Maraeta pamonaē itsamatacabi pexaniacuene pexanaevi tsaneje,” sivajamatabējai. Pajivi asiva itsamonae ata, bajarapajivi tsiayapēbeje atatsi daxitacuene yabara, apo copatsi piasivajava itsamonae ata.

⁸ Itsamonae Espiritu Santo pejamatabēcueneta jamatabēcuene caējēpaeyaexanaponatsi petsipaebinexa itsamonaejavabelia pacuenia Dioso yapētaeyaexanatsi. Itsamonae pijinia jamatabēcuene caējēpaeyaexanaponatsi pecuaicuaijainexa itsajivi ata mapanacuata apo pejumetaejumeta. Itsamonae pijinia jamatabēcuene caējēpaeyaexanaponatsi pacuenia Dioso pejumelivaisibaxutota jumaitsi pepāpētaeyaexanaenexa itsamonaejavabelia. Daxita bajarapacuene, xua Dioso Espiritu Santo pejamatabēcueneta Dioso pejumecovēnēsivi jamatabēcuenecaējēpaeyaexanatsi, itsamatacabi tocopiarucaenatsi. Itsiata baitsi jane jivi namataenetsia penasivacuene, apo copiarucaē tsane. ⁹ Dioso nacajamatabēcuene caējēpaeyaexanae ata vajapētaenexa, abaxē tsiquirijavayo yapētaeponatsi. Palivaisi ata tsipaebatsi itsamonaejavabelia Dioso pejumelivaisi, apo ayaijava. ¹⁰ Pamatacabi icatsia Cristo patsianica, Espiritu Santo pejamatabēcueneta vajanacajamatabēcuene caējēpaeyaexanaejamatabēcuenemi, nacamatacabi. Nexata jane baja bajarapamatacabi vajatuxanenē xaniavaetsia nacayapētaeyaexanaena daxitacuene Dioso pijacuene.

¹¹ Pamatacabi abaxē pejevaxinēyonē, cuaicuaijanē pejevaxinēyonēcuenia. Najamatabēxainajēnua pejevaxinēyonēcuenia. Jumetanijinua abaxē pejevaxinēyonēcuenia. Itsa baja tanaveretsinē, pejevaxijamatabēcuenemi baja copatajē. ¹² Bajara pijinia itsinē Dioso tajamatabēcueneyapētaejava. Tsiquirijavayo abaxē Dioso jamatabēcueneyapētāniji. Pacuenia pitatsēcēnaetsaxuta itsa naitatanetsi, apo nacatonapebetsi, bajarajamatabēcuenēitsinē Dioso tajamatabēcueneyapētaejava. Abaxē saya tsiquirijavayo Dioso jamatabēcueneyapētāniji. Itsiata baitsi jane itsamatacabi Dioso xaniavaetsia jamatabēcueneyapētaenajē. Pacuenia aeconoxae Dioso xaniavaetsia nejamatabēcueneyapētane, bajara pijinia pacuenia xanē ata itsamatacabi xaniavaetsia Dioso jamatabēcueneyapētaenajē. ¹³ Apo vereverecae daxitamatacabi vaxaitsi vajanajamatabēcuenecopatsijava Diosojavabelia. Vaxaitsi evetavanpatsinua Dioso vajanacacapanepanexa. Nexata vajanajamatabēcuenecopatsijava Diosojavabelia, vajevetavanapaejava ata Dioso vajanacacapanepanexa, bajaraxuabeje matatoxenetsia bitso xanepana vajasivajava itsamonae ata.

14

Pacuenia Espíritu Santo pejamatabêcueneta itsamonae cuaicuaijiaiaex-anatsi itsajivi ata mapanacuata apo pejumetaejumeta yabara pelivaisi

¹ Panajamatabêcueneverere panevajênaeyabelia panecasaêtsavanapaenexa itsamonae ata paneasivajava pacuenia panijacuata panaasivamê. Panatojitsiparenuâ xua Dioso pacatojitsipa papecajamatabêcuene caêjêpaeyaexanaenexa Espíritu Santo pejamatabêcueneta. Bitso jane panatojitsipare palivaisi Dioso payapêtaeyaexana panetsipaebinexa itsamonaejavabelia. Nexata patsipaebianame palivaisi Dioso pacayapêtaeyaexana. ² Itsamonae Espíritu Santo pejamatabêcueneta jamatabêcuene caêjêpaeyaexanaponatsi pecuaicuaijainexa itsajivi ata mapanacuata apo pejumetaejumeta. Nexata bajarapajivi itsajivi ata mapanacuata apo pejumetaejumeta livaisi itsa paeba, tsipaeba Diosojavabelia. Nexata Dioso jumetanetsi palivaisi paeba. Bajarapajivi apo tsipaebi jivijavabelia. Nexata bajarapajivi livaisi itsa paeba itsajivi ata mapanacuata apo pejumetaejumeta, jivi jumetae atatsi, itsiata itsajivi ata apo jumetaetsi palivaisi paeba. Tshipaji itsajivi ata mapanacuata apo pejumetaejumeta paeba. Bajarapajivi Espíritu Santo pejamatabêcueneta livaisi paebiaexanatsi. Palivaisi Espíritu Santo bêpênêa xainaponapona, paebiaexanatsi. ³ Itsamonae pijinia Espíritu Santo pejamatabêcueneta jamatabêcuenecaêjêpaeyaexanatsi jivi pejumetaejumeta petsipaebinexa palivaisi Dioso yapêtaeyaexanatsi. Nexata bajarapajivi tsipaeba jivi pejumetaejumeta pejumetaenexatsi paivaisi tsipaeba. Nexata jivi pejumetaejumeta bajarapalivaisi bajarapajivi itsa tsipaeba, itsamonae pevajênaeuabelia sivaajamatabêcuenesaê tspanoe Dioso pejumecovênêtavanapaejava. Bajarapajivi jamatabêcuenebabatanua bitso penajamatabêxainaeivi. ⁴ Pajivi Espíritu Santo pejamatabêcueneta jamatabêcuenecaêjêpaeyaexanatsi livaisi pepaebinexa itsajivi ata mapanacuata apo pejumetaejumeta, bajarapajivi pijacuata jamatabêcuenevitsabapona Diosojavabelia bajarapalivaisita. Itsiata baitsi jane pajivi jamatabêcuenecaêjêpaeyaexanatsi jivi pejumetaejumeta petsipaebinexa palivaisi Dioso yapêtaeyaexanatsi, bajarapajivi petsipaebilivaisita Diosojavabelia jamatabêcuenevitsabiaexanapona daxita Dioso pejumecovênêtsivi.

⁵ Pacatojitsipatsi picani daxita paxamê Espíritu Santo pejamatabêcueneta papecajamatabêcuene caêjêpaeyaexanaenexa panecuaicuaijainexa itsajivi ata mapanacuata apo pejumetaejumeta. Itsiata rajane bajaraxua matatoxenetsia bitso pacatojitsipatsi papecajamatabêcuene caêjêpaeyaexanaenexa jivi pejumetaejumeta panetsipaebinexa palivaisi Dioso pacayapêtaeyaexana. Pajivi tsipaebapona jivi pejumetaejumeta palivaisi Dioso yapêtaeyaexanatsi, bajarapajivi bitso jamatabêcuenevavenona itsamonae Dioso pejumecovênêtsivi. Pajivi livaisi tsipaeba itsajivi ata mapanacuata apo pejumetaejumeta, bajarapajivi apo jumetaetsi palivaisi tsipaeba. Nexata bajarapajivi Dioso pejumecovênêtsivi apo jamatabêcuenevitsabiaexanae Diosojavabelia. Itsiata bajarapajivi itsa caêjêpatsinua jivi pejumetaejumeta penajumevajunupaebinexa pejumetaenexatsi palivaisi tsipaeba, nexata bajarapajivi Dioso pejumecovênêtsivi jamatabêcuenevitsabiaexana Diosojavabelia. ⁶ Bajaraxuata xanê ata pijinia paxamêjavata itsa patsipajê livaisi patacatsipaebinexa apo panejumetaejumeta, nexata apo panejumetaemê tsipae palivaisi pacatsipaebijitsipatsi. Nexata apo pacajamatabêcuene vitsabiaexanae tsipaetsi

Diosojavabelia. Itsiata bailsi jane itsa patsipajë panejumetaejumeta patacatsipaebinexa pacuenia Dioso bemajitsinaebota netsitajëta, nexata pacajamatabëcuene vitsabiaexanaejitsipatsi Diosojavabelia. Itsa pacatsipaebijitsipatsinua pexaniajailivaisi, nexata pacajamatabëcuene vitsabiaexanaejitsipatsi Diosojavabelia. Palivaisi Dioso neyapëtaeyaxana, palivaisi ata Dioso jumaisi, pexaniajailivaisi, itsa pacatsipaebijitsipatsi, nexata pacajamatabëcuene vitsabiaexanaejitsipatsi Diosojavabelia.

⁷ Pamona Espiritu Santo pejamatabëcueneta jamatabëcuenecaëjëpaeyaexanatsi pecuaicuaijainexa itsajivi ata mapanacuata apo pejumetaejumeta, bajarapamona livaisi tsipaebi ata, itsajivi ata apo jumetaetsi palivaisi tsipaeba. Bajara pijinia itsi tsipae penaxëanaejavanë peracatsivi ata xaniavaetsia itsa apo racatsi tsipae. Flauta piobinë, bijiata itsa obijitsipa, arpa pijinia peracatsinë ata, bijiata itsa racatsipa, nexata itsajivi ata apo vajiyapëtaetsibeje tsipae, pavaji picani naxëanaeyaexanabeje. Flauta piobijava, arpa ata peracatsijava, amatamobi tsipae. ⁸ Bajara pijinia itsi tsipae vajabitsaë trompeta piobijava ata. Vajabitsaë itsa ponaejitsia penavajabitsaëtsinexa, trompeta baoba penajunatsinexa. Nexata trompeta piobijava vajabitsaë itsa jumetane, bamuxunaothopa penacaetuatsinexa. Nexata trompeta piobinë xaniavaetsia itsa apo obi tsipae, nexata trompeta piobijava vajabitsaë jumetae ata tsipae, apo muxunaothopae tsipae penacaetuatsinexa penavajabitsaëtsinexa. ⁹ Bajara pijinia paitsimë tsipae paxamë ata. Itsajivi ata mapanacuata apo pejumetaejumeta itsa patsipaebijitsipame itsamonaejavabelia palivaisi Dioso pacayapëtaeyaxana, nexata apo pacajumetae tsipae palivaisi patsipaebame. ¡Nexata saya pajumenaxuabijitsipame bajarapalivaisi panetsipaebijava! ¹⁰ Daxitaviriajumevi bitso navita mapanacuajavaje. Caeviriajumevi canacujitsia yapëtaepona xaniavaetsia pijajume. ¹¹ Itsiata bailsi jane tajanacuapijinë ata itsa nebarëcuaijajai tsipae itsaviriavi pijajumeta, apo tajumetaejumeta, nexata besaicaya nacuapijinë taejitsipajë bajaraponë. Bajaraponë ata pijinia itsaviriavi pijumeta, apo pejumetaejumeta, itsa barëcuaijajanë tsipae, besaicaya nacuapijinënë netaejitsipa. ¹² Itsa pajitsipame Dioso papecajamatabëcuene caëjëpaeyaexanaenexa daxitacuene, nexata panatovajëre Diosojavabelia papecajamatabëcuene caëjëpaeyaexanaenexa. Itsiata bailsi jane bitso panatojitsipare Dioso papecajamatabëcuene caëjëpaeyaexanaenexa itsamonaejavabelia panetsipaebinexa palivaisi Dioso pacayapëtaeyaxana. Nexata Dioso pejumecovënëtsivi itsa pacajumetane palivaisi patsipaebame, ajamatabëcuenesaë tsane Dioso pejumecovënëtsijava.

¹³ Nexata pajivi Espiritu Santo pejamatabëcueneta jamatabëcuenecaëjëpaeyaexanatsi jivijavabelia livaisi petsipaebinexa itsajivi ata mapanacuata apo pejumetaejumeta, bajarapajivi bevëjëta Diosojavabelia pejamatabëcuenecaëjëpaeya exanaenexatsinua jivi pejumetaejumeta penajumevajunupaebinexa bajarapalivaisi. Nexata bajarapajivi Dioso itsa jamatabëcuenecaëjëpaeyaexanatsi jivi pejumetaejumeta penajumevajunupaebinexa daxitajivijavabelia, itsa najumevajunupaebiana, yapëtaeyaxanaena palivaisi tsipaeba. ¹⁴ Xanë ata apo tajumetaejumeta vajëtsi atanë tajamatabëthëtojavavetsina, itsiata apo yapëtaenë xua vajëtajë Diosojavabelia. ¹⁵ Mara pacuenia tavajënaeyabelia xanë exanaenajëje. Vajëtsianajë Diosojavabelia anijavirijumetabeje. Vajëtsianajë apo tajumetaejumeta. Vajëtsianajëna tajajumeta ata daxitajivi tanejumetaenexa. Tanaxëanaejavata ata pijinia bajarapacuenia

exanaenajë. Naxëanaenajë apo tajumetaejumeta. Naxëanaenajëna tajajumeta ata daxitajivi tanejumetaenexa. ¹⁶ Pexaniacuene Dioso papecatoexanaejava yabara itsa pavajëtsipame Diosojavabelia itsajivi ata mapanacuata apo pejumetaejumeta, nexata pajivi pacajumetaeyeca, apo pacajumetae tsipae xua yabara pavajëtsipame Diosojavabelia. Nexata bajarapajivi toacuenebitsi tsipae papecayavenonaeyavajëtsinexa Diosojavabelia. ¹⁷ Paxamë picani Dioso pexaniacuene papecatoexanaexae, Diosojavabelia pavajëtsipame xaniavaetsia. Itsiata baitsi jane itsajivi ata mapanacuata apo pejumetaejumeta panevajëtsixae Diosojavabelia, pajivi pacajumetaeyeca, ajamatabëcuene covëbi tsipae. Tsipaji apo pacajumetae tsipae xua yabara pavajëtsipame. Nexata apo pacamuxunajamatabëcuenevitsabi tsipae Diosojavabelia. ¹⁸ Dioso baja cajena xanë nejamatabëcuene caëjëpaeyaexana tacuaicuajainexa itsajivi ata mapanacuata apo pejumetaejumeta. Bajarapacuenia cuaicuajianë itsajivi ata mapanacuata apo pejumetaejumeta daxita paxamë matatoxenetsia. Bajarapacuenia Dioso tanejamatabëcuene caëjëpaeyaexanaexae, jumaitsinë tsabiabi Diosojavabelia: “Xanepana rabaja. Pexaniacuene bitso netoexaname,” janë tsabiabi Diosojavabelia. ¹⁹ Itsiata baitsi jane Dioso pejumecovënëtsivi penacaetuatsijavata, ayailivaisi tsipaebi atanë tsipae itsajivi ata mapanacuata apo pejumetaejumeta, bajarapamonae apo nejumetae tsipae palivaisi tsipaebajë. Bajaraxuata Dioso pejumecovënëtsivi penacaetuatsijavata, apo jitsipañë tatsipaebinexa itsajivi ata mapanacuata apo pejumetaejumeta. Bijñ rajane jitsipajë bajarapamonae pejumetaejumeta tatsipaebinexa saya tsiquirilivaisiyo ata tanejumetaenexa, palivaisi tsipaebajë.

²⁰ Tajamonae, pacuenia pejevaxi bajamatabëcueneitsi, pëtsa bajara pajamatabëcueneitsimë. Xaniavaetsia panajamatabëxainaname. Pacuenia panaveretsivi bajamatabëcueneitsi, bajara pajamatabëcueneitsimë tsane. Itsiata baitsi jane pibisiacuene paneexanaeyaniva, bepapejevaxijiviximë panataenename. Tsipaji pejevaxijivixi abaxë bitso apo najamatabëxainae pibisiacuene pexanaenexa. ²¹ Dioso pejumelivaisibaxutota tajëvelia jumaitsi mapacueniaje: “Itsamonae cuaicuajiaeyaxanaenajë itsajivi ata mapanacuata apo pejumetaejumeta. Nexata bajarapamonae tajumelivaisi netotsipaebiana tajajivijavabelia. Itsiata baitsi jane tajajivi apo jumecovënëtsi tsane tajumelivaisi,” jai tajëvelia Dioso pejumelivaisibaxutota judfovi Dioso apo pejumecovënëtsijavanexa yabara. ²² Nexata Dioso pejumecovënëtsivi Espiritu Santo pejamatabëcueneta jamatabëcuene caëjëpaeyaexanaponaenatsi pecuaicuajainexa itsajivi ata mapanacuata apo pejumetaejumeta. Nexata Dioso apo pejumecovënëtsivi itsa taena bajarapacuenae, canaëjëtsiana Diosojavabelia. Canaëjëtsiananua bajarapamonae penaneconitanapaejava Diosojavabelia. Dioso pejumecovënëtsivi jamatabëcuene caëjëpaeyaexanaenatsi pepsipaebinexa itsamonaejavabelia palivaisi Dioso yapëtaeyaexanatsi. Nexata itsamonae Dioso pejumecovënëtsivi xaniavaetsia pejumetaexae palivaisi tsipaebatsi, canaëjëtsiana pepacuene Dioso pitaxutotsoniataejavatsi pepadepaenexatsi pijaneconivecua. ²³ Nexata pijina itsamonae Dioso apo pejumecovënëtsivi napatsipa panenacaetuatsijavata. Nexata bajarajota paxamë livaisi patsipaebijitsipame itsajivi ata mapanacuata apo pejumetaejumeta. Nexata pamonae penapatsivi apo papecayumetaexae palivaisi patsipaebame itsajivi ata mapanacuata apo pejumetaejumeta, nexata pacabarajamatabëjumai tsipae: “Mara pamonaeje saya pematajemabivitsije,” pacabarajamatabëjai tsipae. Tsipaji apo pacajumetae tsipae palivaisi patsipaebame. ²⁴ Jivi pejumetaejumeta panetsipaebijavata

palivaisi Dioso pacayapëtaeyaexana, Dioso apo pejumecovënëtsijivi napatsipa. Nexata bajarapajivi papecajumetaexae palivaisi patsipaebame, najamatabëxainaejitsipa. Nayapëtaejitsipanaua bajarapajivi penaneconitsijava Diosojavabelia. Nexata pijaneconi bitso yanajamatabëxainaejitsipa Diosojavabelia. ²⁵ Papecanamuxunaevetsijavata, bajarapajivi muetsia penajamatabëxainabiabijava najamatabëcuenyapëtaejitsipa. Nexata nayapëtaejitsipa penaneconitsijava Diosojavabelia. Nexata pematatabacabëta nucaejitsipa. Vajëtsipa Diosojavabelia. Pevajëtsijavata jumai tsipae Diosojavabelia: “Diosomë, bitso baja cajena ayaijamatabëcuenenëmë,” jai tsipae Diosojavabelia. Nexata paxamëjavaberena ata bajarapajivi pacajumaitsi tsipae: “Pepacuene majotaje paxamë Dioso pacayajavaponapona,” pacajai tsipae.

Pacuenia Dioso pejumecovënëtsivi muxujibatsi peyapëtaenexa pacuenia exanaejitsia culto pexanaejavata yabara pelivaisi

²⁶ Tajamonae, itsa panacaetuame Dioso pejumelivaisi yabara, mapacuenia paexanaenameje. Itsamonae naxëanaena vaji. Itsamonae najamatabëcueneveretsiana jivi pejumetaejumeta livaisi petsipaebinexa daxitajivijavabelia. Itsamonae najamatabëcueneveretsiana palivaisi Dioso yapëtaeyaexanatsi juya petsipaebinexa itsamonaejavabelia. Itsamonae najamatabëcueneveretsiana livaisi petsipaebinexa itsajivi ata mapanacuata apo pejumetaejumeta. Itsamonae pijinia najamatabëcueneveretsiana jivi pejumetaejumeta juya pejumevajunupaebaponaenexa daxitajivijavabelia, palivaisi tsipaeba itsajivi ata mapanacuata apo pejumetaejumeta pecuaicuaijai. Bajarapacuenia paexanaename panenacaetuatsijavata daxita Dioso pejumecovënëtsivi pevajënaeyabelia pejamatabëcuenevitsabaponaenexa Dioso pejumecovënëtsijava. ²⁷ Panenacaetuatsijavata, jivijavabelia itsamonae livaisi itsa tsipaebijitsia itsajivi ata mapanacuata apo pejumetaejumeta, nexata Dioso tocopatatsi petsipaebinexa anijajivibeje, acueyabi pajivibeje ata. Baitsi pejumevajunupaebinexatsi palivaisi tsipaeba itsajivi ata mapanacuata apo pejumetaejumeta. Itsiata baitsi jane caecuenia acueyabi pajivibeje apo benajuatsipaebi. Nexata pajivi jivijavabelia livaisi tsipaebijitsia itsajivi ata mapanacuata apo pejumetaejumeta, bajarapajivi copiata betsipae. Nexata pijinia pajivi jumevajunupaebaponaejitsia jivi pejumetaejumeta, bajarapajivi cotocaevi bejumevajunupaebapona jivijavabelia. Bajarapacuenia itsamonae jivijavabelia livaisi itsa tsipaeba itsajivi ata mapanacuata apo pejumetaejumeta, nexata juya itsajivi jivi pejumetaejumeta bejumevajunupaebapona daxitajivijavabelia peyapëtaenexa palivaisi tsipaeba itsajivi ata mapanacuata apo pejumetaejumeta. ²⁸ Nexata itsa ajibi jivi pejumetaejumeta pejumevajunupaebijivinexatsi daxitajivi peyapëtaenexa palivaisi tsipaeba itsajivi ata mapanacuata apo pejumetaejumeta, nexata panenacaetuatsijavata livaisi apo betsipaei itsajivi ata mapanacuata apo pejumetaejumeta. Bajarapamonae moya beena. Bëpënë saya pejamatabëëthëtota becuaijai tsenae itsajivi ata mapanacuata apo pejumetaejumeta. Diosojavabelia ata pijinia bajarapacuenia bëpënë pejamatabëëthëtota bevajëtena. ²⁹ Bajara pijinia pacuenia Dioso tocopata itsamonae ata jivijavabelia petsipaebinexa palivaisi Dioso yapëtaeyaexanatsi. Bajarapamonae ata Dioso tocopata jivijavabelia petsipaebinexa anijajivibeje, acueyabi pajivibeje ata. Nexata petsipaebijavata, itsamonae xaniavaetsia benamuxunaevetena pejumeyapëtaenexa itsa xaniajai Dioso pejamatabëcueneta bajarapamonae

tsipaebatsi bajarapalivaisi. ³⁰ Nexata bajarapamonae livaisi petsipaebaponaejavata, bajarajota penamuxunaevetecaenē Dioso pejamatabēcueneta livaisi itsa yapētaeyaexanatsi, nexata ponē jivijavabelia livaisi tsipaebapona, benajumecopata baja. Nexata ponē penamuxunaevetecaevata, Dioso livaisi yapētaeyaexanatsi, bajaraponē juya daxitajivijavabelia betsipaeba palivaisi Dioso yapētaeyaexanatsi penamuxunaevetecaevata. ³¹ Bajarapacuenia daxita paxamē Dioso pejumelivaisi papecayapētaeyaexanaevi Dioso pacatocopata jivijavabelia livaisi panetsipaebinxeta pacaiejivimē tsaponae. Bajarapacuenia Dioso pacatocopata daxitajivi peyapētaenexa Dioso papecayapētaeyaexanaelivaisi, pesivaajamatabēcuenesaē tsaponaenexanua Dioso pejumecovēnētsijava panetsipaebilivaisita. ³² Pamonae tsipaeba daxitajivijavabelia palivaisi Dioso yapētaeyaexanatsi, bajarapamonae yapētane paepatota najumecopatsijitsia. Tsipaji Espiritu Santo pejamatabēēthēto itorobatsi paepatota najumecopatsijitsia. Nexata itsa najumecopata bajaraponē, juya itsanē petsipaebinxeta daxitajivijavabelia. ³³ Dioso apo tocopatsi caecuenia anijajivibeje jivijavabelia livaisi penajuatsipaebinxeta. Tsipaji caecuenia anijajivibeje livaisi itsa najuatsipaebijitsipabeje, xaniavaetsia apo jumetaetsi tsipae penajuanacaetuatsivi. Bajaraxuata Dioso tocopata jivijavabelia livaisi petsipaebinxeta caejivi tsaponae.

Pacatsipaebijitsiatsi pacuenia exanabiaba daxita Dioso pejumecovēnētsivi penacaetuatsijavata. ³⁴ Petiriavi moya beena Dioso pejumecovēnētsivi penacaetuatsijavata. Tsipaji petiriavi Dioso apo tocopatsi Dioso pejumecovēnētsivi penacaetuatsijavata pecuaicuajitsenaenexa. Petiriavi pamonajivi bejumecovēnētsijajivananapa pacuenia Dioso pejumelivaisibaxutota itorobatsi. ³⁵ Petiriva itsa jamatabēyanijoba itsalivaisiyo, nexata bota beyanijoba pamonajavabelia. Piauracuene exanaejitsipa Dioso pejumecovēnētsivi penacaetuatsijavata petiriva itsa cuaicuajiai tsecae tsipae.

³⁶ Pētsa pacopatame Dioso pejumecovēnētsivi penacaetuatsijavata petiriva pecuaicuajitsecaenexa. Tsipaji itsatomaranējava Dioso pejumecovēnētsivi bajarapacuenia apo exanae. Pētsa bepaayajamatabēcuenevimē panataneme bajarapacuenia paneexanavanapaenexa. ³⁷ Itsamonae paxamēyajuvēnēvi natane bepetsipaebarusvinexeta daxitajivijavabelia palivaisi Dioso yapētaeyaexanatsi. Itsamonae natane Espiritu Santo pejamatabēcueneta bepejamatabēcuenē caējēpaeyaexanaevitsi pacuenia Dioso jitsipa. Nexata bajarapamonae itsa xaniajai Espiritu Santo yajavajinavanapa, beyapētane picani patacatoyaquinaelivaisi, mapalivaisije vajatuxanenē pitorobilivaisi jivi pejumecovēnētsinexa. ³⁸ Itsiata baitsi jane pajivi apo namuxunaevetsi pejumecovēnētsinexa mapalivaisije, pētsa pajumecovēnētame bajarapajivi penavajunupaebijava Dioso pejamatabēcuenecaējēpaeya exanaejavatsi.

³⁹ Bajaraxuata asaēyata panatojitsipare Dioso papecajamatabēcuenē caējēpaeyaexanaenexa panetsipaebinxeta daxitajivijavabelia palivaisi Dioso pacayapētaeyaexana. Itsiata baitsi jane pētsa pajumeitavetame itsamonae itsa cuaicuajiai itsajivi ata mapanacuata apo pejumetaejumeta.

⁴⁰ Nexata panenacaetuatsijavata, itsa patsipaebame daxitajivijavabelia palivaisi Dioso pacayapētaeyaexana, xaniavaetsia pacaenēmē tsaponae patsipaebabianame.

¹ Tajamonaē, pacatojitsipatsi panenajamatabēnapitsinexa palivaisi baja imata pacatsipaebatsi. Bajarapalivaisi, pexanialivaisi, papecacapanepaelivaisinexa panijaniconivecua. Pajumecovēnētame baja bajarapalivaisi. Nexata panevajēnaeyabelia asaēya pajumecovēnētavanapaename bajarapalivaisi. ² Panevajēnaeyabelia itsa pajumecovēnētavanapaename bajarapalivaisi, nexata pibisiacuene paneexanaeconivecua Dioso pacacapanepaena. Matacabi apo pevereverecaejava paxainaename. Itsiata baitsi jane copiaya panenamatabēēthētojavavetsina itsa apo pajumecovēnētāsimē tsane bajarapalivaisi, nexata Dioso apo pacacapanepae tsane.

³ Copiaya baja cajena pacatsipaebatsi palivaisi vajatuxanenē copiaya netsipaeba. Pacatsipaebatsi baja cajena Cristo vajanacasivatēpaejava pibisiacuene vajaexanaeconiconivecua. Cristo baja cajena nacasivatēpa pacuenia Dioso pejumelivaisibaxutota tajēvelia jumaitsi. ⁴ Nexata Cristo petēpaenē pemēthētsicujinaetsi, acueyabi maticabita, icatsia Dioso asaēyaexanatsi. Bajarapacuenia Cristo Dioso icatsia asaēyaexanatsi pacuenia baja cajena tajēvelia Dioso pejumelivaisibaxutota jumaitsi Cristo yabara. ⁵ Nexata Cristo Dioso piasaēyaexanaecujinaetsi, copiaya Pedrojavabelia tsitanaitajēta. Bajaraxuacujinae Jesús pijajivi, doce ponēbeje apóstolevijavabelia, tsitanaitajēta. ⁶ Bajaraxuacujinae Jesús pijajivi quinientos pematatsēnēa pajivibejevabelia penacaetuatsijavata, tsitanaitajēta. Bajarapamonaejavuvēnēvimi Jesús petaevitsi itsamonae baja tēpae ata, itsiata ayaibitsaētoxaeto abaxē asaē tsavanapae. ⁷ Bajaraxuacujinae icatsia Santiagojavabelia Jesús tsitanaitajēta. Bajaraxuacujinae icatsia daxita apóstolevijavabelia Jesús tsitanaitajēta.

⁸ Xanē daxita apóstolevivecua bexējavaberena apóstolenēnē nexana. Nexata pacuenia pexi pexainaejivi cotocaevi pexainaenacueto itsi, bajarapacuenia nataniji bajarapamonaevecua. Itsiata baitsi jane daxita Jesús pijajivijavabelia petsitanaitajētsicujinae, xanējavaberena ata Jesús netsitanaitajēta tataenexa. ⁹ Daxita apóstolevivecua xanē beveliajamatabēcuenenēnē nataniji. Tspaji abaxē xanē Jesús itsa apo jumecovēnētāsinē, Jesús pijajivi bejiobiaexanabiabajē. Bajaraxuata: “Apóstolenē,” tanejainexa ata, auranē tsabiabi. ¹⁰ Itsiata baitsi jane Dioso taneitaxutotsoniataexae, nitapeta baja apóstolenēnēxanē. Xanējavaberena Dioso taneitaxutotsoniataejava, apo nacueratsi. Biji rajane xanē daxita itsaapóstolevi matatoxenetsia bitso Dioso tonacuenebaponaponajē. Itsiata xanē tajamatabēcuenesaēta apo tonacuenebaponaponanē. Dioso raja pesaēta tonacuenebaponaponajē. Nexata Dioso pesaēta nejamatabēcueneyavenonapona asaēya tatonacuenebaponaponanexa. ¹¹ Xanē meta bitso Dioso tonacuenebaponaponajē itsamonae apóstolevi matatoxenetsia. Itsa jume, nexata meta bajarapamonae bitso Dioso tonacuenebavanapa xanē matatoxenetsia. Itsiata baitsi jane bajarapacuenie yabara apo canaējētāsinē. Bitso rajane pacatojitsipatsi paneyapētaenexa palivaisi baja pacatsipaebatsi, pexanialivaisi, Jesucristo pelivaisi. Nexata baja bajarapalivaisi pajumecovēnētavanapame.

Pacuenia itsamatacabi Dioso icatsia asaēyaexanaejitsia petēpaevimi yabara pelivaisi

¹² Pacatsipaebatsi baja cajena Cristo petēpaecujinae Dioso icatsia piasaēyaexanaejavatsi. Itsiata baitsi jane itsamonae paxamējavuvēnēvi jamatabēcuenenavēxaniabiaya jumai tsabiabi: “Jivi rabaja petēpaecujinae ajibi icatsia piasaējavanaxa,” jai tsabiabi. Nexata bajarapacuenia apo bejumaitsi

bajarapamona. ¹³ Tsipaji peneta itsa pepacuene ajibi tsipae petêpaevi icatsia piasaêjavanexa, nexata baja Cristo ata icatsia Dioso apo asaêyaexanaetsi tsipae petêpaecujinae. ¹⁴ Itsa baja Cristo petêpaecujinae icatsia Dioso apo asaêyaexanaetsi tsipae, nexata palivaisianê pacatsipaebavanapatsi, amatamobi tsipae. Paxamê ata panenajamatabêcuenecopatsijava Cristojavabelia Dioso papecacapanepaenexa panijaneconivecua, amatamobi tsipae. ¹⁵ Pematatsênêa xua Dioso exana patavajunupaebijava, panajumetsênêtsipajê. Tsipaji pajumaitsinê tsabiabi mapacueniaje: “Cristo raja petêpaecujinae Dioso baja icatsia asaêyaexanatsi,” pajanê tsabiabi. Itsa pepacuene ajibi tsipae petêpaevi icatsia piasaêjavanexa, nexata baja Cristo Dioso icatsia apo asaêyaexanaetsi tsipae. ¹⁶ Itsa peneta pepacuene ajibi tsipae petêpaevi icatsia piasaêjavanexa, nexata Cristo ata petêpaecujinae icatsia Dioso baja apo asaêyaexanaetsi tsipae. ¹⁷ Nexata Cristo petêpaecujinae Dioso baja icatsia itsa apo asaêyaexanaetsi tsipae, nexata paxamê ata panenajamatabêcuenecopatsijava Cristojavabelia Dioso papecacapanepaenexa panijaneconivecua, panacueratsipame baja. Tsiteca abaxê panijaneconi paxainaejitsipame. ¹⁸ Bajarapacuenia itsa itsipae, nexata baja pamonaemi têpa Cristo pepua pejumecovênêtsivi, bajarapamonaemi ata naxuabijitsipa baja. ¹⁹ Vaxaitsi ata pijinia Cristojavabelia vajanajamatabêcuenecopatsicujinae, xua Dioso nacayavenonabiaba, saya nacayavenonaejitsipa vajajinavanapaepatojebi mapanacuataje. Vajatêpaecujinae, Cristo pejamatabêcueneta Dioso itsa apo nacacapanepaejitsia tsipae vajaneconecivecua, vajajamatabêcuenenavêxaniabivi baja tsipae. Tsipaji vaxaitsi jamatabêjumaititsi tsabiabi mapacueniaje: “Cristo pejamatabêcueneta Dioso nacacapanepaena,” jamatabêjaiti tsabiabi. Nexata ayaicuenia Dioso vajatonacuenebabiabijava ata, nacueratsipatsi. Maticabi apo peverevereaejava Dioso vajanacarajutsinexa vajeavetavanapaejava ata, nacueratsipatsi. Caranata meta jitsipaejitsipatsi Dioso apo pejumecovênêtsivi vajanacaitaxutobejiobiataenexa.

²⁰ Itsiata baitsi jane mapalivaisije xaniajai cajena. Tsipaji baja Cristo petêpaecujinae, capanepaeya baja icatsia Dioso asaêyaexanatsi. Nexata pacuenia Cristo petêpaecujinae mêtêhevecua pitsapa, bajara pijinia pacuenia itsamatacabi mêtêhevecua pitsapaena daxita pamonaemi têpa Dioso pepua pejumecovênêtsivi. Nexata baja Cristo petêpaecujinae, mêtêhevecua itsa pitsapa, daxita petêpaevivecua Cristo baja namataxainaeya pitsapa mêtêhevecua. ²¹ Caenê Adânpijinê pejamatabêcueneta taxuxuaba jivi petêpaevava mapanacuataje pibisiacuene pexanaexae. Bajara pijinia pacuenia caenê Cristo pejamatabêcueneta vajanacasivatêpaexae cruzata, taxuxuaba petêpaevimi itsamatacabi mêtêhevecua pepitsapaejavanexa. ²² Daxitajivi têpona Adânpijinê petaxuxuabicuenia. Bajara pijinia pacuenia daxita pamona. Cristo pijajivi, petêpaecujinae icatsia Dioso asaêyaexanaenatsi pacuenia Cristo Dioso asaêyaexanatsi. ²³ Paepatota Dioso jitsipa petêpaevi piasaêyaexanaenexa, caejivi canacujitsia asaêyaexanaponaena. Cristo baja petêpaecujinae, Dioso itsa asaêyaexanatsi, daxita petêpaevivecua namataxainaeya baja asaêyaexanatsi. Bajaraxuacujinae icatsia pamatacabi Cristo patsianica, daxita pamona. Cristo pijajivi, Dioso icatsia asaêyaexanaenatsi. ²⁴ Bajaraxuacujinae jane baja daxitacuene pecopiarucaeyaexanaejavanexa, copiapatsiana. Bajarapamatacabi Cristo copiarucaeyaexanaena daxita xua Cristo pijavajabitsaê evetavanapa.

Nexata bajaraxua Cristo pecopiarucaeyaexanaecujinae, xua paxa Dioso tocopatatsi Cristo pevetsinexa, bajaraxua tocanaviatsiana baja paxa Diosojavabelia. ²⁵ Cristo evetaponaponaena daxitacuene. Matapania Dioso cueneamoneyabiana daxita Cristo pijavajabitsaë, Cristo copatsiana daxitacuene pevetsijava. ²⁶ Daxita Cristo pijavajabitsaë verebiabiana. Bajaraxuacujinae cotocaevi copiarucaeyaexanaena jivi petëpaecuenemi. ²⁷ Dioso pejumelivaisibaxutota tajëvelia jumaitsi mapacueniaje: “Dioso itsamatacabi pexënato Cristo tocopatsiana daxitacueneviria petoevetsinexatsi,” jai Dioso pejumelivaisibaxutota. Itsiata baitsi jane Dioso pexënatojavabelia apo jumaitsi: “Xanë ata nitorobianame,” apo jai Dioso. Dioso raja itorobiana pexënato petoevetsinexatsi daxitacueneviria. ²⁸ Nexata itsamatacabi Cristo daxitacueneviria itsa evetsiana, daxitacueneviria Cristo pitorobicuenia jumecovënëtabiabianatsi. Nexata jane baja bajarapamatacabi Cristo jumecovënëtsiana paxa Dioso pitorobicueniatsi. Bajarapacuenia Cristo paxa Dioso jumecovënëtsixae tsane, nexata bajarapamatacabi Dioso daxitanacuanëjava daxitacueneviria pitorobinë tsane.

²⁹ Itsamonae pepua penabautisabivi baja, pijamonae totëpatsi. Pijamonae ata baja pepuanajamatabëcuene copabi Cristojavabelia, totëpatsi. Itsiata baitsi jane bajarapamonae tëpa nabautisabinejeva. Nexata pajivi pijamonae totëpatsi, bajarapajivi penabautisabijivi ata baja, pijamonae pevënamuto icatsia nabautisaba. Bajarapacuenia anijatobeje nabautisaba pevëcuatëpaejivitsi bepenabautisabijivi petotaenexatsi Dioso. Petëpaevimi peneta icatsia Dioso itsa apo asaëyaexanaetsijitsia tsipae, penabautisabijivi baja pijamonae pevënamuto icatsia apo nabautisabi tsipae, nabautisabinejeva pevëcuatëpaejivitsi bepenabautisabijivi petotaenexatsi Dioso.

³⁰ Petëpaevimi peneta icatsia Dioso itsa apo asaëyaexanaejitsiatsi tsipae, nexata Dioso pejumelivaisi apo patsipaebavanapaenë tsipae, daxitamatacabi panetsiyai tsabiabi ata. ³¹ Tajamonae, daxitamatacabi baja cajena netsiyai tsabiabi. Itsamonae picani jamatabënebeyaxuabiaba. Bajaraxua paneyapëtaenexa, pacatsipaebatsi. Tsiipaji pacasivajamatabëcuenebarëyatsi vajatuxanenë Jesucristo xaniavaetsia panejumecovënëtanapaexae. ³² Majotaje Efeso tomarapijivi ata jamatabënebeyaxuaba picani. Bajarapamonae benevëthëjamatabëcuenevi. Tsiquirijavayota vecuapanepajë. Jivi petëpaecujinae icatsia Dioso itsa apo asaëyaexanaejitsiatsi tsipae, nexata xanë ata nacueratsipajë. Nacueratsipajë, netsiyai ata, jivi tatsipaebaponaëjava Dioso pejumelivaisi. Vajatëpaecujinae icatsia Dioso itsa apo nacaasaëyaexanaejitsia tsipae, nexata xaniavaetsia jumecovënëtsipatsi pamonae jamatabëcuenenavëxaniabiya nacatsipaeba mapacuenia pejumaitsilivaisije: “Ayaijavanë vajaxaejava xaeyabianatsi. Aitajibitsinua tsabiabi tsane vajabarëyatsabiabinexa. Tsiipaji raja bepijia tëpaenatsi,” pejailivaisi vajanacatsipaebivi jumecovënëtsipatsi.

³³ Itsiata baitsi jane pëtsa panacopatame papecayamaxëitojorobinexa bajarapacuenia pejumaitsi. Tsiipaji raja itsamonae bajumaitsi: “Itsa yajavaponaponaëjitsipame pibisiajamatabëcuenevi, cajamatabëcuenebijianaëjitsipa. Nexata pexaniajamatabëcuenenë atamë, bajarapamonae cuenejëpaeya ponaponaëjitsipame,” bajai itsamonae. ³⁴ Panajamatabëxainare xaniavaetsia. Pëtsa baja pematatsënëa pibisiacuene paexaname. Itsamonae paxamëyajuvënëvi Dioso apo yapëtae. Mapacuenia pacajumaitsijsipe paneauranexa.

Pacuenia petēpaevimi Dioso icatsia itsa asaēyaexanatsi, perabēitothianaējitsiatsi yabara pelivaisi

³⁵ Itsamonae raeta yanijobiana petēpaevimi icatsia Dioso piasaēyaexanaejavanexatsi yabara. Jumaitsi meta tsane bajarapamonae: “¿Detsa meta pacuenia petēpaevimi icatsia asaēyaexanaenatsi? ¿Detsa meta nexata pitsiperabēto icatsia xainaena bajarapamonae?” jai meta tsane bajarapamonae. ³⁶ Bajarapacuenia itsa yanijobiana, apo canaējētsinejeva jamatabēcuenenavēxaniabiaya bajarapacuenia yanijobiana. Vajaubijava, pexuto itsa ubatsi, pejuvicujinae bajarapaxutomi batsabana pepitsapaenexa pejananae. ³⁷ Arrozzuto, itsaviriauxutoxi ata, pexu saya ubatsi. Apo mēthēcaetsi pepabotonē. ³⁸ Peubixu, caevirixu canacujitsia, peubicujinae capitsapona pijaviriabotonē, pijaviriabaxu yajava. Dioso baja cajena pēcopatsicuenia caeviriaboto canacujitsia naexanapona. ³⁹ Mapanacuata Dioso copatsi ata daxitacueneviria pejinavanapaenexa, itsiata apo naperabējēpae. Jivi saicaya itsaviriaperabēto xaina. Unupijidujuai pijinia saicaya itsaviriaperabēto xaina. Pepunaevi pijinia saicaya itsaviriaperabēto xaina. Menepijidujuai pijinia saicaya itsaviriaperabēto xaina. ⁴⁰ Bajara pijinia itsi athēbētatsia pejinavanapaevi ata. Bajarapamonae saicaya itsaviriaperabēto xaina mapanacuapijivivecuaje. Athēbētatsia pejinavanapaevi nacavecuapexaniaperabētovi. Mapanacuata pejinavanapaevi ata, itsamonae nacatsitapexaniaperabētovi picani. Itsiata pijinia saicayacuenia. ⁴¹ Matabapijijuameto itayota. Meravipijijuameto ata itayota. Itsiata saicayacuenia navecuaitayotabeje. Tulupu ata pijinia itayota. Itsiata caetluputo canacujitsia saicayacuenia navecuaitayotapona. ⁴² Bajara pijinia nacavecuaitane petēpaevimi. Saicayaperabēto nacavecuaxainaena Dioso icatsia itsa asaēyaexanaenatsi. Petēpaejivi irabelia mēthētatsi. Nexata baja tsabana. Bajaraxuacujinae Dioso icatsia itsa asaēyaexanaenatsi, apo petsabanaeperabētonexa jane baja xainaena. ⁴³ Petēpaejivi mēthētatsi vajaataejitsibiperabēto yajava. Bajaraxuacujinae Dioso icatsia itsa asaēyaexanaenatsi, pexaniapenivenenaeperabēto jane baja xainaena. Petēpaejivi mēthētatsi pecueranaeperabētomu yajava. Bajaraxuacujinae Dioso icatsia itsa asaēyaexanaenatsi, daxita matababijavabelianexa jane baja pesaē pexainaeperabēto xainaena. ⁴⁴ Petēpaejivi mēthētatsi mapanacuapijiperabēto yajava. Bajaraxuacujinae Dioso icatsia itsa asaēyaexanaenatsi, athēbēnacupijiperabēto xainaena. Itsaviriaperabēto abaxē aeconoxae xainatsi mapanacuata vajajinavanapaenexa. Bajara icatsia pacuenia itsamatababi itsaviriaperabēto xainaenatsi athēbēnacuatatsia vajajinavanapaenexa.

⁴⁵ Dioso pejumelivaisibaxutota jumaitsi mapacueniaje: “Adánpijinē copiaya Dioso exanatsi mapanacuataje. Bajaraponē Dioso exanatsi pecueranaeperabēto yajava peponaponaenexa mapanacuataje,” jai Dioso pejumelivaisibaxutota. Itsiata baitsi jane Adánpijinē matatoxenetsia Cristo bitso ayaijamatabēcuenenē. Nexata Cristo petēpaeacujinae icatsia Dioso itsa asaēyaexanatsi, caējēpatsi vajanacajamatabē cueneasaēyaexanaenexa Diosjavabelia. Caējēpatsinua vajanacarajutsinexa matababi apo peverevereacajava. ⁴⁶ Pacuenia athēbēnacupijivi perabēitsi, abaxē copiaya apo perabēitsi. Biji rajane pacuenia mapanacuapijivi perabēitsije, bajaraperabēitsi. Itsiata baitsi jane vajatēpaeacujinae Dioso icatsia itsa nacaasaēyaexanaena, pacuenia athēbēnacupijivi perabēitsi, bajara vaxaitsi ata perabēitsi tsanetsi. ⁴⁷ Adánpijinē copiaya Dioso exanatsi mapanacuataje. Atsabenota exanatsi.

Bajaraxuacujinae bexëajavabelia athëbëvetsica Cristo patsica, ponë vajatuxanenë. Bajaraponë saicaya athëbëvetsica pepatsinë. ⁴⁸ Daxitatsi vaxaitsi, mapanacuapijivitsije, perabëjêpatsi Adánpijinë, atsabenota pexanaenëtsi. Itsiata baitsi jane itsamatacabi daxitatsi, Cristo vajajumecovënëtsivi, perabëjêpaenatsi Cristo. Nexata pacuenia athëbënacuaipijivi perabëitsi, bajaraperabëitsi tsanetsi Cristo vajajumecovënëtsivi. ⁴⁹ Aeconoxae abaxë perabëjêpatsi Adánpijinë, ponë atsabenota pexanaenëtsi. Bajara icatsia pacuenia itsamat-acabi Cristo perabëjêpaenatsi, ponë athëbëvetsica pepatsinë.

⁵⁰ Tajamonae, jitsipajë patacatsipaebinea mapacueneye. Acuenebi caejivi ata mapanacuapijivije mapanacuapijiperabëto yajava pejonenexa Dioso pijanacuayabetsia. Tsipaji vajaperabëto saya pevereverecejavanexa. Bajaraxuata acuenebi vajayajavajinavanapaenexa bajaraperabëto daxita matacabijavabelianexa. ⁵¹ Nexata panamuxunaevere mapalivaisije, Dioso bajayata muetsia pexainabuatsilivaisimi, palivaisi aeconoxae Dioso nacayapëtaeyaexanapona. Daxitatsi raja vaxaitsi Cristo icatsia pepatsimatacabinexatsica pevajënaeya, apo tēpaetsi tsane. Itsiata baitsi jane apo tēpae atatsi tsane, pamatacabi Cristo patsianica, daxitatsi nacaperabëitothianaena Dioso. ⁵² Itsa najumetsiana cotocaevi piobijava trompeta, bepijiayo tsatabi tsane, paepatoyovajëto banaitatsaquetajarabatsi, bajarapaepatoyovajëto Dioso nacaperabëitothianajonena. ⁵³ Vajaperabëto raja pevereverecejavanexa. Bajaraxuata xanepana vajanacaperabëitothianaenexa, apo pevereverecejaperabëto vajaxainaenexa. ⁵⁴ Nexata paepatota bajarapacuenia nacaperabëitothianajonena, copiajopaena jane baja pacuenia Dioso pejumelivaisibaxutota tajëvelia jumaitsi. Dioso baja cajena pejumelivaisibaxutota tajëvelia jumaitsi mapacueniajaje: “Jivi petëpaecuenemi itsamatacabi copiarucaena. Pinijicuenia Dioso copiarucaeyaexanaena jivi petëpaecuenemi. ⁵⁵ Jivi petëpaeyaexanaecuenemi ajibi tsane pesaë vajanacaavitaniaexanaeyaniva. Ajibi tsane vajanacatëpaeyaexanaecuenemi,” jai tajëvelia Dioso pejumelivaisibaxutota jivi petëpaeyaexanaecuenemi Dioso pecopiarucaeyaexanaejavanexa yabara. ⁵⁶ Pibisiacue ne vajaexanaeconi yabara tēpaenatsi. Palivaisi bajayata Dioso Moiséspijinëta najumecopata, bajarapalivaisi pejamatabëcueneta yapëtanetsi vajatëpaecujinae Diosovecua picani vajanaxuabijavanexa pibisiacue itsa exanatsi. ⁵⁷ Itsiata baitsi jane baja vajatëpaecujinae Diosovecua apo naxuabitsi tsane. Tsipaji baja vajatuxanenë Jesucristo nacasivatëpa cruzata vajanacapanepaenexa vajaneconivecua. Bajaraxuata vaxaitsi Diosojavabelia jumaitsitsi tsabiabi mapacueniajaje: “Pexaniacue ne rabaja panetoexaname,” jaitsi tsabiabi.

⁵⁸ Tajamonae, bitso patacaasivivi. Payapëtaneme rabaja mapacueneye. Dioso panetonacuenebijava, apo panacueratsimë tsane. Bajaraxuata panevajënaeyabelia asaëya patonacuenebavanapare Dioso. Pëtsa pacopabame Dioso panejumecovënëtsijava. Panevajënaeyabelia asaëya Dioso patonacuenebaponare.

16

Pacuenia Pablo itoroba Corinto tomarapijivi ofrenda pexanaenexa Jerusalén tomarata Dioso pejumecovënëtavapanapaevi petoitobinexa yabara pelivaisi

¹ Pacatsipaebijitsiatsi pacuenia pacaetuatsijitsiamë ofrenda pane-toitorobinexa Jerusalén tomarata Dioso pejumecovënëtavapanapaevijavabelia bajarapacuenia paneyavenonaenexa. Pacuenia Galacia nacuata

Dioso pejumecovënëtsivi, caebitsaëto canacujitsia, itorobajë ofrenda pecaetuataponaenexa, bajara pijinia pacuenia paxamë ata pacaetuataponaenexa ofrenda. ² Pacaejivimë canacujitsia, caesemana canacujitsia panenacanabipalatayajuvënëjava, ofrendanexa saicaya patsataponae caedomingo canacujitsia. Pajivi tsiquirijavayo nacanaba, tsiquirijavayo pijinia saicaya tsatsiana. Pajivi ayaijava nacanaba, ayaijavayo pijinia saicaya tsatsiana. Bajarapacuenia paxaniavaetaponaenexa palata. Nexata pamatacabi paxamëjavabelia patsianajë, palata ofrendanexa apo pacaetuataponaenexa tsane. ³ Nexata pamatacabi paxamëjavabelia patsianajë, paitapetsianame bajarapapalata pecaponaevinexa Jerusalén tomarapijivijavabelia. Pamonae palata pecaponaevinexa, tsicobeyaquinaenajë cuyalato. Bajarapacuyalato bajarapamonae peyajavacaponae, panecaetuatsiofrenda ita tocaponae Jerusalén tomarata Dioso pejumecovënëtsivijavabelia. Nexata bajarapapalata pecaponaevi, Jerusalén tomarapijivi yapëtaenatsi xaniavaetsia Dioso pejumecovënëtsivicuene, peyajavacaponae tsane tatsicobeyaquinaebaxuto. ⁴ Xanë ata ita jitsipajë taponaenexa, ponaenajë Jerusalén tomarabelia. Nexata meta bajarapamonae naponae tapëta.

Pacuenia Pablo tajëvelia navajunupaeba pacuenia exanaejitsia yabara pelivaisi

⁵ Itsa ponaenajë paxamëjavabelia, tapatsivajënaeya paxamëjavabelia, copiaya pataponaenajë Macedonia nacujava. Bajaraxuacujinae jane baja patsianajë paxamëjavabelia, Corinto tomarata. ⁶ Ponaponaenajë meta paxamëjavata bajayajebi. Daxita emarapaejebi ata meta naponaponaenajë paxamëjavata. Nexata bajaraxuacujinae paneyavenonaenexa tajanamutonexa, itsabelia jitsipajë taponaenexa icatsia. ⁷ Caepatoyo saya tanaponaponaenexa paxamëjavata, apo jitsipajë. Biji rajane jitsipajë bajayajebi taponaenexa paxamëjavata pacuenia vajatuxanenë netojitsipa. ⁸ Itsiata baitsi jane abaxë aeconoxae ponaponaenajë majotaje Efeso tomarata. Pentecostësvënë fiestacujinae meta, matapania vecuaponaenajë Efesotomara. ⁹ Majotaje aeconoxae baja bitso xanepana tatsipabine Dioso pejumelivaisi. Tspiji mapatomarapijivije bitso baja jitsipapona pejumetaenexa Dioso pejumelivaisi. Itsiata baitsi jane itsamonae ayaibitsaëto apo jitsipae. Nexata tatsipabibilivaisi pejumecovënëtsivi, jamatabëcopabiaexanaponatsi.

¹⁰ Timoteo ita patsiana paxamëjavabelia, pacopiapitsianame xaniavaetsia jamatabëcuenabarëyaya peponaponaenexa paxamëjavata. Bajarapacuenia xaniavaetsia pacopiapitsianame. Tspiji pacuenia xanë vajatuxanenë pejamatabëcueneta tonacuenebaponaponaenajë, bajara pijinia pacuenia bajaraponë ata vajatuxanenë pejamatabëcueneta tonacuenebaponapona. ¹¹ Bajaraxuata pëtsa itsajivi ata pacopatame pequenetsiataenexatsi. Biji rajane payavenonaenexa pijanamutonexa jamatabëcuenexanepanaeya pepatsinexa xanëjavaberena. Xanë, itsamonae yajava, vajënaevetaponaenajë Timoteo pepatsinexarena xanëjavaberena.

¹² Vajabanenë Apolos pelivaisi pacatsipabijitsiatsi. Bajaraponë picani itorobajë itsamonae Dioso pejumecovënëtsivi pepëta penaponaenexa paxamëjavabelia papecataenexa. Itsiata baitsi jane aeconoxae abaxë apo jamatabëponae. Ponaena meta itsiata itsajota cuenecaëjëpatsi.

Pacuenia Pablo jamatabënajina Corinto tomarapijivi yabara pelivaisi

¹³ Dovathi pejamatabëcueneyaniva, jamatabëcuenenaëcotsiaya pajinavana-pare. Pajamatabëcuenesaëmère tsavanapae Jesucristojavabelia panenajamatabëcuenecopatsijava. Pëtsa jamatabëcueneaittejepaebiaya pajinavanapame. Pajamatabëcueneaitatsacamère tsavanapae pebicuenia. Itsamonae patsitaa-jamatabëcuenesaëmère tsavanapae. ¹⁴ Daxita xua paexanavanapame, itsa-monae ata asivaya paexanavanapare.

¹⁵ Tajamonae, payapëtaneme rabaja mapacueneje. Estéfnas pijabopijivi barëjumecovënëta Jesús pelivaisi. Bajarapamonae daxita pijanacuapijivive-cua copiaya jumecovënëta Jesús pelivaisi Acaya nacuata. Nexata bajarapamonae jamatabëcueneenabiabatsi ëDioso pijacuene. Bajaraxuata bajarapamonae asaëyata bitso yavenonabiaba itsamonae Dioso pejumecovënëtsivi.

¹⁶ Pacatojitsipatsi xaniavaetsia panejumecovënëtsinexa xua pacaitoroba bajarapitsivi. Bajarapitsivi peyajavanacuenebivi ata, xua pacaitoroba, pajumecovënëtsianame.

¹⁷ Paxamëyajuvënëvi parena xanëjavaberena mapamatabëxëyoje. Estéfnas, Fortunato, Acaico, bajarapamatabëxëyo parena. Bajaraxuata sivajamatabëcuenebarëyanë. Bitso picani pacaitaxanabiabatsi. Itsiata baitsi jane bajarapamonae tanetopatsixaerena, neyavenonabiaba pacuenia paxamë itsa papatsiparemena, paneyavenonaejitsipame.

¹⁸ Nexata bajarapamonae itaxutuanajamatabëcuenesaëtajë. Paxamë ata bajarapamonae pacajamatabëcuenesaëyaexanaena icatsia itsa naviabiana paxamëjavabelia. Bajarapitsivi bepayaivaneneme.

¹⁹ Caebitsaëto canacujitsia Dioso pejumecovënëtsivi, Asiavënë nacuapijivi, pacabajacobalia. Aquila pijava, Prisca, pacabajacobalia. Aquila ata pacabajacobalia. Daxita Dioso pejumecovënëtsivi, pamonae nacaetuatabiaba bajarapajivibeje pijabota, bajarapamonae ata, daxita pacabajacobalia vajatuxanenë pevënëta. ²⁰ Daxita Dioso pejumecovënëtsivi, majotaje pejinavanapaevi, pacabajacobalia. Paxamë ata Dioso panejumecovënëtsixae, xaniavaetsia namataenetsia bitso nasivaya panabajacobabiabare.

²¹ Xanë Pablonë, tajacuata tacobeta pacatoyaquinatsi mapacotocaevili-vaishiyoje. Apo itorobinë taneyavenonabiabinë tanetoyaquinaenexa. Bitso pacabajacobatsi.

²² Pajivi apo jitsipae vajatuxanenë Jesucristo, bajarapajivi Dioso navecuaxuabianatsi. ¡Vajatuxanenë raja naxanitsiayo patsianica!

²³ Pacatovajëtabiabatsi Diosojavabelia vajatuxanenë Jesucristo papecayavenonabiabinexa. ²⁴ Daxita paxamë asivaya pacajamatabënanajinatsi caenë Jesucristo pijajivixaetsi.

Mapabaxutoje San Pablo cotocaevi toyaquina Corinto tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Corinto tomarapijivijavabelia, yabara pelivaisi

1 Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi tatsipaebinexa pexanialivaisi. Vajabananë Timoteo xanëjavata ponapona. Nexata pacatoyaquinatsibeje mapalivaisije Dioso panejumecovënëtsivi, paCorinto tomarapijivimë. Patoyaquinajëbejenua mapalivaisije Acaya nacujava pejinavanapaevi ata. 2 Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaeenexa.

Pacuenia Pablo navajunupaeba itsamonae pebejiobiaexanaejavatsi yabara pelivaisi

3 “Ayaicuenia panejamatabëcueneyavenoname,” pajanë vaxa Diosojavabelia. Bajaraponë Dioso, vajatuxanenë Jesucristo paxa. Dioso, vajanacaitaxutotsoniataenë, vajanacajamatabëcuenebabatsinë bitso vajanamatabëxainaeayaniva. 4 Pamatacabi panetocopiapatabiaba daxita xua bitso panenajamatabëxainaeaya exanaejitsia, itsiata Dioso panejamatabëcuenebabatabiaba bajaraxuavecua. Bajara pijinia pacuenia paxanë ata panejamatabëcuenecaëjëpa itsamonae juya patajamatabëcuenebabatsinexa pamatacabi bajarapomonaë ata tocapiapatatsi xua bitso najamatabëxainaeaya exanaejitsiatsi. 5 Itsamonae bitso panebejiobiaexanabiaba Jesucristo patajumecovënëtsixae. Nexata pijinia Jesucristo pejamatabëcueneta Espiritu Santo panejamatabëcuenebabatabiaba bitso patanamatabëxainaeayaniva. 6 Nexata paxanë itsamonae itsa panebejiobiaexanabiaba, Dioso panejamatabëcueneyavenonabiaba patanejamatabëcuenebabatsinexa. Nexata paxanë ata panejamatabëcuenecaëjëpaena juya itsamatacabi paxamë patacjamatabëcuenebabatsinexa itsa pacatocopiapata xua bitso pacanajamatabëxainaeaya exanaejitsia. Nexata itsa pacajamatabëcuenebabatsianatsi, bajayajebi pajamatabëcuenesaëmë tsane Dioso panejumecovënëtsijava matapania Dioso papecacapanepaejavabelianexa. Paxamë ata raja itsamonae pacabejiobiaexanabiabiana. 7 Payapëtaniji baja cajena paxamë ata Dioso papecacapanepaejavanexa. Pacuenia paxanë itsamonae panebejiobiaexanabiaba, bajarapacuenia paxamë ata itsamonae pacabejiobiaexanabiabiana. Nexata paxamë ata itsamonae itsa pacabejiobiaexanabiabiana, Dioso pacajamatabëcuenebabatabiabiana panevajënaeyabelia panejamatabëcuenesaënexa Dioso panejumecovënëtsijava. Bajarapacuenia Dioso pacajamatabëcuenebabatabiabiana matapania Dioso papecacapanepaejavabelianexa.

8 Tajamonae, pajitsipajë paxamë ata paneyapëtaenexa itsamonae Asiavënë nacuata patanebejiobiaexanabiabijava. Ayaicuenia bitso panebejiobiaexanabiaba. Nexata baja picani pasaëjibinë tsaponae. Apo panecaëjëpae baja picani patavajënaeyabelia pataponaenexa. Nexata pajamatabëjumaitsinë tsabiabi: “Patëpaenajë meta baja rovia,” pajamatabëjanë tsabiabi. 9 “Pepacuene raeta baja panebeyejebiana,”

pajamatabëjanë tsabiabi. Dioso baja cajena panetocopata bajarapacuenia itsamonae patanebejiobiaexanabiabinexa. Nexata paepatota panebejiobiaexana patajamatabëjumaitsinexa mapacueniaje: “Xanë tajacuata apo necaëjêpae tavecuapanepaenexa mapacuenene. Matapania Dioso neyavenonaena, necaëjêpaena tavecuapanepaenexa mapacuenene,” patajamatabëjainexa. Dioso caëjêpatsi pataneyavenonaenexa. Tsipaji baja cajena Dioso pematacotsinë petêpaevi ata. ¹⁰ Dioso baja panecapanepa itsamonae patanebejiobiaexanaejavata patanebeyaxuabiyaniwa. Icatsia bajarapacuenia itsamonae itsa panebejiobiaexanaena, Dioso icatsia panecapanepaena. Bajaraponëjavabelia panajamatabëcueneocopatajê bajarapacuenia pataneyavenonabiabinexa. ¹¹ Paneyavenonaeyavajêtaponae name Diosojavelia bajarapacuenia Dioso pataneyavenonabiabinexa. Paayaibitsaëttoxanetomê itsa panetovajêtaponae name Diosojavelia, nexata Dioso paneyavenonabiabiana. Nexata pijinia jivi ayaibitsaëttoxaneto paxanê yabara jumai tsabiabi tsane Diosojavelia: “Pexaniacuene bitso toexaname Pablobana. Ayaicuenia yavenoname pebeyejebiyani vatsi,” jai tsabiabi tsane.

Pajamatabëcuene yabara Pablo apo ponae Corinto tomarabelia yabara pelivaisi

¹² Itsa pajinavanapajê daxitajivijava, paxamëjava ata, xaniavaetsia pajinavanapajê Dioso pitabarata. Itsa pajinavanapajê paxamëjava, pibisiacuene apo pacasivanajamatabëxainaetsi. Bajaraxuata panasivajamatabëcuenebarëyanë. Paxanê raja saya mapanacuapijilivaisita apo panejamatabëcuene yavenonae xaniavaetsia patajinavanapaenexa. Dioso raja patanejamatabëcuene yavenonaexae, bajarapacuenia xaniavaetsia pajinavanapajê. ¹³ Palivaisianê baja pacatoyaquinabiabatsi, caelivaisita anijamatabëcuene livaisibeje apo xainaponae. Palivaisianê pajumetaneme itsa palebame patacatoyaquinaelivaisianê, bajarapalivaisianê saya caejamatabëcuene livaisi xainapona. Pematatsënêa itsajamatabëcuene livaisi apo xainaponae. Pacatojitsipatsi xaniavaetsia panejumeyapêtaenexa palivaisianê pacatoyaquinatsi. ¹⁴ Pacatojitsipatsi xaniavaetsia patanejamatabëcuene yapêtaenexamê. Tsipaji abaxê xaniavaetsia apo panejamatabëcuene yapêtaemê pacuenia pajamatabëcuene itsinë tsavanapae. Nexata pamatacabi vajatuxanenê Jesús icatsia patsianica, paxamê panesivajamatabëcuene barëyamê tsane. Bajara pijinia pacuenia paxanê ata pacasivajamatabëcuene barëyatsi tsane.

¹⁵ Nexata xanë pacasivajamatabëcuene jumai tsitsi mapacueniaje: “Corinto tomarapijivi baja cajena xaniavaetsia nejamatabëcuene yapêtane. Yapêtane pacuenia apo sivanajamatabëxainaenê itsajamatabëcuene bajarapamonaejavabelia,” pacasivajamatabëjaiti. Bajaraxuata picani jamatabëpatajê paxamëjavata patanesivajamatabëcuene barëyanexamê itsa patajê paxamëjavata. ¹⁶ Pamatacabi ponajê Macedonia nacuyavelia, talianê picani jamatabëpacataeponatsi bajaraxuayo. Bajaraxuacujinae icatsia tanaviatsinêrena jamatabëpacataeponatsi picani icatsia bajaraxuayo. “Bajarajota bajarapamonae neyavenonaena tajanamutonexa, Judea nacuyavelia taponaeenexa,” pacasivajamatabëjaiti picani. ¹⁷ Pacuenia najamatabëxainabiabajê taponaeenexa itsajavelia, ponabiabajê baja cajena. Itsiata aeconoxae bajarapacuenia apo exanaenê taponaeenexa paxamëjavabelia. Mapanacuata itsamonae najamatabëxainae ata itsacuenejavayo pexanaenexa, itsiata apo exanabiabi. Bajarapacuenia itsiata xanê apo jamatabëcuene itsinë. Paxamê baja cajena panecueneyapêtaneme.

¹⁸ Dioso ata panecueneyapētane apo patacayamaxēitojorobicuene. Dioso baja cajena pejumelivaisi pacatsipaebabiabatsi. Nexata icatsia xuacujinae bajarapalivaisi itsa pacatsipaebabiabatsi, saicayalivaisicuenia icatsia apo pacatsipaebabiabitsi. ¹⁹ Xanē Pablonē, Silvano, Timoteo, bajarapamatabēxēyo, pacatsipaebabiabatsi Jesucristo, Dioso pexēnato, pelivaisi. Bajaraponē Jesucristo caejamatabēcuene xainabiaba. Nexata pacuenia jumaitsi, xaniajai tsabiabi. ²⁰ Jesús pejamatabēcueneta Dioso baja daxita nacatoexana pacuenia tajēvelia najumecapanepaeya jumaitsi vajanacatoexanaenexa. Bajaraxuata Diosojavabelia vajavajētsijavata itsa jumaitsi: “Diosomē, bitso ayaijamatabēcuenenēmē,” itsa jaitsi, nexata Jesucristo pejamatabēcueneta jumaitsi. ²¹ Dioso pacajamatabēcueneyavenonapona panevajēnaeyabelia paneajamatabēcuenesaēnexa Cristojavabelia panenajamatabēcuenecopatsijava. Bajarapacuenia paxanē ata Dioso panejamatabēcueneyavenonapona. Dioso nacaitapeta Jesucristo pijajivinxatsi, Dioso pijacuene vajatonacuenebavanapaenexa. ²² Dioso raja Espiritu Santo nacatsijamatabēcaeyaexana. Nexata nayapētanetsi Dioso pexicuenetsi. Bajaraxuata yapētanetsi pepacuene xaniajai Dioso vajanacapanepaejavanexa.

²³ Mapacuenia pacajumaitsijsije Dioso pitabarata. Dioso baja cajena nejamatabēcueneyapētane. Pamatacabi picani jamatabēponabiabajē paxamējavabelia, caecuenia itsa ponaejitsipajē, nexata pacabijataejitsipatsi. Tspipaji abaxē apo paexanavanapaemē patacaitorobicuenia. Bajaraxuata abaxē apo navecuaponaenē paxamējavabelia, itsa pacabijatanetsi, bitso panenajamatabēxainaeyaniva. ²⁴ Nexata apo jitsipāenē icatsia patacatsipaebaponaenexa paneyapētaenexa pacuenia bepaexanavanapame. Tspipaji baja xaniavaetsia Dioso pajumecovēnētavanapame. Jamatabēpacayavenonatsi. Pacuenia baja pajamatabēcuenebarēyamē tsavanapae, matatoxenetsia icatsia panejamatabēcuenebarēyanexa Dioso pitabarata.

2

¹ Najamatabēcopatajē baja taponaejava paxamējavabelia. Tspipaji jamatabējumaitsinē paxamē yabara mapacueniaje: “Apo ponaenē abaxē tsane Corinto tomarapijivijavabelia tanajamatabēxainaeyaexanaeyaniva bajarapamonae,” jamatabējanē. ² Paxamē itsa pajamatabēcuenebarēyamē, nexata xanē ata pacasivajamatabēcuenebarēyatsi tsabiabi. Itsiata itsa pacanajamatabēxainaeya exanaejitsipatsi, nexata apo pajamatabēcuenebarēyamē tspipae. Nexata xanē ata apo pacasivajamatabēcuenebarēyatsi tspipae. Tspipaji ajibi tspipae patacasivajamatabēcuenebarēyajavanexa. ³ Bajaraxuata taponaejavajēnaeya paxamējavabelia copiata baja cajena pacatoitorobaliatsi itsabaxuto, patacatoyaquinaebaxuto. Bajarapacuenia pacatoyaquinatsi tspipaji abaxē apo jamatabēponaenē paxamējavabelia patacasivanajamatabēxainaeyaniva, itsa pacatanetsi panejinavanapaejava apo patacaitorobicuenia. Jitsipajē picani paxamē patacasivajamatabēcuenebarēyanexa. Paxamē yabara jamatabējumaitsinē mapacueniaje: “Corinto tomarapijivi baja cajena nejamatabēcueneyapētane. Bajarapamonae itsa jamatabēcuenebarēya, xanē ata bajarapamonae sivajamatabēcuenebarēyanē tsabiabi,” jamatabējanē. ⁴ Apo jitsipāenē picani patacatoyaquinaenexa bajarapabaxuto. Itsiata itsa pacatoyaquinatsi, nuajē paxamējitsia. Najamatabēxainajē cajena bitso tajamatabēēthētovetsina. Apo pacatoyaquinaetsi raja saya patacanajamatabēxainaeya exanaenexa.

Ayaicuenia raja patacaasivajava patanejamatabëcueneyapëtaenexamë, pacatoyaquinatsi.

Pacuenia Pablo itoroba Corinto tomarapijivi barajamatabëcuenexanepanaeya baja petaenexa pibisiacuene pexanaponaponaenëmi yabara pelivaisi

⁵ Ponë pibisiacuene exana, caenënë xanë apo nenajamatabëxainaeyaexanae. Daxita paxamë ata bajarapacuenia pacanajamatabëxainaeyaexana. ⁶ Ponë yabara itsabaxutota pacatoyaquinatsi, paxamë baja cajena najamatabëcuenejëpaeya panavecuaitavetame bajaraponë, pibisiacuene pexanaenë, penapatsiyaniwa panenacaetuatsijavata. Nexata baja bajaraponë helia copata pibisiacuene pexanaejava. Xanepana rabaja. Pëtsa baja pematatsënëa icatsia panavecuaitavetame bajarapacuenia. ⁷ Aeconoxae baja pajamatabëcuenecaevare bajaraponë pibisiacuene pexanaejava. Pabarajamatabëcuenexanepanare baja. Bajaraponë juya pajamatabëcueneyavenonaenëmi piaurayaniva. Bajarapacuenia pajamatabëcueneyavenonaenëmi pejamatabëcuene matatoxenetsiyaniwatsi bitso pejamatabëcuenebëjajiva pijaneconi yabara. ⁸ Bitso pacatojitsipatsi panetsitanajamatabëcueneitajëtsinexa paneasivajava bajaraponë. ⁹ Nexata pabaxuto copiaya pacatoyaquinatsi, bajarapabaxuto pacatoyaquinatsi saya patacajamatabëcueneëjëtsinexa. Jitsipajë xaniavaetsia tayapëtaenexa itsa panejumecovënëtsijitsiamë daxita pacuenia pacaitorobatsi. ¹⁰ Nexata baja aeconoxae itsa pajamatabëcuenecaevame papibisiacuene bajaraponë exana paxamë tuatuajëta, xanë ata baja jamatabëcuenecaevajë bajaraponë pibisiacuene pexanaejava. Xanë baja jamatabëcuenecaevajë paneconi bajaraponë exana xanëjavaberena. Jamatabëcuenecaevajë baja bajaraponë pibisiacuene pexanaejava, daxita paxamë aneconijibia jamatabëcuenebarëyaya panejinavanapaenexa Cristo pitabarata. ¹¹ Jamatabëcuenecaevatsi baja papibisiacuene bajaraponë exana vaxaitsijavaberena. Tsipaji vaxaitsi itsa apo jamatabëcuenecaevitsi tsipae bajarapapibisiacuene pexanaejava, vaxaitsi ata dovathi nacayamaxëitojorobjitsipa. Vaxaitsi baja dovathi cueneyapëtanetsi, xua exanabiaba vajanacacopabiaexanaenexa Dioso pejumelivaisi vajajumecovënëtsijava.

Pacuenia bitso Pablo Tito sivanajamatabëxaina yabara pelivaisi

¹² Patajopajë Troas tomarata tatsipaebinxexa Cristo pelivaisi. Troas tomarata tapatsivajënaeya, taniji Dioso tanetoxanepanaeyaexanaejava tatsipaebinxexa pejumelivaisi bajarapatomarata. Nexata Troas tomarata itsa tsipaebabiabajë Dioso pejumelivaisi, Troas tomarapijivi nenamuxunaevetabiaba xaniavaetsia. ¹³ Itsiata baitsi jane bajarajota abaxë apo jamatabëcuenebarëyanë. Najamatabëxainajë vajabananë Tito yabara. Tsi-paji abaxë Tito apo caxitajarabaxuabinë Troas tomarata. Nexata baja napëjijobajë Troas tomarapijivi taponanexa baja Macedonia nacuyabelia.

Pacuenia Cristo nacajamatabëcueneyavenona yabara pelivaisi

¹⁴ “Pexaniacuene rabaja panetoexaname,” pajanë Diosojavabelia, Cristo pejamatabëcueneta Dioso patanejamatabëcuene yavenonabiabixae. Itsajavabelia itsa paponajë, Dioso paneyajavaponabiaba. Panejamatabëcueneyavenonabiaba pacuenia Dioso jitsipa pataexanaenexa. Panejamatabëcueneyavenonabiabanua itsamonaejavabelia xaniavaetsia patatsipaebinxexa Dioso pejumelivaisi. Pamonae jumecovënëta bajara-palivaisi, tsitapexanialivaisitsi bitso. ¹⁵ Dioso sivajamatabëcuenebarëyatsi

pajivi itsamonaejavabelia tsipaeba Cristo pelivaisi. Paxanë ata Dioso panesivajamatabëcuenebarëya. Tsipaji patsipaebabiabajë Cristo pelivaisi daxitajivijavabelia. Itsamonaë baja jumecovënëta pona Cristo pelivaisi Dioso pecapanepaevinexatsi. Itsamonaë pijinia apo jumecovënëtsi Cristo pelivaisi Diosovecua penaxuabivinxä. ¹⁶ Pamonaë Diosovecua naxuabiana apo pejumecovënëtsixäe Cristo pelivaisi, naxuabiana. Pamonaë pijiniä Dioso capanepaenatsi pejumecovënëtsixäe Cristo pelivaisi, capanepaenatsi. Paxanë, paapöstolevinë, Dioso paneyavenonabiaba. Nexata panejamatabëcuenecaëjëpa patatsipaebabiabinxä pexanialivaisi, Cristo pelivaisi, jivi pecapanepaelivaisinxatsi. ¹⁷ Pacuenia itsamonaë tsipaebabiaba Cristo pelivaisi ëpematamotsinexatsi, paxanë apo paitsinë. Biji rajane itsajamatabëcuene ata apo pasivanajamatabëxainäenë jivijavabelia itsa patsipaebabiabajë Cristo pelivaisi. Dioso baja cajena panejamatabëcuenepëtane. Dioso paneitoroba Cristo patatonacuenebinexä.

3

Pacuenia Dioso pejanalivaisi najumecapanepaeya jumaitsi jivi pecapanepaenexa yabara pelivaisi

¹ Itsa pacanavajunupaebatsi paneyapëtaenexa Dioso patanitorobijava Cristo pelivaisi patacatsipaebinxä, paayajamatabëcuenevinë apo panataenë. Itsamonaë pata paxamëjavata penajumetsënëtsilivaisi papecatsipaebinxä beDioso pejumelivaisicuenia. Bajarapamonaë pacatocapata cuyalato itsamonaë petsicobeyaquinaebaxutotsi. Bajarapabaxutota pacatoyaquina: “Dioso raja pejumelivaisi pepaebivi,” pejailivaisi. Bajaraxuata xaniavaetsia pacopiäpitame bajarapamonaë. Itsiata baitsi jane paxanë itsa papatajë paxamëjavata, apo pacarajutsitsi itsamonaë patanetsicobeyaquinaecuyalato. “Pablo raja apöstolenë,” pejailivaisi itsamonaë patanetsicobeyaquinaebaxuto, apo pacarajutsitsi xaniavaetsia patanecopiäpitsinexamë. Apo panamatavenonaenë paxamë ata cuyalato patanetsicobeyaquinaenexamë patacaponaenexä itsamonaejavabelia bajarapamonaë pataneyapëtaenexa xaniavaetsia patanecopiäpitsinexä.

² Bajarapacuenia cuyalato apo panamatavenonaenë patacaponaenexa jivi pataneyapëtaenexa xaniavaetsia patanecopiäpitsinexä. Tsipaji baja jivi yapëtane xaniavaetsia Jesucristo pelivaisi patacatsipaebixäe panenajamatabëcuene pënëyorotsijava Diosojavabelia pibisiacuenë paneexanabiabijavamivecua. Nexata jivi bajarapamonaë yapëtanenua Dioso patanitorobijava. ³ Paxamë xaniavaetsia panejumecovënëtamë patacatsipaebilivaisi, Jesucristo pelivaisi. Nexata itsamonaë, apo pataneyapëtaevi ata, itsa pacavënëlvaisitane patanejumecovënëtsijavamë, panesivajamatabëjumaitsi: “Plobana Corinto tomarapijivi cuyalato apo tsicobeyaquinae atatsi, itsa jume, ibopanata ata apo tsicobeyaquinae atatsi vajayapëtaenexa, itsiata yapëtanetsi Dioso pitorobijavatsi pexanijailivaisi, Jesucristo pelivaisi, jivi patsipaebavanapaenexa,” panesivajamatabëjai. Piasäetsaponaponaenë baja cajena Espiritu Santo pacatsijamatabëcca. Nexata baja pacajamatabëcuenepënëyorota pejanajamatabëcuene panexainäenexa. Nexata itsamonaë xaniavaetsia itsa patsitajinavanapame, bajarapamonaë ata baja pacayapëtane Cristo pelivaisi papecatsijamatabëcäejäva.

⁴ Paxanë payapëtaniji Dioso patanitorobijava pepacuenë Cristo pelivaisi jivi patatsipaebavanapaenexa. Tsipaji baja Dioso paneyavenonabiaba Jesucristo pejamatabëcueneta. ⁵ Paxanë patasaëta Dioso patatonacuenebinexä, apo panejamatabëcuenecaëjëpae. Nexata

xua Dioso patoexanavanapajë, Dioso baja cajena paneyavenonabiaba.
 6 Dioso panejamatabëcueneyavenonabiaba patatsipaebabiabinexa itsamon-
 aejavabelia Dioso najumecapanepaeya pejanalivaisi pejumaitsijava jivi
 pecapanepaenexa. Bajarapamonaejavabelia apo pajumaitsinë tsabiabi:
 “Pajumecovënëtavapare Dioso Moiséspijinëta penajumecopatsilivaisi.
 Itsa apo pajumecovënëtsimë tsane, nexata panaxuabianame,” apo pajanë
 tsabiabi. Biji rajane jivi patsipaebabiabajë pacuenia Espiritu Santo
 jamatabëcueneasaëyaexanaejitsiatsi. Palivaisi bajayata Dioso Moiséspijinëta
 najumecopata, itoroba pebeyaxuabinoxatsi pajivi apo jumecovënëtsi
 bajarapalivaisi. Itsiata baitsi jane pajivi jumecovënëta papejanalivaisi jivi
 patsipaebabiabajë, Espiritu Santo pesaëta jamatabëcueneasaëyaexanaponatsi.

7 Bajayatami Dioso Moiséspijinëta najumecopata. Bajarapalivaisi
 Dioso yaquina ibopanabejumatata. Bajarapalivaisita Dioso itoroba
 pajivi apo jumecovënëtsi bajarapalivaisi pebeyaxuabaponaenexatsi.
 Bajarapacuenia Dioso Moiséspijinëta itsa najumecopata bajarapalivaisi,
 Moiséspijinë itabarandenivenena bitso. Nexata Israelpijinë pemomoxi
 apo itabaranaëcotsicapanepaetsi. Itsiata baitsi jane bajaraxuacujinae
 itsamatacabianëjavabelia, itabaracotiacaevapona baja. 8 Palivaisi
 bajayata Dioso Moiséspijinëta najumecopata, xanepana baja picani
 caepatoyonexa saya. Bajarapalivaisimi matatoxenetsia bitso xanepana
 pejanalivaisi mapamatacabitaje jumecovënëtavapanatsi Dioso
 vajanacapanepaenexa. Bajarapacuenia Dioso nacacapanepaena
 Espiritu Santo vajanacatsijamatabëcaexae daxitamatacabijavabelianexa.

9 Bajayata Dioso Moiséspijinëta najumecopata. Nexata bajarapalivaisi
 xanepana. Tsipaji bajarapalivaisi pejamatabëcueneta, jivi yapëtane
 Dioso penaneconitsiaexanaejavanexatsi pibisiacuene pexanaecononi
 yabara. Itsiata baitsi jane bajarapalivaisimi matatoxenetsia bitso
 xanepana pejanalivaisi pejamatabëcueneta Dioso nacacapanepaejitsia.
 Bajarapapejanalivaisi pejamatabëcueneta, Dioso baja aneconijibia nacatane.

10 Palivaisi bajayata Dioso Moiséspijinëta najumecopata, xanepana baja
 picani. Itsiata baitsi jane palivaisi Dioso cotocaevi najumecopata,
 bajarapalivaisi bitso xanepana. Bajaraxuata palivaisimi copiaya Dioso
 najumecopata Moiséspijinëta, aeconoxae baja nacatsitaajumematamobi.

11 Palivaisi copiaya Dioso Moiséspijinëta najumecopata, xanepana picani
 caepatoyonexa saya. Biji rajane palivaisi cotocaevi Dioso najumecopata,
 bitso xanepana. Tsipaji daxitamatacabijavabelianexa bajarapalivaisi
 tsitecaena.

12 Payapëtaniji papejanalivaisi Dioso cotocaevi najumecopata
 bitso pexanepanaejava. Tsipaji daxitamatacabijavabelianexa apo
 vereverecae tsane bajarapalivaisi. Bajaraxuata apo pajumejunavabiabinë
 bajarapalivaisi patatsipaebinxaxa jivijavabelia. Palivaisivajëto payapëtaniji,
 patsipaebabiabajë jivijavabelia. 13 Bajayata Moiséspijinë yapëtae ata
 livaisi. Itsiata xaniavaetsia apo tsipaebi pijajivijavabelia. Itsiata paxanë
 bajarapacuenia apo paitsinë. Bajayata Moiséspijinë itsa itabarandenivenena,
 naitabaraacata papaëbërëpanata. Bajarapacuenia naitabaraacata
 pijajivi, Israelpijinë pemomoxi, pitabarataeyanivatsi bajarapacotia
 pecaevaponaejava.

14 Itsiata baitsi jane bajarapamonaejavabelia
 Moiséspijinë tsipaebi ata, apo jumeyapëtaetsi pajamatabëcuenelivaisi
 yabara tsipaeba. Bitso ajamatabëcuenetaja bajarapamonaemi. Nexata
 apo jumeyapëtae palivaisi tsipaebatsi. Bajara pijinia pacuenia ajena
 mapamatacabijavaberena ataje, tsiteca abaxë ajamatabëcuenetaja

bajarapamonae pemomoxi ata. Bajarapamonae penacaetuatabiabibota, itsa lebabiaba Dioso Moiséspijinëta penajumecopatsilivaisimi, apo jumeyapëtaeyabiabi pajamatabëcuenelivaisi xaina. Bajarapamonae itsa jumecovënëtsipa Cristo pesivatëpaejavatsi, nexata matapania jumeyapëtaejitsipa pajamatabëcuenelivaisi xaina palivaisi bajayata Moiséspijinë tsipaebabiaba. ¹⁵ Ajena mapamatacabijavaberena ataje, judíovi penacaetuatabiabibota itsa lebabiaba Dioso Moiséspijinëta penajumecopatsilivaisimi, apo jumeyapëtaeyabiabi pajamatabëcuenelivaisi xaina. Bitso ajamatabëcuenetaja bajarapamonae. ¹⁶ Itsiata baitsi jane pajivi najamatabëcuenecopata vajatuxanenë Jesucristojavabelia, bajarapajivi Dioso vecuaajibiaexanatsi pibisiacuene pexanaeconimi. Nexata bajarapajivi xaniavaetsia jumeyapëtane pajamatabëcuenelivaisi xaina palivaisi bajayata Moiséspijinë tsipaebabiaba. ¹⁷ Vajatuxanenë Jesucristobeje, Espíritu Santobeje, najamatabëcuenejëpabeje. Jesucristo pejamatabëcueneta Espíritu Santo ponapona vajajamatabëëthëtota. Nexata Espíritu Santo nacajamatabëcueneyavenonapona pibisiacuene vaxaxanaeyaniva. ¹⁸ Nexata Jesucristo pejamatabëcueneta, Espíritu Santo nacayavenona. Nexata pacuenia Moiséspijinë jivi vecuanaitabaraacata pitabaracotiataeyanivatsi pitabaranivenivenaejava, bajara vaxaitsi apo itsitsi. Biji rajane tsitanacueneitajëtsiaya jinavanapatsi xaniavaetsia jivi peyapëtaenexa Dioso ayaijamatabëcuene pexainaejava. Espíritu Santo nacajamatabëcueneyavenonapona vajavajënaeyabelia pejanajamatabëcuene vajaxainaponaenexa. Nexata pacuenia Jesucristo jamatabëcueneitsi, bajara vaxaitsi ata vajajamatabëcueneitsinexa.

4

¹ Dioso baja cajena patanitaxutotsoniataexae, panetocopata patatsipaebabiabinexa jivijavabelia pexanialivaisi, Jesucristo pelivaisi. Bajaraxuata itsajavata panetsiayai tsabiabi ata, itsiata apo pajamatabëcopatsinë patatsipaebabiabijava Jesucristo pelivaisi. Tsipaji baja Dioso panetocopata bajara-pacuenia. ² Muetsia apo paexanaenë itsacuenejava ata. Apo paexanaenë daxita xua piauracuene ata. Jivi patayamaxëitojorobinexa, itsacuenejava ata apo paexanaenë. Apo patsipaebabiabinënuua saicayalivaisi Dioso pejumelivaisivecua. Dioso baja cajena yapëtane jivijavabelia ëpexaniajailivaisi patatsipaebabiabijava. Patanejumetaeyenaevi ata bajarapacuenia jumai tsipae. ³ Itsa patsipaebabiabajë jivi pecapanepaelivaisinexatsi, jumenapebetsi-aya patsipaebabiabajë xaniavaetsia patanejumeyapëtaenexa. Nexata patsipaebi atanë, pajivi apo jumecovënëtsi bajarapalivaisi, bajarapajivi pijacuata nanaxuabiaexanaena Diosovecua. Nexata bajarapajivi daxitamatacabijavabelianexa, Diosovecua naxuabiana. ⁴ Bajarapacuenia apo jumecovënëtsi tsipaji dovathi pejamatabëcueneta ajamatabëcueneitaquiriayaxanatsi pejumecovënëtsiyaniva bajarapalivaisi. Bajarapapexanialivaisi, Cristo pelivaisi, bepinijicotia jivi pejamatabëcueneitayotsinexa itsa jumecovënëta bajarapalivaisi. Nexata dovathi, mapanacuapijivi pijatuxanenë, apo jitsipae bajarapalivaisi jivi pejumecovënëtsinexa pejamatabëcueneitayotsiyanivatsi. Cristo paxa Dioso jamatabëcuenejëpa. Nexata pacuenia Dioso jamatabëcueneitsi, bajara Cristo ata jamatabëcueneitsi. ⁵ Livaisi itsa pacatsipaebabiabatsi, paxané apo panalivaisipaebabiabinë pataneyaiyataenexamë. Biji rajane vajatuxanenë Jesucristo pelivaisi pacatsipaebabiabatsi. Paxané saya panataniji bepanijajivinë. Jesucristo bitso pajitsipajë. Bajaraxuata paxamë ata jamatabëpacayavenonatsi. ⁶ Bajayata Dioso mapanacuaeje itsa exana, pitaquir-

ijavata pitayotsinexa, itoroba juameto penaexanaenexa. Bajara pijinia pacuenia paxanë ata patajamatabëcueneaitaquirijavami, Jesucristo pelivaisi ita pajumecovënëtajë, Dioso panejamatabëcueneitayota. Bajarapacuenia ita panejamatabëcueneitayota, payapëtaniji Dioso bitso ayaijamatabëcuene pexainaejava. Jesucristo ita itabaraniveniva Dioso pexëinatoxae, paxa Dioso jamatabëcueneitajëta Dioso bitso ayaijamatabëcuene pexainaejava.

Pacuenia Dioso jamatabëcuene yavenona pijajivi, ita tonacuenebavanapatsi, yabara pelivaisi

⁷ Paxanë Dioso patanejamatabëcueneitayotsivi ata, pataperabëto apo ajamatabësaë. Pacuenia atsavaxi bajayajebi apo ajamatabësaë, bajara saya itsi. Pataperabëto apo paperabësaë atanë, Dioso pataneyavenonaeaxae, pajamatabëcuenesaënë tsavanapae. Nexata bajarapacuenia pataajamatabëcuenesaë tsavanapaejava patanetaevi, jamatabëjumai tsane paxanë yabara: “Mapamonaeje ajamatabëcuenesaë tsavanapae Dioso pesaëta,” jamatabëjai tsane. ⁸ Nexata panetocopiapatabiabi ata itsacuene patanetoyapëbejucene, itsiata Dioso paneyavenonabiaba patavecuapanepaenexa bajarapacuenie. Apo payapëtaeyabiabi atanë pajamatabëcuene yabara panetocopiapata patanetoyapëbejucene, itsiata paxanë apo pacopatsinë Dioso patajumecovënëtsijava. ⁹ Itsamonae panebejiobiaexanabiabi ata Dioso patajumecovënëtsijava yabara, itsiata Dioso apo panecopatsi patajaepato. Itsamonae irata panepenetiabiabi ata patanebeyejebinexa picani, itsiata pepacuenie apo panebeyaxuababiabi Dioso pataneyavenonabiabixae. ¹⁰ Pacuenia Jesús pijavajabitsaë bajayajebi picani jamatabëbeyaxuababiabatsi, bajarapacuenia paxanë ata Jesús papijajivixanë, itsamonae jamatabëpanebejebabiaba picani. Itsiata apo panebejebicanepae. Bajaraxuata daxita jivi yapëthane Jesús pataneyavenonabiabijava. ¹¹ Daxitamatacabi patajinavanapae-matacabanë, panetsiyai tsabiabi itsamonae patanebeyejebinexa Jesús papijajivixanë. Bajarapacuenia panetocopiapatabiabi jivi pataneyapëtaenexa Jesús pataneyajavaponaponaejava. ¹² Panetsiyai tsabiabi itsamonae patanebeyejebinexa patacatsipaebabiabixae papecacapanepaelivaisinexa Diosojavabelia. Nexata paxanë patacatsipaebilivaisi panejumecovënëtsixae, itsamatacabi athëbëtatsia Dioso pacarajutsiana matacabi apo pevereverecaejava.

¹³ Dioso pejumelivaisibaxutota jumaitsi mapacueniaje: “Jumecovënëtajë Dioso taneyavenonaejavanexa. Bajaraxuata tsipaebajë jivijavabelia Dioso taneyavenonaejavanexa,” jai. Bajara pijinia pacuenia paxanë ata pajamatabëcueneitsinë. Pajumecovënëtajë Dioso pataneyavenonaejavanexa. Bajaraxuata patsipaebabiabajë jivijavabelia Dioso pataneyavenonaejavanexa. ¹⁴ Vajatuxanenë Jesús petëpaecujinae Dioso icatsia asaëyaexanatsi. Bajaraxuata payapëtaniji baja pexaniajaicuene Dioso icatsia paxanë ata pataniasaëyaexanaejavanexa patatëpaecujinae, Dioso patayajavajinavanapaenexa pijanacuatatsia. ¹⁵ Paxanë itsamonae panebejiobiaexanabiabi ata, itsiata apo pacopatsinë patacatsipaebabiabijava pexaniajailivaisi. Nexata panevajënaeyabelia pajumecovënëtaaponame patacatsipaebilivaisi. Nexata baja ita paayaibitsaëtömë tsaponae Dioso panejumecovënëtsivi, paayaibitsaëtömë baja pijinia tsaponae Diosojavabelia panejumaitsvinexa: “Xanepana rabaja. Tsipaji bitso pexaniacuene panetoexaname,” panejainvixanexa Diosojavabelia. Nexata papecajumetaevi ayaiabitsaëto yapëtaena Dioso bitso ayaijamatabëcuene pexainaejava.

¹⁶ Bajaraxuata itsamonae panebejiobiaexanabiabi ata, itsiata apo pajamatabēcopsatinē jivi patatsipaebabiabijava pexaniajailivaisi. Pataperabēto cueranaponae ata, itsiata patavajēnaeyabelia, caematacabi canacujitsia, pajamatabēcuenesaēnē tsaaponae Dioso patajumecovēnēnsijava. ¹⁷ Xua nacatocopiapatabiabi itsamonae vajanacabejiobiaexanabiabinexa, saya caeepatoyo bajarapacuenia nacabejiobiaexanabiaba mapanacuataje vajajinavanapaeepatoyo. Bajaraxuacujinae athēbētatsia xainaenatsi daxitacuenvecua pexaniajava, baitsi matacabi apo peverevereaejava. ¹⁸ Nexata apo vajēnaeevetavanapaetsi vajanacatocopiapatsinexa, xua nacacaējēpa vajataenexa. Biji rajane jamatabēnjinavanapatsi vajanacatocopiapatsinexa xua apo nacacaējēpae vajataenexa. Tsipaji xua nacacaējēpa vajataenexa, daxita bajaraxua, vereverecaena. Itsiata baitsi jane xua apo nacacaējēpae vajataenexa, daxitamatacabijavabelianexa apo vereverecae tsane.

5

¹ Mapanacuata jivi pexanaebobērēto bepijia baabeje. Bajara pijinia itsi vajaperabēto ata. Bepijia vereverecaena. Itsiata baitsi jane yapētanetsi mapacueneye. Vajatēpaecujinae itsamatacabi Dioso athēbētatsia nacarajutsiana apo peverevereaeperabētōnēxaxa. ² Xaniajai cajena. Itsa abaxē jinavanapatsi mapanacuataje, bitso picani jitsipabiabatsi vajanacaperabēithianaenexa athēbēpijiperabētōnēxaxa. Jitsipabiabatsi picani vajaponaenexa athēbēabetsia pejanaperabēto vajayajavajinavanapaenexa athēbētatsia. ³ Athēbētatsia raja aperabējibia apo jinavanapae tsanetsi. Biji rajane pejanaperabēto yajavajinavanapaenatsi. ⁴ Itsa abaxē jinavanapatsi mapanacuataje, bitso picani jitsipabiabatsi vajanacaperabēithianaenexa. Apo jitsipaetsi picani vajatēpaejava. Itsiata baitsi jane yapētanetsi mapacueneye. Vajatēpaecujinae itsamatacabi athēbētatsia yajavajinavanapaenatsi pejanaperabēto, apo peverevereaeperabētōnēxaxa jane baja. Nexata mapanacuata vajayajavajinavanapaeperabētomi ajibi baja tsane. Xainaenatsi juya apo peverevereaeperabētōnēxaxa. ⁵ Bajarapacuenia vajanacaperabēithianaenexa Dioso nacatoxaina. Nexata Dioso nacatocopata Espiritu Santo vajanacayajavaponaponaenexa. Nexata Dioso yabara bejamatabējumaitsitsi mapacueniaje: “Mapacueniaje Espiritu Santo Dioso pataneyajavaponaponaeyaexanaexae, nexata payapētaniji xaniajai pepacuenē itsamatacabi Dioso pataneperabēithianaenexaxa. Xaniajai baja cajena. Pepacuenē itsamatacabi Dioso paneperabēithianaenexa pacuenia baja najumecapanepaeya jumaitsi,” bejamatabējaitsi Dioso yabara.

⁶ Bajaraxuata apo jamatabēcopsatsi vajajumecovēnēnsijava Dioso. Vajavajēnaeyabelia jamatabēcuenēbarēyatsi. Yapētanetsi mapacueneye. Itsa abaxē vajaperabēto yajavajinavanapatsi mapanacuataje, panacuata itsamatacabi vajatuxanenē daxitamatacabijavabelianexa yajavajinavanapaejitsiatsi, bajarapanacua abaxē tajē vecujinavanapatsi. ⁷ Apo taetsi abaxē athēbētatsia vajatuxanenē vajayajavajinavanapaejavanexa. Itsiata yapētanetsi itsamatacabi xaniajai vajatuxanenē athēbētatsia vajayajavajinavanapaejavanexa. ⁸ Bajaraxuata jitsipatsi vajatēpaejava. Tsipaji mapanacuata vajajinavanapaejava, matatoxenetsia bitso jitsipatsi vajatuxanenē pijanacuataatsia vajayajavajinavanapaenexa. ⁹ Bajaraxuata mapanacuata vajajinavanapaeamatcabibeje, asaēyata vajatuxanenē tonacuenēbavanapatsi. Tsipaji jitsipatsi vajanacasivajamatabēcuenē barēyajava. Vajatēpaecujinae ata, pijanacuataatsia jamatabētojinavanapatsi pejitsipaecuenia. ¹⁰ Vajatuxanenē pejitsipaecuenia jamatabētojinavanapatsi mapanacuata ata

vajajnavanapaeepato. Tspaji caejivitsi canacujitsia Cristo pitabarata tonaitajëtaonaenatsi. Nexata bajarapamatacabi nacarajutsiana daxita pijajivitsi xua nacatoxaina vajanacarajutsinexa. Xaniavaetsia vajatuxanenë ita tonacuenebavanapatsi, nacarajutsiana xua nacatoxaina vajanacarajutsinexa. Pamonae xaniavaetsia apo tonacuenebavanapae, nacueratsiana.

Pacuenia Dioso nacabarajamatabëcuenexanepana vajaneconi yabara Cristo vajanacasivatëpaexae yabara pelivaisi

¹¹ Payapëtaniji baja cajena itsamatacabi vajatuxanenë pitabarata cjunaviaya patananubenaejavanexa. Bajaraxuata asaëyata jivijavabelia patsipaebabiabajë Jesucristo pesivatëpaejavatsi pejume-covënëtsinexa. Itsajamatabëcuene apo panajamatabëxainabiabinë bajarapalivaisivecua. Dioso baja cajena panejamatabëcueneyapëtane pacuenia pajamatabëcueneitsinë. Pajitsipajë paxamë ata patane-jamatabëcueneyapëtaenexamë. ¹² Bajarapacuenia paxanë apo pacanavajunupaebitsi saya pataneyaiyataenexamë. Pacanavajunupaebitsi rajane pataneyapëtaenexamë vajatuxanenë papijajivicuenenë. Nexata bajarapacuenia paxamë papecajamatabëcuenecaëjëpaenexa panejumecanaviatsijaya pamonae pibisiacuenia panebaracuaicuajjai. Bajarapamonae panyalivaisiaexanabiaba. Beayaijamatabëcuenevi nataeyabiaba. Pexaniacuene exanabiabi ata, bajaraxua exanabiaba saya jivi petanenexatsi. Itsiata baitsi jane bitso naneconita Diosojavabelia pibisiacuene pexanaeneconi yabara. Apo canaëjëtsi pexaniajamatabëcuene pexanaenexa. ¹³ Paxanë picani xaniavaetsia Dioso jumecovënëtsiaya jivi patsipaebabiabajë Jesús pelivaisi. Itsiata Dioso apo pejumecovënëtsivi, panejumai tsabiabi: “Pematajemabivitsi raja saya,” panejai tsabiabi. Itsiata ita pacatsipaebabiabatsi bajarapalivaisi, Jesucristo pelivaisi, pacatsipaebabiabatsi paxamë ata Dioso papecacapanepaenexa. Paxamë apo panetaemë hepatanematajemabivi. ¹⁴ Cristo raja paneasiva tsabiabi. Bajaraxuata patonacuenebavanapajë. Pajamatabëjumaitsinë tsabiabi: “Caenë Cristo nacasivatëpa daxitanexatsi. Bajaraxuata Dioso baja nacatane Cristo bevajayajavatëpaevi. Nexata baja bevajananeconimatamotsicapanepaevi Dioso nacatane,” pajamatabëjanë tsabiabi. ¹⁵ Cristo jivi sivatëpa. Petëpaecujinae Dioso icatsia asaëyaexanatsi. Nexata daxita pamonae jumecovënëta Cristo pesivatëpaejavatsi, matacabi apo pevereverecaejava xainaena. Nexata bajarapamonae apo bexanavanapae pijacuata penatojitsipaecuenia. Biji rajane bexanavanapa pacuenia Cristo tojitsipatsi pesivajamatabëcuenebarëyanexatsi. ¹⁶ Bajaraxuata ajena mamapatacabijavaveliacujinaeje, patavajënaeyabelia tsaponae, Dioso pejumecovënëtsivi yabara apo bepanajamatabëxainaenë pibisiacuenia, pacuenia Dioso apo pejumecovënëtsivi banajamatabëxaina. Tspaji pamonae Dioso pejumecovënëtsivi pacuenia bëpënëaverena jamatabëcueneitsi, apo pajamatabëcueneyapëtaenë. Xanë ata rabaja picani Jesucristojavabelia tanajamatabëcuenecopsativajënaeya, Jesucristo yabara najamatabëxainajë pibisiacuenia, pacuenia banajamatabëxaina Dioso apo pejumecovënëtsivi. Bepenajumetsënëtsinë taniji Cristo. Itsiata baitsi jane aeconoxae baja bajarapacuenia apo najamatabëxainaenë Cristo yabara. Tspaji baja yapëtaniji Cristo pexaniajainëcuene. ¹⁷ Pajivi najamatabëcueneocopata Jesucristojavabelia, bajarapajivi xaina pejanajamatabëcuene. Pijaperujumatabëcuenemi baja vecuaajibiaexanatsi. Nexata bajarapajivi daxitacuene sivanajamatabëxaina pexaniajamatabëcueneta.

18 Daxitatsi Dioso pejanajamatabëcuene nacarajuta. Dioso nacabarajamatabëcuenexanepana Cristo vajanacasivatëpaexae vajaneconi yabara. Nexata Dioso panetocopata pejumelivaisi patatsipaebanajetarubenaenexa daxitajivijava, bajarapamonae ata itsa jumecovënëta, Dioso pebarajamatabëcuenexanepanaenexatsi. 19 Nexata Cristo cruzata itsa sivatëpa mapanacuapijivije, Cristo pesivatëpaexaetsi, Dioso barajamatabëcuenexanepanaeya tanetsi daxita pamonaе jumecovënëta Cristo pesivatëpaejavatsi. Paneconi picani bajarapamonae xaina, Dioso baja vecuaajibiaexanatsi Cristo pesivatëpaejamatabëcuenetatsi. Bajarapalivaisi Dioso panetocopata patatsipaebanajetarubenaenexa jivijavabelia. 20 Nexata paxanë Cristo papijajivinë tsanajetarubenaе. Cristo baja cajena pejamatabëcueneta, papatajë paxamëjavata patacatsipaebinexa pexanialivaisi. Pacuenia Dioso itsa patsipa, pacamuxujibijitsipa, bajarapacuenia xanë ata pacamuxujibatsi Cristo papecasivatëpaexae panijaneconi yabara Dioso papecabarajamatabëcuenexanepanaenexa. 21 Cristo pibisiacuene apo exanae, tsiquirijavayo ata. Itsiata baitsi jane Cristo Dioso tsijumaxuabatsi daxita voxaitsi vajaneconimi. Nexata vajaneconi yabara Cristo bepibisiacuene pexanaenëcuenia cruzata beyaxuabatsi. Bajarapacuenia Cristo cruzata vajanacasivatëpaexae, nexata Dioso aneconijibia nacatane itsa jumecovënëtatsi Cristo vajanacasivatëpaejava vajaneconi yabara.

6

1 Dioso pataneyajavanacuenebixae, asaëyata pacamuxujibatsi. Dioso pinijicuenia papecaitaxutotsoniataejava, pacatsipaebatsi panejumeaebianiva. Itsa pajumeabijitsipame, nexata Dioso nacueratsipa papecaitaxutotsoniataejava. 2 Tsipaji Dioso jivi pitaxutotsoniataejavanexa, tajëvelia Dioso pejumelivaisibaxutota jumaitsi mapacueniaje: Pamatacabi jivi itaxutotsoniataenajë, cajumetaenatsi. Nexata pamatacabi jivi capanepaenajë, xamë ata cayavenonaenatsi, jai tajëvelia Dioso pejumelivaisibaxutota.

Aeconoxae rabaja nacatocopiapata Dioso vajanacaitaxutotsoniataejava vajanacacapanepaenexa jane baja.

3 Itsa patanacuenebavanapajë Dioso, pajitsipajë daxitajivi xaniavaetsia patatsitajinavanapaejava, daxitajivi Dioso pejumecovënëtsinexa. Apo paexanaenë pibisiacuene, tsiquirijavayo ata, pataexanaejava yabara jivi patanejumeaebianiva Dioso pejumelivaisi itsa patsipaebajë. 4 Biji rajane daxita xua paexanavanapajë, xaniavaetsia patsitaexanavanapajë jivi pataneyapëtaenexa Dioso papijajivicuenenë. Itsamonae panebejibiaexanabiaba. Itsajavata bitso panamatavenonabiabajë itsacuenejavaxi. Itsajavata bitso panetsiyai tsabiabi itsamonae patanebeyejebinexa. Bajarapacuenia panetsiyai tsabiabi ata, itsiata bajayajebi pajamatabëcuenesaenë tsavanapae Dioso pejumelivaisi jivi patatsipaebavanapaejava. 5 Itsajavata panejumatitibabeyabiaba. Itsajavata penaneconitsivi pejebabiabibota panejebabiaba. Itsajavata Cristo pelivaisi jivi itsa patsipaebajë, itsamonae anaeya panebarajinabiaba patanebeyejebinexa picani. Itsajavata bitso panacuenebabiabajë. Itsajavata meravi ata apo pamajitabiabinë Dioso pejitsipaecuenia pataexoanexa. Itsajavata bitso patajani tsabiabi. Bajarapacuenia panetoayapëbeje tsabiabi ata, itsiata bajayajebi pajamatabëcuenesaenë tsavanapae Dioso pejumelivaisi jivi patatsipaebavanapaejava. Nexata jivi paneyapëtane Dioso papijajivicuenenë. 6 Dioso papijajivicuenenë jivi pataneyapëtaenexa, jivi patsitajinavanapajënu mapacueniaje.

Pamatacabibeje pajinavanapajë, pibisiacuene apo paexanavanapaenë. Biji rajane jivi patsitajinavanapajë pexaniajailivaisi patayapëtaevicuena. Bajayajebi itsamonae pibisiacuene paneexanabiabi ata, apo pacueneceanaviatabiabinëna. Pexaniacuene patoexanabiabajëna itsamonaejavabelia. Patsitajinavanapajëna pacuenia Espiritu Santo paneyapëtaeyaxanapona Espiritu Santo patanetsijamatabëecaexae. Patsitanajamatabëcuene itajëtavanapajëna itsamonae ata pataasivajava patajamatabëethëtojavavetsina. Bajarapacuenia patatsitajinavanapaexae, jivi xaniavaetsia paneyapëtane Dioso papijajivicuene. ⁷ Dioso papijajivicuene jivi patanepapëtaenexa, patsitajinavanapajëna mapacueniaje. Epexaniajailivaisi jivi patsipaebabiabajë. Patsitanacueneitajëtavanapajëna daxita xua paexanavanapajë, Dioso pataneyavenonabiabijava. Dioso baja aneconijibia patanetaexae, Espiritu Santo paneyavenonabiaba patanayajivitaeyabiabinexa dovathi pijacuene. Paneyavenonabiabanua Espiritu Santo patacueneamoneyabinexa dovathi. Bajarapacuenia patatsitajinavanapaexae, jivi paneyapëtane Dioso papijajivicuene. ⁸ Itsamonae paneyaiyataeyabiaba. Itsamonae pijinia apo paneyaiyataeyabiabi. Itsamonae pexaniacuena panebaracuaicuaijai tsabiabi. Itsamonae pijinia pibisiacuena panebaracuaicuaijai tsabiabi. Itsamonae panetaeyabiaba pexaniajailivaisi patsipaebivicuene. Itsamonae pijinia panetaeyabiaba bepatanajumetsënëtsivi. ⁹ Itsamonae pataneyapëtaevi ata, itsiata apo bepataneyapëtaevi panetaeyabiaba. Itsjavata itsamonae jamatabëpanebeyejebabiaba picani. Itsiata tsiteca asaëya bajarapalivaisi patsipaebavanapajë. Dioso baja cajena panetocopata itsamonae ayaicuenia patanebejiobiaexanabiabinexa, itsiata apo patanebeyejebinxa. ¹⁰ Panajamatabëxainabiabi atanë bitso itsamonae pibisiacuene pexanaejava yabara, itsiata bëpënëa pepacuene pajamatabëcuenebarëyanë tsavanapae daxitamatacabijavabelianexa. Patabejiobivi picani. Itsiata jivi ayaibitsaëttoxanetonë ricovi paexanaponajë Dioso pejumelivaisi patsipaebijamatabëcueneta pejumecovënëtsixae. Apo paxainanë picani mapanacuapijicuene. Itsiata baitsi jane Diosojavabelia daxitacuene paxainajë, apo peverevereaejavanexa jane baja.

¹¹ Tajamonae, paxamë paCorinto tomarapijivimë, pacanajamatabëcuene vajunupaebatsi baja cajena roviaalia. Apo pacavescuanajamatabëcuene matayatsitsi. ¹² Asivaya pacatae atatsi, paxamë itsiata bajarapacuenia asivaya apo panetaemë. ¹³ Pacuenia pexi pexainanë asaëya banacoximuxujioba, bajara pijinia pacuenia paxanë ata pacamuxujiobatsi. Paxamë ata panejamatabëcuenevetsina asivaya panetaema pacuenia baja paxanë asivaya pacatanetsi.

Pacuenia piasaëtsaponaponaenë Dioso nacatane bepijatemplotsi tsavana-pae yabara pelivaisi

¹⁴ Dioso apo pacatojitsipae mapacueneje. Paxamëyajuvënëva, Dioso pejumecovënëtsiva, pëtsa pitatsi Dioso apo pejumecovënëtsinë. Paxamë ata papebijivimë, pëtsa papitame Dioso apo pejumecovënëtsiva. Bajayajebinxata atë pëtme Dioso apo pejumecovënëtsivi. Tsipaji apo pacajamatabëcuenejëpae tsipae. Dioso pejumecovënëtsivi apo jamatabëcuenejëpae Dioso apo pejumecovënëtsivi. Tsipaji Dioso jivi pejamatabëcuene itayotsijamatabëcuenetsi, mapanacuata pitaquirijamatabëcuenebeje, apo najamatabëcuenejëpaebeje. ¹⁵ Cristobeje dovathibeje apo najamatabëcuenejëpaebeje. Nexata pijinia pajivi Dioso pejumecovënëtsijivi, Dioso apo pejumecovënëtsijivibeje, acuenebi bajayajebi penajuanacuenebaponaponaenexabeje. Tsipaji

apo najamatabëcuenejêpaebeje. ¹⁶ Bajara pijinia navecuaitsibeje Dioso pijatemplobobeje, jumapecataeya pexanaenëanë penubenaetemplobobeje. Apo najamatabëcuenejêpaebeje. Vaxaitsi baja cajena piasaëtsaponaponaenë Dioso, nacatane bepijatemplobotsi tsavanapae. Bjarapacuenia nacatane tsipaji pacuenia bajayata Dioso templobota ponaponabiaba, bajara pijinia pacuenia aeconoxae Dioso nacayajavaponapona. Bjarapajamatabëcuene yabara bajayata Dioso vaxaitsi yabara tajëvelia jumaitsi mapacueniaje: Tsjamatabëcaenajê bjarapamonaë tayajavaponaponaenexa. Bjarapamonaë pijaDiosonë tsane. Bajara pijinia pamonaë tajajivi tsane, jai Dioso bajayata tajëvelia vaxaitsi yabara.

¹⁷ Bjaraxuata Dioso apo pejumecovënëtsivi vajavecuapitsapaejavanexa, vajatuxanenë Dioso tajëvelia nacavajunupaeba. Vajanacavajunupaebijavata jumaitsi mapacueniaje:

Pamonaë tuatuajêta pajinavanapaename, pavecuapitsapaename. Bjarapamonaë navecuëtsatsia pajinavanapaename. Paxamë pëtsa pibisiacuene panaexanaename bjarapamonaëta papecajamatabëcuene bijianaeyaniva. Nexata xanë pacasivabarëya tsanetsi. ¹⁸ Paneaxanë tsane. Nexata daxita paxamë pataximë tsane, jai bajayata vajatuxanenë Dioso fajëvelia vaxaitsi yabara, daxitacuene pevetsinë.

7

¹ Tajamonaë bitso patacaasivavi, daxita baja pacuenia Dioso pejumelivaisibaxutota tajëvelia najumecapanepaeya jumaitsi pexicueniatsi vajanacataenexa, yapëtanetsi baja. Bjaraxuata Dioso pitabarata aneconijibia jinavanapaenatsi. Vajavitota pibisiacuene vajaexanabiabijavami, copatsianatsi baja. Vajajamatabëëthëtota pibisiagamatabëcuene vajanajamatabëxainabiabijavami ata, copatsianatsi baja. Dioso yayiataeya jinavanapaenatsi Dioso vajanacatojitsipacuenia.

Pacuenia Pablo sivajamatabëcuenebarëya Corinto tomarapijivi yabara pelivaisi

² Panetsitanajamatabëcueneitajêre pataniasivajavamë. Caejivi ata paxamëyajuvënëjivi apo pacayajuvënëitsacueniabitsi. Apo pacayajuvënë jamatabëcuenebijianaetsinua. Apo pacayajuvënë yamaxëitojorobitsinua bjarapacuenia panijapalata patacavecuapitsinexa. ³ Itsa pacajumaitsitsi mapacueniaje, apo pacabijataetsi. Jume baja cajena. Pacuenia baja cajena copiaya pacajumaitsitsi, daxita matabcabijavabelianexa asivaya pacajamatabënajinabiabatsi. ⁴ Payapëtanijinua caejamatabëcuene panenajamatabëxainaëjava. Bjaraxuata bitso pacasivajamatabëcuenebarëyatsi. Paepatota ata itsamonaë panebejiobiaexanabiaba, apo panasivabëjanë tsabiabi. Tsipaji bjarapaepatota ita pacavënëlivaisitaeyabiabatsi xaniavaetsia panejinavanapaejava, pacasivanajamatabëcuene saëtabiabatsi. Nexata panebejiobiaexanabiabi ata, bitso pabarëyanë tsabiabi paxamë yabara.

⁵ Macedonia nacuata patapatsicujinaë, caeto ata cajena xaniavaetsia apo panacueraevetsinë. Daxitajava, itsaxuayo panajetarubenajê, paneyalivaisiaexanabiaba. Nexata ita panayajumetaeyabiabajê itsacuenlivaisi, patajamatabëëthëtota bëpënë pajajunaviainavanapabiabajê. ⁶ Itsiata baitsi jane Dioso, jivi pejamatabëcueneasaëyaexanaenëxae, panejamatabëcueneasaëyaexana. Bjarapacuenia Dioso panejamatabëcueneasaëyaexana paxamëjavaverena peponaenë, Tito, ita patajopa paxanëjavata. ⁷ Tito pepatsixaë

paxamējavaverena, panejamatabēcueneasaēyaexana. Itsiata Tito ēpēpatsijava, apo panejamatabēcueneasaēyaexanae. Biji rajane Tito paxamējavabelia itsa patajopa, paxamē pina Tito pajamatabēcueneasaēyaexaname. Bajarapacuenia paneexanaejava, Tito itsa pacavajunupaeba paxanējavaverena, pamuxunanajamatabēcuenesaētājē. Bitso pina picani jamatabēpanetaneme. Bajarapalivaisinua Tito panetsipaeba. Panetsipaebanua bitso paneyana-jamatabēxainaejava pibisiacuene paneexanaeconi. Panetsipaebanua bitso patanesivanajamatabēxainaejavamē itsa panevënēlivaisitaneme bitso patacasivanajamatabēxainaejava. Bajarapacuenia paneexanaejava, Tito itsa pacavajunupaeba paxanējavaverena, bitso pamuxunajamatabēcuenebarēyanē.

8 Pabaxutomi copiaya pacatoyaquinatsi, itsa palebame, bitso pacanajamatabēxainaeaxana. Itsiata saya caeepatoyonexa.

Bajarapacuenia pepecanajamatabēxainaeaxanaexae, bajarapabaxutomi yabara jamatabējumaitsinē mapacueniaje: “Apo betoyaquinaenē picani bajarapabaxutomi,” jamatabējanē. Itsiata baitsi jane aeconoxae baja bajarapabaxutomi yabara bajarapacuenia apo sivanajamatabēxainanē.

9 Aeconoxae baja sivabarēyanē patacatoitorobixae bajarapabaxutomi. Itsiata apo sivabarēyanē xua pacanajamatabēxainaeaxanatsi panijaneconi yabara. Biji rajane sivabarēyanē tsipaji patacanajamatabēxainaeaxanaejavata bajarapabaxutomita, pacopabame baja pibisiacuene paneexanabiabijava. Panajamatabēcuenepeñeyorotame baja Diosojavabelia. Nexata pacuenia Dioso pacatojitsipa, paexanavanapame. Itsiata apo pacaitsacueniabi patacatoyaquinaebaxutomi. Biji rajane bajarapabaxutomi pejamatabēcueneta, pacajamatabēcuenejavenonatsi.

10 Nexata pacuenia Dioso pacatojitsipa, bitso payanajamatabēxainame panijaneconi. Nexata baja pacopabame pibisiacuene paneexanaejavami. Panajamatabēcuenepeñeyorotame baja Diosojavabelia. Nexata paxamē Dioso pacapanepaena. Pamonaē Dioso capanepaenatsi, apo jumaitsi tsane: “Apo jitsipañē picani Dioso tanecapanepaejava,” apo jai tsane. Itsiata baitsi jane pamonaē yanajamatabēxainavanapae ata pibisiacuene pexanaeconi, itsiata itsa apo copabi tsane pibisiacuene pexanabiabijava, itsa apo najamatabēcuenepeñeyorotsi Diosojavabelia, bajarapamonaē Diosovecua naxuabiana daxitamatacabijavabelianexa.

11 Panajamatabēcuenecanaējēre mapacuenieje. Pacuenia Dioso pacatojitsipa, bitso paxamē payanajamatabēxainame panijaneconi. Nexata baja aeconoxae paneconijibimē Dioso pitabarata. Najamatabēcuenejaviabiaya baja pacanaējētame panijaneconi. Pepacuenie panavajunupaebamenua Diosojavabelia pacuenia paexanavanapame. Paxamē picani bitso pabaraanaepanabiabame paxamēyajuvënēnē, ponē pibisiacuene exanaponapona paxamē tuatujēta. Panecujunavabiabamenua picani bajaraponē pijaneconi yabara. Itsiata bitso pajitsipame paneexanaenexa Dioso papecatojitsipaecuenia. Pasivanajamatabēcueneveretamenua panenaneconitsiaexanaenexa paxamēyajuvënēnē, ponē pibisiacuene exanaponapona paxamē tuatujēta. Bajarapacuenia itsa pasivanajamatabēxainame pibisiacuene pexanaponaponaenē, Dioso patsitanajamatabēcueneitajētame Diosojavabelia apo panenaneconitsijava.

12 Itsa pacatoyaquinatsi copiaya pabaxutomi, pacatoyaquinatsi padaxitamē patacamuxujobinexa. Apo toyaquinaenē caenē paxamēyajuvënēnē tamuxujobinexa, ponē pibisiacuene exanaponapona paxamē tuatujēta. Apo toyaquinaenēnua tamuxujobinexa ēponē ata

pibisiacuene toexanatsi itsanë. Pacatoyaquinatsi bajarapabaxutomi padaxitamë patacamuxujobinexa. Pacatoyaquinatsi bajarapabaxutomi tsipaji pajitsipajë panijacuata panenajamatabëcueneypätaenexa juya pataniasivajavamë. Baitsi pacuenia pajitsipame, Dioso pitabarata patanejumecovënëtsinexamë patacasivajamatabëcuenebarëyanexa. ¹³ Nexata baja panejumecovënëtamë. Bajarapacuenia patanejumecovënëtsixaemë, bitso pacasivajamatabëcuenebarëyatsi.

Pibisiacuene itsa paexaname, Tito bitso pacasivanajamatabëxaina. Itsiata baja aeconoxae daxita paxamë Dioso pitabarata xaniavaetsia panejinavanaepaxae, apo pacasivanajamatabëxainae baja. Bajaraxuata pacasivajamatabëcuenebarëya Tito. Nexata Tito papecasivajamatabëcuenebarëyajava yabara, paxanë ata bitso pacasivajamatabëcuenebarëyatsi. ¹⁴ Tito peponaevajënaeya paxamëjavabelia, jumaitsinë bajaraponëjavabelia: “Corinto tomarapijivi, Dioso pejumecovënëtsivi, tatoyaquinaebaxuto pejamatabëcueneta, itsiata najamatabëcuenexanebiana Diosojavabelia,” janë paxamë yabara Titojavabelia. Nexata bajarapacuenia paexaname baja. Bitso nexata Tito pacasivajamatabëcuenebarëya. Pacuenia xanë pacatsipaebabiabatsi pexaniajailivaisi, bajarapacuenia paxamë yabara tsipaebajë Titojavabelia. Bajarapacuenia itsa tsipaebajë, xaniajanë cajena. Tsipaji pacuenia pacatoyaquinatsi, paexanavanapame. Bajaraxuata pacasivajamatabëcuenebarëyatsi. ¹⁵ Tito najamatabënapitabiaba panejumecovënëtabiabiJava pacuenia pacaitoroba. Najamatabënapitabiabanua yaityataeya panecopiapitsijava ata. Bajaraxuata Tito bitso pacaitaxanapona pevajënaeyabelia. ¹⁶ Pacasivajamatabëcuenebarëyatsi. Tsipaji xaniavaetsia yapëtaniji paneexanavanapaeJava pacuenia Dioso pacatojitsipa.

8

Pacuenia Dioso pejumecovënëtsivi penajamatabëcuenerajutsixae Diosojavabelia, ofrenda tojeba Diosonexa yabara pelivaisi

¹ Tajamonae, pacatoyaquinatsi mapalivaisije paneyapëtaenexa pacuenia Dioso jamatabëcueneYavenonatsi Dioso pejumecovënëtsivi, Macedonia nacuapijivi. ² Macedonia nacuapijivi petoayapëbejecuenetsi tocopiapataponae atatsi ayaicuenia pejamatabëcuenejëtsinexatsi, itsiata jamatabëcuenebarëya tsavanapae. Bajarapamonae bitso bepejiobivi picani. Itsiata ofrenda itsa exana petoitorobinexa bepejiobivi Jerusalén tomarapijivijavabelia, ayaiJava jebabiaba. ³ Xanë yapëtaniji bajarapamonae bepejiobivacuene. Itsiata bepejiobivi ata, ayaiJava jebabiaba ofrenda itsa exanabiaba. Bajarapamonae jebabiaba bajarapacuenia, itsajivi ata apo itorobi atatsi ayaiJava pejebinexa. ⁴ Bajarapamonae pinijicuenia paneitoroba patatocaponaenexa pejebiofrenda. Panejumaitsi mapacueniaje: “Pexaniacuene panetoexanaename. Panetocaponaename mapaofrendaje Jerusalén tomarajavabelia Dioso pejumecovënëtsivi panerajutsinexa. Paxanë ata bitso jamatabëpayavenonajë bajarapamonae,” panejai. ⁵ Nexata bajarapamonae bepejiobivixae, pasivajamatabëjumaitsinë picani: “Tsiquirijavaxi meta bajarapamonae jebiana,” pasivajamatabëjanë picani. Itsiata bajarapamonae ayaiJava jeba. Bajarapamonae eofrenda apo rajutsi Diosojavabelia. Biji rajane copiaya najamatabëcuenerajuta Diosojavabelia pacuenia Dioso itorobaponatsi pexanabiabinexa daxitamatacabijavabelianexa. Bajaraxuacujinae pejebiofrenda paxanëjavaberena panerajuta patatocaponaenexa bepejiobivijavabelia.

Bajarapacuenia itsa exana, exana Dioso petojitsipaecueniatsi. ⁶ Paxamë, paCorinto tomarapijivimë, paofrenda paxamë ata pacaeatuatame panerajutsinexa Dioso pejumecovënëtsivi, Jerusalén tomarapijivi, Tito pacajamatabëcueneavenona panecaetuatsijava. Itsiata abaxë apo paveratsimë panecaetuatsijava. Bajaraxuata aeconoxae baja icatsia Tito paitorobajë paxamëjavabelia paneveretsinexa jane baja bajarapaofrenda panecaetuatsijava. ⁷ Paxamë itsamonaevēcua xaniavaetsia Dioso patojinavanapame. Xaniavaetsia panajamatabëcuenecopatame Diosojavabelia. Payapëtanemenua xaniavaetsia Dioso pejumelivaisi. Pacacaëjëpanua xaniavaetsia Dioso pejumelivaisi panetsipaebinexa itsamonaē. Bitso pacajamatabëcueneenabiabanua Dioso pijacuene panetonacuenebavanapaenexa. Bitso paneasivamēnuā. Nexata paneyavenonaenexa bepejobivi, Jerusalén tomarapijivi, ayaijava bepajebame ofrenda itsa paexaname.

⁸ “Macedonia nacuapijivi, bepejobivi ata, ayaijava ofrenda jeba,” itsa janë, apo pacaitorobitsi paxamë ata ayaijava ofrenda panerajutsinexa. Biji rajane saya pacatsipaebatsi paneyapëtaenexa pacuenia Macedonia nacuapijivi bitso jamatabëcuenebarëyaya jamatabëpatoexaname ofrenda bepejobivi peyavenonaenexa. Bajarapacuenia paxamë ata itsa paexaname, itsamonaē patsitanajamatabëcuene itajëtsianame panexaniajaicuene Dioso paneasivajava. ⁹ Bajarapacuenia paxamë ata ofrenda parajutsianame. Tsipaji payapëtaneme pacuenia vajatuxanenë Jesucristo nacayavenona vajanacaasivaxae. Bajaraponë picani ayaijamatabëcuenenë. Daxitacuene pevetsinë. Itsiata papecaasivaxae, nabejobiaexana papecayavenonaenexa. Bajarapacuenia papecasivanabejobiaexanaexae, nexata paxamë ata itsamatabi paayaijamatabëcuenevimë tsane Dioso pijanacuatatsia.

¹⁰ Pacatsipaebatsi paneyapëtaenexa pacuenia panetsitaxanepana paxamë paneexanaenexa bajarapaofrenda. Paxamë picani imata pavaimi bitso jamatabëpayavenoname Dioso pejumecovënëtsivi, Jerusalén tomarapijivi. Nexata paxamë daxitajivivajënaeya jamatabëpatoexaname ofrenda. ¹¹ Paxamë picani imata pavaimi Jerusalén tomarapijivi bitso jamatabëpayavenoname ofrendanexa. Bajarapacuenia aeconoxae ata tsiteca paexanare paneveretsinexa jane baja palata panecaetuatsijava bajarapaofrendanexa. Parajutsianame pacuenia pacacaëjëpa. ¹² Nexata itsa pepacuene parajutsianame pacuenia pacacaëjëpa, Dioso pacasivajamatabëcuenebarëya tsane. Tsipaji apo pacaitorobi xua apo paxainaemë panerajutsinexa.

¹³ Apo pacaitorobitsi raja mapacueniaje: “Itsamonaē paneyavenonaenexa, ofrenda itsa paexaname, pabuare daxita panexainaepalatayomi,” apo pacajaitsi. Tsipaji juya paxamë panamatavenonaejitsipame. ¹⁴ Jitsipatsi namataenetsia vajanayavenonaenexa vajanamatavenonaejavaxi yabara. Aeconoxae baja pacacaëjëpa paneyavenonaenexa bepejobivi, Jerusalén tomarapijivi. Itsamatabijavabelia, pamatacabi paxamë panamatavenonaenexa, caëjëpaenatsi juya bajarapamonae papecayavenonaenexa. Bajarapacuenia nexata daxita paxamë panamatavenonaejavaxi, apo panamatavenonaemë tsane. ¹⁵ Bajarapajamatabëcuenelivaisi yabara Dioso pejumelivaisibaxutota jumaitsi mapacueniaje: “Itsajivi bitso ayaijava xainae ata, itsiata apo toyajuvënënacopatsitsi. Itsajivi pijinia tsiquirijavayo xainae ata, itsiata apo namatavenonaē,” jai Dioso pejumelivaisibaxutota. Bajaraxuata paxamë ata panexainaeyajuvënëjava, beparajutame panamatavenonaevijavabelia.

*Pacuenia Tito, anijanëbeje yajava, pona Corinto tomarabelia yabara peliv-
aisi*

¹⁶ Xanë bitso jitsipajë paxamë patacayavenonaenexa. Tito ata bajarapacuenia jitsipa papecayavenonaenexa. Bajaraxuata pexaniajamatabëcuene rajutajë Diosojavabelia. Tsipaji Espiritu Santo pejamatabëcueneta Titobeje panajamatabëcuenejëpajëbeje paxamë yabara. ¹⁷ Nexata Tito itorobajë papecataenexalia, papecayavenonaenexanua bajarapaofrenda panecaetuatsijava paneveretsinexa baja tavajënaelia. Barëyaya Tito jejai peponaenexa paxamëjavabelia. Bajaraponë ata pijacuata pejitsipaexae peponaejava paxamëjavabelia, ponaena papecayavenonaenexa.

¹⁸ Tito pepëta paitorobajë itsanë Dioso pejumecovënëtsinë. Bajaraponë Macedonia nacuata daxita Dioso pejumecovënëtsivi bitso peyapëtaenëtsi. Peyaiyataenëtsinua. Tsipaji xaniavaetsia tsipaebabiaba Dioso pejumeliv-aisi jivi pecapanepaelivaisinexati. ¹⁹ Ponë, Tito yajava, ponaejitsia paxamëjavabelia, bajaraponë Macedonia nacuata itapetatsi daxita Dioso pejumecovënëtsivi. Nexata pamatacabi paponaeñajë Jerusalén tomarajavabelia, bajaraponë payajavaponaenajë. Nexata paofrenda pacaponaejitsianë, bajaraponë paneyavenonaeyacaponaena. Bajarapaofrenda pacaponaenajë Jerusalén tomarapijivi pesivajamatabëcuenebarëyanexa Dioso. Patsitanajamatabëcuene itajëtsianajënuu patajitsipaejava patayavenonaenexa pamonaë bepejiobivi. Nexata bajarapamonae jamatabëjumai tsane: “Matsaena pamonaë jitsipa peyavenonaenexa bepejiobivije,” jamatabëjai tsane. ²⁰ Bajarapacuenia Macedonia nacuapijinë payajavaponaenajë itsajivi ata patanebaracuaicuajaiyaniva bajarapapalataxaneto yabara. “Pablo bana raeta bajarapapalata yajuvënëcopata,” patanejaiyaniva. ²¹ Dioso baja cajena paneyapëtane apo patanacobetoxotsivicuene. Itsiata pajitsipajë daxitajivi ata pataneyapëtaenexa apo patanacobetoxotsivicuene.

²² Titobeje icatsia itsanë patsicueyaitorobajë Dioso pejumecovënëtsinë peyajavaponaenexabeje paxamëjavabelia. Bajaraponë anijatone pajamatabëcuenejëtabiabajë. Xaniavaetsia bitso paneyavenonabiaba. Nexata aeconoxae paxamë bitso jamatabëpacayavenona. Tsipaji pacavënëlivaisitane paneyavenonaejavanexa Jerusalén tomarapijivi. ²³ Nexata Tito yabara itsajivi itsa pacayanijobiana: “¿Detsa pacuenia maponë peponaponaenajë?” itsa pacajai tsane, pajumaitsimë tsane: “Pablobeje raja penajuaponaponaenëbeje. Bajaraponë Tito Pablo yavenonabiaba vaxaitsi juya Pablo vajanacayavenonaenexa,” pajamë tsane. Itsajivi itsa pacayanijobiana Tito peyajavaponaenajëbeje yabara, pajumaitsimë tsane: “Bajaraponëbeje Dioso pejumecovënëtsivi pitorobinëtsibeje. Bajaraponëbeje xaniavaetsia Cristo petoponaponaejavabeje jivi petaeaxae, nexata jivi yayiatane Cristo pelivaisi,” pajamë tsane. ²⁴ Nexata bajaraponëbeje itsa patsianabeje paxamëjavata, patsitanajamatabëcuene itajëtsianame paneasivajava bajaraponëbeje. Nexata Dioso pejumecovënëtsivi, pamonaë itorobatsibeje bajaraponëbeje, pacavënëlivaisitaena paneasivajava bajaraponëbeje. Nexata asivaya itsa pacopiapitsianame Dioso pejumecovënëtsivi pitorobinëtsibeje, nexata Dioso pejumecovënëtsivi jamatabëjumai tsane paxamë yabara: “Pacuenia baja Pablo bana nacatsipaeba, xaniajai baja cajena. Corinto tomarapijivi asivaya tane daxitajivi,” jamatabëjai tsane.

9

*Ofrenda pecaetuatsijava Dioso pejumecovënëtsivijavabelia peyavenon-
aenexa yabara pelivaisi*

¹ Ofrenda pacaetuataponame paneyavenonaenexa bepejiobivi, Dioso pejumecovënëtsivi, Jerusalén tomarapijivi. Apo jitsipaeñe picani icatsia patacatoyaquinaenexa bajaraxua yabara. ² Tsipaji baja yapëtaniji pacuenia bitso jamatabëpayavenoname bajarapamonae. Bajaraxuata pacasivajamatabëcuenebarëyatsi. Nexata paxamë yabara jumaitsinë Macedonia nacuapijivijavabelia: “Acaya nacuapijivi, Corinto tomarata penacaetuatabiabi, imata baja cajena pavaimi najamatabëcuenevereta perajutsinexa ofrenda Jerusalén tomarapijivijavabelia,” janë paxamë yabara. Nexata Macedonia nacuapijivi ita pacavënëlivaisitane paneyavenonaejavanexa Jerusalén tomarapijivi, Macedonia nacuapijivi ata ayaibitsaëttoxaneto tocaetuatapona ofrenda peyavenonaenexa Jerusalén tomarapijivi. ³ Nexata pacatoitorobatsi Titobana papecayavenonaenexa paneveretsinexa baja bajarapaofrenda panecaetuatsijava panerajutsinexa Jerusalén tomarapijivi. Tavajënaelia ita apo paveretsimë tsipae ofrenda panecaetuatsijava, paxamë yabara pexaniacuenia tajumaitsijava, najumecovëauranë tsipae Macedonia nacuapijivijavabelia. ⁴ Tsipaji itsamonae Macedonia nacuapijivi belia naponaejitsipa tapëta paxamëjavabelia. Itsa bajarapamonae taejitsipa bajarapaofrenda apo paneveretsijava, nexata bitso paxamë yabara auranë tsipae. Tsipaji paxamë yabara bajaya baja jumaitsinë: “Corinto tomarapijivi jamatabëveretapona baja ofrenda pecaetuatsijava,” janë paxamë yabara. Nexata paxamë ata bitso pauramë tsipae. ⁵ Bajaraxuata jamatabëjumaitsinë: “Titobana Corinto tomarabelia tavajënaeyabelia itorobianajë,” jamatabëjanë. Nexata Titobana pacajamatabëcuenejavenonaena ofrenda panecaetuatsijava, paneveretsinexa baja pacuenia najumecapanepaeya panetocaëjëtame. Nexata baja tavajënaelia bajarapaofrenda ita paxaniavaetabuatsianame, panajamatabëcueneitajëtsianame Jerusalén tomarapijivi paneasivaxae paneyavenonaejava, apo epatacaitorobixae.

⁶ Pacanaëjere mapalivaisije. Tsiquirijavayo peubinë, tsiquirijavayo pijinia batopitsapatsi. Ayaijava pijinia peubinë, ayaijava batopitsapatsi. Nexata ayaijava ita parajutsianame itsamonaejavabelia, Dioso juya pacarajutsiana ayaijava. ⁷ Nexata caejivi canacujitsia berajuta pacuenia najamatabëcuenevereta perajutsinexa. Pëtsa pajamatabëjumaitsimë: “Apo jamatabërajutsi atanë picani, itsiata taneitorobixae, rajutsianajë,” pajamatabëjamë pëtsa. Tsipaji pajivi rajuta itsajivijavabelia jamatabëcuenebarëyaya, Dioso asivatsi. ⁸ Dioso baja cajena caëjëpatsi papecarajutaponaeenexa pacuenia panamatavenoname matatoxenetsia. Nexata xua panamatavenoname, paxainaponaeenae. Pacatonacopatsiananua panerajutsinexa bepejiobivijavabelia. ⁹ Dioso pejumelivaisibaxutota jumaiti mapacueniaje: Ponë rajutabiaba bepejiobivi penamatavenonaecue, bajaraponë pexaniacue exanabiaba Dioso pitabarata. Nexata bajarapacue Dioso apo nacofënëtsi daxitamatacabijavabelianexa, jai Dioso pejumelivaisibaxutota.

¹⁰ Dioso rajuta jivi peubixunexa. Bajaraxuacujinae icatsia Dioso pejamatabëcueneta penaveretsixu capitsapa penotsinexa jivi pexaejavanexa. Bajara pijinia pacuenia Dioso pacarajutsiana panexinaejavanexa, panerajutsinexanua bajaraxuayajuvënëjava

bepejiobivijavabelia. Pacacaējēpaeyaexanaenanua ēpexaniacuene ayaijava paneexanaenexa. ¹¹ Bajarapacuenia Dioso pacarajutsiana panexainaenexa ayaijava. Nexata pacacaējēpaena bajaraxuayajuvēnējava juya panerajutsinexa bepejiobivijavabelia. Nexata paofrenda panerajutame patatocaponaenexa Dioso pejumecovēnētsivi, Jerusalén tomarapijivi, itsa parajutsianajē bajarapamonae, pexaniajamatabēcuene rajutsiana Diosojavabelia bajarapacuenia paneyavenonaexae. ¹² Bajarapacuenia Dioso pejumecovēnētsivi, bepejiobivi, itsa parajutame, payavenoname bitso penamatavenonaejavata. Bajarapamonae paneyavenonaejava itsa taena, pexaniajamatabēcuene Diosojavabelia perajutabiabijava pematatsēnēa bitso pexaniajamatabēcuene rajutsiana Diosojavabelia. ¹³ Bajarapacuenia Jerusalén tomarapijivi ofrenda itsa parajutsianame paneyavenonaenexa, bajarapamonae patsitanajamatabēcuene itajētsianame pepacuene xaniajai panjumecovēnētsijava pexanialivaisi, Cristo pelivaisi. Nexata bajarapamonae pexaniajamatabēcuene rajutsiana Diosojavabelia Cristo pelivaisi panejumecovēnētavanapaejava yabara. Ofrenda ata panerajutsijava Jerusalén tomarapijivi, paofrenda ata parajutame itsamonaejavabelia, bajaraxua ata yabara Jerusalén tomarapijivi pexaniajamatabēcuene rajutsiana Diosojavabelia. ¹⁴ Nexata bajarapamonae bitso asivaya pacajamatabēnajinaeya pacatovajētabiabiana Diosojavabelia. Tspaji paxamē bajarapamonae payavenoname Dioso pejamatabēcueneta papecaitorobixae. ¹⁵ Vaxaitsi pexaniajamatabēcuene rajutabiabatsi Diosojavabelia. Tspaji Dioso pexēnato athēbēvetsica nacatoitorobica vajanacasivatēpaenexa mapanacuataje. ¡Cristo vajanacasivatēpaejava pexaniacuene bitso!

10

Pacuenia Pablo navajunupaeba Cristo pitorobijavatsi Dioso pejumelivaisi daxitanacuanējava jivi petsipaebanajetarucaenexa yabara pelivaisi

¹ Pacuenia Cristo pexaniacuena pacaitorobijitsipa, bajarapacuenia xanē ata pexaniacuena ajumesaēya pacaitorobatsi. Itsiata baitsi jane itsamonae paxamēyajuvēnēvi xanē yabara jamatabēcuenenavēxaniabiaya jumai tsabiabi: “Itsa abaxē Pablo tajē nacavecuaponapona, ajumelivaisisaēya nacatoyaquinabiabarena. Itsiata baitsi jane majotaje, vaxaitsijavata, itsa patajopaena, piaitejepaebinēcuenia patajopaena. Ajumejibia ponaponaena piajumeuraxae,” jai tsabiabi paxamēyajuvēnēvi xanē yabara jamatabēcuenenavēxaniabiaya. Itsiata bajarapacuenia apo itsinē tsane. ² Nexata pexaniacuene pacavajētatsi. Pētsa itsajamatabēcuene panetoexaname, itsa patsialiajē paxamējavabelia, ayaijumeta pacabijataeya patacamuxujobiyaniva. Itsamonae paxamēyajuvēnēvi xanē yabara jamatabēcuenenavēxaniabiaya jumai tsabiabinua: “Pablo apo ponapona Dioso pejumecovēnētsinēcuenia. Saya ponapona Dioso apo pejumecovēnētsinēcuenia. Yajavaponapona pijaperujumatabēcuene,” jai tsabiabi paxamēyajuvēnēvi xanē yabara. Bajarapacuenia xanē yabara pecuaicuaijaittsabiabivijavabelia ayaijumeta bijataeya cuaicuaijanē tsane. ³⁻⁴ Mapanacuapijivi, Dioso apo pejumecovēnētsivi, saicayacuenia nayajiviyapētane pijavajabitsaēvecua penaevetsinexa pitsacueniabivanivatsi. Vaxaitsi ata mapanacuata vajajinavanapaevi, Dioso vajajumecovēnētsivi, saicayacuenia pijinia nayajiviyapētanetsi vjanaevetsinexa dovathivecua. Dovathivecua apo naevetsitsi mapanacuapijicueneta. Pajamatabēcuenesaē Dioso

nacarajuta, bajarapajamatabēcuenesaëta jamatabēcueneamoneyabaponatsi dovathi. ⁵ Nexata Dioso pejamatabēcuenesaëta, paajibiaexanaponajë jivi Dioso yabara penajumetsënëtsilivaisimi. Bajarapamonae dovathi pejamatabēcueneta itorobatsi penajumetsënëtsilivaisi petsipaeababinexa itsamonaejavabelia. Nexata pamonae Dioso yabara penajumetsënëtsivi, pajumecovënëtsiaexanaponajë Cristo pelivaisi Dioso pejamatabēcuenesaëta. Itsamonae pijinia dovathi pejamatabēcueneta beayajamatabēcuenevi natane. Pamonae bajarapacuenia najamatabëxaina, apo yapëtae Dioso. Bajaraxuata bajarapajamatabēcuenemi paajibiaexanaponajë baja. Nexata pamonae ata bajarapacuenia beayajamatabēcuenevi natane, pajumecovënëtsiaexanaponajë Cristo pelivaisi Dioso pejamatabēcuenesaëta. ⁶ Bajarapacuenia paxamëjava ata paexanaponaenajë. Paxanë panajamatabēcueneveretajë pataexanaenexa mapacueniaje. Paxamë baja xaniavaetsia Dioso itsa pajumecovënëtanapaename, paxanë pacavecuacapitsapaenatsi pamonae apo jitsipae patanejumecovënëtsinexa Cristo pelivaisi.

⁷ Paxamë raja saya jema pataneme daxitajivi. Nexata daxitajivi pataneme pacuenia Dioso apo pejumecovënëtsivi tane daxitajivi. Nexata apo payapëtaemë pacuenia paxanë pajamatabēcuenetsinë. Pajivi nayapëtane Cristo pijajivitonëcuene, bajarapajivi bepaneyapëtane paxanë ata Cristo papijajivicuenenë. ⁸ Paxamë meta xanë yabara pajamatabëjumaitsimë tsabiabi: “Pablo saya bitso navajunupaebabiaba Dioso pitapetsijavatsi apóstolenënexa,” pajamatabëjamë meta tsabiabi xanë yabara. Dioso baja cajena paneitoroba patacajamatabēcuenesaëta asaëyaexanaenexa. Apo paneitorobi patacajamatabēcuenesaëta faefaenaeyaexanaenexa. Bajaraxuata apo ajumeuranë tsabiabi tanavajunupaebabiabijava apóstolenëjavanë. ⁹ “Pablo saya nacajamatabēcuenenabenajacaeya exanabiaba vajanacatoyaquinaelivaisianëta,” panejaijava xanë yabara apo jitsipaenë. Tsipaji bajaraxua yabara apo pacatoyaquinaetsi. ¹⁰ Itsamonae xanë yabara jumai tsabiabi: “Pablo ajumelivaisisaëya nacatoyaquinabiabarena. Itsiata bajaraponë itsa patajopa majotaje, vaxaitsijavata, apo ajumesaë tsabiabi. Saya ajumelivaisixaebi tsabiabi,” jai tsabiabi itsamonae xanë yabara. ¹¹ Itsiata baitsi jane pamonae bajarapacuenia jumai tsabiabi xanë yabara, beyapëtane pacuenia bajarapamonaejavabelia exanaejitsianë itsa papatsialiajë paxamëjavabelia. Pacuenia baja pacatoyaquinaiatsi taexanaenexa paxamëjavabelia, bajarapacuenia exanaenajë paxamëjavabelia.

¹² Palivaisi paxanë pacatsipaebabiabatsi, bajarapalivaisivecua saicayalivaisi itsamonae pacatsipaebabiaba. Bajarapamonae apo canaëjëtsi pacuenia Dioso pejumelivaisibaxutota jumaitsi. Nexata bajarapamonae namataenetsia natane bepexaniajamatabēcuenevi. Nexata pamonae apo bajarapamonaejavajuvënëvi, bepibisiajamatabēcuenevi tane. Saya xua bajarapamonae tsitaxanepanatsi, bajaraxua yabara jumai tsabiabi: “Maxuaje pexaniacuene,” jai tsabiabi. Xua pijinia apo tsitaxanepanaetsi, bajaraxua yabara jumai tsabiabi: “Maxuaje pibisiacuene,” jai tsabiabi. Bajarapamonae cajena bitso apo yapëtae. Paxanë raja bajarapacuenia apo pajamatabēcuenetsinë. ¹³ Paxanë Dioso paneitoroba Dioso pijacuene patatonacuenebinexa. Nexata panacuanëjava Dioso paneitoroba, bajarapanacuanëjava Dioso pejumelivaisi patsipaebanajetarubenajë. Dioso paneitoroba tajë ata paxamë paCorinto tomarapijivimëjavabelia ata pataponaenexa patacatsipaebinxa pejumelivaisi. Nexata itsa panavajunupaebabiabajë Dioso patanitorobijava, xuayovajëto Dioso panetocopata patatonacuenebinexa, panavajunupaebabiabajë. Ayailivaisi apo panavajunupaebabiabinë saya itsa-

monae pataneyaiyataenexa patanavajunupaebijava yabara. ¹⁴ Bajaraxuata itsa papatajê paxamêjavata, pacatsipaebatsi pexanialivaisi, Cristo pelivaisi. Tsipaji bajarapanacuanêjava Dioso paneitoroba pejumelivaisi patacatsipaebinexa. Bajarapalivaisi copiaya baja paxanê pacatsipaebatsi. ¹⁵ Itsamonaê baja Cristo pelivaisi jumecovênêta itsamonaê petsipaebixaetsi. Nexata Cristo pelivaisi pejumecovênêtsivi yabara najumetsênêtsiaya apo pajumaitsinê tsipae mapacueniaje: “Paxanê raja patatsipaebixae, bajarapamonae jumecovênêta Cristo pelivaisi,” apo pajanê tsipae. Pacatojitsipatsi pãnevajênaeyabelia panejumecovênêtavanapaenexa Dioso. Nexata pajitsipajê orijibia patacatsipaebavanapaenexa pexanialivaisi, Cristo pelivaisi. Itsiata baitsi jane êpanacuanêjava Dioso paneitoroba patatsipaebavanapaenexa pejumelivaisi, bajaraêpanacuanêjava patsipaebavanapaenajê. ¹⁶ Nexata paxamê majotaje patacatsipaebicujinae, panepênêyabelia penaetomaranêjava ata jamatabêpatsipaebajê pexanialivaisi, Cristo pelivaisi. Apo pajitsipaenê patatsipaebinexa bajarapalivaisi itsaxuayo baja patavajênaeya itsamonaê tsipaebapona bajarapalivaisi.

¹⁷ Pajivi itsamonaejavabelia navajunupaeba pexanaejava, benavajunupaeba Dioso peyavenonaejavatsi. Bajarapacuenia benavajunupaeba pejumetaevitsi peyayataenexa Dioso. Bajarapajivi apo benavajunupaebi pijacuata pexanaejava jivi saya peyayataenexatsi. ¹⁸ Pajivi pijacuata navajunupaebabiaba: “Xanê ra bitso pexaniacuene exanabiabajê,” jai tsabiabi, bajarapajivi ajumematamobi. Tsipaji saya pijacuata navajunupaebabiaba. Itsiata baitsi jane pajivi yabara vajatuxanenê jumaitsi: “Mara pajivije xaniavaetsia netoponapona,” jai, nexata tojumenamatamotatsi.

11

Pablo pelivaisi, penajumetsênêtsilivaisi petsipaebaponaevi ata, yabara pelivaisi

¹ Natsiquejemalivaisi pecuaicuajainê, xua exana, pijacuata banavajunupaeba itsamonaejavabelia. Bajara pijinia pacuenia xanê ata, xua exanjê, tajacuata pacanavajunupaebijitsiatsi. Bajarapacuenia tajacuata pacanavajunupaebi ata tsanetsi, itsiata jitsipajê xaniavaetsia ajamatabêcuenesaëya patanenamuxunaevetsinexamê. ² Bajarapacuenia pacanavajunupaebijitsiatsi tsipaji bitso pacaasivatsi pacuenia Dioso pacaasiva. Pacatojitsipatsi êCristo panejitsipaenexa. Pacuenia petiriva caenê jitsipa êpamonanexa, bajarapacuenia caenê Cristo pajitsipare. ³ Bajayata Evapijiva yamaxêitojorobatsi dovathi penajumetsênêtsicueneta. Pacacacujunavatsi paxamê ata bajarapacuenia dovathi papecayamaxêitojorobianiva. Nexata paxamê yabara jamatabêjumaitsinê mapacueniaje: “Dovathi meta jamatabêcuenebijianaenatsi Corinto tomarapijivi. Cristo meta pejitsipaejavami copabiana,” jamatabêjanê paxamê yabara. ⁴ Pacacacujunavatsi penajumetsênêtsilivaisi petsipaebaponaevi papecayabianiva. Tsipaji bajarapamonae pata baja paxamêjavata. Xanê Jesús pelivaisi pacatsipaebabiabatsi. Nexata Jesús pelivaisivecua bajarapamonae saicayacuenia pacatsipaebabiabi ata, itsiata bajarapalivaisi panamuxunaevetabiabame xaniavaetsia. Espiritu Santo, ponê pacatsijamatabêeca, pelivaisi, xanê pacatsipaebabiabatsi. Nexata Espiritu Santo pelivaisivecua saicayacuenia bajarapamonae pacatsipaebabiabi ata, itsiata bajarapalivaisi ata panamuxunaevetabiabame xaniavaetsia. Xanê pacatsipaebabiabatsi pexanialivaisi papecacapanepelivaisinexa

Diosojavabelia. Nexata bajarapalivaisivecua bajarapamonae saicayalivaisi pacatsipaebabiabi ata, itsiata panamuxunaevetabiabame xaniavaetsia. ⁵ Pamonae penajumetsënëtsilivaisi pacatsipaebabiaba, ayaijamatabëcuenevi nataeyabiaba. Paxanë paapóstolevinë bajarapamonae bitso panevecuaayaijamatabëcuenevi natane. Itsiata baitsi jane xanë bajarapamonaevecua beveliajamatabëcuenenënë apo nataenë. ⁶ Jivijavabelia xaniavaetsia livaisi tatsipaebinexa, apo necujani ata, itsiata xaniavaetsia yapëtaniji xua yabara tsipaebajë. Xaniavaetsia Jesús pelivaisi patayapëtaejava panyapëtaenexa, pacatsitanajamatabëcuene itajëtabiatsi paxamëjavata itsa pacatsipaebavanapatsi Jesús pelivaisi.

⁷ Paxamëjavata itsa pacatsipaebaponaponatsi pexanialivaisi papecacapanepaelivaisinexa Diosojavabelia, itsacuenejavayo ata paxamëjavabelia apo pacavajëtsitsi. Xanë tacobeta asaëyata nacuenebabiabajë tanaevetsinexa. Bajarapacuenia betajibicuenia nacuenebabiabajë tanaevetsinexa pamatacabi pacatsipaebaponaponatsi Jesús pelivaisi. Nexata baja pajumecovënëtime Jesús pelivaisi itsamatacabi panexainanexa matacabi apo pevereverecejava. ⁸ Itsamonae Dioso pejumecovënëtsivi itsa netoitoroba palata, itsiata pitajë paxamëjavata tanaevetaponaponanexa bajarapapalatata. Nexata pacayavenonaponaponatsi. Bajarapacuenia paxamëjavata naevetaponaponajë. Paxamë apo panerajutsimë palata. ⁹ Nexata pamatacabi paxamëjavata ponaponajë, namatavenonae atanë, apo pacavajëtsitsi panexainaejayüvenëtsi patanerajutsinexamë. Itsiata Dioso pejumecovënëtsivi, Macedonia nacuaverena pepatsivi, netocapata daxita tanamatavenonaejava. Bajarapacuenia paxamëjavata ponaponajë itsacuenejavayo ata pacavajëtsinejevatsi patacavamatabëitonotsiyaniva. Apo najamatabëxainanë bexëjavabelia ata patacavajëtsinexa. ¹⁰ Yapëtaniji Cristo pelivaisi pepacune pexaniajailivaisicue. Bajaraxuata daxita Acaya nacujava Cristo pelivaisi amoneya asaëya tatsipaebaponaejava, sivajamatabëcuenebarëyanë. ¹¹ Itsamonae xanë yabara jamatabëcuenenavëxaniabiaya pacajumaiti: “Pablo raja apo pacaasiva. Bajaraxuata apo pacavecuapitsi palata,” pacajai. Jemajai raja bajarapamonae. Dioso raja yapëtane bitso patacaasivajava.

¹² Itsiata tavajënaeyabelia Dioso pejumelivaisi pacatsipaebaponaponatsi pacavajëtsinejevatsi itsacuenejavayo ata. Pamonae penajumetsënëtsilivaisi pacatsipaebabiaba, bajarapamonae pacamatamoyanijobabiaba papecat-sipaebimatamo. Bajarapacuenia papecamatamoyanijobabiabixae, nexata toacuenibitsi pevajënaeyabelia papecajumaitisaponanexa: “Paxanë ata patonacuenebavanapajë Dioso pacuenia Pablo tonacuenebaponapona Dioso,” papecajinexa. ¹³ Bajarapamonae apo pepo apóstolevi. “Paxanë raja paapóstolevinë,” itsa pacajai, saya raja pacayamaxëitojoroba. Paxanë Cristo papijajivinë, paapóstolevinë, bajarapamonae saya panecuenecataeya apóstolevi naexana. ¹⁴ Paxamë apo bepasivajamatabëcuenenabenajacaemë bajarapamonae. Bajarapacuenia saya bajarapamonae exanavanapa papeayamaxëitojorobinexa. Dovathi raja caëjëpatsi Dioso bepijaangelnë penaexanaenexa, bepxaniajailivaisi itajara petsipaebinë jivi petanexatsi. ¹⁵ Nexata dovathi pijajivi ata pexaniacue itajara exanavanapae ata, itsiata apo besivajamatabëcuenenabenajacaetsi. Paneconivajëto bajarapamonae xaina, bajarapaneconivajëtota itsamatacabi Dioso naneconitsiaexanaena bajarapamonae.

Pacuenia Pablo apóstolenëxae nabejibitsiaponapona yabara pelivaisi

¹⁶ Icatsia pacajumaitsitsi. Xua aeconoxae pacajumai tsanetsi, bajaraxua yabara pëtsa panetaneme betanematajemabinë. Bajarapacuenia panetae atamë, itsiata panenamuxunaevere palivaisi pacatsipaebijitsiatsi. Pacuenia peyamaxëitojorobiapóstolevi ajumeurajibia pacanavajunupaebabiaba paneyaiyataenexa, bajara pijinia pacuenia xanë ata ajumeurajibia pacanavajunupaebijitsiatsi pataneyaiyataenexamë. ¹⁷ Vajatuxanenë picani apo nitorobi patacanavajunupaebinexa. Itsiata pacuenia pematajemabinëtsi ajumeurajibia banavajunupaeba xua exana, bajarapacuenia xanë ata aeconoxae ajumeurajibia pacanavajunupaebijitsiatsi pataneyaiyataenexamë. ¹⁸ Pamonae peyamaxëitojorobiapóstolevi, ayaijamatabëcuenevi nataeyabiaba. Nexata ajumeurajibia pacanajamatabëcuene vajunupaebabiaba bajarapamonae. Nexata xanë ata bajarapacuenia ajumeurajibia pacanajamatabëcuene vajunupaebijitsiatsi. ¹⁹ Paxamë bitso ayailivaisi beponeyapëtaevi panataneme. Itsiata apo payapëtaemë. Tsipaji saya jamatabëcuenebarëyaya panamuxunaevetabiabame palivaisi pacatsipaebabiaba peyamaxëitojorobiapóstolevi. Pacuenia pematajemabinëtsi ajumeurajibia banavajunupaeba xua exana, bajarapacuenia ajumeurajibia pacanavajunupaebabiaba peyamaxëitojorobiapóstolevi. ²⁰ Bajarapamonae bepapijavitonëmëcuenia pacaitorobabiabi ata, itsiata xaniavaetsia panamuxunaevetabiabame. Panexainaejavaxi pacavecuaveretaponae ata, itsiata xaniavaetsia panamuxunaevetabiabame. Bijiaya pacanaëcotabiabi ata, itsiata xaniavaetsia panamuxunaevetabiabame. Pacaitabarapacababeyabiabi ata, itsiata xaniavaetsia panamuxunaevetabiabame. ²¹ Paxanë bajarapacuenia apo pacaexanaetsi pamatacabi pajinavanapajë paxamëjavata.

Xua yabara bajarapamonae ajumeurajibia pacanavajunupaebabiaba, xanë ata necajëpja bajarapitsicuene yabara ajumeurajibia patacanavajunupaebinexa pataneyaiyataenexamë. ²² Bajarapamonae ayaijamatabëcuenevi nataeya itsa pacanavajunupaebabiaba, pacajumai tsabiabi paneyaiyataenexa: “Paxanë raja pajudíovinë,” pacajai tsabiabi. Xanë ata raja judíonënë. Itsiata bajarapacuenia apo pacajumaitsitsi pataneyaiyataenexamë. Bajarapamonae pacajumai tsabiabinua: “Paxanë raja Israelpijinë papemoxinë,” pacajai tsabiabi. Xanë ata raja Israelpijinë pemomonë. Itsiata bajarapacuenia apo pacajumaitsitsi. Bajarapamonae pacajumai tsabiabinua: “Paxanë raja Abrahampijinë papemoxinë,” pacajai tsabiabi. Xanë ata raja Abrahampijinë pemomonë. Itsiata bajarapacuenia apo pacajumaitsitsi. ²³ Bajarapamonae Cristo bepajivi nataeya ajumeurajibia pacanavajunupaebabiaba. Xanë xaniavaetsia Cristo tonacuenebaponaponajë. Xanë picani apo jitsipaenë patacanavajunupaebinexa. Itsiata Cristo tatonacuenebaponaponaejava, xanë ajumeurajibia pacanavajunupaebijitsiatsi. Pacuenia pematajemabinëtsi ajumeurajibia banavajunupaeba xua exana, bajarapacuenia ajumeurajibia pacanavajunupaebijitsiatsi. Itsiata mapacuenia pacanavajunupaebijitsiatsije. Xanë bitso Cristo tonacuenebaponaponajë bajarapamonae matatoxenetsia. Bajarapamonae matatoxenetsia xanë bitso nejumaconibabeyabiaba penaneconitsivi pejumaconibabeyabiabimacata. Bajarapamonae matatoxenetsia nenaneconitsiaexanabiaba penaneconitsivi pejebabiabibota taneetsinexa. Bajarapamonae matatoxenetsia anijatone imoxo tanebeyaxuababiabi. ²⁴ Cinco xuabeje judíovi nevaetaba tanenaneconitsiaexanaenexa. Caenevaetabi canacujitsia nejumaconibabeyabiaba penaneconitsivi pejumaconibabeyabiabimacata. Itsa nejumaconibabeyabiaba, treinta y

nueve xuabeje nejumaconibabeyabiaba caenevaetabita. ²⁵ Acueyabi icatsia xuabeje apo judíovi nevaetaba tanenaneconitsiaexanaenexa. Bajaraxuané saicaya naebota nejumaconibabia. Icatsia itsamatacabijavabelia caeto judíovi ibotonëta netsecona. Acueyabi pijinia panamutobeje menia barcota tanaponaejavata, acueyabi xuabeje nayabubunajë manuameneta. Caepayajopaetanë, caemeravi, caematacabi yajava, manuameneta juenajetarucajë. ²⁶ Xanë ayaicuenia jinarutabiabajë Cristo pelivaisi jivi tatsipaebaponaenexa. Nexata itsajavata netsiyayi tsabiabi menia taponabiabijava. Itsajavata namutua itsa ponajë, netsiyayi tsabiabi tanevecuanacobetoxotsinexa tacobecovëjavaxi. Itsajavata netsiyayi tsabiabi tajanaacuapijivi taneitsacueniabinexa. Itsajavata netsiyayi tsabiabi saicayanacuapijivi taneitsacueniabinexa. Itsajavata netsiyayi tsabiabi tomaranëjava, petusato nacuanëjava ata, manumenejava ata. Itsajavata netsiyayi tsabiabi pamonaejava Dioso bepejumecovënëtsivi penataevijava. ²⁷ Itsajavata bitso nacuenebabiabajë. Cueranabiabajënu. Itsajavata apo majitabiabinë. Itsajavata bitso tajani tsabiabi. Meranua jitsipabiabajë. Itsajavata taxaejava xaenejevanë ponaponabiabajë. Itsajavata bitso aquenë tsabiabi apo taxainaexae tanaxatatsijava.

²⁸ Bajaraxua icatsia pematatsënëa mapacueneje. Caematacabi canacujitsia bitso sivanajamatabëxainabiabajë caetomarapijivi canacujitsia, Dioso pejumecovënëtsivi. ²⁹ Pajivi jamatabëcuenecuerana Dioso pejumecovënëtsijava, xanë ata sivajamatabëcuenecueranabiabajë. Pajivi itsajivi pejamatabëcueneta pibisiacuene exanaeyaexanatsi pejopaenexa Dioso pejumelivaisivecua, bajarapajivi yapijiviauranë tsabiabi Diosojavabelia. Baraanaepanabiabajënu pajivi pejamatabëcueneta jopaeayaexanatsi. ³⁰ Itsajivi itsa nitoroba tanajamatabëcuenevajunupaebinexa, nexata najamatabëcuenevajunupaebianajë tanajamatabëcueneitajëtsinexa tajamatabëcuenefaenaenajava. ³¹ Vajatuxanenë Jesucristo paxa Diosojavabelia pexaniajamatabëcuene berajutabiabatsi daxitamatacabijavabelianexa. Dioso baja cajena yapëtane jivi tatsipaebilivaisi pexaniajaicuene. ³² Imata ponaponajë Damasco tomarata. Nexata pepo iraevevsinë, Aretasvënënë, eveta bajarapaira. Nexata pijajivitonë eveta Damascotomara. Damascotomara matatoyorotsia yacaranata piaitayaëibopanaxanetota. Bajara payacaranatsijavaxaneto ibopanë mataropotsia catsanaeya pefaratsijava. Bajaraxua apia athëbëabetsia pacuenia pinijinaejavaxaneto apia. Nexata Damascotomara pevetsinë pijajivi itoroba tanevajënaevetsinexa pabaupajava pitsapaejitsianë picani bajarapatomaravecua. Bajaraponë itoroba pijajivi tanevaetabinexa tanecaponaenexa picani penaneconitsivi pejebabiabiboyabelia. ³³ Itsiata baitsi jane itsamoniae Dioso pejumecovënëtsivi bemapirecuenia pexanaejavaxanetoënëta neecaeyaexana. Nexata Damascotomara matatoyorotsia peyacaranatsi ibopanaxanetojumabelia neyamaëyacopareca athëbëyo perucaeventanavojojotualia. Bajarapacuenia Damasco tomarata vecuapanepajë Damascotomara pevetsinë pijajivi.

12

Pacuenia Pablo navajunupaeba bemajitsinaebota vajatuxanenë petsi-tanaitäjëtabijavatsi yabara pelivaisi

¹ Apo netsitaxanepanae picani ajumeurajibia patacanavajunupaebinexa. Itsiata baitsi jane pamonae peyamaxëitojorobiapóstolevi, ajumeurajibia pacanavajunupaebabiaba saya paneyaiyataenexa.

Nexata xanë ata ajumeurajibia pacanavajunupaebatsi bemajitsinaebota vajatuxanenë Jesucristo tanetsitanaitajëtabijava. Neyapëtaeayaxanana pajamatabëcuenelivaisi xaina xuanë ata netsitajëtabiaba. ²⁻³ Catorce pavaibeje xainajë tanecapanæpæcujinae athëbëabetsia Dioso pijanacuayabetsia. Apo nayapëtaenë athëbëabetsia tanecaponaejava taperabëto yajava. Itsa jume, ëtajamatabëcuene meta saya capona. Caenë Dioso yapëtane pacuenia necapona athëbëabetsia. ⁴ Itsiata necapona paraísojavabetsia. Bajarajotatsia jumetaniji Dioso muetsia pexainabuatsilivaisi. Bajarapalivaisi Dioso apo netocopatsi tatsipaebinexa itsajivi ata. ⁵ Bajarapacuenia athëbëabetsia tanecaponaejava tanavajunupaebinexa, necaëjëpa picani jivi taneyaiyataenexa. Itsiata apo navajunupaebabiabinë tsane bajaraxua. Ètasaëjibijava saya navajunupaebabiabianajë. ⁶ Ayailivaisi picani xainajë ajumeurajibia tanavajunupaebaponaenexa pacuenia taniji athëbëtatsia. Ajumeurajibia itsa navajunupaebaponaëjitsipajë, apo navajunupaebaponaenë tsipae betanematajemabinëcuena. Tspiji ëpexaniajailivaisi navajunupaebaponaëjitsipajë. Itsiata baitsi jane apo navajunupaebaponaenë tsane daxita xua yapëtaniji. Tspiji apo jitsipaenë bajarapalivaisita jivi taneyaiyataenexa. Biji rajane jitsipajë jivi taneyaiyataenexa taexanaponaejava yabara, livaisi tatsipaebaponaejava ata yabara.

⁷ Dioso netocopata tanavixaetaeyabinexa. Bajarapacuenia Dioso netocopata tanavixaetaeyabiabinexa tajacuata tanabarajamatabëjumaitsiyaniva mapacueniaje: “Xanë baja cajena pinijicuene Dioso netsitajëtabiaba xua itsajivi ata apo tae. Bajaraxuata bitso xanë ayaijamatabëcuenenë daxitajivi matatoxenetsia,” tanabarajamatabëjaiyaniva, Dioso netocopata tanavixaetaeyabiabinexa. Dioso netocopata dovathi pejamatabëcueneta tanevixaeitonotabiabinexa daxitamatacabi. ⁸ Diosojavabelia picani vajëtajë acueyabi xuabeje tanevecuaajibiaexanaenexa bajarapavixae. ⁹ Itsiata baitsi jane vajatuxanenë nejumaitsi mapacueniaje: “Jume. Apo cavecuajibiaexanaetsi tsane. Bitso casivatsi. Nexata cayavenonaetsi daxita xua namatavenoname. Pajivi apo jamatabëcuenecaëjëpæe atatsi pesaëta tanetonacuenebinexa tajacuene, itsiata baja itsa caëjëpatsi tanetonacuenebinexa, nayapëtane tayavenonaecuene,” nejai vajatuxanenë. Bajaraxuata vajatuxanenë pijacuene tatonacuenebinexa, xanë tasaëta apo tanejamatabëcuenecaëjëpæejava, nasivajamatabëcuenekarëyanë. Tspiji Cristo pesaëta neyavenonabiaba daxitacuene yabara. ¹⁰ Apo tanejamatabëcuenecaëjëpæexae tasaëta tatonacuenebinexa vajatuxanenë pijacuene, nasivajamatabëcuenekarëyanë tsabiabi. Itsamonae pibisiacuenia itsa nebijataeyabiaba Cristo pijajivitonëxaenë, nasivajamatabëcuenekarëyanë tsabiabi. Itsacuenejavaxi itsa namatavenonabiabajë, itsiata nasivajamatabëcuenekarëyanë tsabiabi. Itsamonae itsa nebejiobiaexanabiaba Cristo pijajivitonëxaenë, itsiata nasivajamatabëcuenekarëyanë tsabiabi. Itsa netsiyapëbeje tsabiabi tatonacuenebinexa Cristo pijacuene, itsiata nasivajamatabëcuenekarëyanë tsabiabi. Tspiji paepatota apo nejamatabëcuenecaëjëpæe, bajarapaepatota vajatuxanenë bitso nejamatabëcueneyavenonabiaba.

Pacuenia bitso Pablo sivanajamatabëxaina Dioso pejumecovënëtsivi, Corinto tomarapijivi, yabara pelivaisi

¹¹ Pamonae peyamaxëitojorobiapóstolevi, saya jivi peyaiyataenexatsi ajumeurajibia navajunupaebabiaba pacuenia pematajemabinëtsi banavajunupaeba ajumeurajibia. Bajarapacuenia xanë ata

navajunupaebajë. Apo jitsipañë picani tanavajunupaebinexa. Paxamë xaniavaetsia ita panevajunupaebijitsipame pacuenia exanaponaponajë paxamëjavata, nexata xanë tajacuata apo navajunupaebinë tsipae. Bevelijamatabëcueneñë atanë, itsiata pamonaë peyamaxëitojorobiapöstolevivecua, xanë apo bevelijamatabëcueneñë. ¹² Paxamëjavata ita ponaponajë, netsiyapëbeje ata, bajayajebi pacatsitaexanaponaponatsi pacuenia Dioso nitoroba. Pacatsipaebaponaponatsi Jesús pelivaisi. Nexata pacatsitaexanabiabatsi pinijicuene taexanaejava Dioso pesaëta. Nexata paneyapëtaneme Dioso taneyavenonabiabijava. ¹³ Pacuenia taniji daxita Dioso pejumecovënëtsivi, bajarapacuenia paxamë ata pacatanetsi. Nexata itsamonae Dioso pejumecovënëtsivivecua bepavelijamatabëcuenevimë, apo pacataetsi. Itsamonae Dioso pejumecovënëtsivi, neyavenonabiaba itsajota namatavenonajë. Itsiata bajarapacuenia paxamë ata patanayavenonaenexamë, apo pacavajëtsitsi. Pamatacabi ponaponajë paxamëjavata, apo pacavajëtsitsi itsacueniejavayo ata. Pëtsa itsiata bajaraxua pasivanajamatabëxainame. Biji rajane pasivajamatabëcuenebarëyamëre itsacueniejavayo ata apo patacavajëtsijava.

¹⁴ Mabaja panamutotaje, acueyabi namuto taponaeñexa paxamëjavabelia naxaniavaetaponaponajë baja. Itsiata apo pacamatamoyanijobi tsanetsi Dioso pejumelivaisi patacatsipaebimatamo. Tsipaji palata apo jitsipañë. Jitsipajë rajane xaniavaetsia panejumecovënëtsinexa Dioso. Bepataximë pacatanetsi. Pacuenia pejevaxi paxajavabelia apo rajutsi palata paxa penaevetsinexa, bajara pijinia pacuenia paxamë ata apo panerajutsimë palata tanaevetsinexa. ¹⁵ Xanë patacayavenonaenexa, mapacuenia exanaejitsipajë. Daxita taxinaejavami, veretsipajë jamatabëcuenebarëyaya. Tasaëtsaponaponaepatojebi abaxë mapanacuatajaje, pacayavenonabiabijitsipatsi. Bajarapacuenia pacayavenonabiabijitsipa patacayamatabëcuenevavenonaenexa, xaniavaetsia Dioso panejumecovënëtsinexa. Tavajënaeyabelia bitso pacaasiva tsaponae atatsi, itsiata covë paxamë juya bevelia saya paneasivamë tsaponae.

¹⁶ Itsamonae paxamëjavüvënëvi xanë yabara jamatabëcueneñavëxaniabiaya jumai tsabiabi: “Xaniajai. Vaxaitsi Pablo apo rajutsitsi palata, Dioso pejumelivaisi vajanacatsipaebimatamo. Itsiata Pablo piatatsacanë. Nexata meta itsacuenia nacayamaxëitojorobiaya nacavecuapítabiaba palata,” jai tsabiabi itsamonae xanë yabara. ¹⁷ Itsanë ata cajena, paxamëjavabelia xanë taitorobiviyajüvënëñë, yamaxëitojorobiaya palata apo pacavecuapitsi. ¹⁸ Itorobajë baja Tito peponaenexa paxamëjavabelia papecaenexa. Itorobajëna it-sanë Dioso pejumecovënëtsinë Tito peyajavaponaenexa. Nexata pamatacabi Tito ponapona paxamëjavata, ¿pacavajëta tsaja palata? Jume. Apo pacavajëtsi cajena. Paxanëbeje Titobeje panajamatabëcuenejëpajëbeje. Nexta panacueniejëpajëbeje.

¹⁹ Panesivajamatabëjumaitsimë raeta: “Bajarapacuenia Pablobana nacanajamatabëcuenelivaisipaeba saya penayajivicuaicuaijainexa vaxaitsi vajananeconitsiaexanaeyaniva,” panesivajamatabëjamë raeta. Bajarapacuenia ita pacanavajunupaebatsi, apo pacanavajunupaebitsi patacuunavixae patanenaneconitsiaexanaejavamë. Pacatsipaebatsi raja Dioso pitabarata pacuenia Cristo panetojitsipa. Tajamonae bitso patacaasivavi, daxita palivaisi baja pacatsipaebabiabatsi, pacatsipaebabiabatsi patacayamatabëcuene yavenonaponaeñexa. Nexata bajarapalivaisi panevajënaeyabelia pacatsijamatabëvitsabaponaena Dioso papijajivixamë. ²⁰ Pamatacabi ponaenajë paxamëjavabelia, bitso meta

najamatabēxainae ya patsianajē paxamējavata. Aeconoxae pajitsipame tapatsinexa paxamējavata. Itsiata meta itsa patsianajē paxamējavata, apo pajitsipaemē tsane patacananeconitsiaexanaenexa. Tsipaji meta apo pacacaxitajarabi tsanetsi pexaniacuena panejinavanapaejavata pacuena pacatojitsipatsi. Itsa patsianajē paxamējavata, pacataenatsi meta panenajumeanaenotabiabijava. Pacataenatsi meta panenacaēbabiabijava ata. Pacataenatsi meta panenabaraanaepanabiabijava ata. Pacataenatsi meta apo paneyavenonaejava itsajiviyo ata. Pacataenatsi meta itsamonae pepēya pibisiacuena najumetsēnētisia panebaracuaicuajitsabiabijava ata. Pacataenatsi meta itsamonaevecua paayaijamatabēcuenevimē panenataeyabiabijava ata. Pacataenatsi meta apo panenajamatabēcuenejēpaexae navecuanatsanaeya panejinavanapaejava ata. ²¹ Paxamējavata icatsia itsa patsianajē, Dioso meta pitabarata pacayapijiviaura tsanetsi pibisiacuene paneexanavanapaejava yabara. Bajaraxuata bitso pacasivanajamatabēxainatsi icatsia patacataenexalia. Tsipaji itsa apo pajinavanapaeemē tsane pacuena pacaitorobatsi, patacasivajamatabēcuenebarēyajavami, nevecuaajibi meta tsane. Paxamēyajuvēnēvi bajayatajavaverenacujinae pibisiacuene pexanavanapaejava, sivajamatabēnuenajē. Bajarapamonae pibisiacuene pexanavanapaejava pevitota, apo sivajamatabēcuenebējai. Apo jamatabēcopatsinua pibisiacuene pexanavanapaejava pevitota.

13

Pacuenia icatsia Pablo itaveta Corinto tomarapijivi Diosojavelia penaneconitsiyaniva yabara pelivaisi

¹ Aeconoxae baja icatsia ponaejitsianē paxamējavavelia acueyabi namutonexa. Pibisiacuene pexanaejivi yabara, Dioso pejumelivaisibaxutota jumaitsi mapacueniaje: “Pajivi pibisiacuene exana, xanepana pevjunupaebinxatsi anijajivibeje, acueyabi pajivibeje ata, petaevitsi. Nexata xuacujinae xanepana jane baja penaneconitsiaexanaenexatsi,” jai Dioso pejumelivaisibaxutota. Nexata paxamējavavelia itsa patsianajē, bajarapacuenia xanē pacananeconitsiaexanaenatsi. ² Imata panamutomi pacaitavetatsi daxita paxamē pibisiacuene paneexanavanapaejava panecopatsinexa, Diosojavelia panenaneconitsiyaniva. Bajarapacuenia itavetajē itsamonae ata pibisiacuene pexanavanapaeayaniva. Aeconoxae tajē pacavecuaponaponae atatsi, pacatoyaquinatsi icatsia patacavitetsinexa pibisiacuene paneexanaeyaniva. Icatsia paxamējavavelia itsa patsianajē, pacananeconitsiaexanaenatsi padaxitamē. Caejivi ata apo bejiobiataenē tsane pibisiacuene pexanaeneconi yabara. ³ Itsa pacananeconitsiaexanaenatsi, ajumesaenē tsane patacananeconitsiaexanaenexa. Nexata bajarajota xaniavaetsia paneyapētaename tayajavacuacuajitsabiabijava Cristo. Cristo baja cajena pajamatabēcuenesaējava, pacatsitanajamatabēcueneitajēta itsa pacayavenonaponapona paxamējavata. ⁴ Xaniajai rabaja. Pacuena vaxaitsi mapanacuapijivitsi ajamatabēcuenesaējibitsi, bajara pijinia itsi Cristo ata mapanacuata itsa naexana pacuena vaxaitsi banaexanatsi. Nexata Cristo cruzata itsa beyaxuabatsi, Dioso pesaēta icatsia asaēyaxanatsi petēpaecujinae. Paxanē pajamatabēcuenesaējibi atanē, itsiata aeconoxae Dioso pesaēta Cristo payajavajinavanapajē patacajamatabēcueneyavenonaenexa.

⁵ Jica jane. Panajamatabēcuene livaisiējēre itsa xaniajai pepacuene Cristo papijajivimē. Itsa pepacuene Cristo papijajivimē, nexata payapētaename Cristo papecajavaponaponaejava. Itsa Cristo apo papijajivimē, nexata Cristo apo pacayajavaponaponae. ⁶ Paxanē

pajamatabējumaitsinē paxamē yabara mapacueniaje: “Corinto tomarapijivi vaxaitsi itsa nacacuenecanaējētsiana, xaniavaetsia yapētaena pepacuenē Cristo pijajivicuenetsi,” pajamatabējanē. ⁷ Pacatovajētaponatsi Diosojavabelia pibisiacuene paneexanaponaeyaniva. Bajarapacuenia itsa pacatovajētaponatsi Diosojavabelia, itsajamatabēcuene apo pacasivanajamatabēxainaetsi. Nexata apo pajamatabējumaitsinē paxamē yabara: “Itsa bajarapamonae xaniavaetsia jinavanapaena, nexata pijinia daxitajivi nacayapētaena pepacuenē apóstolevicuenetsi,” apo pajamatabējanē paxamē yabara. Bajarapacuenia Diosojavabelia pacatovajētatsi tsipaji pacatojitsipatsi ēpexaniacuene paneexanavanapaejava. Xaniavaetsia itsa pajinavanapaename, nexata itsa papatsianajē paxamējavabelia, ajibi tsane patacayabarananeconitsiaexanaejava. Pacuenia Cristo panetocopata patananeconitsiaexanaenexa pijaneconi pexainaevi, bajarapacuenia apo pacaexanaetsi tsane. ⁸ Tsipaji acuenebi patananeconitsiaexanaejava pajivi baja jumecovēnēta pexaniajailivaisi, Jesucristo pelivaisi. Pananeconitsiaexanaenajē ēpijaneconi pexainaevi. ⁹ Aneconijibia itsa pajinavanapaename, acuenebi patacananeconitsiaexanaenexa. Itsiata pacasivajamatabēcuenebarēyatsi. Tsipaji apo paxainaemē paneconi yabara pacananeconitsiaexanaejitsiatsi. Pacatovajētaponatsinua Diosojavabelia panevajēnaeyabelia panejamatabēcuenevitsabaponaenexa Dioso panejumecovēnētsijava. ¹⁰ Pacatoyaquinaliatsi mapabaxutoje taponaevajēnaeya paxamējavabelia tavajēnaelia panenajamatabēcuenexanebinexa pibisiacuene paneexanaejavavecua. Nexata itsa patajopaeliajē paxamējavabelia, apo pacabijatae tsanetsi. Apo pacananeconitsiaexanaetsinua tsane. Dioso nitoroba patacaevetsinēnexa. Nexata itsa patsialiajē paxamējavabelia, apo jitsipaeñē tsane patacananeconitsiaexanaenexa. Biji rajane jitsipajē patacjamatabēcuene saēyaexanaejava panevajēnaeyabelia panejamatabēcuenesaēnexa Dioso panejumecovēnētsijava.

¹¹ Tajamonae, pajamatabēcuenebarēyamēre tsavanapae. Panevajēnaeyabelia panajamatabēcuene vitsabiaexanaponare Dioso panejumecovēnētsijava. Panamuxunaevere palivaisi pacatoyaquinaliatsi. Najamatabēcuenejēpaeya pajinavanapare jamatabēcuenexanepanaeya Dioso vajanacaasivanē. Bajaraponē jamatabēcuenexanepanaeya nacajinavanapaeyaexana. Nexata Diosojavabelia pacatovajētabiabatsi Dioso papecayajavaponaponaenexa. ¹² Paxamē ata Dioso panejumecovēnētsixae, xaniavaetsia nasivaya namataenetsia panabajacobabiabare. ¹³ Daxita pamonaē Dioso pejumecovēnētsivi, majota pejinavanapaevije, pacabajacobalia.

¹⁴ Pacatovajētabiabatsi Diosojavabelia vajatuxanenē Jesucristo papecayavenonabiabinexa. Pacatovajētabiabatsinua itsamonae ata asivaya panetaenexa pacuenia paxamē ata Dioso pacaasiva. Pacatovajētabiabatsinua Espiritu Santo ata papecayajavaponaponaenexa.

Mapabaxutoje San Pablo toyaquina Galacia nacuapijivijavabelia

Pacuenia Pablo toyaquina mapabaxutoje Dioso pejumecovënëtsivi, Galacia nacuapijivijavabelia, yabara pelivaisi

¹ Xanë Pablonë, apóstolenënë. Jivi pejamatabëcueneta apo nitorobi tatsipaebaponaenexa Jesucristo pelivaisi. Nitorobabeje raja Jesucristobeje, paxa Diosobeje, ponë icatsia Jesucristo asaëyaexanatsi petëpaecujinae. ² Pacatoyaquinatsi mapabaxutoje paGalacia nacuapijivimë, Dioso panejumecovënëtsivi. Daxita majota Dioso pejumecovënëtsivi pacajamatabënajinalia. ³ Pacatovajëtabiabatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa. ⁴ Pacuenia vaxa Dioso itorobatsi, vajatuxanenë Jesucristo pijacuata tonacaeveta pebeyaxu-abinexatsi pibisiacuene vajaexanaeneconi yabara. Nexata Jesucristo pejamatabëcueneta vaxa Dioso aneconijibia nacatane. ⁵ Bajaraxuata vaxaitsi Diosojavabelia jumaitsitsi tsabiabi: “¡Xamë Diosomë, bitso ayaijamatabëcuenenëmë!” jaitsi tsabiabi daxitamatacabijavabelianexa. Bajara itsi tsane.

Pacuenia baja Jesús pelivaisivecua pematatsënëa ajibi itsalivaisi jivi peca-panepaelivaisinexatsi yabara pelivaisi

⁶ Paxamë saya caematacabibejecujinae, pacopabame Dioso panejumecovënëtsijava. Bajaraxuata xanë bitso pacasivajamatabëcuene nabena-jacatsi. Jesucristo picani pejamatabëcueneta, Dioso pacaitaxutotsoni-atane itsa pacajunata papecacapanepaenexa. Itsiata baja aeconoxae jamatabëcuenenavëxaniabiaya pavecuanajamatabëcuene pënëyorotame saicay-alivaisijavabelia, bepapecacapanepaelivaisinexa itajara panejumetaexae. ⁷ Itsiata baitsi jane baja pematatsënëa ajibi itsalivaisi papecacapanepaelivaisinexa. Itsamonae pata paxamëjavata livaisi papecatsipaebinexa. Bajara-pamonae pata papecajamatabëcuene naepatajërëcaeyaexanaenexa. Bajarapa-monae saicayalivaisi jamatabëpacatsipaebapona panecopabinexa panejumecovënëtsijava pexanialivaisi, Jesucristo pelivaisi. ⁸ Copiaya baja cajena pax-anë pacatsipaebatsi pexanialivaisi, Jesucristo pelivaisi, papecacapanepaelivaisinexa Diosojavabelia. Nexata acunebi paxanë pataitothianaenexa bajarapalivaisi. Athëbëvetsica pepatsinë ata tsipae, ángelnë, acunebi piaithianaenexa bajarapalivaisi. Jesucristo pelivaisivecua, saicayalivaisi, itsa pacatsipaebijitsipatsi, nexata Diosojavabelia pananeconitsipajë. Nexata Dioso panenaneconitsiaexanaejitsipa daxitamatacabijavabelianexa. ⁹ Copiaya baja cajena pacuenia pacatsipaebatsi, bajara icatsia pacuenia aeconoxae ata pacatsipaebatsi. Pajivi Jesucristo pelivaisivecua, saicayalivaisi pacatsipaeba bepapecacapanepaelivaisinexa itajara, nexata bajarapajivi Dioso naneconitsiaexanaenatsi daxitamatacabijavabelianexa. Tsipaji pacacopatsiaexana panejumecovënëtsijava pexanialivaisi, Jesucristo pelivaisi.

¹⁰ Payapëtaneme rabaja xua yabara bajarapacuenia pacajumaitsitsi. Bajarapacuenia itsa pacajumaitsitsi, apo pacajumaitsitsi saya jivi tanesivabarëyanexa. Jume cajena. Jivi apo nesivabarëya ata Jesucristo pelivaisi jivi tatsipaebaponaejava yabara, itsiata jitsipajë jivi tatsipaebinexa Jesucristo

pelivaisi, Dioso tanesivajamatabëcuenebarëyanexa. Saya jema jivi livaisi itsa tsipaebijitsipajë saya tanesivabarëyanexa, nexata pacuenia Jesucristo nitoroba, apo tsipaebaponaenë tsipae. Nexata Jesucristo apo pijajivitonënë tsipae.

Pacuenia Pablo Dioso junatatsi apóstolenënexa yabara pelivaisi

¹¹ Tajamonae, jitsipajë patacatsipaebinexa mapalivaisije. Palivaisi tsi-paebaponajë jivi pecapanepaelivaisinexatsi Diosojavabelia, bajarapalivaisi itsajivi ata pejamatabëcueneta apo pexanaelivaisi. ¹² Itsajivi ata cajena bajarapalivaisi apo netsipaebi. Jesucristo raja neyapëtaeyaexana bajarapalivaisi. Nexata Jesucristo nitoroba jivi tatsipaebaponaenexa bajarapalivaisi.

¹³ Panevënëlivaisitaneme rabaja pacuenia exanaponaponajë pamatacabi abaxë jumecovënëtajë Dioso Moiséspijinëta penajumecopatsilivaisi. Bajarapalivaisi Dioso Moiséspijinëta najumecopata pajudióvinë patajumecovënëtsinexa. Panevënëlivaisitanemenua pacuenia barajinabiabajë Jesucristo pijajivi. Apo itaxutobejiobiataeyabiabinë cajena tsiquirijavayo ata. Jamatabëverebiaxuaabiabajë Jesucristo pijajivi. ¹⁴ Xanë abaxë itsa pevëjëatonë, jumecovënëtajë bitso Dioso Moiséspijinëta penajumecopatsilivaisi. Xanë bitso asaëyata jumecovënëtsiaponaponajë bajarapalivaisi pitorobicuenia. Daxita pamonae pevëjëavi judíovi, Israel nacuapijivi, matatox-ensenia xanë bitso casaenë tajumecovënëtsijava bajarapalivaisi. ¹⁵ Itsiata baitsi jane tanaexanaevajënaeya ata, Dioso nitapeta Jesucristo tajumecovënëtsinexa. Dioso taneitaxutotsoniataexae, nejunata apóstolenëxanë.

¹⁶ Nexata pamatacabi ponajë Damasco tomarabelia, namutoepatota Dioso netsitajëta pexënato. Nexata Dioso neyapëtaeyaexana pexënato pelivaisi. Bajarapacuenia Dioso pexënato pelivaisi neyapëtaeyaexana tatsipaebaponaenexa apo judíovijava. Nexata Dioso taneyapëtaeyaexanaecujinae pexënato pelivaisi, apo ponaenë itsajivijavabelia ata tayanijobinexa Dioso pexënato pelivaisi. Apo ponaenë tanemuxujobinexanua Dioso pexënato pelivaisita. ¹⁷⁻¹⁸ Pamatacabi namutoepatota Dioso netsitajëta pexënato, apo naviatecaenë Jerusalén tomarabelia tayanijobinexa pamonaevavabelia xanëvecua copiaya exanatsi apóstolevi. Biji rajane rovia paliajë Damasco tomarabelia. Nexata Damasco tomarata tapatsicujinae, caenënë ponajë Arabia nacua-yabelia, petusato nacua-yabelia. Nexata petusato nacuaata Dioso xaniavaetsia neyapëtaeyaexanapona pexënato pelivaisi. Bajaraxuacujinae icatsia bexëa Arabia nacuaavereña navierenajë Damasco tomarabereña. Bajaraxuacujinae tapuaxainera baja acueyabi pavaibeje tajumecovënëtsicujinae Dioso pexënato pelivaisi, ponajë jane baja Jerusalén tomarabelia apóstolenë Pedro tacaxitajarabinexa. Nexata Jerusalén tomarata, Pedrojavata, naponaponajë quince pamatacabibeje. ¹⁹ Itsiata Jerusalén tomarata pematatsënëa itsaapóstolenë apo taenë. Ësantiago saya, vajatuxanenë peyuyapijinë, taniji. ²⁰ Xaniavaetsia pacajumaitsitsi Dioso pitabarata. Palivaisi pacatoy-aquinatsi, pexaniajailivaisi cajena.

²¹ Jerusalén tomarata taponaponacujinae, ponajë icatsia Siria nacua-yabelia Jesucristo pelivaisi jivi tatsipaebaponaenexa. Ponajë Cilicia nacua-yabelia ata. ²² Jesucristo pelivaisi jivi itsa tsipaebanajetarucajë, Jesucristo pelivaisi pejumecovënëtsivi, Judea nacuapijivi, abaxë apo neyapëtae. Tsi-paji abaxë Judea nacuaata apo tsipaebaponaenë Jesucristo pelivaisi. ²³ Bajarapamonae saya nevënëlivaisitane itsamonae xanë yabara pejumaitisijava: “Ponë pina nacabarajinabiaba Jesucristo pelivaisi vajajumecovënëtsivi, aeconoxae pina baja bajaraponë ata

jumecovënëta. Nexata pina itsamonae ata pejumecovënëtsinexa Jesucristo pelivaisi, bajaraponë tsipaebapona. Bajarapalivaisi yabara bajaraponë jamatabënacaverebiaxuaba picani,” pejaijava, itsamonae xanë yabara nevënëlivaisitane Judea nacuapijivi, Jesucristo pelivaisi pejumecovënëtsivi. ²⁴ Bajaraxuata Judea nacuapijivi, Jesucristo pelivaisi pejumecovënëtsivi, jumai tsabiabi Diosojavabelia: “Diosomë, bitso ayaijamatabëcuenenëmë. Tspaji Pablo ata najamatabëcuenecopatsiaexaname nexenato Jesucristojavabelia,” jai tsabiabi xanë yabara.

2

Pacuenia Pablo pevëna apóstolevi Jerusalén tomarata xaniavaetsia copiapitatsi yabara pelivaisi

¹ Jerusalén tomarata naropotajë Jesucristo pelivaisi jivi tatsipaebanajetarucaenexa Siria nacujava, Cilicia nacujava ata. Nexata Jesucristo pelivaisi jivi tatsipaebanajetarucaecujinae bajarapanacuabejjava, catorce pavaibejecujinae matapania icatsia patajë tacovëyaberena, Jerusalén tomarata. Bernabébeje Titobeje barëpatajë. ² Patajë Jerusalén tomarata tspaji Dioso nitoroba tapatsinexa Jerusalén tomarata. Nexata Jerusalén tomarata Dioso pejumecovënëtsivi ëpenamatacaitorobivi penacaetuatsijavata, navajunupaebajë bajarapamonaejavabelia. Bajarapacuenia navajunupaebajë Dioso pejumecovënëtsivi penamatacaitorobivijavabelia, taneyapëtaenexa Jesucristo pelivaisi tatsipaebaponaejava apo judiovijava pecapanepaelivaisinexatsi Diosojavabelia. Bajarapacuenia navajunupaebajë Dioso pejumecovënëtsivi penamatacaitorobivijavabelia tspaji jamatabëjumaitsinë: “Maraeta pamona apo pejitsipaecuenia, tsipaebaponajë apo judiovijavaje,” jamatabëjanë. Itsiata baitsi jane Dioso pejumecovënëtsivi penamatacaitorobivi, tsitaxanepanatsi pacuenia tsipaebaponajë apo judiovijava. ³ Bajarapacuenia tanavajunupaebixae, taneyanabinë Tito, apo judionë ata, Dioso pejumecovënëtsivi penamatacaitorobivi pajudiovinë patajacuenia apo perabëcaucutsiaexanaetsi. Baitsi apo houpiperabëcaucutsiaexanaetsi. ⁴ Itsamonae, judiovi, Jesucristo pelivaisi apo jumecovënëtsi. Nexata bajarapamonae Jesucristo pelivaisi bepejumecovënëtsivicuenia, saya jema najunua paxanë Jesucristo pelivaisi patajumecovënëtsivijavaberena. Bajarapamonae picani jitsipa Tito peperabëcaucutsiaexanaenexatsi. Itsiata apo perabëcaucutsiaexanaetsi. Bajarapamonae saya jema najunua patanenaitaxutocaevetsinexa patanetaenexa jamatejema patavecuajinavanapaejava Dioso Moiséspijinëta penajumecopatsilivaisi, palivaisimi patajasalinaivi jumecovënëta. Bajarapalivaisi patajumecovënëtsijavami, pacopatajë baja Jesucristo pejamatabëcueneta. Nexata pamonaen panenaitaxutocaeveta, jamatabëpanejumecovënëtsiaexana picani icatsia Dioso Moiséspijinëta penajumecopatsilivaisi. ⁵ Itsiata baitsi jane tsiquirijavayo ata apo paexanaenë pacuenia bajarapamonae paneitoroba. Nexata Jesucristo pelivaisi jivi itsa patsipaebaponajë, apo payajavatsipaebaponaenë Dioso Moiséspijinëta penajumecopatsilivaisi. Dioso Moiséspijinëta penajumecopatsilivaisi, itsa pacatsipaebijitsipatsi, jamatabëcuenenavëxaniabiaya pajamatabëjumaitsimë tsipae: “Naperabëcaucutsiaexanaenajë pacuenia judiovi naperabëcaucuba. Jumecovënëtsianajënuua Dioso Moiséspijinëta penajumecopatsilivaisi. Nexata Dioso pepacuenenecapanepaena,” pajamatabëjamë tsipae jamatabëcuenenavëxaniabiaya.

⁶ Jerusalén tomarata Dioso pejumecovênétsivi penamatacaitorobivi-javabelia, navajunupaebajê Jesucristo pelivaisi tatsipaebaponaejava apo judíovijava pecapanepaelivaisinexatsi Diosojavabelia. Itsiata bajarapamatacabi Dioso pejumecovênétsivi penamatacaitorobivi, apo netsipaebi itsalivaisiyo ata Jesucristo pelivaisi tayajavatsipaebaponaenexa apo judíovijava. Bajarapamonaе yabara itsamonaе jamatabêjumai tsabiabi: “Mapamonaеje Dioso pejumecovênétsivi bitso pepo penamatacaitorobivi. Nexata bitso ayaijamatabêcuenevi,” jamatabêjai tsabiabi. Itsiata xanê apo sivanajamatabêxainaenê bajarapamonaе ayaijamatabêcuenevi tataenexa. Tsipaji cajena daxita vaxaitsi, Jesucristojavabelia vajanajamatabêcuene copatsivi, Dioso najêpaeya nacatane. ⁷ Dioso pejumecovênétsivi penamatacaitorobivi, apo nitorobi itsalivaisiyo ata tayajavatsipaebaponaenexa apo judíovijava itsa tsipaebajê Jesucristo pelivaisi pecapanepaelivaisinexatsi Diosojavabelia. Biji rajane Dioso pejumecovênétsivi penamatacaitorobivi, neyapêtane Dioso taneitorobinêcuene. Nexata Dioso pejumecovênétsivi penamatacaitorobivi, jumaitsi xanê yabara: “Xaniajai. Pablo Dioso itorobatsi Jesucristo pelivaisi petsipaebaponaenexa apo judíovijava. Pacuenia copiaya Pedro Dioso itorobatsi Jesucristo pelivaisi petsipaebaponaenexa judíovijava, bajara pijinia pacuenia Pablo ata Dioso itorobatsi Jesucristo pelivaisi petsipaebaponaenexa apo judíovijava,” jai Dioso pejumecovênétsivi penamatacaitorobivi xanê yabara. ⁸ Apóstolenê Pedro Dioso pesaêta Jesucristo pelivaisi petsipaebaponaexae judíovijava, judíovi baja najamatabêcuene copabapona Jesucristojavabelia. Bajara pijinia pacuenia xanê ata Dioso pesaêta Jesucristo pelivaisi tatsipaebaponaexae apo judíovijava, apo judíovi ata baja najamatabêcuene copabapona Jesucristojavabelia.

⁹ Mara pamatabêxêyo Jerusalén tomarata Dioso pejumecovênétsivi penamatacaitorobivije. Santiago, Pedro, Juan, bajarapamatabêxêyo. Dioso pejumecovênétsivi penamatacaitorobivi, itsa neyapêtane Dioso taneitorobinêcuene tatsipaebaponaenexa Jesucristo pelivaisi apo judíovijava, nexata Dioso pejumecovênétsivi penamatacaitorobivi, panebajacobabeje pexaniacuenia Bernabêbeje. Bajarapacuenia Dioso pejumecovênétsivi penamatacaitorobivi, pexaniacuenia panebajacobabeje tsipaji paneyapêtanebeje patatonajuanacuenebivicuene Dioso pijacuene. Bajaraxuata paxanêbeje Bernabêbeje, Jesucristo pelivaisi patavajênaeyabeliabeje patsipaebaponaêbeje apo judíovijava. Santiagobana pijinia, Pedrobana, Juanbana, tsipaebapona judíovijava. ¹⁰ Bajarapamonaе caelivaisiyo panejumaitsibeje Jerusalén tomarata. Paneitorobabeje patayavenonaenexabeje Dioso pejumecovênétsivi, bitso bepejiobivi, Jerusalén tomarata pejinavanapaevi. Bajaraxuata xanê jamatabêcuene barêyaya bajarapamonaenexa ofrenda toexanaeyaexanaponajê itsaxuayo tatsipaebilivaisi, Jesucristo pelivaisi, jumecovênétapona.

Pacuenia Pablo muxujioba Pedro Antioquia tomarata yabara pelivaisi

¹¹ Perujulivaisimi, judíovi pijalivaisi, itavetatsi judíovi caejavata peyavanabaniyaniva apo judíovi. Pedro itsa ponapona Antioquia tomarata, muxujiobajê daxitajivi pitabarata. Tsipaji Pedro apo pexanepanaecueene exana. Pedro apo judíovijavata itsa naponapona, jemata apo judíovi vecuanaicayaba. ¹² Pedro, judíonê ata, pecopatsixae baja pejumecovênétsijava

perujulivaisimi, judíovi pijalivaisi, abaxë picani Pedro jamatejema nana-banebiaba apo judíovijavata. Nexata itsa pata Santiago pijajivi Antioquia tomarata, Pedro baja vecuanasaicayaba apo judíovi. Tsipaji Pedro cujunava Santiago pijajivi petaeyanivatsi apo judíovijavata penanabanijava. Pedro baja nexata copata apo judíovijavata penanabanebiabijava. Santiago pijajivi perujulivaisi tsiteca jumecovënëtaavanapa. Nexata Santiago pijajivi jumai tsabiabi: “Pamonae apo judíovi ata, Jesús pelivaisi itsa jumecovënëta, bajarapamonae ata benaperabëcaucubiaexana,” jai tsabiabi. Nexata Pedro cujunava bajarapamonae. Nexata Pedro jamatabëjumaiti: “Itsa netaejitsipa Santiago pijajivi tananabanijava apo judíovijavata, neneconitsipa judíovijavelia Jerusalén tomarata. Nexata judíovi ayaicuenia nebijataejitsipa,” jamatabëjai Pedro. Bajaraxuata Pedro vecuanasaicayaba baja apo judíovi. ¹³ Pedro yapëtae ata pacuenia picani apo bevecuanasaicayabi apo judíovi, itsiata vecuanasaicayaba. Nexata daxita judíovi, pamonae najamatabëcuenecopaba Jesucristojavelia, itsa tane Pedro pevecuanasaicayabijava apo judíovi, bajarapamonae ata vecuanasaicayaba apo judíovi. Bernabé ata yapëtae ata pacuenia picani apo bevecuanasaicayabi apo judíovi, itsiata vecuanasaicayaba apo judíovi. ¹⁴ Nexata pacuenia jumaiti pexanalivaisi jivi pecapanepaelivaisinexatsi Diosojavelia, bajarapamonae apo exanae. Nexata saya bajarapamonae vecuanasaicayaba apo judíovi. Bajaraxuata itsa taniji bajarapamonae pevecuanasaicayabijava apo judíovi, nexata muxujijobajë. Daxita Dioso pejumecovënëtsivi pitabarata, jumaitinë Pedrojavabelia: “Xamë judíonë atamë, itsiata apo judíovijavata naponaponame. Nexata pacuenia apo judíovi jinavanapa, naponaponabiabame picani. Apo napononabiabimë judíonëcuenia. Pacuenia baja picani naponaponabiabame apo judíovijavata, xanepana baja picani. Xamë judíonë atamë, itsa apo napononaemë judíonëcuenia, ¿detsa nexata xuajitsia caranata apo judíovi aconoxae jamatabëjinavanapaeyaexaname judíovicuenia?” janë Pedrojavavelia pevecuanasaicayabixae apo judíovi.

Pacuenia judíovi ata xanepana penajamatabëcuenecopatsinexa Cristojavelia pecapanepaenexatsi Diosojavelia yabara pelivaisi

¹⁵ Paxanë baja cajena pajudíovinë. Patanaexanaejavaveliacujinae itsa pavitsabaponajë, payapëtaniji patajumecovënëtsinexa pexaniajailivaisi, Dioso pejumelivaisi. Nexata pacuenia apo judíovi pejevaxijavaveliacujinae apo yapëtae pejumecovënëtsinexa pexaniajailivaisi, Dioso pejumelivaisi, apo paitsinë. ¹⁶ Pexaniajailivaisi patajumecovënëtsinexa, patajamonae baja cajena paneyajavavitsata. Nexata payapëtaniji mapacuenije. Itsajivi jumecovënëtsi ata tsipae Dioso Moiséspijinëta penajumecopatsilivaisi, itsiata Dioso aneconijibia apo taetsi tsipae. Bajarapacuenie paxanë pajudíovinë payapëtaniji. Bajaraxuata paxanë pajudíovi atanë, panajamatabëcuenecopatajë Jesucristojavelia. Nexata Dioso aneconijibia panetane patanajamatabëcuenecopatsixae Jesucristojavelia. Dioso aneconijibia apo panetae patajumecovënëtsixae Dioso Moiséspijinëta penajumecopatsilivaisi. Tsipaji itsajivi ata apo jumecovënëtsicapaneapae bajarapalivaisi. Nexata itsamonae jumecovënëtsi ata bajarapalivaisi, itsiata Dioso aneconijibia apo taetsi.

¹⁷ Pexaniajailivaisi patacatsipaebijavata, itsajivi jamatabëcuenenavëxaniabiaya nejumaiti tsipae: “Xamë jumaitimë tsabiabi: ‘Dioso aneconijibia netane tajumecovënëtsixae Cristo tanesivatëpaejava tajaneconi yabara. Nexata baja apo jumecovënëtsinë Dioso

Moiséspijinëta penajumecopatsilivaisi, jamë tsabiabi. Dioso Moiséspijinëta penajumecopatsilivaisi apo nejumecovënëtsixae, nexata Dioso catane pibisiacuene nexanaenë,” nejai tsipae itsajivi jamatabëcuenenavëxaniabiaya. Itsiata baitsi jane bajarapacuenia itsajivi nejumaitsi ata tsipae, itsiata Dioso apo netae tsipae pibisiacuene taexanaenë. ¹⁸ Diosojavabelia rajane naneconitsipajë mapacuenia itsa exanaejitsipajë. Dioso Moiséspijinëta penajumecopatsilivaisi, tajumecovënëtsijavami tacopatsicujinae, icatsia caevëalia itsa jumecovënëtsipajë, nexata Diosojavabelia naneconitsipajë. ¹⁹ Pamatacabi abaxë ajamatabëcuenesaenë tsabiabi tajumecovënëtsijava Dioso Moiséspijinëta penajumecopatsilivaisi, naneconitajë picani Diosojavabelia. Tsipaji ajamatabëcuenesaenë tsabiabi ata tajumecovënëtsijava bajarapalivaisi, itsiata apo necaëjëpae tajumecovënëtsicapaneapenaxa daxita pacuenia jumaitsi bajarapalivaisi. Itsa meta abaxë tsiteca bajarapalivaisi jumecovënëtaaponaponeajitsipajë, yajavatëpaejitsipajë meta tajaneconi. Bajaraxuata aeconoxae baja icatsia bajarapalivaisi tajumecovënëtsinexa, apo sivanajamatabëxainanë. Pacuenia baja petëpaejivi itsacuenejavayo apo sivanajamatabëxainae, bajara itsinë taexanaeyaniva icatsia pacuenia bajarapalivaisi nitoroba. Biji rajane aeconoxae baja Dioso nerajuta pejanajamatabëcuene taexanaponaponaenexa pacuene Dioso jitsipa. ²⁰ Cristo cruzajavabelia itsa cobematabiabarutatsi, xanë ata tajaneconi yabara nesivatëpa. Nexata xanë ata Cristo betaneyajavatëpae. Bajaraxuata perujumatabëcuenemi, pibisiacuene taexanaenexa taneitorobabiabijamatabëcuenemi, nevecuatëpa baja cruzata. Nexata baja piasaëjamatabëcuene, pejanajamatabëcuene, xainajë. Cristo baja neyajavaponapona. Pajamatabëcuene yaasaenë tsaponapone, Dioso pexënatojavabelia najamatabëcuenecopatsiaya ponaponajë. Dioso pexënato nejitsipa. Nesivatëpanua baja cajena. ²¹ Apo namuxujematsinë Dioso vajanacaitaxutotsoniatæjava. Dioso Moiséspijinëta penajumecopatsilivaisi, jivi pejumecovënëtsixae, Dioso aneconijibia jivi itsa tæjitsipa, nexata Cristo jivi apo sivatëpae tsipae pijaneconi yabara. Nexata Cristo saya jema tæpaejitsipa.

3

Pacuenia Cristo pejumecovënëtsivi, Dioso aneconijibia tanetsi pacapanepaenexatsi pijaneconivecua, itsa jumecovënëta pacuenia Abrahampijinë jumecovënëta, yabara pelivaisi

¹ Paxamë paGalacianacuapijivimë, bitso cajena paneajamatabëcuenetajavili Itsamonaë raeta saicayalivaisi yamaxëitojorobiaya pacatsipaeba, pexaniajailivaisi, palivaisi baja picani pajumecovënëtame, panecopabinexa. Xanë Jesucristo pelivaisi patacatsipaebijavata, xaniavaetsia baja cajena pacatsipaebatsi, pacuenia Jesucristo cruzajavabelia cobematabiabarutatsi. Nexata baja picani panijacuata bepanetaë Jesucristo papecasivatëpæjava cruzata. ² Cæjumeyo pacayanijobatsi. ¿Detsa xua yabara pacatsijamatabëjunua Espiritu Santo? Apo pacatsijamatabëjone raja panejumecovënëtsixae Dioso Moiséspijinëta penajumecopatsilivaisi. Espiritu Santo raja pacatsijamatabëjunua panejumecovënëtsixae Jesucristo papecacapanepæjavanexa panijaneconivecua. ³ Paxamë bitso pajamatabëcuenetajamë. Pamatacabi pataxuxuabame panejumecovënëtsijava Jesucristo papecacapanepæjavanexa panijaneconivecua, panajamatabëxainabiabame Espiritu Santo papecayavenonabiabinexa. Aeconoxae

baja icatsia caevéalia panajamatabëxainame panejumecovënëtsinexa Dioso Moiséspijinëta penajumecopatsilivaisi. Itsiata apo caejëpaetsi bajarapalivaisi papecacapanepaenexa. ⁴ Itsamonae bitso pacabejiobiaexanabiaba pexanialivaisi, Jesucristo pelivaisi, panejumecovënëtsixae. Bajaraxuata apo bepacopatsimë panejumecovënëtsijava Jesucristo pelivaisi, palivaisi yabara itsamonae pacabejiobiaexanabiaba. Tspipaji itsa pacopabijitsipame panejumecovënëtsijava Jesucristo pelivaisi, saya panacueratsipame. ⁵ Payapëtaneme rabaja Dioso papecarajutsijava Espiritu Santo. Pinijicuene pexanaejavanë ata Dioso pacatsitaexana paxamë tuatujëta. Baitsi pivantanevi jamatejemaya exanapona. Petëpaevimi ata asaëyaexanapona. ¿Detsa xua yabara bajarapacuene Dioso pacatsitaexana? Dioso raja apo pacatsitaexanae bajarapacuene panejumecovënëtsixae Dioso Moiséspijinëta penajumecopatsilivaisi. Dioso raja pacatsitaexana bajarapacuene panejumecovënëtsixae patacatsipaebilivaisi, Jesucristo pelivaisi.

⁶ Bajayata Abrahampijinë Diosojavabelia najamatabëcuene copatsiaya jamatabëjumaitsi: “Xaniajai. Dioso netoexanaena pacuenia najumecapanepaeya nejumaitsi,” jamatabëjai. Bajaraxuata Dioso Abrahampijinë aneonijibia tanetsi Dioso pijanacuayabetsia pecapanepaenexatsi. ⁷ Bajaraxuata paxamë bepapapëtaneme mapacueneje. Pamonae jumecovënëta pacuenia Dioso najumecapanepaeya jumaitsi, bajarapamonae Abrahampijinë apo pemomoxi ata, itsiata Dioso tanetsi Abrahampijinë bepepo pemomoxi. Bajarapamonae Dioso capanepaenatsi. ⁸ Dioso pejumelivaisibaxutota tajëvelia jumaitsi pacuenia apo judíovi ata Dioso capanepaejitsiatsi pijaneconivecua. Nexata apo judíovi ata Dioso itsa jumecovënëtsiana, capanepaenatsi pacuenia Dioso najumecapanepaeya jumaitsi. Dioso jivi pecapanepaejavanexa yabara, tajëvelia Abrahampijinëjavabelia Dioso jumaitsi mapacueniaje: “Tacatsipaebilivaisi tanejumecovënëtsixaemë, daxitanacuapijivi ata aneonijibia taenajë, bajarapamonae ata itsa nejumecovënëtsiana pacuenia xamë nejumecovënëtame,” jai Dioso Abrahampijinëjavabelia. Bajarapacuenia Dioso pejumelivaisibaxutota tajëvelia jumaitsi. ⁹ Nexata baja vaxaitsi xaniavaetsia yapëtanetsi mapacueneje. Pamonae jumecovënëta Jesucristo pelivaisi, bajarapamonae Dioso aneonijibia tanetsi pecapanepaenexatsi pijaneconivecua. Tspipaji bajarapamonae ata jumecovënëta pacuenia bajayata Abrahampijinë jumecovënëta pacuenia Dioso najumecapanepaeya jumaitsi.

¹⁰ Pajivi Dioso Moiséspijinëta penajumecopatsilivaisi apo jumecovënëtsicapanepae ata, jamatabëjumaitsi: “Bajayata Dioso Moiséspijinëta najumecopata jivi pejumecovënëtsinexa. Nexata baja xanë bajarapalivaisi jumecovënëtaaponaponajë Dioso tanecapanepaenexa,” jamatabëjai, itsiata bajarapajivi Dioso naneconitsiaexanaenatsi. Tspipaji Dioso pejumelivaisibaxutota jumaitsi mapacueniaje: “Pamonae apo jumecovënëtsicapanepae tsane daxita pacuenia itorobatsi Dioso Moiséspijinëta penajumecopatsilivaisi, bajarapamonae cajena Dioso naneconitsiaexanaenatsi,” jai Dioso pejumelivaisibaxutota. ¹¹ Nexata baja vaxaitsi xaniavaetsia yapëtanetsi bajarapacuene. Dioso Moiséspijinëta penajumecopatsilivaisi, jivi jumecovënëtsi ata, itsiata itsajivi ata Dioso aneonijibia apo taetsi pecapanepaenexatsi Diosojavabelia. Tspipaji itsajivi ata apo jumecovënëtsicapanepae daxita pacuenia itorobatsi Dioso Moiséspijinëta penajumecopatsilivaisi. Bajarapacuene vaxaitsi yapëtanetsi. Tspipaji Dioso pejumelivaisibaxutota icatsia jumaitsi mapacueniaje: “Pajivi pepacuene Dioso pejumecovënëtsixae, jamatabëjumaitsi: ‘Xanë

pepacuene Dioso neyavenonaena pacuena najumecapanepaeya jumaitsi, jamatabėjai, Dioso aneonijibia tanetsi. Bajarapajivi xainaena matakabi apo peverevereaejava,” jai Dioso pejumelivaisibaxutota. ¹² Dioso Moisėspijinėta penajumecopatsilivaisi jivi jumecovėnėtsi ata, itsiata apo jumecovėnėtsicapaneapae daxita pacuena itorobatsi bajarapalivaisita. Bajaraxuata Dioso Moisėspijinėta penajumecopatsilivaisi yabara, Dioso pejumelivaisibaxutota jumaitsi mapacueniaje: “Pajivi apo jumecovėnėtsicapaneapae ata Dioso Moisėspijinėta penajumecopatsilivaisi, itsiata itsa jamatabėjumaitsi tsane: ‘Xanė pepacuene Dioso neyavenonaena pacuena najumecapanepaeya jumaitsi,’ itsa jamatabėjai tsane, apo jumecovėnėtsicapaneapae ata, bajarapajivi Diosojavabelia capanepaenatsi,” apo jai. Biji rajane Dioso Moisėspijinėta penajumecopatsilivaisi yabara, Dioso pejumelivaisibaxutota jumaitsi mapacueniaje: “Pajivi matapania jumecovėnėtsicapaneapae daxita pacuena itorobatsi Dioso Moisėspijinėta penajumecopatsilivaisi, bajarapajivi capanepaenatsi Diosojavabelia. Itsa apo jumecovėnėtsicapaneapae tsane daxita pacuena itorobatsi Dioso Moisėspijinėta penajumecopatsilivaisi, nexata tēpaena. Naxuabiana Diosovecua,” jai Dioso pejumelivaisibaxutota Dioso Moisėspijinėta penajumecopatsilivaisi yabara.

¹³ Vaxaitsi baja cajena naneconitatsi Diosojavabelia. Tsipaji apo jumecovėnėtsicapaneapatsi Dioso Moisėspijinėta penajumecopatsilivaisi. Itsiata baitsi jane Cristo itsa tēpa cruzata, nacaneconimatamota pijanata. Dioso Moisėspijinėta penajumecopatsilivaisi apo vajajumecovėnėtsicapaneapae, naneconitatsi picani Diosojavabelia. Itsiata Cristo cruzata itsa tēpa, nacavecuaajibiaexana baja bajarapaneconimi. Nexata baja Dioso apo nacaneconitsiaexanae tsane. Cristo saya tsijumaxuabatsi vajaneconimi. Nexata Dioso tanetsi Cristo bepenaneconitsinė vajaneconi pejamatabėcueneta. Nexata vajaneconi yabara Cristo nacopata pebeyaxuabinexatsi pacuena Dioso pejumelivaisibaxutota jumaitsi. Dioso pejumelivaisibaxutota jumaitsi mapacueniaje: “Pajivi bitso naneconita Diosojavabelia pibisiacuene pexanaeconi yabara, bajarapajivi naejavajavabelia rutatsi,” jai. ¹⁴ Nexata Cristo pibisiacuene bepexanaenė vajaneconi yabara, nacopata cruzajavabelia pecobematabarutsinexatsi. Bajarapacuenia Cristo itsa nacopata cruzajavabelia pecobematabarutsinexatsi vajaneconi yabara, copiajopa jane baja pacuena tajėvelia Dioso najumecapanepaeya jumaitsi Abrahampijinėjavabelia. Nexata apo judėovi ata Dioso capanepaenatsi Jesucristo pejamatabėcueneta. Vaxaitsi vajanajamatabėcuenecopatsixa Jesucristojavabelia vajanacapanepaenexa Diosojavabelia, nexata pacuena Dioso tajėvelia najumecapanepaeya jumaitsi, bajarapacuenia Dioso nacatsijamatabėcaeyaexana Espiritu Santo.

Pacuena Abrahampijinėjavabelia Dioso najumecapanepaeya jumaitsi, pacuena ata icatsia cotocaevi Moisėspijinėjavabelia najumecapanepaeya jumaitsi, yabara pelivaisi

¹⁵ Tajamona, livaisi pacatsipaebijitsiatsi paneyapėtaenexa mapacuenaje. Pepacuene raja Dioso exanaena pacuena bajayata tajėvelia Abrahampijinėjavabelia Dioso najumecapanepaeya jumaitsi. Mapanacuapijinė ata, pecobecovė pexainaenė, petėpaevajėnae bayaquina pecobecovė yabara. Nexata pecobecovė pexainaenė itsa tēpa, pevėnamuto pexi penatsicobetsanaenexa. Nexata jumenamatamota pecobecovė pexainaenė peyaquinaelivaisi. Nexata acuenebi itsajivi ata pejumaitsinexa: “Ajumematamobi mapalivaisije,” pejainexa.

Mataropotsia ata itsanë peyaquinaponaenexa, acuenebi. Tspaji pecobecovë pexainaenë peyaquinaelivaisi, jumenamatamota. ¹⁶ Bajara pijinia pacuenia Dioso jumenamatamota bajayata tajëvelia Dioso najumecapanepaeya pejumaisijava Abrahampijinëjavabelia. Baitsi Abrahampijinë pemomo pejamatabëcueneta, jivi ayaibitsaëto Dioso aneconijibia petaejavanexa, Dioso jumenamatamota. Bajayata tajëvelia Dioso najumecapanepaeya jumaisi Abrahampijinëjavabelia ayaibitsaëto mapanacuapijivi Abrahampijinë pemomo pejamatabëcueneta Dioso aneconijibia petaenexa. Ayaibitsaëto Abrahampijinë pemomoxi pejamatabëcueneta Dioso jivi aneconijibia petaenexa, bajarapacuenia tajëvelia Dioso najumecapanepaeya apo jumaisi. Biji rajane caenë, Jesús, pejamatabëcueneta Dioso jivi aneconijibia petaenexa, tajëvelia najumecapanepaeya jumaisi. “Abrahampijinë pemomo,” itsa jai, tajëvelia jumaisi Cristo yabara. ¹⁷ Palivaisi pacatsipaebatsi, maitsije. Bajayatami copiaya Dioso tajëvelia najumecapanepaeya jumaisi Abrahampijinëjavabelia pacuenia Dioso toexanaejitsia Abrahampijinëjavabelia. Bajaraxuacujinae icatsia cotocaevi, cuatrocientos treinta pavaihejecujinae, Dioso icatsia Moiséspijinëta najumecopata jivi pejumecovënëtsinexa. Itsiata palivaisi copiaya Dioso tajëvelia najumecapanepaeya jumaisi Abrahampijinëjavabelia, bajarapalivaisi acuenebi Dioso penajumeamatamobiaexanaenexa. ¹⁸ Nexata palivaisi cotocaevi Dioso Moiséspijinëta najumecopata, bajarapalivaisi jivi pejumecovënëtsixae, Dioso aneconijibia jivi itsa taejitsipa pecapanepaenexa pijaneconivecua, nexata palivaisi copiaya Dioso tajëvelia najumecapanepaeya jumaisi Abrahampijinëjavabelia, ajumematamobi tspae. Itsiata baitsi jane palivaisi cotocaevi Dioso Moiséspijinëta najumecopata, jivi jumecovënëtsi ata tspae, itsiata Dioso apo capanepae tsipaetsi. Nexata yapëtanetsi pejumenamatamotsijava palivaisi copiaya Dioso tajëvelia najumecapanepaeya jumaisi Abrahampijinëjavabelia. Tspaji pajivi jumecovënëta pecapanepaejavanexatsi pacuenia Dioso tajëvelia najumecapanepaeya jumaisi Abrahampijinëjavabelia, bajarapajivi Dioso aneconijibia tanetsi.

¹⁹ Itsa baja jumenamatamota palivaisi copiaya Dioso tajëvelia najumecapanepaeya jumaisi Abrahampijinëjavabelia, ¿detsa nexata xuajitsia icatsia Dioso Moiséspijinëta nacatonajumecopata bajarapalivaisi? Dioso raja nacatonajumecopata bajarapalivaisi saya vajanacueneyapëtaenexa pibisiacuene vajaexanavanapaejava Dioso pitabarata. Bajrapalivaisi Dioso nacatonajumecopata vajajumecovënëtaavanapaenexa matapania Abrahampijinë pemomo, Cristo, pepatsimatacabitsicajavabelianexa. Tajëvelia Dioso najumecapanepaeya jumaisi Cristo pejamatabëcueneta ayaibitsaëto xaneto mapanacuapijivije Dioso aneconijibia petaenexa. Palivaisi Dioso Moiséspijinëta najumecopata, pijacuata Dioso apo jumaisi Moiséspijinëjavabelia. Dioso saya itoroba ángelevi Moiséspijinë petsipaebinxatsi. Nexata juya Moiséspijinë tsipaeba jivijavabelia. Moiséspijinë jivi petocuaicuaijinë Diosojavabelia. Dioso juya Moiséspijinë itorobatsi petocuaicuaijinexa jivijavaberena. ²⁰ Pamatacabi Dioso najumecapanepaeya jumaisi Abrahampijinëjavabelia pacuenia Dioso toexanaejitsia Abrahampijinëjavabelia, Dioso pijacuata jumaisi Abrahampijinëjavabelia. Dioso apo itorobi ángelevi petotsipaebinxatsi Abrahampijinëjavabelia. Dioso pijacuata najumecapanepaeya jumaisi Abrahampijinëjavabelia pacuenia pepacuenetoxanaejitsia.

Pjamatabëcuenelivaisi yabara bajayata Dioso Moiséspijinëta najumecopata

yabara pelivaisi

²¹ Dioso icatsia cotocaevi Moiséspijinēta itsalivaisi najumecopatsi ata, pali-
vaisi copiaya Dioso najumecapanepaeya jumaiti Abrahampijjinējavabelia,
itsiata apo ajumematamobiaexanae. Tsipaji Dioso Moiséspijinēta pe-
najumecopatsilivaisi pejamatabēcueneta, jivi Dioso apo capanepaejitsi-
atsi. Jivi itsa caējēpaejitsipatsi pejumecovēnētsicapaneapenexa daxita pali-
vaisi Dioso Moiséspijinēta najumecopata, nexata Dioso jivi capanepaejit-
sipa pijaneconivecua Dioso Moiséspijinēta penajumecopatsilivaisi pejume-
covēnētsicapaneapexae. ²² Itsiata baitsi jane itsajivi ata apo caējēpaetsi
pejumecovēnētsicapaneapenexa Dioso Moiséspijinēta penajumecopatsilivaisi.
Dioso pejumelivaisibaxutota jumaiti pacuenia daxitajivi pibisiacuene pe-
anaexae, Dioso naneconitsiaexanaejitsiatsi Diosovecua penaxuabinexa. Ba-
jarapacuenia Dioso pejumelivaisibaxutota jumaiti vajayapētaenexa. Nexata
yapētanetsi vajanajamatabēcuenecopatsinexa Jesucristojavabelia, vajanacaca-
panepaenexa pacuenia Dioso copiaya tajēvelia najumecapanepaeya jumaiti
Abrahampijjinējavabelia.

²³ Cristo abaxē athēbēvetsica pepatsivajēnaeyatsica, Dioso Moiséspijinēta
penajumecopatsilivaisi nacayapētaeyaexana pamatacabi Cristo patsica
vajanajamatabēcuenecopatsinexa Cristojavabelia. Nacayapētaeyaexananua
pacuenia vajacuata vajaexanaejava pejamatabēcueneta, acuenebi
Dioso vajanacapanepaenexa. Nexata Dioso Moiséspijinēta
penajumecopatsilivaisi, nacajamatabēcueneevetapona matapania
Cristo athēbēvetsica pepatsimatacabitsicajavabelianexa. Nexata
bajarapalivaisi vajanacajamatabēcueneevetsijavata, Cristo baja
nacacaxitajaraba.

²⁴ Pacuenia pejevaxi pevetsijivi, pejevaxi
baeveta, bajarapacuenia Dioso Moiséspijinēta penajumecopatsilivaisi,
nacajamatabēcueneeveta daxita vajajumecovēnētsivi bajarapalivaisi.
Bajarapacuenia nacajamatabēcueneeveta matapania Cristo athēbēvetsica
pepatsimatacabitsicajavabelianexa. Nexata jane baja athēbēvetsica Cristo
pepatsicujinaetsica, vajanajamatabēcuenecopatsixae bajaraponējavabelia,
Dioso aneconijibia nacatane. ²⁵ Aeonoxae baja najamatabēcuenecopatatsi
Cristojavabelia. Nexata pacuenia pejevaxi pevetsijivi, pejevaxi baeveta,
bajarapacuenia baja Dioso Moiséspijinēta penajumecopatsilivaisi, apo
nacajamatabēcueneevetsi.

²⁶ Paxamē rabaja Dioso papeximē panenajamatabēcuenecopatsixae Jesu-
cristojavabelia. ²⁷ Nexata baja daxita paxamē panabautisabame panetsi-
tanaifajētsinexa jivijavabelia Cristo papijajivicuenemē. Nexata Cristo, Dioso
pexēnatojavabelia, panenajamatabēcuenecopatsixae, paxamē ata baja Dioso
papeximē. ²⁸ Daxitatsi vaxaitsi vajanajamatabēcuenecopatsivi Jesucristojav-
abelia, pajudíovinē, apo pajudíovi atamē, aeconoxae baja Dioso najēpaeya
necatane. Paxamē ata pijinia dajubicuenia papecanajetsivi itsamonaejav-
abelia amoneya panetonacuenebavanapaenexa, apo patanecacanajetsivi
ata itsamonaejavabelia amoneya panetonacuenebavanapaenexa, daxitatsi
Dioso najēpaeya nacatane. Paxanē papebijivinē, paxamē pijinia papetiriavi
atamē, bajarapacuenia daxitatsi Dioso najēpaeya nacatane. ²⁹ Cristo pija-
jivixaetsi, nexata Abrahampijjinē bepepo pemomoxitsi Dioso nacatane. Nex-
ata pacuenia Dioso bajayata tajēvelia najumecapanepaeya jumaiti Abra-
hampijjinējavabelia, bajarapacuenia Dioso nacacapanepaena.

4

¹ Mara pacuenia jitsipajē patacajumaitsinexaje. Pejevaxinēyo paxa itsa

vecuatēpatsi, paxami riconē ata, abaxē apo rajutsitsi paxami pecobecovē pepitsinexa pijajavanexa. Tsipaji abaxē pejevaxinēyo. Pacuenia itorobabiabatsi pevetsijivitsi, bajarapacuenia exanabiaba. Daxitacuenie pexainaenēnexa ata, bajaraponēyo jumecovēnētabiaba pevetsijivitsi pitorobicueniatsi. ² Itsa abaxē pejevaxinēyo, pevetsijivitsi evetatsi. Xua ata pijajavanexa, toevetatsi. Matapania baja itsa tocopiapatatsi paxapijinē petocaējētsimatacabitsi, tocopatatsi jane baja petoevetsijavatsi pevetsinexa baja pijacuata. Pevetsijavatsi ata baja copatatsi. ³ Bajara pijinia paitsinē pajudíovinē Jesucristo abaxē athēbēvetsica pepatsivajēnaeaysica. Itsa abaxē apo payapētaenē pexaniajailivaisi, Jesucristo pelivaisi, pajumecovēnētabiabajā pacuenia paneitoroba Dioso Moiséspijinēta penajumecopatsilivaisi. Nexata pacuenia pejevaxinēyo jumecovēnētabiaba pevetsijivitsi pitorobicueniatsi, bajarapacuenia pajumecovēnētabiabajā Dioso Moiséspijinēta penajumecopatsilivaisi. Jamatabēcuenenavēxaniabiaya pajamatabējumaitsinē tsabiabi: “Pacuenia Dioso Moiséspijinēta najumecopata vajaexanaexae, nacacapanepaena Dioso,” pajamatabējanē tsabiabi. ⁴ Itsiata Dioso pecaējētsimatacabi itsa copiapata, Dioso pexēnato itorobica judíovata penaexanaenexa mapanacuataje. Nexata Dioso pexēnato mapanacuataje judíonēcuenia ponapona. Nexata pacuenia itoroba Dioso Moiséspijinēta penajumecopatsilivaisi, bajarapacuenia Dioso pexēnato exanaponapona. ⁵ Bajarapacuenia Dioso pexēnato naexana mapanacuataje vajanacavecuajibiaexanaenexa pibisiacuenie vajaneconimi. Nexata baja nacacopatsiaexana vajaexanabiabijavami pacuenia nacaitoroba Dioso Moiséspijinēta penajumecopatsilivaisi. Bajarapacuenia Dioso nacatoexana pexicueniatsi Dioso vajanacataenexa.

⁶ Bajaraxuata paxamē Dioso papexicuenemē panenayapētaenexa, Dioso pacatoitorobica Espíritu Santo papecatsijamatabējonenexa. Nexata Espíritu Santo pejamatabēcueneta: “¡Taxa!” pacajaiyaexana Diosojavabelia. ⁷ Nexata Dioso papexixaemē, aeconoxae baja apo pajumecovēnētsimē pacuenia pacaitoroba Dioso Moiséspijinēta penajumecopatsilivaisi. Dioso papexixaemē, itsmatacabi pacarajutsiana xua Dioso toxaina pexi perajutsinexa.

Pacuenia Pablo sivanajamatabēxaina Galacia nacupijivi, Dioso pejumecovēnētavanapaevi, yabara pelivaisi

⁸ Pamatacabi abaxē Dioso apo payapētaemē, panematabacabēta panubenabiabame panevajēcabiabinexa bediosovi panetaevijavabelia. Bajarapamonae baja cajena apo diosovi. Nexata saya panacueratabiabame. ⁹ Itsiata baitsi jane aeconoxae baja payapētaneme pepo Dioso. Bajaraponē jane xaniavaetsia pacayapētane. ¿Detsa xuajitsia nexata pajitsipame panejumecovēnētsinexa Dioso Moiséspijinēta penajumecopatsilivaisi? Pamatacabi abaxē apo payapētaemē pepo Dioso, panematabacabēta pavajēcabiabame bediosovi panetaevijavabelia. Itsiata baitsi jane bajarapamonae apo caējēpaetsi papecacapanepaenexa. Bajara pijinia itsi Dioso Moiséspijinēta penajumecopatsilivaisi. Pajumecovēnētsi atamē tsipae Dioso Moiséspijinēta penajumecopatsilivaisi, itsiata Dioso aneonijibia apo pacatae tsipae papecacapanepaenexa. ¹⁰ Judíovi nacueraevetabiaba penacueraevetsimatacabita. Exanabiabanua fiesta Dioso Moiséspijinēta penajumecopatsilivaisi pitorobicueniatsi. Bajara pijinia pacuenia paxamē ata paexanabiabame. Pajuametota, pavaita ata, judíovi nacueraevetabiaba, fiesta ata

exanabiaba, bajara pijinia pacuenia paxamë ata paexanabiabame. Jamatabëcuenenavëxaniabiaya pajamatabëjumaitsimë tsabiabi: “Bajarapacuenia vaxaitsi ata itsa exanaenatsi, Dioso aneconijibia nacataena,” pajamatabëjamë tsabiabi. ¹¹ Bajarapacuenia paneexanabiabixae, bitso pacasivanajamatabëxainatsi. Tsipaji paxamë yabara jamatabëjumaitsinë mapacueniaje: “Ayaicuenia Jesucristo pelivaisi tatsipaebabiabijava bajarapamonaejavabelia, saya meta nacueratajë,” jamatabëjanë paxamë yabara.

¹² Tajamonae, pacaitorobatsi paxamë ata panenajamatabëcuenecopatsinexa Jesucristojavabelia pacuenia xanë najamatabëcuenecopatajë. Tanajamatabëcuenecopatsixae baja Jesucristojavabelia, judionë atanë, copatajë baja tajumecovënëtsijavami Dioso Moiséspijinëta penajumecopatsilivaisi. Nexata pacuenia paxamë, apo pajudíovimë, apo pajumecovënëtsimë picani Dioso Moiséspijinëta penajumecopatsilivaisi, bajarapacuenia xanë ata baja apo jumecovënëtsinë Dioso Moiséspijinëta penajumecopatsilivaisi. Nexata pëtsa baja pajumecovënëtamë Dioso Moiséspijinëta penajumecopatsilivaisi. Pamatacabi copiaya pacatsipaebatsi Jesucristo pelivaisi, paxamë apo paneitsacueniabimë. ¹³ Paxamë baja cajena payapëtaneme mapacuenije. Tavitanexae, copiaya patajopajë paxamëjavata. Nexata bajarapacuenia paxamëjavata pacatsipaebatsi pexanialivaisi, Jesucristo pelivaisi, papecacapanepaelivaisinexa Diosojavabelia, palivaisi picani abaxë apo payapëtaemë. ¹⁴ Dioso baja cajena netocopata tanevaetabinexa bajarapavitane pataneyaaitajitsibinexamë picani. Itsiata baitsi jane bajarapavitane yabara bijiata apo panetaemë. Apo panenavecuaitorobimë patacavecuaponaenexa itsajavabelia. Biji rajane xaniavaetsia pancopiapitame. Pacuenia ángel xaniavaetsia pacopiapitsipame, itsa jume, pacuenia Jesucristo xaniavaetsia pacopiapitsipame, bajarapacuenia xaniavaetsia pancopiapitame. ¹⁵ Bajarapamatacabi bitso pajamatabëcuenearëyamë patacatsipaebixae pexanialivaisi, Jesucristo pelivaisi. ¿Detsa baja aeconoxae paitsimë panejamatabëcuenearëyajavami? Bajarapamatacabi meta itsa pacavajëtsipatsi, paneitaxuto ata panerajutsipame tanaitaxutorutsinexa. ¹⁶ Aeconoxae meta bepanijavajabitsaënënë panetaeijtsipame patacatsipaebixae pexaniajailivaisi, Jesucristo pelivaisi.

¹⁷ Pamonae saicayalivaisi Jesucristo pelivaisivecua petsipaebaponaevi, pata paxamëjavata bajarapalivaisi papecatsipaebinexa. Bajarapamonae najamatabëxainabiaba pexanaenexa xua yabara pasivabarëyamëjitsia bajarapamonae. Itsiata baitsi jane bajarapamonae apo najamatabëxainae papecatsipaebinexa pexaniajailivaisi papecacapanepaelivaisinexa Diosojavabelia. Bajarapamonae jitsipa paxanë patanevecuanasaicayabinexamë. Jitsipa panejamatabëcuenejëpaenexa bajarapamonae. ¹⁸ Xanepana picani itsamonae ata panesivabarëyanexa itsa pacayavenona, itsa baitsi jane pepacuenie xaniavaetsia pacasivanajamatabëxaina papecayavenonaenexa. Bepacayavenona bajarapamonae daxitamatacabijavabelianexa. Nexata paxanë etapatsimatacabi paxamëjavata, apo bepacayavenona. ¹⁹ Paxamë bepataximë pacatanetsi. Petiriva itsa vixanotatsi penacueto pevecua-naexanaenexatsi, bitso banajamatabëxaina epexanaejavabelianexa. Bajara pijinia pacuenia xanë ata bitso pacasivanajamatabëxainatsi. Tsipaji bitso patojitsipatsi, pacuenia Cristo jamatabëcueneitsi, bajara paxamë ata panejamatabëcueneitsinexa. ²⁰ Bitso picani jitsipajë aeconoxae taponaponaejava paxamëjavata bitso patacasivanajamatabëxainaexae. Nexata itsa ponaponaejitsipajë paxamëjavata, apo patacatoyaquinae tsipaetsi. Pacabarëcuaicuaijaitsti

tsipae pexaniacuenia. Apo patacataexae, nexata abaxë xaniavaetsia apo yapëtaenë pacuenia exanaeijitsianë paxamëjavabelia.

Agarpijivabeje Sarapijivabeje yabara pelivaisi

²¹ Paxamë pajumaitsimë tsabiabi: “Jumecovënëtsianatsi Dioso Moiséspijinëta penajumecopatsilivaisi Diosojavabelia vajanacapanepaenexa,” pajamë tsabiabi. ¡Nexata panamuxunaevere xaniavaetsia paneyapëtaenexa pacuenia Dioso jumaitsi bajarapalivaisi yabara! ²² Dioso pejumelivaisibaxutota jumaitsi pacuenia bajayata Abrahampijinë xaina pexënatobeje. Abrahampijinë pexënato itsanë xaina Agarpijivata. Agarpijiva, Abrahampijinë bedajubicuenia pecomuatsiva amoneya petonacuenebaponaponaenexatsi pijabota. Nexata Agarpijiva jumecovënëtabiaba pijatuxanejivibeje pitorobicueniatsi. Bajaraxuacujinae icatsia Abrahampijinë itsanë xaina Sarapijivata, pepo pijavata jane baja. Bajarapova apo pecomuatsiva. ²³ Panacuetonëyo Abrahampijinë xaina Agarpijivata, pecomuatsivata jane baja, xaina pacuenia baxaina pexi pexinaeivi. Panacuetonëyo pijinia xaina Sarapijivata, pepo pijavata jane baja, mavecova ata bitso pepua perujavata, xaina. Bajarapanacuetonëyo xaina petocopiapatsixaetsi pacuenia Dioso tajëvelia najumecapanepaeya jumaitsi Abrahampijinë pexënato pexinaenexa. ²⁴ Bajarapovabeje pelivaisita Dioso nacayapëtaeyaexana pacuenia Dioso jivi tane anijacueniabeje. Dioso Moiséspijinëta najumecopata Moiséspijinë pijajivi pebarëjumecovënëtsinexa bajarapalivaisi. Bajarapalivaisi Dioso najumecopata Moiséspijinëta Sinaivënë tsutojumata, Arabia nacuata. ²⁵ Itsamonae abaxë mapamatacabi ataje tsiteca jumecovënëtavanapa Dioso Moiséspijinëta penajumecopatsilivaisi. Bajarapamonae abaxë tsiteca pejumecovënëtavanapaexae Dioso Moiséspijinëta penajumecopatsilivaisi, Abrahampijinë pecomuatsivami, Agarpijivami, cuenejëpavanapa. Tspaji pacuenia Agarpijiva daxitamatacabi jumecovënëtabiaba pijatuxaneva pitorobabiabicueniatsi, bajara pijinia pacuenia bajarapamonae jumecovënëtabiaba Dioso Moiséspijinëta penajumecopatsilivaisi pitorobicueniatsi. ²⁶ Vaxaitsi pijinia Jesucristojavabelia vajanajamatabëcueneocopatsivi, Abrahampijinë pepo pijavami, Sarapijivami, cuenejëpavanapatsi. Nexata itsamatacabi Dioso pijatomarata, pejanaJerusalén tomarata, jinavanapaenatsi. Tspaji pacuenia Abrahampijinë pepo pijavami, Sarapijivami, itsajivi ata apo pijajivitova pitorobabiabicueniatsi pexanaenexa, bajara pijinia vaxaitsi ata itsitsi. Tspaji Dioso Moiséspijinëta penajumecopatsilivaisi pitorobicuenia apo jumecovënëtavanapaetsi. ²⁷ Nexata ayaibitsaëtotsi tsaponae Jesucristojavabelia vajanajamatabëcueneocopatsivi. Abrahampijinë pepo pijavami, Sarapijivami, yabara, Dioso pejumelivaisibaxutota tajëvelia jumaitsi mapacueniaje:

Mavecovamë, nexi apo nexainaeva. Jamatabëcuenebarëyamë tsane. Caeto ata apo nenvaxaetaeva ata, itsiata jamatabëcuenebarëyaya vavajamë tsaxuabi tsane, navixaetae atamë. Tspaji nemomoxi ayaibitsaëto xainaename. Xainaename ayaibitsaëto nemomoxi, nijajivitova pemomoxi matatoxenetsia,

jai tajëvelia Dioso pejumelivaisibaxutota ayaibitsaëtotsi Jesucristojavabelia vajanajamatabëcuene copatsijavanexa yabara.

²⁸ Tajamonae, pacuenia Abrahampijinë pepo pijavata, Sarapijivata, naexana Isaacpijinë pacuenia Dioso tajëvelia najumecapanepaeya jumaitsi, bajara pijinia pacuenia vaxaitsi ata Dioso nacatane. Jesucristojavabelia

vajanajamatabëcuenecopatsixae, Dioso nacatane Sarapijiva bepepo pemomoxitsi. Nexata pacuenia Dioso tajëvelia najumecapanepaeya jumaitsi vajanacacapanepaenexa, bajarapacuenia Dioso nacacapanepaena.²⁹ Bajayata Abrahampijinë pexënato, matapijinë, ponë naexana Agarpijivata, bajaraponë jamatabëitonotabiaba pejuypapijinë, ponë naexana Sarapijivata Dioso pejamatabëcueneta Espiritu Santo peyavenonaexaetsi. Bajara pijinia pacuenia aeconoxae ata, pamonae casaë tsavanapae pejumecovënëtsijava Dioso Moiséspijinëta penajumecopatsilivaisi, nacajamatabëitonotabiaba Dioso pejamatabëcueneta Espiritu Santo vajanacatsijamatabëcaevi.³⁰ Pijuyapijinë, pejamatabëitonotabiabinë yabara, Dioso pejumaitsiyava Abrahampijinëjavabelia Dioso pejumelivaisibaxutota jumaitsi mapacueniaje: “Ponë nexënato xainame necomuatsivata, apo rajutsimë tsane nexainaeyajuvënëjaya nevënamuto pepitsinexa. Daxita rajutsianame ponë xainame pepo nijavata. Bajaraxuata nijabovecua pitsapaeayaexanaename necomuatsiva, nexënato yajava,” jai Dioso pejumelivaisibaxutota Abrahampijinëjavabelia Dioso pejumaitsiyava.³¹ Tajamonae, Dioso apo nacatae Abrahampijinë pecomuatsiva bepemomoxitsi. Biji rajane Dioso nacatane Abrahampijinë pepo pijava bepemomoxitsi. Bajaraxuata vaxaitsi baja apo jumecovënëtsitsi Dioso Moiséspijinëta penajumecopatsilivaisi.

5

Pacuenia icatsia apo bejumecovënëtsi Dioso Moiséspijinëta penajumecopatsilivaisi, pamonae baja najamatabëcuenecopaba Cristojavabelia, yabara pelivaisi

¹ Cristo pejamatabëcueneta nacacopatsiaexana Dioso Moiséspijinëta penajumecopatsilivaisi vajajumecovënëtsijavami. Nexata Dioso Moiséspijinëta penajumecopatsilivaisi panejumecovënëtsijavami panecopatsijava, tsiteca baja pacopatavanapare. Pëtsa icatsia caevëlia pajumecovënëtame Dioso Moiséspijinëta penajumecopatsilivaisi, bajarapalivaisi bepapijajivimë papecaitorobabiabicuenia paneexanavanapaeyaniva.

² Xanë Pablonë, panenamuxunaevere palivaisi pacatsipaebijitsiatsi. Jamatabëcuenenavëxaniabiaya pëtsa pajamatabëjumaitsimë: “Xanë rabaja taneperabëcaucutsinë. Bajaraxuata tajaneconivecua Dioso necapanepaena,” pajamatabëjamë pëtsa. Bajarapacuenia itsa panajamatabëxainaejitsipame, nexata Cristo papecasivatëpaejaya papecacapanepaenexa panijaneconivecua, saya pacasivanacueratsipa. Nexata pajumecovënëre Cristo papecasivatëpaejaya papecacapanepaenexa panijaneconivecua.

³ Icatsia pacamuxujibatsi asaëyata. Pajivi jamatabëcuenenavëxaniabiaya jamatabëjumaitsi: “Xanë naperabëcaucutsiaexanaenajë tajaneconivecua Dioso tanecapanepaenexa,” jamatabëjai, bajarapajivi bejumecovënëtsicapanepe daxita pacuenia Dioso Moiséspijinëta penajumecopatsilivaisi itorobatsi.

⁴ Jamatabëcuenenavëxaniabiaya itsa pajamatabëjumaitsimë tsipae: “Xanë jumecovënëtsianajë Dioso Moiséspijinëta penajumecopatsilivaisi. Nexata Dioso aneonijibia netaena tanecapanepaenexa,” itsa pajamatabëjamë tsipae, nexata pacopabijitsipame panejumecovënëtsijavami Cristo papecasivatëpaejaya panijaneconi yabara. Dioso papecaixutotsoniataexae aneonijibia papecataejavami ata, pacopabijitsipame.⁵ Vaxaitsi baja cajena yapëtanetsi Dioso vajanacacapanepaejavanexa. Tsipaji jumecovënëtatsi Jesucristo vajanacasivatëpaejaya vajaneconi yabara. Bajaraxuata Espiritu

Santo pejamatabëcueneta vajanacayavenonaexae, evetavanapatsi Dioso vajanacajumaitsinexa: “Paxamë rabaja paneconijibimë,” vajanacajainexa, pamatacabi Dioso pitabarata nubenaenatsi. ⁶ Vaxaitsi baja Jesucristo pijajivitsi. Nexata nacaperabëcaucutsi ata, apo nacaperabëcaucutsi ata, itsiata bajarapacuen amatamobi Dioso pitabarata. Namatamota rajane asivaya vajayavenonaponaejava itsamonae ata vajanajamatabëcuenecopatsixae Jesucristojavabelia.

⁷ Pajumecovënëtavanapame baja picani pexaniajailivaisi. ¿Jipatsa nexata pacacopatsiaexana bajarapalivaisi panejumecovënëtsijavami? ⁸ Dioso raja apo pacacopatsiaexanae. Biji rajane Dioso pacajunata Jesucristojavabelia panenajamatabëcuenecopatsinexa. ⁹ Pëtsa panacofënëtamē mapalivaisije. Pan pexanaematabënexa ayaimatabë ata, levadurajava pijinia tsiquirijavayo ata, itsiata pematajërëabijavata, bacaëjêpa daxitamatabëjava. Nexata bafufunaeyaexana daxitamatabë. Bajara pijinia itsi penajumetsënëtsilivaisi jivi petsipaebaponaevi. Penajumetsënëtsilivaisi jivi petsipaebaponaevi, caenëbeje ata, itsiata ayaiBITSaëto Jesucristojavabelia penajamatabëcuenecopatsivi, jamatabëcuenebijianapona. ¹⁰ Yapëtaniji baja cajena mapacueneye. Paxamë baja Jesucristo papijajivimë. Nexata Dioso pacayavenonaena. Xanë yapëtaniji pacuenia paexanaejitsiamë. Tsiteca pajumecovënëtavanapaename patacatsipaebilivaisi. Dioso cajena itsamatacabi naneconitsiaexanaenatsi ponë Jesucristo pelivaisivecua pacajamatabëcuenebijiana penajumetsënëtsilivaisita.

¹¹ Tajamonae, Jesucristo pelivaisi apo judíovi tatsipaebabiabijavata, itsa jumaitsinë tsabiabi tsipae: “Paxamë apo pajudíovimë, Jesucristojavabelia panenajamatabëcuenecopatsivi, bëpanaperabëcaucubiaexaname Diosojavabelia papecacapanepaenexa,” itsa janë tsabiabi tsipae, nexata judíovi apo nebejibiaexanabiabi tsipae. Apo judíovi ata, Jesucristojavabelia penajamatacuenecopatsivi, itsa itorobaponaejitsipajë peperabëcaucubinexatsi, nexata Jesucristo cruzata petëpaelivaisi tsipaebi atanë, itsiata judíovi apo nitoya tsipae. ¹² Pamonaē pacajamatabëitonotabiabapanaeperabëcaucutsiaexanaenexa, bajarapamonae tojitsipajë mapacueniaje. Tojitsipajë bajarapamonae papecavecupatsapaenexa, papecacopatsinexa baja papecacajamatabëitonotabiabijava.

¹³ Tajamonae, Dioso pacajunata panecopabinexa Dioso Moiséspijinëta penajumecopatsilivaisi panejumecovënëtsijavami. Itsiata baitsi jane pëtsa pajamatabëjumaitsimë: “Dioso Moiséspijinëta penajumecopabilivaisi tajumecovënëtsijavami, tacopatsixae baja, nexata exanaenajë daxita pibisiacuenē pacuenia jitsipajë,” pajamatabëjamë pëtsa. Biji rajane Dioso Moiséspijinëta penajumecopatsilivaisi panejumecovënëtsijavami, panecopabixae baja, Jesucristojavabelia penajamatabëcuenecopatsivi bepapijajivimë panataema namataenetsia panenayavenonabiabinexa. Bajarapacuenia namataenetsia panayavenonabiabianame panenasivaxae.

¹⁴ “Asivamëre itsamonae ata pacuenia nijacuata nasivamë,” pejailivaisi itsa pajumecovënëtsianame, nexata daxita palivaisi Dioso Moiséspijinëta najumecopata, pajumecovënëtsicapaneaname. ¹⁵ Itsa panaitoyamë, itsa panabaracuaicuaijamënuā pibisiacuenia, nexata xaniavaetsia panaitavere. Tspaji itsa panaitoyamë tsipae, itsa panabaracuaicuaijamënuā tsipae pibisiacuenia, nexata Jesucristojavabelia panenajamatabëcuenecopatsijava, namataenetsia panajamatabëcuene faefaenaeyaexanaejitsipame. Pacopatsipamenuā baja Dioso pejumelivaisi yabara panenacaetuatabiabijava ata.

Pacuenia Espíritu Santo nacajamatabëcueneyavenona yabara pelivaisi

¹⁶ Mapacuenia pacajumaitsitsije. Pacuenia Espíritu Santo pacaitorobiaba, paexanabiabare daxitamatacabi canacujitsia. Pětsa pibisiacuene paexanabiabame panijacuata panenajamataběxainaejava. ¹⁷ Xua vajacuata vajajamataběěthětota najamataběxainabiabatsi pibisiacuene vajaexanabiabinexa, bajaraxua vajaexanaenexa, Espíritu Santo apo jitsipae. Xua pijinia Espíritu Santo nacaitorobiaba pexaniacuene vajaexanabiabinexa, bajaraxua juya vajajamataběcuene vajaexanabiabinexa apo jitsipae. Nexata vajajamataběcuenebeje, Espíritu Santobeje apo najamataběcuenejěpaebeje. Bajaraxuata pexaniacuene pajamataběexanabiabi atamě, itsiata apo paexanabiabimě pexaniacuene. ¹⁸ Itsa baja paexanavanapaename pacuenia Espíritu Santo pacaitorobiaba, nexata baja tsiteca apo paexanavana-paemě tsane pacuenia pacaitoroba Dioso Moiséspijiněta penajumecopatsilivaisi. Tsipaji baja pacuenia Espíritu Santo pacaitoroba, paexanavanapaename.

¹⁹ Xua jivi pijacuata najamataběxaina, itsa exana, yapěxanepana vajayapětaenexa. Tsipaji xua jivi pijacuata najamataběxaina itsa exana, pebi itsava jaita pijavavecu. Petiriva pijinia jaita itsaně pamonavecu. Pamona pevitota pibisiacuene exana pacuenia pijacuata najamataběxaina, bajarapamona jitsipana daxita xua pibisiacuene pexanaenexa. ²⁰ Pamona pibisiacuene exana pacuenia pijacuata najamataběxaina, pematatababěta nubenabiaba pevajětabiabinexa jumapecataeya pexanaeněanějavabelia. Junatabiabanua penajorobivi. Bajarapamonaeyajuvěni naexananua penajorobivi. Itoyanu tsabiabi itsamonae. Jumeanaenotabiabanua itsamonae. Cueneaěbabiabanua itsamonae. Anaepanabiabanua apo vajayabaraanaepanaejavayo ata. Natoexanabiabanua daxitacuene epamonaenexa. Vecuanasaicayababianua itsamonae Dioso pejumecověnětsivi. Caebitsaěto caejavata apo najuanacaetuanabiabi. ²¹ Pamona pibisiacuene exana pacuenia pijacuata najamataběxaina, jamataběyacajěretabiabanua itsamonae pexanaejava. Jamataběbeyaxuababiabanua jivi. Aitajibinua tsabiabi pijabonějava. Aitajibinua tsabiabi fiestajava ata. Itsacuenenua pematatsěněa, bajara bepitsipibisiacuene, exanabiaba. Pacuenia copiata pacamuxujibatsi, bajara icatsia pacuenia pacamuxujibatsi. Pamona bajarapacuenia pibisiacuene exana, bajarapamona apo jinavanapae tsane Dioso pijanacuatatsia.

²² Pacuenia peubinae, pexaniana, pexaniacuai capitsapa, bajara pijinia pacuenia Espíritu Santo vajajamataběěthětovetsina capitsapa mapacuenije. Capitsapa itsamonae ata vajaasivajamataběcuene. Capitsapa vajabarěyajamataběcuene. Capitsapa Diosojavabelia, itsamonaejavabelia ata, barajamataběcuenexanepanaeya vajataenexa. Capitsapa, itsamonae nacaitsacueniabi ata, vajavajěnaeyabelia vajaajamataběsaějamataběcuene. Capitsapa itsamonae vajaitaxutotsoniatē jamataběcuene. Capitsapa itsamonae pexaniacuene vajatoexanaejamataběcuene. Capitsapa Dioso vajajumecověnětsijava vajaajamataběsaějamataběcuene. ²³ Espíritu Santo vajajamataběěthětovetsina capitsapa vajaaitejepaebijamataběcuene. Capitsapa vajanajamataběcataitsi jamataběcuene pibisiacuene vajaexanaeyaniva. Daxita bajarapajamataběcuene, Espíritu Santo vajajamataběěthětovetsina pecapitsapaejamataběcuene, xanepana. Itsalivaisi ata cajena apo itavetsi daxita bajarapacueni. ²⁴ Pamona Jesucristo pijajivi, bajarapamona jamatabějumaisi: “Jesucristo cruzajavabelia itsa cobematabiabarutatsi, tajaperujujamataběcuenemi vajavatěpa,” jamatabějai. Nexata vecuaajibiaexanatsi pajamataběcuene

itorobabiabatsi pibisiacuene pexanaenexa. ²⁵ Vaxaitsi Espíritu Santo nacayajavaponapona. Nexata betonacopatabiabatsi vajanacaitorobinexa pacuenia Espíritu Santo nacatojitsipa vajaexanabiabinexa.

²⁶ Ayaijamatabëcuenejivitsi apo benataetsi. Namataenetsia itsacuenejavayo ata pibisiacuene apo benatoexanaetsi vajanabaraanaepanaeyaniva, vajanacuenecaëbíaniva ata.

6

Pacuenia Dioso pejumecovënëtsivi itorobatsi namataenetsia penajamatabëcuenejavenonaenexa yabara pelivaisi

¹ Tajamonaē, itsa pacaxitajarabame Dioso pejumecovënëtsijavavecua pejopaejivi, paxamē pacuenia Espíritu Santo pacaitoroba panejinavana-paēvi, payavenonare bajarapajivi. Payavenonare bajarapajivi pija-matabëcuenesaēnexa icatsia Dioso pejumecovënëtsijava. Itsiata baitsi jane pexaniajamatabëcuenia xaniavaetsia payavenonare. Paxamē ata pibisiacuene nayajivitaeya pajinavanapare. Belia paxamē ata Dioso panejumecovënëtsijavavecua, pajopaejitsipame dovathi itsa pacajamatabëcuenejēta pibisiacuene paneexanaenexa. ² Namataenetsia panayavenonabiabare dovathi itsa pacajamatabëcuenejēta, pibisiacuene paneexanaeyaniva. Namataenetsia itsa panayavenonabiabianame panenasivaxae, nexata pajumecovënëtsianame pacuenia Cristo pacaitoroba.

³ Pajivi jumaitsi itsa vënëlivaisitane itsajivi Dioso pejumecovënëtsijavavecua pejopaejava: “Xanē cajena ayaijamatabëcuenenēnē bajarapajivi matatoxenetsia. Nexata Dioso tajumecovënëtsijavavecua apo jopaenē tsane,” jai, bajarapajivi najamatabëcueneapaeba. Tsipaji bajarapajivi ata dovathi itsa jamatabëcuenejētatsi pibisiacuene pexanaenexa, apo ajamatabëcuenesaē tsipae Dioso pejumecovënëtsijava. ⁴ Caejivi canacujitsia benacuenejanaējēta peyapētaenexa xua exanaponapona Dioso pitabarata. Nexata pajivi pexaniacue exanaponapona, bajarapajivi jamatabëcuenebarēya Dioso pitabarata. Itsiata baitsi jane bajarapajivi pexaniacuene exanaponaponaē ata, apo bejamatabëjumaitsi mapacueniaje: “Xanē itsamonaevēcua pexaniacuene Dioso toexanaponaponajē,” apo bejamatabëjai. ⁵ Caejivi canacujitsia baja cajena saicaya xaina pexanaponaejavanexa Dioso pitorobicueniatsi.

⁶ Pamonaē tsipaebatsi Dioso pejumelivaisi, bajarapamonaē pexainaeyajuvënējava juya berajuta Dioso pejumelivaisi petsipaebinētsijavabelia.

⁷ Pētsa pajamatabëcuenenavēxaniabame saicayacuenia paneexanaeyaniva Dioso papecaitorobicuenevecua. Tsipaji itsajivi ata apo caējēpaetsi peyamaxētojorobinexa Dioso. Xua jivi bauba pabita, pamatacabi baja navereta bajaraxua, icatsia banota. Bajara pijinia itsane Dioso ata. Pajivi pibisiacuene exana, bajarapajivi juya pibisiacuene tocopiapatsianatsi pamatacabi Dioso naneconitsiaexanaenatsi. ⁸ Pajivi pibisiacuene exanaponapona pijacuata penatojitsipaecuenia, nexata bajarapajivi itsa tēpaena, pepacuene Diosovecua naxuabiana. Pajivi pijinia pexaniacuene exanaponapona Espíritu Santo pesivabarēyanexatsi, nexata bajarapajivi tēpae ata, xainaena matacabi apo pevevererecaejava. ⁹ Vaxaitsi itsa apo yabaracueranaetsi tsane pexaniacuene vajaexanavanapaejava, nexata Dioso pecaējētsimatacabitata nacarajutsiana pexaniacuene. Bajaraxuata pexaniacuene vajaexanavanapaejava, apo beyabaracueranaetsi. ¹⁰ Nexata itsajota nacacuencaējēpa, pexaniacuene betoexanabiabatsi itsamonaeyavabelia. Pamonaē Jesucristo vajanajuajumecovënëtsivi, bajarapamonaē bitsoyo beyavenonaponatsi.

Pacuenia Pablo pemuxujobilivaisi Galacia tomarapijivi toyaquina pevretsinea baja petoyaquinaelivaisi mapabaxutotaje yabara pelivaisi

¹¹ Pataema mapaayaiitanetonėje. Xanē raja Pablonē tajacuata pacatoyaquinatsi mapalivaisije. ¹² Itsamonae judiōvi ajumesaēya pacajumai tsabiabi: “Paxamē apo pajudiōvi atamē, Jesucristo pelivaisi itsa pajumecovēnētame, bepanaperabēcaucubiaexaname papecacapanepaenexa Diosojavabelia,” pacajai tsabiabi. Pajudiōvi bajarapacuenia pacajumai tsabiabi, jamatabēcuenenavēxaniabiaya jamatabējumai tsabiabi: “Jesucristo pelivaisi apo judiōvi itsa tsipaebianatsi, yajavaitorobianatsi penaperabēcaucubiaexanaenexa. Nexata bajarapacuenia itsa exanaenatsi, vajamonae judiōvi nacasivajamatabēcuenenarēya tsane. Nexata vajamonae judiōvi apo nacaitsacueniabi tsane, apo judiōvi tsipaebi atatsi Cristo vajanacasivatēpaejava cruzata,” jamatabējai tsabiabi bajarapajudiōvi jamatabēcuenenavēxaniabiaya. ¹³ Pajudiōvi bajarapacuenia pacajumai tsabiabi, pijacuata naperabēcaucubiaexanae ata, itsiata apo exanavanapae daxita pacuenia itorobatsi Dioso Moiséspijinēta penajumecopatsilivaisi. Bajarapamonae jitsipa panenaperabēcaucubiaexanaenexa, saya papecavajunupaebinea pevēna judiōvijavabelia: “Paxanē patajamatabēcueneta Galacia nacuapijivi naperabēcaucubiaexana,” pejainexa paxamē yabara. Tsipaji bajarapajudiōvi jitsipa pesivajamatabēcuenenarēyajavatsi pevēna judiōvi. ¹⁴ Xanē cajena bajarapacuenia apo exanaenē. Apo najamatabēxanaenē, xua exanajē, tanavajunupaebinea jivi saya tanesivabarēyanexa. Itsiata jitsipajē caelivaisiyo jamatabēcuenenarēyaya jivi tatsipaebinea. Jitsipajē jivi tatsipaebinea Jesucristo vajanacasivatēpaejava cruzata. Jesucristo cruzata tanesivatēpaexae, nevejamatabēcaeva baja tajitsipaejavami mapanacuapijicuenene. Mapanacuapijivi pijinia tanejitsipaejamatabēcuenemi ata ajibi baja. ¹⁵ Espiritu Santo vajanacaitorobicuenia itsa exanavanapatsi, nacaperabēcaucutsi ata, apo nacaperabēcaucutsi ata, najēpabeje. Tsipaji cajena amatamobi bajarapacuenē Dioso pitabarata. Vajanajamatabēcuenē pēnyorotsijava rajane pejanajamatabēcuenējavabelia, namatamota vajanacacapanepaenexa Diosojavabelia. ¹⁶ Nexata pamonae exanavanapa pacuenia pejanajamatabēcuenē itorobatsi, bajarapamonae jamatabēcuenexanepanaeya jinavanapaena Dioso pitabarata. Dioso itaxutotsoniataenatsinua. Bajarapamonae daxita Dioso baja pepo pijajivi tsane. ¹⁷ Tavajēnaeyabelia baja apo jitsipaenē tanejamatabēitonotaponaenexa pamonae nejumaeaba Jesucristo taneitorobinēcuenē. Jesucristo pelivaisi yabara tanejumaconibabeyabiabijavata, nejumatitibabeyabiaba. Bajarpavajēncovēanē tanetsijumarubenaexae, daxitajivi neyapētane Jesucristo pijajivitonēcuenenē. ¹⁸ Tajamonae, pacatovajētabiabatsi Diosojavabelia vajatuxanenē Jesucristo papecayavenonabiabinea. Bajara itsi tsane.

Mapabaxutoje San Pablo toyaquina Efeso tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Efeso tomarapijivijavabelia, yabara pelivaisi

¹ Xanë Pablonë, Dioso tanetojitsipaexae, nitapeta Jesucristo pijaapóstolenëxanë. Nexata Jesucristo nitoroba jivi pexanialivaisi tatsipaeabaponaenexa. Pacatoyaquinatsi mapabaxutoje Dioso papijajivimë, Jesucristojavabelia panenajamatabëcuenecopatsivi, panejinavanapaevi Efeso tomarata. ² Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Dioso jivi capanepaejitsia pijaneconivecua Jesucristo pesivatëpaexaetsi yabara pelivaisi

³ “Pexaniacuenë rabaja panetoexaname,” jaitsi vaxaitsi, vajatuxanenë Jesucristo paxa, Diosojavabelia. Jesucristo baja pijajivixaetsi, daxitacuenejavabelia Dioso nacayavenonapona vajanacajamatabëcuene asaëyaexanaenexa. Nexata Dioso nacajamatabëcuenexaniavaetapona vajanaponaenexa Dioso pijanacuayabetsia. ⁴ Dioso mapanacuaje pexanaevajënaeya ata, tajëvelia nacaitapeta pijajivinexatsi. Tsipaji baja Dioso tajëvelia yapëtane Jesucristojavabelia vajanajamatabëcuene copatsijavanexa Jesucristo vajanacativatëpaexae. Bajarapacuenia Dioso tajëvelia nacaitapeta pijajivinexatsi vajajinavanapaenexa aneconijibia Dioso pitabarata. ⁵ Dioso bitso vajanacajitsipaexae, tajëvelia najamatabëcuenevereta pexicueniatsi vajanacataenexa. Jesucristo nacasivatëpa Dioso petojitsipaecueniatsi. Bajaraxuata nexata Dioso nacatane pexicueniatsi. ⁶ Nexata Dioso pexaniacuenia vajanacaitaxutotsoniataexae, daxitamatacabi canacujitsia Diosojavabelia jumaitsitsi tsabiabi. “Xanepana rabaja. Tsipaji pexaniacuenë panetoexaname,” jaitsi tsabiabi Diosojavabelia. Dioso pexënato piasivanë pijajivixaetsi, Dioso nacaitaxutotsoniatane. ⁷ Piniijicuenia Dioso vajanacaitaxutotsoniataexae, nexata pexënato itorobica mapanacuayabetsicaje vajanacativatëpaenexa. Bajarapacuenia Dioso nacavecuaajibiaexana pibisiacuenë vajaexanaeconimi. ⁸ Dioso piniijicuenia vajanacaitaxutotsoniataexae, nacayapëtaeyaexana pexaniajallivaisi. Nacayapëtaeyaexananua pacuenë nacatoxanepana Dioso pejitsipacuenia vajaexanavanapaenexa. ⁹ Xua Dioso tajëvelia najamatabëcuenevereta pexanaenexa, bajaraxua baja aeconoxae Dioso nacayapëtaeyaexana. Bajaraxua picani abaxë itsajivi ata apo yapëtae. Xua Dioso tajëvelia najamatabëcuenevereta pexanaenexa, maitsije. Dioso itorobijitsiatsica pexënato mapanacuayabetsicaje petoexanaeveretsinexatsi daxita pacuenia itoroba. ¹⁰ Pacuenia Dioso tajëvelia najamatabëcuenevereta, bajarapacuenia daxita Cristo pijajivitsi nacacaeuat-siana Dioso pecaëjëtsimatacabi itsa copiapatsiana. Dioso pecaëjëtsimatacabi itsa copiapatsiana daxitacuene mapanacuapijicuenije, athëbëpijicuenë ata, Dioso baja tocopatsiana pexënato juya pevetsinexa.

¹¹ Jesucristo pijajivinexatsi tajëvelia Dioso nacaitapeta. Bajarapacuenia Dioso tajëvelia nacaitapeta tsipaji baja cajena Dioso tajëvelia najamatabëcuenevereta bajarapacuenia pexanaenexa. Dioso daxitacuene exana pacuenia tsitaxanepanatsi. ¹² Bajarapacuenia Dioso tajëvelia

nacaitapeta vajanajamatabëcuenecopatsinexa Jesucristojavabelia. Nexata vaxaitsi Dioso tojinavanapatsi Diosojavabelia vajajumaitsitsabiabinexa: “Diosomë, ayaijamatabëcuenenëmë bitso,” vajajaitsabiabinexa Diosojavabelia. ¹³ Pexaniajailivaisi papecacapanepaelivaisinexa, paxamë ata itsa pajumetaneme, nexata baja panajamatabëcuenecopatame Jesucristojavabelia papijajivinxamë. Nexata pacuenia Dioso tajëvelia najumecapanepaeya jumaiti, pacarajuta baja Espiritu Santo papecatsijamatabëcaenexa. Nexata bajarapacuenia panayapëtaneme Dioso papijajivicuenemë. ¹⁴ Espiritu Santo vajanacatsijamatabëcaexae, yapëtanetsi pexaniajaicue Dioso vajanacarajutsinexa matababi apo peverevereaejava. Yapëtanetsinua Dioso vajanacapanepaejavanexa pexënato vajanacasivatëpaexae. Bajaraxuata vaxaitsi bejumaitsitsi Diosojavabelia: “Diosomë, ayaijamatabëcuenenëmë bitso,” bejaitsi.

Pacuenia Pablo tovajëta Diosojavabelia Dioso pejumecovënëtsivi, Efeso tomarapijivi, yabara pelivaisi

¹⁵ Pacavënëlivaisitanetsi panenajamatabëcuenecopatsijava vajatuxanenë Jesucristojavabelia. Pacavënëlivaisitanetsinua paneasivajava daxita pamonae Dioso pejumecovënëtsivi. ¹⁶ Bajaraxuata itsa vajëtajë Diosojavabelia, pacatovajëtabiabatsi. Nexata pexaniajamatabëcuene rajutabiabajë Diosojavabelia paxamë yabara. ¹⁷ Ayaijamatabëcuenenë Dioso, vajatuxanenë Jesucristo paxa. Bajaraponëjavabelia pacatovajëtabiabatsi. Pacatovajëtabiabatsi Espiritu Santo pejamatabëcueneta xaniavaetsia panevajënaeyabelia papecayapëtaeyaexanaponaenexa pacuenia Dioso jamatabëcueneitsi. Nexata Espiritu Santo pejamatabëcueneta panevajënaeyabelia pacayapëtaeyaexanaponaena pacuenia Dioso jamatabëcueneitsi. Pacayapëtaeyaexanaponaenua pacuenia Dioso nacatsitanajamatabëcueneitajëta. ¹⁸ Pacatovajëtabiabatsinua Diosojavabelia Dioso papecjamatabëcueneitayotsinexa panevajënaeyabelia paneyapëtaeponaenexa pajamatabëcuene yabara Dioso pacajunata papijajivinxamë. Pacatovajëtabiabatsinua Diosojavabelia paneyapëtaenexa xua Dioso pacarajutsijitsia, bitso ayaijamatabëcuenejava, matababi apo peverevereaejava. Tajëvelia Dioso najumecapanepaeya jumaiti Dioso pijajivitsi vajanacarajutsinexa matababi apo peverevereaejava. ¹⁹⁻²⁰ Pacatovajëtabiabatsinua paneyapëtaenexa Dioso bitso piasaënëcuene. Vajanacayavenonaenë vajanajamatabëcuenecopatsivi bajaraponëjavabelia. Dioso bitso piasaënëcuene jivi tsitanajamatabëcueneitajëta pamatababi Cristo asaëyaexanatsi petëpaecujinae. Nexata baja Cristo paxa Dioso athëbëtatsia pemuxuneneta ecaeyaexanatsi pecujuanenia penajuaevetsinexabeje daxitacuene. Nexata bajarapasaëta vaxaitsi ata Dioso nacayavenonapona. ²¹ Bajarapacuenia Cristo athëbëtatsia, paxa Dioso pemuxuneneta, ecaeyaexanatsi pecujuanenia Cristo pevetsinexa daxitacuene. Nexata daxitanacuanëjava pevetsivi matatoxenetsia aeconoxae jane baja daxitacuene Cristo pepo pevetsinë. Cristo baja daxitacuene eveta mapamatacabitaje. Pejanamatacabijavabelianexa ata evetsiana. ²² Dioso tocopatatsi Cristo daxitacuene pevetsinexa. Nexata Cristo pepo pitorobinë daxita pamonae najamatabëcuenecopata bajaraponëjavabelia. ²³ Daxita baja pamonae najamatabëcuenecopata Jesucristojavabelia, Dioso tanetsi Cristo pijajivi. Cristo nexata itoroba bajarapamonae. Nexata Cristo bajarapamonae yajavaponapona daxita mapanacuajavaje.

2

Pacuenia Dioso pijajivi, piasivaxae, capanepaejitsia yabara pelivaisi

1 Dioso baja cajena pacajamatabêcueneaitavayaexana Jesucristo pejamatabêcueneta. Paxamê abaxê bajayata Dioso itsa apo pajumecovênêtsimê, naxuabiaya picani Dioso vecua pajinavanapame pibisiacuene paneexanavanapaeneconi yabara. Nexata pacuenia itsi petêpaevi, bajara picani pajamatabêcueneitsimê Dioso javabelia itsa abaxê Dioso apo pajumecovênêtsimê. 2 Pacuenia Dioso apo pejumecovênêtsivi, pibisiacuene exanavanapa, bajara picani pacuenia paxamê ata bajayata pibisiacuene paexanavanapame. Pajumecovênêtavanapame picani êdovathi, ponê eveta pitaquirijamatabêcuene mapanacuataje. Aeconoxae dovathi jamatabêcueneasaêyaexanapona pamonaê Dioso apo pejumecovênêtsivi pibisiacuene pexanaenexa. 3 Daxita picani bajayata vaxaitsi pibisiacuene exanavanapatsi. Pacuenia vajajamatabêêthêtota jitsipatsi vajaexanaenexa, exanabiabatsi. Xua najamatabêxainatsi, exanabiabatsi. Bajaraxuata pacuenia daxita itsamonae naneconita Dioso javabelia, bajara picani pacuenia vaxaitsi ata naneconitatsi Dioso javabelia vajanacananeconitsiaexanaenexa. 4 Itsiata baitsi jane Dioso, bitso jivi pitaxutotsoniataenê, vaxaitsi bitso nacajitsipa. 5 Dioso vecua naxuabiaya picani vajajinavanapaevimi ata pibisiacuene vajaexanaeneconi yabara, itsiata Dioso nacajamatabêcueneaitavayaexana, Jesucristo Dioso itsa asaêyaexanatsi petêpaecujinae. Bajarapacuenia Dioso nacatoexana vajanacaitaxutotsoniataexae. Nexata Dioso nacacapanepaena pibisiacuene vajaexanaeneconimivecua. 6 Jesucristo petêpaecujinae, Dioso icatsia asaêyaexanatsi petêpaejavavecua. Nexata vaxaitsi Jesucristojavelia vajanajamatabêcuene copatsixae, Dioso nacatane bevajanacayajavaasaêyaexanaevi. Dioso nacatanenua Jesús athêbêtatsia bevajanacayajavaeaevi daxitacuene vajanacabarêevetsinexa. 7 Bajarapacuenia Dioso nacatoexana vajanacatsitanajamatabêcuene itajêtsinexa daxitamatacabijavabelianexa vajanacajitsipaecuene. Nacatsitanajamatabêcuene itajêtanua vajanacaitaxutotsoniataecuene Jesucristo vajanacasi vêtêpaexae. 8 Dioso cajena bitso pacajitsipa. Bajaraxuata Jesucristojavelia itsa panajamatabêcuene copatame, Dioso pacacapanepaena panijaneconivecua. Bajarapacuenia Dioso papecacapanepaejavanexa, panijacuata apo panatoexanaemê. Biji rajane Dioso pejamatabêcueneta pacacapanepaena. 9 Itsajivi ata Dioso petonacuenebaponaponaejamatabêcuene, Dioso apo capanepaetsi tsane. Biji rajane Jesucristojavelia penajamatabêcuene copatsixae, Dioso capanepaenatsi. Bajaraxuata itsajivi ata beayajamatabêcuene jivi apo benatae Dioso pecapanepaejavanexatsi yapêtae ata. Apo bejumaitsinua: “Xanê Dioso tatonacuenebixae, nexata necapanepaena,” jai bejai. 10 Vaxaitsi raja Dioso nacaexana. Nacaexananua Jesucristo pijajivitsi Dioso vajatoexanavanapaenexa pexaniacuene. Bajarapacuenia Dioso tajêvelia najamatabêxaina vajatoexanavanapaenexa.

Pacuenia Dioso pejumecovênêtsivi jamatabêcuene xanepanaeya jinavanapa Jesucristo pejamatabêcueneta yabara pelivaisi

11 Panajamatabênapire pacuenia picani paxamê bajayata pajamatabêcuene itsimê tsavanapae itsa abaxê Dioso apo pajumecovênêtsimê. Paxamê apo pajudiovimê. Judiovi saicaya peperabêcaucubivitsi Dioso pijajivi penayapêtaenexa. Nexata judiovi jumai tsabiabi: “Vaxaitsi vajanacaperabêcaucubivi, Dioso pijajivitsi nayapêtanetsi,” jai tsabiabi.

Paxamē pijinia apo pajudíovixaemē, judíovi paxamē yabara jumai tsabiabi: “Bajarapamonae apo peperabēcaucubivitsi. Nexata Dioso apo pijajivi,” jaj tsabiabi judíovi paxamē yabara. ¹² Bajarapamatacabi abaxē apo pajumecovēnētsimē Cristo. Pasaicayavimē abaxē tsavanapae Diosovecua. Pasaicayavimē abaxē tsavanapae judíovi atavecua. Bajarapamatacabi abaxē apo payapētaemē pacuenia Dioso pacayavenonaejitsia papecacapanepaenexa. Mapanacuata picani abaxē naxuabiaya Diosovecua pajinavanapame. “Pamatacabi tēpaenajē, pepacuene naxuabianajē,” pajamatabējamē tsabiabi. ¹³ Paxamē picani Diosovecua bitso naxuabiaya pajinavanapame. Itsiata bailsi jane aeconoxae baja Cristo papijajivimē. Cristo papecasivatēpaexae, aeconoxae baja payajavajinavanapame Dioso. ¹⁴ Paxanē pajudíovinē, paxamē apo pajudíovi atamē, Jesucristo pejamatabēcueneta daxitatsi Dioso nacajamatabēcuenexanepanaeyaexana namataenetsia vajanasisavasanapaenexa. Jesucristo pejamatabēcueneta benacaemonaetsi Dioso nacaexana. Jesucristo daxitatsi vajanacasi- vatēpaexae, ajibi vajanayabaraitoyacuene vajanavecuanatsanaenexa. ¹⁵ Jesucristo cruzata itsa tēpa, copiarucaeyaexana baja namataenetsia vajanaitoyacuenemi. Tspaji baja Jesucristo itsa tēpa, copiarucaeyaexana palivaisimi bajayata Dioso Moiséspijinēta najumecopata. Bajarapalivaisimi paxanē pajudíovinē bitso picani asaēyata pajumecovēnētavanapajē. Nexata bajarapalivaisimi Jesucristo baja copiarucaeyaexana. Dioso Moiséspijinēta penajumecopatsilivaisi itsa pajumecovēnētavanapajē, paxamē apo pajudíovimē apo pacabarajamatabēcuenexanepanaetsi. Aeconoxae baja Jesucristo vajajumecovēnētsixae, Jesucristo pijajivitsi nacaexana. Nexata baja Jesucristo pejamatabēcueneta nacanabarajamatabēcuene xanepanaeyaexana. ¹⁶ Jesucristo cruzata vajanacasivatēpaexae, copiarucaeyaexana baja namataenetsia vajanaitoyacuenemi. Nexata paxanē pajudíovinē, paxamē pijinia apo pajudíovi atamē, Cristo baja caebitsaētotsi nacaexana pijajivinxatsi. Nexata baja Dioso jamatabēcuenexanepanaeya nacatane.

¹⁷ Jesucristo patajopa mapanacuayabetsicaje. Nexata capatsica pex- anialivaisi vajayapētaenexa daxitatsi Dioso jamatabēcuenexanepanaeya va- janacataejava. Paxamē apo pajudíovimē bitso picani Diosovecua naxuabi- aya pajinavanapame. Bajaraxuata Dioso pacatocopata Jesucristo peliv- aisi panejumecovēnētsinexa. Paxanē pajudíovinē pajumecovēnētajē picani palivaisi bajayata Dioso Moiséspijinēta najumecopata. Nexata paxanē ata Dioso panetocopata Jesucristo pelivaisi patajumecovēnētsinexa. ¹⁸ Nexata Jesucristo daxitatsi vajanacasivatēpaexae, paxanē pajudíovinē, paxamē pi- jinia apo pajudíovi atamē, vaxa Dioso nacatocopata vajajonenexa Dioso pijatomarabetsia. Bajarapacuenia vaxa Dioso nacatocopata vajajonenexa pijatomarabetsia Espiritu Santo vajanacayavenonaexae. ¹⁹ Bajaraxuata apo pajudíovi atamē, aeconoxae baja Dioso panejumecovēnētsixae, bepa- saicayavimē baja Dioso apo pacatae. Biji rajane itsamonae, Dioso pe- jumecovēnētsivi yajava, paxamē baja Dioso papeximē pacaexana Dioso pijanacuatatsia panenajuajinavanapaenexa. ²⁰ Palivaisi bajayata Diosojumepaebivi profetavi tajēvelia yaquina, Jesucristo baja cajena pelivaisi, bajarapalivaisi pajumecovēnētame baja. Paxanē ata Jesucristo papijajiv- inē, paapóstolevinē, paneitoroba patacatsipaebaponaenexa bajarapalivaisi, Jesucristo pelivaisi. Nexata bajarapalivaisi panejumecovēnētsixae, panaja- matabēcuenecopabame baja Jesucristojavabelia papecacapanepaenexa. Ba- jaraxuata Dioso baja papeximē pacaexana. ²¹ Nexata baja itsamonae ata

ayaibitsaëtoxaneto najamatabëcuenecopabapona Jesucristojavabelia. Nexata Cristo pejamatabëcueneta itorobaponatsi bajarapamonae. Daxita bajarapamonae Dioso baja pexi exanatsi. Nexata pacuenia Dioso tojitsipatsi, jinavanapa. ²² Bajara pijinia pacuenia paxamë ata, itsamonae yajava, pamonaë Jesucristojavabelia penajamatabëcuenecopabivi, caebitsaëto Dioso papeximë pacaexana. Nexata Dioso pacayajavaponapona Espíritu Santo papecatsijamatabëcaexae.

3

Pacuenia Pablo itorobatsi pexanialivaisi, Jesucristo pelivaisi, petsipae-baponaenexa apo judíovijava yabara pelivaisi

¹ Paxamë apo pajudíovi atamë, Dioso papijajivixaemë, pacatovajëtabiabatsi Diosojavabelia. Xanë Pablonë, Jesucristo pijajivitonënë. Nexata Jesucristo pelivaisi jivi tsipaebabiabajë. Nexata Jesucristo pelivaisi jivi tatsipaebabiabixae, nenaneconitsiaexaneta penaneconitsivi pejebabiabibota. Jesucristo pelivaisi jivi tatsipaebabiabijavata, jumaitsinë tsabiabi: “Pamonae apo judíovi ata, itsa jumecovënëta Jesucristo pelivaisi, bajarapamonae ata Dioso pijajivi,” janë tsabiabi paxamë yabara. Bajarapacuenia Jesucristo pelivaisi jivi tatsipaebabiabixae, penaneconitsivi pejebabiabibota tavëna judíovi neeta. ² Bepayapëtaname xanë Dioso taneitorobicuene patacatsipaebinexa apo pajudíovi atamë Dioso papecaitaxutotsoniataejava. ³ Apo pajudíovi atamë, Dioso papecaitaxutotsoniataejava tayapëtaenexa, Dioso baja cajena neyapëtaeyaexana. Dioso papecaitaxutotsoniataexae papecacapanepaejavanexa ata tayapëtaenexa, Dioso baja cajena neyapëtaeyaexana. Nexata Dioso papecaitaxutotsoniataejava paneyapëtaenexa, pacatoyaquinartutatsi caelivaisiyobeje saya. ⁴ Itsa palebianame, payapëtaename pacuenia Dioso neyapëtaeyaexana épajudíovinë Dioso apo patanitaxutotsoniataejava. Payapëtaenamenua pacuenia Dioso neyapëtaeyaexana, apo pajudíovi atamë, Dioso papecaitaxutotsoniataejava. ⁵ Bajayata abaxë itsajivijavabelia ata Dioso apo yapëtaeyaexanae, apo pajudíovi atamë, Dioso papecaitaxutotsoniataejavanexa. Aeconoxae baja paxanë Dioso papijajivinë, paapóstolevinë, Dioso paneyapëtaeyaexana, apo pajudíovi atamë, Dioso papecaitaxutotsoniataejava. Profetavijavabelia ata Dioso yapëtaeyaexana, apo pajudíovi atamë, Dioso papecaitaxutotsoniataejava. Aeconoxae baja bajarapacuenia Dioso paneyapëtaeyaexana Espíritu Santo pejamatabëcueneta. ⁶ Xua picani itsajivijavabelia ata Dioso apo yapëtaeyaexanae, bajaraxua maitsije. Paxanë pajudíovinë, itsa pajumecovënëtajë pexanialivaisi, Jesucristo pelivaisi, panecapanepaena Dioso. Bajara pijinia pacuenia paxamë ata, apo pajudíovi atamë, itsa pajumecovënëtame pexanialivaisi, Jesucristo pelivaisi, pacapanepaena Dioso. Pajudíovinë, apo pajudíovi atamë, daxitatsi benacaemon-aetsi nataenatsi. Jesucristo pelivaisi vajajumecovënëtsixae, daxitatsi Dioso nacarajutsiana xua Dioso najumecapanepaeya nacarajutsiapaeba.

⁷ Piasaënë Dioso taneitaxutotsoniataexae, netocopata Jesucristo pelivaisi tatsipaebaponaenexa daxitajivijava. Dioso necaëpayaexananua xaniavaetsia jivi tatsipaebaponaenexa bajarapalivaisi. ⁸ Xanë itsiata bevelijamatabëcuenenënë nataniji daxita Dioso pejumecovënëtsivivecua. Itsiata baitsi jane mapapexaniacueneje Dioso netocopata. Dioso netocopata apo

pajudíovimējava patacatsipaebaponaenexa pexanialivaisi, Jesucristo pelivaisi. Nexata pacatsipaebaponatsi ayaicuenia Jesucristo vajanacayavenonaponaejavanexa. ⁹ Dioso nitoroba patacatsipaebaponaenexa, apo pajudíovi atamē, Dioso papecacapanepaejavanexa. Dioso daxitacuene pexanaenē mapanacuataje. Dioso cajena tajévelia najamatabēxaina paxamē ata, apo pajudíovi atamē, papecacapanepaenexa. Itsiata itsajivijavabelia ata Dioso apo yapētaeyaexanae, apo pajudíovi atamē, Dioso papecacapanepaejavanexa. ¹⁰ Bajarapacuenia Dioso pacacapanepaena, apo pajudíovi atamē, petsitanajamatabēcuene itajētsinexa athēbētatsia pevetsivijavabelia. Nexata athēbētatsia pevetsivi itša nacataena daxitatsi Dioso vajumecovēnētsivi, pajudíovinē, apo pajudíovi atamē, benacaemonaetsi vajanajuajinavanapaejava, athēbētatsia pevetsivi yapētaena bitso Dioso peyapētaenēcuene daxitacuene pexanaenexa. ¹¹ Pacuenia Dioso tajévelia copiaya najamatabēxaina, mapanacua pexanaevajēnaeya ataje, bajarapacuenia baja Dioso exanaevereta. Tshipaji baja Dioso itorobica vajatuxanenē Jesucristo vajanacasivatēpaenexa cruzata. ¹² Vaxaitsi baja najamatabēcuene copatatsi Jesucristojavabelia vajanacapanepaenexa. Bajaraxuata Diosojavabelia vajētabiabatsi ajumejunavijibia. ¹³ Bajaraxuata Diosojavabelia asaēyata pacatovajētabiabatsi patanesivajamatabēcuene cueranaeyanivamē abaxē naneconitsia taponaponaejava penaneconitsivi pejebabiabota. Jesucristo pelivaisi jivi tatsipaebijavata, jumaitšinē tsabiabi: “Pamonae apo judíovi ata itša jumecovēnēta Jesucristo pelivaisi, bajarapamonae ata Dioso pijajivi,” janē tsabiabi paxamē yabara. Bajarapacuenia Jesucristo pelivaisi jivi tatsipaebabiabixae, penaneconitsivi pejebabiabibota tavēna judíovi nenaneconitsiaexaneta. Bajaraxuata panesivajamatabēcuene barēyamēre naneconitsia taponaponaejava penaneconitsivi pejebabiabibota.

Pacuenia Pablo Diosojavabelia tovajēta Dioso pejumecovēnētsivi yabara pelivaisi

¹⁴ Itša najamatabēnapitabiabajā, apo pajudíovi atamē, Dioso papecacapanepaejavanexa, nexata tamatabacabēta nucabiabajā asaēyata pacatovajētsinexa vajatuxanenē Jesucristo paxa Diosojavabelia. ¹⁵ Daxita Dioso pijajivi, pamonae athēbētatsia jinavanapa, pamonae ata mapanacuataje jinavanapa, daxita bajarapamonae Dioso tanetsi benacaemonae. Caenē paxa exana Dioso. ¹⁶ Dioso baja cajena bitso piasaenē. Ayajamatabēcuene pexinaenē. Bajaraxuata pacatovajētabiabatsi Diosojavabelia Dioso pesaēta papecajamatabēcuene asaēyaexanaenexa Espiritu Santo pejamatabēcueneta. ¹⁷ Pacatovajētabiabatsinua Jesucristo papecatsijamatabēcaenexa panesivanajamatabēcopatsixae bajaraponējavabelia. Pacatovajētabiabatsinua bitso paneasivanexa itsamonae ata, pamonae Dioso pejumecovēnētsivi. ¹⁸ Pacatovajētabiabatsinua daxita Dioso panejumecovēnētsivi panejamatabēcuenyapētaenexa Jesucristo bitso papecaasivajava. ¹⁹ Pacatovajētabiabatsinua panijacuata xaniavaetsia paneyapētaenexa Jesucristo vajanacaasivajava. Jesucristo vajanacaasivajava, bitso pexaniacuene, apo vajayapētaecapanepaejava xaniavaetsia vajayapētaenexa. Nexata itša payapētaenae Jesucristo vajanacaasivajava, paxainaname pajamatabēcuene Dioso pacatojitsipa. ²⁰ “Diosomē, bitso ayajamatabēcuenenēmē,” jaitsi vaxaitsi Diosojavabelia. Bajarapacuenia jumaittsiti tshipaji bitso Dioso pecaejēpaenētsi vajanacayavenonaenexa. Dioso caējēpatsi vajanacatoexanaenexa

vajavajëtsicuenia. Vajanajamatabëxainaejava ata matatoxenetsia, Dioso caëjëpatsi vajanacatoexanaenexa. Dioso pesaëta nacayavenonabiaba. ²¹ Dioso pejumecovënëtsivi Dioso peyavenonaponaxaetsi, itsamonaëjavabelia tsipaebavanapa Dioso bitso ayaijamatabëcuene pexainaeñe. Jesucristo ata itsa ponapona mapanacuataje, nexata Dioso tsitanajamatabëcueneitajëta jivijavabelia Dioso bitso ayaijamatabëcuene pexainaeñe. Bajaraxuata daxitajivi bejumai tsabiabi Diosojavabelia: “iDiosomë, bitso ayaijamatabëcuenenëmë!” bejai tsabiabi Diosojavabelia daxitamatacabijavabelianexa. Bajara itsi tsane.

4

Pacuenia Espiritu Santo pejamatabëcueneta daxita Dioso pejumecovënëtsivi najamatabëcuenejëpaeya jinavanapaena yabara pelivaisi

¹ Naneconitsiaponaponajë majotaje, penaneconitsivi pejebabiabibota, tajumecovënëtsixae vajatuxanenë Jesucristo taneitorobicuenia. Asaëyata pacamuxujibatsi panejinavanapaenexa pacuenia Dioso pacatojitsipa Dioso papecajunatsivi papijajivinxamë. ² Itsamonaevécua beveliamatabëcuenevi nataeya pajinavanapare. Panajamatabëxainarenua pexaniajamatabëcuene daxitajivijavabelia. Pajamatabëcuenesaëmërenua tsavanapae bajayajebi, itsamonaë pacaitsacueniababiabi ata. Namataenetsianua panayavenonabiabare namataenetsia panenasivaxae. ³ Pajamatabëcuenesaëmëre tsavanapae najamatabëcuenejëpaeya panejinavanapaenexa. Bajaraxua yabara Diosojavabelia panatovajëtabiabare papecayavenonaenexa Espiritu Santo. Nexata nabaramatabëcuenexanepanaeya pajinavanapaename. ⁴ Jesucristojavabelia vajanajamatabëcuene copatsixae, vaxaitsi baja nexata caenë Jesucristo pijajivitsi. Xainatsi baja caeEspiritu Santo Dioso vajanacajunatsivi. Bajaraxuata caejamatabëcuene xainavanapatsi. Evetavanapatsi pacuenia Dioso najumecapanepaeya jumaitsi vajanacapanepaenexa. ⁵ Caenë rabaja vajatuxanenë Jesucristo. Daxitatsi najamatabëcuene copatatsi caenëjavabelia. Nacabautisabanua caenë Jesucristo pevënëta. ⁶ Xainatsi caenë vaxa Dioso. Caenë Dioso daxitatsi vajanacanamatacaitorobinë. Dioso pijajivitsi, daxitatsi, nacayavenona. Nacayajavaponaponatsi.

⁷ Caejivitsi canacujitsia, Cristo pejitsipacuenia nacajamatabëcuene caëjëpaeyaexanapona pecovëta vajatonacuenebavanapaenexa vajanacaitorobicuenia. ⁸ Tsipaji baja cajena Dioso pejumelivaisibaxutota tajëvelia jumaitsi Jesucristo yabara mapacueniaje:

Ayaibitsaëtoxaneto pitoyavitsi pepuajamatabëcueneamoneyabi, athëbëabetsia naviatsiania. Pijajivi pijinia pepuajamatabëcuene caëjëpaeyaexanae pecaëjëpaejamatabëcuenetsi pecovëta petonacuenebavanapaenexatsi, naviatsiania, jai tajëvelia Dioso pejumelivaisibaxutota Jesucristo yabara.

⁹ Bajarapacuenia Dioso pejumelivaisibaxutota Jesús yabara tajëvelia jumaitsi. Tsipaji Jesús patsijitsiatsica mapanacuayabetsicaje. Bajaraxuacujinae icatsia Jesús naviatsijitsia athëbëabetsia. Mapanacuaje bevelianacua saya Dioso pijanacuavecua. ¹⁰ Ponë yabara Dioso pejumelivaisibaxutota bajarapacuenia tajëvelia jumaitsi, patsica baja mapanacuayabetsicaje. Bajaraxuacujinae icatsia bajaraponë naviatsia baja tajënacuyabetsia. Bajaraxuacujinae Jesucristo itorobica Espiritu Santo. Nexata daxitanacuanëjava Espiritu Santo yajavaponapona daxita Dioso pejumecovënëtsivi. ¹¹ Nexata Dioso pejumecovënëtsivi,

caejivi canacujitsia, Espíritu Santo jamatabëcuene caējëpaeyaexanaponatsi saicayacuenia. Itsamonae Espíritu Santo jamatabëcuene caējëpaeyaexanatsi apóstolevinexa Jesucristo pexanaejavanë pevajunupaebaponaenexa. Itsamonae pijinia Espíritu Santo jamatabëcuene caējëpaeyaexanatsi peyapëtaenexa pajamatabëcuene livaisi xaina Dioso pejumelivaisi. Nexata tsipaeba itsamonaejavabelia. Itsamonae pijinia Espíritu Santo jamatabëcuene caējëpaeyaexanatsi petsipaebaponaenexa apo peyapëtaevi abaxë pexanialivaisi, Jesucristo pelivaisi. Itsamonae pijinia Espíritu Santo jamatabëcuene caējëpaeyaexanatsi pevetsinexa Dioso pejumecovënëtsivi. Jamatabëcuene caējëpaeyaexanatsinua xaniavaetsia peyapëtaeyaexanaenexa Dioso pijacuene. ¹² Bajarapacuenia Espíritu Santo, daxita Dioso pejumecovënëtsivi, jamatabëcuene caējëpaeyaexanatsi petonacuenebavanapaenexa Dioso pijacuene. Nexata daxita Dioso pejumecovënëtsivi, caejivi canacujitsia, ajamatabëcuene saë tsaponae pevajënaeyabelia. ¹³ Nexata belia daxitatsi bajarapacuenia najamatabëcuene jëpaeya jumecovënëtsianatsi Dioso. Jamatabëcuene yapëtaenatsinua xaniavaetsia vajatuxanenë Jesucristo, Dioso pexënat. Nexata daxitatsi Espíritu Santo nacajamatabëcuene caējëpaeyaexanaena Dioso vajajumecovënëtsinexa. Nacajamatabëcuene caējëpaeyaexanaenanua xaniavaetsia Dioso vajatojinavanapaenexa. Nexata pacuenia Jesucristo jamatabëcuene itsi, bajara vaxaitsi ata jamatabëcuene itsi tsane. Nexata jinavanapaenatsi pacuenia Dioso nacatojitsipa. ¹⁴ Nexata pacuenia pejevaxi caejamatabëcuene apo najamatabëxainae, bajara vaxaitsi apo jamatabëcuene itsi tsane. Itsajamatabëcuene apo vecuanajamatabëxainae itsi tsane, palivaisi baja jumecovënëtavanapatsi. Nexata itsamonae penajumetsënëtsilivaisi bepexaniajailivaisicuenia nacatsipaebi ata tsane vajanacayamaxëitojorobinexa picani, itsiata apo nacayamaxëitojorobi tsane. ¹⁵ Nexata itsamonaejavabelia itsa tsipaebapontatsi pexaniajailivaisi, bajarapamonae asivaya betanetsi. Pacuenia Cristo vajanacaitorobinë jamatabëcuene itsi, bajara vaxaitsi ata vajajamatabëcuene itsinexa, benatojitsipatsi Cristo vajajamatabëcuene jëpaenexa. ¹⁶ Daxitatsi Cristo pelivaisi vajajumecovënëtsivi, caenë Cristo pijajivitsi. Vajaperabëtota caevitoyo canacujitsia exanapona pacuenia Dioso tocopatatsi. Bajara pijinia pacuenia vaxaitsi ata, caejivitsi canacujitsia, Cristo nacatocopatapona vajatonacuenebavanapaenexa pacuenia nacatojitsipa. Nexata namataenetsia nayavenonaeya natonacuenebianatsi. Namataenetsianua nasivatsi tsavanapae tsane. Bajarapacuenia nexata jamatabëcuene vitsabaponaenatsi Dioso vajajumecovënëtsijava.

Pacuenia Cristo pijajivi pejanajamatabëcuene xaina yabara pelivaisi

¹⁷ Jesucristo taneitorobixae, mapacuenia pacajumaitsijitsiatsije. Pëtsa baja pajinavanapame pacuenia jinavanapa Dioso apo peyapëtaevi. Dioso apo pejumecovënëtsivi najamatabëxainavanapa pexanaenexa piamatamobicuene Diosojavabelia. ¹⁸ Dioso apo pejumecovënëtsivi ajamatabëcuene itaquiri tsavanapae. Tsipaji apo yapëtae Dioso. Bitso saya ajamatabëcuene taja. Bajaraxuata Dioso pejitsipaenexa apo tojinavanapae. Diosovecua naxuabiaya jinavanapa. ¹⁹ Nexata apo yapëtae piauracuene. Casaë bitso pexanaenexa daxita xua pibisiacuene. ²⁰ Itsiata baitsi jane paxamë itsa pajumecovënëtame Jesucristo pelivaisi, apo pacaitorobi pibisiacuene paneexanaenexa. ²¹ Pajumetaneme baja cajena Jesucristo pelivaisi. Jesucristo pelivaisi panejumecovënëtsixae, nexata Jesucristo pijajivi pacatsipaeba pexaniajailivaisi pacuenia copiaya Jesucristo tsipaebatsi. ²² Nexata

pacopabare panijaperujamatabëcuene. Bajarapajamatabëcuene bajayata abaxë Dioso itsa apo pajumecovënëtsimë, pacaitorobabiaba pibisiacuene paneexanaenexa. Panijaperujamatabëcuene cajena bitso abeje. Bajarapajamatabëcuene picani pacayamaxëitojorobabiaba panejitsipaecuenia pibisiacuene paneexanaenexa. ²³ Paxamë Diosojavabelia panajamatabëcuenepeñëyorore. Papejanajamatabëcuenevimë panaexanare. ²⁴ Pacuenia Dioso jamatabëcueneitsi, bajara paxamë ata pajamatabëcueneitsimëre. Nexata jivi xaniavaetsia patsitajinavanapaename pacuenia Dioso pacatojitsipa.

²⁵ Bajaraxuata pëtsa baja panajumetsënëtamë. Pacaenëmë canacujitsia namataenetsia panatsipaebare pexaniajallivaisi. Tsipaji daxitatsi caenë Jesucristo pijajivitsi.

²⁶ Itsa panabaraanaepaname, pëtsa pibisiacuene panaexaname panenabaraanaepanaejavata. Pëtsa panasivajamatabëcueneitsitecame itsamatacabijavabelia ata. ²⁷ Tsipaji itsa panasivajamatabëcuene tsitecaejitsipame, nexata dovathi pacayamaxëitojorobijitsipa. Nexata pibisiacuene paexanaejitsipame.

²⁸ Pajivi penacobetoxotsijivi, copatsi baja penacobetoxotabiabijava. Nacuenebi pepitsinexa xua namatavenona, peyavenonaenexanua bepejiobivijavabelia.

²⁹ Pëtsa pacuaicuajamë pibisialivaisi. Biji rajane pacuaicuajamëre pexanialivaisi. Pexanialivaisi itsa pacuaicuajamë tsane, nexata papecajumetaevi pajamatabëcuene yavenonaename. Tsipaji paepatota jamatabëcuenefaefaena, itsa pacajumetaena, pacamuxunaajamatabëcuenesaë tsane. ³⁰ Pëtsa itsacuene paexaname Espíritu Santo papecatojitsipaecuevecu panejamatabëcuenebejibitsiyaniva Espíritu Santo. Dioso pijaEspíritu Santo papecatsijamatabëcaexae, panayapëtaneme pepacuene Dioso papijajivicuenemë. Nexata Dioso pacacapanepaena pamatacabi Dioso pijajivi capanepaena mapanacuavecuaje.

³¹ Daxita pibisijamatabëcuene pacopabare. Pacopabarena baja, itsajivi itsa pacaitsacueniaba, bajayajebi panejamatabësitecabiabijava. Pëtsa bajayajebi pajamatabësitecame paneanaepanaejava. Bepijia pajamatabëcaevare. Pacopabarena baja paneajamatabëcuenebejejava ata. Pacopabarena baja panenabaraanaepanabiabijava ata. Pacopabarena baja itsamonae pibisiacuenia panebijataeyabiabijava ata. Pacopabarena baja itsamonae pibisiacuenia panebaracuaicuajaitsabiabijava ata.

³² Biji rajane pexaniajamatabëcuene paxainare. Namataenetsia panaitaxutobejiobiataema. Pacuenia Jesucristo pejamatabëcueneta Dioso pacabarajamatabëcuenexanepana pibisiacuene paneexanaevi ata, bajara pijinia pacuenia paxamë ata panabarajamatabëcuenexanepanare, paxamëyajuvënëvi pacaitsacueniabi ata.

5

Pacuenia Dioso pexi bejinavanapa yabara pelivaisi

¹ Paxamë Dioso papeximë. Pacuenia Dioso jamatabëcueneitsi, bajara paxamë ata pajamatabëcueneitsimëre tsavanapae. ² Pacuenia bitso Cristo nacaasiva, bajara pijinia pacuenia paxamë ata bitso pasivamëre tsavanapae itsamonae ata. Bajayata judíovi Diosojavabelia pijaneconi itsa xaina, oveja pebito beyaxuababiaba. Nexata judíovi ofrendacuenia ovejavi rajutabiaba

Diosojavabelia pijaneconi Dioso pevecuaajibiaexanaenexatsi. Bajara pijinia pacuenia Cristo bitso vajanacaasivaxae, nacopata pebeyaxuabinexatsi vaxaitsi vajaneconi vajanacavecuajibiaexanaenexa. Bajarapacuenia Cristo bitso vajanacaasivaxae, ita nacopata vajanacasivatēpaenexa, nexata paxa Dioso bitso sivajamatabēcuenebarēyatsi.

³ Paxamē rabaja Dioso papijajivimē. Bajaraxuata pētsa baja paexaname daxita xua pibisiacuene. Pētsa panajamatabēxainamenua pibisiacuene paneexanaenexa panevitota. Pētsa panajamatabēxainamenua bitso pananaxainaeyabinexa daxitacuene mapanacuapijicueneje.

⁴ Pētsa panabarēcuaiacuajiamēnua piauracuene yabara ata. Pētsa panabarēcuaiacuajiamēnua saya jema natsiquejemalivaisixi ata. Tsipaji apo pexanepanaecuene. Biji rajane Diosojavabelia pexaniajamatabēcuene parajutabiabianame. ⁵ Payapētaneme rabaja pexaniajaicuene mapalivaisije. Pajivi daxita pibisiacuene exana, apo jone tsane Dioso pijanacuayabetsia. Ponē jaita itsava pijavavecu, pova pijinia jaita itsanē pamonavecu, apo jone tsane Dioso pijanacuayabetsia. Pamonaē ata bitso jitsipa pexainaenexa daxitacuene mapanacuapijicueneje, apo jone tsane Dioso pijanacuayabetsia. Pamonaē bitso jitsipa pexainaenexa daxitacuene mapanacuapijicueneje, jamatabēcuenejēpa pamonaē vajēcabiaba jumapecataeya pexanaenēanējavabelia. Bajarapamonaē jamatabēcuenejēpa tsipaji bitso jitsipa saicayacuene Diosovecu. ⁶ Pētsa pacayamaxēitojoroba itsajivi ata paxamē ata paneexanaenexa bajarapitsipibisiacuene. Tsipaji Dioso ayaiucenia naneconitsiaexanaena pamonaē Dioso apo pejumecovēnētisivi, bajarapitsipibisiacuene pexanaēvi. ⁷ Bajaraxuata pētsa payajavajinavanapame pibisiacuene pexanaēvi.

⁸ Paxamē picani bajayata pajamatabēcueneaitaquirimē tsavanapae ita abaxē apo payapētaemē pexanialivaisi, Jesucristo pelivaisi. Itsiata baitsi jane aeconoxae baja Jesucristojavabelia panenajamatabēcopatsixae, Dioso baja pacajamatabēcueneitayota. Bajaraxuata pajinavanapare Dioso pejitsipaecuenia, pacuenia Dioso pijajivi jinavanapa. ⁹ Dioso baja papecajamatabēcueneitayotsixae pexanialivaisita, paexanavanapare ēpexaniacuene. Pacanaējētaponarenua ēpexaniajaicuene paneyapētaenexa, xaniavaetsia panejinavanapaenexa Dioso pejitsipaecuenia.

¹⁰ Panevajēnaeyabelia pacanaējētaponare paneyapētaenexa xua yabara Dioso pacasivajamatabēcuene barēyajitsia. Nexata ita payapētaeneme xua yabara Dioso pacasivajamatabēcuene barēyajitsia, bajaraxua tsiteca asaēyata panevajēnaeyabelia paexanavanapaeneme. ¹¹ Dioso apo pejumecovēnētisivi pibisiacuene ita exanavanapa, pētsa panaexaname bajarapapibisiacuene. Biji rajane paitavetsianame bajarapamonaē pibisiacuene pexanaeyaniva Dioso pitabarata. ¹² Xua bajarapamonaē exana muetsia, bajaraxua bitso pibisiacuene. Nexata itsajivi ita cuenetaejitsipatsi bajaraxua pexanaejava, bajarapajivi bitso ajumeura tsipae juya petsipaebinexa itsamonaejavabelia. Tsipaji bitso pibisiacuene xua muetsia exana bajarapamonaē. ¹³ Itsiata baitsi jane bajarapamonaē ita paitavetsianame Dioso pejumelivaisita, nacueneyapētaena bajarapamonaē bitso pibisiacuene pexanaejava. ¹⁴ Bajaraxuata pina bajarapamonaē yabara, itsamonaē Dioso pijajivi jumaitsi mapacueniaje:

Jamatejema saya pajinavanapame, pibisiacuene paexanavanapae atamē. Bajaraxuata Diosovecu naxuabiaya pajinavanapame. Pacopabare baja pitaquirijamatabēcuene. Nexata Cristo pejamatabēcueneta panijaneconivecu Dioso pacacapanepaena. Pacajamatabēcueneitayotsiana,

jai pina itsamonae Dioso pijajivi.

¹⁵ Nexata baja xania tsane. Panayajivitaema pibisiacuene xaniavaetsia panejinavanapaenexa. Pëtsa pajinavanapame pacuenia bajinavanapa Dioso apo peyapëtaevi. Biji rajane pajinavanapare pacuenia bajinavanapa bitso peyapëtaevi Dioso pijacuene. ¹⁶ Dioso papecaitorobicuena xaniavaetsia patojinavanapare daxitamatacabijavabelianexa. Pamuxujobiabare itsamonae ata Cristo pelivaisi pejumecovënëtsinexa. Tsi-paji mapanacuapijivije, Dioso apo pejumecovënëtsivi, ëpibisiacuene exanavanapa. ¹⁷ Pëtsa pajinavanapame pacuenia Dioso apo peyapëtaevi jinavanapa. Pacaasaëmëre tsavanapae Dioso panejumecovënëtsijava, pacuenia Dioso pacatojitsipa paneexanavanapaenexa. ¹⁸ Pëtsa paitajibimë tsabiabi. Tsi-paji bajarapacuenia Diosovecua pacanaxuabiaexanaejitsipa in-fiernojavabelia. Biji rajane panacopatabiabarë Espiritu Santo papecat-sijamatabëvënëcaenexa, Espiritu Santo papecaitorobicuena paneexanabi-abinexa. ¹⁹ Namataenetsia panatsipaebabiabarë vajatuxanenë ayaijamatabëcuene pexainaecuene. Bajarapacuenia namataenetsia itsa panatsipaebabiabianame, daxita panejamatabëëthëtovetsina panaxëanabiabianame pavajianë rubena Salmosbaxutota. Panaxëanabiabianamenua himnobaxutota ata pavajianë rubena. Panaxëanabiabianamenua pavaji ata Espiritu Santo jemata pacanaxëanaeyaexanaena. ²⁰ Pajumaitsimë tsabiabi tsane Diosojavabelia: “Xanepana rabaja. Tsi-paji bitso pexaniacuene panetoexaname,” pajamë tsabiabi tsane daxitacuene yabara vaxa Diosojavabelia vajatuxanenë Jesucristo pevënëta. Bajarapacuenia Diosojavabelia pajumaitsimë tsabiabi tsane pexanepanaecuene yabara, apo pexanepanaecuene ata yabara.

Pacuenia muxujibatsi penapitsijivibeje yabara pelivaisi

²¹ Padaxitamë namataenetsia panajamatabëcueneevere, xua jamatabëpanaitorobame, namataenetsia panenaitorobabiabinexa Cristo panejumecovënëtsivixae.

²² Paxamë papetirivimë, pacuenia yaiyataeya pajumecovënëtabiabarë vajatuxanenë Jesucristo papecaitorobicuena, bajara pijinia pacuenia yaiyataeya pajumecovënëtabiabarë paneamonajivi ata. ²³ Pacuenia Cristo Dioso tocopatatsi daxita vaxaitsi Dioso vajajumecovënëtsivi vajanacaitorobinexa, bajara pijinia pacuenia pebi Dioso tocopatatsi pijava pitorobinexa. Cristo nacopata pebeyaxuabinexatsi vajanacapanepaenexa daxita vaxaitsi vajanajamatabëcuene copatsivi Cristojavabelia. Daxitatsi caenë Cristo pijajivitsi. ²⁴ Nexata bejumecovënëtavapatsi pacuenia nacaitorobapona Cristo. Bajara pijinia pacuenia paxamë ata, papetirivimë, bepajumecovënëtavapame daxita pacuenia pacaitoroba paneamonajivi.

²⁵ Paxamë pijinia papebijivimë, pasivamëre panijavajivi. Bepaasivamë panivajivi pacuenia daxitatsi Cristo nacaasiva daxita Dioso vajajumecovënëtsivi. Vajanacaasivaxae, Cristo nacopata pebeyaxuabinexatsi vajanacapanepaenexa vajaneconivecua. ²⁶ Bajarapacuenia Cristo exana caenë Cristo pijajivitsi vajanacaexanaenexa. Nexata baja Cristo vajanacaajamatabëcuene xuirajibiaexanaejava, najamatabëcueneitajëtatsi vajanacabautisabijavata. Vajajumecovënëtavapapaexae Dioso pejumelivaisi, nacaajamatabëcuene xuirajibiaexanapona. ²⁷ Bajarapacuenia Cristo exana daxita Dioso vajajumecovënëtsivi itsamatacabi vajanubenaenexa Cristo pitabarata. Nexata itsamatacabi nubenaenatsi Cristo pitabarata vajaneconijibivi, Dioso vajanacajamatabëcuene xaniavaetsivi. ²⁸ Nexata pebijivi bitso biasiva pijavajivi. Pacuenia pijacuata naperabëasiva, bajarapacuenia biasiva pijavajivi. Nexata ponë asiva pijava, bajaraponë asiva

pijava pacuenia pijacuata naperabēasiva. ²⁹ Itsajivi ata apo naperabēitoja. Biji rajane xaniavaetsia naperabēeveta. Bajara pijinia pacuenia Cristo ata nacaevea daxita Dioso vajajumecovēnētsivi. ³⁰ Tsipaji vaxaitsi Cristo pijajivitsi, ayaibitsaēto atatsi, becaejivitsi Dioso nacatane. ³¹ Nexata nayapētane pexaniajaicuene mapacueneye. Pebi petiriva itsa pita pijavanexa, naexanabeje becaejivi peperabētocuenia. Tsipaji Dioso pejumelivaisibaxutota jumaitsi mapacueniaje: “Pebi itsa nacojioba, paxavecua, pena atavecua, bavecuanatsata pijavajavabelia. Nexata anijajivimibeje becaejivicuenia naexanabeje,” jai Dioso pejumelivaisibaxutota. ³² Mapalivaisije bitso ayapēbeje vajajumeyapētaenexa. Itsiata baitsi jane comparacióncuenia nacayapētaeyaexana. Cristo vajanacaavaxae, vaxaitsi Cristo pijajivitsi Dioso nacatane becaenē Cristo peperabētotsi. ³³ Bajarapalivaisi comparacióncuenia pacayapētaeyaexana nexata paxamē, pacaenēmē canacujitsia, paneasivanexa panijavajivi. Nexata panijavajivi pasivamēre. Pacuenia panijacuata panaperabēasivamē, bajara pijinia pacuenia panijavajivi pasivamēre. Panijavajivi ata pijinia bepacayaiyatane.

6

¹ Paxamē papeximē, Dioso panejumecovēnētsivixae, pajumecovēnētabiabare paneaxajivi, paneenajivi ata. Bajarapacuenia panijamonae pajumecovēnētabiabare. Tsipaji bajarapacuenia Dioso pacatocopata panejumecovēnētabinexa panijamonae. ²⁻³ Dioso pejumelivaisibaxutota jumaitsi mapacueniaje: “Yaiyataema axa. Yaiyataema ena ata nejamatabēcuenebarēyanexa, neponaponanexanua bajajajebi mapanacuataje,” jai Dioso pejumelivaisibaxutota. Bajarapalivaisi Dioso itsa najumecopata jivi pejumecovēnētsinexa, yajavanajumecopata pacuenia Dioso yavenonaejitsia pajivi jumecovēnēta bajarapalivaisi. Itsalivaisianē coplaya Dioso najumecopatsi ata, apo yajavanajumecopatsi pacuenia yavenonaejitsia pajivi jumecovēnēta bajarapalivaisianē. Nexata matapania mapalivaisitaje Dioso yajavanajumecopata pacuenia yavenonaejitsia pajivi jumecovēnēta bajarapalivaisi.

⁴ Paxamē panexi panexainaevi, anaeyacuenia pētsa panexi paitorobabiabame papecabaraanaepanaeyaniva. Biji rajane xaniavaetsia panacoxivitsare papecajumecovēnētabinexa paneitorobjava. Pacujarubarenua Dioso pejumelivaisi pejumecovēnētsinexa.

⁵ Paxamē pijinia itsamonae papijajivimē, dajubicuenia papeccanajetsivi, itsamonae amoneya patonacuenebavanapaenexa. Patoexanabiabare pacuenia panijatuxanevi pacaitoroba. Payaiyataema panijatuxanevi. Cujunaviaya panijatuxanevi patonacuenebabiabare asaēyata. Pacuenia Cristo panejitsipaexae, xaniavaetsia patonacuenebabiabame Cristo pijacuene, bajara pijinia pacuenia xaniavaetsia panijatuxanevi patonacuenebabiabare.

⁶ Xaniavaetsia panijatuxanevi patonacuenebabiabare daxitamatacabi canacujitsia pacuenia patonacuenebijitsipame Cristo. Pētsa matapania itsajota pacanaitaxutocaeveta panijatuxanevi, asaēyata patonacuenebame papecasivabarēyanexa panetonacuenebijava yabara. Patoexanabiabare panijatuxanevi pacuenia Dioso pacatojitsipa panetoexanaenexa daxita panejamatabēēthētovetsina. ⁷ Jamatabēcuenebarēyaya patonacuenebavanapare panijatuxanevi. Xua panijatuxanevi patonacuenebavanapame, bajaraxua yabara pasivajamatabējumaitsimēre: “Maxuaje nacuenebajē apo ētajatuxanenēnexa. Taniji pepo tajatuxanenē, Cristo, betatonacuenebijava,” pasivajamatabējamēre panijatuxanevi panetonacuenebijava yabara.

⁸ Payapëtaneme rabaja mapacueneye. Pajivi pexaniacuene toexana itsamonae ata, bajarapajivi matamotsianatsi Dioso. Pamonaе ata dajubicuenia canajetatsi itsamonae amoneya petonacuenebabiabinexa, bajarapamonaе ata Dioso matamotsianatsi pexaniacuene itsa toexana itsamonae ata. Pamonaе ata apo pecanajetsivitsi, bajara pijinia pacuenia bajarapamonaе ata Dioso matamotsianatsi pexaniacuene itsa toexana itsamonae ata.

⁹ Paxamë pijinia papijatuxanevimë, pacamuxujiobatsi mapacueniaje. Xaniavaetsia pataema panijajivi, papecatonacuenebivi. Pëtsa anaeya patiobabiabame panijajivi asaëya papecatonacuenebabiabinexa. Pacanaëjere pacuenia paxamë ata panijatuxanenë Dioso eca athëbëtatsta. Pamonaе ata apo pecanaia. Bajaraponëjavabelia pananeconitsipame. Bajaraponë panijajivi ata pijatuxanenë baja cajena. Bajaraponë saya najëpaeya nacatane daxitatsi. Nexata paneconivajëto xainatsi caevivitsi canacujitsia, bajarapaneconivajëto nacanconivitsiaexanaponaena. Bajaraxuata panijajivi ata itorobajë xaniavaetsia papecatonacuenebabiabinexa.

Pacuenia Dioso pejumecovënëtsivi itorobatsi penayajivitaenexa dovathi yabara pelivaisi

¹⁰ Tajamonaе, icatsia cotocaevi patacatoyaquinaelivaisita, pacajumaitsitsi mapacueniaje. Pajamatabëcuenesaëmëre tsavanapae vajatuxanenë pesaë paneyajavajinavanapaexae. ¹¹ Vajabitsaënë banayajivinaxatata piatajajava pijavajabitsaënë pejorojoronaeyanivatsi. Bajara pijinia pacuenia paxamë ata panayajivinajamatabëcuenexatare Dioso pejumelivaisita. Nexata bajarapacuenia pajamatabëcuenesaëmë tsane dovathi papecajamatabëcuene yamaxëitojorobiyanima.

¹² Tspaji Dioso vajanacatojitsipaecuenia itsa exanavanapatsi, nexata dovathi jamatabënacaitacueniaba. Nexata bëpënëa vajajamatabëcuenesaëta asaëyata vajabitsaë hexanatsi, dovathi pijajivijavabelia, apo vajataevijavabelia. Dovathi cajena pijajivi ayaibitsaëtoxaneto. Dovathi pijajivi xaina penamatacaitorobivitsi, bitso pijamatabëcuenesaëvi. Nexata dovathi pijajivi jinavanapa athëbëtatsta. Jinavanapa mapanacuata ataje. Nexata dovathi pijajivi itoroba daxitajivi pibisiacuene pexanaeyaexanaenexatsi mapanacuataje. Bajaraxuata bëpënëa vajajamatabëcuenesaëta, asaëyata vajabitsaë hexanatsi dovathi pijajivijavabelia. ¹³ Nexata paxamë dovathi papecajamatabëcuene yamaxëitojorobiyanima, panayajivinajamatabëcuenexatare Dioso pejumelivaisita. Nexata pamatacabi pibisiacuene pacatocopiapatsiana dovathi pejamatabëcueneta papecajamatabëcuenejëtsinexa, itsiata pajamatabëcuenesaëmë tsane bajarapalivaisita. Nexata pibisiacuene apo paexanaëmë tsane. ¹⁴ Vajabitsaënë itsa nayajivinaxatata piatajajava, caecovëta banuca. Nexata pijavajabitsaë apo titsitsi pecovëvecua. Bajara pijinia pacuenia paxamë ata pajamatabëcuenesaëmëre Dioso pejumelivaisita dovathi papecajopaeyaexanaeyanima Dioso pejumelivaisi panejumecovënëtsijavavecua. Vajabitsaënë piatajajava itsa nayajivinaxatata, bayanaepacëta penaepacëtsijavata pesarabiyanivatsi penayajivinaxatatsijava. Bajara pijinia pacuenia paxamë ata Dioso pejumelivaisita, pexaniajailivaisita, panayajivinajamatabëcuenexatare. Vajabitsaënë piatajajava banamëpabëxatata pijavajabitsaënë pejorojoronaeyanivatsi. Bajara pijinia pacuenia paxamë ata Dioso pejumelivaisita panayajivinajamatabëcuenexatare. Pajamatabënajinavanapare Dioso baja aneconijibia papecataejava. Nexata dovathi nayajivitaeya pajinavanapare papecajamatabëcuene yamaxëitojorobiyanima.

¹⁵ Vajabitsaënë najamatabëcueneveretsiaya pexaniazapato banataxuxatata

pijavajabitsaëjavabelia jamatejema peponaenexa. Bajara pijinia pacuenia paxamë ata panajamatabëcueneverere, jamatejema pexanialivaisi jivi panetsipaebavanapaenexa. Daxita baja pamonae jumecovënëta bajarapalivaisi, Dioso baja barajamatabëcuenexanepanaeya tanetsi. ¹⁶ Panajamatabëcuenecopare Diosojavelia papecayavenonabiabinexa. Vajabitsaënë banayajivicaona escudovënëjava, pijavajabitsaënë itsa bixabajarabatsi piipiitarunutsipuyaeneta, penacaranatsinexa bajarapaescudota, penayajiviitacaëbinexanua. Bajara pijinia pacuenia paxamë ata dovathivecua Dioso pacajamatabëcuenecaranatsiana, itsa panajamatabëcuenecopatsianame Diosojavelia papecayavenonabiabinexa. ¹⁷ Vajabitsaënë banamataxatata piatajajava, cascovënëjava, pematathinaxuabiyaniivatsi pijavajabitsaënë. Bajara pijinia pacuenia paxamë ata panayajivinajamatabëcuenexatare Dioso pejumelivaisita. Pajumecovënëre papecacapanepaelivaisinexa panijaneconivecua. Vajabitsaënë itsa pona pijavajabitsaëjavabelia, banayajivicaona espada. Bajara pijinia pacuenia paxamë ata panayajivicaonare Dioso pejumelivaisi, palivaisi baja pacayapëtaeyaexana Espíritu Santo. ¹⁸ Dioso pejumelivaisita najamatabëcuenexatatsiaya itsa pajinavanapaename, nexata pacuenia Espíritu Santo pacaitoroba, daxitamatacabi canacujitsia Diosojavelia pavajëtabiabianame Dioso papecajamatabëcuene yavenonabiabinexa. Pajamatabëcueneitatsacamëre tsavanapae dovathi papecajamatabëcuene yamaxëitojorobiyaniiva. Nexata pacopatsinejevamë Diosojavelia panevajëtabiabijava, ajamatabëcueneitatsacaya Diosojavelia panayajivi-vajëtabiabare. Asaëyata patovajëtabiabarena daxita Dioso pejumecovënëtsivi. ¹⁹ Xanë ata panetovajëtabiabarena Dioso taneyapëtaeyaexanaenexa paepatota bajarapalivaisi tsipaebajë itsamonaejavabelia. Panetovajëtabiabarena ajumeurajibia tatsipaebabiabinexa apo judíovi ata Dioso pecapanepaejavanexatsi. ²⁰ Naneconitsiaponaponajë majotaje, penaneconitsivi pejebabiabibota, itsamonaejavabelia tatsipaebabiabixae bajarapaxanialivaisi, Dioso tanetocopatsilivaisi. Bajaraxuata Diosojavelia panetovajëtabiabare, naneconitsiaponaponae atanë, ajumeurajibia jivijavelia tatsipaebabiabinexa bajarapalivaisi pacuenia jamatabëtsipaebajë.

Pacuenia Pablo toyaquina Efeso tomarapijivi peveretsinexa baja petoy-aquinaelivaisi mapabaxutotaje yabara pelivaisi

²¹ Vajabananë Tíquico itsa patsiana paxamëjavabelia, pacatsipaebiana daxita pacuenia netane. Bajaraponë bitso vajaasivanë. Xaniavaetsia paneyavenonabiaba itsa patonacuenebabiabajë pacuene vajatuxanenë paneitoroba. ²² Bajaraxuata Tíquico pacatoitorobatsi baja paxamëjavabelia papecatsipaebinxua pacuenia pajinavanapajë. Nexata Tíquico itsa pacatsipaebiana pacuenia pajinavanapajë, pamuxunaajamatabëcuenesaëmë tsane. ²³ Pacatovajëtabiabatsi vaxa Diosojavelia, vajatuxanenë Jesucristojavelia ata, jamatabëcuenexanepanaeya panejinavanapaenexa. Pacatovajëtabiabatsinua namataenetsia panenasivanexa Diosojavelia panenajamatabëcuenecopatsivixae. ²⁴ Pacatovajëtabiabatsinua Diosojavelia daxita paxamë Dioso papecayavenonabiabinexa. Paxamë abaxë tsiteca bitso pasivamë tsavanapae vajatuxanenë Jesucristo. Bajara itsi tsane.

Mapabaxutoje San Pablo toyaquina Filipos tomarapijivijavabelia

Pacuenia Pablo toyaquina mapabaxutoje Dioso pejumecovënëtsivi, Filipos tomarapijivijavabelia, pamatacabi naneconitsia ponapona penaneconitsivi pejebabiabibota yabara pelivaisi

¹ Xanë Pablonë, Timoteobeje, Jesucristo papijajivitonënëbeje. Pacatoy-aquinatsibeje mapabaxutoje padaxitamë paFilipos tomarapijivimë, Jesucristo pelivaisi panejumecovënëtavapaevi. Paancianovimë, paxamë ata padiaconovimë, pacatoyaquinatsibeje. ² Pacatovajëtatsibeje vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Pablo Diosojavabelia tovajëta Jesucristo pelivaisi pejumecovënëtsivi yabara pelivaisi

³ Itsa pacanajamatabënapitatsi Diosojavabelia tavajëtsijavata, jumaitsinë tsabiabi Diosojavabelia: “Xaniavaetsia yavenonabiabame nijajivi, Filipos tomarapijivi,” janë tsabiabi Diosojavabelia paxamë yabara. ⁴ Itsa vajëtajë Diosojavabelia, nexata pacatovajëtabiabatsi jamatabëcuenëbarëyaya. ⁵ Bajarapacuenia pacatovajëtabiabatsi tsipaji Dioso pejumelivaisi, pexanialivaisi, panejumecovënëtsijavaveliacujinae, paneyavenonabiabame tanamatavenonaejavaxi yabara. Patsipaebabiabamenua Jesucristo pelivaisi itsamonaejavabelia. ⁶ Yapëtaniji baja cajena pacuenia Dioso pacayavenonaejitsia bitso pexaniajamatabëcuene panexainavanapaenexa. Tsipaji baja Dioso taxuxaba papecajamatabëcuene xanepanaeyaexanaenexa. Bajaraxuata panevajënaeyabelia Dioso pacajamatabëcuene xanepanaeyaexanaponaena copatsinejeva matapania Jesucristo icatsia pepatsimatacabitsicajavabelianexa. ⁷ Bajarapacuenia paxamë patacasivanajamatabëxainaejava, netsitaxanepana. Tsipaji bitso pacaasivatsi. Pamatacabi naneconitsiaponaponajë penaneconitsivi pejebabiabibota, panejamatabëcueneyavenoname. Panejamatabëcueneyavenonamenua pamatacabi nacuaeavetsivi pitabarata nenuta Jesucristo pelivaisi jivi tatsipaebaponaejava yabara. Nexata bajarapamatacabi jumaitsinë bajarapamonaejavabelia: “Mara palivaisije, Jesucristo pelivaisi, pexaniajilivaisi cajena jivi pecapanepaelivaisinexatsi Diosojavabelia,” janë nacuaeavetsivijavabelia. ⁸ Dioso cajena nejamatabëcueneyapëthane pacuenia bitso paxamë pacaasivatsi. Jesucristo neyavenona bitso patacaasivanexa. ⁹ Pacatovajëtatsi Diosojavabelia itsamonae ata bitso paneasivatsavanapaenexa panevajënaeyabelia. Pacatovajëtatsinua paneypëtaenexa Dioso. Pacatovajëtatsinua paneypëtaenexa xua Dioso pacatojitsipa paneexanavanapaenexa. ¹⁰ Nexata payapëtaename paneitapetsinexa palivaisi bitso xanepana daxitalivaisivecua, panejumecovënëtsinexa bajarapalivaisi. Nexata bajarapacuenia pacacajëpaena xaniavaetsia panejinavanapaenexa aneconijibia. Matapania Jesucristo icatsia pepatsimatacabitsicajavabelianexa, bajarapacuenia panaevetavanapaename. ¹¹ Nexata ëpexaniajamatabëcuene paxainaname panejamatabëëthëtojavavetsina Jesucristo papijajivixaemë. Nexata itsamonae paxamë yabara jamatabëjumaitsi tsane Diosojavabelia:

“Diosomē, ayaijamatabēcuenenēmē bitso. Pexaniacuene bitso toexaname Filipos tomarapijivi ēpexaniajamatabēcuene pexainaenexa pejamatabēēthētota,” jamatabējai tsane itsamonae Diosojavabelia paxamē xaniavaetsia panetsitajinavanapaexae.

Pacuenia Pablo jumecovēnētaponapona Cristo yabara pelivaisi

¹² Tajamonae, payapētaneme rabaja pajamatabēcuene yabara naneconitsia ponaponajē penaneconitsivi pejebabiabibota. Jitsipajē paneyapētaenexa mapacueneje. Majotaje penaneconitsivi pejebabiabibota neeta pexanialivaisi, Jesucristo pelivaisi, jivi tatsipaebaponaexae. Xanē neetsi ata penaneconitsivi pejebabiabibota, itsiata apo yacaranatsicapanepae pexanialivaisi, Jesucristo pelivaisi, peyacaējēpaponanexa daxitanacuanejāva. Nexata baja aeconoxae bajarapalivaisi pevajēnaeyabelia yacaējēpapona daxitanacuanejāva daxitajivi Diosojavabelia pecapanepaenexatsi.

¹³ Nacuaevevtsinē pijabopijivi, vajabitsaē, daxita itsamonae ata, neyapētane majota naneconitsia taponaponaejāva Jesucristo pijajivitonēxaenē.

¹⁴ Mapatomarataje ayaibitsaētoخانeto Dioso pejumecovēnētsivi, itsa nevēnētane tananeconitsiaponaponaejāva, najamatabēcuenesaētavanapa. Diosojavabelia asaēyata najamatabēcuene copaba peyavenonaenexatsi. Nexta ajumejunavijibia Dioso pejumelivaisi tsipaebapona itsamonaejavabelia.

¹⁵ Pamonae ajumejunavijibia Dioso pejumelivaisi tsipaebapona itsamonaejavabelia, bajarapamonae yajuvēnēvi, panecuenecaēba. Nexata itsamonaejavabelia asaēya tsipaebapona Cristo pelivaisi. Bajarapamonae xanē yabara jamatabējumaitsi: “Pablo bitso ayaiacuena Dioso pejumelivaisi jivi nacatsutsipaebapona. Pacuenia bajaraponē tsipaebapona, matatoxenetsia vaxaitsi tsipaebaponaenatsi jivi vajanacayaiyataenexa,” jamatabējai bajarapamonae. Itsiata itsamonae, bajarapamonae yajuvēnēvi, taneyavenonaenexa, itsamonaejavabelia tsipaebapona Cristo pelivaisi bajarapamonae ata xaniavaetsia pejumecovēnētsinexa.

¹⁶⁻¹⁷ Itsamonae tsipaebapona Cristo pelivaisi pejumetaevitsi saya peyaiyataenexatsi, pepēnaponaenexatsinua. Bajarapamonae pejamatabēēthētovetsina apo jumecovēnētsi ata Cristo, saya jema Cristo pelivaisi tsipaebapona. Jamatabējumaitsi: “Vecae Pablo naneconitsiaponaponaē penaneconitsivi pejebabiabibota, pecovēta itsajamatabēcuene xainaeyaxanaenatsi Cristo pelivaisi pejumecovēnētsivi. Bajarapacuenia Pablo jamatabēcuenebējaiyaxanaenatsi,” jamatabējai bajarapamonae xanē yabara. Itsiata itsamonae xaniavaetsia tsipaebapona Cristo pelivaisi pejumecovēnētsixae Cristo. Bajarapamonae yapētane Dioso tanetocopsitijāva penaneconitsivi pejebabiabibota naneconitsia taponaponaejāvata, tajumaitsi javanexa nacuaevevtsivijavabelia mapacueneja: “Jesucristo pelivaisi jivi pecapanepaelivaisinexatsi, pexaniajailivaisi cajena,” tajaijavanexa nacuaevevtsivijavabelia, bajarapamonae yapētane.

¹⁸ Majotaje nenaneconitsiaexanae ata, apo natsinajamatabēxaināenē. Itsamonae pejamatabēēthētovetsina Cristo pelivaisi pejumecovēnētsixae, tsipaebapona jivi pejumecovēnētsinexa bajarapalivaisi. Itsamonae pijinia pejamatabēēthētovetsina apo jumecovēnētsi ata, itsiata Cristo pelivaisi tsipaebapona jivi pejumecovēnētsinexa bajarapalivaisi. Bajaraxuata bajarapamonae ata jivi petsipaebaponaejāva yabara, itsiata sivajamatabēcuenebarēyanē.

Bitso orijibia tavajēnaeyabelia jamatabēcuenebarēyanē tsaponae tsane. ¹⁹ Tshipaji yapētaniji pacuenia panetovajētaponame Diosojavabelia. Espiritu Santo, ponē Jesucristo itrobica, bajaraponē neyavenonapona. Bajaraxuata yapētaniji daxita pacuenia netoxanepanaejitsia. Nexata

baja pitsapaenajē tananeconitsia ponaponaejavavecuā. ²⁰ Bitso jitsipajē ēpexaniacue ne taexanaenexa. Apo jitsipaenē taexanaenexa itsacuenejavayo ata, xua yabara auranē tsipae. Cristo tajumecovēnētšijavaveliacujinae, aeconoxae ata, ajunavijibia jitsipajē taexanaenexa Cristo pejitsipaecuenia daxitamatacabijavabelianexa. Bajarapacuenia jitsipajē taexanaponaenexa ēbajaraponēnēxa. Bajaraponē tanetojitsipaecuenia abaxē taasaētšaponaponaepato mapanacuataje, tatēpaepatotanexa ata, jitsipajē taexanaenexa xua pejamatabēcueneta daxitajivi yayataejitsia Cristo. ²¹ Tasaētšaponaponaepato abaxē mapanacuataje, Cristo pejitsipaecuenia toexanapononajē. Itsa pamatacabi tēpaenajē, netoxanepanaejitsia mapanacuata tasaētšaponaponaejava matatoxenetsia. Tsipaji Cristo yajavaponaponaenajē athēbētatsia. ²² Tasaētšaponaponaepato abaxē mapanacuataje, necaējēpa tatoexanaponaponaenexa Cristo tanetojitsipaecuenia. Itsiata apo yapētaenē xua pepacune jitsipajē. ²³ Itsajavata bitso jitsipabiabajē tatēpaejava taponaponaenexa Cristo pijanacuayabetsia. Bajaraxua bitso netoxanepanaejitsipa. ²⁴ Itsiata paxamē panenamatavenoname abaxē taponaponaenexa mapanacuata, patacayavenonaponaponaenexa. ²⁵ Yapētaniji baja cajena abaxē taponaponaejava paxamēnēxa. Ponaponaenajē abaxē patacayavenonaenexa, paneajamatabēcuenesaēnēxa panevajēnaeyabelia, panejamatabēcuenēbarēyanexana panejumecovēnētšixae Cristo pelivaisi papecacapanepaenexa panijaneconivecuā. ²⁶ Nexata pamatacabi Jesucristo neyavenonaena penaneconitsivi pejebabiabibovecuā tapitsapaenexa, ponaponaenajē icatsia paxamējavata. Nexata jamatabēcuenēbarēyaya neyavajunupaebianame itsamonaejavabelia pacuenia Jesucristo panevunona tapitsapaenexa penaneconitsivi pejebabiabibovecuā.

²⁷ Pajinavanapare xaniavaetsia, pacuenia pexanialivaisi, Cristo pelivaisi, pacaitoroba. Nexata itša pacataenatsi, apo pacatae atatsinua tsane, itsiata jitsipajē patacavēnēlvaisitaeponaejava najamatabēcuenējēpaeya panecasaētšavanapaejava Cristo pelivaisi panejumecovēnētšavanapaejava. Jitsipajē patacavēnēlvaisitaejava asaēyata najamatabējēpaeya jivi panetsipaebavanapaejava Jesucristo pelivaisi jivi pecapanepaelivaisinexatsi. ²⁸ Pētša pacujunavame pamonae pacaitoya. Dioso papecayavenonaexae, itša apo pacujunavimē tsane itsamonae pacabejiobiaexanae ata, nexata bajarapamonae jamatabējumaitš tsane: “Pexaniajailivaisi cajena bajarapamonae tsipaebapona. Tsipaji Dioso yavenonatsi. Nexata vaxaitsi bajarapamonae vajabejiobiaexanaexae, Dioso nacaverebiabiana,” jamatabējai tsane. Yapētaenanua paxamē papecacapanepaejavanexa Dioso. ²⁹ Cristo pejamatabēcueneta pacatocopata bajaraponē panejumecovēnētšsinexa. Itsiata baitsi jane apo pacatocopatsi ēbajaraponē panejumecovēnētšsinexa. Pacatoyajavacopatana baja cajena itsamonae papecabejiobiaexanaenexa bajaraponē papijajivixaemē. ³⁰ Pacuenia Cristo pijajivitonēxaenē itsamonae nebejiobiaexanapona, bajara pijinia pacuenia paxamē ata itsamonae pacabejiobiaexanaena. Pacuenia baja imata panetaneme itsamonae tanebejiobiaexanaejava, bajarapacuenia abaxē tsiteca nebejiobiaexanapona pacuenia baja panevēnēlvaisitaneme.

2

Pacuenia Dioso pejumecovēnētšivi itavetatsi beayajamatabēcuenēvi penataeyaniva yabara pelivaisi

¹ Payapëtaneme rabaja mapacueneyeje. Jesucristo paneyajavajinavana-paexae, panajamatabëcuenesaëtame panejumecovënëtsijava. Payapëtaneme rabaja. Jesucristo papecaasivaxae, pacajamatabëcuenebabata. Payapëtaneme rabaja Espiritu Santo papecatsijamatabëceaejava papecayajavaponaponaenexa. Payapëtaneme rabaja Jesucristo papecaixatovotsonia taeyabiabijava. ² Bajaraxuata nexata pacaitorobatsi mapacuenia panejinavanapaenexaje patacasivabarëyanexa. Najamatabëcueneyëpaeya pajinavanapare. Najamatabëcueneyëpaeya namataenetsia panaasivamëre tsavanapare. Xua paexanaejitsiamë Dioso pejamatabëcueneta, najamatabëcueneyëpaeya paexanavanapare. ³ Pëtsa panatoexaname itsacueneyavayo ata, xua ëpaxamënexa pacatoxanepana. Biji rajane paexanare xua itsamonaenexa ata toxanepanatsi. Pëtsa paexanamenua itsacueneyavayo ata saya bepaayaijamatabëcuenemimë papecataenexa itsamonae. Biji rajane beveliajamatabëcuenevi panataeyabiabianame. Itsamonae paxamëvecua ayaijamatabëcuenevi pataeyabiabianame. ⁴ Pëtsa panajamatabëxainabiabame ëpaxamë panenatojitsipacuenene. Biji rajane payajavanajamatabëxainabiabianame itsamonae ata penatojitsipacuenene.

⁵ Pacuenia Jesucristo jamatabëcuenetsi, bajara pijinia paxamë ata jamatabëcuenetsimëre. ⁶ Pacuenia Dioso jamatabëcuenetsi, bajara pijinia Jesucristo ata jamatabëcuenetsi. Itsiata baitsi jane Jesucristo apo jamatabëjumaitsi: “Jitsipajë daxitajivi taneyaiyataenexa pacuenia taxa Dioso yayiatanetsi,” apo jamatabëjai. ⁷ Bajaraponë picani ayaijamatabëcuenenë. Paxa Dioso yajavaponapona athëbëatsia. Itsiata itsa patsica mapanacuaya-betsicaje, naexana pacuenia vaxaitsi banaexanatsi mapanacuataje. Nexata paxa Dioso bepijajivitonë naexana, pacuenia Dioso itorobatsi pexanaenexa. ⁸ Bejivitonëcuenia itsa naexana, beveliajamatabëcuenenëcuenia ponapona. Paxa Dioso pitorobicueniatsi jumecovënëta. Pacuenia bitso pibisiacuene pexanaevi pijaneconi yabara cruzajavabelia bacobematabiabarutatsi pebeyaxuabinexatsi, bajara pijinia pacuenia Jesucristo ata nacopata cruzajavabelia pecobematabiabarutinsinexatsi. ⁹ Bajaraxuata Dioso mëthëvetsina matacotatsi. Caponatsi athëbëabetsia peecaenexa paxa Diosojavatatsia, pebarëevetsinexatsi daxitacuene. ¹⁰ Nexata bajaraponë itsa vënëlivaisitaenatsi, pematabacabëta yayiyataeya tonubenaenatsi daxitajivi. Athëbëatsia pejinavanapaevi, mapanacuapijivi ata, petëpaevimi ata, pematabacabëta yayiyataeya tonubenaenatsi. ¹¹ Nexata daxitajivi jumai tsane Jesucristo yabara: “Jesucristo rabaja cajena pepo petuxanënë,” jai tsane. Nexata daxitajivi yapëtaena pacuenia paxa Dioso bitso ayaijamatabëcuenenë.

Pacuenia Dioso pejumecovënëtsivi pexaniajailivaisi pejumecovënëtavanapaexae, bepecotia mapanacuataje yabara pelivaisi

¹² Tajamonae bitso patacaasivavi, pacuenia panejumecovënëtame pamatacabi pacatsipaebaponaponatsi Dioso pejumelivaisi, bajarapacuenia matatoxenetsia Dioso pajumecovënëtavanapare, aeconoxae xanë tajë pacavecuaponaponaë atatsi. Pacaejivimë canacujitsia cujanaviaya Dioso pajumecovënëre. Nexata ëpexaniacuene paexanavanapaename. Tsipaji Dioso papecacapanepaevinexa. ¹³ Dioso rabaja pacajamatabëcueneyavenona panejamatabëthëtovetsina jitsipaeya paneexanaenexa, pacuenia Dioso pacatojitsipa. Dioso pacajamatabëcuenene caëjëpaeyaexananua paneexanaenexa bajarapacuenene.

¹⁴ Daxitacuene paexanavanapare pajamatabëcuenenatsipaebinejevamë. Pëtsa anaeya namataenetsia najumenotsia panabijatanemenua. ¹⁵ Bajarapacuenia itsa pajinavanapaename, nexata daxita paxamë

aneconijibia jivi patsitajinavanapaename Dioso papexixaemë. Nexata mapanacuapijivi pibisiacue ne pexanaevi tuatuajëta pajinavanapae atamë tsane, itsajivi ata acuenebi tsane pibisiacuenia papecabaracuaicuaijainexa. Pacuenia pecotia itayota pitaquirijavata, bajara pijinia pacuenia paxamë ata paitsimë tsane. Bepapecotiamë tsane pexaniajailivaisi panejumecovënëtaavanapaexae bajarapamonaejavata. ¹⁶ Bepapecotiamë tsane xaniavaetsia itsa patsitajumecovënëtaavanapaename bajarapamonaejavata pexaniajailivaisi, Jesucristo pelivaisi. Bajarapacuenia itsa patsitajumecovënëtaavanapaename, pacasivabarëyatsi tsane pamatacabi icatsia Cristo patsianica. Bajarapacuenia pacasivabarëyatsi tsane tsipaji baja yapëtaenajë apo tanacueratsijava asaëya tanacuenebijava paxamëjavata. ¹⁷ Dioso pacasivabarëya panenajamatabëcuenerajutsixae Diosojavabelia panetojinavanapaenexa bajaraponë papecatojitsipaecuenia. Itsamonae nebeyaxuabijitsia ata tsipae Cristo pelivaisi patacatsipaebixae, xanë itsiata nasivajamatabëcuenebarëyanë tsipae. Tsipaji Cristo pelivaisi bajarapacuenia patacatsipaebinxexa, Dioso netocopata. Nexata daxita paxamë pacayajavajamatabëcuenebarëyatsi tsane. ¹⁸ Bajarapacuenia paxamë ata pajamatabëcuenebarëyamëre tsavanapae. Paneyajavabarëyamërenua tsavanapae.

Timoteobeje Epafroditobeje yabara pelivaisi

¹⁹ Itsa vajatuxanenë Jesús jitsipa, naxanitsiayo jamatabëitorobajë Timoteo papecataenexalia. Pepatsicujinaerena, itsa pacavënëlivaisitaenatsi pacuenia pajinavanapame, nejamatabëcuenebarëyaya exanaejitsia. ²⁰ Bajaraponë caenë nejamatabëcuenejëpa. Bajaraponë bitso pacasivanajamatabëxaina xaniavaetsia panejinavanapaenexa. ²¹ Daxita itsamonae bitso najamatabëxaina ëpenatojitsipaecuenia pexanaenexa. Apo sivanajamatabëxainae Jesucristo petonacuenebinxexa. ²² Paxamë baja payapëtaneme pacuenia Timoteo pacatsitaponapona pexaniajamatabëcuenia. Pacuenia itsamonae paxa penacuenebijava bayavenona, bajara pijinia pacuenia Timoteo neyavenona jivi tatsipaebaponaejava pexanialivaisi, Jesucristo pelivaisi. ²³ Bajaraxuata jamatabëitorobajë Timoteo paxamëjavabelia papecataenexalia. Itsa yapëtaenajë pacuenia nexanaejitsia penaneconitsivi pejebabiabibota tananeconitsiaponaponaejava yabara, nexata bajaraxuacujinae paca-toitorobialiatitsi Timoteo papecataenexalia. ²⁴ Xanë jamatabëjumaitsinë paxamë yabara: “Itsa Dioso netojitsipaena xanë ata taponaeenexa bajarabelia, nexata neyavenonaena bepijia taponaeenexa tataenexalia Filipos tomarapijivi,” jamatabëjanë paxamë yabara.

²⁵ Panetoitorobaremena rabaja vajabananë Epafrodito pataneyavenonaeexamë bajarapacuenia tanamatavenonaeapatota. Nexata Jesucristo patonajuanacuenebajëbeje. Asaëyata panajuanacuenXanë jamatabëjumaitsinë paxamë yabara: “Itsa Diosobajëbeje, Dioso apo pejumecovënëtsivi paneitsacueniababiabi atabeje. Nexata icatsia netsitaxanepana bajaraponë patacatoitorobinexalia. ²⁶ Majotaje Epafrodito piavitane��ujinae, jamatejema baja. Nexata aeconoxae bitso jamatabëpona paxamëjavabelia papecataenexa. Bitso jamatabëpona tsipaji yapëtanepanevënëlivaisitaejava pebitsojava piavitane��uene. ²⁷ Xaniajai rabaja picani. Avitane petëpaejavabelianexa. Itsiata baitsi jane Dioso itaxutotsonianetsi. Xanë ata Dioso nitaxutotsonianetane. Tsipaji itsa nevecuatëpaejitsipa, xanë bitso najamatabëxainaejitsipajë. Tsipaji penaneconitsivi pejebabiabibotaneetsixae tanajamatabëxainaejavata, nevecuatëpaejitsipa. ²⁸ Bajaraxuata

bitso jitsipajë bajaraponë patacatitorobinexalia panetaenexa, nexata paxamë panejamatabëcuenebarëyanexa itsa pataneme icatsia bajaraponë. Nexata xanë ata paxamë yabara bevelia najamatabëxainanajë.
 29 Pacopiapitsianame bajaraponë bitso jamatabëcuenebarëyaya Dioso pejamatabëcueneta vajabananëxae. Pamonaë jamatabëcueneitsi pacuenia bajaraponë jamatabëcueneitsi, payaiyataename. 30 Paxamë apo papatsi atamërena maberena je pataneyavenonaenexamë, itsiata panejamatabëcueneta bajaraponë panetoitorobaremena taneyavenonaenexa. Nexata bajaraponë neyavenonabiaba Cristo pijacuene tatonacuenebijava. Bajaraxuacujinae itsa avitane, imoxo picani petëpae.

3

Pacuenia jivi Dioso pejitsipaecuenia betojinavanapa yabara pelivaisi

1 Tajamonaë, palivaisi capanepaeya patacotoyaquinatsi baja, bajarapalivaisi pasivajamatabëcuenebarëyamëre Cristo papijajivixaemë. Xanë apo pacasivacueneranaetsi patacotoyaquinaenexa icatsia bajarapalivaisi. Tsipaji xanepana icatsia panejumetaenexa bajarapalivaisi. 2 Panayajivitaema piamatabëcuenebejevi, pamonaë beaviri pianapanaevi. Tsipaji raja bajarapamonaë apo aura pexanaejava yabara. Bajarapamonaë jamatabëcuenenavëxaniabiaya jumaitsi tsabiabi Jesucristo pijajivijavabelia: “Xanepana paxamë ata papecaperabëcaucubinexa judíovicuenia Dioso pepacuene papecacapanepaenexa panijaneconivecua,” jai tsabiabi. 3 Nacaperabëcaucutsi ata tsipae, vajanacaperabëcaucutsijava yabara, Dioso pexitsi apo nacaexanae tsipae. Vaxaitsi pepacuene vajanacapanepaevinexa Diosojavabelia. Tsipaji vajamatabëthëtojavavetsina najamatabëcueneocopatsi Diosojavabelia vajanacapanepaenexa. Jamatabëcuenebarëyatsi Jesucristo pijajiviaetsi. Yapëtanetsinua pacuenia Dioso apo nacapanepae tsipae vajacuata vajaexanaejava pejamatabëcueneta. 4 Itsajivi itsa caëjëpaejitsipatsi pijacuata penacapanepaenexa Diosojavabelia judíonëxae, Dioso petonacuenebijava yabara ata, nexata xanë ata necaëjëpaejitsipa tajacuata tanacapanepaenexa. 5 Xanë picani mataitsinëje. Itsa baja xainajë ocho pamatacabibeje tanaexanaecujinae, tajasalinaivicuenia neperabëcaucuta. Baitsi nebouipiperabëcaucuta. Xanë raja tajasalinainëmi Israelpijnë. Benjamínpijinë pemomoxiyajuvënënenë. Taxa judíonë. Taena ata judíova. Xanë picani fariseonë. Pacuenia fariseovi bitso jumecovënëta Dioso Moiséspijinëta penajumecopatsilivaisi, bajara pijinia pacuenia xanë ata itsinë. 6 Daxita tajamatabëcuenesaëta caasaënë tajumecovënëtsijava Dioso Moiséspijinëta penajumecopatsilivaisi. Jamatabëcuenenavëxaniabajë tsaena bitso. Jesús pelivaisi pejumecovënëtsivi yabara, jumaitsinë tsabiabi: “Dioso Moiséspijinëta penajumecopatsilivaisivecua saicayalivaisi jumecovënëta. Nexata bajarapamonaë bebeyejebatsi,” janë tsabiabi. Nexata Jesús pijajivi bejiobiaexanabiabajë. Dioso Moiséspijinëta penajumecopatsilivaisi, bitso xaniavaetsia jumecovënëtaponaponajë. Nexata itsajivi ata acuenebi pejumaitsijava xanë yabara: “Pablo xaniavaetsia apo jumecovënëtsi Dioso Moiséspijinëta penajumecopatsilivaisi,” pejajjava. 7 Daxita bajarapalivaisi yabara xanë picani sivabarëyanë. “Itsa jumecovënëtsianajë bitso, netonamatamotsiana Diosojavabelia,” jamatabëjanë picani. Itsiata aeconoxae yapëtaniji daxita bajarapalivaisi

piamatamobilivaisicuene. Tsipaji baja najamatabëcueneocopatajê Cristojavabelia tanevecuaajibiaexanaenexa tajaneconi. ⁸ Aeconoxae baja yapêtaniji daxita bajarapalivaisi piamatamobilivaisicuene. Daxita bajarapalivaisivecua netonamatamota tayapêtaenexa xaniavaetsia tajatuxanenê Jesucristo. Jesucristo taneyajavaponaponaxae, nexata piamatamobilivaisi tajumecovênêtsijavami, copatajê baja. ⁹ Dioso aneconijibia apo netae tajumecovênêtsixae Dioso Moiséspijinêta penajumecopatsilivaisi. Aeconoxae baja Dioso aneconijibia netane tsipaji najamatabëcueneocopatajê Jesucristojavabelia tanevecuaajibiaexanaenexa tajaneconi. ¹⁰ Tavajënaeyabelia bitso jitsipajê daxitacuenevecua tayapêtaenexa pacuenia Cristo jamatabëcueneitsi. Pasaêta Dioso matacotatsi Cristo petêpaejavavecua, bajarapaasaê jitsipajê tayajavaponaponaxae. Cristo pijajivitonêxaenê, jitsipajê xanê ata tanebejiobiaexanaenexa, tatêpaenexa ata. ¹¹ Tsipaji xanê ata copiaevetaponaponajê Dioso tanematacotsinexa tatêpaejavavecua.

Pacuenia Pablo najamatabëcuenesaêta xaniavaetsia Cristo peyajavaponaponaxae, pepatsinexa Dioso pijanacuayabetsia, yabara pelivaisi

¹² Xanê apo jamatabëjumaitsinê: “Daxita baja Dioso pejitsipaecuenia toexanajê. Nejamatabëcuenecaêjêpa baja tajumecovênêtsinexa pacuenia Dioso netojitsipa taexanaenexa,” apo jamatabêjanê. Itsiata tavajënaeyabelia tanejamatabëcuene caêjêpaponaxae, caasaenê tsaponaponaxae taexanaejava pacuenia Dioso netojitsipa. Jitsipajê bitso tajamatabëcuenexanepanaejava tavajënaeyabelia pacuenia Dioso netojitsipa. Tsipaji bajarapacuenia yabara Jesucristo nesivatêpa. ¹³ Tajamonae, apo jamatabëjumaitsinê: “Xanê rabaja nejamatabëcuenecaêjêpa Dioso tajumecovênêtsinexa pacuenia Dioso netojitsipa taexanaenexa,” apo jamatabêjanê. Jume baja cajena. Mapacuenia najamatabëxainajêje. “Daxita xua exanajê Jesús pelivaisi tajumecovênêtsivajënaeya, nacofênêtajê baja,” jamatabêjanê. Najamatabëcuenesaêtajê xaniavaetsia tatoaponaponaxae Dioso. Pacuenia pebitsojinaenê pecujinaejinaejava penayacobijavata, nasaêta pepatsinexa petocaêjêtsijavabeliatsi, bajara pijinia pacuenia xanê ata najamatabëcuenesaêtajê xaniavaetsia tatoaponaponaxae Dioso. Tavajënaeyabelia najamatabëcuenesaêtajê taexanaenexa pacuenia Dioso netojitsipa. Bajarapacuenia najamatabëxainaponaponajê. ¹⁴ Pacuenia pecujinaejinaenê nasisaêta penacanabinexa perajutsinexatsi premiovênêjêpa, bajara pijinia pacuenia najamatabëcuenesaêtajê. Najamatabëcuenesaêtajê xaniavaetsia tatoaponaponaxae Dioso tanerajutsinexa athêbêtatsia taxainaejavanexa tayajavaponaponaxae Jesucristo.

¹⁵ Daxita pamona xaniavaetsia jumecovênêtavanapa Dioso, bajarapamonaxae ata benajamatabëcuenesaêtavanapa xaniavaetsia petojinavanapaenexa Dioso. Itsa abaxê paxamê saicaya itsajamatabëcuene paxainame, nexata Dioso pacayapêtaeyaexanaena saicaya abaxê itsajamatabëcuene panexainaejava. ¹⁶ Nexata palivaisivajêto jumeyapêtanetsi pexaniajallivaisi, bajarapalivaisi bejumecovênêtavanapatsi. Becaasaê tsavanapaetsinua vajavajënaeyabelia orijibia vajajumeyapêtaeponaenexa.

¹⁷ Tajamonaxae, pacuenia baja pacatsitaponaponatsi, bajara pijinia pacuenia paxamê ata pajinavanapare. Itsamonaxae paxamêyajuvênêvi xaniavaetsia

jinavanapa pacuenia pacatsitaponaponatsi. Bajarapamonae ata panaitax-
utocaevetsianame paxamē ata xaniavaetsia panejinavanapaenexa pacue-
nia bajarapamonae jinavanapa. ¹⁸ Ayaibitsaētoخانeto paxamēyajuvēnēvi
apo jumecovēnētsi Jesucristo cruzata pesivatēpaejavatsi pecapanepaenex-
atsi. Bajarapamonae yabara pacatsipaebatsi baja anijatonē. Itsiata
icatsia aeconoxae yaitaxutonueya pacatsipaebianatsi. ¹⁹ Mapanacuaeje
pecopiarucaematacabita, bajarapamonae Dioso verebiabianatsi. Tsipaji
bitso jitsipa pijacuata penatojitsipaecuenia pexanavanapaenexa. Piau-
racuene exanabiabi ata, jamatabēcuenenavēxaniabiaya jamatabējumaitsi tsabi-
abi: “Pexaniacuene bitso vaxaitsi exanavanapatsi,” jamatabējai tsabi-
abi bajarapamonae. Ēmapanacuapijicuene saya sivanajamatabēxainabiaba.
²⁰ Vaxaitsi baja cajena jinavanapaenatsi Dioso pijanacuatsia. Bajaraxuata
copiaevetavanapatsi vajatuxanenē Jesucristo pepatsijavatsica vajanacaca-
panepaenexa Dioso pijanacuayabetsia. ²¹ Vajaperabēto vereverecaena. It-
siata vajatuxanenē Jesús nacaperabēitothianaena. Nexata pacuenia bajara-
ponē perabēitsi athēbētatsia, bajara vaxaitsi ata perabēitsitsi tsane. Nexata
pasaēta Jesús caējēpatsi pitorobinexa daxitacuene, bajarapasaēta nacaper-
abēitothianaena.

4

Pacuenia vaxaitsi besivabarēyatsi tsabiabi vajatuxanenē Jesucristo yabara pelivaisi

¹ Tajamonae bitso patacaasivivi, pacaitaxanatsi. Bitso ja-
matabēpacatanetsi. Bitso pacasivajamatabēcuenebarēyatsi. Tsipaji
xaniavaetsia pajumecovēnētavanapame Jesús pelivaisi pacuenia baja
pacatsipaebatsi. Pajamatabēcuenesaēmēre tsavanapae pacopatsinejevamē
panejumecovēnētsijava Jesús pelivaisi.

² Papatirivamēbeje, Evodia Síntique, paxamēbeje pacatoyaquinatsibeje
patacaitavetsinexabeje mapacueniaje. Pētsa baja icatsia pematatsēnēa
namataenetsia panajumeanaenotamebeje. Panajamatabēcuenejēparebeje
Jesús pelivaisi panejumecovēnētsivaxaebje. ³ Xamē ata xani-
avaetsia taneyavenonaenēmē Dioso pijacuene tanacuenibijava,
catoyaquinatsi. Jitsipajē neyavenonaenexa bajarapapatirivabeje,
penabarajamatabēcuenexanepanaenexabeje namataenetsia icatsia
penajumeanaenotsiyanivabeje. Bajarapovabeje bitso neyavenonaebeje
tatsipaebijava itsamonaejavabelia pexaniajalivaisi pecapanepaeliv-
aisinexatsi Diosojavabelia. Bajarapacuenia Clemente ata neyavenona.
Itsamonae ata patanajuanaacuenebivi, bajarapacuenia neyavenona.
Daxita baja bajarapamonae vērērubena Dioso pijabaxutota, itsa
pabaxutota vērēyaquinarubatsi pamonaē pexainaevinexa matacabi apo
pevereverecejava.

⁴ Jesús pelivaisi panejumecovēnētsivixae, pajamatabēcuenebarēyamēre
daxitamatacabijavabelianexa. Icatsia pematatsēnēa pacajumaitsi.
¡Pajamatabēcuenebarēyamēre tsavanapae! ⁵ Jamatabēcuenexanepanaeya xani-
avaetsia pajinavanapaenname daxitajivi papecajamatabēcueneypētaenexa.
Tsipaji rabaja vajatuxanenē imoxoyo pevājēnaē pepatsinexatsica.

⁶ Pētsa pajamatabēcuenebējamē itsacuenejavayo ata yabara. Biji
rajane pavajēre Diosojavabelia daxitacuenejavanē yabara. Pexaniaja-
matabēcuenenua parajutabiabare Dioso papecayavenonaejavanē yabara.

⁷ Nexata Dioso pacajamatabējemayaexanaena panejamatabēcuenebējaiyaniva.

Pexaniacuene bitso bajarapajamatabëcuene. Dioso itsa nacajamatejemayaexana vajajamatabëcuenebëjaiyaniva, itsiata apo yapëtaetsi pacuenia nacajamatejemayaexana vajajamatabëcuenebëjaiyaniva. Dioso itsa pacajamatejemayaexanaena panejamatabëcuenebëjaiyaniva, nexata apo pajamatabëcuenebëjamë tsane. Jesucristo itsa pajumecovënëtanapame, daxitacuene yabara panenajamatabëxainaejava atavecua Dioso pacaevetsiana.

Pacuenia benajamatabëxainabiabatsi ëpexaniacuene yabara pelivaisi

⁸ Tajamonae, pecotocaevilivaisi pacatoyaquinatsi mapacueniaje. Panajamatabëxainabiabare ëpexaniajailivaisi yabara. Panajamatabëxainabiabarenua panenayaiyataecuene ata yabara. Panajamatabëxainabiabarenua xua xanepana paneexanavanapaenexa. Panajamatabëxainabiabarenua Dioso papecajamatabëcuene barëyayaexanaenexa. Panajamatabëxainabiabarenua xua jivi baracuaicuaijijitsia pexaniacuena. Panajamatabëxainabiabarenua daxita xua pexaniacuene. Panajamatabëxainabiabarenua xua yabara Dioso pacabarëyataejitsia.

⁹ Daxita pacuenia pacatsipaebatsi, pacuenia pacatsitaponaponatsinua, bajarapacuenia paexanavanapare. Nexata Dioso, ponë pacajamatejemayaexanaejitsia panejamatabëcuenebëjaiyaniva, pacayajavaponaponaena.

Pacuenia Filipos tomarapijivi ofrenda tojebabiabatsi Pablonexa yabara pelivaisi

¹⁰ Vajatuxanenë bitso nejamatabëcuenebarëyayaexana. Tsipaji baja paxamë icatsia panesivanajamatabëxainame pataneyavenonaenexamë. Nexata baja icatsia ofrenda panetoitorobaremena. Bajayajebi apo panetoitorobi atamë ofrenda, itsiata paxamë yabara apo jamatabëjumaitsinë: “Apo jitsipae raeta icatsia taneyavenonaenexa bajarapamonae,” apo jamatabëjanë. Jume cajena. Yapëtaniji pacuenia picarini jamatabëpanetoitorobi atamë ofrenda pataneyavenonaenexamë, itsiata apo pacacuenecaëjëpae patanetoitorobinexamë.

¹¹ Apo pacatoyaquinaetsi mapacueniaje ofrenda patanetoitorobivajënaeyamë bitso tanamatavenonaexae itsacuenejavayo. Dioso tanejamatejemayaexanaexae tajamatabëcuenebëjaiyaniva daxitacuene yabara, sivajamatabëcuenebarëyanë saya xuayovajëto xainajë.

¹² Yapëtaniji pacuenia ponaponajë, pamatacabi tsiquirijavayo xinae atanë. Yapëtanijinua pacuenia ponaponajë pamatacabi ayaijava xainajë. Yapëtanijinua pacuenia jamatabëcuenebarëyanëjitsia daxitamatacabijavabelianexa. Nexata itsa xainajë daxita tanamatavenonaejavaxi, barëyanë. Apo xinae atanë itsacuenejavayo ata, itsiata barëyanë tsabiabi.

¹³ Nejamatabëcueneecaëjëpa tanajamatabëcuenesaëtsinexa daxitacuene yabara. Tsipaji Cristo pesaëta nejamatabëcueneecaëjëpaeyaexana. ¹⁴ Itsiata baitsi jane paxamë pexaniacuene bitso panetoexaname itsa panetoitorobaremena bajarapaofrenda bitso tanamatavenonaejavata.

¹⁵ Payapëtaneme rabaja mapacuenije. Pamatacabi copiaya tsipaebanajetarucajë jivi pecapanepaelivaisinexatsi Macedonia nacujava, paxamë paFilipos tomarapijivimë panijanacuavecua itsa ponajë, paxamë panerajumate ofrenda pataneyavenonaenexamë. Itsatomarapijivi, Dioso pejumecovënëtsivi ata, apo nerajutsi ofrenda bajarapacuenia taneyavenonaenexa. Ëpaxamë itsiata paneyavenoname. ¹⁶ Nexata bajaraxuacujinae, itsa abaxë ponaponajë Tesalónica tomarata, panetoitorobabiabame

icatsia ofrenda anijatonë tanamatavenonabiabijavata. ¹⁷ Sivabarëyanë tsabiabi itsa panetoitorobabiabame bajarapacuenia. Itsiata apo sivabarëyanë tsabiabi tanetoxanepanaexae bajarapacuenia pataneyavenonaejavamë. Jume baja cajena. Biji rajane sivabarëyanë tsabiabi bajarapacuenia pataneyavenonaejavamë. Tsipaji juya paxainaejitsiamë Diosojavabelia papecarajutsijavanexa athëbëtsia. ¹⁸ Nexata pitajë daxita patanetoitorobijavamë Epafroditota. Xainajë baja nexata bitso ayaijjava, tanamatavenonaejava matatoxenetsia. Xua panetoitorobame ofrendacuenia, tsitapexaniacuenetsi Dioso. Bajaraxua Dioso sivajamatabëcuenebarëya. ¹⁹ TajaDioso bitso pexainaenë. Nexata pacarajutsiana daxita pacuenia panamatavenoname. Bajara pijinia pacuenia ayaijjava Dioso pacarajutsiana Jesucristojavabelia xaniavaetsia panenajamatabëcuene copatsixae. ²⁰ Vaxa Dioso ayaijamatabëcuene daxitamatacabijavabelianexa! Bajara itsi tsane.

Pacuenia Pablo tonajumeitoroba Dioso pejumecovënëtsivi pebajacobinexatsi yabara pelivaisi

²¹ Nebajacobiana paxamëjavata daxita Jesús pelivaisi pejumecovënëtsivi, pamona Dioso pijajivi. Dioso pijajivi, pamona xanëjavata jinavanapa, pacabajacobalia. ²² Daxita Dioso pijajivi, mapatomarataje pejinavanapaevi, pacabajacobalia. Romanonacua pepo pevetsinë pijabota penacuenebivi ata bitso pacabajacobalia.

²³ Pacatovajëtabiabatsi Diosojavabelia, vajatuxanenë Jesucristo papecayavenonabiabinexa. Bajara itsi tsane.

Mapabaxutoje San Pablo toyaquina Colosas tomarapijivijavabelia

Pacuenia Pablo toyaquina mapabaxutoje Dioso pejumecovênétsivi, Colosas tomarapijivijavabelia, yabara pelivaisi

¹⁻² Xanê Pablonê, Dioso tanetojitsipaexae, nitapeta Jesucristo pijaapóstolenênexanê. Nexata Jesucristo nitoroba jivi pexanialivaisi tatsipaebaponaenexa. Pacatoyaquinatsi mapabaxutoje xaniavaetsia Jesucristo pelivaisi panejumecovênétsivi, Colosas tomarata panejinavanapaevi. Vajabananê Timoteo ata pacajamatabênajina. Aeonoxae baja nacaemonaetsi, paxamê ata Jesús pelivaisi panejumecovênétsixae. Pacatovajêtatsi vaxa Diosojavabelia papecaitaxutotsoniataenexa jamatabêcuenexanepanaeya panejinavanapaenexa.

Pacuenia Pablo Diosojavabelia tovajêtabiaba Colosas tomarapijivi, Jesús pelivaisi pejumecovênétsivi, yabara pelivaisi

³ Paxanêbeje Timoteobeje pacatovajêtabiatsibeje vajatuxanenê Jesucristo paxa Diosojavabelia. Nexata Diosojavabelia patacatovajêtsijavatabeje, paxamê yabara Diosojavabelia pajumaitsinêbeje tsabiabi mapacueniaje: “Pexaniajamatabêcuene pacarajutatsibeje. Tspaji pexaniacuenia yavenonabiabame Colosas tomarapijivi,” pajanêbeje tsabiabi Diosojavabelia paxamê yabara. ⁴ Bajarapacuenia pajumaitsinêbeje tsabiabi tspaji pacavênêlivaisitanetsibeje xaniavaetsia panejumecovênétavanapaejava Jesús pelivaisi. Pacavênêlivaisitanetsibejenua paneasivatsavanapaejava daxita Jesús pelivaisi pejumecovênétsivi. ⁵ Bajara pajamatabêcueneitsimê tspaji baja xaniavaetsia payapêtaneme xua Dioso pacatoxaniavaeta athêbêtatsia papecarajutsinexa. Pamatacabi ajena pajumetaneme pexanialivaisi papecacapanepaelivaisinexa, bajarapamatacabi payapêtaneme baja xua Dioso pacatoxaniavaeta athêbêtatsia papecarajutsinexa. ⁶ Bajarapapexanialivaisi pajumetaneme baja pamatacabi copiaya Epafra pacatsipaeba Dioso papecaasivajava. Bajarapalivaisi baja aeonoxae daxitanacuanêjava yacaêjêpaponâ. Nexata daxitanacuanêjava, pamonaê jumecovênétapona bajarapalivaisi, copatapona baja perujumatabêcuenemi. Nexata baja pejanajamatabêcuene xainapona. Bajarapamonae pejanajamatabêcuene xainapona, pacuenia paxamê ata pejanajamatabêcuene paxainame pamatacabi ajena pajumecovênétame bajarapalivaisi. Bajara pamatacabijavaverenacujinae paxamê baja payapêtaeponame pepacuenê Dioso papecaitaxutotsoniataejava. ⁷ Dioso papecaitaxutotsoniataejava, copiaya baja cajena vajaasivanê Epafra pacatsipaeba. Bajaraponê Jesucristo xaniavaetsia petonacuenebinê. Nexata bajaraponê panefitorobaremena pataneyavenonaenexabeje Dioso patatonajuanacuenebinexa majotaje. ⁸ Nexata pamatacabi Epafra pata paxanêbejevaberena, panetsipaebabeje xaniavaetsia panejinavanapaejava. Panetsipaebabejenua Espíritu Santo papecayavenonaejava paneasivanexa itsamonae ata.

⁹ Nexata patacavênêlivaisitaecujinaebeje, pacatovajêtabiatsi Diosojavabelia. Pacatovajêtabiatsi xua Dioso pacatojitsipa papecayapêtaeyaexanaenexa. Nexata Dioso itsa pacayapêtaeyaexana xua Dioso pacatojitsipa, bajaraxua paneexanavanapaenexa. Bajarapacuenia

pacatovajëtabiabatsi daxitacuene, Dioso pijacuene ata, Dioso papecayapëtaeayaexanaenexa. ¹⁰ Pacatovajëtabiabatsinua xaniavaetsia jivi panetsitajinavanapaenexa, Dioso papecasivabarëyanexa pexaniacuene paneexanabiabixae. Pacatovajëtabiabatsinua Diosojavabelia panevajënaeyabelia Dioso panejamatabëcueneyapëtaeponaenexa. ¹¹ Pacatovajëtabiabatsinua Dioso papecajamatabëcueneta asaëyaexanaenexa pesaëta. Nexata bajayajebi itsamonae pacaitsacueniababiabi ata, pacajamatabëcuenecaëjëpaena paneajamatabëcuenesaë tsavanapaejava. ¹² Pacatovajëtabiabatsinua paxamë panejumaitsabiabinexa Diosojavabelia: “Xanepana rabaja. Tspaji bitso pexaniacuene panetoexaname,” panejaitisabiabinexa Diosojavabelia. Bajarapacuenia pajumaitsimë tsabiabi tsane tspaji bajaraponë pacavecuajibiaexana baja panijaneconimi. Nexata baja Dioso aneconijibia pacatane. Nexata paxamë ata Dioso pacarajutsiana xua xaina pijajivi perajutsinexa pijapenivenivenaenacuataatsia. ¹³ Vaxaitsi bajayata apo yapëtaetsi pexaniajailivaisi. Nexata picani bepitaquirinacuata vajajinavanapaevi. Tspaji picani dovathi pijajivitsi tsavanapae. Pibisiacuene exanabiabatsi pacuenia dovathi nacaïtoroba. Itsiata baja aeconoxae Dioso nacapita dovathivecu. Nexata baja Dioso pexënato, piasivanë, pijajivitsi nacaexana. ¹⁴ Nacasivatëpa Cristo. Nexata baja Cristo pejamatabëcueneta Dioso nacavecuajibiaexana vajaneconimi. Nexata baja aneconijibia jinavanapatsi.

Pacuenia Dioso nacavecuajibiaexana pibisiacuene vajaexanaeconimi Cristo vajanacasivatëpaexae yabara pelivaisi

¹⁵ Dioso cajena caeto ata apo vajataenë. Itsiata Dioso pexënato, Cristo, naexana mapanacuataje. Cristo paxa jëpa. Dioso daxitacuene mapanacuata pexanaevajënaeya ata, Cristo baja cajena ponapona athëbëtatsia. ¹⁶ Cristo baja cajena exana daxitacuene Dioso pejamatabëcueneta. Athëbëtatsia xua apo taetsi, Cristo exana. Daxitacuene xua tanetsi mapanacuata ataje, Cristo exana. Cristo daxitacuene itsa exana, ángelevi ata exana. Ángelevi penamatacaïtorobivinexa ata, Cristo exana. Bajarapacuenia Cristo ángelevi ata exana pacuenia Cristo jitsipa petonacuenebavanapaenexatsi. ¹⁷ Daxitacuene Cristo pexanaevajënaeya ata, Cristo baja cajena athëbëtatsia ponapona. Daxitacuene xua Cristo exana, bajaraxua pexanaecujinae abaxë Cristo pesaëta mapamatacabita ataje tsitecanajetaruca. ¹⁸ Cristo baja cajena pevetsinë daxita Dioso pejumecovënëtsivi. Nexata daxita Dioso pejumecovënëtsivi Cristo penamatacaïtorobinë. Cristo pejamatabëcueneta daxita Dioso pejumecovënëtsivi Dioso pijajivi exanatsi. Cristo taxuxuaba jivi petëpaecujinae icatsia jivi piasaëjavanexa. Bajaraxuata itsamonae ata icatsia asaë tsane petëpaecujinae. Nexata Cristo daxitajivi matatoxenetsia bitso ayajamatabëcuenenë. ¹⁹ Bajarapacuenia Cristo bitso ayajamatabëcuenenë tspaji Dioso pexënato tojitsipa pejamatabëcuenejëpaenexatsi. ²⁰ Daxitajivi, pamonaë jinavanapa mapanacuataje, naneconita Diosojavabelia. Pamonaë ata jinavanapa athëbëtatsia, naneconita Diosojavabelia. Nexata Dioso jitsipa daxita bajarapamonae pebarajamatabëcuenexanepanaenexa. Nexata Dioso itorobica Cristo mapanacuayabetsicaje cruzata pesivatëpaenexa daxita bajarapamonae. Nexata daxita bajarapamonae Dioso aneconijibia tane Cristo pesivatëpaejamatabëcueneta. Bajaraxuata Dioso baja barajamatabëcuenexanepana bajarapamonae.

²¹ Paxamë picani abaxë bajayata Diosovecu naxuabiaya pajinavanapame. Dioso bepapijavajabitsaëmë tsavanapae pibisiacuene paneexanavanapaexae. Itsiata baitsi jane aeconoxae baja Dioso

pacabarajamatabëcuenexanepana. ²² Dioso baja aeconoxae pacabara-jamatabëcuenexanepana. Tsipaji Jesucristo bepejiobicuena cruzata pacasivatëpa. Nexata baja Dioso pacavecuajibiaexana pibisiacuene paneexaneconimi. Bajaraxuata aeconoxae baja Dioso papijajivimë. Dioso baja pitabarata aneconijibia pajinavanapame. ²³ Nexata panevajënaeyabelia aneconijibia Dioso pitabarata panejinavanapaenexa, asaëyata pajumecovënëtanapare Cristo papecasivatëpaejava panijaneconi yabara. Palivaisi baja pajumecovënëtime papecacapanepelivaisinexa, pëtsa pacopatame panejumecovënëtsijava. Bajarapalivaisi baja yacaëjëpa daxitanacuanëjava petsipaebaponaejava. Xanë ata, Pablonë, tsipaebaponajë bajarapalivaisi.

Pacuenia Pablo itorobatsi peyavenonaenexa Dioso pejumecovënëtsivi yabara pelivaisi

²⁴ Xanë Pablonë, majotaje penaneconitsivi pejebabiabibota, naneconit-siaponaponajë paxamë apo pajudiovimëjava Cristo pelivaisi patacatsipae-baponaexae. Itsiata jamatabëcuenabarëyanë tsaponaponaë, nebejiobiaex-anabiabi ata. Pacuenia Cristo bejiobiaexanatsi pijajivi pecapanepaenexa, bajara pijinia pacuenia xanë ata itsamonae nebejiobiaexanabiaba. Bajara-pacuenia Dioso netocopata tanebejiobiaexanabiabinexa tavajënaeyabelia ta-jamatabëcuenesaëtsaponaenexa Dioso tajumecovënëtsijava. Nexata tanesi-vaajamatabëcuenesaënexa daxita pamonaë jumecovënëta Cristo pelivaisi. ²⁵ Dioso netocopata tayavenonaenexa Dioso pijajivi, pamonaë Cristo pelivaisi jumecovënëta. Bajaraxuata paxamë ata pacayavenonatsi. Tsipaji Dioso nitoroba daxitajivi xaniavaetsia tatsipaebaponaenexa pexanialivaisi, Dioso pejumelivaisi. ²⁶ Dioso nitoroba jivi tatsipaebaponaenexa pacuenia Dioso tajëvelia najamatabëxaina pijajivi pecapanepaenexa. Dioso baja cajena nacua pexanaevajënaeya ata, najamatabëxaina pacuenia exanaejitsi pijajivi pecapanepaenexa. Abaxë picani itsajivi ata Dioso apo yapëtaeyaexanaë bajarapacuene. Itsiata baitsi jane aeconoxae baja Dioso tocopata daxita Dioso pejumecovënëtsivi peyapëtaenexa pacuenia Dioso exana pijajivi peca-panepaenexa. ²⁷ Dioso tojitsipa apo judiovi ata peyapëtaenexa pexanialivaisi, palivaisi picani itsajivijavabelia ata Dioso apo yapëtaeyaexanaë. Bajara-palivaisi mapacuenia itsije. Cristo cajena pacatsijamatabëca papecaya-javaponaponaenexa. Bajaraxuata nexata payapëtaneme itsamatacabi Cristo panëyajavajinavanapaejavanexa Dioso pijapenivenivenaenacuatatsia.

²⁸ Paxanë patanecaëjëpacuenia, daxitajivi xaniavaetsia patsipaebaponajë Cristo pelivaisi. Pamuxujobaponajënu xaniavaetsia daxita bajara-pamonaë pejumecovënëtsinexa Cristo pelivaisi. Bajarapacuenia pamuxu-jobaponajë pevajënaeyabelia pijamatabëcuenesaëtsaponaenexa Cristo pelivaisi pejumecovënëtsijava. ²⁹ Bajaraxuata asaëyata Dioso tonacuenebaponajë daxita pasaëta Cristo nerajutapona.

2

¹ Jitsipajë paneyapëtaenexa pacuenia bitso pacasivanajamatabëxainatsi. Nexata asaëyata Diosojavabelia pacatovajëtabiabatsi. Laodicea tomarapijivi ata tovajëtabiabajë. Itsamonae ata, pamonaë abaxë apo netaë, bajarapamonae ata tovajëtabiabajë. ² Asaëyata Diosojavabelia pacatovajëtabiabatsi papecajamatabëcuene asaëyaexanaenexa Cristo pelivaisi panejumecovënëtsijava. Pacatovajëtabiabatsinua najamatabëcuenejëpaeya panejinavanapaenexa namataenetsia panenasivaxae. Pacatovajëtabiabatsinua panejamatabëëthëtota ayallivaisi paneyapëtaeponaenexa

xaniavaetsia itsa payapëtaneme Cristo. Bajarapacuenia pacatovajëtabiatsi xaniavaetsia paneyapëtaenexa pexaniajailivaisi, palivaisi picani Dioso apo yapëtaeyaexanae itsajivijavabelia ata, baiatsi jane baja Cristo pelivaisi. ³ Cristo pelivaisi xaniavaetsia itsa yapëtanetsi, nexata yapëtanetsi pacuenia Cristo nacatojitsipa vajatonacuenebavanapaenexa. ⁴ Bajarapacuenia pacatsipaebatsi itsajivi ata papecayamaxëitojorobianiva, penajumetsënëtsilivaisi itsa pacatsipaeba, bepexaniajailivaisi itajara panejumetaeyaniva. ⁵ Apo pacayajavaponaponae atatsi, itsiata pacajamatabënajinabiatsi. Jamatabëcuenebarëyanë itsa pacavënëlivaisitanetsi najamatabëcuenejëpaeya panejinavanapaejava. Jamatabëcuenebarëyanëna itsa pacavënëlivaisitanetsi panevajënaeyabelia paneajamatabëcuenesaë tsavanapaejava panejumecovënëtsijava Cristo pelivaisi.

⁶ Bajaraxuata pacuenia baja copiaya panajamatabëcuenecopatame vajatuxanenë Jesucristojavabelia papecacapanepaenexa Diosojavabelia, bajarapacuenia tsiteca panajamatabëcuenecopatavanapare. Panajamatabëcuenecoparenuva panevajënaeyabelia Cristo papecayavenonapon-aenexa daxitacuene yabara. Nexata pajinavanapaeneme Cristo papecatojitsipaecuenia. ⁷ Paxamë xaniavaetsia panajamatabëcuenecopare Jesucristojavabelia papecayavenonaenexa. Nexata Jesucristo pacajamatabëcueneasaëyaexanaena. Nexata papexaniajailivaisi itsamonae pacatsipaeba, tsiteca pajumecovënëtavanapaeneme. Pajumaitsimëna tsabiabi tsane Diosojavabelia: “Xanepana rabaja. Tspijaji bitso pexaniacuene panetoexaname,” pajamë tsabiabi tsane Diosojavabelia.

Pacuenia Cristo pijajivi pejanajamatabëcuene xainavanapa yabara pelivaisi

⁸ Xania. Nayajivitaeya pajinavanapare. Pëtsa panacopatame papecayamaxëitojorobinexa pamona tsipaebavanapa saicayalivaisi Dioso pejumelivaisivecua. Bajarapamonae apo tsipaebaponae Cristo pelivaisi. Saya tsipaebapona mapanacuapijivi penajamatabëxainaelivaisi, penajumetsënëtsilivaisi, saya natsiquejemalivaisi.

⁹ Pacuenia Dioso jamatabëcueneitsi, Cristo itajëta mapanacuata itsa ponapona. ¹⁰ Pacuenia Dioso jamatabëcueneitsi, bajara paxamë ata itsamat-acabi pajamatabëcueneitsimë tsane. Tspijaji Cristo payajavajinavanapame. Bajaraponë bitso ayajamatabëcuenenë. Caëjëpatsi pitorobinexa daxitacuene. Caëjëpatsinua pitorobinexa daxitanacuanë pevetsivi ata. ¹¹ Itsa panajamatabëcuenecopatame Cristojavabelia, nexata baja Dioso pacavecuajibiaexana pibisiacuene paneexanaeconomicsi papecacapanepaenexa. Pibisijamatabëcuene ata baja pacavecuajibiaexana. Nexata pacuenia judiövi pijacuenia perabëcaucubatsi, bajarapacuenia paxamë apo pacaperabëcaucubi pibisiacuene paneexanaeconomicsi Dioso papecavecuajibiaexanaenexa. Jume baja cajena. Biji rajane Cristo papecasivatëpaejava panejumecovënëtsixae, Dioso pacavecuajibiaexana pibisiacuene paneexanaeconomicsi. ¹² Itsa pacabautisaba, merata pacabubutaxuareca. Nexata papecabautisabijavata itsa pacabubutaxuareca, Dioso pacatane Cristo bepapecayajavamëthëtsivi itsa mëthëtatsi petëpaecujinae. Nexata papecabautisabijavata, papecabubutaxuabicujinaereca icatsia itsa pacamat-acotsina menevetsina, Dioso pacatane Cristo icatsia bepapecayajavaasaëvi petëpaecujinae icatsia itsa asaë. Bajarapacuenia Dioso pacatane tspijaji Cristo yabara pajamatabëjumaitsimë mapacueniaje: “Xaniajai rabaja. Dioso pesaëta Cristo asaëyaexanatsi petëpaecujinae,” pajamatabëjamë. ¹³ Paxamë

picani abaxë bajayata bepanetëpaevi. Diosovecua naxuabiaya pajinavana-pame pibisiacuene paneexanaeneconi yabara. Bajarapacuenia picani Diosovecua naxuabiaya pajinavanapame apo pajudiovixaemë. Itsiata baitsi jane aeconoxae baja Cristo payajavajinavanapame papecacapanepaenexa. Tspijaji baja Cristo pejamatabëcueneta Dioso pacavecuajibiaexana pibisiacuene paneexanaeneconimi. ¹⁴ Bitso picani pibisiacuene exanavanapatsi. Tspijaji apo exanaetsi pacuenia Dioso pejumelivaisita nacaitoroba. Itsiata baitsi jane Dioso baja nacavecuajibiaexana daxita bajarapaneconimi Cristo cruzata vajanacasivatëpaexae. ¹⁵ Bajarapacuenia Cristo cruzata vajanacasivatëpaexae, Cristo baja cueneamoneyaba dovathi. Tspijaji bajarapacuenia Cristo itsa nacasivatëpa cruzata, asaëjibiaexana dovathi, pijajivi yajava. Pacuene dovathi pijajivi barëvetaponapona pitorobinexa, bajarapacuenia Cristo cueneamoneyaba. Nexata Cristo daxitajivijavabelia tsitanacueneitajëta pecueneamoneyabijava dovathi, pijajivi yajava.

Pacuenia Pablo muxujioba Jesús pelivaisi pejumecovënëtsivi pejamatabënjinavanapaenexa Cristo peecaejava athëëtatsia yabara pelivaisi

¹⁶ Cristo baja pecueneamoneyabixae dovathi, pëtsa panacopatame itsajivi ata papecajanuifavetsinexa panexaejava, panematavëjëaapejava ata. Itsamonae abaxë tsiteca jumecovënëtavapanapa perujulivaisi, Dioso Moiséspijinëta penajumecopatsilivaisi. Nexata pacuenia itorobatsi bajarapalivaisita, fies-tanë exanabiaba caevai canacujitsia. Itsafiestanë exanabiaba caeuameto canacujitsia, pejanajuameto itsa ecaica. Itsafiestanë exanabiaba penacuer-aevetsimatacabianë canacujitsia. Pëtsa pajumecovënëtame, itsajivi paca-junatsi ata panenaponaenexa bajarapafiestanëjavabelia. ¹⁷ Bajayata picani jivi ponabiaba bajarapafiestanëjavabelia. Tspijaji palivaisi bajayata Dioso Moiséspijinëta najumecopata, itorobatsi penaponabiabinexa bajarapafiestanëjavabelia. Itsiata baja Cristo itsa patsica mapanacuayabetsi-caje, Cristo baja copiarucaeyaexana bajarapacuenemi. Nexata pacue-nia Cristo nacaitoroba, bajarapacuenia exanavanapenatsi. ¹⁸ Pëtsa pajumecovënëtame itsamonae pacajumaitsi ata mapacueniaje: “Beveliaja-matabëcuenevi panataema. Pavajëtabiabarenua ángelevijavabelia Diosovecua panenaxuabiyaniya. Bemajitsinaebota baja cajena pataniji bajarapacue-nia vajaexanabiabinexa,” pacajai ata, pëtsa pajumecovënëtame. Bajarapamonae beayajmatabëcuenevi nataeyabiaba pejamatabëcuenepijilivaisi saya petsipaebaponaejava yabara. ¹⁹ Bajarapamonae Cristo apo pejumecovënëtsivi. Daxita vaxaitsi Cristo vajajumecovënëtsivi, Cristo pijajivitsi. Nexata Dioso nacatane caenë Cristo bepeperabëtotsi. Caejivi canacujit-sia peperabëtota vinamataropotsiarubenaponareca. Bajara pijinia pacue-nia vaxaitsi ata caenë Cristo bepeperabëtotsi Dioso nacatane. Bajarapacuenia Dioso nacatane Cristo pejamatabëcueneta. Nexata Dioso naca-jamatabëcueneyavenonapona. Nacajamatabëcuene vitsabiaexanaponanua pacuenia Dioso nacatojitsipa.

²⁰ Itsamonae jamatabëcuenenavëxaniabiaya jumai tsabiabi: “Va-janacacapanepaenexa Diosojavabelia, pexaniacuene toexanavana-paenatsi itsamonaejavabelia. Jumecovënëtavapanapenatsinua daxita pacuenia nacaitoroba mapanacuapijivije,” jai tsabiabi itsamonae jamatabëcuenenavëxaniabiaya. Itsiata baitsi jane paxamë baja payapëtaneme bajarapalivaisi apo pexaniajailivaisicuene. Cristo itsa tëpa, paxamë ata, Cristo bepapacayajavatëpaevi, Dioso pacatane. Nexata baja picani paxamë mapanacuapijicuene yabaraje apo bepasivanajamatabëxainaemë. ¿Detsa nexata xuajitsia itsiata pajumecovënëtavapanapame mapanacuapijivi

jamatabëcuenenavëxaniabiaya papecatsipaebilivaisije? ²¹ Bajarapamonae jumai tsabiabi: “Dioso pitabarata panenajamatabëcuene bijianaeyaniva, pëtsa pajayatame maxuaje. Pëtsa paxaneme maxuaje. Pëtsa papitame panecobeta maxuaje,” jai tsabiabi bajarapamonae. ²² Bajarapamonae xua itaveta itsamonae pejayatsiyaniva, pexaeyaniva ata, pepitsiyaniva ata, bajarapacuenae daxita vereverecaena. Bajarapacuenia pitavetsicuene saya jivi pejamatabëcuenepijilivaisita itaveta. ²³ Pamonaee bajarapacuenia pacaitavetapona, bepacatsita peyapëtaevi itajara. Tspaji bajarapamonae jamatabëpacaitoroba panevajëtabiabinea ángelevijavabelia. Bajarapamonae pacaitorobanua beveliajamatabëcuenevi panenataenexa. Pacaitavetanua panijacuata panenatojitsipaecuene paneexanaeyaniva. Bajarapamonae papecaitavetsicuene pajumecovënëtaponaee atamë tspaee, itsiata apo pacajamatabëcueneyavenonaee tspaee papecavecuajibiaexanaenexa papibisiamatabëcuene paxainame panejamatabëëthëtota.

3

¹ Cristo petëpaecujinae Dioso icatsia itsa asaëyaexanatsi, paxamë ata Cristo bepapecayajavaasaëyaexanaevi, Dioso pacatane. Bajaraxuata athëbëpijicuene pajamatabënajavanapare, Dioso pijanacuapijicuene. Athëbëtatsia Cristo eca Dioso pemuxuneneta, pecujanenia, penajuaevetsinexabeje daxitacuene. ² Pasivanajamatabëxainabiabare ëathëbëpijicuene. Pëtsa pasivanajamatabëxainabiabame mapanacuapijicueneje. ³ Cristo itsa tēpa, paxamë ata Cristo bepaneyajavatēpaevi, Dioso pacatane. Aeconoxae baja paxamë Cristo papecayajavaponaponaejava, itsamonae apo tae. Apo yapëtaenua. Pacuenia Cristo Dioso yajavaponapona, bajara pijinia pacuenia paxamë ata Dioso payajavajinavanapame. ⁴ Cristo baja cajena nacayajavaponapona. Vaxaitsi ata pijinia Cristo yajavajinavanapatsi. Pamatacabi Cristo icatsia athëbëvetsica patsianica, paxamë ata paxainaename penivenivenaecotia Cristo papijajivixaemë.

Pacuenia Dioso pejumecovënëtsivi perujamatabëcuenemi baja copata pejanajamatabëcuene pexainaenexa yabara pelivaisi

⁵ Mapacuenia pajamatabëjumaitsimëre tsavanapaeje: “Tajaperujamatabëcuenemi baja copatajë. Nexata baja apo jitsipañë icatsia taxainaejava perujamatabëcuene, mapanacuapijijamatabëcueneje. Apo jitsipañë baja itsapetiriva tajaitsijava tajavavecuua. Apo jitsipañë baja piauracuene ata taexanaponaejava. Apo jitsipañë baja pibisiacuene ata tanajamatabëxainaejava. Apo jitsipañë baja pibisiamatabëcuene ata tajitsipaejava. Apo jitsipañë baja ayaijava taxainaejava tanaxainaeyabinexa. Daxita baja bajarapajamatabëcuenemi copatajë. Nexata baja matavëjëa apo jitsipañë bajarapajamatabëcuene taxainaejava,” pajamatabëjamëre tsavanapae. Tspaji itsa pajitsipaejitsipame ayaijava panexainaejava pananaxainaeyabinexa, nexata pacopabijitsipame Dioso pancujitsipaejavami. Tspaji Diosovecuua bitso pajitsipaejitsipame mapanacuapijicueneje. Nexata pajamatabëcuenejēpaejitsipame pamonaee vajëcabiaba jumapecataeya pexanaenëanëjavabelia. Tspaji bajarapamonae Diosovecuua jitsipa jumapecataeya pexanaenëanë. ⁶ Daxita pamonaee Dioso apo pejumecovënëtsivi, bajarapitsipibisiacuene pexanavanapaevi, Dioso ayaicuenia naneconitsiaexanaenatsi. ⁷ Paxamë ata picani daxita bajarapitsicuene paexanavanapame Dioso panejumecovënëtsivajënaeya. ⁸ Nexata baja aeconoxae pacopabare daxita mapajamatabëcueneje. Paneanaepanabiabijava itsamonaejavabelia, pacopabare. Pibisiacuene

paneexanaenexa panenajamatabëxainabiabijava ata, pacopabare. Pibisiacuenia itsamonae panebaracuaicuaijaitabiabijava ata, pacopabare. Itsa pacuaicuaijamë, pëtsa pacuaicuaijamë pibisialivaisi. ⁹ Pëtsa namataenetsia panatsipaebame penajumetsënëtsilivaisi. Perujumatabëcuene picani bajayata panexainaexae, bajarapacuenia paexanavanapame. Itsiata baja aeconoxae pacopabame bajarapaperujumatabëcuenemi. ¹⁰ Nexata baja pejanajamatabëcuene paxainavanapame. Panevajënaeyabelia payapëtaeponame paneexanavanapaenexa pexaniacuene. Dioso, ponë pacaexana, pacuenia jamatabëcueneitsi, bajara pijinia paxamë ata pajamatabëcueneitsimëre tsavanapae. ¹¹ Daxita pamonaë Dioso pejumecovënëtsivi, pejanajamatabëcuene xaina. Nexata daxita Dioso pejumecovënëtsivi Dioso najëpaeya tane. Judíovi, apo judíovi ata, daxita bajarapamonaë Dioso najëpaeya tane. Pamonaë peperabëcaucubivitsi, pamonaë ata apo peperabëcaucubivitsi, daxita bajarapamonaë Dioso najëpaeya tane. Saicayanacuapijivi ata, pamonaë ata dajubicuenia canajetatsi itsamonaëjavabelia amoneya petonacuenebavanapaenexa, pamonaë ata apo canajetsitsi itsamonaëjavabelia amoneya petonacuenebavanapaenexa, daxita bajarapamonaë Dioso najëpaeya tane. Tsipaji bajarapamonaë Cristo tsijamatabëcatsi peyajavajinavanapaenexa caejivi canacujitsia. Nexata bajarapamonaë xaina baja pajamatabëcuene Dioso tane bitso penamatamotsicuene mapanacuataje.

¹² Dioso bitso pacaasiva. Pacaitapetanua papijajivinexamë. Bajaraxuata paitaxutotsoniataeyabiabianame itsamonae ata. Nexata ëpexaniajamatabëcueneta pajinavanapaename. Beveliajamatabëcuenevi nataeya pajinavanapaename. Pajamatabëcuenesaëmë tsavanapae tsane itsamonae, bajayajebi pacaitsacueniababiabi ata. ¹³ Namataenetsia panajamatabëcuene yavenonare bajayajebi ata. Itsa pacaitsacueniaba itsajivi, bajarapajivijavabelia pabarajamatabëcuenexanepanare. Pacuenia paxamë ata Cristo pacabarajamatabëcuenexanepana pibisiacuene paneexanaevi ata, bajara pijinia pacuenia paxamë ata pabarajamatabëcuenexanepanare itsamonaëjavabelia. ¹⁴ Matavëjëa mapacuenia paexanavanapareje. Namataenetsia bitso panaasivamëre tsavanapae. Bajarapamonaë nexata najamatabëcuenejëpaeya pajinavanapaename. ¹⁵ Pavajëtabiabare Diosojavabelia papecayavenonaenexa jamatabëcuenexanepanaeya panejinavanapaenexa. Bajarapacuenia panejinavanapaenexa, Dioso pacajunata caebitsaëto papecaexanaenexa Cristo yajava. Nexata Dioso itsa pacayavenona jamatabëcuenexanepanaeya panejinavanapaenexa, pajumaitsimë tsabiabi tsane Diosojavabelia. "Xanepana rabaja. Tsipaji bitso pexaniacuene panetoexaname," pajamë tsabiabi tsane Diosojavabelia.

¹⁶ Pavajëtabiabare Diosojavabelia Cristo pelivaisi itsamonae papecatsipaebijava papecajamatabëcueneenabiabinexa. Pavajëtabiabarenua Diosojavabelia xaniavaetsia Dioso panejamatabëcueneypëtaenexa. Namataenetsia panatsipaebabiabare Cristo pelivaisi. Namataenetsia panajamatabëcuene yavenonabiabarenua panejamatabëcuenesaënexa Cristo pelivaisi panejumecovënëtsijava. Daxita panejamatabëcuenevetsina pexaniajamatabëcuene rajutsiaya Diosojavabelia panaxëanabiabare vaji. Palivaisianë ata rubena Salmosbaxutota, panaxëanabiabare. Pavajianë ata rubena vajibaxutonëta, panaxëanabiabare. Pavajianë ata Espíritu Santo pejamatabëcueneta pacanaxëanaeyaxana, panaxëanabiabare. ¹⁷ Daxita xua paexanavanapame, paexanavanapare vajatuxanënë Jesucristo pejitsipaecuenia. Palivaisianë ata pacuaicuaijamë tsabiabi, pacuaicuaijamë

tsane vajatuxanenē Jesucristo pejitsipaecuena. Pexaniajamatabēcuene itsa parajutabiabianame vajatuxanenē Jesucristo paxa Diosojavabelia, Dioso papecayavenonabiabixae, Jesucristo pevēnēta pexaniajamatabēcuene parajutabiabianame.

Pacuenia Pablo Dioso pejumecovēnētsivi muxujioaba yabara pelivaisi

¹⁸ Paxamē papetiriavimē, pajumecovēnētabiabare pacuenia pacaitoroba paneamonajivi. Tspaji bajarapacuenia vajatuxanenē pacatojitsipa paneexanavanapaenexa. ¹⁹ Paxamē pijinia papebijivimē, pasivamēre panijavajivi. Pētsa anaeyacuenia paitorobabiabame panijavajivi. ²⁰ Paxamē pijinia papeximē, daxita xua paneaxajivi, paneenajivi ata, pacaitoroba paneexanaenexa, pajumecovēnētabiabare. Tspaji bajarapacuenē vajatuxanenē sivabarēya. ²¹ Paxamē pijinia panexi panexinaevi, pētsa panexi anaeya paitorobabiabame papecajumecovēnētabiabinexa xua paitorobame. Tspaji saya belia panexi jamatabēcuenefaefaenaejitsipa Dioso pejumecovēnētsijava. ²² Paxamē pijinia itsamonae papijavimē, dajubicuenia papecacanajetsivi itsamonae amoneya panetonacuenebavanapaenexa. Pacuenia panijatuxanevi pacaitoroba, bajarapacuenia patonacuenebabiabare panijatuxanevi. Pētsa matapania itsajota pacanaitaxutocaeveta panijatuxanevi, asaēyata patonacuenebame papecasivabarēyanexa panijatuxanevi panetonacuenebijava yabara. Biji rajane daxitamatacabi asaēyata xaniavaetsia patonacuenebabiabare. Panejamatabēcuenevetsina cuenejitsipaeya panijatuxanevi patonacuenebabiabare papecasivabarēyanexa vajatuxanenē. ²³ Daxita xua panijatuxanevi patonacuenebabiabame, jamatabēcuenebarēyaya patonacuenebabiabare panijatuxanevi. Xua panijatuxanevi patonacuenebabiabame, bajaraxua yabara pajamatabējumaitsimēre tsabiabi mapacueniaje: “Xua tajatuxanenē tonacuenebajē, bajaraxua taniji Cristonexa betatonacuenebijava. Apo ētajatuxanenēnēxa,” pajamatabējamēre tsabiabi. ²⁴ Payapētaneme rabaja mapacuneje. Vajatuxanenē pacarajutsiana pacuene pijajivi toxaina perajutsinexa, baitsi matacabi apo pevereverecaejaya. Patonacuenebavanapame baja cajena Cristonexa. Bajara jane ponē pepacuene panijatuxanenē. ²⁵ Panejumecovēnēre pacuenia pacaitorobatsi. Tspaji pajivi pibisiacuene exana, bajarapajivi itsamatacabi Dioso naneconitsiaexanaenatsi pibisiacuene pexanaeneconi yabara. Pamatacabi Dioso daxitajivi naneconitsiaexanaena, paneconivajēto caejivi canacujitsia xainapona, bajarapaneconivajētota Dioso naneconitsiaexanaponaena caejivi canacujitsia. Nexata itsajivi ata apo vecuapanepae tsane Dioso jivi penaneconitsiaexanaecuene.

4

¹ Paxamē papetuxanevimē, xaniavaetsia paevere panijajivi, papeca-tonacuenebabiabivi. Panajamatabēnapitabiabare paxamē ata panijatuxanenē athēbētatsia peecaejaya.

² Daxita Dioso panjumecovēnētsivi icatsia pacatoyaquinatsi mapacueniaje. Diosojavabelia pavajētabiabare ajamatabēcueneitacsaya pajamatabēcuenemajitsinejevamē. Itsa pavajētabiabianame Diosojavabelia, Dioso papecayavenonabiabijava yabara, pajumaitsimē tsabiabi tsane mapacueniaje: “Xanepana rabaja. Tspaji bitso pexaniacuene panetoexaname,” pajamē tsabiabi tsane Diosojavabelia. ³ Itsa pavajētabiabianame Diosojavabelia, paxanē ata panetovajētabiabianame. Panetovajētabiabianame Diosojavabelia Dioso pataneyavenonaenexa

nacuanē pevetsivi patanitavetsiyaniva jivi patatsipaebaponaejava Cristo pelivaisi. Pajitsipajē jivi patatsipaebinxaxa pacuenia Jesucristo patsica mapanacuayabetsicaje vajanacasivatēpaenexa pibisiaeuene vajaexanaeconi yabara. Bajarapalivaisi jivi tatsipaebaponaexae, nenaneconitsiaexana. Nexata abaxē naneconitsiaya ponaponajē penaneconitsivi pejebabiabibota. ⁴ Cristo pelivaisi jivi itsa tsipaebabiabajē, jitsipajē jumenapebetsiaya tatsipaebabiabinxaxa. Nexata panetovajētabiabianamenua Cristo pelivaisi jivi jumenapebetsiaya tatsipaebabiabinxaxa tanejumeyapētaenexa xaniavaetsia.

⁵ Paepatota pacatoxanepana pexanialivaisi, Cristo pelivaisi, panetsipaebinxaxa itsamonaejavabelia, patsipaebabiabare. Xaniavaetsianua patsitajinavanapare pamonaē Dioso apo pejumecovēnētsivi. Tsipaji rabaja imoxoyo pevājēnae Cristo icsatia pepatsijavanexatsica. ⁶ Daxita palivaisianē pacuaicuanetsipaebilivaisi. Panajamatabēcuenererenua xaniavaetsia panejumecanaviatsinxaxa caejivi canacujitsia bajarapamonae itsa pacayanijobapona Dioso pejumelivaisi yabara.

Pacuenia Pablo toyaquina pecopatsinxaxa baja petoyaquinaelivaisi mapabaxutotaje yabara pelivaisi

⁷ Vajabananē Tíquico, bitso vajaasivanē. Bajaraponē xaniavaetsia tonacuenebabiaba vajatuxanenē. Vajatuxanenē pijacuene patonajuanacuenebajēbeje. Bajaraponē pacatsipaebiana daxita pacuenia xanē ponaponajē. ⁸ Bajaraxuata bajaraponē pacatoitorobaliatsi papecatsipaebinxaxa pacuenia pajinavanapajē. Bajaraponē nexata itsa pacatsipaebiana, nexata panesivaajamatabēcuenesaēmē tsane. ⁹ Bajaraponē paxamējavabelia yajavaponaejitsia vajabananē Onésimo. Bajaraponē Onésimo panijatomarapijinē. Tonacuenebabiaba xaniavaetsia vajatuxanenē. Bajaraponēbeje pacatsipaebiana daxita pacuenia Dioso pejumecovēnētsivi jinavanapa majotaje Roma tomarata.

¹⁰ Aristarco beje naneconitsia paponaponajēbeje penaneconitsivi pejebabiabibota. Aristarco ata pacabajacobalia. Marcos ata, Bernabé peyujapijinē, pacabajacobalia. Paxamē rabaja payapētaneme pacuenia paxanajitsiamē. Nexata Marcos itsa patsialia paxamējavabelia, pacopiapitsianame xaniavaetsia. ¹¹ Pacabajacobalia Jesús ata, ponē itsavēnē, Justo. Judíovi picani ayaibitsaēto Jesucristo pelivaisi jumecovēnēta. Itsiata bajarapamonae yajuvēnēvi, caenēbeje saya, neyavenona vajatuxanenē pijacuene tatonacuenebijava. Neyavenona saya mapamatabēxēyoje. Aristarco, Marcos, Jesús. Bajara saya pamatabēxēyo neyavenona. Bajarapamonae bitso neyavenona.

¹² Epafra ata, Cristo pijajivitonē, panijatomarapijinē. Bajaraponē ata pacabajacobalia. Bajaraponē bitso pacatovajētabiaba Diosojavabelia. Pacatovajētabiaba ajamatabēcuenesaēya panejumecovēntavanapaenexa Dioso pejumelivaisi. Pacatovajētabiabanua xaniavaetsia paneexanabiabinxaxa pacuene Dioso pacatojitsipa. ¹³ Pacatsipaebatsi baja cajena pacuenia Epafra pacatovajētabiaba Diosojavabelia bitso papecajamatabēnajinaexae. Bajara pijinia pacuenia bitso tovajētabiaba Dioso pejumecovēnētsivi, pejinavanapaevi Laodicea tomarata. Bitso tovajētabiabanua Hierápolis tomarata pejinavanapaevi ata. ¹⁴ Vajaasivanē Lucas, ponē jivi vaēbabiaba, bajaraponē ata pacabajacobalia. Demasvēnēnē ata pacabajacobalia.

¹⁵ Nebajacobi vajamonae, daxita Dioso pejumecovēnētsivi, Laodicea tomarata pejinavanapaevi. Nebajacobi Ninfas ata. Pamonaē ata nacaetuatabiaba bajaraponē pijabota, nebajacobi. ¹⁶ Itsa baja

paveretame panelebijava mapabaxutoje, patoitorobianame Laodicea tomarapijivijavabelia penalebinexa bajarapamonae ata. Bajarapamonae ata tatoyaquinaebaxuto juya pacatoitorobiana panenalebinexa paxamě ata. ¹⁷ Arquipojavabelia pajumaitsimě tsane mapacueniaje: “Dioso pecatocopatsijava netonacuenebinexa, verere xaniavaetsia,” pajamě tsane.

¹⁸ Xaně Pabloně, pacatoyaquinatsi baja cajena tacobeta mapalivaisiy-oje patanebajacobinexamě. Pajamataběnajinavanapare penaneconitsivi pe-jebabiabibota taponaponaejava. Pacatovajětabiabatsi Diosojavabelia papacayavenonabiabinexa Dioso. Bajara itsi tsane.

Mapabaxutoje San Pablo copiaya toyaquina Tesalónica tomarapijivjavabelia

Pacuenia Pablobana, Silvanobana, Timoteobana toyaquina mapabaxutoje Dioso pejumecovënëtsivjavabelia yabara pelivaisi

¹ Xanë, Pablonë, Silvano, Timoteo, mapamatabëxëyoje pacatoyaquinatsi mapabaxutoje. Pacatoyaquinatsi Dioso panejumecovënëtsivi, paTesalónica tomarapijivimë. Panenajamatabëcuenecopatsivi baja vaxa Diosojavabelia, vajatuxanenë Jesucristojavabelia ata. Pacatovajëtatsi vaxa Diosojavabelia papecaitaxutotsoniataenexa jamatabëcuenexanepanaeya panejinavanapaenexa.

Pacuenia Tesalónica tomarapijivi Dioso pejumecovënëtsivi xaniavaetsia Dioso jumecovënëtsia jinavanapa yabara pelivaisi

² Itsa pavajëtabiabajë Diosojavabelia, pexaniajamatabëcuene parajutabiabajë Diosojavabelia paxamë yabara. Pacatovajëtabiabatsi Diosojavabelia daxitamatacabi canacujitsia Dioso papecayavenonabiabinexa. ³ Itsa pacatovajëtabiabatsi vaxa Diosojavabelia, panajamatabënapitabiabajë Dioso pinijicuenia panetonacuenebavanapaejava panenajamatabëcuenecopatsixae Diosojavabelia. Panajamatabënapitabiabajënuua bitso pinijicuenia panejitsipaejava Dioso. Paxamë rabaja pajamatabëcuensaëmë tsavanapae panecopiaevetavanapaejava vajatuxanenë Jesucristo icatsia pepatsijavanexatsica. ⁴ Tajamonae, Dioso baja cajena pacaasiva. Payapëtaniji baja cajena Dioso papecaitapetsijava papijajivinexamë. ⁵ Bajayata itsa pacatsipaebatsi mapapexanialivaisije Diosojavabelia papecacapanepaelivaisinexa, saya patacuibovojotota apo pacatsipaebitsi. Jume baja cajena. Biji ra Espíritu Santo pesaë yajava pacatsipaebabiabatsi. Nexata baja payapëtaneme palivaisi pacatsipaebatsi, pexaniajailivaisicuene. Payapëtanemenua pacuenia paxanë xaniavaetsia panajinavanapajë paxamëjavata patanitaxutua ajamatabëcuensaënexamë.

⁶ Pacuenia paxanë pajinavanapajë, pacuenia Jesús ata ponapona, bajarapacuenia paxamë ata pajinavanapame. Barëyaya baja pajumecovënëtavanapame patacatsipaebilivaisi Espíritu Santo papecatsijamatabëcaexae. Bajarapacuenia barëyaya pajumecovënëtavanapame patacatsipaebilivaisi, itsamonae bitso pacabejibioaexanabiabi ata.

⁷ Bajarapacuenia panejinavanapaejava daxita Dioso pejumecovënëtsivi, Macedonia nacuapijivi, Acaya nacuapijivi ata, itsa pacavënëlivaisitane, bajarapamonae ata yapëtane bajarapacuenia xaniavaetsia Dioso petojinavanapaenexa. Nexata bajarapamonae ata xaniavaetsia jinavanapa pacuenia paxamë pajinavanapame.

⁸ Itsiata ëMacedonia nacuapijivi, ëAcaya nacuapijivi ata, bajarapacuenia xaniavaetsia panejinavanapaejava, apo pacavënëlivaisitane. Tajë nacuapijivi ata pacavënëlivaisitane panenajamatabëcuenecopatsijava Diosojavabelia. Bajarapacuenia itsa pacavënëlivaisitane, bajarapamonae ata yapëtane baja Jesús pelivaisi pexaniajailivaisicuene. Bajaraxuata paxanë apo pacavajunupaebitsi daxita bajarapamonaejavabelia. Tsipaji baja yapëtane. ⁹ Biji rajane bajarapamonae pijacuata panetsipaeba paxamë xaniavaetsia patanecopiapitsjavamë pamatacabi pacanasivaxainatsi. Paxamë picani jumapecataeya pexanaenëanëjavabelia panavajëcabiabame.

Itsiata baja aeconoxae pacopatame jumapecataeya pexanaenēanējavabelia panenavajēcabiabijavami. Nexata baja pepo Diosojavabelia panajamatabēcuenecopatame. Patonacuenebavanapame pepo Dioso, ponē piasaētsaponaponaenē daxitamatacabijavabelianexa. Bajarapacuenia paxamē yabara panetsipaeba baja cajena daxita bajarapamonae. ¹⁰ Bajarapamonae panetsipaebanua panecopiaevetavanapaejava Jesús, Dioso pexēnato, athēbēvetsica icatsia pepatsijavanexatsica. Bajaraponē, Jesús, Dioso baja cajena asaēyaexanatsi petēpaecujinae. Jesús nacacapanepaena pibisiacune vajaexanaeconi yabara Dioso vajanacananeconitsia exanaejavaminexavecua.

2

Pacuenia Pablo nacueneba Tesalónica tomarata yabara pelivaisi

¹ Tajamonae, apo panacueratsinē itsa pacasivaxainatsi. Bajarapacuenie paxamē panijacuata payapētaneme. ² Paxamē baja cajena payapētaneme mapacueneye. Paxanēbeje Silasbeje patapatsivajēnaebeje paxamējavabelia, Filipos tomarata panenaneconitsiaexanabeje itsaneconi apo paxainae atanēbeje. Panebejiobiaexanabenua bajarapamonae. Itsiata baitsi jane Dioso pataneyavenonaexaebeye, ajumeurajibia pacatsipaebatsi pexanialivaisi Diosojavabelia papecacapanepaelivaisinexa. Pacatsipaebatsi bajarapalivaisi, patanitoyavi picani apo panetocopatsi ata patacatsipaebinexa. ³ Palivaisi pacatsipaebatsi, pexaniajailivaisi cajena. Apo penajumetsēnētasilivaisi. Apo pacatsipaebitsi bajarapalivaisita patacayamaxēitojorobinexa. ⁴ Biji ra Dioso paneitoroba. Panetocopatanua jivi patatsipaebinexa pexanialivaisi pecapanepaelivaisinexatsi Diosojavabelia. Bajaraxuata bajarapalivaisi jivi itsa patsipaebaponajē, apo patsipaebaponaenē saya jivi patanebarēyataenexa bajarapalivaisi patatsipaebijava yabara. Biji ra bajarapalivaisi jivi patsipaebaponajē Dioso patanebarēyataenexa. Tspaji Dioso vajanacajamatabēcueneyapētanē. ⁵ Paxamē baja cajena payapētaneme mapacueneye. Caeto ata paxanē itsalivaisi apo pacabarēcuaiquajitsi saya jema bajarapalivaisi yabara patanebarēyataenexamē. Yamaxēitojorobiaya livaisi apo pacatsipaebitsi palata patacavecuapitsinexa. Dioso baja cajena daxita bajarapacuenie panejamatabēcueneyapētane. ⁶ Cristo patanitorobixae, panejamatabēcuenecaējēpa picani patacaitorobinexa pataneyaiyataenexamē. Itsiata baitsi jane caeto ata apo pacaitorobitsi pataneyaiyataenexamē. Apo paitorobinē itsamonae ata pataneyaiyataenexa. ⁷ Biji rajane paxenia petiriva asivaya xaniavaetsia baevetaponapona pexi, bajara pijinia pacuenia paxanē ata asivaya xaniavaetsia pacaevetavanapatsi. ⁸ Bitso pacaasivatsi. Nexata pacatsipaebatsi Dioso pejumelivaisi. Bitso patacaasivaxae, itsamonae jamatabēpanebejebabiabi ata, itsiata apo pacopatsinē patacayavenonaponaejava. ⁹ Tajamonae, panecuenecanaējēre mapacueneye. Pamatacabi paxamējavata pajinavanapajē, pinijicuenia panacuenebabiabajē. Pinijicuenia panacuenebabiabajē patajacuata patanaevetsinexa. Pacatsipaebaponatsinua pexanialivaisi, palivaisi Dioso nacayapētaeyaexana. Paepatota pacuenesajinajē, panatonacuenebabiabajē matacabita, meravi ata. Bajarapacuenia panatonacuenebabiabajē itsanē ata paxamēyajuvēnēnē petoayapēbejeyanivatsi patanevetaponaejava. ¹⁰ Paxamē baja cajena paneyapētaneme pacuenia pajinavanapajē. Dioso ata paneyapētane. Paxamē baja cajena paneyapētaneme paxanē pibisiacune apo pataxanaevi. Paxamē baja cajena paneyapētaneme paxanē

bitso Dioso patajumecovënëtsivi. Paxamë baja cajena paneyapëtaneme paxanë itsacueneneconiyi ata apo paxainaenë, paneconi yabara pananeconitsijitsianë paxamëjavata itsa pacatsipaebavanapatsi Dioso pejumelivaisi. ¹¹ Paxamë baja cajena paneyapëtaneme paxamë pacaenëmë canacujitsia patacamuxujobaponaejava paneajamatabëcuenesaënexa Diosojavabelia. Pacuenia pexi pexainaenë nacoximuxujioba, bajara pijinia pacuenia paxanë ata pacamuxujobatsi. ¹² Pacaitorobatsi baja cajena xaniavaetsia panetojinavanapaenexa Dioso papecabarëyataenexa. Dioso baja cajena pacajunata daxitacue ne papecabarëevetsinexa pijapenivenivenaenacuatsia.

¹³ Itsa pacatsipaebatsi Dioso pitorobilivaisi, panenamuxunaevetame. Nexata panejumecovënëtame patacatsipaebilivaisi. “Xaniajai baja cajena. Dioso pejumelivaisi nacatsipaeba,” panejamatabëjaixae, panejumecovënëtame. Apo pajumetaemë saya bejivitonë pejamatabëcueneta pepaebilivaisi. Xaniajai cajena. Dioso pejumelivaisi pacatsipaebaponatsi. Bajarapalivaisi panejumecovënëtsixae, panevajënaeyabelia paexanavanapame pacuenia Dioso pacaitoroba. Bajaraxuata paxamë yabara pexaniajamatabëcuene parajutabiabajë Diosojavabelia. ¹⁴ Tajamonae, pacuenia Judea nacuata Dioso pejumecovënëtsivi bejiobiaexanatsi pijanacuapijivi, judíovi, bajara pijinia pacuenia pacabejiobiaexana panijanacuapijivi. ¹⁵ Pacuenia bajarapajudíovi pijasalinaivimi bajayata beyaxuabapona Diosojumepaebivimi profetavi, bajara icatsia pacuenia bajarapamonaemi pemomoxi beyaxuaba pepo petuxanenë Jesús. Nexata Jesús papijajivixaenë, paxanë ata bajarapamonaenë panecapitsapa judíovi penacaetuatabiabibovecua. Dioso apo pejisipaecue ne bajarapajudíovi exanapona. Bajara pajudíovi daxitajivi bitso itoya. ¹⁶ Paxanë pexanialivaisi itsa patsipaebabiabajë apo judíovijavabelia, apo judíovi ata pecapanepaenexatsi Diosojavabelia, nexata bajarapajudíovi panejumeitavetabiaba. Bajarapacuenia patanejumeitavetabiabixae, pibisiacue ne pexanaeneconi pematatsënë ayaineconi natsixaina Diosojavabelia. Nexata baja aeconoxae bajarapamonaenë tocopiapatatsi ayaiacuenia Dioso penaneconitsiaexanaematacabinexatsi.

Pacuenia picani icatsia Pablo jamatabëtane Tesalónica tomarapijivi yabara pelivaisi

¹⁷ Tajamonae, patacavecuaponaecujinae, caematacabibeje apo pacatae atatsi, itsiata pacajamatabënajinavanapatsi. Bitso picani icatsia jamatabëpaponajë paxamëjavabelia patacataenexa. ¹⁸ Jamatabëpaponajë picani paxamëjavabelia. Xanë Pablonë, jamatabëponabiabajë picani. Itsiata dovathi apo panecopatsi. ¹⁹ Vajatuxanenë Jesucristo icatsia itsa patsianica, pacavajunupaebianatsi bajaraponëjavabelia xaniavaetsia Dioso panejumecovënëtsijava. Bitso pacasivajamatabëcuenebarëya tsanetsi. ²⁰ Paxamë yabara baja cajena pexaniajamatabëcuene parajutabiabajë Diosojavabelia. Pacasivajamatabëcuene barëyatsinua tsabiabi.

3

¹ Bajayajebi baja cajena apo pacataetsi. Nexata baja belia apo panajamatabëcuene saëtaponaejitsipaenë matavëjëa pataevetaponaejava patacataenexa. Nexata baja panajamatabëxainajëbeje ëTimoteo pataitorobinexabeje, peponaenexa paxamëjavabelia papecataenexa. Paxanëbeje Silvanobeje, Atenas tomarata panacopatsianajëbeje. ² Nexata baja pacatoitorobatsibeje vajabanenë Timoteo. Timoteobeje baja cajena

Dioso patatonajuanacuenebinēbeje, jivi patatsipaebaponaenexabeje pexanialivaisi, Cristo pelivaisi. Pacatoitorobatsibeje Timoteo papecayavenonaenexa, papecajamatabēcuene asaēyaexanaenexa Dioso panejumecovēnētsijava yabara. ³ Pacatoitorobatsibeje Timoteo papecayavenonaeya tsipaebabiabinexa pexanialivaisi, caenē ata paxamēyajuvēnēnē Dioso pejumelivaisi pejumecovēnētsijava pecipabiyaniva, itsamonae itsa bejiobiaexanaponatsi. Paxamē baja cajena payapētaneme Dioso vajanacatocopatsijava itsamonae vajanacabejiobiaexanaponaenexa. ⁴ Pamatacabi abaxē pacayajavajinavanapatsi, tajēvelia baja cajena pacatsipaebabiabatsi itsamonae papecabejiobiaexanaponaevanexa Dioso papijajivixaemē. Nexata jane baja bajarapacuene aeconoxae pacatocopiapata. ⁵ Bajaraxuata baja apo najamatabēcuene saētaponaejitsipaenē matavējēa taevetaponaejava patacataenexa. Nexata baja itorobajē Timoteo peponaenexa paxamējavabelia papecataenexa pacuenia pajumecovēnētavanapame Dioso pitorobilivaisi. Xanē picani paxamē yabara jamatabējumaitsinē: “Dovathi meta bajarapamonae jamatabēcuenejētatsi. Othopaica meta baja. Nacueratajē meta baja bajarapamonaejavata pexanialivaisi tatsipaebabiabijava,” jamatabējanē picani paxamē yabara.

⁶ Timoteo nexata itsa parena paxamējavaverena, Tesalónica tomaraverena, panetsipaebabeje pexanialivaisi. Xaniavaetsia pina Dioso pajumecovēnētavanapame. Paxamē pina pasivamē tsavanapae itsamonae ata. Panejamatabēnjinavanapame pina pexaniajamatabēcuenia. Bitso pina jamatabēpanetaneme picani pacuenia paxanē ata jamatabēpacatanetsi picani. ⁷ Tajamonae, panetocopiapata rajane baja pibisiacuenia itsamonae patanebejiobiaexanaponaenexa. Itsiata baitsi jane panajamatabēcuenesaētavanapajē paxamē yabara. Panajamatabēcuenesaētajē itsa pacavēnēlvivisitantsi asaēya Dioso panejumecovēnētsijava. ⁸ Itsa pacavēnēlvivisitantsi asaēya Dioso panejumecovēnētsijava, nexata pacasivanajamatabēcuenesaētatsi. ⁹ Nexata pexaniajamatabēcuene parajutajē Diosojavabelia paxamē yabara. Pexaniajamatabēcuene parajutajē Diosojavabelia bitso patacasivajamatabēcuenebarēyaxae Dioso pitabarata. ¹⁰ Matacabita, meravi ata, daxita patajamatabēēthētovetsina pavajētabiabajē Diosojavabelia patanetocopatsinexa icatsia pataponaenexa paxamējavabelia patacataenexa. Pacatovajētabiabatsinua Dioso papecayapētaeyaexanaenexa palivaisi abaxē pacatosaica xaniavaetsia panejumecovēnētsinexa Dioso pejumelivaisi.

¹¹ Pavajētajē vaxa Diosojavabelia, vajatuxanenē Jesucristojavabelia ata, pataneyavenonaenexa pataponaenexa paxamējavabelia. ¹² Pacuenia paxanē pacaasivatsi tsavanapae, bajarapacuenia paxamē ata caejivi canacujitsia panevajēnaeyabelia nāmataenetsia panenasivanexa, pacatovajētatsi Diosojavabelia papecayavenonaenexa. Pacatovajētatsi Dioso papecayavenonaenexa itsamonae ata panasivanexa. ¹³ Pacatovajētatsi Dioso papecajamatabēcuene asaēyaexanaenexa, jamatabēcuenepanaeya panejinavanaenexa. Nexata paneconijibimē tsane. Paneconijibimē tsane Dioso pitabarata panubenaevavata, pamatacabi vajatuxanenē Jesús, daxita pijivi yajava, patsianica.

Pacuenia Dioso pitabarata xaniavaetsia bejinavanapatsi Dioso vajanacasivajamatabëcuenebarëyanexa yabara pelivaisi

¹ Tajamonae, nexata pinijicuenia pacamuxujobatsi. Vajatuxanenë Jesús pejamatabëcueneta pacaitorobatsi xaniavaetsia panejinavanapaenexa. Pacatsipaebatsi rabaja cajena pacuenia pajinavanapaejitsiamë Dioso papecasivajamatabëcuenebarëyanexa. Bajarapacuenia panevajënaeyabelia xaniavaetsia pajinavanapare daxitamatacabijavabelianexa.

² Payapëtanemenua baja cajena palivaisi vajatuxanenë Jesús pejamatabëcueneta pacaitorobatsi panejumecovënëtsinexa. ³ Dioso raja jitsipa xaniavaetsia panetojinavanapaenexa ëponënexa. Dioso raja pacatojitsipa panecopabinexa pibisiacuene panevitota paneexanaejava. ⁴ Dioso raja pacatojitsipa pacanëmë canacujitsia paneypëtaenexa mapacueneje. Petiriva itsa papitame panijavanexa, xaniavaetsia paevere. Payaiyataemanua. ⁵ Pëtsa petiriva papitame pibisiacuene saya panevitota paneexanaenexa bajarapovajavabelia pacuenia Dioso apo pejumecovënëtsivi baexana. ⁶ Dioso cajena apo jitsipae itsanë ata pevifota pibisiacuene pexanaenexa itsanë pijavajavabelia. Vajatuxanenë cajena pinijicuenia naneconitsiaexanaena daxita pamonaë exana bajarapacuene. Bajarapacuene yabara imata baja cajena pacatsipaebatsi pamatacabi abaxë pajinavanapajë paxamëjavata. ⁷ Dioso baja cajena nacajunata ëpexaniacuene vajaexanavanapaenexa. Dioso apo nacajunatsi pibisiacuene vajaexanavanapaenexa. ⁸ Itsamonae apo panejumecovënëtsi patatsipaebilivaisi. Bajarapamonae itsa apo panejumecovënëtsi paxanë, apo jumecovënëtsi Dioso, ponë nacarajuta Espiritu Santo.

⁹ Paxamë rabaja namataenetsia panaasivamë tsavanapae itsamonae Dioso pejumecovënëtsivijavabelia. Dioso baja cajena pacayapëtaeyaexana bajarapacuenia panenasivanexa. Bajaraxuata apo namatavenonaenë baja patacatoyaquinaenexa patacayapëtaeyaexanaenexa bajarapacuene. Tsipaji baja payapëtaneme. ¹⁰ Xaniajai rabaja. Pasivamë tsavanapae daxita vajamonae, Macedonia nacujava pejinavanapaevi. Itsiata icatsia pacaitorobatsi namataenetsia bitsoyo orijibia panenasivanexa. ¹¹ Pacuenia baja cajena copiaya pacaitorobatsi, bajarapacuenia jamatabëcuenexanepanaeya pajinavanapare. Epanijacuene saya paexanare panejamatabëitonotsiyanima itsamonaëjavabelia. Panijacuata panatonacuenebare bajarapacuenia panenaëvetavanapaenexa. ¹² Bajarapacuenia nexata Dioso apo pejumecovënëtsivi pacayaiyataena. Nexata apo pacatosaiacë tsane itsacuenejavayo ata panenamataavenonaëjava.

Pacuenia pepo petuxanenë Jesús icatsia patsijitsiatsica yabara pelivaisi

¹³ Tajamonae, pacatojitsipatsi xaniavaetsia paneypëtaenexa pacuenia itsamatacabi itsijitsia Dioso pepua pejumecovënëtsivi petëpaevi. Pacatsipaebatsi baja cajena bitso panenajamatabëxainaeayaniva itsa pacavecuatëpa itsajiviyo. Pacatsipaebatsi baja cajena bitso panenajamatabëxainaeayaniva, pacuenia bitso banajamatabëxaina Dioso apo pejumecovënëtsivi itsa vecuatëpatsi itsajiviyo. Bajarapamonae jamatabëcuenenavëxaniabiaya bajumaitsi: “Petëpaevi rabaja peponaxuabi,” bajai Dioso apo pejumecovënëtsivi. ¹⁴ Vaxaitsi baja cajena jumecovënëtsi Jesús vajanacasivatëpaëjava. Jesús vajanacasivatëpaëcujinaë, Dioso icatsia asaëyaexanatsi petëpaëjavavecua. Dioso icatsia itsamatacabi asaëyaexanaena daxita pamonaë Dioso pepua pejumecovënëtsivi petëpaevimi. Bajarapalivaisi vaxaitsi baja jumecovënëtsi.

¹⁵ Palivaisi pepo petuxanenē Jesús netsipaeba, bajarapalivaisi pacatsi-paebijitsiatsi. Vaxaitsi abaxē mapanacuata vajaasaētsavanapaevi pamatacabi pepo petuxanenē Jesús icatsia patsianica. Vaxaitsi athēbēabetsia apo namataxainatsitsia tsane. Petēpaevimi rajane copiaya namataxainania. ¹⁶ Angelevi penamatacatorobinē vavajai tsaxuabi tsane. Dioso pijatrompeta najumetsiana. Pepo petuxanenē jane baja pijacuata patsianica athēbēvetsica. Nexata pamonae Cristo pepua pejumecovēnētsivi tēpa, bajarapamonae asaēyaexanaenatsi petēpaejavamivecua. ¹⁷ Bajaraxuacujinae vaxaitsi, abaxē mapanacuata vajaasaētsavanapaevi bajarapamatacabita, itarērēbotatsia nacacaetuatsiania petēpaevimi yajava. Caxitajarabianatsi jane baja athēbētatsia pepo petuxanenē Jesús. Nexata jane baja daxitamatacabi-javabelianexa yajavajinavanapaenatsi bajaraponē. ¹⁸ Bajaraxuata panajamatabēcuenesaētavanapare mapalivaisitaje.

5

¹ Tajamonae, itsiata apo panamatavenonaenē patacatoyaquinaenexa patacayapētaeyaexanaenexa pamatacabita, paepatota ata, copiapatsijitsia daxita bajarapacue. ² Payapētaneme baja cajena pepo petuxanenē Jesús icatsia pepatsijavanexatsica. Paepatota apo vajēnaeevetsitsi, jemata patsianica. Pacuenia penacobetoxotsinēnexa meravi bapata itsajota apo jamatabēnajinaetsi, bajarapacuenia jemata patsianica pepo petuxanenē Jesús. ³ Pamatacabita jivi jumai tsaponae tsane: “Daxitanacuanējava baja cajena xanepana. Daxitajivi xaniavaetsia jinavanapa,” jai tsane, bajarapaepatota jemata tocopiapatsianatsi Dioso apo pejumecovēnētsivi peverebiabinexatsi. Nexata acuenebi tsane Dioso apo pejumecovēnētsivi pevecuarēcēpecaenexa bajarapacue. Pacuenia petriva, penacoxitsiva, itsa vixaenotatsi penacueto pevecuanaexanaenexatsi, acuenebi pevecuanajetabajiravijava bajarapavixae, bajara pijinia itsane pamonae Dioso apo pejumecovēnētsivi. ⁴ Tajamonae, paxamē baja apo pajamatabēcueneitaquirimē. Pacuenia Dioso apo pejumecovēnētsivi ajamatabēcueneitaquiri, bajarapacuenia apo pajamatabēcueneitaquirimē. Pepo petuxanenē Jesús pepatsimatacabineaxatsica pacopiaevetavanapame. Nexata pamatacabi pepo petuxanenē patsianica, apo pajamatabēcuenenabenajacaemē tsane. Pacuenia penacobetoxotsinē itsa pata, basivajamatabēcuenenabenajacatsi, apo paitsimē tsane. ⁵ Tsipaji baja daxita paxamē pexanialivaisita pacajamatabēcueneitayota. Nexata baja daxita vaxaitsi pitaquirijamatabēcuene apo xainatsi. ⁶ Bajaraxuata nexata vaxaitsi apo bejamatabēcuenemajitsitsi. Pacuenia Dioso apo pejumecovēnētsivi jamatabēcueneitsi, bajara apo bejamatabēcueneitsitsi. Biji rajane jamatabēcueneaitavaya bejinavanapatsi. Nayajivitaeya bejinavanapatsinua pibisiacuene vajaexanaeyaniva. ⁷ Pamonae jamatabēcueneitaquiri, jamatabēcuenemajitabiaba. Aitajibi tsabiabinua meravi. ⁸ Itsiata bailsi jane vaxaitsi baja pexanialivaisita nacajamatabēcueneitayota. Nexata nayajivitaeya jinavanapatsi pibisiacuene vajaexanaeyaniva. Najamatabēcuenecopatatsi baja ēDiosojavabelia. Asivatsi tsavanapae Dioso. Itsamonae ata asivatsi tsavanapae. Copiaevetavanapatsi Cristo vajanacapanepaenexa Diosojavabelia. Bajarapacuenia itsa copiaevetavanapatsi Cristo vajanacapanepaenexa Diosojavabelia, nexata dovathi pejamatabēcuenevecua nayajivina-jamatabēcuenexatatsi Dioso pejumelivaisita. Nexata pacuenia vajabitsaēnē nayajivinaxatata piatajajava, namataxatatanua piatajajava pejorojoronaeyanivatsi pijavajabitsaēnē, bajara vaxaitsi ata itsitsi

dovathi vajanacayamaxëitojorobiyani. ⁹ Dioso apo nacaitapetsi vajanacananeconitsiaexanaenexa pibisiacuene vajaexanaeneconi yabara. Biji rajane Dioso nacaitapeta vajanacacapanepaenexa pibisiacuene vajaexanaeneconivecua pepo petuxanenë Jesucristo pejamatabëcueneta. ¹⁰ Jesucristo baja cajena nacasivatëpa vajanacayajavaponaponenexa vajaasaëtsavanapaevi mapanacuataje. Vajatëpaecujinae ata, Dioso pijanacuataisia Cristo nacayajavaponaponaena. ¹¹ Bajaraxuata pacuenia baja namataenetsia panajamatabëcueneasaëya exanaponame, bajarapacuenia panevajënaeyabelia tsiteca paexanavanapare.

Pacuenia Pablo Dioso pejumecovënëtsivi muxujioba yabara pelivaisi

¹² Tajamonae, pinijicuenia pacamuxujiobatsi paneyaiyataenexa pamonaë paxamë tuatuajëta Dioso tonacuenebavanapa. Bajarapamonae Dioso pitorobicueniatsi pacaevetavanapa. Pacamuxujiobiabianua. ¹³ Payaiyataema bajarapamonae. Asivaya pataema. Tshipaji bajarapamonae xaniavaetsia Dioso tonacuenebavanapa. Jamatabëcuenexanepanaeya panajuajinavanapare.

¹⁴ Pacaitorobatsinua panemuxujiobinexa pamonaë piafaetabivi. Pamonae pijinia jamatabëcuenecuerana itsamonae bepejiobiaexanapon-aexaetsi Dioso pejumecovënëtsijava yabara, pajamatabëcueneasaëyaxanare. Payavenonare pamonaë jamatabëcuenefaefaena Dioso pejumelivaisivecua. Itsa pamuxujiobianame bajarapamonae, itsa pamuxujiobianamenua itsamonaejavabelia ata, ajamatabëcueneasaëya pamuxujiobianame bajayajebi pacopatsinejevamë.

¹⁵ Pëtsa bajarapamonaejavabelia pibisiacuene panamatamoexaname, copiaya pibisiacuene pacaexanae ata. Biji pajamatabënjajinavanapare pexaniacuene namataenetsia panenatoexanaponaenexa. Pajamatabënjajinavanapare daxitajivijavabelia ata pexaniacuene panetoexanaenexa.

¹⁶ Daxitamatacabi pajamatabëcuenebarëyamëre tsavanapae. ¹⁷ Daxitamatacabi Diosojavabelia pavajëtabiabare pacopatsinejevamë. ¹⁸ Daxita pacuene apo panejitsipacuene ata, Dioso itsa pacatocopata papecatocopiapatsinexa, nexata itsa pacatocopiapata bajarapacuene, itsiata pexaniajamatabëcuene parajutabiabianame Diosojavabelia bajarapacuene yabara. Bajarapacuenia paneexanavanapaenexa, Dioso pacatojitsipa Jesucristo papijajivixamë.

¹⁹ Espiritu Santo itsa pacajamatabëcueneitoroba itsacuenejavayo paneexanaenexa, pëtsa pajamatabëjumaitsimë: “Apo exanaenë tsane bajarapacuenia,” pajamatabëjamë pëtsa. ²⁰ Pëtsa panamuxujematame Espiritu Santo peyjavacuaicuaijaivi, Dioso pejumelivaisianë pepaebivi. ²¹ Nexata pacuenia bajarapamonae pacaitoroba panejumecovënëtsinexa, copiaya pajaire Dioso pejumelivaisibaxutota paneyapëtaenexa. Nexata xaniajai bajarapacuenia Dioso pejumelivaisibaxutota itsa jumaitsi, bajarapacuenia paexanare. ²² Daxita xua pibisiacuene, panayajivitaema.

²³ Dioso baja cajena vajanacajamatabëcuenexaniavaetsinë. Bajaraponeë pibisiacuene paneexanaeconimi pacavecuajibiaexanaena. Dioso evetsiana panejamatabëcuene, paneperabëto ata, pibisiacuene paneexanaeyani. Bajarapacuenia Dioso pacaevetsiana matapania vajatuxanenë Jesucristo icatsia pepatsimatacabitsicajavabelianexa. ²⁴ Bajarapacuenia Dioso pacaevetsiana, ponë pacajunata papexinexamë. Dioso cajena pacatoexanaena daxita pacuenia najumecapanepaeya pacajumaitsi.

*Pacuenia Pablo jamatabēnajina Tesalónica tomarapijivi, pacuenia ata to-
vajēta Dioso peyavenonaenexatsi, yabara pelivaisi*

²⁵ Tajamonae, Diosojavabelia panetovajētabiabare.

²⁶ Asivaya nebajacobiana daxita bajarajotalia Dioso pejumecovēnētsivi.

²⁷ Pacaitorobatsi Dioso pejamatabēcueneta. Patsimuxulebianame ma-
pabaxutoje daxita Dioso pejumecovēnētsivi pejumetaenexa.

²⁸ Pacatovajētabiabatsi Diosojavabelia vajatuxanenē Jesucristo
papecayavenonabiabinexa.

Mapabaxutoje San Pablo cotocaevi toyaquina Tesalónica tomarapijivijavabelia

Pacuenia icatsia Pablobana, Silvanobana, Timoteobana, toyaquina mapabaxutoje Dioso pejumecovënëtsivijavabelia yabara pelivaisi

¹ Xanë Pablonë, Silvano, Timoteo, mapamatabëxëyoje pacatoyaquinatsi mapabaxutoje. Pacatoyaquinatsi Dioso panejumecovënëtsivi, paTesalónica tomarapijivimë. Panenajamatabëcuenecopatsivi baja vaxa Diosojavabelia, vajatuxanenë Jesucristojavabelia ata. ² Pacatovajëtatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Dioso naneconitsiaexanaena pibisiacuenë pexanaevi pamatacabi Cristo icatsia patsianica yabara pelivaisi

³ Tajamonae, panevajënaeyabelia bitso orijibia panajamatabëcuenecopataponame Diosojavabelia. Pacaenëmë canacujitsia namataenetsia panaasivamënuia tsavanapae. Bajaraxuata daxitamatacabi paxamë yabara pajumaitsinë tsane Diosojavabelia: “Xanepana rabaja. Pexaniacuenia yavenonaponame Tesalónica tomarapijivi,” pajanë tsane. ⁴ Diosojavabelia pajamatabëcuenesaëmë tsaponae itsamonae pinijicuenia pacabijataeyabiabi ata, pacabejiobiaexanabiabi atanua. Bajaraxuata paxanë barëyaya pacavënëlivaisipaebaponatsi itsatomaranëjava, Dioso pejumecovënëtsivijava. ⁵ Bajarapacuenia pacabejiobiaexanabiabi ata, Diosojavabelia paneajamatabëcuenesaë tsaponaexae, nayapëtane Dioso papecajamatabëcueneyavenonaevanexa pamatacabi naneconitsiaexanaena pijaneconi pexainaevi. Bajarapamatacabi Dioso papecasivajamatabëcuenëbarëyaxae, pacatocopatsiana pamajonenexa Dioso pijanacuayabetsia Dioso papecaevetsinexa.

⁶ Dioso baja cajena najamatabëcuenevereta pacuenia exanaejitsia. Nexata juya Dioso bejiobiaexanaena pamonaë pacabejiobiaexanapona maparucaeje. ⁷ Paxamë abaxë pacabejiobiaexanaponaena pacuenia paxanë ata panebejiobiaexanapona. Itsiata Dioso nacayavenonaena bajarapacuenëvecua. Bajarapacuenia Dioso nacayavenonaena pamatacabi pepö petuxanenë Jesús icatsia patsianica piasaëängelevi yajava, pitarunutsicotia ata yajava. ⁸ Jesús jane baja patsianica penaneconitsiaexanaenexa pamonaë apo yapëtaë Dioso. Pamonaë ata apo jumecovënëtsi pepo petuxanenë Jesucristo pelivaisi, Jesús naneconitsiaexanaena. ⁹ Bajarapamonae pijaneconi yabara Jesús naneconitsiaexanaenatsi daxitamatacabiavabelianexa. Dioso pitabaravecua tajë xuabianatsi. Bajarapamonae Dioso pijapenivenivenaecotia apo tae tsane caeto ata. ¹⁰ Pamatacabi vajatuxanenë icatsia patsianica, pinijicuenia pijajivi yayataenatsi. Pinijicuenia sivajamatabëcuenë nabena-jacaenatsi daxita Jesús pejumecovënëtsivitsi. Bajarapacuenia tocopiapatsianatsi pamatacabi patsianica vajatuxanenë. Paxamë ata Jesús pijajivi payajavamë tsane patanejumecovënëtsixaëmë patacatsipaebilivaisi.

¹¹ Bajaraxuata pacatovajëtabiabatsi Diosojavabelia. Pacatovajëtabiabatsi vajaDiosojavabelia papecajamatabëcuenë xaniavaetsinexa. Pacuenia vejamatabëcuenëitsi Dioso pijajivi, bajara paneajamatabëcuenëitsinexa. Pacatovajëtabiabatsinua Diosojavabelia pecajëpaejamatabëcuenetatsi papecajamatabëcueneyavenonaenexa, paneexanaenexa daxita pacuenia

pajamatabëexanaponame. Pacatovajëtabiabsinua Diosojavabelia papecayavenonaponaenexa daxita pacuene paexaname Jesucristo papijajivixaemë. ¹² Nexata paxamë xaniavaetsia panejinavanapaejamatábëcueneta, vajatuxanenë Jesucristo daxitajivi yayitanaetsi. Paxamë ata juya Dioso pacayaiyataeyaexanaena daxitajivi. Bajarapacuenia pacayaiyataeyaexanaena papecaitaxutotsoniataexae vajaDioso, vajatuxanenë Jesucristo ata.

2

Pibisiacuene bitso pexanabiabinë yabara pelivaisi

¹ Tajamonae, pacatsipaebatsi baja cajena paneyapëtaenexa pacuenia vajatuxanenë Jesucristo patsijitsiatsica. Pacatsipaebatsinua baja cajena pacuenia ata nacacaetuatsijitsia bajaraponëjavabelia pamatacabi patsianica. ² Nexata pajivi najumetsënëtsiaya pacajumai tsane: “Espiritu Santo raja neyapëtaeyaexana. Jesucristo rabaja patsica,” pacajai tsane, pëtsa pajumecovënëtamë. Pajivi pijinia najumetsënëtsiaya pacajumai tsane: “Pepacuene rabaja Jesucristo patsica,” pacajai tsane, pëtsa pajumecovënëtamë. Pajivi pijinia najumetsënëtsiaya pacajumai tsane: “Pabloana raja nacatoyaquina: ‘Jesucristo rabaja patsica,’ jai raja vajanacatoyaquinaebaxutota,” pacajai tsane, pëtsa pajumecovënëtamë. Itsamonae najumetsënëtsia ita pacatsipaeba Jesús pepatsijavatsica yabara, pëtsa panajamatabëcuenepatajërërëcame panejumecovënëtavapanae livaisivecua. Pëtsa pajamatabëcuenenabenajacamenua. ³ Pëtsa pajumecovënëtamë pematatsënëa itsalivaisicuenia ita pacatsipaeba Jesucristo pepatsijavatsica yabara. Jesucristo raja abaxë apo patsitsica tsane. Peneta raja ita baja imoxoyo pevajënae tsane Jesucristo pepatsinexatsica, jivi ayaibitsaëtonë Dioso pejumelivaisi pejumecovënëtsijava copabiana. Bajara pijinia pamatacabi patsiana ponë bitso pibisiacuene pexanabiabinënexa. Bajaraponë itsamatacabi Dioso xuabiana isotuabelia, bitso bejiobiaya peponaponaenexa daxitamatacabijavabelianexa. ⁴ Bajaraponë cueneytoya tsane Dioso pijacuene. Pamonaë ata vajëcabiaba bedioso petaevijavabelia, itavetsiana pevajëcabiyaniva. Dioso pijatemplobota ata belia ecaena bediosonë jivi petaenexatsi. Bajaraponë jumai tsane: “Xanë rajane baja diosonë,” jai tsane. Bajarapacuenia jivi ayaibitsaëto bajaraponë yamaxëitojorobiana.

⁵ Pamatacabi abaxë paxamëjavata naponaponajë, tajëvelia baja cajena pacatsipaebabiabatsi bajarapalivaisi. ¿Panacofënëtamë tsabaja bajarapalivaisi? ⁶ Payapëtaneme baja cajena pacuenia abaxë Dioso yacaranata pibisiacuene bitso pexanabiabinënexa pepatsiyaniva. Dioso petocaëjëtsimatacabita bajaraponë patsiana. ⁷ Mapamatacabita ataje jivi pibisiacuene pexanaejava navitapona pevajënaeyabelia. Itsiata abaxë apo patsi ponë bitso pibisiacuene pexanabiabinënexa. Matapania pamatacabi Dioso copatsiana pecaranatsijava bajaraponë pepatsiyaniva, patsiana jane baja pibisiacuene bitso pexanabiabinexa. ⁸ Bajarapamatacabi bajaraponë patsiana bitso pibisiacuene pexanabiabinexa. Nexata pepo petuxanenë Jesús pijumalisaëta bajaraponëmi beyaxuabiana. Pamatacabi Jesús patsianica, bajaraponëmi Jesús vereverecaeyaexanaena pijapenivenivenaecotiata. ⁹ Bajaraponë patsiana dovathi pejamatabëcueneta pibisiacuene bitso pexanabiabinexa. Nexata bajaraponë dovathi pesaëta pinijicuenë pexanaejava exanaponaena jivi peyamaxëitojorobinexa, beayaijamatábëcuenenë

petaenexatsi. ¹⁰ Bajaraponë exanaena daxita xua pibisiacuene, jivi peyamaxëitojorobinexa. Nexata bajaraponë pejamatabëcueneta Diosovecua jivi naxuabiana. Jivi Diosovecua naxuabiana tsipaji apo jitsipae pejumecovënëtsinexa pexaniajailivaisi pecapanepaelivaisinexatsi Diosojavabelia. ¹¹ Bjaraxuata Dioso tocopatsiana bajaraponë penajumetsënëtsilivaisi pëtsipaëbinexatsi peyamaxëitojorobinexatsi. Nexata bajarapamonae jumecovënëtsiana ëpenajumetsënëtsilivaisi. ¹² Bjaraxuata nexata daxita bajarapamonae Dioso naneconitsiaexanaenatsi. Tsipaji apo jumecovënëtsi tsane pexaniajailivaisi. Caranata saya sivabarëya tsabiabi tsane ëpibisiacuene pexanaejava.

Pacuenia Dioso pijajivi itapeta pecapanepaenexa yabara pelivaisi

¹³ Tajamonae Dioso papecaasivavi, pepo bajayata abaxë itsa apo panaexanaemë, vajatuxanenë baja cajena tajëvelia pacaitapeta papecacapanepanexa. Dioso baja cajena pacacapanepaena. Espiritu Santo pesaëta pacajamatabëcuenexaniavaetsiana panejumecovënëtsixae pexaniajailivaisi, Jesús pelivaisi. Bjaraxuata paxamë yabara pajumaitsinë tsabiabi Diosojavabelia: “Xanepana rabaja. Pexaniacuene exaname. Tsipaji tajëvelia itapetame Tesalónica tomarapijivi pecajumecovënëtsinexa. Nexata baja cajumecovënëta,” pajanë tsabiabi. ¹⁴ Dioso paneitoroba patacatsipaëbinexa pexanialivaisi papecacapanepaelivaisinexa Diosojavabelia. Nexata baja pajumecovënëtime bajarapalivaisi. Bjarapacuenia Dioso pacajunata panepatsinexa vajatuxanenë Jesucristojavabetsia, papecayajavaponaponaenexa.

¹⁵ Tajamonae, bajaraxuata panevajënaeyabelia pacaasaëmëre tsavanapae panejumecovënëtsijava Dioso. Pajumecovënëtavapanare patacatsipaëbilivaisi. Palivaisi ata patacatoyaquinatsi panejumecovënëtsinexa, pëtsa panacofënëtime. ¹⁶ Vajatuxanenë Jesucristo, vaxa Dioso ata, nacaasiva. Bjaraponëbeje nacaitaxutotsoniatane. Bjaraxuata nacajamatabëcuenesaëyaexanapona daxitamatacabijavabelianexa. Nacatocopatanua vajacopiaevetavanapaenexa pepo petuxanenë Jesucristo icatsia pepatsijavanexatsica. ¹⁷ Nexata pacatovajëtatsi vajatuxanenë Jesucristojavabelia, vaxa Diosojavabelia ata, papecjamatabëcuene asaëyaexanaenexa. Pacatovajëtatsinua jivi panetsipaëbinexa pexanialivaisi. Pacatovajëtatsinua paneexanaenexa daxita xua pexaniacuene.

3

Pacuenia Pablo toyaquina Dioso pejumecovënëtsivi: “Panetovajëre Diosojavabelia,” pejailivaisi yabara pelivaisi

¹ Tajamonae, pecopiarucelivaisi rabaja maje pacatoyaquinatsije. Panetovajëre Diosojavabelia Dioso pejumelivaisi bepijia peyacaëjëpaenexa daxitanacujava. Patovajërenua daxitajivi pejumecovënëtsinexa Dioso pejumelivaisi pacuenia baja paxamë pajumecovënëtime bajarapalivaisi. Patovajërenua daxitajivi peyaiyataenexa Dioso pejumelivaisi. ² Panetovajërenua Dioso patanevetsinexa pibisijamatabëcuenevivecua. Bjarapacuenia panetovajëre tsipaji raja daxitajivi Dioso apo jumecovënëtsi. ³ Itsiata baitsi jane vajatuxanenë nacayavenonabiaba. Bjaraponë pacajamatabëcuenesaëyaexanaena. Paeavetsiananua dovathivecua. ⁴ Paxamë yabara baja cajena pajamatabëjumaitsinë: “Bjarapamonae vajatuxanenë yavenonaenatsi. Nexata xaniavaetsia exanavanapaena daxita pacuenia itorobatsi. Pevajënaeyabelia xaniavaetsia

exanavanapaena pacuenia itorobatsi,” pajamatabëjanë baja cajena paxamë yabara. ⁵ Diosojavabelia pacatovajëtatsi xaniavaetsia paneyapëtaenexa Dioso papecaasivajava. Pacatovajëtatsinua panevajënaeyabelia paneajamatabëcuenesaë tsavanapaenexa Cristo papecajamatabëcuene yavenonabiabinexa.

Pacuenia daxitajivi benacueneba penaevetsinexa yabara pelivaisi

⁶ Tajamonae, vajatuxanenë Jesucristo pejamatabëcueneta pacaitorobatsi. Dioso pejumecovënëtsivi ata itsa piafaetabivi, bajarapamonae panavecuatsare. Bajarapamonae apo nacuenebabiabi penaevetsinexa pacuenia picani paitorobajë. ⁷ Payapëtaneme rabaja pacuenia paxanë paexanavanapajë pamatacabi panajinavanapajë paxamëjavata. Nexata pacuenia pacatsitajinavanapatsi, bajarapacuenia bejajinavanapame. Pamatacabi abaxë panajinavanapajë paxamëjavata, apo pafaetabinë tsavanapae. ⁸ Amoneya baja cajena itsajivi ata apo pavecuaxaenë itsacuenejavayo ata. Biji rajane panatonacuenebabiabajë pinijicuenia. Matacabita, meravi ata, panatonacuenebabiabajë patanaevetsinexa. Bajarapacuenia panatonacuenebabiabajë itsajivi ata paxamëyajuvënëvi petoayapëbejeyanivatsi patanevetsijava patanajinavanapaejavata. ⁹ Paxamëjavata pexanialivaisi patacatsipaebavanapaexae, vajatuxanenë picani panetocopata patacavajëtsinexa xua panamatavenonajë patanerajutsinexamë. Itsiata baitsi jane apo pacavajëtsitsi. Pacatsitanacuenebabiabatsi baja cajena. Bajarapacuenia paxamë ata panatonacuenebabiabare panenaevetsinexa. ¹⁰ Pamatacabi abaxë panajinavanapajë paxamëjavata, pacajumaititsi baja cajena: “Pajivi afaetabi, pëtsa naxane,” pacajaitsi baja cajena. ¹¹ Pavënëlivaisitaniji pacuenia itsamonae paxamëyajuvënëvi saya jinavanapa nacuenebinejeva. Bajarapamonae pina bitso jamatabëitonotabiaba itsamonae. ¹² Bajarapamonaejavabelia pajumaitsimë tsane: “Pablo raja vajatuxanenë Jesucristo pejamatabëcueneta jumaitsi: ‘Panacuenebianame pina panenaevetsinexa,’ jai raja Pablo,” pajamë tsane.

¹³ Tajamonae, pëtsa pajamatabëcuenecueraname pexaniacuene paneexanavanapaejava. ¹⁴ Pajivi apo nacuenebi tsane penaevetsinexa, apo jumecovënëtsinua tsane palivaisi pacatoyaquinatsi mapabaxutotaje, bajarapajivi panavecuatsare. Pëtsa payajavajinavanapame. Nexata aura tsane apo penacuenebijava yabara. ¹⁵ Itsiata baitsi jane bajarapajivi bepanijavajabitsaëjivi pëtsa pataneme. Dioso panenajujumecovënëtsivixae, pexaniajamatabëcuenia pamuxujobianame.

Pacuenia Pablo toyaquina peveretsinexa baja petoyaquinaelivaisi mapabaxutotaje yabara pelivaisi

¹⁶ Vajatuxanenë vajanacajamatabëcuene xanepanaeyaexanaenë. Pacatovajëtatsi bajaraponëjavabelia daxitamatacabi papecajamatabëcuene xanepanaeyaexanaenexa, itsamonae pacaitsacueniababiabi ata. Pacatovajëtatsi vajatuxanenë papecayajavaponaponabiabinexa.

¹⁷ Xanë Pablonë, tacobeta pacatoyaquinatsi mapalivaisiyoje patacajamatabënajinaexae. Paitanacuenia yaquinabiabajë daxita tayaquinaebaxutonëta, bajarapaitanacuenia pacatoyaquinatsi mapalivaisiyoje paneyapëtaenexa xanë patacatoitrobicueneta mapabaxutotaje.

¹⁸ Pacatovajëtabiabatsi Diosojavabelia daxita paxamë vajatuxanenë Jesucristo papecayavenonabiabinexa.

Mapabaxutoje San Pablo copiaya toyaquina Timoteojavabelia

Pacuenia Pablo mapabaxutoje toyaquina Timoteojavabelia yabara pelivaisi

¹ Xanë Pablonë, Jesucristo pijaapóstolenënë. Dioso, ponë nacacapanepaejitsia, bajaraponë nitoroba pijacuene tatonacuenebinexa. Vajatuxanenë Jesucristo, ponë pejamatabëcueneta Dioso nacacapanepaejitsia, bajaraponë ata nitoroba pijacuene tatonacuenebinexa. ² Timoteo, bepepo taxënatomë tacataenë, Jesucristo pelivaisi xamë ata nejumecovënëtsixae. Catovajëtatsi mapabaxutoje. Catovajëtatsi vaxa Diosojavabelia, vajatuxanenë Jesucristojavabelia ata, pecayavenonaenexabeje pecaasivaxaebeje. Catovajëtatsinua bajaraponëbeje pecaitaxutotsoniataenexabeje pecajamatabëcuene xanepanaeyaexanaenexabejenua.

Pacuenia Pablo itoroba Timoteo pejumeitavetsinexa penajumetsënëtsilivaisi petsipaebaponaevi yabara pelivaisi

³ Pamatacabi baja ponajë Macedonia nacuyabelia, capuenetatsi neponaponaenexa Efeso tomarata. Nexata icatsia matavëjêa caitorobatsi tsiteca abaxë neponaponaenexa bajarajota. Tsipaji itsamonae bajarajota tsipaebavanapa saicayacuenia Dioso pejumelivaisivecua. Palivaisi tsipaebavanapa bajarapamonae, apo pexaniajailivaisi cajena. Jumeitavetsianame bajarapamonae matavëjêa baja petsipaebaponaeyaniva bajarapalivaisi.

⁴ Itavetsianamenua bajarapamonae penajamatabëxainabiabiyanima saya jemalivaisixi, perujulivaisiximi. Itavetsianamenua pijasalinaivimi pevënëxi yabara ata penajamatabëxainabiabiyanima. Bajarapitsilivaisixi ajumemata-mobi baja cajena ita nabarëcuaijai tsaponae jivi. Bajarapalivaisixi apo nacajamatabëcuenevavenonae tsipae pacuenia Dioso nacaitoroba jumecovënëtsiaya vajatoexanaenexa.

⁵ Bajarapacuenia caitorobatsi nejumecovënëtsiaya bajarapamonae pecopatsinexa bajarapalivaisi pecuaicuajitsabiabijava. Nexata juya pexanaenexa pacuenia Dioso jitsipa. Dioso cajena jitsipa jivi pejamatabëëthëtovetsina jamatabëcuenexanepanaeya namataenetsia penaasivatsavanapaejava. Dioso jitsipanua jivi pejinavanapaenexa aneconijibia Dioso pitabarata. Dioso jitsipanua jivi pejamatabëëthëtovetsina xaniavaetsia pejumecovënëtanapaenexa Dioso pejumelivaisi.

⁶ Bajarapamonae pacuenia Dioso jitsipa apo pexanavanapaexae, Dioso pejitsipaevamivi vecuanajamatabëcuenemuxifeta. Nexata jamatabëcuenenaxuaba natsiquejemalivaisixi pecuaicuajitsabiabinexa.

⁷ Bajarapamonae picani jamatabënaexana jivi livaisi petsipaebabiabivonexa. Palivaisi Dioso Moiséspijinëta najumecopata, bajarapalivaisi picani jivi asaëya jamatabëtsipaebapona. Itsiata baitsi jane bajarapamonae apo jumeyapëtae pajamatabëcuenelivaisi xaina bajarapalivaisi.

⁸ Vaxaitsi baja cajena yapëtanetsi pexanepanaecue ne palivaisi Dioso Moiséspijinëta najumecopata. Bajarapalivaisi Dioso nacatocopata vajatsipaebinexa jivijavabelia, jivi peyapëtaenexa penaneconitsicue ne Diosojavabelia. ⁹ Pamonaenexa pexaniacuene exanavanapa, apo toyaquinabiabitsi

pitavetsilivaisinexatsi. Biji rajane pamonae pibisiacuene exanavanapa, toy-aquinabiabatsi pitavetsilivaisinexatsi. Pamonaē ata apo yayatae itsacuenejavayo ata Dioso pijacuene, toyaquinabiabatsi pitavetsilivaisinexatsi. Pamonaē ata najamatabēcuenebijiana Dioso pijacuenevecuā, toyaquinabiabatsi pitavetsilivaisinexatsi. Pamonaē ata jivivevi, paxa ata, pena ata, pebeyaxu-abivi, toyaquinabiabatsi pitavetsilivaisinexatsi. ¹⁰ Pamonaē ata pijavajivi vecuanamatayajita itsavajavabelia, toyaquinabiabatsi pitavetsilivaisinexatsi. Pamonaē ata pevēna pebijavabelia pevitota pibisiacuene exana, toy-aquinabiabatsi pitavetsilivaisinexatsi. Bajara pijinia pacuenia petiriavi ata. Pamonaē pamonajivi vecuanamatayajita itsanējavabelia, toyaquinabiabatsi pitavetsilivaisinexatsi. Pamonaē ata pevēna petiriavijavabelia pevitota pibisiacuene exana, toyaquinabiabatsi pitavetsilivaisinexatsi. Pamonaē ata jivi nacobetoxotsiaya pifa, toyaquinabiabatsi pitavetsilivaisinexatsi. Pamonaē ata najumetsēnēta, toyaquinabiabatsi pitavetsilivaisinexatsi. Pamonaē ata itsamonaē yabara najumetsēnētsiaya baracuaicuajjai tsabiabi, toyaquinabiabatsi pitavetsilivaisinexatsi. Pamonaē ata apo jitsipae pexaniajailivaisi jivi petsipaebaponaenexa, toyaquinabiabatsi pitavetsilivaisinexatsi. ¹¹ Bajarapalivaisicuenia xanē ata itavetaponajē itsa tsipaebaponaē palivaisi Dioso netocopata jivi tatsipaebaponaenexa. Bajarapalivaisi itsa tsipaebaponaē, tsipaebaponaē daxitajivi peyapētaenexa pacuenia Dioso itaxutotsonianetsi pecapanepaenexatsi.

Pacuenia Pablo pexaniajamatabēcuene rajuta Jesucristojavabelia yabara pelivaisi

¹² Pexaniajamatabēcuene rajutajē vajatuxanenē Jesucristojavabelia tanerajutsixae pesaē tatonacuenebinexa. Jesucristo nesivanajamatabēxaina xaniavaetsia tatonacuenebinexa. Bajaraxuata pexaniajamatabēcuene rajutajē. ¹³ Copiata abaxē itsa apo jumecovēnētsinē Jesucristo, pibisiacuena picani baracuaicuajjanē tsabiabi Jesucristo. Pijajivi ata tobarajinabiabajē tabejiobiaexanaenexa. Pibisiacuena bijataeyabiabajē Jesucristo pijajivi. Bajarapacuenia taexanabiabinē ata, Dioso itsiata nebejibiatane. Tsipaji jamatabēcuenenavēxaniabiaya bajarapacuenia exanabiabajē. Apo yapētaenē picani xua exanaponajē Jesucristojavabelia. Tsipaji abaxē apo jumecovēnētsinē Jesucristo Dioso pexēnatocuene. ¹⁴ Nexata baja itsiata belia vajatuxanenē Jesucristo pinijicuenia neyavenona tana-jamatabēcuene copatsinexa bajaraponējavabelia. Bajaraxuacujinae pijajivitonēxanē, neyavenona tasivanexa itsamonaē ata.

¹⁵ Mapalivaisije pacatsipaebijitsiatsi. Bajarapalivaisi pexaniajailivaisi cajena. Nexata daxitajivi xaniavaetsia bejumecovēnēta mapalivaisije. Jesucristo baja cajena patsica mapanacuayabetsicaje pibisiacuene pexanaevimi pecapanepaenexa Diosojavabelia. Xanē ata picani bitso pibisiacuene taexanaenēmi daxitajivi matatoxenetsia. ¹⁶ Xanē itsiata bajara taitsinēmi ata, Dioso itsiata nebejibiatane. Bajarapacuenia Dioso nebejibiatane daxitajivi peyapētaenexa Jesucristo bajayajebi tansivaajamatabēcuenesaējava tajumecovēnētsinexa, pibisiacuene taexanaenēmi ata. Nexata pamonaē bexējavabelia ata Jesucristojavabelia najamatabēcuene copataponaena, xainaena matababi apo peverevere caejava. Bajarapamonaē nesivaajamatabēcuenesaē tsane itsa nevēnēlivaisitaena Jesús taneitapetsijava pijajivitonēxanē, pibisiacuene bitso taexanabiabinēmi ata. ¹⁷ Bajaraxuata vaxaitsi pepo Dioso, daxitacuene peyapētaenējavabelia, jumaitsi tsabiabi: “Xamē Diosomē bitso ayajamatabēcuenenēmē. Bitso ayacuene nexanaenē,” jaitsi tsabiabi. Bajaraponē Dioso daxitacuene

peypätaenē. Pepo pevetsinēna daxitacuene. Apo petēpaenēnexana daxitamatacabijavabelianexa. Apo petaenētsinua itsajivi ata.

¹⁸ Timoteo, betaxēnatomē tacataenē. Pacuenia caitorobatsi, exanaename. Bajayata baja cajena itsamonae Dioso pejumecovēnētsivi Dioso pejamatabēcueneta tajēvelia cavajunupaeba pacuenia exanaejtsiamē. Bajarapacuenia Dioso asaēyata tocanacuenebaponare mapalivaisije. Nexata bajarapacuenia Dioso pitorobilivaisi daxitajivi yapētaena. Catoayapēbeje ata dovathi pecajamatabēcuenējētsixae, ajamatabēcuenesaēmēre Diosojavabelia nenajamatabēcuenecopatsijava. Exanabiabare xua yapētaneme pexaniajacuene nenajamatabēcuenebijianaeyaniva Diosovecua. ¹⁹ Itsamonae baja yapētae ata pacuenia Dioso itorobatsi, itsiata pibisiacuene exana. Nexata bajarapamonae Diosovecua naxuabiana pecopabixae Cristo pejumecovēnētsijavami. ²⁰ Bajarapamonaeyajuvēnēnēbeje Himeneobeje Alejandrobeje. Pibisiacuenia Dioso baracuaicuajiaibeje tsabiabi. Nexata pecopatsinexabeje Dioso pebaracuaicuajiajavabeje, bajaraponēbeje copatajē dovathijavabelia. Nexata bexēa itsa najamatabēcuxainabeje pexanialivaisi, xaniavaetsia jane baja Dioso pejumecovēnētsinexabeje.

2

Pacuenia Dioso pejumecovēnētsivi daxitajivi betovajēta Diosojavabelia yabara pelivaisi

¹ Timoteo, copiaya caitorobatsi mapacueniaje. Caitorobatsi panetovajētabiabinexa daxitajivi Diosojavabelia. Daxitajivi Diosojavabelia patovajētabiabiname pitaxutotsoniataenexatsi Dioso. Itsa baja Dioso itaxutotsoniataenatsi bajarapamonae, nexata pexaniajamatabēcuenē parajutsianame Diosojavabelia bajarapamonae yabara. ² Patovajētsianamenua Diosojavabelia presidentevi ata. Patovajētsianamenua daxita gobierno pijalivaisi pevetsivi ata. Bajarapacuenia patovajētsianame bajarapamonae Dioso peyavenonaenexatsi. Nexata xaniavaetsia jinavanapaenatsi avajabitsaējibia. Nexata xaniavaetsia Dioso jumecovēnētavanapaenatsi. Nexata exanavanapaenatsi epexaniacuene. ³ Bajarapacuenia Diosojavabelia daxita bajarapamonae vajatovajētsijava, xanepana Dioso, ponē nacacapanepaejitsia, vajanacasivabarēyanexa. ⁴ Bajarapacuenia daxitajivi vajatovajētsijava Dioso jitsipa. Tsipaji Dioso jitsipa daxitajivi pecapanepaenexa bajaraponējavabelia. Dioso tojitsipana daxitajivi peypätaenexa pexaniajailivaisi, Jesucristo pelivaisi. ⁵ Nexata daxitajivi itsa yapētaena pexaniajailivaisi, Jesucristo pelivaisi, yapētaenanua pacuenia caenē Dioso daxitajivi capanepaejitsia. Yapētaenanua pacuenia pijinia caenē Jesucristo daxitajivi petocuaicuajinēnēna Diosojavabelia. ⁶ Jesucristo rabaja nacopata pebeyaxuabinexatsi. Nexata Jesucristo petēpaejavata, daxitajivi pijaneconimi matamota. Bajarapacuenē daxitajivi peypätaenexa, Dioso pecaējētsimatacabita pijajivi itoroba daxitanacuanējjava pexaniajailivaisi jivi petsipaebinexa. Tsipaji baja cajena Dioso jitsipa daxitajivi pecapanepaenexa. ⁷ Bajarapalivaisi jivi tatsipaebinexa Dioso nitoroba. Dioso nitoroba bajarapalivaisi tatsipaebinexa pamonaē apo judiōvi ata penajamatabēcuenecopatsinexa Diosojavabelia. Nexata pexaniajailivaisi jivi tatsipaebijava, itsa canavajunupaebatsi, xaniajanē cajena. Cristo tajumecovēnētsinēxae, pexaniajailivaisi jivi tsipaebaponajē. Apo najumetsēnētsinē cajena.

⁸ Bajaraxuata daxitanacuanējjava pebijivi, pamonaē baja Dioso pitabarata aneconijibi, itsa vajēta Diosojavabelia, jitsipajē nacobeyotsiaya pevajētsijava Diosojavabelia. Bajarapamonae bevajēta Diosojavabelia anaepanaenējeva

itsajiviyojavabelia, jumeanaenotsinejevanua itsajiviyojavabelia. ⁹ Jitsipajé pijinia petiriavi penaxatabinexa xanepanaeya. Pětsa bitso naitabětsiaya naxataba. Itsa naxaniavaeta, bitso pětsa namataitaběta pexaniacuenia. Pětsa bitso naitaběta oronanitota pexanaejavaněta. Pětsa naitaběta penamatamotsiviriaibotoxita ata. Pětsa naitabětsiaya naxataba bitso penamatamotsinavaně ata. ¹⁰ Petiriavi, pamonae baja xaniavaetsia nājamataběcuenecopata Diosojavabelia, pětsa naitaběta bitso. Bajarapamonae Dioso pitabarata pexaniacuenie betoexanabiaba itsamonaejavabelia penajamataběcuenieitabětsinexa bēpēnējavaverena. ¹¹ Dioso pejumecovēnētsivi itsa nacaetuata Dioso pejumelivaisi penamuxunaevetsinexa, petiriavi beveliajamataběcuenievi nataeya ajumejibia benamuxunaefena pejumecovēnētsinexa palivaisi tsipaebatsi. ¹² Petiriavi apo tocopatsinē pemuxujiobinexa pebijivi. Apo tocopatsinēnua petiriavi beayajamataběcuenievi nataeya pitorobabiabinexa pebijivi. Biji rajane petiriavi beveliajamataběcuenievi nataeya ajumejibia benamuxunaefetena. ¹³ Bajarapacuenia itorobajé tsipaji copiaya Dioso exana pebi. Bajaraponē pevēnē Adán. Bajaraxuacujinae cotocaevi Dioso exana petiriva. Bajarapova pevēnē Eva. ¹⁴ Adán cajena picani dovathi apo yamaxēitojorobatsi. Biji rajane copiaya petiriva dovathi yamaxēitojorobatsi. Nexata petiriva copiaya pibisiacuenie exana. ¹⁵ Bajaraxuata daxita petiriavi Dioso tocopatatsi pevixaeitonotsinexatsi penacueto itsa vecuanaexanatsi. Itsiata baitsi janē bajarapamonae capanepaenatsi Diosojavabelia itsa casaē tsane penajamataběcuenecopatsijava Diosojavabelia. Capanepaenatsi Diosojavabelia daxitajivi ata asivaya itsa taena, Dioso ata asivaya itsa taena. Capanepaenatsi Diosojavabelia xaniavaetsia itsa jinavanapanua pacuenia Dioso tojitsipatsi.

3

Pacuenia ancianovinexa bejamataběcuenieitsi yabara pelivaisi

¹ Pexaniajailivaisi cajena maje. Ponē jitsipa pitapetsinexatsi ancianonēnexa, Dioso pejumecovēnētsivi pevetsinēnexa, bajaraponē pexaniacuenie, Dioso pijacuene, jamatabětonacueneba. ² Ancianonēnexa, xanepana ponē apo xainae itsacueneneconi ata, paneconi yabara itsamonae neconitsijitsiatsi. Caevayo pepitsinē. Penajamataběcueniereviabinē. Xaniavaetsia penajamataběxaināenē. Peyaiyataenētsi. Xaniavaetsia pecopiapitabiabinē pijaboyaberena pesivaxaināevitsi. Pecaējēpaenētsi xaniavaetsia jivi Dioso pejumelivaisi petsipaebinexa. ³ Ancianonēnexa, xanepana ponē apo piapaenē piatajibinexa. Pevēna pebi apo pebenē. Apo pejitsipaenē itsajivi ata yamaxēitojorobiaya palata pevēcuanacobetoxotsinexa. Biji rajane ancianonēnexa xanepana ponē pexaniajamataběcuenenē. Anaeya itsajivi ata apo pejumepitsinē pebarēnajumeanaenotsinexa. Bitso pexaināenexa ata pexaināejava, apo penajamataběxaināenē. ⁴ Ancianonēnexa, xanepana ponē xaniavaetsia eveta pexi, pijaya yajava. Pexi pejumecovēnētsinētsi. Pejumeyaiyataenētsinua. ⁵ Ponē apo caējēpaetsi xaniavaetsia pexi pevetsinexa, pijaya yajava, nexata bajaraponē apo caējēpae tsipaetsi pevetsinexa Dioso pejumecovēnētsivi. ⁶ Apo xanepanae tsipae ancianonēnexa ponē abaxē ajena jumecovēnēta Dioso. Beayajamataběcuenenē itajara nataejitsipa bajaraponē. Nexata epatua Diosovecua jopaejitsipa. Bajarapacuenia bajayata dovathi penajamataběxaināenē, Dioso vecuajopaica. Nexata dovathi daxitamatacabijavabelianexa naneconita Diosojavabelia. ⁷ Ancianonēnexa, xanepana ponē peyaiyataenētsi pamonae Dioso apo pejumecovēnētsivi ata.

Bajarapitsinē xanepana ancianonēnēna ancianonē pexanaecujinaetsi jivi pequenetsiataeyanivatsi, dovathi ata peyamaxēitojorobiyanivatsi.

Pacuenia diáconovinēna bejamatabēcueneitsi yabara pelivaisi

⁸ Diáconovinēna pijinia, xanepana pamonaē penajamatabēcuenerēviabivi. Itaxutojema apo pecuaicuajaiivi. Apo piapaēvi piatājibinēna. Apo pejisipaēvi itsajivi ata yamaxēitojorobiaya palāta pevecuanacobetoxotsinēna.

⁹ Diáconovinēna, xanepana pamonaē xaniavaetsia najamatabēcuenecopata Cristojavabelia. Pejamatabēēthētota peyapētaēvi pexaniajaicuene palivaisi jumecovēnēta.

¹⁰ Pamonaē diáconovinēna, copiaya bitorobatsi itsacuenejavayo pevetsinēna bajarapacuenia pejamatabēcuenejētsinēxatsi. Nexata xaniavaetsia itsa eveta xua evetsiaexanatsi, diáconovi jane baja hexanatsi.

Nexata jane baja bitorobatsi penacuenēbinēna xua diáconovi banacueneba.

¹¹ Diáconovi pijinia pijavajivi xanepana penajamatabēcuenerēviabinēna, apo bebaracuaicuajaii itsamonaē. Xaniavaetsia benajamatabēxaina. Nexata xaniavaetsia hexanabiaba pacuenia itorobatsi.

¹² Diácononēnēna, xanepana ponē caeva pepitsinē. Pecaējēpaenētsinua xaniavaetsia pevetsinēna pexi, pijava yajava.

¹³ Diáconovi xaniavaetsia yaiyataenatsi daxitajivi. Ajumeurajibianua jivijavabelia navajunupaebiana Jesucristojavabelia penajamatabēcuenecopatsijava.

Pacuenia Timoteo toyaquinatsi peyapētaēnēna pacuenia exanaponaponaejitsia Dioso pejumecovēnētsivi tuatuajēta yabara pelivaisi

¹⁴ Timoteo, bepījia picani jamatabēponajē xamējavabelia tacataenēna. Itsiata tavajēnaeyabelia catoyaquinatsi mapacuene yabaraje.

¹⁵ Nexata abaxē itsa cuenenajematsianajē tapatsijava xamējavabelia, neyapētaēnēna pacuenia exanaponaponaejitsiamē Dioso pejumecovēnētsivi tuatuajēta. Pamonaē baja Dioso pejumecovēnētsivi, Dioso rabaja piasaēnē pijajivi. Bajara-

pamonaē Dioso pejumelivaisi, pexaniajailivaisi, xaniavaetsia baja jumecovēnētavanapa. Daxita nacuanēpijivi ata pejumecovēnētsinēna bajarapalivaisi. Bajarapamonaē pexaniajailivaisi itsamonaējavabelia tsipaebapona.

Bajarapamonaē apo tocopatsinua itsajivi ata pexaniajailivaisivecua saicayalivaisi pejumecovēnētsiyaniva.

¹⁶ Pepo pexaniajailivaisi cajena Cristo pelivaisi. Bajaraponē baja vaxaitsi jumecovēnētavanapatsi. Itsiata baitsi jane itsamonaē apo jamatabēcuenēyapētaē bajaraponē. Bajaraponē Cristo ayaijamatabēcuenēnē bitso:

Bajaraponē Cristo mapanacuata naexana bevaxaitsi jivitonēcuena. Espíritu Santo pejamatabēcueneta daxitajivi yapētaēyaexanatsi Cristo pianeconijibinēcuene. Angelevi ata Cristo tanetsi. Cristo pijajivi vēnēlvaisipaebaponatsi daxitanacuanēpijivijava. Nexata daxitanacuanēpijivi najamatabēcuenecopabapona Cristojavabelia. Dioso pijanacuatatsia ata Cristo copiapitatsi.

4

Dioso pejumelivaisi pejumecovēnētsijava pecopabivi yabara pelivaisi

¹ Espíritu Santo baja cajena tajēvelia nacayapētaēyaexana pacuenia bexējavabelia itsamonaē copabijitsia Dioso pejumelivaisi pejumecovēnētsijavami. Bajarapamonaē nexata jumecovēnētsiana penajumetsēnēsilivaisi petsipaebaponaevitsi. Nexata bajarapamonaē asaēya jumecovēnētaponaeana itsamonaē dovathi pejamatabēcueneta petsipaebilivaisitsi.

² Bajarapamonaē namuxunaevetsiana penajumetsēnēsilivaisi petsipaebaponaevitsi, betsitapexaniajamatabēcuenevitsi

itajara tsane, pibisiajamatabëcuenevi ata. Bajarapamonae tsipaebaponaena penajumetsënëtsilivaisi. Apo acueneura cajena tsane. ³ Bajarapamonae itavetsiana penacasabicuene. Bajarapamonae itavetsiananua itsacunejavanë jivi pexaeyaniva. Dioso cajena daxitacuene pexaejava exanae ata, jivi pexaeyaniva apo itavetsi. Bajaraxuata Dioso pejumecovënëtsivi, pexaniajailivaisi peyapëtaevi, jumai tsabiabi pexaejava yabara: “Xanepana rabaja,” jai tsabiabi Diosojavabelia pexaejava pexaevajënae. ⁴ Daxitacuene, xua Dioso exana vajaxaejavanexa, pexaniacuene bitso. Nexata apo biatsobitsi itsacunejavyo ata Dioso pexanaejava. Biji rajane itsa pitatsi Dioso pexanaejava, “Xanepana rabaja,” bejai tsabiabitsi Diosojavabelia vajanacarajutsixae vajaxaejavanexa. ⁵ Bajarapacuenia Dioso pejumelivaisibaxutota pejumaitsixae, xanepana daxitacuene vajaxaenexa. Pexaniajamatabëcuene rajutatsi Diosojavabelia vajaxaejavanexa vajanacarajutsixae. Bajaraxuata Dioso nacatoxanepanaeyaexana vajaxaejavanexa.

Pacuenia Timoteo itorobatsi xaniavaetsia peponaponaenexa, xaniavaetsia petsipaebinxanua Dioso pejumelivaisi, yabara pelivaisi

⁶ Itsa tsipaebianame pexaniajailivaisi Dioso pejumecovënëtsivijavabelia, penajumetsënëtsilivaisi petsipaebaponaevi pejumecovënëtsiyaniva, nexata xaniavaetsia Jesucristo netonacuenebinë tsane. Nijamatabëcuenesaënexa nevajënaeyabelia, asaëya jumecovënëtaponaponare palivaisi baja jumecovënëtavapanatsi. Pexaniajailivaisi, Dioso pejumelivaisi, palivaisi itsamonae catsipaeba, tsiteca asaëya jumecovënëtaponaponare. ⁷ Itsiata baitsi jane pëtsa jumecovënëtame mapanacuapijilivaisianëje, saya natsiquejemalivaisianë. Daxita nesaëta nacujaubare xaniavaetsia neponaponaenexa Dioso pejitsipaecuenia. ⁸ Vajajumalixanepanaenexa, xanepana picani vajaperbësaëta vajacujinaejinaejava. Itsiata baitsi jane daxitacunevecua xanepana bitso vajajinavanapaenexa pacuenia Dioso nacatojitsipa. Bajarapacuenie nacatoxanepana tsipaji vajatëpaecujinae ata Dioso nacajamatabëcuenejavenonaena xaniavaetsia vajajinavanapaenexa. ⁹ Bajarapalivaisi pexaniajailivaisi cajena. Nexata daxitajivi xaniavaetsia bejumecovënëta bajarapalivaisi. ¹⁰ Bajaraxuata Dioso tonacuenebaponaponatsibeje. Casaëtsibeje tsaponaponaie Dioso vajatonacuenebaponaponaejavabeje, itsamonae pibisiacuenia nacabijataeyabiabi atabeje. Bajarapacuenia exanatsibeje tsipaji najamatabëcueneocopatatsibeje piasaënë Diosojavabelia. Bajaraponë Dioso daxitajivi pecapanepaenë pijaneconivecua. Dioso capanepaena daxita pamonae najamatabëcueneocopata bajaraponëjavabelia.

¹¹ Bajarapalivaisi tsipaebaponare. Itorobaponarenuu bajarapacuenia pexanaenexa. ¹² Pëtsa nacopatame pevëjëatoxaemë itsajivi ata pecaquenetsiataenexa. Biji rajane Dioso pejumecovënëtsivijava, xaniavaetsia tsitaponaponare. Cuaicuajjamëre xaniavaetsia. Livaisi ata itsa tsipaebame, tsipaebare xaniavaetsia. Ponaponare xaniavaetsia. Asivamëre daxitajivi. Najamatabëcopare xaniavaetsia Diosojavabelia pecayavenonaenexa daxitacuene yabara. Ëpexaniacuene yabara najamatabëxainare. Bajarapacuenia itsa tsitaexanaponaenename, nexata Dioso pejumecovënëtsivi cacuenëjëpaeyajinavanapaena. ¹³ Tavajënaelia bajarapacuenia exanaponaponare. Jivi penacatuatsijavata, Dioso pejumelivaisibaxuto tsmuxulebabiabare. Tsipaebaponarenuu pacuenia jumaitsi Dioso pejumelivaisibaxutota bajarapamonae pijamatabëcuenesaënexa Diosojavabelia. ¹⁴ Dioso baja cajena carajuta pecacaëjëpaejamatabëcuene

xaniavaetsia jivi livaisi netsipaebinexa, pecacaëjēpaenexanua xaniavaetsia nevetsinexa Dioso pejumecovēnētsivi. Bajaraxua xaniavaetsia najamatabēcuenevetaponaponare. Pamatacabi ancianovi nacaetuata, catsimatanacobeuatsiaya catovajēta Diosojavabelia. Nexata bajarajota Dioso carajuta pecacaëjēpaejamatabēcuene.

¹⁵ Daxita nesaëta evetaponaponare daxita pacuenia caitorobatsi nexanaenexa. Nexata daxitajivi cayapētaena xaniavaetsia tanejumecovēnētaponaponaejavamē pacuenia caitorobatsi. ¹⁶ Pibisiacuene nayajivitaeya ponaponare. Palivaisi ata tsipaebaponame, xaniavaetsia tsipaebaponare. Saicayacuena pētsa bajarapalivaisivecua tsipaebaponame. Bajarapacuenia nexanaejava casaëmēre tsaponaponae. Nexata Dioso cacapanepaena. Pamonaē ata cajumecovēnēta netsipaebilivaisi, Dioso capanepaenatsi.

5

Pacuenia Timoteo itorobatsi penaponaponaenexa Dioso pejumecovēnētsivijava yabara pelivaisi

¹ Pētsa asaëya muxujobame pamonaē nevajēnaeyapijivi. Biji xaniavaetsia yaiyataeya beaxacuena muxujobare. Necovēpijivi pijinia benejuyapijivicuenia muxujobare. ² Petiriavi ata nevajēnaeyapijivi beenacuena muxujobare. Necovēpijivaxi pijinia benejuyapijivaxicuenia muxujobare. Ēpexaniajamatabēcuena taema bajarapovaxi itsajamatabēcuene bēpēnēa nejamatabēthētota sivanajamatabēxainaenejevamē.

³ Pamona peveuatēpaevatsi, Dioso pejumecovēnētsiva, yaiyataeya yavenonare itsa bitso bejiobi. ⁴ Itsiata baitsi jane pamona peveuatēpaevatsi, itsa xaina pexi, pemomoxi ata, bajarapamonae xanepana pevetsinexatsi. Bajarapamonae xanepana peyavenonaenexa pijamonae. Bajarapamonae juya beveta paxa, pena ata, pamo ata, pacue ata, pamonaē vitsatsi. Bajarapacuenia itsa exana, exana pexaniacuene. Nexata Dioso barēyataenatsi. ⁵ Pamona peveuatēpaevatsi, Dioso pejumecovēnētsiva, itsa apo xinae itsajivi ata pevetsinexatsi, bajarapova najamatabēcuenecopataponaponae Diosojavabelia peyavenonaenexatsi. Navajētabiabi Diosojavabelia matacabita, meravi ata. ⁶ Itsiata baitsi jane pamona peveuatēpaevatsi pejitsipaecuenia pibisiacuene itsa exanaponapona, Dioso tanetsi bepetēpaeva, abaxē asaë tsaponaponae ata. ⁷ Bajarapacuenia itorobare Dioso pejumecovēnētsivi pijamonae peyavenonaenexa itsa bitso bejiobi. Nexata pamonaē Dioso apo pejumecovēnētsivi, toacuenebi tsanetsi pebaracuaicuaijajivatsi bajaraxua yabara. ⁸ Dioso pejumecovēnētsivi, pijamonae beveta. Pajivi apo itaxutotsoniatae pevetsinexa pepo pijamonae ata, bajarapajivi apo exanae pacuenia Dioso itorobatsi. Nexata pijamonae itsa apo evetsi, bajarapajivi bitso pibisiacuene exana Dioso apo pejumecovēnētsijivi matatoxenetsia.

⁹ Petiriva sesenta pavaibeje pexainaeva, caeto penacojiobicujinae pamona peveuatēpaevatsi, xanepana pevēnēyaquinarutsinexatsi pamona peveuatēpaevatsi pevēnēyaquinarubibaxutota. Nexata daxita Dioso pejumecovēnētsivi peyavenonabiabinexatsi. ¹⁰ Pova pamona peveuatēpaevatsi itsa cueneyapētanetsi pexaniacuene pexanaejava, bajarapova xanepana pevēnēyaquinarutsinexatsi pamona peveuatēpaevatsi pevēnēyaquinarubibaxutota. Mabaitsi pacuene pexanaeva xanepana pevēnēyaquinarutsinexatsije. Pexi xaniavaetsia pevitsatsiva. Jivi ata itsa sivaxainatsi, xaniavaetsia pijabota pecopiapitsiva. Ajamatabēcuenecovēbia

Dioso pejumecovënëtsivi peyavenonaeva. Peyavenonaevanua itsamonae itsa bejiobiaexanatsi Dioso pejumecovënëtsijava yabara. Daxita xua pexaniacuene, pexanaeva, xanepana pevënëyaquinarutsinexatsi pamona pevecuatëpaevitsi pevënëyaquinarubibaxutota.

¹¹ Itsiata baitsi jane pova abaxë sesenta pavaibeje apo pexainaeva, pëtsa vënëyaquinarutame nevënëyaquinarubibaxutota peyavenonaenexatsi daxita Dioso pejumecovënëtsivi. Tsipaji bajarapova itsa jitsipa pexanaenexa pacuenia natojitsipa, copatsipa Cristo pejumecovënëtsijavami. Nexata icatsia nacojiobjitsipa. ¹² Nexata pijaneconi xainaejitsipa Diosojavabelia. Tsipaji copatsipa Cristojavabelia penajamatabëcuenecopatsijavami: “Capanepaeya baja jumecovënëtajë Cristo,” jai ata. ¹³ Pematatsënëa bajarapova sivaxainarutsipa itsa bonëjava. Afaetabinua tsipae. Pematatsënëa baracuaicuaijai tsabiabi tsipae itsamonae. Jamatabëitonotabiabijitsipa itsamonae. Xuaxi yabara ata apo becuaiacuajitsi, cuaiacuajai tsabiabi tsipae. ¹⁴ Bajaraxuata pamona pevecuatëpaevatsi, pova abaxë bitso apo perujuva, jitsipajë icatsia penacojiobjivaja pexi pexainanexa, pijabo ata xaniavaetsia pevetsinexa. Nexata bajarapacuenia vajanacacueneyoyavi ata toacuenebi tsanetsi pebaracuaicuaijajivatsi bajarapitsiva. ¹⁵ Bajarapacuenia jumaitsinë tsipaji baja itsamonae pamonajivi pevecuatëpaevitsi copaba baja Cristo pejumecovënëtsijavami. Nexata pacuenia dovathi itorobatsi, exanavanapa.

¹⁶ Dioso pejumecovënëtsivi, pebijivi, petiriavi ata, itsa pijamonaeya-juvënëva pamona vecuatëpatsi, nexata bajarapomona bitaxutotsoniatane bajarapova. Bajarapacuenia nexata apo namatavenonae tsane peyavenon-aeenexatsi daxita Dioso pejumecovënëtsivi. Tsipaji baja pijamonaevetatsi. Nexata Dioso pejumecovënëtsivi caëjêpaejitsiatsi peyavenonaenexa pamonaev bitso bepejiobivi, pamona pevecuatëpaevitsi pijamonaev petoajibivitsi.

¹⁷ Ancianovi, pamonaev xaniavaetsia evetabiaba Dioso pejumecovënëtsivi, bajarapomonaev xaniavaetsia bematamotatsi. Beyaiyatanetsinua. Ancianovi, pamonaev Dioso pitorobilivaisi bitso tsipaeaba, bitso cujarubanua, bajarapomonaev xaniavaetsia bematamotatsi. ¹⁸ Dioso pejumelivaisi-baxutota jumaitsi pacuenia bueyu copatatsi pexaejava pexaenexa penacuenebijavata. Jumaitsi mapacueniaje: “Pabueyu canacuenebame trigoxu pecatotanabataxubinxë, pëtsa pumuxatatame nepumuxatatabi-abijavata. Pëtsa pumuxatatame trigoxu pexaenexa pecatotanabataxubijavata,” jai Dioso pejumelivaisibaxutota. Itsalivaisita pijinia Dioso pejumelivaisibaxutota xaniavaetsia pematamotsijavanexa yabara jumaitsi mapacueniaje: “Penacuenebinë bematamotatsi,” jai Dioso pejumelivaisibaxutota. Bajaraxuata bematamotatsi ancianovi Dioso pejamatabëcueneta bitso penacuenebivi.

¹⁹ Pëtsa jumexaniataneme caejivi pepaebijava ancianonë pibisiacuene pexanaejava yabara. Matapania anijajivibeje, acueyabi pajivibeje ata, petaevitsi catsipaebiana, jumecovënëtsianame. ²⁰ Nexata xaniajai ancianovi pibisiacuene itsa exanapona, itavere daxita Dioso pejumecovënëtsivi pitabarata. Nexata pijinia itsamonae ancianovi itsa cacuenetane nitavetsijava pibisiacuene pexanaevi, cjunaviana pibisiacuene pexanaejava. ²¹ Dioso pitabarata, vajatuxanenë Jesucristo ata pitabarata, Dioso pijaängelevi ata pitabarata, xanë jamatabëcuenereviaya caitorobatsi pacuenia caitorobatsi nexanaponaponaenexa. Daxita ancianovi, pibisiacuene pexanaevi, najëpaeya itavetsianame. Ponë ancianonë, bitso pecayapëtaenë, pibisiacuene itsa exana, pëtsa sivaajumeuramë nitavetsinexa pibisiacuene

pejanaejava. ²² Pëtsa itsanë ata bepïjia exaname ancianonënexa. Tsi-paji ponë bepïjia ancianonënexa exanaejitsipame, bepïjia pibisiacuene itsa exana, nexata itsamonae cataejitsipa pibisiacuene pexanaevi benejamatabëcueneyavenonaenë. Daxita pibisiacuenevecua, xaniavaetsia naevetsi-aya ponaponare.

²³ Xamë raja ajamatabëepatanemë tsabiabi. Nexata pëtsa apaeyabiabame ëpitaranae. Tsiquirijavayo vinorayo, pitaranae yajava, apaeyabiabianame.

²⁴ Itsamonae pibisiacuene itsa exana, bananeconitsiaexanatsi daxitajivi pepuacueneypëtaetsi. Itsamonae pijinia pibisiacuene exanae ata, bepïjia apo cueneyapëtaetsi. Bexëa matapania xaniavaetsia vënëlvivaisinaitajëta pibisiacuene pexanaejava. ²⁵ Bajara pijinia itsi itsamonae pexaniacuene itsa exana. Pexaniacuene itsa exana, daxitajivi cuenetanetsi pexaniacuene pexanaejava. Itsajavata pexaniacuene exanae ata, jivi apo cuenetaetsi. Itsiata baitsi jane bajarapajivi pexaniacuene itsa exana, acuenebi navënëmatayatsia peponaponaejava. Nexata bexëajavabelia daxitajivi vënëlvivaisitanetsi pexaniacuene pexanaejava.

6

¹ Pamonae dajubicuenia canajetatsi itsamonaejavabelia amoneya petonacuenebabinexa, bajarapamonae Jesús pelivaisi itsa pejumecovënëtsivi, yayiyataeya tonacuenebi pijatuxanenë. Bajarapacuenia tonacuenebi pijatuxanenë pesivajamatabëcuenebarëyanexatsi. Nexata pijatuxanenë Dioso pibisiacuena apo baracuaicuajai tsane. Jesús pelivaisi ata, palivaisi vaxaitsi jivi tsipaebaponatsi, pijatuxanenë pibisiacuena apo baracuaicuajai tsane. ² Dajubicuenia pecanajetsivitsi pijatuxanenë, Dioso itsa pejumecovënëtsinë, pecanajetsivitsi pëtsa jamatabëjumaisi pijatuxanenë yabara mapacueniaje: “Tajatuxanenë rabaja abaxë Dioso pejumecovënëtsinë. Nexata asaëyata apo tonacuenebi atanë tsane, itsiata apo nebijatae tsane,” jamatabëjai pëtsa. Biji rajane asaëya xaniavaetsia tonacuenebi pijatuxanenë. Tsi-paji raja Dioso pejumecovënëtsinë yavenonaeya tonacueneba Dioso penajuaasivavitsiyajuvënë. Bajarapalivaisi tsipaebaponare. Itorobarena bajarapacuenia pexanavanapaenexa.

Pacuenia Dioso pejumecovënëtsijivi jamatabëcuenebarëya yabara pelivaisi

³ Itsamonae saicaya itsalivaisi tsipaebapona. Bajarapalivaisibeje apo najamatabëcuenejëpaebeje palivaisi vajatuxanenë Jesucristo tsipaebapona. Palivaisi vaxaitsi jumecovënëtanapatsi, apo nalivaisijëpaebeje.

⁴ Cueneyapëtanetsi pamonae penajumetsënëtsilivaisi tsipaebapona. Bajarapamonae beayajamatabëcuenevi itajara natane. Itsiata bajarapamonae pexaniajailivaisi apo yapëtae. Bitso bepematajemabivitsi jinavanapa. Nexata bajarapamonae jitsipabiaba itsamonaejavabelia pejumeanaeyanotabiabinexa saya jema itsacuenelivaisixi peyanjibojjavata. Apo barënamatabëcuenejëpae itsajivi ata. Bajarapamonaeayajuvënëvi itsa xaina itsacuenetabëcueni, bajarapamonae nacobecaëbabiaba. Anaepanabiaba. Nabijataeyabiaba. “Itsamonae covë nitsacueniabijitsia,” jamatabëjai tsabiabi, itsamonae apo itsacueniabijitsia atatsi. ⁵ Bajarapamonae anaeya namataenetsia najumenotabiaba. Tsi-paji pijamatabëcuenebejevi. Bajarapamonae pexaniajailivaisi, Cristo pelivaisi, apo yapëtae xaniavaetsia jivi petsipaebinxaxa. Saya bajarapamonae jamatabëjumai tsabiabi: “Xanë raja Dioso pejumelivaisi tatsipaebaponaexae, palata nacanabianajë,” jamatabëjai tsabiabi bajarapamonae. Bajarapitsivi nayajivitsare. ⁶ Vaxaitsi

Dioso vajajumecovënëtsivi, bitso cajena vajaxinaeivi Diosojavabelia, itsa sivajamatabëcuenebarëyatsi xuayovajëto Dioso nacatocopata vajaxinaenexa mapanacuataje. ⁷ Pamatacabi vaxaitsi naexanatsi mapanacuataje, itsacuenjavayo ata apo capatsitsi. Pamatacabi pijinija tēpaenatsi, apo caponae tsanetsi itsacuenjavayo ata mapanacuapijicueneje. ⁸ Bajaraxuata nexata itsa xainatsi vajaxaejava, vajanaxatabijava ata, besivajamatabëcuenebarëyatsi. ⁹ Itsiata baitsi jane pamonae najamatabëxaina ëpexinaejavanexa, bajarapamonae dovathi jamatabëcueneçëtsi. Nexata pibisiacuene exana palata pepitsinexa. Jamatabëcuenebijianatsi. Nexata bajarapamonae Diosovecua naxuabiaya jinavanapa. ¹⁰ Pamonae bitso palata jitsipa, daxita xua pibisiacuene exana palata pepitsinexa. Itsamonae bitso najamatabëxaina ëpexinaecuene pexainaenexa. Nexata baja copaba Dioso pejumecovënëtsijavami. Nexata bajarapajamatabëcuene bēpënëa bitso vajamatabëcuenebëjai.

Pacuenia Timoteo muxujjobatsi pijamatabëcuenesaënexa Diosojavabelia penajamatabëcueneçopatsijava yabara pelivaisi

¹¹ Timoteo, xamë Dioso pijajivitonëmë. Navecuatsare mapanacuata jivi palata pejitsipaejamatabëcuene. Biji jane ajamatabëcuenesaëmëre Dioso nejumecovënëtaaponaponaejava. Dioso asivamëre. Diosojavabelia najamatabëcueneçopatsiaya ponaponare. Itsamonae ata asivamëre tsaponaponae. Itsamonae caitsacueniababiabi ata, bajayajebi casaëmëre tsaponaponae Dioso nejumecovënëtaaponaponaejava. “Xanë ayaijamatabëcuenenënë,” nejaiyaniva, beveliajamatabëcuenenë nataeya ponaponare. ¹² Catoayapëbeje ata Diosojavabelia nenajamatabëcueneçopatsijava, ajamatabëcuenesaëmëre nepitsinexa xua Dioso carajutsijitsia, matacabi apo peverevereaejava. Pamatacabi navajunupaebame nejumecovënëtsijava Jesús Dioso pexënatocuene, Dioso cajunata pecarajutsinexa matacabi apo peverevereaejava. AyaiBITSaëtoXaneto Dioso pejumecovënëtsivi pitabarata, Dioso cajunata pecarajutsinexa matacabi apo peverevereaejava. ¹³ Dioso baja cajena pesaëta daxita vaxaitsi asaë tsavanapaetsi. Pamatacabi Jesucristo nutatsi Poncio Pilato pitabarata, ajumejunavijibia navajunuapaeba pexaniajailivaisita. Nexata Diosobeje Jesucristobeje pitabarata caitorobatsi aeconoxae mapacueniaje. ¹⁴ Caitorobatsi xaniavaetsia nejumecovënëtaaponaponaejava daxita pacuenia jumaitsi pexanialivaisi, Cristo pelivaisi. Nexata acuenebi tsane itsajivi ata pecaitavetsinexa. Bajarapacuenia vajënaeevetaponaponare vajatuxanenë Jesucristo matapania pepatsimatacabitsicajavabelianexa. ¹⁵ Pamatacabi Dioso caëjëta, itsa copiapatsiana, Cristo icatsi patsianica. Caenë Dioso bitso ayaijamatabëcuenenënë daxitanacuaneë pevetsivivecua. ¹⁶ Caenë Dioso apo tēpae tsane daxita matcabijavabelianexa. Dioso peyacotiyaponaponaeenë. Bajaraxuata itsajivi ata acuenebi pimoxoyotsijava Dioso. Itsajivi ata cajena caeto ata apo tae Dioso. Tsipaji apo caëjëpaetsi petaejava. ¡Daxitamatacabi Dioso pijajivi yayatanetsi! ¡Dioso cajena ayaijamatabëcuenenënë daxitamatacabijavabelianexa!

¹⁷ Pamonae bitso pexainaevi mapanacuapijicueneje, bajarapamonae muxujjobare beayaijamatabëcuenevi penataeyaniva. Muxujjobarenu pejamatabëjumaitsiyaniva: “Palata baja taxainaexae, apo namatavenonaenë itsacuenjavaya ata,” pejamatabëjaiyaniva. Tsipaji saya palata peverevereaejava. Biji rajane itorobare bitso pexainaevi penajamatabëcueneçopatsinexa piasaëtsaponaponaeenë Diosojavabelia. Dioso nacarajuta daxita vajaxinaejava barëyaya vajacajinavanapaenexa. ¹⁸ Itorobarenu

bajaramonae pijapalata pecanacuenebinexa, itsamonaejavabelia pexaniacuene petoexanabiabinexa bajarapapalatata. Itorobarena penajamatabēcueneveretsinexa palata perajutsinexa bepejiobivijavabelia, bajarapacuenia peyavenonaenexa. Itorobarena petsicobetsanapon-aenexa pexainaejava bepejiobivijavabelia.¹⁹ Bajarapacuenia itsa exanaena, nexata athēbētatsia Dioso tobuataponaenatsi pepacuene penamatamotsijava pexainanexa daxitamatacabijavabelianexa. Xainaenana matacabi apo peverevereaejava.

Pacuenia Pablo Timoteo pemuxujiobilivaisi toyaquina, pecopatsivajēnae petoyaquinaelivaisi mapabaxutotaje, yabara pelivaisi

²⁰ Timoteo, exanapononare daxita xua Dioso catocopata nexanaenexa. Pētsa namuxunaevetame pamonae bitso pecuaicuaijaivi saya mapanacuapijicuene yabaraje. Pētsa namuxunaevetame pecuaicuaijaivi natsiquejemalivaisixi. Pētsa namuxunaevetame pamonae jivi tsipaebapona penajumetsēnētsilivaisi. Bajarapamonae tsipaebapona itajara pepacuene bepexaniajailivaisi. Itsiata cajena apo pexaniajailivaisi.

²¹ Itsamonae bajarapalivaisi jumecovēnēta. Nexata baja copaba Dioso pejumecovēnētsijavami.

Catovajētatsi Dioso pecayavenonaenexa.

Mapabaxutoje San Pablo cotocaevi toyaquina Timoteojavabelia

Pacuenia icatsia Pablo cotocaevibaxuto toyaquina Timoteojavabelia yabara pelivaisi

¹ Xanë Pablonë, Jesucristo nitoroba Dioso pejamatabëcueneta. Jesucristo nitoroba daxitanacuanëjava jivi tatsipaebinexa pacuenia Dioso najumecapanepaeya jumaitsi vajanacarajutsinexa matakabi apo pevereverecejaya. Dioso nacarajutsiana matakabi apo pevereverecejaya, Jesucristo vaju-jumecovënëtsivi. ² Timoteo, bitso tacaasivanë, betaxënatomëcuenia tacataenë. Catoyaquinatsi mapabaxutoje. Catovajëtatsi vaxa Dioso, vajatuxanenë Jesucristo ata, pecayavenonaenexa pecaasivaxaebje. Catovajëtatsi pecaifaxutotsoniataenexabeje, pecajamatabëcuene xanepanaeyaexanaenexanua bajaraponëbejevabelia.

Pacuenia Pablo Cristo vajunupaeba yabara pelivaisi

³ Pexaniajamatabëcuene rajutabiabajë Diosojavabelia. Dioso tonacuenebabiabajë pacuenia bajayata tajasalinaivimi ata Dioso tonacuenebavanapa. Pacuenia Dioso nitoroba, bajarapacuenia xaniavaetsia toponaponajë. Itsa canajamatabënapitatsi favajëtsijavata Diosojavabelia, meravi, matakabita ata, Diosojavabelia pexaniajamatabëcuene rajutabiabajë xamë yabara. ⁴ Najamatabënapitabiabajë tanepënueyabaxuabijavamë pamatacabi navecuanatsatsibeje. Bitso icatsia jamatabëcatanetsi tacasivajamatabëcuenebarëyanexa itsa catanetsi. ⁵ Najamatabënapitabiabajë pacuenia daxita nejamatabëëthëtovetsina najamatabëcuenecopatame Diosojavabelia. Copiaya acue Loidabeje, ena Eunicebeje, pejamatabëëthëtovetsina najamatabëcuenecopatabeje Diosojavabelia. Nexata yapëtaniji bajarapacuenia xamë ata nenajamatabëcuenecopatsijava Diosojavabelia.

⁶ Bajaraxuata canajamatabënapitsiaexanatsi mapacueniaje. Exanaponaename pacuenia Dioso caitoroba pecavejamatabëcaevianiva Dioso pecacajëpaeyaexanaejamatabëcuene. Nexata xaniavaetsia evetaponaponaename Dioso pejumecovënëtsivi. Pajamatabëcuene Dioso cacajëpaeyaexana, Dioso carajuta pamatacabi catsimatanacobebuatatsi tacatovajëtsijavata Diosojavabelia. ⁷ Dioso cajena nacarajuta Espiritu Santo. Espiritu Santo nexata vajanacayjavaponaponaexae, apo cujunavitsi itsacuenejava ata. Espiritu Santo pesaëta nacacajëpaeyaexana pacuenia Dioso nacatojitsipa vajaexanabiabinexa. Nacayavenonanua vajaasivanexa itsamonae ata. Nacanajamatabëcuene cataitsiaexananua pibisiacuene ata vajaexanaeyaniva. ⁸ Pëtsa ajumeuramë nevajunupaebaponaejava vajatuxanenë Jesús. Pëtsa ajumeuramë xanë ata tanevajunupaebijavamë, Jesucristo pijajivitonëxanë penaneconitsivi pejebabiabibota taneetsijava. Biji rajane xamë ata tonacopare itsamonae pecabejiobiaexanaenexa, jivi Diosojavabelia pecapanepaelivaisinexatsi yabara. Itsamonae pecabejiobiaexanaejavata, Dioso cajena cajamatabëcuenebabatsiana.

⁹ Dioso cajena nacacapanepaena pibisiacuene vajaexanaeconimivecua. Nexanjunata vajatojinavanapaenexa xaniavaetsia. Itsacuenejavayo pexaniacuene apo exanae atatsi, Dioso itsiata nacajunata. Nacajunata tsipaji Dioso jitsipa vajanacajunatsinexa. Dioso nacaitaxutotsoniatanenua

Jesucristo pejamatabēcueneta. Pepo bajayatamicujinae, pamatacabi abaxē Dioso nacua ata apo exanae, Dioso baja cajena nacajitsipa. ¹⁰ Dioso cajena nacatsitanajamatabēcuenetajēta vajanacaasivajava. Dioso vajanacaasivaxae, pexēnato itorobica vajanacapanepaenexa. Nexata tēpae ata tsanetsi, apo nacatoitsacuene. Tsipaji itsa najamatabēcuenecopatatsi Jesucristojavabelia, nacacapanepaena Diosojavabelia. Nexata xainaenatsi matacabi apo peververeceajava.

¹¹ Dioso cajena nitapeta jivi tatsipaebaponaenexa bajarapapexaniali-vaishi. Nitoroba apóstolenēnēxanē tatsipaebaponaenexa bajarapalivaisi apo judiōvijavabelia. ¹² Bajarapalivaisi jivi tatsipaebaponaexae, itsamonae nebe-jiobiaexanapona mapacueniaje. Itsiata baitsi jane apo auranē tanebe-jiobiaexanaejava yabara. Tsipaji ponējavabelia najamatabēcuenecopatājē, jamatabēcueneyapētaniji. Jamatabēcueneyapētaniji pacuenia bajaraponē jamatabēcuenecaējēpatsi taneyavenonaenexa. Nexata bajaraponē neyavenon-abiabiana pacuene netocopata taexanaponaenexa matapania icatsia Cristo pepsimatatabitsicajavabelianexa.

¹³ Timoteo, casaēmēre tsaponaponaē nejumecovēnētsijava pexaniajaili-vaishi, palivaisi baja catsipaebatsi. Pacuenia baja catsipaebatsi, bajarapacuenia juya itsamonaejavabelia tsipaebabiabianame. Bajarapalivaisi jamatabēnaponaponare. Xaniavaetsia jumecovēnētsia ponaponare. Asivaya taeyabiabare itsamonae ata Jesucristo pijajivitonēxamē. ¹⁴ Espiritu Santo cajena nacayajavaponabeje. Nexata nacayavenonaponabeje. Bajaraxuata pexaniajailivaisi xaniavaetsia tsipaebaponaenexa. Pacuenia Dioso caitoroba, exanabiabare. Saicayalivaisicuenia pētsa tsipaebaponaenexa. Espiritu Santo cayavenonaena.

¹⁵ Xamē baja cajena yapētaneme pacuenia Asiāvēnē nacupijivi, daxita Dioso pejumecovēnētsivi, nexuabarēcēpeca. Tanexuabarēcēpecaevi yajuvēnēbeje Figelobeje Hermógenesbeje. ¹⁶ Onesíforo, pijamonae yajava, Dioso pitaxutotsoniataenexatsi, tovajētājē Diosojavabelia. Onesíforo nejamaatabēcuenebabatabiaba. Penaneconitsivi pejebabiabibota ecae atanē, nesivaxaina anijatonē. Onesíforo cajena apo neyabaraaura, penaneconitsivi pejebabiabibota ecae atanē. ¹⁷ Biji rajane Onesíforo itsa patajopa Roma tomarata, nejaitaruta. Apo copatsi cajena tanejaitarutsijava. Matapania itsa necaxitajaraba penaneconitsivi pejebabiabibota, copata baja tanejaitarsijava. ¹⁸ Diosojavabelia Onesíforo tovajētājē Dioso pitaxutotsoniataenexatsi pamatacabi icatsia Cristo patsianica. Xamē baja cajena yapētaneme pacuenia Onesíforo nacayavenonabeje pamatacabi ponaponatsibeje Efeso tomarata.

2

Pacuenia Jesucristo pijajivitonē jamatabēcuenetsi, ponē xaniavaetsia jumecovēnēta, yabara pelivaisi

¹ Timoteo, xamē betaxēnatomēcuenia tacataenē. Catovajētatsi Diosojavabelia pecajamatabēcuenē asaēyaxanaenexa. Nacayavenonaena Jesucristo pijajivixaetsi. ² Xamē rabaja cajena nejumetaeyabiabame palivaisi tsipaebabiabajē jivi ayaibitsaētoxanetonējavabelia. Bajarapalivaisi juya tsipaebare itsamonaejavabelia. Pamonae apo piacuenejitsibivi pexanaenexa pacuenia itorobatsi, pecaējēpaevitsinua xaniavaetsia jivi livaisi petsipaebinxā, bajarapamonae itorobare juya mataropotsia bajarapalivaisi petsipaebinxā itsamonaejavabelia.

³ Dioso pejumelivaisi jivi netsipaebaponaejavata, itsa catoayapēbeje, itsamonae itsa cabejiobiaexanaejitsianua, pētsa najetabajiravame. Jesucristo pijajivitonēxaemē, jamatabēcueneevetaponaponare pacuenia caitoroba nexanaenexa. Pacuenia pexaniavajabitsaēnē itsi, bajaraitsimēre. ⁴ Vajabitsaēnē pitorobabiabinētsi jamatabēcueneevetaponapona pacuenia itorobatsi pexanaenexa. Nexata apo vecuanajamatabēcueneepatajērētsi saicayacuene pevetaponaenexa. ⁵ Bajara pijinia pacuenia pebitsojinaeivi pecujinaejinaejava, penayacobijavata, cujinaejina pacuenia itorobatsi pijatuxanevi. Penacanabinē jamatejema perajutsinexatsi itsacuenejavayo. Pajivi xaniavaetsia apo cujinaejinae pacuenia itorobatsi, bitsojinae ata pecujinaejinaejava, itsiata apo nacanabi. Nexata apo rajutsitsi pecujinaejinaematamo. ⁶ Ponē pijinia pabi nacueneba peubinexa peubijava, bajaraponē copiaya nacueneba asaēyata. Nexata peubijava itsa tonavereatsi, pita baja penacuenebimatamo. Bajara pijinia pacuenia xamē ata asaēya tonacuenebare vajatuxanenē. Nexata vajatuxanenē carajutsiana netonacuenebimatamo. ⁷ Najamatabēxainare tacatsipaebilivaisi. Nexata vajatuxanenē cayapētaeyaexanaena bajarapalivaisi.

⁸ Canaējēre Jesucristo. Bजारaponē cajena Dioso asaēyaexanatsi petēpaecujinae. Bजारaponē cajena Davidpijinē pemomoxiyajuvēnēnē. Bजारaponē pelivaisi jivi tsipaebabiabajā. Itsa jumecovēnēta bajarapalivaisi, pecapanepaelivaisinexatsi Diosojavelia. ⁹ Bजारapalivaisi tatsipaebaponaexae, penaneconitsivi pejebabiabibota neeta tavajēnaeyabelia daxitanacuanējava tatsipaebaponaeyaniva. Cadenamaētonēta xanē necēta, pacuenia bitso pibisiacuene pexanaenē bacētatsi. Itsiata Jesucristo pelivaisi apo cētsicapanepae. Nexata xanē majotaje naneconitsia ponaponae atanē, aeconoxae baja Jesucristo pelivaisi yacaējēpapona daxitanacuanējava. ¹⁰ Bजारaxua tayapētaexae, tonacaevetajē itsamonae ayaicuenia tanebejiobiaexanaenexa, Dioso pitapetsivitsi pecapanepaenexatsi Jesucristo pelivaisi pejumecovēnētsixae. Nexata bajarapamonae ata Dioso capanepaenatsi pexainaenexa matababi apo peverevereceaeyava daxita matababijavabelianexa. Nexata bajarapamonae Jesucristo yajavajinavanapaena pinijicotia yajava. ¹¹ Palivaisi aeconoxae jumaitsinējitsia, pexaniajailivaisi cajena:

Itsa xaniajai Cristo yajavatēpatsibeje, nexata icatsia Cristo yajavaasaētsibeje tsaponaponae tsane. ¹² Itsa casaē tsaponaponaetsibeje tsane Cristo pelivaisi vajajumecovēnētsijavabeje, itsamonae nacabejiobiaexanae atabeje, nexata daxitacuene Cristo cobenaevetsianatsibeje pamatacabi daxitacuene evetsiana pijanacuatatsia. Itsa vaxaitsibeje bajaraponē pelivaisi vajajumecovēnētsijavabeje nayavajunuaxainanatsibeje jivijavabelia, nexata juya bajaraponē pijajivitonēcueneetsibeje nacayavajunuaxainabeje paxa Diosojavelia. ¹³ Vaxaitsi itsajamatabēcuene Dioso vecuanajamatabēxainae atatsi, itsiata Dioso naca-toexanaena pacuenia baja cajena najumecapanepaeya jumaitsi.

Pacuenia jamatabēcueneitsi xaniavaetsia Dioso petonacuenebinē yabara pelivaisi

¹⁴ Daxita Dioso pejumecovēnētsivi najamatabēnapitsiaexanaename palivaisi catsipaebatsi. Vajatuxanenē pitabarata tsipaebare bajarapamonae. Pētsa bajarapamonae anaeya jumenota saya itsamonae pecuaicuaijajava. Pejumeanaenotsijava itsamonae, apo jamatabēcuenejavonae tsipaetsi itsajivi ata. Saya jamatabēcuenebijinaejitsipatsi daxita pejumetaevitsi. ¹⁵ Pacuenia

cacaējēpa, Dioso peccatorobicuena exanapononare. Nexata pamatacabi naitajētsianame Dioso pitabarata, cabarēyataena xaniavaetsia nejumecovēnētsixae pacuena caitoroba. Ajibi tsane neyabaraaurajava Diosojavabelia. Tspaji xaniavaetsia jivi tsi-paebaponaponame Dioso pejumelivaisi, pepo pexaniajailivaisi. ¹⁶ Pētsa namuxunaevetame pamonaē tsi-paebapona natsiquejemalivaisi, mapanacuapijilivaisi. Tspaji raja bajaramonaē petsipaebaponaelivaisita, jivi Dioso pejumecovēnētsijavami copabiaexanapona pevajēnaeyabelia. ¹⁷ Bitso cajena abeje bajarapalivaisi. Pacuena ayaivajēnē banaexanapona pevajēnētsabananajetarucaejava, bajara pijinia jamatabēcueneitsi bajarapamonaē petsipaebaponaelivaisi. Tspaji pevajēnaeyabelia jivi ayaibitsaēto jamatabēcuenebijianaponatsi bajarapalivaisi petsipaebaponaexaetsi. Bajarapalivaisi petsipaebaponaevi yajuvēnēnēbeje Himeneobeje Fileto-beje. ¹⁸ Bajaraponēbeje copatabeje baja pexaniajailivaisi pejumecovēnētsijavamibeje. Jamatabēcuenenavēxaniababeje saya. Tspaji jumaitsibeje tsabiabi: “Panepa rabaja jivi petēpaecujinae icatsia Dioso piasaēyaexanaponaējavaminexa,” jaibeje tsabiabi. Nexata bajarapacuenia Dioso pejumelivaisivecua najamatabēcuene epatajērērcaponabeje. Nexata bajaraponēbeje itsamonaē ata Dioso pejumecovēnētsijavamivecua najamatabēcueneepatajērērcaya exanaponabeje. ¹⁹ Pacuena ibotoxaneto apo tixitsicapanepaetsi, bajara pijinia itsi Dioso pejumelivaisi, pexaniajailivaisi. Caelivaisi rabaja tsiteca. Nexata itsalivaisijavabelia apo tixitsicapanepaetsi. Bajarapalivaisijavata mapacuenia pejumaitsilivaisiyo rucaje: “Pepo petuxanenē cajena yapētane pijajivi,” pejailivaisiyo ruca. Itsalivaisijavata pijinia mapacuenia pejumaitsilivaisiyo rucaje: “Pajivi jumaitsi: ‘Xanē raja Cristo pijajivitonēnē,’ jai, bajarapajivi becopata pibisiacuene pexanaejava,” pejailivaisiyo ruca.

²⁰ Riconē pijaboxanetota jivi pecanabaninēanēnexa, xaina daxitacuenevirianēanē. Itsanēanē penioponaēplatananitota pexanaenēanē. Itsanēanē oronanitota pexanaenēanē. Pamatacabi riconē topatatsi petuxanevi, ayaijamatabēcuenevi, pexaejava abatabiabi bajaraponēnēta. Itsanēanē bevelianēanē, naejavanēanē. Itsanēanē atsananinēanē. Bajaraponēanē xaina daxitamatacabi jivi pecanabaninexa. ²¹ Bajara pijinia jamatabēcueneitsi Dioso pejumecovēnētsivi ata. Pajivi xaniavaetsia najamatabēcuenevetaponapona pibisiacuene pexanaeyaniva, bajarapajivi jamatabēcueneitsi pacuena oronanitota pexanaenēanē itsi. Baitsi baja ajamatabēcueneuxirajibi. Nexata pijatuxanenē tsitaxanepana pitorobinexatsi xua pexaniacuene pijatuxanenē petonacuenebinexa. Timoteo, bajaraxuata xaniavaetsia benaevetaponaponame pibisiacuene nexanaeyaniva.

²² Pacuene pevējēavi najamatabēxaina pibisiacuene pexanaenexa, bajarapacuenē vecuanajetabajiravaponare. Casaēmēre tsaponaponaē ēpexaniacuene nexanaponaponaejava. Diosojavabelia najamatabēcuene copatsiayaponaponaē. Asivamēre tsaponaponaē itsamonaē ata. Jamatabēcueneexanepanaeya ponaponare Dioso pitabarata. Bajarapacuenia barēajamatabēcuenesaēmēre tsaponaponaē, pamonaē xaniavaetsia penaevetavanapaevi pibisiacuene pexanaeyaniva, penavajēcabiavinua Diosojavabelia peyavenonaenexatsi. ²³ Namuxujemare natsiquejemalivaisixi pecuaicuaijavi. Yapētaneme rabaja. Bajarapitsilivaisixi jivi itsa cuaicuaijai, belia najumeanaenotabiabapona. ²⁴ Jesús cajena pijajivitonē, itsamonaē apo bejumeanaenotsi. Biji rajane pexaniajamatabēcuene hexaina daxitajivijavabelia. Livaisi jivi betsipaeba xaniavaetsia. Bajayajebi ata apo becopatsi livaisi petsipaebaponaejava. ²⁵ Xaniavaetsia muxujiobiaya

livaisi betsipaeabaponapona pamonaē Dioso apo pejitsipaevi ata. Nexata beevetaponapona bajarapamonae ata pecopabinexa pibisiacuene pexanabiabijava penajamatabēcuene pēnēyorotsinexa Diosojavabelia. Nexata bajarapamonae ata Dioso yapētaeayexanaenatsi Jesús pelivaisi pexaniajailivaisicuene. ²⁶ Nexata icatsi najamatabēxainaeana xaniavaetsia Dioso pejumecovēnētsinexa. ²⁵ Xaniavaetsia muxujiobiaya livaisi betsipaeabaponapona pamonaē Dioso apo pejitsipaevi ata. Nexata beevetaponapona bajarapamonae ata Nexata dovathi pejamatabēcuene itorobabiabijavatsivecua najamatabēcuene pēnēyorotsiana Diosojavabelia.

3

Pacuenia jivi itsane itsa baja imoxoyo pevajēnae nacua pevereverecaenexa yabara pelivaisi

¹ Timoteo, xaniavaetsia beyapētaneme mapacueneje. Itsa baja imoxoyo pevajēnae tsane nacua pevereverecaenexa, bajarapamatacabi bitso ayapēbeje tsane daxitacuenejavabelia. ² Bajarapamatacabi cajena caejivi canacujitsia pexainaejava, natoasiva tsane ēbajarapamonae ayaijava pexainaeana. Navajunupaebiana saya peyaiyataenexatsi pejumetaevitsi. Beayaijamatabēcuenevi nataena. Navajunupaebiana pexanaejava yabara peyaiyataenexatsi. Bajarapamonae pibisiacuena baracuaicuajai tsane Dioso. Apo jumecovēnētsi tsane paxajivi, penajivi ata, pitorobicueniatsi. Vitsatsi atatsi, yavenonabiabi atatsi, apo jamatabēnajinae tsane pijamonae. Bajarapamonae apo yaiyatae tsane itsamonae Diosojavabelia pevajēcabiabijava. ³ Bajarapamatacabita bajarapamonae apo asiva tsane pijamonae ata. Apo itaxutotsoniatae tsane itsamonaejavabelia ata. Najumetsēnētsiaya baracuaicuajai tsabiabi tsane itsamonae. Apo caējēpaetsi tsane penajamatabēcuene cataitsinexa pibisiacuene pexanaejava. Anaepanabiabiana bitso pebejiobiaexanaenexa itsamonae. Itoya tsane daxita pexaniacuene pexanaevi. ⁴ Bajarapamonae canajetsiana penajuajinavanapaevi ata pijavajabitsaē pecobeyabelia. Xaniavaetsia najamatabēxainaeenejeva, exanaena daxitacuene. Bijiaya naēcotsiana itsamonae. Dioso apo jamatabēnajinae tsane. Jaitsiana biji pebarēyajamatabēcuene saya pebarēyanexa. ⁵ Bajarapamonae itajara najonena Dioso pejumecovēnētsivijavabelia. Itsiata baitsi jane apo jumecovēnētsi tsane Dioso pejumelivaisi, jumetae ata.

Bajarapamonae navecuatsatsianame. ⁶ Bajarapamonae navecuatsatsianame tsipaji bajarapamonae yajuvēnēvi itsamonae pijabonējavabelia joneyabiabiana. Nexata bajarapabonēpijivi, petiriavi, bajarapamonae yamaxēitorobabiabiana. Bajarapapetiriavi jamatabēcuene faeanaena. Daxitacuene pibisiacuene jamatabēxanabiabiana. Nexata pamatacabi bajarapapetiriavi pibisiacuene jamatabēexana, patabiabiabiana penajumetsēnētsilivaisi petsipaebinexatsi. Nexata bajarapapetiriavi itsa tsipaebianatsi penajumetsēnētsilivaisi, beDioso itajara pejumelivaisi petsipaebivi taeyabiabiana. ⁷ Bajarapapetiriavi picani jitsipaena petsipaebabinexatsi Dioso pejumelivaisi. Itsiata baitsi jane apo tsijamatabējonepsi tsane pepo pexaniajailivaisi pecapanepaelivaisinexatsi Diosojavabelia. ⁸ Bajayata penajorobinēmibeje, Janespijinēmibeje Jambrespjinēmibeje, nayajiviitavetabeje Moiséspjinē pexaniajailivaisi petsipaebiyansivatsibeje. Bajara pijinja pacuenia pamonaē petiriavijavabelia penajumetsēnētsilivaisi tsipaebaponaena. Bajarapamonae nayajiviitavetaponaena pepo pexaniajailivaisi petsipaebiyansivatsi. Bajarapapebijivi apo caējēpaetsi tsane penajamatabēxainaeana xaniavaetsia. Bajarapamonae saya

yamaxëitorobiaya jumai tsabiabi tsane itsamonaejavabelia: “Paxanë raja Dioso patajumecovënëtsivi,” jai tsabiabi tsane. ⁹ Itsiata bajarapamonae ayaiabitsaëto jivi apo pënaponaeysi tsane. Daxitajivi cueneyapëtaenatsi bajarapamonae saya jema livaisi petsipaebaponaejava. Nexata pacuenia bajayata Janespijinëmibeje Jambrespijinëmibeje daxitajivi cueneyapëtanetsibeje pibisiacuene pexanaponaejavabeje, bajara pijinia pacuenia bajarapamonae ata daxitajivi cueneyapëtaenatsi penajumetsënësilivaisi petsipaebaponaejava.

Pacuenia baja Pablo copatsijitsia Timoteo pemuxujobijava yabara pelivaisi

¹⁰ Timoteo, xamë baja cajena yapëtaneme palivaisi tsipaebabiabajë jivibitsaëtoxanetojavabelia. Yapëtanemenua baja cajena pacuenia xaniavaetsia ponaponajë. Yapëtanemenua pacuene yabara Dioso tonacuenebaponaponajë. Yapëtanemenua pacuenia Dioso jumecovënëtaaponaponajë. Yapëtanemenua pacuenia itsamonaejavabelia livaisi tsipaebaponajë bajayajebi copatsinejevanë. Yapëtanemenua pacuenia itsamonaeta asivanë. Yapëtanemenua pacuenia casaënë tsaponaponae jivi livaisi tatsipaebaponaejava netoayapëbeje ata. ¹¹ Yapëtanemenua pacuenia itsamonaepibisiacuena nebaracuaicuaijai tsabiabi Jesucristo tajumecovënëtsinëxae. Yapëtanemenua pacuenia nebejiobiaexanapona. Yapëtanemenua pacuenia nebejiobiaexana Antioquia tomarata, Iconia tomarata ata, Listra tomarata ata. Bajarapatomaranëpijivi bitso nebejiobiaexana. Itsiata baitsi jane Dioso necapanepa daxita bajarapacuenecua. ¹² Xaniajai cajena. Daxita pamonaenajamatabëcuenecopata xaniavaetsia petojinavanapaenexa Jesucristo, bajarapamonae bejiobiaexanaponaenatsi. ¹³ Nexata pibisijamatabëcuenevi, pamonaedovathi pejamatabëcueneta jivi yamaxëitorobapona, orijibia bitso pevajënaeyabelia pibisiacuene exanapona. Bajarapamonaedovathi pejamatabëcueneta jivi yamaxëitorobaponaena. Nexata pijinia bajarapamonae ata bitsoyo dovathi yamaxëitorobaponaenatsi.

¹⁴ Timoteo, itsiata baitsi jane xamë casaëmëre tsaponaponae palivaisi baja capanepaeya jumecovënëtame. Tsipaji baja cajena xamë jamatabëcueneyapëtaneme pacuenia jamatabëcuenetsi pamonaecatcipaeba bajarapalivaisi. ¹⁵ Tsiquirinëyomëjavaveliacujinae baja cajena yapëtaneme Dioso pejumelivaisi. Bajarapalivaisi cayapëtaeyaxana pecacapanepaejavanexa Diosojavabelia nenajamatabëcuenecopatsixae Jesucristojavabelia. ¹⁶ Dioso pijajivi Espiritu Santo itorobatsi peyaquinaenexa Dioso pejumelivaisi. Nexata pacuenia Espiritu Santo itorobatsi, bajarapacuenia Dioso pijajivi yaquina daxita Dioso pejumelivaisibaxutonënexa. Nexata nacatoxanepana Dioso pejumelivaisi itsamonaevajanacatsipaebinexa vajayapëtaenexa pexaniajallivaisicuene. Nacatoxanepanua Dioso pejumelivaisi vajanacaitavetsinexa apo pexanepanaecuene itsa exanatsi. Nacatoxanepanua Dioso pejumelivaisi vajanacajamatabëcuenetorobinexa ëDiosopejitsipaecuene vajatoexanabiabinexa. Nacatoxanepanua Dioso pejumelivaisi vajanacayapëtaeyaxanaenexa xaniavaetsia vajatojinavanapaenexa Dioso. ¹⁷ Nexata Diosopejumecovënëtsinë itsa yapëtaneeDiosopejumelivaisi, jamatabëcuenecaëjëpaenatsi daxita xua pexaniacuene pexanaenexa.

4

¹ Pepo petuxanenë Jesucristo patsianica penaneconitsiaexanaenexa

daxita pibisiacuene pexanaevi. Naneconitsiaexanaena piasaëtsavanapaevi, petëpaevi ata. Bajaraponë itsa patsianica, daxitacuene pevetsinexa, patsianica. Jesucristo pitabarata, Dioso ata pitabarata, xanë jamatabëcuenereviaya caitorobatsi mapacueniaje. ² Daxitamatabaci jivi tsipaebare Dioso pitorobilivaisi. Ajamatabëcuenesaëya Dioso pitorobilivaisi tsipaebaponare. Paepatota jivi jitsipa pecanamuxunaevetsinexa, tsipaebare. Paepatota ata apo jitsipae pecanamuxunaevetsinexa, itsiata tsipaebare. Dioso pitorobilivaisi jivi jumecovënëtsiaexanare. Itavere pibisiacuene pexanaejava. Muxujobare piamatabëcuenesaënexa Diosojavabelia. Tsipaebaponare xaniavaetsia Dioso pejumelivaisi bajayajebi jamatabëcuenecueranaenejevamë. ³ Bajarapacuenia tsipaebaponare tsipaji raja itsamatabaci jivi apo namuxunaevetsi tsane pexaniajailivaisi petsipaebijavatsi. Biji rajane itsamatabaci jivi pijacuata natojaitsiana saicayalivaisi Dioso pejumelivaisivecua ayaibitsaëto petsipaebinxatsi. Bajarapamonae pijacuata junatsiana petsipaebinxatsi palivaisi muxujitsipa. ⁴ Nexata pexaniajailivaisi petsipaebiyativatsi, navecua itavetsiana. Jumecovënëtsiana saya ënatsiquejemalivaisixi. ⁵ Itsiata baitsi jane xamë saicaya nayajivitaeyaponaponare. Daxita pacuenia Dioso catocopata nexanaenexa, veretsianame. Catoayapëbeje ata, itsamonae cabejibiaexanae ata, casaëmëre tsaponaponae nevajënaeyabelia. Casaëmëre tsaponaponae jivi netsipaebijava pexanialivaisi pecapanepaelivaisinxatsi Diosojavabelia.

⁶ Xanë baja netoimoxoyo tsaponae tatonacaevetsinexa tanebeyaxu-abinexa. ⁷ Pacuenia pebitsojinaenë pecujinaejinaejava daxitasaëta cujinaejinaejava pata, bajarapacuenia xanë ata xaniavaetsia daxita tasaëta tonacuenebajë tajatuxanenë. Toveretajonajë baja tatonacuenebijava taneitorobicuenia. Apo copatsinë cajëna tanajamatabëcuenecopatsijava Diosojavabelia. ⁸ Pacuenia penayacobijavata, pebitsojinaenë pecujinaejinaejava, barajutatsi corona pecujinaejinaematamo, baja pijinia pacuenia xanë ata vajatuxanenë athëbëtsia nerajutsiana pexaniacuene taneitorobicuenia tatoponaponaexae. Bajarapacuenie nerajutsiana pamatabaci vajatuxanenë patsianica. Itsiata baitsi jane ëxanë apo nerajutsi tsane bajarapacuenie. Daxita pamonaë ata ajamatabëcuenesaëya vajënaeevetavanapa pepatsijavatsica Jesucristo, bajarapamonae ata rajutsianatsi bajarapacuenie. Vajatuxanenë itsa patsianica, naneconitsiaexanaena daxita pamonaë naneconita bajaraponëjavabelia. Vajatuxanenë itsa naneconitsiaexanaena daxita pamonaë naneconita bajaraponëjavabelia, itaxutojema apo naneconitsiaexanae tsane. Paneconivajëto caejivi canacujitsia xainapona, bajarapaneconivajëtota naneconitsiaexanaponaena.

Pacuenia Pablo jumaitsi Timoteojavabelia yabara pelivaisi

⁹ Itsa cacuenecaëjëpa neponaejava, bepjiyajo netaeyojopaeremena. ¹⁰ Demasvënëne rabaja nexuabatabajirava. Tsipaji Dioso pejumelivaisi matatoxenetsia jitsipa bitso mapanacuapijicuenije. Pona baja nexata Tesalónica tomarabelia. Crescentevënëne baja itorobajë Galacia nacuyabelia. Tito pijinia itorobajë Dalmacia nacuyabelia. ¹¹ Caenë Lucas xanëjavata ponapona. Jaire Marcos. Bajaraponë caëjëpatsi taneyavenonaenexa Dioso tatonacuenebijava. Nexata barërenamë tsane. ¹² Tiquico baja itorobajë Efeso tomarabelia. ¹³ Itsa renamë tsane xanëjavaberena, Troas tomarata tajacamisajumavelia tanaxatatsijava netopitaponaeremena. Carpovënëne raja pijabota puenetarutajë.

Tajalibronëna, tajacuyalatobaxutoxinua, netopitaponaeremena. Bitso tajacuyalatobaxutoxi namatavenonajë.

¹⁴ Alejandro, cobrenanita daxitacuene pexanaenë, bitso baja cajena pibisiacuene nexana. Itsiata baitsi jane Dioso neyamatomotsiana tanebejiobiaexanaematamo. ¹⁵ Nayajivitaema bajaraponë. Tsipaji raja bitso itoya patatsipaebaponaelivaisi.

¹⁶ Pamatacabi nayajivicuaicuaijanë majotaje Roma tomarata, nacua pevetsivi pitabarata, itsajivi ata apo neyavenonaeyacuacuaijai. Daxita nexuabanuta. Nexata bajarapamonae tovajëtajë Diosojavabelia penaneconitsiaexanaeyanivatsi tanexuabanutsijamatabëcuene. ¹⁷ Itsiata baitsi jane bajarapaepatota vajatuxanenë neyavenona. Vajatuxanenë pesaë nerajuta daxitalivaisi tatsipaebinexa. Apo judïovi ata pejumecovënëtsinexa, bajarapalivaisi tsipaebaponaajë Diosojavabelia pecapanepaelivaisinexatsi. Tanexuabanutsijavata pïcani netsiayai tanebeyaxuabinexa. Itsiata vajatuxanenë necapanepa tanebeyaxuabijavaminexavecua. ¹⁸ Vajatuxanenë cajena necapanepaponaena daxita pibisiacuene taneexanaeyaniva. Necaponaena athëbëabetsia bajaraponë pevetsinacuayabetsia. Vaxaitsi jumai tsabiabi tsanetsi Diosojavabelia daxitamatacabijavabelianexa: “Diosomë, pinijicuene baja cajena nexanaenë,” jai tsabiabi tsanetsi.

Pacuenia Pablo Timoteo tonajumeitoroba Efeso tomarabelia pebajacobinexatsi peyapëtaevitsi yabara pelivaisi

¹⁹ Nebajacobiana Prisca. Prisca pamona ata, Aquila, nebajacobiana. Nebajacobiana Onesiforo pijamonae ata. ²⁰ Erasto nacopatajopa Corinto tomaratalia. Tróximo pijinia puenetajë Mileto tomaratalia. Tsipaji avitane. ²¹ Itsa cacuenecaëjëpa, naxanitsiayo renamë tsane emarapae pecopiajopae-vajënaeya. Cajamatabënajina pina Eubulo, Pudente ata, Lino ata, Claudia ata, daxita itsamonae Dioso pejumecovënëtsivi yajava.

²² Catovajëtatsi vajatuxanenë Jesucristo pecayjavaponaenexa. Daxita paxamë pacatovajëtatsi Dioso papecayavenonaenexa.

Mapabaxutoje San Pablo toyaquina Titojavabelia

Pacuenia Pablo mapabaxutoje toyaquina Titojavabelia yabara pelivaisi

¹ Xanë Pablonë, Dioso pijajivitonënë. Jesucristo ata pijaapóstolenënë. Jesucristo baja cajena nitoroba jivi tayavenonaenexa Diosojavabelia penajamatabëcuenecopatsinexa. Dioso baja cajena tajëvelia itapeta bajarapamonae penajamatabëcuenecopatsinexa Diosojavabelia. Jesucristo nexata nitoroba bajarapamonae tatsipaebinexa pexaniajailivaisi Dioso pitabarata bajarapamonae xaniavaetsia pejinavanapaenexa. ² Jesucristo nitoroba tatsipaebinexa pexaniajailivaisi bajarapamonae ata pexainaenexa matabi apo peverevereaejava. Pepo bajayatami, Dioso abaxë nacua ata itsa apo exanae, Dioso najumecapanepaeya jumaitsi vajanacarajutsinexa matabi apo peverevereaejava. Dioso baja cajena apo penajumetsënëtsinë. ³ Nexata baja Dioso pecaëjëtsimatacabita, bajarapalivaisi nacayapëtaeyaexana. Nexata Dioso, vajanacapanepaenënexa, xanë nitoroba jivi tatsipaebinexa bajarapalivaisi. Nexata xanë daxitajivi tsipaebaponajë bajarapalivaisi. ⁴ Tito, betaxënatomëcuenia tacataenë. Tsipaji cayavenonatsi xamë ata nejumecovënëtsinexa Jesucristo pelivaisi. Catoyaquinatsi mapabaxutoje. Catojitsipatsi vaxa Dioso pecayavenonaenexa, Jesucristo ata, vajanacapanepaenënexa, pecayavenonaenexa. Catojitsipatsi pecaitaxutotsoniataenexa, pecajamatabëcuenenaxepanaeyaexanaenexanua.

Pacuenia Pablo Tito puenetanuta Cretatunaeto nacuata petonacuenebinexa Dioso pijacuene yabara pelivaisi

⁵ Capuenetatsi baja cajena Cretatunaeto nacujavata. Capuenetatsi nexanaponaponaenexa, xua abaxë catosajina nejamatabëcuenesaeyaexanaenexa Dioso pejumecovënëtsivi. Caitorobatsinua baja cajena caetomarapijivi canacujitsia nitapetsinexa ancianovinexa, Dioso pejumecovënëtsivi pevetsivinexa. ⁶ Nejumenajamatabënapire pacuenia caitorobatsi. Itsa itapetsijitsiamë ponë ancianonënexa, itapetsianame ponë toajibitsi jivi peyabaraneconitsijavanexatsi. Caeva pepitsinë. Pexi Dioso petojumecovënëtsinëtsi. Pexi apo petoacujirubejenëtsi. Pacuenia ata pexi itoroba, pejumecovënëtsinëtsi. ⁷ Tsipaji ponë itapetsianame ancianonënexa, Dioso pijacuene tonacuenebianana. Bajaraxuata ancianonënexa, itapetsianame ponë xaniavaetsia peponaponaenë, pianeconijibinë. Beayaijamatabëcuenenë apo penataenë. Bepejia apo pianaepeanaenë. Apo piapaenë piatajibinexa. Pevëna pebi apo pebenë. Apo pejitsipaenë itsajivi ata yamaxëitojorobiaya pevecuanacobetoxotsinexa palata. ⁸ Ancianonënexa, xanepana ponë xaniavaetsia copiapitabiaba pijabota pepatsivi. Pexaniacuene pexanaenë. Xaniavaetsia copiya penajamatabëxainaenë pacuene exanaeijitsia. Xaniavaetsia peponaponaenë jivi pitabarata, Dioso ata pitabarata. Pexanaponaponaenë daxita pacuenia Dioso pejumelivaisita itoroba jivi pexanaenexa. Pecaëjëpaenëtsi penajamatabëcuenecataitsinexa pibisiacuene pexanaeyaniva. ⁹ Ancianonënexa, xanepana ponë casaë tsaponapona pejumecovënëtsijava palivaisi tsipaebatsi, pexaniajailivaisi. Bajarapamonae nexata bajaraponë caëjëpaenatsi itsamonae ata pejamatabëcuenebabatsinexa pexaniajailivaisita. Caëjëpaenatsinua xaniavaetsia pejumecanaviatsinexa pamonae jamatabëcuenenavëxaniabiaya pibisiacuena baracuaicuajiai Dioso

pejumelivaisi. Nexata ancianonē xaniavaetsia itsa jumecanaviatsiana pamonaē pibisiacuēnia baracuaicuaijai Dioso pejumelivaisi, bajarapamonae ata jumecovēñetsiana Dioso.

¹⁰ Bajarapitsijamatabēcuēnevi itapetaponaenēme ancianovinexa. Tspajji raja Cretatunaeto nacuata, Dioso jumecovēñetsivi tuatuajeta, ayaibitsaēto jinavanapa apo pejumecovēñetsivi pacuenia itorobatsi pevetsivitsi. Bajarapamonaeyajuvēñēvi ayailbitsaēto judiōvi. Bajarapajudiōvi jumai tsabiabi: “Pamonaē apo judiōvi ata Jesús pelivaisi itsa jumecovēñēta, bajarapamonae ata benaperabēcaucubiaexana,” jai tsabiabi. Bajarapajudiōvi natsiqueje-malivaisi saya cuaicuaijai tsabiabi. Nexata yamaxēitojorobapona Dioso pejumecovēñetsivi. ¹¹ Bajarapajudiōvi bejumeitavetame. Tspajji saya penajumetsēñetsilivaisi jivi tsipaebapona Dioso apo pejitsipaecuēnia. Bajarapajudiōvi, caebopijivi canacujitsia, Dioso jumecovēñetsivi, najamatabēcuēne epatajērērecaeyaexanapona Dioso jumecovēñetsijavavecua. Bajarapajudiōvi penajumetsēñetsilivaisi jivi tsipaebapona saya pematamotsinexatsi palata.

¹² Bajayata pina livaisi bitso peyapētaenēmi ponapona Cretatunaeto nacuata. Nexata pina bajaraponēmi jumaitsi Cretatunaeto nacuapijivi yabara mapacueniaje: “Cretatunaeto nacuapijivi cajena bitso penajumetsēñetsivi. Bitso piacujirubejevi. Ayaijavanua jamatabēxaeyabiaba. Bitso afaetabinua,” jai pina cajena bajayata Cretatunaeto nacuapijinēmi. ¹³ Xaniajai baja cajena pacuenia jumaitsi bajaraponēmi. Bajara jamatabēcuēneitsi Cretatunaeto nacuapijivi. Tito, nexata xamē asaēyata itorobare bajarapamonae xaniavaetsia penajamatabēcuēnecopatsinexa Diosojavabelia. ¹⁴ Itavere bajarapamonae penamuxunae vetsiyāniva judiōvi pijasalinaivimi pijalivaisixi. Itavere baja bajarapamonae jumecovēñetsiyāniva pacuenia itorobapontsi pamonaē copaba pexaniajailivaisi jumecovēñetsijavami.

¹⁵ Pajivi jumecovēñēta Jesucristo pesivatēpaejavatsi, bajarapajivi jamatabēcuēnexuirajibi. Bajarapajivi daxita xua tane, ēpexaniacuēnia sivanamatabēxaina. Nexata itsacuenejavayo ata apo jamatabēcuēnebijaetsi. Pajivi pijinia apo jumecovēñētsi Jesucristo pesivatēpaejavatsi, bajarapajivi ajamatabēcuēnexuira. Nexata bajarapajivi daxita xua tane, pibisiacuēnia sivanajamatabēxaina. Nexata daxitacuēne jamatabēcuēnebijaetsi. Pibisiacuēne exanabiabi ata, jamatejema saya ponapona. ¹⁶ “Xanē rabaja bitso Dioso yapētāniji,” jai tsabiabi. Itsiata baitsi jane bajarapamonae pibisiacuēne exanavanapa. Nexata nayapētane Dioso apo peyapētaejava. Bajarapamonae itoya Dioso. Bajarapamonae apo jumecovēñētsi pacuenia Dioso itorobatsi. Nexata apo caējēpaetsi itsacuenejavayo ata pexaniacuēne pexanaenexa.

2

Pacuenia Pablo Tito itoroba pexaniajivaisi jivi petsipaebaponaenexa yabara pelivaisi

¹ Tito, xamē jivi livaisi itsa tsipaebabiabianame, tsipaebabiabianame ēpexaniajailivaisi. ² Perujepebijivi muxujiobabiabianame penajamatabēcuēnereviabinexa. Muxujiobabiabianame xaniavaetsia pejinavanapaenexa jivi peyayataenexatsi. Muxujiobabiabianame penajamatabēcuēnecataitsinexa pibisiacuēne pexanaeyāniva. Muxujiobabiabianame pexaniajailivaisi, Jesús pelivaisi, xaniavaetsia jumecovēñetsinexa. Muxujiobabiabianame daxitajivi asivaya petaenexa. Muxujiobabiabianame, itsamonae bejiobiaexanae atatsi Dioso pejumelivaisi yabara, pevājēnaeyabelia pecaasaēnexa Dioso jumecovēñetsijava.

³ Bajara pijinia pacuenia muxujiobabiabianame perujupetiriavi ata jamatabëcuenereviaya pejinavanapaenexa Dioso pitabarata. Bajarapamonae pibisiacuena itsamonae apo bebaracuaicuaijai. Apo biaitajibi tsabiabinua. Bajarapapetiriavi itsamonae pexaniacuene betsitæxanavanapa. ⁴ Nexata perujupetiriavi itsamonae pexaniacuene itsa tsitæxanavanapa, jamatabëcuene cjarubiana pecovëpijipetiriavi ata xaniavaetsia pamonajivi piasivanexa, penacoxiasivanexana. ⁵ Perujupetiriavi itorobianame pemuxujiobabiabinexa pecovëpijipetiriavi ata penajamatabëcuenereviabinexa, pexaniajamatabëcuene ata penajamatabëxainænexa. Perujupetiriavi muxujiobabiabianame pijabo ata xaniavaetsia pevetsinexa, pexaniacuene ata pexanabiabinexa, pamonajivi ata xaniavaetsia pejumecovënëtabiabinexa. Nexata juya perujupetiriavi muxujiobabiabiana pecovëpijipetiriavi xaniavaetsia pejinavanapaenexa. Nexata bajarapamonae xaniavaetsia itsa jinavanapaena, itsajivi ata pibisiacuena Dioso pejumelivaisi apo baracuaicuaijai tsane.

⁶ Bajara pijinia pacuenia muxujiobabiabianame pevëjævi penajamatabëcuene cataitsinexa pibisiacuene pexanaeyaniva. ⁷ Xamë xaniavaetsia bajarapamonae ëpexaniacuene tsitæxanaponaponaenæ. Nexata bajarapacuenia daxitajivi cacuena xaniavaetsia neponaponaevæja. Pexanialivaisi itsa tsipaebabiabianame, tsipaebabiabianame nejamatabëëthëtovetsina nexaniajajumeta jamatabëcuenereviaya. ⁸ Xaniavaetsia tsipaebabiabianame pexaniajailivaisi. Bajarapacuenia itsa exanabiabianame, peccaitoyavi ata aura tsane. Tsipaji ajibi tsane pecayabaranæconitsiaexanæjava.

⁹ Pajivi bedajubicuenia canajetatsi petonacuenebabiabinexa amoneya pijatuxanenë, bajarapajivi muxujiobabiabianame pijatuxanenë pejumecovënëtsinexa daxita pacuenia itorobatsi. Muxujiobabiabianame xaniavaetsia pijatuxanenë petonacuenebabiabinexa pesivajamatabëcuenebarëyanexatsi. Pëtsa bajarapajivi apo jejai pijatuxanenë pitorobijavatsi. Pëtsa jumatsi pijatuxanenëjavabelia: "Jume raja. Bajarapacuenia apo xanepanæ tacatoexanaenexa. Mara jane pacuenia xanepanæ tacatoexanaenexajæ," jai pëtsa. ¹⁰ Pëtsa bajarapajivi muetsia pita pijatuxanenë pijajava. Biji rajane pijatuxanenëjavabelia tsitanajamatabëcueneitajëtsi daxitacuene xaniavaetsia petonacuenebabiabijava nacobetoxotsinejevæ. Bajarapacuenia itsa exanaena bajarapajivi, nexata daxitajivi yapëtaena Dioso vajanacacapanepænënexa pejumelivaisi pexaniajailivaisicuene.

¹¹ Dioso baja cajena nacayapëtaeyæxana vajanacaitaxutotsoniatæjava. Nexata Dioso nacacapanepænæ daxitanacuapijivitsi. ¹² Dioso vajanacayapëtaeyæxanæxæ vajanacaitaxutotsoniatæjava vajanacacapanepænexa, nexata becopatatsi pibisiacuene vaxænæjavami. Bitso vajajitsipæjava ata mapanacuapijicuene vajaxainænexa, becopatatsi. Dioso rajane jitsipa mapanacuata nayajivitaeyæ vajajinavanapaenexa pibisiacuene vaxænæyaniva. Nexata Dioso pejitsipæcuenia betoxanavanapatsi. Dioso cjunaviaya xaniavaetsia bejinavanapatsi. ¹³ Bajarapacuenia Dioso cjunaviaya xaniavaetsia bejinavanapatsi paepatojebi Jesucristo copiaevetavanapatsi icatsia pepatsijavanexatsica. Nexata icatsia pamatacabi Jesucristo patsianica, sivajamatabëcuenebarëyatsi tsane. Pacuenia Dioso tajëvelia najumecapanepæya nacajumatsi Jesucristo pepatsijavanexatsica, bajarapacuenia xaniajai Jesucristo patsianica. Jesucristo rabaja cajena, pinijiDiosonë, vajanacacapanepænexa. Bajaraponë penivenivenæcotia yajavapatsianica. ¹⁴ Bajaraponë pijacuata

tonacaeveta pijavajabitsaë pebeyaxuabinexatsi. Nexata Jesucristo itsa beyaxuabatsi, pijanata nacacomuata pibisiacuene vajaexanaeneconivecua. Nacavecuajaajibiaexana baja bajarapaneconimi Jesucristo pijajivitsi vajanacaexanaenexa. Nacajitsipaeyaexananua ëpexaniacuene Jesucristo vajatoexanaenexa.

¹⁵ Daxita bajarapacuenia muxujiobaponaename. Jamatabëcuenebabataponaename asaëya bajarapamonae. Asaëya muxujiobabiabianame pibisiacuene itsa exanapona. Bajarapacuenia muxujiobabiabianame Dioso pecatocopatsixae bajarapacuenia nexanaponaenexa. Pëtsa copatame itsajivi ata bijiaya pecataenexa.

3

Pacuenia Dioso pejumecovënëtsivi pexaniacuene bexanavanapa yabara pelivaisi

¹ Dioso pejumecovënëtsivi, Cretatunaeto nacupijivi, najamatabënapitsiaexanaename yayiataeya pejumecovënëtsinexa gobierno pitorobilivaisi, pejumecovënëtsinexanua gobierno pijajivi ata. Itorobianamenua bajarapamonae pexanaenexa daxitaxua pexaniacuene. ² Muxujiobabiabianame bajarapamonae itsajivi ata pibisiacuena pebaracuauaijaiyaniva. Muxujiobabiabianame bajarapamonae, itsamonae itsacueniabi atatsi, pecuencanaviatsiyaniva. Muxujiobabiabianame bajarapamonae pexaniajamatabëcuenia pebarëcuauaijainexa daxitajivijavabelia. Itorobianamenua daxitajivivecua beveliajamatabëcuenevi nataeya pejinavanapaenexa.

³ Itsa abaxë vaxaitsi ata Dioso apo jumecovënëtsitsi, saya picani jema jinavanapatsi. Apo exanavanapatsi pacuenia Dioso nacaitoroba. Apo exanavanapaetsinua pacuenia nacuaevetsivi ata nacaitoroba. Naxuabiaya saya jinavanapatsi Dioso pejumelivaisivecua. Pibisiacuene, pacuene vajavitota jamatabëexanatsi, exanavanapatsi. Pacuene ata nacajamatabëcuenebarëyaexana, exanavanapatsi. Pibisiacuene bitso exanavanapatsi itsamonaejavabelia. Itsamonae cuenecaëbabiabatsi. Daxitajivi nacaitoya tsabiabi. Vaxaitsi ata namataenetsia naitoyatsi tsabiabi.

⁴ Bajara vajaitsivimi ata, itsiata Dioso, vajanacapanepaenënexa, nacayapëtaeyaexana vajanacaitaxutotsoniataecuene. Nacayapëtaeyaexananua pacuenia ata Dioso nacaasiva daxitatsi mapanacuapijivitsije.

⁵ Dioso nacacapanepaena vaneconivecua. Itsiata baitsi jane pexaniacuene vajaexanaejava yabara, Dioso apo nacacapanepae tsane. Jume baja cajena. Dioso raja nacacapanepaena tsipaji nacaitaxutotsoniatane. Nexata nacajamatabëcuenequiata. Dioso vajanacaitaxutotsoniataexae, nacacapanepaena. Espiritu Santo pejamatabëcueneta pejanajamatabëcuenevitsi baja nacaexana.

⁶ Dioso baja cajena ayaicuenia vajanacayavenonaenexa, Espiritu Santo nacatoitorobica vaxaitsijavabetsica. Bajarapacuenia Dioso Espiritu Santo nacatoitorobica Jesucristo vajanacacapanepaenënexa pejamatabëctsoniatane. Nexata nacajamatabëcuenequiata. Dioso vajanacaitaxutotsuena. ⁷ Bajaraxuata Dioso vaxaitsi yabara jumaitsi: “Bajarapamonae baja aneconijibia taniji,” jai Dioso. Tsipaji nacaitaxutotsoniatane. Nexata vaxaitsi xainaenatsi matacabi apo pevereverecaeyava, xua copiaevetavanapatsi.

⁸ Daxita baja palivaisi pacatoyaquinatsi, pexaniajailivaisi cajena. Nexata jitsipajë ajumesaëya jivi netsipaebaponaenexa bajarapalivaisi. Nexata Dioso pejumecovënëtsivi ëpexaniacuene pexanaenexa pejamatabëcueneenaenexatsi. Bajarapalivaisi bitso xanepana

daxitajivi pejumecovënëtsinexa. ⁹ Nexata navecuaitavetsianame saya jema natsiquejemalivaisixi itsamonae pecabarëcuaicuajaiyaniva. Navecuaitavetsianamenua judiovi pijasalinaivimi pevënëxi yabara pecabarëcuaicuajaiyaniva. Navecuaitavetsianamenua Dioso Moiséspijinëta penajumecopatsilivaisi yabara anaeya pecajumenotsiyaniva. Bajarapacuenia pecabarëcuaicuajaijava apo xanepanae tsipae itsacunejavayonexa ata.

¹⁰ Itsamonae penajumetsënëtsilivaisi jivi tsipaebapona. Nexata bajarapamonae penajumetsënëtsilivaisita Dioso pejumecovënëtsivi navecuantsanaeyaexanapona. Bajarapapamonae jumeitavetsianame. Anijato-beje ata jumeitavetsianame. Nexata bajarapamonae copatsiana penajumetsënëtsilivaisi jivi petsipaebaponaejava. Jumeitavetsi atamë, itsiata itsa apo cajumecovënëtsi tsane, nexata bajarapamonae itorobianame itsajavabelia peponaenexa. ¹¹ Yapëtaneme rabaja mapacueneje. Ponë peneta copata pexaniajailivaisi pejumecovënëtsijavami, pibisiacuene pexanaexa. Nexata bajaraponë naneconita Diosojavabelia pibisiacuene pexanaexae.

Pacuenia icatsia Pablo itsalivaisi toitoroba Tito asaëya Dioso petonacuenebinexa yabara pelivaisi

¹² Catoitorobialitsi Artemas. Itsa jume, catoitorobialitsi Tíquico. Bajaraponë itsa patsialia xamëjavabelia, nexata xamë bepíjia renamë tsane xanëjavaberena. Nacaxitajarabianatsibeje Nicápolis tomarata. Daxita emarapae raja ponaponaenajë Nicápolis tomarata. ¹³ Itsa baja pacavecuaponaena Zenasbeje Apolosbeje, nexata yavenonaename pacuenia namatavenon-aenabeje pijanamutobejenexa. Zenas raja abogadonë, penaneconitsivi peyavenonaeyacuacuajainë. Rajutsianame pacuenia namatavenonabeje, itsacunejavayo ata petosajinaeyanivatsibeje itsa najetarucabeje namuto. ¹⁴ Pamona vaxaitsi pexanialivaisi tsipaebatsi, bajarapamonae tojitsipajë peyapëtaenexa xua pexaniacuene. Nexata ëpexaniacuene pexanaenexa. Nexata bajarapamonae tojitsipajë asaëya penacuenebinexa, peyavenon-aenexa pamona bitso bepejiobivi. Pëtsa saya bajarapamonae jinavanapa nacuenebinejeva.

Pacuenia Pablo itsamonae jamatabënajina yabara pelivaisi

¹⁵ Daxita pamona yjavaponaponajë, cajamatabënajinalia. Pajamatabënajinaliajë daxita pamona pataniasivivi, Dioso pejumecovënëtsivi. Pacatovajëtatsi Diosojavabelia daxita paxamë Dioso papecayavenonaenexa.

Mapabaxutoje San Pablo toyaquina Filemónjavabelia

Pacuenia Pablo mapabaxutoje toyaquina Filemónjavabelia yabara pelivaisi

¹ Xanë Pablonë, Jesucristo pijajivitonëxaenë, Jesucristo pelivaisi jivi tsi-paebabiabijë. Bajaraxuata nenaneconitsiaexana. Nexata penaneconitsivi pejebabiabibota naneconitsiaponaponajë. Filemón, paxanëbeje vajabananë Timoteobeje, bitso pacaasivatsibeje patacayajavanacuenebabiabinëxaebeje. Paxanëbeje, pacatoyaquinatsibeje mapabaxutoje. ² Patoyaquinajëbejenua mapabaxutoje pamonaë Dioso pejumecovënëtsivi, nijabota penacaetuatabiabiivi. Patoyaquinajëbejenua mapabaxutoje vajabanava Apiavënëva ata. Patoyaquinajëbejenua mapabaxutoje Arquipovënënë ata. Pacuenia xanë Dioso pijacuene tonacuenebabiabijë, bajarapacuenia Arquipo ata Dioso pijacuene tonacuenebabiaba. ³ Pacatovajëtabiabatsi vaxa Diosojavabelia, vajatuxanenë Jesucristojavabelia ata, papecaitaxutotsoniataenexa jamatabëcuenexanepanaeya panejinavanapaenexa.

Pacuenia Pablo tovajëta Filemón Diosojavabelia yabara pelivaisi

⁴⁻⁵ Filemón, cavënëlivaisitanetsi niasivajava vajatuxanenë Jesucristo, daxita Dioso pejumecovënëtsivi yajava. Cavënëlivaisitanetsinua nenajamatabëcuenecopatsijava pepo petuxanenë Jesúsjavabelia. Bajaraxuata itsa cajamatabënajinatsi, catovajëtabiabatsi Diosojavabelia. Nexata pexaniajamatabëcuene rajutabiabijë Diosojavabelia xamë yabara. ⁶ Pamonaë ata Diosojavabelia najamatabëcuenecopaba xamë pexanialivaisi netsipaebixae, bajarapamonaë ata tovajëtabiabijë Diosojavabelia. Tovajëtabiabijë bajarapamonaë xaniavaetsia peyapëtaenexa Dioso vajanacayavenonabiabijava Jesucristo pijajivixatsi. ⁷ Itsamonaë ata Dioso pejumecovënëtsivi niasivaxae, casivajamatabëcuenebarëyatsi. Cavënëlivaisimuxua najamatabëcuenesaëtsi. Tsiipaji daxita Dioso pejumecovënëtsivi jamatabëcuenebabatabiabame.

Pacuenia Pablo itoroba, Filemónjavata Onésimo itsa pata, xaniavaetsia Filemón pecopiapitsinexa yabara pelivaisi

⁸ Xanë Cristo taneitorobinëxae, nejamatabëcuenecaëjëpa picani tacaitorobinexa xua hexaname Dioso pecasivabarëyanexa. Itsiata baitsi jane apo caitorobi tsanetsi. ⁹ Tacaasivaxae, saya pexaniacuena cavajëtatsi pexaniacuene tanetoexanaexamë. Xanë Pablonë, perujunënë baja. Maparucæje naneconitsiaponaponajë penaneconitsivi pejebabiabibota Jesucristo pijajivitonëxaenë. ¹⁰ Majotaje, xanëjavata, nijajivitonë Onésimo patajopa, pecavecuanajetabajiravinë. Nexata cavajëtatsi pexaniacuene tanetoexanaexamë Onésimojavabelia. Onésimo raja betaxënatocuena tataanë pejumecovënëtsixae Jesucristo pelivaisi. Pexanialivaisi, Jesucristo pelivaisi, Onésimo tatsipaebixae, jumecovënëta baja Jesucristo pelivaisi. Jesucristo pelivaisi Onésimo jumecovënëta majotaje, penaneconitsivi pejebabiabibota.

¹¹ Onésimo baja cajena bajayata bedajubinëcuena comuatame amoneya nijabota pecatonacuenebabiabinexa. Nexata bajarapamatacabi catonacuenebi ata, itsiata itsacuenejavayo ata xaniavaetsia apo catonacuenebi. Itsiata baitsi jane maparucæje Jesucristo baja

pelivaisi Onésimo pejumecovēnētsixae, xanēnexa xaniavaetsia netonacuenebaponapona. Nexata baja aeconoxae itsa naviatsipa xamējavabelia, xamēnexa ata xaniavaetsia catonacuenebijitsipa. ¹² Nexata icatsia Onésimo catoitorobaliatsi mapabaxuto yajavaje. Copiapitsianame xaniavaetsia. Tspiji Onésimo bitso tasivanē. Itsa baja ponaponaena xamējavatalia, jamatabēnainabiabianajē bitso. ¹³ Naneconitsiaya ponaponajē penaneconitsivi pejebabiabibota pexanialivaisi, Jesucristo pelivaisi, jivi tatsipaeabiabixae. Bitso picani Onésimo asivanē xanējavata peponaponaenexa. Nexata Onésimo itsa ponaponaejitsipa xanējavata, neyavenonaponaponaejitsipa xaniavaetsia. Taneyavenonaenexa, betanetoitorobinēmēcuenia neyavenonabiabijitsipa. ¹⁴ Itsiata baitsi jane apo jitsipaenē Onésimo taneyavenonaponaponaenexa copiaya cavajētsinejevatsi. Apo jitsipaenēnua tacavajētsinexa tanetocopatsinexamē bajaraponē taneyavenonabiabinexa. Biji rajane picani jitsipajē cavajētsinejevatsi nijacuate tanetocopatsinexamē bajaraponē. ¹⁵ Onésimo picani itsa cavacuanajetabajirava, cavacuanatsata caematacabibeje. Itsiata baja icatsia aeconoxae xamējavabelia naviatsijitsialia. Nexata jane baja daxitamatacabijavabelianexa nijajivitonē tsaponaponaenē tsane. ¹⁶ Pētsa baja taneme saya nijajivitonēcuenia. Biji rajane nijajivitonē ata, Dioso pejamatabēcueneta asivaya taename benejuyapijinēcuenia. Xanē picani bitso asivanē Onésimo. Itsiata xanē bajaraponē tasivajava matatoxenetsia, xamē bitso asivamē tsane. Tspiji xamē bajaraponē nijajivitonē. Nejuyapijinēnua baja Dioso pejamatabēcueneta.

¹⁷ “Pablobeje rabaja patanajuaponaponaenēbeje,” itsa nesivajamatabējāmē tsane, nexata Onésimo xaniavaetsia copiapitsianame, pacuenia xanē necopiapitabiabame. ¹⁸ Onésimo itsa catonaneconita, itsa camoneyabanua, nexata xanē bajaraxumatamo neyanijobianame. ¹⁹ Peneta raja paitanebēretoyoy jumaitsi: “Xanē Pablonē. Camatamotsianatsi cajena,” jai, xanē tajacuata tacobeta yaquinajē. Itsiata pijinia pacuenia niamoneyabame, apo catoitajētsitsi. Tspiji itsa catoitajētsipatsi pacuenia niamoneyabame, nexata jitsipaejitsipame daxitanēmē, nejamatabēcuenē yajava, tanerajutsinexamē. ²⁰ Tajabanānē, pacuenia cavajētatsi, xaniavaetsia copiapitsianame Onésimo Jesucristo pijajivitonēxaemē. Xaniavaetsia Onésimo itsa copiapitsianame, bitso nejamatabēcuenēbarēyaya exanaename.

²¹ Catoyaquinatsi mapabaxutoje tspiji yapētaniji tanejume-covēnētsijavanexa tacaitorobicuenia. Casivajamatabējumaitsitsi mapacueniaje: “Filemón cajena taitorobicuenia matatoxenetsia xaniavaetsia copiapitsiana Onésimo,” casivajamatabējajatsi. ²² Caecuenia tavajēnaeyabelia cavajētatsi tavajēnaelia nijabota tanetoxaniavaetsinexamē, itsajota patsijitsianē itsa ponajē paxamējavabelia. Tspiji bajayajebi panetovajēcabiabame Diosojavabelia tapatsinexa paxamējavabelia. Nexata jamatabējumaitsinē: “Pacuenia bajarapamonae netovajēcabiaba Diosojavabelia, bajarapacuenia Dioso netocopatsiana,” jamatabējanē taponaenexa paxamējavabelia.

Pacuenia itsamonae jamatabēnainatsi Filemón yabara pelivaisi

²³ Epafra, ponēbeje panajuaponaponajēbeje penaneconitsivi pejebabiabibota Jesucristo pijinia pijajivitonēxae, bajaraponē cajamatabēnainalia. ²⁴ Cajamatabēnainalia Marcos ata, Aristarco ata, Demas ata, Lucas ata.

Cajamatabënajinalia daxita bajarapamonae patanajuanacuenebivi Dioso pijacuene. ²⁵ Pacatovajëtabiabatsi Diosojavabelia vajatuxanenë Jesucristo papecayavenonabiabinexa.

Mapabaxutoje Dioso pijajivitonë toyaquina judíovijavabelia

Pacuenia Dioso pexënato itoroba jivijavabelia petocuaicuaijainexatsi yabara pelivaisi

¹ Bajayatami Dioso anijatonë najamatabëcueneitajëtabiaba Dioso-jumepaebivi profetavijavabelia. Nexata juya profetavi tsipaebabiaba vajasalinaivimijavabelia pacuenia Dioso itorobatsi. Bajarapacuenia Dioso najamatabëcueneitajëtabiaba profetavijavabelia matacabita bemajitsinaebocuenia. Itsajavata Dioso najamatabëcueneitajëtabiaba profetavijavabelia meravi majitsinaebota. Itsajavata pepacuenie Dioso roviaalia barëcuaicuaijai tsabiabi profetavijavabelia. Nexata juya profetavi tsipaebabiaba vajasalinaivijavabelia pacuenia Dioso itorobatsi.

² Nexata jane baja aeconoxae, mapamatacabitaje, Dioso itorobica pexënato vajanacatsitanajamatabëcuene itajëtsinexa, vajayapëtaenexa Dioso vajanacatojitsipaejava. Bajayata Dioso itoroba pexënato pexanaenexa mapanacuaje, daxitacuene yajava. Nexata daxitacuene mapanacuateje Dioso pexënato tocopata pevetsinexa. ³ Nexata pacuenia Dioso bitso ayaijamatabëcuenenë, pexaniajamatabëcuenenëna, bajara pijinia Dioso pexënato ata jamatabëcueneitsi. Dioso pexënato caëjëpatsi daxitacuene pexanaenexa pijumesaëta. Nexata pijumeta itsa itoroba mapanacuaje penaexanaenexa, daxitacuene yajava naexana. Bajaraponë pexanaecujinae mapanacuaje, bajaraponë pejamatabëcueneta abaxë tsiteca xanepana mapamatacabijavaberena ataje. Bajaraponë nacasivatëpa cruzata vajanacavecuaxuabinexa pibisiacuene vajaexanaeiconimi. Bajaraxuacujinae pona jane baja athëbëabetsia pecaenexa paxa Dioso pemuxuneneta, pecujanenia, penajuaevetsinexabeje daxitacuene.

Pacuenia Dioso pexënato bitso ayaijamatabëcuenenë ángelevi matatoxenetsia yabara pelivaisi

⁴ Dioso pexënato bitso ayaijamatabëcuenenë ángelevi matatoxenetsia. Bajarapajamatabëcuene yapëtanetsi. Tsipaji Dioso pexënato tocopata daxitacuene pevetsinexa. Dioso saya ángelevi tocopata beveliajamatabëcuenejava pevetsinexa. ⁵ Dioso baja cajana jumaitsi pexënatojavabelia mapacueniaje: Xamë raja taxënatomë. Xanë raja axanë, jai Dioso.

Dioso icatsia jumaitsi pexënato yabara mapacueniaje:
Xanë raja bajaraponë paxanë. Xanë raja bajaraponë taxënato,
jai Dioso pexënato yabara.

Bajarapacuenia Dioso apo jumaitsi ángelevi yabara. Biji rajane Dioso pexënato yabara jumaitsi. Bajaraxuata nayapëtane Dioso pexënato bitso ayaijamatabëcuenenëcuene ángelevi matatoxenetsia. ⁶ Pacujinae Dioso itorobijitsiatsica pepo caenë pexënato mapanacuata penaexanaenexa, Dioso jumaitsi pexënato yabara mapacueniaje:

Daxita tajajivi, ángelevi, pematabacabëta tonubenaena ayaijamatabëcuene perajutsinexa bajaraponëjavabelia,
jai Dioso pexënato yabara.

⁷ Dioso icatsia jumaitsi ángelevi yabara mapacueniaje:

Tajajivi, ángelevi, tanelivaisipaebinexa, bepíjia pona pacuenia jovibo. Bajarapamonae beisotocotiata verebiabiana daxita pamonaе naneconita xanëjavaberena, jai Dioso ángelevi yabara.

⁸ Itsiata baitsi jane icatsia Dioso pexënatonavabelia jumaitsi mapacueniaje: Diosomë, daxita xua evetame, daxitamatacabijavabelianexa evetsianame. Xua xamë evetame, xaniavaetsia evetabiabianame. ⁹ Xamë jitsipame jivi pexaniacuene pexanaejava. Apo jitsipaemë pibisiacuene pexanaejava. Bajaraxuata xanë, nijaDiosonë, cajamatabëcuenebarëyayaexanatsi. Cajamatabëcuenebarëyayaexanatsi daxita itsamonae matatoxenetsia, jai Dioso pexënatonavabelia.

¹⁰ Icatsia Dioso pexënatonavabelia jumaitsi mapacueniaje: Xamë petuxanenëmë. Itsa abaxë daxitacuene ajibi, xamë exaname mapanacuaeje. Nesaëta exaname daxita itaboxopijicuene yajava. Xua jivi apo tae, bajaraxua ata exaname. ¹¹ Daxita bajaraxua, nexanaejava, vereverecaena. Itsiata baitsi jane xamë apo vereverecaemë tsane daxitamatacabijavabelianexa. Daxita xamë nexanaejava, perujujava naexanaena. Pacuenia jivi penaxatatsijava, perujujava banaexana, bajara pijinia itsi tsane nexanaejava. ¹² Pacuenia jivi baquiona penaxatatsijava, bajarapacuenia itsamatacabi xamë quionaename itaboxo, ira yajava, pejananacua icatsia nexanaexa. Itsiata baitsi jane xamë tsitecaename. Apo vereverecaemë tsane,

jai Dioso pexënatonavabelia.

¹³ Dioso baja cajena caeto ata ángeleviyajuvënënëjavabelia apo jumaitsi mapacueniaje: Ecare abaxë tacujanenia daxitacuene vajanajuavevtsinexabeje. Nijavajabitsaë abaxë copiaya vecatsivajënae jumecovënëtsiaexanaenatsi nitobricuenianexa,

apo jai Dioso ángeleviyajuvënënëjavabelia.

Biji rajane Dioso pexënatonavabelia bajarapacuenia jumaitsi. ¹⁴ Daxita ángelevi apo taetsi vajaitaxutota. Bajarapamonae saya Dioso tonacuenebabiaba pacuenia Dioso itorobatsi. Nexata ángelevi yavenona pamonaе jumecovënëta Dioso pecapanepaejavanexatsi.

2

Pacuenia apo benamuxujematsitsi pexaniajailivaisi Dioso vajanacapanepaenexa yabara pelivaisi

¹ Dioso pexënato bitso ayijamatabëcuenenë ángelevi matatoxenetsia. Bajaraxuata vajanacatsipaebilivaisi xaniavaetsia benamuxunaevetatsi. Bitso baja cajena pexaniajailivaisi nacatsipaeba. Nexata vajavajënaeyabelia asaëyata bejumecovënëtsi bajarapapexaniajailivaisi vajajumecovënëtsijava, itsamatacabijavabelia ata vajacopatsiyaniva. ² Bajayata palivaisi Dioso najumecopata Moiséspijinëta, Dioso najumeitoroba ángelevita. Nexata juya ángelevi bajarapalivaisi tsipaeba Moiséspijinëjavabelia. Xaniajai baja cajena bajarapalivaisi. Pamonaе apo jumecovënëtsi bajarapalivaisi, paneconivajëto xaina, bajarapaneconivajëtota Dioso naneconitsiaexanatsi.

³ Itsa namuxujematatsi papinijicueneta Dioso nacacapanepaejitsia, ¿detsa pacuenia nacacaejëpaejitsipa vajacuata vajanacapanepaenexa? Ajibi. Vajatuxanenë Jesucristo baja cajena copiaya tsipaeba itsamonaejavabelia pacuenia capanepaejitsia daxitajivi. Nexata bajarapamonae yapëtane bajarapalivaisi pexaniajailivaisicuene. Nexata juya bajarapamonae

vaxaitsijavaberena nacatsipaeba bajarapalivaisi. ⁴ Nexata nayapētane bajarapamonae vajanacatsipaebilivaisi pexaniajailivaisicuene. Tsipaji Jesucristo petsipaebilivaisitsi, jivi itsa tsipaebavanapa, Dioso pesaēta pinijicuene pexanaejavanē tsitaexanapona. Bajarapamonae pivitanēvi ata jamatejemayaexanapona. Petēpaevi ata icatsia asaēyaexanapona. Espiritu Santo ata jamatabēcuene caējēpaeyaexanaponatsi, caejivi canacujitsia, bajarapamonae pexanaenexa pacuenia Dioso tojtispatsi.

Pacuenia baja Jesucristo naexana bejivitonēcuenia yabara pelivaisi

⁵ Papejananacua yabara pacatsipaebatsi, Dioso baja itsa exanaena bajarapanacua, Dioso apo tocopatsi tsane ángelevi pevetsinexa. Biji rajane jivi tocopatsianatsi pevetsinexa bajarapanacua. ⁶ Tsipaji Dioso pejumelivaisibaxutota, tajēvelia jumaitsi pacuenia jivi ayaijamatabēcuenevi Dioso exanaejitsiatsi ángelevi matatoxenetsia. Bajaraxua yabara Dioso pejumelivaisibaxutota jumaitsi mapacueniaje:

Diosomē, jivi matatoxenetsia bitso ayaijamatabēcuenenē atamē, ¿detsa xuajitsia itsiata jivi sivanajamatabēxainame nevetsinexa? ⁷ Jivi itsa exaname, ángelevivecua jivi beveliajamatabēcuenevi exaname. Bajarapacuenia picani exaname. Itsiata baitsi jane aeconoxae jivi pecajumecovēnētsixae, ayaijamatabēcuenevi baja exaname ángelevi matatoxenetsia. ⁸ Nexata itsamatacabi tocopatsianame jivi pevetsinexa daxitacuene nexanaejava,

jai Dioso pejumelivaisibaxutota Dioso pejumecovēnētsivi yabara.

Bajarapacuenia Dioso itsa tocopatsiana daxitacuene Dioso pexanaejava jivi pevetsinexa, itsacuenejavayo ata Dioso apo vecuacopatsi tsane jivi pevetsiaexanaejava. Itsiata baitsi jane abaxē apo taetsi vajaitaxutota jivi pevetsijava daxita bajaraxua. ⁹ Pamatacabi Jesús bejivitonēcuenia naexana mapanacuataje, bajaraponē ata ángelevivecua beveliajamatabēcuenenē picani naexana. Dioso pitaxutotsoniataexae daxita mapanacuapijivije, Dioso pexēnato itorobica penaexanaenexa mapanacuata, pesivatēpaenexa daxitajivi pijaneconi yabara. Jesús baja daxitajivi pesivatēpaexae, aeconoxae baja Dioso tocopatatsi Jesús athēbētatsia peecaenexa paxa Dioso pemuxuneneta.

¹⁰ Dioso baja cajena daxitacuene natoexana bajaraponēnexa. Dioso daxitacuene pexanaecujinae, Dioso abaxē pejamatabēcueneta daxitacuene tsiteca xanepana mapamatacabijavaberena ataje. Daxita pamonaē jumecovēnētatsi, pexicuenia petaevi, Dioso jitsipa pebarēvevetsinexa daxitacuene Dioso pexanaejava. Bajaraxuata Dioso tocopata Jesucristo cruzata ayaicuenia bepejiobiaexanaenexatsi. Nexata Jesucristo capanepaena daxita pamonaē najamatabēcuenecopata Jesucristojavabelia, peyajavaponaponaeenexa Dioso pijapenivenivenacuatsia. ¹¹ Jesucristo baja cajena jivi tsata Dioso pijajivinexa. Nexata pamonaē Jesucristo tsata Dioso pijajivinexa, bajarapamonae, Jesús yajava, benacaexapijivi baja tanetsi Dioso. Bajaraxuata Jesús, Dioso pexēnato, pijajivi yabara itsa cuaicuaijai, apo ajumeura: “Tajuyapijivi,” pejaijava. ¹² Jesús pijajivi yabara pejumaitsijavanexa, Dioso pejumelivaisibaxutota tajēvelia jumaitsi mapacueniaje:

Taxa Diosomē, tajuyapijivijavabelia cavajunupaebianatsi. Nexata daxita bajarapamonae tabarēnacaetuatsijavata, xamēnexa catonaxēanaenatsi, tanaxēanaejavata ayaijamatabēcuene tacarajutsinexa,

jai Dioso pejumelivaisibaxutota Jesús paxa Diosojavabelia pejumaitsijavanexa.

¹³ Jesús icatsia pijajivi yabara pejumaitsijavanexa, Dioso pejumelivaisibaxutota tajēvelia jumaitsi mapacueniaje:

Xanë ata najamatabëcuenecopatsianajë taxa Diosojavabelia taneyavenon-aenexa pacuenia najamatabëcuenecopaba tajuyapijivi, jai Dioso pejumelivaisibaxutota.

Jesús icatsia pijajivi yabara pejumaitsijavanexa, Dioso pejumelivaisibaxutota tajëvelia jumaitsi mapacueniaje:

Yajavaponaponajë baja mapamonaeje, Dioso pexi tanetocopatsivi tato-evetsinexa,

jai Dioso pejumelivaisibaxutota.

¹⁴ Vaxaitsi, Dioso pexitsi, mapanacuata jinavanapatsi. Bajaraxuata Jesús ata naexana mapanacuataje, pacuenia vaxaitsi banaexanatsi, peponaponanexa mapanacuataje. Nexata Jesús penaexanaexae mapanacuataje pacuenia vaxaitsi banaexanatsi, caëjëpatsi pebeyaxuabinexatsi vajanacasivatëpaenexa. Jesús baja itsa nacasivatëpa, jamatabëcuenematatoxeneta dovathi. Nexata baja copiaruca dovathi vajanacaitorobabiabijava. Nexata jivi tēpae ata tsane, itsiata icatsia asaë tsane petëpaecujinae. ¹⁵ Bajarapacuenia Jesús vajanacasivatëpaexae, nacavecuajibiaexana baja vajacujunavabiabijavami, vajatëpaejava. Vajatëpaejava picani cujunavabiabatsi daxita vajajinavanapaematacabianë. ¹⁶ Jesús baja cajena patsica mapanacuayabet-sicaje, jivi peyavenonaenexa, pamonae Abrahampijinë pepo pemomoxi, baitsi Dioso pejumecovënëtsivi. Jesús apo patsi peyavenonaenexa ángelevi. ¹⁷ Bajaraxuata Jesús naexana mapanacuataje pacuenia vaxaitsi banaexanatsi, jivi petocuaicuajainexa Diosojavabelia. Jesús nacaitaxutotsoni-atane. Nacatoexana pexaniacuene. Jesús nacatoexana pacuenia Dioso itorobatsi vajanacatoexanaenexa. Jesús pijacuata nacopata pebeyaxuabinexatsi, bajaraponë pejamatabëcueneta Dioso vajanacavecuajibiaexanaenexa pibisiacuene vajaexanaeconimi. ¹⁸ Nexata Jesús jamatabëcuenecaëjëpatsi peyavenonaenexa pijajivi, dovathi pejamatabëcuenëjëtsivitsi. Tspipaji baja copiaya Jesús ata jamatabëcuenëjëtsi dovathi. Bejiobiaexanatsinua.

3

Pacuenia bitso Jesús ayaijamatabëcuenenë Moisésipjinë matatoxenetsia yabara pelivaisi

¹ Tajamonae, Dioso papijajivimë, Dioso pacajunata papijajivinexamë. Nexata xaniavaetsia pacanaëjëre Jesucristo yabara. Bajaraponë Dioso nacatoitorobica vajanacatsipaebinxaxa Dioso pejumelivaisi, vajanacatocuaicuajainexanua vajatuxanenë Diosojavabelia. ² Bajayatami Moisésipjinë daxita Dioso pijajivi toevetabiaba Dioso pitorobicueniatsi. Bajara pijinia pacuenia Jesús ata mapanacuataje jumecovënëta Dioso pitorobicueniatsi. ³ Nexata Jesús jivi pecapanepaenëxae, ayaijamatabëcuenenë Moisésipjinë matatoxenetsia. Pacuenia bo pexainanë, ayaijamatabëcuene xaina pijajivitonë matatoxenetsia, bajara pijinia pacuenia Jesús ayaijamatabëcuenenë Moisésipjinë matatoxenetsia. ⁴ Cao bo canacujitsia tanetsi jivi pexanajebixae bajarapabonë. Itsiata baitsi jane mapanacuata Dioso pexanajevanëta, jivi exanejeba bonë. ⁵ Bajayata Moisésipjinë Dioso itorobatsi daxita Dioso pijajivi petoevetsinexa xaniavaetia. Nexata Moisésipjinë Dioso pijajivi itsa toevetaponapona, tajëvelia itorobatsi petsipaebinxaxa jivijavabelia pacuenia itsamatacabijavabelia Dioso jumaitsijitsia pijajivijavabelia. ⁶ Cristo Dioso pexënattoxae, xaniavaetsia toeveta paxa Dioso pijajivi. Vaxaitsi baja Dioso vajajumecovënëtsivi, Dioso nacatane pijajivitsi. Tspipaji baja nacayajavaponapona Jesucristo. Bajarapacuenia vajavajënaeyabelia Dioso nacataeponaena

xaniavaetsia Jesucristo itsa jumecovënētavanapaenatsi vajatēpaejavabelianexa. Jamatabēcuenebarēyaya jinavanapatsi. Tsipaji yapētanetsi Dioso pexania-jaicuene vajanacacapanepaenexa.

Pacuenia Dioso jumecovënētsivi tocopatatsi pejonenexa Dioso pijanacuayabetsia yabara pelivaisi

⁷⁻⁸ Jesucristo baja cajena ayaijamatabēcuenenē Moiséspijinē matatoxenetsia. Angelevi ata matatoxenetsia ayaijamatabēcuenenē. Bajaraxuata Espiritu Santo Dioso pejumelivaisibaxutota jumaitsi mapacueniaje:

Ajena, mapamatacabitaje, itsa pajumetaneme pacuenia Dioso jumaitsi, pētsa pajamatabēcuenetajamē panejumecovënētsinexa. Pacuenia bajayata panijasalinaivimi ajamatabēcuenetaja baja, pētsa paitsimē. Bajarapamonaemi pamatacabi petusato nacuata jinavanapa, apo jitsipae pexanaenexa pacuenia Dioso itorobatsi. Bajarapacuenia bajayajebi Dioso apo jumecovënētsi ata, bajarapamonaemi itsi-ata abaxē Dioso apo verebiabitsi. ⁹ Bajarajota petusato nacuata panijasalinaivimi jamatabēitonotabiaba Dioso. Apo jumecovënētsi pacuenia Dioso itorobatsi pejinavanapaenexa. Cuarenta picani pavaijeje Dioso ayaicuene pexanaejavanē, tsitaexanapona bajarapamonaē peyavenonaenexa. Bajaraxua panijasalinaivimi taeyabiabi ata, itsiata Dioso apo jumecovënētsi. ¹⁰ Bajaraxuata Dioso baraanaepana panijasalinaivimijavabelia. Nexata panijasalinaivimi yabara Dioso najumecapanepaeya jumaitsi: “Najamatabēxainabiaba saya ēpibisiacuene yabara. Apo jitsipae pejinavanapaenexa pacuenia picani tojitsipajē,” jai Dioso. ¹¹ Bajaraxuata Dioso bitso baraanaepana panijasalinaivimijavabelia. Nexata Dioso najumecapanepaeya jumaitsi: “Bajarapamonaē apo jone tsane xanējavaberena. Nexata apo jinavanapae tsane itsajota picani toxaniavaetajē pejinavanapaenexa,” jai Dioso,

jai Espiritu Santo panijasalinaivimi yabara Dioso pejumelivaisibaxutota.

¹² Tajamonae, dovathivecua panajamatabēcuenevetavanapare, paxamēyajuvēnjivi ata, pacuenia panijasalinaivi najamatabēxaina pibisiacuene pexanaenexa, penajamatabēxainaeayaniva. Tsipaji Dioso itsa apo pajumecovënētsimē tsipae, nexata pacopabijitsipame panejumecovënētsijavami Dioso, daxitamatacabijavabelianexa piasaētsaponaponaenē. ¹³ Nexata namataenetsia panajamatabēcuene yavenonare daxitamatacabi canacujitsia panecasaētsavanapaenexa Dioso panejumecovënētsijava. Bajarapacuenia panajamatabēcuene yavenonare itsajivi ata paxamēyajuvēnjivi dovathi peyamaxēitojorobiyaniavatsi pibisiacuene pexanaeyaniva. Panajamatabēcuene yavenonare itsajivi ata paxamēyajuvēnjivi pecopabiyaniava Dioso pejumecovënētsijava. ¹⁴ Vajataxuxuabijavaveliacujinae Dioso vajajumecovënētsijava, tsiteca abaxē Dioso jumecovënētavanapatsi vajatēpaejavabelianexa. Nexata daxita xua Cristo Dioso rajutsianatsi, bajaraxua vaxaitsi ata Dioso nacarajutsiana.

¹⁵ Bajaraxuata papecamuxujobinexa, Dioso pejumelivaisibaxutota jumaitsi mapacueniaje:

Ajena, mapamatacabije, itsa pajumetaneme Dioso papecajumaitsiyava, pētsa pajamatabēcuenetajamē. Pacuenia panijasalinaivimi petusato nacuata ajamatabēcuenetaja, pētsa paxamē bajarapacuenia paitsimē, jai Dioso pejumelivaisibaxutota.

¹⁶ ¿Detsa pamonaē bajayata bajarapacuenia jumetae ata Dioso pejumaitsi-javatsi, itsiata apo jumecovënētsi? Baitsi pamonaemi bajayata Moiséspijinē

matacapona Egipto nacuaverena. ¹⁷ ¿Detsa jane pamonaemijavabelia Dioso baraanaepana cuarenta pavaibeje? Dioso baraanaepana pamonaemijavabelia pibisiacuene exana petusato nacuata. Nexata daxita bajaramonaemi pijaneconi yatēpa petusato nacuata. ¹⁸ ¿Detsa jane pamonaemijavabelia Dioso najumecapanepaeya jumaiti: “Apo pajonemē tsane xanējavaberena,” jai? Bajarapacuenia Dioso najumecapanepaeya jumaiti apo pejumecovēnētsivitsijavabelia. ¹⁹ Nexata yapētanetsi panijasalinaivimi apo pejonejava Diosojavabelia. Tspaji apo jumecovēnētsi Dioso pitorbicueniatsi.

4

¹ Dioso baja cajena najumecapanepaeya jumaiti vajajonenexa bajaraponē pijanacuayabetsia vajanacueraevetavanapaenexa, itsajotatsia nacatoxaniavaeta vajajinavanapaenexa. Bajaraxuata nexata benajamatabēcuenexaniavaetavanapatsi. Tspaji itsamonae paxamēyajuvēnēvi apo jonecapanepae tsipae Dioso pijanacuayabetsia itsa apo jumecovēnētsi Dioso. ² Vaxaitsi ata rabaja jumetanetsi pexanialivaisi vajanacapanepaelivaisinexa pacuenia bajayata vajasalinaivimi ata jumetane picani. Itsiata baitsi jane vajasalinaivimi apo toxanepanaetsi bajarapalivaisi pecapanepaenexatsi. Tspaji jumetae ata, apo jumecovēnētsi. ³ Nexata vaxaitsi Dioso vajajumecovēnētsivi, nacacaējēpaena vajajonenexa Dioso pijanacuayabetsia, itsajotatsia nacatoxaniavaeta vajajinavanapaenexa. Dioso apo pejumecovēnētsivi apo jone tsane. Tspaji bajarapitsivi yabara Dioso bajayata jumaiti mapacueniaje: Anaepanaenajē apo tanejumecovēnētsivijavabelia. Nexata najumecapanepaeya jumaitsinē baja: “Bajarapamonae apo jone tsane xanējavaberena,” janē, jai Dioso.

Dioso nacua pexanaejavaveliacujinae, toxaniavaetsi atatsi picani panijasalinaivimi pejinavanapaenexa bajaraponējavatatsia, itsiata apo jone. ⁴ Yapētanetsi pacuenia Dioso petoxaniavaetsicujinaetsi, copiaevetatsi picani panijasalinaivimi pejonenexa pejinavanapaenexa bajaraponējavatatsia. Tspaji Dioso pejumelivaisibaxutota jumaiti mapacueniaje: Dioso baja daxita mapanacuaje, daxitacuene yajava, itsa vereta pexanaejava, vemaxēnacueraeveta siete matacabita, jai Dioso pejumelivaisibaxutota.

⁵ Icatsia Dioso pejumelivaisibaxutota jumaiti Dioso apo pejumecovēnētsivi yabara mapacueniaje: Bajarapamonae apo jone tsane xanējavaberena, pejinavanapaenexa xanējavata,” jai Dioso pejumelivaisibaxutota.

⁶ Pamonaē baja picani copiaja jumetane pexanialivaisi pecapanepaelivaisinexatsi, itsiata apo pejumecovēnētsixae, nexata apo jone tsane Dioso pijanacuayabetsia. Itsiata baitsi jane Dioso najumecapanepaeya jumaiti mapacueniaje: “Pamonae tajajivi, jonena xanējavaberena,” jai. Nexata pamonaē jumecovēnēta pona Dioso, jonena Dioso pijanacuayabetsia. ⁷ Bajarapacuenia bajayata itsamonae Dioso apo pejumecovēnētsixae, nexata icatsia Dioso caējēta itsamatacabi itsamonae pejonenexa. Bajarapacuenia Dioso itsa caējēta itsamonae pejonenexa, mapamatacabitaje cajena caējēta itsamonae pejonenexa. Bajayata Davidpijinē Dioso itorobatsi tajēvelia pevajunupaebinexa itsamonae mapamatacabitaje pejonepaejavavanexa Diosojavabelia. Nexata bajayata Davidpijinē tajēvelia itsa vajuropaeba itsamonae mapamatacabije pejonejavavanexa Diosojavabelia, jumaiti mapacueniaje:

Mapamatacabitaje ita pajumetaneme Dioso papecajumaitsijava, pëtsa pajamatabëcuenetajamë panejumecovënëtsinexa Dioso, jai Davidpijinë tajëvelia.

⁸ Bajayata Josuépijinë vajasalinaivimi petusato nacujavaverena matacapona Israel nacujavaberena. Panacua bajarapamonaenexa Dioso toxaniávaetatsi pejonenexa, bajarapanacua daxitamatacabijavabelianexa. Bajarapanacua cajena xaina Dioso pijanacuatatsia. Nexata panacua yabara jumaiti: “Dioso pijajivi pejinavanapaenacuanexa, toxaniávaeta,” ita jai, Israelnacua yabara apo jumaiti. Itsa meta peneta Israelnacua yabara jumai tsipae, nexata mapamatacabitaje Dioso apo caëjëtsi tsipae itsamonae pejonenexa Diosojavabelia. Tsipaji baja vajasalinaivimi bajayata baja pata Israel nacuada. ⁹ Bajaraxuata yapëtanetsi pacuenia abaxë Dioso tocopata mapamatacabitaje itsamonae ata Dioso pejumecovënëtsinexa pejonenexa Dioso pijanacuayabetsia. ¹⁰ Pajivi jonena Dioso pijanacuayabetsia peponaponaenexa Diosojavatatsia, bajarapajivi penacuenebabiabijava vemaxënacueraevetsiana. Pacuenia bajayatami Dioso ata nacua baja pexanaejava ita vereta, vemaxënacueraeveta, bajarapacuenia vemaxënacueraevetsiana. ¹¹ Daxita vaxaitsi vajajitsipaejamatabëcueneta, bejitsipatsi Dioso pijanacuayabetsia vajajonenexa, bajaraponëjavatatsia vajajivanaponaenexa. Bajayata pamonaemi Dioso apo jumecovënëtsi, nexata apo jone Dioso pijanacuayabetsia. Nexata vaxaitsi bajarapamonaemi apo becuenjëpaetsi.

¹² Dioso cajena pejumelivaisi bitso asaë. Nexata Dioso pejumelivaisi caëjëpatsi ayaiçuene pexanaenexa pijumesaëta. Dioso pejumelivaisi bitso pexiujailivaisi anijabarëneniabeje espada matatoxenetsia. Nexata bajarapalivaisi ita yapëtanetsi, nacayapëtaeyaxana pacuenia pepacuene jamatabëcueneitsitsi. ¹³ Vaxaitsi Dioso vajanacaexanaevi, apo nacacaëjëpae Dioso vajaveçuanamatayabinexa. Bajaraponë tane daxita xua exanatsi. Nexata itsamatacabi bajaraponëjavabelia navajunupaebianatsi daxita xua exanatsi.

Pacuenia Jesús ayajamatabëcuenenë, jivi petocuaicuaijainë Diosojavabelia, yabara pelivaisi

¹⁴ Jesús cajena Dioso pexënato, ayajamatabëcuenenë. Pepo sacerdotenë vajanacatocuaicuaijainë Diosojavabelia. Jesús baja pona Diosojavabetsia vajanacayavenonaenexa. Bajaraxuata nexata vaxaitsi becaasaë tsavana paetsi Dioso vajajumecovënëtsijava mapanacuataje. ¹⁵ Jesús, Diosojavabelia vajanacatocuaicuaijainë, nacajamatabëcueneyapëtanë pacuenia vaxaitsi jamatabëcueneitsitsi. Nexata dovathi ita nacajamatabëcuenejëta pibisiacuene vajaexanaenexa, Jesús nacajamatabëcueneyapëtanë. Bajarapacuenia nacajamatabëcueneyapëtanë tsipaji Jesús ata abaxë ita ponapona mapanacuataje, jamatabëcuenejëtatsi dovathi. Itsiata baitsi jane Jesús caeto ata pibisiacuene apo exanae. ¹⁶ Bajaraxuata ajumejunavijibia vajacuata benavajëtatsi Diosojavabelia. Dioso nacaitaxutotsoniatane vajanacaasivaxae. Nexata nacayavenonaena paepatota vaxaitsi namatavenonatsi vajanacayavenonaenexa.

5

¹ Sacerdoteviyajuvënënë, caenë, itapetatsi sacerdotevi penamatacaitorobinënexa, daxitajivi petocuaicuaijaitisabiabinexa Diosojavabelia. Nexata jivi Diosojavabelia ofrendacuenia perajutsijavanexa, capatabiaba sacerdotenëjavaberena. Nexata juya sacerdotenë rajutabiaba Diosojavabelia

bajarpaofrenda. Dajubinē, pijana ata yajava, bajarapacuenia rajutabiaba Diosojavabelia, daxitajivi pibisiacuene pexanaeneconi Dioso pevecuaajibiaexanaenexatsi. ² Sacerdotenē caējēpatsi dovathi pejamatabēcuenējētšinexatsi pibisiacuene pexanaenexa. Tsipaji bajaraponē ata saya jivitonē. Nexata sacerdotenē jamatabējumaitsi jivi yabara: “Jamatabēcueneyapētanjivi pamonaē abaxē apo yapētae Dioso pejumelivaisi. Nexata pibisiacuene exana. Jamatabēcueneyapētanjiniua pamonaē dovathi jamatabēcuenējētatsi pibisiacuene pexanaenexa,” jamatabējai sacerdotenē. Bajaxuata jivi pibisiacuene itsa exana, sacerdotenē itaxutotsонатane jivi. ³ Sacerdotenē ata apo ajamatabēcuenesaē. Sacerdotenē dajubinē, pijana yajava, Diosojavabelia ofrendacuenia rajutabiaba jivi pibisiacuene pexanaeneconi Dioso pevecuaajibiaexanaenexatsi. Bajarapacuenia itsa rajutabiaba, bajaraponē ata pibisiacuene pexanaeneconi Dioso pevecuaajibiaexanaenexatsi, yajavarajutabiaba.

⁴ Itsanē ata pijacuata pepo sacerdotenē apo naexanae daxitajivi petocuaicuajainexa Diosojavabelia daxitajivi peyaiyataenexatsi. Biji rajane sacerdoteviyajuvēnēnē, caenē, Dioso itapetatsi pepo sacerdotevi penamatacaitorobinē pexanaenexatsi, pacuenia bajayata Aarónpijinē ata Dioso itapetatsi pepo sacerdotenē pexanaenexatsi. Nexata bajayata Aarónpijinē ata daxitajivi yayiatanetsi. ⁵ Bajara icatsia itsi Cristo ata. Pijacuata apo naexanae pepo sacerdotenē, vajanacatocuaicuajainexa Diosojavabelia. Biji rajanē Dioso itapetatsi Cristo pepo sacerdotenēnaxa daxitajivi peyaiyataenexatsi. Cristojavabelia copiaya Dioso jumaitsi mapacueniaje:

Xamē raja taxēnatomē. Xanē raja axanē,
jai Dioso.

⁶ Icatsia itsabaxutota, Dioso pejumelivaisibaxutota, jumaitsi pacuenia Dioso itapeta pexēnato pepo sacerdotenēnaxa. Jumaitsi mapacueniaje: Xamē raja pepo sacerdotenēmē tsane daxitamatacabijavabelianexa. Jivi netocuaicuajainē tsane xanējavarberena. Pacuenia bajayatami itsi Melquisedec, bajara xamē ata itsimē tsane,
jai Dioso pexēnatojavabelia.

⁷ Jesucristo abaxē itsa ponapona mapanacuataje, pinijijumeta yaitaxu-tonueya vajēta Diosojavabelia. Bajarapacuenia vajēta Diosojavabelia pecapanepaenexatsi petēpaejavavecua. Nexata Jesucristo xaniavaetsia Dioso jumetanetsi. Tsipaji Jesucristo jamatabējumaitsi Dioso yabara: “Jitsipajē taneexanaenexa pacuenia taxa netojitsipa,” jamatabējai. ⁸ Jesucristo, Dioso pexēnato, ayaijamatabēcuenēnē ata, itsiata paxa jumecovēnēta. Nexata pijacuata nacopata pebejiobiaexanaenexatsi pacuenia Dioso tojitsipatsi.

⁹ Nexata Jesucristo paxa itsa jumecovēnēta, nacopata pebeyaxuabinexatsi jivi pesivatēpaenexa. Nexata daxita pamonaē jumecovēnētavanapa pacuenia Jesucristo itorobatsi, Dioso rajutsianatsi matababi apo peverevereaejava.

¹⁰ Dioso baja cajena itapetatsi Jesús pepo sacerdotenēnaxa, jivi petocuaicuajainexa Diosojavabelia, pacuenia bajayata itsi Melquisedecpijinē.

Pacuenia Dioso pejumecovēnētsivi muxujibatsi pecopabianiva Dioso pejumecovēnētsijava yabara pelivaisi

¹¹ Xainajē picani ayailivaisi patacatsipaebinxaxa paneyapētaenexa pacuenia Cristo pepo sacerdotenē vajanacatocuaicuajainexa Diosojavabelia. Itsiata baitsi jāne ayapēbeje patacajumeyapētaeayaxanaenexa bajarapalivaisi. Pacuenia pejevaxi beaxayo bayapētaepona vajacujarubijava, bajara pajamatabēcuenētsimē. ¹² Bajayajebi baja picani Jesucristo pajumecovēnētame.

Juya baja picani bepatsipaebaponame itsamonaejavabelia. Itsiata baitsi jane abaxê panamatavenoname icatsia papecatsipaebinexa bajarapalivaisi. Palivaisi picani yapêxanepana, Dioso pejumelivaisi, itsiata apo pajumeyapêtaemê. Nexata abaxê panamatavenoname icatsia papecatsipaebinexa bajarapalivaisi. Pacuenia pejevaxinacuetoxi êmitobarêmene apa, apo xae abaxê pexaejava, bajara pajamatabêcueneitsimê. Tsipaji palivaisi ayapêbejavajêto, apo pacacaêjêpae orijibia panejumeyapêtaenexa. ¹³ Pamona abaxê namatavenona petsipaebinexatsi peyapêxanepanalivaisixi, Dioso pejumelivaisi, bajarapamona pejamatabêcuene abaxê mito bepiapanacuetoxi. Bajarapamona abaxê apo yapêtae pexanaenexa pacuenia Dioso tojitsipatsi. ¹⁴ Pacuenia penaveretsivi pijacuata xane pexaejava, bajara jamatabêcueneitsi pamona pejamatabêcuenevitsabivi Diosojavabelia. Nexata pacuenia Dioso itorobatsi, jumecovênêta. Najamatabêxainabiaba pexanaenexa êpexaniacuene. Apo jitsipae pibisiacuene pexanaejava.

6

¹ Vaxaitsi Dioso vajajumecovênêtsijavaveliacujinae, vajavajênaeyabelia jumecovênêtaponatsi vajajamatabêcuenevitsabaponaenexa Diosojavabelia, pacuenia jamatabêcuenevitsabapona bitso Dioso pejumecovênêtsivi. Bajaraxua baja vaxaitsi yapêtanetsi. Nexata baja apo namatavenonaetsi icatsia vajanacatsipaebinexa Cristo pelivaisi, pacuenia copiaya nacatsipaeba pamâtacabi ajena najamatabêcuenecopatatsi Diosojavabelia. Vaxaitsi baja copabatsi pibisiacuene vajeaxanabiabijava. Najamatabêcuenepênêyorotatsi baja Diosojavabelia. Bajaraxuata apo namatavenonaetsi baja icatsia itsajivi ata vajanacatsipaebaponaenexa bajaraxua vajayapêtaenexa. ² Apo namatavenonaetsinua baja icatsia vajanacatsipaebaponaenexa vajayapêtaenexa pajamatabêcuenelivaisi xaina vajanacabautisabijava. Apo namatavenonaetsi baja icatsia vajanacatsipaebaponaenexa vajayapêtaenexa pajamatabêcuene yabara pijinia tsimatanacobebeuata ancianovi Dioso pejumecovênêtsivijavabelia. Pacuenia ata icatsia Dioso asaêyaexanaejitsia petêpaevimi, vajayapêtaexae baja, apo namatavenonaetsi icatsia vajanacatsipaebaponaenexa. Pacuenia ata daxita pamona naneconita Diosojavabelia, naneconitsiajinavanapaejitsia daxitamatacabijavabelianexa, vajayapêtaexae baja, apo namatavenonaetsi vajanacatsipaebaponaenexa. ³ Dioso itsa nacatocopataponaena, vajavajênaeyabelia jamatabêcuenevitsabaponaenatsi pacuenia Dioso nacatojitsipa.

⁴ Itsamona baja picani yapêtane pexaniajailivaisi. Jumecovênêtanua baja picani Jesucristo pelivaisi Dioso pecapanepaenexatsi. Espiritu Santo ata baja picani tsijamatabêcatsi. ⁵ Yapêtanenua baja picani pacuenia Dioso pejumelivaisi bitso xanepana. Yapêtanenua baja picani pacuenia taejitsia Dioso pinijicuene pexanaejava pamâtacabi pejananacua Dioso exanaena. ⁶ Itsiata baitsi jane bajarapamona itsa copaba baja Jesucristo pelivaisi pejumecovênêtsijavami, nexata baja acuenebi icatsia penajamatabêcuenepênêyorotsijava pibisiacuene Diosojavabelia. Pecopabixae Jesucristo pelivaisi pejumecovênêtsijava, naexana quenetsiataeya bepecapocaponaevi Jesucristo pelivaisi. Bajaraxuata bajarapamona jamatabêcuenejêpa pamonaemi bajayata Jesucristo beyaxuabatsi cruzata. Tsipaji pamonaemi Jesucristo beyaxuabatsi, quenetsiataeya capocaponatsi daxitajivi pitabarata. ⁷ Ema itsa runa mapairataje, Dioso pejamatabêcueneta pecopatsixae, runa bajarapaema. Nexata Dioso pejamatabêcueneta perunaexae, bajarapaema banacale

naxaniabiaexana mapairataje. Nexata capitsapa pexaniabanacale. ⁸ Itsiata baitsi jane mapanacuataje saya itsa juva piabejejava, apo xanepanae itsacuenejavayonexa ata. Nexata bajaraxua tajuatsi. Bajara pijinia itsi tsane jivi ata. Pamonaē Jesucristo pelivaisi pejumecovēnētsicujinae, copabiana bajarapalivaisi pejumecovēnētsijavami, nexata tajuenatsi infiernojavabelia.

Pajamatabēcuene yabara Dioso pejumecovēnētsivi casaē tsavanapae Dioso pejumecovēnētsijava yabara pelivaisi

⁹ Tajamonae bitso patacaasivavi, pacuenia itsamonae jumecovēnētsi ata Dioso pecapanepaejavanexatsi, itsiata copaba, bajara paxamē apo paitsimē tsane. Dioso panejumecovēnētsijava apo pacopabimē tsane. Yapētaniji baja cajena paxamē xaniavaetsia panejinavanapaejavanexa. Dioso baja nexata panejumecovēnētsixae, Dioso pacapanepaena. ¹⁰ Dioso ēpexaniacuene exana. Apo nacofēnētsinua xua baja paexaname paneyavenonaenexa itsamonae Dioso pejumecovēnētsivi. Tsiteca abaxē payavenonaponame bajarapamonae. Bajarapacuenia itsa payavenonaponame itsamonae, pat-sitanacueneitajētaPONAME Cristo bitso panejitsipaejava. ¹¹ Pacatojitsipatsi, pacaējivimē canacujitsia, itsamonae panetsitanacueneitajētaPONAE nA-MATAENETSI bitso panenasivajava panetēpaejavabelianexa. Nexata bajarapacuenia itsa paexaname, pacapanepaena Diosojavabetsia. ¹² Apo pacatojitsipaetsi paneayabarafaetabijava Dioso panejumecovēnētsijava. Biji rajane pacatojitsipatsi paneajamatabēcuenesaēnexa, pacuenia itsamonae ajamatabēcuenesaē bajayajebi penajamatabēcuenecopatsijava Diosojavabelia. Bajarapamonae rajutsianatsi xua Dioso najumecapanepaeya jumaitsitsi perajutsinexatsi.

¹³ Bajayata Dioso pexaniajajumeta tajēvelia najumecapanepaeya jumaitsi pacuenia Dioso toexanaejitsia Abrahampijinējavabelia. Dioso navēnēcacuaicuajaiya jumaitsi mapacueniaje: “Xanē Diosonēxaenē, najumecapanepaeya cajumaitsitsi pepacuene tacatoexanaenexa pacuenia najumecapanepaeya cajumaitsitsi,” jai Dioso Abrahampijinējavabelia. Bajarapacuenia Dioso najumecapanepaeya jumaitsi Abrahampijinējavabelia pepacuene petoexanaenexa pacuenia najumecapanepaeya jumaitsi. Jivi namataenetsia penajumexaniataenexa Dioso pevēnē bacacuaicuajai. “Xaniajanē. Pepacuene Dioso pitabarata cajumaitsitsi,” banajai. Itsiata baitsi jane ponē pevēnē Dioso cacuaicuajaijitsia, ajibi. Tsipaji baja pematatsēnēa Dioso matatoxenetsia ayaijamatabēcuenenē ajibi. Bajaraxuata Dioso pexaniajajumeta navēnēcacuaicuajaiya jumaitsi pacuenia toexanaejitsia Abrahampijinējavabelia. ¹⁴ Nexata Dioso jumaitsi Abrahampijinējavabelia mapacueniaje: “Pepacuene xanē cayavenonabianatsi. Xainaenamenua ayabitsaēto nemomoxi,” jai Dioso pexaniajajumeta.

¹⁵ Nexata Abrahampijinē Dioso jamatabēcueneevetsiaponapona bajayajebi. Nexata jane baja belia Abrahampijinē Dioso rajutatsi pacuenia najumecapanepaeya jumaitsitsi. ¹⁶ Itsamonae Dioso pevēnē bacacuaicuajai pejumexaniataenexatsi xua toexanaejitsia itsajivijavabelia. “Paxaniajanē. Pepacuene Dioso pitabarata pacajumaitsitsi,” bajai. Nexata bajarapacuenia itsa jumaitsi, acuenebi itsajivi ata pejumatsijava bajarapamonaejavabelia: “Apo pacajumexaniataetsi,” pejaijava. Tsipaji Dioso pevēnē cacuaicuajai pexaniajajumeta. ¹⁷ Dioso baja cajena pexaniajajumeta najumecapanepaeya jumaitsi jivi peyavenonaenexa. Dioso najamatabēcueneitajēta jivijavabelia xaniajai peyavenonaenexa jivi pejumeaebiyaniivatsi, “Jemajai raja. Dioso epatua itsajamatabēcuene xainaena,” pejaiyanivatsi. Bajaraxuata nexata Dioso tajēvelia

navënëcacaucuaiaijaya jumaitsi Abrahampijinējavabelia mapacueniaje: “Xanē Diosonēxaenē, najumecapanepaeya cajumaitsitsi pepacuene tacatoexanaenexa pacuenia najumecapanepaeya cajumaitsitsi,” jai Dioso Abrahampijinējavabelia. ¹⁸ Bajarapacuenia Dioso najumecapanepaeya pejumaitsicujinae, acuenebi epatua itsajamatabēcuene pexainaejava. Tspaji baja Dioso acuenebi penajumetsēnētsijava. Nexata vaxaitsi Dioso vajanacacapanepaejavanexa vajajumecovēnētsivi, bejamatabējematsi. Apo bejamatabēcuenebējaisi. Tspaji baja yapētanetsi Dioso pexaniajajava vajanacacapanepaenexa, pacuenia baja bajayata tajēvelia najumecapanepaeya jumaitsi. ¹⁹ Cristo vajanacasivatēpaenē, athēbētatsia peecaexae Dioso pemuxuneneta, nexata baja yapētanetsi vajanacacapanepaejavanexa Diosojavabelia. Nexata ajamatabēcuensaētsi tsavanapae Dioso vajajumecovēnētsijava. ²⁰ Jesús athēbēabetsia vajavajēnaeyabetsia pona vajanacatoexanarutsinexatsia namuto. Nexata jane baja Jesús athēbētatsia pepo sacerdotenē Dioso exanatsi, jivi petocuaicuaijainexa Diosojavabelia daxitamatacabijavabelianexa. Nexata Jesús pepo sacerdotenē pacuenia bajayatami itsi Melquisedecpijinē.

7

Pacuenia Jesús pepo sacerdotenē pacuenia bajayatami itsi Melquisedecpijinē yabara pelivaisi

¹ Bajayatami Melquisedecpijinē ponapona. Salemtomara pevetsinēmi. Bajaraponēmi sacerdotenē, jivi petocuaicuaijainexa, athēbētatsia peecaenē, Diosojavabelia. Nexata bajarapamatacabi Abrahampijinē vajabitsaē exana itsanacuanē pevetsivijavabelia. Itsa baja Abrahampijinē verebiaba pijavajabitsaē, naviarena. Nexata penaviatsinērena caxitajarabatsi Melquisedecpijinē. Nexata Melquisedecpijinē jumaitsi Abrahampijinējavabelia: “Catovajētsianatsi Diosojavabelia pecayavenabiabinexa,” jai. ² Abrahampijinē pijavajabitsaē peverebiavivimi pecobcovē penotsijavanē, caponapona. Nexata bajaraxua diez xuabejeyajuvēnējavanē tsaponae, Abrahampijinē caejavayo ofrendacuenia rajutapona Melquisedecpijinējavabelia. “Melquisedec,” itsa jai hebreojumeta, mapajumetaje pejumaitsijume: “Dioso pitabarata aneonijibia xaniavaetsia jivi pevetsinē,” peajijume. “Salemtomara pevetsinē,” itsa jai hebreojumeta, mapajumetaje pejumaitsijume: “Jamatabēcuenexanepanaeya tomara pevetsinē,” peajijume. Nexata Melquisedecpijinē Salemtomara pevetsinēmi. ³ Melquisedecpijinē paxa yabara, pena ata yabara, pamojivimi ata yabara, Dioso pejumelivaisibaxutota apo jumaitsi. Penaexanaejava ata yabara, petēpaejava ata yabara, apo jumaitsi. Nexata pacuenia Dioso pexēnato, Jesucristo, jivi petocuaicuaijainē Diosojavabelia daxitamatacabijavabelianexa, bajara pijinia itsi Melquisedecpijinē. Melquisedecpijinē jivi petocuaicuaijainē Diosojavabelia daxitamatacabijavabelianexa.

⁴ Nexata aeconoxae pacanaējere mapacueneyeje. Melquisedecpijinē bitso ayajamatabēcuenenē vajasalinainēmi Abrahampijinē matatoxenetsia. Bajaraxuata Abrahampijinē ayajamatabēcuenenēmi ata, ofrenda rajuta Melquisedecpijinējavabelia. Pamatacabi Abrahampijinē pijavajabitsaē verebiaba, pecobcovē nota. Nexata Abrahampijinē itsa caxitajaraba Melquisedecpijinē, diez xuabejeyajuvēnējavanē tsaponae, caejavayo rajutapona Melquisedecpijinējavabelia. ⁵ Bajayatami Dioso najumecopata Moiséspijinēta. Bajarapalivaisi juya itorobatsi Levijijinēmi pexi, pemomoxi

ata, sacerdotevi penaexanaponaevinexa, jivi petocuaicuajiaivinexa Diosojavabelia. Nexata Levípijinē pemomoxi, sacerdotevi naexanapona. Nexata bajarapamonae Dioso tocopatatsi perajutsinexatsi daxita judíovi pexainaeyajuvēnjējava. Baitis tocopatatsi pematamoyanijobinexa diez xuabejeyajuvēnjējavanē tsaponae, caejavayo pevēcuaipitaponaenexa. Nacaeviriavi ata, daxita bajarapamonae Abrahampijjinē ēpemomoxi ata, itsiata Dioso tocopatatsi nacaeviriavi ata pexainaeyajuvēnjējavanē perajutsinexatsi. ⁶ Melquisedecpijinē picani Levípijinē apo pemomo. Itsiata Melquisedecpijinē ayaijamatabēcuenēxae, Abrahampijjinē ofrenda rajuta Melquisedecpijinējavabelia. Diez xuabejeyajuvēnjējavanē tsaponae, caejavayo rajutapona. Nexata Melquisedecpijinē jumaitsi Abrahampijjinējavabelia: “Catovajētsianatsi Diosojavabelia pecayavenonabiabinexa,” jai Abrahampijjinējavabelia, ponējavabelia Dioso najumecapanepaeya jumaitsi peyavenonaenexa. ⁷ Pajivi jumaitsi: “Catovajētsianatsi Diosojavabelia pecayavenonaenexa,” jai, bajarapajivi ayaijamatabēcuenējivi Dioso pitabarata pajiviyo tovajētsijitsia matatoxenetsia. Daxita baja cajena yapētanetsi bajarapacuenē. ⁸ Majotaje, vaxaitsijavata, itsamonae sacerdotevijavabelia ofrenda rajutabiaba. Diez xuabeje pexainaeyajuvēnjējavanē, caejavayo rajutabiaba sacerdotevijavabelia. Pasacerdotevijavabelia rajutabiaba bajaraxuanē, petēpaevinexa. Tsipaji saya jivi. Itsiata baitis jane Dioso pejumelivaisibaxutota Melquisedecpijinē yabara jumaitsi pacueniaje: “Melquisedec abaxē mapamatacabita ataje asaē tsaponapona. Nexata tsiteca jivi tocuaicuajiai tsabiabi Diosojavabelia,” jai. ⁹⁻¹⁰ Bajayatami Abrahampijjinē ofrenda rajuta Melquisedecpijinējavabelia. Bajarapamatacabi abaxē Levípijinē apo naexanae. Pexi ata abaxē ajibi. Pemomoxi ata abaxē ajibi, pamonaē jane baja mapamatacabitaje sacerdotevi naexana jivi petocuaicuajainexa Diosojavabelia. Itsiata paofrenda Abrahampijjinē rajuta Melquisedecpijinējavabelia, bajaraxua Dioso tane Levínexa, daxita Leví pemomoxinexa ata. Bajarapacuenia Abrahampijjinē daxitanexa yaiyataeya ofrenda rajuta Melquisedecpijinējavabelia.

¹¹ Pamatacabi Aarónpijinē, pexi ata, sacerdotevi baja tsavanapae, bajarapamatacabi judíovi pejumecovēnētsinexa Dioso Moiséspijinēta najumecopata. Pamonaē Aarónpijinē pexi, Levípijinē baja cajena pemomoxi. Judíovi itsa jumecovēnētsipa Dioso Moiséspijinēta penajumecopatsilivaisi Dioso aneonijibia petaenexatsi, nexata Dioso apo itorobitsca tsipae Cristo, ponē be-Melquisedecjamatabēcuenēnē, jivi petocuaicuajainexa Diosojavabelia daxitamatacabijavabelianexa. Dioso Moiséspijinēta penajumecopatsilivaisi pejamatabēcueneta Dioso aneonijibia judíovi itsa taejitsipa, nexata icatsia Dioso saya mataropotsia pepo sacerdotenē exanaponaējitsipa Aarónpijinē pemomoxi. ¹² Nexata Cristo sacerdotenē itsa exanatsi, jivi petocuaicuajainexa Diosojavabelia daxitamatacabijavabelianexa, yajavacopatatsi pijinia itsalivaisi Dioso Moiséspijinēta penajumecopatsilivaisivecua. ¹³ Vajatuxanenē, ponē Dioso pejumelivaisibaxutota tajēvelia vajuropaebatsi, bajaraponē Levípijinē apo pemomo. Biji rajane saicayavirianē. Bajaraponē pijaviriavi bajayata caenē ata sacerdotenē apo naexanae. ¹⁴ Vajatuxanenē itsa naexana mapanacuataje, daxitajivi baja cajena yapētanē penaexanaejava mapanacuataje. Vajatuxanenē naexana Judápijinē pemomoyota. Daxitajivi yapētanenua pacuenia bajayata Moiséspijinē tajēvelia vajuropaeba pamonaē sacerdotevi naexanaponaējitsia. “Judápijinē pemomoxi ata sacerdotevi

naexanaena,” apo jai picani.

¹⁵ Bajaraxuata vaxaitsi xaniavaetsia jane baja yapētanetsi pepatsijava itsavriiasacerdotenē. Tspaji Cristo, ponē jane baja pepo sacerdotenē jivi petocuaicuajainexa Diosojavabelia daxitamatacabijavabelianexa, bajara-
ponē beMelquisedecjamatabēcuenenē. ¹⁶ Levípijinē pemomoxi sacerdotevi exanaponatsi. Tspaji bajayata Moiséspijinē tocopata bajarapamonaeya-
juvēnēvi sacerdotevi pexanaenexatsi. Itsiata baitsi jane Cristo, pepo sac-
erdotenē itsa exanatsi jivi petocuaicuajainexa Diosojavabelia daxitamata-
cabijavabelianexa, Levípijinē pemomoxae, pepo sacerdotenē apo exanaetsi.
Jume baja cajena. Biji rajane Cristo pepo sacerdotenē exanatsi icatsia
piasaēxae petēpaecujinae. ¹⁷ Dioso baja cajena tajēvelia pexēnatojavabelia pe-
jumaitsijava, Dioso pejumelivaisibaxutota jumaitsi mapacueniaje:
Xamē raja pepo sacerdotenēmē tsane daxitamatacabijavabelianexa. Pacue-
nia Melquisedec jamatabēcueneitsi, bajarajamatabēcueneitsimē tsane,
jai baja cajena tajēvelia Dioso pejumelivaisibaxutota Dioso pejumaitsijava
pexēnatojavabelia.

¹⁸⁻¹⁹ Nexata baja palivaisimi copiaya Dioso Moiséspijinēta najumeco-
pata jivi pejumecovēnētsinexa, Dioso baja copiarucaeyaexana. Tspaji
bajarapalivaisimi apo caējēpaetsi jivi pevecuaajibiaexanaenexatsi pibisi-
acuene pexanaeconi. Nexata palivaisi aeconoxae Dioso nacatocopata,
xanepana bitso bajarapalivaisimi matatoxenetsia. Tspaji baja Cristo
vajanacasivatēpaexae, bajaraponē pejamatabēcueneta Dioso baja aneconi-
jibia nacatane. Nexata nacatocopata vajajamatabēcuene saya vajaimoxoy-
otsinexa Dioso.

²⁰ Dioso baja cajena tajēvelia najumecapanepaeya jumaitsi Cristo pepo sac-
erdotenē pexanaenexatsi, jivi petocuaicuajainexa Diosojavabelia daxita-
matacabijavabelianexa. ²¹ Pamonaemi bajayata copiaya Cristo pevājēnaeya
sacerdotevi exanaponatsi, bajarapamonaemi yabara Dioso bajarapacuenia
apo jumaitsi. Itsiata baitsi jane tajēvelia Dioso najumecapanepaeya jumaitsi
Cristo pepo sacerdotenē pexanaenexatsi. Bajaraxuata tajēvelia Dioso pe-
jumelivaisibaxutota jumaitsi mapacueniaje:

Dioso baja cajena najumecapanepaeya itsa jumaitsi, itsajamatabēcuene icat-
sia epatua apo xinae. Bajaraxuata tajēvelia Dioso pexēnatojavabelia
pejumaitsijava, Dioso pejumelivaisibaxutota jumaitsi mapacueni-
aje: “Xamē baja cajena pepo sacerdotenēmē tsane daxitamatacabij-
avabelianexa. Pacuenia Melquisedec jamatabēcueneitsi, bajaraja-
matabēcueneitsimē tsane,”

jai Dioso pejumelivaisibaxutota tajēvelia Dioso pejumaitsijava
pexēnatojavabelia.

²² Bajarapacuenia tajēvelia Dioso najumecapanepaeya pejumaitsixae
Cristo yabara, nexata yapētanetsi xua Cristo nacatoexana, bitso pex-
aniacuene. Bajaraxua bitso pexaniacuene, palivaisimi copiaya Dioso
Moiséspijinēta najumecopata matatoxenetsia. ²³ Copiaya pamonaemi
sacerdotevi exanaponatsi, ayaibitsaēto jonepona sacerdotevinexa. Tsi-
paji tēpona. Nexata apo caējēpaetsi pevetsinexa daxitamatacabijav-
abelianexa. ²⁴ Itsiata baitsi jane Jesús baja icatsia apo tēpae tsane. Nex-
ata pepo sacerdotenē tsane daxitamatacabijavabelianexa. Nexata baja
icatsia itsanē pepo sacerdotenē apo exanaetsi tsane. ²⁵ Nexata pajivi
najamatabēcuenecopata Diosojavabelia pibisiacuene pexanaeconi Dioso
pevecuaajibiaexanaenexatsi, daxitamatacabijavabelianexa Dioso vecuaa-
jibiaexanaenatsi. Bajarapacuenia daxitamatacabijavabelianexa pibisi-
acuene pexanaeconi vecuaajibiaexanaenatsi Jesús pejamatabēcueneta.

Tsipaji Jesús daxitamatacabijavabelianexa asaê tsaponaponae tsane jivi petocuaicuaijainexa Diosojavabelia.

²⁶ Pacuenia baja Jesús pepo sacerdotenê, bajarapitsinë vaxaitsi vajanamatavenonaexae, Jesús baja patsica. Jesús cajena Dioso pejamatabêcuenejêpaenê, pianeconijibinë Diosojavabelia. Pibisiacuene pexanaevi ata, apo jamatabêcuenebijianaetsi. Tocopatatsi peecaenexa athêbêtatsia, paxa Dioso pemuxuneneta, penajuaeveltsinexabeje daxitacuene. ²⁷ Pacuenia itsamonae pepo sacerdotevi jamatabêcueneitsi, bajara Jesús apo jamatabêcueneitsi. Itsamonae pepo sacerdotevi, daxitamatacabi dajubi beyabiaba ofrendacuenia bajarapavi perajutsinexa Diosojavabelia, perajutsinexa pijana ata. Bajarapacuenia sacerdotevi exanabiaba, pibisiacuene pexanaeconi Dioso pevecuaajibiaexanaenexatsi, itsamonae ata pibisiacuene pexanaeconi Dioso pevecuaajibiaexanaenexatsi. Bajarapacuenia Jesús apo exanae. Jesús saya nacopata pebeyaxuabinexatsi ofrendacuenia penarajutsinexa Diosojavabelia. Bajarapacuenia Jesús itsa nacopata pebeyaxuabinexatsi, caecuenia matamota daxitajivi pibisiacuene pexanaeconi daxitamatacabijavabelianexa. ²⁸ Bajayata palivaisi Dioso Moiséspijinêta najumecopata, bajarapalivaisi Dioso tocopata pepo sacerdotevi penaexanaenexa mapanacuapijivi. Bajarapamonae apo caêjêpae atatsi pejinavanapaenexa pibisiacuene exanaenejeva, itsiata Dioso tocopata pepo sacerdotevi penaexanaenexa. Itsiata baitsi jane bajaraxuacujinae Dioso najumecapanepaeya jumaitsi Dioso pexênato pepo sacerdotenê penaexanaenexa daxitamatacabijavabelianexa. Jesús caeto ata pibisiacuene apo exanae.

8

Pacuenia Jesús daxitajivi petocuaicuaijainê Diosojavabelia yabara pelivaisi

¹ Xua yabara baja pacatsipaebatsi, maitsije. Aeonoxae baja xainatsi Jesús, pepo sacerdotenê vajanacatocuaicuaijainexa Diosojavabelia. Bajaraponê ecaeyaexanatsi athêbêtatsia, Dioso ayaijamatatabêcuenenê pemuxuneneta, pecujanenia, penajuaeveltsinexabeje daxitacuene. ² Nexata jane baja aeonoxae Jesús Dioso pijatemplobota athêbêtatsia nacueneba pepo sacerdotenê penacuenebijava. Bajarapatemplobo Dioso pexanaetemplobo. Jivi apo pexanaetemplobo. ³ Daxita pamonaepo sacerdotevi, tocopatatsi perajutabiabinexa ofrenda Diosojavabelia. Dajubi ata beyabiaba ofrendacuenia bajarapavi perajutsinexa Diosojavabelia. Bajaraxuata Jesucristo ata, vajanacatocuaicuaijainê Diosojavabelia, ofrenda rajuta Diosojavabelia. Nexata Jesucristo ofrenda itsa rajuta Diosojavabelia, pijacuat nacopata pebeyaxuabinexatsi ofrendacuenia penarajutsinexa Diosojavabelia. ⁴ Itsa abaxê Jesucristo mapamatacabi ata ponaponaejitsipa mapanacuataje, apo sacerdotenê tsipae. Jesucristo apo exanae tsipae pacuenia itsamonae sacerdotevi exanabiaba. Bajarapamonae saya dajubi beyabiaba ofrendacuenia bajarapavi perajutsinexa Diosojavabelia Moiséspijinê pitorobicueniatsi. ⁵ Xua Jesucristo athêbêtatsia exanaponapona, bajaraxua saya sacerdotevi cuenecataya exanavanapa templobota mapanacuataje. Bajaraxua sacerdotevi cuenecataya pexanavanapaenexa, Dioso tocopatatsi.

Yapëtanetsi baja cajena xua Jesucristo athëbëtatsia exana, bajaraxua mapanacuapijsacerdotevi saya cuenecataeya exanavanapa. Tsipaji pamatacabi Dioso Moiséspijinë itorobatsi mapanacuata pexanaenexa Dioso pijacarpaboxaneto, Moiséspijinëjavabelia Dioso jumaitsi mapacueniaje: “Exanaename daxita pacuenia baja catsitajëtatsi petsutojumata,” jai Dioso. Bajaraxuata mapamatacabijavaberena ataje sacerdotevi templobota exanapona pacuenia Moiséspijinë Dioso tsitajëtatsi petsutojumata. ⁶ Itsiata baitsi jane Cristo, ponë pepo sacerdotenë, xua Dioso athëbëtatsia tocpatatsi petonacuenebinexa, bajaraxua bitso ayaijamatabëcuene. Xua bajaraxuata sacerdotevi Dioso tonacuenebavanapa mapanacuataje, beveliajamatabëcuenejaya saya. Tsipaji Cristo jivi tocuaiacuajai tsane Diosojavabelia daxitamatacabijavabelianexa. Cristo nacayavenonabiabiana. Pepacuene baja Cristo pejamatabëcueneta Dioso nacavecuajibiaexana vajaneconimi. Cristo nacayavenonaenanua Dioso vajanacarajutsinexa xua yabara Dioso najumecapanepaeya jumaitsi vajanacarajutsinexa, baitsi matacabi apo pevereverecejaya. Bajaraxua bitso pexaniacuene. Palivaisimi copiaya Dioso Moiséspijinëta najumecopata, bevelialivaisimi saya.

⁷ Itsa baja xanepanaejitsipa copiaya palivaisi Dioso Moiséspijinëta najumecopata, nexata baja icatsia cotocaevi itsalivaisi Dioso najumecapanepaeya apo nacatonajumecopatsi tsipae. ⁸ Israelpijinë pemomoxi xaniavaetsia apo jumecovënëtsi palivaisi bajayata Dioso najumecopata Moiséspijinëta. Bajaraxuata Dioso tajëvelia najumecapanepaeya pejumaitisijava, Dioso pejumelivaisibaxutota jumaitsi mapacueniaje:

Itsamatacabijavabelia icatsia najumecapanepaeya jumaitsinë tsane pejanalivaisi jivi pejumecovënëtsinexa. Pajivi jumecovënëtsiana bajarapalivaisi, rajutsianajë matacabi apo pevereverecejaya. Bajarapacuenia najumecapanepaeya jumaitsinë tsane Israel nacuapijivijavabelia, Judea nacuapijivijavabelia ata. ⁹ Bajarapamonae pijasali-naivimi bajayata matacarenanë Egipto nacuaverena. Bajarapamatacabi baja najumecapanepaeya jumaitsinë pacuenia bajarapamonaeami yavenonaejitsianë picani. Itsiata baitsi jane bajarapamonaeami apo nejumecovënëtsi. Bajaraxuata copatajë baja bajarapamonaeami tayavenonaejaya,

jai Dioso pejumelivaisibaxutota tajëvelia Dioso pejumaitisijava Israelpijinë pemomoxi yabara.

¹⁰ Dioso icatsia tajëvelia pejumaitisijava, Dioso pejumelivaisibaxutota jumaitsi mapacueniaje:

Nexata icatsia itsamatacabijavabelia najumecapanepaeya jumaitsinë tsane Israel nacuapijivi yabara mapacueniaje: “Caejivi canacujitsia pejamatabëëthëtota yapëtaeyaexanaponaenajë pacuenia netojinavanapaejitsia. Nexata bajarapamonae pejamatabëëthëtöjavavetsina jitsipaena tanejumecovënëtsinexa. Nexata bajarapamonae pijaDiosonënë tsane. Bajarapamonae pijinia tajajivi tsane. ¹¹ Nexata bajarapamatacabi itsajivi ata apo jumai tsane itsanëjavabelia, pijamonaenëjavabelia ata: “Xamë ata beyapëtaneme Dioso,” apo jai tsane. Tsipaji baja daxitajivi neyapëtaena. Neyapëtaena beveliajamatabëcuenevi. Neyapëtaena ayaijamatabëcuenevi ata. Daxita bajarapamonae neyapëtaena. ¹² Xanë baja daxita tajajivi pibisiacuene pexanaeconimi, vecuajibiaexanaenajë. Apo najamatabënapitsinë tsane bajarapapibisiacuene, jai Dioso pejumelivaisibaxutota bajayata tajëvelia Dioso pejumaitisijava.

¹³ Bajarapacuenia Dioso itsamatacabijavabelia icatsia najumecapanepaeya pejumaitisijavanexa yabara jumaitsi. Tsipaji baja

ajumematamobi palivaisimi copiaya Dioso najumecapanepaeya jumaitsi judíovi pijasalinaivimijavabelia. Pacuenia mapanacuapijicuene ajibi tsaponae, bajara itsi bajarapalivaisimi. Vereverecapona baja.

9

Pacuenia mapanacuata eca Diosojavabelia jivi penavajécabiabibo, bajara pijinia pacuenia athèbètatsia ata peecaabo, yabara pelivaisi

¹ Dioso copiaya najumecopata Moiséspijinèta. Bajarapalivaisita itoroba Israel pemomoxi pexanaenexa Dioso pijacarpaboxaneto, bajarapabota Diosojavabelia penavajécabiabinexa. Itorobanua sacerdotevi Dioso pijacuene petonacuenebavanapaenexa bajarapacarpabota. ² Itsa baja vereteta carpaboxaneto Diosojavabelia penavajécabiabibonexa, bajarapabo ènètuatuajè yatuucutsiaya epatajèrètsiarena rurena ayaipapabèbèrèpana. Bajarapaènèyatuucutsijava jumavereca, paènètuatuajè pevènè Lugar Santo. Bajarajota nuta candelerovènèjava pitayotanucaenexa. Mesa ata nuta bajarajota. Bajarapamesajumata pejebinexa pan, papan ofrendacuenia rajutabiaba Diosojavabelia. ³ Bajara papapaèbèrèpanacujinaereca, paènètuatuajè, pevènè pijinia Lugar Santísimo, itsajota baitsi Dioso peponaponaenexa yatuucuta. ⁴ Bajarapaènèyatuucutsijava tuatuajèta, nuca orota pexanaejava, altavènèjava. Bajara paaltarjumata jeba petuxujuvijavanè, inciensovènèjavanè, petajuitsinexa. Bajarapaènèyatuucutsijava tuatuajèta boca baula, orota pexanaebaula. Bajarapabaula ènètuatuajèta nuca orota pexanaebotellabè. Bajarapabotellabèta yanuca pexaejava, manávènèjava. Bajarapabaula ènètuatuajèta bocanua Aarónpijinèmi pijanaeboyo. Bajarapanaeboyo bajayata Aarónpijinè: “Baxujuvare,” itsa jai, baxujuvatababiaba. Bajarapabaula ènètuatuajèta bocabejenua ibopanabeje. Bajarapaibopanatabeje Dioso jivi pitavetsilivaisi najumeyaquinabuata. ⁵ Bajarapabaula matatsènèta anijanèbeje pecorofeto pexainaenèbeje nucabeje. Bajaraponèbeje beàngelnèbeje, jumapecataeya pexanaenètsibeje. Bajaraponèbeje nutatsibeje Dioso pijapenivenivenaecotia pitajètsinexabeje. Bajaraponèbeje pecorofetota baula matatsènècaranatanucabeje. Nexata pepo sacerdotenè caevai canacujitsia bajarapabaula jumatsicababiaba dajubinè pijanata. Pepo sacerdotenè bajarabaula itsa jumatsicababiaba, jamatabèjumai tsabiabitsi: “Dioso nacaitaxutotsoniataena. Nacavecuajibiaexanaena pibisiacuene vijaexanaeiconimi,” jamatabèjai tsabiabi pepo sacerdotenè dajubinè pijanata baulajuma petsicababiabijavata. Itsiata aeconoxae apo necuenecaèjèpae patacatoyaquinaponaenexa pajamatabècuenelivaisi xainapona daxita bajaraxua.

⁶ Bajarapacuenia bajayata Diosojavabelia penavajécabiabibonexa, vereteta Dioso pijacarpaboxaneto. Nexata sacerdotevi joneyabiaba daxitamatacabi canacujitsia bajarapabojavabelia. Bajarapabo pènèyatuucutsijava penamataxainaeènètuatuajètatsina, sacerdotevi jinavanapabiaba. Sacerdotevi joneyabiaba penacuenebinexa Dioso pijacuene petonajumecopatsicueniatsi. ⁷ Nexata bajarapabo pènèyatuucutsijava penamataxainaeènètuatuajètsina cujinaereca, paènètuatuajèjavabereca, sacerdotevi pepo penamatacaitorobinè caenè joneyabiaba. Bajarapacuenia joneyabiaba caeto caevai canacujitsia. Itsa joneyabiaba, cajoneyabiaba dajubi pijana. Bajarapajanata sacerdotevi pepo penamatacaitorobinè jumatsicababiaba bajarapabaula. Bajarapacuenia exanabiaba bajarapajana ofrendacuenia

perajutsinexa Diosojavabelia. Bajarapacuenia exanabiaba pibisiacuene pexanaeconi Dioso pevecuaajibiaexanaenexatsi. Bajarapacuenia exanabiaba daxita itsamonae xua pibisiacuene exanae ata, itsiata apo nacueneyapētae, Dioso pevecuaajibiaexanaenexatsi. ⁸ Espiritu Santo pejamatabēcueneta nacayapētaeayaxana mapacueneye. Pamatacabi abaxē Dioso pijacarpaboxaneto piapiapapaēbērēpanaxanetota ēnētuaatujē yatuucutarurena, sacerdotevi Dioso pijacuene tonacuenebavanapa bajarapacarpaboxanetota. Bajarapamatacabi Dioso apo tocopatsi jivi pejonenexa Lugar Santísimojavabelia pijacuata pevajētsinexa Diosojavabelia. Bajaraxua vajayapētaenexa Espiritu Santo pejamatabēcueneta nacayapētaeayaxana. ⁹ Bajaraxua bajayata sacerdotevi exana comparacióncuenia ajena mapamatacabijavaberenaje vajanacayapētaeayaxanaenexa bajaraxua yabara. Jivi dajubi beyabiaba ofrendacuenia bajarapavi perajutsinexa Diosojavabelia. Vaxaitsi baja yapētanetsi mapacueneye. Bajarapacuenia jivi exanae ata, nacueratabiaba. Tspaji jivi dajubinēvi ofrendacuenia rajutabiabi ata Diosojavabelia, tsiteca pijaperujumatabēcuene xainavanapa. ¹⁰ Paperujulivaisimi bajayata Dioso Moiséspijinēta najumecopata, jivi apo itorobitsi penajamatabēcuenexaniavaetsinexa. Biji rajane saya itorobatsi pexaejavanexa xaniavaetsia pevetsinexa, piapaeranexa ata xaniavaetsia pevetsinexa, xaniavaetsia penaperabēquiatsinexana. Bajarapacuenia itorobatsi bajarapalivaisimi pejumecovēnētavanapanexa abaxē Cristo pepatsivajēnaeyatsica. Nexata Cristo pepatsicujinaetsica, Dioso jane baja bajarapalivaisimi peverevereceaayaxanaenexa pejanalivaisita.

¹¹ Capanepaeya baja pata Cristo, pepo sacerdotenē. Bajaraponē vajanacatocuaicuaijinēnaxa Diosojavabelia daxitamatacabijavabelianexa. Aeconoxae baja Cristo pexaniacuene nacatoexana. Cristo baja pona athēbēabetsia, Dioso pepo pijaboyabetsia. Bajarapabo bitso pexaniabo mapanacuata jivi pexanaebo matatoxenetsia. Dioso saicaya pexanaebo. ¹² Bajarabetsia Cristo itsa junua bajarapabotatsia, caecueneta junua bajarapaboēnēalia, Lugar Santísimojavabelia, itsajota baitsi Dioso peponaponanexa yatuucuta. Cristo itsa junua, apo cajone chivojana, becerrojana ata. Biji rajane Cristo najanacajunua daxitajivinexa. Nexata baja caecuenia nacaneconimatamota daxitamatacabijavabelianexa Dioso vajanacacapanepaenexa. ¹³ Xaniajai. Bajayata Israelpijinē pemomoxi itsa naneconita Diosojavabelia, abaxē apo tocopatabiabitsi penajonenexa Diosojavabelia penavajēcabiabibojavabelia. Nexata Israelpijinē pemomoxi copiaya matatsicababiabatsi chivojanata, torojanata ata. Becerrami altarvēnējavajumata petajuitsiipumana ata tsimataothoothotabiabatsi. Nexata jane baja xuacujinae tocopatabiabatsi icatsia penajonenexa Diosojavabelia penavajēcabiabibojavabelia. ¹⁴ Bajarapacuenia bajayata Dioso tocopatatsi dajubinē pijana pejamatabēcueneta Israelpijinē pemomoxi pejonenexa Diosojavabelia penavajēcabiabibojavabelia. Dajubinē pijana matatoxenetsia Cristo bitso caējēpatsi vajanacayavenonaenexa Dioso pexēnatoxae. Espiritu Santo, apo peverevereceaenē daxitamatacabijavabelianexa, Cristo yavenonatsi. Nexata Cristo nacopata pebeyaxuabinexatsi vajanacasivatēpaenexa. Cristo cajena caeto ata pibisiacuene apo exanae. Nexata Cristo pijanata nacavecuajibiaexana baja pibisiacuene vaxaxanaeiconimi. Bajarapaneconi yabara picani Dioso vecua vajanaxuabiviminexa. Bajarapacuenia Cristo vajanacatoexanaexae, tonacuenebavanapatsi piasaētsaponaponanē Dioso.

¹⁵ Nexata Jesucristo pejamatabēcueneta nacavecuajibiaexana baja va-

janeconimi. Nexata baja aneconijibia Dioso nacatane. Bajaraxuata daxita pamonaē Dioso junatatsi, rajutsianatsi maticabi apo peverevercaejava, pacuenia baja Dioso najumecapanepaeya jumaitsi perajutsinexatsi. Cristo itsa nacasivatēpa, nacaneconimatamota baja. Nexata nacavecuajibiaexana daxita paneconimi xainatsi itsa abaxē jumecovēnētavanapatsi copiaya palivaisimi Dioso Moiséspijinēta najumecopata. ¹⁶⁻¹⁷ Itsajivi petēpaevajēnae, yaquina pecobecovē yabara. Bajarapajivi itsa tēpa, pijamonae pevēnamuto penatsicobetsanaenexa. Nexata yaquina pacuenia caejivi canacujitsia pitaponaejitsia. Itsiata baitsi jane abaxē itsa asaē tsaponaponae pecobecovē pexinaejivi, ajumematamobi abaxē bajarapalivaisi. Matapania baja itsa tēpa pecobecovē pexinaejivi, jumenamatamota jane baja bajarapalivaisi. Nexata jane baja xanepana pijamonae penatsicobetsanaenexa pacuenia petēpaejivi yaquina petēpaevajēnaeya pecobecovē yabara. ¹⁸ Bajara pijinia itsi paperujulivaisimi bajayata Dioso Moiséspijinēta najumecopata Israelpijinē pemomoxi pejumecovēnētasinexa. Jumenamatamotapona Israelpijinē pemomoxi dajubi pebeyabiabixae ofrendacuenia bajarapavi perajutsinexa Diosojavabelia. ¹⁹ Bajayata Moiséspijinē copiaya tsipaeba daxitajivijavabelia daxitajivi bajarapalivaisi pejumecovēnētavanapaenexa. Nexata Moiséspijinē pita hisopovēnē naeboxi pepacētetsicunuyo petsobialana maētota. Bajaraxuacujinae bajarapacunuyo Moiséspijinē jabuta merata, becerrojanata, chivojanatanua, peyayavamatajērēabijanarata. Nexata Moiséspijinē tsmatatsicaba pabaxutota itanerubena palivaisi Dioso najumecopata Moiséspijinēta. Bajaraxuacujinae Moiséspijinē daxitajivi tsmatatsicabapona. ²⁰ Nexata Moiséspijinē jumaitsi jivijavabelia: “Mara pacuenia pacamatatsicabatsije. Nexata patacamatatsicabixae, xaniavaetsia jane baja Dioso pajumecovēnētavanapaenexa. Nexata pacuenia Dioso najumecapanepaeya pacajumaitsi, pacatocopiapatsiana,” jai Moiséspijinē jivijavabelia. ²¹⁻²² Bajaraxuacujinae icatsia Moiséspijinē tscabanajaenajaeba Diosojavabelia penavajēcabiabibo ēnētuaatjē. Xuanē bajarapabo ēnētuaatjēta xaina pecanacuenebinexa Dioso pijacuene, daxita bajaraxuanē yajavatsicabanajaenajaeba. Bajarapacuenia pexanaenexa itoroba baja cajena Dioso Moiséspijinēta penajumecopatsilivaisimita. Itoroba dajubinē pijanata daxitacune petsicabinexa, petsicabicujinae Dioso axuirajibia petaenexa daxita bajaraxuanē, jivi ata Dioso aneconijibia petaenexa. Tsi-paji jivi pibisiacuene pexanaeneconi yabara, acuenebi Dioso aneconijibia petaenexatsi. Matapania dajubinē itsa beyaxuaba, pijanata itsa matatsicabatsi, Dioso jane baja aneconijibia tanetsi.

Pacuenia Cristo nacopata pebeyaxuabinexatsi mapanacuapijivi pijaneconi pevcuajibiaexanaenexa yabara pelivaisi

²³ Diosojavabelia penavajēcabiabibota, xuabeje xaina pecanacuenebinexa Dioso pijacuene, dajubinē pijanata bajayata Moiséspijinē tscabanajaenajaeba. Bajarapacuenia Moiséspijinē itsa exana, tajēvelia comparacióncuenia itajētapona jivi peyapētaenexa itsamatacabijavabelia Cristo pesivatēpaejavanexa mapanacuapijivi. Cristo dajubinē pijanata apo tscabanajaenajaebi Diosojavabelia penavajēcabiabibo ēnētuaatjē. Biji rajane Cristo nacopata pebeyaxuabinexatsi. Nexata Cristo pijana pejamatabēcueneta, mapanacuapijivi pibisiacuene pexanaeneconi, Dioso baja vecuajibiaexanatsi. Cristo cajena bitso janamatamota Dioso pitabarata, dajubinē pejana matatoxenetsia. ²⁴ Cristo baja cajena vajanacasivatēpaecujinae, athēbēabetsia pona. Aeonoxae baja Cristo athēbētatsia eca, paxa Dioso pemuxuneneta,

vajanacatocuaicuajaitsecaenexa Diosojavabelia. Nexata Dioso pepo pijabotatsia Cristo nacatocuaicuajai tsaponae. Bajarapabo apo pexanaebo itsajivi ata. Apo bemapanacuapijibo. Tshipaji pacarpaboxaneto mapanacuta jivi exana Diosojavabelia penavajëcabiabibonexa, bajarapabo saya cuenecataeya exana pacuenia athëbëtatsia Dioso pepo pijabo itsi. ²⁵ Sacerdotevi pepo penamatacaitorobinë, bajaraponë judionë. Caevai canacujitsia cajoneyabiaba dajubinë pijana Lugar Santísimovënëjavabelia, itsajota baitsi Dioso peponaponaenexa yatuucuta. Itsiata baitsi jane Cristo bajarapacuenia apo exanabiabi caevai canacujitsia. Caeto penacopatsicujinae pebeyaxuabinoxatsi vajanacasivatëpaenexa, icatsia baja pematatsënëa apo nacopatsi petëpaenexa. ²⁶ Dioso mapanacuaje pexanaejavaveliacujinae, Dioso itsa tocopatsipa Cristo jivi pesivatëpaponaponaenexa caevai canacujitsia, nexata Cristo bitso anijatonë jivi pijaneconi yabara sivatëpaponaejitsipa. Itsiata baitsi jane Cristo caeto petëpacujinae, icatsia baja apo tēpae. Itsa baja copiarucaejitsia perujulivaisimi, Cristo naexana mapanacuataje. Nexata caeto nacopata pebeyaxuabinoxatsi vajanacasivatëpaenexa, pibisiacuene vajaexanaeneconimi vajanacavecuajibiaexanaenexa. ²⁷ Bajara pijinia pacuenia vaxaitsi ata caeto tēpaponaponaenatsi. Bajaraxuacujinae jane baja Dioso naneconitsiaexanaponaena daxita pamonaë pijaneconi pexinaevi. ²⁸ Bajara pijinia pacuenia Cristo caeto nacopata pebeyaxuabinoxatsi vajanacasivatëpaenexa, ayaibitsaëtöxanetotsi pibisiacuene vajaexanaeneconi vajanacavecuajibiaexanaenexa. Bajaraxuacujinae Cristo baja athëbëabetsia pona. Icatsia patsianica cotocaevijava. Itsiata baitsi jane baja icatsia apo nacasivatëpae tsane pibisiacuene vajaexanaeneconi yabara. Saya baja nacasivatëpae vavajënaevetavanapaevi vajanacacaponaponaenexa athëbëabetsia.

10

¹ Palivaisi bajayata Dioso Moiséspijinëta najumecopata, bajarapalivaisi saya Dioso najumecopata tajëvelia vajayapëtaenexa papexaniacuene aeconoxae Cristo nacatoexana. Pacuenia jumaitsi Dioso Moiséspijinëta penajumecopatsilivaisi, sacerdotevi exanabiaba Cristo pepatsivajënaeyatsica. Caevai canacujitsia dajubinë beyaxuababiaba ofrendacuenia pevi perajutsinexa Diosojavabelia, pibisiacuene pexanaeneconi Dioso pevecuajibiaexanaenexatsi. Itsiata baitsi jane bajarapacuenia exanabiabi ata, pepacuene apo jamatabëcuenexaniavaetsitsi. ² Pacuenia bajayata itorobatsi Dioso Moiséspijinëta penajumecopatsilivaisi, sacerdotevi exanabiaba. Dajubinë beyaxuababiaba ofrendacuenia pevi perajutsinexa Diosojavabelia. Bajarapacuenia pexanabiabixae, pepacuene Dioso itsa vecuajibiaexanaejitsipatsi pibisiacuene pexanaeneconi, nexata bajarapamonae apo yanajamatabëxainae tsipae pijaneconi. Nexata baja itsa aneonijibi tsipae, pematatsënëa dajubinë apo beyaxuababiabi tsipae ofrendacuenia pevi perajutsinexa Diosojavabelia pijaneconi yabara. Caeto saya ofrenda rajutsipa Diosojavabelia. ³ Bajarapacuenia dajubinë caevai canacujitsia beyaxuababiabi ata ofrendacuenia pevi perajutsinexa Diosojavabelia, itsiata jivi jamatabëcuenabarëyaya apo jinavanapae. Biji rajone bajarapacuenia exanabiabi ata, pevajënaeyabelia tsiteca yanajamatabëxainapona pijaneconi. ⁴ Bajarapacuenia beyaxuababiabi ata toro, chivo ata, bajarapajana apo caëjēpaetsi jivi pijaneconi pepacuene pevecuajibiaexanaenexatsi.

⁵ Bajaraxuata Cristo pepatsicujinaetsica mapanacuayabetsicaje, paxa Diosojavabelia jumaitsi mapacueniaje: Apo jitsipaemë xamë xua jivi carajutabiaba ofrendacuenia. Apo jitsipaemënuu dajubinë ata pebeyaxuababiabijava pevi

pecarajutsinexa ofrendacuenia. Bajaraxuata xanë nitorobimica pacuenia banaexana mapanacuapijivi, tanaexanaenexa mapanacuata, mapanacuapijivi tasivatëpaenexa pijaneconi yabara. ⁶ Jivi picani dajubinë beyaxuababiaba ofrendacuenia pevi pecarajutabiabinexa, altarvënëjavajumata pecatotajutsinexa. Jamatabëjumai tsabiabi bajarapamonae: “Tajaneconi Dioso nevecuaajibiaexanaena mapacuenia itsa exanaenajë,” jamatabëjai tsabiabi. Itsiata baitsi jane apo sivajamatabëcuenebarëyamë bajaraxua yabara. ⁷ Bajara jane manucajëje pacuenia jitsipame tacatoexanaenexa, pacuenia nijumelivaisibaxutota tajëvelia jumaitsi xanë yabara, tasivatëpaenexa nijajivi, jai Cristo paxa Diosojavabelia.

⁸ Nexata bajarapacuenia Cristo pejumaitsixae, aeconoxae baja vaxaitsi yapëtanetsi mapacuenieje. Dioso aeconoxae apo sivajamatabëcuenebarëya jivi dajubinë pebeyaxuababiabijava ofrendacuenia pevi perajutabiabinexa Diosojavabelia. ⁹ Icatsia Cristo jumaitsi paxa Diosojavabelia mapacueniaje: “Bajara jane manucajëje pacuenia jitsipame tacatoexanaenexa,” jai Cristo. Cristo baja mapanacuapijivi pibisiacuene pexanaeneconi yabara sivatëpa cruzata pacuenia paxa Dioso itorobatsi. Nexata sacerdotevi dajubinë pebeyaxuababiabijava ofrendacuenia pevi perajutabiabinexa Diosojavabelia, Cristo baja copiarucaeyaexana. ¹⁰ Pacuenia Dioso tojitsipatsi, Jesucristo nacopata pebeyaxuabinexatsi vajanacasivatëpaenexa cruzata. Bajarapacuenia Jesucristo nacasivatëpa vajanacavecuajibiaexanaenexa pibisiacuene va-jaexanaeneconimi. Caeto baja Jesucristo nacasivatëpa daxifa mapanacuapijivitsije.

¹¹ Caematacabi canacujitsia picani sacerdotevi nubenabiaba altarvënëjava muxuneneta, dajubinë itsa beyaxuaba, ofrendacuenia pevi perajutabiabinexa Diosojavabelia. Itsiata baitsi jane bajarapacuenia exanabiabi ata, Dioso pepacuene apo vecuaajibiaexanaetsi pibisiacuene pexanaeneconi.

¹² Jesucristo baja cajena nacopata pebeyaxuabinexatsi, vajanacaneconimatamotsinexa pibisiacuene vajaexanaeneconimi. Caeto baja Jesucristo tëpa pibisiacuene vajaexanaeneconi vajanacaneconimatamotsinexa daxitamatacabijavabelianexa. Bajaraxuacujinae Jesucristo athëbëtatsia eca, paxa Dioso pemuxuneneta, penajuaeavetsinexabeje daxitacuene. ¹³ Cristo abaxë aeconoxae athëbëtatsia ecaya. Jamatabëcueneevetecaya abaxë pijavajabitsaë paxa Dioso petojamatabëcueneamoneyabinexatsi. Nexata Jesús pijavajabitsaëmi ata pacuenia itoroba, pejumecovënëtsinexatsi. ¹⁴ Caeto baja Cristo nacopata vajanacasivatëpaenexa. Nexata vaxaitsi, Cristo pelivaisi vajajumecovënëtavanapaevi, Cristo pejamatabëcueneta Dioso nacavecuajibiaexana pibisiacuene vajaexanaeneconimi daxitamatacabijavabelianexa.

¹⁵ Cristo baja cajena caeto vajanacasivatëpaejavanexa daxitamatacabijavabelianexa, Espiritu Santo tajëvelia nacayapëtäyaexana. Espiritu Santo tajëvelia nacayapëtäyaexana pexaniajacuene, xua baja aeconoxae Cristo nacatoexana. Tspipaji baja cajena Dioso pejumelivaisibaxutota tajëvelia jumaitsi mapacueniaje:

¹⁶ Najumecapanepaeya tajajivi yabara pejanalivaisi itsamatacabi jumaitsinë tsane mapacueniaje: “Caejivi canacujitsia pejamatabëëthëtota yapëtäyaexanaponaponajë pacuenia netojivanavanapaajitsia. Nexata bajarapamonae pejamatabëëthëtovavavetsina jitsipaena tanejumecovënëtsinexa,” jai Dioso.

¹⁷ Bajaraxuacujinae icatsia Dioso jumaiti mapacueniaje: Apo najamatabēnapitsinē tsane itsamatacabijavabelia ata daxita papibisiacuene bajarapamonae exana, jai Dioso tajēvelia pija-jivi yabara.

¹⁸ Nexata jane baja Cristo nacasivatēpa pibisiacuene vajaexanae neconimi Cristo pejamatabēcueneta Dioso vajanacavecuajibiaexanaenexa. Nexata baja pematatsēnēa dajubinē apo beyaxuababiabi tsanetsi ofrendacuenia pevi vajarajutababinexa Dioso javabelia, pibisiacuene vajaexanae neconi Dioso vajanacavecuajibiaexanaenexa.

Pacuenia saya vajajamatabēcuenie imoxoyotsijitsiatsi Dioso yabara pelivaisi

¹⁹ Tajamonae, Jesucristo baja vajanacasivatēpaexae, aeconoxae baja Dioso nacatocopata ajunavijibia vajajonenexa Dioso pijanacuayabetsia. Nacatocopatanua bajarajotatsia vajajonenexa Lugar Santísimovēnējavabelia, itsajota baitsi Dioso ponapona. ²⁰ Jesucristo nacatoexana pejananamuto vajaponaenexa athēbēabetsia, Dioso vajanacarajutsinexa matacabi apo peverevereaejava. Jesucristo baja itsa nacasivatēpa cruzata, nacasivatēpa vajapatsinexa Dioso javabetsia. ²¹ Bajayata sacerdotevi toevetavanapa Dioso pijacarpaboxaneto. Bajara pijinia pacuenia aeconoxae Jesucristo, pepo sacerdotenē jane baja, nacaevetaponapona vaxaitsi vajanacatocuaicuajainexa Dioso javabelia. ²² Bajaraxuata vajajamatabēthētojavavetsina vajajamatabēcuenie saya bimoxoyotatsi Dioso. Bēpēnēa vajajamatabēcueneta Dioso yamaxēitojorobiaya apo bejumecovēnētsitsi. Tsipaji yapētanetsi Dioso vajanacapanepaejavanexa. Bajarapacuenia Dioso nacacapanepaena tsipaji baja pibisiacuene vajaexanae neconimi Dioso nacavecuajibiaexana. Nexata baja nacaajamatabēcuenie xuirajibiaexana Jesucristo vajanacasivatēpaexae. Vajanacabautisabijavata, nacaperabēquiatanua piaxuirajibimerata. ²³ Vajavajēnaeyabelia asaēyata copiaevetavanapaenatsi Dioso vajanacapanepaejavanexa. Bajarapacuenia asaēyata copiaevetavanapaenatsi Dioso jumeaebinejevatsi. Nexata itsamonaejavabelia navajunupaebabiabianatsi Dioso vajanacapanepaejavanexa. Tsipaji baja pacuenia Dioso najumecapanepaeya nacajumaiti, xaniajai baja cajena. Dioso nacacapanepaena. ²⁴ Nexata vaxaitsi namataenetsia benayavenonatsi vajanajamatabēcuenetajētsinexa vajanasivacuene. Namataenetsianua pexaniacuene benatoexanabiabatsi. ²⁵ Itsamonae baja vaxaitsiyajuvēnēvi copabapona penajoneyabiabijava vajanacatuatabiabiobavabelia. Vaxaitsi nexata bajarapamonae apo becuenejēpaetsi. Namataenetsia benajamatabēcuenesaēyaexanaponatsi. Aeconoxae baja bitsoyo biajamatabēcuenesaētsi tsavanapae. Tsipaji baja imoxoyo pevajēnae vajatuxanenē pepatsinexatsica.

²⁶ Vaxaitsi tsiteca vajavajēnaeyabelia pibisiacuene itsa exanaponaejitsipatsi, yapētae atatsi Dioso vajanacasivatēpaexae, nexata nacatoacuenebi tsipae Dioso vajanacavecuajibiaexanaenexa pibisiacuene vajaexanae neconi. ²⁷ Bajarapacuenia vajavajēnaeyabelia tsiteca pibisiacuene itsa exanaponaejitsipatsi, nexata saya copiaevetavanapaejitsipatsi pinijicuenia Dioso évajanacaneconitsia exanaejavanexa. Pamatacabi Dioso pijavajabitsaē naneconitsiaexanaena pinijisotojavabelia peverebabinexa, bajarapamatacabi vaxaitsi ata, bajarapamonae yajava, pinijicuenia Dioso nacayajavananeconitsia exanaejitsipa. ²⁸ Bajayata Dioso Moiséspijinēta najumecopata jivi pejumecovēnētsinexa. Nexata pajivi apo jumecovēnētsi

Dioso Moisésþijinëta penajumecopatsilivaisi, beyaxuabaponatsi. Anijajivibeje, acueyabi pajivibeje ata, itsa jumaiti pibisiacuene pexanaejivi yabara: “Pataniþi pepacuene pibisiacuene pexanaejava mapajivije,” itsa jai, nexata bajarapajivi apo itaxutotsoniatetsi. Beyaxuabatsi pibisiacuene pexanaeconi yabara. ²⁹ Pacanaëþjere mapacuenatsi. Pajivi apo jumecovënëtsi Dioso Moisésþijinëta penajumecopatsilivaisi, naneconitsiaexanatsi. Nexata bajaraxua matatoxenetsia Dioso bitso naneconitsiaexanaenatsi pajivi copata pejumecovënëtsijava Dioso pexënato pesivatëpaejavatsi pijaneconi yabara. Pajivi copata pejumecovënëtsijava Dioso pexënato pesivatëpaejavatsi pijaneconi yabara, bajarapajivi tane Dioso pexënato pesivatëpaejavatsi bepiamatamobicujiru. Apo canaëþjëtina Espiritu Santo piasivajavatsi. ³⁰ Yapëtanetsi baja cajena Dioso pejumaitisijava mapacueniaje: “Pamonae pibisiacuene exanapona itsamonaejavabelia, bajarapamonae xanë naneconitsiyaexanaenajë,” pejaijava. Jumaitisina Dioso mapacueniaje: “Xanë Diosonëne, naneconitsiaexanaenajë tajajivi,” jai. ³¹ Pajivi Dioso apo jumecovënëtsi, nexata Dioso itsa naneconitsiaexanaenatsi, iþitso piyaucuene taeyaxanaenatsi piasaëtsaponaponaenë Dioso!

³² Panajamatabënapire pacuenia pajamatabëcueneitsimë tsavanapae pamatacabi ajena Cristo pajumecovënëtame. Bajarapamatacabi pajamatabëcuenaesämë tsavanapae panejumecovënëtsijava vajatuxanenë pelivaisi, itsamonaecacabeþiobiaexanae ata bajarapalivaisi yabara. ³³ Paxamëyajuvënëvi baja cajena jivi ayaiþitsaëto pitabarata itsamonaecapocaponatsi. Ayaiacuenia baja cajena beþiobiaexanatsinua bajarapamonae pitabarata. Nexata þijinia itsamonaepaxamëyajuvënëvi bitso sivanajamatabëxaina bajarapacuenia papeçayajuvënëþeþiobiaexanaeatsi. ³⁴ Paxamë paitaxutotsoniataneme pamonae þebatsi penaneconitsivi þeþebabiabibota Dioso pejumelivaisi yabara. Paxamë itsamonaepacavecuanotsi ata panijairanëmi, panecobecovëjavaximi yajava, itsiata paxamë pajamatabëcuenebarëyamë. Bajarapacuenia pajamatabëcuenebarëyamë tsipaji baja payapëtaneme xua athëþëtatsia paxainaeþitsiamë. Bajaraxua mapanacuþijicuenematatoxenetsia bitso pexaniacuenajava. Tsipaji daxitamatacabijavabelianexa apo peverevereçaejavanexa. ³⁵ Bajaraxuata pëtsa pacopabame panesivanajamatabëcueneçopatsijava Diosojavabelia papeçayavenonaenexa. Dioso cajena athëþëtatsia pacarajutsiana ayaiacuenajava panenajamatabëcueneçopatsixae bajaraponëjavabelia. ³⁶ Bajayajebi ata panevajënaeyabelia paexanaponare pacuenia Dioso pacatoþisipa. Nexata xua yabara tajëvelia Dioso najumecapanepaeya jumaiti papeçarajutsinexa, bajaraxua Dioso pacarajutsiana. ³⁷ Cristo icatsia pepatsijavanexatsica yabara, Dioso pejumelivaisibaxutota tajëvelia jumaiti mapacueniaje:

Bepijia patsianica ponë patsiþitsatsica. Apo cuenenajematsi tsane pepatsinexatsica. ³⁸ Nexata pajivi Dioso aneconijibiatanetsi Diosojavabelia penajamatabëcueneçopataponaponaexae, bajarapajivi xainaena matacabi apo peverevereçaejava. Itsiata baitsi jane pajivi nevecuanaviata pecovëyabelia, apo sivajamatabëcuenebarëyanë tsane, jai Dioso pejumelivaisibaxutota.

³⁹ Itsiata baitsi jane vaxaitsi vajacovëyabelia Diosovecua apo naviabi tsanetsi Diosovecua vajanaxuabiyaniava. Biji rajane vaxaitsi najamatabëcueneçopabatsi Diosojavabelia ëvajanacapanepaejavabelianexa.

11

Pacuenia Dioso pejumecovënëtsivi apo jumeaebi xua Dioso najumecapanepaeya jumaitsi yabara pelivaisi

¹ Itsa pepacuene vaxaitsi xaniavaetsia najamatabëcuenecopatatsi Diosojavabelia, nexata najamatabëxainatsi mapacueniaje: “Abaxë daxitacuene apo copiapatsi ata, xua yabara Dioso najumecapanepaeya jumaitsi, itsiata yapëtaniji pexaniajaicuene. Pacuenia Dioso najumecapanepaeya jumaitsi, xaniajai baja cajena. Pepacuene Dioso exanaena,” jamatabëjaitsi.

² Bajayata vajasalinaivimi jumecovënëta Dioso. Nexata bajarapamonaemi jamatabëjumaitsi tsabiabi: “Pacuenia Dioso najumecapanepaeya jumaitsi, pepacuene neyavenonaena,” jamatabëjai tsabiabi. Bajaraxuata bajarapamonaemi yabara Dioso jumaitsi: “Sivajamatabëcuenebarëyanë,” jai.

³ Vaxaitsi ata jumecovënëtatsi Dioso. Nexata yapëtanetsi pexaniajaicuene mapacuenia pejumaitsilivaisije: “Dioso baja cajena nacua exana daxitacuene yajava. Dioso saya pijumeta daxitacuene exana. Daxita xua aeconoxae vajaitaxutota tanetsi, Dioso baja cajena exana. Abaxë pamatacabi ajibi itsacuenejavayo ata mapanacuataje, Dioso baja cajena exana daxitacuene,” pejailivaisi yapëtanetsi pexaniajaicuene.

⁴ Bajayatami Abelpijinë najamatabëcuenecopata Diosojavabelia. Abelpijinë jumecovënëta pacuenia Dioso itorobatsi. Nexata Abelpijinë dajubinë beyaxuaba. Nexata ofrendacuenia pevi rajuta Diosojavabelia. Dioso nexata sivajamatabëcuenebarëyatsi. Abelpijinë pijinia pematapijinëmi, Caïnpijinë, apo jumecovënëtsi pacuenia Dioso itorobatsi. Saicaya pijinia itsavirijajava ofrendacuenia rajuta Diosojavabelia. Dioso nexata apo sivajamatabëcuenebarëyatsi Caïnpijinë. Nexata Abelpijinë bajayatami baja tēpae ata, itsiata mapamatacabijavaberena ataje vënëlivaisitaeponatsi Dioso pejumecovënëtsijava. Nexata baja vaxaitsi yapëtanetsi, vaxaitsi ata Dioso ita jumecovënëtatsi, Dioso vajanacasivabarëyajavanexa.

⁵ Bajayata Enocpijinë ata najamatabëcuenecopata Diosojavabelia. Bajaraxuata apo tēpaenejeva Dioso caponatsi athëbëabetsia. Jemata pitajarbatsi. Nexata itsamonae jaitsi atatsi, itsiata apo caxitajarabitsi. Dioso pejumelivaisibaxutota jumaitsi pacuenia Enocpijinë Dioso pepitsivajënaeyatsi, Dioso sivajamatabëcuenebarëyatsi. ⁶ Pajivi apo najamatabëcuenecopatatsi Diosojavabelia, bajarapajivi yabara Dioso apo jamatabëcuenebarëya. Pajivi najamatabëcuenecopatatsijitsia Diosojavabelia, bajarapajivi copiaya bejamatabëjumaitsi mapacueniaje: “Xaniajai tsaena baja. Dioso ponapona. Bajaraponë jivi pitaxutotsoniataenë. Nexata pamonaee asaëyata vajëta Diosojavabelia pibisiacuene pexanaeconi pevecuaajibiaexanaenexatsi, bajarapamonaee pijaneconi Dioso vecuaajibiaexanatsi,” bejamatabëjai copiaya.

⁷ Bajayata Noëpijinëmi ata najamatabëcuenecopata Diosojavabelia. Nexata Noëpijinëmijavabelia tajëvelia Dioso jumaitsi pacuenia mapairaje Dioso bubutsiaexanaejitsia. Nexata Noëpijinëmi abaxë apo tae ata mapairaje pebubutsijava, itsiata jumecovënëta pacuenia Dioso jumaitsi. Nexata baja pinijibarcoxaneto exana pebarëpanepaenexa pijamonae mapaira pebubutsijavavecuaje. Bajarapacuenia Noëpijinëmi pijamonae pebarëjumecovënëtsixae Dioso, nexata Dioso aneonijibia tanetsi. Bajarapamatacabi daxita mapanacuapijivimi apo jumecovënëtsi Dioso. Caenë Noëpijinë pijamonae barëjumecovënëta Dioso. Nexata daxita pamonaemi apo jumecovënëtsi Dioso, nayapëthane bitso penaneconitsijava Diosojavabelia.

⁸ Bajayata Abrahampijiniēmi ata najamatabēcuenecopata Diosojavabelia. Nexata Dioso itsa itorobatsi Abrahampijinē pevēcua pitsapaenexa pijanacuami, jumecovēnēta. Nexata baja Abrahampijinē pona itsanacuayabelia. Panacua Dioso rajutsiapaebatsi, bajarapanacuayabelia pona. Abrahampijinē abaxē apo natsivajēnaeyapētae ata panacuayabelia patsijitsia, itsiata vecuapitsapa pijanacuami Dioso pitorobixaetsi. ⁹ Panacuata Abrahampijinē Dioso patsiaexanatsi, bajarapanacuata itsiata Abrahampijinē pepo pijabo apo exanae. Carpabota saya ponapona. Becaematacabibejenexa saya pepatsinēcuenia carpabota Abrahampijinē ponapona. Itsiata bajayajebi bajarapanacuata carpabota ponapona. Abrahampijinē pexēnato ata, Isaacpijinē, bajarapaira Dioso rajutsiapaebi atatsi, itsiata Isaacpijinē ata carpabota ponapona. Bajara icatsia itsi Isaacpijinē pexēnato ata, Jacobpijinē, Abrahampijinē jane baja pemomo. Jacobpijinē bajarapaira Dioso rajutsiapaebi atatsi, itsiata Jacobpijinē ata carpabota ponapona. ¹⁰ Bajarapacuenia Abrahampijinē bajayajebi carpabota saya ponapona. Tsipaji abaxē vajēnae vetaponapona pecaponaenexatsi athēbēabetsia, Dioso pexanaetomarabetsia, apo pevevere caetomarabetsia, daxitamatacabijavabelianexa jane baja peponaponaenexa bajarapatomaratsia.

¹¹ Bajayata Abrahampijinē pijava pevēnē Sara. Bajarapovami ata najamatabēcuenecopata Diosojavabelia. Bajarapova mavecova picani. Nexata bitso pepua perujuva ata, itsiata Dioso caējēpaeyaexanatsi pexēnato pexainaenexa. Jumecovēnēta pacuenia Dioso najumecapanepaeya jumaitsitsi pexēnato pexainaenexa. Bajaraxuata xaina pexēnatonēyo. ¹² Bajarapacuenia Abrahampijinē bitso pepua perujunē ata, pexēnato xaina. Nexata Abrahampijinē pevēnamuto pemomoxibitsaēto baja tsaponae. Athēbētatsia, itaboxota, bitso navita tulupu. Mapanacuata pijinia fajetabota bitso navita tajetaboatsapērē. Nexata acuenebi itsajivi ata penamataējētsicapapanepaenexa tulupu, tajetaboatsapērē ata. Bajara pijinia itsaponae Abrahampijinē pemomoxi. Bitso cajena Abrahampijinē pemomoxi navita.

¹³ Daxita pamonaemi bajayata Dioso jumecovēnēta, tēpa baja. Bajarapamonaemi xua yabara Dioso najumecapanepaeya jumaitsitsi perajutsinexatsi, pitsinejeva tēpa baja. Abaxē apo tocopiapatsi atatsi xua yabara Dioso najumecapanepaeya jumaitsitsi perajutsinexatsi, itsiata sivajamatabēcuenebarēya bajarapamonaemi. Jamatabējumai tsabiabi mapacueniaje: “Daxita pacuenia Dioso najumecapanepaeya jumaitsi, bajarapacuenia pepacuene Dioso exanaena,” jamatabējai tsabiabi bajarapamonaemi. Bajarapamonaemi namataenetsia najumai tsabiabi: “Mara panacuataje pepacuene apo jinavanapaetsi tsane daxitamatacabijavabelianexa. Vaxaitsi saya caematacabibeje bevajanajinavanapevinexa. Bevajanapatsivi mapanacuataje,” najai tsabiabi bajarapamonaemi. ¹⁴ Pamonaemi bajarapacuenia namataenetsia najumai tsabiabi, itsamonae tsitanajamatabēcueneitajētavanapa. Bajarapamonaemi tsitanajamatabēcueneitajētavanapa pevētavanapaejava athēbēabetsia Dioso pecaponaevanexatsi, bajarajotatsia jane baja pejinavanapaenexa daxitamatacabijavabelianexa. ¹⁵ Bajarapamonaemi apo najamatabēxainavanapae caevēalia icatsia penaviabinexa pijanacuamijavabelia. Itsa najamatabēxainaejitsipa caevēalia icatsia penaviabinexa pijanacuamijavabelia, nexata naviabijitsipa. ¹⁶ Biji rajane bajarapamonaemi najamatabēxainavanapa peponaenexa athēbēabetsia. Tsipaji athēbētatsia panacua, bitso pexaninacua, mapanacua matatoxenetsia. Bajaraxuata bajarapamonaemi: “Taja Diosomē,” pejaijava Diosojavabelia, Dioso sivabarēyatsi. Vaxaitsi ata baja yapētanetsi

bajarapamonaemi Dioso pesivabarëyajavatsi. Tsipaji baja athëbëtatsia bajarapamonaemi Dioso toxaniavaetatsi pepo pijatomaranexa.

¹⁷⁻¹⁸ Copiaya Dioso tajëvelia najumecapanepaeya jumaitsi Abrahampijinëjavabelia. Abrahampijinë pexënato, Isaac, yabara Dioso jumaitsi mapacueniaje: “Nexënato Isaac xainaena pexi. Nexata nemomoxi xainaename,” jai Dioso. Bajaraxuacujinae icatsia Abrahampijinë Dioso itorobatsi penacoxibeyaxuabinexa picani. Bajarapacuenia Abrahampijinë Dioso itorobatsi penacoxibeyaxuabinexa picani saya pejamatabëcuenejëtsinexatsi. Abrahampijinë Dioso itorobatsi penacoxibeyaxuabinexa ofrendacuenia perajutsinexa Diosojavabelia. Nexata baja picani Abrahampijinë jejai. Nacoxibeyaxuabijitsia picani. ¹⁹ Bajarapacuenia picani Abrahampijinë exanaejitsia Dioso pitorobicueniatsi. Tsipaji Abrahampijinë jamatabëjumaitis: “Dioso baja cajena caëjëpatsi piasaëyaexanaenexatsi taxënato icatsia piasaënexa,” jamatabëjai Abrahampijinë. Ajena baja picani Abrahampijinë nacoxiacuatsijitsia cusiupata penacoxibeyaxuabinexa, nexata Abrahampijinë jamatabëjumaitis: “Taxënato baja aeconoxae tëpaena,” jamatabëjai. Nexata bajarapaepatota Abrahampijinë Dioso itavetatsi penacoxibeyaxuabiyani. Nexata baja itsiata Abrahampijinë apo nacoxibeyaxuabi. Nexata itsiata Abrahampijinë bepetëpaenë baja nacoxitane. Nexata bajaraxuacujinae icatsia Dioso bepetoasäyaexanaenëtsi nacoxitane.

²⁰ Bajayata Abrahampijinë pexënato ata, Isaacpijinë, najamatabëcuenecopata Diosojavabelia. Bajaraxuata Isaacpijinë itsa baja perujunë, pexënatoebejavabelia tajëvelia najumecapanepaeya jumaitis: “Dioso pacayavenonabianabeje,” jai Isaacpijinë pexënatoebejavabelia. Isaacpijinë pexënatoebeje itsanë pevënë Jacob. Itsanë pevënë Esaú. Jacobpijinë itsavënë, Israel. ²¹ Nexata Jacobpijinë ata najamatabëcuenecopata Diosojavabelia. Nexata baja pamatacabi Jacobpijinë perujunë, itsa baja nayapëtane petëpaejavanexa, bajarapamatacabi Diosojavabelia tovajëta pemomobeje Dioso peyavenonabiabinexatsibeje. Ponëbeje Jacobpijinë pemomobeje tovajëta Diosojavabelia, Josépijinë pexënatoebeje. Bajarapacuenia Jacobpijinë itsa tovajëta Diosojavabelia, pemomobeje, caenë canacujitsia, tovajëtaponä. Pecobenaeboupita saya Jacobpijinë nayaëtanucaeya vajëtanuca Diosojavabelia. ²² Bajayata Josépijinë ata najamatabëcuenecopata Diosojavabelia. Bajarapamatacabi Egipto nacuata Josépijinë daxita pijamonae barëponapona, Israelpijinë pemomoxi. Nexata baja Josépijinë itsa nayapëtane petëpaejavanexa, tajëvelia vajunupaeba daxita Israelpijinë pemomoxi Dioso pejamatabëcueneta pecapitsapaejavanexatsi Egipto nacuavecua. Josépijinë petëpaejavënë, najumepuëtanua pijamonae pesicaponaenexatsi pamatacabi Dioso pejamatabëcueneta daxita Israelpijinë pemomoxi capitsapatsi Egipto nacuavecua.

²³ Bajayata Moiséspijinë paxapijinë, penapijiva ata, tajëvelia yapëtanebeje Dioso peyavenonaejavanexatsibeje. Nexata bajaraxuacujinae pexënatonëyo xainabeje, Moisésnexa jane baja. Nexata matayatsia caponaponabeje acueyabi pajuametobeje. Bajarapacuenia matayatsia caponaponabeje tsipaji bitso tsitapexanianëyotsibeje. Egiptonacua pepo pevetsinë itoroba tsipani daxita Israelpijinë pemomoxi penacoxibeyaxuabaponanexa itsa tonaxanatsi pebinëyo. Itsiata bajarapajivibeje apo jumecovënëtsibeje penacoxibeyaxuabinexabeje. Tsipaji apo jumecujunavibeje.

²⁴ Bajaraxuacujinae Moiséspijinë jane baja vitsatatsi Egiptonacua

pepo pevetsinē pexēnatoyo. Moiséspijinē bajarapova vitsatatsi bepexēnatonēyocuenia. Moiséspijinē baja itsa penaveretsinē, yapētane Dioso peyavenonaejavanexatsi. Nexata Moiséspijinē apo jitsipae Egiptonacua pepo pevetsinē bepemomocuenia petāenexatsi. ²⁵ Nexata Moiséspijinē najamatabēcueneveretsia jamatabējumaitsi: “Tajamonae, Israelpijinē pemomoxi, Dioso pijajivinexa. Nexata yavenonaenajē tajamonae. Egipto nacuapijivi nebejobiaexanae ata tsane, pacuenia tajamonae bejobiaexanabiabatsi, itsiata yavenonaenajē,” jamatabējai Moiséspijinē. Nexata baja Moiséspijinē Egiptonacua pevetsinē bepemomocuenia pataejavatsi itsa vecuapitsapa, copata baja bibisiajamatabēcuene, mapanacuapijijamatabēcuene. Tsipaji saya bajarapajamatabēcuene caepatoyonexa jamatabēcuenebarēya. ²⁶ Moiséspijinē Dioso jumecovēnēta pacuenia tajēvelia Dioso jumaitsi pijajivi pecapanepaenexa Egipto nacuavecua. Nexata Moiséspijinē tajēvelia jamatabējumaitsi: “Itsamatacabi Cristo itsamonae bejobiaexanaenatsi. Bajarapacuenia xanē ata Egipto nacuapijivi nebejobiaexanaejitsia ata tsane, itsiata Dioso pejitsipaecuenia toexanaenajē. Tsipaji xua Dioso athēbētatsia nerajutsijitsia, bajaraxua bitso pexaniacuene daxita Egipto nacuapijivi pexinaecuene matatoxenetsia,” jamatabējai Moiséspijinajēvelia Dioso jumaitsi pijajivi pecapanepaenexa Egipto nacuavecua. Nexata Moiséspijinē tajēvelia jamatabējumaitsi: “Itsamatacabi Cristo itsamonae bejobiaexanaenatsē. ²⁷ Nexata baja Moiséspijinē Egipto nacuavecua pitsapa. Tsipaji najamatabēcuenecopata Diosojavabelia peyavenonaenexatsi. Egiptonacua pepo pevetsinē Moiséspijinē baraanaepanae atatsi, apo cjunavi. Pevajēnaeyabelia ajamatabēcuenesaē tsanajetarucāe pacuenia Dioso itorobatsi pexanaenexa. Moiséspijinē baja apo naviatsi pecovēyabelia. Tsipaji abaxē Moiséspijinē apo tae ata Dioso, itsiata yapētane Dioso bitso piasaēnēcuene Egiptonacua pepo pevetsinē matatoxenetsia.

²⁸ Moiséspijinē Dioso peyavenonaenexatsi, tajēvelia najamatabēcuenecopata Diosojavabelia. Bajaraxuata pamatacabi Moiséspijinē pijamonae barēpitsapa Egipto nacuavecua, ayaicuenia Dioso yavenonatsi pijamonae pebarēpanepaenexa. Bajaraxuata Moiséspijinē pacuenia Dioso itorobatsi, juya daxita pijamonae itoroba. Moiséspijinē pijamonaejavabelia jumaitsi mapacueniaje: “Daxita paxamē, pacaebopijivimē canacujitsia, pabename ovejaji, pejanapebitoxi. Nexata panijabobaupanē, caebaupa canacujitsia, pamuxunenetsicabianame ovejajanata. Nexata ajena, pameravi, āngelnē najetarucāe ata tsane peverebiabinexa pebinacuetoxi, matapijinacuetoxi, itsiata apo pacoxitēpaemē tsane,” jai Moiséspijinē pijamonaejavabelia. Nexata Moiséspijinē pijamonae pijabobaupanē, caebaupa canacujitsia, tsicaba ovejajanata. Nexata āngelnē najetarucāe ata peverebiabinexa pebinacuetoxi, matapijinacuetoxi, itsiata Moiséspijinē pijamonae apo coxitēpaē. ²⁹ Bajayata pamatacabi Moiséspijinē pijamonae barēpitsapa Egipto nacuaverena, Egipto nacuapijivi picani barajinatsi pebeyebinexatsi. Nexata bajarapamatacabi Moiséspijinē pijamonae barēnajamatabēcuenecopata Diosojavabelia peyavenonaenexatsi. Nexata ayaicuenia Dioso yavenonatsi. Bajarapamonae Dioso pejamatabēcueneta nicaba Rojovēnē manuamenemāxērāna tuatuaējēalia. Dioso pejamatabēcueneta benamutocuenia totseviaexanaxualiatuatsi. Nexata jane baja Egipto nacuapijivi, pamonae jane baja picani barajinatsi pebeyebinexatsi, nanicabarubenapona. Ajena baja epatota najetarubena,

mera baja icatsia avajubua tsaxuabi. Bubuna baja nexata Egipto nacuapijivi.

³⁰ Bajayata Jericó tomarapijivi piatayaëibopanaxaneto exana pijatomara matatoyorotsia penayajivaranatsinexa pijavajabitsaëvecua. Bajara payacaranatsijavaxaneto mataropotsia catsanaruba ibopananë. Bajaraxua athëbëabetsia apia pacuenia pinijinaejavaxaneto apia. Nexata Israelpijinë pemomoxi vajabitsaë pexanaevajënaeya Jericó tomarapijivijavabelia, tajëvelia najamatabëcuenecopaba Diosojavabelia peyavenonaenexatsi. Israelpijinë pemomoxi itsa pata Jericó tomarata, jinavanapa bajara payacaranatsijavaxaneto jumavelia. Nexata jane baja vajabitsaë exana Jericó tomarapijivijavabelia. Israelpijinë pemomoxi Dioso pitorobicueniatsi Jericótomara matatoyorotsia najetarubena seis xuabeje. Seis baitsi baja pijinia pamatacabibeje. Nexata jane baja siete matakabita, caematacabita, matatoyorotsia najetarubena siete xuabeje. Nexata jane baja siete matakabita bajarapayacaranatsijavaxanetomi jopaica. ³¹ Bajayata Rahabpijiva, Jericó tomarata peponaponaeva, pibisiacuene pevitota pexanabiabiva ata, marapijivimi Dioso verebiabatsi. Itsiata baitsi jane Rahabpijiva bajarapamonaë apo yajavatëpae. Tsipaji pexaniacuene exana. Dioso pejamatabëcueneta Jericó tomarapijivimi peverebiabivajënaetsi, Israelpijinë pemomobeje yaenebabeje Jericó tomarapijivi. Bajarapacuenia yaenebabeje vajabitsaë jane baja pexanaenexa Jericó tomarapijivijavabelia. Bajarapamatacabi Rahabpijiva xaniavaetsia copiapita Israelpijinë pemomobeje. Bajaraxuata Jericó tomarapijivimi Dioso verebiabi atatsi, Rahabpijiva apo yajavabeyaxuabitsi.

³² Apo necuenecaëjëpae baja pematatsënëa itsamonae pelivaisi patacatoyaquinaenexa patacamuxujiobinexa, panenajamatabëcuenecopatsinexa Diosojavabelia papecayavenonaenexa. Apo necuenecaëjëpae patacatoyaquinaenexa Gedeónpijinë pelivaisi, Baracpijinë ata pelivaisi, Sansónpijinë ata pelivaisi, Jeftëpijinë ata pelivaisi, Davidpijinë ata pelivaisi, Samuelpijinë ata pelivaisi. Apo necuenecaëjëpaenua patacatoyaquinaenexa itsamonae, Diosojumepaëbivimi profetavi, pelivaisi. ³³ Daxita bajarapamonaemi ata najamatabëcuenecopaba Diosojavabelia peyavenonaenexatsi. Bajaraxuata bajarapamonaemi Dioso yavenonaponatsi. Bajarapamonaemi itsa navajabitsaëtatuataponata itsanacuanëpijivijavabelia, bajarapanacuanëpijivimi verebabilia Dioso peyavenonaexaetsi. Bajarapamonaë pijanacuanëjava pijajivi itsa eveta, xaniavaetsia evetabiaba. Tsipaji Dioso yavenonaponatsi. Bajaraxuata xaniavaetsia pijajivi evetabiaba. Paepatota ata toayapëbejetsi itsacuenejavayo yabara, Dioso yavenonabiabatsi. Yavenonabiabatsi pacuenia Dioso tajëvelia najumecapanepaeya jumaitsitsi peyavenonaenexatsi. Bajaraxuata bajarapamonaeyajuvënëvi xuabi atatsi nevëthëbitsaëto penubenaëbavabelia, bajarapacuenia picani pebeyaxuabinoxatsi, itsiata Dioso yavenonatsi. Nexata Dioso peyavenonaexaetsi Dioso pejamatabëcueneta nevëthëvecua cuibocataitatsi. Nexata baja nevëthë apo itsacueniabitsi.

³⁴ Itsamonae pijinia bajarapamonaeyajuvënëvi xuabi atatsi pinijiisotalia, Dioso peyavenonaexaetsi, itsiata apo tajueti. Itsamonae pijinia jamatabëbeyaxuabi atatsi espadata, vecuapaneya Dioso peyavenonaexaetsi. Pamonaë pijinia apo aitatsaca picani penavajabitsaëtsinexa, bajarapamonaë ata bitso baja piatatsacavi naexanapona vajabitsaë penaexanabuataponaejavata Dioso peyavenonaexaetsi. Nexata bajarapamonaë pijavajabitsaë cuenamoneyaba. Vecuarëcëpecatsi. ³⁵ Bajayata pijinia petiriva penajamatabëcuenecopatsixae Diosojavabelia peyavenonaenexatsi, itsa coxitëpa, Dioso icatsia toasaëyaexanabiabatsi.

Bajayata pijinia itsamonae Dioso pejumecovënëtsiviyajuvënëvi bejiobi-aexanatsi Dioso pejumecovënëtsixae. Bajarapacuenia pebejiobiaexanae-javatatsi, itsamonae tēpabiaba. Bajarapacuenia yajuvënēexanatsi pecopabinexa picani Dioso pejumecovënëtsijava. Itsiata baitsi jane apo copabi Dioso pejumecovënētavanapaejava. Bajarapacuenia apo copabi Dioso pejumecovënëtsijava. Tsipaji bajarapamonae jamatabējumaitsi tsavana-pae: “Mapanacuataje taponaponaejava matatoxenetsia bitso jitsipajē matacabi apo peverevereaejava Dioso tanerajutsinexa,” jamatabējai tsavana-pae bajarapamonae. ³⁶ Itsamonae pijinia Dioso javabelia penajamatabēcuenecopsixae, itsamonae capocaponabiabatsi. Jumattibabeyabiabatsinua penaneconitsivi pejumaconitabiabimacata. Itsamonae pijinia cadena mēto cēbejebabiabatsi. Penaneconitsivi pejebabiabibota jebabiabatsi. ³⁷ Itsamonae pijinia ibotonēta saya tseconabiabatsi pebeyaxuabinexatsi. Itsamonae pijinia petēpaenexa, epacacubatsi sierrata. Itsamonae pijinia jamatabēcuenējētatsi pecopabinexa Dioso pejumecovënëtsijava. Bajaraxuacujinae espadata beyaxuababiabatsi. Itsamonae pijinia pijabovecua capitapatsi. Apo pexainaexae penaxatabijava, bajarapamonae naxataba ovejaboco, chivoboco ata. Pexainaexa ata apo xinae. Nexata bitso bejiobi bajarapamonae. Barajinabiabatsi. Bejiobiaexanatsinua. ³⁸ Bajarapamonaemi petusato nacuanējava jinaruta. Petsutonē nacuanējava ata, jinaruta. Pitanitonējava perubenaevajuanē jaita meravi pemajitabiabinexa. Bajarapamonae yabara itsamonae najumaitsi: “Mapamonaeje vajatomarata pejinavanapaenexa, apo betocopatsitsi,” najai. Itsiata bajarapamonaemi Dioso asivatsi. ³⁹ Daxita bajarapamonaemi najamatabēcuenecopaba Dioso javabelia peyavenonaenexatsi. Bajaraxuata bajarapamonaemi Dioso aneconijibia tanetsi. Itsiata baitsi jane abaxē bajarapamonaemi itsa asaē tsavana-pae, mapanacuataje Dioso abaxē apo rajutsitsi xua yabara Dioso najumecapanepaeya jumaitsi perajutsinexatsi. Matapania baja bajarapamonae itsa tēpa, Dioso jane baja rajutatsi matacabi apo peverevereaejava. ⁴⁰ Dioso abaxē evetavanapaeyaexanatsi xua rajutsijitsiatsi bajarapamonae. Tsi-paji Dioso apo najamatabēxinae ēbajarapamonaejavabelia perajutsinexa bajaraxua. Vaxaitsi ata mapamatacabita vajajinavanapaevi, bajarapamonae yajava, Dioso jamatabēnacarajuta bajarapapexaniacuenē, matacabi apo peverevereaejava.

12

Pacuenia vajavajēnaeyabelia becaasaē tsavanapaetsi Dioso vajajumecovënëtsijava Jesucristo cruzata vajanacasivatēpaexae yabara pelivaisi

¹ Pamonaē yabara pacatoyaquinatsi, bajayata najamatabēcuenecopaba Dioso javabelia peyavenonaenexatsi. Nexata bajarapamonaemi vajavēnēlivaisitaexae, bemuxunanajamatabēcuenesaētatsi vaxaitsi ata Dioso vajanacayavenonaenexa. Itsa nayacobijitsiatsi vajacujinaejinaexa, nexata najonotatsi piarevejava bitsojinaeya vajacujinaejinaenexa, vajapatsinexa itsabelia nacatocājēta vajanacaitorobinē. Bajara pijinia pacuenia Dioso pitabarata xaniavaetsia bejinavanapatsi asaēyata vajatonacuenebinexa pacuenia Dioso nacaitoroba. Nexata copiaya benavecuacopatatsi papibisijamatabēcuenē xainatsi. Tsi-paji bajarapapibisijamatabēcuenē nacaitorobabiaba pibisiacuenē vaxaexanaenexa. Bajarapapibisijamatabēcuenē baja becopabatsi vaxaexanavanapaenexa xua Dioso nacaitoroba. ² Itsa najamatabēcuenecopatatsi Dioso javabelia vajanacayavenonaponaenexa, nexata benajamatabēnapitabiabatsi Jesús.

Tsipaji Jesús vajanacasivatēpaexae, Dioso aneconijibia nacatane. Jesús pejamatabēcueneta Dioso nacayavenonanua vajaajamatabēcuenesaē tsavanapaenexa Dioso vajajumecovēnētsijava matapania vajanacacapanepaejavabelianexa. Pajivi naneconita, cruzata rutatsi pebeyaxuabinexatsi pijaneconi yabara. Bajarapacuenia itsa naneconitsiaexanatsi, bitso piauracuene. Itsiata baitsi jane Jesús nacopata bajarapacuenia pebeyaxuabinexatsi. Bajarapacuenia Jesús nacopata pebeyaxuabinexatsi tsipaji natsivajēnaeyapētane pejamatabēcuenēbarēyajanexa icatsia itsa asaē petēpaecujinae, daxitajivi pijaneconi pematamotsixae. Aeconoxae baja nexata Jesús tronovēnējavata athēbētatsia eca, Dioso pemuxuneneta, pecujanenia, penajuaevetsinexabeje daxitacuene.

³ Pacanaējēre Jesús piamatabēcuenesaē tsaponaponaejava, pibisiacuene pexanaevi pinijicuenia bejiobiaexanae atatsi. Bajarapacue ne pacanaējētsianame itsamonae itsa pacabejiobiaexana Jesús panejumecovēnētsijava yabara. Nexata apo pacueranaemē tsane Dioso patonacuenebijava. Apo pajamatabēcuenēfaeafenaemēnua tsane. ⁴ Paxamē panajamatabēcuenesaētavanapame pibisiacuene paneexanaeyaniva. Bajarapacuenia panajamatabēcuenesaētavanapae atamē pibisiacuene paneexanaeyaniva, itsiata abaxē pibisiacuene pexanaevi apo pacayajuvēnēbeyaxuabi. Bajaraxuata panevajēnaeyabelia bepanajamatabēcuenesaētavanapame pibisiacuene paneexanaeyaniva. ⁵ Pētsa panacofēnētame Dioso papecamuxujobiava papecajamatabēcuenesaēya exanaenexa itsa pacamuxujobia bepapeximēcuenia. Tsipaji Dioso pejumelivaisibaxutota paxamē yabara jumaitsi mapacueniaje:

Taxi, xanējavaberena pananeconitsixae, itsa pacananeconitsiaexanaenatsi, pētsa payanaepaname. Pētsa pasivajamatabēcuenēfaeafenamenua itsa pacabijatanetsi xua yabara pananeconitame. ⁶ Pacananeconitsiaexanaenatsi. Tsipaji xanē muxujobiaya bananeconitsiaexanajē pajivi asivanē, baitsi daxita pamonaetaxicuenia tataevi,

jai Dioso pejumelivaisibaxutota paxamē yabara.

⁷ Nexata patonacaevere Dioso muxujobiaya papecananeconitsiaexanaenexa. Tsipaji Dioso papeximēcuenia pacatanē. Jivi ata baja cajena pexi muxujobiaya banacoxivitsata. ⁸ Nexata Dioso muxujobiaya itsa apo pacaevetsi tsipae, Diosojavabelia pananeconitsi atamē, nexata Dioso papeximēcuenia apo pacatae tsipae. Tsipaji jivi ata, pexi pexinaevi, muxujobiaya banacoxiconita. ⁹ Vaxaitsi abaxē pamatacabi pejevaxitsi mapanacuata, vaxajivi nacamuxujobiaya banacaconita. Nexata vaxajivi yayatanetsi. Nexata biji vaxaitsi bitsoyo bejumecovēnētatsi vaxa Dioso, ponē eca athēbētatsia, vajanacarajutsinexa matacabi apo pevereveceajava. ¹⁰ Itsa abaxē vaxajivi mapanacuata nacavitsata, muxujobiaya banacaconita. Tsipaji vaxajivi nacatojitsipa xaniavaetsia vajatojinavanapaenexa. Bajaraxuata nacamuxujobiaya banacaconita pacuenia vaxajivi nacatojitsipa vajatojinavanapaenexa. Itsiata baitsi jane vaxa Dioso muxujobiaya nacananeconitsiaexana pepacuene vajacopatsinexa pibisiacuene vajaexanaejava. Nexata bajarapacuenia Dioso nacajamatabēcueneyavenona vajaperujamatabēcuenemivecua vajanajamatabēcuenē pēnēyorotsinexa Diosojavabelia. Nexata pacuenia Dioso jamatabēcuenēitsi, bajara vaxaitsi ata vajajamatabēcuenēitsinexa. ¹¹ Paepatota vaxa Dioso nacamuxujobiaya nacananeconitsiaexana, bajarapaepatota abaxē apo sivajamatabēcuenēbarēyatsi xua nacatocopiapata. Itsiata baitsi jane pajivi Dioso muxujobiaya naneconitsiaexanatsi, yapētane

baja xua yabara naneconitsiaexanatsi. Nexata baja copata bajaraxua. Nexata baja jamatabëcuenebarëyaya xaniavaetsia ponapona.

Pacuenia tsiayaitsi tsane pajivi namuxujemata Dioso pejumelivaisi yabara pelivaisi

¹² Pacopabare baja panejamatabëcuene cueranaejavami. Panevajënaeyabelia panajamatabëcuenesaëtaponare. Tsi paji baja panajamatabëcuene copatame Diosojavabelia papecayavenonaenexa. ¹³ Pëtsa pajumecovënëtame itsalivaisi Dioso pejumelivaisivecua. Èpexaniajailivaisi, Dioso pejumelivaisi, panevajënaeyabelia pajumecovënëtavanapare. Nexata itsamonae Dioso pejumecovënëtsivi, pamona abaxë apo ajamatabëcuenesaë Dioso pejumecovënëtsijava, pacaitaxutua ajamatabëcuenesaë tsaponae tsane.

¹⁴ Daxitajivijavabelia pexaniajamatabëcuene patoxainare. Nexata aneconijibia pajinavanapaenae Dioso pitabarata. Pajivi aneconijibia apo ponaponae tsane Dioso pitabarata, bajarapajivi Dioso apo yajavaponapona tsane. ¹⁵ Xania baja panayajivitaema. Pëtsa pacopabame Dioso panejumecovënëtsijava, Dioso papecacopatsiyaniva papecaitaxutotsoniatæjæva panepujumecovënëtsivi Dioso. Pacuenia piatsaxaënëboto daxitamera bijianaëjitsipa, baja pajamatabëcuene itsimë tsi pæ caenë ata, paxamëyajuvënënë, pibisiacuene itsa exanaëjitsipa. Pacajamatabëcuene bijianaëjitsipa padaxitamë. ¹⁶ Panayajivitaemanua itsanë ata, paxamëyajuvënënë, pejaitsiyaniva itsava pepo pijavavecua. Petiriva ata pejaitsiyaniva itsanë pepo pamonavecua. Panayajivitaemanua panejumeaebiyani Dioso najumecapanepaeya papecajumaitsijava. Pëtsa Dioso pajumeaebame pacuenia bajayata Esaúpijinë jumeaeba Dioso najumecapanepaeya pejumaitsijavatsi. Esaú picani matapijinëxæ, Dioso yavenonabi bijitsiatsi. Nexata itsajota Esaú bitso piajani, pejuyapijinëjavabelia pexæjava caenabani namitsavajëta. Nexata pejuyapijinë jumaitsitsi: “Pacuenia nexæjava nevajëtame, carajutsianatsi. Nexata xua Dioso cayavenonabiapiæba, bajaraxua juya xanë netocopatsianame,” jaitsi. Nexata Esaú jejai. Pejuyapijinëjavabelia baja tocopata xua picani Dioso yavenonabi bijitsiatsi. ¹⁷ Payapëtaneme rabaja pacuenia Esaúpijinë exana pejuyapijinë petocopatsicujinae xua picani Dioso yavenonabiapiæbatsi. Esaúpijinë picani paxa itoroba Diosojavabelia petovajëtsinexatsi Dioso peyavenonabi binexatsi paxa pevënamuto. Itsiata baitsi jane paxa apo jumejajitsi. Nexata Esaúpijinë bitso nua pejuyapijinë petocopatsixæ xua picani Dioso yavenonabi bijitsiatsi. Itsiata baja acuenebi pexanaejæva. Bajaraxuata paxamë ata pëtsa pacopabame Dioso panejumecovënëtsijava Dioso najumecapanepaeya papecajumaitsijava.

¹⁸ Paxamë panejumecovënëtsixæ Dioso, pacatocopata rovalia panevajëtsinexa Diosojavabelia. Nexata apo panamatavenonaemë paneponaenexa itsanacuajavabelia panevajëtsinexa Diosojavabelia. Bajayata Israelpijinë pemomoxi pata ibotsutoxanetotabuyaberena. Nexata bajarapatsutotabuta navajëca Diosojavabelia. Nexata bajarapatsutojumatsia Israelpijinë pemomoxi tane beisotocotia itsajota aitaquiri. Bajarapaepatota bitso emaxaneto, ayajivobo yajava.

¹⁹ Bajarapaepatota Israelpijinë pemomoxi jumetane penajumetsijava trompeta. Jumetanenua Dioso pecuaicuaijajavatsica athëbëvetsica bajarapamonæjavabelia. Nexata judiovi pecajunavi bitso, vajëta Diosojavabelia Dioso pecuaicuaijaiyaniva pematatsënëa. ²⁰ Bajarapacuenia Israelpijinë pemomoxi vajëta Diosojavabelia tsi paji bitso jumecujunava Dioso pejumaitsijavatsicatsi mapacueniaje: “Pajivi ponaena

mapatsutoyenepanajavaje, bajarapajivi tseconaenatsi ibotonëta. Itsa jume, becuerebonëta cacuatsianatsi pebeyaxuabinexatsi bajarapacuenia. Dajubinë ata itsa ponaena mapatsutoyenepanajavaje, bajarapacuenia exaenaenatsi,” pejaijavatsica Dioso athëbëvetsica, Israelpijinë pemomoxi bitso jumecujunava. ²¹ Nexata Israelpijinë pemomoxi bajarapajume itsa jumetane, pecajunavi, bitso neconecoja. Moisés-pijinë ata jumaitsi: “Xanë ata rabaja tacajunavi, bitso neconecojanë,” jai.

²² Itsiata baitsi jane paxamë baja aeconoxae Dioso panejumecovënëtsixae, Dioso baja pacatocopata panepatsinexa Dioso pijatomarabetsia roviaalia panevajëtsinexa Diosojavabelia. Bajarapatomaratsia eca Dioso, piasaëtsaponaponaenë. Bajarapatomara pevënë Jerusalén. Eca Sióvnënë tsutojumata. Bajarapatomaratsia Dioso pijajivi ángelevi, miles paángelevibeje, yajavaponapona. ²³ Bajarapatomaratsia payajavanacaetuatsianame itsamonae, pamonaë panevajënaeya jumecovënëta Dioso. Bajarapamonae vënëyaquinarubatsi bajarapatomaratsia. Panacaetuatsianame Dioso pitabarata, ponë naneconitsiaexanaena daxita pamonaë naneconita bajaraponëjavabelia. Payajavanacaetuatsianamenua daxita pamonaemi tēpa Dioso pepua pejumecovënëtsivi. ²⁴ Panajamatabëcuenecopatame baja Jesucristojavabelia, ponë pejamatabëcueneta Dioso nacavecuaajibiaexana vajaneconimi. Nexata Dioso aneconijibia nacatane. Bajayata Abelpijinë itsa beyaxuabatsi, ponë beyaxuabatsi, juya picani xanepana peyamatomobeyaxuabinexatsi. Itsiata baitsi jane pamatacabi Jesús beyaxuabatsi cruzata, itsajivi ata apo najamatabëxainae Jesús peyamatomobeyaxuabinexatsi. Tsipaji Jesús petëpaejava pejamatabëcueneta, Dioso aneconijibia taejitsia daxita pamonaë jumecovënëta Dioso.

²⁵ Bajaraxuata Dioso pejumelivaisi vajanacatsipaebijava, bejumecovënëtsi. Bajayata pamonaë apo jumecovënëtsi Dioso Moisés-pijinëta penajumecopatsilivaisi, naxuaba Diosovecua. Dioso apo capanepaetsi bajarapamonae. Vaxaitsi ata bitsoyo Dioso nacananeconitsiaexanaejitsipa itsa apo jumecovënëtsi ponë nacajunata athëbëvetsica. ²⁶ Paepatota pina Dioso athëbëvetsica Sinaivënë tsutojumavetsica cuaicuaiajai, baja pina paepatota ira najëaba. Nexata icatsia xuacujinae hexëa Dioso tajëvelia najumecapanepaeya jumaitsi mapacueniaje: “Itsamatacabi icatsia ira najëabiaexanaenajë. Nexata jane baja caecuenia ira, itaboxo yajava, najëabiana,” jai Dioso tajëvelia najumecapanepaeya. ²⁷ Xua yabara tajëvelia Dioso najumecapanepaeya jumaitsi, maitsi tsaneje. Mapairaje, itaboxo yajava, itsa najëabiana, daxitacuene xua Dioso exana mapanacuataje, vereverecaena. Itsiata Dioso pejumelivaisi, pijatomara ata, apo vereverecae tsane. ²⁸ Xua itsamatacabi Dioso nacatocopatsiana athëbëtsia vajatoevetsinexa, bajaraxua apo vereverecae tsane. Bajaraxuata vaxaitsi pexaniajamatabëcuene rajutatsi Diosojavabelia. Yaiyataeya vajajamatabëéthëtovetsina Diosojavabelia jumai tsabiabi tsanetsi: “Diosomë, bitso ayaijamatabëcuenenëmë,” jai tsabiabi tsanetsi Dioso vajanacasivajamatabëcuene barëyanexa. ²⁹ VajaDiosu jivi peneconitsiaexanaenë. Pacuenia isoto vayafa itsa tajunenajetarua, verebiaba daxita piabejjava patajuejavata, bajara pijinia pacuenia Dioso verebiabiana pamonaë pibisiacuene pexanaevi.

13

Pacuenia bexanavanapatsi Dioso vajanacasivajamatabëcuene barëyanexa yabara pelivaisi

¹ Pëtsa pacopabame namataenetsia panenasivajava Dioso panejume-covënëtanapaevi. Panevajënaeyabelia namataenetsia panaasivamëre. ² Pëtsa panacofënëtime xaniavaetsia panecopiapitabiabinexa apo paneypëtaevi ata itsa pata panijaboyaberena. Bajayata pina bajarapacuenia xaniavaetsia jivi pecopiapitabivivi, xaniavaetsia copiapita ángelevi, apo yapëtae ata ángelevicuene.

³ Panajamatabënapitabiabare pamonae jebatsi penaneconitsivi pejebabiabibota Dioso pejumecovënëtsixae. Paxamë ata, bajarapamonae yajava, bepanenajuananeconitsivi panataema. Pamonae ata bejiobiaexanatsi Dioso pejumelivaisi yabara, bajarapamonae ata pajamatabëcueneyavenonare. Paxamë ata, bajarapamonae yajava, bepapecabejiobiaexanaevi panataema.

⁴ Daxitajivi beyaiyatane penacojiobijivi. Pajivibeje baja napitabeje, apo benavecyanamatayajitsibeje. Pebi apo bejaitsi itsava pijavavecua. Petriva pijinja apo bejaitsi itsanë pamonavecua. Tsipaji Dioso naneconitsiaexanaena bajarapitsipibisiacuene pexanaevi.

⁵ Pëtsa bitso pajiitsipame palata. Pasivajamatabëcuenebarëyamëre saya xuyovajëto paxainame. Tsipaji Dioso jumaitsi mapacueniaje: “Apo copatsinë tsane patacayajavaponaponaevajava,” jai Dioso. ⁶ Bajaraxuata ajumejunavijibia namataenetsia najumaitsitsi mapacueniaje: Dioso cajena vajanacayavenonaenë. Nexata apo junavitsi tsane, itsajivi nacaitsacueniabijitsia ata, najaitsi vaxaitsi namataenetsia.

⁷ Panajamatabënapitabiabare pamonae bajayata pacatsipaeba Dioso pejumelivaisi. Pacanaëjere pacuenia bajarapamonaemi Dioso pejumecovënëtsijavaveliacujinae, xaniavaetsia jinavanapa Dioso pitabarata matapania petëpaejavabelianexa. Bajarapacuenia paxamë ata Dioso pitabarata xaniavaetsia pajinavanapare matapania panetëpaejavabelianexa.

⁸ Jesucristo epatua itsajamatabëcuene apo xinae tsane. Pamatacabibeje ponapona, caejamatabëcuene xainaponaponaena. Pevajënaeyabelia ata daxitamatacabijavabelianexa, caejamatabëcuene xainaponaponaena. ⁹ Pëtsa pacopabame panejumecovënëtsijava palivaisi baja pajumecovënëtime. Pëtsa pajumecovënëtime itsalivaisi bajarapalivaisivecua. Paxamë baja Dioso panejumecovënëtsijava, pajamatabëcuenesaëmë tsavanapae Dioso asivaya papecayavenonaexae. Diosojavabelia apo pajamatabëcuenesaëmë tsavanapae tsipae, panexaejava paatsobi atomë. Itsamonae jumecovënëta pexaejava piatsobinexa pitavetsilivaisi. Nexata pexaejava atsobabiaba. Itsiata baitsi jane pexaejava piatsobijava pejamatabëcuenetata apo jamatabëcuenesasaëyaexanaetsi Dioso pejumecovënëtsijava.

¹⁰ Jesús itsa cobematabiabarutatsi cruzajavabelia, vaxaitsi nacasivatëpa. Nexata pamonae tsiteca ëperujulivaisimi sivajamatabëjumaitsi: “Itsa jumecovënëtanaponaenajë Dioso Moiséspijinëta penajumecopatsilivaisi, nexata xanë ata Dioso necapanepaena,” sivajamatabëjai, bajarapamonae saya jamatabëcuenenavëxaniaba. Bajarapitsijamatabëcuene penajamatabëxainaeivi, apo capanepaetsi tsane Diosojavabetsia. Tsipaji Jesús pesivatëpaejavatsi, apo jumecovënëtsi. ¹¹ Sacerdotevi pepo penamatacaitorobinë dajubinë beyaxuababiaba. Nexata bajarapajana cajoneyabiaba Lugar Santísimojavabelia, itsajota baitsi Dioso peponaponaenexa yatuucuta. Bajarapayatuucutsijavaenëta sacerdotenë dajubinë pijana rajutabiaba ofrendacuenia Diosojavabelia, Dioso pevecuaajibiaexanaenexatsi pibisiacuene pexanabiabineconi. Nexata bajarapadajubinë pevi

sacerdotenē itsa tajuita, tomarapēnyabelia tajuitabiaba. ¹² Bajaraxuata Jesús ata Jerusalén tomarapēnyabelia bejiobiaexanatsi. Bajaraxuacujinae beyaxuabatsi. Nexata daxita pamonaē jumečovēnēta Jesús pesivatēpaejavatsi, bajarapamonaē Jesús pijana pejamatabēcueneta Dioso vecuaajibiaexanatsi pibisiacuene pexanaeconimi. ¹³ Nexata vaxaitsi ata becopatatsi baja perujulivaisi vajajumecovēnētsijavami. Nexata bejumecovēnētatsi Jesús pelivaisi. Nexata pacuenia Jesús nacopata itsamonaē pebejiobiaexanaenexatsi vajanacasivatēpaenexa vajaneconi yabara, bajara pijinia pacuenia vaxaitsi ata benacopatatsi itsamonaē vajanacabejiobiaexanaenexa Jesús pelivaisi yabara. ¹⁴ Mapanacuataje apo xainaetsi patomarata daxitamatacabijavabelianexa jinavanapaejitsiatsi. Biji rajane abaxē vajēnaeēvetavanapatsi athēbēpijtomara, patomarata patsijitsiatsi athēbētatsia. ¹⁵ Jesucristo vajanacasivatēpaexae, Dioso nacatocopata vajavajētabiabinexa Diosojavabelia. Nexata itsa vajētabiabanatsi Diosojavabelia, jumaitsitsi tsabiabi tsane: “Diosomē, bitso ayajamatabēcuenenēmē.” jaitsi tsabiabi tsane Diosojavabelia. Bajarapacuenia vajajumaitsiabiabijava Diosojavabelia, Dioso taena ofrendacuēnia bevajarajutaponaejava Diosojavabelia. Bajaraxuata itsa vajētabiabanatsi Diosojavabelia, bajarapacuenia jumai tsabiabi tsane. ¹⁶ Pētsa panacofēnētame pexaniacuene panetoexanavanapaejava itsamonaējavabelia. Itsajivi penamatavenonaējava, parajutsianame paneyavenonaenexa bajarapacuenia. Bajarapacuenia itsa parajutsianame itsajivi penamatavenonaējava, Dioso pacasivajamatabēcuenēbarēya tsane.

¹⁷ Pamonaē ancianovi, xua pacaitoroba, pajumecovēnētabiabarē. Itsamonaē ata, pamonaē pijinia Dioso tocopatatsi papecaevetsinexa Dioso panejumecovēnētsivixae, xua pacaitoroba, pajumecovēnētabiabarē. Bajara-pamonaē yapētanenua pacuenia Diosojavabelia naneconitsipa, xaniavaetsia itsa apo pacaevetsi. Itsa pajumecovēnētabiabaname papecaevetsivi papecaitorobicuēnia, nexata papecaevetsivi jamatabēcueneyavenonaēya pajinavanapaejava. Nexata pacasivajamatabēcuenēbarēya tsane papecaevetavanapaejava yabara. Paxamē itsa apo pajumecovēnētsimē tsipae, nexata papecaevetsivi pacasivajamatabēcuenēbējai tsipae. Nexata papecaevetsivi toacuenebi tsipaetsi papecajamatabēcueneyavenonaenexa Dioso panejumecovēnētsijava yabara.

¹⁸ Panetovajētaponae name Diosojavabelia. Paxanē pajamatabējumaitsinē: “Vaxaitsi baja apo naneconitsitsi Diosojavabelia, jivijavabelia ata,” pajamatabējanē. Bajarapacuenia patavajēnaeyabelia Dioso pitabarata aneconijibia patajinavanapaejava, panetovajētsianame Diosojavabelia. ¹⁹ Panetovajētaponae name Diosojavabelia Dioso patanetocopatsinexa patapanaenexa paxamējavabelia. Tsipaji icatsia pajitsipajē bepijia patapatsinexa paxamējavabelia.

Pacuenia Pablo Dioso pejumecovēnētsivi tovajēta Diosojavabelia, pacuenia ata jamatabēnajina itsamonaē Dioso pejumecovēnētsivi, yabara pelivaisi

²⁰⁻²¹ Jesucristo vajanacasivatēpaecujinae, vaxa Dioso icatsia asaēyaxanatsi. Bajaraxuata yapētanetsi pexaniajaicuene Dioso athēbēabetsia vajanacapanepaejavanexa daxitamatacabijavabelianexa. Dioso yavenona daxitajivi jamatabēcuenexanepanaēya pejinavanapaejava. Nexata pacatovajētatsi Diosojavabelia papecarajutsinexa xua panamatavenonaē name, panetoexanavanapaejava pacuenia Dioso pacatojitsipa. Vajētajēnu Diosojavabelia Jesucristo pejamatabēcueneta vajanacajamatabēcuenexanebinexa pacuenia jitsipa. Pacuenia oveja pexainenē xaniavaetsia evetaponapona pijaoveja, ba-

jara pijinia pacuenia vajatuxanenë Jesucristo xaniavaetsia nacaevetapon-
apona. ¡Jesucristo bitso ayaijamatabëcuenenë tsaponaponae daxitamatacabi-
javabelianexa! Bajara itsi tsane.

²² Tajamonae, pacaitorobatsi xaniavaetsia panenamuxunaevetsinexa
palivaisi pacatoyaquinatsi mapabaxutotaje. Tsiquirilivaisiyo saya
pacatoyaquinatsi patacamuxujiobinexa panevajënaeyabelia paneaja-
matabëcuenesaënexa Dioso panejumecovënëtsijava. ²³ Pexanialivaisiyo
pacatoyaquinaliatsi patacatsipaebinexa mapacueneye. Vajabananë
Timoteo rabaja pitsapa penaneconitsivi pejebabiabibovecua. Itsa
patsiarena bepijiayo xanëjavaberena, nexata barëponaenajë paxamëjavabelia.

²⁴ Nebajacobiana daxita Dioso pejumelivaisita papecaevetsivi, daxita va-
jamonae Dioso pejumecovënëtsivi yajava. Vajamonae ata, Italia nacuapijivi,
pacajamatabënajinalia.

²⁵ Daxita paxamë pacatovajëtatsi Diosojavabelia papecayavenonaenexa
Dioso. Bajara itsi tsane.

Mapabaxutoje Santiago toyaquina Dioso pejumecovënëtsivijavabelia

Pacuenia Santiago toyaquina mapabaxutoje Dioso pejumecovënëtsivi nacayajatsia pejinavanapaevi yabara pelivaisi

¹ Xanë Santiagonë, Dioso pijajivitonënë, vajatuxanenë Jesucristo ata pijajivitonënë. Pacatoyaquinatsi pajudïovimë patacabajacobinexa. Israelpijinëmi pexi doce ponëmibeje papëmomoxiyajuvënëvimë. Pepo panijanacuata picani panejinavanapaevimi. Aeconoxae baja pepo panijanacumivecua, nacayajatsia pajinavanapame daxita nacuanëjava.

Pacuenia Dioso pejumecovënëtsivi itsa jamatabë yapëtanë pacuene xanëpana pexanaenexa, bevajëta Diosojavabelia yabara pelivaisi

² Tajamonae, pasivajamatabëcuenebarëyamë tsane daxitacuene, apo panejitsipaecuene ata, itsa pacatocopiapatsiana. Tsipaji raja bajarapacuene pacatocopiapatsiana papecajamatabëcueneëjëtsinexa Dioso panejumecovënëtsijava yabara. ³ Bajarapacuenia Dioso panejumecovënëtsivi pacajamatabëcueneëjëtaponaeana paneajamatabëcuenesaë tsaponaeenexa panevajënaeyabelia Dioso panejumecovënëtsijava. Payapëtaneme rabaja bajarapacuene yabara. ⁴ Apo panejitsipaecuene pacatocopiapatsi ata, pajamatabëcuenesaëmë tsavanapae tsane bajayajebi. Nexata pajamatabëcuenevitsabaponaenae Diosojavabelia. Nexata apo pacatosaicae tsane itsalivaisi ata panejamatabëthëtota.

⁵ Paxamë itsa pajamatabë yapëtaneme pacuene xanëpana paneexanaenexa, nexata bepavajëtamë Diosojavabelia papeca yapëtae yaexanaenexa Dioso. Nexata Dioso pacayapëtae yaexanaenae pacuene xanëpana paneexanaenexa. Dioso cajena bayapëtae yaexana daxita pamonaevajëta bajaraponëjava. Apo jumeitavetsi cajena itsa vajëtsi.

⁶ Itsa pavajëtamë Diosojavabelia, pajamatabëjumaitsimëre: “Dioso cajena nacayapëtae yaexanaenae xua vajëtsi,” pajamatabëjamëre. Pëtsa pajamatabëjumaitsimë: “Dioso cajena itsiata apo nacayapëtae yaexanae tsane xua vajëtsi,” pajamatabëjamë pëtsa. Pajivi jumeaeba Dioso peyapëtae yaexanaejavanexatsi, bajarapajivi xaniavaetsia apo najamatabëxainae. Bajarapajivi pejamatabëcuene bemalataca picani. Pacuenia malataca xaniavaetsia apo rucaev jovibota, bajara saya jamatabëcueneitsi bajarapajivi. Apo najamatabëxainae caelivaisi, palivaisi Dioso yapëtae yaexanaejitsiatsi. ⁷⁻⁸ Bajarapajivi anijamatabëcuenebeje xaina. Najamatabëcuene epatajërërëcabiaba itsa exana daxitacuene. Nexata pajivi jumeaeba Dioso peyapëtae yaexanaejavanexatsi, pëtsa patocopatame pejamatabëjumaitsinexa: “Dioso cajena nerajutsiana tavajëtsijava,” pejamatabëjainexa. Dioso cajena apo rajutsitsi tsane xua vajëta bajarapajivi.

⁹ Dioso pejumecovënëtsinë apo xainae ata pecobecovëjavayo, jivi apo yayiatatatsinua, itsiata bejamatabëcuenebarëya Dioso pejumecovënëtsinëxae. Tsipaji Dioso pejunatsiaetsi Dioso pijajivitonënexa, apo bejiobi tsane daxitamatabijavabelianexa. ¹⁰ Dioso pejumecovënëtsinë itsa bitso pexainae nëpexainaejava, itsamonae itsa yacajërëtsi pexainacuene, itsiata bejamatabëcuenebarëya Dioso pejumecovënëtsinëxae. Tsipaji pacuenia ponatoxi bepijia matonoverevereca, bajara pijinia itsi tsane bitso pexainacuene ata.

Bepijia vereverecaena. ¹¹ Itsa baja juameto tajë rucaina, icotia bitso ataju. Nexata ponatoxi tsaquena. Pematono ata othopa. Nexata pexaniamatonojavami ata verevereca bepijia. Bajara pijinia itsi tsane bitso pexainaejava pexainaevi ata. Yajavavererecaena pexainaejava pecanajetanucaepa-tota ata.

Pacuenia Dioso jivi apo jamatabëcuenejëtsi pibisiacuene pexanaeyaex-anaenexa yabara pelivaisi

¹² Pamonaë jamatabëcuenejëtsi atatsi, najamatabëcuenecaita pibisiacuene pexanaeyaniva, bajarapamonaë jamatabëcuenebarëya. Tspajji itsa vecuapanepa pejamatabëcuenejëtsijavatsi, pibisiacuene exanaenejeva, nexata bajarapamonaë Dioso rajutsianatsi pexaniacuenejava. Rajutsianatsi matakabi apo pevererecajava. Bajarapacuenë yabara Dioso najumecapanepaëya jumaitsi perajutsinexatsi pamonaë jitsipa Dioso. ¹³ Itsa pacajamatabëcuenejëta pibisiacuene panexanaenexa, pëtsa jamatabëcuenenavëxaniabiaya pajumaitsimë: “Dioso raja nejamatabëcuenejëta pibisiacuene taexanaenexa,” pajamë pëtsa. Dioso cajena apo jamatabëcuenejëtsi itsajivi ata pibisiacuene pexanaeyaexanaenexa. Itsajivi ata pijinia apo cajëpaetsi pejamatabëcuenejëtsinexa Diosojavabelia pibisiacuene pexanaenexa Dioso. ¹⁴ Pajivi jamatabëcuenejëtatsi pibisiacuene pexanaenexa, bajarapajivi copiaya pejamatabëëthëtota jamatabënaponapona papibisiacuene jamatabëexana. Nexata jane baja itsa jamatabëcuenejëtatsi pibisiacuene pexanaenexa, bajarapapibisiacuene exana. ¹⁵ Pajivi pibisiacuene exana, bajarapajivi exana pacuenia copiaya pejamatabëëthëtota najamatabëxaina. Nexata tsiteca pibisiacuene itsa exanapona, pepacuenë Dioso vecua naxuabiana bajarapapibisiacuene pexanaponaexaë.

¹⁶ Tajamonaë bitso patacaasivavi, jamatabëcuenenavëxaniabiaya pëtsa pajamatabëjumaitsimë: “Dioso nejamatabëcuenejëta pibisiacuene taexanaenexa,” pajamatabëjamë pëtsa. ¹⁷ Tspajji daxita pacuene pepo pexaniacuene, Dioso baja cajena vajanacatoitorobicueneetsica. Bajaraponë pexanaenë daxita xua naitayotarubena itaboxotatsia. Dioso cajena daxitamatacabijavabelianexa caejamatabëcuene penajamatabëxainaeñë. Caejamatabëcuene Dioso nacasivanajamatabëxaina vaxaitsijavabarena. ¹⁸ Dioso baja cajena copiaya najamatabëxaina pexanaenexa pacuenia jitsipa. Nexata nacayapëtaëyaexana pejumelivaisi pexaniajailivaisi. Bajaraxuata nacarajuta pejanajamatabëcuene pitavajamatabëcuene. Vaxaitsi copiaya Dioso itsa jumecovënëtsi, Dioso pexitsi nacaexana. Pamonaë ata cotocaevi Dioso jumecovënëta, bajarapamonaë ata Dioso pexi exanatsi. Nexata vaxaitsi, copiaya Dioso vajajumecovënëtsivi, Dioso nacatane bematapijivitsi. Cotocaevi pijinia Dioso pejumecovënëtsivi, Dioso tanetsi bejuyapijivi.

Pacuenia bexanavanapa pamonaë xaniavaetsia jumecovënëta Dioso yabara pelivaisi

¹⁹ Tajamonaë bitso patacaasivavi, pacanaëjëtsianame mapalivaisije, palivaisi pacatsipaebijitsiatsi. Daxita paxamë xaniavaetsia bepanamuxunaevetame Dioso pejumelivaisi. Apo bepacuaicuaijamë abaxë copiaya xaniavaetsia panajamatabëxainaejevamë. Apo bepaanaepanaemënuë bepijia. ²⁰ Tspajji itsa anaepanatsi, Dioso apo toexanaetsi pexaniacuene, pacuene Dioso jitsipa. ²¹ Bajaraxuata pacopabare daxita pibisiacuene panenajamatabëxainaejava. Pacopabarena daxita pibisiacuene panexanaejava it-samonaëjavabelia. Dioso raja pejumelivaisi pacatsijamatabëuba. Bajaraxuata beveliajamatabëcuenevi nataëya pajumecovënëre Dioso pejumelivaisi.

Bajarapalivaisi ita pajumecovënëta, nexata pacacapanepaena Diosojavabelia.

²² Pacuenia Dioso pejumelivaisita jumaiti, jumecovënëtsiaya paexanaponare. Pëtsa pajamatabëjumaitimë: “Pacuenia Dioso pejumelivaisita jumaiti, apo exanae atanë, apo itsacuene,” pajamatabëjamë pëtsa. Tsipaji saya pajamatabëcuenenavëxaniabijitsipame. Nexata ita apo paexanaemë tsipae pacuenia Dioso pejumelivaisita jumaiti, pananeconitsipame Diosojavabelia. ²³ Pajivi jumetae ata Dioso pejumelivaisi, itsiata ita apo exanae pitorobicueniatsi, bajarapajivi jamatabëcueniatsi pacuenia itsi ponë naitabarata tsaxuta. ²⁴ Ponë tsaxuta naitabarata, penaitabaratacujinae pona baja. Nexata bajaraponë bepijia nacofënëta pacuenia itabarajumapeitsi. ²⁵ Dioso cajena pejumelivaisi bitso xanepana. Caëjëpatsinua vajanacacapanepaenexa bajaraponëjavabelia. Pajivi daxita bajarapalivaisi pitorobicueniatsi exanaponapona copatsinejeva, bajarapajivi bitso Dioso yavenonaenatsi daxitacuenëjavabelia.

²⁶ Pajivi jumaiti ata: “Xanë bitso toexanaponaponajë Dioso pejitsipaecuenia,” jai ata, itsiata itaxutojema ita cuaicuajai tsabiabi, bajarapajivi saya jamatabëcuenenavëxaniaba. Tsipaji Dioso apo pejitsipaecuenia cuaicuajai. Nexata bajarapajivi xua Dioso toexanaponapona apo tonamatamotsi tsanetsi Diosojavabelia. ²⁷ Dioso pejumecovënëtsijivi, pajivi Dioso aneconijibiatanetsi, exanaponapona mapacueniaje. Yavenona tsonijixi. Yavenonana pamonae pevecuatëpaevitsi bitso ita namatavenona itsacuenëjavaxi. Pajivi Dioso pejumecovënëtsijivi, nayajivitaeyaponapona pibisiacuene pexanaeyaniva, pacuene exanabiaba mapanacuapijivi, Dioso apo pejumecovënëtsivi.

2

Pacuenia Dioso pejumecovënëtsivi muxujibatsi daxitajivi najëpaeya jamatabëcuenexanepanaeya petanexa yabara pelivaisi

¹ Tajamonae, ayajamatabëcuenenë vajatuxanenë Jesucristo panejumecovënëtsixae, daxitajivi najëpaeya pataema. Pëtsa itsamonae bijiaya pataneme. ² Nexata panenacaetuatsijavata, riconë, pexaniajava penaxatatsinë, napatsipa, oro anillo penacobexatatsinë. Bajarapaepatota pijinia bepejibinë, perujuesetoyo penaxatatsinë, napatsipa. ¿Detsa pacuenia pacopiapitsipame bajarapitsinëbeje? ³ Caenë meta xaniavaetsia pacopiapitsipame, pexaniajava penaxatatsinë. Paecaeyaexanaejitsipame pexaniajavata. Ponë bepejibinë, apo pacopiapitsimë tsipae xaniavaetsia. Saya panucaeyaexanaejitsipame. Itsa jume, paecaeyaexanaejitsipame irata. Nexata bajarapacuenia ita paexanaejitsipame, pexaniacuene apo paexanaemë tsipae Dioso pitabarata. ⁴ Bajarapacuenia ita paexanaejitsipame, najëpaeya bajaraponëbeje apo pataemë tsipae. Caenë payaiyataejitsipame. Itsanë saya bijiaya pataejitsipame. Nexata bajarapacuenia ita paexanaejitsipame, pibisiacuena panajamatabëxainaejitsipame.

⁵ Tajamonae bitso patacaasivavi, panejumetaema. Dioso raja itapetatsi pamonae apo pexainaevi mapanacuataje. Bajarapamonae Dioso itapetatsi pexi pexanaenexatsi. Nexata bajarapamonae ita najamatabëcuenecopatsiana Cristojavabelia, bitso pexainaevi tsane athëbëtatsia, Dioso pijanacuataatsia, itsajotatsia Dioso eveta daxitacuene. Bajarapamonae ata tocopatsianatsi Cristo pebarëevetsinexatsi daxitacuene,

pacuenia Dioso najumecapanepaeya jumaitsi Dioso pijajivi yabara. ⁶ Itsiata baitsi jane bajarapacuenia bepejiobivi yabara pejumaitsiyava payapëtae atamë, paxamë bijiaya pataeyabiabame bepejiobivi. Ricovi baja cajena xainapona bitso pexainaejava panejumata. Bajarapamonae pacaneconitabiabanua juezmonaejavabelia juezmonae papecananeconitsiaexanaenexa. ⁷ Ricovi cuaicuajijai tsabiabi pibisiacuena Cristo yabara, ponë vaxaitsi yayiyataeya jumecovënëtavapanatsi.

⁸ Dioso pejumelivaisibaxutota jumaitsi mapacueniaje: “Asivamëre itsamonae ata pacuenia xamë nijacuata nasivamë,” jai. Bajarapalivaisi pexanialivaisi bitso daxitalivaisianë matatoxenetsia. Nexata bajarapalivaisi pepacuene itsa pajumecovënëtsianame, pexaniacuene paexanaename. ⁹ Itsa payaiyataejitsipame itsamonae, itsamonae pijinia bijiaya itsa pataejitsipame, nexata paexanaejitsipame pibisiacuene. Pananeconitsipame Diosojavabelia. Tspijajijajepaeya apo pataemë tspiae daxitajivi Dioso papecaitorobicuenia. ¹⁰ Pajivi jumecovënëtsi ata Dioso Moiséspijinëta penajumecopatsilivaisi, itsiata bajarapalivaisita caelivaisiyo itsa apo jumecovënëtsi, nexata itsiata naneconitsiana Diosojavabelia bajarapalivaisita caelivaisiyo apo pejumecovënëtsixae. Nexata bajarapajivi daxita bajarapalivaisi apo bepejumecovënëtsijivicuenia, Dioso taenatsi. ¹¹ Dioso jumaitsi: “Pëtsa jaitame itsava nijavavecua,” jai. Petiriavinexa pijinia jumaitsi: “Pëtsa jaitame itsanë amonavecua,” jai. Dioso icatsia itsajumeyo jumaitsi: “Pëtsa beyaxuabame jivitonë,” jai. Nexata ponë apo jaitsi ata itsava pijavavecua, itsiata itsa beyaxuaba jivitonë, Dioso tanetsi daxita bajarapalivaisi apo pejumecovënëtsinëcuenia. ¹² Jesucristo papecaitorobicuenia itsa paexanaename, nexata apo pananeconitsimë tsanë Diosojavabelia. Itsa apo pajumecovënëtsimë tsane, nexata pananeconitsianame Diosojavabelia. Bajaraxuata itsa pacuaicuajijamë, pacuaicuajijamëre pexanialivaisi. Paexanavapanarena pexaniacuene pacuenia Jesucristo pacaitoroba. ¹³ Paxamë itsa apo paitaxutotsoniataemë itsamonae ata, nexata juya Dioso apo pacaitaxutotsoniatae tsane pamatacabi Dioso naneconitsiaexanaena daxitajivi pibisiacuene pexanaeneconi yabara. Itsiata baitsi jane itsa paitaxutotsoniataneme itsamonae ata, juya Dioso pacaitaxutotsoniataena. Nexata Dioso apo pacananeconitsiaexanae tsane.

Pacuenia Dioso pejumecovënëtsivi pexaniacuene bexanavanapa yabara pelivaisi

¹⁴ Tajamonae, pajivi jumaitsi ata: “Xanë jumecovënëtajë Jesús pelivaisi,” jai ata, itsiata itsa apo exanae pexaniacuene itsamonaejavabelia pacuenia Dioso nacaitoroba, bajarapajivi apo jumenamatamotsi Diosojavabelia. Bajarapacuenia saya itsa jumaitsi tsane pecuibota, bajarapajivi Dioso apo capanepae tsanetsi. ¹⁵⁻¹⁶ Itsamonae Dioso pejumecovënëtsivi bitso namatavenonaejitsipa penaxatatsijava, pexaejava ata. Nexata bajarapamonaejavabelia paxamëyajuvënëjivi jumaitsi ata tspiae: “Xaniavaetsia baja paponare. Dioso pacayavenonaena panenaxatatsijavanexa paneaqueyaniva. Pacarajutsiananua panexaejavanexa ata,” jai ata tspiae, nexata itsiata bajarapajivi apo jumenamatamotsi tspiae. Tspijaji apo itaxutotsoniatae. Saya itoroba peponaenexa. ¹⁷ Bajara pijinia itsi Jesús pelivaisi vaja jumecovënëtsijava. Pajivi pexaniacuene apo toexanae itsamonaejavabelia, bajarapajivi jumaitsi ata: “Xanë jumecovënëtajë Jesús pelivaisi,” jai ata, itsiata apo jumenamatamotsi. Tspijaji pacuenia Dioso itorobatsi, apo exanae.

¹⁸ Nexata pajivi Jesús pelivaisi jumecovënëtsi ata, itsiata pexaniacuene itsa apo toexanabiabi tsane itsamonaejavabelia, nexata meta itsajivi jumai tsane bajarapajivijavabelia: “Xamë jumaitsimë tsabiabi: ‘Xanë jume-

covēnētajē Jesús pelivaisi, jamē tsabiabi. Itsiata pexaniacuene apo toexanabiabimē itsamonaejavabelia pacuenia Dioso nacaitoroba. Nexata apo cajamatabēcueneypētaetsi nexaniajaicuene nejumecovēnētsijava Jesús pelivaisi. Tspaji pexaniacuene apo toexanabiabimē itsamonaejavabelia pacuenia Dioso nacaitoroba. Xanē rajane pexaniacuene toexanabiabajē itsamonaejavabelia pacuenia Dioso nacaitoroba. Bajarapacuenia pexaniacuene tatoexanabiabixae itsamonaejavabelia catsitanajamatabēcueneitajētatsi taxaniajaicuene tajumecovēnētsijava Jesús pelivaisi,” jai meta tsane itsajivi pajivijavabelia pexaniacuene apo toexanabiabi itsamonaejavabelia, Jesús pelivaisi jumecovēnētsi ata. ¹⁹ “Caenē rabaja tsonaponae Dioso,” pejailivaisi paxamē pajumecovēnētame. Xanepana rabaja picani. Itsiata pexaniacuene itsa apo patoexanaemē tsipae itsamonaejavabelia, pajemajamē tsipae. Tspaji dovathi ata, pijajivi yajava, jumecovēnēta: “Caenē rabaja tsonaponae Dioso,” pejailivaisi. Bajaraxuata dovathi pijajivi barēneconecojai pecajunavi. ²⁰ Paxamē pajamatabēcuenelivaisijibimē. Vaxaitsi jumaitsi atatsi: “Xanē jumecovēnētajē Jesús pelivaisi,” jai paxamē pajumecovēnētame. Xanepana rabaja picani. Itsiata pexaniacuene itsa apo patoexanaemē tsipae itsamonaejavabelia, pajemajamē tsipae. Tspaji dovathi ata, atatsi, itsiata pexaniacuene itsa apo toexanabiabitsi itsamonaejavabelia pacuenia Dioso nacaitoroba, ajumematamobitsi cajena Diosojavabelia. ²¹ Bajayata vajasalinainēmi Abrahampijinē xaina pexēnatonēyo. Pevēnē Isaac. Nexata Abrahampijinē Dioso jamatabēcuenejētsiaya itorobatsi penacoxibeyaxuabinexa picani. Dioso jumaitsi Abrahampijinējavabelia: “Nexēnatonēyo beyaxuare ofrendacuena tanerajutsinexamē,” jai Dioso Abrahampijinējavabelia. Nexata Abrahampijinē ajena nacoxibeyaxuabijitsia, Dioso itavetatsi. Abrahampijinē pejumecovēnētsixae pacuenia Dioso itorobatsi, nacoxicētabuata picani penacoxibeyaxuabinexa. Bajaraxuata Abrahampijinē Dioso aneconijibiatanetsi. ²² Abrahampijinē cajena Dioso jumecovēnēta pacuenia tajēvelia Dioso najumecapanepaeya jumaitsi. Bajaraxuata exana pacuenia Dioso itorobatsi. Bajarapacuenia itsa exana Abrahampijinē, najamatabēcueneitajēta pepacune Dioso pejumecovēnētsijava pejamatabēēthētojavavetsina. ²³ Nexata bajarapajamatabēcuenelivaisi yabara Dioso pejumelivaisibaxutota jumaitsi Abrahampijinē yabara mapacueni-aje: “Abrahampijinē jumecovēnēta pacuenia Dioso najumecapanepaeya jumaitsi. Bajaraxuata Dioso aneconijibia tanetsi,” jai baja cajena Dioso pejumelivaisibaxutota Abrahampijinē yabara. Nexata Abrahampijinē yabara jivi jumai tsabiabi: “Abraham raja Dioso piasivanētsi,” jai tsabiabi.

²⁴ Nexata baja paxamē payapētaneme mapacuneje. Pajivi jumecovēnētsi ata pacuenia Dioso najumecapanepaeya jumaitsi, itsiata itsa apo exanabiabi pexaniacuene, bajarapajivi aneconijibia Dioso apo taetsi. Pajivi jumecovēnēta pacuenia Dioso najumecapanepaeya jumaitsi, nexata itsa exanabiaba pexaniacuene, bajarapajivi Dioso aneconijibia tanetsi. ²⁵ Bajara pijinia pacuenia bajayata Dioso aneconijibia tanetsi Rahabpijivami pibisiacuene pexanabiabivami ata. Bajarapovami palata pepitsinexa, pibisiacuene exanabiaba pevitota. Itsiata baitsi jane bajarapovami pexaniacuene exana. Tspaji copiapita xaniavaetsia Israelpijinē pemomobeje. Bajaraponēbeje jivi peyaenebinēbeje vajabitsaē pexanaenexa bajara patomarapijivijavabelia. Rahabpijivami yavenonana bajaraponēbeje peponaenexabeje saicaya namutua pijavajabitsaē pebeyaxuabianivatsibeje. Bajarapacuenia Rahabpijivami pexaniacuene pexanaexae Dioso aneconijibia tanetsi.

²⁶ Piasaētsaponaponaejivi ata itsa baja ajumalijibi, tēpa baja. Apo exanae baja itsacuenejavayo ata pexaniacuene pevājēnaeyabelia. Bajara pijinia

vaxaitsi ata jamatabëcueneitsitsi Jesús pelivaisi vajajumecovënëtsivi. “Xanë jumecovënëtajë Jesús pelivaisi,” jai atatsi, itsiata itsa apo exanaetsi pexaniacuene pacuenia Dioso nacaitoroba, bevajajamatabëcuenetëpaevi Dioso tsitajinavanapatsi.

3

Pacuenia itsi vajeabarëto yabara pelivaisi

¹ Tajamonae, paxamëyajuvënëvi vënëlivaisitaniji pacuenia ayaibitsaëto jitsipa penaexanaenexa Jesús pelivaisi jivi petsipaebivinexa. Itsiata baitsi jane ayaibitsaëto apo benaexanae jivi livaisi petsipaebaponaevinexa. Paxamë rabaja payapëtaneme mapacueneje. Paxanë Jesús pelivaisi jivi patatsipaebaponaevi, paitavetaponajë pibisiacuene pexanaejava. Nexata pibisiacuene pexanaejava pataitavetsicujinae, bajarapapibisiacuene itsa paexanaejitsipajë, Dioso bitso ayaicuenia panenaneconitsiaexanaejitsipa daxitajivi matatoxenetsia. ² Daxitatsi vaxaitsi itsajavata banacajumejemaba pibisiacuena vajacuacuajainexa, pacuenia picani apo becuacuajaitsi. Pajivi pibisiacuena apo cuacuajai, bajarapajivi ajamatabëcuenesaë baja Diosojavabelia. Nexata bajarapajivi caëjëpatsi penajamatabëcuenesaëtsinexa daxita pibisiacuene pexanaeyaniva. ³ Caballo vajavësimuxufetsinexa tsicui-boxatatatsi freno. Nexata freno caballovecua tsiquirijavayo ata, itsiata caëjëpa caballo vajavësimuxufetsinexa itsabelia jitsipatsi vajaponaenexa. ⁴ Bajara pijinia itsi barco ata, pinijimo ata. Jovibo ayai ata, itsiata petabufetaicaenë tsiquiritenapayo ata, barcotabufe cajënapona itsabelia jamatabëpona peponaenexa. ⁵ Bajara pijinia itsi tsiquiriisotoyo ata. Itsa tajua, naexana ayaisoto petajuenexa pinijiunu ata. Bajara pijinia itsi vajeabarëto ata. Tsiquirijavayo picani vajeabarëto. Itsiata caëjëpatsi pecuacuajainexa ayailivaisi. ⁶ Vajeabarëto cajena ayai, pacuenia isoto ayai. Vajeabarëtota raja pibisiacuene exanatsi daxita vajavi matatoxenetsia. Nexata vajacuacuajajava nacajamatabëcuenebijiana. Tsiquirijiviyotsijavaveliacujinae vajatëpaejavabelianexa, bajarapacuenia cuacuajaitsi. Dovathi vajanacaitorobijava vajajumecovënëtsixae, cuacuajaitsi pibisiacuena. ⁷ Pacanaëjere mapacueneje. Jivi caëjëpatsi penaitajuaniaexanaenexa daxitaviriadajubiyajuvënëvi. Caëjëpatsinua penaitajuaniaexanaenexa unupijivi ata, pepunaevi ata. Caëjëpatsinua penaitajuaniaexanaenexa pecotobëxëta pejinavanapaevi ata, manuamenepijidujuai ata. Itsamonae bajarapacuenia naitajuaniaexana baja pejumecovënëtsinexatsi. ⁸ Itsiata baitsi jane itsajivi ata apo caëjëpaetsi penaabarëtoitavetsinexa jumemabiaya pibisiacuena pecuacuajajava pecopatsinexa. Vajeabarëto cajena bitso abeje. Apo nacacaëjëpae vajanajumecatitsinexa. Nexata pacuenia jomo pijaveneno xaina pebeyaxuabinexa, bajara pijinia itsi vajeabarëto. ⁹ Vajeabarëtota pexaniacuena jumaitsitsi vaxa Diosojavabelia: “Xamë bitso ayajamatabëcuenenëmë,” jaitsi. Vajeabarëtota icatsia pibisiacuena cuacuajaitsi itsamonaejavabelia. Bajarapamonae picani beyaiyatanetsi. Tsipaji Dioso nacuenecataya pexanaevitsi. ¹⁰ Caeabarëtota pexaniacuena cuacuajaitsi Diosojavabelia. Pibisiacuena ata cuacuajaitsi itsamonaejavabelia. Tajamonae, apo hexanaetsi cajena bajarapacuenia. ¹¹ Pacanaëjere mapacueneje. Mera pepitsapaemëthëatsina pitsapaina caera, pexaniara. Apo pitsapae pexaniara, piatsaxara yajava. ¹² Bajara pijinia itsi peubijava ata. Higueranaejavaverena apo pitsapae saicayacuai. Uvanejavaverena ata apo pitsapae saicayacuai. Jume cajena. Bajara pijinia itsi mera pepitsapaemëthë. Caejavatsina apo pitsapae pexaniara, piatsaxara

yajava. Bajara pijinia itsi vajeabarëto ata. Caebarëtota apo becuai cuaijaitsi pibisialivaisi, pexanialivaisi yajava. Nexata becuai cuaijaitsi ëpexanialivaisi.

Pacuenia Dioso pijajivi yapëtae yaexana pexanaenexa pexaniacuene yabara pelivaisi

¹³ Paxamë rabaja xaniavaetsia pajumeyapëtaneme Dioso pejumelivaisi. Nexata itsamonae pexaniacuene bepatsitaexanavanapame pacuenia pajumetaneme Dioso pejumelivaisita. Bajarapacuenia itsamonae pexaniacuene bepatsitaexanavanapame beveliajamatabëcuenevi nataeya. Nexata daxitajivi pacacueneyapëtaena bitso panejumeyapëtaevicuene Dioso pejumelivaisi. ¹⁴ Itsiata baitsi jane bitso itsa pacuene caëbabiabame itsamonae, itsa pajitsipabiabamenua jivi paneevetsivinexa papecaexanaenexa, pëtsa jamatabëcuene navëxaniabiaya pajumaitsimë mapacueniaje: “Xanë bitso xaniavaetsia yapëtaniji Dioso pejumelivaisi,” pajamë pëtsa. Tspiji saya panajamatabëcuene capaebijitsipame xaniavaetsia Dioso pejumelivaisi paneyapëtaejava. ¹⁵ Dioso pejumelivaisi itsa payapëtaejitsipame xaniavaetsia, nexata apo panajamatabëxainamë tspiae bajarapacuenia. Dovathi rajane pejamatabëcueneta pacaitoroba panenajamatabëxainanexa bajarapacuenia. Itsa jume, nexata paxamë panejamatabëcueneta panajamatabëxainame bajarapacuenia. ¹⁶ Itsajota jivi cuene caëba itsamonae, itsa jitsipabiabanua jivi pevetsivinexa pexanaenexatsi, bajarajota nexata jivi najamatabëcuene jëpæya apo jinavanapae. Daxitacuene pibisiacuene ata exanavanapa. ¹⁷ Biji rajane Dioso itsa nacayapëtae yaexana pexaniajamatabëcuene, nexata pexaniajamatabëcuene xainatsi. Apo namaxëvanitsitsi. Itsamonae yaiyatantsi vajeaxanaeyaniva bajarapamonaejavabelia apo pejitsipaecuenia. Najamatabëxainatsi itsamonae ata vajanacamuxujobilivaisi vajajumeyapëtaenexa. Itaxutotsoniatantsi itsamonae ata. Pexaniacuene exanatsi. Apo najamatabëcuene epatajërërëcaetsi. Apo yamaxëitojorobitsi itsamonae ata. Bajarapacuenia exanatsi Dioso pejamatabëcueneta pexaniajamatabëcuene itsa nacayapëtae yaexana. ¹⁸ Vaxaitsi jivi itsa nabarajamatabëcuene xanepanae yaexanaenatsi, namataenetsia penaitoyavi ata, nexata vaxaitsi ata nabarajamatabëcuene xanepanae ya jinavanapaenatsi. Pexaniacuenenua exanavanapaenatsi.

4

Pacuenia jamatabëcueneitsi pajivi jitsipa mapanacuapijicueneje yabara pelivaisi

¹ ¿Detsa xuajitsia paxamëyajuvënëvi anaeya namataenetsia pijanajumeno-tabiabi pecanabeyabiabi? Bajarapacuenia najume anaenotabiaba tspiji pejamatabëthëtota bitso jitsipa pexanaenexa daxita xua pibisiacuene. Bajaraxuata nabeyabiaba. ²⁻³ Paxamë picani pajitsipame itsacuenejava panexainanexa. Itsiata apo pacacajëpæ panepitsinexa. Bajaraxuata nexata pexainae vi payabarabeyaxuababiabame. Pacobecaëbabiabame itsamonae pexainaejava. Nexata pexainae vi payabarabeyabiabame paney-acajërëtsinexa pecobecovë. Paxamë apo paxainamë panejitsipaecueni. Tspiji pavajëcabiabi atamë Dioso javabelia, itsiata apo pacarajutabiabi xua pavajëcæme. Tspiji saya bajaraxua pavajëcabiabame paneexanaenexa daxita xua pibisiacuene. ⁴ Caejamatabëcuene Dioso javabelia apo paxainamë. ËDioso pijacuene apo pajitsipaemë. Mapanacuata pexaniacuene ata bitso payajavajitsipame. Bajarapacuenia panenajamatabëxainae xae, pacuenia petiriva jamatabëcueneitsi, pova pamonavecua jaita itsanë,

bajarapajamatabëcueneitsimë. Payapëtaneme rabaja mapanacuapijicuene bitso pejitsipaevi, bajarapamonae Dioso beprijavajabitsaë naexana. Bajara pijinia paxamë ata paitsimë. ⁵ Bajarapajamatabëcuene yabara Dioso pejumelivaisibaxutota jumaiti mapacueniaje vajacanaëjëtsinexa xaniavaetsia Diosojavabelia: “Espiritu Santo, ponë nacatsijamatabëca, bajaraponë bitso nacaasiva. Bitso nacatojitsipa vajaasivanexa ëDioso,” jai Dioso pejumelivaisibaxutota vajajitsipaeyaniva mapanacuapijicueneje. ⁶ Dioso cajena nacayavenona vajanajamatabëcuene cataitsinexa pibisiacuene vajaexanaeyaniva. Dioso pejumelivaisibaxutota jumaiti mapacueniaje: “Dioso yavenona pamonaë bevelijamatabëcuenevi natane. Pamonaë pijinia beayajamatabëcuenevi natane, Dioso apo yavenonaë,” jai Dioso pejumelivaisibaxutota. ⁷ Nexata bevelijamatabëcuenevi nataeya paexanavanapare pacuenia Dioso pacatojitsipa. Panavecuaitavere dovathi. Nexata dovathi pacavecuanajetabajiraviana. ⁸ Pavajëre Diosojavabelia. Nexata Dioso pacayavenonaëna. Paxamë pibisiacuene paneexanaevi, pacopare bajarapacuene. Paxamë anijajamatabëcuenebeje panexanaevi, Dioso pijalivaisi, pibisijamatabëcuene yajava. Pacopare bajarapajamatabëcuene Dioso papecajamatabëcuene xaniavaetsinexa pibisijamatabëcuenevecua. ⁹ Pibisiacuene paneexanaecononi yabara, bitso panatsinajamatabëxainare. Bitso payaaauramërenua. Pëtsa payabarëyamë. ¹⁰ Bevelijamatabëcuenevi panataema Dioso pitabarata. Nexata pibisiacuene paneexanaecononimivecua, Dioso pacajamatabëcuenyavenonaëna. Nexata panajamatabëcuenyotsianame Diosojavabelia.

Pacuenia nacaitaveta itsamonae Dioso pejumecovënëtsivi pibisiacuena vajabaracuaicuajaiyaniva yabara pelivaisi

¹¹ Tajamonae, pëtsa najumetsënëtsia namataenetsia panabaracuaicuajamë. Pajivi najumetsënëtsia baracuaicuajai Dioso penajuajumecovënëtsivi, bajarapajivi naneconita Diosojavabelia. Dioso penajuajumecovënëtsivi, pibisiacuene pexanaejava xaniavaetsia cuenyapëtaenejeva, itsa jamatabëjumaitsinua: “Bajarapamonae Diosovecua naxuabiana pibisiacuene pexanaeaxe,” itsa jamatabëjai, nexata bajarapajivi ata naneconita Diosojavabelia. Dioso penajuajumecovënëtsivi, najumetsënëtsia itsa baracuaicuajai, nexata apo jumecovënëtsi pacuenia Dioso itorobatsi. Pacuenia Dioso itorobatsi, itsa apo jumecovënëtsi, nexata apo bepexaniajailivaisi tane. Caranata bajarapajivi jivi bepenaneconitsiaexanaenë natane. ¹² Caenë Dioso nacatonajumecopata vajajumecovënëtsinexa. Bajara jane ponë nacananeconitsiaexanaëna pibisiacuene vajaexanaecononi yabara. Bajaraponë caenë caëjëpatsinua pejumaitsinexa itsajiviyojavabelia: “Xamë pepacuene naneconitame. Nexata nevecuanaxuabianame infernojavabelia,” pejainexa. Itsa jume, caëjëpatsi pejumaitsinexa: “Xamë baja caaneconijibiaexanatsi. Nexata aneconijibia catanetsi. Nexata cacapanepaenatsi,” pejainexa. Bajaraxuata paxamë Dioso apo pacatocopatsi itsamonae yabara panejumaitsinexa mapacueniaje: “Bajarapamonae Diosovecua naxuabiana pibisiacuene pexanaeaxe,” panejainexa.

Pacuenia itsajivi ata apo natsivajënaeyapëtae pacuene meravia pitsijavata tocopiapatsijitsiatsi yabara pelivaisi

13 Panenamuxunaevere mapalivaisije. Paxamē abaxē xaniavaetsia payapētaenejevamē xua Dioso pacatocopatsijitsia paneexanaenexa, ayaijamatabēcuenevi nataeya tajēvelia panavajunupaebabiabame. Tajēvelia pajumaitsimē tsabiabi: “Ajena. Itsa jume, pepacue ne jane baja meravia, ponaenatsi bajarapatomarabelia. Bajarajotalia caevai nacuenebianatsi palata vajanacanabinexa,” pajamē tsabiabi. 14 Pētsa bajarapacuenia ayaijamatabēcuenevi nataeya tajēvelia panavajunupaebabiabame. Tspijaji raja apo panatsivajēnaeyapētaemē xua pacatocopiapatsijitsia meravia pitsijavata. Vajajinavanapaepatoyo saya tsiquirimatacabiyota jinavanapatsi vajatēpaenexa. Pacuenia itsi nojobo, bajara saya itsitsi vaxaitsi. Nojobo pitsapa bajayacunua caepatoyonexa saya. Bajaraxuacujinae icatsia ajibi baja. Bajara pijinia itsitsi vaxaitsi ata. 15 Nexata saya bepajumaitsimē: “Itsa Dioso natococopatsiana abaxē vajaasaētsavanapaenexa, jinavanapaenatsi. Exanaenatsi mapacueniaje. Itsa jume, itsacuenia exanaenatsi,” bepajamē saya. 16 Paxamē saya bepaayaijamatabēcuenevimē panataeyabiabame. Nexata paneexanaejavanexa, abaxē tajēvelia panavajunupaebabiabame panatsivajēnaeyapētaenejevamē xua Dioso pacatocopatsijitsia paneexanaenexa. Bajarapacuenia ayaijamatabēcuenevī nataeya panenavajunupaebabiabijava, pibisiacuene. Tspijaji panajamatabēxainabiabame bepajijacuata itajara paneexanaejavanexa. Apo pacanaējētšimē bajaraxua Dioso papecatocopatsijava, bajarapacuenia paneexanaenexa. 17 Pajivi yapētae ata pacuenia picani bexanā, itsiata itsa apo exanae, bajarapajivi naneconita Diosojavabelia.

5

Pacuenia bitso pexainaevi muxujobatsi yabara pelivaisi

1 Bitso panexainaevi, jpanenamuxunaevere mapalivaisije! Panatsinuema bitso ayaijumeta. Tspijaji raja Dioso pacabejiobiaexanaena. 2 Bitso panexainaeacuene panexaniavaetsijavami, pacatotsabanaena. Pexaniavirijavanē, panenaxatabijavanēmi ata, daxita pacatoucubaxaena. 3 Palatanēanē ata, bitso penamatamotsinēanē, pacatotasi bianatsi. Nexata nayapētaena bajarapapalata apo panecanacuenebijava. Bajarapapalata apo paneyavenonaexae itsamonae, pacatotasi bianatsi. Isoto pacaveriajaviana daxita panexainaejava yajava. Pacaetuatoname picani papecatoayaijavanexa. Itsiata baitsi jane pamatacabi Dioso naneconitsiaexanaejitsia daxitajivi, imoxoyo baja pevājēnae tsaponae pecopiapatsinexa. Dioso pacananeconitsiaexanaena. Tspijaji ēpaxamēnexa panatoxaniavaetame panexainaeacuene. 4 Panejumetaema. Pamonaē pacatonacueneba panijacuene, bajarapamonaē tsipaeba itsamonaejavabelia paneyamaxēitojorobijava. Apo pamatamotsimē xaniavaetsia pacuenia picani pamatamotsiapaebame. Nexata vajatuxanenē Dioso, daxita athēbēnacuataatsi pevetsinē, jumetanetsi bajarapamonaē pepaebijava xaniavaetsia apo panematamotsijava. 5 Mapanacuata picani panatsitajinavanapame xaniavaetsia. Pacabarēyamē tsavanapae panexainaeacuene. Paexanavanapame panejitsipaecuena. Pacuenia baca bitso penasitsiepatota beyaxuabatsi, bajara pijinia pacuenia paxamē ata pacatoimoxoyo baja Dioso papecananeconitsia exanaematacabinexa, bitso panenaneconitsixae Diosojavabelia. 6 Jivi pananeconitsiaexanabiabame. Pabeyaxuababiabamenua planeconijilbivi ata. Bajarapacuenia paexanabiabame pamonaējavabelia apo caējēpaetsi papecanayajiviitavetsinexa.

Pacuenia icatsia petuxanenē patsijitsiatsica yabara pelivaisi

⁷ Tajamonae, pajamatabëcuenesaëmëre tsavanapae panecopiaeve-tavanapaejava vajatuxanenë matapania icatsia pepatsimatacabitsi-cajavabelianexa. Pabi penacuenebinë, vajënaeeveta ama peubinexa peubijava. Peubiveretsicujinae peubijava, bajayajebi ajamatabëcuenesaëya evetaponapona petonavereitsijavabelianexatsi. ⁸ Bajara pijinia pacuenia paxamë ata bajayajebi itsamonae pibisiacuene pacaexanae ata, pajamatabëcuenesaëmë tsane. Pëtsa pajamatabëcuenefaefaname. Tshipaji rabaja imoxoyo pevajënae tsaponae vajatuxanenë pepatsinexatsica. ⁹ Tajamonae Dioso panenajuajumecovënëtsivi, pëtsa namataenetsia panabaracuaicuaijamë Diosojavabelia pananeconitsiyaniava. Tshipaji rabaja Jesucristo, ponëjavabelia panavajunupaebijitsiamë daxita pacuene paexanavanapame mapanacuataje, imoxoyo baja pevajënae tsaponae pepatsinexatsica. Bajaraponë pacaejivimë canacujitsia pacarajutaponaena xuavajëto pacatoxainapona. ¹⁰ Tajamonae, pacanaëjere profetavimi, pamonaemi bajayata Diosojumelivaisi paeaba. Bajarapamonaemi bajayajebi bejiobiaexanae atatsi, ajamatabëcuenesaë tsavanapae. Itsajamatabëcuene apo xainae. ¹¹ Pamonaemi ajamatabëcuenesaë, bajayajebi bejiobiaexanae atatsi, bajarapamonaemi aeconoxae baja topexaniacuentsi tsane Diosojavabelia. Pavënëlivaisitaneme rabaja pacuenia bajayata Jobpijinë bejiobiaexanae atatsi, itsiata ajamatabëcuenesaë Diosojavabelia. Pavënëlivaisitanemenua pacuenia pejamatabëcuenëejëtsicujinaetsi, bitso Dioso yavenonatsi. Bajaraxuata nexata payapëtaneme Dioso jivi pitaxutotsioniatenëcuene.

¹² Tajamonae, palivaisi baja pacatsipaebatsi, matatoxenetsia mapalivaisiyoje bitso pajumecovënëtsianame. Itsa pacuaicuaijamë itsamonaejavabelia, pexaniajailivaisi pacuaicuaijamë tsabiabi tsane. Pëtsa Dioso pevënë pacacuaicuaijamë itsamonae papecajumexaniataenexa. Nexata pëtsa pajumaitsimë mapacueniaje: “Xaniajanë raja. Cajumaitsitsi mapacueniaje Dioso pitabarata,” pajamë pëtsa. Tshipaji baja pexaniajailivaisi itsa pacuaicuaijamë tsabiabi tsane, itsamonae ata pacacueneyapëtaena apo panenajumetsenëtabiacuene. Nexata itsa pacayanijoba itsacueneyavayo yabara, roviaalia pajumaitsimëre pacuenia panajamatabëxainame. Itsa pejamëjitsia, pajeamëre roviaalia. Itsa jume, “jume!” pajamëre roviaalia. Bajarapacuenia roviaalia itsa paxaniajamë tsabiabi tsane, nexata apo pananeconitsimë tsane Diosojavabelia. Tshipaji Dioso pevënë apo pacacuaicuaijamë tsabiabi tsane papecajumexaniataenexa itsamonae.

¹³ Paxamëyajuvënëjivi itsa tocopiapatatsi pibisiacuene, bajarapajivi bevajëta Diosojavabelia. Itsa jume, barëyaya itsa ponapona, betonaxëana Diosojavabelia: “Xamë ayaijamatabëcuenenëmë,” bejai Diosojavabelia penaxëanaejavata. ¹⁴ Itsa jume, itsa avitane, bejunata ancianovi, Dioso pejumecovënëtsivi pevetsivi. Nexata ancianovi patsiana petovajëtsinexatsi Diosojavabelia. Nexata ancianovi piavitanejivi aceiterata perabëcalirabiana vajatuxanenë pevënëta. ¹⁵ Petovajëcaejavata, daxita ancianovi itsa jamatabëjumaitsi: “Dioso cajana pepacuene jamatejemayaexanaenatsi mapajivije,” itsa jamatabëjai ancianovi, nexata Dioso jamatejemayaexanaenatsi piavitanejivi. Piavitanejivi pibisiacuene itsa exana piavitanevajënaeya, itsiata Dioso vecuaajibiaexanaenatsi bajarapaneconimi. ¹⁶ Bajaraxuata pibisiacuene namataenetsia itsa panatoexaname, namataenetsia panatsipaebare. Itsa pavitanemënu, namataenetsia panatovajëre Diosojavabelia papecajamatejemayaexanaenexa Dioso. Xaniavaetsia peponaponaenë Dioso pitorbicueniatsi, daxita pejamatabëëthëtojavavetsina itsa vajëta, bajaraponë jumematamota Diosojavabelia. Ayaiacuenia Dioso pexaniacuene toexanaenatsi.

¹⁷ Diosojumepaebinēmi, profeta Eliáspijinē, bevaxaitsijamatabēcuenenēmi. Bajayata bajaraponēmi asaēyata vajēta Diosojavabelia ema pejopaeyaniva. Nexata acueyabi pavaibeje epatua ema apo jopae bajaraponēmi pijanacuta. Nexata daxita peubijavaximi, totēpatsi. Nexata daxita bajarapanacuapijivi bitso janibo. ¹⁸ Bajaraxuacujinae icatsia asaēyata Eliáspijinē vajēta Diosojavabelia ema pejopaenexa. Nexata icatsia ema jopa. Ira icatsia capitsapa pexaejavanexa. Bajarapacuenia vaxaitsi ata asaēyata bevajētatsi Diosojavabelia.

¹⁹ Tajamonae, paxamēyajuvēnjivi itsa copaba Dioso pejumelivaisi pejumecovēnētsijavami, nexata icatsia bepajumecovēnētsiaexaname bajarapalivaisi. ²⁰ Bepayapētaneme mapacueenje. Pajivi icatsia copabiaexana it-samonae pibisiacue ne pexanaejavami, pejumecovēnētsinexa icatsia Dioso, bajarapajivi jamatabēcueneyavenonaena bajarapamonae penaxuabiyaniva pibisianacuayabelia. Jamatabēcueneyavenonaenanua bajarapamonae Dioso pevecuaajibiaexanaenexatsi ayaineconi ata, pibisiacue ne pexanaenecomimi.

Mapabaxutoje San Pedro copiaya toyaquina Dioso pejumecovënëtsivijavabelia

Pacuenia Pedro mapabaxutoje toyaquina Dioso pejumecovënëtsivi, nacaya-jatsia penaevijavabelia, yabara pelivaisi

¹ Xanë Pedronë, Jesucristo taneitorobinë. Nitoroba jivi tatsipaebapon-aenexa Jesucristo pelivaisi. Pacatoyaquinatsi mapabaxutoje paxamë pepo panijatamaravecuca, Jerusalëntomara, nacayajatsia paneenarutsivi. Nacaya-jatsia pajinavanapame Ponto nacujava, Galacia nacujava ata, Capadocia nacujava ata, Asiavënë nacujava ata, Bitinia nacujava ata. ² Vaxa Dioso baja cajena bajayata tajëvelia panenaexanaevajënaeya ata, pacaitapeta papijajivinexamë. Bajarapacuenia tajëvelia Dioso papecaitapetsixae, aeconoxae baja Espiritu Santo pejamatabëcueneta pacatsata Jesucristo panejumecovënëttavanapaenexa. Dioso pacaitapeta papecavecucaajibiaexanaenexa, daxita pibisiacuene paneexanaeconimi Jesucristo papecasivatëpæxae. Pacatovajëtatsi Dioso javabelia ayaicuenia Dioso papecayavenonabiabinexa. Pacatovajëtatsinua jamatabëcuenexanepanaeya panejinavanapaenexa daxitacuenevecua.

Pacuenia Jesucristo pelivaisi pejumecovënëtsivi Dioso rajutsianatsi matacabi apo peverevereaejava yabara pelivaisi

³ Vaxaitsi vajatuxanenë Jesucristo paxa Dioso javabelia jumaitsi tsabiabi: “Xanepana rabaja. Pexaniacuene panetoexaname,” jaitsi tsabiabi. Ayaicuenia Dioso vajanacaitaxutotsoniataexae, pejanajamatabëcuenevitsi nacaexana Jesucristo vajajumecovënëtsixae. Jesucristo petëpæcujinae, Dioso icatsia asaëyaexanatsi. Bajaraxuata vaxaitsi ata evetavanapatsi vajanacaru-jutsinexa matacabi apo peverevereaejava. ⁴ Nexata Dioso nacarajutsiana xua nacatoxaina athëbëtatsia vajanacarajutsinexa. Bajaraxua apo vereverecae tsane. Apo abejenua tsane. ⁵ Bajaraxua Dioso nacatoxaniavaeta athëbëtatsia vajanajamatabëcuenecopatsixae Dioso javabelia. Nexata abaxë vajajinavanapaepato mapanacuataje, Dioso pesaëta nacaevetaponapona. Bajarapacuenia Dioso pesaëta nacaevetaponapona vajanacapanepaenexa. Pamatacabi mapanacuaje vereverecaena, nayapëtaena jane baja xua Dioso nacarajutsiana.

⁶ Bajaraxuata paxamë Dioso papecacapanepaejavanexa, pasivajamatabëcuenekarëyamëre tsavanapae. Aeconoxae abaxë mapamatacabitaje pacajamatabëcuenebejitobitsi ata daxitacuene papecajamatabëcuenëjëtsijava, itsiata pasivajamatabëcuenekarëyamëre tsavanapae. ⁷ Pacajamatabëcuenëjëtaepona papecajamatabëcueneyapëtaenexa pepacuene panenajamatabëcuenecopatsijava Jesucristojavabelia. Oronanito ata itsa ëjëta, baseta isotota peyapëtaenexa itsa pepacuene orojava. Panenajamatabëcuenecopatsijava Jesucristojavabelia, bitso namatamota orojava matatoxenetsia. Nexata pijinia paxamë ata pacajamatabëcuenëjëtaeponaena papecajamatabëcueneyapëtaenexa xaniavaetsia panenajamatabëcuenecopatsijava Jesucristojavabelia. Nexata itsa pavecuapanepaename papecajamatabëcuenëjëtsijava, panevajënaeyabelia pajamatabëcuenesaëmë tsaponae tsane Jesucristojavabelia panenajamatabëcuenecopatsijava. Nexata pamatacabi vajatuxanenë

Jesucristo patsianica, pacasivajamatabëcuenebarëya tsane. Dioso ata pacasivabarëya tsane. Daxitajivinua pacayaiyataena.

⁸ Paxamë abaxë Jesucristo apo patae atamë, itsiata pajitsipame. Aeconoxae apo patae atamë Jesucristo, itsiata panajamatabëcuenecopatame bajaraponëjavabelia. Jesucristo bitso pasivajamatabëcuenebarëyamë tsavanapae. Jesucristo panesivajamatabëcuenebarëyajava, itsa panajamatabëcuenevahunupaebame itsamonaejavabelia, epatua saya payapëtaeyaexaname. Tsipaji xaniavaetsia apo payapëtaemë xaniavaetsia panenajamatabëcuene vahunupaebinxaxa itsamonaejavabelia peyapëtaenexa pacuenia bëpënëa pajamatabëcuenebarëyamë. ⁹ Jesucristo papecasivatëpaexae, panajamatabëcuenecopatame Diosojavabelia papecacapanepaenexa. Bajaraxuata Dioso pacacapanepaena Dioso papecananeconitsia exanaejavaminexavecua pibisiacuene paneexanaeneconimi yabara.

¹⁰ Bajayatami Diosojumepaebivimi profetavi bajayajebi livaisijaitapona peyapëtaenexa. Nexata baja profetavi itsa yapëtane pacuenia Dioso pijajivi capanepaejitsia, nexata profetavi tajëvelia vahunupaebapona jivijavabelia. Profetavi tajëvelia vahunupaebapona pacuenia Cristo pejamatabëcueneta Dioso pacaitaxutotsoniataejitsia papecacapanepaenexa. ¹¹ Espiritu Santo baja cajena pejamatabëcueneta bajayata tajëvelia profetavimi yapëtaeyaexanaponatsi. Nexata profetavimi bajayata tajëvelia yaquina pacuenia yapëtaeyaexanaponatsi Espiritu Santo pejamatabëcueneta. Nexata profetavimi yaquina pacuenia itsamonae Cristo bejiobiaexanaejitsiatsi pebeyaxuabinxatsi. Yaquinua pacuenia Cristo petëpaecujinae, icatsia itsa asaë, athëbëabetsia caponaejitsiatsi pecaenexa paxa Dioso pemuxunenetsia. Nexata bajarapaprofetavimi jamatabëjumai tsabiabi: “¿De tsaeta pacujinae copiapatsiana xua tajëvelia vaxaitsi vahunupaebaponatsi?” jamatabëjai tsabiabi. ¹² Itsiata baitsi jane bajarapaprofetavimi Dioso yapëtaeyaexanatsi pacuenia bajarapamonaemi bevënamuto bexëa bajaraxua copiapatsijitsia. Nexata vaxaitsi, bajarapamonaemi pecovëpijivitsi, vajajinavanapaematacabita matapania jane baja copiapata pacuenia tajëvelia Cristo yabara vahunupaebapona profetavimi. Nexata baja paxamë bajarapalivaisi itsamonae pacatsipaeba papecacapanepaelivaisinexa. Espiritu Santo, ponë Cristo athëbëvetsica itorobica, bajaraponë pesaë pacayajavatsipaeba bajarapamona. Angelevi ata bitso jitsipa xaniavaetsia peyapëtaenexa bajarapalivaisi.

Pacuenia Dioso nacajunata xaniavaetsia vajatojinavanapaenexa yabara pelivaisi

¹³ Panajamatabëcuenecopare Diosojavabelia. Tsipaji rabaja payapëtaneme xua Dioso pacarajutsijitsia. Bajaraxua Dioso pacarajutsiana papecaitaxutotsoniataexae pamatacabi Jesucristo icatsia patsianica. Bajaraxuata xaniavaetsia panajamatabëcueneverere paneexanaenexa daxita xua Dioso pacatocopata. Najamatabëcueneevetsiyanua xaniavaetsia pajinavanapare. ¹⁴ Pajumecovënëtavapanare Dioso. Pëtsa panajamatabëxainame panenatojit-sipaecuenia pibisiacuene paneexanaenexa, pacuenia paexanavanapame pamatacabi abaxë Dioso apo payapëtaemë. ¹⁵ Xaniavaetsia saya pajinavanapare pibisiacuene paexanaenejevamë. Tsipaji raja Dioso, ponë pacajunata papijajivinxamë, xaniavaetsia peponaponaenë. Pibisiacuene baja cajena caeto ata Dioso apo pexanaenë. ¹⁶ Dioso baja cajena pejumelivaisibaxutota

jumaitsi mapacueniaje: “Xaniavaetsia pajinavanapare. Tsipaji xanë apo jitsipaenë pibisiacuene paneexanaejava,” jai Dioso pejumelivaisibaxutota.

¹⁷ Paxamë itsa pavajètame Diosojavabelia, pajumaitsimë tsabiabi: “Taxa Dioso,” pajamë tsabiabi. Bajaraponë Dioso najëpaeya tane daxita pamonae jumecovënètatsi, ayaijamatabëcuenevi, beveliajamatabëcuenevi ata. Dioso cajena yapètane paneconivajëto exanapona caejivi canacujitsia. Bajaraxuata Dioso cujunaviaya bepajinavanapame pamatacabibeje abaxë pasaëmë tsavanapae mapanacuataje. ¹⁸ Paxamë picani naxuabiaya Diosovecua pajinavanapame panijasalinaivimi abaxë pijacuene itsa pacaasaëmë tsavanapae. Itsiata baitsi jane aeconoxae baja bajarapacuenecua Dioso baja pacapanepa. Payapëtaneme rabaja Dioso ayaimatamota papecaneconimatamotsijava papecacapanepaenexa. Apo pacacomuatsi baja cajena peverevere-caejavata, pacuenia oro itsi, palata ata. ¹⁹ Dioso baja cajena pacacomuata bitso penamatamotsijavata, Cristo pijanata. Pajivi pijaneconi xaina Diosojavabelia, bajarapajivi oveja, pejanapebito, peperabëxanepanaenë, beyaxuaba ofrendacuena pevi perajutsinexa Diosojavabelia. Nexata bajarapajivi pijaneconi Dioso baja vecuaajibiaexanatsi bajarapaoveja pijana pejamatabëcueneta. Nexata pacuenia oveja, peperabëxanepanaenë, beyaxuabatsi, bajara pijinia itsi Cristo. Baitsi Cristo, pianeconijibinë, nacopata pebeyaxuabinexatsi. Nexata Cristo petëpaejamatabëcueneta, pacavecuajibiaexana panijaneconimi. ²⁰ Bajayatami Dioso mapanacuaje pexanaevajënaeya ata, Dioso itapetatsi Cristo papecasivatëpaenexa. Belia jane baja mapamatacabitaje Cristo patsica papecasivatëpaenexa. ²¹ Itsiata baitsi jane Cristo petëpaeaujinae, acueyabi matacabita, Dioso icatsia asaëyaexanatsi. Athëbëtatsia, paxa Dioso pecujanenia, Cristo ecaeyaexanatsi. Bajaraxuata panajamatabëcuenecopatame Diosojavabelia papecarajutsinexa matabi apo peverevere-caejava.

²² Nexata baja aeconoxae paxamë pajumecovënètame pexaniajailivaisi, Jesucristo belivaisi, Espiritu Santo papecajamatabëcueneitayotsixae. Nexata pibisiacuene paneexanaeconimi, Dioso pacavecuajibiaexana. Nexata xaniavaetsia pasivamë tsavanapae itsamonae ata, Dioso pejumecovënëtsivi. Bajarapacuenia asaëyata namataenetsia bepanaasivamë tsavanapae daxita panejamatabëthëtovetsina. ²³ Pacuenia pejananaexanae-nacuetoyo itsi, bajara paxamë pajamatabëcueneitsimë Dioso pejumelivaisita pejanajamatabëcuene panexainaexae. Itsiata baitsi jane bajarapapejanajamatabëcuene paneaxajivi apo pacarajutsi. Dioso raja pejumelivaisi, apo peverevere-caelivaisinexa panejumecovënëtsixae, pejanajamatabëcuene baja paxainame. ²⁴ Dioso pejumelivaisi apo peverevere-caejavanexa yabara, Dioso pejumelivaisibaxutota jumaitsi mapacueniaje:

Pacuenia vayafopijipona bepijia tsaquena, petsaquinaecujinae tēpa, bajara pijinia saya itsi jivi ata. Bepijia tēpa. Pacuenia pematono ata bepijia tsaquena, nexata othopa, bajara pijinia saya itsi ayaijamatabëcuene pexinaenë ata. Bepijia tēpa. ²⁵ Itsiata baitsi jane Dioso pejumelivaisi apo vereverecae tsane daxitamatabijavabelianexa, jai Dioso pejumelivaisibaxutota.

Bajarapalivaisi papecacapanepaelivaisinexa, itsamonae baja pacatsipaeba.

2

¹ Bajaraxuata pacopare baja daxita pibisiacuene paneexanabiabijava itsamonaejavabelia. Pacoparenua paneyamaxëitojorobabiabijava. Pacoparenua saya yamaxëitojorobiaya panecuaicuaijaitsiabijava. Tsipaji pax-

amē yamaxēitorobiaya pacuaicuajamē tsabiabi itsamonae bepapexania-jamatabēcuenevimē papecataenexa. Pacoparenua panecuenecaēbabiabijava itsamonae. Pacoparenua panebaracuaicuajaitsabiabijava pibisiacuenia itsamonae. ² Pacuenia pejananaexanaenacueto bitso bajitsipa mitobarēmene piapaenexa, bajara pijinia pacuenia paxamē bitso pajitsipare Dioso pejumelivaisi. Bajarapalivaisi baja cajena bevajaxaejava tanetsi vajajamatabēēthētōnēxa. Nexata bajarapalivaisi panelebabiabixae, pacatsijamatabēcuenevitsabaponaena pevajēnaeyabelia. Nexata bajarapalivaisi pejamatabēcueneta Dioso pacajamatabēcuenē naveretsiaexanaena pacuenia Dioso pacatojitsipa. ³ Nexata baja pepacuene pajamatabēcueneyapētaename vajatuxanenē pexaniajamatabēcuenenēcuene. Bajaraxuata pajitsipaponare orijibia panevajēnaeyabelia Dioso pejumelivaisi.

Pacuenia iboto apo vereverecae mapanacuataje, bajara pijinia pacuenia Cristo apo pevereverecaenē daxitamatacabijavabelianexa yabara pelivaisi

⁴ Vajatuxanenē Cristo raja bepiatajaiboto tsaponaponae. Apo pevereverecaenē daxitamatacabijavabelianexa. Nexata paimoxoyore bajaraponē. Vajatuxanenē Cristo itsamonae apo pejumecovēnētsixaetsi, pacuenia ibota bo pexanaevi pibisiaiboto naitaxutojematabuata, bajaraitsitsi. Itsiata baitsi jane Dioso tanetsi bepiatajaiboto, bepexania penamatamotsiiboto tsaponaponae. ⁵ Paxamē ata rabaja Jesucristojavabelia panenajamatabēcuenecopatsixae, bepaibotonēmē Dioso pacatane. Nexata padaxitamē Cristo papijajivixaemē, Dioso pacatane bepijatemplobo, ibotonēta bepexanaetemplobo. Tspaji pacuenia Dioso ponapona templobota, bajara pijinia pacuenia Espiritu Santo pacatsijamatabēeca. Paxamē rabaja cajena Dioso panetonacuenebavanapaevi, baitsi papijasacerdotēvimē. Nexata Jesucristo pejamatabēcueneta aneonijibia papecataexae, Diosojavabelia najamatabēcuenērajutsiaya pavajētābianame Dioso papecasivajamatabēcuenēbarēyanexa. ⁶ Cristo, ponē athēbēvetsica Dioso itorobijitsiatsica jivi pecapanepaenexa, bajaraponē yabara tajēvelia Dioso jumaitsi: “Ponē itorobianajē, beiboto tsane,” ja. Nexata tajēvelia Dioso pejumaitsiyava, Dioso pejumelivaisibaxutota jumaitsi mapacueniaje:

Taitapetsinē netoponaponaena Jerusalēn tomarata. Bajaraponē beiboto tsane. Nexata pacuenia ibota bo pexanaevi, itsaiboto bitso tsitanapanatsi daxitaibotonēvecua, bajaraitsitsi tsane. Bepitapetsiibototsi tsane. Bitso bepenamatamotsiibotonua tsane. Nexata paji najamatabēcuenecopatsiana bajaraponējavabelia, bajarapajivi apo nacueratsi tsane,

jai mapacueniaje Dioso pejumelivaisibaxutota tajēvelia Dioso pejumaitsiyava Cristo yabara.

⁷ Paxamē Cristo pelivaisi panejumecovēnētsivi, pataneme Cristo bepiatajaiboto tsaponaponae, bitso bepenamatamotsiibotonua. Itsiata baitsi jane pamonaē Cristo pelivaisi apo pejumecovēnētsivi, bajarapamonae bepibejeiboto tanetsi Cristo. Tspaji baja copiajopa pacuenia Dioso pejumelivaisibaxutota tajēvelia najumecapanepaeya jumaitsi Cristo yabara. Tajēvelia Cristo yabara comparacióncuenia jumaitsi mapacueniaje:

Paiboto boexanaevi naitaxutojematabuata bepetsitaabejexaetsi itajara, bajarapaiboto itsamonae pita. Nexata bajarapaibotota xaniavaetsia yaēta botabu daxita itsaibo matatoxenetsia,

jai Dioso pejumelivaisibaxutota comparacióncuenia Cristo yabara.

Bajarapacuenia jumaitsi itsamonae Cristo apo pejumecovēnētsijavanexatsi yabara. ⁸ Copiajopana jane baja Dioso pejumelivaisibaxutota tajēvelia

Cristo yabara pejumaitisijava mapacueniaje: “Bajarapaiboto jivi pefirapecaeyaexanaeiboto tsane,” pejaijava Cristo yabara. Bajarapacuenia Dioso pejumelivaisibaxuta jumaiti jivi itsa apo jumecovënëtsi Cristo pelivaisi, Diosovecua penaxuabijavanexa yabara jumaiti. Tshipaji tajëvelia Dioso yapëtane jivi apo pejumecovënëtsijavanexa pexanialivaisi, Cristo pelivaisi, pecapanepaelivaisinexatsi picani.

Dioso pijajivi yabara pelivaisi

⁹ Dioso apo pejumecovënëtsivivecua, paxamë baja Dioso pacaitapeta pajijivinexamë. Dioso baja papijasacerdotevimë tsavanapaenua, daxitacuenepo pevetsinë panetonacuenebavanapaexae. Dioso baja papijajivimë tsavanapae panevajunupaebavanapaenexa Dioso ayaicune pexanaejavanë. Dioso baja cajena pacajunata pibisijamatabëcuenevecua, mapanacuataje pitaquirijamatabëcuenevecua. Nexata baja pajunuame pexaniamatabëcuenejavabelia, Dioso pitayotsijamatabëcuenejavabelia. ¹⁰ Paxamë abaxë Cristo panejumecovënëtsivajënaeya, Dioso picani apo papijajivimë. Itsajivi ata picani abaxë paxamëyajuvënëvi Dioso apo itaxutotsoniataetsi. Itsiata baitsi jane aeconoxae baja Dioso papijajivimë pacaexana papecaitaxutotsoniataexae.

Pacuenia Dioso pejumecovënëtsivi jinavanapa Dioso petonacuenebavanapaenexa yabara pelivaisi

¹¹ Tajamonaebitso patacaasivavi, mapanacuataje abaxë pajinavanapae atamë, athëbëtatsia baja Dioso pijanacuatatsia bepanëjinavanapaeivi panataema. Saya raja caeapatoyonexa mapanacuataje pajinavanapame. Bajaraxuata pacatoyaquinatsi mapacueniaje daxita picani papibisiacuene jamatabëpaexaname panecopabinexa. Bajarapitsijamatabëcuene jamatabënacanaejamatabëcuene bijianaeyaexana vajajamatabëcuenejavavetsina.

¹² Dioso apo peyapëtaevi petuatuajëa itsa pajinavanapame, xaniavaetsia patsitajinavanapaename. Aeconoxae pacabaracuaicuaijai ata bepibisiacuene paneexanaevi papecataexae, itsiata itsamatacabijavabelia itsa najamatabënapitsiana pexaniacuene paneexanaejava, bajarapamonae ata Dioso jumecovënëtsiana. Nexata bajarapamonae jumaiti tsane Diosojavabelia: “Diosomë, bitso ayajamatabëcuenenëmë,” jai tsane. Bajarapacuenia jumaiti tsane itsa copiapatsiana pamatacabi Dioso naneconitsiaexanaejitsia daxita pamonae Dioso apo pejumecovënëtsivi.

¹³ Dioso papijajivixaemë, pajumecovënëre pacuenia pacaitoroba pamonae nacua pevetaavanapaeivi. Daxita raja bajarapamonae mapanacuapijivi pejamatabëcueneta evetsiaexanatsi. Nexata pajumecovënëre presidentenë, ponë jane baja daxitajivi pevetsinë. ¹⁴ Pajumecovënërenua nacua pevetsivi. Bajarapamonae presidentenë itorobatsi penaneconitsiaexanaenexa pibisiacuene pexanaevi. Itorobatsinua pejumaitsinexa pexaniacuene pexanavanapaeivjavabelia: “Xanepana rabaja xua paexaname,” pejainexa.

¹⁵ Bajarapamonae pajumecovënëre. Tshipaji raja Dioso pacatojitsipa xaniavaetsia panejinavanapaenexa. Nexata bajarapacuenia itsa patsitajinavanapaename, belia moya tsane itsamonae papecabaracuaicuaijajava, pamonae apo pejumecovënëtsivi pexanialivaisi, Cristo pelivaisi.

¹⁶ Paxamë picani pajumecovënëtanapame Dioso Moiséspijinëta penajumecopatsilivaisi. Nexata picani paexanabiabame pacuenia pacaitoroba Dioso Moiséspijinëta penajumecopatsilivaisi. Aeconoxae baja Cristo pelivaisi panejumecovënëtsixae, apo pajamatabëcueneevetsimë baja pacuenia Dioso Moiséspijinëta penajumecopatsilivaisi pacaitoroba paneexanaenexa. Itsiata baitsi jane pibisiacuene paneexanaenexa apo pacatocopatsi. Biji rajane

Dioso pacatocopata pacuenia Dioso jitsipa panetonacuenebavanapaenexa. ¹⁷ Daxitajivi yaiyataeya pajinavanapare. Itsamonae ata, pamonae Dioso pejumecovënëtsivi, pasivamëre. Cujunaviaya Dioso payaiyataema. Payaiyataema presidentenë ata.

Pacuenia itsamonae Cristo bejiobiaexanae atatsi, itsiata ajamatabëcuenesaë tsaponaponae, bajara pijinia pacuenia Cristo pejumecovënëtsivi ata itsamonae bejiobiaexanae atatsi, pijamatabëcuenesaë tsavanapaenexa, yabara pelivaisi

¹⁸ Paxamë itsamonae panetonacuenebavanapaevi, pacamuxujjobatsi mapacueniaje. Pajumeyaiyataeyabiabare pacuenia pacaitorobabiaba panijatuxanevi. Ëpexaniajamatabëcuenevi pëtsa panijatuxanevi pajumeyaiyataneme. Pajumeyaiyataema panijatuxanevi, piacujirubejevi ata. ¹⁹ Panijatuxanevijavabelia itsacueneneconi apo paxainae atamë, panijatuxanevi pacabejiobiaexanabiabijatsipa. Nexata panijatuxanevi papecabejiobiaexanabiabijavata: “Dioso nitaxutobejiobiataena,” itsa pajamatabëjamë tsabiabi tsipae, nexata Diosojavabelia pacatonamatamotsipa. ²⁰ Itsa pananeconitsipame panijatuxanevijavabelia, nexata bajarapaneconi yabara panijatuxanevi pacaconitsipa. Nexata papecabejiobiaexanaejavata: “Dioso nitaxutobejiobiataena,” pajamatabëjamë ata tsipae, itsiata Diosojavabelia pacatoamatamobi tsipae. Itsa jume, pexaniacuene paexanae atamë, panijatuxanevi pacaconitsipa. Nexata papecabejiobiaexanaejavata: “Dioso nitaxutobejiobiataena,” itsa pajamatabëjamë tsipae Diosojavabelia, nexata Diosojavabelia pacatonamatamotsipa. ²¹ Bajarapacuenia itsacueneneconi apo paxainaenejevamë, itsamonae pacabejiobiaexanaponaena. Tsipaji Dioso bajarapacuenia pacatocopata itsamonae papecabejiobiaexanaponaenexa. Payapëtaneme rabaja mapacueneje. Cristo itsa pacasivatëpa, bejiobiaexanatsi itsacueneneconi xainaenejeva. Nexata paxamë ata Dioso pacatocopata itsamonae papecabejiobiaexanaenexa. ²² Itsacuenejala ata pibisiacuene apo exanae Cristo. Apo yamaxëitojorobi cajena itsajiviyojavabelia ata. ²³ Pibisiacuena Cristo bijatae atatsi itsamonae, itsiata juya pibisiacuena apo jumecanaviatsi. Bejiobiaexanae atatsi jivi, “Neyamatamotsiana Dioso,” apo jai Cristo bajarapamonaejavabelia. Biji rajane bajarapamonaejavabelia Cristo cujirucanaviatsinejeva, copata bajarapamonae Dioso penaneconitsiaexanaenexatsi pamatacabi Dioso naneconitsiaexanaena pijaneconi pexainaevi. ²⁴ Cristo cruzata itsa tëpa, tsijumaxuabatsi voxaitsi pibisiacuene vajaexanaeneconi. Bajarapacuenia Cristo nacatoexana vajacopatsinexa pibisiacuene vajaexanaejava. Bajarapacuenia Cristo nacatoexananua vajavajënaeyabelia vajajinavanapaenexa Dioso pejitsipaecuenia. Cristo pacasivavajënrubatsi paxamë papecajamatabëcuene xaniavaetsinexa pibisijamatabëcuenevecua, xaniavaetsia panejinavanapaenexa Dioso pitabarata. ²⁵ Paxamë picani Diosovecua naxuabiaya pajinavanapame. Pacuenia oveja pevetsinëtsivecua naxuabiaya jinavanapa, bajara picani paitsimë. Itsiata baitsi jane aeconoxae baja Cristo pejamatabëcueneta panaviabame Diosojavabelia. Pacuenia pijaoveja pevetsinë xaniavaetsia baevetaponapona pijaoveja, bajara pijinia pacuenia Cristo pacaevetaponapona. Panejamatabëcuene ata Cristo evetaponapona.

3

Pacuenia penacjobivi xaniavaetsia benabarëjinavanapa yabara pelivaisi

¹ Paxamē papetiriavimē, pacamuxujibatsi mapacueniaje. Pacaevamē canacujitsia paneamonajivi jumecovēnētsiaya pajinavanapare. Pova pamona abaxē apo jumecovēnētsi Jesús pelivaisi, bajarapova xaniavaetsia tsitaponaponae pamona, pamona ata Jesús pelivaisi jumecovēnētsinexa. Nexata bajarapova pamonajavabelia Jesús pelivaisi apo tsipaebi ata, pamona ata jumecovēnētsiana Jesús pelivaisi xaniavaetsia petsitaponaponaeaxae pamona. ² Bajarapacuenia pamona ata Jesús pelivaisi jumecovēnētsiana, pijava itsa cuenetaena Dioso paneyaiyataejava, itsa cuenetaenanua pijava Dioso pitabarata aneconijibia peponaponaejava. ³ Papetiriavimē, pētsa pajamatabējumaitsimē mapacueniaje: “Bepexaniavanē jivi tanetaenexa, naxatatsianajē naitabētsiaya. Namatafaratsianajē naitabētsiaya. Oronanita pexanaejavanēta naitabētsianajē. Itsa jume, nexata bitso pexaniaviriana naxatatsianajē,” pajamatabējamē pētsa. Pētsa bajarapacuenia panajamatabēxainame saya naniavelia panenaitabētsinexa. ⁴ Biji rajane bēpēnēaverena panajamatabēcueneitabēre. Bēpēnēaverena panenajamatabēcueneitabētsinexa, xaniavaetsia aneconijibia pajinavanapaename Dioso pitabarata. Nexata itsamonae pacaitsacueniabi ata, pētsa pacueneceanaviatame. Nexata xua bēpēnēaverena panajamatabēcueneitabētame, apo pacatoverevereae tsane. Bajarapitsijamatabēcuene pexainaeva tonamatamotsianatsi Diosojavabelia. ⁵ Pamonamei petiriavi bajayatami Dioso pejisipaecuenia exanavanapa, bajarapacuenia bēpēnēaverena Dioso pejumelivaisita najamatabēcueneitabēta. Bajarapamonaemi najamatabēcuene copata Diosojavabelia. Jumecovēnētavanapanua pamonajivi. ⁶ Bajarapamonaeyajuvēnēvami, Sarapijivami, Dioso pejumelivaisita najamatabēcueneitabēta bēpēnēaverena. Sarapijivami jumecovēnētsia ponapona pamona, Abrahampijinē. Itsa junata pamona, “Tajatuxanenē,” jai tsabiabi pamonajavabelia. Papetiriavimē, panajamatabēcuene copatavanapare Diosojavabelia. Paexanavanaparenua pexaniacuene. Pētsa pacujunavamenua pacaitsacueniabijitsi ata itsajivi papecaitoxaxae. Nexata bajarapacuenia itsa paexanavanapaename, pajamatabēcuenejēpaename Sarapijivami.

⁷ Paxamē papebijivimē, pacamuxujibatsi mapacueniaje. Xaniavaetsia pabarējinavanapare panijavajivi. Pacuenia Dioso nacaitoroba, bajarapacuenia payaiyataema panijavajivi. Bajarapacuenia payaiyataema tsipaji raja bajarapamona vaxaitsi pebijivitsi nacavecuasaajibi. Payaiyataema tsipaji raja bajarapamona ata yajava Dioso pacarajutsiana matacabi apo peverevereaejava. Bajarapacuenia panijavajivi yayiyataeya pabarējinavanapare paneajumeurayaniva panenavajētsijava Diosojavabelia.

Pacuenia pexaniacuene pexanaevi ata itsamonae bejibiaexanaenatsi yabara pelivaisi

⁸ Tajamona bitso patacaasivavi, pematatsēnēa pacamuxujibatsi mapacueniaje. Najamatabēcuenejēpaeya pajinavanapare. Paxamēyajuvēnējivi itsacuene itsa tocopiapatatsi, nexata bajarapacuenia yabara bitso itsa najamatabēxaina, paxamē ata pacobenajamatabēxainare. Daxita Dioso panenajajumecovēnētsivixae, namataenetsia panaasivamēre. Naitaxutotsoniataeyanua pajinavanapare. Beveliajamatabēcuenevinua nataeya pajinavanapare. ⁹ Itsajivi pibisiacuene itsa pacaexana, pētsa pacueneceanaviatame. Pibisiacuene itsa pacabijatanenua, pētsa pajumecanaviatame. Biji rajane bajarapajivi patovajēre Diosojavabelia Dioso peyavenonaenexatsi.

Tsipaji pamatacabi Dioso pacajunata papijajivinxamē, bajarapacuenia paneexanaenexa, pacaitoroba. Nexata juya paxamē Dioso pacaitaxutotsoniataena pacuenia najumecapanepaeya pacajumaitsi papecayavenonaenexa. ¹⁰ Bajarapacuenia yabara Dioso pejumelivaisibaxutota jumaitsi mapacueni-aje:

Pajivi jitsipa peponaponaenexa jamatabēcuenebarēyaya, bajarapajivi benaebarētoeveta pibisialivaisi pecuaicuaijayaniva. Benaebārētoevetanua penajumetsēnētsiyaniva ata. ¹¹ Bajarapajivi becopata pibisiacuene pexanabiabijavami pexanaponaponaenexa pexaniacuene. Beponapona xaniavaetsia itsajivi ata pebaraanaepanaeyanivatsi. ¹² Bajarapacuenia beponapona. Tsipaji raja Dioso naitaxutocaeveta xaniavaetsia pejinavanapaevi. Namuxunaevetanua penavajētsijavatsi bajaraponējavabelia. Dioso cajena baraanaepana pexanae pibisiacuene pexanavanapaevi, jai Dioso pejumelivaisibaxutota.

¹³ Itsa pajamatabēcuenesaēmē tsavanapae tsane pexaniacuene paneexanavanapaejava, nexata itsamonae pacabejiobiaexanae ata, itsiata apo pacajamatabēcuene bijianaecapanepae tsane. ¹⁴ Itsa pacabejiobiaexanaena xaniavaetsia pajinavanapae atamē, itsiata pajamatabēcuenebarēyamē tsane. Tsipaji raja Dioso pacayavenonaena. Pētsa pacujunavame bajarapamonae. Pētsa panasivajamatabēcuenebējamēnua papecabejiobiaexanaejava yabara. ¹⁵ Biji rajane panejamatabēēthētojavavetsina yaiyataeya pajumecovēnēre vajatuxanenē Cristo. Panajamatabēcuene veretavanaparenua xaniavaetsia panejumecanaviatsinexa itsajivi itsa pacayanijoba vajatuxanenē Cristo panejumecovēnētsijava yabara. Nexata itsa pacayanijoba mapacueniaje: “¿Detsa xuajitsia xamē jumecovēnētame Cristo?” itsa pacajai, nexata xaniavaetsia pajumecanaviatsianame. Itsiata baitsi jane itsa pajumecanaviatame, paxamē bevelijamatabēcuenevi panataeneme. Nexata bajarapajivi yaiyataeya pajumecanaviatsianame. ¹⁶ Cristo papijajivixaemē, pexaniacuena pajinavanapeneme. Nexata payapētaeneme Dioso pitabarata aneonijibia panejinavanapaejava. Nexata itsamonae najumetsēnētsiaya pacabaracuaicuaijai tsabiabi ata tsane, bajarapamonae belia najumecopatsiana papecabaracuaicuaijajava. Naurabiana papecabaracuaicuaijaitsabibijava yabara. ¹⁷ Pexaniacuene paexanabiabi atamē, Dioso itsa pacatocopatsiana itsamonae papecabejiobiaexanaenexa, nexata bajaraxua pacatonamatamotsiana Diosojavabelia. Itsiata baitsi jane itsamonae itsa pacabejiobiaexanaejitsipa pibisiacuene paneexanaejava yabara, nexata bajaraxua apo pacatonamatamotsi tsipae Diosojavabelia.

¹⁸ Cristo ata bejiobiaexanatsi itsa nacasivatēpa pibisiacuene vajaexanaeneconi yabara. Caeto rabaja Cristo tēpa. Pematatsēnēa baja apo nacasivatēpae tsane. Bajaraponē pepo pexaniacuene pexanaenē. Itsiata bejiobiaexanatsi vaxaitsi yabara, pibisiacuene vajaexanaevi, vajanacapanepaenexa Diosojavabelia. Peperabētomi baja picani tēpa. Itsiata baitsi jane pepo pejamatabēcuene jane baja icatsia Dioso asaēyaexanatsi. ¹⁹ Nexata abaxē Cristo petēpaenē itsa boca, pepo pejamatabēcuene jane baja pona petēpaevijavabelia pexanialivaisi petsipaebinxaxa. Tsipaji bajarapamonae naneconitsia jinavanapa petēpaevi pijanacuata. ²⁰ Bajarapamonaemi bajayata jinavanapa, pamatacabi Noépijinē ponapona. Bajarapamonaemi petēpaevajēnae Dioso apo jumecovēnētsi. Noépijinē abaxē itsa exanabatapona pinijilbarcoxaneto, Dioso picani bajayajebi jamatabēcueneeveta pejumecovēnētsinexatsi daxita mapanacuapijivije. Itsiata baitsi jane apo jumecovēnētsitsi. Saya ocho pajiviyobeje, Noépijinē, pijamonae yajava, bajara-

pamota Dioso capanepatsi mapanacuae pebubutsijavavecua. Yajavacapanepatsinua mapanacuataje pibisiacuene pexanaejavavecua. ²¹ Bajara pijinia itsi itsa nacabautisaba merata. Vajanacabautisabicujinae, meravecua itsa nonotajunatsi, itajētatsi vajacopabijava pibisiacuene vajaexanaejavami. Apo nacabautisabi baja cajena saya vajanacaperabēquiatsinexa. Biji rajane nacabautisaba vajanacajamatabēcuenequiatsinexa vajavajētisixae Diosojavabelia. Nexata Dioso vajanacajamatabēcuenequiatsijava, pexaniajaicuene. Tsipaji Jesucristo vajanacasivatēpaecujinae, icatsia Dioso asaēyaexanatsi. Bajarapacuenia Jesucristo Dioso piasaēyaexanaexaetsi, nexata yapētanetsi pepacune Dioso vajanacapanepaejavanexa. ²² Jesucristo Dioso piasaēyaexanaecujinaetsi, pona jane baja athēbēabetsia. Nexata athēbētatsia Jesucristo eca paxa Dioso pecujanenia. Daxita ángelevi Jesucristo jamatabēcuenevetatsi pitorobinexa.

4

Pacuenia Dioso asaēyata betonacuenebavanapatsi, pacuenia Dioso nacajamatabēcuene caējēpaeyaexana, yabara pelivaisi

¹ Cristo abaxē itsa ponapona mapanacuataje, itsamonae bejiobiaexanatsi. Bajara pijinia pacuenia paxamē ata tajēvelia bepaevetavanapame itsamonae papecabejibiaexanaenexa. Pajivi bejiobiaexanatsi Cristo pelivaisi pejumecovēnētisixae, bajarapajivi pevajēnaeyabelia ajamatabēcuenesaē baja tsaponae. Copata baja pibisiacuene pexanaejava. ² Pevajēnaeyabelia jamatabēexanaponapona pacuenia Dioso tojtsipatsi. Pibisiacuene baja apo exanae pacuenia Dioso apo pejumecovēnētisivi penatojtsipaecuena baexana. ³ Dioso panejumecovēnētisivajēnaeya, pibisiacuene paneexanavanapaeneconi yabara, ayaicuenia picani pananeconitame Diosojavabelia. Dioso panejumecovēnētisivajēnaeya, panevitota pibisiacuene paexanabiabame. Panajamatabēxainabiabamenua ēpibisiacuene yabara. Paitajibimēnua tsabiabi panijabonējjava. Paitajibimēnua tsabiabi fiestajava ata. Jumapecataeya pexanaenēanējavabelia ata panavajēcabiabame. Itsiata baitsi jane aeconoxae baja daxita bajarapacune pacopabame. ⁴ Nexata pamonaē Dioso apo peyapētaevi, pibisiacuene panenajuaexanabiabivimi, aeconoxae baja pacasivajamatabēcuenenabenajaca. Tsipaji papibisiacuene bajarapamonae exana, paxamē baja apo pajamatabēcuene yavenonaemē. Bajaraxuata bajarapamonae pibisiacuena pacabaracuaicuaijai. ⁵ Itsiata baitsi jane bajarapamonae itsamatacabi Dioso pitabarata nubianatsi. Nexata daxita bajarapamonae pibisiacuene pexanavanapaeneconi yabara, Dioso naneconitsiaexanaenatsi. Piasaētsavanapaevi, petēpaevimi ata, daxita Dioso naneconitsiaexanaena. ⁶ Petēpaevimijavabelia baja picani bajayata itsamonae tsipaebatsi pexanialivaisi, Cristo pelivaisi, itsa abaxē asaē tsavanapae bajarapamonaemi. Itsiata daxita bajarapamonaemi apo jumecovēnētisī Cristo pelivaisi. Itsiata bajarapamatacabi itsamonae baja jumecovēnēta Cristo pelivaisi. Nexata xuacujinae daxita bajarapamonaemi tēpaponā. Itsiata baitsi jane pamonaē baja pepuajumecovēnētisī Cristo pelivaisi, tēpa, bajarapamonae xaina baja matacabi apo pevereverecejava.

⁷ Imoxoyo rabaja pevajēnae peverevereceaenexa mapanacuae. Bajaraxuata itsacunenajava ata pibisiacuene paexanaenejevamē, xaniavaetsia pajinavanapare. Namataenetsianua najamatabēcueneevetsiaya xaniavaetsia pajinavanapare panenajuvajētabiabinexa Diosojavabelia. ⁸ Namataenetsia panaasivamēre tsavanapae. Bajarapacune daxitacuene matatoxenetsia bitso nacatoxanepana vajaexanaenexa. Tsipaji itsa asivatsi

itsajivi ata, nexata pibisiacuene nacaexanabiabi ata, bajarapajivi apo barajamatabësitecaetsi. ⁹ Namataenetsia xaniavaetsia panacopiapire panijaboyaberena jamatabëcuenexanepanaeya. ¹⁰ Pacaenëmë canacujitsia Dioso saicayacuenia pacajamatabëcuene caëjëpaeyaexanapona Dioso pijacuene panetonacuenebavanapaenexa. Nexata namataenetsia panajamatabëcueneyavenonare xua Dioso pacaenëmë canacujitsia pacajamatabëcuene caëjëpaeyaexanapona paneexanaenexa. Bajarapacuenia Dioso patonacuenebavanapare xaniavaetsia. ¹¹ Itsajivi itsamonaejavabelia itsa tsipaeba Dioso pejumelivaisi, bajarapajivi betsipaeba palivaisi Dioso yapëtaeyaexanatsi. Itsajivi pijinia itsa yavenonaejitsia itsanë, bajarapajivi beyavenona pacuenia Dioso jamatabëcuenecaëjëpaeyaexanatsi peyavenonaenexa. Daxita xua paexanaejitsiamë Jesucristo papijajivixamë, paexanare jivi peyaiyataenexa Dioso. Dioso baja cajena daxitacuene pitorobinë, penivenivenaecotia pexainaenë daxitamatabijavabelianexa. Bajara itsi tsane.

Pacuenia Jesucristo pelivaisi pejumecovënëtsivi itsamonae bejiobiaexanaponatsi yabara pelivaisi

¹² Tajamonae bitso patacaasivavi, pëtsa pajamatabëcuenenabenajacame, itsamonae bitso pacabejiobiaexanaponaë ata. Bajarapacuenia pacatocopiapatatsiana papecajamatabëcueneëjëtsinexa papecajamatabëcueneyapëtaenexa pepacuene panenajamatabëcuenecopatsijava Diosojavabelia. Nexata pëtsa pajamatabëjumaitsimë: “Xanë cajena Dioso tajumecovënëtsinë. Nexata bajarapacuenia caenënë netocopiapatapona,” pajamatabëjamë pëtsa. Tsipaji raja daxita Dioso pejumecovënëtsivi bajarapacuenia tocopiapataponatsi pejamatabëcueneëjëtsinexatsi pejamatabëcueneyapëtaenexatsi pepacuene penajamatabëcuenecopatsijava Diosojavabelia. ¹³ Nexata saya panasivajamatabëcuenebarëyamëre tsavanapae paxamë ata itsa pacabejiobiaexanapona pacuenia Cristo bejiobiaexanatsi. Nexata pamatacabi pataename Cristo pepatsijavatsica pijapenivenivenaecotia yajava, pasivajamatabëcuenebarëyamë tsane. ¹⁴ Pibisiacuenia itsamonae itsa pacabijatane Jesucristo pelivaisi panejumecovënëtsivixae, pasivajamatabëcuenebarëyamëre. Tsipaji raja paepatota itsamonae pacabijatane, ayaijamatabëcuenenë Espiritu Santo, ponë pacayajavaponapona, ayaiacuenia pacayavenonaena. ¹⁵ Pëtsa jivitonë pabeyaxuabame. Pëtsa panacobetoxotame. Pëtsa paexaname itsacueneyava ata pibisiacuene. Pëtsa patoebetame itsamonae pijacuene pacajunatsinejeva panetoevetsinexa, bajarapacuenia itsamonae panejamatabëitonotsiyaniva. Pëtsa bajarapitsicuene paexaname itsajivi ata paxamë yabara pejumaitsiyaniva: “Pibisiacuene pexanaevixae, bejiobiaexanatsi bajarapamonae,” pejaiyaniva itsa pacabejiobiaexana itsamonae. ¹⁶ Pajivi bejiobiaexanatsi Jesucristo pelivaisi pejumecovënëtsixae, bajarapajivi apo benacaura pebejiobiaexanaejavatsi. Pexaniajamatabëcuene berajuta Diosojavabelia Jesucristo pelivaisi pejumecovënëtsixae.

¹⁷⁻¹⁸ Dioso yapëtanë pacuenia daxita pijajivi tojinavanapatsi. Nexata aeconoxae Dioso tocopiapatatsi pijajivijavabelia pejumaitsinexa: “Paxamë xaniavaetsia panetojinavanapame. Pexaniacuenenua patoexanabiabame itsamonaejavabelia. Nexata pacasivajamatabëcuenebarëyatsi,” pejainexa Dioso, pexaniacuene pijajivi itsa toexanavanapatsi. Itsiata pamonae Dioso pijajivi ata, xaniavaetsia Dioso apo tojinavanapae, pexaniacuenenua apo toexanabiabi itsamonaejavabelia, bajarapamonaejavabelia Dioso jumaitsi

tsane: “Paxamē apo pacasivajamatabēcuenebarēyatsi. Tsipaji tajitsipaecuenia apo paexanavanapaemē,” jai tsane. Bajarapacuenia Dioso itsa jumaitsi tsane pejumecovēnētsivitsijavabelia ata, ždetsa nexata Dioso jumaitsi tsane Dioso apo pejumecovēnētsivitsijavabelia? Nexata Dioso ayaicuenia naneconitsiaexanaena bajarapamonae. Pamonaejavabelia Dioso jumaitsi tsane: “Pacasivajamatabēcuenebarēyatsi,” jai tsane, bajarapamonae Dioso capanepaena pijanacuayabetsia. Pamonaejavabelia ata Dioso jumaitsi tsane: “Paxamē apo pacasivajamatabēcuenebarēyatsi,” jai tsane, bajarapamonae ata itsiata tsiquirijavayota Dioso capanepaena pijanacuayabetsia. Bajara-pacuenia Dioso itsa exanaena pejumecovēnētsivitsijavabelia ata, nexata biji pamonaē apo jumecovēnētsi Dioso pejumelivaisi, pamonaē pibisiacuene pexanaevi, Dioso apo capanepae tsane pijanacuayabetsia. ¹⁹ Nexata paxamē Dioso pacatocopatsi ata itsamonae papecabebiobiaexanaponaenexa, pētsa pajamatabēcuenebējamē. Tsiteca panevajēnaeyabelia pexaniacuene paexanavanapare. Panajamatabēcuene copare papecaexanaenē, Dioso javabelia, papecayavenonaxa. Dioso cajena pacuenia najumecapanepaeya jumaitsi, bajarapacuenia pacatoexanaena.

5

Pacuenia Dioso pejumecovēnētsivi muxujiobatsi yabara pelivaisi

¹ Aeconoxae ancianovi papecayajavajinavanapaevi, muxujiobijitsianē. Xanē ata rabaja ancianonēnē. Pacuenia itsi bajarapaancianovi, xanē ata rabaja itsinē. Taniji pacuenia Cristo cruzata bejiobiaexanatsi. Pamatacabi icatsia Cristo patsianica, daxitatsi, Cristo pijajivitsi, nacabarēevetsiana xua Cristo evetsiana. ² Pacuenia oveja pevetsivi xaniavaetsia baevetavanapa, bajara pijinia pacuenia paxamē ata xaniavaetsia paevetavanapare Dioso pejumecovēnētsivi, pamonaē Dioso pacatocopata panetoevetsinexa. Jamatabēcuenebarēyaya Dioso pejitsipaecuenia patoevetavanapare Dioso pejumecovēnētsivi. Pētsa pajamatabējumaitsimē: “Apo jitsipae atanē tatoevetsinexa Dioso pejumecovēnētsivi, itsiata toevetsianajē. Tsipaji Dioso netojitsipa tatoevetsinexa,” pajamatabējamē pētsa. Pētsa pajamatabējumaitsimēnua: “Tanematamotsinexa toevetsianajē,” pajamatabējamē pētsa. Paxamē panejamatabēēthētojavavetsina panejitsipaexae Dioso pejumecovēnētsivi panetoevetsinexa, patoevetavanapare. ³ Pamonaē Dioso pacatocopata panetoevetsinexa, bajarapamonae pētsa bepapijatuxanevimē panataneme saya jema paneitorobabiabinexa. Biji rajane xaniavaetsia patsitajinavanapare pacuenia patojitsipame bajarapamonae pejinavanapaenexa. ⁴ Nexata pamatacabi icatsia Cristo patsianica, ponē jane baja pepo vajanacaevetsinēnēnaxa, nacarajutsiana pinijicuene. Xua Cristo nacarajutsiana, apo vereverecae tsane daxita matacabijavabelianexa.

⁵ Paxamē papevējēavimē, pacuenia ancianovi pacaitoroba, pajumecovēnētabiabarē. Pacaejivimē canacujitsia namataenetsia panayavenonabiabianame beveliajamatabēcuenevi nataeya. Bajara-pacuenia panataema tsipaji raja Dioso pejumelivaisibaxutota jumaitsi pacacueniajaje: Dioso apo yavenonae pamonaē beayaijamatabēcuenevi penataevi. Itsi-ata baitsi jane Dioso pitaxutotsoniataexae, pexaniajamatabēcuenia yavenona pamonaē beveliajamatabēcuenevi penataevi, jai Dioso pejumelivaisibaxutota.

⁶ Nexata saya paxamē beveliajamatabēcuenevi panataema ayaijamatabēcuenenē Dioso pitabarata. Nexata Dioso pecajējtsimatacabita,

paayaijamatabëcuenevimë pacaexanaena. ⁷ Dioso papecaasivaxae, pacaevetaponapona. Bajaraxuata daxita panejamatabëcuenebëjajava, pacopare. Pavajëre Diosojavabelia papecayavenonaenexa.

⁸ Nayajivitaeyanua pajinavanapare panijavajabitsaënë, dovathi, papecayamaxëitojorobiyaniiva. Pacuenia nevêthë itsa piajani, jaitaponapona pexaeyabuatsinënexa, bajarajamatabëcueneitsi dovathi papecayamaxëitojorobinexa.

⁹ Paepatota dovathi jamatabëpacayamaxëitojoroba panecopabinexa Jesús pelivaisi panejumecovënëtsijava, bajarapaepatota pajamatabëcuenesaëmëre Jesús pelivaisi panejumecovënëtsijava. Diosojavabelia najamatabëcueneocopatsiaya dovathi panayajiviitavere. Itsamonae itsa pacabejiobiaexana dovathi pejamatabëcueneta, panajamatabënapire pacuenia itsamonae ata, Dioso pejumecovënëtsivi, daxitanacuanëjava dovathi pejamatabëcueneta bejiobiaexanaponatsi.

¹⁰ Itsiata baitsi jane saya caepatoyo Dioso pacacopatsiana papecabebiobiaexanaenexa. Bajaraxuacujinae Dioso pacajamatabëcuenesaëyaexanaena. Bajaraponë Dioso vajanacayavenonaenë daxitacuenejavabelia. Nacajunatanua Jesucristo yajava athëbëtatsia vajanacayajavaecaenexa, penivenivenaenacuatatsia, daxitamatacabijavabelianexa. ¹¹ Dioso baja cajena daxitacuene pevetsinë daxitamatacabijavabelianexa. Bajara itsi tsane.

Pacuenia Pedro toyaquina peveretsinexa baja petoyaquinaelivaisi mapabaxutotaje yabara pelivaisi

¹² Silvano betajuyapijinë taniji bajaraponë ata Dioso pejumecovënëtsixae. Silvano yaquinaeayexanajë palivaisi pacatoitorobijitsiatsilia. Bajaraponë ponaejitsia baja paxamëjavabelia. Nexata pacatoyaquinatsi mapabaxutoje patacajamatabëcuene asaëyaexanaenexa. Dioso vajanacayavenonabiabixae, yapëtanetsi baja xaniajai pepacuene Dioso vajanacaasivacuene. Bajaraxuata pacabejiobiaexanabiabi ata, pajamatabëcuenesaëmëre tsavanapae paneyapëtaexae baja bajarapacuene.

¹³ Dioso pejumecovënëtsivi, Babilonia tomarapijivi, pacajamatabënajina. Pacuenia paxamë Dioso pacaitapeta papijajivinexamë, bajara pijinia pacuenia bajarapamonae ata Dioso itapetatsi pijajivinexa. Marcos, ponë betaxënatocuenia tataenë, bajaraponë ata pacajamatabënajina.

¹⁴ Namataenetsia naasivaya panabajacobare bepanacaemonaemë panenataexae.

Pacatojitsipatsi daxita paxamë jamatabëcuenexanepanaeya panejinavana-paenexa Jesucristo papijajivixaemë. Bajara itsi tsane.

Mapabaxutoje San Pedro cotocaevi toyaquina Dioso pejumecovënëtsivijavabelia

Pacuenia Pedro mapabaxutoje cotocaevi toyaquina Dioso pejumecovënëtsivijavabelia yabara pelivaisi

¹ Xanë Simón Pedronë, Jesucristo taneitorobicuenia tatonacuenebaponaponaenë. Nitorobanua jivi tatsipaebabiabinexa Jesucristo pelivaisi. Pacatoyaquinatsi mapabaxutoje paxamë baja Dioso panejumecovënëtsivi. Jesucristo patanesivatëpaejava patajaneconi yabara patajumecovënëtsijava, paxanë panetonamatamota Diosojavabelia. Bajara pijinia paitsimë paxamë ata. Jesucristo papecasivatëpaejava panijaneconi yabara panejumecovënëtsijava, pacatonamatamota Diosojavabelia. Bajarapacuenia daxitatsi Jesucristo vajanacasivatëpaejava vajaneconi yabara vajajumecovënëtsijava, nacatonamatamota Diosojavabelia. Tsipaji vajatuxanenë Jesucristo, vajanacapanepaenë, nacaneconimatamota baja. ² Pacatovajëtatsi Diosojavabelia bitso papecayavenonaponaenexa daxitacuene yabara. Pacatovajëtatsinua jamatabëcuenevanepanaeya panejinavanapaenexa. Bajarapacuenia Dioso pacayavenonaponaena panevajënaeyabelia, Dioso itsa pajamatabëcueneyapëtaeponaename, vajatuxanenë Jesucristo ata itsa pajamatabëcueneyapëtaeponaename.

Pacuenia Dioso pejumecovënëtsivi jamatabëcueneitsi tsavanapae yabara pelivaisi

³ Dioso, ponë nacajunata pijajivinxatsi, yapëtanetsi baja bitso ayaijamatabëcuene pexainaenëcuene. Bajaraponë Dioso bitso pexaniacuene pexainaenë. Bajaraponë Dioso pesaëta pinijicuene pexanaejava, itsa exana mapanacuataje, nacatsitanajamatabëcueneitajëta bitso ayaijamatabëcuene pexainaenëcuene. Bajarapacuenia itsa yapëtaeponatsi Dioso, nexata Dioso nacarajutapona pesaë vajajinavanapaenexa xaniavaetsia pacuenia Dioso nacatojitsipa. ⁴ Bajarapacuenia Dioso pinijicuene pexanaejavanë pexanaexae mapanacuataje, nexata yapëtanetsi Dioso xaniajai vajanacapanepaejavanexa pacuenia najumecapanepaeya jumaitsi. Dioso vajanacapanepaejavanexa pinijicuene bitso. Jumecovënëtatsi Dioso vajanacapanepaejavanexa. Nexata Dioso nacayavaponapona. Bajaraxuata Dioso pesaëta nacajamatabëcueneasaëyaexanaena vajajinavanapaenexa xaniavaetsia. Nexata nacajamatabëcuene caëjëpaeyaexanaena vajavecuapanepaenexa mapanacuata pibisiacuene vajanacaexanaeyaexanae jamatabëcuene. Nexata pacuenia Dioso jamatabëcueneitsi tsaponapona, bajara vaxaitsi ata jamatabëcueneitsi tsavanapae tsane. ⁵ Nexata pacuenia Dioso jamatabëcueneitsi tsaponapona, bajara panejamatabëcueneitsinexa, asaëyata Dioso pajumecovënëtaaponare. Asaëyata Dioso itsa pajumecovënëtaeponaename, nexata icatsia itsajava payapëtaeponaename. Asaëyata paexanavanapare ëpexaniacuene. Asaëyata itsa paexanavanapaename ëpexaniacuene, nexata icatsia orijibia pajamatabëcueneyapëtaeponaename Dioso. Nexata payapëtaename pacuenia Dioso pacatojitsipa asaëyata panetoexanavanapaenexa. ⁶ Paneyapëtaecujinae pacuenia Dioso pacatojitsipa asaëyata panetoexanavanapaenexa, icatsia payapëtaename panenajamatabëcueneicatsinexa pibisiacuene panenajamatabëxainaejaniva.

Paneyapëtaecujinae panenajamatabëcuenecataitsinexa pibisiacuene panenajamatabëxainaeyaniva, icatsia payapëtaename dovathi pejamatabëcueneta bajayajebi pacajamatabëcuenëjëtaaponae ata, asaëyata panenajamatabëcuenesaëtsinexa ëDiosojavabelia. Paneyapëtaecujinae dovathi pejamatabëcueneta bajayajebi pacajamatabëcuenëjëtaaponae ata, asaëyata panenajamatabëcuenesaëtsinexa ëDiosojavabelia, icatsia payapëtaename xaniavaetsia panejinavanapaenexa pacuenia Dioso pacatojitsipa. ⁷ Paneyapëtaecujinae xaniavaetsia panejinavanapaenexa pacuenia Dioso pacatojitsipa, icatsia payapëtaename asaëyata panenayavenonaenexa itsamonaë ata Dioso pejumecovënëtsivi. Paneyapëtaecujinae paneyavenonaeenexa itsamonaë ata Dioso pejumecovënëtsivi, icatsia payapëtaename asaëyata namataenetsia bitso panenasivanexa bajarapamonaëjavabelia.

⁸ Daxita bajaraxua asaëyata panevajënaeyabelia itsa paexanavana-paename, nexata pacuenia Dioso jamatabëcuenëitsi tsaponaponae, bajara pajamatabëcuenëitsimë tsane. Bajarapacuenia asaëyata itsa paexanavanapaename, nexata pajamatabëcuenëitsabaponaename Dioso panjumecovënëtsijava. Nexata Dioso ata tsitanepanaenatsi xua patonacuenebavanapame. Nexata vajatuxanenë Jesucristo panejamatabëcueneyapëtaejava, apo panacueratsimë tsane. ⁹ Itsiata baitsi jane pajivi apo exanaë tsane daxita bajaraxua, nexata apo yapëtae tsane Dioso pijacuene. Tsipaji bajarapajivi nacofënëtsiana Dioso picani pevecuaajibiaexanaejavatsi pibisiacuene pexanaeeneconimi. ¹⁰ Tajamonae, bajaraxuata pacasaëmëre tsavanapae Dioso panejumecovënëtsijava, jivijavabelia panetsitanaitjëtsinexa Dioso papecajunatsijava, papecaitapetsijava ata papijajivinxamë. Nexata bajarapacuenia itsa paexanavanapaename, Dioso panjumecovënëtsijavavecua, apo pajopaemë tsane. Pacacapanepaena Dioso. ¹¹ Nexata Dioso pacatocopsiansa panejonenexa vajatuxanenë Jesucristo vajanacapanepaenënexa, pijanacuayabetsia, apo pevereveercaenacuayabetsia, paneyajavajinavanapaenexa.

¹² Daxita rabaja bajaraxua payapëtaneme. Pajamatabëcuenesaëmënuja baja panejumecovënëtsijava pexaniajailivaisi. Itsiata icatsia pematatsënëa pacanajamatabënapitsiaexanaponatsi. ¹³ Abaxë tasaëtsaponaponaepato mapacanatajaje, netsitaxanepana patacamuxujobinexa, bajarapacuenia patacanajamatabënapitsia exanaponaenexa. ¹⁴ Tsipaji baja vajatuxanenë Jesucristo tajëvelia neyapëtaeyaexana bepijia tatëpaejavanexa. ¹⁵ Itsiata baitsi jane pacuenia necaëjëpa, xaniavaetsia pacatoyaquinaenatsi panenacofënëtsiyaniva. Nexata itsa tēpajë, paxamë tavënamuto panenajamatabënapitabiabinexa pacuenia pacamuxujobatsi.

Pacuenia Jesucristo pijajivijavabelia tsitanajamatabëcuenëitajëta ayajamatabëcuenë pexainanëcuenë yabara pelivaisi

¹⁶ Imata vajatuxanenë Jesús pelivaisi itsa pacatsipaebatsi, xaniavaetsia pacatsipaebatsi mapacueniajaje: “Vajatuxanenë Jesucristo baja cajena bitso pecaëjëpaenëtsi Dioso pesaëta pinijicuene pexanaejava pexanaenexa. Bajaraponë icatsia patsianica,” pacajaitsi. Saya jivi pejamatabëcueneta penajumetsënëtsilivaisi, apo pacatsipaebitsi. Tsipaji baja pataitaxutota pataniji vajatuxanenë ayajamatabëcuenë pexainanëcuenë. ¹⁷ Xaniavaetsia baja cajena pajumetaniji pamatacabi paxa Dioso athëbëvetsica barëcuaicuajiajitsi. Bajarapapatota daxitanë Cristo nivenivenareca. Athëbëvetsica paxa Dioso jumaitsitsica mapacueniajaje: “Mara ponë taxënatoje, tasivanë. Bitso siva-jamatabëcuenëbarëyanë,” jaitsica paxa Dioso athëbëvetsica. ¹⁸ Vajatuxanenë

Jesucristo payajavanubenajē petsutojumata, itsajota jane baja paxa Dioso athēbēvetsica barēcuaicuajajitsitsica. Nexata bajarapatsutojumata paxanē patajacuata pajumetaniji vajatuxanenē Jesucristo paxa Dioso athēbēvetsica pebarēcuaicuajajavatsitsica.

¹⁹ Nexata pataniji. Payapētanjiniua. Xua bajayata Diosojumepaebivimi profetavi tajēvelia vajunupaeba pecopiapatsinexa, bajaraxua jane baja aeconoxae copiapata. Paxamē pibisiacuene panenayajivitaenexa, pajumecovēnere profetavimi pepaebilivaisi. Profetavimi pepaebilivaisi, pexaniajailivaisixae, belāmpara picani. Pacuenia lāmpara itayota pitaquirjavata, bajara pijinia itsi profetavimi pepaebilivaisi pibisiacuene panenayajivitaenexa mapanacuataje. Pajumecovēnere xaniavaetsia profetavimi pepaebilivaisi. Nexata bajarapalivaisi pacajamatabēcueneyavenonaena pibisiacuene panenayajivitaevanapaenexa mapanacuataje. Bajarapacuenia pacajamatabēcueneyavenonaena matapania icatsia Jesucristo pepatsimatacabitsicajavabelianexa. Nexata bitso pabarēyamē tsane pamatacabi icatsia Jesucristo patsianica. ²⁰ Xaniavaetsia pacanaējere daxitacuenevecuapaneyapētaenexa mapalivaisije. Daxita xua copiapatsijitsia mapanacuataje, tajēvelia Dioso pejumelivaisibaxutota vajunupaeba. Itsajivi ata cajena apo caējēpaetsi saya pejamatabēcueneta bajaraxua xaniavaetsia pevajunupaebinexa itsamonaejavabelia, itsamonae ata peyapētaenexa pajamatabēcuenelivaisi xaina bajaraxua. Matapania pajivi Espiritu Santo yapētaeyaxanatsi, caējēpatsi xaniavaetsia pevajunupaebinexa bajaraxua. ²¹ Bajayata Diosojumepaebivimi profetavi tajēvelia itsa vajunupaeba daxita xua copiapatsijitsia mapanacuataje, pejamatabēcueneta apo exanae bajarapalivaisi. Profetavimi Dioso pijajivixae, pacuenia Espiritu Santo yapētaeyaxanatsi, paebabiaba.

2

Pacuenia Dioso pejumecovēnētsivi muxujibatsi penajumetsēnētsilivaisi petsipaebaponaevi pejumecovēnētsyaniva yabara pelivaisi
(Jud 4-13)

¹ Bajayata itsamonae tsipaebapona penajumetsēnētsilivaisi Israel nacuapijivijava Dioso pejumelivaisi bepaebivi petaenexatsi. Bajara icatsia aeconoxae ata itsane paxamējava. Itsamonae pacatsipaebiana penajumetsēnētsilivaisi. Bajarapamonae yamaxēitorobiaya pacatsipaebiana penajumetsēnētsilivaisi. Nexata bajarapalivaisita pacacopabiaexanaena Dioso panejumecovēnētsijavami. Bajarapamonae apo pejumecovēnētsivi tsane vajatuxanenē Jesucristo, ponē picani sivatēpatsi pecapanepaenexatsi. Bajarapacuenia pexanaexae tsane bajarapamonae, nexata bepimia Dioso verebiabiana bajarapamonae. ² Bajarapamonae pevitota pibisiacuene exanavanapaena. Nexata bajaraxua yabara jumaitsi tsane: “Apo itsacuene itsiata, bajaraxua exanae atatsi,” jai tsane bajarapamonae. Nexata ayaiBITSaēto paxamēyajuvēnēvi jumecovēnētsiana. Naexanaenunia papibisiacuene bajarapamonae exana. Nexata bajarapacuenia paxamēyajuvēnēvi pibisiacuene petsitaexanaexae tsane, pamonae Dioso apo pejumecovēnētsivi pibisiacuenia baracuaicuajai tsane pexanialivaisi, Jesucristo pelivaisi. ³ Nexata pamonae penajumetsēnētsilivaisi tsipaebaponaena, bitso jitsipaena palata. Bajaraxuata pacatsipaebiana penajumetsēnētsilivaisi papecatsipaebijamatabēcuenē papecavecuapitsinexa panijapalata. Itsiata baitsi jane Dioso tajēvelia najamatabēcuenevereta bajarapamonae

penaneconitsiaexanaenexa. Nexata bajarapamonae bajarapitsixae tsane, pepacue ne jemata Dioso naneconitsiaexanaena.

⁴ Angelevi ata baja cajena itsa naneconita, aneconijibia Dioso apo copatsi. Angelevi ata itsa naneconita, nexata Dioso xuaba infernojavabelia. Nexata bajarajota, pitaquirinacuata, cēbiaya Dioso jinavanapaeyaexana. Nexata bajarapaängelevi Dioso jane baja naneconitsiaexanaena pamatacabi Dioso naneconitsiaexanaena daxita pijaneconi pexainaevi. ⁵ Dioso cajena aneconijibia apo copatsi bajayatami ata pamonaē pibisiacuene exana. Dioso ira bubutsiaexana bajarapamonae penaxuabinexa. Caenē, Noépijinē, Dioso capanepa pijamonae yajava, siete pajiviyobeje. Noépijinē picani itavetabiaba jivi pibisiacuene pexanaeyaniva. ⁶ Bajayata Dioso isotota verebiaba Sodoma tomarapijivimi. Bajara pijinia pacuenia Dioso verebiaba Gomorra tomarapijivimi ata. Nexata Dioso copiarucaeyaexana bajarapatomaramibeje. Tsipaji bitso pibisiacuene exana bajarapatomaramibejepijivi. Bajarapatomaramibeje nacopata ēipumana. Bajarapacuenia Dioso verebiaba bajarapamonaemi, pamonaē cotocaevi jinavanapa, peyapētaenexa, bajarapamonae ata pibisiacuene pexanaeyaniva. ⁷ Pamatacabi Dioso verebiaba bajarapatomaramibejepijivi, caenē, Lotpijinē, Dioso capanepa pexaniacuene pexanabiabixae. Lotpijinē itsa taeyabiaba bajarapamonaemi bitso pibisiacuene pexanaejava, nexata bitso sivanajamatabēxainabiaba. ⁸ Lotpijinē pexaniacuene pexanaenē, bajarapamonaemi tuatuaēta naponapona. Nexata caematacabi canacujitsia Lotpijinē bitso sivanajamatabēxainabiaba, itsa tane bajarapamonaemi pibisiacuene pexanaejava, itsa vēnēlivaitsitanenua pibisiacuene pexanaejava. ⁹ Bajaraxuata vaxaitsi baja yapētanetsi mapacue neje. Vajatuxanenē caējēpatsi pejamatabēcueneasaēyaexanaenexa pajivi najamatabēcuene copata vajatuxanenējavabelia. Nexata pajivi najamatabēcuene copata vajatuxanenējavabelia, dovathi itsa jamatabēcueneējētatsi, vajatuxanenē jamatabēcueneasaēyaexana. Vajatuxanenē caējēpatsinua pibisiacuene pexanaevi, nabejibitsiaya pejinavanapaeyaexanaenexa, mapanacuataje abaxē itsa asaē tsavanapae. Bajarapacuenia vajatuxanenē nabejibitsiaya jinavanapaeyaexanaena penaneconitsiaexanaenexa icatsia petēpaecujinae ata, pamatacabi naneconitsiaexanaena daxita pijaneconi pexainaevi.

¹⁰ Pamonaē bitso casaē tsavanapae pibisiacuene pexanaejava pijacuata penatojitsipacuenia, bajarapamonae bitso ayaucuenia Dioso naneconitsiaexanaena itsamonae penaneconitsiaexanaejava matatoxenetsia. Pamonaē ata apo jumecovēnētsi vajatuxanenē pevetsicuenetsi, bajarapamonae ata Dioso bitso ayaucuenia naneconitsiaexanaena. Pamonaē penajumetsēnētsilivaisi petsipaebaponaevi, apo yayiatae itsamonae ata. Ajamatabēcuenetajanua. Apo jumejunavinua bajarapamonae pibisiacuenia pebaracuaicuaijainexa Ángelevi. ¹¹ Angelevi biji picani bitso piasaēvi penajumetsēnētsilivaisi petsipaebaponaevi matatoxenetsia. Nexata Ángelevi vajatuxanenē pitabarata pejinavanapaexae, bitso piasaēvi ata penajumetsēnētsilivaisi petsipaebaponaevi matatoxenetsia, itsiata pibisiacuenia apo baracuaicuaijai penajumetsēnētsilivaisi petsipaebaponaevi.

¹² Pamonaē penajumetsēnētsilivaisi petsipaebaponaevi, beveliajamatabēcuenevi saya. Pacuenia saya jinavanapa unupijidujuai, bajara saya jamatabēcueneitsi bajarapamonae. Apo najamatabēxainae pexanialivaisi. Saicaya xua jamatabēxana, exanabiaba. Unupijidujuai saya jema bajinavanapa. Nexata jivi jemata itsa tane, vaetaba. Beyaxuabanua. Pamonaē penajumetsēnētsilivaisi petsipaebaponaevi, pibisiacuenia

baracuaicuajai tsabiabi xaniavaetsia apo peyapëtaejava ata. Nexata pacuenia unupijidujuai baverebiabatsi, bajara pijinia pacuenia jemata Dioso verebiabiana bajarapamonae. ¹³ Nexata Dioso bajarapamonae juya bejioabiaexanabiaba. Bajarapamonae pibisiacuene itsa exanabiaba, barëya tsabiabi. Bajarapamonae apo pacajamatabëcuenejëpae ata, nanacaetuatsiana itsa panacaetuatame. Nexata yamaxëitojorobiaya pacayajavanabanebiabiana fiesta paneexanaematacabi. Bajarapamonae pibisiacuene pexanabiabixae tsane, nexata panetuatujëta bepiaxuirajava tsane.

¹⁴ Bajarapamonae itsa tane petiriva, pibisiacuene jamatabëexanabiaba pevitota bëjarapovajavabelia. Apo yabaracueranae pibisiacuene pexanaejava. Penajumetsënëtsilivaisi petsipaebaponaevi, pibisiacuene exanaeyaxanabiaba pamonae abaxë apo jamatabëcuenesaë Dioso pejumecovënëtsijava. Bajarapamonae bitso jitsipa daxitacuene pexinaejava ëpamonae nexa. Bitso yapëtanenua pepitsinexa xua jitsipa. Nexata bajarapamonae Dioso bitso ayaicuenia naneconitsiaexanaena. ¹⁵ Bajarapamonae baja Diosovecua naxuabiaya jinavanapa. Tsi-paji baja copaba pexania-jailivaisi pejumecovënëtsijavami. Apo jumecovënëtsi Dioso. Nexata bajarapamonae cuenejëpa Diosojumepaebinëmi, profeta Balaampijinëmi, Beor-pijinëmi pexë nato. Balaampijinëmi bajayata itsamonae tsi-paebatsi palata pibisiacuene picani pexanaenexa. Nexata baja picani Balaampijinëmi je-jai pibisiacuene pexanaenexa. ¹⁶ Itsiata baitsi jane Balaampijinë Dioso itavetatsi bajarapapibisiacuene bitso pexanaeyaniva Dioso pitabarata. Balaampijinë pijaburrota yanajetaruca. Dioso cuaicuajaiyaexana burro. Nexata pacuenia jivitonë bacuaicuajai, bajarapacuenia Balaampijinë pijaburro barëcuaicuajaitsi pitavetsinexatsi pibisiacuene pexanaeyaniva. Nexata picani xua Balaampijinë jamatabëexana, copata baja.

¹⁷ Pamonae penajumetsënëtsilivaisi petsipaebaponaevi, apo jumenamata-motsi. Yapëtanetsi pacuenia baitsi meramatathaibëmi itsa tseveca. Meramatathaibëmi itsa tseveca, apo jamatabëcueneyavenonae itsajiviyo ata. Tsi-paji itsajivi mera jitsipae ata, piapaenexa apo puatsi bajarajota. Bajara pijinia itsi pamonae petsipaebaponaevi penajumetsënëtsilivaisi. Itsajivi ata apo jamatabëcueneyavenonae bajarapamonae petsipaebilivaisita. Pacuenia itarërëbo ata jovibota xaniavaetsia caecovëta apo rucae, bajara jamatabëcueneitsi bajarapamonae. Caejamatabëcuene apo xainae. Nexata Dioso bajarapamonae bitso ayaicuenia naneconitsiaexanaena. Bajarapamonae pitaquirinacuata naneconitsia jinavanapaena daxitamatacabijavabelianexa. ¹⁸ Bajarapamonae ayaijamatabëcuenevi nataeya cuaicuajai tsabiabi. Itsiata baitsi jane saya natsiquejemalivaisi cuaicuajai tsabiabi. Bajarapamonae yamaxëitojorobiaya jumai tsabiabi: “Apo itsacuene raja apo payaiyatae atamë petiriva. Pibisiacuene itsa jamatabëpaexaname panevitota petirivajavabelia, paexanare,” jai tsabiabi bajarapamonae. Bajarapacuenia bajarapamonae othopaeyaxanapona pamonae pejanajumecovënëtsivi Dioso. Tsi-paji pibisiacuene exanaeyaxanapona. ¹⁹ Bajarapamonae yamaxëitojorobiaya jumai tsabiabinua: “Itsa panejumecovënëtsianame patacatsipaebilivaisi, nexata pacatoxanepanaena paneaxanabiabinexa daxitacuene,” jai tsabiabi pamonae penajumetsënëtsilivaisi petsipaebaponaevi. Itsiata baitsi jane bajarapamonae apo jamatabëcuenecajëpaeatsi daxita xua pexaniacuene pexanaenexa. Saya ëpibisiacuene exanabiaba. Bajaraxuata Dioso bajarapamonae verebiabiana. Tsi-paji bajarapamonae pibisiacuene exanabiaba pijacuata penatojitsipaecuenia, pacuenia pejamatabëcuene itorobatsi. Caejivitsi canacujitsia vajacuata vajanatojitsipae-

cuenia itsa exanaponatsi, vajajamatabëcuene bepijajivitonëtsi naexanatsi. Tspaji pacuenia vajajamatabëcuene nacaitoroba, exanaponatsi. ²⁰ Pamonaë baja yapëtaë vajatuxanenë Jesucristo, ponë capanepaejitsiatsi pibisiacuene pexanaeoneconimivecua, bajarapamonaë baja Dioso vecuaajibiaexanatsi pibisiacuene pexanaeoneconimi. Pajamatabëcuenemi ata jitsipaeyaexanabiabatsi pibisiacuene pexanaenexa, bajarapajamatabëcuenemi ata baja vecuaajibiaexanatsi. Itsiata baitsi jane bajarapamonaeyajuvënëvi icatsia pibisiacuene itsa exanapona, nexata icatsia bajarapajamatabëcuene pejumečovënëtaþonaexae, bitso naneconitsiana Diosojavabelia. Nexata jane baja copiaya pexainaenconimi matatoxenetsia, bitsoyo ayaineconi natsixainaena. ²¹ Pamonaë copaba pexaniajailivaisi pejumečovënëtsijavami, bitso ayaineconi natsixaina Diosojavabelia. Bajarapamonaë itsa apo tsipaebi tsipaetsi bajarapapexaniajailivaisi, bevelia naneconitsipa Diosojavabelia. Tspaji apo yapëtaë tsipae bajarapalivaisi. Nexata baja peyapëtaexae bajarapalivaisi, pecopabixaenua pejumečovënëtsijavami bajarapalivaisi, naneconita bitso Diosojavabelia. Toxanepanaejitsipatsi meta bajarapamonaë itsa apo tsipaebi tsipaetsi bajarapalivaisi bevelia penaneconitsinexa Diosojavabelia. ²² Bajayatapijilivaisi jumaitsi mapacueniaje: “Aviri peyacabicujinaë, icatsia nayacabixane. Marrano pijinia tsorobota pebocaecujinaë, itsa matavanetsi pexaniamerata, pematavaecujinaetsi, icatsia caevëalia tsorobota boca.” jai bajayatapijilivaisi. Xaniajai baja cajena bajarapalivaisi. Bajara pijinia jamatabëcueneitsi pamonaë icatsia caevëalia pibisiacuene exana.

3

Pacuenia icatsia Jesucristo patsijitsiatsica yabara pelivaisi

¹ Tajamonaë bitso patacaasivavi, copiaya baja cajena pacatoyaquinatsi itsabaxuto. Nexata icatsia mapabaxutoje cotocaevi pacatoyaquinatsi. Pacatoyaquinatsi bajarapabaxutobeje patacamuxujioþinexa nexata xaniavaetsia panenajamatabëxainaenexa. ² Panajamatabënapire pacuenia Diosojumeþaebivimi profetavi bajayata tajëvelia jumaitsi. Panajamatabënapirenuu pacuenia baja cajena apóstolevi pacatsipaeba vajatuxanenë Cristo pelivaisi. Cristo, ponë papecacapanepaenënexa, copiaya tsipaeba apóstolevijavabelia. Nexata juya apóstolevi paxamëjavabelia pacatsipaeba. ³ Xaniavaetsia panamuxunaevere daxitacuenivecua paneyapëtaenexa mapacuenieje. Nacua pecopiarucaevajënaeyotanexa, najetarubenaena itsamonaë pecapocaponaevinexa pexaniajailivaisi. Bajarapamonaë exanavanapaena pibisiacuene pacuenia pijacuata natojitsipa. ⁴ Bajarapamonaë Cristo pepatsijavanexatsica apo pejumečovënëtsixae, najumequenetsiataeya saya jumaitsi tsane: “¿Jica Cristo icatsia pepatsijavanexatsica pacuenia baja Cristo tajëvelia najumecapanepaeya jumaitsi? Bajayata vajavajënaeyapijivimi, pamonaë jumečovënëta Cristo pepatsijavanexatsica, vajënaeevetavanapa picani. Itsiata Cristo apo patsiatsica. Nexata bajarapamonaemi belia baja tþpa Cristo patsinejevatsica. Daxitanacua abaxë itsiata tsitecanua Dioso pexanaecujinaë,” jai tsane saya bajarapamonaë apo pejumečovënëtsixae Cristo pepatsijavanexatsica. ⁵ Bajarapacuenia jumaitsi tsane tspaji bajarapamonaë apo canaëjëtsi tsane pacuenia bajayata Dioso itoroba saya pijumeta itaboxo penaexanaenexa mapanacua yajavaje. Nexata mapairanexaje, manuamene tuatuajëatsina Dioso ira jumapitsapaeyaexanaina. ⁶ Bajayata pijinia mapanacuae Dioso itsa bubutsiaexana, daxitajivi Dioso vereþiba merata. ⁷ Itsiata baitsi jane itaboxo, ira yajava, daxita xua tanetsi, Dioso pejamatabëcueneta abaxë xaniavaetsia tsitecanua. Dioso abaxë xaniavaeta itsamatacabi isotota peveriapaenexa. Dioso isotota veriapaena

mapanacuaaje, itaboxo yajava, pamatacabi naneconitsiaexanaena daxita pijaneconi pexainaevi. Bajarapamatacabi Dioso naneconitsiaexanaena pibisiacuene pexanaevi. Dioso verebiabiana daxitacuene.

⁸ Tajamonae bitso patacaasivavi, pëtsa panacofënètame mapacueneye. Vajatuxanenë saya tsitacaematacabitsi mil pavaibeje ata. Mil pavaibeje ata apo tsitabajayajebitsi. Betsitacaematacabi tsanucaetsi saya vajatuxanenë.

⁹ Itsamonae jamatabëcuenenavëxaniabiaya jamatabëjumaitsi: “Dioso bitso cuenenajemata pexanaenexa pacuenia najumecapanepaeya jumaitsi,” jamatabëjai. Vajatuxanenë raja apo cuenenajematsi. Xua raja vajatuxanenë bajayajebi becuenenajematsi, abaxë saya eveta jivi pejumecovënëtsinexatsi. Tsipaji vajatuxanenë apo jitsipae itsajivi ata pevecuanaxuabijavatsi. Vajatuxanenë raja jitsipa daxitajivi pecopabinexa pibisiacuene pexanabiabiava, penajamatabëcuenepënëyorotsinexa Diosojavabelia.

¹⁰ Vajatuxanenë baja cajena icatsia jemata patsianica. Pamatacabi jivi jamatejema jinavanapaena, jemata vajatuxanenë patsianica. Pacuenia penacobetoxotsinënexa jemata bapata, itsajota apo jamatabënajinaetsi, bajara pijinia itsi tsane vajatuxanenë. Jemata patsianica. Nexata jane baja bajarapamatacabita itaboxo copiarucaena. Ayaijume najumetsiana. Daxita athëbëpijiacuene vereverecaena isotota. Mapanacuamije, daxita xua tanetsi mapanacuataje, yajavatajuena isotota.

¹¹ Daxitacuene bajarapacuenia vereverecaena. ¡Bajaraxuata bitso xaniavaetsia bepajinavanapame Dioso papecatojitsipacuena!

¹² Bepacopiaevetavanapame vajatuxanenë pepatsijavanexatsica. Vajatuxanenë pijacuene bepatonacuenebavanapame bepijia pepatsinexatsica. Pamatacabita vajatuxanenë patsianica, itaboxo vereverecaena isotota. Daxita athëbëpijiacuene veriajiviana isotocotiata.

¹³ Itsiata baitsi jane xuacujinae Dioso icatsia pejanaitaboxo, pejanairanua, exanaena pacuenia tajëvelia najumecapanepaeya jumaitsi. Nexata vaxaitsi evetavanapatsi vajataenexa pejanaitaboxo, pejanairanua. Itsamatacabi pejanairata daxitajivi ëpexaniacuene exanavanapaena, xua Dioso tojitsipatsi.

¹⁴ Tajamonae bitso patacaasivavi, pejanaitaboxo, pejanairanua, pane-taenexa, panecopiaevetavanapaepato xaniavaetsia pajinavanapaenae. Nexata pamatacabi vajatuxanenë icatsia patsianica, pacasivabarëya tsane. Bajarapacuenia pacasivabarëya tsane itsa pacacaxitajarabiana jamatabëcuenexanepanaeya aneconibia panejinavanapaejavata.

¹⁵ Pacanaëjere xua yabara abaxë vajatuxanenë apo patsitsica. Abaxë raja apo patsitsica daxitajivi apo pejumecovënëtsixae Dioso. Tsipaji daxitatsi vajatuxanenë jamatabënacacapanepa pijanacuayabetsia. Pacuenia daxitatsi vajatuxanenë jamatabënacacapanepa pijanacuayabetsia, bajaraxua vajaasivanë, vajabananë Pablo, peyapëtaenexa Dioso yavenonatsi. Nexata Pablo peyaquinaebaxutonëta, pacatoyaquina pacuenia vajatuxanenë daxitatsi jamatabënacacapanepa pijanacuayabetsia.

¹⁶ Pablo baja cajena peyaquinaebaxutonëta, pacatoyaquina pacuenia vajatuxanenë daxitatsi jamatabënacacapanepa pijanacuayabetsia. Pablo peyaquinaelivaisianë, itsalivaisi ayapëbeje tsabiabi vajumeyapëtaenexa xua yabara Pablo yaquina. Nexata palivaisi apo jumeyapëtaetsi, apo yapëtaetsi pajamatabëcuenelivaisi xaina. Nexata pamonae xaniavaetsia apo jumeyapëtae Pablo peyaquinaelivaisianë, juya tsipaebabiaba itsamonaejavabelia apo jumeyapëtae ata. Pamonae ata caejamatabëcuene apo xainae Dioso pejumecovënëtsijava, juya itsamonaejavabelia tsipaebabiaba Pablo peyaquinaelivaisianë. Nexata bajarapamonae itsamonaejavabelia itsa tsipaebabiaba, Pablo peyaquinaelivaisianë

mataropotsia saicayacuenia tsipaebabiaba. Bajarapacuenia itsabaxutonēta ata, perubenaelivaisianē ata, bajarapamonae saicayacuenia mataropotsia tsipaebabiaba. Bajarapamonae itsamonaejavabelia itsa tsipaebabiaba, apo tsipaebabiabi pacuenia Dioso pejumelivaisibaxutota jumaitsi. Saicayacuenia saya tsipaebabiaba. Nexata bajarapamonae pijacuata naneconita Diosojavabelia. Nexata Dioso verebiabianatsi.

¹⁷ Tajamonae bitso patacaasivavi, paxamē baja cajena tajēvelia payapētaneme bajaraxua yabara. Bajaraxuata panayajivitaema pibisiacuene pexanaevi penajumetsēnētsilivaisi papecatsipaebianiva. Tsipaji papecatsipaebilivaisita, pacajopaeyaexanaejitsipa Dioso panejumecovēnētsijavavecua. ¹⁸ Pacatojitsipatsi paneajamatabēcuenesaē tsavanapaenexa Dioso panejumecovēnētsijava Jesucristo papecaitaxutotsoniataexae. Panevajēnaeyabelia payapētaeponarenuava jatuxanenē Jesucristo, ponē pacacapanepaejitsia pibisiacuene paneexanaeneconivecua. Jesucristojavabelia daxitajivi jumai tsabiabi tsane: “¡Xamē Jesucristomē, bitso cajena ayajamatabēcuenenēmē!” jai tsabiabi tsane daxitamatabijavabelianexa. Bajara itsi tsane.

Mapabaxutoje San Juan copiaya toyaquina Dioso pejumecovënëtsivijavabelia

Cristo vajanacajamatabëcuene asaëyaexanaenë yabara pelivaisi

1-2 Pacatoyaquinatsi Dioso pexënato pelivaisi. Bajaraponë athëbëatsia ponapona baja cajena pepo bajayatami ata, itsa abaxë Dioso apo exanae mapanacuaeje. Nexata bajaraponë patsica mapanacuayabetsicaje. Bajaraponë itsa patsica mapanacuayabetsicaje, naexana pacuenia vaxaitsi baexanatsi. Nexata abaxë itsa ponapona mapanacuataje, bajaraponë patanetsipaebilivaisianë pajumetaniji. Bajaraponë pataniji baja cajena pataitaxutota. Pajayabajëna patacobeta. Nexata bajaraponë pelivaisi pacatsipaebatsi. Bajaraponë matacabi apo peverevereaejava pexainaenë. Paxa Dioso yajavaponapona. ³ Pacatojitsipatsi paxamë ata paneyajavajinavana-paenexa Dioso. Pacatojitsipatsi Dioso pexënato, Jesucristo, ata paneyajavajinavana-paenexa. Bajaraxuata pacuenia pataniji, pacuenia ata pajumetaniji bajaraponë patanetsipaebilivaisianë, juya paxamëjavabelia pacatsipaebaponatsi. ⁴ Nexata pacuenia pataniji, pacuenia ata pajumetaniji bajaraponë patanetsipaebilivaisianë, pacatoyaquinatsi mapabaxutotaje paxamë ata paneyapëtaenexa, bitso panesivajamatabëcuenebarëyanexa Jesús.

Dioso pejumelivaisita vajanacajamatabëcueneitayotsinë yabara pelivaisi

⁵ Palivaisianë rabaja Jesucristo panetsipaeba, bajara mapalivaisianëje juya paxamëjavabelia pacatoyaquinatsije. Dioso raja pejumelivaisita vajanacajamatabëcueneitayotsinë. Dioso raja apo pijamatabëcueneitaquirinë. ⁶ Bajaraxuata vaxaitsi jumaitsi atatsi: “Dioso raja vaxaitsi yajavajinavana-patsi,” jai atatsi, itsiata pibisiacuene itsa exanavanapatsi, nexata najamatabëcueneapaebatsi. Najumetsënëtsatsi saya Dioso vajayajavajinavanapaevajava. Najumetsënëtsatsinua pexaniacuene vajaexanaejava ata. ⁷ Itsiata vaxaitsi xaniavaetsia itsa jumecovënëtavanapaenatsi Dioso pejumelivaisi pacuenia Dioso ata pijacuata bajarapalivaisi najumecovënëtaponapona, nexata vaxaitsi ata mapanacuata xaniavaetsia najamatabëcuenejëpaeya najuajinavanapaenatsi. Bajarapacuenia vaxaitsi itsa jinavanapaenatsi, nexata Jesucristo, Dioso pexënato, vajanacasivatëpaexae, nacavecuaajibiaexanaena daxita vajapibisiajamatabëcuenemi.

⁸ Vaxaitsi pibisiacuene exanae atatsi, itsiata itsa jumaitsitsi: “Vaxaitsi cajena aneconjibitsi. Tsipaji pibisiacuene apo exanaetsi,” itsa jaitsi, nexata saya jamatabëcuenenavëxaniabatsi. Pexaniajailivaisi, Dioso pejumelivaisi, apo nacatsijamatabëecae. ⁹ Dioso baja cajena nacayavenonabiaba pacuenia najumecapanepaeya nacajumaitsi. Dioso pexanepanaecuene exanababanua. Bajaraxuata pibisiacuene vajaexanaejavami, itsa navajunupaebatsi Diosojavabelia, nexata Dioso nacavecuaajibiaexana pibisiacuene vajaexanaeconimi. Nacavecuaajibiaexanana daxita pibisiajamatabëcuene vajaxinaejavami. ¹⁰ Vaxaitsi pibisiacuene exanae atatsi, itsiata itsa jumaitsitsi: “Vaxaitsi cajena caeto ata pibisiacuene apo exanaetsi,” itsa jaitsi, nexata saya jamatabëcuenenavëxaniabatsi. Dioso pejumelivaisi ata apo nacatsijamatabëecae. Bajarapacuenia itsa jumaitsitsi, nexata Dioso tanetsi bepanajumetsënëtsinë. Tsipaji Dioso pejumelivaisibaxutota jumaitsi pacuenia daxitatsi pibisiacuene évajaexanaevi.

2

Cristo vajanacatocuaicuajainë Diosojavabelia yabara pelivaisi

¹ Tajamonaë, pacatoyaquinatsi mapalivaisije patacamuxujio binexa pibisiacuene paneexanaeyaniva. Itsiata baitsi jane cajena itsajivi pibisiacuene itsa exana, xainatsi Jesucristo, vajanacayavenonaenë, vajanacatocuaicuajainë Diosojavabelia. Bajaraponë cajena caeto ata pibisiacuene apo pexanaenë. ² Jesucristo vajanacasivatëpaexae, nacavecuaajibiaexana baja daxita pibisiacuene vajaexanae neconimi. Itsiata ëvaxaitsi apo nacasivatëpae. Daxita mapanacuapijivije pibisiacuene pexanae neconi pevecuaajibiaexanaenexa, Jesucristo sivatëpa.

³ ¿Detsa pacuenia nayapëtanetsi Dioso pijajivitsi? Itsa exanavanapatsi pacuenia Dioso nacaitoroba, nayapëtanetsi Dioso pijajivitsi. ⁴ Itsajivi jumaitsi ata: “Xanë raja cajena Dioso yapëtaniji,” jai ata, itsiata itsa apo jumecovënëtsi pacuenia Dioso itorobatsi, bajarapajivi saya najumetsënëta. Pexaniajailivaisi cajena, Dioso pejumelivaisi, apo tsijamatabëcaetsi. ⁵ Pajivi exanaponapona Dioso pitorobicueniatsi, bajarapajivi pepacuenie jumecovënëta Dioso bajarapajivi bitso pejitsipaexae Dioso. Bajarapacuenia vaxaitsi ata itsa jumecovënëta vanapaenatsi Dioso, nexata nayapëtaevanapaenatsi vajayajavajinavanapaejava Dioso. ⁶ Pajivi jumaitsi: “Xanë rabaja Dioso yajavaponaponajë,” jai, bajarapajivi xaniavaetsia beponapona pibisiacuene exanaenejeva. Pacuenia Jesús ponapona, bajarapacuenia bajarapajivi beponapona.

Palivaisi baja bajayata jivi jumecovënëta, bajarapalivaisi icatsia bepejanalivaisicuentia jivi pejumecovënëtsinexa, yabara pelivaisi

⁷ Tajamonaë, pacatoyaquinatsi mapalivaisije panejumecovënëtsinexa. Apo pejanalivaisi ra picani. Itsiata baitsi jane palivaisi baja copiaya bajayata pajumetaneme, pamatacabi ajena pajumecovënëtame Jesús pelivaisi, bajarapalivaisi jumëjëpa. ⁸ Nexata mapalivaisije pacatoyaquinatsi pejanalivaisicuentia panejumecovënëtsinexa. Mapalivaisije pexaniajailivaisi cajena. Cristo cajena pijacuata bajarapalivaisi natoexanaponapona. Paxamë ata baja pajumecovënëta vanapame bajarapalivaisi. Nexata mapanacuapijijamatabëcuenemije, pitaquirijamatabëcuenemi, pacavecuaajibi baja tsaponae. Tsipaji bajarapalivaisita Jesucristo nacajamatabëcueneyatopona.

⁹ Itsajivi jumaitsi ata: “Xanë raja Dioso pitorobicuentia exanaponaponajë,” jai ata, itsiata itsa itoya itsajivi Dioso penajuajumecovënëtsivi, nexata bajarapajivi abaxë tsiteca ajamatabëcueneyatquiri tsaponaponae. ¹⁰ Pajivi bitso asiva itsajivi ata, Dioso penajuajumecovënëtsivi, bajarapajivi Dioso jamatabëcueneyatotsi. Nexata bajarapajivi apo caëjëpaetsi itsacuenejavayo ata pibisiacuene itsajivi pexanaeyaexanaenexatsi. ¹¹ Pajivi itoya itsamonae ata Dioso penajuajumecovënëtsivi, bajarapajivi abaxë tsiteca ajamatabëcueneyatquiri tsaponaponae. Apo yapëtae pibisiacuene pexanaejava. Apo yapëtaena itsabelia caponaejitsiatsi pibisiacuene pexanae neconi yabara. Bajara jamatabëcueneyatsi tsipaji pevajënaeyabelia dovathi yaajamatabëcueneyatquiriaya exanaponatsi piagamatabëcueneyatquirixae.

¹² Tajamonaë, pacatoyaquinatsi mapalivaisije. Tsipaji baja Dioso pacavecuaajibiaexana pibisiacuene paneexanae neconimi Jesucristo papecasivatëpaexae. ¹³ Patavajënaepijivimë, pacatoyaquinatsi mapalivaisije. Tsipaji baja payapëtaneme Jesucristo, ponë baja cajena athëbëtatsia ponapona pepo bajayatami ata, Dioso daxitacuene mapanacuata pexanaevajënaeya. Paxamë ata papevëjëavimë, pacatoyaquinatsi mapalivaisije. Tsipaji baja dovathi pajamatabëcueneamoneyabame.

Bepataxicueniamē patacataevi, imata baja cajena itsabaxuto pacatoy-aquinatsi. Tshipaji baja vaxa Dioso payapētaneme. ¹⁴ Patavajēnaeyapijivimē, imata baja cajena itsabaxuto pacatoyaquinatsi. Tshipaji baja payapētaneme Jesucristo, ponē baja cajena athēbētatsia ponapona pepo bajayatami ata, Dioso daxitacuene mapanacuata pexanaevajēnaeya. Paxamē ata papevējēavimē, imata baja cajena itsabaxuto pacatoyaquinatsi. Tshipaji baja pajamatabēcuenesaēmē Dioso panejumecovēnētsijava. Pacatsijamatabēeca baja Dioso pejumelivaisi. Nexata baja dovathi pajamatabēcueneamoneyabame.

¹⁵ Pētsa pajitsipame mapanacuapijicueneje. Pētsa pajitsipame mapanacuapijipibisiacuene ataje. Itsa pajitsipaejitsipame mapanacuapijipibisiacueneje, nexata apo pajitsipaemē tshipae Dioso. ¹⁶ Pajamatabēcuenē jivi jitsipaeyaexanabiabatsi pibisiacuene pexanaenexa, bajarapajamatabēcuenē apo pitsapae Diosojavaverena. Bajarapajamatabēcuenē pitsapa mapanacuataje. Pajamatabēcuenē ata jivi najamatabēxainaeaexanabiabatsi penaxainaeayabinexa xua itajitsipa, bajarapajamatabēcuenē ata pitsapa mapanacuataje. Pajamatabēcuenē ata jivi najamatabēxainaeaexanabiabatsi beayaijamatabēcuenēvi penataenexa, bajarapajamatabēcuenē ata pitsapa mapanacuataje. Daxita bajarapajamatabēcuenē pitsapa mapanacuataje. Bajarapajamatabēcuenē apo pitsapae vaxa Diosojavaverena. ¹⁷ Imoxoyo rabaja pevajēnae tsaponae pevereverecaenexa mapanacuaje. Nexata daxita pajamatabēcuenē jivi jitsipaeyaexanabiabatsi pibisiacuene pexanaenexa, yajavavereverecaena mapanacuaje. Itsiata baitsi jane pamonae exanavanapa Dioso pitōrobicueniatsi, jinavanapaena daxitamatacabijavabelianexa.

Pexaniajailivaisi, penajumetsēnētsilivaisi ata, yabara pelivaisi

¹⁸ Tajamonae, imoxoyo rabaja pevajēnae tsaponae pevereverecaenexa mapanacuaje. Pavēnēlivaisitaneme rabaja pacuena najetarucaejitsia ponē cueneitoyatsi Cristo. Pata rabaja cajena ayaibitsaēto, pamonae Cristo cueneitoyatsi. Bajarapamonae pepatsixae, yapētanetsi imoxoyo baja pevajēnae tsaponae pevereverecaenexa mapanacuaje. ¹⁹ Pamonae Cristo cueneitoyatsi, bajarapamonae vaxaitsiyajuvēnēvimi picani. Itsiata baja nacavecuapitsapa. Bajarapamonae pepacuene apo vaxaitsiyajuvēnēvi cajena. Itsa peneta bajarapamonae vaxaitsiyajuvēnēvi tshipae, nexata tsitecaeya najinavanapaejitsipa vaxaitsita. Bajaraxuata bajarapamonae nacavecuapona baja. Nexata daxitajivi xaniavaetsia yapētane bajarapamonae pepacuene Dioso apo pejumecovēnētsivicuene.

²⁰ Cristo rabaja pacarajuta Espiritu Santo. Bajaraxuata daxita paxamē payapētaneme baja pexaniajailivaisi, Dioso pejumelivaisi. ²¹ Pacatoyaquinatsi mapabaxutoje tshipaji baja payapētaneme pexaniajailivaisicuene Jesús pelivaisi. Nexata apo pacatoyaquinaetsi matapania patacayapētaeyaexanaenexa pexaniajailivaisicuene Jesús pelivaisi. Tshipaji baja bajaya payapētaneme bajarapalivaisi pexaniajailivaisicuene. Payapētanemenua baja Jesús pelivaisijavaverena acuenebi pepitsapaejava penajumetsēnētsilivaisi. Tshipaji pexaniajailivaisijavaverena acuenebi pepitsapaejava penajumetsēnētsilivaisi.

²² ¿De jane peneta jumaitsi pepo penajumetsēnētsijivi? Pajivi peneta pepo penajumetsēnētsijivi, jumaitsi mapacueniaje: “Jesús raja apo Cristo, ponē Dioso athēbēvetsica itorobijitsiatsica vajanacacapanepaenexa,” jai. Bajara peneta pejumaitsijivi, pepo penajumetsēnētsijivi jane baja. Bajarapajivi Cristo pijavajabitsaējivi. Bajarapajivi apo jumecovēnētsi Dioso. Apo jumecovēnētsinua Dioso pexēnato ata. ²³ Pajivi peneta jumaitsi: “Jesús raja Dioso

apo pexēnato,” jai, bajarapajivi Dioso apo yajavaponaponaetsi. Pajivi pijinia peneta jumaietsi: “Jesús raja Dioso pexēnato,” jai, bajara jane pajivi Dioso yajavaponaponatsi.

²⁴ Bajaraxuata paxamē baja palivaisi pajumetaneme panejume-covēñetsijavaverenacujinae, panevajēnaeyabelia tsíteca pacajinavanapare. Bajarapalivaisi tsíteca itsa pacatsijamatabēecaena, nexata panevajēnaeyabelia payajavajinavanapaename Dioso. Payajavajinavanapaenamenua Dioso pexēnato ata, Cristo. ²⁵ Jesucristo rabaja najumecapanepaeya jumaietsi vajanacarajutsinexa matababi apo peververeceaeva.

²⁶ Pacatoyaquinatsi mapabaxutoje patacayapētaeyaexanaenexa panenayajivitaenexa pamonaē jamatabēpacayamaxēitojoroba. ²⁷ Paxamē rabaja Espiritu Santo pacatsijamatabēeca, ponē acarajuta Jesucristo. Bajaraxuata apo panamatavenonaemē baja itsajivi ata papecatsipaebinexa paneyapētaenexa daxitacuene. Tsipaji baja daxita xua Espiritu Santo pacayapētaeyaexanapona, pexaniājaiacuene baja cajena. Penajumetsēñetsicuene baja cajena Espiritu Santo apo pacayapētaeyaexanaponaē. Pacuenia Espiritu Santo pacayapētaeyaexanapona, bajarapacuenia pajumecovēñetaponare panevajēnaeyabelia paneyajavajinavanapaenexa Cristo.

²⁸ Tajamonae, ajamatabēcuenaēya yajavajinavanapaenatsi Cristo. Bajarapacuenia yajavajinavanapaenatsi vajacujunaviyaniva pamatacabi bajaraponē patsianica. Nexata apo aura tsanetsi bajaraponējavabelia pamatacabi patsianica. ²⁹ Paxamē rabaja payapētaneme Jesucristo, Dioso pexēnatoxae, pexaniacuene pexanabiabijava. Nexata bepayapētaneme mapacueneje. Pamonaē peneta pexaniacuene exana, bajarapamonae Dioso pexi.

3

Dioso pexi yabara pelivaisi

¹ Pacanaējēre vaxa Dioso vajanacaasivacuene. Nacaasiva bitso. Bajaraxuata Dioso pexicueniatsi nacatane. Xaniajai rabaja. Dioso pexitsi. Mapanacuapijivije Dioso apo peyapētaexae, nexata bajarapamonae vaxaitsi ata apo nacayapētae Dioso pexicuenetsi. ² Tajamonae bitso patacaasivavi, aeconoxae rabaja vaxaitsi daxitatsi Dioso pexitsi. Apo yapētaetsi abaxē pacuenia itsamatacabi vaxaitsi cueneitsijitsiatsi. Itsiata Cristo itsamatacabi itsa patsianica, vaxaitsi cuenetaenatsi Cristo pacuenia cueneitsi. Nexata vaxaitsi itsa cuenetaenatsi Cristo, cuenejēpaenatsi. Tsipaji cuenetaenatsi pacuenia Cristo cueneitsi. ³ Cristo pibisiacuene apo pexanaenē caeto ata. Bajaraxuata daxita pamonaē copiaevetavanapa Cristo pepatsijavanexat-sica, pevajēnae tonajamatabēcuene xaniavaetavanapaena. Pibisiacuene apo exanavanapae tsane.

⁴ Pajivi pibisiacuene exana, apo jumecovēñetsi palivaisi Dioso najumecopata jivi pejumecovēñetsinexa. Pibisiacuene itsa exana, nexata Dioso pitavetsijava exana. ⁵ Payapētaneme rabaja mapacueneje. Cristo patsica mapanacuayabetsicaje vajanacavecuajibiaexanaenexa pibisiacuene vajaexanaeconimi. Cristo baja cajena caeto ata pibisiacuene apo pexanaenē. ⁶ Bajaraxuata pajivi baja Cristo yajavaponapona, pibisiacuene apo exanaponaponaē. Pajivi tsíteca pevajēnaeyabelia pibisiacuene exanaponapona, bajarapajivi apo tae baja cajena Cristo. Apo yapētaenua cajena. ⁷ Tajamonae, pētsa panacopatame itsajivi ata papecayamaxēitojorobinexa. Pajivi exanabiaba pexaniacuene, Dioso

pejitsipaecuene, bajarapajivi Dioso aneconijibia tanetsi. Pacuenia Cristo jamatabëcueneitsi, bajarajamatabëcueneitsi bajarapajivi. ⁸ Pajivi tsiteca pevajënaeyabelia pibisiacuene exanaponapona, bajarapajivi dovathi pijajivitonë tsaponapona. Dovathi pibisiacuene pexanaecujinae, apo copatsi. Tsiteca pevajënaeyabelia pibisiacuene exanaponapona mapanacuataje. Bajaraxuata Dioso pexë nato patsica mapanacuayabetsicaje daxitajivi dovathi pejamatabëcueneta pibisiacuene pexanabiabijavami piajibiaexanaenexa.

⁹ Pajivi baja Dioso pexijivi exanatsi, bajarapajivi baja pibisiacuene apo exanaponapona. Tsipaji baja Dioso najamatabëcuenerajutatsi. Bajarapajivi baja copata pibisiacuene pexanabiabijava. Tsipaji baja Dioso pexijivi exanatsi. ¹⁰ Bajarapacuenia xaniavaetsia yapëtanetsi pajivi Dioso pexijivi exanatsi. Pajivi pijinia dovathi pexijivi exanatsi, yapëtanetsi. Tsipaji pajivi Dioso pexijivi apo exanaetsi, pexaniacuene apo exanae. Apo asivanua itsamonae ata.

*Pacuenia vaxaitsi namataenetsia benaasivatsi tsavanapae yabara peliv-
aïsi*

¹¹ Dioso baja cajena panejumecovënëtsijavaveliacujinae, pajumetaeyabi-abame pejumaitsilivaisi mapacueniaje: “Vaxaitsi namataenetsia benaasivatsi tsavanapae,” pejaïlvaisi. ¹² Vaxaitsi nexata apo bitoyatsi itsamonae ata. Pacuenia bajayatami Caïnpijinë itoya pejuyapijinëmi, bajara apo bitsitsi vaxaitsi. Caïnpijinë dovathi pijajivitonë tsaponapona. Nexata beyaxuaba pejuyapijinëmi. Pacatsipaebijitsiatsi pacuene yabara Caïnpijinë beyaxuaba pejuyapijinëmi. Caïnpijinë dovathi pitorobicueniatsi, pibisiacuene exanaponapona. Pejuyapijinëmi pijinia pexaniacuene, Dioso pitorobicueniatsi, exanaponapona. Bajaraxuata Caïnpijinë beyaxuaba pejuyapijinëmi.

¹³ Tajamonae, pëtsa pajamatabëcuenenabenajacame paxamë ata itsa pacaitoya mapanacuapijivije. ¹⁴ Vaxaitsi picani bajayata Dioso pitabarata jamatabëcuenetëpavanapatsi. Itsiata baja aeconoxae Dioso nacajamatabëcueneasaëyaexana vajanajamatabëcuenecopatsixae bajaraponëjavabelia. Yapëtanetsi baja cajena Dioso vajanacajamatabëcuene asaëyaexanaejava. Tsipaji itsamonae ata Dioso vajanajuajumecovënëtsivi, asivatsi tsavanapae. Pajivi apo asiva itsamonae ata, Dioso penajuajumecovënëtsivi ata, bajarapajivi Dioso pitabarata jamatabëcuenetëpaponapona. ¹⁵ Pajivi itoya itsajivi, Dioso penajuajumecovënëtsivi ata, bajarapajivi jamatabëcuenejëpaponapona jivibenë. Paxamë rabaja payapëtaneme mapacueneye. Jivibenë baja cajena apo xinae tsane matacabi apo pevereverecaejava. ¹⁶ Yapëtanetsi baja cajena mapacueneye. Jesucristo vajanacaasivaxae, nacopata pebeyaxuabinexatsi vajaneconï yabara. Nexata vaxaitsi ata vajaasivaxae Dioso vajanajuajumecovënëtsivi, bejamatabëjumaitstsi mapacueniaje: “Itsamonae nebeyaxuabijitsia ata tsane, yavenonaenajë Dioso patanajuajumecovënëtsivi,” bejamatabëjaitsi. ¹⁷ Ponë Dioso pejumecovënëtsinë, bitso pexainaenë pexainaeva, tae ata itsanë pijinia Dioso pejumecovënëtsinë penamatavenonaejava, itsiata itsa apo yavenonae, nexata acuenebi pejumaitsijava: “Xanë bitso Dioso jitsipajë tajamatabëëthëtojavavetsina,” pejaijava. ¹⁸ Tajamonae, “Asivanë raja itsamonae ata,” apo bejaitsi saya vajacuïbovojotota pexaniacuene toexanaejevatsi bajarapamonaevajavelia. Biji rajane bajarapamonae vajanacayapëtaenexa pepacuene vajaasivajava, pexaniacuene betoexanatsi. Beyavenonatsi bitso penamatavenonaevavata.

Pacuenia apo auratsi Dioso pitabarata yabara pelivaisi

¹⁹ Daxitatsi vaxaitsi itsa asivatsi tsavanapae tsane itsamonae ata, Dioso vajanajuajumecovënëtsivi, nexata nayapëtaenatsi Dioso pexicuenetsi. Aju-navijibianua jinavanapaenatsi Dioso pitabarata. Dioso baja cajena pexaniajailivaisi jivijavabelia petsipaebinë. ²⁰ Dioso baja cajena bitso ayai-jamatabëcuenenë. Dioso peyapëtaenë daxitacuene. Bajaraxuata vaxaitsi jamatabëjumaisi atatsi: “Xanë bitso ajamatabëcuenebejenë pibisi-acuene taexanaejava yabara,” jamatabëjai atatsi, itsiata xainatsi Dioso vajanacayavenonaenë. Dioso vajanacaitaxutotsoniataenë. Tsiteca nacaasiva. Nacaevetanua. ²¹ Tajamonae bitso patacaasivavi, vajajamatabëëthëtota itsacueneneconi itsa apo xainaetsi, nexata apo auratsi Diosojavabelia vajavajëtsinexa. Jamatejematsi Dioso pitabarata. ²² Dioso nacarajutsiana daxita xua vajëtsianatsi Diosojavabelia. Bajarapacuenia Dioso nacarajutsiana tsipaji Dioso jumecovënëtavanapatsi pacuenia nacaitoroba. Pacuene yabara Dioso sivajamatabëcuenebarëya, bajarapacuenie ata vaxaitsi exanavanapatsinua. ²³ Dioso raja nacaitoroba vajajamatabëjumaisinexa mapacuenije: “Jesús baja patsica, ponë copiaevetavanapatsi vajanacapanepaenexa. Bajaraponë Dioso baja cajena pexënato,” vajajamatabëjainexa. Nacaitorobanua namataenetsia vajanaasivatsavanapaenexa. ²⁴ Pajivi jumecovënëta Dioso pitorobilivaisi, bajarapajivi Dioso yavavaponaponae. Bajarapajivi ata pijinia Dioso yavavaponaponaeatsi. Yapëtanetsi pepacuene Dioso vajanacayavavaponaponaejava. Tsipaji Espiritu Santo, ponë Dioso nacarajuta, bajaraponë nacayapëtaeayaxana pepacuene Dioso vajanacayavavaponaponaejava.

4

Espiritu Santo yabara, Cristo pijavajabitsaë ata, yabara pelivaisi

¹ Tajamonae bitso patacaasivavi, itsamonae itsa pacajumai tsane mapacueniaje: “Espiritu Santo raja, ponë netsijamatabëca, netsipaeba. Nexata juya bajarapalivaisi pacatsipaebatsi,” itsa pacajai tsane, pëtsa abaxë caecuenia pajumecovënëtame. Copiaya abaxë pajamatabëcueneëjëbianame paneyapëtaenexa itsa xaniajai bajarapamonae Espiritu Santo petsipaebilivaisitsi pacatsipaebiana. Bajarapacuenia pajamatabëcueneëjëbianame tsipaji raja daxitajava mapanacuajavaje yacaëjëpa penajumetsënëtsilivaisi petsipaebanajetarubenaevi. Bajarapamonae penajumetsënëtsilivaisi daxitajivijava tsipaebanajetarubena. BeDioso itajara pepumelivaisi petsipaebivicuenia, tsipaebanajetarubena. ² Nexata bajarapacuenia copiaya itsa pajamatabëcueneëjëbianame, payapëtaename pamonae tsijamatabëcatsi Espiritu Santo. Pamonae raja peneta pepacuene Espiritu Santo tsijamatabëcatsi, jumaisi mapacueniaje: “Jesucristo itsa patsica mapanacuayabetsicaje, naexana pacuenia vaxaitsi baexanatsi mapanacuataje,” jai peneta pamonae pepacuene Espiritu Santo tsijamatabëcatsi. ³ Pamonae peneta jumaisi mapacueniaje: “Jesucristo raja Dioso apo pexënato,” jai, bajarapamonae cajena apo tsijamatabëcatsi Espiritu Santo. Bajarapamonae tsijamatabëcatsi ponë cueneitoyatsi Cristo. Ponë baja pavënëlivaisitaneme pepatsijavanexa, ponë Cristo cueneitoyatsi, bajaraponë pata baja. Ponapona rabaja mapanacuajavaje. ⁴ Tajamonae, paxamë rabaja Dioso papijajivimë. Nexata baja penajumetsënëtsilivaisi papecatsipaebivi, apo pacayamaxëitojorobicapanepae. Apo caëjëpaetsi papecayamaxëitojorobijava.

Tsipaji ponë pacatsijamatabëeca, bajaraponë bitso piasaënë, ponë ponapona mapanacuajavaje, matatoxenetsia. ⁵ Pamonaë tsipaebapona penajumetsënëtsilivaisi, bajarapamonaë saya Dioso apo peyapëtaevi. Bajaraxuata mapanacuapijicuenë cacuaicuaïjai. Nexata pamonaë bitso jitsipa maëpanacuapijicuenëje, namuxunaevetabiabatsi. ⁶ Vaxaitsi raja Dioso pijajivitsi. Pajivi yapëthane Dioso, vaxaitsi ata nacanamuxunaeveta. Pajivi Dioso apo jitsipae, vaxaitsi ata apo nacanamuxunaevetsi. Nexata bajarapacuenia nayapëthane pajivi tsijamatabëecatsi Espiritu Santo. Espiritu Santo baja cajena jivi pexaniajailivaisi petsipaebinë. Bajara pijinia pacuenia nayapëthane pajivi ata tsijamatabëecatsi dovathi. Dovathi baja cajena penajumetsënëtsilivaisi jivi petsipaebinë.

Dioso vajanacaasivanë yabara pelivaisi

⁷ Tajamonae bitso patacaasivavi, daxitatsi namataenetsia benaasivatsi tsavanapae. Tsipaji Diosojavaverena pitsapa vajanacaasivajamatabëcuene. Pajivi peneta asiva Dioso penajuajumecovënëtsivi, bajarapajivi Dioso pexijivi. Bajarapajivi yapëthane Dioso. ⁸ Pajivi apo asiva itsamonae ata, bajarapajivi apo yapëtae Dioso. Tsipaji baja cajena Dioso bitso asiva daxitajivi. ⁹ Dioso raja vajanacaasivajava, nacayapëtaeyaexana mapacueniaje. Dioso athëbëvetsica nacatoitorobica pepo caenë pexënato mapanacuayabetsicaje. Bajarapacuenia Dioso pexënato nacatoitorobica matacabi apo peverevereaejava vajaxinaenexa pexënato vajanacasivatëpaexae. ¹⁰ Bajarajamatabëcueneitsi Dioso bitso vajanacaasivajava. Vaxaitsi rajane bevelia Dioso jitsipatsi. Dioso ra picani bitso vaxaitsi nacajitsipa. Bajaraxuata Dioso nacatoitorobica pexënato cruzata vajanacasivatëpaenexa. Nexata Jesús vajanacasivatëpaexae, Dioso baja nacavecuajibiaexana daxita pibisiacuenë vajaexanaenecomini.

¹¹ Tajamonae bitso patacaasivavi, itsa Dioso bajarapacuenia bitso nacaasiva, nexata vaxaitsi ata daxitatsi namataenetsia benaasivatsi tsavanapae. ¹² Itsajivi ata cajena abaxë Dioso apo tae. Itsiata baitsi jane vaxaitsi namataenetsia itsa nasivatsi, Dioso baja nacayjavaponapona. Dioso vajanacatojitsipaecuenia itsamonae ata vajaasivanexa, Dioso nacamatabëcueneasaëyaexanapona. ¹³ Vaxaitsi yajavajinavanapatsi Dioso. Bajara pijinia pacuenia Dioso ata nacayjavaponapona. Yapëtanetsi pexaniajaicuenë Dioso vajanacayjavaponaponaëjava. Tsipaji baja Dioso nacarajuta Espiritu Santo. ¹⁴ Vaxaitsi baja cajena tanetsi Dioso pexënato. Nexata vaxaitsi tsipaebabiabatsi itsamonaejavabelia Dioso pexënato pitorobijavatsica mapanacuayabetsicaje pecapanepaenexa daxita mapanacuapijivije. ¹⁵ Pajivi jumaitsi mapacueniaje: “Jesús raja Dioso pexënato,” jai, bajarapajivi Dioso yjavaponapona. Bajarapajivi pijinia Dioso ata yjavaponaponatsi.

¹⁶ Nexata vaxaitsi jamatabëcuenyapëtanetsi pacuenia bitso Dioso nacaasiva. Dioso cajena piasanë daxitanacuapijivi. Pamonaë itsamonae ata namataenetsia naasiva tsavanapae, bajarapamonae Dioso yjavaponapona. Bajarapamonae ata pijinia Dioso yjavajinavanapa. ¹⁷ Nexata pacuenia Dioso nacatojitsipa itsamonae ata vajanasivatsavanapaenexa, bajarapacuenia itsamonae ata asivatsi tsavanapae tsane. Nexata pamatacabi Dioso naneconitsiaexanaponaena daxita pibisiacuenë pexanaevi, bajarapamatacabi vaxaitsi Dioso pitabarata apo junavitsi tsane. Apo junavitsi tsane Dioso pitabarata tsipaji baja mapanacuataje vaxaitsi asivatsi tsavanapae tsane itsamonae ata pacuenia Cristo daxitatsi nacaasiva. ¹⁸ Itsa yapëtanetsi Dioso vajanacaasivajava, apo cujanavitsi itsacuenejava ata. Tsipaji Dioso itsa nacaasiva, nacavecuajibiaexana vajajunavijavami. Pajivi Diosojavabelia naneconita, yapëthane Dioso penaneconitsiaexanaëjavanexatsi. Bajaraxuata

daxitacuene cujunava. Pajivi cujunava daxitacuene, abaxë xaniavaetsia apo yapëtae pacuenia Dioso asivatsi. Bajaraxuata cujunava.

¹⁹ Vaxaitsi Dioso asivatsi tsipaji Dioso copiaya nacaasiva. ²⁰ Pajivi jumaitsi ata mapacueniaje: “Xanë raja Dioso asivanë,” jai ata, itsiata itsa itoya itsajivi Dioso pejumecovënëtsijivi ata, nexata saya bajarapajivi penajumetsënëtsijivi. Bajarapajivi itsa apo asiva itsajivi ata, petaeyabiabijivi ata, nexata biji bitsoyo bajarapajivi apo asiva Dioso. Tsipaji biji cajena caeto ata apo tae Dioso. ²¹ Pajivi asiva Dioso, bajarapajivi biasiva itsajivi ata, Dioso pena-juajumecovënëtsijivi. Tsipaji baja cajena Cristo nacaitoroba vajaasivanexa itsamonae ata.

5

Pacuenia vaxaitsi mapanacuataje dovathi jamatabëcueneamoneyabatsi yabara pelivaisi

¹ Pajivi jumecovënëta: “Jesús raja Cristo, ponë Dioso athëbëvetsica itorobjitsiatsica vajanacacapanepaenexa,” pejalivaisi, bajarapajivi Dioso pexijivi exanatsi. Pajivi asiva itsajivi ata, caejivi apo biasiva. Nexata bajarapajivi daxita pexi beyajavaasiva. ² Bajara pijinia pacuenia vaxaitsi ata hexanatsi itsa asivatsi Dioso. Itsa jumecovënëtsi pacuenia Dioso nacaitoroba, nexata beyajavaasivatsi itsamonae ata, Dioso vajanajuajumecovënëtsivi. Tsipaji bajarapamonae Dioso pexi exanatsi. ³ Vaxaitsi itsa asivatsi Dioso, nexata pacuenia Dioso nacaitoroba, jumecovënëtsi. Pacuenia Dioso nacaitorobapona vajatoexanaenexa, apo nacatsitaayapëbeje. ⁴ Apo nacatsitaayapëbeje tsipaji baja Dioso pexitsi. Nexata caejivitsi canacujitsia Dioso nacacajëpaeyaexanapona vajaexanaenexa pacuenia Dioso nacaitorobapona. Najamatabëcueneocopatatsi baja Cristojavabelia vajanacayavenonaenexa mapanacuapijjamatabëcuenevecuaje. Nexata bajara-pacuenia mapanacuataje dovathi jamatabëcueneamoneyabaponatsi. ⁵ Pajivi jumecovënëta Jesús Dioso pexënatocuene, bajarapajivi caejëpatsi dovathi pejamatabëcueneamoneyabinexa.

Pacuenia yapëtanetsi Jesús pepacuene Dioso pexënatocuene yabara pelivaisi

⁶ Jesucristo baja cajena athëbëvetsica pepatsinë. Yapëtanetsi Jesús pepacuene Dioso pexënatocuene. Tsipaji copiaya bautisabatsi merata. Bajaraxuacujinae cruzata beyaxuabatsi. Nexata saya Jesús ëpebautisabicujinaetsi apo ponaponae. Biji rajane copiaya bautisabatsi. Bajaraxuacujinae cruzata beyaxuabatsi. Espiritu Santo ata nacayapëtaeyaexana Jesucristo pepacuene Dioso pexënatocuene. Espiritu Santo baja cajena pexaniajainë. Nexata Espiritu Santo vajanacayapëtaeyaexanaejava, Jesús Dioso pexënatocuene, bejumecovënëtsi. ⁷ Athëbëtsia jinavanapa acueyabi ponëbeje, penajamatabëcuenejëpaevi, pevajunupaebivi Jesucristo Dioso pexënatocuene. Pamonaë jinavanapa athëbëtsia, mapamonaeje: Dioso, Jesucristo, Espiritu Santo. Bajarapamonae acueyabi ponëbeje, penajamatabëcuenejëpaevi, caenë rabaja picani tsaponaponae. ⁸ Mapanacuata ataje acueyabi xuabeje pejamatabëcueneta yapëtanetsi Jesucristo pepacuene Dioso pexënatocuene. Yapëtanetsi Espiritu Santo pejamatabëcueneta. Yapëtanetsinua Jesús pebautisabijavatsi ata pejamatabëcueneta. Yapëtanetsinua Jesús cruzata pebeyaxuabijavatsi ata pejamatabëcueneta. Bajarapaacueyabi xuabeje pejamatabëcueneta yapëtanetsi Jesucristo pepacuene Dioso pexënatocuene. ⁹ Dioso baja cajena nacayapëtaeyaexana Jesús Dioso pexënatocuene.

Mapanacuapijivi ata, itsa nacatsipaeba itsacuenelivaisiyo, nexata jumecovënëtabiabatsi pacuenia nacatsipaebabiaba. Itsiata baitsi jane Dioso itsa nacatsipaeba, bejumecovënëtatsi xaniavaetsia pacuenia nacatsipaeba. Tsipaji Dioso bitso pejumenamatomotsinē. Bitso pexaniajainē. ¹⁰ Pajivi jumecovënëta Jesús Dioso pexēnatocuene, bajarapajivi pejamatabēēthētota yapētane bajarapalivaisi pexaniajailivaisicuene. Pajivi apo jumecovënëtsi Jesús Dioso pexēnatocuene, bajarapajivi Dioso bepenajumetsēnētsinē tane. Tsipaji bajarapajivi Dioso peyapētaeyaexanaejavatsi, apo jumecovënëtsi, Jesús Dioso pexēnatocuene. ¹¹ Dioso itsa nacayapētaeyaexana Jesús Dioso pexēnatocuene, nacayapētaeyaexana mapalivaisije. Nacayapētaeyaexana Dioso vajanacarajutsijavanexa matababi apo peverevereaejava. Nexata Dioso pexēnato pejamatabēcueneta xainaenatsi matababi apo peverevereaejava. ¹² Pajivi yajavaponaponaena Dioso pexēnato, bajarapajivi xainaena matababi apo peverevereaejava. Pajivi apo yajavaponapona tsane Dioso pexēnato, bajarapajivi apo xainae tsane matababi apo peverevereaejava.

Pacuenia Juan muxujoba pecopatsivajēnae baja petoyaquinaelivaisi mapabaxutotaje yabara pelivaisi

¹³ Pacatoyaquinatsi mapalivaisije panejumecovënëtsivi Dioso pexēnato. Pacatoyaquinatsi paneyapētaenexa matababi apo peverevereaejava panexanaejavanexa.

¹⁴ Yapētanetsi Dioso vajanacajumetaejava itsa vajētatsi vajanacatojitsi-pacuenia. Bajaraxuata apo jumejunavitsi vajavajētsinexa Diosojavabelia. Jamatejematsi Dioso pitabarata. ¹⁵ Yapētanetsi Dioso vajanacajumetaejava itsa vajētatsi. Nexata yapētanetsi Dioso vajanacarajutsijavanexa xua vajētatsi.

¹⁶ Dioso panenajuajumecovënëtsivi itsa pataename pibisiacuene pexanaejava, patovajētsianame Diosojavabelia, Dioso pejamatabēcuenexaniavaetsinexatsi pibisiacuene pexanaejivi. Bajarapacuenia Diosojavabelia patovajētsianame itsa payapētaename paneconi yabara abaxē Dioso apo vecuanaxuabijitsia. Itsajava raja jivi pibisiacuene itsa exana, bajarapaneconi yabara pepacune jivi Diosovecua naxuabiana. Nexata baja itsa payapētaename paneconi yabara pepacune baja bajarapajivi Diosovecua naxuabijitsia, pētsa patovajētame Diosojavabelia. Bajarapitsineconi baja pexainaevi panetovajētsinexa Diosojavabelia, apo pacaitorobitsi. ¹⁷ Daxitacuene xua apo pexanepanaecuene jivi exana, pibisiacuene baja cajena. Itsiata baitsi jane bajarapapibisiacuene jivi pexanaejava itsa copabiana, nexata bajarapaneconi yabara itsiata jivi pepacune Dioso apo vecuanaxuabi tsane.

¹⁸ Yapētanetsi baja cajena mapacuneje. Pajivi Dioso pexijivi exanatsi, bajarapajivi copata baja pibisiacuene pexanaejava. Tsipaji baja Dioso pexēnato, Jesucristo, evetatsi bajarapajivi. Nexata dovathi apo itsacueni-abitsi.

¹⁹ Yapētanetsi daxita vaxaitsi Dioso pexicuenetsi. Yapētanetsinua itsamonae dovathi pitorobabiavajavatsi pibisiacuene pexanaenēta.

²⁰ Yapētanetsinua baja Dioso pexēnato, Jesucristo, athēbēvetsica pepatsijavatsica. Patsica vajanacajamatabēcuenē yapētaeyaexanaenexa pepo Dioso. Vaxaitsi baja yajavajinavanapatsi Dioso. Tsipaji baja yajavajinavanapatsi Dioso pexēnato, Jesucristo. Bajaraponē ata pepo Dioso baja cajena, vajanacarajutsinēnaxa matababi apo peverevereaejava. ²¹ Tajamonae, panayajiviitavere papecatsipaebiyani va palivaisi tsipaebapona pamonaē vajēcabiaba jumapecataeja pexanaenēanējavabelia.

Mapabaxutoje San Juan cotocaevi toyaquina Dioso pejumecovënëtsivijavabelia

Pexaniajailivaisi yabara, jivi ata penaasivacuene, yabara pelivaisi

¹ Xanë ancianonëñ, pacatoyaquinatsi mapabaxutoje Dioso pecaitapetsiva, nexi yajava. Xanë bitso pacaasivatsi. Itsamonae ata, pamonaе jumecovënëta Dioso pejumelivaisi, bajarapamonae ata pacaasiva. ² Bajarapacuenia pacaasivatsi tsipaji paxamë ata Dioso pejumelivaisi pajumecovënëtame. Bajarapalivaisi cajinavanapatsi vajajamatabëthëtota daxitamatacabijavabelianexa. ³ Pacatovajëtabiabatsi Diosojavabelia, Jesucristo, Dioso pexënatovajavelia ata. Pacatovajëtabiabatsi papecayavenonabiabinexa, papecaitaxutotsonia taeyabiabinexanua. Pacatovajëtabiabatsinua jamatabëcuenexanepanaeya panejinavanapaenexa. Bajarapacuenia Dioso pacatoexanaena pexaniajailivaisi, Dioso pejumelivaisi, itsa pacajinavanapame, itsamonae ata asivaya itsa pajinavanapamenua.

⁴ Bitso sivajamatabëcueneparëyanë itsa caxitajarabaxuabajë nexiyajuvëñevi, pejumecovënëtavanapaevi pacuenia vaxa Dioso nacaitoroba. ⁵ Tajabanava, aeconoxae catsipaebatsi namataenetsia vajanasivanexa. Bajarapalivaisi apo pejanalivaisi picanı. Bajayata palivaisi itsa copiaya jumetaneme Jesús pelivaisi, bajarapalivaisi jumejëpa. ⁶ Vaxaitsi itsa jitsipatsi Dioso, nexata pacuenia Dioso nacaitoroba, bejumecovënëtavanapatsi. Bajarapalivaisi papecatsipaebijavaveliacujinae, pacaitoroba baja cajena namataenetsia panenasivatsavanapaenexa.

Penajumetsënëtsilivaisi daxitanacuanëjava petsipaebanajetarubenaevi yabara pelivaisi

⁷ Penajumetsënëtsilivaisi petsipaebanajetarubenaevi, ayaibitsaëto najetarubena daxitanacuanëjava. “Pacuenia vaxaitsi banaexanatsi, bajarapacuenia Jesucristo naexana mapanacuataje,” pejailivaisi, bajarapamonae apo pejumecovënëtsivi. Bajarapitsijamatabëcuene pexainaevi peyamaxëtojobivi baja cajena. Bajarapamonae Cristo pijavajabitsaë. ⁸ Panayajivitaevanapare papecavecuaxuabiyanima xua pisavanacuenebavanapame Dioso papecarajutsinexa. Bajarapacuenia panayajivitaevanapare Dioso papecarajutsinexa daxitajavayo panetonacuenebimatamo.

⁹ Pajivi tsiteca pevajënaeyabelia jumecovënëtaponapona palivaisi Cristo tsipaebapona, bajarapajivi vaxa Dioso yajavaponaponatsi. Vaxa Dioso pexënatato ata yajavaponaponatsi. Pajivi pijinia copata pejumecovënëtsijava palivaisi Cristo tsipaebapona, bajarapajivi Dioso apo yajavaponaponatsi. ¹⁰ Nexata bajarapitsijivi itsa pona paxamëjavabelia livaisi papecatsipaebinxexa, pëtsa pacajunuame panijaboyaberena. Pëtsa pabajacobamenua bajarapitsijivi. ¹¹ Pajivi bajacobijitsipa bajarapitsijivi, jamatabëcueneyavenonaejitsipa pijisiacuene pexanaejava. Bajaraxuata pëtsa pabajacobame bajarapitsijivi.

Pacuenia Juan jumaitsi pecopiarutaponaelivaisita yabara pelivaisi

¹² Xanë picani xainajë ayailivaisi patacamuxujiobinexa. Itsiata abaxë apo jitsipaenë bajarapalivaisi patacatoyaquinaenexa mapabax-utotaje. Evetajë abaxë taponaejava paxamëjavabelia patacataenexa, patacabarëcuaicuaijainexanua, vajajamatabëcuenearëyanexa bitso.

¹³ Nejuyapijiva Dioso pitapetsivatsi pexi, catonajumeitoroba nebajacobinexa.

Mapabaxutoje, acueyabibaxuto, San Juan toyaquina Dioso pejumecovënëtsivijavabelia

Pacuenia Juan pexaniajamatabëcuenia tane Gayovënëñë yabara pelivaisi

¹ Gayo bitso tacaasivanë. Xanë ancianonënë, catoyaquinatsi mapabaxutoje. Casivatsi bitso tsipaji xamë ata pexaniajailivaisi jumecovënëtame.

² Catovajëtabiabatsi Diosojavabelia. Catovajëtabiabatsi daxitacuenejavanë pecatoxanepanaenexa, jumalixanepanaeya neponaponanexanua. Cavënëlivaisitanetsi rabaja Dioso pitabarata xaniavaetsia Dioso netoponaponaejava pibisiacuene exanaenejevamë. ³ Itsamonae Dioso pejumecovënëtsivi parena xanëjavaberena. Nexata bajarapamonae xanëjavaberena cavënëlivaisipaeba xaniavaetsia neponaponaejava. Netsipaeba xaniavaetsia asaëya nejumecovënëtaponaponaejava pexaniajailivaisi, Dioso pejumelivaisi. Nexata bitso casivajamatabëcuenearëyatsi. ⁴ Pamona tsipaebabiabajë Dioso pejumelivaisi, bajarapamonae taniji betaxicuenia. Nexata itsa vënëlivaisitaniji bajarapamonae Dioso pejumecovënëtavanapaejava, nexata bitso sivajamatabëcuenearëyanë tsabiabi. Itsacuenejava ata pematatsënëa bajarapacuenia apo nejamatabëcuenearëyayaexanae.

⁵ Xamë xaniavaetsia Dioso tonacuenebabiabame itsa yavenoname Dioso pejumecovënëtsivi. Bajarapamonae saicayanacuaverena pepatsivi ata, yavenoname. ⁶ Pamona Dioso pejumecovënëtsivi parena xanëjavaberena, daxita majotaje Dioso pejumecovënëtsivi pitabarata, cavënëlivaisipaeba bajarajotalia asivaya neyavenonaejava Dioso pejumecovënëtsivi. Bajarapamonae itsa ponaena pevajënaeyabelia, Dioso pejumelivaisi jivi petsipaebaponaenexa, yavenonaename pacuenia namatavenonaena pijanamutonexa. Bajarapacuenia bajarapamonae itsa yavenonaename, Dioso casivabarëya tsane. ⁷⁻⁸ Bajarapamonae naropoba Jesucristo petonacuenebinxaxa pexaniajailivaisi, Dioso pejumelivaisi, daxitajivijava petsipaebanajetarubenaenexa. Bajarapamonae apo jitsipae peyavenonaenexatsi pamona Dioso apo pejumecovënëtsivi. Bajaraxuata vaxaitsi Dioso vajajumecovënëtsivi, xanepana vajayavenonaenexa bajarapamonae. Bajarapacuenia itsa yavenonatsi, nexata Dioso nacatane bajarapamonaeta Dioso pijacuene bevajatonanacuenebivi.

Pacuenia Diótreres pibisiacuene exana yabara pelivaisi

⁹ Xanë bajayata copiaya toyaquinajë Dioso pejumecovënëtsivi, panijatamarata pejinavanapaevi. Itsiata bajarapabaxutota taitorobicuenia Diótreres apo jumecovënëtsi. Jesucristo ata taneitorobinëcuene, apo jumecovënëtsi. Bajaraponë ayaijamatabëcuenenë jamatabënaexana papecanamatacaitorobinënexa. ¹⁰ Bajaraxuata itsa patsianajë xamëjavata, catsipaebianatsi daxita pacuenia Diótreres exana. Bajaraponë pibisiacuena tanebaracuaicuaijajava, taneyabaranajumetsënëtsijava ata, catsipaebianatsi. Itsacuenejavanënu pematatsënëa pibisiacuene exanabiaba. Diótreres apo copiapitabiabi xaniavaetsia pamona Dioso pejumecovënëtsivi. Itsamonae ata itaveta pecopiapitsiyaniya pepatsivi. Nexata picani pamona Diótreres itaveta, itsiata copiapitabiaba Dioso pejumecovënëtsivi. Nexata pamona Diótreres itavetsi ata, itsiata copiapitabiaba, bajarapamonae Diótreres jamatabëvecuacapsipa Dioso pejumecovënëtsivi penacatuatsibovecua bajarapamonae pematatsënëa penajoneyaniva bajarapabota.

¹¹ Gayo, pëtsa exanaponaponame pacuenia pibisiajamatabëcuene pexainaevi baexanavanapa. Exanaponaponare jane pacuenia pexaniacuene pexanaevi baexanavanapa. Pajivi Dioso pexijivi exanatsi, bajarapajivi pexaniacuene exanaponapona. Pajivi Dioso pexijivi apo exanaetsi, bajarapajivi pibisiacuene exanaponapona. Tsipaji bajarapajivi Dioso apo yapëtae.

Pacuenia Demetrio pexaniacuene exana yabara pelivaisi

¹² Daxitajivi pexaniacuena Demetrio vënëlivaisipaebatsi pexaniacuene pexanaponaponaejava. Espiritu Santo baja cajena pexaniajailivaisi jivi peyapëtaeyaexanaenë. Nexata Espiritu Santo jivi yapëtaeyaexanaponatsi pexaniacuene Demetrio pexanaponaponaejava. Paxanë ata baja cajena payapëtaniji Demetrio pexaniacuene pexanaponaponaejava. Nexata daxitajivijava patsipaebaponajë bajarapalivaisi. Paxamë ata paneyapëtaneme pexaniajailivaisi patatsipaebaponaejava.

Pacuenia Juan jumaitsi pecopiarutsilivaisiyota yabara pelivaisi

¹³ Xanë picani xainajë ayailivaisi tacamuxujobinexa. Itsiata abaxë apo jitsipaenë bajarapalivaisi tacatoyaquinaenexa mapabaxutotaje. ¹⁴ Tsipaji jamatabëcatanetsi bepijia. Nexata abaxë tajacuata cabarëcuaicuaijajitsi tsane.

¹⁵ Catovajëtatsi Diosojavabelia pecayavenonaenexa jamatabëcuenexanepanaeya neponaponaenexa. Daxita pecayapëtaevi, majotaje pejinavanapaevi, cabajacobalia. Nebajacobiana caejivi canacujitsia, daxita vajayapëtaevibeje.

Mapabaxutoje San Judas toyaquina Dioso pejumecovënëtsivijavabelia

Pacuenia Judas mapabaxutoje toyaquina Dioso pejumecovënëtsivijavabelia yabara pelivaisi

¹ Xanë Judasnë, Jesucristo pijajivitonënë, Santiago pejuyapijinënë. Paca-toyaquinatsi mapabaxutoje paxamë Dioso papecaasivaivi. Dioso pacaju-nata papijajivinexamë. Paxamë asaëya Dioso pajumecovënëttavanapame Je-sucristo papecaayavaponaponaexae. ² Pacatovajëtatsi Diosojavabelia bitso papecaitaxutotsoniataenexa. Pacatovajëtatsinua Diosojavabelia itsamonae ata Dioso pitabarata barajamatabëcuenexanepanaeya panejinavanapaenexa. Pacatovajëtatsinua Diosojavabelia namataenetsia panenasivanexa.

Pacuenia Judas toyaquina Dioso pejumecovënëtsivijavabelia pejume-covënëtsiyaniya penajumetsënëtsilivaisi petsipaebavanapaevitsi yabara pelivaisi (2 Pe 2.1-7)

³ Tajamonae bitso patacaasivivi, jamatabëpacatoyaquinatsi picani matavëjëa paneyapëtaenexa Dioso papecapanepaejavanexa panijaneconivecua. Jamatabëpatoyaquinatsinua picani paneyapëtaenexa paxanë ata Dioso patanecapanepaejavanexa. Itsiata bajaraxua yabara apo pacatoyaquinae tsanetsi mapabaxutotaje. Vënëlivaisitaniji paxamëjavata pepatsijava penajumetsënëtsilivaisi petsipaebaponaevi. Bajaraxuata jitsipajë patacatoyaquinaenexa panejumecovënëtsiyaniya bajarapamonae papecatsipaebilivaisi. Tsipaji bajarapamonae pexaniajailivaisi, palivaisi vaxaitsi jumecovënëtatsi, bajarapalivaisivecua, saicayalivaisi pacatsipae-bavanapa. Nexata paxamë bajarapamonae ajumesaëya patsipaebare palivaisi vaxaitsi jumecovënëttavanapatsi. ⁴ Tsipaji bajarapamonae, paneyumetsënëtsilivaisi papecatsipaebavanapaevi, paxamë tuatuajëta najoneyabiaba pacatsitanajamatabëcuene itajëtsinejeva. Bajarapamonae jamatabëcuenenavëxaniabiaya jumai tsabiabi: “Dioso baja cajena nacaitaxutotsoniatane vajanacacapanepaenexa. Bajaraxuata pibisiacuene exanae atatsi, apo itsacuene,” jai tsabiabi bajarapamonae. Bajarapamonae apo jumecovënëtsi caenë Dioso vajanacaevetsicuene. Apo jumecovënëtsinua caenë Jesucristo vajatuxanenëcuene. Bajarapamonae apo exanae pacuenia Dioso jitsipa. Apo exanaenua pacuenia Jesucristo ata jitsipa. Bajarapamonae itsamatacabi Dioso penaneconitsiaexanaejavanexatsi pijaneconi yabara, Dioso tajëvelia pejumelivaisibaxutota vaju-nupaebatsi.

⁵ Payapëtaneme rabaja mapacuenije. Bajayata vajatuxanenë Dioso pijajivi capanepa Egipto nacuavecua, Israel nacuayaberena. Nexata baja payapëtae atamë bajarapacueni, itsiata jitsipajë panenajamatabënapitsinexa icatsia bajarapacueni. Bajarapacuenia vajatuxanenë Dioso pijajivi capanepae ata, pëcapanepaecujinae icatsia verebiaba bajarapamonaemiya juvënëvi. Bajarapacuenia verebiaba tsipaji bajarapamonae apo jumecovënëtsitsi.

⁶ Panajamatabënapirenuu pacuenia Dioso exana angelevijavabelia ata. Angelevi Dioso tonacuenebavanapa athëbëtatsia. Angeleviyajuvënëvi apo exanae pacuenia Dioso itorobatsi. Apo jinavanapenua itsajota picani Dioso tocopata pejinavanapaenexa. Bajaraxuata Dioso angeleviyajuvënëvi cëbiaya jinavanapaeyaexana itsanacuata, pitaquirinacuata. Bajarajota angelevi copiaevettavanapaeyaexanatsi

Dioso penaneconitsiaexanaejavanexatsi. Nexata pamatacabi Dioso daxitamatacabijavabelianexa naneconitsiaexanaena daxita pamonaenaneconita Diosojavabelia, bajarapamatacabi Dioso bajarapaángelevi atananeconitsiaexanaena daxitamatacabijavabelianexa.

⁷ Panajamataběnapirenuua Sodoma tomarami ata, Gomorra tomarami ata, pemuxuneneta penaetomaraněmi ata. Pamonaemi jinavanapa bajarapatomaraněta, bitso pibisiacuene exanabiaba. Bajarapamonaemi apo jumecověnětsi Dioso. Apo jumecověnětsinua ángelevi ata. Bajarapamonaemi pevitota bitso pibisiacuene exanabiaba pevěna pebijivjavabelia. Bajaraxuata Dioso verebiaba bajarapamonaemi. Bajarapacuenia Dioso verebiaba bajarapamonaemi, pamonaecotocaevi jinavanapa mapamatacabitaje, peyapětaenexa. Nexata bajarapamonaenata pibisiacuene pexanaeyaniva, apo pevereverecaesitojavabelia Dioso penaneconitsiaexanaeyanivatsi.

⁸ Bajarapacuenia bajayata Dioso naneconitsiaexana pamonaemi pibisiacuene exanavanapa. Bajarapacuenia Dioso naneconitsiaexanaenata pamonaemi bajayata pibisiacuene exanavanapa, itsiata pamonaenajumetsěnětsilivaisi pacatsipaebavanapa, apo canaějětsi Dioso penaneconitsiaexanaejavanexatsi. Pamonaenajumetsěnětsilivaisi pacatsipaebavanapa, pibisiacuene exanabiaba. Bajarapamonaepina majitsinaebotane papibisiacuene bajarapamonaenaxanaejitsia. Bajaraxuata nexata bajarapamonaepibisiacuene exanabiabapevitota. Apo jumecověnětsi pacuenia Dioso itorobatsi. Dioso pijaángelevi ata bajarapamonaepibisiacuenia baracuaicuajai tsabiabi. ⁹ Angelně Miguel, ángelevi penamatacaitorobině. Angelně Miguel bitso ayajamataběcueneně ata, yayiatane dovathi. Pibisiacuenia apo baracuaicuajai. Apo bijataenua. Bajayata Moiséspijině petěpanucaeně jamataběpitisani picani dovathi. Nexata ángelně Miguel apo copatsi Moiséspijině dovathi pepitsinexatsi. Nexata dovathibeje, ángelně Miguelbeje, najumenotabeje Moiséspijiněmi yabara. Itsiata bajarajota ángelně Miguel pibisiacuenia apo bijatae dovathi. Saya xaniavaetsia ángelně Miguel jumaisi dovathijavabelia: “Dioso raja cabijataena,” jai. ¹⁰ Itsiata baitsi jane pamonaenajumetsěnětsilivaisi pacatsipaebavanapa, xaniavaetsia ángelevi apo tae ata, apo yapětae atanua, pibisiacuenia baracuaicuajai tsabiabi. Nexata pacuenia unupijidujuai apo cujarubi atatsi, itsiata pijacuata yapětane pexanaejavanexa, bajara pijinia pacuenia bajarapamonaenata saya pijacuata yapětane mapanacuapijicuene pexanaenexa. Nexata exanavanapa pibisiacuene pacuenia jamataběexana. Nexata itsamatacabi Dioso verebiabiana bajarapamonaebajarapapibisiacuene pexanaexae.

¹¹ ¡Bitso bejiobi tsane pamonaenajumetsěnětsilivaisi pacatsipaebavanapa! Bajarapamonaenadiosonaneconitsiaexanaena. Tspijai pacuenia bajayata Cainpijině jamataběcuenetsi, bajarapamonaenajamataběcuenetsi tsavanapae. Bajayata Cainpijině pibisiacuene exanaponapona pacuenia jamataběexana. Pacuenia bajayata Balaampijinė ata jamataběcuenetsi, bajarajamataběcuenetsi tsavanapae pamonaenajumetsěnětsilivaisi pacatsipaebavanapa. Bajayata Balaampijinė Dioso apo jumecověnětsi pacuenia itorobatsi. Balaampijine palata pepitsinexa, jivi matabacaponapibisiacuene pexanaenexa. Pacuenia bajayata Corépijině ata jamataběcuenetsi, bajaramataběcuenetsi tsavanapae pamonaenajumetsěnětsilivaisi pacatsipaebavanapa. Bajayata Corépijině apo jumecověnětsi pacuenia Moiséspijině itorobatsi. Nexata Corépijině beyaxuabatsi Dioso. Bajara pijinia pacuenia pamonaenajumetsěnětsilivaisi pacatsipaebavanapa, pibisiacuene pex-

anaexae, nexata Dioso verebiabiana bajarapamonae. ¹² Pamonae penajumetsënëtsilivaisi pacatsipaebavanapa, payajavanacaetuatabiabame itsa panacaetuatabiabame panenabaninexa. Paxamë panacaetuatabiabame namataetsia panenasivaxae. Nexata bajarapamonae najoneyabiaba panenacaetuatsijavata. Bajarapamonae pibisiacuene pexanabiabixae, bepiaxuirajava paxamë tuatuajëta. Bajarapamonae aurajibia ayajjava xaeyabiaba. Petocopatsinexa itsamonae ata penaxaenexa, apo najamatabëxainabiabi. Pacuenia pijaoveja pevetsivi xaniavaetsia baeveta pijaoveja, bajarapacuenia itajara pacaeveta. Itsiata apo pacaevetsi xaniavaetsia. Epamonae saya naeveta. Bajarapamonae pexanaejava, itsacuenejavayonexa ata apo xanepanae. Yapëtanetsi pacuenia itsi vaita. Vaita itarërëbo pitsapae ata, itsiata ema apo jopae. Jovibo saya caponatsi. Nexata itsamonae peubijavaxi tsotsaenae atsi, apo jamatabëcuene yavenonaetsi. Bajara saya jamatabëcueneitsi tsavanapae pamonae penajumetsënëtsilivaisi pacatsipaebavanapa. Tsipaji apo jamatabëcuene yavenonae itsajivi ata. Peubinae, ponae apo nacuaitabiabi penacuaitsimatacabita ata, bajaraponae apo xanepanae itsacuenejavayonexa ata. Bajara saya jamatabëcueneitsi tsavanapae pamonae penajumetsënëtsilivaisi pacatsipaebavanapa. Tsipaji apo jamatabëcuene yavenonae itsajivi ata. Peubinae, ponae apo nacuaitabiabi penacuaitsimatacabita ata, bajaraponae peubinë yatabutopaya juta petajuitsinexa isotojavabelia. Bajara pijinia pacuenia Dioso naneconitsiaexanaena pamonae penajumetsënëtsilivaisi pacatsipaebavanapa pibisiacuene pexanabiabixae. Nexata bajarapamonae Dioso xuabianatsi infernojavabelia. ¹³ Pacuenia malataca caecovëta apo rucae, caponanua piaxuirapërë pitapayabelia, bajara saya jamatabëcueneitsi tsavanapae pamonae penajumetsënëtsilivaisi pacatsipaebavanapa. Caejamatabëcuene apo xainabiabi. Bajarapamonae piauracuene pexanabiabixae, nexata bepiaxuirajava paxamë tuatuajëta. Bajarapamonae pejamatabëcueneta jamatabëcuenebijanabiaba itsamonae Dioso pejumecovënëtsivi. Pacuenia athëbëvetsica tulupu othopaena pevereverecaenexa, bajara pijinia pacuenia bajarapamonae ata vereverecaena. Diosovecu naxuabiana. Tsipaji copaba pejumecovënëtsijavami pexaniajailivaisi. Bajaraxuata Dioso bajarapamonae naneconitsiaexanaenatsi. Nexata bajarapamonae pitaquirinacuata jinaavanapaena daxitamatacabijavabelianexa.

¹⁴ Enocpijinë bajayata ponapona. Bajaraponëmi Adánpijinë pemomoxiyajuvënë. Nexata Enocpijinë Dioso pejamatabëcueneta bajayata tajëvelia vajuupaeba, pamonae aeconoxae mapamatacabitaje penajumetsënëtsilivaisi pacatsipaebavanapa. Enocpijinë baja cajena bajayata tajëvelia bajarapamonae yabara jumaitsi mapacueniaje: “Vajatuxanenë Cristo, pijaivi ángelevi, ayailbitsaëttoxaneto yajava, najetarucaena. ¹⁵ Najetarucaena penaneconitsiaexanaenexa daxita pamonae apo exanae Dioso pitorobicueniatsi. Najetarucaena penaneconitsiaexanaenexanua daxita pamonae pibisiacuenia baracuaicuajiai Dioso,” jai baja cajena bajayata tajëvelia Enocpijinë. ¹⁶ Pamonae penajumetsënëtsilivaisi pacatsipaebavanapa, apo sivajamatabëcuenebarëya itsacuenejavayo ata. Nexata pibisiacuenia baracuaicuajiai tsabiabi daxita xua bajarapamonae tocopiapatonatsi. Apo jumecovënëtsi pacuenia Dioso itorobatsi. Nexata bajarapamonae exanavanapa pijacuata penatojitsipaecuenia. Bajarapamonae ayajamatabëcuenevi nataeya navajunupaebabiaba xua exana. Itsamonaejavabelia itsa cuaicuajiai, pexaniacuenia cuaicuajiai tsabiabi. Bajarapacuenia pexaniacuenia cuaicuajiai tsabiabi saya pebarëyataenexatsi, perajuitsinexatsinua penamatavenonaejavanë.

Pacuenia Dioso pejumecovënëtsivi muxujiobatsi pejumecovënëtsiyaniva penajumetsënëtsilivaisi petsipaebavanapaevitsi yabara pelivaisi

¹⁷ Tajamonae bitso patacaasivavi, panajamatabënapire pacuenia baja cajena tajëvelia pacatsipaeba apóstolevi, vajatuxanenë Jesucristo pijajivi. Apóstolevi baja cajena tajëvelia pacatsipaeba pepatsijavanexa penajumetsënëtsilivaisi papecatsipaebivinexa. ¹⁸ Apóstolevi baja cajena tajëvelia pacajumaitsi mapacueniaje: “Nacua pecopiarucaevajënaeyota, itsamonae capocaponaena pexaniajailivaisi, Dioso pejumelivaisi. Bajaramonae exanavanapaena pibisiacuene, pacuenia pijacuata natojitsipa,” pacajai baja cajena tajëvelia apóstolevi. ¹⁹ Pamonae penajumetsënëtsilivaisi pacatsipaebavanapa, bajarapamonae papecatsipaebilivaisita, Dioso panejumecovënëtsivi pacanavecyanatsanaeyæxanapona. Bajaramonae saya najamatabëxaina ëmapanacuapijijamatabëcueneje. Nexata pibisiacuene exanavanapa pacuenia pijacuata natojitsipa. Bajaramonae Espiritu Santo apo tsijamatabëcaetsi.

²⁰ Tajamonae bitso patacaasivavi, asaëyata Dioso pajumecovënëtavanapare. Pacuenia Espiritu Santo pacaitoroba, pavajëtabiabare Diosojavabelia. ²¹ Paxamë bitso Dioso pacaasiva. Bajaraxuata pacuenia Dioso pacaitoroba, pajinavanapare pibisiacuene paneexanaeyaniva. Bajayajebi pacopatsinejavamë, pacopiaevetavanapare matakabi apo pevereverecejava papecarajutsinexa vajatuxanenë papecaitaxutotsoniataexae.

²² Itsamonae jumecovënëtsi ata pexaniajailivaisi, Dioso pejumelivaisi, itsiata jumeaebapona. Bajarapitsivi payavenonare xaniavaetsia pejumecovënëtsinexa bajarapalivaisi. ²³ Bajarapamonae isotojavabelia bepejopaevinexa. Tsjapaji pibisiacuenejavabelia jamatabëjopa. Bajaraxuata payavenonare bajarapitsivi. Itsamonae pijinia bitso pibisiacuene exanavanapa. Bajarapapibisiacuene paitoyamëre. Bajarapamonae itsiata paitaxutobejiobiataema. Payavenonaponare bajarapapibisiacuene pecopatsinexa. Itsiata baitsi jane xania. Panayajivitaema. Pëtsa paxamë ata bajarapamonaeta pibisiacuene panaexaname.

Pacuenia apóstolenë Judas itoroba daxita Dioso pejumecovënëtsivi: “Dioso, bitso ayajamatabëcuenenëmë,” pejainexa Diosojavabelia yabara pelivaisi

²⁴ Dioso caëjëpatsi papecaevetsinexa pibisiacuene paneexanaeyaniva. Nexata pamatakabi Dioso naneconitsiaexanaena daxita pijaneconi pexainaevi, paxamë ata pacanubenaeyæxanaena bajaraponë Dioso, penivenivenaecotia pexainanë, pitabarata. Itsiata baitsi jane paxamë paneconijibimë tsane. Bitso pabarëyamë tsane. ²⁵ Bajaraponë pepo caenë Dioso. Bajaraponë Dioso nacacapanepaena vajatuxanenë Jesucristo cruzata vajanacasivatëpaexae vajaneconi yabara. Bajaraxuata daxitajivi bejumaitsi Diosojavabelia: “Diosomë, bitso ayajamatabëcuenenëmë,” bejai. Betsipaebaponanua itsamonaejavabelia Dioso bitso ayajamatabëcuene pexainanëcuene. Dioso cajena daxitanacua pevetsinë. Betsipaebaponanua itsamonaejavabelia Dioso pecaëjëpaejavatsi pevetsinexa daxitajivi. Bajarapacuenia Dioso jamatabëcueneitsi tsaponaponae mapanacuae pexanaevajënaeya, mapamatakabi ataje, daxitamatacabijavabelianexa ata. Bajara itsi tsane.

San Juan peyaquinaelivaisi pacuenia tajëvelia Dioso tsitajëtatsi pacuenia itsijitsia mapanacuataje

Pacuenia tajëvelia Jesucristo Dioso tsitajëtatsi, juya bajarapacuenia Jesucristo petsitajëtsijava Juanjavabelia yabara pelivaisi

¹ Daxita xuanë Jesucristo tajëvelia Dioso tsitajëtatsi, daxita bajaraxuanë pelivaisi, xanë Juannë, yaquinajë mapabaxutotaje. Bajaraxuanë baja bepijiayo copiapatsiana. Xuanë tajëvelia Dioso tsitajëtatsi Jesús, bajaraxuanë juya Jesús tsitajëtsiana pijajivijavabelia. Bajaraxuata nexata Jesús itorobica pijaángel xanëjavabetsica. Nexata bajaraxuanë jumapecataeya tajëvelia netsitajëta Jesús pijaángel. Neyapëtaeyaexananua pajamatabëcuenelivaisi xaina bajaraxuanë. ² Nexata daxita bajaraxuanë pacuenia taniji, pelivaisi yaquinajë mapabaxutotaje. Pacuenia Dioso nejumaitsi, yaquinajë. Pacuenia Jesucristo ata jumaitsi, bajaraxua ata yaquinajë.

³ Pajivi tsmuxulebiana mapabaxutoje Dioso pejumecovënëtsivi penacaetsi sijaavata, jamatabëcuenegarëya tsane. Pamonaë ata namuxunaevetsiana mapalivaisije, nexata itsa jumecovënëtsiana pacuenia Dioso tajëvelia jumaitsi, bajarapamonaë ata jamatabëcuenegarëya tsane. Bajarapacuenia jamatabëcuenegarëya tsane tsipaji baja imoxoyo pevajënaë tsaponae pecopiapatsinexa daxita xuanë pelivaisi yaquinajë mapabaxutotaje.

Pacuenia Juan toyaquina siete patomarabejijivi, Dioso pejumecovënëtsivi, yabara pelivaisi

⁴ Xanë rabaja Juannë. Pacatoyaquinatsi siete papabitsaëtomëbeje, Dioso panejumecovënëtsivi, Asiävënë nacuata panejnavanapaevi. Ajena, mapamatacabitaje, Dioso ponapona. Dioso nacua pexanaevajënaeya ata, Dioso ponapona. Daxitamatacabijavabelianexa ata Dioso ponapona. Pacatovajëtatsi Diosojavabelia papecajamatabëcuene barëyayaexanaenexa, papecayavenonaenexanua. Siete paespiritubeje nubena Dioso peecaejava, tronovënëjava, pitabarata. Pacatojitsipatsi bajarapamonaë papecajamatabëcuene barëyayaexanaenexa, papecayavenonaenexanua.

⁵ Jesucristojavabelia ata bajarapacuenia pacatovajëtatsi. Jesucristo baja cajena pexaniajailivaisi, Dioso pejumelivaisi, jivi tsipaebabiaba. Daxita petëpaevevica, Jesús baja namataxainaea Dioso asaëyaexanatsi petëpaejavavevica. Mapanacuata jivi pevetsivi ata matatoxenetsia, Jesús pepo pevetsinë daxitacuene. Jesús vajanacaasivaxae, nacasivatëpa. Nexata baja nacavecuaajibiaexana daxita pibisiacuene vajaexanaeconimi. ⁶ Nexata baja Jesús pijajivitsi nacaexana itsamatacabi vajanacabarëevetsinexa daxitacuene. Jesús baja nacaexananua sacerdotevitsi, Jesús paxa Diosojavabelia jivi vajatovajëtabiabinexa. Nexata vaxaitsi daxitamatacabijavabelianexa ayajiamatabëcuene rajutabiabianatsi Jesúsjavabelia. ¡Apo vereverecae tsane Jesús daxitacuene pevetsijava! Bajara itsi tsane.

⁷ ¡Panenamuxunaevere mapalivaisije! Cristo raja najetarucaena athëbëvetsica itarërëbota. Pamatacabi Cristo najetarucaena athëbëvetsica, daxitajivi taenatsi. Pamonaë ata yenecacuatatsi, bajarapamonaë ata taenatsi. Daxita nacuanëpajivi, pamonaë Dioso apo pejumecovënëtsivi,

itsa taena Cristo penajetaruaejava athëbëvetsica, nuena pecajunavi. Bajara itsi tsane jivi itsa taena Cristo athëbëvetsica penajetaruaejava.

⁸ Jesús nayabarajumaitsi mapacueniaje: “Xanë rajane baja daxitacuene pepo tataxuxuabinë. Xanë rajane baja icatsia daxitacuene tacopiarucaeyaexanaenë^{nexa},” nayabarajai Jesús daxitacuene pevetsinë, daxitacuene pexanaenexa ata pecaëjëpaenëtsi. Ajena mapamatacabitaje Jesús ponapona. Dioso nacua pexanaevajënaeya ata, Jesús ponapona. Daxitamatacabijavabelianexa ata Jesús ponapona.

Pacuenia Juan Jesús yacotiaya tsitanaitajëtsi yabara pelivaisi

⁹ Xanë Juannë, panijabananënë. Tsipaji najuajumecovënëtavanapatsi Jesucristo. Nexata pacuenia paxamë ata itsamonae pacabejiobiaexanapona Dioso papijajivixaemë, bajara pijinia pacuenia xanë ata itsamonae nebejiobiaexanapona. Jesucristo pijajivitsi nacaexana itsamat-acabi vajanacabarëevetsinexa daxitacuene. Jesucristo papecayavenon-aexae, pacaasaemë tsavanapae Dioso panejumecovënëtsijava. Bajara pijinia xanë ata itsinë. Dioso pejumelivaisi jivi tatsipaebabiabixae, naneconit-sia ponaponajë Patmosvënë tunaetota. Jesucristo pelivaisi ata jivi tatsipaebabiabixae, naneconëtsiaponaponajë. ¹⁰ Nexata Patmosvënë tunaetotota domingota Espiritu Santo netsijamatabëvënëca. Nexata tapënëverena pecuaicuaijajava ayajjume, betrompetajume penajumetsijava, jumetaniji.

¹¹ Pecuaicuaijajava nejumaitsi mapacueniaje:

—Xanë rajane baja daxitacuene pepo tataxuxuabinë. Daxitacuene icatsia tacopiarucaeyaexanaenë^{nexa}. Xua baja taneme, bajaraxua baja pelivaisi copiaya yaquinare. Xuanë ata icatsia aeconoxae taeponaeneme, bajaraxuanë ata pelivaisi yaquinaeneme. Bajaraxuacujinae bajarapalivaisi toitorobianame Dioso pejumecovënëtsivi, siete patomarabejipijivijavabelia, Asiavënë nacua pejinavanapaevi. Toitorobianame bajarapalivaisi Efeso tomarapijivijavabelia, Esmirna tomarapijivijavabelia ata, Pérgamo tomarapijivijavabelia ata, Tiatira tomarapijivijavabelia ata, Sardis tomarapijivijavabelia ata, Filadelfia tomarapijivijavabelia ata, Laodicea tomarapijivijavabelia ata, nejai mapacueniaje tapënëverena pecuaicuaijajava.

¹² Nexata napënëyorotajë tataanexa ponë tapënëverena nebarëcuaicuaijai. Nexata taenubajë siete xuabeje orota pexanaejavanë. Bajaraxuanë pematatuta naitayotanubena. ¹³ Bajaraxuanë petuatujajëta taenutajë pebi. Bajaraponë yabara jamatabëjumaitsinë:

—Jesús raeta, Daxitajivi Pematapijinë, jamatabëjanë.

Bajaraponë penaxatatsijava apiareca. Nacorobëcëtanuca orota pexanaepana. ¹⁴ Mataniojai bitso pacuenia baniojai papaëputo. Pitaxutobeje naitayota. Pacuenia isotocotia bacotia itsi, bajara itaxutocotia itsi. ¹⁵ Petaxubeje ata nivenivenabeje pacuenia banivenivena broncevënëjava pesetsijava, beoronanitomi. Pecuaicuaijajava najumeta pacuenia banajumeta jonca. ¹⁶ Pecujanenia cobenanuca siete patuluputobeje. Pecuibuatsina pitsapa anijabarëneniabeje pexiujaiespada. Pacuenia mat-acabipijijumeto itsa itavajënae, xaniavaetsia baitayota, bajarapacuenia itabaranaitayota.

¹⁷ Itsa taniji bajaraponë, betatëpaenë irataeya bocajunuajë bajaraponë pitabarata. Itsiata baihsi jane bajaraponë nejayarena pecujuacobeta. Nejumaitsi:

—Pëtsa necujunavame. Xanë rajane baja daxitacuene pepo tataxuxuabinë. Daxitacuene icatsia tacopiarucaeyaexanaenë^{nexa}. ¹⁸ Xanë rajane baja pepo tasaëtsaponaponaenë daxitamatacabijavabelianexa. Xanë

picani tēpajē. Itsiata baitsi jane icatsia asaēnē tatēpaecujinae. Nexata baja asaēnē tsaponaponae daxitamatacabijavabelianexa. Dioso netocopata tacapanepaenexa tajajivi peponaeyaniva infernojavabelia. Netocopatana tananeconitsiaexanaenexa pijaneconi pexainaevi peponaenexa infernojavabelia. ¹⁹ Xua baja taneme, bajaraxua baja pelivaisi yaquinare. Xuanē ata icatsia aeconoxae taeponaeneme, bajaraxuanē ata pelivaisi yaquinaeneme. ²⁰ Xuanē, siete patuluputobeje, tacujuanenia cobenanucajē, mapajamatabēcuenelivaisi xainaje. Siete rabaja pijinia patomarabejepijivi Dioso pejumecovēnētsivi penamatacaitorobivi tsavanapae. Xuanē pijinia siete xuabeje orota pexanaejavanē pematatuta naitayotanubena, mapajamatabēcuenelivaisi xainaje. Siete rabaja pijinia patomarabejepijivi Dioso jumecovēnētavanapa, nejai Jesús, ponē taenutajē, siete xuabeje orota pexanaejavanē tuatuajēta penucaenē.

2

Pacuenia Juan vajatuxanenē Jesús itorobatsi petoyaquinaenexa Efeso tomarata Dioso pejumecovēnētavanapaevi penamatacaitorobinējavabelia yabara pelivaisi

¹ Jesús icatsia nejumaitsi:

—Efeso tomarata peecaenē, Dioso pejumecovēnētavanapaevi penamatacaitorobinējavabelia, foyaquinare. Nexata daxita pijajivi yajava yapētaena mapalivaisije, nejai Jesús, ponē siete patuluputobeje pecujuanenia cobenanuca, siete xuabeje orota pexanaejavanē pematatuta penaitayotanubeneajavanē tuatuajēta penucaenē.

Jesús nitoroba Efeso tomarata peecaenē, Dioso pejumecovēnētavanapaevi penamatacaitorobinējavabelia, tatoyaquinaenexa mapejumaitsilivaisije:

² “Yapētaniji daxita xua paexanavanapame. Yapētanjiniua ayaicuenia Dioso panetonacuenebijava. Yapētanjiniua ajamatabēcuenesaēya Dioso panejumecovēnētavanapaevaja. Yapētanjiniua panecueneataejitsibijava pibisiacuene pexanaevi. Yapētanjiniua nayajivitaeya panejinavanapaevaja itsamonae papecayamaxēitojorobianiva. Itsamonae picani papecayamaxēitojorobinexa, pacajumai tsabiabi: ‘Paxanē raja paapóstolevinē,’ pacajai tsabiabi. Itsiata penajumetsēnētsivicuene payapētaeyabiabame panenayajiviyapētaexae. ³ Paxamē bajayajebi pacaajamatabēcuenesaēmē tsavanapae Dioso panejumecovēnētavanapaevaja, itsamonae pacabejiobiaexanabiabi ata. Ayaicuenia panacuenebame patacaitorobicuene. Apo payabaracueranaemē cajena. Bajarapacuenia panenacuenebavanapaexae, pacasivajamatabēbarēyatsi. ⁴ Itsiata baitsi jane caejavayo yabara pananeconitame xanējavaberena. Tspaji aeconoxae apo panejitsipaemē pacuenia picani bajayata copiaya panejitsipame. ⁵ Panenajamatabēnapire icatsia pacuenia bajayata panejitsipame. Panajamatabēcuenepēnēyorore xanējavaberena. Panetonacuenebavanapare icatsia pacuenia bajayata xaniavaetsia panetonacuenebavanapame. Itsa baja apo panejitsipaemē tsane icatsia, nexata baja apo patajajivimē tsane. ⁶ Itsiata baitsi jane pacasivajamatabēcuenēbarēyatsi patanejamatabēcuenēpēpaexaemē mapacuene yabaraje. Pacujiruitoyamē nicolaítavi pibisiacuene pexanaponajava. Bajaraxua pexanaeyaja xanē ata cujiruitoyanē. ⁷ Itsa pamuxuvojorubename, panatojumetaema pacuenia Espíritu Santo jumaitsi Dioso pejumecovēnētsivijavabelia. Jumaitsi mapacueniaje: ‘Pajivi Cristo jumecovēnētaponapona ēpetēpaejavabelianexa,

bajarapajivi Dioso tocopatsianatsi pejonenexa Dioso pijanacuayabetsia, 'jai Espiritu Santo,' pejailivaisi toyaquinare Efeso tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

Pacuenia Juan vajatuxanenë Jesús itorobatsi petoyaquinaenexa Esmirna tomarata Dioso pejumecovënëtavanapaevi penamatacaitorobinëjavabelia yabara pelivaisi

⁸ Jesús icatsia nejumaitsi:

—Esmirna tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare daxita pijajivi yajava peyapëtaenexa mapalivaisije, nejai Jesús, ponë daxitacuene pepo petaxuxuabinë, daxitacuene icatsia pecopiarucaeyaexanaenënexa.

Bajaraponë picani tëpa. Itsiata baitsi jane icatsia asaë petëpaecujinae. Nexata baja asaë tsaponaponae daxitamatacabijavabelianexa. Jesús nitoroba Esmirna tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: ⁹ “Yapëtaniji daxita xua paexanavanapame. Yapëtanijinau itsamonae papecabejiobiaexanaponaejava. Yapëtanijinau bepanejiobivicuene. Itsiata baitsi jane itsamatacabi Diosojavatatsia bitso panexainaevi tsane. Yapëtanijinau pibisiacuenia papecabaracuaicuajijajava judíovi, Dioso apo pejumecovënëtsivi. Bajarapamonae cajena saya dovathi pijajivi. ¹⁰ Pëtsa pacujunavame itsamonae, pacabejiobiaexanaejitsia ata. Dovathi raja pejamatabëcueneta penaneconitsivi pejebabiabibota, pacananeconitsiaexanejebiana. Bajarapacuenia pacananeconitsiaexanejebiana dovathi papecajamatabëcuenejëbinexa, papecajamatabëcueneypëtaenexa xaniajai pepacune patanejumecovënëtsijavamë. Pacabejiobiaexanaponaena diez pamatacabijeje. Bajarapacuenia pacaexanae ata tsane, itsiata panejumecovënëtsianame matapania panetëpaejavabelianexa. Nexata xanë pacarajutsianatsi matacabi apo peverevereaejava. ¹¹ Itsa pamuxuvojorubename, panatojumetaema pacuenia Espiritu Santo jumaiti Dioso pejumecovënëtsivijavabelia. Jumaiti mapacueniaje: ‘Pajivi Cristo jumecovënëtaponapona ëpetëpaejavabelianexa, bajarapajivi apo itsacueniabi tsanetsi cotocaevi patëpaejava,’ jai Espiritu Santo,” pejailivaisi toyaquinare Esmirna tomarata peecaenë, Dioso pejumecovëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

Pacuenia Juan vajatuxanenë Jesús itorobatsi petoyaquinaenexa Pérgamo tomarata Dioso pejumecovënëtavanapaevi penamatacaitorobinëjavabelia yabara pelivaisi

¹² Jesús icatsia nejumaitsi:

—Pérgamo tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare daxita pijajivi yajava peyapëtaenexa mapalivaisije, nejai Jesús, ponë pecuibuatsina pitsapa anijabarëneniabeje pexiujaispada.

Jesús nitoroba Pérgamo tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: ¹³ “Yapëtaniji daxita xua paexanavanapame. Yapëtanijinau dovathi pijajivi tuatuajëta panejinavanapaejava.

Itsiata baitsi jane pajamatabēcuenesaēmē tsavanapae patanejume-covēnētavanapaejavamē. Bajayata Antipaspijinē tajumelivaisi jivijavabelia tsipaebabiaba. Nexata Antipaspijinē paxamē tuatujēta dovathi pijajivi pebeyaxuabijavatsi, patae atamē, itsiata apo pacopatsimē patanejume-covēnētavanapaejavamē. Bajarapacuenia patanejume-covēnētavanapaexaemē, pacasivajamatabēcuenenabarēyatsi. ¹⁴ Itsiata baitsi jane itsajamatabēcuenejavaxi yabara pananeconitame xanējavaberena. Bajarajota Pērgamo tomarata paxamēyajuvēnēvi muxubijiapenetapona itsamonaē pibisiacuene pexanaenexa. Bajayata Balaampijinēmi jivi peyamaxēitorobabiabinēmi ponapona. Nexata Israelpijinē pemomoxi penaneconitsinexa Diosojavabelia, Balaampijinēmi itoroba Balacpijinēmi pemuxubijiapenetaponaenexa Israelpijinē pemomoxijavabelia. Nexata Balacpijinēmi muxubijiapeneta Israelpijinē pemomoxi penaponaenexa fiestajavabelia. Nexata fiestajavata itsamonaē dajubinē itsa beyaxuaba, jumapecataeya pexanaenēanējavabelia ofrendacuenia perajutsiyajuvēnēvi naxane Israelpijinē pemomoxi. Balacpijinēmi muxubijiapenetanua Israelpijinē pemomoxi pibisiacuene pexanaenexa pevitota. Bajara pijinia pacuenia aeconoxae paxamēyajuvēnēvi ata exanapona. Pērgamo tomarapijivi pibisiacuene pexanaenexa, muxubijiapenetapona. ¹⁵ Itsamonaē pijinia paxamēyajuvēnēvi nicolaítavi petsipaebaponaelivaisi jume-covēnētavanapa. Nexata tanejume-covēnētsivi pibisiacuene pexanaenexa, bajarapamonaē muxubijiapenetapona. ¹⁶ Bajaraxuata paxamē xaniavaetsia panajamatabēcuenepēnēyorore Diosojavabelia. Itsa jume, xanē nexata naxanitsiayo ponaenajē paxamējavabereca tabarēnabenexa bajarapamonaē tacuibuatsina pepitsapaeespadata. ¹⁷ Itsa pamuxuvojorubename, panatojumetaema pacuenia Espiritu Santo jumaitsi Dioso pejume-covēnētsivijavabelia. Jumaitsi mapacueniaje: ‘Pajivi Cristo jume-covēnētaponapona ēpetēpaejavabelianexa, bajarapajivi rajutsianajē pexaenexa manávēnējava, athēbēpijijava, pejamatabēcuenē asaēyaxanaejavanexatsi. Rajutsianajēnua penioponaēiboto. Bajarapaiboto pijumata bajarapajivi vēnērutsianajē pejanavēnē. Itsajivi ata apo vēnēyapētae tsanetsi. Caejivi, bajarapaiboto pepitsijivi, navēnēyapētaena,’ jai Espiritu Santo,” pejailivaisi toyaquinare Pērgamo tomarata peccaenē, Dioso pejume-covēnētavanapaevi penamatacaitorobinējavabelia, nejai Jesús, siete xuabeje orota pexanaejavanē tuatujēta penucaenē.

Pacuenia Juan vajatuxanenē Jesús itorobatsi petoyaquinaenexa Tiatira tomarata Dioso pejume-covēnētavanapaevi penamatacaitorobinējavabelia yabara pelivaisi

¹⁸ Jesús icatsia nejumaitsi:

—Tiatira tomarata peccaenē, Dioso pejume-covēnētavanapaevi penamatacaitorobinējavabelia, toyaquinare pijajivi yajava peyapētaenexa mapalivaisije, nejai Dioso pexēnato, ponē pitaxutobeje naitayota. Pacuenia isotocotia bacotia itsi, bajara pitaxutocotiaitsinē, ponē petaxubejenivenivena ata pacuenia banivenivena broncevēnējava pesetsijava, beoronanitomi.

Jesús nitoroba Tiatira tomarata peccaenē, Dioso pejume-covēnētavanapaevi penamatacaitorobinējavabelia, tatoyaquinaenexa mapejumaitsilivaisije: ¹⁹ “Yapētaniiji daxita xua paexanavanapame. Yapētanijinua itsamonaē ata paneasivatsavanapaejava. Yapētanijinua patanesivanajamatabēcuenē copatavanapaejavamē. Yapētanijinua panetonacuenebijava Dioso.

Yapētānijinua paneajamatabēcuenesaē tsavanapaejava, itsamonaē pacait-sacueniababiabi ata. Yapētānijinua pacuenia panetonacuenebavanapame pamatacabi ajena panejumecovēnētame. Yapētānijinua pacuenia jane baja aeconoxae bitsoyo panetonacuenebavanapame. Bajarapacuenia paneexanavanapaexae pacasivajamatabēbarēyatsi. ²⁰ Itsiata baitsi jane itsajamatabēcueneyo yabara pananeconitamē xanējavaberena. Tspaji apo pacujiruitavetsimē Jezabelvēnēva pibisiacuene pexanaejava. Bajarapova beprofetava, Diosojumelivaisi bepepaebiva, natane. Nexata patajajivimē bajarapova pacayajuvēnyamaxēitojorobapona baja. Bajarapova papeayajuvēnē yamaxēitojorobinexa jumai tsabiabi: ‘Pebijivi pijavavecua jaitsi ata itsava, itsiata apo itsacuene. Bajara pijinia itsi petiriavi ata. Itsanē jaitsi ata pamonavecua, itsiata apo itsacuene. Bajara pijinia itsi pevi ata. Dajubinē itsa beyaxuaba ofrendacuena pevi perajutsinexa jumapecataeya pexanaenēanējavabelia, bajarapaviyajuvēnējava xae atatsi, itsiata apo itsacuene,’ jai tsabiabi bajarapova patajajivimē papeayajuvēnē yamaxēitojorobinexa. ²¹ Bajarapova picani pecopatsijava pibisiacuene pexanabiabijavavecua, bajayajebi evetaponaponajē. Itsiata baitsi jane apo jamatabēcopatsi pevitota pibisiacuene pexanabiabijava. Apo najamatabēcuenepēnēyorotsi xanējavaberena. ²² Bajarapova nexata avitaniaexanaenajē camata pebobocaenexa. Nexata pamonaē paxamēyajuvēnēvi itsa apo copatsi tsane bajarapova pitorobicueniatsi pexanavanapaajava, pamatabēxēyo pevitota pibisiacuene exana bajarapova pitorobicueniatsi, nexata bajarapamonae ata bitso nabejibitsiaexanaenajē. ²³ Bajarapova pexi ata verebiabianajē. Nexata daxita Dioso pejumecovēnētsivi nejamatabēcueneyapētaena. Nejamatabēcueneyapētaena daxitajivi bēpēnēa pejamatabēēthētota, penajamatabēxainaecuene ata, tayapētaenēcuene. Pacaejivimē canacujitsia xuavajēto panetonacuenebavanapame, bajara pijinia pitsijavavajēto pacarajutsianatsi. Xuavajēto pijinia panijaneconi paxainame, bajara pijinia paneconivajētota pacananeconitsiaexanaponaenatsi. ²⁴ Paxamē apo panejumecovēnētsivi, Jezabel pacaitorobi ata pibisiacuene picani paneexanaenexa, mapacuenia pacajumaitsitsije. Paxamē apo pajumecovēnētsimē dovathi pijalivaisi, palivaisi Jezabel jivi tsipaebapona. Bajarapalivaisita cujarubapona dovathi pijacuene pevājēnaeyabelia peyapētaeyaexanaponaenexa. Bajaraxuata apo pacaitorobitsi panejumecovēnētsinexa pematatsēnēa itsalivaisi, piyapēbejelivaisi. ²⁵ Nexata pacaasaēmē tsavanapae panejumecovēnētsijava Dioso pejumelivaisi matakānia ētapatsimatakabitsica javabelianexa. ²⁶ Itsamonaē ēpetēpaejavabelianexa, catsitecavanapaena tanesivanajamatabēcuenē copatavanapaejava. Tajitsipaecuene ata netoexanavanapaena. Bajarapamonae itsamatacabi tocopatsianajē pevetsinexa daxitanacuapijivi. ²⁷ Bajarapamonae itsamatacabi daxitanacuapijivi itsa evetsiana, ajumesaēya itorobabiabiana pejumecovēnētsinexatsi. Pacuenia xanē ata taxa netocopata daxitanacuapijivi taevetsinexa, bajara pijinia pacuenia bajarapamonae ata pevetsinexa daxitanacuapijivi, tocopatsianajē. Pacuenia atsananito pefaratsicanalito toxobiaxuabatsi, hierronaebota itsa conitaxuabatsi, bajara pijinia itsanētsi pamonaē Dioso apo pejumecovēnētsivi. Tajajivi verebiabiana daxita Dioso apo pejumecovēnētsivi. ²⁸ Pamonaē tajajivi, rajutsianajē pexainaenexa papinijicotia xainajē ayaijamatabēcuenevinexa. ²⁹ Itsa pamuxuvojorubename, panatojumetaema pacuenia Espiritu Santo jumaitsi Dioso pejumecovēnētsivijavabelia,” pejailivaisi toyaquinare Tiatira tomarata

peecaenē, Dioso pejumecovēnētavanapaevi penamatacaitorobinējavabelia, nejai Jesús, siete xuabeje orota pexanaejavanē tuatuajēta penucaenē.

3

Pacuenia Juan vajatuxanenē Jesús itorobatsi petoyaquinaenexa Sardis tomarata Dioso pejumecovēnētavanapaevi penamatacaitorobinējavabelia yabara pelivaisi

¹ Jesús icatsia nejumaitsi:

—Sardis tomarata peecaenē, Dioso pejumecovēnētavanapaevi penamatacaitorobinējavabelia, toyaquinare pijajivi yajava peyapētaenexa mapalivaisije, nejai Jesús, ponē xaina siete paespíritubeje, Dioso pijaespíritu, ponē cobenanuca siete patuluputobeje.

Jesús nitoroba Sardis tomarata peecaenē, Dioso pejumecovēnētavanapaevi penamatacaitorobinējavabelia, tatóyaquinaenexa mapejumaitsilivaisije: “Yapētaniji daxita xua paexanavanapame. Yapētanijinua itsamonae papecasivajamatabējumai tsabiabijava: ‘Bajarapamonae bitso tonacuenebavanapa Dioso pijacuene,’ papecasivajamatabējai tsabiabijava. Itsiata baitsi jane xanē yapētaniji pibisiacuene paneexanaejava. Yapētanijinua bēpēnēa panejamatabēcuenefaenaajava patanejumecovēnētsijavamē. ² Nexata namataenetsia panajamatabēcueneasaēyaexanare. Pajamatabēcueneitsamonae papecasivajamatabējumai tsabiabijava: ‘Bajarapamonae bitso tonacuenebavanapa Dioso pijacuene,’ papecasivajamatabējai tsabiabijava. Itsiata baitsi jane xanē yapētaniji pibisiacuene exanaenamenua itsamonae ata, pamonae pijinia jamatabēcuenefaenaepona tanejumecovēnētsijava. Tsipaji baja bajarapamonae imoxo pecopatsi tanejumecovēnētsijavami. Xua paexanavanapame, bajaraxua picani paxamē pacatsipaxaniacuene. Itsiata baitsi jane bajaraxua Dioso apo tsitapexaniacuene. ³ Panajamatabēnapire palivaisi baja copiaya itsamonae pacatsipaeba xanē patacacapanepaejavanexa yabara. Pacaasaēmēre tsavanapae bajarapalivaisi panejumecovēnētavanapaajava. Pacopabare pibisiacuene paneexanabiabijava. Panajamatabēcuenepēnyorore Diosojavabelia. Namataenetsia itsa apo panajamatabēcueneasaēyaexanaemē tsane patanejumecovēnētsijavamē, nexata jemata patsiarecajē patacananeconitsiaexanaenexa. Apo payapētaemē tsane paepatota patsijitsianēreca. Tsipaji paepatota apo panejamatabēnajinaemē, jemata patsiarecajē. Pacuenia penacobetoxotsinēnexa jemata bapata, paepatota apo jamatabēnajinaetsi, bajara pijinia xanē ata itsinē tsane. ⁴ Paxamē Sardis tomarata panejinavanapaevi, itsamonae paxamēyajjuvēnēvi pibisiacuene apo exanae. Pacuenia itsi pamonae apo toaxuiratsi penaxatabijavanē, bajara pijinia jamatabēcueneitsi tsavanapae bajarapamonae Dioso pitabarata aneconijibia pejinavanapaexae. Itsamatacabi bajarapamonae xanējavata jinavanapaena. Bajarapamonae itsamatacabi xanējavata itsa jinavanapaena, pianeconijibixae, naxatabiana penioponaejavanē. ⁵ Pamonae nejumecovēnētavanapaena ēpetēpaejavabelianexa, bajarapamonae naxatabiana penioponaejavanē. Bajarapamonae apo vēnēiquinaenē tsane pabaxutota vēnērubena pamonae matacabi apo pevereverecaajava pexainaevinexa. Biji rajane pamonae tajajivi, vēnēyapētaeyaxanaponaenajē taxajavabelia, taxa pijaángelevijavabelia ata. ⁶ Itsa pamuxuvojorubename, panatojumetaema pacuenia Espíritu Santo jumaitsi Dioso pejumecovēnētsivijavabelia,” pejaillivaisi toyaquinare Sardis tomarata peecaenē,

Dioso pejumecovënētavanapaevi penamatacaitorobinējavabelia, nejai Jesús, siete xuabeje orota pexanaejavanē tuatuajēta penucaenē.

Pacuenia Juan vajatuxanenē Jesús itorobatsi petoyaquinaenexa Filadelfia tomarata Dioso pejumecovënētavanapaevi penamatacaitorobinējavabelia yabara pelivaisi

⁷ Jesús icatsia nejumlahtsi:

—Filadelfia tomarata peecaenē, Dioso pejumecovënētavanapaevi penamatacaitorobinējavabelia, toyaquinare pijajivi yajava peyapētaenexa mapalivaisije, nejai Jesús, ponē pianeconijibinē, ponē copiaevetavanapatsi icatsia petsipijavanexatsica vajanacapanepaenexa.

Pacuenia bajayata Davidpijinē eveta Israelnacia, bajara pijinia pacuenia Jesús evetsiana mapanacuaaje. Evetsiana athēbētatsia ata, Dioso pijanacia. Nexata itsamatacabi Jesús pijajivi itorobiana daxitanacuanējava jivi petsipaebanajetarubenaenexa Diosojavabelia pecapanepaelivaisinexatsi. Nexata panacuanējava Jesús pijajivi itorobiana, bajarapanacuanējava pejinavanapaevi Jesús pijajivi tsipaebanajetarubenaena Diosojavabelia pecapanepaelivaisinexatsi. Nexata itsajivi ata apo caējēpaetsi tsane Jesús pijajivi pitavetsinexa petsipaebanajetarubenaeyaniva bajarapanacuanējava pejinavanapaevi. Panacuanējava pijinia Jesús pijajivi apo tocopatsi tsane Diosojavabelia jivi pecapanepaelivaisinexatsi petsipaebanajetarubenaenexa, bajarapanacuanējava pejinavanapaevi Jesús pijajivi apo tsipaebanajetarubena tsane. Nexata itsajivi ata apo caējēpaetsi tsane Jesús pijajivi pitorobinexa petsipaebanajetarubenaenexa bajarapanacuanējava pejinavanapaevi. Jesús nitoroba Filadelfia tomarata pecaenē, Dioso pejumecovënētavanapaevi penamatacaitorobinējavabelia, tatoyaquinaenexa mapejumlahtsilivaisije:

⁸ “Yapētaniji daxita xua paexanavanapame. Apo pasaēmē. Itsiata panejumecovënētavanapame. Apo panayavajunuaxainaemē patajajivicuenemē. Bajaraxuata pācatocopatatsi talivaisi jivi panetsipaebaponaenexa panevajēnaeyabelia. Nexata itsajivi ata apo caējēpaetsi tsane papecacopatsiaexanaenexa talivaisi jivi panetsipaebaponaejava.” ⁹ Panejumetaema. Itsamonae rabaja judíovi ata, dovathi pijajivi. Tsipaji apo nejumecovënētsi. Bajarapamonae jamatabēcuenenavēxaniabiaya jumai tsabiabi: ‘Paxanē raja pajudíovinē, Dioso papijajivinē,’ jai tsabiabi. Itsiata baitsi jane Dioso apo pijajivi. Tsipaji apo nejumecovënētsi. Bajarapamonae itsamatacabi paneitabarata pematābacabēta pacatonubenaeyaexanaenatsi. Nexata bajarapamonae yapētaena paxamē patacaasivacuene. ¹⁰ Pacaitorobatsi patanejumecovënētsijavamē bajayajebi panecasāetsavanapāenexa. Nexata baja bajarapacuenia panejumecovënētavanapame. Bajaraxuata nexata pamatacabi daxitanacuapijivi piayaicuene taeponaena, paxamē pacaevetsianatsi. Nexata paxamē apo pacaitsacueniabi tsane. ¹¹ Naxanitsiayo rabaja ponaenajē paxamējavabēreca. Xaniavaetsia baja pacaasaēmēre tsavanapae patanejumecovënētavanapaejavamē. Nexata itsajivi ata apo pacavecuapitsi tsane xua taxa Dioso pacarajutsiana athēbētatsia. ¹² Pamonae nejumecovënētavanapaena ēpetēpaejavabelianexa, bajarapamonae taxa Dioso bepijatemplobonaesituronē taenatsi athēbētatsia. Bajarapacuenia taxa Dioso bepijatemplobonaesituronē taenatsi bitso piajamatabēcuenesaē tsavanapaexae tsane tanejumecovënētavanapaejava. Bajarapamonae taxa Dioso athēbētatsia yajavajinavanapaena daxitamatacabijavabelianexa. Nexata taxa Dioso pevēnē yaquinarutsianajē bajarapamonaejavabelia.

Javavayaquinarutsianajë taxa Dioso pijatomara pevënë. Bajarapatomara, pejana Jerusaléntomara. Bajarapatomara athëbëvetsica patsianica, taxa Diosojavavetsica. Tavënë ata, pejanavënë, yaquinarutsianajë bajarapamonaejavabelia. ¹³Itsa pamuxuvojorubename, panatojumetaema pacuenia Espíritu Santo jumaiti Dioso pejumecovënëtsivijavabelia,” pejaillivaisi toyaquinare Filadelfia tomarata peecaenë, Dioso pejumecovënëtavanapaevi penamatacaitorobinëjavabelia, nejai Jesús, siete xuabeje orota pexanaejavanë tuatujëta penucaenë.

Pacuenia Juan vajatuxanenë Jesús itorobatsi petoyaquinaenexa Laodicea tomarata Dioso pejumecovënëtavanapaevi penamatacaitorobinëjavabelia yabara pelivaisi

¹⁴Jesús icatsia nejumaiti:

—Laodicea tomarata peecaenë, Dioso pejumecovënëtavanapaevi penamatacaitorobinëjavabelia, toyaquinare pijajivi yajava peyapëtaenexa mapalivaisije, nejai Jesús, ponë copiaevetavanapatsi icatsia pepatsijavanexatsica vajanacapanepaenexa.

Bajaraponë pexaniajailivaisi jivi tsipaebabiaba. Pexanaenënuaxaxitacuene, xua Dioso exana mapanacuataje. Jesús nitoroba Laodicea tomarata peecaenë, Dioso pejumecovënëtavanapaevi penamatacaitorobinëjavabelia, tatoyaquinaenexa mapejumaitsilivaisije: ¹⁵“Yapëtanijidaxita xua paexanavanapame. Yapëtanijinua patanejumecovënëtsivi atamë, panejamatabëcuenevetsina bevelia patanejitsipaejavamë. Yapëtanijinua bevelia patanetonacuenebavanapaevamë. Pacuenia apo tanejumecovënëtsivi jamatabëcueneitsi xanëjavaberena, itsiata picani bitso apo pajamatabëcueneitsimë. Pacuenia pijinia xaniavaetsia tanejumecovënëtsivi jamatabëcueneitsi xanëjavaberena, itsiata apo pajamatabëcueneitsimë. Pacuenia jamatabëcueneitsi pamonaepo tanejumecovënëtsivi, itsa pajamatabëcueneitsimë tsipae, nexata xanepanaejitsipa. Itsa jume, pacuenia jamatabëcueneitsi pamonaexaniavaetsia tanejumecovënëtsivi, itsa pajamatabëcueneitsimë tsipae, nexata xanepanaejitsipa. Tsipaji rovalia panajamatabëcuene yapëtaejitsipame pacuenia pajamatabëcueneitsimë tsavanapae xanëjavaberena. ¹⁶Nexata pacuenia mera perëbënaera apo cainejebi, bitso apo atajunua, bajara pajamatabëcueneitsimë xanëjavaberena. Bajarapitsira apo jitsipaetsi vajaapaenexa. Nexata vajaapaeyaniva, navecuapatajarabatsi penaxuabinexa. Bajara pijinia pacuenia pacanavecuaxuabianatsi. Tsipaji apo jitsipaenë pacuenia bëpënë panejamatabëcuenevetsina pajamatabëcueneitsimë tsavanapae. Baitsi apo jitsipaenë bevelia patanejitsipaejavamë. Bajaraxuata pacanavecuaxuabianatsi. ¹⁷Paxamë pajamatabëjumaitsimë tsabiabi: ‘Xanë baja cajena bitso daxitacuene taxainaenë. Daxita xua nacuenebaponaponajë taxinaejavanexa, netocapitsapona. Nexata itsacuenejava ata apo namatavenonaenë,’ pajamatabëjamë tsabiabi. Itsiata baitsi janë Diosojavabelia apo panejamatabëcuenebanepanaexae, pepacuene apo pajamatabëcuenebarëyamë tsavanapae. Apo yayapëtaemënuaxaxitacuene bitso bepenejibicuene Dioso pitabarata. Paxamë cajena Dioso pacatane bepeneitaxutotsëcënaevi bitso, bepenejumasaajinaevinua. ¹⁸Bajaraxuata pacamuxujibijitsiatsi. Panevecuapire bitso penamatamotsijava paricovinxamë janë baja Diosojavatatsia. Panevecuapirenuaxaxitacuene penioponaenaxatatsijava panenaxatatsinexa, panenaperabëcaranatsinexa Dioso pitabarata paneaurajavavecu. Panevecuapirenuaxaxitacuene

panetaenexa jane baja xaniavaetsia. Nexata dovathi pijacuene panayajivitaename papecayamaxëitojorobiyanima. ¹⁹ Daxita pamonaе tasivavi, muxujiobajë peyapëtaenexa. Naneconitsiaexanajënuа pecopatsinexa apo tajitsipaeuene pexanaejava. Nexata asaëyata panejumecovënëre. Pacopabare bibisiacuene paneexanabiabijava. Panajamatabëcuenepënyorore Diosojavabelia. ²⁰ Panajumetaema. Itsajivi itsa pata panijabota, nexata itsa pacajunata, patobaupatame pejonenexa. Bajara pijinia pacuenia xanë ata panejamatabëëthëto itsa panetobaupatsianame, pacatsijamatabëjonenatsi. Nexata pacayajavaponaponaenatsi daxitamatacabijavabelianexa. ²¹ Xanë baja cajena taxa Dioso taneitorobicuenia jumecovënëtaponaponajë ètatëpaejavabelianexa. Nexata baja aeconoxae yajavaecajë taxa peecaejavata, pijatronovënëjavata. Pamonaе pijinia nejumecovënëtavanapaena èpetëpaejavabelianexa, bajarapamonaе pijinia tocopatsianajë tayajavaecaenexa tronovënëjavata. ²² Itsa pamuxuvojorubename, panatojumetaema pacuenia Espiritu Santo jumaitsi Dioso pejumecovënëtsivijavabelia,” pejailivaisi toyaquinare Laodicea tomarata peecaenë, Dioso pejumecovënëtavanapaevi penamat-acaitorobinëjavabelia, nejai Jesús, siete xuabeje orota pexanaejavanë tuatuajëta penucaenë.

4

Pacuenia Juan tane Dioso pijajivi Dioso pijanacuatatsia yabara pelivaisi

¹ Icatsia taniji baupa penabaupatanucaejava athëbëtatsia. Ponë baja copiaya jumetaniji pecuaicuaijajava betrompetajume, bajaraponë icatsia pecuaicuaijajava jumetaniji. Nejumaitsi mapacueniaje:

—Junaimina xanëjavabetsina. Catsitajëtsianatsi majotatsinaje pacuenia pevajënaeyabelia itsi tsaponaejitsia bajarapanacuatareca, nejai ponë jumetaniji pecuaicuaijajava.

² Nexata bajarapaepatota nayapëtaniji athëbëtatsia Espiritu Santo pesaë tayajavaponaponaejava. Athëbëtatsia taniji tronovënëjava. Bajara patronota Dioso taeyetajë. ³ Dioso, ponë eca bajarapatronota, itabara-cotiabatsi. Pacuenia cotiaitsi penamatamotsiibotonë, bajara itabara-cotiaitsi. Pacuenia cotiaitsi jaspevënëiboto, pacuenia cotiaitsi cornalinavënëiboto ata, bajaraitabaracotia itsi. Bajarapatrono matatoyorotsia aravalibo taenutajë. Pacuenia esmeraldavënëiboto cotiaitsi, bajaracotia itsanucæe bajarapaaravalibo. ⁴ Bajarapatrono matatoyorotsia taenubajënuа veinticuatro patronobeje. Caetronota canacujitsia ecapona ancianonëanë. Bajarapaancianovi naxatabena penioponaejavanë. Orotа pexanaecoronanë mataena. ⁵ Patronota eca Dioso, bajarapatronojavaverena yamaxë binebinejai. Najumetajununua. Siete xuabeje pitayotanubenaejavanë taenubajë bajarapatronoitabarata. Bajarapaitayotanubenaejavanë mapajamatabëcuenelivaisi xainaje. Siete rabaja pijinia patomarabejepijivi, Dioso pejumecovënëtavanapaevi, Espiritu Santo peyavenonabiabijavanexatsi. ⁶ Bajarapatronoitabarata taeyetajë bemanuamene picani. Itsiata baitsi jane piatajajava. Pacuenia vidriojava nasaba, bajarapitsijava.

Bajarapatronojavata taenubajë cuatro ponëbeje piaitothiavi, ayainëanë. Trono matatoyorotsia nubena. Bajarapamonaе pitabarayareca, pejumareca ata, itaxutorubenaponareca. ⁷ Copiaya ponë, benevëthë petsobianë. Bajaraxuacujinae cotocaevinë, betoro. Bajaraxuacujinae acueyabinë, bejiviitabaranë. Bajaraxuacujinae cuatronë, pacuenia cotsala itsa punanajetaruca baitsi, bajaraitsi. ⁸ Ponëanë, cuatro ponëbeje piaitothiavi taniji,

xainapona seis pacorofetobeje caenë canacujitsia. Bajarapamonae daxitanëanëreca itaxutorbenaponareca. Bëpënëaverena ata bajarapacuenia itaxutorbenaponareca. Matacabijebi, meravijebi ata, apo copatanubenaë pejumaitsanubenaejava Diosojavelia.

Bitso nianeconijibinë. Bitso ayaijamatabëcuenenëmë. Nexata cacaëjëpa daxitacuene nexanaenexa. Ajena, mapamatacabitaje, ponaponame. Mapanacuae nexanaevajënaeya ata, ponaponame. Daxitamatacabijavelianexa ata ponaponame, jai tsanubenaë bajarapamonae Diosojavelia.

⁹ Pamonaë cuatro ponëbeje piaithiavi, pexaniajamatabëcuenenua rajutabiaba Diosojavelia. Bajarapamonae pexaniajamatabëcuene itsa rajutabiaba Diosojavelia, jumai tsabiabi mapacueniaje:

—¡Diosomë, nenivenivenaecotia bitso pinijicue! ¡Ayaijamatabëcuenenëmë bitso! jai tsabiabi.

Bajarapacuenia jumai tsabiabi tronota pecaenëjavavelia, daxitamatacabijavelianexa peponaponaenëjavavelia. ¹⁰ Pamonaë cuatro ponëbeje piaithiavi, bajarapacuenia itsa jumai tsanubenaë Diosojavelia, nexata pininia bajarapaepatota pamonaë veinticuatro ponëbeje ancianovi pematabacabëta tonubenajunua Dioso pitabarata, daxitamatacabijavelianexa peponaponaenë pitabarata. Bajarapacuenia tonubenajunua Dioso pitabarata peyayataexae. Bajarapaancianovi Dioso pijatronojavelia topenelia pija-coronanë. Bajarapaancianovi Diosojavelia jumai tsanubenaë:

¹¹ Patajatuxanenëmë, pataja Diosonëmë. Xanepana itsamonaëjavavelia patacavajunupaebaponaëjava nenivenivenaecotia pexinaëjava. “Diosomë, bitso ayaijamatabëcuenenëmë,” pacajai tsaponaetsinua. Xanepanua patajumaitsaponaëjava: “Dioso cajena bitso piasaënë,” patajaitsaponaëjava. Tsipaji baja daxitacuene nexanaenë. Nejtisipaecuenia daxitacuene exaname. Mapamatacabijavaberena ata abaxë tsiteca daxitacuene nexanaëjava nexanaecujinaë. Bajarapacuenia abaxë tsiteca daxitacuene nexanaëjava xamë nejamatabëcueneta, jai tsanubenaë ancianovi Diosojavelia.

5

Pacuenia Juan athëbëatsia cobetaeyeta Dioso pequionaecuyalatobaxuto pecobenaëcaëjava yabara pelivaisi

¹ Athëbëatsia taeyetajë Dioso. Tronota eca. Pequionaecuyalatobaxuto cobenaëca pecujanenia. Bajarapacuyalatobaxuto peboxoverena, pejumavelia ata, xaina pitane. Bajarapacuyalatobaxuto siete pasellotabeje upicatsanaruba. ² Nexata taenutajë bitso piasaëángelnë. Bajarapaángelnë pinijijumeta jumaitsi mapacueniaje:

—¿Jipatsa nexata jamatabëcuenecaëjëpatsi Dioso petocopsinexatsi pesaracaenexa sellovënëjavaxi, bajarapacuyalatobaxuto piupicatsanarubiselloxi? jai.

³ Itsiata baitsi jane ajibi pejamatabëcuenecaëjëpaejivitsi bajarapacuyalatobaxuto piupicatsanarubiselloxi pesaracaenexa. Athëbëpijiivi ata, mapanacuapijivi ataje, petëpaevimi ata, apo jamatabëcuenecaëjëpaetsi cajena. Nexata itsajivi ata Dioso apo tocopatsi pesaracaenexa bajarapacuyalatobaxuto piupicatsanarubiselloxi bëpënëa paitane rubena petanenexa. ⁴ Nexata xanë bajaraxua itsa taniji, bitso cajena nuajë. Bitso nuajë tsipaji baja ajibi pejamatabëcuenecaëjëpaejivitsi bajarapacuyalatobaxuto pequionaëjava

pebaxuisinaenexa pelebinea. ⁵ Nexata itsanē ancianoviyajuvēnēnē neju-
maitsi:

—Pētsa baja nuame. Caenē raja jamatabēcueneaējēpatsi bajarapacuyala-
tobaxuto pequionaajava pebaxuisinaenexa. Bajaraponē Judápijinē pemo-
moxiyajuvēnēnē. Piasaēnē bitso. Nexata bajaraponē yabara itsamonae
jumai tsabiabi: “León,” jai tsabiabi. Bajaraponē nacuaevevtsinēmi David-
pijinē pemomoxiyajuvēnēnē. Bajaraponē jamatabēcueneamoneyaba baja
dovathi. Nexata bajaraponē jamatabēcueneaējēpatsi pesaracaenexa ba-
jarapacuyalatobaxuto piupicatsanarubiseloxi, nejai ancianoviyajuvēnēnē
Jesucristo yabara.

⁶ Nexata jane baja taenutajē Corderonē. Nuca veinticuatro ponēbeje
ancianovi pitabarata. Nucanua trono pitabarata. Nucanua pamonaē
cuatro ponēbeje piatothiavi pitabarata. Cordero nayapētane pebeyaxu-
abinēmitscuene. Tsipaji cruzajavabelia pecobematabiabarutsvijānēmitsi
ruca pecobeta. Corderonē xaina siete pamataetobeje, siete pijinia paitax-
utobeje. Xuanē, siete paitaxutobeje, mapajamatabēcuenelivaisi xainaje.
Siete rabaja pijinia paespíritubeje, Dioso pijaespirituanē. Bajarapasiete
paespíritubeje Dioso baja itoroba daxitanacuanējāva. ⁷ Nexata jane baja
Dioso, ponē eca tronota, ponē pequionaecuyalatobaxuto cobenaeca pecu-
juanenia. Corderonē kujitabalia. Corderonē jane baja vecuapita bājara-
pacuyalatobaxuto. ⁸ Corderonē baja itsa pita bajarapacuyalatobaxuto,
naxata pamonaē cuatro ponēbeje piatothiavi, Corderonē pitabarata pe-
matabacabēta tonubenajunua. Bajara pijinia pacuenia pamonaē veinticu-
atro ponēbeje ancianovi, Corderonē pitabarata pematabacabēta tonubena-
junua. Caeciano canacujitsia saicaya xainapona pijaarpa. Bajarapaan-
cianovi capona orota pexanaecopanē. Bajarapacapanē vēnēca petuxujivi-
java. Bajarapatuxujivijava xaina mapajamatabēcuenelivaisije. Dioso pijajivi
pevajētaeponejavami Diosojavabelia, Dioso tane bajarabepitsituxujivijava.
⁹ Nexata pamonaē cuatro ponēbeje piatothiavi, pamonaē pijinia veinticuatro
ponēbeje ancianovi, daxita bajarapamonaē, naxēana Corderojavabelia ma-
papejanavajije. Penaxēanaejavata vajita jumaisi Corderojavabelia mapacue-
niaje:

Cajamatabēcueneaējēpa rabaja Dioso pecatocopatsixae nepitsinexa ma-
pacuyalatobaxutoje. Nexata baja cajamatabēcueneaējēpanua bājara-
pacuyalatobaxuto piupicatsanarubiseloxi ata nesaracaenexa. Ba-
jarapacuenia cajamatabēcueneaējēpa baja tsipaji baja cabeyaxu-
aba pataneneconimatamotsinexamē. Nexata padaxitavirajumevi
atanē, padaxitanacuanēpijivi atanēnua, nijanata baja panecomuatame
Diosonexa. ¹⁰ Paneexanamenua baja Dioso papijajivinē itsamata-
cabi Dioso patanebarēevtsinexa daxitacuene. Paneexanamenua baja
pasacerdotevinē jivi patatocuaicuaijaitsviabinexa Diosojavabelia.
Paneexanamenua baja nacuanē pataevetsivinxena,
jai ancianovi Corderonējāvabelia penaxēanaejavata mapapejanavajije.

¹¹ Trono matatoyorotsia nubena cuatro ponēbeje piatothiavi. Nexata
piatothiavi pepēnēvelia matatoyorotsia nubena ancianovi. Bajaraxuacu-
jinae jane baja ancianovi matatoyorotsia nubenatsi ángelevi. Angelevi
bitso ayaiBITSaēto, millones paángelbeje nubena. Nexata bajarapaángelvi
pecuaicuaijajiva jumetaniji. ¹² Angelevi ayaijumeta jumaisi mapacueni-
aje:

Corderonē, ponē picani beyaxuabatsi, bitso ayaijamatabēcuenenē.
Bajaraxuata Dioso tocopatsi pevetsinexa daxitacuene

mapanacuataje. Tocopatatsinua daxitacuene pexainaenexa. Tocopatatsinua daxitacuene peyapêtaenexa. Tocopatatsinua pinijsaê pexainaenexa. Tocopatatsinua itsamonaê pejumaitsinexatsi: “Xamê bitso ayaijamatabêcuenenê,” pejainexatsi. Tocopatatsinua pevajunupaebinexatsi penivenivenaecotia pexainaejava. Tocopatatsinua daxita pamonaê jumecovênêtatsi, pexaniajamatabêcuene perajutsinexatsi bajaraponêjavabelia. Bajarapacuenia tocopatatsi tsipaji ayaijamatabêcuenenê bitso,

jai tsanubenaê mapacueniaje ângelevi Jesús yabara.

¹³ Jumetanijinua icatsia daxita Dioso pexanaevi pecuaicuaijajava. Athêbêpijivi cuaicuaijai. Mapanacuapijivi ata cuaicuaijai. Petêpaevimi ata cuaicuaijai. Manuamenianêpijivi ata cuaicuaijai. Nexata daxita bajarapamonaê Diosobeje Jesúsbeje yabara jumaitsi mapacueniaje:

Diosomê, tronota neecaenê. Xamê pijinia Corderonê. Paxamêbejejavabelia pexaniajamatabêcuene pacarajutatsi. Paxamêbeje bitso ayaijamatabêcuene panexainaenêbeje. Panenivenivenaecotiabeje paxainamebeje. Nexata panenivenivenaecotiabeje panexainaejavabeje itsamonaejavabelia pacavajunupaebaponatsi. Pinijsaê bitso panexainaenêbeje. Bajarapajamatabêcuene panejamatabêcuenetsitecaenêbeje daxita matabacijavabelianexa,

jai daxita Dioso pexanaevi Diosobeje Jesúsbeje yabara.

¹⁴ Pamonaê pijinia cuatro ponêbeje piatiothiavi jumaitsi tsaponae mapacueniaje:

—¡Bajara itsi tsane! jai bajarapamonaê.

Nexata pamonaê veinticuatro ponêbeje ancianovi, pematatabacabêta tonubenajunua Dioso pitabarata. Pexaniajamatabêcuene rajutanubena Diosojavabelia, daxitamatabacijavabelianexa peponaponaenêjavabelia.

6

Siete pasellobeje yabara pelivaisi

¹ Corderonê taenutajê. Penamataxainaesello sarananuca. Nexata pamonaê cuatro ponêbeje piatiothiaviyajuvênênê, caenê pecuaicuaijajava ayaijumeta, jumetaniji. Pecuaicuaijajava, beyamaxêjume najumeta. Nexata jumetaniji: “¡Naxanitsia!” pejaijava caballojumata peponaenêjavabelia.

² Nexata bajaraxuacujinae icatsia taniji perenajava penioponaecaballota peyanajetarucaenê. Caballojumata peecaenê, cobenaeca bitsabi. Rajutatsi corona penamataxatatsinexa. Bajaraxuacujinae pona pijavajabitsaê pebarênabenexa. Nexata pijavajabitsaê cueneamoneyabanajetaruca pepacuene êpecopiarucaeya exanaejavabelianexa.

³ Bajaraxuacujinae icatsia Corderonê sarananuca itsasello, pecotocaevijava. Nexata pamonaê cuatro ponêbeje piatiothiaviyajuvênênê, icatsia itsanê: “¡Naxanitsia!” pejaijava, jumetaniji.

⁴ Nexata bajaraxuacujinae icatsia taniji perenajava petsobiacaballota peyanajetarucaenê. Caballojumata peecaenê, piapiaespada rajutatsi. Tocopatatsi pecopiarucaeyaexanaenexa mapanacuata jivi xaniavaetsia pejinavanapacuenemi. Jivi jane baja namataenetsia nabeyaexanaejitsia daxita nacuanêjava.

⁵ Bajaraxuacujinae icatsia Corderonê sarananuca itsasello, acueyabijava. Nexata pamonaê cuatro ponêbeje piatiothiaviyajuvênênê, acueyabinê icatsia: “¡Naxanitsia!” pejaijava, jumetaniji.

Nexata bajaraxuacujinae icatsia taniji perenajava petsaebiacaballota peyanajetarucaenë. Caballojumata peecaenë, cobenaeca pepesabaponaejava. ⁶ Icatsia jumetaniiji pamonaе cuatro ponëbeje piaitothiavijavata pejumaitsijava mapacueniaje: “Janibomatacabixae, caedenariota pecomuatsinexa caejëpa saya caekilo trigoxu. Itsa pijinia cebadaxu, caejëpa saya acueyabi pakilobeje. Nexata caedenariota pecomuatsinexa aceitera, itsa jume, vinora, apo caejëpae. Tsipaji bajaraparanë bitso namatamota,” pejaijava, jumetaniiji.

⁷ Bajaraxuacujinae icatsia Corderonë sarananuca itsasello, cuatrojava. Nexata pamonaе cuatro ponëbeje piaitothiavi, pecopiarucaenë jane baja: “¡Naxanitsia!” pejaijava, jumetaniiji.

⁸ Nexata bajaraxuacujinae icatsia taniji perenajava pevayanae-caballota peyanajetarucaenë. Caballojumata peecaenë, pevënë Jivi Petëpaeyaexanaponaenë. Itsanë pënaponatsi. Bajaraponë pijinia ponë pevënë Infiernonë. Bajaraponëbeje Dioso tocopatsianatsibeje jivi ayaibitsaëto pebeponaenexabeje. Pitsibitsaëtovajëto beponaenabeje, bajarapitsibitsaëtovajëto matatoxenetsia nacopatsiana mapanacuataje. Daxita mapanacuajavaje bajarapacuenia exanaponaenabeje. Bajaraponëbeje pejamatabëcueneta beyaexanaponaenabeje jivi vajabitsaëcuenia, janibocuenia ata, piavitanecuenia ata. Unupijinëanë piayainëanë pitsapaena. Nexata bajarapapiayainëanë jivi beponaenatsi. Bajarapacuenia itsi tsane mapanacuataje pamatacabi Dioso jivi nananeconitsiaexanaena pibisiacuene pexanaeneconi yabara.

⁹ Bajaraxuacujinae icatsia Corderonë sarananuca itsasello, cincojava. Nexata daxita pamonaemi bajayata beyejebatsi Dioso pejumelivaisi yabara, taeyejebajë pebobenaejava altarjavabëxëpanata. Bajarapamonaemi bajayata beyejebatsi apo pecopatsixae Dioso pejumelivaisi jivi petsipaebaponaejava. ¹⁰ Daxita pamonaemi bajayata beyejebatsi, Diosojavabelia pinijumeta jumai tsanubenaе:

—Diosomë, pepo pexaniajamatabëcuenenëmë. Pacuenia najumecapanepaeya jumaitsimë, bajarapacuenia exanabiabame. ¿Detsa pamatacabibeje abaxë saica nenaneconitsiaexanaenexa mapanacuata pejinavanapaevije, pamonaе panebeyejeba? jai tsanubenaе altarjavabëxëpanata pebobenaеvi.

¹¹ Nexata jane baja bajarapamonaе Dioso rajutatsi penioponaenaxatabijavanë. Abaxë Dioso itorobatsi bajarapamonaе penacueraevetanubenaenexa. Tsipaji abaxë saica itsamonae Dioso pijajivi, Jesucristo ata petonacuenebivi, pebeyejebinxatsi. Bajaraxuata bajarapamonaе abaxë nacueraevetsiaexanejebatsi Dioso.

¹² Bajaraxuacujinae icatsia Corderonë sarananuca itsasello, seisjava. Nexata icatsia taniji bitso ira penajëabijava. Matacabipijijuumeto bitso itaxutotsaebia. Pacuenia meravi bitso itsa aitaquiri, bitso batsaebia, bajara itaxutoitsi. Meravipijijuumeto pijinia bitso itaxutotsobia. Pacuenia pijana batsobia, bajara itaxutoitsi. ¹³ Nexata tulupu irabetsica othopaica. Pacuenia naejavacuai bathopaica, naejava itsa najëaba pinijijovibota, bajarapacuenia othopaica tulupu. ¹⁴ Pacuenia cuyalato baquiona, bajarapacuenia quiona daxita itaboxomi. Ajibi baja nexata itaboxo. Daxita petsutonëmi, petunaetonëmi ata, najëaba. ¹⁵ Nexata daxita mapanacuenëjavaje jivi pevetsivi, namatayaba ibovajuanëjava. Namatayaba ibotoxanetonë tuatujëjava ata. Daxita ayaijamatabëcuenenëanë, bitso riconëanë ata, namatayaba. Vajabitsaë penamatacaitorobinëanë ata, piasaënëanë ata, namatayaba. Dajubicuenia pecanajetsivitsi ata itsamonaejavabelia amoneya

petonacuenebavanapaenexa, namatayaba. Apo pecanajetsivitsi ata itsa-
monaejavabelia amoneya petonacuenebavanapaenexa, namatayaba. Ba-
jarapacuenia daxita namatayaba. ¹⁶ Nexata penamatayabivi jumaitsi ibot-
sutonējavabelia, ibotoxanetonējavabelia ata:

—Panetsimataothopare. Dioso, ponē eca tronota, bajaraponēvecua
panematayatsianame. Pinijicuenia raeta panenaneconitsiaexanaena
Corderonē. Bajaraxuavecua panematayatsianame, jai picani pamonae
penamatayabivi.

¹⁷ Tocopiapatatsi jane baja pinijicuenia Dioso penaneconitsiaexanaemat-
acabitsi. Itsajivi ata cajena apo caējēpaetsi pevecuapanepaenexa Dioso
penaneconitsiaexanaecuenetsi.

7

*Pacuenia Juan tane athēbētatsia pacuenia itsamatacabi itapaitanerubijitsi-
atsi Israel nacuapijivi Dioso pijajivixae yabara pelivaisi*

¹ Icatsia taniji cuatro ponēbeje ángelevi. Bajarapaángelevi nacua
matatoyorotsia nubena. Caenē canacujitsia ángelevi caranatanubena
jovibo. Irajava jovibo peponaeyaniva, caranatanubena. Manuamene
atavecua caranatanubena. Caenae ata naejava penajēabianiva jovibota,
caranatanubena ángelevi. ² Tanijinua icatsia itsaángelnē penajetaruaenē
orientejavavetsina. Bajarapaángelnē caponapona piasaenē Dioso pijasello.
Bajarapasellota Dioso pijajivi pitapaitanerubaponaenexa. Bajarapaángelnē
vavajai ayaijumeta cuatro paángelnēbejejavabelia. Pamonae cuatro ponēbeje,
ángelevi, Dioso tocopatatsi pebijianaenexa ira, manuamene ata. Nexata
orientejavavetsina paángelnē najetaruca, cuatro paángelnēbejejavabelia
jumaitsi mapacueniaje:

³—Dioso pijajivi yajava peitsacueneyaniva, pētsa abaxē pabijianame ira,
naejavanē ata, manuamene ata. Matapania baja Dioso pijajivi Dioso pijasel-
lota vaxaitsi itapaitanerubianatsi, bajara jane pabijianaename, jai ángelnē
orientejavavetsina penajetarucaenē.

⁴ Bajaraxuacujinae jumetaniji jivi ayabitsaētoxaneto Dioso pijasellota
pitapaitanerubijavatsi. Ciento cuarenta y cuatro mil pina pajivibeje ita-
paitanerubatsi Dioso pijasellota. Pamonae itapaitanerubatsi Dioso pi-
jasellota, daxita bajarapamonae Israelpijinēmi pexi doce ponēmibeje pe-
momoxiyajuvēnēvi. ⁵ Nexata Dioso pijasellota itapaitanerubatsi doce mil
pajivibeje, Judápijinēmi pemomoxiyajuvēnēvi. Doce mil pijinia pajivibeje,
Rubénpijinēmi pemomoxiyajuvēnēvi. Doce mil pijinia pajivibeje,
Gadpi-
jinēmi pemomoxiyajuvēnēvi. ⁶ Doce mil pijinia pajivibeje, Aserpijinēmi
pemomoxiyajuvēnēvi. Doce mil pijinia pajivibeje, Neftalípijinēmi pemomoxiya-
juvēnēvi. Doce mil pijinia pajivibeje, Manaséspijinēmi pemomoxiya-
juvēnēvi. ⁷ Doce mil pijinia pajivibeje, Simeónpijinēmi pemomoxiyajuvēnēvi.
Doce mil pijinia pajivibeje, Levípijinēmi pemomoxiyajuvēnēvi. Doce mil pi-
jinia pajivibeje, Isacarpijinēmi pemomoxiyajuvēnēvi. ⁸ Doce mil pi-
jinia pajivibeje, Zabulónpijinēmi pemomoxiyajuvēnēvi. Doce mil pijinia
pajivibeje, Josépijinēmi pemomoxiyajuvēnēvi. Doce mil pijinia pajivibeje,
Benjamínpijinēmi pemomoxiyajuvēnēvi. Nexata bajarapacuenia caejavata
Dioso pijasellota itapaitanerubatsi ciento cuarenta y cuatro mil pajivibeje,
Israelpijinēmi pexi doce ponēmibeje pemomoxiyajuvēnēvi.

Pacuenia Juan athëbëtatsia tane jivi ayaibitsaëtoxonetonë, penioponaejavanë penaxatabivi, yabara pelivaisi

⁹ Icatsia taniji jivi ayaibitsaëtoxonetonë. Bajarapamonae daxitanacuanëpijiviyajuvënëvi, daxitaviriajumeviyajuvënëvi. Bajarapamonae nubena Dioso peeaetrono pitabarata, Corderonë ata pitabarata. Jivi cajena ayaibitsaëtoxonetonë bitso. Itsajivi ata cajena apo caëjëpaetsi penamataëjëtsicapanepaenexa bajarapajivibitsaëtoxonetonë. Daxita bajarapamonae ëpenioponaejavanë penaxatabivi. Cobenanubena benaxarebobaxutonë. ¹⁰ Daxita bajarapajivibitsaëtoxonetonë vavajai tsanubenaë ayajumeta. Jumaitsi tsanubenaë mapacueniaje: VajaDioso, ponë Corderonë yajavaeca tronota, bajaraponë nacacapanepa pibisiacuene vajaexanaeneconimivecua. Bajarapacuenia nacacapanepa Corderonë pejamatabëcueneta, jai tsanubenaë bajarapajivibitsaëtoxonetonë.

¹¹ Trono matatoyorotsia nubena cuatro ponëbeje piaithiavi. Nexata piaithiavi pepënëvelia matatoyorotsia nubena ancianovi. Bajaraxuacujinae jane baja ancianovi matatoyorotsia nubenatsi ängelevi. Daxita ängelevi ira taenubenaëya bobena irata Dioso peeaetrono pitabarata. Bobenaëya pexaniajamatabëcuene rajutanubena Diosojavabelia. ¹² Bajarapaängelevi ira taenubenaëya jumai tsanubenaë mapacueniaje:

¡Bajara itsi tsane! PatajaDiosomë, pexaniajamatabëcuene pacarajutabiabianatsi daxitamatacabijavabelianexa. Nenivenivenaecotia nexainaëjava, daxitacuene neyapëtaenëcuene ata, pacavajunupaebapon-aenatsi daxitajivijavabelia. Daxitajivi casivajamatabëcuenebarëya tsabiabi tsane itsa yavenonabiabianame bajarapamonae. Daxitajivi cayaiyataeyabiabiana. Bitso cajena niasaënë daxitamatacabijavabelianexa. Cajamatabëcuenecaëjëpa nexanaenexa daxitacuene ata daxitamatacabijavabelianexa. Bajara itsi tsane, jai tsanubenaë irataëya daxita bajarapaängelevi Diosojavabelia.

¹³ Nexata itsanë ancianonë nejumlahtsi:

—¿Detsa mapamonae penioponaejava penaxatabivije? ¿Detsa verena pata bajarapamonae? nejai ancianonë.

¹⁴ Xanë nexata jumaitsinë:

—Xamë raeta jane yapëtaneme, janë ancianonëjavabelia.

Nexata ancianonë nejumlahtsi:

—Mara pamonaëje nacua pecopiarucaevajënaëya, piyajiunavixaneto pecanicabanubenaëvimije. Corderonë pesivatëpaexaetsi, bajarapamonae pibisiacuene pexanaeneconimi vecuaajibiaexanatsi baja. Bajaraxuata penioponaejavanë naxataba. ¹⁵ Bajaraxuata baja bajarapamonae nubena Dioso peeaetrono pitabarata. Copatsinejeva Dioso petonacuenebijatsi, tonacuenebavanapa Dioso pijatemplobota. Dioso, ponë eca tronota, bajaraponë evetsianatsi peyajavajinavanapaëxae. ¹⁶ Bajarapamonae baja apo namatavenonae tsane pexaëjava. Apo namatavenonae tsane mera ata. Icotia ata apo tsajavi tsanetsi. Icotia piatajujava ata apo jamatabëitonotsi tsanetsi.

¹⁷ Bajara itsane tsipaji Corderonë, ponë nuca trono pitabarata, evetsianatsi bajarapamonae. Evetsianatsi xaniavaetsia. Pacuenia pijaoveja pevetsinë xaniavaetsia baeveta pijaoveja, bajarapacuenia evetsianatsi. Bajaraponë matacaponabiabianatsi itsabelia rubena iravetsina pepitsaparubenaëmeranë, jivi piaitavayaëxanaëmeranëjavabelia. Daxita bajarapamonae Dioso pijanacuatsia jamatabëcuenebarëya tsavanapae tsane. Tsipaji ajibi tsane peyabaranuejavanexa, nejai ancianonë mapacueniaje.

8

Sietejava sello yabara pelivaisi

¹ Icatsia Corderonē sarananua cuyalatobaxuto piupicatsatarutsisello, sietejava. Nexata jane baja athëbëtatsia ajumejibi. Bajayaepatovajëto ajumejibi. ² Bjaraxuacujinae icatsia taniji siete ponëbeje ängelevi. Dioso pitabarata nubena. Nexata bajarapaängelevi rajutatsi siete patrompetabeje. ³ Icatsia xuacujinae itsanë ängelnë najetaruca. Cobenanajetaruca orota pexanaevaxi. Bajarapavaxita pecaponaenexa pitatsajaviitairē. Nexata nucojopa altarvënëjava pitabarata. Nexata jane baja rajutatsi ayajava petuxujuvijava. Nexata bajarapatuxujuvijava Dioso tane daxita Dioso pijajivi pevajëtaponaejumemi Diosojavabelia bepematajërëbijjava. Nexata bajarapatuxujuvijava ängelnë buata altarjumata. Bajarapaaltar, orota pexanaealtar, nuca Dioso peacaetrono pitabarata. ⁴ Nexata jane baja bajarapatuxujuvijavami ängelnë tajuita. Nexata petsëxë athëbëabetsia junaya. Patsëxë athëbëabetsia junaya altarjavavetsia, ängelenë pecobejavavetsia junaya Diosojavabetsia. Bjarapatsëxë yajavajunaya Dioso pijajivi pevajëtaponaejumemi Diosojavabelia. ⁵ Bjaraxuacujinae ängelnë altarjumavecua nota pitatsajaviitairē. Bjarapaitatsajaviitairē vënëta pijavaxi. Bjaraxuacujinae ängelnë bajarapaitatsajaviitairē bajarapavaxi ënëtuatuajëvecua othotajarabareca irabereca. Nexata yamaxë iratareca najumeta. Yamaxë binebinejai iratareca. Iranë jane baja ayaicuenia najëba.

Siete patrompetabeje yabara pelivaisi

⁶ Siete paängelbeje canaveretanubena pijatrompetanë piobinexa.

⁷ Nexata jane baja penamataxainaeängelnë oba pijatrompetä. Nexata bitso pecainejebimatarejetonë othopareca irabereca. Bajara pacainejebimatarejetonë matajërëba isoto. Matajërëabanua pijana yajava. Nexata jane baja ira tajuepona daxita nacuanëjava. Panacuanëjava ira tajuepona, pairavajëto tajuepona matatoxenetsia itsiata yajuvënënacopatapona. Daxitaira apo veriajavapona. Nexata panacuanëjava ira tajuepona, daxita naejavanëmi, pejuvijavanëmi ata, yajavatajuepona.

⁸ Bjaraxuacujinae icatsia pecotocaeviängelnë oba pijatrompetä. Taniji bepinijitsutoxaneto petajueyecajava. Bjaraxua jopareca manuameniareca. Manuamenemi nexata pijana. Pamenevajëto ëpijanamene tsarucäe, bajarapamenevajëto matatoxenetsia itsiata pijananejeva yajuvënënacopata.

⁹ Pamanuamene ëpijanamene tsarucäe, bajara pamanuamenepijidujuaimi tëpa baja. Pamanuamene pijinia pijananejeva nacopata, bajara pamanuamenepijidujuai apo tëpae. Pamanuamene ëpijanamene tsarucäe, bajarapamanuamena perubenaebarcocoxanetonëmi ata napeneta. Pamanuamene pijinia pijananejeva nacopata, bajarapamanuameneta perubenaebarcocoxanetonë apo napenetsi.

¹⁰ Bjaraxuacujinae icatsia acueyabiängelnë oba pijatrompetä. Nexata pinijitulputoxaneto jopareca irabereca. Bjarapatulputoxaneto tajuerocaponareca. Pacuenia bepinijisotocotiaxaneto bacotia itsi, bajaracotia itsi tsarunaereca. Panacuata jopa bajarapatulputo, bajarapanacuata daxita perubenaemenianëmi, bijiana baja. Iravetsina mera pepitsaparubenaevanëmi ata, bijiana baja. Nexata baja abeje daxita bajarapameranëmi. Panacuata apo jopae bajarapatulputo, bajarapanacuata perubenaemenianë, apo bijiana. Nexata xanepana daxita bajarapameranë. Mera iravetsina pepitsaparubenaevanëjava ata, xanepanarubena.

¹¹ Bajarapatuluputo pevënë Ajenjo. Pamerajavareca jopareca bajarapatuluputo, bajarapamera atsaxa baja. Jivi ayaibitsaëtoxanetonë tēpa penatsiapaexae bajarapamera.

¹² Bajaraxuacujinae icatsia cuatroángelnë oba pijatrompeta. Nexata jane baja itaxutobijiana matababipijjuameto. Itaxutobijiana meravipijjuameto ata. Itaxutobijiana tuluputonë ata. Nexata matababipijjuameto bijiaya naitayota. Meravipijjuameto ata bijiaya naitayota.

¹³ Bajaraxuacujinae icatsia taniji itsanë ángelnë pepunanajetarucaenë. Pepunanajetarucaenë ángelnë jumai tsanajetarucæ ayaijumeta:

—¡Toabejetsi baja tsaponae tsane mapanacuapijivije itsa obiana trompeta acueyabi paángelnëbeje penacopabivi! jai tsanajetarucæ ángelnë pepunana-jetarucaenë.

9

¹ Bajaraxuacujinae icatsia cincoángelnë oba pijatrompeta. Nexata taniji athëbëvereca ángelnë perunaejavareca irabereca. Nexata bajarapaángelnë Dioso rajutatsi llave, iravetsina pepitsapaeméthëxaneto pijallave. ² Nexata jane baja bajarapallaveta ángelnë méthëxaneto vëpacasarana. Ángelnë jane baja vëpata méthëxaneto. Nexata bajarapaméthëxanetojavatsina pitsapaina ètsëxëxaneto. Pitsitsëxëxaneto bapitsapa pinijipabixaneto itsa tajuiña, bajarapitsitsëxëxaneto pitsapaina bajarapaméthëxanetojavatsina. Nexata bajarapatsëxëta matababipijjuametomi itaxutoaitaquiriayaexana. Itaboxo ata aitaquiriayaexana. ³ Bajarapatsëxëjavaverena pitsapa bosese. Bajarapabosese daxitanacuanëjava punanajetarubena. Bajarapabosese caëjëpaeyaexanatsi jivi pecacuatsinexa pebosotota. Pacuenia aqueto cacuata pebosotota, bajarapacuenia jivi pecacuataponaenexa. ⁴ Bajarapabosese apo itorobitsi pebijianaenexa itsacuenejava ata xua pejuvijava. Nexata bajarapabosese apo bijianaponae pona. Apo bijianaponae naejavanë ata. Tsipaji itorobitsi pecacuatsinexa saya ëjivi. Nexata pamonaë Dioso pijasellota apo itapaitanerutsitsi, bajarapamonae pecacuatsinexa. ⁵ Itsiata baitsi jane apo tocopatsitsi caecuenia pebeyaxuabaponaenexa. Tocopatatsi saya jivi itsa cacuata, penavixaetaeyaexanaenexa cinco pajuametobeje. Nexata bajarapabosese jivi itsa cacuatsianatsi, bitso jivi navixaetaena. Pavixaevajëto aqueto itsa cacuata, baatane, bajarapavixaevajëto jivi navixaetaena. ⁶ Nexata pamonaë cacuatsianatsi bajarapabosese, jitsipaena picani petëpaenexa bajayajebi penavixaetaeyaniva. Itsiata baitsi jane bajarapamonae Dioso abaxë apo tocopatsi tsane petëpaenexa. Penabayaxuabinexa ata, Dioso apo tocopatsi tsane.

⁷ Bajarapabosese ajumabocotaja. Pacuenia vajabitsaë itsa nabejitsia, pijacaballo bajumaxataba hierropananë pijavajabitsaë petojorojoron-ayenivatsi, bajara itsanubenae bajarapabosese. Beorota pexanaecoronanë namataxatabanubena. Pacuenia pebi itabaraitsi, bajaraitabaraitsi. ⁸ Pematana xaina. Pacuenia petiriva matanaitsi, bajara matanaitsi. Pevonotonë pijinia benevëthëvonotonë. ⁹ Bajarapamonae pejumabocotonë yajavanaexana baja cajena behierrojumabocotonë pejorojoronaeyanivatsi itsajivi ata. Pecorofe najumeta. Pacuenia vajabitsaë penabenexa itsa pona pijavajabitsaëjavabelia, caballo itsa roboboca carrozavënëmonë banajumeta, bajarapacuenia najumeta bosese pecorofe. ¹⁰ Bajarapabosese pebosotonëcopiata xaina peetonë jivi pecacuatsinexa. Pacuenia aqueto pebosotocopiata xaina peeto, bajnia benevëthëvonotara itsi. Tocopatatsi peetota pecacuatsinexa jivi, jivi penavixaetaenexa cinco pajuametobeje. ¹¹ Bosese

cajena xaina ángelnē pitorobinēnexatsi, pinijimēthēxaneto pevetsinē. Bajarapaángelnē hebreojumeta pevēnē Abadón. Griegojumeta pijinia Apolión, “Peverebiabinē,” pejaijume.

¹² Bajarapapiayaicuene penamataxainaejava. Itsiata baitsi jane abaxē saica anijajavabeje.

¹³ Bajaraxuacujinae icatsia seisángelnē oba pijatrompeta. Paaltar nuca Dioso pitabarata, bajarapaaltarjavaverena penajumetsijava, ayaijume, jumetaniji. Bajarapaaltar orota pexanaealtar. Bajarapaaltar cuatro pamataetobeje xaina. Caepi canacujitsia mataerucazona. Bajarapamataetonē tuatujēta jumepitsapa. ¹⁴ Bajarapaaltarjavaverena jumaiti seisángelnē trompeta pexinaenējavabela mapacueniaje:

—Isicare cuatro ponēbeje ángelevi, pamonae cēbejebatsi pinijimenejavata, Eufratesvēnē menejavata, jai bajarapaaltarjavaverena.

¹⁵ Nexata jane baja pecēbejebiánglelevimitsi isicatsi. Isicatsi bajarapaánglelevi pebenexa jivi. Bajarapaánglelevi jivi ayaibitsaetonē beponaejitsia daxitanacuanējava. Bajara saya cajena ēxuanexa, paánglelevi Dioso jamatabēcueta pexinaenējavabela mapacueniaje:

—Isicare cuatro ponēbeje ángelevi, pamonae eneevetanubena Dioso pitorobinexatsi jivi pebeponaenexa paepatota tocaējētatsi. ¹⁶ Nexata icatsia jumetaniji bajarapaánglelevi pijajivi, vajabitsaēvi, pitorobijava peponaenexa caballota. Doscientos millones ponēbeje vajabitsaēvi pona jivi pebeponaenexa daxitanacuanējava.

¹⁷ Bemajitsinaebota taniji bajarapamonae caballota peponaejava. Vajabitsaēvi namēpabēxataba hierropananē pejorojronaeyanivatsi pijavajabitsaē. Vajabitsaēvi penamēpabēxatabijavanē itabēta acueyabi paviriabejevavata. Itabēta mapaviriabejevavataje. Itabēta petsobijavata. Itabēta perajenaevavata. Itabēta pevayanaevavata. Bajarapaviriabejevavata itabēta. Pacuenia nevēthēmatabocoto itsi, bajaramataboco itsi bajarapacaballuanē. Pecuibovojotonējavavetsina pitsapa pitarunutsicotia, ētsēxē yajava, azufre ata yajava. ¹⁸ Xuanē caballuanē pecuibovojotonējavavetsina pitsapa, bajaraxuanē jivi ayaibitsaētoxanetonē yatēpazona daxitanacuanējava. Pabitsaētovajēto tēpa, bajarapabitsaētovajēto matatoxenetsia nacopata mapanacuataje. ¹⁹ Bajarapacaballuanē caējēpatsi jivi pebeponaenexa pecuibovojotonēta, pebosotonēta ata. Bajarapacaballuanē pebosotonēupianē bejomomatabocotonē. Pacuenia jomo pematabocotota caējēpatsi jivi pesininexa pebeyaxuabinexa, bajara itsi bajarapacaballuanē pebosotonēupianē.

²⁰ Itsiata baitsi jane pamonae peyajuvēnētēpaevi, pamonae penacopabivi, bajarapamonae tsiteca pibisiacuene exanavanapa. Apo copatsi dovathivijavabela penavajēcabiabijava. Apo copatsinua pecobeta jumapecataeya pexanaenējavabela ata penavajēcabiabijava. Bajaraxuanē saya pexanaenēanē oronanitonēta, platananitonēta ata, broncejavanēta ata, ibotonēta ata, naejavanēta ata. Nexata bajaraxuanē apo caējēpaetsi petaenexa. Apo caējēpaetsi pejumetaenexa ata. Apo caējēpaetsi peponaenexa ata. ²¹ Pamonae peyajuvēnētēpaevi, pamonae penacopabivi, bajarapamonae apo copatsi jivi pebejava. Apo copatsi penajorobijava ata. Apo copatsi pevitota pibisiacuene pexanaevajava ata. Apo copatsi penacobetoxotsijava ata.

10

Pacuenia Juan tane ángelenē pecobenanucaejava cuyalatobaxutoyo yabara pelivaisi

¹ Icatsia taniji itsaángelnē athēbēvetsica perunaejavatsica. Runaica mapanacuayabetsicaje. Bajarapaángelnē bitso piasaéángelnē. Itarērēbo tuat-uajēta najetaruca. Natsimatatsēnērutanajetaruca aravalibo. Itabaranaitayotanajetaruca. Pacuenia maticabipijiuameto baitayota, bajarapacuenia itabaranaitayotanajetaruca. Petopabeje pijinia pacuenia isotocotia tsobia, bajarapacuenia cotiatsobia. ² Cuyalatobaxutoyo baxupatanuca. Pecujuanenia pataxu nataxunutanuca manuameneboxovereca. Petsavenonenia pijinia pataxu nataxunutanuca irajumavereca. ³ Nexata vavajai tsaxuabi ayaijumeta. Pacuenia nevēthē itsa fiaba ayaijume, bajarapacuenia ayaijume. Pevavajaicujinae siete payamaxēbeje najumeta athēbētatsia. ⁴ Yamaxē penajumetsicujinae, yaquinaejiťsianē picani pajamatabēcuene yabara yamaxē penajumetsijava neypētaeayaexana. Itacarajeta athēbēvetsica tanejumaitsijava, jumetaniji. Nejumaitsi athēbēvetsica mapacueniaje:

—Muetsia saya xainare pajamatabēcuene yabara yamaxē penajumetsijava, cayapētaeayaexana. Pētsa yaquiname bajarapalivaisi, nejai athēbēvetsica.

⁵ Bajaraxuacujinae ángelnē, ponē nataxunutanuca manuameneboxovereca, irajumavereca ata, bajaraponē nacobeyotanutuca athēbēabetsia pecujuanenia pacobe. ⁶ Bajarapaángelnē nacobeyotsiaya jumai tsanuca:

—Dioso, daxitamatacabijavabelianexa peponaponaenē, caecuenia exana mapanacuaje, itaboxo yajava. Nexata caecuenia yajavaexana mapanacupijicueje, itaboxopijicueje ata yajava. Caecuenia yajavaexana manuamene ata, manuamene pijicueje ata yajava. Bajaraponē pitabarata najumecapanepaeya cajumaitsijitsiatsi mapacueniaje. Copiapatsijitsia rabaja pacuenia Dioso tajēvelia najamatabēxaina pexanaexa. ⁷ Itsa rabaja pēpatota siete ángelnē obiana pijatrompeta, bajarapēpatota Dioso jane baja taxuxuabiana pexanaejava pacuenia baja cajena tajēvelia Dioso najamatabēxaina pexanaponaenexa jivijavabelia. Muetsia pexainabuatsilivaisimi itajēťsiana. Copiapatsiana jane baja pacuenia bajayata Dioso tajēvelia najumecapanepaeya jumaiti profetavimijavabelia, jai tsanuca nacobeyotsiaya ángelnē.

⁸ Copiaya pajume jumetaniji athēbēvetsica tanejumaitsijava, bajarapajume icatsia jumetaniji. Nejumaitsi icatsia athēbēvetsica mapacueniaje:

—Ponē ángelnē nataxunutanuca manuameneboxovereca, irajumavereca ata, bajarapaángelnē kujiremelia. Vecuapire pacuyalatobaxutoyo bajarapaángelnē baxupatanuca, nejai athēbēvetsica.

⁹ Nexata kujiliajē ángelnē. Vajētajē nexata tanerajutsinexa bajarapacuyalatobaxutoyo. Bajarapaángelnē nejumaitsi mapacueniaje:

—Ājā, pire baja. Xaema necuiboxaicaenexa. Pacuenia jabēra xaica, bajara itsi mapacuyalatobaxutoyoje. Itsiata baitsi jane necotsorotubereca atsaxa tsane, nejai ángelnē.

¹⁰ Nexata baja ángelnē bajarapacuyalatobaxutoyo vecuapitajē. Xaniji jane baja. Nexata jane baja cuiboxaicajē. Pacuenia jabēra xaica, bajara itsi. Itsiata baitsi jane taquijonicujinae tacotsorotubereca atsaxa. ¹¹ Nexata icatsia ángelnē nejumaitsi:

—Tsipaebare pacuenia Dioso sivanajamatabēxaina daxitanacuanēpijivi. Tsipaebare pacuenia Dioso sivanajamatabēxaina daxitavirijumevi ati. Tsipaebare pacuenia Dioso sivanajamatabēxaina caenacia canacujitsia pevetsinēanē ata, nejai ángelnē.

11

Pacuenia itsamatacabi anijanēbeje jivi tsipaebaponaenabeje palivaisi Dioso yapētaeyaexanaenatsibeje yabara pelivaisi

¹ Icatsia taniji ángelnē. Nerajuta piapianaēbo. Nejumaitsi mapacueniaje: —Nonotapunare. Caponare mapanaēboje necaējēbinexa Dioso pijatemplobo, necaējēbinexa altarvēnējava ata. Namataējētsianamenua pajivibeje bajarapatemplobota navajēca Diosojavabelia. ² Itsiata pētsa caējētame templobopanabo. Tsipaji bajarapapanabo tocopata baja Dioso apo pejumecovēnētsivinexa, pamonaē saicayanacuaverena pepatsivi pejinavanapaenexa. Bajarapamonae jinavanapaena Jerusalén tomarata cuarenta y dos pajuametobeje. Saicayanacuaverena pepatsivi, apo yayataē tsane juđiovi pijatomara. ³⁻⁴ Bajayata profetanēmi peyaquinaebaxutota, comparacióncuenia tajēvelia jumaiitsi mapacueniaje: “Anijanaēbeje, olivonaēbeje, anijajavabeje pijinia pitayotanucaejavabeje, nubenaena mapanacuapijivi pijatuxanenē Dioso pitabarata,” jai. Bajarapacuenia comparacióncuenia tajēvelia itsa jumaiitsi, tajēvelia vajunupaeba anijanēbeje jivi petsipaebanajetarucaejavanexabeje palivaisi Dioso yapētaeyaexanaenatsibeje. Nexata anijanēbeje Dioso itorobiana jivi petsipaebanajetarucaenexabeje palivaisi Dioso yapētaeyaexanaenatsibeje. Palivaisi bajaraponēbeje Dioso yapētaeyaexanaenatsibeje, bajarapalivaisi mil doscientos sesenta pamatacabibeje jivi tsipaebanajetarucaenabeje. Naxatatsianabeje piayopapaēbērējava. Bajarapacuenia naxatatsianabeje bitso pesivajamatabēcuenebējaixaebeje tsane pamonaē apo peyayataēvi Jerusaléntomara, nejai ángelnē.

⁵ Itsajivi itsa jamatabēitsacueniabianatsibeje, bajaraponēbeje nayajivitajuitsianabeje pecuibovojotovetsina pepitsapaecotiata, pitarunutsicotiata. ⁶ Bajaraponebanajetarucaenabeje. Naxatatsianabeje piayopapaēbērējava. Bajēbeje caējēpaenatsibeje pitavetsinexabeje ema pejopaeyaniva. Pamatacabibeje jivi tsipaebanajetarucaenabeje palivaisi Dioso yapētaeyaexanaenatsibeje, bajarapamatacabibeje abaxē ema apo jopaeaexanaēbeje tsane. Caējēpaenatsibejenua mera ata pijanara pexanaenexabeje. Caējēpaenatsibejenua daxitaviria piayaicueene pecapitsapaenexabeje pamatacabita jitsipaenabeje. ⁷ Bajaraponēbeje itsa veretsianabeje palivaisi Dioso yapētaeyaexanaenatsibeje jivi petsipaebanajetarucaejavabeje, bitso piayainē pitsapaenina pinijimēthēxanetojavatsina. Bitso piayainē pitsapaenina pebenexatsibeje bajaraponēbeje. Nexata amoneyabianatsibeje. Nexata baja beyaxuabianatsibeje. ⁸ Nexata petēpaenēbeje bocaenabeje Jerusalén tomaraxaneto callejavata. Bajarapatomarata bajayatami vajatuxanenē ata cobematabiabarutatsi cruzajavabelia. Bajarapatomara yabara jivi itsajavata: “Sodomatomara raja,” jai tsabiabi. Itsajavata: “Egiptotomara raja,” jai tsabiabi. Bajarapacuenia jumai tsabiabi Jerusaléntomara yabara tsipaji bajarapatomarapijivi bitso pibisiacueene exana. ⁹ Nexata bajaraponēbeje, Jerusaléntomara callejavata petēpaenēbeje, bocaenabeje acueyabi pamatacabibeje epatua. Tsipaji Jerusaléntomara pevetsivi apo tocopatsi tsane itsajivi ata pemēthētsinexatsibeje bajaraponēbeje. Nexata daxitaviriajumevi, daxitanacuanēpijivi ata, taeyabuatsianatsibeje. ¹⁰ Dioso apo pejumecovēnētsivi sivajamatabēcuenebarēyatsibeje tsane petēpanucaejavabeje. Bitso cajena barēya tsane Dioso apo pejumecovēnētsivi. Nexata pebarēyajamatabēcuene fiesta exanaena. Namataenetsia

narajutsiana amoneya itsacuenejavanē. Bajarapacuenia exanaena Dioso apo pejumecovēnētsivi bajaraponēbeje petēpaejavabeje yabara. Tsipaji Dioso apo pejumecovēnētsivi jumaitsi tsane: “Copiaruca rabaja maponēbeje livaisi vajanacatsipaebabiabijavaje. Copiaruca baja vajanacajamatabēitonotabiabijava,” jai tsane. ¹¹ Itsiata baitsi jane petēpaecujinaebeje, acueyabi pamatacabibejecujinae itsamatacabi epatua, icatsia Dioso piasaējumali rajutsianatsibeje. Nexata petēpaejavabejevecua namatacotsianabeje. Daxita cajena pamonae taeyabuatsianatsibeje petēpanucaejavabeje, bitso cujunavianatsibeje. ¹² Bajaraxuacujinae bajaraponēbeje jumetaenabeje athēbēvetsica pinijijumeta pejumaitsijavatsibeje: “Pajunaiminabeje,” pejaijavatsibeje. Nexata bajaraponēbeje junaeniabeje athēbēabetsia itarērēbo tuatuajējavabetsia. Daxita pitoyavitsibeje pētaenubenaenatsibeje. ¹³ Bajara jane paepatota ira najēabiana. Nexata Jerusalén tomarata, itsajota diez pabobeje najuaenaena, caebo yajuvēnējopaponaena. Nueve nexata pabobeje nacopataponaena. Nexata Jerusalén tomarata ayaijava bo othopaena. Siete mil pijinia pajivibeje bajarapairanajēabita tēpaena. Jerusalén tomarapijivi, pamonae nacopabiana, bitso cajena junaviana. Nexata bajarapamonae pecajunavi, Diosojavabelia jumaitsi tsane:

—Diosomē, ayaijamatabēcuenenēmē bitso, jai tsane pecajunavi Diosojavabelia, athēbētatsia peecaenējavabelia.

¹⁴ Anijapiayaicuenebeje rabaja panepaena. Itsiata baitsi jane icatsia itsajava piayaicuenejava bepijia najetarucaena, acueyabijava.

Sietenē baja ángelnē pijatronpeta piobijava yabara pelivaisi

¹⁵ Sietenē jane baja ángelnē oba pijatronpeta. Nexata athēbēvetsica pinijijumeta pejumaitsijava, jumetaniji. Jumaitsi mapacueniaje:

Daxitanacuanēpijivi rajane baja vajatuxanenē Cristobeje, Diosobeje, evetaponaponaenabeje. Bajaraponēbeje evetaponaponaenabeje daxitamatacabijavabelianexa, pejaijava athēbēvetsica, jumetaniji.

¹⁶ Nexata pamonae veinticuatro ponēbeje ancianovi, pamonae ena pijatronota Dioso pitabarata, daxita bajarapamonae irataeya bobena.

¹⁷ Bajarapamonae ancianovi irataeya jumai tsanubenaē Diosojavabelia:

Xamē Diosonēmē, nijamatabēcuenesaēnē daxita mapanacuanē pevetsivivecuaje. Ajena, pamatacabi, ponaponame. Bajayata mapanacujine xanaevajēnaeya ata, ponaponame. Daxitamatacabijavabelianexa ata ponaponame. Pexaniajamatabēcuenē pacarajutatsi. Tsipaji baja taxuxuabame pinijisaēta nevetaponaponaenexa daxita mapanacuanēpijivije. ¹⁸ Daxita mapanacuanēpijivije cabaraanaepana bitso. Bajaraxuata tocopiapatatsi baja nenaneconitsiaexanaenexa daxita bajarapamonae. Tocopiapatatsinua baja petēpaevimi ata nenaneconitsiaexanaenexa. Tocopiapatatsinua baja nijajivi, xuavajēto catonacuenebavanapa, bajarapitsijavavajēto nerajutsinexa pecatonacuenebavanapaematamo. Pamonaē catotsipaebavanapa nijumelivaisi itsamonaejavabelia, bajarapamonae jane baja rajutsianame xua toxainame bajarapamonae nerajutsinexa. Pamonaē ayaijamatabēcuenē pexainaēvi ata, cavēnēlivaisiyaiyatane. Pamonaē

beveliajamatabëcuene pexainaevi ata, cavënëlivaisiyaiyatane. Bajarapamonae ata jane baja rajutsianame xua toxainame bajarapamonae nerajutsinexa. Tocopiapatatsinua baja pijinia neverebibinexa daxita pamonaе bijiana mapanacuaje, pamonaе ata jamatabëcuenebijiana pecajumecovëñetsivi, jai tsanubenaе irataeya ancianovi Diosojavabelia.

¹⁹ Nexata athëbëtsia Dioso pijatemplobo nabaupata. Bajarapatemplobo ëñëtsia taeyabuatsiajë baula. Bajarapabaulaënëta jeba Dioso pejumelivaisi peyaquinajebijava. Bajarapaitane jumai tsarubenaе pacuenia Dioso najumecapanepaeya jumaiti pijajivi pecapanepaenexa pijaneconivecua. Yamaxë binebinejai. Najumetanua. Ira najëbanua. Bitso pecainejebimatarejtonë irabetsica othopaica pinijicuenia.

12

Pacuenia Juan athëbëtsia tane dragón bitso pianaepanaejava yabara pelivaisi

¹ Athëbëtsia ayaicuene naitajëta vajanacayapëtaeyaexanaenexa pacuenia itsamatacabi pevajënaeyabelia itsi tsaponaejitsia mapanacuataje. Athëbëtsia petiriva taenutajë. Petiriva jumanava naitayotanua. Pacuenia matacabipijjuameto baitayota, bajarapacuenia jumanava naitayotanua. Meravipijjuametojavavelia nataxunufanua. Namataxatatanua doce patuluputobeje pexinaecorona. ² Bajarapova petiriva penacueto peyacotajinaeva. Pevixaenotsijavatatsi bitso yaaëajai. ³ Nexata bajarajotatsia naitajëta piayainë, petsobianë, pinijinëxaneto dragón, baitsi dovathi. Xaina siete pamatabocotobeje, diez pamataetobeje. Caematabocoto canacujitsia namataxatatapona corona. ⁴ Bajaraponë, dragón, nabosovebabia. Nexata penabosovebabejavata tulupu ayajjava penetsica irabetsica. Xuavajëto tulupu othopaica irabetsica, bajaraxuavajëto matatoxenetsia nacopabarubenaya athëbëtsia. Bajaraponë, dragón, nucojopa penacueto pevixaenotsivatsi pitabarata, bajarapova itsa vecuanaexanatsi penacueto, pecoxixaenexatsi picani. ⁵ Nexata jane baja petiriva vecuanaexanatsi pebinëyo. Bajaraponëyo caponatsi Diosojavabetsia Dioso pijatronota peecaenexa. Nexata baja bajaraponëyo apo xaetsi dragón. Bajaraponë itsamatacabi mapanacuta jivi pepo pevetsinë tsane. Itsa evetsiana, ajumesaëya itorobabiabiana pejumecovëñetsinexatsi. ⁶ Nexata petiriva penacuetonëyo pevécuanaexanaecujinaetsi, najetabajirava petusato nacuayabelia, itsabelia Dioso tsivajënaexaniavaetatsi peponaponaenexa. Bajarajota pexaejava baja Dioso rajutatsi mil doscientos sesenta pamatacabibeje.

⁷ Bajaraxuacujinae athëbëtsia vajabitsaë exana. Angelevi penamatacaitorobinë, Migulvënëñë, pijaängelevi yajava, barënabia dragónjavabelia. Dragón pijinia, pijaängelevi yajava, barënabia Miguljavabelia. ⁸ Itsiata baitsi jane dragón cujiruamoneyabatsi. Nexata apo tocopatsitsi caenë ata dragón pijajivitonë penacopatsinexa athëbëtsia. ⁹ Dragón cajena ayainëxaneto. Itsiata baitsi jane xuabicatsi athëbëvetsica daxita pijajivi yajava. Nexata bajaraponë pevënë Dovathi. Itsavënë Satanás. Bajaraponë bajayata itsa naitajëta jivijavabelia, naitajëta bejomocuenia. Bajaraponë jivi yamaxëitojorobabiaba daxitanacuanëjava.

¹⁰ Nexata jumetaniji pinijijumeta athëbëvetsica pejumaitsijava. Jumaiti mapacueniaje:

—Copiapata rabaja Dioso vajanacacapanepaejavanexa vajaneconivecua. Copiapata rabaja Dioso pesaëta jivi pevetaponaponaenexa. Copiapata rabaja Dioso pijajivi pitorobaponaenexa. Copiapata rabaja Cristo ata pitorobaponaenexa mapanacuajavaje. Bajarapacuenia copiapata baja daxita bajarapacuenia tsipaji baja ponë neconitabiaba Diosojavabelia Dioso vajanajuajumecovënëtavapaeivi, bajaraponë baja xuabicatsi athëbëvetsica. Baitsi dovathi. Bajaraponë picani Dioso pitabaratsia nuca. Nexata bajaraponë daxita matabijebi, daxitameravijebi ata, Diosojavabelia neconitabiaba Dioso vajanajuajumecovënëtavapaeivi.

¹¹ Dioso vajanajuajumecovënëtavapaeivi pejumecovënëtsixae Cristo pesivatëpaejavatsi cruzata, cueneamoneyabapona dovathi. Bajarapacuenia cueneamoneyabapona tsipaji navajunupaebaponanua itsamonaejavabelia Cristo pecapanepaejavanexatsi pijaneconivecua. Dioso vajanajuajumecovënëtavapaeivi jamatabëjumai tsabiabi: “Itsa nebeyaxuabiana Dioso pejumelivaisi yabara, jema baja nebeyaxuabiana,” jamatabëjai tsabiabi.

¹² Athëbënuacuatsia panejinavanapaeivi, pasivajamatabëcuenebarëyamëre Dioso mapanacuayabetsicaje papecavecuaxuabijavatsica dovathi. Mapanacuataje panejinavanapaeivi, bitso cajena bepajibimë tsane. Paxamë ata, manuameneta panejinavanapaeivi, bitso cajena bepajibimë tsane. Bajarapacuenia bitso bepajibimë tsane tsipaji baja panetuatuajëtsica dovathi xuabicatsi. Nexata baja aeconoxae bitso bajaraponë anaepanapona. Tsipaji baja yapëtane caematabibeje saya petonacopatsijavatsi pexuabinexatsi infiernojavabelia, pejaijume athëbëvetsica pinijijumeta, jumetaniji.

¹³ Nexata dragón, ponë dovathi, itsa yapëtane athëbëvetsica pexuabijavatsitsica irabetsica, nexata barajinapona pova vecuanaexanatsi pebinëyo.

¹⁴ Itsiata baitsi jane bajarapova rajutatsi anijacorofetobeje, becotsalacoro-fetobeje. Bajarapova nexata dragón vecuapuna tajëbelia, petusato nacuyabelia, bajarajotalia peponaponaenexa. Nexata bajarajotalia Dioso rajutababatsi pexaejava acueyabi pavaibeje epatua. ¹⁵ Dragón pecuibovojotuat-sina capitsapa mera, ayaira. Pecuibovojotuat-sina pepitsapaamera naexana pepamene pecaponaenexatsi picani petiriva. ¹⁶ Itsiata baitsi jane petiriva Dioso yavenonatsi. Ira nexata nivoconareca ayajava. Nexata pamerami dragón pecuibovojotuat-sina pitsapaina, bajarapamëthëareca joneca. ¹⁷ Bajaraxuata nexata dragón bitso anaepana petirivajavabelia. Nexata baja icatsia dragón pona petiriva pexi penacopabivi pebeyejebinexa. Bajarapamonae jumecovënëtavapaeivi Dioso pejumelivaisi pitorobicueniatsi. Bajarapamonae caasaë tsavanapaeivia penavajunupaebijava Jesucristo pejumecovënëtavapaejava. Nexata bajarapamonae dragón tsimaxëponatsi pebeyejebinexatsi.

13

Pacuenia piayainëbeje pelivaisi Juan yaquina yabara pelivaisi

¹ Nucajë manuamene tajetabota. Nexata taenucajë manuamenejavatsina pepitsapaejavatsina piayainë. Siete pamatabocotobeje diez pamataetobeje pexainanë. Caemataeto canacujitsia xainapona corona. Caematabocoto canacujitsia Dioso apo pejitsipaevenëanë itanerubena. ² Ponë piayainë taenucajë pepitsapaejavatsina, benevëthë picani. Itsiata petaxu betsonëtaxu. Pecuibovojoto pijinia benevëthë petsobianëcuibovojoto. Bajaraponë nasaërajutatsi dragón. Pijatrono ata rajutatsi. Jamatabëcuene cajëpaeaxanatsinua ayaicuenia pitorobinexa daxitajivi

mapanacuajavaje. ³ Piayainē caematabocoto matabocovajēnēbatsi apo bepeyaasaēvajēnēnexa itajara. Itsiata baja bajarapavajēnē matanacēta. Nexata daxitanacuanēpijivi itsa tane bajaraponē pematavajēnēnacētsijava, bitso jamatabēcuenenabenajaca. Nexata bajarapamonae jumecovēnēta bajaraponē. ⁴ Dragón tocopatatsina pitorobinexa daxitajivi mapanacuajavaje. Bajaraxuata daxitajivi pematabacabēta navajēcabiaba dragónjavabelia. Pematabacabēta navajēcabiabanua piayainējavabelia ata. Bajarapamonae najumaitsi mapacueniaje:

—Ajibi cajena itsanē ata pejamatabēcuenecaējēpaenētsi pacuenia itsi mapa-piayainēje. Ajibi cajena itsanē ata pecaējēpaenētsi pebarēnabenexa maponēje pecueneamoneyabinexa, najai bajarapamonae piayainē yabara.

⁵ Piayainē tocopatatsinua pibisiacuenia Dioso pebaracuaicuai-jainexa. Tocopatatsinua pejumaitsiabinexa: “Xanē cajena bitso ayaijamatabēcuenenēnē Dioso matatoxenetsia,” pejaitsiabinexa. Tocopatatsinua pitorobinexa jivi mapanacuajavaje cuarenta y dos pajuametoheje, baitsi acueyabi pavaibeje epatua. ⁶ Bajaraponē exanapona pacuenia tocopatatsi. Bitso pibisiacuenia Dioso baracuaicuaijai tsabiabi. Dioso pijatemplobo ata pibisiacuenia baracuaicuaijai tsabiabi. Athēbētatsia pejinavanapaevi ata pibisiacuenia baracuaicuaijai tsabiabi. ⁷ Tocopatatsinua vajabitsaē pexanaenexa Dioso pijajivijavabelia. Tocopatatsinua pecueneamoneyabinexa vajabitsaē itsa exana Dioso pijajivijavabelia. Tocopatatsinua pitorobinexa daxitavirijamevi ata. Tocopatatsinua pitorobinexa daxita nacuanēpijivi ata. ⁸ Nexata daxita mapanacuapijivije pematabacabēta navajēcabiaba piayainējavabelia. Dioso nacua pexanaevajēnaeya, Dioso nacua pexanaecujinae ata, bajarapamonae apo vēnērubenae Corderonē pijacuyalatoxaxutota. Corderonē jivi rajuta matabacabi apo pevevereceajava pesivatēpaexae cruzata.

⁹ Itsa pamuxuvojorubename, panatojumetaema mapalivaisije. ¹⁰ Pamonae Dioso pijajivi naneconitsiaexanaena, nexata penaneconitsivi pejebabiabibojavabelia jebiana, bajarapamonae juya itsamonae naneconitsiaexanaenatsi. Pamonae pijinia Dioso pijajivi espadata bona, bajarapamonae juya itsamonae bajarapitsiespadata benatsi. Bajaraxuata itsamonae Dioso pijajivi bejiobiaexanabiabi atatsi, xanepana xaniavaetsia penajamatabēcuenecopatsinexa Diosojavabelia epatua copatsinejeva.

¹¹ Bajaraxuacujinae icatsia taenucajē iravetsina pepitsapaejava itsanē piayainē. Anijamataetobeje pexanaenē. Pacuenia oveja pēbito mataeitsi, bajara pemataeitsinē. Itsiata baitsi jane pecuaicuaijijava, pacuenia dragón pecuaicuaijijava jumeitsi, bajarajumeitsi. ¹² Papiayainē copiaya pitsapaina manuamenejavatsina, bajaraponē yajavaponapona. Nexata papiayainē copiaya pitsapaina manuamenejavatsina, nasaērajuta iravetsina papiayainē cotocaevi pitsapainajavabelia. Nexata papiayainē cotocaevi iravetsina pitsapaina, daxita mapanacuapijivi itoroba papiayainē copiaya manuamenejavatsina pitsapainajavabelia pematabacabēta penavajēcaenexa. Baitsi ponē apo bepeyaasaēvajēnēnexa itajara matavajēnēnacēta baja, bajaraponējavabelia daxita mapanacuapijivije pematabacabēta penavajēcaenexa. ¹³ Nexata papiayainē iravetsina cotocaevi pitsapaina, ayaiacuene pexanaejava jivi tsitaexanapona. Pitatsajaviitairē ata athēbēvētsica othopaeyaexana irabetsica daxitajivi petaenubenaevajata. ¹⁴ Bajarapacuenia ayaiacuene pexanaejava pexanaponaexae, yamaxēitojoroba mapanacuajava pejinavanapaevi. Bajarapaayaiacuene exanapona, papiayainē copiaya manuamenejavatsina pitsapaina, pitabarata. Bajaraxuacujinae, papiayainē cotocaevi

iravetsina pitsapaina, itorobapona Dioso apo pejumecovënëtsivi pexanaenexa pejumapecataenë. Nexata Dioso apo pejumecovënëtsivi, papiayainë copiaya manuamenejavatsina pitsapaina, bajaraponë jumapecataeya exana jane baja. ¹⁵ Nexata papiayainë cotocaevi iravetsina pitsapaina, caëjêpatsi piasaëyaexanaenexa Dioso apo pejumecovënëtsivi jumapecataeya pexanaenë. Nexata asaëyaexana. Bajarapacuenia asaëyaexana papiayainë copiaya manuamenejavatsina pitsapaina Dioso apo pejumecovënëtsivi jumapecataeya pexanaenë pecuaicuajainexa. Pamonaë pematatabacabëta apo nanavajëcae bajarapajumapecataenëjavabelia, beyaxuabiaexanapona. ¹⁶ Papiayainë cotocaevi iravetsina pitsapaina, bajaraponë jane baja pejamatabëcueneta, daxitajivi mapanacuata pejinavanapaevi, cobejumaitanerubaponatsi, pecujanenia pacobe. Itsa jume, pitapathaitota ata itapaitanerubaponatsi. Nexata bajaraponë pejamatabëcueneta itanerubaponatsi daxitajivi. Itanerubaponatsi beveliajamatabëcuenevi. Itanerubaponatsi ayaijamatabëcuenevi ata. Itanerubaponatsi ricovi ata. Itanerubaponatsi bepejiobivi ata. Itanerubaponatsi pamonaë ata dajubicuenia canajetatsi itsamonaëjavabelia amoneya petonacuenebabiabinexa. Itanerubaponatsi pamonaë ata dajubicuenia apo canajetsitsi itsamonaëjavabelia amoneya petonacuenebabiabinexa. ¹⁷ Nexata pajivi aitanejibi, apo tocopatsitsi itsacuenëjavayo ata pecomuatsinexa. Apo tocopatsitsinua itsacuenëjavayo ata pecanajetsinexa. Paitanetota jivi itanerubaponatsi, papiayainë copiaya manuamenejavatsina pitsapaina, bajaraponë pevënë. Itsa apo pevënë, nexata pijanúmero. ¹⁸ Mapajamatabëcuenelivaisi bepacanaëjëtameje xaniavaetsia paneyapëtaenexa. Pajivi yapëtane, canaëjëtsi piayainë pijanúmero. Tsipaji bajaraponë panúmero xaina pevënënexa. Panúmero bajaraponë xaina seiscientos sesenta y seis.

14

Pacuenia Juan tane 144.000 pajivibeje Dioso pijajivi penaxëanaejava yabara pelivaisi

¹ Taenutajë Corderonë penucaejava Siónvënë tsutojumata. Barënuca ciento cuarenta y cuatro mil pajivibeje. Bajarapamonae pitapathaitota itanerubena Corderonë pevënë, Corderonë paxa ata pevënë. ² Bajaraxuacujinae jumetaniji athëbëvetsica pecuaicuajijajava. Pecuaicuajijajava najumeta pacuenia bitso banajumeta pinijjonca. Najumetanua beyamaxë penajumetsijume ata. Pecuaicuajijajava najumetanua pacuenia arpa banajumeta, ayaibitsaëttoxaneto itsa najuaracata. ³ Corderonë pijajivi naxëananubena pejanavaji trono pitabarata, cuatro ponëbeje piatothiavi pitabarata ata, ancianovi ata pitabarata. Itsajivi ata cajena apo caëjêpaetsi pecujaninexatsi bajarapavaji. Pamonaë ciento cuarenta y cuatro mil pajivibeje, ëbajarapamonae, caëjêpatsi penaxëanaenexa bajarapavaji. Bajarapamonae neconimatamotatsi Corderonë pijanata. Nexata baja bajarapamonae Dioso capanepatsi mapanacuavecuaje. ⁴ Bajarapapëbijivi penaexanaejavaverenacujinae apo naperabëquenetsiatæ petirivjavabelia. Apo jamatabëcuenebijianaetsi itsajivi ata. Bajarapamonae pënajinavanapa Corderonë itsaxuayo ponapona. Bajarapamonae Corderonë pijanata neconimatamotatsi. Nexata baja bajarapamonae capanepatsi Diosojavabelia mapanacuavecuaje. Bajarapamonae baja namataxainaeya capanepatsi Dioso pijajivinexa, Corderonë ata pijajivinexa. ⁵ Bajarapamonae caeto ata apo najumetsënëtsi. Aneconijibi tsavanapæ Diosojavabelia.

Pacuenia acueyabi ponēbeje ángelēvi vajunupaeba pacuenia itsamatacabi itsijitsia mapanacuataje yabara pelivaisi

⁶ Icatsia ángelnē taniji pepunanajetarucaejava. Canajetaruca pexaniali-vaisi, apo peverevereacaelivaisi. Tsipaebijitsia bajarapalivaisi mapanacua-
java pejinavanapaevi. Tsipaebijitsia daxitanacuanēpijivi, daxitaviriajumevi
ata. ⁷ Ángelnē pinijijumeta jumai tsanajetarucaē:

—Dioso cujunaviaya pajinavanapare. “Xamē bitso ayaija-
matabēcuenenēmē,” pajamēre tsabiabi Diosojavabelia. Copiapata
rabaja Dioso penaneconitsiaexanaponaenexa daxitajivi. Ponē itaboxo
exana, ira ata, manuamene ata, mera pepitsaparubenaejavanē ata,
bajaraponējavabelia panematabacabēta panavajētabiabare, jai tsanajetarucaē
ángelnē pinijijumeta.

⁸ Icatsia cotocaevi taniji itsanē ángelnē pepunanajetarucaejava. Jumai
tsanajetarucaē bajarapaángelnē:

—Verebiabatsi rabaja Babilonia tomaraxanetomita pejinavanapaevimi.
Tsipaji Babilonia tomarapijivimi navajēcabiaba jumapecataeya
pexanaenēanējavabelia. Nexata belia daxita nacuanēpijivi ata navajēcabiaba
jumapecataeya pexanaenēanējavabelia. Babilonia tomarapijivimi
jumapecataeya pexanaenēanējavabelia penavajēcaejamatabēcueneta,
jamatabēcuenebijanapona daxitanacuanēpijivi. Nexata pacuenia
pevitota pibisiacue pexanabiava pejamatabēcueneta, daxitajivi
jamatabēcuenebijanapona, bajara pijinia pacuenia Babilonia tomarapijivimi
ata jumapecataeya pexanaenēanējavabelia penavajēcabiabijamatabēcueneta,
jamatabēcuenebijanapona daxitanacuanēpijivi. Bajaraxuata bajarapacuenia
verebiabatsi, jai tsanajetarucaē ángelnē, ponē cotocaevi taniji
pepunanajetarucaejava.

⁹ Bajaraxuacujinae icatsia taniji acueyabiángelnē pepunanajetarucaejava.
Bajarapaángelnē pinijijumeta jumai tsanajetarucaē:

—Pajivi pematabacabēta navajēcabiaba piayainējavabelia, bajaraponē
jumapecataeya pexanaenētsijavabelia ata, bajarapajivi naneconitsiana
Diosojavabelia. Bajarapajivi itsa nacopatanua piayainē pevēnēta
pitapaitanerutsinexatsi, itsa jume, pecobejumata ata pecobejumai-
tanerutsinexatsi, nexata bajarapajivi naneconitsiana Diosojavabelia.

¹⁰ Dioso bitso pebaraanaepanaexaetsi, bajarapajivi bevelia apo
naneconitsiaexanaetsi tsane. Ayaiacuenia naneconitsiaexanaenatsi
isotojavabelia, azufre petajueisotojavabelia. Nexata bajarapajivi
isoto petajuta bitso jamatabēfaenaena Dioso pijaángelēvi pitabarata,
Corderonē ata pitabarata. ¹¹ Athēbēbetsia bajarapaisototsēxē
junaenia daxitamatacabijavabelianexa. Ayaiacuenia bajarapajivi Dioso
penaneconitsiaexanaejavatsi, tsitecaena daxitamatacabijavabelianexa.

Bajarapajivi isoto petajuta bitso pejamatabēfaenaejava, caepatoyo ata
apo copatsi tsane. Bajarapacuenia Dioso naneconitsiaexanaenatsi pajivi
pematabacabēta navajēcabiaba piayainējavabelia, bajaraponē jumapecataeya
pexanaenētsijavabelia ata. Bajarapajivi itsa nacopatanua piayainē pevēnēta
pitanerutsinexatsi, bajarapacuenia Dioso naneconitsiaexanaenatsi.

¹² Bajaraxuata Dioso pijajivi xaniavaetsia bejumecovēnētavanapa
Dioso pitorobilivaisitsi. Becasaēnua tsavanapae Jesúsjavabelia
penajamatabēcuenecopatsijava, jai tsanajetarucaē acueyabi ángelnē
pepunanajetarucaejava.

¹³ Bajaraxuacujinae jumetaniji athēbēvētsica tanejumaitsijava. Nejumaitsi
athēbēvētsica mapacueniaje:

—Yaquinarure mapacuenia pejumaitsiitaneje: “Mapamatacabijavaveliacujinaeje, pevajënaeyabelia ata, jamatabëcuenebarëya baja tsavanapae tsane pamonaë tëpaponã Dioso pepua pejumecovëñëtsivi,” pejaiitane, yaquinarure, nejai athëbëvetsica.

Espritu Santo ata nejumaitsi bajarapamonaë yabara mapacueniaje:

—Xaniajai rabaja tsane. Bajarapamonaë nacueraevetsiana penacuenebijava. Pamatacabi abaxë bajarapamonaë asaë tsavanapae mapanacuataje, daxita xua pexaniacuene exanavanapa, bajaraxuajamatabëcuene Dioso athëbëtatsia matamotsianatsi. Bajaraxuata jamatabëcuenebarëya tsavanapae tsane bajarapamonaë, nejai Espritu Santo.

Pacuenia itsamatacabi Dioso naneconitsiaexanaejitsia daxita pamonaë pijaneconi pexainaevi yabara pelivaisi

¹⁴Icatsia taniji penioponaëitarërëbo. Bajarapaitarërëbo tuatuajëta jivitonë eca. Itarërëbo tuatuajëta peecaenë yabara jamatabëjumaitsinë:

—Jesús raeta, Daxitajivi Pematapijinë, jamatabëjanë.

Namataxatateca orocorona. Cobenaeca bemasete pexiuajijava pecaucubinexa penaveretsiruanë. ¹⁵Nexata icatsia itsanë ángelnë pitsaparena temploboëñeverena. Bajarapaángelnë asaëyata vavajai itarërëbo tuatuajëta peecaenëjavabelia. Jumaitsi bajarapaángelnë:

—Caucubare jane baja penaveretsiruanë mapanacuayaberecaje. Copiapata rabaja pecaetuatsinexa penaveretsixu mapanacuatarecaje, jai ángelnë, ponë pitsaparena temploboëñeverena.

¹⁶Nexata bajaraxuacujinae ponë eca itarërëbo tuatuajëta, bemasete pexiuajijava yota irajumabereca. Caucuba jane baja penotsinexa penaveretsiruanë. Pecaucubijava penaveretsiruanë penotsinexa, mapajamatabëcuenelivaisi xainaje. Pacuenia caucuba penaveretsiruanë penotsinexa, bajara pijinia pacuenia itsamatacabi daxita Jesús pijajivi pitsiana.

¹⁷Bajaraxuacujinae icatsia athëbëtatsia itsaángelnë pitsaparena temploboëñeverena. Bajaraponë ata capona bemasete pexiuajijava pecaucubinexa penaveretsiruanë. ¹⁸Icatsia itsaángelnë pitsaparena altarjavaverena. Bajarapaángelnë altarpijiisoto pevetsinë. Junata pinijijumeta it-saángelnë, bemasete pexiuajijava pecaponaenëjavabelia. Jumaitsi bajara-paángelnëjavabelia mapacueniaje:

—Mapanacuayaberecaje caucubaremecca daxita uvaruanë, penaveretsiruanë, jai.

¹⁹⁻²⁰Nexata jane baja bajarapaángelnë bemasete pexiuajijava yota irajumabereca. Caucuba jane baja uvaruanë, penaveretsiruanë. Nexata bajarapauvaruanë othotajarabaxuaba pinijivaxixaneto ënëabelia, bajarapavaxixanetoënëta pëmarëbeneyujubataxuabinexa. Nexata jane baja uvacuaimarëbene yujubataxuaba tomara jumaverena. Nexata pëmarëbeneyujubataxubijavata, pinijijanaxaneto pitsapona. Nexata bajarapanaxaneto navotanucapona. Bajarapanaxaneto penavotanucapónaejava, piapiajava xaina trescientos pakilómetrobeje. Piavajubuajava pijinia xaina bejamatabëcuene caemetro epatua. Xua taniji, uvaruanë penaveretsiruanë pecaucubijava, xua ata taniji, pinijivaxixaneto ënëabelia piothotajarabijava pëmarëbeneyujubataxuabinexa, xaina mapajamatabëcuenelivaisije. Itsamatacabi ángelnë caetuatsiana daxita pibisiacuene pexanaevi penaneconitsiaexanaenexa. Nexata pibisiacuene pexanaevi ayaibitsaëtöxanetonë tëpaena. Nexata bajarapacuenia ayaijana xuabiana.

15

Pacuenia Juan tane athëbëtatsia siete ponëbeje ángelevi, siete xuabeje piayaijavanë pecaponaevi peverebiabinexa mapanacuaje, yabara pelivaisi

¹ Icatsia taniji athëbëtatsia pinijicuene pitajëtsijava pacuenia itsamatacabi itsijitsia mapanacuataje. Pinijicuene pitajëtsijava itsa taniji, nabenajacajë bitso. Siete paángelnëbeje capona siete xuabeje piayaijavanë peverebiabinexa mapanacuaje. Bajarapapiayaicuene pepanepacuujinae, Dioso bitso jivi pebaraanaepanaejava, copiarucaena baja.

² Nexata icatsia taeyetajë bemanuamene picani. Itsiata baitsi jane piatajajava. Pacuenia vidriojava nasaba, bajarapitsijava. Itsiata bajarapaboxoya pitarunutsicotia xaina. Tanijinua jivi bajarapamene boxojumavereca penubenaevi. Bajarapamonae cueneamoneyaba piayainë. Cueneamoneyabanua bajaraponë jumapecataeya pexanaenëtsi ata. Tsipaji pamonaevubena bajarapamene boxojumavereca, itorobi atatsi bajaraponëbejejavabelia pematabacabëta pevajëcaenexa, apo jumecovënëtsi. Apo nacopatsinua pitanerubinexatsi piayainë pijanúmerota, panúmero xaina piayainë pevënëxa. Bajaraxuata bajarapamonae canubena arpa, Dioso perajutsiarpatsi. ³ Bajarapamonae naxëananubena Moiséspijinë, Dioso pijavitonë, pevaji. Bajarapavaji Corderonë ata pevaji. Penaxëanaejavata, bajarapamonae vajita jumai tsanubenaev mapacueniaje:

Xamë Diosomë, nijamatabëcuenaenë daxita mapanacuata jivi pevetsivi matatoxenetsia. Xua pinijicuene exaname, bitso pexaniacuene. Xamë daxitanacuënë nevetsinë. Daxita xua pexaniacuene, nexanaenë. Penajumetsënëtsicuene jivi neyamaxëitojorobinexa, apo nexanaenë. ⁴ Daxitajivi xamë pecacujunavinë tsane. “Dioso cajena bitso ayaijamatabëcuenaenë,” cajai tsane. Xamë rabaja cajena caenëmë nianeconijibinë, caeto ata pibisiacuene apo nexanaenë. Daxita nacuanëpijivi xamëjavaberenapatsiana pematabacabëta xamëjavabelia penavajëcaenexa. Bajarapacuenia catoitsane tsipaji baja daxitajivi tane ëpexaniacuene nexanaponaponaejava, jai tsanubenaev Diosojavabelia bajarapamonae penaxëanaejavata.

⁵ Bajaraxuacujinae icatsia taniji athëbëtatsia templobo ënëtuatuajëalia peyatuucutshipana penapatsijava. Bajara paënëyatuucutshipavaenëta bajayatami Dioso Moiséspijinëta penajumecopatsilivaisi peyaquinaevibopananë xaniavaetejeba. ⁶ Bajarapatemploboënëverena pitsaparena siete paángelnëbeje. Bajarapamonae capona siete xuabeje piayaijavanë, bajaraxuanëta mapanacuaje peverebiabinexa. Bajarapaángelevi naxataba pexaniaviriapapaëbërëjavanë, piaxuirajibijavanë. Peniojaijavanë bitso. Nacorobëcëbanubena oropananë. ⁷ Bajaraxuacujinae pamonaev cuatro ponëbeje piatothiaviyajuvënëne, ángelevijavabelia rajuta copanë. Piayainë caéángelnë canacujitsia rajutapona caecopa. Bajarapacopanë orocupanë. Dioso, ponë daxitamatacabijavabelianexa peponaponaenë, ayaiacuena anaeya naneconitsiaexanaena pamonaev naneconita bajaraponëjavabelia. Xuanë vënëba bajarapacopanë, bajaraxuanëta Dioso naneconitsiaexanaena bajarapamonae. ⁸ Bajarapatemplobo tuatuajëmi bitso vënëca etsëxë. Bajarapatsëxë pitsapa Dioso ayaijamatabëcuenaenëjavaverena. Itsajivi ata cajena apo caëjëpaetsi pejonenexa bajarapatemplobo ënëtuatuajëabelia. Xuanë siete paángelnëbeje capona, piayaijavanë, itsa baja panepaena, matapania jivi caëjëpaenatsi pejonenexa bajarapatemplobo ënëtuatuajëabelia.

16

Pacuenia Juan tane athëbëtsia pacuenia itsamatacabi Dioso naneconitsiaexanaejitsia daxita pijaneconi pexainaevi yabara pelivaisi

¹ Icatsia jumetaniji templobojavaverena pinijijumeta pejumaitsijava. Siete paángelnëbejejavabelia jumaiti mapacueniaje:

—Paponare baja iranëjavabereca paneepacaponae nexa jane baja xuanë siete pacopabeje vënëca, piyaijavanë. Dioso jane baja anaeya ayaicuenia penaneconitsiaexanaexa, daxita pamona naneconita bajaraponëjavabelia, pejaijava, templobojavaverena jumetaniji.

² Nexata jane baja pona penamataxainaeángelnë. Pecaponaera epatajaraba iranëjavabereca. Nexata daxita pamona piyaiainë pevënëitanetota itanerubatsi, daxita bajarapamona bajarapapatota bitso perabëtsabanareca. Nexata bitso aperabëtane bajarapamona. Bajarapamona bajarapapiyaiainë jumapecataeya pexanaenëtsijavabelia ata pematabacabëta penavajëcaevi.

³ Bajaraxuacujinae icatsia pecotocaeviángelnë pijacopapijira epatajaraba manuamenejavabereca. Manuamenemi nexata naexana bepetëpaenë pijanara. Daxita baja tëpa manuameneta pejinavanapaevimi.

⁴ Bajaraxuacujinae icatsia acueyabiángelnë pijacopapijira epatajaraba menianëjavabereca mera, iravetsina pepitsaparubenaëjavanëjavabereca ata. Nexata daxita bajarapameranëmi naexana ëpijanaranë. ⁵ Bajaraxuacujinae jumetaniji mera pevetsiángelnë pejumaitsijava Diosojavabelia. Jumaiti mapacueniaje:

—Diosomë, caeto ata pibisiacuene apo nexanaenë. Ajena, pamatacabi, ponaponame. Bajayata mapanacuaje nexanaevajënaeya ata, ponaponame. Pibisiacuene pexanaevi, paneconivajëto xaina, bajarapaneconivajëtota naneconitsiaexaname. Bajaraxuata meranëmi pijanaranë naexanaeyaexaname. Tobijianame meranë piyaiainë pijajivi bajarapameranë penatsiapaenexa. ⁶ Bajarapamona bajayata beyejeba nijajivimi. Pamona ata cavajunupaebapona, beyejeba. Bajaraxuata bajarapacuenia meranë pijanaranë naexanaeyaexaname penatsiapaenexa bajarapamona, jai Diosojavabelia mera pevetsiángelnë.

⁷ Icatsia jumetaniji itsaángelnë altarjavaverena pejumaitsijava. Jumaiti mapacueniaje:

—Xamë Diosomë, nijamatabëcuenesaenë daxita mapanacuata jivi pevetsivi matatoxenetsia. Itsa naneconitsiaexaname jivi, paneconivajëto xaina, bajarapaneconivajëtota bananeconitsiaexaname. Itsa aneconijibi tsipae, nexata cajena apo naneconitsiaexanaemë tsipae, pejaijava itsaángelnë altarjavaverena jumetaniji.

⁸ Bajaraxuacujinae icatsia cuatroángelnë pijacopapijira epatajaraba. Epatajaraba matabacipijijiumetojavabetsica. Nexata matabacipijijiumeto pecotiata jivi bitso ayaicuenia tsajavatsi. ⁹ Itsiata bajarapamona apo copabi pibisiacuene pexanabiabijava. Apo najamatabëcuenepënëyorotsi Diosojavabelia. “Xamë bitso ayaijamatabëcuenenëmë,” apo jai ata cajena Diosojavabelia. Biji rajane Dioso, ponë cajëpatsi daxitacuene pexanaenexa, bajaraponë caranata pibisiacuenia baracuaicuaijai.

¹⁰ Bajaraxuacujinae icatsia cincoángelnë pijacopapijira epatajaraba. Epatajaraba piyaiainë pijatronojavabereca. Piyaiainë jane baja pevetsinacuami aitaquiri tsanuae. Piyaiainë jane baja pijajivi bitso penavixaetaexae, navonosine. ¹¹ Itsiata baitsi jane bajarapamona apo

copabi papibisiacuene exanavanapa. Apo najamatabëcuenepënëyorotsi Diosojavabelia. Biji rajane Dioso, ponë athëbëtatsia peecaenë, bajaraponë caranata bajarapamonae pibisiacuena baracuaicuaijai. Bajarapacuenia bajarapamonae Dioso pibisiacuena baracuaicuaijai penavixaetaexae, bitso peperabëtsabanaexaenua.

¹² Bajaraxuacujinae icatsia seisángelnë pijacopapijira epatajaraba. Epatajaraba pinijimenexanetovavabetsica, Eufratesmenejavabetsica. Nexata Eufratesmenexaneto tsevajunava. Nexata bajarapacuenia namuto torucarenatsi iranë pevetsivi penicabinexa, penajetarubenaevi orientejavavetsina.

¹³ Bajaraxuacujinae taniji acueyabi padovathibeje. Bajarapadovathivi becuaitoxicuena pitsapa. Itsanë pitsapa dragón pecuibovojotuatsina. Itsanë pitsapa piayainë pecuibovojotuatsina. Itsanë pitsapa peyamaxëitorobiprofanë pecuibovojotuatsina. ¹⁴ Bajarapadovathivi pinijicuene pexanaejava, exanapona. Pona baja pecaetuatsinexa daxitanacuanë pevetsivi. Bajarapadovathivi caetuatapona jivi vajabitsaë pebarëxanaenexa Diosojavabelia. Dioso piamatabëcuenesaenë daxitanacuanë pevetsivi matatoxenetsia. Bajarapamatacabi Dioso exanaena daxita pacuenia tajëvelia najumecapanepaeya jumaitsi. ¹⁵ Bajaraxuacujinae jumetaniji Jesús pejumaitsijava: “Panenamuxunaevere. Itsajota apo panejamatabënajinaemë, bajarajota jemata patsianicajë. Pacuenia penacobetoxotsinë jemata bapata itsajota apo jamatabënajinaetsi, bajara itsinë tsane. Nexata pajivi jamatabëcuenaitavaya ponaponaena tanecopiapitsinexa, bajarapajivi barëya tsane. Pacuenia itsajavabelia peponaejivinexa, baxaniavaeta penaxatatsijava pecaponaenexa pejumasajinaeyaniva, bajara itsi tsane bajarapajivi. Nexata pamatacabi patsianicajë, apo aura tsane,” pejaijava Jesús, jumetaniji. ¹⁶ Nexata jane baja dovathi pijajivi caetuataksi daxitanacuanë pevetsivi. Caetuataksi caejavata penacaetuatsinexa. Itsajota nacaetuata daxitanacuanë pevetsivi hebreojumeta pevënë Armagedón.

¹⁷ Bajaraxuacujinae icatsia sieteaángelnë pijacopapijira epatajaraba. Epatajaraba itaboxojavabetsia. Nexata athëbëtatsia templobo ënëtuatuajëta Dioso peecaetronojavaverena pinijijumeta jumaitsi:

—Daxita rajane baja vereta, jai athëbëtatsia templobo ënëtuatuajëta.

¹⁸ Nexata jane baja binebinejai yamaxë. Pinijijovibo bitso najumeta. Yamaxë ata najumeta. Iranë ata najëaba pinijicuena. Jivi pejinavapaejavaveliacujinae mapanacuataje, caeto ata bajarapacuenia ira penajëabijava pinijicuena apo tae. ¹⁹ Pinijitomaraxanetomi, Babilonia tomarami, acueyabi xuabeje natsanaeya othopa. Bajarapacuenia itsanacuanëpijitoranëmi ata othopa irata. Dioso nexata najamatabënapita pinijitomaraxanetopijivimi, Babilonia tomarapijivimi. Ayaicuena Dioso baranaepana Babilonia tomarapijivimijavabelia pibisiacuene bitso pexanaexae. Bajaraxuata pinijicuena Dioso naneconitsiaexana Babilonia tomarapijivimi. ²⁰ Itsa ira najëaba, daxitatunaetonëmi, daxitatsutonëmi ata, ajibi baja. Ira namatajëpa baja. ²¹ Athëbëvetsica othopaica jivijavabetsica bitso pecainejebimatarejetonë. Bajarapamatarejetonë xaina piarevejava cuarenta pakilobeje. Nexata mapanacupajivi pibisiacuena Dioso baracuaicuaijai. Tspaji athëbëvetsica piothopaejava, bitso pecainejebimatarejetonë, bitso piayacuene.

17

Pacuenia itsamatacabi Dioso naneconitsiaexanaena pamonae navajęcabiaba jumapecataeya pexanaenėanėjavabelia yabara pelivaisi

1 Pamonae siete paąngelnėbeje, siete pacopabeje pecaponaevi, bajarapaąngleviyajuvėnėnė, caenė rena xanėjavaberena. Bajarapaąngelnė neju-maitsi:

—Naxanitsia. Catsitajėtsianatsi pacuenia Dioso naneconitsiaexanaejitsia Babilonia tomarapijivi, patomaraxaneto eca menexanetonė imoxoyojavata. Bajarapatomarapijivi Diosojavabelia apo navajęcabiabi. Caranata saya navajęcabiaba jumapecataeya pexanaenėanėjavabelia. Nexata pacuenia petiriva pevitota bitso pibisiacuene pexanabiabiva jamatabėcueneitsi, bajarajamatabėcueneitsi Babilonia tomarapijivi. Pova petiriva pibisiacuene pevitota exanabiaba, bajarapova pejamatabėcueneta jamatabėcuenebijiana itsamonae ata. Bajara pijinia pacuenia Babilonia tomarapijivi ata pexanabiabijava pejamatabėcueneta, jamatabėcuenebijiana ayaibitsaėtoxaneto itsanacuanėpijivi ata. 2 Tsipaji itsanacuanė pevetsivi patabiaba Babilonia tomaraberena. Nexata bajarapamonae ata copaba Diosojavabelia penavajęcabiabijava. Caranata saya Babilonia tomarapijivi cuenejėpaeya navajęcabiaba jumapecataeya pexanaenėanėjavabelia. Nexata jamatabėcuenebijianatsi bajarapamonae ata, nejai bajarapaąngelnė.

3 Bajaraxuacujinae Espiritu Santo netsijamatabėvėnėca. Nexata bemajitsi-naebota ąngelnė nebarėpona petusato nacuyabelia. Bajarajotalia taeyetajė petiriva. Bajarapova eca piayainė, petsobianė, pejumata. Bajaraponė peperabėtuareca, Dioso apo pejitsipaevėnėanė, itanerubena. Bajarapapi-ayainė xaina siete pamatabocotobeje diez pamataetobeje. 4 Nexata bajarapova penaxatatsijavareca itsajava pabanaeya saėjai. Itsajava tsobia. Naitabėteca orojavanėta, perlavėnėjavanėta ata, penamatamotsiibotonėta ata. Cobenaeca orocopa. Pibisiacuene bitso pexanaejava pevitota, bajarapajamatabėcuenelivaisi vėnėca bajarapacopata. 5 Bajarapova pitapathaitota vėnėyaquinarutatsi. Pajamatabėcuenelivaisi yabara bajarapova pitapathaitota vėnėyaquinarutatsi, itsajivi ata apo yapėtae. Pejumaitsijume picani mapacueniaje: “Pinijitomaraxaneto Babiloniatomara. Bajarapatomaraverena pitsapa jivi pejamatabėcuenebijianaejavatsi, jumapecataeya pexanaenėanėjavabelia penavajęcabinexa. Bajarapatomaraverena pitsapanua jivi pejamatabėcuenebijianaejavatsi, daxitaxua pibisiacuene pexanaenexa mapanacuataje,” pejaijume, picani bajarapova pitapathaitota vėnėyaquinarutatsi. 6 Taeyetajė icatsia bajarapova. Aitajibi tsecae Dioso pijajivimi pijanarata. Pamonae ata beyejebatsi pevajunupaebixae Jesės, bajarapamonaeimi ata pijanarata aitajibi tsecae bajarapova. Bajarapitsecaejava itsa taniji, bitso baja cajena jamatabėcuenenajunaviacajė. 7 Nexata ąngelnė nejumaitsi:

—¿Detsa xuajitsia jamatabėcuenenajunaviacame? Cayapėtaeyaexanaenatsi pajamatabėcuenelivaisi xaina mapovaje. Ponė piayainė siete pamatabocotobeje diez pamataetobeje pexanaenė, ponėjumata bajarapova eca, bajaraponė ata pajamatabėcuenelivaisi xaina, cayapėtaeyaexanaenatsi. 8 Mapapiayainė tanemeje, bajaraponė picani bajayata ponapona mapanacuataje. Itsiata baja aeconoxae bajaraponė ajibi. Itsiata baitsi jane itsamatacabi pinijimėthėxanetojavatsina pitsapaenina icatsia peponaponaenexa mapanacuataje. Bajaraxuacujinae bajaraponėmi beyaxuabianatsi pepacuene jane baja bajaraponė pecopiarucaenexa. Daxita mapanacuapijivije, pamonae Corderonė pijacuyalatobaxutota apo

vënërubenaē Dioso nacua pexanaevajēnaēya, Dioso nacua pexanaecujinaē ata, bajarapamonae matababi apo peverevereceaējava apo xainae tsane. Bajarapamonae jamatabēcuenenajunaviacaena piayainē itsa pitsapaenina pinijimēthēxanetojavatsina, nejai āngelnē.

⁹ Icatsia āngelnē nejumlahitsi:

—Pamonae baja peyapētaēvi, pamonae baja caējēpatsi pejumeyapētaēnaē, bajarapamonae pejumeyapētaēnaē mapalivaisije. Papiayainē xaina siete pamatabocotobeje, ponējumata taeyetame petiriva, anijajamatabēcuenelivaisibeje itajēta. Bajaraponē pamatabocotonē, siete pamatabocotobeje, mapajamatabēcuenelivaisi xainaje. Siete rabaja pijinia patsutobeje eca Babilonia tomarata. Bajarapasiete pamatabocotobeje mapajamatabēcuenelivaisi yajavaxainaje. ¹⁰ Siete rabaja pijinia ponēbeje Babiloniatomara pevetsivi. Nexata Babiloniatomara pevetsiviyajuvēnēvi cinco baja ponēbeje pitsapa. Seisnē abaxē aeconoxae eveta Babiloniatomara. Sietenē abaxē apo taxuxuabi pevetsinexa. Itsiata sietenē itsa evetsiana, bajayajebi apo evetsi tsane. ¹¹ Papiayainē, petsobianē, taneme, mapajamatabēcuenelivaisi xainaje. Bajaraponē picani bajayata eveta Babiloniatomara. Itsiata baja aeconoxae bajaraponē apo evetsi. Tsipaji baja tēpa. Itsiata baitsi jane icatsia bajaraponē pinijimēthēxanetojavavetsina pitsapaenina Babiloniatomara icatsia pevetsinexa. Nexata icatsia bajaraponē itsa evetsiana, ochonē baja evetsiana Babiloniatomara. Bajaraponē abaxē bajayata itsa ponapona, siete ponēbeje Babiloniatomara pevetsiviyajuvēnēnēmi baja cajena. Bajaraponē icatsia Babiloniatomara itsa evetsiana, pevetsicujinaē bajaraponēmi beyaxuabianatsi pepacuene jane baja bajaraponē pecopiarucaenexa, nejai āngelnē.

¹² Icatsia āngelnē nejumlahitsi:

—Ponē piayainē pamataetonē taneme diez pamataetobeje, mapajamatabēcuenelivaisi xainaje. Diez rabaja pijinia ponēbeje, itsamatababi nacuanē evetsiana. Nexata bajarapamonae itsamatababi nacuanē itsa evetsiana, evetsiana diez panacuabeje. Tsipaji caenē canacujitsia evetapon-aena caenacua. Bajarapamonae abaxē apo taxuxuabi bajarapanacuanē pevetaavanapaenexa. Itsiata baitsi jane itsa taxuxuabijitsia nacuanē jane baja pevetaavanapaenexa, copatsianatsi pijanacuanējava pevetsinexa saya caeepatoyovajēto. Bajarapamonae itsa evetsiana pijanacuanējava, piayainē barēevetsianatsi. ¹³ Pamonae diez ponēbeje, diez pijinia panacuabeje itsamatababi itsa evetsiana, barēnajamatabēcuenējēpaenatsi piayainē. Nexata bajarapadieze ponēbeje jumlahitsi tsane piayainējavabelia:

—Xamē pacatocopatsianatsi patanematacaitorobinēnexamē, jai tsane.

¹⁴ Pamatababi bajarapadieze ponēbeje evetaavanapaena pijanacuanē, piayainē vajabitsaē barēexanaenatsi Corderonējavabelia. Daxita pamonae Corderonē pijajivi, pamonae Dioso pejunatsivi, bajarapamonae pijinia Corderonē barēbena piayainējavabelia. Nexata Corderonē cueneamoneyabiana piayainējavabelia. Cueneamoneyabiana tsipaji Corderonē daxita petuxanevi pijatuxanenē baja cajena. Nexata Corderonē daxita nacuanē pevetsivi matatoxenetsia pepo pevetsinē, nejai āngelnē.

¹⁵ Angelnē icatsia nejumlahitsi:

—Pamanuameneboxovereca taeyetame pibisiacuene pexanaeva, bajarapamanuamene mapajamatabēcuenelivaisi xainaje. Mapanacuata jinanapa jivibitsaētoxanetonē daxitavirijamevi, daxitanacuanēpijivina. Bajarapajamatabēcuene yabara taneme bajarapamanuamene. ¹⁶ Pamonae

diez panacuabeje pevetsivinexa, bajarapamonae piayainē barēitoya tsane pibisiacuene pexanaevajavabelia. Nexata bajarapamonae beyaxuabiana bajarapova. Jumasa xuababuatsiana. Xaeyabuatsiananua. Bajarax-uacujinae tajuitsiana isotota. ¹⁷ Pamonae diez ponēbeje itsamatacabi nacuanē itsa evetsiana, bajarapamonae najamatabēcuenejēpaena petoc-patsinexa piayainē pijanacuanē petoevetsinexatsi. Bajarapacuenia najamatabēcuenejēpaena tsipaji baja cajena Dioso jamatabēcueneitorobatsi bajarapacuenia pexanaenexa bajarapamonae. Nexata piayainē bajarapamonae pijanacuanē bajayajebi toevetsianatsi matapania pecopiapatsijavabelianexa daxita pacuenia Dioso tajēvelia najumecapanepaeya jumaiti. ¹⁸ Pova pibisiacuene pexanaeva taeyetame manuameneboxovereca, bajarapova mapajamatabēcuenelivaisi xainaje. Pinijitomaraxaneto Babiloniatomara. Bajarapatomarapijivi pejamatabēcueneta mapanacuanē pevetsivi pibisiacuene exanapona, nejai āngelnē.

18

Pacuenia Babilonia tomaraxanetomi copiaruca yabara pelivaisi

¹ Icatsia itsaāngelnē taniji perunaejavatsica athēbēvetsica. Caējēpatsi pinijicuenia piayaiacuene pitorobinexa. Bajarapaāngelnē pinijicotia yajavarunaica. Ira itayota daxitanacuanējava. ² Ayaijumeta vavajai. Jumaiti mapacueniaje:

—Verebiabijitsiatsi rabaja Babilonia tomaraxanetota pejinavanapaevi. Nexata baja ējoriminacua tsarucae tsane. Daxita xua pibisiacuene pexanaedovathivi, juya bajarapatomarata jinavanapaena. Bitso pibisiaviriavi pepunaevi, pamonae daxitajivi apo itajitsipae petaenexa, juya bajarapatomarata jinavanapaena. ³ Babilonia tomarapijivi navajēcabiaba jumapecataeya pexanaenēanējavabelia. Nexata belia daxitanacuanē pevetsivi ata, pijajivi yajava, navajēcapona jumapecataeya pexanaenēanējavabelia. Nexata Babilonia tomarapijivi jumapecataeya pexanaenēanējavabelia penavajēcabiabijamatabēcueneta, daxita xua pibisiacuene pexanaejamatabēcuenetanua, jamatabēcuenebijianapona daxitanacuanēpijivi. Babilonia tomarapijivi bitso xainapona ayaijava palata pibisiacuene pexanaejamatabēcueneta. Nexata pijinia pamonae Babilonia tomaraberena capatabiaba daxitacuene pecanajetsinexa Babilonia tomarapijivijavabelia, bajarapamonae ata baja bitso ayaijava palata xainapona. Bajarapacuenia Babilonia tomarapijivimi pibisiacuene pexanabiabixae, ayaiacuenia naneconita Diosojavabelia. Bajaraxuata Babilonia tomarapijivi Dioso baja verebiabijitsiatsi, jai āngelnē.

⁴ Bajaraxuacujinae icatsia athēbēvetsica jumetaniji itsajume. Jumaiti mapacueniaje:

—Paxamē patajajivimē, papitsapare baja Babilonia tomaravecua. Papitsapare baja pibisiacuene paxamē ata paneexanaeyaniva, bajarapatomarapijivi yajava Dioso papecananeconitsiaexanaeyaniva. ⁵ Babilonia tomarapijivi pijaneconi baja bitso ayaijava xaina. Pijaneconi itsa napebetsipa, itsa najumaetaponaejitsipa, nexata copiapatsipa itaboxojavabetsia. Dioso cajena yapētane daxita Babilonia tomarapijivi pibisiacuene pexanaejava. ⁶ Bajarapamonae bejibiaexanabiaba itsamonae. Nexata Dioso itsa naneconitsiaexanaena, bajarapamonae bitso ayaiacuenia bejibiaexanaena. ⁷⁻⁸ Babilonia tomarapijivi bitso beayaijamatabēcuenevi natane. Natocomuacabiaba ayaijava penamatamotsijavanē pibisiacuene pexanabiabimatamota. Bajarapamonae

pejamatabëëthëtota jamatabëjumaitsi tsabiabi: “Xanë raja majota ecajê nacua betaevetsinë. Nexata apo jamatabëcuenebëjanê tsane itsacuenejavayo ata yabara. Apo namatavenonaenê tsane itsacuenejavayo ata,” jamatabëjai tsabiabi bajarapamonae pejamatabëëthëtota. Bajarapacuenia Babilonia tomarapijivi pejamatabëjumaitsixae, ayaicuenia Dioso bejiobiaexanaenatsi. Babilonia tomarapijivi caecuenia caematacabita Dioso tocopiapatsiaexanaenatsi petëpaecuene, pematanueyabicuene ata, janibocuene ata. Tajuenatsi isotota bajarapatomarapijivimi. Bajarapacuenia Dioso naneconitsiaexanaenatsi bajarapamonae tsipaji vajatuxanenê Dioso bitso piasaenê.

⁹ Babilonia tomarapijivi pejamatabëcueneta daxitanacuanê pevetsivi jamatabëcuenebijanapona. Nexata daxitanacuanê pevetsivi copaba Dioso pejumecovênêtsijavami. Natocomuacabiabanua ayaijava penamatamotsijavanê. Nexata bajarapamonae itsa tsëxëtaena Babilonia tomarapijivimi petajuejavatsi, yaitaxutonueya vavajai tsane. ¹⁰ Bajarapamonae pecajunavi, tajê vecuanubenaena Babilonia tomarapijivimi itsa tajuenatsi. Bajarapamonae najumai tsane:

—jBitso baja rovia bejiobi mapamonaeje! jPinijitomaraxanetota, Babilonia tomaraxanetota, pejinavanapaevimi peyaiyataevimitsi! Caepatoyocujinae baja veriajavatsi Dioso penaneconitsiaexanaexaetsi, najai tsane bajarapamonae.

¹¹ Daxitanacuanëjava, pamonaecuanê pecanajetabiabavanapaevi, yaitaxutonueya vavajai tsane. Bajarapacuenia yaitaxutonueya vavajai tsane tsipaji baja xua capatabiaba pecanajetsinexa, ajibi baja pecomuacaevitsi tsane. ¹² Bajarapamonae capatabiaba oronanita pexanaejavanê, platananita pexanaejavanê ata, perlavênëjavanê ata, penamatamotsiibotonê ata. Capatabiabanua pexaniaviriapapaëbërê ata. Itsapapaëbërê linovênëjavanê. Itsajava sedajavanê. Bajarapapaëbërê itsajavanê peraënaejavanê. Itsajavanê petsobiajavanê. Capatabiabanua daxitavirianaejava petuxujuvinaejavanê. Capatabiabanua pexaniajavanê, marfilvênëjavata pexanaejavanê, penamatamotsinaejavanê ata, broncenani ata, hieronani ata, mármolvênëibo ata. ¹³ Capatabiabanua canelavênëjavanê, especiavênëjavanê ata, inciensovênëjavanê ata, mirravênëjavanê ata. Capatabiabanua petuxujuviranê, vinoranê ata, aceiteranê ata, pexaniaviriatribononê ata, trigobultonê ata. Capatabiabanua baca, oveja ata, caballo ata, perobobocaemonê ata, carrozavênëmonê. Jivi ata capatabiaba dajubicuenia pecanajetsinexa itsamonaejavabelia amoneya petonacuenebabiabivinexa. ¹⁴ Nexata daxita bajaraxua pecanajetabiabavanapaevi, yaitaxutonueya najumai tsane Babilonia tomarapijivi yabara:

—jDaxitacuene pejisipaecuenelemi tovereverecatsi baja! jTovereverecatsi baja bitso pexinaejavami, xua picani mapanacuapijivi tane penamatamotsijava! najai tsane bajarapamonae yaitaxutonueya.

¹⁵ Babilonia tomarapijivimi abaxê itsa apo tajueti, pamonaecuanê pecanajetabiabavanapaevi, ayaijava palata xainapona, xua capata, pecanajetabiabixae Babilonia tomarapijivimijavabelia. Bajarapamonae itsa taena Babilonia tomarapijivimi petajuejavatsi, yaitaxutonueya vavajai tsane. Tajê vecuanubenaena pecajunavi. ¹⁶ Bajarapamonae daxita najumai tsanubenaecuanê tsane:

—jBejiobitatsi bitso pinijitomaraxanetota pejinavanapaevimi! Bajarapatomarapijivimi naxatabiaba pexaniaviriapapaëbërê, linovênëjavanê. Itsajava peraënaejava. Itsajava petsobiajava. Naitabëtabiaba orojavanêta,

perlavënëjavanëta ata, penamatamotsiibotonëta ata. ¹⁷ ¡Caepatoyocujinae saya verevereca baja bitso pexainaejavami! najai tsanubenae tsane daxita bajarapamonae.

Daxita pamonae barcoxanetonë pevetsivi, bajarapamonëta penaponaeivi ata, bajarapamonëta penacuenebivi ata, bajarapamonëta pecaponaejavanë pecanajetaponaeivi ata, daxita bajarapamonae tajë vecuanubenaena pecajunavi Babilonia tomarapijivimi itsa tajuenatsi. ¹⁸ Bajarapabarcxanetonëta peponaeivi, tsëxëtaenubenaena Babilonia tomarami itsa tajuenatsi. Nexata vavajaiya najumai tsanubenae tsane bajarapamonae:

—¡Itsanacuanëjava ata baja ajibi itsatomara mapitsipinijitomaraxanetoje! ¡Caetomarami baja maje pinijitomaraxanetomi, tajuatsije! najai tsanubenae tsane.

¹⁹ Pamonae tsëxëtaenubenaena, natsimataothocaena atsabenonë, bitso pe-sivanajamatabëxainaeaxae Babilonia tomarapijivimi. Yaitaxutonueya naju-mai tsanubenae tsane:

—¡Bitso pinijicuenia bejiobitatsi pinijitomaraxanetomita pejinavanapae-vimi! Babilonia tomarapijivimi ayaijava palata pexainaeaxae, bitso pexainaeivi naexana daxita pamonae barco pexainaeivi, pecanajetabiabixae xua capata bajarapatomaraberena. ¡Caepatoyocujinae saya bajarapatomarami verevereca baja! najai tsanubenae tsane bajarapamonae.

²⁰ Dioso baja cajena itsamatacabi naneconitsiaexanaena Babilonia tomarapijivi pebejiobiaexanabiabijamatabëcuene Dioso pijajivi. Nexata itsamatacabi, Babilonia tomarami itsa vereverecaena, peververecaejava yabara, sivajamatabëcuenebarëya tsane daxita athëbëtatsia pejinavanapaeivi. Daxita Dioso pijajivi, mapanacuta pejinavanapaeivi ata, sivajamatabëcuenebarëya tsane. Apóstolevi ata, Diosojumelivaisi pepaebivi ata, sivajamatabëcuenebarëya tsane Babilonia tomarami itsamatacabi itsa vereverecaena.

²¹ Bajaraxuacujinae piasaëángelnë yotaxuaba ibotoxaneto. Bajarapaiboto pinijiibotoxaneto bitso. Nexata ángelnë manuamienabereca asaëyata xu-abareca bajarapaibotoxaneto. Angelnë jumaitsi mapacueniaje:

—Pacuenia asaëyata xuarecajë mapaibotoxanetoje, bajara pijinia pacuenia pinijitomaraxaneto, Babiloniatomara, itsamatacabi pinijicuenia xuabi-anatsi. Apo taetsi baja tsane icatsia matavëjëa. ²² Ajumejibi baja tsane pi-jacallejava arpa peracatabiajibjava. Ajumejibi baja tsane flauta ata piobabi-ajibjava. Ajumejibi baja tsane trompeta ata piobabiajibjava. Itsajivi ata baja apo nacuenebi tsane bajarajota. Apo najumetsi baja tsane icatsia matavëjëa trigoxu pecaquiatabiajibjava pecaquiatabiabiibotoxanetota. ²³ Itsalámpara ata baja apo naitayotsi tsane bajarajota. Ajumejibi baja tsane jivi pen-abarëcuaiicuaijaitsiabijabjava. Penacasabifiesta ata baja pexanabiabijaba, ajibi tsane. Bajarapatomarapijivi pexainaejava pecanajetabiabavanapaeivi, daxitanacuanëjava pevënëjoneyabiabivimi, ajibi baja tsane. Ajibinua baja tsane bajarapatomarapijivi daxitanacuanëjava yamaxëitojorobiaya penajorobabi-ajibjava, jai bajarapaángelnë.

²⁴ Dioso yapëtene pacuenia Babilonia tomarapijivi pejamatabëcueneta, Diosojumepaebivimi profetavi beyejebiabatsi. Babilonia tomarapijivi peja-matabëcueneta, Dioso pijajivimi ata beyejebiabatsi. Bajaraxuata juya Dioso ayaicuenia naneconitsiaexanaena Babilonia tomarapijivi.

19

¹ Bajaraxuacujinae jumetaniji jivi ayaibitsaëtoxaneto athëbëtatsia. Piniji-jumeta jumai tsaponae mapacueniaje:

“Diosomë, ¡ayaijamatabëcuenenëmë bitso!” jaitsi vaxaitsi Diosojavabelia. Bajaraponë nacacapanepa vajaneconivecua. Penivenivenaecotia pexainaenë. Pijamatabëcuenesaënë bitso. Daxitacuene pexanaenexa pecaëjëpaenëtsi. ² Itsa naneconitsiaexana jivi, paneconivajëto jivi xaina bajaraponëjavabelia, bajarapaneconivajëtota bananeconitsiaexana. Pajivi aneonijibi, apo naneconitsiaexanae cajena. Nexata baja Dioso naneconitsiaexana pibisiacuene bitso pexanaevi, Babilonia tomarapijivimi. Bajarapamonaemi pibisiacuene pexanaejamatabëcueneta jamatabëcuenebijianapona daxitanacuanëpijivi. Bajarapamonaemi pejamatabëcueneta Dioso pijajivimi beyejebatsi. Bajaraxuata Dioso juya naneconitsiaexana bajarapamonaë,

jai jivi ayaibitsaëtoxaneto athëbëtatsia.

³ Bajaraxuacujinae bajarapamonaë icatsia jumaitsi:

—“¡Diosomë, ayaijamatabëcuenenëmë bitso!” jaitsi vaxaitsi Diosojavabelia. Athëbëabetsia petsëxëjunaejavatsia Babilonia tomarapijivimi petajuetsëxëtsi, apo vereverecanucaë tsane daxitamatacabijavabelianexa, jai bajarapamonaë.

⁴ Pamonaë veinticuatro ponëbeje ancianovi, pamonaë pijinia cuatro ponëbeje piatothiavi, daxita bajarapamonaë Dioso yayataeya irata bobena. Ira taenubena. Bajarapamonaë irata jumai tsanubenaë Diosojavabelia, tronota peacaenëjavabelia:

—¡Xanepana rabaja nexanaëjava! ¡Bitso ayaijamatabëcuenenëmë! jai tsanubenaë irata bajarapamonaë Diosojavabelia.

⁵ Bajaraxuacujinae icatsia tronojavaverena daxita Dioso pijajivijavabelia jumaitsi:

Dioso panecujunavivi, ayaijamatabëcuene panexainaevi, bevelijamatabëcuene panexainaevinua, pexaniajamatabëcuene parajutabiabare vajaDiosojavabelia, jai tronojavaverena.

Corderonë penacasabifesta yabara pelivaisi

⁶ Icatsia jumetaniji ayaibitsaëtoxaneto jivi pecuaicuaijajava. Bajarapamonaë pecuaicuaijajava, jumetaniji bepinijijoncajume. Beyamaxëjume ata, ayaijume, najumeta. Jumai tsaponae bajarapamonaë mapacueniaje:

VajaDiosojamatabëcuenesaënë daxita mapanacuata jivi pevetsivi matatoxenetsia. Taxxuuba rajane baja daxitanacuanëjava Dioso jivi pevetsinexa. Bajaraxuata vaxaitsi jumaitsitsi: “Diosomë, ¡ayaijamatabëcuenenëmë bitso!” jaitsi vaxaitsi Diosojavabelia. ⁷ Sivajamatabëcuenebarëyatsi Dioso. Nexata tsipaebatsi itsamonaëjavabelia pacuenia sivajamatabëcuenebarëyatsi Dioso. “Diosomë, ¡bitso pinijicuene nexanaenë!” jaitsi vaxaitsi Diosojavabelia. Bajarapacuenia jumaitsitsi tsipaji baja copiapata fiesta pexanaematacabinexa, Corderonë penacasabifestanexa. Petiriva rabaja naxaniavaeta Corderonë penacasabivanexa.

⁸ Bajarapova rajutatsi bitso pexaniaviriapapaëbërëjava penaxatatsinexa, piaxuirajibijava, bitso peniojajava, jai bajarapamonaë.

“Bajarapova rajutatsi bitso pexaniaviriapapaëbërëjava penaxatatsinexa,” itsa jai, comparacióncuenia pejumaitsinexa picani mapacueniaje: “Diosojavabelia, ¡vaxaitsi Diosojavabelia!”

pijajivi aneconijibia tane Cristo pesivatēpaexaetsi pijaneconi yabara,” pe-jainexa picani. Bajarapajamatabēcuenelivaisi: “Bajarapova rajutatsi bitso pexaniaviriapapaēbērējajava penaxatatsinexa,” pejaijava comparaciōncuenia.

⁹ Nexata bajaraxuacujinae āngelnē nejumlahitsi:

—Yaquinare mapejumlahitsilivaisije: “Jamatabēcuenēbarēya pamonaē junatatsi Corderonē penacasabifiestajavaberena,” pejailivaisi. Daxita xua catsipaebatsi, bajaraxua pepacuene Dioso taneitorobijava, nejai āngelnē.

¹⁰ Nexata tamatabacabēta tonucajunuajē āngelnē pitabarata. Pexaniaj-matabēcuenē picani tarajutsinexa āngelnējavabelia. Itsiata baitsi jane āngelnē nejumlahitsi:

—Pētsa bajaraxua exaname. Tsipaji saya xanē ata Dioso pijajivitonēnē. Pacuenia xamē, pacuenia itsamonae ata, Dioso panenajuajumecovēnētšivi xaniavaetsia pajumecovēnētavanapame papexaniajailivaisi Jesús pacatsi-paeba, bajara saya xanē ata taitšinē. Nexata pexaniajamatabēcuenē rajure Diosojavabelia, nejai āngelnē.

Papexaniajailivaisi Jesús pacatsipaeba, bajarapalivaisita ja-matabēcuenesaēyaexanatsi pamonaē jivijavabelia tsipaebapona Dioso pejumlahivaisi.

*Pacuenia athēbētatsi Juan tane Cristo penioponaecaballojumata peecae-
java yabara pelivaisi*

¹¹ Taniji itaboxo penapatsijava. Tanijinua penioponaecaballo. Bajara-pacaballojumata jivitonē eca. Ponē bajarapacaballojumata eca, pevēnē Najumecapanepaya Pejumaitsicuenia Pexanaenē. Itsavēnē Pepo Pexa-niajailivaisi Petsipaebinē. Bajaraponē jivi naneconitsiaexana paneconi-vajētota jivi naneconita. Vajabitsaē ata exana pibisiacuene pexanaevi-javabelia. ¹² Pitaxutobeje naitayota. Pacuenia isoto bacotiatsobia, ba-jara itaxutocotiaitsi. Bajaraponē matapona ayaijava coronanē. Pitapata vēnēruca. Itsiata baitsi jane itsajivi ata apo vēnēyapētaetsi. Ēbajaraponē pijacuata navēnēyapētane. ¹³ Penaxatatsijavareca tsobia. Pijanarata pejabutsijava. Bajaraponē pevēnē Diosojamatabēcuenelivaisi itajētšinē.

¹⁴ Bajaraponē pēnaponatsi vajabitsaē ayaibitsaētoxaneto, athēbēpijivi. Bajara-pamonaē naxataba bitso pexaniaviriapapaēbērējaavanē, piaxuirajibijavanē, bitso peniojajivanē. Bajarapamonaē ata yapona penioponaecaballuanēta.

¹⁵ Ponē vajabitsaē barēexana, bajaraponē pecuibuatsina pitsapa pexiujaiēs-pada penaneconitsiaexanaenexa daxitanacuanēpijivi. Bajaraponē daxitanacuanējajava jivi pevetsinēnexa. Itsa evetsiana, ajumesaēya itorobabiabi-ana pejumecovēnētšinexatsi. Pacuenia uvaruanē ita barēmeneyujubataxuaba, ayaibarēmene pitsapa pexanaenexa vinoranē, bajara pijinia pacuenia dax-itanacuanēpijivi, pijaneconi pexainaevi, Dioso ita verebiabiana, ayai-jana xuabiana. Dioso, ponē pijamatabēcuenesaēnē daxitanacuanē pevetsi-
sivi matatoxenetsia, ayacuenia naneconitsiaexanaena bajarapamonaē pe-
baraanaepanaexae. ¹⁶ Ponē vajabitsaē barēexana, bajaraponē pijacamisaju-
mavelia penaxatatsijavata, pevēnēitanēbērētoyo ruca. Pethaētojumata ata
pevēnēitanēbērētoyo ruca. Jumai tsarucae bajarapaitanēbērētoyo: “Maponēje
daxitanacuanē pevetsivi ata pepo pevetsinē. Daxita petuxanevi ata pijatux-
ane,” jai tsarucae.

¹⁷ Bajaraxuacujinae taenutajē āngelnē, icotiata penucaenē. Pinijijumeta vavajai tsanucaē daxita quequeremonaējavabelia. Jumai tsanucaē ma-pacueniaje:

—Naxanitsia. Panacaetuanare payaibitsaëtoxanetomë ayaijava panenaninexa Dioso pejamatabëcueneta. ¹⁸ Naxanitsia. Daxita petëpaevi pevi panexaenexa. Paponaremena nacuanë pevetsivimi, vajabitsaë penamat-acaitorobivimi ata, vajabitsaë piaiatsacavimi ata, pevi panexaenexa. Caballuanëmi, caballuanëjumata peponaevimi ata, pevi panexaenexa. Pamonaeami dajubicuenia pecanajetsivimitsi itsamonaejavabelia amoneya petonacuenebinexa, apo pecanajetsivimitsi ata, bevelijamatabëcuene pexainaevimi ata, ayaijamatabëcuene pexainaevimi ata, daxita bajarapamonae pevi panexaenexa paponaremena, jai tsanucae ángelnë quequeremonaejavabelia.

¹⁹ Bajaraxuacujinae taniji piayainë. Tanijinua daxitanacuane pevetsivi pijajivi, vajabitsaë, pecaetuatsijava ata. Daxita bajarapamonae nacaetuana vajabitsaë penaexanaenexa. Nexata barënnabia penioponaecaballota peponaenëjavabelia, bajaraponë pijajivijavabelia ata. ²⁰ Nexata penioponaecaballota peponaenë vaetaba piayainë. Vaetaba peyamaxëitojorobiprofetanë ata. Ponë peyamaxëitojorobiprofetanë, jivi peyamaxëitojorobinexa, bajayata pinijicuene exanaponapona piayainë pitabarata. Bajarapacuenia bajayata pinijicuene pexanaexae, peyamaxëitojorobiprofetanë jivi yamaxëitojorobapona. Nexata jivi nacaeveta piayainë pevënëitanetota pitanerubapon-aenexatsi. Bajarapacuenia bajayata peyamaxëitojorobiprofetanë jivi yamaxëitojorobapona piayainë jumapecataeya pexanaenëtsijavabelia ata jivi pematabacabëta penavajëcabiabinexa. Bajaraxuata nexata piayainëbeje, peyamaxëitojorobiprofetanëbeje, xuabaliatsibeje abaxë piasaenëbeje isotopucabelia. Bajarapapuca tajueyabiaba azufre yajava. ²¹ Nexata daxita bajaraponëbeje pijajivi, pamonae nacopaba, beyejebatsi. Beyejebatsi penioponaecaballota peponaenë, pecuibuatsina pepitsapaeespadata. Nexata jane baja daxita quequeremonae napeneyaba bajarapamonae pevi.

20

Pacuenia Juan tane pacuenia itsamatacabi Cristo mil pavaibeje evetsijitsia mapanacuaje yabara pelivaisi

¹ Icatsia taniji ángelnë perunaejavatsica athëbëvetsica. Cobenarunaica pinijimëthëxaneto pijallave. Cobenarunaicanua ayaicadenamaëtoxaneto. ² Bajarapaángelnë vaetaba dragón, ponë pevënë Dovathi. Itsavënë Satanás. Bajaraponë dovathi bajayata itsa naitajëta jivijavabelia, naitajëta bejomocuenia. Nexata ángelnë cëtabuata dovathi mil pavaibejenexa. ³ Pinijimëthëxanetojavareca xuareca. Yavëpaxatatabuata bajarapamëthëxanetojavareca. Pematatsënëa icatsia sellovënëjavata yamëthëvëpajumacatsata. Nexata dovathi apo caëjëpaetsi tsane peyamaxëitojorobinexa mapanacuapijivi mil pavaibeje. Bajaraxuacujinae icatsia isinaenatsi caeepatoyo icatsia jivi peyamaxëitojorobaponaponaenexa.

⁴ Bajaraxuacujinae icatsia taniji jivi tronojumata penaevi. Bajarapatronojumata penaevi, Dioso itorobatsi penaneconitsiaexanaenexa jivi, pijaneconi pexainaevi. Tanijinua itsamonaë ata, pamonae bajayata vësiucubejebatsi. Bajarapacuenia bajarapamonae bajayata vësiucubejebatsi tsipaji jivi tsipaebapona Jesús pelivaisi. Tsipaebanajetarubenanua Dioso pejumelivaisi. Bajarapamonae apo navajëcae pematabacabëta piayainëjavabelia, piayainë jumapecataeya pexanaenëtsijavabelia ata. Apo nacopatsinua piayainë pevënëitanetota pitapaitanerubinxatsi. Apo

nacopatsinua pecobejumaitanerubinexatsi. Nexata bajarapamonaemi icatsia Dioso piasaëyaexanaejavatsi, taniji. Pacuenia ata bajarapamonae mil pavaibeje Cristo barëvetatsi mapanacuaje, taniji. ⁵⁻⁶ Bajarapamonae Dioso asaëyaexanatsi Dioso copiaya jivi piasaëyaexanaematacabita. Bajarapamonae Dioso asaëyaexanatsi caecuenia ayaibitsaëto. ¡Pamonae copiaya Dioso jivi piasaëyaexanaematacabita asaëyaexanatsi, bajarapamonae pejamatabëcuenebarëyavi, planeconijibivinua! Cotocaevi patëpaejavanexa, acuenebi baja itsacuene pexanaenexatsi bajarapamonae. Biji rajane bajarapamonae Dioso, Cristo ata, pijasacerdotevinox, jivi petocuaicuaijatsabiabivinx Diosojavabelia. Bajarapamonae Cristo barëvetsianatsi mapanacuaje mil pavaibeje. Itsamonae petëpaevimi, pamonae abaxë nacopabanubena, Dioso icatsia asaëyaexanaenatsi bajarapamil pavaibejecujinae.

⁷ Itsa baja panepaena mil pavaibeje, dovathi icatsia isinaenatsi mëthëvecua pepitsapaenexa. ⁸ Pitsapaena icatsia jivi peyamaxëitojorobinexa daxitanacuanëjava. Bajarapacuenia yamaxëitojorobiana jivi ayaibitsaëtoxanetonë, Dioso apo pejumecovënëtsivi. Nexata bajarapacuenia dovathi vajabitsaë caetuatsiana. Dovathi pijajivi bitso ayaibitsaëtoxaneto tsane. Pacuenia tajetaboatsapërë navita, bajara itsi tsane dovathi pijajivi, vajabitsaë. ⁹ Bajarapamonae vajabitsaë copiata jivi benajetarubenaena daxitanacuanëjava. Bajaraxucujinae matatoyoronaena jane baja Jerusaléntomara peverebiabinexa picani Dioso pijajivi, Dioso piasivatomarata, Jerusalén tomarata, pejinavanapaevi. Itsiata baitsi jane dovathi pijajivi Dioso tsixuabianicatsi isoto athëbëvetsica. Nexata tajuenatsi daxita vajabitsaëmi, dovathi jane baja pijajivimi. ¹⁰ Nexata dovathi, ponë jivi yamaxëitojorobaponaena daxitanacuanëjava, xuabialiatsi isotopucalia, azufre yajava petajueyabiabipucalia. Bajarapapucalia baja cajena copiaya xuabatsibeje piayainëbeje peyamaxëitojorobiprofetanëbeje. Nexata bajarajota bajarapamonae Dioso naneconitsiaexanaenatsi daxitamatacabijavabelianexa. Nexata bajarajota bajarapamonae isoto petajuta bitso jamatabëfaenaena. Bajarapamonae bitso pejamatabëfaenajava isoto petajuta tsitecaena daxitamatacabijavabelianexa.

Pacuenia Juan tane pacuenia itsamatacabi jivi nubenaëjitsia penioponaetrono pitabarata Dioso penaneconitsiaexanaenexatsi yabara pelivaisi

¹¹ Icatsia taniji penioponaetronoxanetojumata peecaenë. Bajaraponë nacua baja vereverecaëyaexana. Itaboxo ata baja vereverecaëyaexana.

¹² Taenubajë daxita petëpaevimi penubenaëjava Dioso pitabarata. Nubena Dioso penaneconitsiaexanaenexatsi. Bajarapamonae ayajamatabëcuene pexainaevimi. Itsamonae bevelijamatabëcuene pexainaevimi. Taeyejebajënua cuyalatobaxutonë. Bajarapacuyalatobaxutonë baxupanejeba. Bajarapacuyalatobaxutonëta itanerubena daxita petëpaevimi pacuenia exanavanapa petëpaevajënaeya mapanacuataje. Itsacuyalatobaxuto ata taeyabuatajë. Bajarapacuyalatobaxuto ata baxupatabuata. Bajarapabaxutota vënërubena pamonae matacabi apo pevereverecaëjava pexainaevinexa. Nexata caejivi canacujitsia Dioso pijaneconi petorutaponaexaetsi, caejivi canacujitsia paneconivajëto xaina. Bajarapaneconivajëtota Dioso naneconitsiaexanaponatsi.

¹³ Manuameneta petëpaevimi ata, daxita pitsapaina. Jivi ata petëpaeucujinae, pejinavanapaenacuajavavetsina, ira bëxëpanavetsina, daxita pitsapaina. Nexata caejivi canacujitsia paneconivajëto xaina, bajarapaneconivajëtota Dioso naneconitsiaexanaponatsi.

14 Bajaraxuacujinae jivi petēpaeyaexanaejamatabēcuenemi, jivi petēpaecujinae pejinavanapaenacuami ata yajava, Dioso xualia isotopucalia. Bajarapapuca jivi cotocaevi patēpaejava petēpaeyaexanaepuca. 15 Pamonaē apo vēnērubenaē, pabaxutota vēnērubena pamonaē matakabi apo peverevereceajava pexainaevinexa, bajarapamonaē peneliatsi bajarapapucalia.

21

Pacuenia Juan tane pacuenia itsamatacabi Dioso icatsia pejanaitaboxo, pejananacua yajava, exanaejitsia yabara pelivaisi

1 Icatsia taniji pejanaitaboxo, pejananacua yajava. Paitaboxo, panacua ata, Dioso copiaya exana, ajibi baja. Manuamene ata ajibi. 2 Xanē rabaja Juannē. Taniji Dioso pijatomara, pejana Jerusalēntomara. Athēbēvetsica, Diosojavavetsica, runaica bajarapatomara. Daxita rabaja Dioso xaniavaeta. Pacuenia petiriva pamonanexa itsa sivapatsijitsiatsi, pevājēnaē banaxaniavaeteca, bajara pijinia pacuenia Dioso xaniavaeta baja Jerusalēntomara pijajivi petojinavanapaenexatsi. 3 Nexata jumetaniji pinijijume athēbēvetsica, tronojavavetsica. Jumaitsi mapacueniaje:

—Taema. Dioso rabaja jivijava ponapona. Dioso baja jivi yajavaponapona daxitamatacabijavabelianexa. Bajarapamonaē pepo Diosonē pijajivi tsane. Dioso pijinia bajarapamonaē pijatuxanenē tsane. 4 Dioso itaxutobuaremeineiquinaponaena bajarapamonaē. Ajibi baja tsane petēpaecuene, penubarue ata, bitso penajamatabēxainaecuene ata, penavixaetaecuene ata. Daxita bajarapitsicuenemi copiarucaena jane baja, jai athēbēvetsica.

5 Bajaraxuacujinae Dioso, tronojumata peecaenē, jumaitsi:

—Taema. Daxitacuene bajayata taexanaejavami, xuami baja picani vereverecaeyaexanaejē, pejanajava icatsia exanaej, jai.

Bajaraxuacujinae xanējavaberena icatsia nejumaitsi:

—Yaquinare bajaraxuanē pelivaisi. Tsipaji baja palivaisi catsipaebatsi, bajarapalivaisi pexaniajailivaisi cajena. Xanepana nexata daxifajivi pejumecovēnētšinexa bajarapalivaisi, nejai.

6 Bajaraxuacujinae icatsia nejumaitsi Dioso, tronojumata peecaenē:

—Daxita rabaja icatsia pejanajava taexanaejava, veretajē. Xanē rajane baja daxitacuene tataxuxuabinē. Daxitacuene icatsia tacopiarucaeyaexanaenēnexa. Pacuenia jivi pejamatabēēthētojavavetsina bitso jitsipa mera piapaenexa, bajara pijinia pacuenia jivi bitso itsa jitsipaena tacapanepaejavanaxa, nexata bajarapamonaē rajutsianajē matakabi apo peverevereceajava. Tocopatsianajē bajarapamonaē amoneya pexainaenexa matakabi apo peverevereceajava itsa jumecovēnēta taxēnato, Cristo, pesivatēpaejavatsi. Bajaraponē Cristo jivi pejamatabēcueneasaēyaexanaenē. 7 Pajivi tsiteca jumecovēnētaponapona tajumelivaisi ēpetēpaejavabelianexa, bajarapajivi xanē pija Diosonē tsane. Bajarapajivi pijinia taxēnatojiviyo tsane. 8 Itsiata baitsi jane pamonaē pejunavivi tajumelivaisi yabara itsamonae pebejibiaexanaeyanivatsi, pamonaē ata apo tanejumecovēnētšivi, pamonaē ata pitoyavi itsamonae, pamonaē ata pevitota pibisiacuene pexanaevi, bajarapamonaē ponaena petajueyabiabipucajavabelia. Pamonaē ata penajorobivi, pamonaē ata jumapetacataeya pexanaenēanējavabelia penavajēcaevi, pamonaē ata penajumetsēnētšivi, daxita bajarapamonaē ponaena petajueyabiabipucajavabelia. Bajarapapuca tajueyabiaba azufre yajava. Bajarapatēpaejava cotocaevi jane baja petēpaejava tsane, nejai Dioso, tronojumata peecaenē.

Pacuenia Juan tane pejana Jerusalēntomara pacuenia itsamatacabi itsijitsia yabara pelivaisi

⁹ Nexata jane baja rena caenē ángelnē. Bajarapaángelnē siete paángelnēbeje siete pacopabeje piayaijavanē pevēnēcaecopanē pepacaeviyajuvēnēnē. Bajarapaángelnē nexata nejumlahsi:

—Naxanitsia. Catsitajětsianatsi pova Corderonē pijavanexa, nejai ángelnē.

¹⁰ Bajaraxuacujinae Espírítu Santo netsijamatabēvēnēca. Nexata be-majitsinaebota ángelnē nebarēpona pinijitsutoxanetojavabelia, piapiatsutoxanetojavabelia. Nexata bajara patsutoxanetojavatalia ángelnē netsitajěta Dioso pijatomara, pinijitomaraxaneto, Jerusaléntomara. Athěběvetsica Diosojavavetsica runaica bajarapatomara. ¹¹ Bajarapatomara cotianiveniveneca Dioso pijapenivenivenaecotiata. Pacuenia penamatamotsiiboto jaspevēnēiboto cotianivenivena, bajarapacuenia cotianiveniveca. Nasabanua pacuenia nasaba vidriojava. ¹² Bajarapatomara matatoyorotsia yacaranata piatayaēibopanaxanetota. Bajara payacaranatsijavaxaneto mataropotsia čatsanaruba ibopananē. Bajara payacaranatsijavaxaneto apia athěběabetsia pacuenia pinijinaejavaxaneto apia. Bajara payacaranatsijavaxaneto matatoyorotsia xaina doce pabaupabeje. Nexata ángelevi, caenē canacujitsia, nucapona caebaupa canacujitsia. Bajarapabaupanějava Israelpijině pexi, doce ponēmibeje, pevēnēanē vēnērubena. ¹³ Acueyabi pabaupabeje xainapona caeyenepana canacujitsia. Estevēnēnēnia payenepana xaina acueyabi pabaupabeje. Nortevēnēnēnia pijinia payenepana xaina acueyabi pabaupabeje. Survēnēnēnia pijinia payenepana xaina acueyabi pabaupabeje. Oestevēnēnēnia pijinia payenepana xaina acueyabi pabaupabeje. ¹⁴ Jerusaléntomara matatoyorotsia peyacaranatsiibopanaxanetonexa, ibo penajumaetaponaevavata, copiaya pinijiibotoxanetonē sasavia jebapona, doce paibotoxanetobeje. Bajarapaibotoxanetonē, caeibotoxaneto canacujitsia pejumavelia, Corderonē pijajivi doce poněbeje, apóstolevi, pevēnēanē rubena.

¹⁵ Paángelnē nebarěcuaicuajjai, cobenaponapona oronaebo. Bajarapaoronaebota pecaějěbinexa Jerusaléntomara, pecaějěbinexa haupanē ata, pecaějěbinexa Jerusaléntomara matatoyorotsia peyacaranatsiibopanaxaneto ata. ¹⁶ Jerusaléntomara matatoyorotsia peyacaranatsiibopanaxaneto, daxitayenepananē namatajěpaeya apia. Pacuenia apiareca matonotsiareca payenepanabeje, bajara pijinia pacuenia apialia epatajěrětsialia ata payenepanabeje. Nexata jane baja ángelnē pecaějěbinaebota caějěba Jerusaléntomara. Nexata Jerusaléntomara matonotsiareca piapiajava xaina dos mil doscientos pakilómetrobeje. Epatajěrětsialia ata xaina bajarapacuenia, dos mil doscientos pakilómetrobeje. Athěběabetsia ata piapiajava bajarapacuenia xaina, dos mil doscientos pakilómetrobeje. ¹⁷ Bajaraxuacujinae ángelnē caějěba Jerusalén tomara matatoyorotsia peyacaranatsiibopanaxaneto peyapětaenexa paitayaětovajěto xaina. Jerusaléntomara matatoyorotsia peyacaranatsiibopanaxaneto, piaitayaējěva xaina sesenta y cuatro pametrobeje. Pavirianaebota mapanacuaipijivi bacaějěba, bajarapavirianaebota ángelnē caějěba.

¹⁸ Jerusaléntomara matatoyorotsia peyacaranatsiibopanaxaneto, exana jaspevēnēibota. Jerusaléntomara ěorojavaněta pexanaetomara. Nexata Jerusaléntomara nasaba bitso. Pacuenia bitso nasaba piaxuirajibividrijojava, bajara itsi. ¹⁹ Jerusaléntomara matatoyorotsia peyacaranatsiibopanaxanetonexa, itsa taxuxuaba pexanaejava, copiaya pinijiibotoxanetonē sasavia tsivajěnaejeba. Bajarapaibotoxanetonē itabětsiaya jumacatsanaruba daxitaviria ibotoněta, bitso penamatamotsiibotoněta. Pena-

mataxainaeibotoxaneto itabëta jaspevënëibotonëta. Pecotocaeviibotoxaneto itabëta zafirovënëibotonëta. Acueyabiibotoxaneto itabëta ágatavënëibotonëta. Cuatroiibotoxaneto itabëta esmeraldavënëibotonëta. ²⁰ Cincoibotoxaneto itabëta ónicevënëibotonëta. Seisibotoxaneto itabëta cornalinavënëibotonëta. Sieteibotoxaneto itabëta crisólitovënëibotonëta. Ochoibotoxaneto itabëta berilovënëibotonëta. Nueveibotoxaneto itabëta topaciovënëibotonëta. Diezibotoxaneto itabëta crisoprasavënëibotonëta. Onceibotoxaneto itabëta jacintovënëibotonëta. Doceibotoxaneto itabëta amatistavënëibotonëta. ²¹ Doce rabaja pabaupabeje. Doce rabaja pijinia paperlavënëjavatabeje, bitso penamatamotsijavanëta, exana caebaupa canacujitsia. Bajarapatomarata caecalle ruca daxitacallevecua bitso ayaicallexaneto. Bajarapacalle éorojavanëta pexanaecalle. Nasaba bitso. Pacuenia nasaba vidriojava, bajara itsi.

²² Bajarapatomarata apo taenë templobo. Itsiata baitsi jane daxita bajarapatomara betemplo. Bajarapacuenia betemplobo tsipaji Dioso, daxita mapanacuata jivi pevetsivi matatoxenetsia piäjamatabëcuenesaënë, Corderonëbeje, ponaponabeje bajarapatomarata. ²³ Dioso ayaijamatabëcuenë pijapenivenivenaecotiata itayota bajarapatomara. Corderonë ata itayota pijapenivenivenaecotiata bajarapatomara. Bajaraxuata apo namatavenonae bajarapatomarata pitayotsinexa matacabipijjuameto, meravipijjuameto ata. ²⁴⁻²⁶ Daxitanacuanëpijivi, pamonaebaja Dioso capanepatsi pijaneconivecua, bajarapamonaebitsamatacabi jinavanapaena Diosobeje Corderonëbeje pijapenivenivenaecotiata. Daxitanacuanë pevetsivi pijatomaranëjavaverena capatsiana bajarapatomaraberena bitso penamatamotsijavanë, Dioso yayiataeya perajutsinexa. Daxitamatacabijavabelianexa, bajarapatomara baupatanutsiana. Bajarapatomarata ajibi tsane meravi. ²⁷ Itsiata baitsi jane bajarapatomaraberena pibisiajamatabëcuene pexinaevi, apo jone tsane. Piauracuene pexanaevi, penajumetsënëtsivi ata, apo jone tsane. Jonena épamonae vënërubena Corderonë pijacuyalatobaxutota. Corderonë pijacuyalatobaxutota vënërubena pamonaeb matacabi apo pevereverecaevajava pexinaevinexa.

22

¹ Bajaraxuacujinae icatsia ángelnë netsitajëta pepamene, bitso pitaranaemene. Nasaba bitso. Pacuenia vidriojava nasaba, bajara itsi. Bajarapamene jivi petépaejavavecua piatavayaexanaemene. Bajarapamene pitsaparena Diosobeje Corderonëbeje pijatronojavaverena. ² Bajarapamene bocapona ayaicallexaneto tuatuajëareca. Bajarapamene itapayareca anijamuxubërëneniabeje nubena naejavanë, jivi petépaejavavecua piatavayaexanaenaenë. Bajaraponaenë caevaita nacuaitapona doce panacuaitsibeje. Caejuameto canacujitsia nacuaitapona. Bajaraponaenë pebaxuta xanepana daxitanacuanëpijivi penavaëbinexa, pejamatejemanexa piavitanejavavecua. ³ Nexata bajarapatomarata ajibi tsane jivi pejamatabëcuenebijianaejavanexatsi. Nexata jivi pibisiacuene apo exanae tsane. Diosobeje Corderonëbeje pijatronota ecaenabeje pijajivi pitorobabiabinexabeje daxitamatacabijavabelianexa bajarapatomarata. Nexata daxita pamonaeb Dioso pijajivi, pexaniajamatabëcuene rajutsiana Diosojavabelia. ⁴ Bajarapamonaeb Dioso itabarataena. Dioso pevënë ata rucaena bajarapamonaeb pitapathaitota. ⁵ Bajarapatomarata ajibi tsane meravi. Pepo petuxanë Dioso pijapenivenivenivenaecotiata itayotsiana. Nexata bajarapatomarata pejinavanapaevi apo namatavenonae tsane

lámparamacotia, matababipijijumetocotia ata. Pamonaie jinavanapaena Dioso pijanacuata, Dioso pijanacua barëevetsianatsi daxitamatababijavabelianexa.

Pacuenia baja imoxoyo pevajënae Jesucristo pepatsijavanexatsica yabara pelivaisi

⁶ Icatsia ángelnë nejumlahtsi:

—Palivaisi baja yaquiname, pexaniajailivaisi cajena. Daxita xua yabara yaquiname, pepacuenie copiapatsiana. Dioso baja cajena bajayata tajëvelia yapëtaeyaxana profetavimi peyapëtaenexa pacuenia itsamatababi itsijitsia mapanacuataje. BajarapaDiosonë icatsia itoroba pijaángelnë. Nexata Dioso pijaángelnë tsitajëta Dioso pijajivijavabelia, Dioso pijajivi peyapëtaenexa pacuenia baja imoxoyo pevajënae pecopiapatsinexa xua copiapatsijitsia mapanacuataje, nejai ángelnë.

⁷ Icatsia ángelnë nejumlahtsi:

—Jesús raja jumaiatsi: “¡Bepijia patsianicajë!” jai. ¡Nexata pajivi jumečovënëta Dioso pejumelivaisi, neyaquinaelivaisi mapabaxutotaje, bajarapajivi jamatabëcuenebarëya tsane Jesús itsa patsianica! nejai ángelnë.

⁸ Xanë rabaja Juannë, daxita baja palivaisi yaquinajë, jumetaniji. Tanijinua. Bajaraxuacujinae ángelnë, ponë netsitajëta daxita bajaraxua, pitabarata yayiataeya picani tamatabacabëta tonucajë. ⁹ Itsiata baitsi jane ángelnë nejumlahtsi:

—Pëtsa bajaraxua exaname. Tsipaji saya xanë ata Dioso pijajivitonënë. Pacuenia xamë, pacuenia itsamonaie ata, pamonaie Diosojumepaebivi profetavi, pacuenia ata pamonaie jumecovënëtsiana mapabaxutotaje neyaquinaelivaisi, bajara saya xanë ata taitsinë. Nexata Dioso yayiataeya nematabacabëta tonucare nevajëtsinexa Diosojavabelia, nejai ángelnë.

¹⁰ Icatsia ángelnë nejumlahtsi:

—Pëtsa nejumeyavajunuaxainame Dioso pejumelivaisi, neyaquinaelivaisi mapabaxutotaje. Tsipaebianame daxitajivijava daxitajivi peyapëtaenexa. Tsipaji rabaja imoxoyo pevajënae pecopiarucaenexa mapanacuaje. Pacuenia baja cajena Dioso tajëvelia najumecapanepaeya jumaiatsi, bajarapacuenia Dioso exanaena. ¹¹ Neponaponaeepato abaxë mapanacuataje, tocopare pibisiacuene pexanaponaeivi, pibisiacuene pexanaejava pecatsitecaenexa. Èpibisiacuene yabara penajamatabëxainaeivi ata, tocopare pecatsitecaenexa penajamatabëxainaejave èpibisiacuene yabara. Itsiata baitsi jane pijinia pamonaie pexaniacuene pexanavanapaevi, catsitecae pevajënaeyabelia pexaniacuene pexanavanapaevajava. Pamonaie ata Dioso aneconijibia tanetsi pejumecovënëtsixae Jesucristo pesivatëpaejavatsi, casaë pevajënaeyabelia aneconijibia pejinavanapaenexa, nejai ángelnë.

¹² Icatsia ángelnë nejumlahtsi:

—Jesús raja jumaiatsi: “Panenumetaema. Bepijia patsianicajë. Capatsianicajë tajajivi tarajutsijavanexa. Bajaraxua rajutsianajë caejivi canacujitsica, pamonaie xaniavaetsia netonacuenebavanapa. Pamonaie pijinia pibisiacuene exanavanapa, naneconitsiaexanaenajë. ¹³ Xanë rajane baja daxitacuene tataxuxuabinë. Daxitacuene icatsia tacopiarucaeyaexanaenëna,” jai raja Jesús, nejai ángelnë.

¹⁴ Icatsia ángelnë nejumlahtsi:

—Jamatabëcuenebarëya baja pamonaie pibisiacuene pexanaeconimi Dioso vecuaajibiaexanatsi, pejumecovënëtsixae Jesucristo pesivatëpaejavatsi. Bajarapamonaie itsamatababi Dioso tocopatsianatsi penajonenexa Dioso pijatomara baupanëjava. Tocopatsianatsinua jivi petëpaejavavecua

piaitavayaexanaena pecuaixaenexa. ¹⁵ Itsiata baitsi jane daxita pamona Dioso apo pejumecovēnētsivi, nacopabanubenaena Dioso pijatomarajumavelia. Nacopabanubenaena pamona bitso ėpibisiacuene pexanaevi, penarobivi ata, pevitota pibisiacuene pexanaevi ata, jivibevi ata, jumapecataeya pexanaenēanējavabelia penavajēcabiabivi ata, bitso penajumetsēnētsivi ata. Daxita bajarapamona nacopabanubenaena Dioso pijatomarajumavelia, nejai āngelnē.

¹⁶ Nexata Jesús nejumaitsi:

—Xanē rabaja Jesúsne. Itorobajē tajaāngelnē pecatsipaebinexa palivaisi baja catsipaeba. Bajarapacuenia itorobajē daxita Dioso pejumecovēnētsivi peypapētaenexa palivaisi baja tajaāngelnē catsipaeba. Xanē rabaja nacuaevevtsinēmi Davidpijinē pemomoxiyajuvēnēnē. Xanē rabaja taja matabēcueneitayotsinē daxitajivi pexaniajailivaisita, nejai Jesús.

¹⁷ Espiritu Santo jumaitsi. Petiriva ata, pova Corderonē pijavanexa, bajarpova ata jumaitsi. Jumaitsiube Jesúsjavabelia mapacueniaje:

—Naxanitsiayo patsianimica, jaiube.

Pamona jumetane bajarapacuenia pejumaitsijavabeje Jesúsjavabelia, bajarapamona ata bejumaitsi Jesúsjavabelia:

—Naxanitsiayo patsianimica, bejai bajarapamona ata.

Pacuenia jivi pejamatabēthētojavavetsina bitso jitsipa mera piapaenexa, bajara pijinia pacuenia jivi bitso itsa jitsipaena Dioso pecapanepaejavanexatsi, nexata bajarapamona Dioso rajutsianatsi matababi apo peverevereceaeva. Tocopatsianatsi bajarapamona amoneya pexainaenexa matababi apo peverevereceaeva itsa jumecovēnēta Cristo pesivatēpaejavatsi. Tsipaji Cristo jivi petēpaejavavecua piaitavayaexanaenē.

¹⁸ Daxita pamona leba Dioso pejumelivaisi, tayaquinaelivaisi mapabaxutotaje, jamatabēcuenereviaya tsipaebijitsianē roviaia mapacueniaje. Mapabaxutotaje tayaquinaelivaisi itsajivi icatsia saicayalivaisi mataropotsia itsa yaquinaena, bajarapajivi naneconitsiana Diosojavabelia. Nexata Dioso naneconitsiaexanaenatsi. Papiayaicuene yabara jumaitsi mapabaxutotaje, bajarapacuenia Dioso taeyaexanaenatsi bajarapajivi. ¹⁹ Mapabaxutotaje tayaquinaelivaisi, itsajivi itsa xubiana itsalivaisiyo, nexata bajarapajivi naneconitsiana Diosojavabelia. Nexata bajarapaneconijamatabēcueneta bajarapajivi vēnēyaquinae atatsi pabaxutota vēnērubena daxita pamona matababi apo peverevereceaeva pexainaevinexa, matababi apo peverevereceaeva apo xainae tsane. Dioso pijatomarabetsia ata pejonenexa, apo tocopatsi tsanetsi. Pabaxutota vēnērubena matababi apo peverevereceaeva pexainaevinexa pelivaisi, Dioso pijatomara ata pelivaisi, jumaitsi mapabaxutotaje.

²⁰ Jesús, ponē itoroba pijaāngelnē tanetsipaebinexa pacuenia itsamatababi itsijitsia mapanacuataje, bajaraponē nejumaitsi mapacueniaje:

—Bepijia patsianicajē, jai.

Nexata xanē jumaitsinē:

—Je. Xanepana rabaja. Jesús pepo petuxanenēmē, ¡naxanitsiayo patsianimica! janē.

²¹ Pacatovajētatsi daxita paxamē vajatuxanenē Jesucristo papecayavenonēnē. Bajara itsi tsane.